


Tnúhu ní cáháⁿ yă
ndiöxí xito cùu uú



New Testament in Mixtec, Peñoles (MX:mil:Mixtec, Peñoles)

Tnúhu ní cáháⁿ yă ndiöxí xito cùu uú

New Testament in Mixtec, Peñoles (MX:mil:Mixtec, Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
872f7754-0986-5ecd-a059-925a708a6939

Contents

SAN MATEO	1
SAN MARCOS	89
SAN LUCAS	144
SAN JUAN	230
LOS HECHOS	289
ROMANOS	366
1 CORINTIOS	401
2 CORINTIOS	436
GÁLATAS	458
EFESIOS	470
FILIPENSES	482
COLOSENSES	490
1 TESALONICENSES	498
2 TESALONICENSES	505
1 TIMOTEO	509
2 TIMOTEO	519
TITO	526
FILEMÓN	530
HEBREOS	532
SANTIAGO	559
1 PEDRO	567
2 PEDRO	577
1 JUAN	583
2 JUAN	591
3 JUAN	592
JUDAS	594
APOCALIPSIS	597

TNÚHU NÍ CHÍDÓ TǸUNÍ TÈ M̀ATEÚ

Nchaa cue tée ní xíndecu ndéé sanaha cǔtnàhà vátá quixí-gǎ Xítóhó Jesucristú (Lc. 3:23-38)

1 Te ñani tnáhá Xítóhó Jesucristú ní cuu ndí Dàví ndíhí ndí Àbráhám, cue tée ní xíndecu ndéé sanaha v́hi-gá ñuyíú-a. Te duha ndúu cuendá dava-gá cue tée ní cuu ñani tnáhá-gǎ ní xíndecu ndéé sanaha.

2 Ndí Àbráhám ní xóo ñⁿ déhe ndí, te ndí-án ní xínani ndí Isàác. Te déhe ndí Isàác-án ní cuu ndí Jácób, te déhe ndí Jácób-án ní cuu ndí Jùdá, te ñu-ni ndí Jácób-án ní cuu tátá dava-gá cue ñani ndí Jùdá-án.

3 Te déhe ndí Jùdá-án ndíhí ñadihí ndí, ndí Tàmár ní cuu ndí Fàrés ndíhí ndí Zàrá. Te déhe ndí Fàrés-án ní cuu ndí Èsróm, te déhe ndí Èsróm-án ní cuu ndí Àrám.

4 Te déhe ndí Àrám-án ní cuu ndí Aminàdáb, te déhe ndí Aminàdáb-án ní cuu ndí Nàsón, te déhe ndí Nàsón-án ní cuu ndí Sàlmón.

5 Te ñadihí ndí Sàlmón-án ní xínani-a Ràháb, te ní xóo ñⁿ déhe-yu ní xínani-dě Bòóz. Te ñadihí ndí Bòóz-án ní xínani-a Rùt, te ní xóo ñⁿ déhe-yu ní xínani-dě Òbéd, te déhe ndí Òbéd-án ní cuu ndí Isái.

6 Te déhe ndí Isái-án ní cuu ndí Dàví tée ní xíndaha ñaha xii cue ñáyíu isràèl. Te déhe ndí Dàví-án ndíhí ñadihí ndí ní cuu ndí Salòmón. Te díhna-gá ndí Ùriás ní cándeca ndí ñadihí-án te dàtǹuní ní naquehe ñaha ndí Dàví-án.

7 Te déhe ndí Salòmón ní cuu ndí Ròboám, te déhe ndí Ròboám-án ní cuu ndí Àbiás, te déhe ndí Àbiás-án ní cuu ndí Àsá.

8 Te déhe ndí Àsá-án ní cuu ndí Josáfát, te déhe ndí Josáfát-án ní cuu ndí Jòrá, te déhe ndí Jòrá-án ní cuu ndí Ùziás.

9 Te déhe ndí Ùziás-án ní cuu ndí Jòtám, te déhe ndí Jòtám-án ní cuu ndí Àcáz, te déhe ndí Àcáz-án ní cuu ndí Ezèquiás.

10 Te déhe ndí Ezèquiás-án ní cuu ndí Manàsés, te déhe ndí Manàsés-án ní cuu ndí Àmón, te déhe ndí Àmón-án ní cuu ndí Jòsiás.

11 Te déhe ndí Jòsiás-án ní cuu ndí Jecóniás. Te ñu-ni ndí Jòsiás-án ní cuu tátá nchaa dava-gá cue ñani ndí Jecóniás-án. Te dàvá-án ní quide yica cue tée ñuú Babiloniá ndéca-güedé ñáyíu isràèl cuáhá ñuú-güedé cuendá yácáⁿ cundecú-yu.

12 Te sátá ñ yáha ducaⁿ ní cuu, te ndí Jecóniás ní xóo ñⁿ déhe ndí ndíhí ñadihí ndí, te tée-án ní xínani-dě Salàtiél. Te déhe ndí Salàtiél-án ní cuu ndí Zorobàbél.

13 Te déhe ndí Zorobàbél-án ní cuu ndí Àbiúd, te déhe ndí Àbiúd-án ní cuu ndí Eliàquím, te déhe ndí Eliàquím-án ní cuu ndí Àzór.

14 Te déhe ndí Àzór-án ní cuu ndí Sàdóc, te déhe ndí Sàdóc-án ní cuu ndí Àquím, te déhe ndí Àquím-án ní cuu ndí Èliúd.

15 Te déhe ndí Èliúd-án ní cuu ndí Eleàzár, te déhe ndí Eleàzár-án ní cuu ndí Mátán, te déhe ndí Mátán-án ní cuu ndí Jácób.

16 Te déhe ndí Jácób-án ní cuu ndí Chèé tée ní cuu yí tá Màriá xíchí ní cuu náná Jèsús Yáá ní tendaha Dùtú Ndióxi ní quixí ñuyíú-a.

17 Te sa ní cuu úxúú tñhá cue tée cùu ñani tñhá ndii Àbrahám ndécú dàv-áⁿ, te dàtnùní ní cacu ndii Dàvií ðiu-ni ñani tñhá ndii. Te núú tñhá méé ndii Àbrahám ndihi ndii Dàvií ní cuu úxícúmi tñhá-güedé. Te ducaⁿ te sa ní xínu úxícúmi-gã tucu-güedé ní cacu, te dàtnùní ní tñi ñaha cue tée ñuu Babilonia xii ñayiu isràél ndécá ñaha-güedé xii-yu cuháⁿ ñuu-güedé cuendá yàcáⁿ cundecu-yu. Te sátá ní yáha sá dúcáⁿ ní cuu, te ní cacu úxúni tucu cue tée ní cuu ñani tñhá ndii Àbrahám ndihi ndii Dàvií, te dàtnùní ní cacu Xitohó Jesucristú ñuyúí-a. Te núú tñhá méé-gã ní cuu úxícúmi tñhá-güedé.

*Ní cacu Jèsús
(Lc. 2:1-7)*

18 Te duha ní cuu cútnàhá ní cacu Xitohó Jesucristú, chi dàv-áⁿ ní xíndecu ñⁿ xíchi cuéchi ní xínani Màriá. Te xíchi-áⁿ sa ní cundáá tñuhu sá tñandaha-xi ndihi ñⁿ tée ñani Cheé. Te cùmání-gã tñandaha-xi ndihi tée-áⁿ te Espiritú Yá Ndióxi ní quide ní ngúhuⁿ dèhe-xi.

19 Te té Chèè tée cuini candeca ñaha xii xíchi-áⁿ ní cutnùní iní-dé sá ñuhú dèhe-xi. Te cùu-dé ñⁿ tée quide ndáá, núu xiáⁿ duuⁿ duuⁿ ní sani iní-dé sá vã tñandaha-gá-dé ndihi-xi, te ðicó-ni sá ñà túú ní cãháⁿ-dé chi ní cuini-dé sá vã cãháⁿ cuèhé cãháⁿ duha ñayiu cuendá-xi.

20 Te sátá dúcáⁿ ní sani iní-dé te ní ngáva-dé ní xídí-dé, te núú sàni-dé ní sáháⁿ ñⁿ espíritú xínú cuèchi núú Yá Ndióxi ní xáhaⁿ-xi xii-dé:

—Yòhó té Chèè tée cùu ñani tñhá ndii Dàvií, yúhú càchi tñuhu-í xii-n sã ñà túú nã cani iní-n, tñandaha nahi-ni-n ndihi tá Màriá cuèi ñuhu dèhe-xi, chi mee Espiritú Yá Ndióxi ní quide-xi ducaⁿ ní ngúhuⁿ dèhe-xi.

21 Te na càcu dèhe-xi-áⁿ te danàni-n-dé Jèsús. Te ducaⁿ cùnani-dé, chi tée-áⁿ cada-dé cuendá sá vã cündecu-gá cue ñani tñhá-dé ñayiu isràél ichi cuèhé ichi duha —duha ní xáhaⁿ espíritú-áⁿ xii té Chèè-áⁿ núú sàni-dé.

22 Te ducaⁿ ní cuu chi ní quee ndáá-xi nàcuáa ní xáhaⁿ Yá Ndióxi xii ñⁿ tée ní cãháⁿ tñuhu-gá ndéé sanaha. Te tée-áⁿ ní chídó tñuni-dé núú tütú-gá nàcuáa ní xáhaⁿ-gã xii-dé, te duha ní xáhaⁿ-gã:

23 Cundecu ñⁿ xíchi cuéchi ndéé cuèé-gã.

Te òré ndécú íí-xi vátá ñhí-gá yii-xi te ngúhuⁿ dèhe-xi.

Te òré ná cacú dèhe-xi te danàni ñahá-yu Emànuél.

Duha ní xáhaⁿ-gã xii tée-áⁿ ní chídó tñuni-dé núú tütú-gá. Te tñuhu Emànuél-áⁿ quèé-xi: Yá Ndióxi ndécú ndihi-o. Núu xiáⁿ ducaⁿ ní cuu vitna.

24 Te òré ní ndiquíú iní té Chèè-áⁿ te ní quide-dé nàcuáa ní xáhaⁿ espíritú-áⁿ xii-dé chi ní tñandaha-dé ndihi tá Màriá.

25 Dico ndi ðiiⁿ ní xíndecu-yu ndéé ní sáá nduu ní cacu dèhe-xi. Te òré ní cacu dèhe-xi-áⁿ te ní dánání ñaha-dé Jèsús.

2

Cue tée cuángoto ñaha xii Jèsús

1 Te Jèsús ní cacu-gá ñⁿ ñuu nání Belén, te ñuu-áⁿ yíndèhu-xi distritú Jùdeá. Te dàv-áⁿ cùnùu té Hèrodés yíndàha-dé ñayiu. Te ñuu Jerusalén ní quexio cue tée véxi ndàa xio nàcuáa quène nchíanchii, cue tée túha dàcuaha cuendá nchaa sá ndéé andiu.

2 Te ndücu tñuhu-güedé núú ñayiu ñuu-áⁿ, te xáhaⁿ-güedé:

—¿Vá cündèe iní-ndó càchi tñuhu-ndo ndéé ndécú tée quíndaha ñaha xii ñayiu isràél-áⁿ? Chi ní xiní-ndí ní quene chódíní-dé ndàa xio nàcuáa quène

nchíanchii, núu xíáⁿ véxi-ndí chi cuíní-ndí quíní-ndí-dé te chiñuhu-ndí-dé — càchí-güedé xáhaⁿ-güedé xii-yu.

³ Te òré ní níhí tée cunu nani Herodés tnúhu sá ndúcú tnúhu cue tée-áⁿ ndèé ndécú tée quíndaha ñaha xii ñáyiú isràél, te ñá túú tnàhí ní cùu váha iní-dé, te ñá-ni ducaⁿ ñá túú ní cùu váha iní tnàhá nchaa ñáyiú ñúú-áⁿ.

⁴ Te ní cana-dé cue tée cùu dútú cùnùu, ndihi cue tée ñàcuaha ñaha xii ñáyiú nchaa tnúhu ní chídó tnùní ndíi Moisés, te ní xicáⁿ tnúhú-dé núú-güedé núu xini-güedé ndèé cacu Cristú tée tendaha Yá Ndiòxi quixi ñuyú-a.

⁵ Te ní xáhaⁿ-güedé xii-dé:

—Hⁿ ñúú yíndèhu distritú Júdeá cacu-dé, te ñúú-áⁿ nání-xí Belén, chi quee ndáá-xi nàcuáa ní xáhaⁿ Yá Ndiòxi xii ñⁿ tée ní xóo cáháⁿ tnúhu-gá ndéé sanaha. Te duha ndúu tnúhu ní chídó tnùní-dé núú tütú-gá:

⁶ Ñúú Belén cúu-xí ñⁿ ñúú líhi yíndèhu distritú Júdeá, te ío-gá cùnùu-xi dacúxí dàva-gá ñúu cùnùu yíndèhu distritú-áⁿ,

chi diu ñúú-áⁿ quee ñⁿ tée ío cunu.

Te tée cunu-áⁿ quíndaha-dé ñáyiú cùu cuendá-í ñáyiú isràél.

Duha ní xáhaⁿ-gá xii tée ní xóo cáháⁿ tnúhu-gá, te ducaⁿ ní chídó tnùní-dé núú tütú-gá —càchí-güedé xáhaⁿ-güedé xii té Hèrodés.

⁷ Te sáta dúcáⁿ te té Hèrodés dayuhu ñí cana-dé cue tée ndècu tnúhu núu ndèé ní cacu tée quíndaha ñaha xii ñáyiú isràél, te ní xicáⁿ tnúhú-dé núú-güedé ná nduu cùu-xi nduu díhna nuu ní xini-güedé chódíní.

⁸ Te sáta dúcáⁿ te ní xáhaⁿ-dé xii-güedé:

—Chí cuáháⁿ ñúú Belén te nducu tnúhu váha-ndo núu ndèé ní cacu tée ducaⁿ quíndaha ñaha xii ñáyiú isràél. Te òré ná náníhí-ndó-dé te quixi-ndo càchí tnúhu-ndo cuendá quíhíⁿ-í tnàhá-í chiñuhu-í-dé —càchí-dé xáhaⁿ-dé xii-güedé.

⁹ Te sáta dúcáⁿ ñí xáhaⁿ té Hèrodés-áⁿ te ní xica-güedé cuáháⁿ-güedé. Te chódíní ñí xini-güedé ní quene ndàa xio nacuáa quène nchíanchii-áⁿ yòdo nuu-di núú-güedé cuáháⁿ. Te ní ngüíñí chódíní-áⁿ, te núú ñí ngüíñí-di-áⁿ yíndáá núú ndécú Jèsús.

¹⁰ Te òré ní xini cue tée-áⁿ ní ngüíñí chódíní-áⁿ núú yíndáá ndécú-gá, te ní cudíí víhí iní-güedé.

¹¹ Te ducaⁿ te ní quexio-güedé ndéé núú cáá vèhe ndecu Jèsús. Te òré cuánguihu-güedé xití vehe te ní xini-güedé Jèsús ndécú-gá ndihi náná-gá Màriá. Te ní ngüíñí xití-güedé, te ní ngüíta-güedé ní cachí-güedé sá ío càhnu cuu Jèsús. Te dātnùní ní nacaáⁿ-güedé cājá xinehe-güedé, te ní tava-güedé díhúⁿ cuááⁿ, ndihi dúsa sá ío váha sáháⁿ tnámí nani insiensú, ndihi yúcu sá nání mírriá ní taxi ndecu-güedé núú Jèsús cuendá cuu-xi ñⁿ táhú sá cúu-xí-gá.

¹² Te Yá Ndiòxi ní cáháⁿ-gá núú sání-güedé, te xáhaⁿ-gá xii-güedé sá vā náyáha-gá-güedé cáháⁿ ndihi-güedé té Hèrodés. Núu xíáⁿ cue tée-áⁿ cuánuhú-güedé íngá ichi, te ñá túú-gá ní náyáha-güedé núú ndécú té Hèrodés.

Cuáháⁿ-yu ndihi Jèsús nàcióⁿ Ègiptú

¹³ Te sáta ñí yáha cuánuhú cue tée ní sángoto ñaha xii Jèsús, te ní quexio ñⁿ espíritú xínú cuèchi núú Yá Ndiòxi núú sání té Chèé, te xáhaⁿ-xi xii-dé:

—Véxi-í càchí tnúhu-í xii-n sá ndàcòo-n, te ndee-n ñúú-a ndihi Jèsús, ndihi náná-gá cunu-ndo quíhíⁿ-ndó nàcióⁿ Ègiptú, chi té Hèrodés tendaha-dé cue tée quixi nanducu ñaha xii Jèsús cuendá cahni ñaha-güedé. Te yacáⁿ cundecu-ndo

ndéé cachí tnúhu-í xii-n ndùu ndixi-ndo —cachí espíritú-án xáhaⁿ-xi xii té Chèé núú sàní-dé.

¹⁴ Te té Chèé-án nǐ ndacóo-dé, te niú ní xica-dé ndihí tá Màriá ndécã-yu Jèsús cuáhán nàcióⁿ Ègiptú.

¹⁵ Te nàcióⁿ Ègiptú-án ndécũ-yu ní xihí té Hèrodés. Te ducaⁿ nǐ cuu chi ní quee ndáá-xi nàcuáa ní cachí ìⁿ téé ní xóo cáháⁿ tnúhu Yá Ndióxi ndéé sanaha nǐ quide-dé núú-gã ní cáháⁿ-dé yuhu-gã, te duha ní xáhaⁿ-gã ní cáháⁿ-dé: “Nàcióⁿ Ègiptú ndécú Dêhe-í ní cùu, te ní xáhaⁿ-í xii-dé sá ndéé-dê ñuú-án vã cúndècu-gã-dé”, duha ní xáhaⁿ-gã xii téé ní cáháⁿ tnúhu-gã ní quide-dé núú-gã.

Té Hèrodés ní táuchúú-dê cahni-güedé cue landú

¹⁶ Te cue téé ní sângoto ñaha xii Jèsús ní dándàhú-güedé té Hèrodés, chi ñá túú ní nàyáha-güedé cùñaha-güedé sá nǐ naníhí-güedé Jèsús. Te sátá nǐ cutnùni iní té Hèrodés sá nǐ dándàhú ñáhá-güedé xii-dé te ní cudééⁿ víhí-dé, te ní tendaha-dé cue téé cuáhán ñuú Belén, ndihí nchaa dava-gã ñuú cáá yàtni xiáⁿ cuendá cahni-güedé mee-ni cuè landú téé. Te ndéé cue landú íchí nǐ cacu, ndihí ndéé cue landú sa ní nútahá úú cuíá-xi nchaa-güexi cahni-güedé ní xáhaⁿ-dê. Te ducaⁿ nǐ quide-dé chí ní quide cuendá-dé nàcuáa ndùu tnúhu ní xáhaⁿ cuè téé ní sângoto ñaha xii Jèsús nduu nǐ xiní-güedé chódíní, núu xiáⁿ ducaⁿ nǐ táuchúúⁿ-dê ní quide cue téé-án.

¹⁷ Te ducaⁿ nǐ cuu chi ní quee ndáá-xi nàcuáa ní cachí ndíi Jeremiás téé ní xóo cáháⁿ tnúhu Yá Ndióxi ndéé sanaha, te duha ní cachí ndíi:

¹⁸ Ní tecú ndáhí víhí ñáyi ñuú Rámá sá ndìhú iní-yu, te ñáyi xindáhyú-án cùú-yu ñaní tnáhá tá Ràquél, te ndàhyú-yu cuendá sá nǐ xihí déhe-yu.

Te ñáyi-án ñá túú ní cuini-yu dàñá-yu sá ndìhú iní-yu cuendá sá nǐ xihí déhe-yu.

Duha ní cachí ndíi Jeremiás.

¹⁹ Te sátá nǐ xihí té Hèrodés te ní sáháⁿ tucu espíritú xínú cuèchi núú Yá Ndióxi núú sàní té Chèé òré ndécú-dê nàcióⁿ Ègiptú, te ní xáhaⁿ-xi xii-dé:

²⁰ —Véxi tucu-í càchí tnúhu-í xii-n sã ndácóo-n, te núhú-n ndihí Jèsús ndihí náná-gã ñuú cue ñaní tnáhá-n ñáyi isràèl cundecu-ndo, chi sa ní xihí cue téé cuini cahni ñaha xii Jèsús ní cùu —cachí espíritú-án xáhaⁿ-xi xii té Chèé núú sàní-dé.

²¹ Te té Chèé-án nǐ ndacóo-dé, te ní ndee-dé ndihí Jèsús ndihí náná-gã cuánuhú-yu ñuú cue ñáyi isràèl ñáyi cùu ñaní tnáhá-yu.

²² Te té Chèé ní níhí-dé tnúhu sá té Arquelaú ní nucúnutnii-dé núú tátá-dé té Hèrodés distritú Jüdeá yindàha-dé ñáyi. Te ní yuhú té Chèé-án, te ñá túú ní cuini-dé quihíⁿ-dé cundecu-dé distritú-án. Te Yá Ndióxi ní cáháⁿ-gã núú sàní-dé, te ní xáhaⁿ-gã xii-dé sá quihíⁿ-dé distritú Galileá, núu xiáⁿ yacáⁿ cuáhán-yu.

²³ Te òré ní quexió-yu distritú Galileá, te ní sáháⁿ-yu ìⁿ ñuú nání Nàzarét ní xíndecú-yu. Te ducaⁿ nǐ cuu chi ní quee ndáá-xi nàcuáa ní cachí cue téé ní xóo cáháⁿ tnúhu Yá Ndióxi ndéé sanaha sá Jèsús cuu-gã téé ñuú Nazàrét.

3

Té Juàá téé dàcuandute ñaha xii ñáyi càháⁿ-dé tnúhu Yá Ndióxi xiti yucu (Mr. 1:1-8; Lc. 3:1-9, 15-17; Jn. 1:19-28)

¹ Te ní xica nduu sá dúcáⁿ ní cuu, te téé nàni Juáá téé dacuàndute ñaha xii ñáiyu ní quexio-dé yucu distritú Jùdeá càháⁿ-dé tñuhu Yá Ndiõxí núú ñáiyu xití yucu-áⁿ.

² Te xáhaⁿ-dê xíí-yu:

—Chí dándixi túu iní sá ñà túú quide váha-ndo ndècu-ndo, te daña-ndo nchàa ichi cuehé ichi duha, chi sa ní cuyatni nduu ndíhu ndaha ñaha Yá Ndiõxí xii-ndo —càchí-dé xáhaⁿ-dê xíí-yu.

³ Te ñu cuendá té Juáá-áⁿ ní chídó tñuní ndíi Chàiaá téé ní xóo cáháⁿ tñuhu Yá Ndiõxí ndéé sanaha, te duha ndíu tñuhu ní chídó tñuní ndíi cuendá-dé:

Tècú càháⁿ níhi ìⁿ téé yìhi xití yucu, te càchí-dé:

“Chí daña nchàa ichi cuehé ichi duha ndècu-ndo, te tñii-ndo ichi váha, Te ducaⁿ càda-ndo cuendá cundecu túha-ndo chi véxi Yaá ío cùnnu”, duha quesaha téé-áⁿ.

Duha ndíu tñuhu ní chídó tñuní ndíi Chàiaá-áⁿ cuendá té Juáá.

⁴ Te té Juáá-áⁿ ní xóo cuihnu-dé dóó idi caméyu, te ìⁿ ñii ní cuu pañú xití-dé, te ní xóo caxi-dé tíca làngóstá ndíhi ndudí ñúñú cuéchí.

⁵ Te ñáiyu ñuú Jerusàlén, ndíhi ñáiyu nchaa ñuú yíndèhu distritú Jùdeá, ndíhi ñáiyu nchaa ñuú cáá yàtni yúte Jòrdán ní sáháⁿ-yu ní xíndedóho-yu nàcuáa ní cáháⁿ té Juáá.

⁶ Te ní ngúita-yu ní náhmá-yu nchaa cuéchi-yu núú Yá Ndiõxí. Te òré ducaⁿ ní náhmá-yu te ní dácuàndute ñaha té Juáá xíí-yu yúte Jòrdán.

⁷ Te vâi cue téé cùu fariséú ndíhi cue téé cùu saducéú cuáháⁿ-güedé núú ndécú té Juáá cuíní-güedé dacuàndute ñaha-dé xii-güedé. Te òré ní quexio-güedé núú ndécú-dê, te ní xáhaⁿ-dê xii-güedé:

—jNchaa nchòhó cúú-ndó dàtná ìⁿ cóó dèéⁿ chi ío cuihna iní-ndó! ¿Te nása ní cuu núu tnáhá nchòhó ndúcú-ndó nàcuáa cada-ndo càcu nihnu-ndo núú tñúndóho cahnú vihi ta cuyatni ñaha xii-ndo véxi-í?

⁸ Te chí cádá vâha vitna cundecu-ndo cuendá ducaⁿ cùtñuní sá ní dáñá-ndó nchàa ichi cuehé ichi duha ndècu-ndo.

⁹ Te vâ càchí-ndó sã ío càhnu cuu-ndo cuendá sá cúú-ndó ñàní tnáhá ndíi Àbrahám. Chi cuéi ndéé yúú te ndacu Yá Ndiõxí ndada-gá ñáiyu te cuú-yu ñàní tnáhá ndíi Àbrahám.

¹⁰ Te caá chi ndècu túha-xi sá quèhndé-xi nchaa yutnu sá dúcáⁿ ñà túú càváha sávídí-xi-áⁿ, chi nchaa yutnu-áⁿ tèhndé-xi te cuángée-xi núú ñùhú càyú-xi. Te duha sãtnáhá-xi ndoho nchaa ñáiyu ñá túú quide váha-áⁿ chi nchaa ñáiyu ñá túú quide váha cúú-yu dàtná nchaa yutnu sá ñà túú càváha sávídí-xi.

¹¹ Te na càchí tñuhu ndáá-í xii-ndo sã yùhú dácuàndute-í mee-ni ñáiyu ní dáñá nchàa ichi cuehé ichi duha. Dico nchícúⁿ tucu íngá téé véxi, te téé-áⁿ taxi-dé Espíritú Yá Ndiõxí cundecu ndíhi-ndo. Te cùu-xi datná ìⁿ ñuhú, chi ndada ndóo ndada nine-xi iní-ndó. Te téé-áⁿ ío-gá cùnnu-dé dàcúúxi yùhú, chi yùhú cúú-í ìⁿ téé duuⁿ duuⁿ ñá túú tàú cuita nehe ni chàú-dé dico quide-í chiúⁿ-dé.

¹² Te téé-áⁿ sa véxi túha-dé sá cádá dèíⁿ ñaha-dé xii-o dàtná quidé ñáiyu ndàda ndoo triú, chi ñáiyu-áⁿ sa nèhe túha-ná-yu yaxíⁿ-yu òré náñàni cuendá ndada ndoo-yu. Te òré ndadá ndóo-yu triú-áⁿ te dàquee dèíⁿ-yu mihi-xi, te tàxúha-yu mee-nã triú-áⁿ te sàhmí-yu mihi-xi-áⁿ. Te dàtná quidé-yu mihi triú-áⁿ ducaⁿ sãtnahá-xi cada ñaha téé-áⁿ xii nchaa ñáiyu ñá túú quide váha, chi daquihíⁿ

ñáhá-dě xii-yu núú ñùhú núú càyú, te ñuhú-áⁿ ñà túú tñàhí ndàhvá —càchí-dé xáhaⁿ-dě xii-güedé.

Sàndute Jesús

(Mr. 1:9-11; Lc. 3:21-22)

¹³ Te Jèsús ní quee-gá distritú Galiléa cuáháⁿ-gá yúte Jòrdán núú ndécú tē Juàá cuèndá dacuàndute ñaha-dé xii-gá.

¹⁴ Te òré ní quexìo Jesús núú ndécú tē Juàá, te ñá cuíní-dé dacuàndute ñaha-dé xii-gá ní cùu, te ní xáhaⁿ-dě xii-gá:

—Yúhú tàù-í sá dácuañdute ñaha-n xii-í, te ñá díú dà yúhú dacuàndute ñaha-í xii-n —càchí-dé xáhaⁿ-dě xii-gá.

¹⁵ Te Jèsús ní xáhaⁿ-gá xii-dé:

—Queheⁿ daña, chí dacuítí xini ñuhu-xi ducaⁿ cada-o nacuaá cundáá-ó núú Yá Ndiòxí —càchí-gá xáhaⁿ-gá xii-dé.

Te té Juàá-áⁿ ní sáháⁿ uuⁿ-dé tñúhu ní xáhaⁿ Jèsús xii-dé.

¹⁶ Te ní dácuañdute-dé Jèsús. Te òré ní nene-gá xití ndute te ní xiní-gá nchìi andiù, te ní quee Espiritú Yá Ndiòxí véxi cuuⁿ-xi ngúndecu ndihí ñaha-xi xii-gá, te dàtná cáá ìⁿ lómá cáá Espiritú-áⁿ véxi cuuⁿ-xi.

¹⁷ Te òré-áⁿ ní tecú ní cáháⁿ Yá Ndiòxí ndéé andiù, te xáhaⁿ-gá xii Jèsús:

—Yòhó cúu-n Dèhe-í tée ío cùu iní-í te ío cùdíí ìní ñàhà-í xii-n —càchí-gá xáhaⁿ-gá xii Jèsús.

4

Sáculhá quidé yíca-xi cada Jesús sá ñà túú tàù-gá cada-gá ní cùu

(Mr. 1:12-13; Lc. 4:1-13)

¹ Te Espiritú Yá Ndiòxí ndécá-xí Jèsús cuáháⁿ ìⁿ xití yucu cuèndá yàcáⁿ cundecu tnaa-gá, te yàcáⁿ quexìo sáculhá coto ndeé ñáhá-xí xii-gá te núu ndisa sá vā cādá-gá ìⁿ sá ñà túú tàù-gá cada-gá.

² Te Jèsús ñá ní xèxi-gá údico nduu údico niú, te ducaⁿ te dàtnùni ní xícáⁿ iní-gá caxi-gá.

³ Te sátá dúcáⁿ te ní quexìo sáculhá quidé yíca-xi cada Jesús ìⁿ sá ñà túú tàù-gá cada-gá, te xáhaⁿ-xi xii-gá:

—Te núu ndisa sá cúu-n Dèhe Yá Ndiòxí te cùñaha xii yúú-a na nduu-xi paá —càchí-xi xáhaⁿ-xi xii-gá.

⁴ Te Jèsús ní xáhaⁿ-gá xii-xi:

—Núú tütú Yá Ndiòxí càchí-xi: “Ñá díú mèe-ni paá candeca-xi iní ñáyü ñuyú, chí tñàhá nchaa tñúhu càháⁿ Yá Ndiòxí candeca-xi iní-yu”, duha càchí-xi núú tütú-gá —càchí-gá xáhaⁿ-gá xii-xi.

⁵ Te dàtnùni sáculhá-áⁿ ndécá ñaha-xi xii-gá cuáháⁿ ñuu Jerusàlén, te yàcáⁿ ní xáhaⁿ-xi xii-gá cuasaá-gá díquí véñùhu càhnu sá ío cùnuu núú ñáyü isràél,

⁶ te dàtnùni ní xáhaⁿ tucu-xi xii-gá:

—Te núu ndisa cùu-n Dèhe Yá Ndiòxí te cuandèe ndava núú ñùhú cuèndá quee ndáá-xi nàcuáa càháⁿ-xi núú tütú-gá núú càchí-xi: “Yá Ndiòxí tendaha-gá cue espíritú xinú cuèchi núú-gá quixi-xi cuèndá coto ñaha-xi xii-n, te núú ndáhá-xí càundodo-n cuèndá sá vā dánícuèhé yúú sáháⁿ”, duha càchí-xi núú tütú-gá —càchí sáculhá-áⁿ xáhaⁿ-xi xii Jesús.

⁷ Te Jèsús ní xáhaⁿ-gá xii-xi:

—Te càchí tucu-xi núú tütú Yá Ndiöxí: “Vá cání ínì-n còto ndeé-n Dütú Ndiöxí Yaá cúú Ndiöxí-n cuèndá-ní sá cuìnì-n sá dácácu nihnu ñaha-gá xii-n ìⁿ sá sání ínì-n càda-n”, duha càchí-xi núú tütú-gá —càchí-gá xáhaⁿ-gá xii-xi.

⁸ Te sácuíhná ndécá tucu-xi Jesús cuáháⁿ ìⁿ núú tìndúú dùcúⁿ, te uuⁿni ní dánèhé núú ñáhá-xí xii-gá nchaandi tühú nacióⁿ cáá ñùyíú, ndìhi nchaa sá vaha íó ìⁿ ñàcióⁿ-án.

⁹ Te ní xáhaⁿ-xi xii-gá:

—Te núú yòhó ngüíñí xítì-n nùù-í chiñuhu ñaha-n xii-í ñá, te taxi cuèndá-í nchaa sá ní dánèhé ñáhá-í-a cuu cuèndá-n —càchí-xi xáhaⁿ-xi xii-gá.

¹⁰ Te Jesús ní xáhaⁿ-gá xii-xi:

—Xocuñí yòhó sácuíhná nùú ndécú-í-a, chi vá cúú càda-í nàcuáa càchí-n, chi núú tütú Yá Ndiöxí càchí-xi: “Chiñuhu-ndo Dütú Ndiöxí Yaá cúú Ndiöxí-ndó, te ñu-ni-gá cada-ndo nchaa nacuáa càháⁿ-gá”, duha càchí-xi núú tütú-gá —càchí-gá xáhaⁿ-gá xii-xi.

¹¹ Te dàtnùní sácuíhná ní dáñá-xí Jesús ní xica-xi cuáháⁿ-xi. Te sátá dúcáⁿ te ní quexio cue espíritu xínú cuèchi núú Yá Ndiöxí ní xinu cuechi-xi núú Jesús.

Distritú Galiléa ní chisaha Jesús chiùⁿ ní tnhú Tátá-gá Dütú Ndiöxí cada-gá (Mr. 1:14-15; Lc. 4:14-15)

¹² Te òré ní nihí Jesús tñuhu sá ní ngava té Juáá téé dàcuandute ñaha xii ñáyiú vecaá, te ní xica-gá cuáháⁿ-gá distritú Galiléa.

¹³ Te ní ñà túú ní xíndecu-gá ñuú Nazàrét, chi ní yáha-gá cuáháⁿ-gá ndéé ñuú Capèrnaúm yàcáⁿ ní xíndecu-gá, te ñuú-án cáá yatni yuhu lagúná, te yatni xiáⁿ cáá ñuhu nani Zabulón, ndìhi ñuhu nani Neftalí.

¹⁴ Te ducaⁿ ní cuu chi ní quee ndáá-xi nàcuáa ní chídó tñùní ndí Chàíá téé ní xóo cáháⁿ tñuhu Yá Ndiöxí ndéé sanaha núú tütú-gá núú càchí-xi:

¹⁵ Ñuhu nani Zabulón, ndìhi ñuhu nani Neftalí, ñuhu-án yíndèhu-xi distritú Galiléa,

te xiáⁿ xíndecu cue ñáyiú ñá túú cùu ñáyiú isràél,

te càa-xi yatni yuhu lagúná te ndáa ìngá xio yúte Jòrdán cúú-xí.

¹⁶ Te cue ñáyiú-án ndécú-yu ìⁿ núú néé chi ndécú-yu ichi cuèhé ichi duha, te sáá nduu te cada ínì-ndó sá ñáyiú-án queé-yu núú ditó chi vá cùndecu-gá-yu ichi cuèhé ichi duha.

Te ñu-ni ñáyiú-án cúú-yu ñáyiú ta xíta nihnu duuⁿ cuáháⁿ,

dico sáá nduu te vá cuíta nihnu-gá-yu.

Duha ní chídó tñùní ndí núú tütú-gá.

¹⁷ Te dàvá-án ní ngüíta Jesús ní dánèhé-gá ñáyiú, te ní xáhaⁿ-gá xií-yu:

—Chí dándixi túu ínì sá ñà túú quide váha-ndo ndècu-ndo te dañá-ndo nchàa ichi cuehé ichi duha, chi sa ní cuyatni nduu ndìhu ndaha ñaha Yá Ndiöxí xii-ndo —càchí-gá xáhaⁿ-gá xií-yu.

Jesús càháⁿ-gá cúmí tnhá cue téé tñì chácá (Mr. 1:16-20; Lc. 5:1-11)

¹⁸ Te Jesús ñhúh-gá ichi cuáháⁿ-gá tá yáha-gá yuhu làgúná Galiléa, te ní xiní-gá úú tnhá cue téé xídáquèe-güedé ñunu-güedé xítì ndute tñì-güedé chácá, chi quiti tnhá-án cúú chiùⁿ-güedé tñì-güedé-di. Te ìⁿ-dé nání-dé Xímú, àdi Pelú chi úú ñu-dé, te ñaní-dé cúú ìngá téé ndìhi-dé te téé-án nání-dé Ndríxí.

¹⁹ Te Jesús ní xáhaⁿ-gá xii-güedé:

—Chí dáñá chiùn quide-ndo-án te quixi-ndo chitnahá ñáhá-ndó xii-í, te taxi-í ingá núú chiùn cada-ndo chi quíhí-ndó dàcahá-ndó ñáiyu cuèndá tuha ñàhá-yu xii-í —càchí-gá xàha-gá xii-güedé.

²⁰ Te òré-ni-án ní dáñá cuè téé-án ñunu-güedé, te ní tuha-güedé Jèsús.

²¹ Te ní xica tucu Jèsús cuáhá-gá luha-gá, te ní xiní tucu-gá úú-gá tnàhá cue téé tñi chácá. Te ñi téé-án nání-dé Jàcobó, te ñaní-dé cúú ingá téé ndíhí-dé te téé-án nání-dé Juàá, te ndi ndúú-güedé cúú-güedé dehe té Zebedeú. Te xixínucóo-güedé ndíhí tátá-güedé xití bàrcú xinatícu-güedé ñunu-güedé, te Jèsús ní cana ñaha-gá xii-güedé.

²² Te òré-ni-án ní dándóo-güedé bàrcú-güedé, ndíhí tátá-güedé, te ní tuha ñaha-güedé xii-gá.

Jèsús dánhé-gá cuéhé víhí ñáiyu

(Lc. 6:17-19)

²³ Te Jèsús tá xica ndodo-gá ñihí distritú Galileá cuáhá-gá tá dánhé-gá ñáiyu tnúhu váha tnúhu sá sánú lchi ñaha xii-yu nàcuáa ndíhu ndaha ñaha Yá Ndióxi xii-yu. Te ndi tnàhá ñi ñi ñuú sàá-gá te duca cuànguihu-gá xití veñúhu dánhé-gá ñáiyu tnúhu-án. Te ndi díñ ndi díñ núú cuéhé tnàhá ñi ñi ñáiyu dico nchaá-ni-yu ta quide tátna-gá cuáhá-gá.

²⁴ Te ndéé nchaá ñáiyu yíndehu distritú Siríá ní níhí-yu tnúhu nchaá nàcuáa quide Jèsús. Te ní queé-yu ñuú-yu te ndécá-yu nchaá ñáiyu tnàhá ndi díñ núú cuéhé cuáhá-gá núú ndécú Jèsús. Te cuéi ñáiyu xiyíhí, ndíhí ñáiyu ñá túú-gá càndá ñihú, ndíhí ñáiyu yíhí ñaha espíritú cündíhí yucu ñávàha ndécá-yu cuáhá-gá núú-gá, te nchaá-yu ní quide tátna ñaha-gá xii-yu.

²⁵ Te ío vai ñáiyu ní chinchícú ñáhá xii Jèsús, chí ní chinchícú ñáhá ñáiyu distritú Galileá, ndíhí ñáiyu nchaá ñuú xindáa Decápolis, ndíhí ñáiyu ñuú Jerusalén, ndíhí cue ñáiyu nchaá ñuú yíndehu distritú Júdeá, ndíhí ñáiyu xíndecu yatni yúte Jórdán ndáa xio quene nchíanchi.

5

Jèsús núcúo-gá ñi núú tìndúú dánhé-gá ñáiyu

¹ Te sáta ní xiní Jèsús sá cuéhé víhí ñáiyu nchicú ñáhá xii-gá, te ní xica-gá cuasaá-gá ñi núú tìndúú te xía ní ngóo-gá, te cue téé xica cuu ndíhí-gá ní nadúcú ndéé ñáhá-güedé xii-gá.

² Te ní ngúita-gá dánhé ñáhá-gá xii-güedé ndíhí cue ñáiyu-án, te xàha-gá:

Cuèndá ñáiyu ío váha táhú-xi

(Lc. 6:20-23)

³ —Váha táhú nchaá ñáiyu cùtnuní iní-xi sá ío-gá cúmāñi-yu cudíú-yu núú Yá Ndióxi, chí ñáiyu-án nduu táhú-yu ndíhu ndaha ñaha-gá xii-yu.

⁴ Váha táhú nchaá ñáiyu ndàhyú sá ndíhú iní-yu, chí Yá Ndióxi cuáñaha-gá tnúhu ndee iní cundecu ndíhí-yu.

⁵ Váha táhú nchaá ñáiyu ndàhú iní-xi, chí ñáiyu-án nduu táhú-yu cundecu-yu ñi xichi núú cuáñaha Yá Ndióxi xii-yu.

⁶ Váha táhú nchaá ñáiyu ío cuní cada nchaá nàcuáa càhá Yá Ndióxi, chí ñáiyu-án ío nduu vétú iní-yu.

⁷ Váha táhú nchaá ñáiyu cundahú iní tnàha ñáiyu-xi, chí ñáiyu-án diu-ni duca càda ñaha Yá Ndióxi xii-yu cundahú iní ñáhá-gá.

⁸ Váha táhú nchaa ñáyiú ní nduu ndoo ní nduu nine iní-xi, chi cue ñáyiú-án nduu táhũ-yu cundecú-yu ndihi Yá Ndiõxí.

⁹ Váha táhú nchaa ñáyiú càháⁿ dóho tnàha ñáyiú-xi nàcuáa cundecu ndihi váha tnàhá-yu, chi cùtnuní sá ñáyiú-án cuú-yu déhe Yá Ndiõxí.

¹⁰ Váha táhú nchaa ñáyiú ío ndòho ndecu ñuyíú-a sá cuendá sá quidě-yu nàcuáa càháⁿ Yá Ndiõxí, chi ñáyiú-án nduu táhũ-yu ndíhu ndaha ñàha-gá xií-yu.

¹¹ Te cùu-ndo ñáyiú ío váha táhũ-xi te núu na cùcuèhé ñáhá ñáyiú, àdi cada úhú ñáhã-yu xii-ndo, àdi daciaa díquí ñáhã-yu nándi cuéchi neñúú xii-ndo sá cuendá-í.

¹² Te òré ducaⁿ na càda ñahá-yu xii-ndo te cudíí víhí-ní ìní-ndó cundecu-ndo, chi ío váha càa sá ndécú àndiu nduu táhũ-ndó cundecu ndihi-ndo nduu na saá-ndó yàcáⁿ cundecu-ndo, chi ñu-ni ducaⁿ ní xóo cada ñaha cué ñani tnáhã-yu xii cue tée ní xóo càháⁿ tnúhu Yá Ndiõxí ní xíndecu ndéé sanaha.

*Cuendá ñíí ndihi cuendá ñuhú
(Mr. 9:50; Lc. 14:34-35)*

¹³ Te nchòhó cada iní-ndó sá cúú-ndó dàtná ñíí cuendá ñuyíú-a. Te ñíí chi nándihi-xi dico núu na ndúu víxiⁿ-xi, te ñá túú-gã nándihi-xi chi dängoyo-ná-ó, te yàha ñáyiú xènihmú-yu. Te ducaⁿ sãtnahá-xi cùu nchohó chi cùu-ndo dàtná ñíí váha te núu na càda váha-ndo, te núu vá càdá váha-ndo te queue tíhú-ndó.

¹⁴ Te nchòhó cada iní-ndó sá cúú-ndó dàtná ìⁿ sá dáyèhé ndécú ñuyíú-a, chi sànu ichi-ndo ñáyiú ichi váha. Te nchòhó xìní-ndó sá ñuu ìⁿ ñuu cáá ìⁿ núú tìndúú te vá cúú càchí-ó sá nguĩvãha-xi.

¹⁵ Te ñá túú xìní-ó ìⁿ ñáyiú teñuhú-yu ìⁿ lìntèrná te chiváha-yu xití ìⁿ càjá, chi tàxi ndecú-yu núú ñnu cuendá cutnùní núú nchàa ñáyiú ndècu vehe.

¹⁶ Te ducaⁿ càda nchohó cada váha-ndo dàtná quidé ìⁿ ñuhú dayèhe-xi núú ñáyiú, te ducaⁿ quini ñáyiú nàcuáa quide-ndo ndecu-ndo, te tnàhá-yu cachí-yu sá ío càhnu cuu Dútú Ndiõxí Yáa cúú Tátá-ndó ndècu andíu chi quini-yu sá quidé váha-ndo ndècu-ndo.

Cuendá tnúhu ní chídó tnùní ndíi Moisés

¹⁷ Te vá cáni ìní-ndó sá yùhú véxi-í xocàni-í tnúhu ní chídó tnùní ndíi Moisés, te ní vá cáni ìní-ndó sá véxi-í xocàni-í tnúhu ní chídó tnùní cue tée ní xóo càháⁿ tnúhu Yá Ndiõxí ndéé sanaha, chi yùhú véxi-í sá càdá-í nàcuáa càháⁿ nchaa tnúhu-án.

¹⁸ Te na càchí tnúhu ndáá-í xii-ndo sá tnúhu ní chídó tnùní ndíi Moisés ío ndáá càháⁿ-xi, chi dacuití cùu nchaa nacuuáa càháⁿ-xi. Te yáchí-gá naa andíu ndihi ñuyíú dàcúúxí sá quèe càva ìⁿ tnúhu-án.

¹⁹ Núu xíáⁿ nchaa ñáyiú na càchí sá dává tnúhu ní chídó tnùní ndíi Moisés ñá túú xini ñuhu-xi chi ñá túú cùnuu-xi, te ñáyiú-án ñu-ni ducaⁿ dànehé-yu nchaa dava-gá tnàha ñáyiú-yu, te sá dúcáⁿ quidé-yu te vá cùnùu vihí-yu núú ndécú Yá Ndiõxí táxí tnùní-gá, chi cuú-yu dàtná ìⁿ ñáyiú nchicúⁿ cuií-nã. Dico nchaa ñáyiú nchicúⁿ nihnu quide nchaa nacuuáa càháⁿ nchaa tnúhu-án, te ñu-ni ducaⁿ dànehé-yu nchaa dava-gá tnàha ñáyiú-yu, te ñáyiú-án ío cunúú-yu núú ndécú Yá Ndiõxí táxí tnùní-gá.

²⁰ Te na càchí tnúhu-í xii-ndo sá ío xini ñuhu-xi cada-ndo nchaa nacuuáa càháⁿ Yá Ndiõxí, te vá càdá-ndó dàtná xíquide cue tée dànehé ñáhá xii ñáyiú nchaa tnúhu ní chídó tnùní ndíi Moisés, ndihi dàtná xíquide cue tée cùu fariséú,

chi núu na càda-ndo datná xĩquide cue téé-áⁿ ñá, te vá ndúú tǎhú-ndó ndĩhu ndaha ñaha Yá Ndiõxi xii-ndo.

Jèsús càháⁿ-gá cuendá ñáyiú cùdééⁿ
(Lc. 12:57-59)

21 Te nchòhó sa xini-ndó sǎ ncháá ñáyiú ní cuu ñaní tnáhá-ndó ní xindecu ndéé sanaha ní níhĩ-yu tnúhu sá vǎ cúú cǎhni-yu tnàha ñáyiú-yu, chi núu ducaⁿ na càdá-yu te nacháhu-yu cuéchi-yu.

22 Dico vitna na cǎchĩ tnúhu-í xii-ndo sǎ núu ndédani càa-ndo na cudééⁿ-ndó núú tnàha ñáyiú-ndo, te nacháhu-ndo sǎ dúcáⁿ quide-ndo, àdi núu na cǔcuèhé-ndó-yu te núú chítú núú tàcá cundáá cuéchi-ndo te núu ducaⁿ na càda-ndo, àdi núu na cúu-ndo tnàha ñáyiú-ndo ìⁿ tnúhu véé vihi, te cucuéchi vihi xii-ndo chi quihíⁿ-ndó núú ùhú núú ndàhú.

23 Te xǎⁿ núu nchòhó òré ndécú ndihĩ-ndo ìⁿ sá cuini-ndó cuǎha-ndo Yá Ndiõxi nduu tǎhú-gǎ, te òré cuáháⁿ-ndó cuǎñaha-ndo xii-gá, te òré ní quexio-ndo núú dúcáⁿ cuǎñaha-ndo xii-gá sá ndúú tǎhú-gǎ, te ní ndacu ini-ndó sǎ ndécú ñáyiú ñá túú cùu váha ini ñáhá xii-ndo cuendá ìⁿ sá ní cumání núú tnáhá-ndó.

24 Te dàndóo-ndo sǎ dúcáⁿ nèhe-ndo cuáháⁿ nduu tǎhú Yá Ndiõxi, te díhna-gá quihíⁿ-ndó nàcáháⁿ cǎhnú ini tnáhá-ndó ndihĩ ñáyiú ñá túú cùu váha ini ñáhá xii-ndo-áⁿ, te dàtnúni ducaⁿ te quihíⁿ-ndó cuǎha-ndo Yá Ndiõxi sá ndúú tǎhú-gǎ.

25 Te núu ió ìⁿ-ndo ní sáháⁿ ñáyiú núú tǎe cùchiuⁿ ní sacáⁿ cuéchi-yu cuendá-ndó cuendá ìⁿ sá ní quide-ndo, te òré ní nanihĩ tnáhá-ndó ndihĩ-yu cuáháⁿ-ndó núú tǎe cùchiuⁿ-áⁿ, te nacáháⁿ cǎhnú ini tnáhá-ndó ndihĩ-yu cuendá sá vǎ cuǎha cuendá ñáhá-gǎ-yu xii-ndo núú tǎe cùchiuⁿ, chi núu ducaⁿ na càdá-yu te tǎe cùchiuⁿ-áⁿ cuǎha cuendá ñáhá-dě xii-ndo núú cùe tǎe cùu poleciá, te cue téé-áⁿ chihĩ ñaha-güedé vecaá xii-ndo.

26 Te na cǎchĩ tnúhu ndáá-í xii-ndo sǎ vǎ cǎcu-ndo te núu na ngáva-ndo vecaá ndéé nacháhu-ndo ncháa sá tǎu-ndó.

Cuendá cue ñáyiú ñá túú quide váha

27 Te nchòhó sa xini-ndó nàcuáa nduu tnúhu ní cǎháⁿ cue téé ní xindecu ndéé sanaha, te duha ní cachĩ-güedé: “Nchaa cue téé vá cúú cǎháⁿ ndihĩ-güedé ñadihĩ te núu ñá díú ñadihĩ-güedé cúú-yu, te diu-ni ducaⁿ tùcu nchaa cue ñáyiú dihĩ vá cúú cǎháⁿ ndihĩ-yu tǎe te núu ñá díú yĩⁿ-yu cùu-güedé”, duha ní cachĩ-güedé.

28 Dico yúhú cǎchĩ tnúhu-í xii-ndo sǎ ndéda-ni càa cue téé na cundehe ìⁿ ñadihĩ te núu na càni ini-güedé cundecu díú ini-güedé ndihĩ-yu te cada ini-ndó sǎ datná sá sá ní cǎháⁿ ndihĩ ñaha-güedé xii-yu sá dúcáⁿ ní sani ini-güedé.

29 Te núu ìⁿ xio tinùu-ndo quide-xi quide-ndo nándi sá cuèhé sá dúhá te tava-ndo, chi váha-gá sá ná cuíta te ñá díú nihĩ ní ndúú yiqui cuñú-ndó quihíⁿ-xi núú ùhú núú ndàhú.

30 Te núu ìⁿ xio ndaha-ndo quide-xi quide-ndo nándi sá cuèhé sá dúhá te quehdé-ndó, chi váha-gá sá ná cuíta ìⁿ xio ndaha-ndo te ñá díú sǎ nihĩ ní ndúú yiqui cuñú-ndó quihíⁿ-xi núú ùhú núú ndàhú.

Jèsús càháⁿ-gá cuendá cue ñáyiú dàña tnaha
(Mt. 19:9; Mr. 10:11-12; Lc. 16:18)

31 "Te nchòhó sa nàha tucu-ndo nacuaá ní cáháⁿ tucu cue téé ní xíndecu ndéé sanaha, te duha ní cachí-güedé: "Te núu ìⁿ téé na dàña tñaha-dé ndihí ñadìhí-dé, te xini ñuhu-xi cadúha-dé ìⁿ tutú cuáñaha-dé núú cáháⁿ-xi sá ní dáñá ñaha-dé", duha ní cachí-güedé.

32 Dico yúhú cächí tñuhu-í xii-ndo sã cúú dàña ìⁿ téé ñadìhí-dé, te núu cùtnuní ndáá iní-dé sá cáháⁿ ndihí-aⁿ ingá téé. Dico núu ñá túú dùcaⁿ quide-aⁿ te ñá túú ndúu váha-xi daña ñaha-dé. Te núu ñá túú dùcaⁿ quide ñadìhí-dé, te cada iní-ó sã méé-dé ní sanu ichi ñaha-dé xii-aⁿ cáháⁿ ndihí-aⁿ ingá téé te núu na dàña ñaha-dé. Te téé na nàqueheⁿ ñaha xii ñaha ní dáñá ñaha yì-xi-áⁿ, te ñiu-ni ñá túú ní quide váha-dé sá dúcáⁿ ní nàqueheⁿ-dé ñaha-áⁿ.

Ñáyiu cãcunehe ñaha xii Yá Ndiòxí cuendá cutnùnì iní tñaha ñáyíu-yu sá ndàá cadá-yu ìⁿ sá sání iní-yu cadá-yu

33 Te sa nàha tucu-ndo nacuaá ní cáháⁿ tucu cue téé ní xíndecu ndéé sanaha, chi cue téé-áⁿ ní cachí-güedé: "Te núu cãcunehe-ndo Yá Ndiòxí núú tñaha ñáyiu-ndo nãcuáa cutnùnì iní-yu sá ndàá cada-ndo ìⁿ sá sání iní-ndó càda-ndo, te cada-ndo", duha ní cáháⁿ dóho tñaha-güedé.

34 Dico yúhú cächí tñuhu-í xii-ndo sã ñà túú nã cacunehe-ndo sã ndàá cada-ndo ìⁿ sá sání iní-ndó càda-ndo. Te ni vã cãcú nèhe-ndo andiu chi yacáⁿ cúú-xi núú núcóo Yá Ndiòxí táxi tñuní-gá.

35 Te ni vã cãcú nèhe-ndo ñuyúu-a, chi tñahá ñuyúu-a ndècu-gá, te ni vã cãcú nèhe-ndo ñuú Jerusalén chi ñuú-áⁿ cúú cuendá-gá, te ñiu-gá cúú-gã Yáá ío cùnuu.

36 Te ni vã cãcú nèhe-ndo díquí-ndó chi nàha-ndo sá ni ìⁿ idi díquí-ndó ñã ndácú-ndó ndàda cuixíⁿ-ndó àdi ndada tñuu-ndo.

37 Te váha-gá sá núu ìⁿ sá sání iní-ndó càda-ndo, te cachí-ni-ndo: "Cuu cada-ndí, àdi vã cúú càda-ndí", cachí-ni-ndo. Chi nchaa dava-gá sá chídó-ndó cáháⁿ-ndó òré ducaⁿ sání iní-ndó càda-ndo ìⁿ sá cadá-ndó cùu-xi sá dácàhu iní ñáhá yùcu ñávaha.

Cuendá ñáyiu nàchinaa sá quidé ñaha tñaha ñáyiu-xi
(Lc. 6:29-30)

38 Te sa nàha tucu-ndo nacuaá ní cáháⁿ tucu cue téé ní xíndecu ndéé sanaha, chi cue téé-áⁿ ní cachí-güedé: "Ñáyiu na càda ñaha tñaha ñáyiu-xi ìⁿ sá ñà túú vãha, te nanchòcáva-yu nachinaa-yu sá ní quide ñaha tñaha ñáyíu-yu", duha ní cachí-güedé.

39 Dico yúhú cächí tñuhu-í xii-ndo sã ñà túú nã cada-ndo nchàa cue ñáyiu cuihna iní-xi te núu quide ñahá-yu ìⁿ sá ñà túú vãha xii-ndo. Te núu ní canihá-yu ìⁿ xito te cuiní tucú-yu canihá-yu ingá xito te daña-ndo na cãnihá-yu.

40 Àdi ní sacáⁿ cuéchi-yu núú cuè téé cùchiuⁿ cuendá-ndó, te cuiní-yu quendé-yu dúhnú-ndó te daña-ndo na cãnehé-yu quíhíⁿ, te tñahá-ni dóo ndéxí ndòdo-ndo daña-ndo na canehé-yu quíhíⁿ.

41 Te núu quide yicá-yu caca-ndo dàtná úú kilómetrú cuido-ndo ndàchiúⁿ-yu ña, te chido-ndo úú-gá tucu kilómetrú cuido-ndo ndàchiúⁿ-yu.

42 Te núu ío ìⁿ sá xicáⁿ-yu núú-ndó te cuáñaha-ndo, àdi ío ìⁿ sá sánùu-yu núú-ndó te cuáñaha ñuu-ndo.

Cuu iní-ó nchàa ñáyiu cùu úhú iní ñáhá xì-o
(Lc. 6:27-28, 32-36)

43 Te sa nàha tucu-ndo nacuaá ní cachí tucu cue téé ní xíndecu ndéé sanaha, chi cue téé-án ní cachí-güedé: “Cuu iní-ndó cuè ñáyiú ndècu ndìhi váha-ndo, te cuu úhú iní-ndó cuè ñáyiú cuu úhú iní ñáhá xii-ndo”, duha ní cachí-güedé.

44 Dico yúhú càchí tnúhu-í xii-ndo sá cúú iní-ndó cuè ñáyiú cuu úhú iní ñáhá xii-ndo, te cáháⁿ váha-ndo cuèndá cue ñáyiú cáháⁿ úhú ñáhá xii-ndo, te cada-ndo sá váha sá cúú-xí cuè ñáyiú cuu úhú iní ñáhá xii-ndo, te cáháⁿ ndìhi-ndo Yá Ndióxi cuèndá cue ñáyiú xícuèhè ñáhá xii-ndo, ndìhi cuèndá cue ñáyiú quide úhú ñáhá xii-ndo.

45 Te núu na càda-ndo nchaa nacuaá cáháⁿ-í-a, te ducaⁿ te cutnúni sá cúú-ndó déhe Tátá-ndó Dütú Ndióxi Yaá ndécú àndiú. Te diu-gá cúú-gá Yaá quidé quène nchíanchii, te diu-ni-gá cúú-gá Yaá dácúuⁿ dáú ñuyúú-a, te ducaⁿ quide-gá cuèndá cuu-xí sá váha sá cúú-xí cuè ñáyiú quide váha, ndìhi sá cúú-xí cuè ñáyiú ñá túú quide váha.

46 Te núu nchòhó ná cúú iní-ndó mèe-ni ñáyiú na cuu iní ñáhá xii-ndo, te vá càchí-ndó sá Yá Ndióxi taxi-gá sá ndúú tǎhú-ndó sá dúcáⁿ quide-ndo, chi cuèi cue téé cuihna iní-xi quide cobrá ñáhá xii cue ñáyiú cuèndá impuèstú ducaⁿ xíquidè-güedé.

47 Te núu mee-ni ñáyiú ndècu ndìhi váha-ndo ïo váha cáháⁿ ndìhi-ndò-yu, te vá càchí-ndó sá ïo váha quide-ndo sá dúcáⁿ quide-ndo, chi cuèi ndéé nchaa ñáyiú ñá túú xini dana cuèndá Yá Ndióxi ducaⁿ xíquidè-yu.

48 Te duha ndùu tnúhu cáháⁿ-í cuèndá sá nchòhó cada ndáá-ndó cùndecu-ndo datná quidé ndáá méé Tátá-ndó Dütú Ndióxi Yaá ndécú àndiú –duha ní dánèhè ñáhá Jèsús xii cue téé xica cuu ndìhi-gá ndìhi nchaa ñáyiú.

6

Jèsús dánèhé-gá ñáyiú nàcuáa cadá-yu sá vǎha

1 Te Jèsús ndécú-ni-gá dánèhé-gá cue téé xica cuu ndìhi-gá ndìhi nchaa ñáyiú, te xǎhaⁿ-gǎ:

–Te òré quidé-ndó sá vǎha te vá cadá-ndó núú ñáyiú cuèndá-ni sá cuini-ndó cáháⁿ váha-yu cuèndá-ndó, chi núu núú ñáyiú ducaⁿ na càda-ndo te Dütú Ndióxi Yaá cúú Tátá-ndó vǎ táxi-gǎ sá ndúú tǎhú-ndó.

2 Te xǎⁿ núu nchòhó òré chindèe-ndo ñáyiú ndǎhú, te vá cǔñaha-ndo xii cue ñáyiú sá chindèe-ndo cue ñáyiú ndǎhú-áⁿ dátáá xíquide cue ñáyiú dǎndahú méé-xí sá quidé ndáá te ñá ndáá sá quidé ndáá-yu, chi ñáyiú-án ducaⁿ xíquidè-yu òré sǎháⁿ-yu veñúhu, chi dátécú tnúhu-yu nchaa ñáyiú òré ducaⁿ chindeé-yu ñáyiú ndǎhú. Te diu-ni ducaⁿ quidé-yu xǎháⁿ-yu xii cue ñáyiú sá chindèe-yu cue ñáyiú ndǎhú-áⁿ nchaa núú xícá cúú-yu, te ducaⁿ xíquidè-yu cuèndá cuini-yu cáháⁿ váha ñáyiú cuèndá-yu. Te yúhú na càchí tnúhu ndáá-í xii-ndo sá ñá túú ná nduu tǎhú ñáyiú-án núú Yá Ndióxi sá dúcáⁿ quidé-yu chi mee-ni núú tnǎha ñáyiú-yu cùdiú-yu.

3 Te nchòhó òré chindèe-ndo ñáyiú ndǎhú, te cuèi ñáyiú ïo-gá váha ndècu ndìhi-ndo dico vá cǔñaha-ndo sá dúcáⁿ chindee-ndo cue ñáyiú ndǎhú-áⁿ, te ni cuè dava-gá ñáyiú vá cǔñaha-ndo.

4 Chi váha-gá sá ïni méé-ni-ndó ná cùhuⁿ sá dúcáⁿ chindee-ndo cue ñáyiú ndǎhú-án. Te núu ducaⁿ na càda-ndo ña, te Dütú Ndióxi Yaá cúú Tátá-ndó taxi-gá sá ndúú tǎhú-ndó chi diu-ni mee-gǎ ndéhé-gǎ nàcuáa quide-ndo ndecu-ndo.

*Jèsús dánèhé-gá ñáyiú nàcuáa cáháⁿ ndìhi-yu Yá Ndióxi
(Lc. 11:2-4)*

⁵ Te nchòhó òré càháⁿ ndihì-ndo Yá Ndiòxí, te vá cádá-ndó dàtná xíquide cue ñáyiú dándahú méé-xí càchí sá quidé ndáá te ñá ndáá sá quidé ndáá-yu, chi ñáyiú-áⁿ tnàhá iní-yu cunutnii-yu càháⁿ ndihí-yu Yá Ndiòxí òré yíhí-yu veñúhu. Te ñu-ndí ducaⁿ xíquidé-yu nchaa núú xicá cùú-yu, te ducaⁿ quidé-yu cuèndá sá cuiní-yu quini ñáyiú nàcuáa xíquidé-yu. Te na càchí tnúhu ndáá-í xii-ndo sá ñá túú ná nduu táhú ñáyiú-áⁿ núú Yá Ndiòxí sá dúcáⁿ quidé-yu chi mee-ni núú tnàhá ñáyiú-yu cùúú-yu.

⁶ Te nchòhó òré cuiní-ndó càháⁿ ndihì-ndo Yá Ndiòxí, te ndíhu ndedí nihnu-ndo xití vehe-ndo, chi ñu-gá cúú Tátá-ndó te ndècu ndihì ñaha-gá xii-ndo, te ñu-ndí mee-gá ndéhé ñaha-gá xii-ndo nàcuáa quide-ndo, te núú ducaⁿ na càda-ndo te taxi-gá sá ndúú táhú-ndó.

⁷ Te òré càháⁿ ndihì-ndo Yá Ndiòxí te vá súúni cuèndá-ni dacáá-ndó tnúhu càháⁿ ndihì-ndo-gá dàtná xíquide cue ñáyiú ñá túú xini tnúhu-gá, chi ñáyiú-áⁿ sání iní-yu sá tédòho ñaha vli-gá Yá Ndiòxí xii-yu sá dúcáⁿ súúni dacáa-yu tnúhu càháⁿ ndihì ñàhá-yu xii-gá dico ñàhá.

⁸ Dico nchòhó, vá cádá-ndó dàtná xíquide cue ñáyiú-áⁿ, chi mee Tátá-ndó Dútú Ndiòxí sa ñaha-gá ná cúú nchàa sá xini ñùhu-ndo cuéi òré vátá càcáⁿ-gá-ndó núú-gá.

⁹ Te duha càháⁿ-ndó òré càháⁿ ndihì-ndo Yá Ndiòxí: Yòhó Tátá-ndí Dútú Ndiòxí Yaá ndécú àndiú, nchaa ñáyiú na càháⁿ-yu sá cúú-n Yaá ío yíñùhu.

¹⁰ Te xicáⁿ táhú-ndí núú-n sá ná sàá nduu ndíhu ndàhá-n-yu. Te cada-n dàtná càchí iní-n ñùyíú-a dàtná quidé-n àndiú.

¹¹ Te xicáⁿ táhú-ndí núú-n sá táxí-n sá cóhó-ndí sá cáxí-ndí ñⁿ nduu ñⁿ nduu.

¹² Te cada càhnu iní-n nchàa yicá cuèchi-ndí, chi tnàhá nchúhú quidé càhnu iní-ndí nchaa sá quidé ñàhá tnaha ñáyiú-ndí.

¹³ Te vá dáñá-n dàcàháⁿ ñàhá yùcu ñávàha xii-ndí cada-ndí sá ñá túú vàha, chi coto ñaha-n xii-ndí cuèndá sá vā dúcáⁿ càda ñaha-xi.

Te ñu-n cùú-n Yaá ío cùnuu nchaa nduu nchaa quíú, te ío càhnu cuu-n, te ñu-ndí-n quindaha ñaha-n xii-ndí ni caa ni quíhíⁿ. Te ducaⁿ na cùnduu. Duha dānehé ñàhá-í xii-ndo càháⁿ ndihì-ndo Yá Ndiòxí.

¹⁴ Te núú nchòhó quidé càhnu iní-ndó nchàa sá quidé ñàhá tnaha ñáyiú-ndo, te ducaⁿ te Tátá-ndó Dútú Ndiòxí Yaá ndécú àndiú cada cahnu iní-gá nchaa sá ñá túú vāha quide-ndo tucu.

¹⁵ Dico núú nchòhó vá cádá càhnu iní-ndó nchàa sá quidé ñàhá tnaha ñáyiú-ndo ña, te ni Dútú Ndiòxí Yaá cúú Tátá-ndó vā cádá càhnu iní-gá nchaa sá quidé-ndó tucu.

Cuèndá ñáyiú ñá túú tnàhí ná xéxí áma càháⁿ ndihí-yu Yá Ndiòxí

¹⁶ Te nchòhó, nduu ñá túú tnàhí ná xéxí-ndó càháⁿ ndihì-ndo Yá Ndiòxí, te vá cùndiyí-ndó dàtná xíquide nchaa ñáyiú dándahú méé-xí càchí sá quidé ndáá te ñá ndáá sá quidé ndáá-yu, chi ñáyiú-áⁿ ducaⁿ xíquidé-yu cuèndá sá cuiní-yu cutnùni iní ñáyiú sá ñá túú tnàhí ná xéxí-yu càháⁿ ndihí-yu Yá Ndiòxí. Te yúhú càchí tnúhu-í xii-ndo sá sá dúcáⁿ quidé-yu te ñá túú ná chindee ñàha-xi xii-yu cuèndá ñihí-yu ñⁿ sá ndúú táhú-yu núú Yá Ndiòxí.

¹⁷ Dico nchòhó, nduu dùcaⁿ quide-ndo ñá túú tnàhí ná xéxí-ndó càháⁿ ndihì-ndo Yá Ndiòxí, te vāha vāha naquete-ndo núú-ndó, te vāha vāha chihì-ndo cùcá

18 cuendá sá vǎ cǔtnúní iní ñáyiú sá ñà túú nǎ xéxí-ndó ndùu ducaⁿ caháⁿ ndihí-ndo Yǎ Ndiǒxí. Te Dútú Ndiǒxí Yaa cúú Tátá-ndó ndècu ndihí-ndo òu-ni mee-gǎ ndéhé-gǎ nàcuáa quide-ndo ndecu-ndo, te òu-gǎ taxi-gǎ sá ndúú tǎhú-ndó.

Cuendá nchaa sá vǎha nduu tǎhú-ó

(Lc. 12:33-34)

19 Te vǎ cání íní-ndó cùu-ndo ñáyiú cuica nǎndí sá cǔndècu ndihí-ndo ñuyíú-a chí vǎ cǔdí-xi, chí dava quee tíquidi, te dava caxi cudi ñùhu, àdi quíhu ñadúhú vehe-ndo te duhu-güedé.

20 Te váha-gǎ chí ndúcú nàcuáa cada-ndo cuendá ducaⁿ ngǔndecu sá ndúú tǎhú-ndó àndiú, te xíáⁿ cudí-xi cundecu ndihí-ndo ñi caa ñi quíhíⁿ, chí yácaⁿ vǎ quéé-gǎ tíquidi, te ñi vǎ cáxí-gǎ cudi ñùhu, te ñi vǎ quíni-gǎ-ndó ñadúhú duhu-güedé ndachíuⁿ-ndo.

21 Te núu cùu-ndo ñáyiú cuica ndècu ñuyíú-a, te òu-ni nchaa sá ndécú ndihí-ndo ñuyíú-a ñùhu iní-ndó. Àdi cuu-ndo ñáyiú quide nacuáa ngǔndecu sá ndúú tǎhú-ndó àndiú, te òu-ni sá ndúú tǎhú-ndó ndècu àndiú-áⁿ ñùhú iní-ndó.

Núú-ó cùu-xi datná ìⁿ ñuhú

(Lc. 11:34-36)

22 Te cada iní-ndó sǎ núú-ndó cùu-xi datná ìⁿ ñuhú. Te núu núú-ndó cǎváha te cǔtnúní iní-ndó nǎ cúú sǎ ndécú núú-ndó.

23 Dico núu cǔhú núú-ndó ñà túú cǔtnúní cundehe-ndo ña, te ñà túú cǔtnúní iní-ndó nǎ cúú sǎ ndécú núú-ndó. Te sǎ dúcáⁿ cǔhú núú-ndó te cada iní-ndó sǎ ndécú-ndó datná ìⁿ núu néé. Te duha ndùu tnúhu cǎháⁿ-í chí núu sàni váha iní-ndó cuendá Yǎ Ndiǒxí ñá, te cùu víi cuu váha iní-ndó ndècu-ndo. Áⁿ te núu ñà túú sàni váha iní-ndó cuendá-gǎ ñá, te ñà túú tnàhí cùu váha iní-ndó ndècu-ndo. Te sǎ dúcáⁿ ñà túú sàni váha iní-ndó cuendá-gǎ te cada iní-ndó sǎ ndécú-ndó datná ìⁿ núu néé.

Vǎ ndácú ìⁿ téé cunu cuechi-dé núú úú pàtróóⁿ

(Lc. 16:13)

24 Te ñi ìⁿ téé xínu cuechi vǎ ndácú-dé cunu cuechi-dé núú úú pàtróóⁿ, chí téé-áⁿ cuu váha iní-dé núú ìⁿ pàtróóⁿ-dé te tñi-dé nchaa tnúhu cǎháⁿ pàtróóⁿ téé cùu váha iní-dé núú-xi-áⁿ. Te núú ìngǎ tucu pàtróóⁿ-dé vǎ cúú vǎha iní-dé, te ñi vǎ tñí-dé tnúhu cǎháⁿ ìngǎ téé-áⁿ. Te ducaⁿ sǎtnahá-xi cùu nchóhó chí vǎ ndácú-ndó cunu cuechi-ndo núú Yǎ Ndiǒxí te cuhuⁿ iní-ndó nchaa sǎ ió ñuyíú-a.

Yǎ Ndiǒxí xító-gǎ nchaa ñáyiú cùu déhe-gǎ

(Lc. 12:22-31)

25 Te na cǎchí tnúhu-í xii-ndo sǎ vǎ ió caní iní-ndó núu nása níhí-ndó sǎ cóhó sǎ cáxí-ndó, te ñi vǎ ió caní iní-ndó núu nása níhí-ndó dóó cuíhnu-ndo, chí cùnuu-gǎ méé-ndó dàcúúxí sǎ nchító-ndó, te ducaⁿ cùnuu-gǎ yíqui cǔnú-ndó dàcúúxí dóó sácúhnu-ndo.

26 Te chí cadá cuendá sǎ ncháá quèti ndava ñà túú tnàhí ná xítú-güedi, te ñi ñà túú ndéé cuháⁿ-güedi nàtahu-güedi, te ñi ñà túú nǎ nátàxúha-güedi, te ñi ñà túú ndéé cáá yáca-güedi, chí mee Tátá-ó Dútú Ndiǒxí Yaa ndécú àndiú xito ñaha-gǎ xii-güedi níhí-güedi sǎ xéxí-güedi. Te núu cue quiti-áⁿ ducaⁿ xito ñaha-gǎ xii-güedi, ðte uuⁿ-gǎ xító ñaha-gǎ xii nchóhó, chí nchóhó ío-gǎ cùnuu-ndo dàcúúxí cuè quiti-áⁿ!

²⁷ Te cuèi nándi sá sání vihi iní-ndó ndècu-ndo, dico ñá ndácú-ndó càda-ndo nacuaá cuehnu-ndo cuèdicó ìⁿ yiqui-gã.

²⁸ Te vá ïo cani iní-ndó nùu nása níhí-ndó dǒo cuihnu-ndo. Te chí cáda cuèndá nàcuáa sàhnu nchaa itá ïó yucu, chi nchaa itá-án ñà túú quide chiuⁿ-xi, te ni ñà túú quèheⁿ-xi idi.

²⁹ Te na cächí tnúhu-í xii-ndo sã ndíi Salòmón cuèi ïo vii ní xínduu dǒo ní xóo cuihnu ndíi, dico ñá túú nǔtnahá-xi nàcuáa càa nchaa itá, chi ïo-gá vii càa nchaa itá.

³⁰ Te nchaa itá ïó yucu tnaa-ni cùdí-xi, te yìchí-xi te sàhmi ñáyi. Te cuèi ducaⁿ dico mee Yã Ndiǒxí quidé-gã ïo vii sácúnduu-xi. Te núu nchaa itá-án ducaⁿ quide-gá xitǒ-gã sácúnduu vii-xi, te xíãⁿ cútñuní sá ïo-gá coto ñaha-gã xii-ndo, dicó-ni sá ñà túú sàndáa váha iní-ndó-gã.

³¹ Te xíãⁿ nùu ñá túú xìni ñuhu vihi-xi cani iní-ndó nùu nása níhí-ndó sã cóho sã cáxí-ndó, àdi nása níhí-ndó dǒo cuihnu-ndo.

³² Chi nchaa ñáyi ñá túú xìni nàcuáa càháⁿ tnúhu Yá Ndiǒxí mee-ni nchàa xíãⁿ ñúhú iní-yu. Dico nchòhó chi mee Tãtá-ndó Dútú Ndiǒxí sa nàha-gá ná cúú sá xíni ñuhu-ndo.

³³ Te xíãⁿ nùu ïo xìni ñuhu-xi sá cúhúⁿ iní-ndó sã Yã Ndiǒxí yíndàha ñaha-gá xii-ndo, te ducaⁿ càda-ndo nchaa nacuaá cuíní-gã, te ducaⁿ te taxi-gá nchaa sá xíni ñuhu-ndo.

³⁴ Núu xíãⁿ vá ïo cani iní-ndó nása cundecu-ndo ndùu tneé, chi cani iní-ndó nàcuáa cada-ndo cundecu-ndo vitna, chi nduu tneé-án te òré-nã te cutñuní nùu nása cada-ndo cundecu-ndo. Chi nchòhó sa nàha-ndo sá ïo títñí núú sá quidé-xí ìⁿ nduu ìⁿ nduu —duha ní dánèhè ñáhá Jèsús xii cue téé xica cuu ndihí-gá ndihí nchaa ñáyi.

7

Vá càháⁿ cuèhé-ó cuèndá tnàha ñáyi-ó (Lc. 6:37-38, 41-42)

¹ Te Jèsús ndècuu-ni-gá dánèhé-gá cue téé xica cuu ndihí-gá ndihí nchaa ñáyi, te xãhaⁿ-gã:

—Vá càháⁿ cuèhé-ndó cuèndá tnàha ñáyi-ndo, te ducaⁿ te Yá Ndiǒxí ñá túú nã tnúhu cúñaha-gã xii-ndo.

² Chi núu na càháⁿ cuèhé-ndó cuèndá tnàha ñáyi-ndo, te Yá Ndiǒxí ïó ìⁿ sá cáda ñaha-gá xii-ndo. Te núu nchòhó ná càháⁿ cuèhé víhí-ndó cuèndá tnàha ñáyi-ndo te Yá Ndiǒxí ïo-gá dandòho ñaha-gá xii-ndo.

³ ¿Te ná cuèndá ndéhé-ndó ìⁿ sá ñà túú váha quide tnaha ñáyi-ndo te mee-ndo vihi-gá quidé-ndó-í? Te sá dúcáⁿ quide-ndo te cada iní-ndó sã ndéhé-ndó dàtná ìⁿ mihi líhli ñuhu núú tnàha ñáyi-ndo te mee-ndo ñuhu ìⁿ mihi cahnu-gá núú-ndó te ñá túú quide cuèndá-ndó.

⁴ Te núu na nàcanu ichi-ndo tnaha ñáyi-ndo cuèndá sá ñà túú quide váha-yu ndécú-yu, te mee-ndo vihi-gá quidé-ndó ñá, te cada iní-ndó sã xãhaⁿ-ndo xii tnaha ñáyi-ndo sã nátava-ndo mihi líhli ñuhu núú-yu sá dúcáⁿ quide-ndo, te mihi cahnu ñuhu núú méé-ndó ñà túú quide cuèndá-ndó.

⁵ Te sá dúcáⁿ quide-ndo te ïo dándahú-ndó mée-ndo sá quidé ndáá-ndó te ñá ndàá sá quidé ndáá-ndó, te xìni ñuhu-xi díhna-gá dañu-ndo nchàa sá ñà túú váha quide-ndo, te dàtnuní ducaⁿ te cuu nàcanu ichi-ndo tnàha ñáyi-ndo cuèndá nchaa sá ñà túú váha quidé-yu.

⁶ Te nchaa ñáyiú ío sàá iní-xi, te vá cáda yica-ndó-yu cundedóho-yu tnúhu Yá Ndióxi, chi núu na càda yica-ndó-yu te ngóo-yu cuu úhú iní ñáhá-yu xii-ndo. Te ñáyiú-áⁿ cúú-yu dàtná iná chi quiti-áⁿ núu na cuañaha-o ñⁿ sá cuañaha-o, te núu ñá túú cùtnuní iní-di ná cúú xiáⁿ te tní ñaha-di xii-o. Te cùu tucú-yu dàtná cùchí chi quiti-áⁿ núu na chùcu-o núú-di yúú vâha sá ío vii càa nani pérlá, te dicó-ni cùnu sáhá-di chi ñá túú cùtnuní iní-di sá cúú-xí yúú vâha.

Cácáⁿ-ó núú Yá Ndióxi núu ná cuíní-ó
(Lc. 11:9-13; 6:31)

⁷ Te na cächí tnúhu-í xii-ndo sá cácaⁿ-ndó núú Yá Ndióxi te núu ná cuíní-ndó te taxi-gá, te vá dáña ndéé-ndó cácaⁿ-ndó núú-gá núu ná cuíní-ndó te ducaⁿ te nihí-ndó. Te cada iní-ndó sá ní quexio-ndo vehe ñⁿ tñaha ñáyiú-ndo te ní cáháⁿ-ndó, te ñáyiú-áⁿ ní tedóho ñáhá-yu xii-ndo te ní nacaáⁿ-yu yuyèhe. Te ducaⁿ càda iní-ndó chi Yá Ndióxi tedóho ñaha-gá xii-ndo, te taxi-gá sá ná cácaⁿ-ndó núú-gá.

⁸ Chi nchaa ñáyiú ducaⁿ xíquide, te Yá Ndióxi tédóho ñaha-gá xii-yu te nihí-yu sá cuíní-yu. Te ñu-ni ducaⁿ tucu nchaa ñáyiú na cácaⁿ núú-gá ñⁿ sá cuíní-yu, chi sáñaha-gá sá xicáⁿ-yu núú-gá. Te ñu-ni ducaⁿ tucu nchaa ñáyiú ñá túú dàña ndéé xicáⁿ núú Yá Ndióxi sá cuíní-yu chi nihí-yu.

⁹ Te nchòhó cue téé cùu tátá, ñá túú cùndee iní-ndó cuañaha-ndo xii cue déhe-ndo ñⁿ yúú caxi-güexi òré xicáⁿ-güexi ñⁿ pàá núú-ndó càxi-güexi.

¹⁰ Te ni ñá túú cùndee iní-ndó cuañaha-ndo ñⁿ cóo caxi-güexi òré xicáⁿ-güexi ñⁿ chácá núú-ndó càxi-güexi.

¹¹ Te nchòhó cuéi ndéé dau-na sàá iní-ndó dico sâha-ndo cué déhe-ndo sá vâha xèxi-güexi òré ná cúú sá xicáⁿ-güexi núú-ndó càxi-güexi. Te núu nchòhó ducaⁿ quide-ndo, ñte uuⁿ-gá ducaⁿ quide Tátá-ndó Dütú Ndióxi Yaá ndécú àndü, chi taxi-gá sá vâha sá cúú-xí-ndó te núu na cácaⁿ-ndó núú-gá!

¹² Te nchaa sá vâha cuíní-ndó càda tñaha ñáyiú-ndo, te cada-ndo tñahá-ndó ndihí-yu, chi ducaⁿ sânu ichi ñaha tnúhu ní chídó tnùní ndí Moisés, te ñu-ni ducaⁿ sânu ichi ñaha tucu nchaa tnúhu ní chídó tnùní cue téé ní xóo cáháⁿ tnúhu Yá Ndióxi ndéé sanaha.

Yuyèhe cuiñi
(Lc. 13:24)

¹³⁻¹⁴ Te xini ñuhu-xi nducu-ndo nacuaá cada-ndo tní-ndo ichi Yá Ndióxi. Te ichi-gá-áⁿ cúú-xí dàtná ñⁿ ichi cuiñi, àdi datná ñⁿ yuyèhe cuiñi. Te duha cáháⁿ-í chi ío úhú xínu iní-ndó tní-ndo ichi Yá Ndióxi, te sacú-ni nchòhó cue ñáyiú ndécú ñuyíú-a tní-ndo ichi-gá. Te nchaa ñáyiú ndécú ichi quehé ichi duha ta xíta nihnú-yu cuaháⁿ. Te ichi ndécú-yu-áⁿ cada iní-ndó sá cúú-xí ñⁿ ichi cahnu ichi quehéⁿ, àdi ñⁿ yuyèhe quehéⁿ. Te duha cáháⁿ-í chi ío vai ñáyiú ndécú-yu ichi-áⁿ.

Ndi ñⁿ núú yutnu xini-ó ná yutnu cùu-xi cuendá sá sãvidi-xi
(Lc. 6:43-44)

¹⁵ Te cächí tnúhu-í xii-ndo sá ío quíhi iní-ndó cùndecu-ndo cuendá sá vâ dándáhú ñáhá cué téé cächí sá cáháⁿ tnúhu Yá Ndióxi te ñá ndáá sá cáháⁿ-güedé tnúhu-gá. Chi cue téé-áⁿ sânuu sá quidé-güedé dàtná quidé mbéé quiti ío vâha iní-xi, dico ñá ndáá chi ñá túú ñuhu vâha iní-güedé, chi quide-güedé dàtná quidé quiti dééⁿ quiti nani yíhí.

¹⁶ Te òré quexio-güedé núú ndécú-ndó te cada cuendá-ndó nàcuáa quide-güedé cuendá ducaⁿ cùtnuní iní-ndó ná ñáyiú cùu-güedé. Te nchòhó

xìní-ndó sǎ ñà túú cùuⁿ ndéhé yoho yàha stilé tnu ìñu, te ni ñà túú xìní-ndó cùuⁿ ngúxí ìⁿ tnu ìñu.

17-18 Te xìní tucu-ndo sǎ ncháá yùtnu váha cùuⁿ sávidí váha, te nchaa yutnu váha-áⁿ ñà túú cùuⁿ sávidí sǎ ñà túú váha. Te nchaa yutnu sǎ ñà túú váha ñà túú cùuⁿ sávidí váha, chí mee-ni sávidí sǎ ñà túú váha cùuⁿ.

19 Te nchaa yutnu sǎ ñà túú cùuⁿ sávidí váha xèhndé-güedé, te cuánguee-xi núú ñùhú càyú-xi. Te ducaⁿ sǎtnahá-xi yáha nchaa cue téé dándahú ñáhá càchí sǎ càháⁿ tnúhu Yá Ndiòxí te ñà ndáá sǎ càháⁿ-güedé tnúhu-gá, chí quíhíⁿ-güedé núú ñùhú núú càyú.

20 Te nchòhó cutnùní iní-ndó ñà ñáyiú cùu cue téé-áⁿ cuèndá nchaa sǎ quidé-güedé.

*Ñà ncháá ñáyiú ngündecú-yu núú ndécú Yá Ndiòxí táxí tnùní-gá
(Lc. 13:25-27)*

21 Te na càchí tnúhu-í xii-ndo sǎ ìo vai ñáyiú cachí-yu sǎ yùhú cùu-í Xítóhó-yu, dico ñà ncháá-yu nduu táhù-yu cundecú-yu núú ndécú Tàtá-í Dútú Ndiòxí táxí tnùní-gá, chí mee-ni ncháa ñáyiú na càda nchaa nacuaá càháⁿ-gá ñáyiú-áⁿ nduu táhù-yu cundecú-yu núú ndécú-gá táxí tnùní-gá.

22 Te na sǎá nduu càda ndáá Yá Ndiòxí cuéchi nchaa ñáyiú, te vai-yu cúñahá-yu xii-í: “Yòhó Xítóhó Jesucristú nchúhú cúu-ndí ñáyiú ní càháⁿ tnúhu-n nàcuáa ní cachí-n, te ñu-ni-n ní cacunehe-ndí te ní sándáá iní ñáhá ncháa espíritú cündíhi yucu ñáváha xii-ndí ní quee-xi yiqui cùñú ñáyiú, te ñu-ni yòhó ní chindee ñàha-n xii-ndí ní ndacu-ndí ní quide-ndí títí núú sǎ vǎ yòo tnàhí ndacu cada”, duha cúñahá-yu xii-í dává-áⁿ.

23 Dico yùhú cúñaha-í xii-yu: “Ñà túú tnàhí xìní ñáhá-í xii nchòhó núu ndèé ñáyiú cùu-ndo, te chí xócuíñí nchaa nchòhó ñáyiú quide nchaa sǎ cuèhé sǎ dúhá núú ndécú-í-a”, duha cúñaha-í xii-yu.

*Ìⁿ vehe ndècu cimientú-xi ndíhi ìⁿ vehe ñà túú cimientú-xi
(Mr. 1:22; Lc. 6:47-49)*

24 Te nchaa ñáyiú sàcündedóho tnúhu càháⁿ-í te núu na tníⁿ-yu, te ñáyiú-áⁿ cùu-yu dàtná ìⁿ téé ìo váha cùtnuní iní-xi. Chí téé-áⁿ ní dácáá-dé ìⁿ vehe, dico díhna-gá ní xete-dé ndéé ní tnahá-dé yúú cǎxíⁿ te dàtnuní ní tava-dé cimientú-xi.

25 Te òré ní cuuⁿ dáú te ní ndee ndute ñuhu, te ní dándáá-xí ndéé núú cáá vèhe-áⁿ, dico ñà túú ní ndàcu-xi cuido-xi. Te ní quene tucu táchí ñíhi dico ñà túú ní ndàcu-xi cuido-xi vehe-áⁿ, te ducaⁿ chí téé ní dácáá vèhe-áⁿ ní tava-dé cimientú-xi núú yúú cǎxíⁿ. Duha sǎtnahá-xi cùu nchaa ñáyiú tní tnúhu càháⁿ-í.

26 Dico nchaa ñáyiú sàcündedóho tnúhu càháⁿ-í te ñà túú cùní-yu tníⁿ-yu, ñáyiú-áⁿ cùu-yu dàtná ìⁿ téé ñà túú tnàhí cùtnuní iní-xi. Chí téé-áⁿ ní dácáá-dé ìⁿ vehe núú yúú mèe-ni ñuhu cùchí.

27 Te òré ní cuuⁿ dáú te ní ndee ndute ñuhu, te ní dándáá-xí ndéé núú cáá vèhe-áⁿ, te ní quene táchí ñíhi te íí-ni ní xido-xi vehe-áⁿ cuèndá sǎ núú ñuhu cùchí ní sǎá. Duha sǎtnahá-xi cùu nchaa ñáyiú sàcündedóho tnúhu càháⁿ-í te ñà túú cùní-yu tníⁿ-yu —duha ní dánèhé ñáhá Jèsús xii cue téé xica cuu ndíhi-gá ndíhi nchaa ñáyiú.

28 Te òré ní ndíhi Jèsús sǎ dúcáⁿ ní càháⁿ-gá, te nchaa ñáyiú ní xíndedóho nchaa tnúhu ní càháⁿ-gá ìo ní cuñuhu-yu nàcuáa ní dánèhé ñáhá-gá xii-yu.

²⁹ Chi ní cǎháⁿ-gá dàtná cǎháⁿ cue tée cùnūu, te cùnūu ndisa-gá, te ñá túú ní cǎháⁿ-gá dàtná cǎháⁿ nchaa cue tée dàcuaha ñaha xii ñáyiū nchaa tnúhu ní chidó tnúni ndíi Moisés.

8

Jèsús quidé tǎtna-gá ìⁿ tée tnàhá cuéhé sǎ dátèhyú nihnu-xi yi²qui cùñú-ó (Mr. 1:40-45; Lc. 5:12-16)

¹ Te Jèsús ní xica-gá cuánuu-gá dǐñi tindúú núú dúcáⁿ ní xíndecu-gá ní dánèhé-gá ñáyiū-áⁿ, te cuéhé víhí ñáyiū nchicúⁿ ñáhá xii-gá cuánuu.

² Te ní quexio ìⁿ tée tnàhá cuéhé sǎ dátèhyú nihnu-xi yi²qui cùñú-ó núú Jèsús, te ní ngüñí xítí-dě núú-gǎ, te xǎhaⁿ-dě xii-gá:

—Mèstrú, véxi-í cǎháⁿ ndàhú-í núú-n núu vá cúndèe iní-n càda tǎtna ñaha-n xii-í, chi cùtnuni iní-í sǎ ndácú-n —càchí-dé xǎhaⁿ-dě xii-gá.

³ Te Jèsús ní dácáá-gá ndaha-gá ní tendaha ñaha-gá xii-dé, te xǎhaⁿ-gǎ:

—Cuu cada tǎtna ñaha-í xii-n, te vitna ndúha-n —càchí-gá xǎhaⁿ-gǎ xii-dé.

Te òrè-ni-áⁿ ní xócuñí cuéhé tnàhá-dé.

⁴ Te Jèsús ní xǎhaⁿ tucu-gá xii-dé:

—Te vitna cuanùhú te vá yǒ ìⁿ cúñaha-n sǎ yǔhú ní quide tǎtna ñaha-í xii-n, núú dütú-ni cuáháⁿ cuéndá sǎ ná quini ñáhá-dě xii-n sǎ ní ndúha-n, te cuáñaha-n sǎ ndúú tǎhú Yá Ndiòxí dàtná ní cachí ndíi Moisés. Te ducaⁿ càda-n cuendá cutnuni iní ñáyiū sǎ ní ndúha-n —càchí-gá xǎhaⁿ-gǎ xii tée ní quide tǎtna-gá-áⁿ.

Jèsús quidé tǎtna-gá ìⁿ tée xìnu cuechi núú ìⁿ tée cùu capitáⁿ (Lc. 7:1-10)

⁵ Te Jèsús ní xica-gá cuáháⁿ-gá ñuú Capèrnaúm. Te òrè cuánguihu-gá ñuú-áⁿ te ní quexio ìⁿ tée cùu capitáⁿ cǎháⁿ ndàhú-dé núú-gǎ,

⁶ te xǎhaⁿ-dě xii-gá:

—Mèstrú, véxi-í cǎháⁿ ndàhú-í núú-n núu vá cúndèe iní-n càda tǎtna-n ìⁿ tée xìnu cuechi núú-í, chi cùhú-dé te cǎhú víhí tnàhá-dé, te ío ndòho-dé te ní ñá cúndèe-gá-dé candá nihnu-dé —càchí-dé xǎhaⁿ-dě xii-gá.

⁷ Te Jèsús ní xǎhaⁿ-gǎ xii-dé:

—Te na quíhíⁿ-ó càda tǎtna-í-dé —càchí-gá xǎhaⁿ-gǎ xii-dé.

⁸ Te tée cùu capitáⁿ-áⁿ ní xǎhaⁿ-dě xii-gá:

—Mèstrú, ñá túú tàù-í sǎ quíhu-n ndèe xítí vehe-í, chi cùu-í ìⁿ tée cùtexínu sǎ cùu-xí-n, te cǎháⁿ-ni sǎ ndúha tée xìnu cuechi núú-í te ndúha-dé.

⁹ Chi yúhú ndècu cue tée tǎxi tnuni ñáhá xii-í, te ducaⁿ yúhú tucu ndècu cue sandadú tǎxi tnúni-í. Te òrè xǎhaⁿ-í xii ìⁿ-dé quíhíⁿ-dé ìⁿ chiúⁿ te cuáháⁿ-dé, te òrè xǎhaⁿ-í xii ingá-dé quixi-dé te véxi-dé, te òrè xǎhaⁿ-í xii ìⁿ tée xìnu cuechi núú-í cada-dé ìⁿ chiúⁿ te quide-dé. Núu xǎⁿ yòhó cǎháⁿ-ni sǎ ndúha tée xìnu cuechi núú-í te ndúha-dé —càchí-dé xǎhaⁿ-dě xii Jèsús.

¹⁰ Te Jèsús ío ní cuñúhu-gá sǎ dúcáⁿ ní cǎháⁿ tée cùu capitáⁿ-áⁿ, te ní xǎhaⁿ-gǎ xii nchaa ñáyiū nchicúⁿ ñáhá xii-gá:

—Na càchí tnúhu ndáá-í xii-ndo sǎ vǎtá quini-gá-í ni ìⁿ ñáyiū isràèl, ñáyiū súni ío váha sandáá iní ñáhá xii Yá Ndiòxí dàtná sandáá iní ñáhá tée-a xii-gá.

¹¹ Te na càchí tnúhu ndáá tucu-í xii-ndo sǎ ío cuéhé ñáyiū quixi ndàa xio nacuáa quène nchíanchii, te ñu-ni ducaⁿ ío cuéhé tucu-yu quixi ndàa xio nacuáa quée tucu nchíanchii. Te nchaa ñáyiū-áⁿ naníhí tnáhá-yu ndíhí té

Àbrahám, ndihí té Isàác, ndihí té Jàcób núú ndécú Yá Ndiǒxí táxí tnùnì-gá te yàcáⁿ cundecu ndihí ñàhá-yu xii-güedé.

¹² Te nchaa ñáyiú tàú nduu táhú cundecu núú ndécú Yá Ndiǒxí táxí tnùnì-gá ní cùu, ñáyiú-áⁿ quee tíhǔ-yu, chí quíhíⁿ-yu ìⁿ xichi núú néé núú ìo ndohó-yu cundécú-yu, te yàcáⁿ ìo ndáhí-yu, te dícó rúhñú-nǎ cuu núhu-yu sá sàtú iní-yu cuendá sá ndóhó-yu —càchì-gá xáhaⁿ-gǎ xii-yu.

¹³ Te Jèsús ní xáhaⁿ tùcu-gá xii téé cùu capitáⁿ-áⁿ:

—Yòhó téé ndècu ndihí téé cùhú cuanùhú vehe-n vitna chí ndúha-dé chí ní sándáá iní-n Yá Ndiǒxí —càchì-gá xáhaⁿ-gǎ xii-dé.

Te ñu-ni òré ducaⁿ ní xáhaⁿ Jèsús xii téé cùu capitáⁿ-áⁿ ní ndúha téé xínu cuechi núú-dé.

Jèsús quidé tǎtna-gá nǎná ñadìhí té Pèlú
(Mr. 1:29-31; Lc. 4:38-39)

¹⁴ Te Jèsús ní xica-gá cuáháⁿ-gá vehe té Pèlú, te òré ní quexìo-gá vehe-dé te ní xiní-gá cáá nǎná ñadìhí-dé cùhú-aⁿ ñùhu vihi-aⁿ cahni.

¹⁵ Te Jèsús ní tnii-gá ndaha ñaha cùhú-áⁿ, te òré-ni-áⁿ ní nchíco-aⁿ cahni te ní ndacóo-aⁿ ní xínu cuechi-aⁿ núú-güedé ndihí-gá.

Jèsús quidé tǎtna-gá vǎi ñáyiú cùhú
(Mr. 1:32-34; Lc. 4:40-41)

¹⁶ Te òré ní dáhu nchícanhii te ní quexìo ñáyiú núú ndécú Jèsús, te ndècá-yu vǎi ñáyiú yìhí ñaha espíritú cùndìhí yucu ñáváha ní sáá núú-gǎ te ndèca tucú-yu vǎi ñáyiú tnàhá dava-gá núú cuéhé. Te ìⁿ-ni tnúhu ní cáháⁿ Jèsús ní tenàá-gá nchaa espíritú cùndìhí yucu ñáváha yìhí ñaha xii nchaa ñáyiú-áⁿ, te ní quee-xi yìqui cùñú-yu cuáháⁿ-xi. Te tnàhá nchaa dava-gá ñáyiú cùhú-áⁿ ní quide tǎtna-gá.

¹⁷ Te ducaⁿ ní cuu chí ní quee ndáá-xi nàcuáa ní cáháⁿ ndíi Chàiaí téé ní xóo cáháⁿ tnúhu Yá Ndiǒxí ndéé sanaha, te duha ní cachí ndíi: “Mee-gǎ cada tǎtna ñaha-gǎ xii-o, chí ñu-gá xocàni-gá nchaa sá quidé ùhú yìqui cùñú-ó”, duha ní cachí ndíi.

Ñáyiú cuìní tuha ñaha xii Jèsús
(Lc. 9:57-62)

¹⁸ Te òré ní xiní Jèsús sá ìo cuéhé ñáyiú xixúcu núú ndécú-gǎ, te ní xáhaⁿ-gǎ xii cue téé xica cuu ndihí-gá sá quee-gá ndihí-güedé bàrcú cuendá téhndé-gá ndihí-güedé ndàa ingá xio yuhu làgúná.

¹⁹ Te mei òré-áⁿ ní quexìo ìⁿ téé dàcuaha ñaha xii cue ñáyiú nchaa tnúhu ní chídó tnùnì ndíi Moisés, te xáhaⁿ-dǎ xii-gá:

—Mèstrú, cuìní-í canchicúⁿ ñàhá-í xii-n ndèni ní cuu na quíhíⁿ-n —càchì-dé xáhaⁿ-dǎ xii-gá.

²⁰ Te Jèsús ní xáhaⁿ-gǎ xii-dé:

—Nchaa ñúcuii chí ndècu yaú cúú vèhe-güedi saquíhí-güedi, te nchaa cue quiti ndáva caa tacá-güedi ñiquí yutnu. Dico yúhú Téé cùu ñaní tnàhá-ndó nchaa-ndo chí ñá túú ndèé cáá vèhe-í ñuyúyú-a ndetatú-í —càchì-gá xáhaⁿ-gǎ xii-dé.

²¹ Te ìⁿ téé ní chitnahá ñàhá xii Jèsús ní xáhaⁿ-dǎ xii-gá:

—Jèsús, dañá na nùhú-í cundetu-í cuú tǎtà-í te chindúxi-í-dé dǎtnùnì quixi-í chitnahá ñàhá dùcaⁿ-ná-í xii-n —càchì-dé xáhaⁿ-dǎ xii-gá.

²² Te Jèsús ní xáhaⁿ-gǎ xii-dé:

—Daña ñáyiú ñá túú sàndáá ínì ñáhá xì-í ná chìndúxi tñàha meé-yu, chí ñáyiú-áⁿ cúu-yu dàtná ñáyiú ní xíhí cuèi ndècu-ní-yu núú ñuyúú-a, te yòhò canchicúⁿ ñáhá-ní xì-í —càchí-gá xàhaⁿ-gá xii-dé.

Jèsús ngání-gá táchí ndihi ndute làgúná

(Mr. 4:35-41; Lc. 8:22-25)

²³ Te sáta dúcáⁿ te Jèsús cuánguee-gá bàrcú ndihi cue téé xica cuu ndihi-gá, te ní xica bàrcú-áⁿ cuáháⁿ-xì.

²⁴ Te nini ñùhu bàrcú-áⁿ ichi cuáháⁿ-xì núú ndute ní xídí Jèsús, te ní ngúita-xì níhi víhi quene táchí, te ta nàdachitú-xì ndute xití bàrcú cuáháⁿ.

²⁵ Te cue téé xica cuu ndihi-gá cuáháⁿ-güedé núú cáá-gá xidí-gá, te xàhaⁿ-güedé xii-gá:

—¡Mèstrú, ndiquíú ínì chí dàcácu ñaha-n xì-o chí quée naa-o cuínì-xì! —càchí-güedé xàhaⁿ-güedé xii-gá.

²⁶ Te Jèsús ní xàhaⁿ-gá xii-güedé:

—¿Ná cuendá ndéé ducaⁿ ïo yùhú-ndó? ¿Náa ñá túú sàndáá ínì ñáhá ndisa-ndo xii-í-áⁿ? —càchí-gá xàhaⁿ-gá xii-güedé.

Te Jèsús ní ndacóo-gá te ní tenáa-gá táchí-áⁿ ndihi ndute-áⁿ, te ní ngúíñí táchí-áⁿ te ní nucúndecu nahi-ná ndute làgúná-áⁿ.

²⁷ Te nchaa cue téé ñùhu xití bàrcú-áⁿ ní cuúhu-güedé sá dúcáⁿ ní quide-gá ní xiní-güedé, te ní xítñaha-güedé:

—¿Te ná téé cuu téé-a núú duha ní cáháⁿ-ni-dé te ní ngúíñí táchí te ní nucúndecu nahi-ní ndute làgúná-a-í? —càchí-güedé xítñaha-güedé.

Cue téé ñúú Gàdará cue téé yíhí ñaha espíritú cúndìhi yucu ñávàha

(Mr. 5:1-20; Lc. 8:26-39)

²⁸ Te òré ní quèxio Jesús ndàa ingá xio yuhu làgúná yucu cue téé ñúú Gàdará, te úú tñàhá cue téé quide vehe núú yíndúxi ndíyí ní quee-güedé cuáháⁿ-güedé núú ndécú Jèsús, te ndi ndúú-güedé yíhí ñaha espíritú cúndìhi yucu ñávàha xii-güedé, te ío màñá-güedé chí vá yòo tñàhí dàña-güedé yáha yatni núú ndécú-güedé.

²⁹ Te cue espíritú yíhí ñaha xii-güedé-áⁿ ní quide-xì níhi ní cáháⁿ-güedé, te xàhaⁿ-güedé xii-gá:

—¿Ná cuendá véxi-ò Jesús Déhe Dútú Ndióxi chidáca ñáhá-n xii-ndí? ¿Áⁿ sàma véxi-n dàndoho ñaha-n xii-ndí? Te vátá sàá-gá nduu ducaⁿ cada-n —cachí-güedé xàhaⁿ-güedé xii-gá.

³⁰ Te yatni xíaⁿ xíxica cuu vai cuchí xíxexi-güedi.

³¹ Te cue espíritú cúndìhi yucu ñávàha yíhí ñaha xii cue téé-áⁿ ní cáháⁿ ndàhú-xì núú Jèsús, te xàhaⁿ-xì:

—Te núú vá dàñá-gá-n quíhí-ndí yiqui cùñú cue téé-a, te càháⁿ ndàhú-ndí núú-n sá dàña-n na quíhíⁿ-ndí quíhu-ndí yiqui cùñú nchaa cùchí-áⁿ —càchí cue espíritú-áⁿ xàhaⁿ-xì xii-gá.

³² Te Jèsús ní xàhaⁿ-gá xii cue espíritú cúndìhi yucu ñávàha-áⁿ:

—Chí táquèe yiqui cùñú cue téé-áⁿ te quíhíⁿ-ndó núú ndéè ichi quíhíⁿ-ndó —càchí-gá xàhaⁿ-gá xii nchaa espíritú-áⁿ.

Te cue espíritú cúndìhi yucu ñávàha-áⁿ ní quee-xì yiqui cùñú cue téé-áⁿ, te cuáháⁿ-xì cuánguihu-xì nchaa cùchí-áⁿ. Te cue quiti-áⁿ ní xinu-güedi duha ní

queé-güedi ndaa núú dèhvá yuhu làgúná-án, te ní ngaunihnu-güedi xití ndute, te ní ndihi-güedi ní cáhá.

³³ Te cue téé xito ñaha xii nchaa cuchí-án ní yùhú-güedé te ní xinu-güedé, te ní sáháⁿ-güedé ní cani-güedé cuendú núú cuè ñáyiú ndècu xití ñuú nchaa nàcuáa ní cuu cuendá cue téé ní xíhi ñaha nchaa espíritu cundáhi yucu ñáváha-án.

³⁴ Te nchaa ñáyiú ñuú-án ní queé-yu cuáháⁿ-yu núú ndécú Jèsús. Te òré ní quexió-yu núú ndécú-gá te ní cáháⁿ ndáhú-yu núú-gá sá ná queé-gá yucu ñuú-yu núhú-gá.

9

*Jèsús quidé tãtna-gá ñⁿ téé cùhú ñá cúú-gã candá nihnu
(Mr. 2:1-12; Lc. 5:17-26)*

¹ Te sátá dúcáⁿ ní cuu te Jèsús cuándeé-gá bàrcú cuáháⁿ-gá ní natehndé-gá ndaa ingá xio yuhu làgúná. Te xiáⁿ ní ndexio-gá ñuú núú quidé ñuú-gá.

² Te xiáⁿ ndécú-gá ní quexió cue téé nchido-güedé ñⁿ téé cùhú ñá cúú-gã candá nihnu ñuhu-dé xito, te Jèsús ní cutnùní iní-gá sá sàndáá ndisa iní ñhá-güedé xii-gá núú ní xáhaⁿ-gá xii téé cùhú-án:

—Yòhó téé cùhú vá ndihú-gá iní-n, chi sa ní quide càhnu iní-í nchaa cuéchi-n —càchí-gá xáhaⁿ-gá xii-dé.

³ Te sá dúcáⁿ ní cáháⁿ-gá núú xiáⁿ cue téé dàcuaha ñaha xii ñáyiú nchaa tnúhu ní chídó tnùní ndí Moisés ní sani iní-güedé: “Tée-a cáháⁿ cuèhé-dé cuendá Yá Ndióxi”, duha ní sani iní-güedé.

⁴ Te Jèsús ní cutnùní iní-gá nàcuáa sàni iní-güedé núú ní xáhaⁿ-gá xii-güedé:

—¿Ná cuendá ducaⁿ sàni cuehé sání duha iní-ndó?

⁵ Te sá dúhá ní xáhaⁿ-í xii téé cùhú-a sá ní quide càhnu iní-í nchaa yíca cuéchi-dé, te xiáⁿ nchòhó ñá túú cutnùní iní-ndó núú ndáá cáháⁿ-í àdi ñá ndáá. Dico núú cúú-í-dé sá ndácóo-dé te caca-dé, te cutnùní ndáá iní-ndó núú ndáá cáháⁿ-í àdi ñá ndáá, chi cundehe núú-ndó nàcuáa cada-í.

⁶ Te vitna na càda-í nàcuáa cutnùní iní-ndó nchaa-ndo sá yùhú Tée cùu ñaní tnáhá-ndó nchaa-ndo ndecu ndihi-í tnúhu ndee iní ñuyíú-a sá cáda càhnu iní-í nchaa cuéchi ñáyiú —càchí-gá xáhaⁿ-gá xii-güedé.

Te sátá dúcáⁿ te ní xáhaⁿ-gá xii té cùhú-án:

—Ndacóo, te ndocani-n xito ñuhu-n véxi-án te núhú-n vèhe-n —cachí-gá xáhaⁿ-gá xii-dé.

⁷ Te òré-ni-án ní ndúha téé cùhú-án te ní ndacóo-dé te ní ndocani-dé xito ñuhu-dé ní quexió-án te ní xica-dé cuánuhú-dé vehe-dé.

⁸ Te nchaa ñáyiú xíndecu-án ño ní cuñúhu-yu sá dúcáⁿ ní quide Jèsús ní xiní-yu, te ní cachí-yu sá ño càhnu cuu Yá Ndióxi cuendá sá ní sáñaha-gá xii Jèsús tnúhu ndee iní cada-gá nchaa sá vã yõ tnàhí ndàcu cada.

*Jèsús càháⁿ-gá ñⁿ téé nàni Mateú chitnahá ñhá-dě xii-gá
(Mr. 2:13-17; Lc. 5:27-32)*

⁹ Te Jèsús ní nucúhuⁿ tucu-gá ichi cuáháⁿ-gá, te ichi ñuhu-gá ní xiní-gá núcõo ñⁿ téé nàni Mateú quidé còbrá-dé ñáyiú chi cobràdór impuèstú cúú-dé, te ní xáhaⁿ-gá xii-dé:

—Màteú, néhé chitnahá ñhá-n xii-í —càchí-gá xáhaⁿ-gá xii-dé.

Te té Màteú-án ní ndacuñí-dé ní chitnahá ñhá-dě xii-gá.

10 Te ìn xito ndècu Jesús ìn vehe, te yìhi-gá mèsá ndìhi cue téé xìca cuu ndìhi-gá xéxí ndìhi ñaha-gá xii-güedé. Te tnàhá cue téé cuihna ìní-xi quide cobrá ñháá xii ñáyiú cuendá impuèstú yíhi ndìhi-gá mèsá, te tnàhá tucu dava-gá cue téé ndècu ichi cuehé ichi duha yìhi ndìhi-gá mèsá.

11 Te sá ní xini cue téé cùu fariséú xéxí Jèsús ndìhi nchaa cue téé-á, te ní xicáⁿ tnúhú-güedé núú cuè téé xìca cuu ndìhi-gá, te xáhaⁿ-güedé:

—¿Ná cuendá ducaⁿ quide téé cùu mestrú-ndó xèxi-dé ndìhi cue téé cuihna ìní-xi quide cobrá ñháá xii ñáyiú cuendá impuèstú, ndìhi nchaa dava-gá cue téé ndècu ichi cuehé ichi duha-ì? —càchí-güedé xáhaⁿ-güedé.

12-13 Te Jèsús ní tecu dóho-gá nàcuáa ndùu tnúhu ní xáhaⁿ-güedé xii cue téé xìca cuu ndìhi-gá, núú ní xáhaⁿ-gá xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chí xini ñuhú-yu ñátátná. Te yúhú véxi-í cáháⁿ-í ñáyiú cùtnuní ìní-xi sá ndécú cuèchi-xi cuendá dàñá-yu nchaa sá cuèhé sá dúhá quidé-yu, te ñá túú véxi-í cáháⁿ-í ñáyiú cächí sá ñá túú ndècu cuèchi-xi. Te chí cadá cuendá váha nàcuáa cáháⁿ Yá Ndióxi núú tütú-gá núú cächí-xi: “Yúhú cuíni-í sá cündàhú ìní-ndó cuè tnaha ñáyiú-ndo, te ñá díú mèe-ni sá cáhni-ndó quiti nduu táhú-í”, duha cächí-gá núú tütú-gá —cächí Jèsús xáhaⁿ-gá xii-güedé.

Cue téé ndùcu tnúhu núú Jèsús cuendá ñáyiú ñá túú tnàhí ná xéxí áma càháⁿ ndìhí-yu Yá Ndióxi

(Mr. 2:18-22; Lc. 5:33-39)

14 Te cue téé xìca cuu ndìhi té Juàá téé dàcuandute ñaha xii ñáyiú ní sáháⁿ-güedé núú ndécú Jèsús, te xicáⁿ tnúhú-güedé núú-gá, te xáhaⁿ-güedé:

—Cuíni-ndí cächí tnúhu-n nã cuendá nchúhú, ndìhi cue téé cùu fariséú ñá túú tnàhí ná xéxí-ndí áma càháⁿ ndìhi-ndí Yá Ndióxi, te cue téé xìca cuu ndìhi-n ñá túú dùcaⁿ quide-güedé —cächí-güedé xáhaⁿ-güedé xii-gá.

15 Te Jèsús ní xáhaⁿ-gá xii-güedé:

—Nchòhó xini-ndó sá vã cùú cùñaha-o xii ñáyiú ñùhu víco tnándaha sá vã cùú càxi-yu nini ndècu ndìhi ñaha téé tnándaha xii-yu, dico sáá nduu vã cündècu ndìhi ñaha-gá téé tnándaha-áⁿ xii-yu, te dàvã-áⁿ te cahni ìní-yu vã càxi-yu cuendá sá ndìhú ìní-yu.

16 Te ni vã yõ dandée luha dóó sáá ìn dóó sa ní cuu tühú víhí, chi dóó sáá-áⁿ nàndiyi-xi te uuⁿ-gá ndata-xi dóó sá ní cuu tühú-áⁿ.

17 Te ni vã yõ chihí ndidí sáá xiti ìn lamba sa ní cuu tühú víhí, chi núú yoo ducaⁿ na càda te ndava lamba sa ní cuu tühú-áⁿ chi ío níhi yócó ndidí-áⁿ, te cuíta-ni ndidí-áⁿ te cuíta-ni lamba-áⁿ te núú ducaⁿ na càdá-yu, núú xiáⁿ xini ñùhu-xi quée ndidí sáá-áⁿ xiti ìn lamba saa cuendá ducaⁿ ñá túú nã cuu cováha-xi —cächí-gá xáhaⁿ-gá xii-güedé.

Cuendá déhe yoco té Jàirú ndìhi cuendá ìn ñaha ní tnándée dóó Jèsús

(Mr. 5:21-43; Lc. 8:40-56)

18 Te càháⁿ dúcáⁿ-ní Jèsús ní quexio ìn téé cùnno núú ndécú-gá, ìn téé tàxi tnuní veñúhu, te ní ngüñí xiti-dé núú-gá càháⁿ ndàhú-dé, te xáhaⁿ-dè xii-gá:

—Véxi-í càháⁿ ndàhú-í núú-n nùu vã cündèe ìní-n quíhíⁿ-ó vèhe-í dandòto-n déhe yoco-ì chi ní xihí-xi tnáví, te yúhú cùtnuní ìní-í sá nùu quíhíⁿ-n tëndaha-n yiqui cuñú-xi te ndoto-xi —cächí-dé xáhaⁿ-dè xii-gá.

19 Te Jèsús ní xica-gá cuáháⁿ-gá ndìhi-dé ndìhi cue téé xìca cuu ndìhi-gá.

20 Te ichi ñũhu-gá cuáháⁿ-gá ní sáháⁿ ñ ñadhí ní tnándeé-aⁿ yuhu dõo-gã ndàa sátá-gã, te ñaha-án sa ní cuu úxúú cuía sã cùhú-aⁿ ngõyo ñaha níñí xii-aⁿ.

21 Te ducaⁿ ñi quide-aⁿ chi ní sani iní-aⁿ sá nõu ndacu-aⁿ tnándeé-aⁿ cuèdicò luha yuhu dõo Jèsús te ndúha-aⁿ ní sani iní-aⁿ.

22 Te Jèsús ní nchócótó-gã ndàa sátá-gã te ní xiní-gá ñadhí-án, te ní xáhaⁿ-gã: —Yòhó ñaha cùhú, vá ndíhú-gá iní-n vitna chi sa ní ndúha-n, chi ní sándáa iní ñáhá-n xii-í —càchí-gá xãhaⁿ-gã xii-aⁿ.

Te òré-ni-án ñi ndúha ñaha cùhú-ãⁿ.

23 Te òré ní quexìo Jèsús vehe tée cùnno taxi tnuñi veñũhu-án, te ní xiní-gá xĩndáhí víhí ñãyiu, te xĩndecu mũsicú.

24 Te ní xáhaⁿ-gã xii-yu:

—Chí táquèe xití vehe-a, chí xíchí-a ñã túú ní xíhí-xi chí dícò xidí-xi —càchí-gá xãhaⁿ-gã xii-yu.

Te ní sácú ndeé ñáhã-yu xii-gá sá dúcáⁿ ñi cáháⁿ-gá, chí sá cúú-xí mèé-yu te ní xíhí ndisa xíchí-ãⁿ.

25 Te ñãyiu-án ñi queé-yu te cuángũhu Jèsús núú cándòdo xíchí ñi xíhí-án, te ní tñi-gá ndaha-xi te òré-ni-án ñi ndacóo-xi.

26 Te nchaa ñuú cáá yàtni xiáⁿ ñi níhí ñãyiu tnuñu nàcuáa ní quide Jèsús.

Jèsús quidé tãtna-gá núú úú tnàhá cue tée cuàá

27 Te sátá dúcáⁿ ñi cuu te ní xica Jèsús cuámuhú-gá, te ichi ñũhu-gá ní chinchícúⁿ ñáhá úú tnàhá cue tée cuàá xii-gá, te níhí cáháⁿ-güedé, te xãhaⁿ-güedé xii-gá:

—Yòhó Jèsús, tée cùu ñani tnàhá ndíi Dàvíi, cundàhú iní ñáhá xii-ndí —càchí-güedé xãhaⁿ-güedé xii-gá.

28 Te òré ní nasáá Jèsús núú quidé vèhe-gá, te cue tée cuàá-án ñi quexìo-güedé ndéé núú-gã, te ní xicáⁿ tnuñú-gã núú-güedé, te xãhaⁿ-gã:

—¿Sándáa iní-ndó sã yùhú ndacu-í cada tátna-í núú-ndó-ãⁿ? —càchí-gá xãhaⁿ-gã xii-güedé.

Te ní xáhaⁿ-güedé xii-gá:

—Sándáa iní-ndí sá díú yòhó Jèsús ndacu-n cada tátna-n nõú-ndí —càchí-güedé xãhaⁿ-güedé xii-gá.

29 Te Jèsús ní dácáá-gã ndaha-gã ní tendaha-gã núú-güedé, te ní xáhaⁿ-gã xii-güedé:

—Te vitna, ndúha núú-ndó chí ní sándáa iní-ndó sã díú yùhú ndacu-í cada tátna-í núú-ndó —càchí-gã xãhaⁿ-gã xii-güedé.

30 Te òré-ni-án ñi ndúha núú-güedé, te Jèsús ní cáháⁿ víhí-gã dóho-güedé cuèndá sã vã cáháⁿ-güedé nàcuáa ní cuu ní ndúha núú-güedé.

31 Te cue tée-án òré ní ndee-güedé núú ndécú Jèsús, te ní ngúita-ni-güedé ní cani-güedé cuèndú núú ñãyiu nàcuáa ní quide ñaha-gã xii-güedé. Te nchaa dava-gã ñuú cáá yàtni xiáⁿ ñi sáháⁿ-güedé ní cani-güedé cuèndú núú ñãyiu nàcuáa ní quide ñaha Jèsús xii-güedé.

Jèsús quidé tãtna-gá ñi téé ñihí

32 Te ichi ñi ndee cue téé ní ndúha núú-xi-án nõú ndécú Jèsús, te ní quexìo ñi úú ñãyiu ndecá-yu ñi téé ñihí yíhí ñaha espíritú cundíhí yucu ñávãha.

33 Te Jèsús ní queñuhu-gá espíritú cundíhí yucu ñávãha yíhí ñaha xii téé-án, te òré-ni-án ñi cuu ní nacáháⁿ-dé. Te nchaa ñãyiu xĩndecu-án ño ní cuñũhu-yu, te ní xitnàhá-yu:

—Ñã túú tnàhì xìnì-ó ìíⁿ tée duha cada ñúú nchoo cuè ñáyíu isràèl ní cùu — cachí-yu xĩtnàhá-yu.

34 Te cue tée cùu fariséú ní ngúíta-güedé xĩtnàhá-güedé:

—Tée-a chí sácúíhná chĩndèe ñaha-xi xii-dé queñúhu-dé nchaa espíritú yíhì ñaha xii ñáyíu te ñíu-ni sácúíhná-áⁿ táxí tnùnì-xi nchaa espíritú-áⁿ — càchì-güedé xĩtnàhá-güedé.

Jèsús cùndàhú inì-gá ñáyíu

35 Te Jèsús cuáháⁿ-gá nchaa ñúú náhnú ndìhì nchaa ñúú líhli, te ndi tnahá ìíⁿ ìíⁿ ñúú sàá-gá te ducaⁿ cuànguìhu-gá ìíⁿ ìíⁿ veñúhu càa nchaa ñúú-áⁿ dánèhé-gá ñáyíu tnúhu váha, tnúhu sá sánú lchi ñaha xii-yu nàcuáa ndíhu ndaha ñaha Yá Ndiòxí xii-yu. Te ducaⁿ-ni ta quìde tátna-gá nchaa ñáyíu cùhú cuáháⁿ cuèi ndi dííⁿ ndi dííⁿ núú cuèhé tnàhá-yu ìíⁿ ìíⁿ-yu.

36 Te sá ní xini Jèsús sá ío vài ñáyíu nchìcúⁿ ñáhá xii-gá, te ní cundàhú inì ñáhá-gá xii-yu chí ío ndíhu inì-yu, te vá yòo nèhe cuendá ñáhá xii-yu, te cùu-yu dàtná cue mbéé cue quiti ñá túú tòli-xi.

37 Te Jèsús ní xáhaⁿ-gá xii cue tée xica cuu ndihì-gá:

—Nchòhó xini-ndó sá òré ná sàá nduu cùu nchaa sá xítú ñáyíu te ío vài cuu. Te na càchì tnúhu ndáá-í xii-ndo sá dàtná ío vài sá xítú ñáyíu cùu, ducaⁿ ío vài ñáyíu cùmání cundedóho tnúhu-í, te ío sacú ñáyíu dàcuaha ñaha xii-yu.

38 Núu xiáⁿ xini ñúhu-xi cacáⁿ-ndó núú Yá Ndiòxí Yáa cùú Xìtohó-ndó ndihì-yu cuendá sá ná dàcaháⁿ-gá inì-yu cáháⁿ-yu tnúhu-gá núú nchaa dava-gá tnàhá ñáyíu-yu cùmání cundedóho tnúhu-gá —càchì-gá xáhaⁿ-gá xii-güedé.

10

Jèsús sãñaha-gã tnúhu ndee inì xii ndi ùxúú cue tée xica cuu ndihì-gá

(Mr. 3:13-19; Lc. 6:12-16)

1 Te Jèsús ní cana-gá ndi ùxúú cue tée xica cuu ndihì-gá, te ní sãñaha-gã xii-güedé tnúhu ndee inì cundecu ndihì-güedé cuendá queñúhu-güedé nchaa espíritú cùndihì yucu ñávãha yíhì ñaha xii ñáyíu, ndihì cuendá sá cádá tátna-güedé nchaa dava-gá ñáyíu cùhú cuèi nándi núú cuèhé tnàhá-yu.

2 Te duha xĩnani ndi ùxúú cue tée-áⁿ: tée cùnno-gá nání-dé Xímú, àdi Pelú chí úú ñíu-dé, te ñaní-dé cùú tã Ndrìxí, te tnàhá tée-áⁿ cùú-dé tée xica cuu ndihì Jèsús, ndihì té Jacóbó ndihì ñaní té Jacóbó-áⁿ tãe nani Juaá, te ndi ndúú cue tée-áⁿ cùú-güedé déhe té Zebèdeú.

3 Te tnàhá té Lipé xicá cùu ndihì-gá, ndihì té Bartolomé, ndihì té Mǎxí, ndihì té Mǎteú tée cùu cobradó impuestú ní cùu, ndihì té Jacóbó déhe té Àlféú, ndihì té Lèbeú tée ñanani-güedé Tàdeú,

4 ndihì té Xímú tée ní cundihì cue tée canànistá, ndihì té Jüdás Iscarioté tée ní sàá nduu ní sáha cuendá ñáhá xii Jèsús núú cuè tée cùu úhú inì ñáhá xii-gá.

Jèsús téndàha-gá ndi ùxúú cue tée xica cuu ndihì-gá quíhìⁿ-güedé cáháⁿ-güedé tnúhu-gá núú ñáyíu

(Mr. 6:7-13; Lc. 9:1-6)

5-6 Te Jèsús ní xáhaⁿ-gá xii ndi ùxúú cue tée xica cuu ndihì-gá sá quíhìⁿ-güedé cáháⁿ-güedé tnúhu-gá núú ñáyíu, te cùmání-gá caca-güedé quíhìⁿ-güedé, te ní xáhaⁿ-gá xii-güedé:

—Na càchí tnúhu-í xii-ndo sã méé-ní ñùú núú xĩndecu cue ñáyiu isràél quihíⁿ-ndó cãháⁿ-ndó tnúhu-í, te vá quihíⁿ-ndó ñi ñiⁿ ñuú yĩndèhu distritú Sãmariá, te ñi vá quihíⁿ-ndó dãva-gá ñuú núú xĩndecu ñáyiu ñã túú cùu ñáyiu isràél. Te cue ñáyiu isràél-áⁿ cúú-yu dàtná cue mbéé cue quiti ní xíta chí ta xíta nihnú-yu cuáháⁿ.

⁷ Te cúñaha-ndo xii-yu sã sã ní cuyatni nduu ndíhu ndaha ñaha Yá Ndiõxí xii-yu.

⁸ Te cada tátna-ndo nchàa ñáyiu cùhú cuéi ñáyiu tnahá cuéhé sã dátèhyú nihnu-xi yiqui cùñú-yu, te queñuhu-ndo nchàa espíritú cùndíhi yucu ñávãha yíhi ñaha xii ñáyiu, te dandòto-ndo cue ñáyiu sa ní xihí, te vá càcãⁿ-ndó yãhu-ndo núú ñáyiu òré cada-ndo nchàa chiuⁿ-áⁿ, chí sa ñaha-ndo sã dícó ducaⁿ ñi taxi-í tnúhu ndee ñi ndécú ndíhi-ndo.

⁹ Te vá cãnehè-ndo díhúⁿ cuu ichi-ndo,

¹⁰ te ñi vá cãnehè-ndo ñunu cuhuⁿ ndachiuⁿ-ndo, te ñi vá cãnehè-ndo ingá ichi dóó-ndó ñadãma-ndo, te ñi vá cãnehè-ndo úú-gá chàú-ndó chí ñi-ñi chàú yíhí-ndó-ãⁿ xíãⁿ-ni quihí-ndo, te ñi vá cãnehè-ndo tatnu, te ducaⁿ càda-ndo chí nchòhó sa ñaha-ndo sã nchãá ñáyiu quide chiuⁿ te ñi-ñi cuendá chiuⁿ quidé-yu ñihí-yu sã xéxi-yu.

¹¹ Te ñdi tnahá ñuú ná quèxio-ndo te nducu-ndo ñáyiu cùtnuní ñi-ndó sã cúú-yu ñáyiu vãha, te vehe ñáyiu-áⁿ cundecu-ndo ndèè sãá nduu ndèe-ndo ñuú-áⁿ.

¹² Te òré quexio-ndo vehé-yu te cúñaha-ndo xii-yu: “Yá Ndiõxí chĩndèè chitúu ñaha-gã xii-ndo ndècu-ndo”, duha cúñaha-ndo xii-yu.

¹³ Te núu ní cãháⁿ vãha ndíhi ñahá-yu xii-ndo, te cuu-xi sã vãha sã cúú-xi-yu cuendá tnúhu ní xáhaⁿ-ndo-ãⁿ, dícó núu ñã túú ní càháⁿ vãha ndíhi ñahá-yu xii-ndo, te cúñaha-ndo xii-yu sã vá cúú-xi sã vãha xii-yu tnúhu ní xáhaⁿ-ndo-ãⁿ.

¹⁴ Te núu ní sãá-ndó ñiⁿ ñuú àdi ñiⁿ vehe, te núu ñã túú ní cãháⁿ ndíhi ñaha vãha-yu xii-ndo te ñi ñã túú ní cuñi-yu cundedòho-yu tnúhu càháⁿ-ndó te ndee-ndo ñuú-áⁿ àdi vehe-áⁿ, te naquidi-ndo tícã chùhmá ñi tñi sáhã-ndó cuendá ná cùtnuní ñi-ñi-yu sã ñã túú quide vãha-yu.

¹⁵ Te na càchí tnúhu ndãá-í xii-ndo sã sãá nduu te ío-gá dandòho ñaha Yá Ndiõxí xii ñáyiu ducaⁿ na càda ñaha xii-ndo-áⁿ dàcúxí ñáyiu ní xĩndecu ñuú Sòdomá ndíhi ñuú Gòmorrá.

Ndoho tnahá-ó cundecu-o ichi Xitohó Jesucristú

¹⁶ Te cada ñi-ndó sã cúú-ndó dàtná cue mbéé cue quiti cuáháⁿ núú ío yíhi. Te ducaⁿ sãtnahá-xi cùu-ndo chí yúhú tendaha ñaha-í xii-ndo quihíⁿ-ndó núú xĩndecu cue ñáyiu cuihna ñi-ñi-xi, te ío vãha cuáha-ndo cuendá ñacúãa cada-ndo dàtná quidé cõó, dícó cunduu vãha ñi-ndó ñã túú ñã cada-ndo dàtná quidé lõmá.

¹⁷ Te quihí ñi-ndó chí cue ñáyiu na cùu úhú ñi ñahá xii-ndo, te cuáha cuendá ñahã-yu xii-ndo núú cuè téè cùchiuⁿ, te caniha-güedè xii-ndo xití veñúhu-güedé.

¹⁸ Te dava tucu ñáyiu cuu úhú ñi ñahá xii-ndo candeca ñahã-yu xii-ndo quihíⁿ núú cuè téè cùnuu yĩndaha nacióⁿ, àdi núú dãva-gá cue téè cùnuu sã cuendá-í. Te nchòhó ñihí-ndó ñacúãa cada-ndo càháⁿ vãha-ndo cuendá-í núú-güedè ndíhi núú cuè ñáyiu ñã túú cùu ñáyiu isràél.

19-20 Dico òré cuáha cuèndá ñáhã-yu xii-ndo núú nchàa cue téé-án, te vá cání iní-ndó núú nása cunduu tnúhu cáháⁿ-ndó núú-güedě, chí òré-nã te níhí-ndó tnúhu cáháⁿ-ndó. Te ñá díú mèe-ndo cahu iní-ndó tnúhu cáháⁿ-ndó, chí mee Espíritú Yá Ndiòxí Yáa cúú Tátá-ndó dàcahú iní ñáhã-xí xii-ndo nacuaá cunduu tnúhu cáháⁿ-ndó.

21 "Te dava cue téé cuáha cuèndá-güedé ñaní-güedé núú cuè téé cùchiuⁿ cuèndá cahni ñaha-güedě, te dava cue téé cùú tátá ñu-ni ducaⁿ càda-güedé déhe-güedé, te ñu-ni ducaⁿ càda ñaha dava cue ñáyíu cùú déhe xii tãtã-yu ndihí ñãñã-yu, chí cuáha cuèndá ñáhã-yu núú cuè téé cùchiuⁿ cuèndá cahni ñaha-güedě xii-yu.

22 Te nchòhó chí nchaa ñáyíu ngüíta-yu cuu úhú iní ñáhã-yu xii-ndo sã cuèndá-í. Te núú na càda ndee-ni iní-ndó càncchicúⁿ nihnu-ni-ndo ìchi-í cuèi nãndi sã ná càda ñáhã-yu xii-ndo ndéé ná sãá nduu vá cùndecu-gá-ndó ñùyíú-a ña, te nduu táhú-ndó cùndecu-ndo ni caa ni quíhíⁿ ndihí Yá Ndiòxí.

23 Te núú ñⁿ ñúú cuíni-güedé tn^ñ ñaha-güedě xii-ndo càda úhú ñáhã-güedé sã cuèndá-í, te cunu-ndo núú-güedé quíhíⁿ-ndó ìngá ñúú. Te na càchí tnúhu ndáá-í xii-ndo sã cùmání-gã quíhíⁿ-ndó nchàa dava-gã ñúú núú xĩndecu ñáyíu isràél cáháⁿ-ndó tnúhu-í, te sa quixi tucu yúhú, Téé cùú ñaní tnáhã-ndó nchàa-ndo ñuyíú-a.

24-25 "Te nchòhó xini-ndó sã ñⁿ téé dàcuaha ñá túú cùnuu-dé dàcúúxí mèstrú-dé, te núú mèstrú téé-án nãndi yãha-dé ndécú-dě te tàú-dé nduu vétú iní-dé te núú tnáhã-dé yãha-dé dàtnã yãha mèstrú-dé-án. Te ñu-ni ducaⁿ sãtnahã tucu-xi cùú ñⁿ téé xĩnu cuechi, chí ñá túú cùnuu-dé dàcúúxí pãtróóⁿ-dě, te nchaa sã yãha pãtróóⁿ-dě-án te tàú-dé nduu vétú iní-dé te núú tnáhã-dé yãha-dé dàtnã yãha pãtróóⁿ-dě-án. Te núú yúhú Yáa táxí tnùnì ñáhã xii-ndo cachí-yu sã cùú-í sácuhlã, te uuⁿ-gã ducaⁿ cùñáhã-yu xii nchòhó cue téé cùndihí-í.

Vá yùhú-ó cuèndá nchaa sã càdá ñàha ñáyíu xii-ó

(Lc. 12:2-7)

26 "Te nchòhó vá yùhú-ndó núú ñáyíu. Chí nchaa tnúhu sã cúú yùhu ni cuu vá cúú yùhu-gã, chí nchaa dacuítí sã quéé tũ-xi núú ñáyíu.

27 Te nchaa tnúhu sã càchí tnúhu-í xii-ndo núú mée núú ñⁿ-ó, cùu-xi tnúhu sã ndúú yùhu ni cuu datúu-ndo núú cuè ñáyíu cuèi núú chítú núú tàcá.

28 Te xini ñuhu-xi sã vá yùhú-ndó cuè ñáyíu cuèi na càhni ñáhã-yu xii-ndo, chí ñu-ni yiqui cùñú-ndó ndacú-yu cahni-yu, dico ñá túú ñãgã ndacú-yu cada ñáhã-yu xii-ndo. Te tàú-ndó sã Yá Ndiòxí yùhú-ndó chí Yáa-án ndacu-gã danãa-gã yiqui cùñú-ndó, te ndacu-gã daquihíⁿ ñáhã-gã xii-ndo núú ùhú núú ndáhú.

29 "Te nchòhó xini-ndó sã ndéé úú tnáhã tĩlaá cùyãhu-di núú ñⁿ-ní dĩhú, te ni ñⁿ-di ñá túú xihí cùtexĩnu-di chí ndéé núú mee Yá Ndiòxí Yáa cúú Tátá-ndó ná càchí-gã te xihí-di.

30 Dico nchòhó chí ío-gã néhé cuèndá ñáhã Yá Ndiòxí xii-ndo chí ndéé idi díquí-ndó yĩndehu.

31 Núú xĩãⁿ càchí-í sã vá yùhú-ndó chí cùnuu-gã-ndó dàcúúxí tĩlaá cuèi vãi vihi-güedi.

Nchaa ñáyíu dàtúu núú tnàha ñáyíu-xi sã ndécú ndihí-yu Xitohó Jesucristú

(Lc. 12:8-9)

32 "Te na cächí tnúhu-í xii-ndo sã ncháá ñäyiu na dàtúu núú tnàha ñáyiu-xi sá ndécú ndìhi ñahá-yu xii-í, te ducaⁿ te tnàhá yúhú dàtúu-í núú Tàtà-í Dútú Ndiöxí Yaa ndécú àndiú sá ndécú ndìhi-í-yu.

33 Dico nchaa ñáyiu na cũñaha xii tnaha ñáyiu-xi sá ñà túú ndècu ndìhi ñahá-yu xii-í, te ñiú-ni ducaⁿ càda yúhú tucu chi cũñaha-í xii Tàtà-í Dútú Ndiöxí Yaa ndécú àndiú sá ñà túú ndècu ndìhi-í-yu.

Ñá túú cùu ñⁿnuu ñáyiu
(Lc. 12:51-53; 14:26-27)

34 "Te na cächí tnúhu-í xii-ndo sã vã cáni ñí-ndó sã yúhú véxi-í ñuyú-a te cuu ñⁿnuu-gã ñáyiu cundecú-yu, chi da ngüñta-yu vá cúú ñⁿnuu-gá-yu cundecú-yu, te ducaⁿ chi nchaa ñáyiu vá quindáá ñí ñahá xii-í ñáyiu-áⁿ ngóo-yu cuu úhú ñí-yu nchaa ñáyiu quindáá ñí ñahá xii-í.

35 Te dava cue téé xíndecu tãtã-xi te ngóo-güedé cuu úhú ñí-güedé tãtã-güedé, te ñiú-ni ducaⁿ càda cue ñáyiu ñíhi xíndecu ñáná-xi, chi ngóo-yu cuu úhú ñí-yu ñáná-yu, te ñiú-ni ducaⁿ càda tucu cue ñáyiu cùu sãnu, chi ngóo-yu cuu úhú ñí-yu ñáná yí-yu.

36 Te ndi mèe-yu vehé-yu ngóo-yu vá cúú ñⁿnuu-gá-yu cundecú-yu.

37 "Te na cächí tnúhu tucu-í xii-ndo sã ncháá ñäyiu ío-gá ná cùu ñí tãtã-xi àdi ñáná-xi dàcúúxí yúhú, te ñáyiu-áⁿ ñà túú tàú-yu cundecu ndìhi ñahá-yu xii-í, te nchaa ñáyiu ío-gá ná cùu ñí déhe ducuⁿ-xi, àdi déhe yoco-xi dàcúúxí yúhú, te ñiú-ni ducaⁿ ñà túú tàú-yu cundecu ndìhi ñahá-yu xii-í.

38 Te nchaa ñáyiu vá cãncñícúⁿ ñihnu ñaha xii-í cuendá sá yúhú-yu ndohó-yu dàtná ndohó-í ñáyiu-áⁿ ñà túú tàú-yu cundecu ndìhi ñahá-yu xii-í.

39 Te cue ñáyiu na yúhú cuú sá cuendá-í te ñáyiu-áⁿ cuñta ñihnú-yu, dico nchaa ñáyiu vá yúhú cuú sá cuendá-í, te ñáyiu-áⁿ nduu táhü-yu cundecú-yu ñi caa ñi quíhíⁿ ndìhi Yá Ndiöxí.

Cuendá sá ndúú táhü-ó
(Mr. 9:41)

40 "Te nchaa ñáyiu na quèheⁿ cuendá ñahá xii-ndo te cada ñí-yu sá tnàhá yúhú ñí queheⁿ cuendá-yu. Te nchaa ñáyiu na quèheⁿ cuendá ñahá xii-í, te cada ñí-yu sá tnàhá Tàtà-í Dútú Ndiöxí Yaa ñí tendaha ñaha xii-í véxi-í ñuyú-a ñí queheⁿ cuendá-yu.

41 Te nchaa ñáyiu na quèheⁿ cuendá ñⁿ téé càháⁿ tnúhu Yá Ndiöxí cuendá sá quidé-dé chiúⁿ-gá, te dàtná-ñi càa táhü cuññaha-gã nduu táhü téé ducaⁿ càháⁿ tnúhu-gá-áⁿ, ñiú-ni ducaⁿ cùnduu táhü cuññaha-gã nduu táhü ñáyiu ducaⁿ na quèheⁿ cuendá ñahá xii-dé. Te nchaa ñáyiu na quèheⁿ cuendá ñⁿ téé quide váha cuendá sá dúcáⁿ quide váha-dé, te dàtná-ñi càa táhü nduu táhü téé-áⁿ ñiú-ni ducaⁿ cùnduu táhü nduu táhü ñáyiu na quèheⁿ cuendá ñahá xii-dé.

42 Te nchaa ñáyiu na cuññaha ñⁿ yaxiⁿ ndute coho ñⁿ ñáyiu cùu cuendá-í cuendá sá ñí tuha ñahá-yu xii-í cuéi ñà túú cùnuu vihí-yu, te ñáyiu ducaⁿ na cuññaha ndüte-áⁿ ñíhi-yu sá ndúú táhü-yu núú Yá Ndiöxí —cächí Jesús xãhaⁿ-gã xii-güedé.

11

Jèsús càháⁿ ndìhi-gá cue téé xica cuu ndìhi té Juadé
(Lc. 7:18-35)

¹ Te sátá ní yáha ducaⁿ ní xáhaⁿ Jèsús xii ndí ùxúú cue téé xìca cuu ndihí-gá, te ní xica-gá cuáháⁿ-gá nchaa ñúú cáá yàtni xíáⁿ dánèhé-gá ñáyíu tnúhu-gá.

² Te té Juàá yìhí-dé vecaa te ní níhí-dě tnúhu nchaa nàcuáa quide Xítohó Jesucristú. Te sátá dúcáⁿ te ní tendaha-dě ìⁿ úú cue téé xìca cuu ndihí-dé cuáháⁿ-güedé núú ndécú Jèsús.

³ Te òré ní quexìo-güedé núú ndécú-gă, te xìcáⁿ tnúhú-güedě núú-gă nàcuáa ní xáhaⁿ tē Juàá xii-güedé, te xăhaⁿ-güedě xii-gă:

—Véxi-ndí xìcáⁿ tnúhú-ndí núú-n nùu sá díú-n cùu-n Cristú Yáá ní tendaha Yá Ndiòxí véxi ñuyúú-a, àdi sá cùndètu nahi-ni-ndí mei Yáá-án —càchí-güedé xăhaⁿ-güedě xii-gă.

⁴ Te Jèsús ní xáhaⁿ-gă xii-güedé:

—Chí cuánùhú te cani-ndo cuèndú núú tē Juàá nchaa sá ní xini-ndó quide-í, ndihí nchaa nàcuáa ndùu tnúhu ní cáháⁿ-í ní xíndedóho-ndo.

⁵ Te cùñaha-ndo xii-dé sá quidé tătna-í núú cuè ñáyíu cuáá, te quide tătna-í cue ñáyíu yacua, ndihí cue ñáyíu tnàhá cuéhé sá dátèhyú nihnu-xi yiqui cùñú-yu, ndihí cue ñáyíu doho, nchaa ñáyíu-án quidé tătna-í, te ndúha-yu, te ndéé tnàhá cue ñáyíu sa ní xihí dándòto-í cùñaha-ndo. Te cùñaha tùcu-ndo xii-dé sá ndécuu-í dánèhé-í nchaa ñáyíu ndàhú, tnúhu sá sánú ichi ñaha xii-yu nàcuáa naníhí tàhú-yu.

⁶ Te cùñaha tùcu-ndo xii-dé sá ìo váha táhú nchaa ñáyíu ñá túú quide sáá iní-xi nchaa tnúhu cáháⁿ-í, duha cùñaha-ndo xii-dé —càchí-gá xăhaⁿ-gă xii-güedé.

⁷ Te sátá ní yáha-güedé cuánuhú-güedé te ní ngúita Jèsús ní cáháⁿ-gá núú ñáyíu cuèndá tē Juàá, te xăhaⁿ-gă xii-yu:

—Nchòhó ní sáháⁿ ndéhé-ndó ìⁿ téé ndècu xití yucu, te téé-án ñà túú sàni ìⁿ sàni úú iní-dé, chí ñà túú quide-dé dàtná quidé nchaa ité nàhnú cuáháⁿ-xi duha cuáháⁿ-xi dàcáⁿ òré quéné tächí.

⁸ Te ní ñà túú ní sáháⁿ ndéhé-ndó ìⁿ téé nihnu dóó vâha dóó vii càa. Te nchòhó xini-ndó sá ncháá ñáyíu nihnu dóó vâha dóó vii càa xíndécú-yu vehe cue téé cùnùu yindaha ñáyíu.

⁹ Dico nchòhó chí ní sándéhé-ndó ìⁿ téé càháⁿ tnúhu Yá Ndiòxí, te ndáá sá díú ìⁿ téé càháⁿ tnúhu-gá cúú-dě, te cùnùu-gá-dé dàcúúxí dàva-gá cue téé càháⁿ tnúhu-gá.

¹⁰ Te ñu cuèndá tē Juàá-án càháⁿ-xi núú tùtú Yá Ndiòxí nàcuáa ní xáhaⁿ-gă xii Cristú, te duha ní xáhaⁿ-gă:

Tendaha-í ìⁿ téé cáháⁿ-dé tnúhu-í codonùu-dé núú-n,

cuèndá dátúha-dé ñáyíu cuèndá quíndáá iní-yu tnúhu-n.

Duha ní xáhaⁿ-gă, te ducaⁿ ní ngódó tnùní núú tùtú-gá.

¹¹ Te na cächí tnúhu ndáá-í xii-ndo sá ní ìⁿ cue téé ñuyúú-a ñá túú cùnùu-güedé dàtná cùnùu tē Juàá téé dàcuandute ñaha xii ñáyíu. Te nchaa ñáyíu sa ta ndíhu ndaha ñaha Yá Ndiòxí vitna cuáháⁿ cùnùu-gá-ni tucú-yu dàcúúxí tē Juàá cuèi cùú-yu ñáyíu ñá túú cùnùu dàcúúxí dàva-gá ñáyíu yindaha-gá.

¹² Te ndéé cùtnàhá ní ngúita tē Juàá téé dàcuandute ñaha xii ñáyíu càháⁿ-dé tnúhu Yá Ndiòxí ñuyúú-a, ndéé dàvá-án ní ngúita ñáyíu cuìní-yu sá ndíhu ndaha ñaha Yá Ndiòxí xii-yu te ndùcu ndéé-yu quidé-yu nàcuáa ndíhu ndaha ñaha-gá xii-yu.

13 Te nchaa cue téé ní xóo cáháⁿ tnúhu Yá Ndióxi ndéé sanaha ní cáháⁿ-güedé sá díú-gã ndíhu ndaha-gã cue ñáyiú, te ñíu-ni ducaⁿ ní cáháⁿ tucu ndíi Moisés ní ngódó tnúni núú tütú ndíi. Te ñíu-ni ducaⁿ cùnúu nchaa tnúhu-áⁿ cáháⁿ-xi nàcuáa ndíhu ndaha Yá Ndióxi ñáyiú ndéé ní sáá nduu ní ngúíta té Juáa cáháⁿ-dé tnúhu-gã ñuyúú-a.

14 Te na càchí tnúhu-í xii-ndo sã cádá cuèndá-ndó, chí núú tütú Yá Ndióxi càchí-xi sá ndíxi tã Èliás, te ñíu núú tã Èliás-áⁿ ní quide té Juáa.

15 Te nchaa nchòhó ñáyiú ndédóho nchaa tnúhu cáháⁿ-í-a te ío váha chí cuáha cuèndá.

16 Te na càchí tnúhu tucu-í xii-ndo nàcuáa sãtnahá-xi cùu ñáyiú ndècu vitna. Chí ñáyiú-áⁿ cúú-yu dàtná cue landú sácóo núú yáhu dàdiqui-güexi te níhi cáháⁿ-güexi, te xítñaha-güexi ndi mee landú-güexi:

17 “Ní túú-ndí yaá ndíhi vílu te ñá túú ní cuini-ndó càta-ndo. Te ío yica ìní ní xita yuhu-ndí te ñá túú ní ndáhyú-ndó”, càchí-güexi xítñaha-güexi. Te ducaⁿ sãtnahá-xi cùu ñáyiú ndècu vitna,

18 chí té Juáa ío ndáhú ní xóo caxi-dé, te ní ñà túú ní xóo coho-dé ndudí ndéhé yoho yáha stilé sá sà ní nduu-xi ndidí, te sá dúcáⁿ ní xóo cada-dé te ní cachí-yu sá ní xindecu ndíhi-dé espíritú cúndíhi yucu ñáváha.

19 Te sáta ní quexío yúhú Téé cùu ñaní tnáhá-ndó nchaa-ndo, te xèxi-í xíhi-í quidè-í, te càchí-yu sá yúhú cùu-í ñⁿ téé xèxi vihi te xíhi vihi, te càchí tucú-yu sá cùu-í téé xica cuu ndíhi cue téé cuihna ìní-xi quide cobrá ñáhá xii-yu cuèndá impuèstú ndíhi nchaa dava-gá cue téé ndècu ichi cuehé ichi duha, duha càchí-yu. Te ñáyiú ní tnahá tnúhu ndíhi Yá Ndióxi, ñáyiú-áⁿ quidè-yu sá váha nàcuáa cutnúni sá méé-gã ío ndècu ndíhi-gá sá xini tnúni-gá —càchí-gá xáhaⁿ-gã xii-yu.

*Cuèndá ñáyiú dava ñúú ñá túú sàndáa ìní tnúhu Xítohó Jesucristú
(Lc. 10:13-15)*

20 Te Jèsús ní ngúíta-gá cáháⁿ-gá dóho nchaa ñáyiú ñúú núú ío-gá vai núú sã vã yóo tnáhí ndàcu cada ní quide-gá, chí nchaa ñáyiú ñúú-áⁿ ñà túú cuini-yu ndíxi túu ìní-yu sá ñà túú quide váha-yu ndècu-yu, te xáhaⁿ-gã xii-yu:

21 —¡Ndáhú nchòhó cue ñáyiú ñúú Corazín! ¡Te ndáhú nchòhó cue ñáyiú ñúú Betsaidá! Chí núú dícó ñúú Tírú ndíhi ñúú Sídón ní quide-í nchaa sá vã yóo tnáhí ndàcu cada datná ní quide-í ñúú-ndó-á ní xini-ndó ñá, te sá ndéé ama-gá cuihnú-yu dóo ndáhú te cunu cóo-yu núú yaá cuèndá sá ndíxi cuèchi ìní-yu sá ñà túú quide váha-yu ní cùu.

22 Dico sáá nduu te ío-gá dandòho ñaha Yá Ndióxi xii-ndo dàcúúxi ñáyiú ñúú Tírú ndíhi ñáyiú ñúú Sídón.

23 Te nchòhó cue ñáyiú ñúú Capèrnaúm ío quide cahnu-ndo mee-ndo, te quide ìní-ndó sã sã cuánda-a-ndó àndíu, dico ñáhá chí núú ùhú núú ndáhú nduu táhú-ndó cùndecu-ndo. Te núú dícó ñúú Sòdomá ní quide-í nchaa sá vã yóo tnáhí ndàcu cada datná ní quide-í ñúú-ndó ní xini-ndó ñá, te ñáyiú-áⁿ vã nãá-yu chí cundecu-ní-yu ndéé vitna ní cùu.

24 Te na càchí tnúhu-í xii-ndo sã sáá nduu te ío-gá dandòho ñaha Yá Ndióxi xii-ndo dàcúúxi ñáyiú ñúú Sòdomá —càchí-gá xáhaⁿ-gã xii nchaa ñáyiú ñúú-áⁿ.

*Jèsús cuini-gá sá túhá ñaha ñáyiú xii-gá
(Lc. 10:21-22)*

²⁵ Te sáta xǎⁿ te Jèsús ní ngüíta-gá càháⁿ ndihi-gá Tǎtá-gǎ Dútú Ndiöxí, te xǎhaⁿ-gǎ:

—Yöhó Tǎtá-í Dútú Ndiöxí, ío chíñuhu ñaha-í xii-n chi diu-n tàxi tnuní-n àndiu ndihi ñuyíu-a, te dànehé-n cuè ñáyiú nchaa tnúhu váha, te diu-ni ñáyiú-áⁿ cúu-yu ñáyiú ñá túú cùtnuní iní-xi nchaa tnúhu càháⁿ cue téé càchí sá ío túha, te nchaa tnúhu váha-áⁿ ñá túú dàtúu-n núú ñáyiú càchí sá ío túha te ío váha sáá díquí-xi.

²⁶ Chi ducaⁿ cuíní-n cùnduu —cachí-gá xǎhaⁿ-gǎ xii Tǎtá-gǎ.

²⁷ Te xǎhaⁿ-gǎ xii nchaa ñáyiú xǐndecu-áⁿ:

—Mee Tǎtá-í Dútú Ndiöxí ní cachí-gá sá cùnùu-í núú nchàandi túhú sá ío. Te vá yóo ñⁿ-gǎ xiní nàcuáa sàni iní yúhú Déhe Dútú Ndiöxí, chi ñⁿdií ní mee-gǎ xiní-gǎ nàcuáa sàni iní-í, te mee-í xiní-í nàcuáa sàni iní mee-gǎ. Te nchaa ñáyiú càchí iní-í sá quíní-yu nàcuáa sàni iní Tǎtá-í Dútú Ndiöxí te xǐtnúhu-í-yu, te vá yóo ñⁿ-gǎ xiní chí diu-ni ñáyiú ducaⁿ xǐtnúhu-í-áⁿ xiní-yu.

²⁸ Te nchaa nchòhó ñáyiú ñá túú ndècu váha, ñáyiú ñá túú ñihí nàcuáa cada cundecu váha iní-xi quixi-ndo túha ñaha-ndo xii-í nàcuáa ducaⁿ cùndecu váha iní-ndó.

²⁹ Te cuu vii cuu váha iní-ndó tnñ-ndo nchaa tnúhu càháⁿ-í, te ío dacuáha-ndo, te ducaⁿ càda-ndo chí yúhú ío càhnu iní-í, te ío ndáhú iní-í. Te núu ducaⁿ na càda-ndo te ío váha cuu iní-ndó cùndecu-ndo.

³⁰ Te tnñ-ndo nchàa tnúhu càháⁿ-í chí ñá túú cùu-xi ñⁿ sá vèe, chí cada iní-ndó sǎ cúu-xí dàtná ñⁿ chiùu ñamá —càchí-gá xǎhaⁿ-gǎ xii-yu.

12

Cue téé xica cuu ndihi Jesús sahnú-güedé yoco triú nduu ndetátú ñáyiú (Mr. 2:23-28; Lc. 6:1-5)

¹ Te ñⁿ nduu cùu-xi nduu ndetátú ñáyiú ñuhu Jesús ichi ndihi cue téé xica cuu ndihi-gǎ, te ta yǎha-gǎ ndihi-güedé ñⁿ xichi núú cáá triú te xixíhí-güedé docó núu xǎⁿ ní ngüíta-güedé sahnú-güedé yoco triú-áⁿ, te ndihi ndaha-güedé quíñⁿ-güedé quée triú-áⁿ tá xèxi-güedé cuáhá.

² Te cue téé cùu fariséú ní xiní-güedé nàcuáa quide cue téé xica cuu ndihi Jesús, núu ní xáhaⁿ-güedé xii-gǎ:

—¿Ná cuendá ducaⁿ quide cue téé xica cuu ndihi-n sahnú-güedé yoco triú, te vitna cùu-xi nduu ndetátú-i? Te ñá túú tàú-güedé ducaⁿ càda-güedé —càchí-güedé xǎhaⁿ-güedé xii-gǎ.

³ Te Jèsús ní xáhaⁿ-gǎ xii-güedé:

—¿Ná ñá túú dàcuaha-ndo núú tütú Yá Ndiöxí núú càháⁿ-xi nàcuáa ní quide ndí Dávíi cùtnàhǎ ní xíhí ndí docó ndihi cue téé ní xica cuu ndihi ndí-áⁿ?

⁴ Chí ndí-áⁿ ní quíhu ndí vehe Yá Ndiöxí ní queheⁿ ndí páa ní cuu í ndécú-áⁿ ní xexi ndí ndihi cue téé ní xica cuu ndihi ndí, te ñá túú tàú ndí sá dúcáⁿ càda ndí ndihi cue téé-áⁿ ní cùu, chí mee-ni cuè dútú tàú-güedé caxi-güedé páa-áⁿ ní cùu.

⁵ ¿Te náa ñá túú xiní-ndó nàcuáa càháⁿ-xi núú tütú ndí Moisés sá ncháá cuè dútú vǎ ndetátú-güedé nduu cùu-xi nduu ndetátú-áⁿ? Te ñá díú ñⁿ cuèchi cùu-xi sá dúcáⁿ ñá túú ndetátú-güedé nduu cùu-xi nduu ndetátú.

⁶ Te na càchí tnúhu-í xii-ndo sǎ yúhú cùu-í téé ío-gǎ cùnùu ndecu ndihi-ndo dacúuxí vèñúhu sá ío cùnùu.

⁷ Dico nchòhó chí ñá tècú tnùní-ndó nàcuáa càháⁿ Yá Ndiöxí núú tütú-gǎ núú càchí-xi: “Yúhú cuíní-í sá cùndáhú iní-ndó cuè tnaha ñáyiú-ndo te ñá díú

mèe-ni sá cahní-ndó quitì nduu táhù-í", duha càchí-gá núú tütù-gá. Te núú dicó nchòhó tècú tnùnì-ndó ñá, te vâ càháⁿ cuèhé-ndó cuèndá nchaa ñáyiú ñá túú ndècu cuèchi-xi.

⁸ Te yúhú Tée cùu ñaní tnáhá-ndó ncháa-ndo, tnáhá-í ndécú ndìhi-í tnúhu ndee iní sá cùu-í nchaa ñáyiú nàcuáa cadá-yu nduu ndetátù-ó-á —càchí-gá xáhaⁿ-gá xii-güedé.

Ëⁿ téé ní yíhí ìⁿ xio ndaha-xi
(Mr. 3:1-6; Lc. 6:6-11)

⁹ Te Jèsús ní xica-gá cuáháⁿ-gá, te cuánguihu-gá xití ìⁿ veñúhu.

¹⁰ Te xiáⁿ ndécú ìⁿ téé ní yíhí ìⁿ xio ndaha-dé. Te dava cue téé xĩndecu-án ndúcú-güedé nàcuáa cada-güedé cacáⁿ cuèchi-güedé cuèndá-gá núú cuè téé cùnno, te ní xicáⁿ tnúhú-güedé núú-gá, te xáhaⁿ-güedé:

—Cachí tnúhu xii-ndí nùu cuu cada tátna-o ìⁿ téé cùhú nduu cùu-xi nduu ndetátù-ó ãⁿ ñáhá —càchí-güedé xáhaⁿ-güedé xii-gá.

¹¹ Te Jèsús ní xáhaⁿ-gá xii-güedé:

—Te nchòhó òré ná ngáunihu ìⁿ mbéé-ndó ìⁿ déhvá cùnú te nàtava-ndo-di cuéi cùu-xi nduu ndetátù-ó.

¹² Te ìⁿ ñáyiú ío-gá cùnùú-yu dàcúúxí ìⁿ mbéé, núú xiáⁿ tàù-ó sã cadá-ó sã vãha sá cúú-xí-yu cuéi cùu-xi nduu ndetátù-ó —càchí-gá xáhaⁿ-gá xii-güedé.

¹³ Te dàtnùnì ní xáhaⁿ-gá xii téé cùhú ndaha-xi-áⁿ:

—Ndacani ndaha-n —càchí-gá xáhaⁿ-gá xii-dé.

Te téé-áⁿ ní ndacani-dé ndaha-dé, te òré-ni ní ndúha ní nduu-xi dàtná cáá ìngá xio ndaha-dé.

¹⁴ Te cue téé cùu fariséú ní ndee-güedé xití veñúhu, te ní ngúita-güedé ndátnúhu-güedé nùu nása cada-güedé cahni-güedé Jèsús.

Nàcuáa sa ndèé tnunì cuèndá Jèsús

¹⁵ Te sáta ní cutnùnì iní Jèsús nàcuáa cuiní-güedé cada ñaha-güedé xii-gá te ní xica-gá cuáháⁿ-gá, te ío vâi ñáyiú nchícúⁿ ñáhá xii-gá cuáháⁿ, te tnáhá cue ñáyiú cùhú nchícúⁿ ñáhá xii-gá cuáháⁿ, te ní quide tátna-gá cue ñáyiú-áⁿ.

¹⁶ Te ní xáhaⁿ-gá xii-yu sá vâ càháⁿ-yu yoo cùu-gá.

¹⁷ Te ducaⁿ ní cuu chi ní queue ndáá-xi nàcuáa ní xáhaⁿ Yã Ndiõxí xii ndíi Chàíá téé ní xóo cáháⁿ tnúhu-gá ndéé sanaha ní chídó tnùnì ndíi núú tütù-gá, te duha ndùu tnúhu ní xáhaⁿ-gá:

¹⁸ Téé-a cùu-dé téé ní sani iní-í sá cùnú cuèchi-dé núú-í,

te ío cùu iní-í-dé, te cùdìí iní-í-dé.

Te yúhú cuáñaha-í Espiritú-í cundecu ndìhi-dé,

te ñu-dé cùñaha-dé xii nchaa ñáyiú ñuyúú sã yúhú ío ndáá quidè-í.

¹⁹ Te vâ dácaá-dé tnúhu cáháⁿ-dé ndìhi ñáyiú, te ní vâ cáná sãa-dé òré cáháⁿ-dé, te ní vâ yòo níhí tnúhu nása cáháⁿ-dé cuhuⁿ-dé ichi.

²⁰ Te ni ñá túú nã cada-dé cue ñáyiú cùu datná ìⁿ tnú ndóó sá cuiní-xi tnáhnú, te ñu-ni ñáyiú-áⁿ cúú tucú-yu dàtná ìⁿ mèchá càndíl sá ío quène ñúhmá te cuiní-xi ndahvá.

Te ducaⁿ sãtnáhá-xi cùu ñáyiú-áⁿ chi ñá túú nihí ndéé-yu cundecú-yu sá cúú-xi-í, te mee-ni sã vãha cada ñaha-dé xii-yu,

te ñu-ni ducaⁿ càda-dé ndéé sáá nduu cùtnunì iní nchaa ñáyiú sá ío ndáá quidè-dé.

²¹ Te nchaa ñáyiú nihí ñuyúú ío cundee cùu cahnu iní ñáhá-yu xii-dé.

Duha ní xáhaⁿ-gá xii ndíi Chàíá ní chídó tnùnì ndíi núú tütù-gá.

Càchí-güedé sá ndécú ndìhi Jesús espíritú cúndìhi yucu ñávàha
(Mr. 3:20-30; Lc. 11:14-23; 12:10)

22 Te ní quexio ìḡ úú cue téé núú ndécú Jèsús, te ndèca-güedé ìḡ téé ñìhí te cuàá-dé, te yìhí ñaha espíritú cúndìhi yucu ñávàha xii-dé, te Jèsús ní queñuhu-gá espíritú cúndìhi yucu ñávàha yìhí ñaha xii-dé, te òré-ni-án ní cuu ní nacáháⁿ-dé te ní ndúha núú-dé.

23 Te nchaa ñáyiu xíndecu-án ío ní cuñúhu-yu sá dúcáⁿ ní quide-gá, te ní xítñahá-yu:

—Váa téé-a cùu-dé ñaní tnáhá ndii Dàvíí téé tendaha Yá Ndióxi quixi ñuyúú-a —càchí-yu xítñahá-yu.

24 Te cue téé cùu fariséú ní tecú dóho-güedé nàcuáa ndùu tnúhu xítñahá-yu, núu xíáⁿ ní xítñaha-güedé:

—Tée-a ndèñuhu-dé nchaa espíritú cúndìhi sácúíhná yìhí ñaha xii ñáyiu, chi ñiu-ni sácúíhná-án chíndèe ñaha-xi xii-dé te ñiu-ni-xi tàxi tnuní-xi nchaa espíritú-án —duha ní xítñaha-güedé.

25 Te Jèsús ní cutnùnì iní-gá nàcuáa ndùu tnúhu ní xítñaha-güedé, núu ní xáhaⁿ-gá xii-güedé:

—Te nchòhó xínì-ndó sá ñúu ìḡ téé yíndaha ìḡ nacióⁿ vá cúú ìḡ nuu-dé ndìhi cue téé cúndìhi-dé, te vá cúdii-dé cunuú-dé. Te ñiu-ni ducaⁿ sátnahá tucu-xi cùu tucu cue téé cùchiuⁿ ìḡ ñúú, chi núu vá cúú ìḡ nuu-güedé cundecu-güedé, te vá cúdii-güedé cundecu-güedé taxi tnuní-güedé. Te ñiu-ni ducaⁿ sátnahá tucu-xi cùu cue ñáyiu xíndecu ìḡ-ni vèhe, chi núu vá cúú ìḡ nuu-yu cundecú-yu te vá cúdii-yu cundecu càhnú-yu.

26 Te núu sácúíhná ducaⁿ quide-xi queñuhu-xi cue espíritú cúndìhi-xi yìhí ñaha xii ñáyiu ña, te ñá túú cùu ìḡ nuu-xi ndecu-xi te núu ducaⁿ, te vá cúdii sácúíhná-án cundecu-xi taxi tnuní-xi te núu ducaⁿ quide-xi.

27 Te duha càháⁿ-í chi nchòhó càchí-ndó sá chíndèe ñaha sácúíhná xii-í queñuhu-í nchaa espíritú cúndìhi-xi yìhí ñaha xii ñáyiu. Te núu yúhú quidé cuendá-ndó sá sácúíhná chíndèe ñaha-xi xii-í, te xínì ñuhu-xi cada cuendá-ndó yòo chindee ñaha xii cue téé xíca cuu ndìhi-ndo queñuhu-güedé nchaa espíritú cúndìhi yucu ñávàha yìhí ñaha xii ñáyiu. Te mee-güedé càchí-güedé sá nchòhó ñá túú càháⁿ ndáá-ndó sá dúcáⁿ càháⁿ-ndó.

28 Dico yúhú chi Espíritú Yá Ndióxi chíndèe ñaha-xi xii-í queñuhu-í nchaa espíritú cúndìhi sácúíhná yìhí ñaha xii ñáyiu, te sá dúcáⁿ chindee ñaha Espíritú-gá xii-í, xíáⁿ cutnùnì sá sá ní sáá nduu cuní-gá ndíhu ndaha ñaha-gá xii-ndo.

29 Te nchòhó xínì-ndó sá cué ñadúhú chi vá ndácú-güedé cuendá-ni quíhu-güedé duhu-güedé vehe ìḡ téé ío ndee, chi díhna-gá xínì ñuhu-xi tnii-güedé téé-án dacùtu ñaha-güedé xii-dé dàtnùnì ducaⁿ te ndacu-güedé duhu-güedé nchaa sá ndécú ndìhi-dé.

30 Te nchaa ñáyiu ñá túú cúndìhi ñaha xii-í, te cùu úhú iní ñáhá-yu. Te nchaa ñáyiu ñá túú chindee ñaha xii-í, te dàquee tíhñu-yu chiúⁿ quide-í.

31 Te na càchí tnúhu-í xii-ndo sá ncháá ñáyiu quide nchaa sá cuèhé sá dúhá cuu cada càhnu iní ñáhá Yá Ndióxi xii-yu, te ñiu-ni ducaⁿ cùu cada càhnu iní-gá nchaa tnúhu cuèhé tnúhu duha càháⁿ-yu. Dico cue ñáyiu na càháⁿ úhú cuendá Espíritú-gá, te ñáyiu-án vá cáda càhnu iní ñáhá tnáhí-gá xii-yu.

32 Te nchaa ñáyiu na càháⁿ úhú cuendá yúhú Tée cùu ñaní tnáhá-yu ncháá-yu, te cuu cada càhnu iní ñáhá Yá Ndióxi xii-yu. Dico cue ñáyiu na

càháⁿ úhú cuendá Espíritú-gá te vá cáda càhnu iní ñáhá tnàhí-gá xii-yu cuèi vitna ndècu vívũ-yu, te cuèi na cùu-yu.

*Ndi ðííⁿ núú yutnu xini-ó nã yutnu cùu-xi cuendá sã sãvidí-xi
(Lc. 6:43-45)*

³³ Te nchòhó xini-ndó sã ndi ðííⁿ núú yutnu xini-ó nã yutnu cùu-xi cuendá sã sãvidí-xi, te xini-ó sã ncháá yùtnu váha cùuⁿ mee-ni sãvidí váha, dico nchaa yutnu sã ñã túú váha te cùuⁿ mee-ni sãvidí sã ñã túú váha. Te duha càháⁿ-í cuendá cada cuendá váha-ndo nãcuáa ndùu chiuⁿ quide-ndo ìⁿ ìⁿ-ndo cuendá ducaⁿ cùtnuni ná ñáyyu cùu-ndo.

³⁴ Dico nchòhó cùu-ndó dàtná ìⁿ cóo dèéⁿ chi ío cuihna iní-ndó, te vá cáni iní-ndó sã ndácú-ndó càháⁿ-ndó ìⁿ tnúhu váha, chi ío cuihna iní-ndó. Te nchòhó xini-ndó sã ncháá ñáyyu càháⁿ-yu nãni véxi iní-yu.

³⁵ Te nchaa ñáyyu váha iní-xi càháⁿ-yu tnúhu váha, chi ðiu-ni tnúhu váha-áⁿ ñúhú iní-yu. Te nchaa ñáyyu cuihna iní-xi càháⁿ-yu tnúhu cuèhé tnúhu duha, chi ðiu-ni tnúhu cuèhé tnúhu duha-áⁿ ñúhú iní-yu.

³⁶ Te na càhí tnúhu-í xii-ndo sã ná sãa nduu càda ndáá Yã Ndiòxi cuéchi nchaa nchòhó ñáyyu ndècu ñuyú-a, te nchaa tnúhu cuèhé tnúhu duha càháⁿ-ndó càháⁿ-gá sã ñã túú ní quide váha-ndo sã dúcáⁿ ní càháⁿ-ndó tnúhu-áⁿ.

³⁷ Te nãcuáa ndùu tnúhu ní càháⁿ-ndó ìⁿ ìⁿ-ndo, te ducaⁿ càháⁿ Yã Ndiòxi te núu ndècu cuéchi-ndo àdi ñã túú ndècu cuéchi-ndo. Te núu ñã túú cuéchi-ndo te cácu-ndo, dico núu ndècu cuéchi-ndo te vá cácu-ndo —càhí-gá xãhaⁿ-gã xii cue téé cùu fariséú-áⁿ.

*Cue téé cuini sã cáda Jèsús ìⁿ sã vã yõo tnàhí ndàcu cada
(Mr. 8:12; Lc. 11:29-32)*

³⁸ Te cue téé cùu fariséú, ndihi cue téé dàcuaha ñaha xii ñáyyu nchaa tnúhu ní chídó tnùn ndii Moisés xãhaⁿ-güedé xii Jèsús:

—Mèstrú, cuini-ndí cada-n ìⁿ sã vã yõo tnàhí ndàcu cada cuendá ducaⁿ cùtnuni iní-ndí sã Yã Ndiòxi chindèe ñaha-gá xii-n —càhí-güedé xãhaⁿ-güedé xii-gá.

³⁹ Te Jèsús ní xãhaⁿ-gã xii-güedé:

—Ñáyyu ndècu ichi cuehé ichi duha ñã túú cuini-yu tñí-yu tnúhu càháⁿ Yã Ndiòxi, te ñáyyu-áⁿ cuini-yu cada-í ìⁿ sã vã yõo tnàhí ndàcu cada nacuáa cutnùn iní-yu núu ndáá sã Yã Ndiòxi chindèe ñaha-gá xii-í. Dico yúhú chi ñã túú nãgã cada-í quini-yu, chi sa ñihí-yu tnúhu nãcuáa ní yáha ndii Jónás téé ní xóo càháⁿ tnúhu Yã Ndiòxi ndéé sanaha, te ðiu-ni ducaⁿ yãha yúhú tnúhu.

⁴⁰ Chi ndii Jónás-áⁿ ní xúhuⁿ ndii úní nduu úní niú xití ìⁿ chácá cáhnú vñhi nani ballená. Te ðiu-ni ducaⁿ yãha yúhú Téé cùu ñaní tnáhá-ndó nchãa-ndo, chi úní nduu úní niú cuhuⁿ-í xití ñuhu.

⁴¹ Te na sãa nduu càda ndáá Yã Ndiòxi cuéchi nchaa ñáyyu ndècu ñuyú-a, te dàvá-áⁿ cachí nchaa ñáyyu ñuu Nínivé sã ñã túú ní quide ndáá nchaa ñáyyu ndècu vitna, te ducaⁿ càháⁿ-yu chi mée-yu ní dáñã-yu ichi cuèhé ichi duha cùtnáhá ní sáháⁿ ndii Jónás ñuu-yu ní càháⁿ ndii tnúhu Yã Ndiòxi núú-yu. Dico vitna iha ndècu ndihi ñaha-ndo xii yúhú, te ðiu-í ío-gá cùtnu-í dàcúúxí ndii Jónás.

⁴² Te nduu càda ndáá Yã Ndiòxi cuéchi nchaa ñáyyu, te dàvá-áⁿ quini-ndó ìⁿ ñadihí ñaha ní xindaha ìⁿ nacióⁿ cáá ndàa xio datni núú quéné nchíanchii, te ñaha-áⁿ ío xica ní xindecu-aⁿ te ní sáháⁿ-aⁿ ní xindedóho-aⁿ nchaa tnúhu ní càháⁿ

ndíi Salòmón, chi ndíi-ánⁿ ño ní sáá sá xíní tñuní ndíi. Te tñàhá ñaha-ánⁿ cǎháⁿ-aⁿ sá ñà túú ní quide ndáá nchaa ñáyiú ndècu vitna. Dico vitna iha ndècu ndíhi ñaha-ndo xii yúhú, te ñiú-í ío-gá cúnú-í dàcúúxí ndíi Salòmón.

Espiritú cúndíhi yucu ñávãha sá nánchòcava xito cùu uú
(Lc. 11:24-26)

⁴³ Te òrè ná quée ñaha ìⁿ espíritú cúndíhi yucu ñávãha xii ìⁿ ñáyiú, te cuáháⁿ-xi ndècu-xi ìⁿ xichi núú cúndècu-xi te ñà ñíhí-xi te ní sani iní-xi:

⁴⁴ “Váha-gá núhú tucu-í núú ní xíndecu-í”, duha ní sani iní-xi. Te cuánuhú-xi, te òrè ní nasáá-xi, te ní xíní-xi sá cáá ñí ñáyiú-ánⁿ dàtná cáá-ñá ìⁿ vehe ní natíhú ní nduu vií-ná te vá yò-gá ndécú.

⁴⁵ Te sáta dúcáⁿ te ní xica-xi cuáháⁿ-xi cuándúcú-xí ùsá tñàhá espíritú cúndíhi-xi sá nèhé víhí-gǎ xíquide. Te òrè ní ñíhí-xi cue espíritú-ánⁿ te ndèca ñaha-xi cuáháⁿ cuendá ngúndecu ndíhi-xi ñáyiú-ánⁿ. Te ñáyiú-ánⁿ uuⁿ-gǎ nándi yáha-yu dàcúúxí ndèé díhna. Te ñiú-ni ducaⁿ sǎtnahá-xi yáha nchaa ñáyiú cuihna iní-xi ndècu ñuyúú-a vitna –cǎchí-gǎ xǎhaⁿ-gǎ xii-güedé.

Cue ñaní Jèsús ndíhi náná-gǎ
(Mr. 3:31-35; Lc. 8:19-21)

⁴⁶ Te cǎháⁿ dúcáⁿ-ní Jèsús ní quexìo náná-gǎ ndíhi cue ñaní-gǎ cuíní-yu cáháⁿ ndíhi ñàhá-yu xii-gǎ, te ní ngúnu tñí-yu ndàa quehé vehe núú ndécú-gǎ.

⁴⁷ Te ìⁿ cue ñáyiú xíndecu-ánⁿ ñí xáhǎⁿ-yu xii-gǎ:

–Ní quexìo náná-n ndíhi cue ñaní-n xínutñí-yu quehé, te cuíní-yu cáháⁿ ndíhi ñàhá-yu xii-n –cǎchí ñáyiú-ánⁿ xáhǎⁿ-yu xii-gǎ.

⁴⁸ Te ní xǎhaⁿ-gǎ xii ñáyiú ducaⁿ xǎhaⁿ xii-gǎ-ánⁿ:

–Te cǎchí tñúhu yóndí-gǎ ñáyiú cùu datná nǎnà-í ndíhi dàtná cue ñaní-í –cǎchí-gǎ xǎhaⁿ-gǎ xii ñáyiú-ánⁿ.

⁴⁹ Te ní dánèhé ñàhá-gǎ nchaa cue téé xica cuu ndíhi-gǎ, te ní xǎhaⁿ-gǎ xii ñáyiú-ánⁿ:

–Cue téé-a cùu-güedé dàtná nǎnà-í, ndíhi dàtná cue ñaní-í.

⁵⁰ Te nchaa ñáyiú na càda nchaa nacúáa cǎháⁿ Tǎtà-í Dútú Ndiòxí Yaá ndécú àndiu, te ñáyiú-ánⁿ cúú-yu dàtná nǎnà-í, ndíhi dàtná cue ñaní-í, ndíhi dàtná cue cúha-í –cǎchí-gǎ xǎhaⁿ-gǎ xii ñáyiú ducaⁿ ñí dáyǎha tñúhu núú-gǎ-ánⁿ.

13

Nàcuáa quide téé cuángacáⁿ triú
(Mr. 4:1-9; Lc. 8:4-8)

¹ Te ñiú-ni nduu-ánⁿ ní quee Jèsús vehe núú ndécú-gǎ, te ní xica-gǎ cuáháⁿ-gǎ ní ngóo-gǎ yuhu làgúná.

² Te ío cuéhé ñáyiú ní tacá núú ndécú-gǎ. Te sá dúcáⁿ ño cuéhé ñáyiú núu ní quée-gǎ xití ìⁿ bàrcú nútñí xití ndute làgúná-ánⁿ, te núú xǎⁿ ní ngóo-gǎ, te nchaa ñáyiú-ánⁿ xixúcu-yu yuhu làgúná-ánⁿ.

³ Te Jèsús ní ngúíta-gǎ ní caní-gǎ titní cuèndú núú-yu nàcuáa tecú tñuní-yu nchaa nàcuáa ndúu tñúhu-gǎ, te xǎhaⁿ-gǎ xii-yu:

–Ìⁿ téé cuángacáⁿ-dé triú,

⁴ te òrè ní ngúíta-dé dǎngoyo-dé triú-ánⁿ, te dava ní quene ndava ní ngava ndéé ichi, te ní xíní cue tǐláá te ní nadatàcá-güedi.

⁵ Te dava ní ngava ñuhu yadi núú yíhí víhi yúú, te ndíhi-ni ní xínu-xi chi ñá túú cǎvili ñuhu.

⁶ Dico òrè ní nayahé te ñá túú ní cùndee iní-xi chi ní yíchí-xi, chi ñá túú ní ñíhí quíhíⁿ cùnú yóho-xi.

⁷ Te dava ní ngava núú yúcu ndíquíⁿ tnu ñhu, te ñⁿnuu-ni ní xínu-xi ndíhi tnu ñhu. Te tnu ñhu-áⁿ ní sahnú-xi te ní dánáá-xí nchàa triú sá ní xínu-áⁿ.

⁸ Dico dava-gá triú ní ngava núú ndécú ñùhu cocoⁿ te xiáⁿ ío váha ní cuu, chi núú ñⁿ-ní triú-áⁿ te dava yoco-xi ní ngúhí ócò úxí triú-xi, te dava yoco-xi ní ngúhí únídico triú-xi, te dava yoco-xi ní ngúhí ñⁿ cièndú triú-xi.

⁹ Te vitna nchaa nchòhó ñáyiú ní xíndedóho tnúhu ní cáháⁿ-í-a, te ío váha chí cuáha cuèndá —càchí-gá xáhaⁿ-gá xii-yu.

Cue téé xica cuu ndíhi Jesús ndúcú tnúhu-güedé núú-gá ná cuèndá cání-gá cuèndú núú ñáyiú

(Mr. 4:10-12; Lc. 8:9-10)

¹⁰ Te cue téé xica cuu ndíhi Jesús ní sáháⁿ-güedé ndéé núú-gá, te xáhaⁿ-güedé xii-gá:

—Ndúcu tnúhu-ndí núú-n núu ná cuèndá ducaⁿ mèe-ni cuèndú cání-n núú ñáyiú —càchí-güedé xáhaⁿ-güedé xii-gá.

¹¹ Te ní xáhaⁿ-gá xii-güedé:

—Nchòhó chí sa càchí tnúhu Yá Ndióxi xii-ndo ñⁿ sá vátá quíní-gá-ndó, chí càchí tnúhu-gá nàcuáa quide-gá ndíhu ndaha-gá ñáyiú, dico dava-gá ñáyiú chí ñá túú ná xáhaⁿ-gá xii-yu.

¹² Te nchaa ñáyiú sa tècú tnùní te uuⁿ-gá cuita tecú tnùní-yu quíhíⁿ, te nchaa ñáyiú ñá túú tècú tnùní te uuⁿ-gá vá tècú tnùní-yu.

¹³ Te xiáⁿ núu duha càní-í mee-ni cuèndú núú-yu, chí cuèí na quíní-yu nchaa nàcuáa cuu dico ní vâ cùtnùní iní-yu ná cuèndá ducaⁿ cùu, te cuèí na cùndedóho-yu dico ní vâ tècú tnùní-yu.

¹⁴ Te ñu cuèndá ñáyiú-áⁿ ní xáhaⁿ Yá Ndióxi xii ndí Chàíá téé ní xóo cáháⁿ tnúhu-gá ndéé sanaha ní chídó tnùní ndí núú tütú-gá núú càchí-xi: Nchaa nchòhó cundedóho-ndo tnúhu càháⁿ-í, dico ní vâ tècú tnùní-ndó, te cuèí na quíní-ndó nchàa nàcuáa cada-xi, dico ní vâ cùtnùní iní-ndó ná cuèndá ducaⁿ quide-xi.

¹⁵ Te ducaⁿ chí cùu-ndo ñáyiú ío sàá iní-xi, te cùu-ndo ñáyiú ñá túú tècú tnùní tnúhu càháⁿ-í, te cùu tucu-ndo datná cue ñáyiú cuáá chí ñá túú cuíní-ndó càda cuèndá-ndó tnúhu-í,

te ní ñá túú cuíní-ndó cùndedóho-ndo,

te ní ñá túú cuíní-ndó tècú tnùní-ndó,

te ní ñá túú cuíní-ndó nàtuha ñaha-ndo xii-í cuèndá cada càhnu iní-í nchaa yíá cuèchí-ndo nàcuáa ío váha cuu iní-ndó cùndecu-ndo.

Duha ní xáhaⁿ Yá Ndióxi xii ndí Chàíá ní chídó tnùní ndí núú tütú-gá.

¹⁶ Dico nchòhó chí ío váha táhú-ndó chí cùtnuní iní-ndó nchàa nàcuáa quide-í, te cùtnuní tucu iní-ndó nchàa nàcuáa ndúu tnúhu càháⁿ-í.

¹⁷ Te na càchí tnúhu ndáá-í xii-ndo sá ío vâi cue téé ní xóo cáháⁿ tnúhu Yá Ndióxi ndéé sanaha ndíhi nchaa dava-gá ñáyiú váha iní-xi ní cuíní-yu cundehé-yu nchaa sá ndéhé-ndó vitna quide-í dico ñá túú ní xini-yu, te ní cuíní tucu-yu cundedóho-yu nchaa tnúhu ndédóho-ndo vitna cáháⁿ-í te ñá túú ní xíndedóho-yu.

Jesús càháⁿ-gá nàcuáa quèe-xi cuèndá téé cuángacáⁿ triú
(Mr. 4:13-20; Lc. 8:11-15)

18 "Te vitna cundedóho váha-ndo na càchí tnúhu-í xii-ndo nàcuáa quèe-xi cuendú tée cuángacáⁿ triú ní caní-í núú-ndó.

19 Te triú sá ní quene ndava ní ngava ndéé ichi, xíãⁿ cúú-xí dàtná ñáyiú ní xíndedóho tnúhu sá càháⁿ nàcuáa ndíhu ndaha ñaha Yá Ndióxi xii-yu, dico ñá túú ní cuíní-yu tníí-yu, chí sácúíhná cuáháⁿ-xi nàdatuhú-xi iní-yu cuendá sá vǎ cǎnchicúⁿ nihnú-yu nàcuáa càháⁿ tnúhu-áⁿ.

20 Te triú sá ní ngava ñuhu yadi núú yíhí vîhi yúú-ãⁿ, xíãⁿ cúú-xí dàtná ñáyiú ní xíndedóho tnúhu Yá Ndióxi te dǎí iní ní tníí-yu tnúhu-gá,

21 dico òré ná ngúíta ñáyiú cúcuèhé ñáhá-yu xií-yu àdi nándi-gá sá yǎha-yu sá cuendá tnúhu-gá, te ñá cùndèe iní-yu chí dàñá-yu tnúhu-gá cuendá sá ña túú nihí ndéè-yu.

22 Te triú sá ní ngava núú yúcu ndíquíⁿ tnu iñu-áⁿ, xíãⁿ cúú-xí dàtná ñáyiú ní tecú dóho-xi tnúhu Yá Ndióxi dico cuèé cuèé ní nacuanaa-yu tnúhu-gá, chí cuendá mee-ni sá ío ñuyíú-a ñuhu iní-yu, ndíhi cuendá sá ío sàni iní-yu cuu cuicá-yu, te mee-ni nchǎa xíãⁿ ñíhú iní-yu te ñá túú ñuhu iní-yu tnúhu sá ní xíndedóho-yu-áⁿ nàcuáa cada váha-yu cundecú-yu.

23 Dico triú sá ní ngava núú ndécú ñuhu cocoⁿ-áⁿ, xíãⁿ cúú-xí dàtná ñáyiú ní xíndedóho tnúhu Yá Ndióxi te quidé-yu nàcuáa càháⁿ tnúhu-gá. Te cada iní-ndó sá ñáyiú-áⁿ cúú-yu dàtná triú sá ní nguíhi yoco-xi óco úxí triú-xi, ndíhi triú sá ní nguíhi yoco-xi únidico triú-xi, ndíhi triú sá ní nguíhi yoco-xi ìⁿ ciendú triú-xi. Ducaⁿ sǎtnahá-xi cùu-yu chí ío váha quidé-yu —càchí-gá xǎhaⁿ-gǎ xii-güedé.

Cuendá nchaa cùhú sǎ ña túú vǎha xǎnu xití triú

24 Te Jesús ní caní-gá ìⁿ cuendú núú ñáyiú nàcuáa tecú tnùní-yu tnúhu-gá, te xǎhaⁿ-gǎ xií-yu:

—Te vitna na cǎni-í ìⁿ cuendú núú-ndó nàcuáa tecú tnùní-ndó nàcuáa cada-xi òré ndíhu ndaha ñaha Yá Ndióxi xii ñáyiú. ìⁿ tée ío váha triú ní sacáⁿ-dé núú ñíhú-dé.

25 Dico xití níú ní sáháⁿ ìⁿ tée cùu úhú iní ñáhá xii-dé, te ní dǎngoyo-dé ndíquíⁿ yúcu sǎ ña túú vǎha núú ní sacáⁿ-dé triú-áⁿ.

26 Te òré vitna váha váha ní ngúíta-xi quèene yoco nchaa triú-áⁿ, te ní xínu coyo nchaa yúcu sǎ ña túú vǎha-áⁿ.

27 Te cue tée xínu cuechi núú tée ní sacáⁿ triú-áⁿ ní xítnúhu ñaha-güedé xii-dé sá dúcáⁿ ní xínu cùhú sǎ ña túú vǎha-áⁿ núú triú-dé, te xǎhaⁿ-güedé: "Pátróoⁿ, çnása ní cuu núu ní xínu cùhú sǎ ña túú vǎha núú triú-n, te ío váha cǎa triú ní sacáⁿ-n ní cùu?", cǎchí-güedé xǎhaⁿ-güedé.

28 Te tée cùu patróoⁿ-güedé-áⁿ ní xǎhaⁿ-dǎ xii-güedé: "Ìⁿ tée cùu úhú iní ñáhá nàhi xii-í ducaⁿ ní quide-dé ní sáháⁿ-dé ní dǎngoyo-dé ndíquíⁿ cùhú sǎ ña túú vǎha-áⁿ núú triú-í núu ducaⁿ ní xínu coyo-xi", càchí-dé xǎhaⁿ-dǎ xii-güedé. Te cue tée xínu cuechi núú-dé ní xǎhaⁿ-güedé xii-dé: "Te núu cuíní-n te quíhíⁿ-ndí tnuhu-ndí nchaa cùhú sǎ ña túú vǎha ní xínu núú triú-n", cǎchí-güedé xǎhaⁿ-güedé xii-dé.

29 Te tée cùu xítóhó triú-áⁿ ní xǎhaⁿ-dǎ xii cue tée xínu cuechi núú-dé-áⁿ: "Ñáhá, vá quíhíⁿ-ndó tnúhu-ndo, chí òré tnuhu-ndo te tnáhá-ni triú quene chí cǎa vîhi cùhú-ãⁿ.

30 Vǎha-gá chí dàñá ná cuíhnu nahi ndéé ná cùu triú, te dǎtnùní nducu-í cue tée quíhíⁿ-güedé tnuhu-güedé nchaa cùhú sǎ ña túú vǎha-áⁿ, te dacùtu

nuhni-güedé te cahmi-güedé, te dātnūni nàquehndé-güedé triú nacani-güedé te nataxúha-güedé xití yacá-í", cāchí-dé xāhaⁿ-dē xii-güedé —duha ní cani Jèsús cuèndú núŷ-yu.

Cuèndá ndíquíⁿ yutnu nàni mostázá

(Mr. 4:30-32; Lc. 13:18-19)

³¹ Te Jèsús ní cani tucu-gá ingá cuèndú núú ñāyiu nācuáa tecú tñūni-yu tñūhu-gá, te xāhaⁿ-gā xii-yu:

—Na cāni-í ^ñ cuèndú núú-ndó nācuáa tecú tñūni-ndó nācuáa cada-xi òré ndíhu ndaha ñaha Yá Ndióxi xii ñāyiu. ^ñ tée ní queheⁿ-dé ndíquíⁿ yutnu nàni mostázá te ñehe-dé cuáháⁿ ní sacáⁿ-dé núú ñūhú-dē.

³² Te ndíquíⁿ yutnu-ánⁿ ò chāhu, dico òré ná xīnu-xi te sāhnu-gá-xi dācūúxi nchāa cūhú, te cue quití ndāva núú tàchí cādūha-güedi tacá-güedi núú dité-xi —cāchí-gá xāhaⁿ-gā xii-yu.

Nācuáa quide levadurá

(Lc. 13:20-21)

³³ Te Jèsús ní xāhaⁿ tūcu-gá xii ñāyiu:

—Te na cāchí tñūhu tucu-í xii-ndo nācuáa cada-xi òré ndíhu ndaha ñaha Yá Ndióxi xii ñāyiu. ^ñ ñādihí ní chíhi-aⁿ levadurá úní arróbá yuchi triú, te levadurá-ánⁿ ñ quide-xi ní ndaa nihí yusaⁿ-ánⁿ —cāchí-gá xāhaⁿ-gā xii-yu.

Mee-ni cuèndú ní cani Jèsús núú ñāyiu

(Mr. 4:33-34)

³⁴ Te mee-ni cuèndú ní cani Jèsús núú ñāyiu ndi tnahá òré ní dánèhé ñáhá-gā xii-yu tñūhu-gá.

³⁵ Te ducaⁿ ñ quide-gá chí ní quee ndáá-xi nācuáa ní chídó tñūni ^ñ tée ní xóo cáháⁿ tñūhu Yá Ndióxi ndéé sanaha núú tūtú-gá núú cāchí-xi:

Mee-ni cuèndú cani-í núú ñāyiu òré danèhé-í-yu tñūhu-í cuèndá tecú tñūni-yu, te nchaa tñūhu sá vātá yōo-gá cundedóho danèhé-í-yu, te nchaa tñūhu-ánⁿ ndúú yūhu-xi ndéé cūtnáhá ní ngáva ñuyú.

Duha ní chídó tñūni tée-ánⁿ núú tūtú-gá.

Jèsús cāháⁿ-gá nācuáa quèe-xi cuendá cūhú sã ñà túú vāha cāa xití triú

³⁶ Te Jèsús ní dāndacá-gā ñāyiu te cuánuhú-gá vehe, te cue tée xica cuu ndihi-gá ní xāhaⁿ-güedē xii-gá:

—Cāchí tñūhu xii-ndí nása quèe-xi cuendá cūhú sã ñà túú vāha cāa xití triú —cāchí-güedē xāhaⁿ-güedē xii-gá.

³⁷ Te Jèsús ní xāhaⁿ-gā xii-güedē:

—Tée cāchí-í ní sacáⁿ triú cāvāha-ánⁿ cúú yūhú Tée cūu ñāni tñáhá-ndó nchāa-ndo.

³⁸ Te nchaa núú ñ sacáⁿ tée-ánⁿ triú cúú-xí ñuyú. Te tatá vāha-ánⁿ cúú-xí cue ñāyiu yindaha ñaha Yá Ndióxi. Te nchaa cūhú sã ñà túú vāha-ánⁿ cúú-xí ñāyiu yindaha ñaha sácūlná.

³⁹ Te tée ní dāngoyo ndíquíⁿ cūhú sã ñà túú vāha núú triú-ánⁿ cúú-dē mee sácūlná. Te nduu nātehndé-nā triú-ánⁿ cúú-xí nduu ndihí nihnu-nā nchaa sá ò ñuyú-a. Te nchaa ñāyiu nāquehndé triú-ánⁿ cúú-yu mee-ni cue espíritú xínú cūechi núú Yá Ndióxi.

⁴⁰ Te dātná cada cue tée quíhíⁿ tñūhu nchaa cūhú sã ñà túú vāha-ánⁿ dacūtu nuhni-güedé te cahmi-güedé, ducaⁿ sātñahá-xi yāha nchaa ñāyiu cūndihí yucu ñāvāha na sáa nduu.

41 Te yúhú Tée cùu ñaní tnáhá-ndó nchàa-ndo tendaha-í nchaa espíritú xínú cuèchi núú-í quíhíⁿ-xi nadatácá-xi nchaa ñáyiú sànu ichi cue tnaha ñáyiú-xi ichi cuèhé ichi duha, ndíhi nchaa dava-gá ñáyiú ñá túú quide váha, te nchaa ñáyiú-áⁿ xíndecú-yu nchaa núú ndécú cuè ñáyiú yíndaha-í.

42 Te cue espíritú-áⁿ daquihíⁿ-xi cue ñáyiú-áⁿ núú ñùhú núú càyú, te yàcáⁿ ío ndáhyú-yu te dicó rúhñú-ná cuu núhu-yu sá sàtú iní-yu sá ndóhó-yu.

43 Te nchaa ñáyiú quide nchaa nacúáa cuíní Tātá-yu Dútú Ndióxi, ñáyiú-áⁿ ío cunúú-yu cundecú-yu núú ndécú-gá táxi tnùní-gá, chi cuú-yu dàtná nchícanhii dayèhé-yu cundecú-yu núú ndécú-gá. Te nchaa nchóhó ñáyiú ndèdóhó nchaa tnúhu càháⁿ-í-a, te ío váha chí cuáha cuèndá —càchí-gá xáhaⁿ-gá xii-güedé.

Cuèndá ñⁿ sá ío ndèyáhu

44 Te Jèsús xáhaⁿ tucu-gá xii-güedé:

—Na càni tucu-í ingá cuèndú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndióxi xii ñáyiú. Hⁿ téé ní naníhí-dè ñⁿ sá ío ndèyáhu yíndúxi ñⁿ xichi, te ní nachíndúxi tucu-dé ñⁿ ní núú ní naníhí-dè-áⁿ, te ío ní cudíí iní-dé sá dúcáⁿ ní naníhí-dè xíáⁿ. Te ní xica-dé cuánuhú-dé te ní nadico-dé nchaa sá ndécú ndíhi-dé, te ní nacúaaⁿ-dé ñuhu núú dúcáⁿ ní naníhí-dé xíáⁿ.

Cuèndá ñⁿ sá ío ndèyáhu nàni pèrlá

45 "Te na càni tucu-í ingá cuèndú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndióxi xii ñáyiú. Hⁿ téé quide ndáhu ndúcú-dé sá nání pèrlá sá ío ndèyáhu.

46 Te ní naníhí-dè ñáyiú ndècu ndíhi ñⁿ pèrlá sá ío-gá ndèyáhu, te ní xica-dé cuánuhú-dé te ní nadico-dé nchaa sá ndécú ndíhi-dé, te ní sáháⁿ-dé ní saaⁿ-dé pèrlá sá ío-gá ndèyáhu-áⁿ.

Cuèndá ñunu tnèi-güedé chácá

47 "Te na càni tucu-í ingá cuèndú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndióxi xii ñáyiú. Cue téé tnèi chácá ní dàquèe-güedé ñunu-güedé xití ndute lámár tnèi-güedé chácá, te dàcá nuu dàcá nihnu chácá cuànguee-güedé xití ñunu-áⁿ.

48 Te òré ní cutnùní iní-güedé sá ní chítú ñunu-güedé, te ní natava-güedé ní nene yuhu lámár, te ní ngúita-güedé nácáxi-güedé nchaa chácá-áⁿ. Te nchaa chácá váha dàquèe-güedé-di xití tídihi, te nchaa chácá nèhé dāngoyo-güedé-di.

49 Te dàtná ní quide cue téé-áⁿ ducaⁿ càda cue espíritú xínú cuèchi núú Yá Ndióxi ná sàá nduu vā cúndecu-gá nchaa sá ío ñuyíú-a, chi cue espíritú-áⁿ daquèe dñⁿ-xi nchaa ñáyiú ní quide váha tnuú nchaa ñáyiú ñá túú ní quide váha.

50 Te nchaa ñáyiú ñá túú ní quide váha-áⁿ daquihíⁿ ñáhá-xí xii-yu núú ñùhú núú càyú, te yàcáⁿ ío ndáhyú-yu, te dicó rúhñú-ná cuu núhu-yu sá sàtú iní-yu cuèndá sá ndóhó-yu —càchí-gá xáhaⁿ-gá xii cue téé xica cuu ndíhi-gá.

Cuèndá cue téé ndècu ndíhi sá ní quee túu díhna ndíhi sá ní quee túu saa

51 Te Jèsús ní xicáⁿ tnúhú-gá ndúu-güedé, te xáhaⁿ-gá xii-güedé:

—¿Ní tecú tnùní-ndó nàcuáa ndúu nchaa tnúhu ní cáháⁿ-í-áⁿ? —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Ní tecú tnùní-ndí —càchí-güedé xàhaⁿ-güedé xii-gá.

⁵² Te ní xáhaⁿ tùcu Jesús xii-güedé:

—Te núu ìⁿ tée dàcuaha ñaha xii ñáiyu nchaa tnúhu ní chídó tnùní ndíi Moisés ná cùtnuní iní-dé nàcuáa quide Yá Ndiòxí ndíhu ndaha-gá ñáiyu, te tée-áⁿ cúú-dé dàtná ìⁿ tée cùu xitohó vehe. Te tée cùu xitohó vehe-áⁿ ní queñuhu-dé nchaa sá ní quee túu díhna ndècu ndíhi-dé, ndíhi nchaa sá ní quee túu saa. Te ducaⁿ sátnahá-xi cùu tée-áⁿ te núu na cùtnuní iní-dé nàcuáa quide Yá Ndiòxí ndíhu ndaha-gá ñáiyu —càchí-gá xáhaⁿ-gá xii-güedé.

Jèsús ndécú-gá ñúú núú ní sahnú-gá

(Mr. 6:1-6; Lc. 4:16-30)

⁵³ Te sáta ní yáha ducaⁿ ní caní Jèsús cuèndú núú-güedé, te ní xica-gá cuánuhú-gá.

⁵⁴ Te ní ndexio-gá ñúú núú cúú ñùú-gá, te cuánguihu-gá xití veñúhu càa ñúú-áⁿ te ní ngüíta-gá dánèhé-gá ñáiyu. Te nchaa ñáiyu ndédóho nchaa tnúhu càháⁿ-gá xicuñúhu-yu, te xitnàhá-yu:

—¿Nása ní cuu núu ío váha cùtnuní iní tée-a nàcuáa cunduu tnúhu cáháⁿ-dé, te quide-dé nchaa sá vǎ yǒo tnàhí ndàcu cada-i?

⁵⁵ Te dicó déhe tée cùu carpinterú ndíhi tá Màriá cúú-dé, te ñaní-dé cúú tǎ Jàcobó, ndíhi tǎ Chéé, ndíhi tǎ Xímú, ndíhi tǎ Júdás.

⁵⁶ Te cue cúha-dé ndécú ndíhi ñahá-yu xii-o ñùú-a. ¿Te nása ní quide-dé nǔu ndéé dàcáⁿ ío váha cùtnuní iní-dé nàcuáa cunduu tnúhu cáháⁿ-dé-i? —càchí-yu xitnàhá-yu.

⁵⁷ Te ñá túú ní cuíní-yu cáháⁿ ndíhi váha-yu Jèsús, dico mee-gǎ ní xáhaⁿ-gǎ xii-yu:

—Te núu ìⁿ tée càháⁿ tnúhu Yá Ndiòxí ná nàsáá-dé ñúú-dé, te nchaa ñáiyu ñúú-dé-áⁿ ndíhi nchaa ñáiyu cùu ndimee-dé ñá túú nèhé-yu sá yíñúhu núú-dé, dico cue ñáiyu nchaa dava-gá ñúú chí nèhé-yu sá yíñúhu núú-dé —càchí-gá xáhaⁿ-gǎ xii-yu.

⁵⁸ Te ñá túú ní quide Jesús titní núú sǎ vǎ yǒo tnàhí ndàcu cada ñúú-áⁿ, chí ñá túú ní cuíní-yu quindáá iní ñahá-yu xii-gá.

14

Nàcuáa ní cuu ní xíhí tǎ Juáá tǎe dàcuandute ñaha xii ñáiyu

(Mr. 6:14-29; Lc. 9:7-9)

¹ Te ñu-ni dàvá-áⁿ ní níhí tǎ Hèrodés tnúhu nchaa nàcuáa quide Jesús, te tǎ Hèrodés-áⁿ cúú-dé tǎe tàxi tnuní distritú Galiléa.

² Te ní xáhaⁿ-dǎ xii nchaa cue tǎe ndècu ndíhi-dé:

—Tǎe dii cuèndú-xi níhí-ó-áⁿ cùu-dé tǎ Juáá tǎe dàcuandute ñaha xii ñáiyu, tǎe ní xíhí ní cùu te ní ndoto-dé nǔu dàcáⁿ ndácú-dǎ quide-dǎ nchaa sá vǎ yǒo tnàhí ndàcu cada —cachí-dé xáhaⁿ-dǎ xii-güedé.

³ Te ducaⁿ ní cáháⁿ tǎ Hèrodés chí mee-dǎ ní táuchíúⁿ-dǎ ní tnǎ ñaha-güedé xii tǎ Juáá, te ní dácútú ñaha-güedé xii-dé, te ní chíhi ñaha-güedé vecaá. Te ducaⁿ ní quide tǎ Hèrodés-áⁿ sǎ cuèndá ñaha nàni Herodiás, ñaha ní cándeca ñaní-dé tǎ Lìpé, te ní naqueheⁿ ñaha-dǎ xii-aⁿ ndèca ñaha-dé.

⁴ Te tǎ Juáá ní xáhaⁿ-dǎ xii tǎ Hèrodés:

—Ñá túú ní quide váha-n dùha ní naqueheⁿ-n ñaha ní cándeca ñaní-n —duha ní xáhaⁿ tǎ Juáá xii tǎ Hèrodés.

5 Te sá dúcáⁿ ní xáhaⁿ tẽ Juàá-án xii té Hèrodés, te ní cuini té Hèrodés-án cahni-dé té Juàá-án, dico ñá túú ní cùyi-dé chi ní yùhú-dé núú cuè ñáyiu, chi nchaá-yu ní cutnùni iní-yu sá tẽ Juàá cúú-dẽ ìⁿ tée càháⁿ tnúhu Yá Ndiõxi.

6 Te ìⁿ nduu ní quide té Hèrodés vico vehe-dé ní quide càhnu-dé nduu ní cacu-dé. Te ndècu ìⁿ déhe yoco ñaha nani Herodiás-án, te xíchí-án ní quihu-xi xití vehe núú cúú vico-án ní xita saha-xi. Te núcóo té Hèrodés ndihi cue tée ní càhá-dé ndéhe-güedẽ, te io ní cudíi iní-dé nàcuáa ní xita xíchí-án.

7 Te té Hèrodés-án ní cacunehe-dé ndéé Yá Ndiõxi nàcuáa cutnùni iní xíchí-án sá ndáa cuañaha-dẽ núu ná cúú sá ná càcáⁿ-xi núú-dẽ.

8 Te xíchí-án ní dácáhú iní ñáhá náná-xi xii-xi ná cúú sá càcáⁿ-xi núú tẽ Hèrodés, núu xiáⁿ ní xáhaⁿ-xi xii-dé:

—Cuini-í quehndé-n díquí tẽ Juàá tée dàcuandute ñaha xii ñáyiu te taxi-n, dico na cùhuⁿ ìⁿ xití cóhó taxi-n —càchí-xi xáhaⁿ-xi xii-dé.

9 Te sá dúcáⁿ ní xáhaⁿ-xi, te ní cundiýi té Hèrodés, dico ñá túú ní ñihí-dẽ nása cada-dé, chi ndedóho ñáyiu òrè ní cacunehe-dé Yá Ndiõxi sá ndáa cuañaha-dẽ ìⁿ sá ná càcáⁿ-xi núú-dẽ. Te ní quide-dé nàcuáa ní xáhaⁿ-xi.

10 Chi ní táuchíúⁿ-dẽ ní sáháⁿ cue tée ní xehndé-güedé díquí tẽ Juàá òrè yíhí-dẽ vecaá.

11 Te ní chihí-güedé díquí-dẽ ìⁿ xití cóhó te nèhe-güedé cuánuhú ní sáñaha-güedé xii xíchí-án, te xíchí-án ní nacuañaha-xi xii náná-xi.

12 Te cue tée xica cuu ndihi té Juàá-án ní sáháⁿ-güedé ní naqueheⁿ-güedé yiqui cùñú-dé ní chindúxi-güedé, te dàtnùni ní sáháⁿ-güedé ní xáhaⁿ-güedé xii Jèsús nàcuáa ní cuu.

*Jèsús dácàxi-gá úhúⁿ mĩl cue tée te ðìⁿ ñáyiu ðìhí ndihi landú
(Mr. 6:30-44; Lc. 9:10-17; Jn. 6:1-14)*

13 Te Jèsús ní ñihí-gá tnúhu nàcuáa ní cuu ní xihí té Juàá. Te sáta xiáⁿ te cuánguee-gá ìⁿ bàrcú cuáháⁿ-gá ìⁿ xichi núú ñá túú ñáyiu ndècu, dico nchaa ñáyiu xĩndecu nchaa ñuú cáa yàtni xiáⁿ ní ñihí-yu tnúhu sá cuáháⁿ-gá, te ní queé-yu ñuú-yu xica sahá-yu cuáháⁿ núú quidè-yu cuendá quexio Jèsús.

14 Te òrè ní quexio Jèsús núú cuáháⁿ-gá, te ní quene-gá bàrcú, te ní xiní-gá cuéhé víhí ñáyiu xixúcu-yu xiáⁿ, te ní cundáhú iní ñáhá-gá xii-yu, te ní quide tátna-gá nchaa ñáyiu cùhú ndihí-yu.

15 Te sáta ní cuaa te ní sáháⁿ cue tée xica cuu ndihi Jèsús núú-gá, te xáhaⁿ-güedé xii-gá:

—Sa ní cuu dandàca-n nchaa ñáyiu-a chi sa ní cuaa, te na quihíⁿ-yu nchaa ñuú cáa yàtni iha cuaáⁿ-yu sá caxí-yu, chi núú ndécú-ó iha ñá túú tnàhí ná ió —càchí-güedé xáhaⁿ-güedé xii-gá.

16 Te Jèsús ní xáhaⁿ-gá xii-güedé:

—Ñáhá, vá dandàca-í-yu, váha-gá mee-ndo chĩ cuañaha sá ná càxi-yu —càchí-gá xáhaⁿ-gá xii-güedé.

17 Te ní xáhaⁿ-güedé xii-gá:

—Ñá túú nágá ndécú ndihi-ndí, chi úhúⁿ duha-ná pàá ndihi úú-ná chácá ndécú ndihi-ndí —càchí-güedé xáhaⁿ-güedé xii-gá.

18 Te Jèsús ní xáhaⁿ-gá xii-güedé:

—Chí cánèhe paá-án ndihi chácá-án táquixi iha —cachí-gá xáhaⁿ-gá xii-güedé.

19 Te Jèsús ní xáhaⁿ-gá xii nchaa ñáyiu sá ná ngõo-yu nchaá-yu núú itè cuíi càa xiáⁿ, te ní queheⁿ-gá ndi úhúⁿ pàá-án ndihi ndi ndúu chácá-án te ní

ndacoto-gá andiu, te ní ndacáⁿ táhú-gă núú Yă Ndiöxí, te dătnùní ní táhú cuèchi-gă pàá-áⁿ te ní sáñaha-gă xii cue téé xica cuu ndihi-gă ní dácăññu-güedé cue ñáyiu ní xexí-yu.

²⁰ Te nchaá-yu ní xexí-yu ní ndahá xití-yu. Te sátá ñí túhú cóhō-yu te ní nadatácá-güedé nchaá sá ñí quendóo, te ní chírtú úxúú tñahá tídihi mee-ni sá ñí quendóo.

²¹ Te nchaá ñáyiu ní xexi-áⁿ ñí xínu úhúⁿ mĩl mee-ni cuè téé chi mee-ni cuè téé-áⁿ ñí quiúndehu, te dñⁿ cue ñáyiu dñí ndihi cue landú.

*Jèsús xíca-gă núú ndute
(Mr. 6:45-52; Jn. 6:16-21)*

²² Te òré-ni-áⁿ ñí xáhaⁿ Jèsús xii cue téé xica cuu ndihi-gă sá quëe-güedé bàrcú téhndé-güedé ndàa ingá xio yuhu làgúná, te mee-gă quendóo-gă cada ndee ñí tñahá-gă ndihi cue ñáyiu.

²³ Te sátá ñí yáha ní quide ndee ñí tñahá-gă ndihi cue ñáyiu, te medii-gă ní xica-gă cuásaá-gă ñⁿ tĩndúú cáá yàtni xiáⁿ cuendá cáháⁿ ndihi-gă Yă Ndiöxí, te dñi-ni medii-gă ndécú xiáⁿ ñí cundiquiⁿ.

²⁴ Te bàrcú sá ñúhú cuè téé xica cuu ndihi-gă-áⁿ sa cuáháⁿ-xi ndéé cuádava xití làgúná-áⁿ, te níhi víhi quene táchí ndàa ichi cuáháⁿ-xi, te dácandau ndeé-xi ndute nchaá dñi-xi.

²⁵ Te tàcuíhndá váhi-gă tá xica Jèsús núú ndute cuáháⁿ tá cùyatni-gă bàrcú-áⁿ.

²⁶ Te cue téé xica cuu ndihi-gă ní xini ñáhá-güedé xii-gă tá xica-gă núú ndute cuáháⁿ, te ní yùhú-güedé te níhi ní cáháⁿ-güedé te xitnaha-güedé:

—jⁿ ãlmá! —càchí-güedé xitnaha-güedé.

²⁷ Te Jèsús ní cáháⁿ-gă, te xăhaⁿ-gă xii-güedé:

—Ñíí cunduu-ndo vă yùhú-ndó, chí yùhú-cú-í —càchí-gă xăhaⁿ-gă xii-güedé.

²⁸ Te té Pèlú ní xáhaⁿ-dë xii-gă:

—Mèstrú, te núú dñu-n te tauchiuⁿ sá tñahá-í ná càca-í núú ndute quixi tnahá ñáhá-í xii-n —càchí-dé xăhaⁿ-dë xii-gă.

²⁹ Te Jèsús ní xáhaⁿ-gă xii-dé:

—Taquixi —cachí-gă xăhaⁿ-gă xii-dé.

Te té Pèlú ní nuu-dé núú bàrcú, te ní ngüíta-dé tá xica-dé núú ndute cuáháⁿ cuátnahá ñáhá-dë xii-gă.

³⁰ Te ní cutnùní ñí-dé sá ïo níhi xico táchí, te ní ngüíta-dé yùhú-dé. Te òré-ni-áⁿ tá quëe naa-dé xití ndute cuáháⁿ ní cùu, te níhi ní cáháⁿ-dé xăhaⁿ-dë xii Jèsús:

—jⁿ Mèstrú, vá dáñá-n quëe naa-í xití ndute! —càchí-dé xăhaⁿ-dë xii-gă.

³¹ Te òré-ni-áⁿ ñí tñi Jèsús ndaha-dé, te ní xáhaⁿ-gă xii-dé:

—¿Ná cuendá ñá túú sàndáá ndisa ñí ñáhá-n xii-í sàni ñⁿ sani úú ñí-n-i? —càchí-gă xăhaⁿ-gă xii-dé.

³² Te òré cuánguee Jèsús ndihi té Pèlú xití bàrcú, te òré-ni-áⁿ ñí ngüíñí táchí.

³³ Te cue téé ñuhu xití bàrcú-áⁿ ñí ngüíñí xití-güedé núú-gă, te xăhaⁿ-güedé xii-gă:

—Sá ndàá sá cuítí sá díú yòhó cúú-n Dëhe Dútú Ndiöxí —càchí-güedé xăhaⁿ-güedé xii-gă.

*Jèsús quidé tãtna-gă ñáyiu cùhú ñⁿ xichi núú nání Gènesaréé
(Mr. 6:53-56)*

34 Te ní quexìo Jesús ndihi cue tée xica cuu ndihi-gá ndàa ingá xio yuhu làgúná, te núú ní quexìo-gá ndihi-güedé-án nání-xí Gènesarét.

35 Te nchaa ñáyiú xĩndecu xiáⁿ ní cutnùnì iní-yu sá díú-gã ní quexìo, te ní dátécú tnúhu-yu nchaa dava-gá ñáyiú xĩndecu yatni xiáⁿ sá ní quexìo-gá. Te ndècá-yu nchaa ñáyiú cùhú ndécú ndìhí-yu cuáháⁿ núú ndécú Jèsús.

36 Te nchaa ñáyiú cùhú-án ní ngüita-yu càháⁿ ndàhú-yu núú Jèsús sá ná dàña-gá tnándeé-yu cuèdicó luha yuhu dõó-gã cuèndá ndúha-yu, te cue ñáyiú cùhú, ñáyiú ní tnándeé yuhu dõó-gã ní ndúha-yu.

15

Cuèndá nchaa sá quidé-xí ngündecu cuéchi ñáyiú (Mr: 7:1-23)

1 Te sátá dúcáⁿ te ìⁿ úú cue tée cùu fariséú ní quee-güedé ñúú Jerusalén, ndihi cue tée dàcuaha ñaha xii ñáyiú nchaa tnúhu ní chídó tnùnì ndíi Moisés ní quexìo-güedé núú ndécú Jèsús, te xãhaⁿ-güedé xii-gá:

2 —¿Ná cuèndá cue tée xica cuu ndihi-n ñá túú nàquete-güedé ndaha-güedé òrè caxi-güedé nàcuáa ní cachí cue ñani tnáhá-ó ní xĩndecu ndéé sanaha-i? — càchí-güedé xãhaⁿ-güedé xii-gá.

3 Te Jèsús ní xáhaⁿ-gã xii-güedé:

—Te nchòhó tucu, ¿ná cuèndá ñá túú quide-ndo nacuáa ní cachí Yã Ndiõxí cada-ndo, núú da nàcuáa ta quide cue tée ñuyíú-a quide-ndo-i?

4 Te Yã Ndiõxí càchí-gá núú tùtú-gá: “Canehe-ndo sá yĩñuhu núú tãtã-ndó ndihi núú náná-ndó”, càchí-gá. Te càchí tucu-gá ingá xichi núú tùtú-gá: “Nchaa ñáyiú na càháⁿ úhú tãtã-xi àdi náná-xi te cahni ñaha-güedé xii-yu”, duha càchí-gá núú tùtú-gá.

5 Dico nchòhó càchí-ndó sã cuè ñáyiú chi cuu cùñahá-yu xii tãtã-yu àdi náná-yu: “Vá cúú chĩndee ñaha-ndí xii-n, chi sá táxí-ndí xii-n ní cùu, xiãⁿ ní nduu cuèndá Yã Ndiõxí”, cuu duha cùñaha ñáyiú xii tãtã-yu àdi náná-yu càchí-ndó.

6 Te càchí-ndó sã cuè ñáyiú ducaⁿ na cùñaha xii tãtã-xi àdi náná-xi te ñá túú-gã tàù-yu chĩndéé-yu ní tãtã-yu ní nãñá-yu. Te ducaⁿ quide-ndo chi ní dáquéé tĩhú-ndó nàcuáa ní cachí Yã Ndiõxí cada-ndo, te mee-ni nàcuáa ta quide cue tée ñuyíú-a véxi nchícúⁿ nihnu-ndo quide-ndo.

7 Te nchòhó cúú-ndó ñáyiú ío dándahú mée-xí, chi càchí-ndó sã quidé ndãá-ndó te ñá ndàa sá quidé ndãá-ndó! Te ní quee ndãá-xi nàcuáa ní chídó tnùnì ndíi Chàia tée ní xóo càháⁿ tnúhu Yã Ndiõxí ndéé sanaha núú tùtú-gá núú càháⁿ-xi nàcuáa ní càháⁿ-gã cuèndá-ndó, te duha ní cachí-gá:

8 Ñáyiú-a càchí-yu sá ío càhmu cuu-í dico dicó-ni yuhu càháⁿ-yu, chi duuⁿ duuⁿ ñá túú ñuhu iní ñáhã-yu xii-í.

9 Te àúⁿ nã cuu chĩñuhu ñahá-yu xii-í chi ñá túú vèdana ndéé nándĩhi-xi, chi cue ñáyiú-a dàcuahá-yu cue tnàha ñáyiú-yu nàcuáa cundecú-yu, dico mee-ni tnúhu sá ní cahu iní cue ñáyiú ñuyíú-a càháⁿ-yu.

Duha ní chídó tnùnì ndíi Chàia núú tùtú Yã Ndiõxí nàcuáa ní càháⁿ-gã cuèndá-ndó —càchí-gã xãhaⁿ-gã xii-güedé.

10 Te ní xáhaⁿ-gã xii cue ñáyiú:

—Chí táquixi ndehe iha, te cundedóho váha-ndo tnúhu na càháⁿ-í, te ío váha cuáhã-ndo cuèndá.

11 Nchaa sá xéxí-ndó chi ñá túú nă quidé-xí iní-ndó, dico nchaa sá cuèhé sá dúhá sàni iní-ndó càháⁿ-ndó nchaa xíáⁿ quidé-xí ndècu cuéchi-ndo —càchí-gá xăhaⁿ-gă xii-yu.

12 Te cue tée xica cuu ndihi-gá ní sáháⁿ-güedé ndéé núú-gă, te xăhaⁿ-güedé xii-gá:

—Véxi-ndí càchí tnúhu-ndí xii-n sá cuè tée cùu fariséú ñá túú cùu váha iní-güedé cuendá tnúhu ní càháⁿ-n —càchí-güedé xăhaⁿ-güedé xii-gá.

13 Te ní xăhaⁿ-gă xii-güedé:

—Nchaa ñáyiú ñá túú cùu cuendá Tătà-í Dútú Ndióxi cuíta nihnú-yu, chi ñáyiú-án cùu-yu dàtná nchaa cùhú să ñá túú nàndíhi te tnúhu ñáyiú.

14 Te vá cádá cuendá-ndó nàcuáa càháⁿ cue tée-án, chi cùu-güedé dàtná cue ñáyiú cuàá sácúita nehe tnàha. Te nchòhó xiní-ndó sá nùu ìⁿ ñáyiú cuàá ná cuítá nêhe tucú-yu ingá ñáyiú cuàá, te ndí ndùu-yu quée-yu déhvá —càchí-gá xăhaⁿ-gă xii-güedé.

15 Te té Pèlú ní xăhaⁿ-dë xii-gá:

—Cachí tnúhu xii-ndí nàcuáa quèe-xi tnúhu ní càháⁿ-n-ăⁿ —càchí-dé xăhaⁿ-dë xii-gá.

16 Te Jèsús ní xăhaⁿ-gă:

—¿Náa tnàhá nchòhó ñá túú ní tècú tnùní-ndó nàcuáa ndùu tnúhu ní càháⁿ-í núú ñáyiú-ăⁿ ñă?

17 Nchaa sá xéxí-yu cuánguee-xi xití-yu, te dàtnùní náyăha ñaha-xi xii-yu.

18 Dico nchaa tnúhu cuèhé tnúhu duha càháⁿ-yu xíáⁿ véxi quene-xi iní-yu, te ñu nchaa xíáⁿ quidé-xí ndècu cuéchi-yu.

19 Te iní-yu-án cácu nihnu nchaa sá cuèhé sá dúhá, chi sàni cuèhé sání dúha iní-yu, te sàhni-yu tnàha ñáyiú-yu, te cue tée càháⁿ ndihi-güedé ñáyiú ñíhi te ñá díú ñàdihí-güedé cùu-yu. Te ñu-ni ducaⁿ quide cue ñáyiú ñíhi càháⁿ ndihí-yu cue tée te ñá díú yíⁿ-yu cùu-güedé, te cuèi tée te cuèi ñadihí mee-ni ìchi díí iní cúdíⁿ iní-yu cundecú-yu, te dùhu ndachiuⁿ tnahá-yu, te dàcuandehndé-yu, te càháⁿ cuèhé-yu cuendá tnàha ñáyiú-yu.

20 Te nchaa xíáⁿ quidé-xí ndècu cuéchi-yu, dico ñá díú sá ñá túú ndàhá-yu dàtná ní cachí cue tée ndéé sanaha, chi xíáⁿ ñá túú quide-xi cuendá ngúndecu cuéchi-yu —càchí-gá xăhaⁿ-gă xii-güedé.

Íⁿ ñadihí ñaha cùu ñani tnàhá ñáyiú canànea ní sándáá iní-aⁿ Jèsús (Mr. 7:24-30)

21 Te Jèsús ní xica-gá cuáháⁿ-gá ní sáá-gá yucu cue tée ñuú Tírú, ndihi yucu cue tée ñuú Sldón.

22 Te ìⁿ ñadihí ñaha cùu ñani tnàhá ñáyiú canànea ndécú yàtni-aⁿ xíáⁿ, te níhi ta càháⁿ-aⁿ ní quexio núú ndécú Jèsús, te xăhaⁿ-aⁿ xii-gá:

—¡Mèstrú, ñani tnàhá ndíi Dàví, cundàhú iní ñáhá xii-í cada tátna-n dèhe yoco-í! Chi yíhi ñaha espíritú cundíhi yucu ñávăha xii-xi te ío dândoho ñaha-xi —cachí-aⁿ xăhaⁿ xii-gá.

23 Dico Jèsús ñá túú tnàhi ní căháⁿ-gă, te cue tée xica cuu ndihi-gá ní sáháⁿ-güedé núú-gă, te xăhaⁿ-güedé xii-gá:

—Cúñaha xii ñaha-áⁿ ná nùhú-aⁿ, chi ío níhi càháⁿ-aⁿ nchícúⁿ ñáhá-áⁿ xii-o —cachí-güedé xăhaⁿ-güedé xii-gá.

24 Te Jèsús ní xăhaⁿ-gă xii-güedé:

—Yá Ndiõxí ní tendaha ñaha-gá xii-í véxi-í mee-ni ñùú núú xĩndecu cue ñáyiu isràél, chi ñáyiu-án cùu-yu dàtná cue mbéé cue quitì ní xíta, chi ta xíta nihnú-yu cuáháⁿ —càchí-gá xáhaⁿ-gá xii-güedé.

25 Te ñadhí-án ní sáháⁿ-aⁿ ndéé núú Jèsús ní ngüñí xítí-án, te xáhaⁿ-aⁿ xii-gá: —¡Mèstrú, chindee ñaha xii-í! —càchí-aⁿ xáhaⁿ-aⁿ xii-gá.

26 Te Jèsús ní xáhaⁿ-gá xii-aⁿ:

—Vá cúu chindee-í cue ñáyiu ñá túú cùu ñáyiu isràél, chi ñⁿ-ni cùu-xi núu na quèheⁿ-o paá cúu cuendá cue landú te cuáha-o iná caxi-di —càchí-gá xáhaⁿ-gá xii-aⁿ.

27 Dico ñaha-án ní xáhaⁿ-aⁿ xii-gá:

—Ndáá càháⁿ-n, dico cue iná chi nàdatacá-güedi sá ngóyó yùhu cóhó xĩtohó-güedi —càchí-aⁿ xáhaⁿ-aⁿ xii-gá.

28 Te Jèsús ní xáhaⁿ-gá xii-aⁿ:

—¡Yòhó ñaha cùhú déhe-xi, ío váha sàndáá iní ñáhá-n xii-í! Te na càda-í nàcuáa cuiñí-n —càchí-gá xáhaⁿ-gá xii-aⁿ.

Te òré-ni-án ní ndúha déhe-aⁿ.

Jèsús quidé tãtna-gá vãi ñáyiu cùhú

29 Te sátá dúcáⁿ ní cuu te Jèsús ní xica-gá cuáháⁿ-gá ní yáha-gá yuhu làgúná distrítu Galiléa, te cuásaá-gá ñⁿ tindúú te xíaⁿ ní ngóo-gá.

30 Te xíaⁿ núcõo-gá ní quexìo cuéhé víhí ñáyiu, te ndècá-yu ñáyiu yacua, ndihí ñáyiu ní yíchí ñⁿ xio ndaha-xi, ndihí ñáyiu cuáá, ndihí ñáyiu ñihí, te vãi dava-gá cue ñáyiu cùhú tnàhá dava-gá núú cuéhé ndécá-yu ní quexìo núú ndécú-gá. Te ní taxi ndecu ñáhá-yu núú Jèsús te ní quide tátna ñaha-gá xii-yu te ní ndúha-yu.

31 Te nchaá ñáyiu xĩndecu-án ío ní cuñúhu-yu sá dúcáⁿ ní xini-yu ní cuu ní nacáháⁿ nchaá ñáyiu ñihí, ndihí cuendá sá ní ndúha nchaá cue ñáyiu yacua, ndihí cuendá sá ní ndúha cue ñáyiu ní yíchí ñⁿ xio ndaha-xi, ndihí cuendá sá ní ndúha núú cuè ñáyiu cuáá. Te nchaá-yu ní cachí-yu sá ío càhnu cuu Yá Ndiõxí Yáa cúu Ndiõxí cue ñáyiu isràél.

Jèsús dácaxi-gá cúmí mìl cue tée te ñⁿ ñáyiu ñihí ndihí landú

(Mr. 8:1-10)

32 Te Jèsús ní cana-gá cue tée xica cuu ndihí-gá, te ní xáhaⁿ-gá xii-güedé:

—Yúhú cùndáhú iní-í nchaá ñáyiu-a, chi sa ní cuu úní nduu ndècu ndihí ñáhá-yu xii-o ìha, te ñá túú tnàhí-gá sá caxí-yu, te ñá túú cuiñí-í naten-daha-í-yu núhú tnámá-yu vehé-yu, chi ná ndèé cuáháⁿ cuneé-yu docó ichi —càchí-gá xáhaⁿ-gá xii-güedé.

33 Te ní xáhaⁿ-güedé xii-gá:

—¿Te ndèé níhí-ó sá cuáñaha-o càxi nchaá ñáyiu-a, te ío cuéhé-yu te ñá túú nã ío ìha chi cùu-xi xití yucu-í? —càchí-güedé xáhaⁿ-güedé xii-gá.

34 Te Jèsús ní xicáⁿ tnúhú-gá núú-güedé, te xáhaⁿ-gá:

—¿Ná daha-gá paá ndécú ndihí-ndo-í? —cachí-gá xáhaⁿ-gá xii-güedé.

Te ní xáhaⁿ-güedé xii-gá:

—Ndècu ndihí-ndí úsá-gá tnàhá paá ndihí ñⁿ úú-gá chácá —càchí-güedé xáhaⁿ-güedé xii-gá.

35 Te Jèsús ní xáhaⁿ-gá xii nchaá ñáyiu sá ná ngõo-yu nchaá-yu, te ní ngóo-yu.

³⁶ Te ní queheⁿ-gá ndi ùsá pàá-án ndi ìⁿ ùú-gá chácá-án, te ní ndacáⁿ táhú-gá núú Yá Ndióxi, te dátⁿndi ní táhú cuèchi-gá pàá-án ndiⁿ chácá-án te ní sáñaha-gá xii cue téé xica cuu ndiⁿ-gá ní dácãñũ-güedé nchaa ñáyiú-án.

³⁷ Te ncháá-yu ní xexí-yu ní ndahá xití-yu. Te sátá ñí túhú cóhõ-yu te ní nadatácá-güedé nchaa sá ñí quendóo, te ní chítú úsá tñahá tídihi mee-ni sã ñí quendóo-án.

³⁸ Te núú ncháá ñáyiú ní xexi te ní xínu cúmí mĩ mee-ni cuè téé chi ñiu-ni cue téé-án ñí quíúndehu, te ñiⁿ cue ñáyiú ñiⁿ ndiⁿ cue landú.

³⁹ Te sátá dúcáⁿ te Jèsús ní dándácá ñaha-gá xii-yu, te cuánguee-gá bàrcú cuáháⁿ-gá yucu cue téé ñuú Màgdalá.

16

Cue téé cùu fariséú ndiⁿ cue téé cùu saducéú xãhaⁿ-güedé xii Jèsús cada-gá ìⁿ sá vã yõ tñahí ndacu cada

(Mr. 8:11-13; Lc. 12:54-56)

¹ Te cue téé cùu fariséú ndiⁿ cue téé cùu saducéú ní sáá-güedé núú ndécú Jèsús xitó ndèé ñahá-güedé xii-gá, te xãhaⁿ-güedé sá ná cádá-gã ìⁿ sá vã yõ tñahí ndacu cada cundehe-güedé ñacuáa cutnùní iní-güedé núu ndáá sá Yá Ndióxi ní tendaha ñaha-gá xii-gá véxi-gá ñuyúú-a.

² Te Jèsús ní xãhaⁿ-gã xii-güedé:

—Nchòhó chi òré tá cuàa cuáháⁿ te ndàcoto-ndo andiⁿ, te càchí-ndó: “Ío vãha cada-xi tneé chi càa vícò tícuèhé andiⁿ”, duha càchí-ndó.

³ Te òré dátⁿndé ndácòto tucu-ndo andiⁿ, te càchí-ndó: “Vã cádá vãha-xi nduu vitna chi tícuèhé andiⁿ, te càa vícò”, duha càchí-ndó. ¡Dico nchòhó cúú-ndó ñáyiú ío dándahú méé-xí sã quidé ndáá te ñá ndáá sã quidé ndáá-ndó! Te cutnùní iní-ndó ñacuáa quide-xi andiⁿ, dico ñá túú cutnùní iní-ndó ñacuáa quèe-xi nchaa sã quidé Yá Ndióxi vitna.

⁴ Dico nchaa nchòhó ñáyiú ndècu ñuyúú vitna ío cuihna iní-ndó, te ñá túú cuiⁿ-ndó càda ndáá-ndó núú Yá Ndióxi, te cuiⁿ-ndó càda-í ìⁿ sá vã yõ tñahí ndacu cada dico ñá túú ñágá cada-í, chi ñiu-ni ñacuáa ní quide Yá Ndióxi ndí Jónás ñiu-ni ducaⁿ càda tucu-gá vitna —càchí-gá xãhaⁿ-gã xii-güedé.

Te ducaⁿ te ní xica-gá cuáháⁿ-gã ndiⁿ cue téé xica cuu ndiⁿ-gá.

Cuèndá cue téé cùu fariséú ndiⁿ cuèndá cue téé cùu saducéú

(Mr. 8:14-21)

⁵ Te òré ní quexio ndiⁿ ñaha-gá xii-güedé ndàa ingá xio yuhu làgúná, te ní ndacu iní-güedé sã ñí cunaa-güedé canehe-güedé pàá quíⁿ caxi-güedé.

⁶ Te Jèsús ní cáháⁿ-gá dóho-güedé, te xãhaⁿ-gã xii-güedé:

—Na càchí tñuhú-í xii-ndo sã ío quíⁿ iní-ndó cùndecu-ndo, te vã cádá cuèndá tñahí-ndo lèvadurá cue téé cùu fariséú ndiⁿ cue téé cùu saducéú —càchí-gá xãhaⁿ-gã xii-güedé.

⁷ Te ní ngúita-güedé xitñaha-güedé:

—Cuèndá sã ñá túú ní cãnehe-o pàá quixi xíáⁿ duha càháⁿ-gã —càchí-güedé xitñaha-güedé.

⁸ Te Jèsús ní cutnùní iní-gá ñacuáa ndùu tñuhú xitñaha-güedé, núu ní xãhaⁿ-gã xii-güedé:

—Nchòhó chi ñá túú sàndáá iní ñahá vãha-ndo xii-í núu xíáⁿ da sã ñá túú ní cãnehe-ndo pàá quixi càháⁿ-ndó.

⁹ ¿Te náa ñá ndácú ínì-ndó sã núú ùhúⁿ-ni pàá, te ní taxi-í ní dácãhũ-ndo nĩ xexi úhúⁿ mĩl cue téé, chi ñiu-ni cue téé-án nĩ quíúndehu, te sátá nĩ túhú cóhó-güedě te ní chítú tĩtĩ tídihi mee-ni sã nĩ quendóo-ãⁿ? Te ñá təcú tñuní-ndó nàcuáa quèe-xi nacuáa ní quide-í.

¹⁰ ¿Te náa ñá ndácú tucu ínì-ndó sã núú úsá-ni pàá te ní taxi-í ní dácãhũ tucu-ndo nĩ xexi cúmí mĩl cue téé, chi ñiu-ni cue téé-án nĩ quíúndehu, te sátá nĩ túhú cóhó-güedě te ní nadatácá-ndó nchàa sã nĩ quendóo, te ní chítú tĩtĩ tídihi mee-ni sã nĩ quendóo-ãⁿ?

¹¹ Dico nchòhó chi ñá túú ní quide cuendá-ndó nàcuáa ndùu tñúhu càháⁿ-í òré ní cachí-í sã vã quéhéⁿ cuendá-ndó lèvadurá cue téé cùu fariséú ndihi cue téé cùu saducéú, chi ñá díú cuendá pàá ní càháⁿ-í —càchí-gá xãhaⁿ-gã xii-güedě.

¹² Te sátá dúcáⁿ nĩ xãhaⁿ Jèsús xii cue téé xica cuu ndihi-gá, te ní tecú tñuní-güedě sã xãhaⁿ-gã xii-güedě sã vã tñúú-güedě tñúhu càháⁿ cue téé cùu fariséú ndihi cue téé cùu saducéú, te ñá díú cuendá levadurá sã quĩhu yuchi cuãha pàá ní càháⁿ-gã.

*Té Pèlú xãhaⁿ-dě xii Jèsús sã díú-gã cúú-gã Cristú
(Mr. 8:27-30; Lc. 9:18-21)*

¹³ Te Jèsús ní quexìo-gá yucu cue téé ñuú Cèsareá Filipú, te ní xícáⁿ tñúhú-gã núú cuè téé xica cuu ndihi-gá, te xãhaⁿ-gã xii-güedě:

—¿Yoo cùu yúhú Téé cùu ñaní tñáhá-ndó nchàa-ndo cachí cue ñáyiu-va? —càchí-gá xãhaⁿ-gã xii-güedě.

¹⁴ Te ní xãhaⁿ-güedě xii-gá:

—Davá-yu càchí-yu sã cúú-n ndií Juáá téé ní xóo dacuandute ñaha xii ñáyiu, te davá-yu càchí-yu sã cúú-n tè Èliás, te davá-yu càchí-yu sã cúú-n ndií Jeremiás téé ní xóo càháⁿ tñúhu Yá Ndióxi ndéé sanaha, àdi cuu-n ingá téé ní xóo càháⁿ tñúhu-gá ndéé sanaha, duha càchí-yu —càchí-güedě xãhaⁿ-güedě xii-gá.

¹⁵ Te Jèsús ní xícáⁿ tñúhú tucu-gá núú-güedě, te xãhaⁿ-gã xii-güedě:

—Te nchòhó, ¿yoo sãni ínì-ndó cùu-í-i? —càchí-gá xãhaⁿ-gã xii-güedě.

¹⁶ Te té Ximú, àdi Pelú chi úú ñiu-dé, ní xãhaⁿ-dě xii-gá:

—Yòhó cúú-n Cristú Yaá ní tendaha Yá Ndióxi véxi ñuyúú-a, te ñiu Yá Ndióxi cúú-gã Yaá ndécú nchàa nduu nchaa quíú, te yòhó cúú-n Dèhe-gá —càchí-dé xãhaⁿ-dě xii-gá.

¹⁷ Te Jèsús ní xãhaⁿ-gã xii-dé:

—Yòhó té Ximú déhe té Jonás, ío vãha táhú-n chi mee Tàtá-í Dútú Ndióxi ní dácáhú ínì ñáhá-gã xii-n nàcuáa cunduu tñúhu càháⁿ-n, te ñá díú ñⁿ ñáyiu ñuyúú-a ducaⁿ ní dàcahu ínì ñáhã-yu xii-n tñúhu-án.

¹⁸ Te yúhú xãhaⁿ-í Pèlú xii-n, te tñúhu-án quèé-xí yúú, chi quèe ndáá-xi nàcuáa nàni-n, chi cuu-n ñⁿ téé vã cání ñⁿ caní úú ínì-xi canu ichi-n cuè ñáyiu nàcuáa cundecu ndihi ñáhã-yu xii-í. Te nchaa ñáyiu cùu cuendá-í vã ndácú yucu ñávãha dacuãta nihnu ñaha-xi xii-yu.

¹⁹ Te yúhú taxi-í tñúhu ndee ínì cundecu ndihi-n cuendá cunuu-n núú cuè ñáyiu yindaha ñaha Yá Ndióxi, te nchaa sã ná càháⁿ-n sã cúú-xí sã vãha, te ñiu-ni ducaⁿ càháⁿ Yá Ndióxi, te nchaa sã ná càháⁿ-n sã ñà túú cùu-xi sã vãha, te ñiu-ni ducaⁿ càháⁿ tucu-gá, chi quide-n nacuáa cuiní-gá —càchí-gá xãhaⁿ-gã xii-dé.

20 Te sátá dúcáⁿ te ní xáhaⁿ Jèsús xii cue téé xica cuu ndihí-gá sá vǎ yǒ cǔñaha-güedé sá díú-gǎ cúú-gǎ Crístú Yáá ní tendaha Yǎ Ndiǒxí véxí ñuyíú-a.

Jèsús càháⁿ-gá sá càhni ñaha-güedé xii-gǎ
(Mr. 8:31-9:1; Lc. 9:22-27)

21 Te ndéé dàvá-áⁿ ní ngüíta Jèsús xáhaⁿ-gǎ xii cue téé xica cuu ndihí-gá:

—Dacuití sǎ quíhíⁿ-í ñúú Jerusálén, te yàcáⁿ cue téé cùu sacuéhé núú ñáyiú isràél, ndihí cue dútú cúnúu, ndihí cue téé dàcuaha ñaha xii ñáyiú nchaa tnúhu ní chídó tnúni ndíi Moisés, nchaa cue téé-áⁿ ío dandòho ñaha-güedé xii-í, te cahni ñaha-güedé, dico nduu úní sá cùú-í te ndoto-í —càchí-gǎ xáhaⁿ-gǎ xii-güedé.

22 Te té Pèlú ní cana-dé Jèsús ìⁿ xio, te ní ngüíta-dé ténàà ñahá-dé xii-gǎ, te xáhaⁿ-dè:

—Ísǎ vǎ càchí Ndiǒxí sá dúcáⁿ ndòho-n chi ñá túú tàú-n sǎ dúcáⁿ ndòho-n! —càchí-dé xáhaⁿ-dè xii-gǎ.

23 Te ndàa sátá Jèsús núníí té Pèlú òré ducaⁿ xáhaⁿ-dè xii-gǎ núú ní nchócuíhnu-gǎ, te xáhaⁿ-gǎ xii-dé:

—ÍXocuíñí yòhó yucu ñávǎha núú-í-a chi dicó quidé tnèñu-n! Chi ñá túú sàni iní-ò dàtná sání iní Yǎ Ndiǒxí chi ìⁿ-ni sàni iní-ò ndihí dava-gǎ cue ñáyiú ndècu ñuyíú-a —càchí-gǎ xáhaⁿ-gǎ xii-dé.

24 Te sátá dúcáⁿ te ní xáhaⁿ-gǎ xii nchaa cue téé xica cuu ndihí-gá:

—Nchaa ñáyiú cuíni chitnahá ñahá xii-í, te xini ñuhu-xi dañá-yu vǎ cáda-gǎ-yu sá sání iní méé-yu, te ío cada ndee iní-yu cundecu túha-yu ndohó-yu cuèndá-í, te cuèi na ndohó-yu dàtná ndoho-í.

25 Te nchaa ñáyiú cuíni sǎ ñà túú tnàhí ná yáha cundecu ñuyíú-a cuíta nihnú-yu, dico nchaa ñáyiú ñá túú tnàhí yùhú cuèi nándi sǎ ná yáha-yu cundecú-yu ñuyíú-a sǎ cuèndá-í, te ñáyiú-áⁿ nanihí tǎhú-yu.

26 Te cuèi nchaandi túhú sǎ ío ñuyíú-a na nihí ñáyiú cundecu ndihí-yu, dico núú ñúu nchaa xíǎⁿ ná càda cuíta nihnú-yu te ñá túú vèdana nàndíhi-xi sǎ dúcáⁿ ndècu ndihí-yu nchaa xíǎⁿ. Te ni ìⁿ sǎ ío ñuyíú-a vǎ chindèe ñaha-xi xí-yu cuèndá nanihí tǎhú-yu.

27 Te ndáá quée-xí tnúhu càháⁿ-í, chi na quíxi tucu yùhú Téé cùu ñaní tnáhǎ-yu nchaá-yu, te dàvá-áⁿ quíni-yu sǎ ío càhnu cuu-í dàtná càhnu cuu Tátá-í Dútú Ndiǒxí, te quíxi-í ndihí cue espíritú xínú cuèchi núú-gǎ, te dàvá-áⁿ cuǎha-í nchaa ñáyiú sǎ ndúú tǎhú-yu nàcuáa ndúu sǎ ní quidé-yu ìⁿ ìⁿ-yu.

28 Te na càchí tnúhu ndáá-í xii-ndo sǎ ío dava nchòhó ñáyiú ndècu iha vitna vǎ cùú-ni-ndo, chi cundecu-ni-ndo ndéé quíni-ndó quíxi tucu yùhú Téé cùu ñaní tnáhǎ-ndó nchàa-ndo taxi tnuní-í nchaa ñáyiú —càchí-gǎ xáhaⁿ-gǎ xii-güedé.

17

Ní nadáma dóo Jèsús ndihí núú-gǎ
(Mr. 9:2-13; Lc. 9:28-36)

1 Te núú ñúu nduu sǎ dúcáⁿ ní càháⁿ Jèsús, te ní xica-gǎ cuásaá-gǎ ìⁿ yucu dúcúⁿ, te ndèca-gǎ té Pèlú, ndihí té Jàcobó, ndihí té Juàá ñaní té Jàcobó-áⁿ cuásaá. Te úní tnàhí-ni cue téé-áⁿ ndéca-gǎ cuásaá.

2 Te yucu-áⁿ ndécú-gǎ ní nadáma núú-gǎ ndihí dóo-gǎ, te núú-gǎ súúni dàtásaⁿ-xi dàtná quidé-xí núú nchìcanchii, te dóo-gǎ súúni ní nduu cuíxíⁿ dàtná cáá ñùhú cuíxíⁿ.

3 Te òré-ni-án nǐ xiní-güedé ndíi Moisés ndíi té Èliás nútñí-güedé ndíi-gá ndátñuhu ndíi ñaha-güedé xii-gá.

4 Te té Pèlú ní xáhaⁿ-dè xii Jèsús:

—Mèstrú, ¡váha ní cuu sá ndécú-ó iha vitna! Te núu cuíní-n, te na dàcaa-ndí úní tnàhá vehe tnuvixíⁿ, te ñⁿ cuu cuendá-n, te ñⁿ cuu cuendá té Moisés, te ñⁿ cuu cuendá té Èliás —càchí-dé xáhaⁿ-dè xii-gá.

5 Te nini dùcaⁿ caháⁿ té Pèlú ní quexìo ñⁿ vícò núú ndécú-güedé ní dádáhu ñaha-xi xii-güedé te súúni chàhñchí. Te xítí vícò-áⁿ nǐ tecú ní cáháⁿ Yá Ndiòxi, te xáhaⁿ-gá xii-güedé:

—Tée-a cùu-dé Déhe-í tée ío cùu iní-í, te ío cùdíí iní-í-dé, te cundedóho-ndo ncháa tnúhu càháⁿ-dé —duha ní xáhaⁿ-gá xii-güedé.

6 Te sá dúcáⁿ nǐ cáháⁿ Yá Ndiòxi ní tecú dóho cue tée xica cuu ndíi Jesús te ío ní yùhú-güedé, te ní nguñí xítí-güedé te ní nuu núú-güedé ndàa núú ññuhú.

7 Te Jèsús cuáháⁿ-gá núú xñdecu cue tée xica cuu ndíi-gá, te ní tendaha ñaha-gá, te xáhaⁿ-gá xii-güedé:

—Chí ndácúñí, vá yùhú-ndó —càchí-gá xáhaⁿ-gá xii-güedé.

8 Te òré ní ndanehe núú-güedé, te ñá túú-gá ní xiní-güedé cue tée úú-áⁿ chi mee-nǎ Jèsús.

9 Te òré cuánuu ndíi ñaha Jèsús xii-güedé tñdúú-áⁿ, te ní xáhaⁿ-gá xii-güedé:

—Vá yòo cúñaha-ndo nǐ ñⁿ sá nǐ xiní-ndó núú nǐ sáá-ó-á, te cuu cáháⁿ-ndó dico ndéé ná yáha ndoto yùhú Tée cùu ñaní tnáhá-ndó ncháa-ndo sá cùú-í —càchí-gá xáhaⁿ-gá xii-güedé.

10 Te cue tée xica cuu ndíi-gá ní xáhaⁿ-güedé xii-gá:

—Cuiní-ndí cachí tnúhu-n ná cuendá cue tée dàcuaha ñaha xii ñáyíu nchaa tnúhu ní chídó tnùní ndíi Moisés càchí-güedé sá díhna-gá té Èliás quixi, te dàtnùní quixi Yá tendaha Yá Ndiòxi quixi ñuyúyú-a —càchí-güedé xáhaⁿ-güedé xii-gá.

11 Te Jèsús ní xáhaⁿ-gá xii-güedé:

—Ndáá sá códó núu ñⁿ tée quixi-dé te cada-dé dàtná ní quide té Èliás te tée-áⁿ cada ndáá-dé nchaa nàcuáa cùu.

12 Te na càchí tnúhu-í xii-ndo vitna sá sà ní quixi tée ní quide dàtná ní xóo cada té Èliás, te cue ñáyíu ñá túú ní cùtnuní iní-yu sá díú-dé, te ní quide ñáhá-yu xii-dé nchaa nàcuáa ní quixi iní méé-yu, te ñu-ni ducaⁿ càda ñaha tucú-yu xii yùhú Tée cùu ñaní tnáhá-yu nchaá-yu, chi dandòho ñahá-yu xii-í —càchí-gá xáhaⁿ-gá xii-güedé.

13 Te cue tée xica cuu ndíi-gá ní cutnùní iní-güedé sá cuendá ndíi Juáá tée ní xóo dacuàndute ñaha xii ñáyíu ní cáháⁿ-gá.

*Jèsús quidé tātna-gá ñⁿ tée cuechi tnàhá cuéhé xýyíhí
(Mr. 9:14-29; Lc. 9:37-43)*

14 Te Jèsús ní nasáá-gá ndíi cue tée ní sáá ndíi-gá tñdúú-áⁿ núú xñdecu vai ñáyíu, te ní quexìo ñⁿ tée núú-gá ní nguñí xítí-dé, te xáhaⁿ-dè xii-gá:

15 —Mèstrú, cundàhu iní déhe-í chi tnáhá-dé cuéhé xýyíhí, te ío dándoho ñaha-xi xii-dé, te ní cuu vai xito daquée ñaha-xi núú ññuhú xii-dé, te ní cuu vai tucu xito dangauñhnu ñaha-xi ndute xii-dé.

16 Te sa ndèca-í-dé ní quixi núú cué tée xica cuu ndíi-n dico ñá túú ní ndàcu-güedé cada tātna ñaha-güedé xii-dé —càchí-dé xáhaⁿ-dè xii-gá.

17 Te Jèsús ní xáhaⁿ-gá xii nchaa ñáyíu xñdecu-áⁿ:

—Nchaa nchòhó ñáyi ndècu ñuyíú-a, ío sàá iní-ndó chi ñá túú cuíní-ndó quíndáá iní-ndó Yá Ndiöxí, te ní cuu vai nduu quide ndee iní-í nchaa sá quidé-ndó. ¿Te ná ndéé ama vá dúcáⁿ-gã cada-ndo-i? Te chí cándèca tée cùhú-áⁿ táquixi iha —cachí-gá xáhaⁿ-gã xii-yu.

18 Te Jèsús ní tenáá-gá espíritú cúndìhi yucu ñávàha yìhi ñaha xii tée-áⁿ, te ní quee ñaha-xi xii-dé, te òré-ni-áⁿ nǐ ndúha-dé.

19 Te sáta dúcáⁿ te òré ndécú mèe Jesús ndìhi cue tée xica cuu ndìhi-gá, te ní xicáⁿ tnúhú-güedé núú-gã, te xáhaⁿ-güedé xii-gá:

—Cachí tnúhu xii-ndí ná cuèndá ñá túú ní ndàcu-ndí queñuhu-ndí espíritú cúndìhi yucu ñávàha yìhi ñaha xii tée-áⁿ —càchí-güedé xáhaⁿ-güedé xii-gá.

20 Te Jèsús ní xáhaⁿ-gã xii-güedé:

—Te ñá túú ní ndàcu-ndo, chi ñá túú sàndáá ndisa iní-ndó Yá Ndiöxí. Te na càchí tnúhu ndáá-í xii-ndo sã núu nchòhó quíndáá ndisa iní-ndó Yá Ndiöxí cuèdicó luha lí dàtná líhli ndíquín yutnu nàni mostázá, te ducaⁿ te cuu cùñaha-ndo xii ìⁿ tìndúú xocuíñí-xi núú ndécú-xí te xocuíñí-xi. Te nchaa núú sã vâha ndacu-ndo càda-ndo te núu na quíndáá iní ndisa-ndo Yá Ndiöxí.

21 Te xini ñuhu-xi sá ío cáháⁿ ndìhi-ndo-gã te ñá túú tnàhí ná caxi-ndo cáháⁿ ndìhi-ndo-gã, te ducaⁿ te ndacu-ndo queñuhu-ndo espíritú cúndìhi yucu ñávàha yìhi ñaha xii ñáyi, dàtná cúú espíritú sá yíhi ñaha xii tée-áⁿ ní cùu —cachí-gá xáhaⁿ-gã xii-güedé.

Jèsús cáháⁿ tucu-gá sá cáhni ñàha-güedé xii-gá

(Mr. 9:30-32; Lc. 9:43-45)

22 Te nini xica cuu Jesús ndìhi cue tée xica cuu ndìhi-gá distrìtú Galileá, te ní xáhaⁿ-gã xii-güedé:

—Yúhú Tée cùu ñaní tnàhá-ndó nchàa-ndo sáá ìⁿ nduu te cuáha cuèndá ñàhá-güedé xii-í núú cuè tée cùu úhú iní ñàhá,

23 te cahni ñaha-güedé xii-í dico nduu úní sá cùú-í te ndoto-í —càchí-gá xáhaⁿ-gã xii-güedé.

Te sá dúcáⁿ nǐ xáhaⁿ-gã xii-güedé, te ío ní ndíhú iní-güedé.

Díhúⁿ cuèndá veñúhu

24 Te òré ní quexlo Jesús ndìhi cue tée xica cuu ndìhi-gá ñuú Capernaúm, te cue tée quide cobrá díhúⁿ cuèndá veñúhu ní sáháⁿ-güedé ní cáháⁿ ndìhi-güedé té Pèlú, te xáhaⁿ-güedé:

—¿Chãhu mèstrú-ndó úú díhúⁿ sã nání drácmá cuèndá veñúhu ãⁿ ñàhá? —càchí-güedé xáhaⁿ-güedé xii-dé.

25 Te té Pèlú ní xáhaⁿ-dè:

—Chãhu-dé —càchí-dé xáhaⁿ-dè xii-güedé.

Te té Pèlú cuánguihu-dé xití vehe núú ndécú Jèsús, te díhna-gá ní cáháⁿ-gá, te xáhaⁿ-gã xii-dé:

—Xímú, ¿nása sàni iní-n, ná cúú ñáyi quide cobrá ñàhá cuè tée yìndaha ñáyi ndècu ñuyíú-a cuèndá nchaa sá ndúú yãhu ñuú-güedé ndìhi cuèndá nchaa díhúⁿ sã ngáútnàha, cue ñáyi ñuú-güedé ãⁿ cuè ñáyi véxi xica quide cobrá-güedé? —càchí-gá xáhaⁿ-gã xii-dé.

26 Te té Pèlú ní xáhaⁿ-dè xii-gá:

—Cue ñáyi véxi xica quide cobrá-güedé —càchí-dé xáhaⁿ-dè xii-gá.

Te Jèsús ní xáhaⁿ-gã xii-dé:

—Te núu ducaⁿ te cue ñáyi ñuú-güedé ñá túú ná chãhu-yu te núu ducaⁿ.

²⁷ Dico cuendá sá vǎ yǎo dasátú-ó ìní-xi, te cuàháⁿ làgúná te dàquée-n sǎ tñí-n chǎcá xití ndute, te chǎcá ðíhnanuu na tǎva-n te cundehe-n yùhu-ðí, chi yǎhi ìⁿ ðíhúⁿ cuixíⁿ. Te ðíhúⁿ-ǎⁿ canehe-n quǎhíⁿ cháhu-n cuendá-í ndíhi cuendá-n, chi ðíhúⁿ-ǎⁿ sa tnahá quéyǎhu cuendá-ó ndí ndúú-ó —càchí-gǎ xǎhaⁿ-gǎ xii-dé.

18

Cue téé ndúcu tñúhu núú Jèsús yoo ío-gǎ cúnúu

(Mr. 9:33-37; Lc. 9:46-48)

¹ Te sǎtá ðúcáⁿ te cue téé xǐca cuu ndíhi Jèsús ní sǎháⁿ-güedé núú-gǎ, te xǎhaⁿ-güedé xii-gǎ:

—Cachí tñúhu xii-ndí, yoo ío-gǎ cúnúu núú cuè ñáyíu yǎndaha ñaha Yá Ndióxi —càchí-güedé xǎhaⁿ-güedé xii-gǎ.

² Te Jèsús ní cana-gǎ ìⁿ té líhli te ní sanutñí ñaha-gǎ xii-dé cuádava tnuú-güedé.

³ Te xǎhaⁿ-gǎ xii-güedé:

—Na càchí tñúhu ndáá-í xii-ndo sǎ núu vá dáñá-ndó nchàa sǎ ñà túú vǎha quíde-ndo, te nduu ndàhú ìní-ndo dàtná ndàhú ìní té líhli-a, te vá ndúú tǎhú-ndó ndíhu ndaha ñàha Yá Ndióxi xii-ndo.

⁴ Te ñáyíu quíde datná quíde té líhli-a ndàhú ìní-yu, te ñà túú quíde cahnú-yu meé-yu, ñáyíu-áⁿ ío cunúú-yu núú ndécú Yá Ndióxi táxi tñúni-gǎ.

⁵ Te nchaa ñáyíu na quèheⁿ cuendá ìⁿ landú dàtná té líhli-a cuendá sǎ cúú ìní ñáhǎ-yu xii-í ñá, te cada ìní-yu sǎ yǎhú ní queheⁿ cuendá-yu —càchí-gǎ xǎhaⁿ-gǎ xii-güedé.

Quihi ìní-ó vǎ cúnðecu-o ichi cuehé ichi duha

(Mr. 9:42-48; Lc. 17:1-2)

⁶ Te Jèsús xǎhaⁿ tucu-gǎ xii-güedé:

—Te núú ìⁿ téé na dàcaháⁿ-dé cue ñáyíu sàndáá ìní ñáhǎ xii-í cada-yu nándi sǎ cuehé sǎ dúhá, te váha-gǎ sǎ ná dàcutu ndeé-güedé ìⁿ yúú yódó ðúcúⁿ-dè, te dàquée ñaha-güedé xii-dé xití ndute lámár, te ñá ðíú sǎ cúnðecu-dé ducaⁿ càda-dé.

⁷ Te ndàhú ní cuu nchaa ñáyíu xǐndecu ñuyíú-a, chi coo cue téé dacáháⁿ ñáhǎ xii-yu cada-yu nándi sǎ cuehé sǎ dúhá te dacuítí sǎ ðúcáⁿ càda-xi! ¡Dico ndàhú ní cuu cue téé ducaⁿ na dàcaháⁿ ñáhǎ xii-yu cada-yu nándi sǎ cuehé sǎ dúhá!

⁸ Te núú ìⁿ xio ndaha-ndo àdi ìⁿ xio sǎhá-ndó quíde-xi quíde-ndo nándi sǎ cuehé sǎ dúhá, te quehndé-ndó ná cuíta, chi váha-gǎ sǎ nánihí tǎhú-ndó cuèi na cuíta ìⁿ xio ndaha-ndo àdi ìⁿ xio sǎhá-ndó, te ñá ðíú sǎ quǎhíⁿ-ndó ñíhí ní ndúú-ndó núú ñùhú núú cǎyú.

⁹ Te núú ìⁿ xio tǐnù-ndo quíde-xi quíde-ndo nándi sǎ cuehé sǎ dúhá, te tava-ndo na cuíta-xi, chi váha-gǎ sǎ nánihí tǎhú-ndó cuèi na cuíta ìⁿ xio tǐnù-ndo, te ñá ðíú sǎ ndí ndúú xio núú-ndó quǎhíⁿ-ndó núú ñùhú núú cǎyú.

Cuendá ìⁿ mbéé quití ní xíta

(Lc. 15:3-7)

¹⁰ Te vá dàquée tǐhú-ndó cuè ñáyíu cùu cuendá-í cuèi cùú-yu ñáyíu ío ndàhú ìní-xi. Te na càchí tñúhu-í xii-ndo sǎ cuè espíritú xínú cuèchi núú Yá Ndióxi, cue espíritú néhé cuendá ñáhǎ xii-yu ñuyíú-a, nchaa-ni nduu nchaa-ni òré ndécú-xi núú Tǎtà-í Dútú Ndióxi Yáá ndécú àndíu.

11 Te ducaⁿ chi yúhú Tée cùu ñaní tnáhá-ndo nchàa-ndo véxi-í ñuyíú-a dàcácu nihnu-í ñáiyu núú ùhú núú ndàhú, ñáiyu ta xíta nihnu cuáháⁿ.

12 ¿Te nása sàni iní-ndo cuendá ñⁿ tée ndècu ñⁿ ciendú mbéé-xi?, chi núu na cuíta ñⁿ-di te dàndóo-dé cúmídícó sáhúⁿ cúmí-di cundecu-di ñⁿ yucu te quíhíⁿ-dé cúnúndúcú-dé quiti ní xíta-áⁿ.

13 Te núu na naníhí-dé-di, te nchòhó sa cùtnuní iní-ndo sã ïo-gá cudíⁿ iní-dé cuendá quiti ní xíta-áⁿ òré naníhí-dé-di dàcúúxí cúmídícó sáhúⁿ cúmí quiti ñá túú ní xíta-áⁿ.

14 Te ducaⁿ sãtnahá-xi quide Tátá-ó Dütú Ndiòxí Yaá ndécú àndiu, chi cuiní-gá sá vã cuíta ni ñⁿ cue ñáiyu cùu cuendá-gá.

Cada càhnu iní-ó sã quidé ñàha tnaha ñáiyu-o
(Lc. 17:3)

15 Te núu ñⁿ ñáiyu ndècu ndihi-ndo ní quidé-yu ñⁿ sã ñà túú tàú-yu cadá-yu sá cúú-xí-ndó, te cáháⁿ-ndó dôho-yu núú méé núú ñⁿ-ndó ndihí-yu cuendá sá ná ndixi cuéchi iní-yu sã ñà túú quide váha-yu. Te núu ní tníⁿ-yu tnúhu ní xáhaⁿ-ndo xíⁿ-yu, te ní ndacu-ndo ní nacanu ichi-ndó-yu.

16 Te núu ñá túú ní cuiní-yu tníⁿ-yu tnúhu xáhaⁿ-ndo xíⁿ-yu, te nducu-ndo ñⁿ àdi úú tnáhá cue tée canehe núú-güedé cuendá cundedóho-güedé nàcuáa ndùu tnúhu ndàtnúhu-ndo ndihí-yu.

17 Te tnáhá cue tée-án cáháⁿ-güedé dôho-yu, dico núu ni tnúhu càháⁿ cue tée-án ñà túú ní cuiní-yu tníⁿ-yu, te dàtúu-ndo núú dàva-gá ñáiyu ndècu ndihi-ndo ichi Xítohó Jesucristú cuendá cutnùní iní-yu nàcuáa quide ñáiyu-áⁿ. Te núu ñáiyu ndècuéchi-án ñà túú ní cuiní-yu tníⁿ-yu tnúhu sá ní xáhaⁿ dàva-gá cue ñáiyu ndècu ichi-gá, te cada-ná iní-ndó sã cúú-yu ñáiyu ñá túú ndècu ichi Yá Ndiòxí dàtná cue tée cuíhna iní-xi quide cobra ñáhá xii ñáiyu cuendá impuèstú.

18 Te na càchí tnúhu ndáá-í xii-ndo sã núu nchòhó ná càchí-ndó sã ndécú cuéchi ñáiyu, te ñⁿ-ni ducaⁿ cáháⁿ Yá Ndiòxí, àdi càchí-ndó sã ñà túú cuéchi-yu te ñⁿ-ni ducaⁿ cáháⁿ tucu-gá, te ducaⁿ chi nchòhó quidé-ndó nàcuáa càháⁿ-gá.

19 Te na càchí tnúhu-í xii-ndo sã núu úú tnáhá-ndó cùu ñⁿnuu-ndo caháⁿ ndihi-ndo Tátá-í Dütú Ndiòxí Yaá ndécú àndiu xicáⁿ-ndó núú-gá núu ná cúú sã cuiní-ndó, te taxi-gá núu ná cúú sã xicáⁿ-ndó núú-gã.

20 Te núu úú tnáhá-ndó àdi úní tnáhá-ndó ní natacá-ndó ñⁿ xichi cuendá sã ñúhú iní ñáhá-ndó xii-í, te xíáⁿ ndécú ndihí ñàha-í xii-ndo —càchí-gá xáhaⁿ-gã xii-güedé.

21 Te té Pèlú ní sáháⁿ ndehe yatni-dé núú Jèsús, te xáhaⁿ-dè xii-gá:

—Mèstrú, càchí tnúhu xii-í ná daha xito cada càhnu iní-í tnàha ñáiyu-í te núu ñⁿ sã ná càda ñáhá-yu xii-í. ¿Cuèdíco úsá xito-án? —càchí-dé xáhaⁿ-dè xii-gã.

22 Te Jèsús ní xáhaⁿ-gã xii-dé:

—Yúhú càchí-í sã ñà díú-ní úsá xito cada càhnu iní-n-yu, chi únídico úxí xito ndihí úsá ndihí úsá xito cada càhnu iní-n-yu —càchí-gã xáhaⁿ-gã xii-dé.

Cuendá tée ñá túú quide cahnu iní tnàha ñáiyu-xi

23 Te xáhaⁿ tùcu-gá xii-güedé:

—Na càni-í ñⁿ cuendú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiòxí xii ñáiyu. ñⁿ tée yindaha ñàha xii ñáiyu ní sani iní-dé sã cáda ndáá-dé ndihí cue tée xínu cuechi núú-dé cuendá nchaa sã tàú-güedé núú-dé.

24 Te òrè sa ní ngúndecu túha-dé te ní quexìo ìn tée xìnu cuechi núú-dě. Te tée-án tàú-dé cuéhé víhí díhúⁿ núú-dě, chí tàú-dé úxí mìl díhúⁿ sá nání tàlèntú.

25 Te tée xìnu cuechi-án ñà túú díhúⁿ ndécú ndìhi-dé nacháhu-dé sá tàú-dé núú patróóⁿ-dě-án, núú xíàⁿ ní táúchíúⁿ tée cùu patróóⁿ-dě-án dico ñàha-güedé xii-dé ndìhi ñadìhí-dé ndìhi cue déhe-dé ndìhi nchaa sá ndécú ndìhi-dé cuendá nchaá-yu cuú-yu ñáyiu ñà túú tñahí dàñá quee núú chíúⁿ patróóⁿ-xi, te ducaⁿ te ndéyáhu sá tàú-dé núú patróóⁿ-dě.

26 Te tée xìnu cuechi-án ní ngüíñí xítí-dě núú patróóⁿ-dě, te xáhaⁿ-dě: “Patróóⁿ, càháⁿ ndàhú-í núú-n sá ìo ndee ìo càhnu cada iní-n sá dúhá tàú-í núú-n, te ñà túú nà caní iní-n chí nacháhu-í nchaa sá tàú-í núú-n”, càchí-dé xáhaⁿ-dě xii patróóⁿ-dě.

27 Te tée cùu patróóⁿ-dě-án ní cundàhú iní ñàhá-dě xii-dé, te ní quide càhnu iní ñàhá-dě, te ní dàñá ñàha-dé cuánuhú-dé.

28 Te tée xìnu cuechi-án ní naníhí-dě ìn tée xìnu cuechi ndìhi-dé ichi cuánuhú-dé, te tée ní naníhí-dě-án tàú-dé sacú-ní díhúⁿ núú-dě chí ìn cièndú-ní díhúⁿ denàriú tàú-dé. Te ní tñi-dé tée tàú núú-dě-án dácüèhné ñàhá-dě xii-dé, te xáhaⁿ-dě: “Nacháhu sá tàú-n núú-í”, càchí-dé xáhaⁿ-dě.

29 Te tée tàú-án ní ngüíñí xítí-dě núú tée dii núú-xi tàú-dé-án, te xáhaⁿ-dě: “Càháⁿ ndàhú-í núú-n sá cadá càhnu iní ñàhá-n xii-í sá tàú-í núú-n, te nacháhu cuèé-í nchaa sá tàú-í núú-n”, càchí-dé xáhaⁿ-dě.

30 Dico tée dii núú-xi tàú-dé-án ñà túú ní cuíni-dé cada ndee ìni-dé cundetú-dé nacháhu cuèé tée-án sá tàú-dé, chí ní chíhi ñàha-dě vecaa cuendá yacáⁿ quihi-dé ndéé nacháhu-dé nchaa sá tàú-dé.

31 Te dava-gá cue tée xìnu cuechi ní xini-güedé nàcuáa ní quide tée-án, te ní cudééⁿ-güedé núú-dě, te ní sáháⁿ-güedé ní xitnúhu-güedé tée cùu patróóⁿ-güedé sá dúcáⁿ ní quide-dé.

32 Te tée cùu patróóⁿ-güedé-án ní cana-dé tée ducaⁿ ní quide-án, te ní xáhaⁿ-dě: “Yòhó cúú-n ìn tée ío cuihna ìni-xi xìnu cuechi núú-í, chí yúhú ní quide càhnu iní ñàhá-í xii-n cuendá nchaa sá tàú-n núú-í òré ní càháⁿ ndàhú-n.

33 Te tñahá yòhó tàú-n dùcaⁿ cada-n cada càhnu iní-n tée xìnu cuechi ndìhi-n núú-í cuendá nchaa sá tàú-dé núú-n dàtná ní quide ñàha-í xii-n ní quide càhnu iní-í cuendá nchaa sá tàú-n”, càchí tée cùu patróóⁿ-án xáhaⁿ-dě xii tée ducaⁿ ní quide-án.

34 Te tée cùu patróóⁿ-án ní cudééⁿ víhí-dě sá dúcáⁿ ní quide tée-án, te ní táúchíúⁿ-dě dandòho ñàha-güedé xii-dé ndéé nacháhu-dé nchaa sá tàú-dé — duha ní caní Jèsús cuèndú núú-güedé.

35 Te xáhaⁿ tùcu-gá xii-güedé:

—Dàtná ní quide tée cùu patróóⁿ-án ní dándóhó-dě tée tàú núú-dě-án ducaⁿ càda ñàha Tátà-í Dútú Ndiòxí Yaá ndécú àndiú xii-ndo, te núu vá ní yùhu ní iní-ndó càda càhnu iní-ndó sá quidé ñàha tñaha ñáyiu-ndo xii-ndo —càchí-gá xáhaⁿ-gá xii-güedé.

19

Jèsús càháⁿ-gá cuendá cue ñáyiu dàña tñaha

(Mr. 10:1-12; Lc. 16:18)

1 Te sátá ní yáha ducaⁿ ní càháⁿ Jèsús, te ní ndee-gá distritú Galiléa cuáháⁿ-gá ndàa ingá xio yúte Jòrdán yucu distritú Jùdeá.

2 Te ío cuéhé ñáyiu nchícúⁿ ñàhá xii-gá cuáháⁿ, te yacáⁿ ní quide tátna-gá nchaa ñáyiu cùhú.

³ Te ní quexio ìᵐ úú cue téé cùu fariséú núú ndécú Jèsús xító ndèè ñàhá-güedé xii-gá nūu nása cunduu tnúhu cáháⁿ-gá, te xáhaⁿ-güedé xii-gá:

—Véxi-ndí xicáⁿ tnúhú-ndí núú-n, ¿cuu dañá ìᵐ téé ñadihí-dé nūu ndédani càa ìᵐ sá ñà túú cundáá-yu-áⁿ? —càchí-güedé xáhaⁿ-güedé xii-gá.

⁴ Te Jèsús ní xáhaⁿ-gá xii-güedé:

—Te nchòhó, ¿náá ñá túú dàcuaha-ndo núú tùtú Yá Ndiòxí, te ñiú núú tùtú-gá cáháⁿ-xi sá cùtnàhá ní cadúha-gá ñáyiu, te téé ñadihí ní cadúha-gá-áⁿ?

⁵ Te ñuha càchí tucu-xi núú tùtú Yá Ndiòxí nàcuáa ní cáháⁿ-gá: “Cue téé na ñihí ñadihí-xi te ñiᵐ-ná cada-güedé tátá-güedé ndihí náná-güedé, chi ñadihí-ná-güedé cuu cuu ndihí-güedé, te cada iní-ndó sá ñiᵐ-ná yiqui cùñú cuú-yu cundecú-yu”, ñuha càchí Yá Ndiòxí núú tùtú-gá.

⁶ Te xiáⁿ nūu cada iní-ndó sá cuè ñáyiu úú-áⁿ ìᵐ-ná yiqui cùñú cúú-yu, te ñá túú-gá ndí ñiᵐ ndí ñiᵐ yiqui cùñú cúú-yu. Núu xiáⁿ ñá túú nduu váha-xi dañá cuè téé ñadihí-güedé, chi mee Yá Ndiòxí ní cachí-gá sá cúú úú-yu cundecú-yu —càchí Jèsús xáhaⁿ-gá xii-güedé.

⁷ Te ní xáhaⁿ-güedé xii Jèsús:

—Te núu ducaⁿ, ¿te ná cuendá ndí Moisés ní cachí ndí sá nūu ìᵐ téé cuíní-dé dañá-dé ñadihí-dé, te cuu cadúha-dé ìᵐ tutú núú cáháⁿ-xi sá ñí dañá-dé ñadihí-dé, te ducaⁿ te cuu dañá ñaha-dé ní cachí ndí vāⁿ? —càchí-güedé xáhaⁿ-güedé xii-gá.

⁸ Te Jèsús ní xáhaⁿ-gá xii-güedé:

—Te ducaⁿ ñí cachí ndí Moisés sá cúú dàña-ndo ñadihí-ndó, chi nchòhó ío sáá iní-ndó, dico ndéé díhna chi ní tecú tnúhu nchaa cue téé sá vā dañá-güedé ñadihí-güedé.

⁹ Dico yúhú càchí tnúhu-í xii-ndo sá nūu ìᵐ téé na dàña-dé ñadihí-dé te naqueheⁿ-dé ingá ñadihí te ío nèhé quidé-dé, te núu ñá díú cuendá sá cáháⁿ ndihí-aⁿ ingá téé ducaⁿ na dañá ñaha-dé. Te sá dúcáⁿ cuendá-ni na dañá ìᵐ téé ñadihí-dé, te ìᵐ-ni cuèchi cùu-xi ndihí cuèchi quide téé ndéca ñadihí te cáháⁿ ndihí-dé ingá ñadihí —càchí-gá xáhaⁿ-gá xii-güedé.

¹⁰ Te cue téé xica cuu ndihí-gá ní xáhaⁿ-güedé xii-gá:

—Te núu ducaⁿ cùu cuendá cue téé ndihí ñadihí-güedé, te váha-gá sá vā cándeca cue téé ñadihí —càchí-güedé xáhaⁿ-güedé xii-gá.

¹¹ Te Jèsús ní xáhaⁿ-gá xii-güedé:

—Ñá ncháá ñáyiu ducaⁿ nduu táhú-yu cundecú-yu, chi mee-ni ñáyiu ní cachí Yá Ndiòxí sá dúcáⁿ tnàhí nduu táhú cundecu mee.

¹² Te ío cue téé ducaⁿ tnàhí ní nduu táhú-güedé ndéé òré ní cacu-güedé sá vā cándeca-güedé ñadihí. Te ío cue téé ñá ndácú-güedé cándeca-güedé ñadihí cuendá sá ñí quide ñaha dàva-gá cue tnàha téé-güedé xii-güedé. Te dava-güedé ñá túú cándeca-güedé ñadihí chi cuíní-güedé sá vā dañá ndéé-güedé cunu cuèchi-güedé núu Yá Ndiòxí. Te nchaa cue téé ducaⁿ ñí nduu táhú nūu Yá Ndiòxí cundecu mee, te váha-ni te núu na cundecu mee-güedé —càchí-gá xáhaⁿ-gá xii-güedé.

Jèsús xicáⁿ táhú-gá núu Yá Ndiòxí cuendá landú

(Mr. 10:13-16; Lc. 18:15-17)

¹³ Te ìᵐ úú ñáyiu ndéca-yu landú líhli cuáháⁿ núu Jèsús, chi cuíní-yu sá téndàha ñaha-gá xii-güexi, te cacáⁿ táhú-gá núu Yá Ndiòxí cuendá-güexi. Te cue

tée xica cuu ndihi-gá ní ngúíta-güedé ténàá ñáhá-güedě xií-yu, te xáhaⁿ-güedě sá vá dúcáⁿ cadá-yu.

14 Te Jèsús ní xáhaⁿ-gǎ xii-güedé:

—Chí dáñá ná quixi nahi cue landú lĩhli-áⁿ nũ-í-a, te vá cadí-ndó ìchi-güexi, chi dàtná cúú váha iní cue landú lĩhli-áⁿ ducaⁿ cùu váha iní cue ñáyiú yĩndaha ñaha Yá Ndiõxí —càchí-gá xáhaⁿ-gǎ xii-güedé.

15 Te ní tendaha ñaha-gá xii-güexi, te ní xicáⁿ táhú-gǎ núú Yá Ndiõxí cuendá-güexi, te sátá dúcáⁿ ní quide-gá te ní xica-gá cuáháⁿ-gá.

*Íⁿ tée cuica càháⁿ ndihi-dé Jèsús
(Mr. 10:17-31; Lc. 18:18-30)*

16 Te íⁿ tée cuechi ní quexio-dé núú ndécú Jèsús, te xicáⁿ tnúhú-dě núú-gǎ, te xáhaⁿ-dě xii-gá:

—Yòhó Mèstrú, cùu-n tée ío váha iní-xi, te cuiní-í nũu vá cündèe iní-n càchí tnúhu-n ná cúú sá váha cada-í cuendá nduu táhú-í cundecu-í ndihi Yá Ndiõxí ní caa ní quihíⁿ —càchí-dé xáhaⁿ-dě xii-gá.

17 Te Jèsús ní xáhaⁿ-gǎ xii-dé:

—¿Te cùtnuní iní-n nàcuáa ndùu tnúhu càháⁿ-n sǎ yǔhú váha iní-ǎⁿ?, chi íⁿdii díí-ni Yá Ndiõxí ío váha iní-gá. Te núu cuiní-n nàníhí táhú-n te tniⁿ-n nchàa tnúhu càháⁿ Yá Ndiõxí, tnúhu sá sánú ìchi ñaha xii ñáyiú nàcuáa cadá-yu cundecú-yu —càchí-gá xáhaⁿ-gǎ xii-dé.

18 Te tée cuechi-ǎⁿ ní xáhaⁿ-dě xii-gá:

—¿Te ndëndida càa tnúhu càháⁿ Yá Ndiõxí cada-í-i? —càchí-dé xáhaⁿ-dě xii-gá.

Te Jèsús ní xáhaⁿ-gǎ xii-dé:

—Te duha ní cachí Yá Ndiõxí cada ñáyiú: “Vá cáhni-ndó tnàha ñáyiú-ndo, vá càháⁿ ndihi-ndo ñàdihí te núu ñá díú ñàdihí-ndó cùu-yu, te ducaⁿ-ni nchòhó cue ñáyiú òhí tucu vá càháⁿ ndihi-ndo tée te núu ñá díú yì-ndo cuu-güedé, te vá dúhú-ndó sǎ ndécú ndihi tnaha ñáyiú-ndo, vá dácacu-ndo cuéchi neñùú sá cúú-xí tnàha ñáyiú-ndo.

19 Te canehe-ndo sǎ yíñùhu núú tǎtá-ndó ndihi núú nǎná-ndó, te cundàhú iní-ndó tnàha ñáyiú-ndo dàtná cündàhú iní-ndó mèe-ndo”, duha ní cachí Yá Ndiõxí cada ñáyiú —càchí-gá xáhaⁿ-gǎ xii-dé.

20 Te tée cuechi-ǎⁿ ní xáhaⁿ-dě xii-gá:

—Nchaa xǎⁿ ní ngúíta-í quidè-í ndéé cùtnàhá cúú làndú-í, ¿te vitna nágá cúmǎní cada-í-i? —càchí-dé xáhaⁿ-dě xii-gá.

21 Te Jèsús ní xáhaⁿ-gǎ xii-dé:

—Te núu cuiní-n cùu-n íⁿ tée ío váha cada ndáá, te cuáháⁿ dico-n nchàa sá ndécú ndihí-n, te dǐhúⁿ-n cuáha táhú-n cuè ñáyiú ndàhú, te ducaⁿ te nduu táhú-n ngündecu váha-n nũú ndécú Yá Ndiõxí táxí tnùnì-gá. Te sátá ná yáha ducaⁿ càda-n te quixi-n chìtnahá ñáhá-n xii-í —càchí-gá xáhaⁿ-gǎ xii-dé.

22 Te sá dúcáⁿ ní xáhaⁿ Jèsús xii-dé te ío ní cundiýí-dé, chi ío cuica-dě, te ní xica-dé cuáháⁿ-dé.

23 Te Jèsús ní xáhaⁿ-gǎ xii cue tée xica cuu ndihi-gá:

—Na càchí tnúhu ndáá-í xii-ndo sǎ ío úhú quíndáá iní ñaha cuè ñáyiú cuica xii Yá Ndiõxí cuendá ndíhu ndaha ñaha-gá xií-yu.

24 Te na càchí tnúhu tucu-í xii-ndo sã yáchí-gá yáha ìn càméyu yaú ìn yiqui tìcù dàcúxí sã quindáá iní ìn ñáyiú cuica Yá Ndiõxí cuendá ndíhu ndaha ñaha-gá xií-yu —càchí-gá xáhaⁿ-gã xii-güedé.

25 Te sã dúcáⁿ ní cáhán Jèsús, xíáⁿ ío ní cuñúhu cue téé xica cuu ndíhi-gá, te ní nguíta-güedé xítnaha-güedé:

—¿Yoo naníhí tãhú te núu ducaⁿ vaín? —càchí-güedé xítnaha-güedé.

26 Te Jèsús ní ndacoto-gá núú-güedé, te xáhaⁿ-gã xii-güedé:

—Nchaa ñáyiú ñuyíú-a chi vá ndácú-yu ná cadá-yu nàcuáa ndíhu ndaha ñaha Yá Ndiõxí xií-yu, dico mee-gã chi ndacu-gá ndíhu ndaha ñaha-gá xií-yu chi nchaandi túhú sã vãha ndàcu-gá quidé-gã —càchí-gá xáhaⁿ-gã xii-güedé.

27 Te té Pèlú ní xáhaⁿ-dè xii-gá:

—Nchúhú ní dándõ-ndí nchaa sã ndécú ndíhi-ndí, te ní tuha ñaha-ndí xii-n, ¿te ná cúú sã ñihí-ndí nduu táhú-ndí sã dúcáⁿ ní quide-ndí-í? —càchí-dé xáhaⁿ-dè xii-gá.

28 Te Jèsús ní xáhaⁿ-gã xii-güedé:

—Na càchí tnúhu ndáá-í xii-ndo sã ná sáa nduu, nduu saa nchaa sã ío andíu ndíhi ñuyíú-a, te dàvá-án cunucóo yúhú Téé cùu ñaní tnáhá-ndó nchaa-ndo ìn núú xilé váha, te nchaa ñáyiú quini-yu sã ío càhnu cuu-í, te nchòhó cue téé ní tuha ñaha xii-í tnàhá-ndó cùnucóo-ndo núú ìn caa xilé váha ndí ùxúú tnàhá-ndó, te xíáⁿ cunucóo-ndo càda ndáá-ndó cuèchi ndí ùxúú xichi cue ñáyiú isràél.

29 Te nchaa ñáyiú na dándóo vehe-xi, àdi ñaní-xi, àdi cúha-xi, àdi tátá-xi, àdi náná-xi, àdi ñadihí-xi, àdi déhe-xi, àdi ñuhu-xi, te núu ducaⁿ na càdà-yu sã cuendá-í te ío-gá cuéhé sã cuãñaha Yá Ndiõxí cundecu ndíhi-yu, te ñã díú-ní xíáⁿ chi tnàhá nduu táhú-yu cundecú-yu ndíhi-gá ní caa ní quíhíⁿ.

30 Te dava ñáyiú cùnnu ndecu ichi Yá Ndiõxí vitna, ñáyiú-án sáa nduu te vá ío-gá cunúú-yu dàtná cunúú-yu vitna, te dava ñáyiú nchícúⁿ ñã túú cùnnu vitna, ñáyiú-án sáa nduu te ío cunúú-yu —càchí-gá xáhaⁿ-gã xii-güedé.

20

Cuendá cue téé quide chiúⁿ

1 Te xáhaⁿ tucu Jèsús xii cue téé xica cuu ndíhi-gá:

—Na càni-í ìn cuendú núú-ndó cuendá tecú tnúni-ndó nàcuáa cada-xi òré ndíhu ndaha ñaha Yá Ndiõxí xii ñáyiú. Ìn téé ní xitu-dé yoho yàha stilé, te ìn nduu ní quee-dé nehé-ni cuándúcú-dé cue téé cada chiúⁿ núú dúcáⁿ ní xitu-dé yoho yàha stilé-án.

2 Te òré ní níhí-dé cue téé cada chiúⁿ-án, te ní quide ndáá-dé ndíhi-güedé sã chãhu ñaha-dé xii-güedé ìn díhúⁿ denàriú ìn nduu. Te sátá dúcáⁿ te ní tendaha ñaha-dé xii-güedé cuáhán-güedé cada chiúⁿ-güedé núú dúcáⁿ ní xitu-dé yoho yàha stilé-án.

3 Te dàtnúni ní xica tucu-dé cuáhán-dé dàtná òré caá ìn dátneé cuándúcú-gã-dé cue téé cada chiúⁿ núú ní xitu-dé yoho yàha stilé-án, te ní xiní-dé xínutníⁿ ìn úú cue téé núú yãhu te ñã túú nã chiúⁿ xíquide-güedé.

4 Te ní xáhaⁿ-dè xii-güedé: “Ñã túú cùdana cuyáchí-ndó càda-ndo chiúⁿ-í te cháhu ñaha-í xii-ndo nàcuáa tàú-xi cunduu-án”, càchí-dé xáhaⁿ-dè xii-güedé. Te cue téé-án ní sáha-güedé tnúhu cada chiúⁿ-güedé te ní xica-güedé cuáhán-güedé.

5 Te téé ní xitu yoho yàha stilé-án nǐ xica tucu-dé dàtná òré caúxúú nduu cuándúcú-gǎ-dé cue téé cada chiùⁿ-dé, te ní níhí tucu-dé cue téé cada chiùⁿ. Te ní quee tucu-dé dàtná òré caá úní sacuaa, te ñi-ú ní ducaⁿ nǐ quide tucu-dé.

6 Te ní quee tucu-dé dàtná òré caá úhúⁿ sacuaa cuándúcú-gǎ-dé cue téé cada chiùⁿ-dé, te ní xiní-dé xínutnǐ ñiⁿ úú cue téé ñi-ú ní núú yàhu-án te ñá túú nǎ chiùⁿ quide-güedé, te ní xáhaⁿ-dǎ xii-güedé: “Sánuu sá nchòhó ní cuu nchàca vitna ñá túú níhí-ndó chiùⁿ cada-ndo”, cachi-dé xáhaⁿ-dǎ xii-güedé.

7 Te cue téé-án nǐ xáhaⁿ-güedé xii-dé: “Ñá túú níhí-ndí chiùⁿ cada-ndí chí vá yò ndùcu ñaha xii-ndí”, cachi-güedé xáhaⁿ-güedé xii-dé. Te ní xáhaⁿ-dǎ xii-güedé: “Yúhú taxi-í chiùⁿ cada-ndo, te quíhíⁿ-ndó núú nǐ xitu-í yoho yàha stilé yàcáⁿ cada chiùⁿ-ndo, te cháhu ñaha-í xii-ndo nàcuáa tàú-xi cunduu”, cachi-dé xáhaⁿ-dǎ xii-güedé.

8 Te sátá nǐ dáhu nchícanhii, te téé ñi chiùⁿ-xi-án nǐ xáhaⁿ-dǎ xii téé tàxi tnuní ñáhá xii cue téé quide chiùⁿ-án: “Cúñaha xii nchaa cue téé quide chiùⁿ-án ná quíxí-güedé te cháhu-n-güedé, te díhna-gá cue téé nchícúⁿ cuií-nǎ cuánguihu núú chíúⁿ ngüíta-n cháhu-n, te ndéé núú nǐ ndíhí-nǎ cháhu-n cue téé cuánguihu díhna nuu-gǎ núú chíúⁿ”, cachi-dé xáhaⁿ-dǎ xii téé tàxi tnuní ñáhá xii cue téé quide chiùⁿ-án.

9 Te díhna-gá cue téé cuánguihu caá úhúⁿ sacuaa ní quexio-güedé cuendá cháhu ñaha-dǎ, te ní cháhu ñaha-dǎ ñiⁿ caa díhúⁿ denariú xii ñiⁿ güedé.

10 Te sátá nǐ cháhu-dé dava-gá cue téé ní quide chiùⁿ. Te ndéé núú nǐ ndíhí-nǎ ní cháhu-dé cue téé cuánguihu díhna nuu-gǎ núú chíúⁿ. Te cue téé-án nǐ sani iní-güedé sá vái-gǎ cháhu ñaha-dǎ xii-güedé, dico ñáhá chí ñiⁿ caa-ní díhúⁿ denariú ní cháhu ñaha-dǎ xii ñiⁿ güedé.

11 Te cue téé-án nǐ queheⁿ cuendá-güedé díhúⁿ-güedé dico ñá túú ní quide váha-xi iní-güedé.

12 Te ní xáhaⁿ-güedé xii téé ñi chiùⁿ-xi ní quide-güedé: “¿Ná cuendá cue téé nchícúⁿ cuií-nǎ cuánguihu núú chíúⁿ ñiⁿ-ní ní cháhu ñaha-n xii-ndí ndíhí-güedé, te ñiⁿ ñiⁿ oré duha ní quide chiùⁿ-güedé? Te nchúhú nchàca nchaa ní sahni iní-ndí ní quide chiùⁿ-ndí, te ní ndoho-ndí cahni, te ñiⁿ-ní ní cháhu ñaha-n xii-ndí ndíhí-güedé”, cachi-güedé xáhaⁿ-güedé xii téé ñi chiùⁿ-xi ní quide-güedé.

13 Te téé ñi chiùⁿ-xi ní quide-güedé-án nǐ xáhaⁿ-dǎ xii ñiⁿ téé-án: “Yòhó, ñá túú quide-í ñiⁿ sá ñá túú tàú-í cada-í sá cúú-xi-n, chí ní quide ndáá-ó sá díú-ní ñiⁿ díhúⁿ denariú cháhu ñaha-í xii-n ñiⁿ nduu.

14 Te vitna queheⁿ díhúⁿ cuendá nduu-n te núhú-n, chí yúhú cuení-í sá ñiⁿ-ní cháhu ñaha-í xii-n ndíhí cue téé nchícúⁿ cuií-nǎ cuánguihu núú chíúⁿ.

15 Chí yúhú cuu-ní cada-í nání cuení-í ndíhí díhúⁿ-í, ¿adi dico ñá túú quide váha-xi iní-n sá dúhá cundahú iní-í cue téé-án ducaⁿ cháhu-í-güedé?”, cachi téé cù patróⁿ-án xáhaⁿ-dǎ xii téé-án. Duha ndùu cuendú cáni-í núú-ndó.

16 Te duha cahaⁿ-í chí dava ñáyiú cùnuu ndecu ichi Yá Ndióxi vitna sáá nduu te vá cùnuu vihi-gá-yu dàtná cùnuú-yu vitna, te dava ñáyiú ñá túú cùnuu vitna sáá nduu ío cunúú-yu. Te ío cuéhé ñáyiú cahaⁿ ñáhá Yá Ndióxi xii-yu dico sacú-ni-yu nduu táhú-yu cundecú-yu ndíhí-gá —cachi-gá xáhaⁿ-gǎ xii-güedé.

*Jèsús cahaⁿ tucu-gá sá cáhni ñaha-güedé xii-gá
(Mr. 10:32-34; Lc. 18:31-34)*

17 Te ñuhu Jesús ichi cuasaá-gá ñuú Jerusalén ndihi cue tée xica cuu ndihi-gá, te ní cana ñaha-gá xii-güedé ní naníhí tnáhá-güedé ndihi-gá, te ta ndàtnúhu ndihi ñaha-gá xii-güedé cuaháⁿ, te xáhaⁿ-gá xii-güedé:

18 –Vitna ñuhu-o ichi cuasaá-ó ñuú Jerusalén, te yàcáⁿ cuáha cuèndá ñáhá-güedé xii yúhú Tée cùu ñani tnáhá-ndó nchaa-ndo núu cuè tée cùu dútú cùnùu, ndihi núu cuè tée dàcuaha ñaha xii ñáyi nchaa tnúhu ní chídó tnùní ndí Moisés. Te diu cue tée-áⁿ cùñaha-güedé xii dava-gá cue tée sá cáhni ñaha-güedé xii-í.

19 Te cuáha cuèndá ñáhá-güedé xii-í núu cuè tée ñá túu cùu cue tée isràél, te cue tée-áⁿ cudíqui ndeé ñáhá-güedé xii-í, te caniha-güedé ndihi ñi, te dàtnùní cata caa ñaha-güedé xii-í núu cùrúxí te núu cùrúxí-áⁿ cuú-í, dico nduu úní sá cùú-í te ndoto-í –càchí-gá xáhaⁿ-gá xii-güedé.

*Náná tē Jacobó ndihi té Juáá cuíní-aⁿ sá cùnùu-güedé ndihi Jèsús
(Mr. 10:35-45)*

20 Te cue déhe té Zebèdeú té Jacobó ndihi té Juáá ndécá ñaha náná-güedé xii-güedé cuaháⁿ núu ndécú Jèsús, te órè ní quexlo-aⁿ ndihi-güedé núu ndécú-gá te ní ngüñí xítí-áⁿ núu-gá cuèndá cuíní-aⁿ ndàtnúhu ndihi ñaha-aⁿ xii-gá cuèndá sá cùú-xí cuè déhe-aⁿ.

21 Te cùmání-gá cáháⁿ-aⁿ te ní xicáⁿ tnúhú Jèsús núu-aⁿ, te xáhaⁿ-gá:

–¿Ná cuíní-n? –càchí-gá xáhaⁿ-gá xii-aⁿ.

Te ní xáhaⁿ-aⁿ xii-gá:

–Véxi-í cáháⁿ ndàhú-í núu-n ñuú vá cündèe iní-n cùnucóo ñiⁿ déhe-í-a xio cùha-n, te ingá-dé cunucóo-dé xio dàtni-n na saá nduu cùnucóo-n núu táxi tnùní-n –càchí-áⁿ xáhaⁿ-aⁿ xii-gá.

22 Te Jèsús ní xáhaⁿ-gá xii úú cue tée-áⁿ:

–Nchòhó, ñá túu cùtnuní váha iní-ndó nàcuáa ndùu sá xicáⁿ-ndó ñuú-í. ¿Te náa cundee iní-ndó dàndoho ñaha ñáyi xii-ndo dàtná dandòho ñahá-yu xii-í, te cundee tucu iní-ndó cáhni ñahá-yu xii-ndo dàtná cáhni ñahá-yu xii-í-áⁿ? –càchí-gá xáhaⁿ-gá xii-güedé.

Te ní xáhaⁿ-güedé xii-gá:

–Cundee iní-ndí yáha-ndí nchaa nàcuáa cáháⁿ-n-áⁿ –càchí-güedé xáhaⁿ-güedé xii-gá.

23 Te Jèsús ní xáhaⁿ-gá xii-güedé:

–Ndáá sá cündèe iní-ndó ndòho-ndo nchaa nàcuáa ndòho-í, dico sá dúcáⁿ cuíní-ndó sá ñiⁿ-ndó cùnucóo-ndo xio cuha-í, te ñiⁿ-ndo cùnucóo-ndo xio datni-í, te xiáⁿ chi ñá díú yúhú tau-í cachí-í ñuú sá cùú cùnucóo-ndo àdi sá vá cùú cùnucóo-ndo, chi mee Tàtá-í Dútú Ndióxi cachí-gá te núu ná cùú ñáyi nduu táhú cunucóo díñi-í dàvā-áⁿ –càchí-gá xáhaⁿ-gá xii-güedé.

24 Te órè ní níhí úxi-gá cue tée xica cuu ndihi-gá tnúhu nàcuáa ndùu sá cuíní cue tée úú-áⁿ, te ní cudééⁿ-güedé núu cuè tée úú-áⁿ.

25 Te Jèsús ní cana-gá nchaa cue tée xica cuu ndihi-gá, te ní xáhaⁿ-gá xii-güedé:

–Nchòhó xini-ndó sá cuè tée yìndaha nacióⁿ quidé-güedé sá ño cùnùu-güedé, te nchaa dava-gá cue tée cùnùu ndihi-güedé quidé-güedé tnáhá-güedé sá ño cùnùu-güedé.

26 Dico nchòhó chi vá dúcáⁿ càda-ndo, chi núu dava-ndo cuíní-ndó cùnùu-ndo, te xini ñuhu-xi cunu cuechi núu tnáhá-ndó te vá cáda-ndó sá cùnùu-ndo.

²⁷ Te núu dava-ndo cuini-ndó quène cáva-ndo, te cuu-ndo dàtná cue ñáiyu ñá túu tnáhi dàná quee núu chíúⁿ patróóⁿ-xi cunu cuechi núu tnáhá-ndó.

²⁸ Te cada-ndo dàtná quidé yúhú Tée cùu ñaní tnáhá-ndó ncháa-ndo, chi yúhú véxi-í ñuyú-a dico ñá díú sá cúnú cuèchi ñáiyu núu-í chi véxi-í sá cúnú cuèchi-í núu-yu. Te cuu-í ñuyú-a cuèndá vai-yu cácu nihnú-yu núu ùhú núu ndàhú —càchí-gá xáhaⁿ-gá xii-güedé.

Jèsús quidé tātna-gá núu úú tnáhá cue tée cuàá

(Mr. 10:46-52; Lc. 18:35-43)

²⁹ Te òré ní quee Jèsús ñuú Jericó ndihi cue tée xica cuu ndihi-gá, te cuéhé víhi ñáiyu nchicúⁿ ñáhá xii-gá cuáháⁿ.

³⁰ Te yuhu ichi cuáháⁿ-gá xínucóo úú tnáhá cue tée cuàá, te cue tée-áⁿ ní cutnùni iní-güedé sá Jèsús ñúhú-gá ichi-áⁿ te ní ngúita-güedé níhi càháⁿ-güedé, te xáhaⁿ-güedé xii-gá:

—¡Yòhó Mèstrú, ñaní tnáhá ndíi Dàvíi, cundàhú iní ñáhá xii-ndí! —
càchí-güedé xáhaⁿ-güedé xii-gá.

³¹ Te cue ñáiyu tēnaá ñáhá-yu xii-güedé, te xáháⁿ-yu sá ná càdí-güedé yuhu-güedé, dico uuⁿ-gá níhi ní càháⁿ-güedé, te xáhaⁿ-güedé xii-gá:

—¡Yòhó Mèstrú, ñaní tnáhá ndíi Dàvíi, cundàhú iní ñáhá xii-ndí! —
càchí-güedé xáhaⁿ-güedé xii-gá.

³² Te ní ngúíñi Jèsús te ní cana ñaha-gá xii-güedé, te ní xicáⁿ tnúhú-gá núu-güedé, te xáhaⁿ-gá:

—¡Ná cuini-ndó càda ñaha-í xii-ndo-í? —càchí-gá xáhaⁿ-gá xii-güedé.

³³ Te ní xáhaⁿ-güedé xii-gá:

—Mèstrú, cuini-ndí sá càdá tātna-n núu-ndí cuèndá cundehe-ndí —
càchí-güedé xáhaⁿ-güedé xii-gá.

³⁴ Te Jèsús ní cundàhú iní ñáhá-gá xii-güedé, te ní tendaha-gá núu-güedé. Te òré-ni ní ndúha núu-güedé, te nchicúⁿ ñáhá-güedé xii-gá cuáháⁿ.

21

Jèsús cuánguihu-gá ñuú Jerusàlén

(Mr. 11:1-11; Lc. 19:28-40; Jn. 12:12-19)

¹ Te òré sa ta cùyatni Jesús ndihi cue tée xica cuu ndihi-gá ñuú Jerusàlén, te ní quexio-gá ndihi-güedé yatni víi-ná ñuú Bèttagé, te xiáⁿ cáá yùcu nani Olivú. Te ní ndatnúhu-gá ndihi úú cue tée xica cuu ndihi-gá,

² te ní xáhaⁿ-gá xii-güedé:

—Chí cuáháⁿ ñuú cáá yàtni yacáⁿ, te òré quexio-ndo yacáⁿ te nanihí-ndó ñⁿ búrru díhi ndètní-dí ndihi déhe-dí, te nandaxi-ndo-güedi te candeca-ndo-güedi quixi.

³ Te núu ió ñáiyu dàdahaⁿ ñaha xii-güedi, te cúñaha-ndo xii-yu sá yúhú Yaá xicá cùu ndihi-ndo xini ñuhu-í-güedi, te ndíhi-ni natendaha-í-güedi núhú-güedi cúñaha-ndo —càchí-gá xáhaⁿ-gá xii-güedé.

⁴ Te ducaⁿ ní cuu chi ní quee ndáá-xi ñacuáa ní chídó tnùni ñⁿ tée ní xóo càháⁿ tnúhu Yá Ndióxi ndéé sanaha núu tütú-gá núu càchí-xi:

⁵ Chí cúñaha cuè ñáiyu ñuú Slón ná càdá cuèndá-yu, chi véxi tée yíndaha ñaha xii-yu yòdo-dé ñⁿ búrru líhli déhe ñⁿ búrru quiti sa xido,

te cùu-dé ñⁿ tée ió ndàhú iní-xi.

Duha ní chídó tnùni ñⁿ tée ní xóo càháⁿ tnúhu Yá Ndióxi ndéé sanaha núu tütú-gá.

6 Te cue téé xica cuu ndihi-gá ní xica-güedé cuáháⁿ-güedé, te ní quide-güedé nàcuáa ní xáhaⁿ-gá xii-güedé cada-güedé.

7 Te ní ndexio-güedé ndécá-güedé ñⁿ búrru ðíhí ndihi déhe-di, te ní sacáⁿ ndodo-güedé dóo-güedé sátá-güedi, te dátñuní cuáasá Jèsús sátá ñⁿ-di ní ngódo ñaha-gá xii-di.

8 Te ío cuéhé ñáyiu ta sàcáⁿ-yu dóo-yu ichi cuáháⁿ-gá cuendá núú dóo-yu-áⁿ yáha-gá ndihi quítí yodo-gá. Te davá-yu xèhndé-yu ndaha yùtnu ñúú tá sàcáⁿ-yu cuáháⁿ.

9 Te nchaa ñáyiu yòdonuu núú-gá ndihi nchaa ñáyiu nchìcúⁿ ndàa sátá-gá ní ngúíta-yu níhi càháⁿ-yu, te càchí-yu:

—Ío càhnu cuu Yaá cúú ñàní tnáhá ndíi Dàvíí! ¡Te Yá Ndiòxí ío na chindee ñaha-gá chí cùu-gá Yaá ní tendaha Yá Ndiòxí véxi quide núú-gá! ¡Te ndéé nchaa sá ío andíu na càchí-xi sá ío càhnu cuu-gá! —duha càchí-yu.

10 Te òré cuánguihu Jèsús ñúú Jerusálén, te nchaa ñáyiu ñúú-áⁿ ní ngúíta-yu xícúúá-yu, te davá-yu ní ngúíta-yu xitnàhá-yu:

—¿Yoo cùu téé-áⁿ? —càchí-yu xitnàhá-yu.

11 Te davá-yu xitnàhá-yu:

—Téé-áⁿ cúú-dé Jèsús téé càháⁿ tnúhu Yá Ndiòxí, te cùu-dé téé ñúú Nazàrét ñúú yíndèhu distritú Galileá —càchí-yu xitnàhá-yu.

*Jèsús ñá túú tnàhá iní-gá nàcuáa xíquide ñáyiu xití veñúhu
(Mr. 11:15-19; Lc. 19:45-48; Jn. 2:13-22)*

12 Te Jèsús cuánguihu-gá xití veñúhu càhnu sá ío cùnuu, te xití veñúhu-áⁿ xíndecu ñáyiu quide ndáhú nádíco-yu, ndihi ñáyiu xísaaⁿ, te nchaaⁿ-yu ní queñuhu ñaha Jèsús xii-yu quehé, te ní dándúá-gá mèsá nchaa ñáyiu dàma ðíhúⁿ, ndihi nchaa xilé sácóo nchihí ñáyiu ðico lómá xíndecu xití veñúhu-áⁿ.

13 Te ní xáhaⁿ-gá xii-yu:

—Núú tütú Yá Ndiòxí càháⁿ-xi nàcuáa ní càháⁿ-gá, te ní cachí-gá: “Vehe-í cúú-xi núú càháⁿ ndihi ñaha ñáyiu xii-í”, duha ní càháⁿ-gá càchí-xi núú tütú-gá. Dico nchòhó quidé-ndó vèhe-gá vehe ñadúhú —càchí-gá xáhaⁿ-gá xii-yu.

14 Te xíaⁿ ndécú Jèsús ní quexio cue téé cuáá ndihi cue téé yacua, te ní quide tátna ñaha-gá xii-güedé te ní ndúha-güedé.

15 Te cue dütú cùnùu ndihi cue téé dàcuaha ñaha xii ñáyiu nchaa tnúhu ní chídó tnùní ndíi Moisés ní xiní-güedé ní quide Jèsús sá vã yòo tnàhí ndàcu cada, te ndèdóho tucu-güedé níhi xicáháⁿ cue landú xití veñúhu càhnu sá ío cùnuu-áⁿ, te càchí-güexi: “Ío càhnu cuu Yaá cúú ñàní tnáhá ndíi Dàvíí”, càchí-güexi. Te ní cudééⁿ-güedé,

16 te ní xáhaⁿ-güedé xii Jèsús:

—¿Ndèdóho-n nàcuáa càháⁿ cue landú-áⁿ ñã? —càchí-güedé xáhaⁿ-güedé xii-gá.

Te Jèsús ní xáhaⁿ-gá xii-güedé:

—Ndèdóho-í, te nchòhó náa ñá túú dàcuaha-ndo núú tütú Yá Ndiòxí núú càháⁿ-xi cuendá cue landú-áⁿ, te duha càchí-xi:

Yòhó ní quide-n sã cué landú vitna sàdi, ndihi cue dava-gá landú,

chíñuhu ñaha-güexi xii-n nàcuáa tàú-xi cunduu.

Duha càchí-xi núú tütú-gá —càchí-gá xáhaⁿ-gá xii-güedé.

17 Te xíaⁿ ní dándóo ñaha Jèsús xii-güedé, te ní xica-gá cuáháⁿ-gá ñúú Bètaniá, yàcáⁿ ní xíndecu-gá niú-áⁿ.

*Jèsús xáhaⁿ-gã xii yutnu ngüxí sá vã cúúⁿ-gã sávidí-xi
(Mr. 11:12-14, 20-26)*

18 Te nduu tnée-áⁿ nehé-ni cuáháⁿ tucu Jèsús ñuú Jerusálén, te ichi ñuhu-gá ní xihí-gá docó.

19 Te ní xiní-gá ñⁿ yutnu ngüxí nútnⁿ ñⁿ xio yuhu ichi, te ní xica-gá cuáháⁿ ndéhé-gã ñuu ndéé sávidí-xi, dico ñá túú nã ndéé chi mee-ni ndáha-xi ndeé. Te ní xáhaⁿ-gã xii yutnu ngüxí-áⁿ:

—¡Vitna te vã ñⁿ ndüu-gá cuuⁿ sávidí-n! —càchí-gá xáhaⁿ-gã xii-xi.

Te òré-ni-áⁿ ñí yíchí yutnu ngüxí-áⁿ.

20 Te sá dúcáⁿ ñí cuu ní xiní cue téé xica cuu ndihí Jesús, te ío ní cuñuhu-güedé, te ní xicáⁿ tnúhú-güedé núú-gã, te xáhaⁿ-güedé:

—¿Ná cuendá ndéé dàcáⁿ ío ndihí ní yíchí yutnu ngüxí-áⁿ-í? —càchí-güedé xáhaⁿ-güedé xii-gã.

21 Te Jèsús ní xáhaⁿ-gã xii-güedé:

—Na càchí tnúhu ndáá-í xii-ndo sã ñuu nchòhó quíndáá ndisa iní-ndó Yã Ndiòxí, te vã cání ñⁿ cani úú iní-ndó, te ñá díú-ní sã ñí quide-í-a ní xiní-ndó ndácu-ndo cada-ndo, chi ndéé tándúú-a xocuíñí-xi núú ndécú-xí te níu cuñaha-ndo sã xócuíñí-xi te quíhíⁿ-xi quée-xi xití lámár. Te díu ducaⁿ càda-xi te núu na quíndáá iní-ndó.

22 Te nchaa sá ná càcáⁿ-ndó núú Yã Ndiòxí òré càháⁿ ndihí-ndo-gã te taxi-gá te núu sàndáá ndisa iní-ndó sã táxí-gã sá xicáⁿ-ndó núú-gã —càchí-gá xáhaⁿ-gã xii-güedé.

*Jèsús ndécú ndihí-gá tnúhu ndee iní
(Mr. 11:27-33; Lc. 20:1-8)*

23 Te Jèsús cuánguihu-gá xití veñuhu càhnu sá ío cùnuu danehé-gá ñáyiu, te xíáⁿ ndécú-gã ní quexio cue dútú cùnùu ndihí cue téé cùu sacuéhé núú ñáyiu isràél, te xáhaⁿ-güedé xii-gã:

—Cuíní-ndí cachí tnúhu-n xii-ndí nása ndüu tnúhu ndee iní ndécú ndihí-n núu quide-n nándí sá quidé-n, ¿te yoo ducaⁿ ñí taxi tnúhu ndee iní-áⁿ xii-n-í? —càchí-güedé xáhaⁿ-güedé xii-gã.

24 Te Jèsús ní xáhaⁿ-gã xii-güedé:

—Yúhú tnàhá-í cuíní-í càcáⁿ tnúhu-í ñⁿ sá càcáⁿ tnúhu-í núú-ndó, te núu na càchí tnúhu-ndo te cachí tnúhu-í xii-ndo yòo ní taxi tnúhu ndee iní duha quide-í.

25 Te chí càchí tnúhu xii-í yoo ní táuchíúⁿ ñí dácúándüte ndí Juàá ñáyiu, ¿Yã Ndiòxí áⁿ cuè téé ñuyúú-a ní táuchíúⁿ dùcaⁿ ní quide ndí?, te chí càchí tnúhu —càchí-gã xáhaⁿ-gã xii-güedé.

Te ní ngüíta-güedé xitnàha-güedé:

—¿Nása cúñaha-o? Chi núu na cúñaha-o sã Yã Ndiòxí ní táuchíúⁿ dùcaⁿ ní quide ndí Juàá ñá, te quesaha-dé: “¿Ná cuendá ñá túú ní sàndáá iní-ndó tnúhu ní càháⁿ ndí vái?” , quesaha-dé.

26 Te núu na cúñaha-o sã cuè ñáyiu ñuyúú-a ní táuchíúⁿ dùcaⁿ ní quide ndí ñá, te cudééⁿ ñáyiu núú-ó, chi nchaa-yu càchí-yu sã Yã Ndiòxí ní xáhaⁿ-gã xii ndí sá càháⁿ ndí tnúhu-gá núú ñáyiu —càchí-güedé xitnàha-güedé.

27 Te ní xáhaⁿ-güedé xii Jèsús:

—Ñá túú xiní-ndí yoo ní táuchíúⁿ dùcaⁿ ní dácúándüte ndí Juàá ñáyiu —càchí-güedé xáhaⁿ-güedé xii-gã.

Te ní xáhaⁿ-gã xii-güedé:

—Te núu ducaⁿ te ni yùhú vá càchí tnúhu-í xii-ndo yòo ní taxi tnúhu ndee ìní duha quide-í —càchí-gá xáhaⁿ-gã xii-güedé.

Cuèndá ìn tée ndihi úú dèhe-dé

²⁸ Te Jèsús ní xáhaⁿ tùcu-gá xii-güedé:

—Na càni-í ìn cuèndú núú-ndó nàcuáa tecú tnùnì-ndó tnúhu càháⁿ-í. Ìn tée ndècu úú dèhe-dé, te ní xáhaⁿ-dè xii dèhe-dé tée sacuéhé-gá: “Yòhó dèhe-í, véxi-í càháⁿ ndàhú-í núú-n núu vá cùndèe ìní-n cuànùndaha ñaha-n xii-í cada chiúⁿ-o núú ní xitu-í yoho yàha stilé”, càchí-dé xáhaⁿ-dè.

²⁹ Te ní xáhaⁿ dèhe-dé xii-dé: “Vá quíhíⁿ-í cada chiúⁿ-í núú chíúⁿ-n”, càchí-dé xáhaⁿ-dè xii tātá-dè. Dico cuèé ní nacani ìní-dé te ní sáháⁿ-dé ní quide chiúⁿ-dé núú chíúⁿ tātá-dè.

³⁰ Te tée-án ní sáháⁿ tucu-dé ní xáhaⁿ-dè xii dèhe-dé té lìhli-gá núu vá cùndèe ìní-dé cuànùndaha ñaha-dé, te ní xáhaⁿ dèhe-dé-án xii-dé: “Cuu cuànùndaha ñaha-í xii-n”, càchí-dé xáhaⁿ-dè. Dico ñá túú ní sáháⁿ-dé cada chiúⁿ-dé.

³¹ Te vitna chí càháⁿ núu ndèdacàa cue tée úú-án ní quide-güedé sá cuìní tātá-güedé —càchí-gá xáhaⁿ-gã xii-güedé.

Te ní xáhaⁿ-güedé xii-gá:

—Tée cùu sacuéhé-gá, tée ní càháⁿ ndihi-dé díhna —càchí-güedé xáhaⁿ-güedé xii-gá.

Te Jèsús ní xáhaⁿ-gã xii-güedé:

—Na càchí tnúhu ndáá-í xii-ndo sã ncháá cuè tée cuihna ìní-xi quide cobrá ñáhá xii ñáyiu cuèndá impuèstú, ndihi cue ñáyiu ñíhí xĩndecu ichi díí ìní yáchí-gá ndíhu ndaha ñaha Yá Ndiòxi xii cue tée-án ndihi cue ñáyiu ñíhí-án dàcúúxí nchòhó.

³² Chi ndí Juáá tée ní xóo dacuàndute ñaha xii ñáyiu ní càháⁿ ndí nàcuáa cadá-yu cundecú-yu, dico nchòhó chi ñá túú cuìní-ndó quíndáá ìní-ndó nàcuáa ní càháⁿ ndí, dico cue tée cuihna ìní-xi quide cobrá ñáhá xii ñáyiu cuèndá impuèstú, ndihi cue ñáyiu ñíhí xĩndecu ichi díí ìní, chi sàndáá ìní-güedé ndíhí-yu tnúhu ní càháⁿ ndí. Te nchòhó cuèi ndèhe-ndo sá sàndáá ìní cue ñáyiu-án nchaa tnúhu ní càháⁿ ndí, dico ñá túú cuìní-ndó ndíxi cuèchi ìní-ndó cuèndá nchaa sá cuèhé sá dúhá quide-ndo cuèndá tní-ndo tnúhu ní càháⁿ ndí —càchí-gá xáhaⁿ-gã xii-güedé.

Cuèndá cue tée cuihna ìní-xi

(Mr. 12:1-12; Lc. 20:9-19)

³³ Te xáhaⁿ tùcu Jèsús xii-güedé:

—Cundedóho-ndo na càni tucu-í ingá cuèndú núú-ndó cuèndá tecú tnùnì-ndó tnúhu càháⁿ-í. Ìn tée ní nacúxi-dé mee-ni yòho yaha stilé núú ñúhú-dè, te ní chidoco-dè cuèndá sá vá cúú dañú, te ní cadúha-dé núú quíhí-dè ndéhé yoho yàha stilé-án òré ná cùu, te ní cadúha-dé ìn xító dùcúⁿ núú cáúndòdo cue tée coto nchaa yoho yàha stilé-án.

“Te ní sáá ìn nduu quèe-dé quíngaca cuu xica-dè te ní dándõ ndaha-dè sá ní xitu-dé-án xii ìn úú cue tée xìní tnáhá ndíhí-dé cuèndá cada chiúⁿ-güedé, te ní ndatnúhu-güedé sá òré ná cúú te cuu cuèndá dava-güedé, te ducaⁿ te ní quee-dé cuáháⁿ-dé.

³⁴ Te sáta ní sáá nduu ní cuu ndéhé nchaa yoho yàha stilé sá ní xitu-dé-án, te ní xáhaⁿ-dè xii ìn úú cue tée xìnu cuechi núú-dé: “Chí cuáháⁿ cácaⁿ-ndó sá

cúu cuèndá-í núú cuè téé ní dándõ ndaha-í nchaa yoho yàha stilé sá ní xitu-í", cächí-dé xàhaⁿ-dë xii-güedé.

³⁵ Te cue téé ní dándõ ndaha-dë nchaa yoho yàha stilé sá ní xitu-dé-áⁿ ní tnü-güedé cue téé xinu cuechi núú-dë-áⁿ, te üⁿ-dé ní cani-güedé, te üⁿ-dé ní sahni ñaha-güedé, te ingá-dé ní sãñaha-güedë yúú.

³⁶ Te téé ní xitu yoho yàha stilé-áⁿ ní tendaha-dë tññí-gá tucu cue téé xinu cuechi núú-dë cuáháⁿ-güedé cuángácáⁿ-güedé sá cúu cuèndá-dé núú cuè téé ní dándõ ndaha-dë sá ní xitu-dé-áⁿ, dico ñiu-ni ducaⁿ ní quide ñaha cuè téé-áⁿ xii cue téé xinu cuechi núú-dë-áⁿ.

³⁷ Te téé cùu xitohó nchaa yoho yàha stilé-áⁿ ní sani iní-dé: "Vàha-gá nõu tendaha-í déhe-í-a núhú-dé, chi òré quini ñáhá-güedë xii-dé te canehe-güedé sá yññhu núú-dë", duha ní sani iní-dé. Te ní tendaha-dë déhe-dé cuánuhú-dé.

³⁸ Dico òré ní xiní cue téé quide chiuⁿ-áⁿ dëhe téé cùu xitohó nchaa yoho yàha stilé-áⁿ, te ní xitnaha-güedé: "Téé-áⁿ téé véxi nduu táhú ñuhu-a ndihi nchaa sá cáá nõú-xi, dico cahni-o-dë te mee-o ndùu táhú-ó sã ndúú táhú-dë", cächí-güedé xitnaha-güedé.

³⁹ Te ní tnü-güedé téé-áⁿ te ndëca ñaha-güedé cuáháⁿ üⁿ xio yuhu ñuhu-áⁿ, te ní sahni ñaha-güedé xii-dé —duha cuáháⁿ cuèndú ní cani Jësús núú-güedé.

⁴⁰ Te ní xáhaⁿ tucu Jësús xii-güedé:

—¿Te nchòhó sa cùtnuní iní-ndó ñása cada ñaha xitohó ñuhu-áⁿ xii cue téé-áⁿ ñã? —cächí-gá xáhaⁿ-gã xii-güedé.

⁴¹ Te cue téé-áⁿ ní xáhaⁿ-güedé xii-gá:

—Téé cùu xitohó ñuhu-áⁿ nõhú-dé, te vá cùndáhú iní-dé cue téé cuihna ñni-xi-áⁿ chi cahni ñaha-dë xii-güedé, te dándõ ndaha-dë ñuhu-dé xii cue téé cùtnuní iní-dé cada ndáá cuèndá ndi táhú cúuⁿ ndéhé nchaa yoho yàha stilé sá ní xitu-dé-áⁿ te cuáñaha-güedé xii-dé sá cúu cuèndá-dé —cächí-güedé xáhaⁿ-güedé xii-gá.

⁴² Te Jësús ní xáhaⁿ-gã xii-güedé:

—Te nchòhó, náa ñã túú ñacuaha-ndo núú tütú Yã Ndiõxí núú cächí-xi: Yúú sã ní dáquéé tñhú cue téé ñacaa vehe, ní cuu-xi yúú cùnùu vitna. Chi mee Dütú Ndiõxí ducaⁿ ní cächí-gá cunduu, te cùu-xi üⁿ sá ño cùñuhu-o vitna.

Duha cächí-xi núú tütú-gá.

⁴³ Te duha càháⁿ-í chi Yã Ndiõxí cada-gá te vá nihí-ndó tnñhu ndee ñni cundecu ndihi-ndo cuèndá ndíhu ndaha ñaha-gá xii-ndo, chi tnñhu ndee ñni-áⁿ cundecu ndihi cue ñáyiu cada ndáá cuèndá ndíhu ndaha ñaha Yã Ndiõxí xii-yu.

⁴⁴ Te yúú sã cùnùu-áⁿ cúu-xí yñhú, te nchaa ñáyiu ñã túú tnñi tnñhu-í cùu-yu ñatná üⁿ ñáyiu ndúá núú yñ-áⁿ te tnàhnú duuⁿ-yu, àdi núu na tàú ñáhá-xí xii-yu, te ñacächi duuⁿ ñaha-xi —cächí-gá xáhaⁿ-gã xii-güedé.

⁴⁵ Te sá dúcáⁿ ndùu cuèndú ní cani Jësús te cue téé cùu dütú cùnùu-áⁿ, ndihi cue téé cùu fariséú ní cùtnuní iní-güedé sá cuèndá-güedé ní cáháⁿ-gá.

⁴⁶ Te ní cuini-güedé tnñi ñaha-güedé xii-gá òré-áⁿ dico ñã túú ní cùyü-güedé, chi ní yùhú-güedé cue ñáyiu, chi ní cùtnuní iní-yu sá cúu-gã üⁿ téé càháⁿ tnñhu Yã Ndiõxí.

22

Cuèndá üⁿ vico tnãndaha

¹ Te Jësús ní ngüita tucu-gá caní-gã ingá cuèndú núú-güedé, te xáhaⁿ-gã:

2 —Na càni tucu-í ingá cuèndú núú-ndó cuèndá tecú tnùni-ndó nàcuáa cada-xi òrè ndíhu ndaha ñaha Yá Ndiòxí xii ñáiyu. Ìn téè yìndaha ñaha xii ñáiyu ní quide-dé ìn vico ní dátñandaha-dé déhe ducuⁿ-dè.

3 Te ní tendaha-dè cue téè xìnu cuechi núú-dè cuáháⁿ-güedé cuángana-güedé cue ñáiyu sa ní cáháⁿ-dé cuhuⁿ vico, dico ñáiyu-án ñà túú ní cuini-yu quíhíⁿ-yu.

4 Te ní xáhaⁿ tùcu-dé xii dava-gá cue téè xìnu cuechi núú-dè: “Quíhíⁿ-ndó cùñaha-ndo xii cue ñáiyu sa ní cáháⁿ-í cuhuⁿ vico sá sà ní quide túha-í sá cáxi-yu, te sa ní sahní-í ndicutu ndíhi nchaa dava-gá quiti ní dánúcuìhnu-í, te nchaa sa ní quide túha-í, te na quixí-yu cuhúⁿ-yu vico càchí-í cùñaha-ndo”, càchí-dé xáhaⁿ-dè xii cue téè xìnu cuechi núú-dè-án.

5 Dico ní ìn ñáiyu ní cáháⁿ-dé-án ñà túú ní cuini-yu quíhíⁿ-yu cuhúⁿ-yu vico. Chi ìn-yu ní sáháⁿ-yu ní quide chíuⁿ-yu núú ñùhú-yu, te ingá-yu ní sáháⁿ-yu ní nadíco-yu núú nándi cùu ndáhú quidè-yu.

6 Te dava-gá-yu ní tníⁿ-yu dava cue téè xìnu cuechi núú tée quide vico-án, te ní canihá-yu ndéé ní sahní ñahá-yu xii-güedé.

7 Te téè yìndaha ñaha xii ñáiyu quide vico-án ní cudééⁿ víhí-dè sá dúcáⁿ ní quidè-yu, te ní tendaha-dè cue sandadú-dé ní sáháⁿ-güedé ní sahní-güedé cue ñáiyu ducaⁿ ní quide-án, te ní sahní-güedé nchaa vehe càa ñuú-yu.

8 Te sátá dúcáⁿ te ní xáhaⁿ-dè xii dava-gá cue téè xìnu cuechi núú-dè: “Nchaa sa ndècu túha, te cue ñáiyu ní cáháⁿ-í cuhuⁿ vico-a ní cùu ñà túú-gá tauú-yu sá cùhúⁿ-yu.

9 Te chí cuáháⁿ ndèni ní cuu te cáháⁿ-ndó nchaa ñáiyu na nàníhí-ndó ìchi na quixí-yu cuhúⁿ-yu vico-a”, càchí-dé xáhaⁿ-dè xii-güedé.

10 Te cue téè xìnu cuechi-án ní quee-güedé cuáháⁿ-güedé, te ní cáháⁿ-güedé nchaa ñáiyu ní naníhí-güedé ìchi, te cuèi ñáiyu váha iní-xi, te cuèi ñáiyu cuihna iní-xi, te ní chítú-yu núú cúú vico-án.

11 Te sátá dúcáⁿ te téè yìndaha ñáiyu quide vico-án ní quíhu-dé xití vehe ní xíndéhé-dé cue ñáiyu ñùhu vico-án, te ní xini-dé ìn téè ñùtnahá tnuú-yu te ñà túú càa dóó-dè dátñá cáá dǒó níhnú cuè ñáiyu ñùhu vico-án.

12 Te ní xáhaⁿ-dè xii téè-án: “¿Táta, nása ní cuu cuánguihu-ò iha, te ñà túú càa dóó-n dátñá cáá dǒó níhnú cuè ñáiyu ñùhu vico tnándaha-í?”, càchí-dé xáhaⁿ-dè xii téè-án. Dico téè-án ñà túú ní níhí-dè tnúhu cáháⁿ-dè.

13 Te téè yìndaha ñáiyu quide vico-án ní xáhaⁿ-dè xii cue ñáiyu xìnu cuechi núú mèsá: “Chí tníⁿ tée-án te dacùtu-ndo-dé, te queñuhu-ndo-dè ná quíhíⁿ-dé cundecu-dé ìn xichi núú néé núú ío ndoho-dé, te yàcáⁿ ío ndáhyú-dé te díco rúhñú-ná cuu núhu-dé sá sátú iní-dé sá ndóhó-dè”, càchí-dé xáhaⁿ-dè xii cue ñáiyu xìnu cuechi núú mèsá-án.

14 Te duha ndùu cuèndú càháⁿ-í chi ío cuéhé ñáiyu càháⁿ ñahá Yá Ndiòxí xií-yu, dico sacú-ni-yu nduu táhú-yu cundecú-yu ndíhi-gá —càchí-gá xáhaⁿ-gá xii-güedé.

Cuèndá impuèstú

(Mr. 12:13-17; Lc. 20:20-26)

15 Te cue téè cùu fariséú ní sáháⁿ-güedé ìn xichi ní ndatnúhu-güedé nàcuáa cada-güedé daticánuu-güedé Jèsús núú tnúhu cáháⁿ-gá cuèndá ducaⁿ níhí-güedé nàcuáa cada-güedé cacáⁿ cuéchi-güedé cuèndá-gá.

16 Te ní tendaha-güedé ìn úú cue téè cùndíhi-güedé, ndíhi cue téè cùndíhi te Hèrodés cuáháⁿ-güedé núú ndécú Jèsús. Te òrè ní quexìo-güedé núú ndécú-gá, te ní xáhaⁿ-güedé xii-gá:

—Mèstrú, ñihí-ndí tnúhu sá ïo ndáá càháⁿ-n, te càháⁿ ndáá-n nàcuáa càháⁿ Yá Ndióxi cundecu-o ñùyíu-a, te cuèi nděda-ni càa ñáyiu ïⁿ-ni càháⁿ-n ndihí-yu chi ñá túú quide cuendá-n cuèi ná ñáyiu cuú-yu.

¹⁷ Te cachí tnúhu xii-ndí, núu váha-ni quide-ndí sá chăhu-ndí té Cèsár tée ío cùnuu cuendá impuèstú áⁿ ñăhá —càchí-güedé xăhaⁿ-güedě xii-gá.

¹⁸ Dico Jèsús ní cutnuni iní-gá sá xító ndèé ñăhá-güedě xii-gá, núu ní xăhaⁿ-gă xii-güedé:

—Nchòhó cue tée dândahú mée-xí să quidé ndăá te ñá ndàá sá quidé ndăá-ndó, ¿ná cuendá xító ndèé ñăhá-ndó xii-í?

¹⁹ Chí dánhé ñăhá xii-í ïⁿ dîhúⁿ să chăhu-ndo cuendá impuèstú nũ nása càa —cachí-gá xăhaⁿ-gă xii-güedé.

Te ní dánhé ñăhá-güedě xii-gá ïⁿ dîhúⁿ să nání dênariú.

²⁰ Te òrè ní xiní-gá dîhúⁿ-ăⁿ te ní xícáⁿ tnúhú-gă núu-güedě, te xăhaⁿ-gă:

—Chí càchí tnúhu yoo núu-xi ndèé ndihí yoo diu-xi ndeé —càchí-gá xăhaⁿ-gă xii-güedé.

²¹ Te ní xăhaⁿ-güedě xii-gá:

—Núú tē Cèsár ndèé ndihí diu-dé —càchí-güedé xăhaⁿ-güedě xii-gá.

Te Jèsús ní xăhaⁿ-gă xii-güedé:

—Te núu ducaⁿ te chí năcuăha té Cèsár sá cúú cuendá-dé, te sá cúú cuendá mée Yá Ndióxi te xíăⁿ năcuăha-ndo-gă —càchí-gá xăhaⁿ-gă xii-güedé.

²² Te cue tée-áⁿ ïo ní cuñúhu-güedé sá dúcáⁿ nĩ cáháⁿ-gá, te ní natnii-güedé ichi cuánuhú-güedé.

Cuendá cue ñáyiu ndoto

(Mr. 12:18-27; Lc. 20:27-40)

²³ Te diu-ni nduu-ăⁿ nĩ quexiú ïⁿ úú cue tée cùu saducéú núu ndécú Jèsús. Te cue tée-áⁿ ñá túú sàndáá iní-güedé sá ndótó cuè ñáyiu ní xihí, te ní xăhaⁿ-güedě xii-gá:

²⁴ —Mèstrú, ndí Moisés ní cachí ndí sá nũ ïⁿ tée ndècu ñadihí-xi cuú-dé te quendóo ñadihí-dé, te núu ñá túú dēhe-dé ní xõ ndihí-aⁿ te tée cùu ñani-dé naqueheⁿ-dé ñaha ní quendóo quèé-áⁿ cuendá coo dēhe-dé ndihí-aⁿ cuendá ñani-dé tée ní xihí-áⁿ.

²⁵ Te ñuu-ndí-a ní xindecu úsá tnàhá cue tée mee-ni ndí ñani-güedé. Te tée dîhna ní ñihí ñadihí-dé te ñá túú ní cùdi-dé cundecu-dé chi ní xihí-dé, te ni ïⁿ dēhe-dé ñá túú ní xõ ndihí ñadihí-dé-áⁿ. Te tée cùu uú ní nàqueheⁿ-dé ñaha ní quendóo quèé-áⁿ.

²⁶ Dico ní xihí tucu-dé, te ni ïⁿ tucu dēhe-dé ñá túú ní xõ ndihí ñaha-áⁿ, te diu-ni ducaⁿ nĩ yăha tée cùu uní, te ní xínu ndí úsá-güedé ní cãndeca ñaha-güedě xii ñaha-áⁿ dico diu-ni ducaⁿ nĩ xihí-güedé.

²⁷ Te ndéé núú nĩ ndihí-ná te ní xihí tnàhá ñadihí-áⁿ.

²⁸ Te na sàá nduu ndòto-güedé ndihí ñaha-áⁿ, ¿te ndēdacàa-güedé ñadihí-güedé cuu-a-í? Chí ndí úsá-güedé ní cãndeca ñaha-güedě xii-aⁿ —càchí-güedé xăhaⁿ-güedě xii-gá.

²⁹ Te Jèsús ní xăhaⁿ-gă xii-güedé:

—Ní xíta nchòhó tnúhu càháⁿ-ndó, chi ñá túú xini-ndó năcuáa càháⁿ Yá Ndióxi núú tûtú-gá, te ni ñá túú cùtnuni iní-ndó să diú-gă ndácú-gă quidé-gă nchaandi túhú sá văha.

30 Te na càchí tnúhu-í xii-ndo sã òré ná sàà nduu ndòto nchaa ñáyiú ní xíhí, te dàvá-án vã yõ-gá dasaⁿ dèhe yoco-xi chi vá yõ-gá candeca tnàha, chi cuu-ná-yu dàtná cue espirítú xínú cuèchi núú Yã Ndiõxí.

31 ¿Te náa ñá túú quide cuendá-ndó nàcuáa càháⁿ Yã Ndiõxí núú tütú-gá núú càháⁿ-gá cuendá cue ñáyiú ní xíhí-ã? Te duha càchí-gá:

32 “Yúhú cùu-í Ndiõxí tẽ Abrahám, ndihí té Isàac, ndihí té Jàcób”, duha càchí-gá núú tütú-gá. Te cue tée-áⁿ chi cuèi ní xíhí-güedé núú ñuyúú-a, dico sá cùu-xí Yã Ndiõxí chi ndècu vívú-ni-güedé. Chi ñiu-gá cùu-gá Ndiõxí mee-ni cuè ñáyiú xindecu vívú, te ñá túú cùu-gá Ndiõxí cue ñáyiú ñá túú ndècu vívú —càchí-gá xàhaⁿ-gá xii-güedé.

33 Te sá dúcáⁿ ní càháⁿ-gá ní xii-gá cue tée-áⁿ, te ío ní cuñúhu nchaa ñáyiú cuendá sá ío váha ndùu tnúhu ní càháⁿ-gá.

Tnúhu sá ïo-gá cúnúu (Mr. 12:28-34)

34 Te cue tée cùu fariséú ní xini-güedé ní sadí Jèsús yuhu cue tée cùu saducéú, chi ñá túú ní ñihí-gá-güedé tnúhu cùñaha-güedé xii-gá, te cue tée cùu fariséú-án ní nataká-güedé te cuáháⁿ-güedé núú ndécú Jèsús.

35 Te ìⁿ tée cùu fariséú-án ío váha cùtnuní iní-dé nàcuáa ndùu nchaa tnúhu ní chídó tnùní ndíi Moisés te xito ndeé-dé Jèsús, te xàhaⁿ-dẽ xii-gá:

36 —Mèstrú, cachí tnúhu ndèdacaà tnúhu sá ní chídó tnùní ndíi Moisés ío-gá cùnùu cada-o —cachí-dé xàhaⁿ-dẽ xii-gá.

37 Te Jèsús ní xàhaⁿ-gá xii-dé:

—Duha càháⁿ tnúhu sá ïo-gá cúnúu: “Cuu iní-ndó Dütú Ndiõxí Yáá cùu Ndiõxí-ndó ñi yuhu ní iní-ndó, te cani iní-ndó càda-ndo datná cuini mée-gã, te mee-ni tnúhu váha cani iní-ndó nàcuáa cuu vii cuu váha-ndo núú-gã”,

38 duha càháⁿ tnúhu sá ïo-gá cúnúu.

39 Te duha càháⁿ tucu ingá tnúhu cùu uú sá ïo cúnúu, te sa yatni ìⁿ-ni cùu-xi ndihí tnúhu díhna nuu, te càchí-xi: “Cuu iní-ndó tnàha ñáyiú-ndo dàtná cùu iní-ndó mée-ndo”, duha càháⁿ tnúhu cùu uú-án.

40 Te cuendá úú tnúhu-a ní cáá nchaa tnúhu ní càháⁿ ndíi Moisés nàcuáa cada ñáyiú, te ñiu-ni cuendá úú tnúhu-a ní cáá tnúhu ní càháⁿ nchaa cue tée ní xóo càháⁿ tnúhu Yá Ndiõxí ndéé sanaha —càchí-gá xàhaⁿ-gá xii-güedé.

Yoo cùu Xítóhó Jesucristú (Mr. 12:35-37; Lc. 20:41-44)

41 Te ndècu ducaⁿ-ni cue tée cùu fariséú núú ndécú Jèsús.

42 Te ní xicáⁿ tnúhú-gá núú-güedé, te xàhaⁿ-gã:

—Cuini-í cachí tnúhu-ndo yõo dèhe-xi cùu Cristú Yáá tendaha Yã Ndiõxí quixi ñuyúú-a —càchí-gá xàhaⁿ-gã xii-güedé.

Te ní xàhaⁿ-güedé xii-gá:

—Dèhe ndíi Dàvíí cùu Yàà-án —càchí-güedé xàhaⁿ-güedé xii-gá.

43 Te Jèsús ní xàhaⁿ-gã xii-güedé:

—¿Te nása càchí-tu-ndo sã dèhe ndíi Dàvíí cùu Cristú Yáá tendaha Yã Ndiõxí quixi ñuyúú-a, te mee ndíi Dàvíí-án ní dácáhú iní ñáhá Espiritú Yã Ndiõxí xii ndíi, te ní cachí ndíi sá Cristú Yáá tendaha Yã Ndiõxí quixi ñuyúú-a cùu-gá Xítóhó ndíi? Te duha ní cachí ndíi:

44 Dútú Ndiõxí ní xàhaⁿ-gã xii Yáá cùu Xítóhó-í:

“Ngóo xio cùha-í, te yúhú cada-í te nchaa sá cùu ùhú iní ñáhá xii-n canehe-xi sá yíñúhu núu-n.”

Duha ní xáhaⁿ Dütú Ndiöxí xii Yaá cúu Xítohó-í, càchí ndíi.

⁴⁵ Te nása cùu Cristú déhe ndíi Dàvíi, te mee ndíi ní cachí ndíi sá cúu-gã Xítohó ndíi? —càchí Jèsús xáhaⁿ-gã xii-güedé.

⁴⁶ Te ni ìⁿ-güedé ñá túú-gã ní níhí-güedé tnúhu cúñaha-güedé xii-gã. Te ndéé nduu-ãⁿ ñà túú-gã ní cùyi-güedé ná tnúhu cacadáⁿ tnúhú-güedé núú-gã.

23

Jèsús càháⁿ-gã cuendá cue téé cùu fariséu ndihí cuendá cue téé dàcuaha ñaha xii ñáyiu

(Mr. 12:38-40; Lc. 11:37-54; 20:45-47)

¹ Te Jèsús ní cáháⁿ ndodo-gã núú nchaa ñáyiu, ndihí núú cuè téé xica cuu ndihí-gã, te xáhaⁿ-gã:

² —Cue téé dàcuaha ñaha xii ñáyiu nchaa tnúhu ní chídó tnùní ndíi Moisés, ndihí cue téé cùu fariséu ndécú ndihí-güedé tnúhu ndee ìní cáháⁿ-güedé nchaa tnúhu sá ní chídó tnùní ndíi Moisés-áⁿ.

³ Te cada-ndo nàcuáa dànehé ñáhá-güedé xii-ndo, dico vá cadá-ndó dàtná xíquide-güedé, chi tucu ndùu tnúhu càháⁿ-güedé, te tucu quide-güedé.

⁴ Te quide-güedé dàtná quidé ñáyiu dàcuído ìⁿ tnaha ñáyiu-xi ìⁿ sá ïo vée, te meé-yu ni lùha ñá túú cuíní-yu cuidó-yu. Te ducaⁿ sàtnahá-xi cùu-güedé chi dànehé ñáhá-güedé xii-ndo nàcuáa cada-ndo, dico mee-güedé chi ni lùha ñá túú cuíní-güedé cada-güedé nàcuáa dànehé ñáhá-güedé xii-ndo.

⁵ Te mee-ni ndücu-güedé nàcuáa quide-güedé cuendá quini ñáyiu sá ïo cùu cahnu-güedé. Te ndéé xindá sá ndéé ìⁿ ùú tnúhu Yá Ndiöxí tneé-güedé ndihí ndaha-güedé, te tnàhá ìní-güedé sá ïo-gã cunduu quèhéⁿ xindá-áⁿ dàcúúxí xindá dava-gã ñáyiu. Te tnàhá tucu ìní-güedé sá ïo-gã cunduu nani núú dõó sácúihnu-güedé dàcúúxí dõó sácúihnu dava-gã-yu.

⁶ Te ndi tnahá òré sácõo vico, òré quíhu-güedé mèsá caxi-güedé te ïo-gã cúdí ìní-güedé cunucóo-güedé núú xilé núú sácõo cue téé cùnuu-gã, te ñu-ni ducaⁿ quide tucu-güedé cuéi xití veñúhu.

⁷ Te nchaa núú xicá cùu-güedé cuíní-güedé sá ndihí tnúhu yíñùhu cáháⁿ ndihí ñaha ñáyiu xii-güedé, te cuíní tucu-güedé sá cùñahá-yu xii-güedé mèstrú.

⁸ Dico nchòhó vá cùñaha-ndo xii ñáyiu sá cùñahá-yu mèstrú xii-ndo, chi nchòhó ìⁿ-ni cùu-ndo ndecu-ndo, chi ducaⁿ ìⁿ-dii-ni yúhú Yaá ní tendaha Yá Ndiöxí véxi ñuyiú-a cùu-í Mèstrú ndécú ndihí ñaha-í xii-ndo.

⁹ Te ìⁿ-dii-ni Dütú Ndiöxí Yaá ndécú àndüu cuu-gã Tátá-ndó, núú xiãⁿ vá càháⁿ-ndó sã dàva cue téé ñuyiú-a cùu-güedé tátá-ndó.

¹⁰ Te ni vá cání ìní-ndó càda-ndo nacuáa cáháⁿ ñáyiu sá cùnùu-ndo, chi ìⁿ-dii-ni yúhú Cristú Yaá ní tendaha Yá Ndiöxí véxi ñuyiú-a cùnuu-í.

¹¹ Te ñáyiu ïo-gã cùnùu ndecu ndihí-ndo, ñáyiu-áⁿ cúú-yu ñáyiu xìnu cuechi núú-ndó.

¹² Te nchaa ñáyiu quide cahnu mee-xi ñáyiu-áⁿ vá cúú-yu ñáyiu cùnuu, te nchaa ñáyiu ñá túú quide cahnu mee-xi ñáyiu-áⁿ cùnùu-yu.

¹³ Te nchòhó cue téé dàcuaha ñaha xii ñáyiu nchaa tnúhu ní chídó tnùní ndíi Moisés, ndihí nchòhó cue téé cùu fariséu, cùu-ndo cue téé ïo dándahú méé-xí sá quidé ndáá te ñá ndáá sá quidé ndáá-ndó, te ndàhú ní cuu-ndo chi sàdí-ndó ìchi ñáyiu ñá dáñá-ndó ndíhu ndaha ñaha Yá Ndiöxí xií-yu, te ni mèe-ndo ñá

túu quide-ndo nacuaa ndihu ndaha ñaha-gá xii-ndo, te ni dâva-gá cue ñáiyu cuini sá ndihu ndaha ñaha-gá xi-yu ñá dáñá-ndó.

14 Te nchòhó cue tée dâcuaha ñaha xii ñáiyu nchaa tnúhu ní chídó tnùni ndí Moisés, ndihi nchòhó cue tée cùu fariséu, cúu-ndó cuè tée ío dândahú méé-xí sá quidé ndáa te ñá ndáa sá quidé ndáa-ndó, te ndáhú ní cuu-ndo chí quèndeé-ndó vèhe cue ñáiyu quèé, te ío naha càháⁿ ndihi-ndo Yá Ndióxi cuèndá cuini-ndó sá vâ yoo cutnùni iní-xi nâcuáa quide-ndo. Te sá dúcáⁿ quide-ndo te ío-gá ndoho-ndo núu ùhú núu ndáhú dâcúúxi dâva-gá ñáiyu.

15 Te nchòhó cue tée dâcuaha ñaha xii ñáiyu nchaa tnúhu ní chídó tnùni ndí Moisés, ndihi nchòhó cue tée cùu fariséu, cúu-ndó cuè tée ío dândahú méé-xí sá quidé ndáa te ñá ndáa sá quidé ndáa-ndó, te ndáhú ní cuu-ndo chí sàhni iní-ndó cuaháⁿ-ndó ndèni ní cuu dâcaháⁿ-ndó ñáiyu cuèndá cuini-ndó tní-yu ichi ndècu-ndo. Te òré ná xíu iní-yu tní-yu ichi ndècu-ndo-án te uuⁿ-gá cuíta nihnú-yu dâcúúxi mée-ndo.

16 Te nchòhó cúu-ndó datná cue ñáiyu cuàá, chí ñá cutnùni iní-ndó nâcuáa canu ichi-ndo ñáiyu, te ndáhú ní cuu-ndo chí càchí-ndó: “Hⁿ ñáiyu na càcunehe veñúhu càhnu sá ío cùnnu òré cuini-yu cutnùni iní tnàha ñáiyú-yu sá ndáa cadá-yu ìⁿ sá sání iní-yu cadá-yu, te vâ cúu cuèchi xií-yu cuèi vâ cadá-yu. Dico núu na càcu nehé-yu díhúⁿ cuàáⁿ yíhí xítí veñúhu-áⁿ te cuu cuèchi xií-yu te núu vâ cadá-yu sá ní cachí-yu cadá-yu”, duha càchí-ndó.

17 Nchòhó cúu-ndó cuè tée ío ñí díquí-xi, te cùu-ndo datná cue ñáiyu cuàá chí ñá təcú tnùni-ndó! Te vâ càchí-ndó sá ío-gá cùnnu díhúⁿ cuàáⁿ dâcúúxi veñúhu, chí díu cuèndá veñúhu-áⁿ ní cuu íí díhúⁿ cuàáⁿ-áⁿ.

18 Te càchí tucu-ndo: “Hⁿ ñáiyu na càcunehe xító núu sácódó sá ndúú tãhú Yá Ndióxi òré cuini-yu cutnùni iní tnàha ñáiyú-yu sá ndáa cadá-yu ìⁿ sá sání iní-yu cadá-yu, te vâ cúu cuèchi xií-yu cuèi vâ cadá-yu, dico núu na càcu nehé-yu sá ndúú tãhú Yá Ndióxi yódó núu xító-áⁿ te cuu cuèchi xií-yu te núu vâ cadá-yu sá ní sani iní-yu cadá-yu”, duha càchí-ndó.

19 Te cùu-ndo cue tée ío ñí díquí-xi, te cùu-ndo datná cue ñáiyu cuàá chí ñá təcú tnùni-ndó! Te vâ caní iní-ndó sá ío-gá nándíhi sá ndúú tãhú Yá Ndióxi sácódó núu xító núu sácódó tnàhí sá ndúú tãhú-gã-áⁿ dâcúúxi mée xító-áⁿ.

20 Chí nchaa ñáiyu ducaⁿ càcunehe xító-áⁿ, te tnàhá-ni sá yódó núu-xi càcu nehé-yu òré ducaⁿ càháⁿ-yu.

21 Te nchaa ñáiyu ducaⁿ càcunehe veñúhu càhnu sá ío cùnnu te ñá díú mée-ni veñúhu càcu nehé-yu òré ducaⁿ càháⁿ-yu, chí tnàhá-ni Yá Ndióxi Yaá cúu cuèndá veñúhu-áⁿ cácu nehé-yu òré ducaⁿ càháⁿ-yu.

22 Te nchaa ñáiyu càcunehe andíu cuèndá cutnùni iní tnàha ñáiyú-yu sá ndáa cadá-yu ìⁿ sá sání iní-yu cadá-yu, te ñá díú mée-ni andíu cacu nehé-yu chí tnàhá-ni núu núcòo Yá Ndióxi táxi tnùni-gá cácu nehé-yu òré ducaⁿ càháⁿ-yu, te tnàhá méé-gã cácu nehé-yu òré ducaⁿ càháⁿ-yu.

23 Te nchòhó cue tée dâcuaha ñaha xii ñáiyu nchaa tnúhu ní chídó tnùni ndí Moisés, ndihi nchòhó cue tée cùu fariséu, cúu-ndó cuè tée ío dândahú méé-xí sá quidé ndáa te ñá ndáa sá quidé ndáa-ndó. Te cuèi núu ùxi xichi yúcu mèntá nihí-ndó, te sãñaha-ndo ìⁿ xichi xii Yá Ndióxi, te díu-ni ducaⁿ quide-ndo yúcu nání ànis, ndihi yúcu nání còminú, dico ndáhú ní cuu-ndo chí ñá túu quide cuèndá-ndó nâcuáa càháⁿ nchaa tnúhu sá ío-gá cùnnu sanu ichi ñaha xii-ndo, te tnúhu-áⁿ càchí-xi sá ío xini ñihu-xi cada ndáa-ndó cùndecu-ndo, te cundáhú iní-ndó cuè tnàha ñáiyu-ndo, te quèndáa iní-ndó Yá Ndióxi, te cada-ndo nchaa

nacuáa ndùu tnúhu càháⁿ-ndó, te nchaa tnúhu-áⁿ cúu-xí tnúhu sá ío cùnnuu xini ñuhu-xi cada-ndo nacuáa càháⁿ-xi, dico vá dǎná ndéé-ndó cada-ndo nchaa dava-gá nacuáa càháⁿ tnúhu sá sánú ichi ñaha xii-ndo.

24 ¡Te nchòhó cúu-ndó datná cue ñáyiú cuáá, chi ñá túú cùtnuní iní-ndó nacuáa canu ichi-ndo ñáyiú, chi quide cuendá-ndó mée-ni nchaa tnúhu sá ñà túú ío cùnnuu, dico nchaa tnúhu sá ío-gá cùnnuu xini ñuhu-xi cada cuendá-ndó ñà túú quide cuendá-ndó!

25 "Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi nchòhó cue tée cùu fariséú, cùu-ndo cue tée ío dándahú mée-xí sá quidé ndáá te ñá ndáá sá quidé ndáá-ndó. Te ndáhú ní cuu-ndo chi cùu-ndo datná cue ñáyiú nàquete sátá-ni tàsáⁿ ndíhi sátá-ni còhó te xití-xi càndehe caduha-ni. Te ducaⁿ sǎtnahá-xi cùu-ndo chi mee-ni sá ndécú ndíhi tñaha ñáyiú-ndo ñuhu iní-ndó, te nǎndi dándahú-ndó-yu te quèheⁿ-ndo sá ndécú ndíhi-yu.

26 Te nchòhó cue tée cùu fariséú, cúu-ndó datná cue ñáyiú cuáá, chi ñá túú cùtnuní iní-ndó nacuáa ndùu sá quidé-ndó. Te ío xini ñuhu-xi sá cadá-ndó nacuáa nduu ndoo nduu nine iní-ndó cuendá ndacu-ndo cada-ndo sá vaha, te xíáⁿ núu chí cadá datná xíquide ñáyiú nàquete ndaa xití tàsáⁿ ndíhi ndaa xití còhó.

27 "Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi nchòhó cue tée cùu fariséú, cùu-ndo cue tée ío dándahú mée-xí sá quidé ndáá te ñá ndáá sá quidé ndáá-ndó. Te ndáhú ní cuu-ndo chi cùu-ndo datná núu yíndüxi ndíyi núu ní cuáha vii te ní nacáhyú sá cuixíⁿ, dico xití yaú-áⁿ chi càndehe caduha chi mee-ni yiqui ndíyi ñuhu.

28 Te ducaⁿ sǎtnahá-xi cùu-ndo chi sǎnuu sá cúu-ndó cuè tée váha dico iní-ndó chi mee-ni sá cuèhé sá dúhá ñuhu, te ío dándahú-ndó mée-ndo sá quidé ndáá-ndó te ñá ndáá sá quidé ndáá-ndó.

29 "Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi nchòhó cue tée cùu fariséú, cúu-ndó cuè tée ío dándahú mée-xí sá quidé ndáá te ñá ndáá sá quidé ndáá-ndó. Te ndáhú ní cuu-ndo chi cadúha-ndo nchaa núu ní nguíndüxi cue tée ní xóo cáháⁿ tnúhu Yá Ndióxi ndéé sanaha, te ío vii quide-ndo nchaa núu sá ní cuáha núu yíndüxi cue ñáyiú ní quide váha ní xíndecu ñuyíú-a.

30 Te càchí-ndó: "Te núu dicó nchoo ní xíndecu-o cùtnáhá ní xíndecu cue ñani tnáhá-ó ndéé sanaha, te vá chítñahá-ó-güedé cahni-o cuè tée ní xóo cáháⁿ tnúhu Yá Ndióxi dává-áⁿ ní cùu", duha càchí-ndó.

31 Te sá dúcáⁿ càháⁿ-ndó, te xíáⁿ cùtnuní sá íiⁿ-ní cùu-ndo ndíhi cue ñani tnáhá-ndó cuè tée ní xíndecu ndéé sanaha, cue tée ní sahni ñaha xii cue tée ní cáháⁿ tnúhu Yá Ndióxi dává-áⁿ.

32 Te núu ducaⁿ te chí dáxínu cava chùⁿ ní tausaha-güedé.

33 ¡Te nchòhó cúu-ndó cuè tée ío cuihna iní-xi, chi cùu-ndo datná cóo dééⁿ! Te nchòhó vá ñíhi-ndó nacuáa cada-ndo cácu nihnu-ndo núu úhú núu ndáhú.

34 Te cuendá xíáⁿ núu tendaha-í cue tée càháⁿ tnúhu Yá Ndióxi quixi núu-ndó, ndíhi cue tée cùu mestrú danèhé ñáhá xii-ndo tnúhu-gá, ndíhi cue tée ío váha cùtnuní iní-xi cuendá cáháⁿ-güedé tnúhu-gá núu-ndó. Dico nchòhó chi da cùu úhú iní-ndó-güedé, chi dava-güedé cahni-ndo-güedé, te dava-güedé cata caa-ndo-güedé núu cùrúxí, te dava-güedé cani-ndo-güedé xití veñúhu, te ndi tñahá ñuú ndi tñahá ñuú quíhíⁿ-ndó nànducu-ndo-güedé cuendá cada úhú iní-ndó-güedé.

³⁵ Te sá dúcáⁿ ná càda-ndo, te ndadíquí-ndó cuè téé ní quide ndáá ní xíndecu ní xíhí ní sahni ñaha cuè ñaní tnáhá-ndó. Te ndéé ndíi Àbél téé ío váha ní quide ndáá ní xíndecu ní sahni-güedé ndadíquí-ndó, ndíhi nchaa dava-gá cue téé ní sahni-güedé, ndíhi ndéé ndíi Zacàriá déhe ndíi Berèquiás téé ní sahni-güedé ndéé núú ní ndíhi-ná ndadíquí-ndó, te ndíi-án ní sahni-güedé mei tnúú veñúhu càhnu sá ío cùnnu ndíhi xító núú sácódó sá ndúú tãhú Yã Ndióxi, te nchaa cue téé-án ndadíquí-ndó chi dàtná tnúhu mee-ndo ní sahni-ndo cuè téé-án, chi ñiu-ni ñaní tnáhá mée-ndo ducaⁿ ní sahni ñaha xii-güedé.

³⁶ Te na càchí tnúhu ndáá-í xii-ndo sá nchàa cue téé ní quide ndáá ní xíndecu ní sahni-güedé, nchaa cue téé-án ndadíquí nchaa ñáyíu ndècu vitna —cachí-gá xãhaⁿ-gã xii-güedé.

Jèsús càháⁿ-gá cuendá ñáyíu ñúú Jerusalén
(Lc. 13:34-35)

³⁷ Te xãhaⁿ Jèsús xii ñáyíu ñúú Jerusalén:

—Nchòhó ñáyíu ñúú Jerusalén sàhni-ndo cue téé ní tendaha Yã Ndióxi véxi càháⁿ tnúhu-gá núú-ndó, te mee-ni ndíhi yúú sáhní-ndó dàva-güedé. ¡Te yúhú titní xito ní cuiní-í coto ñaha-í xii-ndo dàtná quidé nchùxi xito-güedi déhe-güedi sàquíhi-güedi xití ndíxiⁿ-güedi, dico nchòhó ñá túú ní cuiní-ndó, te ñiu-ni ducaⁿ sàni iní-í ndéé vitna!

³⁸ Te na càchí tnúhu ndáá-í xii-ndo sá sáá nduu te ío ndàhú yáha ñúú-ndó, te vá cündècu-gá-ndó.

³⁹ Te na càchí tnúhu tucu-í xii-ndo sá vã quíní ñáhá-gã-ndó xii-í, dico sáá nduu quíní ñáhá tucu-ndo, te dàvá-án cachí-ndó: “Ío càhnu cuu Yaá ní tendaha Dütú Ndióxi véxi”, duha cachí-ndó —cachí-gá xãhaⁿ-gã xii-yu.

24

Jèsús càchí-gá sá ngóyó veñúhu
(Mr. 13:1-2; Lc. 21:5-6)

¹ Te Jèsús ní quee-gá veñúhu càhnu sá ío cùnnu, te mei òré ní queheⁿ-gá ichi quíhíⁿ-gá ñⁿ xichi, te ní sàndehe yatni cue téé xica cuu ndíhi-gá ñíhí-gá, te xãhaⁿ-güedé xii-gá:

—Cundehe veñúhu-a ná ío váha ní sáá —cachí-güedé xãhaⁿ-güedé xii-gá.

² Te Jèsús ní xãhaⁿ-gã xii-güedé:

—Na càchí tnúhu ndáá-í xii-ndo sá ncháá sá ndéhé-ndó-á vitna saá nduu te vá cünduu-gá-xi dàtná cáá-xí vitna, chi ní ñⁿ-gá yúú vã códó nchíhi tnaha-xi chi ndíhi ngoyo —cachí-gá xãhaⁿ-gã xii-güedé.

Nacuáa cada-xi nduu ta cùyatni naa ñuyíú-a
(Mr. 13:3-23; Lc. 21:7-24; 17:22-24)

³ Te Jèsús ní sáá-gá ndíhi cue téé xica cuu ndíhi-gá yucu Òlívú, te xíaⁿ ní ngóo-gá te núú núcóo-gá-án ní sáháⁿ cue téé xica cuu ndíhi-gá, te dayuhu ní xãhaⁿ-güedé xii-gá:

—Cuíní-ndí cachí tnúhu-n ná nduu ñucaⁿ cada-xi ngoyo veñúhu càhnu sá ío cùnnu, ndíhi nándi cùu sá cádá-xí òré sa ta cùyatni nduu quixi tucu-n ñuyíú-a, ndíhi òré sa ta cùyatni naa-xi —cachí-güedé xãhaⁿ-güedé xii-gá.

⁴ Te Jèsús ní xãhaⁿ-gã xii-güedé:

—Ío quíhi iní-ndó cündecu-ndo cuendá sá vã yõ dandàhú ñáhá xii-ndo.

5 Chi ío cuéhé cue tée coo ñuyú, te danàni-güedé méé-güedé dàtná nánì-í, te cachí-güedé: “Yúhú cùu-í Cristú Yáá ní tendaha Yá Ndiòxí véxi ñuyú-a”, duha cachí-güedé. Te sá dúcáⁿ cáháⁿ-güedé te ío vai ñáyiú dandáhú-güedé.

6 Te níhí-ndó tnúhu nàá-güedé ndèni ní cuu, dico vá yùhú-ndó chí dacuítíi sá dúcáⁿ càda-xi, dico vátá sàà-gá nduu nàa ñuyú òré ducaⁿ càda-xi.

7 Chi cue tée ìⁿ nàcióⁿ nàá-güedé ndíhi cue tée ìngá nàcióⁿ, te titní ñuú ngúita-güedé nàá-güedé, te titní xichi ñuyú coo tnamá, te titní tucu xichi ñuyú quixi cuéhé, te titní tucu xichi ñuyú ïo níhi tnáa.

8 Te nchaa xíáⁿ cuu-xi tnúndòho sá vítná váha quèsaha sá cúu-xí cué ñáyiú xíndecu ñuyú.

9 Te cue ñáyiú na cùu úhú iní ñáhá xii-ndo cuáha cuèndá ñáhá-yu núu cué tée cùchiuⁿ cuèndá caniha-güedé xii-ndo, te dava-ndo càhni ñaha-güedé, te nchaa ñáyiú cuu úhú iní ñáhá-yu xii-ndo sá cuèndá-í.

10 Te dàvá-áⁿ ío vai ñáyiú dàñá-yu sá sàndáá iní-yu Yá Ndiòxí, te ngóo-yu cuu úhú iní tnáhá-yu, te cuáha cuèndá tnáhá-yu núu cué tée cùchiuⁿ.

11 Te ío vai cue tée cachí-güedé sá cáháⁿ-güedé tnúhu Yá Ndiòxí te ñá ndáá sá cáháⁿ-güedé tnúhu-gá, te ducaⁿ ío vai ñáyiú dandáhú-güedé.

12 Te dàvá-áⁿ cunuu mèe-ni nchaa sá cuéhé sá dúhá càdá-yu, te vai-yu vá cúu iní-gá-yu tnàha ñáyiú-yu.

13 Dico nchaa ñáyiú na càda ndee-ni iní canchicúⁿ nihnu ñaha-ni xii-í, ñáyiú-áⁿ naníhí tãhú-yu.

14 Te níhí ñuyú quíhíⁿ ñáyiú cáháⁿ-yu tnúhu váha, tnúhu sá cáháⁿ nàcuáa ndíhu ndaha ñaha Yá Ndiòxí xii ñáyiú, te sátá ná níhí nchaa ñáyiú tnúhu-áⁿ te naa ñuyú.

15 Te ndí Dániél téé ní xóo cáháⁿ tnúhu Yá Ndiòxí ndéé sanaha ní chídó tnùnì ndíi cuèndá ìⁿ sá dáquèè tíhú Yá Ndiòxí cundecu ìⁿ xichi núu ní cuu íi, te xíáⁿ cada-xi sá vã cùndecu-gá ní ìⁿ ñáyiú xíáⁿ. Te cada cuèndá váha-ndo nàcuáa ní cáháⁿ ndíi, chí nduu na quèni-ndó xíáⁿ cundecu-xi núu dúcáⁿ ní cuu íi,

16 te dàvá-áⁿ nchaa ñáyiú xíndecu distritú Jùdeá xíní ñùhu-xi cunú-yu quíhíⁿ-yu xití yucu.

17 Te nchaa ñáyiú ndáa ndódó díquí véhé-xí vã ndíhu-gá-yu vehé-yu quehéⁿ-yu ìⁿ ndachíuⁿ-yu canehé-yu quíhíⁿ.

18 Te nchaa ñáyiú cuáháⁿ yucu vá ñùhú-gá-yu vehé-yu cúnúquehéⁿ-yu dóó-yu.

19 Te ndàhú ní cuu nchaa ñáyiú dìhí ñùhú dèhe-xi, ndíhi cue ñáyiú dìhí xíndeca déhe vítna sàdi na saá nduu dùcaⁿ cada-xi!

20 Te nchòhó, chí cãcã táhú núú Yá Ndiòxí cuèndá sá vã dúcáⁿ ndòho-ndo yóo quidé víxiⁿ-xi, te ní vã dúcáⁿ ndòho-ndo nduu cuu-xi nduu ndetatú-ndó.

21 Chi dàvá-áⁿ coo tnúndòho cahnu vihi ñuyú, te vátá ìⁿ ndùu-gá coo tnúndòho cahnu vihi-áⁿ ndèè cútñáhá ní ngáva ñuyú, chí ñu-ni dàvá-áⁿ coo tnúndòho cahnu vihi-áⁿ, te ní núú cuáháⁿ núú véxi vá cóó-gã tnúndòho-áⁿ.

22 Te Yá Ndiòxí cachí-gá sá vã ío vai nduu coo tnúndòho cahnu vihi-áⁿ sá cuèndá nchaa ñáyiú ní cáháⁿ-gá cundecu ndíhi-gá. Chí núu vai nduu na coo tnúndòho-áⁿ te vá yóo cácu nihnu.

23 Te núu ío ñáyiú càchí-yu xii-ndo: “Chí cùndèhe iha, chí iha ní quexìo Cristú Yáá ní tendaha Yá Ndiòxí véxi ñuyú-a”, àdi cachí-yu: “Chí cùndèhe yacáⁿ chí yacáⁿ ndécú-gã”, càchí-yu ña. Te vá quíndáá iní-ndó tnúhu cáháⁿ-yu.

24 Chi coo cue té cachí-güedé sá cúu-güedé Yáá ní tendaha Yá Ndiöxi véxi ñuyú-a, te dava-güedé cachí-güedé sá cúu-güedé cue té cãháⁿ tnúhu Yá Ndiöxi dico ñá ndáá sá cúu-güedé cue té cãháⁿ tnúhu-gá, te cada-güedé titní núú sã vã yõ tnàhi ndàcu cada cuendá dandáhü-güedé ñáyiu. Te cani iní-güedé dandáhü-güedé ndéé cue ñáyiu ní cãháⁿ Yá Ndiöxi cundecu ndihi-gá.

25 Te duha nduu tnúhu cãháⁿ-í dátüha ñaha-í xii-ndo.

26 Te núu cãchí-yu xii-ndo: “Xití yucu-ãⁿ ní quexio Yáá ní tendaha Yá Ndiöxi véxi ñuyú-a”, cãchí-yu. Te vã quindáá iní-ndó quíhíⁿ-ndó, àdi cachí-yu: “Vehe-ãⁿ ndécú Yáá ní tendaha Yá Ndiöxi véxi ñuyú-a”, cãchí-yu. Te vã quindáá iní-ndó tnúhu cãháⁿ-yu.

27 Chi dátñá xini nchaa ñáyiu quide-xi oré sãá nduté dáyehé-xi ni cãa xico ñuyú ducaⁿ cãda-xi oré quixi tucu yúhú Té cùu ñani tnáhá-ndó nchaa-ndo chi nchaá-yu quini ñáhã-yu xii-í.

28 Te nchòhó xini-ndó sã ncháá núu yúcu yiqui cuñú ní xihí te yacáⁿ tàcã nchaa ndixí xéxi-güedi.

Nàcuáa cada-xi oré quixi tucu Té cùu ñani tnáhá cue ñáyiu

(Mr. 13:24-37; Lc. 21:25-33; 17:26-30, 34-36)

29 Te na yãha-ni coo tnúndòho cahnu vihi-ãⁿ, te vã dáyehé-gá nchícanhii, te ni vã dáyehé-gá yóó, te ngoyo nchaa chódini ndéé andiu, te quidi-xi andiu

30 nàcuáa cutnuni iní ñáyiu sã sã véxi yúhú Té cùu ñani tnáhã-yu nchaá-yu. Te cue ñáyiu nihí ñuyú ndähý-yu sã ndihú iní-yu oré ducaⁿ cãda-xi, te nchaá-yu quini ñáhã-yu xii-í quee-í andiu quixi-í ichi xití vícò, te quini-yu sã ïo cahnu cuu-í, te quide-í nchaa sã vãha.

31 Te tauchiuⁿ-í cue espíritu xínú cuèchi núu-í nihí tiú-xi cutú nadatãcã-xi nchaa ñáyiu ní cãháⁿ-í chitnahá ñáhã xii-í xindecu ni cãa xico ñuyú.

32 Te nchòhó sã xini-ndó nàcuáa quide yutnu ngúxi, chi yutnu-ãⁿ ndúú yùte núu dité-xi te sátáhú ndaha-xi. Te oré ducaⁿ quide-xi te cãchí-ndó sã sã ni cuyatni nuu cahni.

33 Te diu-ni ducaⁿ sãtnahã-xi cada-xi ñuyú-a oré ná quini-ndó cãda-xi nchaa nacuáa ní cãháⁿ-í, te cutnuni iní-ndó sã sã ní cuyatni vii-nã nduu nãa ñuyú.

34 Te na cãchí tnúhu ndáá-í xii-ndo sã oré vátã cùu-gá nchaa ñáyiu xindecu ñuyú-a vitna, te cada-xi nchaa nàcuáa ní cãháⁿ-í.

35 Te andiu ndihi ñuyú-a chi ndihi nihnu-xi, dico tnúhu-í chi vã ndihí nihnu-xi chi cùu-xi tnúhu ndáá cuií.

36 Dico ñá túú cutnuni ná nduu quixi tucu-í, te ni ñá túú cutnuni ná oré chi vã yõ xini, te ni cuè espíritu xínú cuèchi núú Yá Ndiöxi ñá túú xini-xi ná nduu quixi-í, te ni mèe yúhú Té cùu Déhe Dútú Ndiöxi ñá túú xini-í ná nduu quixi tucu-í, chi ñⁿdií dúi-ni mee-gã xini-gã núu ná nduu quixi-í.

37 Te nduu na quixi tucu yúhú Té cùu ñani tnáhá-ndó nchaa-ndo ñuyú-a te cada-xi dátñá ní quide-xi cutnãhá ní xindecu ndí Nõé.

38 Chi nchaa ñáyiu ní xindecu dává-ãⁿ oré vátã ndáá-gã ndute ñuyú, te xéxi-yu xihí-yu quidé-yu, te davá-yu ió-yu vico tnãndaha, te davá-yu dásãⁿ-yu déhe yócó-yu candeca ñaha tée, te ducaⁿ-ni xiquidé-yu ndéé ní sãá nduu cuãnguee té Nõé xití bàrcú.

39 Te ñá túú ní cutnuni iní-yu nàcuáa cada-xi ñuyú ndéé ní sãá nduu ñi ngúita-xi ní cuuⁿ dáú ñi ndaa ndute ñuyú ñi dánáá ñaha-xi xii-yu. Te diu-ni

ducaⁿ sãtnahá tucu-xi cada-xi nduu na quixi tucu yúhú Tée cùu ñaní tnáhã-yu nchaá-yu ñuyú-a, chi nduu ñà túú nã yíhí ìní-yu te quixi tucu-í.

40 Te dàvá-án nũu úú tnàhá cue tée yíhi-güedé xití yucu, te ìⁿ-dé ndanchita te ìⁿ-dé quendóo.

41 Àdi úú ñáyiu ãíhí nchícõ-yu ìⁿ-ni vehe, te ìⁿ-yu ndanchita te ìⁿ-yu quendóo.

42 Te duha nduu tnúhu càháⁿ-í cuendá nchòhó cundecu túha-ndo, chi ñá túú xini-ndó nã òré quixi tucu yúhú Yaá cúú Xitohó-ndó.

43 Te nchòhó xini-ndó sã nũu ìⁿ tée cùu xitohó vehe xini-dé ná òré cúú-xí niú quíhu ñadúhú vehe-dé duhu-güedé, te quíhi ìní-dé cundecu-dé cuendá sã vã dáñá-dé quíhu ñadúhú-ãⁿ vehe-dé duhu-güedé, dico ñá túú xini-dé.

44 Te duha càháⁿ-í chí nchòhó xini ñũhu-xi cundecu túha-ndo, chi na cuáhãⁿ òré ñá túú nã yíhí ìní-ndó quèxio yúhú Tée cùu ñaní tnáhã-ndó nchãa-ndo.

Cuendá ìⁿ tée xinu cuechi (Lc. 12:41-48)

45 Te na càni-í ìⁿ cuendú núú-ndó. ìⁿ tée xinu cuechi núú ìⁿ patróóⁿ cúú-dé ìⁿ tée ío váha tecú tnùní, te quide ndáá-dé ndécú-dé. Te ìⁿ xito ní dándõ ndaha ñaha patróóⁿ-dè xii-dé nchaa cue ñáyiu ndècu vehe-dé cuendá coto ñaha-dé xii-yu cuáñaha-dè sã caxí-yu òré tàú-xi caxí-yu, te tée cùu patróóⁿ-án ñí quee-dé cuáhãⁿ-dé.

46 Te váha táhú tée xinu cuechi-án te núu ndècuu-dé quidé-dé nchaa nàcuáa ní xáhaⁿ patróóⁿ-dè cada-dé mei òré ní nasáá patróóⁿ-dè-án.

47 Te na càchí tnúhu ndáá-í xii-ndo sã tée cùu patróóⁿ-dè-án cũñaha-dè xii-dé sã quíndaha-dé nchaa sã ndécú ndíhi-dé.

48 Dico núu tée xinu cuechi-án ní cùu-dé ìⁿ tée cuihna ìní-xi, te ngóo-dé cani ìní-dé sã cùyaa patróóⁿ-dè vá nasáa ndíhi-dé.

49 Te ngúita-dé cani-dé nchaa dava-gá cue ñáyiu xinu cuechi ndíhi-dé, te ngóo-dé caxi-dé coho-dé cada-dé ndíhi nchaa cue tée quíhu.

50 Te ìⁿ nduu òré ñá túú yíhi ìní-dé nasáá patróóⁿ-dè,

51 te ío dandòho ñaha patróóⁿ-dè xii-dé, chí daquihíⁿ ñáhã-dè xii-dé núu xĩndecu cue ñáyiu ní cachí sã ñí quide ndáá te ñá ndàá sã ñí quide ndáá-yu. Te ducaⁿ sãtnahá-xi dandòho ñaha Yá Ndiõxí xii ñáyiu, chí daquihíⁿ ñáhã-gã xii-yu ìⁿ xichi núú ío ndohó-yu te yàcáⁿ ío ndáhyú-yu, te dico rúhñú-nã cuu núhu-yu sã sãtú ìní-yu sã ndóhó-yu —càchí-gá xáhaⁿ-gã xii-güedé.

25

Cuendá úxí ñáyiu ãíhí

1 Te xáhaⁿ tucu Jesús xii-güedé:

—Na càni-í ìⁿ cuendú núú-ndó nàcuáa tecú tnùní-ndó nàcuáa cada-xi òré ndíhu ndaha ñaha Yá Ndiõxí xii ñáyiu. Te úxí tnàhá ñáyiu ãíhí ñáyiu cuechi ñí quehéⁿ-yu lintéñã-yu, te cuáhãⁿ-yu ìⁿ xichi núú cóó vico tnándaha cuendá cundetú-yu quèxio tée tnándaha.

2 Te úhúⁿ ñáyiu cuechi-ãⁿ ío váha cùtnuní ìní-yu, te úhúⁿ-yu ñáhã.

3 Te ndí úhúⁿ ñáyiu cuechi dùcaⁿ ñá túú cùtnuní ìní-xi-án ñá túú ní cãnehé-yu sã ndèe lintéñã-yu.

4 Dico ndí úhúⁿ ñáyiu cuechi cùtnuní ìní-xi-án nêhé-yu sã ndèe lintéñã-yu.

5 Te tée tnándaha-án cùyàa-dé quexìo-dé núú ndétú ñàhá-yu-án, te nini dùcaⁿ cuyaa-dé ní tñi ñaha sàní xií-yu ní xidí-yu.

6 Te cùu-xi datná dava niú nihi ní cáháⁿ dava-gá ñáyi^u, te càchí-yu: “Sa véxi tée tnándaha, chí táquèe quehé queheⁿ cuendá-ndó-dě”, càchí-yu.

7 Te ndi ùxi ñáyi^u cuechi-án ní ndacóo-yu quide túha-yu lintérná-yu.

8 Te ndi ùhúⁿ ñáyi^u cuechi ñà túú cùtnuní iní-xi-án ní xáhãⁿ-yu xii cue ndi ùhúⁿ ñáyi^u cùtnuní iní-xi-án: “Chí táxi núu luha sá ndèe lintérná-ndó ná ndèe lintérná-ndí chí ñà cùni-xi cáyú mee-ni ndàhvá”, càchí-yu xáhãⁿ-yu.

9 Te cue ñáyi^u cuechi cùtnuní iní-xi-án ní xáhãⁿ-yu: “Vá táxi núu-ndí chí vá tnàhá canehe chiúⁿ mee-ndí, te váha-gá chí cuáháⁿ cuaaⁿ-ndo núú cuè ñáyi^u xidícó cuendá sá vã cùmáni xii-ndo, te vá cùmáni xii nchúhú tucu”, càchí-yu xáhãⁿ-yu.

10 Te nini cuáháⁿ ndi ùhúⁿ ñáyi^u ducaⁿ ñà túú cùtnuní iní-xi-án cuànguaáⁿ-yu sá ndèe lintérná-yu ní quexìo tée tnándaha. Te ndi ùhúⁿ ñáyi^u cuechi cùtnuní iní-xi-án ní queheⁿ cuendá ñáhãⁿ-yu xii-dé, te cuànguihu ndihi ñàhá-yu xii-dé núú cóó víco tnándaha, te sátá dúcáⁿ te ní nandedí yuyèhe.

11 Te òrè ní nasáá cue ñáyi^u cuechi ñáyi^u ní sánguuaⁿ sá ndèe lintérná-xi-án, te ní ngúíta-yu càháⁿ-yu xñutnñi-yu ndàa sátá yuyèhe ndaa quehé, te xáhãⁿ-yu xii tée tnándaha-án: “¡Tàta, nacaáⁿ yuyèhe na quíhu-ndí!”, càchí-yu xáhãⁿ-yu xii-dé.

12 Te tée tnándaha-án ní xáhaⁿ-dě xii-yu: “Na càchí tnúhu ndáá-í xii-ndo sã nchòhò ñà túú tàú-ndó quíhu-ndo víco-a, chí ñà túú tnàhá tnúhu ndihi ñaha-ndo xii-í”, càchí-dé xáhãⁿ-dě xii-yu —càchí Jèsús xáhaⁿ-gã xii-güedé.

13 Te xáhaⁿ tucu Jèsús xii-güedé:

—Ío quihi iní-ndó cùndecu-ndo, chí ñà túú xini-ndó nã nduu, te ni ñà túú xini-ndó nã òrè quixi tucu yúhú Tée cùu ñani tnàhá-ndó nchàa-ndo —cachí-gá xáhaⁿ-gã xii-güedé.

Cuendá cue tée ní ndóo ndaha dñhúⁿ
(Lc. 19:11-27)

14 Te xáhaⁿ tucu Jèsús xii-güedé:

—Na càni tucu-í ingá cuendú núú-ndó nàcuáa tecú tnùní-ndó nàcuáa cada-xi òrè ndíhu ndaha ñaha Yá Ndióxi xii ñáyi^u. Hⁿ tée sa ñúhu ichi-ná-dé sá cacadě quíngaca cuu xica-dě, te ní cana-dé cue tée xinu cuechi núú-dě cuendá dandóo ndaha ñaha-dé dñhúⁿ-dě xii-güedé.

15 Te nàcuáa nduu chiuⁿ quide hⁿ hⁿ-güedé te ducaⁿ dñhúⁿ ní sáñaha-dě xii-güedé, te hⁿ-dé ní sáñaha-dě úhúⁿ tnàhá dñhúⁿ sã ïo yahu nani talentú, te ingá-dé ní sáñaha-dě úú tnàhá dñhúⁿ-án, te ingá-dé ní sáñaha-dě hⁿ dñhúⁿ-án, te dñtñuní ní quee-dé cuáháⁿ-dé.

16 Te tée ní queheⁿ cuendá úhúⁿ tnàhá dñhúⁿ sã nání talentú ní quide-dé ndáhú ndihi-xi te ní níhí tucu-dé úhúⁿ-gá tucu tnàhá dñhúⁿ-án.

17 Te dñu-ni ducaⁿ ní quide tucu tée ní níhí úú dñhúⁿ sã nání talentú-án, chí ní quide-dé ndáhú te ní níhí tucu-dé úú-gá tucu tnàhá.

18 Dico tée ní níhí hⁿ-ni dñhúⁿ-án chí da ní chiváha-dé dñhúⁿ patróón-dě, chí ní xete-dé hⁿ yaú te ní chindúxi-dé.

19 Te ní cuu cuéhé nduu sá ní quee patróón-güedé-án ní sángaca cuu-dé, te ní nasáá-dé te ní ngúíta-dé quidé ndáá-dé ndihi-güedé cuendá dñhúⁿ sã ní dándõ ndaha ñaha-dé xii-güedé.

20 Te téé ní quendóo ndaha úhúⁿ tnàhá díhúⁿ-áⁿ ní xáhaⁿ-dê xii pàtróóⁿ-dê: “Pàtróóⁿ, náú úhúⁿ tnàhá díhúⁿ sã ní dándóo ndaha ñàha-n xii-í-a, te ní sáháⁿ-í ní quide-í ndihi-xi ndáhú te ní chídó-xí úhúⁿ-gá tucu tnàhá, te náú-a naqueheⁿ cuendá-n”, cächí-dé xáhaⁿ-dê xii pàtróóⁿ-dê.

21 Te téé cùu patróóⁿ-dê-áⁿ ní xáhaⁿ-dê xii-dé: “Ío váha ní quide-n, te vitna quide ñàha-í xii-n ñⁿ téé váha téé quide ndáá, te sá sácú díhúⁿ ní dándóo ndaha ñàha-í xii-n te ní quide ndáá-n, te sá dúcáⁿ ní quide-n te vài-gá taxi cuendá ñàhá-í xii-n. Te vitna cuu cundecu-n núú ndécù-í, te ío cudíí ìní-ó cundecu ndihi tnaha-o”, cachí téé cùu patróóⁿ-dê-áⁿ xáhaⁿ-dê xii-dé.

22 Te sátá dúcáⁿ te téé ní quendóo ndaha úú tnàhá díhúⁿ sã nání tàlentú-áⁿ ní xáhaⁿ-dê xii pàtróóⁿ-güedé: “Pàtróóⁿ, náú úú tnàhá díhúⁿ sã ní dándóo ndaha ñàha-n-a, te ní sáháⁿ-í ní quide-í ndihi-xi ndáhú, te ní chídó-xí úú-gá tucu tnàhá, te náú-a naqueheⁿ cuendá-n”, cächí-dé xáhaⁿ-dê xii pàtróóⁿ-güedé.

23 Te ní xáhaⁿ téé cùu patróóⁿ-áⁿ xii-dé: “Ío váha ní quide-n, te vitna quide ñàha-í xii-n ñⁿ téé váha téé quide ndáá, te sá sácú díhúⁿ ní dándóo ndaha ñàha-í xii-n te ní quide ndáá-n, te sá dúcáⁿ ní quide-n te vài-gá taxi cuendá-í. Te vitna cuu cundecu-n núú ndécù-í, te ío cudíí ìní-ó cundecu ndihi tnaha-o”, cachí téé cùu patróóⁿ-áⁿ xáhaⁿ-dê xii-dé.

24 Te téé ní ndóo ndaha ñⁿ-ni díhúⁿ-áⁿ ní xáhaⁿ-dê xii téé cùu patróóⁿ-dê-áⁿ: “Pàtróóⁿ, yúhú sa ñàha-í sá yòhó cúú-n ñⁿ téé ndücu mee-ni sá cúú-xí mèe-xi te tàhu-n chiuⁿ cuáháⁿ nchúhú cue téé xínu cuechi núú-n sácáⁿ-ndí triù, te òré ná nàtaxi tnaha-ndí, te yòhó dícó-nã náqueheⁿ cuendá-n tàxúha-n.

25 Te núú xíáⁿ ní yúhú-í cada-í ndáhú ndihi díhúⁿ-n, te ní sáháⁿ-í ní xete-í ñⁿ yaú te ní chindúxi-í, te náú díhúⁿ-n-áⁿ naqueheⁿ cuendá-n”, cächí-dé xáhaⁿ-dê xii téé cùu patróóⁿ-áⁿ.

26 Te téé cùu patróóⁿ-áⁿ ní xáhaⁿ-dê: “Yòhó cúú-n ñⁿ téé cuihna ìní-xi xínu cuechi núú-í te cuhndu-n, te núú yòhó sání ìní-n sã cúú-í ñⁿ téé tàuchiuⁿ cuáháⁿ-ndó sácáⁿ-ndó triù te òré nàtaxi tnaha-ndo, te yúhú dícó-nã náqueheⁿ cuendá-í nàtaxúha-í.

27 Te núú sàni ìní-n sã dúcáⁿ quide-í, te dasaⁿ núu-n díhúⁿ-í te cúñaha-n chàhu-yu díquí-xi ni cùu, te òré ndexìo-í te sa ngódó lùha-gá díquí-xi naqueheⁿ-í ní cùu”, cachí-dé xáhaⁿ-dê xii téé xínu cuechi-áⁿ.

28 Te téé cùu patróóⁿ-áⁿ ní xáhaⁿ-dê xii dava-gá cue téé ndècu ndihi-dé: “Chí quéndéé ñⁿ díhúⁿ sã nání tàlentú néhé tée-áⁿ, te cuáha-ndo tée nèhe úxí tnàhá díu-ni díhúⁿ-áⁿ.

29 Chí cue téé sa ndècu ndihi te níhí-gã-güedé cundecu ndihi-güedé, te ni vã níhí-gã-güedé ndèé cundecu nchaa sá cündècu ndihi-güedé. Te cue téé ñã túú ná ndécú ndihi vai, te nchaa sá ndécú ndihi-güedé vá cündècu ndihi-gã-güedé.

30 Te téé xínu cuechi ñã túú vèdana nàndíhi-áⁿ, chí tñíⁿ-dê te daquìⁿ-ndó-dê ñⁿ xichi núú néé núú ío ndoho-dé, te yàcáⁿ ndáhyú-dé, te dícó rúhñú-nã cuu núhu-dé sá sàtú ìní-dé sá ndóhó-dé”, cächí téé cùu patróóⁿ-áⁿ xáhaⁿ-dê xii-güedé. Duha sàtnahá-xi ndoho nchaa ñáyiu ñã túú quide váha –cächí-gá xáhaⁿ-gã xii-güedé.

Cuendá cue ñáyiu ní quide váha ndihi cuendá cue ñáyiu ñã túú ní quide váha

31 Te xáhaⁿ tucu Jesús xii-güedé:

–Te nduu na quixi tucu yúhú Téé cùu ñání tnàhá-ndó nchaa-ndo, te quixi-í ndihi nchaa cue espíritu xínú cuèchi núú-í, te nchaa ñáyiu quini-yu sá ío càhmu

cuu-í, te dàvá-áⁿ cunucóo-í núú táxí tñuní-í, te ío cuñúhu ñáyiú sá ïo càhnu cuu-í.

32 Te dàvá-áⁿ nataká nchaa ñáyiú xĩndecu ní càa xico ñuyú cundecú-yu núú-í, te cada-í-yu dàtná quidé ìⁿ toli oré táú ðìⁿ-dé nchaa mbéé ndìhi nchaa chivá chi ðìⁿ taxi ndecu-dé nchaa mbéé, te ðìⁿ taxi ndecu-dé nchaa chivá.

33 Te ducaⁿ sátnahá-xi cada-í chi nchaa ñáyiú ní quide ndáá núú-í ñáyiú-áⁿ taxi ndecu-í-yu xio cuha-í, te nchaa ñáyiú cuihna ìni-xi ñá túú ní cuini cada ndáá núú-í ñáyiú-áⁿ taxi ndecu-í-yu xio dàtni-í.

34 Te ducaⁿ te yúhú téé ío cùnnu cúñaha-í xii ñáyiú na cùndecu xio cuha-í: “Nchaa nchòhó ñáyiú ní quide váha ñaha Tătà-í Dútú Ndiöxí, chí nèhé chi vitna ní sáá nduu cùndecu-ndo núú ndécú-gã táxí tñuní-gá, chí ndéé cùtnahá ní ngáva ñuyú sa ndècu túha tñáhi núú ndécú-gã-áⁿ sá nchòhó nduu táhú-ndó cùndecu-ndo.

35 Te ducaⁿ chi òré xihí-í docó te ní taxi-ndo sá ní xexi-í, te òré yìchí-í ndute te ní taxi-ndo ndute ní xihí-í, te òré ñùhú-í ichi te ní taxi-ndo vehe ní ndetatú-í.

36 Te òré xíní ñùhu-í dóo cuihnu-í te ní taxi-ndo, te òré ní cuhú-í te ní quixi coto ñaha-ndo xii-í, te òré ní xihí-í vecaá te ní quixi tucu-ndo ní quixi coto ñaha-ndo xii-í”, duha cúñaha-í xii nchaa ñáyiú-áⁿ.

37 Te nchaa ñáyiú ducaⁿ ní quide ndáá-áⁿ cùñahá-yu xii-í: “Yòhó Yaá cúú Xìtohó-ndí, ní ìⁿ xito ñá túú ní tàxi-ndí sá cáxi-n òré xihí-n ðòcò, te ní ìⁿ xito ñá túú ní tàxi-ndí ndute coho-n òré yìchí-n.

38 Te ní ñá túú ní tàxi-ndí vehe ndetatú-n òré ñùhú-n ichi, te ní ñá túú ní tàxi-ndí dóo cuihnu-n òré xíní ñùhu-n.

39 Te ní ñá túú ní quixi coto ñaha-ndí xii-n òré ní cuhú-n, te ní ñá túú ní quixi coto ñaha-ndí xii-n òré ní xihí-n vecaá”, duha quesahá-yu cúñahá-yu xii-í.

40 Te yúhú téé cùnnu cúñaha-í xii-yu: “Na càchi tñuhu ndáá-í xii-ndo sá ncháá sá váha ní quide-ndo sá cúú-xí nchaa ñáyiú xĩndecu ichi-í cuéi ío ndáhú xĩndáa-yu, te sá dúcáⁿ ní quide-ndo sá váha sá cúú-xi-yu, te cada iní-ndó sá mèe-í ducaⁿ ní quide-ndo ní xito ñaha-ndo xii-í”, duha cúñaha-í xii-yu.

41 Te dàtnuní cúñaha-í xii ñáyiú na cùndecu xio datni-í: “Nchaa nchòhó ñáyiú ní xita nihnu chí xocuiñí núú ndécú-í-a, chí nchòhó ní nduu táhú-ndó cùndecu-ndo núú ñùhú núú càyú, ðiu-ni núú ní quide túha-í cundecu sácuñhá ndìhi nchaa espíritú cùndìhi-xi, te yàcáⁿ cundecu-ndo ní caa ní quíhíⁿ.

42 Chi yúhú òré xihí-í docó te ñá túú ní tàxi-ndo sá cáxi-í, te ní òré yìchí-í ndute te ñá túú ní tàxi-ndo ndute coho-í.

43 Te ní òré ní xúhuⁿ-í ichi ñá túú ní tàxi-ndo vehe ndetatú-í, te ní òré xíní ñùhu-í dóo cuihnu-í te ñá túú ní tàxi-ndo, te ní òré ní cuhú-í te ñá túú ní quixi-ndo quixi coto ñaha-ndo xii-í, te ní òré ní xihí-í vecaá te ðiu-ni ducaⁿ ní quide-ndo ñá túú ní quixi-ndo quixi coto ñaha-ndo xii-í”, duha cúñaha-í xii-yu.

44 Te ñáyiú-áⁿ cùñahá-yu xii-í: “Yòhó Yaá cúú Xìtohó-ndí ní ìⁿ xito ñá túú ní xini-ndí òré xihí-n ðòcò cuendá taxi-ndí sá cáxi-n, te ní ìⁿ xito ñá túú ní xini-ndí òré yìchí-n ndute cuendá taxi-ndí ndute coho-n, te ní ìⁿ xito ñá túú ní xini-ndí cuhuⁿ-n ichi cuendá taxi-ndí vehe ndetatú-n, te ní ìⁿ xito ñá túú ní xini-ndí òré xíní ñùhu-n dóo cuendá taxi-ndí dóo cuihnu-n, te ní ìⁿ xito ñá túú ní xini-ndí òré cuhú-n cuendá quixi coto ñaha-ndí xii-n, te ní ìⁿ xito ñá túú

ní xìní-ndí quihí-n vècaá cuendá quixi coto ñaha-ndí xii-n", duha quesàhá-yu cúñahá-yu xii-í.

⁴⁵ Te yúhú cúñaha-í xii-yu: "Na càchí tnúhu ndáá-í xii-ndo sã sã cuendá sã ñà túú ní quide-ndo ìñ sã vãha sã cúú-xí cuè ñáyiu ndècu ichi-í cuèí ío ndàhú xindáa-yu, te sã dúcáñ nĩ quide-ndo ñà túú ní quide-ndo sã vãha sã cúú-xí-yu, te cada iní-ndó sã mée-í ducañ nĩ quide-ndo ñà túú ní quide-ndo sã vãha sã cúú-xí-í", duha cúñaha-í xii-yu.

⁴⁶ Te nchaa ñáyiu-án quihíñ-yu núú ùhú núú ndàhú ñi caa ñi quihíñ. Te nchaa ñáyiu ní quide ndáá núú-í ní xindecu ñuyú-a, ñáyiu-án nduu táhú-yu ío vãha cundecú-yu ñi caa ñi quihíñ —càchí-gá xãhañ-gã xii-güedé.

26

Cue tée cùu úhú iní ñáhá xii Jesús ndúcu-güedé nàcuáa cada-güedé tñi ñaha-güedé xii-gá

(Mr. 14:1-2; Lc. 22:1-2; Jn. 11:45-53)

¹ Te sátá ní yáha ducañ nĩ cáháñ Jesús, te ní xáhañ-gã xii cue tée xica cuu ndihí-gá:

² —Nchòhò sa xìní-ndó sã cùmání úú-gá nduu te coo vico pàscuá, te càchí tnúhu-í xii-ndo sã yúhú Tée cùu ñaní tnáhá-ndó nchaa-ndo tñi ñaha-güedé xii-í, te cuáha cuendá ñáhá-güedé núú cuè tée cùu úhú iní ñáhá xii-í, te cata caa ñaha-güedé núú cùrúxí te núú cùrúxí-án cuú-í —càchí-gá xãhañ-gã xii-güedé.

³ Te ñiu-ñi òré càháñ ndihí Jesús cue tée xica cuu ndihí-gá ní natacá cue tée cùu dútú cùnù, ndihí cue tée dàcuaha ñaha xii ñáyiu nchaa tnúhu ní chídó tnùnì ndíi Moisés, ndihí cue tée cùu sacuéhé núú ñáyiu isràèl. Te mei quèhé vehe núú cúú vèchiuñ té Caifás tée cùu dútú ño-gá cùnù ní natacá-güedé.

⁴ Te xíáñ nĩ ndatnúhu-güedé nàcuáa cada-güedé dandàhú-güedé Jesús cuendá tñi ñaha-güedé xii-gá, te cahni ñaha-güedé.

⁵ Te ní xítñaha-güedé:

—Vãha-gá sã vã tñí-ó Jesús mei ndùu vico, chi núu ducañ na càda-o te ío dusañ càda ñáyiu —càchí-güedé xítñaha-güedé.

Íñ ñadhí chíhí-án àcítí díquí Jesús

(Mr. 14:3-9; Jn. 12:1-8)

⁶ Te ndècu Jesús ñuú Bètaniá vehe ìñ tée nàni Xímú, tée ní tnahá cuéhé sã dátèhyú nihnu-xi yiqui cùñú-ó.

⁷ Te xíáñ ndécú-gã ní quexìo ìñ ñadhí néhé-án ìñ sã nĩ cuáha yúú vãha nàni alabastrú, te xítí xíáñ ñúhú àcítí sáháñ tnámí sã ño ndèyáhu. Te yihí Jesús mèsá xéxí-gã, te ñaha-án nĩ sáháñ-añ ní sódó-án àcítí ñúhú xítí xíáñ díquí-gã.

⁸ Te òré ní xìní cue tée xica cuu ndihí Jesús sã dúcáñ nĩ quide ñaha-án te ní cudééñ-güedé, te ní ngúita-güedé xítñaha-güedé:

—Ñà túú quide vãha ñaha-án dàcáñ quidé-án dacuíta-añ acítí-ãñ.

⁹ Chi vãha-gá núu cuyáhu acítí-ãñ ní cùu chi ío ndèyáhu, te díhúñ cuyáhu acítí-ãñ cuu cuendá cue ñáyiu ndàhú ní cùu —cachí-güedé xítñaha-güedé.

¹⁰ Te Jesús ní cutnùnì iní-gá nàcuáa ndùu tnúhu xítñaha-güedé, núu ní xáhañ-gã xii-güedé:

—Vá dásatú-ndó iní ñadhí-a, chi sã nĩ quide ñaha-añ xii-í cúú-xí ìñ sã vãha.

¹¹ Chi cue ñáyiu ndàhú ducañ-ñi cùtnahá ñáyiu-án tnuú-ndó, dico yúhú chi vá ncháá ndùu cundecu ndihí ñaha-í xii-ndo ñuyú-a.

12 Te sá dúhá nǐ quide ñaha ñàdihí-a xii-í ní sódó-aⁿ àcítí díquì-í, te xíãⁿ cada iní-ndó sá sà quide túha-aⁿ yiqui cùñú-í cuèndá nguíndũxi-xi.

13 Te na càchí tnúhu ndáá-í xii-ndo sá ndèni ní cuu ñihí ñuyúú ná càháⁿ ñáyiu tnúhu-í, te càháⁿ-yu tnàhá cuèndá ñadihí-a cuèndá quini nchaa ñáyiu nàcuáa ní quide-aⁿ te ducaⁿ vâ nàcuànaá-yu —càchí-gá xâhaⁿ-gã xii-güedé.

Té Júdás ndúcú-dé nàcuáa cada-dé cuáha cuèndá-dé Jèsús núú cuè tée cùu úhú iní ñáhá xii-gá

(Mr. 14:10-11; Lc. 22:3-6)

14 Te sáta dúcáⁿ te té Júdás Iscarioté ní sáháⁿ-dé ní ndatnúhu-dé ndihi cue tée cùu dútú cùnùu. Te núú tnàhá té Júdás-áⁿ cúú ùxúú cue tée xica cuu ndihi Jèsús.

15 Te ní xâhaⁿ-dê xii cue tée cùu dútú cùnùu-áⁿ:

—¿Ndédau cháhu ñaha-ndo xii-í te taxi cuèndá-í Jèsús xii-ndo-i? —càchí-dé xâhaⁿ-dê xii-güedé.

Te cue dútú-áⁿ nǐ xâhaⁿ-güedé xii-dé sá cuãñaha-güedé ócú úxí díhúⁿ cuixíⁿ, te ñiu-ni ducaⁿ nǐ sãñaha-güedé xii-dé.

16 Te ndéé òré ní queheⁿ cuèndá té Júdás-áⁿ díhúⁿ, te ní ngúita-dé ndúcú-dé nàcuáa cada-dé cuáha cuèndá-dé Jèsús núú-güedé.

Cudini Jèsús ndihi cue tée xica cuu ndihi-gá

(Mr. 14:12-25; Lc. 22:7-23; Jn. 13:21-30; 1 Co. 11:23-26)

17 Te ní sáá nduu nǐ quesaha víco xexi ñáyiu pàá sá ñà túú yìhi levadurá ñiu-ni víco pàscuá, te cue tée xica cuu ndihi Jèsús ní sãndehe yatni-güedé ñiñi-gá, te xâhaⁿ-güedé xii-gá:

—Mèstrú, véxi-ndí xicáⁿ tnúhú-ndí núú-n nũ ndèé cuini-n càda túha-ndí cuèndá cudini-o sacuaa nduu víco pascuá —càchí-güedé xâhaⁿ-güedé xii-gá.

18 Te Jèsús ní xâhaⁿ-gã xii-güedé:

—Chí cuaháⁿ xití ñuú-ãⁿ, te yacáⁿ nanihí-ndó ñⁿ tée cùtnuní iní-ndó sá sà xiní ñáhá-dê xii-o, te cúñaha-ndo xii-dé: “Yáá cúú Mèstrú càchí-gá sá sà ní cuyatni nduu vâ cùndècu-gá ñuyúú-a, te vehe-n cuini-gá cada-gá víco pàscuá ndihi cue tée xica cuu ndihi-gá”, duha cúñaha-ndo xii téé-áⁿ —càchí-gá xâhaⁿ-gã xii-güedé.

19 Te cue tée xica cuu ndihi-gá-áⁿ nǐ xica-güedé cuaháⁿ-güedé, te ní quide-güedé nàcuáa ní xâhaⁿ-gã xii-güedé, te ní quide túha-güedé sá cudini-güedé ndihi-gá sacuaa nduu víco pascuá-áⁿ.

20 Te óré sa ní cundiquiⁿ te ndánguïhu Jèsús ndihi ndi ùxúú cue tée xica cuu ndihi-gá mèsá cuèndá cudini-gá ndihi-güedé.

21 Te ñini xèxi-gá ndihi-güedé ní xâhaⁿ-gã xii-güedé:

—Na càchí tnúhu ndáá-í xii-ndo sá díú ñⁿ nchohó cue tée xica cuu ndihi-í cuáha cuèndá ñáhá-ndó xii-í núú cuè tée cùu úhú iní ñáhá —càchí-gá xâhaⁿ-gã xii-güedé.

22 Te sá dúcáⁿ nǐ xâhaⁿ-gã xii-güedé te nchaa-güedé ní ngúita-güedé cùndiyí-güedé, te da ñⁿ da ñⁿ-güedé ní ngúita-güedé xâhaⁿ-güedé xii-gá:

—Mèstrú, ¿ñá díú yúhú ducaⁿ sàni iní-n càda-í-u? —càchí-güedé xâhaⁿ-güedé xii-gá.

23 Te ní xâhaⁿ-gã xii-güedé:

—Téé nacaxi ndihi-í ñⁿ-ni cóhó caxi-ndí, téé-áⁿ cuáha cuèndá ñáhá-dê xii-í núú cuè tée cùu úhú iní ñáhá.

24 Te yúhú Tée cùu ñani tnáhá-ndó nchàa-ndo ñuhu ichi-í cuáháⁿ-í yáha-í nàcuáa càháⁿ-xi núú tütú Yá Ndiöxí, dico ndàhú ní cuu tée ducaⁿ na cuáha cuèndá ñáhá xii-í núú cuè tée cùu úhú iní ñáhá, chí váha-gá sá vâ cáci tée-áⁿ cundecu-dé ní cùu, te ñá díú sá ñí cacu-dé te ducaⁿ càda-dé —càchí-gá xáhaⁿ-gã xii-güedé.

25 Te sáta dúcáⁿ te ní cáháⁿ té Jüdás tée cuáha cuèndá ñáhá xii-gá, te xáhaⁿ-dë: —Mëstrú, ¿te náa sàni iní-n sá yúhú cuáha cuèndá ñáhá-í xii-n núú cuè tée cùu úhú iní ñáhá xii-n-áⁿ? —càchí-dé xáhaⁿ-dë xii-gá.

Te Jèsús ní xáhaⁿ-gã xii-dé:

—Diu-n —càchí-gá xáhaⁿ-gã xii-dé.

26 Te ñini cùdini cue tée xica cuu ndihí Jesús ní queheⁿ-gá pàá, te ní ndacáⁿ táhú-gá núú Yá Ndiöxí, te dàtnùni ní táhú cuèchi-gá te ní nguíta-gá dácàhñu-gá cue tée xica cuu ndihí-gá-áⁿ, te xáhaⁿ-gã xii-güedé:

—Chí quéhéⁿ pàá-a caxi-ndo, te cada iní-ndó sá yiqui cuñú-í cúú-xí —càchí-gá xáhaⁿ-gã xii-güedé.

27 Te ní queheⁿ-gá vàsú ñhú ndùdí ndéhé yoho yàha stilé, te ní ndacáⁿ táhú-gá núú Yá Ndiöxí, te dàtnùni ní nguíta-gá sãñaha-gã xii-güedé cuèndá coho-güedé luha luha sá ñhú xití-xi, te xáhaⁿ-gã xii-güedé:

—Chí cóhó nchaa nchohó ndudí ndéhé yoho yàha stilé ñhú xití vàsú-a.

28 Te cada iní-ndó sá cúú-xí dàtná ñíñi-í sá cáci òré cahni ñaha-güedé xii-í, te sá dúcáⁿ cáci ñíñi-í xiáⁿ cutnùni ndáá sá Yá Ndiöxí cada-gá ingá núú sá váha sá cúú-xí vâi ñáyiu dàtná ní cachí-gá cada-gá, te ío vâi ñáyiu cada càhnu iní-gá cuèchi-yu.

29 Te na càchí tnúhu-í xii-ndo sá vítná-nã duha xihí ndihí ñaha-í xii-ndo ndùdí ndéhé yoho yàha stilé-a, te vá cóhó ndihí ñaha-gá-í xii-ndo, dico na sàá nduu nanihí tnáhá-ó núú ndécú Tãtà-í Dútú Ndiöxí táxi tnùni-gá te dàvá-áⁿ cada iní-ndó sá dàtná sá cóhó ndihí ñaha tucu-í xii-ndo chí ío cudí iní-ó —càchí-gá xáhaⁿ-gã xii-güedé.

Té Pelú cùñaha-dë xii ñáyiu sá ñà túú xini-dé Jèsús

(Mr. 14:26-31; Lc. 22:31-34; Jn. 13:36-38)

30 Te Jèsús ní xita-gá ñⁿ ndudú ndihí cue tée xica cuu ndihí-gá, te dàtnùni ní xica-gá cuáháⁿ-gá ndihí-güedé yucu Òlívú.

31 Te yacáⁿ ní xáhaⁿ-gã xii-güedé:

—Na càchí tnúhu-í xii-ndo sá ncháá-ndó dándóo ñaha-ndo xii-í niú vitna, chí quee ndáá-xi nàcuáa càháⁿ-xi núú tütú Yá Ndiöxí núú càchí-xi: “Yúhú cuáha-í tnúhu cahni-güedé tée cùu toli, te nchaa mbëé-dé ndihí-güedi cuténuu”, duha càchí-xi núú tütú-gá.

32 Dico na ndòto-í te codonùu-í núú-ndó quíhíⁿ distritú Galileá —càchí-gá xáhaⁿ-gã xii-güedé.

33 Te té Pelú ní xáhaⁿ-dë xii-gá:

—Te cuèi nchaa-güedé ná dándóo ñaha-güedé xii-n, dico yúhú chí vá dándóo ñaha-í xii-n —càchí-dé xáhaⁿ-dë xii-gá.

34 Te Jèsús ní xáhaⁿ-gã xii-dé:

—Na càchí tnúhu ndáá-í xii-n sá niú vitna cùmání-gã cana ñⁿ líhi, te úní xito cáháⁿ-n núú ñáyiu sá ñà túú xini ñáhá-n xii-í —càchí-gá xáhaⁿ-gã xii-dé.

35 Te té Pelú ní xáhaⁿ-dë xii-gá:

—Cuëi na cùú ndihi ñaha-ĩ xii-n dico vá càháⁿ-í núú ñäyiu sá ñà túú xini ñähà-í xii-n —càchí-dé xáhaⁿ-dè xii-gá.

Te nchaa dava-gá cue téé xica cuu ndihi-gá ñi-ni ducaⁿ ñí xáhaⁿ-güedè xii-gá.

*Jèsús càháⁿ ndihi-gá Yä Ndiöxí ñⁿ xichi núú nání Gètsemani
(Mr. 14:32-42; Lc. 22:39-46)*

³⁶ Te Jèsús ní quexio-gá ndihi cue téé xica cuu ndihi-gá ñⁿ xichi núú nání Gètsemani, te xiáⁿ ñí xáhaⁿ-gá xii-güedé:

—Chí cúnucõo iha cundetu-ndo na quihíⁿ-í yacáⁿ cáháⁿ ndihi-í Yä Ndiöxí —càchí-gá xáhaⁿ-gá xii-güedé.

³⁷ Te ndèca-gá té Pèlú, ndihi ndi ndúú déhe té Zebèdeú cuáháⁿ, te ní ngüíta-xi súúni ndihú iní-gá.

³⁸ Te ní xáhaⁿ-gá xii cue téé úní-áⁿ:

—Súúni ndihú iní-í dàtná sá cùú-í, te chí quéndõo nchòhó iha te vá cùdú-ndó chí yúhú vá cùdú-í —càchí-gá xáhaⁿ-gá xii-güedé.

³⁹ Te sa ñùnchíi luha ní xica ndehe Jèsús núú ndécú-güedé, te ní ngüíñí xítí-gá te ní nuu núú-gá ndàa núú ñúhú, te ní ngüíta-gá càháⁿ ndihi-gá Tátá-gá Dútú Ndiöxí, te xáhaⁿ-gá:

—Yòhó Tátá méé-í, càháⁿ ndàhú-í núú-n núu vá cúndèe iní-n tàunihnu ñaha-n xii-í cuèndá sá vá ndòhò-í ná sáá òré, dico vá cadá-n nàcuáa càchí iní méé-í, chí cada-n nàcuáa càchí iní méé-n —càchí-gá xáhaⁿ-gá xii Tátá-gá Dútú Ndiöxí.

⁴⁰ Te sáta ñí yáha ní cáháⁿ ndihi-gá Tátá-gá Dútú Ndiöxí, te cuánuhú-gá núú ñí dándõo-gá cue téé úní-áⁿ te xixidí-güedé òré ní nasáá-gá, te ní xáhaⁿ-gá xii té Pèlú:

—¿Náa ñá cúndèe iní-ndó vá cùdú-ni-ndo cuèdicó ñⁿ òré nini càháⁿ ndihi-í Yä Ndiöxí-áⁿ?

⁴¹ Te chí quéndõo tucu te cuhuⁿ iní-ndó vá cùdú-ndó, te cáháⁿ ndihi-ndo Yä Ndiöxí cuèndá sá vá dácàháⁿ ñáhá yùcu ñávàha xii-ndo càda-ndo sá ñà túú tàú-ndó càda-ndo. Te xini ndáá-í sá nchòhó cuini-ndó càda-ndo nchaa nàcuáa càháⁿ-í dicó-ni sá ñà túú ñihí ndéé-ndó —càchí-gá xáhaⁿ-gá xii-güedé.

⁴² Te xito cùu uú cuáháⁿ tucu Jèsús cáháⁿ ndihi-gá Tátá-gá Dútú Ndiöxí, te xáhaⁿ-gá:

—Yòhó Tátá méé-í, te núu vá cúndèe iní-n tàunihnu ñaha-n xii-í cuèndá sá vá ndòhò-í, te cada nàcuáa càchí iní méé-n —càchí-gá xáhaⁿ-gá xii Tátá-gá Dútú Ndiöxí.

⁴³ Te òré ní yáha ní cáháⁿ ndihi-gá Tátá-gá Dútú Ndiöxí, te cuánuhú tucu-gá núú xindecu cue téé úní xicá cùu ndihi-gá-áⁿ, te xidí-ni tucu-güedé òré ní nasáá-gá, te ducaⁿ ñí quide-güedé chí súúni ñùhu saní núú-güedé.

⁴⁴ Te ní dándõo ñaha tucu Jèsús xii-güedé xiáⁿ, te cuáháⁿ tucu-gá xito cùu úní cáháⁿ ndihi tucu-gá Tátá-gá Dútú Ndiöxí, te ñi-ni tnúhu sá sá ní xáhaⁿ-gá xii Tátá-gá Dútú Ndiöxí, ñi-ni tnúhu-áⁿ ñí xáhaⁿ tucu-gá.

⁴⁵ Te sáta ñí yáha ní cáháⁿ ndihi-gá Tátá-gá Dútú Ndiöxí, te cuánuhú tucu-gá núú ndécú cuè téé xica cuu ndihi-gá-áⁿ, te òré ní nasáá-gá, te ní xáhaⁿ-gá xii-güedé:

—¿Te náa xidí-ni tucu-ndo? Te sa ní sáá òré cuáha cuèndá ñáhá-güedé xii-í núú cuè téé ndècu ichi cuehé ichi duha.

⁴⁶ Dico vitna chí ndácõo na quihíⁿ-ó, chí sa véxi téé cuáha cuèndá ñáhá xii-í núú cuè téé cùu úhú iní ñáhá —càchí-gá xáhaⁿ-gá xii-güedé.

*Ní tñi-güedé Jèsús ndéca ñaha-güedé xii-gá cuáháⁿ
(Mr. 14:43-50; Lc. 22:47-53; Jn. 18:2-11)*

⁴⁷ Te cáháⁿ dúcáⁿ-ní Jèsús ní quexio té Judás. Te núú tñháá téé-áⁿ cúú ùxúú tñháá cue téé xica cuu ndihi-gá ní cúú te ducaⁿ ní quide-dé. Te ndihi-dé vai cue téé ní quexio te dava-güedé xinehe-güedé machiti, te dava-güedé xinehe-güedé carruti. Te cue téé-áⁿ ní tendaha ñaha cue dütú cúnúu, ndihi cue téé cúú sacuéhé núú ñáyiú isráél.

⁴⁸ Te té Judás téé cuáha cuendá ñháá xii-gá-áⁿ sa ní xitnúhu-dé cue téé-áⁿ nàcuáa cada-dé cuáha cuendá-dé Jèsús núú-güedé, te duha ní xáhaⁿ-dè xii-güedé:

—Cundehe-ndo tée na tëyuhu-í te téé-áⁿ tñi-ndo-dè chi téé-áⁿ cúú-dè téé ndéé iní-ndó —duha ní xáhaⁿ-dè xii-güedé.

⁴⁹ Te sáta dúcáⁿ ní xáhaⁿ-dè xii-güedé, te ní sándehe yatni-dé núú Jèsús, te ní xáhaⁿ-dè xii-gá:

—¡Racióⁿ Mèstrú! —càchí-dé xáhaⁿ-dè xii-gá.

Te ní teyuhu ñaha-dé xii-gá.

⁵⁰ Te Jèsús ní xáhaⁿ-gá xii-dé:

—Yòhó téé ní chitnahá ñháá xii-í, ¿ná cuini-n núú véxi-n núú-í? —càchí-gá xáhaⁿ-gá xii-dé.

Te òré-ni-áⁿ ní tñi ñaha cuè téé ndihi té Judás-áⁿ xii Jèsús, te ndéca ñaha-güedé xii-gá cuáháⁿ.

⁵¹ Te ìⁿ cue téé ndihi Jèsús ní tava-dé machiti-dé, te ní xehndé-ni-dé ìⁿ xio lóho ìⁿ téé xinu cuechi núú dütú cúnúu te ní quendeé duuⁿ lóho-dé.

⁵² Te Jèsús ní xáhaⁿ-gá xii téé ducaⁿ ní xehndé lóho téé-áⁿ:

—Nachihí machiti-n ñi-xi, chi nchaa cue téé na náá ndihi machiti cahni-güedé tñaha ñáyiú-güedé te ñu-ni ndihi machiti cuú mée-güedé tucu.

⁵³ Te na càchí tñuhu-í xii-ndo sá núú yúhú cuini-í cácu-í te cáháⁿ ndihi-í Tàtá-í Dütú Ndiòxí, te tendaha-gá cuéhé víhí espíritú xínú cuèchi núú-gá quixi-xi dàcácu ñaha-xi xii-í.

⁵⁴ Dico núú ducaⁿ na càda-í te vá queé ndáá-xi nàcuáa cáháⁿ-xi núú tütú Tàtá-í Dütú Ndiòxí núú ndéé tñuní sá dàcuítí xini ñuhu-xi nándi ndoho-í —càchí-gá xáhaⁿ-gá xii-dé.

⁵⁵ Te Jèsús ní xáhaⁿ-gá xii cue téé ducaⁿ ní tñi ñaha xii-gá-áⁿ:

—Nchaa-ni nduu ní xini-ndó ní xóo cunucóo-í xiti veñuhu càhnu sá ìo cúnuu ní xóo danèhé-í ñáyiú, te ñá tütú ní tñi ñaha-ndo xii-í, ¿te ná cuendá vitna quide ñaha-ná-ndó xii-í dàtná quidé-ndó ìⁿ ñadúhú, nèhe-ná-ndó màchiti nèhe-ná-ndó càrruti ní quexio ní tñi ñaha-ndo xii-í-í?

⁵⁶ Dico dacuítí sá dúhá càda-xi nacuáa quee ndáá-xi nàcuáa ní cáháⁿ cue téé ní xóo cáháⁿ tñuhu Yá Ndiòxí ndéé sanaha ní ngódó tñuní núú tütú-gá —càchí-gá xáhaⁿ-gá xii-güedé.

Te nchaa cue téé xica cuu ndihi-gá ní xinu-güedé ní dándó ñaha-güedé xii-gá.

Jèsús ndécú-gá jündá

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Te cue téé ní tñi ñaha xii Jèsús ndéca ñaha-güedé xii-gá cuáháⁿ núú té Caifás téé cúú dütú cúnúu-gá. Te núú ndécú dütú cúnúu-gá-áⁿ sa ní tacá cue téé dàcuaha ñaha xii ñáyiú nchaa tñuhu ní chídó tñuní ndi Moisés, ndihi cue téé cúú sacuéhé núú ñáyiú isráél cuendá cada-güedé jündá.

⁵⁸ Te té Pèlú xica xica-ni nchicúⁿ ñáhá-dě xii-gá cuáháⁿ ní sáá-dé ndéé quehé vehe núú ndécú tée cùu dútú cúnùu-gá-áⁿ, te xíáⁿ ní ngóo-dé ndihí cue tée cùu poleciá cuendá cuíni-dé quíni-dé nása cada ñaha-güedě xii Jèsús.

⁵⁹ Te cue tée cùu dútú cúnùu, ndihí cue tée cùu sacuéhé núú ñáyiú isràél, ndihí nchaá dava-gá cue tée xíndecu jündá ndúcú-güedě nàcuáa cada-güedě dacáa-güedě ìⁿ cuèchi díquí Jèsús cuèi cùu-xi ìⁿ sá ñã ndáa cuendá níhí-güedě nàcuáa cada-güedě cahni ñaha-güedě xii-gá.

⁶⁰ Te vài cue tée ní nguíta-güedě dácàa-güedě cuèchi díquí-gã, dico ñã túú ní cùndee tnúhu-güedě chí mee-ni tnúhu ndehnde cùu-xi. Te sátá dúcáⁿ te ní quexio tucu úú tnàhá cue tée dàcuandehnde-güedě,

⁶¹ te xáhaⁿ-güedě xii nchaá cue tée xíndecu jündá:

—Véxi-ndí cächí tnúhu-ndí xii-ndo sã tée-a cächí-dé sá dángòyo-dé veñúhu càhnu sá ìo cùnùu núú chíñúhu-o Yá Ndiòxí, te dandàa-dé ingá veñúhu saa, ñu-ni núú cáá tnàhí veñúhu-ãⁿ, te xití úní-ni nduu sa nadaxínu-dé, duha cächí-dé —cächí-güedě xáhaⁿ-güedě.

⁶² Te tée cùu dútú cúnùu-gá-áⁿ ní ndacuñí-dé, te xáhaⁿ-dě xii Jèsús:

—¿Ná cuendá duha ndùu tnúhu càháⁿ cue tée-a cuendá-n? Te càháⁿ núu nása cunduu tnúhu càháⁿ-n —cächí-dé xáhaⁿ-dě xii-gá.

⁶³ Dico Jèsús ñã túú tnàhí ni càháⁿ-gá. Te tée cùu dútú cúnùu-gá-áⁿ ní xáhaⁿ tùcu-dé xii-gá:

—Yúhú, cacú nèhe-í Yá Ndiòxí chí cuíni-í sá cächí tnúhu ndáa-n xii-ndí núu sá díú Crìstú Déhe Yá Ndiòxí Yáá ní tendaha-gã véxi ñuyíú-a cùu-n —cächí-dé xáhaⁿ-dě xii-gá.

⁶⁴ Te Jèsús ní xáhaⁿ-gã xii-dé:

—Ñu Yáá-áⁿ cùu-í dàtná cächí-n-ãⁿ, te na cächí tnúhu-í xii-ndo sã sáá nduu te quíni-ndó yúhú Tée cùu ñani tnàhá-ndó nchàa-ndo cunucóo-í xio cùha Dútú Ndiòxí Yáá ndácú quide nchaandi túhú sá vãha. Te dàvá-áⁿ quíni ñáhá-ndó xii-í quee-í andíu quixi-í ichi xití vícò —cächí-gã xáhaⁿ-gã xii-dé.

⁶⁵ Te dútú cúnùu-gá-áⁿ ní ndátá-dě dóó níhí-dě cuendá sá ñã túú ní tnàhá iní-dé nàcuáa ní càháⁿ Jèsús, te ní xáhaⁿ-dě xii nchaá cue tée xíndecu jündá:

—Tée-a càháⁿ úhú-dé cuendá Yá Ndiòxí, te vitna ñã túú-gã xíní ñúhu-xi cue tée càháⁿ ndáa núu ndáa sá ndècuèchi-dé àdi ñã túú ndècuèchi-dé, chí sa ní tecú dóho-o nàcuáa ndùu tnúhu ní càháⁿ-dé ní càháⁿ úhú-dé cuendá Yá Ndiòxí.

⁶⁶ Te nchaá-ndo chí càháⁿ vitna núu nása sàni iní-ndó cunduu cuendá tée-a —cächí-dé xáhaⁿ-dě xii nchaá cue tée-áⁿ.

Te cue tée-áⁿ ní xáhaⁿ-güedě:

—Nchúhú cächí-ndí sá tàú-xi cuú-dé chí ndècuèchi-dé —cächí-güedě xáhaⁿ-güedě.

⁶⁷ Te ní nguíta-güedě ní tiú dí ñáhá-güedě xii-gá te ní caniha-güedě, te tnàhá núú-gã ní caní-güedě.

⁶⁸ Te ní cudíquí ndéé ñáhá-güedě xii-gá, te xáhaⁿ-güedě:

—Yòhó Tée cächí sá cùu Crìstú Yáá ní tendaha Yá Ndiòxí véxi ñuyíú-a, càháⁿ ná còto yoo ní caniha xii-n —cachí-güedě xáhaⁿ-güedě xii-gá.

*Te Pèlú xáhaⁿ-dě xii ñáyiú sá ñã túú xini-dé Jèsús
(Mr. 14:66-72; Lc. 22:56-62; Jn. 18:15-18, 25-27)*

⁶⁹ Te ñini núcóo té Pèlú quehé, te ní sáháⁿ ìⁿ xíchí xínú cuèchi vehe-áⁿ núú-dé, te xáhaⁿ-xi xii-dé:

—Yòhó tnàhá-n cùu-n téé xìca cuu ndìhi Jesús téé distrítu Galiléa —càchí-xi xǎhaⁿ-xi xii-dé.

⁷⁰ Te té Pèlú ñá túú ní nǎnuu-dé, te ndédóho nchaa ñáyiu xǎndecu-áⁿ ní xáhaⁿ-dè xii xíchí-ǎⁿ:

—Yúhú, ñá túú cùtnuní iní-í nása ndùu tnúhu càháⁿ-n —càchí-dé xǎhaⁿ-dè xii-xi.

⁷¹ Te ní xica té Pèlú cuáháⁿ-dé ndáa nacuáa nchii yuyèhe vehe-áⁿ, te ní xiní ñáhá tùcu ingá xíchí xínú cuèchi vehe-áⁿ, te xǎhaⁿ-xi xii nchaa ñáyiu xǎndecu-áⁿ:

—Téé-a tnàhá-dé xíca cùu-dé ndìhi Jèsús téé ñúú Nazàrét —càchí-xi xǎhaⁿ-xi xii-yu.

⁷² Te té Pèlú ní xáhaⁿ-dè:

—Nchàcui^{ti} Yá Ndiòxí sá ñà túú xiní-í téé càcunehe-ndo-áⁿ —càchí-dé xǎhaⁿ-dè xii-yu.

⁷³ Te tna tnaa-ni ní cuu, te dava ñáyiu xǎndecu xíaⁿ ní xáhaⁿ tùcú-yu xii té Pèlú:

—Ndáá sá tnàhá-n xìca cuu-n ndìhi téé ndèca-güedé cuànguìhu-ǎⁿ, chi ñáyúhú càháⁿ-n —càchí-yu xǎháⁿ-yu xii-dé.

⁷⁴ Te té Pèlú ní xáhaⁿ-dè xii-yu:

—Nchàcui^{ti} Yá Ndiòxí sá yúhú càháⁿ ndáá-í sá ñà túú xiní-í téé càcunehe-ndo-áⁿ —càchí-dé xǎhaⁿ-dè xii-yu.

Te òré-ni-áⁿ ní cana ìⁿ líhi.

⁷⁵ Te ní ndacu iní té Pèlú nàcuáa ní xáhaⁿ Jèsús xii-dé sá cùmání-gǎ cana ìⁿ líhi te úní xito càháⁿ-dé sá ñà túú xiní ñáhá-dè xii-gá. Te ní quee-dé tnuú ñáyiu-áⁿ cuáháⁿ-dé ìⁿ xio ní ndáhyú víhí-dè ní ndixi cuèchi iní-dé.

27

Ndèca-güedé Jèsús cuáháⁿ núú tǎ Pilatú

(Mr. 15:1; Lc. 23:1-2; Jn. 18:28-32)

¹ Te sáta ní túndaá te nchaa cue téé cùu dútú cúnùu, ndìhi cue téé cùu sacuéhé núú ñáyiu isráél ní ndatnúhu-güedé nàcuáa cada-güedé cahni-güedé Jèsús.

² Te ní dácútú ñàha-güedé xii-gá, te ndèca ñàha-güedé cuáháⁿ núú tǎ Pilatú téé cùu gobiernú.

Ní xíhí té Júdás

³ Te té Júdás téé ní sáha cuendá ñáhá xii Jesús ní cutnùní iní-dé sá cáhni ñàha-güedé xii-gá, te ní ndixi cuèchi iní-dé sá ñà túú ní quide váha-dé sá dúcáⁿ ní quide-dé ní sáha cuendá ñáhá-dè xii-gá núú cuè téé cùu úhú iní ñáhá, te ní xica-dé cuáháⁿ-dé danchòcáva-dé ócò úxí dǎhúⁿ cuixíⁿ núú cuè dútú cúnùu-áⁿ, ndìhi núú cuè téé cùu sacuéhé núú ñáyiu isráél, chi ñu cuè téé-áⁿ ní sáñaha-güedé dǎhúⁿ xii-dé.

⁴ Te òré ní quexio té Júdás-áⁿ núú ndécú-güedé, te xǎhaⁿ-dè xii-güedé:

—Yúhú, ñá túú ní quide váha-í sá dúcáⁿ ní quide-í ní taxi cuendá-í ìⁿ téé ñá túú tnàhí cuèchi-xi cahni-ndo-dè —càchí-dé xǎhaⁿ-dè xii-güedé.

Te cue téé-áⁿ ní xáhaⁿ-güedé xii-dé:

—Nchúhú, ñá túú nǎgá cuendú cuiní-ndí càháⁿ ndìhi ñàha-ndí xii-n, te mee-n ñàha núu nása sàni iní-n càda-n —cachí-güedé xǎhaⁿ-güedé xii-dé.

⁵ Te té Júdás ní dǎngoyo-dé dǎhúⁿ-ǎⁿ xití veñúhu càhnu sá ìo cúnuu, te ní xica-dé cuáháⁿ-dé ní dácuehñé-dé mée-dè.

⁶ Te cue dútú cúnùu ní naqueheⁿ-güedé dǎhúⁿ-ǎⁿ, te ní xítàha-güedé:

—Díhúⁿ-a ní quéyǎhu cuendá sá cùú ìⁿ ñáyiú, núú xíáⁿ vá cúú nàchihi-o xítí cǎjá núú ñúhú sǎ cúú cuendá Yǎ Ndiǒxí —càchí-güedé xítñaha-güedé.

7 Te ní ndatnúhu-güedé te ní cuu ìⁿnuu-güedé cuendá nacuaaⁿ-güedé ìⁿ xichí núú cáá ñúhu danani-güedé Núú Cuǎha Nchaa Sá Cuǎha Ñuhu, te xíáⁿ ní saaⁿ-güedé cuendá xíáⁿ nguĩndüxi nchaa ñáyiú véxi xica.

8 Te ní nadáma ðiú ñuhu-áⁿ, te vitna ðanani-güedé Ñuhu Yáhu Níñí, duha ðanani-güedé.

9 Te ducaⁿ ní cuu chi ní quee ndáá-xi nàcuáa ní cáháⁿ ndí Jeremiás téé ní xóo cáháⁿ tnúhu Yá Ndiǒxí ndéé sanaha, te duha ní cachí ndíi: “Cue téé isràél ní cachí-güedé sá òcò úxí díhúⁿ cuixíⁿ cháhu-güedé cuendá ìⁿ téé queheⁿ cuendá-güedé. Te díhúⁿ-áⁿ nàqueheⁿ-güedé,

10 te cuaaⁿ-güedé ìⁿ xichí núú nání Núú Cuǎha Nchaa Sá Cuǎha Ñuhu, te ducaⁿ càda-xi chi ducaⁿ ní cachí Yǎ Ndiǒxí cunduu”, duha ní cachí ndí Jeremiás-áⁿ.

Jèsús ndécú-gǎ núú tǎ Pilatú

(Mr. 15:2-5; Lc. 23:3-5; Jn. 18:33-38)

11 Te Jèsús ndécú-gǎ núú tǎ Pilatú téé cùu gobiernú, te téé-áⁿ ní xícáⁿ tnúhú-dě núú-gǎ, te xǎhaⁿ-dě xii-gǎ:

—¿Ndáá sá díú-n cùu-n téé yíndaha ñaha xii ñáyiú isràél-áⁿ? —càchí-dé xǎhaⁿ-dě xii-gǎ.

Te Jèsús ní xǎhaⁿ-gǎ xii-dé:

—Diu-í yíndaha-í-yu —càchí-gǎ xǎhaⁿ-gǎ xii-dé.

12 Te cue dútú cúnùu ndíhi cue téé cùu sacuéhé núú ñáyiú isràél sácáⁿ cuéchi-güedé núú tǎ Pilatú cuendá Jèsús, dico mee-gǎ ní ìⁿ tnúhu ñá túú ní cáháⁿ-gǎ.

13 Te té Pilatú ní xǎhaⁿ-dě xii-gǎ:

—Cáháⁿ, ná cuendá ñá túú cáháⁿ-n, te cundehe nǎ ndéé duha titní cuéchi ðacaa cue téé-a díquí-n —càchí-dé xǎhaⁿ-dě xii-gǎ.

14 Dico Jèsús ñá túú tnàhí ní cáháⁿ-gǎ, te té Pilatú téé cùu gobiernú-áⁿ ïo ní cuñúhu-dé sá dúcáⁿ ñà túú tnàhí ní cáháⁿ-gǎ.

Ní quide ndáá-güedé sá cáhni-güedé Jèsús

(Mr. 15:6-20; Lc. 23:13-25; Jn. 18:38-19:16)

15 Te ndí tnahá nduu víco pascuá dácácu téé Pilatú téé cùu gobiernú-áⁿ ìⁿ téé yíhi vecaá chi ducaⁿ tnàhí quide-dé, te mee ñáyiú cáháⁿ-yu te núú ndédacàa téé yíhi vecaá-áⁿ cácu-dé te téé-áⁿ dácácu-dé.

16 Te ðavá-áⁿ yíhí ìⁿ téé nàni Barrabás vecaá, te téé-áⁿ ïo cuendú-dé sá ïo nèhé ní quide-dé.

17 Te ní nataká nchaa ñáyiú, te téé Pilatú ní xícáⁿ tnúhú-dě núú-yu, te xǎhaⁿ-dě:

—¿Ndédacàa núú ùú cue téé-a cuñí-ndó dácácu-í-güedé-í? ¿Té Barrabás áⁿ Jèsús téé nàni Cristú? —càchí-dé xǎhaⁿ-dě xii-yu.

18 Te ducaⁿ ní cáháⁿ téé Pilatú, chi ní cutnùni iní-dé sá ðicó sá cuèdú iní-güedé ducaⁿ ní quide-güedé ní sáha cuendá ñáhá-güedé xii Jèsús núú-dě.

19 Te ñini nùcòo téé Pilatú núú xèhndé-dé cuéchi ní tendaha ñàñihí-dé tnúhu cuáháⁿ núú-dě, te duha ndùu tnúhu ní tendaha-aⁿ: “Vá cání iní-n nǎ cada-n téé ní taxi cuendá ñáhá-güedé xii-n, téé ñá túú tnàhí cuéchi-xi, chi icuini ïo nèhé ní dácóto ñaha saní-í cuendá-dé”, duha ndùu tnúhu ní xǎhaⁿ-aⁿ xii téé Pilatú.

20 Dico cue tée cùu dútú cùnùu, ndihi cue tée cùu sacuéhé núú ñáyiú isràèl ní xáhaⁿ-güedé xii ñáyiú sá ná cùñàhá-yu xii té Pilatú dàcácu-dé té Barrábás te cahni-dé Jèsús, te ní quidé-yu nàcuáa ní xáhaⁿ-güedé.

21 Te té Pilatú-áⁿ ní xáhaⁿ tùcu-dé xií-yu:

—¿Ndédacáa núú ùú cue tée-a cuíní-ndó dàcácu-í? —càchí-dé xáhaⁿ-dë xií-yu. Te ní xáhãⁿ-yu xii-dé:

—Té Barrábás dàcácu-n —càchí-yu xáhãⁿ-yu xii-dé.

22 Te té Pilatú ní xicáⁿ tnúhú-dë núú-yu, te xáhaⁿ-dë:

—¿Te ná cuíní-ndó càda-í Jèsús tée nàni Cristú tée càchí sá Yã Ndiöxi ní tendaha ñaha xii-dé véxi-dé ñuyúú-a-í? —càchí-dé xáhaⁿ-dë xií-yu.

Te nchaá-yu ní cáháⁿ-yu, te xáhãⁿ-yu:

—Cata caa-dé núú cùrúxí —càchí-yu xáhãⁿ-yu xii-dé.

23 Te té Pilatú ní xáhaⁿ tùcu-dé xií-yu:

—¿Te ná cúú cuèchi ní quide-dé núu ducaⁿ cuíní-ndó càda-í-dé-í? —càchí-dé xáhaⁿ-dë xií-yu.

Dico nchaá-yu uuⁿ-gá níhi ní cáháⁿ-yu, te xáhãⁿ-yu xii-dé:

—¿Cata caa-dé núú cùrúxí! —càchí-yu xáhãⁿ-yu xii-dé.

24 Te té Pilatú ní cutnùní iní-dé sá vã ñihí-dé nàcuáa cada-dé, chi uuⁿ-gá ní ngúíta ñáyiú xícuaá-yu, te xíãⁿ ní xicáⁿ-dé ndute ní ndáhá-dë núú nchàa ñáyiú, te ní xáhaⁿ-dë xií-yu:

—Tée-a cùu-dé ìⁿ tée ñá túú tnàhí cuèchi-xi, te nchòhó cuíní-ndó sã cùú-dé, dico ñu-ni mee-ndo cuído yáhu-ndo-dë chi yúhú vá cuído yáhu-í-dé —càchí-dé xáhaⁿ-dë xií-yu.

25 Te nchaá-yu ní xáhãⁿ-yu xii-dé:

—¿Ñu nchúhú ndihi cue déhe-ndí cuído yáhu-ndí-dé! —càchí-yu xáhãⁿ-yu.

26 Te sátá dúcáⁿ te té Pilatú ní dàcácu-dé té Barrábás, te ní táuchíúⁿ-dë ní cani-güedé Jèsús. Te sátá dúcáⁿ ní quide ñaha-güedé xii-gá, te ní táuchíúⁿ-dë candeca ñaha-güedé xii-gá quíhíⁿ cata caa ñaha-güedé xii-gá núú cùrúxí.

27 Te cue tée cùu sandadú té Pilatú ndécá-güedé Jèsús cuánguihu xití vehe càhnu cuu cuendá-dé, te cue tée cùu sandadú-áⁿ ní cana-güedé dava-gá cue sandadú núú dúcáⁿ ndèca-güedé Jèsús cuánguihu-áⁿ.

28 Te xíáⁿ ní taunuu-güedé dóó-gã, te ní dácuíhnú ñaha-güedé xii-gá ìⁿ dóó tícuèhé víhí.

29 Te ní cadúha-güedé ìⁿ coróná iñu ní chihi-güedé díquí-gã, te ní chitní-güedé ìⁿ carrùtí ndaha cùha-gá, te ní ngúíñí xítí-güedé núú-gã cúdíquí ndeé ñáhá-güedé xii-gá, te xáhaⁿ-güedé:

—¿Ío càhnu cuu yohó tée yíndaha ñaha xii ñáyiú isràél! —càchí-güedé xáhaⁿ-güedé xii-gá.

30 Te ní tíú díí ñáhá-güedé xii-gá, te ní queheⁿ-güedé carrùtí sá ní sáñaha-güedé xii-gá te ní ducuⁿ-güedé díquí-gã.

31 Te sátá ní yáha ní cudíquí ndeé ñáhá-güedé xii-gá, te ní nataunuu ñaha-güedé xii-gá dóó tícuèhé víhí sã ní dácuíhnú ñaha-güedé xii-gá, te ní dándíunuu ñaha-güedé xii-gá dóó méé-gã, te dátñuní ndécá ñaha-güedé cuáháⁿ núú cáta càa ñaha-güedé xii-gá núú cùrúxí.

*Sàta caa-güedé Jèsús núú cùrúxí
(Mr. 15:21-32; Lc. 23:26-43; Jn. 19:17-27)*

32 Te ñuhu-güedé ndihi-gá ichi, te ní naníhí-güedé ñⁿ téé ñúu Cirené nání-dě Ximú, te téé-án ñi quide yica-güedé ní xido-dé cùrúxí sá nchídó Jèsús.

33 Te ní sáá-güedé ndihi-gá ñⁿ xichi núú nání Gõlgotá, te tñuhu-án quée-xi: Núú nání yiqui díquí ndíyi, duha quée-xi tñuhu-án.

34 Te xiáⁿ sãñaha-güedé ndudí úá coho-gá ní cùu, te ñá túú ní xìhi-gá chi dico-ni ní xito ndéé-gá.

35 Te ní sata caa ñaha-güedé xii-gá núú cùrúxí, te sátá dúcáⁿ te cue téé cùu sandadú-án ñi xito ndéé-güedé ñúu ndèdacàa-güedé cuu cuèndá-güedé dóó-gá. Te ducaⁿ ñi cuu chi ní quee ndáá-xi nàcuáa ní cáháⁿ ñⁿ téé ní xóo cáháⁿ tñuhu Yá Ndiòxí ndéé sanaha yòdo tñuní núú tütú-gá, te duha càchí-xi: “Ní xito ndéé-güedé ñúu ndèdacàa-güedé cuu cuèndá-güedé dóó-gá”, duha ní cachí téé-án te ducaⁿ ñi ngódó tñuní núú tütú-gá.

36 Te sátá dúcáⁿ ñi quide-güedé, te ní ngóo-güedé ndéé ñáhá-güedé xii-gá.

37 Te ní taxi ndecu-güedé ñⁿ sá ndéé lètrá ndàa díquí-gá. Te lètrá-án cáháⁿ-xi ná cuèndá ducaⁿ ñi quide ñaha-güedé xii-gá, te duha cáháⁿ lètrá-áⁿ: “Tée-a cùu-dé téé yìndaha ñaha xii ñáyíu isràél”, duha càchí-xi.

38 Te tñahá úú cue téé cùu ñadúhú ñi sata caa-güedé ñi-ni núú cùrúxí tucu, te ñⁿ-dé ní sata caa-güedé xio cùha-gá, te ingá-dé ní sata caa-güedé xio dàtni-gá.

39 Te nchaa ñáyíu yãha yatni núú tácaà-gá-án, te dàcuicó-yu díquí-yu ndèhe ñahá-yu xii-gá, te xicuehé ñáhá-yu.

40 Te xãháⁿ-yu xii-gá:

—Yòhó càchí-n sá dàngoyo-n veñúhu càhnu sá Ìo cùnuu, te dandàa-n ingá veñúhu saa, te xití úní-ni nduu sa nadaxìnu-n, te vitna tanùu núú cùrúxí-án dácácu-n mèn-n te núu ndisa sá Dèhe Yá Ndiòxí cúu-n —càchí-yu xãháⁿ-yu xii-gá.

41 Te ñi-ni ducaⁿ cùdiquí ndéé ñáhá cuè téé cùu dútú cùnùu xii-gá, ndihi cue téé dàcuaha ñaha xii ñáyíu nchaa tñuhu ní chídó tñuní ndíi Moisés, ndihi cue téé cùu fariséu, ndihi cue téé cùu sacuéhé núú ñáyíu isràél, te xìtnàha-güedé:

42 —Tée-a ní ndacu-dé ní dácácu-dé dava ñáyíu, te mee-dě ñá ndácú-dě dácácu nihnu-dé mée-dě. Te núu ndisa sá cúu-dě téé yìndaha ñaha xii ñáyíu isràél, te na cùndehe-o nuu-dé núú cùrúxí-a cuèndá quíndáá iní-ó-dě.

43 Te càchí-dé sá sàndáá iní-dé Yá Ndiòxí, te mee-gá ná dácácu ñaha-gã xii-dé te núu cùndahú iní ñáhá-gã, chi mee-dě càchí-dé sá Dèhe-gá cúu-dě —càchí-güedé xìtnàha-güedé.

44 Te ndéé tñahá cue téé cùu ñadúhú tácaà xio xio diñi-gá xicuehé ñáhá-güedé xii-gá.

Ní xihí Jèsús

(Mr. 15:33-41; Lc. 23:44-49; Jn. 19:28-30)

45 Te òré ní cuu cuádava nduu te ní cunee nihii ñuyíú, te ducaⁿ-ni càa ní cuu caá úní sacuaa.

46 Te òré sa ta cùyatni cuu caá úní sacuaa-án, te níhi ní cáháⁿ Jèsús, te càchí-gá: —Èlí, Èlí, ¿láma sabàctani? —càchí-gá.

Te tñuhu-án quée-xi: Ndiòxí mée-í, Ndiòxí mée-í, ¿ná cuèndá ní dáñá ñaha-n xii-í?, duha quée-xi tñuhu-án.

47 Te dava cue téé xìndecu yatni núú tácaà-gá-án ñi tecú dóho-güedé nàcuáa ní cáháⁿ-gá, te ní xìtnàha-güedé:

—Tée-a càna-dé té Èliás —càchí-güedé xĩtnàha-güedé.

48 Te òré-ni-án nĩ queene cunu ìn cue tée xĩndecu-án nĩ queheⁿ-dé luha cáchí, te ní chindóyo-dé xití ndudí íá, te ní chinenu-dé díquĩ ìn yutnu càni te ní ndocani-dé ní chihi-dé yuhu-gá.

49 Te dava-güedé ní xáhaⁿ-güedé xii téé-án:

—Cundetú tnaa na cùndehe-o nacoto núu quixi té Èliás dàcácu ñaha-dé xii-dé —càchí-güedé xáhaⁿ-güedé xii téé-án.

50 Te Jèsús níhi ní cana saa-gá, te ní xihí-ni-gá.

51 Te sátá dúcáⁿ te ní ndátá dǒó cúú còrtiná xití veñũhu càhnu sá ìo cùnũu ní queé dava ndáá, te ndáa núu ñũnu ní nguũta-xi ní ndátá, te ní tnáa, te dava cava nàhnu ní tǎhũ.

52 Te dava yaú núu yĩndũxi ñáyũ ní xihí ní sándáá iní ñáhá xii Yá Ndiòxí ní nacaáⁿ te ní ndotó-yu.

53 Te sátá nĩ yáha ní ndoto Jèsús, te cue ñáyũ ní ndoto-án cuãnguihú-yu xití ñũú Jerusálén, te cue ñáyũ ñũú-án ìo vai-yu ní xiní-yu cue ñáyũ ducaⁿ ní ndoto-án.

54 Te sá dúcáⁿ nãndi ní quide-xi, ndihĩ sá dúcáⁿ nĩ tnáa xiáⁿ ìo ní yùhú téé cùu capitáⁿ ndihĩ nchaa dava-gá cue téé ndècu ndihĩ-dé ndéé-güedé yiquĩ cùñú Jèsús, te ní xĩtnàha-güedé:

—Sá ndáá ndisa sá díú tée-a cùu-dé Déhe Yá Ndiòxí ní cùu —cachí-güedé xĩtnàha-güedé.

55 Te xica xĩnutnĩ vai ñáyũ dìhĩ ndéhé-yu nchaa nàcuáa ní quide ñaha-güedé xii Jèsús, te ñáyũ-án cúú-yu ñáyũ ní chindèé-yu Jèsús, te ndéé distritú Galiléa ní chinchícúⁿ ñáhá-yu xii-gá.

56 Te tnuú ñáyũ-án tnáhá tá Màriá Magdaléná, ndihĩ tá Màriá náná tẽ Jàcobó ndihĩ té Chèé, ndihĩ náná cue déhe té Zebèdeú.

Chĩndũxi-güedé Jèsús (Mr. 15:42-47; Lc. 23:50-56; Jn. 19:38-42)

57 Te ndècu ìn téé cuica nàni-dé Chèé te cùu-dé téé ñũú Arimàtea, te tnáhá-dé ní tnahá tnũhu-dé ndihĩ Jèsús. Te òré sa ní cuaa,

58 te ní sáháⁿ-dé núu tẽ Pilatú, te xáhaⁿ-dè ñũu vá cùndèe iní-dé daña-dé chĩndũxi-dé yiquĩ cùñú Jèsús. Te té Pilatú-án nĩ sáha-dé tnũhu, te ní táuchíúⁿ-dè sá cuáha cuendá-güedé té Chèé-án yiquĩ cùñú-gá.

59 Te té Chèé-án nĩ queheⁿ cuendá-dé yiquĩ cùñú-gá, te ní chidúcúⁿnuu-dé ìn dóó cuixíⁿ dóó cándòo.

60 Te sa nchiĩ ìn yaú sáá nĩ caáⁿ té Chèé-án ìn yiquĩ naha cava te xiáⁿ cúú cuendá-dé, te yaú-án ní chihi-dé yiquĩ cùñú Jèsús, te dàtnùnĩ ní sadí-dé ìn yúú cáhnú yũu quèhéⁿ yuhu yaú-án, te ní xica-dé cuánuhú-dé.

61 Te tnáhá tá Màriá Magdaléná, ndihĩ ingá xíchí nání Màriá ní quexìó-yu ní ngóo-yu yatni núu nchiĩ yaú-án.

Cue téé ndèé yaú núu yihĩ yiquĩ cùñú Jèsús

62 Te sátá nĩ yáha ní quide túha ñáyũ nchaa sá nãndihĩ-yu nduu tnéé nduu ndètátú-yu-án, te diu-ni nduu ndètátú-yu-án nĩ sáháⁿ cue dútú cùnũu, ndihĩ cue téé cùu fariséú ní cáháⁿ ndihĩ-güedé té Pilatú.

63 Te xáhaⁿ-güedé xii-dé:

—Yòhó tée cùnnoo, véxi-ndí càchí tnúhu-ndí sá ní ndacu iní-ndí sá tée ndehnde ní xihí-án càchí-dé òré ndécú-gá-dé sá ndúu úní sá cuú-dé, te ndoto-dé.

⁶⁴ Te tendaha-n cuè tée na quíhíⁿ-güedé cundeé-güedé yuhu yàù núú ní chihí-güedé yiqui cùñú-dé, chi na cuáháⁿ quíhíⁿ cue tée ní xica cuu ndihi-dé duhu-güedé yiqui cùñú-dé, te cùñaha-güedé xii ñáyíu sá ní ndoto-dé. Chi núu ducaⁿ na càda-güedé te ío-gá dandàhú-güedé cue ñáyíu dàcúxí dàtná ní quide mee tée ní xihí-án —càchí-güedé xàhaⁿ-güedé.

⁶⁵ Te té Pilatú ní xáhaⁿ-dè xii-güedé:

—Náu cue sandàdú-a candeca-ndo-güedé quíhíⁿ, te cadí váha-ndo ndihi-güedé yuhu yàù-áⁿ nàcuáa tàú-xi cunduu, te na cundeé-güedé nàcuáa sàni iní-ndó cunduu —cachí-dé xàhaⁿ-dè xii-güedé.

⁶⁶ Te cue tée-áⁿ ní xica-güedé cuáháⁿ-güedé, te ní tee-güedé ìⁿ sèñá yúú ndèdí yèhe yaú-áⁿ, te ní dándóo-güedé cue sandàdú-áⁿ ndèé-güedé yaú-áⁿ, te ducaⁿ ní quide-güedé cuendá sá vǎ yòo quíhíⁿ nacaáⁿ yaú-áⁿ.

28

Ní ndoto Jèsús

(Mr. 16:1-8; Lc. 24:1-12; Jn. 20:1-10)

¹ Te sáta ní yáha nduu ndètatú ñáyíu, te ndumìngú nehé víhí-ní ní xica tá Màriá Magdalená ndihi ingá xíchí nání Màriá cuángotó-yu yaú núú ní chihí-güedé yiqui cùñú Jèsús.

² Te uuⁿ ní nìhi víhi ní tnáa, te òré ducaⁿ ní quide-xi chi ìⁿ espíritú xínú cuèchi núú Yá Ndiòxí ní quexìo-xi núú dúcáⁿ nchìi yaú núú ní chihí-güedé yiqui cùñú Jèsús, te ní xócání espíritú-áⁿ yúú ndèdí yèhe yaú-áⁿ te ní ngóo-xi núú yúú-áⁿ.

³ Te dàtná dátásaⁿ-xi òré sàá ndúté dùcaⁿ datásaⁿ-xi núú espíritú-áⁿ, te dóó níhñú-xí cuixíⁿ quiyí.

⁴ Te òré ducaⁿ ní quide-xi te cue sandàdú ndèé yaú-áⁿ ní quidi ñaha-xi xii-güedé sá ní yuhú-güedé, te ní nduá-güedé, te ní xíta sá xíní tnùnì-güedé.

⁵ Te espíritú-áⁿ ní xáhaⁿ-xi xii cue ñáyíu òhí cuángoto yaú-áⁿ:

—Nchòhó ñáyíu òhí véxi coto yaú-a, vǎ yuhú-ndó chi yuhú cùtnùnì iní-í sá nchòhó véxi-ndo nànducu-ndo yiqui cùñú Jèsús Yáá ní xihí núú cùrúxí.

⁶ Dico Yaá-áⁿ chi ñá túú-gá ndécú yiqui cùñú-gá iha, chi sa ní ndoto-gá, te òdu ducaⁿ ní cachí-gá sá ndótó-gá cùtnàhá vátá cuú-gá, te chí táquixi cundehe-ndo núú ní sacáⁿ-güedé yiqui cùñú-gá ní cùu te quiní-ndó nǎ ñá túú-gá.

⁷ Te vitna ío ndíhi chí cuáháⁿ núú xíndecu cue tée ní xica cuu ndihi-gá, te duha cùñaha-ndo xii-güedé: “Ní ndoto Jèsús Yáá ní xihí ní cùu, te codonúu-gá núú-ndó quíhíⁿ distritú Galiléa te yàcáⁿ quiní-ndó-gá”, duha cùñaha-ndo xii-güedé. Duha ndúu tnúhu ní cachí tnúhu-í xii-ndo —càchí espíritú-áⁿ xàhaⁿ-xi xii cue ñáyíu òhí-áⁿ.

⁸ Te cue ñáyíu òhí-áⁿ ní natniiⁿ-yu ichi, te súuní ndíhi cuánuhú-yu núú xíndecu cue tée ní xica cuu ndihi Jèsús cuendá nacani tnúhu-yu núú-güedé nàcuáa ní xáhaⁿ espíritú-áⁿ xii-yu, te cuèi ní yuhú-yu dico súuní cùdíí iní-yu.

⁹ Te ichi ñhúhú-yu cuánuhú-yu, te na iní-yu ní quexio Jèsús núú-yu ní dándácóo váha ñaha-gá xii-yu. Te ñáyíu-áⁿ ní ngúíñí xítí-yu núú-gá, te ní numi ñàhá-yu xii-gá, te ní chíñuhu ñàhá-yu.

10 Te ní xáhaⁿ-gã xii-yu:

—Vá yùhú-ndó, chí cuáháⁿ cúñaha-ndo xii cue téé ní xica cuu ndihi-í sá ná quihíⁿ-güedé distritú Galiléa, te yacáⁿ quini ñáhá-güedé xii-í —cächí-gá xáhaⁿ-gã xii-yu.

Nàcuáa ndüu tnúhu ní nacani cue sandàdú

11 Te nini ñuhu cue ñáyiú dihi-áⁿ ichi cuánuhú-yu, te dava cue sandàdú cue téé ndéé yaú-áⁿ ní cùu ní xica-güedé cuánuhú-güedé ñuu cuendá nacani tnúhu-güedé núu cuè téé cùu dútú cúnüu nacúaa ní cuu.

12 Te cue téé cùu dútú cúnüu-áⁿ ní quide-güedé jündá ndihi cue téé cùu sacuéhé núu ñáyiú isràél, te ní ndatnúhu-güedé nàcuáa cada-güedé, te ní quide ndáá-güedé ndihi cue sandàdú-áⁿ sá cuáñaha-güedé vai díhúⁿ cuendá dacuàndehnde-güedé.

13 Te ní xáhaⁿ-güedé xii cue sandàdú-áⁿ:

—Cuini-ndí sá vã cãháⁿ ndáá-ndó núu ñáyiú nàcuáa ní cuu, chí cúñaha-ndo xii-yu sá òré xidí-ndó ní quixi cue téé ní xica cuu ndihi-dé ní dúhú-güedé yiqui cùñú-dé néhé-güedé cuáháⁿ, duha cúñaha-ndo xii-yu.

14 Te núu na nihí té Pilatú téé cùu gobiernú tnúhu nàcuáa cúñaha-ndo xii ñáyiú, te nchúhú cada ndáá-ndí ndihi-dé cuendá sá ñà túú nã cada ñaha-dé xii-ndo —cächí-güedé xáhaⁿ-güedé xii cue sandàdú-áⁿ.

15 Te cue sandàdú-áⁿ ní queheⁿ cuendá-güedé díhúⁿ, te ní xica-güedé cuáháⁿ-güedé te ní cãháⁿ-güedé nàcuáa ní xáhaⁿ cuè téé-áⁿ cãháⁿ-güedé. Te nchaa ñáyiú isràél ní nihí-yu tnúhu ní cãháⁿ-güedé-áⁿ, te diu-ni tnúhu-áⁿ cãháⁿ-yu ndéé vitna.

Jèsús xáhaⁿ-gã xii cue téé ní xica cuu ndihi-gá nàcuáa ndüu chiuⁿ cada-güedé (Mr. 16:14-18; Lc. 24:36-49; Jn. 20:19-23)

16 Te ndi úxí ñⁿ cue téé ní xica cuu ndihi Jèsús ní xica-güedé cuáháⁿ-güedé ñⁿ yucu cãa distritú Galiléa núu ní xáhaⁿ-gã naníhí tnáhá-güedé ndihi-gá.

17 Te òré ní xiní-güedé Jèsús te ní chiñuhu ñaha-güedé xii-gá, dico dava-güedé sàni ñⁿ sani úú iní-güedé núu diu-gá àdi ñã díú-gá.

18 Te Jèsús ní sãndehe yatni-gá ndéé núu-güedé, te ní xáhaⁿ-gã xii-güedé:

—Yúhú ndécú ndihi-í tnúhu ndee iní táxí tnüni-í cuèi andiu te cuèi ñuyúú-a.

19 Te vitna tàuchiúⁿ-í sá quihíⁿ-ndó nihíí ñuyúú cãháⁿ-ndó tnúhu-í núu ñáyiú cuendá tuha ñáhá-yu xii-í, te dacuàndute-ndó-yu. Te òré ducaⁿ cãda-ndo, te cacuehe-ndo tãtã-ó Dútú Ndióxi ndihi yúhú Yaá cúú Déhe-gá ndihi Espiritú-gá.

20 Te cúñaha-ndo xii-yu sá ná cãdá-yu nchaa nàcuáa sa ní dánèhé ñáhá-í xii-ndo cãda-ndo. Te na cächí tnúhu-í sá cündècu ndihi ñaha-ni-í xii-ndo ñuyúú-a ndéé ná sàà nduu nãa-xi —cachí-gá xáhaⁿ-gã xii-güedé. Te ducaⁿ na cùnduu.

TNÚHU NÍ CHÍDÓ TǸUNÍ TÈ MĂCÚ

*Té Juàá téè dàcuandute ñaha xii ñáyíu càháⁿ-dé tnúhu Yá Ndiòxí xití yucu
(Mt. 3:1-12; Lc. 3:1-9, 15-17; Jn. 1:19-28)*

¹ Duha ní quesaha tnúhu sá càháⁿ nàcuáa naníhí tàhú-ó tnúhu Xítohó Jesucristú Déhe Yá Ndiòxí.

² Te ndíi Chàíá téé ní xóo càháⁿ tnúhu Yá Ndiòxí ndéé sanaha ní chídó tǹuní ndíi nàcuáa ní xáhaⁿ Yá Ndiòxí xii Déhe-gá, te duha ní xáhaⁿ-gá:

Tendaha-ĩ ĩⁿ téé codonù-dé núú-n,

te dàtúha-dé ñáyíu cuendá tñí-yu tnúhu-n.

³ Te téé-áⁿ quihí-dé xití yucu te níhi càháⁿ-dé cúñaha-dě xii ñáyíu:

“Chí dǎná nchàa ichi cuehé ichi duha ndècu-ndo, te tñí-ndo ichi váha, te ducaⁿ càda-ndo cuendá cundecu túha-ndo, chí véxi Yaá ío cùnùu”, duha cúñaha-dě xii-yu.

Duha ndùu tnúhu ní chídó tǹuní ndíi Chàíá nàcuáa ní xáhaⁿ Yá Ndiòxí xii Déhe-gá.

⁴ Te téé dii cuendá-xi ní ngódó tǹuní-áⁿ nání-dě Juàá, te téé-áⁿ ní xíhi-dé xití yucu ní càháⁿ-dé tnúhu Yá Ndiòxí, te ní xóo dacuandute-dé ñáyíu, te duha ní xáhaⁿ-dě xii-yu:

—Chí dándixi túu iní sá ñà túú quide váha-ndo ndècu-ndo, te dañá-ndo nchàa ichi cuehé ichi duha te cuandute-ndo, te ducaⁿ te Yá Ndiòxí cada càhmu iní-gá nchaa yíca cuèchi-ndo —duha ní xáhaⁿ-dě xii-yu.

⁵ Te nchaa ñáyíu distritú Jùdeá, ndíhi ñáyíu ñúú Jerusálén ní sáháⁿ-yu ndéé yúte Jòrdán núú ndécú tè Juàá ní xíndedóho-yu nchaa tnúhu ní càháⁿ-dé. Te cue ñáyíu ní náhmá nchaa yíca cuèchi-xi te ní dácuañdute ñaha-dé xii-yu.

⁶ Te té Juàá-áⁿ ní xíhnu-dé dóó idi càméyu, te ĩⁿ ñí ní cuu pǎñú xití-dé, te ní xóo caxi-dé tíca làngóstá ndíhi nudú ñúñú cuéchí.

⁷ Te ní xáhaⁿ tucu-dé xii ñáyíu:

—Nchícúⁿ ĩⁿ téé véxi, te téé-áⁿ ïo-gá cùnùu-dé dàcúxí yǔhú, chí yúhú cúu-í ĩⁿ téé duuⁿ duuⁿ ñá túú tàù-í ngúnundeyi-í nandaxi cuèdicó ñíi nihnu chàù-dé dico quide-í chùu-dé.

⁸ Te yúhú dácuañdute ñaha-í xii-ndo, dico mee-dě taxi-dé Espiritú Yá Ndiòxí cundecu ndíhi-ndo —càchí-dé xáhaⁿ-dě xii-yu.

Sàndute Jesús

(Mt. 3:13-17; Lc. 3:21-22)

⁹ Te dàvá-áⁿ ní quee Jèsús ñúú Nazàrét ĩⁿ ñúú yíndèhu distritú Galilea cuáháⁿ-gá yúte Jòrdán. Te yàcáⁿ ní dácuañdute ñaha té Juàá xii-gá.

¹⁰ Te òré ní nene-gá xití ndute, te ní xiní-gá nchíi andíu, te ní quee Espiritú Yá Ndiòxí véxi cuuⁿ-xi ngúndecu ndíhi ñaha-xi xii-gá, te dàtná cáá ĩⁿ lómá cáá Espiritú-áⁿ véxi cuuⁿ-xi.

¹¹ Te òré-áⁿ ní tecú ní càháⁿ Yá Ndiòxí ndéé andíu, te xáhaⁿ-gá xii Jèsús:

—Yòhó cúu-n Dèhe-í téé ío cùu iní-í te ío cùdíí iní ñáhà-í xii-n —càchí-gá xáhaⁿ-gá.

Sácuíhná quidé yica-xi cada Jesús sá ñà túú tàù-gá cada-gá dico ñá túú ní quide-gá

(Mt. 4:1-11; Lc. 4:1-13)

¹² Te Espiritú Yá Ndiõxí ndécá-xí Jèsús cuáháⁿ ìⁿ xití yucu.

¹³ Te xití yucu-án ió víhí quiti dééⁿ, te xiáⁿ ndécú Jèsús ní ngüíta sácuíhná quidé yica-xi cada-gá ìⁿ sá ñà túú tàù-gá cada-gá dico ñá túú ní sàndáá iní-gá. Te cue espíritu xínú cuéchi núú Yá Ndiõxí ní xinu cuechi-xi núú-gá. Te ní xíndecu-gá údico nduu xití yucu-án.

Distritú Galileá ní chisaha Jèsús chiúⁿ ní táhú Tátá-gă Dútú Ndiõxí cada-gá

(Mt. 4:12-17; Lc. 4:14-15)

¹⁴ Te sátá ní ngava té Juáa vecaá, te Jèsús cuáháⁿ-gá distritú Galileá dānehé-gá ñáyiú tnúhu váha, tnúhu sá cāháⁿ nācuáa ndihu ndaha ñaha Yá Ndiõxí xii-yu.

¹⁵ Te xāhaⁿ-gă xii-yu:

—Vitna sa ní cuyatni nduu ndihu ndaha ñaha Yá Ndiõxí xii-ndo, te chí dáñá nchāa ichi cuehé ichi duha ndēcu-ndo, te quindáá iní-ndó tnúhu váha, tnúhu sá cāháⁿ nācuáa naníhí tǎhú-ndó —cāchí-gá xāhaⁿ-gă xii-yu.

Jèsús cāháⁿ-gá cúmí tnàhá cue téé tñí chácá

(Mt. 4:18-22; Lc. 5:1-11)

¹⁶ Te Jèsús ñúhú-gă ichi cuáháⁿ-gá tá yāha-gá yuhu làgúná Galileá, te ní xiní-gá té Xímú ndihí ñaní-dé té Ndríxí xidáquēe-güedé ñunu-güedé xití ndute tñí-güedé chácá, chi quiti tnàhí-áⁿ cúú chiúⁿ-güedé tñí-güedé-di.

¹⁷ Te Jèsús ní xāhaⁿ-gă xii-güedé:

—Chí dáñá chiúⁿ quide-ndo-án, te quixi-ndo chitnahá ñáhá-ndó xii-í te taxi-í ingá núú chiúⁿ cada-ndo chi quihíⁿ-ndó cāháⁿ-ndó ñáyiú cuendá dacuáhá-yu tnúhu-í —cāchí-gá xāhaⁿ-gă xii-güedé.

¹⁸ Te òré-ni-án ní dáñá cué téé-án ñunu-güedé te ní tuha ñaha-güedé xii-gá.

¹⁹ Te cuáháⁿ-gá luha-gá, te ní xiní-gá té Jācobó ndihí ñaní-dé té Juáa ñúhú-güedé xití bàrcú-güedé náticu-güedé ñunu-güedé, te ndi nduú-güedé cúú-güedé déhe té Zebēdeú.

²⁰ Te ní cana ñaha-gă xii-güedé, te ní dándō-güedé tātá-güedé ndihí cue téé xinu cuechi núú-güedé xití bàrcú, te ní tuha ñaha-güedé xii-gá.

Èⁿ téé yìhí ñaha espíritu cundihí yucu ñávāha

(Lc. 4:31-37)

²¹ Te ní quexio Jesús ndihí cue téé-án ìⁿ ñuú nání Cāpernaúm, te yacáⁿ ndécú-gá ní tnahá nduu ndētatú ñáyiú, te cuānguihu-gá veñúhu ñáyiú isráel dānehé ñáhá-gă xii-yu.

²² Te xīcuñúhu víhí-yu nchaa tnúhu cāháⁿ-gá, chi quide-gá sá cúú-gă ìⁿ Yáá táxi tnúni víhí, te ñá túú dācuaha ñaha-gá xii-yu dátñá dācuaha ñaha cue téé dācuaha ñaha xii-yu nchaa tnúhu ní chídó tnúni ndí Moisés.

²³ Te xití veñúhu-án ndécú tnàhá ìⁿ téé yìhí ñaha ìⁿ espíritu cundihí yucu ñávāha, te espíritu-án ní quide-xi níhí ní cāháⁿ téé-án, te xāhaⁿ-dē xii Jèsús:

²⁴ —¿Te ná cuini yòhó Jèsús téé ñuú Nazàrét cada ñaha-n xii-ndí núu véxi-n núú ndécú-ndí-i? ¿Áⁿ véxi-n dànaa ñaha-n xii-ndí? Chí yúhú xini ñáhà-í xii-n sá cúú-n ìⁿ téé ñá túú tnàhí cuéchi-xi, chí núú Yá Ndiõxí ní quee-n véxi-n ñuyú-a —cāchí-dé xāhaⁿ-dē xii-gá.

25 Dico Jèsús ní tenàà-gá espíritú cùndìhì yucu ñávãha-án, te xãhaⁿ-gã:

—¡Cadí yuhu-n, te taquèe yiqui cuñú téé-án! —càchí-gá xãhaⁿ-gã xii espíritú-án.

26 Te espíritú cùndìhì yucu ñávãha-án nǐ dácüyihí ñáhá-xí xii téé-án, te nǐ dácáná sãa ñaha-xi, te nǐ quee-xi yiqui cùñú-dé cuáháⁿ-xi.

27 Te nchaa ñáyiu xĩndecu-án ïo ní cuñúhu-yu, te ní xĩtnáhá-yu:

—¿Te nása ndùu-tu sá quidé tée-a? ¿Ndudú sáa càháⁿ-tu-dé sánùu? Te quide-dé dàtná quidé ìⁿ téé cùnùu vihi, chi càháⁿ-ni-dé te sàndáá iní ñáhá nchaa espíritú cùndìhì yucu ñávãha —càchí-yu xĩtnáhá-yu.

28 Te ïo ndìhì ní nìhì nchaa ñáyiu dava-gá ñuú yĩndèhu distritú Galileá tnúhu nchaa nàcuáa càháⁿ Jèsús ndihì nchaa sá quidé-gá.

Jèsús quidé tãtna-gá nãná ñadìhì té Ximú

(Mt. 8:14-15; Lc. 4:38-39)

29 Te òré ní ndee Jèsús veñúhu cue ñáyiu isràél, te cuáháⁿ-gá ndihì té Jàcobó ndihì té Juáa vehe té Ximú ndihì té Ndrìxí.

30 Te nãná ñadìhì té Ximú cùhú-aⁿ ñùhu vihi-aⁿ cahni, te ndìhì-ni ní xãhaⁿ-güedé xii Jèsús sá cùhú-aⁿ.

31 Te ní sáháⁿ-gá núú cáá ñàha cùhú-án te ní tnì-gá ndaha-aⁿ ní ndocani ñaha-gã xii-aⁿ. Te òré-ni-án nǐ nchíco-aⁿ cahni, te ní ngúita-aⁿ xĩnu cuechi-aⁿ núú-güedé ndihì-gá.

Jèsús quidé tãtna-gá vãi ñáyiu cùhú

(Mt. 8:16-17; Lc. 4:40-41)

32 Te òré sa cuñí-xi cundiquìⁿ te ní quexìo ñáyiu núú ndécú Jèsús, te nchaa ñáyiu cùhú ní dátacá-yu ndecá-yu ní sáa núú-gã, te tnàhá cue ñáyiu yìhì ñaha espíritú cùndìhì yucu ñávãha ndecá-yu ní sáa núú-gã.

33 Te nchaa ñáyiu ñuú-án nǐ chítú nìhmù-yu yuyèhe vehe núú nǐ quexìo Jèsús.

34 Te Jèsús ní quide tãtna-gá nchaa ñáyiu cùhú cuèi ndì dǐíⁿ ndì dǐíⁿ núú cuèhé tnàhá-yu ìⁿ ìⁿ-yu, te ní queñuhu-gá nchaa espíritú cùndìhì yucu ñávãha yìhì ñaha xii ñáyiu, te ñá túú ní dàña-gá càháⁿ cue espíritú cùndìhì yucu ñávãha-án ní ìⁿ tnúhu, te ducaⁿ nǐ quide-gá chi cue espíritú-án sa xìnì-xi yoo cùu-gá.

Jèsús càháⁿ-gá tnúhu Yá Ndiòxí distritú Galileá

(Lc. 4:42-44)

35 Te òré vátá tũndaá váha-gá ní ndacóo Jèsús cuáháⁿ-gá ìⁿ xio yuhu ñuú núú ñã túú ñáyiu ndècu cuendá yacáⁿ càháⁿ ndihì-gá Yá Ndiòxí.

36 Te té Ximú ndihì cue téé cùndìhì-dé nándücu ñaha-güedé xii-gá.

37 Te òré ní naníhì ñáhá-güedé xii-gá, te ní xãhaⁿ-güedé:

—Nchaa ñáyiu nànducu ñahá-yu xii-n —càchí-güedé xãhaⁿ-güedé xii-gá.

38 Te ní xãhaⁿ-gã xii-güedé:

—Chí ná quihíⁿ-ó nchaa ñuú xĩndáa yatni-a, chi danèhé-í ñáyiu tnúhu Yá Ndiòxí chi ñuú chiuⁿ-án vèxi-í —càchí-gá xãhaⁿ-gã xii-güedé.

39 Te Jèsús tá xìca ndodo-gá cuáháⁿ nchaa ñuú yĩndèhu distritú Galileá dánèhé-gá ñáyiu, te ndì tnàhá ìⁿ ìⁿ ñuú sáa-gá te ducaⁿ cuãnguìhu-gá veñúhu-yu dànehé ñáhá-gã xií-yu tnúhu Yá Ndiòxí, te cue ñáyiu yìhì ñaha espíritú cùndìhì yucu ñávãha ta queñuhu-gá nchaa espíritú-án yiqui cùñú-yu cuáháⁿ.

Jèsús quidé tãtña-gã ìªn téé tñàhá cuéhé sã dátèhyú nihnu-xi yiqui cùñú-ó
(Mt. 8:1-4; Lc. 5:12-16)

⁴⁰ Te ní quexio ìªn téé tñàhá cuéhé sã dátèhyú nihnu-xi yiqui cùñú-ó núú Jèsús, te ní nguĩñí xití-dě núú-gã càháªn ndàhú-dé, te xãhaªn-dě xii-gã:

—Véxi-í càháªn ndàhú-í núú-n núu vá cùndèe iní-n càda tátña ñaha-n xii-í chi cùtnuní iní-í sã ndácú-n —càchí-dé xãhaªn-dě xii-gã.

⁴¹ Te Jèsús ní cundàhú iní ñáhã-gã xii-dé te ní dácãá-gã ndaha-gã ní tendaha ñaha-gã xii-dé, te xãhaªn-gã:

—Cuu cada tátña ñaha-í xii-n, te vitna ndúha-n —càchí-gã xãhaªn-gã xii-dé.

⁴² Te òré-ni-áªn ní xócuiñí cuéhé tñàhá-dé.

⁴³⁻⁴⁴ Te Jèsús ní càháªn víhí-gã dóho-dé, te xãhaªn-gã xii-dé:

—Vitna cunahú-na, dico vá yõ ìªn cùñaha-n sã ní quide tátña ñaha-í xii-n, te núú dütú-ni cuahãªn cuendã sã ná quini ñáhã-dě xii-n sã ní ndúha-n te cuahã-n-dě sã ndúú tãhú Yã Ndiõxí dàtnã ní cachí ndí Moisés cuendã ná quini ñáyiu sã ndàã ní ndúha-n —càchí-gã xãhaªn-gã xii-dé.

⁴⁵ Te téé ní cuhú-áªn ní xica-dé cuahãªn-dé, te ní nguíta-dé xãhaªn-dě xii nchaa ñáyiu ta nãnhí-dě nãcuãã ní quide Jèsús ní quide tátña ñaha-gã xii-dé. Te sã dúcãªn ní xité nuu téé-áªn cuendú nãcuãã ní quide ñaha Jèsús xii-dé ní quide tátña ñaha-gã ní ndúha-dé, te xiãªn núu dayuhu ní xóo quihu-gã dava ñuú núú ío vãi ñáyiu ndèhe ñaha xii-gã, te ní xóo cundecu-gã xití yucu núú ñã túú ñáyiu ndècu. Te nchaa ñuú ní quee ñáyiu ní sáhãªn-yu núú ndécú-gã ní càháªn ndíhi ñáhã-yu xii-gã.

2

Jèsús quidé tãtña-gã ìªn téé cùhú ñã cúú-gã candã nihnu
(Mt. 9:1-8; Lc. 5:17-26)

¹ Te sãtã ní cuu ìªn úú nduu sã ní quee Jèsús ñuú Capèrnaúm te ní nasãã tucu-gã, te cue ñáyiu ní ñihí-yu tñuhu sã ní ndexio-gã núú quidé vèhe-gã.

² Te ndíhi-ni ní tacã cuéhé víhí-yu, te ní chítú víhí-yu ndéé yuyèhe te ñã ní tñáhã-gã-yu. Te ní nguíta-gã ní dãnèhé ñáhã-gã xii-yu tñuhu Yã Ndiõxí.

³ Te òré-áªn ní quexio cúmí tñàhá cue téé núú ndécú-gã nchídó-güedé ìªn téé cùhú ñã cúú-gã candã nihnu-dé.

⁴ Dico ñã túú ní ndàcu-güedé sãã-güedé ndéé núú-gã chi ío cuéhé ñáyiu ndècu. Te xiãªn núu ní sãã-güedé díquí véhé núú yihí-gã-áªn ní caãªn-güedé, te ichi ndàã díquí véhé-ãªn ní dáquèe-güedé téé cùhú-áªn, te ñuhu-dé ìªn xító ní dáquèe ñaha-güedé ndéé núú-gã.

⁵ Te Jèsús sa ní cutnùní iní-gã sã sãndãã iní ñáhã-güedé xii-gã núu ní xãhaªn-gã xii téé cùhú-áªn:

—Yòhó téé cùhú, sa ní quide càhnu iní-í nchaa cuéchi-n —càchí-gã xãhaªn-gã xii-dé.

⁶ Te xiãªn xñucóo ìªn úú cue téé dàcuaha ñaha xii ñáyiu nchaa tñuhu ní chídó tñuní ndí Moisés, te sã dúcãªn ní càháªn Jèsús núú cue téé-áªn ní sani iní-güedé:

⁷ “Téé-a càháªn cuéhé-dé cuendã Yã Ndiõxí duha càháªn-dé, chi vá yõ ìªn ndàcu cada cahnu iní nchaa yicã cuèchi ñáyiu chi ìªn dîí-ni Yã Ndiõxí quidé càhnu iní-gã”, duha ní sani iní-güedé.

⁸ Dico òré-ni-áªn ní cutnùní iní Jèsús nãcuãã sãni iní-güedé, núu ní xãhaªn-gã xii-güedé:

—¿Te ná cuendã ducaªn sãni iní-ndó-í?

9 Te sá dúhá nǐ xáhaⁿ-í xii téé cùhú-a sá nǐ quide càhnu iní-í nchaa yíca cuèchi-dé, te xíáⁿ nchòhó ñá túú cùtnuní iní-ndó nǔu ndáá càháⁿ-í àdi ñá ndáá. Dico núu cùu-í-dé sá ndácòo-dé, te ndocani-dé xító ñùhu-dé véxi, te caca-dé, te cutnùni ndáá iní-ndó nǔu ndáá càháⁿ-í àdi ñá ndáá chi cundehe nǔu-ndó nàcuáa cada-í.

10 Te vitna na càda-í nàcuáa cutnùni iní-ndó nchaa-ndo sá yǔhú Téé cùu ñani tnáhá-ndó nchaa-ndo ndecu ndihi-í tnúhu ndee iní sá cáda càhnu iní-í nchaa cuèchi ñáyiu ñuyúú-a —càchí-gá xáhaⁿ-gǎ xii-güedé.

Te sátá dúcáⁿ te ní xáhaⁿ-gǎ xii téé cùhú-áⁿ:

11 —Ndacóo te ndocani-n xító ñùhu-n véxi-áⁿ, te núhú-n vèhe-n —cachí-gá xáhaⁿ-gǎ xii-dé.

12 Te òré-ni-áⁿ nǐ ndacóo-dé, te ní ndocani-dé xító ñùhu-dé ní quexio-áⁿ, te ndèhe nchaa ñáyiu xíndecu-áⁿ nǐ ndee-dé tnuú-yu cuáháⁿ-dé. Te sá dúcáⁿ nǐ quide Jesús ní quide tátna-gá téé-áⁿ, xíáⁿ ío ní cuñúhu nchaa ñáyiu, te ní xítñahá-yu:

—Càhnu vihi cuu Yá Ndiòxí, chí ñá ííⁿ ndùu quini-ó dùha cuu datná ní cuu vitna —càchí-yu xítñahá-yu.

*Jesús càháⁿ-gǎ ííⁿ téé nàni Leví
(Mt. 9:9-13; Lc. 5:27-32)*

13 Te Jesús cuáháⁿ tucu-gá yuhu làgúná, te ío cuéhé ñáyiu ní sátnàhá ñáhá xii-gá, te ní dánèhé ñáhá-gǎ xii-yu tnúhu Yá Ndiòxí.

14 Te òré ní yáha ní dánèhé ñáhá-gǎ xii-yu, te ní naqueheⁿ-gǎ ichi, te ní yáha yatni-gǎ ííⁿ xichi núu núcòo ííⁿ téé nàni Leví dèhe ííⁿ téé nàni Alfeú quidé còbrá-dé ñáyiu cuendá impuèstú chi cobràdór cúu-dé. Te òré ní xiní ñáhá-gǎ xii-dé, te ní xáhaⁿ-gǎ:

—Néhé chitnahá ñáhá-n xii-í —càchí-gá xáhaⁿ-gǎ xii-dé.

Te té Leví-áⁿ nǐ ndacuííⁿ-dé, te ní tuha ñaha-dé xii-gá.

15 Te té Leví-áⁿ cuáháⁿ-dé ndihi Jesús vehe-dé. Te yíhi Jesús mèsá xéxi-gǎ ndihi cue téé xíca cuu ndihi-gǎ, te tnáhá vài cue téé cuihna iní-xi quide cobrá ñáhá xii ñáyiu cuendá impuèstú, ndihi dava-gǎ cue téé ndecu ichi cuehé ichi duha núcòo ndihi ñaha-güedé xii-gǎ xéxi ndihi ñaha-güedé, te ducaⁿ chí ío vài ñáyiu nchicúⁿ ñáhá xii-gǎ.

16 Te sá nǐ xiní cue téé dàcuáha ñaha xii-yu nchaa tnúhu ní chídó tnùni ndíi Moisés, ndihi cue téé cùu fariséu xéxi Jesús ndihi nchaa cue téé-áⁿ nǔu ní xicáⁿ tnúhú-güedé núu cué téé xíca cuu ndihi-gǎ, te xáhaⁿ-güedé:

—¿Ná cuendá ducaⁿ quide téé cùu mestrú-ndó xéxi-dé ndihi cue téé cuihna iní-xi quide cobrá ñáhá xii ñáyiu cuendá impuèstú, ndihi nchaa dava-gǎ cue téé ndecu ichi cuehé ichi duha-í? —càchí-güedé xáhaⁿ-güedé.

17 Te Jesús ní tecú dóho-gǎ nàcuáa ndùu tnúhu ní xáhaⁿ-güedé xii cue téé xíca cuu ndihi-gǎ, núu ní xáhaⁿ-gǎ xii-güedé:

—Nchaa ñáyiu ñá túú cùhú chí ñá túú xini ñuhú-yu ñátátná, dico nchaa ñáyiu cùhú chí xini ñuhú-yu ñátátná. Te yúhú véxi-í càháⁿ-í ñáyiu cùtnuní iní-xi sá ndécú cuèchi-xi te ñá túú véxi-í càháⁿ-í ñáyiu càchí sá ñá túú ndecu cuèchi-xi —càchí-gá xáhaⁿ-gǎ xii-güedé.

*Cuendá cue ñáyiu ñá túú tnàhí ná xéxi áma càháⁿ ndihí-yu Yá Ndiòxí
(Mt. 9:14-17; Lc. 5:33-39)*

18 Te cue téé xíca cuu ndihi té Juáá, ndihi cue téé xíca cuu ndihi cue téé cùu fariséu ñá túú tnàhí ná xéxi-güedé áma càháⁿ ndihi-güedé Yá Ndiòxí. Te ííⁿ

nduu ducaⁿ xíquide-güedé, te ní sáháⁿ ñáyiu ní xicáⁿ tnúhũ-yu núú Jèsús, te xáhãⁿ-yu xii-gá:

—Cuini-ndí cachí tnúhu-n nã cuendá cue téé xica cuu ndihi té Juáá, ndihi cue téé xica cuu ndihi cue téé cùu fariséú ñá túú tnáhí ná xexi-güedé ama càháⁿ ndihi-güedé Yá Ndióxí, te cue téé xica cuu ndihi-n ñá túú dùcaⁿ quide-güedé —càchí-yu xáhãⁿ-yu xii-gá.

¹⁹ Te Jèsús ní xáhaⁿ-gã xii-yu:

—Nchòhó xini-ndó sã vã cùú cũñaha-o xii ñáyiu ñùhu vico tnándaha sá vã cùú càxi-yu nini ndecu ndihi ñaha téé tnándaha xii-yu.

²⁰ Dico sáá nduu te vá cùndecu ndihi ñaha-gá téé tnándaha-áⁿ xii-yu, te dàvá-áⁿ te cahni iní-yu vá càxi-yu cuendá sá ndihú iní-yu.

²¹ Te vá yõo ìⁿ dándée luha dóó sáá ìⁿ dóó sa ní cuu tühú víhí, chi dóó sáá-ãⁿ nàndiyi-xi te uuⁿ-gá ndata-xi dóó sà ní cuu tühú-áⁿ.

²² Te ni vã yõo ìⁿ chìhi ndidí sáá xití ìⁿ lamba sa ní cuu tühú víhí, chi núu yoo ducaⁿ na càda te ndava lamba sa ní cuu tühú-áⁿ, chi ío ñihi yócó ndidí-áⁿ, te cuíta-ni ndidí-áⁿ te cuíta-ni lamba-áⁿ te núu ducaⁿ na càdá-yu. Núu xíãⁿ xíní ñùhu-xi queé ndidí sáá-ãⁿ xití ìⁿ lamba saa —càchí-gá xáhãⁿ-gã xii-yu.

Cue téé xica cuu ndihi Jesús sàhnú-güedé yoco triú nduu ndetátú ñáyiu (Mt. 12:1-8; Lc. 6:1-5)

²³ Te ìⁿ nduu cùu-xi nduu ndetátú ñáyiu ñùhu Jesús ichi ndihi cue téé xica cuu ndihi-gá, te ta yáha-gá ndihi-güedé ìⁿ xichi núú cáá triú, te ní ngúita-güedé sàhnú-güedé yoco triú-áⁿ.

²⁴ Te cue téé cùu fariséú ní xáhaⁿ-güedé xii-gá:

—Ná cuendá ducaⁿ quide cue téé xica cuu ndihi-n sahnú-güedé yoco triú vitna cùu-xi nduu ndetátú-i? Te ñá túú tàú-güedé ducaⁿ càda-güedé —càchí-güedé xáhaⁿ-güedé xii-gá.

²⁵ Te ní xáhaⁿ-gã xii-güedé:

—¿Te náa vátá dácuaⁿ tnahi-gá-ndó núú tütú Yá Ndióxí núú càháⁿ-xi nàcuáa ní quide ndíi Dàvíí cùtnàhá ní xíhí ndíi docó ndihi cue téé ní xica cuu ndihi ndíi-ãⁿ?

²⁶ Te dàvá-áⁿ ñí xíndecu ìⁿ téé ní xínani Abiátár ní cuu-dé dútú cúnúu, te ndíi Dàvíí ní quíhu ndíi xití vehe Yá Ndióxí ní queheⁿ ndíi pàá ní cuu íí ndécú-ãⁿ ñí dácãñu ndíi cue téé ní xica cuu ndihi ndíi ní xexi ndíi ndihi-güedé, te mee-ni cué dútú tàú-güedé càxi-güedé pàá-áⁿ ní cùu —cachí-gá xáhaⁿ-gã xii-güedé.

²⁷ Te ní xáhaⁿ tucu Jesús xii-güedé:

—Mee Yá Ndióxí ní taxi ndecu-gá nduu ndetátú ñáyiu, te ñá túú ní càchí-gá sá mée-yu nándi cani iní-yu cadá-yu canehe ñi-yu nduu ndetátú-yu-áⁿ.

²⁸ Te yúhú Téé cùu ñani tnáhá-ndó nchàa-ndo, tnáhá-í ndécú ndihi-í tnúhu ndee ñni sá cùu-í nchaa ñáyiu nàcuáa cadá-yu nduu ndetátú-ó-áⁿ —càchí-gá xáhaⁿ-gã xii-güedé.

3

Ìⁿ téé ní yíchí ìⁿ xio ndaha-xi (Mt. 12:9-14; Lc. 6:6-11)

¹ Te Jèsús cuánguihu tucu-gá xití veñúhu, te xití veñúhu-áⁿ ndécú ìⁿ téé ní yíchí ìⁿ xio ndaha-dé.

² Te xíaⁿ ndécú cuè téé xìto dayuhu ñaha xii-gá, te núu cada tátna-gá téé cùhú-áⁿ nduu cùu-xi nduu ndetatú-güedé ndihi ñáyiú, cuendá ducaⁿ te níhi-güedé ñacuáa cada-güedé cacáⁿ cuéchi-güedé cuendá-gá.

³ Te ní xáhaⁿ-gá xii téé cùhú ndaha-xi-áⁿ:

—Ndacuíñi te ngúnutñi-n cuådava iha —càchí-gá xáhaⁿ-gá xii-dé.

⁴ Te ní xícáⁿ tnúhú-gá núu-güedé, te xáhaⁿ-gá:

—Chí càchí tnúhu ná cúú sá cúú càda-o nduu ndetatú-ó. ¿Sá vaha ñã sá cuèhé? ¿Sá cadá tátna-o ñáyiú cùhú ñã sá cáhni-ó-yu? —càchí-gá xáhaⁿ-gá xii-güedé.

Dico ni ñiⁿ-güedé ñá túú tnàhí ni cáháⁿ-güedé.

⁵ Te Jèsús ní xíndéhé vaha-gá núu ncháa-güedé te ní cudééⁿ-gá, te ní ndíhú iní-gá chí ío sáa iní-güedé, te ní xáhaⁿ-gá xii téé cùhú ndaha-xi-áⁿ:

—Ndocani ndaha-n —càchí-gá xáhaⁿ-gá xii-dé.

Te ní ndocani-dé ndaha-dé, te òré-ni-áⁿ ní ndúha.

⁶ Te cue téé cùu fariséú ní xica-güedé cuáháⁿ-güedé ñiⁿ xichi núu ñi naníhí tnàhá-güedé ndihi cue téé cündihi té Hèrodés cuendá ndatnúhu-güedé nása cada-güedé cahni-güedé Jèsús.

Cuéhé víhi ñáyiú ní quexìo yuhu lagúná

⁷ Te Jèsús ní xica-gá cuáháⁿ-gá ndihi cue téé xica cuu ndihi-gá yuhu làgúná distritú Galiléa, te ío cuéhé ñáyiú distritú-áⁿ nchicúⁿ ñáhã-yu xii-gá cuáháⁿ.

⁸ Te núu ñi quexìo-gá-áⁿ ní sáháⁿ ñáyiú distritú Judeá, ñáyiú ñuú Jerusalén, ñáyiú distritú Idúmeá, ñáyiú xíndecu ndaa íngá xio yúte Jòrdán, ndihi ñáyiú xíndecu yatni ñuú Tírú ndihi ñuú Sidón, te ducaⁿ ío vai-yu ní sáháⁿ núu ndécú-gá chí ní níhi-yu tnúhu nchaa ñacuáa quide-gá.

⁹ Te Jèsús ní xáhaⁿ-gá xii cue téé xica cuu ndihi-gá sá cadá túha-güedé ñiⁿ bàrcú cuendá caa-gá núu-xi cuendá sá vã dádèhnde ñahá-yu xii-gá chí ío cuéhé-yu.

¹⁰ Te sá dúcáⁿ ní níhi-yu tnúhu sá quidé tátna-gá ñáyiú cùhú, núu xíaⁿ nchaa dava-gá ñáyiú cùhú súúni ñicó ngõnchihí tnàhá-yu cuáháⁿ-yu núu ndécú-gá cuíni-yu tnándeé ñáhã-yu xii-gá cuendá sá cuíni-yu ndúha-yu.

¹¹ Te cue ñáyiú yíhi ñaha espíritú cündihi yucu ñávãha ní sanu xiti ñaha-xi xii-yu núu Jèsús òré ní xiní ñáhá-xí xii-gá, te xíaⁿ ní quide níhi ní cáháⁿ-yu, te xáhãⁿ-yu xii Jèsús:

—¡Yòhó cúú-n Dèhe Yá Ndiòxí! —càchí-yu xáhãⁿ-yu xii-gá.

¹² Te Jèsús ní tenáa-gá nchaa espíritú cündihi yucu ñávãha-áⁿ, te ní xáhaⁿ-gá xii nchaa ñáyiú ní xíhi-xi-áⁿ sá vã càháⁿ-yu núu ñáyiú yoo cùu-gá.

Jèsús cãxi-gá úxúú tnàhá cue téé dacuàha ñaha xii ñáyiú tnúhu-gá (Mt. 10:1-4; Lc. 6:12-16)

¹³ Te sátá dúcáⁿ ñi cuu te Jèsús ní sáa-gá ñiⁿ yucu, te xíaⁿ ndécú-gá ní cana-gá nchaa cue téé càchí iní-gá. Te òré ní quexìo nchaa cue téé-áⁿ núu-gá,

te ní cáxi-gá úxúú tnàhá cue téé caca cuu ndihi-gá, te ñiⁿ-ni cue téé-áⁿ tendaha-gá quíhiⁿ-güedé cáháⁿ-güedé tnúhu-gá núu ñáyiú.

¹⁵ Te ní sáñaha-gá xii-güedé tnúhu ndee íni cundecu ndihi-güedé cuendá cada tátna-güedé ñáyiú cùhú, ndihi cuendá queñuhu-güedé nchaa espíritú cündihi yucu ñávãha yíhi ñaha xii ñáyiú.

¹⁶ Te duha xínani ndi úxúú cue téé-áⁿ: ñiⁿ-dé nání-dé Xímú, te mee-gá ní taudíu ñaha-gá xii-dé sá cúnani-dé Pèlú.

17 Te ingá-dé nání-dě Jàcobó, te ingá-dé nání-dě Juàá, te ñani té Jàcobó-án cúú tē Juàá te ndi ndúú-güedé cúú-güedé déhe té Zebèdeú, te ndi ndúú cue téé-án ní dánání ñàha Jesús xii-güedé Boànergés, te tnúhu-án quèé-xi: Cue téé ío yáchi cúdéⁿ, duha quèe-xi tnúhu-án.

18 Te duha xīnani dàva-gá-güedé: Té Ndrīxí, té Lìpé, té Bartolómé, té Mâteú, té Mǎxi, té Jàcobó déhe té Àlfeú, té Tàdeú, té Ximú téé ní cundihi cue téé canànistá ní cùu,

19 ndihi té Jùdás Iscàrioté téé ní sáá nduu ní sáha cuèndá ñáhá xii Jesús núú cuè téé cùu úhú iní ñáhá xii-gá, duha xīnani cuè téé ní cáxi Jèsús ní xica cuu ndihi-gá.

*Càchí-güedé sá ndécú ndihi Jesús yucu ñávàha dico ñá ndàà
(Mt. 12:22-32; Lc. 11:14-23; 12:10)*

Te sátá dúcáⁿ te cuáháⁿ-gá ndihi-güedé núú quidé vèhe-gá.

20 Te ío vài ñáyiú ní tacá-ni tucú-yu xíáⁿ, te ni ñá ní níhí-gǎ nása cada-gá caxi-gá ndihi cue téé xica cuu ndihi-gá cuèndá sá ío vài-yu.

21 Te cue ñáyiú cùu ndi mee Jesús ní níhí-yu tnúhu nchaa nàcuáa cùu, te nchaa ñáyiú ñá cùtnuní váha iní-xi ní cachí-yu sá ní nduu lùcú-gá núu xiáⁿ cuáháⁿ ñáyiú cùu ndi mee Jesús núú ndécú-gá cuèndá candeca ñáhá-yu xii-gá núhú ní cùu.

22 Te cue téé dàcuaha ñaha xii ñáyiú nchaa tnúhu ní chídó tnùní ndii Moisés véxi ndéé ñuu Jerusalén ní cáháⁿ cuèhé-güedé cuèndá Jèsús, chi ní xítnàha-güedé:

—Téa ndécú ndihi-dé sácúfnhá, te diu xiáⁿ chindèe ñaha-xi xii-dé queñuhu-dé nchaa espíritú cùndihi-xi yihi ñaha xii ñáyiú, te diu-ni-xi tàxi tnuní-xi nchaa espíritú-án —duha ní xítnàha-güedé.

23 Te Jèsús ní cana ñaha-gǎ xii-güedé, te ní cani-gá ìⁿ cuèndú núú-güedé nàcuáa tecú tnùní-güedé tnúhu-gá, te xáhaⁿ-gǎ xii-güedé:

—¿Te nása cada sácúfnhá queñuhu-xi cue espíritú cùndihi-xi yihi ñaha xii ñáyiú-í?

24 Te nchòhó xini-ndó sǎ núu ìⁿ téé yìndaha ìⁿ nacióⁿ vá cúú ìⁿnuu-dé ndihi cue téé cùndihi-dé, te vá cúdí-dé cunuu-dé.

25 Te diu-ni ducaⁿ sǎtnahá-xi cùu tucu ñáyiú xīndecu ìⁿ-ni vèhe, chi núu vá cúú ìⁿnuú-yu, te vá cúdí-yu cundecu càhnú-yu.

26 Te núu sácúfnhá ñá túú cùu ìⁿnuu-xi ndihi cue espíritú cùndihi-xi, te vá cúdí-xi cundecu-xi taxi tnùní-xi te núu ducaⁿ quide-xi.

27 Te nchòhó xini-ndó sǎ cuè ñadúhú chi vá ndácú-güedé cuèndá-ni quíhu-güedé duhu-güedé vehe ìⁿ téé ío ndee, chi díhna-gá xini ñuhu-xi tní-güedé téé-án dacùtu ñaha-güedé xii-dé dàtnuní ducaⁿ te ndacu-güedé duhu-güedé nchaa sá ndécú ndihi-dé.

28 Te na càchí tnúhu ndáá-í xii-ndo sǎ ncháá sǎ cuèhé sá dúhá quide ñáyiú, ndihi nchaa tnúhu cuèhé tnúhu duha càháⁿ-yu cuèndá Yǎ Ndiòxí cuu cada càhu iní-gá.

29 Dico cue ñáyiú na càháⁿ cuèhé cuèndá Espíritú Yǎ Ndiòxí, ñáyiú-án vǎ cáda càhu iní ñáhá tnàhí-gá xií-yu, chi cundecu-ni cuéchi-yu núú-gǎ ni caa ni quíhíⁿ —càchí-gá xáhaⁿ-gǎ xii-güedé.

30 Te ducaⁿ ní cáháⁿ-gá chi càchí-güedé sá ndécú ndihi-gá espíritú cùndihi yucu ñávàha.

*Náná Jèsús ndihì cue ñaní-gá
(Mt. 12:46-50; Lc. 8:19-21)*

³¹ Te ní quexio náná Jèsús ndihì cue ñaní-gá núú ndécú-gã xĩnutnĩ-yu quehé, te ní xáhãⁿ-yu xii ñⁿ ñáyiu xĩndecu-áⁿ sã dáyãha-yu tnúhu núú-gã cuèndá quee-gá ndatnúhu ndihì ñaha-gã xií-yu.

³² Te cue ñáyiu xĩnucóo ni càndéé dǎñi-gá ní xáhãⁿ-yu xii-gá:

—Náná-n ndihì cue ñaní-n ndécú-yu quehé nándücu ñahá-yu xii-n —cächí-yu xáhãⁿ-yu xii-gá.

³³ Te Jèsús ní xáhãⁿ-gã xií-yu:

—Te cachí tnúhu-ndo yǒndi-gá ñáyiu cùu datná nǎnà-í ndihì dàtná cue ñaní-í —cächí-gá xáhãⁿ-gã xií-yu.

³⁴ Te dàtnùní ní xíndéhé vãha-gá núú nchàa ñáyiu xĩnucóo ni càndéé dǎñi-gá-áⁿ, te ní xáhãⁿ-gã xií-yu:

—Nchaa ñáyiu-a cùú-yu dàtná nǎnà-í ndihì dàtná cue ñaní-í.

³⁵ Chi nchaa ñáyiu quide nacúaá càháⁿ Yã Ndiǒxi, ñáyiu-áⁿ cùú-yu dàtná cue ñaní-í, ndihì dàtná cue cùha-í, ndihì dàtná nǎnà-í —cächí-gá xáhãⁿ-gã xií-yu.

4

*Nàcuáa quide téé cuángacáⁿ triú
(Mt. 13:1-9; Lc. 8:4-8)*

¹ Te Jèsús ní ngüíta-gá dácuaà tucu-gá ñáyiu yuhu làgúná. Te cuéhé vǐhi-yu ní tacá xíaⁿ nũu cuásaá-gá núú ñⁿ bàrcú nutnĩ xití ndute làgúná-áⁿ, te núú xiãⁿ ní ngóo-gá te ní ngüíta-gá dánèhé ñahá-gã xií-yu, te nchaa-yu xixúcu-yu yuhu làgúná-áⁿ.

² Te ní ngüíta-gá ní cani-gá titní cuèndú núú-yu nàcuáa tecú tnùnì-yu tnúhu-gá, te xáhãⁿ-gã xií-yu:

³ —Chí cùndèdóho vãha ñⁿ cuèndú ná càni-í-a. ñⁿ téé cuángacáⁿ-dé triú.

⁴ Te òrè ní ngüíta-dé dǎngoyo-dé triú-áⁿ, te dava ní quene ndava ní ngava ndéé ichi, te ní xini cue tílaá te ní nadatàcá-güedi.

⁵ Te dava ní ngava ñuhu yadi nũu yíhí vǐhi yúú, te ndǐhi-ni ní xĩnu-xi cuèndá sá ñà túú cǎvìhi ñuhu.

⁶ Dico òrè ní nayehé ñá túú ní cùndee iní-xi chí ní yíchí-xi, chí ñá túú ní ñihí quǐhíⁿ cùnú yóho-xi.

⁷ Te dava ní ngava núú yúcu ndǐquíⁿ tnu iñu, te ñⁿnuu-ni ní xĩnu-xi ndihì tnu iñu, te tnu iñu-áⁿ ñǐ sahnu-xi te ní dánáá-xi nchàa triú sá ñǐ xĩnu-áⁿ.

⁸ Dico dava triú-áⁿ ñǐ ngava-xi núú ndécú ñũhu cocoⁿ, te xiãⁿ ní xĩnu-xi te ní sahnu-xi te ío vãha ní cuu, chí núú ñⁿ-ní triú-áⁿ te dava yoco-xi ní ngüihí ócó úxí triú-xi, te dava yoco-xi ní ngüihí únídico triú-xi, te dava yoco-xi ní ngüihí ñⁿ cièndú triú-xi —cächí-gá xáhãⁿ-gã xií-yu.

⁹ Te xáhãⁿ tùcu-gá xií-yu:

—Nchaa nchòhò ñáyiu ní xíndèdóho nchaa tnúhu ní cáháⁿ-í-a, te ío vãha chí cuãha cuèndá —cächí-gá xáhãⁿ-gã xií-yu.

*Jèsús càháⁿ-gá ná cuèndá ducáⁿ càni-gá cuèndú
(Mt. 13:10-17; Lc. 8:9-10)*

¹⁰ Te sáta ñǐ ndaca ñáyiu-áⁿ te ní quendóo mee-nã Jèsús ndihì cue téé xìca cuu ndihì-gá, ndihì ñⁿ úú-nã ñáyiu. Te ñáyiu-áⁿ ndihì cue téé-áⁿ ñǐ xicáⁿ

tnúhũ-yu ndihĩ-güedé núú-gã, núu nása quèe-xi cuendú ní cani-gá núú-yu ndihĩ-güedé.

¹¹ Te ní xáhaⁿ-gã:

—Nchòhó chí sa càchí tnúhu Yá Ndiòxí xii-ndo ìⁿ sá vátá quìní-gá-ndó, chí càchí tnúhu-gá nàcuáa cada-gá ndihu ndaha-gã ñáyiu, dico dava-gá ñáyiu càni-í mee-ni cuendú núú-yu.

¹² Chí cuéi na quìní-yu nchaa nàcuáa cuu dico ni vã cútñuní iní-yu ná cuendá ducaⁿ cùu, àdi cuéi na cùndedóho-yu dico ni vã tècú tnùnĩ-yu. Te ducaⁿ ndòhó-yu cuendá sá vã quìndáá iní-yu Yá Ndiòxí, ndihĩ cuendá sá vã cáda càhnu iní-gá nchaa yíca cuèchi-yu —càchí-gá xáhaⁿ-gã xii-yu ndihĩ-güedé.

*Jèsús càháⁿ-gá nàcuáa quèe-xi cuendá tée cuángacáⁿ triù
(Mt. 13:18-23; Lc. 8:11-15)*

¹³ Te ní xáhaⁿ tucu Jesús xii cue tée xica cuu ndihĩ-gá, ndihĩ cue ñáyiu-áⁿ:

—Nchòhó, ñá túú ní tècú tnùnĩ-ndó cuendú ní cani-í núú-ndó, te núu ducaⁿ, ¿te nása tecú tnùnĩ-ndó dava-gá cuendú cani-í núú-ndó-í? Te na càchí tnúhu-í xii-ndo nàcuáa quèe-xi cuendú ní cani-í núú-ndó.

¹⁴ Te tée cuángacáⁿ triù-áⁿ cúú-dé dàtná ìⁿ tée cuáháⁿ càháⁿ tnúhu Yá Ndiòxí núú ñáyiu.

¹⁵ Te triù-áⁿ cúú-xí dàtná tnúhu Yá Ndiòxí, te triù sá ñi quene ndava ní ngava ndéé ichi, xiãⁿ cúú-xí dàtná ñáyiu ní tnahá iní-xi tnúhu Yá Ndiòxí, dico sácúíhná cuáháⁿ-xi xòceni-xi tnúhu-gá iní-yu cuendá sá vã cáncícúⁿ nihnú-yu nàcuáa càháⁿ tnúhu-áⁿ.

¹⁶ Te triù sá ñi ngava ñuhu yadi núú yíhĩ vihĩ yúú, xiãⁿ cúú-xí dàtná ñáyiu ní xíndedóho tnúhu Yá Ndiòxí te díí iní ní tñiⁿ-yu tnúhu-gá.

¹⁷ Dico òré ná ngúíta ñáyiu cúcuèhé ñáhã-yu xii-yu àdi nándi-gá sá yãha-yu sá cuendá tnúhu-gá, te ñá cùndèe iní-yu chí dàñá-yu tnúhu-gá cuendá sá ñá túú nihí ndé-yu.

¹⁸ Te triù sá ñi ngava núú yúcu ndĩquíⁿ tnu iñu xiãⁿ cúú-xí dàtná ñáyiu ní tecú dóho-xi tnúhu Yá Ndiòxí,

¹⁹ dico cuèé cuèé ní nacuanaá-yu tnúhu-gá, chí cuendá mee-ni sá cúú-xí mèe-yu ñuhu iní-yu, ndihĩ cuendá sá ìo sàni iní-yu cuu cuicá-yu, ndihĩ cuendá sá ìo cùdíí iní-yu nchaa sá ìo ñuyíú-a, te ñá túú ñuhu iní-yu tnúhu sá ñi xíndedóho-yu-áⁿ nàcuáa cada váha-yu cundecú-yu.

²⁰ Dico triù sá ñi ngava núú ndécú ñuhu cocoⁿ, xiãⁿ cúú-xí dàtná ñáyiu ní xíndedóho tnúhu Yá Ndiòxí te quidé-yu nchaa nàcuáa càháⁿ tnúhu-áⁿ. Te cada iní-ndó sã ñáyiu-áⁿ cúú-yu dàtná triù sá ñi nguíhi yoco-xi ócò úxí triù-xi, ndihĩ triù sá ñi nguíhi yoco-xi únidico triù-xi, ndihĩ triù sá ñi nguíhi yoco-xi ìⁿ ciendú triù-xi. Te ducaⁿ sãtnahá-xi cúú-yu chí ìo váha quidé-yu —càchí-gá xáhaⁿ-gã xii cue tée xica cuu ndihĩ-gá ndihĩ cue ñáyiu-áⁿ.

*Cuendá iti
(Lc. 8:16-18)*

²¹ Te xáhaⁿ-gã xii nchaa ñáyiu:

—Ñá túú ñi ìⁿ ñáyiu tèñuhú iti te chiváha-yu ìⁿ xití quídi, àdi chiváha-yu ìⁿ caha camá, chí tàxi ndecú-yu ìⁿ núú dùcúⁿ cuendá cutñuní núú nchaa ñáyiu.

²² Te ni ìⁿ tnúhu sá ñá tècú tnùnĩ ñáyiu vitna cachí-ó sã vã tècú tnùnĩ-yu chí dacuítí sã tècú tnùnĩ-yu, te ni ìⁿ tnúhu sá càchí-ó cùu yuhu vitna vá cúú yuhu chí dacuítí sã quée túu-xi núú ñáyiu.

²³ Te nchòhò cue ñáyiú ní xíndedóho nchaa tnúhu ní cáháⁿ-í-a, te ío váha chí ná cuáha cuendá —càchí-gá xáhaⁿ-gã xii-yu.

²⁴ Te ní xáhaⁿ tùcu-gá:

—Ío váha chí cùndedóho tnúhu na cáháⁿ-í-a. Te nàcuáa-ni quide-ndo danehé-ndó ñáyiú tnúhu Yá Ndiòxí, te ñiu-ni ducaⁿ càda ñaha-gá xii-ndo, te uuⁿ-gá ducaⁿ càda-gá sá cúú-xí-ndó.

²⁵ Te nchaa nchòhò ñáyiú tècú tnùní tnúhu Yá Ndiòxí, uuⁿ-gá cuita tecú tnùní-ndó tnúhu-gá quihíⁿ. Te nchaa nchòhò ñáyiú ñá túú tècú tnùní tnúhu-gá, te uuⁿ-gá vá tècú tnùní-ndó —càchí-gá xáhaⁿ-gã xii-yu.

Nàcuáa sàhnu triú

²⁶ Te Jèsús xáhaⁿ tùcu-gá:

—Na càni-í ìⁿ cuendú núú-ndó cuendá tecú tnùní-ndó nàcuáa cada-xi òre ndíhu ndaha ñaha Yá Ndiòxí xii ñáyiú. ìⁿ téé cuángacáⁿ-dé triú.

²⁷⁻²⁸ Te sátá ní yáha ní sacáⁿ-dé triú-áⁿ, te cuánhú-ⁿde vehe-ⁿdé ndétátú-ⁿdé. Te ducaⁿ-ni ta xica nduu cuáháⁿ te ní xínu triú-áⁿ, te nàcuáa ta sàhnu-xi cuáháⁿ te ta quèe ndaha-xi, te ducaⁿ-ni cùu ní sáá nduu ní quene yoco-xi te ní nguíhi triú-xi, dico téé ní sacáⁿ triú-áⁿ ñà túú xini-ⁿdé nása ní sahnu-xi, chi mee ñúhu ní quide-xi ní sahnu triú-áⁿ.

²⁹ Te òre sa ní ndíhi ní cuaaⁿ te ní nguíta téé ní sacáⁿ-áⁿ náquèhndé-ⁿdé nátàxi tnaha-ⁿdé —càchí-gá xáhaⁿ-gã xii-yu.

Cuendá ndíquíⁿ yutnu nàni mostázá

(Mt. 13:31-32; Lc. 13:18-19)

³⁰ Te xáhaⁿ tùcu Jèsús xii-yu:

—Na càni tucu-í ingá cuendú núú-ndó cuendá tecú tnùní-ndó nàcuáa cada-xi òre ndíhu ndaha ñaha Yá Ndiòxí xii ñáyiú.

³¹ ìⁿ yutnu nàni mostázá cúú-xi ìⁿ yutnu sá líhli vìhi-gá ndíquíⁿ-xi dàcúúxi ndíquíⁿ nchaa cúhú,

³² dico òre ná cacáⁿ-güedé núú ñúhú-güedé, te na xínu-xi te sàhnu-gá-xi dàcúúxi nchaa cúhú, te nchaa dité-xi ío cùu cahnu-xi, te ndéé cue quiti ndava núú tàchí sácò-güedi nchaa núú dité-xi xínu ndeti-güedi —càchí-gá xáhaⁿ-gã xii-yu.

Ío titní cuendú ní cani Jèsús núú ñáyiú

(Mt. 13:34-35)

³³ Te ío-gá vai cuendú ní cani Jèsús núú ñáyiú cuendá tecú tnùní-yu tnúhu Yá Ndiòxí, dico dava cuendú ñá túú ní càni-gá núú-yu, chi ní cutnùní iní-gá sá vã tècú tnùní-yu nchaa.

³⁴ Te mee-ni cuendú ní cani Jèsús núú ñáyiú ndi tnahá òre ní dánèhé ñáhá-gã xii-yu tnúhu-gá. Te òre ndécú mèe Jèsús ndíhi cue téé xica cuu ndíhi-gá, te ní xáhaⁿ-gã xii-güedé nàcuáa quèe-xi ìⁿ ìⁿ cuendú ní cani-gá núú ñáyiú.

Jèsús ngání-gã táchí ndíhi ndute làgúná

(Mt. 8:23-27; Lc. 8:22-25)

³⁵ Te ñiu-ni nduu-áⁿ òre sa ta cùndiquiⁿ cuáháⁿ ní xáhaⁿ Jèsús xii cue téé xica cuu ndíhi-gá:

—Chí ná quihíⁿ-ó ndàa ingá xio yuhu làgúná —càchí-gá xáhaⁿ-gã xii-güedé.

³⁶ Te ní quide ndee ìni-gá nchaa ñáyiú xixúcu-áⁿ, te ñiu-ni bàrcú sá ñúhú-gã òre ní dánèhé-gá ñáyiú tnúhu-gá ñiu-ni xíáⁿ ní dácáca cuè téé xica cuu ndíhi-gá

ndécá ñaha-güedé xii-gá cuáhán, te tnàhá ìñ ùú-gá bàrcú ní xica-xi nchícúñ-xi bàrcú ñùhú-gã-án cuáhán.

37 Te ñùhu barcú ñùhú-gã-án ichi cuáhán-xi núú ndute, te ní quexio ìñ táchí ññhi, te ta nàdachitú-xi ndute xití bàrcú-án cuáhán, te sa cuini-nã-xi quée naa bàrcú-án xití ndute ni cùu.

38 Te Jèsús cáá-gã xidí-gá ìñ xichi ndàa sátá bàrcú-án, te yìncihi ìñ dóó dǎquí-gã. Te sá dúcán cuini-xi quée naa bàrcú-án ñùu ní sáhán-güedé ní ndocani ñaha-güedé xii-gá, te xáhañ-güedé:

—ìMèstrú, ndiquíú ìní! ¿Náa ñá túú ndìhú ìní-n sã tá quée naa-o cuáhán-ãñ? —càchí-güedé xáhañ-güedé xii-gá.

39 Te Jèsús ní ndiquíú ìní-gá te ní ndacóo-gá, te ní tenàá-gá táchí-ãñ, te ní xáhañ-gã xii ndute làgúná:

—ìTnavíí-nã cuhuñ, chí ío dusañ! —càchí-gá xáhañ-gã xii ndute-án.

Te òré-ni ní ngüíñí táchí-ãñ te ní nucúndecu nahi-nã ndute làgúná-án.

40 Te Jèsús ní xáhañ-gã xii-güedé:

—¿Ná cuendá ndée dúcán yùhú-ndó-í? ¿Náa ñá túú sàndáá ìní ñáhá ndìsa-ndo xii-í-ãñ? —càchí-gá xáhañ-gã xii-güedé.

41 Dico mee-güedé chí ío ní yùhú-güedé sá ducañ ñí quide-gá ní xiní-güedé, te ní xitnaha-güedé:

—¿Te ná téé cùu téé-a núu ní cáháñ-ni-dé, te ní ngüíñí táchí te ní nucúndecu nahi ndute làgúná-a-í? —càchí-güedé xitnaha-güedé.

5

Ìñ téé yìhi ñaha espíritú cúndìhi yucu ñávãha
(Mt. 8:28-34; Lc. 8:26-39)

1 Te ní sáá Jèsús ndìhi cue téé xica cuu ndìhi-gá ndàa ingá xio yuhu làgúná yucu cue téé ñùu Gàdará.

2 Te òré ní queene-gá xití bàrcú te ìñ téé yìhi ñaha espíritú cúndìhi yucu ñávãha ní quee-dé núú yíndùxi ndíyi cuáhán-dé núú-gã.

3 Te mee-ni núú yíndùxi ndíyi-án quidé vèhe-dé, te cuéi dàcutu ñaha-güedé cadená xii-dé dico ñá túú tnàhí ndàcu-güedé núú-dé.

4 Te ío titní xito ní dácútú-güedé cadená sáhá-dé ndìhi ndaha-dé dico ní dándává-ni-dé, te ní xóo dacàchi-gá-dé nchaa cadená-án, te ñá túú tnàhí ni ndàcu-güedé núú-dé.

5 Te cuéi nduu cuéi níú ní xóo cana saa-dé, te váha-ni núu xití yucu ndècu-dé àdi núú yíndùxi ndíyi dico càna saa nahi-ni-dé, te ío ní xóo dàmícuèhé-dé mée-dé ndìhi yúu.

6 Te òré ní xiní-dé Jèsús te xinu-dé ní sáhán núú-gã, te ní ngüíñí xití-dé,

7 te espíritú yìhi ñaha xii-dé-án ñí quide-xi ññhi ní cáháñ-dé, te xáhañ-dé xii-gá:

—¿Ná cuendá véxi yòhó Jèsús Déhe Dútú Ndiòxí sàdí-n ichi-í? Te càháñ ndàhú-í núú Ndiòxí yuhu núú-n sã vã dándòho ñaha-n xii-í —càchí-dé xáhañ-dé xii-gá.

8 Te ducañ ñí cáháñ-dé cuendá sá Jèsús ní xáhañ-gã xii espíritú cúndìhi yucu ñávãha yìhi ñaha xii-dé-án sã quée ñaha-xi xii-dé.

9 Te Jèsús ní xícáñ tnùhú-gã núú-dé, te xáhañ-gã:

—¿Nása nàni-n-i? —cachí-gá xăhaⁿ-gă xii-dé.

Te ní xáhaⁿ-dě:

—Vài Sandadú, duha nàni-í chí ío cuéhé-ndí —cachí-dé xăhaⁿ-dě xii-gá.

10 Te cue espíritú cúndìhi yucu ñávăha-áⁿ nǐ cáháⁿ ndàhú-xi núú Jèsús sá vǎ téndàha ñaha-gá xii-xi quíhíⁿ-xi ingá xichi.

11 Te ðiu-ni yatni yucu núú ndécú Jèsús-áⁿ yíhí vǎi cuchí xǐxexi-güedi.

12 Te nchaa cue espíritú-áⁿ nǐ cáháⁿ ndàhú-xi núú-gă, te xăhaⁿ-xi xii-gá:

—Càháⁿ ndàhú-ndí núú-n sǎ dáńá-n quíhu-ndí yiqui cùñú nchaa cùchí-ăⁿ —cachí-xi xăhaⁿ-xi xii-gá.

13 Te Jèsús ní xáhaⁿ-gă sá cúú quíhu-xi yiqui cùñú-güedi, te xǐnu dàtná úú mǐl-güedi yíhi yucu-áⁿ. Te nchaa espíritú cúndìhi yucu ñávăha yíhi ñaha xii téé-áⁿ nǐ quee ñaha-xi xii-dé, te cuánguihu-xi yiqui cùñú nchaa cùchí-áⁿ, te nchaa-güedi ní xinu-güedi duha ní quée-güedi ndàa núú dèhvá yuhu làgúná-áⁿ, te ní ngaunihnu-güedi xití ndute te ní ndihí-güedi ní cáhá.

14 Te òré ní xiní cue téé xito cuchí-áⁿ nàcuáa ní cuu te ní xinu-güedé, te ní sáháⁿ-güedé ní caní-güedé cuèndú núú cuè ñáyiu ndècu xití ñuú, ndihí núú cuè ñáyiu ndècu xití yucu. Te nchaa ñáyiu ní níhí tñuhu ní xicá-yu cuáháⁿ ndéhé-yu nàcuáa ní cuu.

15 Te òré ní quexió-yu núú ndécú Jèsús te ní xiní-yu téé ní xíhi ñaha cuè espíritú cúndìhi yucu ñávăha-áⁿ núcòo-dé núú sàhá Jèsús, te nìhnu-ná-dé dóó-dé te núcòo-ná-dé dàtná ìⁿ ñáyiu váha, te ní yùhú-yu òré ní xiní ñáhá-yu xii-dé.

16 Te nchaa ñáyiu ní xiní nàcuáa ní cuu ní ndúha téé yíhi ñaha cue espíritú cúndìhi yucu ñávăha-áⁿ ní cùu ní caní-yu cuèndú núú nchàa ñáyiu ní quexió-áⁿ nàcuáa ní cuu ní ndúha téé-áⁿ ndihí nàcuáa ní cuu cuèndá nchaa cùchí-áⁿ.

17 Te sá dúcáⁿ ní níhí ñáyiu-áⁿ tñuhu nàcuáa ní cuu núu nchaa-yu ní ngúita-yu càháⁿ ndàhú-yu núú Jèsús sá ná quèe-gá yucu ñuú-yu núhú-gá.

18 Te ní xica-gá cuáháⁿ-gá núú ndécú bàrcú, te òré ndée-gá bàrcú-áⁿ nùhú-gá ní ngúita téé ní xíhi ñaha cuè espíritú cúndìhi yucu ñávăha-áⁿ càháⁿ ndàhú-dé núú-gă nùu vǎ cùndèe iní-gá quíhíⁿ ndihí ñaha-gă xii-dé.

19 Dico ñá túú ní sàha-gá tñuhu quíhíⁿ ndihí ñaha-gă xii-dé, te ní xáhaⁿ-gă xii-dé:

—Cuanùhú vehe-n, te caní-n cuèndú núú cuè ñáyiu sá Yǎ Ndiòxí ní cundàhú iní ñáhá-gă xii-n, te ío càhnu cuu nchaa sá vǎha ní quide-gá sá cúú-xí-n —cachí-gá xăhaⁿ-gă xii-dé.

20 Te téé-áⁿ ní xica-dé cuánuhú-dé, te ní sáháⁿ-dé ndi ùxí ñuú nání Dècápolis, te ní caní-dé cuèndú núú nchàa ñáyiu sá ío càhnu cuu nchaa sá vǎha ní quide ñaha Jèsús xii-dé, te nchaa-yu ío ní cuñúhu-yu.

Cuèndá déhe yoco té Jàirú ndihí cuèndá ìⁿ ñadìhí ní tnándeé dóó Jèsús (Mt. 9:18-26; Lc. 8:40-56)

21 Te Jèsús cuánde-gá bàrcú, te ní natehdé-gá ndàa ingá xio yuhu làgúná, te ío vǎi ñáyiu ní tacá núú nǐ quexió-gá-áⁿ, te xíáⁿ ndécú-gá

22 ní quexió ìⁿ téé tàxi tñuní veñúhu núú-gă, te téé-áⁿ nání-dé Jàirú, te ní ngúití xití-dé núú-gă.

23 Te ní ngúita-dé càháⁿ ndàhú-dé núú-gă, te xăhaⁿ-dě xii-gá:

—Ío càhú tnahá déhe yoco-ĩ cùhú-xi, te ndècu-ná-xi sá cùu-xi, te véxi-ĩ càháⁿ ndàhú-ĩ núu-n núu vá cùndèe iní-n quĩhíⁿ-ó vèhe-ĩ tendaha-n-xi cuendá ndúha-xi, te cundecu-xi —càchí-dé xáhaⁿ-dè xii-gá.

24 Te Jèsús ní xica-gá cuaháⁿ-gá ndihí téé-án, te ío vai ñáyiú nchicúⁿ ñáhá xii-gá cuaháⁿ, te dàdehnde ñaha-ná-yu xii-gá ní cùu.

25 Te tnuú nchaa ñáyiú-án ñútnàhá ìⁿ ñaha cùhú, te ñaha-án sa ní cuu úxúú cuiá sá cùhú-aⁿ ngòyo ñaha ñííⁿ xii-aⁿ.

26 Te ío ta ndòho-aⁿ véxi, te ío cuéhé ñátátná ní cuu ta quide tátna ñaha xii-aⁿ, te sa ní ndihí nchaa sá ndécú ndihí-aⁿ ní nadico-aⁿ cuendá ní ñhí-aⁿ díhúⁿ ní queheⁿ nchaa ñáyiú ní quide tátna ñaha xii-aⁿ dico ní ìⁿ-yu ñá túú ní ndacú-yu ndúha-aⁿ, chi da uuⁿ-gá tá cùu cahú-aⁿ cuaháⁿ.

27 Te òré ní ñhí-aⁿ tñúhu cuendá Jèsús, te ní xica-aⁿ cuaháⁿ-aⁿ núú ndécú-gá. Te òré ní quexio-aⁿ núú ndécú-gá te ní sáháⁿ ndehe yatni-aⁿ ndàa sátá-gá ní tnándeé-aⁿ dóo-gá.

28 Te ducaⁿ ní quide-aⁿ chi ní sani iní-aⁿ sá núu ndacu-aⁿ tnándeé-aⁿ cuèdicó luha yuhu dõo Jèsús te ndúha-aⁿ ní sani iní-aⁿ.

29 Te òré ducaⁿ ní quide-aⁿ te ñá túú-gá ní ngòyo ñaha-gá ñííⁿ xii-aⁿ, te òré-án ní cutnùní iní-aⁿ sá ní ndúha-aⁿ cuéhé tnahá-aⁿ.

30 Te Jèsús ní cutnùní iní-gá sá ìⁿ ñáyiú ní ndúha sá cuendá-gá, núu ní nchócótó-gá ndàa sátá-gá te ní xicáⁿ tñúhú-gá núú nchàa ñáyiú nchicúⁿ ñáhá xii-gá, te xáhaⁿ-gá xii-yu:

—¿Ndédacàa-ndo ní tnándeé ñáhá xii-í? —càchí-gá xáhaⁿ-gá xii-yu.

31 Te cue téé xica cuu ndihí-gá ní xáhaⁿ-güedé xii-gá:

—Mèstrú, ndèhe-n sá vái ñáyiú nchicúⁿ ñáhá xii-n, te texio texio dàdehnde ñahá-yu xii-n te xicáⁿ tñúhú-gá-n yòo ní tnándeé ñáhá xii-n —cachí-güedé xáhaⁿ-güedé xii-gá.

32 Te Jèsús ní xindéhé vaha-gá xio xio díñi-gá núu ndédacàa ñáyiú ní tnándeé ñáhá xii-gá.

33 Te sá dúcáⁿ ní cutnùní iní ñadhíⁿ-áⁿ nàcuáa ní cuu, núu yùhú yùhú-aⁿ ní sáháⁿ-aⁿ ní ngüíñí xití-án núú Jèsús, te ní xáhaⁿ ndáa-aⁿ xii-gá nàcuáa ndùu cuendá-aⁿ.

34 Te Jèsús ní xáhaⁿ-gá xii-aⁿ:

—Yòhó ñaha cùhú ní cùu, ní sándáá iní ñáhá-n xii-í, núu ní ndúha-n, te vitna cuanùhú te vá ndihú-gá iní-n, chi vá dúcáⁿ-gá ndoho-n —càchí-gá xáhaⁿ-gá xii-aⁿ.

35 Te càháⁿ dúcáⁿ-ní Jèsús ní sáá cue téé xinu cuechi vehe té Jàirú téé tàxi tñuní veñúhu-án, te xáhaⁿ-güedé xii-dé:

—Sa ní xihí déhe-n, vá chíchiuⁿ-gá-n Mèstrú —càchí-güedé xáhaⁿ-güedé xii-dé.

36 Dico Jèsús ñá túú ní quide cuendá-gá nàcuáa ndùu tñúhu ní cáháⁿ cue téé-án, te ní xáhaⁿ-gá xii téé tàxi tñuní veñúhu-án:

—Ñá túú nã cani iní-n, quíndáá iní ñáhá-ní-n xii-í —càchí-gá xáhaⁿ-gá xii-dé.

37 Te Jèsús vá yòo-gá ní cuiní-gá canchicúⁿ ñáhá xii-gá quihíⁿ, chi té Pelú-ni, ndihí té Jàcobó-ni, ndihí ñani-ni-dé té Juáa cuaháⁿ ndihí ñaha-gá xii-güedé.

38 Te òré ní quexio-gá ndihí-güedé vehe téé tàxi tñuní veñúhu-án, te ní xiní-gá sá ío vai ñáyiú xíndecu, te súúni dùsaⁿ quidé-yu te ñhí xicáháⁿ-yu te xindáhí-yu.

39 Te òré cuánguñu-gá xití vehe, te ní xáhaⁿ-gá xii-yu:

—¿Ná cuèndá ndéé dúcáⁿ ío dusaⁿ quide-ndo, te ndàhyú-ndó? Te xíchí-a ñá túú ní xíhí-xi chí dicó xídí-xi —càchí-gá xàhaⁿ-gá xíi-yu.

40 Te ní sácú ndeé ñáhà-yu xii-gá sá dúcáⁿ ní cáháⁿ-gá, chí sá cúú-xí mèe-yu chí ní xíhí ndisa xíchí-áⁿ. Te òré-áⁿ ní queñuhu-gá nchaá-yu quehé, te cuànguihu-gá núú cándòdo yiqui cuñú xíchí ní xíhí-áⁿ. Te ndèca-gá tātá xíchí ní xíhí-áⁿ ndihí náná-xi cuànguihu, te tnàhá cue téé úní ndihí-gá-áⁿ cuànguihu ndihí-gá.

41 Te ní tn̄-gá ndaha xíchí ní xíhí-áⁿ, te ní xáhaⁿ-gá:

—Tàlíta, cúmí —càchí-gá xàhaⁿ-gá.

Te tnúhu-áⁿ queé-xí: Yòhò xíchí cuéchí yúhú càchí-í sá ndácò-n, duha quèe-xi tnúhu-áⁿ.

42 Te òré-ni-áⁿ ní ndoto xíchí cuéchí-áⁿ ní ndacóo-xi ní nacaca cuu-xi, te ndècu-xi úxúú cuá-xi. Te ío ní cuñúhu nchaá ñáyiú sá dúcáⁿ ní dándótó ñaha Jesús xii-xi.

43 Te Jèsús ní cáháⁿ víhí-gá dóho tātá-xi ndihí náná-xi sá vǎ yòo ñⁿ cuñàhá-yu sá ní dándótó ñaha-gá xii-xi. Te sátá dúcáⁿ te ní xáhaⁿ-gá xii-yu sá cuñàhá-yu xii-xi sá caxí-xi.

6

Jèsús ndécú-gá ñuú Nazàrét
(Mt. 13:53-58; Lc. 4:16-30)

1 Te Jèsús ní ndee-gá ñuú núú ní dándótó-gá xíchí ní xíhí-áⁿ, te cuánuhú-gá núú cúú ñuú-gá, te tnàhá cue téé xica cuu ndihí-gá cuánuhú ndihí-gá.

2 Te ndècu Jesús ñuú-gá ní tnahá nduu ndètatú ñáyiú. Te nduu-áⁿ cuànguihu-gá xítí veñúhu dàcuaha ñaha-gá xii-yu. Te vǎi ñáyiú ndèdóho nchaá tnúhu càháⁿ-gá, te xicuñúhu víhí-yu, te xitnàhá-yu:

—¿Ndeé ní sáháⁿ dácúhá té-e a núú ndéé duha váha càháⁿ-dé, nása ní quide-dé núú ndéé duha ío váha cùtnuní iní-dé, te ndàcu-dé quidé-dé nchaá sá vǎ yòo tnàhí ndàcu cada-i?

3 Te dicó carpintèrú cúú-dě, dicó déhe tá Màriá cúú-dě, te ñaní-dé cúú tē Jàcobó, ndihí té Chéé, ndihí té Jùdás, ndihí té Xímú, te diu-ni cue cúha-dé cúú ñáyiú ndècu ndihí-o ñuú-a —càchí-yu xitnàhá-yu.

Te ñá túú ní cuíní-gá-yu cáháⁿ ndihí váha ñahá-yu xii-gá.

4 Te Jèsús ní xáhaⁿ-gá xii-yu:

—Te núú ñⁿ téé càháⁿ tnúhu Yá Ndiòxí ná nàsáá-dé ñuú-dé dacuàha-dé ñáyiú tnúhu-gá, te nchaá ñáyiú ñuú-dé-áⁿ, ndihí nchaá ñáyiú ndècu ndihí-dé vehe-dé, ndihí nchaá ñáyiú cùu ndi mee-dé ñá túú nèhé-yu sá yíñúhu núú-dě, dico cue ñáyiú nchaá dava-gá ñuú chí nèhé-yu sá yíñúhu núú-dě —càchí-gá xàhaⁿ-gá xii-yu.

5 Te ñá túú ní quide tātna Jèsús vǎi ñáyiú cuèndá sá ñà túú ní sàndáá iní ñáhà-yu xii-gá, dico ní quide tātna-gá ñⁿ úú ñáyiú cùhú ní sàndáá iní ñáhà xii-gá. Te ní tendaha ñaha-ni-gá xii-yu te ní ndúha-yu.

6 Te ío ní cuñúhu-gá sá dúcáⁿ ñà túú ní cuíní-yu quindáá iní ñáhà-yu xii-gá. Te sátá dúcáⁿ te ní xica-gá cuáháⁿ-gá nchaá dava-gá ñuú líhli càa yatni xiáⁿ cuèndá dacuàha-gá ñáyiú tnúhu-gá.

Jèsús táuchìu-gá quíhíⁿ cue téé xica cuu ndihí-gá càháⁿ-güedé tnúhu Yá Ndiòxí
núú ñáyiú

(Mt. 10:5-15; Lc. 9:1-6)

7 Te Jèsús ní cana-gá ndi ùxúú cue téé xica cuu ndihi-gá, te ní sáñaha-gã xii-güedé tnúhu ndee íní cundecu ndihi-güedé cuendá queñuhu-güedé nchaa espíritú cündihi yucu ñávaha yihi ñaha xii ñáyiu. Te ní xáhaⁿ-gã xii-güedé sá ndi ndúú ndi ndúú-güedé quíhíⁿ-güedé cáháⁿ-güedé tnúhu Yá Ndióxi núú ñáyiu.

8-9 Te cùmání-gã caca-güedé quíhíⁿ-güedé, te ní xáhaⁿ-gã xii-güedé:

—Vá cánèhe-ndo ñunu cuhuⁿ ndachiuⁿ-ndo, te ní vã cánèhe-ndo sá cáxi-ndó, te ní vã cánèhe-ndo díhúⁿ, chí ìⁿ caa-ni tátnu canehe-ndo, te chàú yihí-ní-ndó-áⁿ xiáⁿ-ni quíhí-ndo, te vã cánèhe-gá-ndó ìngá ichi dóó-ndó chí ñu-ni dóó níhmú-ndó-áⁿ xiáⁿ tnàhí-ni cuihnu-ndo te ñá túú tnàhí-gá ná canehe-ndo —càchí-gá xáhaⁿ-gã xii-güedé.

10 Te xáhaⁿ tùcu-gá:

—Te òré ná sàá-ndó ìⁿ ñuú, te ió ñáyiu cáháⁿ ñáhã-yu xii-ndo vèhé-yu, te xiáⁿ-ni cundecu-ndo ndèè ná sàá nduu ndèe-ndo ñuú-áⁿ.

11 Te núú ió dava ñuú ñá túú cuíní-yu cáháⁿ ndihi ñaha vaha-yu xii-ndo, te ní ñá túú cuíní-yu cundedóho-yu tnúhu cáháⁿ-ndó, te ndee-ni-ndo ñuú-áⁿ te naquidi-ndo ticáchúhmá ní tní sáhá-ndó cuendá ná cùtnuní iní-yu sá ñá túú quide váha-yu. Te na cächí tnúhu ndáá-í xii-ndo sá ná sàá nduu cada ndáá Yá Ndióxi cuéchi nchaa ñáyiu, te cue ñáyiu ducaⁿ na càda ñaha xii-ndo-áⁿ ìo-gá ndohó-yu dàvá-áⁿ dàcúúxi dàtná ndoho cue ñáyiu ñuú Sòdomá ndihi cue ñáyiu ñuú Gòmorá —cächí-gá xáhaⁿ-gã xii-güedé.

12 Te cue téé-áⁿ ní xica-güedé cuáháⁿ-güedé te ní ngúita-güedé dácuaaha-güedé cue ñáyiu tnúhu Yá Ndióxi, te xáhaⁿ-güedé xií-yu:

—Chí dándixi túú iní sá ñá túú quide váha-ndo ndècu-ndo, te dañá-ndo nchaa ichi cuehé ichi duha ndècu-ndo. —cächí-güedé xáhaⁿ-güedé xií-yu.

13 Te vãi espíritú cündihi yucu ñávaha yihi ñaha xii ñáyiu ta queñuhu-güedé yiqui cuñú-yu cuáháⁿ, te vãi tucu ñáyiu cùhú tá quide tátna-güedé cuáháⁿ chíhí ñaha-güedé acití xií-yu te ndúha-yu.

Nàcuáa ní cuu ní xihí té Juáa téé dàcuandute ñaha xii ñáyiu

(Mt. 14:1-12; Lc. 9:7-9)

14 Te nchaa xichi ní níhí ñáyiu tnúhu nchaa nàcuáa quide Jesús, te tnàhá té Hèrodés téé yìndaha ñaha xii ñáyiu ní níhí-dé tnúhu nchaa nàcuáa quide-gá, te ní cachí-dé:

—Té Juáa téé ní xóo dacuandute ñaha xii ñáyiu ní ndoto núú dàcáⁿ ndácú-dé quidé-dé nchaa sá vã yóo tnàhí ndàcu cada —duha ní cachí-dé.

15 Te dava ñáyiu cächí-yu sá tã Èliás téé ní xóo cáháⁿ tnúhu Yá Ndióxi ndéé sanaha ní nasáá-dé.

Te davá-yu cächí-yu sá cúú-gã dàtná ìⁿ téé ní xóo cáháⁿ tnúhu Yá Ndióxi ndéé sanaha.

16 Te té Hèrodés ní níhí-dé tnúhu nchaa nàcuáa cáháⁿ-yu, te ní cachí-dé:

—Díu té Juáa téé ní táuchíúⁿ-í ní xehndé-güedé díquí-xi ní ndoto —cächí-dé.

17-18 Te duha ní cuu cùtnàhá ní sahní té Hèrodés té Juáa, chí dàvá-áⁿ ní naqueheⁿ té Hèrodés-áⁿ ìⁿ ñaha nani Herodiás ndécá-dé, te ñaha-áⁿ sá ní cándeca ñaha ñàní-dé té Lipé. Te té Juáa ní xáhaⁿ-dè xii té Hèrodés sá ñá túú ní quide váha-dé sá dúcáⁿ ní naqueheⁿ-dé ñaha ní cándeca ñàní-dé, núú sá cuendá ñaha-áⁿ ní táuchíúⁿ té Hèrodés ní tnúú-güedé té Juáa ní chíhí ñaha-güedé vecaá, te ní dácútú ñaha-güedé xii-dé, te ducaⁿ ní quide-dé cuendá sá ndécá ñaha-dé xii-aⁿ.

19 Te ñaha nàni Herodiás ndéca tẽ Hèrodés-án ïo ní cuu úhú iní-aⁿ té Juàá, te ní cuiní-aⁿ cahni-aⁿ-dé, dico ñá túú ní ñihí-aⁿ nàcuáa cada-aⁿ.

20 Te mee tẽ Hèrodés chí ní cutnùni ndáá iní-dé sá tẽ Juàá cúú-dẽ ìⁿ tée quide mee-ni sá vaha, te quide ndáá-dé núú Yá Ndiõxí, te ní xóo yùhú ñáhá-dẽ núu xiãⁿ ñá túú ní ðaña-dé ná cada ñaha ñaha ndeca-dé-án xii té Juàá. Te tẽ Hèrodés-án ïo ní cudíí iní-dé ní xíndedóho-dé nchaa tnúhu ní xáhaⁿ tẽ Juàá xii-dé, dico ñá túú ní sàni iní-dé duuⁿ duuⁿ tñii-dé tnúhu-án.

21 Te ìⁿ nduu ní xóo vico vehe tẽ Hèrodés ní quide càhnu-dé nduu nĩ cacu-dé. Te nduu-án nĩ ñihí ñaha nàni Herodiás-án nàcuáa cada-aⁿ cuendá cuú té Juàá. Te nduu-án ní cáháⁿ tẽ Hèrodés nchaa cue tée cùchiuⁿ, ndihí nchaa cue tée tàxi tnuni ñáhá xii cue sandadú, ndihí nchaa cue tée cuica ndècu distritú Galilea cuendá cudini ndihí ñaha-dé xii-güedé nduu-án.

22 Te ndècu ìⁿ déhe yoco ñaha nani Herodiás-án, te xíchí-án nĩ quíhu-xi vehe núú cúú vico-án nĩ xita saha-xi mèi oré yíhí tẽ Hèrodés mèsá ndihí nchaa cue tée ní cáháⁿ-dé, te ïo ní cudíí iní-dé ndihí nchaa cue tée-án nàcuáa ní xita xíchí-án. Te tẽ Hèrodés ní xáhaⁿ-dẽ xii-xi:

—Cácaⁿ núú-í núu ná cuiní-n te taxi-í —càchí-dé xáhaⁿ-dẽ xii-xi.

23 Te ní cacunehe-dé ndéé Yá Ndiõxí nàcuáa cutnùni iní xíchí-án sá ndáá cuañaha-dẽ núu ná cúú sá ná càcáⁿ-xi núú-dé cuèi ndéé cuádava nchaa sá ndécú ndihí-dé, te núu na càcáⁿ-xi.

24 Te sá dúcáⁿ nĩ xáhaⁿ-dẽ xii-xi núu ní queue-xi quehé ní xáhaⁿ-xi xii náná-xi:

—Ñáá, ¿ná cúú sá càcáⁿ-í núú tẽ Hèrodés? —càchí-xi xáhaⁿ-xi xii-aⁿ.

Te náná-xi-án nĩ xáhaⁿ-aⁿ xii-xi:

—Cuáháⁿ càcáⁿ-n díquí tẽ Juàá tée dàcuandute ñaha xii ñáyiú —càchí-aⁿ xáhaⁿ-aⁿ.

25 Te ndihí-ni cuándihu xíchí-án xití vehe núú yíhí tẽ Hèrodés-án, te xáhaⁿ-xi xii-dé:

—Cuiní-í sá mèi nduu vitna quehndé-n díquí tẽ Juàá tée dàcuandute ñaha xii ñáyiú te taxi-n, dico na cùhuⁿ ìⁿ xití cóhó taxi-n —càchí-xi xáhaⁿ-xi xii-dé.

26 Te tẽ Hèrodés ní ngúita-dé ndihú víhí iní-dé sá dúcáⁿ nĩ xáhaⁿ-xi xii-dé, dico ñá túú ní cùyii-dé cuñaha-dẽ xii-xi sá vã cúú cuañaha-dẽ sá xicáⁿ-xi, chí cuendá sá núu nchaa ñáyiú ní xáhaⁿ-dẽ sá cúú cuañaha-dẽ núu ná cúú sá ná càcáⁿ-xi, te ní cacunehe-dé ndéé Yá Ndiõxí nàcuáa cutnùni iní-xi sá ndáá cuañaha-dé sá ná càcáⁿ-xi núú-dé.

27 Te tẽ Hèrodés-án ndihí-ni ní xáhaⁿ-dẽ xii ìⁿ sandadú sá quihíⁿ-dé quehndé-dé díquí tẽ Juàá.

28 Te sandadú-án nĩ xica-dé cuáháⁿ-dé vecaá núú yíhí tẽ Juàá-án, te ní quexìo-dé te ní xehndé-ni-dé díquí tẽ Juàá, te ní chihi-dé ìⁿ xití cóhó te nèhe-dé cuánuhú ní sáha-dé xíchí xicáⁿ-án, te xíchí-án nĩ nàcuáha-xi náná-xi.

29 Te oré ní ñihí nchaa cue tée ní xica cuu ndihí ndí Juàá-án tnúhu sá dúcáⁿ nĩ sahani ñaha-güedé xii ndí, te ní sáháⁿ-güedé ní ndocani-güedé yiquí cùñú ndí te ní chindúxi-güedé.

*Jesús dácaxi-gá úhúⁿ mĩl cue tée te ðìⁿ ñáyiú ðihí ndihí landú
(Mt. 14:13-21; Lc. 9:10-17; Jn. 6:1-14)*

30 Te nchaa cue tée ní táuchíúⁿ Jesús cuáháⁿ cáháⁿ tnúhu Yá Ndiõxí núú ñáyiú ní ndexìo-güedé núú-gã te ní ngúita-güedé nácàni tnúhu-güedé nchaa nàcuáa ní quide-güedé ndihí nchaa nàcuáa ní dánèhè ñáhá-güedé xii-yu.

31 Te Jesús ní xáhaⁿ-gã xii-güedé:

—Chí nèhé ná quíhíⁿ-ó ìⁿ xichi núú ñà túú ñáyiú ndetatú-ó —càchí-gá xǎhaⁿ-gǎ xii-güedé.

Te ducaⁿ ní xáhaⁿ-gǎ xii-güedé, chí ío cuéhé ñáyiú cuáháⁿ véxi-yu cuú-yu núú ndécú-gǎ. Te ní ñà níhí-gá nása cada-gá caxi-gá ndihí cue téé xica cuu ndihí-gá.

³² Te Jèsús cuánguee-gá bàrcú ndihí mee-ni cuè téé ní táuchíúⁿ-gǎ cáháⁿ tnúhu-gá, te cuáháⁿ-gá ndihí-güedé ìⁿ xichi núú ñà túú ñáyiú ndècu.

³³ Dico vǎi ñáyiú ní cutnùní iní-yu sá díú-gǎ ñúhú bàrcú-án cuáháⁿ ndihí cue téé xica cuu ndihí-gá, te nchaa ñuú cáá yàtni xíaⁿ ní quee ñáyiú xixínú-yu cuáháⁿ núú ní quidé-yu cuèndá quexio Jesús, te sa ndécú-yu xíaⁿ ní quexio-gá.

³⁴ Te òré ní quene Jèsús xití bàrcú, te ní xini-gá cuéhé víhí ñáyiú xixúcu núú ní quexio-gá-án, te ní cundàhú iní ñáhá-gǎ xii-yu chí ndécú-yu dátá ná xíndecu cue mbéé cue quití ñà túú tòli-xi, te ío vǎi núú sǎ ní ngúita-gá ní dácuáhá ñàha-gá xii-yu.

³⁵ Te sátá tá cuàa cuáháⁿ te ní sáháⁿ cue téé xica cuu ndihí Jesús núú-gǎ, te xǎhaⁿ-güedé xii-gá:

—Sa ní cuaa te ñà túú ñáyiú ndècu yatni iha.

³⁶ Váha-gá dandàca nchaa ñáyiú-a chí na quíhíⁿ-yu nchaa vehe càa xití yucu-a, ndihí nchaa ñuú cáá nchàa yatni iha cuaáⁿ-yu sá caxí-yu —càchí-güedé xǎhaⁿ-güedé xii-gá.

³⁷ Te Jèsús ní xáhaⁿ-gǎ:

—Mee-ndo chí cuáñaha sǎ ná caxí-yu —càchí-gá xǎhaⁿ-gǎ xii-güedé.

Te xǎhaⁿ-güedé xii-gá:

—¿Te nása cada-ndí, chí xini ñuhu-xi dátá úú cièndú díhúⁿ denàriú cuèndá cuaaⁿ-ndí sá caxí-yu? —càchí-güedé xǎhaⁿ-güedé xii-gá.

³⁸ Te Jesús ní xáhaⁿ-gǎ xii-güedé:

—Chí cuáháⁿ cundehe-ndo núu ná daha pàá ndécú ndihí-ndo te cachí tnúhu-ndo —càchí-gá xǎhaⁿ-gǎ xii-güedé.

Te ní sáháⁿ ndéhé-güedé núu ná daha pàá ndécú, te ní xáhaⁿ-güedé xii-gá:

—Úhúⁿ duha-ná pàá ndihí úú-nǎ chácá ndécú —càchí-güedé xǎhaⁿ-güedé xii-gá.

³⁹ Te Jèsús ní xáhaⁿ-gǎ xii nchaa ñáyiú sá ná níhí tnáhǎ-yu cuu titní xichí-yu, te ngóo-yu nchaa núú cùhú cuíí càa xíaⁿ.

⁴⁰ Te nchaá-yu ní ngóo-yu, te dava xichí-yu ní ngóo ìⁿ cièndú-yu, te dava xichí-yu ní ngóo údico úxí-yu.

⁴¹ Te sátá ní ndihí-yu ní ngóo, te ní queheⁿ Jèsús ndi ùhúⁿ pàá ndi úú chácá-án, te ní ndacoto-gá andiú te ní ndacáⁿ táhú-gǎ núú Yá Ndióxi, te dátá nùní ní táhú cuèchi-gá pàá-án te ní sáñaha-gǎ xii cue téé xica cuu ndihí-gá ní dáccǎhñu-güedé nchaa ñáyiú-án ní xexí-yu. Te díu-ni ducaⁿ ní quide tucu-gá úú chácá-án.

⁴² Te nchaá-yu ní xexí-yu ní ndahá xití-yu.

⁴³ Te sátá ní túhú cóhò-yu te ní nadatàcá-güedé nchaa sá ní quendóo, te ní chítú ùxúú tnàhá tídihi mee-ni sǎ ní quendóo núú ùhúⁿ-ni pàá, ndihí núú úú-ni chácá.

⁴⁴ Te nchaa ñáyiú ní xexi-án chí xínu úhúⁿ mǐl mee-ni cuè téé chí díu-ni cue téé-án ní quíúndehu, te ñáyiú ñáyiú díhí ndihí cue landú.

*Jèsús xicá-gǎ núú ndute
(Mt. 14:22-27; Jn. 6:16-21)*

45 Te òré-ni-án nǐ xáhaⁿ Jèsús xii cue téé xìca cuu ndìhi-gá sá quèe-güedé bàrcú codonùu-güedé quíhíⁿ-güedé ìⁿ ñúú nání Bètsaidá cáá ndàa ingá xio yuhu làgúná núú ndécú-güedé-áⁿ, te mee-gă quendóo-gă cada ndee iní tnáhá-gă ndìhi cue ñáyiu.

46 Te sátá nǐ yáha ní quide ndee iní tnáhá-gă ndìhi-yu, te ní xica-gă cuáháⁿ-gă ìⁿ tìndúú cáá yàtni xíáⁿ cuendá cáháⁿ ndìhi-gă Yă Ndiòxí.

47 Te òré sa ní cundiquiⁿ te bàrcú sá ñúhú cuè téé xìca cuu ndìhi-gá sa cuáháⁿ-xi ndéé cuádava xití làgúná-áⁿ, te mee-gă ndécú-gă ìⁿ núú tìndúú.

48 Te túu ndèhe-gă sá sùúni ndòho-güedé tá dàcaca-güedé bàrcú-áⁿ cuáháⁿ, chi cuendá ndàa nacuáa cuáháⁿ-xi-áⁿ duha véxi táchí te nàtùndaha-xi. Te ingá nduu-áⁿ tàcuíhndá-gă sa ní cuyatni vií-nă Jèsús bàrcú ñúhú-güedé-áⁿ, dico núú ndute tá xìca-gă cuáháⁿ te luha-ná te yáha ñaha-gă xii-güedé ní cuu.

49-50 Te òré ní xiní ñáhá cuè téé ñùhu barcú-áⁿ xii-gă te ní yùhú-güedé ní cana saa-güedé, chi ní sani iní-güedé sá ìⁿ almá cúú-gă. Te ní xáhaⁿ-gă xii-güedé:

—jÑíí cunduu-ndo, vá yùhú-ndó, chi yùhú cùú-í! —càchí-gă xáhaⁿ-gă xii-güedé.

51 Te Jèsús cuánguee-gă xití bàrcú ñúhú-güedé-áⁿ, te sátá cuánguee-gă te òré-ni ní ngúíí táchí, te ní cuñúhu vihi-güedé.

52 Te ducaⁿ chi cue téé-áⁿ ñà túú ní cùtnuní iní-güedé nása quide-gă, chi ñà túú ní cùtnuní váha iní-güedé nàcuáa ndùu sá nǐ quide-gă òré ní nadacàyá-gă pàá, chi ío nǐ díquí-güedé.

*Jèsús quidé tătna-gă ñáyiu cùhú ñúú Genesàrét
(Mt. 14:34-36)*

53 Te ní yáha-güedé ndìhi-gă ndàa ingá xio yuhu làgúná, te ní sáá-güedé ndìhi-gă yucu cue téé ñúú Genesàrét. Te yàcáⁿ ní dácútú ndéé-güedé bàrcú-güedé yuhu làgúná.

54 Te òré ní quene Jèsús ndìhi cue téé xìca cuu ndìhi-gă xití bàrcú, te nchaa ñáyiu xĩndecu-áⁿ nǐ cutnùnì iní-yu sá díú-gă.

55 Te ñáyiu-áⁿ ndìhi-ni ní sáháⁿ-yu nchaa núú xĩndecu cue ñáyiu cùhú, te cue ñáyiu cùhú-áⁿ nǐ quée-yu xító nchìdo ñahá-yu cuáháⁿ ndi tnahá ìⁿ ìⁿ xichi núú nihí-yu tnúhu quèxio Jèsús.

56 Te nchaa ñúú náhnú ndìhi nchaa ñúú líhli núú cuáháⁿ Jèsús, ducaⁿ xĩndecá-yu nchaa ñáyiu cùhú cuáháⁿ xití ñúú sacáⁿ ñáhá-yu núú-gă cuendá cada tătna ñaha-gă xii-yu. Te ñu-ni ducaⁿ xĩquidé-yu nchaa dava-gă xichi núú cuáháⁿ-gă núú xĩndecu cue ñáyiu, te càháⁿ ndáhú-yu núú-gă sá ná dáñá-gă tnándeé cue ñáyiu cùhú-áⁿ cuédìcò luha yuhu dǒo-gă cuendá ndúha-yu. Te nchaa ñáyiu cùhú ní tnándeé yuhu dǒo-gă ní ndúha-yu.

7

*Cuendá nchaa sá quidé-xí ngĩndecu cuéchi ñáyiu
(Mt. 15:1-20)*

1 Te ñúú Jerusálén ní quee cue téé dàcuaha ñaha xii ñáyiu nchaa tnúhu ní chídò tnùnì ndí Moisés, te ní quexìo-güedé núú ndécú Jèsús, te tnáhá cue téé cùu fariséú ní quexìo ndìhi-güedé.

2 Te cue téé-áⁿ nǐ xiní-güedé sá dàva cue téé xìca cuu ndìhi Jèsús ñà túú ndàha-güedé dàtná ndáhá mèe cue téé cùu fariséú-áⁿ òré caxi-güedé. Te

xíáⁿ núu cue téé ní quexio-áⁿ ní cáháⁿ cuèhè-güedé cuèndá cue téé xica cuu ndihi-gá.

³ Te ducaⁿ chi nchaa cue téé cùu fariséu-áⁿ ndihi nchaa ñáyiú isràél nchicúⁿ nihnú-yu quidé-yu dàtná ní xóo cada nchaa cue ñaní tnáhã-yu ní xindecu ndéé sanaha, chi nchaa ñáyiú-áⁿ và cáxi-yu te núu và ndáhã-yu dàtná ní xóo ndaha nchaa cue ñaní tnáhã-yu ní xindecu ndéé sanaha-ãⁿ.

⁴ Te ñáyiú-áⁿ ndi tnahá òré cuáhãⁿ-yu núu yãhu te nàsáá-yu, te ndáhã-yu nàcuáa sãni iní-yu ndùvétú iní Yã Ndiõxí, te núu và dúcãⁿ càdá-yu te và cáxi-yu. Te tnáhã náquètè-yu vàsú sá sácũhuⁿ sá xíhí-yu, ndihi lítu, ndihi cóhó cáã, ndihi camá. Te nchaa xéhé náquètè-yu nàcuáa sãni iní-yu ndùvétú iní Yã Ndiõxí. Te ío-gá titní sá ní xóo cada nchaa ñáyiú ní xindecu ndéé sanaha-ãⁿ nchicúⁿ nihnú-yu quidé-yu.

⁵ Te cue téé cùu fariséu-áⁿ, ndihi cue téé dàcuaha ñaha xii ñáyiú nchaa tnúhu ní chídó tnùní ndíi Moisés-áⁿ ní xáhaⁿ-güedé xii Jèsús:

—¿Ná cuèndá cue téé xica cuu ndihi-n ñã túú náquete-güedé ndaha-güedé òré caxi-güedé dàtná ní cachí nchaa cue téé ní xindecu ndéé sanaha-i? —càchí-güedé xáhaⁿ-güedé xii-gá.

⁶ Te Jèsús ní xáhaⁿ-gã xii-güedé:

—Nchòhó cúu-ndó cuè téé ío dàndahú mée-xí chi càchí-ndó sã ío quide ndáã-ndó te ñã ndáã sá quidé ndáã-ndó. Te ní quee ndáã-xi nàcuáa ní chídó tnùní ndíi Chàiaá téé ní xóo cáháⁿ tnúhu Yã Ndiõxí ndéé sanaha núu tütú-gá núu càháⁿ-xi nàcuáa ní cáháⁿ-gã cuèndá-ndó, te duha ní cachí-gá:

Ñáyiú-a càchí-yu sá ío càhnu cuu-í, dico dicó-ni yuhu càháⁿ-yu, chi ñã túú ñùhu iní ñáhã-yu xii-í.

⁷ Te àúⁿ nã cuu chiñuhu ñahã-yu xii-í, chi ñã túú vèdana ndéé nándĩhi-xi, chi cue ñáyiú-a dàcuahã-yu cue tnàha ñáyiú-yu nàcuáa cundecú-yu, dico mee-ni tnúhu sá ní cahu iní cue ñáyiú ñuyúú-a càháⁿ-yu.

Duha ní chídó tnùní ndíi Chàiaá núu tütú Yã Ndiõxí nàcuáa ní cáháⁿ-gã cuèndá-ndó.

⁸ Te nchòhó ní dàñã-ndó nàcuáa ní cachí Yã Ndiõxí cada-ndo, te nchicúⁿ nihnu-ndo quide-ndo nàcuáa ní cahu iní cue ñáyiú ñuyúú-a, chi náquete-ni-ndo lítu, te náquete-ni-ndo vasú sácũhuⁿ sá xíhí-ndó nàtava-ndo nàcuáa ní xóo cada ñáyiú-áⁿ ní xóo naquetè-yu nchaa xíáⁿ, te nándi-gã nchaa núu sá quidé-ndó —càchí Jèsús xáhaⁿ-gã xii-güedé.

⁹ Te ní xáhaⁿ tũcu-gã xii-güedé:

—Te nchòhó, ñã túú cuíní-ndó càda-ndo nàcuáa cuíní Yã Ndiõxí, chi mee-ni nàcuáa ní cachí cue téé ní xindecu ndéé sanaha nchicúⁿ nihnu-ndo quide-ndo.

¹⁰ Te ndíi Moisés ní cachí ndíi sá ncháã ñáyiú canehé-yu sá yíñùhu núu tãtä-yu ndihi núu nãñã-yu. Te nchaa ñáyiú na càháⁿ úhú cuèndá tãtä-yu àdi cuèndá nãñã-yu te cahni ñaha-güedé xii-yu ní cachí ndíi.

¹¹ Te nchòhó càchí-ndó sã núu ìⁿ téé na cũñaha-dẽ xii tãtä-dẽ ndihi nãñã-dẽ sá sã ní sani iní-dé cuañaha-dẽ xii-yu cùu-xi Corbán, te ñã túú-gã xíní ñùhu-xi sá cuañaha-dẽ xii-yu, te tnúhu Corbán-áⁿ queé-xi: Sã cúu cuèndá Yã Ndiõxí.

¹² Te sá dúcãⁿ ná càháⁿ ìⁿ téé-áⁿ te nchòhó chindèe tnúhu-ndo-dẽ cuèndá sá và chindèe-gã-dé tãtä-dẽ ndihi nãñã-dẽ.

¹³ Te ducaⁿ quide-ndo chi ní dàquéé tĩhú-ndó nàcuáa ní cachí Yã Ndiõxí cada-ndo, te mee-ni nàcuáa ta quide cue téé ñuyúú-a véxi nchicúⁿ nihnu-ndo quide-ndo, te diu-ni ducaⁿ ta sãnu ichi tnaha-ndo véxi, te nándi-gã nchaa sá cáhú iní-ndó quide-ndo —cachí-gã xáhaⁿ-gã xii-güedé.

14 Te Jèsús ní xáhaⁿ tùcu-gá xii cue ñáyiú xĩndecu-áⁿ:

—Chí táquixi ndehe iha, te cundedóho váha-ndo tnũhu na càháⁿ-í-a te ío váha cuáha-ndo cuèndá.

15 Nchaa sá xéxi-ndó chi ñá túú nã quidé-xí iní-ndó, dico nchaa sá cuèhé sá dúhá sàni iní-ndó quide-ndo, nchaa xíãⁿ quidé-xí ndècu cuèchi-ndo.

16 Te nchaa nchòhò ñáyiú ndèdóho nchaa tnũhu càháⁿ-í-a ío váha chí cuáha cuèndá —càchí-gá xáhaⁿ-gá xii-yu.

17 Te Jèsús ní dándõo-gá nchaa ñáyiú núú xĩxúcu-yu-áⁿ te cuándihu-gá xití vehe. Te cue téé xica cuu ndihí-gá ní xicáⁿ tnúhú-güedé núú-gá nũu nása quèe-xi cuèndú ní cani-gá núú ñáyiú-áⁿ.

18 Te ní xáhaⁿ-gá xii-güedé:

—¿Te náa tnáhá nchòhò ñá túú ní tècú tnùní-ndó cuèndú ní cani-í núú ñáyiú-ãⁿ? Nchaa sá xéxi-yu cuánguee xití-yu ñá túú quide-xi iní-yu nàcuáa ngũndecu cuèchi-yu.

19 Chì ñá díú iní-yu cuánguee-xi chí cuánguee ndáá-xi xití-yu, te náyáha ñaha-xi xii-yu —càchí-gá xáhaⁿ-gá xii-güedé.

Te sá dúcáⁿ nĩ càháⁿ-gá te ní dátũu-gá sá cúú càxi-o nchaa núú sã cúú càxi-o.

20 Te ní xáhaⁿ tùcu-gá xii-güedé:

—Nchaa sá cuèhé sá dúhá quide ñáyiú xíãⁿ cáciu nihnu-xi iní-yu, te nchaa xíãⁿ quidé-xi ndècu cuèchi-yu.

21 Te iní-yu-áⁿ cáciu nihnu nchaa sá cuèhé sá dúhá, chí sàni cuehé sání dùha iní-yu. Te cue téé càháⁿ ndihí-güedé ñadihí te ñá díú ñadihí-güedé cúú-yu, te ñu-ni ducaⁿ quide cue ñáyiú dñí càháⁿ ndihí-yu téé te ñá díú yíi-yu cùu-güedé. Te sàhní-yu cue tnàha ñáyiú-yu, te mee-ni ìchi díí iní cúdeí iní-yu cundecú-yu.

22 Te dùhu ndachiuⁿ tnahá-yu, te xihó-yu cundecu ndihí-yu sá ndécú ndihí tnaha ñáyiú-yu, te ío quide úhú iní-yu sá cúú-xí tnàha ñáyiú-yu, te ío dándahú tnáhã-yu, te mee-ni nchàa sá cuèhé sá dúhá cúdeí iní-yu quide-yu, te ío cuèdú iní-yu, te ío yiti yuhú-yu, te ío quide cahnú-yu mèe-yu, te quide-yu nándi-gá sá ñá túú tàú-yu cadá-yu.

23 Te nchaa sá cuèhé sá dúhá-ãⁿ cáciu nihnu-xi iní-yu, te nchaa xíãⁿ quidé-xi ndècu cuèchi-yu, te ñá túú cùu-xi sá vãha sá cúú-xí iní-yu.

*Ëⁿ ñadihí véxi ñuú xicá ní sándáá iní-aⁿ Jèsús
(Mt. 15:21-28)*

24 Te ní xica Jèsús cuáhãⁿ-gá ndéé yucu cue téé ñuú Tirú, ndihí yucu cue téé ñuú Sidón. Te òré ní quexio-gá xíãⁿ te cuánguñhu-gá ìⁿ vehe te xíãⁿ cundecu-gá, te cuíní-gá sá vã quíní ñáyiú sá xíãⁿ ndécú-gá ní cùu, dico dai ní nihí-yu tnũhu.

25 Te ìⁿ ñadihí ndécú ìⁿ déhe yoco-aⁿ, te yíhi ñaha espíritú cündihí yucu ñávãha xii-xi, te ñaha-áⁿ ío ndihí ní níhí-aⁿ tnũhu sá ní quexio Jesús xíãⁿ nũu ní sáhã-aⁿ núú ndécú-gã, te ní ngüñí xití-áⁿ núú-gã.

26 Te ní ngüita-aⁿ càháⁿ ndàhú-aⁿ núú-gã, te xáhaⁿ-aⁿ sã nũu vá cündèe iní-gá queñuhu-gá espíritú cündihí yucu ñávãha yíhi ñaha xii déhe-aⁿ. Dico ñá díú ñaha israél cúú-áⁿ chí ñaha ñuú Sirofèniciá cúú-áⁿ te tnũhu griégú cúú tnũhu-aⁿ.

27 Te xíãⁿ nũu ní xáhaⁿ Jèsús xii-aⁿ:

—Daña na càxi tnaa nchaa landú chítú xìtí-güexi, te dàtnùní caxi cue iná, chí ñá túú ndùu váha-xi queheⁿ-o sá xéxí lándú te cuáha-o iná —càchí-gá xáhaⁿ-gá xii-aⁿ.

²⁸ Te ní xáhaⁿ-aⁿ xì-gá:

—Mèstrú, ndáá-ni cáháⁿ-n, dico iná chí nàdatacá-güedi sá ngóyó yùhu cóhó lándú —càchí-aⁿ xáhaⁿ-aⁿ xì-gá.

²⁹ Te Jèsús ní xáhaⁿ-gá xii-aⁿ:

—Ío váha ní cáháⁿ-n, te cuanùhú te ñá túú-gá ná cani iní-n, chi sa ní quee espíritú cúndìhi yucu ñáváha yìhi ñaha xii déhe-n —càchí-gá xáhaⁿ-gá xii-aⁿ.

³⁰ Te ñaha-áⁿ ní nasáá-aⁿ vehe-aⁿ te càa déhe-aⁿ núú camá, dico ñá túú-gá espíritú cúndìhi yucu ñáváha yìhi ñaha xii-xi chi sa ní quee ñaha-xi.

Jèsús quidé tátna-gá ìⁿ téé ñá cúú càháⁿ váha te doho-dé

³¹ Te Jèsús ní ndee-gá yucu cue téé ñúú Tírú te ní yáha-gá yucu cue téé ñúú Sídón, ndìhi yucu ndi úxí ñúú nání Dècápolis, te ní sáá-gá ndéé yuhu làgúná distritú Galiléa.

³² Te xiáⁿ ndécú-gá ní quexìo ñáyiu ndéé núú-gá ndécá-yu ìⁿ téé ñá cúú càháⁿ váha-dé te doho-dé. Te càháⁿ ndàhú-yu núú-gá sá ná tèndaha ñaha-gá xii-dé cuèndá ndúha-dé.

³³ Te Jèsús ní queñuhu ñaha-gá xii-dé tnuú-yu, te ndèca ñaha-gá cuáháⁿ ìⁿ xio, te ní dáquihu-gá díquí ndáhá-gá yáú lóho-dé, te ní dácánùu-gá díí-gá díquí ndáhá-gá, te ní tendaha-gá yàa-dé.

³⁴ Te ní ndacoto-gá andiu te ní sánuu iní-gá, te ní cáháⁿ-gá tnúhu mee-gá, te xáhaⁿ-gá:

—jěfatá! —càchí-gá xáhaⁿ-gá xii-dé.

Te tnúhu-áⁿ quée-xí: Nacaáⁿ yòhó lóho.

³⁵ Te òré-ni-áⁿ ní nacaáⁿ lóho-dé, te ní nduu váha yàa-dé, te ní cuu cáháⁿ váha-dé.

³⁶ Te Jèsús ní cáháⁿ víhí-gá dóho ñáyiu ndìhi ñaha xii téé ní quide tátna-gá-áⁿ sá vǎ yòo ìⁿ cúnàhá-yu sá ní quide tátna ñaha-gá xii-dé, dico uuⁿ-gá ní quidé-yu ní cáháⁿ-yu núú ñáyiu sá ní quide tátna-gá téé-áⁿ.

³⁷ Te nchaa-yu ío ní cuñúhu-yu, te ní xitnàhá-yu:

—Váha víhi quide-dé, chí nchaa-ni ndàcu-dé quidé-dé, chí quide tátna-ni-dé ñáyiu doho, te quide tátna-ni-dé ñáyiu ñìhí —càchí-yu xitnàhá-yu.

8

Jèsús dácàxi-gá cúmí mìl ñáyiu
(Mt. 15:32-39)

¹ Te ìⁿ nduu tucu ío cuéhé ñáyiu ní tacá núú ndécú Jèsús, te ñá túú tnàhí sá caxí-yu. Te ní cana-gá cue téé xica cuu ndìhi-gá, te ní xáhaⁿ-gá xii-güedé:

² —Yúhú, cùndahú iní-í nchaa ñáyiu-a chí sa ní cuu úní nduu ndècu ndìhi ñahá-yu xii-o ìha, te ñá túú tnàhí ná sá caxí-yu.

³ Te núu na nàtendaha-í-yu núhú tnámá-yu vehé-yu, te cuneé-yu docó ichi, chí davá-yu ío xica ndécú-yu —càchí-gá xáhaⁿ-gá xii-güedé.

⁴ Te ní xáhaⁿ-güedé xii-gá:

—¿Te ndéé ñìhí-ó sá cuñàha-o càxi nchaa ñáyiu-a, te iha ñá túú nǎ ío chí cùu-xi xìtí yucu-i? —càchí-güedé xáhaⁿ-güedé xii-gá.

⁵ Te Jèsús ní xicáⁿ tnúhú-gá núú-güedé, te xáhaⁿ-gá:

—¿Ná daha-gá pǎa ndécú ndìhi-ndo-i? —càchí-gá xáhaⁿ-gá xii-güedé.

Te ní xáhaⁿ-güedë xii-gá:

—Ndëcu ndihi-ndí úsá-gá tnàhá —càchí-güedé xáhaⁿ-güedë xii-gá.

⁶Te Jèsús ní xáhaⁿ-gá xii nchaa ñáyiú sá ngõo-yu nchaá-yu, te ní ngóo-yu, te ní queheⁿ-gá ndi úsá pàá-áⁿ, te ní ndacáⁿ táhú-gá núú Yá Ndiõxí. Te dàtnùní ní táhú cuèchi-gá te ní sáñaha-gá xii cue téé xica cuu ndihi-gá ní dácãhñu-güedé nchaa ñáyiú-áⁿ.

⁷Te ndëcu ndihi-güedé ìⁿ úú chácá lĩhli, te ḍi-u-ni ducaⁿ ní quide-gá ní ndacáⁿ táhú-gá núú Yá Ndiõxí. Te dàtnùní ní táúchíúⁿ-gá ní dácãhñu ñaha-güedë xii-yu.

⁸Te nchaá-yu ní xexí-yu ní ndahá xití-yu. Te sátá ní túhú cóhõ-yu te ní nadatácá-güedé nchaa sá ní quendóo, te ní chítú úsá tnàhá tídihi mee-ni sá ní quendóo-áⁿ.

⁹Te núú ncháá ñáyiú ní xexí-áⁿ xĩnu dàtná cùmí mĩ-yu. Te sátá ní yáha ní dácáxí ñaha Jesús xii-yu te ní dándácá ñaha-gá.

¹⁰Te dàtnùní cuánguee-gá bàrcú ndihi cue téé xica cuu ndihi-gá cuáháⁿ-gá ndihi-güedé yucu cue téé ñuú Dalmànutá.

Cue téé cùu fariséú xáhaⁿ-güedë xii Jèsús cada-gá ìⁿ sá vǎ yõo tnàhí ndàcu cada (Mt. 16:1-4; Lc. 12:54-56)

¹¹Te núú ní quexio Jesús xíáⁿ ní sáá cue téé cùu fariséú, te ní ngúita-güedé nándi tnúhu xáhaⁿ-güedë xii-gá xító ndèè ñáhá-güedë. Te xáhaⁿ-güedë sá ná cádá-gá ìⁿ sá vǎ yõo tnàhí ndàcu cada cundehe-güedé nàcuáa cutnùní iní-güedé núú ndáá sá Yá Ndiõxí ní tendaha ñaha-gá xii-gá véxi-gá ñuyíú-a.

¹²Te ní sánuu iní-gá te ní xáhaⁿ-gá xii-güedé:

—Nchaa nchòhò ñáyiú ndëcu ñuyíú-a cuiní-ndó càda-í ìⁿ sá vǎ yõo tnàhí ndàcu cada nacuáa cutnùní iní-ndó núú ndáá sá Yá Ndiõxí chĩndèe ñaha-gá xii-í. Dico na càchí tnúhu ndáá-í xii-ndo sá vǎ cádà-í sá cuiní-ndó —càchí-gá xáhaⁿ-gá xii-güedé.

¹³Te ní dándõ-gá ñáyiú xĩndecu-áⁿ, te cuánde-gá bàrcú ndihi cue téé xica cuu ndihi-gá te cuáháⁿ-gá ndihi-güedé ndàa ingá xio yuhu làgúná.

Nàcuáa quide cue téé cùu fariséú (Mt. 16:5-12)

¹⁴Te ní cunaa-güedé canehe-güedé sá caxí-güedé quíhíⁿ, te ìⁿndi-ni paá ndécú xití bàrcú-áⁿ ní nanhí-güedë.

¹⁵Te Jèsús ní cáháⁿ-gá dóho-güedé, te xáhaⁿ-gá xii-güedé:

—Na càchí tnúhu-í xii-ndo sá ìo quíhí iní-ndó cùndecu-ndo te vǎ cádá cuèndá tnàhí-ndo lèvadurá cue téé cùu fariséú, ndihi levadurá cue téé cùndihi té Hèrodés —càchí-gá xáhaⁿ-gá xii-güedé.

¹⁶Te ní ngúita-güedé xitnàha-güedé:

—Cuèndá sá ñà túú ní cǎnehe-o pàá quixi núú xíáⁿ duha càháⁿ-gá —càchí-güedé xitnàha-güedé.

¹⁷Te Jèsús ní cutnùní iní-gá nàcuáa ndùu tnúhu xitnàha-güedé, núú ní xáhaⁿ-gá xii-güedé:

—¿Ná cuèndá da sá ñà túú ní cǎnehe-ndo pàá quixi càháⁿ-ndó? Te ñá díú cuèndá pàá-áⁿ ní cáháⁿ-í, te dicó-ni sá méé-ndó ñà túú quide cuèndá váha-ndo nàcuáa ndùu tnúhu càháⁿ-í, te ni ñǎ tècú tnùní-ndó chi ìo ñi díquí-ndó.

18 Te cuèi ndèhe-ndo dico ñá túú cùtnuní iní-ndó nǎ cúú nchàa sá quidè-í, te cuèi ndédóho-ndo nchàa tnúhu càháⁿ-í dico ñá cùtnuní iní-ndó nǎsa ndúu-xi, te ní ñá ndácú iní-ndó nchàa sá tá quide-í véxi.

19 Te chí dándacu iní cùtnàhá ní táhú cuèchi-í úhúⁿ-ni pàá te ní xexi úhúⁿ mǐl mee-ni cuè téé chí ðiu-ni cue téé-áⁿ ní quíundehu. Te chí càchí tnúhu ná daha tídihi ní chítú mee-ni sǎ ní quendóo òré ní nadatàcá-ndó —càchí-gá xǎhaⁿ-gǎ xii-güedé.

Te ní xáhaⁿ-güedé xii-gá:

—Úxúú tnàhá tídihi ní chítú mee-ni sǎ ní quendóo —càchí-güedé xǎhaⁿ-güedé xii-gá.

Te xáhaⁿ tùcu-gá:

20 —Te cùtnàhá ní táhú cuèchi tucu-í úsá tnàhá pàá ní xexi cúmí mǐl ñáyiu, te chí càchí tnúhu ná daha tucu tídihi ní chítú mee-ni sǎ ní quendóo —càchí-gá xǎhaⁿ-gǎ xii-güedé.

Te ní xáhaⁿ-güedé xii-gá:

—Úsá tnàhá tídihi ní chítú mee-ni sǎ ní quendóo —càchí-güedé xǎhaⁿ-güedé xii-gá.

21 Te Jèsús ní xáhaⁿ tùcu-gá xii-güedé:

—Vitna, ¿te sa ní tecú tnùní-ndó tnúhu ní cáháⁿ-í ǎ ñàhá? —càchí-gá xǎhaⁿ-gǎ xii-güedé.

Jèsús quidé tǎtna-gá ìⁿ téé cuàá ñuú Bètsaidá

22 Te Jèsús ní sáá-gá ndihi cue téé xica cuu ndihi-gá ñuú Bètsaidá. Te ñuú-áⁿ ndécú-gǎ ní quexio ñáyiu núú-gǎ tánèhé-yu ìⁿ téé cuàá, te càháⁿ ndàhú-yu núú-gǎ núu vá cùndèe iní-gǎ tendaha ñàha-gǎ xii-dé cuèndá ndúha núú-dé.

23 Te Jèsús ní tnì-gǎ ndaha téé cuàá-áⁿ, te ní queñuhu ñàha-gǎ tnuú-yu, te ndèca ñàha-gǎ cuáháⁿ ìⁿ xio yuhu ñuú. Te yàcáⁿ ní dácánù-gǎ dí-gǎ núú-dé te ní tendaha ñàha-gǎ xii-dé, te dàtnuní ní xícáⁿ tnúhú-gǎ núú-dé, te xáhaⁿ-gǎ: —¿Cùtnuní núú-n-áⁿ? —càchí-gá xǎhaⁿ-gǎ xii-dé.

24 Te téé cuàá-áⁿ ní ndonehe núú-dé, te xáhaⁿ-dǎ xii-gá:

—Cùtnuní núú-í ndèhé-í nchaa cue téé-áⁿ, dico dà ndáa yutnu cuì ndáa-güedé te xica-güedé —càchí-dé xáhaⁿ-dǎ xii-gá.

25 Te Jèsús ní tendaha tùcu-gǎ núú-dé te ní cuu ní ndacoto váha-gǎ-dé, te òré-áⁿ ní ndúha núú-dé. Te nchaandi túhú sá ndéhé-dé ní cutnùní váha núú-dé nándi cùu nchaa xǎⁿ.

26 Te ní xáhaⁿ Jèsús xii-dé:

—Vitna te núhú-n, dico ndáa ichi vehe-n nùhú-n te ñá díú dà xití ñuú quíhíⁿ-n, te vá yóo ìⁿ cùñaha-n sǎ yùhú ní quide tǎtna-í núú-n ní ndúha —càchí-gá xǎhaⁿ-gǎ xii-dé.

Té Pèlú xáhaⁿ-dǎ xii Jèsús sá díú-gǎ cúú-gǎ Cristí

(Mt. 16:13-20; Lc. 9:18-21)

27 Te Jèsús ní xica-gǎ cuáháⁿ-gǎ ndihi cue téé xica cuu ndihi-gǎ nchaa ñuú líhi càa ñuú Cèsareá Filipú, te òré ñúhú-gǎ ndihi-güedé ichi te ní xícáⁿ tnúhú-gǎ núú-güedé, te xáhaⁿ-gǎ xii-güedé:

—Chí càchí tnúhu nása càháⁿ ñáyiu cuèndá-í. ¿Yoo cùu-í càchí-yu-va? —càchí-gá xǎhaⁿ-gǎ xii-güedé.

28 Te ní xáhaⁿ-güedé xii-gá:

—Dává-yu càchí-yu sá cúú-n ndí Juàà téé ní xóo dacuàndute ñaha xii ñáiyu, te davá-yu càchí-yu sá cúú-n tē Èliás, te dava tucú-yu càchí-yu sá cúú-n ñⁿ téé ní xóo cáháⁿ tnúhu Yá Ndióxi ndéé sanaha, duha càchí-yu —càchí-güedé xáhaⁿ-güedē xii-gá.

²⁹ Te ní xícáⁿ tnúhú tucu-gá núú-güedē, te xáhaⁿ-gá xii-güedé:

—Te nchòhó, ¿yoo sàni iní-ndó cùu-í-i? —càchí-gá xáhaⁿ-gá xii-güedé.

Te té Pèlú ní xáhaⁿ-dē xii-gá:

—Yòhó cúú-n Cristú Yaa ní tendaha Yá Ndióxi véxi ñuyú-a —càchí-dé xáhaⁿ-dē xii-gá.

³⁰ Te Jèsús ní cáháⁿ-gá dóho-güedé, te xáhaⁿ-gá:

—Vá yòo ñⁿ cùñaha-ndo yòo cuu-í —càchí-gá xáhaⁿ-gá xii-güedé.

*Jèsús càháⁿ-gá sá cáhni ñaha-güedé xii-gá
(Mt. 16:21-28; Lc. 9:22-27)*

³¹ Te Jèsús ní ngüita-gá xitnúhu-gá cue téé xica cuu ndihi-gá nàcuáa yáha-gá, te xáhaⁿ-gá xii-güedé:

—Yúhú Téé cùu ñani tnáhá-ndó nchaa-ndo chi ío ndoho-í, chi daquèe tihú ñáhá nchaa cue téé cùu sacuéhé núú ñáiyu israél, ndihi cue dútú cúnúu, ndihi cue téé dàcuaha ñaha xii ñáiyu nchaa tnúhu ní chídó tnùní ní chídó tnùní ndí Moisés, nchaa cue té-áⁿ daquee tihú ñáhá-güedé xii-í. Te sáá nduu te cahni ñaha-güedé xii-í, dico nduu úní sá cùu-í te ndoto-í —càchí-gá xáhaⁿ-gá xii-güedé.

³² Te ducaⁿ ní cáháⁿ Jèsús núú cuè téé xica cuu ndihi-gá nàcuáa tecu tnùní váha-güedé tnúhu càháⁿ-gá. Te té Pèlú ní cana ñaha-dē xii-gá ñⁿ xio, te ní ngüita-dé ténàá ñáhá-dē xii-gá ní cùu.

³³ Dico Jèsús ndihi-ni ní nchocuiñu-gá ní ndàcoto-gá núú nchaa-güedé chi ndáa sáta-gá xindecu-güedé, te ní ngüita-gá ténàá-gá té Pèlú, te xáhaⁿ-gá xii-dé:

—¡Xocuiñí yòhó núú-í-a, chi dàtná cáháⁿ yucu ñávaha càháⁿ-n! Chi ñá túú sàni iní-ò dàtná sání iní Yá Ndióxi, chi ñⁿ-ni sàni iní-ò ndihi dava-gá cue ñáiyu ndècu ñuyú-a —càchí-gá xáhaⁿ-gá xii-dé.

³⁴ Te Jèsús ní cana-gá nchaa cue téé xica cuu ndihi-gá, ndihi nchaa ñáiyu xindecu-áⁿ, te ní xáhaⁿ-gá:

—Nchaa ñáiyu cuní chitnahá ñáhá xii-í, te xini ñuhu-xi vá cáda-gá-yu sá sání iní méé-yu, te ío cada ndee iní-yu cundecu túha-yu ndohó-yu cuèndá-í, te cuèi na ndòhó-yu dàtná ndoho-í.

³⁵ Te nchaa ñáiyu cuní sá ñá túú tnáhi ná yáha cundecu ñuyú-a cuíta nihnú-yu, dico nchaa ñáiyu ñá túú tnáhi yùhú cuèi nándi sá ná yáha-yu cundecú-yu ñuyú-a sá cuèndá-í, ndihi sá cuèndá tnúhu-í, te ñáiyu-áⁿ naníhi tãhú-yu.

³⁶ Te cuèi nchaandi túhú sá ío ñuyú-a na nihí ñáiyu cundecu ndihí-yu, dico núu ñu nchaa xíáⁿ ná cáda cuíta nihnú-yu te ñá túú vèdana nàndíhi-xi sá dúcáⁿ ndècu ndihí-yu nchaa xíáⁿ.

³⁷ Te ní ñⁿ sá ío ñuyú-a vá chindèe-xi ñáiyu cuèndá naníhi tãhú-yu.

³⁸ Te nchaa ñáiyu na cùcahaⁿ núú-xi cáháⁿ váha cuèndá-í, ndihi cuèndá tnúhu-í núú nchaa ñáiyu daquee tihú ñáhá xii Yá Ndióxi, ñáiyu xindecu ichi cuèhé ichi duha, te tnáhá yúhú Téé cùu ñani tnáhá-yu nchaa-yu cùcahaⁿ núú-í núú-yu òré ná quixi tucu-í ndihi cue espíritú xínú cuèchi núú Tãtà-í Dútú Ndióxi. Te mee-gá cada cutnùní iní nchaa ñáiyu sá yùhú ío càhnu cuu-í.

9

¹ Te na càchí tnúhu ndáá-í xii-ndo sã ío dava nchòhó ñáyiú xĩndecu iha vitna vá cùú-ni-ndo, chí cundecu-ni-ndo ndèè quini-ndó sãá nduu ndíhu ndaha ñaha Yá Ndióxi xii ñáyiú, te dàvá-án quini-ndó sã ndácú-gã quidé-gã nchaandi túhú sã vãha —càchí-gã xãha-n-gã xii cue tée xica cuu ndíhi-gã ndíhi cue ñáyiú-án.

Jèsús ní nadama dóó-gã ndíhi núú-gã

(Mt. 17:1-13; Lc. 9:28-36)

² Te núú ìñú nduu sã dúcáⁿ ní cáháⁿ Jèsús te ní xica-gã cuásaá-gã ìⁿ yucu dúcúⁿ, te ndéca-gã té Pèlú, ndíhi té Jacobó, ndíhi té Juáá cuásaá, te úní tnàhí-ni cue tée-án ndécá-gã cuásaá. Te yucu-án ndécú-gã ní nadama núú-gã,

³ te ní nadama dóó-gã. Te dóó-gã-án sũúni ní nduu cuixíⁿ quiyí te tãsaⁿ, te ní ìⁿ ñáyiú ñuyíú-a ñá túú ndácú-yu naqueté-yu ìⁿ dóó nduu cuixíⁿ dàtná ní nduu dóó-gã.

⁴ Te ní xiní-güedé té Moisés ndíhi té Èliás nútñi-güedé ndíhi-gã ndátnúhu ndíhi ñaha-güedé xii-gã.

⁵ Te té Pèlú ní xãha-n-dé xii Jèsús:

—Mèstrú, ¡vãha ní cuu sã ndécú-ó iha vitna! Te na dàcaa-ndí úní tnàhá vehe tuvixíⁿ, te ìⁿ cuu cuendá-n te ìⁿ cuu cuendá té Moisés te ìⁿ cuu cuendá té Èliás —càchí-dé xãha-n-dé xii-gã.

⁶ Te ducaⁿ ní cáháⁿ-dé chí ío ní yùhú-güedé, te cuendá-ni ní cuu yáchí-dé ní cáháⁿ-dé, te ní mèe-dé ñá túú ní cùtnuní iní-dé nása nduu tnúhu ní cáháⁿ-dé.

⁷ Te òré-án ní quexio ìⁿ vícó núú ndécú-güedé ndíhi Jèsús ní dáðãhu ñaha-xi xii-güedé ndíhi-gã, te xití vícó-ãⁿ ní cáháⁿ Yá Ndióxi ní tecú dóho-güedé, te xãhaⁿ-gã xii-güedé:

—Tée-a cùú-dé Déhe-í tée ío cùú iní-í, te cundedóho-ndo nchaa tnúhu cáháⁿ-dé —càchí-gã xãha-n-gã xii-güedé.

⁸ Te òré ní quide cuendá-güedé, te ñá túú-gã ní xiní-güedé cue tée úú-án chí mee-nã Jèsús ndécú.

⁹ Te òré cuánuu ndíhi ñaha-gã xii-güedé yucu-án, te ní cáháⁿ-gã dóho-güedé, te xãhaⁿ-gã:

—Vá yõo ìⁿ cúñaha-ndo nchaa sã ní xiní-ndó núú ní sáá-ó-á, te cuu cáháⁿ-ndó dico ndéé ná yãha ndoto yùhú Tée cùú ñani tnàhá-ndó nchaa-ndo sã cùú-í —càchí-gã xãha-n-gã xii-güedé.

¹⁰ Núú xiãⁿ cue tée-án ní xúhuⁿ nahi-ni iní-güedé nchaa sã ní xiní-güedé núú ní sáháⁿ-güedé ndíhi Jèsús te ñá túú tnàhí ní cáháⁿ-güedé, dico ní ndúcú tnúhu núú tnàhá-güedé ná cuendá ducaⁿ ní cáháⁿ-gã sã ndèè ná yãha ndoto-gã sã cùú-gã te dàtnuní cáháⁿ-güedé nàcuáa nduu nchaa sã ní xiní-güedé.

¹¹ Te ní xicáⁿ tnúhú-güedé núú Jèsús, te xãhaⁿ-güedé xii-gã:

—¿Cùini-ndí cachí tnúhu-n nã cuendá càchí cue tée dàcuaha ñaha xii ñáyiú nchaa tnúhu ní chídó tnuní ndíi Moisés sã ðíhna-gã té Èliás ndixi-dé te dàtnuní quixi Yáá tendaha Yá Ndióxi quixi ñuyíú-a? —càchí-güedé xãhaⁿ-güedé xii-gã.

¹² Te Jèsús ní xãhaⁿ-gã:

—Ndáá sã códo núu ìⁿ tée quixi-dé te cada-dé dàtná ní quide té Èliás, te tée-án cada ndáá-dé nchaa nàcuáa cùú. Dico núú tütú Yá Ndióxi cáháⁿ-xi cuendá yùhú Tée cùú ñani tnàhá-ndó nchaa-ndo sã ío ndoho-í, te daquèe tihú ñahá ñáyiú xii-í.

13 Te na càchí tnúhu-í xii-ndo vitna sá sà ní quixi ñⁿ tée ní quide dàtná ní xóo cada té Èliás, te cue ñáyiú ñá túú ní cãnehé-yu sá yíñùhu núú-dé, te ní quide ñàhá-yu xii-dé nchaa nàcuáa ní quixi iní méě-yu. Te núú tùtú Yá Ndióxí sa ndéé tnuní nchaa nàcuáa yáha-dé, te nchaa xíáⁿ sa ní quide ñaha ñáyiú xii-dé —càchí-gá xáhaⁿ-gá xii-güedé.

Jesús quidé tãtna-gá ñⁿ tée cuechi yìhi ñaha espíritú cündìhi yucu ñávãha (Mt. 17:14-21; Lc. 9:37-43)

14 Te Jësús ní ndexio-gá ndìhi cue tée úní-áⁿ núú xĩndecu dava-gá cue tée xica cuu ndìhi-gá, te vai vihi ñáyiú ndècu núú ndécú-güedé-áⁿ, te tnàhá cue tée dàcuaha ñaha xii-yu nchaa tnúhu ní chídó tnuní ndíi Moisés xĩndecu, te cue tée-áⁿ nãndi tnúhu xáhaⁿ-güedé xii cue tée xica cuu ndìhi Jësús.

15 Te òré ní xiní-yu ní ndexio-gá, te ncháa-yu ío ní cuñúhu-yu, te xinú-yu ní sáháⁿ ní cáháⁿ ndìhi ñàhá-yu xii-gá.

16 Te ní xícáⁿ tnúhú-gá núú cuè tée xica cuu ndìhi-gá núú ná tnúhu ndàtnúhu-güedé ndìhi cue tée-áⁿ.

17 Te ñⁿ ñáyiú xĩndecu xíáⁿ ní xáhãⁿ-yu xii-gá:

—Mèstrú, ndèca-í déhe-í véxi nànducu ñaha-í xii-n, chi yìhi ñaha espíritú cündìhi yucu ñávãha xii-dé, te ðiu xíáⁿ ní quide ní cuu ñìhí-dé.

18 Te ío ndòho-dé chi súúni ndèni ní cuu ngòtni ñaha-xi xii-dé, te òré ducaⁿ quide ñaha-xi xii-dé te dànduá ñàhá-xí, te quène tíñú yuhu-dé, te cürúhñú ñùhu-dé, te ndàda ruúⁿ ñàhá-xí xii-dé. Te sa ní xáhaⁿ-í xii cue tée xica cuu ndìhi-n sá queñùhu-güedé espíritú cündìhi yucu ñávãha yìhi ñaha xii-dé dico ñá túú ní ndàcu-güedé queñuhu-güedé-xi —càchí ñáyiú-áⁿ xáhãⁿ-yu xii-gá.

19 Te Jësús ní xáhaⁿ-gá:

—¡Nchaa nchòhò ñáyiú ndècu ñuyíú-a ío sàá iní-ndó, chi ñá túú cuíní-ndó quĩndáá iní-ndó Yá Ndióxí, te ní cuu vai nduu quide ndee iní-í nchaa sá quidé-ndó! ¿Te ná ndéé ama vá dúcáⁿ-gá cada-ndo-i? Te chí cándèca tée cùhú-áⁿ táquixi iha —càchí-gá xáhaⁿ-gá xii-yu.

20 Te ñáyiú ndìhi ñaha xii tée yìhi ñaha espíritú cündìhi yucu ñávãha-áⁿ ndécá ñàhá-yu xii-dé cuaháⁿ ndéé núú Jësús, te òré ní xiní ñàhá espíritú cündìhi yucu ñávãha-áⁿ xii-gá, te ní ngüíta-ni-xi sãhni yìhi ñàhá tùcu-xi xii-dé, te ní dànduá ñàhá-xí xii-dé, te ní ngüíta-dé xíchí ñùhu-dé, te quène tíñú yuhu-dé.

21 Te Jësús ní xícáⁿ tnúhú-gá núú tãtã-dé, te xáhaⁿ-gá xii-dé:

—¿Ná ndéé ama ní ngüíta-xi duha ndòho déhe-n? —càchí-gá xáhaⁿ-gá xii-dé. Te tée-áⁿ ní xáhaⁿ-dè xii-gá:

—Ndéé cútnàhá cúú lìhli-dé ní ngüíta espíritú cündìhi yucu ñávãha duha quide ñaha-xi xii-dé.

22 Te ní cùtìtrí xito dàngaunihnu ñaha-xi xii-dé núú ñùhú, te ní cutìtrí tucu xito dàngaunihnu ñaha-xi xii-dé ndute cuíní-xi cahni ñaha-xi xii-dé. Te ndèca-í-dé véxi núú-n te núu ndacu-n càda tátna-n-dé, te cundàhú iní ñàhá-n xii-ndí chindee ñaha-n —càchí-dé xáhaⁿ-dè xii-gá.

23 Te Jësús ní xáhaⁿ-gá:

—Te ná cuèndá càchí-n núu ndacu-í cada tátna-í déhe-n, chi nchaa ñáyiú na quĩndáá iní ñàhá xii-í te ñìhí-yu sá ná càcáⁿ-yu núú-í —càchí-gá xáhaⁿ-gá xii-dé.

24 Te tãtã tée cuechi-ãⁿ ñìhi ní cáháⁿ-dé xáhaⁿ-dè xii-gá:

—Sàndáá iní ñàhà-í xii-n, dico chindee ñàhà xii-í cuendá ná quíndáá iní ñàhá-gã-í xii-n —càchí-dé xàhaⁿ-dë xii-gá.

²⁵ Te Jèsús ndéhé-gá sá ïo vâi ñáyiu ta tàcá núú ndécú-gã-áⁿ. Te ní tenáá-gá espíritú cúndìhi yucu ñávãha-áⁿ, te xàhaⁿ-gã xii-xi:

—Yöhó espíritú cúndìhi yucu ñávãha, ní quide ñìhí-n ñi quide doho-n tõe-a, dico vitna yúhú càchí-í sá quée-n yìqì: cuñú-dé te vá ndìhu-gá-n —càchí-gá xàhaⁿ-gã xii espíritú cúndìhi yucu ñávãha-áⁿ.

²⁶ Te espíritú cúndìhi yucu ñávãha-áⁿ ñi dácáná sàa ñaha-xi xii tée-áⁿ, te ní sahní yìhí ñàhá tùcu-xi xii-dé, te dàtnùní ní quee ñaha-xi xii-dé cuhááⁿ-xi, dico tée-áⁿ chi dacàa-ni ndíyì: càa-dé cátùu-dé. Te nchaa ñáyiu xíndecu xíáⁿ càchí-yu sá ñi xihí-dé ní cùu.

²⁷ Te Jèsús ní tñii-gá ndaha-dé ní ndocani ñaha-gã xii-dé, te ní ndacóo-dé ní nucúnutñii-dé.

²⁸ Te Jèsús cuándihu-gá xití vehe ndihi cue tée xica cuu ndihi-gá, te òrè ndéhé-güedë ñá túú-gã ñáyiu, te ní xicáⁿ tñuhú-güedë núú-gã, te xàhaⁿ-güedë xii-gá:

—Cachí tñuhu xii-ndí ná cuendá ñá túú ní ndàcu-ndí queñuhu-ndí espíritú cúndìhi yucu ñávãha yìhi ñaha xii tée-áⁿ —càchí-güedë xàhaⁿ-güedë xii-gá.

²⁹ Te Jèsús ní xàhaⁿ-gã xii-güedë:

—Na càchí tñuhu-í xii-ndo sã ñuu òrè cuíní-ndó queñuhu-ndo espíritú cúndìhi yucu ñávãha yìhi ñaha xii ñáyiu dàtná cúú espíritú cúndìhi-xi yìhi ñaha xii tée-áⁿ ní cùu ña, te xini ñuhu-xi sá ïo cáháⁿ ndihi-ndo Yã Ndiöxí te ñá túú tñahí ná caxi-ndo cãháⁿ ndihi-ndo-gã, te ducaⁿ te ndacu-ndo queñuhu-ndo espíritú cúndìhi yucu ñávãha yìhi ñaha xii ñáyiu —càchí-gá xàhaⁿ-gã xii-güedë.

Jèsús càháⁿ tucu-gá sá cáhni ñàha-güedë xii-gá

(Mt. 17:22-23; Lc. 9:43-45)

³⁰ Te Jèsús ní quee-gá núú ndécú-gã-áⁿ ndihi cue tée xica cuu ndihi-gá cuhááⁿ-gá ndihi-güedë distritú Galileá, te cuíní-gá sá vã quíní ñáyiu ndéé ichi cuhááⁿ-gá.

³¹ Te ducaⁿ ñi sani iní-gá, chi mee-gã sa ñaha-gá sá ndáa cada-xi ñacúaa xàhaⁿ-gã xii cue tée xica cuu ndihi-gá, te duha xàhaⁿ-gã xii-güedë:

—Yúhú Tée cùu ñani tñahá-ndó nchàa-ndo sáá ñi nduu te cuáha cuendá ñàhá-güedë xii-í núú cuè tée cùu úhú iní ñàhá, te cahni ñaha-güedë xii-í, dico nduu úní sá cùú-í te ndoto-í —càchí-gá xàhaⁿ-gã xii-güedë.

³² Dico ñá túú tñahí ní tècú tñuní-güedë nása nduu tñuhu ní cáháⁿ-gá, te ní ñá túú ní cùyii-güedë cãcáⁿ tñuhú-güedë núú-gã.

Cue tée ndücu tñuhu núú tñahá ñuu ndédacàa-güedë ïo-gá cúnüu

(Mt. 18:1-5; Lc. 9:46-48)

³³ Te Jèsús ní quexio-gá ndihi cue tée xica cuu ndihi-gá ñuu Capèrnaúm, te òrè sa ndècu-gá ñi vehe te ní xicáⁿ tñuhú-gã núú-güedë, te xàhaⁿ-gã xii-güedë:

—¿Nándi cùu tñuhu ta xitñaha-ndo véxi? —càchí-gá xàhaⁿ-gã xii-güedë.

³⁴ Dico ñá túú tñahí ní cãháⁿ-güedë cúñaha-güedë xii-gã núú ná tñuhu xitñaha-güedë òrè ñíhú-güedë ichi. Te ducaⁿ ñi quide-güedë chi cuendá tá ndàtñuhu-güedë ñuu ndédacàa-güedë ïo-gá cúnüu.

³⁵ Te Jèsús ní ngóo-gá, te ní xàhaⁿ-gã xii ndi ùxúú cue tée xica cuu ndihi-gá:

—Chí táquxi iha te cundedóho-ndo tn̄hu na càháⁿ-í-a. Te núu ió dava-ndo cuiní-ndó cūnuu-ndo, te cada-ndo sá cúu-ndó ñáyiū nchicúⁿ cuií-nã, te cunu cuechi-ndo núu tn̄aha ñáyiū-ndo —càchí-gá xãhaⁿ-gã xii-güedé.

36 Te Jësús ní sanutñi-gá ñⁿ té lihli cuádava truu-güedé, te dàtnùnì ní nguídèhé ñáhá-gã xii-dé, te xãhaⁿ-gã xii-güedé:

37 —Nchaa ñáyiū na quèheⁿ cuendá ñⁿ té lihli dàtná té lihli-a cuendá sá ñúhú iní ñáhã-yu xii-í ñá, te cada iní-yu sá yǔhú ní queheⁿ cuendá-yu. Te nchaa ñáyiū na quèheⁿ cuendá ñáhá xii-í te ñá díú-ní mèe-í ní quèheⁿ cuendá-yu, chi tn̄ahá Tãtà-í Dútú Ndióxi Yaa ní tendaha ñaha xii-í véxi-í ñuyú-a ní queheⁿ cuendá-yu —càchí-gá xãhaⁿ-gã xii-güedé.

Nchaa ñáyiū ñá túu cūu úhú iní ñáhá xii-o te cūndihi ñáhá-yu
(Mt. 10:42; Lc. 9:49-50)

38 Te té Juáa diu-ni ñⁿ tée xica cuu ndihi-gá ní xãhaⁿ-dè xii-gá:

—Mèstrú, ní xiní-ndí ñⁿ tée càcunehe ñaha-dé xii-n, te quèñuhu-dé espíritu cūndihi yucu ñávãha yihí ñaha xii ñáyiū, te nchúhú ñá túu ní dàña-gá-ndí ducaⁿ càda-dé, chi ñá túu xica cuu ndihi ñaha-dé xii-o —càchí-dé xãhaⁿ-dè xii-gá.

39 Te Jësús ní xãhaⁿ-gã xii-güedé:

—Daña-ndo na càda nahi-dé ní cūu, chi ñá túu nì ñⁿ ñáyiū ndihi ndihi-ni ndacu càháⁿ cuèhé cuendá-í te núu càcunehe ñáhá-yu xii-í, te quidè-yu sá vã yõ tn̄ahí ndàcu cada.

40 Te nchaa ñáyiū ñá túu cūu úhú iní ñáhá xii-o te cūndihi ñáhá-yu.

41 Te na càchí tn̄uhu-í xii-ndo sá cuè ñáyiū na tàxi ñⁿ yaxiⁿ ndute coho-ndo cuendá sá cúu-ndó cuè tée xica cuu ndihi-í, te ñáyiū-án sãá nduu te dacuéi sá nihí-yu sá ndúu tãhũ-yu —càchí-gá xãhaⁿ-gã xii-güedé.

Cada cuendá-ó vã cūndècu-o ichi cuèhé ichi duha
(Mt. 18:6-9; Lc. 17:1-2)

42 Te xãhaⁿ tūcu Jësús xii-güedé:

—Te núu ñⁿ tée na dàcáhãⁿ-dè cue ñáyiū sàndáá iní ñáhá xii-í cadá-yu nãndi sá cuèhé sá dúhá, te váha-gá sá núu na dàcutu ndeé-güedé ñⁿ yúu yódo dúcúⁿ-dè, te dàquèe ñaha-güedé xii-dé xití ndute lámár, te ñá díú sá cūndècu-dé ducaⁿ càda-dé.

43 Te núu ñⁿ xio ndaha-ndo quide-xi quide-ndo nãndi sá cuèhé sá dúhá, te quehndé-ndó cuíta-xi, chi váha-gá sá nãnihí tãhú-ndó cuèi na cuíta ñⁿ xio ndaha-ndo te ñá díú sá quihíⁿ-ndó nihíi ní ndúu-ndó núu ùhú núu ndàhú núu dícó sãá ndáhá itã ñuhú ni caa ni quihíⁿ.

44 Chi yàcãⁿ cúu-xí núu ñà túu tn̄ahí ndàhvã ñuhú, te ío ndoho-ndo cūndècu-ndo xíãⁿ ni caa ni quihíⁿ.

45 Te núu ñⁿ xio sáhã-ndó quide-xi quide-ndo nãndi sá cuèhé sá dúhá, te quehndé-ndó cuíta-xi, chi váha-gá sá nãnihí tãhú-ndó cuèi na cuíta ñⁿ xio sáhã-ndó, te ñá díú sá quihíⁿ-ndó nihíi ní ndúu-ndó núu ùhú núu ndàhú núu dícó sãá ndáhá itã ñuhú ni caa ni quihíⁿ.

46 Chi yàcãⁿ ñá túu tn̄ahí ndàhvã ñuhú, te ío ndoho-ndo cūndècu-ndo xíãⁿ ni caa ni quihíⁿ.

47 Te núu ñⁿ xio tin̄u-ndo quide-xi quide-ndo nãndi sá cuèhé sá dúhá, te tava-ndo cuíta-xi, chi váha-gá sá cūndècu-ndo núu ndécú Yã Ndióxi táxi

tnùní-gá cuèi na cuíta ìⁿ xio tìnùu-ndo, te ñá díú sã ndì nduú xio núú-ndó quíhíⁿ-ndó núú ùhú núú ndàhú.

⁴⁸ Chi yàcáⁿ ñá túú tnàhí ndàhvá ñuhú, te ío ndoho-ndo cùndecu-ndo xíáⁿ ni caa ni quíhíⁿ.

⁴⁹ Te dàtná quidé-güedë quiti sàhni-güedé chihi-güedé cuñú-di ñíí te dàqueé-güedé núú ñùhú, ducaⁿ sàtnahá-xi ndoho cue ñáyiu chi ío ndohó-yu.

⁵⁰ Te ñíí chi ío váha nàndíhi-xi, dico núu na ndùu víxiⁿ-xi te ñá túú-gã nándíhi-xi te ni ñà túú-gã nása cada-o ndùu úhá tucu-xi. Te ío váha cada cuendá-ndó nàcuáa cundecu-ndo cuendá cuu-ndo ñáyiu váha, te ducaⁿ te cuu-ndo dàtná ñíí sã ñà túú ndùu víxiⁿ, te ío váha cundecu ndíhi tnàha-ndo –cachí-gá xàhaⁿ-gã xii-güedé.

10

Jèsús càháⁿ-gá cuendá cue ñáyiu dàña tnaha

(Mt. 19:1-12; Lc. 16:18)

¹ Te Jèsús ní xica-gá cuáháⁿ-gá ní yáha-gá yucu distritú Jùdeá ní téhndé-gá ndàa ingá xio yúte Jordán. Te yàcáⁿ ndécú-gã ní tacá tucu cuéhé víhí ñáyiu, te ní ngúita-ni tucu-gá dánèhé ñáhá-gã xii-yu tnúhu-gá chi ducaⁿ tnàhí quide-gá.

² Te ní quèxio ìⁿ úú cue tée cùu fariséú núú ndécú Jèsús xító ndèè ñáhá-güedë xii-gá nùu nása cunduu tnúhu cáháⁿ-gá, te xàhaⁿ-güedë xii-gá:

–Véxi-ndí xicáⁿ tnúhú-ndí núú-n nùu cuu dàña ìⁿ tée ñadíhí-dé àⁿ ñáhá –càchí-güedé xàhaⁿ-güedë xii-gá.

³ Te Jèsús ní xàhaⁿ-gã xii-güedé:

–Te nchòhó, ¿nása ní cachí ndíi Moisés cada-ndo-i? –càchí-gá xàhaⁿ-gã xii-güedé.

⁴ Te ní xàhaⁿ-güedë xii-gá:

–Ndíi Moisés ní cachí ndíi sá cúú dàña ìⁿ tée ñadíhí-dé dícó-ni sá cadúha-dé ìⁿ tutú cuáñaha-dë, te núú tütù-áⁿ codo tnùnì sá ní dáñá ñàha-dé, te ducaⁿ te cuu dàña-dë ñadíhí-dé –càchí-güedé xàhaⁿ-güedë xii-gá.

⁵ Te Jèsús ní xàhaⁿ-gã xii-güedé:

–Te ducaⁿ ní chídó tnùnì ndíi Moisés cada-ndo cuendá sá ío sàà iní-ndó.

⁶ Dico Yá Ndióxi cútnàhá ní cadúha-gá ñuyíú ndíhi nchaa sá ío, chi tée ñadíhí ní cadúha-gá.

⁷ Te xíáⁿ nùu nchaa cue tée na níhí ñadíhí-xi, te dèⁿ-ná cada-güedé tãtá-güedé ndíhi náná-güedé, chi mee-nã ñadíhí-güedé cuu cuu ndíhi-güedé.

⁸ Te cue ñáyiu úú-áⁿ ñà túú-gã ndí dèⁿ ndí dèⁿ yiqui cuñú cúú-yu, chi cada iní-ndó sã ìⁿ-nã yiqui cùñú cúú-yu.

⁹ Te xiáⁿ nùu ñà túú ndùu váha-xi dàña cuè tée ñadíhí-güedé, chi mee Yá Ndióxi ní cachí-gá sá cúú úú-yu cundecú-yu ndéé naa ndéé cuú-yu –càchí-gá xàhaⁿ-gã xii-güedé.

¹⁰ Te òré yíhí Jèsús ndíhi cue tée xica cuu ndíhi-gá vehe, te ní xicáⁿ tnúhú-güedé núú-gã nása ndùu tnúhu ní cáháⁿ-gá cuendá cue ñáyiu dàña tnaha.

¹¹ Te Jèsús ní xàhaⁿ-gã xii-güedé:

–Te núu ìⁿ tée na dàña-dé ñadíhí-dé te naqueheⁿ-dé ingá ñadíhí, te ío nèhé quidé-dë, te ìⁿ-ni cuèchi cùu-xi ndíhi cuèchi quide tée ndëca ñadíhí te càháⁿ ndíhi-dé ingá ñadíhí.

12 Te diu-ni ducaⁿ sãtnahá-xi cùu tucu ñáyiu ðihí te núu na ðañá-yu yí-yu te naquehéⁿ-yu ingá tée, chi ñⁿ-ni cuéchi cùu-xi sá quidé-yu ndihí sá quidé cué ñáyiu ðihí ndécú yí-xi, te càháⁿ ndihí-yu ingá tée —càchí-gá xáhaⁿ-gã xii-yu.

Jèsús xicáⁿ táhú-gã núu Yã Ndiõxí cuendá landú

(Mt. 19:13-15; Lc. 18:15-17)

13 Te ñⁿ úú ñáyiu ndécá-yu landú lihli cuáháⁿ núu Jèsús, chi cuiní-yu sá téndaha ñaha-gá xii-güexi. Te cue tée xica cuu ndihí-gá ní ngüíta-güedé ténáa ñáhá-güedé xii-yu, te xáhaⁿ-güedé sá vã dúcáⁿ càdá-yu.

14 Te òré ní xiní-gá sá dúcáⁿ quide-güedé, te ní cudééⁿ-gã núu-güedé, te xáhaⁿ-gã xii-güedé:

—Chí ðañá ná quixi nahi cue landú lihli-áⁿ núu-í-a te vã càdí-ndó ichi-güexi, chí ðàtná cúú vaha iní cue landú lihli-áⁿ ducaⁿ cùu váha iní cue ñáyiu yíndaha Yã Ndiõxí.

15 Te na càchí tnúhu ndáá-í xii-ndo sã núu vã quíndáá iní ñáhá-ndó ðàtná quidé cué landú lihli sàndáá iní ñáhá xii-í, te vã ndihu ndaha ñaha Yã Ndiõxí xii-ndo —càchí-gá xáhaⁿ-gã xii-güedé.

16 Te sáta dúcáⁿ ní xáhaⁿ-gã te ní nguídèhé-gá cue landú-áⁿ te ní tendaha ñaha-gá xii-güexi, te ní xicáⁿ táhú-gã núu Yã Ndiõxí cuendá-güexi.

Íⁿ tée cuica càháⁿ ndihí-dé Jèsús

(Mt. 19:16-30; Lc. 18:18-30)

17 Te òré sa ñúhu ichi Jèsús caca-gá quíhíⁿ-gã ingá xichi ní cùu ní quexio cunu ñⁿ tée ní ngüíñí xítí-dé núu-gã, te xáhaⁿ-dë xii-gá:

—Yòhó Mèstrú, cùu-n téé ío váha iní-xi, te cuiní-í núu vã cúndèe iní-n càchí tnúhu-ñ ná cúú sã càdá-í cuendá nduu táhú-í cundecu-í ndihí Yã Ndiõxí ní caa ní quíhíⁿ —càchí-dé xáhaⁿ-dë xii-gá.

18 Te Jèsús ní xáhaⁿ-gã xii-dé:

—¿Te cùtnuní iní-n nàcuáa ndùu tnúhu càháⁿ-n sã yúhú váha iní-ãⁿ? Chi ñⁿndí ðíí-ní Yã Ndiõxí ío váha iní-gá.

19 Te yòhó xiní-n nàcuáa ní cachí Yã Ndiõxí cada ñáyiu, te duha ní cachí-gá: “Nchòhó cue téé vã càháⁿ ndihí-ndo ñàðihí te núu ñã díú ñàðihí-ndó cùu-yu, te ducaⁿ-ni nchòhó cue ñáyiu ðihí tucu vã càháⁿ ndihí-ndo tée te núu ñã díú yí-ndo cuu-güedé, te vã càhni-ndó tnàha ñáyiu-ndo, te ní vã dúhú-ndó sã ndécú ndihí-yu, te ní vã dácàcu-ndo cuéchi neñúú sá cúú-xí tnàha ñáyiu-ndo, te ní vã dácúandehnde-ndo, te canehe-ndo sã yíñúhu núu tátá-ndó ndihí núu náná-ndó”, duha ní cachí Yã Ndiõxí cada ñáyiu —càchí-gá xáhaⁿ-gã xii-dé.

20 Te téé-áⁿ ní xáhaⁿ-dë xii-gá:

—Mèstrú, nchaa xíãⁿ ní ngüíta-í quidé-í ndéé cùtnàhá cúú làndú-í —càchí-dé xáhaⁿ-dë xii-gá.

21 Te Jèsús ní xíndèhé ñaha váha-gá xii-dé, te ní cuu váha iní ñáhá-gã, te ní xáhaⁿ-gã xii-dé:

—Dico cùmání ñngá núu sã càdá-n. Vitna te quíhíⁿ-n te dico-n nchàa sã ndécú ndihí-n, te díhúⁿ-n cuáha táhú-n cué ñáyiu ndàhú. Te ducaⁿ, te nduu táhú-n núcúndecu váha-n núu ndécú Yã Ndiõxí táxí tnuní-gá, te sáta ná yáha ducaⁿ càda-n, te quixi-n chìtnahá ñáhá-n xii-í cué na ndòho-n ðàtná ndoho-í —càchí-gá xáhaⁿ-gã xii-dé.

22 Te sá dúcáⁿ ní xáhaⁿ Jèsús xii-dé te ío ní cundíyí-dé chí ío cuica-dë, te ní xica-dé cuánuhú-dé.

23 Te ní ndacoto-gá ni càndéé dìñi-gá, te ní xáhaⁿ-gã xii cue téé xica cuu ndihi-gá:

—Cue ñáyiú cuica chi ío úhú quíndáá iní-yu Yá Ndiòxí cuèndá ndíhu ndaha ñàha-gá xii-yu —càchí-gá xáhaⁿ-gã xii-güedé.

24 Te cue téé xica cuu ndihi-gá-án ío ní cuñúhu-güedé nàcuáa ní cáháⁿ-gá, te ní xáhaⁿ tucu-gá xii-güedé:

—Nchòhò cue téé xica cuu ndihi-í càchí tnúhu tucu-í xii-ndo sã ío úhú quíndáá iní cue ñáyiú cuica Yá Ndiòxí cuèndá ndíhu ndaha ñàha-gá xii-yu, chi sàni iní-yu sá ncháá sã ndécú ndihí-yu dàcácu nihnu ñaha-xi xii-yu núú úhú núú ndáhú.

25 Te yáchí-gá yáha ìⁿ càméyu yaú ìⁿ yiqui ticú dàcúúxí sã quíndáá iní ìⁿ ñáyiú cuica Yá Ndiòxí cuèndá ndíhu ndaha ñàha-gá xii-yu —càchí-gá xáhaⁿ-gã xii-güedé.

26 Te cue téé xica cuu ndihi-gá ní cuñúhu vìhi-gá-güedé sá dúcáⁿ nĩ cáháⁿ-gá, te ní ngúíta-güedé xitnàha-güedé:

—¿Te yoo sá ndacu naníhí tàhú te núú ducaⁿ vaìⁿ? —càchí-güedé xitnàha-güedé.

27 Te Jèsús ní xíndéhé vâha ñaha-gã xii-güedé, te ní xáhaⁿ-gã:

—Nchaa ñáyiú ñuyúú-a chi vá ndácú-yu ná cadá-yu nàcuáa ndíhu ndaha ñàha Yá Ndiòxí xii-yu, dico mee-gã chi ndacu-gá ndíhu ndaha ñàha-gá xii-yu, chi nchaandi túhú sá vâha ndàcu-gá quídé-gã —càchí-gá xáhaⁿ-gã xii-güedé.

28 Te té Pèlú ní xáhaⁿ-dẽ xii-gá:

—Nchúhú ní dándõo-ndí nchaandi túhú sá ndécú ndihi-ndí te ní tuha ñaha-ndí xii-n —càchí-dé xáhaⁿ-dẽ xii-gá.

29 Te Jèsús ní xáhaⁿ-gã xii-dé:

—Na càchí tnúhu ndáá-í xii-ndo sã ncháá ñáyiú na dándõo vehe-xi, àdi ñani-xi, cúha-xi, tãtá-xi, nãná-xi, déhe-xi, àdi ñuhu-xi, te núú ducaⁿ na cadá-yu sá cuèndá-í ndihi sá cuèndá tnúhu-í,

30 te ío-gá cuéhé sã cuãñaha Yá Ndiòxí cundecu ndihí-yu, chi níhí-yu vehé-yu, ñuhú-yu, ñani-yu, cúha-yu, nãñá-yu, déhe-yu, te ñá díú-ní sã nchàa xíáⁿ níhí-yu cundecu ndihí-yu, chi tnàhá nduu táhù-yu cundecu ndihi ñàhá-yu xii-í ni caa ni quíhíⁿ ná sáá nduu. Dico díhna-gá ndoho tnahá-yu núú ñuyúú-a sá cuèndá-í.

31 Te dava ñáyiú cùnuu ndecu ichi Yá Ndiòxí vitna, ñáyiú-án sáá nduu te vá ío-gá cunúú-yu dàtná cúnúú-yu vitna, te dava ñáyiú nchícúⁿ ñá túú cùnuu vitna ñáyiú-án sáá nduu te ío cunúú-yu —càchí-gá xáhaⁿ-gã xii-güedé.

*Jèsús càháⁿ tucu-gá sá cáhni ñàha-güedé xii-gá
(Mt. 20:17-19; Lc. 18:31-34)*

32 Te ñuhu Jèsús ichi ndihi cue téé xica cuu ndihi-gá cuásaá ndihi ñaha-gã xii-güedé ñuú Jerusàlén, te yòdo nuu-gá núú-güedé cuásaá. Te cue téé-án xicuñúhu-güedé sá dúcáⁿ cuáháⁿ-gã ñuú Jerusàlén, te dava cue ñáyiú xínchícúⁿ xiyùhú-yu. Te ní taudìⁿ-gá ndi ùxúú cue téé xica cuu ndihi-gá, te ní ngúíta-gá caní-gã cuèndú núú-güedé nchaa nàcuáa yáha-gá.

33 Te xáhaⁿ-gã xii-güedé:

—Vitna ñuhu-o ichi cuásaá-ó ñuú Jerusàlén, te yàcáⁿ cuáha cuèndá ñàhá-güedé xii yúhú Téé cùu ñani tnàhá-ndó nchàa-ndo núú cuè téé cùu dútú cúnúu, ndihi núú cuè téé dàcuaha ñaha xii ñáyiú nchaa tnúhu ní chídó tnùnì

ndí Moisés. Te diu cue téé-án cǔñaha-güedě xii dava-gá cue téé sá cáhni ñaha-güedé xii-í, te cuáha cuendá ñahá-güedé xii-í núú cuè téé ñá túú cùu cue téé isráel.

34 Te cue téé-án cudíquí ndeé ñahá-güedě xii-í, te caniha-güedě ndihi ñii, te tiú dí ñahá-güedě, te cahni ñaha-güedě xii-í dico nduu úní sá cùú-í te ndoto-í —càhí-gá xáhaⁿ-gá xii-güedé.

Té Jàcobó ndihi té Juáá càháⁿ ndàhú-güedé núú Jèsús sá cádá-gǎ ñⁿ sá cuíní-güedé

(Mt. 20:20-28)

35 Te cue déhe té Zebèdeú té Jàcobó ndihi té Juáá ní quexìo-güedé núú Jèsús, te xáhaⁿ-güedě xii-gá:

—Mèstrú, véxi-ndí càháⁿ ndàhú-ndí núú-n núu vá cùndèe iní-n càda-n ñⁿ sá cuíní-ndí —càhí-güedé xáhaⁿ-güedě xii-gá.

36 Te Jèsús ní xicáⁿ tnúhú-gǎ núú-güedě, te xáhaⁿ-gǎ:

—¿Ná cúú sǎ cuíní-ndó càda-í-í? —càhí-gá xáhaⁿ-gǎ xii-güedé.

37 Te ní xáhaⁿ-güedě xii-gá:

—Cuíní-ndí sá òré ná saá nduu cùndecu-n núú táxí tnúní-n, te ñⁿ-ndí cunucóo-ndí xio cùha-n te ñⁿ-ndí cunucóo-ndí xio dàtni-n —càhí-güedé xáhaⁿ-güedě xii-gá.

38 Te Jèsús ní xáhaⁿ-gǎ xii-güedé:

—Nchòhó, ñá túú cùtnuní iní-ndó nàcuáa ndùu sá xicáⁿ-ndó núù-í. ¿Te náa cundee iní-ndó dàndoho ñaha ñáyiu xii-ndo dàtná dandòho ñahá-yu xii-í, te cundee tùcu iní-ndó càhni ñahá-yu xii-ndo dàtná cahni ñahá-yu xii-í-áⁿ? —càhí-gá xáhaⁿ-gǎ xii-güedé.

39 Te ní xáhaⁿ-güedě xii-gá:

—Cundee iní-ndí yáha-ndí nchaa nàcuáa càháⁿ-n-áⁿ —càhí-güedé xáhaⁿ-güedě xii-gá.

Te Jèsús ní xáhaⁿ-gǎ xii-güedé:

—Ndáá sá cùndèe iní-ndó ndòho-ndo nchaa nàcuáa ndòho-í, te cundee tùcu iní-ndó càhni ñahá-yu xii-ndo, chí yúhú cahni ñahá-yu xii-í.

40 Dico sá dúcáⁿ cuíní-ndó sǎ ñⁿ-ndó cùnucóo-ndo xio cuha-í te ñⁿ-ndo cùnucóo-ndo xio datní-í, te xiáⁿ chí ñá díú yúhú tàú-í càhí-í te núú sá cúú cùnucóo-ndo àdi sá vǎ cúú cùnucóo-ndo, chí mee Tàtà-í Dútú Ndiòxí càhí-gá te núú ná cúú ñáyiu nduu táhú cunucóo dìñí-í dàvǎ-áⁿ —càhí-gá xáhaⁿ-gǎ xii-güedé.

41 Te òré ní níhí ùxí-gá cue téé xica cuu ndihi-gá tnúhu nàcuáa ndùu sá cuíní té Jàcobó ndihi ñani-dé té Juáá, te ní cudééⁿ-güedě núú cuè téé úú-áⁿ.

42 Te Jèsús ní cana-gá nchaa cue téé xica cuu ndihi-gǎ-áⁿ, te ní xáhaⁿ-gǎ xii-güedé:

—Nchòhó xini-ndó sǎ cuè téé yìndaha ñⁿ nacióⁿ quide-güedé sá ïo cùnucóo-güedé, te nchaa dava-gá cue téé cùndihi-güedé tnàhá-güedé quidé-güedé sá ïo cùnucóo-güedé.

43 Dico nchòhó chí vǎ dúcáⁿ càda-ndo. Chí núú dava-ndo cuíní-ndó cùnucóo-ndo te xini ñuhu-xi cunu cuechi núú tnàhá-ndó te vǎ cádá-ndó sǎ cùnucóo-ndo.

44 Te núú dava-ndo cuíní-ndó quène cáva-ndo, te cuu-ndo dàtná cue ñáyiu ñá túú tnàhí dàñá quee núú chíúⁿ patróoⁿ-xi cunu cuechi núú tnàhá-ndó.

45 Te yúhú Tée cùu ñaní tnáhá-ndó nchàa-ndo, chi ñá túú vèxi-í sá cúnú cuèchi ñáyiu núù-í, chi véxi-í sá cúnú cuèchi-í núù-yu. Te cuú-í ñuyúú-a cuèndá vai-yu cácu nihnu núú ùhú núú ndàhú —càchí-gá xàhaⁿ-gá xii-güedé.

Jèsús quidé tātna-gá ñⁿ tée cuàá nání-dě Bartimeú
(Mt. 20:29-34; Lc. 18:35-43)

46 Te Jèsús ní quexìo-gá ñúú Jericó ndihi cue tée xica cuu ndihi-gá, te ní yáha-gá ndihi-güedé ichi xití ñúú-án, te ío cuéhé ñáyiu nchícúⁿ ñháá xii-gá cuáháⁿ te ñⁿ xio yuhu ìchi sá ní quee xití ñúú-án núcõo ñⁿ tée cuàá nání-dě Bartimeú, te tātá-dě nání-dě Timeú, te tée-án núcõo-dé yuhu ichi-án xicáⁿ ndàhú-dé.

47 Te tée-án ní cutnùnì iní-dé sá Jèsús tée ñúú Nazàrèt ñúhú-dě ichi, te ní ngüita-dé níhi càháⁿ-dè, te xàhaⁿ-dè xii-gá:

—Jèsús, ñaní tnáhá ndlí Dàvíí, cundàhú ínì ñháá xii-í! —càchí-dé xàhaⁿ-dè xii-gá.

48 Te vai ñáyiu tènaá ñáhá-yu xii-dé, te xáháⁿ-yu sá ná càdí-dé yuhu-dé dico uuⁿ-gá níhi ní càháⁿ-dè xàhaⁿ-dè xii-gá:

—Jèsús, ñaní tnáhá ndlí Dàvíí cundàhú ínì ñháá xii-í! —càchí-dé xàhaⁿ-dè xii-gá.

49 Te Jèsús ní ngüíñí-gá te ní xáhaⁿ-gá xii cue tée ndihi-gá:

—Chí cuànguaca tée cuàá-án candeca-ndo-dě quixi iha —càchí-gá xàhaⁿ-gá.

Te cue tée-án ní xica-güedé cuànguaca-güedé tée cuàá-án, te òré ní quexìo-güedé núú-dè te ní xáhaⁿ-güedé xii-dé:

—Ndcuñí te vá ndìhú-gá iní-n, na quèhíⁿ-ó chi càna ñaha Jesús xii-n —càchí-güedé xàhaⁿ-güedé xii-dé.

50 Te tée-án ní xócánì-dè dóo ndíxì-dè, te ndihi-ni ní ndacuñíⁿ-dè te ní xica-dé cuáháⁿ-dè núú Jèsús.

51 Te òré ní quexìo-dé te ní xicáⁿ tnúhú-gá núú-dè, te xàhaⁿ-gá xii-dé:

—¿Ná cuìnì-n càda ñaha-í xii-n-í? —càchí-gá xàhaⁿ-gá xii-dé.

Te tée cuàá-án ní xáhaⁿ-dè xii-gá:

—Mèstrú, cuìní-í cada tātna-n núú-í cuèndá cundehe-í —càchí-dé xàhaⁿ-dè xii-gá.

52 Te Jèsús ní xáhaⁿ-gá xii-dé:

—Cuanúhú vitna, chí sa ní ndúha núú-n chi ní sándáá iní-n Yá Ndióxi —càchí-gá xàhaⁿ-gá xii-dé.

Te òré-ni-án ní ndúha núú-dè te nchícúⁿ-dè Jèsús cuáháⁿ.

11

Jèsús cuànguahu-gá ñúú Jerusalén

(Mt. 21:1-11; Lc. 19:28-40; Jn. 12:12-19)

1 Te Jèsús ní cuyatni-gá ndihi cue tée xica cuu ndihi-gá ñúú Bètaniá, ndihi ñúú Bètágé, te xiáⁿ cáá yùcu nani Olivú, te yatni víí-ná xiáⁿ cáá ñúú Jerusalén. Te Jèsús ní cana-gá úú-ni tnàhá cue tée xica cuu ndihi-gá.

2 Te ní xáhaⁿ-gá xii-güedé:

—Chí cuáháⁿ ñúú cáá yatni yacáⁿ, te òré quexìo-ndo yacáⁿ te naníhí-ndó ñⁿ búrru ndètníⁿ-dí, te vátá yõo ñⁿ-gá codo ñaha xii-dí, te nandaxi-ndo-dí te candeca-ndo-dí quixi.

3 Te núu yoo na càcáⁿ tnúhú núú-ndó ná cuèndá nándàxi-ndo-dí, te cúñaha-ndo sá yúhú Yaá xicá cùu ndihi-ndo xini ñuhu-í-dí, te na yáha canehe

chìuⁿ-í-di te ndìhi-ni natendaha-í-di, duha cùñaha-ndo —càchí-gá xáhaⁿ-gá xii-güedé.

⁴ Te cue téé-áⁿ ní xica-güedé cuáháⁿ-güedé, te òré ní quexìo-güedé ñuú-áⁿ te ní nanhí-güedé ìⁿ búrru ndètníi-di ìⁿ yutnu nihnu yatni ìⁿ yuyehe vehe caa yatni yuhu ichi, te ní ngúíta-güedé nándàxi-güedé-di.

⁵ Te mei òré nándàxi-güedé-di ní quexìo ñáyiú xáhãⁿ-yu xii-güedé:

—¿Ná cuendá nándàxi-ndo búrru-áⁿ-i? —càchí-yu xáhãⁿ-yu xii-güedé.

⁶ Te cue téé-áⁿ ní xáhaⁿ-güedé xii-yu nàcuáa ní xáhaⁿ Jèsús cùñaha-güedé. Te sátá dúcáⁿ te ní dáñã-yu ndèca-güedé búrru-áⁿ cuáháⁿ núú ndécú Jèsús.

⁷ Te òré ní quexìo-güedé ndìhi-di núú ndécú-gá, te ní sacáⁿ ndodo-güedé dóo-güedé sátá-di, ní ngódó ñaha Jèsús xii-di.

⁸ Te ío cuéhé ñáyiú ta sàcáⁿ-yu dóo-yu ichi cuáháⁿ-gá cuendá núú dõo-yu-áⁿ yáha-gá ndìhi quiti yòdo-gá, te davá-yu xèhndé-yu ndaha yùtnu ta sacáⁿ-yu cuáháⁿ.

⁹ Te nchaa ñáyiú yòdo nuu núú-gá ndìhi nchaa ñáyiú nchìcúⁿ ndàa sátá-gá ní ngúíta-yu níhi càháⁿ-yu, te càchí-yu:

—Ío càhnu cuu Yaá-a! ¡Te Yá Ndiõxí ná chìndee ñaha-gá, chi diu-gá cúú-gá Yaá ní tendaha-gá véxi quide núú-gá!

¹⁰ ¡Te diu-ni Yaá-á cúú-gá Yaá véxi quindaha ñaha xii-o datná ní xóo cada ndíi Dàvií! ¡Te ndéé nchaa sá ío andiú na càchí-xi sá ío càhnu cuu-gá! —duha càchí-yu.

¹¹ Te Jèsús ní quexìo-gá ñuú Jerusalén, te cuánguihu-gá xití veñúhu càhnu sá ío cùnuu, te ní xíndéhé váha-gá nchaa sá ndécú xití veñúhu-áⁿ. Te sátá dúcáⁿ te ní ndee-gá cuáháⁿ-gá ñuú Bètaniá ndìhi ndi úxúú cue téé xica cuu ndìhi-gá chi sa ní cuaa.

*Jèsús xáhaⁿ-gá xii yutnu ngüxí sá vã cúúⁿ-gã sávidí-xi
(Mt. 21:18-19)*

¹² Te nduu tnéé-áⁿ ní quee Jèsús ñuú Bètaniá ndìhi cue téé xica cuu ndìhi-gá, te ichi ñùhu-gá ní xihí-gá docó.

¹³ Te xica ní xiní-gá nútñi ìⁿ yutnu ngüxí, te ní xica-gá cuándéhé-gá nõu ndéé sávidí-xi te ñá túú nã ndéé, chi mee-ni ndàha-xi ndéé chi ñã díú yõó sácundeé sávidí-xi.

¹⁴ Te Jèsús ní xáhaⁿ-gá xii yutnu ngüxí-áⁿ:

—Vitna te vá yõo ìⁿ-gá caxi sávidí-n, chi vá cúúⁿ-gã —càchí-gá xáhaⁿ-gá xii yutnu ngüxí-áⁿ.

Te cue téé xica cuu ndìhi-gá ní tecú dóho-güedé nàcuáa ní xáhaⁿ-gá xii yutnu ngüxí-áⁿ.

*Jèsús ñã túú tnàhá iní-gá nàcuáa quide ñáyiú xití veñúhu
(Mt. 21:12-17; Lc. 19:45-48; Jn. 2:13-22)*

¹⁵ Te Jèsús ní quexìo tucu-gá ndìhi cue téé xica cuu ndìhi-gá ñuú Jerusalén, te cuánguihu tucu-gá xití veñúhu càhnu sá ío cùnuu, te xití veñúhu-áⁿ xíndecu cue ñáyiú quide ndáhú nádíco-yu, ndìhi cue ñáyiú xísaaⁿ. Te nchaa-yu ní queñuhu ñaha Jèsús xii-yu quehé, te ní dándüá-gá mèsá cue ñáyiú dàma díhúⁿ, ndìhi nchaa xilè sácóo nchihi cue ñáyiú dìco lómá xíndecu xití veñúhu-áⁿ.

¹⁶ Te ñã túú tnàhí-gá ní dàña-gá yáha cue ñáyiú ndìhi nchaa sá nchídó-yu ichi xití veñúhu-áⁿ.

¹⁷ Te ní xáhaⁿ-gá xii-yu:

—Núú tütú Yá Ndiöxí càháⁿ-xi nàcuáa ní cáháⁿ-gá, te ní cachí-gá: “Vehe-í cúú-xí vèhe núú tàcá ñáyiú nihíí ñuyíú càháⁿ ndihi ñháⁿ-yu xii-í”, duha ní cáháⁿ-gá càchí-xi núú tütú-gá. Dico nchòhó quidé-ndó vèhe-gá vehe ñadúhú —càchí-gá xáhaⁿ-gã xii-yu.

18 Te nchaa dútú cúnúu, ndihi nchaa cue téé dàcuaha ñaha xii-yu nchaa tnúhu ní chídó tnúni ndíi Moisés ní tecú dóho-güedé nàcuáa ní cáháⁿ-gá te ní ngúita-güedé ndúcú-güedé nàcuáa cada-güedé cahni ñaha-güedé xii-gá, chi yùhú-güedé sá ïo cunuu-gã, te ducaⁿ chi nchaa ñáyiú ïo cùñúhu-yu nchaa tnúhu càháⁿ-gá.

19 Te òré sa ní cuaa cuií-nã, te ní quee tucu Jèsús ndihi cue téé xica cuu ndihi-gá ñúú Jerusalén cuáháⁿ-gá ndihi-güedé ingá xichi.

Ní yíhí yutnu ngúxí
(Mt. 21:20-22)

20 Te nduu tnéé nehé-ni ní yáha tucu Jèsús ndihi cue téé xica cuu ndihi-gá núú níhú yutnu ngúxí, te ní xiní-güedé sa ní yíhí nihíí ndéé yóho-xi.

21 Te té Pèlú ní ndacu iní-dé nàcuáa ní xáhaⁿ Jèsús xii yutnu ngúxí-án, te ní xáhaⁿ-dè xii-gá:

—Mèstrú, cundehe nã ní yíhí yutnu ngúxí sá ní xáhaⁿ-n sã vã cúúⁿ-gã sávidí-xi —càchí-dé xáhaⁿ-dè xii-gá.

22 Te Jèsús ní xáhaⁿ-gã xii-güedé:

—Quindáá ndisa iní-ndó Yá Ndiöxí.

23 Te na càchí tnúhu ndáá-í xii-ndo sã núu nchòhó cùñaha-ndo xii tindúú-a xocuñí-xi núú ndécú-xí, te quíhíⁿ-xi quéé-xi xití lámár. Te ñu ducaⁿ càda-xi te núu nchòhó vá caní ñⁿ caní úú iní-ndó, te quindáá iní-ndó sã dúcáⁿ càda-xi.

24 Te xíáⁿ núu càchí tnúhu-í xii-ndo sã nchàa sá ná càcáⁿ-ndó núú Yá Ndiöxí òré càháⁿ ndihi-ndo-gã, te taxi-gá te núu nchòhó sàndáá ndisa iní-ndó sã táxi-gã sá xicáⁿ-ndó núú-gã.

25 Te òré càháⁿ ndihi-ndo Yá Ndiöxí te dandàcu iní-ndó te núu ndècu ñáyiú ñá túú cùu váha iní ñháⁿ xii-ndo, te cada càhnu iní-ndó-yu cuendá ducaⁿ càda cahnu iní ñháⁿ Tátá-ndó Dütú Ndiöxí Yáa ndécú àndu xii-ndo cuendá nchaa sá ñà túú vãha quide-ndo.

26 Dico núu nchòhó vá cáda càhnu iní-ndó sã quidé ñàha tñaha ñáyiú-ndo xii-ndo, te ni Tátá-ndó Dütú Ndiöxí vá cáda càhnu iní ñháⁿ-gã xii-ndo cuendá nchaa sá ñà túú vãha quide-ndo —cachí-gá xáhaⁿ-gã xii-güedé.

Jèsús ndécú ndihi-gá tnúhu ndee iní
(Mt. 21:23-27; Lc. 20:1-8)

27 Te Jèsús ní ndexio tucu-gá ñúú Jerusalén ndihi cue téé xica cuu ndihi-gá, te cuànguihu tucu-gá xití veñúhu càhnu sá ïo cùnuu ndihi-güedé. Te xití veñúhu-án yíhí-gã ní quexio cue dútú cúnúu ndihi cue téé dàcuaha ñaha xii ñáyiú nchaa tnúhu ní chídó tnúni ndíi Moisés, ndihi cue téé cùu sacuéhé núú ñáyiú isràél.

28 Te xáhaⁿ-güedé xii-gá:

—Cuíní-ndí cachí tnúhu-n xii-ndí nása ndúu tnúhu ndee iní ndécú ndihi-n núu quide-n nãndi sá quidé-n, ¿te yoo ducaⁿ ní taxi tnúhu ndee iní-án xii-n-í? —càchí-güedé xáhaⁿ-güedé xii-gá.

29 Te Jèsús ní xáhaⁿ-gã xii-güedé:

—Yúhú tñháⁿ-í cuíní-í càcáⁿ tnúhu-í ñⁿ sá càcáⁿ tnúhu-í núú-ndó te núu na càchí tnúhu-ndo, te cachí tnúhu-í xii-ndo yòo ní taxi tnúhu ndee iní xii-í duha quide-í.

³⁰ Te chí cächí tnúhu xii-í yoo ní táuchíúⁿ ní dáciuándùte ndíi Juàà ñáyíu, ¿Yá Ndiòxí àⁿ cuè téé ñuyíú-a ní táuchíúⁿ dùcaⁿ ní quide ndíi? Te chí cächí tnúhu –cächí-gá xáhaⁿ-gä xii-güedé.

³¹ Te ní ngüíta-güedé xítñaha-güedé:

–¿Nása cúñaha-o? Chí núu na cúñaha-o sã Yá Ndiòxí ní táuchíúⁿ dùcaⁿ ní quide ndíi Juàà ñá, te quesaha-dé: “¿Ná cuendá ñá túú ní sàndáá iní-ndo tnúhu ní cáháⁿ ndíi vàiⁿ?”, quesaha-dé.

³² Te ni vã cúú cúñaha-o sã cuè ñáyíu ñuyíú-a ní táuchíúⁿ dùcaⁿ ní quide ndíi Juàà –cächí-güedé xítñaha-güedé.

Te ducaⁿ ní xítñaha-güedé chí ñá túú ní cùtnuní iní-güedé nása cúñaha-güedé xii-gá, chí xiyùhú-güedé cue ñáyíu chí nchaa ñáyíu-áⁿ ní cùtnuní ndáá iní-yu sã Yá Ndiòxí ní táuchíúⁿ-gä ducaⁿ ní quide ndíi Juàà.

³³ Te ní xáhaⁿ-güedé xii Jèsús:

–Ñá túú xini-ndí yoo ní táuchíúⁿ dùcaⁿ ní dáciuándùte ndíi Juàà ñáyíu –cächí-güedé xáhaⁿ-güedé xii-gá.

Te Jèsús ní xáhaⁿ-gä xii-güedé:

–Te núu ducaⁿ te ni yùhú vã cächí tnúhu-í xii-ndo yòo ní taxi tnúhu ndee iní duha quide-í –cächí-gá xáhaⁿ-gä xii-güedé.

12

Cuendá cue téé cuihna iní-xi (Mt. 21:33-46; Lc. 20:9-19)

¹ Te Jèsús ní ngüíta-gá cání-gä ñⁿ cuendú núú ñáyíu nàcuáa tecú tnùní-yu tnúhu-gá, te xáhaⁿ-gä xií-yu:

–Ñⁿ téé ní nacúxi-dé mee-ni yòho yaha stilé núú ñúhú-dé, te ní chidoco-dé cuendá sã vã cúú dàñú, te ní cadúha-dé núú quíhni-dé ndéhé yoho yaha stilé-áⁿ òré ná cùu, te ní cadúha-dé ñⁿ xító dùcúⁿ núú cáundòdo cue téé coto yoho yaha stilé-áⁿ.

Te ní sáá ñⁿ nduu quèe-dé quíngaca cuu xica-dé vài nduu, te ní dándõo ndaha-dé sã ní xitu-dé-áⁿ xii ñⁿ úú cue téé càháⁿ ndíhi-dé cuendá cada chiúⁿ-güedé, te ní ndatnúhu-güedé sã òré ná cúú te cuu cuendá dava-güedé te ducaⁿ te ní quee-dé cuáháⁿ-dé.

² Te sáta ní sáá nduu ní cuu ndéhé yoho yaha stilé sã ní xitu-dé-áⁿ, te ní xáhaⁿ-dé xii ñⁿ téé xínu cuechi núú-dé: “Cuáháⁿ cácáⁿ-n sã cúú cuendá-í núú cuè téé ní dándõo ndàha-í nchaa yoho yaha stilé sã ní xitu-í-áⁿ”, cächí-dé xáhaⁿ-dé. Te téé xínu cuechi-áⁿ ní xica-dé cuáháⁿ-dé.

³ Te cue téé-áⁿ ní tñi-güedé téé xínu cuechi-áⁿ, te ní caniha-güedé xii-dé, te dátñuní ní nacuícúⁿ ñáhá-güedé, te ñá túú tñàhí ná ní sãñaha-güedé.

⁴ Te téé cùu xítóhó yoho yaha stilé-áⁿ ní tendaha tùcu-dé ingá téé xínu cuechi núú-dé cuáháⁿ-dé. Te òré ní quexio téé xínu cuechi-áⁿ te cue téé-áⁿ ní sáha ñaha-güedé yúú xii-dé, te ní táhú-güedé díquí-dé, te ní xícuèhé ñáhá-güedé xii-dé.

⁵ Te téé cùu xítóhó nchaa yoho yaha stilé-áⁿ ní tendaha tùcu-dé ingá téé xínu cuechi núú-dé cuáháⁿ-dé núú cuè téé-áⁿ, dico téé-áⁿ òré ní quexio-dé te ní sahni ñaha-güedé xii-dé. Te téé cùu xítóhó nchaa yoho yaha stilé-áⁿ ní tendaha-dé vài-gá cue téé xínu cuechi núú-dé cuáháⁿ ngácáⁿ-güedé sã cúú cuendá-dé ní cùu dico ñi-ni ducaⁿ ní quide ñaha tùcu cue téé ndéé nchaa yoho yaha stilé-áⁿ xii-güedé, chí dava-güedé ní caniha-güedé te dava-güedé ní sahni ñaha-güedé.

⁶ Te tée cùu xítòhò nchaa yòhò yàhà stilé-án ndécú ìñdii-ná tée tendaha-dé quíhíñ nùú cuè tée ní dándóo ndaha-dé sá ñí xítu-dé-án, te tée tendaha-dé-án cùú-dé déhe ducuñ-dé, te ío cùu iní ñáhá-dé. Te ní sani iní-dé: “Váha-gá ñúu tendaha-í déhe-í-a nùhú-dé, chí òré quini ñáhá-güedé xii-dé te cànehe-güedé sá yíñhu nùú-dé”, duha ní sani iní-dé. Te ducañ te ní xáhañ-dé xii déhe-dé-án sá nùhú-dé, te tée-án cuñuhú-dé cuáháñ ngacáñ-dé sá cùú cuendá tátá-dé nùú cuè tée-án.

⁷ Dico òré ní xiní cue tée quide chiuñ-án déhe tée cùu xítòhò nchaa yòhò yàhà stilé-án, te ní xítñaha-güedé: “Tée-án tée véxi nduu táhú ñuhu-a ndíhí sá cáá nùú-xi, dico cahni-o-dé te mee-o nduu táhú-ó sá ndúú táhú-dé”, duha ní xítñaha-güedé.

⁸ Te ní tññ-güedé tée-án, te ní sahni ñaha-güedé, te ní dáquéne-güedé yiqui cùñú-dé ìñ xio yuhu ñuhu nùú cáá yòhò yàhà stilé-án —duha cuáháñ cuendú ní cani Jèsús nùú-yu.

⁹ Te Jèsús ní xáhañ tucu-gá xii-yu:

—¿Te nchòhó sa cùtnuní iní-ndó nàcuáa cada xítòhò ñuhu-án ãñ? Chí nùhú-dé te cahni-dé cue tée-án te dándóo ndaha-dé ñuhu-dé xii cue tée cùtnuní iní-dé cada ndáá —càchí-gá xáhañ-gá xii-yu.

¹⁰ Te xáhañ tucu-gá xii-yu:

—Te nchòhó, náá ñá túú dàcuaha-ndo nùú tütú Yá Ndiòxí nùú càchí-xi: Yúú sá ñí dáquéé tñhú cue tée dàcaa vehe, ní cuu-xi yúú cùnùu vitna.

¹¹ Chí mee Yá Ndiòxí ducañ ñí càchí-gá cunduu, te cùu-xi ìñ sá ío cùñúhu-o vitna.

Duha càchí-xi nùú tütú-gá —càchí Jèsús xáhañ-gá xii-yu.

¹² Te cue tée ní xíndedóhò nàcuáa nduu tñhu ní cáháñ-gá ní cuini-güedé tññ ñaha-güedé xii-gá ní cùu, chí ní cutnuni iní-güedé sá cuendá-güedé ní cáháñ-gá, dico ní yùhú-güedé tññ ñaha-güedé xii-gá cuendá sá ío vài ñáyiú, te ná ío ná cada ñáhá-yu xii-güedé ní sani iní-güedé, te ní xica-güedé cuáháñ-güedé.

Cuendá impuèstú

(Mt. 22:15-22; Lc. 20:20-26)

¹³ Te sátá ñí xica-güedé cuáháñ-güedé, te ní tendaha-güedé ìñ úú cue tée cùu fariséú, ndíhí ìñ úú cue tée cùndíhí té Hèrodés cuáháñ-güedé nùú ndécú Jèsús ndúcú-güedé nàcuáa cada-güedé datícánuu ñaha-güedé xii-gá nùú tñhu cáháñ-gá.

¹⁴ Te cue tée-án ñí quexio-güedé nùú Jèsús, te xáhañ-güedé xii-gá:

—Mèstrú, cùtnuní iní-ndí sá ío ndáá càháñ-n, te ñá túú quide cuendá-n nàcuáa càháñ ñáyiú, te cuèi ndédani càá-yu ìñ-ni càháñ-n ndíhí-yu chí ñá túú quide cuendá-n cuèi ná ñáyiú cùú-yu, te càháñ ndáá-n nàcuáa càháñ Yá Ndiòxí cundecu-o ñyúyú-a. Te càchí tñhu xii-ndí ñúu váha-ni quide-ndí sá cháhu-ndí té Cèsár tée ío cùnùu cuendá impuèstú ãñ ñáhá —càchí-güedé xáhañ-güedé xii-gá.

¹⁵ Dico Jèsús ní cutnuni iní-gá sá xító ndèé ñáhá-güedé xii-gá, nùú ní xáhañ-gá xii-güedé:

—¿Ná cuendá ducañ xító ndèé ñáhá-ndó xii-í? Chí dánèhé ñáhá xii-í ñí díhúñ sá cháhu-ndo cuendá impuèstú te nùú nása càa —càchí-gá xáhañ-gá xii-güedé.

¹⁶ Te cue tée-án ñí dánèhé ñáhá-güedé xii-gá ìñ díhúñ sá cháhu-güedé cuendá impuèstú. Te Jèsús ní xáhañ-gá xii-güedé:

—Chí càchí tnúhu xii-í nũu yoo núú-xi ndèé ndihí yoo òu-xi ndeé —càchí-gá xáhaⁿ-gã xii-güedé.

Te ní xáhaⁿ-güedé xii-gá:

—Núú tẽ Cèsár ndèé ndihí òu-dé —càchí-güedé xáhaⁿ-güedé xii-gá.

¹⁷ Te Jèsús ní xáhaⁿ-gã xii-güedé:

—Te núú ducaⁿ te chí nàcuáha tẽ Cèsár sá cúú cuendá-dé, te sá cúú cuendá méé Yá Ndiòxí te xiáⁿ nacuáha-ndo-gã —càchí-gá xáhaⁿ-gã xii-güedé.

Te cue tée-áⁿ òo ní cuñúhu-güedé sá dúcáⁿ ní cáháⁿ-gá.

Cuendá cue ñáyiú ndoto

(Mt. 22:23-33; Lc. 20:27-40)

¹⁸ Te sáta dúcáⁿ te ní quexio ñⁿ úú cue tée cùu saducéú núú ndécú Jèsús, te cue tée-áⁿ ñá túú sàndáá iní-güedé sá ndótó cuè ñáyiú ní xihí, te ní xáhaⁿ-güedé xii-gá:

¹⁹ —Mèstrú, ndíi Moisés càchí ndíi núú tùtú ndíi ndècu vitna sá nũu ñⁿ tée na cùú-dé te quendóo ñadihí-dé, te núú ñá túú ní xõo déhe-dé ndihí ñadihí-dé-áⁿ, te tée cùu ñaní-dé naqueheⁿ-dé ñaha ní quendóo quèé-áⁿ cuendá coo déhe-dé ndihí-aⁿ cuendá tée ní xihí-áⁿ.

²⁰ Te ní xindecu úsá tnàhá cue tée mee-ni ndí ñaní-güedé. Te tée díhna ní níhí ñadihí-dé, te ñá túú ní cùdí-dé cundecu-dé chi ní xihí-dé, te ni ñⁿ déhe-dé ñá túú ní xõo ndihí ñadihí-dé.

²¹ Te tée cùu úú ní naqueheⁿ-dé ñaha ní quendóo quèé-áⁿ, dico ní xihí tucu-dé, te ni ñⁿ tucu déhe-dé ñá túú ní xõo ndihí ñaha-áⁿ. Te òu-ni ducaⁿ ní xihí tée cùu uní.

²² Te ní xínu ndí ùsá-güedé ní cándeca ñaha-güedé xii ñaha-áⁿ, dico ni ñⁿ-güedé ñá túú ní xõo déhe-güedé ndihí-aⁿ, te ní ndihí-güedé ní xihí te ndeé núú ní ndihí-ná ní xihí tnàhá ñadihí-áⁿ.

²³ Te na sáá nduu ndòto-güedé ndihí ñaha-áⁿ, ¿te ndèdaca-güedé ñadihí-güedé cuu-aⁿ-i? Chi ndí ùsá-güedé ní cándeca ñaha-güedé xii-aⁿ —càchí-güedé xáhaⁿ-güedé xii-gá.

²⁴ Te Jèsús ní xáhaⁿ-gã xii-güedé:

—Ní xíta nchòhó tnúhu cáháⁿ-ndó, chi ñá túú xini-ndó nàcuáa cáháⁿ Yá Ndiòxí núú tùtú-gá, te ni ñá túú xini-ndó sã díú-gã ndácú-gã quidé-gã nchaandi túhú sá vãha.

²⁵ Te na càchí tnúhu-í xii-ndo sã òré ná sáá nduu ndòto nchaa ñáyiú ní xihí, te dàvã-áⁿ vã yõo-gã dasaⁿ déhe yoco-xi chi vã yõo-gã candeca tnàha, chi na ndòtó-yu te cuu-ná-yu dàtná cue espíritú xínu cuèchi núú Yá Ndiòxí.

²⁶ Te núú nchòhó cuini-ndó cáháⁿ-ndó cuendá nchaa ñáyiú ndoto, te díhna-gã dacuáha-ndo nacuáa ní chídó tnùnì ndíi Moisés núú tùtú ndíi ni cùu. Chi òu núú tùtú ndíi cáháⁿ-xi nàcuáa ní xáhaⁿ Yá Ndiòxí xii ndíi cùtnàhá ní cáháⁿ ndihí ñaha-gã ñⁿ xichí núú níhnú tnùtaú nchìcúⁿ ñuhú. Te duha ní xáhaⁿ-gã xii ndíi: “Yúhú cùú-í Ndiòxí tẽ Àbrahám, ndihí tẽ Isàác, ndihí tẽ Jàcób”, duha ní xáhaⁿ Yá Ndiòxí xii ndíi càchí-xi núú tùtú ndíi.

²⁷ Te Yá Ndiòxí ñá túú cùu-gã Ndiòxí cue ñáyiú ní xihí, chi cùu-gã Ndiòxí cue ñáyiú xindecu vívú, núú xiáⁿ nchòhó òo xíta-ndo tnúhu cáháⁿ-ndó. Te sá dúcáⁿ ní cáháⁿ-gã cuendá cue tée-áⁿ, te xiáⁿ cùtnùnì sá cuèi ní xihí-güedé sá cúú-xi tnàha ñáyiú-güedé, dico ndècu vívú-güedé sá cúú-xi-gã —càchí-gã xáhaⁿ-gã xii-güedé.

Tnúhu sá òo-gá cúnúu

(Mt. 22:34-40)

28 Te tnàhá ìn tée dàcuaha ñaha xii ñáyiú nchaa tnúhu ní chídó tnùnì ndíi Moisés ndèdóho-dé nchaa tnúhu càháⁿ Jèsús ndihì cue tée cùu saducéú-áⁿ, te ndèdóho-dé sá súunì vâha ñhí-gá tnúhu nàdanchocáva-gá. Te ní sàndehe yatni-dé núú-gá, te xâhaⁿ-dè xii-gá:

—Cachí tnúhu xii-í ndèdàca tnúhu sá ñí càháⁿ Yá Ndiòxí ío-gá cúnúu cuu díhna —càchí-dé xâhaⁿ-dè xii-gá.

29 Te Jèsús ní xâhaⁿ-gá xii-dé:

—Duha càháⁿ tnúhu sá ìo-gá cúnúu: “Nchòhò ñáyiú isràél ío váha chí cùndèdóho tnúhu-a. Ìnⁿdii díí-ní Yá Ndiòxí ndécú, te òu-ni-gá cúú-gá Ndiòxí-ó.

30 Te cuu iní-ndó Dütú Ndiòxí Yaá cúú Ndiòxí-ndó ñí yuhu ñí iní-ndó, te caní iní-ndó càda-ndo datná cuiní mée-gá, te mee-ni tnúhu váha caní iní-ndó cuendá cuu vii cuu váha-ndo núú-gá, te coo iní-ndó càda-ndo nacuáa cuu váha iní-gá”, duha càháⁿ tnúhu sá ìo-gá cúnúu.

31 Te duha càháⁿ tucu ingá tnúhu cùu uú sá ìo cúnúu: “Cuu iní-ndó tnàha ñáyiú-ndo datná cúú iní-ndó mée-ndo”, duha càháⁿ tnúhu cùu uú-áⁿ. Te uú duha-ni tnúhu-a cùu-xi tnúhu sá ìo-gá cúnúu —cachí-gá xâhaⁿ-gá xii-dé.

32 Te tée dàcuaha ñaha xii ñáyiú nchaa tnúhu ní chídó tnùnì ndíi Moisés ní xâhaⁿ-dè xii-gá:

—Mèstrú, váha-ni càháⁿ-n chí ndáá sá ìnⁿdii-ni Yá Ndiòxí ndécú, te ñá túú-gá ndèé ndécú ingá ndiòxí.

33 Te datná ní cachí-n sá ñí yuhu ñí iní-ó cùu iní-ó Yá Ndiòxí, te caní iní-ó càda-o nacuáa cuu vii cuu váha iní-gá te ío vii ío váha cuu iní-ó datná cuiní mée-gá, te coo iní-ó càda-o nacuáa cuu váha iní-gá, te cuu iní-ó cuè tnàha ñáyiú-o datná cúú iní-ó mée-o. Te nchaa xiáⁿ ío-gá xíní ñùhu-xi cada-o dacúúxí sá cuáñaha-o quítì cahni-güedé te cáyú-di nduu táhú ñáhá Yá Ndiòxí, ndihì dàcúúxí nchàa dava-gá sá sãñaha-o ndùu táhú-gá —càchí-dé xâhaⁿ-dè xii-gá.

34 Te sá dúcáⁿ ìo váha ndùu tnúhu ní càháⁿ tée-áⁿ, núu ní xâhaⁿ Jèsús xii-dé:

—Luha-ná cúmãní xii-n te ndíhu ndaha ñaha Yá Ndiòxí —càchí-gá xâhaⁿ-gá xii-dé.

Te sá dúcáⁿ ñí xâhaⁿ-gá xii tée-áⁿ, núu vá yõ ìnⁿ-gá ní cùyii nágá tnúhu nducu tnúhu-yu núú-gá.

Yoo cùu Xítóhó Jesucristú
(Mt. 22:41-46; Lc. 20:41-44)

35 Te Jèsús yíhí-gá xití veñúhu càhnu sá ìo cúnúu danehé-gá ñáyiú, te xâhaⁿ-gá xií-yu:

—Cue tée dàcuaha ñaha xii ñáyiú nchaa tnúhu ní chídó tnùnì ndíi Moisés càchí-güedé sá Cristú Yaá tendaha Yá Ndiòxí quixi ñuyíú-a cùu-gá déhe ndíi Dàvíí, te ndíi-áⁿ ñí cunaha vihi ní xíhí ndíi. ¿Te ná cuendá ducaⁿ càháⁿ-güedé?

36 Te mee ndíi Dàvíí-áⁿ ñí dácáhu iní ñáhá Espíritú Yá Ndiòxí xii ndíi nàcuáa càháⁿ ndíi, te duha ní cachí ndíi:

Dütú Ndiòxí ní xâhaⁿ-gá xii Yaá cúú Xítóhó-í:

“Ngóo xio cùha-í,

te yúhú cada-í te nchaa sá cúú ùhú iní ñáhá xii-n canehe-xi sá yíñùhu núú-n.”

Duha ní xâhaⁿ Dütú Ndiòxí xii Yaá cúú Xítóhó-í.

Duha ní cachí ndíi.

37 ¿Te nása cùu Cristú déhe ndíi Dàvíí, te mee ndíi ní cachí ndíi sá cúú-gá Xítóhó ndíi? —càchí Jèsús xâhaⁿ-gá xií-yu.

Te ío cuéhé ñáyiú ní xíndedóho nchaa tnúhu ní cáháⁿ-gá, te ío ní cudíí ìní-yu ní xíndedóho ñàhá-yu xii-gá.

Jèsús càháⁿ-gá cuèndá cue téè dàcuaha ñaha xii ñáyiú nchaa tnúhu ní chídó tnúni ndíi Moisés

(Mt. 23:1-36; Lc. 11:37-54; 20:45-47)

³⁸ Te òré dánèhé ñàhá Jèsús xii cue ñáyiú, te xáhaⁿ-gá xií-yu:

—Cada cuèndá-ndó vǎ cádá-ndó dàtná quidé cuè téè dàcuaha ñaha xii ñáyiú nchaa tnúhu ní chídó tnúni ndíi Moisés, chí cue téè-áⁿ tnàhá ìní-güedé cuíhnu-güedé dóó nání sǎ sácúhnu cue téè cùnuu-gá te cuíni-güedé sǎ méé-ní ndíhi tnúhu yiñùhu cáháⁿ ndíhi ñaha ñáyiú xii-güedé nchaa núú xíca cùu-güedé.

³⁹ Te nàcáxi-güedé xilé sácóo nchíhi cue téè cùnuu-gá xití veñúhu sácóo nchíhi-güedé. Te ducaⁿ-ni quide-güedé cuèi òré quíhu-güedé mèsá caxi-güedé òré ndécú-güedé ìⁿ vico, chí mee-ní núú sácóo cue téè cùnuu cuíni-güedé coo-güedé.

⁴⁰ Te quèndé-güedé vehe nchaa ñáyiú quèé, te ío naha càháⁿ ndíhi-güedé Yǎ Ndióxi dándahú-güedé méé-güedé sǎ ío quide ndáá-güedé cuèndá sǎ cuíni-güedé cáháⁿ váha ñáyiú cuèndá-güedé. Te sǎ dúcáⁿ quide-güedé te ío-gá ndoho-güedé núú ùhú núú ndàhú dàcúúxí dàva-gá ñáyiú —càchí-gá xáhaⁿ-gá xií-yu.

Díhúⁿ nduu táhú Yǎ Ndióxi ní dáquèe ìⁿ ñaha ndàhú ñaha quèé

(Lc. 21:1-4)

⁴¹ Te núcóo Jèsús xití veñúhu yatni núú ndécú àlcanjá te ndèhe-gá xídáquèe ñáyiú díhúⁿ xití alcancjá-áⁿ, te tnàhá cue ñáyiú cuica xídáquèe-yu vǎi díhúⁿ.

⁴² Te ní quexio ìⁿ ñaha ndahú ñaha quèé, te ndèhe-gá ní dáquèe-aⁿ úú tnàhá díhúⁿ còbrí xití alcancjá, te díhúⁿ-ǎⁿ ío sacú yáhu-xi.

⁴³ Te Jèsús ní cana-gá cue téè xíca cuu ndíhi-gá, te ní xáhaⁿ-gá xii-güedé:

—Na càchí tnúhu ndáá-í xii-ndo sǎ ñaha ndahú ñaha quèé-a ío-gá nándíhi díhúⁿ ní dáquèe-aⁿ xití alcancjá dàcúúxí díhúⁿ ní dáquèe dàva-gá-yu.

⁴⁴ Chí nchaa ñáyiú-áⁿ ní dáquèe-yu mee-nǎ díhúⁿ sǎ ní quendóo-ná, dico ñaha quèé-a cuèi ndàhú-aⁿ dico ní dáquèe-aⁿ nihíí díhúⁿ sǎ cuááⁿ sǎ cǎxí-áⁿ ní cùu —càchí-gá xáhaⁿ-gá xii-güedé.

13

Jèsús càchí-gá sǎ ngóyó veñúhu

(Mt. 24:1-2; Lc. 21:5-6)

¹ Te òré ní ndee Jèsús xití veñúhu càhnu sǎ ío cùnuu, te ìⁿ téè xíca cuu ndíhi-gá ní xáhaⁿ-dè xii-gá:

—jMèstrú, cundehe nǎ ío víi ní sǎá veñúhu-aⁿ ndíhi nchaa vehe nèhe tnaha ndíhi-xi, te ío víi ndǎa nchaa yúú yíhí! —càchí-dé xáhaⁿ-dè xii-gá.

² Te Jèsús ní xáhaⁿ-gá xii-dé:

—Nchaa nàcuáa cǎa nchaa vehe sǎ cúñùhu-n-a vítna sǎá nduu te vǎ cùnduu-gá-xi dàtná cáá-xí vítna, chí ní ìⁿ-gá yúú vǎ códó nchíhi tnaha-xi, chí ndíhi ngoyo —càchí-gá xáhaⁿ-gá xii-dé.

Nàcuáa cada-xi nduu ta cùyatni naa ñuyúú

(Mt. 24:3-28; Lc. 21:7-24; 17:22-24)

3 Te Jèsús ní xica-gá ndihi cue téé xica cuu ndihi-gá cuáháⁿ ndihi ñaha-gã xii-güedé yucu nàni Olívú, te yucu Olívú-áⁿ tũu ndáá núú cáá veñúhu càhnu sá ïo cùnnuu. Te Jèsús ní quexio-gá ndihi-güedé yucu Olívú-áⁿ, te xíáⁿ ñi ngóo-gá te núú núcõo-gá-áⁿ ñi sáháⁿ té Pèlú ndihi té Jácobó ndihi té Juáá ndihi té Ndríxí, te dayuhu ñi xáhaⁿ-güedé xii-gá:

4—Cuíní-ndí cachí tnúhu-n nã nduu dùcaⁿ cada-xi ngoyo veñúhu càhnu sá ïo cùnnuu, àdi nándi cùu sá cadá-xí cuendá cutnùní iní-ndí sá sã ta cuyatni nduu ducaⁿ cada-xi —cachí-güedé xáhaⁿ-güedé xii-gá.

5 Te Jèsús ní xáhaⁿ-gã xii-güedé:

—Ío quíhi iní-ndó cùndecu-ndo cuendá sá vã yõo dandáhú ñáhá xii-ndo.

6 Chi ío cuéhé cue téé coo ñuyú te danani-güedé méé-güedé dàtná nání-í, te cachí-güedé: “Yúhu cùu-í Cristú Yáá ní tendaha Yã Ndiõxí véxi ñuyú-a”, duha cachí-güedé. Te sá dúcáⁿ cãháⁿ-güedé te ío vãi ñáyi dandáhú-güedé.

7 Te òré ná ñihí-ndó tnúhu sá nãá-güedé ndëni ní cuu, te vã yùhú-ndó chi dacuítí sã dúcáⁿ càda-xi, dico vátá sãá-gá nduu nãa ñuyú òré ducaⁿ càda-xi.

8 Chi cue téé ñⁿ nacióⁿ nãá-güedé ndihi cue téé ñngá nacióⁿ, te titní ñuú ngúita-güedé nãá-güedé, te titní xichi ñuyú ñihi vïhi tnáa, te titní tucu xichi ñuyú coo tnamá, te ío-gá cuéhé sã yãha ñáyi. Te nchaa sã dúcáⁿ càda-xi-áⁿ cùu-xí tnündòho sã vítná vãha vãha quèsaha-xi sácúu-xí cuè ñáyi ndècu ñuyú-a.

9 Dico nchòhó ío quíhi iní-ndó cùndecu-ndo, chi nchaa ñáyi na cùu úhú iní ñáhá xii-ndo cuáha cuendá ñáhã-yu xii dava-ndo núú cuè téé cùchiuⁿ, te candeca ñaha-güedé xii-ndo quíhiⁿ xití veñúhu-güedé, te yácáⁿ caniha-güedé xii-ndo. Te quíhiⁿ-ndó núú cuè téé yindaha nacióⁿ àdi núú ðava-gá cue téé cùnnuu sã cuendá-í, te nchòhó ñihí-ndó nãcuáa cada-ndo cãháⁿ vãha-ndo cuendá-í núú-güedé.

10 Te cùmání-gã sãá nduu nãa ñuyú-a te sa cutènuu tnúhu-í ñi càa xico ñuyú-a, te tnúhu-áⁿ càháⁿ-xi nãcuáa naníhi tãhú ñáyi.

11 Te òré ná càndeca ñaha ñáyi xii-ndo quíhiⁿ núú cuè téé cùchiuⁿ cuáha cuendá ñáhã-yu, te òré vátá sãá-gá-ndó núú-güedé te vã cání iní-ndó nũu nãsa cunduu tnúhu cùñaha-ndo xii-güedé. Chi òré-nã te Yã Ndiõxí dacàhu iní ñáhã-gã xii-ndo nãsa cunduu tnúhu cùñaha-ndo xii-güedé, te ðiu-ni tnúhu sã dacàhu iní ñáhã-gã-áⁿ cùñaha-ndo xii-güedé. Te ñã ðíú mèe-ndo cãháⁿ-ndó chi Espiritú Yã Ndiõxí cãháⁿ-xi yuhu-ndo.

12 Te dava cue téé cuáha cuendá-güedé ñani-güedé núú cuè téé cùchiuⁿ cuendá cahni ñaha-güedé. Te dava cue téé cùu tátá ðiu-ni ducaⁿ càda-güedé cuáha cuendá-güedé déhe-güedé núú cuè téé cùchiuⁿ. Te dava cue téé cùu déhe cuu úhú iní-güedé tátá-güedé ndihi nãná-güedé, te cuáha cuendá ñáhã-güedé xii-yu núú cuè téé cùchiuⁿ cuendá cahni ñaha-güedé xii-yu.

13 Te ío cuéhé ñáyi cuu úhú iní ñáhã-yu xii-ndo sã cuendá-í, dico nchaa nchòhó ñáyi na càda ndee-ni iní canchicúⁿ nihnu ñaha-ni xii-í te naníhi tãhú-ndó.

14 Te ndí Dániél téé ní xóo cãháⁿ tnúhu Yã Ndiõxí ndéé sanaha ñi chídó tnùní ndí núú tütú ndí cuendá ñⁿ sã dáquèe tihú Yã Ndiõxí cundecu ñⁿ xichi núú ñã túú tàú-xi cundecu-xi, te xíáⁿ cada-xi sã vã cùndecu-gá ñi ñⁿ ñáyi xíáⁿ. Te cada cuendá vãha-ndo nãcuáa ní cãháⁿ ndí, chi nduu na quíní-ndó xíáⁿ cundecu-xi

ɨⁿ xichi núú ñà túú tàú-xi cundecu-xi, te dàvá-áⁿ nchaa ñáyiú xĩndecu distritú Jùdeá xíní ñùhu-xi cunú-yu quíhíⁿ-yu xítí yucu.

15 Te nchaa ñáyiú ndáa ndódó ñiquí véhé-xí vǎ ndǐhu-gá-yu vehé-yu quehéⁿ-yu ɨⁿ ndachíúⁿ-yu canehé-yu quíhíⁿ.

16 Te nchaa ñáyiú cuáháⁿ yucu ni vǎ ñùhú-gá-yu vehé-yu cúnúquehéⁿ-yu dóó-yu.

17 Te ndàhú ní cuu nchaa ñáyiú ñíhí ñùhú ñéhe-xi, ndíhi cue ñáyiú ñíhí xĩndeca ñéhe vitna sàdi na saá nduu dùcaⁿ cada-xí!

18 Te nchòhó ío chí càcáⁿ táhú núú Yǎ Ndióxi cuèndá sá vǎ dúcáⁿ ndòho-ndo yóó quidé víxiⁿ-xi.

19 Chí dàvá-áⁿ coo tnúndòho cahnu vihi ñuyúú, te vátá ííⁿ ndúu-gá coo tnúndòho cahnu vihi-áⁿ ndéé cútñahá ní cadúha Yǎ Ndióxi ñuyúú, chí ñiú-ni dàvá-áⁿ coo tnúndòho cahnu vihi-áⁿ, te ni núú cuáháⁿ núú véxi vǎ cóó-gǎ tnúndòho-áⁿ.

20 Te Yǎ Ndióxi càchí-gá sá vǎ ío vǎi nduu coo tnúndòho cahnu vihi-áⁿ ñuyúú sǎ cuèndá nchaa ñáyiú ní cáháⁿ-gá cundecu ndíhi-gá. Te núú vǎi nduu na coo tnúndòho-áⁿ, te vǎ yóo cácu nihnu.

21 Te dàvá-áⁿ cǔñaha ñáyiú xii-ndo: “Chí cundéhe iha, chí iha ní quexio Cristú Yaá ní tendaha Yǎ Ndióxi véxi ñuyúú-a”, duha cǔñahá-yu xii-ndo. Àdi quesahá-yu: “Chí cundéhe yacáⁿ chí yácáⁿ ndécú-gǎ”, quesahá-yu. Te vǎ quíndáá iní-ndó tnùhu càháⁿ-yu.

22 Te coo cue téé danani-güedé méé-güedé dàtná nání-í te cachí-güedé sǎ cúú-güedé Yaá ní tendaha Yǎ Ndióxi véxi ñuyúú-a. Te dava-güedé cachí-güedé sǎ cúú-güedé cue téé càháⁿ tnùhu Yǎ Ndióxi dico ñá ndàá sǎ cúú-güedé cue téé càháⁿ tnùhu-gá, te cada-güedé titní núú sǎ vǎ yóo tnàhí ndàcu cada cuèndá dandàhú-güedé ñáyiú, te caní iní-güedé dandàhú-güedé ndéé cue ñáyiú ní cáháⁿ Yǎ Ndióxi cundecu ndíhi-gá.

23 Te vitna ío váha cuáha-ndo cuèndá, te quíhi iní-ndó cundecu-ndo, chí nchaa sa ní dátùha ñaha-í xii-ndo.

*Nàcuáa cada-xi òré quixi tucu Téé cùu ñaní tnáhá nchàa ñáyiú
(Mt. 24:29-35,42-44; Lc. 21:25-36)*

24 Te na yáha-ni coo tnúndòho cahnu vihi-áⁿ, te vǎ dáyhé-gá nchíanchii te ni vǎ dáyhé-gá yóó.

25 Te ngoyo nchaa chódíní ndéé andíu, te quídi-xi andíu.

26 Te dàvá-áⁿ quíní ñáhá nchàa ñáyiú xii yúhú Téé cùu ñaní tnáhá-yu ncháa-yu quee-í andíu quíxi-í ichi xítí vícò, te quíní-yu sǎ ío càhnu cuu-í, te quíde-í nchaa sǎ vǎha.

27 Te tendaha-í cue espíritú xínú cuèchi núú-í quíhíⁿ-xi nadatàcá-xi nchaa ñáyiú ní cáháⁿ-í chitnahá ñáhá xii-í xĩndecu ni càa xico ñuyúú.

28 Te cundehe-ndo nàcuáa quíde yutnu ngúxí, chí yutnu-áⁿ ndúú yùte núú ñí-í te nàtahú ndaha-xi, te òré ducaⁿ quíde-xi te càchí-ndó sǎ sǎ ní cuyatni nuu cahni.

29 Te ducaⁿ sǎtnahá-xi cada-xi òré ná quíní-ndó càda-xi nchaa nacuáa ní cáháⁿ-í, te cutnùní iní-ndó sǎ sǎ ní cuyatni víí-ñǎ nduu nàa ñuyúú.

30 Te na càchí tnùhu ndáá-í xii-ndo sǎ òré vátá cùú-gá cue ñáyiú xĩndecu ñuyúú-a vitna, te cada-xi nchaa nàcuáa ní cáháⁿ-í.

31 Te andïu ndïhi ñuyú-a chi ndïhi nihnu-xi, dico tnúhu-í chi vá ndíhi nihnu-xi chi cùu-xi tnúhu ndáá.

32 'Dico ñá túú cùtnuní ná nduu quixi tucu-í, te ni ñà túú cùtnuní ná òré chi vá yõ xini, te ni cuè espíritu xínú cuèchi núú Yá Ndiõxi ñá túú xini-xi ná nduu quixi-í, te ni mèe yúhú tée cùu Déhe Dútú Ndiõxi ñá túú xini-í ná nduu quixi tucu-í, chi ñndii díi-ni mee Tàtà-í Dútú Ndiõxi xini-gá núu ná nduu quixi-í.

33 'Te nchòhó xini ñùhu-xi sá ïo quihí iní-ndó cùndecu-ndo, te cáháⁿ ndïhi-ndo Yá Ndiõxi, chi ñá túú xini-ndó ná nduu quixi tucu-í.

34 Te na càchí tnúhu-í xii-ndo cuèndá ñndé cùnín quíngaca cuu xica. Te téé-áⁿ cùmání-gá quee-dé vehe-dé te ní xáhaⁿ-dē xii cue téé xinu cuechi núú-dē sá ná cáda cuèndá-güedé vehe-dé. Te ní sáñaha-dē xii-güedé ndí díiⁿ núú-güedé chiuⁿ cada-güedé. Te ní xáhaⁿ-dē xii téé ndéé yuyēhe sá ná cùndecu túha-ni-dé yuyēhe ndéé nāsáá-dé.

35 Te duha nduu tnúhu càháⁿ-í cuèndá nchòhó cùndecu túha-ndo, chi ñá túú xini-ndó ná nduu te ni ñà túú xini-ndó ná òré quixi tucu yúhú Yáá cúu Xitohó-ndó, núu òré sa ní cundiⁿquⁿ, àdi dava niú, àdi oré sa ní cana uuⁿ líhi, àdi oré sa ta cùditó cuáháⁿ, núu xíáⁿ ío chí cùndecu túha.

36 Te duha càháⁿ-í chi na cuáháⁿ òré ñá túú ná yíhi iní-ndó quèxio-í, te ñá túú ndècu túha-ndo.

37 Te dàtná-ni xáhaⁿ-í xii nchòhó sá cùndecu túha-ndo, te diu-ni ducaⁿ xáhaⁿ-í xii nchaa dava-gá ñáyu sá cùndecu túha-yu —càchí-gá xáhaⁿ-gá xii-güedé.

14

Ndùcu-güedé nàcuáa cada-güedé cahni-güedé Jèsús (Mt. 26:1-5; Lc. 22:1-2; Jn. 11:45-53)

1 Te cùmání ùú-gá nduu te quesaha vico pascuá, vico xèxi ñáyu pàá sá ñà túú yíhi levadurá. Te cue dútú cúnúu, ndïhi cue téé dàcuaha ñaha xii ñáyu nchaa tnúhu ní chídó tnúní ndíi Moisés ndúcú-güedé nàcuáa cada-güedé dandàhú-güedé Jèsús cuèndá tnñ ñaha-güedé xii-gá te cahni ñaha-güedé.

2 Te ní xitnáha-güedé:

—Váha-gá sá vā tnñ-ó Jèsús mei ndúu vico, chi núu ducaⁿ na càda-o te ío dusaⁿ càda ñáyu —càchí-güedé xitnáha-güedé.

Ñndíhi chíhí-áⁿ acití díquí Jèsús (Mt. 26:6-13; Jn. 12:1-8)

3 Te Jèsús ndécú-gá ñuu Bètaniá vehe ñndé téé nàni Ximú, téé ní tnahá cuéhé sá dátèhyú nihnu-xi yiqui cùñú-ó. Te yíhi Jesús mèsá xéxi-gá ní quexio ñndíhi néhé-áⁿ ñndé sá ní cuáha yúú váha yúú nání àlabastrú, te xití xíáⁿ ñúhú acití sàháⁿ tnámí sá nání nàrdú sá ïo ndèyáhu, te ní táhú-áⁿ xíáⁿ te acití ñúhú xití-xi-áⁿ ní sódó-aⁿ díquí Jèsús.

4 Te ñndé ùú cue téé xíndecu-áⁿ ní cudééⁿ-güedé sá dúcáⁿ ní quide-aⁿ, te ní xitnáha-güedé:

—Ñá túú quide váha ñaha-áⁿ dàcáⁿ quidé-áⁿ, chí íí ní dácúita-aⁿ acití váha-áⁿ.

5 Chí váha-gá núu cuyáhu acití-áⁿ sá ùní cièndú díhúⁿ denàriú, te díhúⁿ sá cuyáhu acití-áⁿ cuu cuèndá ñáyu ndàhú ní cùu —cachí-güedé xitnáha-güedé.

Te ní tenáá-güedé ñaha-áⁿ sá dúcáⁿ ní quide-aⁿ.

6 Te Jèsús ní xáhaⁿ-gá xii-güedé:

—Chí dáñá, vá dásàtù-ndó ìní ñadìhí-a, chí sá ní quide ñaha-aⁿ xii-í cúú-xí ìⁿ sá vǎha.

⁷Chí cue ñáyiú ndáhú ducaⁿ-ni cùtnahá ñáyiú-áⁿ tnuú-ndó, te nání òré càchí ìní-ndó te chindee-ndó-yu. Dico yúhú chí vá ncháá ndùu cundecu ndihi ñaha-í xii-ndo ñùyú-a.

⁸Te ñadìhí-a ní quide-aⁿ ìⁿ sá vǎha ndèé neni ní ndacu-aⁿ, chí sá dúhá ní quide ñaha-aⁿ xii-í ní chíhi ñaha-aⁿ àcítí, te xíáⁿ cada ìní-ndó sá sá quide túha-aⁿ yíqui cùnú-í cuèndá quíndúxi-xi.

⁹Te na càchí tnúhu ndáá-í xii-ndo sǎ ndèni ní cuu nihí ñuyúú ná càháⁿ ñáyiú tnúhu-í, te càháⁿ-yu tnahá cuèndá ñadìhí-a cuèndá quiní nchaa ñáyiú nàcuáa ní quide-aⁿ, te ducaⁿ vá nácuànaa-yu —càchí-gá xǎhaⁿ-gá xii-güedé.

Té Jüdás ndúcú-dé nàcuáa cada-dé cuáha cuèndá-dé Jèsús núú cuè téé cùu úhú ìní ñáhá xii-gá

(Mt. 26:14-16; Lc. 22:3-6)

¹⁰Te té Jüdás Iscarioté ní sáháⁿ-dé ní ndatnúhu-dé ndihi cue téé cùu dútu cùnùu sá cuáha cuèndá-dé Jèsús núú-güedé, te núú tnahá té Jüdás-áⁿ cúú ùxúú tnahá cue téé xica cuu ndihi-gá ní cùu.

¹¹Te òré ducaⁿ ní ndatnúhu-dé ndihi-güedé, te ío ní cudíí ìní-güedé, te ní xáhaⁿ-güedé xii-dé sá cuáñaha-güedé díhúⁿ xii-dé. Te té Jüdás-áⁿ ní nguíta-dé ndúcú-dé nàcuáa cada-dé cuáha cuèndá-dé Jèsús núú-güedé.

Cùdini Jèsús ndihi cue téé xica cuu ndihi-gá

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹²Te ní sáá nduu ní quesaha víco pascuá, víco ñá túú xèxi ñáyiú pàá sá ñá túú yíhi levadurá, te diu-ni nduu-áⁿ sáhní-güedé ìⁿ mbéé líhli xèxí-yu nduu víco pascuá-áⁿ. Te cue téé xica cuu ndihi Jèsús ní xicáⁿ tnúhú-güedé núú-gá, te xǎhaⁿ-güedé xii-gá:

—Mèstrú, véxi-ndí xicáⁿ tnúhú-ndí núú-n núu ndèé cáá vèhe cuíni-n càda túha-ndí sá cùdini-o sacuaa nduu víco pascuá —càchí-güedé xǎhaⁿ-güedé xii-gá.

¹³Te Jèsús ní xáhaⁿ-gá xii úú-ni tnahá cue téé xica cuu ndihi-gá:

—Chí cuàháⁿ xití ñuú-áⁿ, te yàcáⁿ naníhí-ndó ìⁿ téé tànehe yóó ndute, te téé-áⁿ cándèndaha-ndo-dé quíhíⁿ.

¹⁴Te núu ndèdacàa vehe na ndíhu-dé te xíáⁿ quíhu-ndo. Te cúñaha-ndo xii xítóhó vehe-áⁿ: “Yáá cúú Mèstrú càchí-gá sá núu ndèdacàa xichi xití vehe-n cuáñaha núu-n xii-gá cùdini-gá ndihi cue téé xica cuu ndihi-gá sacuaa nduu pascuá”, duha cúñaha-ndo.

¹⁵Te dàtnúni danèhé ñáhá-dé xii-ndo ìⁿ quartú cáhnú cǎa núú ñnu, chí vehe yòdo tnahá cuu-xi, te sa ní quide túha-dé nchaa sá nándíhi, te nchòhó dicó-ná comidá cada túha-ndo cùdini-o —càchí-gá xǎhaⁿ-gá xii-güedé.

¹⁶Te cue téé-áⁿ ní xica-güedé cuáháⁿ-güedé xití ñuú-áⁿ, te nchaa-ni nàcuáa ní xáhaⁿ Jèsús ní cuu. Te ní quide túha-güedé sá cùdini-güedé ndihi-gá sacuaa nduu víco pascuá-áⁿ.

¹⁷Te sátá ní cundiquiⁿ te ní quexìo Jèsús ndihi ndi ùxúú cue téé xica cuu ndihi-gá.

¹⁸Te cuánguihu-gá mèsá ndihi-güedé cuèndá cùdini ndihi ñaha-gá xii-güedé, te òré yíhí-gá mèsá ndihi-güedé, te xǎhaⁿ-gá xii-güedé:

—Na càchí tnúhu ndáá-í xii-ndo sã ñⁿ nchohó cue téé xèxi ndihi ñaha xii-í cuáha cuendá ñáhá-ndó núú cuè téé cùu úhú iní ñáhá xii-í —càchí-gá xáhaⁿ-gã xii-güedé.

19 Te sá dúcáⁿ ní xáhaⁿ-gã xii-güedé, te nchaa-güedé ní ngüíta-güedé cündiyí-güedé. Te da ñⁿ da ñⁿ-güedé ní ngüíta-güedé xicáⁿ tnúhú-güedé núú-gã, te xáhaⁿ-güedé xii-gá:

—Ñá díú yúhú ducaⁿ sàni iní-n càda-í-u? —càchí-güedé xáhaⁿ-güedé xii-gá.

20 Te Jèsús ní xáhaⁿ-gã xii-güedé:

—Di-u ni ñⁿ nchòhó cue téé úxúú xicá cùu ndihi-í, téé na dàquéndaha còhó òré daquéndaha-í, téé-áⁿ cuáha cuendá ñáhá-dé xii-í núú cuè téé cùu úhú iní ñáhá.

21 Te yúhú Téé cùu ñani tnáhá-ndó ncháa-ndo ñuhu ichi-í cuáháⁿ-í ndoho-í nàcuáa càháⁿ-xi núú tütú Yá Ndiòxí. Dico ndàhú ní cuu téé ducaⁿ na cuáha cuendá ñáhá xii-í núú cuè téé cùu úhú iní ñáhá, chí váha-gá sá vã cacú téé-áⁿ cundecu-dé ní cùu, te ñá díú sã ní cacu-dé te ducaⁿ càda-dé —càchí-gá xáhaⁿ-gã xii-güedé.

22 Te nini cùdini cue téé xica cuu ndihi Jesús ní queheⁿ-gã pàá, te ní ndacáⁿ táhú-gã núú Yá Ndiòxí, te dàtnùní ní táhú cuèchi-gá, te ní ngüíta-gã dácãhñu ñaha-gã xii-güedé, te xáhaⁿ-gã:

—Chí quehéⁿ pàá-a caxi-ndo, te cada iní-ndó sã cúú-xí dàtná yiqui cùñú-í —càchí-gá xáhaⁿ-gã xii-güedé.

23 Te ní queheⁿ-gã vãsú ñúhú ndúdí ndéhé yoho yàha stilé, te ní ndacáⁿ táhú-gã núú Yá Ndiòxí, te dàtnùní ní ngüíta-gã sãñaha-gã xii-güedé cuendá coho-güedé luha luha sã ñúhú xití-xi, te nchaa-güedé ní xihí.

24 Te ní xáhaⁿ-gã xii-güedé:

—Ndudí ndéhé yoho yàha stilé-a cada iní-ndó sã cúú-xí dàtná níñí-í sá catí òré cahni ñaha-güedé xii-í. Te sá dúcáⁿ catí níñí-í xíáⁿ cutnùní ndáá sá Yá Ndiòxí cada-gã ingá núú sã váha sá cúú-xí vãi ñáyiú dàtná ní cachí-gã cada-gã.

25 Te na càchí tnúhu ndáá-í xii-ndo sã vitná-ndó duha xihí-í ndudí ndéhé yoho yàha stilé-a te vã cóhó-gã-í, dico na sàà nduu cundecu-í núú ndécú Yá Ndiòxí táxí tnùní-gã, te dàvá-áⁿ cada iní-í sã dàtná sã cóhó tucù-í chí ío cudíí iní-í —càchí-gá xáhaⁿ-gã xii-güedé.

Jèsús càháⁿ-gã sá té Pèlú cùñaha-dé xii ñáyiú sã ñà túú xini ñáhá-dé xii-gã

(Mt. 26:30-35; Lc. 22:31-34; Jn. 13:36-38)

26 Te Jèsús ní xita-gã ñⁿ ndudú ndihi cue téé xica cuu ndihi-gã, te dàtnùní ní xica-gã cuáháⁿ-gã ndihi-güedé yucu Òlívú.

27 Te yacáⁿ ní xáhaⁿ-gã xii-güedé:

—Na càchí tnúhu-í xii-ndo sã ncháá-ndó dàña nihnu ñaha-ndo xii-í niú vitna, chí quee ndáá-xi nàcuáa càháⁿ-xi núú tütú Yá Ndiòxí núú càchí-xi: “Yúhú cuáha-í tnúhu cahni-güedé téé cùu toli, te nchaa mbéé-dé ndihi-güedi cuténuu”, duha càchí-xi núú tütú-gã.

28 Dico na cùú-í te ndoto-í te codonùu-í núú-ndó quñíⁿ distritú Galileá —càchí-gá xáhaⁿ-gã xii-güedé.

29 Te té Pèlú ní xáhaⁿ-dë xii-gã:

—Te cuèi nchaa-güedé ná dàndóo ñaha-güedé xii-n, dico yúhú chí vã dàndóo ñaha-í xii-n —càchí-dé xáhaⁿ-dë xii-gã.

30 Te Jèsús ní xáhaⁿ-gã xii-dé:

—Na càchí tnúhu ndáá-í xii-n sã núú vitna cùmání-gã cana líhi úú xito, te úní xito cáháⁿ-n núú ñãyiú sã ñà túú xini ñáhá-n xii-í —càchí-gã xãhaⁿ-gã xii-dé.

³¹ Dico té Pèlú ní cáháⁿ ñíí-dé, te xãhaⁿ-dë xii-gá:

—Cuëi na cùú ndihí ñaha-í xii-n dico vá cáháⁿ-í núú ñãyiú sã ñà túú xini ñáhá-í xii-n —càchí-dé xãhaⁿ-dë xii-gá.

Te nchaa dava-gá cue téé xica cuu ndihí-gá diu-ni ducaⁿ ñí xãhaⁿ-güedë xii-gá.

Jèsús càháⁿ ndihí-gá Yã Ndiõxí ñí xichi núú nání Gètsemani

(Mt. 26:36-46; Lc. 22:39-46)

³² Te Jèsús cuáháⁿ-gá ndihí cue téé xica cuu ndihí-gá ñí xichi núú nání Gètsemani. Te òré ní quexiò-gá ndihí-güedé xiáⁿ, te ní xãhaⁿ-gã xii-güedé:

—Chí cúnucõo iha cundetú-ndo na quihíⁿ-í yacáⁿ cáháⁿ ndihí-í Yã Ndiõxí —càchí-gã xãhaⁿ-gã xii-güedé.

³³ Te ndëca-gá té Pèlú, ndihí té Jàcobó, ndihí té Juàá cuáháⁿ, te ñà túú tnàhí-gá cùú vãha iní-gá te ní ngüita-xi súúni ndihú iní-gá.

³⁴ Te ní xãhaⁿ-gã xii cue téé úní-áⁿ:

—Súúni ndihú iní-í dàtná sá cùú-í, te chí quéndõo iha te vá cùdú-ndó —càchí-gã xãhaⁿ-gã xii-güedé.

³⁵ Te sa ñunchií luha ní xica ndehe Jèsús núú ndécú-güedë, te ní ngáundayi-gá ndéé ñuhu càháⁿ ndihí-gá Tãtã-gã Dútú Ndiõxí sá núu vá cündèe iní-gá taunihnu ñaha-gã xii-gá cuëndá nchaa nãcuáa yãha-gá.

³⁶ Te òré càháⁿ ndihí Jèsús Tãtã-gã Dútú Ndiõxí, te xãhaⁿ-gã:

—Yòhó tãtã mée-í, nchaandi túhú sá vãha ndàcu-n quide-n, te càháⁿ ndàhú-í núú-n núu vá cündèe iní-n taunihnu ñaha-n xii-í cuëndá sá vã ndòhò-í ná sàà òré, dico vá cadá-n nãcuáa càchí iní mée-í chi cada-n nãcuáa càchí mee-n —càchí-gã xãhaⁿ-gã xii Tãtã-gã Dútú Ndiõxí.

³⁷ Te sãtã ñí yãha ní cáháⁿ ndihí-gã Tãtã-gã Dútú Ndiõxí, te cuánuhú-gá núú ñí dándõo-gá cue téé úní-áⁿ, te xixidí-güedé òré ní nasáá-gã, te ní xãhaⁿ-gã xii té Pèlú:

—Xímú, ¿náa sama xidí-n? ¿Náa ñà cündèe tnahi núú-n vã cùdú-ni-n cuëdìcò ñí òré-áⁿ? —càchí-gã xãhaⁿ-gã xii-dé.

Te ní xãhaⁿ tùcu-gá xii-güedé:

³⁸ —Te chí quéndõo tucu, te cuhuⁿ iní-ndó vã cùdú-ndó, te cáháⁿ ndihí-ndo Yã Ndiõxí cuëndá sá vã dácàháⁿ ñáhá yùcu ñávãha xii-ndo càda-ndo sã ñà túú tàú-ndó càda-ndo. Te na càchí tnúhu ndáá-í xii-ndo sã nchòhó cuní-ndó càda-ndo nchaa nãcuáa càháⁿ-í dicó-ni sã ñà túú ñihí ndéé-ndó —càchí-gã xãhaⁿ-gã xii-güedé.

³⁹ Te Jèsús ní xica tucu-gá cuáháⁿ-gã cáháⁿ ndihí-gã Tãtã-gã Dútú Ndiõxí, te diu-ni nãcuáa ní xãhaⁿ-gã díhna xãhaⁿ tùcu-gá.

⁴⁰ Te òré ní yãha ní cáháⁿ ndihí-gã Tãtã-gã Dútú Ndiõxí, te cuánuhú tucu-gá núú xíndecu cue téé úní xicá cùu ndihí-gã-áⁿ, te xidí-ni tucu-güedé òré ní nasáá-gã, te ducaⁿ ñí quide-güedé chí súúni ñuhu saní núú-güedé, te ñà ní ñihí-güedé tnúhu cùñaha-güedé xii-gá òré ní nasáá-gã.

⁴¹ Te ní sáháⁿ tucu-gá xito cùu úní ní cáháⁿ ndihí-gã Tãtã-gã Dútú Ndiõxí, te òré ní nasáá tucu-gá núú xíndecu-güedé, te xãhaⁿ-gã xii-güedé:

—¿Te náa xidí-ni tucu-ndo?, te vitna vá cùdú-gã-ndó chí sa ní sáà òré cuãha cuëndá ñáhá-güedé xii yúhú Téé cùu ñani tnáhá-ndó nchàa-ndo núú cuè téé ndëcu ichi cuehé ichi duha.

42 Te vitna chí ndácõo na quihíⁿ-ó chi sa véxi téé cuáha cuèndá ñáhá xii-í núú cuè téé cùu úhú iní ñáhá —càchí-gá xáhaⁿ-gá xii-güedé.

Ní tñi-güedé Jèsús ndécá ñàha-güedé xii-gá cuáháⁿ
(Mt. 26:47-56; Lc. 22:47-53; Jn. 18:2-11)

43 Te càháⁿ dúcáⁿ-ní Jèsús ní quexio té Júdás. Te núú tñáhá téé-áⁿ cúu ùxúu tñáhá cue téé xica cuu ndihí-gá. Te ndihí-dé vai cue téé ní quexio, te dava-güedé xínehe-güedé machití te dava-güedé xínehe-güedé carrutí. Te cue téé-áⁿ ní tendaha ñàha cue dútú cúnùu ndihí cue téé dàcuaha ñàha xii ñáyi u nchaa tñúhu ní chidó tñúni ndíi Moisés, ndihí cue téé cùu sacuéhé núú ñáyi u isràél.

44 Te té Júdás téé cuáha cuèndá ñáhá xii Jesús sa ní xitnùhu-dé cue téé-áⁿ nàcuáa cada-dé cuáha cuèndá ñáhá-dé xii Jesús núú-güedé. Te duha ní xáhaⁿ-dè xii-güedé:

—Cundehe-ndo tée na tèyuhu-í, te téé-áⁿ tñi-ndo-dé chi téé-áⁿ cúu-dé téé ndèé iní-ndó, te ío quihí iní-ndó càndeca-ndo-dé quihíⁿ —duha ní xáhaⁿ-dè xii-güedé.

45 Te òré ní quexio té Júdás ndihí cue téé-áⁿ núú ndécú Jèsús, te ní xáhaⁿ-dè xii-gá:

—Mèstrú —càchí-dé xáhaⁿ-dè xii-gá.

Te ní teyuhu ñàha-dé.

46 Te nchaa cue téé ndihí-dé-áⁿ ní tñi-güedé Jèsús cuèndá candeca ñàha-güedé xii-gá quihíⁿ.

47 Te ñiⁿ téé cuechi Jèsús ní tava-dé machití-dé, te ní xehndé-ni-dé ñiⁿ xio lóho ñiⁿ téé xinu cuechi núú dútú cúnùu, te ní quendéé duuⁿ lóho téé-áⁿ.

48 Te Jèsús ní xáhaⁿ-gá xii cue téé ní tñi ñàha xii-gá-áⁿ:

—Nchòhó, nèhe-ná-ndó màchití, nèhe-ná-ndó carrutí véxi ní tñi ñàha-ndo xii-í, dàtná quidé-ndó ñiⁿ ñadúhú quidé ñàha-ndo xii-í.

49 Te nchaa-ni nduu ní xiní-ndó ní xíndecu-í xití veñúhu càhnu sá ío cúnuu ní xóo danèhé-í ñáyi u, te ñá túú ní tñi ñàha-ndo xii-í. Dico dàcuatíí sã dúhá yàha-í cuèndá quee ndáá-xi nàcuáa càháⁿ-xi núú tütú Yá Ndiõxí —càchí-gá xáhaⁿ-gá xii-güedé.

50 Te nchaa cue téé xica cuu ndihí-gá ní xinu-güedé ní dándõ ñàha-güedé xii-gá.

Ñiⁿ téé cuechi ní xinu-dé

51 Te ñiⁿ téé cuechi ndèndaha-dé Jèsús cuáháⁿ, te lavichi-dé, ñiⁿ-ni dóo yádí yídúcúⁿ nuu-dé ñihí-dé, te ní tñi ñàha-güedé xii-dé,

52 dico ní ndacu-dé ní quenuñi-dé te ní dándõ-dé dóo yídúcúⁿ nuu-dé-áⁿ ní xinu-dé.

Jèsús ndécú-gá jündá
(Mt. 26:57-68; Lc. 22:54-55, 63-71; Jn. 18:12-14, 19-24)

53 Te cue téé ní tñi ñàha xii Jesús ndécá ñàha-güedé xii-gá cuáháⁿ núú tée cùu dútú cúnùu-gá. Te xíaⁿ ní tacá nchaa dava-gá cue téé cùu dútú cúnùu, ndihí cue téé cùu sacuéhé núú ñáyi u isràél, ndihí cue téé dàcuaha ñàha xii-yu nchaa tñúhu ní chidó tñúni ndíi Moisés cuèndá cada-güedé jündá.

54 Te té Pèlú xica xica-ni nchicúⁿ ñáhá-dé xii-gá cuáháⁿ ní sáá-dé ndéé quehé vehe núú ndécú tée cùu dútú cúnùu-gá-áⁿ, te xíaⁿ ní ngóo teté-dé yuhu nùhú ndihí cue téé cùu poleciá.

55 Te cue tée cùu dútú cùnùu ndìhi nchaa dava-gá cue tée xĩndecu jùndá ndúcú-güedě ñáyiú dacàa ìⁿ cuéchi díquí Jèsús cuendá ducaⁿ ñíhí-güedě nàcuáa cada-güedě cahni ñaha-güedě xii-gá, dico ñá túú ní ndàcu-güedě.

56 Te cuéi vai ñáyiú dàcaá-yu cuéchi díquí-gã dico mee-ni sã ní cahu iní méé-yu ní cáháⁿ-yu, chi tucu cãháⁿ ìⁿ tucu cãháⁿ ìⁿ-yu.

57 Te davá-yu ní ndacuñíⁿ-yu te ní ngüíta-yu dàcaá-yu ìⁿ cuéchi neñùú díquí-gã, te xãháⁿ-yu xii nchaa cue tée cùnùu:

58 —Nchúhú ní tecú dóho-ndí cãchí-dé sá dãngòyo-dé veñúhu cãhnu sá ïo cùnùu sá ní dácáá cuè tée ñuyúⁿ-a, te dandaa tucu-dé ingá veñúhu saa, ñiu-ni núú cáá tñahí veñúhu-áⁿ te xití úní-ni nduu sa nadaxĩnu-dé, te vá cúú-gã-xi veñúhu sá ní dácáá cuè tée ñuyúⁿ-a, duha cãchí-dé ní tecú dóho-ndí —cãchí-yu xãháⁿ-yu xii-güedě.

59 Dico ní dùcaⁿ ñá túú ní cùu ìⁿnuú-yu nchaa tñuhu ní cáháⁿ-yu.

60 Te tée cùu dútú cùnùu-gá ní ndacuñíⁿ-dé tnuú nchaa ñáyiú, te xãháⁿ-dë xii Jèsús:

—¿Ná cuendá duha ndùu tñuhu cãháⁿ ñáyiú-a cuendá-n? Te cáháⁿ núu nása ndùu tñuhu cáháⁿ-n —cãchí-dé xãháⁿ-dë xii-gá.

61 Dico Jèsús ñá túú tñahí ní cãháⁿ-gá. Te tée cùu dútú cùnùu-gá-áⁿ ní xãháⁿ tucu-dé xii-gá:

—Cuini-í cachí tñuhu-n xii-ndí núu sá díú Cristú Déhe Yá Ndióxi Yaá ní tendaha-gã véxi ñuyúⁿ-a cùn-n. Te ñiu Yá Ndióxi cúú-gã Yaá quidé cãhnu-ndí —cãchí-dé xãháⁿ-dë xii-gá.

62 Te Jèsús ní xãháⁿ-gã xii-dé:

—Ñiu Yaá-áⁿ cùu-í, te na cãchí tñuhu-í xii-ndo sã sáá nduu te quini-ndó yũhú Tée cùu ñani tñahá-ndó nchaa-ndo cunucóo-í xio cùha Dútú Ndióxi Yaá ndácú quide nchaandi tñúhú sá vãha. Te davá-áⁿ quini ñahá-ndó xii-í quee-í andiú quixi-í ichi xití vícó —cãchí-gã xãháⁿ-gã xii-dé.

63 Te dútú cùnùu-gá-áⁿ ní ndátá-dé dóó caní ñihnu-dé cuendá sá ñà túú ní tñahá iní-dé nàcuáa ní cáháⁿ Jèsús, te ní xãháⁿ-dë xii nchaa cue tée xĩndecu jùndá:

—Ñá túú-gã xiní ñuhu-xi cue tée cáháⁿ núu ndáá sá ndècuéchi-dé àdi ñá túú ndècuéchi-dé.

64 Chi sa ní xĩndédoho-o nàcuáa ndùu tñuhu ní cáháⁿ-dé ní cáháⁿ úhú-dé cuendá Yá Ndióxi, te nchaa-ndo chí cãháⁿ vitna núu nása sãni iní-ndó cùnduu cuendá tée-a —cãchí-dé xãháⁿ-dë xii-í-güedě.

Te nchaa-güedé ní cachí-güedé sá ná cùú-dé.

65 Te dava-güedé ní ngüíta-güedé ní tiú díí ñáhá-güedě xii-gá, te ní dádãhu-güedé núú-gã, te ní ngüíta-güedé cãñha-güedě xii-gá, te xãháⁿ-güedě:

—¿Cáháⁿ ná cótó ná cúú tée ní caníha xii-n! —cachí-güedé xãháⁿ-güedé xii-gá.

Te cue tée cùu poleciá ní caní-güedé núú-gã.

Té Pèlú cãháⁿ-dé núú ñáyiú sá ñà túú xiní-dé Jèsús

(Mt. 26:69-75; Lc. 22:56-62; Jn. 18:15-18, 25-27)

66 Te ndéé xití vehe càa núú ññu quide-güedě jùndá, chi vehe yòdo tñaha cuu-xi, te té Pèlú núcõ-dé quehé vehe-áⁿ. Te ìⁿ xíchí xínú cuéchi núú dútú cùnùu-áⁿ ní quexio-xi núú núcõó té Pèlú.

67 Te òré ní xiní ñáhá-xi xii-dé núcõó teté-dé yuhu nùhú, te ní xĩndéhé ñaha vãha-xi xii-dé, te xãháⁿ-xi:

—Yòhó tñahá-n cùu-n téé xìca cuu ndihi Jèsús téé ñuú Nazàrét —càchí-xi xǎhaⁿ-xi xii-dé.

⁶⁸ Te té Pèlú ní xáhaⁿ-dě xii-xi:

—Yúhú ñá túú xini-í téé-áⁿ, te ní ñà túú cùtnuni iní-í nása ndùu tñuhu càháⁿ-n —càchí-dé xǎhaⁿ-dě xii-xi.

Te té Pèlú ní xica-dé cuáháⁿ-dé ndàa nacuaá nchii yuyèhe vehe-áⁿ, te ní cana ìⁿ líhi.

⁶⁹ Te xíchí xínú cuèchi-áⁿ ní xini ñáhá tucu-xi xii-dé, te xǎhaⁿ-xi xii nchaa ñáyiú xĩndecu-áⁿ:

—Diu téé-áⁿ tñahá-dé xíca cùu-dé ndihi téé ndèca-güedé cuánguñhu-a —càchí-xi xǎhaⁿ-xi xii-yu.

⁷⁰ Dico té Pèlú ñá túú ní nũnuu tucu-dé sá xíca cùu-dé ndihi Jèsús. Te tna tnaa-ni ní cuu sá dúcáⁿ ní xáhaⁿ xíchí-áⁿ xii-dé, te ní xáhaⁿ tucu dava cue ñáyiú xĩndecu-áⁿ xii-dé:

—Ndáá sá tñahá-n cùu-n téé xìca cuu ndihi téé ndèca-güedé cuánguñhu-áⁿ chi cùu-n téé distritú Galileá, te càháⁿ-n dàtná càháⁿ-güedé —càchí-yu xǎháⁿ-yu xii-dé.

⁷¹ Te té Pèlú ní xáhaⁿ-dě xii-yu:

—Nchàcuiti Yá Ndiöxí sá yũhú càháⁿ ndáá-í sá ñà túú xini-í téé càcunehe-ndo-áⁿ —càchí-dé xǎhaⁿ-dě xii-yu.

⁷² Te òré-ni-áⁿ ní cana tucu líhi xito cùu uú, te òré-áⁿ ní ndacu iní té Pèlú nàcuáa ní xáhaⁿ Jèsús xii-dé sá cùmání-gǎ cana ìⁿ líhi úú xito te úní xito càháⁿ-dé núú ñáyiú sá ñà túú xini ñáhá-dě xii-gǎ. Te òré ducaⁿ ní ndacu iní-dé nàcuáa ní xáhaⁿ Jèsús xii-dé, te ní ndáhyú-dé ní ndixi cuèchi iní-dé.

15

Jèsús ndécú-gǎ núú tẽ Pilatú

(Mt. 27:1-2, 11-14; Lc. 23:1-5; Jn. 18:28-38)

¹ Te sátá ní tũndaá te cue téé cùu dútú cùnùu, ndihi cue téé cùu sacuéhé núú ñáyiú isràél, ndihi cue téé dàcuaha ñaha xii ñáyiú nchaa tñuhu ní chídó tñuní ndii Moisés, ndihi nchaa dava-gǎ cue téé cùnùu ní xĩndecu jundá ní natacá-güedé, te ní dácútú-güedé Jèsús te ndèca ñaha-güedé xii-gǎ cuáháⁿ núú tẽ Pilatú.

² Te té Pilatú ní xícaⁿ tñuhú-dě núú Jèsús, te xǎhaⁿ-dě xii-gǎ:

—¿Ndáá sá díú-n cùu-n téé yĩndaha ñaha xii ñáyiú isràél-áⁿ? —càchí-dé xǎhaⁿ-dě xii-gǎ.

Te Jèsús ní xáhaⁿ-gǎ xii-dé:

—Diu-í yĩndàha-í-yu —càchí-gǎ xǎhaⁿ-gǎ xii-dé.

³ Te cue téé cùu dútú cùnùu dacao-güedé vǎi cuèchi díquí-gǎ.

⁴ Te té Pilatú ní xícaⁿ tñuhú tucu-dé núú-gǎ, te xǎhaⁿ-dě xii-gǎ:

—Cáháⁿ, ná cuèndá ñá càháⁿ-n te cundehe nǎ ndéé duha titní cuéchi dàcaa díquí ñáhá cuè téé-a xii-n —càchí-dé xǎhaⁿ-dě xii-gǎ.

⁵ Dico Jèsús ñá túú tñahí ni càháⁿ-gǎ te té Pilatú ío ní cuñũhu-dé sá dúcáⁿ ñà túú tñahí ni càháⁿ-gǎ.

Cue ñáyiú xǎháⁿ-yu xii tẽ Pilatú sá cáhni-dě Jèsús

(Mt. 27:15-31; Lc. 23:13-25; Jn. 18:38-19:16)

⁶ Te ndi tñahá nduu víco pascuá dácacu té Pilatú ìⁿ téé yìhi vecaá chi ducaⁿ tñahí quide-dé, te mee ñáyiú càháⁿ-yu te núu ndédacàa téé yìhi vecaá-áⁿ càcu-dé, te téé-áⁿ dácacu-dé.

7 Te yìhi ìn tée nàni Barrabás vecaá ndihi dava-gá cue tée cùndihi-dé. Te té Barrabás-á nǐ sanu ichi-dé ñáyiu ñúú ingá ichi, te ní ngúíta-yu ndihi-dé ní cuu úhú iní-yu cue tée cùchiu, te ní sahní-dé ndíyí núu xǎá nǐ chíhi ñaha-güedé vecaá xii-dé.

8 Te nchaa ñáyiu ní sáhá-yu núú tē Pilatú, te càháⁿ ndàhú-yu núú-dě sá ná cáda ñahi-ni-dé dàtná quidé-dě.

9 Te té Pilatú ní xáhaⁿ-dě xii-yu:

—¿Cuíní-ndó sǎ dácácu-í tée yìndaha ñaha xii ñáyiu isràèl-á? —càchí-dé xáhaⁿ-dě xii-yu.

10 Te ducaⁿ nǐ cáháⁿ té Pilatú, chí ní cutnùnǐ iní-dé sá dìcò sá cuèdú ínǐ cuè dútú cúnúu núu xǎá ducaⁿ nǐ quíde-güedé ní sáha cuèndá ñáhá-güedé xii Jesús núú-dě.

11 Te cue dútú cúnúu ní xáhaⁿ-güedé xii nchaa ñáyiu sá ná cǔñahá-yu xii té Pilatú dácácu-dé té Barrabás, te ní quíde-yu nàcuáa ní xáhaⁿ-güedé.

12 Te té Pilatú ní xícáⁿ tnúhú-dě núú-yu, te xáhaⁿ-dě xii-yu:

—¿Ná cuíní-ndó càda-í tée càchí-ndó yìndaha ñaha xii ñáyiu isràèl-i? —càchí-dé xáhaⁿ-dě xii-yu.

13 Te nchaá-yu níhi ní cáháⁿ-yu, te xáháⁿ-yu xii-dé:

—¿Cata caa-dé núú cùrúxí! —càchí-yu xáháⁿ-yu xii-dé.

14 Te té Pilatú ní xáhaⁿ-dě xii-yu:

—¿Te ná cúú cuèchi ní quíde-dé te núu ducaⁿ cuíní-ndó càda-í-dé-i? —càchí-dé xáhaⁿ-dě xii-yu.

Dico nchaá-yu uuⁿ-gá níhi ní cáháⁿ-yu, te xáháⁿ-yu xii-dé:

—¿Cata caa-dé núú cùrúxí! —càchí-yu xáháⁿ-yu xii-dé.

15 Te té Pilatú ní quíde-dé nàcuáa ní xáháⁿ-yu xii-dé cuèndá sá cúdiu-dé núú-yu, te ní dácácu-dé té Barrabás, te ní táuchíuⁿ-dě ní caní-güedé Jesús ndihi ñí. Te sátá dúcáⁿ nǐ quíde ñaha-güedé xii-gá, te ní táuchíuⁿ-dě candeca ñaha-güedé quíhíⁿ cata caa ñaha-güedé xii-gá núú cùrúxí.

16 Te cue tée cùu sandadú ndécá ñaha-güedé xii-gá cuáháⁿ vechíuⁿ, te diu-ni xǎá cúú vèhe tée cùu gobiernú. Te xǎá nǐ tacá nchaa dava-gá cue tée cùu sandadú.

17 Te xǎá nǐ dácúlnú ñaha-güedé xii-gá ìn dóo tǔcuèhé víhí, te ní cadúha-güedé ìn coróná iñu ní chíhi-güedé díquí-gá.

18 Te ní ngúíta-güedé níhi càháⁿ-güedé cúdíquí ndeé ñáhá-güedé xii-gá, te xáhaⁿ-güedé:

—Ífo càhnu cuu yohó tée yìndaha ñaha xii ñáyiu isràèl! —càchí-güedé xáhaⁿ-güedé xii-gá.

19 Te caní-güedé díquí-gá ndihi ìn carrütí, te tíú díí ñáhá-güedé xii-gá, te ngúíñǐ xítí-güedé núú-gá quíde-güedé sá néhé-güedé sá yíñùhu núú-gá dico ñá ndáá chí dìcò cúdíquí ndeé ñáhá-güedé xii-gá.

20 Te sátá dúcáⁿ nǐ cudíquí ndeé ñáhá-güedé xii-gá, te ní nataunuu ñaha-güedé xii-gá dóo tǔcuèhé víhí sǎ ní dácúlnú ñaha-güedé, te ní dándíunuu ñaha-güedé xii-gá dóo meé-gá. Te dàtnùnǐ ndécá ñaha-güedé cuáháⁿ núú catá càa ñaha-güedé xii-gá núú cùrúxí.

*Sàta caa-güedé Jesús núú cùrúxí
(Mt. 27:32-44; Lc. 23:26-43; Jn. 19:17-27)*

21 Te ichi cuáháⁿ-güedé ndihi Jèsús ní naníhí-güedé ìⁿ tée ñuú Cìrené nání-dě Xímú, te déhe-dé cúú ìⁿ tée nàni Lijandrí, ndihi ingá tée nàni Rúfú. Te té Xímú-áⁿ ñúhú-dě ichi duha cuándixi-dé ní sáháⁿ-dé yucu, te ní quide yica-güedé ní xido-dé cùrúxí sá nchídó Jèsús.

22 Te ndèca-güedé Jèsús cuáháⁿ ìⁿ xichi núú nání Gōlgotá, te tnúhu-áⁿ quée-xí: Ìⁿ xichi núú nání yìquí díquí ndíyí, duha quèe-xi tnúhu-áⁿ.

23 Te ní sáñaha-güedé xii-gá ndudí sá ní quée yúcu nání mìrrá coho-gá ní cùu dico ñá túú ní xihí-gá.

24 Te ní sata caa ñaha-güedé xii-gá núú cùrúxí. Te sátá dúcáⁿ te cue tée cùu sandadú-áⁿ ñí xito ndeé-güedé ñúu ndèdacàa-güedé cuu cuendá-güedé dóó-gá.

25 Te cùu-xi caá ìⁿ dátneé òré ní sata caa ñaha-güedé xii-gá núú cùrúxí.

26 Te ní taxi ndecu-güedé ìⁿ sá ndeé lètrá núú tácaà-gá. Te lètrá-áⁿ càháⁿ-xi ná cuendá ducaⁿ ñí quide ñaha-güedé xii-gá. Te duha càháⁿ lètrá-áⁿ: “Tée yìndaha ñaha xii ñáyiú isràél”, duha càchí-xi.

27 Te tnàhá úú cue tée cùu ñadúhú ñí sata caa-güedé ñu-ni núú cùrúxí tucu. Te ìⁿ-dé ní sata caa-güedé xio cùha-gá, te ingá-dé ní sata caa-güedé xio dátni-gá.

28 Te ducaⁿ ñí cuu chi ní quee ndáá-xi nàcuáa càháⁿ-xi núú tütú Yá Ndiòxí núú càchí-xi: “Ìⁿ-ni ñí quide ñaha-güedé xii-gá ndihi cue tée ndècu cuéchi-xí”, duha càchí-xi núú tütú-gá.

29 Te nchaa ñáyiú yáha yatni núú tácaà-gá dácuicó-yu díquí-yu te xícuèhé ñáhá-yu xii-gá, te xáháⁿ-yu:

—Te ná cuendá ducaⁿ càa-n tacaa-n xíaⁿ, te càchí-n sá dàngoyo-n veñúhu càhnu sá ìo cùnuu te dandàa-n ingá veñúhu saa, te xití úní-ni nduu sa nadaxínu-n càchí-n.

30 Te vitna tanùu núú cùrúxí-áⁿ dàcácu-n mèe-n —cachí-yu xáháⁿ-yu xii-gá.

31 Te ñu-ni ducaⁿ ñí quide cue tée cùu dútú cùnùu, ndihi cue tée dàcuaha ñaha xii ñáyiú nchaa tnúhu ní chídó tnùní ndí Moisés, chi ní cudíquí ndeé ñáhá-güedé xii-gá, te ní xitnàha-güedé:

—Tée-a ní ndacu-dé ní dàcácu nihnu-dé ñáyiú, ¿te ná cuendá ñá ndácú-dé dàcácu nihnu-dé mée-dé-i?

32 Te núu ndáá sá díú-dé cúú-dé Crístú Yaá ní tendaha Yá Ndiòxí véxi ñuyíú-a quíndaha ñaha xii ñáyiú isràél, te na cùndehe-o nuu-dé núú cùrúxí, cuendá quíndáá iní-ó-dé —càchí-güedé xitnàha-güedé.

Te ndeé tnàhá cue tée tàcaà xio xio diñi-gá xícuèhé ñáhá-güedé xii-gá.

Ní xihí Jèsús

(Mt. 27:45-56; Lc. 23:44-49; Jn. 19:28-30)

33 Te òré ní cuu cuádava nduu, te ní cunee ñihí ñuyíú, te ducaⁿ-ni càa ní cuu ndeé caá úní sacuaa.

34 Te ñu-ni òré caá úní sacuaa-áⁿ ñhi ní càháⁿ Jèsús, te xáháⁿ-gá xii Tátá-gá Dútú Ndiòxí:

—Elòí, Elòí, láma sabàctaní —càchí-gá xáháⁿ-gá.

Te tnúhu-áⁿ quée-xí: Ndiòxí mée-í, Ndiòxí mée-í, ná cuendá ní dáñá ñaha-n xii-í, duha quèe-xi tnúhu-áⁿ.

35 Te dava cue tée xíndecu yatni núú tácaà-gá-áⁿ ñí tecú dóho-güedé nàcuáa ní càháⁿ-gá, te ní xitnàha-güedé:

—Chí cùndèdóho chi càna-dé té Èliás —càchí-güedé xitnàha-güedé.

36 Te ñⁿ cue tée xĩndecu-áⁿ xínú-dě ní sáháⁿ ní chindóyo-dé luha cáchí xítí ndudí íá, te ní chinenu-dé díquí ñⁿ yutnu càni te ní ndocani-dé chíhí-dě yuhu-gá cuendá coho-gá. Te ní xáhaⁿ cuè tée xĩndecu-áⁿ xii tée-áⁿ:

—Cundetú tnaa na cùndehe-o nacoto núu quixi té Èliás nunehe ñaha-dě xii-dé núu cùrúxí —cáchí-güedé xáhaⁿ-güedě xii-dé.

37 Te Jèsús níhi ní canasaa-gá te ní xíhí-ni-gá.

38 Te sáta dúcáⁿ te ní ndátá dõó cúu còrtiná xití veñúhu càhnu sá ïo cùnunu ní quée dava ndáá, te ndàa núu ññu ní ngüita-xi ní ndátá.

39 Te tée cùu capitáⁿ nùtnĩ-dé ndàa núu Jèsús, te ndèhe-dé nàcuáa ní quide-gá òrè ní xíhí-gá, te ní cachí-dé:

—Sá ndàa ndisa sá díú tée-a cùu-dé Déhe Yá Ndiõxí ní cùu —duha ní cachí-dé.

40 Te xica xĩnutnĩ ñⁿ úú ñáyiu díhí ndéhě-yu nchaa nàcuáa ní quide ñaha-güedé xii Jèsús, te tñahá tá Màriá Magdalèná, ndihí tá Salómé, ndihí tá Màriá náná tē Chèé ndihí té Jàcobó tée cáchí-güedé cúu lihli-gá.

41 Te cue ñáyiu díhí-áⁿ nĩ xica cuú-yu ndihí Jèsús distritú Galileá ní xinu cuèchí-yu núu-gá. Te cue ñáyiu díhí-áⁿ nchícúⁿ ñáhã-yu xii-gá ní quexiõ ndéé ñúú Jerusálén ndihí dava-gá ñáyiu díhí nchícúⁿ ñáhã xì-gá cuáháⁿ.

Chindúxi-güedé Jèsús

(Mt. 27:57-61; Lc. 23:50-56; Jn. 19:38-42)

42 Te cùu-xi nduu vispré nduu ndètatú ñáyiu. Te nduu-ãⁿ xĩquide túha-yu sá cúu ñngá nduu nduu ndètatú-yu-áⁿ, te díu-ni nduu-ã sa ní cuaa víhi,

43 te ñⁿ tée nani Cheé tée ñúú Arimãtea ní cuyĩ-dé ní sáháⁿ-dé núu tē Pilatú, te ní xáhaⁿ-dē sá núu vá cùndèe iní-dé dañá-dé chindúxi-dé yiqui cùñú Jèsús. Te tñahá tē Chèé-áⁿ cúu-dé ñⁿ tée cùnunu cundihi-dé cue tée quide jundá, te tñahá-dé ndétú-dě sáá nduu ndíhu ndaha ñaha Yá Ndiõxí xii-dé ndihí cue ñáyiu.

44 Te té Pilatú ío ní cuñúhu-dé sá dúcáⁿ ïo ndĩhi ní xíhí Jèsús, te ní cana-dé tée cùu capitáⁿ ní xicáⁿ tnúhú-dé núu-dé núu ndisa sá sà ní xíhí-gá.

45 Te tée cùu capitáⁿ-áⁿ nĩ xáhaⁿ-dē xii té Pilatú sá ndáá ní xíhí Jèsús, núu xíáⁿ té Pilatú-áⁿ nĩ sáha-dé tnúhu chindúxi té Chèé-áⁿ yiqui cùñú-gá.

46 Te té Chèé-áⁿ nĩ saaⁿ-dē ñⁿ dóó vãha, te ní sáháⁿ-dē ní nunehe-dé yiqui cùñú Jèsús núu cùrúxí, te ní chidúcúⁿnuu-dé yiqui cùñú-gá dóó vãha sá nĩ saaⁿ-dē-áⁿ, te dãtnùní nehé-dé yiqui cùñú-gá cuáháⁿ ní chihi-dé ñⁿ yaú nchii yiqui naha càva, te ní sadí-dé yuhu yaú-áⁿ ndihí ñⁿ yúú quèhéⁿ.

47 Te tá Màriá Magdalèná, ndihí tá Màriá náná tē Chèé ní xini-yu núu ní chihi-dé yiqui cùñú Jèsús.

16

Ní ndoto Jèsús

(Mt. 28:1-10; Lc. 24:1-12; Jn. 20:1-10)

1 Te sáta nĩ cundiquíⁿ nduu ndètatú ñáyiu, te tá Màriá Magdalèná, ndihí tá Salómé, ndihí tá Màriá náná tē Jàcobó ní saáⁿ-yu acití sáháⁿ tnámí cuendá canehé-yu quíhíⁿ chíhí-yu yiqui cùñú Jèsús.

2 Te ndumĩngú nehé-ni òrè vitna váha váha ní xínu coto núu nchĩcanchii ní quexiõ-yu núu nchii yaú yíhí yiqui cùñú Jèsús.

3 Te ní xitñahá-yu:

—Yoo cúñaha-o xòcani yúú ndèdí yuhu yaù-a, chi vá yõ tnàhí ndècu iha — cachí-yu xĩtnàhá-yu.

⁴ Te òré ní xíndéhé vâha-yu te ní xiní-yu sá yúú cáhnú ndèdí yuhu yaù-áⁿ ìⁿ xio-ná ndécú.

⁵ Te cuánguñhú-yu xítí yaù-áⁿ, te ní xiní-yu nùcòo ìⁿ espíritú xínú cuèchi núú Yã Ndiòxí ndàa xio cuhá-yu, te càa-xi datná cáá ìⁿ tée cuechi, te ñihnu-xi ìⁿ dóo cuixíⁿ dóo cání, te ní yùhú-yu òré ní xiní-yu espíritú-áⁿ.

⁶ Te espíritú-áⁿ ñí xáhaⁿ-xi xii-yu:

—Vá yùhú-ndó, chí yùhú sa cùtnuní iní-í sá nchòhò véxi-ndo nànducu-ndo yiqui cuñú Jèsús tée ñuu Nazàrét tée ní sahani-güedé núú cùrúxí, dico ñá túú-gã yiqui cuñú-dé ndécú iha chí sa ní ndoto-dé, te chí cùndèhe núú ñí sacáⁿ-güedé yiqui cuñú-dé te quiní-ndó ñá túú-gã-dé.

⁷ Te chí cuáháⁿ núú ndécú tẽ Pèlú ndihi dava-gá cue tée ní xica cuu ndihi-dé, te duha cúñaha-ndo xii-güedé: “Jèsús codonù-gá núú-ndó quíhíⁿ distritú Galiléa, te yàcáⁿ quiní-ndó-gã datná ní cachí-gá xii-ndo”, duha cúñaha-ndo xii-güedé —càhí espíritú-áⁿ xáhaⁿ-xi xii-yu.

⁸ Te cue ñáyiú dìhí-áⁿ Ìo ní yùhú-yu, te ní queue cunú-yu cuánuhú-yu, te quidí ñaha-ná-xi xii-yu sá Ìo ní yùhú-yu, te ñá túú tnàhí ná tnúhu ní xáháⁿ-yu xii cue ñáyiú ní naníhí-yu ichi cuendá sá Ìo ní yùhú-yu.

Tá Màriá Magdaléná ní xiní-xi Jèsús (Jn. 20:11-18)

⁹ Te sáta dúcáⁿ ñí ndoto Jèsús ndumìngú nehé-ni-áⁿ, te díhna nuu-gã tá Màriá Magdaléná ní quee túu-gá núú-xi, te diu tá Màriá-áⁿ cúú-xí xíchí ñí xíhi ñaha úsá espíritú cùndihi yucu ñávâha ni cuu, te Jèsús ní queñuhu-gá nchaa espíritú-áⁿ yiqui cuñú-xi.

¹⁰ Te xíchí-áⁿ ñí sáháⁿ-xi ní xĩtnúhu-xi cue tée ní xica cuu ndihi Jèsús nàcuáa ní cuu, te xíndáhi-güedé sá ndíhú iní-güedé òré ní quexio-xi núú ndécú-güedé.

¹¹ Te òré ní xáhaⁿ tá Màriá xii-güedé sá ñí ndoto Jèsús ndihi sá ñí xiní ñáhá-xí xii-gá, te ñá túú ní sàndáá iní-güedé.

Jèsús ní quee túu-gá núú úú cue tée ní xica cuu ndihi-gá (Lc. 24:13-35)

¹² Te úú tnàhá cue tée ní xica cuu ndihi Jèsús ñúhú-güedé ichi cuáháⁿ-güedé yucu, te uuⁿ ní ní quee túu-gá núú-güedé, te ní dácótó ñaha-xi xii-güedé sá ñá túú-gã cáá-gã datná cáá-gã.

¹³ Te cue tée úú-áⁿ ñí xica-güedé cuáháⁿ-güedé ní xĩtnúhu-güedé nchaa dava-gá cue tée ní xica cuu ndihi-gá sá ñí xiní ñáhá-güedé xii-gá, dico diu-ni ducaⁿ ñá túú ní sàndáá iní cue tée-áⁿ tnúhu ní cáháⁿ-güedé.

Jèsús xáhaⁿ-gã xii cue tée ní xica cuu ndihi-gá nàcuáa ndíu chiuⁿ cada-güedé (Mt. 28:16-20; Lc. 24:36-49; Jn. 20:19-23)

¹⁴ Te ndi ùxí ìⁿ cue tée ní xica cuu ndihi Jèsús yíhí-güedé mèsá xéxí-güedé, te ní quee túu-gá núú-güedé te ní tenàá ñáhá-gã xii-güedé cuendá sá Ìo sáá iní-güedé ñá túú sàndáá iní ñáhá vâha-güedé xii-gá, chí ñá túú ní cuñí-güedé quíndáá iní-güedé nàcuáa ní xáhaⁿ ñáyiú ní xiní ñáhá xii-gá sáta ñí yáha ní ndoto-gá.

¹⁵ Te ní xáhaⁿ-gã xii-güedé:

—Quihíⁿ-ndó ñihí ñuyú cǎháⁿ-ndó nǔú nchà ñáyiú tnúhu váha tnúhu sá cǎháⁿ nàcuáa naníhí tǎhú-yu.

¹⁶ Te nchaa ñáyiú na quíndáá iní tnúhu-áⁿ te cuanduté-yu, te naníhí tǎhú-yu, dico nchaa ñáyiú vá quíndáá iní tnúhu-áⁿ te cuíta nihnú-yu.

¹⁷ Te nchaa ñáyiú na quíndáá iní ñáhá xii-í te cadá-yu sá vǎ yǒo tnàhí ndàcu cada, te cacunehe ñàhá-yu xii-í, te queñuhú-yu nchaa espíritú cúndihí yucu ñávǎha yǐhi ñaha xii ñáyiú. Te uuⁿi ndacú-yu cǎháⁿ-yu ingá núú tnúhu sá vǎtá dácuàha-gá-yu.

¹⁸ Te cuèi na tnǐⁿ-yu cóo dǎéⁿ dico ñá túú nǎ cada ñaha-di xii-yu, te cuèi venènú ná cǎxǐ-yu dico ñá túú nǎ tnahá-yu, te tendàhá-yu cue ñáyiú cùhú te ndúha-yu —cǎchí-gá xǎhaⁿ-gǎ xii-güedé.

Jèsús cuánda-gá andiu
(Lc. 24:50-53)

¹⁹ Te sǎtá ñǐ yáha ducaⁿ ñǐ xáhaⁿ Jèsús xii cue téé ní xica cuu ndihí-gá, te ní ndanchita-gá cuánda-gá andiu te ní ngóo-gá xio cùha Dútú Ndióxi.

²⁰ Te cue téé-áⁿ ñǐ xica-güedé cuáháⁿ-güedé, te ní ngüíta-güedé cǎháⁿ-güedé tnúhu Xítóhó Jesucristú nchaa xichi. Te mee-gǎ ní chindee ñàha-gá xii-güedé ní quide-güedé nchaa sá vǎ yǒo tnàhí ndàcu cada cuendá cutnùní iní ñáyiú sá ndáá cǎháⁿ-güedé tnúhu-gá. Duha ní cuu dàvá-áⁿ.

TNÚHU NÍ CHÍDÓ TNUNÍ TÈ LÙCÁ

Nàcuáa ní ngódó tnùnì tnúhu Yá Ndiöxí

¹ Te vâi ñáyiú chîdo tnuní-yu nchaa nàcuáa ndúu tnúhu ñihí-yu nàcuáa ní cuu, te nchoo tnàhá-ó sà naha-o nacuáa ní cuu.

² Te ñiú-ní nchaa tnúhu chîdo tnuní-yu-án cúú-xí tnúhu ní cáháⁿ nchaa cue téé ní xíní ndáá nàcuáa ní cuu ndéé díhna, cue téé ní cáháⁿ tnúhu Yá Ndiöxí.

³ Te yúhú sa ní cuu nduu quide cuendá-í nchaa nàcuáa ní cuu, núu xiáⁿ ní sani iní-í tee váha-í nchaa tnúhu-a núu tütú sá cúú-xí yòhó té Tëofilú chí ío váha cùu iní-í sá cúú-xí-n,

⁴ te tée-í cuendá cutnùnì iní-n sã sã ndáá cúú-xí nchaa sá ní dánèhè ñáhá-güedé xii-n.

Íⁿ espíritú xínú cuèchi núú Yá Ndiöxí càchí-xi sá cácuú ñⁿ téé cunani Juàá

⁵ Te cúnàhá ní xíndaha té Hèrodés ñáyiú distrítú Júdeá dàvá-án ní xíndecu ñⁿ dútú ní xínani-dě Zacàriá, te ní cundihi-dé cue dútú Àbiás. Te ñadihí-dé ní xínani-aⁿ Elisabét, te ñaha-án ní cuu-aⁿ ñani tnáhá ndií Àrón.

⁶ Te ndi ndúu-yu ío ní quide ndáá-yu núú Dütú Ndiöxí, chí ní tníⁿ-yu nchaa tnúhu ní cáháⁿ-gá.

⁷ Te ñá túú ñi ñⁿ dèhe-yu, chí ducaⁿ táhú tã Elisabét sá vã cóó dèhe-aⁿ, te ducaⁿ ndi ndúu-yu ío ní sahnú-yu.

⁸ Te ñⁿ nduu xínu cuèchi tucu té Zacàriá ndihí nchaa cue téé cundihi-dé núú Yá Ndiöxí xití veñúhu.

⁹ Te dàvá-án ní xito ndeé-güedé cuendá cutnùnì iní-güedé núu ndédacàa-güedé quíhu núu nàá xití veñúhu-án cahmi-güedé sá sàháⁿ tnámí, te ní cutnùnì sá tẽ Zacàriá quíhu-dé. Te ducaⁿ ní quide-güedé, chí ducaⁿ tnàhí ní xóo cada nchaa cue dútú dàvá-án.

¹⁰ Te ñini sàhmi té Zacàriá sá sàháⁿ tnámí núu nàá, te vâi vihi ñáyiú xíndecu quehé veñúhu-án càháⁿ ndihí-yu Yá Ndiöxí.

¹¹ Te ní xíní té Zacàriá ñⁿ espíritú xínú cuèchi núú Yá Ndiöxí nútñⁿ-xi xio cùha núu nàá núu càyú sá sàháⁿ tnámí-án.

¹² Te òré ní xíní té Zacàriá espíritú-án te ñá ní cùnuni iní-dé nása cada-dé chí ío ní yùhú-dé.

¹³ Te espíritú-án ní xáhaⁿ-xi:

—Zacàriá, vá yùhú-n chí Yá Ndiöxí ní tedóho-gá tnúhu ní cáháⁿ-n, te vitna coo ñⁿ dèhe ñadihí-n tã Elisabét te danàni-n-dé Juàá.

¹⁴ Te ío cudíí iní-n, te ducaⁿ ío vâi ñáyiú cudíí iní-yu na càcu-dé.

¹⁵ Te ío cudíu-dé núú Yá Ndiöxí, te ni vã cóhó-dě ndidí te ni vã cóhó-dě ndudí sá ní natíu, te sa cundecu ndihí-dé Espíritú Yá Ndiöxí òré cacu-dé.

¹⁶ Te ñiú-dé cada te ío vâi ñáyiú isràél natuhá-yu ichi Dütú Ndiöxí Yaá cúú Ndiöxí-ó.

¹⁷ Te té Juàá-án codonuu-dé núú-gã, te cundecu ndihí-dé Espíritú-gá, te taxi tnùnì-dé dàtná ní quide té Èliás. Te nacanu ichi-dé cue téé cùu sacuéhé cuendá cada-güedé sá váha sá cúú-xí cuè téé cuèchi, te cuèi cue téé ío sàá iní-xi, te ñiú-dé cada te tníⁿ-güedé tnúhu váha, tnúhu càháⁿ ñáyiú quide ndáá. Te ducaⁿ

càda-dé cada túha-dé ñáiyu cuendá cunu cuèchí-yu núú Dǔtú Ndiǒxí —càchí-xi xǎhaⁿ-xi xii-dé.

18 Te té Zacàriá ní ndúcú tnúhu-dé núú espíritú-án, te xǎhaⁿ-dě:

—¿Te nása cutnùní ndáá iní-í tnúhu càháⁿ-n-í? Chi yúhú ío ní sahnú-í ndihí ñadhí-í —càchí-dé xǎhaⁿ-dě xii-xi.

19 Te espíritú-án nǐ xáhaⁿ-xi:

—Yúhú cùu-í espíritú nání Gàbriél, te xínu cuechi-í núú Yǎ Ndiǒxí, te mee-gǎ ní táúchíúⁿ-gǎ nǎhá-í tnúhu-gǎ véxi cuendá cutnùní iní-n nàcuáa cada ñaha-gǎ xii-ndo.

20 Te vitna cuu ñihí-n te vá càháⁿ-gǎ-n ndéé ná sǎá nduu càcu déhe ñadhí-n, chi ñá túú ní sàndáá-ni iní-n tnúhu ní cáháⁿ-í. Te dacuítí sǎá nduu càda-xi nacuáa ní cáháⁿ-í-a —càchí espíritú-án xǎhaⁿ-xi xii-dé.

21 Te nchaa ñáiyu xǐndecu quehé ndétú-yu té Zacàriá, te xǐcuñúhu-yu sǎ ío cùyaa-dé xití veñúhu.

22 Te òré ní ndee té Zacàriá, te ñá ní cùu-gǎ cáháⁿ ndihí ñaha-dě xii-yu, te òré-án nǐ cutnùní iní-yu sǎ ní xiní-dé ìⁿ espíritú xínú cuèchi núú Yǎ Ndiǒxí xití veñúhu. Te mee-nǎ ndaha-dé ní quide-dé núú-yu chi ñá ní cùu-gǎ cáháⁿ-dé.

23 Te ní xínu nduu nǐ xinu cuechi tè Zacàriá núú Yǎ Ndiǒxí xití veñúhu, te cuánuhú-dé vehe-dé.

24 Te sǎtá dúcáⁿ ní cuu te ñadhí-dé tá Elisàbét ní ngúhuⁿ déhe-aⁿ, te úhúⁿ yóó ñà túú tnàhí-gǎ ní quèe-aⁿ caca cuu-aⁿ, te ní cachí-aⁿ:

25 “Mee Dǔtú Ndiǒxí duha ní cundàhú iní ñáhá-gǎ sǎ cóó ìⁿ déhe-í cuendá sǎ vǎ cùú yǐchí iní ñáhá ñáiyu xii-í”, duha ní cachí-aⁿ.

Ìⁿ espíritú xínú cuèchi núú Yǎ Ndiǒxí càchí-xi sǎ cǎcú Jèsús

26-27 Te núú ìñú yóó sǎ ní ngúhuⁿ déhe tá Elisàbét, te ní tendaha túcu Yǎ Ndiǒxí espíritú nání Gàbriél cuáháⁿ-xi ìⁿ ñuú nání Nàzarét cuáháⁿ ngoto-xi ìⁿ xíchí cuèchí nàni Mariá. Te ñuú-án yǐndèhu-xi distritú Galiléa. Te xíchí-àn sa ní cundáá tnúhu sǎ tnǎndaha-xi ndihí ìⁿ téé nàni Chee ñani tnáhá ndii Dàvíí.

28 Te espíritú-án nǐ quíhu-xi ndéé xití vehe núú ndécú tá Màriá, te ní xáhaⁿ-xi:

—¿Cóvǎha-n-aⁿ! Dútú Ndiǒxí ío cùu iní ñáhá-gǎ xii-n te ndècu ndihí ñaha-gǎ, te ío-gǎ xitó ñaha-gǎ xii-n dàcúúxí dàva-gǎ ñáiyu ñihí —càchí espíritú-án xǎhaⁿ-xi.

29 Dico òré ní xiní tá Màriá espíritú-án, te ní quiyùhú iní-xi sǎ dúcáⁿ nǐ cáháⁿ espíritú-án. Te ní sani iní-xi: “¿Ná cuendá duha càháⁿ-tu espíritú-a-í?”, duha ní sani iní-xi.

30 Te espíritú-án nǐ xáhaⁿ-xi:

—Màriá, vá yùhú-n chi ducaⁿ nǐ nduu táhú-n nùu Yǎ Ndiǒxí.

31 Te vitna ngúhuⁿ déhe-n, te na càcu-dé te danàni-n-dé Jèsús.

32 Te ío cunuu-dě, chi Dútú Ndiǒxí Yaá ío cunuu cachí-gǎ sǎ Dèhe-gǎ cùú-dě, te ñu-gǎ cada te cuu-dé ìⁿ téé cunuu núú ñáiyu isràél dàtná ní quide-gǎ ndii Dàvíí.

33 Te taxi tnùní-dé ñáiyu isràél, te ducaⁿ-ni cunuu-dé ni caa ni quíhíⁿ —càchí-xi xǎhaⁿ-xi.

34 Te tá Màriá ní xáhaⁿ-xi xii espíritú-án:

—¿Te nása cuu tnúhu càháⁿ-n te ñá túú yì-í-í? —càchí-xi xǎhaⁿ-xi.

35 Te ní xáhaⁿ espíritú-án:

—Espiritú Yá Ndióxi quixi cundecu ndihi-n, te ducaⁿ Yá Ndióxi cada-gá ñⁿ sá vâha sá cúú-xí-n ná càcu dêhe-n. Te Yá Ndióxi càchí-gá sá ño cundecu yíñùhu-dé núú-gă, chi Dêhe-gă cúú-dê.

³⁶ Te tnâhá didí-n tâ Elisábét ñùhú dêhe-aⁿ cuêi ío ní sahnú-aⁿ, te ñu-aⁿ cachí-yu sá vâ cóo dêhe-aⁿ ní cùu, te vitna sa ní cuu ññú yóo ñùhú dêhe-aⁿ.

³⁷ Chi Yá Ndióxi ndácú-gă quidé-gă nchaá sá vâ yóo tnâhí ndàcu cada — cachí-xi xâhaⁿ-xi.

³⁸ Te tá Màriá ní xâhaⁿ-xi:

—Yùhú ná cúnú cuêchi-í núú Dütú Ndióxi, te mee-gă ná cádá ñâha-gă xii-í nàcuáa ní cachí-n —cachí-xi xâhaⁿ-xi xii espíritú-áⁿ.

Te sáta dúcáⁿ te espíritú-áⁿ ní xica-xi cuáháⁿ-xi.

Tá Màriá cuáháⁿ ngoto-xi tá Elisábét

³⁹ Te tá Màriá ío ndihi cuáháⁿ-xi ñⁿ ñuú cáá xití yucu distrítú Jùdeá.

⁴⁰ Te ní sáá-xi vehe té Zacàriá, te cuánguihu-xi ní dándácõo váha-xi tá Elisábét.

⁴¹ Te òré ní tecú dóho tá Elisábét ní cáháⁿ tá Màriá, te ní candá dêhe-aⁿ xití-aⁿ, te òré-áⁿ ní ngúndecu ndihi-aⁿ Espíritú Yá Ndióxi.

⁴² Te níhi ní cáháⁿ-aⁿ, te xâhaⁿ-aⁿ xii tá Màriá:

—Yá Ndióxi ío xito ñâha-gă xii-n dàcúúxí ðava-gă tnâha dihí-ó, te ducaⁿ-ni xito-gă cuêi dêhe-n.

⁴³ ¿Te ná cúú yùhú ññu véxi coto ñâha yòhó náná Yaá cúú Xitohó-í-i?

⁴⁴ Chi òré-ni ní tecú dóho-í ní cáháⁿ-n te ní candá-ni dêhe-í xití-í sá cùdíí ñí-dê.

⁴⁵ Te váha táhú yòhó sá ní sàndáá ñí-n, chi dacuitíí sá cádá Dütú Ndióxi nàcuáa ní cáháⁿ espíritú ní tendaha-gă ní quixi ní cachí tnùhu xii-n nàcuáa cada-gă —càchí-aⁿ xâhaⁿ-aⁿ xii tá Màriá.

⁴⁶ Te ní xâhaⁿ tá Màriá:

Ío càhnu cuu Dütú Ndióxi,

⁴⁷ Ío cùdíí ñí-í chi ñu-gă taunihnu ñâha-gă xii-í núú ùhú núú ndàhú.

⁴⁸ Chi ní ndacu ñí ñâhá-gă xii yùhú, te ñicó ñⁿ xíchí xínú cuêchi núú-gă cúú-í, te vitna te nchaandi túhú ñáyiú cachí-yu sá ño váha táhù-í.

⁴⁹ Te Yá Ndióxi cándòo caa nine ñí-gă, te ío càhnu ñⁿ sá vâha ní quide-gă sá cúú-xí-í.

⁵⁰ Te cùndahú ñí-gă nchaá ñáyiú nèhe sá yíñùhu núú-gă.

Te ducaⁿ-ni cuêi ñáyiú sa ndècu ñuyuí-a ndihi ñáyiú vitna véxi.

⁵¹ Chi ta quide-gă nchaá sá vâ yóo tnâhí ndàcu cada véxi, te ta dàndóo canúú-gă cue ñáyiú quide cahnu mee-xi.

⁵² Te cue ñáyiú tàxi tnuní ñá túú-gă dáñá-gă taxi tnùnì-yu, te cue ñáyiú ndàhú ní quide nínu ñâha-gă xii-yu.

⁵³ Te cue ñáyiú ndècu ndihi tnúndòho tnùhu ndàhú ní quide váha ñâha-gă xii-yu,

te cue ñáyiú cuica ñà túú nã ní ñíhí-gă-yu cundecu ndihí-yu.

⁵⁴ Te chindee-gă ñáyiú isrâél, ñáyiú xìnu cuechi núú-gă, te ñá túú dàña nihnu ñâha-gă xii-yu, chi cùndahú ñí ñâhá-gă.

⁵⁵ Chi ducaⁿ ní xâhaⁿ-gă xii ndíí Àbrahám, ndihi cue ñaní tnâhá ndíi.

Duha ní xâhaⁿ tá Màriá xii tá Elisábét.

⁵⁶ Te ní xíndecu tá Màriá dàtná úní yóo ndihi tá Elisábét te dàtnùnì cuánuhú-xi vehe-xi.

Ní cacu té Juàà tée dacuàndute ñaha xii ñáyi

⁵⁷ Te ní sáá nduu ní cacu ñⁿ déhe téé tá Elisábét.

⁵⁸ Te nchaa ñáyi ndécu yatni ndihi-aⁿ, ndihi nchaa ñani tnáhá-áⁿ ní níhí-yu tnúhu nàcuáa ní chindee ñaha Yá Ndióxi xii-aⁿ. Te ío ní cudíí ínì-yu cuendá-aⁿ.

⁵⁹ Te núú úná nduu sá ní cacu déhe-aⁿ, te ní sáháⁿ ñáyi núú ndécú-áⁿ cuendá cuáhà-yu seña ñiⁿ déhe-aⁿ. Te cuini-yu cunani déhe-áⁿ Zacàriá dàtná nání tátá ní cùu.

⁶⁰ Te ní xáhaⁿ náná dēhe-áⁿ:

—Ñáhá, chí Juàà cunani-dē —càchí-aⁿ xáhaⁿ-aⁿ xii-yu.

⁶¹ Te ní xáháⁿ-yu:

—¿Te ná cuendá te ñá túú ní ñⁿ ñani tnáhá-ndó dùcaⁿ nani-i? —cachí-yu xáháⁿ-yu.

⁶² Te ní quidē-yu ndàhá-yu núú tátá dēhe-áⁿ cuendá cuini-yu núú nása cuini méé-dē cunani dēhe-dé.

⁶³ Te ní xicáⁿ-dē ñⁿ tutú ní chidó tnúni-dé nàcuáa cunani dēhe-dé, te duha ní chidó tnúni-dé: “Juàà cunani-dē”, càchí-xi núú tutú ní tee-dé-áⁿ. Te nchaa ñáyi xindecu-áⁿ ní cuñúhu-yu nàcuáa ní cuu.

⁶⁴ Te òrē-áⁿ ní nacáháⁿ té Zacàriá sá ní cuu ñihí-dé ní cùu, te ní ngúita-dé ní cachí-dé sá ío càhnu cuu Yá Ndióxi.

⁶⁵ Te nchaa ñáyi xindecu yatni ndihi-dé ní cuñúhu-yu, te nchaa ñáyi xindecu níhí xití yucu distritú Jùdeá ní níhí-yu tnúhu nàcuáa ní cuu.

⁶⁶ Te nchaa ñáyi-áⁿ ío vài ní sani ínì-yu, te ní xitnàhá-yu:

—¿Ná cúú sá cádá tēe-áⁿ ndéé idá-gá ná cuèhnu-dé? —càchí-yu xitnàhá-yu.

Te ducaⁿ ní xitnàhá-yu chí Dútú Ndióxi ndécú ndihi ñaha-gá xii-dé.

Té Zacàriá càchí-dé sá ío càhnu cuu Yá Ndióxi

⁶⁷ Te té Zacàriá tátá tē líhli-áⁿ ní ngúndecu ndihi-dé Espiritú Yá Ndióxi te ní cáháⁿ-dé nchaa tnúhu sá ní dánéhé ñáhá-gá, te ní cachí-dé:

⁶⁸ Ío càhnu cuu Dútú Ndióxi nchoo ñáyi isràél, chí ní quixi coto ñaha-gá xii-o, te cùu-o ñáyi cùu cuendá-gá, chí dàcácu nihnu ñaha-gá xii-o vítna.

⁶⁹ Chí ní tendaha-gá ñⁿ tēe véxi-dé dàcácu nihnu ñaha-dē xii-o núú ùhú núú ndàhú.

Te cùu-dé ñani tnáhá ndí Dàvíí tēe ní xinu cuechi núú-gá ndéé sanaha.

⁷⁰ Te ñi-ni tnúhu ní cáháⁿ Yá Ndióxi ní cáháⁿ cue tēe ní quide ndáá ní xindecu núú-gá ñuyíú-a ndéé sanaha.

⁷¹ Te ní cachí-güedé sá táunihnu ñaha-gá xii-o núú nchaa ñáyi cùu ùhú ínì ñáhá, ndihi núú nchaa ñáyi ñá túú cùu quini ndee ñáhá.

⁷² Te ní xáhaⁿ-gá sá cündàhú ínì ñáhá-gá xii-o, te ducaⁿ cada-gá chí vá nàcuánaa-gá tnúhu ní cáháⁿ-gá ndihi-güedé.

⁷³ Te ñi ducaⁿ ndùu tnúhu ní xáhaⁿ-gá xii ndí Àbrahám sá

⁷⁴ táunihnu ñaha-gá xii-o núú nchaa ñáyi cùu ùhú ínì ñáhá, cuendá sá vā yùhú-ó cùnu cuechi-o núú-gá.

⁷⁵ Te cada ndáá-ó, te cundecu yíñúhu-o núú-gá ndí nchaa nduu cundecu-o ñuyíú-a.

Duha ní cachí té Zacàriá.

⁷⁶ Te xáhaⁿ-dē xii té líhli-áⁿ:

Te yòhó té líhli, cáháⁿ ñáyi cuendá-n sá cúú-n ñⁿ tēe cáháⁿ tnúhu Dútú Ndióxi Yáá ío cùnuu,

chi quíhíⁿ-n còdonuu-n núú Yáá cúú Xítóhó-ó dàtúha-n ñáyiú cuendá cundecu túha-yu òré quexio-gá.

77 Te cúñaha-n xì ñáyiú isràél sá cuíní-gá cada càhnu iní-gá nchaa cuèchi-yu, te naníhí tàhú-yu.

78 Te ducaⁿ càda-gá chi ío cùu iní ñáhá-gă xii-o, chi ndéé andiú ñí tendaha-gă ñí tée véxi cuuⁿ-dé dandixi túu-dé iní-ó cuendá cutnùní iní-ó nàcuáa ndùu cuendá Yá Ndiòxí.

79 Te ducaⁿ dandixi túu-dé iní nchaa ñáyiú ndècu ichi cuehé ichi duha ta xíta nihnu cuáháⁿ cuendá nucúnu ichí-yu ñí ichi váha.

Duha ní xáhaⁿ tē Zacàriá xii déhe-dé.

80 Te tē lĩhli-án tá sàhnu-dé, te ta chĩndee chitúu ñaha Yá Ndiòxí xii-dé cuáháⁿ, te ní xĩndecu-dé xití yucu ndéé ní sáá nduu ñí ngúita-dé ní cáháⁿ-dé núú cué ñáyiú isràél tnúhu Yá Ndiòxí.

2

Ní cacu Jèsús

(Mt. 1:18-25)

1 Te dàvá-án ñí táúchíúⁿ tē Aùgustú Cèsár nucódó tnùní nchaa ñáyiú nacióⁿ yĩndàha-dé.

2 Te xéhé sã dĩhnanuu ñí nucódó tnùní ñáyiú, te diu-ni dàvá-án ñí cunuu té Cireníú distritú Siríá.

3 Te nchaa ñáyiú ní natacá-yu ñúú núú ñí cacú-yu cuendá nucódó tnùní-yu.

4 Núu xíáⁿ ní quee té Chèé ñúú Nazàrét ñí ñúú yĩndèhu distritú Gallléa, te cuáháⁿ-dé ñúú Bèlén ñí ñúú yĩndèhu distritú Jùdeá, chi xíáⁿ ñí cuu ñúú ndí Dàvíí, te diu-ni ñani tnáhá tē Chèé-án ñí cuu ndí.

5 Núu xíáⁿ cuáháⁿ-dé ndéé ñúú Bèlén nucódó tnùní-dé, te tnàhá tá Màriá xíchí ñí cundáá tnúhu sá tnàndaha ndĩhi-dé cuáháⁿ ndĩhi ñaha-dé, te sa ñúhu déhe-xi.

6 Te ñini cùyaá-yu ñúú Bèlén-án ñí sáá òré cacu déhe-xi.

7 Te ní cacu déhe dĩhna-xi, te ní chidúcuⁿnuu-xi dóó, te ní sacáⁿ ñáhá-xi ñí vehe núú cúú vehe quiti, chi ñá túú ní ñĩhí-yu vehe coó-yu.

Cue espíritú xínú cuèchi núú Yá Ndiòxí ndĩhi cue toli.

8 Te yatni ñúú-án xĩndecu ñí ùú toli ndéé-güedé mbéé-güedé ndécú-güèdi majadá niú-án.

9 Te uuⁿni ní quexio ñí espíritú xínú cuèchi núú Yá Ndiòxí, te Yá Ndiòxí ní quide-gá ní dáyèhè-xi ní càndéé núú xĩndecu-güedé, te ní yùhú víhí-güedé.

10 Te ní xáhaⁿ espíritú-án:

—Vá yùhú-ndó, chi ñaha-í ñí tnúhu váha véxi sá cúú-xi-ndó, te ío cudíí iní-ndó ndĩhi nchaa ñáyiú.

11 Chì vitna ní cacu ñí tée dàcácu nihnu ñaha xii-ndo núú ùhú núú ndàhú ñúú ndí Dàvíí, te tée-án cúú-dé Xítóhó Jesucristú.

12 Te dàtná ñí sèñá te naníhí-ndó tē lĩhli-án yídúcuⁿ nuu-dé dóó cáá-dé ñí vehe quiti —càchí-xi xáhaⁿ-xi xii-güedé.

13 Te òré-án ñí quexio cuéhé víhí espíritú véxi cuuⁿ andiú ñí naníhí tnáhá-xi ndĩhi espíritú-án, te ní ngúita-xi ní chĩñuhu-xi Yá Ndiòxí, te càchí-xi:

14 ¡Ío càhnu cuu Yá Ndiòxí Yáá ndécú àndiú, te na cùndecu váha-ni nchaa ñáyiú cùu iní méé-gá! Duha càchí cue espíritú-án.

15 Te òré cuándaa cue espíritú-áⁿ andiu, te ní ngúíta cue toli-áⁿ xítñàha-güedé:
—Na quíhíⁿ-ó ñùú Bèlén quini-ó nàcuáa ní cuu, chi Dútú Ndiòxí sa ní cachí
tnúhu-gá —càchí-güedé xítñàha-güedé.

16 Te ní tñii-güedé ichi súúni ndíhi cuáháⁿ-güedé, te ní naníhí-güedé tá Màriá
ndíhi té Chèé, ndíhi té líhli-áⁿ cáá-dé xítí ìⁿ vehe quití.

17 Te òré ní xiní ñáhá-güedé te ní xáhaⁿ-güedé xíi-yu nàcuáa ní xáhaⁿ
espíritú-áⁿ xii-güedé cuendá té líhli-áⁿ.

18 Te nchaa ñáyiú ní tecú dóho-xi ní cuñúhu-yu nàcuáa ní cáháⁿ-güedé.

19 Dico tá Màriá chi ñùhu nahi-ni iní-xi, te dicó-ni sàni iní-xi cuendá nchaa
tnúhu-áⁿ.

20 Te cue toli-áⁿ ní natñii-güedé ichi, te ta xítñàha-güedé cuánuhú sá ïo càhnu
cúu Yá Ndiòxí cuendá nchaa tnúhu ní xíndedóho-güedé, ndíhi cuendá nchaa sá
ní xiní-güedé, chi cuendá sá ndàá ní cuu nchaa nàcuáa ní tecú tnúhu-güedé.

Ndècá-yu Jèsús cuáháⁿ veñúhu

21 Te núú ùná nduu sá ní cacu té líhli-áⁿ, te ní sáha-güedé seña ñii-dé, te ní
dánáni ñàha-güedé Jèsús xii-dé, diu-ni nàcuáa ní xáhaⁿ espíritú xinú cuèchi núú
Yá Ndiòxí xii tá Màriá ndéé cútñàhá vátá ngúhuⁿ-gá-dé xítí-xi.

22 Te sáta ní tñahá nduu, ndúu ìi-yu nàcuáa càháⁿ nchaa tnúhu ní chídó tnùní
ndíi Moisés, te ndècá-yu té líhli-áⁿ cuáháⁿ ñùú Jerusalén cuendá quee túu-dé
núú Dútú Ndiòxí.

23 Te ducaⁿ ní quidé-yu, chi ducaⁿ càháⁿ-xi núú tütú Yá Ndiòxí sá ncháá
làndú téé na càcu díhna quetúu-güexi núú-gá cuendá cundecu-ná-güexi
cuendá-gá.

24 Te ní quidé-yu nàcuáa càháⁿ Yá Ndiòxí núú tütú-gá núú càchí-xi:
“Canehe-ndo ùú lómá àdi úú cùcu quíhíⁿ nduu tahú ñáhá Yá Ndiòxí”, duha
càháⁿ-gá núú tütú-gá.

25 Te dàvá-áⁿ ndécú ìⁿ téé nàni Mió ñùú Jerusalén. Te ïo váha iní-dé, te
chíñuhu-dé Yá Ndiòxí, te ndètu-dé sáá nduu chindee ñaha Yá Ndiòxí xii ñáyiú
isràél. Te ndècu ndíhi té Mió-áⁿ Espíritú Yá Ndiòxí.

26 Te sa ní xáhaⁿ-xi xii-dé sá vā cùu-ni-dé, chi dacuití quini-dé Cristú Yaa
tendaha Yá Ndiòxí quixi ñuyúú-a.

27 Te téé-áⁿ ndècá ñàha Espíritú Yá Ndiòxí xii-dé cuáháⁿ veñúhu càhnu sá ïo
cùnuu. Te cuáháⁿ-yu ndíhi Jèsús veñúhu-áⁿ cuendá cadá-yu ndíhi-gá nàcuáa
càháⁿ tnúhu ní chídó tnùní ndíi Moisés.

28 Te òré ní sáá-yu, te té Mió-áⁿ ní nguídèhé-dé Jèsús, te ní cáháⁿ-dé sá ïo
càhnu cuu Yá Ndiòxí, te ní xáhaⁿ-dè xii-gá:

29 Yòhó Dútú Ndiòxí sa ní cuu dañá-n cùú-í vitna,
chi sa ní quide-n nàcuáa ní cachí-n xii yúhú téé xinú cuechi núú-n.

30 Chi sa ní xiní núú-í Yaa dàcácu nihnu ñaha xii ñáyiú núú ùhú núú ndàhú
vitna.

31 Te Yaa ní tendaha-n vèxi núú ndécú nchàa ñáyiú ñuyúú-a.

32 Te cùu-gá dàtná ìⁿ ñuhú, chi dandixi túu-gá iní ñáyiú cuendá cutnùnì iní-yu
cuendá Yá Ndiòxí cuèi ñá díú ñáyiú isràél cùú-yu.

Te diu-gá cada, te canehe ñáyiú dava-gá ñùú sá yíñùhu núú ñáyiú isràél chi diu
ñáyiú isràél cùú-yu ñáyiú cùu cuendá-n.

Duha ní xáhaⁿ té Mió xii Yá Ndiòxí.

33 Te té Chèé ndíhi náná Jèsús ní cuñúhu-yu tnúhu ní cáháⁿ té Mió cuendá-gá.

34 Te dǎtnùnì té Miò ní xícáⁿ táhú-dě núú Yǎ Ndiòxí cuèndá-yu, te xǎhaⁿ-dě xii tá Màriá nǎná Jèsús:

—Cundedóho tnúhu na càháⁿ-í-a, té lǐhli-a ní nduu táhú-dě nacanu ichi-dé dava ñáyiú isràél ichi Yá Ndiòxí, te davá-yu vá tnǐⁿ-yu tnúhu càháⁿ-dé, te ñáyiú-áⁿ cuíta nihnú-yu, te cada-dé nàcuáa cutnùnì iní ñáyiú sá Yǎ Ndiòxí ní tendaha ñàha-gá xii-dé, dico vá quèndáá iní-yu, chi daquèe tíhú ñǎhǎ-yu xii-dé.

35 Te ducaⁿ te cutnùnì nàcuáa sàni iní ñⁿ ñáyiú. Dico sá cúu-xí yòhó chi ío cada ndàhú-xi iní-n, chi sùúnì dǎtná sá ñí nícuèhé iní-n càda-xi —cachí-dé xǎhaⁿ-dě xii tá Màriá.

36 Te xiáⁿ ndécú tnàhá ñⁿ ñaha càháⁿ tnúhu Yá Ndiòxí nánì-áⁿ Àná, te tǎtá-aⁿ ní xínani-dé Fǎnuél ñanì tnàhá ndíi Àsér. Te ñaha-áⁿ sa ní sahnú vihi-aⁿ, te cuechì-ni-aⁿ ní tnándaha-aⁿ te úsá-ni cuía ní xǐndecu-aⁿ ndihì yǐi-aⁿ,

37 te ní quendóo quèe-aⁿ, te sa ñùhu-aⁿ cúmidíco cǔmí cuía-aⁿ. Te ñǎ túú ní xǒo quee-aⁿ veñùhu càhnú sá ío cùnuu, chi nduu niú ní xóo chiñuhu-aⁿ Dútú Ndiòxí, te áma ñǎ túú tnàhí ná ní xǒo caxi-aⁿ ní xóo càháⁿ ndihì-aⁿ Yá Ndiòxí.

38 Te ðiu-ni òrè ndécú-yu ndihì Jèsús ní quexio-aⁿ núú-yu, te ní ndacáⁿ táhú-áⁿ núú Yǎ Ndiòxí cuèndá sá ñí xínì-aⁿ Jèsús, te dǎtnùnì ní ngúíta-aⁿ càháⁿ váha-aⁿ cuèndá-gá núú nchàa ñáyiú, ñáyiú ndètu quini sáá nduu dàcácu Yá Ndiòxí ñáyiú Jerusalén núú tnùndóho tnúhu ndàhú.

Cuánuhú-yu ñuú Nazàrét

39 Te sátá ñí quidé-yu nchaa nàcuáa càháⁿ tnúhu Yá Ndiòxí, te cuánuhú-yu ñuú Nazàrét núú ndécú tnàhí-yu, te ñuú-áⁿ yǐndèhu-xi distritú Galiléa.

40 Te té lǐhli nàni Jesús-áⁿ tá sahnú-dé, te ta ñihí ndéé-dé cuáháⁿ, te ducaⁿ ío váha ta sàá sá xínì tnùnì-dé cuáháⁿ, chi Yá Ndiòxí ndécú ndihì ñaha-gá xii-dé.

Jèsús ndécú-gǎ veñùhu

41 Te ndi tnahá cuía ñí xóo quíhíⁿ té Chèé ndihì nǎná Jèsús vico pàscuá ñuú Jerusalén.

42 Te cútñahá ní chítú Jèsús úxúú cuía-gǎ, te cuáháⁿ-yu ndihì-gá ñuú Jerusalén vico pàscuá, chi ducaⁿ tnàhí quidé-yu.

43 Te òrè ní yáha vico, te ní natnǐⁿ-yu ichi cuánuhú-yu, te ní quendóo-gá ñuú Jerusalén, te ni nǎná-gá, te ni tǎ Chèé ñǎ túú ní xínì ní quendóo-gá.

44 Chi ní sani iní-yu sá ñùtnàhá-gá tnuú nchaa ñáyiú ní sáháⁿ vico cuánuhú. Te ní xúhuⁿ-yu ñⁿ nduu ichi ta ndùcu tnúhu-yu-gá núú nchàa ñanì tnàhǎ-yu, ndihì núú nchàa ñáyiú xínì tnàhá ndihì-yu,

45 te ñǎ túú ní nànhí ñǎhǎ-yu xii-gá. Núú ní naculócó-yu cuánuhú tucú-yu ñuú Jerusalén cuèndá yàcáⁿ nanducu ñàhǎ-yu xii-gá.

46 Te núú ùnì nduu sá ñí dana núú ñǎhǎ-yu xii-gá, te ní nànhí ñǎhǎ-yu nùcócó-gá xití veñùhu càhnú sá ío cùnuu tnuú cue tée dàcuaha ñaha xii-yu nchaa tnúhu ní chídó tnùnì ndíi Moisés, te ndèdóho ñaha-gǎ xii-güedé, te nándì sá ndúcú tnúhu-gá núú-güedé.

47 Te nchaa cue tée xǐndedóho ñaha xii-gá xǐcuñùhu-güedé sá ío váha sàá sá xínì tnùnì-gá, te ío váha ñihí-gá tnúhu nàdanchocáva-gá.

48 Te òrè ní xínì ñǎhá tǎ Chèé ndihì nǎná-gǎ xii-gá, te ío ní cuñùhu-yu, te ní xáhaⁿ nǎná-gǎ xii-gá:

—Yòhó déhe-í, ¿ná cuèndá ducaⁿ ñí quide ñaha-n xii-ndí? Te tǎtá-n ndihì yúhú ndihú iní-ndí xícá nànducu ñaha-ndí xii-n —cachí-xi xǎhaⁿ-xi xii-gá.

49 Te ní xáhaⁿ Jèsús xií-yu:

—¿Ná cuèndá nándücu ñaha-ndo? ¿Náa ñá túú xìní-ndó sã núú chíúⁿ Tãtà-í tàù-í caca cuu-i-ãⁿ? —càchí-gã xáhaⁿ-gã xií-yu.

50 Dico mèé-yu ñá túú ní tècú tnùnì-yu nàcuáa ní xáhaⁿ-gã.

51 Te sátá dúcáⁿ te cuánuhú ndihì ñahá-yu xii-gã ñuú Nazàré^t, te ío ní sándáá iní ñáhá-gã xií-yu. Te nchaa sá ní quide-gã-áⁿ ní xúhuⁿ nahi-ni ñni ñaná-gã.

52 Te Jèsús ducaⁿ-ni ta sàhnu-gã cuáháⁿ, te ta sàà-gã sá xìní tnùnì-gã cuáháⁿ, te ducaⁿ cùdù-gã núú Yã Ndiõxí, ndihì núú nchaa ñáyiú.

3

Té Juàá tée dàcuandute ñaha xii ñáyiú càháⁿ-dé tnúhu Yã Ndiõxí xití yucu (Mt. 3:1-12; Mr. 1:1-8; Jn. 1:19-28)

1 Te ní cuu sáhúⁿ cuáá sã yíndàha té Tiberiú cuéhé nàcióⁿ, te dàvã-áⁿ ní cunuu té Pilatú distritú Júdeá, te té Hèrodés ní cunuu-dé distritú Galileá, te ñani-dé té Lipé ní cunuu-dé distritú Itureá ndihì ñngá distritú nání Tràconité, te té Lisaniás ní cunuu-dé distritú Abiliniá.

2 Te té Anás ndihì té Caifás ní cuu-güedé dútú cùnùu. Te dàvã-áⁿ ní càháⁿ ndihì ñaha Yã Ndiõxí xii té Juàá déhe té Zacàriá xití yucu sá quihíⁿ-dé càháⁿ-dé tnúhu-gã núú ñáyiú.

3 Te té Juàá ní yáha-dé nchaa ñuú cáá yàtni yúte Jòrdán, te xáhaⁿ-dè xii nchaa ñáyiú:

—Chí dándixi túu iní sá ñà túú quide váha-ndo, te dañã-ndo nchaa ichi cuehé ichi duha ndècu-ndo, te cuandute-ndo, te ducaⁿ te cada càhnu iní Yã Ndiõxí nchaa yíca cuèchi-ndo —duha ní xáhaⁿ-dè xií-yu.

4 Te ducaⁿ ní quide-dé chi ní quee ndáá-xi nàcuáa ní chídó tnùnì ndí Chàiaá téé ní xóo càháⁿ tnúhu Yã Ndiõxí ndéé sanaha núú tùtú ndí núú càchí-xi: Tècú càháⁿ níhi ñⁿ téé yihì xití yucu, te xáhaⁿ-dè xii ñáyiú:

“Chí dáña nchaa ichi cuehé ichi duha ndècu-ndo, te tnii-ndo ìchi váha, te ducaⁿ càda-ndo cuendá cundecu túha-ndo, chí véxi Yáá ío cùnùu.

5 Te nchaa núú cùnù nachítú,

te nchaa tìndúú ndihì nchaa yucu ngoyo nihnu cuèndá nduu ndáá,

te nchaa ichi ñá túú cuáháⁿ ndáá nduu ndáá,
te nchaa ichi ñá túú càváha nduu váha.

6 Te nchaa ñáyiú ñuyíú-a níhí-yu tnúhu sá Yã Ndiõxí véxi-gã dàcácu nihnu ñaha-gã xií-yu núú ùhú núú ndàhú.”

Duha ní chídó tnùnì ndí Chàiaá núú tùtú ndí.

7 Te òré ní xica ñáyiú cuáháⁿ-yu cuèndá dacuandute ñaha té Juàá xií-yu, te ní xáhaⁿ-dè:

—¿Nchaa nchòhò cúú-ndó dàtná ñⁿ cóó dèéⁿ chí ío cuihna ñni-ndó! ¿Te nása ní cuu núú tnàhá nchòhò ndúcu-ndó nàcuáa cácu nihnu-ndo núú tnùndòho cahnu vihì sá tá cùyatni ñaha xii-ndo véxi-i?

8 Te chí cádá váha vitna cuèndá ducaⁿ cùtnunì sá ní dáña-ndó nchaa ichi cuehé ichi duha ndècu-ndo. Te vá càchí-ndó sã ío càhnu cuu-ndo cuendá sá cúú-ndó ñani tnàhá ndí Abrahám, chí cuèí ndéé yúú te ndacu Yã Ndiõxí ndada-gã ñáyiú te cuú-yu ñani tnàhá ndí Abrahám.

9 Te caá chí ndècu túha-xi sá quèhndé-xi nchaa yutnu sá ñà túú càváha sávidí-xi, chí nchaa yutnu-áⁿ tèhndé-xi te cuánguee-xi núú ñùhú càyú-xi. Te duha sàtnahá-xi ndoho nchaa ñáyiú ñá túú quide váha, chí nchaa ñáyiú ducaⁿ ñà túú quide váha cúú-yu dàtná nchaa yutnu sá ñà túú càváha sávidí-xi. —càchí-dé xáhaⁿ-dè xií-yu.

10 Te ní xícáⁿ tnúhu-yu núú-dě, te xǎhǎⁿ-yu:

—ζte nása cada-ndí váíⁿ? —càchí-yu xǎhǎⁿ-yu xii-dé.

11 Te xǎhaⁿ-dě:

—Te núu ndědacàa-ndo ndecu ndihi-ndo úú dóó te cuǎñaha-ndo ìⁿ xii ñáyiú ñá túú ndècu ndihi, àdi núu ndècu ndihi-ndo sá nchító-ó te cuáha-ndò-yu na cǎxí-yu —càchí-dé xǎhaⁿ-dě xii-yu.

12 Te ní quexio ìⁿ úú cue téé cuihna ìní-xi quide cobrá ñáhá xii ñáyiú cuendá impuèstú cuendá cuàndute-güedé, te ní xícáⁿ tnúhu-güedé núú tē Juáá, te xǎhaⁿ-güedé:

—Mèstrú, ζte nása cada-ndí cuendá cuu váha iní Yǎ Ndiǒxí-í? —càchí-güedé xǎhaⁿ-güedé xii-dé.

13 Te tē Juáá ní xǎhaⁿ-dě:

—Vá cuidó-ndó càda cobrá-ndó ñáyiú —càchí-dé xǎhaⁿ-dě xii-güedé.

14 Te tnàhá ìⁿ úú cue téé cùu sandadú xǐndecu-án ní xícáⁿ tnúhú-güedé núú tē Juáá, te xǎhaⁿ-güedé:

—Te nchúhú ζnása cada-ndí cuendá cuu váha iní Yǎ Ndiǒxí-í? —càchí-güedé xǎhaⁿ-güedé xii-dé.

Te ní xǎhaⁿ tē Juáá:

—Vá quéndéé-ndó sǎ néhé tnàha ñáyiú-ndo, te ni vǎ dácàa díquí-ndò-yu ìⁿ sǎ ñà túú nǎ quidē-yu, te nduu vétú iní-ndó nàcuáa ñùhu yáhu-ndo —càchí-dé xǎhaⁿ-dě xii-güedé.

15 Te nchaa ñáyiú xǐndetu sá quíxí Cristú sàni ìⁿ sani úú iní-yu núu sá díú Cristú Yáá tendaha Yǎ Ndiǒxí quixi ñuyíú-a cùu te Juáá àdi ñáhá.

16 Dico tē Juáá ní cǎháⁿ ndodo-dé núú-yu nchaa-yu, te xǎhaⁿ-dě:

—Na càchí tnúhu ndáá-í xii-ndo sǎ yǔhú véxi-í sá cuendá-ni dacuàndute ñaha-í xii-ndo dàtná ní cachí Yǎ Ndiǒxí, dico nchícúⁿ ingá téé véxi, te téé-án taxi-dé Espíritú Yǎ Ndiǒxí cundecu ndihi-ndo, te cùu-xi datná ìⁿ ñuhú, chi ndada ndoo ndada nine-xi iní-ndó. Te téé-án ìo-gá cúnùu-dé dácúúxí yǔhú, chi yǔhú cùu-í ìⁿ téé duuⁿ duuⁿ ñá túú tàú-í nandaxi-í cuèdicó ñⁿ chǎu-dé dico quide-í chùⁿ-dé.

17 Te téé-án sa véxi túha-dé sá cǎdá ìⁿ ñaha-dé xii-o dàtná quidé ñáyiú ndàda ndoo triú, chi ñáyiú-án sa nèhe túha-ná-yu yaxíⁿ-yu òré nǎñani cuendá ndada ndoo-yu, te òré ndáda ndòo-yu triú-án te dàquee ìⁿ-yu mihi-xi, te tàxúha-yu mee-nǎ triú-án, te mihi-xi-án sǎhmí-yu. Te dàtná quidē-yu mihi triú-án ducaⁿ sǎtnahá-xi cada ñaha téé-án xii nchaa ñáyiú ñá túú quide váha, chi daquihíⁿ ñáhá-dé xii-yu núú ñùhú núú càyú, te ñuhú-án ñà túú tnàhí ndàhvǎ —càchí-dé xǎhaⁿ-dě xii-yu.

18 Te titní víhí-gǎ tnúhu váha ní xǎhaⁿ tē Juáá xii-yu òré ní dásàhú ñáhá-dé.

19 Te ní cǎháⁿ-dé dóho tē Hèrodés cuendá sá ndéca-dé ìⁿ ñaha nàni Herodiás ñaha ní cǎndeca ñani-dé tē Lìpé, te ní xǎhaⁿ-dě cuendá nchaa dava-gǎ sá cuèhé sá dúhǎ quide-dé.

20 Dico tē Hèrodés ñá túú ní quide cuendá-dé tnúhu ní cǎháⁿ tē Juáá, chi nèhé-gǎ tucu ní quide-dé, chi da vecaá ní chihi-dé tē Juáá.

Sàndute Jesús

(Mt. 3:13-17; Mr. 1:9-11)

21 Te òré dacuàndute tē Juáá nchaa ñáyiú, te tnàhá Jèsús ní dacuàndute ñaha-dé xii-gǎ. Te nini cǎháⁿ ndihi-gǎ Dútú Ndiǒxí ní nacaáⁿ andiu,

²² te ní quee Espíritú Yă Ndiöxí véxi cuuⁿ túu-xi, te càa-xi datná cáá ìⁿ lómá, te òré-án nǐ tecu ní cáháⁿ Yă Ndiöxí ndéé andiü, te xăhaⁿ-gă xii Jësús:

–Yöhó cúu-n Dêhe-í tée ío cùu iní-í, te ío cùdǐí iní ñáhà-í xii-n —cächí-gá xăhaⁿ-gă xii Jësús.

Cue tée ní xindecu dihna-gá ñuyúú-a dàcúúxí Xïtohö Jesucristú (Mt. 1:1-17)

²³ Te ndècu Jesús datná ócú úxí cuíá-gă cúnàhá ní chisaha-gă chiüⁿ ní táhú Tâtá-gă Dútú Ndiöxí cada-gá. Te ní cuu-gá dèhe té Chèè chí ducaⁿ sàni iní ñáyüü ñuyúú-a. Te té Chèè-án nǐ cuu-dé dèhe té Èlí,

²⁴ te tée-án nǐ cuu-dé dèhe té Mátát. Te té Mátát-án nǐ cuu-dé dèhe té Lèví, te tée-án nǐ cuu-dé dèhe té Mèlquí. Te té Mèlquí-án nǐ cuu-dé dèhe té Jàná, te tée-án nǐ cuu-dé dèhe té Chèè.

²⁵ Te té Chèè-án nǐ cuu-dé dèhe té Matàtiás, te tée-án nǐ cuu-dé dèhe té Àmós. Te té Àmós-án nǐ cuu-dé dèhe té Nàhúm, te tée-án nǐ cuu-dé dèhe té Èslí. Te té Èslí-án nǐ cuu-dé dèhe té Nagài,

²⁶ te tée-án nǐ cuu-dé dèhe té Màát. Te té Màát-án nǐ cuu-dé dèhe té Matàtiás, te tée-án nǐ cuu-dé dèhe té Semèi. Te té Semèi-án nǐ cuu-dé dèhe té Chèè, te tée-án nǐ cuu-dé dèhe té Jüdá.

²⁷ Te té Jüdá-án nǐ cuu-dé dèhe té Jòaná, te tée-án nǐ cuu-dé dèhe té Rèsá. Te té Rèsá-án nǐ cuu-dé dèhe té Zorobàbél, te tée-án nǐ cuu-dé dèhe té Salàtiél. Te té Salàtiél-án nǐ cuu-dé dèhe té Nèrí,

²⁸ te tée-án nǐ cuu-dé dèhe té Mèlquí. Te té Mèlquí-án nǐ cuu-dé dèhe té Àdí, te tée-án nǐ cuu-dé dèhe té Còsám. Te té Còsám-án nǐ cuu-dé dèhe té Elmòdám, te tée-án nǐ cuu-dé dèhe té Èr.

²⁹ Te té Èr-án nǐ cuu-dé dèhe té Jòsué, te tée-án nǐ cuu-dé dèhe té Elièzér. Te té Elièzér-án nǐ cuu-dé dèhe té Jòrim, te tée-án nǐ cuu-dé dèhe té Mátát.

³⁰ Te té Mátát-án nǐ cuu-dé dèhe té Lèví, te tée-án nǐ cuu-dé dèhe té Mió. Te té Mió-án nǐ cuu-dé dèhe té Jüdá, te tée-án nǐ cuu-dé dèhe té Chèè. Te té Chèè-án nǐ cuu-dé dèhe té Jònán, te tée-án nǐ cuu-dé dèhe té Eliàquím.

³¹ Te té Eliàquím-án nǐ cuu-dé dèhe té Mèléá, te tée-án nǐ cuu-dé dèhe té Mainán. Te té Mainán-án nǐ cuu-dé dèhe té Mátatá, te tée-án nǐ cuu-dé dèhe té Nátán.

³² Te té Nátán-án nǐ cuu-dé dèhe té Dàvií, te tée-án nǐ cuu-dé dèhe té Isàí. Te té Isàí-án nǐ cuu-dé dèhe té Òbéd, te tée-án nǐ cuu-dé dèhe té Bòóz. Te té Bòóz-án nǐ cuu-dé dèhe té Sàlmón, te tée-án nǐ cuu-dé dèhe té Naàsón.

³³ Te té Naàsón-án nǐ cuu-dé dèhe té Aminadáb, te tée-án nǐ cuu-dé dèhe té Àrám. Te té Àrám-án nǐ cuu-dé dèhe té Èsróm, te tée-án nǐ cuu-dé dèhe té Fàrés. Te té Fàrés-án nǐ cuu-dé dèhe té Jüdá,

³⁴ te tée-án nǐ cuu-dé dèhe té Jàcób. Te té Jàcób-án nǐ cuu-dé dèhe té Isàác, te tée-án nǐ cuu-dé dèhe té Àbrahám. Te té Àbrahám-án nǐ cuu-dé dèhe té Tàré, te tée-án nǐ cuu-dé dèhe té Nàcór.

³⁵ Te té Nàcór-án nǐ cuu-dé dèhe té Sèrúg, te tée-án nǐ cuu-dé dèhe té Ragàú. Te té Ragàú-án nǐ cuu-dé dèhe té Pèlég, te tée-án nǐ cuu-dé dèhe té Hèbér. Te té Hèbér-án nǐ cuu-dé dèhe té Sàlà,

³⁶ te tée-án nǐ cuu-dé dèhe té Cainán. Te té Cainán-án nǐ cuu-dé dèhe té Arfàxád, te tée-án nǐ cuu-dé dèhe té Sém. Te té Sém-án nǐ cuu-dé dèhe té Nöé, te tée-án nǐ cuu-dé dèhe té Làméc.

³⁷ Te té Làméc-án nǐ cuu-dé dèhe té Matusalén, te tée-án nǐ cuu-dé dèhe té Ènóc. Te té Ènóc-án nǐ cuu-dé dèhe té Jàréd, te tée-án nǐ cuu-dé dèhe té Mahalàleél. Te té Mahalàleél-án nǐ cuu-dé dèhe té Cainán,

38 te tée-án nĩ cuu-dé déhe té Ènós. Te té Ènós-án nĩ cuu-dé déhe té Sèt, te tée-án nĩ cuu-dé déhe té Àdán. Te té Àdán-án chi mee Yá Ndiõxí ní cadúha ndaha ñaha-gá xii-dé.

4

Sácuíhná quidé yica-xi cada Jesús sá ñà túú tàú-gá cada-gá ní cùu (Mt. 4:1-11; Mr. 1:12-13)

1 Te Jèsús ní naqueheⁿ-gá ichi yuhu yúte Jòrdán cuánuhú-gá. Te sa ndècu ndihí-gá Espiritú Yá Ndiõxí, te Espiritú-áⁿ ndéca ñaha-xi xii-gá cuáháⁿ ìⁿ xití yucu.

2 Te yàcáⁿ ní xíndecu-gá údico nduu, te sácuíhná nĩ cuiní-xi coto ndeé ñáhá-xi xii-gá te núu ndisa sá vǎ cadá-gǎ ìⁿ sá ñà túú tàú-gá cada-gá. Te ñà túú tnàhí ná ní xèxi-gá ndi údico nduu-áⁿ, te sátá dúcáⁿ te ní xicáⁿ iní-gá caxi-gá.

3 Te sácuíhná-áⁿ nĩ xáhaⁿ-xi xii-gá:

—Te núu ndisa sá cúu-n Dèhe Yá Ndiõxí, te cúñaha xii yúú-a na ndùu-xi paá —càchí-xi xǎhaⁿ-xi xii-gá.

4 Te Jèsús ní xáhaⁿ-gǎ xii-xi:

—Núú tütú Yá Ndiõxí càchí-xi: “Ñá díú mèe-ni paá candeca-xi iní ñáyiu, chi tnàhá nchaa tnúhu càháⁿ Yá Ndiõxí candeca-xi iní-yu”, duha càchí-xi núú tütú-gá —càchí-gá xǎhaⁿ-gǎ xii-xi.

5 Te dàtnùnì sácuíhná ndéca ñaha-xi xii-gá cuáháⁿ ìⁿ núú tìndúú dùcúⁿ, te uuⁿ ní dánèhé núú ñáhá-xi xii-gá nchaandi túhú nàcióⁿ cáá ñùyúú.

6 Te ní xáhaⁿ-xi xii-gá:

—Yúhú cada-í, te taxi tnùnì-n nchàa-ndi túhú nàcióⁿ-a ndihí nchaa sá vǎha ío díu-ni nchaa nàcióⁿ-a, te cachí ñáyiu sá ío cùnuu-n, chi yúhú cúú cuendá-í nchaa sá ío nchaa nàcióⁿ-a, te ndédani càa ñáyiu cùu iní-í te cúñaha-í xii-yu taxi tnùnì-yu.

7 Te núu nì yùhu ni iní-n chiñuhu ñaha-n xii-í ñá, te nchaa taxi-í cuu cuendá-n —càchí-xi xǎhaⁿ-xi xii-gá.

8 Te Jèsús ní xáhaⁿ-gǎ xii-xi:

—Xocuñí yòhó sácuíhná núú ndécú-í-a, chi vǎ cúú cada-í nàcuáa càchí-n chi núú tütú Yá Ndiõxí càchí-xi: “Chiñuhu-ndo Dùtú Ndiõxí Yaá cúú Ndiõxí-ndó, te ìⁿ dìí-ni-gǎ cada-ndo nchàa nàcuáa càháⁿ-gǎ”, duha càchí-xi núú tütú-gá —càchí-gá xǎhaⁿ-gǎ xii-xi.

9 Te sácuíhná ndéca ñaha tucu-xi xii-gá cuáháⁿ ñuu Jerusálén, te ní xáhaⁿ-xi xii-gá cuasá-gǎ díquí veñúhu càhnu sá ío cùnuu, te ní xáhaⁿ tucu-xi:

—Te núu ndisa cùu-n Dèhe Yá Ndiõxí te cuandèe ndava ndeé núú ñúhú

10 cuendá quee ndáá-xi nàcuáa càháⁿ-xi núú tütú Yá Ndiõxí núú càchí-xi: Yá Ndiõxí tendaha-gǎ cue espíritú xínú cuèchi núú-gǎ quixi-xi coto ñaha-xi xii-n.

11 Te núu ndáhá-xi càundodo-n cuendá sá vǎ dánícuèhé yúú sǎhá-n, duha càchí-xi núú tütú-gá —càchí sácuíhná xǎhaⁿ-xi xii-gá.

12 Te Jèsús ní xáhaⁿ-gǎ xii-xi:

—Te càchí tucu-xi núú tütú Yá Ndiõxí: “Vǎ cánì iní-n còto ndeé-n Dùtú Ndiõxí Yaá cúú Ndiõxí-n núu ndisa sá dácacu nihnu ñaha-gǎ xii-n cuendá ìⁿ sá sání iní-n càda-n sá cúú-xí mèe-n”, duha càchí-xi núú tütú-gá —càchí-gǎ xǎhaⁿ-gǎ xii-xi.

13 Te sátá dúcáⁿ te sácuíhná ñà túú-gǎ ní cùtnunì iní-xi nása cada-xi Jèsús, núu xǎⁿ ní xica-xi cuáháⁿ-xi ní sanaa tnaa-xi.

Distritú Galileá ní chisaha Jèsús chiùⁿ ní táhú Tátá-gã Dútú Ndiõxí cada-gá (Mt. 4:12-17; Mr. 1:14-15)

14 Te Jèsús cuáhán tucu-gá distritú Galileá, dico sa ndècu ndihí-gá Espíritú Yá Ndiõxí, te ní càa xico xiáⁿ ní nhí-yu tnúhu nchaa nàcuáa quide-gá.

15 Te ndí tnaháⁿ ñúu cuáhán-gá ducaⁿ cuãnguihu-gá veñúhu-yu dānehé ñáhá-gã xií-yu, te nchaa-yu cāchí-yu sá ïo cāhnu cuu-gá.

Jèsús ndécú-gã ñúu Nazàrét (Mt. 13:53-58; Mr. 6:1-6)

16 Te Jèsús ní sáhán-gá ñúu Nazàrét ñúu núú ní sahnu-gá. Te nduu ndètatú ñáyiú ní quíhu-gá veñúhu, chi ducaⁿ tnahí quide-gá, te ní ngúnutnñ-gá dācuáha-gá tutú ndèé tnúhu Yá Ndiõxí.

17 Te ní sáñaha-güedé xii-gá tutú ndèé tnúhu ní cáhán ndí Chàíá téé ní xóo cáhán tnúhu Yá Ndiõxí ndéé sanaha, te òré ní nandicá-gá núú tütú-án te ní naníhí-gá núú cāchí-xi:

18 Espíritú Yá Ndiõxí ndécú ndihí ñaha-xi xii-í, chi ní cāchí-gá sá cáhán-í tnúhu-gá sá cúú-xí ñáyiú ndàhú, ñáyiú vátá cündedóho tnahí-gá.

Te véxi-í cuendá vá ndìhú-gá iní ñáyiú ñá túú ndècu váha iní-xi, te cue ñáyiú sa nèhe váha ñaha-nã yucu ñávãha dācácu nihnu-í-yu.

Te cue ñáyiú cuáá nacaán-í núú-yu, te ñáyiú ndòho dandoho ñaha tnahá ñáyiú-xi taunihnu-í-yu.

19 Te cúñaha-í xii ñáyiú sá sáá nduu càda Yá Ndiõxí ìⁿ sá vãha sá cúú-xí-yu. Duha cāchí-xi núú tütú dācuáha-gá.

20 Te Jèsús ní nacadí-gá núú tütú-án, te ní nacuáha-gá ìⁿ téé xínu cuechi veñúhu-án, te ní ngóo-gá. Te nchaa ñáyiú yìhí veñúhu ñá núú núú-yu ndèhe ñáhá-yu xii-gá.

21 Te xãhaⁿ-gã xií-yu:

—Mei vïtna ní quee ndáá-xi nàcuáa cāhán-xi núú tütú Yá Ndiõxí —cāchí-gá xãhaⁿ-gã xií-yu.

22 Te nchaa-yu ní cáhán váha-yu cuendá-gá, te ní cuñúhu-yu tnúhu váha cāhán-gá, te xïtnáhá-yu:

—¿Te náa ñá díú tēe-a cùu-dé déhe té Chèè-ãⁿ? —cāchí-yu xïtnáhá-yu.

23 Te Jèsús ní xáhaⁿ-gã:

—Na cāchí tnúhu ndáá-í xii-ndo sã ñúhú iní-ndó cúñaha-ndo xii-í ìⁿ tnúhu cütexínu sá cāhán méé-ndó, te quesaha-ndo: “Nátátná cada tátna mee-n”, duha quesaha-ndo. Te cúñaha tūcu-ndo xii-í: “Sa ní nhí-nđí tnúhu nàcuáa ní quide-n ñúú Capèrnaúm, te cada-n tnahá ñúú núú ní sahnu-n”, duha quesaha-ndo —cāchí-gá xãhaⁿ-gã xií-yu.

24 Te ní xáhaⁿ tūcu-gá:

—Na cāchí tnúhu ndáá-í xii-ndo sã ñi ìⁿ téé cāhán tnúhu Yá Ndiõxí ñá túú tnahá iní ñáhá ñáyiú ñúu-dé.

25 Te na cāchí tnúhu ndáá tucu-í xii-ndo sã ïo vài ñáyiú dñí ñáyiú quèé ní xíndecu nacióⁿ Isràèl cütñáhá ní xíndecu té Èliás cütñáhá ñá túú ní cùuⁿ dáú úní cuíá dava, te dàvá-án ïo ní ndoho ñáyiú docó nitùhú nacióⁿ.

26 Dico Yá Ndiõxí ñá túú ní tēndaha-gá té Èliás quíhíⁿ-dé vehe ndēdani càa ñáyiú dñí-án, chi vehe ìⁿ ñaha ñúú Sàreptá ní xáhaⁿ-gã ní sáhán-dé, te ñúu-án cáá yàtni-xi ñúú Sidón.

27 Te ní xíndecu tucu ingá téé ní xóo cáháⁿ tnúhu Yá Ndióxí ndéé sanaha, te téé-áⁿ ní xínani-dé Eliseú, te ñiu-ni dàvá-áⁿ ní xíndecu tucu vai ñáiyu cùhú nàcióⁿ Isràél, ñáiyu ní tnahá cuéhé sá dátèhyú ñihnu-xi yiqui cuñú-yu dico ñá túu ní ndúha-yu, chi ñⁿdi-ni té Nàamán téé distritú Siríá ní ndúha-dé —càchí-gá xáhaⁿ-gá xií-yu.

28 Te sá dúcáⁿ ní cáháⁿ-gá te xiáⁿ ní cudééⁿ víhí nchàa ñáiyu yìhi veñúhu-áⁿ núú-gá.

29 Te ní queñuhú-yu Jèsús yuhu dèhvá tìndúú núú cáá ñúú-yu-áⁿ cuendá yàcáⁿ dàqueé-yu-gá déhvá ní cùu.

30 Dico Jèsús vii-ni ní quee-gá tnuú-yu cuáháⁿ-gá.

Ëⁿ téé yìhi ñaha espíritú cùndìhi yucu ñávàha
(Mr. 1:21-28)

31 Te Jèsús cuáháⁿ-gá ñuú Capèrnaúm, te ñuú-áⁿ yíndèhu-xi distritú Galileá. Te yàcáⁿ ndécú-gá ní tnahá nduu ndètátú ñáiyu, te ní ngúíta-gá dácuàha-gá ñáiyu.

32 Te xicuñúhu-yu nchaa nàcuáa dànehé ñáhá-gá xií-yu, chi càháⁿ-gá dàtná càháⁿ ñⁿ téé cùnuu, te cùnuu ndisa-gá.

33 Te xití veñúhu yìhi ñⁿ téé yìhi ñaha ñⁿ espíritú cùndìhi yucu ñávàha, te espíritú-áⁿ ní quide-xi níhi ní cáháⁿ téé-áⁿ, te xáhaⁿ-dè xii Jèsús:

34 —¿Te ná cuìní yòhó Jèsús téé ñuú Nazàrèt cada ñaha-n xii-ndí núu véxi-n núú ndécú-ndí-i? ¿Áⁿ véxi-n dànaa ñaha-n xii-ndí? Chi yúhú xìní ñáhà-í xii-n sá cúu-n ñⁿ téé ñá túu tnahí cuéchi-xi chi núú Yá Ndióxí ní quee-n véxi-n ñùyúú-a —càchí-dé xáhaⁿ-dè xii-gá.

35 Te Jèsús ní tenàá-gá espíritú cùndìhi yucu ñávàha-áⁿ, te xáhaⁿ-gá:

—¡Cadi yuhu-n, te taquèe yiqui cuñú téé-áⁿ! —càchí-gá xáhaⁿ-gá.

Te espíritú cùndìhi yucu ñávàha-áⁿ ní dándúá-xi téé-áⁿ ndéé ñuhu tnuú ñáiyu xíndecu-áⁿ, te ñá túú-gá ná ní quide ñaha-xi, te ní quee ñaha-xi xì-dé.

36 Te nchaa ñáiyu xíndecu-áⁿ ní cuñúhu-yu, te ní xitnahá-yu:

—¿Te nása ndúu-tu tnúhu càháⁿ téé-áⁿ ñá? ¡Te càháⁿ-dé dàtná càháⁿ ñⁿ téé tàxi tnuú víhí, chi càháⁿ-ni-dé te nchaa espíritú cùndìhi yucu ñávàha quèe-ni-xi yiqui cuñú-yu! —càchí-yu xitnahá-yu.

37 Te nchaa xichi ní níhí-yu tnúhu nàcuáa quide Jèsús.

Jèsús quidé tãtna-gá nãná ñadìhí té Xímú
(Mt. 8:14-15; Mr. 1:29-31)

38 Te Jèsús ní ndee-gá xití veñúhu, te cuáháⁿ-gá vehe té Xímú. Te nãná ñadìhí té Xímú-áⁿ cùhú-aⁿ ñùhu vihi-aⁿ cahni, te ní cáháⁿ ndàhú-yu núú Jèsús cuendá-aⁿ.

39 Te Jèsús ní sáháⁿ-gá núú ndécú-áⁿ, te ní ngúnundeyi-gá te ní xáhaⁿ-gá xii cahni-áⁿ sã ná xócuiñí-xi, te ní xócuiñí-ni-xi, te òrè-ni-áⁿ ní ndúha ñaha cùhú-áⁿ te ní ndacóo-aⁿ ní xinu cuechi-aⁿ núú-güedé ndihí-gá.

Jèsús quidé tãtna-gá vai ñáiyu cùhú
(Mt. 8:16-17; Mr. 1:32-34)

40 Te òrè ní ngódó tnuú nchícanchii, te nchaa ñáiyu xíndecu ndihí ñáiyu cùhú vehe-xi ndèca ñáhá-yu cuáháⁿ núú Jèsús. Te Jèsús ní sacáⁿ ndodo-gá ndaha-gá díquí ñⁿ ñáiyu cùhú-áⁿ, te ducaⁿ ní quide-gá te ní ndúha-yu. Te ndi dñⁿ núú cuéhé tnahá-yu ñⁿ ñⁿ-yu ni cùu.

41 Te tnàhá dava ñáyiú cùhú-án yíhí ñàha espíritú cùndìhi yucu ñávàha xií-yu ní cùu, te òré ní quee ñaha-xi xií-yu, te xiǎn ní quide-xi níhi ní cáháⁿ-yu, te xǎhǎⁿ-yu xii Jèsús:

—Yòhó cùú-n Dèhe Dútú Ndiǒxí —càchí-yu xǎhǎⁿ-yu xii-gá.

Dico Jèsús níhi ní cáháⁿ-gá ní tenàá-gá nchaa espíritú cùndìhi yucu ñávàha-án, te xǎhaⁿ-gǎ sá vǎ dúcáⁿ-gǎ cada-xi, chi sa xìní-xi sá díú-gǎ cùú-gǎ Cristú Yaa ní tendaha Yǎ Ndiǒxí véxi ñuyíú-a.

Jèsús dánèhé-gá ñáyiú distritú Galileá

(Mr. 1:35-39)

42 Te ìⁿ nduu ní túndaá-ni ní quee Jèsús ñuu núú ndécú-gǎ-án cuǎháⁿ-gǎ ìⁿ xichi núú ñǎ túú ñáyiú ndècu. Te cue ñáyiú ní ngúita-yu nànducu ñahá-yu xii-gǎ te ní naníhi ñǎhǎ-yu, te cuiní-yu ngani ñahá-yu xii-gǎ cuendá sǎ ñà túú-gǎ ndèé quíhíⁿ-gǎ ní cùu.

43 Dico ní xáhaⁿ-gǎ xií-yu:

—Dacuití quíhíⁿ-í cúñaha-ǎ xii nchaa ñáyiú dava-gǎ ñuu tnúhu sá càháⁿ nàcuáa ndíhu ndaha ñàha Yá Ndiǒxí xií-yu, chi chiùⁿ tnahí-ǎn vèxi-í —càchí-gǎ xǎhaⁿ-gǎ xií-yu.

44 Te ní xica cuu Jèsús ní dánèhé-gá ñáyiú tnúhu-gǎ nchaa xití veñúhu ndǎa distritú Galileá.

5

Jèsús ní quide-gá ní níhi-güedé chácá

(Mt. 4:18-22; Mr. 1:16-20)

1 Te ìⁿ xito ndècu Jesús yuhu làgúná Genesàrét, te ío cuéhé ñáyiú ní sáá, te ta dàdehnde ñaha-ná-yu xii-gǎ cuǎháⁿ sǎ cuiní-yu cundedóho-yu nchaa tnúhu càháⁿ-gǎ.

2 Te Jèsús ní xini-gǎ úú bàrcú cue téé tñè chácá xñnutnì-xi yatni yuhu làgúná-án, te sa ní quene cue téé ñúhu xití-xi-án xñnaquete-güedé ñunu-güedé.

3 Te Jèsús cuásaá-gǎ núú ìⁿ bàrcú-án, te bàrcú-án cùú-xi bàrcú té Xímú, te ní xáhaⁿ-gǎ xii té Xímú-án sǎ dánundehe-dé-xi luha-gǎ xití ndute. Te dàtnùnì ní ngóo-gǎ núú bàrcú-án, te xián núcóo-gǎ ní ngúita-gǎ dánèhé-gǎ ñáyiú.

4 Te òré ní túhú ní dánèhé ñahá-gǎ xií-yu, te ní xáhaⁿ-gǎ xii té Xímú:

—Daquihíⁿ bàrcú-a xití làgúná mei núú cùnù-gǎ, te dàquée-ndo ñunu-ndo tñè-ndo chácá —càchí-gǎ xáhaⁿ-gǎ xii-dé.

5 Te té Xímú ní xáhaⁿ-dè:

—Mèstrú, ni niú ní quide chiùⁿ-ndí te ni ìⁿ chácá ñà túú ní níhi-ndí, dico vitna cuendá-ni sǎ yòhó táuchiuⁿ-n te na dàquée-ndí ñunu-ndí váⁿ —càchí-dé xǎhaⁿ-dè xii-gǎ.

6 Te òré ní dàquée-güedé ñunu-güedé te súuní vai chácá ní níhi-güedé, te ta ndátá-ñǎ ñunu-güedé cuǎháⁿ ní cùu.

7 Núú ní quide-güedé ndaha-güedé núú dàva-gǎ cue téé cùndìhi-güedé xixúhuⁿ ingá bàrcú cuendá quíhíⁿ-güedé chindee ñàha-güedé. Te cue téé-án ní sáháⁿ-güedé ní chindee tñaha-güedé ní dáchtù-güedé ndi ndúú bàrcú mee-ni chácá, te súuní ní cuu véé núú cuiní-na-xi quee naa-güedé ndíhi bàrcú ní cùu.

8 Te sǎ dúcáⁿ cuiní-xi quee naa bàrcú ní cùu, núú té Xímú, àdi Pelú chi úú diù-dé, ní ngúñí xití-dé núú Jèsús, te xáhaⁿ-dè:

—Xocuiñí yòhó Jèsús núú ndécù-í-a, chi yúhú cùú-í ìⁿ téé ío ndècu cuéchi-xi —càchí-dé xáhaⁿ-dè xii-gá.

⁹ Te ducaⁿ ní cáháⁿ-dé chi ní yúhú-dé, te ní cuñúhu-dé ndihí nchaa cue téé ndihí-dé-áⁿ cuendá sá ío vai chácá ní níhí-güedé.

¹⁰ Te tnàhá té Jácobó ndihí té Juáá cue déhe té Zebèdeú ío ní cuñúhu-güedé, te díu-ni cue téé cündihí té Xímú-án cùú-güedé tnàhá-güedé. Te Jèsús ní xáhaⁿ-gá xii té Xímú:

—Vá yúhú-n, chi neni vitna quíhíⁿ-n dàcaháⁿ-n ñáyiú cuendá tuha ñàhá-yu xii-í —càchí-gá xáhaⁿ-gá xii-dé.

¹¹ Te ní quene-güedé ndihí bàrcú ndéé ñuhu yìchí yuhu làgúná-áⁿ. Te òré-áⁿ ní dándò-güedé nchaandi túhú sá ndécú ndihí-güedé, te ní tuha-güedé Jèsús.

Jèsús quíde tátna-gá ìⁿ téé tnàhá cuéhé sá dátèhyú nihnu-xi yiqui cùñú-ó
(Mt. 8:1-4; Mr. 1:40-45)

¹² Te òré ní quexío Jèsús ìⁿ ñuú, te ní quexío ìⁿ téé cùhú tnàhá-dé cuéhé sá dátèhyú nihnu-xi yiqui cùñú-ó, te òré ní xiní-dé Jèsús te ní sáháⁿ-dé núú ndécú-gá, te ní ngúñí xití-dè núú-gá te ní nuu núú-dè ndàa núú ñúhú te càháⁿ ndàhú-dé, te xáhaⁿ-dè xii-gá:

—Mèstrú, véxi-í càháⁿ ndàhú-í núú-n núu vá cündèe iní-n càda tátna ñaha-n xii-í, chí cùnuni iní-í sá ndécú-n —càchí-dé xáhaⁿ-dè xii-gá.

¹³ Te Jèsús ní dácàá-gá ndaha-gá ní tendaha ñaha-gá xii-dé, te xáhaⁿ-gá:

—Cuu cada tátna ñaha-í xii-n, te vitna te ndúha-n —càchí-gá xáhaⁿ-gá xii-dé.

Te òré-ni ní xócuñí cuéhé tnàhá-dé.

¹⁴ Te dàtnúni ní xáhaⁿ tucu Jèsús xii-dé:

—Vá yò ìⁿ cùñaha-n sá ní quide tátna ñaha-í xii-n, núú dùtú-ni cuaháⁿ cuendá sá ná quini ñàhá-dè xii-n sá ní ndúha-n te cuáha-n-dè sá ndúú tãhú Yá Ndiòxí dàtná ní cachí ndí Moisés cuendá ná quini ñáyiú sá ndàá ní ndúha-n —càchí-gá xáhaⁿ-gá xii-dé.

¹⁵ Te ducaⁿ ta xitè nuu-gá tnúhu nchaa nàcuáa quide Jèsús, te ío cuéhé ñáyiú ní xóo tacá nchaa núú ní xíndecu-gá cuendá sá cuini-yu cundedóho-yu tnúhu càháⁿ-gá, ndihí cuendá sá cuini-yu cada tátna ñaha-gá xii-yu.

¹⁶ Dico Jèsús ní xóo quee nihni-gá tnuú-yu ní xóo quíhíⁿ-gá núú ñà túú ñáyiú ndècu ní xóo cáháⁿ ndihí-gá Yá Ndiòxí.

Jèsús quíde tátna-gá ìⁿ téé cùhú ñá cùú-gá candá nihnu
(Mt. 9:1-8; Mr. 2:1-12)

¹⁷ Te ìⁿ nduu dànehé-gá ñáyiú, te xínucóo ìⁿ úú cue téé cùu fariséú, ndihí cue téé dàcuaha ñaha xii ñáyiú nchaa tnúhu ní chidó tnúni ndí Moisés. Te cue téé-áⁿ ní quee-güedé nchaa ñuú yíndèhu distritú Galileá, ndihí distritú Júdeá, ndihí ñuú Jerusalén, te nchaa ñuú-áⁿ ní quee-güedé cuaháⁿ-güedé núú ndécú-gá. Te Yá Ndiòxí chíndèe ñaha-gá quíde tátna-gá ñáyiú cùú.

¹⁸ Te ìⁿ tucú cue téé nchido-güedé ìⁿ téé cùhú ñá cùú-gá candá nihnu ñuhu-dé xití ní quexío ndihí ñaha-güedé, te cuini-güedé quíhu ndihí ñaha-güedé ndéé xití vehe, sáá-güedé ndéé núú Jèsús ndihí téé cùhú-áⁿ.

¹⁹ Dico ñá túú ní níhí-güedé ndéé ichi quíhu-güedé, chi cuendá ío cuéhé ñáyiú ndècu, núú xíáⁿ ní sáá-güedé díquí véhé-áⁿ ní caáⁿ-güedé te ndàa díquí véhé-áⁿ ní dáquèe-güedé téé cùhú-áⁿ, te ñuhu-ni-dé xití ní dáquèe ñaha-güedé tnuú ñáyiú ní sáá ndéé núú Jèsús.

20 Te Jèsús ní cutnùnì iní-gá sá nì yuhu nì iní-güedé sàndáá iní ñáhá-güedé xii-gá, núu ní xáhaⁿ-gã xii téé cùhú-áⁿ:

—Yòhó téé cùhú, sa ní quide càhnu iní-í nchaa cuéchi-n —càchí-gá xáhaⁿ-gã xii-dé.

21 Te cue téé dàcuaha ñaha xii-yu nchaa tnúhu ní chídó tnùnì ndíi Moisés ndihi cue téé cùu fariséú ní sani iní-güedé: “¿Ná cúú tée-a núu càháⁿ cuèhé-dé cuendá Yá Ndióxi-í? Te vá yóo ìⁿ ndácu cada cahnu iní nchaa yíca cuéchi ñáiyu, chí ìⁿ dií díí-ni Yá Ndióxi quidé càhnu iní-gá”, duha ní sani iní-güedé.

22 Dico Jèsús sa ní cutnùnì iní-gá nàcuáa sàni iní-güedé núu ní xáhaⁿ-gã xii-güedé:

—¿Te ná cuendá ducaⁿ sàni iní-ndó-í?

23 Te sá dúhá nì xáhaⁿ-í xii téé cùhú-a sá cáda càhnu iní-í nchaa yíca cuéchi-dé, te xiáⁿ nchòhó ñá túú cùtnunì iní-ndó núu ndáá càháⁿ-í àdi ñá ndáá. Dico núu cúu-í-dé sá ndáçòo-dé, te caca-dé te cutnùnì ndáá iní-ndó núu ndáá càháⁿ-í àdi ñá ndáá, chí cundehe núu-ndó nàcuáa cada-í.

24 Te vitna na càda-í nàcuáa cutnùnì iní-ndó nchaa-ndo sá yùhú Téé cùu ñani tnáhá-ndó nchaa-ndo ndecu ndihi-í tnúhu ndee ìní sá cáda càhnu iní-í nchaa cuéchi ñáiyu ñuyiú-a —càchí-gá xáhaⁿ-gã xii-güedé.

Te sáta dúcáⁿ te ní xáhaⁿ-gã xii téé cùhú-áⁿ:

—Ndacóo, te ndocani-n xito ñùhu-n véxi-áⁿ, te núhú-n vèhe-n —cachí-gá xáhaⁿ-gã xii-dé.

25 Te òrè-ni-áⁿ nì ndúha téé cùhú-áⁿ te ní ndacóo-dé, te ní ndocani-dé xito ñùhu-dé ní quexìo-áⁿ, te ní natni-dé ichi ta càháⁿ-dé cuánuhú sá ìo càhnu cuu Yá Ndióxi.

26 Te nchaa ñáiyu xíndecu-áⁿ nì cuñúhu-yu, te tnáhá-yu ní cachí-yu sá ìo càhnu cuu Yá Ndióxi, te ducaⁿ ìo ní yùhú-yu, te ní xitnàhá-yu:

—Vitna ní xiní-ó ìⁿ sá ñà túú tnàhí xiní-ó ní cùu —cachí-yu xitnàhá-yu.

Jèsús cáná-gã té Lèví (Mt. 9:9-13; Mr. 2:13-17)

27 Te sáta dúcáⁿ nì cuu te ní quee Jèsús xiáⁿ, te ní xiní-gá ìⁿ téé nàni Leví núcòo-dé ìⁿ xichi quide cobrá-dé ñáiyu cuendá impuèstú, chí cobradór cúú-dé, te ní xáhaⁿ-gã xii-dé:

—Néhé chitnàhá ñáhá-n xii-í —càchí-gá xáhaⁿ-gã xii-dé.

28 Te té Lèví-áⁿ nì ndàcuíñi-dé te ní dándòo-dé nchaa sá ndécú ndihi-dé núu núcòo-dé-áⁿ, te ní tuha-dé Jèsús.

29 Te sáta dúcáⁿ te té Lèví-áⁿ nì quide-dé ìⁿ vico càhnu vehe-dé sá cúu-xí Jèsús, te ní tacá vai cue téé quide chiuⁿ quide-dé, te nchaa-güedé cuánguihu-güedé mèsá ní ngóo-güedé ndihi dava-gá ñáiyu ní quexìo cuendá caxi-güedé ndihi-yu.

30 Dico cue téé cùu fariséú ndihi cue téé dàcuaha ñaha xii-yu nchaa tnúhu ní chídó tnùnì ndíi Moisés ní ngúita-güedé xicuèhé-güedé cue téé xica cuu ndihi-gá, te xáhaⁿ-güedé:

—¿Ná cuendá xéxi-ndó xihhi-ndo ndihi cue téé cuihna iní-xi quide cobrá ñáhá xii ñáiyu cuendá impuèstú, ndihi nchaa dava-gá cue téé ndècu ichi cuehé ichi duha-í? —càchí-güedé xáhaⁿ-güedé.

31 Te Jèsús ní xáhaⁿ-gã xii-güedé:

—Nchaa ñáiyu ñá túú cùhú chí ñá túú xinì ñuhú-yu ñátátná, dico nchaa ñáiyu cùhú chí xinì ñuhu ñáhá-yu.

³² Te yúhú véxi-í càháⁿ-í ñáyíu cùtnuní iní-xi sá ndécú cuěchi-xi cuèndá dàhá-yu nchaa sá cuèhé sá dúhá quidé-yu, te ñá túú véxi-í càháⁿ-í ñáyíu càchí sá ñá túú ndècu cuéchi-xi —càchí-gá xáhaⁿ-gá xii-güedé.

Cue téé ndücu tnúhu núú Jèsús cuèndá ñáyíu ñá túú tnàhí ná xéxí áma càháⁿ ndíhí-yu Yá Ndiòxí

(Mt. 9:14-17; Mr. 2:18-22)

³³ Te ní xáhaⁿ-güedé xii Jèsús:

—Te áma ñá túú tnàhí ná xéxí cué téé xíca cuu ndíhí té Juáá càháⁿ ndíhí-güedé Yá Ndiòxí, te ñíu-ni ducaⁿ quide cue téé xíca cuu ndíhí nchúhú cue téé cùu fariséú. ¿Te ná cuèndá cue téé xíca cuu ndíhí-n ñá túú dùcaⁿ quide-güedé nñu nchaa-ni nduu xèxi-güedé xíhí-güedé quidé-güedé-i? —cachí-güedé xáhaⁿ-güedé xii-gá.

³⁴ Te Jèsús ní xáhaⁿ-gá xii-güedé:

—Nchòhó xìní-ndó sá vǎ cúú cǔñaha-o xii cue ñáyíu ñùhu vico tnándaha sá vǎ cúú cǎxí-yu ñini ndècu ndíhí ñaha téé tnándaha-áⁿ xii-yu.

³⁵ Dico sáá nduu te vǎ cǔndècu ndíhí ñaha-gá téé tnándaha-áⁿ xii-yu, te dàvá-áⁿ te cahni iní-yu vǎ cǎxí-yu sá ndíhú iní-yu —càchí-gá xáhaⁿ-gá xii-güedé.

³⁶ Te ní cani-gá ñⁿ cuèndú núú ñáyíu nàcuáa tecu tnùní-yu tnúhu-gá, te xáhaⁿ-gǎ:

—Vǎ yǎo ñⁿ dǎndée luha dóó sáá ñⁿ dóó sa ní cuu tǔhú víhí, chí núu yoo ducaⁿ na càda, te dóó sáá-áⁿ nǎndíyí-xi te uuⁿ-gǎ ndata-xi dóó sǎ ní cuu tǔhú-áⁿ, te luha dóó sáá-áⁿ ñá túú nàtaú-xi ndée dóó sǎ ní cuu tǔhú-áⁿ.

³⁷ Te ní vǎ yǎo ñⁿ chíhí ndídí sáá xití ñⁿ lamba sa ní cuu tǔhú víhí, chí núu yoo ducaⁿ na càda, te ndava lamba sa ní cuu tǔhú-áⁿ chí ío níhí yóócó ndídí-áⁿ, te cuíta-ni ndídí-áⁿ te cuíta-ni lamba-áⁿ.

³⁸ Núu xǎá xíní ñùhu-xi quée ndídí sáá-áⁿ xití ñⁿ lamba saa cuèndá ducaⁿ ñá túú nǎ cuu cováha-xi.

³⁹ Te ní ñⁿ ñáyíu ñá túú tnàhá iní-yu cohó-yu ndídí sáá, te núu díhna-gá ná cohó-yu ndídí sǎ ní quene díhna-gá, chí càchí-yu sá xíhí váha-gá ndídí sǎ ní quene díhna-gá-áⁿ dàcúxí ndídí sáá —càchí-gá xáhaⁿ-gá xii-yu.

6

Cue téé xíca cuu ndíhí Jèsús sàhnú-güedé yoco triú nduu ndétatú ñáyíu
(Mt. 12:1-8; Mr. 2:23-28)

¹ Te ñⁿ nduu cùu-xi nduu ndetátú ñáyíu ñùhu Jèsús ichi ndíhí cue téé xíca cuu ndíhí-gá, te ta yáha-gá ndíhí-güedé ñⁿ xíchi núú cáá triú, te ní ngúita-güedé sàhnú-güedé yoco triú-áⁿ te ndíhí ndaha-güedé quíⁿ-güedé quée triú tá xèxi-güedé cuháⁿ.

² Te ñⁿ úú cue téé cùu fariséú ní xáhaⁿ-güedé xii cue téé xíca cuu ndíhí-gá:

—¿Te ná cuèndá ducaⁿ quide nchohó ñⁿ sá ñá túú tàú-ó càda-o vitna cuu-xi nduu ndetátú-ó-i? —càchí-güedé xáhaⁿ-güedé.

³ Te Jèsús ní xáhaⁿ-gá xii-güedé:

—¿Te náá ñá túú dàcuaha-ndo núu tutú Yá Ndiòxí núú càháⁿ-xi nàcuáa ní quide ndí Dávíí cǔtnàhá ní xíhí ndíi docó ndíhí cue téé ní xíca cuu ndíhí ndíi-áⁿ?

⁴ Chí ní quíhu ndíi vehe Yá Ndiòxí, te ní queheⁿ ndíi páá ní cuu íí ndécú-áⁿ ní dǎcǎhñu ndíi cue téé xíca cuu ndíhí ndíi ní xexi ndíi ndíhí-güedé, te ñá túú

tàù ndíi sá dúcáⁿ càda ndíi ni cùu, chi mee-ni cuè dútú tàù-güedé caxi-güedé pàá-áⁿ ní cùu —cachí-gá xǎhaⁿ-gǎ xii-güedé.

⁵ Te ní xáhaⁿ tùcu-gá:

—Te yúhú Tée cùu ñaní tnáhá-ndó nchaa-ndo, tnáhá-í ndécú ndíhi-í tnúhu ndee ínì sá cùu-í nchaa ñáyiú nàcuáa cadá-yu nduu ndètátú-ó-á —cachí-gá xáhaⁿ-gǎ xii-güedé.

Ëⁿ tée ní yíhí ìⁿ xio ndaha-xi

(Mt. 12:9-14; Mr. 3:1-6)

⁶ Te ingá nduu ñiu-ni nduu ndètátú ñáyiú cuánguìhu Jèsús xítí veñúhu dànehé-gá ñáyiú. Te xíáⁿ ndécú ìⁿ tée cùhú ní yíhí nihnu ìⁿ xio ndaha cùha-dé.

⁷ Te cue tée dàcuaha ñaha xii ñáyiú nchaa tnúhu ní chídó tnùnì ndíi Moisés, ndíhi cue tée cùu fariséú ndéhé-güedé nùu cada tátna ñaha Jèsús xii tée cùhú-áⁿ nduu ndètátú-güedé-áⁿ cuendá níhí-güedé nàcuáa cada-güedé cacáⁿ cuéchi-güedé cuendá-gá.

⁸ Dico Jèsús sa ní cutnùnì iní-gá nàcuáa sàni iní-güedé, te ní xáhaⁿ-gǎ xii tée cùhú ndaha-xi-áⁿ:

—Ndacuíñí te ngúnutnìi-n cuádava tnuú-ndí-a —cachí-gá xáhaⁿ-gǎ xii-dé.

Te tée-áⁿ nì ndacuíñí-dé te ní ngúnutnìi-dé cuádava tnuú-güedé ndíhi-gá.

⁹ Te dǎtnùnì Jèsús ní xícáⁿ tnúhú-gǎ núu cuè ñáyiú xǐndecu-áⁿ, te xáhaⁿ-gǎ xii-yu:

—Cuíni-í cachí tnúhu-ndo nǎ cúú sǎ vǎha cada-o nduu ndetátú-ó. ¿Ëⁿ chiúⁿ vǎha àdi ìⁿ chiúⁿ cuehé, sá cadá tátna-o ñáyiú cùhú àdi sá cáhni-ó-yu? —cachí-gá xáhaⁿ-gǎ xii-yu.

¹⁰ Te dǎtnùnì ní ndacoto-gá núu-yu nchaá-yu, te ní xáhaⁿ-gǎ xii tée cùhú ndaha-xi-áⁿ:

—Ndocani ndaha-n —cachí-gá xáhaⁿ-gǎ xii-dé.

Te ní ndocani-dé ndaha-dé, te òrè-ni ní ndúha.

¹¹ Te cue tée xǐndecu-áⁿ sùúnì nǐ cudééⁿ-güedé sá dúcáⁿ nǐ quide tátna Jèsús tée cùhú-áⁿ, te ní ngúita-güedé ndátnúhu-güedé nùu nása cada ñaha-güedé xii-gá.

Jèsús cǎxi-gá úxúú tnáhá cue tée dacuàha ñaha xii ñáyiú tnúhu-gá

(Mt. 10:1-4; Mr. 3:13-19)

¹² Te sátá dúcáⁿ ní cuu te ní xica Jèsús cuáháⁿ-gǎ xítí yucu cuendá yacáⁿ cáhánⁿ ndíhi-gá Tǎtá-gǎ Dútú Ndióxi, te ní niú ní cáhánⁿ ndíhi ñaha-gǎ.

¹³ Te sátá nǐ túndaá, te ní cana-gá nchaa cue tée xica cuu ndíhi-gá, te ní cáxi-gá úxúú tnáhá-güedé, te cue tée-áⁿ nǐ xáhaⁿ-gǎ sá díú-güedé cuu-güedé cue tée quíhíⁿ cáhánⁿ tnúhu-gá núu ñáyiú.

¹⁴ Te duha xǐnani ndi úxúú cue tée-áⁿ. Té Xímú, àdi Pelú chi úú ñiu-dé, ndíhi ñaní-dé té Ndríxi, ndíhi té Jàcobó, ndíhi té Juáá, ndíhi té Lipé, ndíhi té Bartolómé,

¹⁵ ndíhi té Mátéú, ndíhi té Mǎxi, ndíhi té Jàcobó dehe té Àlfeú, ndíhi ingá té Xímú tée ní cundíhi cue tée canánístá,

¹⁶ ndíhi té Judás ñaní té Jàcobó, ndíhi té Judás Iscàrioté tée ní sáá nduu nǐ sáha cuendá ñáhá xii Jèsús núu cuè tée cùu úhú iní ñáhá xii-gá, duha xǐnani cuè tée ní cáxi Jèsús ní xica cuu ndíhi-gá.

Jèsús dánèhé-gá cuehé víhí ñáyiú

(Mt. 4:23-25)

17 Te Jèsús cuánuu-gá yucu núú nǐ sáá-gá-án, te ní ngava-gá ìⁿ núú ndàà ndihì cue tée xica cuu ndihì-gá, te xíáⁿ nǐ ngúnutnǐi-gá. Te xíáⁿ ndécú dàva-gá cue tée xica cuu ndihì-gá ndihì vài ñáyiú ndètu ñahá-yu xii-gá, te ñáyiú-áⁿ vèxi-yu nchaa ñuú cáá dístrítú Jùdeá, ndihì ñuú Jerusalén, te ndècu ñáyiú vèxi ndàa yuhu lamár yatni ñuú Tírú, ndihì ñuú Sídón. Te nchaa ñáyiú-áⁿ nǐ quexió-yu cuiní-yu cundedóho-yu nchaa tnúhu càháⁿ Jèsús, ndihì cuendá sá cuiní-yu ndúha-yu nchaa cuéhé tnàhá-yu.

18 Te tnàhá ñáyiú yìhi ñaha espíritú cundihì yucu ñávaha.

19 Te ncháá-yu cuiní-yu dacàá-yu ndahá-yu tendahá-yu Jèsús ní cùu cuendá sá nǐ níhì-yu tnúhu sá ndècu ndihì-gá tnúhu ndee ìní quidé tátna-gá nchaa ñáyiú cùhú.

*Cuendá ñáyiú ío váha táhú-xi
(Mt. 5:1-12)*

20 Te Jèsús ní ndacoto-gá núú cuè tée xica cuu ndihì-gá, te ní xáhaⁿ-gá:

—Váha táhú nchaa nchòhó cue ñáyiú ndàhú, chi nduu táhú-ndó cundecu-ndo núú táxí tnúni Yá Ndiòxí.

21 Váha táhú nchaa nchòhó ñáyiú ío cuiní cundedóho tnúhu Yá Ndiòxí chi ío víi ío váha cuu iní-ndó.

Váha táhú nchaa nchòhó ñáyiú ndàhyú sá ndihú iní-ndó, chi sáá nduu te cudíí ìní-ndó nǐ caa ni quíhíⁿ.

22 Váha táhú nchaa nchòhó ñáyiú na cùu úhú iní ñáhá tnàha ñáyiú-xi, chi sáá nduu te vá dáñá-gá-yu quíhu-ndo vèñúhu, te cúcuèhé ñáhá-yu xii-ndo, te cachí-yu sá ñá díú ñáyiú váha cùu-ndo, te ducaⁿ càda ñahá-yu xii-ndo sá cuendá yúhú Tée cùu ñani tnàhá-ndó nchàa-ndo.

23 Te òré ducaⁿ na càda ñahá-yu xii-ndo te cudíí víhí-ní ìní-ndó cundecu-ndo, chi sáá nduu nduu táhú-ndó sá ío váha càa ndecu andiú cundecu ndihì-ndo nduu na nasaá-ndó yàcáⁿ cundecu-ndo, chi ñu-ni ducaⁿ nǐ xóo cada ñaha cuè ñani tnàhá-yu xii cue tée ní xóo càháⁿ tnúhu Yá Ndiòxí ní xíndecu ndéé sanaha.

24 Te ndàhú ní cuu nchaa ñáyiú cuica ñá túú sàndáá ìní ñáhá xii Yá Ndiòxí, chi vitna ío váha ndécú-yu, dico sáá nduu te nduu ndàhú-yu.

25 Te ndàhú ní cuu tucu nchaa ñáyiú ñá túú tnàhí ná cúmání xii-xi vitna, chi sáá nduu quiní-yu tnúndóho tnúhu ndàhú.

Te ndàhú ní cuu nchaa ñáyiú cudíí ìní-xi ndècu ichi cuehé ichi duha vitna, chi sáá nduu te ndàhyú-yu sá ndihú iní-yu.

26 Te ndàhú ní cuu nchaa ñáyiú na càháⁿ váha ñava-gá ñáyiú cuendá-xi, chi ducaⁿ nǐ xóo càháⁿ váha-yu cuendá nchaa cue tée ní xóo dandàhú ñáhá xii ñáyiú ndéé sanaha, chi ní cachí-güedé sá càháⁿ-güedé tnúhu Yá Ndiòxí te ñá ndàá —càhí-gá xáhaⁿ-gá xii-güedé.

*Cuu iní-ó nchàa ñáyiú cùu úhú iní ñáhá xii-o
(Mt. 5:38-48; 7:12)*

27 Te Jèsús ní xáhaⁿ-gá xii nchaa ñáyiú xíndecu-áⁿ:

—Nchaa nchòhó ñáyiú xíndedóho ñaha càhí tnúhu-í xii-ndo sá cúú ìní-ndó ñáyiú cùu úhú iní ñáhá xii-ndo, te cada-ndo sá váha sá cúú-xi-yu cuèí nándi sá ná cáda ñahá-yu xii-ndo.

28 Te cácáⁿ táhú-ndó núú Yá Ndiòxí cuendá ñáyiú càháⁿ úhú ñáhá xii-ndo, ndihì cuendá ñáyiú tèe ñaha cuèchi neñúú xii-ndo.

29 Te núu ní canihá-yu xii-ndo ìn̄ xito te cuíní tucú-yu canihá-yu, te dañá-ndo na cànihá-yu, àdi núu na quèndeé-yu dóó ndíxí ndòdo-ndo, ndihi dúhnú-ndó, te dañá-ndo na cànehé-yu quíhíⁿ.

30 Te núu xicáⁿ-yu ìn̄ sá nándíhí-yu núú-ndó te cuáñaha-ndo, àdi quèndeé-yu ìn̄ ndachiuⁿ-ndo, te vá nándàcáⁿ-ndó núú-yu.

31 Te nchaa sá vâha cuíní-ndó càda tnahá ñáyiⁿ-ndo, te cada-ndo tnàhá-ndó ndíhí-yu.

32 Chi núu nchòhó ná cùu iní-ndó mèe-ni ñáyiⁿ cùu iní ñáhá xii-ndo, te vá càchí-ndó sã ïo vâha quide-ndo, chi tnàhá nchaa ñáyiⁿ ndècu ichi cuehé ichi duha ducaⁿ xiquidé-yu.

33 Àdi mee-ni ñáyiⁿ quide ñaha sá vâha xii-ndo quide váha-ndó-yu, te vá càchí-ndó sã ïo vâha quide-ndo, chi tnàhá nchaa ñáyiⁿ ndècu ichi cuehé ichi duha ducaⁿ xiquidé-yu.

34 Àdi mee-ni ñáyiⁿ sàni iní-ndó nàcoto ñaha xii-ndo cuáñaha-ndo ìn̄ sá xicáⁿ-yu núú-ndó, te vá cání iní-ndó sã ïo quide váha-ndo, chi tnàhá ñáyiⁿ ndècu ichi cuehé ichi duha dàsaⁿ nuú-yu ìn̄ sá néhé vâha-yu, te ndètu cahnu-ná-yu nacoto ñaha ñáyiⁿ ní sáha núu-yu-áⁿ.

35 Dico nchòhó xíní ñùhu-xi cuu iní-ndó ñáyiⁿ cùu úhú iní ñáhá xii-ndo, te cada-ndo sã vâha sá cúú-xí-yu, te cuáñaha núu-ndo ìn̄ sá ná ndíhí-yu te núu xicáⁿ-yu núú-ndó, te vá cùndètu-ndo nacoto ñahá-yu xii-ndo. Te ducaⁿ te ïo-gá cuehé ñíhí-ndó cùndècu ndíhí-ndo, te cuu ndisa-ndo dèhe Dútú Ndiòxí, chi ïo càhnu iní-gá sá cúú-xí nchaa ñáyiⁿ ñá túú ndàcáⁿ táhú núú-gá cuendá nchaa sá vâha quide-gá, ndihi sá cúú-xí nchaa ñáyiⁿ ndècu ichi cuehé ichi duha.

36 Te cunduu càhnu iní nchòhó tucu dàtná càhnu iní Tátá-ó Dútú Ndiòxí.

*Vá càháⁿ cuèhé-ó cuendá tnàha ñáyiⁿ-o
(Mt. 7:1-5)*

37 Te vá càháⁿ cuèhé-ndó cuendá sá quidé tnàha ñáyiⁿ-ndo, te ducaⁿ te Yá Ndiòxí ñá túú nà tnúhu cúñaha-gã xii-ndo. Te vá cùñaha-ndo xii ñáyiⁿ sá quíhíⁿ-yu ìn̄ xichi núú úhú núú ndàhú ndohó-yu cuendá nchaa sá ñá túú vâha quidé-yu, te ducaⁿ te Yá Ndiòxí vá cùñaha-gã xii-ndo sã tnàhá-ndó quíhíⁿ-ndó ìn̄ xichi núú úhú núú ndàhú ndoho-ndo. Te chí cadá càhnu iní nchaa sá quidé-yu, te ducaⁿ te Yá Ndiòxí cada càhnu iní ñáhá-gã xii-ndo tucu.

38 Te chí cuáñaha xii ñáyiⁿ núu ná cúú sã xíní ñùhú-yu, te dàtná chitu ìn̄ yicá súúni xidó coyo-ná, ducaⁿ tàxi Yá Ndiòxí xii-ndo. Te nánicuáa na càda-ndo cada váha-ndo sã cúú-xí tnàha ñáyiⁿ-ndo, te ñu-ni ducaⁿ càda ñaha Yá Ndiòxí xii-ndo —càchí Jesús xâhaⁿ-gã xii-yu.

39 Te dàtnúni ní cani-gá ìn̄ cuèndú núú-yu nàcuáa tecú tnúni-yu tnúhu-gá, te xâhaⁿ-gã:

—Ìn̄ tée cuáa chi ñá ndácú-dé cuita nehe-dé ñngá tée cuáa, chi núu ducaⁿ na càda-güedé te ndi ndúú-güedé ngaunihnu-güedé déhva.

40 Te ni ìn̄ landú yíhí scuèlá ñá túú cùnuu-gá-güexi dàcúxí mèstrú-güexi, te ndéé núu na cùtúha váha-güexi, te dàtnúni nútñahá-güexi tée dànehé ñáhá xii-güexi.

41 Te na càchí tnúhu-í xii-ndo sã nchaa cuéchi quide ñáyiⁿ cùu-xi datná ìn̄ mihi líhli. ¿Te ná cuendá ndéhé-ndó ìn̄ sá ñá túú vâha quide tnàha ñáyiⁿ-ndo, te mee-ndo vihi-gá quidé-ndó-í? Te sá dúcáⁿ quide-ndo te cada iní-ndó sã

ndéhé-ndó dàtná ìíⁿ mihi líhli ñùhu núú tnàha ñáyiu-ndo, te mee-ndo ñùhu ìíⁿ mihi cahnu-gá núú-ndó.

42 Te núu na nàcanu ichi-ndo tnaha ñáyiu-ndo cuendá sá ñà túú quide váha-yu ndécú-yu te mee-ndo vîhi-gá quidé-ndó ñá, te cada iní-ndó sã xâhaⁿ-ndo xii-yu sá nátava-ndo mihi líhli ñùhu núú-yu, te mihi cahnu ñùhu núú méé-ndó ñà túú quide cuendá-ndó. ;Te sá dúcáⁿ quide-ndo te ío dândahú-ndó mèe-ndo sá quidé ndáá-ndó te ñá ndáá sá quidé ndáá-ndó! Te xini ñuhu-xi díhna-gá daña-ndo nchàa sá ñà túú vâha quide-ndo, te dàtnùní ducaⁿ te cutnùní váha iní-ndó nàcuáa nacanu ichi-ndo tnàha ñáyiu-ndo.

*Ndi dîíⁿ núú yutnu xini-ó nã yutnu cùu-xi cuendá sá sãvidí-xi
(Mt. 7:17-20; 12:34-35)*

43 Te ñá túú ni ìíⁿ yutnu váha te quini-ó cùuⁿ sãvidí sá ñà túú vâha, te ni ìíⁿ yutnu sá ñà túú vâha, te quini-ó cùuⁿ sãvidí váha, chi mee-ni sãvidí sá ñà túú vâha cùuⁿ.

44 Te ndi dîíⁿ núú yutnu xini-ó nã yutnu cùu-xi cuendá sá sãvidí-xi, chi ñá túú xini-ó cùuⁿ ngúxí ìíⁿ tnu ñù, te ni ñà túú xini-ó cùuⁿ ndéhé yoho yàha stilé díquí ìíⁿ yoho yàha cutexínu.

45 Te nchaa ñáyiu váha iní-xi càháⁿ-yu tnúhu váha, chi ñiu-ni tnúhu váha tnàhí-án ñùhú ìní-yu, te nchaa ñáyiu ñá túú vâha iní-xi càháⁿ cuèhé-yu, chi ñiu-ni tnúhu cuèhé tnàhí-án ñùhú ìní-yu, chi nchaa sá ñùhú ìní-yu te xíãⁿ càháⁿ-yu.

*Ííⁿ vehe ndècu cimientú-xi ndihi ìíⁿ vehe ñá túú cimientú-xi
(Mt. 7:24-27)*

46 '¿Te ná cuendá càchí-ndó sã yùhú cùu-í Yaa cúú Xítoho-ndó te ñá túú quide-ndo nchaa nacúaa càháⁿ-í-í?

47 Te na càchí tnúhu-í xii-ndo cuendá ñáyiu tùha ñaha xii-í, chi ñáyiu-án sácúndedóho-yu nchaa tnúhu càháⁿ-í te tñíⁿ-yu.

48 Te ñáyiu-án cúú-yu dàtná ìíⁿ téé ní dácáá ìíⁿ vehe, chi téé-án díhna-gá ní xete-dé ndéé ní tnahá-dé yúú cáxíⁿ te dàtnùní ní tava-dé cimientú-xi, te òré ní cuuⁿ dáú, te ní ndee ndute ñuhu, te ní ndacáⁿ-xi ndéé núú cáá vèhe-án, dico ñá túú ní ndàcu-xi cuido-xi, te ducaⁿ chi téé ní dácáá vèhe-án ní tava-dé cimientú-xi núú yúú cáxíⁿ. Duha sãtnahá-xi cùu nchaa ñáyiu sácúndedóho tnúhu càháⁿ-í te tñíⁿ-yu.

49 Te ñáyiu sácúndedóho tnúhu càháⁿ-í te ñá túú tñíⁿ-yu, ñáyiu-án cúú-yu dàtná ìíⁿ téé ní dácáá ìíⁿ vehe, te ñá túú ní tava-dé cimientú-xi, te òré ní cuuⁿ dáú, te ní ndee ndute ñuhu, te ní ndacáⁿ-xi ndéé núú cáá vèhe-án, te íí-ni ní xido-xi vèhe-án cuendá sá ñà túú ní quène cimientú-xi. Duha sãtnahá-xi cùu nchaa ñáyiu sácúndedóho tnúhu-í te ñá túú cuini-yu tñíⁿ-yu —càchí-gá xâhaⁿ-gá xii-yu.

7

*Jèsús quidé tãtna-gá ìíⁿ téé xínu cuechi núú ìíⁿ téé cùu capitán
(Mt. 8:5-13)*

1 Te sátá ní yáha ní càháⁿ Jèsús ndihi ñáyiu, te cuáháⁿ-gá ñúú Capèrnaúm.

2 Te yàcáⁿ ndécú ìíⁿ téé cùu capitán, te cùhú ìíⁿ téé xínu cuechi núú-dé téé ío-gá cúú ìní-dé, te sa ndècu-ná-dé sá cùú-dé.

³ Te òré ní níhí tée cùu capitáⁿ-áⁿ tnúhu cuèndá Jèsús, te ní tendaha-dě ìⁿ ùú cue tée cùu sacuéhé nùú ñáyíu isràèl cuáháⁿ-güedé cáháⁿ ndàhú-güedé núú-gã nùú vá cùndèe iní-gá quíhíⁿ-gá cada tátna-gá tée xínu cuechi núú-dě-áⁿ.

⁴ Te ní quexìo-güedé núú ndécú Jèsús, te ní ngüita-güedé cáháⁿ ndàhú víhí-güedé núú-gã, te xãhaⁿ-güedé:

—Tée cùu capitáⁿ ní cachí-dé véxi-ndí nùú vá cùndèe iní-n quíhíⁿ-n càda tátna-n ìⁿ tée xínu cuechi núú-dě chi cùhú-dé, te tàù ndisa-n càda-n nacúaá cáháⁿ capitáⁿ-áⁿ,

⁵ chi tée-áⁿ ío cùu iní ñáhá-dě xii nchaa nchúhú ñáyíu isràèl te ñíu-dé ní táuchíúⁿ-dè ní sáá veñúhu-ndí —càchí-güedé xãhaⁿ-güedé xii-gã.

⁶ Te sáta dúcáⁿ te Jèsús ní xica-gá cuáháⁿ-gá ndihí-güedé, te òré tá cùyatni-gá vehe núú ndécú tée cùhú-áⁿ cuáháⁿ, te tée cùu capitáⁿ-áⁿ ní xãhaⁿ-dè xii ìⁿ ùú cue tée cáháⁿ ndihí-dé:

—Quíhíⁿ-ndó cũñaha-ndo xii Yaá cúú Mèstrú sá càchí-í sá ñà túú nã cani iní-gá, chi ñà túú tàù-í sá quíhu-gá ndéé xití vehe-í,

⁷ chi ní sá cùnú ndúcú mèe-í-gá ñà túú ní cùyí-í. Núu xíãⁿ cúñaha-ndo xii-gá sá ná cáháⁿ-ni-gá sá ndúha tée xínu cuechi núú-í-a te ndúha-dé.

⁸ Chi yúhú ndécú cuè tée tàxi tnuní ñáhá xii-í, te ducaⁿ yúhú tucu ndécú cue sandadú táxi tnuní-í. Te òré xãhaⁿ-í xii ìⁿ-dè quíhíⁿ-dè ìⁿ chiuⁿ te cuáháⁿ-dè, te òré xãhaⁿ-í xii ingá-dé quixi-dé te véxi-dé, te òré xãhaⁿ-í xii tée xínu cuechi núú-í cada-dé ìⁿ chiuⁿ te quide-dé. Duha càchí-í cúñaha-ndo xii-gã —càchí-dé xãhaⁿ-dè xii cue tée cáháⁿ ndihí-dé-áⁿ.

⁹ Te sáta dúcáⁿ ní xãhaⁿ-güedé xii Jèsús, te ní cuñúhu-gá nchaa tnúhu ní cáháⁿ tée cùu capitáⁿ-áⁿ, te ní nchócótó-gã núú nchaa ñáyíu nchícúⁿ ñáhá xii-gã cuáháⁿ, te ní xãhaⁿ-gã:

—Na càchí tnúhu ndáá-í xii-ndo sã vátá quini-gá-í ní ìⁿ ñáyíu isràèl, ñáyíu ío váha sãndáá iní-xi Yá Ndiõxí dàtná sãndáá iní ñáhá tée-áⁿ xii-gã —càchí-gã xãhaⁿ-gã xii-yu.

¹⁰ Te òré ní ndexìo cue tée nèhe tnúhu-áⁿ ní sáháⁿ núú Jèsús, te sa ní ndúha tée cùhú-áⁿ.

Jèsús dándòto-gá déhe ìⁿ ñaha quèé

¹¹ Te sáta dúcáⁿ ní cuu te ní xica Jèsús cuáháⁿ-gã ìⁿ ñuú nání Nàin, ndihí cue tée xica cuu ndihí-gã, ndihí vài ñáyíu.

¹² Te òré ní sáá-gã yuhu ñùú-áⁿ, te ní xiní-gã nchídó-güedé ìⁿ ndíyí cuáháⁿ chindúxi ñaha-güedé, te ndíyí-áⁿ cúú déhe ìⁿ ñaha quèé, te ìⁿ ñíu ducaⁿ-ni déhe-aⁿ ndécú ní cuu te ní xihí-dé. Te ío cuéhé ñáyíu cuáháⁿ chindúxi ñaha.

¹³ Te òré ní xiní ñáhá Jèsús xii-aⁿ ndàhyú-aⁿ te ní cundàhú iní ñáhá-gã, te ní xãhaⁿ-gã:

—Vá ndàhyú-n —càchí-gã xãhaⁿ-gã xii-aⁿ.

¹⁴ Te ní dáyátní-gã cãjá ñúhú ndíyí-áⁿ te ní dácàá-gã ndaha-gã te ní tendaha-gã cãjá-áⁿ, te ní ngüñíⁿ cue tée nchìdo ñaha-áⁿ. Te ní xãhaⁿ-gã xii ndíyí-áⁿ:

—Tée cuechi, yúhú càchí-í sá ndácòo-n —càchí-gã xãhaⁿ-gã xii ndíyí-áⁿ.

¹⁵ Te tée ní xihí-áⁿ ní núcùnucóo-dé te ní ngüita-dé cáháⁿ-dè, te Jèsús ní nacúaá cuèndá ñáhá-gã xii-dé ndaha nãná-dè.

¹⁶ Te sá dúcáⁿ ní quide Jèsús ní xiní-yu te ío ní yúhú-yu, te ní xitnàhá-yu:

—Ío cãhnu cuu Yá Ndiõxí chí ìⁿ tée cáháⁿ tnúhu-gã ní quexìo núú ndécú-ó —càchí-yu xitnàhá-yu.

Te ní xítàhà tucú-yu:

—Yá Ndiòxí véxi-gá chindee ñàha-gá xii nchaa nchoo ññyiu cùu cuendá-gá —càchí-yu xítàhá-yu.

¹⁷ Te nchaa ñúú distritú Jùdeá, ndihi dava-gá ñúú ní níhí-yu tnúhu nàcuáa ní quide Jèsús.

Cue téé ní tendaha té Juáá cuáháⁿ núú ndécú Jèsús

(Mt. 11:2-19)

¹⁸ Te cue téé xica cuu ndihi té Juáá ní xáhaⁿ-güedé xii-dé nchaa sá ní quide-gá, núú ní cana-dé úú tnàhá-güedé

¹⁹ cuendá cùñaha-dé quihíⁿ-güedé nducu tnúhu-güedé núú Jèsús, te núú sá díú-gá cúú-gá Cristú Yaá ní tendaha Yá Ndiòxí véxi ñuyúú-a àdi sá cùndètu nahi-ni-güedé mei Yàá-áⁿ.

²⁰ Te òré ní quexìo cue téé ní tendaha tè Juáá núú ndécú Jèsús, te xáhaⁿ-güedé xii-gá:

—Té Juáá téé dàcuandute ñaha xii ñáyiu ní tendaha ñàha-dé xii-ndí véxi-ndí cacaⁿ tnúhú-ndí núú-n, núú sá díú-n cùu Cristú Yaá quixi ñuyúú-a, àdi sá cùndètu-ndí mei Cristú càchí-dé —càchí-güedé xáhaⁿ-güedé xii-gá.

²¹ Te mei òré ní quexìo-güedé-áⁿ ní quide tátna Jèsús vai ñáyiu cùhú, te davá-yu càhú víhí tnàhá-yu, te ndi dííⁿ ndí dííⁿ núú cuèhé tnàhá-yu ìíⁿ ìíⁿ-yu, te cue ñáyiu yìhi ñaha espíritú cùndèhi yucu ñávàha ní queñuhu-gá espíritú-áⁿ yiqui cùñú-yu, te ío vai ñáyiu cuáa ní nacaáⁿ-gá núú-yu.

²² Te Jèsús ní xáhaⁿ-gá xii-güedé:

—Chí cuánùhú te cani-ndo cuèndú núú tè Juáá nchaa sá ní xiní-ndó quide-í, ndihi nchaa nàcuáa ndùu tnúhu ní cáháⁿ-í ní xíndedóho-ndo. Te cùñaha-ndo xii-dé sá quidé tátna-í núú cuè ñáyiu cuáa, te quide tátna-í cue ñáyiu yacua, ndihi cue ñáyiu tnàhá cuèhé sá dátèhyú nihnu-xi yiqui cùñú-yu, ndihi cue ñáyiu doho, nchaa ñáyiu-áⁿ quide tátna-í te ndúha-yu, te ndéé cue ñáyiu sa ní xihí dándòto-í cùñaha-ndo xii-dé, te cùñaha tùcu-ndo xii-dé sá ndécuu-í dánèhé-í nchaa ñáyiu ndàhú tnúhu sá sánú lchi ñaha xii-yu nàcuáa naníhí tànhú-yu.

²³ Te cùñaha tùcu-ndo xii-dé sá ío váha tànhú nchaa ñáyiu ñá túú quide sáá iní nchaa tnúhu càháⁿ-í, duha cùñaha-ndo xii-dé —càchí-gá xáhaⁿ-gá xii-güedé.

²⁴ Te sátá ní yáha-güedé cuánuhú-güedé, te ní ngúíta Jèsús ní cáháⁿ-gá núú ñáyiu cuendá té Juáá, te xáhaⁿ-gá xii-yu:

—Nchòhó ní sándèhé-ndó ìíⁿ téé ndècu xití yucu, te téé-áⁿ ñà túú sàni ìíⁿ sani úú iní-dé, chí ñá túú quide-dé dátna quidé nchaa ité náhnú cuáháⁿ-xi duha cuáháⁿ-xi dàcáⁿ òré quéné táchí.

²⁵ Te ni ñà túú ní sándèhé-ndó ìíⁿ téé nihnu dóó vaha dóó vii càa. Te nchòhó xiní-ndó sá ñáyiu sàcúhnu dóó vaha dóó vii càa ñá túú nã cùmání xii-yu, te nchaa ñáyiu-áⁿ ndécú-yu vehe cue téé cùnuu yindaha ñaha xii ñáyiu.

²⁶ Dico nchòhó chí ní sándèhé-ndó ìíⁿ téé càháⁿ tnúhu Yá Ndiòxí. Te ndáá sá díú téè càháⁿ tnúhu-gá cúú-dé dico cùnuu-gá-dé dàcúúxí dàva-gá cue téé càháⁿ tnúhu-gá.

²⁷ Te díu cuendá té Juáá-áⁿ càháⁿ-xi núú tùtú Yá Ndiòxí nàcuáa ní xáhaⁿ-gá xii Cristú, te duha ní xáhaⁿ-gá:

Tendaha-í ìíⁿ téé cáháⁿ tnúhu-í codonùu-dé núú-n cuendá dátúha-dé ñáyiu cuendá quíndáá iní-yu tnúhu-n.

Duha ní xáhaⁿ-gã, te ducaⁿ ní ngódo tnùní núú tùtù-gá.

²⁸ Te na cächí tnúhu-í xii-ndo sã ní ìⁿ cue téé ñuyíú-a ñá túú cùnūu-güedé dàtná cùnūu té Juáá téé dàcuandute ñaha xii ñáiyu. Te nchaa ñáiyu sa ta ndíhu ndaha ñaha Yá Ndióxi vitna cuáháⁿ cùnūu-gá-ni tucú-yu dàcuúxi tē Juáá cuēi cuú-yu ñáiyu ñá túú cùnūu dacúúxi dàva-gá ñáiyu yìndaha-gá —cächí Jèsús xáhaⁿ-gã xii-yu.

²⁹ Te sã dúcáⁿ ní cáháⁿ Jèsús, núu nchaa ñáiyu ní dácúándute té Juáá ní cachí-yu sã ío váha quide Yá Ndióxi, te diu-ni ducaⁿ ní cáháⁿ cue téé cuihna iní-xi quide cobrá ñáhá xii ñáiyu cuendá impuéstú, cue téé ní dácúándute-dé.

³⁰ Dico cue téé cùu fariséú, ndihi cue téé dàcuaha ñaha xii ñáiyu nchaa tnúhu ní chídó tnùní ndíi Moisés, cue téé ñá túú ní dàcuandute té Juáá ñá túú ní tnàhá iní-güedé cada-güedé nchaa sã váha cuiní Yá Ndióxi.

³¹ Te Xítoho Jescristú ní xáhaⁿ-gã xii-yu:

—Na cächí tnúhu-í xii-ndo nàcuáa sãtnahá-xi cùu ñáiyu ndècu vitna.

³² Chi ñáiyu-áⁿ cùú-yu dàtná cue landú sácõo núú yáhu dàdiqui-güexi te níhi cáháⁿ-güexi, te xitnàha-güexi: “Ní tiú-ndí yaá ndihi vílu te ñá túú ní cuiní-ndó càta-ndo. Te ío yica iní ní xita yuhu-ndí te ñá túú ní ndáhyú-ndó”, cächí-güexi xitnàha-güexi. Te ducaⁿ sãtnahá-xi cùu ñáiyu ndècu vitna.

³³ Te té Juáá téé ní xóo dacuandute ñaha xii ñáiyu ío ndàhú ní xóo caxi-dé, te ní ñá túú ní xóo coho-dé ndudí ndéhé yoho yàha stilé sã sã ní nduu-xi ndidí, te ní cachí-ndó sã ní xíndecu ndihi-dé espíritú cündihi yucu ñávaha.

³⁴ Te sáta ní quexio yúhú Téé cùu ñaní tnáhá-ndó ncháa-ndo, te xèxi-í xihí-í ndècú-í te cächí-ndó sã cùú-í téé xèxi vihi te xihí vihi-í. Te cächí tucu-ndo sã cùú-í téé xica cuu ndihi cue téé cuihna iní-xi quide cobrá ñáhá xii ñáiyu cuendá impuéstú, ndihi nchaa dava-gá cue téé ndècu ichi cuehé ichi duha, duha cächí-ndó.

³⁵ Te ñáiyu ní tnàhá tnúhu ndihi Yá Ndióxi, ñáiyu-áⁿ quidè-yu nàcuáa cutnùní sã méé-gã ío ndècu ndihi-gã sã xini tnùní-gã —cächí-gã xáhaⁿ-gã xii-yu.

Jèsús ndécú-gã vehe ìⁿ téé cùu fariséú téé nàni Xímú

³⁶ Te ìⁿ téé cùu fariséú ní cáháⁿ-dé Jèsús vehe-dé caxi-gã, te òré ní quexio-gã te cuàngihu-gã mèsá.

³⁷ Te xián núcõo-gã ní sáá ìⁿ ñadhí te diu-ni ñaha ñuú-áⁿ cùú-áⁿ, te ndècu-aⁿ ichi díí iní, te sã ní níhí-aⁿ tnúhu sã cuàngaxi Jèsús vehe téé cùu fariséú-áⁿ, núu nèhe-aⁿ ìⁿ yoó chitu àciti sàháⁿ tnámí.

³⁸ Te ní ngóo-aⁿ ìⁿ xio díñi Jèsús, te ní ngúita-aⁿ ndàhyú-aⁿ te ndihi ndute núu-aⁿ ní naquete-aⁿ sáhá-gã. Te dàtnùní ní nadayichí-aⁿ ndihi idi díquí-aⁿ, te ní teyuhu-aⁿ sáhá-gã, te ní chíhi ñaha-aⁿ àciti sàháⁿ tnámí-áⁿ.

³⁹ Te sã dúcáⁿ ní quide-aⁿ ní xini téé cùu fariséú téé ní cáháⁿ ñáhá xii-gá-áⁿ núu ní sani iní-dé: “Te núu dico ndisa téé cáháⁿ tnúhu Yá Ndióxi cùú téé-a ña, te sa cutnùní iní-dé yoo cùu ñaha tnàndéé ñáhá xii-dé, àdi ná ñáiyu cùu-aⁿ, te dico ìⁿ ñaha ndècu ichi díí iní cùú-áⁿ”, duha ní sani iní-dé.

⁴⁰ Te Jèsús ní xáhaⁿ-gã xii-dé:

—Xímú, ndècu ìⁿ tnúhu cachí tnúhu-í xii-n —cächí-gã xáhaⁿ-gã xii-dé.

Te téé cùu fariséú-áⁿ xáhaⁿ-dè xii-gá:

—Cachí tnúhu, Mèstrú —cächí-dé xáhaⁿ-dè xii-gá.

⁴¹ Te Jèsús ní xáhaⁿ-gã:

—Ní xíndecu ìn téé ní xóo dasaⁿ nùu díhúⁿ, te ní xítau úú tñàhá-güedé núú-dě. Te ìn-dé ní sáha-dé úhúⁿ cièndú díhúⁿ denàriú, te ingá-dé ní sáha-dé údico úxí.

42 Te ñá ní ñíhí-güedé nacháhu-güedé núú-dě, te téé ní sánùu ñaha-áⁿ ñi quide càhnu iní-dé ndi ndüü-güedé. Te vitna cachí-ò tucu te núu ndéda cáa-güedé cúú iní ñáhá-gá-güedé xii-dé —càchí-gá xáhaⁿ-gá xii-dé.

43 Te ní xáhaⁿ tẹ Xímú-áⁿ:

—Sànuu sá tée tàù vài-gá díhúⁿ ìo-gá cúú iní-dé téé ní sánùu ñaha díhúⁿ-áⁿ —càchí-dé xáhaⁿ-dẹ xii-gá.

Te ní xáhaⁿ Jèsús:

—Sá ndáà càháⁿ-n —càchí-gá xáhaⁿ-gá xii-dé.

44-46 Te Jèsús ní ndacoto-gá núú ñadihí-áⁿ, te ní xáhaⁿ-gá xii té Xímú-áⁿ:

—¿Ndèhe-n nacuaa quide ñadihí-a ñá? Chi cuánguihu-í vehe-n, dico ñá túú ní tàxi-n ndute ndoo sáhà-í, te ní ñà túú ní tẹyuhu ñaha-n, te ní ñà túú ní chìhi-n acití díquí-í, dico ñadihí-a ní naquete-aⁿ ndihi ndute núú-aⁿ sáhà-í, te ní nadayichí-aⁿ ndihi idi díquí-aⁿ, te nuu núu teyuhu-aⁿ sáhà-í, te ní chìhi-aⁿ acití sáháⁿ tnámí sáhà-í.

47 Te na càchí tñúhu-í xii-n sá ìo cùu iní ñáhá-áⁿ xii-í, te núu xiáⁿ cùtnùni iní-ó sá cuèí ìo vài sá cuèhé sá dúhá ní quide-aⁿ, dico Yá Ndiòxí sa ní quide càhnu iní ñáhá-gá xii-aⁿ. Chi Yá Ndiòxí quidé càhnu iní-gá ñáyiú cuèí vài àdi sacú cuéchi-yu, te núu sacú cuéchi-yu te sacú cúú iní ñáhà-yu xii-í —càchí-gá xáhaⁿ-gá xii-dé.

48 Te ní xáhaⁿ-gá xii ñadihí-áⁿ:

—Sa ní quide càhnu iní-í nchaa cuéchi-n —càchí-gá xáhaⁿ-gá xii-aⁿ.

49 Te cue téé xínucóo ndihi-gá xitnàha-güedé:

—¿Ná téé cùu téé-a núu nándí sá quidé-dě, te ndéé nchaa yíca cuéchi ñáyiú quide cahnu iní-dé-í? —càchí-güedé xitnàha-güedé.

50 Te Jèsús ní xáhaⁿ tucu-gá xii ñadihí-áⁿ:

—Sa ní cácu nihnu-n nùú ùhú núu ndàhú vitna chi ní sándáá iní ñáhá-n xii-í, te vitna cuanùhú te ñá túú-gá ná caní iní-n —càchí-gá xáhaⁿ-gá xii-aⁿ.

8

Ñáyiú dìhí ní chindee ñaha xii Jèsús

1 Te sáta dúcáⁿ ñi cuu te Jèsús ní xica-gá cuáháⁿ-gá titní víhí ñùú náhnú, ndihi ñúú líhli dànehé-gá ñáyiú nàcuáa ndíhu ndaha ñaha Yá Ndiòxí xii-yu. Te cuáháⁿ ndihi-gá ndi ùxúú tñàhá cue téé xica cuu ndihi-gá,

2 ndihi ìn úú ñáyiú dìhí ní quide tátna-gá ní xíhi ñaha espíritú cùndihi yucu ñávàha, ndihi ñáyiú tñàhá dava-gá cuéhé úhú ní cùu. Te xiáⁿ tñàhá tucu ìn ñaha nani Mariá Magdaléná, te ñaha-áⁿ ñi xíhi ñaha úsá espíritú cùndihi yucu ñávàha xii-aⁿ ni cùu, te ní queue ñaha-xi.

3 Te tñàhá ìn ñaha nani Juáná ñadihí ìn téé nani Chúza téé ní cunuu ñi xinu cuechi vèhe té Hèrodés, ndihi ingá ñaha nani Susaná nchaa ñáyiú-áⁿ ñi chindee ñáhá-yu xii-gá ndihi nchaa sá ndécú ndihí-yu, te diu-ni ducaⁿ ñi quide vài-gá tucu ñáyiú nchícúⁿ ñáhá xii-gá cuáháⁿ.

Nàcuáa quide téé cuángacáⁿ trùú

(Mt. 13:1-9; Mr. 4:1-9)

4 Te ìo vài ñáyiú ndaa ñúú ní tacá-yu núú ndécú Jèsús, te ní ngúita-gá ní caní-gá ìn cuèndú núú-yu cuèndá tecú tñuní-yu tñúhu-gá, te xáhaⁿ-gá xii-yu:

5 —Híⁿ téé cuángacáⁿ-dé triú. Te òré ní ngúíta-dé dǎngoyo-dé triú-áⁿ te dava ní quene ndava ní ngava ndéé ichi, te ní xénihnu ñáyiú, te ní xiní tǐlaá te ní nadatàcá-güedi.

6 Te dava ní ngava ñuhu yadi núú yíhí vihi yúú, te ní xínu-xi dico núú sàcú-ni nduu te ní yíchí-xi, chi ñá túú cǒhyo yíhi.

7 Te dava ní ngava núú yúcu ndíquíⁿ tnu iñu, te híⁿnuu-ni ní xínu-xi ndíhi tnu iñu-áⁿ, te tnu iñu-áⁿ ní dánáá-xí nchàa triú sá ní xínu-áⁿ.

8 Dico dava triú-áⁿ ní ngava-xi núú ndécú ñuhu cocoⁿ, te xǎⁿ ní xínu-xi te ní sahnú-xi, te ío váha ní cuu, chi núú híⁿ-ní triú te ní nguíhi yoco-xi híⁿ cièndú triú-xi —càchí-gá xáhaⁿ-gá xíi-yu.

Te níhi ní cáháⁿ-gá ní xáhaⁿ tùcu-gá xíi-yu:

—Nchaa nchòhó ñáyiú ní xíndedóho tnúhu ní cáháⁿ-í-a, te ío váha chí cuáha cuèndá —càchí-gá xáhaⁿ-gá xíi-yu.

Nàcuáa quèe-xi tnúhu ní cáháⁿ Jèsús

(Mt. 13:10-17; Mr. 4:10-12)

9 Te cue téé xìca cuu ndíhi Jèsús ní xícáⁿ tnúhú-güedě núú-gǎ núu nása quèe-xi cuèndú ní caní-gá núú ñáyiú.

10 Te ní xáhaⁿ-gá xii-güedé:

—Nchòhó chí sa càchí tnúhu Yá Ndióxi xii-ndo híⁿ sá vǎtǎ quíní-gá-ndó, chí càchí tnúhu-gá nàcuáa cada-gá ndíhu ndaha-gá ñáyiú, dico dava-gá ñáyiú càni-í mee-ni cuèndú núú-yu, chí cuéi na quíní-yu nchaa nàcuáa cuu dico ní vá cútñuní iní-yu ná cuèndá ducaⁿ cùu, àdi cuéi na cùndedóho-yu dico ní vá tècu tnùní-yu —càchí-gá xáhaⁿ-gá xii-güedé.

Jèsús càháⁿ-gá nàcuáa quèe-xi tnúhu cuèndá téé cuángacáⁿ triú

(Mt. 13:18-23; Mr. 4:13-20)

11 Te xáhaⁿ tùcu-gá xii-güedé:

—Duha quèe-xi cuèndú ní caní-í núú-ndó, chí triú ní sacáⁿ téé-áⁿ cúú-xí dàtná tnúhu Yá Ndióxi.

12 Te triú sá ní quene ndava ní ngava ndéé ichi-áⁿ, xǎⁿ cúú-xí dàtná ñáyiú ní quèe iní-xi tnúhu Yá Ndióxi, dico sácúíhná cuáháⁿ-xi xòcani-xi tnúhu-gá iní-yu cuèndá sá vǎ quíndáá iní-yu, te vá nánihí tǎhú-yu.

13 Te triú sá ní ngava ñuhu yadi núú yíhí vihi yúú, xǎⁿ cúú-xí dàtná ñáyiú ní xíndedóho tnúhu Yá Ndióxi te díí iní ní tñíⁿ-yu tnúhu-gá, dico òré ná dàcáháⁿ ñáhá yùcu ñáváha xíi-yu nándi cadá-yu, te dàña nihnú-yu tnúhu-gá chí ñá nihí ndéé-yu canchicúⁿ nihnú-yu nàcuáa càháⁿ tnúhu-gá.

14 Te triú sá ní ngava núú yúcu ndíquíⁿ tnu iñu-áⁿ, xǎⁿ cúú-xí dàtná ñáyiú ní tecú dóho-xi tnúhu Yá Ndióxi, dico cuèé cuèé ní nacuaaná-yu tnúhu-gá, chí cuèndá mee-ni sá cúú-xí mèe-yu ñuhu iní-yu, ndíhi cuèndá sá ío sàni iní-yu cuu cuicá-yu, ndíhi cuèndá sá ío cùdíí iní-yu nchaa sá ío ñuyíú-a núu xǎⁿ àúⁿ nǎ cuu ní xíndedóho-yu tnúhu-gá.

15 Dico triú sá ní ngava núú ndécú ñuhu cocoⁿ, xǎⁿ cúú-xí dàtná ñáyiú váha iní-xi ní xíndedóho tnúhu Yá Ndióxi chí ñá túú dàña nihnú-yu, te ní yùhu ní iní-yu quidé-yu nchaa nàcuáa càháⁿ tnúhu-gá.

Nàcuáa quidé-yu iti

(Mr. 4:21-25)

16 "Te ñá túú nì ìⁿ ñáyiú tèñuhú-yu ìⁿ iti te dàdáhu-yu, àdi chiváha-yu ìⁿ caha cãmá, chí tàxi ndecú-yu núú ññu cuèndá cutnùnì núú nchàa ñáyiú ndècu vehe.

17 Te nì ìⁿ tnúhu sá ñǎ tècú tnùnì ñáyiú vitna vá càchí-ó sǎ vǎ tècú tnùnì-yu chí dacuèí sá tècú tnùnì-yu, te nì ìⁿ tnúhu sá càchí-ó cùu yuhu vitna vá cúú yùhu chí dacuítí sǎ quée túu-xi núú ñáyiú.

18 "Te chí cùndèdóho váha tnúhu na càháⁿ-í-a. Nchaa ñáyiú sàndáá iní ñáhá xii Yá Ndiòxí ío-gá cuita quindáá-gá iní ñáhá-yu xii-gá quíhíⁿ, te nchaa ñáyiú ñá túú sàndáá iní ñáhá xii-gá uuⁿ-gá cuita cuu sáa-gá iní-yu núú-gǎ quíhíⁿ — càchí-gá xáhaⁿ-gǎ xii-güedé.

Cue ñani Jèsús ndihi nǎná-gǎ
(Mt. 12:46-50; Mr. 3:31-35)

19 Te ní quexio náná Jèsús ndihi cue ñani-gá vehe núú ndécú-gǎ, te ñá ndácú-yu càháⁿ ndihi ñáhá-yu xii-gá chí ío cuéhé ñáyiú ndècu núú ndécú-gǎ.

20 Te ìⁿ ñáyiú x̄ndecu-áⁿ ní dáyáha-yu tnúhu núú-gǎ, te xǎhǎⁿ-yu:

—Ní quexio náná-n ndihi cue ñani-n x̄nutn̄iⁿ-yu quehé, te cuínì-yu càháⁿ ndihi ñáhá-yu xii-n —càchí-yu xǎhǎⁿ-yu xii-gǎ.

21 Te ní xáhaⁿ-gǎ:

—Nchaa ñáyiú sácùndedóho tnúhu Yá Ndiòxí te quidé-yu nchaa nàcuáa càháⁿ tnúhu-gǎ, ñáyiú-áⁿ cúú-yu dàtná nǎná-í ndihi dàtná cue ñani-í —càchí-gá xáhaⁿ-gǎ xii ñáyiú ní dáyáha tnúhu núú-gǎ-áⁿ.

Jèsús ngání-gǎ táchí ndihi ndute làgúná
(Mt. 8:23-27; Mr. 4:35-41)

22 Te ìⁿ nduu ní quée Jèsús bàrcú ndihi cue téé xica cuu ndihi-gá, te ní xáhaⁿ-gǎ:

—Chí ná quíhíⁿ-ó ndàa ingá xio yuhu làgúná —càchí-gá xáhaⁿ-gǎ xii-güedé.

Te cuáháⁿ-güedé ndihi-gǎ.

23 Te ñini ñùhu bàrcú ichi cuáháⁿ-xi núú ndute ní xidí Jèsús. Te ní ngúita-xi níhi vihi quene táchí te ta nàdachitú-xi ndute xití bàrcú-áⁿ cuáháⁿ, te sa cuínì-nǎ-xi quée naa bàrcú-áⁿ xití ndute ni cùu.

24 Te ní sáháⁿ-güedé núú cáá Jèsús xidí-gá, te ní xáhaⁿ-güedé xii-gǎ:

—¡Mèstrú, ndiquíú iní chí tà quée naa-o cuáháⁿ! —càchí-güedé xáhaⁿ-güedé xii-gǎ.

Te Jèsús ní ndiquíú iní-gá te ní ndacóo-gá te ní tenáa-gá táchí-áⁿ ndihi ndute làgúná-áⁿ, te ní ngúíñi-ni táchí-áⁿ te ní nucùndecu nahi-nǎ ndute làgúná-áⁿ.

25 Te ní xáhaⁿ-gǎ xii-güedé:

—¿Náa ñá túú sàndáá iní ñáhá ndisa-ndo xii-í ǎⁿ? —càchí-gá xáhaⁿ-gǎ xii-güedé.

Te ní cuúhu-güedé sá dúcáⁿ ní quide-gá ní xiní-güedé, te ní yùhú-güedé, te ní xitnàha-güedé:

—¿Te ná téé cùu téé-a núú ní càháⁿ-ni-dé te ní ngúíñi táchí te ní nucùndecu nahi-ni ndute làgúná-a-í? —càchí-güedé xitnàha-güedé.

Tée yìhi ñaha cue espíritú cùndihi yucu ñávaha
(Mt. 8:28-34; Mr. 5:1-20)

26 Te ní sáa-gá ndihi-güedé yucu cue téé ñuú Gàdará, te yìhi ndáa-ni ndàa ingá xio làgúná-áⁿ cáá distritú Galilea.

27 Te òré ní quene Jèsús xití bàrcú te ní dáyátní ñàha ìṣṣ tée ñuú-án xii-gá, te yìhí ñàha titní espíritú cùndìhí yucu ñávàha xii-dé. Te ní cunaha ñà túú-gá sácùnhu-dé dóó-dé, te ní ñà túú-gá sácùndecu-dé vehe-dé, chi da nchaa núú yíndùxi ndíyí quide vehe-dé.

28 Te òré ní xiní-dé Jèsús te ní ngúíñí xítí-dé núú-gá, te cue espíritú yìhí ñàha xii-dé-án ní quide-xi níhí ní cáháⁿ-dé, te xàhaⁿ-dè xii-gá:

—¿Ná cuendá véxi-ò Jèsús Déhe Dútú Ndiòxí sàdì-n ìchi-í-í? Te cáháⁿ ndàhú-í núú-n sá và dándòho ñàha-n xii-í —càchí-dé xàhaⁿ-dè xii-gá.

29 Te ducaⁿ ní cáháⁿ-dé cuendá sá Jèsús ní xàhaⁿ-gá xii nchaa espíritú cùndìhí yucu ñávàha yìhí ñàha sá ná quèe ñàha-xi xii-dé. Te nchaa xiáⁿ ní xóo dacáháⁿ-xi iní-dé nándí sá ní xóo cada-dé núu ní xóo dacùtu ñàha-güedé cadená xii-dé cuendá sá ñà túú-gá ná cada-dé, te ní xóo cundee ñàhá-güedé, dico cuèi ducaⁿ dico ní xóo dandáva-ni-dé cadená, te cue espíritú cùndìhí yucu ñávàha-án ní xóo dacùnu ñàha-xi xii-dé ní xóo quíhíⁿ-dé xití yucu.

30 Te Jèsús ní xícáⁿ tnúhú-gá núú-dé, te xàhaⁿ-gá:

—¿Nása nàni-n-í? —cachí-gá xàhaⁿ-gá.

Te ní xàhaⁿ-dè:

—Vài Sandadú nàni-í —càchí-dé xàhaⁿ-dè xii-gá.

Te ducaⁿ ní xàhaⁿ-dè xii-gá cuendá sá ìo cuéhé espíritú cùndìhí yucu ñávàha yìhí ñàha xii-dé.

31 Te nchaa espíritú-án ní cáháⁿ ndàhú-xi núú Jèsús sá và téndàha ñàha-gá xii-xi quíhíⁿ-xi núú ùhú núú ndàhú.

32 Te diu-ni yatni yucu núú ndécú Jèsús-án yìhí vài cuchí xìxexi-güedi, te nchaa espíritú-án ní cáháⁿ ndàhú-xi núú-gá sá ná dàña-gá quíhu-xi yìyì cuñú nchaa cùchí-án, te Jèsús ní xàhaⁿ-gá sá cúu quíhu-xi yìyì cuñú-güedi.

33 Te ní quee ñàha nchaa espíritú-án xii tée-án, te ní quíhu-xi nchaa cùchí-án, te cùchí-án ní xinu-güedi duha ní quée-güedi ndaa núú dèhvá yuhu làgúná-án, te ní ngaunihnu-güedi xití ndute te ní ndihi-güedi ní cáhá.

34 Te òré ní xiní cue tée xito cuchí-án nàcuáa ní cuu te ní yùhú-güedé ní xinu-güedé, te ní sáháⁿ-güedé ní caní-güedé cuendú núú cuè ñáyíu ndècu xití ñuú, ndihí núú cuè ñáyíu ndècu xití yucu.

35 Te nchaa ñáyíu ní níhí tnúhu ní queé-yu cuáháⁿ ndèhè-yu nàcuáa ní cuu. Te òré ní quexió-yu núú ndécú Jèsús, te ní xiní-yu tée ní xíhí ñàha cuè espíritú cùndìhí yucu ñávàha-án núcòo-dé núú sàhá Jèsús, te ñihnu-ná-dé dóó-dé, te núcòo-dé dàtná ìṣṣ ñáyíu váha, te ní yùhú-yu òré ní xiní ñàhá-yu xii-dé.

36 Te nchaa ñáyíu ní xiní nàcuáa ní cuu ní ndúha tée yìhí ñàha cue espíritú cùndìhí yucu ñávàha-án ní cùu ní caní-yu cuendú núú nchaa ñáyíu ní quexio-án nàcuáa ní cuu ní ndúha tée-án ndihí nàcuáa ní cuu cuendá nchaa cùchí-án.

37 Te sá dúcáⁿ ní níhí-yu tnúhu nàcuáa ní cuu, núu nchaa ñáyíu ñuú Gàdará ìo ní yùhú-yu te ní ngúíta-yu cáháⁿ ndàhú-yu núú Jèsús sá ná nùhú-gá núu ndèé ìchi véxi-gá. Te sá dúcáⁿ ní cáháⁿ-yu núu cuáháⁿ-gá núú ndécú bàrcú. Te òré ndée-gá bàrcú-án nùhú-gá

38 ní ngúíta tée ní xíhí ñàha cuè espíritú cùndìhí yucu ñávàha cáháⁿ ndàhú-dé núú-gá núu và cùndèe iní-gá quíhíⁿ ndihí ñàha-gá xii-dé, dico Jèsús ní quide ndee iní ñàhá-ni-gá xii-dé, te ní xàhaⁿ-gá:

39 —Cuanùhú vehe-n, te cani-n cuèndú núú nchàa ñáiyu sá ïo càhnu cuu nchaa sá vâha ní quide ñaha Yã Ndiõxí xii-n —càchí-gá xáhaⁿ-gã xii-dé.

Te téé-áⁿ ní xica-dé cuánuhú-dé te ní ngúíta-dé ní cani-dé cuèndú núú nchàa ñáiyu xĩndecu nihí ñúú sá ïo càhnu cuu nchaa sá vâha ní quide ñaha Jèsús xii-dé.

Cuèndá déhe yoco tẽ Jàirú, ndihí cuèndá ìⁿ ñadìhí ní tnándeé dóó Jèsús (Mt. 9:18-26; Mr. 5:21-43)

40 Te òré ní ndexìo Jèsús ndàa ingá xio yuhu làgúná, te ñáiyu xĩndecu xiáⁿ sa ndètu cahnu ñaha-ná-yu, te ïo vâha ní cãháⁿ ndihí ñahá-yu xii-gá òré ní nasáá-gá.

41 Te ìⁿ téé tàxi tunní veñúhu ní quexìo-dé núú ndécú Jèsús, te téé-áⁿ nání-dẽ Jàirú, te ní ngúíñí xítí-dẽ núú-gã càháⁿ ndàhú-dé, te xáhaⁿ-dẽ xii-gá:

—Véxi-í càháⁿ ndàhú-í núú-n nõu vá cùndèe iní-n quíhíⁿ-ó vehe-í cada tátna-n déhe yoco-í —càchí-dé xáhaⁿ-dẽ xii-gá.

42 Te ducaⁿ ñí xáhaⁿ-dẽ chi ndècu ìⁿ dii-ní déhe yoco-dẽ, te ndècu-xi datná úxúú cuíá-xi, te càhú víhí tnáhá-xi cùhú-xi te cuíní-xi cuú-xi. Te Jèsús ní xica-gá cuáháⁿ-gá ndihí téé-áⁿ, te ïo vâi ñáiyu nchìcúⁿ ñahá xii-gá cuáháⁿ, te dàdehnde ñaha-ná-yu xii-gá ní cùu.

43 Te tnuú nchaa ñáiyu-áⁿ ñútnàhá ìⁿ ñaha cùhú, te ñaha-áⁿ sà ní cuu úxúú cuíá sã cùhú-aⁿ ngòyo ñaha níñí xii-aⁿ, te ïo cuéhé díhúⁿ ní cuu dândoñuhu-aⁿ chi ní nadico-aⁿ nchàa sá ndécú ndihí-aⁿ cuendá ní níhí-aⁿ díhúⁿ ñí queheⁿ nchaa ñáiyu ní quide tátna ñaha xii-aⁿ, dico ní ìⁿ-yu ñá túú ní ndácú-yu ndúha-aⁿ.

44 Te ní sáháⁿ ndehe yatni-aⁿ ndàa sátá Jèsús, te ní tnándeé-aⁿ luha yuhu dóó-gã te òré-ni-áⁿ ñí ndúha-aⁿ.

45 Te Jèsús ní xicáⁿ tnúhú-gã núñ-yu, te xáhaⁿ-gã:

—¿Ndédacãa-ndo ní tnándeé ñahá xii-í? —càchí-gá xáhaⁿ-gã xii-yu.

Te nchaa-yu ní xáhã-yu sá ní ìⁿ-yu ñá túú ní tnándeé ñahá xii-gá. Te té Pèlú ndihí cue téé cùndihí-dé ní xáhaⁿ-güedẽ xii-gá:

—Mèstrú, ndèhe-n sá vái ñáiyu nchìcúⁿ ñahá xii-n, te xio xio dàdehnde ñahá-yu, te xicáⁿ tnúhú-gã-n yòo ní tnándeé ñahá xii-n —cachí-güedẽ xáhaⁿ-güedẽ xii-gá.

46 Dico Jèsús ní xáhaⁿ-gã xii-yu:

—Dico diu ìⁿ-ndo ní tnándeé ñahá xii-í, chi ní cutnùní iní-í sã ìⁿ ñáiyu cùhú ní tnándeé ñahá xii-í te ní ndúha-yu —càchí-gá xáhaⁿ-gã xii-yu.

47 Te sátá ñí xiní ñaha-áⁿ sã ñí cutnùní iní Jèsús sá ní tnándeé ñahá-áⁿ xii-gá, te yùhú yùhú-aⁿ ní sáhá-aⁿ ní ngúíñí xítí-áⁿ núú-gã, te ní náhmá-aⁿ núú-gã, ndihí núú nchàa ñáiyu ná cuèndá ducaⁿ ñí quide-aⁿ ní tnándeé-aⁿ-gã, ndihí cuèndá sá òré-ni-áⁿ ñí ndúha-aⁿ.

48 Te Jèsús ní xáhaⁿ-gã xii-aⁿ:

—Yòhó ñaha cùhú, ní sándáá iní ñahá-n xii-í nõu ní ndúha-n, te cuanùhú vitna te ñá túú-gã ná cani iní-n —càchí-gá xáhaⁿ-gã xii-aⁿ.

49 Te càháⁿ dúcáⁿ-ní Jèsús ní sáá ìⁿ téé xìnu cuechí vehe tẽ Jàirú téé tàxi tunní veñúhu, te xáhaⁿ tẽe xìnu cuechí-áⁿ xii-dé:

—Sa ní xihí déhe-n, vá chíchiuⁿ-gã-n Mèstrú —càchí-dé xáhaⁿ-dẽ.

50 Te sá dúcáⁿ xáhaⁿ tẽe xìnu cuechí-áⁿ xii tẽ Jàirú ní tecú dóho Jèsús, núu ní xáhaⁿ-gã xii-dé:

—Vá ndihú iní-n, quindáá iní ñáhá-ní-n xii-í te ndúha déhe-n —càchí-gá xáhaⁿ-gã xii-dé.

51 Te òré ní saá-gá vehe té Jàirú te ñá ní dàña-gá quíhu ñáyiú cùtexínu, núu té Pèlù-ni ndihi té Jàcobó-ni, ndihi té Juàá-ni, ndihi tâtá ndihi náná-ni xíchí ní xíhí-áⁿ cuãnguíhu ndihi-gá xití vehe.

52 Te nchaa ñáyiú sa xindecu vehe-dé-áⁿ xindáhyú-yu sá ndihú iní-yu cuèndá sá ní xíhí-xi. Te Jèsús ní xáhaⁿ-gã xii-yu:

—Vá ndàhyú-ndó, chi dicó-ni xidí-xi ñá túú ní xíhí-xi —càchí-gá xáhaⁿ-gã xii-yu.

53 Te ní sácú ndeé ñáhã-yu xii-gá, chi sá cúú-xí mèè-yu chi ní xíhí ndisa xíchí-ãⁿ.

54 Te Jèsús ní tñi-gá ndaha xíchí ní xíhí-áⁿ, te níhi ní cáháⁿ-gá, te xáhaⁿ-gã:

—Xíchí cuéchí, ndacóo —càchí-gá xáhaⁿ-gã.

55 Te xíchí-ãⁿ ní ndoto-xi, te òré-ni ní ndacóo-xi, te Jèsús ní xáhaⁿ-gã sá ná cuãñáhã-yu sá cáxí-xí.

56 Te tâtá-xi ndihi náná-xi súúni ní cuñúhu-yu sá dúcáⁿ ní dándótó ñàha Jèsús xii-xi, te ní xáhaⁿ-gã xii-yu sá vã yõo ñⁿ cuñáhã-yu sá dúcáⁿ ní quide-gá.

9

Jèsús téndàha-gá ndi ùxúú cue téé xica cuu ndihi-gá quíhíⁿ-güedé cáháⁿ-güedé tñúhu-gá

(Mt. 10:5-15; Mr. 6:7-13)

1 Te Jèsús ní cana-gá ndi ùxúú cue téé xica cuu ndihi-gá, te ní sáñaha-gã xii-güedé tñúhu ndee iní cundecu ndihi-güedé cuèndá queñuhu-güedé nchaa espíritú cündihi yucu ñávàha yihi ñaha xii ñáyiú, ndihi cuèndá sá cádá tâtna-güedé nchaa ñáyiú cùhú.

2 Te ní xáhaⁿ-gã xii-güedé sá quíhíⁿ-güedé danèhé-güedé ñáyiú nàcuáa cada Yá Ndióxí ndíhu ndaha ñàha-gá xii-yu, te ducaⁿ càda tâtna-güedé cue ñáyiú cùhú.

3 Te cùmání-gã caca-güedé quíhíⁿ-güedé, te ní xáhaⁿ-gã xii-güedé:

—Ñá túú tñàhí ná canehe-ndo cùu ichi-ndo, ni tâtnu, ni ñùnu, ni sã cáxí-ndó, ni díhú. Te ni vã cánèhe-ndo ingá ichi dóó-ndó, chi diu-ni dóó níhñú-ndó-ãⁿ xiãⁿ tñàhí-ni.

4 Te ndédani càa vehe na saá-ndó, te xíáⁿ cundecu-ndo ndèè ná sàà nduu ndèe-ndo.

5 Te núu ñá túú cuíní-yu queheⁿ cuèndá ñáhã-yu xii-ndo, te ndee-ndo ñùú-áⁿ, te naquidi-ndo tìcá chùhmá ní tñi sáhá-ndó cuèndá sá ná cùtnuni iní-yu sá ñá túú quide váha-yu —càchí-gá xáhaⁿ-gã xii-güedé.

6 Te sátá dúcáⁿ ní xáhaⁿ Jèsús xii-güedé, te ní quee-güedé cuáháⁿ-güedé nchaa ñuú dácuaà-güedé ñáyiú tñúhu Yá Ndióxí, tñúhu sá cáháⁿ nàcuáa naníhí tãhú-yu, te ducaⁿ ta quide tâtna-güedé nchaa ñáyiú cùhú cuáháⁿ.

Nàcuáa ní cuu ní xíhí té Juàá téé dácuaandute ñaha xii ñáyiú

(Mt. 14:1-12; Mr. 6:14-29)

7 Te té Hèrodés téé cùu gobiernú ní níhí-dé tñúhu nchaa nàcuáa quide Jèsús, te quíyuhú iní-dé te sàni iní-dé yoo cùu-gá. Te ducaⁿ ní sani iní-dé chi dava ñáyiú càchí-yu sá tã Juàá téé ní xóo dácuaandute ñaha xii ñáyiú ní ndoto cùu-gá.

8 Te davá-yu càchí-yu sá tã Èliás cúú-gã, te davá-yu càchí-yu sá ñⁿ téé ní xóo cáháⁿ tñúhu Yá Ndióxí ndéé sanaha vihi ní ndoto cùu-gá, càchí-yu.

9 Dico té Hèrodés ní cachí-dé:

—Yúhú ní táuchíùⁿ-í ní xehndé-güedé díquí tē Juáá. ¿Te yoo cùu tée dii cuèndú-xi nihí-a sá sùúni cuèhé núú sã quidé-dě váin? —duha ní cachí-dé.

Te té Hèrodés ndúcú-dě nàcuáa cada-dé cuèndá quini-dé Jèsús.

Jèsús dácaxi-gá úhúⁿ mĩl cue tée te d̃h̃ⁿ ñáyiú d̃h̃ⁱ nd̃h̃ⁱ landú

(Mt. 14:13-21; Mr. 6:30-44; Jn. 6:1-14)

10 Te nchaa cue tée ní táuchíùⁿ Jèsús cuáháⁿ cáháⁿ tnúhu Yá Ndiòxí núú ñáyiú ní ndexio-güedé núú-gã te ní ngúita-güedé nácani tnúhu-güedé nchaa nàcuáa ní quide-güedé. Te dātnùni ní xica-gã medii-ni-gã ndécã ñaha-gã xii-güedé cuáháⁿ ìⁿ xichi núú ñà túú ñáyiú ndècu, yatni núú cáá ñuú Bètsaidá.

11 Dico òrè ní nihí ñáyiú tnúhu sá cuáháⁿ Jèsús, te nchicúⁿ-yu-gã cuáháⁿ, te òrè ní quexió-yu núú-gã, te ní queheⁿ cuèndá ñáhá-gã xii-yu, te ní dánèhè ñáhá-gã xii-yu nàcuáa nd̃h̃ⁱu ndaha ñaha Yá Ndiòxí xii-yu, te ní quide tátna-gã nchaa ñáyiú cùhú.

12 Te òrè sa ní cuaa te ní nataká ndi ùxúú cue tée xica cuu nd̃h̃ⁱ-gã núú-gã, te ní xáhaⁿ-güedé xii-gã:

—Sa ní cuu dandāca-n nchaa ñáyiú-a, chi sa ní cuaa, te na quihíⁿ-yu nchaa vehe cáa yatni iha, nd̃h̃ⁱ nchaa xití ñuú cáá yatni iha cuaáⁿ-yu sá cáxi-yu, te d̃i^u-ni yácáⁿ ndetatú-yu, chi núú ndécú-ó ìha ñã túú tnàhí ná íó —càchí-güedé xáhaⁿ-güedé xii-gã.

13 Te Jèsús ní xáhaⁿ-gã xii-güedé:

—Mee-ndo chí cuñaha sã ná cáxi-yu —càchí-gã xáhaⁿ-gã xii-güedé.

Te ní xáhaⁿ-güedé xii-gã:

—Ñã túú nãgã ndécú nd̃h̃ⁱ-ndí, chí úhúⁿ duha-ná pàá, nd̃h̃ⁱ úú-nã chácá ndécú nd̃h̃ⁱ-ndí, te d̃i^u-ni núú quihíⁿ-ndí cuaaⁿ-ndí sá cáxi-yu —càchí-güedé xáhaⁿ-güedé xii-gã.

14 Te x̃inu dātná úhúⁿ mĩl mee-ni cuè tée, te d̃h̃ⁿ ñáyiú d̃h̃ⁱ nd̃h̃ⁱ landú. Te Jèsús ní xáhaⁿ-gã xii cue tée xica cuu nd̃h̃ⁱ-gã:

—Chí cūñaha na ngõ ndi údico úxí ndi údico úxí-yu ìⁿ ìⁿ xichi —càchí-gã xáhaⁿ-gã xii-güedé.

15 Te ducaⁿ ní quide-güedé, te ní ngóo-yu ncháá-yu.

16 Te dātnùni ní queheⁿ-gã ndi ùhúⁿ pàá-áⁿ, nd̃h̃ⁱ ndi nduú chácá-áⁿ. Te ní ndacoto-gã andi, te ní ndacáⁿ táhú-gã núú Yá Ndiòxí, te dātnùni ní táhú cuèchi-gã pàá-áⁿ nd̃h̃ⁱ chácá-áⁿ, te ní sáha-gã nchaa cue tée xica cuu nd̃h̃ⁱ-gã ní dácãh̃^{ñu} ñaha-güedé xii-yu.

17 Te ncháá-yu ní xexi-yu ní ndahá xití-yu. Te sátá ní túhú cóhõ-yu te ní nadatácá-güedé nchaa sã ní quendóo, te ní chítú ùxúú tnàhá tídihi mee-ni sã ní quendóo.

Té Pèlú xáhaⁿ-dē xii Jèsús sá d̃i^u-gã cúu-gã Crísti

(Mt. 16:13-19; Mr. 8:27-29)

18 Te ìⁿ nduu ndècu mee Jèsús nd̃h̃ⁱ cue tée xica cuu nd̃h̃ⁱ-gã, te càháⁿ nd̃h̃ⁱ-gã Yá Ndiòxí, te sátá ní yáha ní cáháⁿ nd̃h̃ⁱ-gã Yá Ndiòxí, te ní xicáⁿ tnúhú-gã núú-güedé, te xáhaⁿ-gã xii-güedé:

—¿Yoo cùu yúhú cáchí ñáyiú-va? —càchí-gã xáhaⁿ-gã xii-güedé.

19 Te ní xáhaⁿ-güedé xii-gã:

—Davá-yu càchí-yu sá cúu-n nd̃iⁱ Juáá tée ní xóo dacuàndute ñaha xii ñáyiú, te davá-yu càchí-yu sá cúu-n tē Èliás, te davá-yu càchí-yu sá ìⁿ tée ní xóo cáháⁿ

tnúhu Yá Ndiöxí ndéé sanaha nĩ ndoto cùu-n, duha càchì-yu —càchì-güedé xáhaⁿ-güedé xii-gá.

²⁰ Te ní xícáⁿ tnúhú tucu-gá núú-güedé, te xáhaⁿ-gá xii-güedé:

—Te nchòhó, ¿yoo sàni iní-ndó cùu-í-í? —càchì-gá xáhaⁿ-gá xii-güedé.

Te té Pèlú ní xáhaⁿ-dě xii-gá:

—Yòhó cúu-n Crìstú Déhe Dútú Ndiöxí —càchì-dé xáhaⁿ-dě xii-gá.

Jèsús càháⁿ-gá sá cáhni ñaha-güedé xii-gá

(Mt. 16:20-28; Mr. 8:30-9:1)

²¹ Te ní xáhaⁿ-gá xii-güedé sá vǎ yòo ìⁿ cúñaha-güedé yoo cùu-gá.

²² Te ní xáhaⁿ-gá xii-güedé:

—Yúhú Tée cùu ñani tnáhá-ndó nchàa-ndo ío cuéhé sǎ ndóhò-í, chi daquèe tǐhú ñáhá cuè tée cùu sacuéhé núú ñáyiu isràél, ndihì cue dútú cùnù, ndihì cue tée dàcuaha ñaha xii ñáyiu nchaa tnúhu ní chídó tnùnì ndíi Moisés, te sáá nduu te cahni ñaha-güedé xii-í, dico nduu únì sá cùu-í te ndoto-í —càchì-gá xáhaⁿ-gá xii-güedé.

²³ Te dàtnùnì ní xáhaⁿ-gá xii nchaa ñáyiu:

—Nchaa ñáyiu cuinì chitnahá ñáhá xii-í, te xini ñuhu-xi vǎ cáda-gǎ-yu sá sání iní mǎe-yu, te ìⁿ nduu ìⁿ nduu cada ndee iní-yu cundecu túha-yu ndohó-yu cuèndá-í, te cuèi na ndòhó-yu dàtná ndoho-í.

²⁴ Te nchaa ñáyiu cuinì sǎ ñà túú tnàhí ná yáha cundecu ñuyúú-a cuíta nihnú-yu. Dico nchaa ñáyiu ñá túú yùhú cuèi nándi sǎ ná yǎha-yu cundecú-yu ñuyúú-a sǎ cuèndá-í, te ñáyiu-áⁿ naníhí tǎhú-yu.

²⁵ Te cuèi nchaandi túhú sǎ ío ñuyúú-a na nihí ñáyiu cundecu ndihí-yu, dico núu ñiu nchaa xǎⁿ ná cáda cuíta nihnú-yu te ñá túú vǎdana nàndíhì-xi sǎ dúcáⁿ ndècu ndihí-yu nchaa xǎⁿ.

²⁶ Te nchaa ñáyiu na cùcahaⁿ núú-xi cáháⁿ váha cuèndá-í ndihì cuèndá nchaa tnúhu-í, te tnàhá yúhú Tée cùu ñani tnáhá-ndó nchàa-ndo cucahaⁿ núu-í núu-yu òré quixi tucu-í ndihì cue espíritú xínú cuèchi núú Tàtá-í Dútú Ndiöxí, te mee-gǎ cada cutnùnì iní nchaa ñáyiu sǎ ío càhnu cuu-í.

²⁷ Te na càchì tnúhu ndáá-í xii-ndo sǎ ío dava nchòhó ñáyiu ndècu iha vitna vǎ cùu-ni-ndo, chi cundecu-ni-ndo ndéé quiní-ndó sǎá nduu ndíhu ndaha ñaha Yá Ndiöxí xii ñáyiu —càchì-gá xáhaⁿ-gá xii-yu.

Ní nadáma dóó Jèsús ndihì núú-gǎ

(Mt. 17:1-8; Mr. 9:2-8)

²⁸ Te ní cuu dàtná úná nduu sǎ dúcáⁿ nĩ cáháⁿ Jèsús, te cuásaá-gǎ ìⁿ yucu cáháⁿ ndihì-gá Yǎ Ndiöxí, te ndéca-gǎ té Pèlú, ndihì té Jàcobó, ndihì té Juàá cuásaá.

²⁹ Te nini càháⁿ ndihì-gá Yǎ Ndiöxí ní nadáma núú-gǎ ndihì dóó-gǎ, te dóó-gǎ-áⁿ súúnì nĩ nduu cuixíⁿ víhí, te súúnì dàtásaⁿ-xi.

³⁰ Te òré-ni-áⁿ nĩ xiní-güedé úú tnàhá cue tée cáháⁿ ndihì-gá, te ìⁿ-dé cúu-dě té Moisés, te ingá-dé cúu-dě té Èliás,

³¹ te súúnì dàtásaⁿ-xi nĩ càndéé núú ndécú cuè tée úú-áⁿ ndihì-gá, te xǐndatnúhu-güedé nàcuáa ndoho Jèsús cuú-gá ñúú Jerusalén dàtná ní cachì mǎe-gǎ.

³² Te té Pèlú ndihì úú-gǎ-güedé cuinì víhí-güedé cúdú-güedé, dico ní sahnì iní-güedé ñá túú ní xidí-güedé, te ní dánèhé núú ñáhá-xi xii-güedé sǎ súúnì váha càa núú ndécú Jèsús, ndihì úú cue tée cáháⁿ ndihì-gá-áⁿ.

33 Te òrè sa ndùcu ndee cue tée úú-áⁿ caca-güedé núhú-güedé, te ní xáhaⁿ tē Pèlú xii-gá:

—Mèstrú, ¡váha ní cuu sá ndécú-ó ìha vitna! Te na dàcaa-ndí úní tnàhá vehe tnuvixiⁿ, ìⁿ cuu cuendá-n, te ìⁿ cuu cuendá té Moisés, te ìⁿ cuu cuendá té Èliás —càchí-dé xáhaⁿ-dē xii-gá.

Dico té Pèlú chí ní mèe-dé ñá túú ní cùtnuní iní-dé nása ndùu tnúhu ní cáháⁿ-dē.

34 Te ñini cáháⁿ-dē ní quexiò ìⁿ vícò núú ndécú-güedē-áⁿ ní dádáhu ñaha-xi xii-güedé, te ní yùhú-güedé sá dúcáⁿ ní quexiò vícò-áⁿ ní dádáhu ñaha-xi.

35 Te xití vícò-áⁿ ní tecú ní cáháⁿ Yá Ndiòxí, te xáhaⁿ-gá xii-güedé:

—Tée-a cùu-dé Déhe-í, tée ío cùu iní-í, te tñi-ndo nchàa tnúhu cáháⁿ-dē —duha ní xáhaⁿ-gá xii-güedé.

36 Te sáta dúcáⁿ ní cáháⁿ Yá Ndiòxí, te ní quide cuendá-güedé sá mèdii-ná Jèsús ndécú-gá xíaⁿ. Te vá yò ìⁿ ní xáhaⁿ-güedē nàcuáa ndùu nchaa sá ní xiní-güedé-áⁿ.

Jèsús quidé tātna-gá ìⁿ tée cuechi yìhi ñaha espíritú cúndìhi yucu ñávãha
(Mt. 17:14-21; Mr. 9:14-29)

37 Te ingá nduu-áⁿ cuãnuu-gá yucu-áⁿ ndihi-güedé, te ío cuéhé ñãyiu cuáháⁿ tnahá ñáhá xii-gá.

38 Te ìⁿ tée ñúhu tnahá tnuú-yu-áⁿ ní cáháⁿ níhi-dé, te xáhaⁿ-dē xii-gá:

—Mèstrú, ío cáháⁿ ndàhú-í núú-n núu vá cúndèe iní-n cada tātna-n dēhe-í, chí ìⁿ dñi duha-dé ndécú,

39 te yìhi ñaha espíritú cúndìhi yucu ñávãha xii-dé, te òrè ná nàtni ñaha-xi xii-dé, te dàcana saa ñaha-xi, te ndàda ruúⁿ ñáhá-xí xii-dé, te tàva-xi tíñú yuhu-dé. Te ío dándoho ñaha-xi xii-dé, chí ndéé núú ñà cúú-gá, te dàña ñaha tnaa-xi xii-dé.

40 Te sa ní cáháⁿ ndàhú-í núú cuè tée xica cuu ndihi-n queñuhu-güedé-xi, dico ñá túú ní ndàcu-güedé —càchí-dé xáhaⁿ-dē xii-gá.

41 Te Jèsús ní xáhaⁿ-gá xii nchaa ñáyiu:

—¡Nchaa nchòhó ñáyiu ndècu ñuyú-a ío sàá iní-ndó, chí ñá túú cuìní-ndó quindáa iní-ndó Yá Ndiòxí! Te ní cuu vai nduu quide ndee iní-í nchaa sá quidé-ndó, ¿te ná ndéé ama vá dúcáⁿ-gá cada-ndo-i? —càchí-gá xáhaⁿ-gá xii-yu.

Te ní xáhaⁿ-gá xii tée cùhú déhe-xi-áⁿ:

—Taxi déhe-n ìha —cachí-gá xáhaⁿ-gá xii-dé.

42 Te òrè cuáháⁿ tée cuechi-áⁿ núú-gá, te espíritú cúndìhi yucu ñávãha-áⁿ ní dándúá ñáhá-xí xii-dé, te sàhni yìhi ñáhá tùcu-xi xii-dé ní cùu, dico Jèsús níhi ní cáháⁿ-gá ní tenáa-gá espíritú-áⁿ, te ní quee ñaha-xi xii-dé, te ní nacúáha cuendá ñáhá-gá xii-dé tātá-dē.

43 Te ncháa-yu ní cuñúhu-yu sá dúcáⁿ ní cuu, te ní cachí-yu sá ío càhnu cuu Yá Ndiòxí.

Jèsús cáháⁿ tucu-gá sá cùú-gá
(Mt. 17:22-23; Mr. 9:30-32)

Te ñini xicuñúhu-yu nàcuáa ní quide Jèsús, te ní xáhaⁿ-gá xii cue tée xica cuu ndihi-gá:

44 —Nchòhó cundedóho váha-ndo tnúhu na cáháⁿ-í-a, te vá ná cuánaa-ndo, chí yúhú Tée cùu ñaní tnáhá-ndó nchàa-ndo sáá ìⁿ nduu te cuáha cuendá ñáhá-güedé xii-í núú cuè tée cùu úhú iní ñáhá —càchí-gá xáhaⁿ-gá xii-güedé.

45 Dico cue téé-án ñà túú ní tècú tnùnì-güedé nàcuáa ndùu tnúhu ní xáhaⁿ-gã xii-güedé, te ducaⁿ ñí yáha-güedé, chi ducaⁿ tnàhí ní cachí-gá sá vã tècú tnùnì-güedé, te ní yùhú-güedé cãcãⁿ tnúhú-güedé núú-gã nása ndùu tnúhu ní xáhaⁿ-gã xii-güedé.

Cue téé ndücu tnúhu núú tnáhá núu ndëdacàa-güedé ío-gá cúnùu
(Mt. 18:1-5; Mr. 9:33-37)

46 Te cue téé xica cuu ndíhi-gá ní ngüíta-güedé ndátnúhu-güedé núu ndëdacàa-güedé ío-gá cúnùu,

47 dico Jèsús ní cutnùnì iní-gá nàcuáa sàni iní-güedé núu ní cana-gá ìⁿ té líhli, te ní sanu tníi ñaha-gã ìⁿ xio dñi-gá.

48 Te ní xáhaⁿ-gã xii-güedé:

—Nchaa ñáyíu na queheⁿ cuendá ìⁿ té líhli dàtná té líhli-a cuendá sá ñúhú ìní ñáhã-yu xii-í ñá, te cada iní-yu sá yùhú ní queheⁿ cuendá-yu, te nchaa ñáyíu na queheⁿ cuendá ñáhá xii yùhú, te cada iní-yu sá tnáhá Tãtà-í Dútú Ndiòxí Yáá ní tendaha ñaha xii-í véxi-í ñuyú-a ní queheⁿ cuendá-yu. Te nchaa ñáyíu ío ndáhú iní-xi mee-ni xinu cuechí-yu, ñáyíu-án ío-gá cúnùú-yu —cächí-gá xáhaⁿ-gã xii-güedé.

Ñáyíu ñá túú cùu úhú iní ñáhá cùndíhi ñahá-yu xii-o
(Mr. 9:38-40)

49 Te té Juáa ñíu-ni ìⁿ téé xica cuu ndíhi-gá ní xáhaⁿ-dë xii-gá:

—Mèstrú, ní xiní-ndí ìⁿ téé càcunehe ñaha-dé xii-n, te ndëñuhu-dé espíritu cùndíhi yucu ñávaha yíhi ñaha xii ñáyíu, te nchúhú ñá túú ní dàña-gá-ndí ducaⁿ càda-dé, chi ñá túú xica cuu ndíhi ñaha-dé xii-o —cächí-dé xáhaⁿ-dë xii-gá.

50 Te Jèsús ní xáhaⁿ-gã xii-dé:

—Daña-ndo na càda nahi-dé ní cùu, chi ñáyíu ñá túú cùu úhú iní ñáhá xii-o te cùndíhi ñahá-yu —cächí-gá xáhaⁿ-gã xii-dé.

Jèsús càháⁿ-gá dóho té Jacobó ndíhi té Juáa

51 Te órè sa ta cùyatni ndaa Jèsús andíu, te ní xica-gá cuáháⁿ-gá ñúú Jerusálén, chi duuⁿ duuⁿ ní sani iní-gá sá quíhíⁿ-gá.

52 Te ní tendaha-gã cue téé yòdo nuu cuáháⁿ, te ní quexìo-güedé ìⁿ ñúú, te ñúú-án yíndèhu-xi distritú Sàmariá, te ndücu-güedé ìⁿ vehe cada túha-güedé órè quexìo-gá.

53 Dico ñáyíu Sàmariá ñá túú ní cuiní-yu cuáñaha núú-yu vehe, chi cuendá sá ñí cutnùnì iní-yu sá íchi yáha-ni-gá quíhíⁿ-gá ñúú Jerusálén.

54 Te sá dúcãⁿ ñí quidé-yu ñá túú ní cuiní-yu cuáñaha núú-yu vehe ndeatú-gá, núu ní xáhaⁿ té Jacobó ndíhi té Juáa cue téé xica cuu ndíhi-gá xii-gá:

—Mèstrú, ¿cuiní-n càcãⁿ táhú-ó núú Yá Ndiòxí cuendá dangáva-gá ñuhú danàa-gá ñáyíu ñúú-a dàtná ní quide té Èliás téé ní xóo càháⁿ tnúhu Yá Ndiòxí ndéé sanaha-ãⁿ? —cächí-güedé xáhaⁿ-güedé xii-gá.

55 Te Jèsús ní nchócótó-gã núú-güedé, te níhi ní càháⁿ-gá dóho-güedé, te xáhaⁿ-gã:

—Nchòhó, chi ñá túú vãha iní-ndó te núu ducaⁿ càháⁿ-ndó.

56 Chi yùhú Téé cùu ñanì tnáhá-ndó nchàa-ndo véxi-í sá dácãcu nihnu-í ñáyíu, te ñá díú véxi-í sá dácuíta nihnu-í-yu —cächí-gá xáhaⁿ-gã xii-güedé.

Te sátá dúcãⁿ ñí xáhaⁿ-gã, te ní xica-gá cuáháⁿ-gá ndíhi-güedé íngá ñúú.

Ñáyi cuini chitnahá ñáhá xii Jesús ní cùu

(Mt. 8:19-22)

⁵⁷ Te ñuhu Jesús ichi ndihi-güedé, te ñí tée ní xáhaⁿ-dë xii-gá:

—Mèstrú, cuini-í canchicúⁿ ñáhà-í xii-n ndëni ní cuu na quihíⁿ-n —càchí-dé xáhaⁿ-dë xii-gá.

⁵⁸ Te Jèsús ní xáhaⁿ-gã xii-dé:

—Nchaa ñúcuii chi ndëcu yaú cúú vèhe-güedi saquihí-güedi, te nchaa quiti ndava caa tacá-güedi díqui yutnu, dico yúhú Tée cùu ñaní tnáhá-ndó nchaa-ndo chi ñá túú ndèe cáá vèhe-í ñuyúú-a ndetatú-í —càchí-gá xáhaⁿ-gã xii-dé.

⁵⁹ Te dàtnùní ní xáhaⁿ tùcu-gá xii ingá-dé:

—Yòhó taquixi chitnahá ñáhá-n xii-í —càchí-gá xáhaⁿ-gã xii-dé.

Dico tée-áⁿ ñí xáhaⁿ-dë xii-gá:

—Mèstrú, dañá na nùhú-í cundetu-í cuú tātá-í te chindúxi-í-dé, te dàtnùní quixi-í chitnahá ñáhá ñucaⁿ-ná-í xii-n —càchí-dé xáhaⁿ-dë xii-gá.

⁶⁰ Te Jèsús ní xáhaⁿ-gã xii-dé:

—Daña ñáyiú ñá túú sándáá iní ñáhá xii-í ná chindúxi tnàha meé-yu, chi ñáyiú-áⁿ cúú-yu dàtná ñáyiú ní xihí cuèi ndëcu-ní-yu núú ñuyúú-a. Te yòhó taquixi, chi quihíⁿ-n dànehé-n ñáyiú nàcuáa cada Yá Ndiòxí ndíhu ndaha ñàha-gá xii-yu —càchí-gá xáhaⁿ-gã xii-dé.

⁶¹ Te ní xáhaⁿ tùcu ingá-dé xii-gá:

—Mèstrú, cuini-í chitnahá ñáhà-í xii-n, dico díhma-gá dañá na nùhú-í cada ndee iní-í nchaa ñáyiú ndëcu vehe-í, te dàtnùní quixi-í —càchí-dé xáhaⁿ-dë xii-gá.

⁶² Te Jèsús ní xáhaⁿ-gã:

—Nchaa ñáyiú ní sándáá iní ñáhá xii-í, te núu vá cànchicúⁿ nihnu ñáhá-yu ni yuhu ni iní-yu, te cúú-yu dàtná ñí tée ní tní ndaha làtú cutu-dé, chi tée-áⁿ núu na ndàcoto-dé ndaa sáta-dë òrè xítú-dë, te vá quihíⁿ ndáá làtú-dé ducaⁿ sátnahá-xi cúú-yu. Te cue ñáyiú chi vá cúú ndáá-yu nàcuáa ndíhu ndaha-gá dava-gá ñáyiú—càchí-gá xáhaⁿ-gã xii-dé.

10

Jèsús tendàha-gá únídico úxí cue tée quihíⁿ cáháⁿ tnúhu-gá núú ñáyiú

¹ Te sáta dúcáⁿ ñí cuu, te ní cáxi tucu Xítohó Jesucristú únídico úxí cue tée codonù-güedé quihíⁿ-güedé cáháⁿ-güedé tnúhu-gá nchaa ñuú, ndihi nchaa dava-gá xichi núú quihíⁿ-gá, te ndi ndúú ndi ndúú-güedé tendaha ñàha-gá xii-güedé quihíⁿ-güedé.

² Te cùmání-gã caca-güedé, te ní xáhaⁿ-gã xii-güedé:

—Nchòhó xini-ndó sã òrè ná sáá yóó cuu nchaa sá xítú ñáyiú, te ío vài cuu. Te na càchí tnúhu ndáá-í xii-ndo sã dàtná vài sá xítú ñáyiú cùu, ducaⁿ ío vài ñáyiú cùmání cundedóho tnúhu Yá Ndiòxí te ío sacú ñáyiú dàcuaha ñàha xii-yu tnúhu-gá, núu xíáⁿ xini ñuhu-xi cácaⁿ-ndó núú Yá Ndiòxí cuendá sá ná dàcaháⁿ-gá iní ñáyiú cáháⁿ-yu tnúhu-gá núú ñáyiú cùmání cundedóho tnúhu-gá.

³ Te nchòhó cúú-ndó dàtná cue mbéé cue quiti cuáháⁿ núú yihí cuè quiti dééⁿ. Chi tendaha ñàha-í xii-ndo quihíⁿ-ndó núú xíndecu nchaa ñáyiú cuihna iní-xi.

⁴ Te vá cànèhe-ndo ñunu cuhuⁿ ndachiuⁿ-ndo, ni núú cùhúⁿ dǐhúⁿ-ndó, te ni vǎ cǎdá tǔha-gá-ndó chàu-ndó chi ðiu-ni chàu yǐhí-ndó-ǎⁿ xǎⁿ-ni quihí-ndo, te vá ïo cuyaa-ndo cǎháⁿ ndihí-ndo ñǎyiu ñũhu ichi.

⁵ Te òrè ná quèxio-ndo ñⁿ vehe, te duha cúñaha-ndo xì ñǎyiu dii vèhe-xi-áⁿ: “Yá Ndióxi chindee ñaha-gá xii-ndo ïo váha cuu iní-ndó cùndecu-ndo”, duha cúñaha-ndo xii-yu.

⁶ Te núú ñǎyiu-áⁿ ñí nduu táhũ-yu sá cùndècu váha iní-yu núú Yá Ndióxi, te cuu-xi sá váha sá cúú-xí-yu tnúhu cúñaha-ndo-ǎⁿ, dico núú ñá túú ní cǎháⁿ váha ndihí ñàhá-yu xii-ndo, te cúñaha-ndo sǎ vǎ cúú-xí sǎ váha sá cúú-xí-yu. Dico núú ní cǎháⁿ váha ndihí ñàhá-yu xii-ndo,

⁷ te ðiu-ni vehe-áⁿ cada vehe tnaa-ndo, te ñá túú-gǎ ndèè nducu-ndo vèhe cundecu-ndo, te caxi-ndo nchàa sá ná tàxí-yu, chi nchaa cue téé quide chiúⁿ dacuítí tǎu-güedé sá nihí-güedé sá cáxi-güedé cuendá nchaa chiúⁿ quide-güedé.

⁸ Te núú ní sǎá-ndó ñⁿ ñuú núú ñí queheⁿ cuendá ñáhǎ-yu xii-ndo, te caxi-ndo nchàa sá ná tàxí-yu.

⁹ Te cada tátna-ndo cuè ñǎyiu cùhú xǐndecu ñuú-áⁿ, te cúñaha-ndo xii-yu sá sà ní sǎá nduu ndíhu ndaha ñaha Yá Ndióxi xii-yu.

¹⁰ Dico núú ní sǎá-ndó ñⁿ ñuú núú ñà túú ní quèheⁿ cuendá ñáhǎ-yu xii-ndo, te tñi-ndo ichi cuita cǎháⁿ-ndó cuǎháⁿ, te cúñaha-ndo xii-yu:

¹¹ “Ndéé tícá chúhmá ñí tñí sáhá-ndí ñuú-ndó nàquidi-ndí, te duha quide-ndí cuendá cutnùni iní-ndó sǎ ñà túú quide váha-ndo ndècu-ndo. Dico cunaha-ndo sǎ sà ní sǎá nduu ndíhu ndaha ñaha Yá Ndióxi xii-ndo ni cùu”, duha cúñaha-ndo xii-yu.

¹² Te na cǎchí tnúhu-í xii-ndo sǎ ná sǎá nduu càda ndáá Yá Ndióxi cuèchi nchaa ñǎyiu, te ñǎyiu ñuú-áⁿ ïo-gá ndohó-yu dàvá-áⁿ dàcúúxí ñǎyiu ñuú Sòdomá —cǎchí-gá xáhaⁿ-gǎ xii-güedé.

*Cuendá ñǎyiu dava ñuú ñá túú sàndáá iní tnúhu Xitohó Jesucristú
(Mt. 11:20-24)*

¹³ Te Jèsús xáhaⁿ-gǎ xii ñǎyiu dava ñuú ñá túú sàndáá iní tnúhu-gá:

—¡Ndàhú nchòhó cue ñǎyiu ñuú Coràzín! ¡Te ndàhú nchòhó cue ñǎyiu ñuú Bètsaidá! Chi núú dicó ñuú Tírú, ndihí ñuú Sídón ní quide-í nchaa sá vǎ yǒ tnàhí ndàcu cada datná ní quide-í ñuú-ndó-áⁿ ñí xiní-ndó ñá, te sá ndéé ama-gá cuihnú-yu dóo ndàhú, te cunucóo-yu núú yáá cuendá sá ndíxí cuèchi iní-yu sá ñà túú quide váha-yu ni cùu.

¹⁴ Dico sǎá nduu te ïo-gá dandòho ñaha Yá Ndióxi xii-ndo dàcúúxí ñǎyiu ñuú Tírú, ndihí ñǎyiu ñuú Sídón.

¹⁵ Te nchòhó ñǎyiu ñuú Capèrnaúm quide iní-ndó sǎ sà cuándaa-ndo àndiu, dico ñáhǎ chi núú ùhú núú ndàhú cundecu-ndo —duha ní xáhaⁿ-gǎ xii nchaa ñǎyiu ñuú-áⁿ.

¹⁶ Te xáhaⁿ tùcu-gá xii cue téé tendaha-gǎ quíhíⁿ cǎháⁿ tnúhu-gá-áⁿ:

—Nchaa ñǎyiu na cùndedóho nchaa tnúhu cǎháⁿ-ndó, te cada iní-yu sá yǔhú cǎháⁿ-í ndedóho-yu, te nchaa ñǎyiu na dàquee tíhú ñáhǎ xii-ndo, te tnàhá yúhú daquèe tíhũ-yu, te nchaa ñǎyiu ducaⁿ na dàquee tíhú ñáhǎ xii-í, te tnàhá Tǎtà-í Dútú Ndióxi Yáá ní tendaha ñaha xii-í véxi-í ñuyúú-a dàquee tíhũ-yu —cǎchí-gá xáhaⁿ-gǎ xii-güedé.

Te ducaⁿ te ní xica-güedé cuáhǎⁿ-güedé.

Ní nasáá cue téé únídico úxí ní tendaha Jèsús ní sáháⁿ ní cáháⁿ tnúhu-gá núú ñáyiú

17 Te cue téé únídico úxí-áⁿ ní nasáá-güedé te súúni cùdíí ìní-güedé, te xáhaⁿ-güedé xii Jèsús:

—Mèstrú, ndéé espíritú cúndìhi yucu ñávàha sàndáá ìní ñáhá-xí xii-ndí òré cáciu nèhe ñaha-ndí xii-n —càchí-güedé xáhaⁿ-güedé xii-gá.

18 Te Jèsús ní xáhaⁿ-gá:

—Ndáá càháⁿ-ndó chí yúhú ní xíní-í cùtnàhá ní xíta nihnu yucu ñávàha, chí dàtná ní ngava ìⁿ tasaⁿ ní ngava-xi ñuyúú-a.

19 Te dàtná quidé-ndó òré xènihnu-ndo ìⁿ cóó, àdi ìⁿ nchacua ducaⁿ cada-ndo daquee tíhú-ndó yùcu ñávàha, te ñá túú nă cada ñaha-xi xii-ndo, chí ní taxi-í tnúhu ndee ìní ndécú ndìhi-ndo.

20 Dico vá cùdíí ìní-ndó cuèndá sá sàndáá ìní ñáhá cuè espíritú cúndìhi yucu ñávàha xii-ndo, chí cùdíí ìní-ndó cuèndá sá sá yodo tnuní-ndó núú tütú Yá Ndióxi Yáá ndécú àndiú —cachí-gá xáhaⁿ-gá xii-güedé.

Jèsús cùdíí ìní-gá

(Mt. 11:25-27; 13:16-17)

21 Te òré-áⁿ súúni ní quide díí ìní ñáhá Espíritú Yá Ndióxi xii Jèsús, te ní xáhaⁿ-gá xii Yá Ndióxi:

—Yòhó Tàtá-í Dútú Ndióxi, ío chíñuhu ñaha-í xii-n chí ñiú-n tàxi tnuní-n àndiú ndìhi ñuyúú-a, te dànehé-n cuè ñáyiú nchaa tnúhu váha, te ñiú-ni ñáyiú-áⁿ cúú-yu ñáyiú ñá túú cùtnuní ìní-xi nchaa tnúhu càháⁿ cue téé túha, te nchaa tnúhu càháⁿ-n-áⁿ ñá túú ní dàtúu-n núú ñáyiú càchí sá ío túha, te ío váha sáá díquí-xi. Te ducaⁿ quide-n, chí ducaⁿ cuíni-n cùnduu —cachí-gá xáhaⁿ-gá xii Yá Ndióxi.

22 Te xáhaⁿ tùcu-gá xii cue téé ní nasáá-áⁿ:

—Mee Tàtá-í Dútú Ndióxi ní cachí-gá sá cùnùu-í núú nchàa-ndí túhú sá ío. Te vá yòo ìⁿ xini nàcuáa sàni ìní yúhú Déhe Dútú Ndióxi, chí ìⁿdií díí-ni mee-gá xini-gá nàcuáa sàni ìní-í. Te ducaⁿ ìⁿdií-ni yúhú xini-í nàcuáa sàni ìní mée-gá, te nchaa ñáyiú càchí ìní-í sá quini-yu nàcuáa sàni ìní Tàtá-í Dútú Ndióxi te xitnùhu-í-yu, te vá yòo ìⁿ-gá xini nàcuáa sàni ìní-gá chí ñiú-ni ñáyiú ducaⁿ xitnùhu-í-áⁿ xini-yu —càchí-gá xáhaⁿ-gá xii-güedé.

23 Te ní nchóótó-gá núú xíndecu mee-ni cuè téé xica cuu ndìhi-gá, te ní xáhaⁿ-gá xii-güedé:

—Váha táhú nchòhó ndìhi nchaa ñáyiú ndèhe nchaa nacuaa quide-í vitna.

24 Chí ío cuèhé cue téé ní xóo càháⁿ tnúhu Yá Ndióxi ndéé sanaha, ndìhi cue téé ní xíndaha ñaha xii ñáyiú ní cuini-güedé cundehe-güedé nchaa sá ndéhé-ndó quide-í vitna, te ñá túú ní xini-güedé, te ní cuini-güedé cundedóho-güedé nchaa tnúhu càháⁿ-í ndedóho-ndo vitna, te ñá túú ní xíndedóho-güedé —cachí-gá xáhaⁿ-gá xii-güedé.

Nàcuáa ní quide ìⁿ téé ñáyiú Sàmaría

25 Te ìⁿ téé dàcuaha ñaha xii ñáyiú nchaa tnúhu ní chídó tnuní ndíi Moisés ní ndacuúñí-dé xító ndéé-dé Jèsús núú nása cunduu tnúhu càháⁿ-gá, te xáhaⁿ-dè xii-gá:

—Mèstrú, ¿ná cúú sá càdá-í cuèndá nduu táhú-í cundecu-í ndìhi Yá Ndióxi ní caa ní quíhíⁿ-i? —càchí-dé xáhaⁿ-dè xii-gá.

26 Te Jèsús ní xáhaⁿ-gá xii-dé:

—Cuini-í cachí tnúhu-n nãsa cãháⁿ-xi núú tütú ndíi Moisés —cãchí-gã xãháⁿ-gã xii-dé.

27 Te xãháⁿ-dë xii-gã:

—Ndíi Moisés cãchí ndíi núú tütú ndíi: “Cuu iní-ndó Dütú Ndióxi Yáa cúu Ndióxi-ndó nì yuhu nì iní-ndó, te cani iní-ndó cada-ndo datná cuini mée-gã, te mee-ni tnúhu váha cani iní-ndó nãcuáa cuu vii cuu váha-ndo núú-gã, te coo iní-ndó cùu iní-ndó-gã. Te cuu iní-ndó tnàha ñáyiú-ndo datná cúu iní-ndó mée-ndo”, duha cãchí ndíi núú tütú ndíi —cãchí-dé xãháⁿ-dë xii-gã.

28 Te Jèsús ní xãháⁿ-gã:

—Váha-ni cãháⁿ-n, te núu cada-n nãcuáa cãháⁿ-n ãn, te nduu táhú-n cùndecu-n ndíhi Yá Ndióxi ní caa ní quíhíⁿ —cãchí-gã xãháⁿ-gã xii-dé.

29 Te sá dúcãⁿ ní xãháⁿ Jèsús xii-dé núu ndùcu-dé nãcuáa cada-dé cácu niñu-dé núú tnúhu ní cãháⁿ-dë, te ní xícãⁿ tnúhú-dé núú-gã, te xãháⁿ-dë:

—¿Yoo cùu tnaha ñáyiú-í-í? —cãchí-dé xãháⁿ-dë xii-gã.

30 Te Jèsús ní cani-gã ñⁿ cuendú núú-dë nãcuáa tecú tnúni-dé tnúhu-gã, te xãháⁿ-gã:

—Ñⁿ téé ní ndee-dé ñuú Jerusalén ñúhú-dë ichi cuánuu-dé cuáhãⁿ-dé ñuú Jericó, te ní quee ñadúhú ichi-dé ní dúhú-güedë dóó níñnú-dë, ndíhi nchaa sá néhé-dë, te ní caniha viði-güedë, te nchìto ñu-ná-dé ní dáña ñaha-güedë te cuáhãⁿ-güedë.

31 Te meì òré cãtùu-dé-án ñúhú ñⁿ dútú ichi-án, te òré ní xiní ñáhã dútú-ãⁿ xii-dé, te ñⁿ xio-ni ní xócõo ndee-dé ní yáha-dé.

32 Te ñúhu tucu ñⁿ téé cùu levítã ichi-án, te òré ní xiní-dé téé-án cãtùu-dé, te ñu-ni ducaⁿ ní quide-dé ñⁿ xio-ni ní xócõo ndee-dé ní yáha-dé.

33 Dico ñⁿ téé distritú Sãmariã ñúhú tucu-dé ichi-án te òré ní xiní-dé téé-án cãtùu-dé, te ní cundãhú iní ñáhã-dë.

34 Te ní sáhãⁿ-dé núú cãtùu téé-án, te ní quide tátna-dé nchaa núú ní nícuèhé xii téé-án ní chíhi-dé yúcú, te ní dácútú-dë. Te dàtnùnì ní dácãá ñaha-dé sãtã quiti-dé, te ndëca ñaha-dé cuáhãⁿ ñⁿ vehe núú sãcõo cue ñáyiú sãcúhuⁿ ichi, te yãcãⁿ ní xito ñaha-dë.

35 Te ingã nduu òré ní nucúhuⁿ téé Samaritãnú-án ichi, te ní tava-dé úú ñíhúⁿ denãriú, te ní sãha-dé téé cùu xitohó vehe-án, te ní xãháⁿ-dë: “Coto saú-n tãe-a, te núu ñã ní tnãhá ñíhúⁿ sã ní taxi-í, te cuèi na ñãndoñuhu-gã-n ñíhúⁿ-n cuendã-dé, te òré ná quixi tucu-í te nachãhu-í”, duha ní xãháⁿ tãe Samaritãnú-án xii téé ñíi vèhe xíãⁿ.

36 Te vitna cãháⁿ, te núu ndëdacãa cue téé úní-án cúu-güedë téé váha cùu iní-güedë tnaha ñáyiú-güedë —cãchí-gã xãháⁿ-gã xii téé ñacuaha ñaha xii-í ñáyiú-án nchaa tnúhu ní chídó tnùnì ndíi Moisés.

37 Te téé-án ní xãháⁿ-dë xii-gã:

—Téé ní cundãhú iní ñáhã xii téé ní ñãncuèhé ñáhã cuè ñadúhú-ãⁿ, téé-án cúu-dé téé cùu iní tnaha ñáyiú-xi —cãchí-dé xãháⁿ-dë xii-gã.

Te Jèsús ní xãháⁿ-gã:

—Cuáhãⁿ te ñu-ni ducaⁿ càda-n tnahã-n —cãchí-gã xãháⁿ-gã xii-dé.

Jèsús ndécú-gã vehe tá Mãrta ndíhi tá Mãriã

38 Te Jèsús ñúhú-ni-gã ichi cuáhãⁿ-gã ndíhi cue téé xica cuu ndíhi-gã, te ní sãã-gã ñⁿ ñuú líhli, te xíãⁿ ní quee ñⁿ xíchí nãní Mãrta ní cãháⁿ ñáhã-xí xii-gã vehe-xi.

39 Te tá Mãrta ndëcu ñⁿ cúhú-xi nãni-xi Mariã, te xíchí-ãⁿ ní ngóo-xi núú Jèsús ndëdóho-xi nchaa tnúhu cãháⁿ-gã.

40 Te tá Mārta-án ndīhi vihi-ni iní-xi quide-xi chiuⁿ-xi, te ní sáháⁿ-xi núú Jèsús, te ní xáhaⁿ-xi:

—Mèstrú, ¿náa ñá túú tnàhí sàni iní-n sã ñí dándõo ndaha ñàha cùhù-í nchaa chiúⁿ-án? Cũñaha sàù ná quixi-xi chindee ñaha-xi —cachí-xi xáhaⁿ-xi xì-gá.

41 Dico Jèsús ní xáhaⁿ-gã:

—Yòhó Mārta, ñuhu tneñu vihi-n, te ndihú iní-n sã ño vãi chiuⁿ-n ñuhu,

42 dico xini ñuhu vihi-gá-xi cundedõho-n tnùhu càháⁿ-í, chi tá Mária-a sa ndedõho-xi tnùhu-í, te vã yõo ìⁿ ndacu xocani tnùhu-í sã ñí ngúndecu ndihi-xi —càchí-gá xáhaⁿ-gã xii-xi.

11

Jèsús dánèhé-gá cue téé xica cuu ndihi-gá nàcuáa càháⁿ ndihi-güedé Yã Ndiõxí (Mt. 6:9-15, 7:7-11)

1 Te ìⁿ nduu càháⁿ ndihi Jèsús Yã Ndiõxí ìⁿ xichi, te sátá ñí yáha ní càháⁿ ndihi-gá Yã Ndiõxí, te ní xáhaⁿ ìⁿ téé xica cuu ndihi-gá xii-gá:

—Mèstrú, danèhé ñáhá xii-ndí nása càháⁿ ndihi-ndí Yã Ndiõxí dàtná ní quide ndí Juáa ní dánèhé ndíi cue téé ní xica cuu ndihi ndíi —càchí-dé xáhaⁿ-dè xii-gá.

2 Te Jèsús ní xáhaⁿ-gã:

—Òré càháⁿ ndihi-ndo Yã Ndiõxí, te cachí-ndó:

Yòhó tãtá-ndí Dútú Ndiõxí Yaá ndécú àndiu, nchaa ñáyiú na càháⁿ-yu sã cúú-n Yáá ño yíñùhu.

Te xicáⁿ táhú-ndí núú-n sã ná sàà nduu ndihu ndàhá-n-yu.

Te cada-n dàtná càchí iní-n ñùyúú-a dàtná quidé-n àndiu.

3 Te xicáⁿ táhú-ndí núú-n sã táxí-n sã cándèca iní-ndí ìⁿ nduu ìⁿ nduu.

4 Te cada càhnu iní-n nchàa yicá cuèchi-ndí, chi tnàhá nchúhú quidé càhnu iní-ndí nchaa sã quidé ñàha tnaha ñáyiú-ndí.

Te vã dáñá-n dàcàháⁿ ñáhá yùcu ñávàha xii-ndí cada-ndí sã ñà túú vãha, chi coto ñaha-n xì-ndí cuendá sã vã dúcáⁿ càda ñaha-xi, duha càháⁿ-ndó

—càchí-gá xáhaⁿ-gã xii-güedé.

5 Te Jèsús ní xáhaⁿ tùcu-gá:

—Te núú ndèdacàa nchohó ndécú ìⁿ téé tnàha tnùhu ndihi-ndo, te dava niú càháⁿ-ndó vehe-dé, te òré ní quexio-ndo, te xáhaⁿ-ndo xii-dé: “Véxi-í núú vã cündèe iní-n tàxi nuu-n úní tnàhá pàà,

6 chi ìⁿ téé xini tnàhá ndihi-í ñùhú-dé ichi ní quexio-dé vehe-í, te ñá túú tnàhí ná cuñaha-í caxi-dé”, quesaha-ndo cũñaha-ndo.

7 Te téé-án càháⁿ-dé ndéé xití vehe-dé, te cũñaha-dè xii-ndo: “Vã dásàtú nihá-n chi ndedí yuyèhe-í, te càa-í ndihi cue landú-í, te vã cúú ndàcõo-í taxi-í sã cuiniⁿ”, quesaha-dè cũñaha-dè xii-ndo.

8 Te na càchí tnùhu-í xii-ndo sã cuèi cùu-dé téé tnàha tnùhu ndihi-ndo, dico ducaⁿ cũñaha-dè xii-ndo, dico dacuití sã ndácõo-dé taxi-dé sã cuiniⁿ-ndó cuendá sã vã dásàtú-gá-ndó iní-dé.

9 Te yuhú càchí-í xii-ndo sã cãcáⁿ-ndó núú ná cuiniⁿ-ndó núú Yã Ndiõxí te taxi-gá. Te vã dáñá ndèé-ndó cãcáⁿ-ndó núú-gã núú ná cuiniⁿ-ndó, te ducaⁿ te níhí-ndó. Te cada iní-ndó sã ñí quexio-ndo vehe ìⁿ tnaha ñáyiú-ndo te ní càháⁿ-ndó, te ñáyiú-án ñí tedõho ñáhá-yu xii-ndo te ní nacaáⁿ-yu yuyèhe.

Te ducaⁿ càda iní-ndó chi Yá Ndióxi tedóho ñaha-gã xii-ndo, te taxi-gá sá ná càcáⁿ-ndó núú-gã.

10 Chi nchaa ñáyiu ducaⁿ xíquide te Yá Ndióxi tédóho ñaha-gã xii-yu nihí-yu sá cuíní-yu. Te ñiu-ni ducaⁿ tucu nchaa ñáyiu na càcáⁿ núú-gã ñⁿ sá cuíní-yu, chi sãñaha-gã sá xicáⁿ-yu núú-gã. Te ñiu-ni ducaⁿ tucu nihí nchaa ñáyiu ñá túú ðãña ndeé xicáⁿ núú Yá Ndióxi sá cuíní-yu, chi nihí-yu.

11 Te nchòhó cue téé cùu tátá ñá túú cùndee iní-ndó cuãha-ndo cuè déhe-ndo ñⁿ yúú caxi-güexi òrè xicáⁿ-güexi ñⁿ pàà núú-ndó càxi-güexi, te ni ñà túú cùndee iní-ndó cuãñaha-ndo ñⁿ cóo caxi-güexi òrè xicáⁿ-güexi ñⁿ chácá núú-ndó càxi-güexi.

12 Te ni ñà túú cùndee iní-ndó cuãñaha-ndo ñⁿ nchacua caxi-güexi oré xicáⁿ-güexi ñⁿ ndíú núú-ndó càxi-güexi.

13 Te nchòhó cuèi ndeé dau sáá iní-ndó, dico sãha-ndo cuè déhe-ndo sã vãha xèxi-güexi oré xicáⁿ-güexi núú-ndó. Te núu nchòhó ducaⁿ quide-ndo, ðe uuⁿ-gá ducaⁿ quide Tátá-ndó Dùtú Ndióxi Yáá ndécú àndiu, chi taxi-gá Espiritú-gá cundecu ndihí-ndo te núu na càcáⁿ-ndó núú-gã! —càchí-gá xáhaⁿ-gã xii-güedé.

*Càchí-güedé sá ndécú ndíhi Jesús yucu ñávãha
(Mt. 12:22-30; Mr. 3:20-27)*

14 Te Jësús ndeñuhu-gá espíritú cùndìhi yucu ñávãha yìhi ñaha xii ñⁿ téé ní quide ñihí-xi, te òrè ní ndee ñaha espíritú-áⁿ xii téé-áⁿ, te ní nacáháⁿ-dé. Te ío ní cuñúhu ñáyiu sá dúcáⁿ ní quide-gá.

15 Te davá-yu ní xítnàhá-yu:

—Tée-a ndeñuhu-dé nchaa espíritú cùndìhi sácúíhná yíhi ñaha xii ñáyiu, chi ñiu-ni sácúíhná-áⁿ chíndèe ñaha-xi xii-dé, te ñiu-ni-xi tàxi tñuní-xi nchaa espíritú-áⁿ —càchí-yu xítnàhá-yu.

16 Te davá-yu xito ndeé ñãhá-yu xii-gá, te xãháⁿ-yu sá ná cáda-gã ñⁿ sá vã yõ tñàhi ndàcu cada ñuyúú-a cundehé-yu nàcuáa cutnùní iní-yu núu ndáá sá Yá Ndióxi ní tendaha ñaha-gã xii-gá véxi-gá ñuyúú-a.

17 Dico mee-gá sa ní cutnùní iní-gá nchaa nàcuáa sàni iní-yu, núu ní xáhaⁿ-gã xii-yu:

—Te nchòhó xìní-ndó sã núu ñⁿ téé yìndaha ñⁿ nacióⁿ vá cúú ñⁿnuu-dé ndihí cue téé cùndìhi-dé, te vá cúdíi-dé cunuu-dé. Te ñiu-ni ducaⁿ sãtnahá tucu-xi cùu cue ñáyiu xíndecu ñⁿ-ni vèhe, chi núu vá cúú ñⁿnuú-yu cundecú-yu, te vá cúdíi-yu cundecu càhnú-yu.

18 Te ducaⁿ sãtnahá-xi cùu sácúíhná, chi núu vá cúú ñⁿnuu-xi ndihí nchaa espíritú cùndìhi-xi te vá cúdíi-xi cundecu-xi taxi tñuní-xi. Te duha càháⁿ-í chi nchòhó càchí-ndó sã sácúíhná chíndèe ñaha-xi xii-í queñúhu-í nchaa espíritú cùndìhi-xi yìhi ñaha xii ñáyiu.

19 Te núu yúhú quidé cuendá-ndó sã sácúíhná chíndèe ñaha-xi xii-í, te xìní ñuhu-xi cada cuendá-ndó yõ chindee ñaha xii cue téé xíca cuu ndihí-ndo queñuhu-güedé nchaa espíritú cùndìhi-xi yìhi ñaha xii ñáyiu. Te mee-güedé càchí-güedé sá nchòhó ñá túú càháⁿ ndáá-ndó sã dúcáⁿ càháⁿ-ndó.

20 Te ndáá sá Yá Ndióxi chíndèe ñaha-gã xii-í queñúhu-í nchaa espíritú cùndìhi sácúíhná yíhi ñaha xii ñáyiu, te xíáⁿ cutnùní iní-ndó sã sá ní sáá nduu ndíhu ndaha ñaha Yá Ndióxi xii-ndo.

21 "Te núu ìn tée ío ndee, te súúní ñíí cáá-dě, te ndèè-dé vehe-dé cuendá sá vǎ cuíta, te ní quide túha-dé titní sá děé", te ío váha nèhe váha-dé nchaa ndachíuⁿ-dė.

22 Dico núu quexio ingá tée ío-gá ñíí cáá te ndee-gǎ-dé, te ngúíta-dé nàá-dé ndíhi tée ndéé vehe-xi-áⁿ, te cada cànári ñáhá tǎe-áⁿ xii tée ndéé vehe-xi-áⁿ, te quendeé-dé nchaa sá děéⁿ cùndèe iní-dé, te taxi tñùnì-na-dé nchaa xíáⁿ, ndíhi nchaa sá ndécú ndíhi-dé, te dàcáhñu-dé nchaa cue tée cùndíhi-dé nchaa sá ná ñíí-dé.

23 "Te nchaa ñáyiu ñá túu cùndíhi ñaha xii-í, te cùu úhú iní ñáhǎ-yu, te nchaa ñáyiu ñá túu ch̀ndee ñaha xii-í, te dàquee tíhũ-yu chiúⁿ quide-í.

Espíritú cùndíhi yucu ñávǎha sá nánchòcáva xito cùu uú
(Mt. 12:43-45)

24 "Te òré ná quèe ñaha ìn espíritú cùndíhi yucu ñávǎha xii ìn ñáyiu, te cuáháⁿ-xi ndùcu-xi ìn xichi núu cùndècu-xi te ñá ñíí-xi, te ní sani iní-xi: "Váha-gá nùhú tucu-í núu ñí xindecu-í", duha ní sani iní-xi.

25 Te cuánuhú-xi, te òré ní nasáá-xi, te ní xiní-xi sá cáá ñí ñáyiu-áⁿ dàtná cáá-nǎ ìn vehe ní natíhú, chi ní nduu vii-ná, vá yǒ-gá ndécú.

26 Te sáta dúcáⁿ te ní xica-xi cuáháⁿ-xi cuándúcú-xí úsá tñahá espíritú cùndíhi-xi sá nèhé víhí-gǎ xíquide, te òré ní ñíí-xi cue espíritú-áⁿ te ndèca ñaha-xi cuáháⁿ cuendá ng̀unde cu ndíhi-xi ñáyiu-áⁿ, te ñáyiu-áⁿ uuⁿ-gá nándi yáha-yu dàcúúxí ndèe díhna —càchí-gá xáhaⁿ-gǎ xii-yu.

Cuendá ñáyiu cùu váha ndisa iní-xi

27 Te ñíni càháⁿ Jèsús tñúhu-áⁿ núu ñáyiu ní càháⁿ ñíhi ìn ñadíhí tnuú-yu, te xǎhaⁿ-aⁿ xii Jèsús:

—¡Sá váha táhú ñadíhí ní dàcácu ñaha xii-n, te ní dàcuéhnú ñaha-aⁿ! —cachí-aⁿ xǎhaⁿ-aⁿ xii-gǎ.

28 Te Jèsús ní xáhaⁿ-gǎ:

—¡Váha-gá táhú ñáyiu sàcùndedóho nchaa tñúhu càháⁿ Yǎ Ndióxi te sàndáá iní-yu! —càchí-gá xáhaⁿ-gǎ xii-aⁿ.

Ñáyiu ñá túu sàndáá iní ñáhá xii Jèsús cuiní-yu cada-gá ìn sá vǎ yǒ tñahí ndàcu cada

(Mt. 12:38-42; Mr. 8:12)

29 Te ta tàcá vai ñáyiu te dàdehnde tñaha-ná-yu, te ní ngúíta Jèsús xáhaⁿ-gǎ xii-yu:

—Nchòhó ñáyiu ndècu ñuyúú vitna, chi ío sáá iní-ndó, te cuiní-ndó càda-í ìn sá vǎ yǒ tñahí ndàcu cada cuendá cuiní-ndó cùtnuní iní-ndó núu ndisa sá Yǎ Ndióxi ní tendaha ñaha-gǎ xii-í véxi-í. Dico ñá túu nǎgá cada-í quini-ndó, chi sa ñíhí-ndó tñúhu nàcuáa ní yáha ndíi Jónás tée ní xóo càháⁿ tñúhu Yǎ Ndióxi ndéé sanaha, te ñiu-ni ducaⁿ yáha yúhú tucu.

30 Chi nchaa ñáyiu ñuuú Ñinivé ní cutnùnì iní-yu sá Yǎ Ndióxi ní tendaha ñaha-gǎ xii ndíi Jónás ní sáháⁿ ndíi ñuuú-yu. Te ducaⁿ sǎtnahá-xi cùu yúhú Tée cùu ñaní tñahá-ndó nchǎa-ndo, chi sáá nduu te cutnùnì iní-ndó sǎ Yǎ Ndióxi ní tendaha ñaha-gǎ xii-í véxi-í ñuyúú-a.

31 Te na sáá nduu càda ndáá Yǎ Ndióxi cuéchi nchaa nchòhó ñáyiu ndècu ñuyúú-a, te dàvá-áⁿ quini-ndó ìn ñadíhí ñaha ní xíndaha ìn nacióⁿ cáá ndàa xio cuha núu quéné nchícanchii. Te ñaha-áⁿ ío xica ñí xindecu-aⁿ, te ní sáháⁿ-aⁿ ní xíndedóho-aⁿ nchaa tñúhu ní càháⁿ ndíi Salòmón, chi ndíi-áⁿ ío ní sáá sá xiní

tnúní ndí. Te ñaha-án cǎháⁿ-aⁿ dǎvǎ-án sǎ nchòhó ñáyi ndècu vitna ñá túú ní quide ndáá-ndó. Dico vitna iha ndècu ndihí ñaha-ndo xii yúhú, te ñi-í ío-gá cùnù-í dǎcúúxí ndí Salòmón.

³² Te ñi-ni nduu càda ndáá Yá Ndiòxí cuèchi nchaa nchòhó ñáyi ndècu ñuyú-a vitna, dǎvǎ-án tñàhá cue ñáyi ní xíndecu ñuu Nínivé cundecú-yu núú Yá Ndiòxí, te tñàhá-yu cachi-yu sǎ ñá túú ní quide ndáá-ndó. Chi ñáyi ñuu Nínivé-án ní ndixi túu iní-yu sǎ ñá túú quide váha-yu ndècú-yu te ní natuhá-yu ichi Yá Ndiòxí cùnàhá ní cǎháⁿ ndihí ñaha ndí Jónás tnúhu-gá xii-yu. Dico vitna iha ndècu ndihí ñaha-ndo xii yúhú té cǎháⁿ tucu tnúhu Yá Ndiòxí, te ñi-í ío-gá cùnù-í dǎcúúxí ndí Jónás.

*Núú-ó cùu-xi datná ìⁿ ñuhú
(Mt. 5:15; 6:22-23)*

³³ Te ñá túú ní ìⁿ ñáyi tēñuhú ìⁿ linterná, te taxi ndecú-yu ìⁿ núú yídǎhu, àdi chiváha-yu xití ìⁿ tídihi, chi tàxi ndecú-yu ìⁿ núú ñnu cuendá nchaa ñáyi quíhu vehe cutnùní núu-yu.

³⁴ Te núú-ndó cùu-xi datná ìⁿ ñuhú, chi ìⁿ sǎ ná quèní-ndó te ndixi túu iní-ndó nǎ cúú xǎⁿ, te núu cǎváha núú-ndó, te ducaⁿ cutnùní iní-ndó nǎ cúú sǎ ndécú núu-ndó, áⁿ te núu cùhú, te vá cutnùní iní-ndó nǎ cúú sǎ ndécú núu-ndó. Te sǎ dúcáⁿ cùhú núu-ndó te cada iní-ndó sǎ ndécú-ndó datná ìⁿ núú néé.

³⁵ Te ío cada cuendá-ndó vǎ cǎní cuèhé iní-ndó cuendá tnúhu Yá Ndiòxí cuendá cutnùní iní-ndó nǎcuáa cundecu-ndo, chi núu na cǎní cuèhé iní-ndó cuendá tnúhu-gá, te cùu-ndo datná ìⁿ ñáyi ñá túú cutnùní núu-xí.

³⁶ Te núu cǎndoo canine iní-ndó, te mee-ni sǎ vǎha ñuhu iní-ndó, te cutnùní vǎha iní-ndó tnúhu ndáá datná cutnùní vǎha núu-ndó òré cǎyú ñuhú, ducaⁿ cutnùní iní-ndó —cǎchí-gá xáhaⁿ-gǎ xii-yu.

*Jèsús cǎháⁿ-gǎ cuendá cue té cùu fariséú ndihí cue té dǎcuaha ñaha xii-í ñáyi
(Mt. 23:1-36; Mr. 12:38-40; Lc. 20:45-47)*

³⁷ Te òré ní ndihí tnúhu ní cǎháⁿ Jèsús, te ìⁿ té cùu fariséú ní cǎháⁿ ñáhá-dé xii-gǎ vehe-dé caxi-gǎ, te cuánguihu-gǎ vehe-dé, te ní ngóo-gǎ mèsá.

³⁸ Te té cùu fariséú-án ío ní cuñuhu-dé, chi Jèsús ñá túú ní ndàha-gǎ nǎcuáa sǎni iní-güedé nduu vétú iní Yá Ndiòxí òré ní ngóo-gǎ caxi-gǎ datná quidé mèe-güedé.

³⁹ Te Jèsús ní xáhaⁿ-gǎ xii-dé:

—Nchòhó cue té cùu fariséú xini-ndó sǎ ío ñáyi nàquete sǎtá-ni tásáⁿ ndihí sǎtá-ni còhó, te xití-xi cǎndehe caduha-ni. Te ducaⁿ sǎtnahá-xi cùu nchòhó, chi ndaha-ni-ndo nàquete-ndo, te iní-ndó ñá túú nduu ndoo, te nǎndi dǎndahú-ndó tñàha ñáyi-ndo, te quèheⁿ-ndo sǎ ndécú ndihí-yu, te nǎndi-gǎ nchaa sǎ cuèhé sǎ dúhá ñuhu iní-ndó quide-ndo.

⁴⁰ Te nchòhó cùu-ndó cuè té ío ñí iní-xi! ¿Te náa ñá túú cutnùní iní-ndó sǎ Yá Ndiòxí Yaa ní cadúha yiqui cùnù-ó ñi-ni-gǎ ní chihí-gǎ iní-ó-án?

⁴¹ Te nchaa sǎ vǎha ndècu ndihí-ndo cuáha-ndo nchaa ñáyi xini ñuhu na cundecu ndihí-yu, te núu ducaⁿ na càda-ndo, te cuu-ndo ñáyi sa ní nduu ndoo ní nduu nine iní-xi.

⁴² ¿Te ndàhú ní cuu nchaa nchòhó cue té cùu fariséú! Chi sǎha-ndo Yá Ndiòxí núú úxí xichi yúcu nání mèntá, ndihí yúcu rúdá, ndihí nchaa dava-gǎ núu yúcu quèe comidá, dico ñá túú quide ndáá-ndó, te ni ñá túú ñuhu iní-ndó Yá Ndiòxí. Dico tnúhu cǎháⁿ-í-a tàu-ndó càda-ndo, te ni vǎ dáñá ndèé-ndó càda-ndo nchaa dava-gǎ sǎ vǎha.

43 'iTe ndàhú ní cuu nchòhó cue tée cùu fariséú! Chi cuìní-ndó cùnucóo-ndo núú sácóo cue tée ío cùnunu xití veñùhu, te cuìní-ndó mèe-ni ndìhi tnúhu yíñùhu cáháⁿ ndìhi ñaha ñáyiú xii-ndo ncháa núú xicá cùu-ndo.

44 'iTe ndàhú ní cuu nchòhó cue tée dàcuaha ñaha xii ñáyiú ncháa tnúhu ní chídó tnùní ndíi Moisés, ndìhi nchòhó cue tée cùu fariséú chí ío dándahú-ndó mèe-ndo sá quidé ndáá-ndó te ñá ndáá sá quidé ndáá-ndó! Chi cùu-ndo datná ìⁿ ñáyiú ní xihí te ní nguíndüxi, te ñá túú cùtnuní-gá ndéé yíndüxi-yu, te cuèi nà yáha ñáyiú dico ñá túú cùtnuní sá yíndüxi ndíyi. Te ducaⁿ sátnahá-xi cùu nchòhó, chí ncháa ñáyiú ndèhe ñaha xii-ndo ñá túú cùtnuní iní-yu ncháa sá cuèhé sá dúhá sàni iní-ndó —càchí-gá xáhaⁿ-gá xii-güedé.

45 Te ní xáhaⁿ ìⁿ tée dàcuaha ñaha xii-yu ncháa tnúhu ní chídó tnùní ndíi Moisés xii-gá:

—Mèstrü, te sá dúcáⁿ càháⁿ-n te tnàhá nchúhú xícuehé-n ãⁿ —càchí-dé xáhaⁿ-dè xii-gá.

46 Te Jèsús ní xáhaⁿ-gá:

—iNdàhú ní cuu tnàhá ncháa nchòhó cue tée dàcuaha ñaha xii ñáyiú ncháa tnúhu ní chídó tnùní ndíi Moisés! Chi quíde-ndo datná quidé ñáyiú dàcuído ìⁿ tnaha ñáyiú-xi ìⁿ sá ío vée, te mèe-yu ní lùha ñá túú cuìní-yu cuidó-yu. Te ducaⁿ sátnahá-xi quíde nchòhó chí dànehé-ndó ñáyiú nàcuáa cadá-yu, dico mee-ndo chí ní lùha ñá túú cuìní-ndó cada-ndo nacuáa dànehé-ndó-yu.

47 'iTe ndàhú ní cuu tucu-ndo! Chi càdúha-ndo núú ní nguíndüxi cue tée ní xóo cáháⁿ tnúhu Yá Ndiöxí ndéé sanaha cuèndá sá cúnaha-ndo núú yíndüxi cue ndíi, te ñiu-ni cue ñaní tnàhá-ndó ní sahani-güedé cue ndíi.

48 Te nchòhó sa nàha-ndo nacuáa ní quíde cue ñaní tnàhá-ndó, te càchí-ndó sá ní quíde váha-güedé sá dúcáⁿ ní sahani-güedé cue ndíi-áⁿ, te vitna càdúha-ndo núú ní nguíndüxi cue ndíi.

49 Te Yá Ndiöxí ío sàá ncháa sá xini tnùní-gá, te ní cachí-gá sá dácàháⁿ-gá iní cue tée cuèndá cáháⁿ-güedé tnúhu-gá núú ñáyiú, te cada-güedé ncháa nàcuáa cuìní-gá, te dava-güedé cahni ñàhá-yu xii-güedé, te dava-güedé ío dándòho ñàhá-yu xii-güedé duha ní cachí-gá.

50 Te ncháa ñáyiú ñuyíú vitna tnàhá-yu nacháhu-yu núú Yá Ndiöxí cuèndá sá ní sahani-güedé cue tée ní cáháⁿ tnúhu-gá ndéé cùtnàhá ní ngáva ñuyíú.

51 Te ndéé ndíi Àbél tée ní sahani-güedé ndéé díhna nuu, ndìhi ndéé ndíi Zacariá tée ní sahani-güedé ndéé núú ní ndìhi-ná ndácáⁿ cuèndá ñàhá Yá Ndiöxí núú ñáyiú ndècu ñuyíú vitna, te ñiu ndíi-áⁿ ní sahani-güedé mei tnúú veñùhu càhnu sá ío cùnunu, ndìhi xító núú sácódó sá ndúú tãhú Yá Ndiöxí.

52 'iTe ndàhú ní cuu tucu ncháa nchòhó cue tée dàcuaha ñaha xii ñáyiú ncháa tnúhu ní chídó tnùní ndíi Moisés! Chi quíde-ndo datná quidé ìⁿ tée tàxi tnùní ìⁿ vehe, chí nacadí-dé te ñá dáñá-dé quíhu ñáyiú te ní mèe-dé ñá túú quíhu-dé. Te ducaⁿ sátnahá-xi quíde-ndo, chí dàcuaha-ndo tnúhu Yá Ndiöxí te ñá túú cuìní-ndó quíndáá iní-ndó te ní ñá túú dànehé-ndó ñáyiú cuìní tnüi tnúhu-gá nàcuáa tàü-xi cunduu cuèndá naníhí tãhú-yu —càchí-gá xáhaⁿ-gá xii-dé.

53 Te òré ní ndee Jèsús vehe tée cùu fariséú-áⁿ, te cue tée dàcuaha ñaha xii ñáyiú ncháa tnúhu ní chídó tnùní ndíi Moisés, ndìhi cue tée cùu fariséú ní cuédeⁿ-güedé núú-gá, te ní nguíta-güedé nándi sá xicáⁿ tnúhú-güedé núú-gá cuèndá cuìní-güedé núu vá cuíta-gá ìⁿ tnúhu càháⁿ-gá

54 cuèndá ducaⁿ níhí-güedé nàcuáa cada-güedé cacáⁿ cuéchi-güedé cuèndá-gá.

12

Jèsús càháⁿ-gá cuèndá cue téè dándahú mée-xi

1 Te òré-áⁿ ní tacá titní mĩ ñáyiú núú ndécú Jèsús, te súúni dìcò ngõnchihi tñàha-ná-yu. Te ndèdóho-yu ní xáhaⁿ Jèsús xii cue téè xica cuu ndìhi-gá:

—Cada cuèndá-ndó vǎ cǎnchícúⁿ nihnu-ndo nàcuáa quide cue téè cùu fariséú, chí cue téè-áⁿ ïo dándahú-güedé mée-güedé sǎ quidé ndǎá-güedé dico ñǎ ndǎá sǎ quidé ndǎá-güedé.

2 Te nchaa tñúhu sǎ cúú yùhu ni cuu vǎ cúú yùhu-gá, chí nchaa dacuití sǎ quèé tũu-xi núú ñáyiú.

3 Chí nchaa tñúhu càháⁿ dayuhu-ndo quèè túu-xi núú chítú núú tàcá, te nchaa tñúhu càháⁿ mée-ndó vèhe-ndo dacuití sǎ nihí ñáyiú tñúhu.

*Yá Ndiõxí xíní ñùhu-xi yuhú-ó-gǎ
(Mt. 10:26-31)*

4 Te nchòhó cue téè ïo váha tñàhá tñúhu ndìhi-í ná cǎchí tñúhu-í xii-ndo sǎ vǎ yùhú-ndó cuè ñáyiú cuèi na cǎhni ñàhá-yu xii-ndo, chí ñiú-ni yiqui cùñú-ndó ndácú-yu cǎhni-yu, te ñǎ túú nǎgá ndácú-yu cada ñàhá-yu xii-ndo.

5 Te na cǎchí tñúhu-í xii-ndo sǎ Yǎ Ndiõxí tàú-ndó yùhú-ndó-gǎ, chí mee-gǎ ïo cùnuu-gǎ, te ñiú-gǎ quidé-gǎ sǎ vǎ cùndècu-gǎ ñáyiú ñuyíú, te daquihíⁿ ñàhá-gǎ xii-yu núú ùhú núú ndáhú, núú xǎáⁿ cǎchí tñúhu-í xii-ndo sǎ Yǎá-áⁿ tàú-ndó yùhú-ndó-gǎ.

6 Te nchòhó xíní-ndó sǎ ndèè úhúⁿ tñàhá tǐlǎa cúyǎhu-di núú ùú díhúⁿ, dico Yǎ Ndiõxí ñǎ túú cùnaa-gǎ ni ñⁿ-güedi, chí nèhe cuendá ñàhá-gǎ xii-güedi.

7 Te nchòhó ndéé ñⁿ ñⁿ idi díquí-ndó yìndehu, núú xǎáⁿ cǎchí-í sǎ vǎ yùhú-ndó, chí cùnuu-gǎ-ndó dàcúúxí tǐlǎa cuèi vǎi vihi-güedi.

*Ñáyiú na dàtúu núú dàva-gǎ ñáyiú sǎ ndécú ndìhi-yu Xítóhó Jesucristú
(Mt. 10:32-33; 12:32; 10:19-20)*

8 Te na cǎchí tñúhu-í xii-ndo sǎ núu na dàtúu-ndo núú dàva-gǎ ñáyiú sǎ ndécú ndìhi ñàha-í xii-ndo. Te ducaⁿ te tñàhá yùhú Téè cùu ñaní tñàhá-ndó nchàa-ndo datúu-í núú nchàa cue espíritú xínú cuèchi núú Yǎ Ndiõxí sǎ nchòhó ndécú ndìhi ñàha-ndo xii-í.

9 Dico núu na cùñaha-ndo xii ñáyiú sǎ ñǎ túú ndècu ndìhi ñàha-ndo xii-í, te ñiú-ni ducaⁿ càda yùhú Téè cùu ñaní tñàhá-ndó nchàa-ndo, chí cùñaha-í xii cue espíritú xínú cuèchi núú Yǎ Ndiõxí sǎ ñǎ túú ndècu ndìhi ñàha-í xii-ndo.

10 Te ndédani càa ñáyiú na càháⁿ cuèhé cuèndá yùhú Téè cùu ñaní tñàhá-ndó nchàa-ndo, te cada càhnu iní ñàhá Yǎ Ndiõxí xii-yu. Dico ñáyiú na càháⁿ cuèhé cuèndá Espíritú Yǎ Ndiõxí, te ñáyiú-áⁿ vǎ càdá càhnu iní ñàhá-gǎ xii-yu.

11 Te òré ná cǎndeca ñàha-güedé xii-ndo quihíⁿ veñúhu, àdi núú cuè téè cùchiuⁿ, te ni vǎ cání iní-ndó núú nása cunduu tñúhu cùñaha-ndo xii-güedé, te ni vǎ cání iní-ndó núú ná tñúhu nadànchocáva-ndo núú ná tñúhu na cùñaha-güedé xii-ndo,

12 chí òré-nǎ te mee Espíritú Yǎ Ndiõxí dacàhu iní ñàhá-xí xii-ndo tñúhu cùñaha-ndo xii-güedé —cǎchí-gǎ xáhaⁿ-gǎ xii-güedé.

Cuèndá ñⁿ téè cuica

13 Te ñⁿ téè ñùhu tñàhá tñúú ñáyiú-áⁿ ní xáhaⁿ-dè xii Jèsús:

—Mèstrú, cùñaha xii ñaní-í sǎ ná chidava-dé sǎ ní dándóo tǎtá-ndí cuu cuèndá-ndí —cǎchí-dé xáhaⁿ-dè xii-gǎ.

14 Te Jèsús ní xáhaⁿ-gã xii-dé:

—¿Te ná cuendá ducaⁿ càháⁿ-n? Te ñá díú chiúⁿ-án vëxi-í cada-í, chi ñá díú tée cùchiuⁿ cuu-í —càchí-gá xáhaⁿ-gã xii-dé.

15 Te xáhaⁿ-gã xii nchaa ñáyiú xíndecu-án:

—Nchaa nchòhó ñáyiú ndèdóho nchaa tnúhu càháⁿ-í ío váha cada cuendá-ndó, te vá cání ínì-ndó nándi nducu-ndo cùndecu ndihì-ndo, chi cuèi vâi vihi na nihì-ndó cùndecu ndihì-ndo, dico vá chindèe ñaha-xi cudíi-ndo cùndecu-ndo ñuyíú-a —càchí-gá xáhaⁿ-gã xii-yu.

16 Te dătnúni ní ngúita-gá cání-gã ìⁿ cuendú núŷ-yu cuendá tecú tnúni-yu tnúhu-gá, te xáhaⁿ-gã:

—Ëⁿ tée cuica sũúni ní cuu nchaa tatá ní xitu-dé núú ñúhú-dě.

17 Te ní ngúita-dé sání ínì-dé: “¿Te nása cada-í? Te ñá túú ndèe nataxúha-í nchaa sá ní xitu-í”, duha ní sani ínì-dé.

18 Te dătnúni ní sáha váha tucu-dé cuendá năcuáa cada-dé, te ní cachí-dé: “Duha na cùnduu, dangôyo-í yacá-í, te ndada càhnu-gá-í, te xití-xi nataxúha-í nchaandi túhú sá ní xitu-í, ndihì nchaa dava-gá sá ndécú ndihì-í.

19 Te sátá dúcá, te cachí-í: Ío vâi sá ndécú ndihì-í, te cudíi-xi cuéhé cuiá, te vitna ndetatú-í, te coho-í te caxi-í cada-í, te nándi-gá cada-í cuendá cudíi ínì-í cùndecu-í, duha quesaha-í”, càchí-dé.

20 Dico Yá Ndióxí ní xáhaⁿ-gã xii-dé: “Yòhó, ñá túú nândihì sá sání ínì-n, chi yúhú càchí-í sá niú vitna cuú-n, te nchaa sá ndécú ndihì-n ÿyoo cuu sá váha xii-a-í?”, càchí-gá xáhaⁿ-gã xii-dé.

21 Duha yáha nchaa ñáyiú nándi sàni ínì-xi cùndecu ndihì-xi ñuyíú-a, dico ñáyiú-án ío ndàhú-yu chí ñá túú nă nduu táhú-yu núú Yá Ndióxí cùndecu ndihì-yu —càchí Jèsús xáhaⁿ-gã xii-yu.

Yá Ndióxí xító-gã nchaa ñáyiú sàndáa ínì ñáhá xii-gá

(Mt. 6:25-34)

22 Te ní xáhaⁿ Jèsús xii cue tée xica cuu ndihì-gá:

—Te na càchí tnúhu-í xii-ndo sã vã ío cani ínì-ndó nũ nása cùndecu-ndo, àdi nása nihì-ndó sã caxí-ndó, àdi nása nihì-ndó dđó cuihnu-ndo.

23 Chi cùnuu-gá méé-ndó dăcúúxí sã nchító-ndó, te ducaⁿ yiqui cuúú-ndó cùnuu-gá-xi dăcúúxí dđó sácuihnu-ndo.

24 Te chí cuáha cuendá năcuáa quide cue tícacá, chi ní ñá túú chihì-güedi tatá cuu itú natahu-güedi te ní ñá túú ndèe nútñi yacá-güedi, te nihì-güedi xëxi-güedi, chí Yá Ndióxí xító ñaha-gá xii-güedi. ¡Te nchòhó cùnùu-gá-ndó dăcúúxí nchaa cue quitì ndava!

25 Te cuèi nándi sá sání vihi ínì-ndó ndècu-ndo, dico ñá ndácú-ndó càda-ndo nacuáa cuehnu-ndo cuèdicó ìⁿ yiqui-gá.

26 Te núu ní sã lúhá xiãⁿ ñá ndácú-ndó càda-ndo, ¿te ná cuendá ío sàni ínì-ndó cuendá nchaa sá cùlnì-ndó nihì-ndó cùndecu ndihì-ndo?

27 Te chí cádá cuendá năcuáa sàhnu ìⁿ tnu itá, chí ní ñá túú quide chiúⁿ-xi, te ní ñá túú quèheⁿ-xi idi. Te na càchí tnúhu-í xii-ndo sã ndíi Salòmón ío vii ní cáa nchaa sá ní xíndecu ndihì ndíi, dico vii-gá tucu càa nchaa itá dăcúúxí nchaa sá ní xíndecu ndihì ndíi.

28 Te cùhú sã ío vitna tnaa-ni cùdíi-xi te sàhmí-yu, te cuèi ducaⁿ dico ío vii càdúha Yá Ndióxí nchaa cùhú-án. ¡Te nchòhó ío cùnuu-ndo dăcúúxí nchaa cùhú-án, núu xiãⁿ ío xito ñaha-gá xii-ndo, te dicó yica cùu ínì-ndó sàndáa ínì-ndó-gã!

²⁹ Te vá ïo canchicúⁿ nihnu-ndo sã cóhó sã cáxí-ndó, te ni vã dándihú-ndó ïní-ndó nõu nása cada-ndo ñihí-ndó.

³⁰ Chi nchaa ñáyiú ñá túú sàndáá ïní ñáhá xii Yá Ndiõxí ducaⁿ mée-ni sã cóhó sã cáxí-yu xica nchicúⁿ nihnú-yu. Dico mee Tãtá-ó Dütú Ndiõxí sa ñaha-gá nãndi cùu sã xíni ñuhu-ndo, te taxi-gá.

³¹ Te cada-ndo nchaa nacuaa càháⁿ Yá Ndiõxí Yaá yíndàha ñaha xii-ndo, te ducaⁿ te taxi-gá nchaa sã xíni ñuhu-ndo.

*Cuèndá sã vãha nduu táhú-ó nõú Yá Ndiõxí
(Mt. 6:19-21)*

³² Te vá yúhú nchòhó cue téé ndècu ndihi-í cuèi ïo sacú-ndó, chi Tãtá-ó Dütú Ndiõxí ní cachí-gá sã ndúú táhú-ndó cùndecu-ndo nõú ndécú-gã taxi tnùní-ndó tnàhá-ndó.

³³ Te chí dícó nchaa sã ndécú ndihi-ndo, te chí cuãha nchaa ñáyiú ndàhú dikhú-ndó ñáyiú xini ñuhu, te cada váha-ndo cùndecu-ndo, te ducaⁿ te nduu táhú-ndó sã ïo-gá váha nõú Yá Ndiõxí cùndecu ndihi-ndo, te xíãⁿ vá cùú tühú tnàhí-gá-xi, te ni vã ndíhí nihnu-gá-xi, te ni ñadúhú vã ndácú-güedé duhu-güedé, te ni tiquidi vá queé-dí.

³⁴ Te nõú xíãⁿ cùú cuèndá-ndó ñá, te ñiu-ni xíãⁿ ñúhú ïní-ndó, áⁿ te nõú mee-ni sã ndécú ñüyúú-a ndècu ndihi-ndo, te ñiu-ni nchaa xíãⁿ ñúhú ïní-ndó.

Xini ñuhu-xi quíhi ïní-ó cùndecu-o

³⁵⁻³⁶ Te ïo quíhi ïní-ndó cùndecu-ndo, te cada-ndo dàtná quidé dáva cue téé xinu cuechi sacúndecu túha-güedé cuèi nání òré-áⁿ ndétú-güedé patróóⁿ-güedé ná òré nasáá-dé sã cuaháⁿ-dé vico tnãndaha. Te nõú niú te sa cùú cáyú-ni ñuhú-güedé sã cùndètu ñaha-güedé, chi òré ná nasáá-dé dacasaⁿ-dé yuyèhe, te ndíhi-ni nacaáⁿ-güedé ndíhu-dé.

³⁷ Te váha táhú nchaa cue téé xinu cuechi-áⁿ, chi ndècu túha-ni-güedé ndétú-güedé ndéé òré ní nasáá patróóⁿ-güedé, te na càchí tnúhu ndáá-í xii-ndo sã òré ná nasáá patróóⁿ-güedé-áⁿ te chíhi ñaha-dé mèsá xii-güedé, te ndacáⁿ ndee-dé dóó nihnú-dé nõú yíquí-dé, te ngüita-dé cani-dé cóhó-güedé cuèndá caxi-güedé.

³⁸ Te ñiu-ni ducaⁿ càda-dé cuèi dava niú, àdi tacuíhndá-gá, te nõú ñá túú xidí-güedé òré nasáá-dé, te cue téé xinu cuechi-áⁿ ïo váha tnahá-güedé.

³⁹ Te nõú dícó ñⁿ téé cùú xítóhó ñⁿ vehe xini-dé ná òré quíhu ñadúhú vehe-dé ñá, te quíhi ïní-dé te vá cùdú-dé, te vá dáñá-dé nacaáⁿ-güedé yuyèhe-dé quíhu-güedé duhu-güedé.

⁴⁰ Te nchòhó tucu nchaa-ni nduu quíhi ïní-ndó cùndecu túha-ndo, chi na cuaháⁿ nduu ñá túú yíhi ïní-ndó, te quixi tucu yúhú Téé cùú ñaní tnàhá-ndó nchaa-ndo —cachí-gá xáhaⁿ-gã xii-güedé.

*Cue téé quide ndáá ndihi cue téé ñá túú quide ndáá
(Mt. 24:45-51)*

⁴¹ Te té Pèlú ní xicáⁿ tnúhú-dé nõú Jèsús, te xáhaⁿ-dè:

—Mèstrú, ¿te tnúhu ní cáháⁿ-n-ãⁿ cùu-xi mee-ni cuèndá nchúhú ãⁿ cuèndá nchaa ñáyiú? —càchí-dé xáhaⁿ-dè xii-gá.

⁴² Te Jèsús ní xáhaⁿ-gã:

—Càháⁿ-í cuèndá ñáyiú quide váha dàtná quidé ñⁿ téé taxi tnuní ñáhá xii cue ñáyiú xinu cuechi ndècu vehe patróóⁿ-xi, chí téé-áⁿ ïo váha tècú tnùní-dé, te

quide-dé nchaa nàcuáa càháⁿ patróóⁿ-dë, te dàcaxi-dé cue ñáyiu xìnu cuechi oré tàú-xi caxí-yu.

43 Te núu ducaⁿ quide váha tée tàxi tñuní ñáhá xìi cue ñáyiu xìnu cuechi-áⁿ ñá, te ío váha tñáhá-dé òré násáá patróóⁿ-dë núu ndéé cuáháⁿ-dë.

44 Te na càchí tñuhu ndáá-í xii-ndo sã tée quide ndáá táxi tñuní ñáhá xìi cue ñáyiu xìnu cuechi-áⁿ cũñaha-nã patróóⁿ-dë xii-dé sá ncháándí tùhú-nã sá ndécú ndíhi-dé quindaha-dë.

45 Dico núu tée tàxi tñuní ñáhá xìi cue ñáyiu xìnu cuechi-áⁿ ná càni iní-dé sá cùyàa patróóⁿ-dë vá násáá ndíhi-ni-dé ñá, te ngüíta-dé caní-dé nchaa ñáyiu xìnu cuechi, cuèi tée cuèi ñadihí, te ngüíta-dé caxi-dé coho-dé, te dàxíni-dé méé-dë,

46 te nduu ñà túú yìhi iní-dé te nasáá patróóⁿ-dë, te dandòho ñaha patróóⁿ-dë-áⁿ xii-dé, te daquihíⁿ ñáhá-dë xii-dé núu ndécú ñáyiu ñá túú ní quide ndáá.

47 Te dava cue tée xìnu cuechi xiní-güedé nàcuáa cuíní patróóⁿ-güedé cada-güedé te ñá túú quide-güedé, te ní ñà túú cuíní-güedé cundecu túha-güedé cundetu-güedé patróóⁿ-güedé, te nchaa cue tée ducaⁿ xiquide dandòho ñaha patróóⁿ-güedé, chí ñáni vñhi-güedé.

48 Te dava cue tée xìnu cuechi ñá túú xiní-güedé nàcuáa cuíní patróóⁿ-güedé cada-güedé, te ní quide-güedé sá neñùú-güedé ìⁿ sá ñà túú tàú-güedé cada-güedé ñá, te cue tée-áⁿ sacú-gá dandòho ñaha patróóⁿ-güedé, chí sacú-gá ñáni-güedé. Te ñáyiu cùtnuní iní-xi nàcuáa cuíní Yá Ndiòxí cadá-yu, te diu-ni ducaⁿ tàú-yu cadá-yu nàcuáa cuíní-gá. Te ñáyiu vài-gá tècú tñuní nàcuáa càháⁿ-gá, te diu-ni ducaⁿ vài nchaa sá càháⁿ-gá tàú-yu cadá-yu.

*Ñá túú cùu ìⁿnuu ñáyiu
(Mt. 10:34-36)*

49 Te yúhú véxi-í ñuyúú-a cuendá cutnùní iní ñáyiu nàcuáa cada ñaha Yá Ndiòxí xii-yu, jte cuíní-í sá ndíhi-ni cada-gá nàcuáa sàni iní-gá!

50 Te yúhú ío vài tñuhu sàni iní-í, jchi sáá nduu te ío ndoho-í, te diu-ni xíãⁿ cùhuⁿ iní-í ndéé ná sáá nduu dùcaⁿ yáha-í!

51 Te nchòhó vá càni iní-ndó sã yúhú véxi-í ñuyúú-a te cundecu ndíhi tñaha váha-ni ñáyiu, te ñáhá chí da ngüíta-yu vá cúú ìⁿnuú-yu cundecú-yu.

52 Te ndéé není vitna ngüíta ñáyiu vá cúú ìⁿnuú-yu cundecú-yu, te na càda-o cuendá te núu úhúⁿ ñáyiu xíndecu ìⁿ-ni vèhe, te vá cúú ìⁿnuu-gá-yu, chí úní-yu ndatnúhu-yu te nàá-yu ndíhi úú-gá-yu, àdi ñáyiu úú-áⁿ ndatnúhu-yu te nàá-yu ndíhi ñáyiu úní-áⁿ.

53 Te dava cue tée cùu tátá vá cúú ìⁿnuu-gá-güedé ndíhi déhe ducuⁿ-güedé, te ní dàva cue ñáyiu cùu náná vá cúú ìⁿnuu-gá-yu ndíhi déhe yòcò-yu, te ní sãnu-yu vá cúú ìⁿnuu ndíhi-gá-yu. Te ducaⁿ cadá-yu chí davá-yu quindáá iní ñáhá-yu xii-í, te davá-yu vá quindáá iní ñáhá-yu –càchí-gá xáhaⁿ-gã xii-güedé.

*Ñáyiu cùtnuní iní-xi nàcuáa quide-xi ñuyúú ndíhi andíu
(Mt. 16:1-4; Mr. 8:11-13)*

54 Te Jèsús ní xáhaⁿ-gã xii nchaa ñáyiu xíndecu-áⁿ:

—Te nchòhó òré ndéhé-ndó ndànchita vícò ndáa xio quée nchícanhii, te càchí-ndó sã cúúⁿ dáú, te diu ducaⁿ ndisa quide-xi.

⁵⁵ Te òré ná quène táchí ndàa xio datni nacúáa quène nchíanchii, te càchí-ndó sá ïo cada ihni-xi, te ñu ducaⁿ ndisa quide-xi.

⁵⁶ Te nchòhó ïo váha cùtnuní iní-ndó nàcuáa quide-xi andiu ndihi ñuyú, ¿te ná cuendá quidé-ní-ndó sá ñã təcú tnùní-ndó nàcuáa quide Yá Ndiòxí vitna? Te sá dúcáⁿ quide-ndo-áⁿ ïo dándahú-ndó mèe-ndo sá ïo váha cùtnuní iní-ndó, chi ñã ndàá sá cùtnuní iní-ndó.

Nducu-o nàcuáa nucuñdecu ndihi váha-o ñayiu cùu úhú iní ñáhá
(Mt. 5:25-26)

⁵⁷ Te nchòhó, ¿ná cuendá ñã túú dándixi túu-ndo ìní-ndó càda-ndo mee-ni sá váha sá tàú-ndó càda-ndo-i?

⁵⁸ Te núu ïó ñⁿ-ndo ní sacáⁿ cuéchi ñayiu cuendá-ndó cuendá ñⁿ sá ní quide-ndo, te cuáháⁿ-ndó ndihí-yu núu tée cùchiuⁿ, te ñini ñùhu-ndo ndihí-yu ichi, te nducu-ndo nàcuáa cada-ndo nàcáháⁿ cáhnú iní tnáhá-ndó ndihí-yu cuendá sá vã cándeca ñaha-gá-yu quíhíⁿ núu tée cùchiuⁿ, chi núu ducaⁿ na càda-yu te tée cùchiuⁿ-áⁿ nachihi ñaha-dě ndaha cue tée cùu poleciá, te cue tée-áⁿ chihí ñaha-güedě vecaá xii-ndo.

⁵⁹ Te na càchí tnúhu-í xii-ndo sá ñuu na ngàva-ndo vecaá, te vã cãcu-ndo te núu vã náchãhu-ndo nchàa sá tàú-ndó —càchí-gá xáhaⁿ-gã xii-yu.

13

Xini ñuhu-xi natuha-o ichi Yá Ndiòxí

¹ Te ñu-ni òré-áⁿ ní ngùnntñi ñⁿ úú ñayiu núu Jèsús cáni-yu cuendú núu-gã nàcuáa ní quide ñaha té Pilatú xii cue tée ñiñtítú Galileá cue tée ní sañni quiti nduu táhú Yá Ndiòxí, te mei òré ní sañni-güedé cue quiti-áⁿ ní táuchíúⁿ té Pilatú cue sandadú-dé ní sañni-güedé cue tée Galileá-áⁿ, te ní xica ñiñi-güedé núu ñùhú ndihi ñiñi cue quiti-áⁿ, te ní nadácãnuu-xi.

² Te Jèsús ní xáhaⁿ-gã xii-yu:

—Te núu nchòhó sání ìní-ndó sá sá dúcáⁿ ní yáha cue tée ñiñtítú Galileá-áⁿ te cùu-güedé cue tée ndècu vihi-gá cuéchi-xi dàcúúxí cuè tée ñuu-güedé ñã.

³ Te na càchí tnúhu-í xii-ndo sá ñáhá. Te núu nchòhó vã ndíxí cuéchi iní-ndó cuendá nchaa sá cuèhé sá dúhá quide-ndo ndecu-ndo ña, te tnáhá nchaa nchòhó cuíta nihnu-ndo te núu vã nátnñi-ndo ichi Yá Ndiòxí.

⁴ Te núu nchòhó sání ìní-ndó sá ñayiu sáhúⁿ úní ní xihí ní táú ñáhá vèhe ducúⁿ Silòé ïo-gá ndécú cuéchi-yu dàcúúxí nchàa ñayiu xñdecu ñuu Jerusálén ñã,

⁵ te na càchí tnúhu tucu-í xii-ndo sá ñáhá. Te núu nchòhó vã ndíxí cuéchi iní-ndó cuendá nchaa sá cuèhé sá dúhá quide-ndo ndecu-ndo ña, te tnáhá nchaa nchòhó cuíta nihnu-ndo te núu vã nátnñi-ndo ichi Yá Ndiòxí —càchí-gá xáhaⁿ-gã xii-yu.

Yutnu ngúxí ñã túú cùuⁿ sávidí-xi

⁶ Te Jèsús ní caní tucu-gá ñⁿ cuendú núu-yu nàcuáa tecú tnùní-yu tnúhu-gá, te xáhaⁿ-gã:

—Ñⁿ tée nùtnñi ñⁿ yutnu ngúxí núu ñùhú-dě, te cuáháⁿ ndéhé-dě ñuu ní cuuⁿ sávidí-xi ní cùu, te ñi ñⁿ ñã túú ní cùuⁿ.

⁷ Te ní xáhaⁿ tée-áⁿ xii tée ndéé ñuhu-dé: “Ñaha-n sá vitna ní cuu úní cuía quíxí còto-í yutnu ngúxí-a te ñã túú xini-í ní ñⁿ sávidí-xi. Te quehndé-n vitna, chí áúⁿ ná cuu nùtnñi-xi quide tneñu-xi núu ñuhu-áⁿ”, càchí-dé xáhaⁿ-dě xii tée ndéé ñuhu-dé-áⁿ.

⁸ Te téé ndéè ñuhu-áⁿ ní xáhaⁿ-dè: “Pàtróón, dañá na cuìhmu-xi cuíá vitna-ná, te na nàdatayá-í ñuhu núú sàhá-xi, te chihi-í sahá.”

⁹ Te ducaⁿ te cudana cuuⁿ sávidí-xi, àdi núú ñá túú ní cùuⁿ sávidí-xi ña te téhndé-nǎ-xi”, càchí-dé xáhaⁿ-dè xii pàtróón-dé —càchí-gá xáhaⁿ-gǎ xii-yu.

Jèsús quidé tǎtna-gǎ ìⁿ ñadihí ní nduu cueyi sǎtá-xi nduu ndètatú ñáiyi

¹⁰ Te ìⁿ xito cùu-xi nduu ndetatú ñáiyi, te yihi Jèsús ìⁿ veñúhu dànehé-gǎ ñáiyi.

¹¹ Te xiáⁿ ndécú ìⁿ ñadihí ní cuu sáhúⁿ úní cuíá sǎ cùhú-aⁿ yihi ñaha espíritú cúndihí yucu ñávaha xii-aⁿ, te xiáⁿ ní ndada cueyi-xi sǎtá-aⁿ, te ñá dáñá-gǎ-xi núcúnutnǎí ndáá-aⁿ.

¹² Te òré ní xiní ñáhá Jèsús xii-aⁿ te ní cana ñaha-gǎ, te xáhaⁿ-gǎ:

—Yöhó ñaha cùhú, ndúha-n cuèhé tnáhá-n —càchí-gá xáhaⁿ-gǎ xii-aⁿ.

¹³ Te ní dácáá-gǎ ndaha-gǎ ní tendaha ñaha-gǎ xii-aⁿ, te òré-ni-áⁿ ní ndúha-aⁿ te ní núcúnutnǎí ndáá-aⁿ, te ní ngüita-aⁿ ní cachí-aⁿ sǎ ío càhmu cuu Yá Ndiöxí.

¹⁴ Dico téé tàxi tnuní veñúhu ní cudééⁿ-dè sá dúcáⁿ ní quide Jèsús ní quide tǎtna-gǎ ñaha cùhú-áⁿ nduu ndètatú-yu, te ní xáhaⁿ-dè xii-yu:

—Íó íñú nduu tǎú-ó càda chiuⁿ-o, te ndèdani càa nduu-áⁿ quixi-ndo cùtǎtna-ndo, dico ñá díú ndùu cuu-xi nduu ndetatú-ó —càchí-dé xáhaⁿ-dè xii-yu.

¹⁵ Te ní xáhaⁿ Jèsús:

—Nchòhó chi ío dàndahú-ndó mèe-ndo sá quidé ndáá-ndó dico ñá ndáá sá quidé ndáá-ndó, ¿náa ñá túú nàndaxi-ndo ndicutu-ndo àdi búrru-ndo dàcoho-ndo-güedi ndute nduu ndetatú-ó ǎⁿ?

¹⁶ Te ñadihí-a cùu-aⁿ ñani tnáhá ndii Àbrahám, te dícó-ni sá yùcu ñávaha quide duha cùhú-aⁿ ní cuu sáhúⁿ úní cuíá, ¿te náa ñá túú xiní ñuhu-xi cutǎtna-aⁿ cuèi cùu-xi nduu ndetatú-ó ǎⁿ? —càchí-gá xáhaⁿ-gǎ xii-dé.

¹⁷ Te sá dúcáⁿ ní cáháⁿ Jèsús, núu nchaa cue téé cùu úhú iní ñáhá xii-gǎ ní cucahaⁿ núú-güedè, dico nchaa dava-gǎ ñáiyi chi xicudíí iní-yu xíndèhè-yu nchaa sǎ vǎ yóo tnáhí ndàcu cada quide-gǎ.

Cuèndá ndíquíⁿ yutnu nàni mostázá

(Mt. 13:31-32; Mr. 4:30-32)

¹⁸ Te ní xáhaⁿ-gǎ xii-yu:

—Na càni-í ìⁿ cuèndú núú-ndó nàcuáa tecú tnuní-ndó nàcuáa cada-xi òré ndíhu ndaha ñaha Yá Ndiöxí xii-ndo.

¹⁹ Hⁿ téé ní queheⁿ-dè ndíquíⁿ yutnu nàni mostázá te nèhe-dé cuáháⁿ ní sacáⁿ-dè núú ñúhú-dè te ní xínu-xi, te ní sahnú-xi ní cuu dùcúⁿ-xi, te cue quiití ndáva núú tàchí cadúha-güedi tacá-güedi núú dìtè-xi —càchí-gá xáhaⁿ-gǎ xii-yu.

Nàcuáa quide levadurá

(Mt. 13:33)

²⁰ Te ní xáhaⁿ tucu Jèsús xii-yu:

—Te na càchí tnúhu tucu-í xii-ndo nàcuáa cada tucu Yá Ndiöxí òré ndíhu ndaha ñaha-gǎ xii-ndo.

²¹ Hⁿ ñadihí ní queheⁿ-aⁿ levadurá ní chihi-aⁿ úní arròbá yuchi triú, te levadurá-áⁿ ní quide-xi ní ndaa ñihí yusaⁿ-áⁿ —càchí-gá xáhaⁿ-gǎ xii-yu.

*Yuyèhe cuiñi**(Mt. 7:13-14, 21-23)*

22 Te ichi ñuhu Jesús cuaháⁿ-gá ñuú Jerusálén, te nchaa ñuú náhnú, ndihi nchaa ñuú lihli ta yáha-gá ducaⁿ ta dànehé-gá ñáyiú tnúhu-gá cuaháⁿ.

23 Te ñⁿ ñuú-áⁿ ní xáhaⁿ ñⁿ téé xii-gá:

—Mèstrú, cuiñi-í cácaⁿ tnúhu-í ñⁿ tnúhu núú-n, ¿ndáá sá ïo sacú ñáyiú nánihí tãhú-ãⁿ? —cächí-dé xáhaⁿ-dë xii-gá.

Te Jesús ní xáhaⁿ-gá xii-dé ndihi nchaa ñáyiú:

24 —Cada-ndo sã nánihí tãhú-ndó, te tñi-ndo ichi Yá Ndiöxí, te ichi-gá-áⁿ cúú-xí dàtná ñⁿ yuyèhe cuiñi, te cächí tnúhu-í xii-ndo sã ïo cuéhé ñáyiú cachí iní-yu quihu-yu yuyèhe cuiñi-áⁿ dico vá ndácü-yu.

25 Te na càni tucu-í ingá cuèndú núú-ndó nàcuáa tecú tnùní-ndó tnúhu càháⁿ-í. Te òré ná ndacuiñi téé cùu xitohó vehe, te nacadi-dé yuyèhe, te nchaa nchòhó ñáyiú na quèndóo quehé dacàsaⁿ-ndo yuyèhe, te quesaha-ndo cñaha-ndo xii-dé: “Tátá, nacaáⁿ yuyèhe na quihu-ndí”, quesaha-ndo cñaha-ndo xii-dé. Dico téé cùu xitohó vehe-áⁿ cñaha-dë xii-ndo: “Ná túú xiní-í nchòhó ndèé ñáyiú cùu-ndo”, duha cñaha-dë xii-ndo.

26 Te dàtnùni ngüita nchòhó cñaha-ndo xii-dé: “Nchúhú ní xexi ndihi ñaha-ndí, te ní xihí ndihi ñaha-ndí xii-n, te nchaa ichi ní xóo dacuàha ñaha-n xii-ndí”, quesaha-ndo cñaha-ndo xii-dé.

27 Dico cachí tucu téé cùu xitohó vehe-áⁿ cñaha-dë xii-ndo: “Sa ní cachí-í sá ñà túú xiní-í ndèé ñáyiú cùu-ndo. Te chí xócuñi nchòhó ñáyiú ndècu ichi cuéhé ichi duha núú ndècu-í”, quesaha-dë cñaha-dë xii-ndo.

28 Te na sáa nduu ducaⁿ cada-xi te quini-ndó tã Abraham, ndihi té Isàac, ndihi té Jácób, ndihi nchaa cue téé ní xóo cáháⁿ tnúhu Yá Ndiöxí, te nchaa cue téé-áⁿ ndécú-güedë núú ndécú-gã táxi tnùní-gá, te nchòhó quee tíhú-ndó núú-gã sá tnúhu ñá túú ní cuiñi cada ndáá, te dàvá-áⁿ ndáhyú-ndó te cuu rúhñú-ná núhu-ndo sã sätú iní-ndó cuèndá sá ndóhó-ndó.

29 Te dàvá-áⁿ quihu nchaa ñáyiú ndi cümü xio ñuyú núú ndécú Yá Ndiöxí táxi tnùní-gá caxi-yu ndihi-gá, te cundecú-yu ndihi-gá.

30 Te dava ñáyiú nchicúⁿ ñá túú cùnuu ndecu ichi Yá Ndiöxí vitna, ñáyiú-áⁿ sáa nduu te ïo cunúú-yu. Te dava ñáyiú cùnuu ndecu ichi-gá vitna, ñáyiú-áⁿ sáa nduu te vá ïo-gá cunúú-yu —cächí-gá xáhaⁿ-gã xií-yu.

*Jèsús ndáhyú-gá cuèndá ñáyiú ñuú Jerusálén**(Mt. 23:37-39)*

31 Te ñi-ni nduu-áⁿ ní quexìo ñⁿ úú cue téé cùu fariséú núú ndécú-gã, te xáhaⁿ-güedë xii-gá:

—Quee-n iha quiñiⁿ-n núú ndèé quiñiⁿ-n, chí téé cùu Herodés cuiñi-dé cahni ñaha-dë xii-n —cächí-güedë xáhaⁿ-güedë xii-gá.

32 Te Jesús ní xáhaⁿ-gã:

—Chí cuaháⁿ te cñaha-ndo xii téé nèhe maña-áⁿ sã cächí-í sá ná cùndedóho váha-dë ñⁿ tnúhu càháⁿ-í, chí cùmání ñⁿ úú-gá nduu cundecu-í xocani-í nchaa espíritu cùndihí yucu ñáváha yihí ñaha xii ñáyiú, te cada tátna-í nchaa dava-gá ñáyiú cùhú, te ducaⁿ te ndihi chiúⁿ-í, duha cñaha-ndo xii-dé.

33 Dico dacuitíⁿ sã cùhúⁿ-í ichi ñⁿ úú-gá nduu, te ducaⁿ te sáa-í núú quiñiⁿ-í, chí vá cúú tnàhí cuú ñⁿ téé càháⁿ tnúhu Yá Ndiöxí ingá ñuú, chí mei ñuú Jerusálén cuú-güedë —cächí-gá xáhaⁿ-gã xii-güedë.

³⁴ Te ní xáhaⁿ-gã xii ñáyiú ñuú Jerusàlén:

—Nchòhó chí sàhni-ndo nchaa cue téé càháⁿ tnúhu Yá Ndiòxí, cue téé ní tendaha-gã véxi, te mee-ni ndihi yúú sáhní-ndó-güedé. ¡Te titní xito ní cuiní-í nadatácá ñàhá-í xii-ndo dàtná nádàtácá ìⁿ nchuxi cuè déhe-di sàquihí-güedi xití ndixíⁿ-di, dico ñá ní cuiní-ndó, te ducaⁿ-ni sàni iní-í ndéé vitna!

³⁵ Te chí cùndèdòho tucu ingá tnúhu na càháⁿ-í-a: Yá Ndiòxí dañá ñàha-gã xii-ndo. Te na càchí tnúhu tucu-í xii-ndo sã vã quìní ñàhá-gã-ndó xii-í, dico sáá nduu te quini ñàhá tùcu-ndo, te nduu-ãⁿ cachí-ndó sã ìo càhnu cuu yúhú Yáá ní tendaha Dütú Ndiòxí véxi ñuyúú-a —càchí-gã xáhaⁿ-gã xii-yu.

14

Jésus quidé tãtna-gã ìⁿ téé ñùhu cuiñu

¹ Te duha ní cuu ìⁿ nduu, nduu ndetàtú ñáyiú chí ìⁿ téé cùu fariséú cùnùu ní cáháⁿ-dé Jesús vehe-dé caxi-gã, te cue téé ndècu vehe-dé ndéhé-güedé ñu nása cada-gã.

² Te xíaⁿ ndécú tnàhá ìⁿ téé cùhú ñùhú-dé cuiñu.

³ Te Jesús ní xicáⁿ tnúhú-gã núú cuè téé dàcuaha ñaha xii ñáyiú nchaa tnúhu ní chidó tnùní ndíi Moisés, ndihi núú cuè téé cùu fariséú, te xáhaⁿ-gã:

—¿Cuu cada tãtna-o ìⁿ ñáyiú cùhú nduu ndetàtú-ó àⁿ ñàhá? —càchí-gã xáhaⁿ-gã xii-güedé.

⁴ Dico cue téé-án ñà túú tnàhí ni cãháⁿ-güedé. Te ní dácaá-gã ndaha-gã ní tendaha-gã téé cùhú-án ní quide tãtna ñaha-gã xii-dé, te ní xáhaⁿ-gã sá ná ñùhú-dé vehe-dé.

⁵ Te ní xicáⁿ tnúhú-gã núú nchaa cue téé-án, te xáhaⁿ-gã:

—¿Te núu nchòhó ná ngáúñhnu ìⁿ búrru-ndo àdi ìⁿ ndicutu-ndo déhvã, te vã ná tàva ndihi-ni-ndo-di cuèi cùu-xi nduu ndetàtú-ndó-án? —càchí-gã xáhaⁿ-gã xii-güedé.

⁶ Te ñá túú ní ñihí-güedé tnúhu na dànhocáva-güedé.

Ñáyiú càháⁿ-yu quíhíⁿ vico tnándaha

⁷ Te ndèhe Jesús nàcuáa xiquide nchaa ñáyiú ndècu vico sá súñí ní nacáxi-yu xilé sácõo nchihí cue téé cùnùu-gã conchihí-yu òré cuánguñhú-yu mèsá caxi-yu, núu ní xáhaⁿ-gã xii-yu:

⁸ —Òré ná càháⁿ ñàhá ìⁿ ñáyiú xii-ndo ìⁿ vico tnándaha, te vã cóo-ndó núú xilé sácõo cue téé cùnùu-gã, chí núu ducaⁿ na càda-ndo, te cudana quexio dava-gã ñáyiú cùnùu-gã dàcúúxí nchòhó.

⁹ Te ñáyiú ní cáháⁿ ñàhá xii-ndo-án quixí-yu te cùñàhá-yu xii-ndo: “Chí cuñàhá xilé núcõo nchihí-ndo-án ná cõnchihí ñáyiú ní quexio-a”, quesàhá-yu cùñàhá-yu xii-ndo. Te cuiní-ndó ñàhá cuèi cùcahaⁿ núú-ndó ndàcuíñí-ndó quíhíⁿ-ndó ngõo-ndo núú xilé xñutnñí ndéé núú ní ndihi-ná ndàa sátá-xi.

¹⁰ Te yúhú càchí-í sá òré ná càháⁿ ñàhá-yu xii-ndo, te ngóo-ndo núú xilé xñutnñí ndéé núú ní ndihi-ná ndàa sátá-xi chí cuèndá òré ná quexio ñáyiú ní cáháⁿ ñàhá xii-ndo, te cùñàhá-yu xii-ndo: “Nchòhó cue ñáyiú càháⁿ ndihi-í, chí yúha núú xilé sácõo cue téé cùnùu-gã coo-ndo”, duha cùñàhá-yu xii-ndo. Te ducaⁿ te cada ñinu ñaha nchaa ñáyiú yíhi ndihi-ndo mesá.

¹¹ Te nchaa ñáyiú na càda ñinu mee-xi, te ñáyiú-án ñà túú cùu ñinu-yu, te nchaa ñáyiú ñá túú quide ñinu mee-xi, ñáyiú-án cúú ñinu-yu —càchí-gã xáhaⁿ-gã xii-yu.

12 Te dătnùnì ní xáhaⁿ-gă xii téé ní cáháⁿ ñáhá xii-gá:

—Te yòhó òré cuinì-n càda-n ìⁿ vico, te vá càháⁿ-n mèe-ni cue téé càháⁿ ndihì-n, ni cuè ñanì-n, ni cuè ñáyiu cùu ñanì tnáhá-n, ni cuè ñáyiu cuica ndècu yatni ndihì-n, chi ñáyiu-án ducaⁿ càdà-yu ìⁿ nduu cáháⁿ ñáhá-yu xii-n te ndéyăhu-ní sá ní quidè-n-yu.

13 Te ñáhá chi òré ná càda-n ìⁿ vico, te cáháⁿ-n ñáyiu ndàhú, ndihì ñáyiu ñá cúú càca, ndihì ñáyiu yacua, ndihì ñáyiu cuàá.

14 Te núu ducaⁿ na càda-n, te cuu-xi ìⁿ sá văha xii-n, chi ñáyiu-án vă nihì-yu nacoto ñáhá-yu xii-n, dico na cùu-n te sáá nduu ndòto-n ndihì nchaa ñáyiu ní quide ndáá ní xindecu ichi Yá Ndiòxí, te dāvā-áⁿ taxi-gá sá ndúú tãhú-n — càchì-gá xáhaⁿ-gă xii-dé.

Năcuăa xĩquide ñáyiu òré càháⁿ ñáhá ìⁿ téé cada vico

(Mt. 22:1-10)

15 Te sá dúcáⁿ ñí cáháⁿ Jèsús ní tecú dóho cue téé yìhi mesá-áⁿ, núu ní xáhaⁿ ìⁿ-dé xii-gá:

—Ío váha tãhú nchaa ñáyiu na càxi nchaa sá cuăha ñaha Yá Ndiòxí nduu na sáá-yu cundecú-yu núú ndécú-gă táxí tnùnì-gă —càchì-dé xáhaⁿ-dè xii-gá.

16 Te Jèsús ní xáhaⁿ-gă xii-dé:

—Ìⁿ téé quide-dé vico, te ní dátècú tnúhu-dé cuéhé vîhí ñáyiu quihìⁿ-yu caxí-yu.

17 Te òré sa ní cuu-ná sá cãxì-yu, te ní xáhaⁿ-dè xii téé xinu cuechi núú-dè sá quihìⁿ-dé cùñaha-dè quihìⁿ-yu caxí-yu, chi sa ndècu túha nchaa sá cãxì-yu.

18 Dico nchaa-yu ní xáhaⁿ-yu xii-dé sá ná cádá càhnu iní téé càháⁿ ñáhá-ăⁿ, chi ñá túú cùyáchì-yu quihìⁿ-yu vico-án. Te téé ní cáháⁿ ndihì téé xinu cuechi-án dîhna ní xáhaⁿ-dè: “Íchì ñí saaⁿ-í ìⁿ pedàsú ñuhu, te quihìⁿ ndèhè-í tnavíí, núu xíăⁿ càháⁿ ndàhú-í núú-n sã cùñaha-n xii téé càháⁿ ñáhá-ăⁿ xii-í sá ná cádá càhnu iní-dé chi ñá túú cùyáchì-í”, càchì-dé xáhaⁿ-dè.

19 Te ìngá-dé ní xáhaⁿ-dè: “Ní saaⁿ-í úhúⁿ yùndá ndicutu sa xitu, te cue quiti-án quihìⁿ-í coto ndeé-í-güedi vitna, núu xíăⁿ càháⁿ ndàhú-í núú-n sã cùñaha-n xii téé càháⁿ ñáhá-ăⁿ xii-í sá ná cádá càhnu iní-dé chi ñá túú cùyáchì-í”, càchì-dé xáhaⁿ-dè.

20 Te ìngá tucu-dé ní xáhaⁿ-dè: “Íchì ñí tnándaha-í nũu xíăⁿ vá cùyáchì-í quihìⁿ-í”, càchì-dé xáhaⁿ-dè.

21 Te òré ní nasáá téé xinu cuechi-án, te ní nacani tnúhu-dé núú patróóⁿ-dè nchaa năcuăa ní xáháⁿ-yu. Te ní cudééⁿ téé cùu patróóⁿ-ăⁿ, te ní xáhaⁿ-dè xii téé xinu cuechi núú-dè-án: “Yáchì cuàháⁿ nanducu-n nchàa ñáyiu ndàhú, ndihì nchaa ñáyiu ñá cúú càca, ndihì nchaa ñáyiu yacua, ndihì nchaa ñáyiu cuàá, te ndèni ní cuu na nãnihì-n-yu te candècá-n-yu quixí”, càchì-dé xáhaⁿ-dè.

22 Te sátá ñí nasáá téé xinu cuechi-án, te ní xáhaⁿ-dè xii patróóⁿ-dè: “Patróóⁿ, sa ní quide-í chiùⁿ ní tãhú-n, dico ndècu-gá núú cóo-yu”, càchì-dé xáhaⁿ-dè.

23 Te téé cùu patróóⁿ-dè-án ñí xáhaⁿ-dè: “Cuàháⁿ tucu ndèni ní cuu te cada yica-n na quixí-yu quihu-yu cuèndá ná chitú vehe-í.

24 Te na càchì tnúhu-í xii-n sã ñí ìⁿ ñáyiu ní cáháⁿ-í dîhna vá cúú-gă caxí-yu sá sã ní quide túha-í caxí-yu ní cùu”, càchì téé-án xáhaⁿ-dè xii téé xinu cuechi núú-dè —càchì-gá xáhaⁿ-gă xii téé-án.

Ndoho-o cùndecu-o ichi Xitohó Jesucristú

(Mt. 10:37-38)

25 Te ío cuéhé ñáyiú nchìcúⁿ-yu Jèsús, te ní xáhaⁿ-gǎ xíi-yu:

26 —Te núu dava nchòhó cuíní-ndó chìtnahá ñáhá-ndó xii-í, te cuu iní ñáhá ndísa-ndo. Te cuéi na dàndóo-ndo tǎtá-ndó, ndìhi náná-ndó, ndìhi ñadihí-ndó, ndìhi déhe-ndo, ndìhi ñani-ndó, ndìhi cúha-ndo, te caní iní-ndó sǎ cuéi na cúú-ndó sǎ cuendá-í, te ducaⁿ te cuu ndísa-ndo cué ñáyiú tnàhá tnúhu ndìhi-í.

27 Te nchaa ñáyiú vá cǎnchícúⁿ nihnu ñaha xii-í cuendá sǎ yùhú-yu ndohó-yu dàtná ndoho-í, ñáyiú-áⁿ vá cúú-yu ñáyiú tnahá tnúhu ndìhi-í.

28 Te núu ìⁿ nchòhó ná cǎni iní-ndó dàcaa-ndo ìⁿ vehe ducúⁿ, ¿te náa ñá díú dǐhna-gǎ cada cuendá-ndó núu ndédau díhúⁿ cuu, ducaⁿ te cutnúni iní-ndó núu tnahá díhúⁿ-ndó cǎa vehe-áⁿ àdi ñáhá?

29 Chi núu vá dúcáⁿ cǎda-ndo, te na nguíta-ndo tàusaha-ndo te vá xǐnu cada-ndo, te nchaa ñáyiú na cundehe ñaha xii-ndo, te cǎháⁿ cuéhé-yu cuendá-ndó.

30 Te cachí-yu: “Tée-ǎⁿ ní nguíta-dé dácàa-dé ìⁿ vehe te ñá ní ndàcu-dé xínu”, cachí-yu.

31 Àdi te núu ìⁿ tée yǐndaha ñaha xii ñáyiú cuíní-dé nàá-dé ndìhi ingá tucu tée yǐndaha ñaha xii ñáyiú, ¿te náa ñá díú dǐhna-gǎ cada cuendá-dé te núu ndacu-dé ndìhi úxí mǐl cue sandàdú-dé nàá-güedé, ndìhi ócò mǐl cue sandàdú ingá tucu tée yǐndaha ñaha xii ñáyiú cùu úhú iní tnáhá ndìhi-dé-ǎⁿ?

32 Àdi te núu xito-dé sǎ vǎ ndácú-dé ñá, te òrè vátá cùyàtni ñaha-gǎ tée cùu úhú iní tnáhá ndìhi-dé-áⁿ, te tendaha-dé ìⁿ tée quíhíⁿ-dé quíhu-dé tnúhu ndàhú núú tée-áⁿ cuendá sǎ vǎ nàá-güedé.

33 Te duhá cǎháⁿ-í chi núu nchòhó vá cǎdá ndèe iní-ndó dàña-ndo nchaa sǎ ndécú ndìhi-ndo cuendá chitnahá ñáhá-ndó xii-í, te vá cúú-ndó cué ñáyiú tnàhá tnúhu ndìhi-í.

Ñí ñí nduu víxiⁿ

(Mt. 5:13; Mr. 9:50)

34 “Te ñí chi ío váha, dico núu na ndùu víxiⁿ-xi, ¿te nása-gǎ cada-o nàndíhi-o te núu ducaⁿ-í?”

35 Chi ñá túú-gǎ nándíhi-xi ní sǎ dácá ñuhu, te ní sǎ dácá saháⁿ, chi cuendá-ñǎ dǎngoyo-o. Te nchaa nchòhó ñáyiú ní xíindedóho tnúhu ní cǎháⁿ-í-a xini ñuhu-xi ío váha cuáha-ndo cuendá —cǎchí-gǎ xáhaⁿ-gǎ xii-yu.

15

Cuendá ìⁿ mběé quiti ní xíta

(Mt. 18:10-14)

1 Te cue tée cuihna iní-xi quide cobrá ñáhá xii ñáyiú cuendá impuèstú ndìhi cue dava-gǎ ñáyiú ndècu ichi cuéhé ichi duha ní quexió-yu núu ndécú Jèsús cuendá cundedóho-yu tnúhu cǎháⁿ-gǎ.

2 Te ní nguíta cue tée cùu fariséú, ndìhi cue tée dàcuaha ñaha xii ñáyiú nchaa tnúhu ní chídó tnùní ndíi Moisés xícáháⁿ cuéhé-güedé cuendá-gǎ, te cǎchí-güedé:

—Tée-a quèheⁿ cuendá-dé ñáyiú ndècu ichi cuéhé ichi duha, te xèxi ndìhi ñaha-dé xii-yu —cǎchí-güedé xitnàha-güedé.

3 Te Jèsús ní caní-gǎ ìⁿ cuendú nàcuáa tecú tnùní-güedé tnúhu-gǎ, te xáhaⁿ-gǎ xii-güedé:

4 —Hñ téé ndècu ìñ ciendú mbèé-dě, te ní xíta ìñ-di, te nchòhó sa cùtnuní iní-ndó nàcuáa cada téé-á, chí dándóo-dé cùmídíco sáhúñ cùmí-di ìñ yucu, te cúnúndúcú-dě quití ní xíta xiáñ ndèé ndéé naníhí-dě-di.

5 Te òré ní naníhí-dě-di te ní dácáá-dě-di chíó-dě ní docó-dé-di sá cúdñ iní-dé.

6 Te òré ní nasáá-dé vehe-dé, te ní dátacá-dé nchaa cue téé càháñ ndihí-dé, ndihí nchaa ñáyíu ndècu yatni ndihí-dé, te ní xáhañ-dě: “Chí ná cùdíí iní-ó vitna, chí ní naníhí-í mbèè-í quití ní xíta ni cùu”, cachí-dé xáhañ-dě xií-yu.

7 Te yúhú càchí-í sá ìo-gá cúdñ iní Yă Ndióxi ndihí cue espíritu xínú cuèchi núú-gá núu ìñ ñáyíu ndècu ichi cuehé ichi duha na ndixi cuèchi iní-yu cuèndá nchaa sá ñà túú vâha quidè-yu ndécú-yu te tñí-yu ichi-gá, dàcúúxí cùmídíco sáhúñ cùmí ñáyíu sa ní tuha ichi-gá, chí ñà túú-gă xíní ñùhu-xi ndixi cuèchi iní-yu chí sa ndécú-yu ichi-gá —càchí-gá xáhañ-gă xii-güedé.

Cuèndá dîhúñ nî xíta

8 Te ní caní Jèsús ingá cuèndú núú-güedé, te xáhañ-gă:

—Hñ ñadihí ndécú ndihí-añ úxí dîhúñ cuixíñ, te ní dácúita-añ ìñ te ní teñuhú-añ iti, te ní ngúita-añ nàtihu-añ vehe, te súúni vâha vâha ní nanducu-añ ndéé ní naníhí-añ.

9 Te òré ní naníhí-añ, te ní dátacá-añ nchaa ñáyíu dîhí càháñ ndihí-añ ndihí nchaa ñáyíu ndècu yatni ndihí-añ, te ní xáhañ-añ: “Chí ná cùdíí iní-ó vitna chí ní naníhí-í dîhúñ-í sá nî xíta ni cùu”, cachí-añ xáhañ-añ xií-yu.

10 Te yúhú càchí-í sá dúcáñ ìo cùdíí iní nchaa espíritu xínú cuèchi núú Yă Ndióxi, núu ìñ ñáyíu ndècu ichi cuehé ichi duha na ndixi cuèchi iní-yu cuèndá nchaa sá ñà túú vâha quidè-yu, te tñí-yu ichi-gá —càchí-gá xáhañ-gă xii-güedé.

Cuèndá ìñ téé ñà túú ní quidè vâha

11 Te ní caní tucu Jèsús ingá cuèndú núú-güedé, te xáhañ-gă:

—Hñ téé ndècu úú déhe ducuñ-dé,

12 te téé lîhli-gá ní xáhañ-dě xii tâtá-dě: “Táu, taxi-n tãhú sá cúú cuèndá-í”, càchí-dé xáhañ-dě. Te tâtá-dě-áñ nî sãñaha-dě ndí díñ núú-güedé sá cúú cuèndá-güedé.

13 Te núú sàcú-ni nduu, te déhe-dé téé lîhli-gá-áñ nî nadico-dě nchaa sá nî sãñaha tâtá-dě, te ní xica-dé cuáháñ-dé ìñ ñuú xícá, te yacáñ ní tñí-dé ìñ ichi cuèhé ichi duha, te ní ndihí dîhúñ-dě ní dándóñùhu-dé ndihí cue téé càháñ ndihí-dé, ndihí nchaa ñáyíu dîhí xîndecu ichi díí iní.

14 Te ní ndihí ndoo dîhúñ-dě ní dándóñùhu-dé, te núú sàcú-ni nduu ní sáa tnamá ñuú núú ndécú-dě-áñ, te ñà nihí-gá-dé sá caxí-dě, te xihí-dé docó.

15 Núú ní xica-dé cuáháñ ndúcú chîuñ-dé núú ìñ téé dîu-ni ñuú xiáñ, te téé-áñ ní sáha chîuñ ñaha-dé ìñ xichi núú ñùhú-dě coto-dé cùchí.

16 Te súúni xihí-dé docó te cùiní-dé caxi-dé nchaa sá sáha-yu cùchí-áñ ní cùu, dico ñà túú ní sãñàhá-yu xii-dé.

17 Te uuñ ní sani vâha iní-dé, te ní cachí-dé: “Ío cuehé cue téé xínu cuechi vehe tâtá-í te ío cuehé sá xéxi-güedé ndécú, te yúhú duha ndòho-í docó iha!

18 Te ndacuíñ-í te núhú-í vehe tâtá-í, te cúñaha-í xii-dé: Táu, ñà túú ní quidè vâha-í núú Yă Ndióxi te ní ñà túú ní quidè vâha-í núú-n,

19 te ñà túú-gă tãú-í sá cùú-í déhe-n vitna, te cada ñaha-ñă-n xii-í dàtná ìñ téé xínu cuechi núú-n”, duha ní sani iní-dé cúñaha-dě xii tâtá-dě.

20 Te sáta dúcáñ ní sani iní-dé, te ní natñí-dé ichi cuánuhú-dé vehe tâtá-dě, te xica-gă cuánuhú-dé ní xíní ñáhá tâtá-dě xii-dé te ní cundáhú iní ñáhá-dě.

Te xìnu tátá-dě-án nǐ sáhán núnahá ñáhá-dě, te ní numi ñaha-dě, te ío váha ní cáháⁿ ndihi ñaha-dě.

²¹ Te ní xáhaⁿ dēhe-dé-án xii-dé: “Táu, ñá túú ní quide váha-í núú Yá Ndiöxí te ní ñá túú ní quide váha-í núú-n, te ñá túú-gã tãú-í sá cùú-í dēhe-n vitna”, cachí-dé xáhaⁿ-dē.

²² Dico tátá-dě-án nǐ xáhaⁿ-dē xii cue tée xìnu cuechi núú-dě: “Chí queñùhu ndíhi-ni dóo vâha-gá cuáha-ndo dēhe-í-a na cuìhnu-dé, ndihi ñⁿ dehé ná quíhi díquí ndáhá-dě, ndihi chàù váha na quíhi-dé.

²³ Te quíhiⁿ ngueheⁿ-ndo ñⁿ ndicutu numa quiti caváha-gá, te cahni-ndo-di, te na càda-o vico, te na càxi-o-di.

²⁴ Chí dēhe-í-a ní sani iní-í sá nǐ xíhi-dé ní cùu, te ñáhá chi ndècu vívú-dě, te ní sani tucu iní-í sá nǐ xíta-dé ní cùu te ní nasáá méé-dě”, cachí-dé xáhaⁿ-dē xii cue tée xìnu cuechi núú-dě-án. Te ní ngüita-güedé ní quide-güedé vico.

²⁵ Te dēhe-dé tée sàcuéhé-gã cuáháⁿ-dé yucu, te óré cuándixi-dé tá ndùu yatni-dé vehe, te ní tecú dóho-dé ío yaá cúú vico.

²⁶ Te ní cana-dé ñⁿ tée xìnu cuechi, te ní xícáⁿ tnúhú-dě núú-dě ná cuendá ducaⁿ ío yaá.

²⁷ Te tée xìnu cuechi-án nǐ xáhaⁿ-dē: “Ñani-n tēe cuáháⁿ ní cùu ní nasáá-dé, te tátá-n nǐ táuchíúⁿ-dē ní xíhi ñⁿ ndicutu nùma quiti caváha-gá cuendá sá nǐ nasáá váha-dé”, cachí-dé xáhaⁿ-dē.

²⁸ Dico ñani-dé tēe sàcuéhé-án nǐ cudééⁿ-dē, te ní cachí-dé sá vâ ndíhu-dé vehe cundecu-dé vico-án ní cùu, dico ní quee tátá-güedé ní cáháⁿ ndáhú-dé núú-dě cuendá ndíhu-dé.

²⁹ Te ní xáhaⁿ-dē xii tátá-dē: “Táu, cundedóho váha saú-n tnúhu na càháⁿ-í-a, yúhu ío cuéhé cuíá nǐ cuu xìnu cuechi-í núú-n, te ní ñⁿ xito ñá túú quide sáá iní-í núú-n, te ní ñⁿ chivá líhi ñá túú tàxi-n-di caxi díí iní-í-di ndihi cue tēe càháⁿ ndíhi-í.

³⁰ Te vitna ní nasáá dēhe-n tēe ní sáhán ní dándóñùhu díhúⁿ-n ndihi nchaa ñáyiú xíndecu ichi díí iní. Te ní sahni-n ñⁿ ndicutu numa quiti caváha-gá sá cuendá-dé”, cachí-dé xáhaⁿ-dē xii tátá-dē.

³¹ Te ní xáhaⁿ tátá-dē xii-dé: “Yòhó dēhe-í ducaⁿ-ni ndècu ndíhi ñaha-n xii-í, te nchaa sá ndécú ndíhi-í cúú-xí cuendá-n.

³² Te vitna dacuitíi tãú-xi sá cáda-ó vico, te cudíí iní-ó, chi ñani-n-án nǐ quide-í cuendá sá nǐ xíhi-dé ní cùu, te ñáhá chi ndècu vívú-dě, te sa ní xíta-dé ní cùu, te ní nasáá méé-dě”, cachí-dé xáhaⁿ-dē xii dēhe-dé tēe sàcuéhé-gã-án –duha cuáháⁿ cuendú ní cani Jèsús núú-güedé.

16

Nàcuáa ní quide ñⁿ tēe tàxi tnuní ñáhá xii cue tēe xìnu cuechi

¹ Te Jèsús xáhaⁿ-gã xii cue tēe xìca cuu ndíhi-gá:

—Ní xíndecu ñⁿ tēe cuica, te ducaⁿ nǐ xíndecu ñⁿ tēe ní taxi tnuní ñáhá xii cue tēe ní xìnu cuechi núú-dē. Te tēe-án nǐ xini ñáhá ñáyiú dùhu-dé díhúⁿ tēe cùu patróóⁿ-dē, te cuáháⁿ-dé dándóñuhu-dé, te ní xáhãⁿ-yu xii tēe cùu patróóⁿ-dē sá dúcáⁿ quide-dé.

² Te tēe cùu patróóⁿ-dē-án nǐ cana ñaha-dē xii-dé, te ní xáhaⁿ-dē: “¿Ná cuendá duha càháⁿ ñáyiú cuendá-n? Yáchí chi na tàxi cuendá-n nchaa chiúⁿ ní quide-n, chi vitna te vá táxi tnuní-gá-n cuè tēe xìnu cuechi núú-í”, cachí-dé xáhaⁿ-dē.

³ Te téé tàxi tñuní ñáhá xii cue téé xínu cuechi-án ní sani iní-dé: “¿Te nása cada-í vitna na quèhndé pàtróòⁿ-í chiùⁿ-í? Chi ñá cùndèe-gá-í cada-í chiùⁿ vée, te cùcahaⁿ núu-í cácaⁿ ndàhú-í.

⁴ Dico duha cada-í cuèndá queheⁿ cuèndá ñáhá ñàyiù vehé-yu òré ná quèhndé duuⁿ-ná pàtróòⁿ-í chiùⁿ-í”, duha ní sani iní-dé.

⁵ Te sáta dúcáⁿ te ní cana-dé ìⁿ ìⁿ cue téé tàù núú pàtróòⁿ-güedé. Te téé díhna ní xícáⁿ tñuhú-dé núú-dé, te xáhaⁿ-dè: “¿Ndèé dau tàù-n núú pàtróòⁿ-í?”, càchí-dé xáhaⁿ-dè.

⁶ Te téé-án ní xáhaⁿ-dè: “Tàù-í ìⁿ cièndú bàrríl acítí”, càchí-dé xáhaⁿ-dè. Te téé tàxi tñuní ñáhá xii cue téé xínu cuechi-án ní xáhaⁿ-dè: “Iha náú reciù-n-á, te ndadúha ingá sá ùdico úxí taxi-n”, càchí-dé xáhaⁿ-dè.

⁷ Te dätñuní ní xícáⁿ tñuhú tucu-dé núú ìngá-dé, te xáhaⁿ-dè: “Te yòhò, ¿ndèé dau tàù-n-í?”, càchí-dé xáhaⁿ-dè. Te téé tàù-án ní xáhaⁿ-dè: “Ìⁿ cièndú ngohnchí triù tàù-í”, càchí-dé xáhaⁿ-dè. Te téé tàxi tñuní ñáhá xii cue téé xínu cuechi-án ní xáhaⁿ-dè: “Iha náú reciù-n-á, te cadúha ingá sá cùmídícó-ná taxi-n”, càchí-dé xáhaⁿ-dè.

⁸ Te téé cùu pàtróòⁿ-án ní cachí-dé sá ìo váha ñùhu díquí tée dùhu-án nàcuáa cada-dé cundecu váha-dé. Te nchaa ñàyiù xñdecu íchi cuèhé íchi duha, ìo-gá váha ñùhu díquí-yu nàcuáa cadá-yu cundecu váha-yu ndìhì nchaa ñàyiù cùndìhì-yu dàcúúxí ñàyiù ndècu íchi Yá Ndiòxí.

⁹ Te yúhú càchí-í sá cadá-ndó sã váha ndìhì nchaa sá ndécú ndìhì-ndo ní cuáha ñuyúú yícá cuèchi-a, te ducaⁿ te coo cue téé ìo váha tnahá tñuhu ndìhì-ndo, te òré ná ndìhì nchaa sá ìo ñuyúú-a, te Yá Ndiòxí queheⁿ cuèndá ñáhá-gã xii-ndo, te cundecu-ndo ndìhì-gá ní caa ní quíhí.

¹⁰ Te núu ìⁿ téé quide ndáá cuèí ìⁿ chiùⁿ líhli na cada-dé, te ñiù-ni ducaⁿ quide ndáá-dé cuèí ìⁿ chiùⁿ cahnu na cada-dé. Dico téé ñá túú quide ndáá, chí cuèí chiùⁿ líhli àdi chiùⁿ cahnu na cada-dé dico ìⁿ-ni quide-dé.

¹¹ Te núu nchòhò vá cadá-ndó sã váha ndìhì nchaa sá ní cuáha ñuyúú yícá cuèchi-a ña, te Yá Ndiòxí vá táxi-gã sá váha ndècu ndìhì-gá xii-ndo.

¹² Te núu vá cadá ndáá-ndó còto-ndo nchaa sá táxi núu tnahá ñàyiù-ndo, te vá yòo taxi sá ndúú tàhú-ndó.

¹³ Te ni ìⁿ téé xínu cuechi vá ndácú-dè cunu cuechi-dè núú úú pàtróòⁿ, chi téé-án cuu váha iní-dé núú ìⁿ pàtróòⁿ-dè te tñi-dé nchaa tñuhu càháⁿ pàtróòⁿ tée cùu váha iní-dé núú-xi-án. Te núú ìngá tucu pàtróòⁿ-dè vá cúú váha iní-dé, te ní vã tñí-dè tñuhu càháⁿ pàtróòⁿ-dè-án. Te ducaⁿ sãtnahá-xi cùu nchòhò chí vá ndácú-ndó cunu cuechi-ndo núú Yá Ndiòxí te cuhuⁿ iní-ndó nchàa sá ìo ñuyúú-a –càchí-gá xáhaⁿ-gã xii-güedé.

¹⁴ Te nchaa cue téé cùu fariséú ìo ñùhu iní-güedé nchaa sá ìo ñuyúú-a, te xñdedóhò-güedé nchaa tñuhu càháⁿ Jèsús, te ní càháⁿ yíchí-güedé cuèndá-gá.

¹⁵ Te Jèsús ní xáhaⁿ-gã xii-güedé:

–Nchòhò cúú-ndó cuè téé ìo váha càháⁿ núú ñàyiù cuèndá-ni sá cuíní-ndó càháⁿ váha-yu cuèndá-ndó, dico Yá Ndiòxí xini ndáá-gá nàcuáa càa iní-ndó ìⁿ ìⁿ-ndo, te nchaa sá càchí cue ñàyiù ñuyúú-a sá ìo nàndìhì, Yá Ndiòxí dáquèe tíhú-gã.

Cuèndá nchaa tñuhu ní chídó tñuní ndí Moisés

¹⁶ Te nchaa tñuhu ní chídó tñuní ndí Moisés cùnù-xi ni cuu, ndìhì nchaa tñuhu ní chídó tñuní cue téé ní xóo càháⁿ tñuhu Yá Ndiòxí ndèé sanaha. Dico

cútnàhá ní ngúíta té Juàá téé ní xóo dacuàndute ñaha xii ñáiyu ní cáháⁿ-dé tñúhu-í, ndéé dàvá-án ñà túú-gá ní cùnūu nchaa tñúhu ní chídó tñùní ndíi Moisés ndíhi nchaa tñúhu ní chídó tñùní cue téé ní xóo cáháⁿ tñúhu Yá Ndióxi ndéé sanaha. Te diu-ni ndéé dàvá-án ní quesaha ta təcú tñùní ñáiyu nàcuáa ndíhu ndaha ñaha Yá Ndióxi xii-yu, te vài ñáiyu ío sàni iní-yu vitna nàcuáa cadá-yu ndíhu ndaha ñaha Yá Ndióxi xii-yu.

17 Te nchaa tñúhu ní chídó tñùní ndíi Moisés ío ndáá cáháⁿ-xi, te ndíhi-gá naa andíu ndíhi ñuyíú dàcúúxí sá ndíhí ñiⁿ ñiⁿ tñúhu-áⁿ cada-xi nàcuáa cáháⁿ-xi.

*Jèsús càháⁿ-gá cuèndá ñáiyu dàña tnaha
(Mt. 19:1-12; Mr. 10:1-12)*

18 Te núu ñiⁿ téé na dàña tnaha-dé, ndíhi ñadíhí-dé, te tñándaha tucu-dé ndíhi ñngá-yu, te nèhé víhí quide-dé te núu ducaⁿ na cada-dé, te téé na tñándaha ndíhi ñaha ní dáñá yí-xi, te diu-ni ducaⁿ ñà túú cùu-xi sá vaha te núu ducaⁿ na cadá-yu –càchí-gá xáhaⁿ-gá xii-güedé.

Cuèndá ñiⁿ téé nàni Lázará ndíhi cuèndá ñiⁿ téé cuica

19 Te xáhaⁿ tucu-gá xii-güedé:

–Ní xíndecu ñiⁿ téé cuica, te ní xóo cuihnu-dé mee-ni dóó vaha dóó vii càa, te nchaa nduu súuní vaha ní xóo cada-dé vico vehe-dé.

20 Te ní xíndecu tucu ñiⁿ téé ndàhú ní xínani-dé Lázará, te téé-áⁿ ní cùhú-dé ní xíndeé-dé nitùhú-dé ndíhiyí, te ñiⁿ nduu ñiⁿ nduu ní xóo taxinucóo ñaha-güedé xii-dé yuyèhe téé cuica-áⁿ.

21 Te téé ndàhú-áⁿ ní xóo cuú-dé docó, te ní xóo cuini-dé caxi-dé nchaa sá ñà túú-gá ní xóo yaha caxi téé cuica-áⁿ, te ñà túú ní xóo níhí-dé. Te cuéi iná ní xóo quíhíⁿ-di ní xóo nayuu-di nchaa núú ndíhiyí ndéé-dé-áⁿ.

22 Te ní sáá ñiⁿ nduu te ní xíhí téé ndàhú-áⁿ, te cue espíritu xínú cuèchi núú Yá Ndióxi ndécá ñaha-xi xii-dé cuánda núú ndécú té Àbrahám cundecu-dé. Te ní sáá nduu ní xíhí téé cuica-áⁿ tñàhá-dé, te ní chindúxi ñaha-güedé xii-dé.

23 Te ní sáá-dé núú xíndecu nchaa ñáiyu ní xíhí ñà túú ní quide ndáá núú Yá Ndióxi te xíáⁿ ío ndòho-dé ndécú-dé, te ní ndonehe núú-dé te xica ní xini-dé té Àbrahám ndíhi té Lázará-áⁿ xíndecu-güedé.

24 Te níhí ní cáháⁿ-dé, te xáhaⁿ-dè: “Yòhó tātá Àbrahám, cundàhú iní ñàhá xii-í, te cúñaha xii té Lázará ná dàndaxiⁿ-dé díqui ndàhá-dé, te na quixi-dé dandàxiⁿ-dé yàa-í, chi ío ndòho-í ñúhù-í núú ñúhú núú càyú-a”, càchí-dé xáhaⁿ-dè xii té Àbrahám.

25 Dico té Àbrahám ní xáhaⁿ-dè: “Ndàhú yòhó ñani tñàhá-í, dandàcu iní sá ío váha ní xíndecu-n ñuyíú, te té Lázará ío ndàhú ní ndòho-dé ní xíndecu-dé. Te vitna ní nucúndecu váha-dé iha, te yòhó ndóhó-n vitna.

26 Te ñà díú-ní sá xíáⁿ tucu, chi cuádava ndècu ñiⁿ déhvé cùnú ñúhú nèhu-xi núú ndécú-ó, te cuéi nchaa ñáiyu xíndecu iha na càchí iní-yu quixí-yu núú ndécú-ndó dico vá ndácú-yu, te ni nchòhó vá ndácú-ndó quixi-ndo núú ndécú-ndí”, càchí-dé xáhaⁿ-dè.

27 Te ní xáhaⁿ téé cuica-áⁿ: “Te núu ducaⁿ te càháⁿ ndàhú-í núú yòhó tātá Àbrahám vitna sá tэндàha-n té Lázará ná quíhíⁿ-dé vehe tātà-í,

28 chi ndècu úhúⁿ-gá ñani-í, te na cúñaha-dé xii-güedé sá vā cadá-güedé dàtná ní quide-í cuèndá sá vā quíxí-güedé tñàhá-güedé núú ndécú-í ndòhó-í-a”, càchí-dé xáhaⁿ-dè.

²⁹ Te té Àbrahám ní xáhaⁿ-dê: “Mee-güedê ndécú ndìhi-güedé nchaa tnúhu ní chídó tnùnì ndíi Moisés, ndìhi nchaa tnúhu ní chídó tnùnì cue téé ní xóo cáháⁿ tnúhu Yá Ndiòxí ndéé sanaha, te nchaa tnúhu-áⁿ ná tñi-güedé nàcuáa cáháⁿ-xì”, càchí-dé xáhaⁿ-dê xii-dé.

³⁰ Te ní xáhaⁿ tùcu téé cuica-ãⁿ: “Tátá Àbrahám, dico vá cáda cuendá-güedé nchaa tnúhu-áⁿ, dico núu ìⁿ ñáyiú ñá túú-gã ndécú ñùyíú ìⁿ ñáyiú ndècu ndìhi-n quíhíⁿ-yu cáháⁿ ndìhi ñáháⁿ-yu xii-güedé nàcuáa ndùu tnúhu váha, te ndixi cuéchi iní-güedé nchaa sá ñá túú quide váha-güedé ndécú-güedé, te cada váha-güedé”, càchí-dé xáhaⁿ-dê xii-dé.

³¹ Dico té Àbrahám ní xáhaⁿ-dê: “Te núu ñá túú cuiní-güedé tñi-güedé tnúhu ní cáháⁿ ndíi Moisés, ndìhi tnúhu ní cáháⁿ cue téé ní xóo cáháⁿ tnúhu Yá Ndiòxí ndéé sanaha ña, te diu-ni ducaⁿ càda-güedé cuèi ìⁿ ñáyiú ní xihí ná ndótó-yu cúñáháⁿ-yu nàcuáa ndùu tnúhu váha, chi vá quíndáá iní-güedé”, càchí té Àbrahám xáhaⁿ-dê xii téé cuica-ãⁿ —càchí Jèsús xáhaⁿ-gã xii cue téé cùu fariséú.

17

Quihi iní-ó vã cündècu-o ichi cuehé ichi duha

(Mt. 18:6-7, 21-22; Mr. 9:42)

¹ Te Jèsús ní xáhaⁿ-gã xii cue téé xica cuu ndìhi-gá:

—Dacuití sã cóo cuè téé dacáháⁿ-güedé ñáyiú cadá-yu nándi sá cuèhé sá dúhá, ðdico ndàhú ní cuu cue téé ducaⁿ na dàcaháⁿ ñáhá xii-yu cadá-yu nándi sá cuèhé sá dúhá!

² Chi váha-gá sá nùu na dàcutu ndéé ñáyiú ìⁿ yúú yódó dücúⁿ-güedé te dàquéé ñáháⁿ-yu xii-güedé xití ndute lámár, te ñá díú sã cündècu-güedé dacáháⁿ-güedé ñáyiú cadá-yu nándi sá cuèhé sá dúhá, cuèi ñáyiú ndàhú iní-xi dandàhú-güedé.

³ Te ío quihi iní-ndó cündècu-ndo.

Te núu ìⁿ ñaní tnáhá-ndó quide-dé ìⁿ sá ñá túú tàú-dé cada-dé sá cùú-xí-ndó te cáháⁿ-ndó dõho-dé, te núu ní ndixi cuéchi iní-dé sá ñá túú ní quide váha-dé, te cada càhnu iní-ndó sá ñi quide-dé.

⁴ Te cuèi úsá xito na càda-dé nándi sá ñá túú tàú-dé cada-dé sá cùú-xí-ndó ìⁿ nduu, te núu na quixi-dé úsá xito núú-ndó, te cachí-dé sá vã ducáⁿ-gã cada-dé, te xini ñuhu-xi cada cahnu iní-ndó-dê —càchí-gá xáhaⁿ-gã xii-güedé.

Ñáyiú sàndáá ndisa iní-xi

⁵ Te ní xáhaⁿ cuè téé xica cuu ndìhi Jèsús xii-gá:

—Chindee ñàha xii-ndí cuendá ducaⁿ te quíndáá-gá iní-ndí sá Yá Ndiòxí ndácú-gã quidé-gã nchaa sá váha —càchí-güedé xáhaⁿ-güedé xii-gá.

⁶ Te ní xáhaⁿ Jèsús:

—Te núu nchòhó quíndáá ndisa iní-ndó sùúnì cuèdicó luha líí dàtná cuiní-ndó càa ìⁿ ndíquíⁿ yutnu nàni mostázá, te ducaⁿ te cuu cúñaha-ndo xii ìⁿ yutnu: “Quene-n ìha te quíhíⁿ-n cuìhnu-n xití lámár”, duha cúñaha-ndo. Te ducaⁿ càda-xi te núu na quíndáá ndisa iní ñáhá-ndó xii-í —càchí-gá xáhaⁿ-gã xii-güedé.

Nàcuáa tàú ìⁿ téé xinu cuechi cada-dé

⁷ Te xáhaⁿ tùcu-gá xii-güedé:

—Te núu ìⁿ nchòhó ndécú ìⁿ téé xinu cuechi núú-ndó, te cuáháⁿ-dé yucu cuángada chiúⁿ-dé, àdi cuáháⁿ-dé yucu coto-dé quiti, te òré ní nasáá-dé vehe

sá ní sáháⁿ-dé yucu, te vá cũñaha nchòhó cue téé cùu patróóⁿ-dě xii-dé: “Yáchí nehé caxi-n dítá”, vá dúhá cũñaha-ndo.

⁸ Chi nchòhó cue téé cùu patróóⁿ-dě cũñaha-ndo xii-dé: “Cundihi iní cada túha sá cúdini-í, te díhna-gá-í caxi-í dítá te dātnùnì caxi-n”, duha cũñaha nchòhó cue téé cùu patróóⁿ xii-dé.

⁹ Te òré ná ndíhi chiùⁿ ní táhú nchòhó cue téé cùu patróóⁿ cada téé xìnu cuechi núú-ndó, te ñá túú tàú-ndó ndàcáⁿ táhú-ndó núú téé xìnu cuechi núú-ndó.

¹⁰ Te duha càháⁿ-í chi núú òré ná ndíhi nchaa chiuⁿ ní táhú Yá Ndióxi cada-ndo, te cachí-ndó: “Nchúhú cúú-ndí cue téé xìnu cuechi núú Yá Ndióxi, dico ñá túú tàú-gá ndacáⁿ táhú-gá núú-ndí, chi mee-ni chiùⁿ ní táhú-gá ní quide-ndí”, duha cachí-ndó —càchí-gá xáhaⁿ-gá xii-güedé.

Jèsús quidé tātna-gá úxi cue téé tnàhá cuéhé sã dátèhyú nihnu-xi yiqui cùñú ñáyiu

¹¹ Te ññhu Jèsús ichi cuáháⁿ-gá ñuú Jerusálén, te ní yáha-gá núú ràyá distritú Sàmariá ndíhi distritú Galileá.

¹² Te ta cùyatni-gá ìⁿ ñuú lìhli cuáháⁿ, te ní sátnahá ñáhá úxi tnàhá cue téé cùhú xii-gá, te tnàhá-güedé cuéhé sã dátèhyú nihnu-xi yiqui cùñú-ó dico xica lùha ní ngúnu tní-güedé,

¹³ Te níhi ní cáháⁿ-güedé, te xáhaⁿ-güedé xii Jèsús:

—¡Mèstrú, cundàhú iní ñáhá xii-ndí! —càchí-güedé xáhaⁿ-güedé xii-gá.

¹⁴ Te òré ní xiní ñáhá Jèsús xii-güedé, te ní xáhaⁿ-gá:

—Chí cuáháⁿ núú dùtú ná cùndehe ñaha-dé xii-ndo —càchí-gá xáhaⁿ-gá xii-güedé.

Te ní xica-güedé cuáháⁿ-güedé, te ichi-ni ññhu-güedé cuáháⁿ-güedé ní ndúha-güedé cuéhé tnàhá-güedé.

¹⁵ Te nchaa-güedé ní cutnùnì iní-güedé sá ní ndúha-güedé, dico ìⁿ-ni-dé ní nacuíco-dé, te ní ngúita-dé níhi ní cáháⁿ-dé, te ní cachí-dé sá ìo càhnu cuu Yá Ndióxi.

¹⁶ Te ní ngúíñí xítí-dé núú Jèsús, te ní nuu núú-dé ndàa núú ññhú ndàcáⁿ táhú-dé núú-gá. Te téé-áⁿ cúú-dé téé distritú Sàmariá.

¹⁷ Te Jèsús ní cachí-gá:

—Úxi tnàhá-güedé ní ndúha cuéhé tnàhá-güedé. ¿Te ndéé ndécú dàva-gá-güedé-í?

¹⁸ ¿Te náa ìⁿ-ni-téé ingá ñuú-a ní nacuíco-dé ndàcáⁿ táhú-dé núú Yá Ndióxi, te cachí-dé sá ìo càhnu cuu-gá ñá? —càchí-gá.

¹⁹ Te ní xáhaⁿ-gá xii téé-áⁿ:

—Ndacuñí te núhú-n, chi sa ní ndúha-n cuéhé tnàhá-n, chi ní sándáá iní-n Yá Ndióxi —càchí-gá xáhaⁿ-gá xii-dé.

*Nàcuáa yìndaha ñaha Yá Ndióxi
(Mt. 24:23-28, 36-41)*

²⁰ Te cue téé cùu fariséú ní xícáⁿ tnúhú-güedé núú Jèsús núu ná ama ngúita Yá Ndióxi ndíhu ndaha-gá ñáyiu. Te ní xáhaⁿ-gá:

—Ñá túú ná cada-xi ñuyúu quiní-ndó cuendá cutnùnì iní-ndó sã ndíhu ndaha ñaha Yá Ndióxi xii-ndo.

21 Te ni vǎ yǒ cachí: “Iha ndècu-gá táxí tnùnì-gá, àdi yacáⁿ ndécú-gǎ táxí tnùnì-gá”, chi tnuú-ndó sà ndecu-gá ndihi nchaa ñáyiú yìndaha-gá —càchì-gá xáhaⁿ-gǎ xii-güedé.

22 Te ní xáhaⁿ-gǎ xii cue téé xica cuu ndihi-gá:

—Te nchòhó chí sáá nduu, te cachí iní-ndó sǎ sǔúni cuèdicó ìⁿ nduu quini ñáhá-ndó xii yúhú Téé cùu ñani tnáhá-ndó nchaa-ndo, dico vá quini ñáhá-gǎ-ndó xii-í.

23 Te coo ñáyiú cùñáhá-yu xii-ndo: “Iha ndècu-gá, áⁿ yacáⁿ ndécú-gǎ”, quesàhá-yu cùñáhá-yu xii-ndo. Dico vá quindáá iní-ndó quihíⁿ-ndó ndihí-yu núú càchì-yu, te ni vǎ cánì iní-ndó quihíⁿ méé-ndó.

24 Chí dàtná cuìní-ndó quide-xi oré sáá nduté àndiú, chi uuⁿi dàyehe-xi nihí ñuyúú, ducaⁿ càda-xi nduu na quixi tucu yúhú Téé cùu ñani tnáhá-ndó nchaa-ndo, te dàvá-áⁿ quini ñáhá nchaa-ndi túhú ñáyiú xii-í.

25 Dico díhna-gá ndoho vihi-í, te daquèe tíhú ñáhá ñáyiú ñuyúú-a xii-í.

26 Te cadá-yu dàtná ní quide ñáyiú ní xíndecu cùtnàhá ní xíndecu té Nǒé, te ñiú-ni ducaⁿ sǎtnahá-xi cada nchaa ñáyiú ndècu vitna ndéé sáá nduu quixi tucu yúhú Téé cùu ñani tnáhá-ndó nchaa-ndo.

27 Chí caxi-ní-yu, coho-ní-yu, te caca cuu-ni cue téé xica ndáhú, te tnándaha-ní-yu, chí ducaⁿ ñi quidé-yu dàvá-áⁿ ndéé ní sáá nduu cuǎnguee té Nǒé xití bàrcú, te ní ngúita-xi ní cuuⁿ dáú ñi ndaa ndute ñuyúú, te nchaa-yu ní xihí ní cáhá-yu dàvá-áⁿ.

28 Te ñiú-ni ducaⁿ ñi quide tucu ñáyiú cùtnàhá ní xíndecu té Lǒt, chí xèxi-yu xihí-yu, te sááⁿ-yu te nàdicó-yu, te xixitú-yu nándi sá xixitú-yu, te nchaa cue téé xidácáá-güedé vehe.

29 Te oré ní quee té Lǒt ñuú Sòdomá, te ní ngoyo ñuhú andiú, te dàcá yúú sǔúni dicó ní nduu ñuhú-nǎ-xi, te ní xihí nchaandi túhú ñáyiú ñuú-áⁿ.

30 Te ñiú-ni ducaⁿ sǎtnahá-xi cada ñáyiú na sáá nduu quixi tucu yúhú Téé cùu ñani tnáhá-ndó nchaa-ndo ñuyúú-a.

31 Te núú ìⁿ ñáyiú càndodó-yu díquí véhè-yu nduu-áⁿ, te ñi vǎ ndíhu-gá-yu quehéⁿ-yu ìⁿ ndachìúⁿ-yu canehé-yu quihíⁿ, te ñáyiú cuáháⁿ yucu, te ñi vǎ ñuhú-gá-yu vehé-yu.

32 Te chí dándacu iní nàcuáa ní yáha ñadihí té Lǒt.

33 Te nchaa ñáyiú cuìní dàcácu nihnu mee-xi ñuyúú-a ña, te cuíta nihnú-yu, te nchaa ñáyiú na cùú sá cuèndá-í, te naníhí tǎhú-yu.

34 Te na càchì tnúhu tucu-í xii-ndo sǎ ndùu-áⁿ, te núú úú-yu càa ìⁿ núú xito, te ìⁿ-yu ndanchitá-yu ndaa-yu andiú, te ìⁿ-yu quendóo.

35 Te núú úú ñáyiú díhí nchicó-yu ìⁿ-ni vèhe, te ìⁿ-yu ndanchitá-yu ndaa-yu andiú, te ìⁿ-yu quendóo.

36 Te núú úú cue téé yìhì-güedé yucu, te ìⁿ-dé ndanchita-dé ndaa-dé andiú, te ìⁿ-dé quendóo —càchì-gá xáhaⁿ-gǎ xii-güedé.

37 Te sá dúcáⁿ ñi cáháⁿ-gá ñuú ní xicáⁿ tnúhú-güedé núú-gǎ, te xáhaⁿ-güedé xii-gá:

—Mèstrú, ¿te ndéé ducaⁿ càda-xi-i? —cachì-güedé xáhaⁿ-güedé xii-gá.

Te ní xáhaⁿ-gǎ:

—Te nchòhó xini-ndó sǎ ncháá ñúú yúcu yìqui cuñú ní xihí, te yacáⁿ tàcá cue ndixí xéxi-güedé —cachì-gá xáhaⁿ-gǎ xii-güedé.

18

Jèsús càháⁿ-gá cuèndá ìⁿ juéxí ndihi cuèndá ìⁿ ñaha quèé

¹ Te Jèsús ní cani-gá ìⁿ cuèndú núú-güedé cuèndá sá vâ ná tùhú iní-güedé càháⁿ ndihi-güedé Yâ Ndiòxí nchaa-ni òré.

² Te xáhaⁿ-gâ:

—Ìⁿ ñuú ndécú ìⁿ juéxí, te ni ñà túú sàndáá iní-dé Yâ Ndiòxí, te ni ìⁿ tnúhu xáhaⁿ ñáyiú ñà túú cuìní-dé cada cuèndá-dé.

³ Te ñuú-ni ñuú-án ndécú tùcu ìⁿ ñadihí ñaha quèé, te ní sáháⁿ-aⁿ càháⁿ ndàhú-aⁿ núú juéxí-án cuèndá cada ndáá-dé ìⁿ cuèchi.

⁴ Te titní xito ní cuu sàháⁿ-aⁿ càháⁿ ndàhú-aⁿ núú-dé te ñà túú cuìní-dé cada cuèndá-dé tnúhu càháⁿ-aⁿ ní cùu, te ndéé núú ñà cùú-gâ te ní sani iní-dé: “Te cuèi ñà túú sàndáá iní-í Yâ Ndiòxí, te ni ñà túú quide cuèndá-í nchaa tnúhu càháⁿ ñáyiú cada-í,

⁵ dico na càda ndáá-í cuèndá ñaha quèé-a ndihi ñáyiú cùu úhú iní tnáhá ndihi-aⁿ, chi vâ cùndèe-gâ iní-í nuu núu quixi-aⁿ dasátú iní ñáhá xii-í”, duha ní sani iní téé cùu juéxí-án —càchí-gâ xáhaⁿ-gâ xii-güedé.

⁶ Te ní xáhaⁿ tùcu-gâ xii-güedé:

—Cada cuèndá-ndo nàcuáa ní sani iní juéxí téé cuihna iní-xi-án.

⁷ Te Yâ Ndiòxí ío chindee-gâ nchaa ñáyiú ní càháⁿ-gâ cundecu ndihi-gâ, chi cuèi nduu cuèi niú càháⁿ ndihi ñáhá-yu xii-gâ, te vâ cùyàa-gâ nachinaa-gâ nchaa sá quidé ñaha nchaa ñáyiú cùu úhú iní ñáhá xii-yu.

⁸ Te ío ndíhi ducaⁿ càda-gâ. Te òré ná quixi yúhú Téé cùu ñani tnáhá-ndo nchaa-ndo, çte náa naníhí-gâ-í ñáyiú sàndáá ndisa iní Yâ Ndiòxí-án? —càchí-gâ xáhaⁿ-gâ xii-güedé.

Nàcuáa quide ìⁿ téé cùu fariséú ndihi ìⁿ téé cùu cobradór

⁹ Te Jèsús ní càháⁿ-gâ núú ñáyiú nàcuáa quide ñáyiú sàni iní sá ío quide ndáá te dàquee tíhú-yu tnàha ñáyiú-yu, te xáhaⁿ-gâ xii-yu:

¹⁰ —Úú cue téé cuáháⁿ-güedé veñúhu càhnu sá ío cùnuu càháⁿ ndihi-güedé Yâ Ndiòxí, te ìⁿ-dé cùú-dé téé cùu fariséú, te ingá-dé cùú-dé téé cuihna iní-xi quide cobrá ñáhá xii ñáyiú cuèndá impuèstú.

¹¹ Te téé cùu fariséú-án nùtní-dé càháⁿ ndihi-dé Yâ Ndiòxí, te xáhaⁿ-dè xii-gâ: “Yòhó Dútú Ndiòxí ndàcáⁿ táhú-í núú-n, chi ñà túú quide-í dàtná quidé dàva-gâ-güedé, chi dùhu-güedé, càháⁿ ndihi-güedé ñadihí te ñà díú ñadihí-güedé cùú-yu, te nándi-gâ nchaa sá cuèhé sá dúhá quide-güedé, te ni ñà túú quide-í dàtná quidé téé cuihna iní-xi quide cobrá ñáhá xii ñáyiú cuèndá impuèstú ndécú iha.

¹² Chi yúhú ñà túú tnàhí ná xéxi-í úú nduu xití samàná cuèndá sá càháⁿ ndihi ñaha-í xii-n, te nchaa sá nihí-í te càhu-í úxí xichi, te ìⁿ xichi tàxi-í xii-n”, càchí-dé xáhaⁿ-dè xii Yâ Ndiòxí.

¹³ Dico téé cuihna iní-xi quide cobrá ñáhá xii ñáyiú cuèndá impuèstú-án chi xica lùha nutnii-dé, te ni lùha ñà túú cùyii-dé ndonehe núú-dé andiu cuèndá sá ndíxí cuèchi iní-dé nchaa sá ñà túú vâha quide-dé, te ndèdí ndaha-dé pèchú-dé sá ndíhú iní-dé, te xáhaⁿ-dè xii Yâ Ndiòxí: “íYòhó Dútú Ndiòxí cundàhú iní ñáhá xii-í, chi ío cuèhé sá ñà túú vâha quide-í núú-n!”, càchí-dé xáhaⁿ-dè xii Yâ Ndiòxí.

¹⁴ Te na càchí tnúhu-í xii-ndo sã tèe cuihna iní-xi quide cobrá ñáhá xii ñáyiú-án ní tedóho Yâ Ndiòxí nchaa tnúhu ní càháⁿ-dé, te ní quide càhnu iní-gâ

nchaa sá ñà túú vâha ní quide-dé, te cuánuhú-dé vehe-dé. Te téé cùu fariséú-án ñà túú ní tédóho ñaha Yá Ndiòxí xii-dé. Chi nchaa ñáiyu na càda cahnu mee-xi ñuyíú-a te vá cùú-yu ñáiyu cùnuu, te nchaa ñáiyu ñà túú quide cahnu mee-xi, ñáiyu-án cunúú-yu —càchí Jèsús xáhaⁿ-gã xií-yu.

Jèsús quidé ÿ-gã landú
(Mt. 19:13-15; Mr. 10:13-16)

15 Te ñú ÿ ñáiyu ndécá-yu landú lìhli cuáháⁿ núú Jèsús chi cuíní-yu sá téndâha ñaha-gã xii-güexi, te òré ní xiní cue téé xica cuu ndihi-gã sá ndécá-yu landú-án cuáháⁿ núú-gã, te ní nguíta-güedé ténà ñáhá-güedé xií-yu, te xáhaⁿ-güedé sá vâ dúcáⁿ càdá-yu.

16 Dico Jèsús ní cana ñaha-gã xii-güedé, te ní xáhaⁿ-gã:

—Chí dañá ná quixi nahi landú lìhli-án núú-í-a, te vá cadí-ndó ìchi-güexi, chi dàtná cúú vâha iní cue landú lìhli-án ducaⁿ cùu váha iní cue ñáiyu yindaha ñaha Yá Ndiòxí.

17 Te na càchí tnúhu ndáá-í xii-ndo sá núu vá quindáá iní ñáhá-ndó dàtná quidé dàva landú lìhli sàndáá iní ñáhá xii-í, te vá ndíhu ndaha ñaha Yá Ndiòxí xii-ndo, te vá ndúú táhú-ndó cùndecu-ndo ndihi-gã ni caa ni quíhíⁿ —càchí-gã xáhaⁿ-gã xii-güedé.

Íⁿ téé cuica càháⁿ ndihi-dé Jèsús
(Mt. 19:16-30; Mr. 10:17-31)

18 Te ñú téé cùnuu ní xicáⁿ tnúhú-dé núú Jèsús, te xáhaⁿ-dè xii-gã:

—Yòhó Mèstrú, cùu-n téé ío váha iní-xi, te cuíní-í núu vá cùndéé iní-n càchí tnúhu-n ná cúú sá vâha cada-í cuendá nduu táhú-í cundecu-í ndihi Yá Ndiòxí ni caa ni quíhíⁿ —càchí-dé xáhaⁿ-dè xii-gã.

19 Te Jèsús ní xáhaⁿ-gã xii-dé:

—¿Te cùtnuní iní-n nàcuáa nduu tnúhu càháⁿ-n sá yùhú váha iní-án? Chi ñúndí díí-ní Yá Ndiòxí váha iní-gã.

20 Te yòhó xiní-n nàcuáa ní cachí Yá Ndiòxí cada ñáiyu, te duha ní cachí-gã: “Nchòhó cue téé vá càháⁿ ndihi-ndo ñàdihí te núu ñà díú ñàdihí-ndó cùú-yu, te ducaⁿ-ni nchòhó cue ñáiyu ñíhí tucu vá càháⁿ ndihi-ndo téé te núu ñà díú yí-ndo cuu-güedé, te vá cáhni-ndó tnàha ñáiyu-ndo, te ni vâ dúhú-ndó sá ndécú ndihí-yu, te ni vâ dácàcu-ndo cuéchi neñúú sá cúú-xí tnàha ñáiyu-ndo, te canehe-ndo sá yíñùhu núú tátá-ndó ndihi núú ñaná-ndó”, duha ní cachí Yá Ndiòxí cada ñáiyu —càchí Jèsús xáhaⁿ-gã xii-dé.

21 Te téé-án ní xáhaⁿ-dè xii-gã:

—Nchaa xiáⁿ ní nguíta-í quidè-í ndéé cùtnàhá cúú lándú-í —càchí-dé xáhaⁿ-dè xii-gã.

22 Te Jèsús ní xáhaⁿ-gã xii-dé:

—Dico cùmání ñgá núú sá cadá-n, vitna te quíhíⁿ-n te dico-n nchàa sá ndécú ndihi-n, te díhúⁿ-n cuàha táhú-n cuè ñáiyu ndàhú, te ducaⁿ te nduu táhú-n cùndecu váha-n núú ndécú Yá Ndiòxí táxí tnùní-gã, te na yàha ducaⁿ càda-n te quixi-n chitnahá ñáhá-n xii-í —càchí-gã xáhaⁿ-gã xii-dé.

23 Te sá dúcáⁿ ní xáhaⁿ Jèsús xii-dé, te ío ní cundiyí-dé, chi ío cuica-dé.

24 Te sá ní xiní ñáhá Jèsús xii-dé cùndiyí-dé, núu ní cachí-gã:

—Ío úhú quindáá iní ñáiyu cuica Yá Ndiòxí cuendá ndíhu ndaha ñaha-gã xií-yu!

25 Te yáchí-gá yáha ìn càméyu yaú ìn yiqui tìcú dàcúúxí sǎ quìndáá iní ìn ñáyiu cuica Yá Ndióxi cuèndá ndíhu ndaha ñàha-gá xii-yu —duha ní cachí-gá.

26 Te nchaa ñáyiu ní tecú dóho-xi tnúhu ní cáháⁿ-gá ní xáhǎⁿ-yu xii-gá:

—¿Te yoo naníhí tǎhú te núu ducaⁿ vǎi? —càchí-yu xáhǎⁿ-yu xii-gá.

27 Te Jèsús ní xáhaⁿ-gǎ xii-yu:

—Cue ñáyiu ñuyíú-a chí vá ndácú-yu ná cadá-yu nàcuáa ndíhu ndaha ñàha Yá Ndióxi xii-yu, dico mee-gǎ chí ndacu-gá ndíhu ndaha ñàha-gá xii-yu chí nchaa sá vǎha ndàcu-gá quidé-gǎ —càchí-gá xáhaⁿ-gǎ xii-yu.

28 Te té Pèlú ní xáhaⁿ-dǎ xii-gá:

—Nchúhú ní dándöo-ndí nchaa sá ndécú ndíhi-ndí, te ní tuha ñàha-ndí xii-n —càchí-dé xáhaⁿ-dǎ xii-gá.

29 Te ní xáhaⁿ-gǎ xii ñáyiu:

—Na càchí tnúhu ndáá-í xii-ndo sǎ ncháá ñáyiu na dándöo vehe-xi, àdi tátá-xi, nǎná-xi, ñaní-xi, cúha-xi, ñadìhí-xi, déhe-xi cuèndá sá cuíní-yu ndíhu ndaha ñàha Yá Ndióxi xii-yu,

30 te ío-gá cuéhé sǎ cuǎñaha-gǎ xii-yu cundecu ndíhí-yu, te ñá díú-ní xǎǎⁿ, chí tnàhá nduu tǎhú-yu cundecu ndíhi ñàhá-yu xii-í ní caa ní quíhíⁿ ná sǎá nduu —càchí-gá xáhaⁿ-gǎ xii-yu.

*Jèsús càháⁿ tucu-gá sá cáhni ñàha-güedé xii-gá
(Mt. 20:17-19; Mr. 10:32-34)*

31 Te Jèsús ní taudíhí-gá ndi ùxúú cue téé xica cuu ndíhi-gá tnuú ñáyiu, te ní xáhaⁿ-gǎ xii-güedé:

—Vitna te quíhíⁿ-ó ñùú Jerusálén, chí yàcáⁿ cada-xi nchaa nàcuáa sa ní chídó tnùnì cue téé ní xóo cáháⁿ tnúhu Yá Ndióxi ndéé sanaha nàcuáa yáha yúhú Téé cùu ñaní tnàhá-ndó nchaa-ndo.

32 Chí cuáha cuèndá ñàhá-güedé xii-í núú cuè téé ñá túú cùu cue téé isràèl, te cudíquí ndéé ñàhá-güedé xii-í, te cúcuèhé ñàhá-güedé, te tiú díí ñàhá-güedé xii-í.

33 Te caniha-güedé ndíhi ñíi, te dàtnùnì cahni ñàha-güedé xii-í, dico nduu únì sá cùú-í te ndoto-í —càchí-gá xáhaⁿ-gǎ xii-güedé.

34 Dico ní ìn tnúhu ní cáháⁿ-gá ñá túú ní tècú tnùnì-güedé, chí ío yìdáhu tnúhu ní cáháⁿ-gá núu xǎǎⁿ ní ìn ñá túú ní tècú tnùnì-güedé.

*Jèsús quidé tǎtna-gá núú ìn téé cuàá ñuú Jericó
(Mt. 20:29-34; Mr. 10:46-52)*

35 Te òré tá cùyatni Jesús ñuú Jericó cuáháⁿ, te yuhu ìchi cuáháⁿ-gá-áⁿ núcöo ìn téé cuàá xicáⁿ ndàhú-dé.

36 Te òré ní tecú dóho-dé xícáháⁿ vǎi ñáyiu xiyáha-yu, te ní xicáⁿ tnúhú-dé núú ñáyiu ndècu ndíhi-dé ná cuèndá ducaⁿ vǎi-yu yáha.

37 Te ní xáhǎⁿ-yu sá Jèsús téé ñuú Nazàrét ñúhú-dé ichi.

38 Te níhi ní cáháⁿ-dé, te xáhaⁿ-dǎ xii-gá:

—Jèsús ñaní tnàhá ndíi Dàvíí, cundàhú iní ñàhá xii-í! —càchí-dé xáhaⁿ-dǎ xii-gá.

39 Te ñáyiu xixódó núú núú Jèsús ní tenàá ñàhá-yu xii-dé, te xáhǎⁿ-yu sá ná càdì-dé yuhu-dé dico uuⁿ-gá níhi ní cáháⁿ-dé xáhaⁿ-dǎ xii-gá:

—¿Yòhó téé cùu ñaní tnàhá ndíi Dàvíí, cundàhú iní ñàhá xii-í! —càchí-dé xáhaⁿ-dǎ xii-gá.

40 Te Jèsús ní ngüíñí-gá, te ní táúchíúⁿ-gã ní sángueheⁿ ñaha cuè téé ndíhi-gá. Te òré ní quexio-dé núú-gã, te ní xicáⁿ tnúhú-gã núú-dě, te xáhaⁿ-gã:

41 —¿Ná cuini-n cada ñaha-í xii-n-í? —càchí-gá xáhaⁿ-gã xii-dé.

Te téé cuàá-áⁿ nǐ xáhaⁿ-dě:

—Mèstrú, cuini-í cada tátna-n nùú-í cuèndá cundehe-í —càchí-dé xáhaⁿ-dě xii-gá.

42 Te Jèsús ní xáhaⁿ-gã:

—Sa ní ndúha núú-n chi ní sándáá iní-n Yá Ndiöxí —càchí-gá xáhaⁿ-gã xii-dé.

43 Te òré-ni-áⁿ nǐ ndúha núú-dě, te ní chinchicúⁿ-dé Jèsús, te ní cachí-dé sá ïo càhnu cuu Yá Ndiöxí. Te nchaa ñáyiú ní xiní nàcuáa ní cuu ní ndúha núú-dě tnàhá-yu ní cachí-yu sá ïo càhnu cuu Yá Ndiöxí.

19

Jèsús ndíhi ñⁿ téé nàni Zaqueú

1 Te Jèsús ní sáá-gá ñuú Jericó, te ta yãha-gá xití ñuú-áⁿ cuáháⁿ.

2 Te ñuú-áⁿ ndécú ñⁿ téé cuica nàni-dé Zaqueú, te cùnnu-dé táxi tnùní-dé cue téé cùndíhi-dé, cue téé cuihna ìní-xi quide cobrá ñáhá xii ñáyiú cuèndá impuèstú.

3 Te téé-áⁿ cuini-dé quini-dé Jèsús òré-áⁿ ní cùu te ñá ní ndàcu-dé, chi ïo cuéhé ñáyiú, te ñá túú dùcúⁿ-dé.

4 Te xinu-dé ní ngódó núú-dě te ní sáá-dé díquí ñⁿ yutnu sicómorú nùtní yatni yuhu ichi núú yãha Jèsús cuèndá cuini-dé quini ñáhá-dě xii-gá.

5 Te òré tá yãha Jèsús xíaⁿ, te ní ndonehe núú-gã díquí yutnu núú cándò-dé-áⁿ, te ní xáhaⁿ-gã xii-dé:

—Zaqueú, tanùu ndíhi díquí yutnu-áⁿ, chi tnaví quexio-í vehe-n ndètátú-í —càchí-gá xáhaⁿ-gã xii-dé.

6 Te té Zaqueú-áⁿ nǐ nuu ndíhi-dé díquí yutnu-áⁿ, te ïo ní cudíí ìní-dé ní queheⁿ cuèndá-dé Jèsús vehe-dé.

7 Te sá ní xiní ñáyiú ní quexio Jesús vehe-dé, te ncháá-yu ní ngüíta-yu càháⁿ cuéhé-yu cuèndá-gá, te xitnàhá-yu:

—Tée-a cuánguihu-dé vehe ñⁿ téé ndècu ichi cuehé ichi duha —càchí-yu xitnàhá-yu.

8 Te té Zaqueú-áⁿ nǐ ndacuíñí-dé tnuú-yu, te xáhaⁿ-dě xii Jèsús:

—Yöhó Mèstrú, na cuãha-í ñáyiú ndàhú cuádava nchaa sá ndécú ndíhi-í. Te núu yoo ní dándàhú-í ní dúhù-í, te codo ùní-gá tnàhá sá ní dúhù-í-yu nacúañaha-í xii-yu —càchí-dé xáhaⁿ-dě xii-gá.

9 Te Jèsús ní xáhaⁿ-gã xii té Zaqueú:

—Vitna ní naníhí tàhú-n ndíhi nchaa ñáyiú xindecu vehe-n, chi tnàhá-n cùu-n ñaní tnàhá ndíi Àbrahám.

10 Te yúhú Tée cùu ñaní tnàhá-ndo nchaa-ndo véxi-í nándücu-í ñáyiú ní xíta nihnu cuèndá dàcácu nihnu-í-yu núú ùhú núú ndàhú —càchí-gá xáhaⁿ-gã xii-dé.

*Nàcuáa ní quide-güedé ndíhi díhúⁿ cuááⁿ
(Mt. 25:14-30)*

11 Te nchaa ñáyiú-áⁿ nǐ sani iní-yu sá ndíhi-ni ndíhu ndaha ñaha Yá Ndiöxí xii-yu cuèndá sá nǐ cuyatni Jèsús ñuú Jerusalén, te xíaⁿ núu ní ngüíta Jèsús ní caní-gá ñⁿ cuèndú núú-yu cuèndá tecú tnùní váha-yu tnúhu-gá.

12 Te xáhaⁿ-gã xií-yu:

—Ní xíndecu ìⁿ tée cùu ñáni tnáhá ñáyiú cùnuu, te cuáháⁿ-dè ingá ñuú xíca cuendá yàcáⁿ cuáha ñaha-güedè chiuⁿ coo-dé, te dätñuní ndixi-dé quíndaha-dè titní ñuú.

13 Te cùmání-gã quee-dé quíhíⁿ-dè, te ní cana-dé úxí cue tée xínu cuechi núú-dè, te ní sáñaha-dè ndí dííⁿ núú-güedè ìⁿ caa ìⁿ caa díhúⁿ cuááⁿ, te ní xáhaⁿ-dè: “Chí cádá ndáhú ndíhi díhúⁿ-áⁿ ndèé ná sáá nduu nàsáá-í”, càchí-dé xáhaⁿ-dè xii-güedé.

14 Dico nchaa ñáyiú ñuú quíndaha-dè-áⁿ ñà túú tnáhá iní-yu sá quíndaha ñaha-dé, núu ní tendáhá-yu cue tée nèhe tnúhu cuáháⁿ núú cuè tée cuáñaha chiúⁿ coo-dé-áⁿ, te ní xáháⁿ-yu sá cùñaha-güedè sá ñà túú tnáhá iní-yu sá tée-áⁿ quíndaha ñaha-dé xií-yu.

15 Dico dacuítí sá ní sáha-güedè tée-áⁿ chiúⁿ coo-dé sá díú-dè quíndaha-dè ñáyiú nchaa ñuú-áⁿ, te ní nacuico-dè cuánuhú-dé ñuú-dé. Te òré ní nasáá-dé vehe-dé, te ní tendaha-dè ìⁿ tée ní sánúcana ñaha xii cue tée xínu cuechi núú-dè, cue tée ní dándóo ndaha-dè díhúⁿ cuendá cacaⁿ tnúhú-dé núú-güedè ìⁿ ìⁿ-güedè núu ndèé dau ní chídó-xí díquí díhúⁿ sá ní dándóo ndaha ñaha-dé-áⁿ.

16 Te tée ní ndèxio díhna xáhaⁿ-dè: “Pàtróóⁿ, ní quide-í ndáhú ndíhi díhúⁿ-n sá ní dándóo ndaha ñaha-n xii-í, te sá ìⁿ ní taxi-n te ní chídó-xí úxí-gá tnáhá te ná-u naqueheⁿ cuendá-n”, càchí-dé xáhaⁿ-dè.

17 Te tée cùu patróóⁿ-dè-áⁿ ní xáhaⁿ-dè: “Ío váha tée xínu cuechi cuu-n chí ío váha ní quide-n, te sá ní quide váha-n ndíhi sacú díhúⁿ sá ní dándóo ndaha ñaha-í xii-n, te xíáⁿ núu yúhú càchí-í sá táxí tnùní-n úxí ñuú vitna”, càchí-dé xáhaⁿ-dè.

18 Te ní ndèxio ingá-dé, te ní xáhaⁿ-dè: “Pàtróóⁿ, ní quide-í ndáhú ndíhi díhúⁿ-n sá ní dándóo ndaha ñaha-n xii-í, te sá ìⁿ ní taxi-n te ní chídó-xí úhúⁿ-gá tnáhá te ná-u naqueheⁿ cuendá-n”, càchí-dé xáhaⁿ-dè.

19 Te ní xáhaⁿ tée cùu patróóⁿ-dè-áⁿ xii-dé: “Te yòhó taxi tnùní-n úhúⁿ ñuú”, càchí-dé xáhaⁿ-dè xii tée xínu cuechi-áⁿ.

20 Te dätñuní ní ndèxio tucu ingá-dé, te xáhaⁿ-dè: “Pàtróóⁿ, náú díhúⁿ-n-á, te naqueheⁿ cuendá-n chí ní taxúha-í ní chidúⁿcuⁿnuu-í ìⁿ pañú te ñá túú ní quide-í ndáhú ndíhi díhúⁿ-n,

21 chí ní yúhú ñáhà-í xii-n, chí cùu-n ìⁿ tée díí, te nàqueheⁿ-n ìⁿ sá ñà túú ní taxi ndecu-n, te nàtahu-n ìⁿ xichi núú ñà túú ní chíhi-n tatá”, càchí-dé xáhaⁿ-dè xii patróóⁿ-dè.

22 Te ní xáhaⁿ patróóⁿ-dè xii-dé: “Yòhó cúu-n ìⁿ tée cuíhna iní-xi xínu cuechi núú-í, te díu-ni nchaa tnúhu càháⁿ-n-áⁿ càchí tnùní-xi nàcuáa cuu ndáá cuéchi-n. Te núu sàni iní-n sá cùu-í ìⁿ tée díí, te nàqueheⁿ-í ìⁿ sá ñà túú ní tàxi ndecu-í, te nàtahu-í ìⁿ xichi núú ñà túú ní chíhi-í tatá,

23 te núu ducaⁿ ña, ¿te ná cuendá ñá túú ní càhu iní-n dàsaⁿ nuu-n díhúⁿ ní taxi-í, te cùñaha-n cháhu-yu díquí-xi, te òré ná nàsáá-í vehe-í, te sa ngódó lùha-gá díquí-xi naqueheⁿ cuendá-í ní cùu-i?”, càchí-dé xáhaⁿ-dè xii tée xínu cuechi-áⁿ.

24 Te ní xáhaⁿ tée cùu patróóⁿ-áⁿ xii cue tée xíndecu xíáⁿ: “Chí quéndèé díhúⁿ cuááⁿ néhé tée-a, te cuáha-ndo tée nèhe úxí tucu díhúⁿ cuááⁿ-áⁿ”, càchí-dé xáhaⁿ-dè xii-güedé.

²⁵ Te ní xáhaⁿ-güedê: “Pàtróón, dico sa nèhe-dé úxí díhúⁿ cuàán”, càchí-güedê xáhaⁿ-güedê.

²⁶ Te ní xáhaⁿ tée cùu patróón-áⁿ: “Na càchí tnúhu-í xii-ndo sá cuè ñáyiú íó xii-xi te níhí-gá-yu cundecu ndihí-yu, te cue ñáyiú sacú ndécú ndihí cuita ndihí nihnu nchaa sá ndécú ndihí-yu”, càchí tée cùu patróón-áⁿ xáhaⁿ-dê xii-güedê.

²⁷ Te xáhaⁿ tùcu-dé xii-güedê: “Nchaa ñáyiú cùu úhú iní ñáhá xii-í ñá tnàhá iní-yu quindaha-í-yu, te chí cándécá-yu taquixi iha, te cahni-ndò-yu núu-í-a”, càchí tée cùu patróón-áⁿ xáhaⁿ-dê xii-güedê —duha cuáháⁿ cuèndú ní cani Jèsús núu ñáyiú.

Jèsús cuánguihu-gá ñuú Jerusàlén

(Mt. 21:1-11; Mr. 11:1-11; Jn. 12:12-19)

²⁸ Te sáta dúcáⁿ ní cáháⁿ-gá, te ní nucúhuⁿ ichi-gá cuáháⁿ-gá ñuú Jerusàlén.

²⁹ Te òrè sa ní cuyatni-gá ñuú Bèttagé, ndihí ñuú Bètania te xíaⁿ cáá yùcu nani Olívú, te ní xáhaⁿ-gá xii úú cue tée xica cuu ndihí-gá:

³⁰ —Chí cuáháⁿ ñuú cáá yàtni yacáⁿ, te òrè quexìo-ndo yacáⁿ, te naníhí-ndó ìⁿ búrru ndètníⁿ-di, te vátá yòo ìⁿ-gá codo ñàha xii-di, te nandaxi-ndo-di te candeca-ndo-di quixi.

³¹ Te núu yoo na cacáⁿ tnúhu núu-ndó nã cuèndá nándàxi-ndo-di, te cúñaha-ndo xii-yu sá yùhú Yaá xicá cùu ndihí-ndo xini ñuhu-í-di —càchí-gá xáhaⁿ-gá xii-güedê.

³² Te cue tée-áⁿ ní xica-güedê cuáháⁿ-güedê, te nchaa-ni nàcuáa ní xáhaⁿ Jèsús ducaⁿ ní cuu,

³³ chí mei òrè nándàxi-güedê búrru-áⁿ ní quexìo cue ñáyiú cùu xitohó-di xicáⁿ tnúhu-yu núu-güedê, te xáháⁿ-yu:

—¿Ná cuèndá nándàxi-ndo búrru-ndí-i? —càchí-yu xáháⁿ-yu.

³⁴ Te ní xáhaⁿ-güedê xii-yu:

—Nà ndaxi-ndí-di chí Yaá xicá cùu ndihí-ndí xíní ñùhu ñaha-gá xii-di —càchí-güedê xáhaⁿ-güedê xii-yu.

³⁵ Te ndèca-güedê-di cuáháⁿ núu ndécú Jèsús, te òrè ní quexìo-güedê ndihí-di núu ndécú-gá te ní sacáⁿ ndodo-güedê dóo-güedê sáta-di, te ní ngódó ñáhá-gá xii-di.

³⁶ Te ío cuéhé ñáyiú ta sàcáⁿ-yu dóo-yu ichi cuáháⁿ-gá cuèndá núu dóo-yu-áⁿ yáha-gá ndihí quiti yodo-gá.

³⁷ Te ní nucuíta nuu-gá ichi tìndúú yucu Olívú tá cùyatni-gá ñuú Jerusàlén cuáháⁿ, te nchaa ñáyiú sàndáá iní ñáhá xii-gá nchìcúⁿ ñáhá-yu te ní ngúita-yu níhi càháⁿ-yu sá cúdíⁿ iní-yu, te càchí-yu sá ío càhnu cuu Yá Ndióxi cuèndá sá ní xiní-yu nchaa sá vã yòo tnàhí ndàcu cada ní quide-gá.

³⁸ Te càchí-yu:

—Ío càhnu cuu Yaá véxi quindaha ñàha xii-o, te ñuú-gá cúú-gá Yaá ní tendaha Yá Ndióxi véxi quide núu-gá! ¡Te ío càhnu cuu mee-gá! ¡Te andiú ñà túú tnàhí ná cúú! —duha càchí-yu.

³⁹ Te ìⁿ úú cue tée cùu fariséú ñúhú tnàhá tnuú ñáyiú-áⁿ ní xáhaⁿ-güedê xii Jèsús:

—Mèstrú, cúñaha nchaa ñáyiú ndihí-n na càdí-yu yuhú-yu —càchí-güedê xáhaⁿ-güedê xii-gá.

⁴⁰ Dico Jèsús ní xáhaⁿ-gá xii-güedê:

—Te na càchí tnúhu-í xii-ndo sã nõu ñáyiu-a na càdí-yu yuhú-yu ña, te nchaa yúú cãháⁿ nñhi-xi dàtná ñⁿ ñáyiu —càchí-gá xáhaⁿ-gã xii-güedé.

41 Te òré ní cuyatni-gá ñuú Jerusálén te ní xiní-gá, te ní ndáhyú-gá cuendá nchaa ñáyiu dii ñuú-xi-áⁿ sã ndihú iní-gá.

42 Te ní xáhaⁿ-gã xii cue ñáyiu-áⁿ:

—Ío cuu váha iní-í te núu dicó nchòhó tecú tnùní-ndó vitna ñⁿ tnúhu sá cáda váha ñaha xii-ndo, chi ñá túú-gã ná cuu cundecu-ndo, te núu na tècú tnùní-ndó. Dico ñá tècú tnùní-ndó, chi ío yidáhu tnúhu-a.

43 Te sáá nduu tnündòho tnúhu ndàhú sá cúú-xi-ndó, te nchaa cue téé dava-gá ñuú cúú ùhú iní tnáhá ndìhi-ndo quixi-güedé chidoco ñaha-güedé xii-ndo, te ni càndéé núu ndécú-ndó-áⁿ dacàa-güedé ndòho cuendá xiáⁿ quihí váha-güedé nàa ndìhi ñaha-güedé xii-ndo, te vá dáñá-güedé cunu-ndo.

44 Te cahni ñaha-güedé xii-ndo, te ndìhi nchaa vehe-ndo dàngoyo-güedé ndéé cimièntú-xi, chi ñá túú ní cuiní-ndó nàcuáha-ndo cuendá òré ní quixi coto ñaha Yá Ndiòxí xii-ndo —duha ní xáhaⁿ-gã xii ñáyiu ñuú-áⁿ.

Jèsús ñá túú tnàhá iní-gá nàcuáa quidé-yu veñúhu
(Mt. 21:12-17; Mr. 11:15-19; Jn. 2:13-22)

45 Te Jèsús cuànguihu-gá xití veñúhu càhnu sá ío cùnunu, te xití veñúhu-áⁿ xĩndecu cue ñáyiu quidé ndáhú ndìhi cue ñáyiu xisaaⁿ. Te ní queñuhu ñaha Jèsús xii-yu quehé.

46 Te ní xáhaⁿ-gã xii-yu:

—Núú tütú Yá Ndiòxí cãháⁿ-xi nàcuáa ní cãháⁿ-gá, te duha ní cachí-gá: “Vehe-í cúú-xi nõu cãháⁿ ndìhi ñaha ñáyiu xii-í”, duha ní cãháⁿ-gá càchí-xi núú tütú-gá. Dico nchòhó quidé-ndó vèhe-gá vehe ñadúhú —càchí-gá xáhaⁿ-gã xii-yu.

47 Te Jèsús nchaa nduu dànehé-gá ñáyiu xití veñúhu, dico cue téé cùu dútú cùnunu, ndìhi cue téé dàcuaha ñaha xii ñáyiu nchaa tnúhu ní chidó tnùní ndíi Moisés, ndìhi cue téé cùnunu ñuú-áⁿ ndúcú-güedé nàcuáa cada-güedé cahni ñaha-güedé xii-gá.

48 Dico ñá nihí-güedé nàcuáa cada-güedé, chi cuendá nchaa ñáyiu ío cùdíí iní-yu ndèdòho-yu nchaa tnúhu càháⁿ-gá.

20

Jèsús ndécú ndìhi-gá tnúhu ndee iní
(Mt. 21:23-27; Mr. 11:27-33)

1 Te ñⁿ nduu yihí Jèsús xití veñúhu càhnu sá ío cùnunu danehé-gá ñáyiu tnúhu sá càháⁿ nàcuáa naníhí tãhú-yu. Te ní quexio cue téé cùu dútú cùnunu ndìhi cue téé dàcuaha ñaha xii ñáyiu nchaa tnúhu ní chidó tnùní ndíi Moisés, ndìhi cue téé cùu sacuéhé nõu ñáyiu isràél,

2 te ní xáhaⁿ-güedé xii-gá:

—Cuiní-ndí cachí tnúhu-n xii-ndí nása nduu tnúhu ndee iní ndécú ndìhi-n núu quidé-n nándi sá quidé-n. ¿Te yoo ducaⁿ ní taxi tnúhu ndee iní-áⁿ xii-n? —càchí-güedé xáhaⁿ-güedé xii-gá.

3 Te Jèsús ní xáhaⁿ-gã:

—Yuhú tnàhá-í cuiní-í cácaⁿ tnúhu-í ñⁿ sá cácaⁿ tnúhu-í núú-ndó, te cachí tnúhu-ndo.

4 Te chí càchí tnúhu xii-í yoo ní táúchíúⁿ ní dácuaándüte ndí Juàá ñáyi. ¿Yá Ndiòxí àⁿ cuè téé ñuyúⁿ-a ní táúchíúⁿ dùcaⁿ ní quide ndí? —càchí-gá xáhaⁿ-gã xii-güedé.

5 Te ní ngüita-güedé xitnáha-güedé:

—¿Nása cúñaha-o? Chi núu nà cúñaha-o sã Yá Ndiòxí ní táúchíúⁿ dùcaⁿ ní quide ndí Juàá ñá, te quesaha-dé: “¿Ná cuendá ñá túú ní sàndáá iní-ndó tnúhu ní cáháⁿ ndí vãi?”, quesaha-dé.

6 Àdi te núu nà cúñaha-o sã cuè ñáyi ñuyúⁿ-a ní táúchíúⁿ dùcaⁿ ní quide ndí ñá, te nchaa ñáyi cuáha ñhá-yu yúú xii-o, te cahni ñhá-yu, chí càchí-yu sá ndáá sá Yá Ndiòxí ní táúchíúⁿ-gã ní cáháⁿ ndí Juàá tnúhu-gá núú ñáyi —càchí-güedé xitnáha-güedé.

7 Te ní xáhaⁿ-güedé xii-gá sá ñá túú xini-güedé yoo ní táúchíúⁿ dùcaⁿ ní dácuaándüte ndí Juàá ñáyi.

8 Te ní xáhaⁿ Jèsús xii-güedé:

—Te núu ducaⁿ te ní yùhú vã càchí tnúhu-í xii-ndo yòo ní taxi tnúhu ndee iní duha quide-í —càchí-gá xáhaⁿ-gã xii-güedé.

*Cuendá cue téé cuihna iní-xi
(Mt. 21:33-44; Mr. 12:1-11)*

9 Te sáta dúcáⁿ te ní ngüita Jèsús ní cani-gá ìⁿ cuendú núú ñáyi nàcuáa tecu tnúni-yu tnúhu-gá, te xáhaⁿ-gã xii-yu:

—Èⁿ téé ní xitu-dé mee-ni yòho yaha stilé núú ñùhú-dé. Te ní sáá ìⁿ nduu quingaca cuu xica-dé vãi nduu te ní dándóo ndaha-dé sá ñí xitu-dé-án xii ìⁿ úú cue téé càháⁿ ndíhí-dé cuendá cada chiuⁿ-güedé, te ní ndatnúhu-güedé sá òré ná cùu te cuu cuendá dava-güedé te ducaⁿ te ní quee-dé cuáháⁿ-dé.

10 Te sáta ñí sáá nduu ní cuu nchaa ndéhe yoho yaha stilé sá ñí xitu-dé-án, te ní xáhaⁿ-dè xii ìⁿ téé xinu cuechi núú-dé: “Cuáháⁿ cácaⁿ-n sá cùú cuendá-í núú cuè téé ní dándóo ndàha-í nchaa yoho yaha stilé sá ñí xitu-í”, càchí-dé xáhaⁿ-dè. Te téé xinu cuechi-án ñí xica-dé cuáháⁿ-dé, dico cue téé ndéé nchaa yoho yaha stilé-án ñí tñi-güedé téé xinu cuechi-án te ní caniha-güedé, te ní nacuícúⁿ ñhá-güedé xii-dé, te ñá túú tñáhi ná ní sãñaha-güedé.

11 Te dātñuní téé cùu xitohó nchaa yoho yaha stilé-án ñí tendaha tucu-dé ingá téé xinu cuechi núú-dé cuáháⁿ-dé, dico diu-ni ducaⁿ ní quide ñaha-güedé xii-dé, chí ní xicuehè ñhá-güedé, te ní caniha-güedé te ní nacuícúⁿ ñhá-güedé, te ñá túú tñáhi ná ní sãñaha-güedé.

12 Te téé cùu xitohó nchaa yoho yaha stilé-án ñí tendaha tucu-dé ingá-dé cuáháⁿ-dé, te diu-ni ducaⁿ ñí quide ñaha tucu-güedé, chí ní dánicuehè ñhá-güedé, te ní nacuícúⁿ ñhá-güedé.

13 Te téé cùu xitohó nchaa yoho yaha stilé-án ñí sani iní-dé: “¿Nása cada-í vitna? Váha-gá tendaha-í déhe-í téé ío cùu iní-a ñùhú-dé, chí cudana te òré quini ñhá-güedé xii-dé, te canehe-güedé sá yíñùhu núú-dè”, duha ní sani iní-dé.

14 Dico òré ní xini cue téé quide chiuⁿ-án dèhe xitohó nchaa yoho yaha stilé-án, te ní xitnáha-güedé: “Té-ãⁿ téé véxi nduu táhú ñuhu-a ndíhí nchaa sá cáá ñú-xi, dico cahni-o-dé te mee-o nduu tahú-ó sã ndúú táhú-dè”, càchí-güedé xitnáha-güedé.

15 Te ní queñuhu ñaha-güedé ìⁿ xio yuhu ñùhu-án, te ní sahani ñaha-güedé xii-dé —duha cuáháⁿ cuendú ní cani Jèsús núú-yu.

Te dātñuní ní xáhaⁿ tucu-gá xií-yu:

—¿Te nchòhò sa cùtnuní iní-ndó nàcuáa cada ñaha xĩtohó ñuhu-áⁿ xii cue tée-áⁿ ñǎ?

16 Chĩ nùhú-dé te cahni-dé cue tée-áⁿ, te dàndóo ndaha-dě ñuhu-dé xii cue tée cùtnuní iní-dé cada ndáá —càchĩ-gá xáhaⁿ-gǎ xií-yu.

Te ná dúcáⁿ ñĩ cáháⁿ-gá, núu ní cachĩ-yu:

—¡sá vǎ càchĩ Ndiõxí sá dúcáⁿ yǎha-o! —càchĩ-yu.

17 Te Jèsús ní ndacoto-gá núu-yu, te ní xáhaⁿ-gǎ:

—Chĩ càchĩ tnúhu nása quèe-xi nacuáa càháⁿ-xi núu tütú Yǎ Ndiõxí, núu càchĩ-xi:

Yúu sǎ ñĩ dáquéé tĩhú cue tée dàcaa vehe ní saa-xi cùu-xi yúu cùnùu vitna.

Duha càchĩ-xi núu tütú-gá.

18 Te nchaa ñáyiu ñá túu cuiní tnñi tnúhu-í, te ndohó-yu dàtná ññi ñáyiu tnàhnú duuⁿ òré ndúá-yu núu yúu, àdi núu na tàu ñáhá-xí te dàcachi duuⁿ ñaha-xi —cachĩ-gá xáhaⁿ-gǎ xií-yu.

Cuendá impuèstú

(Mt. 21:45-46; 22:15-22; Mr. 12:12-17)

19 Te cue tée cùu dütú cùnùu, ndihĩ cue tée dàcuaha ñaha xii ñáyiu nchaa tnúhu ní chídó tnùnĩ ndĩi Moisés ní cuiní-güedé tnñi-güedé Jèsús òré-ni-á ní cùu, chĩ ní cutnùnĩ iní-güedé sá cuendá-güedé ní cáháⁿ-gá, dico ní yùhú-güedé cuendá sá ïo vǎi ñáyiu.

20 Te ní ndúcú-güedé nàcuáa cada-güedé tnñi ñaha-güedé xii-gá, te ní tendaha-güedé cue tée cuáháⁿ ngoto dayuhu ñaha xii-gá, te cuáháⁿ-güedé dàtná cue tée váha iní-xi, te ndücu-güedé nàcuáa cada-güedé núu cáháⁿ-gá ññi tnúhu sá ñà túu tàu-gá cáháⁿ-gá cuendá ducaⁿ te candeca ñaha-güedé xii-gá quihĩⁿ cuáha cuendá ñáhá-güedé núu tée cùnùu.

21 Te ní xáhaⁿ-güedé xii Jèsús:

—Mèstrú, ñihĩ-ndí tnúhu sá dánèhé-n ñáyiu mee-ni tnúhu váha, te cuèi ndédani càa ñáyiu ññi-ni càháⁿ-n ndihĩ-yu, te càháⁿ ndáá-n nàcuáa càháⁿ Yǎ Ndiõxí cundecu-o ñùyú-a.

22 Te cachĩ tnúhu xii-ndí núu váha-ni cháhu-ndí té Cèsár tée ío cùnùu cuendá impuèstú áⁿ ñáhá —càchĩ-güedé xáhaⁿ-güedé xii-gá.

23 Dico Jèsús ní cutnùnĩ iní-gá sá xító ndèé ñáhá-güedé xii-gá, núu ní xáhaⁿ-gǎ xii-güedé:

24 —Chĩ dánèhé ñáhá xii-í ññi díhúⁿ cuixíⁿ te cachĩ tnúhu-ndo núu yoo núu-xi ndèé, ndihĩ yoo ñi-u-xi ndeé —càchĩ-gá xáhaⁿ-gǎ xii-güedé.

Te ní xáhaⁿ-güedé xii-gá:

—Núu tǎ Cèsár ndèé ndihĩ ñi-u-dé —càchĩ-güedé xáhaⁿ-güedé xii-gá.

25 Te ní xáhaⁿ tucu-gá xii-güedé:

—Te núu ducaⁿ te chí nàcuáha té Cèsár sá cúu cuendá-dé, te sá cúu cuendá meé Yǎ Ndiõxí, te xiǎⁿ nacuáha-ndo-gǎ —càchĩ-gá xáhaⁿ-gǎ xii-güedé.

26 Te ñá ní ndàcu tnahĩ-güedé datícànùu ñaha-güedé xii-gá núu tnúhu càháⁿ-gá, chĩ òré ní cáháⁿ-gá, te da ní cuñúhu-güedé nchaa tnúhu ní cáháⁿ-gá, te váha-gá ní sadĩ-güedé yuhu-güedé.

Cuendá nchaa ñáyiu ndoto

(Mt. 22:23-33; Mr. 12:18-27)

27 Te sáta dúcáⁿ te ní sáá ññi úu cue tée cùu saducéu núu ndécú Jèsús. Te cue tée-áⁿ ñà túu sàndáá iní-güedé sá ndótó cuè ñáyiu ní xihí, te ní xáhaⁿ-güedé xii-gá:

28 —Mèstrú, ndí Moisés càchí ndí núú tütú ndècu vitna sá nõu ìⁿ téé na cùú, te quendóo ñadìhí-dé te ñá túú dèhe-dé ní xõ ndìhi-aⁿ, te téé cùú ñaní-dé naqueheⁿ-dé ñaha ní quendóo quèè-áⁿ cuèndá coo déhe-dé ndìhi-aⁿ cuèndá ñaní-dé téé ní xíhí-áⁿ.

29 Te ní xíndecu usá tnahá cue téé mee-ni ndí ñaní-güedé. Te téé díhna ní níhí ñadìhí-dé, dico ñá túú ní cùdí-dé cundecu-dé chí ní xíhí-dé, te ní ìⁿ déhe-dé ñá túú ní xõ ndìhi ñadìhí-dé-áⁿ.

30 Te téé cùú uú ní naqueheⁿ-dé ñaha ní quendóo quèè-áⁿ dico ní xíhí tucu-dé, te ní ìⁿ tucu déhe-dé ñá túú ní xõ ndìhi ñaha-áⁿ.

31 Te téé cùú uní ní naqueheⁿ tucu-dé ñaha ní quendóo quèè-áⁿ, te ñu-ni ducaⁿ ní xíhí-dé, te ní xínu ndí usá-güedé ní cándeca ñaha-güedé xii ñaha-áⁿ, dico ní ìⁿ-güedé ñá túú ní xõ déhe-güedé ndìhi-aⁿ, te ní ndìhi-güedé ní xíhí.

32 Te ndéé núú ní ndìhi-ná ní xíhí tnahá ñadìhí-áⁿ.

33 Te na sáá nduu ndòto-güedé ndìhi ñaha-áⁿ ¿Te ndèdaca-güedé ñadìhí-güedé cuu-aⁿ-i? Chí ndí usá-güedé ní cándeca ñaha-güedé xii-aⁿ —càchí-güedé xáhaⁿ-güedé xii-gá.

34 Te Jèsús ní xáhaⁿ-gá xii-güedé:

—Nchaa ñáyíu ñuyú-a tñandahá-yu.

35 Dico nchaa ñáyíu ní nduu táhú ndoto díhna nuu ñáyíu-áⁿ cundecú-yu ndìhi Yá Ndiõxí ní caa ní quíhíⁿ, te yàcáⁿ ñá túú-gá sá cándeca tnahá-yu.

36 Te ní ñá túú-gá tñuhu xíhí, chí cuu-ná-yu dátá cue espíritú xínú cuèchi núú Yá Ndiõxí cuèndá sá ní ndotó-yu, chí cùú-yu déhe-gá.

37 Te ndéé ndí Moisés ní chídó tñuní ndí núú tütú ndí sá ncháá ñáyíu ní xíhí ndotó-yu, te ñu-ni xíáⁿ càháⁿ-xi cuèndá tñutàú nchìcúⁿ ñuhú, te ñu-ni xíáⁿ càchí tucu-xi sá Yá Ndiõxí cùú-gá Ndiõxí ndí Àbrahám, ndí Isàác, ndìhi ndí Jàcób.

38 Te cue téé-áⁿ chí cuèí ní xíhí-güedé sá cùú-xí nchòhó, dico sá cùú-xí Yá Ndiõxí chí ndècu vívú-ni-güedé. Chí cùtñuní iní-ó sá Yá Ndiõxí cùú-gá Ndiõxí mee-ni cuè ñáyíu xíndecu vívú, te ñá túú cùú-gá Ndiõxí cue ñáyíu ñá túú ndècu vívú. Te sá cùú-xí mèe-gá chí nchaa ñáyíu ndècu ndìhi-gá ndècú vívú-yu cuèí sa ní xíhí-yu núú ñuyú-a —càchí-gá xáhaⁿ-gá xii-güedé.

39 Te ìⁿ téé dàcuaha ñaha xii ñáyíu nchaa tñuhu ní chídó tñuní ndí Moisés ní xáhaⁿ-dè xii Jèsús:

—Mèstrú, váha-ni càháⁿ-n —càchí-dé xáhaⁿ-dè xii-gá.

40 Te ñá túú-gá ní cùyí-güedé cácaⁿ tñuhú-güedé ní ìⁿ tñuhu núú-gá.

Yoo déhe-xi cùú Cristú

(Mt. 22:41-46; Mr. 12:35-37)

41 Te Jèsús ní xáhaⁿ-gá xii-güedé:

—¿Te nása càchí-tu-yu sá Cristú Yaá tendaha Yá Ndiõxí quixi ñuyú-a cùú-gá déhe ndí Dàvíí?

42 Te mee ndí Dàvíí-áⁿ ní cachí ndí núú librú Sálmú:

Dútú Ndiõxí ní xáhaⁿ-gá xii Yaá cùú Xítohó-í:

“Ngóo xio cùha-í,

43 te yúhu cada-í te nchaa sá cùú ùhú iní ñháá xii-n canehe-xi sá yíñuhu núú-n.”

Duha ní xáhaⁿ Dútú Ndiõxí xii Yaá cùú Xítohó-í càchí ndí núú librú Sálmú.

44 ¿Te nása cùú Cristú déhe ndí Dàvíí, te mee ndí ní cachí ndí sá cùú-gá Xítohó ndí-i? —càchí Jèsús xáhaⁿ-gá xii-güedé.

Jèsús càháⁿ-gá cuendá cue tée dàcuaha ñaha xii ñáyi u nchaa tnúhu ní chídó tnùní ndí Moisés

(Mt. 23:1-36; Mr. 12:38-40; Lc. 11:37-54)

⁴⁵ Te òré ndátnúhu Jèsús ndihi cue tée xica cuu ndihi-gá xíndedóho ñaha ñáyi, te xáhaⁿ-gá xii-güedé:

⁴⁶ —Cada cuendá-ndó vǎ cádá-ndó nàcuáa quide cue tée dàcuaha ñaha xii ñáyi u nchaa tnúhu ní chídó tnùní ndí Moisés, chi tnàhá iní-güedé cuihnu-güedé dóó nání sǎ sácuihnu cue tée cùnuu. Te nchaa núú tàcǎ ñáyi u cuiñí-güedé sǎ ndihi tnúhu yíñúhu cáháⁿ ndihi ñàhá-yu xii-güedé, te nàcǎxi-güedé xilé sácóo nchihi cue tée cùnuu-gǎ xití veñúhu conchihi-güedé, te ducaⁿ-ní quide-güedé cuèi òré quihu-güedé mèsǎ caxi-güedé òré ndécú-güedé ìⁿ vico, chi mee-ni núú sácóo cue tée cùnuu-gǎ cuiñí-güedé coo-güedé.

⁴⁷ Te quèndé-güedé vehe nchaa ñáyi u dǐhí ñáyi u quèé, te ío naha càháⁿ ndihi-güedé Yǎ Ndiǒxí cuendá cuiñí-güedé cáháⁿ váha-yu cuendá-güedé. Te sǎ dúcǎⁿ quide-güedé te sǎá nduu te ío-gǎ ndoho-güedé núú ùhú núú ndàhú dàcúxí dàva-gǎ ñáyi u —càchí-gǎ xáhaⁿ-gǎ xii-güedé.

21

Dǐhúⁿ nduu táhú Yǎ Ndiǒxí ní dáquèe ìⁿ ñaha ndàhú ñaha quèé

(Mr. 12:41-44)

¹ Te Jèsús ní xiní-gǎ xití veñúhu xídáquèe cue tée cuica dǐhúⁿ nduu táhú Yǎ Ndiǒxí xití alcanciǎ.

² Te ní xiní-gǎ tnàhá ìⁿ ñaha ndàhú ñaha quèé ní dáquèe-aⁿ úú dǐhúⁿ còbrí,

³ te ní xáhaⁿ Jèsús xii cue ñáyi u xíndecu-áⁿ:

—Na càchí tnúhu ndáá-í xii-ndo sǎ ñàha ndahú ñaha quèe-a ío-gǎ nándǐhi dǐhúⁿ nǐ dáquèe-aⁿ xití alcanciǎ nduu táhú Yǎ Ndiǒxí dàcúxí dǐhúⁿ nǐ dáquèe dàva-gǎ-yu.

⁴ Chi nchaa ñáyi u-áⁿ nǐ dáquèe-yu mee-nǎ sǎ nǐ ndóo-ná, dico ñaha quèe-a cuèi ndàhú-aⁿ dico ní dáquèe-aⁿ nihí dǐhúⁿ sǎ cuááⁿ-áⁿ sǎ cǎxí-áⁿ ní cùu —cachí-gǎ xáhaⁿ-gǎ xii-yu.

Jèsús càchí-gǎ sǎ ngóyò veñúhu

(Mt. 24:1-2; Mr. 13:1-2)

⁵ Te ìⁿ úú ñáyi u xícáháⁿ-yu cuendá veñúhu càhnu sǎ ío cùnuu sǎ ío vii càa nchaa yúú yíhí, ndihi cuendá nchaa sǎ nǐ sǎñaha táhú ñáyi u yíhi xití-xi. Te Jèsús ní xáhaⁿ-gǎ xii-yu:

⁶ —Sǎá nduu te nchaa sǎ cúñúhu-ndo-a vǎ cúnduu-gǎ-xi dàtnǎ cáá-xí vitna, chi ní ìⁿ-gǎ yúú vǎ códó nchihi tnaha-gǎ-xi chi ndihi ngoyo —càchí-gǎ xáhaⁿ-gǎ xii-yu.

Nàcuáa cada-xi nduu ta cùyatni naa ñuyúú

(Mt. 24:3-28; Mr. 13:3-23)

⁷ Te cue tée xíndecu-áⁿ nǐ xicáⁿ tnúhú-güedé núú Jèsús, te xáhaⁿ-güedé xii-gǎ: —Mèstrú, ¿te ná nduu dùcaⁿ cada-xi ngoyo veñúhu, àdi nándi cùu sǎ cádá-xí cuendá cutnúni iní-ndí sǎ sǎ ta cuyatni nduu ducaⁿ cada-xi-í? —cachí-güedé xáhaⁿ-güedé xii-gǎ.

⁸ Te Jèsús ní xáhaⁿ-gǎ xii-güedé:

—Ío quihi iní-ndó cúndecu-ndo, te vǎ dáñá-ndó mèe-ndo dandahú ñàhá ñáyi u xii-ndo. Chi ío cuhéhe cue tée coo ñuyúú-a, te danàni-güedé mée-güedé

dàtná nánì-í te cachí-güedé: “Yúhú cùú-í Crìstú Yaa ní tendaha Yá Ndiòxí véxi ñuyúú-a”, duha cachí-güedé. Te cachí tucu-güedé: “Vitna sa ní sáá nduu càda-xi nchaa nacuáa ní cáháⁿ-í”, duha cachí-güedé. Dico vá quindáá iní-ndó, te nì vá túhá-ndó-güedé.

⁹ Te òré ná nihí-ndó tnùhu sá tìtní nacióⁿ xìnàá-güedé te dava ñuú xìnàá-güedé ndi mèe-güedé, te vá yùhú-ndó chi dacuití sá dúcáⁿ càda-xi, dico vátá sáá-gá nduu nàa ñuyúú òré ducaⁿ càda-xi —cachí-gá xáhaⁿ-gá xii-güedé.

¹⁰ Te xáhaⁿ tucu-gá xii-güedé:

—Nchaa cue téé ìⁿ nacióⁿ nàa-güedé ndihi cue téé ingá nacióⁿ, te titní ñuú ngüíta-güedé nàa-güedé.

¹¹ Te titní xichi ñuyúú ñihi vèhi tnáa, te titní tucu xichi ñuyúú coo tnamá, te titní tucu xichi ñuyúú quixi cuéhé, te titní núú sá cadá-xí àndiu, te yùhú ñáyiu.

¹² Te òré cúmání-gá cada-xi nchaa nàcuáa càháⁿ-í-a, te cue téé cùu úhú iní ñáhá xii-ndo tñi ñaha-güedé, te candeca ñaha-güedé xii-ndo quíhíⁿ xití veñúhu-güedé cada ndáá-güedé cuéchi-ndo, te chihi ñaha-güedé vecaá xii-ndo, te candeca ñaha-güedé quíhíⁿ núú cué téé cùnuu yindaha nacióⁿ àdi núú dàva-gá cue téé cùnuu sá cuèndá-í.

¹³ Te òré ducaⁿ na càda ñaha-güedé xii-ndo, te òré-áⁿ tàù-xi cáháⁿ váha-ndo cuèndá-í núú-güedé.

¹⁴ Te vá cáni ìní-ndó nùu nása cunduu tnùhu cúñaha-ndo xii-güedé cuèndá cácu nihnu-ndo.

¹⁵ Chi yúhú dacàhu iní ñáhà-í xii-ndo tnùhu cúñaha-ndo xii-güedé, te taxi-í sá vátá quini tnùnì-gá-ndó, te ìⁿ ñáyiu cùu úhú iní ñáhá xii-ndo vá nihí-gá-yu tnùhu cúñáhà-yu xii-ndo.

¹⁶ Te ndéé tàtá-ndó, ndihi ñaní-ndó, ndihi cue ñáyiu cùu ñani tnáhá-ndó, ndihi cue ñáyiu càháⁿ ndihi váha-ndo cuáha cuèndá ñáhà-yu xii-ndo núú cué téé cùchiuⁿ, te dava-ndo càhni ñaha-güedé xii-ndo.

¹⁷ Te ío cuéhé ñáyiu cuu úhú iní ñáhà-yu xii-ndo sá cuèndá-í.

¹⁸ Dico Yá Ndiòxí ío coto ñaha-gá xii-ndo chi ndéé idi díquí-ndó còto-gá.

¹⁹ Te núu na càda ndee iní-ndó càncicúⁿ nihnu ñaha-ndo xii-í, te nduu táhú-ndó cùndecu-ndo ndihi Yá Ndiòxí ñi caa ñi quíhíⁿ.

²⁰ Te nduu na quini-ndó ñuuhu doco sandadú ñi càndéé yuhu ñuú Jerusalén, te sa cutnúni iní-ndó sá sá ní cuyatni nduu dànaa-güedé ñuú-áⁿ.

²¹ Te dàvá-áⁿ nchaa ñáyiu xíndecu distritú Júdeá xíní ñuuhu-xi cunú-yu quíhíⁿ-yu xití yucu, te nchaa ñáyiu xíndecu ñuú Jerusalén queé-yu xití ñuú-áⁿ, te ñáyiu ñá túú xíndecu ñuú-áⁿ vǎ ndíhu-gá-yu.

²² Chi dàvá-áⁿ cuu-xi nduu tnùndòho tnùhu ndàhú, te ducaⁿ càda-xi chi ducaⁿ ndéé tnuní núú tütú Yá Ndiòxí nàcuáa dandòho ñaha-gá xii-yu.

²³ Te ndàhú ní cuu nchaa ñáyiu dìhí ñúhú dèhe-xi, ndihi nchaa ñáyiu ndèca dèhe vitna sàdi na sáá nduu òucaⁿ cada-xi! Chi ío cuéhé tnùndòho tnùhu ndàhú coo núú ndécú-yu dàvá-áⁿ, te xǎⁿ cuu-xi ìⁿ tnùndòho tendaha Yá Ndiòxí quixi sá cùú-xí-yu.

²⁴ Te dava cue téé cuú-güedé cahni ñaha-güedé, te dava-güedé tñi ñaha-güedé candeca ñaha-güedé quíhíⁿ nchaa ñuú xícá, te cue téé dava-gá ñuú cunuu-güedé ñuú Jerusalén, te mee Yá Ndiòxí cachí-gá te núu ná daha nduu cunuu-güedé ñuú-áⁿ.

Nàcuáa cada-xi òré quixi tucu Téé cùu ñani tnáhá cuè ñáyi

(Mt. 24:29-35, 42-44; Mr. 13:24-37)

²⁵ Te cada-xi ñiⁿ sá vátá quini-gá ñáyi nuú nchĩcanchii, ndihi nuú yóó, ndihi nuú nchàa chódíní, te ñuyú-a coo tnúhu ndihú iní-xi te vá cùtnùni iní-yu nása cada-yu cuendá sá ño dusaⁿ càda ndute lamár òré candaundéé tnáhá-xí.

²⁶ Te nchaa ñáyi cuneé-yu sá yùhú-yu, ndihi sá ndihú iní-yu cuendá nchaa sá cáda-xí ñuyú-a, te quidi-xi andiu.

²⁷ Te sáta dúcáⁿ te quini-ndó yùhú Téé cùu ñani tnáhá-ndó nchàa-ndo quee-í andiu quixi-í ichi xití vícò, te dàvã-áⁿ quini ñáhá nchàa ñáyi sá ño cùnũu-í te ndàcu-í quide-í nchaa sá vãha.

²⁸ Te òré ná ngũita-xi ducaⁿ càda-xi, te cuita cundee-gã iní-ndó quĩhíⁿ, te quihí iní-ndó chí sa ní cuyatni víi-nã nduu cãcu nihnu-ndo vá cùndècu-gá-ndó núú ñuyú yíca cuèchi-a —càchí-gá xáhaⁿ-gã xii-güedé.

²⁹ Te ní cani-gá ñiⁿ cuendú nuú-güedé nàcuáa tecú tnùni vãha-güedé tnúhu-gá, te xáhaⁿ-gã xii-güedé:

—Chí cùndèhe yutnu ngúxí ndihi nchaa dava-gá yutnu.

³⁰ Chí nàtahú ndaha-xi, te òré ducaⁿ quide-xi te càchí-ndó sã sã ní cuyatni nuu cahni.

³¹ Te ñiu-ni ducaⁿ sãtnahá-xi cùu oré ná quini-ndó càda-xi nchaa nacuáa cáháⁿ-í, te sá dúcáⁿ te cutnùni iní-ndó sã sã ní cuyatni nduu ndihu ndaha ñaha Yá Ndiõxí xii-ndo.

³² Te na càchí tnúhu ndáá-í xii-ndo sã òré vátá cùu-gá cue ñáyi xĩndecu ñuyú-a vitna, te cada-xi nchaa nàcuáa ní cáháⁿ-í.

³³ Te andiu ndihi ñuyú-a chí ndihi nihnu-xi, dico tnúhu-í chí vá ndihí nihnu-xi, chí cùu-xi tnúhu ndáá.

³⁴ Te quihí iní-ndó vá cùndècu-ndo ichi cuehé ichi duha, te vá cúu-ndó ñáyi quihu, te vá cúhúⁿ iní-ndó mèe-ni nchaa sá ño ñuyú-a, chí nuú ducaⁿ na càda-ndo te nacuanaa-ndo sã sã nduu càda-xi nacuáa ní cáháⁿ-í. Te uuⁿni sáá nduu-ãⁿ,

³⁵ te cada-xi dàtná cuini-ndó quide ñiⁿ trampá chí uuⁿni ngáva-xi, te ducaⁿ càda-xi nchaa ñáyi xĩndecu ñuyú-a, chí uuⁿni sáá nduu-ãⁿ.

³⁶ Te nchòho cundecu túha-ndo te ío cáháⁿ ndihi-ndo Yã Ndiõxí cuendá ndacu-ndo yãha-ndo nchàa tnùndòho quixi ñuyú-a, te ducaⁿ te nasáá-ndó cùndecu-ndo núú ndécú yùhú Téé cùu ñani tnáhá-ndó nchàa-ndo —càchí-gá xáhaⁿ-gã xii-güedé.

³⁷ Te nduu ndùu ní xóo danèhé Jèsús ñáyi tnúhu-gá xití veñúhu càhnu sá ño cùnũu, te niú niú ní xóo quihíⁿ ngúdú-gá xití yucu Òlívú.

³⁸ Te nehé nehé ní xóo quihíⁿ nchaa ñáyi veñúhu-áⁿ ní xóo cundedòho-yu nchaa tnúhu cáháⁿ-gã.

22

Ndùcu-güedé nàcuáa cada-güedé cahni-güedé Jèsús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Te sa ní cuyatni nduu tnáhá vico pãscuá, te vico-áⁿ xéxí ñáyi pàá sá ña túú yihí levadurá.

² Te cue téé cùu dútú cùnũu, ndihi cue téé dàcuaha ñaha xii ñáyi nchaa tnúhu ní chídó tnùni ndíi Moisés ndúcú-güedé nàcuáa cada-güedé cahni-güedé Jèsús, te dicó-ni sá xiyùhú-güedé ñáyi.

³ Te yucu ñávãha ní dácáhu ínì ñáhá-xí xii té Júdás déhe té Iscarioté, te núu tñahá téé-án cúú ùxúú tñahá cue téé xica cuu ndihi-gá ní cùu.

⁴ Te té Júdás-án ní sáháⁿ-dé ní ndatnúhu-dé ndihi cue téé cùu dútú cúnúu, ndihi cue téé tàxi tñuní ñáhá xii cue téé quide cuendá veñúhu nàcuáa cada-dé cuáha cuendá-dé Jèsús núu-güedé.

⁵ Te ío ní cudíí ínì-güedé, te ní xáhaⁿ-güedé xii-dé sá cuãñaha-güedé díhúⁿ,

⁶ te ní xáhaⁿ-dé sá cúú queheⁿ-dé díhúⁿ-ãⁿ, te ní nguíta-dé ndúcú-dé nàcuáa cada-dé cuáha cuendá-dé Jèsús núu-güedé òré ñá túú ñãyiú.

Cúdini Jesús ndihi cue téé xica cuu ndihi-gá

(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Te ní sáá nduu ní quesaha vico xexí-yu pàá sá ñã túú yìhi levadurá, te ñiu-ni nduu-ãⁿ sáhnì-güedé ìⁿ mbéé líhli xèxí-yu.

⁸ Te Jèsús ní xáhaⁿ-gã xii té Pèlú ndihi té Juáá:

—Chí cuaháⁿ chí cada túha-ndo núú cúdini-o sacuaa nduu vico pascuá — cächí-gá xáhaⁿ-gã xii-güedé.

⁹ Te ní xicáⁿ tñuhú-güedé núú-gã, te xáhaⁿ-güedé xii-gá:

—¿Te ndèé cáá vèhe cuiní-n càda túha-ndí-i? —cächí-güedé xáhaⁿ-güedé xii-gá.

¹⁰ Te ní xáhaⁿ Jèsús xii-güedé:

—Chí cündédóho na cächí tñuhu-í xii-ndo nàcuáa cada-ndo. Òré quíhu-ndo xití ñuú núú quíhíⁿ-ndó, te naníhí-ndó ìⁿ téé tànehe ìⁿ yoó ndute, te téé-án candèndaha-ndo-dé quíhíⁿ, te núu ndèdacàa vehe na ndíhu-dé te xiánⁿ quíhu-ndo.

¹¹ Te cúñaha-ndo xii xítóhó vehe-án: “Yaá cúú Mèstrú cächí-gá núu ndèdacàa xichi xití vehe-n cuãñaha ñu-n xii-gá cudini-gá ndihi cue téé xica cuu ndihi-gá sacuaa nduu vico pascuá”, duha cúñaha-ndo.

¹² Te dàtnùnì danèhé ñáhá-dé xii-ndo ìⁿ quartú cáhnú cãa núú ñnu, chí vehe yòdo tñaha cuu-xi, te sa ní quide túha-dé nchaa sá ná ndihi, te nchòhó dicó-nã sá cúdini-o cada túha-ndo —cächí-gá xáhaⁿ-gã xii-güedé.

¹³ Te ní xica-güedé cuaháⁿ-güedé, te nchaa-ni nàcuáa ní xáhaⁿ Jèsús xii-güedé ní cuu, chí nchaa sa ndècu túha, te ní quide túha-güedé sá cúdini-güedé ndihi-gá sacuaa nduu vico pascuá-án.

¹⁴ Te sátá ní tñahá òré cudini Jesús ndihi cue téé ní táuchíúⁿ-gã cáháⁿ tñuhu-gá núú ñãyiú, te cuánguìhu ndihi ñaha-gã xii-güedé mèsá.

¹⁵ Te xáhaⁿ-gã xii-güedé:

—¡Ducaⁿ-ni ío sàni ínì-í sá cúdini ndihi ñaha-í xii-ndo sàcuua nduu vico pascuá òré cúmãní-gã sáá nduu ndòho-í te cuú-í!

¹⁶ Te na cächí tñuhu-í xii-ndo sã vã dúhá-gã caxi ndihi ñaha-í xii-ndo ndùu vico pascuá, chí ndéé òré ná sáá nduu nàsáá-ndó núú táxí tñuní Yã Ndiõxí cundecu-o, te dàvá-án cada ínì-ndó sã dàtnã sã caxí tucu-o chí ío váha cuu ínì-ó cündecu-o —cächí-gá xáhaⁿ-gã xii-güedé.

¹⁷ Te ní queheⁿ-gã ìⁿ vãsú ññhú ndúdì ndéhé yoho yàha stilé, te ní ndacáⁿ táhú-gã núú Yã Ndiõxí, te dàtnùnì ní xáhaⁿ-gã xii-güedé:

—Chí quéhéⁿ vãsú ññhú ndúdì ndéhé yoho yàha stilé-a, te coho-ndo lùha lùha nchaa-ndo.

¹⁸ Te na cächí tñuhu tucu-í xii-ndo sã vítná-nã duha xihì ndihi ñaha-í xii-ndo ndúdì ndéhé yoho yàha stilé-a te vá cóhó ndihi ñaha-gã-í, dico na sáá nduu

nànhí tnàhá-ó nùú ndécú Tàtà-í Dútú Ndiòxí táxí tnùnì-gá, te dàvã-áⁿ cada iní-ó sã dàtná sã cóhó ndìhi ñaha tucu-í xii-ndo, chi ío cudí iní-ó —càchí-gá xáhaⁿ-gã xii-güedé.

19 Te sátá nĩ túhú cóhó-güedé ní cudìni-güedé, te ní queheⁿ-gá pàã te ní ndacáⁿ táhú tucu-gá núú Yã Ndiòxí, te dàtnùnì ní táhú cuèchi-gá, te ní dácãhñu ñaha-gã xii-güedé, te xáhaⁿ-gã:

—Pãã-a cùu-xi datná yiqui cùñú-í, chi cahni ñaha-güedé xii-í sã cuendá-ndó, te ducaⁿ-ni càxi-ndo paã-a cuendá ndacu iní ñáhã-ndó xii-í —càchí-gá xáhaⁿ-gã xii-güedé.

20 Te ñu-ni ducaⁿ nĩ quide-gá ndìhi vãsú ñúhú ndùdí ndéhé yoho yàha stilé, chi ní queheⁿ-gá te òré sãñaha-gã xii-güedé coho-güedé, te ní xáhaⁿ-gã:

—Ndudí ñúhú vãsú-a cada iní-ndó sã cúu-xí dàtná níñi-í sã cãtí òré cahni ñaha-güedé xii-í. Te sã dúcãⁿ cãtí níñi-í xiãⁿ cutnùnì ndáã sã Yã Ndiòxí cada-gá ingá núú sã vãha sã cúu-xí-ndó.

21 'Dico vitna chi iha tnàhá téé cuáha cuendá ñáhã xii-í núú cuè téé cùu úhú iní ñáhã yìhi-dé mèsá.

22 Te yúhú Téé cùu ñani tnàhá-ndó nchàa-ndo ñuhu ichi-í cuáhã-í cuú-í dàtná ní cachí Yã Ndiòxí. ¡Dico ndàhú ní cuu téé ducaⁿ na cuáha cuendá ñáhã xii-í núú cuè téé cùu úhú iní ñáhã! —càchí-gá xáhaⁿ-gã xii-güedé.

23 Te ní ngüita-güedé ndúcú tnùhu núú tnàhá-güedé nùu ndèda càa-güedé ducaⁿ càda cuáha cuendá ñáhã xii-gá núú cuè téé cùu úhú iní ñáhã.

Xĩndatnúhu-güedé ndèdacàa-güedé cunuu-gã

24 Te sátá dúcãⁿ te ní ngüita-güedé xĩndatnúhu-güedé nùu ndèdacàa-güedé tàu-güedé cunuu-güedé.

25 Dico Jèsús ní xáhaⁿ-gã xii-güedé:

—Nchaa cue téé yĩndaha ñaha xii ñáyiu ío tàxi tnuní-güedé, te mee-güedé cuní-güedé sã càháⁿ vãha ñáyiu cuendá-güedé.

26 Dico nchòhó vá dúcãⁿ càda-ndo, chi núú ñⁿ-ndo cùnuu te cada-ni-ndo sã ñà túú cùnuu-ndo, àdi cuu-ndo ñⁿ téé tàxi tnuní ñáhã xii cue téé xĩnu cuechi, te cada-ni-ndo sã cúu-ndó ñⁿ téé xĩnu cuechi-áⁿ.

27 Te vá càchí-ó sã téé xĩnu cuechi cunuu-gã-dé, chi téé quíhu mèsá cùnùu-gã-dé. Dico yúhú ndécú ndìhi ñaha-í xii-ndo dàtná ñⁿ téé xĩnu cuechi.

28 'Te nchòhó ducaⁿ-ni ndècu ndìhi ñaha-ndo xii-í, te tàyãha ndìhi ñaha-ndo xii-í nchaa sã táyãha-í véxi.

29 Te Tàtà-í Dútú Ndiòxí ní cachí-gá sã táxí tnùnì-í, te yúhú càchí-í xii-ndo sã sãà nduu te tnàhá-ndó tàxi tnuní-ndó.

30 Te dàvã-áⁿ caxi-o coho-o càda-o núú táxí tnùnì-í, te yàcãⁿ ngüita-ndo càda ndáã-ndó cuèchi ndi ùxúú xichi ñáyiu isràél —càchí-gá xáhaⁿ-gã xii-güedé.

Jèsús càháⁿ-gã sã té Pèlú cúñaha-dé xii ñáyiu sã ñà túú xini ñáhã-dé xii-gã (Mt. 26:31-35; Mr. 14:27-31; Jn. 13:36-38)

31 Te Xítóhó Jesucristú ní xáhaⁿ-gã xii té Xímú:

—Yòhó Xímú, cundedóho vãha ñⁿ tnúhu na càháⁿ-í-a, chi dàtná cuní-n quide táchí triú sácãⁿ-xi duha sácãⁿ-xi dácãⁿ, ducaⁿ quèsaha yucu ñávãha cada ñaha-xi xii-ndo. Chi coto ndeé ñáhã-xí xii-ndo te núu ndisa sãndáã iní ñáhã-ndó xii-í.

32 Dico yúhú xicãⁿ táhú-í núú Yã Ndiòxí cuendá-n, cuendá sã vã dáñã ndèe-n quindáã iní ñáhã-n xii-í. Te òré ndixi túu iní-n sã ñà túú ní quide

váha-n, te quíhíⁿ-n cuáha-n cuè téé cùndihí-n tnúhu ndee ìní cuèndá canchicúⁿ nihnu-ni-güedé ichi Yá Ndióxi —càchí-gá xáhaⁿ-gã xii-dé.

33 Te ní xáhaⁿ-dè xii-gá:

—Mèstrú, sa ndècu túha-í sá quíhíⁿ ndihí ñaha-í xii-n vècaá, àdi cuéi na cùú ndihí ñaha-í xii-n —càchí-dé xáhaⁿ-dè xii-gá.

34 Te Jèsús ní xáhaⁿ-gã:

—Pèlú, na càchí tnúhu-í xii-n sã cùmání-gã cana ìⁿ líhi te úní xito cáháⁿ-n núú ñáyiú sá ñà túú xíní ñáhá-n xii-í —càchí-gá xáhaⁿ-gã xii-dé.

Sa ní cuyatni ndoho Jèsús

35 Te Jèsús ní xáhaⁿ-gã xii-güedé:

—Te cútñahá ní tendaha ñaha-í xii-ndo ní sáháⁿ-ndó chùⁿ-í, chi ñá túú ní cãnehe-ndo ni ìⁿ sá cùhúⁿ dǐhúⁿ-ndó, te ni ìⁿ sá cùhúⁿ ndàchiuⁿ-ndo ñá túú ní cãnehe-ndo. Te chí càchí tnúhu núú ió ìⁿ sá ní cumání xii-ndo —càchí-gá xáhaⁿ-gã xii-güedé.

Te ní xáhaⁿ-güedé:

—Ñáhá, chi ni ìⁿ sá ñà túú ní cùmání xii-ndí —càchí-güedé xáhaⁿ-güedé xii-gá.

36 Te ní xáhaⁿ-gã:

—Te vitna núú ndècu ndihí-ndo sá sácũhuⁿ dǐhúⁿ-ndó, àdi sá sácũhuⁿ ndachiuⁿ-ndo te canehe-ndo. Te núú ñá túú ndècu ndihí-ndo machití, te nadico-ndo dǒó tǐcachi nihnu-ndo te cuaaⁿ-ndo.

37 Te na càchí tnúhu-í xii-ndo sã dàcuítí sã yáha-í ñàcuáa càháⁿ-xi núú tütú Yá Ndióxi núú càchí-xi: “Íⁿ-ni ní quide ñaha-güedé xii-gá, ndihí cue téé ndècu cuéchi-xi”, duha càchí-xi núú tütú-gá. Te ñá díú-ní xǎⁿ yáha-í chi nchaandí tǐhú ñàcuáa càháⁿ-xi núú tütú-gá yáha-í —càchí-gá xáhaⁿ-gã xii-güedé.

38 Te xáhaⁿ-güedé:

—Mèstrú, iha ndècu úú machití —càchí-güedé xáhaⁿ-güedé xii-gá.

Te ní xáhaⁿ-gã:

—Chí návíi-ñá yuhu-ndo, vá càháⁿ-gá-ndó —càchí-gá xáhaⁿ-gã xii-güedé.

Jèsús càháⁿ ndihí-gá Yá Ndióxi yucu Ólívú

(Mt. 26:36-46; Mr. 14:32-42)

39 Te Jèsús ní quee-gá cuáháⁿ-gá yucu Ólívú, chi ducaⁿ tnàhí quide-gá. Te cue téé xica cuu ndihí-gá nchicúⁿ ñáhá-güedé xii-gá cuáháⁿ.

40 Te òré ní quexio-gá xíaⁿ, te ní xáhaⁿ-gã xii-güedé:

—Chí càháⁿ ndihí Yá Ndióxi cuèndá sá vá dácàháⁿ ñáhá yucu ñávaha xii-ndo càda-ndo sá ñà túú tàú-ndó càda-ndo —càchí-gá xáhaⁿ-gã xii-güedé.

41 Te sátá dúcáⁿ te ní quee dǐⁿ-gá tnuú-güedé cuáháⁿ-gá ìⁿ xio, te sa ñùnchií luha ní xica ndehe-gá núú ndécú-güedé, te xíaⁿ ní ngúíⁿ xítí-gá càháⁿ ndihí-gá Tátá-gá Dútú Ndióxi.

42 Te xáhaⁿ-gã:

—Táu, te núú dicó cachí-n te taunihnu ñaha-n xii-í cuèndá sá vá ndóhò-í ná sáá òré, dico vá cáda-n ñàcuáa càchí ìní mée-í, chí cada-n ñàcuáa càchí ìní mée-n —càchí-gá xáhaⁿ-gã xii Tátá-gá Dútú Ndióxi.

43 Te sátá dúcáⁿ te ní quexio ìⁿ espíritú xínú cuèchi núú Yá Ndióxi ní sáñaha-gã-xi tnúhu ndee ìní xii-gá.

44 Te òré súúní ndǐhú ìní-gá, te uuⁿ-gá súúní nǐ yuhu ni ìní-gá càháⁿ ndihí-gá Dútú Ndióxi, te tnée-gá cáá dàtná cáá ñǐⁿ te ngóyó núú ñúhú.

45 Te sáta ní yáha ní cáháⁿ ndihi-gá Tǎtá-gǎ Dútú Ndiòxí, te ní ndacuíñí-gá cuánuhú-gá núú ní dándóo-gá cue téé-áⁿ, te òré ní nasáá-gá te xixídí-güedé cuendá sá ïo cuéhé tnúhu sàni iní-güedé cuendá-gá.

46 Te xáhaⁿ-gǎ xii-güedé:

—¿Ná cuendá xidí-ndó? Chí ndácóo, te cáháⁿ ndihi-ndo Yǎ Ndiòxí cuendá sá vǎ dácáháⁿ ñhá yúcu ñáváha xii-ndo càda-ndo sá ñà túú tàú-ndó càda-ndo —cachí-gá xáhaⁿ-gǎ xii-güedé.

Ní tñii-güedé Jèsús ndéca ñaha-güedé cuáháⁿ
(Mt. 26:47-56; Mr. 14:43-50; Jn. 18:2-11)

47 Te càháⁿ dúcáⁿ-ní Jèsús ní quexìo vai cue téé, te ìⁿ téé xica cuu ndihi-gá nání Jùdás cúnúu-dé yódó núu-dé núú-güedé ní quexìo ndéé núú-gǎ, te ní teyuhu ñaha-dé xii-gǎ, te núú tnàhá téé-áⁿ cúú ùxúú cue téé xica cuu ndihi-gǎ.

48 Te ní xáhaⁿ Jèsús xii-dé:

—Jùdás, ¿te yòho cuáha cuendá ñáhá-n xii yúhú Téé cùu ñaní tnàhá-ndó ncháa-ndo núú cué téé cùu úhú iní ñáhá xii-í cáháⁿ-n núu duha tēyuhu ñaha-n-áⁿ? —càchí-gá xáhaⁿ-gǎ xii-dé.

49 Te sáta ní xiní nchaa cue téé cündihi Jèsús nàcuáa cùu cue téé ní quexìo-áⁿ, núú ní xicáⁿ tnúhú-güedé núú-gǎ, te xáhaⁿ-güedé xii-gǎ:

—Mèstrú, ¿cúu nàá-ndí ndihi-güedé ndihi machití-a ñǎ? —càchí-güedé xǎhaⁿ-güedé xii-gǎ.

50 Te ìⁿ-dé ní xehndé-ni-dé lóho xio cùha ìⁿ cue téé ní quexìo-áⁿ, te téé-áⁿ xínú cuèchi-dé núú dútú cúnúu-gǎ, te ní quendéé duuⁿ lóho-dé.

51 Te Jèsús ní xáhaⁿ-gǎ xii-güedé:

—Chí dáñá-güedé, vǎ dúcáⁿ càda-ndo —cachí-gá xáhaⁿ-gǎ xii-güedé.

Te ní dácáa-gǎ ndaha-gǎ ní tendaha-gǎ núú ní xindeé lóho téé-áⁿ, te ní nduu váha dàtná-ni càa.

52 Te nchaa cue téé cùu dútú cúnúu, ndihi cue téé tàxi tñuní nchaa cue téé quide cuendá veñúhu sá ïo cúnúu, ndihi cue téé cùu sacuéhé núú ñǎyiu isráel, nchaa cue téé-áⁿ véxi tñii ñaha-güedé xii-gǎ, te ní xáhaⁿ-gǎ xii-güedé:

—Nchòhó, nèhe-ná-ndó màchití, nèhe-ná-ndó càrrutí véxi-ndo núú ndécù-í, dàtná quidé-ndó ìⁿ ñadúhú quidé ñaha-ndo xii-í.

53 Te ducaⁿ-ni ní xiní-ndó ní xindecu-í xití veñúhu càhnu sá ïo cúnúu ní xóo danèhé-í ñǎyiu, te ní lùha ñà túú ní cùu tnándeé ñáhá-ndó xii-í òré-áⁿ, te vitna ní sáá òré ducaⁿ càda-ndo, te cada sácúihná nàcuáa cùu iní-xi —càchí-gá xáhaⁿ-gǎ xii-güedé.

Té Pèlú càháⁿ-dé núú ñǎyiu sá ñà túú xini-dé Jèsús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Te ní tñii-güedé Jèsús, te ndéca ñaha-güedé xii-gǎ cuáháⁿ vehe téé cùu dútú cúnúu-gǎ, te té Pèlú xica xica-ni nchicúⁿ ñáhá-dé xii-gǎ cuáháⁿ.

55 Te òré ní quexìo-güedé xíaⁿ te ní dátñáhá-güedé ñuhú quehé vehe-áⁿ, te ní càndéé yuhu nùhú-áⁿ ní ngóo teté-güedé, chi quide víxiⁿ-xi, te tnàhá té Pèlú ní ngóo teté ndihi ñaha-dé xii-güedé.

56 Te xíaⁿ ndécú ìⁿ xíchí xínú cuèchi vehe-áⁿ, te òré ní xiní-xi núcóo teté tnàhá té Pèlú, te ní ndacoto-xi núú-dé, te ní xáhaⁿ-xi xii-güedé:

—Tnàhá téé-a xica cuu ndihi-dé téé ndéca-güedé cuànguihu-ǎⁿ —càchí-xi xǎhaⁿ-xi xii-güedé.

57 Dico té Pèlú ñà túú ní nñuu-dé, te xǎhaⁿ-dé xii-xi:

—Yúhú ñà túú xini-í téé-áⁿ —càchí-dé xǎhaⁿ-dé xii-xi.

58 Te tna tnaa-ni ní cuu, te ní xini ñáhá tùcu ìṣṣ-dé, te xǎhaⁿ-dè:

—Yòhó tnhá-n xica cuu ndihi-n téé ndèca-güedé cuánguihu-ǎⁿ —càchí-dé xǎhaⁿ-dè xii-dé.

Dico té Pèlú ní xáhaⁿ-dè:

—Ñáhá, ñá díú yúhú xíca cùu ndihí-í-dé —càchí-dé xǎhaⁿ-dè.

59 Te sa ní cuu dàtná ìṣṣ òré te càchí tucu ingá-dé:

—Ndáá sá tée-a xica cuu ndihi-dé téé ndèca-güedé cuánguihu-ǎⁿ, chi tnhá-dé cúú-dè téé distritú Galiléa —càchí-dé xǎhaⁿ-dè xii-güedé.

60 Te té Pèlú ní xáhaⁿ-dè xii téé-áⁿ:

—Yúhú ñá túú cùtnuní iní-í nása ndùu tñúhu càháⁿ-n —càchí-dé xǎhaⁿ-dè.

Te ni vátá xǐnu ducaⁿ-gǎ tñúhu càháⁿ-dé ní cana-ni ìṣṣ líhi.

61 Te Xítóhó Jesucrístú ní nchócótó-gǎ núú-dè, te òré-ni-áⁿ ñí ndacu iní-dé tñúhu ní xáhaⁿ-gǎ xii-dé sá cùmání-gǎ cana ìṣṣ líhi, te úní xito cáháⁿ-dé sá ñá túú xini ñáhá-dè xii-gǎ.

62 Te té Pèlú ní quee-dé tnuú-güedé cuáháⁿ-dé ìṣṣ xio, te ní ndáhyú víhí-dè ní ndixi cuéchi iní-dé.

Cùdiquí ndeé-güedé Jèsús
(Mt. 26:67-68; Mr. 14:65)

63-64 Te cue téé ndèé ñáhá xii Jesús ní cudíquí ndeé ñáhá-güedè xii-gǎ, te ní dádáhu-güedé núú-gǎ, te ní caniha-güedè xii-gǎ, te xǎhaⁿ-güedè:

—¡Cáháⁿ ná cótó yòo ní caniha xii-n! —cachí-güedé xǎhaⁿ-güedè xii-gǎ.

65 Te cuéhé víhí-gǎ tñúhu cuèhé ní xáhaⁿ-güedè xii-gǎ.

Jèsús ndécú-gǎ jùndá
(Mt. 26:59-66; Mr. 14:55-64; Jn. 18:19-24)

66 Te sátá ñí túndaá, te ní tacá cue téé cùu sacuéhé núú ñǎyiu isràèl, ndihi cue téé cùu díútù cùnùu, ndihi cue téé dàcuaha ñaha xii-yu nchaa tñúhu ní chídó tñuní ndii Moisés, te ndèca-güedé Jesús cuáháⁿ núú cáda-güedè jùndá, te òré ní quexìo-güedé ndihí-gǎ núú cáda-güedè jùndá-áⁿ, te ní xáhaⁿ-güedè xii-gǎ:

67 —Cuíní-ndí cachí tñúhu-n xii-ndí núu ñu-n cùu-n Cristú Yaa ní tendaha Yá Ndiòxí véxi ñuyúú-a —càchí-güedé xǎhaⁿ-güedè xii-gǎ.

Te ní xáhaⁿ-gǎ xii-güedé:

—Te núu na càchí-í sá díú-í cúú Cristú ñá, te ní vǎ quíndaá iní-ndó,

68 àdi te núu ìṣṣ sá ná càcáⁿ tñúhu-í núú-ndó, te ñí vǎ càchí tñúhu-ndo, te ñí vǎ dáñá ñaha-ndo.

69 Dico vitna ní cuyatni nduu ngóo yúhú Tée cùu ñani tnhá-ndó nchaa-ndo xio cuha Díútú Ndiòxí Yaa ío cùnùu —cachí-gǎ xáhaⁿ-gǎ xii-güedé.

70 Te dàtnuní nchaa-güedé ní xícaⁿ tñúhú-güedè núú-gǎ, te xǎhaⁿ-güedè xii-gǎ:

—¿Te yòhó cúú-n Dèhe Yá Ndiòxí te núu ducaⁿ vǎni? —càchí-güedé xǎhaⁿ-güedè xii-gǎ.

Te ní xáhaⁿ Jèsús:

—Ndáá sá díú Dèhe-gǎ cúú-í dàtná càchí méé-ndó-ǎⁿ —càchí-gǎ xáhaⁿ-gǎ xii-güedé.

71 Te ní xítñaha-güedé:

—Ñá túú-gǎ xini ñúhu-xi cue téé cáháⁿ núu ndáá sá ndècuéchi-dé àdi ñá túú ndècuéchi-dé chi yuhu mee-dè ní cáháⁿ-dé vitna ní xíndedóho-o —càchí-güedé xítñaha-güedé.

23

*Jèsús ndécú-gã núú tẽ Pilatú**(Mt. 27:1-2, 11-14; Mr. 15:1-5; Jn. 18:28-38)*

¹ Te nchaa-güedé ní ndacuñí-güedé, te ndèca-güedé Jèsús cuáháⁿ núú tẽ Pilatú,

² te núú tõe-áⁿ ñí nguíta-güedé sàcáⁿ cuéchi-güedé cuendá-gá, te xãhaⁿ-güedé:
 –Ní naníhí-ndí tée-a dándahú-dé ñáyíu ñúú-ó, chi xãhaⁿ-dẽ xíí-yu sá vã chãhu-gá-yu impuestú xii té Cèsár tée ío cùnúu, te càchí-dé sá díú-dẽ cúú-dẽ Crístú Yaa ní tendaha Yã Ndiõxí véxi ñuyíú-a te yíndaha-dé ñáyíu càchí-dé – càchí-güedé xãhaⁿ-güedé xii-dé.

³ Te té Pilatú ní xicáⁿ tnúhu-dé núú-gã, te xãhaⁿ-dẽ xii-gá:

–¿Ndáá sá díú-n cùu-n tée yíndaha ñaha xii ñáyíu isràél-áⁿ? –càchí-dé xãhaⁿ-dẽ xii-gá.

Te Jèsús ní xáhaⁿ-gã xii-dé:

–Díu-í yíndaha-í-yu –càchí-gá xáhaⁿ-gã xii-dé.

⁴ Te té Pilatú ní xáhaⁿ-dẽ xii nchaa ñáyíu, ndíhi cue tée cùu dútú cùnúu:

–Yúhú cútñúni iní-í sá ñà túú ñí ñíⁿ cuéchi tée-a –càchí-dé xãhaⁿ-dẽ xíí-yu.

⁵ Dico níhi-gá ní cáháⁿ-güedé, te xãhaⁿ-güedé:

–Càchí-ndí sá ío dusaⁿ xíquide ñáyíu cuendá nchaa sá dánèhé ñáhá-dẽ xíí-yu, te ní quesaha-dẽ ndéé distritú Galileá, te ní yáha-dé ñíhí distritú Jùeá dánèhé-dé ñáyíu, te vitna ní sáá-ni-tu-dé ndéé ndíha dānehé-dé-yu – càchí-güedé xãhaⁿ-güedé xii té Pilatú.

Jèsús ndécú-gã núú tẽ Hèrodés

⁶ Te sá dúcáⁿ ñí tecú dóho té Pilatú ní cacu nehé-yu distritú Galileá, núú xíáⁿ ní xicáⁿ tnúhú-dẽ núú-yu núú tée Galileá cúú-gã.

⁷ Te ní xáháⁿ-yu sá díú tõe yàcáⁿ cúú-gã, núú xíáⁿ ní na dàyáha ñaha-dẽ xii-gã ndaha té Hèrodés tée cùu gobiernú distritú Galileá chi nduu-áⁿ ndécú-dé tnáhá-dé ñúú Jerusálén-áⁿ.

⁸ Te òré ní xiní té Hèrodés-áⁿ Jèsús te ío ní cudíí ñí-dé, chi ní cunaha dùcaⁿ-ní cuiní-dé quini ñáhá-dé xii-gá te ñà túú tnàhí xiní ñáhá-dẽ xii-gá ní cùu, chi cuendá-ñí tnúhu ñíhí-dé cuendá-gá, te ndètu-dé sáá ñíⁿ nduu quini ñáhá-dé xii-gá, te cada-gá ñíⁿ sá vã yõ tnàhí ndacu cada cundehe-dé ní sani iní-dé.

⁹ Te vai sá ñí xicáⁿ tnúhú-dé núú Jèsús, dico ní ñíⁿ tnúhu ñà túú ñí cáháⁿ-gã.

¹⁰ Te xíáⁿ xíndecu tnáhá cue tée cùu dútú cùnúu, ndíhi cue tée dàcuaha ñaha xii ñáyíu nchaa tnúhu ní chídó tnúni ndíi Moisés, te cue tée-áⁿ sùúni ío iní-güedé sàcáⁿ cuéchi-güedé cuendá-gá.

¹¹ Te té Hèrodés ndíhi cue tée cùu sandadú-dé ñà túú ní cùu váha iní-güedé núú Jèsús, te ní cudíquí ndéé ñáhá-güedé xii-gá, te ní dácúíhnú ñaha-güedé dóó vãha xii-gá dàtná cáá dóó sácúíhnu cue tée sàquíndaha ñaha xii ñáyíu. Te dàtnúni té Hèrodés ní dánùhú ñáhá tucu-dé xii-gá ndaha té Pilatú.

¹² Te nduu-áⁿ ní tnahá tnúhu té Pilatú ndíhi té Hèrodés, chi cùu úhú iní tnáhá-güedé ní cùu.

*Càchí-güedé sá cáhí-güedé Jèsús**(Mt. 27:15-26; Mr. 15:6-15; Jn. 18:39-19:16)*

¹³ Te té Pilatú ní nadatàcá-dé nchaa cue tée cùu dútú cùnúu ndíhi dava-gá cue tée cùnúu, ndíhi nchaa ñáyíu ñúú-áⁿ,

14 te ní xáhaⁿ-dě:

—Nchòhó ndécá-ndó tée-a véxi ní taxi cuendá-ndó-dě iha, te cächí-ndó sã ïo dusaⁿ quide ñáyiú cuendá nchaa sã dánhèhè ñáhá-dě xií-yu, te núú-ndó ndúcu tnúhu-í núú-dě núú ná ní quide-dé. Dico yúhú cùtnùní iní-í sã ñà túú ní ìⁿ cuèchi-dé dàtná càháⁿ-ndó-ãⁿ.

15 Te cuèi té Hèrodés ñu-ni ducaⁿ càháⁿ-dé sã ñà túú cuèchi-dé núú ní techiúⁿ ñaha tucu-dé cuándixi-dé iha. Te vitna sa ní cutnùní iní-ó sã ñà túú tàú-xi cahni-o-dé chi ñà túú cuèchi ni quide-dé.

16 Te na dândoho-ni-í-dé te dàcácu-í-dé —cächí-dé xãhaⁿ-dě xií-yu.

17 Te ndi tnahá nduu víco pascuá te dacuítíi sã dàcácu té Pilatú-áⁿ ìⁿ cue tée yihi vecaá, chi ducaⁿ tnahí quide-dé.

18 Dico nchaá-yu ní cuáá-yu, te xãháⁿ-yu xii-dé:

—¡Queñuhu tée nàni Jesús-áⁿ, te cahni-n-dé! ¡Te dàcácu-n tẽ Barrábás! —cächí-yu xãháⁿ-yu xii-dé.

19 Te té Barrábás-áⁿ ñi sanu ichi-dé ñáyiú ñuú ingá ichi, te ní ngúita-yu ndihi-dé ní cuu úhú iní-yu cue tée cùchiuⁿ, te ní sahani-dé ndíyi núú xíãⁿ ní chihi ñaha-güedé vecaá xii-dé.

20 Te té Pilatú cuiní-dé dàcácu-dé Jèsús núú xíãⁿ càháⁿ ndihi ñaha tucu-dé xií-yu ni cùu,

21 dico uuⁿ-gá níhi ní cuáá-yu, te ní xãháⁿ-yu xii-dé úú xito:

—¡Cata caá-dé núú cùrúxí! ¡Cata caá-dé núú cùrúxí! —cächí-yu xãháⁿ-yu xii-dé.

22 Te xito cuu úní ní xáhaⁿ tẽ Pilatú:

—¿Te ná cúú cuèchi ní quide-dé te núú ducaⁿ cuiní-ndó càda-í-dé-i? Te yúhú cùtnùní iní-í sã ñà túú cuèchi ni quide-dé núú xíãⁿ ñà túú tàú-xi cahni-o-dé, te na dândoho-ni-í-dé te dàcácu-í-dé —cächí-dé xãhaⁿ-dě xií-yu.

23 Dico níhi-ni càháⁿ-yu xãháⁿ-yu sã ná càta caa ñaha-dé xii-gá núú cùrúxí, te ñáyiú-áⁿ ndihi nchaa cue tée cùu dùtú cùnùu xícháⁿ níhi-güedé ndihí-yu déé ní xínu iní té Pilatú cada-dé nàcuáa cächí iní-yu.

24 Te ní xáhaⁿ-dẽ xií-yu sã cúú càda-dé nàcuáa xãháⁿ-yu.

25 Te ducaⁿ te ní dàcácu-dé té Barrábás tée ní sanu ichi ñáyiú ñuú ingá ichi, te ñu-ni-dé ní sahani-dé ndíyi núú xíãⁿ ní xíhi-dé vecaá, te dàtnùní ní táúchíúⁿ-dẽ cada-güedé Jèsús nàcuáa xãháⁿ-yu.

Sàta caa-güedé Jèsús núú cùrúxí

(Mt. 27:32-44; Mr. 15:21-32; Jn. 19:17-27)

26 Te ndèca-güedé Jèsús cuáháⁿ núú catá càa ñaha-güedé xii-gá, te ichi cuáháⁿ-güedé ndihí-gá ní tnií-güedé ìⁿ tée ñuú Cirené nání-dé Ximú ñúhú-dé ichi duha cuándixi-dé ní sáháⁿ-dé yucu, te ní dàcuídó ñaha-güedé xii-dé cùrúxí nchídó Jèsús, te ní ngúita nchicúⁿ-dé sátá-gã.

27 Te ío cuéhé ñáyiú nchicúⁿ ñáhá xií-gá cuáháⁿ, te vai ñáyiú ñíhí ío níhi ndáhí-yu sã ndíhú iní-yu cuendá Jèsús.

28 Te Jèsús ní nchócótó-gã núú-yu, te ní xáhaⁿ-gã:

—Nchòhó ñáyiú ñíhí ñuú Jerusalén, vá ndàhyú-ndó cuendá-í chí ndàhyú cuendá méé-ndó ndihí cuendá déhe-ndo.

29 Chì sáá nduu quèsaha ñáyiú: “Sá vãha táhú nchaa ñáyiú ñà túú càcu déhe-xi, ndihí nchaa ñáyiú vátá quíní-gá cuhuⁿ déhe-xi, chi ni ñà túú xini-yu dacadí-yu”, duha quèsahá-yu.

30 Te dàvá-án cǔñaha ñáyiú xii nchaa tìndúú ndihì nchaa núú xìquí: “Chí tàcùuⁿ ngónchihi ñaha-ndo xii-ndí”, duha cǔñàhà-yu.

31 Te núú yúhú téé quìde ndáá duha quìde ñaha-güedé xii-í vitna, te ndèé-gá cada-güedé nchaa ñáyiú ndècu ichi cuehé ichi duha –càchí-gá xáhaⁿ-gá xii-yu.

32 Te ndèca tucu-güedé úú tnhá cue téé ndècu ndisa cuéchi-xi cuáháⁿ cuendá cahni ñaha-güedé xii-güedé ndihì Jèsús.

33 Te òré ní quexio-güedé ndihì-gá ìⁿ xichi núú nání Yìquí Díquí Ndíyì, te xíaⁿ ní sata caa ñaha-güedé xii-gá núú cùrúxí, ndihì úú cue téé ndècu ndisa cuéchi-xi-án, te ìⁿ-dé ní sata caa-güedé xio cùha-gá te ingá-dé ní sata caa-güedé xio dàtni-gá ñu-ni núú cùrúxí tucu.

34 Te ní xáhaⁿ-gá xii Tátá-gá Dútú Ndiòxí:

–Táu, cada càhnu iní sá quidé-güedé, chi ñá túú cùtnuní iní-güedé ná cúú sá quidé-güedé –càchí-gá xáhaⁿ-gá.

Te cue téé cùu sandadú ní xito ndéé-güedé ñu ndèdaca-güedé cuu cuendá-güedé dóó-gá.

35 Te nchaa ñáyiú xìndecu-án ndéhè-yu nàcuáa quìde-güedé Jèsús, te nchaa cue téé cùnuu ní cudíquí ndeé ñhá-güedé xii-gá, te ní xìtnàha-güedé:

–Te dava ñáyiú ní ndacu-dé ní dácácu nihnu-dé, te vitna na dácácu nihnu-dé méé-dé, te núú ndisa sá Crìstú Yáá ní tendaha Yá Ndiòxí véxi ñuyíú-a cùu-dé –càchí-güedé xìtnàha-güedé.

36 Te tnhá cue téé cùu sandadú ní cudíquí ndeé ñhá-güedé xii-gá, chi ní sàndehe yatni-güedé núú taca-gá sáñaha-güedé ndudí íá còho-gá ní cùu,

37 te ní xáhaⁿ-güedé xii-gá:

–Te núú yòhó cúú-n tée yìndaha ñaha xii ñáyiú isràél, te dácácu nihnu mee-n –càchí-güedé xáhaⁿ-güedé xii-gá.

38 Te ní taxi ndecu-güedé ìⁿ sá ndeé lètrá ndàa díquí-gá te ndèé úní núú tnùhu, tnùhu griégú, ndihì tnùhu làtín, ndihì tnùhu hèbreú, te duha quèe-xi ndí nuní núú tnùhu-án “Tée-a cùu-dé téé yìndaha ñaha xii ñáyiú isràél”, duha quèe-xi.

39 Te ìⁿ téé ndècu ndisa cuéchi-xi, téé ní sata caa-güedé dñi-gá xìcuèhé ñhá-dé xii-gá, te xáhaⁿ-dè:

–Te núú yòhó cúú-n Crìstú Yáá ní tendaha Yá Ndiòxí véxi ñuyíú-a, te dácácu nihnu mee-n, te dácácu nihnu ñaha xii nchúhú tnhá-ndí tucu –càchí-dé xáhaⁿ-dè xii-gá.

40 Dico ingá téé cùndihì-dé téé tàcaa ingá xio dñi-gá ní tenáá ñhá-dé xii-dé, te xáhaⁿ-dè:

–¿Te náa ñá túú ndàcu iní-n Yá Ndiòxí vitna duha càa-o ndoho-o ndihì téé nani Jèsús-a ñá?

41 Chi nchoo tàú ndisa-o sá dúhá ndòho-o nacháhu-o cuéchi-o, dico Jèsús-a chi ñá túú cuéchi-dé –càchí-dé xáhaⁿ-dè xii téé tàcaa ndihì-dé-án.

42 Te dàtnùní ní xáhaⁿ-dè xii-gá:

–Jèsús, ndacu iní ñhá-n xì-í òré ná quixi-n taxi tnuní-n ñuyíú-a –càchí-dé xáhaⁿ-dè xii-gá.

43 Te Jèsús ní xáhaⁿ-gá:

–Na càchí tnùhu ndáá-í xii-n sá méí ndùu vitna cundecu ndihì ñaha-í xii-n núú ní nduu támù-í cundecu-í –càchí-gá xáhaⁿ-gá xii-dé.

Ní xihì Jèsús

(Mt. 27:45-56; Mr. 15:33-41; Jn. 19:28-30)

44 Te òré ní cuu cuádava nduu. Te ní cunee nihì ñuyú, te ducaⁿ-ni càa ní cuu ndéé caá úní sacuaa.

45 Chi ñá túú-gá ní ðayehé nchíanchii te ní ndátá dǒo cúú còrtiná veñúhu càhnu sá ïo cùnnu ní quée dava ndáá.

46 Te níhi ní cáháⁿ Jèsús, te xáhaⁿ-gá xii Tátá-gá Dútú Ndiǒxí:

—Táu, naqueheⁿ cuèndá-n espíritú-í —cáchi-gá xáhaⁿ-gá xii Tátá-gá.

Te tnúhu-ná-án ní cáháⁿ-gá te ní xíhí-ni-gá.

47 Te òré ní xiní téé cùu capitáⁿ sá dúcáⁿ ní cuu, te ní ndacu iní-dé Yá Ndiǒxí, te ní cachí-dé:

—Sá ndáá ndisa sá tǎe-a cùu-dé ìⁿ téé ío quide ndáá ndécú ñuyú-a ní cùu —duha ní cachí-dé.

48 Te chitu ñáyiú ní tacá xíaⁿ chi cuiní-yu cundèhé-yu nása cada-güedé Jèsús. Te sátá ní yáha ní xiní-yu nàcuáa ní quide ñaha-güedé xii-gá, te ní ndihí-yu ní ndaca ta càní-yu pèchú-yu cuánuhú sá ndìhú iní-yu.

49 Dico ndècu tnahá cue ñáyiú xiní tnahá ndihí Jèsús, ndihí ñáyiú ðihí ní chinchícúⁿ ñáhá xii-gá ndéé distritú Galileá, te ñáyiú-án xica-ni xixínutñí-yu xíndéhé-yu nchaa nàcuáa ní quide ñaha-güedé xii-gá.

Chindúxi-güedé Jèsús

(Mt. 27:57-61; Mr. 15:42-47; Jn. 19:38-42)

50 Te ndècu ìⁿ téé ñúú Arimateá nání-dé Chèè, te ñúú-án yíndèhu-xi distritú Júdeá, te ío váha iní-dé te quide ndáá-dé núú Yá Ndiǒxí, te tnahá-dé cúú-dé chiuⁿ te ní xíndecu-dé jündá cue téé isráél.

51 Te ñá ní tnahá tnahí iní-dé nàcuáa ní cáháⁿ-güedé núú jündá nàcuáa cada-güedé Jèsús. Te téé-án ndétú-dé sáá nduu ndíhu ndaha ñaha Yá Ndiǒxí xii-dé ndihí ñáyiú.

52 Te téé-án ní sáháⁿ-dé núú tǎ Pilatú te ní xáhaⁿ-dǎ sá núu vá cündèe iní-dé dañá-dé chindúxi-dé yíqui cùñú Jèsús. Te té Pilatú-án ní sáha-dé tnúhu.

53 Te ní nunehe-dé yíqui cùñú-gá núú cùrúxí, te ní chidúcúⁿnuu-dé ìⁿ dóo cuixíⁿ, te ní chihi-dé ìⁿ yaú nchí yíqui naha càva, te vátá yǒo ìⁿ-gá nguíndüxi yaú-án.

54 Te cùu-xi nduu vispré nduu ndètatú ñáyiú, núu xíquide túha-ná-yu sá cúú ìngá nduu.

55 Te nchaa ñáyiú ðihí ní chinchícúⁿ ñáhá xii Jèsús ndéé distritú Galileá ndéndáhá-yu té Chèè ní sáháⁿ núú nchí yaú-án, núu ní xiní-yu nàcuáa ní sacáⁿ-dé yíqui cùñú-gá xití yaú-án.

56 Te ducaⁿ te cuánuhú-yu vehé-yu, te ní quide túha-yu acití sáháⁿ tnámí, ndihí pomadá, te ní ndetatú-yu ìngá nduu-án ní quidé-yu nàcuáa càháⁿ tnúhu Yá Ndiǒxí.

24

Ní ndoto Jèsús

(Mt. 28:1-10; Mr. 16:1-8; Jn. 20:1-10)

1 Te ndumìngú nehé víhí-ní cuáháⁿ tucu ñáyiú ðihí núú nchí yaú ní chihi-güedé yíqui cùñú Jèsús, te nèhé-yu nchaa sá sáháⁿ tnámí ní quide túha-yu-án cuáháⁿ, te tnahá tucu ìⁿ úú-gá tnahá ðihí-yu nchícúⁿ ñáhá xii-yu cuáháⁿ.

2 Te òré ní quexió-yu yuhu yaú-án te ní xiní-yu sá yúú ndédí ìⁿ xio-ná ndécú,

3 te ní quíhu-yu xítí yaú-án, dico ñá túú-gá yiqui cùñú Jèsús yíhí.

4 Te ñá ní cùtnumí tnàhí iní-yu ndéé ichi cuáhán yiqui cùñú-gá, te ní xiní-yu úú espíritú xínú cuèchi núú Yá Ndiòxí xĩnutnĩ-xi ñĩnĩ-yu te xĩxĩhnu-xi dóó chàhnchí.

5 Te ní yuhú-yu te ñá túú ní cùyí-yu cundèhé-yu cue espíritú-án, te cue espíritú-án ní xáhaⁿ-xi xií-yu:

—¿Ná cuèndá nándücu-ndo Jèsús Yaá ndécú vǐvú núú yíndüxi ñáyiu ní xíhí-í?

6 Te ñá túú-gá yiqui cùñú-gá ndécú ìha chi sa ní ndoto-gá, te chí dándacu iní nàcuáa ní cáháⁿ-gá cùtnhá ní xĩndecu-ndo ndĩhi-gá distrítú Galilea,

7 chí ní cachí-gá sá méé-gá cúú-gá ñani tnáhá-ndo nchaa-ndo, te dacuítí cuáha cuèndá ñáhá-güedé xii-gá núú cuè téé ndècu ichi cuehé ichi duha, te cata caa ñaha-güedé xii-gá núú cùrúxí, te núú cùrúxí-án cuú-gá dico nduu úní sá cúú-gá te ndoto-gá, duha ní cachí-gá xii-ndo.

8 Te òré-án ní ndacu iní-yu tnúhu ní cáháⁿ Jèsús.

9 Te sátá dúcán te ní naquehéⁿ-yu ichi cuánuhú-yu, te ní caní-yu cuèndú núú ndí úxí ñⁿ te téé ní táúchíúⁿ Jèsús cáháⁿ tnúhu-gá, ndihí núú dàva-gá ñáyiu.

10 Te ñáyiu ducaⁿ ñaha tnúhu cuánuhú núú-güedé-án cúú tá Màriá Magdaléná, ndihí tá Juáná, ndihí tá Màriá náná tē Jàcobó, ndihí dava-gá ñáyiu ñĩhí.

11 Dico cue téé-án ní sani iní-güedé sá ñícó cáhú iní-yu tnúhu xáháⁿ-yu xii-güedé núú ñá túú ní sàndáa iní-güedé nàcuáa ní xáháⁿ-yu.

12 Dico té Pèlú ní quee-dé xínú-dé cuáhán cuándéhé-dé yaú núú ní chihí-güedé yiqui cùñú Jèsús, te ní sáa-dé te ní ngáundeyí-dé xító ñĩhni-dé xítí yaú-án te ní xiní-dé sá méé-ñá dóó ní xíducúⁿ nuu-gá yúcu ñⁿ xio, te ío ní cuñúhu-dé sá dúcán ní cuu, te ní natnĩ-dé ichi cuánuhú-dé vehe núú xĩndecu-güedé.

Ichi ñuú Emàús (Mr. 16:12-13)

13 Te ñiu-ni nduu-án ñúhú úú cue téé ní xica cuu ndihí Jèsús ichi cuáhán-güedé ñⁿ ñuú nání Emàús, te sàcúhuⁿ-güedé dàtná úú òré ichi ndéé ñuú Jerusalén, te ndéé ñuú Emàús.

14 Te ta ndàtnúhu-güedé cuáhán nchaa nàcuáa ní cuu,

15 te ñini dúcán xicáhán-güedé, te Jèsús ní natnahá ñáhá-gá xii-güedé te ndèca tnaha-gá ndihí-güedé cuáhán.

16 Te cuèi ndèhe ñaha-güedé xii-gá dico dàtná ñⁿ sá ndèdí núú-güedé, chí ñá ná quíní ñáhá-güedé xii-gá ní cùu.

17 Te Jèsús ní xicán tnúhú-gá núú-güedé, te xáhaⁿ-gá:

—¿Ná tnúhu xicáhán-ndó ñũhu-ndo ichi núu ducaⁿ ío cùu ndiyí-ndó-í? —càchí-gá xáhaⁿ-gá xii-güedé.

18 Te ñⁿ téé nani Cleofás ní xáhaⁿ-dē xii-gá:

—¿Te ná cuèndá nchaa ñáyiu íchí ní sáa ñuú Jerusalén xiní-yu nchaa nàcuáa ní cuu, te ñⁿ ñi-ná yòhó ñá túú xiní-n-í? —càchí-dé xáhaⁿ-dē xii-gá.

19 Te ní xáhaⁿ-gá xii-güedé:

—¿Te ná ní cuu-í? —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Cuèndá Jèsús téé ñuú Nazàrét càháⁿ-ndí, chí téé-án cúú-dé ñⁿ téé càháⁿ tnúhu Yá Ndiòxí, te ío váha nduu tnúhu càháⁿ-dé ní cùu, te quide-dé sá vǎ yòo tnàhí ndàcu cada nàcuáa cudíí iní Yá Ndiòxí ndihí ñáyiu ní cùu.

20 Te cue téé cùu dútú cúnùu, ndìhi cue téé cùnùu taxi tñuní ñáhá xii-ndí ní sáha cuèndá ñáhá-güedé xii-dé núú të Pilatú te ní sata caa ñaha-güedé te núú cùrúxí-án ní xihí-dé.

21 Dico vitna sa ní cuu úní nduu sá ní xihí-dé, te nchúhú ní sani iní-ndí sá téé-án dácácu nihnu ñaha-dé xii nchúhú ñáyiu israhél núú nchàa tñúndòho tñúhu ndàhú ndécú-ndí.

22 Dico ío cùnúhu-ndí cúú, chi ì# ùú ñáyiu dìhí ní tuha ñaha xii-dé ndécú ndìhi-ndí ní sáháⁿ ngotó-yu ndéxuehe tàcúhndá-gá yaú núú ní chihi-güedé yiqui cùnú-dé,

23 te ní nasáá-yu càchí-yu xii-ndí sá ñà túú-gá yiqui cùnú-dé yihí xití yaú-án. Te ní xiní-yu espíritú xínú cuèchi núú Yá Ndiòxí, te ní xáhaⁿ-xi xii-yu sá ndécú vívú-dé.

24 Te sáta dúcáⁿ te ì# ùú cue téé cùndìhi-ndí ní sáháⁿ ndéhé-güedé yaú-án, te ní xiní-güedé sá ndàá cúú-xí nchàa tñúhu ní cáháⁿ ñáyiu dìhí-án, dico ñá túú ní xiní-güedé téé-án —càchí-güedé xáhaⁿ-güedé xii-gá.

25 Te Jèsús ní xáhaⁿ-gá xii-güedé:

—Ío cùmání sá xiní tñuní-ndó, chi ío cuèé sàndáá iní-ndó tñúhu ní cáháⁿ cue téé ní xóo cáháⁿ tñúhu Yá Ndiòxí ndéé sanaha!

26 ¿Te náa ñá túú tau-xí sá ndóhó Cristú òré cùmání-gá sáá nduu ndàa-gá andíu núú ndécú Dútú Ndiòxí cundecu-gá-án? —càchí-gá xáhaⁿ-gá xii-güedé.

27 Te ní nguíta-gá xáhaⁿ-gá nàcuáa quèe-xi nchaa tñúhu càháⁿ-xi núú tütú Yá Ndiòxí cuèndá-gá, te dìhna-gá ní cáháⁿ-gá nàcuáa nduu nchaa tñúhu yòdo tñuní núú tütú ndíi Moisés, te dàtnùni ní cáháⁿ-gá nàcuáa nduu nchaa tñúhu yòdo tñuní núú tütú nchaa cue téé ní xóo cáháⁿ tñúhu Yá Ndiòxí ndéé sanaha.

28 Te òré ní quexio-güedé yuhu ñúú núú cuaháⁿ-güedé-án, te Jèsús ní quide-ni-gá sá yáha-gá quíhíⁿ-gá ingá xichi ní cùu.

29 Dico ní cáháⁿ ndàhú-güedé núú-gá sá quèndòo-gá xíaⁿ ndetatú-gá ndìhi-güedé, te xáhaⁿ-güedé xii-gá:

—Quendóo ndìhi ñaha xii-ndí iha ndetatú-n chi sa ní cuaa, te tnavíi cundiquiⁿ —càchí-güedé xáhaⁿ-güedé xii-gá.

Te xíaⁿ cáá ì# vehe cuánguìhu-güedé ndetatú-güedé ndìhi-gá.

30 Te òré sa yihí-güedé mèsá ndìhi-gá cùdini ndìhi ñaha-güedé, te ní queheⁿ-gá pàá te ní ndacáⁿ táhú-gá núú Yá Ndiòxí, te ní táhú cuèchi-gá te dàtnùni ní dácáhñu ñaha-gá xii-güedé.

31 Te òré-án ní naquiní ñáhá-güedé xii-gá ní cùu, dico uuⁿ ní ndóñuhú-gá.

32 Te ní xitnáha-güedé:

—Te ndáá sá súni cùdíi ìni-ó òré tá ndàtñúhu-o ndìhi Jèsús véxi ichi, te ta dànehé ñáhá-gá xii-o nchàa nacuáa quèe-xi tñúhu càháⁿ-xi núú tütú Yá Ndiòxí —càchí-güedé xitnáha-güedé.

33 Te ñá túú-gá ní xíndetu-güedé chi ndìhi-ni ní natnì-güedé ichi cuánuhú-güedé ñúú Jerusalén, te ní nasáá-güedé núú xíndecu ndí úxí ì# cue téé ní táuchíúⁿ Jèsús cáháⁿ tñúhu-gá, ndìhi dava-gá ñáyiu.

34 Te cue téé xíndecu-án xáhaⁿ-güedé:

—Ndáá sá ní ndoto Yaá cúú Mèstrú, chi ní xiní ñáhá të Xímú —càchí-güedé xáhaⁿ-güedé.

35 Te cue téé ní nasáá-án ní caní-güedé cuèndú nàcuáa ní cuu ichi, ndìhi nàcuáa ní cuu ní naquiní-güedé Jèsús òré ní táhú-gá pàá ní dácáhñu ñaha-gá xii-güedé.

*Jèsús ní quexìo-gá núú xĩndecu cue téé ní xica cuu ndìhi-gá
(Mt. 28:16-20; Mr. 16:14-18; Jn. 20:19-23)*

36 Te càháⁿ dúcáⁿ-ní-güedé nàcuáa ní cuu ní quexìo Jèsús ní ngúnutnii-gá ndéé tnuú-güedé, te xáhaⁿ-gã xii-güedé:

—Yá Ndióxí chĩndèe ñaha-gá xii-ndo ìo váha cùu iní-ndó ndècu-ndo — cachí-gá xáhaⁿ-gã xii-güedé.

37 Te da ní yùhú-güedé, te ní sani iní-güedé sá dicó ìⁿ espíritú cúú sã ndéhé-güedé ní cùu.

38 Dico Jèsús ní xáhaⁿ-gã xii-güedé:

—¿Ná cuèndá yùhú-ndó, te sàni ìⁿ sani úú iní-ndó-í?

39 Chí cùndèhe ndaha-í ndìhi sáhà-í te quiní-ndó nã diu-ni-í. Te chí téndàha ñaha xii-í te cundehe-ndo, te núu ìⁿ espíritú ndécú yìqui cuñú-xi dàtná ndécú ndìhi yùhú —càchí-gá xáhaⁿ-gã xii-güedé.

40 Te sáta dúcáⁿ ní xáhaⁿ-gã te ní dánhèhè ñáhà-gã xii-güedé ndaha-gá ndìhi sáhà-gã.

41 Te ío ní cuñúhu-güedé, te ní cudíí iní-güedé sá ndécú-gã tnuú-güedé dico sàni ìⁿ sani úú iní-güedé, te ní xáhaⁿ Jèsús xii-güedé:

—¿Ndècu ndìhi-ndo luha sá cáxí-ó ìha ñá? —càchí-gá xáhaⁿ-gã xii-güedé.

42 Te ní sáñaha-güedé xii-gá luha chácá ní chíhó, ndìhi dítá ñũñú ñũhú ndúdí,

43 te ní queheⁿ-gá te ndèhe-güedé ní xexi-gá.

44 Te dàtnùní ní xáhaⁿ-gã:

—Nchaa sá ñí yáha-í-a cùu-xi sá ñí cachí tnúhu-í xii-ndo cùtnáhá ndécú ndìhi ñaha-gá-í xii-ndo, chí ní cachí-í sá dàcuiítí càda-xi nchaa nacuáa càháⁿ-xi núú tütú ndí Moisés, ndìhi núú tütú ndéé tnúhu ní cáháⁿ cue téé ní xóo cáháⁿ tnúhu Yá Ndióxí ndéé sanaha, ndìhi núú librú Sãlmú —càchí-gá xáhaⁿ-gã xii-güedé.

45 Te òrè-án ñí sáñaha-gã sá xìní tñuní-güedé, te ní tecú tñuní-güedé nchaa tnúhu càháⁿ-xi núú tütú Yá Ndióxí.

46 Te ní xáhaⁿ-gã xii-güedé:

—Ducaⁿ ndéé tñuní núú tütú Yá Ndióxí sá dàcuiítí sã yùhú Cristú cuú-í, te nduu úní ndoto-í.

47 Te ñihí ñuyíú cùtènuu tnúhu ní cáháⁿ-í, dico díhna nuu-gã ñuú Jerusálén ngúíta-yu cacunehe ñáhà-yu xii-í, te cáháⁿ-yu nàcuáa ní dánhèhè-í-yu, te cùñáhà-yu xii cue ñáyíu sá ná dándixi túu-yu iní-yu sá ñà túú quide váha-yu, te dàñá-yu nchaa ichi cuèhé ichi duha ndécú-yu, te natnii-yu ichi Yá Ndióxí, te ducaⁿ te cada càhnu iní-gá nchaa yíca cuèchi-yu.

48 Te vitna nchòhó cuu-ndo cuè téé cáháⁿ ndáá nchaa nàcuáa ní cuu chí ní xìní núú-ndó.

49 Te yùhú tendaha-í Espíritú Yá Ndióxí quixi cundecu ndìhi-ndo, chí ducaⁿ ñí cachí-gá. Dico chí cùndècu-ni ñuú Jerusálén-án ndéé ná quèxìo Espíritú Yá Ndióxí ngúndecu ndìhi-ndo cuèndá chindee ñaha-xi xii-ndo cada-ndo nchaa nacuáa ní cáháⁿ-í —càchí-gá xáhaⁿ-gã xii-güedé.

*Jèsús cuánda-gá andíu
(Mr. 16:19-20)*

50 Te Jèsús ní queñuhu ñaha-gã xii-güedé ñuú Jerusálén ndécá ñaha-gá cuáháⁿ ñuú Bètaniá, te xíáⁿ ní ndonehe-gá ndaha-gá núú ñínu, te ní xícáⁿ táhú ñaha-gá xii-güedé núú Yá Ndióxí.

51 Te sáta ñí xícáⁿ táhú ñaha-gá xii-güedé núú Yá Ndióxí, te ní quee-gá tnuú-güedé cuánda-gá andíu.

⁵² Te ní ngüíta-güedé ní cachí-güedé sá ïo càhnu cuu Jesús, te ní natn#-güedé ichi cuánuhú-güedé ñuú Jerusàlén, te súú ní cùd# ìní-güedé ñúhú-güedě ichi.

⁵³ Te ncha nduu ní xíndecu-güedé veñúhu càhnu sá ïo cùnuu ní ndacáⁿ táhú-güedě núú Yă Ndióxi, te ní cachí-güedé sá ïo càhnu cuu-gá. Duha ní cuu dává-áⁿ.

TNÚHU NÍ CHÍDÓ TǸNÍ TÈ JUÀÁ

Déhe Yá Ndiõxí ní cuu-gá ìⁿ ñáyíu

¹ Cùmání-gã ngáva ñuyíú, te sa ndècu ndìhi Yá Ndiõxí Déhe-gá. Te ìⁿ-ní xícuu-gá. Te Déhe-gá-áⁿ ní cuu-gá dàtná ìⁿ tnúhu, chi ní cachí tnúhu-gá nàcuáa càa Tátá-gã Dútú Ndiõxí.

² Te sa ndècu-gá ndìhi Dútú Ndiõxí te ní ngáva ñuyíú.

³ Te òu-ni tnúhu mee Dútú Ndiõxí ní cuu ní cadúha Déhe-gá nchaa sá ò ñuyíú. Te núu ñá túú Déhe-gá ñá, te ñá túú ná coo ñuyíú-a ní cùu.

⁴ Te òu-ni Déhe-gá quidé-gã ndécú-ó, te ní dáyèhé-gá iní-ó nàcuáa cundecu-o.

⁵ Te tnúhu-gá ní xité nuu-xi núu ndécú nchaa ñáyíu ñùhu ichi cuehé ichi duha. Te ñáyíu-áⁿ cùú-yu dàtná cue ñáyíu ndècu ìⁿ núú néé, te òu-ni-yu cachí iní-yu xocàni-yu tnúhu-gá dico vá ndácũ-yu.

⁶⁻⁷ Te ní xindecu ìⁿ téé ní xínani-dě Juàá, te téé-áⁿ ní táuchíúⁿ Yá Ndiõxí sá càháⁿ-dé tnúhu-gá núú ñáyíu. Te ní xáhaⁿ-dě xii-yu sá vèxi Déhe-gá ñuyíú-a, te dandixi túu-gá iní-yu cuèndá cutnùni iní-yu nàcuáa ndùu cuèndá Yá Ndiõxí cuèndá quíndáá iní-yu tnúhu-gá.

⁸ Te ñá díú mèè té Juàá ní dándixi túu-dé iní-yu cuèndá cutnùni iní-yu nàcuáa ndùu cuèndá Yá Ndiõxí, chi cuèndá-ni ní xica cuu-dé ní càháⁿ-dé sá Déhe Yá Ndiõxí vèxi-gã dandixi túu-gá iní-yu.

⁹ Te ndáá ndisa sá mée-gã dándixi túu-gá iní ñáyíu ñuyíú-a cuèndá cutnùni iní-yu nàcuáa ndùu cuèndá Yá Ndiõxí.

¹⁰ Te ní xindecu-gã ñuyíú-a, te ñáyíu ñuyíú-a ñá ní cùtnuní iní-yu yoo cùu-gá, te òu-ni mee-gã ní cadúha-gã ñuyíú-a ní quide-gã chùⁿ ní táhú Dútú Ndiõxí.

¹¹ Te ní quixi-gã ñuyíú ní cadúha mee-gã, dico cue ñáyíu ñuyíú-a ñá ní cùu váha iní-yu núú-gã.

¹² Dico davá-yu ní sándáá iní ñáhã-yu xii-gã, te ní nduu táhũ-yu ní nduu déhe ñaha Yá Ndiõxí xii-yu.

¹³ Te ñá túú ní ndùu déhe ñaha-gã xii-yu sá cùú-yu déhe ñáyíu ñuyíú-a, àdi sá ndécú tãtã-yu, ñaná-yu chi mee Yá Ndiõxí ducaⁿ ní cuini-gã cunduu sá ndúú déhe ñaha-gã xii-yu.

¹⁴ Te Déhe-gá ní quixi túu-gã ñuyíú-a, te ní cuu-gã ìⁿ yíqui cùnú ní xindecu ndìhi ñaha-gã xii nchoo cuè ñáyíu ní xica cuu túu ndìhi-gã. Te ní xini-ó sá ò cànu cuu-gã cuèndá sá ìⁿ dìi díi-ni-gã cùú-gã Déhe Yá Ndiõxí, te ò cùndahú iní ñáhã-gã chindèè ñaha-gã xii nchoo ñáyíu ndècu ñuyíú-a, te ò ndáá càháⁿ-gã.

¹⁵ Te duha ní càháⁿ té Juàá cuèndá Déhe Yá Ndiõxí ní xáhaⁿ-dě xii ñáyíu:

—Cuèndá téé iha ni càháⁿ-í ndéé cãni-gã ní cachí-í sá quixí ìⁿ téé quixi. Te téé-áⁿ cùnùu-gã-dé, chi díhna-gã-dé sa ndècu-dé dàcúxí yùhú —duha ní xáhaⁿ-dě xii-yu.

¹⁶ Te ò váha iní Yáá-áⁿ chi xito ñaha-gã xii-o nchaa-o ìⁿ nduu ìⁿ nduu.

¹⁷ Te ndii Moisés ní cachí tnúhu ndii tnúhu Yá Ndiõxí tnúhu sá sánú ichi ñaha xii-o nàcuáa cundecu-o, dico Déhe-gã Xítohó Jesucristú ní cachí-gã sá ò cùu iní ñáhã Yá Ndiõxí xii-o. Te ní càháⁿ-gã nchaa dava-gã tnúhu ndáá.

¹⁸ Te ñá ìⁿ ñáyíu xini túu-yu Yá Ndiõxí. Dico ìⁿ dìi díi-ni Déhe-gã Yáá ndécú ndìhi-gã cachí tnúhu-gã nàcuáa càa-gã.

Té Juàá tée dàcuandute ñaha xii ñáyiú càháⁿ váha-dé cuèndá Xítohó Jesucristú (Mt. 3:11-12; Mr. 1:7-8; Lc. 3:15-17)

¹⁹ Te cue tée israél ndécú ñúú Jerusalén ní tendaha-güedě cue dútú ndihi cue tée cùu levitá cuáháⁿ-güedé núú ndécú tē Juàá ndúcú tñuhu-güedé núú-dě núu ná tée cùu-dé.

²⁰ Te ní cáháⁿ ndáá-dé ní xáhaⁿ-dě xii-güedé:

—Yúhú, ñá díú Crístú Yaá ní tendaha Yá Ndióxi véxi ñuyúú-a cùu-í —càchí-dé xáhaⁿ-dě.

²¹ Te ní xáhaⁿ tùcu-güedé:

—¿Te yoo cùu yohó váiⁿ? ¿Á yòhó cúu-n tē Èliás? —càchí-güedé xáhaⁿ-güedě xii-dé.

Te ní xáhaⁿ tē Juàá:

—Yúhú, ñá díú tē Èliás cúu-í —càchí-dé xáhaⁿ-dě.

Te xáhaⁿ tùcu-güedé:

—¿Te yòhó cúu-n tē ní cachí cue tée ndéé sanaha quixi cáháⁿ tñuhu Yá Ndióxi-áⁿ? —càchí-güedé xáhaⁿ-güedě xii-dé.

Te ní xáhaⁿ-dě:

—Ni ñá díú tē-áⁿ cúu-í —càchí-dé xáhaⁿ-dě xii-güedé.

²² Te ní xáhaⁿ tùcu-güedé:

—¿Te ná tée cùu yohó váiⁿ?, cuèndá ducaⁿ nàcani tñuhu-ndí núú cuè tée ní tendaha ñaha xii-ndí véxi-ndí, te cáháⁿ duuⁿ-n núu ná tée cùu-n —càchí-güedé xáhaⁿ-güedě xii-dé.

²³ Te ní xáhaⁿ tē Juàá:

—Yúhú cúu-í tēe xica cáháⁿ xití yucu nàcuáa ní cáháⁿ ndíi Chàíá, chi ndíi-áⁿ ní cachí ndíi: “Chí dáñá ichi cuehé ichi duha ndècu-ndo te tñii-ndo ichi váha, chi véxi Yaá ío cùnuu”, duha ní cachí ndíi —càchí tē Juàá xáhaⁿ-dě xii-güedé.

²⁴ Te cue tée ndùcu tñuhu núú tē Juàá núu ná tée cùu-dé, cue tē-áⁿ ní tendaha ñaha cue tēe cùu fariséú xii-güedé.

²⁵ Te ní xáhaⁿ tùcu-güedé xii tē Juàá:

—¿Ná cuèndá dàcuandute-n ñáyiú te núu ñá díú Crístú cúu-n, te ni ñá díú tē Èliás, te ni ñá díú tē véxi cáháⁿ tñuhu Yá Ndióxi cúu-n váiⁿ? —càchí-güedé xáhaⁿ-güedě xii-dé.

²⁶⁻²⁷ Te ní xáhaⁿ tē Juàá:

—Yúhú ní ngódo núú-í dàcuandute-í ñáyiú. Dico nchícúⁿ ñiⁿ tēe véxi, te tē-áⁿ cùnùu-gá-dé dàcúxí yúhú, chi yúhú cúu-í ñiⁿ tēe duuⁿ duuⁿ ñá túú tau nandaxi cuèdicó ñiⁿ chàú-dé dico quide-í chiiⁿ-dé. Te tē-áⁿ sa ñuhu tnahá-dé tnuú-ndó dicó-ní sá ñá túú xiní-ndó-dé —càchí-dé xáhaⁿ-dě.

²⁸ Duha ní cuu ñuu Bètábará ñuu cáá ndaa ingá xio yúte Jòrdán, yàcáⁿ ní xindecu tē Juàá ní dàcuandute-dé ñáyiú.

Jèsús quidé càhnu iní-gá nchaa yíca cuèchi ñáyiú

²⁹ Te nduu tñéé ní xiní tē Juàá Jèsús véxi yatni-gá núú ndécú-dě ndihi ñáyiú. Te ní xáhaⁿ-dě xii-yu:

—Chí cundèhe tē-áⁿ, chi tē-áⁿ cúu-dě Crístú Yaá ní tendaha Yá Ndióxi véxi ñuyúú-a, te véxi-dé cada càhnu iní-dé nchaa yíca cuèchi ñáyiú ñuyúú. Te cùu-dé dàtná ñiⁿ mbéé quiti ío váha iní-xi.

³⁰ Te díu tē-áⁿ ní cachí-í sá cànchícúⁿ-dé quixi. Te cùnùu-gá-dé dàcúxí yúhú, chi díhma-gá-dé sa ndècu ní cachí-í xii-ndo.

31 Te ni yúhú ñá túú xini-í-dé ní cùu, dico xica cuu-í dácuañdute-í ñáyiu cuendá nchaa ñáyiu israél quini ñáhã-yu xii-dé —cachí-dé xáhaⁿ-dë xií-yu.

32 Te ní xáhaⁿ túcu-dé:

—Ní xini-í Espíritú Yá Ndióxi ní quee-xi andíu vëxi cuuⁿ-xi ngúndecu ndihi ñaha-xi xii-dé, te dàtná cáá lómá cáá Espíritú-án vëxi cuuⁿ-xi.

33 Te yúhú ñá túú xini-í-dé ní cùu, dico Yá Ndióxi Yaá ní tendaha ñaha xii-í xicá cùu-í dácuañdute-í ñáyiu, Yaá-án ní cachí tnúhu-gá sá tée na quini-í ngúndecu ndihi Espíritú-gá sá vëxi cuuⁿ andíu, te tée-án taxi-dé Espíritú-gá cundecu ndihi-o.

34 Te yúhú ní xini-í-dé te xini ndáá-í sá Dëhe Dútú Ndióxi cúu-dé. Te xiáⁿ cachí tnúhu-í xii-ndo —cachí té Juáá xáhaⁿ-dë xií-yu.

Cue tée díhna nuu xica cuu ndihi Jesús

35 Te nduu tnée-án díu-ni xiáⁿ ndécú té Juáá ndihi úu cue tée xica cuu ndihi-dé.

36 Te ní xini-dé Jèsús ñúhú-gã ichi, te ní xáhaⁿ-dë xii cue tée xica cuu ndihi-dé-án:

—Chí cundëhe tée-án, chí tée-án cúu-dë Crístú Yaá ní tendaha Yá Ndióxi vëxi ñuyíú-a. Te cùu-dé dàtná ìⁿ mbéé quiti ío váha ini-xi —cachí-dé xáhaⁿ-dë.

37 Te sá dúcáⁿ ní cáháⁿ té Juáá núu cuè tée úu ndihi-dé-án núu ní chinchicúⁿ-güedé Jèsús.

38 Te ní nchócótó-gã ndàa sátá-gã, te ní xini-gá sá nchicúⁿ ñáhá-güedë xii-gá. Te ní xáhaⁿ-gã xii-güedé:

—¿Ná nánducu-ndo? —cachí-gá xáhaⁿ-gã xii-güedé.

Te ní xáhaⁿ-güedé:

—¿Ndëé ndécú-n, Ràbíí? —cachí-güedé xáhaⁿ-güedé xii-gá.

Te Ràbíí-án quée-xí Mèstrú tnúhu mee-güedé.

39 Te ní xáhaⁿ Jèsús xii-güedé:

—Chí nèhé te quini-ndó —cachí-gá xáhaⁿ-gã.

Te ní xica-güedé cuáháⁿ-güedé, te ní quexiò-güedé núu quidé vëhe-gá. Te ndëcu-ni-güedé ndihi-gá ní cuaa, chí dàtná òré caa cúmí sacuaa ní sáá-güedé.

40 Te úu cue tée-án ní tñi-güedé tnúhu ní cáháⁿ té Juáá, te ní chinchicúⁿ-güedé Jèsús. Te núu úu cue tée-án, ìⁿ-dé nání-dë Ndríxi, te ñaní-dé cúu té Xímú, àdi Pelú chí úu díu-dé.

41 Te té Ndríxi-án ní nanducu-ni-dë ñaní-dé te ní xáhaⁿ-dë:

—Ní naníhí-ndí tée cùu Mesiás —cachí-dé xáhaⁿ-dë.

Te Mesiás-án quée-xí Crístú tnúhu mee-güedé, Yaá ní tendaha Yá Ndióxi vëxi ñuyíú-a.

42 Te ndëca té Ndríxi ñaní-dé cuáháⁿ núu ndécú Jèsús. Te òré ní xini ñáhá Jèsús xii té Xímú, te ní xáhaⁿ-gã:

—Yòhó cúu-n té Xímú déhe té Jónás, te vitna danani ñaha-í Cèfás xii-n —cachí-gá xáhaⁿ-gã.

Te Cèfás-án quée-xí Pelú tnúhu mee-güedé.

Jèsús ní cáháⁿ-gá té Lipé ndihi té Natanàél

43 Te nduu tnée ní sani ini-gá quihíⁿ-gá distritú Galileá. Te ní naníhí-gá ìⁿ tée nani Lipé, te ní xáhaⁿ-gã xii-dé:

—Néhe ná quihíⁿ-ó núu quihíⁿ-í-a —cachí-gá xáhaⁿ-gã.

44 Te té Lipé-án cúu-dé tée ñuu Bètsaidá. Te díu-ni ñuu yacáⁿ cúu ñuu té Ndríxi ndihi té Pèlú.

45 Te té Lipé ní naníhí tnáhá-dë ndihi té Natanàél, te ní xáhaⁿ-dë:

—Ní naníhí-ndí tée dii cuëndú-xi ní chídó tnùnì ndí Moisés ndíhi dava-gá cue tée ní xóo cáháⁿ tnúhu Yá Ndiöxí ndéé sanaha. Te tée-áⁿ nání-dě Jèsús dèhe té Chèé, tée ñuú Nazàrét —càchí-dé xáhaⁿ-dè.

⁴⁶ Te ní xáhaⁿ tē Natanàél xii té Lipé:

—¿Te náa ío váha càa ñuú Nazàrét ñu da yàcáⁿ quee tée cáháⁿ tnúhu Yá Ndiöxí? —càchí-dé xáhaⁿ-dè.

Te ní xáhaⁿ tē Lipé:

—Néhe ná quíhíⁿ-ó te quiní-n —càchí-dé xáhaⁿ-dè.

⁴⁷ Te òré ní xiní Jèsús té Natanàél tá cùyatni-dé cuáháⁿ, te ní cáháⁿ-gá cuëndá-dé te ní cachí-gá:

—Tée véxi-áⁿ cúu-dě mei tēe isràél, te ñá íⁿ ndùu dandahú-dé ñáyiú —càchí-gá xáhaⁿ-gá.

⁴⁸ Te ní xáhaⁿ tē Natanàél xii Jèsús:

—¿Te nása náquiní ñáhá-n? —càchí-dé xáhaⁿ-dè.

Te ní xáhaⁿ Jèsús:

—Yúhú sa ní xiní ñáhà-í xii-n òré ndécú-gá-n càha yutnu ngúxí-áⁿ te ní tē Lipé vátá cáná ñàha-gá-dé xii-n òré-áⁿ —càchí-gá xáhaⁿ-gá xii-dé.

⁴⁹ Te sá dúcáⁿ ní cáháⁿ-gá, núu ní xáhaⁿ tē Natanàél xii-gá:

—Mèstrú, yòhó cúu-n Dèhe Dútú Ndiöxí yíndàha-n ñáyiú isràél —càchí-dé xáhaⁿ-dè xii-gá.

⁵⁰ Te Jèsús ní xáhaⁿ-gá:

—Cuëndá sá ní xiní ñáhà-í xii-n càha yutnu ngúxí xíáⁿ iní ñáhá-n, dico cuéhe-gá núu sá quíní-n —càchí-gá xáhaⁿ-gá xii-dé.

⁵¹ Te ní xáhaⁿ tùcu-gá:

—Na càchí tnúhu ndáá-í sá sàá nduu, te quiní-ndó nàcaáⁿ andiu. Te quiní-ndó cuè espíritú xínú cuèchi núu Yá Ndiöxí sá ndàa nuu-xi quide-xi núu cùndècu yúhú Tée cùu ñaní tnáhá-ndó nchàa-ndo —cachí-gá xáhaⁿ-gá xii-güedé.

2

Vico tnándaha ío ñuú Cànaá

¹ Te nduu úní sá dúcáⁿ ní cuu te ní xóo íⁿ vico tnándaha ñuú Cànaá, íⁿ ñuú yíndèhu distritú Galiléa. Te yàcáⁿ ní xíndecu náná Jèsús.

² Te tnàhá Jèsús ndíhi cue tée xica cuu ndíhi-gá ní cáháⁿ-yu cuáháⁿ-gá ndíhi-güedé vico-áⁿ.

³ Te òré ní ndíhi vínú, te ní xáhaⁿ náná Jèsús xii-gá:

—Ñá túú-gá vínú ndécú ndíhí-yu —càchí-aⁿ xáhaⁿ-aⁿ.

⁴ Te ní xáhaⁿ Jèsús xii-aⁿ:

—Náá, ñá túú xini ñuhu-xi da yúhú cúñaha-n cuëndá vínú-áⁿ, chi vátá tnàhá-gá òré quiní-yu yoo cùu yúhú —càchí-gá xáhaⁿ-gá xii-aⁿ.

⁵ Te ní xáhaⁿ-aⁿ xii ñáyiú xínu cuechi:

—Cada-ndo nchàa nacuáa na cáháⁿ Jèsús —càchí-aⁿ xáhaⁿ-aⁿ.

⁶ Te yàcáⁿ nútñí íñú quídi yúú te quée dàtná íⁿ cièndú lítrú ndute íⁿ íⁿ quídi-áⁿ. Te ndute-áⁿ nándíhi ñáyiú isràél ndáhá-yu te nàqueté-yu cóhō-yu chi ducaⁿ tnàhí quidé-yu nàcuáa sàndáá iní-yu Yá Ndiöxí.

⁷ Te ní xáhaⁿ Jèsús xii nchaa cue tée xínu cuechi:

—Nadachítú-ndó ndüte ndí nchaa quídi-áⁿ —càchí-gá xáhaⁿ-gá xii-güedé.

Te ní nadachítú-güedé.

8 Te ní xáhaⁿ-gǎ:

—Vitna te tava-ndo lùha, te canehé-ndo quǐhíⁿ cuáha-ndo tée quide vico — cachí-gá xáhaⁿ-gǎ xii-güedé.

Te ducaⁿ ní quide-güedé ní tava-güedé luha nèhe-güedé cuáháⁿ ní sáha-güedé tée quide vico.

9 Te ní xito ndée tée quide vico-áⁿ, te sa ní nduu-xi vínú, te ñá túú ní xini-dé ndée véxi-xi, dico mee cuè tée xinu cuechi sa naha-güedé núú ní tava-güedé. Ducaⁿ te tée quide vico-áⁿ ní cana-dé tée tnãdaha.

10 Te ní xáhaⁿ-dë:

—Nchaa ñáyiú quide vico queñuhú-yu díhna-gá vínú váha. Te sa vai vínú váha xihí-yu, te dátnüni queñuhú-yu vínú ndáhú. Te yòhó díhna-gá vínú ndáhú ní queñuhu-n, te ndée núú ní ndihí-ná ní queñuhu-n vínú váha —cachí tée quide vico-áⁿ xáhaⁿ-dë xii tée tnãdaha-áⁿ.

11 Te sá ní nadatiú Jesús ndute-áⁿ ní nduu-xi vínú cúú-xí ìⁿ chiuⁿ díhna nuu sǎ vǎ yòo tnàhí ndàcu cada ní quide-gá ñuú Cànaá, ìⁿ ñuú yíndèhu distritú Galiléa, te chiuⁿ ní quide-gá-áⁿ cúú-xí ìⁿ chiuⁿ cahnu vihi, núú xíáⁿ ní cutnüní iní-yu sǎ ìo càhnu cuu-gá, te ní sándáá iní ñáhá nchàa cue tée xica cuu ndihí-gá.

12 Te sátá ní yáha vico, te ní xica Jèsús ndihí náná-gǎ, ndihí cue ñaní-gá, ndihí nchaa cue tée xica cuu ndihí-gá cuáháⁿ-yu ñuú Capernaúm. Te yacáⁿ ní xíndecú-yu ìⁿ úú nduu ndihí-gá.

Jèsús ñá túú tnàhá iní-gá nàcuáa quide ñáyiú xití veñúhu

(Mt. 21:12-13; Mr. 11:15-18; Lc. 19:45-46)

13 Te ta cüyatni cada ñáyiú isràél vico pàscuá, te ní xica Jèsús cuáháⁿ-gá ñuú Jerusalén.

14 Te sátá ní sáa-gá yacáⁿ, te ní xica-gá cuáháⁿ-gá veñúhu càhnu sǎ ìo cùnuu, te xití veñúhu-áⁿ ní xini-gá ndécú ñáyiú dicó-yu ndicutu, mbéé ndihí lómá, te tnàhá ñáyiú dàma díhúⁿ núcòo-yu ní xini-gá.

15 Te ní queheⁿ-gá ìⁿ úú yoho, te ní cáunuu tnàha-gá, te ní dáyuⁿ-gá ñáyiú ní queé-yu quehé veñúhu, ndihí ndicutú-yu ndihí mbéé-yu. Te cue ñáyiú dàma díhúⁿ-áⁿ ní dǎngòyo-gá díhúⁿ-yu, te ní dándüá-gá mèsá-yu.

16 Te ní xáhaⁿ-gǎ xii cue ñáyiú dico lómá:

—¡Queñuhu-ndo nchàa quiti-a xití veñúhu-a! ¡Vá cádá-ndó vèhe núú yáhu núú cúú vèhe Tàtá-í Dútú Ndióxi! —cachí-gá xáhaⁿ-gǎ xii-yu.

17 Te xíáⁿ ní ndacu iní cue tée xica cuu ndihí-gá sǎ dúcáⁿ yòdo tnuní núú tütú-gá, te cǎchí-xi: “Ío cüyica iní-í chi ñá cuiní-yu canehé ìⁿ-yu vèhe Tàtá-í”, duha cǎchí-xi núú tütú-gá.

18 Te ní xáhaⁿ cuè tée isràél xii-gá:

—¿Ná cúú sǎ vǎ yòo tnàhí ndàcu cada, cada-n cuèndá cutnüní iní-ndí sǎ cúú dùha taxi tnuní ñáhá-n xii-ndí-i? —cǎchí-güedé xáhaⁿ-güedé xii-gá.

19 Te ní xáhaⁿ Jèsús:

—Chí dǎngòyo veñúhu-a, te neni xití úní nduu te sa nadáxínu-í —cǎchí-gá xáhaⁿ-gǎ xii-güedé.

20 Te ní xáhaⁿ tucu cue tée isràél:

—Údico ìñú cuía ní xíndecuu-güedé ní sáa veñúhu-a, te yòhó cuiní-n nàdaxínu-n xití úní-ni nduu —cǎchí-güedé xáhaⁿ-güedé xii-gá.

21 Dico sǎ ní cáháⁿ-gá chi ñá díú cuèndá veñúhu ni cáháⁿ-gá chi cuèndá yiqui cuñú-gá ní cáháⁿ-gá.

²² Núu sátá nǐ xíhí-gá, te ní ndoto-gá, te òré-án nǐ ndacu iní cue téé ní xica cuu ndíhí-gá nàcuáa ní cáháⁿ-gá, núu xǎⁿ ní sándáá iní-güedé tnúhu yòdo tñuní núú tütú-gá. Te ducaⁿ te ní sándáá iní-güedé tnúhu ní cáháⁿ-gá.

Jèsús xini-gá nàcuáa càa iní nchaa ñáyíu

²³ Te òré ndécú Jèsús vico pàscuá, te ío vài ñáyíu ní sándáá iní ñáhá xii-gá cuèndá ío titní sá vǎ yòo tnàhí ndàcu cada ní quide-gá ní xini-yu.

²⁴ Dico Jèsús ñá ní cáháⁿ-gá nchaa tnúhu ñúhu iní-gá, chí sa ní cutnùní iní-gá sá ñá túú cùu váha iní-yu.

²⁵ Te ñá túú xini ñúhu-gá ìⁿ ñáyíu cúñaha nàcuáa càa iní nchaa tnàha ñáyíu-yu, chí mee-gá sa nàha ndáá-gá nàcuáa càa iní-yu nchaa-yu.

3

Jèsús ndíhí té Nicòdemú

¹ Ní xíndecu ìⁿ téé cùu fariséú ní xínani-dé Nicòdemú, te ní cuu-dé ìⁿ téé cùnuu núú ñáyíu isràél.

² Te téé-án nǐ sáháⁿ-dé niú ní cáháⁿ ndíhí-dé Jèsús, te ní xáhaⁿ-dè:

—Mèstrú, yúhú ndíhí dava-gá-güedé sa nàha-ndí sá Yá Ndiòxí ní tendaha ñàha-gá xii-n véxi-n dànehé ñáhá-n xii-ndí, chí núu ñá túú Yá Ndiòxí ndécú ndíhí-n, te vá ndácú-n càda-n nchaa sá vǎ yòo tnàhí ndàcu cada quide-n —cachí-dé xàhaⁿ-dè.

³ Te ní xáhaⁿ Jèsús:

—Na càchí tnúhu ndáá-í xii-n sǎ ncháá ñáyíu vá ná càcu saa tucu, te vá ndíhu ndaha ñàha Yá Ndiòxí xii-yu —càchí-gá xáhaⁿ-gá xii-dé.

⁴ Te ní xáhaⁿ tē Nicòdemú:

—¿Te nása cada ìⁿ ñáyíu sa ní yì te cacu-ni tucú-yu? ¿Náa ndíhu tucú-yu xití nǎnǎ-yu te cacu tucú-yu xito cùu uú-àⁿ? —càchí-dé xàhaⁿ-dè xii-gá.

⁵ Te ní xáhaⁿ Jèsús:

—Na càchí tnúhu ndáá-í xii-n sǎ nchàa ñáyíu na ndùu ndoo nduu nine iní-xi cuú-yu ñáyíu ní na càcu saa ndíhí ndute ndíhí Espíritú Yá Ndiòxí, ñáyíu-án ndíhu ndaha ñàha-gá xii-yu.

⁶ Te nchaa ñáyíu càcu ñuyú-a, chí déhe ñáyíu ñuyú-a cùu-yu. Te ñáyíu ní nduu ndoo ní nduu nine iní-xi, ñáyíu-án nǐ nduu táhù-yu Espíritú Yá Ndiòxí te tàxi tñuní ñáhá-nǎ Espíritú-gá xii-yu.

⁷ Te vá cúñúhu-n tnúhu ní cáháⁿ-í-a, chí nchaa ñáyíu ní sándáá iní ñáhá xii-í ní nduu ndoo ní nduu nine iní-yu, te ñáyíu-án cúú-yu dàtná ñáyíu ní nacacu saa.

⁸ Táchí ndèni xíáⁿ tècú dóho-o xico-xi, dico ñá túú xini-ó ndèé ichi véxi-xi, te ní ñá túú xini-ó ndèé ichi cuáháⁿ-xi. Ducaⁿ sǎtnahá-xi cùu Espíritú-gá ndécú ndíhí ñáyíu ní nduu ndoo ní nduu nine iní-xi —càchí-gá xáhaⁿ-gá xii-dé.

⁹ Te dàtnùní ní xicáⁿ tnúhú tucu té Nicòdemú núú-gá, te xàhaⁿ-dè xii-gá:

—¿Te nása ndùu tnúhu càháⁿ-n dùcaⁿ caháⁿ-n? —càchí-dé xàhaⁿ-dè xii-gá.

¹⁰ Te ní xáhaⁿ Jèsús:

—Yòhó cúú-n ìⁿ téé cùtnuní iní-xi, chí dàcuaha-n ñáyíu isràél, ¿te ñá tècú tñuní-n tnúhu càháⁿ-í-u?

¹¹ Te na càchí tnúhu ndáá-í xii-n sǎ nchúhú càháⁿ-ndí ìⁿ sá ní tecú tñuní-ndí, te càháⁿ ndáá-ndí cuèndá ìⁿ sá nǐ xini-ndí. Dico nchòhó ñá tècú tñuní-ndó tnúhu càháⁿ-ndí.

12 Te ñá sàndáá iní-ndó tñhu càháⁿ-í cuendá nchaa nàcuáa cùu ñuyú-a, te uuⁿ-gá cada-ndo nñu cáháⁿ-í cuendá nchaa nàcuáa cùu andiu.

13 Vá yõ ñⁿ sàá andiu, te caní-xi cuendú nàcuáa càa. Chi ñⁿdii díí-ni yúhú véxi cuuⁿ-í andiu, te cùu-í ñani tnáhá-ndó nchàa-ndo. Te diu-ni yàcáⁿ ndaa-í cundecú-í.

14 Te dàtná ní ndanehe ndíi Moisés cóo ní sata caa ndíi-di xití yucu, ducaⁿ càda ñaha-güedé cata caa ñaha-güedé núú cùrúxí xii yúhú Tée cùu ñani tnáhá-ndó nchàa-ndo ñⁿ nduu,

15 te ducaⁿ yáha-í cuendá nchaa ñáyiú na quíndáá iní ñáhá xii-í te nduu táhú-yu cundecú-yu ndíhi Yá Ndióxi ní caa ní quíhíⁿ —càchí-gá xáhaⁿ-gá xii-dé.

Yá Ndióxi ío cùu iní-gá ñáyiú ñuyú-a

16 Te Yá Ndióxi ío cùu iní-gá ñáyiú ñuyú-a. Te ñⁿdii-ni Déhe-gá ndécú, te ní tendaha ñaha-gá ní quixi-gá ñuyú-a, te núu na quíndáá iní ñáhá ñáyiú, te vá cuíta nihnú-yu, chi nduu táhú-yu cundecú-yu ndíhi-gá ní caa ní quíhíⁿ.

17 Te Yá Ndióxi ñá túú ní tendaha-gá Déhe-gá quixi-gá ñuyú-a dacuíta nihnu-gá ñáyiú, chi ní tendaha-gá Déhe-gá ní quixi-gá sá dácácu nihnu-gá ñáyiú ñuyú-a núú ùhú núú ndáhú.

18 Nchaa ñáyiú sàndáá iní ñáhá xii Déhe-gá, te vá cuíta nihnú-yu. Te nchaa ñáyiú ñá túú sàndáá iní ñáhá xii Déhe-gá ñùhú-yu ichi cuáháⁿ-yu núú ùhú núú ndáhú, chi ñá túú sàndáá iní-yu Déhe Dútú Ndióxi.

19 Chi ní quixi Déhe-gá ñuyú-a ní dándíxí tñu-gá iní-yu cuendá cutnùni iní-yu nàcuáa ndùu cuendá Yá Ndióxi te tñíⁿ-yu ñⁿ ichi váha ní cùu, te ñá ní tnáhá iní-yu, chi ní cudíí-gá iní-yu nchaa sá cuèhé sá dúhá dàcúxí sá vâha, núu xíáⁿ tá xíta nihnú-yu cuáháⁿ.

20 Te nchaa ñáyiú quide nchaa sá cuèhé sá dúhá ñá tnáhá iní-yu cutnùni iní-yu nàcuáa ndùu cuendá Yá Ndióxi, te ñá tñíⁿ-yu tnùhu-gá cuendá yùhú-yu nduu tnùní nchaa sá quidě-yu.

21 Te nchaa ñáyiú ñùhu ichi ndáá cuíní-yu cutnùni iní-yu nàcuáa ndùu cuendá Yá Ndióxi, te cùtnumí sá chíndèe ñaha-gá xii-yu, chi quide váha-yu.

Té Juàá tée dàcuandute ñaha xii ñáyiú càháⁿ váha tucu-dé cuendá Jèsús

22 Te sáta dúcáⁿ ní cuu, te ní quee Jèsús cuáháⁿ-gá ndíhi cue tée xíca cuu ndíhi-gá distritú Júdeá. Te yàcáⁿ ní xíndecu tnaa-gá ndíhi-güedé ní xóo dacuandute-güedé ñáyiú.

23 Te ndécú té Juàá ñⁿ xichi núú nání Ènón yatni ñuú Sàlém dàcuandute-dé ñáyiú, chi yàcáⁿ ío váha ñùhu ndute, núu xíáⁿ ní xóo quíhíⁿ ñáyiú yàcáⁿ ní xóo cuanduté-yu.

24 Duha ní cuu cùtnáhá vátá ngává-gá té Juàá vecaá.

25 Te ní cacu ñⁿ cuendú ní cáháⁿ cue tée xíca cuu ndíhi té Juàá ndíhi ñⁿ úú cue tée isràél, núu ndédacàa sá vâha-gá cada ñáyiú cuendá nduu í-yu.

26 Te ní sáháⁿ-güedé núú ndécú té Juàá ní xáhaⁿ-güedé:

—Mèstrú, tée ní quixi núú ní xíndecu-n ndàa ingá xio yúte Jòrdán, tée dii cuendú-xi ní cáháⁿ-n, tée-àⁿ dàcuandute-dé tnáhá-dé ñáyiú. Te ío vâi ñáyiú ní chinchícúⁿ ñáhá xii-dé —càchí-güedé xáhaⁿ-güedé xii-dé.

27 Te ní xáhaⁿ té Juàá:

—Te vá yõ ñⁿ ndàcu cada ñⁿ chiuⁿ nacuáa cuu váha iní Yá Ndióxi, te núu ñá túú mèe-gá chíndèe ñaha-gá xii-yu.

28 Te nchòhò sa nàha-ndo sá yǔhú ní cǎháⁿ ndáá-í sá ñã díú Crìstú cùú-í, dico mee Yá Ndióxi ní tendaha ñaha-gá yódó ñuu-í véxi núú Yáá-áⁿ.

29 Te nchòhò xini-ndó sá ñⁿ tée tñãndaha te xichí tñãndaha ndihí-ná-dé cùndihí-dé. Te tée ní xica ndáhú ïo cùdíí ñí-dé ndèdòho-dé nchaa tñúhu cǎháⁿ tée tñãndaha-áⁿ. Te ducaⁿ sǎtnahá-xi cùu yúhú, chí ïo cùdíí ñí-í sá vái ñáyi ta chìnchícúⁿ ñáhá xii Jesús cuáháⁿ.

30 Te uuⁿ-gá cuita cuu vai ñáyi cuutnùni ñí-xi sá ïo cùnuu-gá, te yúhú cuita ndóo ndee-í quíhíⁿ —càchí-dé xǎhaⁿ-dẽ xii-güedé.

Crìstú véxi cuuⁿ-gá andiu

31 Te ñⁿdi díí-ñi Crìstú Yáá véxi cuuⁿ andiu cùnuu-gá núú ñùyúú-a. Te nchaa ñáyi ndècu ñuyúú-a cùú-yu ñáyi ñuyúú iha, te cǎháⁿ-yu sá cùú-xí ñùyúú-a. Dico Crìstú Yáá véxi cuuⁿ andiu

32 cǎháⁿ-gá ñⁿ sá ñi xini-gá, te cǎháⁿ-gá ñⁿ sá ñi tecu dóho-gá. Te ñã túú cuñí-yu quindáá ñí-yu tñúhu cǎháⁿ-gá.

33 Te nchaa ñáyi tñi tñúhu cǎháⁿ Yáá véxi cuuⁿ andiu-áⁿ cǎháⁿ-yu sá tñúhu Yá Ndióxi cùú-xí ñⁿ sá ndáá.

34 Te Déhe-gá Yáá véxi cuuⁿ andiu cǎháⁿ-gá mee-ni tñúhu-gá. Te ñã ùhú ñí-gá ní sǎñaha-gǎ Espiritú-gá ndécú ndihí Déhe-gá.

35 Te Dútú Ndióxi ïo cùu ñí-gá Déhe-gá, núu ní xǎhaⁿ-gǎ sá méé-gǎ taxi tñùni-gá nchaandi túhú sá ïo.

36 Te nchaa ñáyi na quindáá ñí ñáhá xii Déhe-gá, ñáyi-áⁿ cundecú-yu ndihí-gá ni caa ni quíhíⁿ. Te nchaa ñáyi vá quindáá ñí ñáhá xii Déhe Yá Ndióxi ïo dandòho ñaha-gá xií-yu.

4

Jèsús ndihí ñⁿ ñaha Sàmariá

1 Te ní ñíhí cue tée cùu fariséú tñúhu sá vai-gá ñáyi ta chìnchícúⁿ ñáhá xii Jesús. Te ducaⁿ vai-gá-yu ta dàcuandute-gá cuáháⁿ dàcúúxí tẽ Juáá.

2 Te cuéi ñã díú mèe-gá dàcuandute ñaha-gá xií-yu, dico cue tée xica cuu ndihí-gá dàcuandute ñaha-güedé xií-yu.

3 Te ní ñíhí Jèsús tñúhu nàcuáa cǎháⁿ cue tée cùu fariséú, núu ní ndee-gá distritú Júdeá cuánuhú tucu-gá distritú Galiléa.

4 Te ichi ñúhu-gá ní nayáha-gá distritú Sàmariá.

5 Te ní sǎá-gá ñⁿ ñúú nání Sicár te ñúú-áⁿ yíndèhu-xi distritú Sàmariá. Te xiáⁿ cáá yàtni ñúhu núú ñi sáha táhú ndii Jàcób dehe ndii Chèé.

6 Te yàcáⁿ cáá dòco ní cuu cuendá ndii Jàcób. Te cùu-xi datná cuádava nduu ñúhu Jesús ichi, te ïo ní xǎú-gá ñúu ní sǎá-gá yuhu dòco-áⁿ ñi ngóo-gá ndètátú-gá.

7-8 Te ní xica cue tée xica cuu ndihí-gá cuáháⁿ-güedé xití ñúú Sicár cuánguaaⁿ-güedé sá cǎxí-güedé. Te yuhu dòco-áⁿ núcòo-gá ní sǎá ñⁿ ñadhí ñaha distritú Sàmariá véxi quèhnu-aⁿ ndute, te ní xǎhaⁿ Jèsús:

—Taxi táhú luha ndute na còho-í —càchí-gá xǎhaⁿ-gǎ.

9 Te ní xǎhaⁿ ñàdihí-áⁿ:

—¿Ná cuendá da núú-í xicáⁿ-n ndute coho-n? Te yòhò cùú-n tẽ isràél, te yúhú cùú-í ñaha Sàmariá —càchí-aⁿ xǎhaⁿ-aⁿ xií-gá.

Te ducaⁿ ñi xǎhaⁿ-aⁿ, chí ñã túú ndècu váha ñáyi isràél ndihí ñáyi distritú Sàmariá.

10 Te ní xáhaⁿ Jèsús xii-aⁿ:

—Ñá cútñuní iní-n ná taxi Yá Ndiöxí xii-n, te ni ñá cútñuní iní-n yòo xicáⁿ ndute núú-n. Te núu dícó xiní-n yòo cuu yúhú á, te da mee-n cǎcáⁿ-n ndüte núú-í coho-n, te yúhú taxi-í ndute cundecu ndihi-n núú cuàháⁿ núú véxi — cǎchí-gá xáhaⁿ-gǎ.

11 Te ní xáhaⁿ tùcu ñadihí-áⁿ:

—Tátá, ni sá quéhnu-n ndüte ñá túú nèhe-n, te doco-a cùnú víhí, te ñá túú ndéé quíngueheⁿ-n ndüte taxi-n coho-í.

12 Ndíu Jácób ñani tnáhá-ndí ní xíndecu ndéé sanaha ñí cadúha ndíu doco-a ñí tóo ndute ní xihí ndíu, ndihi nchaa déhe ndíu, ndihi nchaa quití ndíu, te ní ndóo cùu cuendá-ndí. ¿Te násai, te yòhó cùnùu-gá-n dàcúxí ndí-ǎ? —cǎchí-aⁿ xǎhaⁿ-aⁿ xii-gǎ.

13 Te ní xáhaⁿ Jèsús:

—Nchaa ñáyiu xihí ndute doco-a, te vá cúú vétú dúcáⁿ iní-yu chi dayíchí ñáhá-ní tùcu-xi ndute-a.

14 Dico nchaa ñáyiu na còho ndute na cuáñaha-í, te vá íⁿ ndùu-gá dayíchí ñáhá-xí ndüte-áⁿ xii-yu, chi ndute cuáñaha-í cúú-xí ndüte váha-gá. Te dàtná quée ñihni ndute xití doco-a, nchaa-ni nduu ñùhu ñá túú yìchí, ducaⁿ sǎtnahá-xi cada-xi chi candeca-xi iní-yu ni caa ni quíhíⁿ, te núu na còhó-yu ndute cuáñaha yúhú —cǎchí-gá xáhaⁿ-gǎ xii-aⁿ.

15 Te ní xáhaⁿ-aⁿ:

—Tátá, taxi ndute-áⁿ ná còho-í cuendá sá vǎ dáyíchí ñáhá tnàhí-gá-xi ndute. Te vá quíxí-gǎ-í quíxí quéhnu-í ndute doco-a —cǎchí-aⁿ xǎhaⁿ-aⁿ xii-gǎ.

16 Te ní xáhaⁿ Jèsús:

—Cuàháⁿ cuángàna yì-n, te quixi-ndo lha —cǎchí-gá xáhaⁿ-gǎ xii-aⁿ.

17 Te ní xáhaⁿ-aⁿ:

—Ñá túú yì-í —cǎchí-aⁿ xǎhaⁿ-aⁿ xii-gǎ.

Te ní xáhaⁿ tùcu Jèsús:

—Ndáá cǎháⁿ-n sǎ ñà túú yì-n.

18 Dico ní cuu úhúⁿ téé cǎndeca-n, te téé ndèca-n vitna chi ñá díú yì-n cuu-dé, te ndáá cǎháⁿ-n sǎ ñà túú yì-n —cǎchí-gá xáhaⁿ-gǎ xii-aⁿ.

19 Te sá dúcáⁿ ñí xáhaⁿ-gǎ ñùu ní xáhaⁿ tùcu-aⁿ:

—Tátá, yúhú sání iní-í sá yòhó cúú-n íⁿ téé cǎháⁿ tnúhu Yá Ndiöxí.

20 Te cue ñani tnáhá-ndí ní xíndecu ndéé sanaha ñí xóo cada cǎhnú-yu Yá Ndiöxí tindúú-a, dico nchòhó ñáyiu isràél cǎchí-ndó sǎ ndéé ñuú Jerusálén cada cǎhnu-o-gá —cǎchí-aⁿ xǎhaⁿ-aⁿ xii-gǎ.

21 Te ní xáhaⁿ Jèsús xii-aⁿ:

—Íⁿ tnúhu na cǎháⁿ-í-a, te quíndáá iní-n. Sa ta cùyatni sáá nduu sá ñà díú-gǎ mee-ni tindúú-a, te ni ñà díú-gǎ mee-ni ñùú Jerusálén cada cǎhnu-ndo Tátá-ó Dütú Ndiöxí, chi ndèni ní cuu cada cǎhnu-ndo-gǎ.

22 Te nchòhó cue ñáyiu Sàmariá chi ñá cútñuní iní-ndó ná cúú sǎ quidé cǎhnu-ndo, dico nchúhú ñáyiu isràél, chi cútñuní iní-ndí ná cúú sǎ quidé cǎhnu-ndí. Chi íⁿ téé isràél véxi-dé dàcácu nihnu-dé ñáyiu cuendá vá quíhíⁿ-yu núú úhú núú ndàhú.

23 Te není vitna ngúta-yu cada cǎhnu ndisá-yu Tátá-ó Dütú Ndiöxí, te cadá-yu ni yùhu ni iní-yu sá cúú-xí-gǎ, chi mee-gǎ ducaⁿ cuíní-gǎ cadá-yu cada cǎhnú-yu-gǎ.

²⁴ Te Yá Ndióxi chi ñi espíritú cúú-gă. Te nchaa ñáyiu na càda cahnu ñaha, te cadá-yu ni yùhu ni iní-yu sá cúú-xí-gă te cadá-yu dàtnă cǎháⁿ tnúhu-gă – cǎchí-gă xáhaⁿ-gă xii-aⁿ.

²⁵ Te ní xáhaⁿ ñadĩhí-áⁿ:

–Xini-í sá quíxi tée cùu Mesiás, tée cǎchí-güedé nání Cristú. Te tée-ăⁿ ná sǎá-dé, te cachí tnúhu ndǎá-dé nǎcuáa cuu –cǎchí-aⁿ xáhaⁿ-aⁿ xii-gă.

²⁶ Te ní xáhaⁿ Jèsús:

–Diu tée-áⁿ cúú yǔhú tée ndàtnúhu ndihi-n –cǎchí-gă xáhaⁿ-gă xii-aⁿ.

²⁷ Te òré-áⁿ ni ndexio cue tée xica cuu ndihi-gă, te ní cuñúhu-güedé sá ndàtnúhu-gă ndihi ñadĩhí-áⁿ. Dico ni ñi-güedé ñá ní xicáⁿ tnúhú-güedé núú-gă nũu ná cuëndú ndàtnúhu-gă ndihi ñadĩhí-áⁿ.

²⁸ Ducaⁿ te ní dándõo ñadĩhí-áⁿ yoó ndute-aⁿ xiáⁿ, te ní xica-aⁿ cuánuhú-aⁿ ñũú cùtnúhu-aⁿ ñáyiu cuëndá Jèsús.

²⁹ Te ní xáhaⁿ-aⁿ:

–Chí nèhé ná quihí-ó, chi quini-ndo nă cúú ñi tée núcóo yuhu dòco-áⁿ nũu ñá díú Cristú Yaá ní tendaha Yá Ndióxi véxi ñuyú-a cùu-dé nũu ní cǎháⁿ ndǎá-dé nǎcuáa cùu ndecu-í –cǎchí-aⁿ xáhaⁿ-aⁿ xii-yu.

³⁰ Te sá ni níhi ñáyiu ñũú-áⁿ tnúhu, xiáⁿ ní xicá-yu cuáháⁿ-yu.

³¹ Te òré vátá sǎá-gă-yu xiáⁿ ni xáhaⁿ cuè tée xica cuu ndihi-gă xii-gă:

–Mèstrú, cudèhũu na cudehũu-o –cachí-güedé xáhaⁿ-güedé xii-gă.

³² Te ní xáhaⁿ-gă:

–Ndècu ñi sá cáxi-í, ñi sá ñà túú xini nchòhó –cǎchí-gă xáhaⁿ-gă xii-güedé.

³³ Te cue tée xica cuu ndihi-gă xitnáha-güedé:

–Váa ío ñáyiu ní quixi nehe sá ní xexi-gă nũu duha cǎháⁿ-gă –cǎchí-güedé xitnáha-güedé.

³⁴ Te ní xáhaⁿ-gă:

–Dàtnă cuini-ndo cùu vétú iní-ó òré xéxi-ó, ducaⁿ cùu vétú iní-í quidè-í nchaa nǎcuáa ní cǎháⁿ Yá Ndióxi Yaá ní tendaha ñaha xii-í véxi-í ñuyú-a, te chiúⁿ-gă ío cudíi iní-í dandihí-í.

³⁵ Te nchòhó cǎchí-ndo sá cùmání cümü-gă yoó te cuu itú. Dico yúhú cǎchí-í sá cùndehe-ndo ñáyiu-ăⁿ, chi sa ndècu túha-yu, dàtnă cúú-nă itú sá ní cuu-ná natahu-ó cúú-yu, chi sa ndècu túha-ná-yu cundedóho-yu tnúhu-í.

³⁶ Te dàtnă cúú ñáyiu nàtahu itú chi sa cúhuⁿ yáhu-yu, ducaⁿ sǎtnahá-xi cùu ñáyiu na cǎháⁿ tnúhu-í, chi cuañaha-í sá ndúú tǎhũ-yu na sǎá nduu. Te nchaa ñáyiu na tnèi tnúhu-í te nduu tǎhũ-yu cundecu-í ndihi-yu ni caa ni quihíⁿ. Te dàtnă cúú ñáyiu ní chihi tatá-xi, ndihi ñáyiu ní natahu itú-xi cudíi-nă iní-yu. Ducaⁿ sǎtnahá-xi cùu ñáyiu na cǎháⁿ tnúhu-í.

³⁷ Chi ndǎá quée-xí nǎcuáa cuáháⁿ ñi cuëndú sá cǎchí-xi: “Tucu tée ní chihi tatá, te tucu tée ní natahu”, duha cuáháⁿ cuëndú-áⁿ.

³⁸ Te yúhú tendaha ñaha-í xii-ndo quihíⁿ-ndo cǎháⁿ-ndo tnúhu-í núú sá ní yáha-güedé ní cǎháⁿ-güedé tnúhu-í. Te nchòhó quihíⁿ-ndo dicó-nă nduu cuëndá-ndo chiúⁿ-áⁿ –cǎchí-gă xáhaⁿ-gă xii-güedé.

³⁹ Te ío cuéhé ñáyiu ñũú-áⁿ ni xíndedóho-yu cuëndú ní cani ñadĩhí-áⁿ nũu-yu sá Jèsús ní xáhaⁿ-gă nchaa nǎcuáa quide-aⁿ, te xiáⁿ ío vai-yu ní sándáá iní-yu Jèsús.

⁴⁰ Te ní quexió-yu núú ndécú-gă, te ní cǎháⁿ ndàhú-yu núú-gă sá quéndõo-gă ñũú-yu, núú xiáⁿ ní xíndecu-gă ndihi-yu úú nduu.

41 Te ío cuéhé-gă-yu ní sándáá iní-yu tnúhu ní cáháⁿ mée-gă.

42 Te ní xáhăⁿ-yu xii ñadhí-áⁿ:

—Vitna te ñá díú mèe-ni tnúhu ní cáháⁿ-n ní sándáá iní-ndí-gă, chi ní cáháⁿ mée-gă ní xíndedóho-ndí vitna núu ní sándáá ndisa iní-ndí sá díú-gă cúú-gă Cristú Yáá ní tendaha Yă Ndióxi véxi ñuyíú-a dácácu nihnu-gă ñáyíu núú úhú núú ndáhú —càchí-yu xáhăⁿ-yu xii-aⁿ.

Jèsús quidé tătna-gă déhe ìⁿ téé ndèè chíúⁿ núú gobièrnú

43 Te nduu úní ní nucúhuⁿ Jèsús ichi cuáhăⁿ-gă distritú Galiléa.

44 Te cuáhăⁿ-gă yàcáⁿ, chi mee-gă ní cachí-gă sá núu ìⁿ téé na càháⁿ-dé tnúhu Yá Ndióxi ñúú núú ñí cacu-dé, te ñá túú nèhé-yu sá yíñúhu núú-dé.

45 Te òré ní sáá-gă distritú Galiléa, te ío váha ní cuu iní ñáhă-yu xii-gă, chi cuendá tnàhá-yu ní xíndecu ndihí-gă vico pascuá ñuú Jerusálén. Te yàcáⁿ ní xiní-yu nchaa sá ñí quide-gă.

46 Te ní sáhăⁿ tucu-gă ñuú Cànaá ìⁿ ñuú yíndèhu distritú Galiléa, núú ñí nadatiù-gă ndute ní nduu-xi vínú. Te ñuú Capèrnaúm ndécú ìⁿ téé ndèè chíúⁿ núú téé cùu gobièrnú, te téé-áⁿ cùhú ìⁿ déhe-dé.

47 Te ní níhí-dé tnúhu sá ñí ndee Jèsús distritú Jùdeá ní ndexìo-gă distritú Galiléa, núu ní sáhăⁿ-dé núú ndécú-gă, te ní cáháⁿ ndáhú-dé núú-gă sá quihíⁿ-gă cada tătna-gă déhe-dé, chi sa ndècu-na-dé sá cùú-dé.

48 Te ní xáhăⁿ Jèsús xii-dé:

—Nchòhó, chi vá quíndáá iní ñáhă-ndó xì-í te núu vá cadà-í ìⁿ sá vă yòo tnàhí ndàcu cada quíni-ndó —càchí-gă xáhăⁿ-gă xii-dé.

49 Te ní xáhăⁿ tucu téé cùhú déhe-xi-áⁿ xii-gă:

—Tátá, cundee ìni-n ná quihíⁿ-ni-o cada tătna-n dèhe-í ná cuu-dé, chi càhú víhí tnàhá-dé —càchí-dé xáhăⁿ-dè xii-gă.

50 Te ní xáhăⁿ Jèsús:

—Cuanúhú te quíni-n ná ní ndúha déhe-n —càchí-gă xáhăⁿ-gă xii-dé.

Te ní sándáá iní-dé tnúhu ní cáháⁿ Jèsús, te cuánuhú-dé.

51 Te ñúhu-dé ichi cuánuhú-dé ní sánú tnàhá ñáhă cuè téé xìnu cuechi núú-dé. Te ní xáhăⁿ-güedé sá sà ta ndúha déhe-dé cuáhăⁿ.

52 Te ní xícáⁿ tnúhú-dé núú-güedé ná òré cúú-xí ñí ngúíta-xi ta quétaú cuéhé-dé. Te ní xáhăⁿ-güedé:

—Icu dàtná òré caá ìⁿ sacuaa ní nchíco-dé cahni —càchí-güedé xáhăⁿ-güedé xii-dé.

53 Te tătá téé cùhú-áⁿ ñí ndacu iní-dé sá díú òré ní quétaú cuéhé-dé ní cáháⁿ ndihí-dé Jèsús ní xáhăⁿ-gă sá ndúha déhe-dé. Te xíáⁿ núu ndi nchàa téé-áⁿ vehe-dé ní sándáá iní-yu Jèsús.

54 Te sá ñí quide-gă-áⁿ cúú úú xito quide-gă sá vă yòo tnàhí ndàcu cada. Te sá ñí quide-gă xito cùu uú-áⁿ cúú-xí sá ñí quide-gă cùtnàhá ní ndee-gă distritú Jùdeá cuánuhú-gă distritú Galiléa.

5

Jèsús quidé tătna-gă ìⁿ téé cùhú ìⁿ xichi núú nání Bètesdá

1 Te sátá dúcáⁿ ñí cuu, te ní tnàhá nduu ñí quide ñáyíu isràél ìⁿ vico. Te ní sáhăⁿ Jèsús ñuú Jerusálén.

2 Te ni càa xico yuhu ñuú-án ñúhú dòco, te titní yèhe-xi ndecu. Te ìn yèhe-xi-án nání Yùyehe Mbéé, te yatni xián cáá ìn tanquí ndute dàna-ní-yu Bètesdá tnúhu mèé-yu tnúhu hèbreú, te yuhu tànquí-án cáá ùhúⁿ corrèdór.

3 Te xití corrèdór-án xíndecu cuéhé ñáyiu cùhú, ñáyiu cuáá, ñáyiu yacua, ñáyiu ñá cuú-gã candá nihnu, ndètú-yu candá ndute-án.

4 Chi nihí-yu tnúhu sá ãma nihnu cùuⁿ ìn espíritú xínú cuèchi núú Yă Ndiòxí, te dàcandá-xi ndute ñúhu tanquí-án. Te ñáyiu díhna nuu ná quée xití ndute-án, te òré-ni ndúha-yu.

5 Te yacáⁿ ñútnáhá ìn téé ní cuu ócò sáhúⁿ úní cuía sá cùhú-dé.

6 Te ní xiní Jèsús cáá-dě, te ní cutnùní iní-gá sá ní cuu cuéhé cuía cùhú-dé, te ní xáhaⁿ-gã:

—¿Cuini-n ndúha-n-ã? —càchí-gá xáhaⁿ-gã xii-dé.

7 Te ní xáhaⁿ tée cùhú-án:

—Tãta, vá yôo nihí-í dàquée ñaha xii-í xití tànquí-a òré càndá ndute, chi òré cuini-í quée-í, te ingá-ni tucú-yu quènduú-yu núu-í cuángueé-yu —càchí-dé xáhaⁿ-dě xii-gã.

8 Te ní xáhaⁿ Jèsús:

—Ndacuñí, te ndaca-ni-n yuu-n, te caca-n —càchí-gá xáhaⁿ-gã xii-dé.

9 Te òré-ni-án ní ndúha tée cùhú-án, te ní ndaca-ni-dé yuu-dé, te ní xica-dé cuáháⁿ-dé. Te nduu-ãⁿ cuú-xí nduu ndetatú ñáyiu,

10 núu ní xáhaⁿ cuè tée isràél xii tée ní cuhu-án:

—Vitna cùu-xi nduu ndetatú-ó núu vá cuú cuido-n yuu-n —cachí-güedé xáhaⁿ-güedě xii-dé.

11 Te ní xáhaⁿ-dë:

—Mee tée ní quide tátna ñaha xii-í ní cachí-dé sá ndácàni-í yuu-í, te caca-í —càchí-dé xáhaⁿ-dě xii-güedé.

12 Te ní xáhaⁿ-güedë:

—¿Te ná cuú tée ducaⁿ ní cachí sá ndácàni-n yuu-n te caca-n-i? —càchí-güedé xáhaⁿ-güedě xii-dé.

13 Dico tée ní cuhú-án ñà túú ní cùtnuní iní-dé ná cuú tée ní quide tátna ñaha xii-dé, chi Jèsús òré-ni ní xica-gá cuáháⁿ-gá tnuú nchaa ñáyiu chítu xíndecu xián.

14 Te sátá dúcáⁿ te ní naníhí tnáhá Jèsús ndihí tée ní quide tátna-gá-án xití veñúhu càhnu sá ïo cùnuu, te ní xáhaⁿ-gã xii-dé:

—Ní xiní-n ná ní ndúha-n-va. Te vitna vá cáda-gã-n nãndí sá cuéhé sá dúhá, chi núu ná càda-ni-n ña, te quixi ingá cuéhé, te vihi-gá ndoho-n —càchí-gá xáhaⁿ-gã xii-dé.

15 Ducaⁿ te ní xica tée ní cuhú-án cuángúñaha-dě xii cue tée isràél sá Jèsús ní quide tátna ñaha-gã xii-dé.

16 Núu sátá ní nihí cue tée isràél tnúhu, te ní cuu úhú iní-güedé Jèsús. Te ní cuini-güedé cahni ñaha-güedě xii-gá cuèndá sá dúcáⁿ ní quide tátna-gá nduu ndetatú-güedé.

17 Te ní xáhaⁿ Jèsús xii-güedé:

—Tãtã-í Dútú Ndiòxí quidé chùuⁿ-ni-gá núu xián quidé chùuⁿ-í tnáhá-í —càchí-gá xáhaⁿ-gã xii-güedé.

18 Te ní cudééⁿ-güedé sá ñã ní cãnehe íi-gã nduu ndetatú-güedé, te ní cuini-güedé cahni ñaha-güedě, te uuⁿ-gá ní cuini-güedé cahni ñaha-güedě xii-gá sá ní cachí-gá sá Tãtã-gã cuú Dútú Ndiòxí, chi ní sani iní-güedé sá cuini-gá nùtnahá-gá Yă Ndiòxí núu xián ïo ní cudééⁿ-güedé.

Jèsús Déhe Yá Ndiõxí táxí tñuní-gá

¹⁹ Te ní xáhaⁿ tucu Jesús xii-güedé:

—Na càchí tñuhu ndáá-í xii-ndo sá yùhú chi ni ìⁿ sá ñã ndàcù-í cada mee-í nũ ñã túú mèe Tàtá-í dánèhé ñáhá-gã xii-í nàcuáa cada-í, chi nchaa sá quidé Tàtá-í quidè-í tñahá-í.

²⁰ Te Tàtá-í ío cùu iní ñáhá-gã xii-í nũu dānehé ñáhá-gã nchaa nàcuáa quidè-gá. Te vitna ndècu vai-gá chi^u tahu-gá cada-í, chi^u sá vátá quini-gá-ndó càda-í nàcuáa cuñúhu vihi-ndo.

²¹ Chi Tàtá-í dandòto-gá ñáyiu ní xihí. Te yùhú cada-í te nduu táhú nchaa ñáyiu càchí iní-í cundecu ndihi ñáhá-yu xii-í ni caa ni quíhíⁿ.

²² Te na sáá nduu te ñã díú Tàtá-í cada ndáá-gá cuéchi ñáyiu, chi ní cachí-gá sá yùhú cada ndáá-í

²³ cuendá nchaa ñáyiu canehé-yu sá yíñùhu núu-í dàtná nehé-yu sá yíñùhu núu Tàtá-í Yaá ní tendaha ñaha xii-í véxi-í ñuyúú-a. Te nchaa ñáyiu ñã túú nèhe sá yíñùhu núu yùhú, te ni nũú Tàtá-í ñã túú nèhe-yu sá yíñùhu.

²⁴ Te na càchí tñuhu ndáá-í xii-ndo sá nchaa ñáyiu na cùndedóho tñuhu na càháⁿ-í, te núu na quindáá iní-yu Dútú Ndiõxí Yaá ní tendaha ñaha xii-í véxi-í ñuyúú-a ñã, te vá cuíta nihnú-yu chi nduu táhú-yu cundecú-yu ndihi-gá ni caa ni quíhíⁿ.

²⁵ Te vitna na càchí tñuhu ndáá-í xii-ndo sá nchaa ñáyiu ndècu ichi cuehé ichi duha cúu-yu dàtná ìⁿ ñáyiu ní xihí, te vitna ní sáá nduu cùndedóho-yu tñuhu càháⁿ yùhú Déhe Dútú Ndiõxí, te nchaa ñáyiu na quindáá iní-xi, te naníhí tàhú-yu.

²⁶ Te dàtná quidé mèe Tàtá-í dácäcu nihnu-gá ñáyiu, ducaⁿ ñã cachí-gá cada-í dácäcu nihnu-í-yu.

²⁷ Te ní cachí tucu-gá sá sáá ìⁿ nduu, te cada ndáá-í cuéchi nchaa ñáyiu ñã túú quide ndáá, chi yùhú táxí tñuní-í, te cùu-í ñani tñahá-ndó nchaa-ndo.

²⁸ Te ni vã cúñùhu-ndo tñuhu càháⁿ-í, chi sáá nduu te nchaa ñáyiu ní xihí tecú dóho-yu tñuhu càháⁿ-í.

²⁹ Te ndoto nchaa ñáyiu ní quide váha cundecu ndihi-í-yu ni caa ni quíhíⁿ, te ndoto tñahá nchaa ñáyiu ní quide cuehé ní quide duha, te ñáyiu-án quíhíⁿ-yu núú ùhú núú ndàhú.

Yá Ndiõxí chíndèe tñuhu-gá Jèsús

³⁰ Te yùhú, chi ni ìⁿ sá ñã ndàcù-í cada mee-í nũ ñã díú mèe Yá Ndiõxí táuchìuⁿ-gá nàcuáa cada-í. Te quide ndáá-í cuéchi ñáyiu nàcuáa tàxi tñuní-gá cada-í, te yùhú ñã túú quide-í sá cúú ìní mèe-í chi Tàtá-í ní táuchíuⁿ-gá nàcuáa cada-í.

³¹ Te núu na càháⁿ-í sá mèe-í táxí tñuní-í, te vá quindáá iní-ndó.

³² Chi Yá Ndiõxí chíndèe tñuhu ñaha-gã xii-í, te yùhú xìní-í sá tñuhu càháⁿ-gá cuendá-í cúú-xí ìⁿ sá ndáá.

³³ Te nchòhó ní téchíuⁿ-ndó cuè téé ní sáháⁿ ní ndúcú tñuhu-güedé núú tẽ Juáá nũu ná tñuhu càháⁿ-dé cuendá-í, te téé-ãⁿ ní càháⁿ ndáá-dé nàcuáa nduu cuendá-í.

³⁴ Dico yùhú, chi ñã túú xìni ñuhu-í ìⁿ ñáyiu ñuyúú-a chindee tñuhu ñáhá-yu xii-í, dico té Juáá ní càháⁿ váha-dé cuendá-í, te xíãⁿ càchí tñuhu tucu-í cuendá quindáá iní-ndó, te naníhí tàhú-ndó.

³⁵ Te dàtná cuìní-ndó cùu ìᵐ itì ndéñuhú te dàyehé-xi, ducaⁿ sãtnahá-xi ní cuu té Juáá, chi sacú-ni nduu ío ní cudíí ìní-ndó tnũhu ní cáháⁿ-dé.

³⁶ Te váha-ni ní cáháⁿ té Juáá, dico yúhú chi ndècu nchaa sá tá quide-í véxi nàcuáa ní táuchúúⁿ Yã Ndiõxí cada-í, te nchaa xiãⁿ cúú-xí ìᵐ sá cútñuní ìní-ndó sã mée Yã Ndiõxí ní tendaha ñaha-gá xii-í véxi-í ñuyíú-a.

³⁷ Te ñu-ni-gá chíndèe tnũhu ñaha-gã xii-í, dìcò-ni sá mée-ndó ñã túú cuìní-ndó càda cuendá-ndó tnũhu càháⁿ-gá, te ni ñã túú xini-ndó nàcuáa cà-gá.

³⁸ Te ñã túú quèe ìní nchòhò tnũhu càháⁿ-gá, chi ñã túú sàndáá ìní ñáhá-ndó xii yúhú Déhe-gá.

³⁹ Te dàcuaha vihi-ndo tutú ndèe tnũhu-gá, chi sàni ìní-ndó sã xiãⁿ-ni dacuàha-ndo te naníhí tàhú-ndó. Te váha-ni quide-ndo, chi ñu tutú-áⁿ càháⁿ-xi cuèndá-í.

⁴⁰ Te nchòhò ñã túú cuìní-ndó quindáá ìní ñáhá-ndó xii-í cuèndá naníhí tàhú-ndó.

⁴¹ Te yúhú, ñã túú xini ñuhu-í sá cáda càhnu ñaha-ndo xii-í.

⁴² Dico sa xini-í nàcuáa sàni ìní-ndó chi ñã túú cùu ìní-ndó Yã Ndiõxí.

⁴³ Te yúhú véxi-í ñuyíú-a chi Tãtà-í ní tendaha ñaha-gá, te nchòhò ñã túú cuìní-ndó tnũ-ndo tnũhu càháⁿ-í, dico núu quixi ìᵐ tée cáháⁿ cuèndá mée-xí, chi quindáá ìní-ndó.

⁴⁴ Te ná váha nchòhò ná tnũ-ndó tnũhu càháⁿ-í, te xio xio-ni quide cahnu tnahá-ndo, te ñã túú quide cuendá-ndó sã tnũhu váha càháⁿ Yã Ndiõxí cuu xii-ndo.

⁴⁵ Te vá cání ìní-ndó sã yúhú ndacáⁿ cuéchi-í núú Tãtà-í nàcuáa quide-ndo, chi ndíi Moisés ní chídó tnũní ndíi núú tütú Yã Ndiõxí nàcuáa quide-ndo sá ñã túú quide váha-ndo, te mee-ndo sàni ìní-ndó sã naníhí tàhú-ndó cuèndá tnũhu ní cáháⁿ ndíi.

⁴⁶ Chi núu nchòhò sàndáá ndisa ìní-ndó tnũhu ní cáháⁿ ndíi Moisés ñã, te ducaⁿ te quindáá ìní-ndó yúhú ní cùu, chi ndíi-ãⁿ ní chídó tnũní ndíi nàcuáa cada-í ñuyíú-a vitna.

⁴⁷ Te núu ñã túú sàndáá ìní-ndó tnũhu ní chídó tnũní ndíi, te ñu-ni ducaⁿ càda ñaha-ndo xii-í vá quindáá ìní-ndó tnũhu càháⁿ-í —càchí-gá xáhaⁿ-gã xii-güedé.

6

Jèsús dácàxi-gá úhúⁿ mĩ ñáyiú

(Mt. 14:13-21; Mr. 6:30-44; Lc. 9:10-17)

¹ Te sáta dúcáⁿ ñi cuu, te ní quee Jèsús cuáháⁿ-gá ìngá xio yuhu làgúná Galiléa, àdi Tiberiás chi úú ñu-xi.

² Te ío cuéhé ñáyiú nchìcúⁿ ñáhá xii-gá cuáháⁿ cuèndá sá ñi xini-yu nchaa sá vã yõ tnáhi ndàcu cada ní quide-gá, chi ní quide tátna-gá nchaa ñáyiú cùhú.

³ Te ní sáá Jèsús ndíhi cue tée xica cuu ndíhi-gá ìᵐ núú tìndúú, te xiáⁿ ñi ngóo-gá ndíhi-güedé.

⁴ Te ta cùyatni coo vico pascuá, vico quide ñáyiú isràél.

⁵ Te ní xini-gá sá ío vai ñáyiú nchìcúⁿ ñáhá xii-gá cuáháⁿ, te ní xáhaⁿ-gã xii té Lípé:

—¿Ndèe quíhíⁿ-ó quĩnguaaⁿ-o sã cáxí nchàa ñáyiú-a? —càchí-gá xáhaⁿ-gã xii-dé.

6 Te ducaⁿ ní xáhaⁿ-gǎ xii-dé cuendá sá cuiní-gǎ quini-gǎ nása cunduu tnúhu cáháⁿ-dé, dico mee-gǎ sa xini-gǎ nàcuáa cada-gǎ.

7 Te ní xáhaⁿ tè Lipé xii-gǎ:

—Te cuèi úú cièndú díhúⁿ denàriú ná dàndoñuhu-o cuaaⁿ-o paá, te ni vǎ tnáhá caxi-yu luha luha —càchí-dé xáhaⁿ-dè xii-gǎ.

8 Te té Ndríxí ingá téé xica cuu ndihi-gǎ, ñani té Xímú, àdi Pelú chi úú dǎu-dé, ní xáhaⁿ-dè:

9 —Iha ndècu ñí té líhli nèhe-dé úhúⁿ pàà cebàdà te úú chácá, dico ndéé tnáhá xéhé, te cuéhé víhí ñǎyiu —càchí-dé xáhaⁿ-dè xii-gǎ.

10 Te ní xáhaⁿ Jèsús xii-güedé:

—Chí cǔñaha nà ngóo-yu nchaa-yu —càchí-gǎ xáhaⁿ-gǎ.

Te ñáyiu-án ní ngóo-yu, te càa vihi ité núú ní ngóo-yu-án, te xínu dàtná úhúⁿ míl mee-ni cuè téé, te dǐñ ñáyiu díhí ndihi landú.

11 Te ní queheⁿ Jèsús pàà, te ní ndacáⁿ táhú-gǎ núú Yá Ndióxi, te ní sǎñaha-gǎ pàà-án xii cue téé xica cuu ndihi-gǎ, te cue téé-án ní dácǎhñu-güedé ní xexi nchaa ñáyiu xixúcu-án. Te dǐu-ni ducaⁿ ní quide-gǎ chácá, te ní dácǎhñu tucu-güedé-dí ní xexi ñáyiu ní ndahá xití-yu.

12 Te òré ní túhú cóhó-yu, te ní xáhaⁿ Jèsús xii cue téé xica cuu ndihi-gǎ sá ná nàqueheⁿ-güedé nchaa sá ní quendóo cuendá sá vǎ quihíⁿ-xi núú míhí.

13 Te cue téé-án ní naqueheⁿ-güedé nchaa sá ní quendóo, te ní chíítú ùxúú tídihi núú ùhúⁿ-ni pàà cebàdà.

14 Te sá ní xini-yu ní nadacàyá-gǎ sá ní xexi-yu, xiǎⁿ ní ngüíta-yu ní xitnàhá-yu:

—Ndáá sá tǎe-a sa ió cuèndú sá quixí-dè ñuyú-a cáháⁿ-dé tnúhu Yá Ndióxi —càchí-yu xitnàhá-yu.

15 Te ní cutnùnì iní Jèsús sá cádá yicá-yu candeca ñàhá-yu xii-gǎ quihíⁿ cuendá cundecu-gǎ quindaha ñàhá-gǎ xii-yu ni cùu, núu xiǎⁿ ní xica tucu-gǎ cuáháⁿ-gǎ xití yucu mee dǐi chícuú-gǎ.

Jèsús xicá-gǎ núú ndute

(Mt. 14:22-27; Mr. 6:45-52)

16 Te òré ní cuu ndiquiⁿ, te cuáháⁿ cue téé xica cuu ndihi-gǎ yuhu làgúná.

17 Te ní queé-güedé bàrcú cuáháⁿ-güedé ñuú Capèrnaüm cáá ndàa ingá xio yuhu làgúná, te sa ní cuu ndiquiⁿ, te ñá túú Jèsús quéxio queé-gǎ bàrcú ñúhú-güedé-án.

18 Te ní ngüíta-xi quène táchí ñihi, te ñihi dàcandau ndéé tnáhá ndùte làgúná-án.

19 Te sa ní cuu dàtná úhúⁿ kilómetrú cuáháⁿ-güedé, te ní xini-güedé Jèsús tá cüyatni-gǎ bàrcú ñúhú-güedé véxi-gǎ núú nduté, te ní yùhú-güedé.

20 Te ní xáhaⁿ Jèsús xii-güedé:

—Yúhú véxi-í, vǎ yùhú-ndó —càchí-gǎ xáhaⁿ-gǎ xii-güedé.

21 Te ío ní cudíí iní-güedé sá ní quexio-gǎ cuánguee-gǎ bàrcú, te òré-ni ní quexio-güedé ndihi-gǎ ndéé ingá xio yuhu làgúná núú cuáháⁿ-güedé.

Ñáyiu nànducu ñaha xii Jèsús

22 Te ingá nduu-án xíndecu-ni nchaa ñáyiu ní quendóo yuhu làgúná. Te ní quide cuendá-yu sá ñí dǐi-ná bàrcú nùtní-án ní cùu ñá túú-gǎ, chi cue téé xica cuu ndihi Jèsús ní queé-güedé bàrcú-án cuáháⁿ-güedé. Te ní níhí-yu tnúhu sá ñá túú ní queé tnáhá Jèsús.

23 Te diu-ni nduu-ãⁿ nĩ quee ñⁿ ũú bàrcú ñuú Tiberiás ní sáá-xi yatni núú ní xexi-yu pàá sá nĩ ndacáⁿ tãhú Jèsús núú Yã Ndiõxi.

24 Te ní xiní-yu sá ñà túú Jèsús ndihi cue tée xica cuu ndihi-gá, núú ní quee-yu bàrcú-ãⁿ cuáhãⁿ-yu ñuú Capèrnaúm cuánúndúcú ñáhã-yu xii-gá.

Jèsús cúú-gã dàtná ñⁿ sá nchító-ó

25 Te ní sáá-yu ingá xio yuhu làgúná, xiáⁿ nĩ naníhí-yu Jèsús, te ní xáhãⁿ-yu xii-gá:

—Mèstrú, ¿ná òré ní sáá-n ìha? —cachí-yu xáhãⁿ-yu xii-gá.

26 Te ní xáhaⁿ Jèsús:

—Na càchí tnúhu ndáá-í sá nchòhó nándùcu ñaha-ndo xii-í cuendá-ni sá nĩ xexi-ndo nĩ ndaha xití-ndó, dico ñá díú cuendá sá nĩ quide-í sá vã yõ tnàhí ndàcu cada nanducu ñaha-ndo.

27 Te vã cadá cuendá-ndó sã méé-ní sã cáxi-ndó càda chiuⁿ-ndo chi xiáⁿ vã cúdĩ-xi. Chi ío-gá xiní ñùhu-xi cada cuendá-ndó tnúhu Yã Ndiõxi te tñi-ndo, te naníhí tãhú-ndó. Te tnúhu-áⁿ cachí tnúhu yúhú Tée cuu ñaní tnáhã-ndó nchàa-ndo, te xiãⁿ candeca-xi iní-ndó nĩ caa nĩ quíhíⁿ, chi mee Dùtú Ndiõxi ní cachí-gá sá dúcáⁿ càda-í —càchí-gá xáhaⁿ-gã xií-yu.

28 Te ní xáhãⁿ-yu:

—¿Nása cada-ndí cuendá ngúnu ichi-ndí nàcuáa cuíní Yã Ndiõxi cunduu-i? —càchí-yu xáhãⁿ-yu xii-gá.

29 Te ní xáhaⁿ Jèsús xií-yu:

—Yã Ndiõxi cuíní-gá sã quíndáá iní ñáhã-ndó xii yúhú, tée ní tendaha-gã véxi ñuyú-a —càchí-gá xáhaⁿ-gã xií-yu.

30 Te ní xáhaⁿ tùcú-yu xii-gá:

—¿Ná cúú sã vã yõ tnàhí ndàcu cada, cada-n cundehe-ndí cuendá quíndáá iní ñáhã-ndí xii-n-i? ¿Àdi nágá cúú sã cadá-n cuendá cutnùnì iní-ndí sá ndàá càháⁿ-n-í?

31 Chi cue ñaní tnáhã-ó nĩ xindecu ndéé sanaha nĩ xexi-yu pàá nání mànáá xití yucu dàtná yódó tnùnì núú tùtú Yã Ndiõxi núú càchí-xi: “Yã Ndiõxi ní sãñaha-gã sá nĩ xexí-yu, te ní cuuⁿ túu-xi andiù”, duha càchí-xi núú tùtú-gá —càchí-yu xáhãⁿ-yu xii-gá.

32 Te ní xáhaⁿ Jèsús:

—Na càchí tnúhu ndáá-í xii-ndo sã ñà díú ndii Moisés ní sãñaha ndii pàá ní cuuⁿ andiù nĩ xexí-yu, chi mee Tãtà-í ní sãñaha-gã sá nĩ xexí-yu. Te sá táxi-gã vitna cuu-xi

33 datná pàá véxi cuuⁿ andiù càndeca-xi iní-ndó nĩ caa nĩ quíhíⁿ —càchí-gá xáhaⁿ-gã xií-yu.

34 Te ní xáhãⁿ-yu xii-gá:

—Tãtá, mee-ni pàá-áⁿ taxi-n càxi-ndí —càchí-yu xáhãⁿ-yu xii-gá.

35 Te ní xáhaⁿ Jèsús:

—Yúhú cúú-í dàtná ñⁿ sá xéxí-ndó càndeca-xi iní-ndó. Te duha ndùu tnúhu càháⁿ-í, chi nchaa ñáyíu na quíndáá iní ñáhã xii-í, te vã ndóhó-gã-yu docó te vã ndóhó-gã-yu ndute.

36 Dìcò-ní sá nchòhó ñá túú sàndáá iní ñáhã-ndó cuèi xiní ñáhã-ndó xii-í.

37 Te nchaa ñáyíu na càchí Tãtà-í nduu cuendá-í nasaá-yu núú-í, te ñáyíu-áⁿ vã dáquèe tíhù-í-yu.

38 Te ñá díú yúhu sá véxi cuuⁿ-í andiu te quide-í nchaa sá cúú ìní mèe-í, chi véxi cuuⁿ-í sá càdà-í nchaa nàcuáa ní táuchíúⁿ mèe Tàtá-í Dútú Ndióxi Yáá ní tendaha ñàha xii-í véxi-í ñuyíú-a.

39 Te cuíni-gá sá ncháá ñáyiú ní cachí-gá nduu cuendá-í vá dáñà-í-yu cuíta nihnú-yu, te na sàá nduu te diu-ni-í dandòto-í-yu.

40 Chi ducaⁿ ñí cachí Dútú Ndióxi cunduu sá ncháá ñáyiú na tnèi tnúhu càháⁿ-í, te quindáá ndisa ìní ñáhà-yu xii yúhú Déhe-gá, te nduu táhú-yu cundecú-yu ndihí Yá Ndióxi ní caa ní quíhíⁿ, te yúhú dandòto-í-yu na sàá nduu —càchí-gá xáhaⁿ-gá xii-yu.

41 Te ñá ní tnàhá ìní ñáyiú isràél tnúhu ní cáháⁿ Jèsús núu ní ngúita-yu ní cáháⁿ cuèhé-yu cuendá-gá cuendá sá ñí xáhaⁿ-gá sá mèe-gá cúú-gá dàtná sá xéxi-ó véxi cuuⁿ andiu.

42 Te ní xitnàhá-yu:

—¿Náa ñá díú tée-a cùu-dé Jèsús déhe té Chèé? Nchoo xini-ó tátá-dé, te xini-ó ñáná-dé, ñá cachí-tu tée-a sá andiu véxi cuuⁿ-dé! —càchí-yu xitnàhá-yu.

43 Te ní xáhaⁿ Jèsús xii-yu:

—Vá càháⁿ cuèhé-gá-ndó cuendá-í, chí dáñá.

44 Vá yóo quindáá ìní ñáhá xii yúhú núu ñá túú mèe Tàtá-í táxi cuendá ñáhá-gá xii-yu. Te diu-gá ní tendaha ñàha-gá xii-í véxi-í, te yúhú dandòto-í-yu na sàá nduu.

45 Te núú tútú cue tée ní xóo cáháⁿ tnúhu Yá Ndióxi ndéé sanaha càchí-xi: “Yá Ndióxi danèhé ñáhá-gá xii-yu tnúhu-gá”, duha càchí-xi. Te nchaa ñáyiú na cùndedóho nchaa tnúhu càháⁿ Dútú Ndióxi, te cutúha-yu nàcuáa càháⁿ-gá, te ñáyiú-án quindáá ìní ñáhà-yu xii yúhú.

46 Te vá yóo xini ñáhá xii Dútú Ndióxi chí ñndi-ni yúhú xini-í-gá, chí núú ndécú-gá ní quee-í véxi cuuⁿ-í —càchí-gá xáhaⁿ-gá xii-yu.

47 Te xáhaⁿ tucu-gá:

—Na càchí tnúhu ndáá-í xii-ndo sá ncháa ñáyiú na quindáá ìní ñáhá xii-í, te naníhí tàhú-yu.

48 Te yúhú cúú-í dàtná ñí sá xéxi-ndó cãndeca-xi ìní-ndó, te ducaⁿ sãtnahá-xi cùu-í chí yúhú cada-í te nduu táhú-ndó cùndecú-ndó ndihí Yá Ndióxi ní caa ní quíhíⁿ.

49 Te cue ñaní tnàhá-ó ñí xíndecu ndéé sanaha ñí xexi-yu pàá nání mànáá xití yucu, dico ní sáá nduu te dacuití ñí xihí-yu.

50-51 Te yúhú càháⁿ-í cuendá mèe-í, chí véxi cuuⁿ-í andiu. Te cùu-í dàtná ñí sá nchító-ndó, te nchaa ñáyiú na càxi te candeca-xi ìní-yu ní caa ní quíhíⁿ te vá cuíta nihnu-gá-yu. Te sá táxi-í xii-ndo xíáⁿ cúú-xí yiqui cuñú-í, te cùu-xi cuendá nchaa ñáyiú nihí ñuyíú cuendá nduu táhú-yu cundecú-yu ndihí Yá Ndióxi ní caa ní quíhíⁿ —càchí-gá xáhaⁿ-gá xii-yu.

52 Te ní ngúita ñáyiú isràél xitnàhá-yu:

—¿Nása cada-tu tée-a núu càchí-tu-dé sá yiqui cuñú-dé taxi-dé caxi-o-í? —càchí-yu xitnàhá-yu.

53 Te ní xáhaⁿ Jèsús:

—Na càchí tnúhu ndáá-í xii-ndo sá núu na càda ìní-ndó sá dàtná sá cáxi-ndó yiqui cuñú yúhú Tée cùu ñaní tnàhá-ndó ncháa-ndo, te cada tucu ìní-ndó sá dàtná sá cóhó-ndó ñíhí-í ñá, te xíáⁿ queé-xi sá quindáá ìní ñáhá-ndó ní yuhu ní ìní-ndó te naníhí tàhú-ndó, te núu ñáhá te cuíta nihnu-ndo.

54 Nchaa ñáyiú na càda iní-xi sá dàtná sá cáxí-yu yiqui cùñú-í te cohó-yu níñi-í, ñáyiú-án naníhí tàhú-yu te yúhú dandòto-í-yu na sàá nduu.

55 Chi yiqui cùñú-í ndihí níñi-í cúú-xí mèe-í.

56 Te nchaa ñáyiú na càda iní-xi sá dàtná sá cáxí-yu yiqui cùñú-í te cohó-yu níñi-í, te ñáyiú-án ìⁿ-nǎ cuu-í ndihí-yu chi cundecu ndihí-í-yu.

57 Te yúhú nchìto-í chi ducaⁿ nchìto Tàtá-í Yaá ní tendaha ñàha xii-í véxi-í ñuyúú-a. Te ñu-ñi ducaⁿ nchàa ñáyiú na quìndáá iní ñáhá xii-í te cundecu ndihí-í-yu ni caa ni quíhíⁿ.

58 Te yúhú cúú-í dàtná ìⁿ sá nchító-ndó vèxi cuuⁿ andiú, dico ñá díú pàá sá nání mànáá ní xèxi cue ñani tnáhá-ó ní xíndecu ndéé sanaha, chi ní xexí-yu pàá te dacuéi ní xihí-yu. Te nchaa ñáyiú na quìndáá iní ñáhá xii yúhú Yaá véxi cuuⁿ andiú, te cundecu ndihí-í-yu ni caa ni quíhíⁿ —càchí-gá xáhaⁿ-gǎ xií-yu.

59 Nchaa tnúhu-a ní cáháⁿ-gá xití veñúhu ñáyiú ñuú Capèrnaúm.

Jèsús càchí tnúhu-gá nàcuáa naníhí tàhú-ó

60 Te sá dúcáⁿ ní cáháⁿ-gá ñuú vai ñáyiú nchìcúⁿ ñáhá xii-gá ní xitnàhá-yu:

—Vá tníí cuiti-o tnúhu càháⁿ-dé chi ñá díú tnúhu sá cúú vǎha iní-ó càháⁿ-dé —càchí-yu xitnàhá-yu.

61 Te ní cutnùni iní Jèsús sá ñà túú càháⁿ váha-yu cuèndá tnúhu ní cáháⁿ-gá, núu ní xáhaⁿ-gǎ xií-yu:

—¿Náa ñá tnàhá iní-ndó nàcuáa càháⁿ-í-a?

62 Te uuⁿ-gá cada nchòhó ñuú quini-ndó yúhú Tée cùu ñani tnáhá-ndó nchàa-ndo ndaa-í núu ní xíndecu-í díhna.

63 Te espíritú ndécú ndihí yiqui cùñú-ó, xiǎⁿ ndécá ñàha-xi xii-o, te núu ñá túú xiǎⁿ, te yiqui cùñú-ó ñà túú nàndíhi-xi. Dico núu nchaa tnúhu càháⁿ-í-a quée-xi iní-ndó ñá, te quini-ndó ñà xéhé candeca ñàha-xi xii-ndo núu cuaháⁿ núú vèxi.

64 Te dava nchòhó chi ñá túú sàndáá iní-ndó —càchí-gá xáhaⁿ-gǎ xií-yu.

Te ducaⁿ ní xáhaⁿ-gǎ chi sa nàha-gá nándi cùu ñáyiú vá quìndáá iní ñáhá xii-gá. Te ducaⁿ sá nàha-gá ndédacàa téé cuáha cuèndá ñáhá xii-gá núú cuè téé cùu úhú iní ñáhá.

65 Te ní xáhaⁿ tùcu Jesús xií-yu:

—Te duha càháⁿ-í chi sa ní cachí tnúhu-í xii-ndo sǎ vǎ yǒo ìⁿ cuini tníí tnúhu-í te núu ñá túú Tàtá-í Dútú Ndiòxí sánú ichi ñàha-gá xií-yu —càchí-gá xáhaⁿ-gǎ xií-yu.

66 Te òrè-áⁿ ïo vai ñáyiú nchìcúⁿ ñáhá xii-gá ní xócǒo-yu ñá ní xica cuu-gá-yu ndihí-gá.

67 Te xiǎⁿ ní xáhaⁿ Jèsús xii ndi ùxúú cue téé xica cuu ndihí-gá:

—¿Cuini-ndó dàndóo ñàha-ndo tnàhá-ndó-áⁿ? —càchí-gá xáhaⁿ-gǎ xii-güedé.

68 Te ní xáhaⁿ tè Xímú, àdi Pelú chi úú ñu-dé:

—Mèstrú, ñá túú-gǎ ndéé quíhíⁿ-ndí, chi nchúhú náhá-ndí sá tnúhu mee-n cùu-xi sá vǎha candeca-xi iní-ndí ni caa ni quíhíⁿ.

69 Chi nchúhú sa ní sàndáá iní ñáhá-ndí xii-n chi nàha-ndí sá yòhó cúú-n Crístú Déhe Dútú Ndiòxí yaá ndécú àndiú —cachí-dé xáhaⁿ-dè xii-gá.

70 Te ní xáhaⁿ Jèsús:

—Nàha-ndo sá yùhú ní cáháⁿ ñáhà-í xii ndi ùxúú-ndó xica cuu ndihi ñaha-í xii-ndo, dico ìⁿ-ndo quìhu ñaha yècu ñávàha xii-ndo —càchí-gá xáhaⁿ-gã xii-güedé.

⁷¹ Duha ní cáháⁿ Jèsús cuèndá té Jùdás déhe té Ximú Iscàrioté ìⁿ téé ñùtnahá núú ùxí ìⁿ cue téé xica cuu ndihi-gá, chí sa nàha-gá sá tée-ãⁿ cuàha cuèndá ñáhà-dé xii-gá ìⁿ nduu núú cuè téé cùu úhú iní ñáhá.

7

Cue ñani Jèsús ñá túú sàndáá iní-güedé nàcuáa ndiù tnúhu càháⁿ-gá

¹ Te sátá dúcáⁿ ñí cuu, te ní xica cuu Jèsús distritú Galiléa, te ñá ní sáháⁿ-gá distritú Jùdeá, chí yacáⁿ cuiní cue téé isràèl cahni ñaha-güedé xii-gá ní cùu.

² Te ní cuyatni nduu càdá-yu vico, vico sá dánani-yu Vico Vehe Tnuvixiⁿ.

³ Te ní xáhaⁿ cuè ñani Jèsús xii-gá:

—Váha-gá quíhíⁿ-n distritú Jùdeá te vá cùndècu-n iha, chí yacáⁿ cada-n nchàa sá quidé-n iha cuèndá quini nchaa ñáyiù cùndihi ñaha xii-n ndecu yacáⁿ.

⁴ Chí núú cuiní-ó quini nchaa ñáyiù ná chiùⁿ cada-o te vá càdá dàyuhu-o. Te yòhó cuèhé núú sá quidé-n, te cada-n na quini nchaa ñáyiù —càchí-güedé xàhaⁿ-güedé xii-gá.

⁵ Ducaⁿ ñí cáháⁿ cue ñani-gá, chí ni mèe-güedé ñá túú sàndáá iní-güedé nàcuáa ndiù tnúhu càháⁿ-gá.

⁶ Te ní xáhaⁿ Jèsús xii-güedé:

—Vátá tnàhá-gá òré quíhíⁿ-í dico nchòhó ndèdani càa òré cuu quíhíⁿ-ndó.

⁷ Chí nchaa ñáyiù ñùhu ichi cuèhé ichi duha chí ñá túú cùu úhú iní ñáhà-yu xii nchòhó. Dico yúhú chí cùu úhú iní ñáhà-yu xii-í cuèndá sá càháⁿ-í sá quidé-yu nchaa sá cuèhé sá dùhá.

⁸ Te chí cuàháⁿ nchòhó vico chí yúhú vá quíhíⁿ-ni-í chí vátá tnàhá-gá òré quíhíⁿ-í —càchí-gá xáhaⁿ-gã xii-güedé.

⁹ Te ducaⁿ ñí xáhaⁿ-gã te ní ndóo-gá Galiléa, te cue téé-áⁿ cuàháⁿ-güedé.

Jèsús ndécú-gã ìⁿ vico chiñuhú-yu Yá Ndiõxí

¹⁰ Dico sátá cuàháⁿ cue ñani-gá, te ní xica-gá cuàháⁿ-gá tnàhá-gá dicó-ni sá dàyuhu cuàháⁿ-gá.

¹¹ Te ñáyiù isràèl ñáyiù xíndecu vico nànducú-yu Jèsús, te xítnahá-yu:

—¿Ndèé ndécú Jèsús? —càchí-yu xítnahá-yu.

¹² Te nchaa ñáyiù xíndecu vico xíndatnúhu-yu cuèndá-gá. Te davá-yu xítnahá-yu sá ìo váha iní-gá, te davá-yu xítnahá-yu sá ñà díú tée váha cùu-gá, chí dándahú-gá ñáyiù.

¹³ Dico mee-ni xicáháⁿ náhí-yu, chí xiyùhú-yu cue téé cùnuu núú-yu.

¹⁴ Te ta ngùhuⁿ dava vico, te cuànguìhu Jèsús veñúhu càhnu sá ìo cùnuu, te ní ngùita-gá dácuàha-gá ñáyiù.

¹⁵ Te ñáyiù isràèl ní cuñúhu vihí-yu sá ìo váha càháⁿ-gá, te ní xítnahá-yu:

—¿Ná cuèndá ìo váha ñùhu-tu díquí tée-a tnúhu cáháⁿ-dé te ñá túú ní dàcuaha-dé-í? —càchí-yu xítnahá-yu.

¹⁶ Te ní xáhaⁿ Jèsús:

—Ñá díú cuèndá mèe-í cúú-xí sá dánèhé ñáhà-í xii-ndo, chí cuèndá Dútú Ndiõxí Yáá ní tendaha ñaha xii-í véxi-í cúú-xí.

17 Te núu ìo dava-ndo nì yuhu nì iní-ndó cuíní-ndó càda-ndo nacuaáa cuíní Yá Ndiòxí cunduu, te cutnùní ndáá iní-ndó sã tnũhu dàcuaha ñaha-í xii-ndo cùu-xi cuendá meé Dütú Ndiòxí, te ñã díú cuendá meé-í cúú-xí.

18 Te tée cuíní sá cáda càhnu ñaha ñáyiu xii-dé, té-áⁿ càháⁿ-dé nàcuáa véxi iní meé-dé. Dico yúhú cuíní-í sá cáda càhnú-yu Dütú Ndiòxí Yáá ní tendaha ñaha xii-í véxi-í ñuyú-a, te càháⁿ ndáá-í te ñã túú dàcuandeñde-í.

19 Te ndíi Moisés ní taxi ndíi tnúhu sá sánú ichi ñaha xii-ndo nacuaáa cundecu-ndo, te nì òucaⁿ ñã túú sàndáá iní-ndó nàcuáa càháⁿ tnúhu-áⁿ. ¿Te ná cuendá cuíní-ndó càhni ñaha-ndo xii-í? —càchí-gá xáhaⁿ-gã xii-yu.

20 Te ní xáháⁿ-yu xii-gá:

—Yucu ñãvaha dàcoto ñaha xii-ó, chi vá yõo ñⁿ cuíní cahni ñaha xii-n —càchí-yu xáháⁿ-yu xii-gá.

21 Te ní xáhaⁿ Jèsús xii-yu:

—Sá ní quide-í ñⁿ sá vá yõo tnàhí ndàcu cada nduu cuu-xi nduu ndetatú-ó, xiãⁿ ìo ní cuñúhu ñaha-ndo xii-í.

22 Te ndíi Moisés ní cachí ndíi sá cuãha-yu señã ñⁿ cue landú tée, dico ñã díú mèe ndíi ní càhu iní ndíi chi ducaⁿ tnàhí ní xóo cada cue ñani tnáhá-ó dàvã-áⁿ, núu xiãⁿ nchòhò sãha-ndo señã ñⁿ landú tée cuéi cùu-xi nduu ndetatú-ó.

23 Te ducaⁿ quide-ndo cuendá sá ñã túú ná cumání-ndó núu tnúhu sá sánú ichi ñaha xii-ndo ní dándõo ndíi Moisés. ¿Te ná cuendá cúdééⁿ-ndó núu-í sá ní quide tátna-í tée cùhú nduu ndetatú-ó-í?

24 Te váha váha cada cuendá-ndó, te vá cuendá-ni càháⁿ-ndó sã yúhú ndècuéchi-í chi ñã túú xini-ndó —càchí-gá xáhaⁿ-gã xii-yu.

Jèsús xáhaⁿ-gã xii-yu núu véxi-gá

25 Te dava ñáyiu ñúú Jerusálén ní ngúita-yu xitnàhá-yu:

—¿Náa ñã díú té-áⁿ nándücu-güedé cahni-güedé?,

26 núu náí-dé nútñⁿ núu chítú núú tàcã-ãⁿ càháⁿ-dé, te vá yõo cùyⁿ cúñaha xii-dé ñⁿ tnúhu. Cudana te cue tée cùchiuⁿ sandáá iní-güedé sá díú-dé cúú-dé Cristú Yáá ní tendaha Yá Ndiòxí véxi ñuyú-a.

27 Dico nchoo xini-ó ndèé ichi véxi té-áⁿ, dico Cristú ná quixi-gá chi vá yõo ñⁿ quini ndèé ichi quixi Yáá-áⁿ —càchí-yu xitnàhá-yu.

28 Te yíhi Jèsús xití veñúhu càhnu sá ìo cùnuu danehe-gã ñáyiu, te ní tecu dóho-gã tnúhu càháⁿ-yu. Te níhi ní càháⁿ-gá, te xáhaⁿ-gã xii-yu:

—¡Ná quini-tu nchòhò ndèé ichi véxi yúhú! Yúhú véxi-í dico ñã díú sã cúú iní meé-í, chi Yá Ndiòxí Yáá quidé nchãa-ndi túhú sã váha ní tendaha ñaha-gã xii-í véxi-í, te nchòhò ñã túú xini-ndó-gã.

29 Te yúhú xini-í-gá chi núu ndécú-gã ní quee-í véxi-í, te ñⁿ mee-gã ní tendaha ñaha-gã véxi-í —càchí-gá xáhaⁿ-gã xii-yu.

30 Te sá dúcãⁿ ní càháⁿ-gá, núu cuíní-güedé tñⁿ ñaha-güedé xii-gã quihíⁿ-gã vecaá ní cùu, dico vá yõo ñⁿ ní cùyⁿ tñⁿ ñaha xii-gã chi vátã sàá-gã òrè tñⁿ ñaha-güedé.

31 Dico vai-yu ní sàndáá iní ñãhá-yu xii-gá, te ní xitnàhá-yu:

—¿Nágá cúú sã cáda Cristú ná quixi-gã-í?, te té-á ìo cuéhé núú sã tá quide-dé véxi. Vãa ñⁿ té-á cùu-dé Cristú Yáá ní tendaha Yá Ndiòxí véxi ñuyú-a —càchí-yu xitnàhá-yu.

Cue tée cùu fariséú cuíní-güedé quihíⁿ Jèsús vecaá

32 Te ní níhí cue téé cùu fariséú tnúhu nàcuáa càháⁿ ñáyíu cuèndá Jèsús, núu ní ndatnúhu-güedé ndihí cue dútú cúnùu, te ní techiùⁿ-güedé cue téé quide cuèndá veñúhu cuáháⁿ-güedé cuátní ñaha-güedé xii-gá ní cùu.

33 Te ní xáhaⁿ-gã xii-güedé:

—Sacú duha nduu cundecu ndihí ñaha-í xii-ndo, te nùhú tucu-í núu ndécú tãtà-í Yaá ní tendaha ñaha xii-í véxi-í ñuyíú-a.

34 Te cuéi na nànducu ñaha-ndo dico vá ná ñihí ñáhá-ndó chi vá sàá-ndó núu cündècu-í —càchí-gá xáhaⁿ-gã xii-güedé.

35 Te ní ngúíta ñáyíu isràél xítnàhá-yu:

—¿Ndéé quíhíⁿ-tu téé-a te vá ná ñihí-ó-dé-í? ¿Àdi quíhíⁿ-dé na chìtnahá-dé ñáyíu isràél ñáyíu nchítènnu nchaa ñuu xíca cuèndá danèhé-dé ñáyíu grìégú?

36 ¿Nása càháⁿ-tu-dé duha càháⁿ-dé: “Nanducu ñaha-ndo te vá nánihí ñáhá-ndó chi vá sàá-ndó núu cündècu-í”, càchí-tu-dé? —càchí-yu xítnàhá-yu.

Nàcuáa cada Espíritú Yá Ndióxi iní-ó

37 Te nduu ní yáha-ná vico cùu-xi nduu cahnu vihi, te nduu-ãⁿ ní ngúnu tní Jèsús tnuú ñáyíu, te níhi ní cáháⁿ-gá, te xáhaⁿ-gã xii-yu:

—Núu íó dava-ndo yíchí-ndó ndüte, te quixi-ndo núu-í, te coho-ndo.

38 Duha càháⁿ-í chi nchaa ñáyíu na quíndáá iní ñáhá xii-í, te cada-xi iní-yu dàtná ñⁿ núu xíca ndüte, nchaa-ni nduu xíca ñá túú yíchí, ducaⁿ càda-xi iní-yu núu cuáháⁿ núu véxi dàtná càháⁿ-xi núu tütú Yá Ndióxi —càchí-gá xáhaⁿ-gã xii-yu.

39 Te ducaⁿ ní cáháⁿ-gá cuèndá sá quíxi Espíritú Yá Ndióxi ngúndecu ndihí nchaa ñáyíu na quíndáá iní ñáhá xii-gá, chi sáá nduu ndaa-gá andíu càda cahnu ñaha Tátá-gã xii-gá, te dàvá-áⁿ te quixi Espíritú Yá Ndióxi cundecu ndihí-yu.

Ñá ní cùu ñⁿnuú-yu cuèndá tnúhu ní cáháⁿ Jèsús

40 Te dava ñáyíu ní xíndedóho tnúhu ní cáháⁿ Jèsús ní xítnàhá-yu:

—Ndáá sá tée-a cùu-dé téé càchí-yu quixi cáháⁿ tnúhu Yá Ndióxi —càchí-yu xítnàhá-yu.

41 Te dava tucú-yu xítnàhá-yu:

—Tée-a cùu-dé Cristú Yaá ní tendaha Yá Ndióxi véxi ñuyíú-a —càchí-yu xítnàhá-yu.

Te dava-gá tucú-yu xítnàhá-yu:

—¿Náa ndaa distritú Galileá quixi Cristú Yaá tendaha Yá Ndióxi quixi ñuyíú-a?

42 Chi núu tütú Yá Ndióxi càchí-xi sá Cristú Yaá tendaha Yá Ndióxi quixi ñuyíú-a cuu-gá ñⁿ ñaní tnáhá ndí Dáví, te quee-gá ñuu Bèlén ñuu méé ndí Dáví, duha càháⁿ-xi núu tütú Yá Ndióxi —càchí-yu xítnàhá-yu.

43 Te xíáⁿ núu ñá ní cùu ñⁿnuú-yu cuèndá Jèsús.

44 Te davá-yu cuèní-yu tní-yu Jèsús quíhíⁿ-gá vecaá ní cùu, dico ní ñⁿ-yu ñá túú ní cùyíⁿ-yu tní ñáhá-yu xii-gá.

Cue téé cùchiuⁿ ñá túú sàndáá iní-güedé Jèsús

45 Te cue téé cuáháⁿ tní ñaha xii Jèsús ní cùu ní ndexio-güedé núu cuè téé cùu fariséú ndihí núu cuè dútú cúnùu. Te xáhaⁿ cuè téé cùnno-áⁿ:

—¿Ná cuèndá ñá ní cãndeca-ndo tée-ãⁿ quixi? —càchí-güedé xáhaⁿ-güedé.

46 Te cue téé ní sáháⁿ chiùⁿ ní xáhaⁿ-güedé:

—Ni ìⁿ tée ñá túú xìní-ndí cáháⁿ dàtná càháⁿ tée-ǎⁿ —càchí-güedé xǎhaⁿ-güedě.

⁴⁷ Te ní xáhaⁿ cuè tée cùu fariséú:

—¿Náa tñàhá nchòhó ní sándáá iní-ndó tñùhu ndehnde càháⁿ tée-ǎⁿ?

⁴⁸ ¿Náa ñá túú xìní-ndó sǎ ñi ìⁿ cue tée tàxi tñuní nchúhú, te ñi ìⁿ nchúhú cue tée cùu fariséú ñá túú sándáá iní-ndí tée-ǎⁿ ñǎ?

⁴⁹ Nchaa ñáyiú tùha ñaha xii tée-ǎⁿ ñá túú sándáá iní-yu nàcuáa càháⁿ tñúhu sá sánú ìchi ñaha xii-o, dico cuíta nihnú-yu sá dúcáⁿ quidé-yu —càchí-güedé xǎhaⁿ-güedě xii cue tée-áⁿ.

⁵⁰ Te té Nicòdemú tée ní sáháⁿ niú ní ndatnúhu-dé ndihí Jèsús cúu-dé tñàhá-dé ìⁿ tée fariséú, te ní xáhaⁿ-dé xii-güedé:

⁵¹ —Tnúhu sá sánú ìchi ñaha xii-o nacuáa cundecu-o càchí-xi sá ndèé cundedóho-o nǎsa càháⁿ tée tàú cuéchi cuendá cutnùní iní-ó nǎ ní quide-dé, te dàtnùní cáháⁿ-ó núu ndisa ndècuéchi-dé àdi ñá túú ndècuéchi-dé —càchí-dé xǎhaⁿ-dě.

⁵² Te ní xáhaⁿ-güedě:

—Cùu ní cachí sá tñàhá-ǒ cúu-n tée distritú Galileá núu ducaⁿ càháⁿ-n. Dacuáha tutú yódó tñuní tñúhu Yá Ndiòxí te quiní-n nàcuáa càháⁿ-xi sá ñi ìⁿ tée véxi distritú Galileá ñá túú càháⁿ-dé tñúhu Yá Ndiòxí —càchí-güedé xǎhaⁿ-güedě.

⁵³ Ducaⁿ te ndi díⁿ cuǎnuhú-güedé vehe-güedé.

8

Ìⁿ ñadìhí ndécú vìhi cuéchi-xi

¹ Te Jèsús cuáháⁿ-gá yucu Òlívú.

² Te sátá ñi túndaá nduu tñéé, te cuáháⁿ tucu-gá veñúhu càhnu sá ìo cùnuu. Te ìo cuéhé ñáyiú ní chítú nihnú-yu núú-gǎ, te ní ngóo-gá ní dánèhé ñáhá-gǎ xii-yu.

³ Te ní quexìo cue tée dàcuaha ñaha xii-yu nchaa tñúhu ní chídó tñuní ndí Moisés, ndihí cue tée cùu fariséú, te ndèca-güedé ìⁿ ñadìhí ní sáá, te ñaha-áⁿ ñi xini ñáhǎ-yu càháⁿ ndihí-aⁿ ìⁿ tée dico ñá díú yì-aⁿ cuu-dé, te ní sanutñí ñaha-güedé xii-aⁿ tnuú nchaa ñáyiú xíndecu núú Jèsús.

⁴ Te ní xáhaⁿ-güedé xii Jèsús:

—Mèstrú, ñadìhí-a ní xini ñáhá ñáyiú xii-aⁿ càháⁿ ndihí-aⁿ ìⁿ tée dico ñá díú yì-aⁿ cuu-dé.

⁵ Te tñúhu ní chídó tñuní ndí Moisés càchí-xi sá yúú cahni-o nchàa ñáyiú dìhí duha quide. Te yòhó, ¿nása càchí-n cùnduu-i? —cachí-güedé xǎhaⁿ-güedé xii-gá.

⁶ Duha ní cáháⁿ-güedé chi cuendá sá cuini-güedé coto ndeé ñáhá-güedé xii-gá núu nása cáháⁿ-gá cuendá nùcòo nchihí ñaha-güedé xii-gá ní cáháⁿ-güedé. Te ní ngúnu ndeyi-gá te ní ngúita-gá tée-gǎ ndihí díquí ndáhá-gǎ lètrá núú ñúhú.

⁷ Te xicáⁿ tñuhú-ni tucu-güedé núú-gǎ núu ní ndonehe núú-gǎ, te ní xáhaⁿ-gǎ:

—Ndédani càa nchohó te núu ñá túú nǎ cuéchi quide-ndo te díhna nuu-gǎ-ndó chí cuáha-aⁿ yúú —càchí-gá xáhaⁿ-gǎ xii-güedé.

⁸ Te ní ngúnu ndeyi tucu-gá tée tucu-gá lètrá núú ñúhú.

9 Te sá dúcáⁿ ní xáhaⁿ-gã xii-güedé te ní ndixi túu iní-güedé sá ñà túú quide váha mee-güedé tñahá-güedé, núu da ìⁿ da ìⁿ-güedé ní ndee, te díhna-gá cue téé cùu sacuéhé ní ndee te ní ngúíta nchicúⁿ dava-gá-güedé. Te sátá ní ndihi-güedé ní ndee, te ní quendóo mee-nã Jèsús ndihi ñadìhí-áⁿ.

10 Te ní ndonehe núú Jèsús te ní xiní-gá sá ní ndihi-güedé cuáháⁿ te mee-nã ñadìhí-áⁿ ní ndóo-aⁿ, te ní xáhaⁿ-gã xii-aⁿ:

—¿Ndèndi cuáháⁿ cue téé càchí sá ní quide-n cuèchi? ¿Ni ìⁿ-güedé ñá ní cùndee tñuhu-güedé quíhíⁿ-n càstiú-va? —càchí-gá xáhaⁿ-gã xii-aⁿ.

11 Te ní xáhaⁿ-aⁿ xii Jèsús:

—Ñáhá, chi ní ìⁿ-güedé ñá ní ndàcu-güedé —càchí-aⁿ xáhaⁿ-aⁿ.

Te ní xáhaⁿ Jèsús:

—Te ní yúhú vá dáquihíⁿ ñáhà-í castiú xii-n. Te vitna te núhú-n te vá cádá-gã-n nãndi sá cuéhé sá dúhá —càchí-gá xáhaⁿ-gã xii-aⁿ.

Jèsús dándixi túu-gá iní-ó

12 Te ní cáháⁿ tucu Jèsús núú ñáyiu, te xáhaⁿ-gã xii-yu:

—Yúhú cùú-í dàtná ìⁿ ñuhú dáyèhe-í ñuyíú-a, te nchaa ñáyiu na chìtnahá ñáhá xii-í, te vá cùndecu-gá-yu ichi cuéhé ichi duha, chi yúhú dandixi túu-í iní-yu cuèndá cutnùni iní-yu nàcuáa ndúu cuèndá Yã Ndiòxí, te cundecu-í ndihí-yu ní caa ní quíhíⁿ —càchí-gá xáhaⁿ-gã xii-yu.

13 Te ní xáhaⁿ cuè téé cùu fariséú xii-gá:

—Medi-n caháⁿ-n sá cùú-n téé váha, te vá yõo ìⁿ-gá chindèe tñuhu ñaha xii-n núu ná téé cùu-n, dico xiáⁿ ñá túú nàndìhi-xi —càchí-güedé xáhaⁿ-güedé xii-gá.

14 Te ní xáhaⁿ Jèsús:

—Cuèi càháⁿ-í cuèndá mèè-í dico nàndìhi tñuhu càháⁿ-í. Chi yúhú nàha-í ndèè ichi véxi-í, te xiní-í ndèè ichi núhú-í, dico nchòhó chi ñá túú xiní-ndó ndèè ichi véxi-í, te ní ñá túú xiní-ndó ndèè ichi quíhíⁿ-í.

15 Te nchòhó chi cuèndá-ni càháⁿ-ndó cuèndá ñáyiu núu quide váha-yu àdi ñá túú quide váha-yu. Te yúhú ñá túú càháⁿ-í cuèndá ñáyiu núu quide váha-yu àdi ñá túú quide váha-yu.

16 Àdi núu càháⁿ-í dico ìⁿ tñuhu ndáá càháⁿ-í chi ñá díú-ni mèè-í càháⁿ, chi tñahá Tàtà-í Yaa ní tendaha ñaha xii-í véxi-í ñuyíú-a càháⁿ-gá chindèe tñuhu ñaha-gã xii-í.

17 Te tñuhu sá sánú ichi ñaha xii-ndo cachí-xi sá ñu na cùndecu úú cue téé cáháⁿ ndáá-güedé nàcuáa cùu ìⁿ sá cùndáá, te núu ìⁿ-ni tñuhu na càháⁿ-güedé ndi ndúú-güedé te xiáⁿ nàndìhi-xi, duha càchí tñuhu-áⁿ.

18 Te ñu-ni ducaⁿ cùu-xi yúhú chi càháⁿ-í ìⁿ tñuhu ndáá sá cùú-xi mèè-í, te ñu-ni dàtná càháⁿ-í càháⁿ Tàtà-í Yaa ní tendaha ñaha xii-í véxi-í ñuyíú-a —càchí-gá xáhaⁿ-gã xii-güedé.

19 Te ní xáhaⁿ-güedé xii-gá:

—¿Te ndèè ndécú Tàtà-n-í? —càchí-güedé xáhaⁿ-güedé.

Te ní xáhaⁿ Jèsús:

—Te núu dicó xiní-ndó yòo cuu yúhú-á te ducaⁿ te quiní-ndó Tàtà-í. Te ní yúhú ñá túú xiní-ndó yòo cuu-í ñu xiáⁿ ñá túú xiní-ndó Tàtà-í —càchí-gá xáhaⁿ-gã xii-güedé.

20 Duha ní cáháⁿ Jèsús nini dàcuaha-gá ñáyiu xití veñúhu núu ndécú àlcanjá díhúⁿ. Te vá yõo ìⁿ ní cùyi tñi ñaha xii-gá chi vátá sàá-gá òré tñi ñaha-güedé.

Ñáiyu ñá túú sàndáá iní ñáhá xii Jesús vá ndácũ-yu quíhí-yu núú ñùhù-gá cundecu-gá

²¹ Te ní xáhaⁿ tùcu Jesús xii-güedé:

—Yúhú ñùhù-í te nanducu ñàha-ndo te vá nánihí ñáhá-ndó, te cuú-ndó núú yíca cuèchi-ndo, chi vá ndácú-ndó sáa-ndó núú ñùhù-í cundecu-í —càchí-gá xáhaⁿ-gá xii-güedé.

²² Te ní xítñaha cue téé isràél:

—¿Te náa cahni-dé méé-dé núú càchí-dé sá vá ndácú-ó sáa-ó núú quíhí-dé-ã? —càchí-güedé xítñaha-güedé.

²³ Te ní xáhaⁿ Jèsús xii-güedé:

—Nchòhó chi cue téé ñuyú-a cùu-ndo, núú ío ñùhu iní-ndó sá ío ñuyú-a. Te yúhú chi téé núú ñinu cùu-í núú xiáⁿ ñá túú sá ío ñuyú-a ñùhu iní-í.

²⁴ Te xiáⁿ núú càchí-í sá cùu-ndó núú yíca cuèchi-ndo, chi ñá cuíní-ndó quíndáá iní-ndó sá yúhú véxi cuuⁿ-í andiu, te núú xiáⁿ ñu-ni núú yíca cuèchi-ndo cùu-ndó —càchí-gá xáhaⁿ-gá xii-güedé.

²⁵ Te ní xícáⁿ tnúhú-güedé núú-gá, te xáhaⁿ-güedé:

—¿Te ná cùú yòhó núú ducaⁿ càháⁿ-n-í? —càchí-güedé xáhaⁿ-güedé xii-gá.

Te ní xáhaⁿ-gá:

—Sa ní cachí tnúhu-í xii-ndo ndéé díhna —càchí-gá xáhaⁿ-gá xii-güedé.

²⁶ Te xáhaⁿ tùcu-gá:

—Ndècu cuéhé tnúhu càháⁿ-í cada ndáa-í cuendá nchòhó. Te Tàtà-í Yaá ní tendaha ñàha xii-í véxi-í ñuyú-a càháⁿ-gá tnúhu ndáa, te tnúhu càháⁿ yúhú ñuyú-a cùu-xi tnúhu ní càháⁿ-gá ní xíndedóho-í —càchí-gá xáhaⁿ-gá xii-güedé.

²⁷ Te mee-güedé ñá túú ní tècú tnùní-güedé sá cuendá Dútú Ndiòxí ní càháⁿ Jesús.

²⁸ Te ní xáhaⁿ-gá xii-güedé:

—Óré ná catá càa ñaha-ndo xii yúhú Téé cùu ñaní tnáhá-ndó nchàa-ndo núú cùrúxí cahni ñaha-ndo, te óré-ãⁿ cutnùní iní-ndó yòo cuu-í, te ñá túú quide-í sá cùú iní méé-í, chi yúhú càháⁿ-í nacuáa ní dánèhé ñáhá Tàtà-í

²⁹ Yaá ní tendaha ñàha xii-í véxi-í. Te ñu-gá ndécú ndíhi ñaha-gá xii-í, te ñá túú dàña nihnu ñaha-gá chi quide-í nchaa nacuáa cùu iní-gá —càchí-gá xáhaⁿ-gá xii-güedé.

³⁰ Te sá dúcáⁿ ní càháⁿ-gá núú ío vai ñáiyu ní sàndáá iní ñáhá xii-gá.

Ñáiyu sàndáá iní ñáhá xii Yá Ndiòxí ndíhi ñáiyu ndècu ichi cuéhé ichi duha

³¹ Te ní xáhaⁿ Jèsús xii ñáiyu isràél ñáiyu ní sàndáá iní ñáhá xii-gá:

—Te núú vá dáña ndéé-ndó càda-ndo nchaa nacuáa càháⁿ-í, te cuu ndisa-ndo cuè téé tnáhá tnúhu ndíhi-í,

³² te tecú tnùní-gá-ndó tnúhu ndáa, te ducaⁿ te cácu nihnu-ndo —càchí-gá xáhaⁿ-gá xii-yu.

³³ Te ní xáháⁿ-yu:

—Nchúhú cùú-ndí cue ñaní tnáhá ndíi Àbrahám, te ni ñiⁿ nduu ñá túú ndéé sácúndéí nihnu-ndí ndoho tnáhá-ndí núú cáchí-ó sá dàcácu nihnu ñaha-n xii-ndí —càchí-yu xáháⁿ-yu xii-gá.

³⁴ Te ní xáhaⁿ Jèsús xii-yu:

—Na càchí tnúhu ndáa-í xii-ndo sá nchàa ñáiyu quide nchaa sá cuéhé sá dúhá tàxi tnùní ñáhá-ná-xi xii-yu.

35 Te cue ñáyiú xínu cuechi te vá cúú ñⁿ-ná cuú-yu ndíhi ñáyiú díi vèhe-xi xínu cuechí-yu, dico cue déhe ñáyiú díi vèhe-xi-áⁿ chí ñⁿ-ni cùu ndíhi ñaha-güexi xii-yu.

36 Te núu yúhú Yáa cúú Dèhe Yá Ndiöxí dácácu nihnu ñaha-í xii-ndo núú ncháa yíca cuèchi-ndo, te ndáá sá nchòhó cácu nihnu ndisa-ndo.

37 Te yúhú sa xini-í sá nchòhó cúú-ndó ñani tnáhá ndíi Àbrahám, te dicó-ni sá ñá tnáhá iní-ndó tnúhu cáháⁿ-í núu xiáⁿ cuini-ndó cahní ñaha-ndo.

38 Te yúhú cáháⁿ-í nàcuáa ní dánèhé ñáhá Tàtá-í, te nchòhó quidé-ndó nàcuáa cáháⁿ tátá-ndó —càchí-gá xáhaⁿ-gá xii-yu.

39 Te ní xáháⁿ-yu:

—Ndíi Àbrahám cúú tátá-ndí —càchí-yu xáháⁿ-yu xii-gá.

Te ní xáhaⁿ Jèsús:

—Núu ndisa ñani tnáhá ndíi Àbrahám cúú-ndó, te cada-ndo nàcuáa ní xóo cada ndíi ní cùu.

40 Te yúhú cuèi cáháⁿ-í ñⁿ tnúhu ndáá nàcuáa cáháⁿ Yá Ndiöxí càchí tnúhu-gá xii-í, te cuini-ndó cahní ñaha-ndo. ¡Dico ndíi Àbrahám chí ñá túú dùcaⁿ ni quide ndíi!

41 Te nchòhó quidé-ndó nàcuáa quide tátá-ndó —càchí-gá xáhaⁿ-gá xii-yu.

Te ní xáháⁿ-yu:

—Nchúhú, ñá túú yàyacáⁿ ndécú tátá-ndí, chí ñⁿdíi Yá Ndiöxí cúú tátá-ndí —càchí-yu xáháⁿ-yu xii-gá.

42 Te ní xáhaⁿ Jèsús:

—Núu dicó Yá Ndiöxí ndisa cùu Tátá-ndó te cuu iní ñáhá-ndó xii-í ní cùu chí yúhú ní quee-í núu ndécú-gá véxi-í ñuyíú-a. Te ñá túú véxi-í sá cúú iní mee-í, chí mee-gá ní tendaha ñaha-gá véxi-í.

43 Te ñá túú təcú tnúni-ndó tnúhu cáháⁿ-í chí ñá túú tnáhá iní-ndó.

44 Te nchòhó chí tátá-ndó cùu yucu ñávaha núu cùdíi iní-ndó quide-ndo nchaa nacuáa cùu iní-xi, chí ndéé òré ní ngáva ñuyíú ducaⁿ-ni ndècu-xi dacáháⁿ-xi iní-ndó sàhni tnaha-ndo. Te ñá ñⁿ ndùu cáháⁿ-xi ñⁿ tnúhu ndáá chí ñá túú xica-xi ichi ndáá, chí mee-ni ichi tnúhu ndehnde xica-xi chí ducaⁿ iní-xi. Te díu-xi dácahu-xi iní-ndó dácuandehnde-ndo.

45 Te yúhú cáháⁿ-í tnúhu ndáá te ñá túú cuini-ndó quindáá iní ñáhá-ndó.

46 ¿Te ndèdacàa nchòhó xini-ndó sá quidè-í ñⁿ sá cuèhé sá dúhá-í?, te yúhú ñá túú ñá quidè-í chí cáháⁿ ndáá-í, ¿te ná cuèndá ñá túú cuini-ndó quindáá iní-ndó tnúhu cáháⁿ-í?

47 Te nchaa ñáyiú ndècu ichi Yá Ndiöxí, ñáyiú-áⁿ sácúndedóho-yu nchaa tnúhu cáháⁿ-gá. Te nchòhó chí ñá díú ichi Yá Ndiöxí ndécú-ndó núu ñá túú sácúndedóho-ndo tnúhu cáháⁿ-gá —càchí-gá xáhaⁿ-gá xii-yu.

Díhna-gá Cristú sa ndècu dacúúxi ndíi Àbrahám

48 Te ní xáhaⁿ ñáyiú isràél:

—Váha-ni cáháⁿ-ndí sá tée samaritanú cúú-n, te yucu ñávaha ndècu ndíhi-n —càchí-yu xáháⁿ-yu xii-gá.

49 Te ní xáhaⁿ Jèsús:

—Yúhú, ñá túú yucu ñávaha ndècu ndíhi-í, chí Tàtá-í quidé cahnú-í, te nchòhó da cùu úhú iní ñáhá-ndó xii-í —càchí-gá xáhaⁿ-gá xii-yu.

50 Te xáhaⁿ tucu-gá:

—Yúhú, ñá túú càchí-í sá cáda càhnu ñaha-ndo, dico Dútú Ndióxi cuini-gá sá cáda càhnu ñaha-ndo xii-í. Te mee-gã cáháⁿ-gá núu ndédacàa-ndo quide váha, te ndédacàa-ndo ñá túú quide váha.

⁵¹ Te na càchí tnúhu ndáá-í xii-ndo sã nchàa ñáyiú na tnèi tnúhu càháⁿ-í te vá cuíta nihnú-yu —càchí-gá xáhaⁿ-gã xii-yu.

⁵² Te ní xáhaⁿ tùcu ñáyiú isráel:

—Vitna te ní xiní ndáá-ndí sá yùcu ñávãha ndècu ndihi-n, chi ndíi Àbrahám ndihi nchaa cue téé ní xóo cáháⁿ tnúhu Yá Ndióxi ndéé sanaha ní xihí-güedé, te yòhó càchí-tu-n sã ncháá ñáyiú na tnèi tnúhu càháⁿ-n te vá cùú-gá-yu.

⁵³ ¿Náa ío-gá càhnu cuu-ó dàcúúxí ñàni tnáhá-ndí ndíi Àbrahám-á? Téé-án dai ní xihí-dé ndihi cue téé ní xóo cáháⁿ tnúhu Yá Ndióxi ndéé sanaha. ¿Te yòhó nágá-tu cùu-n te vá cùú-n càhaⁿ-i? —cachí-yu xãháⁿ-yu.

⁵⁴ Te ní xáhaⁿ Jèsús:

—Te núu dicó mée-í quidé càhnu-í mée-í ñá, te ñá túú nàndíhi sá quidé-í núu ducaⁿ. Dico Tàtá-í quidé càhnu ñaha-gá xii-í, te ñu-ni Yaá-áⁿ càchí-ndó cùu Ndióxi-ndó.

⁵⁵ Te nchòhó chi ñá túú xiní-ndó-gã. Te yúhú chi xiní-í-gá. Te núu na càchí-í sá ñá túú xiní-í-gá te dàcuandehnde-í dàtná ndehnde mée-ndo. Te yúhú chi xiní ndisa-í-gá te tnèi-í nchaa tnúhu càháⁿ-gá.

⁵⁶ Te ndíi Àbrahám ñani tnáhá-ndó ní xíndecu ndéé sanaha ío ní cudíí ñni ndíi sá quini ñáhá ndíi xii-í, te ní sáá nduu ní xiní ñáhá ndíi xii-í núu ío ní cudíí ñni ndíi —càchí-gá xáhaⁿ-gã xii-yu.

⁵⁷ Te ní xáhaⁿ ñáyiú isráel xii Jèsús:

—Ni vátá cùhúⁿ-gã-n ùdicó úxí cuía-n te càchí-n sã ní xiní-n ndíi Àbrahám, te ní cunaha vèhi ní xihí ndíi-áⁿ —càchí-yu xãháⁿ-yu xii-gá.

⁵⁸ Te ní xáhaⁿ Jèsús:

—Te na càchí tnúhu ndáá-í xii-ndo sã cùmání-gã cundecu ndíi-áⁿ ñuyíú-a te yúhu sa ndècu-gá-í —càchí-gá xáhaⁿ-gã xii-yu.

⁵⁹ Te sá dúcáⁿ ní cáháⁿ-gá núu xíáⁿ ní queeⁿ-yu yúú cuãha ñáhá-yu xii-gá ní cùu, te ní nguívãha-gá núú-yu te ní quee-gá xití veñúhu cuáháⁿ-gá.

9

Jèsús quidé tãtna-gá ñi tée cuàá

¹ Te núú xicá cùu Jèsús ní naníhí-gã ñi tée cuàá, te sa ducaⁿ tnàhí càa núú-dé ní cacu-dé.

² Te ní xáhaⁿ cuè téé xica cuu ndihi-gá xii-gá:

—Mèstrú, ¿ná cuendá dàcáⁿ cuàá téé-áⁿ ní cacu-dé? ¿Sá cuendá nchaa yicá cuèchi tãtá-dé, áⁿ sã cuendá nchaa yicá cuèchi nãná-dé, áⁿ sã cuendá nchaa yicá cuèchi mee-dé dàcáⁿ cáá-dé ní cacu-dé? —càchí-güedé xãhaⁿ-güedé xii-gá.

³ Te ní xáhaⁿ Jèsús:

—Ni ñá díú sã cuendá nchaa yicá cuèchi mee-dé, te ni ñá díú sã cuendá nchaa yicá cuèchi tãtá-dé, te ni ñá díú sã cuendá nchaa yicá cuèchi nãná-dé, chi mee Yá Ndióxi ní cuini-gá sá dúcáⁿ cùnduu-dé sáá-dé ñuyíú-a cuendá sã ñuyíú-a quini ñáyiú nása cada ñaha Yá Ndióxi xii-dé ndúha núú-dé.

⁴ Te vitna ío-gá nduu cùyica sá cáda-í nchaa chiúⁿ ní táhú Yàá ní tendaha ñaha xii-í véxi-í ñuyíú-a, chi sáá nduu te vá ndácú-gá-í cada-í chiúⁿ-gá.

⁵ Te nini ndècu-gá-í ñuyú-a te dândixi túu-í iní nchaa ñáyiú cuendá cutnùni iní-yu nàcuáa ndùu cuendá Yá Ndiõxí —càchí-gá xáhaⁿ-gá xii-güedé.

⁶ Te sáta dúcáⁿ ní cáháⁿ-gá, te ní sati-gá díí-gá núú ñúhú te ní dácá-gă luha ñuhu ní cuáha ndéhyú, te ndéhyú-án ní dácánùu-gá ndúú xio núú tée cuáá-án.

⁷ Te ní xáhaⁿ-gá xii-dé:

—Quíhíⁿ-n nàquete-n núú-n ndúte tanquí Silòé —càchí-gá xáhaⁿ-gá xii-dé. Te Silòé-án quée-xí tñuhu mée-yu: Tée xica chiun.

Te ní sáháⁿ tée cuáá-án ní naquete-dé núú-dě, te òré ní ndexio-dé te sa ndèhe-dé.

⁸ Te nchaa ñáyiú ndècu yatni núú ndécú-dě ndíhi nchaa ñáyiú xini ñáhá xii-dé núú xicáⁿ ndàhú-dé ní xitnàhá-yu:

—¿Náa ñá díú tée-án ní xóo cácaⁿ ndàhú-dé? —càchí-yu xitnàhá-yu.

⁹ Te davá-yu càchí-yu sá díú-dě, te davá-yu càchí-yu sá ñá díú-dě, dico ducaⁿ càa-dé, càchí-yu xitnàhá-yu.

Dico mee-dě ní xáhaⁿ-dě xií-yu sá díú-dě.

¹⁰ Te ní xicáⁿ tñuhú-yu núú-dě, te xáháⁿ-yu:

—¿Nása ní cuu núu ní ndúha núú-n ndèhe-n vitna? —cachí-yu xáháⁿ-yu xii-dé.

¹¹ Te ní xáhaⁿ-dě:

—Tée nani Jesús-án ní cadúha-dé luha ndéhyú te ní dácánùu-dé núú-í, te ní táuchíúⁿ-dě ní sáháⁿ-í tànquí Silòé ní naquete-í núú-í, te òré-án ní cuu cundehe-í —càchí-dé xáhaⁿ-dě xií-yu.

¹² Te ní xicáⁿ tñuhú tucú-yu núú-dě, te xáháⁿ-yu:

—¿Te ndèe ndécú tée-án? —càchí-yu xáháⁿ-yu xii-dé.

Te ní xáhaⁿ-dě:

—Ñá túú xini-í —càchí-dé xáhaⁿ-dě xií-yu.

Cue tée cùu fariséú ndátnùhu-güedé ndíhi tée ní ndúha núú-xi

¹³ Te ndéca-güedé tée ní ndúha núú-xi-án cuáháⁿ núú cuè tée cùu fariséú.

¹⁴ Te cuendá sá ndùu ndetatú-yu ní cadúha Jèsus ndéhyú ní dácánùu-gá núú tée-án te ní ndúha,

¹⁵ xiáⁿ núu ní xicáⁿ tñuhú cuè tée cùu fariséú núú-dě, te xáhaⁿ-güedé:

—¿Nása ní cuu ní ndúha núú-n? —càchí-güedé xáhaⁿ-güedé xii-dé.

Te ní xáhaⁿ-dě xii-güedé:

—¿Iní tée ní dácánùu-dé ndéhyú núú-í te ní sáháⁿ-í ní naquete-í, te ní cuu ndèhe-í vitna —càchí-dé xáhaⁿ-dě xii-güedé.

¹⁶ Te dava cue tée cùu fariséú ní xitnàha-güedé:

—Ñá díú Yá Ndiõxí ní tëndaha ñaha-gá xii tée-án véxi-dé núu duha quide-dé nchaa sá vǎ yõ tñahí ndàcu cada, te ñá túú sàndáá iní-dé canehe íí-dě nduu ndetatú-ó —càchí-güedé xitnàha-güedé.

Te dava-güedé ní xitnàha-güedé:

—¿Nása ndacu-dé cada-dé sá vǎ yõ tñahí ndàcu cada te núu cùu-dé tée yíca cuéchi? —càchí-güedé xitnàha-güedé.

Te ñá túú ní cùu ñnuu-güedé tñuhu ní cáháⁿ-güedé.

¹⁷ Te ní xicáⁿ tñuhú tucú-güedé núú tée ní ndúha núú-xi-án, te xáhaⁿ-güedé:

—Te yòhó, ¿nása càchí-n cuendá tée ní quide tátna núú-n te ní ndúha? —càchí-güedé xáhaⁿ-güedé xii-dé.

Te ní xáhaⁿ-dě:

—Yúhú càchí-í sá ìíⁿ tõe càháⁿ tnúhu Yá Ndióxi cúu-dě —càchí-dé xáhaⁿ-dě xii-güedé.

18 Dico cue tée isràél ñá ní sàndáá iní-güedé sá cuàá-dé ní cùu, chì cuendá sá ní ndúha núu-dě ní xiní ñáhá-güedé, te xiǎⁿ núu ní cana-güedé tátá-dě ndihi náná-dě,

19 te ní xícáⁿ tnúhú-güedé núu-yu, te xáhaⁿ-güedé:

—¿Diu tée-a déhe-ndo tõe càchí-ndó cuàá-dé ní cacu-dé-ǎⁿ? ¿Te nása ní cuu ní ndúha núu-dě? —càchí-güedé xáhaⁿ-güedé xii-yu.

20 Te ní xáhaⁿ tátá-dě ndihi náná-dé:

—Diu déhe-ndí cúu-dé te sa cuàá ndisa-dé ní cacu-dé,

21 dico ñá túu xini-ndí nása ní cuu ní ndúha núu-dě, te ní ñà túu xini-ndí yoo ní quide tátna. Chí cacáⁿ tnúhú núu méé-dě xiǎⁿ núu sa sacuéhé-dě, te na càháⁿ-dé núu nása ní cuu ní ndúha núu-dě —càchí-yu xáháⁿ-yu xii-güedé.

22 Duha ní cáháⁿ tátá-dě ndihi náná-dé ní xáháⁿ-yu xii-güedé cuendá sá yúhú-yu cue tée cunuú núu ñáyiu isràél, chì cue tée-ǎⁿ sa ní ndatnúhu-güedé ní cuu ìíⁿnuu-güedé sá núu ndédacáa ñáyiu na càháⁿ sá Jesús cúu-gá Cristú Yáa ní tendaha Yá Ndióxi véxi ñuyíú-a, te vá dáñá-gá-güedé quíhu-yu veñúhu.

23 Núu xiǎⁿ ní xáhaⁿ tátá-dě ndihi náná-dé sá ná cacáⁿ tnúhú-güedé núu méé-dě chì sa sacuéhé-dé.

24 Te xiǎⁿ núu ní cana tucu-güedé tée ní ndúha núu-xi-ǎⁿ, te ní xáhaⁿ-güedé:

—Cáháⁿ-n ìíⁿ tnúhu ndáá chì Yá Ndióxi ndéhé ndii-gá nàcuáa ní cuu ní ndúha núu-n, chì nchúhú xini-ndí sá dicó ìíⁿ tée ndècu yíca cuèchi-xi cùu tée càchí-n ní quide tátna núu-n —càchí-güedé xáhaⁿ-güedé xii-dé.

25 Te ní xáhaⁿ-dè:

—Yúhú, ñá túu xini-í te núu tée ndècu yíca cuèchi-xi cùu-dé àdi ñáhá. Dicó-ní sá xini-í sá cuàá-í ní cùu te vitna ní cuu cundehe-í —càchí-dé xáhaⁿ-dè xii-güedé.

26 Te ní xícáⁿ tnúhú tucu-güedé núu-dě, te xáhaⁿ-güedé:

—¿Nása ní quide ñaha-dè xii-n te ní ndúha núu-n-í? —càchí-güedé xáhaⁿ-güedé xii-dé.

27 Te ní xáhaⁿ-dè:

—Yúhú sa ní cáháⁿ-í te ñá túu quide cuendá-ndó. ¿Te ná cuendá cuini-ndó càchí tnúhu-ni tucu-í? ¿Á tnáhá-ndó cuini-ndó quindáá iní-ndó tnúhu càháⁿ-dè? —càchí-dé xáhaⁿ-dè xii-güedé.

28 Te ní cudééⁿ-güedé núu-dě, te ní xáhaⁿ-güedé xii-dé:

—Te núu yòhó cuini-n chinchícúⁿ-n tõe-ǎⁿ te cuáháⁿ, dico nchúhú chì canchícúⁿ nihnu nahi-ni-ndí nàcuáa ní cáháⁿ ndíi Moisés.

29 Te nchúhú chì ñaha-ndí sá Yá Ndióxi ní cáháⁿ ndihi-gá ndíi Moisés, dico tée càchí-n-ǎⁿ chì ní ñà túu xini-ndí ndéé tée cùu-dé —càchí-güedé xáhaⁿ-güedé xii-dé.

30 Te ní xáhaⁿ tõe ní ndúha núu-xi-ǎⁿ:

—¿Te náa ñá díú nchòhó càchí-ndó sá Ìo túha-ndo? Te núu ducaⁿ càháⁿ-ndó sá ñá túu xini-ndó ndéé tée cùu-dé, te diu-dé ní quide tátna-dé núu-í ní ndúha —càchí-dé xáhaⁿ-dè xii-güedé.

Te xáhaⁿ tucu-dé:

31 —Xini-ó sá Yá Ndióxi ñá túu tédóho-gá tnúhu càháⁿ ñáyiu quide nchaa sá cuéhé sá dúhá, chì nchaa ñáyiu quide cahnu ñaha xii-gá te quidé-yu nchaa nàcuáa cùu iní-gá, te ñáyiu-ǎⁿ tédóho-gá tnúhu càháⁿ-yu.

32 Te ñá ñá ndùu cáháⁿ ñáyiú cuèndá ñá tée cada tátna núú ñá ñáyiú cuàá ndéé ní cacu-xi te ndúha.

33 Te núú ñá díú mèe Yá Ndióxi ní tëndaha ñaha-gá xii tée-áⁿ véxi-dé ñá, te vá ndácú-dé cada tátna-dé núú-í ní cùu —cachí-dé xáhaⁿ-dè xii-güedé.

34 Te ní xáhaⁿ-güedé:

—Dico yòhò ndéé yatni vài cuéchi sa ta quide-n véxi, ¿te vitna nacanú ichi ñaha-n xii-ndí cáháⁿ-n-áⁿ? —càchí-güedé xáhaⁿ-güedé xii-dé.

Te ní queñuhu ñaha-güedé xii-dé tnuú-güedé ñá túú ní dàña-gá-güedé níhi tnàhá ndíhi ñaha-dé xii-güedé.

Ñáyiú ñá túú ndíxi túú iní cuèndá nchaa sá cuèhé sá dúhá quidé-yu

35 Te ní níhi Jèsús tnúhu sá ní queñuhu-güedé tée ní cuhú núú-xi-áⁿ tnuú-güedé cuèndá sá vá tnàhá tnúhu ndíhi ñaha-gá-dé xii-güedé, te ní naníhi ñáhá-gá xii-dé te ní xáhaⁿ-gá:

—¿Sàndáá iní-n Déhe Yá Ndióxi-áⁿ? —càchí-gá xáhaⁿ-gá.

36 Te ní xáhaⁿ tée ní cuhú núú-xi-áⁿ:

—Mèstrú, cachí tnúhu núú ndéé ndécú tée-áⁿ cuèndá quíndáá iní-í-dé —càchí-dé xáhaⁿ-dè xii-gá.

37 Te ní xáhaⁿ Jèsús:

—Sa xini-n-dé chi díu-dé cúú yúhú tée ndàtnúhu ndíhi-n —càchí-gá xáhaⁿ-gá xii-dé.

38 Te ní ngüíni xítí-dé núú-gá, te ní xáhaⁿ-dè:

—Xítóhó Jesucristú, sàndáá iní ñáhá-í xii-n —càchí-dé xáhaⁿ-dè xii-gá.

39 Te ní xáhaⁿ tucu Jèsús:

—Yúhú véxi-í ñuyúú-a cada ndáá-í cuéchi ñáyiú. Te nchaa ñáyiú ñá túú quide váha cúu-yu dàtná ñá ñáyiú cuàá, dico nchaa ñáyiú cùtnuní iní-xi sá ñá túú quide váha, te núú na quíndáá iní-yu tnúhu cáháⁿ-í, te cada iní-ndó sá dàtná sá ní nacaáⁿ núú-yu chi tní-yu tnúhu cáháⁿ-í. Te ñáyiú càchí sá quidé váha vá núú núu-yu cuéchi-yu chi quesáhá-yu sá ío ndáá quidé-yu, ñáyiú-áⁿ cúú-yu dàtná ñá ñáyiú cuàá, chi vá ndíxi túú iní-yu sá ñá túú quide váha-yu ndécú-yu, te vá tní-yu tnúhu cáháⁿ-í —càchí-gá xáhaⁿ-gá xii-dé.

40 Te sá dúcáⁿ ní cáháⁿ-gá, núú ní cáháⁿ ñá úú cue tée cùu fariséú, te xáhaⁿ-güedé:

—¿Te náa tnàhá nchúhú cuàá-ndí cáháⁿ-n-áⁿ? —càchí-güedé xáhaⁿ-güedé xii-gá.

41 Te ní xáhaⁿ Jèsús:

—Te núú dìcò nchòhó cuàá-ndó ñá, te vá cùndècu cuéchi-ndo ní cùu, dico càchí-ndó sá ndéhé-ndó ñá sá quidé-ndó te ñá ndáá, núú xíáⁿ ío ndècu cuéchi-ndo.

10

Jèsús cáháⁿ-gá cuèndá cùrrálí mbéé

1 Te na càchí tnúhu ndáá-í xii-ndo sá ñá tée ñá túú quíhu ndáa yuyehé ñá cùrrálí mbéé, te cùtèxínu-ni na cuidó-dé, tée-áⁿ cúú-dé ñádúhú.

2 Dico tée quíhu ichi yèhe cùrrálí-güedí, tée-áⁿ cúú-dé xítóhó-güedí.

3 Te tée ndéé yèhe cùrrálí-güedí nacaáⁿ-dé te cuánguihu xítóhó-güedí te ní cáháⁿ-dé, te ní nucúhuⁿ ndudú ñáhá-güedí xii-dé. Te ní cáháⁿ díú-dé-güedí te ní queñuhu-dé-güedí cùrrálí.

4 Te sáta nǐ quee-güedi cùrrálí, te ní ngódó núú-dé núú-güedi, te ní ngüíta nchicúⁿ ñáhá-güedi xii-dé chi ní nucúhuⁿ ndudú ñáhá-güedi.

5 Te ñá túú chinchicúⁿ-güedi ñⁿ téé tātú, chi núcúhuⁿ ndudú-güedi sá ñà díú xítóhó-güedi cùu-dé, núu xiǎⁿ xínú-güedi núú-dé —càchí-gá xáhaⁿ-gá xii-güedé.

6 Duha ní cáháⁿ Jèsús cuendá sá cuiní-gá dacuahá-yu tnúhu-gá ní cùu, dico ñá ní tècú tnúní-yu nása ndùu tnúhu ní cáháⁿ-gá.

Jèsús cúu-gá dàtná ñⁿ toli

7 Te ní xáhaⁿ tucu Jesús xii-güedé:

—Na càchí tnúhu ndáá-í xii-ndo sǎ yúhú cúu-í dàtná ñⁿ yèhe cùrrálí núu ndíhu cue mbéé.

8 Te nchaa cue téé sa yòdo nuu-gá ní quixi ní dándàhú-güedé ñáyiu cùu-güedé dàtná ñádúhú dùhu-güedé cue mbéé ní cùu, dico ñá ní quide cuendá ñáhá-güedi xii-güedé, chi ní cutnùní iní-güedi sá ñà díú xítóhó-güedi cùu-güedé.

9 Te yúhú cùu-í dàtná yuyèhe cùrrálí cue mbéé. Te ducaⁿ sǎtnahá-xi cùu-í chi nchaa ñáyiu na tùha ñaha xii-í te naníhí tàhú-yu. Te cùu-yu dàtná cue mbéé quiti xíquee cùrrálí-xi cuaháⁿ-güedi núu cáá ité caxi-güedi, te dàtnùní cuándihu-ná-güedi cùrrálí, ducaⁿ sǎtnahá-xi cùu-yu.

10 Ñádúhú òré véxi-dé chi dùhu-dé, sàhni-dé te dànaa-dé mbéé, dico yúhú chi véxi-í cuendá sá naníhí tàhú-ndó te ío cudíⁿ iní-ndó cùnu cuechi-ndo núu Dútú Ndióxi ní caa ní quíhíⁿ.

11 Te yúhú cùu-í dàtná ñⁿ toli téé ío nèhe cuendá mbéé-xi, chi téé-áⁿ cuéi na cùu-dé sá cúu-xí mbéé-dé cuendá-nǎ sá ná càcu-güedi.

12 Te núu ñⁿ téé na còto ñaha xii-güedi, te téé-áⁿ cuendá-ní sá ñúhú yǎhu-dé xító-dé-güedi. Te núu na quíní-dé sáá ñⁿ quiti dééⁿ te dàña-dé-güedi xinu-dé, te ndíhi-güedi xité nuu ñaha quiti dééⁿ-áⁿ, chi ñá díú mèi xítóhó-güedi cùu-dé.

13 Chi cuendá-ní sá ñúhú yǎhu-dé xító-dé-güedi núu ñá túú ná ndíhú iní-dé cuéi na dàndíhi ñaha quiti cuíhna.

14 Te yúhú cùu-í dàtná ñⁿ téé ío váha xito mbéé-xi, chi téé-áⁿ da ñⁿ da ñⁿ-dí xini-í-dé nàcuáa ndáa-dí, te ducaⁿ xini ñáhá-güedi xii-dé. Te ducaⁿ sǎtnahá-xi cùu yúhú ndíhi nchaa ñáyiu sàndáá iní ñáhá xii-í, chi yúhú xini-í-yu te ducaⁿ mèe-yu xini ñáhá-yu xii-í.

15 Te ñu-ní ducaⁿ cùu-í ndíhi Tātá-í, chi xini ñáhá-gá xii-í te xini-í-gá. Te sáá nduu cúu-í cuendá nchaa ñáyiu sàndáá iní ñáhá xii-í.

16 Te ndècu-gá ñáyiu vátá quíndáá iní ñáhá-gá xii-í. Te xini ñuhu-xi cundédóho-yu tnúhu-í te quíndáá iní ñáhá-yu cuendá ñⁿ-ná ichi cúu-yu, te ducaⁿ cùndecu ñⁿ-ná téé coto ñaha xii-yu cuu-dé dàtná ñⁿ tólí-yu, te téé coto ñaha xii-yu-áⁿ cúu yúhú.

17 Te Tātá-í ío cudíⁿ iní ñáhá-gá xii-í cuendá sá sáá ñⁿ nduu te cúu-í, te cúu-í chi ducaⁿ càchí iní-í, te ñá díú sǎ cúu iní ñáyiu ñuyúú-a cúu-í, te cúu-í dico ndoto-í.

18 Te vá yóo ñⁿ te ndacu cahni ñaha xii-í, te núu ñá díú sǎ cúu iní mèe-í cúu-í. Te dàtná-ní cùu iní-í sá cúu-í te ñu-ní ducaⁿ ndòto-í chi ducaⁿ ní càchí Tātá-í Dútú Ndióxi cunduu —càchí-gá xáhaⁿ-gá xii-güedé.

19 Te sá dúcáⁿ ní cáháⁿ-gá te ñá ní cùu ñⁿnuu tucu ñáyiu isràél.

20 Te davá-yu ní xítñahá-yu:

—¿Ná cuendá sàndáá-tu iní-ndó tnũhu càháⁿ tée-ãⁿ, te yucu ñávãha ndècu ndihí-dé, lùcú tée-ãⁿ? —càchí-yu xĩtnàhá-yu.

21 Te davá-yu ní xĩtnàhá-yu:

—¿Náa xini-ndó ìⁿ tée ndècu ndihí yucu ñávãha duha váha càháⁿ-dé? ¿Náa xini-ndó nõu ndàcu yucu ñávãha cada tátna-xi núú ìⁿ tée cuáá te ndúha? —càchí-yu xĩtnàhá-yu.

Ñáyiu isràél dáquèe tíhũ-yu Jèsús

22 Te ndí tnahá cuía ndáá càhnú-yu vico veñũhu càhnu sá ïo cùnũu ñũú Jerusàlén, te mei yõó quidé v̄xiⁿ-xi quidé-yu vico-áⁿ.

23 Te corrèdór veñũhu-áⁿ nání-xí Sàlomón, te xiáⁿ xicá cùu Jèsús.

24 Te ní chítú níhnú ñáyiu isràél núú-gã, te ní xáhãⁿ-yu:

—¿Ná ndéé òré cachí tnũhu ndáá-n, te núú sá Cristú Yaá ní tendaha Yã Ndiõxí véxi ñuyíú-a cùu-n, àdi ná tée cùu-n?, càháⁿ-ni-n —càchí-yu xáhãⁿ-yu xii-gá.

25 Te ní xáhaⁿ Jèsús:

—Sa ní cachí tnũhu-í te ñá sàndáá iní-ndó, te ndèhe-ndo sá vái núú sá quidè-í sá ní táuchíúⁿ Tàtà-í cada-í, te cùu-xi ìⁿ sá cùnùnì iní-ndó ñã tée cùu-í.

26 Dico nchòhó ñã sàndáá iní-ndó, chi ñã túú cùu-ndo ñáyiu ní chitnahá ñáhá xii-í.

27 Chi nchaa ñáyiu ní chitnahá ñáhá xii-í cùu-yu dàtná cue mbéé quití xĩndecu ndihí xítohó-xi chi nùcúhuⁿ ndudú-güedi xítohó-güedi, te ducaⁿ ñàquiní ñáhá-ní xítohó-güedi xii-güedi. Ducaⁿ sãtnahá-xi cùu nchaa ñáyiu ní chitnahá ñáhá xii-í.

28 Te yúhú cada-í te nduu táhũ-yu cundecu ndihí ñáhá-yu xii-í ni caa ni quíh^í te vá ìⁿ ndùu-gá cuíta nihnú-yu, te ni vã yõo ìⁿ ndacu naquendeé ñáhá xii-yu ndaha-í.

29 Chi Tàtà-í ní taxi cuendá ñáhá-gã xii-yu. Te ïo cùnũu-gá nõu xiãⁿ vá yõo ìⁿ ndacu naquendeé ñáhá xii-yu ndaha-gã.

30 Yúhú ndihí Tàtà-í Dútú Ndiõxí ìⁿ-ni cùu-ndí —càchí-gá xáhaⁿ-gã xii-yu.

31 Te ní queheⁿ tucu ñáyiu isràél yúu cuáha ñáhá-yu xii-gá ní cùu.

32 Te ní xáhaⁿ-gã xii-yu:

—Ío cuèhé sã váha ní quide-í núú-ndó ñi chindee ñaha Tàtà-í Dútú Ndiõxí. ¿Te ndèdacàa sã ñã tnahá iní-ndó nõu cuiní-ndó cuáha ñaha-ndo yúú xii-í-í? —càchí-gá xáhaⁿ-gã xii-yu.

33 Te ní xáhaⁿ ñáyiu isràél:

—Ñã díú cuendá nchaa sã váha ni quide-n cuiní-ndí cuáha ñaha-ndí yúú xii-n, chi ìⁿ ñi-ni sá ïo càháⁿ úhú-n cuendá Yã Ndiõxí. Te dicó ìⁿ tée ñuyíú-a cùu-n te càchí-n sã cúu-n Ndiõxí —càchí-yu xáhãⁿ-yu xii-gá.

34 Te ní xáhaⁿ Jèsús:

—Núú tùtú Yã Ndiõxí sá ndécú ndihí-ndo càháⁿ-xi ñacuáa ní càháⁿ-gã, te duha ní cachí-gá: “Nchòhó quidé-ndó nõu-í”, duha ní cachí-gá.

35 Te ñaha-o sã vá cúú quèhndé nihnu-o tnũhu yòdo tnuní núú tùtú Yã Ndiõxí, chi mee-gã ní cachí-gã sã cádá-yu núú-gã, te vá càchí-ó sã ñã ndáá.

36 Te núú ducaⁿ ñi càháⁿ-gã sã nõú-gã quidé nchaa ñáyiu ní sãndáá iní ñáhá xii-gã ñã, ¿te ná cuendá cudééⁿ-ndó nõú yúhú sã càchí-í sã cúu-í Déhe-gã? Te mee Yã Ndiõxí ní tendaha ñaha-gã xii-í véxi-í ñuyíú-a sã cádá-í chiúⁿ-gã.

³⁷ Te núu ñá túú quide-í nàcuáa ní táuchíúⁿ Tătá-í cada-í ñá, te vá quindáá iní ñáhá-ndó.

³⁸ Te núu quide-í ñá, te cuèi vá quindáá iní ñáhá-ndó xii mee-í dico quindáá iní-ndó nchaa chiuⁿ quide-í. Ducaⁿ te cutnùni ndáá iní-ndó sã Yã Ndiöxi ndécú ndih-í te ìⁿ-ni cùu-ndí —càchí-gá xáhaⁿ-gã xií-yu.

³⁹ Te ní cuini-güedé tñ# ñaha tucu-güedé xii-gá quihíⁿ-gá vecaa ní cùu, dico ní xinu núu ñáhá-gã xii-güedé.

⁴⁰ Te ní xica-gá cuáháⁿ-gá ndaa ingá xio yúte Jòrdán núu nĩ xóo dacuàndute ndí Juáá ñáyiu ndéé díhna, yàcáⁿ ní xindecu-gá.

⁴¹ Te yàcáⁿ ío vai ñáyiu ní sáháⁿ ní cáháⁿ ndihí ñaha xii-gá, te ní xitnàhá-yu: —Ndí Juáá, cuèi ñá túú ní quide ndí sá vá yóo tnàhí ndacu cada dico ndáá ní cáháⁿ ndí, chi dàtná-ni ní cáháⁿ ndí quide téé-a —càchí-yu xitnàhá-yu.

⁴² Te yàcáⁿ ío vai-yu ní sándáá iní ñáhá-yu xii-gá.

11

Ní xihí té Lázaru

¹ Nnú Bètania ní xindecu ìⁿ téé ní xinani-dě Lázaru. Te càhú víhí nĩ tnahá-dé ní cuhú-dé, te ní xindecu ndihí-dé cue cùha-dé tá Màriá ndihí tá Màrta chi xiáⁿ ñúú-yu.

² Te tá Màriá-áⁿ cúu-xí xíchí nĩ sódo àciti sáháⁿ tnámí sáhá Jèsús, te ní nadayíchí-xi sáhá-gã ndihí idi díquí-xi. Te cuendá sá cùhú cùha-yu té Lázaru,

³ núu ní tendáhá-yu ñáyiu naha tnúhu cuáháⁿ núu Jèsús, te xáháⁿ-yu xii-gá: —Mèstrú, téé ío cùu iní-n ò càhú tnàhá-dé cùhú-dé —càchí-yu xáháⁿ-yu xii-gá.

⁴ Te sá dúcáⁿ càa tnúhu ní sáá, núu ní xáhaⁿ Jèsús xií-yu:

—Dico cuéhé-áⁿ chi vá cùú-dé sá cùú dúcáⁿ-dè, chi Yã Ndiöxí cuini-gá sá quini-yu nchaa sá cáda-gã cuendá chiñuhu ñáhá-yu xii-gá, te ñu-ni ducaⁿ chiñuhu ñáhá-yu xii yúhú Déhe-gá —càchí-gá xáhaⁿ-gã xií-yu.

⁵ Te cuèi ío cùu iní ñáhá Jèsús xii té Lázaru ndihí cue cùha-dé

⁶ dico òré ní níhí-gã tnúhu, te ní cuyaa-gã úú-gá nduu núu ndécú-gã.

⁷ Te ní xáhaⁿ-gã xii cue téé xica cuu ndihí-gá:

—Na quihíⁿ tucu-o dìstrítú Jùdeá —càchí-gá xáhaⁿ-gã xii-güedé.

⁸ Te ní xáhaⁿ cuè téé xica cuu ndihí-gá xii-gá:

—Mèstrú, vitna-ni cuini cue téé israhél xindecu yàcáⁿ cuáha ñaha-güedé xii-n yùú ní cùu, ¿te cuini-ni tucu-n quihíⁿ-n-ú? —càchí-güedé xáhaⁿ-güedé xii-gá.

⁹ Te ní xáhaⁿ Jèsús:

—Úxúú òré cúú ìⁿ nduu, te núu nduu na càca cuu-o, te ñá túú nã candaundeé-ó chi cùtnùni núú-ó chi ditó.

¹⁰ Dico núu niú ná càca cuu-o, te lò ná candaundeé-ó chi vá cùtnùni núú-ó —càchí-gá xáhaⁿ-gã xii-güedé.

¹¹ Te ní xáhaⁿ Jèsús:

—Té Lázaru téé ío váha tnàhá tnúhu ndihí-o ní xidí-dé dico quihíⁿ-ó chi ndocani-o-dě —càchí-gá xáhaⁿ-gã xii-güedé.

¹² Te ní xáhaⁿ-güedé xii-gá:

—Mèstrú, te núu xidí-dé te váa sa ta ndùha-dé cuáháⁿ —càchí-güedé xáhaⁿ-güedé xii-gá.

¹³ Duha ní cáháⁿ Jèsús, chi té Lázaru sa ní xihí-dé te cue téé xica cuu ndihí-gá ní sani iní-güedé sá nĩ xidí ndisa-dé.

14 Te Jèsús ní xáhaⁿ ndáá-gá xii-güedé:

—Sa ní xíhí té Lázará.

15 Váha-gá sá ñá ní sáháⁿ-í quíngoto-í-dé, chi ndècu íngá chiúⁿ cada-í quini-ndó, te quindáá íni ñáhá-gã-ndó xii-í, te vitna na quíhíⁿ-ó núú ndécú yiqui cuñú ndíi —càchí-gá xáhaⁿ-gã xii-güedé.

16 Te té Mǎxí téé xáhaⁿ-güedé cuáchí ní xáhaⁿ-dè xii dava-gá-güedé:

—Na quíhíⁿ-ó nchàa-o chi yàcáⁿ cuú-ó ndíhí-dé —càchí-dé xáhaⁿ-dè xii-güedé.

Jèsús càháⁿ-gá sá cuéi na cùú ñáyíu dico ndotó-yu cundecú-yu ndíhí-gá

17 Te òrè ní sáá Jèsús ñúú Bètaniá, te ní xáhãⁿ-yu sá sà ní cuu cúmí nduu ní xíhí té Lázará.

18 Te ñúú-áⁿ cáá yàtni-ni-gá ñúú Jerusalén, dàtná cuádava-ná òrè cuhuⁿ-o ìchi te saá-ó.

19 Núu xǎⁿ vǎi ñáyíu isràèl ní sáháⁿ-yu ní càháⁿ ndíhí-yu tá Mǎrta ndíhí cùhú-xi tá Mǎriá, te ní sáñáhá-yu tnúhu ndee íni sá dúcáⁿ ní xíhí cùha-yu.

20 Te ní níhí tá Mǎrta tnúhu sá ñúhú Jèsús ìchi cuáháⁿ-gá núú ndécú-yu núu ní sáháⁿ-xi ní sátnahá-xi-gá, te cùhú-xi tá Mǎriá ní ndóo-xi vehe.

21 Te òrè ní naníhí tá Mǎrta Jèsús, te ní xáhaⁿ-xi xii-gá:

—Mèstrú, te núu dicó ní xíndecu-n ìha te vǎ cùú cùha-ndí ní cúu.

22 Te cuéi vitna te núu ná sá ná càcáⁿ-n núú Yǎ Ndióxi te taxi-gá xii-n —càchí-xi xáhaⁿ-xi xii-gá.

23 Te ní xáhaⁿ Jèsús:

—Vǎ ndíhú íni-n chi ndoto cùha-n —càchí-gá xáhaⁿ-gã xii-xi.

24 Te ní xáhaⁿ tá Mǎrta:

—Ndáá chi sa xini-í sá ndótó-dè ná quítnahá nduu ndòto nchaa ñáyíu ní xíhí —càchí-xi xáhaⁿ-xi xii-gá.

25 Te ní xáhaⁿ Jèsús:

—Yúhú dandòto-í-yu cuendá cundecú-yu ni caa ni quíhíⁿ ná saá nduu. Te nchaa ñáyíu na quindáá íni ñáhá xii-í, te cuéi na cùú-yu dico ndotó-yu cundecu-í ndíhí-yu ni caa ni quíhíⁿ.

26 Te nchaa ñáyíu ndècu vívú ñuyíú-a te núu na quindáá íni ñáhá-yu xii-í, te cundecu ndíhí-í-yu ni caa ni quíhíⁿ. ¿Sàndáá íni-n tnúhu-a ñá? —càchí-gá xáhaⁿ-gã xii tá Mǎrta.

27 Te xáhaⁿ-xi:

—Mèstrú, sàndáá íni-í, te sàndáá tucu íni-í sá díú-n cùu-n Cristú Déhe Yǎ Ndióxi, Yáá ní tendaha-gã véxi ñuyíú-a —càchí-xi xáhaⁿ-xi xii-gá.

Jèsús ndáhí-gá núú ní nguíndüxi té Lázará

28 Sátá dúcáⁿ ní càháⁿ-xi te ní sáháⁿ ngana-xi cùhú-xi tá Mǎriá, te dayuhu ní xáhaⁿ-xi:

—Yǎcáⁿ ní quexìo Mèstrú, te càna ñaha-dé xii-n —càchí-xi xáhaⁿ-xi.

29 Te sá dúcáⁿ xáhaⁿ cùhú tá Mǎriá sá cáná ñaha Jesús xii-xi, núu ndíhí-ni ní xica-xi cuáháⁿ-xi núú ndécú-gã.

30 Te Jèsús vátá quíhu-gá xití ñúú, chi ndècu-ni-gá núú ní sáháⁿ tnahá ñáhá tá Mǎrta.

31 Te ñáyíu isràèl ndécú sáñaha tnúhu ndee íni xii tá Mǎriá ndíhí cùhú-xi ní sani íni-yu sá cuáháⁿ-xi núú yíndüxi cùha-xi ndáhyú-xi ní càháⁿ-yu, núu nchícúⁿ-yu-xi cuáháⁿ.

³² Te ní sáá tá Màriá núú ndécú Jèsús te ní ngúíí xítí-xí núú-gă, te xăhaⁿ-xi xii-gă:

—Mèstrú, te núú dicó ní xĩndecu-n ìha te vá cùú cúha-ndí ní cùú —cachí-xi xăhaⁿ-xi xii-gă.

³³ Te sá ní xiní Jèsús ndàhyú tá Màriá ndìhì ñáyiú isràèl nchìcúⁿ ñáhá cuáháⁿ, xíăⁿ ío ní cuyica ìní-gă.

³⁴ Te ní xăhaⁿ-gă xii-yu:

—¿Ndèè ní taxi ndecu-ndo yìqui cuñú-dé-i? —càchí-gă xăhaⁿ-gă xii-yu.

Te ní xăháⁿ-yu:

—Mèstrú, néhé ná quíhíⁿ-ó te quini-n —càchí-yu xăháⁿ-yu xii-gă.

³⁵ Te ní ndáhyú-gă tñàhá-gă.

³⁶ Te ní xítñàha ñáyiú isràèl:

—Súúní cùú ìní-dé ndíi ni cùú —cachí-yu xítñàhá-yu.

³⁷ Te davá-yu xítñàhá-yu:

—Tée-a ní quide tátna-dé núú tée cuàá te ní ndúha. ¿Te nása ní cuu núú ñá túú ní quide tátna-dé té Lázaru cuendá sá vă cùú-dé ní cùú-i? —cachí-yu xítñàhá-yu.

Jèsús dándòto-gă té Lázaru

³⁸ Te ío ní cuyica tùcu ìní Jèsús òré ní quexio-gă yuhu yàú núú ní chihì-güedé yìqui cuñú té Lázaru. Te yuhu yàú-áⁿ ndèdí ìⁿ yúú.

³⁹ Te ní xăhaⁿ Jèsús xii-yu:

—Chí xócàni yúú-ăⁿ —càchí-gă xăhaⁿ-gă xii-yu.

Te ní xăháⁿ tá Màrta cúha tée ní xíhí-áⁿ:

—Mèstrú, sa tucu sàháⁿ-dé chí sa ní cuu cùmí nduu sá ní xíhí-dé —càchí-xi xăhaⁿ-xi xii-gă.

⁴⁰ Te ní xăhaⁿ Jèsús:

—¿Náa ñá díú ní cachí-í sá núu na quindáá ìní-n, te quini-n să ìo càhnu cuu Yá Ndiòxí? —càchí-gă xăhaⁿ-gă xii-xi.

⁴¹ Te ní xócàni-yu yúú ndèdí yuhu yàú-áⁿ. Te ní ndacoto-gă andiú, te ní xăhaⁿ-gă xii Tátá-gă Dútú Ndiòxí:

—Táu, ndácáⁿ táhù-í núú-n să ní tédoho-n tñúhu ní cáháⁿ-í.

⁴² Te yuhú sa ñàha-í sá ncháá-ni òré ndèdóho ñàha-n xii-í, dico duha càháⁿ-í cuendá sá ná tècú dóho nchaa ñáyiú ndècu iha cuendá quindáá ìní-yu sá díú-n ní tendaha ñàha-n xii-í véxi-í ñuyíú-a —càchí-gă xăhaⁿ-gă xii Dútú Ndiòxí.

⁴³ Te sáta dúcáⁿ ní cáháⁿ-gă ndìhì Yá Ndiòxí, te níhì ní cáháⁿ-gă xăhaⁿ-gă xii tée ní xíhí-áⁿ:

—¿Lázaru, tandèe xíáⁿ! —càchí-gă xăhaⁿ-gă xii-dé.

⁴⁴ Te ní ndee tée ní xíhí-án yàú-áⁿ, te ndùtu dóo cuíñí ndàha-dé ndìhì sáhá-dé, te dàhu tucu ìⁿ dóo núú-dé. Te ní xăhaⁿ Jèsús xii-yu:

—Chí nándaxi-dé te dañà-ndo-dé ná caca-dé —càchí-gă xăhaⁿ-gă xii-yu.

Ndùcu-güedé nàcuáa cada-güedé cahni-güedé Jèsús

(Mt. 26:1-5; Mr. 14:1-2; Lc. 22:1-2)

⁴⁵ Te nchaa ñáyiú nchìcúⁿ ñáhá xii tá Màriá cuáháⁿ ío vâi-yu ní sándáá ìní-yu Jèsús sá ní xiní-yu nàcuáa ní quide-gă.

⁴⁶ Dico davá-yu ní sáháⁿ-yu núú cuè tée cùú fariséú, te ní caní-yu cuèndú núú-güedé nàcuáa ní quide Jèsús.

47 Te cue tée cùu fariséu ndihí cue dútú cùnùu ní natacá-güedé ní xóo-güedé jündá, te ní xítñaha-güedé:

—¿Nása cada-o?, chí tée-án ío vai sá vǎ yǎo tñahí ndacu cada quide-dé.

48 Te núu na dañá ío te nchaa ñáyiú quindáá iní ñáhǎ-yu xii-dé, te quixi cue tée ñuú Rómá dangoyo-güedé veñúhu-o te danàa-güedé nchaa ñuú-ó —càchí-güedé xítñaha-güedé.

49 Te ñⁿ cue tée-án nání-dě Caifás, te cùnùu-gá-dé núu dàva-gá cue dútú cuǎ-ǎn, te ní xáhaⁿ-dě xii-güedé:

—Nchòhó ni lùha ñá túú cùtnuní iní-ndó.

50 Te ni ñá sǎha-ndo cuendá sá vǎha-gá tnahá-ó, te núu na cùú ñⁿ-ni tée cuendá nchaa ñáyiú isràél, te ñá díú sǎ dánàa ñaha-güedé xii-yu —càchí-dé xǎhaⁿ-dě xii-güedé.

51 Dico té Caifás chí ñá díú sǎ cúú iní mee-dě ní cǎháⁿ-dé, chí cuendá sá cuǎ-ǎn ní cùnùu-dě núu cuè dútú, núu xǎⁿ Yǎ Ndióxí ní dácáhu iní ñáhá-gǎ nàcuáa cǎháⁿ-dě sá Jèsús cuú-gá sá cúú-xí nchàa ñáyiú isràél.

52 Te ñá díú cuendá mee-ni ñáyiú-áⁿ cuú-gá, chí cuú-gá tñahá cuendá nchaa ñáyiú ní sándáá iní ñáhá xii-gá, ñáyiú nchítenuu nihí ñuyíú, te ñⁿ-ná cuú-yu ndihí-gá.

53 Núu ndéé nduu-ǎn ní ndatnúhu cue tée cùnùu núu ñáyiú isràél nàcuáa cada-güedé cahni-güedé Jèsús.

54 Te xǎⁿ núu ñá ní xica cuu-gá Jèsús quiní ñáhá ñáyiú isràél, te ní quee-gá cuáháⁿ-gá ñuú Efraín, ñⁿ ñuú cáa yàtni yucu, yàcáⁿ ní ngúñí-gá ndihí cue tée xica cuu ndihí-gá.

55 Te ta cùyatni nduu cadá-yu vico pascuá. Te cuéhé ñáyiú ní quee-yu ñuú-yu cuáháⁿ-yu ñuú Jerusalén cuendá sá sǎ ndihí-yu nchaa-yu nduu í, te tnahá nduu vico pascuá.

56 Te yàcáⁿ nándúcú-yu Jèsús ní cùu te ñá túú-gǎ òré-án, te ní naníhí tñahǎ-yu xití veñúhu, te xítñahá-yu:

—¿Nása sǎni iní-ndó-í? ¿Quixi Jèsús vico ǎn ñáhá? —càchí-yu xítñahá-yu.

57 Te cue tée cùu fariséu ndihí cue dútú cùnùu sa ní xáhaⁿ-güedé xii ñáyiú sá núu ndéda-ni cáa-yu xiní-yu núu ndécú Jèsús te na cǎháⁿ-ni-yu cuendá tñǎ ñaha-güedé xii-gá.

12

*Ñⁿ ñadihí chíhí-án Jèsús acití
(Mt. 26:6-13; Mr. 14:3-9)*

1 Íñú-gá nduu cùmání tnahá vico pascuá, te ní sáháⁿ Jèsús ñuú Bètaniá, ñuú té Lázaru tée ní dándótó-gǎ.

2 Te xǎⁿ ní cadúha-yu sá ní cudini Jesús. Te tá Mǎrta ní sani-xi cóhó, te té Lázaru yíhí-dě mesá ndihí Jesús, ndihí dava-gá-güedé xéxi-güedé.

3 Te tá Mǎriá nehé-xí cuádava lítrú acití sáháⁿ tñámí sǎ ío ndèyáhu, te acití-án ní cuáha mee-ni yúcú nǎrdú, te ní sódó-xi sáhá Jesús, te ní nadayíchí-xi ndihí idi díquí-xi sáhá-gǎ. Te nihí xití vehe ní xité nuu dicó acití-án.

4 Te té Jüdás déhe té Ximú Iscarioté díu-ni ñⁿ tée xica cuu ndihí-gá, tée cuáha cuendá ñáhá xii-gá núu cuè tée cùu úhu iní ñáhá ní xáhaⁿ-dě xii-gá:

5 —¿Ná cuendá ñá ní cùyáhu acití-a sá ùní cièndú díhúⁿ denàriú cuu cuendá ñáyiú ndàhú? —càchí-dé xǎhaⁿ-dě xii-gá.

⁶ Dico sá dúcáⁿ ní cáháⁿ té Júdás chi ñá díú sá ndísá ñùhu iní-dé ñáiyu ndàhú chi dícó-ni ìⁿ ñádúhú cúú-dě, chi ñiú-dé néhé cuèndá-dé díhúⁿ-güedě nchaa-güedě te ní xóo duhu ñàha-dé xii-güedě.

⁷ Te ní xáhaⁿ Jèsús:

—Daña, vá dásátú-n ñí xíchí-a na tàxúha nahi-xi àcítí-a, chi nàndíhi ndéé òré ná nguñdũxi-í.

⁸ Chi nchòhó chi cuhuⁿ tnahá-ni ñáiyu ndàhú tnuú-ndó, dico yúhú chi vá ncháá ndùu cundecu ndíhi ñàha-í xii-ndo —càchí-gá xáhaⁿ-gá xii-dé.

Tnahá té Lázaruí cuíní-güedě cahni ñàha-güedě xii-dé

⁹ Te vai ñáiyu isràél ní níhi-yu tnúhu sá ndécú Jèsús ñúu Bètaniá. Te ní sáháⁿ-yu cuèndá quíní-yu-gá, te quíní-yu tnahá té Lázaruí tée ní dándótó-gá.

¹⁰ Te cue dútú cùntú ní ndatnúhu-güedě ní cuu ìⁿnuu-güedě cuèndá sá cáhni-güedě tnahá té Lázaruí ní cuu,

¹¹ chi ñiú cuèndá tée-áⁿ ní cuu cuéhé ñáiyu isràél tá dàña nihnú-yu-güedě cuáháⁿ cuèndá sá ní sándáá iní-yu Jèsús.

Jèsús cuánguñhu-gá ñúu Jerusalén

(Mt. 21:1-11; Mr. 11:1-11; Lc. 19:28-40)

¹² Te nduu tnée-áⁿ vai ñáiyu ní quexío ñúu Jerusalén cuèndá cundecú-yu vico, te ní níhi-yu tnúhu sá Jèsús sáá-gá tnahá-gá cundecu-gá vico-áⁿ,

¹³ núu ní xehndé-yu ndaha yùtnu ñúú, te nèhé-yu ní sáháⁿ ní sátnahá ñáhá-yu xii-gá. Te níhi ní cáháⁿ-yu, te càchí-yu:

—¡Ío càhnu cuu Yá Ndiòxí! Te ducaⁿ-ni ño càhnu cuu Yaá ní tendaha-gá véxi quindaha ñàha xii-o —duha ní cachí-yu.

¹⁴ Te Jèsús ní níhi-gá ìⁿ búrru, te yòdo-gá-di cuáháⁿ. Te ducaⁿ ní cuu chi ní quee ndáá-xi nàcuáa càháⁿ-xi núú tütú Yá Ndiòxí núú càchí-xi:

¹⁵ Vá yùhú nchòhó cue ñáiyu ndècu ñúu Sìón,

chi iha véxi tée yindaha ñàha xii-ndo yodo-dé ìⁿ búrru.

Duha càchí-xi núú tütú-gá.

¹⁶ Dico cue tée xica cuu ndíhi Jèsús ñá ní ndàcu iní-güedé nàcuáa càháⁿ-xi núú tütú Yá Ndiòxí nàcuáa cada Jèsús. Dico sáta cuàndaa-gá andiú càda cahnu ñàha Tátá-gá xii-gá, te ní ndacu iní-güedé sá dúcáⁿ yòdo tñuní nàcuáa cada-gá, te ducaⁿ ní cuu.

¹⁷ Nchaa ñáiyu ní xindecu ndíhi Jèsús òré ní dándótó-gá té Lázaruí, ya yàcáⁿ ní caní-yu cuèndú núú ñáiyu nàcuáa ní quide ñàha-gá xii-dé.

¹⁸ Te vai-yu ní sáháⁿ-yu núú ndécú Jèsús cuèndá sá ní níhi-yu tnúhu ní quide-gá sá vá yòo tñahí ndàcu cada.

¹⁹ Te cue tée cùu fariséú ní xitnàha-güedé:

—Ní xito-ndo nã ñá túú nàndíhi sá quidé-ó-vá, chi nchaa ñáiyu ní chinchícúⁿ ñáhá-yu xii-dé —càchí-güedé xitnàha-güedé.

Ñáiyu ñá túú cùu ñáiyu isràél nándúcú-yu Jèsús

²⁰ Te tnahá ñáiyu ñá túú cùu ñáiyu isràél ní sáháⁿ-yu vico ñúu Jerusalén ní quide càhnú-yu Yá Ndiòxí.

²¹ Te ñáiyu-áⁿ ní sáháⁿ-yu núú tē Lìpé tée ñúu Bètsaidá, te ñúú-áⁿ yindèhu-xi distritú Galileá. Te ní xáháⁿ-yu xii-dé:

—Tátá, vá cùndèe iní-n càchí tnúhu-n núu ndèé ndécú Jèsús, chi cuíní-ndí cáháⁿ ndíhi-ndí-gá —càchí-yu xáháⁿ-yu xii-dé.

22 Te té Lìpé ní naníhí-dě té Ndríxí te ní xáhaⁿ-dě nàcuáa càháⁿ-yu, te ndi ndùú-güedé ní sáháⁿ-güedé ní xáhaⁿ-güedé xii Jèsús nàcuáa càháⁿ-yu.

23 Te ní xáhaⁿ Jèsús xii-güedé:

—Vitna ní cuyatni òré cada càhnu ñaha Tàtá-í xii-í, te quini-yu sá ïo càhnu cuu yúhú Tée cùu ñani tnáhá-yu nchaá-yu.

24 Te na cachi tnúhu ndáá-í xii-ndo sá nùu ìⁿ tatá vá ngává-xí nùú ñúhú tēhyú-xi ña, te ñi-ni ducaⁿ cùnduu-xi cundecu-xi. Dico ìⁿ tatá ná ngává nùú ñúhú xīnu déhe-xi, te xíáⁿ nádacayá tnáhá-xí, te mee-xi tēhyú-xi.

25 Te nchaá ñáyiú ío ñúhu iní-xi cundecu ñuyíú-a ñá túú ñúhu iní-yu Yá Ndiòxí, te ñáyiú-áⁿ cuíta nihnú-yu. Te nchaá ñáyiú ío ñúhu iní ñáhá xii Yá Ndiòxí, ñáyiú-áⁿ cundecú-yu ndihi-gá ni caa ni quíhíⁿ.

26 Te nchaá ñáyiú cuini cunu cuechi nùú-í xini ñuhu-xi natuha ñahá-yu xii-í, te nduu táhú-yu cundecú-yu núú nùhú-í cundecu-í. Te nchaá ñáyiú na cunu cuechi nùú-í, te cada càhnu ñaha Tàtá-í xii-yu —càchí-gá xáhaⁿ-gá xii-güedé.

Jèsús càháⁿ-gá sá cahní ñaha-güedé xii-gá

27 Te ní xáhaⁿ tucu-gá:

—Ío ndíhí iní-í. Te cùñaha-í xii Tàtá-í taunihnu ñaha-gá nùu dícó sá cúú, dico vá cúú chi cuendá tnàhí-a véxi-í —càchí-gá xáhaⁿ-gá xii-güedé.

28 Te ní xáhaⁿ-gá xii Tàtá-gá Dútú Ndiòxí:

—Táu, cada nàcuáa ní sani iní-n cùnduu cuendá sá ná cadá càhnu ñaha ñáyiú xii-n —càchí-gá xáhaⁿ-gá.

Te ducaⁿ te ní tecú ní cáháⁿ Yá Ndiòxí ndéé andiú, te cachi-gá:

—Sa ní quide-í nàcuáa cachi ñáyiú sá ïo càhnu cuu-í. Te cada tucu-í cuendá cada càhnu ñaha-gá-yu xii-í —càchí Yá Ndiòxí xáhaⁿ-gá xii Déhe-gá.

29 Te nchaá ñáyiú xīndecu ní tecú dóho-yu ní cáháⁿ-gá, dico ñá túú ní sàni iní-yu sá mée-gá ní cáháⁿ, chi davá-yu ní xitnàhá-yu sá ñúhu ní cáháⁿ, te davá-yu ní xitnàhá-yu sá ìⁿ espíritú xínú cuèchi núú Yá Ndiòxí ní cáháⁿ.

30 Te ní xáhaⁿ Jèsús xii-yu:

—Ñá díú cuendá yúhú ní cáháⁿ Yá Ndiòxí, chi ní cáháⁿ-gá cuendá sá nchòhó cundedóho-ndo.

31 Te vitna ní sáá nduu cada ndáá Yá Ndiòxí cuèchi nchaá ñáyiú ñuyíú-a, te ducaⁿ te vá cùnùu-gá yucu ñávaha.

32 Te na càta caa ñaha-güedé xii-í núú cùrúxí, te xíáⁿ cuú-í te níhí-yu tnúhu ní cãa xico ñuyíú, te quindáá iní-yu tnúhu-í —càchí-gá xáhaⁿ-gá xii-yu.

33 Duha ní cáháⁿ-gá cuendá cutnùni iní-yu nàcuáa ndoho-gá òré cuú-gá.

34 Te ní xáhãⁿ-yu xii-gá:

—Nihí-ndí tnúhu sá nùú tütú yódó tnùní tnúhu Yá Ndiòxí càháⁿ-xi sá Crístú Yaá tendaha-gá quixi ñuyíú-a cundecu-gá ni caa ni quíhíⁿ. ¿Te yòhó nása càháⁿ-tu-n sã ìⁿ tée cùu ñani tnáhá nchãa ñáyiú ñuyíú-a cahni ñaha-güedé núú cùrúxí? Te cachi tnúhu-n ná cúú tēe-áⁿ —càchí-yu xáhãⁿ-yu xii-gá.

35 Te ní xáhaⁿ Jèsús:

—Yúhú cùú-í dàtná ìⁿ ñuhu dáyhé ñuyíú-a, dico sacú-ni nduu ndècu ndihi ñaha-í xii-ndo. Te caca-ndo ìchi ndáá vitna dàyhé-gá-í núú-ndó chi na cùnee te vá cutnùni-gá núú-ndó ndéé ìchi quíhíⁿ-ndó.

36 Quindáá iní ñáhá-ndó xii-í vitna ndècu ndihi ñaha-gá-í xii-ndo dândixi túú-í iní-ndó, cuendá cutnùni iní-ndó nàcuáa ndùu cuendá Yá Ndiòxí, te cuu-ndo dēhe-í —càchí-gá xáhaⁿ-gá xii-yu.

Te sátá dúcáⁿ nĩ cáháⁿ Jèsús, te ní quee-gá cuáháⁿ-gá ìⁿ núú vǎ ná nìhí ñáhǎ-yu xii-gá.

Ñáyiú isràèl ñá cuìní-yu quìndáá iní-yu Jèsús

³⁷ Te cuèí ío vǎi sá vǎ yǒo tñàhí ndàcu cada ní quide Jèsús ní xiní-yu, dico ní dùcaⁿ ñá túú ní sàndáá iní-yu-gá.

³⁸ Te ducaⁿ nĩ quidé-yu chí dacuítí nĩ quee ndáá-xi nàcuáa ní chídó tñùní ndí Chàíá ndí ní cáháⁿ tñúhu Yá Ndiǒxí ndéé sanaha núú tütú-gá núú càchí-xi:

Yòhó Yaá cúú Xìtohó-í, vǎ yǒo ìⁿ sàndáá iní tñúhu càháⁿ-ndí.

Te vǎ yǒo ìⁿ cùtnuní iní-xi sá ío càhnu cuu-n.

Duha ní chídó tñùní ndí Chàíá núú tütú-gá.

³⁹ Te ñá ní sàndáá iní-yu chí ní quee ndáá-xi nàcuáa ní chídó tñùní tucu ndí Chàíá núú tütú Yá Ndiǒxí nàcuáa cáháⁿ Jèsús:

⁴⁰ Mee Yá Ndiǒxí ní quide-gá sá vǎ tècú tñùní-yu,

chí ní dádáhu ndodo iní ñáhǎ-gǎ xii-yu,

chí ío sáá iní-yu núú ñá ní cuìní-gá-yu quìndáá iní ñáhǎ-yu xii-gá.

Te ní vǎ túhá ñáhǎ-yu xii yúhú cuendá dacăcu nihnu-í-yu.

⁴¹ Duha ní chídó tñùní ndí Chàíá nàcuáa cáháⁿ Jèsús chí ní xiní ndí sá ío càhnu cuu-gá.

⁴² Te cuèí ducaⁿ nĩ cuu dico titní cue téé cùnunu núú ñáyiú isràèl ní sàndáá iní ñáhǎ-güedé xii-gá. Dico ñá túú ní xǒo cáháⁿ ndáá-güedé chí ní xóo yúhú-güedé sá vǎ dáñǎ-gǎ cue téé cùu fariséú quíhu-güedé veñúhu.

⁴³ Chí ní xóo cudíí-gǎ iní-güedé sá càháⁿ ñáyiú dàcúxí tñúhu càháⁿ Yá Ndiǒxí.

Ñáyiú ñá túú sàndáá iní tñúhu Jèsús cuíta nihnú-yu

⁴⁴ Jèsús níhi ní cáháⁿ-gá, te càchí-gá:

—Nchaa ñáyiú na quìndáá iní ñáhǎ xii-í, te ñá díú-ní mèe-í quìndáá iní-yu, chí tñàhǎ Tǎtà-í Yaá ní tendaha ñàha xii-í véxi-í ñuyíú-a quìndáá iní-yu.

⁴⁵ Te ñáyiú xiní ñáhǎ xii yúhú xiní-yu tñàhǎ Tǎtà-í.

⁴⁶ Te yúhú véxi-í dandixi túu-í iní ñáyiú ñuyíú-a cuendá cutnùní iní-yu nàcuáa ndùu cuendá Yá Ndiǒxí, te nchaa ñáyiú na quìndáá iní ñáhǎ xii-í te vǎ cùndècu-gá-yu ichi cuèhé ichi duha.

⁴⁷ Te núú ío davá-yu ndèdòho-yu nàcuáa càháⁿ-í te ñá túú tñǎ-yu tñúhu-í, te ñá díú yúhú dàcuíta nihnu-í-yu, chí ñá túú véxi-í ñuyíú-a sá dácuíta nihnu-í-yu, chí véxi-í sá dácăcu nihnu-í-yu.

⁴⁸ Te nchaa ñáyiú na cùyíchí iní ñáhǎ xii-í te ñá túú quide cuendá-yu nàcuáa càháⁿ-í, te ñáyiú-áⁿ ná sáá nduu te cuíta nihnú-yu chí ñá ní tñǎ-yu tñúhu ní cáháⁿ-í.

⁴⁹ Te yúhú ñá túú càháⁿ-í tñúhu véxi iní mèe-í, chí mee Tǎtà-í Yaá ní tendaha ñàha xii-í véxi-í ñuyíú-a ní cachí tñúhu-gá nàcuáa cunduu tñúhu cáháⁿ-í danèhé-í ñáyiú.

⁵⁰ Te yúhú xiní-í sá tñúhu ní táúchíúⁿ Tǎtà-í cáháⁿ-í cúú-xí ìⁿ sá vǎha sá cúú xii-ndo chí nduu táhú-ndó cùndecu-ndo ndíhi-gá ní caa ní quíhíⁿ, núú xiáⁿ càháⁿ-í nchaa nàcuáa ní táúchíúⁿ-gǎ —càchí-gá xáhaⁿ-gǎ xii-yu.

13

Jèsús náquète-gá sáhá cuè téé xica cuu ndihi-gá

¹ Te cùmání-gá tnahá vico pàscuá, te Jèsús sa nàha-gá sá sà ní cuyatni òrè dándoo-gá ñuyíú-a, te ndaa-gá núú ndécú Tàtá-gã. Te ío ní cuu iní-gá nchaa ñáyiú ní sándáá iní ñáhá xii-gá, te ní quide ndisa-gá sá ní cuu iní ñáhá-gã xii-yu.

²⁻⁴ Te ní quíhu yucu ñávàha díquí tè Jùdás déhe té Xímú Iscàrioté, te ní sani iní-dé nàcuáa cada-dé cuáha cuèndá-dé Jèsús núú cuè téé cùu úhú iní ñáhá xii-gá. Te Jèsús sa nàha-gá sá méé Yá Ndiòxí Yaá cúú Tàtá-gã ní sáñaha-gã tnúhu ndee iní xii-gá sá cáda-gã núú-gã, te nàha-gá sá díú núú Tàtá-gã ní quee-gá véxi-gá ñuyíú-a. Te sáa nduu nàsáa tucu-gá núú Tàtá-gã. Te cùdini Jèsús ndihi cue téé xica cuu ndihi-gá ní cùu, te ní ndacuíñí-gá yuhu mèsá, te ní taunuu-gá ñⁿ dóo níhnú-gã, te ní queheⁿ-gá ñⁿ dóo ní dácútú-gã núú yíquí-gã.

⁵ Te ní chíhi-gá ndute ñⁿ tìná, te xíaⁿ ní naquete-gá sáhá cuè téé xica cuu ndihi-gá, te ndihi dóo ndútú núú yíquí-gã-án ní nadayíchi-gá sáhá-güedé.

⁶ Te òré naquete-gá sáhá tè Xímú, àdi Pelú, ní cùu ní xáhaⁿ-dè xii-gá:

—Mèstrú, ¿te yòhó naquete-n sàhà-í-u? —càchí-dé xáhaⁿ-dè xii-gá.

⁷ Te ní xáhaⁿ Jèsús:

—Vitna ñá cùtnùní iní-n sã quidè-í-a dico sáa nduu te cutnùní iní-n —càchí-gá xáhaⁿ-gã xii-dé.

⁸ Te ní xáhaⁿ tè Pelú:

—Yúhú chí vá ñⁿ ndùu te naquete-n sàhà-í —càchí-dé xáhaⁿ-dè xii-gá.

Te ní xáhaⁿ Jèsús:

—Te núú vá náquète-í sáhá-n áⁿ, te vá cáda-gã-n cuèndá sá ndécú ndihi ñaha-í xii-n —càchí-gá xáhaⁿ-gã xii-dé.

⁹ Te ní xáhaⁿ tè Pelú:

—Te núú ducaⁿ te vá méé-ní sàhà-í naquete-n, chí naquete-n tnàhá ndaha-í ndihi díquí-í —càchí-dé xáhaⁿ-dè xii-gá.

¹⁰ Te ní xáhaⁿ Jèsús xii-dé:

—Téé íchí ní xichi chí xini ñuhu-xi sá sàhà-na-dè ndoo, te ducaⁿ te nduu ndoo-dé níhí-dé. Te nchòhó sa càndoo-ndo cuéí ñá ncháá-ndó càndoo —càchí-gá xáhaⁿ-gã xii-dé.

¹¹ Te ducaⁿ ní cáhán Jèsús chí sa nàha-gá sá ñⁿ cuè téé-áⁿ cuáha cuèndá ñáhá-güedé xii-gá núú cuè téé cùu úhú iní ñáhá, xiáⁿ núu ní xáhaⁿ-gã sá ñá túú càndoo-güedé nchaa-güedé.

¹² Te sáta ní naquete-gá sáhá-güedé, te ní ndécuihnu-gá dóo-gã, te ní nucóo-gá yuhu mèsá, te ní xáhaⁿ-gã xii-güedé:

—¿Te ní cutnùní iní-ndó sã ní quide ñaha-í xii-ndo-ãⁿ?

¹³ Te nchòhó váha-ni cáhán-ndó sã cùnùu-í, te dànani ñaha tucu-ndo Mestrú xii-í, te ndáá càháⁿ-ndó.

¹⁴ Te núú yúhú cúú-í Mèstrú, te cùu tucu-í téé cùnùu te nàquete-í sáhá-ndó, te díu-ni ducaⁿ càda nchohó tucu naquete sáhá tnàhá-ndó.

¹⁵ Yúhú sànu ichi ñaha-í xii-ndo nàcuáa cada-ndo.

¹⁶ Te na càchí tnúhu ndáá-í xii-ndo sã ní ñⁿ téé xinu cuechi ñá túú cùnùu-dé dácúúxí pàtróoⁿ-dè, te ní ñⁿ téé xica chiúⁿ ñá túú cùnùu-dé dácúúxí tèe tëndaha ñaha xii-dé cuáhán-dé chiúⁿ. Te ducaⁿ sàtnahá-xi cùu yúhú ndihi nchòhó.

¹⁷ Te núú ní cutnùní iní-ndó nàcuáa ní quide ñaha-í xii-ndo ña, te ducaⁿ càda tnaha-ndo te cuu váha iní ñáhá Yá Ndiòxí xii-ndo.

18 Yúhú, ñá túú càháⁿ-í cuendá-ndó nchàa-ndo, chi yúhú sa ñaha-í ñacuáa sàni iní ìⁿ ìⁿ nchòhó cue téé ní nanducu ñhnu-í tnuú nchaa ñáyiu ñùhu ichi cuehé ichi duha ní cachí-í chitnahá ñáhá-ndó xii-í. Chi dacuitíí sá queé ndáá-xi ñacuáa càháⁿ-xi núú tùtú Yá Ndióxi núú cachí-xi: “Téé xèxi ndìhi ñaha xii-í ngóo-dé cuu úhú iní ñáhá-dě”, duha càchí-xi núú tùtú-gá.

19 Te cùmání-gá sáá nduu cada ñaha-dé sá sání ñní-dé, núú xiáⁿ càchí tnuúhu-í xii-ndo ñacuáa cada-dé, chi na sáá nduu-áⁿ te cutnùní iní-ndó sá yúhú cùú-í Cristú Yaa ní tendaha Yá Ndióxi véxi ñuyíú-a.

20 Te na càchí tnuúhu ndáá-í xii-ndo sá nchàa ñáyiu na quèheⁿ cuendá ñáhá xii cue téé tendaha-í càháⁿ tnuúhu-í, te cada iní-yu sá tñahá yúhú ní queheⁿ cuendá-yu. Te nchaa ñáyiu na quèheⁿ cuendá ñáhá xii-í, te cada iní-yu sá tñahá Tàtà-í Dútú Ndióxi Yaa ní tendaha ñaha xii-í véxi-í ñuyíú-a ní queheⁿ cuendá-yu —càchí-gá xáhaⁿ-gá xii-güedé.

Jèsús càchí-gá sá tē Jüdás cuáha cuendá ñáhá-dě xii-gá núú cuè téé cùu úhú iní ñáhá

(Mt. 26:20-25; Mr. 14:17-21; Lc. 22:21-23)

21 Te sáta dúcáⁿ ñí càháⁿ Jèsús te ío ní ndíhú iní-gá, te ní xáhaⁿ-gá xii-güedé: —Na càchí tnuúhu ndáá-í xii-ndo sá díú-ní ìⁿ nchòhó cuáha cuendá ñáhá-ndó xii-í núú cuè téé cùu úhú iní ñáhá —càchí-gá xáhaⁿ-gá xii-güedé.

22 Te ní ngúita cue téé xica cuu ndìhi-gá ndéhe ìⁿ ndehe ìⁿ núú tñahá-güedé, chi ñá ní cutnùní iní-güedé ndédacàa-güedé cuendá-güedé ní càháⁿ-gá.

23 Te ìⁿ téé-áⁿ ío cùdí ñí ñáhá Jèsús, te ndècu yatni-dé dñi-gá cùdini-dé ndìhi-gá.

24 Te té Ximú, àdi Pelú chi úú díu-dé, ní quide-dé señá núú tēe ndècu yatni dñi-gá-áⁿ sá càcáⁿ tnuúhú-dě núú-gá ñuu ndédacàa-güedé cuendá-güedé ní càháⁿ-gá.

25 Te téé-áⁿ ní sáháⁿ ndehe yatni-gá-dé dñi Jèsús, te ní xáhaⁿ-dě xii-gá:

—Mèstrú, ¿ndédacàa-ndí cuendá-ndí ní càháⁿ-n-í? —càchí-dé xáhaⁿ-dě xii-gá.

26 Te ní xáhaⁿ Jèsús:

—Na chindóyo-í luha pàá, te téé na cuáha-í te téé-áⁿ cùú-dě —càchí-gá xáhaⁿ-gá xii-dé.

Te ní chindóyo-gá luha pàá, te ní sáha-gá té Jüdás déhe té Ximú Iscarioté.

27 Te òré ní queheⁿ-dé pàá, te ní ngúndecu ndìhi ñaha dùuⁿ-ná yucu ñávaha xii-dé. Te ní xáhaⁿ Jèsús:

—Sá ñí sani iní-n cada-n te cada ndìhi-ni-n —càchí-gá xáhaⁿ-gá xii-dé.

28 Te ní ìⁿ cue téé cùdini ndìhi-gá ñá ní tēcú tnuúni-güedé nása ndùu tnuúhu ní xáhaⁿ-gá xii té Jüdás.

29 Te dava-güedé ní sani iní-güedé sá sá cuendá sá ndécú ndìhi-dé sá ñúhú díhúⁿ, te váa ío ìⁿ sá cuááⁿ-dě nandìhi-güedé vico, àdi díhúⁿ cuáha-dé ñáyiu ndàhú xáhaⁿ-gá ní càháⁿ-güedé.

30 Te sa ní cundiquíⁿ ní queheⁿ cuendá té Jüdás pàá caxi-dé, te òré ní níhí-dě pàá-áⁿ te ní quee-dé cuáháⁿ-dé.

Jèsús càchí tnuúhu-gá ñacuáa cada-o

31 Te sáta ñí quee té Jüdás cuáháⁿ-dé, te ní xáhaⁿ Jèsús xii dava-gá-güedé:

—Vitna te quini-ndó ndìhi nchaa ñáyiu sá ío càhnu cuu yúhú Téé cùu ñani tñahá-ndó nchàa-ndo, te òré-áⁿ cutnùní iní-ndó sá ío càhnu cuu tucu mee Yá Ndióxi.

32 Te núu yúhú quidé càhnu-í Yă Ndiòxí, te òu-ni ducaⁿ càda cahnu ñaha-gá xii yúhú, te ñá túú-gă titní nduu te ducaⁿ càda-gă.

33 Te nchòhó cue déhe-í na cächí tnúhu-í sá sàcú duha-ná nduu ndècu ndihí ñaha-í xii-ndo. Te nchòhó nanducu ñaha-ndo xii-í dico vâ ná ñihí ñáhá-ndó dàtná ní xáhaⁿ-í xii ñáyiú isràél, te òu-ni ducaⁿ càhàⁿ-í núú-ndó sá vâ ndácú-ndó quíhíⁿ-ndó núú quíhíⁿ-í.

34 Te duha sànu ichi ñaha tucu-í xii-ndo nàcuáa cada-ndo sã cúú iní tnáhá-ndó ìⁿ ìⁿ-ndo datná yúhú cúú iní ñáhà-í xii-ndo.

35 Te núu na cùu iní tnáhá-ndó ìⁿ ìⁿ-ndo ña, te ducaⁿ te cutnùní iní nchaa ñáyiú sá cúú-ndó cuè téé ní chitnahá ñáhá xii-í —cächí-gă xáhaⁿ-gă xii-güedé.

Jèsús càháⁿ-gă sá tẽ Pelú vâ nũnuu-dé sá xicá cùu ndihí ñaha-dé xii-gă (Mt. 26:31-35; Mr. 14:27-31; Lc. 22:31-34)

36 Te ní xáhaⁿ tẽ Xímú, àdi Pelú chi úú òu-dé, xii Jèsús:

—Mèstrú, çndèé quíhíⁿ-n-í? —cächí-dé xáhaⁿ-dẽ xii-gă.

Te ní xáhaⁿ Jèsús:

—Vitna te vâ ndácú-n cànchicúⁿ ñáhá-n quíhíⁿ núú quíhíⁿ-í, dico na sãá nduu te dai sãá-n núú cündècu-í —cächí-gă xáhaⁿ-gă xii-dé.

37 Te ní xáhaⁿ tẽ Pelú xii-gă:

—Mèstrú, çte ná cuendá núu vâ ndácú-í cànchicúⁿ ñáhà-í xii-n quíhíⁿ vitna-í? Chi yúhú ñá túú tnàhí yúhú-í cuèi na cùú-í sá cuendá-n —cächí-dé xáhaⁿ-dẽ xii-gă.

38 Te ní xáhaⁿ Jèsús:

—Çte ndáá sá xèhndé iní-n sã cuèi na cùú-n cuendá-í-u? Te na cächí tnúhu ndáá-í xii-n sã cùmání-gă cana lihi, te úní xito càháⁿ-n sã ñà túú xiní ñáhá-n xii-í —cächí-gă xáhaⁿ-gă xii-dé.

14

Jèsús dánèhé ñáhá-gă nàcuáa cada-o nàsáá-ó núú ndécú Yă Ndiòxí

1 Te ní xáhaⁿ-gă xii-güedé:

—Te ñá túú nã cani iní-ndó. Quindáá iní-ndó Yă Ndiòxí, te quindáá iní-ndó yúhú.

2 Chi núú ndécú Tătà-í ío nùne núú cündècu-o, chi núú ñáhá ñá te sa cächí tnúhu-í xii-ndo ni cùu. Te vitna na nùhú-í te cada túha-í núú cündècu-ndo.

3 Te dàtnùní quixi tucu-í te candeca ñaha-í xii-ndo quíhíⁿ cuendá ìⁿ-ni xichi cundecu-o.

4 Te sa ñaha-ndo ndéé quíhíⁿ-í te sa xiní-ndó ìchi —cachí-gă xáhaⁿ-gă xii-güedé.

5 Te ní xáhaⁿ tẽ Măxí xii-gă:

—Mèstrú, ñá túú xiní-ndí ndèé quíhíⁿ-n te da ichi-ná quini-ndí —cächí-dé xáhaⁿ-dẽ xii-gă.

6 Te ní xáhaⁿ Jèsús:

—Yúhú cùú-í dàtná ìⁿ ichi te càháⁿ-í tnúhu ndáá, te yúhú cada-í te naníhí tãhú-ndó. Te ìⁿ dii dí-í yúhú cada-í te sãá-ndó núú Yă Ndiòxí cundecu-ndo te núu na quindáá iní ñáhá-ndó xii-í.

7 Te núu dícó cutnùní ndisa iní-ndó yòo cuu-í-áⁿ, ducaⁿ te cutnùní iní-ndó yòo cuu Tătà-í ní cùu. Dico vitna dàtná sá ní xiní núú-ndó Dütú Ndiòxí Yaá cúú Tătà-í cada iní-ndó, chi ní xiní-ndó yúhú —cächí-gă xáhaⁿ-gă xii-dé.

8 Te ní xáhaⁿ tẽ Lìpé xii-gă:

—Mèstrú, danèhé ñáhá xii-ndí Dútú Ndiöxí chi na cùu váha iní-ndí —càchí-dé xáhaⁿ-dè xii-gá.

⁹ Te ní xáhaⁿ Jèsús xii-dé:

—Lìpé, ¿te náa ñá túú xini ñáhá-n xii-í? Te sa ní cuu vai nduu ndecu ndihi ñaha-í xii-ndo, chi ñáyiú xini ñáhá xii-í te xini-yu ñàhá Tàtà-í. ¿Te ná cuendá yóhó càchí-n sá dánèhé ñáhá-í xii-ndo Tàtà-í?

¹⁰ ¿Náa ñá túú sàndáá iní-ndó sá yúhú ndécú-í ndihi Tàtà-í? Te mee-gá ndécú ndihi ñaha-gá xii-í. Te nchaa tnúhu càháⁿ-í núú-ndó ñà túú càháⁿ-í sá vèxi iní meé-í, chi Tàtà-í Yaá ndécú ndihi ñaha xii-í chíndèe ñaha-gá quidè-í chiúⁿ-gá.

¹¹ Te quindáá iní-ndó sá yúhú ndécú-í ndihi Tàtà-í, te ducaⁿ mèe-gá ndécú ndihi ñaha-gá xii-í. Te núu ñá túú sàndáá iní-ndó tnúhu càháⁿ-í-a, te dandacu iní-ndó ncháa chiúⁿ ta quide-í véxi, te quindáá iní ñáhá-ndó.

¹² Te na càchí tnúhu ndáá-í xii-ndo sá ncháa ñáyiú na quindáá iní ñáhá xii-í, te cadá-yu chiúⁿ quide-í te càhnu-gá chiúⁿ cadá-yu chi yúhú núhú-í núú ndécú Tàtà-í cundecu-í nàcuáa níhi ndéé-gá-yu cundecu-yu.

¹³ Te nchaa sá ná cacáⁿ-ndó te taxi-í te núu na quindáá iní ñáhá-ndó xii-í, te nchaa cada-í cuendá cutnùnì iní ñáyiú sá ïo càhnu cuu Tàtà-í Dútú Ndiöxí.

¹⁴ Te yúhú cada-í nchaa sá cuiní-ndó cacáⁿ táhú-ndó núù-í, te núu na quindáá iní ñáhá ndisa-ndo xii-í.

Jèsús càchí-gá sá téndàha-gá Espiritú Yá Ndiöxí quixi cundecu ndihi-o

¹⁵ Te núu nchòhó cúú iní ñáhá-ndó xii-í te tnú-ndo ncháa tnúhu càháⁿ-í.

¹⁶ Te yúhú cacáⁿ táhú-í núú Tàtà-í sá téndàha-gá Espiritú-gá quixi cundecu ndihi-ndo cànu ichi ñaha-xi xii-ndo nacuáa cundecu-ndo, te chíndee ñaha-xi xii-ndo nì caa nì quíhíⁿ.

¹⁷ Te nchaa ñáyiú ndecu ichi cuehé ichi duha ñá túú xini-yu Espiritú Yá Ndiöxí te nì vá cúú cundecu ndihi-yu. Dico nchòhó sa xini-ndó Espiritú-gá te ndecu ndihi ñaha-xi xii-ndo. Te sáa ïⁿ nduu te cunuu Espiritú-gá iní-ndó.

¹⁸ Te yúhú vá dáñá ñhnu ñaha-í xii-ndo, chi quixi tucu-í cundecu ndihi ñaha-í xii-ndo.

¹⁹ Te sácú duha-ná nduu ndecu-í te vá quini ñáhá-gá ñáyiú xii-í, dico nchòhó chi quini ñáhá-ní-ndó xii-í. Te ducaⁿ-ní cundecu-ndo ichi váha chi cundecu ndihi ñaha-í xii-ndo nì caa nì quíhíⁿ.

²⁰ Te dàvá-án cutnùnì iní-ndó sá ndécú-í ndihi Tàtà-í, te ducaⁿ nchòhó cundecu ndihi ñaha-ní-ndo xii-í.

²¹ Te nchaa ñáyiú dàcuaha tnúhu-í te tnúⁿ-yu, ñáyiú-án quidé ndisá-yu sá cúú iní ñáhá-yu xii-í. Te ducaⁿ Tàtà-í cúú iní ñáhá-gá xií-yu, te ducaⁿ-ní yúhú cúú iní-í-yu tucu, te ducaⁿ te cùnuni iní-yu sá ndécú ndihi-í-yu —càchí-gá xáhaⁿ-gá xii-dé.

²² Te ní cáháⁿ ïⁿ téee nani Judás dico ñá díú tē Judás déhe té Xímú Iscarioté ní cáháⁿ, chi ingá té Judás ní xáhaⁿ-dè xii-gá:

—Mèstrú, ¿nása cada-n cuendá cutnùnì iní-ndí sá cundecu ndihi ñaha-n xii-ndí, te ñáyiú ñúhu ichi cuehé ichi duha vá cundecu ndihi-n-yu-í? —càchí-dé xáhaⁿ-dè xii-gá.

²³ Te ní xáhaⁿ Jèsús xii-güedé:

—Nchaa ñáyiú cùu iní ñáhá xii-í te tnúⁿ-yu tnúhu càháⁿ-í, te ñáyiú-án cúú iní ñáhá Tàtà-í xií-yu, te yúhú ndihi Tàtà-í ndécú-ndí ndihi-yu.

²⁴ Te nchaa ñáyiú ñá túú cùu iní ñáhá xii-í te ñá túú tn̄i-yu tn̄uhu càháⁿ-í. Te nchaa tn̄uhu ní càháⁿ-í ní xindèdóho-ndo chí Tătà-í Yaá ní tendaha ñaha xii-í véxi-í ñuyúú-a ní dácáhú iní ñáhá-gã xii-í, te ñá díú mèe-í ní càhu iní-í tn̄uhu càháⁿ-í.

²⁵ Duha nduu tn̄uhu càháⁿ-í núú-ndó vitna ndecu ndihi ñaha-gá-í xii-ndo.

²⁶ Dico Yá Ndïoxí tendaha-gã Espiritú-gã quixi-xi cada-xi núú-í taxi-xi tn̄uhu ndee iní xii-ndo, te ñu-xi chindee ñaha-xi xii-ndo te danèhé ñáhá-xí xii-ndo nchaa sá cúmání quini-ndó, te ñu-ni-xi dandacu iní ñáhá-xí xii-ndo nchaa nacuáa ní càháⁿ-í.

²⁷ Te yúhú chindee chituu ñaha-í xii-ndo ño váha cuu iní-ndó cùndecu-ndo datná yúhú ño váha cùu iní-í ndécú-í, chí sa ta cùyatni nduu núhú-í. Te yúhú càhí tn̄uhu ndáá-í sá chindèe ñaha-í xii-ndo, te vá càdá-í datná quidé ñáyiú ñuhu ichi cuehé ichi duha. Te ni vã ndihú iní-ndó, te ni vã yúhú-ndó.

²⁸ Te sa ní xindèdóho-ndo ñi càháⁿ-í sá núhú-í, te quixi tucu-í cundecu ndihi ñaha-í xii-ndo. Te núu ndisa cùu iní ñáhá-ndó xii-í ñá, te òré ní níhí-ndó tn̄uhu sá núhú-í núú ndécú Tătà-í, te cud̄i iní-ndó ní cùu, chí ño càhnu cuu-gã dácúúxi yúhú.

²⁹ Te sa ní cachí tn̄uhu-í sá núhú-í, te na sàá òré núhú-í núú ndécú Tătà-í, te quindáá iní ñáhá-ndó xii-í.

³⁰ Te ñá túú-gã vãi tn̄uhu ndatnúhu ndihi ñaha-í xii-ndo chí sa véxi yucu ñávãha sá táxi tn̄uni ñuyúú-a, dico vá táxi tn̄uni ñáhá-xí xii yúhú.

³¹ Te cada-í nchaa nacuáa ní táuchíúⁿ Tătà-í cuendá cutn̄uni iní nchaa ñáyiú ñuyúú-a sá yúhú ño cùu iní-í-gã. Te vitna chí ndácúñí ná quihíⁿ-ó —càhí-gã xáhaⁿ-gã xii-güedé.

15

Cuendá yoho yàha stilé ndihi nchaa dité-xi

¹ Te ní xáhaⁿ tucu-gã xii-güedé:

—Yúhú cùu-í datná yoho yàha stilé, te Tătà-í cúú-gã datná ñiⁿ téé xito yoho yaha stilé-án.

² Te nchaa ñáyiú ní sándáá iní ñáhá xii-í cúú-yu datná dité nchaa yoho yàha stilé-án. Te téé xito yoho yaha stilé-án xèhndé-dé nchaa dité-xi sá ñã cuini-gã-xi cuuⁿ ndéhé-xi, te ndàda ndoo-dé nchaa dité-xi sá cúúⁿ cuendá cuuⁿ-gã.

³ Te ducaⁿ sãtnahá-xi cùu nchohó, chí sa ní xócúñí nchaa sá cuehé sá dúhá ndécú ndihi-ndo, chí ní sándáá iní-ndó tn̄uhu ní càháⁿ-í.

⁴ Te cuu ñiⁿnuu-ndo cùndecu ndihi ñaha-ndo xii-í, te núu ducaⁿ na càda-ndo, te cundecu ndihi ñaha-í xii-ndo. Chí núu ñiⁿ yutnu vídí ná quendéé dité-xi, te dité-xi sá ñi quendéé-án vã cúúⁿ-gã sávidí-xi chí duuⁿ duuⁿ ní xíta-xi. Ducaⁿ sãtnahá-xi cùu nchohó chí vá ndácú-ndó càda-ndo chiuⁿ-í, te núu vá cùndecu ndihi ñaha-í xii-ndo.

⁵ Chí yúhú cùu-í datná yutnu vídí-án, te nchòhó cúú-ndó datná nchaa dité-xi. Te nchaa ñáyiú cùu ñiⁿnuu ndihi ñaha xii-í, te ndécú ndihi-í-yu, te ndácú-yu quidé-yu chiuⁿ-í. Te núu vá cúú ñiⁿnuu ndihi ñáhá-yu xii-í, te vá ndácú-yu cadá-yu chiuⁿ-í.

⁶ Te nchaa ñáyiú vá cúú ñiⁿnuu ndihi ñaha xii-í, te yàha-yu datná yàha ñiⁿ dité yutnu vídí sá ñá túú cùuⁿ sávidí-xi, chí xèhndé-güedé yichí-xi, te sãhmi-güedé.

⁷ Cúu ñiⁿnuu ndihi ñaha-ndo xii-í, te vá nacuànaa-ndo nacuáa ní càháⁿ-í. Te núu ducaⁿ na càda-ndo, te nání cuini-ndó cãcãⁿ-ndó núu-í te taxi-í.

⁸ Te núu nchòhó ná cáda vǎha-ndo cùndecu-ndo, te ío cada càhnu-ndo Tàtá-í, te ducaⁿ cùtnuní sá ndísá cùu-ndo cue tée ní chitnahá ñáhá xii-í.

⁹ Te yúhú ío cùu iní ñáhá-í xii-ndo dàtná cúú iní ñáhá Yǎ Ndiòxí xii-í. Te cada-ni-ndo mèe-ni sá vǎha cuendá cudíí iní ñáhá-gǎ-í xii-ndo.

¹⁰ Te núu na quindáá iní-ndó càda-ndo nchaa nacuáa ní cáháⁿ-í, te ío cuu iní ñáhá-í xii-ndo, chi yúhú ducaⁿ ío sàndáá iní-í Tàtá-í quidè-í nchaa nàcuáa ní cáháⁿ-gǎ, te xiǎⁿ núu ío cùu iní ñáhá-gǎ xii-í.

¹¹ Duha càháⁿ-í núu-ndó cuendá cudíí ndísa iní-ndó dàtná cudíí iní mèe-í.

¹² Te duha ndùu tnúhu càháⁿ-í cuendá sá cúú iní tnáhá-ndó ñⁿ ñⁿ-ndo dàtná cúú iní ñáhá-í xii-ndo.

¹³ Te núu ní xíhó sǎ cúú-xí ñⁿ tée ío váha tnáhá tnúhu ndihí-o, te xiǎⁿ cutnùní iní ñáyíu sá ío cùu iní-ó-dé.

¹⁴ Te nchòhó cuu-ndo cuè tée ío váha tnáhá tnúhu ndihí-í te núu na càda-ndo nchaa nacuáa càháⁿ-í.

¹⁵ Te vá cǔñaha-gǎ-í xii-ndo sǎ cúú-ndó cuè tée xìnu cuechi núu-í, chi ní ñⁿ tée xìnu cuechi ñá túú xini-dé ná quidé pàtróó-dé. Te yúhú càchí-í xii-ndo sǎ cúú-ndó cuè tée ío váha tnáhá tnúhu ndihí-í, chi ní cachí tnúhu-í nchaa nàcuáa ní cáháⁿ Tàtá-í.

¹⁶ Te ñá díú nchòhó ní càháⁿ ñáhá-ndó xii yúhú, chi yúhú ní cáháⁿ ñáhá-í xii-ndo. Te yúhú tauchiúⁿ-í quíhíⁿ-ndó càda-ndo nchaa nacuáa ní cáháⁿ-í, chi tnúhu-áⁿ vá ndíhí ñihnu-xi. Te ducaⁿ nchàa sá ná càcáⁿ-ndó núú Tàtá-í Yǎ Ndiòxí te taxi-gǎ, te núu na quindáá iní ñáhá-ndó xii-í.

¹⁷ Te yúhú càháⁿ-í dóho-ndo sǎ cúú iní tnáhá-ndó ñⁿ ñⁿ-ndo.

Ñáyíu ndècu ichi cuehé ichi duha cùu úhú iní-yu Jèsús ndihí nchaa ñáyíu sàndáá iní tnúhu-gǎ

¹⁸ Te nchaa ñáyíu ndècu ichi cuehé ichi duha ñá cúú quini ñáhá-yu xii-ndo, te sa nàha-ndo sá díhna-gǎ yúhú ní ngúita-yu ducaⁿ ñá cúú quini ñáhá-yu xii-í.

¹⁹ Te núu dicó tnáhá nchòhó ndécú-ndó ichi cuehé ichi duha ña, te cuu iní ñáhá-yu xii-ndo dàtná cúú iní tnáhá-yu ndí mèe-yu ni cùu. Te yúhú ní nanducu ñihnu ñaha-í xii-ndo tnúú ñáyíu ndècu ichi cuehé ichi duha, núu xiǎⁿ ío cùu úhú iní ñáhá-yu xii-ndo cuendá sá ñá túú-gǎ chitnahá-ndó-yu.

²⁰ Te dandàcu iní-ndó nàcuáa ní cáháⁿ-í sá ní ñⁿ tée xìnu cuechi ñá túú cùnnu-dé dàcúúxí pàtróóⁿ-dé. Te yúhú cúú úhú iní ñáhá-yu, te ñⁿ-ni ducaⁿ càda ñáhá-yu xii nchòhó. Te núu dicó ní tníí-yu tnúhu ní cáháⁿ-í ñá, te ñⁿ-ni ducaⁿ tníí-yu tnúhu càháⁿ-ndó núú-yu ni cùu.

²¹ Te ducaⁿ càda ñáhá-yu xii-ndo sǎ cuendá-í, chi ñá xini-yu Tàtá-í Yaá ní tendaha ñàha xii-í véxi-í ñuyúú-a.

²² Te váa vá cùndècu cuèchi-yu ni cùu, te núu ñá túú yúhú ní càháⁿ-í núú-yu, te vitna vá cúú tnáhí cachí-yu sá ñá túú cuèchi-yu.

²³ Chi nchaa ñáyíu cùu úhú iní ñáhá xii-í, te cùu úhú iní-yu tnáhá Tàtá-í.

²⁴ Te váa ní ñⁿ cuèchi-yu vá cùndècu ni cuu, te núu dicó ñá túú ní xini-yu nchaa sá ní quide-í sá vá yòo tnáhí ndàcu cada. Te cuèí ní xini-yu dico dai cùu úhú iní ñáhá-yu xii-í ndihí Tàtá-í.

²⁵ Te duha quidé-yu chi dacuití quèe ndáá-xi nàcuáa yòdo tnuní núú tùtú Yǎ Ndiòxí sá dácuahá-yu, chi càchí-xi sá ñá túú nǎ cuèchi-í te cuu úhú iní ñáhá-yu xii-í.

26 Te Espiritú Tàtá-í Dútú Ndiöxí sá ndécú núú-gã tendaha-í quixi chindee ñàha-xi xii-ndo, te canu ichi ñàha-xi nàcuáa cundecu-ndo, te Espiritú-áⁿ cãháⁿ ndáá-xi cuendá cutnùní iní nchaa ñáyiú yoo cùu-í.

27 Te nchòhó tñàhá-ndó cãháⁿ váha-ndo cuendá-í cuendá cutnùní iní-yu yoo cùu-í, chi nàha-ndo sá ndéè òré ní ngúita-í quidè-í chiúⁿ Tàtá-í ní chitnahá ñáhá-ndó xii-í —càchí-gá xáhaⁿ-gã xii-güedé.

16

1 Te ní xáhaⁿ tucu-gá xii-güedé:

—Duha cãháⁿ-í cuendá ná nanchòcáva iní-ndó ñhú-ndó ichi cuehé ichi duha.

2 Chi vá dáñá-gã-güedé quíhu-ndo venúhu, te ni vã cúu-gã quini ndéè ñáhá-güedé xii-ndo. Te sáá ìⁿ nduu te cahni ñàha-güedé xii-ndo, te xíáⁿ cuu cahaⁿ-güedé sá quidè-güedé chiúⁿ Yá Ndiöxí.

3 Te ducaⁿ cada-güedé chi ñá túú xini-güedé Tàtá-í, te ni ñà túú xini ñáhá-güedé xii yúhú.

4 Te duha nduu tñúhu cãháⁿ-í núú-ndó, chi na sáá òré te ndacu iní-ndó nchaa tñúhu sá sà ní cachí tñúhu-í xii-ndo nàcuáa cada ñàha-güedé xii-í.

Nchaa chiúⁿ quide Espiritú Yá Ndiöxí

Te ñá túú ní cachí tñúhu-í xii-ndo ndéè díhna chi ndècu ndíhi ñàha-í xii-ndo.

5 Dico vitna sa ta cùyatni nduu núhú-í núú ndécú Tàtá-í Yaá ní tendaha ñàha xii-í véxi-í ñuyíú-a. Te ni ìⁿ nchòhó ñá túú xicáⁿ tñúhú-ndó núú-í núú ndéè quíhíⁿ-í.

6 Chi mee-ni sã ndíhú iní-ndó sã dúcáⁿ ní cãháⁿ-í.

7 Te na cachí tñúhu ndáá-í xii-ndo sã váha-gá sá cúu-xi-ndó núú núhú-í, chi tendaha-í Espiritú Yá Ndiöxí quixi cundecu ndíhi-ndo chindee ñàha-xi, chi núú vá núhú-í te vá quíxí Espiritú-gá cundecu ndíhi-ndo chindee ñàha-xi xii-ndo.

8 Te na quixi Espiritú-gá te dandixi túu-xi iní nchaa ñáyiú ndècu ichi cuehé ichi duha sá ñà túú quide váha-yu. Te dacàhu iní ñáhá-xí sá ndécú ìⁿ ichi váha ichi ndáá. Te Espiritú-gá-áⁿ cada-xi nàcuáa cutnùní iní-yu sá Yá Ndiöxí cada ndáá-gá cuéchi-yu.

9 Te ducaⁿ te cutnùní iní-yu sá ndécú cuéchi-yu, chi ñá túú sàndáá iní ñáhá-yu xii-í.

10 Te ducaⁿ te cutnùní iní-yu nàcuáa nduu cuendá ichi váha ichi ndáá, chi yúhú núhú-í núú ndécú Tàtá-í, te nchòhó vá quini ñáhá-gã-ndó.

11 Te ducaⁿ te cutnùní iní-yu sá Yá Ndiöxí cada ndáá-gá cuéchi-yu, chi sa ní cãháⁿ-gá sá yúcu ñávàha sá táxi tñuni ñuyíú-a quíhíⁿ-xi núú ùhú núú ndáhú.

12 Te vai-gá tñúhu ndècu cachí tñúhu-í xii-ndo, dico nchòhó chi vá cündèe iní-ndó cündedóho-ndo nchaa vitna.

13 Te na quixi Espiritú Yá Ndiöxí, Espiritú cãháⁿ ndáá cuiti, te Espiritú-áⁿ danèhé ñáhá-xí nchaa tñúhu váha tñúhu ndáá. Te vá dacàhu iní ñáhá-xí xii-ndo sá véxi iní méé-xí chi dacàhu iní ñáhá-xí nchaa sá cãháⁿ Yá Ndiöxí, te cachí tñúhu-xi nchaa nàcuáa cada-xi ndéè núú cuáháⁿ núú véxi-gá.

14 Te Espiritú-gá-áⁿ cada càhnu ñàha-xi xii yúhú chi ndècu ndíhi-xi tñúhu-í, te danèhé ñáhá-xí xii-ndo.

15 Te nchaa sá ndécú ndíhi Tàtá-í ndécú ndíhi-í tñàhá-í, núú xíáⁿ cãchí-í sá Espiritú-gá danèhé ñáhá-xí nchaa tñúhu-í xii-ndo.

Nchaa ñáyiú ndíhú iní-xi nduu ñá iní-yu na quixi tucu Jesús

16 Te ìn úú-nǎ nduu ndècu-í te vá quíní ñáhá-gǎ-ndó xii-í, dico núú sàcú-ni nduu te quíní ñáhá tùcu-ndo xii-í, te ducaⁿ chí nùhú-í núú ndécú Tàtá-í — càchí-gá xáhaⁿ-gǎ xii-güedé.

17 Te sá dúcáⁿ ní cǎháⁿ-gá nùu ní ngüíta ìn úú cue téé xica cuu ndihi-gá xǐtnàha-güedé:

—¿Nása ndùu-tu tnúhu cǎháⁿ-gá sá càchí-gá sá ìn úú-nǎ nduu ndècu-gá te vá quíní-gá-ó-gǎ, dico núú sàcú-ni nduu te quíní tucu-o-gǎ-í?, chí nùhú-gá núú ndécú Tàtá-gǎ —càchí-güedé xǐtnàha-güedé.

18 Te xǐtnàha tucu-güedé:

—¿Nása cuáháⁿ-tu tnúhu-ǎn sá sàcú-ni nduu? Te ñá tècú tnùnì-ó nása ndùu tnúhu cǎháⁿ-gá —càchí-güedé xǐtnàha-güedé.

19 Te Jèsús ní cutnùnì iní-gá sá cuínì-güedé cǎcáⁿ tnúhú-güedé núú-gǎ nása ndùu tnúhu ní cǎháⁿ-gá, núu ní xáhaⁿ-gǎ:

—Cuendá sá ní cachí-í sá ìn úú-nǎ nduu ndècu-í te vá quíní ñáhá-gǎ-ndó xii-í, dico núú sàcú-ni nduu te quíní ñáhá tùcu-ndo xii-í ní cachí-í, ¿xǐáⁿ ndúcú tnúhu núú tnáhá-ndó-ǎn? —càchí-gá xáhaⁿ-gǎ xii-güedé.

20 Te ní xáhaⁿ tùcu-gá:

—Te na càchí tnúhu ndáá-í xii-ndo sǎ nchòhó ndíhú víhí iní-ndó te ndáhyú-ndó, dico nchaa ñáyiú ndècu ichi cuehé ichi duha chí da cudíí iní-yu. Dico nchòhó ñáyiú ndáhyú chí sáá nduu te nduu díí iní-ndó.

21 Chí dàtná cuínì-ndó cùu ìn ñadihí ñaha ní tnahá nduu cacu déhe-xi vǎi sani iní-aⁿ sá quidé úhú ñáhá-xí. Dico na yáha cacu déhe-aⁿ, te ñá túú-gǎ ndácú iní-aⁿ sá ní quide úhú ñáhá-xí xii-aⁿ chí mee-nǎ sá cudíí iní-aⁿ déhe-aⁿ.

22 Ducaⁿ sǎtnahá-xi cùu nchohó vitna chí ndíhú iní-ndó sǎ nùhú-í, dico quixi tucu-í quixi coto ñaha-í xii-ndo, te òré-án te cudíí ndisa iní-ndó, te vá yòo ìn-gǎ dandíhú iní ñáhá xii-ndo davá-án.

23 Te davá-án ñá túú-gǎ ná nducu tnúhu-ndo nùu-í. Te na càchí tnúhu ndáá-í xii-ndo sǎ Tàtá-í taxi-gǎ nchaa sá ná cǎcáⁿ-ndó nùú-gǎ nùu na quíndáá iní ñáhá-ndó xii-í.

24 Te ndéé vitna vátá dúcáⁿ-gǎ cada-ndo cǎcáⁿ-ndó. Dico cǎcáⁿ-ndó nùú-gǎ nùu ná cuínì-ndó te taxi-gǎ cuendá cudíí ndisa iní-ndó —càchí-gá xáhaⁿ-gǎ xii-güedé.

Xitohó Jesucristú ní cunuu tnúhu-gá núú yucu ñávaha

25 Te xáhaⁿ tùcu-gǎ xii-güedé:

—Mee-ni ní chidáhu ndodo-í tnúhu ní cǎháⁿ-í núú-ndó, dico sáá nduu te vá chidáhu-gǎ-í tnúhu cǎháⁿ-í, chí cǎháⁿ ndáá-na-í cuendá Tàtá-í.

26 Te davá-án cǎcáⁿ-ndó nùú Tàtá-í nùu ná cuínì-ndó te taxi-gǎ, te núu na quíndáá iní ñáhá-ndó xii yúhú Déhe-gǎ. Te ñá túú-gǎ xíní ñuhu-xi sá yúhú cǎcáⁿ-í núú-gǎ cuendá-ndó chí cǎcáⁿ méé-nǎ-ndó.

27 Chí mee Tàtá-í ò cùu iní ñáhá-gǎ xii-ndo cuendá cúú iní ñáhá-ndó xii-í, te sàndáá iní-ndó sǎ nùú-gǎ ní queue-í véxi-í.

28 Te yúhú ní queue-í núú Tàtá-í véxi-í ñuyíú-a, te vitna dándóo-í ñuyíú-a te nùhú-í núú ndécú-gǎ —càchí-gá xáhaⁿ-gǎ xii-güedé.

29 Te ní xáhaⁿ cuè téé xica cuu ndihi-gá:

—Vitna chí cǎháⁿ ndáá-nǎ-n, ñá túú-gǎ chidáhu-n tnúhu cǎháⁿ-n.

30 Te vitna ní xínì-ndí sá ò váha cùtnunì iní-n nchàa nacuáa cùu, te cùtnunì iní-n nchàa nacuáa sàni iní nchaa ñáyiú. Te ñá túú xini ñuhu-xi nágá nducu

tn̄hu-yu núu-n chi nchaa sa ní dátũu-n nũ-yu. Te xĩáⁿ nũu sàndáá iní-ndí sá nũú Yá Ndiõxí ní quee-n v̄xi-n —càchí-güedé xáhaⁿ-güedé xii-gá.

³¹ Te ní xáhaⁿ Jèsús:

—¿Te vitna sàndáá iní-ndó-ãⁿ?

³² Vitna ní sáá nduu ní sáá òré sá ncháá nchòhó cuténuu-ndo càa ñⁿ caa úú cuu-ndo, te dàndó mee ñaha-ndo xii-í. Dico ñá díú mèe dii-í quendóo chi ndècu ndihí-í Tàtà-í.

³³ Duha càháⁿ-í cuendá cuu váha iní-ndó cùndecu-ndo, chi ñuyú-a cuu úhú iní ñáhã-yu xii-ndo, dico ni v̄ yùhú-ndó chi yùhú sa ní dáquée t̄hú-í nchaa sá cuèhé sá dúhá íó ñuyú-a —càchí-gá xáhaⁿ-gá xii-güedé.

17

Jèsús xicáⁿ táhú-gã núú Tàtà-gã Dútú Ndiõxí cuendá cue téé xica cuu ndihí-gá

¹ Te sáatá dúcáⁿ ní cáháⁿ Jèsús te ní ndacoto-gá andiú, te ní xáhaⁿ-gã xii Tàtà-gã Dútú Ndiõxí:

—Táu, vitna ní sáá nduu càda cahnu ñaha-n xii-í cuendá ducaⁿ càda cahnu ñaha-í xii-n.

² Chi mee-n ní cachí-n sã táxí tn̄nì-í nchaa ñáyíu ñuyú-a, te dàcacu nihnu-í nchaa ñáyíu ní cachí-n nàníhí tàhú.

³ Te cundecu ndihí-õ-yu ní caa ní quíhíⁿ, chi sàndáá iní ñáhã-yu sá ñⁿ dii díí-ni yòhó cúu-n Ndiõxí ndisa, te ducaⁿ xini ñáhã-yu xii yùhú Jesucristú téé ní tendaha-n v̄xi ñuyú-a.

⁴ Te yùhú ní chiñuhu ñaha-í xii-n ñuyú-a, te ní xínu chũⁿ ní cachí-n càda-í.

⁵ Táu, vitna na nàsáá-í núu-n te cada cahnu ñaha-n xii-í dàtná ní xóo cada cahnu ñaha-n xii-í ndéé cùtnáhá vátá ngáva-gá ñuyú.

⁶ Te nchaa ñáyíu ní nanducu nihnu-n tnuú nchaa ñáyíu ndècu ichi cuèhé ichi duha, ní taxi cuendá-n-yu, te ní xáhaⁿ-í xii-yu yoo cùu-n. Te cuendá-n cùu-yu, te ní taxi cuendá-n-yu, te ní sàndáá iní-yu tn̄hu-n.

⁷ Te vitna ní cutnùnì iní-yu sá ncháá tn̄hu ndècu ndihí-í diu-ni mee-n ní taxi-n.

⁸ Te ní dánèhé-í-yu nchaa tn̄hu sá ní dánèhé ñáhã-n xii-í, te ní sàndáá iní-yu. Te ní cutnùnì iní-yu sá nũu-n ní quee-í v̄xi-í, te ní sàndáá iní-yu sá yòhó ní tendaha ñaha-n xii-í v̄xi-í ñuyú-a.

⁹ Te yùhú càháⁿ ndàhú-í núu-n cuendá nchaa ñáyíu ní taxi cuendá-n. Te ñá túú càháⁿ ndàhú-í núu-n cuendá ñáyíu ndècu ichi cuèhé ichi duha, chi cuendá nchaa ñáyíu ní taxi cuendá-n càháⁿ-í, chi cuendá-n cùu-yu.

¹⁰ Te nchaa sá cúú cuendá-í cúú-xí cuendá-n, te nchaa sá cúú cuendá-n cùu-xi cuendá-í tnàhá-í. Te xĩquide cahnu ñahã-yu xii-í.

¹¹ Te yùhú vá cùndecu-gá-í ñuyú-a, dico mèe-yu chi cundecu-ní-yu, te yùhú ndixi-í núú ndécú-n. Táu, yòhó ío yĩñuhu ndecu-n, te yùhú càháⁿ ndàhú-í núu-n sã ní yùhu ní iní-n còto-n nchaa ñáyíu ní taxi cuendá-n, ñáyíu ní sàndáá iní tn̄hu-í cuendá sá ñⁿ-ní ichi cuú-yu cundecú-yu dàtná ñⁿ-ní cùu nchoo.

¹² Chi òré ndécú-í ndihí-yu ñuyú-a ní xito-í-yu nàcuáa cùu iní-n, te ní ñⁿ-yu ñá túú ní xita nihnu, chi ñⁿ-dii-ni té Júdás ní xita nihnu tnàhí-dé, te ducaⁿ ní cuu cuendá sá ní quee ndáá-xi nàcuáa yòdo tnunì núú tùtú-n.

¹³ Te vitna sa ndixi-í núú ndécú-n, dico nini ndècu-gá-í ñuyú-a duha càháⁿ-í cuendá sá cúdí iní-yu dàtná cúdí iní mèe-í.

14 Te yúhú ní dánèhé-í-yu tnúhu-n, dico nchaa ñáyiu ndècu ichi cuehé ichi duha cùu úhú iní ñáhà-yu xií-yu cuendá sá ñà túú-gã ndécù-yu ichi cuehé ichi duha-áⁿ dàtná yúhú ñá túú ndècu-í ichi-áⁿ.

15 Te ñá túú càchí-í sá xócànì-n-yu ñuyíú-a, dico càháⁿ ndàhú-í núú-n sã dácäcu ñihnú-n-yu núú yucu ñävãha.

16 Te yúhú ñá túú ndècu-í ichi cuehé ichi duha, te ducaⁿ mée-yu ñá túú-gã ndécù-yu ichi cuehé ichi duha.

17 Te ío na cùndecu yihi ñuhu-gá-yu núú-n dàcuahá-yu tnúhu-n, chi cùu-xi ñⁿ tnúhu ndáá.

18 Te dàtná ní tendaha ñaha-n xii yúhú véxi-í tnuú nchaa ñáyiu ndècu ichi cuehé ichi duha, ducaⁿ càda-í tendaha-í-yu quíhíⁿ-yu càháⁿ-yu tnúhu-í tnuú nchaa ñáyiu ndècu ichi cuehé ichi duha.

19 Te yúhú ndécú yiñuhu-í núú-n, te cada ñaha-n xii-í nàcuáa cùu iní-n sã cuendá-yu, te ducaⁿ te cundecu yiñuhú-yu núú-n dàcuahá-yu tnúhu-n.

20 Te ñá díú cuendá mee-ni ñáyiu sa ní sándáá iní-xi càháⁿ ndàhú-í núú-n, chi tnáhá cuendá nchaa ñáyiu na quíndáá iní ñáhá xii-í ndée idá-gá ñu na cùndedóho-yu tnúhu càháⁿ ñáyiu na tendaha-í.

21 Te xicáⁿ táhù-í núú-n sã ncháã-yu ñⁿ-nã ichi na cùu-yu, te ñⁿ-nã cani iní ndihi ñáhá-yu xii-o dàtná cúú nchòo ñⁿ-ni cuu-o. Te ducaⁿ ñⁿ-ná cuu-o ndihí-yu cuendá sá ná quíndáá iní nchaa ñáyiu ndècu ichi cuehé ichi duha sá díú-n ñí tendaha ñaha-n xii-í véxi-í ñuyíú-a.

22 Te nchaa sá vãha ní taxi-ndècu ndihi-í ní dánèhé-í-yu cuendá sá ñⁿ-nã cuú-yu cundecú-yu dàtná ndécú nchòo.

23 Te yúhú cundecu ndihi-í-yu, te yòhó cundecu ndihi ñaha-n xii yúhú cuendá ñⁿ-nã cuu ndisá-yu cundecú-yu. Te ducaⁿ te cutnùní iní nchaa ñáyiu ndècu ichi cuehé ichi duha sá díú mée-n ní tendaha ñaha-n xii-í véxi-í ñuyíú-a, te cùu iní-n-yu dàtná cúú iní ñáhá-n xii yúhú.

24 Táu, mee-n ñí taxi cuendá-n-yu, te cuíní-í sá cùndecù-yu núú cùndècu-í cuendá quini-yu sá quidé càhnu ñaha-n xii-í chi ducaⁿ-ni cùu iní ñáhá-n xii yúhú ndée cùtnáhá vátá ngãva-gá ñuyíú.

25 Táu, yòhó ío yiñuhu ndecu-n. Te ñáyiu ndècu ichi cuehé ichi duha ñá túú xini ñáhá-yu xii-n, dico yúhú chi xini ñáhà-í xii-n, dico ñáyiu ní sándáá iní ñáhá xii-í sa xini-yu sá díú-n ñí tendaha ñaha-n xii-í véxi-í ñuyíú-a.

26 Te sa xãhaⁿ-í xií-yu yoo cùu-n, te diu-ni ducaⁿ càda-í cuendá cuu iní tnáhá-yu dàtná cúú iní ñáhá-n xii-í, te ducaⁿ cùndecu-í ndihí-yu —càchí-gá xãhaⁿ-gã xii Tátá-gã Dútú Ndióxi.

18

*Ní tñii-güedé Jèsús ndécá ñaha-güedé cuáháⁿ
(Mt. 26:47-56; Mr. 14:43-50; Lc. 22:47-53)*

1 Te sátá dúcáⁿ ñí càháⁿ Jèsús, te ní quee-gá ndihi cue téé xica cuu ndihi-gá cuáháⁿ-güedé ndaa ingá xio yuhu yùú Cèdrón. Te yacáⁿ cáá ñⁿ lahuertá, te xití lahuertá-áⁿ cuãnguïhu Jèsús ndihi cue téé xica cuu ndihi-gá.

2 Te té Jüdás déhe té Ximú Iscarioté téé ní sáha cuendá ñáhá xii-gá núú cuè téé cùu úhú iní ñáhá sa xini-dé lahuertá-áⁿ chi titní xito ní sáháⁿ Jèsús ndihi-güedé xiáⁿ.

³ Núu ndáá ichi xíaⁿ nĩ sáá té Jùdás ndihì vài sandadú, ndihì cue tée quide cuendá veñuhu ní techiùⁿ ñaha cue dútú cùnùu, ndihì cue tée cùu fariséú. Te xinehe-güedé machití ndihì ìⁿ úú-gá sá dééⁿ, te yòtnúu-güedé lintèrná ndihì iti ní sáá.

⁴ Te Jèsús sa ñaha-gá nchaa ñacuáa cada ñaha-güedé xii-gá núu ní sáháⁿ tuha ñaha-gá xii-güedé, te ní xáhaⁿ-gá:

—¿Yoo nànducu-ndo? —cachí-gá xáhaⁿ-gá xii-güedé.

⁵ Te ní xáhaⁿ-güedé:

—Jèsús tée ñuú Nazàrét nànducu-ndí —cachí-güedé xáhaⁿ-güedé xii-gá.

Te ní xáhaⁿ Jèsús:

—Yúhú ducaⁿ ñani-í, te náu-í ndécú-á te núu yúhú nànducu-ndo —cachí-gá xáhaⁿ-gá xii-güedé.

Te tnàhá té Jùdás tée ní sáha cuendá ñáhá xii-gá ndihì-güedé.

⁶ Te òrè ní xáhaⁿ Jèsús sá díú-gá cùú tée nànducu-güedé, te ní nacaca dùma-güedé te ní nduá-güedé ndéé ñuhu.

⁷ Te ní xicáⁿ tnúhú tùcu Jesús núu-güedé yoo nànducu-güedé. Te ní xáhaⁿ tùcu-güedé sá Jèsús tée ñuú Nazàrét nànducu-güedé,

⁸ núu ní xáhaⁿ-ná Jèsús:

—Sa ní cáháⁿ-í sá díú yúhú ducaⁿ ñani-í, te núu yúhú nànducu-ndo, te dañá-ndo nchaa cue tée iha na ñuhú-güedé —cachí-gá xáhaⁿ-gá xii-güedé.

⁹ Duha ní cuu chi ní quee ndáá-xi ñacuáa ní cáháⁿ méé Jèsús chi ní cachí-gá sá ncháá ñáyiú ní sáha cuendá ñáhá Yá Ndióxi cundecu ndihì-gá vá cuita nihnú-yu.

¹⁰ Te té Xímú, àdi Pelú chi úú díu-dé, néhé-dé ìⁿ machití, te ní tava-dé machití-áⁿ ñii-xi te ní xehndé-dé lóho xio cùha ìⁿ tée ñani Malcú ní queendé duuⁿ. Te tée-áⁿ xínú cuèchi-dé núu dútú cùnùu-gá.

¹¹ Te ní xáhaⁿ Jèsús xii té Pèlú:

—Nataxúha machití-áⁿ núu ñuhú-xí, chi dacuití sá ndòhò-í ñacuáa ní cachí Tàtá-í cunduu —cachí-gá xáhaⁿ-gá xii-dé.

*Jèsús ndécú-gá núu dútú cùnùu-gá
(Mt. 26:57-58; Mr. 14:53-54; Lc. 22:54)*

¹² Te cue sandadú ndihì cue tée cùnùu-gá núu-güedé, ndihì cue tée quide cuendá veñuhu ní tñii-güedé Jèsús, te ní dácútú ñaha-güedé.

¹³ Te ndéca ñaha-güedé xii-gá cuáháⁿ núu ndécú té Ànás, te té Ànás-áⁿ cùú-dé tātá ñadhì té Caifás. Te té Caifás-áⁿ nĩ cuu-dé dútú cùnùu-gá cuía-áⁿ.

¹⁴ Te díu-ni tée-áⁿ nĩ xáhaⁿ-dè xii ñáyiú isràél sá vaha-gá sá ìⁿ-ní tée na cùú-dé sá cuendá-yu ncháá-yu.

*Té Pèlú càháⁿ-dé núu ñáyiú sá ñà túú xini-dé Jèsús
(Mt. 26:69-70; Mr. 14:66-68; Lc. 22:55-57)*

¹⁵ Te té Pèlú, àdi Xímú chi úú díu-dé, ndihì ingá tucu-dé ñacuáa xica cuu ndihì-güedé Jèsús nchicúⁿ ñáhá-güedé xii-gá cuáháⁿ. Te ìⁿ tée-áⁿ xini tnàhá-dé ndihì dútú cùnùu-áⁿ núu nchicúⁿ-dé tnàhá-dé Jèsús cuánguihu ndéé núu cáá vèhe tée cùnùu-áⁿ.

¹⁶ Dico té Pèlú ní ndóo-dé yuyèhe ndaa quehé, núu ní ndee tée ndihì té Pèlú-áⁿ nĩ cáháⁿ ndihì-dé ñaha ndéé yuyèhe, te ndéca-dé té Pèlú cuánguihu.

¹⁷ Te ní xáhaⁿ ñaha ndéé yuyèhe-áⁿ xii té Pèlú:

—¿Náa ñá díú yòhó tnàhá-n xica cuu ndihi-n tée ndèca-güedé cuànguihu-a?
—càchí-aⁿ xáhaⁿ-aⁿ xii-dé.

Te ní xáhaⁿ tē Pèlú:

—Náhá, ñá túú tēe-áⁿ xicá cùu ndihi-ú —càchí-dé xáhaⁿ-dē xii-aⁿ.

¹⁸ Te ío víxiⁿ quide-xi núu cue tée xinu cuechi, ndihi cue tée quide cuendá veñúhu ní dátñhá-güedé ñuhú, te xínutñí teté-güedé ndihi té Pèlú.

Dútú cúnúu nducu tnúhu-dé núú Jèsús

(Mt. 26:59-66; Mr. 14:55-64; Lc. 22:66-71)

¹⁹ Te dútú cúnúu ní xicáⁿ tnúhú-dé núú Jèsús núu nándi cùu cue tée xica cuu ndihi-gá, te nándi sá dánèhé ñáhá-gá xii-güedé.

²⁰ Te ní xáhaⁿ-gá:

—Yúhú càháⁿ ndodo-í núu ncháa ñáyiu cuēi xití veñúhu càhnu sá ío cúnúu, te cuēi xití ncháa dava-gá veñúhu núu tàcá ncháa ñáyiu isràel ducaⁿ-ní dànehé-í-yu, te ñá túú dàyuhu càháⁿ-í.

²¹ Núu vá càcáⁿ tnúhú-n núu-í. Càcáⁿ tnúhú núu ncháa ñáyiu sàcúndedóho tnúhu càháⁿ-í, te na càháⁿ-yu núu nása ndùu tnúhu càháⁿ-í chi xini-yu —càchí-gá xáhaⁿ-gá xii-dé.

²² Te sá dúcáⁿ ní càháⁿ Jèsús núu ñⁿ tée quide cuendá veñúhu nùtní-dé tnàhá-dé te ní caní-dé ñⁿ déhndé núú-gá. Te ní xáhaⁿ-dē:

—¿Ná cuendá ducaⁿ càháⁿ-n núú dútú cúnúu-i? —cachí-dé xáhaⁿ-dē xii-gá.

²³ Te ní xáhaⁿ Jèsús xii-dé:

—Te núu nèhé ní càháⁿ-í te càháⁿ-n nása ndùu tnúhu ní càháⁿ-í, te yúhú càháⁿ váha-í te ducaⁿ càniha-n —cachí-gá xáhaⁿ-gá xii-dé.

²⁴ Te ndùtu yoho-ni Jèsús ní dánùhú ñáhá tē Ànás xii-gá ndaha té Caifás dútú cúnúu-gá.

Té Pèlú càháⁿ tucu-dé núú ñáyiu sá ñà túú xini-dé Jèsús

(Mt. 26:71-75; Mr. 14:69-72; Lc. 22:58-62)

²⁵ Te té Pèlú nùtní teté-ni-dé, te ní xáhaⁿ-güedé xii-dé:

—¿Náa ñá díú tnàhá yòhó xicá cùu ndihi tée ndèca-ndí véxi-áⁿ? —càchí-güedé xáhaⁿ-güedé xii-dé.

Te ní xáhaⁿ tē Pèlú:

—Náhá, ñá túú tēe-áⁿ xicá cùu ndihi-ú —càchí-dé xáhaⁿ-dē xii-güedé.

²⁶ Te ñⁿ ñaní tnàhá tēe ní xehndé té Pèlú lóho-xi-áⁿ xínú cuèchi-dé tnàhá-dé núu dútú cúnúu. Te tēe-áⁿ ní xáhaⁿ-dē xii té Pèlú:

—¿Náa ñá díú tnàhá-n ndihi-n-dé ní xini ñáhà-í òrè ní tñí-ndí-dé xití lahuertá? —càchí-dé xáhaⁿ-dē xii-dé.

²⁷ Te té Pèlú ní xáhaⁿ tucu-dé sá ñà díú-dē, te òrè-áⁿ ní cana ñⁿ líhi.

Jèsús ndécú-gá núú tē Pilatú

(Mt. 27:1-2, 11-14; Mr. 15:1-5; Lc. 23:1-5)

²⁸ Te ní ndeñuhu-güedé Jèsús vehe té Caifás, te ndèca ñaha-güedé xii-gá cuáháⁿ vechiⁿ tēe cùu gobiernú. Te sa ta cùditó-ni-gá cuáháⁿ núu ñá ní cuíni cue tēe isràel quíhu-güedé xití vechiⁿ tēe cùu gobiernú-áⁿ. Te núu ní quíhu-güedé vechiⁿ-áⁿ ñá, te vá cúu-gá quíhu-güedé cudini-güedé vico pàscuá ní cùu chi ducaⁿ tnàhí quide-güedé.

²⁹ Núu té Pilatú tēe cùu gobiernú ní quee-dé vechiⁿ-dē ní càháⁿ ndihi ñaha-dē xii-güedé, te ní xáhaⁿ-dē:

—¿Ná cuèchi ní quide tēe-a núu ndèca-ndo-dé véxi? —càchí-dé xáhaⁿ-dē xii-güedé.

30 Te ní xáhaⁿ-güedë:

—Te núu dìcò ñá túú cuëchi-dé-áⁿ te vá cándëca-ndí-dé quixi núu-n ní cùu —cachí-güedé xáhaⁿ-güedé xii-dé.

31 Te ní xáhaⁿ tucu té Pilatú xii-güedé:

—Chí cándëca-dé cuánùhú, te cada ndáá-ndó cuëchi-dé nàcuáa càa lei méé-ndó —cachí-dé xáhaⁿ-dë xii-güedé.

Te ní xáhaⁿ-güedë:

—Dico nchúhú ñáyiú isràél chi ñá túú dùcaⁿ taxi tnuní lèi sá cáhni-ndí —càchí-güedé xáhaⁿ-güedé xii-dé.

32 Te ducaⁿ ní cuu chi dacuití ní quee ndáá-xi nàcuáa ní cáh^aⁿ méé Jèsús cada-xi cuú-gá.

33 Te cuándihu té Pilatú vechiùⁿ-dé, te ní cana-dé Jèsús ní xicáⁿ tnúhú-dë núu-gá, te xáhaⁿ-dë:

—¿Yòhó yíndaha-n ñáyiú isràél-áⁿ? —càchí-dé xáhaⁿ-dë xii-gá.

34 Te ní xáhaⁿ Jèsús:

—¿Te xíáⁿ càháⁿ-n sá vëxi iní méé-n, àdi ió ìⁿ ñáyiú ní cachí tnúhu xii-n cuendá-í? —càchí-gá xáhaⁿ-gá xii-dé.

35 Te ní xáhaⁿ té Pilatú xii-gá:

—Ñá díú tée isràél cúu-í núu ducaⁿ càháⁿ-n, chi cue ñaní tnáhá-n cuè tée isràél ndihí cue dútú cúnùu ní taxi cuendá ñáhá-güedé xii-n iha. ¿Te ná ní quide-n? —càchí-dé xáhaⁿ-dë xii-gá.

36 Te ní xáhaⁿ Jèsús:

—Ñá díú tée ñuyúú-a cùu-í te ni ñá túú vëxi-í taxi tnuní-í ñuyúú-a, chi núu dìcò iha tàxi tnuní-í áⁿ te cue tée xica cuu ndihí-í nàà-güedé ndihí cue tée isràél cuendá sá vā tní ñàha-güedé xii-í ní cùu, dico ñá túú vëxi-í sá táxi tnuní-í ñuyúú-a —càchí-gá xáhaⁿ-gá xii-dé.

37 Te ní xáhaⁿ té Pilatú:

—¿Te tée yíndaha ñáyiú cùu-ó vání? —càchí-dé xáhaⁿ-dë xii-gá.

Te ní xáhaⁿ Jèsús:

—Te dàtná càchí-n-áⁿ yíndaha ndisa-í ñáyiú, chi yúhú véxi-í ñuyúú-a te iha ní cacu-í te càháⁿ-í mee-ni tnúhu ndáá. Te nchaa ñáyiú na cùdíí ìni-xi tnúhu ndáá, te tedóho-yu nchaa tnúhu càháⁿ-í —càchí-gá xáhaⁿ-gá xii-dé.

38 Te ní xáhaⁿ té Pilatú:

—¿Te ná cúu-tu tnúhu ndáá-áiⁿ? —càchí-dé xáhaⁿ-dë xii-gá.

Càchí-güedé sá cáhni-güedé Jèsús

(Mt. 27:15-31; Mr. 15:6-20; Lc. 23:13-25)

Te sáta ní yáha ní xicáⁿ tnúhú té Pilatú núu Jèsús, te ní quee tucu-dé quehé, te xáhaⁿ-dë xii cue tée isràél:

—Ñá túú nã cuëchi tée-a.

39 Te váha-ni chi ducaⁿ tnáhi quide nchóhó sá ndí tnahá nduu vícò pascuá cuíní-ndó sã dácácu-í ìⁿ tée yíhi vecaá. Te núu cuíní-ndó te na dàcácu-í tée yíndaha ñaha xii-ndo —cachí-dé xáhaⁿ-dë xii-güedé.

40 Te sá dúcáⁿ ní cáháⁿ-dé, núu nchaa-güedé níhi ní cáháⁿ-güedé, te xáhaⁿ-güedé:

—¡Vá dácácu-n tée-áⁿ, té Barrábás dàcácu-n! —càchí-güedé xáhaⁿ-güedé xii-dé.

Te té Barrábás-áⁿ ní cuu-dé ìⁿ ñadúhú.

19

1 Te té Pilatú ní táuchíúⁿ-dě ní tñi ñaha cuè sandadú xii Jèsús, te ní caniha-güedë xii-gá ndihi ñi.

2 Te ðiu-ni cue tée-áⁿ ní cadúha-güedë ñi coróná iñu ní chihi-güedë díquí-gá, te ní dáquñu nuu ñaha-güedë xii-gá ñi dóó tícuèhé víhí.

3 Te ní sáháⁿ ndehe yatni-gá-güedë núú-gá, te ní xáhaⁿ-güedë:

—¡Ío cãhnu cuu yohó tée yindaha ñaha xii ñáyiú isràél! —càchí-güedë xáhaⁿ-güedë cúdíquí ndeé ñáhá-güedë xii-gá.

Te ní cani-güedë déhndé núú-gá.

4 Te ní quee tucu té Pilatú quehé te ní xáhaⁿ-dě xii nchaa ñáyiú xĩndecu quehé:

—Te cundehe-ndo-dë ná ndeé ññu-í-dé iha, chi yúhú sãha-í cuèndá sá ña túú cuèchi-dé —càchí-dé xáhaⁿ-dě xii-yu.

5 Te ní ndeñuhu ñaha té Pilatú xii Jèsús xití vechiúⁿ-dé te ññu ñi coroná iñu díquí-gá, te ñihnu-gá dóó tícuèhé víhí-ã. Te ní xáhaⁿ tẽ Pilatú xii-yu:

—¡Nái-dé-a! —càchí-dé xáhaⁿ-dě xii-yu.

6 Te ní xiní ñáhá cuè dútú cùnùu ndihi cue tée quide cuèndá veñúhu. Te ní cuáá-güedë, te xáhaⁿ-güedë:

—¡Cata caa-dé! ¡Cata caa-dé núú cùrúxí! —càchí-güedë xáhaⁿ-güedë xii-dé.

Te ní xáhaⁿ tẽ Pilatú:

—Váha-gá núu candeca mee-ndo-dë quíhíⁿ cata caa-ndo-dë núú cùrúxí, chi yúhú cùtñuní iní-í sá ña túú na cuèchi-dé —càchí-dé xáhaⁿ-dě xii-güedë.

7 Te ní xáhaⁿ cuè tée isràél:

—Léi ndécú ndihi nchúhú càchí-xi sá dàì cuú-dé, chi càchí-dé sá Dèhe Yá Ndiõxi cúú-dé —càchí-güedë xáhaⁿ-güedë xii-dé.

8 Te sá dúcáⁿ ní xáhaⁿ-güedë xii té Pilatú, te vaa-gá ní yùhú-dé.

9 Núu cuándihu tucu-dé vechiúⁿ-dé, te ní xáhaⁿ tucu-dé xii Jèsús:

—¿Te yohó ndeé tée cùu-n-í? —cachí-dé xáhaⁿ-dë xii-gá.

Dico Jèsús ña túú ní cãháⁿ-gá.

10 Núu ní xáhaⁿ tẽ Pilatú xii-gá:

—¿Te vá càchí tñuhu-n núu ndeé tée cùu-n-u? ¿Naa ña túú xiní-n sã yúhú táxi tñuní-í, te cuu-ni tauchiúⁿ-í cata caa ñaha-güedë xii-n núú cùrúxí cuú-n, te cuu-ni dàcácu ñaha-í xii-n-ã? —càchí-dé xáhaⁿ-dë xii-gá.

11 Te ní xáhaⁿ Jèsús:

—Yohó ña túú sã táxi tñuní ñáhá-n xii yúhú ní cùu núu ña túú Yá Ndiõxi ní cuní-gá sá dúcáⁿ cùnduu, te tée ní táxi cuèndá ñáhá xii-í núú-n tée-áⁿ ño-gá ndècuéchi-dé dàcúxí yohó —càchí-gá xáhaⁿ-gã xii-dé.

12 Te òré-áⁿ ní ngúita té Pilatú ndúcú-dé nàcuáa cada-dé dàcácu-dé Jèsús ní cùu, dico cue tée isràél ní ngúita-güedë ní cuáá-güedë, te xáhaⁿ-güedë:

—Te núu na dàcácu-n tée-áⁿ, te ña díú tée tñhá tñuhu ndihi té Cèsár cúú-n. Chi ndèda-ni cãa tée na càchí sá cúú-dé tée yindaha ñaha xii ñáyiú cùu úhú iní-dé té Cèsár. Te té Jèsús-áⁿ càchí-dé sá táxi tñuní-dé —càchí-güedë xáhaⁿ-güedë xii-dé.

13 Te sá dúcáⁿ ní xáhaⁿ-güedë xii té Pilatú núu ní quee-dé ndihi Jèsús cuáháⁿ ndihi ñaha-dë corrèdór núu ní quee mee-ni yúú váha núú ññúhú, te xiáⁿ nání-xí Gãbatá tñuhu hèbreú. Te xiáⁿ ndécú xilé sácõo nchihí té Pilatú xèhndé-dé cuèchi ñáyiú, núu ní nucóo-dé núú xilé-dé òré ní quexio-dé ndihi Jèsús.

14 Te cùu-xi datná cuádava nduu, nduu vispré vico pàscuá. Te ní xáhaⁿ tē Pilatú xii ñáiyu isràél:

—¡Nái tée yìndaha ñaha xii-ndo-a! —cachí-dé xáhaⁿ-dē xii-yu.

15 Te ní cuáá-yu, te xáháⁿ-yu:

—¡Cahni-dé! ¡Cahni-dé! ¡Cata caa-dé núu cùrúxí! —càchí-yu xáháⁿ-yu.

Te ní xáhaⁿ tē Pilatú:

—¿Te yúhu cata caa-í tée yìndaha ñaha xii-ndo-u? —cachí-dé xáhaⁿ-dē xii-yu. Te cue dútú cúnùu ní xáhaⁿ-güedē:

—Nchúhú ñá túu-gã tée yìndaha ñaha xii-ndí, chi ñⁿdi-ni té Cèsár yìndaha ñaha-dé xii-ndí —càchí-güedé xáhaⁿ-güedé xii-dé.

16 Te té Pilatú ní xáhaⁿ-dē ní queheⁿ cuèndá-güedé Jèsús ndécá ñaha-güedé cuáháⁿ cata caa ñaha-güedé núu cùrúxí.

Sàta caa-güedé Jèsús núu cùrúxí
(Mt. 27:32-44; Mr. 15:21-32; Lc. 23:26-43)

17 Te ní quee Jèsús nchídó-gã cùrúxí cuáháⁿ ñⁿ xichi núu nání Yìqui Díqui Ndÿi. Te tnúhu hèbreú queé-xí Gõlgotá.

18 Te yàcáⁿ ní sata caa ñaha-güedé xii-gã núu cùrúxí-áⁿ. Te xio xio ññi-gá ní sata caa-güedé úu cue tée ndècu ndisa cuéchi-xi ññi-ni núu cùrúxí tucu.

19 Te ní táuchíuⁿ tē Pilatú ní taxi ndecu-güedé ñⁿ sá ndéè lètrá núu cùrúxí tá càa-gã, te duha càchí lètrá-áⁿ: “Jèsús tée ñuú Nazàrét, tée yìndaha ñaha xii ñáiyu isràél”, duha càchí-xi.

20 Te vai ñáiyu isràél ní xiní-yu nàcuáa càháⁿ lètrá-áⁿ, chi yatni-ni yuhu ñuú ní sata caa ñaha-güedé xii-gã núu cùrúxí. Te lètrá-áⁿ càháⁿ-xi tnúhu hèbreú, te càháⁿ-xi tnúhu griégú, te càháⁿ-xi tnúhu làtín.

21 Te ní xáhaⁿ cuè dútú cúnùu xii té Pilatú:

—Vá táuchíuⁿ-n tee-güedé lètrá càháⁿ-xi “Tée yìndaha ñaha xii ñáiyu isràél” ní cùu, váha-gã tauchíuⁿ-n tee-güedé lètrá càháⁿ-xi “Tée càchí yìndaha ñaha xii ñáiyu isràél ní cùu” —cachí-güedé xáhaⁿ-güedé xii-dé.

22 Te ní xáhaⁿ tē Pilatú:

—Nàcuáa ní táuchíuⁿ-í ní tee-güedé te ducaⁿ quèndóo-xi —càchí-dé xáhaⁿ-dē xii-güedé.

23 Te sátá ñí sata caa ñaha cuè sandadú xii Jèsús núu cùrúxí, te cùmí xichi ní quide-güedé dóo-gã, te ñⁿ ñⁿ xichi dóo-gã ní càhñu cue sandadú-áⁿ. Te ndècu ñⁿ dóo-gã dóo cáni ñà túu ní tçu.

24 Te cuèndá dóo-áⁿ ní xitnàha cue sandadú-áⁿ:

—Vá ndátá-ó dóo-a, váha-gã ñu na còto ndéé-ó cuèndá quini-ó ndèdacàa-o cuu cuèndá-ó —càchí-güedé xitnàha-güedé.

Te ducaⁿ ñí quide-güedé chi ní quee ndáá-xi nàcuáa càháⁿ-xi núu tütú Yã Ndióxi núu càchí-xi: “Tití xichi ní càhñu-güedé dóo-í. Te ní xito ndéé-güedé cuèndá cutnùni iní-güedé ndèdacàa-güedé níhí-güedé dóo-í”, duha càchí-xi núu tütú-gã. Te sá dúcáⁿ càháⁿ-xi núu tütú Yã Ndióxi ñuú xíáⁿ ducaⁿ ñí quide cue sandadú-áⁿ.

25 Te yatni ññi curúxí núu tácaà Jèsús nútñⁿ náná-gã, ndihí cùhú-xi, ndihí tá Màriá ñadìhí té Clèofás, ndihí tá Màriá Magdalèná.

26 Te ní xiní Jèsús náná-gã nútñⁿ-a ññi ñⁿ tée ní xica cuu ndihí-gã, tée ío cùu iní-gã, te ní xáhaⁿ-gã xii náná-gã:

—Náá, tée nútñⁿ-áⁿ nduu-dé dàtná déhe mee-n —càchí-gã xáhaⁿ-gã xii-aⁿ.

27 Te ní xáhaⁿ-gã xii téé ní xica cuu ndi^{hi}-gá-áⁿ:

—Ñaha-án nduu-aⁿ dàtná nǎná méé-n —càchí-gá xáhaⁿ-gã xii-dé.
Núu ndéé dàvá-án ní nduu nǎná ñáhá téé-áⁿ xii nǎná-gã.

Ní xihí Jèsús

(Mt. 27:45-56; Mr. 15:33-41; Lc. 23:44-49)

28 Te ní cutnùni iní Jèsús sá ní ndi^{hi} chi^uⁿ ní táhú Tàtá-gã Dútú Ndiòxí ní quide-gá núu ní cachí-gá:

—Yichí-í ndute —càchí-gá.

Te duha ní cáháⁿ-gá chí ní quee ndáá-xi nàcuáa càháⁿ-xi núu tùtú Yá Ndiòxí.

29 Te ndècu ìⁿ lítu ñùhu ndudí íá. Te sá dúcáⁿ ní cáháⁿ-gá sá yichí-gá ndute, núu xǎⁿ ní queheⁿ-güedé cáchí te ní chindóyo-güedé xití ndudí íá-áⁿ, te ní chinenu-güedé díquí ìⁿ dité yutnu nàni hisópó, te ní ndocani-güedé ní chihí-güedé yuhu-gá.

30 Te sáta ní xihí-gá ndudí íá-áⁿ, te cächí-gá:

—Vitna ní dǎxínu cava-í nchaa chi^uⁿ ní cachí Tàtá-í cada-í —duha ní cachí-gá.

Te ní xócuíta dúcúⁿ-gã ndàa núú-gã, te ní xihí-ni-gá.

Ìⁿ sandàdú ní caáⁿ-dé yiqui naha Jèsús ndi^{hi} ìⁿ pùyá yihí càà núú-xi

31 Te cuendá sá ndùu vispré vico pàsua cúú-xí núu ñá ní cuini cue téé isràél cundecu-ni yiqui cùñú-gá núu cùrúxí ndi^{hi} yiqui cùñú cue téé ní sata caa-güedé díñi-gá, chí cuendá nduu tnéé-án cúú-xí ndùu ndetatú ñáyiu, te ío quide cahnú-yu nduu-áⁿ, núu ní xáhaⁿ-güedé xii té Pilatú sá táuchiuⁿ-dé quíhíⁿ cue téé cáhnú-güedé díhíⁿ Jèsús ndi^{hi} díhíⁿ cue téé tàcaa ndi^{hi}-gá, te xocàni-güedé yiqui cùñú-gá ndi^{hi} yiqui cùñú-güedé yàcáⁿ.

32 Te sáta dúcáⁿ te ní sáháⁿ cue sandàdú ní sǎhnú-güedé díhíⁿ cue téé tàcaa xio xio díñi Jèsús.

33 Te òré ní cuyatni-güedé núú-gã, te ní xiní-güedé sá sà ní xihí-gá núu ñá ní sǎhnú-güedé díhíⁿ-gá.

34 Dico ìⁿ sandàdú-án ní cúxi-dé pùyá néhé-dé ìⁿ xio yiqui naha-gã, te yihí caá núú-xi núu ní caáⁿ-xi yiqui naha-gã ní quee níñí ndi^{hi} ndute cuí.

35 Te yúhú té Juáá téé ní cadúha tutú-a ní xiní-í nàcuáa ní cuu ní xihí Jèsús, te xǎⁿ núu càháⁿ ndáá-í cuendá quíndáá iní-ndó.

36 Te ducaⁿ ní cuu ñá ní sǎhnú-güedé díhíⁿ Jèsús, chí ní quee ndáá-xi nàcuáa càháⁿ-xi núu tùtú Yá Ndiòxí núu cächí-xi: “Vá càhnú-güedé ni ìⁿ yiqui-gá”, duha cächí-xi.

37 Te ducaⁿ ní quide-güedé Jèsús ní caáⁿ-güedé yiqui naha-gã, chí ingá xichí núu tùtú Yá Ndiòxí cächí-xi: “Sáá nduu te quini-güedé ìⁿ téé ní dánicüehé-güedé”, duha cächí-xi.

Chindúxi-güedé Jèsús

(Mt. 27:57-61; Mr. 15:42-47; Lc. 23:50-56)

38 Te sáta dúcáⁿ ní cuu, te té Chèé téé ñùu Arimateá tnàhá-dé ní sándáá iní-dé tnúhu Jèsús dico dayuhu, chí ní xóo yúhú-dé cue téé cùnuu núu ñáyiu isràél. Te téé-án ní xáhaⁿ-dé xii té Pilatú núu vá dáñá-dé canehe-dé yiqui cùñú Jèsús quíhíⁿ chindúxi-dé, te té Pilatú ní xáhaⁿ-dé xii-dé sá cúú cànehe-dé yiqui cùñú Jèsús quíhíⁿ, núu ní sáháⁿ-dé ní nuu nehe-dé yiqui cùñú-gá núu cùrúxí nchídó-dé cuáháⁿ.

39 Te té Nicòdemú tée ní sáháⁿ niú ní cáháⁿ ndihi-dé Jèsús ndéé díhna, tée-áⁿ néhé-dé ócò úxí kílú yuchi ní cuáha mee-ni yúcú sá nání mìrrá ndihi yúcú sá nání àloés. Te ío váha tñami saháⁿ.

40 Te ní naníhí tnáhá-dě ndihi té Chèè, te ní chidúcúⁿnuu-güedé yiqui cùñú Jèsús mee-ni dǒó váha, te nàcuáa ta òucuⁿ nuu-güedé yiqui cùñú-gá dǒó-áⁿ, te ducaⁿ ta chido-güedé yuchi sáháⁿ tnámí-áⁿ núú dǒó-áⁿ chí ducaⁿ tñahí quide ñáyiu isràél òré chindúxi tñahá-yu.

41 Te yatni núú ní sata caa-güedé Jèsús cáá ñⁿ lahuertá. Te xítí lahuertá-áⁿ nchí ñⁿ yaú cava duha cuáháⁿ ndáá-xi, te vátá yǒo ñⁿ-gá nguindúxi xíaⁿ.

42 Te cuendá sá ní cuyatni tñahá nduu ndètatú ñáyiu isràél núú xíaⁿ yaú cava nchí yatni-ni xíaⁿ ní chihi-güedé yiqui cùñú Jèsús.

20

Jèsús ní ndoto-gá

(Mt. 28:1-10; Mr. 16:1-8; Lc. 24:1-12)

1 Te ndumìngú tacuìhndá-gá cuáháⁿ tá Màriá Magdalèná cuáháⁿ ngoto-xi yaú núú ní chihi-güedé yiqui cùñú Jèsús, te ní sáá-xi ní xiní-xi sá ñà túú-gá ndèdí yúú yèhe yaú-áⁿ.

2 Núú xínu-xi cuánuhú núú ndécú tē Xímú, àdi Pelú chi úú dìu-dé, ndihi ingá tée ní xica cuu ndihi-gá tée ío cùu iní-gá, te ní xáhaⁿ-xi xii-güedé:

—Nèhe-güedé yiqui cùñú Jèsús cuáháⁿ, te ñà xiní-ó ndèé ní taxi ndecu-güedé —càchí-xi xáhaⁿ-xi xii-güedé.

3 Te ní quee té Pèlú ndihi ingá tée-áⁿ cuáháⁿ ndéhé-güedé yaú núú ní chihi-güedé yiqui cùñú-gá.

4 Te ndùú-güedé xínú-güedé cuáháⁿ ní cùu, dico ingá tée-áⁿ ní cuu níhi-gá sáhá-dě cuáháⁿ-dé núú díhna-gá-dé ní sáá-dé yuhu yaú núú ní chihi-güedé yiqui cùñú Jèsús ní cùu.

5 Te ní ngáundeyi-dé xító nihni-dé xítí yaú-áⁿ, te ní xiní-dé mee-ná dǒó váha sá ní xiducúⁿ nuu-gá yúcú, dico ñà ní quíhu-dé.

6 Te sáá ní sáá té Pèlú te cuànguihu-dé xítí yaú-áⁿ, núú tñahá-dé ní xiní-dé nchaa dǒó ní xiducúⁿ nuu-gá yúcú-áⁿ.

7 Te ní xiní-dé sá dǒó ní xindútú díquí-gá ñà túú càtuu jundú-xi ndihi dǒó ní xiducúⁿ nuu-gá chí ní nadúcúⁿnuu-ná càtùu ñⁿ xio.

8 Te nchícúⁿ tucu tée ní sáá díhna-gá-áⁿ cuànguihu xítí yaú-áⁿ, te ní xiní-dé sá dǒó-ná yúcú, te ñà túú-gá yiqui cùñú Jèsús núú ní sándáá iní-dé sá ní ndoto-gá.

9 Chí vátá tècú tñuní-gá-güedé nàcuáa càháⁿ-xi núú tütú Yá Ndiǒxí núú càchí-xi sá Jèsús ndoto-gá.

10 Te ní xícó ndì ndúú cue tée ní sángoto yaú núú ní chihi-güedé yiqui cùñú Jèsús ní cùu cuánuhú-güedé vehe-güedé.

Jèsús ní naníhí tnáhá-gǎ ndihi tá Màriá Magdalèná

(Mr. 16:9-11)

11 Te ní sáá tucu tá Màriá yuhu yaú núú ní chihi-güedé yiqui cùñú Jèsús te ní nguíta-xi ndàhyú-xi, te ní ngáundeyi-xi xító nihni-xi xítí yaú-áⁿ.

12 Te xítí yaú-áⁿ ní xiní-xi úú espíritú xínú cuèchi núú Yá Ndiǒxí xíxíhnu-xi mee-ni dǒó cuixíⁿ xíndecu-xi núú ní cáa yiqui cùñú-gá. Te ñⁿ-xi nùcòo núú ní cáa díquí-gá, te ñⁿ-xi nùcòo núú ní cáa sáhá-gǎ.

13 Te espíritú-áⁿ ní xáhaⁿ-xi xii tá Màriá:

—¿Ná cuendá ndàhyú-n? —càchí-xi xáhaⁿ-xi.

Te ní xáhaⁿ tá Màriá:

—Ndàhyú-í chi nèhe-güedé yiqui cùñú Yaa cúú Xìtohó-í cuáhán, te ñá túú xìní-í ndéé ní taxi ndecu-güedé —càchí-xi xáhaⁿ-xi xii cue espíritu-án.

14 Te tnúhu-ni-án ní cáháⁿ-xi te ní nchócótó-xí ñⁿ xio, te ní xìní-xi Jèsús núnñi-gá dico ñá túú ní cùnuní iní-xi sá díú mèe-gá.

15 Te ní xáhaⁿ Jèsús xii-xi:

—¿Ná cuendá ndàhyú-n? ¿Yoo nànducu-n? —cachí-gá xáhaⁿ-gã xii-xi.

Te mee-xi ní sani iní-xi sá tée xito lahuertá-án cúú tée-án, núu ní xáhaⁿ-xi:

—Táta, te núu yòhò néhé-n yiqui cuñú Jèsús cuáhán, te cáháⁿ-n ndéé ní taxi ndecu-n chi cuendá naqueheⁿ-í canehe-í nùhú —càchí-xi xáhaⁿ-xi.

16 Te ní cáháⁿ díú ñaha-gá xii-xi, te xáhaⁿ-gã:

—¡Màriá! —càchí-gá xáhaⁿ-gã xii-xi.

Te ní ndacoto-xi núu-gã, te ní cáháⁿ-xi tnúhu hèbreú, te xáhaⁿ-xi:

—¡Rabòní! —càchí-xi xáhaⁿ-xi. Te tnúhu-án quée-xí Mèstrú.

17 Te ní xáhaⁿ Jèsús:

—Daña vá ngání ñaha-n chi vátá ndáá-gã-í núu ndécú Tàtà-í. Te nùhú-n cùñaha-n xii cue tée ío váha ní tnahá tnúhu ndihí-í sá ndáá-í núu ndécú Tàtà-í Dútú Ndiòxí, te diu-gá cúú Tàtà-ndó nchaa-ndo, te diu-ni-gá cúú Ndiòxí-ndó —càchí-gá xáhaⁿ-gã xii-xi.

18 Te ní natnñi tá Màriá Magdalená ichi cuánuhú-xi cúñaha-xi xii cue tée ní xica cuu ndihí-gá sá ní xìní-xi Jèsús, te ní xáhaⁿ-xi xii-güedé nchaa nàcuáa ní xáhaⁿ-gã xii-xi.

Ní quexio Jèsús núu xñdecu cue tée ní xica cuu ndihí-gá

(Mt. 28:16-20; Mr. 16:14-18; Lc. 24:36-49)

19 Te diu-ni ndumíngú sandiquiⁿ ní natacá cue tée ní xica cuu ndihí-gá, te xñdedí nihnu-güedé vehe sá xiyùhú-güedé cue tée cùnuu núu ññayu isràél. Te ní quíhu Jèsús ndéé tnuú-güedé ní ngñnutnñi-gá, te ní xáhaⁿ-gã:

—Yá Ndiòxí chindée ñaha-gá xii-ndo ío váha cùu iní-ndó ndècu-ndo —cachí-gá xáhaⁿ-gã xii-güedé.

20 Te ní dánèhé ñáhá-gã ndaha-gá ndihí yiqui naha-gã xii-güedé. Te ío ní cudíí iní-güedé sá díú ndisa-gá ní xìní ñáhá-güedé.

21 Te ní xáhaⁿ tùcu Jèsús xii-güedé:

—Yá Ndiòxí chindée ñaha-gá xii-ndo ío váha cùu iní-ndó ndècu-ndo. Te dàtná ní tendaha ñaha Tàtà-í Dútú Ndiòxí xii-í véxi-í ñuyú-a, te ducaⁿ tendaha ñaha-í xii-ndo quíhíⁿ-ndó cáháⁿ-ndó tnúhu-í núu ññayu —càchí-gá xáhaⁿ-gã xii-güedé.

22 Te ní chiyócó-gã núu-güedé, te ní xáhaⁿ-gã:

—Chí ndúú tànhú Espiritú Yá Ndiòxí cundecu ndihí-ndo.

23 Te nchaa ññayu na quíndáá iní-xi tnúhu-í te cúñaha-ndo xii-yu sá ní quide càhnu iní Yá Ndiòxí nchaa cuéchi-yu. Te nchaa ññayu vá quíndáá iní tnúhu-í te cúñaha-ndo xii-yu sá vá cádá càhnu iní-gá cuéchi-yu —càchí-gá xáhaⁿ-gã xii-güedé.

Té Mǎxí càháⁿ ndihí-dé Jèsús

24 Te núu ùxúú cue tée ní xica cuu ndihí-gá, te ñⁿ-dé nání-dě Mǎxí tée ní xóo danàni-güedé Cuáchí, te tée-án ñá túú-dě ndécú ndihí-güedé òré ní sáhán Jèsús.

25 Te dava-gá cue tée ní xica cuu ndihí-gá ní xáhaⁿ-güedé xii-dé:

—Ní xìní-ndí Jèsús —càchí-güedé xáhaⁿ-güedé.

Te ní xáhaⁿ tē Mǎxí:

—Te vá quíndáá iní-í, chi ndéé quíni-í ndaha-gá núú ní quée nduyú, te dàquíhu-í díquí ndáhà-í núú ní caáⁿ nduyú-áⁿ, te dàquíhu ndàha-í yiqui naha-gá núú ní caáⁿ, ducáⁿ te quíndáá iní-í —càchí-dé xáhaⁿ-dē xii-güedé.

²⁶ Te núú ùná tucu nduu ní nataká tucu cue téé ní xica cuu ndihi Jèsús ìⁿ vehe, te nduu-áⁿ tnàhá té Mǎxí ndécú ndihi-güedé. Te cuèi ndèdí nihnu-güedé vehe-áⁿ, te ní quíhu Jèsús ndéé tnuú-güedé, te ní xáhaⁿ-gá:

—Yá Ndiòxí chíndèe ñaha-gá xii-ndo ïo váha cùu iní-ndó ndècu-ndo —cachí-gá xáhaⁿ-gá xii-güedé.

²⁷ Te ní xáhaⁿ-gá xii té Mǎxí:

—Cundehe ndàha-í te dàquíhu-n díquí ndáhá-n núú ní quée nduyú, te dàquíhu-n ndàha-n yiqui naha-í-a cuèndá quíndáá iní-n te vá cání ìⁿ caní úú iní-n —càchí-gá xáhaⁿ-gá xii-dé.

²⁸ Te ní xáhaⁿ tē Mǎxí xii-gá:

—jYòhó cúú-n Xìtohó-í! jYòhó cúú-n Ndiòxì-í! —càchí-dé xáhaⁿ-dē xii-gá.

²⁹ Te ní xáhaⁿ Jèsús:

—Mǎxí, ndéé vitna ní sándáá iní-n chi ndéé ní xiní ñáhá-n xii-í te ní sándáá iní-n, dico cùdíí-gá iní nchaa ñáyiu ñá túú ní ximí núú ñáhá xii-í, te ní sándáá iní-yu —càchí-gá xáhaⁿ-gá xii-dé.

Quíndáá iní-ó tnũhu yòdo tnuní núú tütú-a

³⁰ Te vai-gá sá vá yòo tnàhí ndàcu cada ñá túú yòdo tnuní núú tütú-a ní quide Jèsús núú cuè téé ní xica cuu ndihi-gá.

³¹ Dico dava-gá ní ngódó tnùní núú tütú-a cuèndá sá quíndáá iní-ndó sǎ Jèsús cúú-gá Crístú Déhe Dútú Ndiòxí, te naníhí tàhú-ndó te núu na quíndáá iní-ndó-gá.

21

Úsá cue téé ní xica cuu ndihi Jèsús ní xiní ñáhá-güedě xii-gá

¹ Te ingá nduu tucu xíndecu cue téé ní xica cuu ndihi Jèsús yuhu làgúná ñuú Tiberiás, te ní sáháⁿ-gá núú xíndecu-güedé-áⁿ. Te duha ní cuu ní xiní ñáhá-güedě xii-gá.

² Te ndècu té Ximú, àdi Pelú chi úú ñuú-dé, ndihi té Mǎxí téé ní xóo cúñaha-güedě Cuáchí, ndihi té Natanàél téé ñuú Cànaá, te ñuú-áⁿ yíndèhu-xi distritú Galiléa, te tnàhá ndi ndùú déhe té Zebèdeú, ndihi úú-gá tucu cue téé ní xica cuu ndihi-gá.

³ Te ní xáhaⁿ tē Pelú xii-güedé:

—Quíhíⁿ-í quítni-í chácá —càchí-dé xáhaⁿ-dē xii-güedé.

Te ní xáhaⁿ-güedě:

—Tnàhá nchúhú canchicúⁿ ñáhá-ndí xii-n quíhíⁿ tucu —càchí-güedé xáhaⁿ-güedě xii-dé.

Te ní xica-güedé cuáháⁿ-güedé ní sáá-güedé núú ndécú bàrcú, te ní quée-güedé xiti bàrcú-áⁿ cuáháⁿ-güedé. Te niú-áⁿ ñá ní ñhí tnàhí-güedé chácá.

⁴ Te sa ta cùditó-nǎ cuáháⁿ ní xiní-güedé Jèsús yuhu làgúná, dico ñá ní cùtnuní iní-güedé sá díú-gá.

⁵ Te ní xáhaⁿ-gá xii-güedé:

—Cue téé cuechi, çní níhí-ndó chácá caxi-o ñǎ? —càchí-gá xáhaⁿ-gá xii-güedé.

Te ní xáhaⁿ-güedé:

—Vèdana chácá ñà túú ní ñíhí-ndí —càchí-güedé xáhaⁿ-güedé xii-gá.

⁶Te ní xáhaⁿ Jèsús:

—Chí dáquèe ñunu-ndo ndàa xio cuha barcú chi ñíhí-ndó-dí —càchí-gá xáhaⁿ-gá xii-güedé.

Te ducaⁿ ñí quide-güedé, te òré nátava-güedé ñunu xití ndute, te ñá cündèe-gá-güedé natava-güedé cuendá sá ñí chítú chácá xití-xi.

⁷Te tée ní xica cuu ndíhí-gá téé ío cùu iní-gá ní xáhaⁿ-dè xii té Pèlú:

—¡Diu Xítoho Jesucristú! —càchí-dé xáhaⁿ-dè xii-dé.

Te sá ñí tecú dóho té Pèlú sá dúcáⁿ càháⁿ-dé nùu ní ndíúnuu-dé dóó-dé, chí dóó sá yímàa-ni-dé ñíhí-ndé ní cùu. Ducaⁿ te ní nuu ndava-dé barcú ní ngaunihnu-dé ndute, te cuáháⁿ-dé núú ndute-áⁿ ñí quene-dé ndéé ñuhu yìchí.

⁸Te dava-gá cue téé ndíhí té Pèlú diu-ni cue téé ní xica cuu ndíhí Jèsús ní quendóo-güedé dàtná ñíⁿ ciendú-gá mètrú te quene-güedé yuhu ndüte. Te táñuhu-ni-güedé ñunu-güedé chitu chácá ñí quene-güedé ndéé yuhu ndüte.

⁹Te òré ní quene-güedé ñuhu yìchí, te ní xiní-güedé càyú ñuhú, te núú ñuhú-áⁿ ñuhú ñíⁿ chácá ndíhí ñíⁿ pàà.

¹⁰Te ní xáhaⁿ Jèsús xii-güedé:

—Quíhíⁿ ngueheⁿ-ndo ñíⁿ úú chácá quiti íchí ñí tnií-ndo —càchí-gá xáhaⁿ-gá xii-güedé.

¹¹Núú té Pèlú ní sáháⁿ-dé núú ndécú bàrcú, te ní quée-dé xití-xi ní cándé-dé ñunu ñuhu chácá táñuhu-dé ní quene ndéé ñuhu yìchí, te chitu chácá náhnú, te ñuhu ñíⁿ ciendú údico úxí úní-dí xití ñunu-áⁿ, te cuèi ducaⁿ vài-dí ñuhu dico ñá ní ndátá ñunu-áⁿ.

¹²Te ní xáhaⁿ Jèsús:

—Chí nèhé cadí iní-ndó —càchí-gá xáhaⁿ-gá xii-güedé.

Dico ní ñíⁿ cue téé ní xica cuu ndíhí-gá-áⁿ ñá ní xicáⁿ tñuhú-güedé núú-gá nùu yoo cùu-gá, chí sa ní cutnùni iní-güedé sá díú Jèsús cúú-gá.

¹³Te Jèsús ní sáháⁿ-gá ní queheⁿ-gá pàà ní sáñaha-gá xii-güedé caxi-güedé, te dàtnùni ní queheⁿ tucu-gá chácá ñí sáñaha-gá xii-güedé.

¹⁴Vitna cùu úní xito sá xini ñáhá cue téé ní xica cuu ndíhí-gá sátá ñí ndoto-gá.

Jèsús càháⁿ ndíhí-gá té Pèlú

¹⁵Te sátá ñí tühú cohó-güedé ní sadí iní-güedé te ní xicáⁿ tñuhú Jèsús núú té Xímú, àdi Pelú chi úú diu-dé, te xáhaⁿ-gá:

—Xímú, déhe té Jónás, ¿cùu iní-gá-n yùhú dàcúxí dàva-gá cue téé-a ñá? —càchí-gá xáhaⁿ-gá xii-dé.

Te ní xáhaⁿ té Pèlú:

—Mèstrú, cùu iní ñáhà-í, yòhó sa nàha-n —cachí-dé xáhaⁿ-dè xii-gá.

Te ní xáhaⁿ Jèsús:

—Te núú ducaⁿ, te dacàxi-n cue mbéé líhli-í —càchí-gá xáhaⁿ-gá xii-dé.

Te cue mbéé-áⁿ cúú-güèdi ñáyiú cùu cuendá-gá.

¹⁶Te ní xáhaⁿ tucu-gá xii té Pèlú:

—Xímú, déhe té Jónás, ¿cùu iní ñáhà-n xii-í-u? —càchí-gá xáhaⁿ-gá xii-dé.

Te ní xáhaⁿ tucu té Pèlú:

—Mèstrú, cùu iní ñáhà-í, yòhó sa nàha-n —cachí-dé xáhaⁿ-dè xii-gá.

Te ní xáhaⁿ-gá:

—Te núu ducaⁿ, te coto-n cuè mbéè-í —càchí-gá xáhaⁿ-gã xii-dé.

¹⁷ Te xito cùu úní ní xáhaⁿ tùcu-gá xii té Pèlú:

—Xímú, déhe té Jónás, ¿cùu iní ñáhá-n-á? —càchí-gá xáhaⁿ-gã xii-dé.

Te té Pèlú ío ní cundiýí-dé sá dúcáⁿ ní cuu úní xito xicáⁿ tnúhú-gã núú-dě nũ ndisa sá cúú iní ñáhá-dě xii-gá, te ní xáhaⁿ-dë:

—Mèstrú, yòhó nchaa sa xini-n, te sa cùtnuní iní-n sã cúú iní ñáhà-í xii-n —càchí-dé xáhaⁿ-dë xii-gá.

Te ní xáhaⁿ Jèsús:

—Te núu ducaⁿ, te dacàxi-n cue mbéè-í.

¹⁸ Te na càchí tnúhu ndáá-í xii-n sã cùtnhá cuechi-gã-n ní xóo ndécuihnu mee-n dǒo-n, te ní xóo quíhíⁿ-n nděni ní xóo cachí iní-n, dico na yèi-n te dacáa-n ndáha-n, te ingá tée dacuihnu ñaha xii-n dóo-n te cada yica-dě candeca ñaha-dě xii-n quíhíⁿ ìiⁿ núú ñà túú tnàhá iní-n —càchí-gá xáhaⁿ-gã xii-dé.

¹⁹ Te sá dúcáⁿ ní cáháⁿ Jèsús cúú-xí sã ní dátècú tnúhu ñaha-gã xii té Pèlú nàcuáa cada-xi cuú-dé, te ducaⁿ càda cahnu-dé Yã Ndiõxí, te ní xáhaⁿ-gã xii-dé:

—¿Canchicúⁿ ñáhá-n xii-í! —càchí-gá xáhaⁿ-gã xii-dé.

Té ío cùu iní-gá

²⁰ Te ní nchócótó tè Pèlú ndàa sátá-dě, te ní xini-dé sá nchicúⁿ ñáhá ingá tée xica cuu ndihí-gá cuáháⁿ, téé ío cùu iní-gá téé ní xínucóo ñíhí-gá òré ní cudini ndihí ñaha-gã xii-güedé, te ñi-ni téé-áⁿ ní xicáⁿ tnúhú-dě núú-gã dàvá-áⁿ nũ nděda càa téé cuáha cuendá ñáhá xii-gá núú cuè téé cùu úhú iní ñáhá.

²¹ Te òré ní xini té Pèlú sá nchicúⁿ ñáhá téé-áⁿ, te ní xicáⁿ tnúhú-dě núú Jèsús, te xáhaⁿ-dë:

—Mèstrú, te téé-áⁿ, ¿ná cúú sã yáha-dé-i? —càchí-dé xáhaⁿ-dë xii-gá.

²² Te ní xáhaⁿ Jèsús:

—Te núu yúhú cuini-í sá cùndecu-ni-dé ndéé ná quixi tucu-í ñuyú-a, ¿te yòhó ná cuendá-n nũ xicáⁿ tnúhú-n? Yòhó canchicúⁿ ñáhá-ní xii-í —càchí-gá xáhaⁿ-gã xii-dé.

²³ Te ní xinu tnúhu núu nchàa ñáyiú sàndáá iní tnúhu-gá sá tē-áⁿ vã cùú-dé. Dico Jèsús ñá túú dùcaⁿ ní xáhaⁿ-gã sá vã cùú-dé, chi ní xáhaⁿ-gã: “Núu yúhú cuini-í sá tē-áⁿ cundecu-ni-dé ndéé ná quixi tucu-í ñuyú-a, ¿te yòhó ná cuendá-n?”, ñuha ní xáhaⁿ-gã xii té Pèlú.

²⁴ Te ñi-ni yúhú té Juáá téé ní sani iní-yu sá vã cùú càháⁿ ndáá-í nchaa nàcuáa ní cuu, te ducaⁿ ní tee-í núú tütú-a, te cùtnuní iní-ndó sã tnúhu ndáá cúú-xi.

²⁵ Te ndècu vai-gá núú sã ní quide Jèsús. Te núu dicó ní ngũndee nchaandi túhú ñá, te vaa ni te ñihí ñuyú te vã tnàhá núú-xi cundecu libré, te núu dicó ní ngũndee nchaa. Te ducaⁿ na cùnduu. Te ío chí cádá ndèe iní-nã vitna.

NCHAA NÀCUÁA NÍ QUIDE CUE TÉE NÍ TÁÚCHÍÚⁿ JÈSÚS DACUÀHA ÑAHA XII ÑÁYIU TNÚHU-GÁ

Jèsús ní cachí tnúhu ndáá-gá sá quíxí Espíritú Yá Ndiòxí cundecu ndihi ñáyiu

¹ Te duha ní cáháⁿ té Lùcá ní xii-dé té Tëofilú: Yúhú sa ní chídó tnùn-í núú librú ndéé díhna nchaa sá ní quide Jèsús, ndihi nchaa sá ní dácuaá-gá ñáyiu. Te ní chídó tnùn-í nchaa sá ní quide-gá ndéé nduu ní quesaha-gá quidé chiúⁿ-gá,

² ndihi nchaa sá ní quide-gá ndéé òré cuánda-gá andiu. Te sa ta cùyatni nduu ndaa-gá andiu, te ní ndatnúhu-gá ndihi cue téé ní cáháⁿ-gá dacuaá ñaha xii ñáyiu tnúhu-gá, te mee Espíritú Yá Ndiòxí ní chindee ñaha-xi xii-gá ní xáhaⁿ-gá nàcuáa cada-güedé.

³ Te sátá ní xihí-gá te ní ndoto-gá, te ní xíndecu-gá údico nduu. Te titní xito ní sáháⁿ-gá núú ní xíndecu-güedé, te ducaⁿ ní quide-gá cuendá quini-güedé sá ndáá ní ndoto-gá, te ní xáhaⁿ-gá nàcuáa quide Yá Ndiòxí ndíhu ndaha-gá ñáyiu.

⁴ Te ìⁿ nduu ndècu ndihi ñaha-gá xii-güedé, te ní xáhaⁿ-gá:

—Vá quéé-ní-ndó ñúú Jerusálén, chí cundetú-ndo quíxí Espíritú Yá Ndiòxí cundecu ndihi-ndo, chí sa ní cachí tnúhu-í sá dúcáⁿ ní cáháⁿ Tátá-ó Dütú Ndiòxí Yá ndécú àndiu nacuaá cunduu.

⁵ Te ndáá sá ndí Juáá ní dácuaándute ñaha ndí xii-ndo, dico vitna ñá túú-gá cuéhé nduu, te quexio Espíritú Yá Ndiòxí cundecu ndihi-ndo —cachí-gá xáhaⁿ-gá xii-güedé.

Jèsús cuánda-gá andiu

⁶ Te òré ní xíndecu-güedé ndihi Jèsús, te ní xáhaⁿ-güedé xii-gá:

—Mèstrú, cuini-ndí cachí tnúhu-n núu sa ta cùyatni nduu chindee-n ñáyiu ñúú Isràél cuendá taxi tnùn-í tucú-yu ñúú-yu —cachí-güedé xáhaⁿ-güedé xii-gá.

⁷ Te ní xáhaⁿ Jèsús xii-güedé:

—Ñá túú xini ñuhu-xi cunaha nchahó xíáⁿ, chí Tátá-ó Dütú Ndiòxí náhá-gá ná nduu càda-gá nchaa sá ní cáháⁿ-gá.

⁸ Te òré quexio Espíritú Yá Ndiòxí cundecu ndihi-ndo, te cuyi-ndo ní yuhu ní iní-ndó quíhíⁿ-ndó cáháⁿ-ndó tnúhu-í núú ñáyiu ñúú Jerusálén ndihi núú ñáyiu distrítú Jüdeá ndihi núú ñáyiu distrítú Sámariá. Te ducaⁿ-ni cáháⁿ-ndó quíhíⁿ-ndó ní caxico ñuyúú —cachí-gá xáhaⁿ-gá xii-güedé.

⁹ Te sátá dúcáⁿ ní cáháⁿ-gá, te ndèhe-güedé ní ndanchita-gá cuánda-gá andiu cuándihu-gá xití vícò, te ñá túú-gá ní xini ñáhá-güedé xii-gá.

¹⁰ Te ndèhe vihi-güedé andiu núu ndéé quini ñáhá-güedé xii-gá yòtnúhu, te ní quexio cunu úú cue téé ñihnu dóó cuixíⁿ núú ndécú-güedé.

¹¹ Te xáhaⁿ-güedé:

—Nchòhó cue téé Galileá, ¿ná cuendá ndéhé-ndó àndiu? Te dàtná-ni càa Jesús cuánda-gá andiu vitna, te ducaⁿ-ni cünduu-gá quixi tucu-gá —cachí cue téé ñihnu dóó cuixíⁿ-áⁿ xáhaⁿ-güedé.

Cuendá sá ñá túú-gá ndí Judás núu ní nanducu-güedé té Màtiá ní nucúnutí-dé núú ndí

12 Te ní ndee-güedé yucu Òlívú cuánuhú-güedé ñuú Jerusàlén, te ní xúhuⁿ-güedé cuèdicó cuádava òré ichi.

13 Te òré ní ndexio-güedé ñuú-áⁿ, te cuánda-güedé cuàrtú ndéé núú ñnu, chi vehe yòdo tnaha ndecu-güedé. Te ní naníhí tnáhá-güedé nchaa-güedé té Pèlú, té Jácobó, té Juàá, té Ndríxí, té Lìpé, té Mǎxí, té Bartolòmé, té Mǎteú, té Jácobó déhe té Àlféu, ndíhí té Xímú téé ní cundihi cue téé canànistá, ndíhí té Jùdás ñaní té Jácobó.

14 Te ní naníhí tnáhá-güedé nchaa-güedé yàcáⁿ ndíhí tá Màriá nǎná Jèsús, ndíhí cue ñaní-gá ndíhí dava-gá cue ñáyiú dǐhí. Te ìⁿ-ní ní cuú-yu ní cáháⁿ ndíhí-yu Yá Ndiòxí.

15 Te ìⁿ nduu ní xíndecu dàtná ìⁿ cièndú ócò mee-ni ñáyiú sàndáá iní tnúhu Jèsús, te ní ngúnutnǐí té Pèlú núú-yu, te ní xáhaⁿ-dè xíí-yu:

16-17 —Nchòhó cue ñáyiú ndècu ndíhí-í ichi Xítohó Jesucristú, na càni-í cuèndú núú-ndó nàcuáa ní chídó tnùní ndíí Dàvíí téé ní xíndecu ndéé sanaha nàcuáa ní cáháⁿ Espiritú Yá Ndiòxí cuèndá té Jùdás. Te dacuití òucaⁿ ní cuu, chi tnáhá té Jùdás ní xíndecu ndíhí-o, te ní xinu cuechi-o ndíhí-dé núú-gǎ sá dǐhna, te ducaⁿ ní quide-dé ní sáha cuèndá-dé Jèsús núú cuè téé cùu úhú iní ñáhá xì-gá.

18 Te ní cháhu ñaha-güedé xii-dé cuèndá sá ní sáha cuèndá ñáhá-dè xii-gá. Te ní sáháⁿ-dè ìⁿ xichi ní sata caa-dé méé-dè, te ní ngava-dé, te ní cahndí duuⁿ xití-dé te xíaⁿ ní xihí-dé. Te ní naqueheⁿ-güedé dǐhúⁿ sǎ ní cháhu-güedé ndíí, te ní nacuaaⁿ-güedé ñuhu núú ní ngava ndíí-áⁿ.

19 Te nchaa ñáyiú Jerusàlén ní ñíhí-yu tnúhu, te ní dánání-yu ñuhu-áⁿ Acèldamá. Te tnúhu mèé-yu quèe-xi: Ñuhu núú ní sati níñí.

20 Te duha ní cáháⁿ ndíí Dàvíí ní chídó tnùní ndíí núú librú Sǎlmú ní dándõ ndíí: “Nà ndóo nahi vehe-dé, vá yõ ìⁿ quíhíⁿ cundecu”, duha ní cáháⁿ ndíí. Te ìngá tucu tnúhu ní cachí ndíí: “Na nànducu-güedé ìngá téé nucúnutnǐí núú ndíí”, duha ní cáháⁿ ndíí Dàvíí —càchí té Pèlú xáhaⁿ-dè xíí-yu.

21-22 Te ní xáhaⁿ tùcu-dé:

—Te ducaⁿ ní cáháⁿ ndíí Dàvíí, te vitna xìni ñuhu-xi nanducu-o ìⁿ téé nucúnutnǐí-dé núú ndíí Jùdás, te xìni ñuhu-xi diu-ni ìⁿ téé ní xica cuu ndíhí Xítohó Jesucristú cúnáhá ní xica cuu-o ndíhí-gá, ìⁿ téé ní xiní ndéé òré ní dácuaándute ñaha ndíí Juàá xii-gá, te ndéé òré cuánda-gá andíu. Te téé nanducu-o cundecu-dé cáháⁿ-dè nàcuáa ní cuu ní ndoto-gá —càchí té Pèlú xáhaⁿ-dè xíí-yu.

23 Te ní cacunehe-güedé úú tnáhá-güedé ñuú ndédacaa-güedé nduu táhú-güedé nucúnutnǐí-güedé núú ndíí. Te ìⁿ-dè nání-dè Chèè Barsábás, àdi Justú chi úú diu-dé, te ìngá-dé nání-dè Màtiá.

24 Te ní cáháⁿ ndíhí-güedé Yá Ndiòxí, te xáhaⁿ-güedé xii-gá:

—Yòhó Dútú Ndiòxí xìní-n ìní nchaa ñáyiú, te mee-n nàha-n núú ndéda càa núú úú cue téé-a tnáhá iní-n

25 cáháⁿ-güedé tnúhu-n núú ñáyiú, te téé-áⁿ nucúnutnǐí-dé núú ndíí Jùdás, chi cuáháⁿ ndíí núú ùhú núú ndàhú núú tàù-xi quíhíⁿ ndíí —càchí-güedé xáhaⁿ-güedé xii-gá.

26 Te ní xito ndéé-güedé, te ní cutnùní sá tée nàni Matíá quendóo-dé ndíhí úxí ìⁿ cue téé ní táuchíúⁿ-gá dacuaàha ñaha xii ñáyiú tnúhu-gá.

2

Ní quexio Espíritú Yá Ndiöxí cundecu ndihi ñáyi

1 Te ní sáá nduu còo vico Pentecostés te xĩndecu nchaa ñáyi ìⁿ-ni xìchi.

2 Te ní tecú dóho-yu uuⁿi ní ñíhi andi, dàtná quidé ìⁿ táchí ñíhi vìhi ní quide-xi, te ducaⁿ ní cuu ndéé xití vehe núú ndécũ-yu nchaa-yu.

3 Te ní xiní-yu dàtná cáá ítá ñuhú cáá sá ndécú xití vehe, te ní xíté nuu-xi ní ngoyo ndodo-xi díquĩ-yu nchaa-yu.

4 Te ducaⁿ ní quide-xi òré ní quexio Espíritú Yá Ndiöxí ní ngúndecu ndihí-yu nchaa-yu. Te ní ngúita-yu ní cáháⁿ-yu tnúhu cue ñáyi ñá túú cùu ñáyi isràél, te nchaa xiáⁿ ní quide Espíritú Yá Ndiöxí.

5 Te vai ñáyi isràél xĩndecu nchaa dava-gá ñuu ní tacá-yu ñuu Jerusalén, te ñáyi-áⁿ ìo ndùcu ndeé-yu dácuahá-yu nchaa ndudú sá dácuaaha tnahí-yu.

6 Te òré ní tecú dóho-yu ñíhi, te ní sáháⁿ-yu ní xĩndedóho-yu tnúhu cáháⁿ méé-yu ìⁿ ìⁿ ñuu-yu, chi ndi dííⁿ ndí dííⁿ tnúhu cáháⁿ ñáyi ndècu-áⁿ.

7 Te xiáⁿ ìo ní cuñúhu ñáyi véxi dava-gá ñuu, te ní xitnàhá-yu:

—Ñáyi ducaⁿ xicáháⁿ cúu-yu ñáyi distrítú Galiléa.

8 ¿Te nása ní quidé-yu ní cutúha-yu nàcuáa cáháⁿ-ó ìⁿ ìⁿ-o ndéé lìhli-o?

9 Te iha véxi ñáyi dava nacióⁿ, chi véxi ñáyi Partía, véxi ñáyi Mèdiá, véxi ñáyi Èlám, véxi ñáyi Mesopòtamiá, véxi ñáyi Júdeá, véxi ñáyi Capadociá, véxi ñáyi Pòntó, véxi ñáyi Asíá,

10 véxi ñáyi Frigiá, véxi ñáyi Pànfilíá, véxi ñáyi Ègíptú, véxi ñáyi Áfricá ñáyi ndècu ndéé núú-gá-xi ñuu Cirené. Te tnàhá ñáyi ñuu Rómá véxi, te ñáyi-áⁿ chi ñá díú mèe-ni ñáyi isràél cúu-yu nchaa-yu, dico ìⁿ-ni cùu sá dácuahá-yu.

11 Te véxi ñáyi Crétá, véxi ñáyi Àrabíá. Te nchaa-o sa ndedóho-o cáháⁿ-yu nàcuáa cuáháⁿ tnúhu mee-o ìⁿ ìⁿ-o. Te nchaa ñáyi xicáháⁿ tnúhu-o cáháⁿ-yu cuèndá nchaa sá vã yòo tnàhí ndàcu cada ní quide Yá Ndiöxí —càchí-yu xitnàhá-yu.

12 Te ní cuñúhu vìhí-yu, te ñá ná sáá iní-yu nása ní cuu, te xitnàhá-yu:

—¿Nása ní cuu duha cáháⁿ-yu tnúhu-o? —càchí-yu xitnàhá-yu.

13 Te davá-yu ní sácú ndeé yíchí ñáhã-yu, te xitnàhá-yu:

—Xixini ñáyi-áⁿ núu ñá náhã-yu tnúhu cáháⁿ-yu —càchí-yu xitnàhá-yu.

Tnúhu ní xáhaⁿ tẽ Pèlú xii cue ñáyi

14 Te ní ngúnutnii té Pèlú ndihí úxí ìⁿ cue téé ní táuchíúⁿ Jèsús dácuaaha ñaha xii ñáyi tnúhu-gá, te ñíhi ní cáháⁿ-dè, te xáhaⁿ-dè xii-yu:

—Nchaa nchòhó ñáyi distrítú Júdeá ndihí nchòhó ñáyi ñuu Jerusalén, cundedóho váha-ndo tnúhu na cáháⁿ-í-a.

15 Ná ndáá tnúhu cáháⁿ-ndó, chi ñá túú xini-ndí te ducaⁿ cáháⁿ-ndó, chi davitna cùu-xi caá ìⁿ dàtnéé, vátá tnàhá-gá òré coho ñáyi ndidí.

16 Te yúhú ná càchí tnúhu-í xii-ndo vìtna nacuaá ní xáhaⁿ Yá Ndiöxí xii ndí Jòel téé ní xóo cáháⁿ tnúhu-gá ndéé sanaha nàcuáa cada ñaha-gá xii ñáyi, te ndí-áⁿ ní chídó tnùní ndí nàcuáa ní cáháⁿ-gá.

17 Te duha ní xáhaⁿ-gá xii ndí:

Cùmání-gã sáá nduu nãa ñuyú, te cuáñaha-ĩ Espíritú-í cundecu ndihí nchaa ñáyi na quíndáá iní ñáhã xii-í.

Te cue déhe-yu cáháⁿ-yu tnúhu-í,

te cue tée cuechi dacòto núú ñáhá-xí xì-güedé,
 te ducaⁿ-ni cuè tée ni sàhnu cáháⁿ saní-güedé,
 te diu-ni cuèndá nchaa sá quidè-í ducaⁿ dacoto núú ñáhá-xí xì-güedé.

18 Te nchaa ñáiyu xinu cuechi núú-í cáháⁿ-yu tnúhu-í, te cuáñaha-í Espíritú-í cundecu ndihí-yu.

19 Te ndéé andiu, yàcáⁿ vai sá cáda-í nàcuáa cuñúhu vñhí-yu,
 te núú ñuyú-a cada-í ìⁿ sá vátá quini tnàhí-gá-yu,
 te ngoyo ñíñi te ngoyo ñuhú te quene vñhi ñúhmá.

20 Te vá dáyèhé-gá nchíanchii,
 cuu nee ñuyú te cuu ticuèhé núú yóo dàtná ticuèhé ñíñi.

Te dàv-áⁿ sáá nduu quixi Yáá cúú Xitohó-yu,
 te nduu-áⁿ cuu-xi ìⁿ nduu càhnu vihi, chi cada-gá nchaa sá ñà túú xìni-yu, te cuñúhu vñhí-yu.

21 Te òré xiáⁿ te nchaa ñáiyu càháⁿ ndihí ñaha xì Yáá cúú Xitohó-yu-áⁿ nanihí tànhú-yu.

Duha ní xáhaⁿ Yá Ndióxi xii ndíi Jòel ní chídó tnùnì ndíi.

22 Te nchòhó ñáiyu isràèl, cundedóho váha-ndo tnúhu na càháⁿ-í-a cuèndá Jèsús tée ñuu Nazàrét. Te Jèsús ní quide-gá chiúⁿ Yá Ndióxi, chi mee Yá Ndióxi ní chindee ñaha-gá ní quide Jèsús ná daha núú chiúⁿ, núú xiáⁿ ní ndacu-gá ní quide-gá nchaa sá vá yóo tnàhí ndacu cada, te xiáⁿ ní cuñúhu vñhi-ndo. Te sa ñaha-ndo nacuaá ní quide-gá cútnàhá ní xica cuu-gá ñuyú.

23 Te ndíi Júdás ní taxi cuèndá ñáhá ndíi Jèsús xii nchòhó cue tée ní cuu úhú iní ñáhá xì-gá, te ní ndúcú-ndó cuè tée úhú iní-xi ní tñi ñaha-güedé xii-gá te ní sata caa ñaha-güedé núú cùrúxí, te núú cùrúxí-áⁿ ní xihí-gá. Dico sa ní cutnùnì iní Yá Ndióxi sá dúcáⁿ cada-ndo Jèsús, te mee Yá Ndióxi ní cachí-gá sá dúcáⁿ ndòho Jèsús.

24 Te diu-ni mee Yá Ndióxi ní dándótó-gá Jèsús, chi sa ní cáháⁿ-gá sá òré cuú-gá te vá cuú dúcáⁿ-gá.

25 Te ndíi Dàvíí tée ní xíndaha ñaha xii cue ñani tnáhá-ó ní xíndecu ndéé sanaha ní chídó tnùnì ndíi nàcuáa ní cáháⁿ Jèsús, te duha ní cáháⁿ-gá: Cùtnunì iní-í sá ncháá nduu ndecu ndihí-í Yá Ndióxi, te ío chindee ñaha-gá xii-í, te ñá túú tnàhí sá yùhú-í.

26 Te ío ndácáⁿ tànhú-í núú Yá Ndióxi chi cùdíí iní-í, chi sa ñaha-í sá cuú-í dico ndoto-í,

27 chi vá dáñá-gá quihíⁿ dúcáⁿ àlmá-í núú ndécú ñáiyu ní xihí,
 te vá dáñá-gá téhyú yiqui cùnú-í chi cùu-í Déhe-gá, te yúhú sa ñaha-í sá cuú iní ñáhá-gá xii-í.

28 Te sa ní cachí tnúhu-gá nàcuáa cada-í cundecu-í ichi váha, te cuèndá sá ndécú ndihí ñaha-gá xii-í núu ío cùdíí iní-í.

Duha ní cáháⁿ Jèsús, te ducaⁿ ní chídó tnùnì ndíi Dàvíí.

29 Te nchòhó cue ñani tnáhá-í, na cachí tnúhu ndáá-í xii-ndo cuèndá ndíi Dàvíí tée ní xíndecu ndéé sanaha vñhi, chi ní xihí-dé, te ní chindúxi ñaha-güedé, te ñaha-ndo tnáví núú ní chindúxi ñaha-güedé.

30 Te ndíi Dàvíí ní xóo cáháⁿ ndíi tnúhu Yá Ndióxi, te sa ñaha ndíi sá Yá Ndióxi ní cáháⁿ ndáá cuiti-gá sá díú-ní ìⁿ tnaha ndíi taxi tnùnì-dé ñáiyu isràèl ndéé cuèé-gá dàtná ní xóo taxi tnùnì méé ndíi cútnàhá ní xíndecu ndíi, te téé taxi tnùnì-áⁿ cúú Cristú chi cùu-gá ìⁿ tnaha ndíi.

31 Te sa ní cutnùní iní ndíi sá ndótó Crìstú, núu xǎ́n ní chídó tñùní ndíi sá vǎ dáńá Yǎ Ndiòxí sá quíhíⁿ dúcáⁿ àlmá-gǎ cundecu-xi núu ndécú ñǎyiu ní xíhí, te vǎ dáńá-gǎ téhyú yiqui cuñú-gǎ.

32 Te ndáá chi Yá Ndiòxí ní dándótó-gǎ Jèsús, te nchúhú ní xiní-ndí sá ní ndoto-gǎ.

33 Te ní xáhaⁿ Yǎ Ndiòxí xii Jèsús sá cundecu ndíhi ñaha-gǎ, te taxi tñùní Jèsús ni caa ni quíhíⁿ. Te Yá Ndiòxí ní sǎñaha-gǎ Espíritú-gǎ ní ngúndecu ndíhi-gǎ nàcuáa ní xáhaⁿ-gǎ, te ñiu Jèsús ní quide-gǎ nchaa sá ní xiní-ndó vitna ndíhi nchaa sá ní xíndedóho-ndo.

34 Te ndíi Dàvíí ñǎ túú ní ndàa túu ndíi andíu ndíhi yiqui cuñú ndíi, te òré ndécú-gǎ ndíi ñuyíú-a ní cachí ndíi:

Dútú Ndiòxí ní xáhaⁿ-gǎ xii Yaá cúú Xítohó-í:

“Ngóo xio cùha-í,

35 te yúhú cada-í te nchaa sá cúú ùhú iní ñáhá xii-n canehe-xi sá yíñuhu núu-n.”

Duha ní xáhaⁿ Dútú Ndiòxí xii Yaá cúú Xítohó-í cǎchí ndíi.

36 Te nchòhó ñǎyiu isràél cùu-ndo ndí mee-í, te cuñí-í cundedóho váha-ndo ñⁿ tñúhu na cǎháⁿ-í-a. Jèsús ní sata caa-ndo-gǎ núu cùrúxí, dico Yá Ndiòxí ní cachí-gǎ sá Jèsús dacǎcu nihnu-gǎ ñǎyiu, te vǎ cání ñⁿ caní úú iní-ndó, chi ñiu-gǎ cúnùu-gǎ núu nchàa ñǎyiu —cǎchí té Pèlú xáhaⁿ-dě xii-yu.

37 Te ñǎyiu ní xíndedóho tñúhu ní cǎháⁿ té Pèlú ní ndixi túu iní-yu nàcuáa quidé-yu ndécú-yu, te ní xǎháⁿ-yu xii-dé ndíhi dava-gǎ cue téé ní táuchíúⁿ Jèsús dacuàha ñaha xii-yu tñúhu-gǎ:

—Nchaa nchòhó cue ñani tñáhá-ndí, ñnása cachí-ndó cùnduu, nása cada-ndí vitna? —cǎchí-yu xǎháⁿ-yu xii-güedé.

38 Te ní xáhaⁿ té Pèlú xii-yu:

—Daña-ndo nchàa sá cuèhé sá dúhá quide-ndo, te cada cǎhnu iní Yǎ Ndiòxí nchaa yíca cuèchi-ndo. Te cuandute-ndo cuèndá quini-yu sá ní natuha-ndo ìchi Jesús, te ducaⁿ te taxi Yá Ndiòxí Espíritú-gǎ cundecu ndíhi-ndo,

39 chi cuñí-gǎ taxi-gǎ Espíritú-gǎ xii mee-ndo ndíhi déhe-ndo, te cuáñaha-gǎ Espíritú-gǎ xii nchaa ñǎyiu ni cǎa xico ñuyíú, ñǎyiu cǎháⁿ-gǎ cundecu ìchi-gǎ ndéé idá-gǎ —cǎchí té Pèlú xáhaⁿ-dě xii-yu.

40 Te titní-gǎ tñúhu ní xáhaⁿ-dě nàcuáa cadá-yu, te xáhaⁿ tùcu-dé:

—Daña-ndo nchàa sá cuèhé sá dúhá quide-ndo, vǎ cadá-ndó sǎ quidé dáva-gǎ-yu —cǎchí-dé xáhaⁿ-dě.

41 Te nchaa ñǎyiu ní sándáá iní-xi tñúhu ní cǎháⁿ té Pèlú ní sanduté-yu, te ñiu-ni nduu-ǎⁿ ní cuu dàtná úní mǐl ñǎyiu ní sándáá iní-xi ní xíndecu ndíhi ñǎyiu xidácuáhá tñúhu Yá Ndiòxí.

42 Te ío ní xíndedóho-yu tñúhu ní cǎháⁿ cue téé ní táuchíúⁿ Jèsús dacuàha ñaha xii-yu tñúhu-gǎ, te ío váha ní xíndecú-yu ní xóo ndatnúhu váha-yu. Te ní xóo caxi cǎhñú-yu cuèndá náhá-yu sá dúcáⁿ ní quide Jèsús cútñáhá vátá cǎhni ñaha-gǎ-güedé xii-gǎ, te ní xóo cǎháⁿ ndíhi-yu Yá Ndiòxí.

Nàcuáa ní quide nchaa ñǎyiu ní sándáá iní tñúhu Jèsús ndéé díhna nuu

43 Te ncháa-yu ní cuñúhu víhí-yu, chi cue téé ní táuchíúⁿ-gǎ dacuàha ñaha xii-yu tñúhu-gǎ ní quide-güedé titní núú sǎ vǎ yòo tñáhí ndàcu cada, te xǎ́n ní cutnùní iní-yu sá méé Yá Ndiòxí chíndèe ñaha-gǎ xii-güedé.

44 Te nchaa ñáyiú sàndáá ínì tnúhu Jèsús càháⁿ ndihì tnàha váha-yu, te cuèi-ni nchaa ndachìuⁿ nandíhi-yu ndècu cahnu.

45 Te ní dícõ-yu nchaa ndachìuⁿ sá ñà túú xìnì ñuhú-yu, te ní níhì-yu díhúⁿ te ní sáñhàⁿ-yu xii nchaa ñáyiú ñá níhì.

46 Te ìⁿ nduu ìⁿ nduu ní xóo quíhìⁿ ndihì tnàhá-yu veñúhu càhnu sá ïo cùnnu. Te ní xexi ndihì tnàhá-yu vehé-yu. Te ío ní cudíí ínì-yu chí ìⁿ-ní ní cuú-yu nchaa-yu.

47 Te ío ní ndacáⁿ táhù-yu núú Yá Ndióxi, te nchaa dava-gá ñáyiú ní cáháⁿ váha-yu cuèndá ñáyiú-áⁿ. Te mee Yá Ndióxi ní quide-gá ní sàndáá ínì vài-gá ñáyiú, te ní xíndecú-yu ndihì dava-gá ñáyiú xídácuáhá tnúhu-gá.

3

Quide tátna-güedé ìⁿ téé yacua

1 Te ìⁿ nduu òré caá únì sacuaa, òré xícáháⁿ-yu ndihì Yá Ndióxi cuáháⁿ té Pèlú ndihì té Juàá veñúhu càhnu sá ïo cùnnu sácúú-xí ñáyiú isràél.

2 Te ndècu ìⁿ téé yacua, te ducaⁿ-ní càa-dé ní cacu-dé. Te sàháⁿ ndihì ñàhá-yu veñúhu càhnu sá ïo cùnnu, te sácóo-dé ìⁿ xio yuyèhe veñúhu sá nánì Yèhe Vii Caa, chí ducaⁿ nàni-xi, te xicáⁿ ndàhú-dé núú nchaa ñáyiú sàháⁿ veñúhu.

3 Te ní xiní-dé té Pèlú ndihì té Juàá cuánguìhu-güedé veñúhu, te xicáⁿ ndàhú-dé núú-güedé.

4 Te ní ndacoto-güedé núú-dé, te ní xáhaⁿ té Pèlú xii téé yacua-áⁿ:

—Cundehe ñàha xii-ndí —càchí té Pèlú xáhaⁿ-dè xii-dé.

5 Te ní xíndéhe ñàha-dé xii-güedé, chí ní cáháⁿ-dè sá ïo ìⁿ sá cuáñaha-güedé.

6 Te ní xáhaⁿ té Pèlú:

—Ñá túú tnàhí díhúⁿ néhè-í dico chindee ñàha-í xii-n, te Xítóhó Jesucristú Yaa ní xíndecu ñúú Nazàrét, ndacu-gá cada tátna ñaha-gá xii-n, ndacuñí te caa-n —càchí-dé xáhaⁿ-dè.

7 Te té Pèlú ní tñi-dé ndaha cùha téé yacua-áⁿ, te ní ngúíta-dé ndàcàni ñaha-dé, te òré xíaⁿ ní naníhí ndéé-dé, te ní ndúha sàhá-dé.

8 Te ní ndacuñí cunu mee-dé te ní xica-dé, te ní cachí-dé sá ïo càhnu cuu Yá Ndióxi cuèndá sá ní ndúha-dé, te ta sàndava-dé cuánguìhu ndihì ñaha-güedé veñúhu.

9 Te nchaa ñáyiú xíndecu-áⁿ ní xiní-yu sá ní nduu váha-dé, te ndèhé-yu ndàcáⁿ táhù-dé núú Yá Ndióxi.

10 Te ní naquiní ñàhá-yu xii-dé sá díú tèe xicáⁿ ndàhú téé ní xóo cunucóo yuyèhe veñúhu sá nánì Yèhe Vii Caa cuu-dé, te ní cuñúhu vñhí-yu sá ní ndúha-dé.

Té Pèlú ní cáháⁿ-dè corrèdór sá néhé ñiú ndí Salòmón

11 Te sáta veñúhu càa corrèdór sá néhé ñiú ndí Salòmón. Yacáⁿ ndécú té Pèlú ndihì té Juàá ndihì téé ní ndúha sàhá-xi, te ñá cuíní téé ní ndúha sàhá-xi-áⁿ dañà-dé quíhìⁿ-güedé dandóo ñaha-güedé xii-dé. Te chítú-yu ní quexio coyó-yu núú ndécú-güedé, te ní cuñúhu vñhí-yu sá ní ndúha sàhá téé cùhú-áⁿ.

12 Te té Pèlú ní xiní-dé ní quexio coyó-yu, te ní xáhaⁿ-dè xii-yu:

—Nchòhó ñáyiú isràél, ¿ná cuèndá ndéé dúcáⁿ ndèhe ñaha-ndo xii-ndí te cuñúhu-ndo sá ní ndúha téé yacua-áiⁿ? Nchòhó cáháⁿ-ndó sá méé-ndí ní

quide tátna-ndí-dé sá lo váha iní-ndí, dico ñáhá chi ñá díú mèe-ndí ní quide tátna-ndí-dé.

13 Chi Yá Ndiöxí ní ndadúha ñaha-gã xii-dé, chi ñu-gá cúú Ndiöxí ndíi Àbrahám ndíi ndíi Isàac ndíi ndíi Jácób, te ñu-ni cue téé-áⁿ cúú ñani tnáhá-ó ní xíndecu ndéé sanaha vihi. Te ñu-ni Ndiöxí-áⁿ ní xáhaⁿ-gã xii Déhe-gá Jèsús sá táxi tnùní-gá nchaa sá ío andíu ndíi nchaa ñáyíu ndéu ñuyíú-a, dico mee-ndo ní sáha cuendá-ndó Jèsús núú téé cùchiuⁿ. Te té Pilatú ní cuiní-dé dacácu-dé Jèsús ní cùu, te mee-ndo ñá ní cuiní-ndó.

14 Te Yá Ndiöxí ní cachí-gá sá lo váha iní Jèsús te ñá túú tnàhí cuéchi-gá. Te mee-ndo ñá túú ní cuiní-ndó cácu-gá ñuu ní xáhaⁿ-ndo xii té Pilatú sá váha-gá dacácu-dé ñⁿ téé ndéu vihi cuéchi-xi, te vá dacácu-dé Jèsús.

15 Te ní xáhaⁿ-ndo sá cáhni-güedé Jèsús Yaá quidé nchito-o ndecu-o, dico Yá Ndiöxí ní dándótó ñaha-gá, te ní xiní-ndí sá ndáá ní ndoto-gá.

16 Te nchúhú sa nàha-ndí sá díú Xítohó Jesucristú ní ndadúha-gá téé yacua, te náí-dé nútñí-a. Te ducaⁿ ní quide-gá chi ní sándáá iní ñáhá-dé xii-gá, te vitna ní xiní-ndó sá ndáá ní ndúha-dé.

17 Te nchóhó ndíi cue téé cùnuu ní sahani-ndo Xítohó Jesucristú, chi ñá ní cùtnuní iní-ndó sá ní quide-ndo.

18 Te cue téé ní xóo cáháⁿ tnúhu Yá Ndiöxí ndéé sanaha ní chídó tnùní-güedé nàcuáa ní xáhaⁿ Yá Ndiöxí xii-güedé sá Crístú quixi-gá ñuyíú-a, te ndoho vihi-gá, te xíãⁿ ñuu ducaⁿ ní cuu ío ní ndoho-gá.

19 Te vitna te dañá-ndo ncháa sá cuèhé sá dúhá quide-ndo. Te quindáá iní-ndó Yá Ndiöxí, te ducaⁿ te cada cáhnu iní-gá nchaa sá ñá túú váha ní quide-ndo ñuyíú-a, te canu ichi ñaha-gã xii-ndo ñⁿ ichi váha.

20 Te ní tendaha-gã Crístú ní quixi-gá ñuyíú-a, chi mee Yá Ndiöxí ní cachí-gá sá díú Crístú taunihnu ñaha-gã xii-ndo.

21 Te dacuítí cùndecu-gá andíu ndéé ná sáá nduu nàtaxi ndecu-gá nchaa sá ndécú ñuyíú nàcuáa sàni iní méé-gá. Te ñu ducaⁿ ní cáháⁿ Yá Ndiöxí ñuu ducaⁿ ní chídó tnùní cue téé ní xóo cáháⁿ tnúhu-gá ndéé sanaha.

22 Te ndíi Moisés ní xáhaⁿ ndíi xii cue ñani tnáhá-ó ní xíndecu ndéé sanaha: “Yá Ndiöxí tendaha-gã ñⁿ téé quixi-dé cáháⁿ-dé tnúhu-gá dàtná cuiní-ndó ní quide ñaha-gã xii yúhú, te téé-áⁿ cuu-dé ñⁿ ñani tnáhá-ndó. Te cundedóhó váha-ndo ncháa tnúhu cáháⁿ-dé.

23 Te nchaa ñáyíu vá quindáá iní tnúhu cáháⁿ-dé, te cuíta nihnú-yu chi vá quíhíⁿ-yu núú quíhíⁿ ñáyíu sándáá iní tnúhu Yá Ndiöxí”, duha ní xáhaⁿ ndíi Moisés xii-yu —càchí té Pèlú xáhaⁿ-dé xii-yu.

24 Te ní xáhaⁿ tùcu té Pèlú xii-yu:

—Ndíi Sàmuel ndíi nchaa cue téé nchícúⁿ-gá ní xóo cáháⁿ tnúhu Yá Ndiöxí ndéé sanaha ní cáháⁿ-güedé nàcuáa cada-xi vitna.

25 Te Yá Ndiöxí ní cáháⁿ-gá ndíi cue téé ní cáháⁿ tnúhu-gá ndéé sanaha. Te ní quide ndáá-gá ndíi nchaa ñani tnáhá-ó ní xíndecu ndéé sanaha nàcuáa cada-gá naníhí tãhú-ó. Te duha ní xáhaⁿ-gã xii ndíi Àbrahám: “Ío nduu cacu ñⁿ tnàha-n, te téé-áⁿ cada-dé te naníhí tãhú ñáyíu ñuyíú-a”, duha ní xáhaⁿ-gã xii ndíi Àbrahám.

26 Núu xíãⁿ ní tendaha-gã Déhe-gá ní quixi-gá núú ndécú-ndó cuendá dañá-ndo ncháa sá cuèhé sá dúhá quide-ndo, te naníhí tãhú-ndó —càchí té Pèlú xáhaⁿ-dé xii-yu.

4

Té Pèlú ndihi té Juàá ndécú-güedě ndaha té cùchiuⁿ

1 Te té Pèlú ndihi té Juàá càháⁿ dúcáⁿ-ni-güedě ndihi ñáyiú, ní quexìo cue dútú ndihi té tàxi tñuní ñáhá xìi cue té quide cuendá veñúhu càhnu sá ïo cùnuu, ndihi cue té cùu saducéú.

2 Te ní cudééⁿ-güedě nchaa-güedě núú tě Pèlú ndihi té Juàá sá xáhaⁿ-güedě xii ñáyiú sá ndótó ñáyiú ní xíhí dàtná ní ndoto Jèsús.

3 Te ní tñii ñaha-güedě ní chihí ñaha-güedě vecaá xii-güedě, te ñá ní quide ndáá té cùchiuⁿ cuéchi-güedě nduu-áⁿ chí sa ní cuaa.

4 Te ïo vài ñáyiú ní sándáá iní-yu tñúhu ní cáháⁿ-güedě, te ñáyiú-áⁿ ndihi ñáyiú sa ní sándáá iní-xi ndéé cãni-gá ní xínu dàtná úhúⁿ mĩl mee-ni cuè téé, te ðiiⁿ ñáyiú ðihí ndihi landú.

5 Te nduu tñéé-áⁿ ðiu-ni ñúu Jerusálén-áⁿ nĩ tacá cue téé yìndaha veñúhu, ndihi cue téé cùu sacuéhé núú ñáyiú isràél ndihi cue téé dàcuaha ñaha xii-yu nchaa tñúhu ní chídó tñuní ndíi Moisés.

6 Te tñàhá dútú cùnù-gá téé nàni Anás ndécú ndihi té Caifás, ndihi té Juàá, ndihi té Lijandrú ndihi dava-gá ñani tñàhá dútú cùnù-gá-áⁿ ndécú.

7 Te ní xáhaⁿ-güedě xii cue téé xínu cuechi núú-güedě:

—Chí cuàháⁿ queñuhu-ndo tě Pèlú ndihi té Juàá vecaá, te na quixi-güedě iha —càchí-güedě xáhaⁿ-güedě.

Te ní quexìo té Pèlú ndihi té Juàá núú cuè téé cùnuu, te cue téé cùnuu-áⁿ nĩ xícáⁿ tñúhú-güedě núú-güedě, te xáhaⁿ-güedě:

—¿Nása ní quide-ndo cuendá téé yacua-áⁿ? ¿Yoo ní táúchíúⁿ dùcaⁿ cada-ndo? —cachí-güedě xáhaⁿ-güedě.

8 Te ndécú ndihi té Pèlú Espiritú Yá Ndióxi, núú xíáⁿ ní xáhaⁿ-dě xii-güedě:

—Nchòhó cue téé cùchiuⁿ ndihi nchòhó cue téé cùu sacuéhé núú ñáyiú isràél,

9 te núú cuiní-ndó quini-ndó nása ní quide-ndí ní ndúha téé yacua-áⁿ,

10 te cundedóho-ndo ñiⁿ tñúhu na càháⁿ-í-a. Xini ñuhu-xi cundedóho nchaa ñáyiú isràél cuendá quini-yu nàcuáa ní cuu ní ndúha téé-áⁿ. Xitohó Jesucristú Yaá ní xíndecu ñúú Nazàrét ní quide tátna-gá sáhá tée yacua ní ndúha, te ðiu-ni-gá ní sata caa-ndo núú cùrúxi te núú cùrúxi-áⁿ nĩ xihí-gá, te ní dándótó ñaha Yá Ndióxi xii-gá.

11 Te núú tütú Yá Ndióxi càchí-xi: “Cristú cúú-gá dàtná ñiⁿ yúú ndécú xíquí ñiⁿ vehe. Te yúú càchí-yu sá ñà túú nàndíhi, te ðiu xíáⁿ ní nàndíhi-xi ní ngúnutñi-xi xíquí véhé”, duha càchí-xi núú tütú-gá. Te ducaⁿ sãtnahá-xi cùu Jèsús, chí càchí-ndó sã ñà túú nàndíhi-gá,

12 dico Yá Ndióxi ñà túú ndéé ní tàxi ndecu-gá ingá téé dàcácu nihnu ñaha xii-o núú úhú núú ndàhú, chí ñiⁿ ðii díí-ni Déhe-gá Xitohó Jesucristú dacácu nihnu ñaha-gá xii-o —càchí té Pèlú xáhaⁿ-dě xii-güedě.

13 Te té Pèlú ndihi té Juàá ñà túú tũha-güedě, te cùñúhu cue téé cùchiuⁿ sá ïo ñiⁿ xíndáa-güedě. Te ní cutnùní iní cue téé cùchiuⁿ-áⁿ sã Jèsús ní xica cuu ndihi-güedě, núú xíáⁿ ñà túú tñàhí yùhú-güedě càháⁿ-güedě.

14 Te cuendá ndécú ndihi té Pèlú ndihi té Juàá téé ní ndúha sáhá-xi, núú xíáⁿ ñà ní ñihí cue téé cùchiuⁿ tñúhu cáháⁿ-güedě.

15 Te ní xáhaⁿ-güedě xii té Pèlú ndihi té Juàá sá quée-güedě quehé cuendá ndóo mee-güedě ndatnúhu-güedě.

16 Te ní xitnàha-güedě:

—¿Nása cada-o úu cue téé-ãñ?, chi nchaa ñáyiu ñuú Jerusàlén nàhá-yu sá ní quide tátna-güedé ñn téé yacua, te xíãñ xícuñúhu vihi ñáyiu. Te vá cúu càchí-ó sá ñã ndàá, chi vai ñáyiu ní xiní nàcuáa ní cuu.

17 Te dayùhú-ó-güedé te cùñaha-o sã vã càháñ-gá-güedé tnúhu Jèsús, chi núu ñáhá te quindáá-gá iní-yu —càchí-güedé xítñaha-güedé.

18 Te ní cana tucu-güedé té Pèlú ndihi té Juàá, te xãhañ-güedé sá vã dácuaña-gá-güedé ñáyiu tnúhu Jèsús.

19 Te té Pèlú ndihi té Juàá ní xãhañ-güedé:

—Chí cuãha cuendá, te núu sá càchí nchòhó cada-ndí àdi sá càháñ Yã Ndiòxí cada-ndí. Te cada càhnu iní-ndó chi vá cúu càda-ndí sá càchí-ndó, chi cada nahi-ni-ndí sá càchí Yã Ndiòxí.

20 Chi dacuñí cãháñ-ndí nàcuáa ní cãháñ Jèsús, te cãháñ-ndí nchaa sá ní xiní-ndí ní quide-gá —càchí-güedé xãhañ-güedé.

21 Te cue téé cùchiuñ níhi-gá ní cãháñ-güedé xãhañ-güedé sá cáda càstiú ñáhá-güedé núu vá dãñá-güedé sá dácuaña-güedé ñáyiu. Te ducañ te ní dãñá ñaha-güedé cuánuhú-güedé, chi ñã ní ñíhi-güedé nása cada-güedé cada castiú ñáhá-güedé, chi nchaañ-yu ndacáñ táhú-yu núu Yã Ndiòxí sá ní ndúha téé yacua.

22 Te téé ní quide tátna-güedé-áñ ndécú-dé vihi-gá údico cuía-dé, te ío ní cuñúhu-yu sá ní ndúha-dé.

Ñáyiu sãndáá iní tnúhu Jèsús xicáñ táhú-yu núu-gã sá vã yùhú-yu cãháñ-yu tnúhu-gá

23 Te ní ndee té Pèlú ndihi té Juàá cuánuhú-güedé núu ndécú cué téé cùndihi-güedé, te ní nacani tnúhu-güedé nàcuáa ní xãhañ cué dútú cùnùu ndihi cue téé cùu sacuéhé núu ñáyiu isràél.

24 Te sátá ní xíndedóho-yu tnúhu ní cãháñ-güedé, te ñn-ni tnúhu ní cãháñ-yu nchaañ-yu ndihi Yã Ndiòxí, te ní xãháñ-yu xii-gá:

—Yòhó Dútú Ndiòxí, ní cadúha-n àndiu, ní cadúha-n ñuyíú, ní cadúha-n làmár, ní cadúha-n nchàandi túhú sá ío ñuyíú.

25 Te ndíi Dàvíí ní sãndáá iní ndíi tnúhu ní cãháñ-n, te ní chídó tnùní ndíi nàcuáa ní xãhañ-n cãháñ ndíi, te ñu-ni Espíritú-n ní chindee ñaha-xi xii ndíi ní chídó tnùní ndíi, te duha ní chídó tnùní ndíi:

Ñáyiu ñã túu cùu ñáyiu isràél ío cùdézñ-yu núu Yã Ndiòxí, te cuñíñ-yu nãá-yu ndihi-gá, dico vá ndácñ-yu chi mee-gã cùnùu-gá.

26 Te cue téé yíndaha nacióñ ndihi cue téé cùchiuñ tacá-güedé nãá-güedé ndihi

Dútú Ndiòxí ndihi Cristú Yáá ní quixí ñuyíú-a.

Duha ní chídó tnùní ndíi Dàvíí nàcuáa ndùu tnúhu ní cãháñ-n —càchí-yu xãháñ-yu xii Yã Ndiòxí.

27 Te xãhañ tucú-yu xii-gá:

—Ndáá ní cãháñ ndíi Dàvíí chi ñu-ni ñuú iha ní tacá té Hèrodés ndihi té Põnciú Pilatú ndihi ñáyiu ñã túu cùu ñáyiu isràél ndihi ñáyiu isràél ní cãháñ cuéhé-yu cuendá Jèsús. Te Yòhó Dútú Ndiòxí, Déhe-n cùu Jesús núu ío váha iní-gá, te ní sãha chiññ-n-gá, te ío úhú ní cuu iní ñáhá ñáyiu xii-gá.

28 Te ní quideñ-yu nàcuáa ní sani iní-n càdañ-yu ndéé sanaha, ndéé cùtnahá ní ngáva ñuyíú.

29 Te Yòhó Dútú Ndiòxí sa nãha-n nása cãháñ cue téé cuñíñ cadañ úhú ñáhá xii-ndí. Te quideñ-ndí chiññ tahu-n, te vitna chindee ñaha-n xii-ndí cuendá sá vã yùhú-ndí cãháñ-ndí tnúhu-n.

30 Te cada tátna-n ñáyiú cùhú, te chindee ñàha-n xii-ndí, te cada-ndí nchaa sá vǎ yǒo tnàhí ndàcu cada nacuáa cuñúhu víhí-yu. Te xini-ndí sá méé Jèsús chindee ñàha-gá xii-ndí, chi quide-gá chiúⁿ tahu-n —cachí-yu xǎhǎⁿ-yu xii Yá Ndióxi.

31 Te sáta ní yáha ní cáháⁿ-yu ndihí Yá Ndióxi, te ní quidi-xi vehe núú xíndecú-yu, te òré-án ní cutáhú tucú-yu nchaa-yu Espiritú-gá. Te ní cáháⁿ-yu tnúhu Yá Ndióxi, te ñá túú tnàhí ni yùhú-yu.

Cuendá nchaa ndachíuⁿ cánehe chiúⁿ-yu

32 Te nchaa ñáyiú ní sándáá iní tnúhu Yá Ndióxi ñⁿ-ni tnúhu ní cáháⁿ-yu nchaa-yu. ñⁿ-ni tnúhu ní sani iní-yu, te ní xóo chindee tnàhí-yu chi ní xóo cuáha táhú tnàhí-yu nchaa sá xini ñùhú-yu, te ní ñⁿ-yu ñá túú ní cáháⁿ-yu sá ndáchíuⁿ-yu ñⁿ-di-ní-yu cùu nchaa sá ndécú ndihí-yu.

33 Te cue téé ní táuchíuⁿ Jèsús dacuàha ñaha xii-yu tnúhu-gá ío váha ní cáháⁿ-güedé nacuáa ní cuu ní ndoho Xitohó Jesucristú. Te ío ní chindee ñàha Yá Ndióxi ní cáháⁿ-yu tnúhu-gá, te ñá túú ní cáháⁿ cuéhé dava-gá-yu cuendá ñáyiú dácuaa tnúhu-gá.

34 Te ñá túú tnàhí ní cùndahú-yu díhúⁿ, chi nchaa ñáyiú ndècu ndihí ñuhu-xi, ndihí nchaa ñáyiú cǎa vehe-xi ní nadicó-yu, te da ñⁿ da ñⁿ ndachíuⁿ-yu ní nadicó-yu òré xini ñùhú-yu díhúⁿ.

35 Te ní sǎñàhǎ-yu xii cue téé ní táuchíuⁿ Jèsús dacuàha ñaha xii-yu tnúhu-gá, te cue téé-án ní dǎcǎhñu-güedé nchaa ñáyiú xini ñuhu.

36 Te distritú Chipré ndécú ñⁿ téé nani-dé Chèé ñani tnáhá ndí Leví, te ní xóo cunu cuechi-dě veñúhu ñáyiú isráel. Te cuendá sá sǎñaha-dě tnúhu ndee iní xii-yu, xǎⁿ núu ní dánáni ñaha-güedé Vèé xii-dé.

37 Te téé-án ní nadicó-dě luha ñuhu-dé, te nèhe-dé díhúⁿ cuǎháⁿ núú cuè téé ní táuchíuⁿ-gǎ dacuàha ñaha xii-yu tnúhu-gá.

5

Té Ananiás ndihí tá Sǎfirá ñá túú ní quide ndáa-yu

1 Te ndècu ñⁿ téé nani Ananiás, te ñadihí-dé nání-án Sǎfirá, te ñáyiú-án ní nadicó-yu luha ñùhú-yu.

2 Te ní taxúha-dé sacú díhúⁿ, te sacú-gá néhé-dě cuáháⁿ ní sǎñaha-dě xii cue téé ní táuchíuⁿ Jèsús dacuàha ñaha xii ñáyiú tnúhu-gá, te ní dándahú ñáhá-dě xii-güedé, chi ní xáhaⁿ-dě sá ñihí ní sǎñaha-dě, te ñaha ñadihí-dé sá dúcáⁿ ní quide-dé.

3 Te ní xáhaⁿ tǎ Pèlú xii-dé:

—Ananiás, ¿ná cuendá ducaⁿ ní quide-n ní dáñá-n ní quíhu sácuihná iní-n? Te ní dácuaándèhnde-n núú Espiritú Yá Ndióxi, te ní taxúha-n sácú díhúⁿ ní níhí-n cuendá ñuhu-n.

4 ¿Te ñuhu-án cuendá sá ñùhú mèe-n, àdi díhúⁿ-ǎn cuendá sá díhúⁿ méé-n cùu-xi, te cuu-ni cada-n nacuáa cǎchí iní-n cǎhaⁿ-n ñá? ¿Ná cuendá ducaⁿ ní quide-n? ¿Ná ní quide-xi iní-n núu ní dácuaándèhnde-n núú Yá Ndióxi? Chi ñá díú-ní mèe-ni ñáyiú ni dándahú-n —cǎchí té Pèlú xǎhaⁿ-dě xii-dé.

5 Te òré ní ndihí tnúhu ní xáhaⁿ tǎ Pèlú, te uuⁿni ní nduá-dé te ní xihí-ni-dé. Te nchaa ñáyiú ní níhí tnúhu sá ní xihí-dé, te ní yùhú víhí-yu.

6 Te ní quixi ñⁿ úú cue téé cuechi, te ní ndanehe ñaha-güedé ní sacáⁿ ñáhá-güedé núú yuu, te ní ducuⁿ nuu ñaha-güedé yuu-án, te ní xido ñaha-güedé néhé ñaha-güedé cuáháⁿ chindúxi ñaha-güedé xii-dé.

7 Te ní cuu úú uní òré, te ní quexìo ñadihí téé ní xíhí-án, te vátá quini-gá-aⁿ sá ní xíhí yíi-aⁿ.

8 Te ní xáhaⁿ tē Pèlú xii-aⁿ:

—Cuini-í cachí tñuhu ndáá-n. ¿Ndédau ní dícó-ndó ññuhu, ní dícó-ndó nàcuáa ní cachí yíi-n àⁿ? —càchí tē Pèlú xáhaⁿ-dē xii-aⁿ.

Te ní xáhaⁿ-aⁿ:

—Ndáá sá díú-ní dùcaⁿ —cachí-aⁿ xáhaⁿ-aⁿ.

9 Te ní xáhaⁿ tē Pèlú:

—¿Ná cuèndá ducaⁿ ní chitnàha tñuhu-ndo dùcaⁿ ní quide-ndo ní cuini-ndó dāndahú-ndó Espiritú Yá Ndiòxí? Quini-n, chí sa cuándixi cue téé ní sáháⁿ ní chindúxi yíi-n, te yòhó tñahá-n càndeca ñaha tucu-güedé xii-n quíhíⁿ vitna —càchí-dé xáhaⁿ-dē xii-aⁿ.

10 Te òré-án ní nduá-aⁿ núú tē Pèlú, te ní xíhí-ni-aⁿ. Te cuándihu cue téé cuechi-àⁿ xití vehe, te ní xiní-güedé sá sà ní xíhí-aⁿ, núú ní xido ñaha tucu-güedé cuáháⁿ chindúxi-güedé-aⁿ dñi yíi-aⁿ.

11 Te ní yùhú víhí ñáyiú ní sándáá iní tñuhu Yá Ndiòxí, ndihi dava-gá ñáyiú ní níhí tñuhu nàcuáa ní cuu.

Ní quide-güedé titní núú sã vã yõ tñahí ndacu cada te ío ní cuñúhu ñáyiú

12 Te cue téé ní táuchíúⁿ Jèsús dacuàha ñaha xii-yu tñuhu-gá titní víhí sã vã yõ tñahí ndacu cada ní quide-güedé, te ní cuñúhu víhí-yu. Te nchaa ñáyiú ní sándáá iní-xi tñuhu Jèsús ní xóo tacá-yu corrèdór nehé díu ndíi Salómón.

13 Te nchaa ñáyiú ñá túú dācuaha tñuhu-gá ñá ní cuyíi-yu chitnahá-yu ñáyiú ní sándáá iní-xi tñuhu-gá, dico nchaa-yu ní cáháⁿ váha-yu cuèndá ñáyiú ní sándáá iní-xi tñuhu-gá.

14 Te vài téé, vài ñadihí ní sándáá iní-yu tñuhu-gá.

15 Te cuèndá sá ní níhí-yu tñuhu sá quidé tātna cue téé ní xica cuu ndihi Jèsús, núú xiáⁿ ní queñuhú-yu nchaa ñáyiú cùhú ichi, te davá-yu ní quide túha-yu càamá te davá-yu ní quide túha-yu yuu, núú núú nchaa xiáⁿ tá sàcáⁿ-yu cue ñáyiú cùhú-áⁿ cuáháⁿ, te xiáⁿ cáá-yu ndètú-yu, chí ní sani iní-yu sá òré yáha tē Pèlú te cuèdicó cuándahú-dē yáha ndodo ñaha-xi xii-yu te ndúha-yu.

16 Te ní quixi ñáyiú ñuú yatni Jerusalén ndécá-yu ñáyiú cùhú, ndihi ñáyiú yíhi ñaha espíritú cùndihi yucu ñávàha ní quixi, te nchaa-yu ní ndúha.

Ío ní quide úhú-güedé tē Pèlú ndihi tē Juàá

17-18 Te dútú cùnù-gá ndihi cue téé cùu saducéú cue téé cùndihi-dé ní cudééⁿ-güedé sá ío chitú-yu dācuaha tñuhu Jèsús, núú xiáⁿ ní tñi-güedé cue téé ní táuchíúⁿ Jèsús dacuàha ñaha xii-yu tñuhu-gá ní chihí ñaha-güedé vecaá.

19 Te xití niú-án ní quexìo ñⁿ espíritú xínú cuèchi núú Yá Ndiòxí ní nacaáⁿ-xi yèhe vecaá ní quee-güedé, te ní xáhaⁿ-xi xii-güedé:

20 —Quíhíⁿ-ndó veññuhu càhnu sá ío cùnùu te cúñaha-ndo xii ñáyiú nàcuáa cadá-yu naníhí tàhú-yu —càchí espíritú-án xáhaⁿ-xi xii-güedé.

21 Te sá dúcáⁿ ní xáhaⁿ-xi núu sátá ní túndaá, te ní sáháⁿ-güedé veññuhu càhnu sá ío cùnùu sá cùú-xí ñáyiú israhél ní dācuáhá ñaha-güedé xii-yu.

Te dútú cùnù-gá ndihi cue téé cùndihi-dé ní nadatácá tñahá-güedé ndihi nchaa cue téé cùu sacuéhé núú ñáyiú israhél ndihi cue téé cùchiuⁿ, te ní tendaha-güedé sandádú cuáháⁿ queñuhu-güedé cue téé yíhi vecaá ní cùu.

22 Te ní quexìo-güedé yèhe vecaá, te ní xiní-güedé sá ní ñⁿ-gá cue téé dācuaha ñaha xii ñáyiú tñuhu Jèsús ñá túú-gá-güedé yíhí. Te cuánuhú-güedé

23 ní xítñũhu-güedé cue téé cùchiuⁿ, te xãhaⁿ-güedě:

—Ní sáháⁿ-ndí ní sándéhé-ndí vecaá, te ndèé chóó-ni, te xĩndecu-ni sandàdù cue téé xĩndéé yèhe vecaá. Te ní nacaáⁿ-ndí vecaá, te vá yõ ìⁿ-gá yíhí — cächí-güedé xãhaⁿ-güedě.

24 Te sá dúcáⁿ ní xãhaⁿ-güedě, te cuáháⁿ iní cue dútú cúnũ ndihí téé tàxi tnuní cue téé xĩndéé veñũhu càhnu sá ìo cúnũ, te ní xítñaha-güedé:

—¿Nãsa cada-xi vitna duha càa ní cuu ní xinu cue téé yíhi vecaá-i? — cächí-güedé xítñaha-güedě.

25 Te ní quexio ìⁿ téé ní xãhaⁿ-dě:

—Cundedòho-ndo na cächí tnũhu-í ìⁿ tnũhu. Cue téé ní chihi-ndo vècaá ndécú-güedě veñũhu càhnu sá ìo cúnũ dacuaha-güedé ñáyiu —cächí-dé xãhaⁿ-dě.

26 Te cue téé ndèé veñũhu ndihí téé tàxi tnuní ñáhá xii-güedé cuánguaca ñaha-güedě, te ñá túú ní quide úhú ñáhá-güedě, chi ní yühú-güedé cuáha yúú ñáhá ñáyiu dii ñũú-xi-áⁿ.

27 Te ní ndexio ndihí ñaha-güedé núú cuè téé cùu sacuéhé ndihí núú cuè téé cùchiuⁿ. Te dútú cúnũ-gá ní ngüíta-dé ténàá ñáhá-dě xii-güedé, te xãhaⁿ-dě:

28 —Te náa ñá díú ní cachí-ndí sá vã dácuaaha-gá-ndó ñáyiu tnũhu Jèsús te dàcuaha-ni-ndó-yu, te vitna nchaa ñáyiu ñuú Jerusàlén ní níhi-yu tnũhu nàcuáa càháⁿ-ndó. ¿Te ná cuendá ducaⁿ quide-ndo, te cächí-ndó sã nchühú ndècuéchi-ndí ní sahní-ndí Jèsús-i? —cächí dútú cúnũ-gá xãhaⁿ-dě xii-güedé.

29 Te té Pèlú ndihí dava-gá cue téé ní táuchíuⁿ Jèsús dacuàha ñaha xii-yu ní xãhaⁿ-güedé xii cue téé cùchiuⁿ:

—Nchühú, Yá Ndiòxí cúnũ-gá sàndáá iní-ndí tnũhu càháⁿ-gá dàcúúxí tnũhu càháⁿ ñáyiu.

30 Te nchòhó ní sata caa-ndo Jèsús núú cùrúxí te núú cùrúxí-áⁿ nì xíhí-gá, dico ní dándótó ñaha Yá Ndiòxí xii-gá. Te Yá Ndiòxí ní sàndáá iní cue ñaní tnáhá-ndí ní xĩndecu ndéé sanaha.

31 Te Yá Ndiòxí ní xãhaⁿ-gá sá cùndècu Jèsús xio cùha-gá cuendá taxi tnuní-gá te dacacu nihnu-gá ñáyiu isràel núú úhú núú ndàhú. Te ducaⁿ-ni dacacu nihnu-gá nchaa ñáyiu na dàña nchaa sá cuèhé sá dúhá, te cada càhnu iní-gá nchaa yíca cuèchi-yu.

32 Te ní xiní-ndí nàcuáa ní quide-gá, núú xiãⁿ cání-ndí cuendú núú nchaa ñáyiu, te Espiritú Yá Ndiòxí chĩndèe ñaha-xi xii-ndí càháⁿ-ndí tnũhu-gá. Te díu-ni Espiritú-gá ní sãñaha-gã xii nchaa ñáyiu ní sàndáá iní-xi tnũhu-gá — cächí té Pèlú ndihí dava-gá-güedé xãhaⁿ-güedě xii cue téé cùchiuⁿ.

33 Te sátá dúcáⁿ ní xãhaⁿ-güedě xii cue téé cùchiuⁿ, te ní cudééⁿ-güedě, te ní ndatnũhu-güedé sá cãhní ñaha-güedé.

34 Te ìⁿ téé cùu fariséú ñaha-dé cùú-dě chiúⁿ, te nàni-dé Gamaliél, te cùu-dé mèstrú dácuaaha-dé ñáyiu nàcuáa ní chídó tnuní ndí Moisés, te ìo yíñũhu càháⁿ ndihí ñáhá-yu xii-dé. Te ní ngúnutñí-dé, te ní xãhaⁿ-dě sá ná quèe tnaa té Pèlú ndihí dava-gá-güedé quehé.

35 Te ní xãhaⁿ-dě xii cue téé cùchiuⁿ:

—Nchòhó cue téé isràel, xini ñuhu-xi sá cání vãha iní-ndó nãsa cada-ndo ndihí cue téé-ãⁿ.

36 Chi ní cunaha ní xĩndecu ìⁿ téé ní xínani Tèudás, te ní cachí-dé sá cúnũ-dé, te ní cundihí-dé dàtná cùmí ciendú cue téé, te ñá ní cuiní-güedé cuu ìⁿ-nuu-güedě ndihí cue téé cùchiuⁿ. Te ní sahní ñaha cuè téé cùchiuⁿ-áⁿ xii téé

Tèudás, te ní ndihi cue téé ní xica cuu ndihi-dé ní xité nuu-güedé, te ñá túú-gá ní quide-güedé nàcuáa ní sani iní-güedé cada-güedé.

³⁷ Te sátá nì xihí téé-án, te ní tnahá nduu nùcódó tnùnì ñáyiú. Te dàvá-án ñí xíndecu ñí téé distritú Galileá ní xínani-dě Jùdás. Te titní-güedé ní chitnahá ñáhá-güedé xii-dé. Te tnahá-dé ní sahnì ñaha tùcu cue téé cùchiuⁿ, te nchaa cue téé ní xica cuu ndihi-dé ní xité nuu-güedé.

³⁸ Te na cächí tnúhu-í sá dǎñá-ndó cuè téé-án, te ní ñà túú ñágá tnúhu cùñaha-ndo xii-güedé, chi núu chiuⁿ mee-güedé quidé-güedé te cuíta-güedé,

³⁹ dico núu chiuⁿ Yá Ndiöxí quidé-güedé, te vá ndínìhnu chiuⁿ quide-güedé. Te núu quide-güedé chiuⁿ Yá Ndiöxí, te vá nàá-ndó ndihi-güedé, chi Yá Ndiöxí nàá ndihi-ndo sá dúcáⁿ xiquide-ndo —cächí té Gamàliél xáhaⁿ-dě xii cue téé cùchiuⁿ.

⁴⁰ Te nchaa-güedé ní cáháⁿ sá tnúhu ndáá cáháⁿ-dé. Te dǎtnùnì ní nacana tucu-güedé té Pèlú ndihi dava-gá-güedé te ní caniha-güedé, te ní cáháⁿ níhi-güedé, te xáhaⁿ-güedé sá vá cáháⁿ-gá-güedé tnúhu Jèsús, te dǎtnùnì ní dǎñá ñaha-güedé cuánuhú-güedé.

⁴¹ Te ío ní cudíí iní-güedé, chi mee Yá Ndiöxí ní cachí-gá sá dúcáⁿ ndóho-güedé dacuàha-güedé ñáyiú tnúhu Jèsús.

⁴² Te ñí nduu ñí nduu ní dácuahá-güedé ñáyiú xití veñúhu cǎhnu sá ío cùnnu ndihi nchaa vehé-yu. Te ní xáhaⁿ-güedé xii-yu sá Jèsús cúú-gǎ Crístú Yaa ní quixi ñuyíú-a.

6

Ní ndúcu-güedé úsá cue téé cundecu dacǎhñu sá cáxí ñáyiú

¹ Te diu-ni dàvá-án ñí sándáá iní vai ñáyiú tnúhu Jèsús. Te cue ñáyiú griégú ní cáháⁿ cuèhé-yu cuendá ñáyiú isràél, sá ñáyiú ñíhi ñáyiú quèé ñáyiú cáháⁿ tnúhu griégú ñá túú tnahá sá cáxí-yu, chi ñá túú sǎñaha ñínuu-güedé.

² Te cue téé úxúú ní táuchíúⁿ Jèsús dacuàha ñaha xii-yu tnúhu-gá, cue téé-án ñí cana-güedé nchaa ñáyiú sándáá iní tnúhu Jèsús. Te ní xáhaⁿ-güedé xii-yu:

—Nchúhú chi vá cúú dǎcǎhñu-ndí sá cáxí-yu, chi mee-ni tnúhu Yá Ndiöxí cáháⁿ-ndí.

³ Te nchóhó cue téé ndècu ndihi-ndí ichi Xitohó Jesucristú cáháⁿ ndihi-ndo úsá cue téé xíndecu iha, cue téé cáháⁿ ndihi ñàhá-yu mee-ni tnúhu yíñúhu, cue téé ndècu ndihi Espiritú Yá Ndiöxí, mee-ni cuè téé cùtnùnì váha iní-xi. Te cue téé-án cuàha-ndí-güedé chiuⁿ cada-güedé dacǎhñu-güedé sá cáxí-yu.

⁴ Te nchúhú mee-ni Yá Ndiöxí cáháⁿ ndihi-ndí, te mee-ni tnúhu-gá dacuàha-ndí-yu —cächí-güedé xáhaⁿ-güedé xii-yu.

⁵ Te ncháá-yu ní tñí-yu tnúhu ní cáháⁿ-güedé, núu ní ndúcú-yu cue téé cada chiuⁿ-án. Te ñí-dé nání-dě Tèvá, te ío váha sándáá iní-dé Yá Ndiöxí, te ndècu ndihi-dé Espiritú-gá. Te duha ní xínani dáva-gá-güedé: té Lípé, té Prócoró, té Nicánór, té Tímón, té Pärmenás, té Lǎxi téé ñúú Antiòquia téé ní sándáá iní-xi sá dácuaha ñáyiú isràél te vitna ní sándáá iní-dé tnúhu Jèsús.

⁶ Te úsá cue téé-án ñí sáháⁿ-güedé núu cuè téé úxúú ní táuchíúⁿ Jèsús dacuàha ñaha xii-yu tnúhu-gá, te cue téé úxúú-án ñí cáháⁿ ndihi-güedé Yá Ndiöxí, te ní sacáⁿ ndodo-güedé ndaha-güedé díqui cuè téé úsá-án.

⁷ Te ñáyiú ní sándáá iní tnúhu Jèsús cuáháⁿ-yu titní xichi cáháⁿ-yu tnúhu-gá. Te vai-gá ñáyiú ta sándáá iní-yu tnúhu-gá cuáháⁿ, te ní xíndecú-yu ndihi

dava-gá ñáyiú dàcuaha tnúhu-gá ñuú Jerusálén. Te titní dútú nǐ sándáá iní-güedé tnúhu-gá.

Ní tñii-güedé té Těvá

⁸ Te té Těvá ní quide-dé titní núú sá vǎ yõ tnàhí ndàcu cada, te ní cuñúhu vihí-yu sá dúcáⁿ nǐ quide-dé, te ducaⁿ nǐ quide-dé chi ndècu ndihí-dé Yǎ Ndiõxí chindèe ñaha-gá.

⁹ Te ní xindecu cue téé ní xóo cunu cuechi núú ñⁿ téé tàxi tnuní, te téé tàxi tnuní-áⁿ ñǎ ní xóo dañá tnàhí-dé quee-güedé núú chíúⁿ-dè, te ní xinu-ná-güedé. Te sátá xǎⁿ, te ní dácáá-güedé veñúhu-güedé, te veñúhu-áⁿ sáháⁿ ñáyiú ñuú Cirené, ñáyiú ñuú Alejándriá, ñáyiú ñuú Ciliciá, ndihí ñáyiú distritú Ásiá. Te nchaa ñáyiú-áⁿ nǐ náá ndihí-yu té Těvá.

¹⁰ Te ñá ní ñihí-yu tnúhu cáháⁿ-yu, chi ío váha ní sáá díquí-dè nàcuáa ní xáhaⁿ-dè xii-yu, chi Espíritú Yǎ Ndiõxí ní chindee ñaha-xi xii-dé.

¹¹ Te ní cháhu-yu cue téé ní dácuanðehnde tnúhu ní cáháⁿ té Těvá núú-yu. Te ní xáhaⁿ-güedé sá cáháⁿ cuèhé-dé cuendá ndíi Moisés ndihí cuendá Yǎ Ndiõxí.

¹² Te cuendá sá dúcáⁿ nǐ dácuanðehnde-güedé núú ní sándáá iní-yu, te ní cudéⁿ-yu núú tǎ Těvá. Te ní cudéⁿ cue téé cùu sacuéhé, te tnàhá cue téé dàcuaha ñaha xii-yu nchaa tnúhu ní chídó tnùní ndíi Moisés ní cudéⁿ-güedé. Te ní cáháⁿ-güedé ní tñii-güedé té Těvá ndécá ñaha-güedé cuáháⁿ núú quidé cué téé cùchiuⁿ jundá, ndihí cue téé cùu sacuéhé.

¹³ Te ndécá-yu cue téé dàcuandehnde cuáháⁿ núú quidé-güedé jundá, te ní quesaha-ni tucu-güedé cáháⁿ cuèhé-güedé, te xáhaⁿ-güedé:

—Téé-a mee-ni cáháⁿ cuèhé-dé cuendá veñúhu sá ío cùnuu, veñúhu ní cuu íí, te cáháⁿ cuèhé-dé cuendá nchaa sá nǐ chídó tnùní ndíi Moisés.

¹⁴ Te ní tecú dóho-ndí cachí-dé sá Jěsús téé ñuú Nazaréⁿt dangòyo-dé veñúhu cànuu sá ío cùnuu te vǎ dáñá-gǎ-dé cada-ndí nàcuáa ní cachí ndíi Moisés cada-ndí —cachí-güedé xáhaⁿ-güedé.

¹⁵ Te nchaa cue téé ndècu jundá ní ndacoto váha-güedé núú tǎ Těvá. Te ní dáyhèhé-xi núú-dé dàtná quidé-xí núú espíritú xínú cuèchi núú Yǎ Ndiõxí.

7

Té Těvá xáhaⁿ-dǎ sá ñà túú cuèchi-dé

¹ Te ní xáhaⁿ dútú cùnù-gǎ xii-dé:

—¿Ndáá tnúhu cáháⁿ-güedé cuendá-n-ǎⁿ? —cachí-dé xáhaⁿ-dǎ.

² Te té Těvá ní xáhaⁿ-dǎ xii-güedé:

—Nchòhó cue ñaní tnàhá-í ndihí nchòhó cue téé cùu sacuéhé, cund-edóho-ndo ñⁿ tnúhu na cáháⁿ-í-a. Yǎ Ndiõxí ío cùnuu-gǎ, te ní cáháⁿ ndihí-gǎ ndíi Àbrahám naciõⁿ Mesopõtamiá cùtnàhá vátá quihíⁿ-gǎ ndíi cundecu ndíi ñuú Hàrán.

³ Te ní xáhaⁿ-gǎ xii ndíi: “Daña-n nchàa ñaní tnàhá-n, te dañá-n ñùhu-n, te quihíⁿ-n ñⁿ xichi núú dánèhé ñàhá-í cundecu-n”, duha ní xáhaⁿ Yǎ Ndiõxí xii ndíi Àbrahám.

⁴ Te sátá dúcáⁿ nǐ xáhaⁿ Yǎ Ndiõxí xii ndíi Àbrahám, te ní ndee ndíi ñuú Cáldeá, te cuáháⁿ ndíi cundecu ndíi ñuú Hàrán. Te sátá nǐ xihí tátá ndíi, te ní xáhaⁿ Yǎ Ndiõxí quixi ndíi cundecu ndíi núú ndécú-ó vitna.

⁵ Te Yǎ Ndiõxí ñá túú ní sǎñaha-gǎ ni lùha ñuhu cuu cuendá ndíi núú nǐ xindecu ndíi. Te ní xáhaⁿ ndáá Yǎ Ndiõxí xii ndíi sá cuáñaha-gǎ ñuhu cuu

cuèndá ndíi, te na cùú ndíi, te ndóo ndihi nchaa ñaní tnáhá ndíi cacu túu ndéé cuèé-gá. Te ducaⁿ ní xáhaⁿ-gã cuèi vátá cùndècu-gá ni ìⁿ déhe ndíi.

6 Te ní xáhaⁿ túcu Yá Ndiòxí xii ndíi Àbrahám sá díú-ní ñaní tnáhá ndíi quíhíⁿ-yu núú xicá cùndecú-yu cúmí cièndú cuíá, te vá dáñá-yu queé-yu núú chííⁿ-yu, te ío dandòho ñaha-güedé núú cùndècú-yu. Duha ní xáhaⁿ Yá Ndiòxí xii ndíi, te ndáá ducaⁿ ní cuu.

7 Te ní xáhaⁿ túcu Yá Ndiòxí xii ndíi Àbrahám: “Yúhú dandòho-í nchaa ñáyíu na dándoho ñaha xii cue ñaní tnáhá-n. Te dàvá-án te ndee cue ñaní tnáhá-n núú cùndècú-yu, te quixí-yu chiñuhu ñáhá-yu xii-í iha”, duha ní xáhaⁿ Yá Ndiòxí xii ndíi Àbrahám, te ndáá ducaⁿ ní cuu.

8 Te Yá Ndiòxí ní quide ndáá-gá ndihi ndíi Àbrahám, te ní xáhaⁿ-gã xii ndíi sá cuáha-güedé sèñá ñii nchaa landú téé cuèndá cunáhá-yu nàcuáa ndúu sá ní quide ndáá-gá ndihi ndíi Àbrahám. Núú xíáⁿ núú ùná nduu sá ní cacu té Isàác déhe ndíi Àbrahám, te ní sáha ndíi sèñá ñii-dé. Te díu-ni ducaⁿ ní quide tucu té Isàác déhe-dé té Jácób, te díu-ni ducaⁿ ní quide té Jácób, chi úxúú déhe-dé ní xíndecu, te nchaa-güedé ducaⁿ ní quide-dé. Te ndíi úxúú cue téé-án ní cuu-güedé ñaní tnáhá-ó.

9 Te ìⁿ déhe té Jácób ní xínani-dé Chèé. Te ñá ní cùu váha iní cue ñaní-dé núú-dé, núú ní dícú ñaha-güedé ní queheⁿ ñaha cuè téé cuáháⁿ nàcióⁿ Ègiptú, te Yá Ndiòxí ñá ní dàña ñaha-gá xii-dé cuíta nihnu-dé.

10 Te ní chindee ñaha-gá xii-dé ní cácu-dé cùtnáhá ní ndoho vìhi-dé. Te téé yíndaha Ègiptú ío ní cudíi íni-dé té Chèé, te ní cutnùní iní-dé sá ío váha túha té Chèé, te ducaⁿ ní cutnùní iní-dé, chi Yá Ndiòxí ní chindee ñaha-gá xii té Chèé. Te ní xáhaⁿ téé yíndaha Ègiptú xii té Chèé sá díú té Chèé coo-dé gobièrnú Ègiptú, te taxi tnùní-dé nchaa ñáyíu xínu cuechi núú téé yíndaha Ègiptú-án.

11 Te ní quíhu tnamá nihí nàcióⁿ Ègiptú ndihi nàcióⁿ Cànaá, te ío ní ndohó-yu. Te nchaa ñaní tnáhá-ó ní xíndecu ndéé sanaha ñá ní xóo níhí-gá-yu sá cáxí-yu.

12 Te ní níhí té Jácób tnúhu sá ío triú Ègiptú, núú ní tendaha-dé cue déhe-dé ní sáháⁿ-güedé ní ságuaaⁿ-güedé triú-án, te dàvá-án ní sáháⁿ cue ñaní tnáhá-ó xito díhna nuu nàcióⁿ Ègiptú.

13 Te xito cùu uú cuáháⁿ-güedé, te ní xáhaⁿ té Chèé sá ñaní-dé cúú-güedé. Te téé yíndaha Ègiptú ní cutnùní iní-dé sá díú-ní ñaní té Chèé cúú-güedé.

14-15 Te ní cana té Chèé tátá-dé té Jácób ndihi nchaa ñaní tnáhá-dé. Te cùu-xi datná únídico sáhúⁿ-yu ndéca té Jácób cuáháⁿ nàcióⁿ Ègiptú núú ndécú té Chèé, te xíáⁿ ní quexíó-yu ní ngóo-yu. Te yàcáⁿ ní xihí té Jácób ndihi nchaa déhe-dé cue ñaní tnáhá-ó.

16 Te sátá ní cuu titní cuíá, te ní natava-güedé yiqui ndíi Jácób ndihi nchaa déhe ndíi nchido-güedé cuáháⁿ ñuu Siquém. Te ndíi Àbrahám sa ní cuu titní-gá cuíá sá ní nacuaaⁿ ndíi ñuhu núú cuè déhe ndíi Hámór. Te xíáⁿ nchíi yáú ní nachindúxi-güedé yiqui-án.

17 Te cùtnáhá vátá nátàva-gá-güedé yiqui cue ndíi, te sa ta tnáhá yatni cada Yá Ndiòxí nàcuáa ní xáhaⁿ-gã xii ndíi Àbrahám cada-gá sá cúú-xí ñáyíu isràél ndécú Ègiptú, te ta cáyá víhí-yu cuáháⁿ.

18 Te dàvá-án chi ingá téé yíndaha nàcióⁿ Ègiptú, te ñá túú-gá ní xini-dé nása ní xóo cada ndíi Chèé.

19 Te tée yìndaha Egiptú ñá ní quìde ndáá-dé, chi ío ní dándóhó-dé ñani tnáhá-ó ní xíndecu dàvá-án. Te ní táuchíúⁿ-dè sá xócuñíⁿ-yu dándóo-yu déhe yiquiⁿ cuèndá ndihi-güexi cuú.

20 Te dàvá-án ní cacu té Moisés, te ío ní cudíí ñni ñáhá Yá Ndióxi xii-dé. Te ní xíndecu ndihi ñaha náná-dé ndihi tātá-dé úní-ni yóo.

21 Te ndéca ñáhá-yu cuáháⁿ ingá xichi, te yàcáⁿ ní dándóo ñáhá-yu xii-dé, te ní naníhí ñáhá déhe yoco tée yìndaha Egiptú, te ní xito-xi-dé dàtná xító-xí ñⁿ déhe mee-xi ní xito-xi-dé ndéé ní sahnú-dé.

22 Te ní cutúha-dé nchaa sá xini cue tée ègiptú, te ío váha ní sáá díquí-dé tnúhu cáháⁿ-dé ndihi nchaa sá cáda-dé.

23 Te cutnàhá ndécú-dé údico cuía-dé, te ní cachí-dé sá quíhíⁿ-dé cáháⁿ ndihi-dé cue ñani tnáhá-dé ñáyiu isràél.

24 Te ní xini-dé ní caniha ñⁿ tée ègiptú xii ñⁿ tée isràél, te ñá ní cùndee iní-dé cundehe-dé núu ní sáháⁿ-dé ní chindee-dé tée isràél, te ní sahní-dé tée ègiptú,

25 chi ní cachí Yá Ndióxi sá díú-dé dacäcu-dé ñani tnáhá-dé ñáyiu isràél núu cue tée ègiptú. Te ní sani iní-dé sá cutnuni iní-yu nàcuáa ní xáhaⁿ Yá Ndióxi xii-dé, dico ñá túú ní cùtnuni iní-yu.

26 Te nduu tnéé ní xini-dé nàá úú cue tée isràél, te ñá túú ní tnáhá iní-dé nàá-güedé núu ní xáhaⁿ-dé xii-güedé: “¿Ná cuèndá ducaⁿ xñnàá-ndó? ¿Náa ñá díú ndímee-ndo núu ducaⁿ xñnàá-ndó?” Duha ní xáhaⁿ tē Moisés xii-güedé.

27 Te tée ndècuéchi ní sáháⁿ-dé ní chindaha nihnu-dé té Moisés ñⁿ xio, te ní xáhaⁿ-dè: “¿Ná cuú yohó núu véxi-n tàxi tnuñi ñáhá-n?”

28 Te tnáhá-ni tucu yúhú cahni-n dàtná ní sahní-n tē ègiptú icu càhaⁿ-n á”, duha ní xáhaⁿ-dè xii té Moisés.

29 Te sá dúcáⁿ ní cáháⁿ tē isràél núu ní yúhú té Moisés ní xinu-dé cuáháⁿ-dé ní sáá-dé nacióⁿ Mèdián. Yàcáⁿ ní ngóo-dé, te yàcáⁿ ní tnándaha-dé, te ní cacu úú déhe tée-dé.

30 Te sátá ní xinu údico cuía, te ní sáháⁿ té Moisés ñⁿ xio yucu Sinái. Te yàcáⁿ ní xini-dé ñⁿ tnutáú nchicúⁿ ñuhú, te xití itá ñuhú-án ní xini-dé yíhí ñⁿ espíritú xínú cuèchi núú Yá Ndióxi.

31 Te òré ní xini-dé sá yíhí-xí xití itá ñuhú-án, te ní cuñúhu vìhi-dé sá ní xini-dé espíritú-án xití itá ñuhú-án, te ní sàndehe-gá-dé, te ní xindéhé vāha-dé. Te ní tecú dóho-dé ní cáháⁿ Yá Ndióxi, te xáhaⁿ-gá xii-dé:

32 “Yúhú cùú-í Ndióxi ní cáháⁿ ndihi cue ñani tnáhá-n ndéé sanaha, ndíi Àbrahám ndihi ndíi Isàác ndihi ndíi Jácób, ndihi dava-gá cue ñani tnáhá-n. Nchaa cue ndíi-án ní xóo cáháⁿ ndihi-í.” Duha ní xáhaⁿ-gá xii té Moisés. Te ní quidi ñaha-xi xii té Moisés sá ní yúhú-dé, te ñá ní cùyi-gá-dé cundehe-dé tnutáú nchicúⁿ ñuhú-án.

33 Te Yá Ndióxi ní xáhaⁿ-gá xii-dé: “Queñuhu chàu-n, chi núú ñuhú ní cuu íi nùtnñ-n.

34 Te yúhú ndéhé-í sá ño ndòho nchaa ñáyiu cùu cuèndá-í, ñáyiu ndècu nacióⁿ Ègiptú. Te ní tecú dóho-í sá ño ndàhú xicáháⁿ-yu, núu xíⁿ véxi-í càchí tnúhu-í sá nùhú-n nacióⁿ Ègiptú cuèndá ndeñuhú-n-yu yàcáⁿ.” Duha ní xáhaⁿ Yá Ndióxi xii té Moisés.

35 Te ñá ní sàndáá iní-yu té Moisés ndéé díhna, chi ní xáháⁿ-yu: “¿Ná cuèndá véxi-n tàxi tnuñi ñáhá-n xii-ndí?” Duha ní xáháⁿ-yu xii té Moisés. Te ñu-ni té Moisés ní tendaha ñaha Yá Ndióxi ní sáháⁿ-dé dacäcu-dé ñáyiu isràél nacióⁿ

Ègíptú cuèi ñá ní sàndáá iní ñáhă-yu xii-dé. Dico ní taxi tñuní-dé-yu, chi ducaⁿ ní xáhaⁿ-gă ôrè ní xiní-dé espíritú xínú cuèchi núú-gă xítí tnutáú nchícúⁿ ñuhú.

36 Te té Moisés ní ngüita-dé ní quide-dé sá vă yôo tñahí ndàcu cada, te ní cuñúhu vîhî-yu sá dúcáⁿ ní quide-dé, te ducaⁿ ní quide-dé Ègíptú ndihî Lámár Tícuèhé. Te ní ngódó núú-dě núŷ-yu ní quee-yu Ègíptú cuáháⁿ-yu ìⁿ ichi xítí yucu núú vă yôo tñahí ndècu, te ní xîhî-yu údico cuía xítí yucu-áⁿ, te xiáⁿ ní xóo cada-dé sá vă yôo tñahí ndàcu cada.

37 Te ðiu-ni té Moisés ní xáhaⁿ-dě xii cue ñaní tñáhă-dě dàvă-áⁿ: “Yá Ndiôxí cada-gă te coo ìⁿ ñaní tñáhă-ndó ndéé cuèé-gă, te tée-áⁿ cáhăⁿ-dè tñúhu-gă núú-ndó dàtná cuíní-ndó ní cachí-gă quidé yúhú, te io xîni ñuhu-xi cundedóho-ndo tñúhu cáhăⁿ-dè”, duha ní xáhaⁿ tē Moisés xií-yu dàvă-áⁿ.

38 Te ðiu-ni té Moisés ní xíndecu ndihî-dé ñáyiu isrâél xítí yucu, te ní sáa-dé yucu Sináí, te xiáⁿ ní quixi ìⁿ espíritú xínú cuèchi núú Yá Ndiôxí ní cáhăⁿ ndihî ñaha-xi xii-dé, te yàcáⁿ ní dâcuáhă ñaha-xi tñúhu-gă, te ðiu-ni tñúhu-áⁿ ní ndóo dàcuaha-o.

39 Te cue ñaní tñáhă-ó ní xíndecu ndéé sanaha ñă ní sàndáá iní-yu té Moisés, te ñá ní ndéé iní ñáhă-yu xii-dé, chi ní cuíní-yu nuhú tucú-yu ñúú Ègíptú cundecú-yu.

40 Te ôrè ndécú tē Moisés yucu ní xáhăⁿ-yu xii ñaní-dé té Àrón: “Cadúha-n ìⁿ úú ndiôxí díhúⁿ cuááⁿ codonùu núú-ó cùhuⁿ-o ichi, chi ñá túú cùtnuní iní-ó ndéé ichi cuáhăⁿ té Moisés, tée yòdo nuu núú-ó ndùu ní quee-o Ègíptú”, duha ní xî-yu té Àrón.

41 Te dàvă-áⁿ ní cadúha-güedé ìⁿ chēhlu mee-ni díhúⁿ cuááⁿ, te ní sahani-güedé ìⁿ úú quiti nchîto ní quide cāhnu-güedé chēhlu-áⁿ. Te io ní cudî iní-yu quiti-áⁿ, chi ní cachí-yu sá díú-ní ndiôxí cúú-dí.

42 Te sá dúcáⁿ ní quide-yu, xiáⁿ ní dáñă ñaha Yá Ndiôxí xií-yu. Te ní dáñă-gă ní xóo cada cāhnú-yu nchîcanchîi, ndihî yóó, ndihî nchaa chódíní. Te duha ní chídó tñuní ìⁿ tée ní xóo cáhăⁿ tñúhu Yá Ndiôxí ndéé sanaha nàcuáa ní xáhaⁿ-gă xii ñáyiu dàvă-áⁿ:

Nchòhó ñáyiu isrâél, ní cuu údico cuía yíhî-ndó yùcu,

te ní sahani-ndo quiti-ndo ní quide cāhnu ñaha-ndo xii-í cáhăⁿ-ndó, dico ñáhă chi ní sahani-ndo-güedé ní quide cāhnu-ndo sá ní cadúha mee-ndo.

43 Te ní cadúha-ndo ìⁿ veñúhu lîhli,

te ní sanutñî-ndo Mòlóc sá cāchî-ndó cùu ndiôxí-ndó xîca nchido-ndo xítí yucu,

te ní cadúha-ndo ìⁿ chódíní, te quiti-ăⁿ cāchî-ndó să cúú-dí ndiôxí Rēnfán, te ndi ndùu sá ní cadúha-ndo-ăⁿ ní quide cāhnu-ndo.

Te cuèndá sá dúcáⁿ ní quide-ndo te yúhú queñuhu ñaha-í xii-ndo quîhîⁿ-ndó cùndecu-ndo ingá xio nâcióⁿ Babiloniá.

Duha ní xáhaⁿ Yá Ndiôxí xií-yu, te ducaⁿ ní chídó tñuní tée ní xóo cáhăⁿ tñúhu-gă.

44 Te xítí yucu-áⁿ ní dâcáá-güedé ìⁿ veñúhu vehe dóó. Te vehe-áⁿ ní cuu-xi ìⁿ sá cùtnuní iní-yu sá Yá Ndiôxí ndécú ndihî ñaha-gă xií-yu. Te vehe-áⁿ ní dâcáá-güedé nàcuáa ní xáhaⁿ Yá Ndiôxí xii té Moisés, chi ní dánèhè ñáhă-gă xii-dé nàcuáa dacâa-güedé.

45 Te sáta nĩ xihí nchaa cue téé-án, te ní ndóo ndihĩ nchaa déhe-güedé veñúhu-án. Te ní xido tucu-güedé veñúhu-güedé cuáhán-güedé, te cuáhán ndihĩ-güedé té Jósué núú cündécú-yu. Te sáta nĩ quexlío-yu, te ní dácúnú-yu ñáyiú dii ñúú-xi-án chi mee Yá Ndióxi ní chindee ñaha-gá xií-yu. Te sáta nĩ ndihĩ nchaa ñáyiú ní xica nchido veñúhu dóó-án nĩ xihí, te ní ndóo ndihĩ daga-gá-yu. Te ducaⁿ-ni ndécú-xi ní cacu té Dàvií, téé ní xindaha ñaha xií-yu.

46 Te Yá Ndióxi ní cudáí víhí iní-gá té Dàvií. Te ní xicáⁿ tnúhú-dé núú-gá núu cuu dacáa-dé veñúhu cuu cuendá-gá, chi ñⁿ-ni Yá Ndióxi ní xoo cada càhnu té Dàvií ndihĩ té Jácób, ñanĩ tnáhá-ó ní xindecu ndéé sanaha víhí-gá.

47 Te Yá Ndióxi ñá ní dàña-gá dacáa té Dàvií veñúhu-gá dico déhe-dé té Salómón, chi ní dáña-gá ní dácáa-dé veñúhu cuu cuendá-gá

48 cuéi ñá túú sácúndecu-gá veñúhu dàcaa cue téé ñuyiú-a, chi ndēni xiáⁿ ndécú-gá chi espíritú cúú-gá. Te duha ní chídó tnūni téé ní xoo cáháⁿ tnūhu Yá Ndióxi ndéé sanaha nàcuáa ní cáháⁿ-gá:

49 Yúhú táxi tnūni-í andiú ndihĩ ñuyiú,

te xiáⁿ núu nchóhó vá ndácú-ndó chihĩ ñaha-ndo xití veñúhu dàtná quidē-yu sá cächí-yu cùu ndiόxi-yu ní cadúha-yu.

Te ñá túú xini ñuhu-í núú ndétátú-í,

50 chi yúhú ní cadúha-í nchaa sá ió ñuyiú-a.

Duha ní cáháⁿ Yá Ndióxi, te diu-ni ducaⁿ nĩ chídó tnūni téé ní xoo cáháⁿ tnūhu-gá —duha ndūu nchaa tnūhu ní xáhaⁿ tē Těvá xii-güedé.

51 Te ní xáhaⁿ tūcu-dé:

—Nchòhó, ío sáa iní-ndó chi quide-ndo datná quidé ñáyiú ñá túú cùu ñáyiú isràel chi ñá túú tédóho-ndo tnūhu cáháⁿ Yá Ndióxi, chi ñá cuini-ndó quindáa iní-ndó tnūhu-gá, mee-ni cùu úhú iní-ndó Espíritú-gá dàtná ní xoo cada cue ñanĩ tnáhá-ndó ní xindecu ndéé sanaha.

52 Chi cue téé-án ío ní xoo dandóho-güedé nchaa cue téé ní xoo cáháⁿ tnūhu Yá Ndióxi ndéé sanaha. Te ní sahnĩ-güedé nchaa cue téé ní cáháⁿ sá quixí Cristú ñuyiú-a, te Yaá-án ñá túú cuèchi-gá. Te diu-ni ducaⁿ nĩ quide-ndo Cristú cúnáhá ní quixi-gá ñuyiú-a, chi ní sáha cuendá-ndó-gá núú cuè téé ní cuu úhú iní ñáhá xii-gá ní sahnĩ ñaha-güedé.

53 Te ndécú ndihĩ-ndo tnūhu ní chídó tnūni ndíi Moisés nàcuáa ní xáhaⁿ espíritú xínú cuèchi núú Yá Ndióxi xii ndíi, te ní ducaⁿ ñá túú sàndáa iní-ndó tnūhu-án núu ní sahnĩ-ndo Jēsús. Te diu-ni tnūhu-án ndécú ndihĩ-ndo ndéé vitna —cächí té Těvá xáhaⁿ-dē xii-güedé.

Ní sahnĩ-güedé té Těvá

54 Te sá dúcáⁿ ní xáhaⁿ tē Těvá xii-güedé, te ní cudéⁿ víhí-güedé núú-dē, núu ní quide rúhñú-güedé núhu-güedé sá sātú iní-güedé.

55 Te té Těvá ndécú ndihĩ-dé Espíritú Yá Ndióxi, te ní ndacoto váha-dé andiú, te ní xini-dé súúni dátásaⁿ-xi núú ndécú Yá Ndióxi, te ní xini-dé Xitohó Jesucristú nūtni-gá xio cùha Yá Ndióxi.

56 Te ní xáhaⁿ tē Těvá xii-güedé:

—Chí cündèhe andiú chi yúhú ndèhè-í Xitohó Jesucristú nūtni-gá xio cùha Yá Ndióxi, te diu-gá cúú-gá ñanĩ tnáhá-ndó nchaa-ndo —cächí-dé xáhaⁿ-dē.

57 Te ní sadí-güedé dóho-güedé cuendá sá ñá ní tnáhá iní-güedé cundédóho-güedé tnūhu cáháⁿ-dé, te uuⁿi ní cuáá-güedé, te ní taxi ndaha ñaha-güedé xii-dé

⁵⁸ ndécá ñaha-güedé cuáháⁿ ndéé ìⁿ xio yuhu ñùú, te yàcáⁿ ní sáñaha-güedé yúú xii-dé. Te ndècu ìⁿ téé cuechi nàni-dé Sàulú, te téé-áⁿ ñí quide cuendá-dé dóó-güedé cuendá ní nune ndaha-güedé ní sáñaha-güedé yúú xii té Tévá.

⁵⁹ Te òré sáñaha-güedé yúú, te ní cáháⁿ ndihí-dé Xítoho Jesucristú te xáhaⁿ-dè:

—Yòhó Xítoho Jesucristú, naqueheⁿ-n iní-í —càchí-dé xáhaⁿ-dè xii-gá.

⁶⁰ Te ní ngüíñí xítí-dé, te níhi ní cáháⁿ-dé, te xáhaⁿ-dè:

—Yòhó Xítoho Jesucristú, vá técuèchi-n cuè téé-a sá dúhá quide ñaha-güedé xii-í —càchí-dé xáhaⁿ-dè xii-gá.

Te xíáⁿ-ná ní cáháⁿ-dé, te ní xihí-dé.

8

Té Sàulú chíhí-dé ñáyíu sàndáá iní-xi tnúhu Jèsús vecaá

¹ Te té Sàulú ní nduu vétú iní-dé sá ñí sañi-güedé té Tévá.

Te ñiu-ni nduu-áⁿ ñí cuu níhi cuendá nchaa ñáyíu sàndáá iní-xi tnúhu Jèsús ñúú Jerusalén. Te ní ndihí-yu ní xíté nuu cuáháⁿ-yu distritú Júdeá ndihí distritú Sàmaríá. Te cue téé ní táuchíúⁿ Jèsús dácuàha ñaha xii-yu tnúhu-gá ní ndóo-güedé ñúú Jerusalén.

² Te nchaa cue téé càháⁿ ndihí Yá Ndiòxí ní chindúxi-güedé ndí Tévá. Te ío ní ndáhyú ñáyíu ní sàndáá iní tnúhu Jèsús sá ñí xihí ndí.

³ Te té Sàulú ío dàndoho-dé-yu, chí ndí vehe ndí vehe cuáháⁿ-dé cuátnii-dé cuèí téé cuèí ñadìhí ndécá-dé cuáháⁿ vecaá.

Càháⁿ-yu tnúhu Yá Ndiòxí distritú Sàmaríá

⁴ Te nchaa ñáyíu ní xíté nuu cuáháⁿ-yu càháⁿ-yu tnúhu Jèsús nchaa núú quexió-yu.

⁵ Te té Lìpé cuáháⁿ-dé distritú Sàmaríá càháⁿ-dé tnúhu Xítoho Jesucristú Yáá ní tendaha Yá Ndiòxí ní quixi ñuyúú-a.

⁶ Te ío vài núú sá vā yòo tñàhí ndàcu cada ní quide-dé, te ní cuñúhu vñhí-yu, te ní xíndedóho váha-yu nchaa tnúhu ní cáháⁿ-dé.

⁷ Te vài ñáyíu yñhi ñaha espíritú cundihí yucu ñávaha ní queñuhu-dé nchaa espíritú-áⁿ yiqui cunú-yu, te ní cana saa-xi òré ní ndee-xi yiqui cunú-yu cuáháⁿ-xi, te ní ndúha-yu. Te vài ñáyíu cùhú ñá cúú-gã candá nihnú-yu ndihí ñáyíu yacua ní quide tátna-dé, te ní ndúha-yu.

⁸ Te sá dúcáⁿ ní cáháⁿ-dé tnúhu Jèsús te ní quide tátna-dé-yu, xíáⁿ ío ní cudíí iní ñáyíu ñuú-áⁿ.

⁹ Te ñiu-ni ñuú-áⁿ ndécú ìⁿ téé nàni Xímú, te téé-áⁿ xìní-dé cada ndùu-dé, te ní cuu naha dùcaⁿ quide-dé, te ní xóo cuñúhu ñáyíu distritú Sàmaríá sá dúcáⁿ quide-dé, te ní cachí-dé sá díú-ní-dé cúnùu.

¹⁰ Te nchaa ñáyíu cuèí ñáyíu cuica te cuèí ñáyíu ndàhú ío nèhé-yu sá yíñuhu núú-dé, te xitnàhá-yu:

—Téé-áⁿ ío chñndee ñaha Yá Ndiòxí xii-dé núu vài núú sá quidé-dé —càchí-yu xitnàhá-yu.

¹¹ Te ní sàndáá iní-yu nàcuáa ní xóo cada ndùu-dé, te ní xóo cuñúhu vñhí-yu, te ní cuu naha dùcaⁿ-ni dandahú ñáhá-dé xii-yu.

¹² Te té Lìpé ní cáháⁿ-dé tnúhu Xítoho Jesucristú, te ní xáhaⁿ-dè xii-yu sá Yá Ndiòxí cuini-gá ndíhu ndaha ñaha-gá xii-yu. Te cuèí téé cuèí ñadìhí ní sàndáá iní-yu tnúhu-gá, te ní sanduté-yu.

13 Te tnàhá té Xímú ní sándáá iní-dé tnúhu-gá, te ní sandute-dé, te ní xica cuu-dé ndìhi té Lìpé, te ní cuñúhu-dé chi titní núú sá vǎ yǒo tnàhí ndàcu cada ní quide té Lìpé, te ní cuñúhu vihi nchaa ñàyi.

14 Te dava-gá cue téé ní táuchíúⁿ Jèsús dacuàha ñaha xii ñàyiú tnúhu-gá ní níhí-güedé tnúhu sá ñàyiú distritú Sàmariá ní sándáá iní-yu tnúhu Yá Ndiòxí. Te ní tendaha-güedé té Pèlú ndìhi té Juáa cuáháⁿ-güedé distritú Sàmariá.

15 Te ní quexio-güedé, te ní cáháⁿ ndìhi-güedé Yá Ndiòxí ní xícáⁿ-güedé Espiritú-gá quixi cundecu ndihí-yu.

16 Chi ní ññ-yu vátá sàa-gá Espiritú-gá cundecu ndihí-yu, chi òré ní sanduté-yu, te mee-ni Jèsús ní cacunehe-güedé.

17 Te òré ní sacáⁿ ndodo-güedé ndaha-güedé díquǐ-yu, te ní quexio Espiritú-gá ní ngúndecu ndihí-yu.

18 Te ní xiní té Xímú nàcuáa ní quide-güedé ní quexio Espiritú-gá ní ngúndecu ndihí-yu, te cuíní-dé cuàñaha-dé díhúⁿ xii té Pèlú ndìhi té Juáa ní cùu.

19 Te ní xáhaⁿ-dè:

—Chindee ñaha-ndo cuendá ndèda-ni càa-yu cacáⁿ ndodo-í ndaha-í díquǐ-yu, te níhí-yu Espiritú Yá Ndiòxí cundecu ndihí-yu —càhí-dé xáhaⁿ-dè xii-güedé.

20 Te té Pèlú ní xáhaⁿ-dè xii-dé:

—Yòhó cuíta nihnu-n ndìhi díhúⁿ-n, chi cuíní-n cuàaⁿ-n sá vǎha quide Yá Ndiòxí.

21 Yòhó vá cúu càda-n chiuⁿ quide-ndí, chi ñá túú ndècu váha iní-n núú Yá Ndiòxí.

22 Te vá dúcáⁿ cáháⁿ-n, chi ío nèhé càháⁿ-n sá dúcáⁿ càháⁿ-n. Te cáháⁿ ndàhú-n núú Yá Ndiòxí sá ná cáda càhnu iní-gá tnúhu ní cáháⁿ-n.

23 Te yúhú sa xiní-í sá ío úhú iní-n, chi mee-ni sá cuèhé sá dúhá chido nuu-n quide-n —càhí té Pèlú xáhaⁿ-dè xii té Xímú.

24 Te ní xáhaⁿ té Xímú xii-güedé:

—Cáháⁿ ndàhú-ndó núú Yá Ndiòxí sá ñá túú ná tnahá-í sá dúcáⁿ ní cáháⁿ-í —càhí-dé xáhaⁿ-dè.

25 Te té Pèlú ndìhi té Juáa ní cáháⁿ-güedé tnúhu Yá Ndiòxí núú ñàyiú ñuú-áⁿ. Te ní xáhaⁿ-güedé nchaa nàcuáa ní quide Jèsús ní xiní-güedé òré ní xica cuu-gá ñuyú-a. Te ní tñii-güedé ichi cuánuhú-güedé ñuú Jerusalén, te ní yáha-güedé titní ñuú yíndèhu distritú Sàmariá, te ní cáháⁿ-güedé tnúhu-gá.

Té Lìpé ndìhi ññ téé ñuú Etiòpiá

26 Te ññ espíritú xínú cuèchi núú Yá Ndiòxí ní quexio-xi ñuú Jerusalén ní xáhaⁿ-xi xii té Lìpé:

—Cada túha-n chi quée nuu-n ñuú Gǎzá, dico mee-ni xití yucu cuáháⁿ ichi —càhí-xi xáhaⁿ-xi xii-dé.

27 Te ní xica-dé cuáháⁿ-dè, te ní natnahá-dé ññ téé nàcióⁿ Etiòpiá ñúhú-dé ichi. Te cùu-dé tesorèrú xínú cuèchi-dé núú ññ ñadìhí ñaha yíndaha nacióⁿ Etiòpiá, te ñaha-án nání-án Cándacé.

28 Te téé etiòpiá-án ní sáháⁿ-dè ñuú Jerusalén ní cáháⁿ ndìhi-dé Yá Ndiòxí, te ñuuhú-dé ichi cuánuhú-dé ñuú-dé ñúhú-dé càrretá, te dàcuaha-dé tnúhu ní chídó tnùní ndí Chàia téé ní xóo cáháⁿ tnúhu Yá Ndiòxí ndéé sanaha.

29 Te ní xáhaⁿ Espiritú Yá Ndiòxí xii té Lìpé:

—Quíhíⁿ tuha-n càrretá-án —càhí Espiritú-gá xáhaⁿ-xi xii-dé.

³⁰ Te té Lìpé ní sátuha-dé carrètá-án, te ní tecú dóho-dé nàcuáa càháⁿ té etiòpiá-án, té n̄hu carretá-án dácuaaha-dé nàcuáa ní chídó tn̄ní ndí Chàia. Te ní xáhaⁿ t̄ Lìpé xii té etiòpiá-án:

—¿Tècú tn̄ní-n nchàa tn̄hu dácuaaha-n-án? —càchí té Lìpé xáhaⁿ-d̄ xii-dé.

³¹ Te ní xáhaⁿ t̄ etiòpiá:

—¿Nása tecú tn̄ní-í te vá yõ dānehé ñháá xii-í? Ta quène iha coo-n chi danèhé ñháá-n —càchí-dé xáhaⁿ-d̄ xii té Lìpé.

Te cuáaá té Lìpé núu carrètá ní ngóo-dé.

³² Te ndèdóho-dé nàcuáa dácuaaha té etiòpiá-án nàcuáa ní chídó tn̄ní ndí Chàia núu t̄tú Yá Ndiõxí núu càchí-xi:

Dàtná quidé ñⁿ mbéé cada-dé òré candeca ñaha-güed̄ xii-dé quíhíⁿ cahni ñaha-güed̄ chi ñá túú n̄ cada-dé,

dàtná cuñí-ndó quide mbéé òré dètè-d̄ ñá túú ndàhí-d̄ ducaⁿ càda-dé òré cahni ñaha-güed̄ chi ni vá càháⁿ-dé.

³³ Te mee-ni cùdiquí ndeé ñháá-güed̄ xii-dé, te ni vá ndúcú tn̄hu-güed̄ núu-d̄ n̄u ndáá ndècuéchi-dé.

Te ío cuu nduu cuihna ínì cue ñaní tnáhá-d̄, chi cahni ñaha-güed̄ xii-dé ñuyíú-a.

Duha càháⁿ tutú ní dácuaáá t̄ etiòpiá ní xindedóho té Lìpé.

³⁴ Te ní xáhaⁿ t̄cu t̄ etiòpiá xii té Lìpé:

—Cundee ínì-n càchí tn̄hu-n yòo cacunehe t̄ ní cáháⁿ tn̄hu Yá Ndiõxí ndéé sanaha, núu càháⁿ-d̄ cuendá méé-d̄ àdi caháⁿ-d̄ cuendá ingá ñáyiú —càchí t̄ etiòpiá-án xáhaⁿ-d̄ xii té Lìpé.

³⁵ Te té Lìpé ní cani-dé cuèndú núu t̄ etiòpiá nàcuáa ní cáháⁿ ndí Chàia nàcuáa cada Jèsús òré quixi-gá ñuyíú-a. Te ní xáhaⁿ-d̄ nàcuáa nduu tn̄hu Jèsús ndí nàcuáa ní quide-gá.

³⁶ Te ñhu-güed̄ ichi cuáháⁿ-güed̄ ní naníhí-güed̄ ñⁿ xichi núu ñuhú ndute, te ní xáhaⁿ t̄ etiòpiá:

—Iha ñhu ndute, ¿te vá cúú cuàndute-í iha-án? —càchí-dé xáhaⁿ-d̄ xii té Lìpé.

³⁷ Te xáhaⁿ t̄ Lìpé:

—Te núu sàndáá ndisa ínì-n Jèsús, te cuu cuandute-n —càchí-dé xáhaⁿ-d̄.

Te ní xáhaⁿ t̄ etiòpiá:

—Sàndáá ndisa ínì-í sá D̄he Yá Ndiõxí cúú Xítoho Jesucristú —càchí-dé xáhaⁿ-d̄.

³⁸ Te ní ngani-dé carrètá, te ní nuu-güed̄ ndí nduú-güed̄, te cuánguee-güed̄ xití ndute, te ní dácuañdute ñaha té Lìpé xii-dé.

³⁹ Te òré ní nene-güed̄ xití ndute, te ndèca ñaha Espiritú Yá Ndiõxí xii té Lìpé cuáháⁿ. Te ñá túú ní xiní t̄ ní sandute-án ndèé ichi cuáháⁿ té Lìpé. Te ío ní cud̄ ñⁿ ínì-dé sá ñí natuha-dé ichi Yá Ndiõxí, te cuánda-dé núu carrètá-dé cuánuhú-dé.

⁴⁰ Te ní quexìo té Lìpé ñuu Àzotó, te ndí tnahá ñuu ndí tnahá ñuu cuáháⁿ-d̄ càháⁿ-d̄ tn̄hu Yá Ndiõxí, te ní yáha-dé cuáháⁿ-d̄ ní quexìo-dé ndéé ñuu Cèsareá.

9

*Té Sàulú ní tuha-dé ichi Xítoho Jesucristú
(Hch. 22:6-16; 26:12-18)*

1 Te té Sàulú mee-ni càháⁿ cuèhé-dé cuèndá ñáyiú ní sándáá iní tnúhu Jèsús, te cuiní-dé cahni ñaha-dě xii-yu. Te ní sáháⁿ-dé núú dütú cúnùu-gá,

2 te ní xáhaⁿ-dě sá cádúha dütú-ãⁿ ìⁿ tutú canehe-dé quiíⁿ cuáha-dé cue téé xindeé nchito veñúhu ñúú Dàmascú, chí cuiní-dé tnií-dé nchaa ñáyiú dàcuaha tnúhu Xitohó Jesucristú candeca ñaha-dě quiíⁿ ñúú Jerusàlén.

3 Te ní xica-dé cuáháⁿ-dé tá cùyatni-dé ñúú Dàmascú, te uuⁿ ní quee ñuhú andiu, te ní dáyèhé-xi ndéé núú nùtní-dé.

4 Te ní nduá-dé ndéé ñuhu, te ní tecú dóho-dé càháⁿ ìⁿ sá càháⁿ núú ñnu, te xáhaⁿ-xi xii-dé:

—Yòhó Sàulú, ¿ná cuèndá cúú úhú iní ñáháⁿ n xii-í te dándoho ñaha-n? —cachí sá càháⁿ-áⁿ xáhaⁿ-xi xii-dé.

5 Te ní xáhaⁿ-dè:

—¿Ná cúú yòhó sá càháⁿ-áⁿ-í? —cachí-dé xáhaⁿ-dè.

Te ní xáhaⁿ sá càháⁿ xii-dé:

—Yúhú cúú-í Jèsús téé cùu úhú iní-n. Te ío dándoho-n mee-n, chí dàtná quidé ndìcutu quide-n, chí quiíⁿ-áⁿ ñnu na cùxi-güedé-di pùýá te sáha-di patadá núú-xi, te quide úhú-di mee-di. Te ducaⁿ sátnahá-xi cùu yohó chí ñá túú sándáá iní ñáháⁿ n xii-í —cachí sá càháⁿ-áⁿ xáhaⁿ-xi xii-dé.

6 Te té Sàulú ní quiíⁿ ñaha-xi xii-dé sá ñí yùhú-dé, te ní xáhaⁿ-dè:

—Xitohó Jesucristú, ¿te ná cuiní-n càda-í-í? —cachí-dé xáhaⁿ-dè.

Te Jèsús ní xáhaⁿ-gá xii-dé:

—Ndacóo, te quiíⁿ n ñúú-ãⁿ, te yàcáⁿ tecú tnúhu-n ná cúú sá cádáⁿ —cachí-gá xáhaⁿ-gá xii-dé.

7 Te cue téé cuáháⁿ ndihí té Sàulú ní tecú dóho-güedé càháⁿ ìⁿ sá càháⁿ, dico vá yòo tnàhí ní xini-güedé, te ní yùhú víhí-güedé, te ñá túú tnàhí ní càháⁿ-güedé.

8 Te ní ndacóo té Sàulú, te ñá ní cùu-gá cundehe-dè, chí ní cuaa-dé, te ní tnií-güedé ndaha-dé ndéca ñaha-güedé cuáháⁿ ñúú Dàmascú.

9 Te yàcáⁿ ní xindecu-dé úní nduu, te ñá ní cùu tnahí cundehe-dè, te ñá túú ná ní xèxi-dé, te ñá túú ní xihí-dé ndute.

10 Te ndècu téé sándáá iní tnúhu Jèsús ñúú Dàmascú, nání-dè Ananiás, te ní sáháⁿ Jèsús núú sàni-dé, te ní xáhaⁿ-gá xii-dé:

—¡Ananiás! —cachí-gá xáhaⁿ-gá.

Te ní xáhaⁿ-dè:

—¿Yúhú càháⁿ ndihí-n-ãⁿ? —cachí-dé xáhaⁿ-dè.

11 Te ní xáhaⁿ-gá:

—Ndacuií, te quiíⁿ-n ìⁿ chiuⁿ ichi núú dánani-güedé Ichi Ndáá, te yàcáⁿ nanducu-n vehe té Júdás, chí vehe téé-áⁿ ndécú ìⁿ téé ñúú Tàrsú nání-dè Sàulú, te téé-áⁿ sa càháⁿ ndihí ñaha-dè xii-í.

12 Te téé-áⁿ ñí dácótó ñaha-xi sá ñí xini ñáhá-dè xii-n ñí quexio-n núú ndécú-dè, te ní sacáⁿ ndodo-n ndaha-n díqui-dè, te ducaⁿ te ní nacaáⁿ núú-dè ní dácótó ñaha-xi xii-dé —cachí-gá xáhaⁿ-gá.

13 Te té Ananiás ní xáhaⁿ-dè:

—Yòhó Xitohó Jesucristú, cachí tnúhu-í xii-n sá ñí níhí-í tnúhu nàcuáa quide-dé sá ío quide úhú-dé ñáyiú càháⁿ ndihí-n ñúú Jerusàlén.

14 Chí nèhe-dé tutú ní sáñaha cuè dütú cúnùu cuèndá níhí-dè nàcuáa cada-dé tnií-dé nchaa ñáyiú sándáá iní ñáhá xii-n —cachí-dé xáhaⁿ-dè xii-gá.

15 Te Jèsús ní xáhaⁿ-gá xii-dé:

—Quihíⁿ-n ndàtnúhu-n ndihí-dé, chi cuíní-í cada-dé chiⁿ-í, quihíⁿ-dé cáháⁿ-dé tnúhu-í núú cuè ñáyíu isràél, ndihí núú cuè ñáyíu ñá túú cùu ñáyíu isràél, ndihí núú cuè téé yíndaha ñaha xii-yu.

16 Te yùhú cùñaha-í xii-dé sá ndóhó vihi-dé cuèndá-í —càchí-gá xáhaⁿ-gã xii té Anàniás.

17 Te cuáháⁿ té Anàniás vehe núú ndécú tè Sàulú te ní sacáⁿ ndodo-dé ndaha-dé díquí tè Sàulú, te ní xáhaⁿ-dè:

—Yòhó té Sàulú téé ndècu ndihí-í ichi Xítohó Jesucristú, ñi-ni Xítohó Jesucristú Yaá ní cáháⁿ ndihí ñaha xii-n ichi ní tendaha ñaha-gá véxi-í cuèndá cacáⁿ táhù-í núú-gã cuèndá-n te ndúha núú-n, te dàtnùni quixi Espiritú-gá cundecu ndihí-n —càchí-dé xáhaⁿ-dè.

18 Te dàtná sá ní xócání-ó ñⁿ sá ndèdí núú-dé ní quide ñaha-xi xii-dé, te ní nacaáⁿ núú-dé, te ní sandute-dé.

19 Te ní xexi-dé, te ní naníhí ndéé-dé, te titní nduu ní xíndecu ndihí-dé ñáyíu ní sándáá iní tnúhu-gá ñuú Dàmascú.

Té Sàulú dácuaⁿ-dé ñáyíu tnúhu Yá Ndiòxí ñuú Dàmascú

20 Te sátá ní ndúha núú-dé, te ní sáháⁿ-dé veñúhu cue ñáyíu isràél ní xáhaⁿ-dè sá Jèsús cúú-gã Déhe Yá Ndiòxl.

21 Te nchaa ñáyíu ní xíndedóho tnúhu ní cáháⁿ-dé, te ní cuñúhu vihi-yu, te ní xítñahá-yu:

—Ñi téé-ã ní sahani-dé ñáyíu ní xóo chiñuhu ñaha xii Jèsús ñuú Jerusalén. Te ní quixi-dé iha ní cuíní-dé tñⁿ ñaha-dé xii-yu candeca ñaha-dé quihíⁿ núú cuè dútú cúnúu ní cuu —cachí-yu xítñahá-yu.

22 Te ió iní-gá té Sàulú xáhaⁿ-dè xii-yu sá díú Jèsús cúú-gã Cristú Yaá ní tendaha Yá Ndiòxí ní quixi ñuyú-a, te xíⁿ ñá ní níhí ñáyíu isràél ndécú ñuú Dàmascú tnúhu cáháⁿ-yu, te ní cuñúhu vihi-yu.

Té Sàulú ní dáxió-dé núú ñáyíu isràél

23 Te sátá ní cuu titní nduu, te ní ndatnúhu cue téé isràél sá cáhni-güedé té Sàulú.

24 Te té Sàulú ní níhí-dé tnúhu nàcuáa cáháⁿ-güedé cada ñaha-güedé xii-dé, te cuèi nduu cuèi niú néhé cuèndá-güedé yuyèhe núú ñúðoco ndóho yuhu ñuú cuèndá cuíní-güedé tñⁿ ñaha-güedé xii-dé te cahni ñaha-güedé.

25 Te ñⁿ niú ndécá ñaha cue téé ní sándáá iní-xi tnúhu Jèsús cuáháⁿ ndéé núú ñúðoco ndóho yuhu ñuú. Te ní sáá-güedé núú ndóho, te ní chíhi ñaha-güedé xii-dé xití tídihi te ní dándéé ñaha-güedé núú ñuhú, te ní quene-dé cuáháⁿ-dé.

Te Sàulú ndécú-dé ñuú Jerusalén

26 Te té Sàulú ní nasáá-dé ñuú Jerusalén, te cuíní-dé chitnahá-dé ñáyíu sándáá iní tnúhu Jèsús, te ní yùhú-yu chi ní cáháⁿ-yu sá dándàhù ñahá-dé sá sándáá iní-dé Jèsús.

27 Te té Bèé ndécá-dé té Sàulú cuáháⁿ núú ndécú cuè téé ní táuchíúⁿ Jèsús dacuaⁿ ñaha xii-yu tnúhu-gá. Te ní cani té Bèé cuèndú núú-güedé nàcuáa ní cuu ní naníhí tñahá tè Sàulú ndihí Jèsús ichi, te ní cáháⁿ ndihí ñaha-gã xii-dé. Te ní xáhaⁿ túcu té Bèé nàcuáa ní cáháⁿ té Sàulú tnúhu Jèsús núú ñáyíu Dàmascú, te ñá túú tñahí ní yùhú-dé ní cáháⁿ-dé, càchí té Bèé xáhaⁿ-dè xii-güedé.

28 Te ní xíndecu té Sàulú ndihí ñáyíu xídacuáhá tnúhu-gá ñuú Jerusalén. Te ní ndicuu ndicuu-dé ní cáháⁿ-dé tnúhu Jèsús, te ñá túú tñahí ní yùhú-dé

29 ní cáháⁿ ndihí-dé ñáyiú israél ñáyiú càháⁿ tnúhu griégú. Te ñáyiú-áⁿ ñi ngúíta-yu ndàtnúhu-yu sá cáhni ñàhá-yu xii-dé.

30 Te ñáyiú sàndáá iní tnúhu-gá ní níhí-yu tnúhu nàcuáa cuíni ñáyiú càháⁿ tnúhu griégú cada ñàhá-yu xii té Sàulú, núu ní sàndeca ñàhá-yu xii-dé ñúú Césarea, te yàcáⁿ ní tendaha ñàhá-yu cuánuhú-dé ñúú Tàrsú.

31 Te sáta xiáⁿ te ní sanaa-yu ñá túú-gã ní xóo cada úhu-yu nchaa ñáyiú sàndáá iní tnúhu Jèsús nihií distritú Júdeá, ndihí distritú Galileá, ndihí distritú Sàmariá. Te ní níhí ndéé-yu ní quidé-yu nàcuáa ní xáhaⁿ Yá Ndióxi cadá-yu, te ío ní xíndecu yíñùhú-yu núú-gã, te Espíritú-gá ní chindee ñàha-xi xii-yu, te vai-gá ñáyiú ní sàndáá iní-yu tnúhu-gá.

Té Pèlú ní quide tátna-dé té Ènéas

32 Titní xichi ní sáháⁿ té Pèlú ní cáháⁿ-dé tnúhu Yá Ndióxi. Te ñiⁿ nduu ní sáháⁿ-dé ñúú Lidá ní cáháⁿ ndihí-dé ñáyiú sàndáá iní ñàhá xii Jèsús.

33 Te yàcáⁿ ní naníhí-dé ñiⁿ téé nàni Eneás, te ní cuu úná cuíá cùhú-dé, te ní lùha ñá cúú-gã candá nihnu-dé.

34 Te ní xáhaⁿ tẽ Pèlú xii-dé:

—Ènéas, Xítohó Jesucristú cada tátna ñàha-gã xii-n tnàvíí. Ndacóo te ndo-cani-n yùu-n —cachí-dé xáhaⁿ-dẽ.

Te òré-ni ní ndacóo-dé.

35 Te nchaa ñáyiú ñúú Lidá ndihí ñáyiú ñúú Sàrón ní xini-yu sá ñi ndúha-dé, te ní sàndáá víhi iní-yu Xítohó Jesucristú.

Ní ndoto tá Dòrcás

36 Te ñúú Jòpé ndécú ñiⁿ ñadihí sàndáá iní-aⁿ tnúhu Jèsús, te nàni-aⁿ Tabitá, te tnúhu griégú xáhã-yu Dòrcás, te ío váha ní xóo cada-aⁿ chí ío váha iní-aⁿ, te ní xóo chindee-aⁿ ñáyiú ndàhú.

37 Te váha-ni ndécú-aⁿ ni cuu, te ní tniⁿ ñàha cuéhé ñi xíhí-aⁿ, te ní nadacùchi ñàhá-yu, te ní chíhi ñàhá-yu ñiⁿ cuártú ndécú ndéé núú ñinu.

38 Te ñáyiú ní sàndáá iní tnúhu Jèsús ñúú Jòpé ní níhí-yu tnúhu sá ndécú tẽ Pèlú ñúú Lidá. Te yatni-ni càa ñúú-áⁿ, te ní tendàhá-yu úú cue téé cuáháⁿ-güedé núú ndécú-dé cuendá cùñaha-güedé candeca ñàha-güedé xii-dé quíhíⁿ núú ndécú-yu. Te ní xáhaⁿ-güedé xii té Pèlú:

—Yáchí ná quíhíⁿ-ó ñúú-ndí, chí yàcáⁿ cáná ñàhá-yu quíhíⁿ-n tnàvíí —cachí-güedé xáhaⁿ-güedé xii té Pèlú.

39 Te té Pèlú ní xica-dé cuáháⁿ-dé ndihí cue téé-áⁿ ñúú Jòpé, te òré ní quexio-güedé ndihí-dé, te cuásaá ndihí ñàha-güedé cuártú ndéé núú ñinu. Te nchaa ñáyiú ñiⁿ ñáyiú quèé ní tacá ndéé ñàhá xii ndíyi-áⁿ xíndahíyú-yu, te ní dánèhé ñàhá-yu nchaa dóo ñi cadúha ñàha ní xíhí-áⁿ. Chí ní xóo cadúha-aⁿ dícúⁿ, te ní xóo cadúha-aⁿ dío òré ní xíndecu-aⁿ ñuyúyú-a, te nchaa xiáⁿ ní dánèhé ñàhá-yu xii té Pèlú.

40 Te té Pèlú ní xáhaⁿ-dẽ sá quèé-yu ncháa-yu quèhé, te ní quèé-yu. Te ní ngúñí xítí-dé te ní cáháⁿ ndihí-dé Yá Ndióxi, te dàtnùni ní ndacoto-dé núú cándodo ndíyi-áⁿ, te ní xáhaⁿ-dẽ:

—Tàbitá, ndacóo —cachí-dé xáhaⁿ-dẽ.

Te ní ndacoto-aⁿ núú tẽ Pèlú te ní ndacóo-aⁿ.

41 Te ní tniⁿ-dẽ ndaha-aⁿ ní nacanutniⁿ ñàha-dẽ. Te ní cana-dé nchaa ñáyiú ñiⁿ ñáyiú quèé ndihí nchaa ñáyiú sàndáá iní tnúhu Jèsús cuendá quini-yu sá ñi ndoto-aⁿ.

⁴² Te nchaa ñáyiú ñuú Jòpé ní ñíhí-yu tnúhu nàcuáa ní quide té Pèlú ní ndoto ñaha ní xihí-án, te vâi-yu ní sándáá iní-yu Xítóhó Jesucristú.

⁴³ Te titní nduu ní xindecu té Pèlú vehe té Xímú téè dàcuitá ñii.

10

Té Pèlú ndihi té Còrneliú

¹ Te ndècu ñiⁿ téè nàni-dé Còrneliú ñuú Cèsareá te cùu-dé capitáⁿ, te ndècu ndihi-dé ñiⁿ cièndú sandàdú. Te cue téè-án nání-güedě Sandàdú Itàliánú.

² Te téè cùu capitáⁿ ío váha iní-dé, te mee-dě ndihi ñadìhí-dé ndihi nchaa landú-dé ío nèhé-yu sá yíñùhu núú Yá Ndióxi, te sáha-dé ñáyiú ndàhú ñáyiú isràél díhúⁿ, te ío càháⁿ ndihi-dé Yá Ndióxi.

³ Te ñiⁿ nduu dàtná òrè caá úní sacuaa ní dácótó núú ñáhá-xí xii-dé sá ní sáháⁿ ñiⁿ espíritú xínú cuèchi núú Yá Ndióxi núú-dě, te ní xáhaⁿ-xi:

—Còrneliú —càchí-xi xáhaⁿ-xi xii-dé.

⁴ Te ní xini-dé ndi nduú xio núú-dě espíritú-án. Te ío ní yuhú-dé. Te ní xáhaⁿ-dè:

—¿Ná chíúⁿ vèxi-n? —càchí-dé xáhaⁿ-dè.

Te xáhaⁿ-xi:

—Ío càháⁿ ndihi-n Yá Ndióxi, te ñáyiú ndàhú sãñaha-n díhúⁿ-n, te nchaa xíaⁿ sa naha-gá.

⁵ Te vitna tendaha-n cuè téè na quíhíⁿ-güedé ñuú Jòpé quíngana-güedé ñiⁿ téè nàni Xímú, àdi Pelú chi úú òu-dé, te candeca ñaha-güedé quixi.

⁶ Te òrè quexio-dé te cachí tnúhu-dé nchaa dava-gá sá cuíní Yá Ndióxi cada-n. Te ndècu-dé vehe ingá tucu téè nàni Xímú téè dàcuitá ñii, te vehe téè-án caá ñiⁿ xio yuhu lamár —càchí-xi xáhaⁿ-xi xii-dé.

⁷ Te sátá cuáháⁿ espíritú-án, te té Còrneliú ní cana-dé úú tnàhá cue téè xínu cuèchi núú-dě ndihi ñiⁿ sandàdú xínú cuèchi tucu núú-dě, te tnàhá sandàdú-án ío càháⁿ ndihi-dé Yá Ndióxi.

⁸ Te té Còrneliú ní cani-dé cuèndú núú-güedé nàcuáa ní càháⁿ espíritú xínú cuèchi núú Yá Ndióxi. Te ní tendaha ñaha-dé xii-güedé cuáháⁿ-güedé ñuú Jòpé.

⁹ Te nduu tnéè-án ñíhú-ní-güedé ichi cuáháⁿ-güedé, te cùu-xi datná òrè cauxúú nduu ta cùyatni-güedé ñuú-án, te òrè-án ní sáá té Pèlú díquí véhé càháⁿ ndihi-dé Yá Ndióxi.

¹⁰ Te òrè-án sa xihí-dé docó cuíní-dé caxi-dé, te ñini càdúha-yu sá cáxi-dé ní dácótó núú ñáhá-xí

¹¹ sã ní xini-dé ñiⁿ sá ndécú àndiu, te càa datná caá ñiⁿ dóó cáhnú nchícúⁿ yoho ndi cùmí xíquí-xi véxi cuuⁿ núú ñíhú.

¹² Te núú dǒó-ãⁿ yódó cǒo ndihi quiti ndàva ndihi nchaa núú quiti ndéé cùmí sáhá-xi.

¹³ Te ní tecú dóho-dé càháⁿ ñiⁿ sá càháⁿ, te xáhaⁿ sã càháⁿ-án xii-dé:

—Pèlú, ndacuñí cahni-n ndèda-ni càa quiti-a caxi-n-di —cachí sá càháⁿ-án xáhaⁿ-xi xii-dé.

¹⁴ Te té Pèlú ní xáhaⁿ-dè:

—Vá cáhni-í-di chi càchí tnúhu sá sánú ichi ñaha xii nchúhú ñáyiú isràél sá vâ cúú càxi-ndí nchaa quiti-a chi cuu cuèchi, te vátá cáxi-gã-í-di ní ñiⁿ xito —cachí-dé xáhaⁿ-dè.

¹⁵ Te ní càháⁿ tucu sá ní càháⁿ-án, te xáhaⁿ-xi:

—Vá cúú càchí-n sã vâ cúú càxi-n-di, chi mee Yá Ndióxi ní cachí-gá sá díú nchaa quiti-a cuu caxi-o vitna —cachí sá ní càháⁿ-án xáhaⁿ-xi xii-dé.

16 Te ducaⁿ ní cáháⁿ sá ní cáháⁿ-áⁿ ũní xito, te dătnŭnî cuândaa tucu dóó-ăⁿ andiŭ.

17 Te té Pèlú ñá ní cùtnŭnî iní-dé ná cuendá ducaⁿ ní dácótó nŭŭ ñáhá-xí xii-dé, nŭŭ xíăⁿ ío cuéhé ní sani iní-dé. Te òré-áⁿ ní quexio cue téé ní tendaha té Còrneliú ndéé yuyèhe, chí ndi vehe ndi vehe cuáháⁿ-güedé ndúcú tnŭhu-güedé ndèé cáá vèhe té Xímú téé dii vèhe-xi ndecu té Pèlú.

18 Te ní cáháⁿ níhi-güedé, te xăhaⁿ-güedé:

—Ñá túú cùdana iha ndecu ìⁿ téé nănducu-ndí nání-dě Xímú, àdi Pelú chí úú diu-dé —càchí-güedé xăhaⁿ-güedé.

19 Te té Pèlú vâi sani iní-dé sá ní dácótó nŭŭ ñáhá-xí xii-dé. Te òré-áⁿ ní xăhaⁿ Espiritú Yă Ndiôxí xii-dé:

—Cundedóho-n ìⁿ tnŭhu na càháⁿ-í-a. Ní quexio úní cue téé nănducu ñaha xii-n.

20 Yáchí, cuandèe chí quíhíⁿ-n ndihi-güedé, te vâ yùhú-n chí yùhú ní xăhaⁿ-í véxi cuaca ñaha-güedé xii-n —càchí Espiritú-gá xăhaⁿ-xí xii té Pèlú.

21 Te ní xica-dé cuândee-dé nŭŭ ndécú cué téé xica nanducu ñaha xii-dé, te xăhaⁿ-dě xii-güedé:

—Yùhú cúú téé nănducu-ndo-áⁿ. Nău-í-a nŭŭ ná chíúⁿ cuiní ñáhá-ndó —càchí-dé xăhaⁿ-dě xii-güedé.

22 Te xăhaⁿ-güedé:

—Tée cùu capitáⁿ téé năni Corneliú ní tendaha ñaha-dé véxi-ndí, te téé-áⁿ ío váha iní-dé, chí ío sândáá iní-dé Yă Ndiôxí, te nchaa ñáyiu isráél ío váha càháⁿ-yu cuendá-dé. Te ìⁿ espíritú xínú cuéchi nŭŭ Yă Ndiôxí ní xăhaⁿ-xí xii-dé sá cáná ñaha-dé xii-n quíhíⁿ-n vèhe-dé dacuăha-n-dé tnŭhu Yă Ndiôxí —càchí cue téé ní tendaha té Còrneliú xăhaⁿ-güedé xii té Pèlú.

23 Te ní xăhaⁿ té Pèlú sá quíhu-güedé vehe-dé, te candeca tnàha-güedé ndihi-dé quíhíⁿ ndéé nduu tnèé. Te nduu tnèé-áⁿ ní xica-güedé ndécá tnàha-güedé ndihi té Pèlú cuáháⁿ, te tnàhá ìⁿ úú cue téé sândáá iní tnŭhu Jêsús ñuú Jopé cuáháⁿ ndihi ñaha-güedé xii-dé.

24 Te ndéé ingá nduu ní quexio-güedé ñuú Cêsareá. Te té Còrneliú ndétú ñaha-dé xii-güedé vehe-dé te sa ndècu túha-dé ndihi ñadíhí-dé ndihi nchaa landú-dé ndihi cue téé ío váha tnàhá tnŭhu ndihi-dé, chí ní cana ñaha-dé ní nítnáhá-yu ndihi-dé cundetú-yu té Pèlú.

25 Te sátá ní quèxio té Pèlú vehe té Còrneliú, te ní quee-dé quehé, te ní ngüíñí xítí-dé nŭŭ té Pèlú chíñŭhu ñaha-dé ní cùu.

26 Te té Pèlú ní xăhaⁿ-dě:

—Ndacuñí vâ ngüíñí xítí-n nŭŭ-í chí ñá díú Ndiôxí cùú-í, dicó ìⁿ téé ñuyúú-a cùú-í —càchí té Pèlú xăhaⁿ-dě xii-dé.

27 Te ta càháⁿ té Pèlú ndihi té Còrneliú cuanguihu-güedé xítí vehe, te chitu ñáyiu xìxíhi xítí vehe.

28 Te ní xăhaⁿ té Pèlú xii-yu:

—Sa năha-ndo sá càchí tnŭhu sá sánú ichi ñaha xii nchúhú ñáyiu isráél sá vâ cùú quixi-ndí vehe ni ìⁿ nchohó ñáyiu ñá túú cùu ñáyiu isráél te ni vâ cùú tnàhá tnŭhu ndihi ñaha-ndí xii-ndo. Dico Yă Ndiôxí ní cachí-gá sá vâ cùú càháⁿ-í sá vâ cùú càháⁿ ndihi-í ñáyiu ñá túú cùu ñáyiu isráél, chí cuu cuéchi.

29 Nŭŭ xíăⁿ ndihi-ni véxi-í òré ní quexio tnŭhu sá cáná ñaha-ndo. Te cachí tnŭhu-ndo ná cuendá cáná ñaha-ndo —cachí té Pèlú xăhaⁿ-dě xii-yu.

30 Te té Còrneliú ní xăhaⁿ-dě:

—Ní cuu cúmí nduu, te ñi-u-ni dàtná òré iha cùu-xi, te yúhú ndècu-í ñi-u-ni vehe-í, te ñá túú tñahí ná xèxì-í cáháⁿ ndihi-í Yá Ndiòxí, te òré-áⁿ ñí quexio ñⁿ espíritú xínú cuèchi núú-gá ñihnú-xí dóó cuixíⁿ dóó chàhñchí.

³¹ Te càchí-xi: “Còrneliú, ní xíndedóho Yá Ndiòxí tñúhu ní cáháⁿ-n ndihi-gá, te xíní-gá sá sáñaha-n dñhúⁿ xii ñáyiú ndàhú.

³² Te ñúú Jòpé ndécú ñⁿ téé nàni Xímú, àdi Pelú chi úú ñi-u-dé, te ndècu-dé vehe ñⁿ téé nàni tucu Xímú téé dàcutá ñⁱⁱ, te càa vehe-dé ñⁿ xio yuhu làmár, te cana-n-dé ná quèxi-dé ndatnúhu-n ndihi-dé”, duha ní cáháⁿ espíritú xínú cuèchi núú Yá Ndiòxí.

³³ Núú xíáⁿ ndihi-ñi ní cana ñaha-í xii-n. Te táxáhu xii-n sá vèxi-n chi iha ndècu-ndí nchaa-ndí ndétú ñaha-ndí xii-n cùndedóho-ndí tñúhu Yá Ndiòxí, te cuíní-ndí cachí tñúhu-n nchaa tñúhu ní cachí Yá Ndiòxí cáháⁿ-n —càchí té Còrneliú xáhaⁿ-dè.

Té Pèlú ní ndatnúhu-dé ndihi ñáyiú ní tacá vehe té Còrneliú

³⁴ Te té Pèlú xáhaⁿ-dè xii-yu:

—Vitna ní xíní-í sá Yá Ndiòxí cáháⁿ ndihi-gá ñáyiú cuèi ndèda-ni càa ñúú, te ñⁿ-ní quide-gá ndihi nchaa-yu.

³⁵ Te nchaa ñáyiú nèhe sá yíñùhu núú Yá Ndiòxí, te xíquide váha-yu, te nchaa-yu cùu váha iní ñáhá-gá xii-yu. Te ñá túú quide cuendá-gá cuèi ná ñáyiú ñúú cùu-yu.

³⁶ Te Yá Ndiòxí ní tendaha-gá Xítóhó Jesucristú ní sáháⁿ-gá ní xíndecu-gá nàcióⁿ Isràél, te ní xáhaⁿ-gá xii-yu ñⁿ tñúhu váha nàcuáa cuu váha iní-yu. Te ñi-u-ni mee Jèsús cúnú-gá núú ñáyiú ñi càa xico ñuyúí.

³⁷ Te ñaha-ndo sá dñha-gá ndí Juáa ní cáháⁿ ndí tñúhu Yá Ndiòxí núú ñáyiú, te ní dàcuándute ñaha ndí xii-yu. Te dàtnùni ní ngúíta Jèsús ní cáháⁿ-gá tñúhu-gá distritú Galilea, te dàtnùni ní sáháⁿ-gá ñihí nàcióⁿ Isràél ní cáháⁿ-gá tñúhu-gá núú ñáyiú.

³⁸ Te sa ñaha-ndo sá Yá Ndiòxí ní sáñaha-gá Espíritú-gá xii Jèsús téé ñúú Nazàrét ndécú ndihi-dé chindèe ñaha-xi xii-dé. Te ñaha-ndo sá ñí xica cuu Jèsús ní quide tátna-gá nchaa ñáyiú yihí ñaha espíritú cùndihi yucu ñávaha. Te ío vài-gá sá váha ní quide ñaha-gá xii-yu, te ducaⁿ ñí quide-gá, chi Yá Ndiòxí ní chindèe ñaha-gá.

³⁹ Te mee-ndí ní xíní-ndí nàcuáa ní quide Jèsús ñúú Jerusalén ndihi ñihí nàcióⁿ Isràél. Te ní sata caa ñaha-güedè xii-gá núú cùrúxi te yàcáⁿ ní xihí-gá.

⁴⁰ Te núú ùní nduu ní dándótó ñaha Yá Ndiòxí xii-gá. Te ní cuíní-gá sá cùndècu Xítóhó Jesucristú titní nduu sátá ñí ndoto-gá cuendá cáháⁿ ndihi ñaha-gá xii-ndí nchaa-ndí nàcuáa ní xica cuu-ndí ndihi-gá.

⁴¹ Te ñá ncháá ñáyiú ñi xíní ñáhá xii-gá, chi mee-ñi nchùhú cue téé ní cachí-gá sá càháⁿ ndáá-ndí sá ñí ndoto-gá, chi ní xíndecu ndihi-ndí-gá, te ní xihí ní xexi-ndí ndihi-gá, núu càháⁿ ndáá-ndí sá ñí ndoto-gá.

⁴² Te ní cachí-gá sá nchùhú quíhíⁿ-ndí cùñaha-ndí xii ñáyiú sá mée Yá Ndiòxí ní táuchíúⁿ-gá sá Jèsús cada ndáá-gá cuèchi nchaa ñáyiú ndècu vívú ndihi cuèchi nchaa ñáyiú ní xihí. Te ducaⁿ ñí xáhaⁿ Yá Ndiòxí xii Jèsús, te ñi-u-ni ducaⁿ ñí cachí Jèsús cáháⁿ-ndí.

⁴³ Te cue téé ní cáháⁿ tñúhu Yá Ndiòxí ndéé sanaha ñí cáháⁿ-güedé sá quíxi Jèsús, te ní cachí-güedé sá ncháá ñáyiú na quíndáa iní ñáhá xii Jèsús, te cada càhnu iní-gá nchaa cuèchi-yu —càchí té Pèlú xáhaⁿ-dè xii-yu.

Ní quexìo Espíritú Yá Ndióxi ní ngúndecu ndihi cue ñáyiú ñá túú cùu ñáyiú isràél

⁴⁴Te mei òré càháⁿ-dé ndèdóho-yu ní quexìo Espíritú Yá Ndióxi ní ngúndecu ndihi nchaa ñáyiú-áⁿ.

⁴⁵Te cue téé isràél cuáháⁿ ndihi té Pèlú, cue téé ní sándáá iní tnúhu Jèsús ní cuñúhu víhi-güedé sá ñí quexìo Espíritú Yá Ndióxi ní ngúndecu ndihí-yu, chí cuèndá sá ñà díú ñáyiú isràél cùú-yu núu xíáⁿ ní cuñúhu-güedé.

⁴⁶Te ní cutnùnì sá ñí quexìo Espíritú Yá Ndióxi ní ngúndecu ndihí-yu, chí ní ngüíta-yu càháⁿ-yu tnúhu sá dácàhu iní ñáhá Espiritú-gá, tnúhu sá ñà túú xiní-yu càháⁿ-yu. Te ní ndacáⁿ táhü-yu núú Yá Ndióxi cuèndá nchaa sá ñí quide-gá.

⁴⁷Te dàtnùnì ní xáhaⁿ tè Pèlú:

—Vitna te cuandute ñáyiú ní natuha ichi Xítohó Jesucrístú chi sa ndècu ndihí-yu Espíritú Yá Ndióxi dàtná cuìní-ndó ndècu ndihi nchoo, núu xíáⁿ vá cúú cächí dava-gá ñáyiú sá vá cúú cuanduté-yu —cächí-dé xáhaⁿ-dè xii-yu.

⁴⁸Te dàtnùnì ní xáhaⁿ-dè xii ñáyiú:

—Vitna te cuandute-ndo, te òré-áⁿ te cacunehe-ndo Xítohó Jesucrístú —cächí-dé xáhaⁿ-dè xii-yu.

Te dàtnùnì ní càháⁿ ndàhü-yu núú tè Pèlú cundecu ndihi ñaha-dè xii-yu ìⁿ úú nduu.

11

Té Pèlú ní cani-dé cuèndú núú ñáyiú sándáá iní tnúhu Jèsús ñuú Jerusàlén

¹Te cue téé ní táuchíúⁿ Jèsús dacuàha ñaha xii ñáyiú tnúhu-gá, ndihi cue ñáyiú ní sándáá iní tnúhu-gá, ñáyiú ndècu distritú Jùdeá ní níhi-yu tnúhu sá ñáyiú ñá túú cùu ñáyiú isràél ní sándáá iní-yu tnúhu Yá Ndióxi.

²Te òré ní ndexìo té Pèlú ñuú Jerusàlén, te ñáyiú isràél ñáyiú ní cachí sá cadá ncháa nacúaá ní càháⁿ ndíi Moisés ní satnuhu ñáhá-yu xii-dé.

³Te ní xáháⁿ-yu xii té Pèlú:

—¿Ná cuèndá ní sáháⁿ-n ndéé ndiáçáⁿ ní càháⁿ ndihi-n ñáyiú-áⁿ, te ñá túú quidè-yu dàtná quidè nchòo-i? Te ní sáháⁿ-n yacáⁿ ní xexi-n ndihí-yu —cächí-yu xáháⁿ-yu xii-dé.

⁴Te té Pèlú ní cani-dé cuèndú nacúaá ní cuu núú ñí sáháⁿ-dé, te xáhaⁿ-dè:

⁵—Ní xíndecu-í ñuú Jòpé. Te òré càháⁿ ndihi-í Yá Ndióxi, te ní dácótó ñaha-xi xii-í sá vèxi cuuⁿ ìⁿ dóó càhnú àndiú, te ndùtu ndi cumí xíquí-xi, te ní ngava-xi núú ndécù-í.

⁶Te ní xíndéhé vaha-í, te ní xiní-í nchaa quiti yòdo núú-xi. Te ìⁿ xichi yòdo quiti cúmí sáhá-xi, te ìⁿ xichi yòdo quiti dééⁿ, te ìⁿ xichi yòdo cóó, te ìⁿ xichi yòdo quiti ndava.

⁷Te ní tecú dóho-í càháⁿ ìⁿ sá càháⁿ, te cächí-xi: “Pèlú, ndacuñí cahni-n ndèda-ni càa quiti-a caxi-n-di”, cachí sá ñí càháⁿ-áⁿ.

⁸Te ní xáhaⁿ-í: “Vá càhnì-í-di chí cächí tnúhu sá sánú ichi ñaha xii nchúhú ñáyiú isràél sá vá cúú càxi-ndi nchaa quiti-a”, xáhaⁿ-í.

⁹Te ní tecú dóho-í càháⁿ-ni tucu núú ñinu, te cächí sá càháⁿ-áⁿ: “Vá cúú cächí-n sá vá cúú càxi-n-di, chí mee Yá Ndióxi ní cachí-gá sá díú ncháa quiti-áⁿ cuu caxi-o”, cächí sá càháⁿ-áⁿ.

¹⁰Te ducaⁿ ñí càháⁿ sá ñí càháⁿ-áⁿ ùnì xito, te dàtnùnì cuàndaa dóó-áⁿ ndihi nchaa quiti-áⁿ àndiú.

11 Te òré-ni ní quexìo úní cue tée vehe núú ndécù-í. Te cue tée-áⁿ nǐ tendaha ñaha ìⁿ tée ñuú Cèsareá nándücu ñaha-güedé xii-í.

12 Te mee Espiritú Yá Ndiòxí ní cachí-xi sá quíhíⁿ-í ndihi-güedé, te ní cachí-xi sá ña túú nǎ caní iní-í. Te tnàhá ìñú cue tée ndècu iha ní sáháⁿ ndihi ñaha-güedé xii-í, te nchaa-ndí ní sáháⁿ-ndí vehe té Còrneliú ñuú Cèsareá.

13 Te ní caní-dé cuèndú nàcuáa ní cuu ní sáháⁿ ìⁿ espíritú xínú cuèchi núú Yá Ndiòxí vehe-dé, te ní quíhu-xi ndéé xití vehe-dé, te ní xáhaⁿ-xi xii-dé: “Tendaha-n cuè tée na quíhíⁿ-güedé ñuú Jòpé quíngana-güedé ìⁿ tée nàni Xímú, àdi Pelú chi úú ñiú-dé. Te candeca ñaha-güedé quixi.

14 Te tée-áⁿ cachí tnúhu-dé nása cada-n nàníhí tàhú-n ndihi ñadihí-n, ndihi landú-n, ndihi nchaa ñáyiú xínu cuechi vehe-n”, duha ní xáhaⁿ espíritú-áⁿ xii té Còrneliú.

15 Te òré ní nguíta-í càháⁿ ndihi-í-yu ní quexìo Espiritú Yá Ndiòxí ní ngúndecu ndihí-yu dàtná ní quide-xi cúnàhá ní taxi Yá Ndiòxí Espiritú-gá ndéé ñhna ní ngúndecu ndihi nchoo.

16 Te ní ndacu iní-í nàcuáa ní càháⁿ Xítóhó Jesucristú, te duha ní cachí-gá: “Té Juàà ní xóo dacuàndute-dé ñáyiú, dico yúhú sǎñaha-í Espiritú Yá Ndiòxí cundecu ndihí-yu”, duha ní cachí-gá.

17 Te Yá Ndiòxí ní sǎñaha-gǎ Espiritú-gá cundecu ndihi ñáyiú ñá túú cùu ñáyiú isràél dàtná ní quide-gá cúnàhá ní sándáá iní-ó tnúhu Jèsús, núu xiǎⁿ vǎ càchí-í sá vǎ cúú càda-í ìⁿ sá cuiní Yá Ndiòxí cada-í —càchí té Pèlú xáhaⁿ-dè xií-yu.

18 Te sátá dúcáⁿ nǐ xáhaⁿ tǎ Pèlú, te ñá túú-gǎ ná tnúhu ní càháⁿ-yu, te ío ní cudíí ìni-yu nchaa nàcuáa ní quide Yá Ndiòxí, te ní xitnàhá-yu:

—Tnàhá nchaa ñáyiú ñá túú cùu ñáyiú isràél naníhí tàhú-yu núu na dàñá-yu nchaa sá cuèhé sá dúhá quidé-yu, chí ducaⁿ cuiní Yá Ndiòxí cunduu —càchí-yu xitnàhá-yu.

Ñáyiú sándáá iní tnúhu Jèsús ñuú Antiòquiá

19 Te sátá nǐ sañi-güedé té Tévá, te ní cuiní-güedé cada úhú-güedé nchaa ñáyiú ní sándáá iní-xi tnúhu Jèsús, te ní xité nuú-yu ndi tnàhá ìⁿ ñuú. Te davá-yu cuáháⁿ-yu ndéé distritú Fèniciá ndihi distritú Chìpré ndihi ñuú Antiòquiá. Te ní càháⁿ-yu tnúhu Jèsús núú mee-ni ñáyiú isràél, te ñá ní xitnùhu-yu dava-gá-yu.

20 Te dava-gá ñáyiú distritú Chìpré ndihi ñáyiú ñuú Cìrené ní sáháⁿ-yu ñuú Antiòquiá. Te ñá díú mèe-ni ñáyiú isràél ní càháⁿ ndihí-yu, chí tnàhá ñáyiú ñá túú cùu ñáyiú isràél ní xáháⁿ-yu tnúhu Jèsús.

21 Te ní chindee ñaha-gǎ xii ñáyiú càháⁿ tnúhu-gǎ, te vǎi-gǎ-yu ní sándáá iní-yu-gǎ chí ní tuhá-yu ichi-gǎ.

22 Te ñáyiú ndècu ñuú Jerusálén ñáyiú ní sándáá iní tnúhu Jèsús ní níhí-yu tnúhu nàcuáa ní cuu, núu xiǎⁿ ní tendàhá-yu té Bèé cuáháⁿ-dè ñuú Antiòquiá.

23 Te òré ní quexìo té Bèé, te ní xiní-dé nàcuáa ní quide ñaha-gǎ xií-yu sá nǐ naníhí tàhú-yu, núu xiǎⁿ ío ní cudíí ìni-dé. Te ní dácáhu ìni ñáhá-dè, te ní xáhaⁿ-dè:

—Ío nducu ndèe-ndo cada-ndo nchaa sá càchí Yá Ndiòxí cada-ndo —càchí-dé xáhaⁿ-dè xií-yu.

24 Te té Bèé cúú-dè ìⁿ tée váha iní-xi, te ndècu ndihi-dé Espiritú Yá Ndiòxí, te ío sándáá iní-dé tnúhu Jèsús. Te vǎi vihi ñáyiú ní tuhá-yu ichi-gǎ.

²⁵ Te dātnùní cuáháⁿ té Bèè ñuú Tàrsù cuánúndúcú-dě té Sàulú.

²⁶ Te òrè ní naníhí ñáhá-dě, te ndèca ñaha-dé cuáháⁿ ñuú Antiòquiá, te yàcáⁿ ní xíndecu-güedé ìⁿ cuíá ndíhi ñáyiú ní sàndáá iní tnúhu Jèsús, te vài-yu ní dácuáhá ñaha-güedé tnúhu-gá. Te ñuú Antiòquiá ní dánání ñáhá-yu Cristiánú xii nchaá ñáyiú sàndáá iní tnúhu Jèsús.

²⁷ Te ndéé dàvá-áⁿ ní quee ìⁿ úú cue téé cáháⁿ tnúhu Yá Ndiòxí ñuú Jerusàlén cuáháⁿ-güedé ñuú Antiòquiá.

²⁸ Te ìⁿ-dé nání-dě Àgabú, te ní chindee ñaha Espíritú Yá Ndiòxí xii-dé, te ní sáháⁿ-dé núú nchàa ñáyiú sàndáá iní tnúhu-gá, te ní xáhaⁿ-dě xii-yu sá quíxí ìⁿ tnamá ñíhí ñuyú. Te ducaⁿ ní cuu sáta ní ngúnutní té Claudiú téé yìndaha cuéhé ñàcióⁿ.

²⁹ Núú xíáⁿ nchaá ñáyiú sàndáá iní tnúhu Jèsús ñuú Antiòquiá ní ndatnúhu-yu sá chindéé-yu nchaá ñáyiú sàndáá iní tnúhu-gá ndécú ñàcú distritú Jùdeá cuèndá vá ndóhó vñí-yu docó. Te ñàcuáa ní ñíhí-yu, te ducaⁿ ní sacáⁿ tnáhá-yu.

³⁰ Te ní tacá díhúⁿ-áⁿ, te nèhe té Bèè ndíhi té Sàulú cuáháⁿ, cuáha-güedé cue téé yìndaha ñáyiú sàndáá iní tnúhu-gá.

12

Sátá ñí xíhí té Jacobó, te ní ngáta té Pèlú vecaá

¹ Te ndéé dàvá-áⁿ ní ngúita té Hèrodés téé yìndaha ñaha xii ñáyiú isràèl ní quide úhú-dé ìⁿ úú ñáyiú sàndáá iní tnúhu Yá Ndiòxí.

² Te ní táuchíúⁿ-dè ní tñi-güedé té Jacobó ñaní té Juáá, te ní sahni ñaha-güedé ndíhi machìti.

³ Te ío ní cudíⁿ iní dawa ñáyiú isràèl cuèndá sá ní sahni ñaha-güedé xii té Jacobó, núú xíáⁿ ní tendaha tucu té Hèrodés sandádú-dé ní sáháⁿ tñi tucu-güedé té Pèlú. Te ducaⁿ ní quide-dé cútñhá ní xóo vico ní xexí-yu pàá sá ñà túú yìhí levadurá.

⁴ Te ní naníhí-güedé té Pèlú, te ní tñi ñaha-güedé ndécá ñaha-güedé cuáháⁿ vecaá. Te té Hèrodés ní táuchíúⁿ-dè cuáháⁿ sáhúⁿ ìⁿ sandádú cundeé-güedé té Pèlú. Te ní xáhaⁿ-dè:

—Cundeé-ndó ndí cùmí ndí cùmí-ndó tñe-áⁿ —càchí-dé xáhaⁿ-dè xii-güedé.

Te té Hèrodés ní sani iní-dé queñuhu-dé té Pèlú vecaá òrè ná yàha vico cuèndá cahni ñaha-güedé cáháⁿ-dè ní cuu.

⁵ Te ní xíhí-ni té Pèlú vecaá, te ní xíndéé cuaa ñaha sàndadú xii-dé. Te cue ñáyiú sàndáá iní tnúhu Yá Ndiòxí ío ní xíáⁿ táhú-yu núú-gá cuèndá sá ñà túú ná cada ñaha-güedé xii-dé.

Yá Ndiòxí ní dácacu-gá té Pèlú vecaá

⁶ Ìⁿ níú-gá quíhi té Pèlú vecaá ní cuu, te nduu tñé tauchíuⁿ té Hèrodés quíhíⁿ sandádú queñuhu ñaha-güedé xii-dé vecaá cuèndá quini nchaá ñáyiú nása cada ñaha-güedé ní cuu. Te té Pèlú cáá-dè xidí-dé xití vecaá, te ndi ndúú dúcúⁿ ndáhá-dè ndútú càdená, te xio xio dñi-dé ndécú sàndadú, te dawa-gá sandádú xíndéé-güedé yehe vecaá.

⁷ Te ní quexíó ìⁿ espíritú xínú cuèchi núú Yá Ndiòxí xití vecaá núú cáá tñe Pèlú xidí-dé, te uuⁿ ní dáyhé-xi xití vecaá, te ní danguíhí ñaha-xi xii-dé, te xáhaⁿ-xi xii-dé:

—Yáchí, ndácóo —càchí-xi xáhaⁿ-xi xii-dé.

Te ní ndacóo-dé, te nchaa cadèná ndútú dúcúⁿ ndáhá-dě ní nandáxí.

⁸ Te ní xáhaⁿ tùcu espíritú-áⁿ xii-dé:

—Yáchí, nucuíhmu dóo-n, te ndíhu-n chàú-n —càchí-xi xáhaⁿ-xi xii-dé.

Te ní ndíhu nuu-dé dóo-dě, te ní xáhaⁿ tùcu espíritú-áⁿ:

—Candixi dóo-n, te na quíhíⁿ-ó —càchí-xi xáhaⁿ-xi xii-dé.

⁹ Te té Pèlú ní chinchíⁿ-dé espíritú-áⁿ, te ñá ní cùtnuní iní-dé nũu ndáá ìⁿ espíritú xínú cuèchi núú Yá Ndiòxí ducaⁿ quide àdi ñáhá, te dàcoto ñaha-xi xii-dé ní sani iní-dé.

¹⁰ Te ndèndaha-ní-dě espíritú-áⁿ cuáháⁿ ní yáha-dé nàcuáa xínutnìí sandàdú, te ta yáha-gá-dé núú ndécú dàva-gá-güedé. Te ní sáa-dé ndéé yuyèhe núú ndèdí caá nàcuáa ní yáha ichi sá cuáháⁿ ndéé xití ñuú, te ní nacaáⁿ méé yèhe-áⁿ, te ní quee-dé cuáháⁿ-dè ndíhi espíritú-áⁿ. Te ní tnahá-dé ìⁿ tnuú, te yàcáⁿ ní dàndóo ñaha espíritú-áⁿ xii-dé.

¹¹ Te dàtnuní ní nene váha saní núú-dě, te ní cutnùnì iní-dé, te ní cachí-dé:

—Ndáá sá Yá Ndiòxí ní tendaha-gá espíritú-áⁿ ní quixi-xi ní dàcácu ñaha-xi xii-í cuèndá sá và cahní ñaha té Hèrodés. Te dava ñáyiú isràél ío ní cudíí iní-yu cuèndá sá ní cuiní té Hèrodés cahni ñaha-dě xii-í —duha ní cachí-dé sátá ní cutnùnì iní-dé.

¹² Te sátá ní cutnùnì iní-dé sá ní cácu-dé, te cuáháⁿ-dè vehe ìⁿ ñaha nàni Mariá náná tẽ Juáá, àdi Mácú chi úú ñuú-dé, te xíaⁿ ndécú vài-yu càháⁿ ndíhí-yu Yá Ndiòxí.

¹³ Te té Pèlú ní quexio-dé ndéé yuyèhe ní dàcásáⁿ-dè, te ní quixi ìⁿ xíchí nání Ròdé ní quixi ndehe-xi ná cúú ñáyiú dàcasaⁿ.

¹⁴ Te ní nucuíhuⁿ ndudú-xi sá díú tẽ Pèlú, te ní cudíí víhí ìní-xi, dico ñá ní nacaáⁿ-xi yuyèhe. Te ní quene cunu-xi cuáháⁿ ngúñaha-xi xii-yu sá nútnìí té Pèlú yuyèhe ndaa quehé.

¹⁵ Te ñá ní sàndáá iní-yu tnúhu ní càháⁿ-xi, te xáhãⁿ-yu xii-xi:

—¡Ná tnúhu víhí càháⁿ-õⁿ xíchí lúcú! —càchí-yu xáhãⁿ-yu.

Te xáhaⁿ-xi sã ndàá nútnìí-dé, te xáhãⁿ-yu:

—Ñá díú tẽ Pèlú chi espíritú sá xító ñaha xii-dé cúú sã càháⁿ —càchí-yu xáhãⁿ-yu xii-xi.

¹⁶ Te òré ducaⁿ xítnàhá-yu, te té Pèlú ní dàcásáⁿ tùcu-dé yuyèhe. Te ní sáháⁿ-yu ní nacaáⁿ-yu yuyèhe, te ní xiní-yu sá díú tẽ Pèlú, te ní cuíhu víhí-yu.

¹⁷ Te ní quide-dé ndaha-dé núú-yu cuèndá cadí-yu yuhú-yu. Te ní ngúita-dé ní cani-dé cuèndú nàcuáa ní quide ñaha Yá Ndiòxí xii-dé sá ní dàcácu ñaha ìⁿ espíritú xínú cuèchi núú-gá xii-dé vecaá, te ní xáhaⁿ-dè xii-yu:

—Cúu-ndo tẽ Jàcobó ndíhi dava-gá ñáyiú sàndáá iní tnúhu Jèsús nàcuáa ní quide ñaha Yá Ndiòxí xii-í —càchí-dé xáhaⁿ-dè xii-yu.

Te sátá dúcáⁿ ní xáhaⁿ-dè, te ní quee-dé cuáháⁿ-dè ingá xichi.

¹⁸ Te sátá ní túnáa, te ní ngúita nchaa sandàdú càháⁿ ìⁿ càháⁿ ìⁿ-güedé, te xítnàha-güedé:

—Ñá túú-gá té Pèlú yíhí vècaá, ¿te nása cada-o-í? —càchí-güedé xítnàha-güedé.

¹⁹ Te té Hèrodés ní tendaha-dè titnì sandàdú cuáháⁿ-güedé cuánúndúcú ñaha-güedé, te ñá ní nàníhí ñáhá-güedé xii-dé. Te dàtnuní ní cana-dé sandàdú cue téé ní xíndeé ñáhá xii té Pèlú, te ní tenàá ñáhá-dè xii-güedé, te ní xáhaⁿ-dè xii dava-gá cue sandàdú-dé:

—Cahni-ndo cuè téé-ãⁿ —càchí té Hèrodés xãhaⁿ-dë.

Te dàtnùnì ní quee té Hèrodés distritú Jùdeá cuáháⁿ-dé ñuú Cèsareá, yàcáⁿ ní ngündecu-dé.

Ní xíhí té Hèrodés

²⁰ Té Hèrodés ní cudééⁿ-dë núú ñáyiú ñuú Tìrú ndihì núú ñáyiú ñuú Sìdón. Te xíãⁿ ní ndatnúhu-yu ní cuu ìⁿnuu tñúhu-yu, te ní xicá-yu cuáháⁿ-yu cuáháⁿ ndatnúhu ndihì ñáhá-yu xii-dé, te ní ndatnúhu ndihì-yu té Blàstú. Te téé-áⁿ cúú-dë chiúⁿ quide-dé núú tē Hèrodés, te ní chindee tñúhu ñaha-dë xii-yu, chi ní cáháⁿ ndàhú-yu núú tē Hèrodés sá vã cádá úhú ñáhá-dë xii-yu. Te ducaⁿ ní quidé-yu cuèndá ñuú té Hèrodés-áⁿ queé sã xéxi-yu.

²¹ Te ní xáhaⁿ tē Hèrodés ná nduu quíhíⁿ-yu ndatnúhu ndihì ñaha-dë xii-yu, te nduu-ãⁿ ní quíunuu-dé ìⁿ dóó vãha, ìⁿ sá sácúihnu téé tàxi tñuní. Te ní ngóo-dé núú xilé vãha, xilé sá sácóo nchihì téé tàxi tñuní, te ní ngúíta-dé ní cáháⁿ sàhú-dé dóho-yu.

²² Te uuⁿ ní cuáá-yu te càchí-yu:

—¡Téé-a càháⁿ-dé dico ñã díú tē ñuyú-a cùu-dé chi ndiòxí cúú-dé! —càchí-yu xítnáhá-yu.

²³ Te ñuú òré-áⁿ ní yáha ìⁿ espíritú xínú cuèchi núú Yã Ndiòxí, te ní sãñaha-xi cuèhé xii té Hèrodés. Te ducaⁿ ní tnahá-dé chi mee-dé ñã ní xáhaⁿ-dë sã ñáyiú cùu-dé, te ní cáháⁿ-yu sã ndiòxí cúú-dé. Te nchito-gá-dé ní sanú ñáhá tìndácú xii-dé, te dàtnùnì ní xíhí-dé.

²⁴ Te ío tití xichi ní sáháⁿ ñáyiú sàndáá iní tñúhu Yã Ndiòxí ní cáháⁿ-yu tñúhu-gá, te ío chítú-yu ní sàndáá iní-yu tñúhu-gá.

²⁵ Te té Bèé ndihì té Sàulú ní ndihì chiúⁿ-güedé, te ní ndee-güedé ñuú Jerusalén cuáháⁿ-güedé ndihì té Juáá, ãdi Mácú chi úú ñuú-dé.

13

Té Bèé ndihì té Sàulú cuáháⁿ-güedé dácuàha-güedé ñáyiú tñúhu Yã Ndiòxí nchaa ñuú xicá

¹ Te ñuú Antiòquiá ndécú ìⁿ úú cue téé càháⁿ tñúhu Yã Ndiòxí núú nchaa ñáyiú ní sàndáá iní-xi tñúhu-gá. Te ndècu tucu ìⁿ úú cue téé cùu mestrú dácuàha ñaha-güedé xii-yu tñúhu-gá. Ìⁿ-dé nání-dë Bèé, te ìⁿ-dé nání-dë Xímú, te té Xímú-áⁿ xáhaⁿ-güedé Nègrú chi tnuu-dë. Te ingá-dé nání-dë Lùciú, te téé-áⁿ cúú-dë téé ñuú Cìrené. Te ingá-dé nání-dë Sàulú, te ingá tucu-dé nání-dë Manáén. Te té Manáén-áⁿ ndihì té Hèrodés téé cùu gobiernú Galileá ío vãha ní xóo cáháⁿ ndihì tñaha-güedé cùtnáhá ní cuu lìhli-güedé.

² Te ìⁿ nduu ñã túú ñã ní xéxi ñáyiú ní sàndáá iní tñúhu Yã Ndiòxí cuèndá mee-ni-gã ní cáháⁿ ndihì-yu, te ní xáhaⁿ Espíritú Yã Ndiòxí xii-yu:

—Tendaha-ndo tē Bèé ndihì té Sàulú quíhíⁿ-güedé dava-gá ñuú cada-güedé chiúⁿ tahu-í, chi ducaⁿ cuiní-í cunduu —càchí Espíritú-gá xãhaⁿ-xi xii-yu.

³ Te ní cáháⁿ ndihì tucú-yu Yã Ndiòxí, te ñã túú tñahí ná ní xéxi tucú-yu, te ní sacáⁿ ndodo-güedé ndaha-güedé díquí tē Bèé ndihì té Sàulú. Te sátá dúcáⁿ ní quide-güedé, te ní quide ndee iní ñáhã-yu xii-güedé.

Té Bèé ndihì té Sàulú cuáháⁿ-güedé distritú Chìpré cáháⁿ-güedé tñúhu Yã Ndiòxí

⁴ Te té Bèé ndihì té Sàulú ní quee-güedé cuáháⁿ-güedé cuèndá ducaⁿ cuiní Espíritú Yã Ndiòxí cunduu sá cacá cùu-güedé dava-gá ñuú, te ní quexio-güedé

ñuú Selèuciá, te yacáⁿ ní queé-güedé bàrcú cuáháⁿ-güedé distritú Chìpré. Te ñuú-áⁿ cáá xití làmár chi ndècu ñuhu yichí xití ndute.

⁵ Te ní quexio-güedé mei ñuú Saláminá, te ní quene-güedé bàrcú, te ní xica-güedé cuáháⁿ-güedé nchaá veñúhu ñáyiú isràél càháⁿ-güedé tnúhu Yá Ndiöxí. Te cuáháⁿ ndihi-güedé té Juáá cuendá chindee ñaha-dé xii-güedé.

⁶ Te ní tñi-güedé ichi cuáháⁿ-güedé ñuú Páfós cáá ndáa ingá xio Chìpré, te yacáⁿ ní naníhí tnáhá-güedé ndihi ñⁿ téé isràél nání-dé Barjèsús, te téé-áⁿ xiní-dé cada ndùu-dé, te càchí-dé sá càháⁿ-dé tnúhu Yá Ndiöxí dico ñá ndáa.

⁷ Te téé-áⁿ quidé chiùⁿ-dé ndihi té Sèrgiú, àdi Páblú chi úú diù-dé, te cùu-dé gobièrnú Chìpré, te ío túha-dé. Te ní cana-dé té Bèè ndihi té Sàulú, chi cuiní-dé cundedóho-dé tnúhu Yá Ndiöxí.

⁸ Te téé quide nduu-áⁿ ñá ní dàña-dé càháⁿ-güedé tnúhu-gá, chi ñá ní cuiní-dé sá téé cùu gobièrnú-áⁿ tuha-dé ichi Yá Ndiöxí. Te ducaⁿ ñí quide té Barjèsús, téé xáhaⁿ-güedé Èlimás.

⁹ Te tnàhá tucu té Sàulú ndécú úú diù-dé chi xáhaⁿ tucu-güedé Páblú, te ndècu ndihi-dé Espiritú Yá Ndiöxí. Te ní xíndéhé ñí ñáhá-dé xii téé quide nduu-áⁿ.

¹⁰ Te ní xáhaⁿ-dè:

—Yòhó, chi dàtná quidé yùcu ñáváha quide-n chi mee-ni dàndahú-n ñáyiú. Yòhó cúu-n dèhe sácuihná, chi nchaá tnúhu váha cuiní Yá Ndiöxí càháⁿ-yu, te yòhó ñá dáña-n.

¹¹ Te vitna quini-n nàcuáa cunduu, chi taxi Yá Ndiöxí ñⁿ castiú xii-n chi vá cùtnuní-gá núu-n càca cuu-n ñⁿ úú nduu —càchí-dé xáhaⁿ-dè xii téé quide nduu-áⁿ.

Te òré ducaⁿ ñí xáhaⁿ tè Páblú xii-dé, te òré-ni ní cuaa-dé, te ñá túú ní cùtnuní tnàhí-gá núu-dé, te ní xóo nducu-ná-dé ñáyiú ní xóo cuita nehe ñaha xii-dé.

¹² Te téé cùu gobièrnú ní xiní-dé nàcuáa ní quide té Páblú, te ío ní cuñúhu-dé. Te ní tnahá iní-dé tnúhu Jèsús, núu xiáⁿ ní sándáa iní-dé.

Té Páblú ndihi té Bèè ndécú-güedé ñuú Antiòquia Pisiidía

¹³ Te té Páblú ndihi dava-gá cue téé xica cuu ndihi-dé ní queé-güedé bàrcú, te ní quee-güedé ñuú Páfós cuáháⁿ-güedé ñuú Pèrgé, te ñuú-áⁿ yíndèhu-xi distritú Pánfilía. Te té Juáá ní nacuico-dé ní dándóo ñaha-dé xii-güedé cuánuhú-dé ñuú Jerusalén.

¹⁴ Te dava-gá-güedé ní quee-güedé ñuú Pèrgé cuáháⁿ-güedé ñuú Antiòquia, te Pisiidía yíndàha-xi ñuú-áⁿ. Te nduu xíndetatú-yu, te ní sáháⁿ-güedé veñúhu ñáyiú isràél, te ní ngóo-güedé xití veñúhu.

¹⁵ Te cue téé ndècu veñúhu ní queheⁿ-güedé tutú yódó tnùní nchaá tnúhu sá ñí chídó tnùní ndíi Moisés ndihi tutú yódó tnùní nchaá tnúhu sá ñí chídó tnùní dava-gá cue téé ní xóo càháⁿ tnúhu Yá Ndiöxí ndéé sanaha, te ní dácuahá-güedé ní xíndedóho cue ñáyiú, te dàtnuní cue téé yíndaha veñúhu-áⁿ ní xáhaⁿ-güedé xii té Páblú ndihi dava-gá-güedé:

—Nchòhó cue téé cùu ñaní tnáhá-ndí, te núu cuiní-ndó càháⁿ-ndó tnúhu Yá Ndiöxí, te cuu càháⁿ-ndó tnávíi cuendá cutúha-yu —càchí-güedé xáhaⁿ-güedé.

¹⁶ Te té Páblú ní ndacuíñí-dé, te ní ndacani-dé ndaha-dé cuendá cadí-yu yuhú-yu te cundedóho-yu tnúhu càháⁿ-dé, te ní xáhaⁿ-dè:

—Te nchòhó ñáyiú quide nchaá nacuáa càháⁿ Yá Ndiöxí ndihi nchaá nchòhó ñáyiú isràél, cundedóho-ndo nchàa-ndo ñⁿ tnúhu na càháⁿ-í-a.

17 Te cuèi ndéé sanduu te cuèi vitna chindee ñaha-ni Yá Ndiöxí xii nchaa ñáiyu israél, te ní nacáxi ñaha-gá xií-yu te ní chindee ñaha-gá cuendá cáyá-yu, chí cuini-gá sá cúu vai-yu, te ducaⁿ ní quide-gá cútñahá ní xíndecú-yu nàcióⁿ Ègiptú. Te dätñuní ní dácäcu ñaha-gá xií-yu ñuú-áⁿ, chí mee-gá nchaa ndäcu-gá quidé-gá.

18 Te ní xíndecú-yu ñⁿ xichi núu ñà túu tñahí sàcúndecu ñáiyu údico cuía, te xití údico cuía-áⁿ ní cundee ñni-gá nchaa sá ní quidé-yu.

19 Te Yá Ndiöxí ní chindee ñaha-gá xii ñáiyu israél, te ní dánáá-yu úsá nàcióⁿ, chí cuendá ní cuini-gá cuu cuendá-yu ñuhú-áⁿ.

20 Te dätñuní ní cachí Yá Ndiöxí sá díú-ní cuè téé cùchiuⁿ taxi tñuní-güedé nchaa ñáiyu, te ducaⁿ ní quide-güedé dätñá cúmí ciëndú dava cuía. Te sátá xiáⁿ, te ní xíndecu té Sàmuelí téé ní cáháⁿ tñuhu Yá Ndiöxí.

21 Te dàvá-áⁿ ní cuini ñáiyu israél sá cúndecu ñⁿ téé quíndaha ñaha-dé xií-yu, te Yá Ndiöxí ní cachí-gá sá té Sàul quíndaha-dé-yu, te téé-áⁿ ní cuu-dé déhe té Cís, te té Benjàmín téé ní xíndecu ndéé sanaha-gá ní cuu ñani tñahá-dé. Te té Sàul ní xíndaha-dé ñáiyu údico cuía.

22 Te Yá Ndiöxí ñá ní cuini-gá cundecu-ni-dé quíndaha-dé ñáiyu, chí ní cuini-gá sá té Dàvíí ndíhu ndaha-dé cue ñáiyu israél, te ní cachí-gá: “Ío váha ní tñahá ñni-í nàcuáa quide té Dàvíí déhe téé Isáí, te cada-dé nchaa nàcuáa cúñaha-í xii-dé”, duha ní cachí Yá Ndiöxí –cächí té Páblú xáhaⁿ-dè xií-yu.

23 Te ní xáhaⁿ tucu té Páblú:

–Díu-ni ñani tñahá té Dàvíí cúu Jèsús. Te Yá Ndiöxí ní tendaha-gá Jèsús ní quixi-gá ñuyú-a cuendá nchaa ñáiyu israél ná quíndáá ñni ñahá xii Jèsús naníhí tñhú-yu, chí ducaⁿ ní cachí Yá Ndiöxí cunduu.

24 Te cútñahá vátá ngüita-gá Jèsús cáháⁿ-gá tñuhu Yá Ndiöxí, te ní cáháⁿ té Juáá núu ñáiyu israél sá xíní ñuhu-xi dañá-yu nchaa sá cuèhé sá dúhá, te cuanduté-yu.

25 Te sa ta cüyatni-ni-gá cuú-dé, te ní xáhaⁿ-dè xií-yu: “Nchòhó cächí-ndó sá yñhú cúu-í Cristú Yaá ndétú-ndó dico ñahá, chí ñá díú yñhú cúu-í Cristú, chí davitna quixi Cristú Yaá tendaha Yá Ndiöxí quixi ñuyú-a. Te yúhú cúu-í ñⁿ téé duuⁿ duuⁿ ñá túu tñu nandaxi cuèdicó chàu-gá dico quide-í chiúⁿ-gá”, duha ní cáháⁿ te Juáá –cächí té Páblú xáhaⁿ-dè xií-yu.

26 Te ní xáhaⁿ tucu té Páblú:

–Cundedóho tucu-ndo ñngá tñuhu na cáháⁿ-í. Nchòhó tñahá-ndó cùu-ndo ñani tñahá ndíi Àbrahám, te xíní-ndó sá Yá Ndiöxí cúnúu-gá. Te díu-ni-gá cuini-gá sá ncháá-ndó cundedóho-ndo tñuhu-gá, chí cùu-xí tñuhu sá cáháⁿ nàcuáa naníhí tñhú-ndó.

27 Te nchaa ñáiyu ndècu ñuú Jerusálén ndíhi nchaa te téé cúnúu ñá ní cùnuní ñni-yu ndíhi-güedé sá Yá Ndiöxí ní tendaha-gá Jèsús ní quixi-gá ñuyú-a. Te ñá ní sáha-yu cuendá sá díú Jèsús ní cacunehe cue téé ní cáháⁿ tñuhu Yá Ndiöxí ndéé sanaha cuèi ní dácuahá-yu tñuhu-gá veñuhu-yu ndi tñahá úná nduu, nduu ndetatú-yu. Te ní cachí-yu sá ndècuéchi Jèsús, te ní xáháⁿ-yu sá cáhni ñaha-güedé xii-gá. Te xiáⁿ sa ñaha cue téé ní xóo cáháⁿ tñuhu-gá ndéé sanaha sá dúcáⁿ cáháⁿ-yu.

28 Te cuèi ñá túu ñá ní quide-gá te ní xáháⁿ-yu xii té Pilatú téé cùu gobiernú sá táuchùⁿ-dé cahni ñaha-güedé xii-gá.

29 Te xiáⁿ núu ní sata caa ñaha-güedé xii-gá núu cùrúxi. Te ní quide-güedé nchaa nàcuáa ní chidó tñuní cue téé ní cáháⁿ tñuhu Yá Ndiöxí ndéé sanaha.

Te sátá nì xihí-gá, te ní nunehe ñaha-güedě xii-gá núú cùrúxí, te nchìdo ñaha-güedé cuáháⁿ, te ní chihí ñaha-güedě ìⁿ xití yaú.

³⁰ Te Yá Ndiöxí ní dándótó-gá Jèsús.

³¹ Te titní xito ní sáháⁿ Jèsús núú ndécú ñáyiú ní xica cuu ndihí-gá, ñáyiú ní quee distritú Galileá ní sáháⁿ-yu ndihí-gá ñuú Jerusalén. Te vitna nchaa ñáyiú-áⁿ xáháⁿ-yu xii dava-gá ñáyiú isráél nàcuáa ní cuu ní ndoto-gá.

³² Te nchúhú cáháⁿ-ndí nàcuáa cada-ndo nàníhí tàhú-ndó, chi Yá Ndiöxí ní xáhaⁿ-gá xii cue ñaní tnáhá-ó ní xíndecu ndéé sanaha sã téndàha-gá Déhe-gá Jèsús quixi-gá ñuyíú-a.

³³ Te ní quixi-gá ní xihí-gá, te ní dándótó ñaha Yá Ndiöxí xii-gá, te núú xiáⁿ naníhí tàhú-ó núu na quíndáa iní-ó-gá. Te ìⁿ téé ní cáháⁿ tnúhu Yá Ndiöxí ndéé sanaha ní chídó tnùnì-dé núú sàlmú cúú ùú nàcuáa ní cáháⁿ Yá Ndiöxí ní xáhaⁿ-gá xii Déhe-gá, te duha ní xáhaⁿ-gá: “Yòhó cúú-n Déhe-í, te vitna cutnùnì iní ñáyiú sá yùhú cúú-í Tãtá-n”, duha ní xáhaⁿ-gá xii Jèsús. Te ðiú-ni ducaⁿ ní chídó tnùnì téé ní cáháⁿ tnúhu-gá ndéé sanaha.

³⁴ Te ingá xichi tucu núú tùtú-gá ní chídó tnùnì ìⁿ téé ní xíndecu ndéé sanaha nàcuáa ní xáhaⁿ-gá xii Déhe-gá, te duha ní xáhaⁿ-gá: “Mee-ni sã vãha cada ñaha-í dàtná ní xii-í té Dàvíí”, duha ní xáhaⁿ-gá. Te ducaⁿ ní chídó tnùnì téé ní xíndecu ndéé sanaha nàcuáa ní cáháⁿ Yá Ndiöxí, chi òrè ní xihí Jèsús te ní dándótó ñaha-gá cuèndá sá vã tíú yiqui cuñú-gá.

³⁵ Te núú xiáⁿ duha ní chídó tnùnì ìⁿ téé ní xíndecu ndéé sanaha núú libré Sàlmú nàcuáa ní xáhaⁿ-dè xii-gá: “Vá dàñá-n sã tíú yiqui cuñú Déhe-n chi ío vãha quide-gá”, duha ní chídó tnùnì téé ní xíndecu ndéé sanaha —càchí té Pãblú xáhaⁿ-dè xii-yu.

³⁶ Te xáhaⁿ tùcu-dé:

—Te té Dàvíí ní quide-dé nchaa chùuⁿ ní táhú Yá Ndiöxí cada-dé, te dàtnùnì ní xihí-dé. Te ní chindúxi ñaha-güedě xii-dé yatni nàcuáa yíndúxi cue ñaní tnáhá-dè ndéé sanaha-gá, te xiáⁿ ní téhyú yiqui cuñú-dé.

³⁷ Te Jèsús chi ñá ní téhyú yiqui cuñú-gá, chi ní dándótó ñaha Yá Ndiöxí xii-gá.

³⁸ Te cuñí-í cachí tnúhu-í xii-ndo cuèndá cutnùnì iní-ndó nchàa-ndo sá cáda càhnu iní Yá Ndiöxí nchaa cuèchi-o, chi ní xihí Jèsús cuèndá naníhí tàhú-ó.

³⁹ Te nchaa ñáyiú na quíndáa iní ñáhá xii Jèsús te cada càhnu iní-gá nchaa sá ñá túú vãha ní quidé-yu, chi núú mee-ni tnúhu ní chídó tnùnì ndí Moisés ná quíndáa iní-yu te vã nánihí tàhú-yu.

⁴⁰⁻⁴¹ Te ío coto-ndo mèe-ndo cuèndá sá vã yãha-ndo dàtná ní cachí Yá Ndiöxí yãha cue ñáyiú ñá túú ní quide váha ní xíndecu ndéé sanaha. Te nàcuáa ní cáháⁿ-gá ní chídó tnùnì ìⁿ téé ní cáháⁿ tnúhu-gá ndéé sanaha, te duha ní xáhaⁿ-gá xií-yu dàvã-áⁿ:

Cunedóho nchaa nchòhó ñáyiú cuèhé yuhu-xi na cáháⁿ-í ìⁿ tnúhu te quíni-ndó nã cuñúhu-ndo,

yúhú quidè-í vai núú sã ío váha vitna ndècu-ndo ñuyíú-a,

te cuèi na cò ñáyiú cachí tnúhu xii-ndo nàcuáa ndùu nchaa sá vãha-áⁿ, dico nchòhó vã quíndáa iní-ndó,

te sá dúcáⁿ càda-ndo vã quíndáa iní-ndó, te dàcuíta nihnu-ndo mèe-ndo.

Duha ní xáhaⁿ-gá xií-yu te ducaⁿ ní chídó tnùnì téé ní cáháⁿ tnúhu-gá ndéé sanaha —càchí té Pãblú xáhaⁿ-dè xii-yu.

42 Te òrè ní ndee té Páblú veñúhu ñáyíu isràél ndihí cue tée xìca cuu ndihí-dé, te ní cáháⁿ ndàhú ñáyíu yìhí veñúhu núú-dé sá quihíⁿ-dé núú ùná nduu, te ñíu-ni tnúhu ní cáháⁿ-dé cáháⁿ tucu-dé òrè quexìo-dé.

43 Te sàtá ní tùhú veñúhu-yu, te vài ñáyíu isràél ndihí ñáyíu ní chitnahá ñáhá xii-yu nchìcúⁿ nihnu quide nacuaá quidé-yu càháⁿ ndihí-yu Yá Ndiòxí cuáháⁿ ndihí-yu té Páblú ndihí té Bèé. Te ní xáhaⁿ-güedé xii-yu sá vǎ dáñá ndéé-yu canchicúⁿ nihnú-yu tnúhu sá càháⁿ nàcuáa quide Yá Ndiòxí sá cúú-xí-yu.

44 Te núú ùná nduu, nduu ndètátú-yu ní quexìo vai vihi ñáyíu, chi nihí ñúú ní quexìo ndedóho-yu tnúhu Yá Ndiòxí.

45 Te cuendá sá ïo vài ñáyíu ní quexìo, núú xíaⁿ ní cuu cuédú ìní ñáhá ñáyíu isràél xii té Páblú, te ní xícuèhé ñáhá-yu xii-dé. Te ní xáháⁿ-yu xii-dé sá dándàhú ñáhá-dé xii-yu ndihí tnúhu càháⁿ-dé.

46 Te té Páblú ndihí té Bèé ñá túú ní yùhú ñáhá-güedé xii-yu. Te ní xáhaⁿ-güedé:

—Xini ñuhu-xi díhna-gá nchòhó ñáyíu isràél càháⁿ ndihí-ndí tnúhu Yá Ndiòxí, te mee-ndo ñǎ cuíní-ndó cündedóho-ndo. Te sá dúcáⁿ quide-ndo, te vá nánihí tàhú-ndó, te ni vǎ càháⁿ-gá-ndí tnúhu Yá Ndiòxí núú-ndó, dico càháⁿ-ndí núú dàva-gá ñáyíu cuéi ñǎ díú ñáyíu isràél cúú-yu,

47 chi ducaⁿ ní táuchíúⁿ Yá Ndiòxí cada-ndí. Te ní cachí-gá: Cuíní-í cundecu-ndo dàtná ìíⁿ tée yòtnuú ñuhú cundecu-ndo càháⁿ-ndó tnúhu-í núú nchàa ñáyíu ñǎ túú cündihí-ndo ñáyíu ndècu nihí ñuyíú, te nanihí tàhú-yu,

duha ní cáháⁿ-gá —càchí té Páblú ndihí té Bèé xǎhaⁿ-güedé xii-yu.

48 Te ñáyíu ñǎ túú cùu ñáyíu isràél ïo ní cudíí ìní-yu sá dúcáⁿ ní cáháⁿ-güedé, te ní xitnàhá-yu sá ïo váha cuáháⁿ tnúhu Yá Ndiòxí. Te mee Yá Ndiòxí sa ñaha-gá nándí cùu ñáyíu nanihí tàhú, te ñíu-ni ñáyíu-án ní sándáa ìní-yu.

49 Te nchaa xichi xíaⁿ ní sáháⁿ-yu ní cáháⁿ-yu ní cáháⁿ-yu tnúhu-gá.

50 Te cue tée isràél ní ndatnúhu-güedé ndihí cue tée cunuú, ndihí cue ñáyíu ñíhí cúnùu, te ñáyíu ñíhí-án ñǎ túú tnàhí cùmáñí-yu veñúhu. Te ní xáhaⁿ-güedé sá cáda ùhú-yu té Páblú ndihí té Bèé, te dàtnùní cuícúⁿ ñáhá-yu xii-güedé, te ducaⁿ ní quidé-yu.

51 Te ní casaⁿ ñuhu té Páblú ndihí té Bèé sáhá-güedé ní naquidi-güedé tíca chúhmá ní tníí sáhá-güedé. Te ducaⁿ ní quide-güedé cuendá cutnùní ìní-yu sá ñǎ túú ní quide váha-yu. Te dàtnùní ní quee-güedé cuáháⁿ-güedé ñúú Ìconíú.

52 Te ñáyíu ní sándáa ìní-xi tnúhu Jèsús ïo váha ní cuu ìní-yu cuendá sá ní nanihí tàhú-yu, te nchaa-yu sa ndècu ndihí-yu Espíritú Yá Ndiòxí.

14

Té Páblú ndihí té Bèé ndécú-güedé ñúú Ìconíú

1 Te ní quexìo té Páblú ndihí té Bèé ñúú Ìconíú. Te ní sáháⁿ-güedé veñúhu ñáyíu isràél, te ïo váha ní cáháⁿ-güedé tnúhu Yá Ndiòxí, te vài ñáyíu isràél ndihí ñáyíu ñǎ túú cùu ñáyíu isràél ní sándáa ìní-yu tnúhu-gá.

2 Te dava ñáyíu isràél ñǎ ní sándáa ìní-yu, te ní cáháⁿ cuèhé-yu cuendá té Páblú ndihí té Bèé cuendá sá vǎ quíndáa ìní ñáyíu ñǎ túú cùu ñáyíu isràél.

3 Te ní xíndecu-güedé titní nduu, te ñǎ túú tnàhí ní yùhú-güedé ní dácuaáhá-güedé ñáyíu tnúhu Yá Ndiòxí. Te mee-gá ní chindee ñaha-gá ní

quide-güedé titní núú sã vã yõo tñahí ndàcu cada, te ío ní cuñúhu-yu. Te ducaⁿ ní quide-gá cuendá cutnùní iní-yu sá ndaá càháⁿ-güedé sá méé-gã ío cùu iní ñáhá-gã xií-yu, te naníhí tãhú-yu núu na quindáá iní-yu tñúhu-gá.

4 Te ní quee dava ñáyiu ñúú Ìconíú, davá-yu cùndihí-yu ñáyiu isràél ñáyiu ñã túú sàndáá iní tñúhu Jèsús. Te davá-yu cùndihí-yu cue téé ní táuchíúⁿ Jèsús càháⁿ tñúhu-gá.

5 Te ñáyiu isràél ndihí dava-gá ñáyiu ñã túú sàndáá iní-xi ní cuu ìⁿnúu-yu ndihí cue téé cùnúu sá cáñi-yu-güedé, te cuáha yúú ñáhã-yu xii-güedé.

6 Te té Pãblú ndihí té Bèé ní níhí-güedé tñúhu sá cuñi-yu canihá-yu, núu xiãⁿ dayuhu ní quee-güedé cuáhãⁿ-güedé ñúú Lìstrá ndihí ñúú Dèrbé. Te ndi ndúú ñúú-áⁿ yíndèhu-xi Licaoniá. Te ní sáhãⁿ-güedé dava-gá ñúú líhli càa yatni xiáⁿ.

7 Te nchaa ñúú-áⁿ ní cáháⁿ-güedé tñúhu Jèsús.

Ñúú Lìstrá ní sãhayúú ñáhã-yu xii té Pãblú

8 Te ñúú Lìstrá ndécú ìⁿ téé yacua, mee-ni núcóo-dé chi ducaⁿ tñahí càa-dé ní cacu-dé.

9 Te ndedóho-dé tñúhu càháⁿ té Pãblú, te ní cutnùní iní té Pãblú sá ío sàndáá iní téé yacua-ãⁿ sã Yã Ndiõxí cada tátna ñaha-gã xii-dé, núu xiãⁿ ní xíndéhé ñaha váha té Pãblú xii-dé.

10 Te té Pãblú ní cáháⁿ níhi-dé, te ní xáhaⁿ-dè:

—Ndacuíñí cunutñi váha-n —càchí-dé xáhaⁿ-dè.

Te ní ndacuíñí cunu-dé te ní xica-ni-dé.

11 Te òré ní xiní-yu sá tẽ Pãblú ní quide tátna-dé téé yacua-ãⁿ, te nchaa-yu ní cáháⁿ-yu tñúhu meé-yu tñúhu Licàoniá. Te ní cáháⁿ níhi-yu, te xitñahá-yu:

—Cue téé-ãⁿ sànuu sá ñáyiu cùu-güedé dico ñáhã, chi ndiõxí cúú-güedé te ní quexio-güedé ñuyúú-a —càchí-yu xitñahá-yu.

12 Te ní cachí-yu sá tẽ Bèé cúú-dé ndiõxí dánàni-yu Jüpitér, te té Pãblú cúú-dé ndiõxí dánàni-yu Mècuriú, chi cuendá téé-ãⁿ cúú-dé téé càháⁿ.

13 Te càa ìⁿ veñúhu yuhu ñúú-áⁿ núú quidé càhnú-yu ndiõxí sá dánàni-yu Jüpitér. Te dútú yíndàha veñúhu-áⁿ ndécá-dè ìⁿ úú ndicutu cuáhãⁿ quehé veñúhu, te ñúhu itá dúcúⁿ-güedi. Te cue quití-ãⁿ cahni-dé cada càhnu-dé ndihí-yu té Bèé ndihí té Pãblú ní cùu, chi ducaⁿ quidé-yu quide cahnú-yu ndiõxí-yu.

14 Te té Bèé ndihí té Pãblú ní níhí-güedé tñúhu nàcuáa sàni iní-yu cadá-yu, te ní ndátá-güedé dóo-güedé cuendá cutnùní iní-yu sá ñã tñahá iní-güedé nàcuáa sàni iní-yu cadá-yu. Te xinu-güedé cuànguihu-güedé tnuú-yu, te níhi ní cáháⁿ-güedé, te xáhaⁿ-güedé:

15 —¿Ná cuendá ducaⁿ cuñi-ndó càda-ndo? Te ñu-ni tñaha ñáyiu-ndo cùu-ndí, dicó-ni tñúhu Yã Ndiõxí véxi-ndí dacuáha ñaha-ndí xii-ndo cuendá sá vã cadá-gã-ndó nàcuáa quide-ndo, te quindáá iní-ndó Yã Ndiõxí, chi ìⁿndi-ni Yã Ndiõxí ndécú. Te ñu-gá ní cadúha-gá andíu ndihí ñuyúú-a ndihí làmár ndihí nchaandi túhú sá ío ñuyúú-a.

16 Te ndéé sanaha ní dáñá Yã Ndiõxí ní quidé-yu nàcuáa cuáhãⁿ iní méé-yu.

17 Te ní xóo cada-gá sá váha cuendá cutnùní iní-yu sá ío váha iní-gá. Te ñu-gá dácúuⁿ-gá dáú, te tàxi-gá sá nchító-ó chi xitò-gá nchaa tatá xítú-ó, te xiãⁿ cúdíⁿ iní-ó ndècu-o ñuyúú-a —càchí té Pãblú ndihí té Bèé xáhaⁿ-güedé xií-yu.

18 Te cuèi ducaⁿ nĩ xáhaⁿ-güedě nchaa tnúhu-áⁿ, dico ío úhú ní sándáá iní-yu ñá ní sàhni-yu ndicutu-áⁿ chi cuendá ducaⁿ tnàhí quidé-yu sàhni-yu ndicutu óré quidé càhnú-yu ndiòxí-yu.

19 Te ñuú Antiòquia ndihi ñuú İconiú xĩndecu dava ñáyiu isràel, te ní queé-yu cuáháⁿ-yu ñuú Listrá núú ndécú tè Pàblú. Te xíaⁿ nĩ quexió-yu te ní xáháⁿ-yu xii ñáyiu dii ñuú xíaⁿ sá càhni-yu tè Pàblú. Te ní sáha yúú ñáhã-yu xii-dé, te ní cáháⁿ-yu sá ní xihí-dé, te ní tñi ñaha-güedě xii-dé, te tañuhu ñaha-güedě xii-dé cuáháⁿ ñⁿ xio yuhu ñuú ní sá dáquéné ñaha-güedě.

20 Te ní quexio cue ñáyiu sándáá iní tnúhu Jèsús núú cátù-dé-áⁿ, te ní nadúcúⁿ ndéé ñáhã-yu xii-dé, te nini xĩnutñi-yu-áⁿ nĩ ndacóo-dé cuánuhú ndihi ñaha tucu-dé xii-yu xití ñuú. Te nduu tnéé-áⁿ nĩ ndee-dé ndihi tè Bèè cuáháⁿ-güedě ñuú Dèrbé.

21 Te ní cáháⁿ-güedě tnúhu Yá Ndiòxí ñuú-áⁿ, te ío vài ñáyiu ní sándáá iní-yu tnúhu-gá. Te dàtnùni ní quee-güedě cuáháⁿ tucu-güedě ñuú Listrá, ndihi ñuú İconiú, ndihi ñuú Antiòquia.

22 Te ní xáhaⁿ-güedě xii-yu sá vã dáñá ñihnú-yu tnúhu Jèsús. Te sá dúcáⁿ nĩ cáháⁿ-güedě, te vihi-gá ní cudíi ñni-yu cadá-yu nàcuáa cuñi Yá Ndiòxí cadá-yu, te ní xáhaⁿ-güedě:

—Dacuití cùndecu-o ñuyúy-a ndoho-o, te dàtnùni ducaⁿ te nacuaca ñaha Yá Ndiòxí xii-o —càchi-güedě xáhaⁿ-güedě xii-yu.

23 Te ní sáháⁿ-güedě ndi tnahá ñⁿ ñⁿ xichi núú ndécú ñáyiu dàcuaha tnúhu Yá Ndiòxí, te ní taxi ndecu-güedě cue téè quindaha ñaha xii-yu, te ní cáháⁿ ndihi-güedě Yá Ndiòxí, te ñá túú tnàhí ná ní xèxi-güedě cuendá sá ní cáháⁿ ndihi-güedě-gá. Te ní xáhaⁿ-güedě sá Yá Ndiòxí coto ñaha-gã xii-yu chi diu-ni-gá ní sándáá iní-yu.

Té Pàblú ndihi tè Bèè cuáháⁿ tucu-güedě ñuú Antiòquia Sirí

24-25 Te dàtnùni ní quee tè Pàblú ndihi tè Bèè cuáháⁿ-güedě, ní yáha-güedě distrítu Pisidiá. Te ní quexio-güedě ñuú Pèrgé, xíaⁿ nĩ cáháⁿ-güedě tnúhu Jèsús. Te ñuú-áⁿ yĩndèhu-xi Panfilíá. Te dàtnùni cuáháⁿ-güedě ñuú Ataliá.

26 Te yácáⁿ ní quee-güedě bàrcú cuánuhú tucu-güedě ñuú Antiòquia. Te ñuú-áⁿ cúu-xí ñuú núú ní xícáⁿ táhũ-yu núú Yá Ndiòxí cuendá sá chĩndèè ñaha-gá xii-güedě chiuⁿ quide-güedě. Te cuendá sá ní ndihi chiuⁿ-güedě nchaa ñuú núú ní sáháⁿ-güedě, núú xíaⁿ cuánuhú-na-güedě.

27 Te ní ndexio-güedě ñuú-áⁿ, te ní cana-güedě nchaa ñáyiu sándáá iní tnúhu-gá, te ní cani-güedě cuendú núú-yu nchaa nàcuáa ní cuu núú ní sáháⁿ-güedě, te xáhaⁿ-güedě: “Yá Ndiòxí ío ní chindee ñaha-gá xii-ndí ní cáháⁿ-ndí tnúhu-gá núú ní sáháⁿ-ndí, te mee-gã ní quide sá tnàhã ñáyiu ñá túú cùu ñáyiu isràel ní xĩndedóho-yu tnúhu-gá cuendá quĩndáá iní-yu”, càchi-güedě xáhaⁿ-güedě xii-yu.

28 Te vài nduu ní xĩndecu-güedě ñuú Antiòquia ndihi nchaa ñáyiu ní sándáá iní tnúhu Jèsús.

15

Ní natacá ñáyiu sándáá iní tnúhu Jèsús ñuú Jerusalén

1 Te ní quee ñⁿ úú cue téè distrítu Jùdeá cuáháⁿ-güedě ñuú Antiòquia, te ní sáá-güedě, te ní xáhaⁿ-güedě xii ñáyiu sándáá iní tnúhu Jèsús sá núu vã

cuáha-güedé sèñá ñi nchaa cue téé dàtná ní cachí ndí Moisés, te vá nánihí tãhú-güedé.

² Te sá dúcáⁿ ní cáháⁿ cue téé-áⁿ, te ní ngüita té Pãblú ndihí té Bèé ní tenáa-güedé cue téé-áⁿ, chí dandàhú ñáhá-güedé cuiní-güedé ní cùu. Te nchaa ñáyiú sàndáá iní tnúhu-gá ní cachí-yu sá quihíⁿ té Pãblú ndihí té Bèé ndihí ñiⁿ ùú-gá-güedé ñuú Jerusalén. Te yacáⁿ cada-güedé ñiⁿ jundá ndihí mee-ni cùe téé ní táuchíúⁿ Jesús cáháⁿ tnúhu-gá, ndihí cue téé yìndaha ñáyiú sàndáá iní tnúhu-gá ñuú-áⁿ, te jundá-áⁿ cada ndáa-güedé tnúhu ní cáháⁿ cue téé ní sáá ñuú Antiòquia.

³ Te nchaa ñáyiú sàndáá iní tnúhu-gá ní quide ndee iní ñáhã-yu xii-güedé, te ní tñi-güedé ichi cuáhã-güedé. Te ní yáha-güedé distrítú Fènicia ndihí distrítú Sãmariá, te yacáⁿ ní caní-güedé cuèndú nása ní cuu ní tuha ñáyiú ñá túú cùu ñáyiú isràél ichi Yá Ndiòxí, te ní cudíí víhí iní nchaa ñáyiú ní xindedóho-áⁿ.

⁴ Te té Pãblú ndihí té Bèé ní ndexio-güedé ñuú Jerusalén, te ío ní cudíí iní-yu sá ní ndexio váha-güedé. Te ndècu dava-gá cue téé ní táuchíúⁿ Jesús dácuàha ñaha xii-yu tnúhu-gá, ndihí cue téé yìndaha ñaha xii-yu, ndihí dava-gá ñáyiú sàndáá iní tnúhu-gá, te ní caní-güedé cuèndú núú-yu nàcuáa ní quide Yá Ndiòxí ní chindee ñaha-gá xii-güedé ní quide-güedé chiúⁿ-gá.

⁵ Te ndècu ñiⁿ úú cue téé ní tuha ichi Yá Ndiòxí, te cue téé-áⁿ cúu-güedé cue téé farisèú, te ní ndacuíñí-güedé, te ní xáhaⁿ-güedé:

—Dacuití xini ñuhu-xi sá cuáha-güedé sèñá ñi cue téé cùmání cue téé ñá túú cùu ñáyiú isràél, te cùñaha-ndo sá ná cáda-güedé nchaa nàcuáa ní chídó tnùnì ndí Moisés —càchí cue téé cùu farisèú-áⁿ xáhaⁿ-güedé xii-güedé.

⁶ Te cue téé ní táuchíúⁿ Jesús dacuàha ñaha xii ñáyiú tnúhu-gá, ndihí cue téé yìndaha ñáyiú sàndáá iní tnúhu-gá ní quide-güedé jundá cuèndá ní ndatnúhu-güedé nása cunduu.

⁷ Te vai vihi tnúhu ní cáháⁿ-güedé. Te té Pèlú ní ndacuíñí-dé, te ní xáhaⁿ-dè xii-güedé:

—Nchòhò cue téé ndècu ndihí-í ichi Xítohó Jesucristú, chí cùndedóho ñiⁿ tnúhu ná cáháⁿ-í-a. Sa nàha-ndo sá ní cachí Yá Ndiòxí sá ñiú-í cáháⁿ-í tnúhu Jesús núú ñáyiú ñá túú cùu ñáyiú isràél cuèndá sá quindáá iní-yu, te naníhí tãhú-yu.

⁸ Dico Yá Ndiòxí sa nàha-gá nása càa iní ñiⁿ ñiⁿ ñáyiú. Te cùtnumí iní-ó sá cúú iní ñáhã-gá xii cue ñáyiú ñá túú cùu ñáyiú isràél, chí ní sãñaha-gã Espiritú-gá ndécú ndihí-yu dàtná cuiní-ndó ní taxi-gá ndécú ndihí nchoo.

⁹ Chi Yá Ndiòxí ñiⁿ nuu-ni cùu iní ñáhã-gá xii-o nchaa-o ndihí cue ñáyiú ñá túú cùu ñáyiú isràél, chí tnàhá-yu ní xócání-gá nchaa sá cuèhé sá dúhá ní xóo cadá-yu ndéé óré ní sàndáá iní-yu Jesús.

¹⁰ ¿Te ná cuèndá nchòhò cuiní-ndó càda ñáyiú ní sàndáá iní tnúhu-gá ñiⁿ sá ñã tnàhá iní-gá sá cadã-yu? Te cuiní-ndó dándohò-ndó-yu. Te ní nchòo te ní cue ñani tnàhá-ó ní xíndecu ndéé sanaha ñã ní ndàcú-yu cadá-yu nchaa xiãⁿ.

¹¹ Te vá dúcáⁿ cáháⁿ-ndó, chí sa nàha-ndo sá Yá Ndiòxí ní cundàhú iní ñáhã-gá xii-o, te díó ducaⁿ ní quide-gá sá naníhí tãhú-ó nchaa-o. Te ñiú-ni ducaⁿ ní quide-gá ñáyiú ñá túú cùu ñáyiú isràél, te ní naníhí tãhú-yu —càchí té Pèlú xáhaⁿ-dè xii-güedé.

¹² Te dàtnùnì té Bèé ndihí té Pãblú ní ngüita-güedé ní cáháⁿ-güedé, te ní xindedóho-yu nchaa tnúhu ní cáháⁿ-güedé. Te ní xáhaⁿ-güedé xii-yu nàcuáa ní

chindee ñaha Yá Ndiöxí xii-güedé, te ní quide-güedé vai núú sã vã yõ tnàhi ndàcu cada, te ducaⁿ te ní cutnùnì iní ñáyiu ñã túú cùu ñáyiu isràél sá ndàà càháⁿ-güedé.

¹³ Te òrè ní ndihì cuèndú ní càháⁿ-güedé, te té Jàcobó ní xáhaⁿ-dè:

—Nchòhó cue téè ndècu ndihì-í ichi Xítòhó Jesucristú, chí cùndèdòho ìⁿ tnúhu na càháⁿ-í-a.

¹⁴ Té Ximú, àdi Pelú chi úú òu-dé, ní cani-dé cuèndú nàcuáa ní quide Yá Ndiöxí ndéé díhna ní dáquéé d^ìⁿ-gá ñáyiu ñã túú cùu ñáyiu isràél tnuú nchaa ñáyiu ñã túú ndècu ichi-gá, cuèndá cuìní-gá chíñuhu ñàhá-yu xii-gá.

¹⁵ Te dàtnùnì ní càháⁿ-dé nàcuáa ní càháⁿ Yá Ndiöxí ndéé sanaha. Te duha ní chídó tnùnì cue téè ní xóo càháⁿ tnúhu-gá ndéé sanaha nàcuáa ní càháⁿ-gá, te duha ní cachí-gá:

¹⁶ Dàtná cuìní-ndó cùu ìⁿ vehe ní sáá te ní ngoyo te dàndaa-güedé xito cùu úú, ducaⁿ sàtnahá-xi cada-xi ìⁿ nduu,

chi ñanì tnáhá ndí Dàvíí ní xóo càháⁿ ndihì ñàhá-yu xii-í ní cùu, te ní dáñá ndéé-yu ichi-í,

te na quixi-í te natuha ñaha tùcú-yu.

¹⁷ Te ducaⁿ te vai ñáyiu ñã túú cùu ñáyiu isràél nanducú-yu ichi-í te càháⁿ ndihì ñàhá-yu.

¹⁸ Duha ní càháⁿ Yá Ndiöxí, te ducaⁿ ní chídó tnùnì cue téè ní xóo càháⁿ tnúhu-gá ndéé sanaha —càchí té Jàcobó xáhaⁿ-dè xii-güedé.

¹⁹ Te xáhaⁿ tùcu-dé:

—Yúhú càchí iní-í sá vã cúú dàsatú-ó iní nchaa ñáyiu ta sàndáá iní-xi tnúhu Yá Ndiöxí, ñáyiu ñã túú cùu ñáyiu isràél, te ìⁿ úú-ni tnúhu cúñaha-o nàcuáa cada-yu.

²⁰ Dico xini ñuhu-xi daquihíⁿ-ó tùtú cúñaha-o sã vã cáxí-gã-yu nchaa sá nchító-ó ndúu táhú nchaa sá càchí-yu cùu ndióxí-yu. Te cúñaha-o sã vã càháⁿ ndihì cue téè ñadìhí te núú ñã díú ñadìhí-güedé cúú-yu, te ni cuè ñáyiu díhí vã càháⁿ ndihí-yu téè te núú ñã díú yíⁿ-yu cùu-güedé, te vã cáxí-yu cuñú quiti cuèhné, te vã cáxí-yu ñíí.

²¹ Te ducaⁿ cúñaha-o, chi ndi tnahá ñuú núú ndécú-yu, te xíndecu ñáyiu isràél dácuahá-yu tnúhu ní chídó tnùnì ndíi Moisés, te ndi tnahá nduu ndètatú-yu dácuahá-yu tnúhu ndíi veñuhu-yu —càchí té Jàcobó xáhaⁿ-dè xii-güedé.

²² Te dàtnùnì cue téè ní táuchíúⁿ Jèsús dacuaàha ñaha xii-yu tnúhu-gá, ndihì cue téè yíndaha ñáyiu sàndáá iní tnúhu-gá ní cachí-güedé sá ndúcú-güedé ìⁿ úú-gá cue téè quihíⁿ ndihì té Páblú ndihì té Bèè ñuú Antiòquia, te òu-ni ducaⁿ ní càháⁿ dava-gá ñáyiu ndècu ichi-gá. Te úú cue téè ní ndúcú-güedé, ìⁿ-dé nání-dè Silás, te ìⁿ-dé nání-dè Jùdás, àdi Barsabás chi úú òu-dé, te cùnuu-güedé ndi ndúu-güedé.

²³ Te ní cadúha nchaa cue téè cùnuu tutú canehe-güedé quihíⁿ, te duha càháⁿ-xi:

“Còvãha díí-ndó nchàa-ndo. Nchúhú cue téè ní táuchíúⁿ Jèsús càháⁿ-ndí tnúhu-gá, ndihì cue téè yíndaha cue ñáyiu sàndáá iní tnúhu-gá quide ndee iní ñàhá-ndí xii nchòhó cue ñáyiu ndècu ndihì-ndí ichi-gá cuèi ñã díú ñáyiu isràél cúú-ndó. Te nchòhó ñáyiu xíndecu ñuú Antiòquia, ndihì nchòhó ñáyiu ndècu distritú Siríá, ndihì nchòhó ñáyiu ndècu distritú Ciliciá, càchí tnúhu-ndí xii-ndo sã

24 ní níhí-ndí tñúhu sá ñíⁿ úú cue téé ndècu iha ní quixi-güedé núú ndécú-ndó, te ñá túú chiúⁿ ni tahu-ndí quixi-güedé. Te sá ñíⁿ tñúhu ní cáháⁿ-güedé ní xáhaⁿ-güedé xii-ndo sá ngündecu sèñá ñíⁿ-ndo, te canchicúⁿ nihnu-ndo nchàa nacuáa ní chídó tñùní ndíi Moisés, te xiáⁿ ní sani ñíⁿ ní sani úú iní-ndó, chi ñá túú xini-ndó ñúu ndáá tñúhu cáháⁿ-güedé àdi ñá ndáa.

25 Te ní ndatnúhu-ndí nàcuáa cunduu sá téndàha-ndí úú cue téé quixi-güedé ndihi té Bèé ndihi té Páblú, cue téé ío cùu iní-ndí, te cue téé-áⁿ cáháⁿ-güedé nàcuáa cáháⁿ-ndí-a.

26 Te ñiu-ni té Bèé ndihi té Páblú ní sáháⁿ-güedé ní cáháⁿ-güedé tñúhu Xitohó Jesucrístú nchaa xichi. Te ndi tnahá cuáháⁿ-güedé cuíni-yu cahni ñàhá-yu xii-güedé.

27 Te tendaha-ndí té Júdás ndihi té Silás quixi-güedé tñàhá-güedé cachí tñúhu váha-güedé nàcuáa cuáháⁿ tñúhu cáháⁿ-ndí.

28 Te ñiu-ni ducaⁿ cáháⁿ-ndí càchí tñúhu-ndí nàcuáa cáháⁿ Espíritú Yá Ndióxi cada-ndo, chi nchúhú vá cáháⁿ-ndí sá cádá-ndó nchàa sá ní cáháⁿ ndíi Moisés cada ñáyiú, chi ío úhú, te vá yóo ndacu cada. Te vitna na cáháⁿ-ndí ñíⁿ úú-ni tñúhu nàcuáa cada-ndo.

29 Vá cáxi-ndó sá nchító-ó ndùu táhú nchaa sá càchí ñáyiú cùu ndióxí-yu, te vá cáxi-ndó ñíⁿ, te vá cáxi-ndó cùñú quiti cuèhné, te vá cáháⁿ ndihi cue téé ñàdihí te núu ñá díú ñàdihí-güedé cúú-yu, te ni cue ñáyiú ñíⁿ vá cáháⁿ ndihí-yu téé te núu ñá díú yíⁿ-yu cùu-güedé. Te núu na càda-ndo nchaa nacuáa cáháⁿ-ndí-a, te cada váha-ndo. Te vitna ío cada ndee ñíⁿ-ndó nchàa-ndo-na." Duha ní chídó tñùní-güedé núú tütú ní tendaha-güedé cuáháⁿ.

30 Te ní quide ndee ñíⁿ-yu cue téé quíhíⁿ ñúú Antiòquia, te ducaⁿ te ní xica-güedé cuáháⁿ-güedé. Te òré ní quexio-güedé ñúú-áⁿ, te ní cana-güedé nchaa ñáyiú sàndáá ñíⁿ tñúhu Jesús, te ní sáñaha-güedé tutú xii-yu.

31 Te ní dácuahá-yu tutú ní sáñaha-güedé-áⁿ, te ní cudíí víhí ñíⁿ-yu chi ío váha cáháⁿ tutú-áⁿ.

32 Te té Júdás ndihi té Silás tñàhá-güedé ní nduu táhú-güedé cáháⁿ-güedé tñúhu sá dácàhu ñíⁿ ñáhá Yá Ndióxi. Te ní xáhaⁿ-güedé vèi tñúhu nàcuáa cadá-yu, te vèi-gá ní cudíí ñíⁿ-yu cadá-yu nàcuáa cáháⁿ Yá Ndióxi cadá-yu.

33 Te ní xíndecu-güedé ñíⁿ úú nduu ndihí-yu, te dātñùní ní quide ndee ñíⁿ ñàhá-yu xii-güedé cuèndá sá nùhú-güedé núú vèxi-güedé, te mee-ni té Júdás cuánuhú-dé.

34 Te té Silás ní xáhaⁿ-dè sá vè nùhú-ni-dé.

35 Te té Páblú ndihi té Bèé ní ndóo-güedé ní cáháⁿ-güedé tñúhu Yá Ndióxi ñúú Antiòquia, te vèi-gá tucu ñáyiú Antiòquia ní cáháⁿ-yu tñúhu-gá.

Xito cùu uú cuáháⁿ té Páblú cáháⁿ-dé tñúhu Yá Ndióxi núú ñáyiú

36 Te sáta ní cuu cuéhé nduu, te ní xáhaⁿ tè Páblú xii té Bèé:

—Na quíhíⁿ-ó nchàa ñúú núú ní sáháⁿ-ó ní cáháⁿ-ó tñúhu Yá Ndióxi cáháⁿ ndihi-o nchàa ñáyiú ní tuha ichi-gá cuèndá quini-ó ñúu ndècu váha-yu —càchí-dé xáhaⁿ-dè.

37 Te té Bèé ní xáhaⁿ-dè sá quíhíⁿ ndihi-güedé té Juáa, àdi Mácú chi úú ñíⁿ-dè.

38 Dico té Páblú ñá ní dàña-gá-dé quíhíⁿ té Juáa, chi ní dándóo ñaha-dè xii-güedé cútnàhá ní xíndecu-güedé Pánfilía, te ní nacuico-dè cuánuhú-dé, te ñá túú-gá ní sáháⁿ ndihi ñaha-dè xii-güedé.

³⁹ Xíãⁿ ní cuu ní tenàà tnàhá tē Bèè ndihì té Pàblú, te ichi càa ichi caa ní cuu-güedé. Te té Bèè ndihì té Mácú ní quée-güedé bàrcú cuáháⁿ-güedé Chìpré.

⁴⁰ Te té Pàblú ní xáhaⁿ-dē xii té Silás sá quihíⁿ ndihì ñaha-dē, te ñáyiú sàndáá iní-xi tnúhu Jèsús ní cáháⁿ ndihí-yu Yá Ndiòxí sá chíndèe ñaha-gá xii-güedé.

⁴¹ Te ní xica-güedé cuáháⁿ-güedé te ní yáha-güedé nihì distritú Siriá ndihì distritú Ciliciá. Te ní cáháⁿ-güedé tnúhu Jèsús núú nchàa ñáyiú ní sàndáá iní tnúhu-gá, núú xíãⁿ ío-gá ní cudíí iní-yu cadá-yu nàcuáa càháⁿ Yá Ndiòxí.

16

Tnàhá té Timùteú cuáháⁿ ndihì-dé té Pàblú ndihì té Silás

¹ Te té Pàblú ndihì té Silás cuáháⁿ-güedé ñuú Dèrbé ndihì ñuú Lìstrá, te ñuú Lìstrá yàcáⁿ ndécú ñⁿ tée nàni Timuteú. Te tée-áⁿ sàndáá iní-dé tnúhu Jèsús, te tnàhá náná-dē sàndáá iní-aⁿ tnúhu-gá, te ñaha isràèl cúú-áⁿ, te tée griégú cúú tātá-dē.

² Te nchaa ñáyiú ní sàndáá iní tnúhu-gá ñáyiú ndècu ñuú Lìstrá, ndihì ñáyiú ñuú Iconiú, nchaa ñáyiú-áⁿ cudíí iní-yu nàcuáa quìde-dé.

³ Te ní cuini té Pàblú sá tnàhá té Timùteú quihíⁿ ndihì-dé dava-gá ñuú, núú xíãⁿ díhna-gá sèñá ní sáha té Pàblú ñⁿ té Timùteú, chi ñá ní tnàhá iní té Pàblú sá cáháⁿ cuèhé ñáyiú isràèl cuèndá té Timùteú. Te nchaa ñáyiú isràèl ndécú ñuú-áⁿ xini-yu sá tée griégú cúú tātá-dē, te ñá díú tée isràèl cúú-dē, te xíãⁿ ní sáha té Pàblú sèñá ñⁿ té Timùteú.

⁴ Te ndi tnàhá ñuú ndi tnàhá ñuú cuáháⁿ-güedé càháⁿ ndihì-güedé nchaa ñáyiú ní sàndáá iní tnúhu Jèsús. Te ní xáhaⁿ-güedé nàcuáa càháⁿ tutú ní cadúha cue tée ní táuchúúⁿ Jèsús dacuàha ñaha xii-yu tnúhu-gá, ndihì cue tée yìndaha ñáyiú sàndáá iní tnúhu-gá ñuú Jerusalén.

⁵ Te cuèndá ducaⁿ ní sáháⁿ-güedé nchaa ñuú núú ndécú ñáyiú sàndáá iní tnúhu-gá ní dácuhá ñaha-güedé xii-yu, núú xíãⁿ tá cùu túha-gá-yu tnúhu Yá Ndiòxí, te vai-gá-yu ní tuhá-yu ichi-gá.

Ní dácótó ñaha-xi xii té Pàblú sá ñí xini-dé ñⁿ tée distritú Macèdoniá

⁶ Te ñá ní dàña Espiritú Yá Ndiòxí quihíⁿ-güedé cáháⁿ-güedé tnúhu-gá distritú Àsiá, núú ní sáháⁿ-güedé distritú Frigiá ndihì distritú Galaciá cáháⁿ-güedé tnúhu-gá.

⁷ Te ní sáa-güedé yuhu distritú Misiá. Te quihíⁿ-güedé distritú Bìtiniá ní cùu, dico ñá ní dàña Espiritú Yá Ndiòxí quihíⁿ-güedé yàcáⁿ.

⁸ Te ní yáha-güedé Misiá, te ní quexio-güedé ñuú Tròás, te yàcáⁿ ní nanítnàhá-ndí ndihì-dé.

⁹ Te ñⁿ niú ní dácótó-xí núú tē Pàblú sá ñí xini-dé ñⁿ tée distritú Macèdoniá nútñi-dé, te ní xáhaⁿ tē-áⁿ xii té Pàblú: “Cada ndee iní-n quihíⁿ-n Macèdoniá chi dacuàha ñaha-n nchaa sá xini-n”, càchì-dé xáhaⁿ-dē, ní dácótó ñaha-xi xii té Pàblú.

¹⁰ Te cuèndá sá dúcáⁿ ñí dácótó ñaha-xi xii té Pàblú núú ní ndatnúhu-ndí quihíⁿ-ndí Macèdoniá, chi ní cutnùní iní-ndí sá cáná ñaha Yá Ndiòxí quihíⁿ-ndí cáháⁿ-ndí tnúhu-gá núú ñáyiú yàcáⁿ.

Té Pàblú ndihì té Silás ndécú-güedé ñuú Filipú

¹¹ Te ní quée-ndí bàrcú ñuú Tròás, te cuáháⁿ ndáá-ndí ñuú Samòtraciá, te yàcáⁿ ní quexio-ndí, te ní yáha-ni-ndí cuáháⁿ-ndí. Te nduu tnèé ní quexio-ndí ñuú Nèápolis.

12 Te yàcáⁿ ní quene-ndí bàrcú, te xica-na-ndí cuáháⁿ-ndí ñúú Filipú te ñúú-áⁿ yíndèhu-xi distritú Macèdoniá. Te yàcáⁿ ní cudíi-ndí ní xíndecu tnaa-ndí. Te ñúú Filipú-áⁿ ío cùnuu-xi, chí ío chítu ñáyyiu rómá ní ngóo-yu.

13 Te nduu ndètátú-yu ní quee-ndí ñúú cuáháⁿ-ndí ìⁿ xio yuhu yúte, chí yàcáⁿ sáháⁿ-yu càháⁿ ndihí-yu Yá Ndiòxí. Te òré ní quexio-ndí, te ní naníhí tnáhá-ndí ndihí mee-ni ñáyyiu ðihí, te ní càháⁿ-ndí tnúhu Yá Ndiòxí ní xíndedóho-yu.

14 Te ndècu ìⁿ ñaha nani Lidiá ní xíndedóho-aⁿ ñacuáa ní càháⁿ-ndí, te ñaha ñúú Tiàtirá cúú-áⁿ, te ðico-aⁿ dóo murádú, te ío càháⁿ ndihí-aⁿ Yá Ndiòxí. Te ðiu-ni mee Yá Ndiòxí ní chindee ñaha-gá ní sándáá iní-aⁿ tnúhu ní càháⁿ té Páblú.

15 Te ní sandute-aⁿ ndihí landú-aⁿ, ndihí nchaa ñáyyiu xínu cuechi núú-aⁿ, te ní cachí-aⁿ xii-ndí:

—Te núu ní cutnùni iní-ndó sã ní sándáá ndisa iní-í tnúhu Jèsús, te cundecu tnaa-ndo vèhe-í —càchí-aⁿ xii-ndí.

Te ní quide yica-aⁿ ñí xíndecu-ndí vehe-aⁿ.

16 Te ìⁿ nduu ñúhu-ndí ichi cuáháⁿ-ndí núú càháⁿ ndihí-yu Yá Ndiòxí, te ní naníhí-ndí ìⁿ xíchí ñúhú ìchi, te yíhi ñaha espíritú cùndìhi yucu ñávàha xii-xi. Te xiáⁿ ní quide ní càháⁿ-xi nchaa sá vã yóo tnàhi cùtnuní iní-xi núú nchaa ñáyyiu ní sãngándihí ñaha xii-xi. Te ñáyyiu dii vèhe-xi xínu cuechi-xi ío vãi díhúⁿ ñí ñihí-yu chí ní cháhu nchaa ñáyyiu ní sãngándihí ñaha xii-xi.

17 Te xíchí-áⁿ ñí chinchícúⁿ ñáhá-xí xii-ndí ndihí té Páblú ndëndaha ñaha-xi cuáháⁿ, te ní càháⁿ ñihí-xi xãhaⁿ-xi xii ðava-gá ñáyyiu:

—Cue té-a xínu cuechi-güedé núú Yá Ndiòxí, chí ío càhnu cuu-gá, te càchí tnúhu-güedé nása cada-ndo naníhí tàhú-ndó —càchí-xi xãhaⁿ-xi xii-yu.

18 Te titní xito ní yáha-ndí ducaⁿ-ni ñí càháⁿ-xi. Te ñá ní cùndee-gá iní té Páblú sá dúcáⁿ càháⁿ-xi, núu ní nanchocuíhnu-dé núú nútñi-xi, te ní xãhaⁿ-dè xii espíritú cùndìhi yucu ñávàha yíhi ñaha xii-xi:

—Ío càhnu cuu Xítohó Jesucristú, núu xiáⁿ càchí-í sá xócuíñi-n vã quíhi-gã-n yíqui cuñú xíchí-a —càchí-dé xãhaⁿ-dè.

Te òré-ni ní quee espíritú cùndìhi yucu ñávàha-áⁿ yiqui cuñú-xi.

19-20 Te ñáyyiu dii vèhe-xi xínu cuechi-xi-áⁿ ñí cutnùni iní-yu sã vã ñihí-gá-yu díhúⁿ cuendá tnúhu càháⁿ-xi, núu ní tñi-yu té Páblú ndihí té Silás ndéca ñáhá-yu cuáháⁿ núú cuè tée cùchiuⁿ Romá, te xãháⁿ-yu xii-güedé:

—Cue té-a cùu-güedé cue tée isràél, te ío dusaⁿ xíquide-güedé ñúú-ó.

21 Te cuíni-güedé cada-o ñacuáa quide-güedé, te vã túu ðucaⁿ cada-o chí ñáyyiu nacióⁿ Rómá cúú-ó —càchí-yu xãháⁿ-yu xii cue tée cùchiuⁿ.

22 Te uuⁿni ní càháⁿ nchaaⁿ-yu, te xãháⁿ-yu sã ñã túu quide váha té Páblú ndihí té Silás. Te cue tée cùchiuⁿ ní cãndeé-güedé dóo té Páblú ndihí dóo té Silás ní ndátá-güedé, te ní táuchíúⁿ-güedé caníha-güedé ndihí tnudii xii-güedé.

23 Te ní caníha-güedé, te ðãtnùni ní chihi ñaha-güedé vecaá. Te ní xãhaⁿ-güedé xii tée ndënchito vecaá sã cádá cuèdadú víhi-dé cuendá ná canú-güedé vecaá.

24 Te cuendá sã dúcáⁿ ñí càháⁿ-güedé, núu tée ndënchito vecaá ní dáyyaha ñaha-dè ingá cuàrtú ndécú xítí vecaá, te ní chihi-dé sáhá-güedé yaú nduhu, te ní quide tñi-dé.

25 Te dava niú ní cáháⁿ ndihí té Páblú ndihí té Silás Yá Ndiöxí, te ní xita-güedé ndudú ní quide càhnu ñaha-güedé xii-gá. Te dava-gá cue téé yìhi vecaá ní xíndedóho-güedé nàcuáa ní xita-güedé.

26 Te uuⁿni níhi víhi ní tnáa ní quidi-xi ndéé cimièntú vecaá, te ní nacaáⁿ nchaa yèhe vecaá, te ní ndihí cadèná ndútú cuè téé yìhi vecaá ní nandáxi.

27 Te ní ndiquíú cúnú ìní téé ndèñchito vecaá, te ní quide cuèndá-dé nchiì nchaa yèhe vecaá. Te ní tava-dé machití-dé cahni-dé méé-dé ní cùu, chi ní cáháⁿ-dè sá ní ndihí cue téé yìhi vecaá ní xinu ni cùu.

28 Te té Páblú ní cáháⁿ níhi-dé, te xáhaⁿ-dè xii téé ndèñchito vecaá:

—Vá dúcáⁿ càda-n cahni-n mee-n, chi nchaa-ni-ndí yìhí —càchí-dé xáhaⁿ-dè xii téé ndèñchito vecaá.

29 Te dätñuní ní xícáⁿ téé ndèñchito vecaá ñuhú, te xínu-dé cuánguìhu xití vecaá núu yìhí tē Páblú ndihí té Silás, te quidi ñaha-ná-xi xii-dé ní quexìo-dé ní ngüíñí xití-dé núu-güedé.

30 Te dätñuní ndécá ñaha-dé xii-güedé ní ndee vecaá, te ní xícáⁿ tnúhú-dé núu-güedé, te xáhaⁿ-dè:

—Nchòhó cachí tnúhu-ndo nãsa cada-í naníhí tàhú-í —càchí-dé xáhaⁿ-dè.

31 Te ní xáhaⁿ-güedé:

—Quindáá ìní-n ndihí ñadihí-n, ndihí landú-n, ndihí nchaa ñáyíu xínu cuechi núu-n tnúhu càháⁿ Xitohó Jesucristú, te naníhí tàhú-ndó —càchí-güedé xáhaⁿ-güedé.

32 Te ní dácúháⁿ ñaha-güedé xii téé ndèñchito vecaá ndihí nchaa ñáyíu ndècu vehe-dé tnúhu Yá Ndiöxí.

33 Te ñiu-ni òré-áⁿ ní naquete-dé sátá-güedé núu ní ñáni, te dätñuní ní sandute-dé ndihí-yu.

34 Te ndèca ñaha-dé cuáháⁿ vehe-dé ní sáñaha-dè sá ní xexi-güedé, te ní cudíí víhí ìní téé ndèñchito vecaá ndihí nchaa-dé vehe-dé sá ní tuhá-yu ichi Yá Ndiöxí. Te cuándihu tucu té Páblú ndihí té Silás vecaá.

35 Te nduu tnéé ní xáhaⁿ cuè téé cùchiuⁿ xii poleciá cuáháⁿ-güedé cùu-güedé téé ndèñchito vecaá queñuhu-dé úu cue téé cuánguìhu ndedí nduu ìcu núhú-güedé.

36 Te téé ndèñchito vecaá ní xáhaⁿ-dè xii té Páblú ndihí té Silás:

—Cue téé cùchiuⁿ ní cachí-güedé sá queé-ndó nùhú-ndó, chi ñá túú-gã ná cada-güedé, chi sa ní yáha cuèndá-ndó —càchí téé ndèñchito vecaá xáhaⁿ-dè xii-güedé.

37 Te té Páblú ní xáhaⁿ-dè xii cue téé cùu poleciá:

—Téé ròhá cùú-ndí, te vá cùú dùcaⁿ-ni cunduu, chi ní caniha-güedé tnudii xii-ndí, te ní xiní-yu nchaa-yu. Te ñá túú tnàhí ní xicáⁿ tnúhú-güedé nùu ndáá ndècuéchi-ndí àdi ñáhá, chi cuèndá-ni ní chihi ñaha-güedé vecaá xii-ndí. Te vitna cuiní-güedé dacäcu ñaha-güedé núhú-ndí cuèndá sá vã yõ quini ñáhá nùhú-ndí cáháⁿ-güedé, dico vá cùú dùcaⁿ cada ñaha-güedé xii-ndí. Chí cuáháⁿ cùñaha-ndo na quixi mee-güedé queñuhu ñaha-güedé —càchí té Páblú xii-dé cue poleciá.

38 Te cue téé cùu poleciá cuánuhú-güedé núu ndécú cuè téé cùchiuⁿ, te ní xáhaⁿ-güedé nàcuáa ní cáháⁿ té Páblú. Te sá dúcáⁿ ní xáhaⁿ pòleciá sá tēe ròhá cùú-güedé, xíãⁿ ní yuhú-güedé.

³⁹ Te ní sáháⁿ cue téé cùchiuⁿ yehe vecaá, te ní xáhaⁿ-güedë sá cádá càhnu iní-güedë sá ní chihi ñaha-güedë vecaá, te ní ndeñuhu ñaha-güedë vecaá. Te ní cáháⁿ ndàhú-güedé núú cuè téé ní xíhi vecaá sá ndéé-güedë ñuú-áⁿ nùhú-güedé.

⁴⁰ Te ní ndee-güedé vecaá, te cuáháⁿ-güedé vehe tá Lidiá, te ní ndatnúhu-güedé ndihi nchaa ñáyiú ní sándáá iní-xi tnúhu Jèsús, te ní xáhaⁿ-güedë xií-yu nàcuáa cada-yu, te ío ní cudíí iní-yu, te ducaⁿ te ní xica-güedé cuáháⁿ-güedé.

17

Ío dusaⁿ quide ñáyiú ñuú Tesalónica

¹ Te ní yáha-güedé ñuú Ànfpólís ndihi ñuú Apòloniá, te ní quexio-güedé ñuú Tesalónica, te yacáⁿ cáá ñⁿ veñúhu ñáyiú isràél.

² Te ní sáháⁿ té Páblú veñúhu-áⁿ, chí ducaⁿ tnàhí quide-dé, te ndi tnahá nduu ndetátú-yu ní sáháⁿ-dé veñúhu-áⁿ ùní xito. Te ní ndatnúhu ndihi ñaha-dë xií-yu nàcuáa ní chidó tnùní cue téé ní xóo cáháⁿ tnúhu Yá Ndióxí ndéé sanaha.

³ Te ní xitnúhu ñaha-dë nàcuáa ní cáháⁿ cue téé-áⁿ sá Crístú Yá tendaha Yá Ndióxí quixi ñuyíú-a ndoho vèhi-gá, te cuú-gá, te ndoto-gá, te xáhaⁿ-dë:

—Te ñuú Jèsús cúú Crístú Yá ní tendaha Yá Ndióxí ní quixi ñuyíú-a, núú xiáⁿ càchí tnúhu-í vitna —càchí té Páblú xáhaⁿ-dë xií-yu.

⁴ Te dava ñáyiú isràél ní sándáá iní-yu tnúhu ní cáháⁿ té Páblú, te ní níhi tnáhá-yu ndihi-dé, ndihi té Silás. Te vai ñáyiú griégú ñáyiú càháⁿ ndihi Yá Ndióxí ní sándáá iní-yu tnúhu Jèsús. Te ndècu titní ñáyiú ñií ñáyiú cùnno, te ñáyiú-áⁿ tnáhá-yu ní sándáá iní-yu tnúhu-gá.

⁵ Te dava ñáyiú isràél ñá túú ní cùu váha iní-yu núú té Páblú ñuú ní ndúcú-yu cue téé cuihna iní-xi tuhío-güedé cada chùu-güedé, chí ndi cuihnu ndi cuihnu-ni-güedé, te nchaa-yu ndihi cue téé-áⁿ ndi coyo ndi coyo-yu xícuaá-yu. Te sáta ní tecú dóho dava-gá-yu, te ní sáháⁿ tuhá-yu, te ío ní quide dúsáⁿ-yu. Te nísáháⁿ-yu vehe té Jàsón, te ní quide yicá-yu ní quíhu-yu vehe-dé nándúcú-yu té Páblú ndihi té Silás cuendá queñuhu ñahá-yu núú nchaa ñáyiú.

⁶ Te ñá ní náníhi ñáhá-yu xii-güedé, núú xiáⁿ ní tnúú-yu té Jàsón ndihi ñⁿ ùú-gá cue téé sándáá iní tnúhu Jèsús, te tañuhu ñahá-yu xii-güedé cuáháⁿ núú cuè téé cùchiuⁿ. Te òré ní quexio-yu núú ndécú cuè téé cùchiuⁿ, te ní ngúita-yu ní cuáá-yu, te xáháⁿ-yu xii-güedé:

—Ní quexio cue téé-áⁿ ñuú-ó, te ío dusaⁿ quide-güedé, te ducaⁿ-ni quide-güedé nchaa ñuú núú xicá cùu-güedé.

⁷ Te té Jàsón-áⁿ ní xáhaⁿ-dë sá cúú cùndecu-güedé vehe-dé, te ñá túú sándáá iní-güedé nàcuáa càháⁿ té Cèsár téé yindaha cuéhé nacióⁿ, te càchí-güedé sá ndécú ñgá téé cùnno-gá tucu nani-dé Jèsús —càchí-yu xáháⁿ-yu xii cue téé cùchiuⁿ.

⁸ Te sáta dúcáⁿ ní cáháⁿ-yu, te ní cudééⁿ víhi cuè téé cùchiuⁿ ndihi dava-gá ñáyiú ndédóho.

⁹ Te vai díhúⁿ ní xicáⁿ cue téé cùchiuⁿ núú té Jàsón ndihi dava-gá cue téé cuáháⁿ ndihi-dé cuendá té Páblú ndihi té Silás, te núú na ndèe-güedé nùhú-güedé, te nacuáñaha cuè téé cùchiuⁿ díhúⁿ-güedé.

Té Páblú ndihi té Silás ndécú-güedé ñuú Bèrea

10 Te òrè ní cundiḡuⁿ, te ní quide ndee ìní ñáhá ñǎyiu sàndáá ìní tnúhu Jèsús xii té Pǎblú ndihì té Silás, te ní xica-güedé cuáháⁿ-güedé ñuú Bèrèá. Te òu-ni nduu ní sáá-güedé yàcáⁿ ní sáháⁿ-güedé veñúhu ñáyiu isràél.

11 Te váha-gá ìní ñáyiu ñuú Bèrèá dàcúxí ñáyiu ñuú Tesalònicá, chi ò ní cudíí ìní-yu ní xíndedóho-yu tnúhu Jèsús, te ìⁿ nduu ìⁿ nduu ní dácúahá-yu tnúhu ní chidó tnùnì cue téé ní xóo cáháⁿ tnúhu Yá Ndiòxí ndéé sanaha cuená cuiní-yu quíní-yu núu ndáá càháⁿ té Pǎblú ndihì té Silás.

12 Te titní ñáyiu isràél ní sàndáá ìní-yu tnúhu-gá ndihì titní cue téé griégú ndihì ñáyiu òhí ñáyiu cùnūu ní sàndáá ìní-yu.

13 Te dava ñáyiu isràél ndécú-yu ñuú Tesalònicá, te ñáyiu-áⁿ ní níhí-yu tnúhu sá ndécú té Pǎblú ndihì té Silás ñuú Bèrèá càháⁿ-güedé tnúhu Yá Ndiòxí, núu xíáⁿ ní sáháⁿ-yu ñuú Bèrèá ní dácúandèhndé-yu núu ncháa ñáyiu vátá dácúaha-gá. Te ñáyiu-áⁿ ní sàndáá ìní-yu tnúhu ndehnde te ní cudééⁿ víhí-yu núu-güedé.

14 Te òrè-áⁿ ní xáhaⁿ ñáyiu sàndáá ìní tnúhu-gá xii té Pǎblú sá quíhíⁿ-dé yuhu lámár, te ní xica-dé cuáháⁿ-dé, te té Silás ndihì té Timùteú ní quendóo-güedé ñuú Bèrèá.

15 Te ìⁿ úú-güedé cuáháⁿ ndihì-güedé té Pǎblú, te ndèca ñaha-güedé cuáháⁿ ndéé ñuú Àtenás, te ní xáhaⁿ té Pǎblú xii-güedé:

—Núu na nùhú-ndó, te cúu-ndo té Silás ndihì té Timùteú ná quixí ndihì-ni-güedé nanítnáhá-ndí iha —càchí-dé xáhaⁿ-dè.

Te ní xica-güedé cuánuhú-güedé.

Té Pǎblú ndécú-dé ñuú Àtenás

16 Te ñuú Àtenás ndétú té Pǎblú quíhíⁿ té Silás ndihì té Timùteú. Te yàcáⁿ ní xiní-dé sá ò cuhé sá càchí-yu cùu ndiòxí-yu ndècu te ñá ndáá sá díú ndiòxí cúu-xí, te xíáⁿ ñá túú ní cùu váha ìní-dé, chi ñá tnàhá ìní-dé nàcuáa quidé-yu.

17 Te ní sáháⁿ-dé veñúhu ní cáháⁿ ndihì-dé ñáyiu isràél ndihì dava-gá ñáyiu càháⁿ ndihì Yá Ndiòxí. Te ìⁿ nduu ìⁿ nduu sàháⁿ-dé xití ñuú càháⁿ-dé tnúhu-gá ndihì ncháa ñáyiu xica cuu yacáⁿ.

18 Te cue téé cùu epicureú ndihì cue téé cùu estoicú, cue téé-áⁿ ní ndatnúhu-güedé ndihì té Pǎblú, te dava-güedé xítnàha-güedé:

—¡Ná tnúhu víhi cáháⁿ téé lùcú-áⁿ! —càchí-güedé xítnàha-güedé.

Te dava-güedé xítnàha-güedé:

—Sàni ìní-ndí sá càháⁿ-dé cuená ndiòxí sá vátá quíní-gá-ó —càchí-güedé xítnàha-güedé.

Te ducaⁿ xítnàha-güedé, chi càháⁿ té Pǎblú tnúhu Jèsús, te ní cáháⁿ-dé nàcuáa ní dándótó ñaha Yá Ndiòxí xii-gá, xíáⁿ núu ducaⁿ xítnàha-güedé.

19 Te ndèca ñaha-güedé xii té Pǎblú cuáháⁿ ìⁿ xichi núu nání Àreópagú, te ní xáhaⁿ-güedé xii-dé:

—Cachí tnúhu ndáá-n nása cuáháⁿ tnúhu càháⁿ-n, chi na cùtnuní ndáá ìní-ndí,

20 chi ducaⁿ-ni càháⁿ-n tnúhu sá ñà túú sàcúndedóho-ndí, te cuíní-ndí cachí tnúhu ndáá-n nása nduu tnúhu-áⁿ cuená cutnùnì váha ìní-ndí —càchí-güedé xáhaⁿ-güedé xii-dé.

21 Te ncháa ñáyiu ñuú Àtenás ndihì ñáyiu dava-gá ñuú, mee-ni tnúhu saa cuíní-yu cáháⁿ-yu, ncháa sá vátá cúndedóho-gá-yu cuíní-yu cundedóho-yu.

22 Te té Pǎblú ní quínutnì-dé núu xíxúcu-yu ncháa-yu, te xáhaⁿ-dè:

—Nchòhò cue ñáyiu ñúú Àtenás, cundedóho-ndo nchàa tnúhu na càháⁿ-í-a. Ío quíde cahnu nchohó sá càchí-ndó cùu ndiòxí-ndó.

23 Te vitna ní quexìo-í ñúú-ndó, te ní xiní-í sá yàyacáⁿ ndécú nchàa sá càchí-ndó cùu ndiòxí-ndó càháⁿ ndihì-ndo. Te ní xiní-í ìⁿ xichi núú ndéé tnuní quidé càhnu-ndo Yá Ndiòxí Yáá ñá túú xini-ndó, te ñu-ni ducaⁿ càháⁿ lètrá ndéé tnuní xiáⁿ, te càchí-xi: “Iha quíde cahnu-ndí Ndiòxí sá ñà túú xini-ndí”, duha càháⁿ lètrá-án. Te quíde cahnu-ndo Yá Ndiòxí càháⁿ-ndó, dico ñá túú xini-ndó nàsa càa-gá, te yúhú xini ndáá-í nàcuáa càa Yá Ndiòxí, chi ñu-ni Yá Ndiòxí càháⁿ ndihì-í, te ñu tnúhu-gá càháⁿ-í vitna.

24 “Te ñu Yá Ndiòxí ní cadúha-gá ñuyúú-a ndihì nchaa sá ío, núu ñu-gá cúú Xitohó ñuyúú-a ndihì andiu. Te ñá túú xini ñuhu-gá vehe dàcaa ñáyiu ñuyúú-a cundecu-gá.

25 Te ñá túú xini ñuhu-gá ñáyiu chindee ñàhá-yu xii-gá, chi mee-gá quidé-gá nchító-ó ndècu-o te tàxi-gá yócó tàchí-ó ndihì nchaa sá xiní ñuhu-o.

26 “Te ndéé sanaha ñí cadúha-gá ìⁿndi-ni tée, te ñu-ni ñíñí-dé cúú ñáyiu ndècu ñicaxico ñuyúú. Te ñu-ni mee Yá Ndiòxí ní xáhaⁿ-gá nchaa núú cùndécú-yu, te mee-gá ní càháⁿ-gá ná daha cuíá cudí nchaa nàcióⁿ ndihì mèè-yu.

27 Te cuini-gá sá ncháá ñáyiu nanducu ñàhá-yu càháⁿ ndihì ñàhá-yu xii-gá, te mee-gá ndécú tũha-gá sá càháⁿ ndihì ñaha-gá xií-yu ìⁿ ìⁿ-yu.

28 Te ñu-ni Yá Ndiòxí xitó ñàha-gá xií-yu núu cùdí-yu ndécú-yu te càndá-yu. Te duha ní càháⁿ ìⁿ ñaní tnàhá-ndó, tée ní cutnùní iní-xi ní xindecu ndéé sanaha, te ní xáhaⁿ-dè xií-yu: “Nchaa-o cùu-o déhe Yá Ndiòxí”, duha ní xáhaⁿ-dè xií-yu.

29 Te núu déhe Yá Ndiòxí cúú-yu ncháá-yu, te vá cúú càháⁿ-yu sá Yá Ndiòxí cúú sá ní cadúha-yu ndahá-yu. Te sá ní cadúha-yu cùu ndiòxí-yu-án, dava cùu-xi díhúⁿ cuááⁿ, dava cùu-xi díhúⁿ cuixíⁿ, dava cùu-xi yúú. Te mèè-yu ní cau iní-yu nàcuáa cunduu sá cúú ndiòxí-yu.

30 Te cùtnàhá ñá túú ní cùtnuní iní-yu sá nèhè ní quidé-yu ní cadúha-yu nchaa xiáⁿ, te ñá túú ní quíde cuendá Yá Ndiòxí sá dúcáⁿ ñí quidé-yu. Te vitna càchí Yá Ndiòxí sá dáñá nchàa ndi túhú-yu nchaa sá cuèhé sá dúhá quidé-yu.

31 Te Yá Ndiòxí nàhá-gá ná nduu cùndecu nchaa ñáyiu núú-gá, te mee-gá sa ñaha-gá ndèndida càa ñáyiu ní quíde váha, te ndèndida càa ñáyiu ñá túú ní quíde váha. Te mee-gá ní xáhaⁿ-gá xii Déhe-gá Yáá nání Jèsús cùñaha-gá xií-yu núu ndèndida càa-yu ní quíde váha te ndèndida càa-yu ñá túú ní quíde váha. Te mee Jèsús càháⁿ ndáá cuiti-gá, te sa ñaha-o sá ncháá xiáⁿ cada Jèsús, chi ñu cuendá-án ñí dándótó ñàha Yá Ndiòxí xii-gá —càchí té Páblú xàhaⁿ-dè xií-yu.

32 Te òré ní càháⁿ té Páblú sá ñí ndoto Jèsús, te dava ñáyiu ñá ní tnàhá iní-xi tnúhu ní càháⁿ-dé ní càháⁿ yíchí-yu. Te davá-yu ní xáhãⁿ-yu xii-dé:

—Te ñngá xito quixi-n, te càháⁿ tucu-n tnúhu ní càháⁿ-n vitna —cachí-yu xáhãⁿ-yu xii-dé.

33 Te ní xica-dé cuáhãⁿ-dé.

34 Te dava ñáyiu ní xíndedóho tnúhu ní càháⁿ té Páblú ní sándáá iní-yu Jèsús, te ní chindee tnúhu ñàhá-yu xii-dé. Te ìⁿ tée cùchiuⁿ Areópagú nání-dè Nixú ndihì ìⁿ ñadìhì nání-án Dámarís, tnàhá-yu ní sándáá iní-yu tnúhu-gá ndihì dava-gá-yu.

18

Té Pāblú ndécú-dě ňuú Còrintú

1 Te té Pāblú ní quee-dé ňuú Atenás cuáháⁿ-dé ňuú Còrintú.

2 Te yacáⁿ ní naníhí tnáhá-dě ndihí ìⁿ té isràèl nání-dě Àquilú, te té-áⁿ cúú-dě té distritú Pòntó, te ní xíndecu-dé ndihí ñadìhí-dé tá Priscilá ňuú Ròmá. Te té Cèsár tée yìndaha cuéhé nacióⁿ, té nàni Claudiú ní xáhaⁿ-dě sá vā cúú-gā cundecu ñáyiu isràèl ňuú Ròmá, te xíáⁿ núu ní ndee té Àquilú ndihí ñadìhí-dé cuáháⁿ-yu ňuú Còrintú. Te sácú-ni nduu ní cuu sá ní quexió-yu ňuú-áⁿ, te ní sáháⁿ té Pāblú ní ndatnúhu ndihí ñaha-dě xii-yu vehé-yu.

3 Te ní xáháⁿ-yu sá cùndecu-dé cada chiⁿ ndihí ñahá-yu, chi ìⁿ-ni chiⁿ quide-dé ndihí-yu, te ní xóo dacáá-yu vehé dóó. Te núu xíáⁿ ní xíndecu ndihí ñaha té Pāblú ní quide chiⁿ ndihí ñaha-dě xii-yu.

4 Te núu ùná núu ùná nduu, nduu ndètatú-yu, ní xóo quíhíⁿ-dé veñúhu ñáyiu isràèl. Te ní ndatnúhu-dé ndihí ñáyiu isràèl ndihí ñáyiu ñá túú cùu ñáyiu isràèl, te ní xáhaⁿ-dě sá quìndáá iní-yu tnúhu Jèsús.

5 Te té Silás ndihí té Timùteú ní quee-güedé distritú Macèdoniá cuáháⁿ-güedé núú ndécú té Pāblú. Te òré ní quexio-güedé, te ní cáháⁿ-ni té Pāblú tnúhu Yá Ndióxi núú ñáyiu isràèl, te xáhaⁿ-dě xii-yu sá Jèsús cúú-gā Crístú Yaa ní tendaha Yá Ndióxi ní quixi ñuyú-a.

6 Te sá dúcáⁿ ní cáháⁿ-dé núu ní nàá ndihí ñahá-yu xii-dé, te ní cáháⁿ cuéhé-yu cuèndá-dé, núu xíáⁿ ní naquidi-dé dóó-dé. Te ducaⁿ ní quide-dé cuèndá sá cùtnùni iní-yu sá ñā ní tnàhá iní-dé nàcuáa ní cáháⁿ-yu, te ní xáhaⁿ-dě xii-yu:

—Yúhú ñá túú cuèchi-í, te núu ní xíta nihnu-ndo, xíáⁿ quèndóo cuèchi mee-ñā-ndó. Te vitna quíhíⁿ-í cáháⁿ ndihí-í ñáyiu ñá túú cùu ñáyiu isràèl, te vā nándücu-gá-í nchòhó ñáyiu isràèl cáháⁿ ndihí ñaha-í xii-ndo —càchí-dé xáhaⁿ-dě xii-yu.

7 Te ní xica-dé cuáháⁿ-dé vehé ìⁿ té nàni Justú, te té-áⁿ ndécú yàtni-dé núú cáá veñúhu, te tnàhá-dé càháⁿ ndihí-dé Yá Ndióxi.

8 Te té Crìspú tée yìndaha veñúhu-áⁿ ní sándáá iní-dé Jèsús ndihí ñadìhí-dé ndihí landú-dé. Te vai ñáyiu ňuú Còrintú ní sáháⁿ-yu ní xíndedóho-yu tnúhu-gá, te ní sándáá iní ñahá-yu xii-gá, te ní sanduté-yu.

9 Te ìⁿ niú ní cáháⁿ saní té Pāblú sá ní xáhaⁿ Yá Ndióxi xii-dé:

—Cáháⁿ-ni-n tnúhu-í, te vā yúhú-n nchàa tnúhu cuéhé tnúhu duha càháⁿ ñáyiu,

10 chi yúhú chindee ñaha-í xii-n, te vā yóo ìⁿ cada úhú ñahá xii-n, te vai-gā ñáyiu ňuú-áⁿ quìndáá iní-yu tnúhu-í —càchí-gā xáhaⁿ-gā núú saní-dé.

11 Te ňuú Còrintú ní xíndecu té Pāblú ìⁿ cuía dava, te mee-ni tnúhu Yá Ndióxi ní xóo dacuàha-dé ñáyiu.

12 Te ndécú-gá-dé ňuú-áⁿ ní ngóo té Gàlìon chiⁿ taxi tnuní-dé distritú Acáyá. Te dàvā-áⁿ ní cudééⁿ ñáyiu isràèl núú té Pāblú, te ní tní ñahá-yu xii-dé ndécá ñahá-yu cuáháⁿ núú cuè tée cùchiuⁿ.

13 Te ní xáháⁿ-yu xii té Gàlìon tée cùu gobiernú:

—Tée-a ní quexio-dé ňuú-ó xica cuu-dé te cuiní-dé dandàhú ñahá-dě chitnahá-ndí-dé cada-ndí nàcuáa quide-dé quidé càhnu-dé Ndióxi-dě, te dañā-ndí vā cadá-gā-ndí nàcuáa càháⁿ tnúhu sá sánú ìchi ñaha xii-o nacuáa cundecu-o cuiní-dé —càchí-yu xáháⁿ-yu xii té cùu gobiernú.

14 Te té Páblú cuíní-dé cani-dé cuèndú ní cùu, te ní ngúíta té Gàlìón càháⁿ-dé, te xáhaⁿ-dè xíi-yu:

—Nchòhó ñáiyi isràèl, cundedóho-ndo tnúhu na càháⁿ-í-a. Te núu ndècu núú ìⁿ cuéchi ní quide-dé àdi ní sahní-dé ìⁿ ndíyi, te cuu cundáá-xi iha, te càháⁿ-ndó núu nándi cùu sá ní quide-dé,

15 àdi dico-ni sá ìⁿ tnúhu ní càháⁿ-dé, te yáchí-gá chí cuaháⁿ yàcáⁿ ndatnúhu-ndo núú mée-ndó, chí mee-ni sá ñà túú quide-dé nàcuáa càháⁿ tnúhu sá sánú ichi ñaha xii-ndo caháⁿ-ndó, te yúhú ñà túú tnàhá iní-í cada ndáá-í nchaa xíáⁿ —càchí-dé xáhaⁿ-dè.

16 Te ní cudééⁿ-dè, te ní ndèñuhu ñaha-dè xíi-yu vechi^u.

17 Te ñáiyi ñà túú cùu ñáiyi isràèl ní tñí-yu té Sòstenés téé yìndaha veñúhu ñáiyi isràèl, te ndèhe té Gàlìón téé cùu gobiernú ní canihá-yu xii-dé, dico ñà túú tnàhí ná tnúhu ni càháⁿ-dé taunihnu-dé téé ní caní-yu-áⁿ.

Te Páblú cuaháⁿ tucu-dé ñuú Antiòquiá, te yàcáⁿ ní xica tucu-dé cuaháⁿ-dé dava-gá ñuú càháⁿ-dé tnúhu Yá Ndiòxí

18 Te titní-gá nduu ní xíndecu té Páblú ñuú Còrintú, te ní quide ndee iní-dé nchaa ñáiyi ní sándáá iní-xi tnúhu Jèsús, te ní tñí-dé ichi cuaháⁿ-dé distritú Siríá ndihí té Àquilú ndihí ñadhíⁿ té Àquilú-áⁿ tã Priscilá, te ní quexió-yu ñuú Cèncreá. Te cùmání-gã tñí-yu ichi quíhíⁿ-yu ñuú Éfesú, te ní deté díquíⁿ té Páblú, chí ducaⁿ ní xáhaⁿ-dè xii Yá Ndiòxí sá ndéé xínu ìⁿ chi^u ní sani iní-dé cada-dé cuèndá-gá, te dàtnùni deté-dé. Te ní quée-yu bàrcú cuaháⁿ-yu.

19 Te ní quexió-yu ñuú Éfesú, te yàcáⁿ ní xáhaⁿ tè Páblú sá cùndècu té Àquilú ndihí ñadhíⁿ-dé, te mee-dè quíhíⁿ-dé dava-gá ñuú. Te cùmání-gã caca-dé quíhíⁿ-dé, te ní sáháⁿ-dé veñúhu ñáiyi isràèl ní ndatnúhu ndihí ñaha-dè xíi-yu.

20 Te ní xáhãⁿ-yu sá cùndècu-dé titní nduu, te ñà ní cuíní-dé cundecu-dé.

21 Te ní xáhaⁿ-dè:

—Núhú-í chí dacuítíⁿ xini ñuhu-xi cundecu-í vico coo ñuú Jerusalén, te quixi tucu-í te núu Ndiòxí ná càchí-gá, te vitna chí cadá ndèe iní —càchí-dé xáhaⁿ-dè xíi-yu.

Te ní quée-dé bàrcú cuaháⁿ-dé.

22 Te ní quexio-dé ñuú Cèsareá, te ní quene-dé bàrcú, te ní xica-dé cuánuhú-dé ñuú Jerusalén, te ní ndexio-dé, te ní dándácõo váha-dé ñáiyi ndècu ichi Yá Ndiòxí, te dàtnùni ní xica-dé cuaháⁿ-dé ñuú Antiòquiá.

23 Te yàcáⁿ ní xíndecu-dé titní nduu, te dàtnùni ní tñí-dé ichi cuaháⁿ-dé. Te ní sáháⁿ-dé nihí distritú Galaciá ndihí distritú Frigiá. Te ndi tnahá ñuú ní sáháⁿ-dé ní càháⁿ-dé ndihí ñáiyi sándáá iní tnúhu Yá Ndiòxí, te ní ndúcú ndéé-gã-yu ní quide-yu nchaa nàcuáa ní xáhaⁿ-dè cadá-yu.

Te Àpolós càháⁿ-dé tnúhu Yá Ndiòxí ñuú Éfesú

24 Te dàvá-áⁿ ní quèxio ìⁿ téé isràèl ñuú Éfesú, te nàni-dé Àpolós, te cùu-dé téé ñuú Alejandriá, te ío váha túha-dé tnúhu Yá Ndiòxí, te ío váha ñuhu díquíⁿ-dè nàcuáa càháⁿ-dé,

25 chí sa xini-dé nàcuáa ní xóo càháⁿ ndíi Juàá cùtnàhá ní xóo dacuàndute ndíi ñáiyi. Te ío ní cudíⁿ iní-dé ní càháⁿ-dé nchaa nàcuáa ní cuu cuèndá Jèsús, dico vátá dácuàha-gá-dé nchaa tnúhu ní càháⁿ mée Jèsús.

26 Te ní sáháⁿ-dé veñúhu ñáiyi isràèl, te yàcáⁿ ní càháⁿ-dé ní yùhu ni iní-dé. Te ndècu té Àquilú ndihí ñadhíⁿ-dé tá Priscilá ndèdóho-yu tnúhu ní càháⁿ-dé, te

ní xáháⁿ-yu sá quíhíⁿ-dé vehé-yu, te ní sáháⁿ-dé, te ní xítñuhu ñàhá-yu xii-dé dava-gá tñuhu Yá Ndióxi sá ñà túú xini-dé.

²⁷ Te ní cachí té Àpolós sá quíhíⁿ-dé distritú Acâyá, núu xíãⁿ ní cadúha ñáyiú ñúú Éfesú ñⁿ tutú canehe-dé quíhíⁿ ndaha ñáyiú sàndáá iní tñuhu-gá xíndecu Acâyá. Te xáháⁿ-yu núú tütú-yu: “Cáháⁿ váha-ndo ndíhi té Àpolós núu ní quexio-dé”, cächi-yu xáháⁿ-yu núú tütú-yu. Te ní xica-dé cuáháⁿ-dé, te ní quexio-dé Acâyá. Te nchaá ñáyiú sàndáá iní tñuhu-gá yacáⁿ, ñu-ni mee Yá Ndióxi ní chindee ñàha-gá ní sàndáá iní ñáhã-yu xii-gá. Te té Àpolós ío váha ní cáháⁿ-dé tñuhu Yá Ndióxi núú-yu, te xíãⁿ ío ní ndúcú ndéé-gá-yu ní quidé-yu chiúⁿ-gá.

²⁸ Te té Àpolós ní ndatnóhu-dé ndíhi ñáyiú isràél, te ní xíndedóho dava-gá-yu. Te ío váha ní caní-dé cuendú nchaá nàcuáa ní xóo cáháⁿ cue téé ndéé sanaha sá quixí Cristú ñuyíú-a. Te ní cáháⁿ ndáá-dé ní xáhaⁿ-dè sá díú-ní Jèsús cúú-gã Cristú Yaá ní tendaha Yá Ndióxi ní quixi ñuyíú-a. Te ñáyiú isràél xíndatnóhu-yu sá ñã ndáa nàcuáa cáháⁿ-dé, dico ñã ní ñihí-yu tñuhu cúñáhá-yu xii-dé, chi ío váha ñuhu díquí-dè tñuhu cáháⁿ-dé.

19

Té Páblú ndécú-dè ñúú Éfesú

¹ Te cútñahá ndécú-gã té Àpolós ñúú Còrintú, te ní xica té Páblú cuáháⁿ-dé tá yàha-dé mee-ni xití yucu cuáháⁿ, te ní sáá-dé ndéé ñúú Éfesú. Te ñúú-áⁿ ñí naníhí tñáhá-dè ndíhi cue téé sàndáá iní tñuhu Jèsús.

² Te ní xicáⁿ tñuhú-dè núú-güedè, te xáhaⁿ-dè:

—¿Sa ní quexio Espiritú Yá Ndióxi ní ngúndecu ndíhi-ndo ndéé òré ní sàndáá iní-ndó Jèsús-ãⁿ? —cächí-dé xáhaⁿ-dè xii-güedè.

Te ní xáhaⁿ-güedè:

—Ñã túú xini-ndí sá ío Espiritú Yá Ndióxi —cächí-güedè xáhaⁿ-güedè xii-dé.

³ Te ní xáhaⁿ tucu-dé:

—¿Nása ní cáháⁿ téé ní dácúandüte ñaha xii-ndo-i? —cachí-dé xáhaⁿ-dè xii-güedè.

Te ní xáhaⁿ-güedè:

—Ní cáháⁿ-dé nàcuáa ní xóo cáháⁿ ndíi Juáá —cächí-güedè xáhaⁿ-güedè xii-dé.

⁴ Te ní xáhaⁿ tè Páblú:

—Ndíi Juáá ní dácúandüte ñaha ndíi xii ñáyiú, chi ní cuini-yu sá dáñã-yu nchaá sá cuèhé sá dúhá quidé-yu. Te ní xáhaⁿ ndíi xii-yu: “Quindáá iní-ndó tñuhu Jèsús chi dacuití quixi-gá ñⁿ nduu”, duha ní xáhaⁿ ndíi Juáá xii-yu —cächí té Páblú xáhaⁿ-dè xii-güedè.

⁵ Te sá dúcáⁿ ñí cáháⁿ té Páblú xáhaⁿ-dè xii-güedè, núu xíãⁿ ní sandute-güedè nàcuáa ní dándóo tñuhu Jèsús.

⁶ Te ní sacáⁿ ndodo té Páblú ndahá-dé díquí-güedè, te òré-ni ní quexio Espiritú Yá Ndióxi ní ngúndecu ndíhi-güedè, te ní ngüíta-güedè ní cáháⁿ-güedè tñuhu sá dácàhu iní ñáhá Espiritú-gá, tñuhu sá ñà túú xini-güedè cáháⁿ-güedè, te ní cáháⁿ-güedè tñuhu Yá Ndióxi nàcuáa ní dácáhu iní ñáhá Espiritú-gá xii-güedè.

⁷ Te cùu datná úxúú tñáhá-güedè.

⁸ Te té Páblú ní sáháⁿ-dé veñúhu ñáyiú isràél ní cáháⁿ ndíhi-dé-yu, te úní yóo ñí xínu ní xica cuu-dé veñúhu-yu. Te ío váha ñuhu díquí-dè tñuhu cáháⁿ-dé,

núu xíãⁿ ní cuyi-dě ní cáháⁿ-dé, te ní xáhaⁿ-dě sá quíndáá iní-yu tnúhu Jèsús, te ducaⁿ te ndíhu ndaha ñaha Yá Ndiöxí xii-yu.

9 Te davá-yu ío sàá iní-yu ñá ní cuiní-yu quíndáá iní-yu, te ío ní cáháⁿ cuèhé-yu cuèndá Jèsús xití veñúhu núú ðava-gá-yu. Te té Páblú ní ndee-dé veñúhu cuáháⁿ-dé ndíhi ñáyíu sàndáá iní tnúhu Jèsús. Te ñⁿ nduu ñⁿ nduu ní sáháⁿ-dé scuèlá té Tiranú ní ðacuáhá ñaha-dé xii-yu.

10 Te úú cuía ducaⁿ ní sáháⁿ-dé scuèlá ní ðacuáhá-dé ñáyíu. Te nchaa ñáyíu isràél ñáyíu ndècu nihií ðistrítú Àsiá ndíhi nchaa ñáyíu ñá túú cùu ñáyíu isràél ní xíndedóho-yu tnúhu Jèsús.

11 Te té Páblú ío ní chindee ñaha Yá Ndiöxí xii-dé ní quide-dé vài núú sá vã yõ tnàhí ndàcu cada.

12 Te pãñú díquí-dě ndíhi dóó cándèè núú yíquí-dě ní xicáⁿ-yu nèhé-yu ní sáháⁿ núú ndécú ñáyíu cùhú, te xíãⁿ ní tñi ñáyíu cùhú ndíhi ñáyíu yíhi ñaha espíritú cúndíhi yucu ñávãha, te ní ndúha-yu.

13 Te ñuú Isràél véxi cue téé tatna xica cuu-güedé quidé tãtna-güedé ñáyíu yíhi ñaha espíritú cúndíhi yucu ñávãha. Te ní ngúita-güedé ní cacu nèhe-güedé Jèsús cuèndá quee espíritú-án yiqui cùñú-yu, te ní xáhaⁿ-güedé:

—Xocuñí-n, chi càchí Jèsús sá vã cúndècu ndíhi-gá-n tõe-a. Te ðiu-ni Jèsús càcu nèhe té Páblú òré cáháⁿ-dé tnúhu-gá —càchí-güedé xáhaⁿ-güedé xii espíritú-án.

14 Te úsá tnàhá-güedé ducaⁿ ní xóo cada-güedé. Te tãtã-güedé ní xínani-dě Èsevã, te téé-án ní cuu-dé dútú cúnùu.

15 Te sá dúcãⁿ ní cáháⁿ-güedé, te ní xáhaⁿ espíritú cúndíhi yucu ñávãha-án xii-güedé:

—¿Te ná cúú nchòhó nũu dayùhú ñáhã-ndó? Te xini-í Jèsús, te xini-í yoo cùu té Páblú, te nchòhó ñá túú xini ñáhã-í xii-ndo —càchí espíritú-án xáhaⁿ-xi xii-güedé.

16 Te téé yíhi ñaha espíritú cúndíhi yucu ñávãha-án ní ndanchita-dé ní tñi-dé cue téé quide tãtna-án, te ní ndíhi dóó-güedé ní ndátã-dě, te ní ðánicuehè ñáhã-dé xii-güedé, te ní xinu-güedé cuáhã-güedé.

17 Te nchaa ñáyíu isràél ndécú ñuú Èfesú ndíhi ðava-gá ñáyíu ndècu ðiu-ni ñuú-án ní níhi-yu tnúhu nàcuáa ní cuu, te ío ní yùhú-yu, te vãi-yu ní cachí sá ío càhnu cuu Xitohó Jesucristú.

18 Te ðava ñáyíu ní sàndáá iní-xi tnúhu Jèsús ní sáhãⁿ-yu núú ndécú tè Páblú, ndíhi núú ndécú nchaa ñáyíu ní sàndáá iní tnúhu-gá ní náhmã-yu nàcuáa ní xóo cadã-yu.

19 Te titní ñáyíu ni xóo cada ndùu nehé-yu tutú-yu ní sáhãⁿ núú ndécú nchaa ñáyíu sàndáá iní-xi tnúhu-gá, te yacãⁿ ní ndada cuèndã-yu sá ío yahu ní sãha-yu tutú-yu, chi ndéé údico úxí míl ðihúⁿ cuixíⁿ ní sãha-yu núú ncháã. Te ncháã-yu ní sahmí-yu tutú-yu.

20 Te sátã ní cáyú nchaa tutú-án, te vãi-gá ñáyíu ní tuhá-yu ichi Yá Ndiöxí, te ní sãha-yu cuèndã sá ío xini ñuhu tnúhu Yá Ndiöxí.

21 Te ní cachí té Páblú sá quíhíⁿ-dé ðistrítú Macèdoniã ndíhi ðistrítú Acãyã, te ðãtnùní núhú-dé ñuú Jerusàlén, te ducaⁿ te ðãtnùní quíhíⁿ-dé ñuú Rómã.

22 Te ndècu ndíhi-dé té Timùteú ndíhi té Èrastú cue téé chindee ñaha xii-dé. Te té Páblú ní xáhaⁿ-dë xii-güedé sá códó nùu-güedé quíhíⁿ Macèdoniã, te ní xica-güedé cuáhã-güedé, te mee-dě ní quendóo-dé.

Náyiu Éfesú ío dusaⁿ quidé-yu ñuú-yu

23 Te dàvá-án ío ní cudééⁿ-yu núú nchaa ñáyiu ní tuha ichi Yá Ndiöxí.

24 Te ñⁿ téé ñuú Éfesú nání-dě Demètriú. Te téé-án ní xóo canehe chiúⁿ-dē mee-ni dǐhúⁿ cuixíⁿ ní xóo cadúha-dē veñúhu líhli, dàtná cuiniⁿ-ndó cǎa veñúhu Diáná sá cúú ndiöxí-yu. Te vǎi dǐhúⁿ ní xóo níhí-dē ndihí cue téé ní xóo cada chiúⁿ ndihí-dē.

25 Te ní cana-dé cue téé quide chiúⁿ ndihí-dē, ndihí nchaa cue téé quide chiúⁿ ndihí dǐhúⁿ cuixíⁿ, te ní xáhaⁿ-dē xii-güedé:

—Naha-ndo sá ío váha níhí-ó dǐhúⁿ cuendá chiúⁿ quide-o.

26 Te naha-ndo sá cǎchí té Pǎblú sá ñǎ díú ndiöxí cúú sǎ ní cadúha ñáyiu ñuyú-a. Te ducaⁿ cǎháⁿ-dē ñuú-ó, te ducaⁿ-ni cǎháⁿ-dē níhí distritú Àsiá, te ío-gá vǎi ñáyiu sǎndáá iní tnúhu cǎháⁿ-dē.

27 Te ío úhú ñuú na cuíta chiúⁿ quide-o, vá yǎo-gá cuaaⁿ sá cadúha-o. Te ngúita-yu cǎháⁿ-yu sá veñúhu Diáná ñǎ túú cǎváha, te vá cǎdá cǎhnu-gá-yu sǎndú-ó. Te naha-ndo sá ío cǎhnu cuu Dianá, chi nchaa ñáyiu distritú Àsiá quidé cǎhnu ñahá-yu ndihí ñáyiu xǐndecu ní cǎa xico ñuyú —cǎchí té Demètriú xáhaⁿ-dē xii-güedé.

28 Te sá dúcáⁿ ní cǎháⁿ té Demètriú, xǎⁿ ní cudééⁿ-güedē núú tē Pǎblú, te uuⁿ ní cuáá-güedé te cǎchí-güedé:

—Ío cǎhnu cuu Dianá sǎndú ñáyiu Éfesú! —cǎchí-güedé.

29 Te nchaa ñáyiu ñuú Éfesú ndí coyo ndí coyo-yu xǐcǎháⁿ-yu. Te tnàhá úú cue téé distritú Macèdoniá xǐcá cùu-güedé ndihí té Pǎblú, ñⁿ-dē nání-dē Gǎyú, te ñⁿ-dē nání-dē Aristarcú. Te ní tnǐ-güedé úú cue téé-án, te cuánguihu coyo ndihí ñaha-güedé vehe núú quidé-güedé jündá.

30 Te té Pǎblú cuiniⁿ-dē quíhu-dé tnàhá-dē vehe-án cǎháⁿ ndihí ñaha-dē ní cùu, te ñǎ ní dàña cue téé ní sǎndáá iní tnúhu-gá.

31 Te ñⁿ úú cue téé cùnnu distritú Àsiá ní cǎháⁿ váha-güedé cuendá té Pǎblú, te ní xáhaⁿ-güedé xii ñⁿ téé xǐnu cuechi núú-güedé ní sǎháⁿ-dē ní xáhaⁿ-dē xii té Pǎblú sá vǎ quíhu-dé vehe núú quidé-güedé jündá.

32 Te uuⁿ ní cuáá-yu nchaá-yu, te ñǎ ñⁿ-ní tnúhu ní cǎháⁿ-yu, chi ndí dííⁿ tnúhu ní cǎháⁿ-yu ñⁿ ñⁿ-yu. Te chitu-gǎ ñáyiu ñǎ ní cùtnuní iní-yu ná cuendá ní dátacá ñahá-güedé xití vehe-án, chi ñǎ ñⁿ-ní tnúhu ní cǎháⁿ-yu.

33 Te davá-yu ní cǎháⁿ-yu sá cuéchi té Lǐjandrú cúú-xí, chi ní xáhaⁿ ñáyiu israél xii-dé sá cǎháⁿ-dē yuhú-yu chindee tnúhu ñaha-dē xii-yu. Te ní quide-dé ndaha-dé núu-yu sá cündedóho-yu tnúhu cǎháⁿ-dē chindee tnúhu ñaha-dē xii-yu yòtnúhu.

34 Te ní cutnúní iní-yu sá tēe israél cúú-dē, te uuⁿ ní cuáá tucú-yu, ñǎ ní dàñá-yu cǎháⁿ-dē, te cǎchí-yu:

—Ío cùnnu Dianá sǎndú ñuú Éfesú! —cǎchí-yu. Te dàtná úú òrē ñⁿ-ni tnúhu ní cǎháⁿ-yu.

35 Te téé cùu secretariú-ni-gá ní cǎháⁿ-dē, te dàtnúní cuéé cuéé ní sadí-yu yuhú-yu. Te ní xáhaⁿ-dē xii-yu:

—Nchaa-ndo cündedóho-ndo ñⁿ tnúhu na cǎháⁿ-í-a. Ío cùnnu Dianá, te nchandi túhu ñáyiu sa nàhá-yu sá ncháá-ó ío nèhe cuendá-ó veñúhu-án. Te nàhá-yu sá néné cuendá-ó sǎndú-án, chi véxi cuuⁿ-gá andíu.

36 Te vá yǎo ñⁿ cǎchí sá ñǎ ndáá. Te coto-ndo mēe-ndo, te vá cuidó-ndó cǎda-ndo, te vá cuidó-ndó cǎháⁿ-ndó.

³⁷ Te ná cuèndá ndécá-ndó cuè téé-án vëxi, te ñá túú nã ní quide-güedé, te ñá túú nã ní dùhu-güedé veñúhu, te ñá túú càháⁿ cuèhé-güedé cuèndá Diàná.

³⁸ Te núu ió yoo nàá ndihi ñaha xii té Demètriú ndihi cue téé quide chiuⁿ ndihi-dé, te quíhíⁿ-güedé cacáⁿ cuéchi-güedé núu cuè téé cùchiuⁿ. Te cue téé cùchiuⁿ na cundoho-güedé núu quehndé-güedé cuéchi-yu àdi ñáhá.

³⁹ Àdi ío-gá ná cuèndú ñúhú iní-ndó, te càháⁿ-ndó òré ná cóo jùndá.

⁴⁰ Te ío úhú núu na ñihí téé tàxi tñuní ñáhá xii-o tñúhu sá dúhá ío quide dusaⁿ-o, te cachí-dé sá ndécucéchi-o chí ñá túú sàndáá iní-ó-dé quesaha-dé. Te ñá túú tñàhí ndúu váha-xi sá dúhá càda-o ni cuu, te vitna duha ní quide-o, te ñá cútñuní iní-ó nása cúñaha-o xii téé tàxi tñuní ñáhá xii-o núu na càna ñaha-dé —cachí téé cùu secretariú xáhaⁿ-dé xii-yu.

⁴¹ Te ní xáhaⁿ-dé sá ñuhú-yu te ní ndihí-yu cuánuhú.

20

Té Páblú cuáháⁿ-dé distritú Macèdoniá ndihi distritú Grèciá

¹ Te òré ñá túú-gã ní quide dusaⁿ-yu, te ní cana ñaha tẽ Páblú xii nchaa ñáyiu sàndáá iní tñúhu Jèsús ní càháⁿ-dé dóho-yu nàcuáa cadá-yu. Te ní quide ndee iní ñáhá-dé xii-yu, te ní tñiⁿ-dé ichi cuáháⁿ-dé distritú Macèdoniá.

² Te tayáha-dé cuáháⁿ ìⁿ ìⁿ ñúu yíndèhu Macedoniá. Te càháⁿ-dé dóho nchaa ñáyiu sàndáá iní tñúhu Jèsús nàcuáa cadá-yu, te ní cudíⁿ iní-yu cadá-yu nàcuáa càháⁿ Yá Ndióxi cadá-yu sá dúcáⁿ ní càháⁿ-dé dóho-yu. Té ní quexio-dé distritú Grèciá.

³ Te xíaⁿ ní xíndecu-dé úní yóó. Te xíaⁿ quèe-dé bàrcú quíhíⁿ-dé distritú Siríá ní cùu, te ní ñihí-dé tñúhu sá ndétú ñaha ìⁿ úú cue téé isràèl cahni ñaha-güedé xii-dé ní cùu, núu xíaⁿ ní tñiⁿ-dé ichi cuáháⁿ-dé ní yáha-dé ichi distritú Macèdoniá.

⁴ Te cuáháⁿ ndihi-dé té Sopátér téé ñúu Bèrea, ndihi té Aristarcú, ndihi ìⁿ téé nàni Segundú. Te ndi ndúu cue téé-án cúu-güedé cue téé ñúu Tesalónicá. Te tñàhá té Gàyú téé ñúu Dèrbé, ndihi té Timùteú cuáháⁿ ndihi-dé, te tñàhá té Tiquicú ndihi té Trófimú cuáháⁿ ndihi-dé, te úú cue téé-án cúu-güedé cue téé distritú Àsiá. Te nchaa cue téé-án cuáháⁿ ndihi-güedé té Páblú.

⁵⁻⁶ Te ní quexio-güedé ñúu Filipú, te yàcáⁿ ní nanihí ñáhá-güedé xii-ndí. Te té Páblú ní tendaha-dé cue téé ndihi-dé cuáháⁿ-güedé ñúu Tròás, te ní xáhaⁿ-dé sá díú-ní yàcáⁿ cundetu ñaha-güedé xii-ndí. Te ní ndóo-í ndihi-dé, te ní xíndecu-ndí vico xèxi-yu pàá sá ñà túú yíhi levadurá. Te sátá ní yáha vico, te ní quèe-ndí bàrcú cuáháⁿ-ndí, te ní xúhuⁿ-ndí ichi úhúⁿ nduu, te ní quexio-ndí ñúu-án. Te yàcáⁿ ní nanihí tñàhá-ndí ndihi cue téé yòdo nuu cuáháⁿ ní xíndecu-ndí úsá nduu.

Té Páblú cuáháⁿ ngándihi-dé ñáyiu ñúu Tròás

⁷ Te ìⁿ nduu ndumíngú ní nanihí tñàhá-ndí ndihi nchaa ñáyiu ní sàndáá iní-xi tñúhu Jèsús ní xexi-ndí pàá ndihí-yu. Te ducaⁿ ní quide-ndí, chí ní cachí Jèsús sá dúcáⁿ càda-o cuèndá sá vã nàcuànaa-o sá ní xíhí-gá cuèndá nanihí tãhú-ó. Te té Páblú ní ngúita-dé càháⁿ-dé tñúhu-gá, te càháⁿ-dé ní cuu dava niú, chí cuèndá ná tũndaá ingá nduu-án, te caca-dé quíhíⁿ-dé ingá xichi.

⁸ Te ndécú-yu vehe yòdo tñaha, te yíhí-yu ndéé cuártú cúu úní núu ñnu, te càyú víhí ñuhú xití cuártú-án.

⁹ Te ñⁿ téé sa ta cùu sacuéhé luha nàni-dé Èùticú núcõo-dé yèhe ventaná, cuiní-dé cúdú-dé, chi ní cunaha vihi caháⁿ té Páblú, te ní tñi ñaha sàni xii-dé ní xidí-dé, te ní ngava-dé ndéé ñuhu. Te ní nuú-yu núú ñúhú cuèndá ndacani ñàhá-yu, te sa ní xihí-dé, chi ío dùcúⁿ ní ngava-dé.

¹⁰ Te tñahá té Páblú nchicúⁿ-dé ní nuu. Te ní quexio cunu-dé núú cátuu téé ní xihí-áⁿ, te ní numi ñaha-ni-dé, te ní xáhaⁿ-dè xii-yu:

—Vá ndihú iní-ndó, chi ní ndoto-dé —càchí-dé xáhaⁿ-dè xii-yu.

¹¹ Te dàtnùni cuánda ndihi ñaha tucu-dé xii-yu cuártú núú yihí-yu ní cùu, te yàcáⁿ ní xexi ndihi ñaha-dè xii-yu, dàtnùni ní ngüita-dé vai-gá tñuhu ní cáháⁿ-dé, te càháⁿ-ni-dé ní túndaá, te dàtnùni ní xica-dé cuáháⁿ-dè.

¹² Te téé ní ngava-áⁿ ní sánúndeca ñàhá-yu xii-dé ndéé vehe-dé, te ío ní cudíí iní-yu sá ní ndoto-dé.

Ní quee-güedé ñuu Tròas cuáháⁿ-güedé ñuu Miletú

¹³ Te té Páblú ní cachí-dé sá quihíⁿ-ndí ndihi bàrcú ndéé ñuu Àsón, te mee-dè caca saha-dè, te yàcáⁿ nanihí tñahá-ndí ndihi-dé te quee-dé bàrcú, te ní quee-ndí bàrcú cuáháⁿ-ndí.

¹⁴ Te ní nanihí tñahá-ndí ndihi-dé ñuu Àsón, te yàcáⁿ ní quee-dé bàrcú tñahá-dé cuáháⁿ-ndí ñuu Mitilené.

¹⁵ Te ní quexio-ndí ndéé ingá nduu yatni ñuu Quiú, te ndéé nduu tñéé ní quexio-ndí ñuu Sámú te yàcáⁿ ní yáha-ndí, te ní quexio-ndí ñuu Trògilitú. Te ndéé nduu idá ní quexio-ndí ñuu Miletú.

¹⁶ Te té Páblú ñá ní cuiní-dé yáha-ndí ñuu Éfesú, chi ñá túú ní tñahá iní-dé cuyaa-dè ichi, chi ío ndihi iní-dé cuèndá cuiní-dé quiní-dé ñuu vá ndacú-dè ndexio-dé ñuu Jerusálén cundecu-dé vico Pentecòstés.

Té Páblú càháⁿ ndihi-dé cue téé yìndaha ñaha xii ñáyiú sàndáá iní tñuhu Jèsús ñuu Éfesú

¹⁷ Te òré ndécú tè Páblú ñuu Miletú, te ní cana-dé cue téé yìndaha ñaha xii ñáyiú sàndáá iní tñuhu Jèsús ñuu Éfesú sá quihíⁿ-güedé núú ndécú-dè.

¹⁸ Te sáta ní quexio-güedé, te ní xáhaⁿ-dè xii-güedé:

—Nàha-ndo nacuaá ní quide-í ndéé cútñahá ní quexio-í distrítú Asíá.

¹⁹ Chi ní quide-í nàcuáa ní cáháⁿ Yá Ndiõxí cada-í, ñá túú ní tühío-í, te ñá túú ní quide cahnu-í mée-í, te ío ní ndáhyú-í sá quidé dàvá-yu, chi ío sàá iní-yu. Te sa nàha-ndo sá tñíni xito ní cuiní ñáyiú isràél cahni ñàhá-yu xii-í ní cùu, te ío ní ndoho-í ní cácu-í.

²⁰ Te sa nàha-ndo sá ncháándí tñuhu sa ní cachí tñuhu-í nàcuáa cada-ndo cuèndá sá chindèe ñaha Yá Ndiõxí xii-ndo. Te ní cáháⁿ-í tñuhu-gá núú-ndó ncháa-ndo, te diu-ni ducaⁿ ní quixi-í ndi tñahá vehe-ndo ní cáháⁿ-í tñuhu-gá núú-ndó.

²¹ Te ní xáhaⁿ-í xii ñáyiú isràél ndihi ñáyiú ñá túú cùu ñáyiú isràél sá dáñá-yu nchaa sá chéhé sá dúhá quidé-yu te quindáá iní-yu tñuhu Xítóhó Jesucristú.

²² Te dacuítí quihíⁿ-í ñuu Jerusálén, chi Espiritú Yá Ndiõxí ní cachí-xi sá dái quihíⁿ-í, te ñá túú xiní-í nándi cada ñaha-güedé xii-í yàcáⁿ te núu na quèxio-í.

²³ Te ñⁿ ñⁿ ñuu núú sàháⁿ-í càchí tñuhu Espiritú-gá sá chíhí ñaha-güedé vecaá, te cada úhú ñàhá-güedé.

24 Dico ñá túú tnàhí ná cuu cuèi na càhni ñaha-güedé xii-í, dico cuini-í sá dǎí iní dandǎhi-í nchaa sá ní cachí Xítohó Jesucristú cada-í. Te ní cachí Yá Ndiǒxí sá cǎháⁿ-í núú ñǎyiu sá ïo cùu iní ñáhá-gǎ xii-yu, te naníhí tǎhú-yu núu na quindáá iní-yu tnúhu-gǎ.

25 "Te sa ní cachí tnúhu-í xii-ndo nchàa-ndo sá núu na quindáá iní-ndó Yá Ndiǒxí, te ndǎhu ndaha ñaha-gǎ xii-ndo. Te na cǎchí tnúhu-í sá ní ïⁿ nduu-gǎ vá quini ñáhá-ndó xii-í ñuyú-a.

26-27 Te yúhú ñá túú cuèchi-í núu ïó ñǎyiu vá naníhí tǎhú, chi sa ní cachí tnúhu-í nchaa sá ní cǎháⁿ méé Yá Ndiǒxí cada-ndo.

28 Te coto-ndo mèe-ndo, te coto-ndo tnàhá ñǎyiu sàndáá iní tnúhu-gǎ, chi Espíritú-gǎ ní cachí-xi sá cúnúu-ndo núú-yu dacuàha-ndó-yu tnúhu-gǎ. Te cada-ndo cuendá sá dàtná mbéé-ndó cùu-yu, te mee-ndo cùu-ndo datná toli xito-ndó-yu ducaⁿ cǎda-ndo cuendá, chi ñaha-ndo sá Jesús ní sati níñí-gǎ, te ní xihí-gǎ cuendá naníhí tǎhú-ó ndihí-yu.

29 Te yúhú sa cùtnuní iní-í sá òré ñá túú-gǎ-í ndécú, te quixi ñǎyiu dandǎhú ñáhá xii-ndo cuendá daña-ndo tnúhu Yá Ndiǒxí, te cada ñáhá-yu xii-ndo dàtná quidé ñǎñá òré tnǎí-dí mbéé.

30 Te ñiu-ni ïⁿ úú cue téé ndècu ndihí-ndo, cue téé-áⁿ dacuàndehnde-güedé, te cudana davá-yu quindáá iní-yu chítnáhá ñáhá-yu xii-güedé.

31 Te xíáⁿ núu cǎchí tnúhu-í sá ïo quihí iní-ndó cùndecu-ndo ndihí nchaa ñǎyiu sàndáá iní tnúhu-gǎ. Te ñaha-ndo sá yúhú ní xíndecu-í úní cuía ní cǎháⁿ-í tnúhu Jesús núú ñǎyiu cuèi nduu cuèi niú. Te áma ní xóo ndáhyú-í, chi ñá ní cuini-yu quindáá iní-yu nchaa-yu tnúhu ní cǎháⁿ-í —cǎchí té Pǎblú xǎhaⁿ-dè xii-güedé.

32 Te xǎhaⁿ tùcu-dé:

—Nchòhó cue téé ndècu ndihí-í ichi Xítohó Jesucristú, ïo cuini-í sá méé Yá Ndiǒxí chindee ñaha-gǎ xii-ndo. Te mee-gǎ ní cǎháⁿ-gǎ sá ïo cùdǎí iní ñáhá-gǎ xii-ndo. Te naníhí tǎhú-ndó ndihí nchaa ñǎyiu cùu cuendá-gǎ, te chindee ñaha-gǎ xii-ndo cuendá cada-ndo nchàa sá cǎháⁿ-gǎ.

33 Te òré ní xíndecu ndihí ñaha-í xii-ndo, te ní dǎhúⁿ ni dǒó ñá túú ní cùdǎí iní-í.

34 Te mee-ndo sà naha-ndo sá yúhú ní quide chiúⁿ-í, te ní níhi-í nchaa sá ní nandǎhi-í ndihí cue téé xica cuu ndihí-í.

35 Te sa ní xiní-ndó nacuáa ní quide-í ní quide chiúⁿ-í, te ñiu-ni ducaⁿ cǎda chiúⁿ-ndo cuendá chindee-ndo nchàa ñǎyiu ndǎhú, chi sa ñaha-ndo nacuáa ní cachí Xítohó Jesucristú, te duha ní cachí-gǎ: "Cùdǎí-gǎ iní-ó cuàha-o ñǎyiu ndǎhú sá xini ñúhú-yu ñacúxí sá tǎxí-yu xii mee-o", duha ní cachí-gǎ —cǎchí té Pǎblú xǎhaⁿ-dè xii-güedé.

36 Te sáta dúcáⁿ ní cǎháⁿ-dè, te ní ngúñí xítí-dè ndihí dava-gǎ-güedé, te ní cǎháⁿ ndihí-dé Yá Ndiǒxí.

37 Te sáta ní túhú tnúhu ní cǎháⁿ-dè ndihí Yá Ndiǒxí, te ní ndáhyú víhi-güedé sá quihí-dé, te ní numi ñaha-güedé, te ní teyuhu ñaha-güedé.

38 Te ní ndǎhú víhi iní-güedé, chi ní xǎhaⁿ tè Pǎblú sá ní ïⁿ nduu-gǎ vá naníhí tnáhá-güedé cǎháⁿ ndihí tnàha-güedé. Te cuáháⁿ ndihí ñaha-güedé xii-dé núú ndécú bàrcú.

21

Té Páblú cuáháⁿ-dé ñuú Jerusalén

1 Te ní quide ndee iní-ndí nchaa cue tée cùnuu. Te ní queé-ndí bàrcú cuáháⁿ ndáá ichi-ndí ñuú Còs. Te nduu tnéé ní sáháⁿ-ndí ñuú Ròdás, te ní yáha-ndí cuáháⁿ-ndí ñuú Pàtará.

2 Te yàcáⁿ ní naníhí-ndí ñⁿ bàrcú ñúhú ìchi-xi quíhíⁿ-xi distrítú Fèniciá, xíáⁿ ní queé-ndí cuáháⁿ-ndí.

3 Te ichi cuáháⁿ-ndí ní xiní-ndí distrítú Chìpré cáá cuådava xítí làmár, te ní yáha-ndí, te ní quendóo ñuú-áⁿ xio dàtni-ndí. Te cuáháⁿ-ndí ñuú Tírú ñⁿ ñuú yíndèhu distrítú Siríá cuèndá yàcáⁿ tava-güedé nchaa sá nchídó bàrcú.

4 Te yàcáⁿ ní naníhí tnáhá-ndí ndihí ñáyiu ní sándáá iní tnúhu Jèsús, te ní xíndecu-ndí úsá nduu ndihí-yu. Te ní xáháⁿ-yu sá vǎ quíhíⁿ té Páblú ñuú Jerusalén, chi Espiritú Yá Ndiòxí ní xáhaⁿ-xi xii-yu sá ndóhó vihi-dé ñuu na quíhíⁿ-dé.

5 Te sátá ñí yáha nduu úsá, te ní quee-ndí cuáháⁿ-ndí yuhu làmár. Te ní quee nchaa ñáyiu ní sándáá iní tnúhu-gá, tée, ñadihí, nchaa landú, ncháá-yu ní sándeca ñáhá-yu yuhu làmár, te òré ní quexìo-ndí, te ní ngúíñí xítí-ndí ní cáháⁿ ndihí-ndí Yá Ndiòxí.

6 Te ní quide ndee iní tnáhá-ndí ndihí-yu, te dàtnùnì ní queé-ndí bàrcú, te ní naquehéⁿ-yu ichi cuánuhú-yu vehé-yu.

7 Te ní xica bàrcú ñúhú-ndí ní quee-xi ñuú Tírú cuáháⁿ-ndí ndihí-xi ñuú Tolèmaidá. Te xíáⁿ ñí sáá-xi te ní quene-ndí, te ní sáháⁿ-ndí ní cáháⁿ ndihí-ndí nchaa ñáyiu sándáá iní-xi tnúhu Jèsús, te ní xíndecu-ndí ndihí-yu ñⁿ nduu.

8 Te nduu tnéé ní ndée tucu-ndí bàrcú cuáháⁿ-ndí ñuú Cèsareá, te yàcáⁿ ní quene tucu-ndí bàrcú, te cuáháⁿ-ndí vehe té Lìpé cundecu-ndí ndihí-dé. Te tée-áⁿ ñí xóo cada chiuⁿ ndihí-dé íñú-gá cue tée ní chindee ñàha xii ñáyiu sándáá iní tnúhu-gá ñuú Jerusalén ní xóo cuáñaha-güedé sá ñí xóo caxí-yu. Te dàtnùnì mee-nǎ tnúhu Yá Ndiòxí càháⁿ-dé xícá cùu-dé.

9 Te té Lìpé-áⁿ ndècu cúmí dèhe dihí-dé, te ñí ñⁿ-yu vátá ndúcú ñàha-gá tée xii-yu, te ncháá-yu càháⁿ-yu tnúhu Yá Ndiòxí tnúhu sá dácàhu iní ñáhá mée-gá.

10 Te xíáⁿ ñí cuu titní nduu ndècu-ndí, te ní quexìo ñⁿ tée nàni Agabú ñuú-áⁿ, véxi-dé distrítú Jùdeá, te tée-áⁿ tnàhá-dé càháⁿ-dé tnúhu Yá Ndiòxí.

11 Te ní níhí-dé tnúhu núu ndécú-ndí ñuu ní quixi-dé ní cáháⁿ ndihí ñàha-dé xii-ndí. Te ní xícáⁿ-dé cínchú té Páblú, te ní ngóo-dé, te ní ngúíta-dé ní dácútú-dé sáhá-dé ndihí ndaha-dé, te ní cachí-dé xii-ndí:

—Espiritú Yá Ndiòxí ní cachí-xi sá tée dii cínchú-xi-a tnñí ñàha cuè tée isràèl ñuú Jerusalén, te duha dacùtu ñàha-güedé xii-dé, te cuáha cuèndá ñáhá-güedé xii-dé núu cuè tée ñuú Rómá. Duha ní cáháⁿ Espiritú-gá —cachí té Agabú.

12 Te sá dúcáⁿ ñí cáháⁿ-dé, te ní xáhaⁿ-ndí nchaa-ndí sá vǎ quíhíⁿ té Páblú ñuú Jerusalén.

13 Te té Páblú ní cachí-dé:

—¿Ná cuèndá ndéé dúcáⁿ ndàhyú-ndó dàndihú iní ñáhá-ndó xii-í-i? Te ñá túu nǎ cuu cuèi na dàcutu ñàha-güedé, àdi cuèi na càhni ñàha-güedé xii-í cuèndá sá càháⁿ ndihí-í Jèsús, chi sa ndècu túha-í sá cùu-í —cachí-dé.

14 Te ñá túú ní sàndáá iní-dé sá dúcáⁿ xăhaⁿ-ndí, núú xíăⁿ ñá túú-gă ná ní xăhaⁿ-ndí xii-dé sá vă quihíⁿ-dé, te ní xítñaha-ndí:

—Mee-ni-gă Yă Ndiôxí ná cùnaha-gă nása sàni iní-gă cada-gă — xítñaha-na-ndí.

15 Te ní queheⁿ-ndí ndàchiuⁿ-ndí, te ní xica-ndí cuáháⁿ-ndí ñuú Jerusalén.

16 Te cuáháⁿ ndihí-ndí ñⁿ úú cue téé Cèsareá, cue téé ní sàndáá iní tnúhu Jèsús. Te ndèca ñaha-güedé xii-ndí cuáháⁿ vehe té Mnàsón, te téé-áⁿ cúú-dé téé distritú Chipré, te ndècu-dé ñuú Jerusalén, te sa ní cuu vâi nduu ní sàndáá iní-dé tnúhu-gă, te vehe téé-áⁿ ní xíndecu-ndí.

Té Păblú ndátñūhu-dé ndihí té Jàcobó

17 Te òré ní quexìo-ndí ñuú Jerusalén, te nchaa ñáiyu ní sàndáá iní tnúhu Jèsús ní quixí-yu ní dándácôo vâha ñahá-yu, chi ní cudíí víhí iní-yu sá ní quexìo-ndí.

18 Te nduu tnéé cuáháⁿ ndihí-ndí té Păblú cuendá cáháⁿ ndihí-ndí té Jàcobó, te òré ní quexìo-ndí núú ndécú-dé, te ndècu ndihí-dé nchaa cue téé yîndaha ñaha xii ñáiyu sàndáá iní tnúhu Jèsús.

19 Te té Păblú ní dándácôo vâha ñaha-dé xii-güedé, te ní xăhaⁿ-dê nâcuáa ní quide Yá Ndiôxí ní chindee ñaha-gă xii-dé ní cáháⁿ-dé tnúhu-gă núú ñáiyu ñá túú cùu ñáiyu isrâél.

20 Te sátá ní yâha ní cáháⁿ-dé, te ní ndácáⁿ táhŭ-yu núú Yă Ndiôxí cuendá nchaa sá ní quide-gă. Te dâtnùnî ní xăhaⁿ-güedé xii té Păblú:

—Yôhó sa ñaha-n sá ní cuu titní mîl ñáiyu isrâél ní sàndáá iní-yu tnúhu Jèsús, te cächí-yu sá ïo xîni ñuhu-xi cadá-yu nchaa nâcuáa cáháⁿ tnúhu sá ní chídó tnùnî ndí Moisés.

21 Te ní níhí-yu tnúhu sá dâcuâha-n ñáiyu isrâél ñáiyu ndècu ñuú xícá cuendá sá vă cadá-gă-yu nâcuáa ní cächí ndí Moisés cadá-yu. Te xăhaⁿ-n xii-yu sá vă cuâha-gă-yu sêñá ñîi landú-yu, te vă cadá-gă-yu dâtná ní xóo cada ñáiyu ndéé sanaha, duha dâcuaha-n ñáiyu ní níhí-yu tnúhu.

22 Te na níhí-yu tnúhu sá ndécú-n ïha, te tnâvíí ngüíta-yu cáháⁿ cuèhé-yu cuendá-n.

23 Te na cächí tnúhu-ndí nâcuáa cada-n. Ndècu cúmí cue téé vátá cadá-gă-güedé nâcuáa ní cáháⁿ méé-güedé sá cadá-güedé cuendá nduu vétú iní Yă Ndiôxí.

24 Te quihíⁿ-n ndihí-güedé te cada-n nchâa nâcuáa ní xóo cada ñáiyu ndéé sanaha cuendá nduu vétú iní Yă Ndiôxí. Te tava-n dîhúⁿ cuu núú-güedé cháhu-güedé veñúhu, te ducaⁿ te dâtnùnî ndacu dèté díquí-güedé. Nchaa xíăⁿ cada-n, te quini ñáiyu sá ñă ndáá tnúhu cáháⁿ nchaa ñáiyu cáháⁿ cuèhé cuendá-n. Te na cùtnunî iní-yu sá tnâhá-n quide-n nchaa nâcuáa ní chídó tnùnî ndí Moisés cadá-yu.

25 Te sa ní quide ndáá-ndí cuendá nchaa ñáiyu ñuú xícá, nchaa ñáiyu ní tuha ichi Jèsús. Te sa ní cadúha-ndí tutú ní tendaha-ndí cuáháⁿ ndaha nchaa ñáiyu-áⁿ sá vă caxí-yu nchaa sá nchító-ó ndùu táhú nchaa sá cächí-yu cùu ndiôxí ní cadúha cue ñáiyu ñuyú-a. Te ní xăhaⁿ-ndí sá vă caxí-yu níñí, te vă caxí-yu cuñú nchaa quiti cuèhné. Te vă cáháⁿ ndihí cue téé ñadihí te núú ñá díú ñadihí-güedé cúŭ-yu, te ní cuè ñáiyu dîhí vă cáháⁿ ndihí-yu téé te núú ñá díú

yí-yu cùu-güedé. Duha ní tee-ndí núú tùtú cuáháⁿ —càchí-güedé xáhaⁿ-güedé xii té Páblú.

Ní tñi-güedé té Páblú xití veñúhu ñáyiú isràèl

26 Te nduu tnée cuáháⁿ té Páblú ndihí cúmí cue tée veñúhu càhnu sá ïo cùnunu núú ñáyiú isràèl cada-güedé nàcuáa ní xóo cada ñáyiú ndée sanaha cuendá nduu vétú iní Yá Ndióxí. Te ní quíhu-dé veñúhu càhnu sá ïo cùnunu-áⁿ ní xáhaⁿ-dè ná daha-gá nduu cùmání dandihí-güedé nàcuáa ní xóo cada ñáyiú ndée sanaha, te dàtnúni cànehe-güedé sá ndúú tãhú Yá Ndióxí quíhíⁿ veñúhu.

27 Te cùmání-gã cuu úsá nduu sá ní sáháⁿ-güedé veñúhu càhnu sá ïo cùnunu, te sa ndècu tucu té Páblú veñúhu. Te cue tée isràèl véxi distritú Àsiá ní xiní-güedé té Páblú yíhí-dè veñúhu, te ní tñi ñaha-güedé xii-dé, te ïo ní cáháⁿ cuèhé-güedé cuendá-dé núú dàva-gá ñáyiú yíhí veñúhu cuendá sá cúdèèⁿ-yu núú té Páblú.

28 Te níhi ní cáháⁿ-güedé, te xáhaⁿ-güedé xii-yu:

—ñchòhó ñáyiú isràèl, yáchí-ndó chì cuánundaha ñaha-ndo! Chi tée-a yayacáⁿ cuáháⁿ-dé càháⁿ-dé sá ñà túú nàndihí-o, te càháⁿ-dé sá vã cadá-ó nchàa nacuáa càháⁿ tnúhu sá ní chídó tnúni ndíi Moisés, te càchí-dé sá ñà túú nàndihí veñúhu-a. Te ñá díú-ní xiãⁿ chi sa ní quíhu-dé veñúhu-a ndihí cue tée ñá túú cùu ñáyiú isràèl, te sá dúcáⁿ ní quide-dé, te ñá túú-gã ní cànehe lí-dè xití veñúhu. Te veñúhu-a cùu-xi vehe Yá Ndióxí —càchí-güedé xáhaⁿ-güedé xii-yu.

29 Te ducaⁿ ní cáháⁿ-güedé chi ní sani iní-güedé sá ní quíhu ndihí-dé té Trófimú veñúhu-güedé, chi ní xiní-güedé xicá cùu ndihí ñaha-dé xití ñuú. Te tée-áⁿ cúu-dè tée ñuú Éfesú, te ñá díú tée isràèl cúu-dè.

30 Te chítu ñáyiú ñuú-áⁿ ní tacá-yu ní tñiⁿ-yu té Páblú táñùhu ñahá-yu ní ndee veñúhu càhnu sá ïo cùnunu, te òré-ni ní nacadé-güedé yèhe veñúhu-áⁿ.

31 Te sa cahní-yu té Páblú ní cùu, te ní sáháⁿ ìⁿ úú-güedé núú ndécú tée cùu capitáⁿ cúnunu-gá, te ní xáhaⁿ-güedé xii-dé sá ncháá ñáyiú ñuú Jerusálén xĩnã-yu.

32 Te òré-áⁿ cuáháⁿ tée cùu capitáⁿ cúnunu-gá ndihí dava-gá cue tée nchicúⁿ-gá ndihí sandádú-dé. Te òré ní xiní-yu ní quexio coyo-güedé núú xixúcu-yu, te ní yuhú-yu ñá túú-gã ní caní-yu té Páblú.

33 Te tée cùu capitáⁿ ní sátuha-dé té Páblú, te ní xáhaⁿ-dè xii cue sandádú-dé sá tñí ñaha-güedé dacùtu ñaha-güedé úú cadená. Te dàtnúni ní xicáⁿ tnúhú-dè núú-yu, te xáhaⁿ-dè:

—¿Ná cúú tée-a? ¿Ná ní quide-dé? —càchí-dé xáhaⁿ-dè xii-yu.

34 Te tée cùu capitáⁿ-áⁿ ñá ní cùtnúni iní-dé núu ná cúú sã ní quide té Páblú, chi uuⁿni ní cuáá-yu. Te tucu càháⁿ ìⁿ, tucu càháⁿ ìⁿ-yu, núu xiãⁿ ní xáhaⁿ-dè cue sandádú-dé sá cándèca ñaha-güedé xii-dé quíhíⁿ cuártél núú ndécú-güedé.

35-36 Te nchicúⁿ ñáhã-yu cuáháⁿ ní quexio ndée nàcuáa càa nchío cuíni-yu cahní ñahá-yu xii-dé ní cùu. Te níhi ní cáháⁿ-yu xãhãⁿ-yu sá cahní ñaha-güedé, te xiãⁿ ní ndacani ñaha-güedé ndécá ñaha-güedé cuásáa nchío-áⁿ.

Té Páblú xáhaⁿ-dè xii-güedé sá ñà túú cuèchi-dé

37 Te cuánguihu-güedé cuártél ndihí té Páblú ní cùu, te ní xáhaⁿ-dè xii tée cùu capitáⁿ cúnunu-gá:

—Cáháⁿ ndáhú-í núú-n cùndetu-n na cúñaha-í ìⁿ úú tnúhu xii-yu —càchí-dé xáhaⁿ-dè.

Te tée tàxi tnuní-áⁿ ní xáhaⁿ-dè:

—¿Náa tñahá yòhó càháⁿ-n tñuhu grìégú?

³⁸ Te ní càháⁿ-í sá tée ègíptú cúu-n, chí ñu-n ní ndúcú-n cuè tée ní nàá ndihi tée cùchiuⁿ Cesár ní càháⁿ-í, chí ñu ñⁿ tée yàcáⁿ ní ndúcú-dě cúmí míl cue tée ní sahní ndiyi. Te ndèca tñaha-güedé ní sáháⁿ xití yucu ní xíhi váha-güedé — cächí-dé xáhaⁿ-dě xii té Páblú.

³⁹ Te té Páblú ní xáhaⁿ-dè:

—Ñá díú tée ègíptú cúu-í, chí tée isràél cúu-í, chí ñu-ni tée isràél cúu tātà-í, te dicó-ni sá ní cacu-í ñúú Tàrsú ñúú càhnú, te ñúú-án yíndèhu-xi distritú Cìliciá. Te cuiní-í cada ndee iní-n dàña-n na caháⁿ ndihi-í-yu —cächí-dé xáhaⁿ-dè.

⁴⁰ Te ní xáhaⁿ tée cùu capitáⁿ cúnù-gá sá cúu càháⁿ té Páblú, núu ní ngúnutñí-dé núu nchio, te ní quide-dé ndaha-dé sá cündèdóho-yu. Te ní sadí-yu yuhú-yu, te ní càháⁿ-dè tñuhu ñáyíu isràél, te xáhaⁿ-dè xii-yu:

22

¹—Chí cadá càhnu iní nchòhò cue tée sa cuéhé ndihi nchòhò cue tée cuechi, na càháⁿ-í ñⁿ tñuhu cündèdóho-ndo sá ñà túu cuèchi-í, chí ñà túu ná ní quide-í, te ní ñà túu ná tñuhu càháⁿ-í —cächí-dé xáhaⁿ-dè xii-güedé.

² Te cuendá sá dúcáⁿ ní càháⁿ-dè tñuhu mèe-yu núu tñáví-ñá ní sadí-yu yuhú-yu ní xíndedóho-yu ní càháⁿ-dè, te xáhaⁿ-dè:

³—Yúhú cúu-í tée isràél, te ní cacu-í ñúú Tàrsú, te ñúú-án yíndèhu-xi Cìliciá. Te davitna líhli-í cúnàhá ní quexio-í ñúú Jerusalén ní dácuahá ñàha té Gamàiel. Te ní dácuahá-í ncha tñuhu ní chídó tñuní ncha cue tée ndéé sanaha nàcuáa cada ñáyíu. Te yúhú ní cahu iní-í ní quide-í titní núu chiùⁿ nacuaa cuu váha iní Yá Ndiòxi ní càháⁿ-í, te ñu-ni ducaⁿ quide nchohó tucu.

⁴ Te ní sánú ndúcú-í ncha ñáyíu sàndáá iní-xi tñuhu Jèsús, cuèi tée, cuèi ñáyíu ñíhí ní dácútù-í-yu, te ní chíhi-í-yu vecaá, te ní níhí-í tñuhu ndee iní sá càhní-ndí-yu.

⁵ Te dútú cúnù-gá ndihi cue tée cùnùu núu-ndó nàha-güedé sá ndàá càháⁿ-í chí mee-güedé ní taxi-güedé tutú cuáñaha-í xii ñáyíu isràél ñáyíu ndècu ñúú Dàmascú cuendá cutnùní iní-yu ná chíúⁿ cuáháⁿ-í ní cùu. Te ñuhu-í ichi cuáháⁿ-í ñúú-án cuánündúcú-í ñáyíu ní sàndáá iní-xi tñuhu Jèsús cuendá dacùtu-í-yu te candeca-í-yu ndixi, te iha cada úhú ñàhá-güedé xii-yu ní cùu.

*Té Páblú xáhaⁿ-dè xii ñáyíu nàcuáa ní cuu ní tuha-dé ichi Jèsús
(Hch. 9:1-19; 26:12-18)*

⁶ Te ta cùyatni-í ñúú Dàmascú cuáháⁿ-í, te cùu-xi datná òré cauxúu nduu, te uuⁿni ní quee ñuhú andíu, te ní dáyèhé-xi ndéé núu nùtñí-í.

⁷ Te ní quide nee-xi núu-í, xíáⁿ ní nduá-í ndéé ñuhu. Te ní tecú dóho-í càháⁿ ñⁿ sá càháⁿ andíu, te cächí-xi: “Yòhó té Sàulú, ¿ná cuendá cúu úhú iní ñàhá-n dàndoho ñàha-n xii-í?”, cächí sá càháⁿ-án.

⁸ Te ní xáhaⁿ-í: “¿Ná cúu yòhó sá càháⁿ-ái?”, xáhaⁿ-í. Te ní càháⁿ tucu ingá xito te cächí-xi: “Yúhú cúu-í Jèsús tée ní xíndecu ñúú Nazàrèt, te ducaⁿ ño dàndoho ñàha-n xii-í”, cächí sá càháⁿ-án. Te xíáⁿ ní cutnùní iní-í sá díú Jèsús càháⁿ.

⁹ Te ncha cue tée ndihi-í ní xiní-güedé ní dáyèhé ñuhú, te ní yuhú-güedé, dico ñà túu ní tècú dóho-güedé òré ní càháⁿ-gá.

¹⁰ Te ní xáhaⁿ-í xii-gá: “Yòhó Xítohó Jesucristú, ¿ná cuiní-n càda-í?”, xáhaⁿ-í xii-gá. Te ní cachí-gá: “Ndacóo, te quíhíⁿ-n ñúú Dàmascú, yàcáⁿ tecú tñuhu-n

nchàa nacuáa cuiní Yă Ndiöxí cada-n”, cächí-gá —cächí té Păblú xăhaⁿ-dê xií-yu.

¹¹ Te ní xáhaⁿ tùcu té Păblú:

—Te cuendá sá ní dăcuáá ñaha ñuhú xii-í nũu ní tñiⁿ cue tée ndihi-í ndaha-í ndécá ñaha-güedé cuáháⁿ ndée ñuú Dămascú.

¹² Te yacáⁿ ndécú ñⁿ tée nani Ananiás, te io vai sá ní chídó tñuní ndíi Moisés cadá-yu quide-dé. Te nchaa ñáyiu ñuú Dămascú io váha cáháⁿ ndihi ñahá-yu xii-dé.

¹³ Te ní quexiò-dé núu ndécú-í, te ní cachí-dé: “Yòhó té Sàulú, tée ndecu ndihi-í ichí Xítóhó Jesucristú, ndúha núu-n”, cächí-dé. Te òré-ni ní nacaáⁿ núu-í te ní xiní-í-dé.

¹⁴ Te dătnuní ní cachí-dé: “Yă Ndiöxí ní cáháⁿ ndihi-gá ñani tñahá-ó ní xindecu ndée sanaha. Te ñiu-gá ní caxi ñaha-gá xii-n cuendá quini-n nchaa sá váha cuiní-gá cada-n. Te quini-n Jesús Yaá ñă túú cuèchi-xi, te ñiu-ni mee-gá cáháⁿ ndihi ñaha-gá xii-n.

¹⁵ Te cáháⁿ-n tñuhu Jesús núu nchaa ñáyiu, te cáháⁿ-n nchaa sá ní xiní-n ndihi nchaa sá ní xindedóho-n.

¹⁶ Tñáví, te quíhíⁿ-n cuândute-n, te cáháⁿ ndihi-n Yă Ndiöxí cuendá cada cahnú iní-gá nchaa sá cuèhé sá dúhá ní quide-n”, duha ní cachí té Ananiás xii-í —cächí té Păblú xăhaⁿ-dê xií-yu.

Té Păblú ní cani-dé cuendú năcuáa ní xáhaⁿ Jesús cada-dé quíhíⁿ-dê ñuú núu xindecu ñáyiu ñă túú cùu ñáyiu isràél

¹⁷ Te ní xáhaⁿ tùcu té Păblú:

—Te ní ndee-í cuândixi-í ñuú Jerusàlén. Te ní sáháⁿ-í veñuhu cahnú sá ño cùnuu ní cáháⁿ ndihi-í Yă Ndiöxí, te ní dăcótó núu ñahá-xí să meeⁿ Jesús ní xiní-í xití veñuhu,

¹⁸ te ní cachí-gá: “Yáchí, quee-n ñuú Jerusàlén, chi ñáyiu-a vá quindáá iní-yu năcuáa ní cachí-í cùñaha-n xii-yu cuendá-í”, duha ní cachí-gá xii-í.

¹⁹ Te ní xáhaⁿ-í xii-gá: “Yòhó Xítóhó Jesucristú, sa xiní-n să ncháá ñáyiu nahá-yu sá ní sáháⁿ-í ndi tñahá ñⁿ ndi tñahá ñⁿ veñuhu nănducu-í ñáyiu sàndáá iní tñuhu-n, te ní tñiⁿ-í-yu, ní chihí-í-yu vecaá, te ní táuchíuⁿ-í ní caniha-güedé xií-yu.

²⁰ Te cúnahá ní sahi-güedé ndíi Těvá tée ní xóo cáháⁿ tñuhu-n, te tñahá-í ndécú òré-án te ní xindee-í dóo cue tée ní sahi ñaha xii ndíi. Te yúhú ní cáháⁿ-í sá ní quide váha-güedé sá dúcáⁿ ní quide-güedé”, duha ní xáhaⁿ-í xii-gá.

²¹ Te ní cachí tñuhu-gá xii-í: “Cuáháⁿ chi cuiní-í quíhíⁿ-n nchaa ñuú xicá núu xindecu cue ñáyiu ñă túú cùu ñáyiu isràél cáháⁿ-n tñuhu-í”, cächí-gá —cächí té Păblú xăhaⁿ-dê xií-yu.

Te Păblú ndihi tée tàxi tñuní ñahá xii cue sandadú

²² Te sá dúcáⁿ ní cáháⁿ-dê, te ñă ní tñahá-gá iní-yu cundedóho-yu tñuhu cáháⁿ-dê. Te ñⁿ-ni ní cuú-yu nchaá-yu, te ní cuáá-yu, te xăháⁿ-yu:

—¡Chí cahní-dê! ¡Ñă díú să cundecu-dé ñuyíu-a! —cächí-yu xăháⁿ-yu.

²³ Te mei òré ducaⁿ ní cáháⁿ-yu, te ní ndátá-yu dóo-yu, te ní dáquënë-yu núu ñnu sá sätú iní-yu. Te ní quèhnu-yu ñuhu, te ní dăcàcòyó-yu núu ñnu sá ño sätú iní-yu.

²⁴ Te tée cùu capitáⁿ cùnùu-gá ní xáhaⁿ-dê xii cue sandadú-dé:

—Chí dítá-dě ná quǐhu-dé ndéé xití vehe, te cani-ndo-dě ñii, chi na quène yuhu-dé ná tnúhu ní cáháⁿ-dé núu ndéé dúcáⁿ cudéⁿ-yu núú-dě —càchí-dé xáhaⁿ-dě xii-güedé.

²⁵ Te sáta ní dácútú ñaha-güedé xii té Páblú sá caní ñaha-güedé ní cùu, te ní xáhaⁿ-dě xii té cùu capitáⁿ ndécú-ǎⁿ:

—Te na càchí tnúhu-í sá vǎ cùú càniha-güedé ñii, chi té rómá cùú-í, te vátá quíni ndáá-gá-ndó núu ndécuechi-í ãdi ñáhá —càchí-dé xáhaⁿ-dě xii té cùu capitáⁿ.

²⁶ Te sá dúcáⁿ ní cáháⁿ-dé, te ní sáháⁿ té cùu capitáⁿ núú tǎe cùnno-gá, te ní xáhaⁿ-dě:

—Vǎ cùú càni-o té-ǎⁿ, chi té rómá cùú-dě —càchí-dé xáhaⁿ-dě.

²⁷ Te ní sáháⁿ té cùu capitáⁿ cùnno-gá ndéé núú tǎ Páblú, te ní xáhaⁿ-dě:

—Cáháⁿ ndáá-n núu ndisa té rómá cùú-n —càchí-dé xáhaⁿ-dě.

Te ní xáhaⁿ tǎ Páblú:

—Ndáá sá tǎe rómá cùú-í —càchí té Páblú xáhaⁿ-dě xii té cùnno-áⁿ.

²⁸ Te ní xáhaⁿ tǎe cùnno-áⁿ:

—Yúhú tnáhá-í cùú-í té rómá, chi vǎi díhúⁿ ní cháhu-í —càchí-dé xáhaⁿ-dě.

Te té Páblú ní xáhaⁿ-dě:

—Tnáhá-í cùú-í tée yácaⁿ tucu, chi tǎtá-í cùú-dě té rómá —càchí té Páblú xáhaⁿ-dě xii té cùu capitáⁿ cùnno-gá.

²⁹ Te uuⁿ ní nacaca sata cuè té cuáháⁿ caniha xii-dé ní cùu. Te ní yùhú tée tàxi tnuní sá dúcáⁿ ní xáhaⁿ tǎ Páblú sá tǎe rómá cùú-dě, chi ní xáhaⁿ-dě ní dácútú ñaha-güedé xii-dé, núu xǎⁿ ní yùhu-dé.

Te Páblú ní cáháⁿ ndihí-dé cue té cùnno oré ní quide-güedé jündá

³⁰ Te tée tàxi tnuní sandádú ñá ní xini-dé ná cuéchi ní dácáá ñǎyiu isràèl díquí tǎ Páblú, núu xǎⁿ nduu tnéé ní cana-dé cue dútú cùnno, ndihí cue té cùchiuⁿ, ndihí cue té cùu sacuéhé, te ní xáhaⁿ-dě sá cadá-güedé jündá cuendá nducu tnúhu-güedé núú tǎ Páblú ná cuéchi ní dácáá-yu díquí-dě. Te ní xáhaⁿ-dě xii cue sandádú sá nándaxi ñaha-güedé cadená ndútú-dě, te candeca ñaha-güedé quíhíⁿ núú cadá-güedé jündá. Te ní sáháⁿ-güedé ní nandaxi ñaha-güedé xii-dé ndécá ñaha-güedé cuáháⁿ jündá, te ní quexio-güedé, te ní ngúnutniiⁿ-dé núú cuè té cùchiuⁿ.

23

¹ Te yacáⁿ ní xindéhé vǎha té Páblú núú nchàa-güedé, te ní xáhaⁿ-dě:

—Cada càhnu iní nchòhó cue té cùchiuⁿ, te ducaⁿ nchòhó cue té cùu sacuéhé, véxi-í càchí tnúhu-í sá ñá túu cuéchi-í, chi mee Yǎ Ndióxi náhá-gǎ nása ndécú-í ñuyú-a, te ñá túu cùcahaⁿ núú-í núú-gǎ —càchí té Páblú xáhaⁿ-dě xii-güedé.

² Te té Ananiás té cùu dútú cùnno-gá ní xáhaⁿ-dě xii cue tée nùniiⁿ yatni dǐñi té Páblú sá caní-güedé déhndé yuhu-dé.

³ Te té Páblú ní xáhaⁿ-dě xii dútú-ǎⁿ:

—Yòhó, chi úhú tnàhí iní-n, chi ní ndúcú-n tǎe ní caniha xii-í, te ñá túu cuéchi-í, dico quíni-n ná cada ñaha Yǎ Ndióxi xii-n. Te yòhó ní cana ñaha-n ndúcu tnúhu-n núu quide-í nchaa nàcuáa càháⁿ tnúhu sá ní chídó tnuní ndí Moisés cada-o. Te mee-n ní ndúcú-n tǎe ní caniha, te ñá túu dùcaⁿ ní cáháⁿ ndii cada-o —càchí té Páblú xáhaⁿ-dě xii dútú cùnno-gá-áⁿ.

⁴ Te cue tée xínutniiⁿ dǐñi té Páblú ní xáhaⁿ-güedé xii-dé:

—Nèhé ní quide-n chi ní xícuèhé-n dùtú cúnùu-gá tée xínu cuechi núú Yá Ndiòxí —càchí-güedé xáhaⁿ-güedé xii té Páblú.

⁵ Te té Páblú ní xáhaⁿ-dè xii-güedé:

—Cada càhnu iní-ndó chi ñá túú xíní-í sá dùtú cúnùu-gá cúú-dè, chi núú tùtú Yá Ndiòxí càchí-xi sá vā cúú cāháⁿ cuèhé-ó cuèndá ñⁿ tée cúnúu ñúú-ó yòtnúhu. Te yúhú ñá túú xíní-í sá tée cúnúu cuu-dé núu ní sácóo-í ní cāháⁿ-í —càchí té Páblú xáhaⁿ-dè xii-güedé.

⁶ Te òré-áⁿ ní cutnúni iní té Páblú sá dáva-güedé cúndìhi-güedé cue tée cùu saducéú, te dava-güedé cúndìhi-güedé cue tée cùu fariséú, te níhi ní cāháⁿ-dé ní xáhaⁿ-dè xii-güedé:

—Yúhú cùú-í tée fariséú, te tnàhá tātà-í ndìhi xí-í cúú-güedé cue tée fariséú tucu. Te tnàhá yúhú sàndáá iní-í sá ndótó nchàa ñáyiú ní xíhí, te núu xíáⁿ cuini-ndó nducu tnúhu-ndo núu-í cáná ñàha-ndo —cachí-dé xáhaⁿ-dè xii-güedé.

⁷ Te sá dúcáⁿ ní cāháⁿ-dé xíáⁿ ní nàá ndìhi tnàha cue tée cùu fariséú ndìhi cue tée cùu saducéú, chi ñá ñⁿ-ní tnúhu ní cāháⁿ-güedé, chi ní ndi queheⁿ ndi queheⁿ-güedé sá ní cāháⁿ-güedé.

⁸ Te cue tée cùu saducéú càchí-güedé sá vā ndótó cuè ñáyiú ní xíhí, te cue tée cùu fariséú càchí-güedé sá ndótó-yu. Te cue tée cùu saducéú càchí-güedé sá ñá túú espíritú xínú cuèchi núú Yá Ndiòxí, te cue tée cùu fariséú càchí-güedé sá ío espíritú xínú cuèchi núú-gá.

⁹ Te ta cùdéeⁿ-güedé cuáháⁿ, te níhi-gá cúú iní-güedé cāháⁿ-güedé, te ñⁿ úú cue tée cùu fariséú cue tée dàcuaha ñàha xii ñáyiú nchaa tnúhu ní chídó tnúni ndíi Moisés ní cāháⁿ níhi-güedé, te xáhaⁿ-güedé:

—Ñá túú cuèchi-dé, te cudana te ní cāháⁿ ndìhi-dé ñⁿ espíritú xínú cuèchi núú Yá Ndiòxí te vā ngóo vā cúú vāha iní-ó núú-gá —càchí cue tée cùu fariséú xáhaⁿ-güedé xii-güedé.

¹⁰ Te cuèndá sá ío xínàá-güedé, xíáⁿ ní yúhú tée cùu capitáⁿ cúnùu-gá sá cāhni-güedé té Páblú, núu xíáⁿ ní xáhaⁿ-dè sá quíhíⁿ-güedé cúnúcuaca ñàha-güedé candeca ñàha-güedé núhú cuàrtél.

¹¹ Te ndéé niú cúú úú ní quexio Xítohó Jesucristú núú ndécú tè Páblú, te ní xáhaⁿ-gá:

—Ñíⁿ cunduu-n, vā yúhú-n, chi nàcuáa ní cāháⁿ-n ní cacunehe ñàha-n xii-í iha, te ñⁿ ni ducaⁿ cāháⁿ-n càcunehe ñàha-n xii-í quíhíⁿ-n ñúú Rómá —càchí-gá xáhaⁿ-gá xii-dé.

Cahni-güedé té Páblú ní cùu

¹²⁻¹³ Te nduu tnéé ní natacá vñi-gá údico cue tée isràél ní ndatnúhu-güedé sá cāhni-güedé té Páblú, te ní xítnàha-güedé:

—Ni dítá vā caxí-ó te ni ndüte vā cóhó-ó ndéé ndacu-o cāhni-o té Páblú, te ñátnúni caxi-o dítá, te coho-o ndüte, chi sa ní sani iní-ó sá cādá-ó, te cuu cuèchi xii-o núu vā cādá-ó —càchí-güedé xítnàha-güedé.

¹⁴ Te ní sáháⁿ-güedé núú ndécú nchàa dùtú cúnúu ndìhi nchaa cue tée cùu sacuéhé, te ní xáhaⁿ-güedé:

—Ní cachí-ndí sá ni dítá vā caxí-ndí ndéé núu ní ndacu-ndí ní sahni-ndí té Páblú, chi sa ní sani iní-ndí sá cādá-ndí, te cuu cuèchi núu vā cādá-ndí.

¹⁵ Te duha cada-ndo ndìhi dava-gá cue tée cúnúu, chi cúnàha-ndo xii tée cùu capitáⁿ cúnùu-gá: “Quixi ndìhi-n tè Páblú núú ndécú-ndí cuèndá ndatnúhu ndìhi-ndí-dé, chi cuini-ndí nducu tnúhu váha-gá-ndí ná cúú sá

nĩ quide-dé", duha cúñaha-ndo xii téé tàxi tñuní sandàdú. Te ducaⁿ-ni cúñaha-ndo dándahú-ndó-güedé cuèndá quixi ndihi-güedé té Páblú, te nchúhú sa cundetú-ndí-güedé ichi, chi quiní té Páblú ná cahni-ndí-dé —càchí-güedé xáhaⁿ-güedé xii cue téé cùchiuⁿ.

¹⁶ Te déhe cúha té Páblú ní níhí-dé tñúhu nàcuáa cada-güedé ditó-dé. Te ní sáháⁿ-dé cuártél, te ní xáhaⁿ-dè xii ditó-dé nàcuáa càháⁿ-güedé cada ñaha-güedé.

¹⁷ Te ní cana té Páblú ìⁿ téé cùu capitáⁿ, te ní xáhaⁿ-dè:

—Vá cùndèe iní-n, quíhíⁿ ndihi-n tée-a na càháⁿ ndihi-dé téé cùnuu-gá, chi ndècu ìⁿ cuèndú cúñaha-dé cuíní-í —càchí té Páblú xáhaⁿ-dè xii téé cùu capitáⁿ.

¹⁸ Te dàtnùní ní xica téé cùu capitáⁿ ndécá-dé dáxíⁿ tē Páblú cuáháⁿ núu ndécú téé cùnuu-gá, te òré ní quexìo-güedé núu-dé, te ní xáhaⁿ tēé cùu capitáⁿ xii-dé:

—Té Páblú téé yíhi vecaá ní cana ñaha-dé xii-í, te ní cachí-dé véxi-í ndihi tée-a cuèndá cachí tñúhu-dé ìⁿ cuèndú cuíní-dé —càchí-dé xáhaⁿ-dè xii téé cùnuu-gá.

¹⁹ Te téé cùnuu-áⁿ nĩ tñiⁿ-dé ndaha dáxíⁿ tē Páblú, te tànehe ñaha-dé cuáháⁿ ìⁿ xio, te ní xicáⁿ tñúhú-dé núu-dé, te xáhaⁿ-dè:

—¿Ná cuèndú cuíní-n càháⁿ-n? —càchí-dé xáhaⁿ-dè xii dáxíⁿ tē Páblú.

²⁰ Te ní xáhaⁿ-dè xii téé cùnuu-áⁿ:

—Cue téé isràél ní ndatnúhu ndáá-güedé sá quíxí-güedé tneé càháⁿ ndáhú-güedé núu-n càndeca-n té Páblú quíhíⁿ jùndá, te yàcáⁿ cacaⁿ tñúhú ndáá-güedé núu-dé ná cúú sã nĩ quide-dé, càchí-güedé xitñaha-güedé.

²¹ Te vá quíndáá iní-n chi dícó dandàhú ñáhá-güedé, chi víhi-gá údico-güedé ndátñúhu-güedé cundedí-güedé ichi cahni ñaha-güedé. Te xitñaha-güedé sá ní dítá vá caxí-güedé, te ní ndute vá cóhó-güedé ndéé núu ní ndacu-güedé ní sahní ñaha-güedé, te dàtnùní caxi-güedé dítá, te coho-güedé ndute, chi sa ní sani iní-güedé sá cadá-güedé, te cuu cuéchi núu vá cadá-güedé, càchí-güedé xitñaha-güedé. Te cundecu túha-ná-güedé cundetú ñaha-güedé tneé, te núu na quíndáá iní-n càndeca-n-dé quíhíⁿ jùndá —càchí-dé xáhaⁿ-dè xii téé cùnuu-áⁿ.

²² Te téé cùnuu-áⁿ nĩ xáhaⁿ-dè:

—Cuanùhú, te vá yõ tñahí cúñaha-n sã nĩ quixi-n nĩ cachí tñúhu-n nàcuáa càháⁿ-güedé cada-güedé té Páblú —càchí-dé xáhaⁿ-dè.

Ndèca-güedé té Páblú cuáháⁿ núu tē Juélí téé cùu gobiernú

²³ Te téé cùnuu-gá ní cana-dé úú cue téé cùu capitáⁿ, te xáhaⁿ-dè:

—Tava-ndo úú cièndú sandàdú cue téé xica saha, ndihi únídico úxí sandàdú cue téé yòdo cuayú, ndihi úú cièndú sandàdú mee-ni cuè téé Xínehe lànzá. Te cada túha-ndo chi caca-ndo òré caá ìⁿ niú quíhíⁿ-ndó ñúú Cèsareá ndihi té Páblú.

²⁴ Te nducu-ndo cuèdicó ìⁿ úú cuayú codo-dé ndihi cue téé ndèé ñáhá xii-dé. Te cada cuèdádú-ndó-dé ichi, te candeca-ndo-dé quíhíⁿ quíndeca-ndo-dé núu téé cùu gobiernú —càchí téé cùnuu-áⁿ xáhaⁿ-dè xii cue téé cùu capitáⁿ.

²⁵ Te téé cùnuu-áⁿ ní cadúha-dé tutú cuèndá quíhíⁿ ndaha té Juélí téé cùu gobiernú. Te duha ní chídó tñuní-dé núu tütú cuáháⁿ:

²⁶ “Cóvaha díí-n, tãtã gobernàdór. Ío cada càhnu iní, yúhú nání-í Clàudiú Lisías. Yúhú ní tendaha-í ìⁿ tutú véxi ndaha-n cuèndá quiní tñuní-n nàcuáa ní cuu iha.

²⁷ Cue tée isràél ní tn̄i-güedé ìⁿ tée nàni Páblú cuìní-güedé cahni ñaha-güedé ní cùu, te ní ñihì-í tnúhu sá tée rò má cúu-dé nùu ní sáháⁿ-í ndihì sandàdú-í ní dácácu-ndí-dé.

²⁸ Te ní cuìní-í quini-í ná cuèndá tée ñaha-güedé cuèchi xii-dé, núu xiáⁿ ndècà-í-dé ní sáháⁿ núu ní quide cue tée cùchiuⁿ israél jündá.

²⁹ Te yàcáⁿ ní ñihì-í tnúhu sá ñà túú nà cuèchi ní quide-dé, chi cuèndá-ni sá ní ñihì-güedé tnúhu sá ñà túú sàndáá iní-dé cada-dé nchaa sá ní xóo cada ñáyiu ní xíndecu ndéé sanaha nchìcúⁿ nihnu-güedé quide-güedé, xiáⁿ ní cudééⁿ-güedé núu-dé. Te ñà túú cuèchi càhnu ni quide-dé núu quíhìⁿ-dé vecaá àdi cahni-í-dé.

³⁰ Te ní ñihì-í tnúhu sá cuè tée isràél ndúcú-güedé nàcuáa cada-güedé cahni ñaha-güedé xii-dé, xiáⁿ ní xáhaⁿ-í xii sandàdú-í sá cándèca ñaha-güedé quixi xiáⁿ. Te ní xáhaⁿ-í xii cue tée tée ñaha cuèchi sá quixi-güedé ndéé xiáⁿ cáháⁿ-güedé núu ná cuèchi ní quide-dé. Te cada càhnu iní-n chi duha-ni ndùu tnúhu cáháⁿ-í, te cundee iní-n quèheⁿ cuèndá-n-dé”, duha ní chídó tnúni tée ní cadúha tutú cuáháⁿ ndaha té Juéí.

³¹ Te cue sandàdú ní quide-güedé nàcuáa ní xáhaⁿ tée tàxi tnúni ñáhá xii-güedé chi ní xica-güedé ndihì té Páblú òré caá ìⁿ niú, te d̄u-ni niú-áⁿ ní quexio-güedé ñuú Antipatrís.

³² Te sáta ní túndaá, te ní nacucio cuè tée xínehe lànzá ndihì dava-gá sandàdú xicá sàha cuánuhú-güedé cuàrtél, te mee-ná sandàdú cue tée yòdo cuayú cuáháⁿ ndihì té Páblú.

³³ Te òré ní quexio-güedé ñuú Cèsareá, te ní sàha-güedé tée cùu gobiernú tutú nehé-güedé cuáháⁿ. Te ní queheⁿ cuèndá-dé té Páblú.

³⁴ Te sáta ní dácúháá tée cùu gobiernú-áⁿ tutú-áⁿ te ní xicáⁿ tnúhú-dé núu té Páblú, te xáhaⁿ-dè:

—¿Ndéé tée cùu-n? —cachí-dé xáhaⁿ-dè.

Te ní xáhaⁿ té Páblú:

—Tée Ciliciá cúu-í —càchí-dé xáhaⁿ-dè.

³⁵ Te ní xáhaⁿ tée cùu gobiernú-áⁿ:

—Òré quexio cue tée tée ñaha cuèchi xii-n, te cáháⁿ-n ñasa ní cuu, chi ñihì-í nàcuáa cada ndáá-í cuèndá-n —càchí-dé xáhaⁿ-dè xii té Páblú.

Te ní xáhaⁿ-dè xii sandàdú sá cùndèé-güedé té Páblú vehe càhnu té Hèrodés.

24

Té Páblú xáhaⁿ-dè xii té Juéí sá ñà túú cuèchi-dé

¹ Te sáta ní cuu úhúⁿ nduu, te té Ananiás dútú cúnùu-gá cuáháⁿ-dè ñuú Cèsareá ndihì cue tée cùu sacuéhé ndihì ìⁿ tée nàni Tértulú tée cáháⁿ yuhu-güedé. Te cuáháⁿ-güedé núu tée cùu gobiernú cuáháⁿ dácúandèhnde-güedé núu-dé sá ndècuèchi té Páblú.

² Te ní sànguaca-güedé té Páblú. Te òré ní quexio-dé núu-güedé, te ní ngüita té Tértulú xáhaⁿ-dè xii té Juéí nàcuáa càa cuèchi tée-güedé té Páblú:

—Ío càhnu cada iní tátá gobernàdór. Duha ndùu chiuⁿ ndéé iní ñáhá-ndí xii-n vèxi-ndí, núu nása cachí-n cùnduu. Táxáhu xii-n, chi ío váha ndècu nchaa ñáyiu, te ñà túú nàa-yu chi ío váha quide-n.

³ Te ío cùdíí iní-yu chi nchaa-ni nduu xíndecu váha-yu ncháa-yu, te ío táxáhu Ndióxi xii-n sá dúcáⁿ quide-n.

⁴ Te cada càhnu iní, cuìní-í ndatnúhu-o ìⁿ úu-ni cuèndú cuèndá sá vǎ cùyáa-o dacuíta-í chiuⁿ-n.

⁵ Te ñⁿ tée iha ío dàsatú iní ñáhá-dě, chi nděni ní cuu cuáháⁿ-dē ndátnũhu-dē ndihí ñáyiú isràèl dánaá-dē-yu. Te nèhé quidè-dē chi cuáháⁿ-dē dácàháⁿ-dē nchaa ñáyiú cuèndá quindáá iní-yu tnũhu tée ní xindecu ñuú Nazàret.

⁶ Chi ducaⁿ càháⁿ cue tée iha sá ñí sáháⁿ-dē veñũhu càhnu sá ío cùnnuu, te cuiní-dē daquèe tíhú-dē veñũhu cuèndá cuiní-dē xocàni-dē sá íí ndécú, núu xiáⁿ ní tñí ñaha-güedé ndécá ñaha-güedé cuáháⁿ núu cuè tēe cùchiuⁿ cuendá cácaⁿ tnũhú-güedé núú-dē núu ná cuèndá ducaⁿ cuiní-dē cada-dē, chi ducaⁿ càa lei ndécú ndihí-güedé sá cáda ndáá-güedé núu ná ñⁿ sá cúú.

⁷ Te té Lisiú tée cùu capitáⁿ cùnnu-gá ní quexìo-dē ndihí sandádú, te ní dácúnú-güedé nchaa cue tée nùtníⁿ ndihí té Páblú, te dàtnùnì ní tñí ñaha-güedé xii-dē ndécá ñaha-güedé cuáháⁿ.

⁸ Te sátá xiáⁿ, te ní xáhaⁿ-dē sá quixí-güedé ndéé ndíha cundáá cuèchi-dē. Te yòhó cundee iní-n cácaⁿ tnũhú-n núú-dē, te núu ndáá ducaⁿ ñí quide-dē àdi ñáhá —càchí té Tèrtulú xáhaⁿ-dē xii té Juélí tée cùu gobiernú.

⁹ Te dava-gá cue tée isràèl xínutnì xiáⁿ ñí cáháⁿ-güedé sá ndáa càháⁿ té Tèrtulú.

¹⁰ Te tée cùu gobiernú ní quide-dē ndaha-dē núú tē Páblú cuèndá cáháⁿ-dē, te té Páblú ní xáhaⁿ-dē:

—Yòhó sa ní cuu titnì cuía ndécú-n iha xehndé-n cuèchi nchaa ñáyiú xínàá, núu xiáⁿ ío cùdíⁿ iní-í sá ndíha téhndé cuèchi tēe ñaha-güedé xii-í. Te cundee iní-n cùndedóho-n na càni-í cuèndú nàcuáa ní cuu.

¹¹ Te nducu tnũhu-n te quiniⁿ ná càháⁿ ndáá-í, chi sa ní cuu úxúú nduu sá ñí sáháⁿ-í veñũhu càhnu sá ío cùnnuu ñuú Jerusalén ní cáháⁿ ndihí-í Yá Ndiòxi.

¹² Te ní ñà túú ní nàá-í ndihí ñáyiú xití veñũhu, te ñá túú ní xáhaⁿ-í nàá-yu ní ñⁿ xichi, te ní ñⁿ veñũhu líhli ní sáháⁿ-í ñá túú ná ní xáhaⁿ-í cada-yu.

¹³ Te ní ñà túú quèñuhu-güedé cue tée cáháⁿ ndáá te núu ndáá ducaⁿ ñí quide-í.

¹⁴ Te yúhú càháⁿ ndáá-í sá càháⁿ ndihí-í Yá Ndiòxi, chi diu-ni Yá Ndiòxi ní xóo cáháⁿ ndihí ñáyiú ndéé sanaha, núu xiáⁿ ní tuha-í ichi-gá. Te cue tēe-a càchí-güedé sá ñà díú ñⁿ ichi váha ni tuha-í. Te yúhú sàndáá iní-í nchaa sá ñí chídó tnùnì ndíi Moisés ndihí dava-gá cue tée ní xóo cáháⁿ tnũhu Yá Ndiòxi ndéé sanaha.

¹⁵ Te sàndáá tucu iní-í sá ndótó nchaa ñáyiú ní xihí, cuèi ñáyiú váha iní-xi, te cuèi ñáyiú úhú iní-xi, dico ndotó-yu. Te ducaⁿ ñí xóo quindáá iní nchaa ñáyiú ní xindecu ndéé sanaha.

¹⁶ Te yúhú ío ndücu ndee-í quidè-í nchaa sá càháⁿ Yá Ndiòxi cuèndá sá vã cúú càhaⁿ núú-í núú-gã ndihí núú ñáyiú ñuyú-a.

¹⁷ Te sa ní cuu titnì cuía sã ñà túú-gã sáháⁿ-í ñuú Jerusalén, te ní sáháⁿ tucu-í nèhé-í díhúⁿ ní taxi ñáyiú ñuú xicã cuèndá cuañaha-í xii ñáyiú ñuú Jerusalén. Te ní ndúcù-í sá cuãha táhú-í Yá Ndiòxi.

¹⁸ Te ní xindecu-í veñũhu càhnu sá ío cùnnuu ní quide-í nchaa nàcuáa ní xóo cada ñáyiú ní xindecu ndéé sanaha cuèndá nduu vétú iní Yá Ndiòxi. Te ñá túú chitú-yu ní sáháⁿ, te ní ñà túú ná ní cùu, te ní naníhí ñáhá ñⁿ úú cue tēe isràèl xii-í, cue tēe véxi distritú Àsiá.

¹⁹ Te quixi mee-güedé iha cáháⁿ-güedé, te núu sá ndáa ní xini-güedé sá yúhú ndècuèchi-í ní cùu,

²⁰ àdi ñáhá. Dico cachí tnũhu cue tēe-án nãsa ní cuu òré ní xindecu-í jundá-güedé núu ndècuèchi-í àdi ñá túú ndècuèchi-í.

²¹ Dico ñá túú cuëchi-í chi ñⁿdii-ni tnúhu ni cáháⁿ-í ní xáhaⁿ-í xii-güedé sá sandáá iní-í sá ndótó ncháa ñáyiú ní xihí, te ñiu-ni núu xiáⁿ càchí-güedé sá ndècuëchi-í —càchí té Páblú xáhaⁿ-dè xii té Juéli.

²² Te té Juéli sa xini váha-dé nàcuáa cuáháⁿ tnúhu Jèsús, núu xiáⁿ ñá ní cuini-gá-dé ndatnúhu-dé ndihi té Páblú, te ní xáhaⁿ-dè:

—Sa ní cuu, cundetu-n na quexio té Lisiú téee cùu capitáⁿ cúnúu-gá, te òré-áⁿ cundáa cuendá-n —càchí té Juéli xáhaⁿ-dè.

²³ Te ní xáhaⁿ-dè xii téee cùu capitáⁿ:

—Cundeé-n té Páblú-áⁿ, te núu nása càchí-dé cada-n, te daña-n na càháⁿ ndihi-dé cue téee xini tnáhá ndihi-dé núu cuañaha-güedé ncháa sá xini ñuhu-dé àdi nása cada-güedé —càchí té Juéli xáhaⁿ-dè xii téee cùu capitáⁿ.

²⁴ Te ní cuu titní nduu, te ní sáháⁿ té Juéli vechiúⁿ ndihi ñadihí-dé, te ñaha-áⁿ nání-áⁿ Drüsilá, te ñaha isràél cúu-áⁿ. Te ní xáhaⁿ-dè sá quíngueñuhu-güedé té Páblú, te òré ní quexio-dé vechiúⁿ, te ní cáháⁿ-dè núu-yu ncháa-yu sá quindáá iní-yu tnúhu Xítoho Jesucristú.

²⁵ Te ní xáhaⁿ-dè:

—Mee-ni sá váha cada-ndo. Te coto-ndo mée-ndo, te vá cadá-ndó ni ñⁿ sá cuèhé sá dúhá, chi ñⁿ nduu cáháⁿ Yá Ndióxi ndèdacáa ñáyiú váha iní-xi, te ndèdacáa ñáyiú úhu iní-xi —càchí té Páblú xáhaⁿ-dè.

Te sá dúcáⁿ ní xáhaⁿ-dè, te ní yuhú té Juéli, te ní xáhaⁿ-dè:

—Vá cáháⁿ-gá-ó tnávú, cuáháⁿ, te òré cüyächí-í, te cana ñaha-í xii-n —càchí-dé xáhaⁿ-dè.

²⁶ Te té Juéli ní quide-dé cuendá sá cuañaha té Páblú díhúⁿ te vá ndihu-gá-dé vecaá ní cùu, núu xiáⁿ titní xito ní cana-dé té Páblú vechiúⁿ ní ndatnúhu ndihi tnàha-güedé, dico ñá túú ní cháhu-dé.

²⁷ Te úu cuía ducaⁿ ní quide-güedé, te dàtnùni ní xínu té Juéli chiúⁿ-dé, te ní ngúnutnì té Pòrsiú Fèstú. Te òré ní xínu té Juéli chiúⁿ-dé, te ní dándoo-dé té Páblú yíhí-ni-dè vecaá. Te ducaⁿ ní quide-dé cuendá ní cuini-dé cudiú-dé núu cuè téee isràél.

25

Té Páblú càháⁿ ndihi-dé té Fèstú

¹ Te ní cuu úní nduu sá ní quexio té Fèstú ñuú Cèsareá ní queheⁿ-dé chiúⁿ, te ní quee-dé cuáháⁿ-dè ñuú Jerusàlén.

² Te yacáⁿ ní naníhí tnáhá-dè ndihi ncháa dútú cúnúu ndihi ncháa cue téee tàxi tnuni ñáhá xii ñáyiú isràél, te xáhaⁿ-güedé xii té Fèstú sá ndáá ndècuëchi té Páblú.

³ Te ní cáháⁿ ndàhú-güedé núu-dè sá téndaha-dé sandádú-dé quíngueñuhu ñaha-güedé vecaá xii-dé ndéee ñuú Cèsareá te candeca ñaha-güedé quíhíⁿ. Te ducaⁿ ní cáháⁿ-güedé, chi ní ndatnúhu-güedé sá cáhni ñaha-güedé xii té Páblú ichi ní cùu.

⁴ Te té Fèstú ní xáhaⁿ-dè:

—Vá cúu quixi-dé ndéee ndíha. Na cundetu-dé ñuú Cèsareá chi sacú-ni nduu cuyaa-í iha te dàtnùni núhú-í yacáⁿ.

⁵ Te yáchí-gá quíhíⁿ ndihi-í cue téee cúnúu-gá, te yacáⁿ cuu cáháⁿ-ndó núu ndáá ndècuëchi-dé àdi cáháⁿ méé-dè núu ndáá ndècuëchi-dé àdi ñáhá, te cutnùni iní-ndó —càchí-dé xáhaⁿ-dè.

⁶ Te ní xíndecu té Fèstú úná úxi nduu ñuú Jerusàlén, te dàtnùni cuánuhú-dé ñuú Cèsareá. Te nduu tnéee cuáháⁿ-dè vechiúⁿ, te òré ní quexio-dé, te ní

xáhaⁿ-dë xii cue sandädú xínú cuèchi sá quíhíⁿ-güedé queñuhu-güedé té Páblú vecaá te candeca ñaha-güedé quíhíⁿ vechiúⁿ.

⁷ Te òré ní quexió té Páblú vechiúⁿ, te sa ndècu cue téé israèl cue téé ní quee ñuú Jerusálén, te cuánguihu-güedé ndéé ñáñi té Páblú ní ngúnutñi-güedé, te xáhaⁿ-güedé xii cue téé cùchiuⁿ sá ndècuéchi vihi-dé, dico ñá túú ní cùndee tnúhu-güedé.

⁸ Te té Páblú ní xáhaⁿ-dë xii té Fèstú:

—Ñá túú ndècuéchi-í, ñá túú ná ní quide-í, chi ñá túú tnàhá iní-í cada-í ñⁿ sá càchí lèi sá vā cúú càda-o. Te ni xítí veñúhu càhnu sá ïo cùnuu ñá túú ná quidè-í, te ni té Cèsár téé yìndaha cuéhé nacióⁿ ñá túú càháⁿ cuéhé-í cuèndá-dé —càchí té Páblú xáhaⁿ-dë xii-dé.

⁹ Te té Fèstú ní cuini-dé cada-dé nàcuáa cuèiú-dé núú cuè téé israèl ní cùu, núu xíäⁿ ní xáhaⁿ-dë xii té Páblú:

—¿Cundee ñi-n quíhíⁿ-n ñúú Jerusálén-äⁿ? Te yacáⁿ cundáá cuéchi sá sàá díquí-n —càchí té Fèstú xáhaⁿ-dë xii té Páblú.

¹⁰ Te xáhaⁿ tē Páblú:

—Diu-ni ñⁿ vechiúⁿ téé cùchiuⁿ Cèsár ndècú-í iha, te diu-ni iha cada ndáá-n nùu cuini-n ní cùu. ¿Te ná cuèndá candeca ñaha-n quíhíⁿ ingá xichi? Yòhò tnàhá-n xini-n sá ñá túú ná quidè-í ñáyiú israèl.

¹¹ Chi núu dicó yúhú ní quide-í ñⁿ cuéchi càhnu, te ñá túú ná cada-xi cuèi na càhni ñaha-ndo xii-í ní cùu. Te sa ní cutnùni iní-n sá ñá ndáá, chi mee-ni tnúhu ndehnu xicáháⁿ-güedé, te ñá túú ndúu váha-xi ducaⁿ càda-n cúñaha-n sá quíhíⁿ-í ndihí-güedé ingá xichi. Te xíäⁿ cuini-í quíhíⁿ-í núú tē Cèsár téé yìndaha cuéhé nacióⁿ, te yacáⁿ càháⁿ méé-dë nùu ndáá ndècuéchi-í —càchí té Páblú xáhaⁿ-dë xii té Fèstú.

¹² Te ní ndatnúhu té Fèstú ndihí cue téé chindee tnúhu ñaha xii-dé, te dàtnùni ní xáhaⁿ-dë xii té Páblú:

—Te sa ní càháⁿ-n sá quíhíⁿ-n quítnahá-n tē Cèsár te diu-ni quíhíⁿ-n, te quini-n nása càháⁿ téé-äⁿ yacáⁿ —càchí-dé xáhaⁿ-dë xii té Páblú.

Té Páblú càháⁿ ndihí-dé té Àgripá téé yìndaha nacióⁿ Israèl

¹³ Te sáta ní cuu cuéhé nduu, te ní quee té Àgripá téé yìndaha nacióⁿ Israèl cuáháⁿ-dé ñuú Cèsareá ndihí ñadihí-dé, te ñaha-áⁿ nání-áⁿ Berènicé te òré ní quexió-yu, te ní càháⁿ ndihí-yu té Fèstú.

¹⁴ Te sáta ní cuu titní nduu, te ní càháⁿ té Fèstú cuèndá té Páblú ní xii-dé té Àgripá:

—Ndècu ñⁿ téé ní dándõ té Juélí vecaá nání-dë Páblú.

¹⁵ Te cùtnàhá ní sáháⁿ-í ñuú Jerusálén ní nanítnàhá-í ndihí cue dútú cùnùu ndihí cue téé cùu sacuéhé nùú ñáyiú israèl. Te ní dácáá díquí-güedé té Páblú cuéchi, te ní cachi-güedé sá táuchiuⁿ-í cahni ñaha-güedé xii-dé ní cùu.

¹⁶ Te ní xáhaⁿ-í xii-güedé sá vā cúú, chi ñá túú ñucaⁿ quide nchúhú cue téé ròma cùtexínu cada castiú-ndí ñáyiú, chi díhna-gá ndúcú tnúhu-ndí núú ñáyiú sáá cuéchi díquí-xi cuèndá quini-ndí nùu nása càháⁿ méé-yu ndihí ñáyiú sàcáⁿ cuéchi cuèndá-yu, te òré-áⁿ cùtnùni iní-ndí nùu ndáá ndècuéchi-yu àdi ñáhá, te ducaⁿ te nihí-ndí nàcuáa quide ndáá-ndí cuèndá-yu, duha ní xáhaⁿ-í xii-güedé —càchí té Fèstú xáhaⁿ-dë xii té Àgripá.

¹⁷ Te ní xáhaⁿ tucu té Fèstú:

—Te sáta ní quexio-güedé ndéé ndíha, te nduu tnéé ní sáháⁿ-ni-ndí vechi^uⁿ. Te ní xáhaⁿ-í sá quingueñuhu-güedé té Páblú candeca ñaha-güedé quixi, te óré ní quexio-dé,

18 te ní ngúita-güedé xáhaⁿ-güedé sá ndècuéchi-dé. Te ní sani iní-í sá ñíⁿ cuéchi càhnu tee ñaha-güedé dico ñáhá, chi dicó-ni sá ñíⁿ tnúhu ní cáháⁿ-dé, xíáⁿ ducaⁿ ní quide-güedé.

19 Te ní tenáá ñáhá-güedé xii-dé, chi càchí-güedé sá ñà túú càháⁿ váha-dé cuendá ndióxí-güedé. Te tnàhá-ni cuendá ñíⁿ téé nàni Jesús càháⁿ-dé, chi càchí-dé sá ní xihí téé-áⁿ te ní ndoto-dé càchí-dé xáhaⁿ-dè xii-güedé, càchí-güedé.

20 Te ñá ní cùtnuni iní-í nása cúñaha-í xii-güedé cuendá téhndé cuéchi-dé. Te xíáⁿ ní xicáⁿ tnúhu-í núú tē Páblú ñuu cundee ñí-dé quíhíⁿ-dé ñuu Jerusálén, te ndéé ndiácaⁿ cada ndáá-ndí cuendá-dé, te núú ndáá ndècuéchi-dé nàcuáa càháⁿ-güedé àdi ñáhá ní cùu.

21 Te dàtnuni té Páblú ní cachí-dé sá cùndècu tnaa-dé vecaá te dàtnuni quíhíⁿ-dé núú té Cèsár, te téé-áⁿ cada ndáá-dé cuendá-dé. Te cuendá sá dúcáⁿ ní cáháⁿ té Páblú, xíáⁿ ñuu ní xáhaⁿ-í sá cùndéé ñáhá cuè sandadú xii-dé, ñini na còto-í nása cada-í quíhíⁿ-dé núú tē Cèsár, duha ní xáhaⁿ-í xii-güedé —càchí té Fèstú xáhaⁿ-dè xii té Àgripá.

22 Te té Àgripá ní xáhaⁿ-dè xii té Fèstú:

—Te tnàhá yúhú ío cudíí ñí-í cundedóho-í tnúhu càháⁿ-dé —càchí-dé xáhaⁿ-dè.

Te ní xáhaⁿ tē Fèstú:

—Tnéé cana-í-dé te cundedóho-n nása cáháⁿ-dé —càchí-dé xáhaⁿ-dè.

23 Te nduu tnéé ní quexio té Àgripá ndihi ñadihí-dé tá Berenicé vechi^uⁿ, te ío ní quide càhnu ñaha-güedé xii-yu. Te cuánguihú-yu vechi^uⁿ ndihi cue téé cùu capitáⁿ cùnùu-gá ndihi cue téé cùnùu ñuu Cèsareá. Te té Fèstú ní xáhaⁿ-dè sá quingueñuhu-güedé té Páblú vecaá, te óré ní quexio-dé,

24 te ní xáhaⁿ tē Fèstú xii té Àgripá ndihi nchaa ñáyiú xíndecu-áⁿ:

—Chí cùndèhe téé iha chí téé-a càchí cue téé isràel sá ndècuéchi-dé, te cùtnàhá ní xíndecu-í ñuu Jerusálén ní cachí-güedé sá ndàá ndècuéchi-dé, te diu-ni ducaⁿ càháⁿ-güedé iha. Te nchaa-güedé ní cuáá-güedé te càchí-güedé sá táuchiuⁿ-í cahni ñaha-güedé xii-dé ní cùu.

25 Te sáta ní ndihi cuendú ní cáháⁿ-güedé, te ní cutnuni iní-í sá ñà túú ní ñíⁿ cuéchi càhnu ní quide-dé, núú ñá túú ní tàuchiuⁿ-í cahni ñaha-güedé xii-dé. Te mee-dé ní cachí-dé sá quíhíⁿ-dé núú tē Cèsár téé yíndaha cuéhé nàcióⁿ, te ní xáhaⁿ-í sá cúú quíhíⁿ-dé.

26 Te ñá túú ní xini váha-í nása ní quide-dé, núú xíáⁿ ñá ní ñihí-í nàcuáa cadúha-í tutú quíhíⁿ ndaha té Cèsár, te xíáⁿ ní cana-í-dé véxi-dé iha cuendá nchaa-ndo cáháⁿ ndihi-ndo-dé. Te ducaⁿ cànuu cadíhna-gá yòhó tātá Àgripá cacáⁿ tnúhú-n núú-dé ñuu nása cáháⁿ-dé, te óré-áⁿ cutnuni iní-í nása cada-í cadúha-í tutú quíhíⁿ ndaha té Cèsár.

27 Chí sàni iní-í sá ñà túú nduu váha-xi sá quíhíⁿ ñíⁿ téé tàú cuéchi te núú vá códo tnùní núú ñíⁿ tutú nàcuáa càa cuéchi tàú-dé —càchí té Fèstú xáhaⁿ-dè xii-güedé.

26

Te Păblú càháⁿ ndihí-dé té Àgripá

¹ Te dătnūnī ní xáhaⁿ tē Àgripá tēe yìndaha nacióⁿ Isràél xii té Păblú:

—Te vitna càháⁿ-n nūu nása ní cuu cuendá-n —càchí-dé xáhaⁿ-dě.

Te té Păblú ní ndacani-dé ndaha-dé sá cùndedóho-güedé, te ní xáhaⁿ-dě xii té Àgripá tēe yìndaha nacióⁿ Isràél:

²⁻³ —Tătá Àgripá, ío cùdí íní-í sá nī nanihí tnáhá-ó vitna, chi yòhó ío váha xini-n nchàa nacúaa quide ñáyiú isràél quidé càhmú-yu Yá Ndiòxí, te ío váha xini-n nchàa tnúhu xitnàhá-yu. Te vitna cundee íní-n cùndedóho-n ñⁿ úú tnúhu na càháⁿ-í. Na càchí tnúhu-í sá ñă ndàá ní quide-í nchaa sá càháⁿ cue tēe isràél.

Té Păblú càháⁿ-dé nàcuáa ní quide-dé cùtnàhá vátá túhá-gă-dé ichi Yá Ndiòxí

⁴ Te sa nàha nchaa cue tēe cùnūu núú ñáyiú isràél nàcuáa ní quide-í ñūú-í ndihí ñūú Jerusàlén cùtnàhá ní cuu landú-í.

⁵ Te mee-güedé nàhá-güedé sá ndéé lihli-í ní chitnahá-í cue tēe cùu fariséú. Te núu cuini-güedé càháⁿ-güedé sá tēe fariséú cùú-í àdi ñáhá dico nchaa-güedé sa nàha-güedé sá cuè tēe-áⁿ nī chitnahá-í. Te cue tēe cùu fariséú-áⁿ ío cuini-güedé cada-güedé nchaa nàcuáa nchicúⁿ nihnu ñáyiú quidé-yu. Te yúhu nchaa sá nchicúⁿ nihnú-yu quidé-yu-áⁿ nī quide-í.

⁶ Te vitna ndècu-í iha, te càháⁿ-n nūu váha-ni quide-í àdi ñáhá, chi cue tēe-áⁿ tēe ñàha-güedé cuéchi xii-í cuendá sá sàndáá íní-í sá ndótó nchàa ñáyiú ní xihí. Te diu-ni ducaⁿ nī xáhaⁿ Yá Ndiòxí xii nchaa ñani tnáhá-ó ní xindecu ndéé sanaha.

⁷ Te nchaa ñáyiú-áⁿ xindetú-yu nduu ndòto ñáyiú ní xihí ní cùu. Te diu-ni ducaⁿ ndètu nchaa ñani tnáhá-ó ndècu ñuyú-a ndéé vitna, te xiáⁿ nūu cuéi nduu cuéi niú càháⁿ ndihí-yu Yá Ndiòxí. Te sá sàndáá íní-í nūu xiáⁿ ní càháⁿ-í, te tēe ñàha cue tēe isràél cuéchi xii-í.

⁸ ¿Te ná cuendá nchòhò cue tēe isràél ñá túú cuini-ndó quindáá íní-ndó sá dándòto Yá Ndiòxí nchaa ñáyiú ní xihí? —càchí té Păblú xáhaⁿ-dě.

Té Păblú cání-dé cuendú sá nī xóo chihi-dé ñáyiú sàndáá íní tnúhu Jèsús vecaá

⁹ Te ní xáhaⁿ tucu té Păblú:

—Ndéé dává-áⁿ nī quide úhú-í ñáyiú sàndáá íní-xi tnúhu Jèsús Yaá ní quee ñūú Nazàrét, te ní càháⁿ-í sá váha-ni ní quide-í sá dúcáⁿ nī quide-í.

¹⁰ Te diu-ni ducaⁿ nī quide-í ñūú Jerusàlén. Te cue dútú cùnūu ní taxi-güedé ñⁿ tutú cuendá tñi-í ñáyiú ní sàndáá íní tnúhu Jèsús, te vai-yu ní chihi-í vecaá. Te óré ní càháⁿ-güedé sá càhni-güedé ñáyiú-áⁿ, te tnáhá-í ní càháⁿ-í sá cùú càhni ñàha-güedé xií-yu.

¹¹ Te titní xito ní sáháⁿ-í nchaa veúhu ñáyiú isràél, te ní cani-í-yu te ní xáhaⁿ-í sá dáñá-yu ichi Jèsús. Te cuendá ío ní cudèèⁿ-í nūú-yu, xiáⁿ ní sáháⁿ-í nchaa ñūú xicá nī sánúndúcù-í dava-gá ñáyiú sàndáá íní tnúhu-gá cuendá dandòho ñàha-güedé xií-yu.

Té Păblú càháⁿ tucu-dé nása ní cuu ní tuha-dé ichi Yá Ndiòxí

(Hch. 9:1-19; 22:6-16)

¹² Te cuendá xiáⁿ ní xica tucu-í cuáháⁿ-í ñūú Dàmascú, néhè-í tutú ní taxi cue dútú cùnūu cuáháⁿ, cuendá sá ndácù-í tñi-í nchaa ñáyiú sàndáá íní tnúhu Jèsús ní cùu.

13 Te òrè caúxúú nduu ñùhu-í ichi cuáháⁿ-í, te uuⁿni ní quee ñuhú andiú ní dáyèhé-xi ndéé núú nútñí-í ndihí cue téé ndèca tñaha ndihí-í, te ñíhi-gá ní dáyèhé-xi dàcúúxí nchícanchi.

14 Te nchaa-ndí ní nduá-ndí ndéé ñuhu, te ní tecú dóho-í càháⁿ ñⁿ sá càháⁿ tnúhu ñáyíu isràél, te càchí-xi: “Yòhó Sàulú, ¿Ná cuèndá cúú úhú iní ñáhá-n xii-í dándòho ñaha-n? Te ío dàndòho-n mee-n, chi dàtná cuìni-n quide ndicutu quide-n chi quití-á òrè cùxi-güedé-di pùya te sáha-di patadá núú-xi, te sá dúcáⁿ quide-di te quide úhú-di mee-di. Te ducaⁿ sàtnahá-xi cùu yohó chi ñá túú sàndáá iní ñáhá-n xii-í”, càchí sá ñí càháⁿ-áⁿ.

15 Te ní xáhaⁿ-í: “¿Ná cúú yòhó sá ñí càháⁿ-áiⁿ?”, xáhaⁿ-í. Te càchí sá càháⁿ-áⁿ: “Yúhú cúú-í Jèsús Yáa cúú úhú iní-n”, duha ní cachí sá càháⁿ-áⁿ. Te xíáⁿ ní cutnùni iní-í sá Jèsús càháⁿ.

16 Te ní cachí-gá: “Ndacuíñi-n chi yúhú càháⁿ-í chi cuìni-í quíhíⁿ-n càda-n chiú-í, chi quíhíⁿ-n càháⁿ-n núú ñáyíu nàcuáa ní cuu ní xiní ñáhá-n xii-í vitna, te quíxi tucu-í càháⁿ ndihí ñaha-í xii-n, te cúñaha-n xii-yu nàcuáa càháⁿ-í.

17 Chi cuìni-í quíhíⁿ-n càháⁿ-n tnúhu-í núú ñáyíu isràél ndihí núú ñáyíu ñá túú cùu ñáyíu isràél, te coto ñaha-í xii-n cuèndá vá càhni ñáhá-yu xii-n.

18 Te cuìni-í quíhíⁿ-n cùñaha-n xii-yu sá dáñá-yu nchaa ichi cuèhé ichi duha ndècú-yu, te tuhá-yu ichi váha cuèndá vá quíndáá iní-yu cadá-yu sá càháⁿ yucu ñáváha, te quíndáá iní-yu cadá-yu nchaa nàcuáa càháⁿ Yá Ndióxi. Te núu na quíndáá iní-yu tnúhu càháⁿ-í, te cada càhnu iní-í nchaa cuéchi-yu, te naníhí tàhú-yu ndihí dava-gá ñáyíu sa ní xócuíñi nchaa sá cuèhé sá dúhá ní xíndecu iní-yu”, duha ní cachí-gá xii-í —càchí té Páblú xáhaⁿ-dè xii té Àgripá té yindaha nacióⁿ Isràél.

Té Páblú quidé-dè nchaa nàcuáa ní xáhaⁿ Jèsús cada-dé

19 Te ní xáhaⁿ tucu té Páblú xii té Àgripá:

—Ñá túú dàña ndeé-í quidé-í nchaa nàcuáa ní càháⁿ Jèsús òrè ní càháⁿ-gá andiú.

20 Te díhna-gá ñáyíu ñúú Dàmascú ní càháⁿ-í tnúhu-gá núú-yu, te ní xáhaⁿ-í xii-yu sá dáñá-yu nchaa sá cuèhé sá dúhá quidé-yu, te càháⁿ ndihí-yu Yá Ndióxi, te cadá-yu mee-ni sá váha cuèndá cutnùni iní dava-gá-yu sá ñí dáñá-yu nchaa sá ñá túú vâha ní xóo cadá-yu. Te ducaⁿ-ni ñí xáhaⁿ-í xii ñáyíu ñúú Jerusálén ndihí ñáyíu nihí nacióⁿ Isràél ndihí nchaa ñáyíu ñá túú cùu ñáyíu isràél.

21 Te cuèndá sá dúcáⁿ ñí càháⁿ-í núu ní tñí ñaha cuè téé isràél xii-í cutnàhá ní sáháⁿ-í veñúhu càhnu sá ío cùnuu cahni ñaha-güedé ní cùu.

22 Te ñíu-ni mee Yá Ndióxi ní chindee ñaha-gá xii-í núu ndècu-í iha tnávíi càháⁿ-í tnúhu-gá, te mee-ni tnúhu-gá càháⁿ ndihí-í ncháa-yu, cuéi ñáyíu cuica, te cuéi ñáyíu ndàhú. Te ndí Moisés ndihí dava-gá cue téé ní xóo càháⁿ tnúhu Yá Ndióxi ndéé sanaha ñí càháⁿ-güedé nàcuáa cada-xi vitna, te ñíu-ni ducaⁿ càháⁿ-í nchaa-ni nduu.

23 Te cue téé-áⁿ ñí cachí-güedé sá Cristú Yáa tendaha Yá Ndióxi quixi ñuyíú-a ndoho tñahá-gá, te cuú-gá, te dàtnùni ndoto-gá. Te ducaⁿ càda-xi nchaa ñáyíu ní xihí ndotó-yu núu na sáa nduu chi ducaⁿ càda-xi ní cachí méé Yá Ndióxi. Te cuèndá sá dúcáⁿ ñí ndoto-gá, xíáⁿ cútnùni sá cúú naníhí tàhú ñáyíu, cuéi ñáyíu isràél, te cuéi ñáyíu ñá túú cùu ñáyíu isràél. Te dàtná-ni nduu tnúhu ní càháⁿ

cue téé ní xóo cáháⁿ tnúhu-gá ndéé sanaha-ǎⁿ, te diu-ni ducaⁿ càháⁿ yúhú tucu —càchí té Páblú xǎhaⁿ-dē.

Té Páblú xǎhaⁿ-dē xii té Àgripá sá quindáá iní-dé tnúhu Jèsús

²⁴ Te sá dúcáⁿ ní cáháⁿ té Páblú, te ní cáháⁿ níhi té Fèstú, te xǎhaⁿ-dē:

—Páblú, jío lùcú càháⁿ-n! Cuendá ío vai ní dácúaháⁿ, núu xiǎⁿ ndadá lùcú ñáhá-xí xii-n —cachí-dé xǎhaⁿ-dē.

²⁵ Te ní xáhaⁿ tē Páblú:

—Ñáhá, vá dúcáⁿ cáháⁿ-n chi ñá díú sǎ lùcú-í duha càháⁿ-í, chi tnúhu ndáá càháⁿ-í.

²⁶ Te té Àgripá-a sa ñaha-dé ndihi nchaa ñáyiú isràél nàcuáa ní cuu, chi sa ní níhi-dé tnúhu ndihi dava-gá-yu nàcuáa ní cáháⁿ-í, núu xiǎⁿ cùyí-í cáháⁿ ndihi-í-dé —càchí-dé xǎhaⁿ-dē xii té Fèstú.

²⁷ Te ní xáhaⁿ-dē xii té Àgripá:

—Yúhú sa xini-í sá sàndáá iní-n tnúhu ní chidó tnùni cue téé ní xóo cáháⁿ tnúhu Yá Ndióxi ndéé sanaha —càchí-dé xǎhaⁿ-dē.

²⁸ Te ní xáhaⁿ tē Àgripá:

—¿Quide-n cuendá sá ííⁿ úú tnúhu ní cáháⁿ-n te quindáá iní-í tnúhu Jèsús cáháⁿ-n-ǎⁿ? —càchí-dé xǎhaⁿ-dē.

²⁹ Te ní xáhaⁿ tucu té Páblú:

—Cuéi vitna te cuéi ndéé cuéé-gá dico cuini-í sá dácuití sǎ quindáá iní-n tnúhu Jèsús. Te diu-ni ducaⁿ xicáⁿ táhù-í núú Yá Ndióxi sá ncháá ñáyiú ndécu ndihi-o iha quindáá iní-yu tnúhu-gá dàtná cuini-n ní quide yúhú, ducaⁿ càdá-yu. Dicó-ni sá núu vá quihíⁿ-ni-yu vecaá dàtná cuini-n ndòho yúhú —càchí-dé xǎhaⁿ-dē xii té Àgripá.

³⁰ Te sáta dúcáⁿ ní cáháⁿ-dé, te ní ngúnutnii té Àgripá téé yìndaha nacióⁿ Isràél, ndihi té Fèstú téé cùu gobiernú, ndihi tá Berènicé ndihi dava-gá ñáyiú xìnucóo yatni.

³¹ Te ní tnahá-yu ndéca tnahá-yu cuaháⁿ ííⁿ xio. Te ní xitnahá-yu:

—Téé-ǎⁿ ñá túú nǎ cuéchi ní quide-dé núu chihi ñaha-güedé vecaá àdi cahni ñaha-güedé —càchí-yu xitnahá-yu.

³² Te té Àgripá ní xáhaⁿ-dē xii té Fèstú:

—Cuéchi mee-dé chi ní cachí-dé sá quitnahá-dé té Cèsár, xiǎⁿ núu ndíhu tucu-dé vecaá, te núu ñá túú dùcaⁿ ní cáháⁿ-dé, te cacú-dé ní cùu —cachí-dé xǎhaⁿ-dē xii té Fèstú.

27

Té Páblú cuaháⁿ-dé ñuú Rómá

¹⁻² Te ní ndatnúhu-güedé sá quihíⁿ té Páblú ndihi bàrcú nacióⁿ Italiá, te tnahá yúhú quihíⁿ-í ndihi-dé. Te tnahá ííⁿ téé nàni Aristarcú cuini-dé quihíⁿ ndihi-ndí-dé, te cùu-dé téé ñuú Tesalónica, te ñuú-án yìndèhu-xi distritú Macèdoniá. Te ní sáha cuendá-güedé té Páblú ndihi ííⁿ úú-gá cue téé xixíhi vecaá ní queheⁿ cuendá ñáhá tē Jülüú téé cùu capitán, téé yìndaha nchaa sandadú nání Àugustú, te ní quée-ndí nchaa-ndí bàrcú ñuú Adràmitiú. Te ní xica bàrcú-án cuaháⁿ-ndí ndihi-xi te cuita yáha-ndí ííⁿ úú ñuú yìndèhu distritú Àsiá quihíⁿ.

³ Te nduu tnéé ní quexiò-ndí ñuú Sidón. Te ío váha ní quide té Jülüú, chi ní dàñá-dé ní quene té Páblú ní sáháⁿ-dé ní cáháⁿ ndihi-dé cue téé ío váha tnahá

tnúhu ndíhi-dé nõu cudana cundàhú iní ñáhá-güedë cuáñaha-güedë nchaa sá xíní ñúhu-dé.

⁴ Te dätñuní ní ndée tucu-dé bàrcú cuáháⁿ-ndí. Te ío níhi táchí te ñá ní dàña-xi caca ndáá bàrcú, te ní sáháⁿ bàrcú ndée yatni yuhu òstrítú Chìpré, te òstrítú-áⁿ cáa cuádava xítí làmár, te xiáⁿ ñà túú cuéhé táchí ni yáha-ndí.

⁵ Te ta yáha-ndí cuáháⁿ, te ní yáha-ndí ñⁿ xio yuhu òstrítú Cìliciá ndíhi yuhu òstrítú Pànfilíá, te ní sáá-ndí ndée ñúú Mírá ñⁿ ñúú yíndèhu òstrítú Liciá.

⁶ Te ní quene téè cùu capitáⁿ cuándúcú-dé ingá bàrcú, te ní níhi-dé ñⁿ bàrcú téè ñúú Alejándriá, ñúhú ìchi-xi quíhíⁿ-xi nàcióⁿ Italiá. Te ní ndicuaca ñaha-dé xii-ndí cuáháⁿ-ndí ní quée-ndí bàrcú-áⁿ, te ní xica-xi cuáháⁿ-xi.

⁷ Te ío cuéè cuáháⁿ bàrcú-áⁿ, cuéhé nduu ní xúhuⁿ-xi ìchi, te yica-ni ní quexìo-ndí yuhu ñúú Nidú, te ñá ní dàña-gá táchí quíhíⁿ ndáá bàrcú nõu ní xícó ndúú-xi. Te ní yáha-ndí ñⁿ xio yuhu òstrítú Crètá núú ñà túú quène vihi táchí, te òstrítú-ni cuádava tucu làmár cáa òstrítú-áⁿ. Te ní yáha-ndí yuhu ñúú Sàlmón, te òstrítú-ni Crètá yíndàha-xi ñúú-áⁿ.

⁸ Te ní yáha-ndí cuáháⁿ-ndí mee-nã núú ràyá òstrítú Crètá, te ío ní ndoho-ndí ní sáá-ndí ñⁿ xichi núú nání Puèrtú Váha, yatni víi-ni-gá ñúú Làseá.

⁹ Te ní cuyaa vihi-ndí ìchi, ducaⁿ-ni cùu-ndí ní tnahá yóó cùúⁿ dàú táchí, te ío úhú yáha bàrcú nõu na quíhíⁿ-ni-xi.

¹⁰ Te ní xáhaⁿ té Pàblú xii-güedé:

—Nchaa-ndo cùndedóho-ndo tnúhu na càháⁿ-í-a. Ío úhú núú na càda yica-o quíhíⁿ-ó ndíhi bàrcú chí cuíta càrgá te cuíta bàrcú, te cuu-ni iní-xi tnahá-ni mee-o cùú-ó chí càhá-ó nõu na ngàunihnu-o xítí ndute —càchí-dé xáhaⁿ-dë xii-güedé.

¹¹ Te téè cùu capitáⁿ ñá ní sàndáá iní-dé tnúhu ní càháⁿ té Pàblú. Dico tnúhu ní càháⁿ téè dàcaca bàrcú ndíhi xítóhó-xi chí ní sàndáá iní-dé.

¹² Te ñá ní tnahá iní-güedé Puèrtú Váha cuèndá sá ñí tnahá yóó cùúⁿ dàú táchí, te ñá túú dàhu váha táchí xiáⁿ, núú vài-güedé ní cuini-güedé yáha-güedé quíhíⁿ-güedé sáá-güedé ndée ñúú Fènicé ní cùu. Te yàcáⁿ cundecu-güedé yóó cùúⁿ dàú táchí cuéí ñá túú càváha vihi, chí nchíi nàcuáa yáha bàrcú, te yàcáⁿ quíhu táchí, dico dàhu-gá. Núú xiáⁿ ndée ndíácãⁿ nátàcà bàrcú yóó cùúⁿ dàú táchí, te òstrítú-ni Crètá yíndàha-xi ñúú-áⁿ.

Nitùhú làmár cùúⁿ dàú táchí

¹³ Te duha ní quene nuu luha táchí, xiáⁿ ní sani iní-güedé sá ndácú-güedé quíhíⁿ-güedé, núú ní natava-güedé cáa ndètníⁿ ndée bàrcú, te ní xica-xi cuáháⁿ-xi ní yáha-ndí yatni víi yuhu òstrítú Crètá.

¹⁴ Te tnaa-ni ní cuu sá ñí xica bàrcú, te duha ní cunuu dàú táchí ñⁿ xio yuhu ñúú-áⁿ

¹⁵ Te nchìta ìchi cuáháⁿ bàrcú. Te ñá ní ndàcu-gá-xi quíhíⁿ ndáá-xi nàcuáa cuáháⁿ-xi ní cùu, núú ní dáñá-ndí cuáháⁿ mee-nã bàrcú.

¹⁶ Te ní yáha-ndí ñⁿ ñúú nání Clàudá, te ñúú-áⁿ cáa cuádava xítí làmár. Te ñⁿ xio yuhu ñúú núú ñà túú quène vihi táchí ñí yáha-ndí, te bàrcú líhli sá nchícuⁿ sáta bàrcú càhnú, chí ní ndacu-ndí ní taxúha-ndí xítí bàrcú càhnú.

¹⁷ Te sáta ñí ndacu-ndí ní taxúha-ndí bàrcú líhli, te ní ducuⁿ nuu-güedé yoho bàrcú càhnú. Te ío ní yùhú-güedé sá yáha bàrcú ndée núú ñúhú cùchí yuhu

ñũu Sirté, núu xiáⁿ ní ndihí dóó nchítá díquí bàrcú ní nuu nehe-güedé, chí dóó-ãⁿ ío níhi chindaha táchí, núu xiáⁿ cuáháⁿ bàrcú ìⁿ xio. Te ní dǎñá-güedé ñá túú-gǎ ní dácaca-güedé, núu cuáháⁿ méé-nǎ-xi ta chindaha táchí cuáháⁿ.

18 Te ío níhi dáú táchí, te ñá ní cuíní tnàhí-xi yáha. Te nduu úú sá dúcáⁿ ñá túú-gǎ ní dácaca-güedé bàrcú te ní ngúíta-güedé ní dǎngöyo-güedé sá nchídó-xi cuendá cuíní-güedé nduu ñamá-xi.

19 Te nduu úní ní dǎngoyo-güedé nchaa ndachíuⁿ cánehe chíuⁿ-güedé xití bàrcú.

20 Te cuéhe nduu ñá túú ní xíní-ndí ní chòdíni ní nchĩcanchii, chí ío níhi ní cuuⁿ dáú táchí, núu ní cáháⁿ-ndí sá vǎ cácu-ndí, chí ndihí-ndí cáhá ní cáháⁿ-ndí.

21 Te ní cuu tití nduu ñá túú-gǎ xéxi-ndí, núu xiáⁿ ní ngúnutní tē Páblú núu-güedé, te xǎhaⁿ-dē:

—Quindáá íní-ndó tnúhu ní cáháⁿ-í, te cundecu nahi-o Crétá ní cùu. Te núu ní tñiⁿ-ndo tnúhu-í, te vǎ dácúíta-o càrgá ndihí dava-gǎ ndáchíuⁿ ní cuu.

22 Te vǎ yùhú-ndó chí vǎ cùú ní ìⁿ-ndo dico bàrcú chí cuíta.

23 Te ñaha-ndo sá yùhú càháⁿ ndihí-í Yá Ndiöxí te quide-í ñacuáa càháⁿ-gǎ. Te ñu-ni mee-gǎ ní techíuⁿ-gǎ ìⁿ espíritú xínú cuèchi núú-gǎ ní quixi,

24 te ní cachí-xi xii-í: “Vǎ yùhú-n chí vǎ cùú-n, dico dacutíi quíhíⁿ-n cáháⁿ ndihí-n tē Césár. Te ní ìⁿ tée ndihí-n vǎ cùú, chí ío cùdíí íní ñáhá Yá Ndiöxí xii-í”, duha ní cáháⁿ espíritú xínú cuèchi núú-gǎ ní cachí tnúhu-xi xii-í.

25 Núu xiáⁿ càchí tnúhu-í sá vǎ yùhú-ndó, chí sa cùtnuní íní-í sá cádá Yá Ndiöxí ñacuáa ní cáháⁿ espíritú xínú cuèchi núú-gǎ.

26 Te mee táchí chindaha-xi bàrcú daquíhíⁿ-xi ndéé yuhu ndute —cachí tē Páblú xǎhaⁿ-dē xii-güedé.

27 Te sa ní cuu sáhúⁿ nduu sáhúⁿ niú sá ní ngúíta-xi cùuⁿ dáú táchí, te ñá túú-gǎ dácàca-güedé bàrcú, chí mee-nǎ táchí tá chindaha-xi bàrcú cuáháⁿ núu ndute lámár Àdriá. Te sáta ní cuu dava niú, te ní quide cuendá cue tée dácaca bàrcú sá tá cùyatni-güedé ñuhu yìchí.

28 Te ní chicuáhá-güedé ná daha-gǎ mètrú néhé-xí sǎ cùnú xití ndute cuendá cutnùní íní-güedé sá tá cùyatni-xi ndéé yuhu lámár, te nèhe-xi ócò sáhúⁿ ìⁿ-ni-gǎ mètrú. Te ní xica tucu bàrcú luha-gǎ, te dǎtnùní ní chicuáhá tucu-güedé, te xiáⁿ néhé-xí ócò úsá-ni-gǎ mètrú.

29 Te ní yùhú-güedé sá candaundeé-xi cava, te ní queheⁿ-güedé cúmí caá nǎhnú sǎ nchicúⁿ yoho, te ní dáquée-güedé xití ndute ndàa sáta bàrcú, te dǎtnùní ní ngúíñí-xi ñá ní xica-gǎ-xi, te ní cuíní-güedé sá òré-ni túndaá ní cùu.

30 Te cue tée dácaca bàrcú ní natava-güedé bàrcú líhli dǎndée-güedé núu ndute ní cùu, te ní cachí-güedé sá quíhíⁿ-güedé ndàa núu bàrcú dàquée-güedé úú-gǎ caá cuendá cuíta candeé-xi bàrcú cáhnú cuendá sá vǎ cáca-xí. Te cuíní-güedé dandáhú-güedé dava-gǎ nchúhú cue tée ñuhu ndihí-güedé bàrcú, chí ní ndatnúhu-güedé sá cùnú-güedé ní cùu.

31 Te tē Páblú ní xáhaⁿ-dē xii tē cùu capitáⁿ ndihí dava-gǎ sandàdú:

—Te núu ná dǎndóo ñaha cuè tē dácaca bàrcú cunu-güedé, te vǎ cácu-o —càchí-dé xǎhaⁿ-dē.

32 Te sá dúcáⁿ ní xáhaⁿ-dē núu ní sáháⁿ sandàdú ní xehndé-güedé yoho nchicúⁿ bàrcú líhli dǎngáúñihnu-güedé xití ndute cuáháⁿ-xi.

33 Te váha váha-ni ta túndaá cuáháⁿ, te ní xáhaⁿ tē Páblú:

—Sa ní cuu sáhúⁿ nduu ñá túú tnàhí xèxi-ndo sá ndihú íní-ndó.

34 Te vitna yáchí-ndó, chi caxi-ndo cuendá naníhí ndéé-ndó, te vá yùhú-ndó chi ñá túú nã tnahá ni ñⁿ-ndo —cachí-dé xãhaⁿ-dë xii-güedé.

35 Te sátá dúcáⁿ nĩ cáháⁿ-dé, te ní queheⁿ-dé ñⁿ pàá, te ní ndacáⁿ táhú-dë núú Yã Ndiõxí, te núú-güedé nchaa-güedé ducaⁿ nĩ quide-dé, te dãtnùnĩ ní táhú-dë luha ni xexi-dé.

36 Te ducaⁿ te dãtnùnĩ ní cuy^ñ-güedé ní xexi-güedé nchaa-güedé.

37 Te úú ciëndú únídico sáhúⁿ ñⁿ-ndí ñúhú bàrcú núú tnahá té Pãblú, te nchaa-ndí ní xexi ndihí-ndí-dé,

38 Te ní xexi-ndí ní ndahá xití-ndí. Te dãtnùnĩ ní ngüíta-güedé ní tava-güedé nchaa ngohnchi trùú ní dãngoyo-güedé xití ndute cuendá nduu ñamá-gá bàrcú.

Ní dáhu bàrcú xití làmár

39 Te sátá nĩ túndaá, te ñá ní cùtnuní-gá iní-güedé ndéé cúú-xí núú nĩ sáá-güedé, te ní xiní-güedé ñⁿ xichi núú nĩ xícó nduú luha yuhu làmár, te vãi vihi cúchí dándáá-xí yuhu ndute, te xíaⁿ ñá túú dácandá víhí táchí ndute. Te ní ndatnúhu-güedé sá ndácú-güedé dacàca-güedé bàrcú quíhíⁿ-xi ndéé núú ñúhú cùchí.

40 Te xíaⁿ núú ní sáháⁿ-güedé ní xehndé-güedé nchaa yoho nchicúⁿ caá tácãndé bàrcú ní ndóo xití làmár, te ní nadatáyá-güedé vítú sã dácũico-xi barcú, te ní nacata caa-güedé ñⁿ dóo dǐquí bàrcú, te ta chindaha táchí cuáháⁿ yuhu làmár tá cùyatni-xi ñuhu yichí cuáháⁿ.

41 Te ndecu ñⁿ xichi ní natacá víhí cùchí xití ndute, te xíaⁿ nĩ nguíndũxi nihnu bàrcú-güedé, te ní cutí^ñ-xi xití cúchí, te ñá ní ñíhí-gã-güedé nãcuáa cada-güedé nene-xi. Te ío ñihí ní dácandá táchí ndute, te ní chúcú ndéé-xi ndãa sátá bàrcú, te ní ndihí ní táhú-xí.

42 Te cue sandadú ní xítñaha-güedé sá cáhni-güedé nchaa cue téé ní xíhi vecaá cuendá sá vã quíhíⁿ-güedé núú ndute te cunu-güedé.

43 Te téé cùu capitáⁿ ñá ní dàña-dé cahni-güedé cue téé ní xíhi vecaá, chi ñá ní cundee iní-dé cahni-güedé tnahá té Pãblú. Te ní xáhaⁿ-dë xii-güedé sá cué téé xícuu cada quíhíⁿ núú ndute te na yãha-güedé ndute quene-güedé yuhu làmár.

44 Te dava cue téé ñá cúú càda, ní xáhaⁿ-dë nanducu-güedé vítú ní ãdi vítú nĩ táhú sã ní xíhi bàrcú, te núú xíaⁿ caundodo-güedé yãha-güedé ndute quene-güedé ndéé yuhu làmár. Núú duha ní cuu ní cácu-ndí nchaa-ndí.

28

Té Pãblú ndécú-dë ñúú Mãltá cáá cuãdava làmár

1 Te sátá ní cácu-ndí ní nene-ndí ñuhu yichí, te ní níhí-ndí tnúhu nãcuáa nani ñúú núú nĩ sáá-ndí, te ñúú-án nání-xí Mãltá, te càa-xi cuãdava làmár.

2 Te ío quide víxiⁿ-xi cuendá ío cùuⁿ dáú. Te ñáyiu ñúú-án nĩ cundahú iní ñãhá-yu xii-ndí, ní dátñahá-yu ñuhú te ní cana ñãhá-yu ní sáháⁿ-ndí ní nacuídí-ndí.

3 Te té Pãblú dátacá-dé nducú, te tnahá-ni ñⁿ cóo dëéⁿ nĩ tn^ñ nihnu-dé-di, te òrè cuáháⁿ ndaha-dé chucu-dé núú ñúhú, te ní ñáni-di cahni, te ní ndee-di xití nducú ní sãnduú-di ndaha-dé, te ní xexihaⁿ-di xii-dé.

4 Te nchaa ñáyiu ndéhé-yu sá tácãndé-di ndaha-dé, te ní ngüíta-yu ní xítñahá-yu:

—Vaa ndíyí ní sahní tée-a, te ñá ní xíhí-dé lámár, te dacuítí sã cùú-dé vitna, chí sa naha Yá Ndiòxí ná ní quide-dé ñuyú-a —càchí-yu xítnàhá-yu.

⁵ Te té Páblú ní quidi-dé ndaha-dé ní ngaunihnu-dí núú ñùhú, te ñá túú tnàhí ná ní cùu núú ní xexi-dí.

⁶ Te ñáyíu ñúú-áⁿ xíndéhé-yu núu daquihíⁿ-xí chùhúⁿ àdi nduá-dé cuú-dé. Te naha ní xíndéhé ñàhá-yu núu nása cada ñaha-xi xii-dé, te ñá túú tnàhí ná ní quide ñaha-xi, te ní xítnàhá-yu:

—Vaa ndiòxí cúú tée-a núu dàcáⁿ ñá túú tnàhí ná ní quide-xi ndaha-dé núú ní xexi cóó —càchí-yu xítnàhá-yu.

⁷ Te yatni núú dúcáⁿ ní xexihaⁿ cóó-áⁿ cáá ñùhu xitu tée nani Publiú, te tée-áⁿ táxí tnùní-dé nihíí ñúú cáá cuádava xítí lámár núú ndécú-ndí nduu-áⁿ. Te ío váha iní-dé chí ní cana ñaha-dé ní sáháⁿ-ndí ní xíndecu-ndí úní nduu vehe-dé.

⁸ Te tãtã tẽ Publiú-áⁿ cáá-dé cùhú-dé ñùhú-dé cahni, te tnàhá-dé daxi. Te té Páblú ní sáháⁿ-dé núú cáá-dé, te ní cáháⁿ ndihí-dé Yá Ndiòxí, te ní sacáⁿ ndodo-dé ndaha-dé díquí tée cùhú-áⁿ, te ducaⁿ-ni ní quide-dé, te ní ndúha tée cùhú-áⁿ.

⁹ Te sátá dúcáⁿ ní quide té Páblú, te ní quixi nchaa ñáyíu cùhú núú ndécú-ndí, te ní quide tátna ñaha tẽ Páblú xii-yu te ní ndúha-yu.

¹⁰ Te òré ndécú-ndí xíaⁿ, te vãi sá ní taxi táhú-güedé, te òré ní xica-ndí ní taxi tucu-güedé nchaa sá xíní ñùhu-ndí ichi.

Té Páblú ní quexio-dé ñúú Rómá

¹¹ Te yàcáⁿ ní xíndecu-ndí úní yóó, te sa ndècu ìⁿ barchú tée ñúú Alejandriá òré ní quexio-ndí, te ní xíndecu-xi nihíí yóó cúúⁿ dàú táchí. Te núú-xi càndodo sandú sá dánani-güedé Càstór ndihí sàndú sá dánani-güedé Pólux, te xití bàrcú-áⁿ ní quée-ndí cuáháⁿ-ndí.

¹² Te ní quexio-ndí ñúú Siràcusá, te yàcáⁿ ní xíndecu-ndí úní nduu.

¹³ Te ní xica tucu bàrcú cuáháⁿ-xi, te ní quexio-ndí ñúú Règiú. Te nduu tnée duha ní quene nuu táchí. Te ní xica bàrcú cuáháⁿ-xi, te ndée nduu úú ní quexio-ndí ñúú Pùteolí.

¹⁴ Te yàcáⁿ ní nanihí tnàhá-ndí ndihí ñáyíu sàndáá iní tnúhu Jèsús, te ní cachí-yu sá cùndècu-ndí úná nduu, núu xíãⁿ ní xíndecu-ndí úná nduu ndihí-yu. Te ní xica tucu bàrcú cuáháⁿ-xi, te ní quexio-ndí ñúú Rómá.

¹⁵ Te ñáyíu rómá ñáyíu sàndáá iní tnúhu Jèsús, ní nihí-yu tnúhu sá cuáháⁿ-ndí, te ní quixí-yu ní quixi tnahá ñáhã-yu ichi. Te davá-yu ní nanihí-ndí ñúú Fòrú Àpiú, te davá-yu ní nanihí-ndí ñúú Úní Tàbernás. Te òré ní xini té Páblú nchaa ñáyíu véxi tnahá ñáhã xii-ndí, te ndee ndèe ní cuu iní-dé, te ní ndacáⁿ táhú-dé núú Yá Ndiòxí sá dúcáⁿ ní quide-yu.

¹⁶ Te sátá ní quexio-ndí ñúú Rómá, te cue tée cùhíuⁿ ní xáhaⁿ-güedé xii té Páblú sá cùndècu dîⁿ-dé, te ní xíndeé ñáhã cuàa sandadú xii-dé.

Té Páblú càháⁿ-dé tnúhu Yá Ndiòxí ñúú Rómá

¹⁷ Nduu úní sá ní quexio té Páblú, te ní cana-dé cue tée cùnuu núú ñáyíu isràél ndécú ñúú Rómá, te ní sáháⁿ-güedé núú ndécú-dé, te ní xáhaⁿ-dè:

—Nchòhó cue tée isràél, càchí tnúhu-í sá ñà túú nã ní quide-í ní ìⁿ ñáyíu cùtnàhá ní xíndecu-í ñúú Jerusàlén. Te ñá túú ní cáháⁿ cuèhè-í sá quidè-yu nchaa nàcuáa ní xóo cada cue ñani tnàhá-ó ní xíndecu ndée sanaha, te ñá túú

nã ní quide-í te ní tñi ñaha-güedë ní sáha cuendá ñáhá-güedë xii-í núú cuè téé rómá, cue téé ndècu yacáⁿ.

¹⁸ Te cue téé-áⁿ ní ndúcu tñuhu-güedé núu ndáá ndècuéchi-í, te ní cutnùni iní-güedé sá ñã túú nã ní quide-í, te xiãⁿ cuini-güedé queñuhu ñaha-güedé xii-í vecaá ní cùu.

¹⁹ Te ñu-ni cue téé isràél ñã ní ñaha-güedé cácu-í, chi cuini-güedé sá cáhni ñaha cue téé rómá, cue téé xíndecu yacáⁿ xii-í ní cùu, te xiãⁿ núu ní xáhaⁿ-í sá quixi-í cáháⁿ ndihi-í té Cèsár cuendá iha cada ndáá méé-dë cuendá-í, te vá yõ ñⁿ tee-í cuéchi.

²⁰ Núu xiãⁿ ní cana ñaha-í xii-ndo cuendá cunaha-ndo nàcuáa ní cuu. Te ní xáhaⁿ-í sá sàndáá iní-í sá ndótó ñáyiú ní xihí, te ñu-ni ducaⁿ càháⁿ dava-gá ñáyiú isràél, te sá dúcáⁿ ní cáháⁿ-í, te ní chihi ñaha-güedé vecaá, te xíndéé ñáhá-güedé ndéé vitna —càchí té Páblú xáhaⁿ-dë xii-güedé.

²¹ Te ní xáhaⁿ-güedé xii-dé:

—Ñã túú tñahí tutú ní tëndaha cue téé distrítu Jùdeá quixi cuendá-n. Te ni cuè téé isràél ñã túú ní quixi-güedé cáháⁿ cuèhé-güedé cuendá-n.

²² Te cuini-ndí cundedóho-ndí nása cuundu tñuhu cáháⁿ-n, chi sa ní níhí-ndí tñuhu sá ncháá xichi ío xicáháⁿ cuèhé-yu cuendá nchaa ñáyiú sàndáá iní tñuhu Jèsús —càchí-güedé xáhaⁿ-güedé xii té Páblú.

²³ Te ní xáhaⁿ-güedé nduu cùyáchí-güedé te quixi-güedé cundedóho-güedé dava-gá cuendú cáháⁿ té Páblú. Te ní tñahá nduu ní ndatnúhu-güedé quihíⁿ-güedé núú quidé vèhe-dé, te vãi-yu ní sáháⁿ-yu ní xíndedóho-yu tñuhu ní cáháⁿ-dé, te ncháca nchaa ní cáháⁿ ndihi-dé-yu. Te ní xáhaⁿ-dë xii-yu sá ndii Moisés ndihi dava-gá cue téé ní xóo cáháⁿ tñuhu Yá Ndióxí ndéé sanaha ní chídó tñuni-güedé núú tutú-güedé sá díú-gã tendaha-gã Cristú quixi-gá ñuyú-a. Te ní chídó tñuni-güedé nchaa nàcuáa cada-gá, te ñu-ni nàcuáa càháⁿ tutú-güedé cada Cristú, te ducaⁿ ní quide-gá cútnàhá ní xica cuu-gá ñuyú-a, núu xiãⁿ ní cutnùni sá díú Jèsús cúu-gã Cristú Yáa ní tendaha Yá Ndióxí ní quixi ñuyú-a. Te núu quindáá iní-yu, te ndihu ndaha ñaha Yá Ndióxí xii-yu.

²⁴ Te davá-yu ní sàndáá iní-yu tñuhu ní cáháⁿ-dë, te davá-yu ñã túú ní sàndáá iní-yu.

²⁵ Te cuendá sá ñã ñⁿ-ní tñuhu ni cáháⁿ-yu, núu xiãⁿ cuini-yu núhú-yu ni cùu. Te ní xáhaⁿ té Páblú sá cùndètu tñahá-yu cáháⁿ-dë ingá tñuhu, te xáhaⁿ-dë:

—Ní xáhaⁿ Espiritú Yá Ndióxí xii ndí Chàíá nàcuáa cáháⁿ ndii núú ncháa ñani tñahá-ó ní xíndecu ndéé sanaha. Te ní cáháⁿ Espiritú-gá ñⁿ sá ndàá ní xáhaⁿ-xi xii ndí, te duha ní xáhaⁿ-xi:

²⁶ Quihíⁿ-n te cúñaha-n xii ñáyiú:

Nchóhó mee-ni cùndedóho-ndo tñuhu càháⁿ Yá Ndióxí, dico ni vã tècú tñuni-ndó.

Te cada-gá titni núú sã vã yõ tñahí ndàcu cada, dico ni vã cútnùni iní-ndó nàcuáa nduu sá cáda-gã,

²⁷ chi cuendá sá ño sàá iní-ndó,

xiãⁿ ducaⁿ ñã túú sãha-ndo cuendá nása cuáháⁿ tñuhu càháⁿ-gá,

chi ñã cuini-ndó cùndedóho-ndo, te ni ñã sàndáá iní-ndó.

Te ni ñã cuini-ndó ñaha-ndo nchaa sá cuèhé sá dúhá quide-ndo cuendá xocàni-gá nchaa xiãⁿ iní-ndó,

duha cúñaha-n xii-yu.

Càchí Espiritú-gá xáhaⁿ-xi xii ndí.

28 Te na càchí tnúhu-í sá quíhíⁿ cue té cáháⁿ tnúhu Yá Ndiöxí cáháⁿ-güedé tnúhu-gá núú ñáyiú ñá túú cùú ñáyiú isràél, chi ñáyiú isràél ñá túú cuíní-yu cundedóho-yu. Dico ñáyiú ñá túú cùú ñáyiú isràél chi cùdíí iní-yu cundedóho-yu, núú xíáⁿ naníhí tãhú-yu –càchí té Pãblú xãhaⁿ-dẽ xíí-yu.

29 Te sátá ñí ndíhí cuèndú ní xãhaⁿ-dẽ, te ní ndeé-yu cuánuhú-yu ta ndàtnúhu-yu cuáháⁿ.

30 Te úú cuíá ñí xínu ní xíndecu té Pãblú ñíⁿ vehe ní cháhu-dé. Te ní xóo cáháⁿ váha-dé ndíhí nchaa ñáyiú ní xóo quíhíⁿ vehe-dé.

31 Te ní xãhaⁿ-dẽ sá ndíhu ndaha ñàha Yá Ndiöxí xíí-yu núú quíndáá iní-yu tnúhu-gá, te vá yóo ñíⁿ ni sàdí yuhu-dé. Te mee-ni tnúhu Xítohó Jesucristú ní cáháⁿ-dé núú-yu.

TUTÚ NÍ CADÚHA TÉ PĀBLÚ QUIHÍⁿ NDAHA ÑÁYIU ÑUÚ RÒMÁ

Té Pāblú cādúha-dé tutú quíhíⁿ ndaha ñáyiu xĩndecu ichi Xítohó Jesucristú ndécú ñuú Rómá

¹ Yúhú té Pāblú xínú cuèchi-í núú Xítohó Jesucristú, chi mee Yá Ndiõxí ní cachí-gá sá cùú-í ñⁿ téé cáháⁿ tnúhu-gá núú ñáyiu, te tnúhu-gá cúú-xí tnúhu sá cáháⁿ nàcuáa naníhí tành-ó, núú ñuú-gá ní tendaha ñaha-gá xii-í xicá cùú-í cáháⁿ-í tnúhu-gá.

² Te ndéé sanaha nĩ cachí Yá Ndiõxí sá dàcuítíí sàá nduu ngũndecu ndíhi ñáyiu tnúhu-gá. Te ducaⁿ ní xáhaⁿ-gá xii cue téé ní cáháⁿ tnúhu-gá dàv-áⁿ ní chidó tnùn-güedé núú tutú-gá.

³ Te tnúhu-gá sá cáháⁿ-í a cáháⁿ-xi ñuú-ni cuendá Xítohó Jesucristú Yá cúú Déhe-gá. Te Déhe-gá-áⁿ cúú-gá ñⁿ ñáyiu, te cùú-gá ñani tnáhá ndí Dávíí.

⁴ Te cùú-gá Yáá ñá túú tnáhí cuèchi-xi. Te ní xihí-gá te ní ndoto-gá, te xiáⁿ cútnùní iní-ó sá cúú-gá Déhe Yá Ndiõxí, te ío cāhnu cuu-gá.

⁵ Te ñuú-ni Xítohó Jesucristú ní quide-gá ní nduu tành-í núú Yá Ndiõxí sá cáháⁿ-í tnúhu-gá núú cuè ñáyiu ñuyíú-a cuendá quíndáá iní-yu tnúhu-gá te canchicúⁿ nihnú-yu cadá-yu nchaa nācuáa cáháⁿ-xi, te ducaⁿ ío cuu cāhnu-gá.

⁶ Te tnáhá nchòhó cúú-ndó ñáyiu sa nchicúⁿ nihnu quide-ndo nchaa nācuáa cáháⁿ tnúhu-áⁿ, chi ní cachí Yá Ndiõxí sá nchòhó tnáhá tnúhu-ndo ndíhi Xítohó Jesucristú.

⁷ Te nchòhó ñáyiu xĩndecu ñuú Rómá, ñáyiu ío cùú iní ñáhá Yá Ndiõxí, cādúha-í tutú-a daquixi-í ndaha-ndo. Te ñuú-ni nchòhó cúú-ndó cuè ñáyiu ní cachí Yá Ndiõxí cada ndáá cundecu-ndo nūú-gá. Te xicáⁿ tành-í núú Tátá-ó Dütú Ndiõxí ndíhi núú Xítohó Jesucristú sá ío na chindee chítúú ñaha-gá xii-ndo, te ducaⁿ ndí nduú-gá ná cada te ío váha cuu iní-ndó cundecu-ndo.

Té Pāblú cuíní-dé quíhíⁿ ngoto-dé cue ñáyiu xĩndecu ichi Xítohó Jesucristú ndécú ñuú Rómá

⁸ Te díhna nuu-gá cāchí tnúhu-í xii-ndo sá ío ndácáⁿ tành-í núú Yá Ndiõxí cuendá sá ío sàndáá iní-ndó-gá, te nchaa ñáyiu nihí-yu tnúhu sá dúcáⁿ quide-ndo. Te Xítohó Jesucristú dáyáha-gá nchaa tnúhu cáháⁿ-í núú Yá Ndiõxí.

⁹ Te ndí tnáhá òré cáháⁿ ndíhi-í Yá Ndiõxí ducaⁿ-ni xicáⁿ tành-í núú-gá cuendá-ndó, te mee-gá náhá-gá sá cáháⁿ ndáá-í, te ñuú-ni núú-gá xínú cuèchi-í ní yúhu ní iní-í, chi cáháⁿ-í nācuáa ní quide Déhe-gá Xítohó Jesucristú cuendá naníhí tành-ó.

¹⁰ Te xicáⁿ tành-í núú Yá Ndiõxí sá ñuú mee-gá ná cāchí te sáá ñⁿ nduu quixi coto ñaha-í xii-ndo.

¹¹ Chí ío cuíní-í cundecu ndíhi ñaha-í xii-ndo dānehé ñáhá-í ñⁿ úú tnúhu nācuáa ío-gá chindee ñaha Espíritú Yá Ndiõxí xii-ndo, te ducaⁿ ío-gá cuita nducu ndée-ndo cada-ndo nchaa nācuáa cuíní-gá.

¹² Te ío chí ná cuáha tnāha-o tnúhu ndee iní cundecu-o ichi-gá, chi nchòhó ndíhi yúhú ío sàndáá iní-ó-gá.

¹³ Te nchòhó ñáyiu ndècu ndíhi-í ichi Xítohó Jesucristú na cāchí tnúhu-í xii-ndo sá dúcáⁿ-ní ío sàni iní-í quixi coto ñaha-í xii-ndo. Te cuíní-í sá òré quixi

coto ñaha-í xii-ndo, te vá cuíta chiùnⁿ quixi-í dàtná quidè-í òrè sãngoto-í nchaa ñáyiú dava-gá ñuú ñá túú xíta chiùnⁿ-í chi ío váha sàhúuⁿ-yu tnúhu càháⁿ-í, dico ñá ndàcù-í quixi-í quixi coto ñaha-í xii-ndo.

14 Te yúhú yídiqui-í cáháⁿ-í tnúhu Xítohó Jesucristú núú nchaa ñáyiú càháⁿ tnúhu griégú, ndihi núú nchaa ñáyiú càháⁿ dava-gá núú tnúhu, ndihi núú nchaa ñáyiú túha, ndihi núú nchaa ñáyiú ñá túú túha.

15 Te cuendá sá dúhá yídiqui-í cáháⁿ-í tnúhu-gá, xiáⁿ ío cuíní-í danèhé ñáhà-í xii nchaa nchòhó ñáyiú ñuú Rómá nàcuáa ndúu tnúhu sá càháⁿ nàcuáa naníhí tàhú-ó.

Ío cùnuu tnúhu Xítohó Jesucristú

16 Te yúhú ñá túú tnàhí cùcahaⁿ núú-í cáháⁿ-í tnúhu Xítohó Jesucristú, chi cùu-xi tnúhu ío cùnuu, chi Yá Ndiòxí ní cachí-gá sá ncháá ñáyiú na quindáá iní-xi tnúhu-áⁿ te naníhí tàhú-yu. Te ní cachí-gá sá díhnanuu-gá ñáyiú isràél ngúndecu ndihí-yu tnúhu-áⁿ te dàtnúni ngúndecu ndihi ñáyiú ñá túú cùu ñáyiú isràél.

17 Te tnúhu-áⁿ dánèhé ñáhá-xí xii-o sá cúdiu-o núú Yá Ndiòxí te núu mee-ni sã quindáá iní-ó-gá dàtná càháⁿ-xí núú tùtú-gá núú càchí-xí: “Nchaa ñáyiú sàndáá iní ñáhá xii Yá Ndiòxí cúdiu-yu núú-gã, te ndècu ndihi ñáhá-yu xii-gã”, duha càchí-xí núú tùtú-gã.

Nchaa ñáyiú ndècu ñuyú ndècuéchi-yu

18 Te ndéé andiú tëndaha Yá Ndiòxí sá ùhú quixi sá cúú-xí nchaa ñáyiú ñá túú quidè ndáá núú-gã, ñáyiú quidè nchaa sá cuèhé sá dúhá. Te cuendá nchaa sá quidè-yu-áⁿ xiáⁿ ñá túú cuíní-yu tnúⁿ-yu tnúhu ndáá tnúhu Yá Ndiòxí cuendá cuu-xi ñⁿ sá vãha sá cúú-xí-yu.

19 Te cuéi ducaⁿ quidè-yu dico cùtnuní ndáá iní-yu nàcuáa ndúu sá sání iní Yá Ndiòxí ndihi nàcuáa ndúu sá quidè-gã dàtná cùtnuní iní nchaa dava-gá-yu, chi diu-gã dánèhé ñáhá-gã xii-yu.

20 Te ni vã ndácú-ó quíní núú-ó nãsa càa-gã, te ni vã ndácú-ó quíní-ó nãsa càa iní-gã, te ni vã ndácú-ó quíní-ó nãsa quidè-gã táxí tnùní-gã nchaa nduu nchaa quíú. Te cuéi ducaⁿ dico ndéé cùtnàhá ní ngáva ñuyú ní ngúíta nchaa ñáyiú tècú tnùní váha-yu nàcuáa ndúu sá sání iní-gã ndihi nàcuáa ndúu sá quidè-gã te ducaⁿ tècú tnùní-yu cuendá nchaa sá ní cadúha-gã ndéhé-yu ío ñuyú-a, núu xiáⁿ vã càchí-yu sá ñá túú cuéchi-yu.

21 Te cuéi ducaⁿ ní cutnúni iní-yu cuendá Yá Ndiòxí dico ñá túú cuíní-yu canehé-yu sá yíñuhu núú-gã nàcuáa tàù-xi cunduu. Te ni ñá túú cuíní-yu ndacáⁿ táhú-yu núú-gã cuendá nchaa sá vãha quidè ñaha-gã xií-yu, chi mee-ni nchaa sá ñá túú vèdana nàndíhi ñuhu iní-yu. Te quidè-yu dàtná quidè ñⁿ ñáyiú ñá túú ndècu ndihi nchaa sá xini tnùní-xi. Te uuⁿ-gã uuⁿ-gã tá quidè-yu cuáháⁿ.

22 Te càchí-yu sá cúú-yu ñáyiú ío váha saá sá xini tnùní-xi dico ñá ndáá, chi cùu-yu ñáyiú ío ñⁿ díquí-xi.

23 Te ñá túú cuíní-yu cáháⁿ-yu sá ío càhmu cuu Yá Ndiòxí Yáa ndécú nchaa nduu nchaa quíú, chi da nchaa sá ní cadúha mèè-yu quidè cahnú-yu. Te ní cadúha-yu nchaa sá nàhá ñáyiú ñá túú cùdí ndècu ñuyú-a. Te ní cadúha-yu sá nàhá quiti ndáva, ndihi sá nàhá quiti sàcuíta ñuhu mee-xi, ndihi sá nàhá nchaa dava-gã quiti, nchaa xiáⁿ quidè cahnú-yu.

24 Te xíáⁿ núu ní dáñá Yă Ndiôxí quidě-yu nchaa sá cuèhé sá dúhá sàni iní-yu. Te xíáⁿ ío quide ndihi tnahá-yu sá cuèhé sá dúhá sàcúú-xí yìqui; cuñú-yu.

25 Te ducaⁿ quidě-yu chi ñá túú sàndáá iní-yu tnúhu ndáá tnúhu Yá Ndiôxí. Te mee-ni tnúhu ndehnde sàndáá iní-yu, te nèhé-yu sá yíñúhu núú dâva sá ní cadúha-gá ío ñuyíú-a ndihi dava sá ndèè andiu te quide cahnú-yu, te ñá túú càchí-yu sá mée-gă ío càhnu cuu-gá, dico mee-gă xíní ñúhu-xí càháⁿ-yu sá ío càhnu cuu-gá ni caa ni quíhíⁿ. Te ndáá ndisa sá ío càhnu cuu-gá.

26 Te sá dúcáⁿ ñá túú quide váha-yu núu xíáⁿ ní dáñá-nă Yă Ndiôxí quidě-yu nchaa sá cuèhé sá dúhá sàni iní mée-yu. Te dava ñáyiu ðihí càháⁿ ndihi tnàhá-yu ndi mée ðihí-yu te ñá túú quidě-yu nàcuáa ní nduu táhú-yu cadá-yu.

27 Te ðiu-ni ducaⁿ xíquide dava cue téé chi sàni cuèhé sání ðuha iní-güedé sá cúú-xí yìqui cuñú-güedé ndi mée tnahá téé-güedé, chi càháⁿ ndihi tnàha ndi mee-güedé te ñá túú quide-güedé nàcuáa ní nduu táhú-güedé cada-güedé, te sá dúcáⁿ quide-güedé te ñá túú tnàhí cùu váha iní-güedé ndécú-güedé, te ducaⁿ tnàhí tàú-xi ndoho-güedé cundecu-güedé.

28 Te ñá túú tnàhí ñúhu iní-yu Yá Ndiôxí núu xíáⁿ duuⁿ duuⁿ ní dáñá ñihnu ñaha-gá xíí-yu sàni cuèhé sání ðuha iní-yu, te quidě-yu nchaa sá ñá túú tàú-yu cadá-yu.

29 Te nchaa núú să cuèhé sá dúhá cùnnu quidě-yu. Te cue téé càháⁿ ndihi-güedé ñáyiu ðihí te ñá ðúú ñàðihí-güedé cúú-yu. Te ðiu-ni ducaⁿ xíquide cue ñáyiu ðihí chi càháⁿ ndihí-yu cue téé te ñá ðúú yíí-yu cùu-güedé. Te mee-ni sá ñá túú váha quidě-yu sá cúú-xí tnàha ñáyíú-yu, te xihó-yu cundecu ndihí-yu sá ndécú ndihi dava-gá tnàha ñáyíú-yu, te ío sàni cuèhé sání ðuha iní-yu sá cúú-xí tnàha ñáyíú-yu, te ío cuédú iní-yu, te sàhni tnahá-yu, te ío plétú-yu, te dândahú tnàhă-yu, te cùu úhú iní-yu cue tnàha ñáyíú-yu, te ío yiti yùhú-yu.

30 Te càháⁿ cuèhé-yu cuendá nchaa dava-gá tnàha ñáyíú-yu, te cùu úhú iní-yu Yá Ndiôxí, te xio xio cuiní-yu cunuu tnúhu-yu, te mee-ni sàni iní-yu sá ío váha cunduú-yu, te ío quide cahnú-yu mée-yu, te ío sàni iní-yu sá cadá ùhú-yu tnàha ñáyíú-yu, te ñá túú sàndáá iní-yu ni tătă-yu ni nănă-yu.

31 Te ñá túú tècú tnùní-yu sá váha, te ñá túú quidě-yu ìⁿ sá càháⁿ-yu, te ñá túú cùu iní-yu ni ñáyiu cùu ndi meé-yu, te ni dâva-gá tnàha ñáyíú-yu, te ñá túú quide cahnu iní-yu ìⁿ sá cúmăní núú tnàhă-yu, te ni ñá túú cùndahú iní-yu tnàha ñáyíú-yu.

32 Te Yá Ndiôxí ní cachí-gá sá ncháá ñáyiu ducaⁿ xíquide quíhíⁿ-yu núú ùhú núú ndàhú. Te xíní-yu sá Yă Ndiôxí daquíhíⁿ ñàhá-gă xíí-yu núú ùhú núú ndàhú sá dúcáⁿ quidě-yu, dico uuⁿ-gá quidě-yu chi váha-gá cúú iní-yu cue ñáyiu quide datná quidě mée-yu.

2

Yá Ndiôxí cada ndáá-gá cuèchi nchaa ñáyiu ndècu ñuyíú

1 Te nchòhó ñáyiu càchí sá ío ndècu cuèchi dava-gá ñáyiu tnàhá-ndó ío ndècu cuèchi-ndo cuèi nágá ñáyiu cùu-ndo, chi tnàhá-ndó quide-ni-ndo nchaa nacuáa quide dava-gá ñáyiu càchí-ndó ndècu cuèchi-xi, te sá dúcáⁿ càháⁿ-ndó sá ndécú cuèchi ñáyiu-án te dàcaa-ndo cuèchi díquí-ndó chi tnàhá-ndó quide-ndo datná quidě-yu.

² Te nchoo xini-ó sã Yã Ndiõxí ío váha cùtnuní iní-gá nàcuáa cada ndáá-gá cuéchi ìⁿ ìⁿ nchoo ñáyiú ndècu ñuyíú-a, chi daquihíⁿ-gá nchaa ñáyiú quide nacuáa ní cáháⁿ-í núú ùhú núú ndàhú.

³ Te nchòhó ñáyiú ìⁿ-ní quide ndihí ñáyiú càchí mée-ndó sã ndécú cuéchi-xi dacuítí sã ná chãhu-ndo núú Yã Ndiõxí sá dúcáⁿ quide-ndo.

⁴ Te ñá túú cùu váha iní-ndó sã Yã Ndiõxí cùndàhú iní ñáhá-gã xii-ndo, te ni ñà túú cùu váha iní-ndó sã ío cuiní-gá cada càhnu iní-gá nchaa sã ñà túú váha quide-ndo, te ni ñà túú quide cuendá-ndó sã Yã Ndiõxí quidé váha ñaha-gã xii-ndo cuendá cuiní-gá sã nchòhó ndixi túu iní-ndó sã ñà túú quide váha-ndo ndècu-ndo.

⁵ Te nchòhó cúú-ndó ñáyiú ío sàá iní-xi, chi ñá túú cuiní-ndó ndixi túu iní-ndó sã ñà túú quide váha-ndo ndècu-ndo, te xiãⁿ núu ío-gá tá cùu vai tnúndòho sá cúú-xí-ndó. Te na sàá nduu tnúhu ndòho tnúhu ndàhú te ío ndoho-ndo, chi Yã Ndiõxí cada ndáá-gá nàcuáa ndùu cuéchi-ndo.

⁶ Te dàvá-áⁿ cada ndáá Yã Ndiõxí nchaa nàcuáa ndùu nchaa sá ní quide ìⁿ ìⁿ ñáyiú ndècu ñuyíú-a.

⁷ Te nchaa ñáyiú nchícúⁿ nihnu-ni quide mee-ni sá váha, ñáyiú-áⁿ nduu táhũ-yu cundecú-yu ndihí Yã Ndiõxí ni caa ni quihíⁿ, te ducaⁿ quide váha-yu chi cuiní-yu sá Yã Ndiõxí cuu váha iní ñáhá-gã xií-yu, te cuiní tucú-yu nduu táhũ-yu núú ío váha càa ndecu Yã Ndiõxí cundecú-yu ni caa ni quihíⁿ.

⁸ Te ío cùdééⁿ-gã núú nchaa ñáyiú ñùhu iní mee-ni sã cúú-xí mée-xi, te ñá túú sàndáá iní-yu tnúhu ndáá chi mee-ni sã cuèhé sá dúhá quidé-yu.

⁹ Te nchaa ñáyiú ducaⁿ xíquide ío ndíhú iní-yu. Te díhna-gá ñáyiú isràél ngúíta-xi ndohó-yu, te dàtnùní ngúíta-xi ndoho nchaa ñáyiú ñá túú cùu ñáyiú isràél.

¹⁰ Te nchaa ñáyiú ní quide váha, te Yã Ndiõxí cada-gá te ngúndecú-yu núú ío váha càa ndecu-gá, te cachí-gá sá ní quide váha-yu, te ío váha cuu iní-yu cundecú-yu. Te díhna-gá ñáyiú isràél ñáyiú ní quide váha ducaⁿ càa ñaha-gã xií-yu, te dàtnùní ducaⁿ càa ñaha-gã xii ñáyiú ñá túú cùu ñáyiú isràél ñáyiú ní quide váha.

¹¹ Te ñá túú quide cuendá-gá cuéi náí ñáyiú cúú-yu.

¹² Te nchaa ñáyiú ndècu ndihí nchaa tnúhu ní chídó tnùní ndíi Moisés, Yã Ndiõxí cada ndáá-gá cuéchi-yu nàcuáa càháⁿ nchaa tnúhu-áⁿ. Te nchaa ñáyiú ñá túú ndècu ndihí tnúhu ní chídó tnùní ndíi-áⁿ, Yã Ndiõxí vá cada ndáá-gá cuéchi-yu nàcuáa càháⁿ nchaa tnúhu-áⁿ. Dico nchaa ñáyiú quide nándi sá cuèhé sá dúhá dacuítí cùta nihnú-yu cuéi ndècu ndihí-yu tnúhu ní chídó tnùní ndíi Moisés àdi ñá túú ndècu ndihí-yu.

¹³ Te nchaa ñáyiú dícó-ni sàcúndedóho nchaa tnúhu ní cáháⁿ ndíi Moisés te ñá túú tníⁿ-yu, ñáyiú-áⁿ ñà túú cùdúú-yu núú Yã Ndiõxí, dico nchaa ñáyiú tníⁿ nchaa tnúhu ní cáháⁿ ndíi, ñáyiú-áⁿ càchí Yã Ndiõxí sá cúdúú-yu núú-gã, chi ñá túú-gã cuéchi-yu ndècu núú-gã.

¹⁴ Te nchaa ñáyiú ñá túú ndècu ndihí tnúhu ní chídó tnùní ndíi Moisés, te núu quidé-yu nchaa nàcuáa ní cáháⁿ ndíi te cùu-xi ìⁿ sá sání tnàhí iní mée-yu cadá-yu, te sá sání iní-yu-áⁿ cúú-xí ìⁿ tnúhu váha sá sánú ìchi ñaha xií-yu nàcuáa cada váha-yu cundecú-yu.

¹⁵ Te sá dúcáⁿ quidé-yu xiãⁿ cùtnùní sá sání iní-yu dàtná càháⁿ tnúhu ní chídó tnùní ndíi Moisés cada ñáyiú isràél, te ío váha cùtnuní iní-yu nchaa nàcuáa quidé-yu chi ndixi túu iní-yu òré ñá túú quide váha-yu.

16 Te sáá nduu te Yá Ndiöxí cúñaha-gã xii Xítoho Jesucristú cada ndáá-gá nchaa cuéchi ñáyi, nchaa sá sání iní méë-yu nduu yuhu, te cada-gá dàtná càháⁿ tnúhu sá sánú ichi ñaha xii-o nacuaá naníhí tãhú-ó, tnúhu sá dánèhè ñàhà-í xii-ndo.

Cuèndá ñáyi isràél ndihí cuèndá nchaa tnúhu ní chídó tnùní ndí Moisés

17 Te nchòhó ñáyi isràél nchaa-ndo cùu-ndo ndi mee-í, te càchí-ndó sã nchicúⁿ nihnu-ndo quide-ndo nchaa tnúhu ní càháⁿ ndí Moisés núu xiãⁿ ndécú vãha-ndo, te càchí-ndó sã ïo càhnu cuu-ndo sá ndécú ndihí-ndo Yá Ndiöxí.

18 Te cùtnuní iní-ndó nchaa nacuaá cuíní Yá Ndiöxí cada-ndo, te sá dúcáⁿ nchicúⁿ nihnu-ndo quide-ndo nacuaá càháⁿ tnúhu-án xiãⁿ cùtnuní iní-ndó nchaa sã ïo-gá vãha xini ñuhu-xi cada-ndo.

19 Te càchí-ndó sã ïo vãha xini-ndó cànuichi-ndo nchaa ñáyi ñá túú cùtnuní iní-xi, te càchí tucu-ndo sã ïo vãha xini-ndó nã canu ichi-ndo nchaa ñáyi ndècu ichi cuéhé ichi duha.

20 Te sãnu ichi-ndo nchaa ñáyi ïo nii díquí-xi, ndihí nchaa ñáyi vitna ta tècú tnùní nchaa sá vãha, te ducaⁿ quide-ndo chi ndècu ndihí-ndo nchaa tnúhu ní chídó tnùní ndí Moisés, te tnúhu-án cúú-xi tnúhu ndáá, chi sãnu ichi ñaha-xi xii-ndo nacuaá cada-ndo.

21 Te nchòhó dàcuaha-ndo ñáyi nãcuáa cadá-yu, te mee-ndo ñà túú dàcuaha-ndo cada-ndo nchaa nacuaá tàú-xi cunduu, te xãhaⁿ-ndo xii-yu sá vã cúú dùhú-yu te mee-ndo dùhu-ndo.

22 Te dàcuaha-ndó-yu sá cuè téé vã cúú càháⁿ ndihí-güedé ñáyi dñí te núu ñá díú ñàdihí-güedé cúú-yu, te ducaⁿ-ni cuè ñáyi dñí, vã cúú càháⁿ ndihí-yu téé te núu ñá díú yñ-yu cùu-güedé. Te nchaa sã xãhaⁿ-ndo vã cúú càda ñáyi te mee-ndo quide-ni-ndo, te xãhaⁿ-ndo xii-yu sá vã cànéhé-yu sá yññuhu núú nchaa sã càchí-yu cùu ndióxí-yu, te mee-ndo nèhé-gá quidé-ndó, chi dùhu-ndo nchaa sã ndécú vèññuhu.

23 Te càchí-ndó sã ïo cùnuu nchaa tnúhu ní chídó tnùní ndí Moisés, te ñá túú quide-ndo nchaa nacuaá ní càháⁿ ndí, te sá dúcáⁿ quide-ndo-án te dàquee tíhú-ndó Yá Ndiöxí.

24 Te quèe ndáá-xi nãcuáa càháⁿ-xi núú tütú Yá Ndiöxí nãcuáa quide-ndo-án núú càchí-xi sá nchaa ñáyi ñá túú cùu ñáyi isràél càháⁿ cuéhé-yu cuèndá Yá Ndiöxí sá cuèndá-ndó.

25 Te nchòhó ñáyi isràél nchaa-ndo cùu-ndo ndi mee-í, te tnàhá-ndó ndècu ndihí-ndo seña ññ-ndo, te vãha-ni sá dúcáⁿ te núu quide-ndo nchaa nacuaá ní càháⁿ ndí Moisés. Dico núu ñá túú quide-ndo nchaa nacuaá ní càháⁿ ndí ña, te ñá túú nãndíhí-xi sá cúú-ndó ñáyi isràél cuè ndècu seña ññ-ndo.

26 Te nchaa ñáyi ñá túú ndècu ndihí seña ññ-xi, te núu quidé-yu nchaa nãcuáa ní càháⁿ ndí Moisés, te cùu-yu dàtná cue ñáyi ndècu ndihí seña ññ-xi, chi quidé-yu nchaa nãcuáa ní càháⁿ ndí.

27 Te ñáyi ñá túú ndècu ndihí seña ññ-xi, te núu na càdá-yu nchaa nãcuáa ní càháⁿ ndí Moisés, te ñáyi-án càchí-yu sã ñá túú quide ndáá nchaa nchòhó ñáyi ndècu ndihí seña ññ-xi, chi ndècu ndihí-ndo nchaa tnúhu ní chídó tnùní ndí te ñá túú quide-ndo nacuaá càháⁿ tnúhu-án.

28 Te nchòhó ñáyi isràél, ñáyi nchicúⁿ nihnu-ni quide nchaa nacuaá ta quide tnahi-ndo véxi, ñá túú quide-ndo sá cúú-ndó ñáyi isràél, te mee-ndo ndècu seña ññ-ndo dico ñá túú quide-ndo nacuaá tàú-xi cada nchaa ñáyi

ndècu seña ñi-xi, te mee-ni seña-án sãha-ndo ñi-ndo te ñá túú quide-ndo nacuaa cuiñi Yá Ndiöxí cada-ndo.

²⁹ Te nchaa ñáyiú sãndáá ndisa iní-xi Yá Ndiöxí, ñáyiú-án cúú ndisá-yu ñáyiú isràél, te sa ní nduu ndoo ní nduu nine iní-yu chi Espiritú Yá Ndiöxí ducaⁿ ní quide-xi, dico ñá díú sã sãha-yu seña ñi-yu dàtná ní cachí ndí Moisés. Te ñáyiú-án cúú vãha iní ñhá Yá Ndiöxí xií-yu cuéi ñá túú càháⁿ váha tñaha ñáyiú-yu cuendá-yu.

3

¹ Te sá dúhá càháⁿ-í te ío dava ñáyiú quesàhá-yu sá ííⁿ-ní cùu ñáyiú ñá túú cùu ñáyiú isràél ndihí nchoo ñáyiú isràél, te quesaha tùcú-yu sá ííⁿ-ní quide tucu-xi cuéi na cuãha àdi vá cuãha seña ñi-yu.

² Dico yúhú càchí-í sá ncháá ñáyiú isràél ío-gá cúnùu-yu, chi ío titní núú sã váha ní quide ñaha Yá Ndiöxí xií-yu, chi ní sãñaha-gã tnúhu-gá ndécú ndíhí-yu.

³ Te davá-yu ñá túú cuiñi-yu cada ndáá-yu, dico ñá díú sã xiãⁿ te cùyica iní Yá Ndiöxí ñá túú quide ndáá-gá.

⁴ Dico ñháá chi xini ñuhu-xi sá ncháá ñáyiú cada cuendá-yu sá Yá Ndiöxí cúú-gã Yaá quidé ndáá cui^{ti}, te cuéi ncháá-yu na càchí-yu sá ñá túú quide ndáá-gá, dico mee-gã chi quide ndáá-ni-gá. Te núú tùtú-gá càháⁿ-xi nãcuáa ní xáhaⁿ ííⁿ téé ní xíndecu ndéé sanaha xi-gã, te duha ní xáhaⁿ-dë:

Yöhó Dútú Ndiöxí, cùtnuní iní ñáyiú sá ío ndáá càháⁿ-n, te cùnuu nahi-ni tnúhu-n cuéi òré càchí ñáyiú sá ñá túú càháⁿ ndáá-n. Duha ní xáhaⁿ tée ndéé sanaha-ãⁿ xii-gã càchí-xi núú tùtú-gá.

⁵ Te cuendá nchaa sá cuèhé sá dúhá quide ñáyiú, xiãⁿ cùtnuní iní-yu sá Yá Ndiöxí cúú-gã Yaá ío váha quide ndáá, chi mee-gã ñá túú dùcaⁿ quide-gá. Te cuéi ducaⁿ dico vá caní iní-yu sá Yá Ndiöxí ñá túú quide ndáá-gá sá dándòho ñaha-gã xií-yu na sãá nduu, te núú ducaⁿ na caní iní-yu, te sãni iní-yu dàtná sãní iní cue ñáyiú ñá túú ndècu ichi-gã.

⁶ Te vá dúcáⁿ caní iní-yu, chi núú Yá Ndiöxí ñá túú quide ndáá-gã ñá, te vá cúú càda ndáá-gã nchaa cuéchi cue ñáyiú ñuyúú-a te núú ducaⁿ.

⁷ Te núú yúhú ná caní iní-í càháⁿ-í ííⁿ tnúhu ndehnde, te sá tnúhu-án te caní tucu iní-í sá quidé càhnu-gá-í tnúhu ndáá tnúhu Yá Ndiöxí, te sá dúcáⁿ ná càháⁿ-í te caní tucu iní-í sá vã cúú càháⁿ Yá Ndiöxí sá ndécú cuéchi-í.

⁸ Te núú na caní tucu iní-í sá váha-gã cada-í nchaa sá cuèhé sá dúhá cuendá Yá Ndiöxí cada-gã sá váha, dico ñá ndáá. Te ío ñáyiú càháⁿ cuèhé cuendá-í te càchí-yu sá díú-ní dùcaⁿ dacuaaha-í ñáyiú dico ñá ndáá sá dúcáⁿ dànehé-í-yu, te ñáyiú-án nachaha-yu tnúhu càháⁿ-yu, chi ducaⁿ tàú-xi cunduu.

Nchaa ñáyiú ñuyúú-a ndècuéchi-yu

⁹ Te vitna càchí dava ñáyiú sá ío-gá cúnùu nchoo cue ñáyiú isràél dàcúúxi dàva-gã ñáyiú, dico yúhú càchí-í sá ñháá, te sa ní cachí tnúhu ndáá-í xii-ndo sã nchaa ñáyiú ndècuéchi-yu cuéi ñáyiú isràél te cuéi ñáyiú ñá túú cùu ñáyiú isràél.

¹⁰ Te núú tùtú Yá Ndiöxí càchí-xi:

Vá yõo ííⁿ quide ndáá,

¹¹ te ní vá yõo ííⁿ tècú tnùní tnúhu váha, te ní vá yõo ííⁿ nànducu nihnu Yá Ndiöxí.

¹² Chi ncháá-yu ñá túú nchicúⁿ nihnú-yu ichi váha, te ncháá-yu cùu-yu ñáyiú xíndecu neñúú sá cúú-xí Yá Ndiöxí.

Te ni ñⁿ-yu ñá túú quidé-yu ñⁿ sá vâha.

13 Te cada iní-ndó sã yúhũ-yu cùu-xi datná cúú ñⁿ yaú núú yíndũxi ndíyi núú ïo ndehe sàháⁿ,

te ducaⁿ sãtnahá-xi cùu yuhú-yu, chi ïo càháⁿ cuèhé-yu, te mee-ni dândahú-yu nchaa tnàha ñáyiú-yu.

Te cada iní-ndó sã vènenú cóó yíhi yùhú-yu chi mee-ni càháⁿ úhú-yu cuèdá tnàha ñáyiú-yu.

14 Te ïo iní-yu càháⁿ úhú tnáhã-yu.

15 Te àúⁿ nã cuu àúⁿ nã xíãⁿ xĩsahni tnàhá-yu.

16 Te nchaa núú xicá cùu-yu quide úhú iní-yu nchaa tnàha ñáyiú-yu nàcuáa ndihú iní ñáyiú-áⁿ.

17 Te ñá túú cuini-yu cundecu ndihi tnàha váha-yu.

18 Te ñá túú sàni iní-yu canehé-yu sã yíñũhu núú Yã Ndiõxi.

Duha quidé-yu càchí-xi núú tùtú-gá.

19 Te cùtnuní iní-ó sã nchaa tnúhu ní chídó tnùní ndíi Moisés cúú-xi cuèdá nchaa ñáyiú nchicúⁿ nihnu nchaa tnúhu-áⁿ. Te tnúhu-áⁿ cúú-xi cuèdá sã vã yõo tnáhi cachí sã ñá túú cuèchi-xi, te ducaⁿ te nchaandi túhú ñáyiú cutnùní iní-yu sã ná chãhu-yu nchaa sã quidé-yu núú Yã Ndiõxi.

20 Te ducaⁿ càda-xi chi ni ñⁿ ñáyiú vá càchí-ó sã vã cùndècu cuèchi-yu núú Yã Ndiõxi cuèdá-ni sã nchicúⁿ nihnú-yu nchaa tnúhu sã ní chídó tnùní ndíi Moisés, te tnúhu-áⁿ càchí tnúhu-xi cuèdá-ni sã cùtnùní iní-ó sã ndécú-ó ïchi cuèhé ïchi duha.

Te núu na quindáá iní-ó Xítohó Jesucristú te naníhi tàhú-ó

21 Te vitna ní cutnùní iní-ó sã ñá díú sã cádá-ó nchaa nacuáa ní cáháⁿ ndíi Moisés cudíu-o núú Yã Ndiõxi, chi mee-gã quidé cùdũu-o núú-gã. Te núú tùtú ndíi Moisés ndíhi núú tùtú cue téé ní xóo cáháⁿ tnúhu Yã Ndiõxi ndéé sanaha càháⁿ-xi nàcuáa cada ñaha-gã xii-o vitna.

22 Te ducaⁿ cùdũu-o núú Yã Ndiõxi te núu na quindáá iní-ó Xítohó Jesucristú. Te dũu-ni ducaⁿ cùdũu nchaa ñáyiú ñuyú te núu na quindáá iní ñáhã-yu xii-gã, chi ñⁿ-ni cùu-o nchaa-o sã cúú-xi Yã Ndiõxi.

23 Chi ncháa-yu ndècu cuèchi-yu, chi ñá ñⁿ-yu quidé-yu nàcuáa cáháⁿ Yã Ndiõxi sã cùu-yu ñáyiú quide váha.

24 Dico Yã Ndiõxi ïo váha iní-gã chi ní quide ñaha-gã xii-o ñⁿ sá vâha, chi dicó-ni ducaⁿ ní quide-gã nàcuáa vá cùndècu-gã cuèchi-o núú-gã, chi Xítohó Jesucristú ní sati níñí-gã te ní xíhí-gã, te ducaⁿ ní yáha-gã cuèdá sã vã cùndècu-gã cuèchi-o.

25 Te Yã Ndiõxi ní taxi ndecu-gã Xítohó Jesucristú núú ñáyiú ñuyú-a, te ní xíhí-gã sã cuèdá nchaa yicá cuèchi-yu, te ducaⁿ ní cuu cuèdá sã ncháá ñáyiú na quindáá iní ñáhã xii-gã te vá náchãhu-yu cuèchi-yu núú Yã Ndiõxi. Te Yã Ndiõxi ní quide ndee ñni-gã nchaa sã cuèhé sã dúhá ní quide cue ñáyiú ní xíndecu ndéé sanaha. Te xíãⁿ ní xíhí Xítohó Jesucristú cuèdá cutnùní iní-ó sã Yã Ndiõxi cúú-gã Yaá ïo váha quide ndáá cuèi ducaⁿ ní quide ndee ñni-gã nchaa sã ní quide cue ñáyiú-áⁿ.

26 Núú xíãⁿ vitna ní cutnùní ndisa iní-ó sã quidé ndáá-gã, te quide-gã sã cuè ñáyiú vá cùndècu-gã cuèchi-yu núú-gã, te núu na quindáá iní-yu Xítohó Jesucristú.

27 Te vitna vá càchí-ó sǎ ʎo càhnu cuu-o cuendá sǎ ñà túú-gǎ cuéchi-o ndècu núú Yǎ Ndiǒxí, te ducaⁿ ñà túú-gǎ cuéchi-o ndècu núú-gǎ cuendá sǎ sàndáá iní-ó Xítóhó Jesucristú, te ñá díú sǎ cuendá nchaa tnúhu ní cáháⁿ ndíi Moisés.

28 Te cùtnuní iní-ó sǎ ndèda-ní càa ñáyiú vá cùndècu-gǎ cuéchi-yu núú Yǎ Ndiǒxí te núu na quìndáá iní-yu Xítóhó Jesucristú cuéi ní quidé-yu nchaa nàcuáa ní cáháⁿ ndíi Moisés àdi ñá túú ní quidé-yu.

29 Te cùtnuní iní-ó sǎ Yǎ Ndiǒxí cúú-gǎ Ndiǒxí nchaandi túhú ñáyiú, te ñá díú mèe-ní Ndiǒxí ñáyiú isràèl cúú-gǎ.

30 Te ìⁿndíi díí-gǎ cúú-gǎ Ndiǒxí, te nchaa ñáyiú sàndáá iní ñáhá xii Xítóhó Jesucristú te vá cùndècu-gǎ cuéchi-yu núú Yǎ Ndiǒxí cuéi cúú-yu ñáyiú isràèl àdi ñá túú cúú-yu.

31 Te ñá díú sǎ sàndáá iní-ó Xítóhó Jesucristú te cachí-ó sǎ ñà túú nàndíhi nchaa tnúhu sǎ sánú ʎchi ñaha xii-o nacuáa cada-o, te ñáhá chi sǎ dúhá sàndáá iní-ó-gǎ te xiǎⁿ nchícúⁿ nihnu-o quide-o nacuáa càháⁿ tnúhu-áⁿ.

4

Cuendá ndíi Àbrahám

1 Te vitna na cachí tnúhu-í xii-ndo cuendá ndíi Àbrahám téé ní cuu ñani tnáhá-ó ní xíndecu ndéé sanaha.

2 Te ndíi-án ñà túú ní xíndecu cuéchi ndíi núú Yǎ Ndiǒxí, dico ñá díú cuendá ìⁿ chiúⁿ ní quide ndíi ducaⁿ ñà túú ní xíndecu cuéchi ndíi núú-gǎ. Chi núu cuendá ìⁿ chiúⁿ ní quide ndíi ducaⁿ ñà túú ní xíndecu cuéchi ndíi núú Yǎ Ndiǒxí ñá, te cada càhnu ndíi mee ndíi ní cùu, dico ñá díú núú Yǎ Ndiǒxí cada càhnu ndíi mee ndíi te núu ducaⁿ ní quide ndíi.

3 Te chí dándàcu iní nàcuáa càháⁿ-xi núú tùtú Yǎ Ndiǒxí núú càchí-xi: “Té Àbrahám ní sàndáá iní-dé Yǎ Ndiǒxí, te xiǎⁿ ní cachí-gǎ sǎ cúú-dé núú-gǎ”, duha càchí-xi núú tùtú-gǎ.

4 Te sǎ cúhúⁿ yǎhu ìⁿ téé quide chiúⁿ, te vá càchí-ó sǎ xiǎⁿ cúú-xí ìⁿ táhú sǎ cúú-xí-dé chi yáhu tnàhí-dé cúú-xí.

5 Te vá yǎo ìⁿ ndàcu cada ìⁿ chiúⁿ nacuáa cudíu-xi núú Yǎ Ndiǒxí. Te ñá túú nǎ chiúⁿ xini ñuhu-xi cada ñáyiú te cudíu-yu núú-gǎ, chi xini ñuhu-ni-xi sǎ quìndáá-ni iní-yu-gǎ. Te diu-gǎ càchí-gǎ sǎ ñáyiú ndècu ichi cuehé ichi duha vá cùndècu-gǎ cuéchi-yu núú-gǎ, te núu na quìndáá iní ñáhǎ-yu xii-gǎ.

6 Te diu-ní ducaⁿ ní cáháⁿ ndíi Dàvíí, chi ní cachí ndíi sǎ ʎo váha táhú nchaa ñáyiú ní cachí Yǎ Ndiǒxí cudíu núú-gǎ, dico ñá díú cuendá ìⁿ chiúⁿ quidé-yu cudíu-yu núú-gǎ.

7 Te duha ní cachí ndíi:

Váha táhú nchaa ñáyiú quide cahnu iní Yǎ Ndiǒxí nchaa cuéchi-xi, te ñá túú-gǎ quidé cuendá-gǎ nchaa sǎ cuèhé sǎ dúhá ní quidé-yu.

8 Váha táhú-yu chi Yǎ Ndiǒxí càchí-gǎ sǎ ñà túú-gǎ cuéchi-yu.

Duha ní cachí ndíi Dàvíí.

9 Te ñá díú mèe-ní ñáyiú ngúndecu sèñá ñi-xi ducaⁿ váha táhú-yu, chi tnàhǎ ñáyiú ñà túú ngúndecu sèñá ñi-xi ducaⁿ váha táhú-yu. Te sa nàha-o sǎ Yǎ Ndiǒxí ní cachí-gǎ sǎ cúú-dé ndíi Àbrahám núú-gǎ cuendá sǎ ni sàndáá iní ñáhá ndíi xii-gǎ.

10 Te cunaha-ndo sǎ díhna-gǎ ní cachí Yǎ Ndiǒxí sǎ cúú-dé ndíi Àbrahám núú-gǎ te dátuní ngúndecu sèñá ñi ndíi.

11 Te ní ngúndecu señá ñi ndí cuendá xíáⁿ cuu-xi ñⁿ señá sá cúdiu ndí núú Yá Ndióxi. Te ndéé cútñahá vátá ngúndecu-gá señá ñi ndí, te sa cúdiu ndí núú-gá chi ní sándáá iní ñáhá ndí xii-gá. Te sá dúcáⁿ ñà túú ndècu señá ñi ndí cútñahá ní sándáá iní ndí Yá Ndióxi xíáⁿ ní cuu ndí dàtná ñⁿ díhí dütú nchaa ñáyiú sándáá iní ñáhá xii-gá, ñáyiú ñà túú ní ngúndecu señá ñi-xi, te cùdiu-yu núú-gá.

12 Te ndí Abrahám ní cuu tucu ndí dàtná ñⁿ díhí dütú nchaa ñáyiú ní ngúndecu señá ñi-xi, dico ñà díú cuendá-ni sá ní ngúndecu señá ñi-yu cùu ndí díhí dütú-yu, chi cuendá sá sándáá iní-yu Yá Ndióxi nchicúⁿ nihnú-yu nàcuáa ní quide ndí ní sándáá iní ñáhá ndí xii-gá ndéé cútñahá vátá ngúndecu-gá señá ñi ndí.

Yá Ndióxi cada-gá nchaa nàcuáa ní cachí-gá te núu na quíndáa iní-ó-gá

13 Te Yá Ndióxi ní xáhaⁿ-gá xii ndí Abrahám sá ndúú tãhú ndí cunuu ndí ñuyú, ndíhí cue déhe ndí, ndíhí nchaa dava-gá cue ñani tnáhá ndí vitna cacu túu. Te ducaⁿ ní xáhaⁿ Yá Ndióxi xii ndí ndíhí cue ñani tnáhá ndí, chi ní sándáá iní ñáhá ndí xii-gá núu xíáⁿ ní cúdiu ndí núú-gá. Te ducaⁿ ní xáhaⁿ-gá xii ndí dico ñà díú cuendá sá ní quide ndí nàcuáa ní xáhaⁿ Yá Ndióxi xii ndí Moisés cada ñáyiú ndéé cuèé-gá.

14 Te núu mee-ni ñáyiú nchicúⁿ nihnu quide nacuáa ní cáháⁿ ndí Moisés ní nduu tãhú-yu cunúu-yu ñuyú-a ni cùu ña, te ñà túú xini ñuhu-xi quíndáa iní-ó Yá Ndióxi, te ñà túú nandíhí tnúhu ní xáhaⁿ Yá Ndióxi xii ndí Abrahám ní cùu te núu ducaⁿ.

15 Te núu ñⁿ ñáyiú ñà túú quide nacuáa càháⁿ tnúhu sá sánú ichi ñaha xii-o nacuáa cada-o te nacháhu-yu sá dúcáⁿ quidé-yu. Te núu ñà túú tnúhu sá sánú ichi ñaha-xi xii-o nacuáa cada-o ni cùu ña, te ñà túú cuèchi-o ni cùu.

16 Te ducaⁿ ní xáhaⁿ Yá Ndióxi xii ndí Abrahám nàcuáa cada-gá, chi cuendá sá ní sándáá iní ñáhá ndí xii-gá. Te ducaⁿ ní quide-gá chi ío váha iní-gá, dico ñà díú sá ñⁿ chiuⁿ ní quide ndí ducaⁿ ní xáhaⁿ-gá. Te sá dúcáⁿ ní cuu te cùu-xi ñⁿ tnúhu ndáá sá cúu-xí nchaa ñani tnáhá ndí, ñáyiú sándáá iní ñáhá xii-gá dàtná ní sándáá iní ñáhá mèe ndí xii-gá, te ñà díú mèe-ni cuendá nchaa ñani tnáhá ndí nchicúⁿ nihnu nchaa nàcuáa ní cáháⁿ ndí Moisés, chi ndí Abrahám-án ní cuu ndí dàtná ñⁿ díhí dütú cue ñáyiú sándáá iní ñáhá xii Yá Ndióxi.

17 Te núu tütú Yá Ndióxi cáháⁿ-xi nàcuáa ní xáhaⁿ-gá xii ndí, te duha ní xáhaⁿ-gá: "Yóhó té Abrahám ní quide ñaha-í xii-n dàtná ñⁿ díhí dütú cue ñáyiú xíndecu nihí ñuyú." Duha ní xáhaⁿ Yá Ndióxi xii ndí, cächí-xi núu tütú-gá. Te Yá Ndióxi náhá ndáá-gá sá cadá-xi nàcuáa ní xáhaⁿ-gá xii ndí Abrahám, te diu-ni-gá cúu Yáa ní sándáá iní ndí, te diu-ni-gá dándoto-gá ñáyiú ní xihí, te diu-ni-gá quidé tá ngúndecu nchaa sá vátá cùndècu-gá ñuyú-a.

18 Te Yá Ndióxi ní xáhaⁿ-gá xii ndí Abrahám sá ío cuéhé dèhe ndí coo, te ío ní sándáá iní ndí nàcuáa ní xáhaⁿ-gá dico ñà túú ní cùtnuní iní ndí nása cada-gá, chi ío ní sahnu ndí. Te cuendá sá dúcáⁿ ío ní sándáá iní ndí tnúhu ní xáhaⁿ-gá núu xíáⁿ ní cuu ndí díhí dütú vai ñáyiú xíndecu nihí ñuyú.

19 Te ndí Abrahám ñuhu ndí ñⁿ cièndú cuíá cútñahá ducaⁿ ní xáhaⁿ Yá Ndióxi xii ndí, te ní cùtnuní iní ndí sá ñà túú tãhú ndí sá cóó dèhe ndí ndíhí ñadihí ndí ndí Sára, chi ndí ndúu-yu sa ní sahnu vñhí-yu, te cuèí ducaⁿ dico ní sándáá-ni iní ndí nàcuáa ní xáhaⁿ Yá Ndióxi.

20 Te ñá túú ní sàni ìṣṣàni úú iní ndíi nàcuáa ní xáhaⁿ Yá Ndiòxí cada-gá sá cúú-xí ndíi, chí da uuⁿ-gá váha ní sàndáá iní ndíi nàcuáa ní xáhaⁿ-gá, te ní cachí ndíi sá ìo càhnu cuu-gá.

21 Te ní cutnùní ndáá iní ndíi sá Yá Ndiòxí ndácú-gá quidé-gá nchaa sá càháⁿ-gá.

22 Te sá ní sàndáá iní ndíi nàcuáa ní càháⁿ Yá Ndiòxí, núu xíáⁿ ní cachí-gá sá cúú ndíi ìṣṣàni tée ñá túú cuèchi-xí núú-gá.

23 Te ní ngódó tñuní núú tütú Yá Ndiòxí cuèndá ndíi Àbrahám sá ní cachí-gá sá ñà túú cuèchi ndíi núú-gá, te ñá díú-ní cuèndá méé ndíi ní ngódó tñuní núú tütú-gá.

24 Chí tñàhá cuèndá-ó nchaa-o ní ngódó tñuní núú tütú-gá. Te càhí-gá sá ñà túú cuèchi-o núú-gá chí sàndáá iní-ó-gá, te díu-gá cúú-gá Yáá ní dándótó ñàha xii Xítohó Jesucristú Yáá cúú Xítohó-ó.

25 Te Yá Ndiòxí ní cachí-gá sá díú Xítohó Jesucristú cuú-gá cuèndá nacháhu-gá nchaa cuèchi-o. Te ní xihí-gá te ní ndoto-gá cuèndá nchaa-o vǎ cùndècu-gá cuèchi-o núú Yá Ndiòxí te núu na quèndáá iní-ó-gá.

5

Ío váha tñàhá ñáyíu càchí Yá Ndiòxí sá ñà túú cuèchi-xi

1 Te vitna, ñá túú-gá cuèchi-o ndècu núú Yá Ndiòxí chí sàndáá iní-ó Xítohó Jesucristú, te ío váha ndècu ndíhi-o Yá Ndiòxí vitna sá cuèndá Xítohó Jesucristú.

2 Te cuèndá sá ní sàndáá iní-ó Xítohó Jesucristú xíáⁿ díu-gá ní quide ní ngúndecu váha-o núú Yá Ndiòxí, te ducaⁿ-ní cùndecu-o, te ío cùdíí iní-ó chí ndècu ndíhi-o tñúhu ndee iní sá sáá nduu ngúndecu-o núú ío váha càa ndecu Yá Ndiòxí.

3 Te ñá díú-ní sá cuèndá sá ndúú tǎhú-ó cùndecu-o núú ndécú-gá cùdíí iní-ó, chí cùdíí iní-ó ndòho-o cuèndá-gá, chí cùtñuní iní-ó sá núu na ndòho-o cuèndá-gá te cunduu càhnu-gá iní-ó,

4 te núu cùu-o ñáyíu ta quide cahnu-gá iní-xi te cùtñuní sá cúú-ó ñáyíu quide váha, te núu cùu-o ñáyíu quide váha te uuⁿ-gá tá ngúndecu ndíhi-o tñúhu ndee iní cuáháⁿ sá càdá váha ñàha Yá Ndiòxí xii-o.

5 Te núu ducaⁿ te vǎ ìṣṣàni ndùu ndixi cuèchi iní-ó sá ndécú ndíhi-o tñúhu ndee iní ngúndecu váha-o. Te Espiritú sá ní taxi Yá Ndiòxí ndécú ndíhi-o xíáⁿ quidé-xí cùtñuní iní-ó sá ìo cùu iní ñàhá Yá Ndiòxí xii-o.

6 Te nchoo ñà túú vèdana ná ní ndàcu-o cada-o cuèndá dàcácu nihnu-o mèe-o, díco Xítohó Jesucristú ní xihí-gá cuèndá-ó, ndíhi cuèndá nchaa dava-gá ñáyíu ñá túú tñàhá tñúhu ndíhi Yá Ndiòxí, te ní xihí-gá mei ndùu taú-xi cuú-gá.

7 Te cudana-ni núu xihí ìṣṣàni ñáyíu sá cuèndá ìṣṣàni ñáyíu quide ndáá, te áma xihí tucu ìṣṣàni-yu sá cuèndá ñáyíu quide váha tñàha ñáyíu-xi.

8 Te Yá Ndiòxí ní quide-gá sá nchóó cùtñuní iní-ó sá ìo cùu iní ñàhá-gá xii-o, chí cùtñàhá ndécú-ó ìchi cuehé ìchi duha te ní tendaha-gá Xítohó Jesucristú ní quixi-gá ñuyíú-a ní xihí-gá cuèndá-ó.

9 Te sá cuèndá sá ní xihí Xítohó Jesucristú xíáⁿ ñá túú-gá cuèchi-o ndècu núú Yá Ndiòxí, te vitna ní cutnùní ndáá iní-ó sá vǎ dáquìhíⁿ ñàhá-gá Yá Ndiòxí xii-o núú ùhú núú ndàhú sá cuèndá Xítohó Jesucristú.

10 Te cùtñàhá ñá túú tñàhá tñúhu-o ndíhi Yá Ndiòxí ní cùu ní xihí Xítohó Jesucristú Yáá cúú Dèhe-gá cuèndá cuu váha iní ñàhá-gá xii-o, te ducaⁿ te nduu tǎhú-ó cùndecu-o ndíhi-gá ní caa ní quìhíⁿ cuèndá sá ní ndoto Xítohó Jesucristú.

11 Te ndetu-o sáá nduu ngündecu-o ndihi-gá ni caa ni quíhíⁿ, te ñá díú-ní xiǎⁿ quidé-ó chi tnàhá cùdii ìní-ó Yá Ndióxi, chi Xítohó Jesucristú ní quide-gá ducaⁿ cùdii ìní-ó-gá, te diu-ni Xítohó Jesucristú ní quide-gá ní nucúndecu váha-o ndihi Yá Ndióxi.

Nàcuáa ní quide ndii Ádán ndihi nàcuáa ní quide Xítohó Jesucristú

12 Te ndii Ádán ñá túú ní quide ndáá ndii núú Yá Ndióxi núu xiǎⁿ ní ngündecu nchaa sá cuèhé sá dúhá ñuyú-a, te sá cuendá nchaa sá cuèhé sá dúhá quide ñáyiú xiǎⁿ xihí-yu, te nchaa-yu xihí-yu chi nchaa-yu quidé-yu nchaa sá cuèhé sá dúhá.

13 Te sa quide-gá-yu nchaa sá cuèhé sá dúhá te dǎtnúni ní ngündecu nchaa tnúhu sá ní chídó tnúni ndii Moisés nàcuáa ní xáhaⁿ Yá Ndióxi cada ñáyiú, te nchoo cùtnúni iní-ó sá núu ñá túú tnúhu sá sánú ìchi ñaha xii-o nàcuáa cada-o, te ñá túú cuèchi-o sànuu.

14 Te ndéé cùtnàhá ní xíndecu ndii Ádán ní quesaha-xi xihí ñáyiú, te ducaⁿ-ni xihí-yu ndéé ní sáá nduu ní xíndecu ndii Moisés. Te ducaⁿ ní xihí-yu chi ní quidé-yu nchaa sá cuèhé sá dúhá cuèi ñá túú ní quidé-yu nàcuáa ní quide ndii Ádán, chi ndii-áⁿ ñá túú ní sàndáá iní ndii nàcuáa ní xáhaⁿ Yá Ndióxi cada ndii. Te ndii Ádán ní cuu ndii ìⁿ tée cùu cahnu ní xíndecu ñuyú-a, te sátá dúcáⁿ te ní quixi Xítohó Jesucristú te Yáá-áⁿ ïo-gá càhnu cuu-gá.

15 Te sá ní quide ndii Ádán te vá càchí-ó sá ìⁿ-ní cùu-xi ndihi sá ní cachí Yá Ndióxi nduu táhú-ó vitna. Te sá ñá túú ní quide ndáá ndii xiǎⁿ nchaa ñáyiú xihí-yu, dico Yá Ndióxi ío váha iní-gá chi ío váha ní quide-gá sá cùú-xí nchaa nchoo ñáyiú ndècu ñuyú-a, chi dicó ducaⁿ ní cachí-gá sá naníhí tàhú-ó, te ìⁿndii-ni tée tnàhá-dé ío váha ní quide-dé sá cùú-xí-ó, te tée-áⁿ cùú-dé Xítohó Jesucristú.

16 Te sá ní quide ìⁿndii-ni ndii Ádán ñá túú ìⁿ-ni cuu-xi ndihi sá ní quide Yá Ndióxi sá cùú-xí-ó, chi ndii-áⁿ ñá túú ní quide ndáá ndii núú-gá. Te sá dúcáⁿ ní quide ndii te xiǎⁿ ní cuu-xi cuèchi díhna nuu ní quide ndii, núu xiǎⁿ ní cachí Yá Ndióxi sá cuè ñáyiú quíhíⁿ-yu núú ùhú núú ndáhú nacháhu-yu nchaa sá cuèhé sá dúhá quidé-yu. Dico mee-gá ní quide sá cuè ñáyiú naníhí tàhú-yu dicó-ni ducaⁿ, te ducaⁿ te vá cùndècu-gá cuèchi-yu núú-gá cuèi ío vài cuèchi-yu.

17 Te sá dúcáⁿ ñá túú ní quide ndáá ìⁿndii-ni ndii Ádán-áⁿ núu Yá Ndióxi, xiǎⁿ ní quide-xi xihí nchaa ñáyiú. Te sá cuendá sá ní quide ìⁿndii-ni Xítohó Jesucristú xiǎⁿ ío váha ní quide ñaha Yá Ndióxi xii ñáyiú, chi dicó-ni ducaⁿ ní nduu táhú-yu cùdíú-yu núú-gá. Te nchaa ñáyiú ducaⁿ cùdíu núú-gá nduu táhú-yu cunúú-yu ndihi Xítohó Jesucristú cuendá sá ní quide-gá sá váha sá cùú-xí-yu.

18 Te sá dúcáⁿ ní quide ndii Ádán ñá túú ní quide ndii nàcuáa ní xáhaⁿ Yá Ndióxi xii ndii ìⁿ xito, núu xiǎⁿ ní cachí-gá sá ncháá ñáyiú tàú-yu nacháhu-yu nchaa cuèchi-yu, dico Xítohó Jesucristú ní quide-gá ìⁿ sá váha cuendá nchaa ñáyiú vá cùndècu-gá cuèchi-yu núú Yá Ndióxi te núu na quíndáá iní ñáhá-yu xii-gá, te ducaⁿ te cundecú-yu ndihi-gá ni caa ni quíhíⁿ.

19 Te sá ñá túú ní sàndáá iní ìⁿndii-ni ndii Ádán nàcuáa ní xáhaⁿ Yá Ndióxi xii ndii, xiǎⁿ ní nguínchicúⁿ nihnu nchaa ñáyiú quidé-yu nchaa sá cuèhé sá dúhá. Te ducaⁿ ìⁿndii-ni Xítohó Jesucristú ní quide-gá nàcuáa ní xáhaⁿ Yá Ndióxi cuendá sá Yá Ndióxi cachí-gá sá cùdíú-yu núú-gá.

20 Te Yá Ndiöxí ní xáhaⁿ-gã xii ndíi Moisés nàcuáa cada ñáyiú, te sá cuèndá tnúhu-áⁿ uuⁿ-gá ní ngúíta nchaa ñáyiú quidé-yu nchaa sá cuèhé sá dúhá, te Yá Ndiöxí uuⁿ-gá cundàhú iní ñáhá-gã xii-yu tucu.

21 Te sá cuèndá nchaa cuèchi ñáyiú xiáⁿ xihí-yu, dico Yá Ndiöxí ío váha iní-gá chi ðiu-gá ní cachí-gá sá ncháá ñáyiú na tnàhá tnúhu ndíhi ñaha xii-gá cudú-yu núú-gã, te cundecú-yu ndíhi-gá ni caa ni quíhíⁿ, te ducaⁿ chi Xítohó Jesucristú ní quide-gá sá váha sá cúú-xí-yu.

6

Ñáyiú ñá túú-gã ndécú ichi cuehé ichi duha ndécú-yu cuèndá Xítohó Jesucristú

1 Te sá dúcáⁿ quide Yá Ndiöxí, te vá cání iní-ó cànchicúⁿ nihnu-ni-o ichi cuehé ichi duha, chi ñá díú sá cànchicúⁿ nihnu-o ichi-áⁿ te ngóo càni iní-ó sá ïo-gá cundàhú iní ñáhá-gã xii-o.

2 Te vá cúú cànchicúⁿ nihnu-o ichi cuehé ichi duha, chi nchoo cùu-o datná cue ñáyiú sa ní xihí, núú xiáⁿ vá cúú-gã cànchicúⁿ nihnu-o ichi-áⁿ.

3 Te sa nàha-o sá cuèndá sá ní sandute-o quèe-xi sá tnàhá tnúhu-o ndíhi Xítohó Jesucristú. Te sá ní sandute-o quèe tucu-xi sá cúú-ó dàtná ñáyiú ní xihí ndíhi-gá.

4 Te ñá díú-ní sá ní xihí-ó ndíhi-gá chi quèe tucu-xi sá ní nguindüxi-o ndíhi-gá te ní ndoto-o dàtná ní ndoto mee-gã ní dándótó ñaha Dútú Ndiöxí Yaa ío càhnu cuu, te ducaⁿ ní cuu cuèndá sá vá cundècu-gã-ó dàtná ní xíndecu-o.

5 Te núú ìⁿ-ni cùu-o ndíhi Xítohó Jesucristú cuèndá sá cúú-ó dàtná ñáyiú ní xihí ndíhi-gá, te ndáá sá cúú-ó dàtná ñáyiú ní ndoto ní ngúndecu váha dàtná ní ndoto mee-gã ní nucúndecu váha-gá.

6 Te nchoo nàha-o sá cúú-ó ñáyiú ío ndècu cuèchi-xi ni cùu, dico sátá ní cuu-o dàtná ñáyiú ní xihí dàtná ní xihí Xítohó Jesucristú núú cùrúxí, te ndéé dàvá-áⁿ ní dáñá-ó ncháa ichi cuehé ichi duha ndècu-o ni cuu, te ñá túú-gã cúnúu sá cuèhé sá dúhá iní-ó.

7 Chi nchaa ñáyiú ní xihí ñá túú-gã ndécú-yu ichi cuehé ichi duha.

8 Te núú cùu-o datná ñáyiú ní xihí dàtná ní xihí Xítohó Jesucristú ñá, te cùnuni ndáá iní-ó sá cundècu-o ndíhi-gá ni caa ni quíhíⁿ.

9 Te sa nàha-o sá Xítohó Jesucristú ní xihí-gá te ní ndoto-gá te vá ìⁿ ndùu ìⁿ quíú-gá te cuú-gá, chi ñá túú nãgá sá cáda cúú-gá.

10 Te Xítohó Jesucristú ní xihí-gá ìⁿ xito-ni sá cuèndá nchaa cuèchi nchoo ñáyiú ñuyíú, te vá ìⁿ ndùu-gá cuú-gá, te ndècu-ni-gá sá cúú-xí Yá Ndiöxí.

11 Núú xiáⁿ nchòhó cada iní-ndó sá dàtná sá ní xihí-ndó vá cundècu-gá-ndó sá cúú-xí ichi cuehé ichi duha, chi ndècu-ná-ndó sá cúú-xí Yá Ndiöxí, chi ní tnàhá tnúhu-ndo ndíhi Xítohó Jesucristú Yaa cúú Xítohó-ó.

12 Te núú xiáⁿ vá dáñá-gã-ndó cùnúu ni ìⁿ sá cuèhé sá dúhá iní-ndó cuèndá sá vá cáda-gã-ndó ni ìⁿ sá cuèhé sá dúhá sàni iní-ndó.

13 Te vá dáñá-ndó tàxi tnuni ñáhá ni ìⁿ sá cuèhé sá dúhá-áⁿ xii-ndo cuèndá sá vá cáda-gã-ndó, te chí dáñá ná tàxi tnuni ñáhá Yá Ndiöxí xii-ndo, te chí dáñá ná chùndee ñaha-gá cada-ndo mèe-ni sá váha, te ducaⁿ te cada iní-ndó sá cúú-ndó dàtná ñáyiú ní xihí te ní ndoto ndècu.

14 Te ducaⁿ càda-ndo chi vá ndácú-gã ni ìⁿ sá cuèhé sá dúhá tàxi tnuni ñáhá-xí xii-ndo, chi Yá Ndiöxí cundàhú iní ñáhá-gã chùndee ñaha-gá xii-ndo.

Te ducaⁿ chi ñá túú-gã cúnùu nchaa tnúhu sá ñí chídó tnùní ndíi Moisés cada ñáiyu.

Ñáiyu nchicúⁿ nihnu sá vãha

15 Te ñá díú sã cundàhú iní ñáhá Yã Ndiõxí xii-o chindee ñaha-gã ndihi sá ñà túú-gã cúnùu nchaa tnúhu ní chídó tnùní ndíi Moisés, te cachí-ó sã cúú-ní cùndecu-o ichi cuehé ichi duha.

16 Te nchoo xìní-ó sã núu na cuãha-o tnúhu cunu cuechi-o núú ñáiyu cuiní cunu cuechi-o núú-xi, te cùu-ná-ó ñáiyu xínu cuechi núú-yu te quide-o nchaa chiuhⁿ tahú-yu. Te ducaⁿ sãtnahá-xi cùu nchaa ñáiyu quide nchaa sã cuehé sá dúhá chí tàxi tnuní ñáhá-ñá-xi xii-yu, te ñá nchaa xiãⁿ dácuíta ñáha-xi xii-yu, te ñá-ni ducaⁿ sãtnahá-xi cùu nchaa ñáiyu sãndáá iní ñáhá xii Yã Ndiõxí chí tàxi tnuní ñáhá-gã xii-yu, te quidé-yu nchaa sã vãha ñàcuáa cuiní mée-gã cada-yu.

17 Te nchòhó ducaⁿ ñí xóo cada-ndo nchaa sã cuehé sá dúhá ní cùu, dico táxãhu xii Yã Ndiõxí chí vitna ñí yùhu ñí iní-ndó quide-ndo nchaa nacuaá càháⁿ tnúhu-gã sã ñí ngúndecu ndihi-ndo.

18 Te vitna ñá túú-gã táxi tnùní ñáhá ñí ñá sã cuehé sá dúhá xii-ndo, te quide-ná-ndó nchaa sã vãha tàuchiuⁿ Yã Ndiõxí cada-ndo.

19 Te duha càháⁿ-í cuendá cue ñáiyu xínu cuechi cuendá sã nchòhó tecú tnùní-ndó ñàcuáa ndùu tnúhu càháⁿ-í. Te nchòhó ní dáñá-ndó ñí tàxi tnùní ñáhá nchaa sã cuehé sá dúhá xii-ndo, te ñá túú ní quide-ndo nacuaá ñí càháⁿ Yã Ndiõxí cada-ndo chí da vñi-gã ní quide-ndo, te ñá-ni ducaⁿ chí dáñá ná tàxi tnuní ñáhá Yã Ndiõxí xii-ndo vitna cuendá cada-ndo mée-ni sã vãha ñàcuáa cuiní mée-gã cada-ndo, te ducaⁿ te cuu-ndo ñáiyu quide ndáá cundecu núú-gã.

20 Te nchoo cùtnahá ní xóo cada-o nchaa sã cuehé sá dúhá ñà túú ní xóo cada-o ñí ñá sã vãha cuiní Yã Ndiõxí cada-o.

21 Te dicó sácáⁿ-núú sãñaha nchaa sã cuehé sá dúhá-ãⁿ te núu na càda-o, te ñí ñá sã vãha vá ñihí-ó te núu na càda-o nchaa xiãⁿ, te ñá nchaa xiãⁿ dácuíta nihnu ñaha-xi xii-o.

22 Te vitna ñá túú-gã cúú-ó ñáiyu ndècu ichi cuehé ichi duha, chí cùu-ná-ó ñáiyu quide nchaa nacuaá càháⁿ Yã Ndiõxí. Te sã dúhá quide-o cuu ndisa-xi ñá sã vãha sã cúú-xi-ó, te cùu-o ñáiyu quide ndáá ndécú-ó núú-gã vitna, te sáá nduu cùndecu-o ndihi-gã ñí caa ñí quíhíⁿ.

23 Te nchaa sã cuehé sá dúhá dicó dácuíta nihnu ñaha-xi xii-o, dico Yã Ndiõxí ní quide-gã sã dicó-ni ducaⁿ ndùu táhú-ó cùndecu-o ndihi-gã ñí caa ñí quíhíⁿ, chí ñí tnahá tnúhu-o ndihi Xitohó Jesucristú Yaa cúú Xitohó-ó.

7

Cuendá ñáiyu tnãndaha

1 Te nchaa nchòhó ñáiyu ndècu ndihi-í ichi Xitohó Jesucristú sa ñaha-ndo nacuaá càháⁿ tnúhu sã dánèhé ñáhá xii-o nacuaá cada-o cùndecu-o, chí tnúhu-áⁿ càháⁿ-xi dóho nchaa ñáiyu xíndecu vñvú ñuyúú-a.

2 Te nchaa ñáiyu ñáhi sa ndècu yí-xi, te ñá tnúhu-áⁿ dánèhé ñáhá-xi xii-yu sã vã dáñá-yu yí-yu, dico núu na cùu yí-yu te ñá túú-gã ná càháⁿ tnúhu-áⁿ cuendá-yu.

3 Dico núu vátá cùu-gã yí-yu te ñá túú ndùu váha-xi ñaquehéⁿ-yu ñngá téé, dico núu na cùu yí-yu te quendóo mée-yu, te ñá túú ñágá càháⁿ tnúhu sã

dánèhè ñáhá xii-yu nàcuáa cadá-yu te ducaⁿ te cuu naquehéⁿ-yu ingá téé, te ñá túú cùu-xi ìⁿ cuéchi.

⁴ Te nchòhò cue ñáyiú ndècu ndìhi-í ichi Xitohó Jesucristú cúú-ndó dàtná ñáyiú ní xihí dàtná ní xihí-gá. Te xiǎⁿ ñá túú-gǎ táxi tñuní ñáhá nchàa tñúhu ní chídó tñuní ndí Moisés xii-ndo. Te ducaⁿ ní cuu cuendá nchòhò ngúndecu-ndo ndìhi Xitohó Jesucristú Yáa ní xihí ní cùu te ní ndoto-gá. Te ducaⁿ ní cuu cuendá nchaa nchoo ñáyiú ndècu ichi-gá cada-o nchàa nacuáa càháⁿ Yá Ndióxi.

⁵ Te nchoo ní xíndecu-o ìchi cuehé ichi duha, te tñúhu sá sánú ìchi ñaha xii-o nacuáa cada-o cùndecu-o cachí-xi sá ñá túú vǎha cundecu-o ìchi-áⁿ, te nchoo dà uuⁿ-gá ní quide-o nchàa sá cuèhé sá dúhá sá dúcáⁿ càháⁿ tñúhu-áⁿ, te sá dúcáⁿ ní quide-o te ta xíta nihnu-o cuǎháⁿ ní cùu.

⁶ Te vitna cada iní-ó sá cúú-ó dàtná ñáyiú ní xihí sá cúú-xi tñúhu sá dánèhè ñáhá xii-o nacuáa cada-o cùndecu-o, chi ñá túú-gǎ cùnùu-xi, te vitna mee-nǎ Espiritú Yá Ndióxi chíndèe ñaha-xi xii-o xinu cuechi-o núú-gǎ, te ñá díú cuendá nchaa tñúhu sá ní ngúndèe ndéé díhna cada ñáyiú xinu cuechi-o núú-gǎ vitna.

Nchaa sá cuèhé sá dúhá ñúhu iní-í

⁷ Te cuèi duha càháⁿ-í dico vá cúú tñàhí càháⁿ-ó sá tñúhu sá sánú ìchi ñaha xii-o nacuáa cada-o cùndecu-o ñá díú tñúhu vǎha cùu-xi. Te yúhú ñá túú cùtñuní iní-í ná cúú nchàa sá cuèhé sá dúhá ní cùu te núu ñá túú tñúhu-áⁿ ní càhí tñúhu-xi xii-í, te ní ñá túú cùtñuní tucu iní-í núu vǎha àdi ñá túú vǎha sá nchídó iní-í sá ndécú ndìhi tñaha ñáyiú-o ní cùu te núu ñá túú tñúhu-áⁿ ní càhí-xi sá vǎ cúú cùu iní-í sá ndécú ndìhi-yu.

⁸ Te tñúhu-áⁿ ní dánèhè ñáhá-xi xii-í sá vǎ cúú càda-í ní ìⁿ sá cuèhé sá dúhá, dico sá cuendá tñúhu-áⁿ uuⁿ-gá ducaⁿ ní sani iní-í ní quide-í. Te núu ñá túú tñúhu sá sánú ìchi ñaha xii-o nacuáa cada-o cùndecu-o ña, te ñá túú cùtñuní iní-í sá quidè-í nǎndi sá cuèhé sá dúhá ní cùu.

⁹ Te cùtñàhá vátá ñihí-gá-í tñúhu-áⁿ te ñá túú tñàhí ná sání iní-í ndécù-í ní cùu, dico sátá ní ñihí-í tñúhu-áⁿ te ní cutñuní iní-í sá ndécú cuèchi-í, te ta xíta nihnu-í cuǎháⁿ ní cùu.

¹⁰ Te núu ní quide-í nchaa nàcuáa càháⁿ tñúhu-áⁿ te sa ndéé ama-gá naníhí tǎhú-í ní cùu, dico ñá túú ní quide-í núu ní cutñuní iní-í sá tá xíta nihnu-í cuǎháⁿ ní cùu.

¹¹ Te sá xii tñúhu-áⁿ xiǎⁿ uuⁿ-gá ní cunuu nchàa sá cuèhé sá dúhá ní dándàhú ñáhá-xi xii-í te ní quide-í, te ta dàcuíta nihnu ñaha-xi xii-í cuǎháⁿ ní cùu.

¹² Te tñúhu sá sánú ìchi ñaha xii-o nacuáa cada-o cùndecu-o cuu-xi tñúhu jó yíñúhu ní taxi Yá Ndióxi, te ìⁿ ìⁿ tñúhu-áⁿ cúú-xi mèe-ni tñúhu vǎha, te ní ìⁿ tñúhu cuèhé tñúhu duha ñá túú ñúhu tñahá.

¹³ Te vá cúú càhí-í sá tñúhu vǎha-áⁿ ní quide-xi ta xíta nihnu-í cuǎháⁿ ní cùu, chi nchaa sá cuèhé sá dúhá ní quide-í, xiǎⁿ tá dàcuíta nihnu ñaha-xi xii-í cuǎháⁿ ní cùu, te sá cuendá tñúhu vǎha-áⁿ ní cutñuní iní-í sá quidè-í nchaa sá cuèhé sá dúhá, te xiǎⁿ tá xíta nihnu-í cuǎháⁿ ní cùu. Te sá cuendá nchaa nàcuáa càháⁿ tñúhu sá sánú ìchi ñaha xii-o nacuáa cada-o cùndecu-o ní cutñuní iní-í sá xidó ndécú cuèchi-í ní cùu.

¹⁴ Te tñúhu-áⁿ ní taxi Espiritú Yá Ndióxi ndécú ndìhi-o cachí tñúhu-xi nàcuáa cada vǎha-o. Te nchoo cùu-o mee-ni ñáyiú yíca cuèchi, te tàxi tñuní ñáhá nchàa sá cuèhé sá dúhá xii-o ní cuu.

¹⁵ Dico nchoo tñàhá iní-ó càda-o nchaa sá vǎha dico ñá túú quide-o, te da nchaa sá ñá túú tñàhá iní-ó càda-o quide-o, te ñá túú cùtñuní iní-ó nǎ cuendá ducaⁿ quide-o.

16 Te sá dúcáⁿ quide-o nchaa sá ñà túú tnàhá iní-ó, te xíãⁿ ndíxí tũu iní-ó sã tnũhu sá dúcáⁿ sãnu ichi ñaha xii-o nacuaá cada-o cùndecu-o cuu-xi tnũhu ío vãha.

17 Te cùtnuní iní-ó sã nchaa sá cuèhé sá dúhá ñũhu iní-ó, xíãⁿ quidé-xí dùcaⁿ quide-o sá ñà túú vãha, te ñá díú sá cáhú iní mée-ó dùcaⁿ quide-o.

18 Te cùu-o cue ñáyiu sãni cuehé sãní dùha iní-xi, te cuiní-ó càda-o nchaa sá vãha dico ñá túú ñihí ndée-ó càda-o.

19 Te cuiní-ó càda-o nchaa sá vãha dico ñá ndácú-ó, te ñá túú cuiní-ó càda-o datná quidé nchaa ñáyiu ndècu ichi cuehé ichi duha, chi ñáyiu-ãⁿ mee-ni nchaa sá cuèhé sá dúhá quidé-yu, dico ñu-ni nchaa xíãⁿ quidé-ó tnàhá-ó.

20 Te sá dúcáⁿ quide-o nchaa sá ñà túú tnàhá iní-ó càda-o te ñá díú mée-o ducaⁿ cahu iní-ó quide-o, chi nchaa sá cuèhé sá dúhá ñũhu iní-ó xíãⁿ quidé-xí dùcaⁿ quide-o.

21 Te ducaⁿ tnàhí yãha-o òré cuiní-ó càda-o sá vãha, chi da mee-ni nchaa sá cuèhé sá dúhá quide-o.

22 Te ío cùdĩĩ iní-ó càda-o nchaa nacuaá càháⁿ Yã Ndiõxí,

23 te ñicó-ní sã ncháá sá cuèhé sá dúhá ñũhu iní-ó, xíãⁿ quidé-xí ngani ñaha-xi xii-o ñá túú quide-o sá vãha sãni iní-ó càda-o, te ducaⁿ yãha-o chi nchaa sá cuèhé sá dúhá-ãⁿ cùnũu-xi taxi tnuní ñáhá-xí xii-o.

24 ;Te ndàhú ní cuu nchoo! Chi vá yõo ñⁿ ni ndàcu cada nacuaá vá táxí tnùnì ñáhá-gã nchaa sá cuèhé sá dúhá xii-o sá tá dàcuíta nihnu ñaha xii-o cuáháⁿ ní cùu.

25 Te táxãhu xii Yã Ndiõxí sá Xítohó Jesucristú ní quide-gá cuendá sá vã táxí tnùnì ñáhá-gã ní ñⁿ sá cuèhé sá dúhá xii-o, sá tá dàcuíta nihnu ñaha xii-o cuáháⁿ ní cùu. Te mee-o sãni iní-ó càda-o nchaa nacuaá càháⁿ Yã Ndiõxí, dico núu nchaa sá cuèhé sá dúhá ná cùnũu-xi taxi tnuní ñáhá-xí xii-o, te ñu-ni nchaa xíãⁿ cada-o.

8

Ñáyiu quide nchaa nacuaá càháⁿ Espíritú Yã Ndiõxí

1 Te vitna nchaa nchoo ñáyiu tnàhá tnũhu ndihí Xítohó Jesucristú vá cuíta nihnu-gá-ó, chi ñá túú-gã ndécú-ó ichi cuehé ichi duha, chi mee-ñã nchaa ñacuáa càháⁿ Espíritú Yã Ndiõxí quidé-ó.

2 Te Espíritú Yã Ndiõxí-ãⁿ táxí tnùnì ñáhá-xí xii-o, te ducaⁿ chi ndècu ndihí-o Xítohó Jesucristú, te sá dúcáⁿ táxi tnuní ñáhá Espíritú-gá xii-o núu xíãⁿ ñá túú-gã táxí tnùnì ñáhá ní ñⁿ-gá sá cuèhé sá dúhá xii-o, te ducaⁿ quide Espíritú-gá cuendá sá vã cuíta nihnu-o, te ñu-ni Espíritú-gá quidé-xí cuendá sá nchóo ndũu táhú-ó cùndecu-o ndihí-gá ní caa ní quihíⁿ.

3 Te nchoo ñã ní ndàcu-o cada-o nchaa nacuaá càháⁿ tnũhu sá sánú ichi ñaha xii-o nacuaá cada-o cùndecu-o, núu xíãⁿ tnũhu-ãⁿ ñà túú ní ñihí ndée-xí càda-xi cuendá sá nchóo vá cuíta nihnu-o. Dico Yã Ndiõxí ní tendaha-gã Déhe mee-gã ní quixi ñuyúú-a, te Yaá-ãⁿ cúú-gã ñⁿ ñáyiu, te càa-gã datná cáá ñáyiu ndècu cuéchi-xi xĩndecu ñuyúú-a, te sá cuendá nchaa cuéchi nchaa nchoo ñáyiu xĩndecu ñuyúú-a ní quixi-gá, te ndée dàvá-ãⁿ ní quide-gá cuendá sá vã táxí tnùnì ñáhá-gã ní ñⁿ sá cuèhé sá dúhá xii-o.

4 Te ducaⁿ ní quide-gá cuendá nchoo nchicúⁿ nihnu-o quide-o nacuaá càháⁿ tnũhu sá sánú ichi ñaha xii-o nacuaá cada-o, chi ñá túú-gã cùnũu ní ñⁿ sá cuèhé sá dúhá iní-ó, chi Espíritú Yã Ndiõxí-ñã táxí tnùnì ñáhá-xí xii-o.

5 Te nchaa ñáyi cùnnu nchaa sá cuèhé sá dúhá ínì-xi mee-ni xǎñ ñúhú ínì-yu te quidé-yu. Dico nchoo ñáyi quide nchaa nacuaá cuíní Espíritú Yá Ndióxi ñúhú ínì-ó mée-ni nacuaá cǎháⁿ Espíritú-gǎ-áⁿ te quide-o.

6 Te núu mee-ni nchaa sá cuèhé sá dúhá cùnnu ínì-ó, te cuíta nihnu-o, dico núu mee-ni nchaa tnúhu cǎháⁿ Espíritú Yá Ndióxi cùnnu ínì-ó, te ío váha cuu ínì-ó cùndecu-o ndihí-gǎ ni caa ni quíhíⁿ.

7 Te nchaa ñáyi ñúhu ínì mee-ni sá cuèhé sá dúhá cùu úhú ínì-yu Yá Ndióxi, te ñá túú cuíní-yu cadá-yu nàcuáa cǎháⁿ-gǎ, te ni ñǎ ndácǔ-yu cadá-yu.

8 Te nchaa ñáyi ducaⁿ cùnnu nchaa sá cuèhé sá dúhá ínì-xi-áⁿ ñà túú cùdíú-yu núú Yá Ndióxi.

9 Te nchòhó chi ñá túú-gǎ cùnnu sá cuèhé sá dúhá ínì-ndó, chi mee-nǎ nàcuáa cǎháⁿ Espíritú Yá Ndióxi quidé-ndó, te ducaⁿ quide-ndo chi ndècu ndihí-ndo Espíritú-gǎ, te ñu-ni Espíritú-gǎ-áⁿ ñí tendaha Xítohó Jesucristú véxi ndècu ndihí-o, te nchaa ñáyi ñá túú ndècu ndihí Espíritú sá ñí tendaha Xítohó Jesucristú véxi ndècu ndihí-o ñá túú ndècu ndihí ñahá-yu xii-gǎ.

10 Te núu ndècu ndihí-ndo Xítohó Jesucristú, te cuéi na cùu yiqui cùñú-ndó sǎ cuendá nchaa sá cuèhé sá dúhá ío ñuyúú-a, dico ínì-ndó chi cundecu ndihí-xi Yá Ndióxi chi ñá túú-gǎ cuéchi-ndo ndècu núú-gǎ.

11 Te núu ndècu ndihí-ndo Espíritú Yá Ndióxi Yaa ní dándótó ñàha xii Xítohó Jesucristú, te ñu-ni-gǎ cada te ndoto yiqui cùñú-ndó sǎ tá xíta nihnu cuaháⁿ núu na cùú-xi, te ducaⁿ chi ndècu ndihí-ndo Espíritú-gǎ.

12 Te nchòhó ñáyi ndècu ndihí-í ichi Xítohó Jesucristú, ñá túú-gǎ tau-ndó cùnnu ni ñⁿ sá cuèhé sá dúhá ínì-ndó nàcuáa vá cùndecu-gǎ-ndó ìchi cuehé ichi dúha.

13 Chi núu na cùnnu sá cuèhé sá dúhá ínì-ndó te cuíta nihnu-ndo, chi quíhíⁿ-ndó núú úhú núú ndàhú. Dico núu ñàha-ndo mée-ndo chindee ñàha Espíritú Yá Ndióxi xii-ndo cuendá sá vá cùnnu-gǎ sá cuèhé sá dúhá ínì-ndó ñá, te nduu táhú-ndó cùndecu-ndo ndihí-gǎ ni caa ni quíhíⁿ te núu ducaⁿ na càda-ndo.

14 Chi nchaa ñáyi quide nchaa nacuaá sànu ichi ñàha Espíritú Yá Ndióxi cùú-yu déhe-gǎ.

15 Te Espíritú sá ñí taxi Yá Ndióxi ndécú ndihí-o ñá túú quide-xi sá nchóo yùhú-ó cùnno cuechi-o núú-gǎ, chi Espíritú-áⁿ quidé-xi sǎ nchóo cùu-o déhe-gǎ, te ñu-ni Espíritú-áⁿ quidé xǎhaⁿ-o xii Yá Ndióxi: “jòhó Dútú Ndióxi cùú-n Tǎtá méé-ndí!”, duha xǎhaⁿ-o xii-gǎ.

16 Te ñu-ni Espíritú-gǎ-áⁿ tnàhá tnúhu-xi ndihí ínì-ó, te cǎháⁿ ndáá-xi sá nchóo cùu-o déhe-gǎ.

17 Te sá dúcáⁿ cùu-o déhe Yá Ndióxi xǎñ ní cachí-gǎ sá tnàhá-ó ndùu táhú-ó sǎ ñí nduu táhú Xítohó Jesucristú, te ducaⁿ ndùu táhú-ó te núu na càda ndee ínì-ó ndòho-o datná ní ndoho Xítohó Jesucristú, te núu ducaⁿ te ío cuu càhnu-o ndihí-gǎ ni caa ni quíhíⁿ.

18 Te yúhú cǎchí-í sá ñà túú ñǎ cada-xi cuéi ndòho-o cuendá-gǎ ndécú-ó ñuyúú-a, chi ío váha càa núú ndúú táhú-ó cùndecu-o na saá nduu.

19 Te nchaandi túhú sá ñí cadúha Yá Ndióxi ní taxi ndecu-gǎ ñuyúú-a ndètu cahnu-á-xi sáá nduu cǎchí-gǎ sá ío càhnu cuu nchaa déhe-gǎ.

20 Te nchaa sá ñí cadúha Yá Ndióxi ní taxi ndecu-gǎ ñuyúú-a ní sáá nduu ñà túú-gǎ cùú-xi sǎ váha sá cùú-xi-gǎ. Te ñá díú mée sá ñí taxi ndecu Yá Ndióxi ñuyúú-a ducaⁿ ni sàni ínì-xi cunduu, chi mee-gǎ ducaⁿ tnàhí ní cachí-gǎ

cunduu sá sàa nduu vǎ cúú-xí sǎ vǎha sá cúú-xí-gǎ, dico sáa tucu nduu te nchaa xiǎⁿ cuu tucu-xi sá vǎha sá cúú-xí-gǎ.

21 Te nchaa sá ní taxi ndecu-gǎ ñuyíú-a vá cúndúu-gǎ-xi dàtná cáá-xí vitna te ni vǎ dǎnǎa-gǎ, chi nduu saa-xi te ngúndecu váha-xi dàtná ngúndecu váha nchaa cue déhe-gǎ.

22 Te nàha-o sá ncháándì tǔhú sá nchító ní cadúha Yá Ndiǒxí ndécú ñuyíú-a ndòho-xi vitna datná ndóhó ñⁿ ñadihí sa ní tnahá òré cacu déhe-xi.

23 Te ñá díú-ní nchàa sá dúcáⁿ ní cadúha-gǎ-ǎⁿ ducaⁿ ndòho-xi, chi tnahá nchoo dùcaⁿ ndoho-o ndecu-o ñuyíú-a tucu, te nchoo sá ní nduu táhú-ó Espíritú Yá Ndiǒxí Espíritú sá ní cachí méé-gǎ nduu táhú-ó ñhnanuu. Te ío ndòho tnahá-ó ndècu-o ñuyíú-a te ndètu cahnu-ná-ó sáa nduu ndàda saa-gǎ yiqui cuñú-ó, te cáhǎⁿ-gǎ sá cúú-ó déhe-gǎ.

24 Te Yá Ndiǒxí ní quide-gǎ ní naníhí tǎhú-ó nǔu xiǎⁿ ní ngúndecu ndihi-o tñuhu ndee iní ndétú-ó sáa nduu càda-gǎ nàcuáa ní cachí-gǎ, te núu sa ndècu ndihi-o sá ndúú tǎhú-ó te vá cúú cáhǎⁿ-ó sá cúndètu-o sá ndúú tǎhú-ó chi sa ndècu ndihi-o.

25 Dico sá ndétú-ó ndúu táhú-ó cùu-xi sá vǎtá cúndècu ndihi-gǎ-ó, te xini ñuhu-ni-xi cada ndee-ni iní-ó cúndetu-o ndéé sáa nduu ndúu táhú-ó sá dúcáⁿ ní cachí Yá Ndiǒxí nduu táhú-ó.

26 Te Espíritú-gǎ chindee ñàha-xi xii-o nacuáa níhí ndéé-ó cùndecu-o, te nchoo ñà túú xini-ó cáhǎⁿ ndihi-o Yá Ndiǒxí nàcuáa tǎu-xi cunduu dico Espíritú-gǎ cáhǎⁿ ndàhú-xi núú-gǎ cuèndá-ó cuèi òré ñá ñihí-ó tñuhu cáhǎⁿ-ó cuèndá nchaa sá ío cuini-ó cácaⁿ-ó nǔú-gǎ.

27 Te Yá Ndiǒxí sa nàha ndáá-gǎ nchaa nàcuáa sàni iní-ó, te ducaⁿ sá naha ndáá-gǎ nchaa nàcuáa sàni iní Espíritú-gǎ. Te Espíritú-gǎ cáhǎⁿ ndàhú-xi núú-gǎ cuèndá nchoo ñáyiú yìndaha-gǎ, te cáhǎⁿ ndàhú-xi núú-gǎ nàcuáa cuini méé-gǎ cunduu.

Nchaa sá ná càda ñaha ñáyiú te vá ndácú-yu nadatùhú-yu iní-ó chi ndacu nahi-ni-o yǎha-o nchàa sá ná cáda ñàhǎ-yu

28 Te sa nàha-o sá Yá Ndiǒxí quidé-gǎ sá ncháá sǎ yǎha-o ndècu-o ñuyíú-a cùu-xi sá vǎha sá cúú-xí nchòo cue ñáyiú cùu iní ñàhǎ xì-gǎ, chi cùu-o ñáyiú ní cáhǎⁿ-gǎ cundecu ndihi-gǎ dàtná ní cachí iní méé-gǎ.

29 Te ndéé cùtnàhǎ vátá ngǎva-gǎ ñuyíú, te Yá Ndiǒxí sa nàha-gǎ nándi cùu ñáyiú cundecu ndihi-gǎ, te ñu-ni ndéé dàvá-áⁿ ní cachí-gǎ sá ñáyiú-áⁿ cunduu váha iní-yu dàtná váha iní Déhe mee-gǎ, te ducaⁿ ní cachí-gǎ cuèndá sá Déhe mee-gǎ-áⁿ cunuú-gǎ núú nchàa ñáyiú cundecu ndihi-gǎ.

30 Te nchaa ñáyiú ducaⁿ ní cachí-gǎ cundecu ndihi-gǎ ndéé cùtnàhǎ vátá ngǎva-gǎ ñuyíú cáhǎⁿ ñàhǎ-gǎ xií-yu vitna, te nchaa ñáyiú ducaⁿ cáhǎⁿ-gǎ cáhí-gǎ sá ñà túú-gǎ cuèchi-yu ndècu núú-gǎ, te ñu-ni ñáyiú-áⁿ cachí-gǎ sá ío càhnu cuú-yu.

31 Te vitna ní cutnùni iní-ó, te ñá túú nǎgǎ cani iní-ó, chi Yá Ndiǒxí ndécú ndihi ñàha-gǎ xii-o, te vá yòo ñⁿ-gǎ ndacu quehndé nihnu cuèndá sá vǎ chíndèe ñàha-gǎ xii-o.

32 Te Yá Ndiǒxí ñá túú ní cùdíi iní-gǎ Déhe-gǎ sá cùú-gǎ cuèndá nchaa nchoo ñáyiú xìndecu ñuyíú-a, te sá dúcáⁿ ndéè Déhe-gǎ ñá túú ní cùdíi iní-gǎ xiǎⁿ cùtnùni iní-ó sá táxí-gǎ nchaandi tǔhú sá xini ñuhu-o.

³³ Te vá yõo ìᵐ ndacu cacáⁿ cuéchi núú Yá Ndiõxí cuendá nchaa ñáyiú ní cachí-gá cundecu ndihi-gá te núu ná cúú cuéchi-yu ndècu. Chi mee-gã càchí-gá sá ñà túú ndècu cuéchi-yu núú-gã.

³⁴ Te vá yõo ìᵐ ndacu daquihíⁿ ñáhá xii-o núú ùhú núú ndàhú, chi Xítóhó Jesucristú ní xihí-gá te ní ndoto-gá, te cuándaa-gá núú ndécú Dütú Ndiõxí núcõo-gá xio cùha-gá, te ducaⁿ ìo cùnuu-gá, te yàcáⁿ càháⁿ ndàhú-gá núú Dütú Ndiõxí cuendá-ó.

³⁵ Te vá yõo ìᵐ ndacu cada ñaha xii-o ìᵐ sá ñà túú vãha cuendá sá vã cúú ìní ñáhá-gã Xítóhó Jesucristú xii-o, te ni tnúndòho tnúhu ndàhú, te ni sá ndìhú ìní-ó ñã cútñuní ìní-ó nãsa cada-o càcu nihnu-o ìᵐ sá ná yãha-o, te ni nchàa sá cadá ñaha ñáyiú sá cuendá-gã, te cuéi-ní sá vã ñihí-ó sá cóhó sá cáxí-ó, te cuéi-ní sá vã ñihí-ó dõó cuihnu-o, te cuéi ndècu-ná-ó sã yãha-o ìᵐ sá yãha-o, te cuéi sa ndècu-ná-ó sã cáhní ñáhá-yu, dico Xítóhó Jesucristú vá dáñá ndèé-gã sá cúú ìní ñáhá-gã xii-o.

³⁶ Te quee ndáá-xi nàcuáa ní càháⁿ ìᵐ téé ní xóo càháⁿ tnúhu Yá Ndiõxí ndéé sanaha ñí ngódó tnùní núú tütú-gá núú càchí-xi:

Yòhó Dütú Ndiõxí nchaa-ni nduu nchaa-ni òré cuíní ñáyiú cahni ñáhá-yu xii-ndí sá cuendá-n,

te càchí-yu sá cúú-ndí dàtná cue mbéé cue quiti sa ndècu túha-ná cahni-yu.

Duha ní cachí téé ní xóo càháⁿ tnúhu-gá-áⁿ, te ducaⁿ ñí ngódó tnùní núú tütú-gá.

³⁷ Te cuéi ducaⁿ nãndi sá ná càda ñáhá-yu xii-o, dico vá ndácũ-yu nadatùhú-yu ìní-ó chi ndacu nahi-ni-o yãha-o nchàa sá dúcáⁿ ná càda ñáhá-yu xii-o, te ducaⁿ chi Xítóhó Jesucristú Yáá ìo cùu ìní ñáhá xii-o ndecu ndihi ñaha-gã chindèe ñaha-gã.

³⁸⁻³⁹ Te yúhú cútñuní ndáá ìní-í sá ñí ìᵐ sá ìó ñuyíú-a vá ndácú-xí càda-xi cuendá sá vã cúú ìní ñáhá-gã Yá Ndiõxí xii-o, te ni sá cùú-ó, te ni sá cùndècu-o ñuyíú-a, te ni ìᵐ espíritú sá ìo cùnuu cundihí yucu ñávãha te ni ìᵐ dava-gã cue espíritú cùndihí-xi vá ndácú-xí càda-xi cuendá sá vã cúú ìní ñáhá Yá Ndiõxí xii-o. Te ni sá cúú ñuyíú-a vitna, te ni sá cúú ndèé cuèé-gã, te ni ìᵐ sá ndécú àndiú, te ni ìᵐ sá ndécú ñuyíú-a, te ni ìᵐ sá ñí cadúha mee Yá Ndiõxí, ní ìᵐ xíáⁿ vá ndácú-xí càda-xi cuendá sá vã cúú ìní ñáhá-gã xii-o chi ndècu ndihi-o Xítóhó Jesucristú Yáá cúú Xítóhó-ó.

9

Yá Ndiõxí ní cachí-gá sá ñáyiú isràél cuú-yu ñáyiú canchicúⁿ nihnu ñaha xii-gá

¹ Te yúhú càháⁿ ndáá-í chi cùu-í ìᵐ téé ndècu ndihi Xítóhó Jesucristú, te ndècu ndihi-í Espíritú Yá Ndiõxí nũu xíáⁿ cútñuní ìní-í sá càháⁿ ndáá-í.

² Te nchaa-ni nduu nchaa-ni òré ìo ndìhú ìní-í, te ducaⁿ-ni ìo quide úhú-xi ìní-í

³ sá cuendá nchaa ñáyiú cùu ndi mee-í. Te núu dicó cúú-xí ìᵐ sá chindèe ñaha xií-yu nucúndecu váha-yu núú Yá Ndiõxí ñá, te dàñá-í mée-í dàcuíta nihnu ñaha Xítóhó Jesucristú nũu dicó sá cúú.

⁴ Te nchaa ñáyiú cùu ndi mee-í-áⁿ cúú-yu ñáyiú isràél, te Yá Ndiõxí ní cachí-gá sá cúú-yu déhe-gã, te ní quide-gã nàcuáa ní cútñuní ìní-yu sá ìo càhnu cuu-gã, te ní càháⁿ ndáá-gã nũú-yu nàcuáa cada ñaha-gã xií-yu, te ní xáhaⁿ-gã xii ndí Moisés ní chídó tnùní ndí nàcuáa cadá-yu cundecú-yu. Te ní xáhaⁿ-gã

xii-yu nàcuáa cada-yu cada càhnu ñahá-yu xii-gá, te ní xáhaⁿ tùcu-gá xii-yu nchaa nàcuáa cada-gá ndéé cuéé-gá.

⁵ Te nchaa ñáiyu-áⁿ cùu-yu ñani tnáhá nchaa cue téé ní cunuu ñí xíndecu ndéé sanaha, te diu-ni ñani tnáhá-yu cùu Xítoho Jesucristú Yaá ní tendaha Dütü Ndiöxi ní quixi ñuyú-a, te tnáhá-gá cúu-gá Ndiöxi te ío cunuu-gá, te nchaa nduu nchaa quúú ío càhnu cuu-gá. Te ducaⁿ na cunduú.

⁶ Te vá càchí-ó sá Yá Ndiöxi ñá túú ní quide-gá nchaa nàcuáa ní cachí-gá cada-gá cuendá sá ñá túú sàndáá iní ñáhá dáva ñáiyu isràél xii-gá. Te sá dúcáⁿ xíquide davá-yu te ñá túú quidé-yu nàcuáa tàù-xi cada-yu sá cúu-yu ñáiyu isràél. Te ñáiyu ducaⁿ xíquide-áⁿ cúu-yu ñáiyu ñá túú cùu cuendá ñáhá Yá Ndiöxi.

⁷ Te cuéi nchaa-yu cùu-yu ñani tnáhá ndíi Àbrahám dico ñá túú quidé-yu nchaa nàcuáa tàù-xi cunduú cada-yu sá cúu-yu ñani tnáhá ndíi. Te Yá Ndiöxi ní xáhaⁿ-gá xii ndíi Àbrahám: “Nchaa cue ñani tnáhá tè Isàác téé cùu déhe ducuⁿ-n, mee-ni cué ñáiyu-áⁿ cuu ñani tnáhá-n”, duha ní xáhaⁿ-gá xii ndíi Àbrahám.

⁸ Te xíáⁿ cútnùni iní-ó sá ñá ncháá ñáiyu cùu ñani tnáhá ndíi Àbrahám cúu-yu ñáiyu cùu cuendá Yá Ndiöxi, chi mee-ni ñáiyu sàndáá iní nàcuáa ní cáháⁿ-gá cada-gá, ñáiyu-áⁿ cúu cuendá-gá.

⁹ Te duha ndùu tnúhu ní xáhaⁿ Yá Ndiöxi xii ndíi Àbrahám: “Sáá nduu te yúhú cada-í te coo ñí déhe-n ndíi ñadíhí-n tá Sára”, duha ní xáhaⁿ-gá xii ndíi.

¹⁰ Te ñá díú-ní xíáⁿ ní quide Yá Ndiöxi, chi tnáhá ní ndatnúhu-gá ndíi ndíi Rèbecá cútnáhá vitna ñúhu úú déhe ndíi ndíi ndíi Isàác téé ní cuu ñani tnáhá-ó ní xíndecu ndéé sanaha.

¹¹⁻¹³ Te cútnáhá vitna ñúhu-gá déhe ndíi Rèbecá, cútnáhá vátá cáda-gá-güexi ní ñíⁿ sá cuèhé sá dúhá, te ní ñíⁿ sá váha, ní xáhaⁿ Yá Ndiöxi xii ndíi: “Déhe-n téé díhna na càcu te téé-áⁿ tñi-dé nchaa tnúhu cáháⁿ déhe-n téé cùu úú ná càcu”, duha ní xáhaⁿ-gá xii ndíi Rèbecá. Te ní quee ndáá-xi nàcuáa ní cáháⁿ Yá Ndiöxi núú tütú-gá núú càchí-xi: “Té Jácób ní cuu váha iní-í núú-dé”, duha càchí-gá núú tütú-gá. Te ducaⁿ ní cuu chi ducaⁿ ní cachí méé-gá cunduú sá càháⁿ-gá nchaa ñáiyu cuini méé-gá, te ñá díú cuendá ñíⁿ chiúⁿ quidé-yu càháⁿ ñáhá-gá xii-yu.

¹⁴ Te vá cúu tnáhí cáháⁿ-ó sá Yá Ndiöxi ñá túú quide váha-gá sá dúcáⁿ quide-gá chi mee-gá ío ndáá quidé-gá!

¹⁵ Te mee-gá ní xáhaⁿ-gá xii ndíi Moisés: “Cundàhú iní-í chindee-í mee-ni cué ñáiyu càchí iní-í”, duha ní xáhaⁿ-gá xii ndíi.

¹⁶ Te xíáⁿ cútnùni iní-ó sá cundàhú iní-gá ñáiyu chi ducaⁿ cuini méé-gá cunduú, dico ñá túú cundahú iní ñáhá-gá xii-yu cuendá sá dúcáⁿ cuini-yu cada-gá, te ní ñá túú cundahú iní ñáhá-gá xii-yu cuendá sá ío ndùcu ndéé-yu quidé-yu ñíⁿ sá quidé-yu.

¹⁷ Te núú tütú Yá Ndiöxi càháⁿ-xi nàcuáa ní xáhaⁿ-gá xii téé ní cuu Faráon téé ní xíndaha nàcióⁿ Ègíptú, te duha ní xáhaⁿ-gá: “Yúhú ní quide-í yíndàha-n ñáiyu cuendá cada-í títñi núú sá cáda-í núú-n cuendá cutnùni iní-n sá ío càhnu cuu-í, te ducaⁿ nchaa ñáiyu ñuyú cutnùni iní-yu sá yúhú cùu-í Ndiöxi”, duha ní xáhaⁿ-gá xii téé ní cuu Faráon.

¹⁸ Te xíáⁿ cútnùni iní-ó sá Yá Ndiöxi cundàhú iní-gá mee-ni cué ñáiyu càchí iní méé-gá, te ducaⁿ ndàda dí-gá iní nchaa ñáiyu càchí iní méé-gá ducaⁿ cáda-gá.

19 Te sá dúhá càháⁿ-í te dava-ndo quèsaha-ndo: “Ná cuendá Yá Ndiöxí dácàa-gá cuéchi díquí ñáyiú núu ni ñⁿ-yu ñá ndácú-yu quehndé nihnú-yu cuendá sá vâ cadá Yá Ndiöxí nàcuáa cuíní-gá”, quesaha-ndo.

20 Te chí cuáha cuendá sá dicó ñáyiú ñuyíú-a cùu-ndo te ñá túú ndùu váha-xi sá nchòhó cáháⁿ-ndó ñⁿ tnúhu sá ñà túú ndùu váha sá cúú-xí Yá Ndiöxí. Te duha na càháⁿ-í núú-ndó nàcuáa tecu tnùní-gá-ndó nàcuáa ndùu tnúhu càháⁿ-í. Te ñá túú xiní-ó sá ñⁿ quídi ñuhu cúñaha-xi xii ñáyiú ní cadúha ñaha xii-xi: “Ná cuendá duha ní cadúha ñaha-n xii-í”, cúñaha-xi.

21 Chi ñáyiú cadúha nchaa quídi-áⁿ cuu-ni cadúha-yu ndihi ñuhu cuéi nása na cùnduu quídi cadúha-yu canehe chiúⁿ-yu, chi ñⁿ-ní ñuhu cadúha-yu quídi cánehe chiúⁿ-yu ndi tnahá nduu sàcòo-yu vico ndihi quídi sá cánehe chiúⁿ-yu nduu cùtexínu.

22 Te ñu-ni ducaⁿ quíde Yá Ndiöxí, chi cuíní-gá dandòho-gá ñáyiú ñá túú quíde nchaa nacuáa nduu vétú iní-gá, te cada-gá nàcuáa cutnùní iní-yu sá ïo càhnu cuu-gá. Te sa ndècu túha-ná-yu sá quíhⁿ-yu núú ùhú núú ndàhú, te cuéi ducaⁿ dico ío ta quíde cahnu iní-gá cuáháⁿ.

23 Te ducaⁿ quíde-gá cuendá cutnùní iní nchaa ñáyiú ñuyíú sá ïo váha quíde-gá sá cúú-xí nchàa nchoo ñáyiú cùndahú iní-gá, chí ní cachí-gá sá nchóó cué ñáyiú cùndahú iní-gá nduu táhú-ó cùndecu-o ndihi-gá núú ïo váha càa ndecu-gá.

24 Te dava nchoo ñáyiú ní cáháⁿ Yá Ndiöxí cúú-ó ñáyiú isràél, te dava-o cùu-o ñáyiú ñá túú cùu ñáyiú isràél.

25 Te ní quee ndáá-xi nàcuáa ní xáhaⁿ Yá Ndiöxí xii ndíi Òseás téé ní xóo cáháⁿ tnúhu-gá ndéé sanaha ní chídó tnùní ndíi núú tùtú-gá núú càchí-xi: Ñáyiú ñá túú cùu cuendá-í ní cùu te nduu cuendá-í-yu, te ñu-ni ñáyiú-áⁿ ñá túú cùu váha iní-í núú-yu ni cùu, dico vitna cùu váha iní-í núú-yu.

26 Te ñu-ni ñuú núú dúcáⁿ ní cachí-í sá ñà túú ñáyiú cùu cuendá-í ñu-ni ñuú-áⁿ coo ñáyiú cuu déhe yúhú Dútú Ndiöxí Yaá ndécú tùu andiú.

Duha ní xáhaⁿ Yá Ndiöxí xii ndíi Òseás ní chídó tnùní ndíi núú tùtú-gá.

27 Te ndíi Chàìá téé ní xóo cáháⁿ tucu tnúhu Yá Ndiöxí ndéé sanaha ní cáháⁿ ndíi cuendá ñáyiú isràél, te duha ní cachí ndíi: “Cuéi cuéhé víhí ñáyiú isràél dàtná cuéhé ñuhu cúchí lámár dico sacú-ni-yu vá quíni-yu tnúndòho tnúhu ndàhú.

28 Te Yá Ndiöxí ío ndíhi cada-gá nchaa nàcuáa càháⁿ-gá ñuyíú”, duha ní cachí ndíi.

29 Te ní cáháⁿ tucu ndíi nàcuáa cada-xi ndéé cuéé-gá, te ní cachí ndíi:

Yá Ndiöxí Yaá táxi tnùní nchaandi túhú sá ío andiú ndíhi ñuyíú ñà túú ní dànaa-gá nchaa ñáyiú isràél, chí núu ni ndíhi-yu danàa ñaha-gá, te nchoo cùu-o datná ní cuu nchaa ñáyiú ní xíndecu ñuú Sòdomá ndíhi nchaa ñáyiú ní xíndecu ñuú Gòmorrá, te ndíhi-o nàa datná ní naa nchaa ñáyiú-áⁿ ní cùu.

Duha ní cachí ndíi.

Ñáyiú isràél ñá túú sàndáá iní-yu tnúhu Xítohó Jesucristú

30 Te sá cuendá xíáⁿ núu vitna càchí tnúhu-í xii-ndo sá cué ñáyiú ñá túú cùu ñáyiú isràél ñá túú ní nànducu nihnú-yu nàcuáa cadá-yu cudíú-yu núú Yá Ndiöxí, dico vitna cudíú-yu núú-gá chí ní sàndáá iní-yu Xítohó Jesucristú.

³¹ Te ñáyiú isràél nchìcúⁿ nihnú-yu tnúhu sá dánèhé ñáhá xii-yu nàcuáa cadá-yu cudíú-yu núú Yá Ndiöxí dico ñá túú cùdìú-yu núú-gã chi ñá ndácú-yu cadá-yu nchaa nàcuáa càháⁿ-xi.

³² Te ducaⁿ ñá túú cùdìú-yu núú Yá Ndiöxí chi ñá túú sàndáá iní-yu Xitohó Jesucristú, te sàni iní-yu sá sã cuendá mee-ni nchàa sá quidé mèe-yu cudíú-yu núú-gã, te sá dúcáⁿ quidé-yu te cùú-yu dàtná ìⁿ ñáyiú nguñenu ìⁿ yúú te nduá-yu. Te ducaⁿ sãtnahá-xi cùú-yu chi ñá túú cùú váha iní-yu núú Xitohó Jesucristú.

³³ Te quèe ndáá-xi nàcuáa ní cáháⁿ Yá Ndiöxí ìⁿ xichi núú tütú-gá núú càchí-xi:

Yúhú táxi ndècu-í ìⁿ téé ñuú Sión, te cuu-dé dàtná ìⁿ yúú, te yúú-áⁿ nguñenu ñáyiú te nduá-yu,

te nchaa ñáyiú na quìndáá iní ñáhá xii-dé, te vá ndíxí cuèchi iní-yu sá dúcáⁿ ñí sándáá iní ñáhá-yu xii-dé.

Duha càchí-gá núú tütú-gá.

10

¹ Te nchòhó ñáyiú ndècu ndihi-í ichi Xitohó Jesucristú càchí tnúhu-í xii-ndo sã càháⁿ ndihi-í Yá Ndiöxí cuendá ñáyiú isràél, chi ìo cuiní-í sá naníhí tàhú-yu.

² Te na càháⁿ ndáá-í cuendá-yu sá ìo ndècu ndeé-yu xinu cuechí-yu núú Yá Ndiöxí, te dicó-ni sá ñá túú quidé-yu nàcuáa cuiní mée-gã cadá-yu.

³ Chi ñá túú quide cuendá-yu nàcuáa cuiní Yá Ndiöxí cada ñaha-gã xii-yu nàcuáa cudíú-yu núú-gã, te quide-ní-yu nàcuáa sàni iní mée-yu cudíú-yu núú-gã te ñá túú cuiní-yu tñí-yu tnúhu càháⁿ-gã nàcuáa cudíú-yu núú-gã.

⁴ Te Xitohó Jesucristú ní quide-gá cuendá sá vã cúnù-gá nchaa tnúhu ní chídó tnùní ndíi Moisés, te nchaa ñáyiú na quìndáá iní ñáhá xii-gá te ñuú-gá cada te cudíú-yu núú Yá Ndiöxí.

⁵ Te ndíi Moisés càháⁿ ndíi núú tütú ndíi cuendá ñáyiú cuiní cudíú núú Yá Ndiöxí cuendá sá nchìcúⁿ nihnú-yu nchaa nàcuáa ní cáháⁿ ndíi. Te ní cachí ndíi sá ncháá ñáyiú na càda nchaa nàcuáa ní xáhaⁿ Yá Ndiöxí xii ndíi ní chídó tnùní ndíi te naníhí tàhú-yu, te núú dicó ndacú-yu cadá-yu nchaa nàcuáa ní cáháⁿ ndíi.

⁶ Dico vitna núu na quìndáá iní-ó Xitohó Jesucristú, te cudíú-o núú Yá Ndiöxí. Te duha càchí tnúhu ní chídó tnùní ndíi núú tütú-gá: “Vá cáni iní-ndó sá xini ñuhu-xi cada-ndo ìⁿ sá vã yõo tnàhí ndècu cada sá cáá tũu-ndo àndiú te cùñaha-ndo xii Cristú cuuⁿ-ndo ndihi-gá núú ñuyúú-a.

⁷ Te ni vã cáni tucu iní-ndó sá quihíⁿ tũu-ndo núú xindecu nchaa ñáyiú ní xihí te cada-ndo sã Cristú ndoto-gã”, duha càchí tnúhu-áⁿ sá vã dúcáⁿ càni iní-ó.

⁸ Te càchí tucu tnúhu-áⁿ: “Tnúhu Yá Ndiöxí sá ndécú ndihi ñaha-xi xii-ndo chi sàni iní-ndó cuendá tnúhu-áⁿ te càháⁿ-ndó”, duha càchí tnúhu-áⁿ. Te tnúhu sá ndécú ndihi-ndo-áⁿ cùú-xí tnúhu càháⁿ-ndí núú ñáyiú, te xini ñuhu-xi sá quìndáá iní-yu tnúhu-áⁿ.

⁹ Te núu na ñunu-ndo càháⁿ-ndó sã Xitohó Jesucristú cùú-gã Xitohó-ndó, te quìndáá iní-ndó ñi yuhu ni iní-ndó sã Yá Ndiöxí ní dándótó-gã Xitohó Jesucristú, te naníhí tàhú-ndó te núu ducaⁿ na càda-ndo.

¹⁰ Te nchaa ñáyiú ducaⁿ sàndáá iní te cáháⁿ-yu sá Xitohó Jesucristú cùú-gã Xitohó-yu, ñáyiú-áⁿ cudíú-yu núú Yá Ndiöxí te naníhí tàhú-yu.

11 Te núu tütú Yá Ndiöxí cächí-xi sá ni ìⁿ ñáyiú sàndáá iní ñáhá xii Xítóhó Jesucristú vá ndíxi cuèchi iní-yu sá dúcáⁿ sàndáá iní ñáhá-yu xii-gá.

12 Te sá cúú-xí Xítóhó Jesucristú chí ìⁿ-ni cùu ñáyiú isràél ndihi ñáyiú ñá túú cùu ñáyiú isràél, chí diu-gá cúú-gá Yáa cúnùu taxi tñuní-gá nchaa ñáyiú, te ío váha quide-gá sá cúú-xí nchaa ñáyiú cáháⁿ ndihi ñaha xii-gá.

13 Te quèe ndáá-xi nàcuáa cáháⁿ-xi núu tütú Yá Ndiöxí núu cächí-xi: “Nchaa ñáyiú na cáháⁿ ndàhú núu Xítóhó Jesucristú sá dácúcu nihnu ñaha-gá xii-yu, te ñáyiú-áⁿ naníhí tàhú-yu”, duha cächí-xi núu tütú-gá.

14 Te ñáyiú-áⁿ vá nihí-yu nàcuáa cáháⁿ ndàhú-yu núu-gá te núu ñá túú sàndáá iní ñáhá-yu xii-gá, te ni vá nihí-yu nàcuáa cadá-yu quindáá iní ñáhá-yu xii-gá te núu vátá cúndedóho-gá-yu tñuhu-gá, te ni vá nihí-yu tñuhu-gá te núu vá yóo quíhíⁿ cútñuhu ñaha xii-yu.

15 Te ni vá yóo quíhíⁿ ducaⁿ cútñuhu ñaha xii-yu tñuhu-gá te núu Yá Ndiöxí vá téndàha-gá ñáyiú quíhíⁿ cútñuhu ñaha xii-yu. Te núu tütú Yá Ndiöxí cächí-xi: “Ío vii ío váha cùu iní-ó vèxi ñáyiú dànehé ñáhá xii-o nacuáa ndùu tñuhu sá cáháⁿ nàcuáa naníhí tàhú-ó”, duha cáháⁿ-xi núu tütú-gá.

16 Te ñá ncháá-yu cuíní-yu quindáá iní-yu tñuhu-áⁿ. Te ní quee ndáá-xi nàcuáa ní xáhaⁿ ndíi Chàiaí xii Yá Ndiöxí te duha ní xáhaⁿ ndíi xii-gá: “Yòhó Dútú Ndiöxí na nàcani tñuhu-í núu-n sá ío sacú-ni ñáyiú sàndáá iní-yu tñuhu cáháⁿ-ndí”, duha ní xáhaⁿ ndíi xii-gá.

17 Te xini ñuhu-xi sá dǐhna-gá cundedóho-yu tñuhu-áⁿ cuendá ducaⁿ te quindáá iní-yu, te tñuhu-áⁿ cúú-xí tñuhu Xítóhó Jesucristú.

18 Te vá cúú cáháⁿ-ó sá ñà túú ní nihí ñáyiú isràél tñuhu-gá, chí nchaa-yu ní nihí-yu tñuhu-gá, chí núu tütú Yá Ndiöxí cächí-xi: Cue tée ní cáháⁿ tñuhu Yá Ndiöxí ní cáháⁿ-güedé tñuhu-gá núu ñáyiú, te tñuhu-áⁿ ní xité nuu-xi nihí ñuyúú. Duha cächí-xi núu tütú-gá.

19 Te ni vá cáháⁿ-ó sá ñáyiú isràél ñá túú ní cùu tñuní iní-yu nàcuáa ndùu tñuhu-gá chí ní tecú tñuní-yu. Te ndéé sanaha ní chidó tñuní ndíi Moisés nàcuáa ní xáhaⁿ Yá Ndiöxí xii ñáyiú isràél, te duha ní xáhaⁿ-gá xii-yu: Yúhú cada váha-í nchaa ñáyiú ñá túú cùu ñáyiú isràél, ñáyiú ñá túú cùtñuní iní-xi nàcuáa cada váha cundecu núu-í, te nchòhó cudééⁿ-ndó núu-yu te cuu cuédú iní-ndó-yu.

Duha ní xáhaⁿ Yá Ndiöxí xii-yu te ducaⁿ ní chidó tñuní ndíi Moisés.

20 Te ndíi Chàiaí ñá túú tñàhí ní yuhú ndíi ní quide ndíi núu Yá Ndiöxí ní cáháⁿ ndíi tñuhu-gá, te ní cachí ndíi:

Ñáyiú ñá túú nànducu ñaha xii-í ní cùu ní naníhí ñáhá-yu xii-í, te ni ñà túú ndùcu tñuhu ñáhá-yu xii-í ní cùu te ní xini ñáhá-yu.

Duha ní cachí ndíi Chàiaí ní cáháⁿ ndíi tñuhu Yá Ndiöxí.

21 Te ní quide tucu ndíi núu Yá Ndiöxí ní cáháⁿ ndíi tñuhu-gá cuendá ñáyiú isràél, te ní cachí ndíi: “Nchaa-ni nduu yihi-í cáháⁿ-í ñáyiú isràél te ñá túú cuíní-yu quindáá iní-yu chí ío sàá iní-yu”, duha ní cachí ndíi Chàiaí ní cáháⁿ ndíi tñuhu Yá Ndiöxí.

11

Cuendá ñáyiú isràél ñáyiú naníhí tàhú

1 Te cuèi ducaⁿ dico vá cáháⁿ-ó sá Yá Ndiöxí dáquèe tíhú-gá ñáyiú isràél chí diu-ni ñáyiú-áⁿ cúú cuendá-gá, chí yuhú tñàhá-í cùu-í mei tēe isràél, te ñani

tnáhà-í ní cuu ndíí Àbrahám téé ní xíndecu ndéé sanaha vihi-gá, te diu-ni ñani tnáhà-í ní cuu tucu ndíí Benjamín.

² Te ndéé sanaha òucaⁿ ní cachí Yá Ndiòxí sá nchùhú ñáyíu isràèl cúú-ndí ñáyíu cùu cuendá-gá, te ñá túú dàquee tìhú ñáhà-gã xii-ndí, te nchòhò sa xini-ndó nàcuáa càháⁿ-xi núú tütú Yá Ndiòxí núú càchí-xi nàcuáa ní quide té Èliás ní ndacáⁿ cuèchi-dé núú-gã cuendá ñáyíu isràèl.

³ Te duha ní xáhaⁿ-dè xii-gá: “Yòhó Dútú Ndiòxí, ná nàcani tnúhu-í núú-n sã ní sahní-yu cue téé càháⁿ tnúhu-n, te ní dàtnànú-yu núú xihí quiti ndùu tálú-n, te yúhú-nà ní càcu-í ndécù-í dico nànducu ñahá-yu chi tnáhà-í cuini-yu cahni ñahá-yu xii-í”, duha ní xáhaⁿ-dè xii Yá Ndiòxí.

⁴ Te Yá Ndiòxí ní xáhaⁿ-gã xii-dé: “Sa ní dáqueé òìⁿ-í úsá mìl cue téé cùu cuendá-í, te ñá túú nèhe-güedé sá yíñhùu núú Bàál sá càchí-yu cùu ndiòxí-yu te ñá ndàá sá ndiòxí cúú-xí”, duha ní xáhaⁿ-gã xii té Èliás.

⁵ Te ducaⁿ sãtnahá-xi cùu vitna chi xíndecu ñáyíu ní càháⁿ-gá ní chìtnahá ñáhà xii-gá, te ducaⁿ ní quide-gá chi ní cundàhú iní ñáhà-gã xii-yu.

⁶ Te ducaⁿ ní càháⁿ ñáhà-gã xii-yu sá cùndàhú iní ñáhà-gã, te ñá díú cuendá ìⁿ chiuⁿ quidé-yu ducaⁿ ní càháⁿ ñáhà-gã xii-yu, chi núú òìcò cuendá ìⁿ chiuⁿ quidé-yu ducaⁿ ní càháⁿ ñáhà-gã xii-yu ña, te ñá díú-gã sá cúú iní mée-gã ducaⁿ ní càháⁿ ñáhà-gã xii-yu te núu ducaⁿ.

⁷ Te na càchí tnúhu-í xii-ndo nàcuáa cùu vitna sá ñáyíu isràèl cuini-yu cudíú-yu núú Yá Ndiòxí dico ñá ndácù-yu, dico dava ñáyíu ní càháⁿ-gá ñáyíu-áⁿ cudíú-yu núú-gã, te ñáyíu ducaⁿ ñà túú cùdiu núú-gã-áⁿ Ìo ní cuu sáá iní-yu núú-gã.

⁸ Te ní quee ndáá-xi nàcuáa càháⁿ-xi núú tütú Yá Ndiòxí núú càchí-xi: “Yá Ndiòxí ní cachí-gá sá cúú-yu ñáyíu Ìo nì díquí-xi, chi cuèi ndèhé-yu nàcuáa càháⁿ tnúhu-gá dico ñá cùtnùní iní-yu nàcuáa càháⁿ-xi, te cuèi ndèdòho-yu dico ñá túú quèe díquí-yu, te ducaⁿ-ni quidé-yu ndéé vitna”, duha càchí-xi núú tütú-gá.

⁹ Te ndíí Dàvíí ní cachí ndíí: Ñáyíu Ìo váha ndècu te cùdíí iní-yu quidé-yu vico, dico yáha-yu dàtná yáha ìⁿ quiti ngàva trampá àdi ìⁿ quiti ñá cùtnùní iní-xi quée xití ñunu, chi cuíta nihnú-yu te nacháhu-yu nchaa sá quidé-yu.

¹⁰ Te cúú-yu ñáyíu ñá túú vèdana tècú tnùní, te cùu tucú-yu dàtná ìⁿ ñáyíu Ìo ndòho nchido ìⁿ sá vèe.

Duha ní cachí ndíí Dàvíí.

Ñáyíu ñá túú cùu ñáyíu isràèl naníhí tàmú-yu

¹¹ Te cuèi ducaⁿ dico vá càchí-ó sã sá dúcáⁿ ñà túú ní quide ndáá ñáyíu isràèl te ní xíta nihnu duúⁿ-yu, te ñáhà chi sá dúcáⁿ ní quidé-yu te ní ngúndecu ndíhi dava-gá ñáyíu tnúhu sá càháⁿ nàcuáa naníhí tàmú-yu, te ñáyíu isràèl quini-yu nàcuáa naníhí tàmú ñáyíu ñá túú cùu ñáyíu isràèl, te tnáhà-yu cudíí iní-yu naníhí tàmú-yu.

¹² Te sá dúcáⁿ ní quide sáá iní-yu ñá túú ní quide ndáá-yu núú Yá Ndiòxí, te xíáⁿ ní cuu-xi ìⁿ sá váha sá cúú-xí ñáyíu nihíí ñuyíú, dico sáá nduu te cada ñáyíu isràèl nchaa nàcuáa càháⁿ Yá Ndiòxí, te dàvá-áⁿ Ìo-gá váha cuu xii nchaa ñáyíu nihíí ñuyíú.

13 Te nchòhò ñáyiu ñá túú cùu ñáyiu isràèl càchí tnúhu-í xii-ndo sã Yã Ndiòxí ní cachí-gá sá càháⁿ-í tnúhu-gá núú-ndó, te yúhú càchí-í sá ïo càhnu cuu chiunⁿ quide-í.

14 Te duha càháⁿ-í cuendá sá núu cudana ïo dava ñáyiu cùu ndi mee-í cudíí ïní-yu cada váha ñaha Yã Ndiòxí xii-yu dàtná quidé váha ñaha-gã xii-ndo, te naníhí tàhú-yu.

15 Te sá cuendá sá ní quee tíhú ñáyiu isràèl ní nacáháⁿ cáhnú ïní tnáhá ñáyiu ñihí ñuyú ndihí Yã Ndiòxí, dico na sáá nduu nucúndecu váha ñáyiu isràèl ndihí Yã Ndiòxí, te ío-gá váha tnahá ñáyiu ñihí ñuyú, te ñáyiu-án cada ïní-ó sã cúu-yu dàtná ñáyiu ní xihí, dico dàvá-án cada tucu ïní-ó sã cúu-yu dàtná ñáyiu ní ndoto chi nucúndecu váha-yu ndihí-gá.

16 Te núu sá lúhá-ní ïⁿ tílúlu yusaⁿ càváha te ñu-ni ducaⁿ càváha ñihí. Te núu càváha yóho ïⁿ yutnu te ñu-ni ducaⁿ càváha-xi ñihí-xi. Te ñu-ni ducaⁿ sãtnahá-xi cùu ñáyiu isràèl, chi ñaní tnáhã-yu ní xíndecu ndéé sanaha ní cuú-yu ñáyiu ní cuu cuendá ñáhá Yã Ndiòxí, te ñu-ni ducaⁿ cùu cuendá ñáhá-gã xii mée-yu ndéé vitna.

17 Te ío ïⁿ yutnu váha ñani olívú, te dava dité yutnu-án ní téhndé te ní nucódó dité yutnu olívú cùtexínu, te mee-ná yutnu olívú váha-án ïo váha quide-xi nchito dité yutnu olívú cùtexínu-án. Te dité nchaa yutnu olívú váha-án cúu-xi dàtná ñáyiu isràèl, te nchaa dité-xi sá ní téhndé-án cúu-xi ñu-ni ñáyiu isràèl ñáyiu ñá túú tnáhá tnúhu ndihí Yã Ndiòxí. Te dité yutnu olívú cùtexínu sá ní nucódó tnáhá-án cúu-xi dàtná ñáyiu ñá túú cùu ñáyiu isràèl tnáhá tnúhu ndihí Yã Ndiòxí.

18 Te vá cání ïní-ndó sã sá dúcáⁿ ndècu váha-ndo ndihí Yã Ndiòxí te ío cùnuu-ndo dacúúxí ñáyiu isràèl, te vá dúcáⁿ cání ïní-ndó chi sá cuendá nchaa ñaní tnáhá ñáyiu isràèl ní xíndecu ndéé sanaha ducaⁿ ndècu váha-ndo ndihí Yã Ndiòxí vitna, te ñá ñúú sã cuendá nchòhó ndécú ndihí váha ñáyiu-án Yã Ndiòxí vitna.

19 Te cudana sàni ïní-ndó te càchí-ndó sã ñáyiu isràèl ní quee tíhú-yu cuendá sá nchòhó nucuíñí-ndó núu-yu nucúndecu váha-ndo ndihí Yã Ndiòxí.

20 Te ndáá sá ní quee tíhú-yu chi ñá túú ní sàndáá ïní ñáhã-yu xii-gá, te nchòhó ío váha cùu ndecu-ndo ndihí-gá chi ní sàndáá ïní-ndó-gã, dico vá càchí-ndó sã ïo càhnu cuu-ndo, te ío váha chí cuãha cuendá nàcuáa cundecu-ndo.

21 Te cue ñáyiu isràèl cúu-yu ñáyiu cùu cuendá-gá ní cùu te ní dáquéé tíhú ñáhã-gã xii-yu cuendá sá ñá túú ní sàndáá ïní ñáhã-yu xii-gá, te tnáhã nchòhó daquéé tíhú ñáhã-gã xii-ndo te núu na càda-ndo datná ní quide ñáyiu-án.

22 Te chí cadá cuendá sá Yã Ndiòxí ío váha ïní-gá, dico cùdééⁿ-gã núú nchàa ñáyiu ñá túú sàndáá ïní ñáhã xii-gá, dico sá cúu-xi nchòhó cue ñáyiu sàndáá ïní ñáhã xii-gá chí ío váha ïní-gá. Te ducaⁿ-ni cùnduu váha ïní-gá sá cúu-xi-ndó te núu vá dáñá ndéé-ndó càda-ndo nacúáa càháⁿ-gã cuendá sá ïo váha ïní-gá, te núu ñáhã te tnáhã nchòhó quee tíhú-ndó dàtná ní quee tíhú ñáyiu isràèl, ñáyiu ñá túú ní sàndáá ïní ñáhã xii-gá.

23 Dico núu ñáyiu isràèl ñáyiu ní dáquéé tíhú ñáhã Yã Ndiòxí quíndáá ïní ñáhã-yu xii-gá te nduu cuendá ñáhã tucu-gá xii-yu, te ñáyiu-án cúu-yu dàtná dava dité yutnu olívú sá ní téhndé te ní nucódó tnáhã tucu. Te ducaⁿ sãtnahá-xi cúu-yu te núu na quíndáá ïní ñáhã-yu xii-gá.

24 Te nchòhó cúú-ndó dàtná nchaa dité yutnu òlívú cùtexínu, chi ñá díú ñáyiú isràél cúú-ndó, te dité nchaa yutnu òlívú cùtexínu-áⁿ ñí núcódó-xi núú dité yutnu òlívú váha-áⁿ. Te yáchí-gá núcúndecu váha ñáyiú isràél ndìhi Yá Ndiòxí, chi cúú-yu dàtná nchaa dité yutnu òlívú váha sá ñí téhndé te ní núcódó tnáhá tùcu. Te ducaⁿ sàtnahá-xi cúú-yu te núu na quíndáá iní ñáhá-yu xii-gá.

Sáá nduu te naníhí tàhú ñáyiú isràél

25 Te nchòhó ñáyiú ndècu ndìhi-í ichi Xítohó Jesucristú, na càchí tnúhu-í xii-ndo ñíⁿ tnúhu ndùu yuhu ni cuu, cuèndá sá vǎ cáni iní-ndó sǎ ïo-gá váha sǎá díquí-ndó dàcúxí ñáyiú isràél, chi dava ñáyiú isràél cúú sǎá iní-yu núú Yá Ndiòxí ñini na ndìhi ñáyiú ní cachí Yá Ndiòxí ngúndecu váha ndìhi ñáhá-yu xii-gá, ñáyiú ñá túú cùu ñáyiú isràél.

26 Te nduu na ndìhi ñáyiú-áⁿ ngúndecu váha-yu ndìhi Yá Ndiòxí, te dàvǎ-áⁿ naníhí tàhú ñáyiú isràél chi quee ndáá-xi nàcuáa càháⁿ Yá Ndiòxí núú tùtú-gá núú càchí-xi:

Ndǎa ñúú Sìón quixi Yáá cada naníhí tàhú nchaa ñáyiú,
te ñiu-ñi Yáá-áⁿ cada-gá cuèndá sá dáñá nchǎa ñáyiú isràél ichi cuèhé ichi duha.

27 Te yúhú cada càhnu iní-í nchaa cuèchi ñáyiú isràél, chi cada-í dàtná ní cachí-í ndéé sanaha.

Duha càchí Yá Ndiòxí núú tùtú-gá.

28 Te sá cuèndá tnúhu sá càháⁿ nàcuáa naníhí tàhú-ó xiǎⁿ cúú ùhú iní ñáyiú isràél Yá Ndiòxí, te sá dúcǎⁿ quidè-yu xiǎⁿ nchòhó ní ñihí-ndó tnúhu sá càháⁿ nàcuáa naníhí tàhú-ndó. Te ní cachí Yá Ndiòxí sǎ ñáyiú isràél cuu cuèndá-gá, te cùu iní ñáhá-ñí-gǎ xii-yu, te ducaⁿ quidè-gá chi ducaⁿ ñí xáhaⁿ-gǎ xii cue ñani tnáhá-yu ní xíndecu ndéé sanaha.

29 Te Yá Ndiòxí ñá túú ndùu ùhú iní-gǎ ñíⁿ sá táxí-gǎ, te ñí ñà túú ndìxi cuèchi iní-gǎ sá càháⁿ ñáhá-gǎ xii-o.

30 Te nchòhó chi ñá túú sǎndáá iní-ndó Yá Ndiòxí ní cùu, dico vitna ñini ñà túú sǎndáá iní ñáhá ñáyiú isràél xii-gá, te ní cundàhú iní ñáhá-gǎ ní dàcǎcu nihnu ñaha-gǎ xii-ndo nùú ùhú núú ndàhú.

31 Te vitna quidè-yu dàtná ní xóo cada nchòhó cùtnáhá ñá túú ní xóo quíndáá iní-ndó-gǎ. Dico sǎá nduu te natuha ñáhá-yu xii-gǎ te dàcǎcu nihnu ñaha-gǎ xii-yu sá cundàhú iní ñáhá-gǎ dàtná ní quidè ñaha-gǎ xii nchòhó.

32 Te Yá Ndiòxí ní dáñá-gǎ sá dúcǎⁿ cùnduu saá iní nchaa ñáyiú cuèndá cuìní-gǎ cundàhú iní ñáhá-gǎ xii-yu.

33 Te súúni váha quidè ñaha Yá Ndiòxí xii-o, te ïo váha xini-gǎ nchaa cuèi sá ïo andiu te cuèi sá ïo ñuyúú-a, te ducaⁿ ïo váha sǎá nchaa sá xini tnúni-gǎ. Te ñá ndácú-ó cùtnuní iní-ó ñá cúú nchǎa sá sǎni iní-gǎ cada-gǎ, te ñí ñá ndácú-ó cùtnuní iní-ó nàcuáa ndùu cuèndá nchaa sá quidè-gǎ.

34 Te núú tùtú-gǎ càchí-xi: “Vǎ yóo ñíⁿ cùtnuní iní-xi nàcuáa sǎni iní Yá Ndiòxí, te ñí vǎ yóo ñíⁿ ndàcu dacahu iní ñáhá xii-gǎ nàcuáa càháⁿ-gǎ.

35 Te Yá Ndiòxí ñá túú quidè yica iní-gǎ cada-gǎ sá váha sá cúú-xí ñáyiú cuèndá ñíⁿ sá sǎñáhá-yu xii-gǎ chi ñá túú dùcaⁿ quidè-gǎ”, duha càchí-xi núú tùtú-gǎ.

36 Te ducaⁿ chi mee Yá Ndiòxí ní taxi ndecu-gǎ nchaandi túhú sá ïo ñuyúú, te ñiu-ñi mee-gǎ táxí tnúni-gǎ nchaa sá ñí taxi ndecu-gǎ, te nchaa cùu-xi cuèndá-gǎ. Te vitna chí ná càchí-ó sǎ ïo càhnu cuu-gǎ ñi caa ñi quíhíⁿ. Te ducaⁿ na cùnduu.

12

Cada-o nàcuáa nduu vétú iní Yá Ndióxi

¹ Te vitna nchòhó ñáyiú ndècu ndihi-í ichi Xítohó Jesucristú càhí tnúhu-í xii-ndo sá Yá Ndióxi cundàhú iní ñáhá-gá xii-o chindee ñaha-gá, núu xiáⁿ cáháⁿ ndàhú-í núú-ndó sá dáñá-ndó mèe-ndo núú ndáhá-gá, te cada iní-ndó sá cúú-ndó dàtná ìⁿ táhú sá nchító-ó ñí nduu táhú-gá. Te cuu-ndo ñáyiú váha ñáyiú cada nchaa nàcuáa nduu vétú iní Yá Ndióxi chi ducaⁿ taú-ndó càda-ndo sá cúú-xí-gá.

² Te vá cànchicúⁿ nihnu-gá-ndó càda-ndo datná xíquide nchaa ñáyiú ndècu ichi cuehé ichi duha ndècu ñuyíú-a, te vá cúhúⁿ-gá iní-ndó ichi cuehé ichi duha-áⁿ, chi mee-ná sá váha cuhuⁿ iní-ndó, te ducaⁿ te cutnùní iní-ndó nchaa nacuáa cuíní Yá Ndióxi cada-ndo, te nchaa sá cuíní-gá cada-ndo cùu-xi mee-ni sá váha, sá ïo váha ndùu vétú iní-gá, te cùu-xi nchaa sá xíní ñùhu-xi cada-ndo núú-gá.

³ Te sá cuèndá chùuⁿ ní cundàhú iní ñáhá Yá Ndióxi ní taxi-gá xii-í xiáⁿ núu na càháⁿ-í dóho-ndo vitna: Vá cání iní-ndó ìⁿ sá ñà túú taú-ndó càni iní-ndó te cucahaⁿ-ndo sá ïo càhnu cuu-ndo. Te nchòhó ní sàndáá iní-ndó Yá Ndióxi núu chindee ñaha-gá xii-ndo, te vitna chí cuãha cuèndá núu ná daha núú chùuⁿ-gá ndacu-ndo càda-ndo.

⁴ Te nchoo titní xichi cùu yiqui cuñú-ó, te ndí dííⁿ ndí dííⁿ chùuⁿ quide-xi ìⁿ ìⁿ-xí.

⁵ Te ducaⁿ sàtnhá tucu-xi cùu nchoo ñáyiú ndècu ndihi Xítohó Jesucristú chi cuèí ná daha tnàhá-ó dico ìⁿ-ni cùu-o ndihi-gá, te ducaⁿ mèe-o tucu ìⁿ-ni cùu-o.

⁶ Te mee Yá Ndióxi ní cundàhú iní ñáhá-gá xii-o ní taxi-gá chùuⁿ taú-ó càda-o ìⁿ ìⁿ-o te chindee ñaha-gá xii-o, te xini ñùhu-xi cada-o nacuáa ndùu chiuⁿ ní taxi-gá cada-o. Te núu ní nduu táhú-ó núú-gá sá càháⁿ-ó tnúhu sá dácàhu iní ñáhá mèe-gá xii-o te càháⁿ-ó nàcuáa sàndáá iní-ó chindee ñaha-gá xii-o,

⁷ àdi ní nduu táhú-ó núú-gá sá ïo váha chindee-o tnàha ñáyiú-o te ñiú-ni ducaⁿ càda-o, àdi ní nduu táhú-ó dānehé-ó ñáyiú tnúhu-gá te ñiú-ni ducaⁿ càda-o,

⁸ àdi ní nduu táhú-ó núú-gá sá dácàháⁿ-ó ñáyiú canchicúⁿ nihnú-yu ichi-gá te ñiú-ni ducaⁿ càda-o, àdi ní nduu táhú-ó núú-gá sá cuãñaha-o xii tnaha ñáyiú-o sá ñihí-ó ndècu ndihi-o te ñiú-ni ducaⁿ càda-o, dico ní yùhu ní iní-ó cuãñaha-o xii-yu, àdi ní nduu táhú-ó núú-gá taxi tnùní-ó te ñiú-ni ducaⁿ càda-o, te ní yùhu ní iní-ó càda-o, àdi ní nduu táhú-ó núú-gá chindee-o cuè ñáyiú ndècu ndihi tnúndòho tnúhu ndàhú te ñiú-ni ducaⁿ càda-o, te ïo cudíí iní-ó càda-o chiuⁿ-áⁿ.

Nchaa nàcuáa taú-xi cada nchaa ñáyiú ndècu ichi Xítohó Jesucristú

⁹ Te cuu iní tnáhá ndisa-ndo ìⁿ ìⁿ-ndo, te daña-ndo nchaa sá cuèhé sá dúhá te cada-ndo mèe-ni sá váha.

¹⁰ Te ïo cuu iní tnáhá-ndó, te cada-ndo cuèndá sá ìⁿ-ní ñáyiú cùu-ndo, te ìⁿ ìⁿ-ndo càni-gá iní-ndó cànehe yíñùhu núú tnáhá-ndó.

¹¹ Te nducu ndèe-ndo cada-ndo nchaa chiuⁿ Xítohó Jesucristú vá tühío-ndo, te cada-ndo ní yuhu ní iní-ndó sá cúú-xí-gá.

¹² Te ïo cudíí iní-ndó cūndecu-ndo chí ní ngūndecu ndihi-ndo tnúhu ndee iní sá cūndècu ndihi-ndo Xítohó Jesucristú, te cada càhnu iní-ndó cuèí nándi na càda ñaha ñáyiú xii-ndo sá cuèndá-gá, te vá dáñá ndèe-ndó càháⁿ ndihi-ndo Yá Ndióxi.

13 Te chindee tñaha-ndo te núu ío dava nchòhó ñáyiú ndècu ichi-gá ío ìⁿ sá cúmǎní xii-ndo, te ío váha cuu iní-ndó còto-ndo ñáyiú véxi vehe-ndo.

14 Te cǎcáⁿ táhú-ndó núú Yǎ Ndióxi cuendá nchaa ñáyiú nándi quide ñaha xii-ndo, te cǎcáⁿ táhú-ndó núú-gǎ sá ná chindee ñaha-gá xii-yu te ñá díú dà cǎcáⁿ táhú-ndó núú-gǎ sá ná dàcuíta nihnu ñaha-gá xii-yu.

15 Te núu ío ñáyiú cùdǎí iní-xi te cudǎí iní-ndó ndíhí-yu, te núu ío ñáyiú ndíhú iní-xi te ndíhú iní-ndó ndíhí-yu.

16 Te cuu ìⁿnuu-ndo cùndecu-ndo, te vá cǎdá càhnu-ndo mee-ndo, te tnahá tnúhu-ndo ndíhi nchaa ñáyiú ndáhú iní-xi, te vá cǎní iní-ndó sǎ ío-gá túha-ndo.

17 Te vá nánchòcáva-ndo nàchinaa-ndo ìⁿ sá quidé ñaha ñáyiú xii-ndo, te ío nducu ndèe-ndo cada-ndo mee-ní sá váha nàcuáa cuu váha iní ñáyiú.

18 Te ío nducu ndèe-ndo cada-ndo sá ndácú-ndó cùndecu váha-ndo ndíhi nchaa ñáyiú.

19 Te nchòhó ñáyiú ío cùu iní-í, vá cǎní iní-ndó nàchinaa-ndo ìⁿ sá cǎdá ñaha ñáyiú xii-ndo, chi cundetú-ndo sǎ méé Yǎ Ndióxi ná nàchinaa-gá sá quidé ñáhá-yu xii-ndo, chi quee ndáá-xi nàcuáa càháⁿ Yǎ Ndióxi núú tütú-gá núú cǎchí-xi: “Yúhú dandòho-í-yu chi nachinaa-í nchaa sá quidé-yu”, duha cǎchí-gá núú tütú-gá.

20 Te xìni ñuhu tucu-xi cada-ndo nacuáa càháⁿ tucu-xi ingá xichi núú tütú-gá núú cǎchí-xi: “Te núu ñáyiú cùu úhú iní ñáhá xii-ndo ñá túú sǎ cóhó sǎ cǎxí-yu te cuáñaha-ndo xii-yu, te núu ducaⁿ na càda-ndo te ío cucahaⁿ núú-yu”, duha cǎchí-xi núú tütú-gá.

21 Te núu ío ìⁿ sá quidé ñaha tnahá ñáyiú-ndo xii-ndo te vá nánchòcáva-ndo nàchinaa-ndo sá quidé ñáhá-yu xii-ndo, chi cada-ndo sǎ váha sá cúu-xí-yu, te ducaⁿ te vá cǎdá-ndó sǎ ñá túú tàú-ndó càda-ndo núú Yǎ Ndióxi dàtná quidé-yu.

13

1 Te nchaa ñáyiú tàú-yu quindáá iní-yu nchaa cue téé cùchiuⁿ, chi Yǎ Ndióxi ní cǎchí-gá sá cùndècu téé cùchiuⁿ ñuyú-a, núu xǎⁿ xíndecu-güedé vitna.

2 Te nchaa ñáyiú ñá túú sàndáá iní ñáhá xii cue téé cùchiuⁿ ñá túú tnahá iní Yǎ Ndióxi sá dúcáⁿ quidé-yu, chi mee-gǎ ní cǎchí-gá sá cùndècu-güedé. Te nchaa ñáyiú ducaⁿ ñá túú sàndáá iní ñáhá xii cue téé cùchiuⁿ nacháhu-yu sá dúcáⁿ quidé-yu.

3 Te nchaa ñáyiú quide váha ñá túú yùhú-yu cue téé cùchiuⁿ chi quide váha-yu, dico nchaa ñáyiú ñá túú quide váha chi xiyùhú-yu cue téé cùchiuⁿ. Te vitna núu nchòhó cuíní-ndó sǎ vá yùhú-ndó cué téé cùchiuⁿ te chí cǎdá váha, te ducaⁿ te cǎháⁿ váha-güedé cuendá-ndó.

4 Te Yǎ Ndióxi ducaⁿ ní cǎchí-gá cundecu-güedé cuendá cada-güedé sá ñá túú ná cuu cundecu-ndo, te núu ñá túú quide váha-ndo ndècu-ndo te quiyùhú iní-ndó núú-güedé, chi ñá túú àúⁿ ná cuu ndècu ndíhi-güedé tnúhu ndee iní dandòho-güedé nchaa ñáyiú ñá túú quide váha, chi Yǎ Ndióxi ducaⁿ ní cǎchí-gá cundecu-güedé sá dúcáⁿ càda-güedé dandòho-güedé nchaa ñáyiú ñá túú quide váha.

5 Núu xǎⁿ ío xìni ñuhu-xi sá quindáá iní-ndó nchaa cue téé cùchiuⁿ, te ñá díú sǎ yùhú-ndó dándohó ñaha-güedé xii-ndo, chi cada-ndo sǎ cùtnùní iní-ndó sǎ cúu-xí ìⁿ sá váha.

6 Chi ñiu cuëndá xíáⁿ sàcáⁿ-ndó díhúⁿ núu cuè téé cùchiuⁿ, te ducaⁿ chi Yá Ndiöxí ducaⁿ ní cachí-gá cundecu-güedé te ñiu-ná chiúⁿ ndeé-güedé ñúhú iní-güedé.

7 Te nacháhu-ndo nchàa sá tàù-ndó núu nchàa ñáyiú tàù-ndó núu-xi, te cuèi díhúⁿ tàù-ndó cuëndá ñuhu-ndo núu cuè téé cùchiuⁿ àdi nágá díhúⁿ tàù-ndó núu-güedé te nacháhu-ndo núu-güedé. Te ío-gá canehe-ndo sá yíñuhu núu nchàa ñáyiú cùnuu, te cáháⁿ váha-ndo ndíhí-yu.

8 Te vá dácuidó-ndó ndùu nacháhu-ndo sá tàù-ndó núu tñaha ñáyiú-ndo, te cuu iní tñahá-ndó ñⁿ ñⁿ-ndo. Te núu ducaⁿ quide-ndo ndecu-ndo ña, te quide-ndo nchaa nacuaá cáháⁿ tñuhu sá sánú ichi ñaha xii-o nacuaá cada-o cùndecu-o.

9 Te duha ndùu tñuhu cáháⁿ Yá Ndiöxí cuëndá nchaa sá vǎ cúú càda-o: “Nchaa nchòhó cue téé vá cáháⁿ ndíhí-ndo ñáyiú díhí te núu ñá díú ñàdihí-ndó cúú-yu, te ducaⁿ-ni nchàa nchòhó cue ñáyiú díhí tucu vá cáháⁿ ndíhí-ndo téé te núu ñá díú yí-ndo cuu-güedé, te vá cahní-ndó tñaha ñáyiú-ndo, te vá dúhú-ndó sá ndécú ndíhí-yu, te vá dácacu-ndo cuéchi neñúú, te vá xíhó-ndó sá ndécú ndíhí tñaha ñáyiú-ndo”, nchaa xéhé cächí Yá Ndiöxí sá vǎ cúú càda-o. Te tñuhu-a quide-o ndíhí nchaa dava-gá tñuhu sá sánú ichi ñaha xii-o nacuaá cada-o cùndecu-o, te núu quide-o ingá tñuhu sá cächí-xi: “Cuu iní-ndó nchàa tñaha ñáyiú-ndo dàtná cúú iní-ndó mèe-ndo”, duha cáháⁿ tñuhu-án. Te nchaa dava-gá quidé-ó te núu quide-o nacuaá cáháⁿ tñuhu-a.

10 Te nchaa ñáyiú cuu iní tñaha ñáyiú-xi te ñá túú quide úhú iní-yu tñaha ñáyiú-yu, te núu ducaⁿ cuu iní-yu tñaha ñáyiú-yu te quidé-yu nàcuáa cáháⁿ tñuhu sá sánú ichi ñaha xii-o nacuaá cada-o cùndecu-o.

11 Te ducaⁿ xini ñuhu-xi cada-ndo chi sa ní cutnùni iní-ndó nàcuáa ta xica nduu cuáháⁿ ñuyúú-a, te ní sáá nduu sá ío xini ñuhu-xi ndixi túu iní-ó càda-o nchaa nacuaá cáháⁿ Yá Ndiöxí, chi vitna sa ní cuyatni-gá nduu nàcuaca ñaha Xítohó Jesucristú xii-o dácúxí ndèé cùtnàhá ní sándáá iní-ó tñuhu-gá.

12 Te cada iní-ndó sá dàtná ñⁿ niú sá sá ta cuyatni túndaá, ducaⁿ sàtnahá-xi cuu ñuyúú yíca cuéchi-a chi sa ta cuyatni nduu quixi tucu Xítohó Jesucristú, te núu xíáⁿ xini ñuhu-xi daña-o nchaa sá cuéhé sá dúhá te cada-o mèe-ni sá váha, te ducaⁿ te ní ñⁿ sá cuéhé sá dúhá vǎ cúnùu-xi taxi tñuní ñáhá-xi xii-o, te ducaⁿ te vá cúú-gá-ó dàtná ñáyiú ndècu núu néé chi cuu-ná-ó dàtná ñáyiú ndècu núu dító.

13 Te cada-o nchàa nacuaá tàù-xi cunduu cundecu-o dàtná tàù-xi cada ñáyiú ndècu ichi Xítohó Jesucristú, te vá quíhíⁿ-ó víco cuehé vico duha, te vá cúú-ó ñáyiú quíhu, te ní vǎ cáháⁿ ndíhí-o ñáyiú díhí te núu ñá díú ñàdihí-ó cúú-yu, te ducaⁿ-ni cuè ñáyiú díhí tucu vá cáháⁿ ndíhí-yu téé te núu ñá díú yí-yu cuu-güedé, te ní vǎ cùndecu-o ichi díú iní, te ní vǎ nàá-ó ndíhí tñaha ñáyiú-o, te ní vǎ cúú-ó ñáyiú cuédú iní.

14 Te vitna nchòhó daña-ndo mèe-ndo sá Xítohó Jesucristú ná chindee ñaha-gá xii-ndo càda váha-ndo cùndecu-ndo datná quidé mèe-gá ndécú-gǎ, te vá cání-gá iní-ndó càda-ndo datná ní xóo cada-ndo cùtnàhá ní cunuu nchàa sá cuéhé sá dúhá iní-ndó.

14

Vá cuátnùhu tñaha-o nacuaá ndècu-o ichi Xítohó Jesucristú

¹ Te núu ñáyi ndècu ichi Xítóhó Jesucristú ñá túú tècú tnùnì váha-yu nàcuáa cuínì Yá Ndióxi cadá-yu, te queheⁿ cuendá-ni-ndö-yu te vá ténää tnáhá-ndó ndihí-yu.

² Chi íó ñáyi sàni iní sá cúú váha iní Yá Ndióxi sá cúú càxí-yu nání nihí-yu, te dava ñáyi ñá túú cùtnuní váha iní-yu nàcuáa càháⁿ Yá Ndióxi te mee-ni yúcú xéxi-yu.

³ Te ñáyi xéxi nchaa núú sá nihí-yu te vá dáquèe tíhù-yu ñáyi ñá túú xéxi, te ducaⁿ-ni ñáyi ducaⁿ ñá túú xéxi-áⁿ vá cuátnùhù-yu nchaa ñáyi ducaⁿ xéxi nchaa núú sá nihí-xi-áⁿ, chi tnáhá ñáyi ducaⁿ xéxi nchaa núú sá nihí-xi-áⁿ quéhéⁿ cuendá ñáhá Yá Ndióxi xií-yu.

⁴ Te ñá túú ndècu ndihi-o tnúhu ndee iní cuatnúhu-o ñáyi xínu cuechi, chi mee ñáyi cùu patródⁿ-yu tàú-yu càháⁿ-yu te núu cùndáá ñáyi xínu cuechi núú-yu àdi ñá túú cùndáá-yu. Te ducaⁿ sátnahá-xi cùu ñáyi xínu cuechi núú Yá Ndióxi, chi mee-gá càháⁿ-gá te núu nása quidè-yu, te diu-ni mee-gá cada te cùndáá-yu cundecú-yu núú-gá.

⁵ Te na càchí tnúhu tucu-í xii-ndo sá íó ñáyi càchí sá íó dava nduu ío càhnu cuu-xi, te íó tucu dava ñáyi càchí-yu sá ñá-ni cuu-xi nchaa-ni nduu, te xínu ñuhu-xi sá cùtnuní ndáá iní-yu sá ndáá cúú-xí nàcuáa càháⁿ-yu ñá-ni-yu.

⁶ Te ñáyi cànehe íí dava nduu quidè-yu sá nehè-yu sá yíñùhu núú Yá Ndióxi, te ñáyi càchí sá ñá-ni cùu-xi nchaa-ni nduu quidè-yu sá nehè-yu sá yíñùhu núú Yá Ndióxi tnáhá-yu. Te diu-ni ducaⁿ sátnahá-xi cùu nchaa ñáyi xéxi nchaa nání nihí-yu, chi quidè-yu sá nehè-yu sá yíñùhu núú Yá Ndióxi, chi ndácáⁿ táhù-yu núú-gá cuendá nchaa sá nihí-yu. Te diu-ni ducaⁿ sátnahá-xi cùu nchaa ñáyi ñá túú xéxi nchaa núú sá nchító-ó chi quidè-yu sá nehè-yu sá yíñùhu núú Yá Ndióxi, te ndácáⁿ táhù-yu núú-gá cuendá nchaa sá nihí-yu.

⁷ Te nchoo cuéi vitna ndècu vívú-ó àdi cuéi na cùú-ó dico ñá díú cuendá mée-ó cùú-ó.

⁸ Chi vitna ndècu vívú-ó te ndècu-o sá cúú-xí Xítóhó Jesucristú àdi cuéi na cùú-ó dico cuú-ó diu-ni sá cúú-xí-gá, núu xiáⁿ cuéi vitna ndècu vívú-ó àdi cuéi na cùú-ó dico diu-ni Xítóhó Jesucristú cúú cuendá ñáhá-gá xii-o.

⁹ Chi Xítóhó Jesucristú ní xihí-gá te ní ndoto-gá, te vitna cùu-gá Xítóhó nchaa ñáyi, cuéi ñáyi xíndecu vívú te cuéi ñáyi ní xihí.

¹⁰ Te nchòhó, ñá túú ndùu váha-xi cuatnuhu tnàha-ndo nacuéa ndècu-ndo ichi Xítóhó Jesucristú, te ni ñá túú ndùu váha-xi daquèe tíhù tnáhá-ndó, chi nchaa-o sáá nduu cùndecu-o núú Xítóhó Jesucristú, te mee-gá cachí-gá te núu ní quide ndáá-ó àdi ñá túú ní quide ndáá-ó.

¹¹ Te Yá Ndióxi càchí-gá núú tütú-gá:

Yúhú Yá Ndióxi ndécù-í càchí tnúhu ndáá-í xii-ndo sá nchàa ñáyi ngüñí xítí-yu núú-í,

te ncháa-yu càháⁿ-yu sá yúhú cùú-í Ndióxi.

Duha càchí Yá Ndióxi núú tütú-gá.

¹² Núu xiáⁿ nchaa-o ndí dííⁿ nàcani tnúhu-o núú Yá Ndióxi nchaa sá ní quide-o.

Vá dácuíta nihnu tnàha-o

¹³ Núu xiáⁿ vá cuátnùhu tnàha-gá-ndó, te cada yica-ndo càda-ndo mee-ni sá váha, te vá cadá-ndó ñá sá ñá túú tàú-ndó càda-ndo cuendá sá vá cuíta nihnu dava ñáyi ndècu ndihí-ndo ichi Xítóhó Jesucristú.

14 Te yúhú ndécú ndìhi-í Xítóhó Jesucristú te cùtnuní ndáá iní-í sá ncháá núú sá cúú càxi-o cuu-ni caxi-o te vá cúú cuéchi. Te ñáyiú sàni iní sá vá cúú càxi-yu te núú na càxi-yu te cuu cuéchi xií-yu.

15 Te nchòhó, te núú cuendá sá xéxi-ndó ncháa núú sá cúú càxi-ndo, cuendá xiãⁿ ñá túú-gá cúú vâha iní ncháa ñáyiú ndécú ndìhi-ndo ichi Xítóhó Jesucristú, te ñá túú-gá quidé-ndó sá cúú iní ndisa-ndô-yu te núú ducaⁿ na càda-ndo, te núú ìⁿ sá sání iní-ndó càxi-ndo te cùtnuní iní-ndó sá xiãⁿ cada-xi cuíta nihnu ñáyiú ndécú ndìhi-ndo ichi Xítóhó Jesucristú te vá caxí-ndó xiãⁿ te núú ducaⁿ, chí Xítóhó Jesucristú ní xihí-gá cuendá-yu.

16 Te núú ìⁿ sá quidé-ndó sàni iní-ndó sá cúú-xí ìⁿ sá vâha, te ñáyiú cächí-yu sá ñá túú vâha te vá cáda-ndó cuendá sá vá cáháⁿ cuéhé-yu cuendá-ndó.

17 Te sá yíndàha ñaha Yá Ndióxi xii-o xiãⁿ ío xini ñuhu-xi cada ndáá-ó cùndecu-o, te cundecu váha ndìhi tnàha-o, te cudíí iní-ó cùndecu-o chí Espiritú-gá ndécú ndìhi ñaha-xi xii-o, te ncháa xéhé ío-gá cúnùu dacúúxi sá cóhó sá caxí-ó.

18 Te ncháa ñáyiú ducaⁿ quide ncháa sá ío-gá xíní ñuhu-xi, xinu cuechí-yu núú Xítóhó Jesucristú, te sá dúcáⁿ quidé-yu te ndùu vétú iní Yá Ndióxi, te cùdíú-yu núú ñáyiú.

19 Te nchoo chí ná ndùcu-o nacuaá cada-o cùndecu ndìhi váha tnàha-o, te nducu tùcu-o nacuaá cada-o chindee tnúhu tnàha-o nacuaá cuíta cundáá-gá-ó núú Xítóhó Jesucristú quíhíⁿ.

20 Te ñá díú sá cuendá ìⁿ núú sá xéxi-ó, te dàquee tíhú-ó sá vâha ní quide ñaha Yá Ndióxi xii tnàha ñáyiú-o. Te na cächí tnúhu ndáá-í xii-ndo sá ncháá-ní núú sá cúú càxi-o, te dicó-ní sá ñá túú ndùu váha-xi núú sá cuendá-ní sá caxí-ó ìⁿ núú sá cúú càxi-o cuíta nihnu ìⁿ tnàha ñáyiú-o.

21 Te váha-gá sá vá caxí-ó cùñú te vá cóhó ndidí, te ni ñá túú nǎgá cada-o te núú xitò-o sá xiãⁿ cada te ngúíta tnàha ñáyiú-o cáda-yu sá ñá túú vâha, àdi xito-o sá xiãⁿ cada te ngúíta-yu caní ìⁿ caní úú iní-yu cundecú-yu ichi Xítóhó Jesucristú, te vá cundáa-gá-yu núú-gá te núú ducaⁿ na càda-o.

22 Te núú ìⁿ sá vâha sàni iní-ó càda-o, te vá dátúu-o núú ñáyiú chí mee-ni núú Yá Ndióxi dátúu-o. Te nchoo cùu-o ñáyiú ío váha táhú-xi te núú cùtnuní ndáá iní-ó sá quidé ndáá-ó núú nándi cùu sá quidé-ó, te cùtnuní iní-ó sá ñá díú ìⁿ cuéchi cùu-xi sá quidé-ó.

23 Te núú nchoo sàni iní-ó sá quidé vâha-o àdi ñá túú quide vâha-o òrè xéxi-ó ìⁿ núú sá xéxi-ó, te cuu cuéchi xii-o te núú ducaⁿ na càda-o. Te ducaⁿ cùu cuéchi xii-o chí ñá túú ìⁿ-ni sá sání iní-ó, chí ncháa núú sá quidé-ó sàni ìⁿ sani úú iní-ó núú váha-ni àdi ñá túú vâha-ni, te cuu cuéchi xii-o sá dúcáⁿ quide-o.

15

Cada-o sá vâha sá cúú-xí tnàha ñáyiú-o

1 Te nchoo ñáyiú ío váha sàndáá iní ñháá xii Xítóhó Jesucristú, xini ñuhu-xi cuañaha-o tnúhu ndee iní xii ñáyiú ñá túú nihí ndéé cùndecu ichi-gá, te vá cáda-ó mèe-ni sá cúú-xí mèe-o.

2 Te cada-o sá vâha nàcuáa cuu váha iní tnàha ñáyiú-o cuendá cuu-xi sá vâha sá cúú-xí-yu, te ducaⁿ cuíta nihí ndéé-gá-yu quindáá iní-yu Xítóhó Jesucristú.

3 Te Xítóhó Jesucristú ñá túú ní quide-gá mee-ni sá cúú vâha iní mée-gá, te ní queue ndáá-xi nàcuáa cáháⁿ-xi núú tütú Yá Ndióxi nàcuáa ní xáhaⁿ Xítóhó Jesucristú xii-gá, te cächí-xi: “Ncháa ñáyiú cùu úhú iní ñháá xii-n ní xicuehé ní

xíduha ñáhá-yu xii-í", duha càháⁿ-xi núú tütú Yá Ndiöxí ñàcuáa ní xáhaⁿ Xítohó Jesucristú xii-gá.

⁴ Te ndéé sanaha ñí ngúndeé nchaa tnúhu Yá Ndiöxí núú tütú-gá, te ducaⁿ ñí ngúndeé cuendá dachuaha-o, te tnúhu-áⁿ dánèhè ñáhá-xí cùnduu cahnu iní-ó cuèi nándi ná yáha-o cùndecu-o ichi-gá, te sá xii tnúhu-áⁿ te vá ndihú-gá iní-ó cùndecu-o, te ñu-ni sá xii tnúhu-áⁿ cundecu ndihi-o tnúhu ndee iní.

⁵ Te Yá Ndiöxí quidé-gá ndécú ndihi-o tnúhu cahnu iní, te ñu-ni-gá quidé-gá ñá túú ndihú iní-ó ndècu-o. Te xicáⁿ táhú-í núú-gá sá ñúú-gá ná cáda te cuu ñⁿnuu-ndo cùndecu-ndo datná ní quide mee Xítohó Jesucristú cùtnàhá ní xíndecu-gá ñuyú-a.

⁶ Te ducaⁿ nchaa-ndo cuu ñⁿnuu-ndo, te danihí tnáhá-ndó yóó táchí-ndó te cachí-ndó sá ño cahnu cuu Yá Ndiöxí Yaá cúú Tátá Xítohó Jesucristú.

Ñáyiu ñá túú cùu ñáyiu isràél ní ñhí-yu tnúhu Xítohó Jesucristú

⁷ Te núu xíáⁿ chí quéhéⁿ cuendá tnáhá dàtná ní quide Xítohó Jesucristú ní queheⁿ cuendá ñáhá-gá xii-o, te núu ducaⁿ na càda-ndo te ño cuu cahnu Yá Ndiöxí.

⁸ Te na càchí tnúhu-í xii-ndo sá Xítohó Jesucristú ní quixi-gá ní quide-gá sá vaha sá cúú-xí ñáyiu isràél, te sá dúcáⁿ ní quide-gá xíáⁿ cùtnúni ndáá iní-ó sá Yá Ndiöxí quidé-gá ñⁿ sá càháⁿ-gá, chí Xítohó Jesucristú ní quide-gá nchaa ñàcuáa ní xáhaⁿ Yá Ndiöxí xii cue ñaní tnáhá-ó ní xíndecu ndéé sanaha.

⁹ Te ducaⁿ ñí quide Xítohó Jesucristú sá vaha sá cúú-xí ñáyiu isràél cuendá nchaa ñáyiu ñá túú cùu ñáyiu isràél cachí-yu sá ño cahnu cuu Yá Ndiöxí, te ducaⁿ quèsahá-yu chí ño cùndahú iní ñáhá-gá chíndèe ñaha-gá xii-yu, te quee ndáá-xí ñàcuáa càháⁿ-xi núú tütú Yá Ndiöxí núú càchí-xi:

Yúhú cachí-í sá ño cahnu cuu-n núú nchaa ñáyiu ñá túú cùu ñáyiu isràél, te cata-í ndudú chiñuhu ñaha-í xii-n.

Duha càchí-xi núú tütú-gá

¹⁰ Te càchí tucu-xi núú tütú-gá:

Te nchòhó ñáyiu ñá túú cùu ñáyiu isràél ño chí cúú ñí ndihí ñáyiu isràél ñáyiu ndècu ndihi-í.

Duha càchí-xi núú tütú-gá.

¹¹ Te càchí tucu-xi ñgá xichi núú tütú-gá:

Nchaa nchòhó ñáyiu ñá túú cùu ñáyiu isràél chí càháⁿ sá ño cahnu cuu Yá Ndiöxí,

te nchaa ñáyiu na càháⁿ-yu sá ño cahnu cuu-gá.

Duha càchí-xi núú tütú-gá.

¹² Te ndíi Chàíá càchí tucu ndíi núú tütú Yá Ndiöxí:

Coo ñⁿ ñaní tnáhá ndíi Isáí téé ní xíndecu ndéé sanaha, te téé-áⁿ taxi tnúni-dé cue ñáyiu ñá túú cùu ñáyiu isràél,

te ñáyiu-áⁿ cundee cùu cahnu iní ñáhá-yu xii-dé.

Duha ní cáháⁿ ndíi Chàíá càchí-xi núú tütú-gá.

¹³ Te xicáⁿ táhú-í núú Yá Ndiöxí Yaá ní taxi tnúhu ndee iní ndécú ndihi-o sá mée-gá ná càda ño cudí ñí-ndó cùndecu-ndo, te ducaⁿ ño vaha cundecu iní-ndó núú-gá chí sàndáá iní-ndó-gá, te ducaⁿ Espíritú-gá ná càda te uuⁿ-gá uuⁿ-gá cuita ngúndecu ndihi-ndo tnúhu ndee ñí quíhíⁿ sá cáda vaha ñaha-gá xii-ndo.

¹⁴ Te nchòhó ñáyiu ndècu ndihi-í ichi Xítohó Jesucristú cùtnúni ndáá iní-í sá nchòhó ño vaha iní-ndó, te ducaⁿ ño vaha cùtnúni iní-ndó nchaa tnúhu vaha, te ducaⁿ ño dàsahú tnáhá-ndó ñàcuáa cundecu-ndo.

15 Te dava tnúhu ní chídó tnùní-í nùú tütú-a cùu-xi tnúhu sá ïo càháⁿ-í dóho-ndo, te ducaⁿ ní tee-í cuendá sá nchòhó dandàcu iní-ndó tnúhu-áⁿ, te ní tee-í chi Yá Ndiòxí ní cundàhú iní ñáhá-gá xii-í ní taxi-gá chùuⁿ quide-í

16 xínú cuèchi-í nùú Xítohó Jesucristú càháⁿ-í tnúhu-gá nùú ñáyiú ñá túú cùu ñáyiú isràél. Te tnúhu-áⁿ cúu-xí tnúhu sá sánú ichi ñaha xii-o nacúaa naníhí tǎhú-ó, te ducaⁿ dānehé-í ñáyiú ñá túú cùu ñáyiú isràél tnúhu Yá Ndiòxí cuendá cúu-yu dàtná ìⁿ sá ndúú tǎhú-gǎ, te Espíritú-gá quidé-xí cúu-yu ñáyiú cùd̄u nùú-gǎ, te cùu váha iní ñáhá-gá xií-yu.

17 Te ïo váha cùu iní-í cuendá nchaa chùuⁿ quide-í sá cúu-xí Yá Ndiòxí, chi Xítohó Jesucristú ndécú ndìhi ñaha-gá xii-í.

18 Te mee-ni nàcuáa quide Xítohó Jesucristú chindèe ñaha-gá xii-í xiǎⁿ-ni càháⁿ-í, te sá dúcáⁿ quide-gá xiǎⁿ ní sándáá iní cue ñáyiú ñá túú cùu ñáyiú isràél tnúhu-gá. Te ducaⁿ chi ní chindee ñaha-gá xii-í ní càháⁿ-í tnúhu-gá te ducaⁿ-ni ní chindee ñaha-gá xii-í ní quide-í titní nùú sá ní quide-í núú-yu ní xiní-yu.

19 Te Espíritú Yá Ndiòxí ní quide-xi ní quide-í titní nùú sá vǎ yǎo tnàhí ndàcu cada ní xiní-yu te ïo ní cuñúhu-yu. Te nchaa ñuú ní sáháⁿ-í ní càháⁿ-í tnúhu Xítohó Jesucristú nùú ñáyiú cuèi ndéé ñuú Jerusalén, te cuèi ndéé distritú Ìlírícú, nùu nchaa ñuú-áⁿ ní sáháⁿ-í ní càháⁿ-í núú-yu tnúhu sá càháⁿ nàcuáa naníhí tǎhú-ó.

20 Te ducaⁿ ïo ndùcu ndee-í càháⁿ-í tnúhu sá càháⁿ nàcuáa naníhí tǎhú-ó núú vǎtá ñihí-gá-yu tnúhu cuendá Xítohó Jesucristú, te ducaⁿ quide-í chi ñá túú cuiní-í quíhíⁿ-í càháⁿ-í tnúhu-gá nùú sá xīndecu ñáyiú càháⁿ tnúhu-gá.

21 Te quide-í nàcuáa càháⁿ-xi nùú tütú Yá Ndiòxí nùú càchí-xi:

Ñáyiú vǎtá ñihí-gá tnúhu cuendá Yaá quixi ñuyú te ñihí-yu,

te ducaⁿ tècú tnùní-yu tnúhu-gá.

Duha càchí-xi nùú tütú-gá.

Té Pǎblú cuiní-dé quíhíⁿ-dé ñuú Ròmá

22 Te sá dúcáⁿ càháⁿ-í tnúhu-gá núú xiǎⁿ ñá túú ní ndàcu-í quixi-í quixi coto ñaha-í xii-ndo cuèi ducaⁿ-ni sàni iní-í quixi coto ñaha-í.

23 Te ní cuu titní cuía ducaⁿ-ni sàni iní-í quixi coto ñaha-í xii-ndo, te vitna ní ndìhi-í nchaa iha ní càháⁿ-í tnúhu Xítohó Jesucristú nùú nchàa ñáyiú.

24 Nùú xiǎⁿ sání iní-í sá ndùu na quíhíⁿ-í nàción Èspañá te yáha càháⁿ-í quini-í nása ndècu-ndo, te dàvǎ-áⁿ ïo cud̄í iní-ó cūndecu tnaa-o, te ducaⁿ te òre nucúhuⁿ tucu-í ichi te cada ndee iní-ndó chindee ñaha-ndo xii-í.

25 Te vitna quíhíⁿ-í ñuú Jerusalén quínehe-í sá ndúú tǎhú ñáyiú ndècu ichi Xítohó Jesucristú xīndecu yàcáⁿ.

26 Te ñáyiú xīndecu ichi Xítohó Jesucristú ndécú distritú Macèdoniá, ndìhi distritú Acáyá ní cuu ìⁿ nùú-yu ní sacáⁿ tnáhǎ-yu sá ndúú tǎhú ñáyiú ndàhú xīndecu ichi-gá ndécú ñuú Jerusalén.

27 Te ducaⁿ tnàhí ní cud̄í iní-yu cadá-yu, te ducaⁿ tnàhí tàù-yu cadá-yu chindèe-yu ñáyiú xīndecu ñuú Jerusalén. Te ñáyiú Macèdoniá ndìhi ñáyiú Acáyá-áⁿ ñá túú cùu-yu ñáyiú isràél. Te ñáyiú xīndecu ñuú Jerusalén cúu-yu mee-ni ñáyiú isràél, te ducaⁿ tàù-yu cadá-yu chi sá cuendá ñáyiú isràél-áⁿ ní ñihí-yu tnúhu sá càháⁿ nàcuáa naníhí tǎhú-yu, nùu xiǎⁿ tàù-yu chindee ñáhǎ-yu ndìhi nchaa sá ñihí-yu.

²⁸ Te sátá ná yáha quínguáha cuendá-í-yu sá ndúú tǎhǔ-yu, te ducaⁿ te dǎtnùní quee-í quihíⁿ-í nàcióⁿ Èspañá, te ichi yáha-í yáha cáháⁿ-í núú ndécú-ndó.

²⁹ Te cùtnuní ndáá iní-í sá òrè ná quèxio-í núú ndécú-ndó, te Xítohó Jesucristú ío chindee ñaha-gá xii-í cáháⁿ-í tnúhu-gá núú-ndó nàcuáa ío váha cundecu-ndo ichi-gá.

³⁰ Te nchòhó ñáyiu ndècu ndihí-í ichi Xítohó Jesucristú cáháⁿ ndàhú-í núú-ndó sǎ ío chindee ñaha-ndo xii-í cáháⁿ ndihí-o Yá Ndióxi cuendá-í, te ducaⁿ càda-ndo chi ndècu ndihí-ndo Xítohó Jesucristú. Te Espíritú Yá Ndióxi quidé-xí cùu iní tnáhá-ó ìⁿ ìⁿ-o.

³¹ Te ío chí càcáⁿ táhú núú Yá Ndióxi sá ná còto ñaha-gá xii-í, te ñá túú nǎ cada ñaha nchàa ñáyiu ñá túú sàndáá iní ñáhá xii-gá xǎndecu distritú Jùdeá. Te càcáⁿ táhú tùcu-ndo núú-gǎ sá ncháá sǎ cánèhe-í quihíⁿ nduu táhú ñáyiu ndècu ichi-gá ndécú ñúú Jerusalén ío váha cuu iní-yu queheⁿ cuendá-yu.

³² Te ducaⁿ càda-ndo cuendá sá núú Yá Ndióxi ná càchí-gá te ío cudíí iní-í òrè quexio-í núú ndécú-ndó, te ío váha cuu iní-í cundecu ndihí ñaha tnài xii-ndo.

³³ Te vitna xìcáⁿ táhú-í núú Yá Ndióxi Yaá quidé ío váha cùu iní-ó ndècu-o sá ná chindee chitúu ñaha-gǎ xii-ndo nchàa-ndó. Te ducaⁿ na cùnduu.

16

Té Pǎblú quidé ndèe iní-dé ñáyiu ndècu ñúú Ròmá

¹ Te yúhú tendaha-í tá Fèbé quixi-xi núú ndécú-ndó, te tnàhá-xi ndècu-xi ichi Xítohó Jesucristú, te quide-xi chiuⁿ Yá Ndióxi sá cúú-xí ñáyiu ndècu ichi Xítohó Jesucristú xǎndecu ñúú Cèncreá.

² Te cuimí-í sá ío váha cuu iní-ndó quèheⁿ cuendá-ndó-xí, chi ndècu ndihí-xi Xítohó Jesucristú, te cada-ndo nàcuáa tàú-xi cunduu dǎtná tàú-xi cada ñáyiu ndècu ichi-gá, te ío chindee-ndo-xi te núu ná cúú sǎ xíní ñúhu-xi, chi tnàhá-xi ío chindee-xi cue ñáyiu ndècu ichi Xítohó Jesucristú, te tnàhá yúhú ducaⁿ ío chindee-xi.

³ Te cúñaha-ndo ío na càda ndee iní té Àquilú ndihí ñadìhí-dé tá Priscilá, chi ñáyiu-áⁿ nǐ quide chiuⁿ-í ndihí-yu ní quide-ndí chiuⁿ Xítohó Jesucristú.

⁴ Chi mèe-yu ní cácu cuú-yu sá cuendá sá nǐ dácácu ñáhá-yu xii-í sá nǐ yáha-í, núu xǎⁿ ío ndàcáⁿ táhú-í núú-yu, te ñá díú-ní yúhú ducaⁿ ío ndàcáⁿ táhú-í núú-yu chi tnàhá nchaa ñáyiu ñá túú cùu ñáyiu isràél xǎndecu ichi-gá xǎndecu nchaa xichi ducaⁿ ío ndàcáⁿ táhú-yu núú té Àquilú ndihí núú ñadìhí-dé tá Priscilá.

⁵ Te cúñaha tùcu-ndo sá ío na càda ndee iní nchaa ñáyiu xǎndecu ichi Xítohó Jesucristú tàcá vehe té Àquilú ndihí tá Priscilá dácuhá-yu tnúhu-gá, te cúñaha tùcu-ndo sá ío na càda ndee iní té Epènetú chi tnàhá-dé ío ñúhu iní-í-dé, chi tée-áⁿ cúú-dé tée díhna nuu nǐ sàndáá iní tnúhu Xítohó Jesucristú distritú Acáyá.

⁶ Te cúñaha tùcu-ndo sá ío na càda ndee iní tá Màriá xíchí ndécú ndihí-ndo, xíchí ío ndúcu ndee xinu cuechi núú Xítohó Jesucristú.

⁷ Te cúñaha tùcu-ndo sá ío na càda ndee iní cue tée cùu ndi mee-í té Àndrónicú ndihí té Júníás, chi tnàhá-güedé ní xíhí ndihí ñaha-güedé xii-í veccá, te ío cùdiu-güedé núú nchàa cue tée ní táuchíúⁿ Jèsús cáháⁿ tnúhu-gá. Te díhna-gá-güedé ní sàndáá iní-güedé tnúhu Xítohó Jesucristú dácúúxí yúhú.

⁸ Te cúñaha-ndo sã ná càda ndee iní té Àmpliás chi tnàhá-dé ío ñùhu iní-í-dé, te ndècu-dé tnàhá-dé ichi Xítohó Jesucristú.

⁹ Te cúñaha tùcu-ndo xii té Bãnú tée cùndihí ñaha xii-o quide-o chiuⁿ Xítohó Jesucristú sã ná càda ndee iní-dé, te cúñaha tùcu-ndo xii té Èstaquís sã ná càda ndee iní-dé chi tnàhá-dé ío ñùhu iní-í-dé.

¹⁰ Te cúñaha tùcu-ndo xii té Àpelés sã ío na càda ndee iní-dé, chi tée-áⁿ ío váha cùndáá-dé núú Xítohó Jesucristú, te cúñaha tùcu-ndo xii ñáyiú xĩndecu vehe té Aristóbulú sã ío na càda ndee iní-yu.

¹¹ Te cúñaha-ndo xii té Herodión tée cùu ndi mee-í sã ío na càda ndee iní-dé, te cúñaha-ndo xii ñáyiú ndècu ichi Xítohó Jesucristú xĩndecu vehe té Nãrcisú sã ío na càda ndee iní-yu.

¹² Te cúñaha-ndo xii tnahá tá Trifená ndihí tá Trifosá sã ío na càda ndee iní-yu, chi tnàhá-yu quidé-yu chiuⁿ Xítohó Jesucristú. Te tnàhá tá Pèrsidá xíchí ndécú ndihí-o ichi Xítohó Jesucristú cúñaha-ndo xii-xi sã ío na càda ndee iní-xi, chi tnàhá-xi ío ndècu ndee-xi quide-xi chiuⁿ Xítohó Jesucristú.

¹³ Te cúñaha-ndo tnàhá té Rũfú tée ío váha sãndáá iní tnúhu Xítohó Jesucristú sã ío na càda ndee iní-dé ndihí nãná-dé, chi ñaha-áⁿ quidé iní-í sã cúú-áⁿ dàtná nãná-í.

¹⁴ Te cúñaha-ndo sã ío na càda ndee iní té Àsíncritú, ndihí té Flègonté, ndihí té Hèrmás, ndihí té Pãtrobás, ndihí té Hèrmés, ndihí nchaa dava-gá cue ñáyiú ndècu ndihí-o ichi Xítohó Jesucristú xĩndecu ndihí-güedé.

¹⁵ Te cúñaha tùcu-ndo sã ío na càda ndee iní té Filológó, ndihí tá Jüliá, ndihí té Nèréú, ndihí cúha té Nèréú, ndihí tá Òлимпás, ndihí nchaa dava-gá ñáyiú sãndáá iní tnúhu Xítohó Jesucristú xĩndecu ndihí-yu.

¹⁶ Te ío yĩñùhu cada ndee iní tnàhá-ndó ñⁿ ñⁿ-ndo. Te nchaa ñáyiú tàcã nchaa iha dàcuaha tnúhu Xítohó Jesucristú quidé ndèe iní ñáhã-yu xii-ndo.

¹⁷ Te nchòhó ñáyiú ndècu ndihí-í ichi Xítohó Jesucristú càháⁿ-í dóho-ndo sã cádá cuèndá-ndó nõu ío ñáyiú quidé nacuáa vá cúú ñⁿnuu-ndo cundecu-ndo, chi ñáyiú-áⁿ sãnú ichi ñahá-yu ñⁿ ichi ñã túú váha, chi ñã túú ñⁿ-ni cuu-xi tnúhu càháⁿ-yu ndihí tnúhu sã ní ñihí-ndó ndècu ndihí-ndo, te ñáyiú ducaⁿ xĩquide vá ñihí tnàhá-gã-ndó ndihí-yu.

¹⁸ Chi ñáyiú-áⁿ ñã túú quidé-yu chiuⁿ sã cúú-xí Xítohó Jesucristú, chi mee-ni sã cúú-xí mèe-yu quidé-yu, te mee-ni nchaa tnúhu sã ío vii ío váha cuáhãⁿ càháⁿ-yu òrè cuáhãⁿ-yu dãndahú-yu nchaa ñáyiú ío yáchí sãndáá iní-xi ñⁿ tnúhu.

¹⁹ Te nchaa ñáyiú ñihí-yu tnúhu sã nchòhó sãndáá iní-ndó tnúhu Xítohó Jesucristú, núu xĩáⁿ ío cùdí iní-í. Te cuiní-í sã nchòhó ío váha cutnùní iní-ndó nãcuáa cada-ndo mèe-ni sã váha, te vá cãní iní-ndó càda-ndo datná xĩquide nchaa ñáyiú ndècu ichi cuehé ichi duha.

²⁰ Te Yá Ndiõxí Yáá quidé ío váha cùu iní-ó ndècu-o ío ndihí cada-gá cuèndá sã sãculhná ñã túú-gã ná cada ñaha-xi xii-ndo, te xicãⁿ táhú-í núú Xítohó Jesucristú sã ío na chĩndee chitúu ñaha-gã xii-ndo.

²¹ Te té Timùteú tée quidé ndihí-í chiuⁿ Xítohó Jesucristú iha quidé ndee iní ñahá-dé xii-ndo, te tnàhá té Lùciú, ndihí té Jãson, ndihí té Sosipàtér cue tée cùu ndi mee-í quidé ndèe iní ñahá-güedé xii-ndo.

²² Te tnàhá yúhú té Tèrciú tée càdúha tutú-a cuèndá té Pãblú quidé ndèe iní ñahã-í xii-ndo, chi ñⁿ-ni cùu-o ndihí Xítohó Jesucristú.

²³ Te tnahá té Gǎyú téé dii vèhe-xi ndecu-í quidé ndèe iní ñáhá-dě xii-ndo, te diu-dé ní taxi nùu-dé vehe tàcá ñáiyu dàcuahá-yu tnúhu Xítóhó Jesucristú. Te tnahá té Èrastú téé yìndaha dihúⁿ ñùú quidé ndèe iní ñáhá-dě xii-ndo, te tnahá té Cuärtú téé ndècu ndihì-o ichi Xítóhó Jesucristú quidé ndèe iní ñáhá-dě xii-ndo.

²⁴ Te xicáⁿ táhù-í núú Xítóhó Jesucristú sá ïo na chìndee chitúu ñaha-gǎ xii-ndo nchàa-ndo. Te ducaⁿ na cùnduu.

Cáháⁿ-ó sǎ ïo cǎhnu cuu Yá Ndiǒxí

²⁵ Te vitna chí ná cǎchí-ó sǎ ïo cǎhnu cuu Yá Ndiǒxí, chi mee-gǎ cada te ío-gǎ cuita níhí ndéé-gǎ-ndó cùndecu-ndo ichi Xítóhó Jesucristú dàtná cǎchí tnúhu sá cǎháⁿ nàcuáa naníhí tàhú-ó, tnúhu sá dánèhé-í ñáiyu cuèndá Xítóhó Jesucristú, te nchaa tnúhu-a ìⁿ-ni cùu-xi ndihì nchaa tnúhu sá ñ cǎchí Yá Ndiǒxí cuu yuhu ndéé cùtnàhá ní ngáva ñuyíú, te vitna ní quee túu-xi,

²⁶ chi mee Yá Ndiǒxí ní dátúu-gǎ núú-ó vitna, te cǎháⁿ-ndí nàcuáa ní chídó tnùnì cue téé ní xóo cǎháⁿ tnúhu Yá Ndiǒxí ndéé sanaha. Te ducaⁿ tnúhu sá ndúú yùhu ní cuu ta xíté nuu-xi níhí ñuyíú cuǎháⁿ, chi ducaⁿ ñ cǎchí Yá Ndiǒxí Yaá ndécú nchàa nduu nchaa quíú cunduu cuèndá sá quìndáá iní ñáhá ñáiyu xii-gǎ, te tníⁿ-yu nchaa tnúhu cǎháⁿ-gǎ.

²⁷ ¡Te ìⁿdì-ni Yá Ndiǒxí cúú-gǎ Yaá ío sǎá sá xìnì tnùnì-xi! ¡Te nchaa-o chí ná cǎchí-ó sǎ ïo cǎhnu cuu-gǎ, chi ndècu ndihì-o Xítóhó Jesucristú, te ducaⁿ-ni càda-o ní caa ní quíhíⁿ! Te ducaⁿ na cùnduu. Te ío chí cǎdá ndèe iní-nǎ vitna.

TUTÚ DÍHNA NUU NĪ CADÚHA TÉ PĀBLÚ QUIHⁿ NDAHA ÑÁYIU ÑUÚ CÒRINTÚ

Té Pāblú cadúha-dé tutú quíhⁿ ndaha ñáyiú x̄ndecu ichi Xítóhó Jesucristú ndécú ñuú Còrintú

¹ Yúhú té Pāblú ní cáháⁿ ñháá Yá Ndióxi xii-í cuendá sá cáháⁿ-í tnúhu Xítóhó Jesucristú núú ñáyiú, chi ducaⁿ nĩ cachí Yá Ndióxi cunduu. Te cadúha-í tutú-a ndihi té Sōstenés té ndécú ndihi-o ichi Xítóhó Jesucristú

² cuendá daquixi-í ndaha nchòhó ñáyiú x̄ndecu ichi Yá Ndióxi ndécú ñuú Còrintú, chi nchòhó cúú-ndó ñáyiú cùu cuendá Yá Ndióxi cuendá sá ndécú ndihi-ndo Xítóhó Jesucristú. Te ñu-ni-ndo cùu-ndo ñáyiú ní cáháⁿ ñháá Yá Ndióxi cuendá cundecu yĩñùhu-ndo núú-gá, ndihi nchaa dava-gá ñáyiú ndécú nchaa xichi, ñáyiú cachí sá ïo càhnu cuu Xítóhó Jesucristú. Te Yaá-áⁿ cúú-gá Xítóhó-yu, te ñu-ni-gá cúú-gá Xítóhó nchoo tucu.

³ Te xicáⁿ táhù-í núú Tātá-ó Dütú Ndióxi ndihi núú Xítóhó Jesucristú sá ndé nduú-gá ïo na chĩndee chitúu ñaha-gá xii-ndo, te ïo váha cuu iní-ndó c̄ndecu-ndo.

Yá Ndióxi ïo chĩndee ñaha-gá xii-o cuendá sá ndécú-ó ndihi Xítóhó Jesucristú

⁴ Te ducaⁿ-ni ïo ndácáⁿ táhù-í núú Yá Ndióxi cuendá-ndó, chi mee-gá ïo chĩndee chitúu ñaha-gá xii-ndo sá cuendá Xítóhó Jesucristú.

⁵ Te cuendá sá ndécú-ndó ndihi Xítóhó Jesucristú, núú x̄áⁿ Yá Ndióxi ïo chĩndee ñaha-gá xii-ndo sáá díquí-ndó nàcuáa cáháⁿ-ndó, ndihi nàcuáa c̄tunni iní-ndó,

⁶ chi tnúhu sá ni nĩhí-ndó cuendá Xítóhó Jesucristú ní quée-xi iní-ndó.

⁷ Te x̄áⁿ núu nchaa sá váha ñá túú tnáhi c̄mání xii-ndo chi Yá Ndióxi ïo chĩndee ñaha-gá. Te ducaⁿ quide-gá ñini nchòhó ni yùhu ni iní-ndó ndétu-ndo sáá nduu quixi tucu Xítóhó Jesucristú.

⁸ Te Yá Ndióxi ducaⁿ-ni ïo chĩndee ñaha-gá xii-ndo cuendá sá v̄ ȳo teñaha cuèchi nduu na quixi tucu Xítóhó Jesucristú.

⁹ Te nchaa sá cáháⁿ Yá Ndióxi dacuítíi quide-gá, te ñu-gá cúú-gá Yaá ní cáháⁿ ñháá xii-ndo cuendá cuu ñⁿnuu-ndo ndihi Déhe-gá Xítóhó Jesucristú Yaá cúú Xítóhó-ó.

Ñá túú cùu ñⁿnuu ñáyiú ndécú ichi Xítóhó Jesucristú

¹⁰ Te nchòhó ñáyiú ndécú ndihi-í ichi Xítóhó Jesucristú cáháⁿ-í dóho-ndo sá v̄ ndé dííⁿ càni iní-ndó, te ïo cuu ñⁿnuu-ndo c̄ndecu-ndo, te ñⁿ-ni càni iní-ndó, te ñⁿ-ni càda-ndo chi ducaⁿ culmí-gá cunduu.

¹¹ Te duha cáháⁿ-í dóho nchòhó ñáyiú ndécú ndihi-í ichi Xítóhó Jesucristú, chi cue ñáyiú vehe té Clòé ní cachí tnúhu-yu xii-í sá ñà túú cùu ñⁿnuu-ndo ndecu-ndo.

¹² Te duha ndùu tnúhu ní nĩhí-í nàcuáa cùu ndecu-ndo, chi dava-ndo cachí-ndó: “Yúhú cúú-í cuendá té Pāblú.” Te dava-ndo cachí-ndó: “Yúhú cúú-í cuendá té Apólós.” Te dava-ndo cachí-ndó: “Yúhú cúú-í cuendá té Pèlú.” Te dava tucu-ndo cachí-ndó: “Yúhú cúú-í cuendá Xítóhó Jesucristú”, duha cachí-ndó.

13 Te vá dúcáⁿ cáháⁿ-ndó chi ñá túú ná daha Xítóhó Jesucristú ndécú chi ñndi-ni-gá. Te ñá díú yǔhú té Páblú ní xíhí-í núú cùrúxí sá cuendá-ndó, te ni ñá túú ní sàndute-ndo cuendá sá yǔhú cuu cuendá ñáhà-í xii-ndo.

14 Te táxǎhu xii Yá Ndióxi chi ñá díú nchaa-ndo ni dacuandute-í, chi té Crispú-ni ndíhi té Gáyú-ni ní dácuañdute-í-güedé.

15 Te xiǎⁿ núu vá cúú tñáhí cáháⁿ-ndó sǎ ñí sandute-ndo sǎ cúú cuendá ñáhà-í xii-ndo.

16 Te ní ndacu tucu iní-í sá tñahá tucu ñáyiu cùu ndi mee té Èstéfanás ní dácuañdute-í, te diu-ná ñáyiu-áⁿ te sànuu sá ñá túú-gǎ nágá ñáyiu ni dácuañdute-í.

17 Te Xítóhó Jesucristú ñá túú ní tëndaha ñaha-gá xii-í sá dácuañdute-í ñáyiu, chi ní tendaha ñaha-gá xii-í sá cáháⁿ-í tñúhu-gá núu-yu, tñúhu sá cáháⁿ nàcuáa naníhi tǎhú-ó. Te ñá túú cáháⁿ-í dàtná cáháⁿ ñáyiu túha. Te ducaⁿ quide-í cuendá sá nchòhó quíndáá váha iní-ndó tñúhu sá cáháⁿ nàcuáa ní xíhí Xítóhó Jesucristú núú cùrúxí. Chi núu na cáháⁿ-í dàtná cáháⁿ ñáyiu túha te nchòhó vá quíndáá iní-ndó tñúhu-áⁿ nàcuáa tàú-xi cunduu.

Sá cuendá Xítóhó Jesucristú cùtnùní iní-ó sǎ ño càhnu cuu Yá Ndióxi

18 Te nchaa ñáyiu ta xíta nihnu cuáháⁿ càchí-yu sá ñá túú nándíhi tñúhu sá cáháⁿ nàcuáa ní xíhí Xítóhó Jesucristú núú cùrúxí, dico sá cúú-xí nchòhó ñáyiu sa ní naníhi tǎhú, chi tñúhu-áⁿ cúú-xí ñí tñúhu sá ñí taxi Yá Ndióxi ndécú ndíhi-o cuendá ndacu-gá cada-gá nchaa nàcuáa cuíni-gá iní-ó,

19 te quèe ndáá-xi nàcuáa cáháⁿ-gá núú tütú-gá núú càchí-xi:

Yúhú cada-í te nchaa ñáyiu túha vá nándíhi-gá nchaa sá xini tñùni-yu, te nchaa ñáyiu ío váha sǎá díquí-xi vá nándíhi-gá nchaa nàcuáa sàni iní-yu. Duha càchí Yá Ndióxi núú tütú-gá.

20 Te xiǎⁿ cùtnùní iní-ó sǎ ncháá ñáyiu sàni iní-xi sá ño túha ndècu ñuyíú-a, ndíhi nchaa cue tée dàcuaha ñaha xii-yu nchaa tñúhu ní chídó tñùní ndíi Moisés, ndíhi nchaa ñáyiu ío váha sǎá díquí-xi cáháⁿ cuendá nchaa sá ío ñuyíú-a, te nchaa ñáyiu-áⁿ càchí Yá Ndióxi sá ñá túú nándíhi nchaa sá xini tñùni-yu sá cúú-xi-gǎ.

21 Te Yá Ndióxi ío váha cùtnùní iní-gá nàcuáa quide-gá, chi ñá túú dàña-gá cundecu ndíhi ñáhà-yu xii-gá sá cuendá nchaa sá ñí sǎá díquí-mé-yu, te ducaⁿ quide-gá chi cuíni-gá sá cundèdóho-yu tñúhu sá sání iní-yu ñá túú nándíhi. Te sá cuendá tñúhu-áⁿ te naníhi tǎhú-yu te núu na quíndáá iní ñáhà-yu xii-gá.

22 Te cue ñáyiu isràél cuíni-yu quíni-yu sá vǎ yǒo tñáhí ndàcu cada, te cue ñáyiu griégú nchicúⁿ nihnú-yu nchaa sá dácuaña ñáyiu ío túha.

23 Dico nchoo yíhi-o cáháⁿ-ó núú ñáyiu sá Xítóhó Jesucristú ní xíhí-gá núú cùrúxí. Te cue ñáyiu isràél ñá túú tñáhí tñáhá iní-yu cundèdóho-yu tñúhu-áⁿ. Te cue ñáyiu ñá túú cùu ñáyiu isràél càchí-yu sá ñá túú vèdana nándíhi tñúhu-áⁿ.

24 Dico sá cúú-xí nchaa ñáyiu ní cáháⁿ ñáhá Yá Ndióxi chi cuèi cùu-yu ñáyiu isràél àdi ñá túú cùu-yu, dico ñáyiu-áⁿ càchí-yu sá sá cuendá Xítóhó Jesucristú cùtnùní iní-yu sá ño càhnu cuu Yá Ndióxi te ndècu ndíhi-gá nchaa sá xini tñùní-gá.

25 Te sá quidé Yá Ndióxi càchí ñáyiu ñuyíú-a sá ñá túú nándíhi, dico xiǎⁿ ío-gá nándíhi dácúxí sá sání iní-mé-yu. Te sá ñí xíhí Xítóhó Jesucristú núú

cùrúxí, xiáⁿ càchí ñáyiú sá ñã túú ní ñihí ndéé Yá Ndióxi cada-gá sá ñí sani iní-gá cada-gá. Dico sá dúcáⁿ ñí quide Yá Ndióxi, xiáⁿ cúú-xí sá ño-gá ní ñihí ndéé-gá ñí quide-gá ñí sá ñí sani iní-gá dàcúúxí sá sání iní mée ñáyiú ñuyíú-a.

²⁶ Te nchòhó ñáyiú ndècu ndihi-í ichi Xítohó Jesucristú, chí dándàcu iní nàcuáa ndècu-ndo cùtnàhá ní cáháⁿ ñáhá Yá Ndióxi xii-ndo, chí sacú-ni-ndo túha dàcúúxí ñáyiú ñã túú ndècu ichi-gá. Te ducaⁿ sacú-ni-ndo tàxi tnuní-ndó, te ñi-ndi ducaⁿ sacú-ndó nèhe ñáyiú sá yíñuhu núú-ndó.

²⁷ Te ñáyiú ñã túú ndècu ichi Yá Ndióxi càchí-yu sá ñã túú tnàhí túha dava-gá tnàhá ñáyiú-yu, dico dava ñáyiú ñã túú túha-áⁿ cáháⁿ ñáhá Yá Ndióxi xií-yu cundecú-yu ichi-gá, te cundecu ndihi ñaha-gá xií-yu, te ducaⁿ dándóo canúú-yu nchaa ñáyiú càchí sá ño túha. Te cáháⁿ tucu-gá ñáyiú càchí dava-gá ñáyiú sá ñã túú tnàhí tàu cunuú cundecú-yu ichi-gá, te ducaⁿ cundecu ndihi ñaha-gá xií-yu, te dándóo canúú-yu nchaa ñáyiú càchí sá táxi tnuní.

²⁸ Te ducaⁿ Yá Ndióxi cáháⁿ-gá ñáyiú ñã túú tnàhí cunuú cundecu ndihi-gá, ndihi ñáyiú quèe tíhú núú dàva-gá tnàhá ñáyiú-xi, ndihi ñáyiú càchí-yu sá ñã túú vèdana nàndíhi, nchaa ñáyiú-áⁿ cáháⁿ-gá cundecu ndihi-gá, te ducaⁿ quide-gá cuèndá dándóo canúú-yu nchaa ñáyiú càchí sá ño cunuú.

²⁹ Te núú xiáⁿ ñí ñí ñáyiú vá cúú càchí-yu sá ño càhnu cuú-yu núú Yá Ndióxi.

³⁰ Dico nchòhó chí mee Yá Ndióxi ní quide-gá ndécú-ndó ndihi Xítohó Jesucristú, te Xítohó Jesucristú ní quide-gá ní cutnùní iní-ó sá Yá Ndióxi cúú-gá Yáá ndécú ndihi nchaa sá xíní tnuní-gá. Te ñi-ndi Xítohó Jesucristú ní quide-gá cuèndá sá nchóó vã cùndècu-gá cuèchi-o núú Yá Ndióxi, te ducaⁿ cundecu yíñuhu-o núú-gá, te nduu táhú-ó cundecu-o ndihi-gá ñí caa ñí quíhíⁿ.

³¹ Te sá dúcáⁿ quide-gá núú xiáⁿ xíní ññuhu-xi cada-o nacúáa cáháⁿ-xi núú tútú Yá Ndióxi núú càchí-xi: “Vá càchí-ndó sá mée-ndó ño càhnu cuu-ndo, chí càchí-ndó sá Yáá cúú Xítohó-ndó ño càhnu cuu-gá”, duha càchí-xi núú tútú-gá.

2

Tnúhu sá cáháⁿ nàcuáa ní cuu ní xíhí Xítohó Jesucristú núú cùrúxí

¹ Te nchòhó ñáyiú ndècu ndihi-í ichi Xítohó Jesucristú sa nàha-ndo sá cùtnàhá ní quixi-í ní cáháⁿ-í tnúhu Yá Ndióxi núú-ndó, te ñã túú ní cáháⁿ-í dàtná cáháⁿ ñí ñáyiú ño váha sàá díquí-xi, àdi datná cáháⁿ ñí ñáyiú ño túha.

² Chí cùtnàhá ní xíndecu ndihi ñaha-í xii-ndo chí ní sani iní-í sá mée-ní cuèndá Xítohó Jesucristú cáháⁿ-í núú-ndó ndihi nacúáa ní cuu ní xíhí-gá, te ñi ducaⁿ ñí quide-í.

³ Te cùtnàhá ní quexio-í núú ndécú-ndó te ñí ñã cùtnùní iní-í nása cada-í ní cùu, te ño ní quiyùhú iní-í ní cáháⁿ-í tnúhu-gá núú-ndó.

⁴ Te cùtnàhá ní cáháⁿ-í nàcuáa ndùu tnúhu Xítohó Jesucristú núú-ndó, te nàha-ndo sá Espiritú Yá Ndióxi ní chindee ñàha-xi xii-í ní cáháⁿ-í tnúhu-gá núú-ndó, te tnúhu-áⁿ ñí quèe-xi iní-ndó. Te ñã túú ní cáháⁿ-í ñí tnúhu càhnu núú-ndó tnúhu sá cáháⁿ cùe ñáyiú ño váha sàá díquí-xi.

⁵ Te ducaⁿ ñí cuu cuèndá sá nchòhó quíndáá iní-ndó tnúhu Yá Ndióxi chí ní quide-gá sá váha sá cúú-xí iní-ndó, te ñã díú sá cuèndá tnúhu sá cáháⁿ ñáyiú càchí sá ño túha ducaⁿ ñí sándáá iní-ndó tnúhu-gá.

Espiritú Yá Ndióxi quidé-xí cùtnuní iní-ó nàcuáa sàni iní-gá

6 Te nchoo càháⁿ-ó tnúhu càhnu núú ñáyiú sa ní níhí ndéé ndècu ichi Xítóhó Jesucristú. Te tnúhu-áⁿ ñà túú càháⁿ ñáyiú ñá túú ndècu ichi-gá, te ni cuè téé yíndaha ñaha xí-yu ñá túú càháⁿ-güedé tnúhu-áⁿ chi cue téé-áⁿ naa-güedé.

7 Te tnúhu càhnu-áⁿ cúú-xí tnúhu Yá Ndióxi, te mee-gá ní cachí-gá ndéé cútñahá vátá ngáva-gá ñuyíú sá ncháá ñáyiú na quíndáá iní tnúhu-áⁿ te nduu táhú-yu cundecú-yu ndíhi-gá núú ío váha càa ndecu-gá ni caa ni quíhíⁿ. Te tnúhu-áⁿ ndúú yúhu-xi ni cuu.

8 Te ni ñⁿ cue téé yíndaha cue ñáyiú ñuyíú-a ñá túú tècú tnùní-güedé tnúhu-áⁿ, chi núú dicó tècú tnùní-güedé tnúhu-áⁿ te vá catá càa-güedé Xítóhó Jesucristú núú cùrúxi cahni ñaha-güedé xii-gá ní cuu. Te ñi-ni Yaá-áⁿ ío càhnu cuu-gá.

9 Dico ducaⁿ ní cuu chi ní quee ndáá-xi nàcuáa càháⁿ-xi núú tütú Yá Ndióxi núú càchí-xi:

Yá Ndióxi sa ní sani iní-gá nchaa nàcuáa cada-gá sá cúú-xí cuendá nchaa ñáyiú cùu iní ñáhá xii-gá.

Te sá ní sani iní-gá cada-gá cúú-xí sá vátá quíni-gá ñáyiú te ni vátá cùndèdóho-gá-yu,

te ni ñá túú tnàhí cùtnuní iní-yu nása cada-gá.

Duha càchí-xi núú tütú-gá.

10 Te mee Yá Ndióxi ní cachí-gá sá Espiritú-gá cada-xi te nchoo cùtnuní iní-ó ncháa nacúaa sàni iní-gá cada-gá, núu xíáⁿ ducaⁿ tècú tnùní-ó vítña, chi Espiritú-gá xini-xi nchaandi túhú nàcuáa sàni iní-gá cada-gá.

11 Te ñá ííⁿ ñáyiú xini ndáá-yu nàcuáa sàni iní ingá ñáyiú, chi mee ñáyiú-áⁿ xini ndáá-yu nchaa nàcuáa sàni iní-yu. Te ducaⁿ sàtnahá-xi cùu Yá Ndióxi chi medii-ni Espiritú-gá xini-xi nchaa nàcuáa sàni iní-gá.

12 Te nchoo chi Yá Ndióxi ní taxi-gá Espiritú-gá ndécú ndíhi-o, te ñá díú ñuyíú-a ducaⁿ ní quee espíritú ní ngúndecu ndíhi-o. Te ducaⁿ ní taxi-gá Espiritú-gá ndécú ndíhi-o cuendá ducaⁿ cùtnuní iní-ó nàcuáa ndùu nchaa sá vaha sá dicó ducaⁿ ní taxi-gá ndécú ndíhi-o.

13 Te cuendá nchaa sá vaha-áⁿ càháⁿ-ndí, te càháⁿ-ndí nàcuáa dàcahu iní ñáhá Espiritú Yá Ndióxi xii-ndí, te ñá túú càháⁿ-ndí nàcuáa càhu iní ñáyiú ñuyíú-a càháⁿ-yu, te ñi-ni nchaa tnúhu dàcahu iní ñáhá Espiritú-gá xii-ndí càháⁿ-ndí, ñi-ni nchaa xíáⁿ dánèhé-ndí nchaa ñáyiú ndècu ndíhi tucu Espiritú-gá.

14 Te ñáyiú ñá túú ndècu ndíhi Espiritú Yá Ndióxi ñá túú tnàhí iní-yu nàcuáa ndùu tnúhu dàtecú tnúhu ñaha Espiritú-gá xii-yu, te ni ñá túú tècú tnùní-yu, te càchí-yu sá ñá túú nàndíhi-xi. Te ducaⁿ chi mee-ni ncháa ñáyiú ndècu ndíhi Espiritú-gá tècú tnùní-yu nàcuáa ndùu tnúhu-áⁿ.

15 Te cue ñáyiú ducaⁿ ndècu ndíhi Espiritú Yá Ndióxi cùtnuní ndáá iní-yu ná cúú ncháa sá vaha, te vá yóo ñⁿ xini nchaa nàcuáa sàni iní-yu.

16 Te núú tütú Yá Ndióxi càchí-xi: “Vá yóo ñⁿ xini nàcuáa sàni iní Yá Ndióxi, núu xíáⁿ vá yóo ñⁿ ndacu ná danèhé ñáhá xii-gá”, duha càchí-xi núú tütú-gá. Te nchoo chi ñⁿ-ni sàni iní-ó ndíhi Xítóhó Jesucristú.

3

Cue téé xíquide chiúⁿ Yá Ndióxi

1 Te nchóhó ñáyiú ndècu ndíhi-í ichi Xítóhó Jesucristú càchí tnúhu-í xii-ndo sá ñá ní níhi-í nàcuáa cada-í càháⁿ-í tnúhu-gá núú-ndó dàtná càháⁿ-í núú

nchàa ñáyiu quide nchaa nacuaá càháⁿ Espíritú Yá Ndiòxí, chi ní càháⁿ-í núú-ndó dàtná càháⁿ-í núú nchàa ñáyiu cùnnu nchaa sá cuèhé sá dúhá ínì-xi, te ní quide ñaha-í xii-ndo dàtná cue ñáyiu íchí ní sándáá ínì tnúhu Xítohó Jesucristú, núú xíáⁿ ducaⁿ ní càháⁿ-í núú-ndó.

² Te ní quide ñaha-í xii-ndo dàtná ìⁿ déhe yiquiⁿ vitna sadi camá, te ñá túú ní quide ñaha-í xii-ndo dàtná cue landú sa xèxi dítá, chi ní dánèhé ñáhà-í xii-ndo ìⁿ sá ñà túú tnàhí úhú tecú tnùnì-ndó, te ñá túú ní dānehé ñáhà-í xii-ndo ìⁿ sá xítò-í sá vā tècú tnùnì-ndó. Te quide cuendá-í sá díú-ní dùcaⁿ vā tècú tnùnì-ndó ndèè vitna te núu na dānehé ñáhà-í xii-ndo nchàa dava-gá tnúhu.

³ Te ducaⁿ chi quide-ni-ndo nacuaá sàni ínì mée-ndó, chi ndècu-ni-ndo ichi cuédú ínì, te nāa ndihi tnàha-ni-ndo, te ñá túú tnàhí cùu ìⁿnuu-ndo ndecu-ndo. Te xíáⁿ cútñuní sá mée-ní nchàa nacuaá sàni ínì mée-ndó quide-ndo, te xíquide-ndo dàtná quidé nchàa ñáyiu ñá túú ndècu ichi Xítohó Jesucristú.

⁴ Te dava-ndo càchí-ndó: “Yúhú cùú-í cuendá té Pāblú.” Te dava-ndo càchí-ndó: “Yúhú cùú-í cuendá té Apolós”, duha càchí-ndó. Te sá dúcáⁿ càháⁿ-ndó xíáⁿ cútñuní sá quidé-ní-ndó mēe-ni nchaa nacuaá sàni ínì mée-ndó.

⁵ Te yúhú té Pāblú càchí tnúhu-í xii-ndo sã ñá túú cùnnu-í, te ni té Apolós ñá túú cùnnu-dé chi dicó cue téè xīnu cuechi núú Yá Ndiòxí cùú-ndí, te ní càháⁿ-ndí tnúhu-gá núú-ndó, núú xíáⁿ ní sándáá ínì-ndó. Te ndi díⁿ ndí díⁿ ndūu chiⁿ ní táhú Yá Ndiòxí cada-ndí.

⁶ Te yúhú cùú-í dàtná ìⁿ téè chíhi tatá chi dàcáhàⁿ ñáhà-í xii-ndo tūha-ndo ichi Yá Ndiòxí. Te té Apolós cùú-dē dàtná ìⁿ téè nācuhñu chi té-áⁿ ndécú-dē dánèhé ñáhà-dē xii-ndo tnúhu-gá. Te Yá Ndiòxí cùú-gã Yaá quidé sàhnu tatá ní chíhi-í-áⁿ, te duha càháⁿ-í chí dīu-gá quidé-gã tá níhí ndéé-ndó ndècu-ndo ichi-gá.

⁷ Te núú xíáⁿ ni téè chíhi tatá te ní téè nācuhñu ñá túú cùnnu-güedé, dico Yá Ndiòxí ío cùnnu-gá chí dīu-gá quidé-gã xīnu tatá-áⁿ te sàhnu-xi.

⁸ Te ìⁿ-ni cùu téè chíhi tatá ndihi téè nācuhñu. Te ducaⁿ sãtnahá-xi cùu nchúhú cue téè xíquide chiⁿ Yá Ndiòxí, te nācuáa ndūu chiⁿ ní quide-ndí te ducaⁿ cūnduu táhú taxi Yá Ndiòxí nduu táhú-ndí.

⁹ Te nchòhó cùú-ndó dàtná ìⁿ xichi núú ní quée tatá, te nchúhú cùú ìⁿnuu-ndí quidé chíuⁿ-ndí xíáⁿ. Te ducaⁿ sãtnahá-xi cùu-ndo chi cùu cuendá ñáhà Yá Ndiòxí xii-ndo, te nchúhú cùú ìⁿnuu-ndí quidé-ndí chíuⁿ-gá.

Te cùu tucu-ndo datná ìⁿ vehe sá vítná sáá, te ducaⁿ sãtnahá-xi cùu-ndo chi Yá Ndiòxí quidé-gã tá sàhnu nihnu-ndo ichi-gá cuáhàⁿ.

¹⁰ Te yúhú cùú-í dàtná ìⁿ téè cùnnu dāca vehe te ní tava-í cimièntú-xi, te díⁿ cue téè véxi dàca-güedé ndóho, te ìⁿ ìⁿ cue téè-áⁿ ío xīni ñūhu-xi cada cuendá-güedé nācuáa dāca-güedé. Núu ducaⁿ sãtnahá-xi cùu yúhú chí Yá Ndiòxí ní taxi-gá chíuⁿ quide-í te chíndee ñaha-gá, chí díhna-gá-í ní quixi-í ní càháⁿ-í tnúhu Xítohó Jesucristú núú-ndó, te díⁿ cue téè véxi dàcuaha ñaha-ná xii-ndo tnúhu-gá, te ìⁿ ìⁿ cue téè-áⁿ ío xīni ñūhu-xi cada cuendá-güedé nācuáa dācuaha ñaha-güedé xii-ndo tnúhu-gá.

¹¹ Te cimièntú vehe-áⁿ cada ínì-ó sã cùú-xí mēe Xítohó Jesucristú, te ducaⁿ chí yúhú ní dánèhé ñáhà-í xii-ndo ní ngúndecu ndihi-ndo Xítohó Jesucristú, te vā yōo-gá cundecu ndihi-ndo chí ìⁿdí dí-í-ni-gá ndécú.

12 Te dava cue tée dàcaa-güedé vehe váha te çhìhi-güedé dîhúⁿ cuàáⁿ, ndîhi dîhúⁿ cuixíⁿ, ndîhi yúú sá ïo vii càa. Te dava-güedé dácàa-güedé vehe vítú, te dava-güedé dácàa-güedé vehe ité, te dava-güedé dácàa-güedé vehe tnuvixíⁿ.

13 Te sáá nduu te nchaa vehe-áⁿ càyú-xi, te vehe vítú-áⁿ ndîhi vehe ité-áⁿ ndîhi vehe tnuvixíⁿ-áⁿ ndoo ndoo càyú, te nchaa vehe váha-áⁿ vâ càyú-xi cuèi na yáha ñuhú. Te nchaa cue tée ní dácáá vèhe váha-áⁿ cada iní-ó sá cúú-güedé ñáyiu ío váha quide chiuⁿ Yá Ndiöxí. Te nchaa cue tée ní dácáá vèhe vítú, ndîhi cue tée ní dácáá vèhe ité, ndîhi cue tée ní dácáá vèhe tnuvixíⁿ cada iní-ó sá cúú-güedé ñáyiu ñá túú cuíni cada çhiuⁿ Yá Ndiöxí nàcuáa tàú-xi cunduu. Te sáá nduu te cutnùní nàcuáa nduu chiuⁿ ní quide ìⁿ ìⁿ ñáyiu, chi Yá Ndiöxí cáháⁿ-gá nàcuáa nduu chiuⁿ ní quide ìⁿ ìⁿ ñáyiu ní quide çhiuⁿ-gá.

14 Te cue ñáyiu ío váha xiquide çhiuⁿ Yá Ndiöxí te cudí çhiuⁿ quidé-yu, te ñáyiu-áⁿ ñîhi-yu sá ndúú tãhú-yu.

15 Te cue ñáyiu ñá túú quide chiuⁿ Yá Ndiöxí nàcuáa tàú-xi cunduu, te vâ cudí çhiuⁿ ní quidé-yu çhi cuíta te ndóo-ná-yu duha, dico mèe-yu chi naníhí tãhú-yu.

16 Te yúhú càháⁿ-í dóho-ndo dândacu-í iní-ndó sá cúú-ndó dàtná vehe Yá Ndiöxí, chi Espíritú-gá ndécú ndîhi ñaha-xi xii-ndo.

17 Te núu yoo na dànaa ñaha xii nchohó ñáyiu cùu veñúhu-gá, te Yá Ndiöxí danàa ñaha-gá xii ñáyiu-áⁿ, te ducaⁿ càda-gá çhi nchohó cúú-ndó ñáyiu cùu cuendá-gá.

18 Te vâ dándàhú-ndó mèe-ndo sá ïo túha-ndo. Te núu ío dava-ndo sàni iní-ndó sá túha-ndo dàtná sàni iní cue ñáyiu ñá túú ndècu ichi Yá Ndiöxí, te cada-ndo sá cúú-ndó dàtná ñáyiu ñá túú tñàhí túha, te ducaⁿ te cuu ndisa-ndo ñáyiu túha sá cúú-xí Yá Ndiöxí.

19 Te nchaa sá xini tnùni nchaa ñáyiu càchí sá ïo túha ñá túú ndècu ichi Yá Ndiöxí ñá túú nàndíhi-xi sá cúú-xí-gá. Te càchí-xi núú tütú-gá: “Nchaa ñáyiu càchí sá ïo túha te Yá Ndiöxí dandõ canúú ñáhá-gá xií-yu núú nchaa sá quidé-yu”, duha càchí-xi núú tütú-gá.

20 Te càchí tucu-xi ingá xichi: “Yá Ndiöxí cutnùni iní-gá nchaa nàcuáa sàni iní ñáyiu càchí sá ïo túha. Te nchaa nàcuáa sàni iní-yu-áⁿ càchí-gá sá ñà túú vèdana nàndíhi-xí”, duha càchí-xi núú tütú-gá.

21 Núu xíáⁿ càháⁿ-í dóho-ndo sá vâ càchí-ndó sá nchúhú cue tée dānehé ñáhá xii-ndo tnúhu-gá ío càhu cuu-ndí. Te nchaa sá ío ñuyúú-a cùu-xi sá váha sá cúú-xí-ndó.

22 Te cuèi yúhú ndîhi té Àpolós ndîhi té Pèlú ndécú-ndí sá cúú-xí-ndó, te cuèi nchaa sá ío ñuyúú-a te cuèi nchaa nduu ndècu-ndo te cuèi sá cúú-ndó dico nchaa cùu-xi sá váha sá cúú-xí-ndó. Te cuèi nchaa sá ndécú tnàví, te cuèi nchaa sá cóo ndéé cuèé-gá nchaa cùu-xi sá váha sá cúú-xí-ndó.

23 Te mee-ndo ndècu-ndo sá cúú-xí Xitohó Jesucristú, te mee Xitohó Jesucristú ndécú-gá sá cúú-xí Yá Ndiöxí.

4

Nàcuáa nduu chiuⁿ quide cue tée ní táuchúúⁿ Xitohó Jesucristú cáháⁿ tnúhu-gá

1 Te cada cuendá-ndó sá nchúhú dicó-ni cue tée xinu cuechi núú Xitohó Jesucristú cúú-ndí, te çhiuⁿ-áⁿ ní taxi Yá Ndiöxí quidé-ndí cáháⁿ-ndí tnúhu sá ní cachí-gá yíyùhu ni cuu.

2 Te xini ñuhu-xi sá ncháá ñáyiu ducaⁿ ní sáñaha Yá Ndiöxí çhiuⁿ quidé-yu cada ndáá-yu cadá-yu çhiuⁿ-áⁿ.

³ Te yúhú ñá túú quide cuendá-í nõu nása ndùu tnúhu càháⁿ-ndó cuendá-í nõu cùu-í téé váha àdi ñá túú cùu-í. Te ñu-ni ducaⁿ ñá túú quide cuendá-í nõu nása-gá càháⁿ nchaa dava-gá ñáyiú cuendá-í. Te ni mée-í ñá túú càháⁿ-í nõu cùu-í téé váha àdi ñá túú cùu-í.

⁴ Te sànuu iní-í sá ñá túú nã cúmãní-í núú Yã Ndiõxí, dico ñá díú sã xǎⁿ te cachí-í sá ñá túú cuèchi-í ndécú núú-gá, chi mee-gá nãhá ndãá-gá te núu nása quide-í ndécú-í.

⁵ Te nchòhó vá càháⁿ-gá-ndó sá ñá túú cundáá ñáyiú núú Yã Ndiõxí, chi vátá sáá-gá nduu cundáá cuèchi-yu. Te na sáá nduu quixi tucu Xítóhó Jesucristú te dàv-áⁿ dàtúu-gá nchaa sá quidè-yu, nchaa sá ñá túú xìní-ó quide-yu vitna, te ducaⁿ dàtúu-gá nchaa nãcuáa sàni iní-yu. Te Yã Ndiõxí càháⁿ váha-gá cuendá nchaa ñáyiú ní quide váha.

⁶ Te nchòhó ñáyiú ndécú ndihí-í ichi Xítóhó Jesucristú, càcunehe-í té Àpolós ndihí yúhú núú-ndó ònehé ñáhà-í xii-ndo nãcuáa cada-ndo cuendá ducaⁿ cùu-xi ñⁿ sá váha sá cúu-xí-ndó, ndihí cuendá sá nchòhó canchicúⁿ nihnu-ndo càda-ndo mee-ni nchaa nãcuáa yòdo tnuní núú tütú Yã Ndiõxí. Te ducaⁿ te vá càchí-ndó sá ñⁿ téé càháⁿ tnúhu Yã Ndiõxí ío-gá càhnu cuu-dé dàcúúxí ìngá-dé.

⁷ Te nchòhó vá càchí-ndó sá ío-gá cùnùu-ndo dacúúxí dàva-gá ñáyiú chi Yã Ndiõxí ní quide-gá ní ngúndecu ndihí-ndo nchàa sá xìní tnùní-ndó. Te mee-gá ducaⁿ nĩ quide-gá ¿Te ná cuendá nchòhó ducaⁿ quide cahnu-ndo mee-ndo? Te quide-ndo datná tnúhu sá mée-ndó ní quide-ndo dùcaⁿ ní ngúndecu ndihí-ndo nchàa sá xìní tnùní-ndó.

⁸ Te nchòhó quidè-ndó sá ñá túú tnàhí-gá ná cúmãní-ndó nõu Yã Ndiõxí, te quide-ndo sá ni nĩhí-ndó nchàa sá cuiní-ndó nõu-gã ndécú ndihí-ndo, te sànuu sá cúu-nã-ndó dàtná cue téé yìndaha ñáyiú, te nchúhú ñá túú cùu ñⁿnuu ndihí ñaha-ndí xii-ndo quìndaha ndihí ñaha-ndí xii-ndo ñáyiú, jte váha-ni te núu dìcò ndisa sá yìndaha-ndo ñáyiú chi tnàhá nchúhú ní tnahá ndihí ñaha-ndí xii-ndo quìndaha-ó-yu te núu dìcò cúu-xí ñⁿ sá ndàá dico ñáhà!

⁹ Te yúhú quidè cuendá-í sá nchúhú cue téé ní táuchíúⁿ Xítóhó Jesucristú càháⁿ tnúhu-gá núú ñáyiú ní cachí Yã Ndiõxí sá cúu-ndí cue téé ñá túú nàndíhi sá cúu-xí dàva-gá ñáyiú. Te ní cachí tucu-gá sá cúu-ndí dàtná cue ñáyiú sa ní tnahá òrè cuú-xi quíhíⁿ nacháhu cuèchi-xi, te nchaa ñáyiú cùñúhu ñáhà-yu xii-ndí sá dúcáⁿ ndòho-ndí, te tnàhá nchaa espíritú cùñúhu ñaha-xi xii-ndí.

¹⁰ Te cuendá sá xínú cuèchi-ndí núú Xítóhó Jesucristú, xǎⁿ cúu-ndí dàtná cue téé ñá túú vèdana nàndíhi sá cúu-xí ñáyiú. Te nchòhó quidè-ndó sá cúu-ndó ñáyiú ío túha ndècu ndihí Xítóhó Jesucristú. Te ñáyiú càchí-yu sá nchúhú cúu-ndí cue téé ñá túú ndàcu cada ñⁿ sá cádá sá cúu-xí Yã Ndiõxí. Te nchòhó quidè-ndó sá cúu-ndó ñáyiú ío váha ndàcu quide ñⁿ sá sáni iní-ndó sá cúu-xí-gá. Te cue ñáyiú dàquee tihú ñáhà-yu xii-ndí, te nchòhó nêhè-yu sá yíñùhu núu-ndó.

¹¹ Te nchúhú chi nchaa-ni nduu ío ndòho-ndí, chi xihí-ndí docó, yìchí-ndí ndute, te ñá túú dõó-ndí, te nchaa ñáyiú quide úhú ñáhà-yu xii-ndí, te ni vèhe-ndí ñá túú ndèè cáá cùndecu-ndí.

¹² Te ío ndòho-ndí quidè chiùⁿ-ndí nihí-ndí sá xéxi-ndí. Te cue ñáyiú xicuehè ñáhà-yu xii-ndí dico xicáⁿ táhú-ndí núú Yã Ndiõxí cuendá-yu, te ñá túú tnàhí quiní ndeé ñáhà-yu xii-ndí dico quide cahnu iní-ndí nchaa sá quidè ñáhà-yu.

13 Te mee-ni tn̄hu cuèhé tn̄hu duha càháⁿ-yu cuèndá-ndí dico sàcahnu iní-ndí te dāsahú-ndí-yu mee-ni tn̄hu váha. Te cāchí-yu sá cúú-ndí dàtná ìⁿ sá ñà túú-gã vèdana nāndihi, te nchaa-ni nduu ducaⁿ càháⁿ-yu xǎhǎⁿ-yu xii-ndí.

14 Te yúhú duha càháⁿ-í núú tūtú-a dāsahú ñáhà-í xii-ndo, dico ñá díú tn̄hu sá cúú càháⁿ núú-ndó càháⁿ-í. Te duha càháⁿ-í dóho-ndo chi quide iní-í sá súúni dàtná déhe mee-í cúú-ndó chi ío cùu iní ñáhà-í xii-ndo.

15 Te nchaa-o ndècu-o ichi Xítóhó Jesucristú vitna, dico yúhú cúú-í téé díhna nuu ní dánèhé ñáhá xii-ndo nacuaá nduu tn̄hu sá càháⁿ nàcuáa naníhi tǎhú-ó, núu xǎⁿ cúú-í dàtná tǎtá-ndó. Te cuèi vǎi vihi cue téé na quixi-güedé danèhé ñáhá-güedé xii-ndo tn̄hu-gá dico ìⁿ dii-ni yúhú cúú-í téé díhna nuu-gá ní dánèhé ñáhá xii-ndo tn̄hu-gá.

16 Núu xǎⁿ càháⁿ-í dóho-ndo sǎ cānchícúⁿ nihnu-ndo càda-ndo nchaa nacuaá quide-í.

17 Te xǎⁿ núu sa ní tendaha-í té Timùteú véxi coto ñaha-dé xii-ndo, te téé-áⁿ ío cùu iní-í-dé te quide ndáá-dé, te cùu-dé dàtná déhe-í chi yúhú ní sanu ichi-í-dé ichi Xítóhó Jesucristú, te téé-áⁿ cāchí tn̄hu-dé xii-ndo nchaa nacuaá quide-í ndécú-í ichi-gá. Te diu-ni nàcuáa na cāchí tn̄hu-dé-áⁿ diu-ni ducaⁿ quide-í nchaa xichi núú tǎcá ñáyiú dācuaha tn̄hu Xítóhó Jesucristú.

18 Te dava nchòhó ío quide cahnu-ndo mee-ndo chi sàni iní-ndó sǎ vǎ quíxi-gǎ-í quixi coto ñaha-í xii-ndo.

19 Dico mee Yǎ Ndióxi ná cāchí-gá te ío ndíhi quixi coto ñaha-í xii-ndo, te dàvǎ-áⁿ quini-í te núu nása quide nchaa ñáyiú ducaⁿ ío xǎquide càhnu mee-xi-áⁿ ndécú-yu ichi Xítóhó Jesucristú. Te vǎ cáda cuèndá-í tn̄hu càháⁿ-yu chi chiúⁿ quidé-yu cada cuèndá-í.

20 Te vitna yǐndaha ñaha Yǎ Ndióxi xii-o, te chĩndee ñaha-gá xii-o quide-o nchaa sá vǎha sàni iní-ó quide-o te ñá díú mèe-ni sá càháⁿ-ó.

21 Te ío chí cáni iní núu ndédacáa sá vǎha-gá cada-í òrè ná quéxió-í núú ndécú-ndó, núu sá ténǎ ñáhà-í xii-ndo àdi sá càháⁿ ndíhi ñaha-í xii-ndo ndíhi tn̄hu vii tn̄hu váha nàcuáa cutn̄ni iní-ndó sá cúú iní ñáhà-í xii-ndo.

5

Íⁿ cuèchi càhnu vihi

1 Te yúhú sa ní nihí ndǎá-í tn̄hu nàcuáa cùu ndecu-ndo, chi ìⁿ téé ndècu ndíhi-ndo ndeca-dé nǎná chǎhá-dé. Te xǎⁿ cúú-xí ìⁿ cuèchi càhnu vihi, chi ndéé nchaa ñáyiú ñá túú ndècu ichi Yǎ Ndióxi cāchí-yu sá vǎ cúú tnǎhí ducaⁿ càda-o.

2 ¡Te nchòhó ío quide cahnu-ni-ndo mee-ndo xĩndecu-ndo! ¡Te tǎú-ndó sǎ cúnǎyí-ndó ndixi cuèchi iní-ndó sǎ dúcáⁿ cùu ndecu-ndo ni cuu! Te téé ducaⁿ quide-áⁿ xíní ñùhu-xi sá vǎ dáñǎ-gǎ-ndó nihí tnǎhá ndíhi ñaha-dé xii-ndo ni cùu dico ñá túú dùcaⁿ quide-ndo.

3 Te yúhú ñá túú ndècu ndíhi ñaha-í xii-ndo dico dàtná tn̄hu sá ndécú ndíhi ñaha-í xii-ndo chi ducaⁿ-ni ío ñùhu iní ñáhà-í xii-ndo. Te yúhú cāchí-í sá nǎchǎhu téé-áⁿ cuèchi-dé sá dúcáⁿ quide-dé, te diu-ni ducaⁿ cǎháⁿ-í núú-ndó te núu dicó ndécú ndíhi ñaha-í xii-ndo.

4 Te òrè nǎtácá-ndó càháⁿ ndíhi-ndo Yǎ Ndióxi te diu-ni Xítóhó Jesucristú ñá túú dàña ndéé-gá chĩndèe ñaha-gá xii-ndo, te òrè-áⁿ cada-ndo nàcuáa cuini Xítóhó Jesucristú cada-ndo, te cada iní-ndó sǎ tnǎhá-í ndécú ndíhi ñaha-í xii-ndo.

⁵ Chi tàú-xi sá tēe ducaⁿ quide-áⁿ daquee tǎhú-ndó-dě, te ducaⁿ te sácúhǎnǎ dandòho ñaha-xi xii-dé cuéi na cùú-dé, dico na sàà nduu te nduu tǎhú-dě cundecu-dé ndihi Xítóhó Jesucristú.

⁶ Te nchòhó ñá túú nduu váha-xi sá cǎchí-ndó sǎ ïo cǎhnu cuu-ndo. Te xiní-ndó sǎ cuéi luha-ni levadurá ná quihu yuchi cuáha pǎá dándaa-xi cuéi luha-ni ná quíhu te nihi-ni yuchi sǎháⁿ ndoho-xi. Te ducaⁿ sǎtnahá-xi cùu nchohó chi núu ndècu ndihi-ndo ìⁿ ñáyiú quide sá ñà túú váha te nchaa-ndo ñà túú-gǎ cúú váha iní-ndó ndècu-ndo.

⁷ Te xini ñuhu-xi sá cǎdá-ndó datná quidé cuè ñáyiú quide vico pascuá, chi ñá túú chihí-yu levadurá yuchi cuáha pǎá xéxi-yu nduu quidé-yu vico-áⁿ. Te sá quíhu pǎá-áⁿ cada iní-ó sǎ cúú-xi nchaa sá cuéhé sá dúhá ní xóo cada-ndo. Te vǎ cǎdá-gǎ-ndó ñi ìⁿ sá cuéhé sá dúhá, te ducaⁿ te cuu-ndo ñáyiú váha chi sá ní nduu ndoo ní nduu nine iní-ndó. Te cue mbéé cue quiti ní xóo cahni-güedé nduu pascuá cue quiti-áⁿ cada iní-ó sǎ cúú-güèdi datná Xítóhó Jesucristú nacuáa ní xihí-gǎ núú cùrúxí.

⁸ Te núu xǎáⁿ xiní ñuhu-xi sá vǎ cǎdá-gǎ-ndó ñi ìⁿ sá cuéhé sá dúhá sǎ ní xóo cada-ndo, te ni vǎ cúhúⁿ-gǎ iní-ndó te ni vǎ cǎdá-gǎ-ndó, te ni yùhu ni iní-ná-ndó càda-ndo mee-ni sá váha.

⁹ Te tutú sá sǎ ní dáquixi-í ndaha-ndo ní cachí-í sá vǎ nihí tnáhá-ndó ndihi cue ñáyiú ndècu ichi díí ñí.

¹⁰ Te sá dúcáⁿ cǎháⁿ-í núú tütú ní dáquixi-í ndaha-ndo te vǎ cǎní ñí-ndó sǎ yùhú cǎchí-í sá vǎ cúú-gǎ tnahá tnúhu-ndo ndihi cue ñáyiú ndècu ichi cuehé ichi duha, ndihi ñáyiú ndècu ichi díí ñí, ndihi ñáyiú xihó nchaa sá íó ñuyúú, ndihi ñáyiú dùhu sá ndécú ndihi tnaha ñáyiú-xi, ndihi ñáyiú quide cahnu sá cǎchí-yu cùu ndióxí te ñá ndáá sá ndióxí cúú-xi chi dícú cue téé ñuyúú-a ní cadúha nchaa xǎáⁿ, chi núu ducaⁿ na càda-ndo vǎ tnáhá tnúhu-gǎ-ndó ndihi-yu te xini ñuhu-xi sá vǎ cùndècu-gǎ-ndó núú ndécú-yu.

¹¹ Te ñá túú dùcaⁿ quee-xi nacuáa cǎháⁿ-í núú tütú-í, chi yùhú cǎchí-í sá vǎ cúú tnáhá tnúhu-ndo ndihi ñáyiú cǎchí sá ndécú ichi Xítóhó Jesucristú te ñá ndáá sá ndécú-yu ichi-gǎ. Te núu cúú-yu ñáyiú ndècu ichi díí ñí, àdi cúú-yu ñáyiú xihó nchaa sá íó ñuyúú-a, àdi cúú-yu ñáyiú quide cahnu nchaa sá cǎchí-yu cùu ndióxí te ñá ndáá chi dícú cue téé ñuyúú-a ní cadúha nchaa xǎáⁿ, àdi cúú-yu ñáyiú yiti yùhu-xi, àdi cúú-yu ñáyiú quíhu, àdi cúú-yu ñáyiú dùhu sá ndécú ndihi tnaha ñáyiú-xi, te nchaa ñáyiú ducaⁿ cǎchí sá ndécú ichi-gǎ te ñá ndáá te ducaⁿ xǎiquidé-yu, te ni vǎ cúú nihí tnáhá-ndó ndihi-yu caxi-ndo ndihi-yu.

¹²⁻¹³ Te ñá díú yùhú cúú-í téé cǎháⁿ cuendá nchaa ñáyiú ñá túú ndècu ichi Xítóhó Jesucristú núu quide ndáá-yu àdi ñá túú quide ndáá-yu ndécú-yu, chi mee Yǎ Ndióxí cǎháⁿ-gǎ te núu nása quidé-yu ndécú-yu. Dico nchòhó chi tàú-ndó càda cuendá-ndó núu nása quide cue ñáyiú ndècu ndihi-ndo ichi Xítóhó Jesucristú. Núu xǎáⁿ xiní ñuhu-xi daquee tǎhú-ndó tēe ducaⁿ ñà túú quide váha ndècu ndihi-ndo-áⁿ, te vǎ dáñá-gǎ-ndó nihí tnáhá ndihi ñaha-dé xii-ndo.

6

Nacuáa tàú-xi cada ñáyiú ndècu ichi Xítóhó Jesucristú te núu ñá túú ndècu ndihi váha tnáhá-yu

1 Te dava nchòhó òré ñá túú ndècu ndihi váha tnàha-ndo te cùyii-ndo cuáháⁿ-ndó núú cuè téé cùchiiuⁿ ñá túú ndècu ichi Xítóhó Jesucristú sàcáⁿ cuéchi-ndo, te ñá túú dùcaⁿ taú-xi cada-ndo chi núú cuè téé ndècu ichi-gá ducaⁿ tàú-ndó quíhíⁿ-ndó càcáⁿ cuéchi-ndo.

2 Te nchòhó sa nàha-ndo sá ncháá ñáyiú cùu cuendá Yá Ndiòxí sáá nduu cāháⁿ-yu te núu ní quide ndáá nchaa dava-gá ñáyiú àdi ñá túú ní quide ndáá-yu, te nchòhó tnàhá-ndó cùu-ndo ñáyiú ducaⁿ cāháⁿ, te núu ducaⁿ te cutnùní iní-ndó sá ndácú-ndó càda ndáá-ndó nchàa cuéchi sá ñá túú úhú cundáá vitna ndècu-ndo ñuyúú-a.

3 Te nchòhó sa nàha-ndo sá ncháá ndéé cue espíritú xínú cuéchi núú Yá Ndiòxí sáá nduu cāháⁿ-ó te núu nása quide-xi ndecu-xi. ¡Núu xíáⁿ cutnùní iní-ó sá úúⁿ-gá ndacu-o càda ndáá-ó nchàa cuéchi sá ió ñuyúú-a!

4 Te núu ió dava-ndo ió nása cùu ndecu-ndo te xínáá-ndó, te vá quíhíⁿ-ndó càcáⁿ cuéchi-ndo núú cuè téé ndèhe-ndo sá ñá túú ndècu-güedé ichi Yá Ndiòxí, dico nchòhó chi da núú cuè téé-áⁿ cuáháⁿ-ndó sàcáⁿ cuéchi-ndo.

5 Te duha cāháⁿ-í cuendá cucahaⁿ núú-ndó chi ñá túú quide váha-ndo sá dúcáⁿ quide-ndo. ¿Te náa dicó-ná ñá túú tnàhí ñⁿ téé cutnùní iní-xi nàcuáa cada ndáá cuéchi-ndo ndècu ndihi-ndo ichi Xítóhó Jesucristú-áⁿ?

6 Te nchòhó, ñá túú quide váha-ndo, chi dava-ndo cuáháⁿ-ndó núú cuè téé ñá túú ndècu ichi Xítóhó Jesucristú sàcáⁿ cuéchi-ndo cuendá dava-gá cue ñáyiú ndècu ndihi-ndo ichi-gá.

7 Te ñá túú quide váha-ndo sá dúcáⁿ nàa ndihi tnàha-ndo te cuáháⁿ-ndó sàcáⁿ cuéchi-ndo, te váha-gá sá cáda càhnu iní-ndó cuéi nándi na càda ñaha tnaha ñáyiú-ndo xii-ndo cuéi dùhú-yu sá ndécú ndihi-ndo dico cada càhnu-ni iní-ndó.

8 Dico nchòhó chi ñá túú quide cahnu iní-ndó chi da uuⁿ-gá ñá túú quide váha-ndo sàcúú-xí tnàha ñáyiú-ndo, chi cùu úhú iní-ndó-yu, te dùhu-ndó-yu, te ndéé méé-ndó nàcuáa ndècu-ndo ichi Xítóhó Jesucristú ducaⁿ quide tnaha-ndo.

9 Te nchòhó sa nàha-ndo sá ncháá ñáyiú ndècu ichi cuehé ichi duha vá ndúú tǎhǔ-yu cundecú-yu núú ndécú Yá Ndiòxí táxí tnùní-gá, núu xíáⁿ vá cání ìní-ndó sá ñáyiú-áⁿ nduu tǎhǔ-yu cundecú-yu ndihi-gá. Te ni cuè ñáyiú ndècu ichi díí ìní, te ni cuè ñáyiú quide cahnu nchaa sá càchí-yu cùu ndiòxí te ñá ndáá chi dicó cue téé ñuyúú-a ní cadúha nchaa xíáⁿ, te ni cuè téé cāháⁿ ndihi ñadìhí te ñá díú ñadìhí-güedé cǔǔ-yu, te ni cuè ñáyiú dìhí cāháⁿ ndihi téé te ñá díú yǔ-yu cùu-güedé, te ni cuè téé cāháⁿ ndihi tnàha téé-xi,

10 te ni cuè ñáyiú dùhu, te ni cuè ñáyiú xìho sá ndécú ndihi tnaha ñáyiú-xi, te ni cuè ñáyiú quíhu, te ni cuè ñáyiú cāháⁿ úhú, te ni cuè ñáyiú dānicuèhé tnàha ñáyiú-xi te dùhu ñahá-yu, te ni ñⁿ cue ñáyiú duha xǐquide vá ndúú tǎhǔ-yu cundecú-yu núú ndécú Yá Ndiòxí táxí tnùní-gá.

11 Te dava nchòhó ducaⁿ ní xóo cada-ndo ni cùu, te vitna ní cuu-ndo ñáyiú sa ní nduu ndoo ní nduu nine iní-xi, te ní cuu-ndo ñáyiú cùu cuendá Yá Ndiòxí, te ní cuu tucu-ndo ñáyiú ñá túú-gǎ cuéchi-xi ndècu núú-gǎ. Te ducaⁿ ní quide ñaha Yá Ndiòxí xii-ndo sá váha sá cuendá Xítóhó Jesucristú, te ní ngúndecu ndihi-ndo Espíritú Yá Ndiòxí.

12 Te càchí ñáiyu sá ncháá sá sání iní-ó cuu cada-o, te ndáá càháⁿ-yu òcò-ni sá ñá ncháá cùu-xi sá vâha sá cúú-xí-ó. Te núu cuíni nchaá sá sání iní-ó-ãⁿ taxi tnúni ñáhá-xí te vá cáda-ó.

13 Te nchòhò sa xini-ndó sá ncháá sá xéxí-ó cuãnguee-xi xití-ó, te xití-ó ní cuáha tnàhí-xi sá cúhúⁿ ncháa sá cáxí-ó, dico xití-ó ndihí nchaá sá xéxí-ó chí naa-xi. Te Xítohó Jesucristú néhé cuendá-gá yiqui cuñú-ó, te ducaⁿ yiqui cuñú-ó cùu-xi cuendá-gá, te ñá túú ní cuáha yiqui cuñú-ó sá cùndècu-xi ichi díí iní.

14 Te dàtná ní quide Yá Ndiòxí ní dándótó-gã Xítohó Jesucristú ducaⁿ càda ñaha-gá xii nchoo tùcu chi dandoto ñaha-gá xii-o núu na cùú-ó, chi ndàcu-gá quidé-gã nchaá sá vâha.

15 Te nchòhò sa nàha-ndo sá yiqui cuñú-ó cùu-xi cuendá Xítohó Jesucristú chí ñⁿ-ni cùu-o ndihí-gá, núu xíãⁿ ñá túú tnàhí ndùu váha-xi cáháⁿ ndihí-o ñáiyu ndècu ichi díí iní, chí yiqui cuñú-ó cùu-xi cuendá Xítohó Jesucristú, te núu ducaⁿ na càda-o te cada iní-ó sá cuendá-nã ñáiyu-ãⁿ cúú yiqui cuñú-ó, núu xíãⁿ ñá túú tnàhí ndùu váha-xi ducaⁿ càda-o.

16 Te sa xini-ndó sá núu ñⁿ téé na càháⁿ ndihí-dé ñⁿ ñadhí ndécú ichi díí iní te cada iní-ó sá ñⁿ-ná yiqui cuñú cùu-yu. Te ducaⁿ cáháⁿ-xi núú tùtú Yá Ndiòxí núú càchí-xi: “Ñⁿ téé na càháⁿ ndihí-dé ñⁿ ñadhí te ñⁿ-ná yiqui cuñú cùu-yu”, duha càchí-xi.

17 Te ducaⁿ sãtnahá-xi cùu nchaá ñáiyu tnàhá tnúhu ndihí Xítohó Jesucristú, chí ñⁿ-ná cúu-yu ndihí-gá.

18 Te núu xíãⁿ càháⁿ-í dóho-ndo sá vã cùndècu-ndo ichi díí iní, chí núu ducaⁿ na càda-ndo te ñá túú tnàhí sá vâha cùu-xi sá cúú-xí yiqui cuñú-ndó chí ío dàcuíta nihnu-xi yiqui cuñú-ndó. Te nchaá dava-gá sá cuèhé sá dúhá ñá túú quide-xi yiqui cuñú-ndó dàtná quidé xíãⁿ.

19 Te nchòhò sa cùtnuní iní-ndó sá yiqui cuñú-ndó cùu-xi datná ñⁿ vehe núú ndécú Espíritú Yá Ndiòxí. Te ducaⁿ sãtnahá-xi cùu yiqui cuñú-ndó chí ndècu-ndo ndihí Espíritú-gá. Te mee-gã ní taxi-gá Espíritú-gá ndécú ndihí-ndo, te ñá díú mèe-ndo cuu cuendá-ndó mèe-ndo chí Yá Ndiòxí cúú cuendá ñáhá-gã xii-ndo.

20 Te ducaⁿ cùu-ndo ñáiyu cùu cuendá Yá Ndiòxí chí Xítohó Jesucristú ní nacháhu-gá nchaá yíca cuèchi-ndo. Te núu xíãⁿ xini ñùhu-xi sá nihíí ní ndúú-ndó càda-ndo nacúáa cuu càhnu Yá Ndiòxí, te ducaⁿ tàú-xi cada-ndo chí espíritú-ndó ndihí yiqui cuñú-ndó cùu-xi cuendá-gá.

7

Sáhú sã cúú-xí ñáiyu ní tnándaha

1 Te ní quexìo tùtú sá ní dáquíxí-ndó ndàha-í, te vitna na càchí tnúhu-í xii-ndo cuendá tnúhu càháⁿ-ndó núú tùtú-ndó. Te váha çada-xi te núu vá cándèca téé ñadhí, te ducaⁿ-ni váha cada-xi te núu ñáiyu ñihí vá cándècá-yu téé.

2 Te òcò-ni sá núu ducaⁿ na càda-ndo te dava-ndo çani iní-ndó cùndècu-ndo ichi díí iní. Núu xíãⁿ xini ñùhu-xi sá ncháá cuè téé ndi dííⁿ cùndècu ñadhí-güedé, te ducaⁿ-ni tùcu nchaá cue ñáiyu ñihí ndi dííⁿ cùndècu yí-yu.

3 Te càchí tnúhu-í xii-ndo sá ncháá cuè téé vá cúú càchí-güedé sá vã cúú càháⁿ ndihí-güedé ñadhí-güedé, te ñu-ni ducaⁿ cuè ñáiyu ñihí tucu, vá cúú càchí-yu sá vã cúú càháⁿ ndihí-yu yí-yu.

4 Te nchaa cue ñáyiú ñíhí chí ñá díú mèe-ní-yu cùu cuendá-yu yiqui cùñú-yu chí tnàhá cúú cuendá yíi-yu, te ducaⁿ-ni nchàa cue téé tucu chí ñá díú-ní mèe-güedé cúú cuendá-güedé yiqui cùñú-güedé chí tnàhá cúú cuendá cue ñadihí-güedé.

5 Te cue téé vá cúú càchí-güedé sá vá cúú càháⁿ ndihi-güedé ñadihí-güedé. Te ní cuè ñáyiú ñíhí vá cúú càchí-yu sá vá cúú càháⁿ ndihí-yu yíi-yu. Àdi te núu ní ndatnúhu-yu sá vá dúcáⁿ cadá-yu ñⁿ úú nduu cuendá sá cuñí-yu ío càháⁿ ndihí-yu Yá Ndiöxí, dico ná yáha núu ná daha nduu ducaⁿ ní ndatnúhu-yu sá vá dúcáⁿ cadá-yu te naníhí tnàhá tucú-yu, chí núu ñáhá te cudana te vá cuacàhmu iní-yu te sácuihna dacàháⁿ ñáhá-xí xii-yu cadá-yu sá ñá túú tau-yu cadá-yu.

6 Te tnúhu càháⁿ-í-a quèe-xi sá tée ndihi ñadihí cuu candeca tnàhá-yu dico ñá túú quède yica-í sá dúcáⁿ cadá-yu.

7 Te yúhú sání iní-í sá núu dicó sá cúú te nchaa-ndo cùndecu-ndo datná ndécù-í, dico ñáhá chí mee Yá Ndiöxí ní cachí-gá nàcuáa nduu táhú-ó ñⁿ ñⁿ-o cundecu-o, chí dava-o ní cutáhú-ó núú-gá sá cùndecu ñadihí-ó te dava-o ñáhá.

8 Te càchí tnúhu-í xii nchòhó cue téé vátá ñihí-gá ñadihí-xi sá vâha-gá sá núu vá cùndecu ñadihí-ndó dàtná yúhú. Te ducaⁿ-ni nchòhó cue ñáyiú ñíhí ñáyiú vátá ñihí-gá yíi-xi sá vâha-gá sá núu vá cùndecu yíi-ndo. Te ñiu-ní duha càháⁿ-í sá cúú-xí nchàa nchòhó ñáyiú ñíhí ní quendóo quèe sá vâha-gá sá núu vá càndeca-gá-ndó tée.

9 Te càchí tnúhu-í xii nchaa-ndo sá núu xito-ndo sá vá cùndèe iní-ndó cùndecu mee-ndo te vâha-gá sá núu tnándaha-ndo, te ñá díú sá méé-ní caní cuehé caní duha iní-ndó cùndecu-ndo.

10 Te nchaa nchòhó ñáyiú sa ní tnándaha càháⁿ-í dóho-ndo, te ñá díú mèe-í duha càhu iní-í càháⁿ-í dóho-ndo chí Xítohó Jesucristú ducaⁿ dàcahu iní ñáhá-gá xii-í, chí mee-gá cuñí-gá cada-ndo nàcuáa na càháⁿ-í-a. Te nchaa nchòhó cue ñáyiú ñíhí càháⁿ-í dóho-ndo sá vá dáñá-ndó yíi-ndo.

11 Te núu ío dava-ndo sá ní dáñá-ndó yíi-ndo, te xini ñuhu-xi sá vá càndeca-gá-ndó tée, chí cundecu mee-ñá-ndó àdi núu ñáhá te naqueheⁿ tucu-ndo tée ní cuu yíi-ndo. Te nchaa nchòhó cue téé ndècu ñadihí-xi càháⁿ-í dóho-ndo sá vá dáñá-ndó ñáyiú cuu ñadihí-ndó.

12 Te tnúhu na càháⁿ-í-a cùu-xi sá ní sani iní mèe-í te ñá díú tnúhu sá ní cachí Xítohó Jesucristú càháⁿ-í cúú-xí. Te núu dava nchòhó cue téé ndècu ichi Xítohó Jesucristú ndécá-ndó ñáyiú ñíhí ñáyiú ñá túú ndècu ichi-gá, te vá dáñá-ndó-yu te núu cùu vâha iní-yu ndèca ñáhá-yu xii-ndo.

13 Te núu dava nchòhó cue ñáyiú ñíhí ñáyiú ndècu ichi Xítohó Jesucristú ndécá-ndó cuè téé ñá túú ndècu ichi-gá te vá dáñá-ndó-güedé te núu cùu vâha iní-güedé ndécá ñàha-güedé xii-ndo.

14 Te núu ñⁿ tée ñá túú sàndáá iní-dé Xítohó Jesucristú te ñadihí-dé sàndáá iní ñáhá-án xii-gá, te tée-án ní cuu-dé ñⁿ tée sa ní cuyatni tnàhá tnúhu ndihi ñàha xii-gá sá cuendá ñadihí-dé. Te ducaⁿ sàtnahá-xi cùu tucu ñadihí ñá túú sàndáá iní ñáhá xii Xítohó Jesucristú te yíi-aⁿ sàndáá iní ñáhá-dé xii-gá, te ñàha-án sa ní cuyatni tnàhá tnúhu-aⁿ ndihi-gá sá cuendá yíi-aⁿ, te ñiu-ní ducaⁿ sàtnahá-xi cùu cue landú-yu chí sa ní cuyatni tnàhá tnúhu-güexi ndihi-gá. Te núu vá dúcáⁿ cùu te cue landú-yu-án ío xica cùndecu-güexi núú-gá.

15 Te núu ìªn téé ñá túú sàndáá iní ñáhá xii Xítóhó Jesucristú cuiní-dé dañá tñaha-dé ndihi ñadihí-dé ñaha sàndáá iní ñáhá xii Xítóhó Jesucristú, te ñiu-ni na càda-dé nàcuáa sàni iní-dé. Te ñiu-ni ducaªn túcu te núu ñadihí ñaha ñá túú sàndáá iní ñáhá xii Xítóhó Jesucristú cuiní-aªn dañá-aªn téé sàndáá iní ñáhá xii-gá, téé cùu yii-aªn te ñiu-ni na càda-aªn nàcuáa sàni iní-aªn. Chi téé sàndáá iní ñáhá xii Xítóhó Jesucristú ñá túú tàù-dé cada yica-dé ñadihí-dé cundecu ndihi ñaha-aªn xii-dé te núu ñá túú cuiní-aªn. Te ñiu-ni ducaªn ñadihí ñaha sàndáá iní ñáhá xii-gá ñá túú tàù-aªn cada yica-aªn cundecu ndihi ñaha yii-aªn xii-aªn te núu ñá túú cuiní-dé cundecu ndihi ñaha-dé xii-aªn, chi Yá Ndiòxí cuiní-gá sá ncháá nchòò ñáyiu ndècu ichi-gá cundecu váha-o vǎ nǎá-ó.

16 Chi cue téé sàndáá iní tñuhu Xítóhó Jesucristú ñá túú cùtnuní iní-güedé te núu ndacu-güedé canu ichi-güedé ñadihí-güedé ichi-gá àdi ñáhá te núu ñá túú sàndáá iní ñáhá-yu xii-gá, te ducaªn-ni cuè ñáyiu ñihi sàndáá iní tñuhu Xítóhó Jesucristú ñá túú cùtnuní iní-yu te núu ndacu-yu canu ichi-yu yí-yu ichi-gá àdi ñáhá te núu ñá túú sàndáá iní ñáhá-güedé xii-gá.

17 Te duha na càchí tñuhu-í xii-ndo, nchaa chiuªn ní nduu táhú-ndó núu Yá Ndiòxí quidé-ndó ndéè cùtnháá ní cáháªn ñáhá-gá xii-ndo ní natuha-ndo ichi-gá te ñiu-ni chiuªn-áªn cada-ndo cundecu-ndo. Te nchaa xichi núú tàcá ñáyiu dàcuaha tñuhu-gá ñiu-ni duha càháªn-í dóho-yu.

18 Te nchaa cue téé ndècu seña ñii-xi dàtná ní cachi ndii Moisés, cue téé ní cáháªn Yá Ndiòxí ndécú ichi-gá, te ñiu-ni ducaªn cùnduu-güedé cundecu-güedé, te nchaa cue téé ñá túú ndècu seña ñii-xi ní cáháªn-gá cundecu ichi-gá, ñiu-ni ducaªn cùnduu-güedé cundecu-güedé vá cuáha-güedé seña ñii-güedé.

19 Te ìªn-ni cùu-xi cuéi na cuáha-o seña ñii-o àdi vá cuáha-o. Te sá ìo-gá xini ñuhu-xi cada-o xiáªn cùu-xi sá càdá-ó ncháa nàcuáa cuiní Yá Ndiòxí.

20 Chi xini ñuhu-xi sá cùndècu-ni-o datná ndécú-ó cùtnháá ní cáháªn ñáhá Yá Ndiòxí xii-o ní ngùndecu-o ichi-gá.

21 Te núu cùu-ndo ñáyiu ñá túú tñahí dañá quee núu chíuªn patróoªn-xi cùtnháá ní cáháªn ñáhá Yá Ndiòxí xii-ndo, te ñá túú nǎ cani iní-ndó, dico núu dañá ñaha patróoªn-ndó queè-ndo núu chíuªn-ndó te váha-ni quee-ndo núu chíuªn-ndó.

22 Te sátaªn ní cáháªn ñáhá Xítóhó Jesucristú xii nchòhò ñáyiu ducaªn ñá túú tñahí dañá quee núu chíuªn patróoªn-xi-áªn, te ní cuu-ndo dàtná ñáyiu dañá queé núu chíuªn patróoªn-xi sá cùu-xi-gá, te ducaªn chi ñá túú-gǎ ndécú-ndó ichi cuehé ichi duha. Te nchòhò ñáyiu dañá queé núu chíuªn patróoªn-xi cùu-ndo datná ñáyiu ñá túú tñahí dañá quee núu chíuªn patróoªn-xi sá cùu-xi Xítóhó Jesucristú, te ducaªn chi xinu cuechi-ná-ndó núu-gǎ.

23 Te Yá Ndiòxí ní nduu cuèndá ñáhá-gá xii-o chi Xítóhó Jesucristú ní nacháhu-gá nchaa yicá cuèchi-o sá ndécú núu Yá Ndiòxí ní cùu, te vá dañá-ndó sǎ tñaha ñáyiu-ndo nàdatuhú iní ñáhá-yu xii-ndo vǎ cúnú cuèchi-ndo núu Xítóhó Jesucristú nàcuáa tàù-xi cunduu.

24 Te núu xiáªn càchí tñuhu-í xii nchaa nchòhò ñáyiu ndècu ndihi-í ichi Xítóhó Jesucristú sá cùndècu-ni-ndo datná ní ndècu-ndo ndéè cùtnháá ní cáháªn ñáhá-gá xii-ndo, te ñiu-ni ducaªn cundecu-ndo ichi-gá.

25 Te càchí tñuhu tucu-í xii-ndo sǎ Xítóhó Jesucristú ñá túú càchí tñuhu-gá xii-í núu nása cáháªn-í cuèndá nchaa ñáyiu vátá tñándaha-gá. Te duha sàni iní-í cáháªn-í cuèndá-yu, te nchòhò cuu quíndáá iní-ndó tñuhu càháªn-í chi Xítóhó Jesucristú chíndèe chitúu ñaha-gá xii-í.

26 Te yúhú càchí-í sá sã cuendá nchaa tnúndòho tnúhu ndàhú ío ñuyíú-a vitna, te váha-gá sá ncháá ñáyiú te núu nása xĩndecú-yu te ducaⁿ-ni na cùndecú-yu.

27 Te nchaa cue tée ndècu ñadìhí-xi te ducaⁿ-ni na cùndecú-güedé ndihí-yu, te nchaa cue tée ñá túú ñadìhí-xi te ducaⁿ-ni na cùnduu-güedé vá ndúcú-güedé ñadìhí-güedé.

28 Dico nchaa cue tée na ndùcu ñadìhí-xi te ñá díú ìⁿ cuéchi cùu-xi sá dúcáⁿ ná ndùcu-güedé ñadìhí-güedé, te diu-ni ducaⁿ cùu tucu cue ñáyiú ñihí te núu na ñihí-yu yíⁿ-yu chi ñá díú ìⁿ cuéchi cùu-xi sá dúcáⁿ ñihí-yu yíⁿ-yu. Te núu cue tée na ñihí-güedé ñadìhí-güedé te nándi ndohó-yu cundecú-yu ñuyíú-a, te núu xiáⁿ duha càháⁿ-í cuendá sá vã ndúcú-güedé ñadìhí-güedé cuendá sá vã ndóhó-yu.

29 Te nchaa nchòhó ñáyiú ndècu ndihí-í ichi Xítohó Jesucristú na càchí tnúhu-í xii-ndo sã ñá túú-gã vãi nduu cumání te quixi tucu Xítohó Jesucristú, núu xiáⁿ xíní ñùhu-xi sá ndèé vitna nguíta nchaa cue tée ndècu ñadìhí-xi cada-güedé chiúⁿ Xítohó Jesucristú, te cada-güedé dàtná sá ñá túú ñadìhí-güedé.

30 Te nchaa ñáyiú ndìhú iní-xi te na càda-ní-yu sá ñá túú ndìhú iní-yu cadá-yu chiúⁿ Yá Ndiòxí. Te nchaa ñáyiú cùdíí iní-xi te na càda-ní-yu sá ñá túú cùdíí iní-yu cadá-yu chiúⁿ-gã, te nchaa ñáyiú ndècu ndihí nándi sá ndécú ndìhí te na càda-ní-yu sá ñá túú nã ndécú ndìhí-yu cadá-yu chiúⁿ-gã.

31 Te nchaa ñáyiú nèhe chiúⁿ nchaa sá ío ñuyíú-a te na càda-ní-yu cuendá sá ñá túú nã néhé chiúⁿ-yu cadá-yu chiúⁿ Yá Ndiòxí, chi nchaa sá ío ñuyíú-a sa ñùhu-xi ichi cuáháⁿ-xi núu ndìhí ñihnu-xi.

32 Te cuíní-í sá vã cùhúⁿ iní-ndó nándi sá ío ñuyíú-a, te ni ñá túú tnàhí ná cani iní-ndó cùndecú-ndo, chi nchaa cue tée ndècu ichi Xítohó Jesucristú xĩndecú mee ío ñùhu iní-güedé cada-güedé chiúⁿ-gã nàcuáa cudíu-güedé núú-gã.

33 Te nchaa cue tée sa ndècu ñadìhí-xi cue tée ndècu ichi-gã ñùhu iní-güedé nàcuáa cada-güedé cundecú-güedé ñuyíú-a cuendá ducaⁿ cùdiu-güedé núú ñadìhí-güedé.

34 Te diu-ni ducaⁿ cùu tucu cue ñáyiú ñihí chi ñá túú ìⁿ-ni cuu ñáyiú sa ndècu yíⁿ-xi ndihí ñáyiú vátá cùndecú-gã yíⁿ-xi, chi ñáyiú ndècu ichi Xítohó Jesucristú ñá túú ndèca tée ío ñùhu iní-yu cadá-yu chiúⁿ-gã nàcuáa ñihí ní ndúú-yu cundecú yíⁿùhú-yu núú Yá Ndiòxí, dico cue ñáyiú ñihí ndécá tẽ ndècu ichi-gã ío ñùhu iní-yu nàcuáa cundecú-yu ñuyíú-a cuendá cudíu-yu núú yíⁿ-yu.

35 Te duha càháⁿ-í cuendá cúú-xí ìⁿ sá vãha xii-ndo, te cudíu núú tnáhá-ndó, te cuu-ndo ñáyiú cada ndáá núú Xítohó Jesucristú, te mee-ni-gã cuhuⁿ iní-ndó. Te ñá díú sã dúhá càháⁿ-í te quide yica-í sá cáda-ndó nàcuáa càháⁿ-í.

36 Te núu ío dava-ndo sàni iní-ndó sã ñá túú ndùu váha-xi sá ío cuu sacuéhé dèhe yoco-ndo cùndecú-yu ña, te núu sàni iní-ndó sã váha-gã candecá-yu tée te cada-ndo nàcuáa sàni iní-ndó, chi ñá díú ìⁿ cuéchi cùu-xi.

37 Te núu dava-ndo ndècu dèhe yoco-ndo, te vã yóo ìⁿ cada yica ñaha xii-ndo sá cándecá-yu tée. Te núu mee-ndo sàni váha iní-ndó nàcuáa cada-ndo, te núu vá dásáⁿ-ndó dèhe yoco-ndo càndeca ñaha tée te quide váha-ndo sã dúcáⁿ quide-ndo.

³⁸ Te nchaa ñáyiú dàsaⁿ déhe yoco-xi càndeca ñaha téé te váha-ni quidé-yu, te nchaa ñáyiú ñá túú dàsaⁿ déhe yoco-xi càndeca ñaha téé te váha-gá tucu quidé-yu sá dúcáⁿ quidé-yu.

³⁹ Te nchaa ñáyiú ñáhi ndécú yí-xi xini ñuhu-xi sá cùndecu-ní-yu ndihi yí-yu ñini ndècu vívú-güedé chi ducaⁿ càháⁿ tnúhu sá dánèhé ñáhá xii-o nacuaa cada-o cùndecu-o, dico núu na cùu-güedé te cuu naquehéⁿ-yu ñngá téé candecá-yu dicó-ni sá ñiú-ni téé ndècu ichi Xítohó Jesucristú.

⁴⁰ Te yúhú sání iní-í sá ño-gá váha cundecú-yu te núu vá nánducú-yu ñngá téé candecá-yu, te duha càháⁿ-í chi Espíritú Yá Ndióxi ducaⁿ dàcahu iní ñáhá-xi xii-í càháⁿ-í.

8

Cuendá nchaa sá nchító-ó sãñaha ñáyiú ndùu táhú nchaa sá càchí-yu cùu ndióxi

¹ Te vitna na càháⁿ-í cuendá nchaa sá nchító-ó sãñaha ñáyiú ndùu táhú nchaa sá càchí-yu cùu ndióxi te ñá ndáá chi dicó ndaha cue tee ñuyúú-a ní cuáha nchaa xiáⁿ. Te nchoo sa cùtnuní váha iní-ó cuendá nchaa xiáⁿ, dicó-ni sá cuendá nchaa sá cùtnuní váha iní-ó xiáⁿ quidé càhmu-o mee-o, dico núu cùu iní-ó tnàha ñáyiú-o te canu ichi-ó-yu ichi váha.

² Te núu dava-ndo sàni iní-ndó sã túha-ndo dico cùu-ndo ñáyiú vátá cútúha-gá nàcuáa tàú-xi cunduu.

³ Te núu nchòhó cúú iní-ndó Yá Ndióxi te mee-gã càháⁿ-gá sá cúu-ndó ñáyiú cùu cuendá-gá.

⁴ Te vitna na càchí tnúhu-í xii-ndo nàcuáa ndùu cuendá nchaa sá nchító-ó sãñaha ñáyiú ndùu táhú nchaa sá càchí-yu cùu ndióxi te ñá ndáá chi dicó ndaha cue téé ñuyúú-a ní cuáha nchaa xiáⁿ. Te nchoo cùtnuní iní-ó sã ncháá sã càchí ñáyiú cùu ndióxi cadúha-yu ñuyúú-a ñá túú cùu-xi ndióxi, chi ñⁿdii díí-ni Yá Ndióxi ndécú.

⁵ Te cue ñáyiú ñuyúú-a càchí-yu sá cuèi andiú te cuèi ñuyúú-a ndècu titni ndióxi. Te ndáá sá ndèni ní cuu ndècu espíritú sá càchí ñáyiú cùu ndióxi te ñá ndáá sá ndióxi cúu-xí, te nchaa xiáⁿ táxi tnuní ñáhá-xi xii-yu.

⁶ Te nchoo cùtnuní ndáá iní-ó sã ñⁿdii díí-ni Yá Ndióxi ndécú te ñiú-gá cúu-gã Tátá-ó, te nchoo cùu-o ñáyiú cùu cuendá-gá. Te ñiú-ni mee-gã ní táuchíúⁿ-gã ní cuáha nchaa sá ño ñuyúú-a, te cùtnuní tucu iní-ó sã ñⁿdii díí-ni Xítohó Jesucristú ndécú, te Yaá-áⁿ ní quide-gá nchaa chiúⁿ ní táhú Dütú Ndióxi ní cadúha-gá nchaandi túhú sá ño ñuyúú. Te ñiú-ni mee Xítohó Jesucristú quidé ndècu-o ichi-gá vitna.

⁷ Te ñá ncháá nchòhó ñáyiú ndècu ichi Xítohó Jesucristú cùtnuní iní-ndó nàcuáa ndùu tnúhu càháⁿ-í. Chi sa ní cáaⁿ-ndo quide cahnu-ndo nchaa sá càchí-yu cùu ndióxi ní cùu. Te cuendá xiáⁿ núu nàqueheⁿ-ni-ndo nchaa sá nchító-ó ndùu táhú nchaa sá càchí-yu cùu ndióxi-áⁿ xéxi-ndó, te sàni-ni iní-ndó sã quidé càhmu-ndo nchaa sá càchí-yu cùu ndióxi-áⁿ te ñá ndáá sá ndióxi cúu-xí. Te núu sàni iní-ndó sã ñá túú váha caxi-ndo sã dúcáⁿ ndùu táhú-xi-áⁿ te xèxi-ndo te xiáⁿ ñá túú cùu váha iní-ndó cuendá sá dúcáⁿ quide-ndo.

⁸ Te ñá díú ncháa sá xéxi-ó quide-xi cudíu-o núu Yá Ndióxi, chi ñⁿ-ni quide-xi cuéi na càxi-o àdi vá cáxi-ó chi ní ñⁿ sã cáxi-ó vã chindèe ñaha-xi cudíu-o núu Yá Ndióxi. Te cuèi vá cáxi-ó dico ñá díú xiáⁿ cada sá vã cudíu-o núu-gã.

⁹ Te cuu-ni caxi-ndo nchàa nàni nihí-ndó. Te dicó-ni sá càda cuendá-ndó sá ñà diú cuendá sá xéxi-ndó-áⁿ cuíta nihnu dava ñáyiú ndècu ndihí-ndo ichi Xítóhó Jesucristú cadá-yu nándi sá cadá-yu nàcuáa vá cúú vâha iní Yâ Ndióxi chi ñáyiú-áⁿ ñà túú cùtnuní iní-yu.

¹⁰ Te nchòhó ñáyiú xini váha cuendá nchaa sá càchí-yu cùu ndiόxí, te núu na quihí-ndo núú ndécu nchàa xiáⁿ te ngóo-ndo càxi-ndo nchaa sá ní cutáhú-xi, te quini ñáyiú ndècu ndihí-ndo ichi Xítóhó Jesucristú, ñáyiú vátá cùtnuní-gá iní-xi nàcuáa ndùu cuendá nchaa sá dúcáⁿ càchí-yu cùu ndiόxí-áⁿ, te cuéi sàni iní-yu sá ñà túú quide váha-ndo sá dúcáⁿ quide-ndo te cudana te cada yicá-yu caxi-yu tnàhá-yu nchaa sá dúcáⁿ ní nduu táhú nchaa sá càchí-yu cùu ndiόxí-áⁿ te ñà ndàá sá ndiόxí cúú-xí.

¹¹ Te núu ducaⁿ cùtnuní iní-ndó nàcuáa ndùu cuendá nchaa xiáⁿ te ducaⁿ quide-ndo, te sá dúcáⁿ quide-ndo-áⁿ te dàcuíta nihnu-ndo dàva-gá ñáyiú ndècu ndihí-ndo ichi Xítóhó Jesucristú, ñáyiú vátá cùtnuní-gá iní-xi nàcuáa ndùu cuendá nchaa xiáⁿ, te diú cuendá tnàhá ñáyiú-áⁿ ní xihí Xítóhó Jesucristú.

¹² Te sá dúcáⁿ quide-ndo-áⁿ cúú-xí ñⁿ cuéchi núú Xítóhó Jesucristú, chi quide-ndo nàcuáa xínu iní-yu cadá-yu ñⁿ sá sání iní-yu ñà túú vâha, núu xiáⁿ ñà túú quide váha-ndo sá cúú-xí-yu.

¹³ Te núu yúhú cùtnuní iní-í sá sá cuendá ñⁿ sá cáxi-í te ngóo ñⁿ ñáyiú ndècu ndihí-í ichi Xítóhó Jesucristú cadá-yu ñⁿ sá vá cúú vâha iní Yâ Ndióxi, te váha-gá sá vá cáxi-gá-í xiáⁿ cuendá sá vá cadá-yu ñⁿ sá vá cúú vâha iní-gá.

9

Nchaa sá cúú càda cue téé ní táuchíúⁿ Xítóhó Jesucristú càháⁿ tnúhu-gá

¹ Te yúhú chi cuu cada-í nchaa sá sání iní-í, chi tnàhá-í ní táuchíúⁿ Xítóhó Jesucristú càháⁿ-í tnúhu-gá núú ñáyiú. Te yúhú ní xini núú-í Xítóhó Jesucristú Yáa cúú Xítóhó-ó te nchòhó cúú-ndó ñáyiú ní sándáá iní tnúhu-gá sá càháⁿ-í te ducaⁿ chi ndècu ndihí-í-gá.

² Te ió dava ñáyiú ñà túú sándáá iní-yu sá Xítóhó Jesucristú ní táuchíúⁿ-gá càháⁿ-í tnúhu-gá, dico nchòhó chi cùtnuní ndáá iní-ndó sá diú-gá ní tendaha ñàha-gá xii-í xicá cùu-í càháⁿ-í tnúhu-gá, te ducaⁿ chi yúhú ní càháⁿ-í tnúhu-gá núú-ndó te ní sándáá iní-ndó-gá te xiáⁿ cùtnuní sá diú-gá ní tendaha ñàha-gá xii-í xicá cùu-í càháⁿ-í tnúhu-gá núú ñáyiú.

³ Te duha ndùu tnúhu càháⁿ-í cuendá cundedóho nchaa ñáyiú sàtnuhu ñàha xii-í.

⁴ Chi yúhú cuu-ni caxi-í nchaa núú sá cúú càxi-o na taxi ñáyiú.

⁵ Te cuu-ni cundecu ñàdihí-í te caca ndeca-í-yu nchaa núú xicá cùu-í càháⁿ-í tnúhu Yâ Ndióxi dàtná quidé dàva-gá cue téé càháⁿ tnúhu-gá, ndihí cue téé cùu ñàni Xítóhó Jesucristú, ndihí té Pélú.

⁶ Te tnàhá yúhú ndihí té Bèé cuu dañà-ndí chiúⁿ quide-ndí te cada-ndí dàtná xiquide dava-gá-güedé càháⁿ-güedé tnúhu Xítóhó Jesucristú.

⁷ Te nchoo xini-ó sá ncháá cué sandadú dacuitíi sá ñúhú yáhu-güedé xínú cuéchi-güedé, te ñà túú dicó ducaⁿ xínu cuechi-güedé. Te ducaⁿ sàtnahá-xi cùu tucu ñáyiú xitu ñⁿ sá xítú chi dacuitíi nihí-yu ñⁿ sá xítú-yu xéxi-yu, te ñà diú dicó ducaⁿ xítú-yu. Te ducaⁿ cùu tucu cue téé cùu toli chi quihni-güedé dícu quiti xito-güedé xihí-güedé te ñà túú dicó ducaⁿ xito-güedé-di.

⁸ Te vá cání iní-ndó sá sá dúhá càháⁿ-í te càhu iní méé-í duha càháⁿ-í, chi tnúhu càháⁿ-í-a ñⁿ-ni quèe-xi ndihí tnúhu ní càháⁿ ndíi Moisés.

9 Chi ndíi-án nǐ chídó tñuní ndíi núú tütú ndíi nàcuáa ní xáhaⁿ Yá Ndiöxí xii ndíi, te cächí-xi: “Vá chíhí-ndó ñunu yuhu ndicutu oré dánchezí-dí triú”, duha cächí-xi núú tütú ndíi. Te ñá díú sá dúcáⁿ ní cáháⁿ Yá Ndiöxí te cáháⁿ-gá mee-ni cuendá ndicutu-án.

10 Chi ní cáháⁿ-gá cuendá nchoo cuè ñáyiú ndècu ichi-gá, te ndáá sá díú cuendá-ó dùcaⁿ ní cáháⁿ-gá. Te nchaa cue téé xitu chíhí tatá sàni iní-güedé sá díú tàtá chíhí-güedé-ánⁿ cuu sá cáxí-güedé, te ñiú-ni ducaⁿ cùu tucu cue téé xicani triú chí cànì-güedé cuendá quee caxi-güedé.

11 Te ducaⁿ sätnahá-xi cùu nchúhú cue téé cáháⁿ tñuhu Xítoho Jesucristú, chí dànehé ñáhá-ndǐ xii-ndo cuendá nchaa sá vaha quide ñaha Yá Ndiöxí xii-o, núu xiáⁿ dai tàú-xi sá nchòhó chindee ñaha-ndo xii-ndǐ núu ná cúú sá xíní ñuhu-ndǐ.

12 Te núu dava cue téé cáháⁿ tñuhu Yá Ndiöxí chindèe-ndo-güedé, te uuⁿ-gá ducaⁿ tàú-ndó chindee-ndo nchúhú cue téé ní sanu ichi ñaha xii-ndo ichi-gá.

Te cuèj tàú ndisa-ndo sá chindèe ñaha-ndo xii-ndǐ dico ñá túú dùcaⁿ caháⁿ-ndǐ núú-ndó cada-ndo, te quide cahnu iní-ndǐ cuèi nándi sá tá yaha-ndǐ véxi. Te ducaⁿ quide-ndǐ cuendá sá ñà túú nǎ cani iní ñáyiú cuendá-ndǐ te ducaⁿ cuíta cutènuu-gá tñuhu sá cáháⁿ nàcuáa naníhí tǎhú-ó quíhíⁿ.

13 Te nchòhó xíní-ndó sá ncháá cuè téé xínu cuechi veñúhu ñiú-ni xiáⁿ nihí-güedé xéxi-güedé, te ñiú-ni cue téé-ánⁿ xínú cuechi-güedé núú xihí quiti ndúu tǎhú Yá Ndiöxí, te ñiú-ni xiáⁿ nihí tucu-güedé sá xéxi-güedé.

14 Te ñiú-ni ducaⁿ sätnahá-xi cùu nchúhú cue téé cáháⁿ tñuhu sá cáháⁿ nàcuáa naníhí tǎhú-ó, chí Xítoho Jesucristú ní cachí-gá sá díú-ní cuendá chiúⁿ quide-ndǐ nihí-ndǐ caxi-ndǐ.

15 Te ñá ñⁿ ndúu caháⁿ-í núú-ndó cada-ndo nacuáa tàú-xi cunduu sá cúú-xi-í, te vá cǎní iní-ndó sá sá dúhá cáháⁿ-í te ñⁿ sá xicáⁿ-í núú-ndó. ¡Chi cuèi na cúú-í sá ndóhò-í te ñá díú sá cáháⁿ ñáyiú sá sá cuendá sá cáháⁿ-í tñuhu Xítoho Jesucristú nihí-í xéxi-í!

16 Te yúhú ñá túú quide cahnú-í mèe-í sá cáháⁿ-í tñuhu sá cáháⁿ nàcuáa naníhí tǎhú-ó, chí tàú tñahá-í sá cáda-í chí ducaⁿ ní cachí Yá Ndiöxí cada-í. ¡Te ndáhú ní cuu yúhú te núu vá cáháⁿ-í tñuhu-án!

17 Te ñá túú cáháⁿ-í tñuhu-gá sá cúú iní mèe-í chí mee-gǎ ní táuchíúⁿ-gǎ cáháⁿ-í tñuhu-gá. Te núu cáháⁿ-í tñuhu-gá sá cúú iní mèe-í te tàú-í nihí-í sá ndúu tǎhú-í ní cùu.

18 Dico sá sá ní nduu tǎhú-í cúú-xi sǎ ño cùd^{hí} iní-í sá dícó ducaⁿ cáháⁿ-í tñuhu sá cáháⁿ nàcuáa naníhí tǎhú-ó. Te cuèi tàú-í queheⁿ-í sá táxi-ndó ndúu tǎhú-í sá cuendá sá cáháⁿ-í tñuhu Xítoho Jesucristú, dico ñá túú dùcaⁿ quide-í.

19 Te sá dúcáⁿ dícó ducaⁿ cáháⁿ-í tñuhu sá cáháⁿ nàcuáa naníhí tǎhú-ó, xiáⁿ ni ñⁿ ñáyiú ñuyíú-a vá cúú cächí-yu sá táxi tñuní ñáhá-yu xii-í, te cuèi ducaⁿ dico mee-í ní sani iní-í sá cúú-í dàtná ñⁿ téé xínu cuechi núú nchaa ñáyiú cuendá ducaⁿ cuíta cuu vaí-yu tuhá-yu ichi Xítoho Jesucristú quíhíⁿ.

20 Te oré ñúhú tñahí tñuu cue ñáyiú israhél te quide-í sá ñⁿ-ní cùu-í ndihí-yu cuèi ñá túú nchìcúⁿ nihnu-í tñuhu ní cáháⁿ ndíi Moisés, te ducaⁿ quide-í cuendá sá ñáyiú-án quíndáá iní-yu tñuhu cáháⁿ-í te tuhá-yu ichi Xítoho Jesucristú.

21 Te oré ñúhú tñahí tñuu nchaa ñáyiú ñá túú nchìcúⁿ nihnu tñuhu ní cáháⁿ ndíi Moisés, te quide-ni-í sá quidè-í dàtná quidè mèe-yu cuendá quíndáá iní-yu tñuhu cáháⁿ-í, te tuhá-yu ichi Xítoho Jesucristú. Te cuèi ducaⁿ quide-í dico ñá

túu dàña ndeé-í quidè-í nchaa nàcuáa cuíní Yá Ndióxi cada-o, te ducaⁿ chi nchicúⁿ nihnu-í quidè-í nchaa nàcuáa càháⁿ Xítoho Jesucristú.

22 Te òré ndècù-í ndihi nchaa ñáyiú ñá túú cùtnuní váha iní-xi nàcuáa cundecu ichi Xítoho Jesucristú, te tnàhá-í quidè-í dàtná quidè-yu cuèndá sá ná tédóho-yu nchaa tnúhu càháⁿ-í te ducaⁿ cùtnuní-gá iní-yu nàcuáa cundecú-yu ichi-gá. Te nchaandi túhú ñáyiú quidè-í sá ñⁿ-ni cuu-í ndihí-yu cuèndá ducaⁿ ñihí-í nàcuáa cada-í te cundedóho-yu tnúhu càháⁿ-í te tníⁿ-yu ichi Xítoho Jesucristú te naníhí tãhú-yu.

23 Te duha quidè-í cuèndá sá cuítá quèndáá iní-yu tnúhu sá càháⁿ nàcuáa naníhí tãhú-ó quíhíⁿ, te ducaⁿ te tnàhá yúhú ío váha cundecu-í dàtná càháⁿ tnúhu-áⁿ.

24 Te nchòhó sa xìní-ndó sá ncháá cuè téé xínu quíhu màrcúhyú nchaa-güedé xínú-güedé, dico ñⁿ-ni-dé cúú téé ndàcu ngodó núú te téé-áⁿ cúú téé ñihí sá ndúú tãhú-xi, te ducaⁿ xìní ñuhu-xi cada nchòhó tucu chi cada-ndo ncháa nacúa cuíní Yá Ndióxi cada-ndo cuèndá ducaⁿ ñihí-ndó sá ndúú tãhú-ndó.

25 Te nchaa cue téé xìní dadiqui te váha váha quide cuèndá-güedé núu ná cúú sá cáda tnèñu te xòcani-güedé cuèndá sá ñá díú xíáⁿ cada te cuíta-güedé òré dadiqui-güedé. Te ducaⁿ quide-güedé cuèndá cuíní-güedé ñihí-güedé sá ndúú tãhú-güedé, te sá ndúú tãhú-güedé-áⁿ cúú-xí ñⁿ sá ndíhí ñihnu ñuyú-a. Dico nchoo ndùcu ndee-o quide-o nacúa ñihí-ó sá ndúú tãhú-ó, te xíáⁿ cudí-xi cundecu ndihi-o ní caa ní quíhíⁿ.

26 Te yúhú quidè-í dàtná quidè cuè téé xínu, chi cue téé-áⁿ xìní-güedé núú quéxi-güedé, te quide tucu-í dàtná xíquide cue téé sa ní cutúha náá, te ñá túú quidè-í dàtná quidè cuè téé vitna dàcuaha náá. Te ducaⁿ chi yúhú quidè-í nchaa nàcuáa cuíní Yá Ndióxi cunduu.

27 Te yúhú ñá túú dàña-í taxi tnùní ñáhá ní ñⁿ sá cuèhé sá dúhá xii-í chi yòtní-í mée-í. Te ducaⁿ quidè-í chi yúhú càháⁿ-í tnúhu Xítoho Jesucristú núú ñáyiú, te cuíní-í sá vã cuíta sá ní cachí Yá Ndióxi nduu tãhú-í.

10

Cuèndá nchaa sá ní cadúha cue téé ñuyú-a quide cahnu ñáyiú

1 Te nchòhó ñáyiú ndècu ndihi-í ichi Xítoho Jesucristú na càchí tnúhu-í xii-ndo cuèndá nchaa ñaní tnàhá-ndí ñáyiú israhél ní xínecu ndéé sanaha, chi vitna tnàhá nchòhó cúú-ndó dàtná cue ñaní tnàhá ncháa ñáyiú-áⁿ chi ndècu-ndo ichi-gá. Te nchaa ñáyiú-áⁿ ní taxi ndecu Yá Ndióxi ñⁿ vícò ní dánèhé ñáhá-xí xii-yu ichi quíhíⁿ-yu, te ní quée dava ndute làmár naní Mãr Tícuèhé te ncháa-yu ní yáha-yu.

2 Te sá dúcáⁿ ní cuu te ncháa-yu ñⁿ-ná ní cúú-yu ndihi ndíi Moisés, te ní xíhi ndaha ñàha ndíi xii-yu.

3 Te ncháa-yu ní xexí-yu sá ní sáñaha Yá Ndióxi xii-yu.

4 Te ducaⁿ ncháa tucú-yu ní xihí-yu ndute sá ní sáñaha-gã xii-yu, ndute sá ní quee yiqui ñaha cava. Te cava-áⁿ cada iní-ó sá cúú-xí dàtná Xítoho Jesucristú te ducaⁿ chi ndihi ñaha-gã xii-yu ichi cuáháⁿ-yu dàvá-áⁿ.

5 Dico ío vãi-yu ñá túú ní quidè-yu nàcuáa càháⁿ Yá Ndióxi, te xíáⁿ ñá túú ní cùu váha iní ñáhá-gã xii-yu. Te sá dúcáⁿ ní quidè-yu núu xíáⁿ òré ñúhú-yu ichi cuáháⁿ-yu xití yucu ío vãi-yu ní xihí.

6 Te ducaⁿ nĩ cuu cuendá nchoo vǎ cǎnchĩcúⁿ nihnu-o cǎda-o nacuáa ní quidé-yu, chi ñáyi^u-áⁿ mee-ni nchǎa sǎ cuèhé sǎ dúhá ní sani iní-yu ní quidé-yu. Te nchoo xini ñuhu-xi sǎ vǎ dúcáⁿ cǎda-o.

7 Te yúhú cǎháⁿ-í dóho-ndo sǎ vǎ quindáá iní-ndó te ni vǎ cǎdá cǎhnu-ndo ni ñⁿ sǎ cǎchĩ-yu cùu ndióxí ní cadúha cue téé ñuyú^u-a dátǎn ní quide cue ñani tnáhá-ndí ní xindecu ndéé sanaha. Chi ñáyi^u-áⁿ nĩ quidé-yu dátǎn cǎháⁿ-xi núú tütú Yǎ Ndióxí núú cǎchĩ-xi: “Nchaa ñáyi^u ní xexí-yu ní xihí-yu ní quidé-yu vico, ní quide cǎhnú-yu sǎ cǎchĩ-yu cùu ndióxí ní cadúha-yu te ñǎ ndǎá sǎ ndióxí cúú-xí”, duha cǎchĩ-xi núú tütú-gǎ.

8 Te ni vǎ cùndècu-ndo ichi díí iní dátǎn ní quide dava ñáyi^u-áⁿ, chi sǎ dúcáⁿ nĩ quidé-yu te ní xihí ócó úní mĩl-yu ñⁿ-ni ndúu.

9 Te vǎ cǎní iní-ndó sǎ sǎ cǎhnú iní Yǎ Ndióxí te nǎndi sǎ cuèhé sǎ dúhá cǎda-ndo cuendá cuini-ndó quini-ndó núu nása cada ñaha-gǎ xii-ndo, chi ñáyi^u ní xindecu ndéé sanaha-áⁿ ducaⁿ nĩ xóo cadá-yu, te ní xihí-yu ní xexihaⁿ cǎó.

10 Te ni vǎ cǎháⁿ cuèhé-ndó cuendá Yǎ Ndióxí, chi dava ñáyi^u ní xindecu ndéé sanaha-áⁿ ducaⁿ nĩ quidé-yu ní cǎháⁿ cuèhé-yu cuendá-gǎ te ní quixi espíritu xínú cuèchi núú-gǎ ní sahní ñaha-xi xii-yu.

11 Te ducaⁿ nĩ cuu te ducaⁿ nĩ ngundeé núú tütú Yǎ Ndióxí cuendá dacuàha-o vitna ta cuyatni nduu naa ñuyú^u-a. Te nchaa tnúhu sǎ ní ngódó tnùni-áⁿ cǎháⁿ dóho ñaha-xi xii-o cuendá sǎ vǎ cǎdá-ó dátǎn ní quide ñáyi^u-áⁿ.

12 Te xiǎⁿ núu nchaa nchòhó ñáyi^u sǎni iní sǎ ño váha cùndáá ndécú ichi Xítohó Jesucristú cada cuendá-ndó sǎ dúcáⁿ-ní cùndáá-ndó núú-gǎ, te vǎ dáná cuendá-ndó cǎda-ndo sǎ ñǎ túú cùu váha iní Yǎ Ndióxí.

13 Te ñiu-ni dátǎn quidé sǎculhná dǎcǎháⁿ-xi iní nchaa dava-gǎ ñáyi^u nǎndi quidé-yu, te ñiu-ni ducaⁿ quide ñaha-xi xii-ndo. Dico mee Yǎ Ndióxí cúú-gǎ Yǎá quidé ndǎá chi quide-gǎ nchaa sǎ cǎháⁿ-gǎ, te ñǎ dǎñá-gǎ sǎ sùúni cuídó sǎculhná coto ndéé ñáhá-xi xii-ndo, chi není-ni nàcuáa cùndee iní-ndó dǎña-gǎ ducaⁿ quide ñaha-xi xii-ndo. Te ñiu-ni-gǎ chindee ñaha-gǎ xii-ndo cùndee iní-ndó vǎ cǎdá-ndó cuèi nǎndi sǎ ná dǎcahu iní ñáhá-xi xii-ndo.

14 Te xiǎⁿ núu cǎháⁿ-í dóho nchòhó ñáyi^u ño cùu iní-í sǎ vǎ quindáá iní-ndó ni ñⁿ sǎ cǎchĩ-yu cùu ndióxí te ñǎ ndǎá chi dicó ndaha cue téé ñuyú^u-a ní cuáha nchaa xiǎⁿ, te ni vǎ cǎdá cǎhnu-ndo.

15 Te duha cǎháⁿ-í chi cùu-ndo ñáyi^u tècú tnùní, te mee-ndo ño váha cuáha-ndo cuendá te núu váha-ni cǎháⁿ-í àdi ñǎ túú váha-ni.

16 Te nchoo ndǎcáⁿ táhú-ó núú Yǎ Ndióxí cuendá ndudí ndéhé yoho yàha stilé sǎ xihí-ó, te sǎ dúcáⁿ xihí-ó ndudí ndéhé yoho yàha stilé-áⁿ, te xiǎⁿ ndácú iní-ó sǎ ñⁿ-ní cùu-o ndihí Xítohó Jesucristú cuendá sǎ ní sati níñí-gǎ ní xihí-gǎ núú cùrúxí, te ñiu-ni ducaⁿ sǎtnahá tucu-xi cùu paá sǎ xexí-ó órè xihí-ó ndudí ndéhé yoho yàha stilé-áⁿ, chi sǎ dúcáⁿ xèxi-o paá-áⁿ xiǎⁿ ndácú iní-ó sǎ ñⁿ-ní cùu-o ndihí Xítohó Jesucristú sǎ cuendá yiqui cùñú-gǎ.

17 Te cuèi vǎi vihi-o dico ñⁿdii-ni paá xexí-ó, te sǎ dúcáⁿ ñⁿdii-ni paá xexí-ó xiǎⁿ ndácú iní-ó sǎ ñⁿ-ní cùu-o ndihí Xítohó Jesucristú.

18 Te cada cuendá-ndó nàcuáa quide ñáyi^u isrǎél, chi ñáyi^u-áⁿ xexí-yu sǎ ndúú táhú Yǎ Ndióxí. Te sǎ dúcáⁿ quidé-yu-áⁿ cùtnùni iní-ó sǎ tnáhá tnúhu-yu ndihí-gǎ.

19 Te vǎ cǎní iní-ndó sǎ sǎ dúhá cǎháⁿ-í te cǎchĩ-ndó sǎ cùnuu nchaa sǎ cǎchĩ-yu cùu ndióxí ní cadúha cue téé ñuyú^u-a chi ñǎ túú nǎ cúú ni ñⁿ nchaa

xĩã. Te diu-ni ducaⁿ cùu tucu nchaa sá sãñaha ñãyiu ndùu táhú-xi chi ñã túú cùnuu-xi, chi ñⁿ-ni cùu-xi ndihì nchaa dava-gá sá xéxí-ó.

²⁰ Te yúhú càchí-í sá sã dúcáⁿ quide nchaa ñãyiu ñã túú tnàhá tnúhu ndihì Yá Ndióxi, te dicó nchaa espíritú cúndihì yucu ñávaha sãñahá-yu sá ndúú táhú-xi sá dúcáⁿ quidé-yu. Te ñã díú Yá Ndióxi sãñahá-yu sá ndúú táhú-gã. Te yúhú cùiní-í sá vã tnàhá tnúhu-ndo ndihì cue espíritú cúndihì yucu ñávaha.

²¹ Te ducaⁿ chi vá cúú tnàhá tnúhu-o ndihì cue espíritú cúndihì yucu ñávaha te tnàhá tnúhu-o ndihì Xítohó Jesucristú, te ñã túú ndùu váha-xi ngóo càxi-o coho-o sá ndúú táhú cue espíritú cúndihì yucu ñávaha-áⁿ, te ngóo càda-o nacuaá ní dándóo tnúhu Xítohó Jesucristú coho-o ndùú ndéhe yoho yàha stilé, te caxi-o páa cada-o sã ndácú iní-ó sã ñí xihí-gá núú cùrúxi.

²² Te vá cání iní-ó dùcaⁿ cada-o cuendá sá vá cúdeéⁿ Yá Ndióxi, chi ñã túú ñã càhnu cuu-o núu cada-o ñãni véxi iní mée-ó, chi mee-gã ío càhnu cuu-gã.

Cada-o nchaa nacuaá cuu càhnu Yá Ndióxi

²³ Te ndáá sá ncháá sã cùiní-ó càda-o te cuu cada-o dico ñã ncháá cùu-xi sá váha sá cùu-xí-ó, te ñã ncháá-xí chindee ñaha-xi nacuaá ñihí ndéé-gã-ó cùndecu-o ichi Xítohó Jesucristú.

²⁴ Te xini ñuhu-xi sá cádá-ó sã váha sá cúú-xí tnàha ñãyiu-o te ñã díú mée-ni sá cúú-xí mée-o cada-o.

²⁵ Te nchòhó cuu caxi-ndo nchaa cuñú sá cùyãhu cuñú sá xini caxi-ndo, te vá ndúcú tnúhu-ndo te núu cùu-xi cuñú sá ñí nduu táhú sã càchí-yu cùu ndióxi. Te ñã túú ñã caní iní-ndó càxi-ndo,

²⁶ chi ñuyúí-a ndihì nchaa sá ío cúú-xí cuendá Yá Ndióxi.

²⁷ Te núu ñⁿ ñãyiu ñã túú ndècu ichi Xítohó Jesucristú càháⁿ ñáhã-yu xii-ndo quihíⁿ-ndó càxi-ndo dítá vehé-yu, te núu sàni iní-ndó sã quihíⁿ-ndó te cuu quihíⁿ-ndó te caxi-ndo cuèi náí cùu sá táxi-yu dico vá càcáⁿ tnúhú-ndó núu-yu núu ndéé ní ñihí-yu, te ducaⁿ te cuu váha iní-ndó càxi-ndo.

²⁸ Te núu ñⁿ ñãyiu càchí-yu sá xĩãⁿ cúú-xí sã ñí nduu táhú sã càchí-yu cùu ndióxi te vá caxí-ndó cuendá sá ñãyiu ducaⁿ càháⁿ-áⁿ cuu váha iní-yu te ñã túú tnàhí ná caní iní-yu.

²⁹ Te yúhú càháⁿ-í cuendá nàcuáa sàni iní mée ñãyiu ducaⁿ càháⁿ-áⁿ te ñã díú sã nàcuáa sàni iní mée-ndó quide-ndo.

Te dava-ndo càchí-ndó: “Cuu-ni cada-o nchaa nacuaá sàni iní mée-ó cuèi dava-gã ñãyiu sàni iní-yu sá ñã túú ndùu váha-xi sá dúcáⁿ càda-o”, duha càchí-ndó.

³⁰ Te càchí tucu-ndo: “Ñã túú tàu-xi càháⁿ cuèhé ñãyiu cuendá-ó sã cuendá nchaa sá xéxí-ó chi ndácáⁿ táhú-ó núu Yá Ndióxi òré xéxí-ó”, duha càchí-ndó.

³¹ Te cuèi nãndì sá xini caxi-ndo ñihí-ndó xéxi-ndo àdi quide-ndo, te cada-ndo nàcuáa càháⁿ váha ñãyiu cuendá Yá Ndióxi.

³² Te vá cádá-ndó sã ñã túú tàu-ndó càda-ndo cuendá sá vã cádá ñãyiu ñⁿ sá ñã túú cùu váha iní Yá Ndióxi. Te ñí sã cúú-xí cuè ñãyiu israhél, te ñí sã cúú-xí cuè ñãyiu ñã túú cùu ñãyiu israhél, te ñí sã cúú-xí cuè ñãyiu ndècu ichi-gã vá dúcáⁿ càda-ndo sá cúú-xí-yu.

³³ Te yúhú ío ndècu ndee-í quidé-í nàcuáa cudũu-í núú nchaa ñãyiu, te quide-í sá váha sá cúú-xí-yu, te ñã túú quide-í mee-ni sã cúú-xí mée-í. Te ducaⁿ quide-í cuendá quíndáá iní-yu tnúhu Xítohó Jesucristú te naníhí táhú-yu.

11

1 Te chí cánchezicúⁿ nihnu cada-ndo nchàa nacuaáa quide-í nchicúⁿ nihnu-í nchaa nàcuáa quide Xítohó Jesucristú.

Nàcuáa tàu-xi cada nchaa ñáyiú dìhí núú tàcá-yu dàcuahá-yu tnúhu Yá Ndióxi

2 Te nchòhó ñáyiú ndècu ndihí-í ichi Xítohó Jesucristú càchí tnúhu-í xii-ndo sã ïo cùdíí iní-í, chi ndàcu iní ñáhá-ndó xii-í, te quide-ndo nchaa nacuaáa ní dánhèhé ñáhá-í xii-ndo.

3 Te cuiní-í sã nchòhó cutnùní iní-ndó sã ìndii-ni Yá Ndióxi cúú-gã Yaá cúnùu taxi tnuní ñáhá xii Xítohó Jesucristú, te ducaⁿ Xítohó Jesucristú ìndii-ni-gã cúnùu taxi tnuní-gã nchaa cue téé, te nchaa cue téé ñu-ni mee-güedé cúnùu-güedé táxi tnùní-güedé ñadhí-güedé.

4 Te núu nchoo cuè téé na dàdàhu-o díquí-ó òré càháⁿ-ó núú ñáyiú tnúhu sá dácàhu iní ñáhá Yá Ndióxi xii-o àdi oré càháⁿ ndihí-o-gã, te ìⁿ sácáⁿ núú cúú-xí te núu ducaⁿ na càda-o dadàhu-o díquí-ó.

5 Dico núu ñáyiú dìhí vá dàdàhu-yu díquí-yu òré càháⁿ ndihí-yu Yá Ndióxi, àdi oré càháⁿ-yu tnúhu sá dácàhu iní ñáhá-gã xii-yu núú tnàhá ñáyiú-yu, te sácáⁿ núú cúú-xí te núu vá dàdàhu-yu díquí-yu, chi ìⁿ-ni cùu-xi te núu na dètè ndí-yu díquí-yu.

6 Te núu ñá túú cuiní cue ñáyiú dìhí dàdàhu-yu díquí-yu te váha-gá sá ná dètè ndí-yu díquí-yu. Te núu cùcahaⁿ núú-yu sá dètè díquí-yu te váha-gá sá ná dàdàhu-yu díquí-yu.

7 Te nchoo cuè téé vá cúú dàdàhu-o díquí-ó òré càháⁿ ndihí-o Yá Ndióxi ní òré càháⁿ-ó tnúhu sá dácàhu iní ñáhá-gã xii-o núú ñáyiú chi díhna-gã-ó ní cadúha ñaha Yá Ndióxi xii-o, te ní taxi ndecu-gã nchaa sá xini tnùní-ó dàtná ndécú nchàa sá xini tnùní mée-gã. Te ducaⁿ ní quide-gã chi cuiní-gã sá nchóó càda-o nacuaáa cáháⁿ nchaa dava-gã ñáyiú sá ïo càhnu cuu-gã, te cue ñáyiú dìhí quidè-yu nàcuáa cunuu nchòo cue téé.

8 Te Yá Ndióxi ní cadúha-gã téé, dico ñá díú yiqui naha ñadhí ní quenehe-gã ní cadúha-gã téé chi yiqui naha téé ní quenehe-gã ní cadúha-gã ñadhí.

9 Te sá cuendá téé ducaⁿ ní cadúha-gã ñadhí-áⁿ te ñá díú sá cuendá ñadhí ní cadúha-gã téé.

10 Núu xiãⁿ tàu-xi sá ncháá ñáyiú dìhí dàdàhu-yu díquí-yu cuendá ducaⁿ cutnuni sá ñá túú cunuú-yu dàtná cúnùu nchoo cue téé. Te ducaⁿ xini ñuhu-xi cadá-yu sá cuendá nchaa espíritu xínú cuèchi núú Yá Ndióxi.

11 Te vitna nchoo ñáyiú ndècu ichi Xítohó Jesucristú, vá càchí-ó sã cuè téé ñá túú xini ñuhu-güedé cue ñáyiú dìhí chindee ñáhá-yu, te ni vá càchí-ó sã cuè ñáyiú dìhí ñá túú xini ñuhú-yu cue téé chindee ñaha-güedé xii-yu.

12 Te ìⁿ yiqui naha téé ní queñuhu Yá Ndióxi ní cadúha-gã ñadhí, dico vitna chi ñáyiú dìhí dácàcú-yu téé. Te téé, ñadhí ní cadúha Yá Ndióxi, te ñu-ni ducaⁿ ní cadúha-gã nchaa dava-gã sá ïo.

13 Te mee-ndo càda cuendá-ndó te núu ndùu váha-xi sá vá dàdàhu cue ñáyiú dìhí díquí-yu òré càháⁿ ndihí-yu Yá Ndióxi àdi ñáhá.

14 Te nchaa ñáyiú càháⁿ-yu sá ñá túú ndùu váha-xi sá cuè téé cunduu nàni idi díquí-güedé, chi ìⁿ sácáⁿ núú cúú-xí càchí-yu.

15 Te nchaa ñáyiú díhí ñáyiú nàni idi díquí-xi càchí ñáyiú sá ìⁿ sá vâha cùu-xi sá cúu-xí-yu sá dúcáⁿ nàni idi díquí-yu. Te ducaⁿ chi Yá Ndiòxí ní cachí-gá sá dúcáⁿ cùnduú-yu cuendá quidáhu-xi díquí-yu.

16 Te núu ió ñáyiú cuíni dacáa cuèndú cuendá sá ñí cáháⁿ-í-a, te na cùnahá-yu sá ncháá nchùhú cue téé càháⁿ tnúhu Xítohó Jesucristú ñu-ni ducaⁿ sàni iní-ndí cada nchaa ñáyiú díhí. Te ñu-ni ducaⁿ sàni iní nchaa ñáyiú ndècu ichi-gá.

Cuendá ñáyiú ñá túú quide datná ní quide Xítohó Jesucristú cùtnàhá ní cudini-gá ndíhi cue téé ní xica cuu ndíhi-gá

17 Te nchòhó ñá túú quide váha-ndo ndècu-ndo núu xíáⁿ duha na càháⁿ-í dóho-ndo, chi nchòhó òré tàcá-ndó ñá túú quide váha-ndo chi ñá túú chindee tnaha-ndo cada-ndo sá vâha, chi da nàdatuhú iní tnáhá-ndó nacúaa ndècu-ndo.

18 Te díhna-gá na càchí tnúhu-í xii-ndo sá ñihí-í tnúhu sá òré tàcá-ndó quide-ndo nacúaa ní cáháⁿ Xítohó Jesucristú, te ñá túú cùu ìⁿnuu-ndo oré ducaⁿ quide-ndo nacúaa ní cáháⁿ-gá. Te dava sá càháⁿ ñáyiú sàndáa iní-í te dava ñáhá.

19 Te ndáa sá dúcáⁿ tnàhí cada-xi vá cúu ìⁿnuu-ndo cuendá ducaⁿ cùtnuní núu ndèdacáa-ndo sandáa ndisa iní-ndó tnúhu Xítohó Jesucristú te ndèdacáa-ndo ñáhá!

20 Te ndí tnahá òré tàcá-ndó quide-ndo datná ní quide Xítohó Jesucristú cùtnàhá ní cudini-gá ndíhi cue téé ní xica cuu ndíhi-gá, te ñá túú quide-ndo nacúaa tàú-xi cunduu chi cùtexínu-ni quide-ndo.

21 Chi òré tàcá-ndó quide-ndo nacúaa ní cachí Xítohó Jesucristú, te dava-ndo ngódó núu-ndó díhna-gá-ndó xèxi-ndo sá nehé-ndó te ñá túú sá cùndetu tnaha-ndo, te ñá túú càháⁿ tnáhá-ndó núu xíáⁿ dava-ndo ñá túú xèxi-ndo ndahá xití-ndó, te dava-ndo xidó-ndó quide-ndo chi xíni-ndo.

22 Te vá dúcáⁿ càda-ndo chi càa vehe-ndo núu dúcáⁿ càxi-ndo còho-ndo cada-ndo ndéé ndahá xití-ndó, chi sá dúcáⁿ quide-ndo te dàquee tihú-ndó ncháa dava-gá ñáyiú ndècu ndíhi-ndo ichi Yá Ndiòxí, te dàndóo canúú-ndó ncháa ñáyiú ndàhú sá dúcáⁿ quide-ndo. ¡Núu xíáⁿ vá cúu càchí-í sá cúu-ndó ñáyiú quide váha chi ñá túú quide váha-ndo sá dúcáⁿ quide-ndo ndecu-ndó!

Xítohó Jesucristú ní dàndóo tnúhu-gá sá cóhó-ó ndùdi ndéhé yoho yàha stilé te caxi-o pàa cuendá ndacu iní-ó sá ní xihí-gá

(Mt. 26:26-29; Mr. 14:22-25; Lc. 22:14-20)

23 Te dàtná-ni ní dánèhé ñáhá Xítohó Jesucristú xii-í te ñu-ni ducaⁿ ní dánèhé ñáhá-í xii-ndo, chi ñu-ni niú cùtnàhá ní sàha cuendá ñáhá ndíi Júdás Iscarioté xii-gá núu cuè téé cùu úhú iní ñáhá ní queheⁿ-gá pàa,

24 te ní ndacáⁿ táhú-gá núu Yá Ndiòxí, te ní táhú cuèchi-gá, te ní xáhaⁿ-gá xii cue téé xica cuu ndíhi-gá: “Chí quéhé” pàa-a caxi-ndo te cada iní-ndó sá cúu-xí dàtná yiqui cuñú-í, chi yuhú cuú-í sácuendá-ndó. Te ducaⁿ-ni càda-ndo cundecu-ndo cuendá ndacu iní ñáhá-ndó xii-í”, càchí-gá xàhaⁿ-gá xii-güedé.

25 Te sáta ní yáha ní xexi-güedé pàa sá ní sàñaha-gá, te ní queheⁿ-gá tàsáⁿ ñúhú ndùdi ndéhé yoho yàha stilé, te ní ndacáⁿ táhú tùcu-gá núu Yá Ndiòxí. Te ní xáhaⁿ-gá xii cue téé xica cuu ndíhi-gá: “Chí cóhó ndùdi ndéhé yoho yàha stilé-a, te cada iní-ndó sá cúu-xí dàtná níñi-í, te cuendá níñi-í sá cáti òré cuú-í cutnuní ndáa sá Yá Ndiòxí cada-gá ñngá núu sá vâha sá cúu-xí ñáyiú. Te ndí

tnahá òré coho-ndo ndùdí ndéhé yoho yàha stilé-án te ndacu iní ñáhá-ndó xii-í, te ducaⁿ-ni càda-ndo cundecu-ndo”, cachí-gá xàhaⁿ-gá xii-güedé.

²⁶ Te ndi tnahá òré xéxí-ndó paá te xihí-ndo ndudí ndéhé yoho yàha stilé, te xiáⁿ dátü-ndo núú ñáyiú sá Xítohó Jesucristú ní xihí-gá cuendá-yu, te ducaⁿ-ni càda-ndo cundecu-ndo ndéé ná sáá nduu quixi tucu Xítohó Jesucristú.

Nàcuáa cada-o òré caxi-o paá ndihi òré coho-o ndudí ndéhé yoho yàha stilé dātñá ní cachí Xítohó Jesucristú

²⁷ Te dava-ndo ñá túú quide-ndo nacuáa cuini Yá Ndióxi cada-ndo òré xéxí-ndó paá ndihi òré xihí-ndó ndudí ndéhé yoho yàha stilé, te sá dúcáⁿ quide-ndo-án te cucuégi xii-ndo chi ñá túú nèhe-ndo sá yíñühu sá cúú-xí yiqui cuñú Xítohó Jesucristú, te ni ñá túú nèhe-ndo sá yíñühu sá cúú-xí ñíñí-gá.

²⁸ Te ío váha cada cuendá-ndó te núu ndècu váha iní-ndó núú Xítohó Jesucristú òré cúmání-gá caxi-ndo paá ndihi òré cúmání-gá coho-ndo ndudí ndéhé yoho yàha stilé. Te núu ndècu váha iní-ndó núú-gá te caxi-ndo te coho-ndo.

²⁹ Te dava nchòhó ñá túú sàni váha iní-ndó cuendá yiqui cuñú Xítohó Jesucristú te xèxi-ndo paá te xihí-ndo ndudí ndéhé yoho yàha stilé, te nacháhu-ndo sá dúcáⁿ ñá túú sàni váha iní-ndó.

³⁰ Te ñiú sá dúcáⁿ quide-ndo núu xiáⁿ vai-ndo huhú, te ío ndàhú ndécú-ndó, te dava ñáyiú ndècu ndihi-ndo sa ní xihí-yu.

³¹ Dico núu ío váha sáha-o cuendá nacuáa ndècu-o núú Yá Ndióxi, te vá dúcáⁿ dándoho ñaha-gá xii-o.

³² Te òré ndéhé Yá Ndióxi sá ñá túú quide ndáá-ó ndècu-o te dándoho ñaha-gá xii-o. Te ducaⁿ quide-gá cuendá sá vá cuíta nihnu-o, chi núu ñáhá te cuíta nihnu-o ndihi nchaa ñáyiú ndècu ichi cuehé ichi duha.

³³ Te núu xiáⁿ càháⁿ-í dóho nchaa nchòhó ñáyiú ndècu ndihi-í ichi Xítohó Jesucristú sá òré tacá-ndó càda-ndo nacuáa ní quide Xítohó Jesucristú cútnàhá ní cudini-gá ndihi cue téé ní xica cuu ndihi-gá, te cundetu tnàha-ndo nduu nchaa-ndo te dātñúni ducaⁿ càda-ndo.

³⁴ Te núu dava-ndo xihí-ndó dòcò te caxi duuⁿ-ndo vèhe-ndo te dātñúni nataká-ndó, cuendá òré nataká-ndó te vá cáda-ndó ñiⁿ sá ñá túú tau-ndó càda-ndo cuendá sá vá dándoho ñaha Yá Ndióxi xii-ndo. Te òré quixi coto ñaha-í xii-ndo te dāv-áⁿ cachí tnúhu-í xii-ndo nchaa dava-gá sá cúmání.

12

Nàcuáa chindee ñaha Espiritú Yá Ndióxi cada-o ñiⁿ ñiⁿ-o

¹ Te nchòhó ñáyiú ndècu ndihi-í ichi Xítohó Jesucristú cuini-í cachí tnúhu-í xii-ndo nacuáa chindee ñaha Espiritú Yá Ndióxi xii-o ñiⁿ ñiⁿ-o cuendá cutñúni iní-ndó.

² Te nchòhó sa nàha-ndo sá cútnàhá vátá cundècu-gá-ndó ichi Xítohó Jesucristú ní xóo dandàhú ñáhá yucu ñávàha xii-ndo, te ní xóo quíndáá iní-ndó nchaa sá ní cadúha cue ñáyiú ñuyúú-a nchaa sá càchí-yu cùu ndióxi te ñá ndàá sá ndiòxi cúú-xí, te nchaa xiáⁿ ñá túú càháⁿ-xi.

³ Te cuini-í sá nchòhó cutñúni iní-ndó sá Espiritú Yá Ndióxi ñá túú chindee-xi ni ñiⁿ ñáyiú cuendá sá càháⁿ úhu-yu Xítohó Jesucristú. Te ni ñiⁿ ñáyiú ñá túú càhu iní-yu càháⁿ-yu sá Xítohó Jesucristú cúú-gá Xítohó-yu te núu ñá túú Espiritú Yá Ndióxi dácàhu iní ñáhá-xí xii-yu.

4 Te ndi dííⁿ ndi dííⁿ nduu chiuⁿ ní cachí Espíritú Yá Ndiòxí cada-o, te diu-ni ìⁿndi-ni Espíritú-gá ndécú.

5 Te ndi dííⁿ nduu chiuⁿ quide-o xinu cuechi-o núú ìⁿndi-ni Xítóhó Jesucristú.

6 Te ndi dííⁿ ndi dííⁿ chindee ñaha Yá Ndiòxí xii-o nàcuáa cada-o chiuⁿ-gá, te diu-ni ìⁿndi-gá ndécú chindee-gá nchaa ñáyíu.

7 Te Espíritú Yá Ndiòxí quidé-xí sǎ nchóó càda-o sá vǎha, te ducaⁿ chindee-o cue ñáyíu ndècu ndih-i-o ichi Xítóhó Jesucristú.

8 Te dava-o ní nduu táhú-ó núú Yá Ndiòxí sá Espíritú-gá cada te ndacu-o cǎháⁿ-ó tnúhu sá ìo cǎhnu cuu diu-ni tnúhu mee Yá Ndiòxí, te dava tucu-o ní nduu táhú-ó cùtnuní iní-ó nàcuáa cǎháⁿ tnúhu-gá te cǎháⁿ-ó nàcuáa cuíni Espíritú-gá.

9 Te dava tucu-o ní nduu táhú-ó sǎ ìo quíndáá iní-ó Xítóhó Jesucristú cuendá cada-gá ìⁿndi sá cuíni-ó, te ducaⁿ chi Espíritú Yá Ndiòxí chíndèe ñaha-xi xii-o. Te dava tucu-o ní nduu táhú-ó sǎ cǎcǎⁿ táhú-ní-ó núú Xítóhó Jesucristú cuendá ñáyíu cùhú te ndúha-yu.

10 Te dava tucu-o ní nduu táhú-ó sǎ ndácú-ó càda-o nchaa sá vǎ yǎo tnàhí ndàcu cada, te dava tucu-o ní nduu táhú-ó núú Yá Ndiòxí sá cǎháⁿ-ó tnúhu sá dácǎhu iní ñáhá-gá xii-o, te dava tucu-o ní nduu táhú-ó sǎ cùtnuní iní-ó núú diu Espíritú Yá Ndiòxí chíndèe ñaha-xi xii ñáyíu òrè cǎháⁿ-yu tnúhu-gá àdi cue espíritú cùndih-i yucu ñávǎha. Te dava tucu-o ní nduu táhú-ó cǎháⁿ-ó tnúhu sá dácǎhu iní ñáhá Espíritú Yá Ndiòxí xii-o tnúhu sá ñà túú xini-ó, te dava tucu-o ní nduu táhú-ó cǎháⁿ-ó nàcuáa quèe-xi nchaa tnúhu-áⁿ.

11 Te ìⁿndi díí-ni Espíritú Yá Ndiòxí ducaⁿ chindee ñaha-xi, te diu-ni Espíritú-gá dácǎhñu ñaha-xi xii-o ndi dííⁿ núú chiuⁿ sá cuíni méé-xí càda-o.

Nchaa-o ìⁿndi-ni cuu-o ndih-i Xítóhó Jesucristú

12 Te nchoo ñáyíu ndècu ñuyúí-a titní xichi cùu yiqui cuñú-ó dico ìⁿndi-ni cùu-xi, te diu-ni ducaⁿ sǎtnahá-xi cùu-o vitna ndecu-o ichi Xítóhó Jesucristú chi ìⁿndi-ni cùu-o ndih-i-gá.

13 Te dava-o cùu-o ñáyíu isràél, te dava-o ñà túú cùu-o ñáyíu isràél, te dava-o cùu-o ñáyíu ñà túú tnàhí dàñá quee núú chíúⁿ pàtróóⁿ-xi, te dava-o cùu-o ñáyíu dàñá quee núú chíúⁿ pàtróóⁿ-xi. Te mee Espíritú Yá Ndiòxí ní quide-xi sá ncháá-ó ìⁿndi-ná cùú-ó ndècu-o ndih-i Xítóhó Jesucristú. Te Yá Ndiòxí ní cachí-gá sá ncháá-ó cùndecu ndih-i-o Espíritú-gá.

14 Te nchòhó xini-ndó sǎ titní xichi cùu yiqui cuñú-ó te ñà díú ìⁿndi-ni xichi cuu-xi.

15 Te cuéí sǎhá-ó ndih-i ndaha-o ñà túú ìⁿndi-ni cuu-xi dico vá cùú cǎchí-ó sǎ sǎhá-ó ñà túú cùu-xi yiqui cuñú-ó.

16 Te cuéí lóho-o ndih-i tinuu-o ñà túú ìⁿndi-ni cuu-xi dico vá cǎchí-ó sǎ lóho-o ñà túú cùu-xi yiqui cuñú-ó.

17 Te núu nihíí ní ndúú yiqui cuñú-ó ní xíndeé mee-ni tinnuu-o, te ñà túú ndèé cundeé lóho-o cùndedóho ní cùu te núu ducaⁿ, àdi núu nihíí yiqui cuñú-ó ní xíndeé mee-ni lóho-o te ñà túú ndèé cundeé dítní-ó ní cùu te núu ducaⁿ.

18 Dico mee Yá Ndiòxí ní taxi ndecu-gá ìⁿndi ìⁿndi xichi yiqui cuñú-ó nàcuáa ní cachí iní méé-gá.

19 Te núu ìⁿndi-ni sǎ ní xíndecu nihíí yiqui cùú-ó, te vá cùndùu-xi nàcuáa tàú-xi cunduu ni cùu te núu ducaⁿ.

20 Dico titní xichi cùu yiqui cuñú-ó, te ìⁿndi-ni cùu-xi nihíí-xi.

21 Te sa nàha-o sá vǎ cúú càchí-ó sǎ tìnuu-o ñá túú xìnì ñuhu-xi ndaha-o, àdi ñíquí-ó ñà túú xìnì ñuhu-xi sáhá-ó.

22 Te nchoo sà naha-o sá dává xìchi yìqui cuñú-ó sǎ càchí-ó sǎ ñà túú cùnū ío-gá xínì ñuhu-xi.

23 Te dava xìchi yìqui cuñú-ó sǎ ñà túú quide cuendá cávíhí-ó nchàa xíǎⁿ sá quidáhu dóó sácuihnu-o, te dava xìchi yìqui cuñú-ó ñà cúú cùtúu chí dacuítí sǎ quidáhu.

24 Te nchaa xìchi yìqui cuñú-ó sǎ cúú cùtúu ñá túú xìnì ñuhu-xi quidáhu. Te Yá Ndióxi ní taxi ndecu-gá nchaa xìchi yìqui cuñú-ó nàcuáa tàú-xi cunduu. Te ní cachí-gá sá dává-gǎ xìchi yìqui cuñú-ó núú vǎ cúú cùtúu quidáhu.

25 Te ducaⁿ ní quide-gá cuendá sá ííⁿ-ní cùu yìqui cuñú-ó. Te ducaⁿ ndì tnahá ííⁿ xìchi yìqui cuñú-ó chindee tnahá-xi. Te ducaⁿ sǎtnahá-xi cùu nchoo vitna ndecu-o íchi Xìtohó Jesucristú chí chindee tnahá-o.

26 Te núu ííⁿ xìchi yìqui cuñú-ó ná tnahúhú te ñihí-ó quide úhú-xi, te núu ííⁿ xìchi yìqui cuñú-ó ío váha ndècu-xi te ducaⁿ ñihí yìqui cuñú-ó cúú váha-xi. Te ducaⁿ sǎtnahá-xi cùu-o vitna ndecu-o íchi Xìtohó Jesucristú.

27 Te nchoo ndècu ndíhi-o Xìtohó Jesucristú, te cùu-o datná yìqui cuñú-gá te ííⁿ ííⁿ-o cùu-o datná ííⁿ ííⁿ xìchi yìqui cuñú-gá.

28 Te ducaⁿ sǎtnahá-xi cùu-o chí Yá Ndióxi ní taxi-gá ndí dííⁿ ndí dííⁿ chùⁿ quide-o sá cúú-xí nchàa ñáyíu ndècu íchi-gá. Te díhna-gá cue téé caca cuu cáháⁿ tnúhu-gá núú ñáyíu ní taxi ndecu-gá, te dàtnùní ní taxi ndecu-gá cue téé cáháⁿ tnúhu-gá nàcuáa dàcahu iní ñáhá mèe-gá, te dàtnùní ní taxi ndecu-gá cue téé dànehé ñáhá xì ñáyíu tnúhu-gá núú tàcá-yu, te dàtnùní ní taxi ndecu tucu-gá cue téé ndàcu quide sá vǎ yóo tnahí ndàcu cada. Te ní taxi ndecu tucu-gá cue téé xìcáⁿ táhú-ní núú Xìtohó Jesucristú cuendá ñáyíu cùhú te ndúha-yu. Te ní taxi ndecu tucu-gá cue téé chindee cue ñáyíu ndècu íchi-gá. Te ní taxi ndecu tucu-gá cue téé yíndaha ñaha xii ñáyíu ndècu íchi-gá, te ní taxi ndecu tucu-gá cue téé càháⁿ tnúhu sá dácàhu iní ñáhá Espíritú-gá tnúhu sǎ ñà túú xìnì-güedé.

29 Te ñà ncháá-ó cùu-o cue téé ní táuchíúⁿ Xìtohó Jesucristú cáháⁿ tnúhu-gá núú ñáyíu, te ñà ncháá-ó cùu-o cue téé càháⁿ tnúhu sá dácàhu iní ñáhá Yá Ndióxi xii-o. Te ñà ncháá-ó cùu-o cue téé dàcuaha ñaha xii-yu. Te ñà ncháá-ó cùu-o cue téé quide sá vǎ yóo tnahí ndàcu cada.

30 Te ñà ncháá-ó cùu-o cue téé dicó-ní cǎcáⁿ táhú núú Xìtohó Jesucristú cuendá ñáyíu cùhú te ndúha-yu. Te ñà ncháá-ó cùu-o cue téé càháⁿ tnúhu sá dácàhu iní ñaha Espíritú Yá Ndióxi tnúhu sǎ ñà túú xìnì-ó, te ñà ncháá-ó cùu-o cue téé cùtnuní iní-xí cáháⁿ nàcuáa ndùu tnúhu-áⁿ.

31 Te ío nducu ndèe-ndo cada-ndo nacuáa nduu táhú-ndó núú Yá Ndióxi nchaa sá ío-gá cùnū cada-ndo. Te vitna na dànehé ñáhá tucu-í xii-ndo nàcuáa cada-ndo, dico sá dánèhé ñáhá-í-a ío-gá cùnū-xi.

13

Cuu iní-ó tnahá ñáyíu-o

1 Te núu nchoo xìnì-ó cáháⁿ-ó tnúhu sá ío vii ío váha cuáháⁿ càháⁿ ñáyíu ñuyíú-a, àdi xìnì-ó cáháⁿ-ó tnúhu sá ío vii ío váha cuáháⁿ càháⁿ cue espíritú xínú cuèchi núú Yá Ndióxi, te núu xìnì-ó cáháⁿ-ó nchàa tnúhu-áⁿ te ñà túú cùu iní-ó cuè tnahá ñáyíu-o ña, te ñà túú nàndíhi-xi sá xìnì-ó cáháⁿ-ó tnúhu-áⁿ te cùu-o datná dava caá sá ío dusaⁿ quide.

2 Te núu cùu-o ñáyiú càháⁿ tnúhu sá dácàhu iní ñáhá Yá Ndiòxí, àdi cuu-o ñáyiú cùtnuní iní-xi nàcuáa cuáháⁿ nchaa tnúhu ndùu yuhu ni cuu, àdi cuu-o ñáyiú ío váha cùtnuní iní-xi nchaa nàcuáa quíde Yá Ndiòxí, àdi cuu-o ñáyiú ío váha sàndáá iní ñáhá xíi Yá Ndiòxí nàcuáa ndacu-o cùu-o ñⁿ yucu xocuíñí-xi núu ndécú-xí, te núu nchaa xíáⁿ xìní-ó càda-o te ñá túú cùu iní-ó cuè tñaha ñáyiú-o ña, te ñá túú vèdana nàndíhí-xi te núu vá cúú iní-ó tñaha ñáyiú-o cuèi na càda-o nchaa xíáⁿ.

3 Te cuèi nchaa sá ndécú ndíhí-o na dacáhñu-o, te cuèi na cuáha cuendá-ó mée-o cáyú-ó sá cúú-xí Yá Ndiòxí, dico ñá túú vèdana chindee ñaha-xi xii-o sá dúcáⁿ càda-o te núu ñá túú cùu iní-ó cuè tñaha ñáyiú-o.

4 Dico núu cùu iní-ó cuè tñaha ñáyiú-o, te càhnu iní-ó, te quíde váha-o, te ñá túú cùu-o ñáyiú cuédú iní, te ni ñá túú càháⁿ-ó núu cùu cahnu-o, te ni ñá túú sàni iní-ó càda cahnu-o mee-o,

5 te ni ñá túú ññhu cuehé iní-ó, te ni ñá túú ndùcu-o mee-ni sá cúú-xí mée-o, te ni ñá túú-gá cúdeéⁿ-ó cuendá ñⁿ sá cúú, te ni ñá túú-gá sácúhuⁿ iní-ó sá quíde ñaha tñaha ñáyiú-o xii-o.

6 Te ni ñá túú-gá cúdeé iní-ó nchaa sá ñá túú váha quíde ñáyiú, chi mee-ná cuendá nchaa sá váha cúdeé iní-ó.

7 Te nchaa sá yáha-o sàcàhnu iní-ó, te sàni váha iní-ó cuendá nchaa ñáyiú, te sàni iní-ó sá díú-ní nchaa sá váha cuu xii nchaa tñaha ñáyiú-o ndéè cuéé-gá, te ío quíde cahnu iní-ó cuèi nándi sá yáha-o, te nchaa xíáⁿ quíde-ó te núu cùu iní-ó cuè tñaha ñáyiú-o.

8 Te ni caa ni quíhíⁿ duha-ni cuu iní-ó cuè tñaha ñáyiú-o. Dico sáá nduu te vá cóo-gá ñáyiú càháⁿ tnúhu sá dácàhu iní ñáhá Yá Ndiòxí, te ni vá cóo-gá ñáyiú càháⁿ tnúhu sá dácàhu iní ñáhá Espíritú Yá Ndiòxí tnúhu sá ñá túú xìní-yu, te ni vá cóo-gá ñáyiú túha dàtná túha ñáyiú vitna.

9 Te vitna ñá túú cùtnuní iní-ó nchaa nàcuáa sàni iní Yá Ndiòxí chi sacú-ni cùtnuní iní-ó, te ducaⁿ sàcú-ni càháⁿ-ó nàcuáa ndùu tnúhu-gá, dico càháⁿ-ó tnúhu-gá nàcuáa dàcahu iní ñáhá-gá xii-o.

10 Te na sáá nduu càda Yá Ndiòxí nchaa nàcuáa tàú-xi cunduu, te dàvá-áⁿ te nchaa sá càhí-gá ñá túú ndècu-xi nàcuáa tàú-xi cunduu vá dúcáⁿ-gá cundecu-xi.

11 Te yúhú cùtnàhá ní cuu landú-í ní xóo cada-í sá cúú-í landú, ní xóo càháⁿ-í, ní xóo caní iní-í, te ní xóo tecú tnùn-í dàtná quíde cuè landú xíndecu vitna, dico sáta ní cuu-í ñⁿ tée cùu sacuéhé te ñá túú-gá quíde-í dàtná ní xóo cada-í cùtnàhá ní cuu landú-í.

12 Te ducaⁿ sàtnahá-xi cùu-o vitna ndecu-o ichi Xítoho Jesucristú, chi ñá túú cùtnuní váha iní-ó nàcuáa cùu cuendá Yá Ndiòxí, te cùu-o datná ñáyiú ndèhe ñⁿ núu yùtátá sá ñá túú túu váha núú-xi, te ducaⁿ sàtnahá-xi cùu-o chí ñá túú cùtnuní váha iní-ó ñasa cùu cuendá-gá, dico sáá nduu quíni núú-ó-gá. Te nchoo sàcú-ni cùtnuní iní-ó nàcuáa ndùu-gá vitna dico na sáá nduu te quíni ndáá-ó nàcuáa càa nàcuáa ndùu-gá dàtná xìní ñáhá mée-gá xii-o.

13 Te ni caa ni quíhíⁿ ducaⁿ-ni quíndáá iní-ó Yá Ndiòxí, te ducaⁿ-ni cùndecu ndíhí-o tnúhu ndee iní cundecu-o ndíhí-gá, te ducaⁿ-ni ío cuu iní-ó-gá ndíhí tñaha ñáyiú-o. Te sá cúú iní-ó Yá Ndiòxí ndíhí sá cúú iní-ó tñaha ñáyiú-o xíáⁿ ío-gá cùnñu-xi dacúúxí dàva-gá.

14

Ñáyiú càháⁿ tnúhu sá dácàhu iní ñáhá Espíritú Yá Ndiòxí

1 Te vá dáñá ndèé-ndó cùu iní-ndó tnàha ñáyi-ndo, te cuhuⁿ iní-ndó sá ndùu táhú-ndó núú Yá Ndióxi títí ní núú chiúⁿ cada-ndo nacúáa chindee ñàha Espiritú-gá xii-ndo, te ío cuhuⁿ iní-ndó sá ndúú táhú-ndó cáháⁿ-ndó tnúhu sá dácàhu iní ñáhá Yá Ndióxi xii-ndo.

2 Te cue ñáyi cáháⁿ tnúhu sá dácàhu iní ñáhá Espiritú Yá Ndióxi tnúhu sá ñà túú xini-yu, te tnúhu cáháⁿ-yu-ánⁿ cúú-xí sá cúú-xí Yá Ndióxi te ñá díú sá cúú-xi ñáyi chi ñà túú tècú tnùní-yu, te mee Espiritú Yá Ndióxi quidé-xí dùcaⁿ cáháⁿ-yu tnúhu yiyuhu.

3 Te cue ñáyi ní nduu táhú núú Yá Ndióxi cáháⁿ tnúhu sá dácàhu iní ñáhá-gá xií-yu, te ñáyi-ánⁿ dácáháⁿ-yu ñáyi nàcuáa cuita níhí ndéé-gá-yu cundecú-yu ichi-gá, te ducaⁿ cuañáhá-yu tnúhu ndee iní xií-yu òré ndihú iní-yu.

4 Te ñáyi cáháⁿ tnúhu sá dácàhu iní ñáhá Espiritú Yá Ndióxi xií-yu tnúhu sá ñà túú xini-yu-ánⁿ, ñáyi-ánⁿ mee-ní-yu níhí ndéé-yu ndècú-yu ichi-gá. Dico ñáyi cáháⁿ tnúhu sá dácàhu iní ñáhá-gá xií-yu, cáháⁿ-yu tnúhu-ánⁿ nàcuáa níhí ndéé dáva-gá ñáyi nchicúⁿ nihnu ichi-gá.

5 Te yúhú ío cudí iní-í te núu nchaa-ndo cáháⁿ-ndó tnúhu sá dácàhu iní ñáhá Espiritú Yá Ndióxi xii-ndo tnúhu sá ñà túú xini-ndó. Dico ío-gá cudí iní-í te núu nchaa-ndo cáháⁿ-ndó tnúhu sá dácàhu iní ñáhá-gá, chi ío-gá xini ñuhu-xi sá cáháⁿ-ndó tnúhu-ánⁿ dácúúxi sá cáháⁿ-ndó tnúhu sá dácàhu iní ñáhá Espiritú-gá cáháⁿ-ndó tnúhu sá ñà túú xini-ndó. Dico ìⁿ-ni nùtnahá-xi quidé-ndo te núu nchòhó ñáyi cáháⁿ tnúhu sá dácàhu iní ñáhá Espiritú-gá cáháⁿ-ndó nàcuáa quèe-xi tnúhu-ánⁿ. Te ducaⁿ te nchaa ñáyi ndècú ichi Yá Ndióxi cuita níhí ndéé-gá-yu quíhíⁿ cundecú-yu ichi-gá.

6 Te núu yúhú quexió-í núú ndècú nchòhó ñáyi ndècú ndihí-í ichi Xitohó Jesucristú, te ngúita-í cáháⁿ-í mee-ni tnúhu sá dácàhu iní ñáhá Espiritú Yá Ndióxi xii-í tnúhu sá ñà túú xini-í, te ñà túú nã sá vãha cuu-xi sá cúú-xi-ndó. Dico cuu-xi sá vãha xii-ndo te núu na cáháⁿ-í núú-ndó nchaa tnúhu sá dánèhé ñáhá Yá Ndióxi xii-í tnúhu sá vãtá dácúàha-gá-í, ndihí nchaa tnúhu sá sá xini-í, ndihí nchaa tnúhu sá dácàhu iní ñáhá-gá xii-í cáháⁿ-í, ndihí nchaa dáva-gá tnúhu-gá.

7 Te na càda-o cuendá sá núu ìⁿ téé tiú-dé vílu àdi caní-dé àrpá te núu ñà túú sàhnú-dé ndihí-xi ìⁿ yaá, te ñà cútùnì iní-ó nã yaá caní-dé àdi nã yaá tiú-dé te núu ducaⁿ na càda-dé.

8 Te diu-ni ducaⁿ sàtnahá-xi cùu tucu téé cùu sandadú tiú cútú, chi núu vá tiú váha-dé nàcuáa tàú-xi cunduu òré quíhíⁿ-güedé nàá-güedé, te vá ngündecu túha dáva-gá cue sandadú te núu ducaⁿ na càda-dé vá tiú váha-dé.

9 Te ducaⁿ sàtnahá-xi cùu nchòhó te núu vá cáháⁿ-ndó ìⁿ tnúhu nàcuáa tàú-xi cunduu núú ñáyi te vá tècú tnùnì-yu tnúhu cáháⁿ-ndó. ¡Chi áúⁿ nã cuu cáháⁿ-ndó te núu ducaⁿ na càda-ndo!

10 Te ío títí ní núú tnúhu ío ñuyíú, te ìⁿ ìⁿ núú tnúhu-ánⁿ cútùnì iní ñáyi nàcuáa quèe-xi.

11 Te núu nchoo ñã tècú tnùnì-ó ìⁿ tnúhu cáháⁿ ìⁿ ñáyi, te quidé-ó-yu ñáyi ñúú xicá chi ñà túú cáháⁿ-yu tnúhu cáháⁿ-ó, te diu-ni ducaⁿ quidé ñáhá-yu xii nchoo tùcu.

12 Te xiáⁿ núu càchí tnúhu-í xii nchaa nchòhó ñáyi ío cuíni nduu táhú núú Yá Ndióxi sá Espiritú-gá chindee ñàha-xi xii-ndo cada-ndo ná daha núú chiúⁿ, te ío nducu ndèe-ndo cada-ndo chiúⁿ sá ní nduu táhú-ndó nàcuáa cuita níhí ndéé-gá ñáyi ndècú ichi-gá quíhíⁿ.

13 Te núu cãháⁿ-ndó tnúhu sã ñã túú xìní-ndó, tnúhu sã dácãhu iní ñáhã Espiritú Yã Ndiõxí xii-ndo, te xìní ñuhu-xi sã cacãⁿ táhú-ndó núú Yã Ndiõxí cuendá sã ná chindee ñaha-gã xii-ndo cãháⁿ-ndó núú ñãyiú núu nása quèe-xi tnúhu-áⁿ.

14 Chi núu nchoo na cãháⁿ ndihí-o Yã Ndiõxí ndihí tnúhu sã ñã túú xìní-ó, te ni yùhu ni iní-ó cãháⁿ ndihí-o-gã dicó-ni sã ñã tècú tnùní-ó nãcuáa ndùu tnúhu cãháⁿ-ó.

15 Te xiãⁿ núu xìní ñuhu-xi cãháⁿ ndihí-o Yã Ndiõxí ni yùhu ni iní-ó nãcuáa chindee ñaha Espiritú-gã xii-o te cãháⁿ-ó nãcuáa tecú tnùní-ó, te ñiú-ni ducaⁿ cada-o oré xítã yùhu-o chiñuhu-o Yã Ndiõxí, chi ni yùhu ni iní-ó dùcaⁿ cada-o nãcuáa chindee ñaha Espiritú-gã xii-o, te cùtnuní iní-ó nãcuáa cuáhãⁿ nchaa tnúhu cãháⁿ-ó xita-o.

16 Chi núu nchoo na ndácãⁿ táhú-ó núú Yã Ndiõxí ndihí mee-ni tnúhu sã ñã túú xìní-ó tnúhu sã dácãhu iní ñáhã Espiritú-gã xii-o, te ñãyiú ñã túú ní ndùu táhú cãháⁿ tnúhu cãháⁿ-ó ndédóho ñáhã-yu xii-o, te ñãyiú-áⁿ vã ndácũ-yu cãháⁿ-yu tnúhu cãháⁿ-ó ndácãⁿ táhú-ó ndihí-yu núú Yã Ndiõxí chi ñã túú tècú tnùní-yu tnúhu cãháⁿ-ó.

17 Te váha-ni quide-o sã dúcãⁿ cãháⁿ-ó ndácãⁿ táhú-ó núú Yã Ndiõxí, te dicó-ni sã tnúhu-áⁿ ñã túú chindee-xi ñãyiú nãcuáa cuita níhí ndéé-gã-yu cundecú-yu ichi-gã.

18 Te yúhú ío ndácãⁿ táhú-í núú Yã Ndiõxí chi cãháⁿ-í tnúhu sã ñã túú xìní-í tnúhu sã dácãhu iní ñáhã Espiritú-gã xii-í, te cãháⁿ-gã-í dácúúxí nchaa nchohó.

19 Te òrè tacã ñãyiú ndècu ichi Yã Ndiõxí dácuahá-yu tnúhu-gã, te cãháⁿ-í tnúhu-gã núu-yu sã sã ní cutnùní iní mée-í nãcuáa ducaⁿ cùtnuní iní-yu nãcuáa ndùu tnúhu cãháⁿ-í. Te tnàhá-gã iní-í cãháⁿ-í úhú-ni tnúhu-áⁿ núú-yu dácúúxí sã cãháⁿ-í úxí mĩ tnúhu sã ñã túú xìní-í, tnúhu sã dácãhu iní ñáhã Espiritú Yã Ndiõxí xii-í cãháⁿ-í.

20 Te nchòhò ñãyiú ndècu ndihí-í ichi Xitohó Jesucristú, vá caní iní-ndó dàtná sání iní cue landú, chi caní iní-ndó dàtná tàù-xi cunduu chi sa sacuéhé-ndó. Dico yu-ndo dàtná cue landú lĩhli vá cundècu-ndo ichi cuehé ichi duha, chi cue landú-áⁿ ñã túú ndècu-güexi ichi-áⁿ.

21 Te núú tütú Yã Ndiõxí cãháⁿ-xi nãcuáa ní cãháⁿ-gã, te cãchí-xi: “Cue tée ñuú xicã cãháⁿ ndi dííⁿ núú tnúhu quihíⁿ-güedé cãháⁿ-güedé tnúhu-í núú ñãyiú israél cada-güedé núu-í, te cuèi ducaⁿ dico vá quindáá iní-yu tnúhu-í”, duha ní cachí Yã Ndiõxí te ducaⁿ ní ngúndéé núú tütú-gã.

22 Te tnúhu sã dácãhu iní ñáhã Espiritú Yã Ndiõxí xii-o tnúhu sã ñã túú xìní-ó, xiãⁿ cúú-xi cuendá sã cùtnuní iní cue ñãyiú ñã túú sãndáá iní tnúhu Yã Ndiõxí sã ñã túú cùu váha iní ñáhã-gã xii-yu. Dico sã cúú-xi cuè ñãyiú sãndáá iní tnúhu-gã ñã túú nã quidé-xi sã cúú-xi-yu. Te tnúhu sã dácãhu iní ñáhã Yã Ndiõxí xii-o, xiãⁿ cúú-xi cuendá sã cùtnuní iní cue ñãyiú sãndáá iní tnúhu-gã sã ndécú ndihí ñaha-gã xií-yu, dico ñã túú dùcaⁿ sani iní cue ñãyiú ñã túú sãndáá iní tnúhu-gã.

23 Te núu ní tacã nchaa nchòhò ñãyiú ndècu ichi Yã Ndiõxí, te nchaa-ndo ní ngúíta-ndo cãháⁿ-ndó tnúhu sã dácãhu iní ñáhã Espiritú Yã Ndiõxí xii-ndo tnúhu sã ñã túú xìní-ndó, te mei òrè-áⁿ quexio cue ñãyiú ñã túú sãndáá iní tnúhu-gã, ndihí cue ñãyiú vátã quini dana-gã tnúhu-gã núú ndécú-ndó, te ñãyiú-áⁿ quesàhá-yu sã lúcú-ndó te núu ducaⁿ cãháⁿ-ndó tnúhu sã dácãhu iní ñáhã Espiritú-gã xii-ndo òrè quexió-yu.

24 Dico núu nchaa-ndo cãháⁿ-ndó tnúhu sã dácãhu iní ñáhã Yã Ndiõxí

xii-ndo, te mei òrè-áⁿ quexi^o cue ñáyi^u ducaⁿ ñà túú sàndáá iní-xi tnúhu-gá, ndihi cue ñáyi^u ducaⁿ ñà túú xini dana tnúhu-gá-áⁿ, te ñáyi^u-áⁿ cutnùni iní-yu sá ndécú cuèchi-yu núú-gá, te nguíta-yu cuáha-yu cuèndá sá ñà túú quide váha-yu ndécú-yu cuèndá sá cáháⁿ-ndó tnúhu-gá ndedóho-yu.

25 Te nchaa sá cuèhé sá dúhá nǐ quidé-yu sàni iní-yu yiyuhu ndacu iní-yu, te nguíta-yu náhmá-yu nchaa sá ñà túú váha ní quidé-yu núú Yá Ndióxi, te cachí-yu sá ïo càhnu cuu-gá, te cachí tucú-yu sá ndàá ndécú ndihi-ndo-gá.

Cada-o nàcuáa tàú-xi cunduu

26 Te vitna nchòhó ñáyi^u ndècu ndihi-í ichi Xítóhó Jesucristú xini ñuhu-xi duha cada-ndo. Òrè tàcá-ndó te dava-ndo càta yuhu-ndo chiñuhu-ndo Yá Ndióxi, te dava-ndo dàsahú-ndó ñáyi^u tnúhu-gá, te dava-ndo cáháⁿ-ndó nàcuáa dàquixi túu Yá Ndióxi iní-ndó, te dava-ndo cáháⁿ-ndó tnúhu sá dácàhu iní ñáhá Espiritú Yá Ndióxi xii-ndo tnúhu sá ñà túú xini-ndó, te dava-ndo cáháⁿ-ndó nàcuáa quèe-xi tnúhu-áⁿ. Te nchaa sá quidé-ndó ná cùu-xi nacuáa chindee-xi ñáyi^u nàcuáa cuita níhí ndéé-gá-yu cundecú-yu ichi-gá.

27 Te òrè cáháⁿ-ndó tnúhu sá dácàhu iní ñáhá Espiritú Yá Ndióxi xii-ndo tnúhu sá ñà túú xini-ndó, te úú-ni-ndo àdi úní-ni tnàhá-ndó cáháⁿ-ndó tnúhu-áⁿ te vá úúⁿ ní cáháⁿ-ndó chi ndéé ndihi ìⁿ-ndo te dàtnùni nguíta ingá-ndó cáháⁿ-ndó. Te xini ñuhu-xi sá ìⁿ ñáyi^u cáháⁿ-yu nàcuáa quèe-xi tnúhu cáháⁿ-ndó-áⁿ.

28 Te núu ñà túú ñáyi^u tècú tnùnì nàcuáa quèe-xi tnúhu cáháⁿ-ndó-áⁿ, te núu méé núú ìⁿ-ní-ndó cáháⁿ-ndó tnúhu-áⁿ cáháⁿ ndihi-ndo Yá Ndióxi te vá cáháⁿ-ndó núú ñáyi^u.

29 Te òrè cáháⁿ-ndó tnúhu sá dácàhu iní ñáhá Yá Ndióxi xii-ndo te úú-ni-ndo àdi úní-ni tucu-ndo cáháⁿ, te dava-gá-ndó cùndedóho-ndo tnúhu-áⁿ te cáháⁿ-ndó núu váha-ni cáháⁿ-güedé àdi ñà túú váha-ni.

30 Te núu ìⁿ-ndo nǐ dácáhú ìní ñáhá Yá Ndióxi xii-ndo ìⁿ tnúhu cáháⁿ-ndó, te núu ìⁿ-ndo sà caháⁿ-ndó te nguíñí-ndó te quíhu tucu ingá-ndó cáháⁿ-ndó nàcuáa ní dácáhú ìní ñáhá Yá Ndióxi xii-ndo.

31 Te nchaa nchòhó ñáyi^u ní nduu táhú cáháⁿ tnúhu sá dácàhu iní ñáhá Yá Ndióxi, te vá úúⁿ-ní cáháⁿ-ndó chi díhna-gá ìⁿ-ndo cáháⁿ te dàtnùni cáháⁿ tucu ingá-ndó. Te ducaⁿ càda-ndo cuèndá nchaa-ndo tècú tnùnì-ndó nàcuáa nduu tnúhu cáháⁿ ìⁿ ìⁿ-ndo, te ducaⁿ te cudíí-gá iní-ndó càncicúⁿ nihnu-ndo ichi-gá.

32 Te nchaa ñáyi^u cáháⁿ tnúhu Yá Ndióxi sa nàha-ná méè-yu nàcuáa quidé-yu cáháⁿ-yu tnúhu-gá nàcuáa ñà túú quide cutexínu-yu.

33 Te Yá Ndióxi cúú-gá Yaá quidé ïo váha cùu ìⁿ-nuu-ndo ndecu-ndo, te ñà túú dàticá nuu ñaha-gá xii-ndo.

Te na càchi tnúhu-í xii-ndo nàcuáa cáháⁿ-í nchaa núu tàcá cue ñáyi^u ndècu ndihi-o ichi Xítóhó Jesucristú.

34 Te yúhú cachí-í sá vá cúú cáháⁿ cue ñáyi^u ñíhí òrè tàcá-ndó dàcuaha-ndo tnúhu-gá, chi ñà túú dùcaⁿ cuiní-gá cadá-yu, te quíndáá-ni iní-yu cadá-yu nàcuáa tàú-xi cunduu.

35 Te núu ìⁿ sá cuiní-yu nducu tnúhu-yu te ndéé òrè nasáá-yu vehé-yu te nducu tnúhu-yu núú yíí-yu, chi ñà túú nduu váha-xi sá cáháⁿ-yu núú tàcá nchaa ñáyi^u dàcuáha ndihi-yu tnúhu-gá.

³⁶ Te chí dándacu iní sá ñà díú nchòhó cúú-ndó ñáyyiu ní ngúndecu ndíhi tnúhu Yá Ndióxi díhna nuu nàcuáa datècú tnúhu-ndo dáva-gá ñáyyiu, te ní ñà díú mèe-ni nchòhó sa ní ngúndecu ndíhi-ndo tnúhu Yá Ndióxi vitna, núu xiáⁿ vá càchí-ndó sá ïo cùnunu-ndo.

³⁷ Te núu dava nchòhó sání iní-ndó sá càháⁿ-ndó nàcuáa dàcahu iní ñáhá Yá Ndióxi xii-ndo àdi sani iní-ndó sá quidé-ndó nàcuáa chindee ñaha Espíritú-gá xii-ndo, te cuáha váha-ndo cuèndá sá ncháá tnúhu càháⁿ-í-a cùu-xi tnúhu sá ní cachí tnúhu mee Xitohó Jesucristú cada-o.

³⁸ Te ndéda-ni càa ñáyyiu ndècu ndíhi-ndo te núu ñá túú sàndáá iní-yu tnúhu càháⁿ-í, te vá cáda cuèndá-ndó tnúhu càháⁿ-yu.

³⁹ Te vitna nchòhó ñáyyiu ndècu ndíhi-í ichi Xitohó Jesucristú, ïo cani iní-ndó càháⁿ-ndó tnúhu sá dácàhu iní ñáhá Yá Ndióxi núu ñáyyiu, te dañà-ndo na càháⁿ cue ñáyyiu ní nduu táhú núú Yá Ndióxi sá càháⁿ-yu tnúhu sá dácàhu iní ñáhá Espíritú-gá xii-yu tnúhu sá ñà túú xini-yu.

⁴⁰ Te cada-ndo ncháa nacuáa tàù-xi cunduu nàcuáa ñá túú ñá cuu cundecu-ndo.

15

Ní ndoto Xitohó Jesucristú

¹ Te vitna nchòhó ñáyyiu ndècu ndíhi-í ichi Xitohó Jesucristú cuini-í sá dándacu iní-ndó nàcuáa ní dánèhé ñáhà-í xii-ndo tnúhu sá càháⁿ nàcuáa naníhí táhú-ó, chí díu tnúhu-áⁿ ní sàndáá iní-ndó te nchicúⁿ nihnu-ndo.

² Te sá xii tnúhu-áⁿ nihnú-ndó ichi cuáháⁿ-ndó núú ndúú táhú-ndó cùndecu-ndo ndíhi Yá Ndióxi ní caa ní quíhíⁿ, te ducaⁿ nduu táhú-ndó núú cùndecu-ndo ní caa ní quíhíⁿ ndíhi Yá Ndióxi te núu nchicúⁿ nihnu-ndo nàcuáa ní dánèhé ñáhà-í xii-ndo, te núu ñá túú nchicúⁿ nihnu-ndo te ñá túú ní sàndáá iní-ndó nàcuáa tàù-xi cunduu.

³ Te yúhú sa ní cachí tnúhu-í xii-ndo ñⁿ tnúhu sá ïo cùnunu ní ñíhí-í, chí ní cachí tnúhu-í xii-ndo sá Xitohó Jesucristú ní xihí-gá cuèndá nchaa yíca cuèchi-o, te ducaⁿ ní cuu chí ducaⁿ càháⁿ-xi núú tùtú Yá Ndióxi sá dúcáⁿ yáha-gá.

⁴ Te ní chindúxi ñaha-güedé xii-gá te nduu úní ní dándótó ñaha Yá Ndióxi xii-gá, te ducaⁿ ní cuu chí ducaⁿ càháⁿ-xi núú tùtú Yá Ndióxi.

⁵ Te sátá ní ndoto-gá te ní quee túu-gá núú tē Pèlú, te dàtnùní ní quee túu-gá núú dáva-gá cue téé ní táuchíúⁿ-gá càháⁿ tnúhu-gá.

⁶ Te sátá dúcáⁿ te dàtnùní ní quee túu-gá núú úhúⁿ cièndú cue ñáyyiu ndècu ichi-gá, te vai-yu xindecu-ni-yu vitna chí sacú-ni-yu ní xihí.

⁷ Te dàtnùní ní quee túu-gá núú tē Jàcobó, te sátá dúcáⁿ te dàtnùní ní quee túu-gá núú nchaa cue téé ní táuchíúⁿ-gá càháⁿ tnúhu-gá.

⁸ Te ndéé núú ní ndíhi-ná te ní quee túu-gá núú mèé-í, te òré ní quee túu-gá núú-í te cùu-í dàtná ñⁿ déhe yiquíⁿ vátá sàá-gá nduu càcu chí cùu-í ñⁿ téé ñá túú sàni váha iní-xi cuèndá-gá ní cùu.

⁹ Te yúhú ñá túú cùnunu-í dàtná cùnunu cue téé ní táuchíúⁿ Xitohó Jesucristú càháⁿ tnúhu-gá. Te cùu-í ñⁿ téé ní táuchíúⁿ-gá càháⁿ tnúhu-gá, cuèi ñá túú tàù-í sá càháⁿ-í tnúhu-gá, chí ní xóo cuu úhú iní-í cue ñáyyiu ndècu ichi Yá Ndióxi.

¹⁰ Dico Yá Ndióxi ïo váha iní-gá chí ní quide ñaha-gá xii-í ñⁿ téé váha, chí ñá túú-gá quidé-í dàtná ní xóo cada-í. Te ïo cùndahú iní ñáhá-gá chindèe ñaha-gá xii-í dico ñá túú àùⁿ ñá cuu chindee ñaha-gá, chí ïo-gá vai chiúⁿ-gá ní cuu sa ta quide-í cuáháⁿ dàcúúxí dáva-gá cue téé ní táuchíúⁿ-gá càháⁿ tnúhu-gá te ñá díú

mèe-í ducaⁿ quide-í chi mee Yă Ndiöxí ío cùndahú iní ñáhá-gă chîndèe ñaha-gă xii-í quidè-í chùuⁿ-gă.

11 Te ñá túú ná cada-xi cuèi dava-gă-güedé sa ní cuu vai-gă chùuⁿ-gă quidé-güedè àdi yúhú, chi ìⁿ-ni tnúhu cáháⁿ-ndí te tnúhu-áⁿ cúú tnúhu ní sándáá iní-ndó.

Cue ñáyiú ní xihí ndoto-yu

12 Te nchúhú cue tée cáháⁿ tnúhu Xítohó Jesucristú cáháⁿ-ndí sá ní xihí-gă te ní ndoto-gă, ¿te ná cuendá dava nchòhò cächí-ndó sá vă ndótó cuè ñáyiú ní xihí?

13 Te núu ducaⁿ sàni iní-ndó sá vă ndótó cuè ñáyiú ní xihí te ni Xítohó Jesucristú ñá túú ní ndoto-gă te núu ducaⁿ.

14 Te núu dicó Xítohó Jesucristú ñá túú ní ndoto-gă ñá, te nchaa tnúhu sá dánèhè ñáhá-ndí xii-ndo ñá túú nândíhi-xi te núu ducaⁿ, te àúⁿ ná cuu sándáá iní-ndó-gă te núu ducaⁿ.

15 Te núu dicó cúú-xí ìⁿ sá ndáá tnúhu sàni iní dava-ndo ña, te dàcuandehnde-ndí sá cáháⁿ-ndí tnúhu Yă Ndiöxí núú-ndó te núu ducaⁿ, te ñá túú cáháⁿ ndáá-ndí núú-ndó sá Yă Ndiöxí ní dándótó-gă Xítohó Jesucristú, te núu ndáá nàcuáa sàni iní dava-ndo sá vă ndótó cuè ñáyiú ní xihí, dico ñá ndáá nàcuáa sàni iní-ndó.

16 Te núu vă ndótó cuè ñáyiú ní xihí te ni Xítohó Jesucristú ñá túú ní ndoto-gă.

17 Te núu Xítohó Jesucristú ñá túú ní ndoto-gă ñá, te àúⁿ ná cuu sándáá iní-ndó-gă te núu ducaⁿ, te ndècu-ni cuèchi-ndo núú Yă Ndiöxí te núu ducaⁿ.

18 Te núu ndáá nàcuáa sàni iní-ndó ñá te cue ñáyiú ní sándáá iní ñáhá xii Xítohó Jesucristú ñáyiú ní xihí ní xíta nihnú-yu te núu ducaⁿ.

19 Te núu nchoo ndècu ndíhi-o tnúhu ndee iní núú Xítohó Jesucristú cuèndá-ní sá cùndècu-o ñuyúú-a ña, te cùu-o ñáyiú ío-gă duuⁿ duuⁿ ndàhú sá cúú-xí dàva-gă ñáyiú te núu ducaⁿ.

20 Dico ndáá sá Xítohó Jesucristú ní xihí-gă te ní ndoto-gă núu xíáⁿ cùtnùni iní dava-o sá ndótó cuè ñáyiú ní xihí ñáyiú ní sándáá iní tnúhu-gă.

21 Te sá cuèchi ìⁿ-ni téé ní xíndecu ñuyúú-a xíáⁿ xihí ñáyiú, te sá cuèndá ìⁿ-ni tucu ingá téé te ndoto cue ñáyiú ní xihí.

22 Te nchaa ñáyiú xihí-yu sá cuèchi ìⁿ téé, te téé-áⁿ cúú-dè ndíi Àdán téé díhna nuu ní cuu ñani tnáhá cuè ñáyiú ñuyúú. Te diu-ni ducaⁿ sá cuèndá ìⁿ-ni téé te ndoto cue ñáyiú ní xihí, te téé-áⁿ cúú-dè Xítohó Jesucristú chi nchaa ñáyiú ndècu ndíhi-gă ndótó-yu.

23 Te díhna-gă Xítohó Jesucristú ní ndoto-gă xíáⁿ cùtnùni iní dava-o sá ndùu na quixi tucu-gă ñuyúú-a te dàvá-áⁿ ndoto nchaa ñáyiú ní xihí ñáyiú ní sándáá iní tnúhu-gă.

24 Te dàtnùni ducaⁿ te sáá nduu nàa nchaa sá ío ñuyúú, te Xítohó Jesucristú danàa-gă nchaa ndí túhú sá cùnnùu ío ñuyúú-a, chi danàa-gă nchaa ñáyiú ío cùnnùu, ndíhi yucu ñávàha, ndíhi nchaa espíritú xínú cuèchi núú-xi. Te ducaⁿ te cùnhaha-gă xii Tātá-ó Dütú Ndiöxí taxi tnùni-gă.

25 Chi Xítohó Jesucristú dacuítí taxi tnùni-gă ndéé ná sáá nduu dànaa-gă nchaa sá cúú úhú iní ñáhá xii-gă.

26 Te ndéé núú ní ndíhi-ná te danàa-gă sá quidé xihí ñáyiú.

27 Te ducaⁿ chi cáháⁿ-xi núú tùtú Yă Ndiöxí sá mée-gă ní nachihi-gă nchaa sá ío ndaha Xítohó Jesucristú cuèndá sá mée Xítohó Jesucristú taxi tnùni-gă,

te va yoo ìn tàxi tnuní ñáhá xìi Yá Ndiòxí, chi mee Yá Ndiòxí cúú-gá Yaá ní nachihi-gá nchaa sá ío ndaha Xítohó Jesucristú.

28 Te díhna-gá ní xáhaⁿ Yá Ndiòxí xii Xítohó Jesucristú Yaá cúú Dèhe-gá sá quíndàha-gá nchaa sá ío, te òré ná quíndaha Xítohó Jesucristú nchaa sá ío, te cúñaha-gá xii Yá Ndiòxí taxi tnuní ñáhá-gá xii-gá, te ducaⁿ te mee-ná Yá Ndiòxí taxi tnuní-gá nchaandi túhú sá ío.

29 Te núu ñá túú ndáá càháⁿ-í, ¿te ná cuendá dava ñáyiú sànduté-yu cuendá ñáyiú ní xíhí núu ñá túú ndáá sá ndótó ñáyiú ní xíhí?

30 Te nchúhú ducaⁿ-ni sàni iní ñáyiú cahni ñáhá-yu xii-ndí, te núu vá ndótó ñáyiú ní xíhí te àúⁿ ná cuu ducaⁿ quíde cahnu iní-ndí ducaⁿ cuíní-yu cahni ñáhá-yu xii-ndí te núu ducaⁿ.

31 Te nchòhó ñáyiú ndècu ndihí-í ichi Xítohó Jesucristú ío váha sàni iní-í cuendá-ndó, chi ndècu-o ichi-gá. Te na càchí tnúhu ndáá-í xii-ndo sá ìnⁿ nduu ìnⁿ nduu ndeé iní ñáhá ñáyiú cahni ñáhá-yu xii-í.

32 Te núu dícò ndáá sá vǎ ndótó ñáyiú ní xíhí dàtná càchí dava ñáyiú, te àúⁿ ná cuu ní xíndecu-í ñúú Éfesú ní cuu úhú iní ñáhá ñáyiú xii-í te núu ducaⁿ, chi ñáyiú-áⁿ ní quidé-yu dàtná quidé ìnⁿ quítì dééⁿ sá cúú-xì-í. Te núu ndáá sá vǎ ndótó ñáyiú ní xíhí ñá, te váha-gá núu cachí-ó dàtná càchí ñáyiú: “Vítna na còho-o te na càxi-o chi tneé ídá cuú-ó”, duha càchí-yu.

33 Te vá dáñá-ndó mèe-ndo dandahú ñáhá ñáyiú ndècu ichi cuehé ichi duha xii-ndo, te nguíta-ndo càni iní-ndó dàtná sání iní-yu. Chi quèe ndáá-xi nàcuáa càháⁿ tucu dava-gá ñáyiú, chi càchí-yu sá núu ñáyiú quíde váha na nihí tnáhá-yu ndihí ñáyiú ndècu ichi cuehé ichi duha, te nguíta ñáyiú quíde váha-áⁿ cadá-yu tnáhá-yu nchaa sá cuèhé sá dúhá dàtná quidé ñáyiú-áⁿ.

34 Te ío váha cuáha-ndo cuendá nàcuáa cundecu-ndo, te vá cadá-gá-ndó dàtná quidé cuè ñáyiú ndècu ichi cuehé ichi duha. Te dava-ndo quíde-ndo datná quidé cuè ñáyiú ndècu ichi cuehé ichi duha chi ñá túú sàndáá iní-ndó Yá Ndiòxí. Te duha càháⁿ-í cuendá sá cúcàhaⁿ núú-ndó cuendá nchaa sá ñá túú váha quíde-ndo.

Nàcuáa ndoto ñáyiú ní xíhí

35 Te cudana dava-ndo ndècu tnúhu-ndo núu nása ndoto ñáyiú ní xíhí, te nása cunduu yiqui cuñú-yu òré ndotó-yu.

36 Te nchòhó ñáyiú ducaⁿ càháⁿ cúú-ndó ñáyiú ñá túú tnàhí cùtnuní iní-xì, te duha na càháⁿ-í nàcuáa tecu tnuní-ndó. Te núu ìnⁿ tatá ná chíhí-ó te tèhyú mée-xì te xínu déhe-xi.

37 Dico ñá díú sǎ sǎ ní xínu ta sàhnu cuáháⁿ ní cùxi-o, te ñu-ni ducaⁿ quíde-o cuéi triú ndihí nchaa dava-gá tatá xítú-ó.

38 Te Yá Ndiòxí quidé-gǎ sácúnduu tatá xínu-áⁿ dàtná cuíní mée-gǎ cunduu. Te ndéda-ni càa tatá te ñu-ni-gǎ quidé-gǎ sácúnduu-xi nàcuáa tàù-xi cunduu.

39 Te ndí dííⁿ ndáa nchaa yiqui cuñú, chi tucu càa yiqui cuñú nchoo cuè ñáyiú, te tucu càa yiqui cuñú nchaa quítì xica núú ñúhú, te tucu càa yiqui cuñú nchaa quítì ndáva, te tucu càa yiqui cuñú nchaa chácá.

40 Te ducaⁿ ñá túú ìnⁿ-ni caa nchaa yiqui cuñú sá ío andíu ndihí nchaa yiqui cuñú ñáyiú ío ñuyíú-a, te ducaⁿ ñá túú ìnⁿ-ni ndáa víi nchaa sá ío andíu ndihí ñuyíú-a.

41 Te ducaⁿ cùu tucu-xi nchíanchii chi tucu dàyehé-xi, te tucu dàyehé yóó, te tucu dàyehé nchaa chódíní, te ducaⁿ ñá túú ìnⁿ-ni dayehé nchaa chódíní.

42 Te ducaⁿ sàtnahá-xi cùu ñáyiu ní xihí te ndoto, chi tucu càa yiqui cuñú-yu sá nguĩndũxi te tucu cunduu yiqui cùñú-yu òré ndotó-yu, te yiqui cùñú sá ndótó ndihí-yu-áⁿ vã ndihí nihnu-gá-xi.

43 Te yiqui cùñú ñáyiu xihí ñã túú nãndihí-xi, dico yiqui cùñú sá ndótó ndihí-yu te ío váha cunduu. Te nchaa yiqui cùñú ñáyiu xihí ñã túú tnãhí-gã ndee-xi, dico yiqui cùñú ndoto ndihí-yu xiãⁿ ío cunduu ndee-xi.

44 Te yiqui cùñú nchaa ñáyiu xihí cúú-xí cuendá ñuyúú-a, dico yiqui cùñú sá ndótó ndihí-yu xiãⁿ cundecu-ná-xi cuendá Espíritú Yã Ndiõxí. Te dàtná ío yiqui cùñú sá cúú-xí cuendá ñuyúú-a, te ducaⁿ ío yiqui cùñú sá cúú-xí cuendá mee-nã Espíritú Yã Ndiõxí.

45 Te núú tütú Yã Ndiõxí càchí-xi: “Ndií Àdán ndíi ní xĩndecu ndéé díhna ní chihí Yã Ndiõxí iní ndíi”, duha càchí-xi núú tütú-gã. Te ìngã tucu téé cùu-dé dàtná ndíi Àdán te téé-áⁿ cúú-dě Xítóhó Jesucristú, te Yaá-áⁿ quidé-gã sá mèe-nã Espíritú Yã Ndiõxí quidé-xí ndècu-o ichi-gã vitna.

46 Te díhna-gã yiqui cùñú cuendá ñuyúú-a ní ngũndecu, te dàtnúni ngũndecu yiqui cùñú cundecu ndihí mee-nã Espíritú Yã Ndiõxí.

47 Te téé díhna nuu ní xĩndecu ñuyúú-a chi ñuhu ní cadúha ñaha Yã Ndiõxí xii-dé, te téé-áⁿ cúú-dě ndíi Àdán, te ìngã tucu téé ní cuuⁿ-dé andũu te téé-áⁿ cúú-dě Xítóhó Jesucristú.

48 Te nchaa ñáyiu càa yiqui cuñú-yu dàtná cáá yiqui cuñú téé Àdán téé ducaⁿ ní cuáha ñuhu-áⁿ, te nchaa ñáyiu ní nduu táhú cundecu ndihí téé ducaⁿ vèxi cuuⁿ andũu-áⁿ, ñáyiu-áⁿ nduu yiqui cùñú-yu dàtná cáá yiqui cuñú ní nduu táhú-dě ndécú ndihí-dé vitna, te téé-áⁿ cúú-dě Xítóhó Jesucristú.

49 Te nchaa ñáyiu ñuyúú-a càa-yu dàtná-ni càa datná-ni ndũu téé ducaⁿ ní cuáha ñuhu-áⁿ. Te nchaa nchoo ñáyiu ní nduu táhú cundecu ndihí téé ducaⁿ vèxi cuuⁿ andũu-áⁿ nduu-o dàtná-ni càa datná-ni ndũu téé-áⁿ tucu.

50 Te nchòhó ñáyiu ndècu ndihí-í ichi Xítóhó Jesucristú càchí tnúhu-í xii-ndo sã ncháá nãcuáa càa yiqui cuñú ñáyiu xĩndecu vitna vã sãá-xi cundecu-xi núú ndécú Yã Ndiõxí táxi tnùní-gã, chi ñuyúú-a ndihí nihnu-xi. Dico sã tàú-xi sãá núú ndécú-gã táxi tnùní-gã xìni ñuhu-xi cuu-xi sá cudíi cundecu.

51 Te na càchí tnúhu-í xii-ndo ìⁿ tnúhu sá yíyùhu ni cuu: Dava-o cùú-ó te dava-o cũndecu-ni-o, dico nchaa-o nãdáma yiqui cuñú-ó.

52 Te uuⁿni ducaⁿ nãdáma yiqui cuñú-ó òré cáháⁿ ìⁿ cútú, te cútú-ãⁿ cãháⁿ-xi òré sa ta cùyatni naa ñuyúú. Te òré cáháⁿ cútú-ãⁿ te ndoto nchaa ñáyiu ní xihí ñáyiu ní xĩndecu ichi Xítóhó Jesucristú, te ducaⁿ te vã ìⁿ ndũu ìⁿ quíú-gã cuú-yu. Te nchaa ñáyiu ndècu vívú te nãdáma yiqui cuñú-yu tnãhá-yu.

53 Te nchaa yiqui cùñú ndécú ndihí nchaa ñáyiu ndècu ñuyúú-a vitna ñã túú cùdíi-xi chi xihí-xi, dico yiqui cùñú nduu táhú nchoo ñáyiu ndècu ichi Xítóhó Jesucristú chi cudíi-xi ni caa ni quíhíⁿ chi vã cùú-gá-xi.

54 Te òré ná ndũu táhú-ó yiqui cuñú sá dúcãⁿ cudíi ni caa ni quíhíⁿ-áⁿ, te vã cũndecu ndihí-gã-ó yiqui cuñú sã ñã túú cudíi. Te dàvã-áⁿ te quee ndáá-xi nãcuáa cáháⁿ-xi núú tütú Yã Ndiõxí núú càchí-xi: “Vitna ñã túú-gã xihí ñáyiu chi mee-nã Yã Ndiõxí cúnũu-gã táxi tnùní ñãhá-gã xií-yu.

55 Te ñã túú tnãhí-gã ná ndoho ñáyiu sá cuendá tnúhu xihí, chi vã cóó-gã tnúhu xihí”, duha càchí-xi núú tütú Yã Ndiõxí.

56 Te cue ñáyi ndècu ndihí-yu tnúhu sá sánú ìchi ñaha xii-yu nàcuáa cadá-yu cundecú-yu dico uuⁿ-gá quidè-yu nchaa sá cuèhé sá dúhá. Te sá cuèndá nchaa sá cuèhé sá dúhá quidè-yu-án, te xiáⁿ ní ngúndecu tnúhu xihí dándòho ñaha-xi xii-yu.

57 Dico táxáhu xii Yá Ndiöxí chi ní taxi-gá tnúhu ndee ìní ndécú ndihí-o sá sàá nduu te vá quini-gá-ó tnúhu xihí, te ducaⁿ chi ndècu ndihí-o Xítóhó Jesucristú.

58 Te xiáⁿ núu cáháⁿ-í dóho nchòhó cue ñáyi ndècu ndihí-í ichi Xítóhó Jesucristú chi ío cùu ìní ñàhá-í xii-ndo, te cáháⁿ-í dóho-ndo sá cànchícúⁿ nihnu-ni-ndo ìchi Xítóhó Jesucristú cuèi nándi na cada ñaha ñáyi xii-ndo sá cuèndá-gá, te ío nducu ndèe-ni-ndo cada-ndo chiuⁿ-gá, chi sa nàha-ndo sá ncháá chiuⁿ quide-o cuèndá-gá ñá túú àúⁿ nà cuu quide-o.

16

Nàcuáa sàcáⁿ tnáhá ñáyi dáhúⁿ

1 Te na càchí tnúhu-í xii-ndo cuèndá dáhúⁿ sá sàcáⁿ tnáhá-ndó sá cúu-xi ñáyi ñuú Jerusalén, chi ñu-ni duha ní dánèhé-í cue ñáyi xíndecu ichi Xítóhó Jesucristú ndécú ìⁿ ìⁿ xichi distritú Gàlaciá.

2 Te duha cada-ndo ndì tnáhá nduu ndumíngú, te ìⁿ ìⁿ-ndo dàquee ñáⁿ-ndo sacú dáhúⁿ nàcuáa chindee ñaha Yá Ndiöxí xii-ndo ñihí-ndó cuèndá òrè quexìo-í te sa cundecu túha dáhúⁿ-án.

3 Te òrè quexìo-í te mee-ndo cãxi-ndó-yu núu ndèdacàa-yu sàni ìní-ndó cada ndáá canehe dáhúⁿ-án quíhíⁿ ndaha ñáyi xíndecu ichi Xítóhó Jesucristú ndécú ñuú Jerusalén. Te cadúha-í ìⁿ ùú tutú canehe-yu quíhíⁿ cuèndá cutnúni ìní ñáyi ñuú Jerusalén nàcuáa nduu chiuⁿ cuáháⁿ-yu.

4 Te núu xìni ñuhu-xi sá quíhíⁿ-í te candeca-í-yu quíhíⁿ.

Té Páblú sání ìní-dé quíngoto-dé cue ñáyi ndècu ichi Xítóhó Jesucristú

5 Te yúhú sání ìní-í yáha-í ìⁿ ùú ñuú cáá distritú Macedoniá, te dàtnúni ducaⁿ te sáá-í núu ndécú-ndó.

6 Te òrè quexìo-í te cudana cundecu ndihí ñaha-í xii-ndo vài nduu, àdi cudana te cundecu ndihí ñaha-í xii-ndo ndèé yáha nchaa yóó quidè víxiⁿ-xi. Te sátá dúcáⁿ te cada ndee ìní-ndó chindee ñaha-ndo xii-í òrè nucúhuⁿ ichi-í te núu ndèé ichi na quíhíⁿ-í.

7 Te duha cáháⁿ-í chi núu Yá Ndiöxí ná càchí-gá te cundecu ndihí ñaha tnàa-í xii-ndo òrè quexìo-í te ñá díú dicó-ni ichi yáha-í.

8 Te cundecu-ni-í ñuú Éfesú-a ndéé tnáhá vico Pentecóstès.

9 Te ducaⁿ chi iha ío tédóho ñáyi tnúhu Xítóhó Jesucristú sá cáháⁿ-í núu-yu. Núu xiáⁿ ío váha quèe cuèndá cada-í chiuⁿ-gá cuèi ío vài ñáyi ñá túú tnáhá ìní-yu sá cáháⁿ-í tnúhu-gá.

10 Te núu na quixi coto ñaha té Timùteú xii-ndo, te ío váha cuu ìní-ndó cáháⁿ ndihí-ndo-dé cuèndá ducaⁿ ñá túú nà caní ìní-dé cundecu ndihí ñaha-dé xii-ndo, chi tnáhá-dé cúu-dé tée quide chiuⁿ Xítóhó Jesucristú dàtná quidè-í.

11 Te cuini-í sá ní ìⁿ-ndo vá cání cuèhé ìní-ndó cuèndá-dé, te chindee-ndo-dé nàcuáa cuu váha ìní-dé òrè quixi-dé quixi coto ñaha-dé xii-í, chi yúhú ndihí dava-gá ñáyi ndècu ichi Xítóhó Jesucristú ndétú-ndí-dé quexìo-dé.

12 Te ío ní cáháⁿ ndáhú-í núú tē Àpolós tée ndècu ndihí-o ichi Xítóhó Jesucristú cuèndá quixi-dé ndihí dava-gá cue tée ndècu ndihí-o ichi-gá quixi

coto ñaha-güedë xii-ndo dico ñá túú ní cuíni-dé quixi-dé vitna, dico quixi-dé ndeé cuèé-gá.

Tnúhu ndeé núú nĩ ndihí-ná

13 Te ío quihí iní-ndó cùndecu-ndo ichi Xítohó Jesucristú, te vá daña ndeé-ndó quíndaá iní-ndó-gá, te ío yí cùnduu iní-ndó cùndecu-ndo ichi-gá, te ío nducu ndèe-ndo canchicúⁿ nihnu-ndo ichi-gá.

14 Te ío váha cuu iní tnáhá-ndó, te ducaⁿ ío váha cada tnàha-ndo te núu nándi cùu sá váha sàni iní-ndó cada-ndo.

15 Te nchòhó ñáyiú ndècu ndihí-í ichi Xítohó Jesucristú sa nàha-ndo sá dñhanuu cuè ñáyiú cùu ndi mee té Èstéfanás ndécú dístítrú Acáyá ní sándáá iní-yu tnúhu Xítohó Jesucristú. Te vitna ñá túú daña ndeé-yu quidé-yu sá váha sá cúú-xí dáva-gá ñáyiú sándáá iní tnúhu-gá.

16 Te càháⁿ ndàhú-í núú-ndó sá quíndaá iní-ndó nchàa ñáyiú ducaⁿ xíquide, ndihí nchaa dává-gá ñáyiú ío ndùcu ndee quide chiuⁿ ndihí-ndo cuendá Xítohó Jesucristú.

17 Te ío cùdí iní-í sá nĩ quexìo té Èstéfanás, ndihí té Fortunatú, ndihí té Acàicú, chi cue téé-áⁿ nĩ quide-güedé núú-ndó nĩ quide-güedé nchaa sá ñà túú ndàcu-ndo cada-ndo cuendá-í ní cùu.

18 Te ío tàxi-güedé tnúhu ndee iní xii-í, te diu-ni ducaⁿ tàxi-güedé tnúhu ndee iní xii nchòhó tucu, te núu xíáⁿ xíní ñùhu-xi sá cánèhe-ndo sá yíñùhu núú nchàa cue téé duha xíquide váha.

19 Te nchaa ñáyiú xñdecu ichi Xítohó Jesucristú ndécú dístítrú Àsiá quide ndee iní ñáhá-yu xii-ndo, te ío cada ndee iní-ndó càchí té Àquilú ndihí ñadíhí-dé tá Priscilá, te ducaⁿ quide ndee iní ñáhá tucu nchaa ñáyiú tàcá dácuaà tnúhu Yá Ndióxí vehé-yu xii nchaa nchòhó ñáyiú ndècu ichi-gá.

20 Te cada ndee iní tucu-ndo càchí cue dává-gá ñáyiú ndècu ndihí-o ichi Xítohó Jesucristú. Te nĩ yùhu nĩ iní-ndó càda ndee iní tnáhá-ndó ñⁿ ñⁿ-ndo.

21 Te vitna ndaha mee yùhú té Páblú tèé-í tnúhu-a quide ndee iní ñáhà-í xii-ndo.

22 Te ñáyiú ñá túú cùu váha iní-xi núú Xítohó Jesucristú te na cuíta nihnú-yu. Te vitna nchaa-o chí ná càchí-ó sá Xítohó Jesucristú quixi tucu-gá.

23 Te xicáⁿ táhù-í núú Xítohó Jesucristú sá ná chñdee chítúu ñaha-gá xii-ndo.

24 Te ío cùu iní ñáhà-í xii-ndo nàcuáa ndècu-o ichi Xítohó Jesucristú, te ducaⁿ na cùnduu, te ío chí cadá ndèe iní-ná vitna.

TUTÚ CÚÚ ÛÚ NÍ CADÚHA TÉ PĀBLÚ QUIHIⁿ NDAHA ÑÁYIU ÑUÚ CÒRINTÚ

Té Pāblú cādúha-dé tutú quíhiⁿ ndaha ñáyiú xĩndecu ichi Xítohó Jesucristú ndécú ñuú Còrintú

¹ Yúhú té Pāblú cāháⁿ-í tnúhu Xítohó Jesucristú chi ducaⁿ ní cachí Yá Ndiõxi cunduu. Te cādúha-í tutú-a ndihi té Timúteú té ndècu ndihi-o ichi-gá cuendá daquixi-í ndaha nchòhó ñáyiú xĩndecu ichi Yá Ndiõxi ndécú ñuú Còrintú, te tutú-a cuu-xi tnàhá cuendá nchaa ñáyiú cùu cuendá Yá Ndiõxi xĩndecu nchaa ñuú yĩndèhu distritú Acáyá.

² Te xicáⁿ tǎhù-í núú Tátá-ó Dútú Ndiõxi ndihi núú Xítohó Jesucristú sá ïo na chĩndee chítúu ñaha-gǎ xii-ndo, te ñu-ni ndi ndúú-gǎ ná càda te ïo váha cuu iní-ndó cùndecu-ndo.

Té Pāblú cāháⁿ-dé nchaa nàcuáa ndòho-dé

³ Te chí ná cǎchí-ó sǎ ïo váha iní Dútú Ndiõxi Yáa cúú Tátá Xítohó Jesucristú, te ñu-ni Dútú Ndiõxi cúú-gǎ Yáa ïo cùndahú iní ñáhá xii-o, te ñu-ni-gǎ cúú-gǎ Yáa táxi tnúhu ndee iní.

⁴ Te cuéi nándi ndòho-o ndecu-o dico ñu-ni Dútú Ndiõxi táxi-gǎ tnúhu ndee iní xii-o, te ducaⁿ quide-gǎ cuendá sá nchóó cuǎñaha-o tnúhu ndee iní xii nchaa ñáyiú nándi ndòho ndecu, te ñu-ni nchaa tnúhu ndee iní táxi-gǎ xii-o ñu-ni nchaa tnúhu ndee iní-án cuǎñaha-o xii-yu.

⁵ Te Xítohó Jesucristú ïo ní ndoho-gǎ, te ducaⁿ nchòo tucu ïo ndòho-o, te ducaⁿ ïo vai tnúhu ndee iní ñihí-ó ndècu ndihi-o chi ndècu-o ndihi Xítohó Jesucristú.

⁶ Te nchúhú nándi ndòho-ndí ndécú-ndí cuendá sá nchòhó ñihí-ndó tnúhu ndee iní cundecu ndihi-ndo te naníhí tǎhú-ndó. Te Yá Ndiõxi táxi-gǎ tnúhu ndee iní xii-ndí, te ducaⁿ quide-gǎ cuendá sá nchòhó tnàhá-ndó ñihí-ndó tnúhu ndee iní-án te naníhí tǎhú-ndó, te ducaⁿ càda ndee cada cahnu iní-ndó ndòho-ndo datná ndóhó nchúhú.

⁷ Te nchúhú ïo váha sǎni ndáá iní-ndí cuendá-ndó chi ndòho-ndo datná ndóhó-ndí, te ducaⁿ táxi Yá Ndiõxi tnúhu ndee iní xii-ndo datná táxi-gǎ xii-ndí.

⁸ Te nchòhó ñáyiú ndècu ndihi-ndí ichi Xítohó Jesucristú cuini-ndí cachí tnúhu-ndí xii-ndo nàcuáa ní yáha-ndí cùtnàhá ní xĩndecu-ndí distritú Àsiá chi dàvá-án ïo ní ndoho-ndí, te luha-ná te vá cùndèe iní-ndí yáha-ndí nchaa tnúndòho-án ní cùu chi ní xehndé iní-ndí sǎ vǎ cǎcu-ndí.

⁹ Chi ní sǎni iní-ndí sǎ ndíyi-ná cuu-ndí ní cùu, te ducaⁿ ní yáha-ndí cuendá sǎ ïo-gǎ quĩndáá iní-ndí Yá Ndiõxi sǎ díú-gǎ taunihnu ñaha-gǎ xii-ndí, te ñá díú mèe-ndí taunihnu-ndí méé-ndí, te ñu-gǎ cúú-gǎ Yáa dándòto cuéi ñáyiú sa ní xihí.

¹⁰ Te ñu-ni-gǎ ní taunihnu ñaha-gǎ ñá túú ní sǎhni ñaha ñáyiú xii-ndí, te ñu-ni-gǎ táunihnu ñaha-gǎ xii-ndí cuéi vitna, te cùtnuní ndáá iní-ndí sǎ díú-ní-gǎ taunihnu ñaha-gǎ xii-ndí núú cuaháⁿ núú vèxi te vá cǎhni ñaha ñáyiú.

¹¹ Te nchòhó tnàhá-ndó chĩndee ñaha-ndo xii-ndí chi cāháⁿ ndihi-ndo Yá Ndiõxi cuendá-ndí, te ïo vai ñáyiú cāháⁿ ndihi ñáhá-yu xii-gǎ cuendá-ndí, te

ducaⁿ ìo vài ñáyiu ndàcáⁿ táhù-yu núú-gã cuendá nchaa sá vâha quide ñaha-gã xii-ndí.

Té Pãblú càháⁿ-dé ná cuendá ñá túú ní nàyáha-dé ñuú Còrintú

12 Te ìo vâha cùu iní-ndí chi cùtnuní iní-ndí sá cúú-ndí cue tée cùu ndáá dàtná cuíní Yá Ndiòxí cunduu ndècu-ndí ñuyíú-a, te ñiu-ní ducaⁿ quide-ndí sá cúú-xí-ndó chi mee-gã cùndàhú iní ñáhá-gã xii-ndí chùndèe ñaha-gã, te ñá túú quide-ndí dàtná sání iní cue ñáyiu ñuyíú-a.

13-14 Nchaa nàcuáa ndùu tnúhu chido tnuní-ndí dáquixi-ndí ndaha-ndo cùu-xi mee-ni tnúhu sá ñá túú ùhú tecú tnùní-ndó. Te nchòhó sa cùtnuní luha iní-ndó nàcuáa quide-ndí ndécú-ndí, te cuíní-ndí sá ìo-gã vâha tecú tnùní-ndó cuendá sá òré ná quixi tucu Xítohó Jesucristú, te dàvá-ánⁿ ìo cada nínu ñaha-ndo xii-ndí dàtná cada nínu ñaha-ndí xii-ndo.

15 Te cuendá xiáⁿ núu ní sani iní-í yáha cáháⁿ-í úú xito núú ndécú-ndó cuendá ìo cudíí iní-ndó.

16 Chi ní sani iní-í sá òré quíhíⁿ-í distritú Macèdoniá te yáha cáháⁿ-í núú ndécú-ndó, te òré ndixi tucu-í te nayáha cáháⁿ tucu-í, te òré nayáha cáháⁿ-í te taxi-ndo sá cúú ìchi-í cuendá quíhíⁿ-í distritú Jùdeá, duha ní sani iní-í ní cùu.

17 Te sá dúcáⁿ ñá túú ní quíxi coto ñaha-í xii-ndo te cudana sàni iní-ndó sá yùhú ñá túú ní sâha vâha-í cuendá nàcuáa ní sani iní-í cada-í, àdi cudana ñáyiu ndècu ìchi cuehé ìchi duha, chi cue ñáyiu-ánⁿ tnaa càchí-yu sá cúú càdá-yu ñⁿ sá sání iní-yu cadá-yu te tnaa càchí-yu sá ñáhá.

18 Dico Yá Ndiòxí Yáá ìo vâha quide ndáá nàha ndáá náhá càxi-gã sá nchùhú ñá túú dàma-ndí sá càháⁿ-ndí.

19 Te yùhú ndíhi té Silvanú ndíhi té Timùtéu dánèhé ñáhá-ndí xii-ndo cuendá Xítohó Jesucristú Yáá cúú Dèhe Yá Ndiòxí, te Xítohó Jesucristú cúú-gã Yáá ñá túú dàma-gã tnúhu càháⁿ-gã, chi cùu-gã Yáá càháⁿ mee-ni tnúhu ndáá tnúhu cuíti.

20 Te ñiu-ni Xítohó Jesucristú cúú-gã Yáá quidé nchâa nacuáa ní cachí Yá Ndiòxí. Te sá cuendá sá dúcáⁿ quide Xítohó Jesucristú xiáⁿ càchí-ó sá ìo càhnu cuu Yá Ndiòxí. Te nchaa-o na càchí-ó sá díú-ní dùcaⁿ na cada-gã.

21 Te mee Yá Ndiòxí quidé-gã ndécú-ní-ó ìchi Xítohó Jesucristú. Te ñiu-ni mee-gã ní cáháⁿ ñáhá-gã xii-o cuendá cunu cuechi-o núú-gã.

22 Te Yá Ndiòxí ní quide-gã sá nchóo cùu-o ñáyiu cùu cuendá-gã, te ní taxi-gã Espiritú-gã ní ngunde cuíní-ndí cuendá cutnùní iní-ó sá ndáa cada ñaha-gã xii-o nàcuáa ní cachí-gã cada-gã.

23 Te Yá Ndiòxí náhá-gã sá yùhú càháⁿ ndáá-í ná cuendá vátá quíxí-gã-í quixi coto ñaha-í xii-ndo, te vátá quíxí-gã-í chi ñá túú cuíní-í dandìhú-í iní-ndó.

24 Te nchùhú ñá túú tàú-ndí cada yica ñàha-ndí xii-ndo nàcuáa quíndáá iní-ndó Yá Ndiòxí, chi sa sàndáá vâha iní-ndó-gã, chi nchùhú cuíní-ndí chindee tnúhu ñaha-ndí xii-ndo nàcuáa ìo-gã cudíí iní-ndó cùndecu-ndo.

2

1 Te ní sani ndáá iní-í sá vã quíxí ndíhi-ni-í quixi coto ñaha-í xii-ndo cuendá sá vã dándìhú-í iní-ndó.

2 Te nchòhó cúú-ndó ñáyiu tàxi tnúhu ndee ìni xii-í cudíí iní-í ndécú-í, te xiáⁿ núu ñá túú cuíní-í dandìhú-í iní-ndó, chi núu ducaⁿ na càda-í te vã cùndècu vâha-gã iní-ndó nàcuáa taxi-ndo tnúhu ndee ìni xii-í.

³ Te xiáⁿ núu ní tendaha-ĩ tutú véxi ndaha-ndo cuendá sá òrè quixi coto ñaha-ĩ xii-ndo, te dāvā-áⁿ quini-í sá quidé-ndó nàcuáa cudíí iní-í te ñá díú dà dandihú-ndó iní-í òrè quexio-í, chi nchòhó tàù-ndó càda-ndo sá yúhú cudíí iní-í. Te cùtnuní ndáá iní-í sá núu yúhú cudíí iní-í te tnàhá nchòhó cudíí iní-ndó cuendá sá dúcáⁿ cudíí iní-í.

⁴ Te ndàhyú-í sá ndìhú iní-í òrè ní cadúha-í tutú ní dáquixi-í ndaha-ndo, chi ío cuéhé sá sání iní-í, te ñá túú ní dáquixi-í tutú-áⁿ ndaha-ndo cuendá sá dándihú iní ñáhà-í xii-ndo, chi ní dáquixi-í cuendá sá nchòhó cutnùní iní-ndó sá ío cùu iní ñáhà-í xii-ndo.

Nàcuáa tàù ñáyiu ñuú Còrintú cadá-yu cuendá ìⁿ ñáyiu ñá túú quide ndáá

⁵ Te na cachi tnúhu-í xii-ndo cuendá ìⁿ téé ní quide ìⁿ sá ñá túú tàù-dé cada-dé ndécú ndìh-ndo, te ní quide ndàhú-xi luha iní-í cuendá sá ní quide-dé-áⁿ dico nchòhó tnàhá-ndó ní dándihú-dé luha iní-ndó, te duha càchí-í sá lúhá-ní ní dándihú-dé iní-ndó cuendá sá vā cuídó-gá-í ná tnúhu cáháⁿ-í.

⁶ Te nàcuáa ní ndatnúhu-ndo ní quide ndáá-ndó cuèchi téé-áⁿ te sa ndói-gá cuu nàcuáa ní quide-ndo-dě.

⁷ Te vitna tàù-ndó càda cahnu iní-ndó sá ní quide-dé, te cuáñaha-ndo tnúhu ndee iní xii-dé chi núu ñáhá te vā nihí ndéé-gá-dé cada-dé sá vāha cuendá sá ndìhú iní-dé.

⁸ Te xiáⁿ núu càháⁿ ndàhú-í núú-ndó sá cadá tùcu-ndo sá cúú iní-ndó-dě.

⁹ Te ñu-ñi cuendá iha càháⁿ-í ìⁿ núú tùtú sá sá ní dáquixi-í ndaha-ndo, te ducaⁿ ní quide-í xító ndèé ñáhà-í xii-ndo núu ndisa cuíní-ndó càda-ndo nchaa nacuaa càháⁿ-í.

¹⁰ Te ndéda-ní càa ñáyiu na càda cahnu iní-ndó ìⁿ sá quidé-yu, te tnàhá yúhú cada càhnu iní-í sá quidé-yu tucu. Te núu ío ìⁿ sá xíní ñùhu-xi cada cahnu iní-í te quide cahnu iní-í, te mee Xìtohó Jesucristú náhá-gã sá dúcáⁿ quide-í, te ducaⁿ quide-í cuendá sá nchòhó cuu-xi sá vāha xii-ndo.

¹¹ Te ducaⁿ te sácúíhná vā nihí-xi ná cada ñaha-xi xì-o, chi nchoo sá xíní-ó nàcuáa quide-xi.

Té Pàblú ndìhú iní-dé ndécú-dě ñuú Tròás

¹² Te ní xica-í cuáháⁿ-í ñuú Tròás cuendá yàcáⁿ cáháⁿ-í tnúhu sá càháⁿ nàcuáa naníhí tàhú-ó tnúhu Xìtohó Jesucristú, te òrè ní quexio-í te ní nihí-í ìⁿ ichi càhnu cáháⁿ-í tnúhu-gá.

¹³ Dico ñá túú ní cùu vāha iní-í chi ñá túú ní naníhí-í té Títú téé ndècu ndìh-ó ichi Xìtohó Jesucristú, núu xiáⁿ ní quide ndee iní tnàhá-í ndìhi cue ñáyiu ñuú-áⁿ, te ní xica-í cuáháⁿ-í distritú Macèdonia.

Dàquetíhú-ó yùcu ñávāha chi ndècu ndìh-ó Xìtohó Jesucristú

¹⁴ Te táxāhu xii Yá Ndiòxí chi ducaⁿ-ni sànu ichi ñaha-gá xii-ndí nàcuáa cunuu-ndí núu yucu ñávāha chi ndècu ndìh-ndí Xìtohó Jesucristú, te mee Yá Ndiòxí sáchiuⁿ ñaha-gá xii-ndí càháⁿ-ndí tnúhu-gá. Te cada iní-ó sá tnúhu-gá-áⁿ cúú-xí dàtná ìⁿ yúcu sá ío vāha sàháⁿ te ta xítènuu dicó-xi ndèni ní cuu cuáháⁿ. Te ducaⁿ sàtnahá-xi cùu tnúhu-gá chi nchúhú quidé-ndí nàcuáa ta xítènuu ndèni ní cuu cuáháⁿ.

¹⁵ Te cùu-ndí dàtná dicó ìⁿ yúcu sá ío vāha sàháⁿ, te nàcani cuendá Xìtohó Jesucristú núú Yá Ndiòxí, te dicó yúcu-áⁿ nchítá cuèi núú xíndecu cue ñáyiu sa ní naníhí tàhú, te cuèi núú xíndecu cue ñáyiu ta xita nihnu cuáháⁿ.

16 Te sá cúú-xí cuè ñáiyu ta xíta nihnu cuáháⁿ-án, dico yúcu-án cúú-xí dátá ñⁿ sá sáhní ñaha xii-yu, dico sá cúú-xí cuè ñáiyu sa ní naníhí tàhú, dico yúcu-án cúú-xí dátá ñⁿ sá ndécá iní-yu, ducaⁿ sátnahá-xi cùu nchùhú. Te vitna chí cuáha cuendá ñuu ná cúú ñáiyu sàni iní-ndó ndàcu cada nacuaa nduu tnúhu cáháⁿ-í-a.

17 Chi nchúhú cáháⁿ-ndí tnúhu Yá Ndióxi dico ñá túú ndáhú quidé-ndí ndihí tnúhu-gá dátá ñá xiquide dava-gá-güedé, chi quide ndáá-ndí cáháⁿ-ndí tnúhu-gá, te mee-gá ní cachí-gá sá dúcáⁿ càda-ndí te ndèhe-gá sá nchùhú quidé-ndí nàcuáa ní cachí-gá, chi ndècu ndihí-ndí Xítóhó Jesucrístú.

3

Cuendá ingá núú sá vâha ní cachí Yá Ndióxi cada-gá ñáiyu

1 Te cuéi duha cáháⁿ-ndí núú-ndó dico ñá túú xini ñuhu-xi sá cñaha-ndí xii-ndo sá cúú-ndí cue téé quide váha, te ní ñá túú xini ñuhu-xi cacanehe-ndí ñⁿ tutú núú cáháⁿ-xi sá cúú-ndí cue téé váha danèhé ñáhá xii-ndo datná xiquide dava-gá-güedé, te ní ñá túú xini ñuhu-xi sá nchòhó taxi-ndo ñⁿ tutú núú cáháⁿ-ndó sá nchùhú cúú-ndí cue téé quide váha.

2 Te ñá túú xini ñuhu-xi ducaⁿ cada-ndí. Te cùtnuní ndáá iní-ndí sá nchòhó cúú-ndó dátá ñⁿ tutú sá ío váha cáháⁿ cuendá-ndí. Te ducaⁿ sátnahá-xi cùu-ndo chi nchaa ñáiyu ñihí-yu tnúhu nàcuáa quide-ndo ndecu-ndo, te xiáⁿ cùtnuní iní-yu sá nchùhú cúú-ndí cue téé quide váha.

3 Te nchòhó cúú-ndó cuendá Xítóhó Jesucrístú, te cùu-ndo datná tutú-gá te tutú-án ní táuchíuⁿ-gá xii-ndí ní cadúha-ndí, te mee-ni ndihí Espiritú Yá Ndióxi ní ngúndeé tnúhu-án te ñá díú ndihí tindá ní ngúndeé. Te ñá díú ñⁿ núú yúú ní ngúndeé chi iní-ndó cùu-xi núú dúcáⁿ ní ngúndeé tnúhu-án te ducaⁿ sátnahá-xi cùu-ndo.

4 Te duha cáháⁿ-ndí chi cùtnuní ndáá iní-ndí sá Yá Ndióxi quidé váha ñaha-gá xii-ndí, chi ndècu ndihí-ndí Xítóhó Jesucrístú.

5 Te nchúhú chi ndàcu-ndí quidé-ndí sá vâha dico ñá díú mèe-ndí ducaⁿ ndàcu-ndí quidé-ndí, chi mee Yá Ndióxi chíndèe ñaha-gá xii-ndí ñuu ndàcu-ndí quidé-ndí sá vâha.

6 Te mee Yá Ndióxi ní quide-gá sá nchùhú ndacu-ndí cunu cuechi-ndí núú-gá cáháⁿ-ndí núú ñáiyu cuendá ingá núú sá vâha ní cachí-gá cada ñaha-gá xii-yu. Te sá vâha ní cachí-gá cada ñaha-gá xii-yu-án ñá túú ñⁿ-ni cuu-xi ndihí nchaa tnúhu sá ní xáhaⁿ-gá xii ndí Moisés ní chídó tnùní ndí, te ducaⁿ chí espíritú Yá Ndióxi néhé chiⁿ-xi nchaa tnúhu sá cáháⁿ cuendá nchaa sá vâha-án. Te nchaa tnúhu ní chídó tnùní ndí Moisés, dándixi túu-xi iní nchaa ñáiyu ndècu ndihí tnúhu-án sá cuíta nihnú-yu cuendá nchaa cuéchi-yu, dico cue ñáiyu ndècu ndihí Espiritú Yá Ndióxi ñáiyu-án ndécú ndihí-yu tnúhu ndee iní sá càcu nihnú-yu.

7 Te tnúhu sá ní cáháⁿ Yá Ndióxi ndéé díhna nàcuáa cada ñáiyu ní ngúndeé-xi ñⁿ núú yúú quèhéⁿ. Te óré ní dátúu ndí Moisés nàcuáa cáháⁿ tnúhu sá ní cáháⁿ Yá Ndióxi ndéé núú yúú-án núú cuè ñáiyu israhél, te súuní ní tásaⁿ núú ndí te ñá túú-gá ní cùu cundehé-yu núú ndí, te ducaⁿ-gá ducaⁿ-gá quidé-xi dátásaⁿ-xi núú ndí ní cùu ñá túú-gá ducaⁿ ní quide-xi. Te tnúhu ndéé núú yúú-án dándixi túu-xi iní cue ñáiyu sá cuíta nihnú-yu sá cuendá nchaa cuéchi-yu, te ío váha ní quide-xi cùtnáhá ní ngúndecu ndihí cue ñáiyu israhél tnúhu-án.

8 Te sá dúcáⁿ ní quide-xi xíáⁿ cútñuní sá tnúhu càháⁿ Espíritú Yá Ndiöxí vitna uuⁿ-gá ducaⁿ ïo-gá váha quide-xi.

9 Te núu ducaⁿ ïo váha ní quide-xi cútñahá ní ngúndecu ndihi cue ñáyiú isràél tnúhu sá dándixi túu iní-yu sá cuíta nihnú-yu sá cuèndá nchaa cuéchi-yu, te uuⁿ-gá ducaⁿ váha quide-xi vitna ní ngúndecu ndihi-o tnúhu sá càháⁿ nàcuáa quide Yá Ndiöxí cuèndá sá vâ cùndècu-gá cuéchi ñáyiú núú-gá.

10 Te vâ càchí-ó sá cútñahá ní ngúndecu ndihi cue ñáyiú isràél tnúhu ndèè núú yúú-áⁿ ïo-gá váha ní quide-xi, te ñáhá chi uuⁿ-gá váha quide-xi vitna cuèndá tnúhu sá càháⁿ nàcuáa quide Yá Ndiöxí.

11 Te núu ducaⁿ ïo váha ní quide-xi cútñahá ní ngúndecu ndihi ñáyiú isràél tnúhu sá ñà túú ní cùdí, te uuⁿ-gá ducaⁿ ïo váha quide-xi vitna ní ngúndecu ndihi-o tnúhu sá vâ ndíhi nihnu tnahí-gá.

12 Te cútñuní iní-ndí sá vâ ndíhi nihnu sá dúcáⁿ ïo váha quide-xi, núu xíáⁿ ïo vii ïo váha cùu iní-ndí càháⁿ-ndí tnúhu sá ní ngúndecu ndihi-o.

13 Te ñá túú quide-ndí dàtná ní xóo cada ndí Moisés, chi ndí-áⁿ ní xóo dàdáhu ndí núú ndí òré dátásaⁿ-xi núú ndí cuèndá sá vâ quini cue ñáyiú isràél òré ñà túú-gá dátásaⁿ-xi núú ndí.

14 Te cue ñáyiú isràél ñá túú ní tècú tnùní váha-yu nàcuáa ní xóo danèhé ñáhá ndí Moisés xii-yu, te cuéi ndéé vitna ñá túú tècú tnùní-yu òré dácuahá-yu tnúhu sá ní càháⁿ Yá Ndiöxí ndéé díhna nàcuáa cada-gá, te cada iní-ó sá dàtná sá ní xídáhu núú ndí Moisés yídáhu núú-yu cuèndá sá vâ cútñuní núú-yu cundèhé-yu te tecú tnùní-yu, dico núu tnahá tnúhu-yu ndihi Xítohó Jesucristú te tecú tnùní-yu.

15 Te cuéi ndéé vitna òré dácuahá-yu nchaa tnúhu sá ní chídó tnùní ndí Moisés nchaa núú tùtú ndí, te cada iní-ó sá dàtná sá ní xídáhu núú ndí yídáhu núú-yu chi ñá túú tècú tnùní-yu.

16 Dico cue ñáyiú na túha ñaha xii Xítohó Jesucristú te tècú tnùní-yu tnúhu-gá.

17 Te Xítohó Jesucristú ìⁿ-ni cùu-gá ndíhi Espíritú Yá Ndiöxí, te nchaa ñáyiú ndècu ndíhi Espíritú-gá ñá túú-gá táxi tnùní ñáhá nì ìⁿ sá ñà túú váha xii-yu.

18 Te dàtná cúú ìⁿ yutátá sá dánèhé núú ñáhá-xí xii ñáyiú ìⁿ sá váha, ducaⁿ sátnahá-xi cùu-o chi quide-o nàcuáa càháⁿ ñáyiú sá ïo càhnu cuu Xítohó Jesucristú, te ducaⁿ uuⁿ-gá uuⁿ-gá tá cùndáá-ó ndècu-o ichi-gá dàtná quidé mèe-gá quidé ndáá-gá. Te Espíritú-gá quidé-xí dùcaⁿ ta cundáá-ó núú-gá cuáháⁿ.

4

1 Te mee Yá Ndiöxí ní cundàhú iní ñáhá-gã xii-ndí ní taxi-gá chiúⁿ quide-ndí càháⁿ-ndí tnúhu-gá, núu xíáⁿ ñá túú tnahí nàtúhú iní-ndí càháⁿ-ndí tnúhu-gá.

2 Te nchúhú dàquee tíhú-ndí nchaandi túhú sá ñà túú váha quide dayuhu ñáyiú, chi nchaa xíáⁿ cúú-xí ìⁿ sácáⁿ-núú sá cúú-xí-yu, te nchúhú ñá túú sàni iní-ndí dandàhú-ndí ñáyiú te ni ñá túú sàni iní-ndí dama-ndí nàcuáa càháⁿ tnúhu Yá Ndiöxí, chi càháⁿ ndáá-ndí nàcuáa tàú-xi càháⁿ-ndí, te mee Yá Ndiöxí náhá-gã nàcuáa ndùu tnúhu càháⁿ-ndí núú ñáyiú, te ñáyiú-áⁿ cútñuní iní-yu sá nchúhú càháⁿ váha-ndí.

3 Te cue ñáyiú ñá túú tècú tnùní nàcuáa ndùu tnúhu sá càháⁿ nàcuáa naníhí tàhú-ó càháⁿ-ndí núú-yu, ñáyiú-áⁿ cùu-yu ñáyiú ta xíta nihnu cuáháⁿ.

4 Te cue ñáyi-u-án cúu-yu ñáyi-u ío sàà iní-xi chi ñá túú cuíní-yu quíndáá iní-yu tnúhu Xítóhó Jesucristú, te xiáⁿ núu sácuihná cúnú-xi núu-yu te nihí-xi nàcuáa quide-xi dadáhu ndodo iní ñáhá-xi xii-yu cuendá sá vâ təcú tnúní-yu tnúhu sá càháⁿ nàcuáa naníhí tãhú-yu, te tnúhu-án cúú-xí tnúhu sá ío váha chi càháⁿ-xi sá ío càhnu cuu Xítóhó Jesucristú, te cùu-gá dàtná mée Tátá-gã Dútú Ndiõxí.

5 Te nchúhú ñá túú càháⁿ-ndí cuendá sá cúú-xí mée-ndí núú-ndó chi càháⁿ-ndí cuendá Xítóhó Jesucristú, te càchí-ndí xii-ndo sá díú-gã cúú-gã Yaa ío cúnúu, te càchí-ndí xii-ndo sá mée-ndí cúú-ndí dico-ni cue tée xínu cuechi sá cúú-xí-ndó, te ducaⁿ quide-ndí nàcuáa cuu vii cuu váha iní Xítóhó Jesucristú.

6 Te Yá Ndiõxí Yaa ní dáyehé ndée cútñahá nee ñuyúú ní cùu, Yaa-áⁿ ní cachí-gá sá Xítóhó Jesucristú cada-gá nàcuáa tecú tnúní-ó sá ío càhnu cuu mee Yá Ndiõxí. Te sá dúcáⁿ ní quide-gá te cada iní-ó sá dàtná tnúhu sá ní dáyehé-gá iní-ó.

Ío quíndáá iní-ó Yá Ndiõxí

7 Te nchúhú ndécú ndíhi-ndí tnúhu Xítóhó Jesucristú, te tnúhu-gá cúú-xí dàtná ñⁿ sá ío váha ñúhu ñⁿ xití quídí ñuhu, te nchúhú cúú-ndí dàtná quídí-áⁿ. Te ducaⁿ sãtnahá-xi cùu-ndí chi tnúhu-gá ío càhnu cuu-xi te mee-ndí ñáhá, te ducaⁿ cùu nacuáa cutnúní sá mée Yá Ndiõxí quidé-gã nchaa sá váha te ñá díú mée-ndí.

8 Te cuéi ío ndòho-ndí ndécú-ndí dico nihí-ndí nàcuáa quide-ndí tá yãha-ndí nchaa tnúndòho-áⁿ cuáháⁿ, cuéi áma sa ndètu vii-nã quehndé iní-ndí sá vâ ndácú-ndí yãha-ndí nchaa tnúndòho-áⁿ, dico ndacu-ndí yãha-ndí.

9 Te cuéi nànducu ñaha ñáyi-u cuíní-yu ná cada ñáhá-yu xii-ndí dico ñá túú dàña ñaha Yá Ndiõxí xii-ndí, te cuéi cànihá-yu xii-ndí dico cãcu-ndí ñá túú sãhni ñáhá-yu.

10 Te ndèni ní cuu cuáháⁿ-ndí xícá cùu-ndí, te cãcu cãcu cahni ñáhá-yu xii-ndí dàtná ní quidé-yu Xítóhó Jesucristú, te ducaⁿ yãha-ndí cuendá cutnúní sá ndécú tũu Xítóhó Jesucristú andi-u te chĩndee ñaha-gã xii-ndí.

11 Te nchúhú ñini ndècu-ndí ñuyúú-a te nchaa-ni nduu cãcu cãcu cahni ñaha ñáyi-u xii-ndí sá cuendá Xítóhó Jesucristú, te ducaⁿ yãha-ndí ndécú-ndí cuendá cutnúní sá Xítóhó Jesucristú ndécú ndíhi ñaha-gã xii-ndí cuéi vá cúdii yiqui cùñú-ndí cundecu-xi.

12 Te sá dúcáⁿ cãcu cãcu cahni ñaha ñáyi-u xii-ndí xiáⁿ nchòhó uuⁿ-gá tá nihí ndée-ndó cuáháⁿ ndécú-ndó lchi Xítóhó Jesucristú.

13 Te ñⁿ tée ní xĩndecu ndée sanaha ní chídó tnúní-dé núú tütú Yá Ndiõxí núú càchí-xi: “Yúhú ní sãndáá iní-í Yá Ndiõxí núu xiáⁿ ní càháⁿ-í”, duha ní cachí tée-áⁿ. Te dàtná-ni ní sãni iní tée-áⁿ ní càháⁿ-dé te ñi-u-ni ducaⁿ sãni iní nchúhú tucu núu xiáⁿ càchí-ndí: “Sãndáá iní-ndí Yá Ndiõxí núu xiáⁿ càháⁿ-ndí”, duha càchí-ndí.

14 Te cútñuní iní-ndí sá núu na cùú-ndí te Yá Ndiõxí dandòto ñaha-gã xii-ndí dàtná ní dándótó-gã Xítóhó Jesucristú, te tnáhá nchòhó ducaⁿ càda ñaha-gã xii-ndo, te dàvã-áⁿ candeca ñaha-gã xii-o quíhíⁿ nucũndecu-o núú-gã.

15 Te nchúhú nãndi cùu sá tá yãha-ndí véxi cuendá nchòhó ngũndecu váha-ndo, te ducaⁿ cuita cáyã-gã ñáyi-u ngũndecu váha sá xíí Yá Ndiõxí, te ñi-u-ni

ducaⁿ cùita cuu vai-gá ñáyiú ndacáⁿ táhũ-yu núú-gă te cachí-yu sá ïo càhnu cuu-gá.

16 Te xĩăⁿ nõu nchúhú ñá túú tñáhí nàtúhú iní-ndí ndécú-ndí ichi Xítóhó Jesucristú, te cuèi yiqui cùñú-ndí tá xaú-xi cuáháⁿ dico iní-ndí chi uuⁿ-gá uuⁿ-gá tá nihí ndéé-xi cuáháⁿ.

17 Te nchaa sá ndóhó-ndí ñuyíú-a ñá túú cächí-ndí sá cúú-xi ñⁿ tñúndòho cahnu vihi, chi tnaa-ni duha ndòho-ndí, te sá dúhá ndòho-ndí nándi ndòho-ndí ndécú-ndí ñuyíú-a te Yá Ndiõxí ío váha cada ñaha-gá xii-ndí nduu na sàá-ndí núú ndécú-gă, te ñiu-ni ducaⁿ càda ñaha-gá xii-ndí ni caa ni quíhíⁿ.

18 Te nchúhú ñá túú nchicúⁿ nihnu-ndí sá túu ndèhe-ndí ío ñuyíú-a, chi nchicúⁿ nihnu-ndí sá vátá quíni-gá-ndí ndécú àndiu, te ducaⁿ quide-ndí chi nchaa sá túu ndèhe-ndí ío ñuyíú-a vá cúdii-xi cundecu-xi, te nchaa sá ñá túú túu ndècu andiu xĩăⁿ cudíi-xi cundecu-xi ni caa ni quíhíⁿ.

5

1 Te yiqui cùñú-ó cùu-xi datná ñⁿ vehe, te vehe-áⁿ ñá túú cúdii-xi, te ducaⁿ sãtnahá-xi cùu yiqui cùñú-ó chi vá cúdii-xi, te na sàá nduu vã cùndècu-gá-ó ndíhi yiqui cùñú-ó, te Yá Ndiõxí taxi-gá ñⁿ yiqui cùñú sáá sã cúú-xi-ó, te xĩăⁿ cúú-xi datná ñⁿ vehe sã ñá túú ní càdúha cue ñáyiú ñuyíú-a, chi mee Yá Ndiõxí ní cadúha-gá vehe-áⁿ te vehe-áⁿ cudíi-xi cundecu-xi ni caa ni quíhíⁿ andiu. Te ducaⁿ sãtnahá-xi cùu yiqui cùñú sá táxi Yá Ndiõxí xii-o chi cudíi-xi cundecu-xi ni caa ni quíhíⁿ.

2 Te nchúhú ndècu ndíhi-gá-ndí yiqui cùñú-ndí sá ndécú ndíhi-ndí vitna te sama cuíni-ndí sá ïo ndíhi taxi Yá Ndiõxí yiqui cùñú sáá cùndecu ndíhi-ndí.

3 Chi mee-gă vá dáñá-gă sá dúcáⁿ-ní cùnduu-ndí cundecu-ndí, chi dai taxi-gá yiqui cùñú sáá-ãⁿ xii-ndí.

4 Te ñini ndècu-ndí ndíhi yiqui cùñú-ndí vitna ío sàni iní-ndí te ndíhú iní-ndí, dico ñá díú sã dúhá quide-ndí te ñá túú-gă tñahá iní-ndí cundecu-ndí ndíhi yiqui cùñú-ndí, chi cuíni-ndí sá Yá Ndiõxí ío ndíhi taxi-gá yiqui cùñú sáá nduu táhú-ndí, chi xĩăⁿ cudíi-xi ni caa ni quíhíⁿ te yiqui cùñú-ndí sá tá ndíhi nihnu cuáháⁿ-a vá cúdii-xi cundecu-xi.

5 Te ducaⁿ tñáhí ní cachí Yá Ndiõxí cunduu sá dúcáⁿ nduu táhú-ó yiqui cùñú sáá-ãⁿ, te ní taxi-gá Espíritú-gá ní ngúndecu ndíhi-o cuèndá cutnúní iní-ó sã ndáá taxi-gá yiqui cùñú sáá-ãⁿ nduu táhú-ó.

6 Te xĩăⁿ nõu nchúhú nihí ndéé-ndí ndécú-ndí, te cùtnuní iní-ndí sá ñini ndècu-ndí ndíhi yiqui cùñú-ndí sá ndécú ndíhi-ndí vitna te vátá sàá-gá-ndí cundecu-ndí mei nõú ndécú Xítóhó Jesucristú.

7 Te ducaⁿ cùtnuní iní-ndí chi sàndáá iní-ndí Yá Ndiõxí ndécú-ndí ñuyíú-a cuèi ñá túú xini-ndí-gá.

8 Te ío váha cùu iní-ndí ndécú-ndí, te sàni iní-ndí sá váha-gá sá nõu vá cùndècu-gá-ndí ndíhi yiqui cùñú-ndí sá ndécú ndíhi-ndí vitna. Te ducaⁿ sàni iní-ndí chi váha-gá cundecu-ndí mei nõú ndécú Xítóhó Jesucristú.

9 Te ío ndècu ndèe-ndí quidé-ndí nàcuáa cuu vii cuu váha iní Xítóhó Jesucristú vitna ndècu-ndí ñuyíú-a, te ñiu-ni ducaⁿ càda-ndí cuèi òré vá cùndècu-gá-ndí.

10 Te dacuití sã ncháá-ó cùndecu-o núú Xítohó Jesucristú ìⁿ nduu, te dàvá-áⁿ mee-gã cáháⁿ-gá te núú nása ndùu chiuⁿ ní quide-o ìⁿ ìⁿ-o, núú ní quide váha-o àdi ñã túú ní quide váha-o, te nàcuáa ndùu chiuⁿ ní quide-o ìⁿ ìⁿ-o te ducaⁿ ndùu sá táxí-gã nduu táhú-ó.

Nàcuáa ní cuu ní ngúndecu váha-o ndìhi Yá Ndiõxí

11 Te nchúhú quíyùhú iní-ndí nàcuáa cada Xítohó Jesucristú, núú xíãⁿ càháⁿ-ndí tnúhu-gá núú ñãyiú cuendá xínu iní-yu tuha ñàhá-yu xii-gá. Te mee Yá Ndiõxí sa nàha-gá nàcuáa quide-ndí ndécú-ndí, te sàni iní-ndí sá nchòhó cutnùnì iní-ndó nàcuáa quide-ndí ndécú-ndí.

12 Te sá dúhá càháⁿ-ndí te vá cánì iní-ndó sã nchúhú càháⁿ váha-ndí cuendá-ndí nàcuáa nchòhó cuu váha iní ñàhá-gã-ndó xii-ndí te ñàhá, chì duha càháⁿ-ndí cuendá sá nchòhó níhí-ndó tnúhu cáháⁿ váha-gã-ndó cuendá-ndí núú ñãyiú. Te ducaⁿ níhí-ndó tnúhu cúñaha-ndo xii cue ñãyiú quide nínu mee-xi, chì cue ñãyiú-áⁿ ñã túú quide cuendá-yu nása ndècu iní-yu.

13 Te núú nchòhó sání iní-ndó sã lùcú-ndí cuendá nàcuáa quide-ndí ndécú-ndí te cùu-xi cuendá Yá Ndiõxí, àdi núú sàni iní-ndó sã ñã túú lùcú-ndí cuendá nàcuáa quide-ndí ndécú-ndí te cùu-xi sá vãha sá cúú-xi-ndó.

14 Te quide-ndí nàcuáa cuiní Xítohó Jesucristú chì cutnùnì iní-ndí sá ìo cùu iní-gá nchaa ñãyiú, te ducaⁿ xinì ndáá-ndí sá ní xíhí-gã cuendá ncháa-yu, te xíãⁿ núu cada iní-ó sá dàtná tnúhu sá ncháá ñãyiú ní xíhí-yu ndìhi-gá.

15 Te ducaⁿ ní xíhí Xítohó Jesucristú cuendá nchaa ñãyiú chì cuiní-gá sá ncháa-yu cundecú-yu cada-yu nàcuáa cuiní méé-gã te vá cádá-yu nàcuáa cuiní méé-yu, chì mee-gã ní xíhí-gá te ní ndoto-gã cuendá cuu-xi sá vãha sá cúú-xi-yu.

16 Te xíãⁿ núu nchúhú ñã túú-gã ná sání iní-ndí cuendá tnàha ñãyiú-ndí núu nàndìhi-yu àdi ñã túú nàndìhi-yu dàtná ní xóo canì iní-ndí cùtnàhá ní xíndecu-ndí ichi cuehé ichi duha, te dàvá-áⁿ ní xóo canì iní-ndí cuendá Xítohó Jesucristú dàtná sání iní cue ñãyiú ndècu ichi cuehé ichi duha vitna.

17 Te nchaa nchoo ñãyiú ní tnàhá tnúhu ndìhi Xítohó Jesucristú ní nduu-o dàtná ìⁿ ñãyiú saa, te ducaⁿ chì ñã túú-gã quidé-ó dàtná ní xóo cada-o cùtnàhá ní xíndecu-o ichi cuehé ichi duha, chì ní ngúita-o quide-o mee-ná sá vãha te nchaa xíãⁿ cúú-xi sá sáá sá cúú-xi-ó chì vátá quiní-gã-ó càda-o.

18 Te ducaⁿ quide-o ndecu-o chì mee Yá Ndiõxí quidé-gã sá dúcáⁿ càda-o cundecu-o. Te Xítohó Jesucristú ní quide-gã ní ngúndecu váha-o ndìhi Yá Ndiõxí vitna, te ducaⁿ chì mee Yá Ndiõxí ducaⁿ tnàhí ní cachí-gã cunduu, te ðiu-ni mee Yá Ndiõxí ní taxi-gã chiuⁿ quide-ndí càháⁿ-ndí tnúhu-gã nàcuáa ngúndecu váha cue ñãyiú ndìhi-gã.

19 Te ducaⁿ chì mee-gã ní cachí-gã sá Xítohó Jesucristú cada-gã nàcuáa nucúndecu váha nchaa nchoo cue ñãyiú ndècu ñuyiú-a ndìhi Yá Ndiõxí. Te nchaa ñãyiú ní tuha ñaha xii-gã ñã túú-gã sání iní-gã sá ñãyiú-áⁿ nacháhu-yu cuechi-yu núú-gã. Te mee Yá Ndiõxí ní taxi-gã chiuⁿ quide-ndí càháⁿ-ndí tnúhu-gã núú ñãyiú nàcuáa ngúndecu ndìhi ñaha váha-yu xii-gã.

20 Te Xítohó Jesucristú ní cachí-gã sá nchúhú càháⁿ-ndí tnúhu-gã núú ncháa ñãyiú, te sá dúhá quide-ndí càháⁿ-ndí tnúhu-gã te quide-ndí núú Yá Ndiõxí càháⁿ-ndí yuhu-gã, te xíãⁿ núu càháⁿ ndàhú-ndí núú-ndó sã tnàhá tnúhu-ndo

ndìhi Yá Ndiòxí cuendá cundecu váha-ndo ndìhi-gá, te duha càháⁿ-ndí chi ducaⁿ càchí Xítóhó Jesucristú cada-ndí.

²¹ Te Xítóhó Jesucristú cúu-gá Yaá ñá túú tnàhí cuéchi-xi, dico Yá Ndiòxí ní quide ñaha-gá xii-gá dàtná ìⁿ ñáyiu ndècu cuéchi-xi, te ducaⁿ chi Xítóhó Jesucristú ní xido-gá cuéchi nchaa nchoo ñáyiu ñuyú-a, te ducaⁿ ní xido Xítóhó Jesucristú nchaa cuéchi-o cuendá sá nũu na tnàhá tnúhu-o ndìhi-gá te cudũu-o núú Yá Ndiòxí, te ducaⁿ ní cuu chi mee Yá Ndiòxí ducaⁿ ní cachí-gá cunduu.

6

¹ Te nchoo ìⁿ-ni cùu-o quide chiuⁿ-o cuendá Yá Ndiòxí nũu xíáⁿ càháⁿ ndàhú-ndí núú-ndó sá vã dicó-ni ducaⁿ cùndedóho-ndo tnúhu Yá Ndiòxí, chi cada-ndo nãcuáa na chindee ñaha-ni-gá.

² Chi mee-gá càchí-gá ìⁿ xichi núú tùtú-gá núú càchí-xi: Sáa nduu te cundahú iní ñàhá-í xii-ndo chindee ñaha-í cuendá naníhí tãhú-ndó, te ní sáa nduu tàù-xi sá cùndahú iní ñàhá-í xii-ndo chindee ñaha-í cuendá naníhí tãhú-ndó, núu xíáⁿ ní xíndedóho-í tnúhu ní càháⁿ-ndó te ní chindee ñaha-í xii-ndo nãcuáa naníhí tãhú-ndó.

Duha càchí-gá núú tùtú-gá. Te vitna cùu-xi nduu cundahú iní ñàhá Yá Ndiòxí chindèe ñaha-gá, te cùu-xi nduu naníhí tãhú-ó.

³ Te nchúhú ñá túú quide-ndí ìⁿ sá ñà túú tàù-ndí cada-ndí sá cúu-xi ñáyiu, chi cuíní-ndí sá vã càháⁿ cuèhé-yu cuendá chiⁿ quide-ndí.

⁴ Te nchaa sá quidé-ndí cúu-xi nãcuáa cutnùnì iní cue ñáyiu sá nchúhú xínú cuèchi-ndí núú Yá Ndiòxí, te ío quide cahnu iní-ndí cuendá nchaa sá ndóhó-ndí, chi nándi quide ñaha ñáyiu xii-ndí, te ducaⁿ-ni ta quide cahnu iní-ndí cuèi nándi-gá nchaa sá tá yãha-ndí véxi.

⁵ Te duha ta yãha-ndí véxi, núú cãniha ñáyiu xii-ndí, núú chíhí ñàhá-yu vecaá, núú cuáa ndeé ñàhá ñáyiu xii-ndí xicuehé ñàhá-yu, te ío ndòho-ndí quidé-ndí chiⁿ Yá Ndiòxí, te áma xidí-ndí te áma ñá túú xidí-ndí, te áma ñihí-ndí sá xéxi-ndí te áma ñá túú ñihí-ndí.

⁶ Te quide ndáá-ndí ndécú-ndí, te cùtnuní váha iní-ndí nãcuáa càháⁿ tnúhu Yá Ndiòxí, te quide cahnu iní-ndí cuèi nándi quide ñaha ñáyiu xii-ndí, te cùndahú iní-ndí tnàha ñáyiu-ndí, te quide-ndí nchaa sá vãha nãcuáa chindee ñaha Espiritú Yá Ndiòxí xii-ndí, te ío ndisa iní-ndí cúu iní-ndí cue tnàha ñáyiu-ndí.

⁷ Te dãnehé-ndí ñáyiu mee-ni tnúhu ndáá, te nchaa chiⁿ quide-ndí te quide-ndí nãcuáa chindee ñaha Yá Ndiòxí xii-ndí, te cuendá sá quidé ndáá-ndí ndécú-ndí núu xíáⁿ ñihí ndeé-ndí dáquèe tíhú-ndí nchaa sá cuèhé sá dúhá.

⁸ Te dava ñáyiu quide nínu ñàhá-yu xii-ndí, te davá-yu tnúhu cuèhé tnúhu duha càháⁿ-yu xãháⁿ-yu xii-ndí, te davá-yu xicáháⁿ váha-yu cuendá-ndí te davá-yu xicáháⁿ cuèhé-yu, te davá-yu càchí-yu sá dándahú-ndí ñáyiu dico ñá ndáá chi càháⁿ ndáá-ndí.

⁹ Te davá-yu càchí-yu sá ñà túú xíní-yu ná ñáyiu cùu-ndí, te davá-yu càchí-yu sá xíní-yu yoo cùu-ndí, te davá-yu cuíní-yu cahni ñàhá-yu xii-ndí dico vátá cãnní ñaha-gá-yu chi ndècu-ni-ndí. Te ío ndòho-ndí ndécú-ndí ichi Yá Ndiòxí, te cuèi ndòho-ndí dico ñá túú cùu-xi sá cúu-ndí.

10 Te cuëi ndihú iní-ndí dico ñá túú dàña ndeé-ndí sá cúdí iní-ndí, te cùu-ndí cue téé ndàhú dico sànu ichi-ndí vài ñáyiu ichi Yá Ndiòxi cuèndá ngúndecu vâha-yu sá cuèndá-gá, te cuëi ñá túú nã ndécú ndihí-ndí dico ñá túú nã cúmãní xii-ndí.

11 Te nchòhó ñáyiu ndècu ndihí-í ichi Xítohó Jesucristú ndécú ñùú Còrintú ío cùu iní ñáhá-ndí xii-ndo, te ni yùhu ni iní-ndí càháⁿ-ndí nchaa tnúhu càháⁿ-ndí sá cúú-xí-ndó.

12 Te nchúhú chi ni yùhu ni iní-ndí cúú iní ñáhá-ndí xii-ndo, dico nchòhó chi ñá túú dùcaⁿ quide-ndo sá cúú-xí-ndí.

13 Te yúhú càháⁿ ndàhú-í núú-ndó dàtná quidé ìⁿ téé cùu tátá òrè càháⁿ ndihí-dé cue déhe-dé sá ni yuhu ni iní-ndó cùu iní ñáhá-ndó xii-ndí dàtná quidé mèe-ndí cúú iní ñáhá-ndí xii-ndo.

Nchoo cùu-o datná ìⁿ vehe Yá Ndiòxi

14 Te cue ñáyiu ñá túú sàndáá iní tnúhu Xítohó Jesucristú, te vá cúú ìⁿnuu-ndo ndihí-yu cada-ndo dàtná xíquidè-yu, chi dèⁿ cuu nchaa sá vâha te dèⁿ cuu nchaa sá cuèhé sá dúhá, te ñúmí nchícanhii ndihí niú chi ñá túú ìⁿ-ni cuu-xí. Te ducaⁿ sãtnahá-xí cùu nchaa sá vâha ndihí nchaa sá cuèhé sá dúhá chi ñá túú ìⁿ-ni cuu-xí.

15 Te ñiú-ni ducaⁿ ñá túú ìⁿ-ni cuu Xítohó Jesucristú ndihí sácúíhná, te ñiú-ni ducaⁿ ñá túú ìⁿ-ni cuu ñáyiu sàndáá iní ñáhá xii Xítohó Jesucristú ndihí ñáyiu ñá túú sàndáá iní ñáhá xii-gá.

16 Te ñiú-ni ducaⁿ sãtnahá tucu-xi cùu vehe Yá Ndiòxi ndihí nchaa sá càchí ñáyiu cùu ndiòxi ní cadúha cue téé ñuyíú-a, chi vá cúú quíhi ni ìⁿ xíáⁿ xití vehe-gá. Te nchoo cùu-o datná vehe Yá Ndiòxi Yáá ndécú tũu andũu, chi mee-gã càchí-gá núú tütú-gá núú càchí-xi:

Yúhú vá cúmãní cundecu-í ndihí-yu ndèni ní cuu na cùndecú-yu,
te ñiú-ni yúhú cuu-í Ndiòxi-yu,
te mèe-yu cuú-yu ñáyiu cùu cuèndá-í.
Duha càchí-gá núú tütú-gá.

17 Te xíáⁿ nũu càchí tucu-gá ingá xichi núú tütú-gá núú càchí-xi:
Chí tá quèe tnuú nchaa ñáyiu ñá túú sàndáá iní ñáhá xii-í,
te vá cãní iní-ndó càda-ndo ni ìⁿ sá cuèhé sá dúhá,
te ducaⁿ te queheⁿ cuèndá ñáhá-í xii-ndo,

18 te yúhú cuu-í Tãtã-ndó,
te nchòhó cuu-ndo cuè déhe ducuⁿ-í, ndihí cue déhe yoco-í,
duha càháⁿ yúhú Yáá ío càhnu cuu.
Duha càchí-gá núú tütú-gá.

7

1 Te sá dúcãⁿ ío vâha càháⁿ Yá Ndiòxi sá cúú-xí-ó nũu xíáⁿ càháⁿ-í dóho nchòhó ñáyiu ío cùu iní-í sá dùuⁿ duuⁿ dañá-o nchaa sá cuèhé sá dúhá, chi nchaa xíáⁿ ñá túú cùu-xi sá vâha sá cúú-xí ímí-ó ndihí yiqui cuñú-ó, te cada-o nãcuáa tàú-xi cunduu nãcuáa cundáá-ó núú Yá Ndiòxi, te cada-o sã néhé-ó sã yíñùhu núú-gã.

Cue ñáyiu ñuú Còrintú quidé vâha-yu

2 Te ni yùhu ni iní-ndó chì cúú iní ñáhá xii-ndí, chi nchúhú vá yõo ìⁿ quide úhú iní-ndí, te ni vá yõo ìⁿ dàcuíta nihnu-ndí, te ni vá yõo ìⁿ dàndahú-ndí.

3 Te sá dúhá càháⁿ-í te vá cání ìní-ndó sã ìíⁿ cuéchi dàcaa-í díquí-ndó, chi dàtná sa ní cachí-í xii-ndo sã yùhú ío cùu ìní ñàhá-í xii-ndo, te cuèi vitna ndècu-gá-ó ñùyíú-a à ãdi cuèi na cùú-ó dico ãiu-ni ãucaⁿ cùu ìní ñàhá-í xii-ndo.

4 Te yùhú ío váha sàni ìní-í cuèndá-ndó, te ãucaⁿ ío váha càháⁿ-í cuèndá-ndó, te ío ndècu ndìhi-í tñùhu ndee ìní cuèndá-ndó, te ío cudíí ìní-í sá cuèndá-ndó cuèi nándi ndòho-í ndìhi dava-gá-güedé ndécú-ndí.

5 Te nchúhú cútñàhá ní sáháⁿ-ndí distrítu Macèdoniá, te ñá túú tñàhí ní ndètátú-ndí cuèndá nchaa sá ñí yáhandi chi ío ní ndoho-ndí cuèndá nchaa sá ní quidé-yu, chi ío ní cuándeé ñàhá-yu xii-ndí, te ío ní sani ìní-ndí ñùu nása-gá yáha-ndí ní cùu.

6 Dico Yá Ndióxi ní taxi-gá tñùhu ndee ìní xii-ndí òré ní quexìo té Títú núú ndécú-ndí, te ãiu-ni Yaá-án cùú-gã Yaá sãñaha-gã tñùhu ndee ìní xii cue ñáyiu ndìhú ìní-xi.

7 Te ãucaⁿ ñí taxi Yá Ndióxi tñùhu ndee ìní xii-ndí cuèndá sá ñí quexìo té Títú núú ndécú-ndí, te ñá díú-ní sã cuèndá ní quexìo-dé chi ní níhi tucu-ndí tñùhu ndee ìní cuèndá ní caní-dé cuèndú núú-ndí sá nchòhó ní sãñaha-ndo tñùhu ndee ìní xii-dé, te ní cachí tñùhu-dé xii-ndí sá nchòhó ío cuìní-ndó càháⁿ ndìhi ñaha-ndo xii-ndí, te ní cachí tñùhu tucu-dé xii-ndí sá nchòhó ío ndìhú ìní-ndó cuèndá nàcuáa cùu ndecu-ndo ni cuu, ndìhi cuèndá sã ío sàni ìní-ndó cuèndá-í, te sá dúcáⁿ ndùu cuèndú ní caní-dé núú-ndí ñùu xíãⁿ ío ní cudíí ìní-í.

8 Te nchòhó ní ndìhú ìní-ndó cuèndá tñùhu càháⁿ-í núú tütú sá ñí dáquixì-í ndaha-ndo, te òré ní níhi-í tñùhu sá ndìhú ìní-ndó te tnaa-ni ní ndixi cuéchi ìní-í sá dúcáⁿ ñí quidé-í te dàtnùní ñá túú-gã ní ndixi cuéchi ìní-í.

9 Te vitna ní ndìhú ìní-ndó, te xíãⁿ ní quidé-xi ní ndixi cuéchi ìní-ndó sã ñà túú quide váha-ndo ndècu-ndo ni cuu, te ní cudíí ìní-í dico ñá díú cuèndá sá ñí ndìhú ìní-ndó ñí cudíí ìní-í chi cuèndá sá ñí ndixi cuéchi ìní-ndó, te ní ndìhú ìní-ndó nàcuáa ní cuu váha ìní Yá Ndióxi, te xíãⁿ ñùu ní cuu-xi ìíⁿ sá váha sá cùú-xí-ndó cuèndá tñùhu ní càháⁿ-í te ñá túú ní cùu-xi ìíⁿ sá cuèhé sá cùú-xí-ndó.

10 Te nchoo ñùu na ndìhú ìní-ó nàcuáa cuu váha ìní Yá Ndióxi, te ndixi cuéchi ìní-ó te núu ñá túú quide váha-o ndècu-o, te sá dúcáⁿ quide-o te nãñhí tàhú-ó, te vá ndìhú ìní-ó sã dúcáⁿ ñí quide-o, te dava ñáyiu xíndecu ichi cuèhé ichi duha ndìhú ìní-yu dico ñá túú ndixi cuéchi ìní-yu cuèndá nchaa sã ñà túú váha quidé-yu, te sá dúcáⁿ quidé-yu te cuíta nihnú-yu.

11 Te sá dúcáⁿ ñí ndìhú ìní-ndó nàcuáa ní cuu váha ìní Yá Ndióxi, te xíãⁿ ñùu ndùcu ndee-ndo quide-ndo nchaa nacuáa tàú-xi cunduu, te vitna ñí yùhu ñí ìní-ndó càháⁿ-ndó sã quidé váha-ndo, te ío cùdèéⁿ-ndó ñùú méé-ndó sã ñà túú quide váha-ndo ndècu-ndo ni cuu, te yùhú-ndó ndècu-ndo cuèndá sã ñà túú quide váha-ndo ni cùu, te ío ní xùhuⁿ ìní ñàhá-ndó xii-í, te ní ndúcú ndéé-ndó ñí quide ndáá-ndó cuèndá téé ndècuéchi ndècu ndìhi-ndo, te sá dúcáⁿ ñí quide-ndo te xíãⁿ ní cutnùní sá méé-ndó ñà túú cuéchi-ndo.

12 Te ní cadúha-í tutú ní dáquixì-í ndaha-ndo, te ní quide-ndo nàcuáa ní càháⁿ-í, te sá dúcáⁿ ñí quide-ndo xíãⁿ ní cutnùní ìní-ndó sã ío cùu ìní ñàhá-ndó xii-í. Te Yá Ndióxi náhá-gã sá díú cuèndá xíãⁿ ní dáquixì-í tutú ndaha-ndo, te ñá díú-ní cuèndá sá sání ìní-í cuèndá téé ndècuéchi ndècu ndìhi-ndo, te ní ñà díú-ní cuèndá ñáyiu ní dándìhú téé ndècuéchi-án ìní-xi ní càdúha-í tutú ní dáquixì-í ndaha-ndo.

13 Te cuendá sá quidé vâha-ndo ndècu-ndo xiãⁿ cúu-xí tñuhu ndee ìní ndécú ndìhi-ndí.

Dico ñá díú-ní xiãⁿ chi tñhá ío cùdíí ìní-ndí cuendá sá ío cùdíí ìní té Titú, te ducaⁿ cùdíí ìní-dé chi nchòhó ní sãñaha-ndo tñuhu ndee ìní xii-dé.

14 Te yúhú ñá túú cùcahaⁿ núú-í sá ñí cáháⁿ vâha-í cuendá-ndó núú tẽ Titú cùtnhá vátá quixí-gã-dé núú ndécú-ndó, chi ní cutnùnì ìní-dé sá ndáá cáháⁿ vâha-í nàcuáa quide-ndo datná cúu-xí sá ndáá nchaa tñuhu dàcuaha ñaha-í xii-ndo.

15 Te vitna ío-gá vâha cùu ìní té Titú cuendá-ndó, chi ndàcu ìní-dé sá ncháá-ndó ío vâha ní tñii-ndo ncháa tñuhu ní cáháⁿ-dé núú-ndó, te ndàcu tucu ìní-dé sá ñí queheⁿ cuendá vâha-ndo-dẽ, te ní dátũu-ndo núú-dẽ sá ío ní quiyuhú ìní-ndó sã vã ndácú-ndó càda-ndo nchaa nacuáa tàù-xi cunduu.

16 Te ío cùdíí ìní-í cuendá-ndó chi cùtnunì ndáá ìní-í sá ñá túú dàña ndeé-ndó quide-ndo nchaa nacuáa tàù-xi cunduu.

8

Ío vâha cuu ìní-ó chindee tñaha-o

1 Te nchòhó ñáyiu ndècu ndìhi-ndí ichi Xítóhó Jesucristú càchí tñuhu-ndí xii-ndo nàcuáa quide ñaha Yã Ndióxí xii cue ñáyiu xĩndecu ichi-gá ndécú òstrítú Macèdoniá, chi ío chindee ñaha-gá xií-yu cuendá sá quidé vâha-yu ndécú-yu.

2 Te cuèi ndòho vihi-yu ndécú-yu dico ío-ní cùdíí ìní-yu, te cuendá xiãⁿ núu ní yùhu ní ìní-yu ní sacáⁿ tñáhã-yu díhúⁿ sã cúu-xí tñaha ñáyíu-yu, te ñá túú tñáhí ní xĩnduu díi-yu cuèi ío ndáhú-yu.

3 Te ñá díú-ní nàcuáa ní sani ìní-yu ndacú-yu cacáⁿ tñáhã-yu, chi ní quide yica ìní-yu ní sacáⁿ tñáhã-gã-yu, te yúhú càchí tñuhu ndáá-í xii-ndo sã ñí yuhu ní ìní-yu ducaⁿ ñí quidé-yu.

4 Te ío ní cáháⁿ ndáhú-yu núú-ndí cuendá sá cuãha-ndí tñuhu sá tñáhã-yu chindèe-yu dava-gá cue ñáyiu cùu cuendá Yã Ndióxí.

5 Te ñá díú-ní nàcuáa ní sani ìní-ndí ní quidé-yu, chi ní xídó-gã-yu ní quide vâha-yu, te ducaⁿ chi mèe-yu ní sani ìní-yu sá cadã-yu nchaa nàcuáa cuiní Yã Ndióxí, te dátñunì ducaⁿ te ní cachí-yu sá cúu cadã-yu nchaa nàcuáa na cũñaha-ndí xií-yu. Te ducaⁿ ñí quidé-yu chi ducaⁿ ñí cuiní mèe Yã Ndióxí cunduu.

6 Te sá dúcáⁿ ñí quide ñáyiu-áⁿ núu xiãⁿ càháⁿ ndáhú-ndí núú tẽ Titú sá quixí tucu-dé núú ndécú-ndó cuendá dàxínu cava-dé chiúⁿ sá sã ní ngúita-dé quidé-dẽ dátacá-dé díhúⁿ sã sã ní ngúita-ndo sàcáⁿ tñáhã-ndó, te ducaⁿ quide-ndo chi cùndahú ìní-ndó tñaha ñáyiu-ndo.

7 Te nchòhó cúu-ndó ñáyiu ío ngòdónú quide nchaa sã vâha, te ío vâha sãndáá ìní-ndó Xítóhó Jesucristú, te ío vâha cùtnunì ìní-ndó nàcuáa cáháⁿ tñuhu-gá, te ío vâha dàcuaha-ndo ñáyiu tñuhu-gá, te ío ndùcu ndee-ndo quide-ndo mee-ni sã vâha, te ducaⁿ ío cùu ìní ñáhã-ndó xii-ndí, te sá dúcáⁿ quide-ndo núu xiãⁿ cáháⁿ ndáhú-í núú-ndó sã ngòdó núú-gã-ndó càda-ndo sã cúu-xí tñaha ñáyiu-ndo.

8 Dico yúhú ñá túú tàuchiuⁿ-í sã dúcáⁿ càda-ndo, chi cuendá-ni sã càchí tñuhu-í xii-ndo nàcuáa quide dava-gá cue ñáyiu ndècu ichi Xítóhó Jesucristú, chi cue ñáyiu-áⁿ ní yùhu ní ìní-yu quidé-yu sã vâha sã cúu-xí tñaha ñáyíu-yu, te càchí tñuhu-í xii-ndo nàcuáa quidé-yu cuendá cutnùnì núu nása cada-ndo núu ndisa sã cúu ìní-ndó cuè tñaha ñáyiu-ndo.

9 Te nchòhò sa xìnì-ndó sã Xítòhó Jesucristú ío cùndahú iní ñáhá-gã xii-o, te ío váha ndècu-gá ní cùu te ní quixi-gá ñuyíú-a ní quide váha ñaha-gã xii-o, te ñuyíú-a ñá túú ní xĩndecu váha-gã, te ducaⁿ ní quixi-gá ñuyíú-a cuèi ñá túú ní xĩndecu váha-gã cuendá sã nchóó ngũndecu váha-o núú ndécú-gã.

10 Te na càchí tnúhu-í xii-ndo nàcuáa sàni iní-í. Chìuⁿ sá nì yuhu ni iní-ndó nĩ ngũíta-ndo quide-ndo cuíá nì yáha chí cùu-xi sã váha sá cúú-xí-ndó núu na dàxínu cava-ndo.

11 Te dàtná-nì ni yùhu ni iní-ndó nĩ tausaha-ndo chìuⁿ-án te ducaⁿ-ni nì yuhu ni iní-ndó dàxínu cava-ndo, te cacáⁿ tnáhá-ndó sã ndécú ndìhi-ndo nacuáa xító mee-ndo ndacu-ndo.

12 Te núu nchòhó nì yùhu ni iní-ndó càcáⁿ tnáhá-ndó sã xító mèe-ndo ndacu-ndo ña, te cùu váha iní Yã Ndiòxí, chí mee-gã sa ñaha-gã nása ndècu-o te nduu vétú-ni iní-gã.

13 Te sá dúhá nduu tnúhu càháⁿ-í te vá cání iní-ndó sã yùhú cuíní-í sã nchòhó ndoho-ndo cùndecu-ndo te dava-gá-yu ngũndecu váha-yu sá cuendá-ndó.

14 Te vitna ndècu ndee iní-ndó nàcuáa ndacu-ndo chĩndee-ndo cue ñáyíu xìnì ñuhu, te nduu ñá túú ndècu ndee iní-ndó te cue ñáyíu-án chĩndee ñáhá-yu xii-ndo te núu ndècu ndee iní-yu, te ducaⁿ te nì nchòhó ñá túú nã cumání xii-ndo te nì cuè ñáyíu-ã ñá túú nã cumání xií-yu.

15 Te ducaⁿ te quee ndáá-xi nàcuáa càháⁿ-xi núú tütú Yã Ndiòxí núú càchí-xi: “Cue ñáyíu ío vãi sá nì nĩhí ñá túú ní cùu sobrá xií-yu, te cue ñáyíu sacú ní nĩhí ñá túú ní cumání xií-yu”, duha càchí-xi núú tütú-gã.

Té Titú ndìhi cue té cùndìhi-dé

16 Te ndácáⁿ tãhú-í núú Yã Ndiòxí chí mee-gã ní quide sá tẽ Titú ío ñuhu iní ñáhá-dẽ xii-ndo dàtná ñúhú ìní ñáhá-í xii-ndo.

17 Te yúhú ní xáhaⁿ-í xii-dé sá quíxí còto ñaha-dé xii-ndo te ní sáha-dé tnúhu, te ñá díú mèe-ni sá dúcáⁿ nĩ xáhaⁿ-í xii-dé quixi coto ñaha-dé xii-ndo, chí mee-dé cùdí ñahí iní-dé quixi coto ñaha-dé xii-ndo.

18 Te tendaha-ndĩ ìⁿ tée ndècu ndìhi-o ichi Xítòhó Jesucristú quixi-dé ndìhi té Titú, te tée quixi ndìhi té Titú-án cúú-dẽ ìⁿ tée ío váha càháⁿ cue ñáyíu xĩndecu ichi Xítòhó Jesucristú cuendá-dé cuendá sá ío váha quide-dé chìuⁿ Xítòhó Jesucristú càháⁿ-dé tnúhu-gá tnúhu sá càháⁿ nàcuáa naníhí tãhú-ó.

19 Te cue ñáyíu xĩndecu ichi Xítòhó Jesucristú ñá díú-ní sã càháⁿ váha-yu cuendá-dé, chí tnáhá ní cãxi ñáhá-yu xii-dé cuendá sá cacá cùu ndìhi ñaha-dé xii-ndĩ chĩndee ñaha-dé tacá sá cúú-xí ñáyíu ndàhú, te quide-ndí chìuⁿ-a cuendá ío cuu càhnu Yã Ndiòxí, te cue ñáyíu cutnùní iní-yu sã nchòhó nì yùhu ni iní-ndó quide-ndo nchaá sã váha sá cúú-xí cuè tnaha ñáyíu-ndo.

20 Te cuíní-ndí sá vã càháⁿ cuèhé ñáyíu cuendá nàcuáa quide-ndí ndìhi sá ngãutnãha sá cúú-xí cuè tnaha ñáyíu-o, te ío vãi cuu-xi.

21 Chi ndùcu ndee-ndí quidé-ndí nàcuáa càháⁿ váha Xítòhó Jesucristú cuendá-ndí, te quide tucu-ndí nàcuáa càháⁿ váha ñáyíu sá quidé vãha-ndí.

22 Te tendaha tucu-ndí ìngá tucu tée ndècu ndìhi-o ichi Xítòhó Jesucristú quixi-dé ndìhi cue tée úú quixi coto ñaha xii-ndo, te tée quixi ndìhi-güedé-án nĩ cuu vãi xito quide-dé nàcuáa cutnùní iní-ndí sá ío ndùcu ndee-dé quidé-dẽ sá váha, te vitna ío-gá cuíní-dé cada-dé sá váha vitna quixi-dé núú ndécú-ndó, chí cutnùní ndáá iní-dé sá cúú-ndó cuè ñáyíu quide váha.

²³ Te cächí tnúhu-í xii-ndo sã të Tìtù cúú-dě ìªn téé cùndìhi-í quidé-ndĩ chùuªn Xítóhó Jesucristú, te tnàhá-dé cúú-dě ìªn téé xìnu cuechi núú-ndó càháªn-dé tnúhu-gá. Te cächí tnúhu tucu-í xii-ndo cuendá cue téé úú quixi ndìhi-dé, chi cue téé-án cúú-güedě cue téé tendaha cuè ñáyiú xĩndecu ichi Xítóhó Jesucristú quixi coto ñaha xii-ndo. Te cue téé-án quidé-güedě nàcuáa cachí ñáyiú sã ìo càhuu cuu Xítóhó Jesucristú.

²⁴ Te chí cáda sã cúú ìní ndisa-ndo-güedě cuendá ducaªn na cùtnuní ìní nchaa dava-gá ñáyiú xĩndecu ichi Xítóhó Jesucristú sã ndáá ndisa ducaªn quide-ndo, te ducaªn cùtnuní ìní-yu sã ndáá ndisa quide váha-ndo dàtná càháªn-ndí cuendá-ndó sã quidé váha-ndo.

9

Cuendá sã ngäutnàha sã cúú-xí cuè ñáyiú xĩndecu ichi Xítóhó Jesucristú

¹ Te cuendá sã ngäutnàha sã cúú-xí cuè ñáyiú ndècu ichi Xítóhó Jesucristú ñã túú-gã xíní ñùhu-xi cachí tnúhu-í xii-ndo núú tütú-a nàcuáa cada-ndo,

² chi sa cùtnuní ìní-í sã ìo cuìní-ndó chĩndee-ndó-yu. Te ducaªn-ni ìo váha càháªn-í cuendá-ndó núú ñáyiú xĩndecu ichi Xítóhó Jesucristú ndécú distritú Macèdoniá, te xãhaªn-ĩ xii-yu sã nchòhó ñáyiú xĩndecu ichi Xítóhó Jesucristú ndécú distritú Acáyã sa ní cuu ìªn cúú ducaªn cuìní-ndó càcáªn tnàhá-ndó sã cúú-xí cuè ñáyiú ndàhú ndécú ichi-gá. Te vai cue ñáyiú distritú Macèdoniá cuìní-yu cacáªn tnàhá-yu sã cúú-xí cuè ñáyiú ndàhú ndécú ichi Xítóhó Jesucristú cuendá sã ñi ñihí-yu tnúhu sã nchòhó ìo cuìní-ndó dùcaªn cada-ndo.

³ Te cuendá sã sání ìní-ndó càda-ndo xĩãªn tendaha-ĩ cue téé ndècu ndìhi-o ichi Xítóhó Jesucristú quixi-güedě núú ndécú-ndó cuendá dàtúha ñaha-güedě xii-ndo, cuendá sã vã quée ndèhnde-í núú ñáyiú sã ñi càháªn-í váha-í cuendá-ndó, te ducaªn cùndecu túha ndisa-ndo dàtná sa ní càháªn-í núú-yu.

⁴ Chi na cuáháªn ndèé quixi-í ndìhi ìªn úú cue ñáyiú distritú Macèdoniá núú ndécú-ndó te quini-yu sã ñã túú ndècu túha-ndo, te cucahaªn núú-í núú-yu sã ñi càháªn-í váha-í cuendá-ndó te núú ñã túú ndècu túha-ndo, te tnàhá-ndó cùcahaªn núú-ndó.

⁵ Te xĩãªn núú ní sani ìní-í sã váha-gá codonùu cue téé ndècu ndìhi-o ichi Xítóhó Jesucristú quixi coto ñaha-güedě xii-ndo cuendá chĩndee ñaha-güedě tacá sã ñi sani ìní-ndó càcáªn tnàhá-ndó cuendá sã cùndècu túha-xi, te cuu-xi dàtná ìªn táhú sã ñi quene cuu ìní mée-ndó càcáªn tnàhá-ndó sã cúú-xí cuè tnahã ñáyiú-ndo. Te ducaªn te vã yõo cani ìní-xi quesáhã-yu sã nchùhú ní quide yica-ndĩ ducaªn ñi sacáªn tnàhá-ndó.

⁶ Te nchòhó sa xíní-ndó sã ñáyiú na chìhi vai tatá te vai ñihí-yu cùu, te cue ñáyiú na chìhi sacú tatá te sacú ñihí-yu cùu. Ducaªn sãtnahã-xi cùu ñáyiú sacáªn tnàhá sã cúú-xí tnàha ñáyiú-yu.

⁷ Te ìªn ìªn-ndo càcáªn tnàhá-ndó nàcuáa quène cuu ìní mée-ndó, te ìo váha cuu ìní-ndó dùcaªn cada-ndo te vã cáda-ndó cuendá-ni sã quidé yica ñaha ñáyiú xii-ndo, chi Yá Ndiõxí cúú váha ìní-gá núú nchãa ñáyiú cùdĩ ñi sacáªn tnàhá sã cúú-xí cuè tnahã ñáyiú-xi.

⁸ Te Yá Ndiõxí ndacu-gá chĩndee ñaha-gá xii-ndo nàcuáa cundecu váha-ndo, chi ðu-gá cada te ñihí-ndó nchãa núú sã xíní ñùhu-ndo cundecu ndìhi-ndo, te ñã túú tnàhí-gá ná cumání xii-ndo, te mee-gá chĩndee ñaha-gá xii-ndo ñihí-ndó ìo vai cundecu ndìhi-ndo cuendá ducaªn chĩndee-ndo cue tnahã ñáyiú-ndo.

⁹ Te núú tütú Yă Ndiöxí cächí-xi ñⁿ xichi:
 ñⁿ ñáyiú ío vâi sá ñí sáñhá-yu xii ñáyiú ndáhú,
 te sá ñí quide ñáyiú-áⁿ ñí cuu-xi sá vâha sá vâ yôo cùnaa.
 Duha cächí-xi núú tütú-gá.

¹⁰ Te mee Yă Ndiöxí táxí-gă nchaa sá cúú tàtá nchaa nchòhó ñáyiú xítu nándí sá xítu cuendá cuu sá cúú nchító-ndo, te diu-gá cada te ío vâi sá ñíhí-ndó cùndecu ndíhi-ndo, te ducaⁿ ío-gá vâi sá vâha cada-ndo sá cúú-xí cuè tñaha ñáyiú-ndo.

¹¹ Te Yă Ndiöxí taxi-gá vâi núú sá cùndecu ndíhi-ndo cuendá ducaⁿ ñí yuhu ñí iní-ndó vâi cuáñaha-ndo sá cúú-xí tñaha ñáyiú-ndo. Te cuendá nchaa sá sàcáⁿ tñáhá-ndó quèheⁿ cuendá-ndí cuu xii tñaha ñáyiú-ndo, te cue ñáyiú-áⁿ ío ndacáⁿ táhú-yu núú Yă Ndiöxí cuendá sá dúcáⁿ sàcáⁿ tñáhá-ndó sá cúú-xí-yu.

¹² Te sá dúcáⁿ quide-ndo sacáⁿ tñáhá-ndó sá cúú-xí cuè ñáyiú cùu cuendá Yă Ndiöxí, te ñáyiú-áⁿ ñà tütú-gă ná cumání xii-yu, te ío ndacáⁿ táhú-yu núú Yă Ndiöxí sá dúcáⁿ quide-ndo.

¹³ Te ñáyiú-áⁿ cutnùní iní-yu sá nchòhó quidé-ndó sá sàndáá ndisa iní-ndó tñuhu Xítohó Jesucrístú, te cuendá xiáⁿ te ñáyiú-áⁿ chiñùhú-yu Yă Ndiöxí, te cuendá sá dúcáⁿ ñí yuhu ñí iní-ndó sàcáⁿ tñáhá-ndó sá cúú-xí-yu ndíhi sá cúú-xí nchaa dava-gá ñáyiú, te cachí-yu sá ío càhnu cuu Yă Ndiöxí.

¹⁴ Te ñáyiú-áⁿ cǎháⁿ ndíhi-yu Yă Ndiöxí cuendá-ndó, te ío cuu vâha iní ñáhă-yu xii-ndo cuendá sá Yă Ndiöxí chíndèe ñaha-gá xii-ndo quide-ndo sá vâha sá cúú-xí-yu ndíhi dava-gá ñáyiú.

¹⁵ Te ío ndacáⁿ táhú-ó núú Yă Ndiöxí cuendá sá ñí taxi-gá sá ío vâha ndècu ndíhi-o, te ñí ñà cùtnùní iní-ó năsa cunduu tñuhu cǎháⁿ-ó cuendá sá vâha ñí taxi-gá.

10

Té Pǎblú ndécú ndíhi-dé tñuhu ndee iní sá cǎháⁿ-dé tñuhu Xítohó Jesucrístú

¹ Te Xítohó Jesucrístú ío càhnu iní-gá, te cùndahú iní ñáhá-gă xii-o chíndee ñaha-gá, núú xiáⁿ yúhú té Pǎblú ducaⁿ quide-í cǎháⁿ ndáhú-í núú-ndó nàcuáa cada-ndo. Te dava-ndo cächí-ndó sá yùhú ío ndáhú iní-í òré ndécú ndíhi ñaha-í xii-ndo, te òré ñà tütú ndècu ndíhi ñaha-í xii-ndo te ío ñí cǎà-í.

² Te cǎháⁿ ndáhú-í núú-ndó sá cǎdá-ndó nàcuáa vá cǎháⁿ ñí-í núú-ndó òré quixi-í quixi coto ñaha-í xii-ndo. Te cuíní-í sá ndíhi tñuhu ñí iní-xi cǎháⁿ ndíhi-í cue ñáyiú cächí sá ñⁿ-ni cuu-í ndíhi cue ñáyiú ñà tütú sàndáá iní tñuhu Xítohó Jesucrístú.

³ Te nchúhú cùu-ndí cue téé ñuyíú-a, dico ndùcu ndee-ndí quidé-ndí nàcuáa ndàcu-ndí dáquèe tíhú-ndí nchaa sá cuèhé sá dúhá, dico ñà díú mée-ndí ducaⁿ ndàcu-ndí quidé-ndí,

⁴ te ñí ñⁿ sá ío ñuyíú-a ñà tütú chíndee ñaha-xi, chi mee Yă Ndiöxí chíndèe ñaha-gá xii-ndí dáquèe tíhú duuⁿ-ndí nchaa núú sá cuèhé sá dúhá.

⁵ Te xiáⁿ núú ñíhí-ndí tñuhu cǎháⁿ-ndí sàdí-ndí yuhu cue ñáyiú cǎháⁿ tñuhu sá ñà tütú cùu vâha iní Yă Ndiöxí, ñáyiú xiquide nínu mee-xi cächí sá ñà tütú nàndíhi tñuhu-gá. Te quide-ndí sá ñáyiú-áⁿ quíndáá iní-yu tñuhu Xítohó Jesucrístú.

⁶ Te nchúhú sa ndècu túha-ndí sá dáquètíhú-ndí cue ñáyiú ñà tütú cuíní cada nàcuáa cuíní Xítohó Jesucrístú, dico díhna-gá xíní ñùhu-xi sá ncháá nchòhó ñáyiú cuíní cada nàcuáa cuíní-gá cundáá-ndó.

⁷ Te nchòhò nàcuáa ndùu sá ndéhé-ndó te ducaⁿ sàni iní-ndó, dico vá dúcáⁿ càni iní-ndó cuèndá-ndí. Chi núu cùtnuní ndáá iní-ndó sá cúú-ndó cuèndá Xítohó Jesucristú, te diu-ni ducaⁿ tau-ndó càni iní-ndó cuèndá-ndí tucu.

⁸ Te Xítohó Jesucristú ní taxi-gá tnúhu ndee iní ndécú ndìhi-ndí sá dánèhè ñáhá-ndí xii-ndo nàcuáa cuita cuehnu nihnu-ndo ìchi-gá quíhíⁿ, te ñá díú sá dánèhè ñáhá-ndí xii-ndo nàcuáa cuita nihnu-ndo, te cuèi na chido-gá-í cáháⁿ-í cada nínu-í mée-í cuèndá tnúhu ndee iní ní taxi Xítohó Jesucristú ndécú ndìhi-ndí, dico vá cúcàhⁿ núu-í chi cáháⁿ ndáá-í.

⁹ Te ñá túú cuíní-í sá nchòhò caní iní-ndó sá yúhú dáyuhú ñáhà-í xii-ndo nàcuáa ndùu tnúhu cáháⁿ-í núú tútú-í.

¹⁰ Te dava-ndo càchí-ndó sá ténáá ñáhà-í xii-ndo núú tútú-í, te mee-ni tnúhu càhnu sá ìo cùnnu cuu-xi, te càchí tucu-ndo sá òré ndécú ndìhi ñaha-í xii-ndo te ñá túú càa-í sá cúú-í ìⁿ tée cùu váha cùu dico iní-ndó, te càchí tucu-ndo sá ñá túú tnàhá iní-ndó nàcuáa quide-í òré dácùaha ñaha-í xii-ndo.

¹¹ Te nchòhò ñáyiu ducaⁿ cáháⁿ cada cuèndá váha-ndo sá dàtná-ni cáháⁿ-ndí núú tútú-ndí diu-ni ducaⁿ quide-ndí òré ndécú ndìhi ñaha-ndí xii-ndo.

¹² Te nchúhú, vá cúú tnàhí cáháⁿ-ndí sá ìⁿ-ni cuu-ndí ndìhi cue ñáyiu cáháⁿ váha cuèndá méé-xí, chi ñáyiu-áⁿ sání iní-yu ná cúú sá váha te quidé-yu te xíáⁿ càchí-yu sá ìo váha quidé-yu, te càchí-yu sá quidé váha-gá-yu dácúúxi tnàha ñáyíu-yu, te sá dúcáⁿ cáháⁿ-yu te quidé-yu dàtná quidé cue ñáyiu ñá túú tnàhí cùtnuní iní-xi.

¹³ Te dico nchúhú ñá túú xidó-ndí cáháⁿ váha-ndí cuèndá-ndí, chi cáháⁿ váha-ndí cuèndá-ndí dico nàcuáa ndùu chiuⁿ ní taxi Yá Ndiòxí cáháⁿ-ndí, chi mee-gá ní cachí-gá ndéé neni sáá-ndí cáháⁿ-ndí tnúhu-gá, te ní sáá-ndí ndéé ñúú-ndó cáháⁿ-ndí tnúhu-gá.

¹⁴ Te vjtna ndècu ndìhi-ndí tnúhu ndee iní sá tnàhá nchòhò cùu cáháⁿ ndìhi ñaha-ndí xii-ndo, chi díhna-gá nchúhú ní quixi-ndí ní cáháⁿ-ndí tnúhu Xítohó Jesucristú ñúú-ndó, tnúhu sá cáháⁿ nàcuáa naníhí tàhú-ó.

¹⁵ Te nchúhú ñá túú quide cahnu-ndí méé-ndí cuèndá chiuⁿ quide dava-gá-güedé quesaha-ndí sá chíúⁿ mée-ndí cúú-xí. Te cuíní-ndí sá nchòhò cuita quindáá-gá iní-ndó Xítohó Jesucristú, te ducaⁿ te níhí-gá-ndí nàcuáa cada-ndí chiuⁿ-gá nchaa dava-gá xichi núú ní cachí-gá cada-ndí chiuⁿ-gá.

¹⁶ Chi cáháⁿ-ndí tnúhu-gá tnúhu sá cáháⁿ nàcuáa naníhí tàhú-ó, te yáha-gá-ndí ñúú-ndó quíhíⁿ-ndí nchaa dava-gá xichi cáháⁿ-ndí, te vá cádá càhnu-ndí méé-ndí cuèndá chiuⁿ sá sà ní quide dava-gá-güedé.

¹⁷ Te cue ñáyiu cuíní cada càhnu mee-xi te vá dúcáⁿ càdá-yu, chi mee Xítohó Jesucristú ná cada cahnu-yu-gá.

¹⁸ Te nchaa ñáyiu na cáháⁿ váha Xítohó Jesucristú cuèndá-yu, ñáyiu-áⁿ cúdíu-yu núú-gá, te ñá túú cùdíu-yu núú-gá cuèndá sá cáháⁿ váha-yu cuèndá méé-yu.

11

Cuèndá té Páblú ndìhi cuèndá cue tée càchí sá cáháⁿ tnúhu Yá Ndiòxí te ñá ndáá

¹ Te cuíní-í sá nchòhò cada ndee iní-ndó cùndedóho-ndo tnúhu na cáháⁿ-í, chi cáháⁿ-í dàtná cáháⁿ cue ñáyiu ñá túú cùtnuní iní-xi, te cuèi nása-gá ná cùnduu tnúhu cáháⁿ-í dico chí cádá ndèe iní cùndedóho-ndo.

² Chi yúhú ío ñùhu iní ñáhà-í xii-ndo dàtná ñùhú iní ñáhá mèe Yá Ndiòxí xii-o, te ní cáháⁿ-í tnúhu Xítohó Jesucristú núú-ndó núu xíáⁿ ní tnahá tnúhu-ndo ndíhi-gá vitna, te sá dúcáⁿ ní quide-í te cada iní-ndó sá yúhú cùu-í dàtná ìⁿ tée xíca ndáhú te nchòhó cùu-ndó dàtná ìⁿ xíchí cuéchi, te Xítohó Jesucristú cùu-gá dàtná ìⁿ tée tnándaha ndíhi xíchí cuéchi-áⁿ. Te ducaⁿ càda iní-ndó chi na sáa nduu te yúhú na càni cuendá ñáhà-í xii-ndo núú Xítohó Jesucristú, te cuu-ndo ñáyiu vá cùndècu tnahí-gá cuéchi-xi.

³ Te yúhú-í sá sàcúihná dandàhú ñáhá-xí xii-ndo vá cání-gá iní-ndó càncicúⁿ nihnu-ndo nì yuhu ni iní-ndó ìchi Xítohó Jesucristú dàtná nchicúⁿ nihnu-ndo vitna. Te yúhú-í ná yáha-ndo dàtná ní yáha tá Èvá, chi sàcúihná nì nduu-xi cóo ní dándàhú ñáhá-xí xii-xi, chi sàcúihná-áⁿ ío váha ní xito-xi nàcuáa ní quide-xi ní dándàhú-xi tá Èvá-áⁿ.

⁴ Te nchòhó, quidé ndèe iní-ndó sàcúindedóho-ndo nchàa tnúhu càháⁿ cue tée càháⁿ ingá núú tnúhu cuendá Jèsús tnúhu sá ñà túú dànehé ñáhá-ndí xii-ndo, te quide ndee tucu iní-ndó ndèdóho-ndo dànehé ñáhá-güedé xii-ndo cuendá ingá espíritú, te ñá díú cuendá Espíritú Yá Ndiòxí sá ní ngúndecu ndíhi-ndo dànehé ñáhá-güedé xii-ndo, te quide ndee tucu iní-ndó ndèdóho-ndo dànehé ñáhá-güedé xii-ndo ingá núú tnúhu sá càchí-güedé càháⁿ nàcuáa naníhí tàhú-ndó, te ñá díú nàcuáa ndùu tnúhu sá ni sàndáá iní-ndó cuendá naníhí tàhú-ndó càháⁿ-güedé.

⁵ Te cue tée ducaⁿ càháⁿ-áⁿ càchí-güedé sá Yá Ndiòxí ní tendaha ñàha-gá xii-güedé xíca cùu-güedé càháⁿ-güedé tnúhu-gá te ío cùnuu-güedé, dico ñá ndàá sá càháⁿ-güedé tnúhu-gá. Te yúhú cùtnúni iní-í sá cuè tée-áⁿ ñá túú cùnuu-güedé dàtná cùnùu yúhú.

⁶ Te cuéi ñá túú càháⁿ-í dàtná càháⁿ cue tée ío váha sáa díquí-xi dico ío váha cùtnúni iní-í cuendá nchaa sá dácùaha-í, te yúhú sa quide-í nàcuáa cùtnúni iní-ndó sá ío váha cùtnúni iní-í nàcuáa ndùu nchaa tnúhu càháⁿ-í.

⁷ Te cudana te sàni iní-ndó sá yúhú ñá túú ní quide váha-í sá ní quide-í mèe-í dàtná ìⁿ tée ío ndàhú iní-xi, chi ñá túú ní xicáⁿ-í yáhu-í núú-ndó cuendá sá ní càháⁿ-í tnúhu Yá Ndiòxí tnúhu sá càháⁿ nàcuáa naníhí tàhú-ó núú-ndó.

⁸ Te ní queheⁿ-í díhúⁿ ní taxi dava-gá cue ñáyiu ndècu ìchi Xítohó Jesucristú, te díhúⁿ-áⁿ ní dándóñùhu-í ní saaⁿ-í nchaa sá ní xini ñùhu-í cùtnàhá ní càháⁿ-í tnúhu Xítohó Jesucristú núú-ndó.

⁹ Te cùtnàhá ní xíndecu ndíhi ñàha-í xii-ndo te áma ní xóo cumání sá xíní ñùhu-í, te ñá túú ná ní xicáⁿ-í núú ni ìⁿ-ndo. Chi cue ñáyiu xíndecu ìchi Xítohó Jesucristú ndécú distritú Macèdoniá ní quixí-yu ní taxi-yu sá cùmání xii-í, te ñá túú tnahí ni dàsatú iní ñáhà-í xii-ndo càcáⁿ-í núú-ndó núu ná cùú sá xíní ñùhu-í, te díu-ni ducaⁿ càda-í.

¹⁰ Te díu-ni duha càháⁿ váha-í cuendá-í te ni ìⁿ cue ñáyiu distritú Acáyá vá nihí-yu tnúhu cùñáhá-yu xii-í cuendá cadí-yu yuhu-í. Te mee Xítohó Jesucristú nàhá-gá sá ndàá càháⁿ-í dàtná càháⁿ ndàá mèe-gá.

¹¹ Te cudana te sàni iní-ndó sá sá dúhá càháⁿ-í te ñá túú cùu iní ñáhà-í xii-ndo, dico ñáhá chi mee Yá Ndiòxí nàhá-gá sá yúhú ío cùu iní ñáhà-í xii-ndo.

¹² Te nàcuáa-ni ta quide-í véxi te díu-ni ducaⁿ càda-í cuendá sá cuè tée cùini cada nínu mee-xi càchí sá ìⁿ-ni cuu ndíhi ñàha-güedé xii-í vá nihí-güedé tnúhu càháⁿ-güedé càchí-güedé sá ìⁿ-ni chiⁿ quide ndíhi ñàha-güedé xii-í.

¹³ Te cue tée-áⁿ càchí-güedé sá Yá Ndiòxí ní tendaha ñàha-gá xii-güedé xíca cùu-güedé càháⁿ-güedé tnúhu-gá dico ñá ndàá, chi mee-ni dándàhú-güedé

ñáyiú ndihi tnúhu càháⁿ-güedé, te quide-güedé dàtná quidé cuè téé càháⁿ tnúhu Xítohó Jesucristú dico ñá ndàá sá cúú-güedé cue téé càháⁿ tnúhu-gá.

14 Te vá cùñúhu-o sá dúcáⁿ quide cue téé-án, chi mee sàcúihná quidé-xí sá cúú-xí dàtná ìⁿ espíritú xínú cuèchi núú ò váha càa ndecu Yá Ndiòxí dico ñá ndàá sá xínú cuèchi-xi xiáⁿ.

15 Te xiáⁿ vá cùñúhu-o sá cuè téé xínu cuechi núú-xi quide-güedé sá cúú-güedé cue téé quide váha chi ñá ndàá sá quidé váha-güedé chi dándahú-güedé ñáyiú. Te nàcuáa ndùu nchaa sá quidé-güedé te ducaⁿ nàcháhu-güedé núú Yá Ndiòxí.

Té Páblú ío ndòho-dé cuèndá sá cúú-dé téé càháⁿ tnúhu Xítohó Jesucristú

16 Te yúhú càháⁿ tucu-í dóho-ndo sá vǎ cání ínì-ndó sá yúhú cùú-í ìⁿ téé càháⁿ lùcú càháⁿ duha, te núu dava-ndo dùcaⁿ sani ínì-ndó dico chí cádá ndèe ínì cundedóho-ndo tnúhu na càháⁿ-í cuèndá ducaⁿ tnàhá-í cada nínu-í mée-í.

17 Te vitna na càháⁿ-í dàtná càháⁿ ìⁿ téé ñá túú cùtnuní ínì-xi, chi tnúhu càháⁿ-í ñá túú ìⁿ-ni cuu-xi ndihi tnúhu Xítohó Jesucristú, chi vitna càháⁿ-í nàcuáa cada nínu-í mée-í.

18 Te ío cuéhé ñáyiú quide nínu mee-xi cuèndá nchaa sá ío ñuyúú-a te xiáⁿ núu tnàhá-í cuíní-í cada nínu-í mée-í.

19 Chi cùtnuní sá nchòhó quidé ndèe ínì-ndó sàcúndedóho-ndo nchàa tnúhu càháⁿ cue téé càháⁿ lùcú càháⁿ duha, te ducaⁿ quide ndee ínì-ndó sàcúndedóho-ndo tnúhu càháⁿ-güedé chi càchí-ndó sǎ ò túha-ndo.

20 Te nchòhó, quide ndee ínì-ndó tnì-ndo nchaa tnúhu càháⁿ cue téé quide yica ñaha xii-ndo sá cúnú cuèchi-ndo núú-güedé, te xicáⁿ-güedé nándi sá xicáⁿ-güedé núú-ndó, te tàxi tnuní ñàhá-güedé xii-ndo, te quide-güedé sá ío cùnúu-güedé ndécú ndihi ñaha-güedé xii-ndo, te càniha-güedé xii-ndo, te cuèi nchaa xiáⁿ quidé ñaha-güedé xii-ndo dico quide ndee-ni ínì-ndó.

21 Te nchòhó càchí-ndó sá cúú-ndí cue téé ñá túú ní cùyì cada nándi sá cádá, te ndàá chi ñá túú ìⁿ-ni cuu-ndí ndihi cue téé ducaⁿ xíquide.

Dico núu cue téé-án cùyì-güedé quidé nínu-güedé mée-güedé, te tnàhá-í cùyì-í ducaⁿ càda-í. Te sá dúhá càháⁿ-í te càháⁿ-í dàtná ìⁿ téé ñá túú cùtnuní ínì-xi.

22 Te núu quide cahnu-güedé mée-güedé cuèndá sá càháⁿ-güedé tnúhu hèbreú, te yúhú tucu ñu-ni téé càháⁿ tnúhu hèbreú cùú-í, àdi quide cahnu-güedé mée-güedé cuèndá sá cúú-güedé cue téé isràél, te yúhú tucu tnàhá-í cùú-í téé isràél, àdi quide cahnu-güedé mée-güedé cuèndá sá cúú-güedé ñani tnàhá ndíi Àbrahám, te tnàhá yúhú cùú-í ñani tnàhá ndíi Àbrahám tucu.

23 Àdi quide cahnu-güedé mée-güedé cuèndá sá sání ínì-güedé sá díú núú Xítohó Jesucristú xínú cuèchi-güedé, dico yúhú ío-gá xínú cuèchi ndisa-í núú-gǎ. Te sá dúhá quide cahnu-í mée-í te càháⁿ-í dàtná ìⁿ téé ñá túú cùtnuní ínì-xi, te yúhú cùú-í ìⁿ téé ío-gá quidé chiúⁿ-gá dàcúúxí cuè téé-án, te vǎi xito ní cuu càniha ñáyiú xii-í, te vǎi xito ní cuu chíhi ñàhá-yu vecaá xii-í, te vǎi xito ní cuu càcu càcu cahni ñaha ñáyiú xii-í.

24 Te cue ñáyiú isràél ní canihá-yu xii-í úhúⁿ xito, te ndi tnàhá ìⁿ ìⁿ xito ní canihá-yu ní dáquèe-yu ócú sáhúⁿ cúmí ñì sàtà-í.

25 Te únì xito ní caniha túcu ñáyiú xii-í ndihi carrútí, te ìⁿ xito ní sáha yúú ñàhá-yu xii-í, te ní cuu únì xito quèe naa bàrcú xití ndute òrè sácúhuⁿ-í, te ìⁿ xito ío ní ndoho-í ní xíndecu-í ìⁿ nduu ìⁿ níú núú ndute lámár.

26 Te ío titní xichi ní cuu xica cuu-í, te dava xichi ní cácu cuido ñaha ndùte ñuhu xii-í, te dava xichi ní cácu duhu ñadúhú nchaa ndachíuⁿ-í, te dava xichi ní cácu cada ñaha cuè ñáyiú cùu ndi mee-í ñⁿ sá cádá ñáhá-yu xii-í, te ñi-ñi ducaⁿ ní cácu cada ñaha tùcu cue ñáyiú ñá túú cùu ndi mee-í ñⁿ sá cádá ñáhá-yu xii-í ní cùu, te cuèi xití ñúú te cuèi xití yucu cácu cácu cada ñaha ñáyiú xii-í ñⁿ sá cádá ñáhá-yu, te ñi-ñi ducaⁿ cácu cácu quini-í tnúndòho oré ñúhù-í bàrcú cuáháⁿ núú ndute làmár. Te cue ñáyiú càchí sá ndécú ìchi Xítóhó Jesucristú te ñá ndáá cácu cácu cada ñáhá-yu xii-í ñⁿ sá cádá ñáhá-yu.

27 Te ío ndòho-í cuèndá chiⁿ quide-í chi ío xàù-í, te ní cuu vài xito ñá túú xidi-í, te titní xito ní cuu xihí vihi-í docó, te titní xito ní cuu yichí-í ndute, te titní xito ní cuu ñá túú tnàhí ná xéxi-í cuèndá chiⁿ quide-í, te titní xito ní cuu ndòho-í sá víxiⁿ, te titní xito ní cuu ñá túú ñihí-í dóó cuihnu-í.

28 Te ñá ñá-í ní xíáⁿ chi ñⁿ nduu ñⁿ nduu ío sàni iní-í cuèndá nchaa ñáyiú ndècu ìchi Xítóhó Jesucristú xíndecu nchaa xichi.

29 Te ndèda-ñi càa ñáyiú ñá túú ñihí ndéé cùndecu ìchi Xítóhó Jesucristú, te ío cùndahú iní-í chi sànuu sá tnàhá-í ñá túú ñihí ndéé-í cùndecu-í ìchi-gá sá dúcáⁿ quidé-yu. Te núu ñⁿ ñáyiú quidé-yu sá ñⁿ nchóhó ñáyiú ndècu ìchi Xítóhó Jesucristú quidé-ndó ñⁿ sá ñá túú tàù-ndó càda-ndo te vá cúú vâha iní-í chi cudéⁿ-í.

30 Te núu xini ñuhu-xi sá cádá càhnu-í mèe-í, te cuu ducaⁿ càda-í te cáháⁿ-í mee-ñi cuèndá nchaa sá quidé nàcuáa ñá túú ñihí ndéé yiqui cuñú-í.

31 Te Dútú Ndiòxi Yáa cúú Tátá Xítóhó Jesucristú nàhá-gá sá yúhú càháⁿ ndáá-í núú-ndó, te ñi-ñi gá tàù-gá cachí-ó sá ío càhnu cuu-gá ñi caa ñi quíhíⁿ.

32 Te cùtnàhá ní xíndecu-í ñúú Dàmascú te tée cùu gobiernú tée cùndihí tée yíndaha ñáyiú nàni Aretás ní taxi ndecu-dé cue tée ní xíndedí yuyèhe sá ñúhú dòco ñúú cuèndá òré quee-í te tnⁿ ñaha-güedé xii-í ní cùu.

33 Dico yúhú ní queé-í ñⁿ xití tídihi, te cue ñáyiú cùndihí ñaha xii-í ní queñuhu ñáhá-yu ndáa ventana nchíi yiqui naha sá ñúhú dòco ñúú-áⁿ, te ducaⁿ te ní cácu-í ñá túú ní ndàcu-güedé tnⁿ ñaha-güedé xii-í.

12

Té Páblú càháⁿ-dé sá ío vii càa sá ní dánèhé núú ñáhá Xítóhó Jesucristú xii-dé

1 Te ñá túú ndèé nándihí-xi sá càháⁿ váha-o cuèndá mèé-ó, dico vitna xini ñuhu-xi ducaⁿ cada-í chi cáháⁿ-í nàcuáa ní quide ñaha Xítóhó Jesucristú xii-í, chi ní quide-gá sá ñi cutnùni iní-í nàcuáa nduu tnúhu-gá, te vài núú sá ní dánèhé núú ñáhá-gá xii-í.

2 Te yúhú xini-í ñⁿ tée sàndáa iní ñáhá xii Xítóhó Jesucristú, te sa ní cuu úxicúmi cuá sá tèe-áⁿ ní sáá-dé ndéé andiú cùu uní, te ñá túú xini-í te núu ndihí yiqui cuñú-dé ní sáá-dé àdi ñáhá, chi ñⁿ dii díi-ñi Yá Ndiòxi nàhá-gá te núu nása càa-dé ní sáá-dé.

3 Te yúhú càháⁿ ndáá-í cuèndá tée-áⁿ, dico dàtná ní cachí-í sá ñá túú xini-í te núu ndihí yiqui cuñú-dé ní sáá-dé andiú àdi ñáhá, chi mee Yá Ndiòxi nàhá-gá te núu nása càa-dé ní sáá-dé.

4 Te tée-áⁿ ní sáá-dé ñⁿ xichi núú ío váha càa andiú, te yàcáⁿ ní xíndedóho-dé tnúhu mee-ñi sá cúú-xí cuèndá mèé-dé, te tnúhu-áⁿ vâ cúú tnàhí cáháⁿ-dé núú ní ñⁿ ñáyiú.

⁵ Te yúhú quidé nĩnu-í tée-án, dico mee-ĩ ñá túú càháⁿ váha-í cuèndá-í cuèndá cada nĩnu-í mée-í, chi càháⁿ-ni mee-ni cuèndá nchaa sá quidé nàcuáa ñá túú nihí ndéé yiqui cuñú-í.

⁶ Te núu dicó yúhú cuini-í te cuu cáháⁿ váha-í cuèndá-í cuèndá cada nĩnu-í mée-í, te núu ducaⁿ na càháⁿ-í te ñá túú cùu-xi ìⁿ tnúhu neñúú cáháⁿ-í, chi cùu-xi ìⁿ sá càháⁿ ndáá-í te núu na càháⁿ-í. Dico vá dúcáⁿ càda-í chi cuini-í sá nchòhó cada cuèndá-ndó nàcuáa nduu tnúhu càháⁿ-í ndihí nàcuáa quide-í, te ducaⁿ mée-ndo cáháⁿ-ndó te núu ná tée cùu-í, te ñá díú sá yúhú cáháⁿ váha-í cuèndá mée-í cuèndá nchòhó cachí-ndó sá ìo cùnuu-í.

⁷ Te sá ní dánèhé núú ñahá Xitohó Jesucristú xii-í cúu-xí sá xidó ío váha, te cuèndá sá vá cadá càhnu-í mée-í núu xiáⁿ Xitohó Jesucristú ní quide-gá duha ndòho yiqui cuñú-í vitna. Te sá dúcáⁿ quide ñaha-gá xii-í te xiáⁿ sácuihná ní nihí-xi ichi càhnu dandoho ñaha-xi xii-í.

⁸ Te ní cuu úní xito càháⁿ ndáhú-í núú Xitohó Jesucristú sá ná cadá-gã nàcuáa vá ndòhó-gã yiqui cuñú-í.

⁹ Dico mee-gã càchí-gã xii-í: “Yúhú ío cùndahú iní ñahà-í xii-n chindee ñaha-í, te ñá túú nã cúmání xii-n, te cùnuni sá ìo-gã chíndèe-í cue ñáyiu ñá túú nihí ndéé cùndecu”, duha ní cachí-gã xii-í. Te xiáⁿ núu yúhú ío cùdí ìní-í sá ñá túú nihí ndéé-í ndécù-í, chi ñu cuèndá xiáⁿ Xitohó Jesucristú ñá túú ñá ña nihnu ñaha-gá xii-í chíndèe ñaha-gá.

¹⁰ Te xiáⁿ núu cùdí ìní-í sá dúhá ñá túú nihí ndéé-í ndécù-í, te cùdí tucu iní-í cuèndá nchaa tnúhu cuèhé tnúhu duha càháⁿ ñáyiu cuèndá-í, te cùdí ìní-í cuèndá nchaa sá ndòhò-í, te cùdí tucu iní-í cuèndá sá quidé ñaha ñáyiu xii-í, te cùdí tucu iní-í cuèndá nchaa dava-gã sá ndòhò-í cuèndá Xitohó Jesucristú. Te òré ñá túú nihí ndéé-í te Xitohó Jesucristú chíndèe ñaha-gá xii-í nihí ndéé-í.

Te Páblú ío sàni iní-dé cuèndá cue ñáyiu xñdecu ichi Xitohó Jesucristú ndécú ñúú Còrintú

¹¹ Te cùu-í dàtná ìⁿ tée ñá túú cùnuni iní-xi sá dúhá càháⁿ váha-í cuèndá-í, te ducaⁿ quide-í chi mee-ndo quide-ndo sá dúcáⁿ càháⁿ-í, dico mee-ndo táu-ndó càháⁿ váha-ndo cuèndá-í ní cùu. Te dava cue tée ío quide cahnu-güedé mée-güedé, te càchí-güedé sá Xitohó Jesucristú ní táuchíuⁿ-gã sá càháⁿ-güedé tnúhu-gã, dico yúhú cùnuu-gã-í dàcúúxí cuè tée-án cuèi ñá túú vèdana ná cùu-í ndécù-í ñuyú-a.

¹² Te cùtnàhà ní xñdecu ndihí ñaha-í xii-ndo ìo ní quide càhnu iní-í nándi sá ní yáha-í ní quide-í chiúⁿ Xitohó Jesucristú sá cúu-xí-ndó. Te ní chindee ñaha-gá xii-í ní quide-í titní núú sá vá yòo tnàhí ndàcu cada te ní cuñúhu-ndo, te sá dúcáⁿ ní chindee ñaha-gá xii-í ní cutnùní iní-ndó sá yúhú cúu ndìsa-í ìⁿ tée ní cachí Xitohó Jesucristú sá càháⁿ-í tnúhu-gã.

¹³ Te yúhú ìⁿ-ni quide ndihí ñaha-í xii-ndo ndihí nchaa dava-gã cue ñáyiu ndécú ichi Xitohó Jesucristú, te dicó-ní sá yúhú ñá túú ní cuini-í taxi-ndo sá xíní ñúhu-í dàtná ní quide-í dava-gã-yu. Te núu ñá túú ní quide váha-í sá dúcáⁿ ní quide-í ñá túú ní cuini-í chindee ñaha-ndo te chí cadá càhnu iní ñahá xii-í.

¹⁴ Te vitna sa ndècu túha-í sá quixí-í núú ndécú-ndó, te sá quixí còto ñaha tucu-í xii-ndo cùu-xi xito cuu úní sá quixí-í, te cuini-í sá vá dándíhu-ndo ìní-ndó ndùcu-ndo sá táxí-ndó cùu xii-í, chi ñá díú xiáⁿ ndèé iní-í chi mee-ndo ndéé iní-í quixí-í. Te duha càháⁿ-í chi nchòhó xini-ndó sá cuè tée cùu tátá sãñaha-güedé sá cúu-xí cuè déhe-güedé te ñá díú cuè déhe-güedé sãñaha-güedé sá cúu-xí mée-güedé.

15 Te yúhú ío váha cùu iní-í dandòñuhu-í sá ndécú ndìhi-í nàcuáa ndacu-í chindee ñàha-í xii-ndo cùndecu váha-ndo sá cúú-xí Yá Ndiòxí chi ío cùdñí iní-í, te cuèi na cùu-í sá cuèndá-ndó, chi ío cùu iní ñáhà-í xii-ndo, te sá dúcáⁿ cùu iní ñáhà-í xii-ndo, te sànuu sá nchòhó ñá túú cùu iní ñáhà cavihi-ndo xii-í.

16 Te ñaha-ndo sá ñá túú ní dandihú-í iní-ndó nã taxi-ndo cùu xii-í, dico dava-ndo càchí-ndó sã ío váha ní xito-í nàcuáa ní quide-í nàcuáa ní dándàhú ñáhà-í xii-ndo.

17 Te chí cáháⁿ te núu yúhú ní dándàhú ñáhà-í xii-ndo ndìhi cue téé ní tendaha-í ní quixi coto ñaha xii-ndo.

18 Te ní cáháⁿ ndàhú-í núú tẽ Titú ndìhi núú ìngá tucu téé ndècu ndìhi-o ichi Xítohó Jesucristú ní quixi coto ñaha-güedé xii-ndo. Te nchòhó cùtnùní iní-ndó sã tẽ Titú ñá túú ní dándàhú ñáhà-dé xii-ndo, te ducaⁿ chi ñⁿ-ni sàni iní-ndí te ñⁿ-ni quide-ndí.

19 Te cudana te sàni iní-ndó sã sá dúhá càháⁿ-ndí te tàunihnu-ndí meé-ndí, dico ñá díú dùcaⁿ quee-xi tnúhu càháⁿ-ndí, chi càháⁿ-ndí nàcuáa tàú-xi càháⁿ-ndí chi ndècu ndìhi-ndí Xítohó Jesucristú, te mee Yá Ndiòxí náhá ndáá-gá nàcuáa ndùu tnúhu càháⁿ-ndí, te nchaa sá càháⁿ-ndí cúú-xí cuèndá nchòhó cue ñáyiu ío cùu iní-ndí, te càháⁿ-ndí nàcuáa cundecu váha-ndo ichi Xítohó Jesucristú.

20 Te ío sàni iní-í cuèndá-ndó chi na cuáháⁿ te òré quixi-í quixi coto ñaha-í xii-ndo, te ñá túú quide-ndo nàcuáa cuu váha iní-í, te sá dúcáⁿ te yúhú càháⁿ-í nàcuáa vá cúú váha iní-ndó, te ducaⁿ ío sàni iní-í cuèndá-ndó chi na cuáháⁿ òré quexio-í te nãa-ndó, àdi ndecu-ndo ichi cuédú iní, àdi cudééⁿ núú tnáhà-ndó, àdi ñá túú cùu ñⁿnuu-ndo ndecu-ndo, àdi càháⁿ cuèhé-ndó cuèndá tnàha ñáyiu-ndo núú chítú núú tàcá, àdi satnuhu tnaha-ndo, àdi quide cahnu-ndo mee-ndo, àdi quide dusaⁿ dóho tnàha-ndo.

21 Te ío sàni iní-í cuèndá-ndó chi na cuáháⁿ òré quixi-í, te Yá Ndiòxí cada-gá te cucahaⁿ núú-í sá cuèndá-ndó, te ío ndíhú iní-í cuèndá-ndó te núu vátá dáñá-gã-ndó nchàa sá cuèhé sá dúhá ní ngüita-ndo quide-ndo ndéé sanduu, te vài-ndo ní ngüita-ndo dùcaⁿ quide-ndo, chi ndècu-ndo ichi díú iní te nándi-gá nchaa sá cuèhé sá dúhá quide-ndo, te ducaⁿ ío ndíhú iní-í te núu vátá dáñá-gã-ndó nchàa xíáⁿ.

13

Tnúhu ndéé núú ní ndìhi-ná

1 Te sá quíxi-í vitna núú ndécú-ndó cùu-xi xito cuu úní sá quíxi còto ñaha-í xii-ndo. Te càchí tnúhu-í xii-ndo sã òré cundáá cuéchi-ndo te canehe núú úú àdi úní ñáyiu càháⁿ ndáá nàcuáa ndùu cuéchi-ndo.

2 Te yúhú sa ní càháⁿ-í dóho-ndo cùtnàhá ní quixi-í ní quixi coto ñaha-í xii-ndo xito cuu úú, te ñⁿ-ni ducaⁿ càháⁿ tucu-í dóho-ndo vitna vátá quíxi tucu-gá-í quixi coto ñaha-í xii-ndo. Te nchòhó ñáyiu ní cunduu ní ngüita quide nchaa sá cuèhé sá dúhá, tenáá ñáhà-í xii-ndo òré quexio-í te núu vátá dáñá-gã-ndó nchàa sá cuèhé sá dúhá quide-ndo te tnáhà nchaa dava-gã-ndó tenáá ñáhà-í xii-ndo.

3 Te nchòhó cùtní-ndó quíní-ndó núu ndáá sá quidè-í núú Xítohó Jesucristú càháⁿ-í yuhu-gá, dico dàvã-áⁿ cùtnùní ndáá iní-ndó. Te Xítohó Jesucristú quidè-gã nàcuáa cùtnùní iní-ndó sã ío càhnu cuu-gá te ñá túú quide-gã dàtná quidè ñⁿ ñáyiu ñá túú nihí ndéé cùndecu.

⁴ Te Xítohó Jesucrístú ní ndoho-gá dàtná ìᵀ ñáyiú ñá túú ñihí ndéé cùndecu, chí ní sahní ñaha-güedé xii-gá núú cùrúxí dico mee Yá Ndiöxí ní quide-gá ní ñihí ndéé Xítohó Jesucrístú ní ndoto-gá ndécú-gá vitna, te tñahá nchúhú tucu ducaⁿ yáha-ndí ñá túú ñihí ndéé-ndí cundecu-ndí, dico mee Yá Ndiöxí chíndèe ñaha-gá xii-ndí ñihí ndéé-ndí ndécú-ndí cuendá sá ndécú ndíhi-ndí Xítohó Jesucrístú, te xíáⁿ núu ndàcu-ndí quidé-ndí nàcuáa tàú-xi cunduu sá cúú-xí-ndó.

⁵ Te chí cádá cuendá váha te núu ndisa sá sàndáá iní-ndó tnúhu Xítohó Jesucrístú, te núu ndáá sá ndécú-ndó ichi-gá te cùtnuní iní-ndó sá ndécú-ndó ndíhi-gá.

⁶ Te cuíní-ndí sá nchòhó cutnùní ndáá iní-ndó sá nchúhú ndécú ndíhi ndisa-ndí Xítohó Jesucrístú.

⁷ Te nchúhú càháⁿ ndíhi-ndí Yá Ndiöxí cuendá-ndó cuendá sá vā cádá-ndó ní ìᵀ sá cuèhé sá dúhá, te vā cání iní-ndó sá sá dúcáⁿ càháⁿ ndíhi-ndí-gá cuendá-ndó, te cuíní-ndí sá nchòhó cutnùní iní-ndó sá nchúhú ío ndècu yiñuhu-ndí núú-gá, te ñáhá chí càháⁿ ndíhi-ndí-gá cuendá-ndó chí cuíní-ndí sá nchòhó cada váha-ndo cùndecu-ndo cuéi sàni iní-ndó sá nchúhú cúú-ndí cue téé ñá túú ndècu yiñuhu núú-gá.

⁸ Te nchúhú mee-ní càháⁿ váha-ndí cuendá tnúhu ndáá tnúhu Yá Ndiöxí, te ñá túú càháⁿ-ndí ìᵀ tnúhu sá ñá túú tàú-xi càháⁿ-ndí cuendá tnúhu-áⁿ.

⁹ Te cùdí iní-ndí sá ñá túú-gá xíní ñuhu-xi cada-ndí nàcuáa níhí ndéé-ndí tenáa ñáhá-ndí xii-ndo càháⁿ-ndí dóho-ndo, chí nchòhó sa ní níhí ndéé-ndó ndècu-ndo ichi-gá. Te nchúhú càháⁿ ndíhi-ndí Yá Ndiöxí cuendá-ndó cuendá sá nchòhó cundáa-ndó cùndecu-ndo ñá túú-gá ná cumání-ndó núú-gá.

¹⁰ Te xíáⁿ núu nduha ndúu nchaa tnúhu tè-e-í núú tütú-a daquixi-í ndaha-ndo vitna ñá túú ndècu ndíhi ñaha-í xii-ndo, cuendá sá òré ná cùndecu ndíhi ñaha-í xii-ndo te vā ío níhí càháⁿ-í dóho-ndo nàcuáa ndúu tnúhu ndee iní ní taxi Xítohó Jesucrístú ndécú ndíhi-í, chí ní taxi-gá tnúhu ndee iní xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quíhíⁿ, te ñá díú cuendá sá cánúichi ñaha-í xii-ndo cuíta nihnu-ndo.

¹¹ Te vitna nchaa nchòhó ñáyiú ndècu ndíhi-ndí ichi Xítohó Jesucrístú ío quide ndee iní ñáhá-ndí xii-ndo, te ío chí ndúcú nàcuáa cada-ndo cùndáá-ndó núú Yá Ndiöxí cuendá sá ñá túú tñahí-gá ná cùmání-ndó núú-gá, te ndee ndèe cada iní-ndó cùndecu-ndo, te chí cúú ìᵀnuu cundecu ndíhi tñaha, te ducaⁿ te Yá Ndiöxí cundecu ndíhi ñaha-gá xii-ndo chí ío cùu iní ñáhá-gá xii-o, te ñu-gá quidé-gá ío váha cùu iní-ó ndècu-o.

¹² Te ndíhi tnúhu yiñuhu chí cádá ndèe iní tñáhá.

¹³ Te nchaa ñáyiú cùu cuendá Yá Ndiöxí ndécú ìha quide ndee iní ñáhá-yu xii-ndo.

¹⁴ Te xicáⁿ táhú-ndí núú Xítohó Jesucrístú sá ío na chíndee chítúu ñaha-gá xii-ndo. Te mee Yá Ndiöxí ná cádá-gá nàcuáa cutnùní iní-ndó sá ío cùu iní ñáhá-gá xii-ndo, te Espíritú-gá cundee cùu cahnu iní-ndó cùndecu-ndo. Te ducaⁿ na cùnduu. Te ío chí cádá ndèe iní-ñá vitna.

TUTÚ NÍ CADÚHA TÉ PĀBLÚ QUIHÍⁿ NDAHA ÑÁYIU DISTRITÚ GÀLACIÁ

Té Pāblú cadúha-dé tutú quíhíⁿ ndaha nchaa ñáyiú sàndáá iní ñáhá xì Xítohó Jesucristú ndécú distritú Gàlaciá

¹ Te yúhú té Pāblú ní tendaha ñaha Xítohó Jesucristú, ndíhí Dútú Ndiòxí véxi-í cāháⁿ-í tnúhu-gá. Te diu Yá Ndiòxí ní dándótó-gá Xítohó Jesucristú Yáá ní xíhí ní cùu. Te cāchí tnúhu-í xii-ndo sá ñà díú ñáyiú ñuyíú-a ní tendaha ñaha xii-í véxi-í, te ní Yá Ndiòxí te ní Xítohó Jesucristú ñá túú ní xāhaⁿ-gá xii ñⁿ ñáyiú quixí-yu cachí tnúhu-yu nācuáa cada-í.

² Te yúhú té Pāblú cadúha-í tutú-a ndíhí nchaa dava-gá ñáyiú ndècu ichi Yá Ndiòxí ndécú ndíhí-í iha cuèndá daquixi-í ndaha nchòhó ñáyiú sàndáá iní ñáhá xì Xítohó Jesucristú ndécú distritú Gàlaciá.

³ Te xicáⁿ tǎhú-í núú Dútú Ndiòxí, ndíhí núú Xítohó Jesucristú sá ïo na chìndee chítúu ñaha-gá xii-ndo, te ducaⁿ ndí nduú-gá ná cádá te ío váha cuu iní-ndó cùndecu-ndo.

⁴ Te Xítohó Jesucristú ní xíhí-gá sá cuèndá nchaa cuéchi nchoo cuè ñáyiú ndècu ñuyíú-a. Te ducaⁿ ní quide-gá, chí cuiní-gá sá vǎ cùndècu-o ichi cuehé ichi duha. Te ducaⁿ ní cuu, chí Dútú Ndiòxí ducaⁿ ní cuiní-gá cunduu.

⁵ ¡Te ío chí ná ndàcáⁿ tǎhú-ó núú Yá Ndiòxí cuèndá sá ïo cǎhnu cuu-gá, te diu-ni ducaⁿ càda-o ní caa ní quíhíⁿ! Te ducaⁿ na cùnduu.

Mee-ni tnúhu Xítohó Jesucristú cúú-xí tnúhu sá cāháⁿ nācuáa naníhí tǎhú-ó

⁶ Te ío cùñúhu-í cúú chí ío ndíhí ní dǎná-ndó ichi Yá Ndiòxí. Te Yááⁿ ní cāháⁿ ñáhá-gá xii-ndo, chí Xítohó Jesucristú ío ní cundǎhú iní ñáhá-gá ní quide váha ñaha-gá xii-ndo, te vitna dācuaha tucu-ndo ingá tnúhu, te cāchí-ndó sá xǎⁿ dācācu nihnu ñaha-xi xii-ndo núú ùhú núú ndǎhú.

⁷ Dico ñáhá, chí ñá túú-gǎ tnúhu sá dācācu nihnu ñaha xii-o núú ùhú núú ndǎhú. Te dicó-ni sá ío ñáyiú véxi dāticá nuu ñahá-yu xii-ndo dānehé ñáhá-yu tnúhu sá dācuíta nihnu ñaha xii-ndo, chí tnúhu-áⁿ ñà túú cùu-xi tnúhu Xítohó Jesucristú.

⁸ Te yúhú cāháⁿ-í tnúhu Xítohó Jesucristú, dico núú ío ñáyiú véxi dānehé ñáhá xii-ndo ingá tnúhu sá ñà túú ní dānehé ñáhá-í xii-ndo, te nchòhó cachí-ndó sá ñáyiú-áⁿ nachǎhu-yu núú Yá Ndiòxí sá dúcáⁿ quide-yu. Te cuèi yúhú, te núu na dǎma-í tnúhu dānehé ñáhá-í xii-ndo, te diu-ni ducaⁿ cāháⁿ-ndó sá nachǎhu-í núú-gǎ te núu ducaⁿ na càda-í. Àdi te núu ñⁿ espíritú xínú cuéchi núú-gǎ véxi-xi cāháⁿ-xi ingá tnúhu sá ñà túú ní dānehé ñáhá-í xii-ndo nācuáa naníhí tǎhú-ndó ñá, te diu-ni ducaⁿ cāháⁿ-ndó sá nachǎhu-xi núú Yá Ndiòxí te núu ducaⁿ na càda-xi.

⁹ Te diu-ni duha sa ní dānehé ñáhá-í xii-ndo sá ñúu véxi ñáyiú dānehé ñáhá ingá tnúhu sá ñà túú ní dānehé ñáhá-í xii-ndo nācuáa naníhí tǎhú-ndó ñá, te cachí-ndó sá ñáyiú-áⁿ nachǎhu-yu núú Yá Ndiòxí sá dúcáⁿ quide-yu, duha ní cachí-í xii-ndo.

¹⁰ Te duha ndúu tnúhu cāháⁿ-í chí nchòhó sa xíní-ndó sá yúhú cuiní-í sá Yá Ndiòxí cāháⁿ-gá sá quide váha-í ndécú-í, te ñà díú sá ñáyiú ñuyíú-a cachí-yu sá quide váha-í, àdi sá ío cùdíí iní-yu nchaa nācuáa quide-í ndécú-í. Te núu na

càni iní-í cudüü-í núú ñáyü ñuyúú-a, te ñá túú cùu-í téé xìnu cuechi núú Xìtohó Jesucristú te núu ducaⁿ na càda-í.

Nàcuáa ní cuu ní ngüita té Páblú càháⁿ-dé tnúhu Yá Ndiöxi

11-12 Te nchòhó ñáyü ndècu ndihi-í ichi Xìtohó Jesucristú càchí tnúhu-í xii-ndo sá tnúhu sá dánèhé ñáhà-í xii-ndo nàcuáa nanihí ùhú-ndó cùu-xi tnúhu sá ní cachí tnúhu mee Xìtohó Jesucristú xii-í, te ñá díú ñⁿ ñáyü ñuyúú-a ní càhu iní-yu tnúhu-án, àdi danehé ñáhà-yu xii-í, chi mee Xìtohó Jesucristú ní dánèhé ñáhà-gà.

13 Te nchòhó sa nihí-ndó tnúhu nàcuáa ní xóo cada-í cùtnàhá nchicúⁿ nihnu-í nchaa nàcuáa dàcuaha ñáyü cùu ndi mee-í ñáyü isràél ní cùu. Te dàvã-án ïo ní xóo cuu úhú iní-í nchaa ñáyü ndècu ichi Yá Ndiöxi, te nándi sá ní xóo cada-í-yu, te ní cuini-í danàa-í-yu ni cùu.

14 Te yúhú ío-gá ní xóo quene cáva-í ní xóo dacuàha-í nchaa sá dacuàha ñáyü cùu ndi mee-í dàcúúxi ñáyü ñⁿ-ni cuià-í ndihí-yu ni cùu, te ío-gá ní xóo cuini-í cada ndáa-í canchicúⁿ nihnu-í nchaa nàcuáa ní dánèhé ñáhà cue ñani tnáhà-í ní xíndecu ndéé sanaha ni cùu.

15 Te ndéé cùtnàhá vátã cãcú-gã-í Yá Ndiöxi sa nèhe váha ñaha-gã xii-í cuèndá sá càháⁿ-í tnúhu-gá, núu xíáⁿ ní càháⁿ ñáhà-gã xii-í quidè-í chüüⁿ-gá vitna, te sá dúcãⁿ ní quide-gá te ío váha ní quide ñaha-gã xii-í.

16 Te òré ní càháⁿ ñáhà Yá Ndiöxi xii-í te ní cachí tnúhu-gá cuèndá Déhe-gá Xìtohó Jesucristú. Te ducaⁿ ní quide Yá Ndiöxi cuèndá sá cuini-gá sá cùñaha-í xii ñáyü ñá túú cùu ñáyü isràél cuèndá Yaá cúú Déhe-gá. Te cùtnàhá ní càháⁿ ñáhà Yá Ndiöxi xii-í, te vá yóo ñⁿ dìi núú-xi ni ndücu tnúhu-í nàcuáa cada-í.

17 Te ní ñá túú ní sáhãⁿ-í ñuú Jerusalén nducu tnúhu-í núu cue téé díhna nuu ní tendaha Xìtohó Jesucristú càháⁿ tnúhu-gá núu nása cada-í, chi ndihí-ni ní sáhãⁿ-í distrítú Àrabiá ní xíndecu tnaa-í te dàtnùnì cuánuhú tucu-í ñuú Dàmascú.

18 Te núú ùní cuiá sã ní càháⁿ ñáhà Yá Ndiöxi xii-í, te ní sáhãⁿ tucu-í ñuú Jerusalén ní càháⁿ ndihí-í té Pèlù, te ní xíndecu-í ndihí-dé sáhãⁿ nduu.

19 Te tnàhá té Jacobó ñani Xìtohó Jesucristú ní càháⁿ ndihí-í. Te ñá túú ní xini-í dava-gá cue téé ní tendaha Xìtohó Jesucristú càháⁿ tnúhu-gá.

20 Te Yá Ndiöxi ndéhé ndiⁿ ndehe caxi-gá sá ncháá tnúhu tèe-í núú tütú-a sá cúú-xi-ndó cùu-xi ñⁿ sá ndáa.

21 Te sátã ní sáhãⁿ-í ñuú Jerusalén, te dàtnùnì ní sáhãⁿ-í distrítú Siriá, ndihí distrítú Ciliciá.

22 Te nchaa ñáyü xíndecu ichi Xìtohó Jesucristú ndécú distrítú Jùdeá ñá túú xini ñáhà-yu xii-í ní cùu.

23 Dico ní xóo nihí-yu tnúhu nchaa nàcuáa ní xóo cada-í, te ní cachí-yu: “Téé cùu úhú iní ñáhà xii nchaa nchoo ñáyü ndècu ichi Xìtohó Jesucristú càháⁿ-dé tnúhu-gá núú ñáyü cuèndá quíndáa iní ñáhà-yu xii-gá, te díu-dé nándi sá quidé ñaha-dé, te cuini-dé danàa ñaha-dé cuèndá sá vã cóo-gã ñáyü quíndáa iní ñáhà xii-gá ní cùu”, duha ní cachí-yu cuèndá-í.

24 Te ní ngüita-yu ní cachí-yu sã ío càhnu cuu Yá Ndiöxi cuèndá sá ñá túú-gã quidè-í dàtná ní xóo cada-í.

2

Té Páblú ní nihí tnáhã-dé ndihí dava-gã cue téé càháⁿ tnúhu Yá Ndiöxi

¹ Te ní nútahá úxícúmí cuǎ sǎ ní sáháⁿ-í ñuú Jerusàlén ní cáháⁿ ndihí-í té Pèlú, te dàtnùní ndécá-í té Bèé ní sáháⁿ, te tnahá té Títú ní sáháⁿ ndihí-ndí-dé.

² Te ní sáháⁿ-í chí mee Yá Ndiòxí ní cachí-gá sá quíhíⁿ-í. Te yàcáⁿ ní tacá mee-ní cuè téé cùnū. Te ní xáhaⁿ-í xii-güedé nàcuáa ndūu tñúhu dànehé-í ñáyiú ñá túú cūu ñáyiú isràél cuendá naníhí tǎhú-yu. Te ducaⁿ ní quide-í cuendá cuíní-í quini-güedé nàcuáa ndūu chiúⁿ quide-í, chí nacuaháⁿ cachí-güedé sá ñà túú nàndíhí-xi.

³ Te té Títú téé ndècu ndihí-í chí ñá díú téé isràél cúú-dé, dico ñá túú ní quide yica-güedé cuáha-güedé sèñá ñi-dé.

⁴ Te ñáyiú cǎchí sá ndécú ichi Xítohó Jesucristú te ñá ndáá sá ndécú-yu ichi-gá, ñáyiú-áⁿ ní chitnahá ñáhǎ-yu xii-ndí cuendá cuíní-yu quini-yu nása quide-ndí ndécú-ndí ichi Xítohó Jesucristú. Te ducaⁿ ní quide-yu cuendá sá nchúhú sa ní cácu nihnu-ndí ñá túú-gǎ quide-ndí nchaa nàcuáa ní cáháⁿ ndí Moisés. Te cuíní-yu sá núcuíta saa tūcu-ndí cada-ndí nchaa nàcuáa ní cáháⁿ ndí nucúndecu-ndí dàtná ní xíndecu-ndí cútnàhá vátá cǎcu nihnu-gá-ndí núú tñúhu-áⁿ ní cūu.

⁵ Te nchúhú ñá túú tnahí ní dàña-ndí méé-ndí dandáhú ñáhǎ-yu xii-ndí. Te ducaⁿ ní quide-ndí, chí cuíní-ndí sá ñà túú nǎgá tñúhu dácánū ndihí tñúhu sá cáháⁿ nàcuáa naníhí tǎhú-ó ndècu ndihí-ndo.

⁶ Te ní ñⁿ tñúhu sá vátá quini-gá-í ñá túú ní cǎchí tñúhu cue téé cùnū núú ñáyiú cada-í. Dico yúhú chí ñá túú ní quide cuendá-í nūu cùnū-güedé àdi ñá túú cùnū-güedé, chí núú Yá Ndiòxí ñⁿ-ní cūu-o nchaa-o.

⁷ Te ní cutnùní iní-güedé sá Yá Ndiòxí ní cachí-gá xii-í sá cáháⁿ-í tñúhu-gá núú ñáyiú ñá túú cūu ñáyiú isràél dàtná ní quide-gá té Pèlú ní xáhaⁿ-gá cáháⁿ-dé tñúhu-gá núú ñáyiú isràél.

⁸ Te ducaⁿ ní cutnùní iní-güedé, chí ñⁿ-ni Yá Ndiòxí Yáá chíndèe ñaha xii té Pèlú cáháⁿ-dé tñúhu-gá núú ñáyiú isràél, ñⁿ-ni Yáá-áⁿ chíndèe ñaha-gá xii-í cáháⁿ-í tñúhu-gá núú ñáyiú ñá túú cūu ñáyiú isràél.

⁹ Te té Jàcobó, ndihí té Pèlú, ndihí té Juáá, cue téé ío cùnū-gá ní cutnùní iní-güedé sá Yá Ndiòxí ío chíndèe ñaha-gá xii-í quidè-í chiúⁿ-gá. Te ío váha ní cáháⁿ ndihí ñaha-güedé xii-í, ndihí té Bèé, te ní cuu ñⁿ-nuu-ndí sá nchúhú quíhíⁿ-ndí cáháⁿ-ndí tñúhu Yá Ndiòxí núú nchaa ñáyiú ñá túú cūu ñáyiú isràél, te mee-güedé cáháⁿ-güedé tñúhu-gá núú ñáyiú isràél.

¹⁰ Te ñⁿ-ni tñúhu ní cáháⁿ-güedé dóho-ndí te ní cachí-güedé xii-ndí sá chíndèe-ndí cue ñáyiú ndáhú, te sa ducaⁿ tnahí sàni iní-ndí cada-ndí.

Té Pǎblú cáháⁿ-dé dóho té Pèlú ñuú Antiòquia

¹¹ Te cútnàhá ní sáháⁿ té Pèlú ñuú Antiòquia yàcáⁿ ní cáháⁿ-í dóho-dé, chí quide-dé ñⁿ sá ñà túú tǎú-dé cada-dé ní cūu.

¹² Te quide váha-dé ní cūu chí xèxi-dé ndihí ñáyiú ñá túú cūu ñáyiú isràél, dico òré ní sáá ñⁿ úú ñáyiú cùndihí té Jàcobó, te òré-áⁿ ñà túú-gǎ ní cuíní-dé caxi-dé ndihí ñáyiú-áⁿ. Te ducaⁿ ní quide-dé chí ní yúhú-dé cue ñáyiú nchicúⁿ nihnu quide nchaa nacúáa ní cáháⁿ ndí Moisés sá vá cáháⁿ váha-yu cuendá-dé.

¹³ Te tnahá dava-gá ñáyiú isràél xíndecu ichi Yá Ndiòxí ñá túú quide váha-yu, chí quide-yu dàtná quidé té Pèlú ní cūu, te ndéé tnahá té Bèé ní ngúíta-dé ducaⁿ quide-dé ní cūu.

14 Te òré ní xíní-í sá ñà túú quìde-güedé ndihí-yu nàcuáa càháⁿ tnúhu Yá Ndiöxí, te núú nchàa ñáyiú ndècu ichi Yá Ndiöxí ní xáhaⁿ-í xii té Pèlú: “Yòhó cúú-n tée isràél, te ñà túú quide-n nchaa nacuáa quide ñáyiú isràél, chi quide-ni-n datná quidé nchàa ñáyiú ñà túú cùu ñáyiú isràél. Te núú ducaⁿ quide-n, ¿te ná cuèndá dánèhé-n ñáyiú ñà túú cùu ñáyiú isràél sá cádá-yu nchaa nàcuáa quide ñáyiú isràél?”, duha ní xáhaⁿ-í xii té Pèlú.

Ɔⁿ-ni nànhí tàhú-ó ndihí ñáyiú isràél núu na quìndáá iní-ó Xítohó Jesucristú ndihí-yu

15 Te yúhú ndihí té Pèlú cúú-ndí ñaní tnáhá ñáyiú isràél, te ñà túú ndècu-ndí ichi cuèhé ichi duha dàtná ndécú nchàa ñáyiú ñà túú cùu ñáyiú isràél.

16 Te xíní-ó sá vǎ cùndècu-gǎ cuèchi-o núú Yá Ndiöxí te núú na quìndáá iní-ó Xítohó Jesucristú, te ñà díú sǎ cáncícúⁿ nihnu-o càda-o nchaa nacuáa ní cáháⁿ ndíi Moisés. Te tnáhá dava nchúhú ñáyiú isràél sàndáá iní-ndí Xítohó Jesucristú, te xǎⁿ cùtnùní iní-ndí sǎ ñà túú-gǎ cuèchi-ndí ndécú núú-gǎ, dico ñà díú sǎ ñí cáncícúⁿ nihnu-ndí ní quide-ndí nàcuáa ní cáháⁿ ndíi Moisés, chi cuèndá sǎ sàndáá iní-ndí Xítohó Jesucristú. Te vǎ yǎo Ɔⁿ cachí-ó sǎ ñà túú ndècu cuèchi-xi núú Yá Ndiöxí cuèndá sǎ nchìcúⁿ nihnú-yu nchaa nàcuáa ní cáháⁿ ndíi Moisés.

17 Te núú cuíní-ó sǎ vǎ cùndècu cuèchi-o núú Yá Ndiöxí cuèndá sǎ sàndáá iní-ó Xítohó Jesucristú, te xǎⁿ cùtnùní iní-ó sǎ ñà túú quide váha-o. Ɔⁿ Te vǎ cúú tnàhí caní iní-ó sǎ Xítohó Jesucristú dánèhé ñáhá-gǎ xii-o sǎ vǎ cádá váha-o cùndècu-o!

18 Te yúhú càchí-í sǎ vǎ cáncícúⁿ nihnu-gǎ-ó nchàa nacuáa ní cáháⁿ ndíi Moisés, dico núú vitna càchí-í sǎ xíní ñùhu-xi cada-o nchaa nacuáa ní cáháⁿ ndíi ña, te ñà túú quide váha-í núú Yá Ndiöxí te núú ducaⁿ na càda-í.

19 Te yúhú duuⁿ duuⁿ ní cutnùní iní-í sǎ vǎ ndácù-í cada-í nchaa nàcuáa ní cáháⁿ ndíi Moisés núu xǎⁿ ní dàñà-í ñà túú-gǎ nchìcúⁿ nihnu-í nchaa nàcuáa ní cáháⁿ ndíi cuèndá sǎ cuíní-í cùndècu-í sǎ cúú-xi Yá Ndiöxí.

20 Te Xítohó Jesucristú ní xíhí-gǎ cuèndá-í, dico dàtná tnúhu sǎ tnàhá-í ní xíhí ndihí-gǎ, chi ñà cúú-gǎ cada-í nchaa nàcuáa sàni iní mée-í, chi Xítohó Jesucristú-nǎ ndécú ndihí ñaha-gǎ xii-í táxi tnùnì ñáhá-gǎ. Te vitna ndècu-í ñuyíú-a, te ío sàndáá iní-í Xítohó Jesucristú Déhe Yá Ndiöxí, te chindee ñaha-gǎ xii-í. Te ðiu-ni Xítohó Jesucristú ío cùu iní ñáhá-gǎ xii-í núu ní xíhí-gǎ núú cùrúxi sǎ cuèndá-í.

21 Te vitna ñà túú dàquee tíhù-í sǎ váha ní quide ñaha Yá Ndiöxí xii-í, chi núu ní ndàcu-o vǎ cùndècu cuèchi-o núú Yá Ndiöxí cuèndá sǎ nchìcúⁿ nihnu-o quide-o nchaa nacuáa ní cáháⁿ ndíi Moisés ní cùu ña, te àúⁿ nǎ cuu ní xíhí Xítohó Jesucristú ní cùu te núú ducaⁿ.

3

Vǎ dáñá ndèé-ó quìndáá iní-ó tnúhu Xítohó Jesucristú

1 Te nchòhó ñáyiú distrítú Galaciá, ñáyiú sa xǎndècu ichi Xítohó Jesucristú, ¿ná cuèndá ío ñí iní-ndó ñǎ cuíní-ndó tnèi-ndo nchaa tnúhu càháⁿ-gǎ?, ¿te yoo ní dádáhu ndodo iní ñáhá xii-ndo núu ducaⁿ quide-ndo? Te nàha-ndo sǎ ío váha ní dánèhé ñáhá-ndí xii-ndo nàcuáa ní cuu ní xíhí Xítohó Jesucristú.

2 Te vitna càháⁿ-ndó núu sǎ nchìcúⁿ nihnu-ndo nchàa nacuáa ní cáháⁿ ndíi Moisés ní nihí-ndó Espiritú Yá Ndiöxí ndécú ndihí-ndo, àdi sǎ ní sàndáá

iní-ndó tnũhu Xítóhó Jesucristú sá nĩ dánèhé ñáhá-ndĩ xii-ndo nĩ níhí-ndó Espíritú-gá ndécú ndĩhi-ndo.

³ Te nchòhó ío nĩ ãlquí-ndó chi Espíritú Yá Ndiõxí tá quide váha ñaha-xi xii-ndo cuáháⁿ ní cùu. ¿Te náa vitna mee-nã-ndó cuíní-ndó càda-ndo nacuaáa ta quide ñaha Espíritú-gá cuáháⁿ xii-ndo ní cùu-án?

⁴ Te sàni ìⁿ sàni úú iní-í cuendá-ndó sá àùⁿ nã cuu nándi yáha-ndo ndècu-ndo ichi Yá Ndiõxí.

⁵ Te xini-ndó sá Yá Ndiõxí ní taxi-gá Espíritú-gá ní ngúndecu ndĩhi-ndo, te ní quide-gá sá vã yõ tnàhí ndàcu cada núú-ndó ní xini-ndó. Te ducaⁿ ní quide-gá, chi ní sándáá iní-ndó-gã, dico ñá díú cuendá nchaa nàcuáa ní cachí ndíi Moisés cada ñáyiú ducaⁿ ní quide-gá.

⁶ Te ndíi Àbrahám ducaⁿ ìo ní sándáá iní ndíi Yá Ndiõxí, núú xiãⁿ ní cachí-gá sá ní cuèiú ndíi núú-gã sá dúcáⁿ ní quide ndíi.

⁷ Te càchí tnũhu ndáá-í xii-ndo sá ncháá ñáyiú sàndáá iní ñáhá xii Yá Ndiõxí dàtná ní sándáá iní ñáhá ndíi Àbrahám xii-gá, ñáyiú-án ìⁿ-ni cùú-yu ndĩhi ndíi núú-gã.

⁸ Te núú tùtú Yá Ndiõxí ní ngódó tnùnì tnũhu váha, tnũhu sá ní xáhaⁿ Yá Ndiõxí xii ndíi Àbrahám, te duha ní xáhaⁿ-gã xii ndíi: “Nchaa ñáyiú nihíi ñuyíú cada váha-í-yu sá cuendá-n”, duha ní xáhaⁿ-gã xii ndíi. Te sá dúcáⁿ ní ngódó tnùnì núú tùtú Yá Ndiõxí ndéé dàvá-án, te xiãⁿ cútùnì sá sáa nduu, te cue ñáyiú ñá túú cùu ñáyiú isràél vá cùndècu-gá cuèchi-yu núú-gã te núu na quìndáá iní ñáhã-yu xii-gá.

⁹ Te xiãⁿ núu nchaa ñáyiú sàndáá iní ñáhá xii Yá Ndiõxí cada váha ñaha-gã xii-yu dàtná ní quide váha-gá ndíi Àbrahám, chi ndíi-án ducaⁿ ní sándáá iní ñáhá ndíi xii-gá.

¹⁰ Te nchaa ñáyiú cuínì cada nchaa nàcuáa ní cáháⁿ ndíi Moisés cuendá sá cuínì-yu sá vã cùndècu-gá cuèchi-yu núú Yá Ndiõxí, ñáyiú-án dañá nihnu ñaha-gá xii-yu, chi vá ndácũ-yu cadá-yu nàcuáa sàni iní-yu, te ducaⁿ càda-gá chi quèe ndáá-xi nàcuáa càháⁿ-xi núú tùtú-gá núú càchí-xi sá ncháá ñáyiú ñá túú quide nchaandì túhú nàcuáa ní cáháⁿ ndíi Moisés te dañá nihnu ñaha-gá xii-yu.

¹¹ Te núu na càncicúⁿ nihnu-ni-o càda-o nacuaáa ní cáháⁿ ndíi Moisés, te ñá túú vèdana chindee ñaha-xi xii-o nacuaáa vá cùndècu-gá cuèchi-o núú Yá Ndiõxí. Te ndáá chi núú tùtú-gá càchí-xi sá ncháá ñáyiú sàndáá iní ñáhá xii-gá, ñáyiú ñá túú-gá cuèchi-xi ndècu ío váha ndècú-yu núú-gã.

¹² Te núu dícó ío ñáyiú quide nchaandì túhú nàcuáa ní cáháⁿ ndíi Moisés ñá, te ñá túú xini ñuhu-xi quìndáá iní-yu tnũhu Xítóhó Jesucristú, chi núú tùtú Yá Ndiõxí càchí-xi sá núu dícó ío ñáyiú ndacu cada nchaa nàcuáa ní cáháⁿ ndíi Moisés ñá, te cundecu váha-yu núú Yá Ndiõxí.

¹³ Te tnũhu ní chídó tnùnì ndíi Moisés càchí-xi sá ìo ndècu cuèchi-o núú Yá Ndiõxí cuendá sá ñã ndácú-ó càda-o nchaa nacuaáa ní cáháⁿ ndíi, te cuendá xiãⁿ tá dañá nihnu ñaha-gá xii-o cuáháⁿ. Dico Xítóhó Jesucristú ní xido-gá nchaa cuèchi-o cuendá sá vã dañá nihnu ñaha-gá Yá Ndiõxí xii-o. Te càchí-xi núú tùtú Yá Ndiõxí: “Èⁿ tée na càta caa-güedé ìⁿ yutnu, te téé-án cùú-dé téé dañá nihnu ñaha Yá Ndiõxí”, duha càchí-xi núú tùtú-gá.

¹⁴ Te ducaⁿ ní yáha Xítóhó Jesucristú, chi cuínì Yá Ndiõxí sá ndùu táhú nchaa ñáyiú ñá túú cùu ñáyiú isràél cundecu váha-yu dàtná ní nduu táhú ndíi Àbrahám ndécú váha ndíi. Te ducaⁿ ní yáha-gá cuendá nchaa nchoo ñáyiú

sàndáá iní ñáhá xii-gá ngúndecu ndihi-o Espiritú Yá Ndióxí sá nǐ cachí méé-gá taxi-gá.

Nàcuáa ní cachí Yá Ndióxí cada-gá

15 Te nchòhó cue ñáyiú ndècu ndihi-í ichi Yá Ndióxí na càchí tnúhu-í xii-ndo nàcuáa quide cue ñáyiú ñuyíú-a cuendá tecú tnùnì-gá-ndó nàcuáa quide Yá Ndióxí. Chi ñáyiú-áⁿ òré cùnì-yu cadá-yu ìⁿ sá cádà-yu, te dǐhna-gá ndátnúhu-yu te òré cúú ìⁿnuú-yu, te sáha firmá-yu ìⁿ tutú te tutú-áⁿ vǎ yǒ ìⁿ ndacu cáháⁿ sá vǎ nándǐhi-gá-xi, te ni vǎ yǒ-gá ndacu nágá tnúhu chido tnùnì núú-xí.

16 Te ducaⁿ nǐ quide Yá Ndióxí ndihi ndíi Àbrahám, chi ní xáhaⁿ-gǎ xii ndíi nàcuáa cada-gá, te tnúhu-áⁿ cúú-xí cuendá méé ndíi ndihi cuendá ìⁿ ñanì tnáhá ndíi cundecu ñuyíú-a ndéé cuéé-gá. Te núú tǔtú-gá càchí-xi sá tnúhu-áⁿ cúú-xí cuendá ìⁿ-ni ñanì tnáhá ndíi te ñá díú cuendá nchaá-yu. Te ñanì tnáhá ndíi téé cùu cuendá tnúhu-áⁿ cúú Xítóhó Jesucristú.

17 Te na càchí tnúhu-í xii-ndo sǎ Yá Ndióxí ní quide ndáá duuⁿ-gá ndihi ndíi Àbrahám nàcuáa cada-gá. Te sa ní cuu cúmì cièndú ócò úxí cuíá sǎ dúcáⁿ nǐ xáhaⁿ Yá Ndióxí xii ndíi Àbrahám, te dǎtnùnì ní xáhaⁿ-gǎ xii ndíi Moisés chido tnùnì ndíi nàcuáa cada ñáyiú, te nchaa tnúhu ní chídó tnùnì ndíi Moisés ñá túú dàquee tǐhú-xi tnúhu sá nǐ xáhaⁿ Yá Ndióxí xii ndíi Àbrahám nàcuáa cada-gá.

18 Te núú dícò cuendá nchaa tnúhu sá nǐ chídó tnùnì ndíi Moisés ní nánìhí tǎhú-ó ñá, te ñá túú-gǎ xínì ñùhu-xi cada cuendá-ó tnúhu ní xáhaⁿ Yá Ndióxí xii ndíi Àbrahám cada-gá ní cùu te núú ducaⁿ. Te ndíi-áⁿ nǐ nanìhí tǎhú ndíi chi ducaⁿ nǐ cachí Yá Ndióxí cada ñaha-gǎ xii ndíi.

19 Te nchaa tnúhu ní cáháⁿ ndíi Moisés ní ngódó núú-xí nchìcúⁿ nihnu ñáyiú cuendá ducaⁿ cùtnunì iní-yu sá ndécú cuèchi-yu, te nchìcúⁿ nihnu-ní-yu ndéé ní sáá nduu nǐ quexìo Yaá cúú ñanì tnáhá ndíi Àbrahám, chi Yaá-áⁿ ducaⁿ nǐ xáhaⁿ Yá Ndióxí quixi-gá cada váha-gá nchaa ñáyiú. Te nchaa tnúhu ní chídó tnùnì ndíi Moisés, chi Yá Ndióxí ní tendaha-gǎ cue espíritú xínú cuèchi núú-gǎ ní sáhá-xi ní xítñúhu ñaha-xi xii ndíi nàcuáa danèhé ndíi ñáyiú.

20 Te Yá Ndióxí ñá túú ní cáháⁿ-gá núú méé ñáyiú, chi ndíi Moisés ní cáháⁿ ndíi yuhu-gá núú-yu, dico cùtnáhá ní cáháⁿ ndihi-gá ndíi Àbrahám chi núú méé núú ìⁿ ndíi ndihi-gá ní xáhaⁿ-gǎ xii ndíi nàcuáa cada-gá.

Nàcuáa ndíu nchaa tnúhu ní chídó tnùnì ndíi Moisés

21 Te nchaa nàcuáa ní chídó tnùnì ndíi Moisés, ndihi nchaa nàcuáa ní xáhaⁿ Yá Ndióxí xii ndíi Àbrahám cada-gá, ñá túú dàquee tǐhú tnáhá-xí. Te núú dícò nanìhí tǎhú ñáyiú nchìcúⁿ nihnu nchaa nàcuáa ní cáháⁿ ndíi Moisés ñá te cudú-yu núú-gǎ cuendá-ni sá nchìcúⁿ nihnú-yu nchaa nàcuáa ní cáháⁿ ndíi ní cùu.

22 Te núú tǔtú Yá Ndióxí càchí-xi: “Nchaa nchòhó ñáyiú ndècu ñuyíú ndécú cuèchi-ndo”, duha càchí-xi. Te ducaⁿ càháⁿ-xi cuendá quíndáá iní-ó Xítóhó Jesucristú, te nanìhí tǎhú-ó chi ducaⁿ nǐ cachí Yá Ndióxí cada-gá.

23 Te cùtnáhá vátá cùndècu ndihi-gá-ó tnúhu Xítóhó Jesucristú, te nchìcúⁿ nihnu-o nchaa nàcuáa ní cáháⁿ ndíi Moisés, te ní cùtnùnì iní-ó sǎ ò ndècu cuèchi-o ni cùu. Te ducaⁿ-ni nchìcúⁿ nihnu-o ndéé ní sáá nduu nǐ quexìo Xítóhó Jesucristú ñuyíú-a, te ní sándáá iní-ó-gǎ.

24 Te nchaa tnúhu sá nǐ chídó tnùnì ndíi Moisés ní sanu ichi ñaha-xi xii-o nàcuáa cada-o cùndecu-o, te ducaⁿ-ni sanu ichi ñaha-xi xii-o ndéé ní sáá nduu

ní quexio Xítoho Jesucristú ñuyíú-a. Te ducaⁿ ní cuu cuendá quíndáá iní-ó-gã, te vá cúndecu-gá cuéchi-o núú Yá Ndióxi.

²⁵ Te vitna ní ngúndecu ndihi-o tnúhu Xítoho Jesucristú, te ñá túú-gã xíní ñúhu-xi canu ichi ñaha nchaa tnúhu ní chídó tnúni ndíi Moisés.

²⁶ Te vitna tnàhá nchaa nchòhó cúú-ndó dèhe Yá Ndióxi, chi ní sándáá iní-ndó Xítoho Jesucristú.

²⁷ Te nchòhó ní sandute-ndo dàtná càchí-gá, te ndècu-ndo ndihi-gá, te quíde-ndo nchaa nacuaá ní cáháⁿ-gá ndécú-ndó, te ío ndècu yíñuhu-ndo núú Yá Ndióxi dàtná ndécú yíñuhu mee Xítoho Jesucristú.

²⁸ Te vitna ìⁿ-ní cùu-o nchaa-o ndècu-o ndihi Xítoho Jesucristú cuèi cùu-o ñáyiu isràél àdi ñá túú cùu-o, te cuèi cùu-o ñáyiu ñá túú tnàhí dàñá quee núú chíúⁿ pàtróóⁿ-xi àdi cuu-o ñáyiu dàñá queé núú chíúⁿ pàtróóⁿ-xi, te cuèi téé te cuèi ñadihí ìⁿ-ní cùu-o nchaa-o ndècu-o ndihi Xítoho Jesucristú.

²⁹ Te nchòhó ndécú ndihi-ndo Xítoho Jesucristú, te cùu-ndo datná cue ñani tnàhá ndíi Àbrahám, chi ní nduu táhú-ndó cùndecu váha-ndo núú Yá Ndióxi dàtná ní nduu táhú ndíi-áⁿ ndécú váha ndíi núú-gã, te ducaⁿ chi mee-gã ducaⁿ ní cachí-gá cunduu.

4

¹ Te nchòhó xíní-ndó sã ìⁿ té líhli chi vátá nãgá cuañaha tãtã-dè cuu cuendá-dé chi líhli-dé, te ìⁿ-ní cùu-dé ndihi téé xínu cuechi, dico na sãá nduu cuèhnu-dé, te nduu táhú-dé nchaa sã ndécú ndihi tãtã-dé.

² Te xitó-yu té líhli-áⁿ sãhnú-dè ndéé sãá nduu ní cachí tãtã-dé sã cuañaha-dé sã ndúú táhú-dé.

³ Te ducaⁿ sãtnahá-xi cùu nchoo, chi nchicúⁿ nihnu-o nchàa nacuaá ní cáháⁿ cue téé ní xíndecu ndéé sanaha ní cùu.

⁴ Te ní sãá nduu ní quíde Yá Ndióxi dàtná ní cachí-gá, te ní tendaha-gã Déhe-gá Xítoho Jesucristú ní quixi-gá ñuyíú-a, ní dácácú ñaha ìⁿ ñadihí te ní cuu-gã ñáyiu, te ní quíde-gã nchaa nacuaá ní cáháⁿ ndíi Moisés.

⁵ Te ducaⁿ ní tendaha Yá Ndióxi Déhe-gá cuendá sã vã cáncicúⁿ nihnu-gá-ó nchàa nacuaá ní chídó tnúni ndíi Moisés cuendá ducaⁿ te cuu-o dèhe Yá Ndióxi.

⁶ Te Yá Ndióxi ní taxi-gã Espiritú Déhe-gá Xítoho Jesucristú ndécú ndihi-ndo chi cùu-ndo déhe-gá, te Espiritú-áⁿ chíndèe ñaha-xi xii-ndo te càchí-ndó: “Yòhó Dútú Ndióxi cúú-n Tãtã méé-ndí”, duha càchí-ndó.

⁷ Te xiãⁿ cútñuni iní-ndó sã cúú-ndó dèhe Yá Ndióxi vitna, te ñá túú-gã cúú-ndó dàtná cue ñáyiu ñá túú tnàhí dàñá quee núú chíúⁿ pàtróóⁿ-xi. Te sã dúcáⁿ cùu-ndo déhe-gá, te Xítoho Jesucristú taxi-gã nchaa sã váha ní cachí Yá Ndióxi nduu táhú-ndó.

Té Pãblú ío sàni iní-dé cuendá nchaa ñáyiu ndècu ichi Xítoho Jesucristú

⁸ Te cútñahá vátá quíndáá-gã iní-ndó tnúhu Yá Ndióxi ní xínu cuechi-ndo núú nchàa sã cachí-yu cùu ndiòxi te ñá ndáá sã ndiòxi cúú-xi.

⁹ Te vitna nchòhó cáháⁿ ndihi-ndo Yá Ndióxi, te mee-gã xíní ñahá-gã xii-ndo, te ñá túú nduu váha-xi nanchòcáva iní-ndó càdà tucu-ndo nacuaá ní xóo cada-ndo díhna, chi nchaa xiãⁿ ñá túú vèdana nàndihi-xi.

¹⁰ Te nchòhó cànehe íi-ni-ndo nduu cachí-ndó íi, te díu-ni ducaⁿ quíde-ndo dava yoó ndihi dava cuiá, te ndi tnahá nduu sàcòo vico díu-ni ducaⁿ quíde-ndo cànehe íi-ndó ndúú-áⁿ.

¹¹ Te ío sàni iní-í cuendá-ndó, chi na cuáháⁿ àúⁿ nã cuu ní dánèhé ñahà-í xii-ndo tnúhu Yá Ndióxi.

12 Te càháⁿ ndàhú-í núú nchòhò ñáyiu ndècu ndihi-í ichi Xítóhó Jesucrìstú sá cádá-ndó dàtná quidè-í ñá túú nchìcúⁿ nihnu-í nchaa tnúhu ní cáháⁿ ndíi Moisés, chi yúhú quidè-í vitna dàtná ní quide nchòhò ñá túú ní cànchicúⁿ nihnu-ndo nàcuáa ní cáháⁿ ndíi. Te cútñàhá ní xíndecu ndihi ñaha-í xii-ndo ní quide váha ñaha-ndo xii-í.

13 Te sa ñaha-ndo sá cútñàhá ní cáháⁿ-í tnúhu Xítóhó Jesucrìstú núú-ndó ndéé díhna ní cuhú-í, núú xíǎⁿ ní xíndecu ndihi ñaha-í xii-ndo ní cáháⁿ-í tnúhu-gá núú-ndó.

14 Te cuéhé sá ní tnahá-í-áⁿ cúú-xí ìⁿ cuéhé sá vǎ yò tñahí cundee ìní-xi cundecu ndihi ñaha xii-í ní cùu, dico nchòhò chi ío váha ní cáháⁿ ndihi ñaha-ndo xii-í, te ñá túú ní sàni cuéhé ní sàni duha ìní-ndó cuendá-í, te ní cáháⁿ ndihi ñaha-ndo xii-í dàtná tnúhu sá yúhú cùú-í ìⁿ espíritú xínú cuèchi núú Yá Ndiòxí àdi datná méé Xítóhó Jesucrìstú.

15 ¿Te ná ní tnahá-ndó núu ñá túú-gǎ sání váha ìní-ndó cuendá-í dàtná ní xóo cada-ndo ndéé díhna ío váha ní xóo caní ìní-ndó cuendá-í? Te na càchí tnúhu ndáá-í xii-ndo sǎ ío ní cuu ìní ñáhá-ndó xii-í cútñàhá ní xíndecu ndihi ñaha-í xii-ndo, te nándi sá ndécú ndihi-ndo taxi-ndo xii-í ní cùu, te núu dicó sá cúú te ndéé tinùu-ndo tava-ndo te taxi-ndo xii-í ní cùu.

16 ¿Te náa cùu úhú ìní ñáhá-ndó xii-í vitna cuendá sá cáháⁿ-í tnúhu ndáá tnúhu Yá Ndiòxí núú-ndó-ǎⁿ?

17 Te ío ñáyiu ío váha càháⁿ ndihi ñaha xii-ndo, dico ñáyiu-áⁿ ñúhú cuèhé ìní-yu, chi cuíní-yu sá vǎ cúú-gǎ cáháⁿ ndihi tñaha-o, chi mee-nǎ-yu cundecu ndihi-ndo cuíní-yu.

18 Te váha quide ñáyiu càháⁿ ndihi ñaha xii-ndo ndihi tnúhu yíñùhu, te núu cuíní-yu cada-yu ìⁿ sá váha sá cúú-xí-ndó. Te ducaⁿ-ni na càdá-yu cuèí òré ñá túú ndècu ndihi ñaha-í xii-ndo.

19 Te nchòhò ñáyiu ní sanu ichi-í ichi Xítóhó Jesucrìstú càchí tnúhu-í xii-ndo sǎ quidè-xí ìní-í dàtná quidè-xí ìní ìⁿ ñadìhí ñaha sa ní tnahá òré cacu déhe-xi, te ducaⁿ quide-xi ìní-í, chi ío vǎi sàni ìní-í cuendá-ndó dàtná ní xóo cada-í ndéé díhna, te ducaⁿ-ni càdá-í ndéé ná sáá nduu càda-ndo nchaa nacuáa càháⁿ Xítóhó Jesucrìstú.

20 ¿Te ío váha cada-xi te núu dicó tnavíi sa ndècu ndihi ñaha-í xii-ndo cuendá cáháⁿ-í núú-ndó nàcuáa cada-ndo, te ñá cútñàní ìní-í nása cada-í cuendá-ndó!

Cuendá ndíi Àgár ndihi ndíi Sǎrá

21 Te nchòhò ñáyiu cuíní canchicúⁿ nihnu nchaa tnúhu ní cáháⁿ ndíi Moisés, ¿náa ñá túú tècú tñuní-ndó nàcuáa càháⁿ-xi tnúhu ní chídó tñuní ndíi?

22 Chi càchí tnúhu ní chídó tñuní ndíi-áⁿ sǎ ndíi Àbrahám ní xíndecu úú déhe ducuⁿ ndíi, te ìⁿ-dé ní núu déhe ndíi ndihi ñadìhí méé ndíi ndíi Sǎrá, te ìngá-dé ní cuu-dé déhe ndíi ndihi ìⁿ ndíi ní xinu cuechi núú-yu ní xínani Àgár.

23 Te sá dúcáⁿ ní cacu déhe ndíi Sǎrá, chi mee Yá Ndiòxí ní cundàhú ìní ñáhá-gǎ xii-aⁿ, chi ducaⁿ ní cacú-gǎ cada-gǎ. Dico ndíi ní xinu cuechi-áⁿ chi ducaⁿ tñahí ní nduu táhú ndíi-áⁿ sǎ cóo déhe ndíi.

24 Te na càchí tnúhu-í xii-ndo ná cúú sǎ nánèhé ndí ndúú cue ndíi òhí-áⁿ. Te úú xito ní cáháⁿ Yá Ndiòxí nàcuáa cada-gǎ, te ìⁿ ndíi-áⁿ nánèhé ndíi nàcuáa ní cáháⁿ Yá Ndiòxí xito díhna nuu, te ìngá tucu ndíi-áⁿ nánèhé ndíi nàcuáa ní cáháⁿ tucu-gǎ xito cùu uú. Te ndíi Àgár-áⁿ nánèhé ndíi nàcuáa ní xáhaⁿ Yá Ndiòxí xii ndíi Moisés yucu Sináí cada ñáyiu, te nchaa ñáyiu nchìcúⁿ nihnu nchaa tnúhu-áⁿ cúú-yu dàtná déhe ndíi Àgár téé ní xinu cuechi, chi téé-áⁿ

ñà túú tñahí ní dàñá-dé quee-dé núú chíúⁿ pàtróóⁿ-dě, te ducaⁿ sàtnahá-xi cùú-yu chi nchìcúⁿ nihnú-yu nchaa nàcuáa ní xáhaⁿ Yá Ndióxi xii ndíi Moisés.

²⁵ Te tñúhu Àgár quée-xi: Yucu Sinàí, te yucu-án yíndèhu-xi nacióⁿ Àrabíá. Te ndíi Àgár-án nánèhé tucu ndíi cue ñáyiú ndècu ñuú Jerusàlén, chi ñáyiú-án ndécú-ní-yu dàtná ní xíndecu ndíi Àgár ndíhi déhe ndíi, chi cue ndíi-án ní cuu cue ndíi ñáyiú ñá túú tñahí ní dàñá quee núú chíúⁿ pàtróóⁿ-xi, te ducaⁿ sàtnahá-xi cùú ñáyiú-án chi nchìcúⁿ nihnu-ní-yu nchaa nàcuáa ní cáháⁿ ndíi Moisés.

²⁶ Dico nchoo ní nduu táhú-ó cùndecu-o ñuú Jerusàlén sáa núú ndécú Yá Ndióxi, te vitna chi ñá túú-gá nchìcúⁿ nihnu-o nchaa nacuáa ní cáháⁿ ndíi Moisés.

²⁷ Te duha càháⁿ-í, chi núú tütú Yá Ndióxi càchí-xi:

Yòhò ñaha ní nduu táhú vǎ cóó dèhe-xi ní cùú, vitna cana saa-n sǎ cúdǎ ìní-n cuèi vátá quìní-gá-n nǎsa càcu ìⁿ landú.

Te cuèi ní cuu táhú-n sǎ vǎ cóó dèhe-n ní cùú dico ío-gá titní dèhe-n còo dacúúxi xíchí ní cuu táhú tñahí sǎ cóó dèhe-xi.

Duha càchí-xi núú tütú-gá.

²⁸ Te nchoo cuè ñáyiú ndècu ichi Xítóhó Jesucristú vitna cùú-o datná ndíi Isàác, chi ndíi-án ní cacu ndíi, chi mee Yá Ndióxi ní cachí-gá sǎ cǎcú ndíi. Te ducaⁿ sàtnahá-xi cùú nchoo chi ní nduu-o dèhe-gá vitna chí ducaⁿ ní cachí tucu-gá cunduu.

²⁹ Te dèhe ndíi Àgár ní nduu táhú tñahí ndíi sǎ cǎcú ndíi ñuyúú-a, te ndíi-án ní cuu úhú ìní ndíi ndíi Isàác, te ndíi Isàác-án chi Espíritú Yá Ndióxi ní quide ní cacu ndíi. Te ducaⁿ sàtnahá-xi cùú vitna, chi nchaa nchoo ñáyiú ndècu ndíhi Espíritú Yá Ndióxi cúú úhú ìní ñáhá ñáyiú xii-o.

³⁰ Te núú tütú Yá Ndióxi càchí-xi: “Chí nǎcuicúⁿ xíchí xínú cuèchi ndíhi dèhe-xi na nùhú-yu, chí dèhe xíchí xínú cuèchi-án ñà túú nǎ níhí-dě nduu táhú-dě, chí mee-ní dèhe ñaha ndècu vehe-xi nduu táhú-dě sǎ cuǎñaha tǎtá-dě”, duha càchí-xi núú tütú-gá.

³¹ Te nchoo cuè ñáyiú ndècu ichi Xítóhó Jesucristú ñá túú-gá cúú-ó dàtná cúú dèhe ndíi ní xinu cuechi-ǎⁿ, chí ní cuu-o vitna datná cúú ndíi ní nduu táhú nchaa sǎ ní sǎñaha tǎtá-xi-áⁿ. Te ducaⁿ ní cuu, chí Yá Ndióxi ní dǎcǎcu ñaha-gǎ xii-o cuèndá sǎ vǎ cǎnchìcúⁿ nihnu-gá-ó nchaa nacuáa ní cáháⁿ ndíi Moisés.

5

Canchicúⁿ nihnu-ni-o ichi Xítóhó Jesucristú

¹ Te Xítóhó Jesucristú ní quide-gá nàcuáa vǎ cǎní ìní-ó sǎ nǎníhí tǎhú-ó te núu na cǎnchìcúⁿ nihnu-o nàcuáa ní cáháⁿ ndíi Moisés, te ñuú-ni ducaⁿ cǎni ìní-ó cùndecu-o te vǎ ngòo cǎni ìní-ó sǎ nǎníhí tǎhú-ó te núu na cǎnchìcúⁿ nihnu-o càda-o nacuáa ní cáháⁿ ndíi, chí núu ducaⁿ na càda-o te ío dandòho-o mee-o datná ní xóo ndoho-o cùtñahá vátá cùndecu-gá-ó ìchi-a.

² Te yúhú té Pǎblú cuìní-í sǎ cùndedóho-ndo ìⁿ tñúhu na càháⁿ-í-a. Te núu nchòhó cuáha-ndo señá ñii-ndo cuèndá sǎ sǎndáá ìní-ndó nàcuáa ní cachí ndíi Moisés cada-ndo, te núu ducaⁿ na càda-ndo ña, te àúⁿ nǎ cuu ndècu-ndo ichi Xítóhó Jesucristú te núu ducaⁿ.

³ Te dàtná ní cachí-í xii-ndo, te ñuú-ni ducaⁿ càháⁿ tucu-í vitna sǎ núu ndèda-ni cǎa ìⁿ tée na cuáha-dé señá ñii-dé, te xini ñuhu-xi sǎ dàcuítí tǎu-dé cada-dé nchaa nàcuáa ní cáháⁿ ndíi Moisés.

4 Te nchaa nchòhò ñáiyu sàni iní sá ñà túú-gã cuéchi-xi ndècu núú Yã Ndiòxí cuèndá sá nchicúⁿ nihnu-ndo nchàa nacuáa ní cáháⁿ ndíi Moisés, ñá túú-gã ndécú-ndó ndíhi Xítohó Jesucristú, te ni Yã Ndiòxí ñá túú-gã cùndahú iní ñáhá-gã xii-ndo càda váha ñaha-gã.

5 Dico nchaa nchoo ñáiyu sàndáá iní ñáhá xi-gã cùdiu-o núú-gã, chi chindee ñaha Espíritú-gã xii-o, te ndètu cahnu-ná-ó sàa nduu cùñaha núú Yã Ndiòxí xii-o sá cùdiu-o núú-gã.

6 Te nchoo cuè ñáiyu ndècu ndíhi Xítohó Jesucristú ìⁿ-ni quide-xi cuéi na cuáha-o sèñá ñìⁿ-o àdi vá cuáha-o, chi ñá túú chindee ñaha-xi xii-o nacuáa cundecu váha-o ndíhi-gã. Te ìⁿdíi díi-ni sá xíní ñùhu-xi quindáá iní-ó Xítohó Jesucristú, te núu ducaⁿ na càda-o te cuu iní-ó cuè tñaha ñáiyu-o.

7 Te nchòhò ío váha quide-ndo ndecu-ndo ichi Yã Ndiòxí ní cùu, te vitna cùñùhu-í sá ñà túú-gã sàndáá váha iní-ndó tñùhu-gã, te ducaⁿ quide-ndo chi ndècu ñáiyu sànu ichi ñaha xii-ndo ingá ichi.

8 Te ñá díú Yã Ndiòxí Yáa ní cáháⁿ ñáhá xii-ndo ducaⁿ ni cachí-gã cada-ndo sá vã quindáá-gã iní-ndó tñùhu-gã.

9 Te nchòhò xíní-ndó sá núu luha levadurá ná quíhu yuchi te dàndaa-xi. Ducaⁿ sàtnahá-xi cùu ñáiyu dàndahú ñáhá xii-ndo, chi cuíní-yu dàcuíta nihnu ñáhá-yu xii-ndo nchàa-ndo.

10 Te yúhú cùtnùní ndáá iní-í sá Xítohó Jesucristú chindee ñaha-gã xii-ndo cuèndá sá ñá túú ñágá tñùhu quindáá iní-ndó, dico nchaa ñáiyu ducaⁿ dàndahú ñáhá xii-ndo nacháhu-yu núú Yã Ndiòxí nchaa sá quidé-yu cuèi náí-gã ñáiyu cúú-yu.

11 Te càchi tñùhu-í xii nchòhò ñáiyu ndècu ndíhi-í ichi Yã Ndiòxí sá núu dìcò dànehé-ni-í ñáiyu sá cuáha-yu sèñá ñìⁿ-yu dàtná ní cachí ndíi Moisés ñá, te vá yõ cuu úhú iní ñáhá xii-í ní cùu, te ni vã tñù úhú iní-yu cuèndá sá ní xíhí Xítohó Jesucristú núú cùrúxí ní cùu.

12 Te nchaa ñáiyu dàsatú iní ñáhá xii-ndo sã cuáha-ndo sèñá ñìⁿ-ndo, te váha-gã sá ná cádá-yu mèe-yu ìⁿ tñùndòho, te ñá díú sã dúcáⁿ cànuichi ñahá-yu xii-ndo cùndecu-ndo.

13 Te nchòhò ñáiyu ndècu ndíhi-í ichi Xítohó Jesucristú diu-gã ní taunihnu ñaha-gã xii-ndo cuèndá sá vã cànchicúⁿ nihnu-gã-ndó nchàa nacuáa ní cáháⁿ ndíi Moisés, dico vá cání iní-ndó sã sã dúcáⁿ ní taunihnu ñaha-gã xii-ndo, te cuu-ni cada-ndo nãndi sá cuèhé sá dúhá vèxi iní-ndó, dico cuu iní tñáhá-ndó ìⁿ ìⁿ-ndo te chindee tñaha-ndo.

14 Chi ducaⁿ cáháⁿ Yã Ndiòxí sá cúú iní-ó cuè tñaha ñáiyu dàtná cúú iní-ó mèe-o. Te núu ducaⁿ na càda-o, te quide-o nchaa nacuáa tàú-xi cada-o dàtná cáháⁿ nchaa tñùhu ní chídó tñùní ndíi Moisés.

15 Te núu nchòhò cúú úhú iní tñáhá-ndó ndècu-ndo, te ñá túú quide váha-ndo te núu ducaⁿ quide-ndo, dico yúhú càchí-í sá vã dúcáⁿ-gã cada-ndo cùndecu-ndo cuèndá sá vã dàcuíta nihnu tñaha-ndo.

Nacuáa sàni iní ñáiyu ndècu ichi cuèhé ichi duha ndíhi nacuáa sàni iní ñáiyu ndècu ndíhi Espíritú Yã Ndiòxí

16 Te na càchí tñùhu-í xii-ndo sã cádá-ndó nchàa nacuáa cuíní mèé Espíritú Yã Ndiòxí cada-ndo, te ducaⁿ te vá cání-gã iní-ndó càda-ndo nãndi nchaa sá cuèhé sá dúhá sàni iní mèé-ndó.

17 Chi nchaa xíáⁿ ñá túú tñáhá tñùhu-xi ndíhi Espíritú Yã Ndiòxí. Te diu-ni ducaⁿ quide Espíritú Yã Ndiòxí, chi ñá túú tñáhá iní-xi nchaa sá cuèhé sá dúhá

sàni iní-ndó. Te sá dúcáⁿ ñà túú tnàhá tnúhu tnàha-xi xiáⁿ ñá túú nìhí ndéé-ndó càda-ndo ìⁿ sá vâha sàni iní-ndó càda-ndo.

¹⁸ Te núu quide-ndo nchaa nacuaá sànu ichi ñaha Espiritú Yă Ndiôxi, te ñá túú-gă táxi tnùnì ñáhá nchaa tnúhu ní chídó tnùnì ndí Moisés xii-ndo.

¹⁹ Te nchaa ñáyiú iní-yu nchaa nacuaá quide ñáyiú quide cuehé quidé dùha. Te duha quidé-yu: Cue tée càháⁿ ndihì-güedé ñáyiú dihí te ñá díú ñadihí-güedé cù-yu, te ñiú-ni ducaⁿ xiquide cue ñáyiú dihí, te nándi-gá nchaa sá cuehé sá dúhá cuáháⁿ véxi-yu quidé-yu.

²⁰ Te quide cahnú-yu nchaa sá càchí-yu cùu ndiôxi te ñá ndàá sá ndiôxi cúú-xí, te quide nduu tnahá-yu, te cùu úhú iní tnáhâ-yu, te nàâ-yu, te cùu cuiñú tnáhâ-yu, te ío yáchí cüdèèⁿ-yu, te ndúcú-yu mee-ni sá cúú-xí mèe-yu, te ñá túú cùu ìⁿnuú-yu cundecú-yu, te quide ðíⁿ tnahá-yu.

²¹ Te cùu cuedú iní-yu nchaa sá ndécú ndihì dava-gá-yu, te sàhni tnahá-yu, te ío quihú-yu, te ndí cuu ndi cuú-yu quidé-yu nchaa sá cuehé sá dúhá, te nándi-gá nchaa sá cuehé sá dúhá quidé-yu. Te sa càchí tnúhu-í xii-ndo sá ncháá ñáyiú ducaⁿ xiquide vá ndúú tãhú-yu cundecú-yu núu ndécú Yă Ndiôxi táxi tnùnì-gă.

²² Dico Espiritú Yă Ndiôxi chindèe ñaha-xi xii-o cuu iní tnáhâ-ó, te cudíí ìní-ó ndècu-o, te ío váha cùu iní-ó, te càhnu iní-ó, te váha iní-ó, te cundahú iní tnáhâ-ó, te quide ndáá-ó ndècu-o.

²³ Te ndáhú iní-ó, te quide-o nchaa nacuaá tàú-ó càda-o, te nchaa xiáⁿ chindèe ñaha Espiritú Yă Ndiôxi quidé-ó, te núu ducaⁿ quide-o, te vá yôo ìⁿ-gă cáháⁿ sá ñà túú quide váha-o ndècu-o.

²⁴ Te nchoo cue ñáyiú ndècu ndihì Xítohó Jesucrístú, sa ñaha-o sá nì xíhí-gă núú cùrúxí sá cuendá-ó, núu xiáⁿ duuⁿ duuⁿ ní dãnâ-ó ncháa ichi cuehé ichi duha, te ñá túú-gă táxi tnùnì ñáhá nì ìⁿ sá cuehé sá dúhá sá nì xóo cani iní-ó ní cùu.

²⁵ Te vitna ní ngúndecu ndihì-o Espiritú Yă Ndiôxi chindèe ñaha-xi, te xini ñuhu-xi sá cádá-ó nacuaá sànu ichi ñaha Espiritú-gă cada-o.

²⁶ Te vá cádá càhnu-o mee-o, te vá ndúcú-ó plètú, te ni vã cúú cuedú iní-ó sã ndécú ndihì tnaha ñáyiú-o.

6

Chindee tnàha-o ìⁿ ìⁿ-o

¹ Te nchóhó ñáyiú ndècu ndihì-í ichi Xítohó Jesucrístú càchí tnúhu-í xii-ndo sá núu ìⁿ ñáyiú ndècu ndihì-ndo ichi-gă ní quidé-yu ìⁿ sá ñà túú tàú-yu cadá-yu núú-gă, te nchóhó ñáyiú quide váha ndècu ndihì Espiritú Yă Ndiôxi cáháⁿ-ndó dôho cue ñáyiú ducaⁿ xiquide-áⁿ cuendá nucúnu ichí-yu, te vii vii cáháⁿ ndihì-ndó-yu, te ío coto-ndo mèe-ndo cuendá sá vã cádá-ndó ìⁿ sá ñà túú tàú-ndó càda-ndo núú-gă.

² Te ío chindee tnàha-ndo, te cuáha tnàha-ndo tnúhu ndee ìní cundecu-ndo cuendá nchaa sá yãha-ndo. Te núu ducaⁿ na càda-ndo, te quide-ndo nchaa nacuaá ní cáháⁿ Xítohó Jesucrístú cada-o.

³ Te núu ío ìⁿ-ndo càchí-ndó sã ío váha quide-ndo ndecu-ndo ichi Yă Ndiôxi te ñá ndàá ñá, te ðicó dándahú-ndó mèe-ndo sá dúcáⁿ quide-ndo.

⁴ Te ndi ðíⁿ ndi ðíⁿ càda cuendá-ndó núu quide váha-ndo ndècu-ndo àdi ñá túú quide váha-ndo. Te núu quide váha-ndo ndècu-ndo ña, te cudíí ìní-ndó sá cúú-xí mèe-ndo, te vá caní iní-ndó sá quidé váha-gă-ndó dàcúúxí dàva-gă-yu.

⁵ Chi tàú-ó sǎ ndí dǐíⁿ ndí dǐíⁿ càda cuendá-ó nàcuáa ndècu-o.

⁶ Te nchaa nchòhó ñáyiú òcuaha tnúhu Yá Ndióxi chindee-ndo cuè téè òcuaha ñaha xii-ndo tnúhu-gá cuáñaha-ndo nǎndi sá xini ñuhu-güedé.

⁷ Te vá dándàhú-ndó mèe-ndo cundecu-ndo, chi vá cúú cùdiquí ndeé-ó Yá Ndióxi, chi nchòhó xini-ndó sǎ núu na càda váha-o cundecu-o, te cùu-xi ñⁿ sá váha sá cúú-xí-ó, dico núu vá cáda váha-o ña, te ío ndoho-o te núu ducaⁿ na càda-o.

⁸ Te núu quide-o nchaa sá cuèhé sá dúhá sàni iní-ó, te diu-ni xiǎⁿ dàcuíta nihnu ñaha-xi xii-o, dico núu quide-o nchaa nacuáa sànu ichi ñaha Espiritú Yá Ndióxi xii-o, te cundecu ndíhi-o Yá Ndióxi ní caa ní quíhiⁿ.

⁹ Te xini ñuhu-xi vá dáñá ndeé-ó càda váha-o cundecu-o, te ducaⁿ te sáá nduu càda váha ñaha Yá Ndióxi xii-o, te núu vá ná túhú iní-ó càda váha-o cundecu-o.

¹⁰ Te cada-o sǎ váha sá cúú-xí nchàa tnaha ñáyiú-o vitna ndecu-o ñuyiú-a, te ío-gá tàú-ó chindee-o cue ñáyiú ndècu ndíhi-o ichi Xitohó Jesucristú.

Tnúhu ndéé núú ní ndíhi-ná

¹¹ Te cundehe-ndo sǎ ndáa ndáa lètrá tèe-í núú tütú-a sá cúú-xí-ndó.

¹² Te nchaa ñáyiú quide yicá sá cuáha-ndo sèñá ñí-ndo dàtná ní cachí ndíi Moisés, ñáyiú-áⁿ cúú-yu ñáyiú cuini cudíu núú tnàha ñáyiú-xi. Te ducaⁿ quidé-yu cuendá sá vá ndóhó-yu cuendá nchaa tnúhu sá dánèhé ñáhá sǎ ní xihí Xitohó Jesucristú núú cùrúxi.

¹³ Te ní ñáyiú sa ní ngúndecu ndíhi sèñá ñí-xi ñá túú quidé-yu nchaa nàcuáa ní cáháⁿ ndíi Moisés, dico mèe-yu cuini-yu sá cuáha-ndo sèñá ñí-ndo. Te ducaⁿ quidé-yu chi quide cahnú-yu mèe-yu núú nchàa dava-gá ñáyiú.

¹⁴ Te yúhú chi ñá túú quide cahnu-í mèe-í cuendá nchaa sá quidé-í, chi mee-ni sǎ ío cùu váha iní-í sá Xitohó Jesucristú ní xihí-gá núú cùrúxi cuendá-ó. Te diu cuendá sá ní xihí-gá ñá túú-gǎ ndècù-í ichi cuèhé ichi duha, te ní ñá túú-gǎ táxi tnùní ñáhá ní ñⁿ sá cuèhé sá dúhá xii-í.

¹⁵ Te ñá túú nǎ chindèe ñaha-xi xii-o cuéi na cuáha-o sèñá ñí-o àdi vá cuáha-o, chi ndècu ndíhi-o Xitohó Jesucristú, te ní nduu-o dàtná ñⁿ ñáyiú saa, te xiǎⁿ cúú-xí sǎ ío-gá xini ñuhu-xi.

¹⁶ Te xicáⁿ táhú-í núú Yá Ndióxi sá ncháá nchòhó ñáyiú quide nchaa nacuáa càháⁿ-í-a cundecu nahi-ndo, nchòhó ñáyiú cùu cuendá Yá Ndióxi dàtná ñáyiú isràel chi ñáyiú-áⁿ ní cachí-gá sá cúú cuendá-gá. Te mee-gǎ ío cundàhú iní ñáhá-gǎ xii-ndo chindee ñaha-gá.

¹⁷ Te není vitna cuini-í sǎ vá yóo ñⁿ-gá chidácá nihnu ñaha xii-í cuendá chiunⁿ quide-í, chi yayàcáⁿ sa ní nduu tìlòhó ñí-í cuendá sá ndòhò-í cuendá Xitohó Jesucristú.

¹⁸ Te nchòhó ñáyiú ndècu ndíhi-í ichi Xitohó Jesucristú xicáⁿ táhú-í núú-gǎ sǎ ío na chindee ñaha-gá xii-ndo nchàa-ndo. Te ducaⁿ na cùnduu. Te ío chí cáda ndèe iní-nǎ vitna.

TUTÚ NÍ CADÚHA TÉ PĀBLÚ QUIHIⁿ NDAHA ÑÁYIU ÑUÚ ÉFESÚ

Té Pāblú cādúha-dé tutú quíhíⁿ ndaha ñáyiu xĩndecu ichi Xítohó Jesucristú ndécú ñuú Éfesú

¹ Yúhú té Pāblú ní tendaha ñaha Yá Ndióxi cáháⁿ-í tnúhu Xítohó Jesucristú núú ñáyiu, chi ducaⁿ ní cachí Yá Ndióxi cunduu, te vitna cādúha-í tutú-a cuendá daquixi-í ndaha nchaa nchòhò ñáyiu cùu cuendá Yá Ndióxi xĩndecu ñuú Éfesú, te diu-ni nchòhó cúu-ndó ñáyiu sàndáá iní ñáhá xii Xítohó Jesucristú.

² Te xicáⁿ táhù-í núú Dútú Ndióxi Yaá cúu Tátá-ó, ndihi núú Xítohó Jesucristú sá ná chĩndee chítúu ñaha-gã xii-ndo, te ducaⁿ ndì nduú-gá ná cádá te ío váha cuu iní-ndó cùndecu-ndo.

Espíritú Yá Ndióxi chĩndèe ñaha-xi xii-o chi ndècu ndihi-o Xítohó Jesucristú

³ Te cachí-ó sã ïo càhnu cuu Yá Ndióxi Yaá cúu Tátá Xítohó Jesucristú, te ndéé andiu quide Yá Ndióxi nchaa sá vãha sá cúu-xi-ó cuendá sá ndécú ndihi-o Espíritú-gá, te ducaⁿ quide-gá chi ndècu ndihi-o Xítohó Jesucristú.

⁴ Te ndéé cùtnàhá vátá ngáva-gã ñuyúú nĩ cachí Yá Ndióxi sá nchóó cùu-o ñáyiu cùu cuendá-gá, te ducaⁿ nĩ cachí-gá sá cuendá Xítohó Jesucristú cuendá sá nchóó cùu-o ñáyiu ñá túu tnàhí ná cumání cundecu núu-gã, te ducaⁿ te vá cùndecu cuéchi-o.

⁵ Te Yá Ndióxi ío cùu iní ñáhá-gã xii-o nõu xiãⁿ ducaⁿ nĩ cachí-gá ndéé cùtnàhá vátá ngáva-gã ñuyúú sã nchóó ndùu-o déhe-gã. Te sá cuendá nchaa sá cádá Xítohó Jesucristú sá cúu-xi-ó, xiãⁿ ducaⁿ nĩ cachí Yá Ndióxi, te ducaⁿ nĩ cachí-gá chi ducaⁿ tnàhí ní sani iní-gá cunduu.

⁶ Te xiãⁿ nõu xini ñuhu-xi sá nchóó càchí-ó sã ïo càhnu cuu Yá Ndióxi, chi ío cùndahú iní ñáhá-gã chĩndèe ñaha-gã xii-o. Te ducaⁿ quide-gá chi ndècu ndihi-o Xítohó Jesucristú Yaá ío cùu iní-gá.

⁷ Te Yá Ndióxi ío cùu iní ñáhá-gã xii-o nõu xiãⁿ Xítohó Jesucristú ní sati níñí-gã te ní xihí-gá cuendá dacãcu nihnu ñaha-gã xii-o nõu ùhú núú ndàhú, te ducaⁿ càda cahnu iní-gá nchaa yicá cuéchi-o.

⁸ Te Yá Ndióxi ío cùndahú iní ñáhá-gã chĩndèe ñaha-gã xii-o, nàcuáa ngúndecu ndihi-o nchaa sá xini tnúni-ó te ducaⁿ te cuu-o ñáyiu tècú tnúni.

⁹ Te Yá Ndióxi ní dánèhé ñáhá-gã xii-o nchaa sá ndúú yùhu, nchaa sá nĩ sani iní-gá cada-gá. Te ducaⁿ nĩ quide-gá chi ducaⁿ nĩ sani iní-gá cunduu.

¹⁰ Te sá nĩ sani iní-gá cada-gá te dacuití sã cádá-gã ná sàá nduu, te na sàá nduu-áⁿ te mee-gã cada sá Xítohó Jesucristú quindaha-gã nchaa sá ío andiu, ndihi nchaa sá ío ñuyúú-a.

¹¹ Te nchoo nĩ nduu táhú-ó nĩ nduu-o ñáyiu cùu cuendá Yá Ndióxi chi ndècu ndihi-o Xítohó Jesucristú. Te ducaⁿ nĩ cuu chi ducaⁿ tnàhí ní sani iní Yá Ndióxi cunduu. Te nchaandi túhú sá quidé-gã, quide-gá nàcuáa sãni iní mée-gã cunduu.

¹² Te ducaⁿ nĩ cuu cuendá sá nchùhú ñáyiu díhna nuu nĩ sàndáá iní tnúhu Xítohó Jesucristú cáhá-ndí sã ïo càhnu cuu mee Yá Ndióxi cuendá nchaa sá váha quide-gã.

¹³ Te nchòhò tucu cùtnàhá ní xíndedóho-ndo tnùhu ndáá tnùhu sá càháⁿ nàcuáa naníhí tànhú-ó ní cuu ìⁿnuu-ndo ndìhì Xìtohó Jesucristú chí ní sándáá iní-ndó-gã. Te xíãⁿ cùtnùnì sá nchòhò ní nduu-ndo ñãyiu cùu cuendá Yã Ndiõxí, chí ní ngúndecu ndìhì-ndo Espíritú-gá sá ní cachí-gá taxi-gá.

¹⁴ Te sá ndécú ndìhì-o Espíritú Yã Ndiõxí xíãⁿ cùtnùnì sá ndáá nduu tànhú-ó cùndecu-o ndìhì-gá ná sáá nduu nàcuaca ñaha-gá xii nchaa nchoo ñãyiu cùu cuendá-gá, te sá dúcáⁿ càda-gá nùu xíãⁿ tàú-ó cächí-ó sá ìo cànnu cuu-gá.

Te Pãblú xicáⁿ tànhú-dě núú Yã Ndiõxí cuendá cue ñãyiu ndècu ichi-gá

¹⁵ Te yúhú nihí-í tnùhu sá nchòhò ìo váha sándáá iní-ndó Xìtohó Jesucristú, te nchaa ñãyiu cùu cuendá Yã Ndiõxí ìo cùu iní-ndó-yu.

¹⁶ Te xíãⁿ nùu ñá túú dàña ndéé-í ndàcáⁿ tànhú-í núú-gã cuendá-ndó, te ìo xicáⁿ tànhú-í

¹⁷ núú Yã Ndiõxí Yaá cúú Tãtã Xìtohó Jesucristú cuendá-ndó. Te ñiu-ni Yã Ndiõxí cúú-gã Yaá ìo cànnu cuu. Te xicáⁿ tànhú-í núú Yã Ndiõxí sá mée-gã ná càdá sá Espíritú-gá chindee ñaha-xi xii-ndo cuendá cuu-ndo ñãyiu tècú tnùnì, te na càda-xi sá cùtnùnì iní-ndó nàcuáa sàni iní Yã Ndiõxí.

¹⁸ Te ducaⁿ xicáⁿ tànhú-í núú Yã Ndiõxí cuendá-ndó, cuendá sá nchòhò tecú tnùnì-ndó nàcuáa ndùu tnùhu ndee iní ní taxi-gá ní ngúndecu ndìhì-ndo cùtnàhá ní càháⁿ ñáhá-gã xii-ndo. Te ducaⁿ cùtnunì tucu iní-ndó sá ncháá sá ní cachí-gá taxi-gá nduu tànhú nchoo cuè ñãyiu cùu cuendá-gá cúú-xí mée cuií-ni sá ìo-gã váha.

¹⁹ Te cùtnunì tucu iní-ndó sá Yã Ndiõxí ìo cànnu cuu-gá quidé-gã nchaa núú sá váha sá cúú-xí nchòo ñãyiu sándáá iní ñáhá xii-gã, chí quide-gá sá vã yõo tnàhì ndàcu cada sá cúú-xí-ó dàtná ní quide-gã

²⁰ ní dándótó-gã Xìtohó Jesucristú cùtnàhá ní xíhí-gá. Te ní taxinucóo-gã Xìtohó Jesucristú xio cùha-gá táxi tnùnì-gá.

²¹ Te Xìtohó Jesucristú ìo-gá cùnùu-gá dàcúúxí nchàa núú cuè espíritú, ndìhì dàcúúxí nchàa cue téé yìndaha ñãyiu, ndìhì dàcúúxí nchàa ñaha-gá cue téé cùnnu. Te cuèi vitna te cuèi ndéé núú cuaháⁿ núú vèxi ducaⁿ-ni ìo cunuu-gã taxi tnùnì-gá.

²² Te mee Yã Ndiõxí ní quide-gá sá Xìtohó Jesucristú taxi tnùnì-gá nchaandi tànhú sá ìo, te ñiu-ni mee Yã Ndiõxí ní cachí-gá sá ncháá ñãyiu cùu cuendá-gá quindaha ñaha Xìtohó Jesucristú.

²³ Te cada iní-ó sá ncháá ñãyiu cùu cuendá Yã Ndiõxí cúú-yu yiqui cùñú Xìtohó Jesucristú, chí ìⁿ-ni cùú-yu ndìhì-gá, te mee-gã táxi tnùnì-gá nchaandi tànhú sá ìo.

2

Yã Ndiõxí ìo cùndahú iní ñáhá-gã xii-o nùu xíãⁿ ní dàcácu nihnu ñaha-gã

¹ Te nchòhò cúú-ndó dàtná ñãyiu ní xíhí cuendá nchaa sá cuèhé sá dúhá quide-ndo ni cuu, dico vitna cada iní-ndó sá dàtná ní ndoto-ndo chí ní nduu tànhú-ndó cùndecu-ndo ndìhì Yã Ndiõxí ni caa ni quíhíⁿ.

² Te ducaⁿ ní xíndecu-ndo ìchi cuèhé ichi duha, chí ní cànchicúⁿ nihnu-ndo nchàa sá cuèhé sá dúhá ìo ñuyúú-a, te ní xóo cada-ndo nchàa nacuáa càháⁿ sácúíhná, te ñiu-ni sácúíhná-ã táxi tnùnì-xi nchaa ñaha-gá espíritú cùndìhì-xi, te ñiu-ni-xi ndècu ndìhì-xi nchaa ñãyiu ñá túú cuiñì tnùu tnùhu càháⁿ Yã Ndiõxí, te dàcàháⁿ ñáhá-xí xii-yu cuendá cundecu-ní-yu ichi cuèhé ichi duha.

³ Te nchaa-o dùcaⁿ ní xóo cada-o dàtná quidé cuè ñáyi-u-áⁿ, chi ní xóo cada-o nchaa sá cuèhé sá dúhá ní xóo cani iní-ó, te nándi-gá nchaa sá cuèhé sá dúhá ní xóo cahu iní-ó ní xóo cada-o, núu xiáⁿ tàú-ó sá dándòho ñaha Yá Ndióxi xii-o ni cùu datná tàú-xi dandòho-gá nchaa ñáyi-u ducaⁿ ndècu ichi cuèhé ichi duha-áⁿ.

⁴ Te Yá Ndióxi ío cùu iní ñáhá-gă xii-o núu xiáⁿ ní cundàhú iní ñáhá-gă xii-o

⁵ cuèi cùu-o datná ñáyi-u ní xíhi sá cuèndá nchaa sá cuèhé sá dúhá quide-o ni cuu. Te ducaⁿ ní quide-gá ní cundàhú iní ñáhá-gă xii-o cuèndá cundecu-o ndihi Xítoho Jesucristú vitna, te cuu ìⁿnuu-o ndihi-gá. Te sá cuèndá-ni sá cundàhú iní ñáhá Yá Ndióxi xii-o xiáⁿ ní quide-gá nàcuáa nchoo naníhi tàhú-ó.

⁶ Te cada iní-ó sá dàtná ní quide Yá Ndióxi cùtnàhá ní dándótó-gă Xítoho Jesucristú cùtnàhá ní xíhi-gá ducaⁿ ní quide ñaha-gă xii-o chi ndècu-o ndihi-gá vitna. Te Xítoho Jesucristú sa ndècu-gá andi-u núu ndécú Yá Ndióxi. Te cada iní-ó sá Yá Ndióxi sa ní quide-gá sá nchóó ní ngúndecu túu-o ndihi Xítoho Jesucristú, chi ío váha ndècu-o vitna.

⁷ Te Yá Ndióxi quidé vâha ñaha-gă xii-o vitna cuèndá sá ná saá nduu, te ði-u-ni mee-gă cada te cutnùní iní nchaa ñáyi-u sá ío cùu iní ñáhá-gă xii-o, te ducaⁿ ío chindee chítúu ñaha-gă xii-o cuèndá sá ndécú ndihi-o Xítoho Jesucristú.

⁸ Te Yá Ndióxi ío cundahú iní ñáhá-gă xii-ndo núu xiáⁿ ní quide-gá sá nchòhó naníhi tàhú-ndó. Te ducaⁿ ní quide-gá chi ní sándáá iní-ndó-gă. Te ñá díú sá cuèndá ìⁿ chiuⁿ ní quide-ndo ducaⁿ ní naníhi tàhú-ndó, chi mee Yá Ndióxi ní cuini-gá sá dícò-ni ducaⁿ naníhi tàhú-ndó.

⁹ Te mee Yá Ndióxi ní cachí-gá sá ñá díú cuèndá ìⁿ chiuⁿ quide-o naníhi tàhú-ó, te ducaⁿ ní cachí-gá cuèndá sá vâ cádá càhnu-o mee-o.

¹⁰ Te Yá Ndióxi ní quide ñaha-gă xii-o dàtná ìⁿ ñáyi-u saa cuèndá sá ní tnahá tnúhu-o ndihi Xítoho Jesucristú, te ducaⁿ ní quide-gá cuèndá sá cádá-ó mèe-ni sá váha. Te Yá Ndióxi ducaⁿ tnáhi ní sani iní-gá cunduu sá nchóó cùu-o ñáyi-u cada mee-ni sá váha.

Xítoho Jesucristú quidé-gă ío váha cùu iní-ó ndècu-o

¹¹ Te nchòhó chí dándàcu iní nàcuáa ní xíndecu-ndo ni cùu, chi ñá túú cùu-ndo ñáyi-u isràél, te ni ñá túú quide-ndo datná quidé ñáyi-u-áⁿ, chi ñáyi-u-áⁿ sâha-yu señá ñi-yu, te dàquee tíhù-yu nchaa ñáyi-u ñá túú ndècu señá ñi-xi.

¹² Te chí dándàcu iní nàcuáa ní xíndecu-ndo, chi dàvá-áⁿ ñá túú ní xíndecu-ndo ndihi Xítoho Jesucristú, te ni ñá túú ní xóo cuu tnahá tnúhu-ndo ndihi ñáyi-u isràél, te ni ñá túú ní xini tnùní-ndó nàcuáa ndùu tnúhu sá ní cáháⁿ ndáá Yá Ndióxi nàcuáa cada váha-gă ñáyi-u, te ni ñá túú ní cùu-ndo ñáyi-u quíndaha-gă, te ni ñá túú ní xóo níhi-ndó tnúhu ndee iní sá cùndècu-ndo ndihi-gá.

¹³ Te cuèi ní cuu-ndo ñáyi-u ñá túú tnahá tnúhu ndihi Yá Ndióxi ní cùu, dico vitna ní tnahá tnúhu-ndo ndihi-gá chi cùu ìⁿnuu-ndo ndihi Xítoho Jesucristú, cuèndá sá ní sati níñi-gă te ní xíhi-gá te xiáⁿ ducaⁿ tnahá tnúhu-ndo ndihi Yá Ndióxi vitna.

¹⁴ Te Xítoho Jesucristú ní quide-gá sá nchóó ío váha cuu iní-ó cùndecu-o, te ði-u-ni-gá ní quide cuèndá sá vâ dàquèe tíhù ñáhá ñáyi-u isràél xii ñáyi-u ñá túú cùu ñáyi-u isràél, te ducaⁿ ìⁿ-ná cuú-yu cundecú-yu.

15 Te sá nǐ xíhí Xítohó Jesucristú, xǐáⁿ ñá túú-gǎ cúnùu nchaa tnúhu sá sánú ichi ñaha xii ñáyiú nàcuáa cadá-yu cundecú-yu ni cùu. Te ducaⁿ nǐ xíhí Xítohó Jesucristú cuèndá sá cuè ñáyiú isràél ndihi cue ñáyiú ñá túú cùu ñáyiú isràél ìⁿ-nǎ cuú-yu cundecú-yu ichi-gǎ, te ducaⁿ te vǎ dáquèe tihú tnáhá-gǎ-yu, te ío váha cundecu ndihi tnáhá-yu.

16 Te ducaⁿ nǐ quide Xítohó Jesucristú ní xíhí-gǎ núú cùrúxí cuèndá sá cuè ñáyiú cùu ñáyiú isràél ndihi cue ñáyiú ñá túú cùu ñáyiú isràél vǎ dáquèe tihú tnáhá-gǎ-yu. Te ducaⁿ nǐ xíhí-gǎ cuèndá ìⁿ-nǎ cuú-yu tnahá tnúhu-yu ndihi Yá Ndiöxí nàcuáa cuu váha iní ñáhá-gǎ xii-yu.

17 Te cuèi cùu-ndo ñáyiú ñá túú tnáhí xini ndáá cuèndá Yá Ndiöxí ní cùu, dico Xítohó Jesucristú ní quixi-gǎ ñuyíú-a ní cáháⁿ-gǎ tnúhu váha nàcuáa ío váha cuu iní-ndo cundecu-ndo ndihi Yá Ndiöxí. Te ñiu-ni ducaⁿ nǐ quide-gǎ sá cúú-xí ncháa ñáyiú sa xini cuèndá Yá Ndiöxí, ñiu-ni ñáyiú isràél.

18 Te cuèi cùu-o ñáyiú isràél àdi ñá túú cùu-o dico ñiu-ni mee Xítohó Jesucristú ní quide-gǎ sá ncháá-ó tnáhá tnúhu-o ndihi Dútú Ndiöxí Yáa cúú Tátá-ó. Te ducaⁿ nǐ tnahá tnúhu-o ndihi Yá Ndiöxí chi ní ngúndecu ndihi-o Espíritú-gǎ.

19 Te nchòhó ñáyiú ñá túú cùu ñáyiú isràél ní cuu-ndo ñáyiú ñá túú tnáhá tnúhu ndihi Yá Ndiöxí ní cùu, dico vitna chí ìⁿ-nǎ ní cuu-ndo ndihi nchaa dava-gǎ ñáyiú cùu cuèndá-gǎ chí cùu-ndo déhe-gǎ.

20 Te cada iní-ó sǎ cuè tée ní táuchíúⁿ Xítohó Jesucristú cáháⁿ tnúhu-gǎ, ndihi cue tée ní xóc cáháⁿ tnúhu Yá Ndiöxí ndéé sanaha cùu-güedé dàtná cimientú ìⁿ vehe, te nchòhó cúú-ndo dàtná ndóho sá sǎá vehe-áⁿ, te cada tucu iní-ó sǎ Xítohó Jesucristú cúú-gǎ ìⁿ yúú cúnùu cuu cimientú vehe-áⁿ.

21 Te ducaⁿ ío váha cùu ìⁿnuu nchaa ndóho-áⁿ ndihi yúú cúnùu-áⁿ, te ducaⁿ tucu ío váha ta quèe tnàha nchaa ndóho-áⁿ cuásaá. Te xǐáⁿ cada iní-ó sǎ cúú-xí vehe Yá Ndiöxí, vehe sǎ ío ní cuu íí. Te ducaⁿ sǎtnahá-xi cùu nchaa ñáyiú ndècu ichi Xítohó Jesucristú chí ní tnahá tnúhu-yu ndihi-gǎ, te ìⁿ nduu ìⁿ nduu ta cùu vii cuu váha-gǎ-yu núú Yá Ndiöxí cuáháⁿ.

22 Te tnáhá nchòhó ducaⁿ sǎtnahá-xi cùu-ndo chí ní ngúndecu ndihi-ndo Xítohó Jesucristú, te ducaⁿ ta cùu vii cuu váha tucu-ndo núú Yá Ndiöxí cuáháⁿ, te cùu-ndo datná vehe Yá Ndiöxí chí ndècu ndihi-ndo Espíritú-gǎ.

3

Té Pǎblú yíhí ñáyiú-dé cáháⁿ-dé tnúhu Xítohó Jesucristú núú ñáyiú ñá túú cùu ñáyiú isràél

1 Te yúhú té Pǎblú yíhí-í vecaá sǎ cuèndá sǎ cáháⁿ-í tnúhu Xítohó Jesucristú núú nchòhó ñáyiú ñá túú cùu ñáyiú isràél, núu xǐáⁿ ñiu cuèndá-gǎ duha yíhí-í vecaá vitna.

2 Te nchòhó sa nàha-ndo sǎ Yá Ndiöxí ní cundàhú iní ñáhá-gǎ xii-í, te ní cachí-gǎ sǎ yúhú quíhí ñáyiú-í cáháⁿ-í tnúhu Xítohó Jesucristú núú-ndo, te cuèndá sǎ cáháⁿ-í tnúhu-gǎ núú-ndo te cuu-xi sǎ váha sǎ cúú-xí-ndo.

3 Te yúhú sa ní cachí tnúhu-í xii-ndo lùha nacuáa nduu tnúhu nduu yuhu ni cuu, sǎ nǐ cachí tnúhu Yá Ndiöxí xii-í.

4 Te òré dàcuaha-ndo tnúhu nduu yuhu-áⁿ ní cùu te quini-ndo sǎ yúhú tècu tnùn-í-í nàcuáa nduu tnúhu-áⁿ, te tnúhu-áⁿ cáháⁿ-xi cuèndá Xítohó Jesucristú.

5 Te tnúhu-áⁿ cúú-xí tnúhu sǎ vǎ yò tnáhí xini ní cùu, dico cue tée ní táuchíúⁿ Xítohó Jesucristú cáháⁿ tnúhu-gǎ, ndihi cue tée cáháⁿ nàcuáa dàcahu iní ñáhá

Yă Ndiöxí ní níhí-güedě tnúhu ndùu yuhu-án, chi Espíritú Yă Ndiöxí ní xáhaⁿ-xi xli-güedé.

⁶ Te duha càháⁿ tnúhu ndùu yuhu-án ní cùu: “Cuěi ñáyiu ñá túú cùu ñáyiu isràél te cuěi ñáyiu cùu ñáyiu isràél dico ìⁿ-ni ndùu tǎhǔ-yu sá vǎha núú Yă Ndiöxí, te núu na quíndáá iní-yu tnúhu sá càháⁿ nàcuáa naníhí tǎhǔ-yu, te ìⁿ-ná cúǔ-yu cundecú-yu, te ducaⁿ ìⁿ-ni cada váha ñaha Yă Ndiöxí xií-yu te núu na cùndecu ndìhí-yu Xítóhó Jesucristú”, duha ndùu tnúhu ndùu yuhu-án ní cùu.

⁷ Te Yă Ndiöxí ní cundáhú iní ñáhá-gǎ xii-í ní taxi-gǎ chiúⁿ quide-í càháⁿ-í tnúhu-gǎ, te mee-gǎ quidé-gǎ sá yǔhú ndacu-í càháⁿ-í tnúhu-gǎ.

⁸ Te nchaa ñáyiu cùu cuendá Yă Ndiöxí cúǔ-yu ñáyiu ío-gǎ cúnùu cadá-yu chiúⁿ-gǎ dàcúúxí yǔhú, te cuěi ducaⁿ dico Yă Ndiöxí ní cundáhú iní ñáhá-gǎ xii-í ní taxi-gǎ chiúⁿ quide-í càháⁿ-í tnúhu-gǎ núú cuě ñáyiu ñá túú cùu ñáyiu isràél. Te tnúhu-gǎ-án càháⁿ-xi sá sǔúni ío váha cada ñaha Xítóhó Jesucristú xii-o.

⁹ Te ducaⁿ ní cachí Yă Ndiöxí sá càháⁿ-í tnúhu-gǎ cuendá danèhé-í nchaa ñáyiu. Te sá dánèhé-í-yu-án cúú-xí tnúhu ndùu yuhu sá ní sani iní-gǎ ndéé sanaha nàcuáa cada váha-gǎ cue ñáyiu. Te ndéé dàvá-án ní quesaha ndùu yuhu tnúhu-án ní cùu. Te ði-u-ni-gǎ cúú-gǎ Yáa ní cadúha nchaandi tǔhú sá íó.

¹⁰ Te ducaⁿ ndùu yuhu tnúhu-án ní cùu cuendá sá ncháá espíritú cúnùu ndecu andi-u quini-xi vitna nàcuáa quide nchaa ñáyiu ní tuha ñaha xli Yă Ndiöxí cuendá ducaⁿ cǔtnuní iní-xi sá ío váha cǔtnuní iní-gǎ nàcuáa cada-gǎ.

¹¹ Te Yă Ndiöxí ní sani iní-gǎ ndéé sanaha nàcuáa ní cuini-gǎ cada Xítóhó Jesucristú, te ní sáá nduu ní quide Xítóhó Jesucristú nàcuáa ní cuini Yă Ndiöxí cada-gǎ.

¹² Te vitna cùyii-o càháⁿ ndìhi-o Yă Ndiöxí cuendá sá ndécú ndìhi-o Xítóhó Jesucristú, te sàndáá iní-ó-gǎ.

¹³ Te núu xǎⁿ càháⁿ-í dóho-ndo sǎ cuěi duha ndòho-í vitna dico vá ná tǔhú iní-ndó cǎnchicúⁿ nihnu-ndo ìchi Xítóhó Jesucristú. Te sá dúhǎ ndòho-í te cùu-xi sá vǎha sá cúú-xí-ndó, chi cuu-ndo ñáyiu cùu cahnu núú Yă Ndiöxí.

Xítóhó Jesucristú ío cùu iní ñáhá-gǎ xii-o

¹⁴ Te sá cuendá nchaa sá ní sani iní Dútú Ndiöxí quidé-gǎ xǎⁿ yǔhú ngüñí xiti-í núú-gǎ càháⁿ ndìhi-í-gǎ, te ði-u-ni-gǎ cúú Yáa cúú Tǎtǎ Xítóhó Jesucristú.

¹⁵ Te mee Yă Ndiöxí ní cachí-gǎ sá ncháá espíritú ndécú àndi-u cunduu-xi datná ní cachí méé-gǎ cunduu-xi. Te ní cachí tucu-gǎ sá nchóó cùu-o ñáyiu, te cunduu-o datná cuini méé-gǎ cunduu-o.

¹⁶ Te xicáⁿ tǎhú-í núú Dútú Ndiöxí sá Espíritú-gǎ ná cadá nàcuáa cuita níhí ndéé-gǎ-ndó quíhíⁿ cundecu-ndo ìchi-gǎ, te ducaⁿ xicáⁿ tǎhú-í núú-gǎ cada Espíritú-gǎ chí ío cahnu cuu-gǎ.

¹⁷ Te xicáⁿ tǎhú tǔcu-í núú Yă Ndiöxí sá Xítóhó Jesucristú ná cùndecu ndìhi ñaha-ni-gǎ xii-ndo chí sàndáá iní-ndó-gǎ, te ducaⁿ te vá dáñá ndéé-ndó ío cuu iní tnáhá-ndó.

¹⁸ Te xicáⁿ tǎhú tǔcu-í núú Yă Ndiöxí cuendá-ndó ndìhi cuendá dava-gǎ ñáyiu cùu cuendá-gǎ, cuendá sá cǔtnuní iní-ndó sǎ sǔúni cùu iní ñáhá Xítóhó Jesucristú xii-o.

¹⁹ Te duha xicáⁿ tǎhú-í núú Yă Ndiöxí chí cuini-í sá ncháá-ndó tècú tnuní-ndó sǎ ío cùu iní ñáhá Xítóhó Jesucristú xii-o cuěi vá ndácú càva-o

quiní-ó nàcuáa cùu iní ñáhá-gã xii-o. Te xicáⁿ táhú tùcu-í núú Yã Ndiõxí sá ïo na cùndecu ndihi ñaha-gá xii-ndo, te ducaⁿ cànchicúⁿ nihnu-ndo càda-ndo nchaa nacuáa quide mee-gá.

²⁰ Te Yã Ndiõxí ïo-gá vai sá ndácú-gã táxi-gã dàcúúxí sã xicáⁿ-ó núú-gã, te cuèi ndée nchaa sá ñà túú sàni iní-ó ñihí-ò te tàxi-gá, te ducaⁿ chi mee-gã ndécú ndihi ñaha-gá xii-o, te ndàcu-gá quidé-gã nándi sá vãha sá cúú-xí-ó.

²¹ Te vitna nchaa nchoo ñãyiu ndècu ichi Xítóhó Jesucristú chí ná cächí-ó sã ïo càhnu cuu Yã Ndiõxí, te ducaⁿ-ni cãháⁿ-ó sã ïo càhnu cuu-gá ni caa ni quíhíⁿ chi ndècu ndihi-o Xítóhó Jesucristú. Te ducaⁿ na cùnduu.

4

Espíritú Yã Ndiõxí quidé-xí cùu ìⁿnuu-o ndecu-o

¹ Te yúhú té Pãblú yíhí-í vecaá sá cuèndá Xítóhó Jesucristú, te cãháⁿ ndàhú-í núú-ndó sã cadá vãha-ndo cùndecu-ndo datná tàú-xi cada cue ñãyiu ní cãháⁿ Yã Ndiõxí cundecu ndihi-gá. Te nchòhó tnáhá-ndó cùu-ndo ñãyiu ní cãháⁿ ñáhá Yã Ndiõxí cundecu ndihi-gá.

² Te vá cadá càhnu-ndo mee-ndo, cunduu váha iní-ndó, cunduu càhnu iní-ndó, te cuu iní tnáhá-ndó nàcuáa ducaⁿ cùndee iní-ndó núu ná cúú sã cúmãní núú tnáhá-ndó.

³ Te ïo nducu ndèe-ndo cuu ìⁿnuu-ndo cundecu-ndo, chi Espíritú Yã Ndiõxí chindee ñaha-xi xii-ndo, te ducaⁿ ïo váha cuu iní-ndó cùndecu-ndo chi cùu ìⁿnuu-ndo.

⁴ Te nchoo ñãyiu ndècu ichi Xítóhó Jesucristú ìⁿ-ni cùu-o, te ducaⁿ ìⁿ-ni Espíritú Yã Ndiõxí ndécú, te ñu-ⁿni ducaⁿ ìⁿ-ni tnúhu ndee ìni ní ngúndecu ndihi-o cùtnàhá ní cãháⁿ ñáhá Yã Ndiõxí xii-o.

⁵ Te ìⁿ-ni Xítóhó Jesucristú ndécú tàxi tnuní ñáhá-gã xii-o, te ìⁿ-ni cùu-o sandáá iní-ó tnúhu-gá, te ìⁿ-ni ní sandute-o.

⁶ Te ìⁿ-ni Dùtú Ndiõxí cúú Yàá cúú Tãtá-ó nchàa-o, te ñu-ⁿni gá cúnùu-gá yíndàhá ñaha-gá xii-o nchàa-o. Te Yã Ndiõxí dácãháⁿ-gá iní-ó quide-o chiuⁿ-gá, te ducaⁿ ndècu ndihi ñaha-gá xii-o nchàa-o.

⁷ Te nchoo ndi dîⁿ ndi dîⁿ chindee ñaha Yã Ndiõxí xii-o quide-o nacuáa ndùu chiuⁿ ní cachí Xítóhó Jesucristú cada-o.

⁸ Te quèe ndáá-xi nàcuáa cãháⁿ-xi núú tùtú Yã Ndiõxí núú cächí-xi: Xítóhó Jesucristú cuánda-gá andiu te ïo cùnuu-gá, chi nchaa cue espíritú cúú ùhú iní ñáhá xii-gá ñà túú ní ndàcu-xi naá ndihi ñaha-xi xii-gá,

te mee-gá ní cachí-gá nàcuáa ndùu chiuⁿ nduu táhú ìⁿ ìⁿ ñãyiu cadá-yu. Duha cächí-xi núú tùtú-gá.

⁹ Te sá dúcáⁿ cãháⁿ-xi sá cuánda-gá andiu xíáⁿ cùtnùní iní-ó sã ñi cuuⁿ-gá ñuyúú-a.

¹⁰ Te Xítóhó Jesucristú ní cuuⁿ-gá ñuyúú-a, te ñu-ⁿni-gá cuánda-gá andiu cuèndá ïo cunuú-gá taxi tnùní-gá nchaandi túhú sá ïo.

¹¹ Te ní dácãhñu-gá cue téé xinu cuechi núú-gã ìⁿ ìⁿ núú chiuⁿ cada-güedé. Te ní cachí-gá sá dàva-güedé cãháⁿ-güedé tnúhu-gá, te dava-güedé ní cachí-gá sá cãháⁿ-güedé nàcuáa dàcahu iní ñáhá Yã Ndiõxí xii-güedé. Te dava-güedé ní cachí-gá sá cúú-güedé cue téé datècú tnúhu cue ñãyiu nàcuáa cadá-yu naníhí tàhú-yu. Te dava-güedé ní cachí-gá sá cúú-güedé cue téé quindaha ñaha xii ñãyiu dacuáha ñaha-güedé xii-yu tnúhu-gá.

12 Te ducaⁿ ñi cachí-gá cada cue téé-áⁿ cuendá canu ichi-güedé cue ñáyiú cùu cuendá Yá Ndiöxí cuendá ducaⁿ ñáyiú-áⁿ ñihí-yu ñacuáa cada-yu chiúⁿ-gá, te ducaⁿ cuíta ñihí ndéé-gá-yu cundecú-yu ichi Xítohó Jesucristú.

13 Te ducaⁿ ñi cachí Xítohó Jesucristú cunduu ndéé sáá nduu cùu ñⁿnuu-o quindáá iní-ó tñuhu-gá, te ducaⁿ cùu ñⁿnuu-o tecu tñuní-ó ñacuáa ndùu cuendá-gá chi ñiú-gá cúú-gá Déhe Yá Ndiöxí, te cuu-o ñáyiú ío quide ndáá dàtná quidé mée Xítohó Jesucristú. Te ducaⁿ te ñá túú tñahí-gá ná cumání-ó nùú Yá Ndiöxí.

14 Te ducaⁿ te vá cúú-gá-ó dàtná cue landú vátá cútnuní váha-gá iní-xi, te ni vá cáda-gá-ó dàtná quidé ndùte lamár, chi ndute-áⁿ òré quéné táchi te cuáháⁿ-xi duha cuáháⁿ-xi dàcáⁿ, te ducaⁿ chi vá quindáá-gá iní-ó tñuhu càháⁿ nchaa ñáyiú dàndahú ñáhá xii-o, chi ñáyiú-áⁿ ío váha xitó-yu ñacuáa dàndahú ñáhá-yu xii-o chi cachí-yu sá càháⁿ-yu tñuhu Yá Ndiöxí dico ñá ndáá.

15 Te nchoo ío cuu iní tñahá-ó, te vá dàndahú tñahá-ó, chi càháⁿ-ó mée-ni sá ndáá. Te xini ñuhu-xi sá ñⁿ nduu ñⁿ nduu cuíta cada ndáá-gá-ó quíhíⁿ dàtná quidé ndáá mée-gá, te ñiú-ni-gá cúú-gá Yáá cúnùu cuu díhna tàxi tñuní ñáhá-gá xii-o.

16 Te ñiú-ni Xítohó Jesucristú quidé ñàha-gá xii nchaa nchoo ñáyiú ndècu ichi-gá dàtná yiqui cùñú mée-gá, chi ñⁿ yiqui cùñú ío váha ní quée tñaha ñⁿ ñⁿ xichi, te ducaⁿ yihí túchi yiqui cùñú-áⁿ yótni-xi nchaa ñacuáa ní quée tñaha. Te ducaⁿ sãtnahá-xi cùu nchoo chi ñⁿ-ni cùu-o ndecu-o ichi Xítohó Jesucristú táxi tñuní ñáhá-gá xii-o. Te núu nchoo quide-o nchaa ñacuáa táu-xi cunduu te cùu iní tñahá-ó, te ducaⁿ ta ñihí ndéé-gá-ó cuáháⁿ ndécú-ó ichi-gá.

Vá cáda-gá-ó dàtná ní xóo cada-o cùtnàhá ní xíndecu-o ichi cuehé ichi duha

17 Te vitna yúhú càháⁿ-í dóho-ndo quide-í núú Xítohó Jesucristú sá vá cùndecu-gá-ndó dàtná Xíndecu ñáyiú ñá túú sãndáá iní ñáhá xii Yá Ndiöxí, chi nchaa ñáyiú-áⁿ ñá túú vèdana nãndíhi nchaa sá sání iní-yu.

18 Te ní ñá túú vèdana cùtnuní iní-yu ñacuáa ndùu tñuhu ndáá tñuhu Yá Ndiöxí. Te ñáyiú-áⁿ ñá túú ndùu tãhũ-yu cundecú-yu ñacuáa cuiní Yá Ndiöxí, chi ñá túú vèdana tècu tñuní-yu te ducaⁿ chi ío sáá iní-yu.

19 Te ñá túú tñahí-gá ná sání iní-yu ndécú-yu ichi cuehé ichi duha, te ío cùdíí iní-yu ndécú-yu ichi díí iní, te ñá díú-ní xíáⁿ chi nãndí-gá nchaa sá cuehé sá dúhá quidé-yu ndécú-yu.

20 Dico tñuhu Xítohó Jesucristú sá ñi sãndáá iní-ndó chi ñá túú dùcaⁿ sanu ichi ñaha-xi xii-ndo cada-ndo.

21 Te nchòhó ní cutnùní iní-ndó ñacuáa ndùu cuendá Xítohó Jesucristú, te dàcuaha-ndo tñuhu ndáá ñiú-ni tñuhu-gá ñacuáa ndècu-ndo ichi-gá.

22 Te vitna vá cání-gá iní-ndó càda-ndo datná ní xóo cada-ndo cùtnàhá ní xíndecu-ndo ichi cuehé ichi duha, chi núu nchaa-ni sá cuehé sá dúhá-áⁿ ná cùhuⁿ-ni iní-ndó càda-ndo, te uuⁿ-gá uuⁿ-gá cuíta dacuíta ñihnu ñaha-xi xii-ndo quíhíⁿ, chi núu nchaa-ni sá cuehé sá dúhá-áⁿ ná cùhuⁿ-ni iní-ndó te dàticá nuu ñaha-xi xii-ndo.

23 Te nchòhó, xini ñuhu-xi sá vá dúcáⁿ-gá cani iní-ndó càda-ndo te táu-ndó ndùu-ndo datná ñⁿ ñáyiú ní cacu túu saa.

24 Te nduu iní-ndó dàtná cuiní mée Yá Ndiöxí cunduu, chi nduu-xi ñacuáa càa iní mée-gá, te ducaⁿ te cuu-ndo ñáyiú ío váha cada ndáá, te cuu ndisa-ndo ñáyiú ñá túú tñahí ná cumání cundecu núú-gá.

25 Te cuendá xíáⁿ núu cahaⁿ-í dóho-ndo sã nchòhó vá dácuaⁿdehnde-gá-ndó dàtná ní xóo cada-ndo, te mee-nã sá ndàá cahaⁿ ndihí tnàha-ndo, chí ìⁿ-ni cùu-o ndecu-o ichi Xitohó Jesucristú.

26 Te núu cùdéeⁿ-ndó te cada cuendá-ndó sã vá cádá-ndó ìⁿ cuéchi sá dúcáⁿ cùdéeⁿ-ndó, te vá dúcáⁿ-ní cùhuⁿ iní-ndó tnùhu sàtú iní-áⁿ.

27 Te vá dáñá-ndó mēe-ndo dandahú ñáhá sàcúihná xii-ndo.

28 Te núu dava-ndo cùu-ndo ñadúhú te vá dúcáⁿ-gã cada-ndo, chí nducu-nã-ndó ìⁿ chiuⁿ váha cada-ndo nàcuáa ducaⁿ ñihí-ndó sã chíndèe-ndo cue ñáyiu ndàhú ñáyiu ñá túú nã ndécú ndihí.

29 Te vá cahaⁿ-gá-ndó ni ìⁿ tnúhu cuèhé, chí mee-nã tnúhu vii tnúhu váha cahaⁿ-ndó nàcuáa ducaⁿ ngũnu ichi cue ñáyiu ndédóho ñaha xii-ndo, te núu ducaⁿ na cada-ndo te cuu-xi sá váha sá cúu-xí ñáyiu ducaⁿ ndédóho ñaha xii-ndo-áⁿ.

30 Te vá cádá-gã-ndó ni ìⁿ sá ñà túú tàu-ndó càda-ndo cuendá sá vá dándihú-ndó iní Espíritú Yá Ndióxi, chí ñu Espíritú-gá ndécú ndihí-ndo, te xíáⁿ cútñuní iní-ndó sã sàá nduu nàcuaca ñaha-gá xii-ndo cùndecu-ndo ndihí-gá ni caa ni quíhíⁿ.

31 Te vá dásatú-gá-ndó iní tnàha ñáyiu-ndo, te ni vá cùhúⁿ iní-ndó tnùhu sàtú iní, te ni vá cùdéeⁿ-gã-ndó, te cuéi núu chítu núu tàcá vá cahaⁿ cana-ndo cùcuèhé-ndó tnàha ñáyiu-ndo, te ni vá cuátnùhu-ndo tnaha ñáyiu-ndo, te ni vá cáni cuèhé cani duha iní-ndó cuendá tnàha ñáyiu-ndo.

32 Te cundàhú iní tnáhá-ndó, te cada tnàha-ndo sá váha, te cada càhnu iní tnáhá-ndó núu ná cúú sã cúmání núu tnáhá-ndó dàtná ní quide Yá Ndióxi ní quide càhnu iní-gá nchaa yíca cuéchi-ndo sã cuendá Xitohó Jesucristú.

5

Nàcuáa tàu-xi cundecu nchaa ñáyiu cùu déhe Yá Ndióxi

1 Te nchòhó cúu-ndó ñáyiu ío cùu iní ñáhá Yá Ndióxi, te ñu déhe-gá cúu-ndó núu xíáⁿ xini ñùhu-xi canchicúⁿ nihnu-ndo càda-ndo datná quidé mēe-gá.

2 Te ío cuu iní tnáhá-ndó cùndecu-ndo dàtná cúu iní ñáhá Xitohó Jesucristú xii-ndo, chí ñu-gá ní cachí-gá sá cúu-gá cuendá nchaa cuéchi-o te ní xihí-gá, te sá dúcáⁿ ní xihí-gá te ní cuu-gá dàtná ìⁿ táhú sã cúu-xí Yá Ndióxi, te ío váha ní cuu iní Yá Ndióxi sá dúcáⁿ ní quide-gá.

3 Te sá cuendá sã nchòhó cúu-ndó ñáyiu cùu cuendá Yá Ndióxi núu xíáⁿ nchaa nchòhó cue téé vá cahaⁿ ndihí-ndo ñáyiu ñihí te núu ñá ñúú ñàdihí-ndó cúu-yu, te ducaⁿ-ni nchaa nchòhó cue ñáyiu ñihí tucu vá cahaⁿ ndihí-ndo cue téé te núu ñá ñúú yì-ndo cuu-güedé, te ni vá cáni tnáhi iní-ndó cùndecu-ndo ichi ñúú iní, te ni vá xihó-ndó ni ìⁿ sá ndécú ndihí tnaha ñáyiu-ndo, te ni ìⁿ nchaa xíáⁿ vá cáni iní-ndó càda-ndo, te ni vá cécú nèhe-ndo.

4 Te ni vá cahaⁿ-ndó ìⁿ tnúhu sá ni vá cúu cùndedóho ñáyiu, te ni vá cahaⁿ-ndó ìⁿ tnúhu cùtèxínu, te ni dàva-gá nchaa tnúhu sá ñà túú védana nándihí vá cahaⁿ-ndó, chí nchaa tnúhu-áⁿ ñà túú tàu-xi cahaⁿ-ndó, te xini ñùhu-xi sá váha-gá sá ndàcáⁿ táhú-ndó núu Yá Ndióxi cuendá nchaa sá váha quide-gá.

5 Te nchòhó sa xini ndáá-ndó sã ncháá cué téé cahaⁿ ndihí ñáyiu ñihí te ñá ñúú ñàdihí-güedé cúu-yu, ndihí cue ñáyiu ñihí cahaⁿ ndihí cue téé te ñá ñúú yì-yu cùu-güedé, nchaa ñáyiu-áⁿ vá ndúú táhù-yu cundecú-yu núu ndécú Yá

Ndióxí ndìhì Xítóhó Jesucristú táxí tnùnì-gá. Te ni cuè ñáyiú xíndecu ichi díí ìní, te ni cuè ñáyiú xího nchaa sá ndécú ndìhì tnahá ñáyiú-xi v́a ndúú tǎhǔ-yu cundecú-yu ndìhì-gá núú ndécú-gǎ táxí tnùnì-gá. Te tnúhu sá càchí-ó xího-o nchaa sá ndécú ndìhì tnahá ñáyiú-o, ìⁿ-ni cùu-xi ndìhì tnúhu sá càchí ñáyiú quíde cahnú-yu nchaa sá càchí-yu cùu ndióxí te ñá ndáá sá ndióxí cúú-xí.

6 Te v́a quíndáá ìní-ndó ni ìⁿ tnúhu sá ñá túú nándìhì càháⁿ ñáyiú, chi ñáyiú-áⁿ ío dandòho ñaha Yá Ndióxí xí-yu cuèndá nchaa sá cuèhé sá dúhá quíde-yu chi ñá túú sàndáá ìní ñáhǎ-yu xii-gá.

7 Núu xǎⁿ càháⁿ-í dóho-ndo sá v́a ñihí tnahá-ndó ndìhì cue ñáyiú-áⁿ.

8 Te nchòhó ní cuu-ndo dàtná cue ñáyiú ní xíndecu núú néé chi ní xíndecu-ndo ichi cuehé ichi duha, dico vitna ní ngúndecu-ndo ichi Xítóhó Jesucristú, te ñá túú-gǎ ndécú-ndó núú néé dàtná ní xíndecu-ndo ni cùu. Te vitna cada-ndo nchaa nacuaá tàù-xi cunduu chi ndècu-ndo ichi-gá.

9 Te sá cuèndá sá ndécú-ndó ichi-gá núu xǎⁿ cúú-ndó ñáyiú váha, te quíde ndáá-ndó ndècu-ndo, te ñá túú dàcuandehnde-ndo chi càháⁿ-ndó mèe-ni sá ndáá.

10 Te ío váha cada cuèndá-ndó nchaa sá cúú váha ìní Xítóhó Jesucristú, te xǎⁿ cada-ndo.

11 Te v́a cáncǐcúⁿ ñihnu-ndo tnahá-ndó càda-ndo datná quíde cuè ñáyiú ndècu ichi cuehé ichi duha, chi nchòhó tàù-ndó càháⁿ-ndó dǒho nchaa ñáyiú ducaⁿ ndècu ichi cuehé ichi duha-áⁿ cuèndá nchaa sá quíde-yu.

12 Te cucahaⁿ núú-ndó v́a càháⁿ-ndó cuèndá ni ìⁿ sá cuèhé sá dúhá quíde dayuhu nchaa ñáyiú-áⁿ.

13 Dico òrè dándìxi túu tnúhu Yá Ndióxí ìní-yu nàcuáa quíde-yu te cùtnuní ìní-yu sá ñá túú quíde váha-yu, te ducaⁿ ndìxi cuéchi ìní-yu cuèndá nchaa sá cuèhé sá dúhá quíde-yu.

14 Te núú tǔtú Yá Ndióxí càchí-xi:

Nchòhó cúú-ndó dàtná ñáyiú xídí, te vitna ndíquúí ìní-ndó,

te cùu tucu-ndo datná ñáyiú ní xíhí, te vitna ndoto-ndo,

te Xítóhó Jesucristú chindee ñaha-gá xii-ndo nàcuáa v́a cùndècu-gá-ndó ìchi cuehé ichi duha.

Duha càháⁿ-xi núú tǔtú-gá.

15 Te ío váha cada cuèndá-ndó nàcuáa cada-ndo cùndecu-ndo, te v́a cáda-ndó dàtná xíquide cue ñáyiú ñá túú tècú tnùnì, chi cada-ndo dàtná xíquide ñáyiú ío váha sáá díquí-xi.

16 Te ìⁿ nduu ìⁿ nduu cani ìní-ndó càda-ndo nchaa nacuaá tàù-xi cunduu, chi vitna ío cùnuu nchaa sá cuèhé sá dúhá.

17 Te cuu-ndo ñáyiú tècú tnùnì cuèndá ducaⁿ cùtnuní ìní-ndó nàcuáa cuìní Yá Ndióxí cada-ndo, te v́a cáda-ndó dàtná xíquide cue ñáyiú ñá túú tnahí cùtnuní ìní-xi nàcuáa cuìní Yá Ndióxí cadá-yu.

18 Te v́a cúú-ndó ñáyiú quihu chi núu ducaⁿ na càda-ndo te dàcuíta ñihnu-ndo mèe-ndo, te dañá-ndo mèe-ndo sá Espiritú Yá Ndióxí ná tàxi tnuní ñáhǎ-xí xii-ndo.

19 Te càháⁿ-ndó nàcuáa-ni cuáháⁿ ndudú sá ñí xóo cata nchaa cue ñáyiú ndéé sanaha ñí xóo chiñuhu-yu Yá Ndióxí. Te càháⁿ-ndó nàcuáa cuáháⁿ ndudú sá chíñuhu-ndo Yá Ndióxí, te cata-ndo. Te cuèi nchaa dava-gá ndudú ñiu-ni ducaⁿ càháⁿ-ndó te cata-ndo. Te ñí yùhu ñí ìní-ndó càta-ndo nchaa ndudú-áⁿ chíñuhu-ndo Yá Ndióxí.

²⁰ Te vá dáñá ndèè-ndó ndàcáⁿ táhú-ndó núú Tátá-ó Dǔtú Ndiǒxí cuèi ndècu váha-ndo àdi ñá túú ndècu váha-ndo. Te ducaⁿ càda-ndo chi ndècu ndihi-ndo Xítóhó Jesucristú.

Tàú-xi sá quíndáá iní tnáhá cuè ñáyiú ndècu ichi Xítóhó Jesucristú

²¹ Te nchòhó ñáyiú ndècu ichi Xítóhó Jesucristú tàú-xi sá quíndáá iní tnáhá-ndó, te ducaⁿ càda-ndo chi nèhe-ndo sá yíñùhu núú Yá Ndiǒxí.

²² Te nchaa nchòhó ñáyiú dìhí ndécú yíi-xi, xìni ñuhu-xi sá quíndáá iní-ndó yíi-ndo datná sàndáá iní-ndó Xítóhó Jesucristú.

²³ Chi yíi-ndo tàxi tnuní ñáhá-güedé xii-ndo dàtná quidé Xítóhó Jesucristú táxi tnuní ñáhá-gá xii nchoo cuè ñáyiú ndècu ichi-gá. Te diu-gá cúú-gá Yáá ní dácácu nihnu ñaha xii-o núú ùhú núú ndàhú, te cùu-o datná yiqui cùñú-gá.

²⁴ Te dàtná quidé nchòhó ñáyiú ndècu ichi Xítóhó Jesucristú sàndáá iní-ó tníi-o nchaa tnúhu càháⁿ-gá, ducaⁿ tàú-xi cada nchaa nchòhó ñáyiú dìhí quíndáá iní-ndó tníi-ndo nchaa tnúhu càháⁿ yíi-ndo.

²⁵ Te tnàhá nchaa nchòhó cue téé tucu tàú-xi sá ïo cuu iní-ndó ñàdihí-ndó dàtná quidé Xítóhó Jesucristú cúú iní ñáhá-gá xii nchaa nchoo ñáyiú ndècu ichi-gá, chi mee-gá ní xihí-gá sá cuèndá-ó sá cúú iní ñáhá-gá xii-o.

²⁶ Te ducaⁿ ní quide-gá cuèndá sá ncháá ñáyiú vitna ngündecu ichi-gá cuu yíñùhú-yu núú Yá Ndiǒxí, te ducaⁿ ndàda ndoo ndada nine-gá iní-yu sá cuèndá sá quíndáá iní-yu tnúhu Yá Ndiǒxí, te cuanduté-yu.

²⁷ Te ducaⁿ ní quide-gá cuèndá sá ncháá ñáyiú na ngündecu ichi-gá ïo váha cundecú-yu núú-gá, te ducaⁿ vá cündècu-gá ní ñiⁿ cuéchi-yu núú-gá, te ní ñiⁿ-gá sá ñà túú-gá ná cumání-yu núú-gá chi ïo cundecu yíñùhú-yu.

²⁸ Te sá dúcáⁿ quide Xítóhó Jesucristú sá cúú-xí cuè ñáyiú ndècu ichi-gá, xiáⁿ tàú-xi sá nchòhó cue téé xíndecu ñàdihí-xi cuu iní-ndó ñàdihí-ndó, te coto-ndó-yu dàtná xító-ndó yiqui cùñú méé-ndó, te cada iní-ndó sá ncháá cuè téé ïo cùu iní ñàdihí-xi cùu iní-güedé méé-güedé chi ñiⁿ-ná cúú-yu.

²⁹ Te nchoo sà naha-o sá ní ñiⁿ ñáyiú ñá túú dàquee tíhù-yu yiqui cùñú-yu, chi da uuⁿ-gá chíndèé-yu te xító-yu. Te diu-ni ducaⁿ quide Xítóhó Jesucristú ndihi nchaa ñáyiú ndècu ichi-gá,

³⁰ chi cùu-o datná yiqui cùñú méé-gá, te ducaⁿ chi ñiⁿ-ni cùu-o ndihi-gá.

³¹ Te tnúhu Yá Ndiǒxí cächí-xi: “Sá cuèndá xiáⁿ núu nchaa cue téé na nihí ñàdihí-xi te diñiⁿ-ná cada-güedé tátá-güedé ndihi náná-güedé, te ñàdihí-ná-güedé cuu cuu ndihi-güedé, te ducaⁿ ñiⁿ-ná cuu-güedé ndihi-yu”, duha cächí-xi.

³² Te tnúhu-a cùu-xi ñiⁿ tnúhu càhnu vihi, te ducaⁿ sá tnàhá-xi cùu Xítóhó Jesucristú ndihi cue ñáyiú ndècu ichi-gá.

³³ Te càháⁿ-ni tucu-í dóho nchaa nchòhó cue téé xíndecu ñàdihí-xi sá ïo cuu iní-ndó ñàdihí-ndó te coto-ndó-yu dàtná xító-ndó mèe-ndo, te ducaⁿ-ni ncháa nchòhó ñáyiú dìhí tucu canehe-ndo sá yíñùhu núú yíi-ndo.

6

¹ Te nchaa nchòhó cue landú, quíndáá iní-ndó tátá-ndó ndihi náná-ndó chi ducaⁿ cuíni Yá Ndiǒxí cunduu, te diu ducaⁿ tnàhí tàú-xi cada-ndo.

² Te Yá Ndiǒxí ní cächí-gá sá cànéhe-ndo sá yíñùhu núú tátá-ndó ndihi núú náná-ndó. Te tnúhu-áⁿ cúú-xí tnúhu cùnnu ní càháⁿ-gá cada cue ñáyiú cuèndá cada váha ñaha-gá xií-yu.

3 Te ní cachí-gá sá nõu ducaⁿ na càda-ndo te ío váha cundecu-ndo, te ducaⁿ ío naha cùdí-ndo cùndecu-ndo ñuyíú-a.

4 Te nchaa nchòhó cue tée cùu tátá, vá dásátú-ndó ínì cue déhe-ndo chi canu ichi-ndo-güèxi nacuáa tàú-xi cunduu, te dacuáha-ndo-güèxi nchaa tnúhu váha nàcuáa cuíní Yá Ndiòxi cunduu.

5 Te nchaa nchòhó cue ñáyiú xínu cuechi, quindáá ínì-ndó cuè ñáyiú dii chiuⁿ-xi quide-ndo, te canehe-ndo sá yíñùhu nõu-yu, te ío váha cuu ínì-ndó càda-ndo chiuⁿ-yu, te ducaⁿ ñi yuhu ñi ínì-ndó càda-ndo. Te cada ínì-ndó sá dàtná tnúhu sá chíúⁿ Xitohó Jesucristú quidé-ndó.

6 Te dava ñáyiú xínu cuechi, mee-ñi òré ndéhe ñáyiú dii chiuⁿ-xi quidé-yu ío ndùcu ndeé-yu quide chiuⁿ váha-yu cuèndá cuínì-yu cudíú-yu. Dico nchòhó vá dúcáⁿ càda-ndo, chi cuèi ndècu ñáyiú dii chiuⁿ-xi quide-ndo àdi ñá túú-yu dico cada chiuⁿ váha-ñi-ndo, te cada ínì-ndó sá dàtná tnúhu sá chíúⁿ Xitohó Jesucristú quidé-ndó, te cada-ndo ñi yuhu ñi ínì-ndó nàcuáa cuíní Yá Ndiòxi cunduu.

7 Te ío váha cuu ínì-ndó càda-ndo chiuⁿ-án, chi cada ínì-ndó sá dàtná tnúhu sá chíúⁿ Xitohó Jesucristú quidé-ndó te ñá díú chiuⁿ cue ñáyiú ñuyíú-a.

8 Te nchòhó sa cùnuni ínì-ndó sá nàcuáa ndùu chiuⁿ váha ní quide-ndo ñⁿ ñⁿ-ndo, te ducaⁿ cùnduu sá táxi Xitohó Jesucristú nduu táhú-ndó cuèi cùu-ndo ñáyiú dàñá queé nõu chíúⁿ patróóⁿ-xi àdi cuu-ndo ñáyiú ñá túú tnàhí dàñá quee nõu chíúⁿ patróóⁿ-xi.

9 Te nchaa nchòhó ñáyiú xĩndecu ndihi ñáyiú xínu cuechi, tnàhá-ndó tàú-ndó càda váha-ndo sá cúú-xí cuè ñáyiú xínu cuechi nõu-ndó, te vá cùndùu nínu ínì-ndó nõu-yu, te chí cuáha cuèndá sá díú-ní Xitohó Jesucristú Yaá ndécú àndiu taxi tñuní ñàhá-gá xii-ndo ndihí-yu, te sá cúú-xí mée-gá chi ñⁿ-ni cùu-ndo nõu-gá, te ñⁿ-ni càda ñaha-gá xii-ndo.

Yá Ndiòxi chĩndèe-gá cue ñáyiú ndècu ichi-gá cuèndá sá vá ndácú sàculhá nàà ndihi ñaha-xi xii-yu

10 Te vitna nchaa nchòhó ñáyiú ndècu ndihí-í ichi Xitohó Jesucristú cachí tnúhu-í xii-ndo sá ío nducu-ndo nàcuáa cada-ndo ñihí ndéé-ndó cùu ñⁿnuu-ndo ndihi Xitohó Jesucristú, chi mee-gá ío càhnu cuu-gá, te chindee ñaha-gá xii-ndo.

11 Te ñi-ñi nchaa sá ñi nduu táhú-ndó nõu Yá Ndiòxi ñi-ñi nchaa xiáⁿ cuhuⁿ ínì-ndó, chi xiáⁿ chindee ñaha-xi xii-ndo ñihí ndéé-ndó cùndecu-ndo cuèndá sá vá dándàhú ñàhá sàculhá xii-ndo.

12 Chi nchoo ñá díú cue ñáyiú ñuyíú-a nàà ndihí-o, chi ndihi cue espíritú cùndihí yucu ñávàha, te ñi-ñi nchaa espíritú-án cùnùu-xi cuèi nõu ñnu quide-xi nchaa sá cuèhé sá dúhá, te ñi-ñi-xi cùnùu-xi ñuyíú-a sànu ichi-xi cue ñáyiú quidé-yu nchaa sá cuèhé sá dúhá.

13 Te ío cuhuⁿ ínì-ndó nchàa sá ñi nduu táhú-ndó nõu Yá Ndiòxi cuèndá ducaⁿ ñihí ndéé-ndó cùndecu-ndo, te vá ndácú yùcu ñávàha ná cada ñaha-xi xii-ndo oré cuínì-xi coto ndeé ñàhá-xí. Te sáta ná dàquee tíhú-ndó yùcu ñávàha te ñi-ñi cunduu-ndo cùndecu-ndo ichi Yá Ndiòxi.

14 Te ducaⁿ cùndecu-ñi-ndo ichi Yá Ndiòxi cada-ndo dàtná xĩquide cue sandàdú, chi cue tée-án ío ñi xĩndáa-güedé. Te cáháⁿ-ndó mée-ñi tnúhu ndáá tnúhu Yá Ndiòxi, te cuu-ndo dàtná cue sandàdú cue tée ndàda tñi xití-xi òré quihíⁿ-güedé nàá-güedé. Te ducaⁿ sàtnahá-xi cuu-ndo te nõu na càháⁿ-ndó mée-ñi tnúhu ndáá tnúhu Yá Ndiòxi. Te cada ndáá-ndó cùndecu-ndo ichi-gá,

te cuu-ndo dàtná cue sandàdú cue téé xǐxǐhnu sá yídáhu ñaha xii-güedé òré nàà-güedé cuendá sá vǎ ñicuehè-güedé. Te ducaⁿ sǎtnahá-xi cuu-ndo te núu na cada ndáá-ndó cùndecu-ndo ichi-gá.

15 Te cundecu túha-ndo cǎháⁿ-ndó tnúhu Xítoho Jesucristú, tnúhu sá cǎháⁿ nàcuáa cuu váha iní ñáyiú cundecú-yu, te cuu-ndo dàtná cue sandàdú cue téé ndíhu zapatú-xi quíhíⁿ-güedé nàà-güedé. Te ducaⁿ sǎtnahá-xi cuu-ndo te núu na cùndecu túha-ndo cǎháⁿ-ndó tnúhu Xítoho Jesucristú núú ñáyiú.

16 Te cǎchí tnúhu tucu-í xii-ndo sǎ ïo quindáa iní-ndó Yǎ Ndióxi cuendá sá vǎ ndácú sǎculhá nǎ cada ñaha-xi xii-ndo, te ducaⁿ te cuu-ndo dàtná cue sandàdú cue téé xǐnehe vítú chínèe-güedé sáquídáhu ñaha-xi xii-güedé cuendá sá vǎ cuicúⁿ-güedé sá nchicúⁿ ñuhú téé ñaha cue téé nàà ndíhi-güedé. Te ducaⁿ sǎtnahá-xi cuu-ndo te núu na quindáa iní-ndó Yǎ Ndióxi.

17 Te ïo cuhuⁿ iní-ndó sǎ ñi naníhí tǎhú-ndó, te cuu-ndo dàtná cue sandàdú cue téé ñúhu mbelú cǎxíⁿ. Te ducaⁿ sǎtnahá-xi cuu-ndo te núu na cùhuⁿ iní-ndó sǎ ñi naníhí tǎhú-ndó. Te ïo cuhuⁿ iní-ndó tnúhu Yǎ Ndióxi, chí tnúhu-áⁿ ñi taxi Espíritú-gá ndécú ndíhi-ndo chindee ñaha-xi xii-ndo, te cuu-ndo dàtná cue sandàdú cue téé xǐnehe machítí cuáháⁿ-güedé nàà-güedé. Te ducaⁿ sǎtnahá-xi cuu-ndo te núu na cùhuⁿ iní-ndó tnúhu Yǎ Ndióxi.

18 Te vǎ dáñá ndéé-ndó cǎháⁿ ndíhi-ndo Yǎ Ndióxi nàcuáa chindee ñaha Espíritú-gá xii-ndo, te cǎcǎⁿ tǎhú-ndó núú-gǎ núu ná cuíní-ndó, te ïo cundecu túha-ndo cǎháⁿ ndíhi-ndo-gǎ, te vǎ nátùhú iní-ndó cǎcǎⁿ tǎhú-ndó núú-gǎ cuendá nchaa ñava-gǎ cue ñáyiú cùu cuendá-gǎ.

19 Te tnàhá cuendá-í cǎcǎⁿ tǎhú-ndó núú Yǎ Ndióxi cuendá sá ná chindee ñaha-gǎ xii-í ñíhí-í tnúhu cǎháⁿ-í òré cǎháⁿ-í tnúhu-gǎ, te ducaⁿ vǎ yùhú-í cǎháⁿ-í nàcuáa ndùu tnúhu sá cǎháⁿ nàcuáa naníhí tǎhú-ó núú ñáyiú tnúhu sá vǎtá cùndèdóho-gǎ-yu.

20 Te Yǎ Ndióxi ní cachí-gǎ sá yùhú cuu-í ñiⁿ téé cada-í núú-gǎ cǎháⁿ-í tnúhu-gǎ núú ñáyiú, te ñiú cuendá tnúhu-áⁿ yíhí-í vecaá vitna. Te ïo cǎcǎⁿ tǎhú-ndó núú Yǎ Ndióxi cuendá-í cuendá sá yùhú cuyí-í ñi yùhu ñi iní-í cǎháⁿ-í tnúhu-gǎ núú ñáyiú nàcuáa tàú-xi cunduu.

Tnúhu ndéé núú ñi ndíhi-ndó

21 Te té Tiquicú téé ïo cùu iní-í ndécú ndíhi-o ichi Xítoho Jesucristú cúú-dé ñiⁿ téé ïo váha quide ndáa xínú cuèchi-dé núú Xítoho Jesucristú, téé-áⁿ cachí tnúhu-dé xii-ndo nàcuáa cùu ndecu-í ndíhi nchaa nàcuáa quide-í cuendá ducaⁿ cùtnuní iní-ndó.

22 Te cuendá xiǎⁿ núu cuíní-í tendaha-í-dé quixi-dé núú ndécú-ndó cuendá cachí tnúhu-dé xii-ndo nchaa nàcuáa cùu ndecu-ndí iha, te ducaⁿ tàxi-gǎ-dé tnúhu ndee ñi cundecu ndíhi-ndo.

23 Te xicǎⁿ tǎhú-í núú Tǎtá-ó Dùtú Ndióxi ndíhi núú Xítoho Jesucristú sá ncháa nchòhó ñáyiú ndècu ndíhi-í ichi-gǎ sá ñiú-gǎ ná cádá te ïo váha cuu iní-ndó cùndecu-ndo, te ducaⁿ ïo cuu iní tnàhá-ndó, te ïo quindáa iní-ndó-gǎ.

24 Te nchòhó ïo cùu iní-ndó Xítoho Jesucristú, te ñá túú dáña ndéé-ndó cùu iní-ndó-gǎ. Te mee Yǎ Ndióxi ïo na chindee chítúu ñaha-gǎ xii-ndo. Te ducaⁿ na cùnduu. Te ïo chí cádá ndèe iní-nǎ vitna.

TUTÚ NÍ CADÚHA TÉ PĀBLÚ QUIHÍⁿ NDAHA ÑÁYIU ÑUÚ FÌLIPÚ

Té Pāblú cādúha-dé tutú quihíⁿ ndaha ñáyiu quide ndáá xĩndecu ichi Xítóhó Jesucristú ndécú ñuú Filipú

¹ Yúhú té Pāblú ndihí té Timùteú cúu-ndí cue téé xĩnu cuechi núú Xítóhó Jesucristú, te tēndaha-ndí tutú-a véxi ndaha nchòhó cue téé yĩndaha nchaa ñáyiu ndécú ichi Xítóhó Jesucristú, ndihí cue téé chĩndee ñaha xii-ndo, ndihí nchaa dava-gá ñáyiu xĩquide ndáá ndécú ichi-gá ñuú Filipú.

² Te xicáⁿ táhù-í núú Tātá-ó Dütú Ndióxí ndihí núú Xítóhó Jesucristú sá ná chĩndee chítúu ñaha-gá xii-ndo, te ducaⁿ ndí nduú-gá ná cādá te ío váha cuu iní-ndó cūndecu-ndo.

Té Pāblú cāháⁿ ndihí-dé Yă Ndióxí cuendá nchaa ñáyiu ndécú ichi-gá

³ Te ndí tnahá òré ndácú iní ñáhà-í xii-ndo, te ndácáⁿ táhù-í núú Tātá-ó Dütú Ndióxí sá ndécú-ndó ichi-gá.

⁴ Te ndí tnahá òré ducaⁿ quide-í te ío cùdí iní-í cāháⁿ ndihí-í-gá cuendá-ndó.

⁵ Chì ndéé cútñahá ní sándáá iní-ndó-gá ní ngüita-ndo tñahá-ndó quide váha-ndo ndécú-ndo cuendá sá quĩndáá iní ñáyiu tnúhu Xítóhó Jesucristú.

⁶ Te yúhú sàni ndáá iní-í sá Yă Ndióxí Yaá ní quesaha chĩndee ñaha xii-ndo quide váha-ndo ndécú-ndo, te ñu-ni-gá chĩndee ñaha-gá xii-ndo càda váha-ndo cūndecu-ndo ndéé ná sàá nduu quixi tucu Xítóhó Jesucristú.

⁷ Te ducaⁿ tñahí tàu-xi cani iní-í sá cúu-xi-ndó, chí ío cùu iní ñáhà-í xii-ndo. Te tñahá-ndó ío chĩndee chítúu ñaha Yă Ndióxí xii-ndo ndécú-ndo, te ñu-ni ducaⁿ chĩndee ñaha-gá xii-ndo tñahá-ndó cuéi vitna yìhi-í vecaá, te ñu-ni ducaⁿ chĩndee ñaha-gá xii-í cuéi òré cuáháⁿ-í núú cué ñáyiu ñá túu tñahá iní tnúhu-gá, chí ñihí-í tnúhu nàdanchocáva-í ñuu ná tnúhu cāháⁿ-yu cuendá-gá, te nchaa ñáyiu xāhaⁿ-í xii-yu sá tnúhu-gá cúu-xi tnúhu ndáá cuiti.

⁸ Te mee Yă Ndióxí náhá ndáá-gá sá yúhú ío cùu iní ñáhà-í xii-ndo dàtná cúu iní ñáhá mēe Xítóhó Jesucristú xii-o.

⁹ Te xicáⁿ táhù-í núú Yă Ndióxí sá díú-gá ná chĩndee ñaha-gá xii-ndo te uuⁿ-gá cuita cuu iní tñahá-gá-ndó quihíⁿ, te ducaⁿ ío váha cuita cutnùní iní-ndó nchaa nacúaa sàni iní-gá cada-ndo, te ducaⁿ ío váha cuita cutnùní tucu iní-ndó nàcúaa cūndecu-ndo.

¹⁰ Te ducaⁿ cùtnuní tucu iní-ndó nchaa sá ío-gá váha xĩni ñuhu-xi cada-ndo, te ducaⁿ te cuu-ndo ñáyiu cada mee-ni sá váha, te ducaⁿ ñá túu tñahí ná cùmání-ndó núu Yă Ndióxí ndéé ná sàá nduu quixi tucu Xítóhó Jesucristú.

¹¹ Te ñu-ni Xítóhó Jesucristú chĩndee ñaha-gá xii-ndo càda-ndo nchaa núú sá váha nàcúaa cuiní Yă Ndióxí. Te sá dúcáⁿ ná càda-ndo te ío cada càmu-ndo-gá, te nchaa dava-gá ñáyiu cāháⁿ váha-yu cuendá-gá.

Xítóhó Jesucristú ío cūnuu-gá ndécú ndihí-gá té Pāblú

¹² Te nchaa nchòhó ñáyiu ndécú ndihí-í ichi Xítóhó Jesucristú na càchi tnúhu-í xii-ndo sá úuⁿ-gá tá xíté nuu tnúhu-gá vitna yìhi-í vecaá.

¹³ Te nchaa cue téé cùu sandadú xĩndecu vechiúⁿ núú ndécú tēe cūnuu xini-güedé sá sá cuendá sá cāháⁿ-í tnúhu Xítóhó Jesucristú duha yìhi-í vecaá,

te ðiu-ni ducaⁿ sà xiní nchaa dava-gá ñáyiú sá sã cãháⁿ-í tnúhu-gá duha yìhi-í vecaá.

14 Te cuendá sá dúhá yìhi-í vecaá xiáⁿ ío-gá vai ñáyiú ndècu ichi Yá Ndiöxi ta cùtnuní-gá iní-yu sá cúú-gã ìⁿ Yáa ío quide ndáá, te uuⁿ-gá tá cùyíⁿ-yu cãháⁿ-yu tnúhu-gá, te ñã túú tnàhí-gá yùhú-yu cãháⁿ-yu.

15 Te na cãchí-í tnúhu ndáá-í xii-ndo sã ðava ñáyiú cãháⁿ-yu tnúhu Xítoho Jesucristú cuendá-ni sá cúú cuedú iní ñãhá-yu xii-í sá ío chindee ñaha-gá xii-í cãháⁿ-í tnúhu-gá. Te ducaⁿ quidé-yu chi cuiní-yu nãa ndihi ñãhá-yu xii-í, dico ðavá-yu chi ío váha sàni iní-yu cãháⁿ-yu tnúhu-gá.

16-17 Te ñáyiú-áⁿ cãháⁿ-yu tnúhu-gá chi cùu iní ñãhá-yu xii-í, te sa nahá-yu sá sã cuendá sá cãháⁿ váha-í cuendá tnúhu-gá núú ñáyiú ñã túú tnàhá iní tnúhu-gá, cuendá xiáⁿ yìhi-í vecaá. Te dava-gá-yu cãháⁿ-yu tnúhu Xítoho Jesucristú cuendá-ni sá cuiní-yu cuu sá váha xii mée-yu, te ñã díú sã cãháⁿ-yu cuendá sá sání váha iní-yu. Te ducaⁿ quidé-yu chi cuendá cuiní-yu sá nãndi-gá cada ñaha-güedë xii-í.

18 Dico ío cudíí iní-í sá cãháⁿ-yu tnúhu Xítoho Jesucristú cuéi cùu váha iní-yu àdi ñã túú cùu váha iní-yu cãháⁿ-yu.

Te ðiu-ni ducaⁿ cudíí iní-í núú cuaháⁿ núú vëxi.

19 Te cùtnuní iní-í sá sã cuendá nchaa sá quidé ñaha-güedë xii-í, cuendá xiáⁿ cada váha ñaha Yá Ndiöxi xii-í, chi nchòhó ío cãháⁿ ndihi-ndo-gã cuendá-í, te Espíritú ní taxi Xítoho Jesucristú ndécú ndihi-o ío chindee ñaha-xi xii-í.

20 Te cuiní-í sá ñã túú tnàhí nã cumáni-í núú Yá Ndiöxi cuendá sá vã cúú cãháⁿ núú-í, te cùtnuní iní-í sá díú-gã chindee ñaha-gá xii-í. Te cuiní tucu-í sá ío cuyíⁿ-í cãháⁿ-í tnúhu-gá vitna ðatná tá quide-í véxi, te ducaⁿ ío cada nínu-í Xítoho Jesucristú cuéi vitna níni ndècu-í ñuyíú-a te cuéi na cùú-í ducaⁿ-ni cada nínu-í-gá.

21 Te níni ndècu-í ñuyíú-a te Xítoho Jesucristú ío cùnuu-gá ndécú ndihi ñaha-gá xii-í, te na sàá nduu cùú-í te ío-gá váha tnahá-í chi nucúndecu-í ndihi-gá.

22 Te núu na cùndecu-gá-í ñuyíú-a te cada-gá-í chùⁿ sá cúú-xí Yá Ndiöxi, te ñã cùtnuní iní-í nása cada-í núu sá cùndècu-í àdi sá cùú-í.

23 Te ío vai sani iní-í te cuiní-í cuú-í chi ío-gá váha cundecu-í núú ndécú Xítoho Jesucristú.

24 Dico sá cúú-xí nchòhó chi ío xini ñuhu-xi cundecu-í.

25 Te cùtnuní ndáá iní-í sá ìⁿ tnúhu ndáá cãháⁿ-í, te cùtnuní tucu iní-í sá cùndècu-ni-í cundecu ndihi ñaha-í xii-ndo nchãa-ndo cuendá chindee ñaha-í xii-ndo cuita quindáá-gá iní-ndó Xítoho Jesucristú quíhíⁿ, te ducaⁿ ío cudíí iní-ndó cùndecu-ndo.

26 Te ducaⁿ te uuⁿ-gá cachí-ndó sã ío cãhnu cuu Xítoho Jesucristú cuendá sá ní ðácãcu ñaha-gã xii-í ndécú ndihi ñaha-í xii-ndo.

27 Te xini ñuhu-xi cada-ndo nchaa nacuaá cãháⁿ tnúhu Xítoho Jesucristú. Te núu ní ndacu-í véxi coto ñaha-í xii-ndo, te ðavá-áⁿ quini ndáá-í sá ndécú-ni-ndó ichi Xítoho Jesucristú. Dico núu ñã túú ní ndacu-í quixi coto ñaha-í xii-ndo ña, te ðiu-ni níhi-í tnúhu sá ndécú-ni-ndó ichi-gá, te níhi tucu-í tnúhu sá ìⁿ-ní cùu-ndo ndecu-ndo, te níhi tucu-í tnúhu sá ìⁿnuu nducu ndee-ndo cãháⁿ-ndó tnúhu Yá Ndiöxi núú ñáyiú, tnúhu sá sãndáá iní-ndó.

28 Te ñã túú yùhú-ndó nchaa sá quidé ñaha ñáyiú cùu úhú iní ñãhá xii-ndo, te sá ðucáⁿ quide-ndo ñã túú yùhú-ndó nchaa sá quidé ñãhá-yu xii-ndo, te ndixi

túu iní-yu sá nchòhò ndécú-ndó ìⁿ ichi núú nánihí tàhú-ndó, te ñáyi-u-áⁿ cuíta nihnú-yu, chi ducaⁿ ní cachí Yá Ndiòxí cunduu.

²⁹ Te mee Yá Ndiòxí ní taxi-gá tnúhu ndee iní sá quíndáá iní-ó Xítohó Jesucristú, te ñá díú-ní sá quíndáá iní-ó-gá chi tnàhá ndoho-o cuèndá-gá.

³⁰ Te tnàhá nchòhò ndóhò-ndó cuèndá-gá vitna, te nchòhò ní xiní núú-ndó nàcuáa ní ndoho-í, te vitna nihí-ndó tnúhu nchaa nàcuáa ndòho tucu-í.

2

Xítohó Jesucristú ñá túú ní quide nínu-gá mée-gá dico Yá Ndiòxí ní quide nínu ñaha xii-gá

¹ Te Xítohó Jesucristú dácàhu iní ñáhá-gá xii-ndo nàcuáa cundecu-ndo, te cùu iní ñáhá-gá xii-ndo nàcuáa cuu váha iní-ndó cùndecu-ndo, te ndècu ndihí-ndo Espíritú Yá Ndiòxí, te ío cùndahú iní tnàhá-ndó.

² Te xíáⁿ núu càháⁿ-í dóho-ndo sá ío cuu ìⁿnuu-ni-ndo cùndecu-ndo nàcuáa ío-gá cudíí iní-í, te ìⁿ-ní cùu iní tnàhá-ndó, te ìⁿ-ní caní iní-ndó, te ìⁿ-ní càda-ndo.

³ Te vá cadá ñínu-ndo mée-ndo nducu-ndo mee-ní sá cúú-xí mée-ndo, chi cunduu ndàhú iní-ndó, te caní iní-ndó sá tnàha ñáyi-u-ndo ío-gá cùnùú-yu dàcúúxí mée-ndo.

⁴ Te ní vâ caní iní-ndó ndùcu-ndo mee-ní sá váha sá cúú-xí mée-ndo, chi nducu-ndo sá cúú-xí tnàhá cuèndá tnàha ñáyi-u-ndo.

⁵ Te ío váha caní iní-ndó nàcuáa cundecu-ndo dàtná quidé mée Xítohó Jesucristú.

⁶ Te ìⁿ-ní cùu Xítohó Jesucristú ndihí Yá Ndiòxí. Te cuèi ducaⁿ dico mee Xítohó Jesucristú ní sani iní-gá sá ñá túú cùyica cundecu-gá taxi tnùní-gá ndihí Yá Ndiòxí.

⁷ Te ní dàña-gá sá cùnùu-gá andiu te ní quixi-gá ñuyíú-a ní cuu-gá ìⁿ ñáyi-u, te ní quide-gá dàtná quidé ìⁿ téé xínu cuechi.

⁸ Te ní cuu-gá ìⁿ téé dàtná ndáa cue téé xíndecu ñuyíú-a, te ní cuu-gá ìⁿ téé ío ndàhú iní-xi chi ñá túú ní quide nínu-gá mée-gá, te ní sándáá iní-gá ní quide-gá nchaa nàcuáa ní xáhaⁿ Yá Ndiòxí xii-gá cùtnàhá ní quixi-gá ñuyíú-a. Te sá dúcáⁿ ní sándáá iní-gá xíáⁿ ní xihí-gá núú cùrúxí.

⁹ Te xíáⁿ ío ní quide nínu ñaha Yá Ndiòxí xii Xítohó Jesucristú cuèndá ío cunu-u-gá. Te ní xáhaⁿ Yá Ndiòxí xii Xítohó Jesucristú sá cúú-gá Xítohó nchaa ñáyi-u ndècu ñuyíú-a.

¹⁰ Te ducaⁿ ní quide Yá Ndiòxí cuèndá nchaa Espíritú ndécú àndiu, ndihí nchaa ñáyi-u ndècu ñuyíú-a, ndihí nchaa ñáyi-u ní xihí ngúíñí xítí-yu ndihí nchaa espíritú-áⁿ te cachí-yu ndihí-xi sá ío càhnu cuu Xítohó Jesucristú.

¹¹ Te ncháá-yu cachí-yu sá Xítohó Jesucristú cúú-gá Yá táxí tnùní. Te sá dúcáⁿ càdá-yu, te quide cahnú-yu Dútú Ndiòxí.

Ñáyi-u ndècu ichi Xítohó Jesucristú cúú-yu dàtná ìⁿ ñuhú

¹² Te xíáⁿ núu nchaa nchòhò ñáyi-u ío cùu iní-í cuíní-í sá quíndáá iní ñáhá-ndó xii-í dàtná ní quide-ndo cùtnàhá ní xíndecu ndihí ñaha-í xii-ndo, chi dàvâ-áⁿ ñá túú tnàhí ní dàña ndee-ndó ní sándáá iní ñáhá-ndó xii-í. Te cuíní-í sá úúⁿ-gá quíndáá iní ñáhá-ndó xii-í vitna ñá túú ndècu ndihí ñaha-í xii-ndo. Te ío nducu ndèe-ndo cada-ndo nchaa nàcuáa tàú-xi cunduu ndéé ná sàá nduu ndùu táhú-ndó cùndecu-ndo ndihí Xítohó Jesucristú, te ío canehe-ndo sá yíñuhu núú-gá.

13 Te Yá Ndiöxí ío váha dàcahu iní ñáhá-gă xii-ndo càda-ndo nchaa nacuáa cuíní mée-gă, te ðiu-ni mee-gă chíndèe ñaha-gá xii-ndo ðucaⁿ quide-ndo.

14 Te vá cání iní-ndó nă tnúhu cáháⁿ-ndó cuendá ñáyiú, te ni ñă túú nándi tnúhu cútñaha-ndo ndihí-yu,

15 te ðucaⁿ te cuu-ndo ñáyiú ñă túú cuèchi-xi núú Yă Ndiöxí. Te nchòhò ñáyiú cùu déhe Yá Ndiöxí, ñă túú tnàhí-gá ná cumání-ndó núú-gă nini ndècu-ndo tnuú nchaa ñáyiú ndècu ichi cuehé ichi duha ñuyí-a, ñáyiú cuihna iní-xi. Te cuu-ndo dàtná chódíní sá dáyèhé niú nee,

16 te ðucaⁿ chí dàcuaha-ndo ñáyiú tnúhu Yá Ndiöxí tnúhu sá càháⁿ nàcuáa naníhí tànhú-yu. Te núu ðucaⁿ-ni na càda-ndo te òré ná sàá nduu càda ndáá Xítohó Jesucristú nchaa yíca cuèchi ñáyiú, te dàvá-áⁿ vâ cúú càhaⁿ núú-í, chí ñă túú dió ðucaⁿ ni sàhni iní-í cada-í nchaa chiúⁿ ní tànhú-gă.

17 Te nchòhò ío váha quide-ndo ndecu-ndo ichi Yá Ndiöxí chí sàndáá iní-ndó-gă, te yúhú cahni ñaha-güedé xii-í cuendá nchaa sá váha quide-ó. Te xiăⁿ ío cudíí iní-í te cudíí tucu iní-í dàtná cudíí iní-ndó cuendá nchaa sá váha quide-ndo.

18 Te ðiu-ni ðucaⁿ ío chí cudíí iní dàtná cudíí iní mée-í cuendá nchaa sá yăha-í ndécù-í.

Té Timùteú ndihi té Epafròditú

19 Te núu Xítohó Jesucristú ná càchí-gá te ndíhi-ni tendaha-í té Timùteú quixi-dé quixi coto ñaha-dě xii-ndo nàcuáa cudíí iní-ndó. Te òré ndixi-dé canaha-dě tnúhu ndixi núu nása cùu ndecu-ndo, te tnàhá yúhú ío cudíí iní-í tucu.

20 Te núu ncháá cuè téé ndècu ndihi-í te ìⁿdi-ni té Timùteú-a cùu-dé téé ío váha sàni iní-xi dàtná sání iní-í, chí ðiu tnàhí-ni-dé ío sàni iní-dé núu nása ndècu-ndo.

21 Chí dava-gá-güedé mee-ni sá cúú-xí mèe-güedé ío sàni iní-güedé, te ñă túú sàni iní-güedé cada-güedé chiúⁿ tahu Xítohó Jesucristú.

22 Te nchòhò sa xiní-ndó sá té Timùteú-a cùu-dé ìⁿ téé quide váha chí nándi sá tá yăha-dé véxi te quide ndee iní-dé. Te cùu-dé dàtná ìⁿ déhe-í ndécú ndíhi ñaha-dé xii-í xínú cuèchi-ndí núú Xítohó Jesucristú càháⁿ-ndí tnúhu-gá núú ñáyiú.

23 Te òré ná cùtnuní núu nása cada ñaha-güedé xii-í te ndíhi-ni tendaha-í-dé quixi coto ñaha-dě xii-ndo.

24 Te sàni iní-í sá Xítohó Jesucristú cada-gá te tnàhá mèe-í ío ndíhi quixi coto ñaha-í xii-ndo.

25 Te tnàhá sání iní-í sá ío xini ñuhu-xi tendaha-í té Epafròditú téé ndècu ndíhi-o ichi Xítohó Jesucristú ndixi coto ñaha-dě xii-ndo, chí tnàhá-dé quidé-dě chiúⁿ-gá te quide ndee iní-dé tnàhá-dé nándi yăha-dé sá cuendá-gá, te ðiu mee-ndo ní tendaha-ndo-dě véxi-dé cuendá coto ñaha-dě xii-í.

26 Te ðucaⁿ cuíní-í tendaha-í-dé ndixi-dé chí mee-dé ío sàni iní-dé ndixi cáháⁿ ndíhi ñaha-dě xii-ndo, te ío ndíhú iní-dé sá ni níhí-ndó tnúhu sá cùhú-dé ní cùu.

27 Te ndáá sá ní cuhú-dé chí luha ndiquiⁿ-ná cuú-dé ní cùu, dico Yá Ndiöxí ní cundàhú iní ñáhá-gă xii-dé ní quide tátna ñaha-gă te ní ndúha-dé. Te ñă díú-ní mèe-dé ðucaⁿ ní cundahú iní ñáhá-gă xii-dé chí tnàhá yúhú ío ní cundàhú iní ñáhá-gă xii-í, chí núu ni xíhí-dé te ío-gá ndíhú iní-í ní cùu.

28 Te xiáⁿ ío ndíhi cuiní-í tendaha-í-dé ndixi-dé cuendá òré nasáá-dé núú-ndó te ío cudíí íní-ndó, te ducaⁿ yúhú ñá túú-gá ná caní íní-í.

29 Te òré nasáá-dé te ío cudíí íní-ndó nàqueheⁿ cuendá-ndó-dě, te ducaⁿ ío ndacaⁿ táhú-ndó núú Xítohó Jesucristú cuendá-dé. Te ío canehe-ndo sá yíñúhu núú nchaa cue tée quíde datná quídé-dě.

30 Chi tée-a sa luha ndiquiⁿ-ná cuú-dé ní cùu sá xínú cuèchi-dé núú Xítohó Jesucristú, te ní sani íní-dé sá ñà túú ná cada-xi cuèi na cùú-dé ní quíde-dé nchaa chiúⁿ sá cùmáni cada-ndo cuendá-í ní cùu.

3

Ñáyiú cùndáá núú Yá Ndiöxí

1 Te vitna nchaa nchòhò ñáyiú ndècu ndíhi-í ichi Xítohó Jesucristú càháⁿ ndàhú-í núú-ndó sá ío cudíí íní-ndó sá yíndàha ñaha-gá xii-ndo. Te yúhú ñá túú cùu dusaⁿ-í tee tucu-í nchaa tnúhu sá sà ní dánèhé ñàhá-í xii-ndo, chi cùu-xi tnúhu sá ío chindee ñaha-xi xii-ndo.

2 Te ío quíhi íní-ndó vǎ cáda cuendá-ndó ní ìí tnúhu càháⁿ cue tée ío cuihna íní-xi ñá túú tnàhí cuiní cada sá vǎha, chi cue tée-áⁿ nèhé-güedé íní iná chi càchí-güedé sá ncháá cuè tée xini ñuhu-xi cuáha-güedé sèñá ñí-güedé cuendá ducaⁿ cùdiu-güedé núú Yá Ndiöxí.

3 Dico nchoo chi cùdiu-o núú Yá Ndiöxí cuèi dava-o sà ní ngúndecu sèñá ñí-í o te dava-o ñàhá, chi Espíritú-gá chíndèe ñaha-xi xii-o quíde-o nchaa nacuaá tàú-xi cunduu cuendá cuu càhnu-gá. Te ío cudíí íní-ó càchí-ó sá ío càhnu cuu Xítohó Jesucristú, te ñá túú sàni íní-ó sá sá cuendá nchaa sá vǎha quíde-o cùdiu-o núú Yá Ndiöxí.

4 Te núu dicó cuendá nchaa sá vǎha quíde-o cùdiu-o núú Yá Ndiöxí, te yúhú sa ama-gá cùdiu-í núú-gǎ cuendá nchaa sá ní quíde-í ní cùu te núu dicó ducaⁿ. Te ío cue tée càchí-güedé sá cùdiu-güedé núú Yá Ndiöxí cuendá nchaa sá vǎha quíde-güedé. Te yúhú uuⁿ-gá ducaⁿ càháⁿ-í núu dicó sá cùú chi yúhú ní xidó-gǎ-í ní quíde-í dàcúxí dàva-gǎ-güedé.

5 Te núú uná-ní nduu sá ní cacu-í te ní sáha-güedé sèñá ñí-í, te yúhú cùú-í tée isráel, te mei ñàni tnáhá ndíi Benjàmín tée ní xíndecu ndéé sanaha cùu-í. Te càháⁿ-í tnúhu hèbreú tnúhu càháⁿ tǎtà-í ndíhi nǎnà-í, te ní cundihi-í nchaa cue tée cùu fariséú, te ní cǎnchicúⁿ nihnu-í nchaa nacuaá ní càháⁿ ndíi Moisés dàtná xíquide mee-güedé.

6 Te yúhú ní sani íní-í sá ìí ichi ndáá ndécù-í ní cùu, te ío ní cuiní-í cunu cuechi-í núú Yá Ndiöxí, núu xiáⁿ nándi sá ní quíde-í nchaa ñáyiú ndècu ichi Xítohó Jesucristú, te vǎ yóo ìí ní xóo cùñaha ìí tnúhu xii-í cachí-yu sá ñà túú quíde-í nàcuáa ní càháⁿ ndíi Moisés ní cùu.

7 Te nchaa sá sání íní-í sá ío nàndíhi nchicúⁿ nihnu-í ní cùu, ní cutnùní íní-í sá ñà túú tnàhí chindee ñaha-xi nacuaá cundáá-í núú Yá Ndiöxí, núu xiáⁿ duuⁿ duuⁿ ní xehndé íní-í sá vǎ chíndèe ñaha-xi cuendá sá ní cuiní-í cundecu ndíhi-í Xítohó Jesucristú.

8 Te nchaa sá càchí ñáyiú chindee ñaha cundáá-ó núú Yá Ndiöxí ní cutnùní íní-í sá ñà túú chindee ñaha-xi. Te yúhú ní cutnùní íní-í sá ío-gǎ vǎha tnáhá tnúhu-o ndíhi Xítohó Jesucristú. Te nchaa sá sání íní-í chíndèe ñaha xii-í ní cùu, ñá túú-gǎ sàndáá íní-í sá chíndèe ñaha-xi vitna chi ní cutnùní íní-í sá ñà túú nàndíhi-xi. Te ducaⁿ quíde-í ñá túú-gǎ sàndáá íní-í nchaa xiáⁿ sá chíndèe ñaha-xi, chi cuiní-í sá úúⁿ-gǎ cuita tnáhá tnúhu-í ndíhi Xítohó Jesucristú quíhíⁿ,

9 te cuu ìⁿnuu-í ndihi-gá, te ducaⁿ-ni cùndáá-í núú Yá Ndióxi dàtná cùndáá-í vitna, dico ñá díú cuendá sá nchicúⁿ nihnu-í nàcuáa ní cáháⁿ ndí Moisés ní cùu, chi cuendá sá sàndáá iní-í Xítohó Jesucristú. Te Yá Ndióxi ní quide-gá cùndáá-í núú-gã, te ducaⁿ chi ní sàndáá iní-í Xítohó Jesucristú.

10 Te cuini-í cutnùni iní-í nchaa nàcuáa sàni iní Xítohó Jesucristú, te cuini-í sá ìo chindee ñàha-gá, te diu-ni-gá cúú-gã Yaá ní xíhí te ní ndoto-gá, te ducaⁿ cuini-í cada-gá cuendá cada-í nchaa nàcuáa cuini-gá. Te cuini-í tñàhá-í ndoho-í dàtná ní ndoho-gá. Te yúhú cuini-í sá vã cáda-í ní ìⁿ sá ñà túú tñàhá iní Yá Ndióxi, chi diu cuendá-áⁿ ní xíhí Xítohó Jesucristú.

11 Te cuini-í sá Yá Ndióxi cachí-gá te tñàhá-í ndoto na sáa nduu ndòto nchaa ñáyiú sa ní xíhí ní xindecu ichi-gá.

Cada-o nchaa nàcuáa tàú-xi cunduu cuendá níhí-ó sã ndúú tãhú-ó

12 Te cumáni-gã cada-í nchaa nàcuáa càháⁿ-í-a, te cumáni-gã cada-í nchaa nàcuáa càháⁿ Yá Ndióxi cuendá sá ñà túú-gã ná cumáni-í núú-gã. Te ìo ndùcu ndee-í nchicúⁿ nihnu-í quidè-í nàcuáa ducaⁿ ñà túú-gã ná cumáni-í núú-gã, chi diu cuendá-áⁿ ní cáháⁿ ñàhá Xítohó Jesucristú xii-í.

13 Te nchaa nchòhó ñáyiú ndècu ndihi-í ichi Xítohó Jesucristú càhí tñuhu-í xii-ndo sã cùtnuní ndáá iní-í sá vitná cùmání-gã cada-í nchaa nàcuáa ñà túú-gã ná cumáni-í núú-gã. Te ní níhí-í ìⁿ sá ìo xini ñuhu-xi cada-í te xiãⁿ quidè-í, te ñà túú-gã quidè cuendá-í nchaa sá ní xóo cada-í, te ìo ndùcu ndee-í quidè-í nchaa nàcuáa càháⁿ Yá Ndióxi.

14 Te ndùcu ndee vihi-í nchicúⁿ nihnu-í quidè-í nchaa nàcuáa càháⁿ-gá, te diu-ni ducaⁿ càda-í ndéé ná sáa nduu sáa-í núú ndécú-gã taxi-gá sá ndúú tãhú-í. Te ducaⁿ tñàhí sa ní cáháⁿ ñàhá-gã xii-o cùndecu-o ndihi-gá, te ducaⁿ ní cáháⁿ ñàhá-gã xii-o sã cuendá Xítohó Jesucristú chi tñàhá tñuhu-o ndihi-gá.

15 Te nchaa nchòhó ñáyiú quide váha ndècu ichi Yá Ndióxi xini ñuhu-xi cani iní-ndó dàtná sání iní-í-a, àdi núu dava-ndo ñà túú sàni iní-ndó dàtná sání iní-í-a, dico mee Yá Ndióxi dandixi túu-gá iní-ndó te cutnùni iní-ndó nàcuáa cada-ndo.

16 Te xini ñuhu-ni-xi cada-o nchaa nàcuáa ta quide-o véxi.

17 Te nchaa nchòhó ñáyiú ndècu ndihi-í ichi Xítohó Jesucristú càháⁿ-í dóho-ndo sã cànchicúⁿ nihnu-ndo càda-ndo dàtná quidè-í. Te cundehe-ndo nàcuáa quide nchaa ñáyiú sa nchicúⁿ nihnu nchaa nàcuáa dānehé ñàhá-í xii-ndo cuendá ducaⁿ càda-ndo tñàhá-ndo.

18 Te sa ní cuu vai xito cachí tñuhu-í xii-ndo sã ìo ñáyiú ñà túú tñàhí cùu váha iní-xi sá ní xíhí Xítohó Jesucristú núú cùrúxi cuendá sá nánihí tãhú-ó. Te ndihi ndute núú-í dándacu iní ñàhá-í xii-ndo cuendá-yu.

19 Te sáa nduu te nchaa ñáyiú ducaⁿ xiquide-áⁿ cuíta nihnú-yu, chi mee-ni nchaa sá cuèhé sá dúhá ñuhu iní-yu te diu-ni nchaa xiãⁿ cùnùu quidè-yu, te cucahaⁿ núú-yu cuendá nchaa sá quidè-yu núu dicó sá cúú, dico ñàhá chi da quide cahnú-yu mée-yu cuendá nchaa xiãⁿ. Te mee-ni nchaa sá ìo ñuyúú-a ñuhu iní-yu.

20 Dico nchoo chi andiú ndècu núú cúú ñúú-ó, te ndètu cahnu-o sáa nduu quixi tucu Xítohó Jesucristú nacuaa ñàhá-gã xii-o. Te diu-ni-gá cúú-gã Yaá ní dácãcu nihnu ñàhá xii-o núú úhú núú ndàhú.

21 Te yiqui cùñú-ó chi vã cùdí-xi cundecu-xi dàtná cáá-xí vitna, dico mee Xítohó Jesucristú nadama-gá yiqui cùñú-ó te ndada-gá dàtná ní nduu yiqui cùñú mée-gã cùtñàhá ní ndoto-gá. Te ducaⁿ càda-gá chi ndàcu-gá quidè-gã nchaa sá váha càhí iní-gá, te ducaⁿ tàxi tñuni-gá nchaandi tũhú sá ìo.

4

Ío cudíí iní-ó sã ndécú-ó ichi Xítohó Jesucristú

1 Te nchaa nchòhó ñáyiú ío cùu iní-í ndécú ndìhi-í ichi Xítohó Jesucristú ío cùiní-í cáháⁿ ndìhi ñaha-í xii-ndo. Te ío cudíí iní-í cuèndá nchaa sã vâha quide-ndo chi ñá túú ní xíta chi^u Yá Ndiõxí ní quide-í sã cùú-xí-ndó, te ñi-^u ni nchòhó ñáyiú ío cùu iní-í cáháⁿ-í dóho-ndo sã cáncíicúⁿ nihnu-ni-ndo ichi Xítohó Jesucristú.

2 Te yòhó tá Vòdiá ndìhi yòhó tá Sîntiqué càháⁿ ndàhú-í núú-ndó sã cùú ñⁿnuu-ndo cundecu-ndo ichi Xítohó Jesucristú.

3 Te yòhó té cùndìhi-í quide ndáá quidé nchaa chi^u quide-í, càháⁿ ndàhú-í núú-n sã chîndee tnúhu-n ùú ñáyiú ñíhí-áⁿ cuèndá sã ná cùu ñⁿnuú-yu cundecú-yu, chi cùtnáhá ní xîndecu ndìhi ñáhá-yu xii-í ío ní chîndee ñáhá-yu xii-í, ndìhi té Clémenté, ndìhi nchaa dava-gá-yu ní quide-ndí chi^u Xítohó Jesucristú, te nchaa ñáyiú-áⁿ sa yòdo tnuní-yu núú tûtú Yá Ndiõxí sã ndúú tãhú-yu cundecú-yu ndìhi-gá ní caa ní quíhíⁿ.

4 Te nchaa-ni nduu ío cudíí iní-ndó sã ndécú-ndó ichi Xítohó Jesucristú. ¡Te càháⁿ-ni tucu-í dóho-ndo sã cudíí ndísa iní-ndó!

5 Te ío váha cuu iní-ndó càháⁿ ndìhi-ndo ñáyiú cuèndá ná cùtnuní iní-yu sã cùú-ndó ñáyiú váha iní-xi, chi sa ta cùyatni nduu quixi tucu Xítohó Jesucristú.

6 Te ñá túú tnàhí ná caní iní-ndó te núu nása cùu ndecu-ndo, chi càháⁿ ndìhi-ndo Yá Ndiõxí cuèndá sã ná chîndee ñaha-gá xii-ndo. Te ío ndacáⁿ tãhú-ndó núú-gã.

7 Te núu ducaⁿ na càda-ndo te Yá Ndiõxí cada-gá te ío váha cuu iní-ndó cùndecu-ndo. Te nchoo ñáyiú ñá túú cùtnuní iní-ó nása quide-gá ndéé ducaⁿ ío váha cùu iní-ó, te ducaⁿ ío váha cùu iní-ó chi cùu ñⁿnuu-o ndìhi Xítohó Jesucristú.

Mee-ni sã vâha cuhuⁿ iní-ó

8 Te càháⁿ ndàhú tucu-í núú nchaa nchòhó ñáyiú ndècu ndìhi-í ichi Xítohó Jesucristú sã méé-ní sã vâha cuhuⁿ iní-ndó. Te xini ñuhu-xi cuhuⁿ iní-ndó mèe-ni nchaa tnúhu ndáá, ndìhi nchaa tnúhu yíñùhu, ndìhi nchaa tnúhu sã ío cudíí iní-ó, ndìhi nchaa tnúhu sã ío víi ío váha cuáháⁿ, ndìhi nchaa tnúhu sã ñá túú ñùhu tnahá tnúhu cuèhé, ndìhi nchaa tnúhu sã càchí ñáyiú váha, ndìhi nchaa dava-gá tnúhu sã sání iní méé-ndó sã ío váha te ñi-^u ni nchaa xíáⁿ cuhuⁿ iní-ndó.

9 Te cùtnáhá ní xîndecu ndìhi ñaha-í xii-ndo ní dánèhé ñáhà-í nàcuáa cada-ndo te ní sándáá iní-ndó. Te xíáⁿ càháⁿ-í dóho-ndo sã vã dáñá ndéé-ndó càda-ndo, te ñi-^u ni ducaⁿ vã dáñá ndéé-ndó càda-ndo nchaa nacuáa ní quide-í ní xini-ndó. Te núu ducaⁿ na càda-ndo te Yá Ndiõxí Yáa quidé ío váha cùu iní-ó ndècu-o cundecu ndìhi ñaha-gá xii-ndo.

Ñáyiú ñuú Filipú ndécú ichi Xítohó Jesucristú sãñáhá-yu sã ndúú tãhú tẽ Pãblú

10 Te cudíí víhí iní-í ndacáⁿ tãhú-í núú Xítohó Jesucristú sã ní ndacu iní ñáhá-ndó xii-í, dico ñá díú sã ñá túú ñùhu iní ñáhá-ndó xii-í chi dico sã ñá nihí-ndó nàcuáa cada-ndo chîndee ñaha-ndo xii-í ní cùu.

11 Te ñá díú sã dúhá càháⁿ-í te caní iní-ndó sã càchí tnúhu-í xii-ndo sã ío ñⁿ sã cùmání xii-í, chi yúhú cùu váha-ni iní-í núu ío xii-í àdi ñá túú ío.

12 Te xini-í cunduu ndàhú-í, te xini-í cunduu cuica-í, te xini-í caxi-í ndahá xití-í, te xini-í cuú-í docó, te xini-í nàcuáa quide-xi oré ñá túú vèdana ná ndécú

ndìhi-o, te xìní-í nàcuáa quíde-xi oré xídó ndécú ndìhi-o. Te ducaⁿ nǐ cutúha-í quídè-í cuendá nchaa nàcuáa ta yáha-í véxi.

¹³ Te nchaa ndàcu-í quídè-í chí Xítóhó Jesucristú chíndèe ñaha-gá xii-í.

¹⁴ Te nchòhó ío váha ní quide-ndo nǐ cundàhú iní ñáhá-ndó xii-í ní chindee ñaha-ndo vitna ndecu ndìhi-í tnúndòho.

¹⁵ Te nchòhó cue ñáyiu ñúú Filipú sa nàha-ndo nacuáa ní cuu cútnàhà ní nguíta-í càháⁿ-í tnúhu Xítóhó Jesucristú distrítú Macèdoniá, te cútnàhà ní ndee-í distrítú-áⁿ te ñiu tnàhí-ni nchòhó ní taxi-ndo sá ndúú tǎhù-í, te nchaa ñáyiu ndècu ichi Xítóhó Jesucristú dava-gá xichi ñá túú tnàhí ní chindee ñahá-yu xii-í.

¹⁶ Te cuèi cútnàhà ní xíndecu-í ñúú Tesalónicá titní xito ní tendaha-ndo sá ndúú tǎhù-í sá ní cutnùni iní mée-ndó ní xini ñùhu-í.

¹⁷ Te vá cání iní-ndó sá sá dúhá càháⁿ-í te cuiní-í nándi-gá taxi tǎhù-ndó, te duha càháⁿ-í chí Yá Ndiòxí ío-gá vǎi sá váha cada ñaha-gá xii-ndo sá dúcáⁿ quíde-ndo.

¹⁸ Te ní xídó vǎi nchaa sá xíní ñùhu-í ndécú ndìhi-í vitna, te ducaⁿ ío vǎi sá ndécú ndìhi-í ní cuu chí ní tendaha tùcu-ndo sá ndúú tǎhù-í véxi ndìhi té Epafròditú. Te tǎhù-a cùu-xi datná ìⁿ tǎhù sá nǐ sáha-ndo mée Yá Ndiòxí, te cùu vii cuu váha iní-gá sá dúcáⁿ nǐ quíde-ndo.

¹⁹ Te núu ná cúú sá xíní ñùhu-ndó, te mee Yá Ndiòxí ío vǎi taxi-gá chí ío vǎi sá ndécú ndìhi-gá, te ducaⁿ càda-gá chí ndècu ndìhi-o Xítóhó Jesucristú.

²⁰ Te vitna nchaa-o chí ná càchí-ó sá ío càhnu cuu Tátá-ó Dútú Ndiòxí ní caa ní quíhⁿ. Te ducaⁿ na cùnduu.

Tnúhu ndéé núú nǐ ndìhi-ná

²¹ Te cúñaha-ndo sá ío na càda ndee iní nchaa ñáyiu ndècu ichi Xítóhó Jesucristú, ñáyiu cùu cuendá Yá Ndiòxí. Te tnàhà nchaa ñáyiu xíndecu ichi Xítóhó Jesucristú ndécú ndìhi-í quídè ndèe iní ñáhà-yu xii-ndo.

²² Te nchaa ñáyiu cùu cuendá Yá Ndiòxí xínú cuèchi vehe té Cèsár téé yìndaha cuéhé nàcióⁿ quídè ndèe iní ñáhà-yu xii-ndo, ndìhi nchaa dava-gá ñáyiu cùu cuendá-gá.

²³ Te Xítóhó Jesucristú ío na chindee chitúu ñaha-gá xii-ndo nchàa-ndo. Te ducaⁿ na cùnduu. Te ío chí cádá ndèe iní-nǎ vitna.

TUTÚ NÍ CADÚHA TÉ PĀBLÚ QUIHIⁿ NDAHA ÑÁYIU ÑUÚ CÒLOSÁ

Té Pāblú cadúha-dé tutú quíhiⁿ ndaha ñáyiu xĩndecu ichi Xítoho Jesucristú ndécú ñuú Còlosá

¹ Yúhú té Pāblú ní tendaha ñaha Yá Ndióxi càháⁿ-í tnúhu Xítoho Jesucristú núú ñáyiu chi ducaⁿ cuíni méé Yá Ndióxi cunduu, te cadúha-í tutú-a ndihi té Timúteú

² cuendá daquixi-í ndaha nchòho ñáyiu ñuú Còlosá, ñáyiu cùu cuendá Yá Ndióxi, ñáyiu quide ndáá ndécú ichi Xítoho Jesucristú, te xicáⁿ táhù-í núú Tátá-ó Dütú Ndióxi sá ïo na chĩndee chítúu ñaha-gã xii-ndo, te ducaⁿ ndĩ nduú-gá ná cáda te ïo váha cuu iní-ndó cùndecu-ndo.

Té Pāblú càháⁿ ndihi-dé Yá Ndióxi cuendá ñáyiu sàndáa iní ñáhá xii Xítoho Jesucristú

³ Te ducaⁿ-ni càháⁿ ndihi-ndí Yá Ndióxi Yaá cúu Tátá Xítoho Jesucristú ndacáⁿ táhù-ndí núú-gã cuendá nchaa nàcuáa quide-ndo ndecu-ndo,

⁴ chi ñihí-ndí tnúhu sá ïo sàndáa iní-ndó Xítoho Jesucristú, te ducaⁿ ïo cùu iní-ndó nchàa ñáyiu cùu cuendá Yá Ndióxi.

⁵ Te ducaⁿ quide-ndo chi sàndáa iní-ndó sã ndúú tãhú-ndó cùndecu-ndo núú ndécú Xítoho Jesucristú, te tnúhu-áⁿ ñi ñihí-ndó cùtnáhá ní xĩndedóho-ndo tnúhu ndáa tnúhu Xítoho Jesucristú.

⁶ Te tnúhu Xítoho Jesucristú tá xíté nuu-xi ñihí ñuyúy cuáháⁿ. Te vai ñáyiu ta sàndáa iní-yu cuáháⁿ, te ta quidé-yu mee-ni sã váha cuáháⁿ ndécú-yu ichi-gá. Te nchòho chi ndéé cùtnáhá ní tecú dóho-ndo tnúhu-gã ní quesaha-xi ta cùu vai ñáyiu ñuú-ndó tá quide ndáa-yu núú-gã cuáháⁿ. Te dává-áⁿ ñi cutnùni ndáa ndisa iní-ndó sã Yá Ndióxi ïo chĩndee chítúu ñaha-gã xii-ndo.

⁷ Te ducaⁿ ñi dánéhé ñáhá tẽ Ēpafrás tée ïo cùu iní-ndí, chi tnáhá-dé ïo quide ndáa-dé xínú cuèchi-dé núú Xítoho Jesucristú quidé-dé núú-ndí dácúaha ñaha-dé xii-ndo tnúhu-gã.

⁸ Te càchí tnúhu-dé xii-ndí sá ïo cùu iní ñáhá-ndó xii-ndí, te ducaⁿ quide-ndo chi Espiritú Yá Ndióxi chĩndee ñaha-xi xii-ndo.

⁹ Te ndéé cùtnáhá ní ñihí-ndí tnúhu nàcuáa quide-ndo ndecu-ndo ndéé dává-áⁿ ñi ngúita-ndí ñá túú dàña ndee-ndí xicáⁿ táhù-ndí núú Yá Ndióxi cuendá-ndó sã Espiritú-gã ná tàxi-xi nchaa-gã sá cúmãní quini tnùni-ndó, te ducaⁿ te cutnùni váha-gã iní-ndó nàcuáa cuíni Yá Ndióxi cada-ndo.

¹⁰ Te sá dúcáⁿ te ndacu-ndo càda-ndo mee-ni sã váha dàtná cuíni Xítoho Jesucristú cada nchaa ñáyiu ndècu ichi-gã. Te ducaⁿ ïo nduu vétú iní-gã te núu na càda-ndo nchaa núú sã váha. Te ducaⁿ ïo-gã cuita cutnùni iní-ndó nchàa nàcuáa cuíni Yá Ndióxi cada-ndo.

¹¹ Te mee-gã cúu-gã Yaá ïo cùnunu, te ñuú-gã ïo chĩndee ñaha-gã xii-ndo, te cudí iní-ndó cuèi nándi na càda ñaha ñáyiu xii-ndo sã cuendá-gã, te ducaⁿ ïo cunduu càhnu iní-ndó.

12 Te ndacáⁿ táhú-ó núú Dǔtú Ndiǒxí chi ní quide túha ñaha-gǎ xii-o cuèndá nduu táhú-ó cùndecu-o ndihi nchaa dava-gǎ ñáyiú yíndaha-gǎ xǐndecu núú cándòo canine ñá túú tnàhí-gǎ ni ìⁿ cuèchi ió.

13 Te ñiú-gǎ ní quide ní dáñá-ó nchaa ichi cuehé ichi duha núú táxi tnùnì yucu ñávàha, te ní nachihì ñaha-gǎ xii-o ndàha Déhe-gǎ Yaá ío cùu iní-gǎ.

14 Te Déhe-gǎ ní xíhí-gǎ cuèndá sá nchóó cǎcu nihnu-o núú ùhú núú ndàhú, te ní quide cǎhnu iní-gǎ nchaa sá cuèhé sá dúhá nǐ quide-o.

Ñáyiú cùu ìⁿnuu ndihi Yá Ndiǒxí cuèndá sá nǐ xíhí Xítóhó Jesucristú

15 Te Yá Ndiǒxí cúú-gǎ Yaá vá cúú quìní-ó dico Xítóhó Jesucristú chi ní quixi túú-gǎ ñuyíú-a, te ní quide-gǎ nchaa nàcuáa sàni iní-gǎ. Te dàtná-ni sàni iní-gǎ te ducaⁿ sàni iní Yá Ndiǒxí, te Yaá-áⁿ ducaⁿ-ni ndècu-gǎ ndéé cǔtnàhá vátá ngǎva-gǎ ñuyíú.

16 Te Xítóhó Jesucristú ní quide-gǎ núú Yá Ndiǒxí ní cadúha-gǎ nchaa sá ío andiú ndihi nchaa sá ío ñuyíú-a, te ní cadúha-gǎ nchaa sá cúú quìní núú-ó cùndehe-o, ndihi nchaa sá vá quìní tnàhí-o, ndihi nchaa espíritú cùnùu vihi xinu cuechi núú Yá Ndiǒxí, ndihi nchaa dava-gǎ espíritú xínú cuèchi. Te nchaa ní cadúha Xítóhó Jesucristú chi ducaⁿ nǐ cachí Yá Ndiǒxí cunduu. Te ducaⁿ nǐ cachí Yá Ndiǒxí cunduu cuèndá nchaa cuu-xi mee-ni sá vǎha sá cúú-xi Xítóhó Jesucristú.

17 Te Xítóhó Jesucristú ducaⁿ-ni ndècu-gǎ ndéé cǔtnàhá vátá ngǎva-gǎ ñuyíú-a, te ñiú núú ndáhá-gǎ cándòo ñuyíú-a, ndihi andiú, ndihi nchaandi túhú sá ío.

18 Te ñiú Xítóhó Jesucristú cùnùu-gǎ yíndaha ñaha-gǎ xii nchaa nchoo ñáyiú ndècu ichi-gǎ, te ñiú-gǎ quidé-gǎ ndécú vǎha-o núú-gǎ. Te núú ncháá ñáyiú ndoto ñiú-gǎ cúú-gǎ Yaá ío cǎhnu cuu sa ní ndoto, te sá dúcáⁿ nǐ ndoto-gǎ te xiáⁿ cúú-gǎ Yaá ío táxi tnùnì nchaandi túhú sá ío ñuyíú-a ndihi andiú.

19 Te ducaⁿ ío cùnùu-gǎ táxi tnùnì-gǎ chi ndáá sá ìⁿ-ni cuu-gǎ ndihi Yá Ndiǒxí.

20 Te Xítóhó Jesucristú ní xíhí-gǎ núú cùrúxí, chi ducaⁿ nǐ cuiní Yá Ndiǒxí cunduu cuèndá sá vá yǒo ìⁿ-gǎ cuu úhú iní ñáhá xii-gǎ cuéi ñáyiú xǐndecu ñuyíú-a, te cuéi cue espíritú ndécú àndiú.

21 Te nchòhó cǔtnàhá vátá cùndècu-gǎ-ndó ichi Xítóhó Jesucristú ñá túú tnàhí ni xǒo cáháⁿ ndihi-ndo-gǎ, chi mee-ni nǐ xǒo cuu úhú iní-ndo-gǎ, te mee-ni nchaa sá cuèhé sá dúhá nǐ xǒo cunuu nǐ xǒo cada-ndo ni cùu, dico Xítóhó Jesucristú ní quide-gǎ ní tnahá tnúhu-ndo ndihi Yá Ndiǒxí vitna.

22 Chi ñiú cuèndá-áⁿ nǐ xíhí Xítóhó Jesucristú núú cùrúxí cuèndá sá nchóó ndùu ndoo nduu nine iní-ó ngùndecu-o núú Yá Ndiǒxí, te ducaⁿ te ñá túú tnàhí-gǎ ná cumání-ó núú-gǎ, te vá yǒo ìⁿ-gǎ cachí sá nchóó ndècu cuèchi-o.

23 Te núú vá dáñá ndèé-ndó quìndáá iní-ndó Xítóhó Jesucristú, te cundecu-ni-ndo ichi-gǎ, te vá cánì iní-ndó dáña-ndo tnúhu ndee iní ní taxi-gǎ ndécú ndihi-o. Te nchaa tnúhu-gǎ-áⁿ tá xité nuu-xi nihíi ñuyíú cuáháⁿ, te ñiú-ni tnúhu-áⁿ cǎháⁿ yúhú té Pǎblú dánèhé-í ñáyiú.

Té Pǎblú yíhí ñiú-í dǎquí-dé cáháⁿ-dé tnúhu Xítóhó Jesucristú núú ñáyiú ndècu ichi-gǎ

24 Te vitna ío cùdí iní-í ndóhò-í cuèndá-ndó, chi Xítóhó Jesucristú ío ní ndoho-gǎ cuèndá-ó, te tnàhá yúhú ndóhò-í cuèndá nchaa ñáyiú ndècu ichi-gǎ, dico vitna cùmání-gǎ ndoho-í cuèndá-yu.

²⁵ Te Yá Ndiöxí ní cachí-gá sá yǔhú quihi díquí ñáhà-í xii nchaa nchòhó ñáyiú ndècu ichi-gá cuèndá danèhé ñáhá vâha-í xii-ndo tnǔhu-gá cuèndá cuu-xi sá vâha sá cúú-xi-ndó.

²⁶ Te nchaa tnǔhu sá dánèhé ñáhà-í xii-ndo ñà túú ní tècú dóho nchaa ñáyiú ní xindecu ndéé sanaha, te mee-gá ní cuini-gá sá ncháá nchòo ñáyiú yǐndaha-gá vitna cundecu ndihi-o tnǔhu-án.

²⁷ Te mee-gá ní cachí-gá sá dátũu-gá nchaa tnǔhu sá ïo vii ïo vâha cuáháⁿ núú ncháa ñáyiú yǐndaha-gá. Te tnǔhu-án cúú-xi cuèndá tnàhá nchaa nchòhó ñáyiú ñà túú cùu ñáyiú isrâél. Te tnǔhu-án dánèhé ñáhá-xi xii-ndo sá Xitohó Jesucristú ndécú ndihi ñaha-gá xii-ndo. Te cuèndá xiǎⁿ ní ngúndecu ndihi-ndo tnǔhu ndee iní cundecu-ndo ndihi-gá ni caa ni quíhíⁿ.

²⁸ Te nchúhú mee-ni cuèndá Xitohó Jesucristú càháⁿ vâha-ndí, te dàsahú-ndí ñáyiú nàcuáa cadá-yu. Te vâha vihi danehé-ndí nchaa ñáyiú nàcuáa tecú tnùní-yu tnǔhu-gá, te ducaⁿ danehé-ndí-yu nàcuáa cundáa-yu núú Yá Ndiöxí, te ducaⁿ chi tnàhá tnǔhu-yu ndihi Xitohó Jesucristú.

²⁹ Te cuèndá xiǎⁿ ïo ndècu ndee-í quidè-í chiúⁿ Xitohó Jesucristú, te mee-gá ïo chindee ñaha-gá xii-í nũu xiǎⁿ ndácú-í quidè-í chiúⁿ-gá.

2

¹ Te cuini-í sá nchòhó cutnùní iní-ndó sǎ ïo sàni iní-í cuèndá-ndó, ndihi cuèndá nchaa ñáyiú ndècu ñuú Laodiceá, ñáyiú xindecu ichi Xitohó Jesucristú. Te ducaⁿ-ni ïo sàni iní-í cuèndá nchaa ñáyiú vátá quini ñáhá-gá xii-í.

² Te cuini-í sá nchòhó ndihi nchaa ñáyiú-án ïo nducu ndèe-ndo canchicúⁿ ni-hnu-ndo ìchi Xitohó Jesucristú, te ïo cuu iní tnàhá-ndó, te ducaⁿ cùu ìⁿnuu-ndo cundecu-ndo. Te cuini-í sá nchòhó ndihi dava-gá ñáyiú-án ïo vâha sáá sá xini tnùní-ndó cuèndá tecú tnùní-ndó ncháa nàcuáa ndũu cuèndá Xitohó Jesucristú chi ïo ndũu yuhu ni cuu, dico vitna ní dátũu-gá núú-ó.

³ Te Xitohó Jesucristú néhé vâha-gá nchaa tnǔhu sá ïo xini ñuhu-xi tecú tnùní-ó.

⁴ Te duha càháⁿ-í chi cuini-í sá vǎ quindáa iní-ndó ni ìⁿ tnǔhu càháⁿ nchaa ñáyiú cuini dandàhú ñáhá xii-ndo cuéi ïo vâha càháⁿ-yu.

⁵ Te cuéi ñà túú ndècu ndihi ñaha-í xii-ndo dico ducaⁿ-ni ïo ñũhu iní ñáhà-í, te ïo cùdí iní-í chi nihí-í tnǔhu sá ïo cùu ìⁿnuu-ndo ndecu-ndo, te ñà túú dàña ndéè-ndó sàndáa iní-ndó Xitohó Jesucristú.

⁶ Te dàtná-ni ní sàndáa iní-ndó Xitohó Jesucristú, te ducaⁿ-ni quindáa iní-ndó-gǎ canchicúⁿ ni-hnu-ndo ìchi-gá.

⁷ Te ni yũhu ni iní-ndó cànchicúⁿ ni-hnu-ndo ìchi-gá, te ducaⁿ cuita cut-nuní-gá iní-ndó ncháa nàcuáa càháⁿ-gá quíhíⁿ. Te vǎ dáñá ndéé tnàhí-ndo quindáa iní-ndó ncháa tnǔhu sá ní dánèhé ñáhá cuè téé càháⁿ tnǔhu-gá xii-ndo. Te xini ñuhu-xi ndacáⁿ táhú vihi-ndo núú Yá Ndiöxí cuèndá nchaa tnǔhu-án.

Ñáyiú ïo vâha tnàhá tnǔhu ndihi Xitohó Jesucristú

⁸ Te ïo quíhí iní-ndó cundecu-ndo chi xica cuu ñáyiú cuini dandàhú ñáhá xii-ndo, te ñáyiú-án càháⁿ-yu mee-ni ncháa tnǔhu ní cahu iní nchaa cue téé ñuyú-a, te nchaa tnǔhu-án ñà túú vèdana nàndíhí-xi. Te ducaⁿ quidè-yu chi nchicúⁿ ni-hnu-ní-yu nchaa nàcuáa ní xóo cada ñáyiú ní xindecu ndéé sanaha. Te càháⁿ-yu nàcuáa sàni iní yucu ñávâha, te ñà túú càháⁿ-yu nàcuáa cuini méé Xitohó Jesucristú.

⁹ Te Xítohó Jesucristú cúu-gã ìñ ñáiyu dico ìñ-ni cùu-gá ndihi Dútú Ndiöxí.

¹⁰ Te nchòhó chi ñá túú tñahí-gá ná cúmāní-ndó nũú-gã chi ndècu ndihi-ndo Xítohó Jesucristú. Te ío cùnuu-gá te tàxi tñuní-gá nchaa núú cuè espíritú cùnũu.

¹¹ Te mee-gã ní ndada ndoo ní ndada nine-gá iní-ndó chi ní ngúndecu ndihi-ndo-gã te ducaⁿ ñá túú-gã ndécú-ndó ichi cuehé ichi duha, te cada iní-ndó sã ní ngúndecu ndihi-ndo ìñ seña, chi ní ndada ndoo ní ndada nine-gá iní-ndó, dico ñá díú ìñ-ni cuu-xi ndihi seña sá sãha cue téé isráèl ñũ-güedé.

¹² Te nchòhó sa ní sandute-ndo te cada iní-ndó sã dàtná tñũhu sá ní xihí-ndó ndihi Xítohó Jesucristú, te ní nguindũxi-ndo ndihi-gã, te ní ndoto-ndo ndihi-gã, te ducaⁿ cada iní-ndó chi ñá túú-gã ndécú-ndó ichi cuehé ichi duha. Te ducaⁿ chi sàndáá iní-ndó nchaa nacuaá quide Yá Ndiöxí, te ñũ-gã ní dándótó-gã Xítohó Jesucristú.

¹³ Te nchòhó cùnñahá ndécú-ndó ichi cuehé ichi duha cùu-ndo datná ñáiyu ní xihí, chi ñá túú tñahá tñũhu-ndo ndihi Yá Ndiöxí ní cùu, te ni ñá díú ñáiyu isráèl cúu-ndó. Te Yá Ndiöxí ní cachí-gã sá nchóó ío váha tñahá tñũhu-o ndihi Xítohó Jesucristú vitna. Te ducaⁿ ní quide-gã chi sa ní quide cãhnu iní-gã nchaa sá cuehé sá dúhá ñĩ xóo cada-o.

¹⁴ Te vitna duuⁿ duuⁿ ñá túú-gã cuèchi-o ndècu núú-gã. Te nchoo ñá túú cuiní-ó cada-o nacuaá cãháⁿ-gã, te cuendá xíáⁿ ío ndècuèchi-o, te vai nacháhu-o nũú-gã ní cùu. Te vitna ñá túú-gã ni ìñ cuèchi-o ndècu núú-gã, chi ñũ cuendá-án ñĩ xihí Xítohó Jesucristú núú cùrúxí.

¹⁵ Te sá dúcáⁿ ñĩ xihí Xítohó Jesucristú núú cùrúxí, te duuⁿ duuⁿ ní dáquéé tñũ-gã sácũhna ndihi nchaa espíritú cùndĩhi-xi, te ní quendóo canúú-xi, te mee-gã ío cùnũu-gã táxi tñuní-gã.

Nanducu nihnu-o mee-ni sá vãha cãchí Xítohó Jesucristú

¹⁶ Te núu dava ñáiyu xicuehé ñãhá-yu xii-ndo cuendá sá ñá túú xèxi-ndo xihí-ndo datná quidé meè-yu te vã cádá cuendá-ndó, te ni vã cádá cuendá-ndó te núu xicuehé ñãhá-yu xii-ndo cuendá sá ñá túú cãnehe íí-ndó vico quide meè-yu núú cuiá núú cuiá, ndihi vico quidé-yu ndi tñahá yóó, ndihi cuendá sá ñá túú cãnehe íí-ndó ndũu ndetatú-yu.

¹⁷ Te nãcuáa quidé-yu ndi tñahá òrè quidé-yu nchaa vico-án, ndihi nãcuáa quidé-yu ndi tñahá nchaa nduu cãnehe íí-yu-án, te cada iní-ó sã sã quidé-yu-án dãnèhé núú ñãhá-xí nãcuáa cada Xítohó Jesucristú núú cuaháⁿ núú vèxi.

¹⁸ Te vã quindáá iní-ndó ni ìñ tñũhu cãháⁿ ñáiyu cãchí sá cuiá nihnu-ndo cuendá sá ñá túú tñũ-ndo tñũhu cãháⁿ-yu, chi cãchí-yu sá ío xini ñũhu-xi cada cãhnu-o nchaa cue espíritú xínú cuèchi núú Yá Ndiöxí, te ni yũhu ni iní-ó cãnehe-o sá yíñũhu núú-xi. Te ñáiyu-án cãchí-yu sá ndáá cãháⁿ-yu chi dàcoto ñaha saní-yu nãcuáa cãháⁿ-yu, te ío quide cãhnu-yu meè-yu cuendá nchaa sá sání iní meè-yu quidé-yu, te ñá túú vèdana nãndĩhi nchaa sá quidé-yu.

¹⁹ Te nchaa ñáiyu ducaⁿ xiquide-án ñá túú tñahá tñũhu-yu ndihi Xítohó Jesucristú. Te mee-gã cúu-gã Yá cùnũu taxi tñuní ñãhá-gã xii nchaa nchoo ñáiyu ndècu ichi-gã, te chĩndee ñaha-gã xii-o ndècu-o ichi-gã, te mee-gã quidé-gã cúú ìñnuu-o ndècu-o, te ta quide-o nchaa nacuaá cuiní Yá Ndiöxí cuaháⁿ.

²⁰ Te nchòhó cúu-ndó dàtná ñáiyu ní xihí ndihi Xítohó Jesucristú cuendá sá vã cãchicúⁿ nihnu-gã-ndó nãcuáa cãháⁿ ñáiyu ñá túú ndècu ichi-gã. Te núu

ducaⁿ ña, ¿te ná cuendá tníí-ní-ndó tnũhu càháⁿ ñáyiⁿ-áⁿ te quide-ni-ndo datná quidè-yu?

21 Chi ñáyiⁿ-áⁿ càchí-yu sá íó sá ni vã cúú tèe ndaha-o, te dava ni vã cúú càxi-o, te dava ni vã cúú tníi-o.

22 Te nchaa xĩáⁿ, núú néhé chũuⁿ-ni-o ndihí nihnu-xi. Te nchaa sá dúcáⁿ càháⁿ-yu-áⁿ cúú-xi mée-ni sá ní cahu iní mée nchaa ñáyiⁿ ñuyíú-a nàcuáa cadá-yu cundecú-yu.

23 Te nchaa tnũhu càháⁿ-yu-áⁿ sánũu sá cúú-xi ìⁿ tnũhu càháⁿ ìⁿ tée ío váha sàá díquí-xi, chi càchí-yu sá cadá càhnu-o Yá Ndiõxí nàcuáa véxi iní mée-ó, te cunduu ndàhú iní-ó dico ñá túú dànehé ñáhã-yu nàcuáa tàú-xi cunduu. Te càchí tucú-yu sá cadá ùhú-ó mée-o, chi ducaⁿ cuíní Yá Ndiõxí cada-o càchí-yu. Te nchaa xĩáⁿ ñá túú vèdana chĩndee ñaha-xi xii-o cuendá sá vã táxi tnùnì ñáhã ní ìⁿ sá cuèhé sá dúhá sàni iní-ó.

3

1 Te nchòhó cada iní-ndó sã ní xihí-ndó ndihí Xítohó Jesucristú te ní ndoto-ndo ndihí-gá, núu xĩáⁿ tàú-ndó càda-ndo nchaa sá vãha dàtná cuíní mée-gã chi mee-gã núcõo-gã xio cùha Dútú Ndiõxí chi tnàhá-gã ío cùnũu-gã.

2 Te ío cuhuⁿ iní-ndó nchaa sá vãha càchí Xítohó Jesucristú nduu táhú-ndó cundecu ndihí-ndo, te vã cúhúⁿ iní-ndó mée-ni nchaa sá íó ñuyíú-a.

3 Te ducaⁿ càda-ndo chi cùu-ndo datná ñáyiⁿ ní xihí ndihí Xítohó Jesucristú, chi ñá túú-gã ndécú-ndó ìchi cuehé ìchi duha. Te Yá Ndiõxí néhé cuendá ñáhã-gã xii-ndo chi tnàhá tnũhu-ndo ndihí Xítohó Jesucristú.

4 Te Xítohó Jesucristú cúú-gã Yaá ndécú ndihí ñaha xii-o vitna, te sáá nduu quèe túu ndihí ñaha-gã xii-o àndũu, te tnàhá-ó ío cunuu-o ndihí-gã.

Duuⁿ duuⁿ daña-o nchaa sá cuèhé sá dúhá ñũhu iní-ó te cada-o mée-ni sá vãha

5 Te duuⁿ duuⁿ daña-ndo nchaa sá cuèhé sá dúhá ñũhu iní-ndó. Te nchaa nchòhó cue tée vã càháⁿ ndihí-ndo ñáyiⁿ ñihí te núu ñá díú ñàdihí-ndó cúú-yu, te ducaⁿ-ni nchaa nchòhó cue ñáyiⁿ ñihí tucu vã càháⁿ ndihí-ndo cuè tée te núu ñá díú yíi-ndo cuu-güedé, te nchaa-ndo vã cání-gã iní-ndó càda-ndo ní ìⁿ sá cuèhé sá dúhá ndihí tnaha ñáyiⁿ-ndo. Te vã cání cuèhé caní duha-gã iní-ndó sã cúú-xi-ndó ndihí-yu, te vã cání-gã iní-ndó ní ìⁿ sá cuèhé sá dúhá, te ní vã xihó-ndó ìⁿ sá ndécú ndihí tnaha ñáyiⁿ-ndo, chi núu ducaⁿ na càda-ndo xiho-ndo sá ndécú ndihí-yu te ìⁿ-ni cùu-ndo ndihí ñáyiⁿ chĩñuhu nchaa sá càchí-yu cùu ndiõxí te ñá ndaa sá ndiõxí cúú nchaa xĩáⁿ.

6 Te nchaa ñáyiⁿ ducaⁿ xĩquide ío dandõho ñaha Yá Ndiõxí xii-yu na sàá nduu tnũdõho tnũhu ndàhú, chi ñá túú sàndáá iní ñáhã-yu xii-gã.

7 Te nchòhó cútnàhá ní xĩndecu-ndo ìchi cuehé ìchi duha, te tnàhá-ndó ní xóo cada-ndo dàtná quidè nchaa ñáyiⁿ-áⁿ.

8 Te vitna duuⁿ duuⁿ daña-ndo nchaa sá ná càchí tnũhu-í-a: Vã cúdèéⁿ-gã-ndó, te ní vã cùndũu líhli-gã iní-ndó, te ní vã cúú ùhú-gã iní-ndó tnàha ñáyiⁿ-ndo, te ní vã cùcuèhé-gã-ndó-yu, te ní ìⁿ-gã tnũhu cuèhé vã càháⁿ-ndó.

9 Te ní vã dácuàndehnde-gã-ndó, chi nchòhó sa ní dáñá-ndó nchaa ìchi cuehé ìchi duha, te ñá túú-gã sání cuèhé sání dùha iní-ndó nã cada-ndo vitna datná ní xóo cada-ndo.

10 Te vitna nchòhó ní nduu-ndo ñáyiú váha, te uuⁿ-gá tá cùtnuní iní-ndó nchàa nacuaáa cuiní Yá Ndiòxí cada-ndo, te ducaⁿ ta ndùcu ndee-ndo quide-ndo mee-ni sá vâha dàtná quidé mée-gá.

11 Te vitna ní ngúndecu ndihí-ndo Xítohó Jesucristú, te vá cádá cuendá-gá-ndó núu cùu-ndo ñáyiú isráél àdi ñá túú cùu-ndo, te ni vâ cádá cuendá-ndó núu cùu-ndo ñáyiú ní ngúndecu seña ñi-xi àdi ñáhá, te ni vâ cádá cuendá-ndó núu cùu-ndo ñáyiú véxi ñuú xicá, te ni vâ cádá cuendá-ndó núu cùu-ndo ñáyiú cùu neñuú, te ni vâ cádá cuendá-ndó núu cùu-ndo ñáyiú ñá túú tnàhí dàhá quee núú chíúⁿ pàtróóⁿ-xi, te ni vâ cádá cuendá-ndó núu cùu-ndo ñáyiú dàhá quée núú chíúⁿ pàtróóⁿ-xi, chi Xítohó Jesucristú cùnùu-gá ndécú ndihí ñaha-gá xii-o nchàa-o.

12 Te Yá Ndiòxí ní dàquée òhí ñaha-gá xii-ndo cuendá cundecu-ndo ndihí-gá, te vitna cùu-ndo ñáyiú quide ndáá ndécú ichi-gá. Te mee-gá ío cùu iní ñáhá-gá xii-ndo núu xiáⁿ tàú-ndó cùndahú iní tnáhá-ndó, te ío váha cuu iní-ndó chindee tnaha-ndo, te cuu-ndo ñáyiú ndáhú iní-xi, te ío víi ío váha cuu iní-ndó cùndecu ndihí tnaha-ndo, te ío càhnu cunduu iní-ndó cuendá nchaa sá quidé ñaha ñáyiú xii-ndo.

13 Te ducaⁿ cànehe-ndo tnúhu càhnu iní núú ndí mèe-ndo nacuaáa ndècu-ndo ichi-gá, te cada càhnu tucu iní-ndó núu ná cúú sá cúmání núú tnáhá-ndó. Te dàtná ní quide càhnu iní Xítohó Jesucristú nchaa sá ñà túú vâha ní xóo cada-ndo ducaⁿ càda-ndo cada cahnu iní-ndó nchàa sá cúmání núú tnáhá-ndó ndècu-ndo.

14 Te xini ñuhu vihi-xi sá ío cuu iní tnáhá-ndó cùndecu-ndo, chi núu ducaⁿ na càda-ndo, te quide-ndo nchaa dava-gá sá càháⁿ-í, te ñá túú tnàhí-gá ná cúmání-ndó.

15 Te dañ-ndo sá Yá Ndiòxí ná chindee ñaha-gá nàcuáa ío váha cuu iní-ndó cùndecu-ndo, chi ñu cuendá-án ní càháⁿ ñáhá Yá Ndiòxí xii-ndo cuendá cuu ñⁿnuu-ndo ndihí nchaa dava-gá ñáyiú ndècu ichi-gá, te ducaⁿ-ni ío ndacáⁿ táhú-ndó núú-gá.

16 Te ío cuhuⁿ iní-ndó tnúhu Xítohó Jesucristú, te ío váha cuáha-ndo cuendá nàcuáa càháⁿ tnúhu-gá te ducaⁿ dànehé tnáhá-ndó. Te ío càháⁿ dóho tnàha-ndo nacuaáa cada-ndo càncicúⁿ nihnu-ndo càda-ndo nchaa nacuaáa càháⁿ tnúhu-gá, te cata-ndo ndúdú ndée núú tûtú Yá Ndiòxí, ndihí nchaa dava-gá ndudú sá xini mée-ndó xita-ndo te nchaa xiáⁿ cata-ndo chíñuhu-ndo Yá Ndiòxí. Te òré xitá-ndó te ni yúhu ni iní-ndó ndàcáⁿ táhú-ndó núú-gá.

17 Te cuhuⁿ iní-ndó Xítohó Jesucristú òré sání iní-ndó càda-ndo ñⁿ chiuⁿ àdi ná tnúhu cuiní-ndó càháⁿ-ndó, te ñu-ni-gá cuhuⁿ iní-ndó. Te xini ñuhu-xi ndacáⁿ táhú-ndó núú Yá Ndiòxí, te ñu-ni Xítohó Jesucristú chindee ñaha-gá xii-ndo ndàcáⁿ táhú-ndó núú Tátá-ó Dütú Ndiòxí.

Nàcuáa tàú ñáyiú ndècu ichi Xítohó Jesucristú cadá-yu sá cúú-xi ndí meé-yu

18 Te nchaa nchòhó ñáyiú ñáhí ñáyiú ndècu yí-xi quindáá iní-ndó yí-ndo, chi ducaⁿ tàú-xi cada nchaa ñáyiú ñáhí ndécú ichi Xítohó Jesucristú.

19 Te nchaa nchòhó cue téé ndècu ñadihí-xi cuu iní-ndó ñadihí-ndó, te vá cùcuèhé-ndó-yu.

20 Te nchaa nchòhó ñáyiú ndècu tátá-xi ndihí náná-xi quindáá iní-ndó-yu, chi núu ducaⁿ na càda-ndo te ndùu vétú iní Yá Ndiòxí.

21 Te nchaa nchòhó ñáyiú cùu tátá ndihí náná vá dásátú-ndó iní cue déhe-ndo, chi núu ducaⁿ na càda-ndo te ni vâ quíxí-gá iní-güexi cada-güexi sá vâha.

22 Te nchaa nchòhò ñáyiú xínu cuechi quindáá iní-ndó nchàa ñáyiú cùu patróoⁿ-ndó, te ní yùhu ní iní-ndó càda-ndo nchaa chiuⁿ tahú-yu cuèi òrè ndécü-yu àdi oré ñá túú-yu, te ñá díú òrè-ni ndèhé-yu cada-ndo cuendá-ni sá cuíní-ndó cùdiu-ndo núú-yu, chi cada-ndo sá nèhé-ndó sá yíñùhu núú Xìtohó Jesucristú.

23 Te nchaa chiúⁿ sani iní-ndó càda-ndo te cada-ndo nè yuhu ní iní-ndó, te sá dúcáⁿ càda-ndo-án te cada-ndo cuendá sá xínú cuèchi-ndo núú Xìtohó Jesucristú te ñá díú núú ñáyiú ñuyiú-a xínu cuechi-ndo.

24 Te nchòhó sa nàha-ndo sá Xìtohó Jesucristú taxi-gá sá ndúú tãhú-ndó te núu ducaⁿ na càda-ndo, chi cùu-ndo ñáyiú xínu cuechi núú-gã.

25 Te nchaa ñáyiú quide nchaa sá cuèhé sá dúhá nàcháhu-yu núú Yã Ndióxi cuendá nchaa sá quidè-yu, te mee-gã vá cáda cuendá-gá cuèi ná ñáyiú cùu-yu, chi ncháa-yu nacháhu-yu nchaa sá ñá túú vãha quide-yu núú-gã.

4

1 Te nchaa nchòhó ñáyiú cùu patróoⁿ cuu-ndo ñáyiú váha, te cada-ndo nchàa nacúaa tàú-xi cunduu ndihi nchaa ñáyiú xínu cuechi núú-ndó, te cunaha-ndo sá àndiu ndecu Yaá cúú Xìtohó-ndó tàxi tñuní ñáhá-gã xii-ndo.

2 Te nchaa nchòhó ñáyiú ndècu ichi Xìtohó Jesucristú, vá dáña ndèé-ndó cáháⁿ ndihi-ndo Yã Ndióxi, te ío cuhuⁿ iní-ndó-gã òrè cáháⁿ ndihi-ndo-gã, te òrè-án ío ndacáⁿ tãhú-ndó núú-gã.

3 Te cácáⁿ tãhú-ndó tñàhá cuendá-ndí núú-gã cuendá sá díú-gã ná cáda te ndacu-ndí cáháⁿ-ndí tñúhu-gã núú nchàa dava-gã ñáyiú, te ducaⁿ cáháⁿ-ndí tñúhu Xìtohó Jesucristú sá ñá túú ní xíndecu ndihi nchaa ñáyiú ní xíndecu ndéé sanaha, te diu cuendá tñúhu-án yíhì-í vecaá vitna.

4 Te cáháⁿ ndihi-ndo Yã Ndióxi cuendá cáháⁿ-í nàcuáa tàú-xi cunduu te tecú tñuní-yu.

5 Te cada-ndo nchàa nacúaa tàú-xi cunduu sá cúu-xí nchàa ñáyiú ñá túú ndècu ichi-gã, te ducaⁿ-ni ío nducu ndèe-ndo cada-ndo nchaa nacúaa tàú-xi cunduu.

6 Te cada cuendá-ndó sá ío vii ío váha cunduu tñúhu cáháⁿ ndihi-ndò-yu, te cáháⁿ-ndó ñⁿ tñúhu nàcuáa cuu váha iní-yu, te ío váha cundehe-ndo nàcuáa cunduu tñúhu cúñaha-ndo xii ñⁿ ííⁿ-yu.

Tnúhu ndéé núú ní ndihi-ná

7 Te té Tiquicú téé ío cùu iní-ó ndècu ndihi-o ichi Xìtohó Jesucristú, téé-án cachí tñúhu-dé nchaa nàcuáa cùu ndecu-í. Te tñàhá-dé xínú cuèchi-dé núú Xìtohó Jesucristú te ío váha quide ndáá-dé.

8 Te tendaha-í-dé quixi-dé cachí tñúhu-dé nchaa nàcuáa cùu ndecu-ndí iha, te taxi-dé tñúhu ndee ñí cundecu ndihi-ndo.

9 Te tñàhá tucu té Onésimú téé ío cùu iní-ó ndècu ndihi-o ichi Xìtohó Jesucristú quixi ndihi-dé, te diu-ni téé ñuú-ndó cùu-dé te tñàhá-dé ío váha quide ndáá-dé. Te ndí ndúú-güedé cachí tñúhu-güedé nchaa nàcuáa cùu iha.

10 Te té Aristarcú téé yíhì ndihi-í vecaá quidé ndèe iní ñáhá-dé xii-ndo ndihi té Mácú ñaní primú tè Bèé. Te sa nàha-ndo nchaa nacúaa ní cáháⁿ-í cada-ndo quèheⁿ cuendá-ndó tè Mácú, te núu na quixi-dé quixi coto ñaha-dé xii-ndo, te ío váha cuu iní-ndó quèheⁿ cuendá-ndó-dé.

11 Te tñàhá téé nani Jesús, àdi Bustú chi úú diu-dé, quidé ndèe iní ñáhá-dé xii-ndo. Te cue téé-a cùu-güedé cue téé israhél ní chitnahá ñáhá-güedé xii-í

càháⁿ-ndí núú ñáiyu nàcuáa ndíhu ndaha ñàha Yá Ndiöxí xii-yu, te ni ñⁿ-gá ñáiyu isràèl ñá túú quide datná quidé-güedé. Te ío váha tàxi-güedé tnúhu ndee iní xii-í.

¹² Te tnàhá téé ñuú-ndó tē Ępafrás quidé ndèe iní ñáhá-dé xii-ndo, te cùu-dé tnàhá-dé téé xínu cuechi núú Xítohó Jesucristú. Te ducaⁿ-ni ñi yuhu ñi iní-dé xicáⁿ táhú-dé núú Yá Ndiöxí cuèndá-ndó cuèndá sá cànchícúⁿ nihnu-ni-ndo ìchi-gá, te ducaⁿ te ío váha tecu tnùní-ndó nchàa nacuáa cuìní Yá Ndiöxí cada-ndo, te ñiu-ni ducaⁿ cànchicúⁿ nihnu-ndo càda-ndo.

¹³ Te yúhú càchí tnúhu ndáá-í xii-ndo sá sùúní sàni iní-dé sá mée-ní sá vâha cuu xii-ndo cùndecu-ndo ndíhi nchaa ñáiyu xíndecu ìchi Xítohó Jesucristú ndécú ñúú Laodiceá, ndíhi nchaa ñáiyu xíndecu tucu ìchi-gá ndécú ñúú Hièrápólís.

¹⁴ Te tnàhá té Lùcá téé xìní nchaa núú yúcú sá quidé tâtna quide ndee iní ñáhá-dé xii-ndo téé ío cùu iní-ó, te tnàhá tucu té Dêmás quidé ndèe iní ñáhá-dé xii-ndo.

¹⁵ Te cúñaha-ndo na càda ndee iní nchaa ñáiyu ndècu ndíhi-o ìchi Xítohó Jesucristú ndécú ñúú Laodiceá, ndíhi tá Míñfás, ndíhi nchaa ñáiyu ndècu ìchi-gá tàcá vehe-xi dàcuahá-yu tnúhu-gá.

¹⁶ Te tutú cádũha-í-a tendaha-í quixi ndaha-ndo, te òré ná ndíhí dàcuaha-ndo te tendaha-ndo quíhíⁿ ndaha ñáiyu xíndecu ìchi-gá ndécú ñúú Laodiceá cuèndá dacuahá-yu tnàhá-yu. Te ñiu-ni ducaⁿ dàcuaha-ndo tutú tendaha-í quíhíⁿ ndaha ñáiyu ñuú Laodiceá òré ná dândixí-yu ndaha-ndo.

¹⁷ Te na càchí tnúhu-í xii-ndo nàcuáa cúñaha-ndo xii té Àrquipú, te duha cúñaha-ndo xii-dé: “Yá Ndiöxí ní taxi-gá chùu” quide-n, te ío váha cada cuèndá-n càda-n nchaa nacuáa ní cachí-gá”, duha cúñaha-ndo xii-dé.

¹⁸ Te yúhú té Páblú ndíhi ndaha mee-í tée-í ñⁿ úú tnúhu-a quide ndee iní ñáhà-í xii-ndo, te cunaha-ndo sá yúhú yíhí-í vecaá. Te Yá Ndiöxí ío na chĩndee chitúu ñaha-gá xii-ndo. Te ducaⁿ na cùnduu. Te ío chí cádá ndèe iní-ñá vitna.

TUTÚ DÍHNA NUU NĬ CADÚHA TĚ PĀBLÚ QUIHĬⁿ NDAHA ÑÁYIU ÑUÚ TESÀLÓNICÁ

TĚ Pāblú ndihĭ cue tĚe cùndihĭ-dĚ cādúha-güedĚ tutú quihĭⁿ ndaha ñáyĭu xĭndecu ichi Xĭtohá Jesucristú ndĚcú ñúú Tesàlónicá

¹ Yúhú tĚ Pāblú cādúha-í tutú-a ndihĭ tĚ Silvanú, ndihĭ tĚ Timúteú cuendá daquixi-í ndaha nchòhó ñáyĭu ndĚcu ndihĭ-ndĭ ichi Xĭtohá Jesucristú ndĚcú ñúú Tesàlónicá, chi cùu ñnuu-ndo ndihĭ Tátá-ó Dütú Ndiòxí, ndihĭ Xĭtohá Jesucristú. Te xĭcáⁿ táhù-í núú Dütú Ndiòxí, ndihĭ núú Xĭtohá Jesucristú sá ĩo na chĭndĚe chitúu ñaha-gă xii-ndo, te ducaⁿ ndĭ nduú-gă ná càda te ĩo váha cuu inĭ-ndó cùndecu-ndo.

Ñáyĭu ñúú Tesàlónicá ĩo váha sàndáá inĭ-yu Yá Ndiòxí

² Te ndĭ tnahá òré cáháⁿ ndihĭ-ndĭ Yá Ndiòxí ndĚcáⁿ táhú-ndĭ núú-gă sá ĩo quide váha-ndo ndĚcu-ndo, te ducaⁿ xĭcáⁿ táhú-ndĭ núú-gă sá ná còto ñaha-gă xii-ndo.

³ Te ĩo ndĚcáⁿ táhú-ndĭ núú Tátá-ó Dütú Ndiòxí sá ñĭ yuhu ñĭ inĭ-ndó sàndáá inĭ-ndó-gă, te xĭnu cuechi-ndo núú-gă, te cùu inĭ tnahá-ndó nàcuáa ndĚcu-ndo ichi-gă núu xĭáⁿ ĩo xĭto tnahá-ndo. Te cùtnunĭ ndáá inĭ-ndó sá quixí tucu Xĭtohá Jesucristú núu xĭáⁿ ñá túú dàña ndĚé-ndó ndĚtu-ndo-gă.

⁴ Te nchòhó ñáyĭu ndĚcu ndihĭ-ndĭ ichi Xĭtohá Jesucristú sa nàha-ndĭ sá Yá Ndiòxí ĩo cùu inĭ ñáhá-gă xii-ndo, te diu-gă ní cáháⁿ ñáhá-gă xii-ndo cuendá cundecu-ndo ĩchi-gă.

⁵ Te cùtnáhá ní dànehĚ ñáhá-ndĭ xii-ndo tnùhu-gă, chi ñá díú sá cùú inĭ mĚé-ndĭ ducaⁿ ñĭ dànehĚ ñáhá-ndĭ xii-ndo, chi mee Espĭritú Yá Ndiòxí ní chĭndĚe ñaha-xi ní cáháⁿ-ndĭ ñĭ yuhu ñĭ inĭ-ndĭ tnùhu-gă núú-ndó. Te nàha-ndo sá cùtnáhá ní xĭndecu ndihĭ ñaha-ndĭ xii-ndo ñĭ quide-ndĭ nàcuáa cáháⁿ Yá Ndiòxí cuendá sá cùú-xĭ sá váha sá cùú-xĭ-ndó.

⁶ Te nchòhó nchĭcúⁿ nihnu-ndo quide-ndo vitna datná quidĚ-ndĭ, chi quide váha-ndo dàtná quidĚ mĚe Xĭtohá Jesucristú, te díí inĭ ní tnĭ-ndo ĩchi-gă cuĚĭ ní ndoho ní tnahá-ndó, chi mee Espĭritú-gă ní chĭndĚe ñaha-xi xii-ndo.

⁷ Te sá dúcáⁿ quide váha-ndo núú Yá Ndiòxí, xĭáⁿ yĭnchĭcúⁿ nihnu ñáyĭu distritú Macèdoniá, ndihĭ ñáyĭu distritú Acăyá xĭquide váha-yu tnahá-yu, ñáyĭu xĭndecu ichi-gă.

⁸ Te diu-ndo ñĭ sanu ichi-ndo ñáyĭu distritú Macèdoniá, ndihĭ ñáyĭu distritú Acăyá, te ñá díú-nĭ ñáyĭu nchaa ñuú-áⁿ chi nchaa ñáyĭu dava-gă ñuú ñihĭ-yu tnùhu sá ĩo sàndáá inĭ-ndó Yá Ndiòxí. Te ñá túú-gă ná tnùhu cáháⁿ-ndĭ cuendá-ndó, chi nchaa-yu sa ñihĭ-yu tnùhu sá ĩo váha quide-ndo ndĚcu-ndo.

⁹ Te mĚé-yu xĭcáháⁿ váha-yu cuendá-ndó sá ĩo váha ní queheⁿ cuendá ñáhá-ndó xii-ndĭ cùtnáhá ní quixi-ndĭ díhna nuu. Te ní dáñá-ndó nchàa sá càchĭ-ndó cùu ndiòxí-ndó chi ñá díú ndiòxí cùú-xĭ, te ní tnĭ-ndo ĩchi Yá Ndiòxí Yáa ndĚcú tūu andĭu chi diu-gă cùú-gă Ndiòxí ndĭsa, te xĭnu cuechi-ndo núú-gă vitna,

¹⁰ te ndĚtu-ndo quixi tucu Xĭtohá Jesucristú Déhe Yá Ndiòxí Yáa ndĚcú àndĭu, chi diu-nĭ-gă ní quixi-gă ñuyúú-a ní xĭhĭ-gă, te ní ndoto-gă ní dándótó ñaha Yá

Ndiöxí xii-gá. Te ñu-ni Xítóhó Jesucristú dácăcu nihnu ñaha-gă xii-o núú ùhú núú ndàhú, chi sàndáá iní-ó-gă.

2

Nàcuáa ndùu chiuⁿ ní quide té Păblú ñuú Tesalónicá

¹ Te nchòhó ñáyiu ndècu ndihí-ndí ichi Xítóhó Jesucristú nàha-ndo sá ñà díú àúⁿ nă cuu ni quixi coto ñaha-ndí xii-ndo, chi ní sàndáá iní-ndó tnúhu Yá Ndiöxí.

² Te nàha-ndo sá cùtnàhú ní xindecu-ndí ñuú Fìlipú ío ní xúhuⁿ tnúhu cuèhé tnúhu duha núú-ndí, te ní caniha-güedé xii-ndí. Te ní ndee-ndí ní quixi-ndí ñuú-ndó, te ñá túú ní yùhú-ndí ní cáháⁿ-ndí tnúhu Yá Ndiöxí núú-ndó, chi mee-gă ní chindee ñaha-gá xii-ndí cuèí ío chitu ñáyiu ní cuu úhú iní ñáhá xii-ndí.

³ Te ñá túú ní dándahú ñáhá-ndí xii-ndo chi mee-ni tnúhu ndáá ní cáháⁿ-ndí núú-ndó, te ní ñà túú ní ñⁿ tnúhu cuèhé ñúhú iní-ndí ní cáháⁿ-ndí tnúhu-gá núú-ndó chi sa ní nduu ndoo ní nduu nine iní-ndí.

⁴ Te mee Yá Ndiöxí ní cachí-gá sá càháⁿ-ndí tnúhu-gá, te càháⁿ-ndí nàcuáa cùu iní méé-gă, chi sa nàha-gá nàcuáa cà iní-ndí, te ñá túú càháⁿ-ndí nàcuáa cùu iní ñáyiu.

⁵ Te nàha-ndo sá ñà díú ñⁿ tnúhu cudí iní-ndó cùndecu-ndo ichi ñuyúú ní cáháⁿ-ndí núú-ndó cuèndá taxi-ndo díhúⁿ. Te Yá Ndiöxí sa nàha-gá sá cáháⁿ ndáá-ndí.

⁶ Te ñá ñⁿ ndùu ni quide-ndí ñⁿ sá cádá-ndí cuèndá-ni sá cádá càhnu ñaha-ndo xii-ndí, àdi cada cahnu ñaha dava-gá ñáyiu, te cuèí tàù ndisa-ndí sá cádá càhnu ñaha-ndo xii-ndí ní cùu, chi chiúⁿ Xítóhó Jesucristú quidé-ndí, te dìcò-ni sá nchùhú ñá túú ní cuíní-ndí sá dúcáⁿ càda-ndo.

⁷ Te ío vii ío váha ní cáháⁿ-ndí núú-ndó, dàtná quidé ñⁿ ñaha cuu náná vii vii càháⁿ ndihí cue déhe-aⁿ dăcuehnu ñaha-aⁿ xii-güexi.

⁸ Te ducaⁿ ío cùu iní ñáhá-ndí xii-ndo, dico ñá díú-ní sá ñí cáháⁿ-ndí tnúhu Yá Ndiöxí núú-ndó, chi ndéé iní-ndí taxi-ndí ní dácótó ñaha-xi, te núu dìcò ní cùu-xi sá cúú, cuèndá sá ío cùu iní ñáhá-ndí xii-ndo.

⁹ Te nchòhó ñáyiu ndècu ndihí-ndí ichi Xítóhó Jesucristú nàha-ndo sá ío ní quide chiúⁿ-ndí cuèndá ní níhí-ndí sá ñí xexi-ndí. Te cuèí nduu cuèí niú ní quide chiúⁿ-ndí ní níhí-ndí sá ñí xexi-ndí ní cáháⁿ-ndí tnúhu Yá Ndiöxí núú-ndó cuèndá sá ñà túú ní cuíní-ndí chichiuⁿ ñaha-ndí xii-ndo.

¹⁰ Te nchòhó ñáyiu sàndáá iní tnúhu Yá Ndiöxí xini ndáá-ndó sá cúú-ndí cue téé váha te ducaⁿ sà naha Yá Ndiöxí tucu, te ní xica-ndí ichi ndáá òré ní cáháⁿ-ndí tnúhu-gá núú-ndó te ñu-ni ducaⁿ quide-ndí vitna. Te vá yò ñⁿ càháⁿ sá ñà túú quide ndáá-ndí ndécú-ndí.

¹¹ Te nàha tucu-ndo sá ñí dácàháⁿ ñáhá-ndí xii-ndo, te ní taxi-ndí tnúhu ndee iní xii-ndo nchàa-ndo, te dàtná quidé ñⁿ tátá ndihí cue déhe-dé ní quide-ndí.

¹² Te ní cachí-ndí xii-ndo sá cádá ndáá-ndó cùndecu-ndo nacuáa tàù-xi cada nchaa ñáyiu tnàhá tnúhu ndihí Yá Ndiöxí, chi mee-gă ní cáháⁿ ñáhá-gă xii-o cuèndá nduu táhú-ó cùndecu-o ndihí-gá núú ío váha càa ndecu-gá táxi tnùní-gá.

13 Te xǎn ío ndàcáⁿ táhú-ndí núú Yá Ndiǒxí sá nchòhò òrè ní tedóho-ndo tnúhu-gá ní cáháⁿ-ndí, te ní sándáá iní-ndó chí ní cutnúmí iní-ndó sá díú tnúhu Yá Ndiǒxí cúú-xí, te ñá díú tnúhu ñáyiú ñuyíú-a cùu-xi. Te ndáá sá cúú-xí ñⁿ sá ío váha sá cúú-xí nchòo cue ñáyiú ní sándáá iní tnúhu-gá.

14 Te nchòhò ñáyiú ndècu ndihí-í ichi Xítóhó Jesucristú, ío ní ndoho ní tnàhá-ndó sá ní quide ñaha ñáyiú ñuú-ndó. Te nchòhò ní ndoho-ndo dàtná ní ndoho nchaa ñáyiú tàcá dácuaⁿá tnúhu Xítóhó Jesucristú ndécú distritú Judeá, chí tnàhá-yu ío ní dándóhó ñaha ñáyiú ñuú-yu.

15 Te diu-ni ñáyiú distritú Jùdeá-áⁿ ní sahní-yu cue téé ní xóo cáháⁿ tnúhu Yá Ndiǒxí ndéé sanaha. Te diu-ni ñaní tnàhá-yu cùu cue ñáyiú ní sahní ñaha xii Xítóhó Jesucristú, te sátá xǎn te ní ngúíta-yu ní cuu úhú iní ñáhá-yu xii-ndí, núú xǎn ñá túú tnàhá iní Yá Ndiǒxí nchaa sá quidè-yu, te ndéé nchaa dava-gá ñaní tnàhá-yu cùu úhú iní-yu.

16 Te ío chidácá nihnu ñahá-yu xii-ndí òrè càháⁿ-ndí tnúhu Yá Ndiǒxí núú ñáyiú ñá túú cùu ñáyiú isràél-áⁿ, te ducaⁿ quide ñáyiú-áⁿ cuèndá cuíní-yu sá vâ càháⁿ-ndí tnúhu-gá, sá cádá cuèndá naníhí tàhú ñáyiú ñá túú cùu ñáyiú isràél-áⁿ, te sá dúcáⁿ quidè-yu te ío ta cùu vai-gá cuèchi-yu cuáháⁿ. Te Yá Ndiǒxí ío cùdèéⁿ-gá núú-yu, te tendaha-gá ñⁿ tnúndòho quixi sá cúú-xí-yu te ío ndohó-yu.

Té Pǎblú cuíní-dé quíngoto-dé ñáyiú xǎndecu ichi Xítóhó Jesucristú ndécú ñuú Tesalónicá

17 Te nchòhò ñáyiú ndècu ndihí-ndí ichi Xítóhó Jesucristú ní quee-ndí núú-ndó, te cuèi ní cuxica-ndí dico ducaⁿ-ni ñúhu iní ñáhá-ndí xii-ndo, te ío ñúhu iní-ndí sá quixí còto ñaha tucu-ndí xii-ndo.

18 Te yúhú té Pǎblú ducaⁿ-ni ñúhu iní-í sá cuèdicó mèé-í quixi-í, quixi coto ñaha-í xii-ndo, dico yucu ñávàha chidácá nihnu ñaha-xi xii-í.

19 Te nchoo ñáyiú ndècu ichi Xítóhó Jesucristú ndètu-ni-gá-ó quèxio-gá candeca ñaha-gá xii-o ndàa andíu cundecu-o ndihí-gá. Te cùdíí víhí iní-ndí sá cuèndá-gá chí ní chindee ñaha-gá ní sanu ichi ñaha-ndí xii-ndo ichi-gá, te ío vâi ñáyiú cáháⁿ váha-yu cuèndá-ndí ná sáa nduu quixi tucu-gá.

20 Te ducaⁿ ío vâi ñáyiú cáháⁿ váha-yu cuèndá-ndí cuèndá sá ní sanu ichi ñaha-ndí xii-ndo ichi-gá, te quide váha-ndo. Te xǎn ío cùdíí iní-ndí.

3

1-2 Te sa ní cunduu ñá túú-gá càháⁿ ndihí tnàha-o, núú xǎn ñá ní cùndee-gá iní-ndí ní tendaha-ndí té Timùteú ní quixi coto ñaha-dé xii-ndo, te nchúhú ní quendóo-ndí ñuú Àtenás, chí tnàhá-dé xínú cuèchi-dé núú Yá Ndiǒxí, ndihí núú Xítóhó Jesucristú càháⁿ-dé tnúhu-gá núú ñáyiú. Te ní quixi-dé ní taxi-dé tnúhu ndee iní xii-ndo cuèndá sá ío quíndáá-ni iní-ndó Xítóhó Jesucristú, te canchicúⁿ nihnu-ni-ndo ní yuhu ni iní-ndó ichi-gá.

3 Te vâ nátúhú iní-ndó càchicúⁿ nihnu-ndo ichi-gá sá dúhá cùu úhú iní ñáhá ñáyiú xii-o, te nchòhó sa nàha-ndo sá dàcuítíí sá ndóhó víhi-o cuèndá-gá.

4 Te ndéé cùtnàhá ndécú ndihí ñaha-gá-ndí xii-ndo ní cachí tnúhu ndáá-ndí sá ío ndoho-o, te ducaⁿ ndísa quide-xi.

5 Te xǎn núú ñá ní cùu váha-gá iní-í chí cuèndá ñá túú-gá ní ñihí-í tnúhu nàcuáa cùu ndecu-ndo núú ní tendaha-í té Timùteú ní quixi-dé ní ndécú

tnúhu-dé núú-ndó nõu ndècu-ni-ndo ichi Xítóhó Jesucristú, chi ní sani ìⁿ ní sani úú iní-í sá cúú-xí-ndó, chi ná ndèé chidácá nihnu ñaha yùcu ñávãha xii-ndo te cuíta chùⁿ ní quide-ndí sá cúú-xí-ndó nĩ càháⁿ-í.

⁶ Te ñáhá, chi ní ndexio té Timùteú sá ní quixi-dé ñuú-ndó, te ñaha-dé tnúhu ní nasáá sá nì yuhu ni iní-ni-ndo sàndáá iní-ndó Yã Ndiõxí, te cùu iní-ndó cuè tñaha ñáyiu-ndo. Te càchí-dé sá ïo ñúhu iní ñáhá-ndó xii-ndí, te ïo cuíní-ndó cãháⁿ ndihí ñaha-ndo, te ñu-ni ducaⁿ ïo cuíní nchúhú cáháⁿ ndihí ñaha-ndí xii-ndo tùcu.

⁷ Te ïo ndòho-ndí chi ïo cùu úhú iní ñáhá ñáyiu xii-ndí, dico sá nĩ níhí-ndí tnúhu sá nchòhó ñáyiu ndècu ndihí-ndí ichi Xítóhó Jesucristú ñá túú dàña ndéé-ndó sàndáá iní-ndó Yã Ndiõxí, te xíãⁿ cúú-xí ìⁿ tnúhu càhnu iní ní níhí-ndí chi ní naníhí ndéé-ndí.

⁸ Te ní nduu vétú iní-ndí sá ní níhí-ndí tnúhu ndècu-ni-ndo ichi-gá.

⁹ Te òré càháⁿ ndihí-ndí Yã Ndiõxí, te ïo ndàcáⁿ táhú-ndí núú-gã cuèndá sá ñá túú dàña nihnu-ndo ichi-gá, núu xíãⁿ ïo cùdí ìníní-ndí.

¹⁰ Te cuèi nduu cuèi niú xicáⁿ táhú-ndí núú Yã Ndiõxí sá mée-gã ná càda te sáá ìⁿ nduu nàníhí tnáhá-ó cuèndá danèhé ñáhá vãha-gã-ndí tnúhu-gã sá cumání-gã xii-ndo.

¹¹ Te mee Tãtá-ó Dütú Ndiõxí, ndihí Xítóhó Jesucristú chindee ñaha-gã xii-ndí te quixi-ndí quixi coto ñaha-ndí xii-ndo.

¹² Te mee Xítóhó Jesucristú ná chindee ñaha-gã xii-ndo, te ïo-gã cuita cuu iní tnáhá-gã-ndó nàcuáa ndècu-ndo ichi-gá ndihí nchaa dava-gã ñáyiu dàtná cúú ìnì ñáhá-ndí xii-ndo.

¹³ Te xicáⁿ táhú tùcu-ndí núú Tãtá-ó Dütú Ndiõxí sá nì yuhu ni iní-ndó càchicúⁿ nihnu-ni-ndo ichi-gá, te ducaⁿ te cundáá-ndó nõú-gã, te ñá túú-gã ná cumání-ndó òré ná sáá nduu quixi tucu Xítóhó Jesucristú ndihí nchaa ñáyiu sa ndècu ndihí-gã.

4

Nàcuáa cuíní Yã Ndiõxí cada-o

¹ Te nchòhó ñáyiu ndècu ndihí-í ichi Xítóhó Jesucristú càháⁿ ndàhú-í núú-ndó sã cùndédóho-ndo na càháⁿ-í nàcuáa ndùu tnúhu càháⁿ Xítóhó Jesucristú, chi mee-gã cuíní-gã sá cadá-ndó nàcuáa ní dánèhé ñáhá-ndí xii-ndo cuèndá cuu vãha ìnì Yã Ndiõxí núú-ndó, te ducaⁿ-ni càda-ndo ndéé núú cuaháⁿ núu vèxi.

² Te nchòhó sa ñaha-ndo nàcuáa ní càháⁿ-ndí núú-ndó, chi ní càháⁿ-ndí nàcuáa ní táuchíúⁿ Xítóhó Jesucristú te ní cachí-gã sá

³ Yã Ndiõxí cuíní-gã sá cadá ndáá-ó cùndecu-o ichi-gã. Te nchoo cuè téé vã càháⁿ ndihí-o ñáyiu ñihí te núu ñá díú ñàdihí-ó cùu-yu, te ni cuè ñáyiu ñihí vã càháⁿ ndihí-yu téé núu ñá díú yíi-yu cùu-güedé.

⁴ Te núu xíãⁿ nchaa nchòhó tnàha téé-í ndi díiⁿ cùndecu ñàdihí-ndó, te ñu-ni ducaⁿ nchòhó cuè ñáyiu ñihí tucu ndi díiⁿ cùndecu yíi-ndo, te mee-ni tnúhu yíiñúhu càháⁿ ndihí tnàha-ndo.

⁵ Te vã cání cuèhé cani duha iní-ndó dàtná quidé cuè ñáyiu ñá túú sàndáá ìnì tnúhu Yã Ndiõxí.

⁶ Te ni ìⁿ-ndo vã cání ìnì-ndó dàndahú-ndó tnàha téé-ndo càháⁿ ndihí-ndo ñàdihí-güedé. Te ducaⁿ-ni nchòhó cuè ñáyiu ñihí tucu vã cání ìnì-ndó

dàndahú-ndó tnàha dihí-ndó cǎháⁿ ndihi-ndo yǐ-yu. Chi núu ducaⁿ na càda-ndo, te Yá Ndiõxí ío dandòho ñaha-gá xii-ndo dàtná ní cachí-ndí ndéé díhna.

⁷ Chi Yá Ndiõxí ní cǎháⁿ ñáhá-gǎ xii-o cuendá sá cadá-ó mèe-ni sá vǎha, te ñá díú sǎ cuèhé sá dúhá.

⁸ Te nchaa ñáyiú na càda sáá iní-xi tnúhu càháⁿ-ndí, te quide sáá iní-yu núú Yá Ndiõxí, chi ñá díú tnúhu téé ñuyíú-a cùu-xi, chi tnúhu Yá Ndiõxí, Yaá ní taxi Espiritú-gá ndécú ndihi-o cuu-xi.

⁹ Te nchòhó ñáyiú ndècu ndihi-í ichi Xítóhó Jesucristú, ñá túú-gǎ xíní ñùhu-xi cachí tnúhu-í xii-ndo sǎ cúú iní tnáhá-ndó, chi Yá Ndiõxí sa ní dánèhé ñáhá-gǎ xii-ndo nàcuáa cuu iní tnáhá-ndó, ndihi nàcuáa cuu iní-ndó dàva-gǎ tnàha ñáyiú-ndo.

¹⁰ Te ducaⁿ xíquide-ndo ndihi nchaa ñáyiú ndècu ndihi-ndo ichi Xítóhó Jesucristú ndécú distritú Macèdoniá. Te càháⁿ ndàhú-ndí núú-ndó sǎ cadá ndǎá-gǎ-ndó, te cuíta cuu iní-gǎ-ndó cuè tnaha ñáyiú-ndo quíhíⁿ.

¹¹ Te cada ndee iní-ndó cùndecu ñucaxi iní-ndó, te cuhuⁿ iní-ndó chiúⁿ mee-ndo, te xiǎⁿ cada-ndo dàtná ní dánèhé ñáhá-ndí xii-ndo.

¹² Te ducaⁿ te tnáhá nchaa ñáyiú ñá túú sàndáá iní tnúhu Yá Ndiõxí cǎháⁿ váha-yu cuendá-ndó, te ducaⁿ te ñá túú tnàhí-gǎ ná cùmání xii-ndo.

Nàcuáa cada-xi òré quixi tucu Xítóhó Jesucristú

¹³ Te vitna na càchí tnúhu-ndí xii nchòhó ñáyiú ndècu ndihi-ndí ichi Xítóhó Jesucristú cuendá nchaa ñáyiú sa ní xíhí, ñáyiú ní sàndáá iní tnúhu Yá Ndiõxí cuendá sǎ vǎ ndìhú iní-ndó cuendá-yu dàtná xíquide nchaa ñáyiú ñá túú yíhi iní-xi sǎ quixí tucu Xítóhó Jesucristú ñuyíú-a.

¹⁴ Te nchoo sàndáá iní-ó sǎ ní xíhí Xítóhó Jesucristú te ní ndoto-gǎ ní dándótó ñaha Yá Ndiõxí, te sàndáá tucu iní-ó sǎ dàtná ní dándótó Yá Ndiõxí Xítóhó Jesucristú, ducaⁿ dándoto-gǎ nchaa ñáyiú ní xíhí ñáyiú ní sàndáá iní ñáhá xii-gǎ.

¹⁵ Te na càchí tnúhu tucu-ndí ingá tnúhu nàcuáa ní cǎháⁿ Xítóhó Jesucristú, chi ní cachí-gǎ sǎ ná sáá nduu quixi tucu-gǎ te nchaa ñáyiú sàndáá iní tnúhu-gǎ ndécú vívú ñuyíú-a vá códó núu-yu núú ñáyiú ní xíhí ndaa andiú, chi jùndú candeca ñaha-gǎ xii-yu ndaa.

¹⁶ Chi Xítóhó Jesucristú quee túu-gǎ andiú, te cana-gǎ nchaa ñáyiú ní sàndáá iní tnúhu-gǎ, te òré-án Yá Ndiõxí cada-gǎ te òré-án, cǎháⁿ ñáⁿ cútú te òré-ni-án ndoto nchaa ñáyiú ní xíhí, ñáyiú ní sàndáá iní tnúhu-gǎ.

¹⁷ Te dàtnùní nchaa nchoo ñáyiú xíndecu vívú ñuyíú-a naníhí tnáhá-ó ndihi-yu, te ndanchita-o ndìhu-o xítí vícó naníhí tnáhá-ó ndihi Xítóhó Jesucristú, te candeca ñaha-gǎ xii-o ndáa andiú cundecu ndihi-o-gǎ ní caa ní quíhíⁿ.

¹⁸ Núu xiǎⁿ chí cuáha tnàha tnúhu ndee iní, te vá ndìhú iní-ndó chi naníhí tǎhú-ndó núú-gǎ.

5

¹ Te nchòhó ñáyiú ndècu ndihi-í ichi Xítóhó Jesucristú ñá túú-gǎ xíní ñùhu-xi sǎ càchí tnúhu-í xii-ndo sǎ quixí tucu-gǎ, te ní ñá túú-gǎ xíní ñùhu-xi sǎ càchí tnúhu-í xii-ndo nǎsa cada-xi òré quixi-gǎ.

² Chi nchòhò sa nàha ndáá-ndó sã Xítohó Jesucrístú quixi-gá nduu ñà túú yíhi iní-ó, chi dàtná quidé ìⁿ ñadúhú cada-gá òré quixi-gá, chi nduu ñà túú nã yíhi iní-ó quixi tucu-gá.

³ Te sáá nduu te cachí nchaa ñáyiú ndècu ichi cuehé ichi duha: “Vitna ío váha cùu iní-ó ndècu-o, te ñá túú-gã ná cúmání xii-o”, duha quesàhá-yu. Te ñáyiú-án òré ñá túú nã yíhi iní-yu, te quèxio tnúndòho tnúhu ndàhú sá cúú-xí-yu. Chi cada-xi dàtná quidé-xí ìⁿ ñáyiú òhí ní tnahá òré cacu déhe-xi, chi na iní-yu ní dátñùhú ñáhá-xí te vá cãcu-yu núú tnúndòhò-yu, te ducaⁿ sã tnahá-xi yáha nchaa ñáyiú ñá túú ndècu ichi-gá, chi na iní-yu quexio tnúndòho sá cúú-xí-yu te vá cãcu-yu núú tnúndòhò-án.

⁴ Te nchòhò ñáyiú ndècu ndihi-í ichi Xítohó Jesucrístú, ñá túú-gã ndécú-ndó ichi cuehé ichi duha, núú xíãⁿ sa yíhi-ná iní-ndó ndùu quixi-gá te vá yáha-ndo dàtná yáha nchaa ñáyiú ñá túú ndècu ichi-gá, chi ñáyiú-án ñà túú nã yíhi iní-yu sá quíxí-gã. Te na iní-yu quexio-gá dàtná quidé ñadúhú na iní-ó quíhu-güedé vehe-o dùhu-güedé ducaⁿ càda-gá òré quixi-gá.

⁵ Te nchoo ñà túú-gã ndécú-ó ichi cuehé ichi duha, te ichi-án cúú-xí dàtná ìⁿ ichi nee ndècu-o ní cuu, te vitna sa ní ngúndecu-o ichi váha, te ducaⁿ chi Yá Ndiòxí ní dándíxí túu-gá iní-ó cuèndá cutnùní iní-ó nàcuáa ndùu cuèndá-gá.

⁶ Te xíni ñuhu-xi dandixi túu-o iní-ó, te cada váha-o cùndecu-o ichi-gá, te vá cáda-ó dàtná quidé nchaa ñáyiú ñá túú sàndáá iní ñáhá xii-gá, chi ñáyiú-án ñà túú-gã quidé cuèndá-yu te núú quide váha-yu àdi ñá túú quide váha-yu ndécú-yu.

⁷ Te nchaa ñáyiú quide cuehé quidé dùha cuú-yu dàtná ìⁿ ñáyiú xidí àdi xíni, chi ñá túú quide cuèndá-yu nàcuáa cada-yu ìⁿ sá váha dàtná cuíni Yá Ndiòxí.

⁸ Te nchòhò ñáyiú sa ní cutnùní iní-xi nàcuáa ndùu ichi váha, dandixi túu-ndo iní-ndó cùndecu-ndo, te quíndáá ndisa iní-ndó Yá Ndiòxí, te cuu iní-ndó cuè tnahá ñáyiú-ndo te ducaⁿ te vá táxi tnùní ñáhá ní ìⁿ sá cuèhé sá dúhá xii-ndo. Te ío cuhuⁿ iní-ndó sã cùndecu-ndo ndihi-gá ní caa ní quíhíⁿ.

⁹ Chi Yá Ndiòxí ní cachí-gá sá vã quíhíⁿ-ó núú ùhú núú ndàhú, chi mee-gã nacuaca ñaha-gã xii-o cùndecu-o ndihi-gá, chi ní sàndáá iní-ó Xítohó Jesucrístú.

¹⁰ Te mee Xítohó Jesucrístú ní xíhí-gá sá cuèndá nchaa yíca cuèchi-o, te ní ndoto-gá cuèndá nduu táhú-ó cùndecu-o ndihi-gá andiú na sáá nduu cuéi sa ní xíhí-ó, àdi vátá cùú-gá-ó.

¹¹ Núú xíãⁿ chí cuãha tñaha tnúhu ndee iní, te chindee tñaha-ndo cundecu-ndo ichi-gá dàtná tá quide-ndo véxi.

Té Pãblú dáquini sàhú-dé ñáyiú ndècu ichi Xítohó Jesucrístú

¹² Te nchòhò ñáyiú ndècu ndihi-ndí ichi Xítohó Jesucrístú, càháⁿ ndàhú-ndí núú-ndó sã cànèhe-ndo sá yíñùhu núú cuè téé cùnùu xinu cuechi núú Yá Ndiòxí, cue téé dànèhé ñáhá xii-ndo nacuáa cundecu-ndo ichi-gá.

¹³ Te cáháⁿ váha-ndo ndihi-güedé, te cuu iní-ndó-güedé, chi nàha-ndo sá chíúⁿ Yá Ndiòxí quidé-güedé. Te cundecu ndihi váha tñaha-ndo nchaa-ndo.

¹⁴ Te càháⁿ ndàhú tucu-ndí núú-ndó sã cáháⁿ-ndó dòho nchaa ñáyiú ñá túú cuíni cada chiúⁿ, te ducaⁿ cuãñaha-ndo tnúhu ndee iní xii nchaa ñáyiú quíyuhu iní-xi canchicúⁿ nihnu ichi-gá, te chindee tùcu-ndo nchaa ñáyiú vátá ngũnu ichi váha-gá, te cunduu càhmu iní-ndó núú-yu ncháá-yu.

15 Te cada ndee iní-ndó te núu ndècu tnahá ñáyi-u-ndo cùu úhú iní ñáhá-yu xii-ndo, te vá tnahá-ni-ndo cùu úhú iní-ndó-yu. Te mee-ni sá vâha cada-ndo sá cúú-xí nchâa tnahá ñáyi-u-ndo.

16 Te nchaa nduu ío cudíí iní-ndó cùndecu-ndo.

17 Te ññ nduu ññ nduu cáháñ ndihí-ndo Yá Ndióxi.

18 Te ndacáñ táhú-ndó núú-gã te núu nándi cùu sá yâha-ndo ndècu-ndo, chi ducañ cuíní-gã cada-o, te ñu ducañ ndúu tnúhu cáháñ Xítohó Jesucristú.

19 Te vá quèhndé nihnu-ndo chiuñ quide Espíritú Yá Ndióxi iní-ndó.

20 Te vá cádá sáá iní-ndó núú cuè téé cáháñ tnúhu Yá Ndióxi nâcuáa dàcahu iní ñáhá-gã xii-güedé.

21 Te cada cuèndá vâha-ndo nâcuáa cáháñ-güedé, te tñi-ndo nchâa tnúhu vâha cáháñ-güedé.

22 Te dañá-ndo nchâa ichi cuehé ichi duha.

23 Te mee Yá Ndióxi quidé-gã ío vâha cùu iní-ó ndècu-o ichi-gã. Te xicáñ táhú-í núú-gã sá ná càda íí ñáhá-gã xii-ndo, te na còto ñaha-gã xii-ndo ndihí iní-ndó cuèndá sá vâ cádá-gã-ndó nì ññ sá cuèhé sá dúhá, te ñu-ni ducañ na càda-gã sá cúú-xí-ndó ndéé ná sáá nduu quixi tucu Xítohó Jesucristú ñuyíú-a.

24 Chi Yá Ndióxi Yáá ní cáháñ ñáhá xii-o cada-gã nâcuáa ní cáháñ-gã, te chindee ñaha-gã xii-ndo.

Té Páblú quidé ndèe iní-dé ñáyi-u xñdecu ichi Xítohó Jesucristú ndécú ñúú Tesalónica

25 Te nchòhó ñáyi-u ndècu ndihí-í ichi Xítohó Jesucristú, cácáñ táhú-ndó núú Yá Ndióxi sá ná chindee ñaha-gã xii-ndí.

26 Te cúñaha-ndo xii nchaa ñáyi-u ndècu ndihí-o ichi Xítohó Jesucristú sá nì yuhu nì iní-ndí quidé ndèe iní ñáhá-ndí xii-ndo ndihí-yu.

27 Te vitna mee Yá Ndióxi ndéhé-gã sá cáháñ ndàhú-í núú-ndó sá dácuàha-ndo tutú-a núú nchâa ñáyi-u ndècu ndihí-o ichi-gã.

28 Te Xítohó Jesucristú ío na chindee chitúu ñaha-gã xii-ndo núú cuàháñ núú vèxi. Te ducañ na cùnduu. Te ío chí cádá ndèe iní-nâ vitna.

TUTÚ CÚÚ ÒÚ NÍ CADÚHA TÉ PĀBLÚ QUIHÍⁿ NDAHA ÑÁYIU ÑUÚ TESÀLÓNICÁ

Té Pāblú ndihi cue té cùndihi-dé cádũha-güedé tutú quihíⁿ ndaha ñáyiu xĩndecu ichi Xítóhó Jesucristú ndécú ñúú Tesàlónicá

¹ Yúhú té Pāblú cádũha-í tutú-a ndihi té Silvanú, ndihi té Timùteú cuèndá daquixi-í ndaha nchòhó ñáyiu ndècu ndihi-ndí ichi Xítóhó Jesucristú ndécú ñúú Tesàlónicá, chi tnàhá tnúhu-ndo ndihi Tátá-ó Dũtú Ndiòxí, ndihi Xítóhó Jesucristú.

² Te xicáⁿ táhú-ndĩ núú Dũtú Ndiòxí, ndihi núú Xítóhó Jesucristú sá ná chĩndee chitúu ñaha-gá xii-ndo, te ducaⁿ ndĩ nduu-gá ná cádá te ío váha cuu iní-ndó cùndecu-ndo.

Yá Ndiòxí cada ndáá-gá cuèchi nchaa ñáyiu ndècu ichi cuehé ichi duha na sàá nduu quixi tucu Xítóhó Jesucristú

³ Te nchòhó ñáyiu ndècu ndihi-ndí ichi Xítóhó Jesucristú, càchí tnúhu-í xii-ndo sá cúnaha-ndo sá ñà túú dàña ndee-ndí ndácáⁿ táhú-ndĩ núú Yá Ndiòxí cuèndá-ndó, chí dacuití ducáⁿ taú-xi cunduu chí ío-gá tá sàndáá iní-ndó-gá cuáháⁿ, te ducaⁿ ùuⁿ-gá tá cùu iní tnáhá-ndó nàcuáa ndècu-ndo ichi Yá Ndiòxí.

⁴ Núu xĩáⁿ nchúhú ío váha càháⁿ-ndí cuèndá-ndó núú nchaa ñáyiu sàndáá iní tnúhu Yá Ndiòxí nchaa núú tàcá-yu dàcuahá-yu tnúhu-gá, chí ío sàndáá iní-ndó-gá, te ñà túú dàña ndeé-ndó nchicúⁿ nihnu-ndo ichi-gá, te quide cahnu-ní iní-ndó cuèi nándi sá yáha-ndo ndècu-ndo ichi-gá.

⁵ Te sá dúcáⁿ quide váha-ndo ndècu-ndo xĩáⁿ cùtnùni nàcuáa cada ñaha Yá Ndiòxí xii-ndo na sàá nduu, chí nduu táhú-ndó cùndecu-ndo núú táxí tnùní-gá, te ducaⁿ càda-gá chí cùu-gá Yáá quidé ndáá cuiti. Te vitna ndòho-ndo nacuáa ndíhu ndaha-gá dava-gá ñáyiu.

⁶ Te Yá Ndiòxí ío váha ndáá quidé-gá, chí mee-gá nachinaa-gá nchaa sá quidé ñaha ñáyiu cùu úhú iní ñáhá xii-ndo,

⁷ te nchoo ñáyiu ndòho cuèndá Xítóhó Jesucristú nucúndecu váha-o na sàá nduu núu túu-gá andíu, te tnàhá cue espíritú xínú cuèchi núú Yá Ndiòxí cuuⁿ ndihi-gá, te cue espíritú-áⁿ quidé-xí nchaa núu chiuⁿ tahu-gá. Te òré nuu túu-gá andíu ndihi cue espíritú-áⁿ, te ío dàtásaⁿ-xi andíu.

⁸ Te dandòho-gá nchaa ñáyiu ñà túú tnàhá tnúhu ndihi Yá Ndiòxí, ñáyiu ñà túú sàndáá iní tnúhu Xítóhó Jesucristú tnúhu sá càháⁿ nàcuáa naníhí tàhú-yu.

⁹ Te nchaa ñáyiu-áⁿ ío dandòho ñaha-gá xii-yu, chí ndohó-yu ní caa ní quihíⁿ, te vá cùndécú-yu núú ío váha càa ndecu-gá táxí tnùní-gá.

¹⁰ Te ducaⁿ càda ñaha-gá xii-yu na sàá nduu, te dàvá-áⁿ ío cada càhnu ñaha nchaa ñáyiu sàndáá iní ñáhá xii-gá. Te tnàhá nchaa nchòhó ñáyiu ní sàndáá iní tnúhu ní càháⁿ-ndí ducaⁿ càda-ndo, te nchaa-o ío cuñúhu-o-gá dàvá-áⁿ.

¹¹ Te cuèndá xĩáⁿ núu ío xicáⁿ táhú-ndĩ núú Dũtú Ndiòxí sá ná chĩndee ñaha-gá xii-ndo cùndecu váha-ndo ichi-gá dàtná cuini méé-gá cundecu nchaa ñáyiu ní càháⁿ-gá cundecu ndihi-gá. Te xicáⁿ táhú tucu-ndí núu-gá sá ío na chĩndee ñaha-gá xii-ndo càda-ndo nchaa sá váha sàni iní-ndó, ndihi cuèndá chiuⁿ quide-ndo cuèndá-gá, te ducaⁿ chí sàndáá iní-ndó-gá.

12 Te núu ducaⁿ na càda-ndo, te cáháⁿ váha ñáyiú cuèndá Xítóhó Jesucristú, te tnàhá-ni nchòhó cáháⁿ váha-yu cuèndá-ndó, chi mee Yá Ndióxiⁿ ndihi Xítóhó Jesucristú cúndàhú iní ñáhá-gá chíndèe ñaha-gá xii-ndo.

2

Tée quixi dandàhú ñáyiú

1 Te nchòhó ñáyiú ndècu ndihi-ndí ichi Xítóhó Jesucristú càchí tnúhu-ndí xii-ndo nàcuáa cada-xi nduu na quixi tucu-gá, chí quixi-gá nacuaca ñaha-gá xii-o, núu xíáⁿ cáháⁿ-ndí dóho-ndo.

2 Te ñá díú sá ñⁿ tnúhu tecú dóho-ndo te ngüíta-ndo càni ñⁿ cani úú iní-ndó, te ni vâ yùhú-ndó te núu véxi ñⁿ tée càchí-dé sá cáháⁿ-dé tnúhu Yá Ndióxiⁿ, te càchí-dé sá sá véxi Xítóhó Jesucristú, te vâ quindáá iní-ndó tnúhu cáháⁿ-dé chí ñá ndáá, àdi véxi ñⁿ tée nèhe ñⁿ tutú núú-ndó te càchí-dé sá yùhú ní tendaha-í véxi, te núu tütú-án cáháⁿ-xi sá sá véxi Xítóhó Jesucristú, te diu-ni vâ quindáá iní-ndó nàcuáa cáháⁿ-xi, te ndèda-ni càa ñáyiú cáháⁿ-yu dàvá-án sá sá véxi-gá dico vâ quindáá tnàhí iní-ndó.

3 Núu xíáⁿ dátüha ñaha-í xii-ndo cuèndá sá vâ dáñá tnàhí-ndo mèe-ndo dandahú ñáhá ñáyiú. Chí cümání-gá sáá nduu quixi tucu Xítóhó Jesucristú, te ngüíta nchaa ñáyiú cuu úhú iní-yu Yá Ndióxiⁿ, te dàvá-án quini-yu ñⁿ tée xidó quidé nchàa sá cuèhé sá dúhá, te tée-án quíhíⁿ-dé núu ùhú núu ndàhú ni caa ni quíhíⁿ.

4 Te diu-ni tée-án vâ ndèe iní-dé nchaa sá càchí ñáyiú cùu ndiòxiⁿ-yu ndihi nchaa dava-gá sá quidé cahnú-yu, te cachí-dé sá ño cùnuu-dé, te quíhu-dé ndéé xití veñúhu núu ndécú cuè ñáyiú chihñuhu ñaha xii Yá Ndióxiⁿ coo-dé, te cúñaha-dé xii-yu sá cúú-dé Yá Ndióxiⁿ.

5 Te dandàcu iní-ndó chi nchaa tnúhu-a sa ní cachí tnúhu-í xii-ndo cùtnàhà ní xindecu ndihi ñaha-í.

6 Te nchòhó sa cùtnuní iní-ndó nã cúú sã ngání ñaha xii tée-án núu ñá túú-dé vitna, dico na sáá nduu tàú-xi quee-dé caca cuu-dé te dàvá-án quini ñáhá nchàa ñáyiú.

7 Te ío titní núu sá cuèhé sá dúhá quide yucu ñávàha dicó-ni sá vátá quini-gá ñáyiú, dico ndècu ñⁿ sá ñá dáñá càda-xi nchaandi túhú nàcuáa càchí iní-xi, dico sáá nduu xòcuñí sá ñá dáñá-án te dàvá-án cada-xi nchaa nàcuáa càchí iní-xi.

8 Te sáá nduu quini-yu tée quide nchaa sá cuèhé sá dúhá-án ñuyíú-a. Te òré ná quixi túú Xítóhó Jesucristú, te mee-ni sá dátäsaⁿ-xi, ndihi yócó yuhu-gá cuú tée-án.

9 Te sácúíhná tendaha-xi tée-án quixi-dé, te cuañaha-xi tnúhu ndee iní cada-dé nándi sá cáda-dé. Te cada-dé sá ñá túú tnàhí ndàcu ni ñⁿ ñáyiú ñuyíú-a cáda-yu, dico mee-ni dandahú ñáhá-dé xii-yu caca cuu-dé.

10 Te nchaa núu sá cuèhé sá dúhá càda-dé dandàhú-dé nchaa ñáyiú sa ñùhu ichi cuáháⁿ núu ùhú núu ndàhú, chí ñá túú ní cuini-yu quindáá iní-yu tnúhu ndáá tnúhu Yá Ndióxiⁿ cuèndá naníhí tàhú-yu.

11 Te sá dúcáⁿ ñà túú ní cuini-yu quindáá iní-yu tnúhu ndáá, núu xíáⁿ daña Yá Ndióxiⁿ dacáháⁿ yucu ñávàha iní-yu quindáá iní-yu nchaa tnúhu ndehnde

12 cuèndá cuíta nihnú-yu, te ducaⁿ yáha-yu chí ñá túú sàndáá iní-yu tnúhu ndáá cáháⁿ Yá Ndióxiⁿ, chí mee-ni nchàa sá cuèhé sá dúhá cùdíⁿ iní-yu quidé-yu, te cuíta nihnú-yu chí ducaⁿ ní cachí Yá Ndióxiⁿ cunduu.

Ñáyiú ní cachí Yă Ndiôxí naníhí tàhú

13 Te nchòhó ñáyiú ndècu ndihi-ndí ichi Xítóhó Jesucristú, ñáyiú ío cùu iní-gá càchí tnúhu-ndí xii-ndo sã ñà túú dàña ndee-ndí ndácáⁿ táhú-ndí núú Yă Ndiôxí cuendá-ndó, chi ducaⁿ tàú-xi cunduu, chi Yă Ndiôxí ní cachí-gá ndéé cùtnàhá vátá ngáva-gá ñuyíú sã nánihí tàhú-ndó, te ñiu Espiritú-gá dácàháⁿ-xi iní-ndó ndècu yíñhu-ndo núú-gã, te sàndáá iní-ndó tnúhu ndáá càháⁿ-gá núú xĩáⁿ ní naníhí tàhú-ndó.

14 Chi cuendá tnàhí-a ní càháⁿ ñáhá Yă Ndiôxí xii-ndo, te ducaⁿ ñí naníhí tàhú-ndó chi ní sàndáá iní-ndó tnúhu Xítóhó Jesucristú ní càháⁿ-ndí núú-ndó, te sáá nduu te cundecu-ndo tnàhá-ndó núú ío váha càa ní nduu táhú Xítóhó Jesucristú ndécú-gã.

15 Núú xĩáⁿ nchòhó ñáyiú ndècu ndihi-ndí ichi Xítóhó Jesucristú ío càháⁿ-ndí dóho-ndo sã và dàña ñihnu-ndo ichi-gá, te ni và nàcuànaa-ndo nchaa tnúhu ní càháⁿ-ndí núú-ndó cùtnàhá ní xíndecu ndihi ñaha-ndí xii-ndo, te ñiu-ni ducaⁿ càda-ndo nchaa tnúhu tëndaha-ndí véxi.

16-17 Te xicáⁿ táhú-ndí núú-gã sá ná dácàháⁿ-gá iní-ndó cùndecu-ni-ndo ichi-gá, te ducaⁿ ío na chĩndee ñaha-gá xii-ndo càháⁿ-ndó mèe-ni tnúhu váha, te cada váha-ndo cùndecu-ndo nacúáa cuu váha iní-gá, chi mee Dütú Ndiôxí ío cùu iní ñáhá-gã xii-o, te ñiu-gá ní taxi-gá tnúhu ndee ñí cundecu ndihi-o ñí caa ñí quíhíⁿ, te ní cachí tnúhu tucu-gá ñngá tnúhu váha sá cùndètu-o Xítóhó Jesucristú.

3

Càháⁿ ndihi-ndo Yă Ndiôxí cuendá-ndí

1 Te nchòhó ñáyiú ndècu ndihi-ndí ichi Xítóhó Jesucristú, ndéé núú ndíhí-nã càchí tnúhu-í xii-ndo sã càháⁿ ndihi-ndo Yă Ndiôxí cuendá-ndí cuendá sá ná chĩndee ñaha-gã xii-ndí, te ducaⁿ ndíhí-ni cuténuu tnúhu Xítóhó Jesucristú nchaa xichi, te cudíí ñí-yu tnúhu-gá dàtná quidé nchòhó.

2 Te càháⁿ ndihi tucu-ndo Yă Ndiôxí cuendá sá ná còto ñaha-gá xii-ndí, te ñá túú nã cada ñaha ñáyiú cuihna ñí-xi ndècu ichi cuehé ichi duha xii-ndí, chi ñá ncháá-yu sàndáá ñí-yu tnúhu-gã.

3 Dico Xítóhó Jesucristú quidé-gã nchaa sá càháⁿ-gá, te ñiu-gá cada te nchòhó cundecu-ni-ndo ìchi-gá, te còto ñaha-gã xii-ndo cuendá sá ñà túú nã cada ñaha yùcu ñávãha.

4 Te Xítóhó Jesucristú quidé-gã cùtnùní iní-ndí sá nchòhó quidé-ndó nchàa nacúáa ní dánèhé ñáhá-ndí xii-ndo, te ñiu-ni ducaⁿ càda-ndo cundecu-ndo.

5 Te xicáⁿ táhú-ndí núú Yă Ndiôxí sá ná chĩndee ñaha-gã xii-ndo cùu iní-ndó-gã, te ñiu-ni-gá ná chĩndee ñaha-gã xii-ndo cùnduu cahnu iní-ndó, chi Xítóhó Jesucristú ducaⁿ ío càhnu iní-gá.

Tàú-ó càda chiuⁿ-o

6 Te nchòhó ñáyiú ndècu ndihi-í ichi Xítóhó Jesucristú, càháⁿ-í dóho-ndo sã mèe-gã cuíní-gá sá và ñihí tnàhá-gã-ndó ndihi ndéda-ni càa ñáyiú càchí sá sàndáá ñí tnúhu-gã, ñáyiú ñá túú cuíní cada chiuⁿ, chi ñáyiú ducaⁿ xiquide ñá túú cuíní-yu tñí-yu tnúhu sá ñí dánèhé ñáhá-ndí xii-ndo.

7 Te nchòhó sa xíní-ndó nàcuáa cada-ndo cùndecu-ndo canchicúⁿ ñihnu-ndo nàcuáa quide-ndí. Te cùtnàhá ní xíndecu ndihi ñaha-ndí xii-ndo chi ñí ñíⁿ nduu ñá túú ní tùhío-ndí.

⁸ Te ni ñà túú díco ducaⁿ ni quèheⁿ-ndí sá ndécú ndíhi ñáyiú caxi-ndí àdi canehe-ndí, chi cuéi nduu cuéi níú ío ní quide chiúⁿ-ndí ní níhí-ndí díhúⁿ ní saaⁿ-ndí nchaa sá ní nàndíhi-ndí cuèndá sá ñà túú ní cuíní-ndí chichíuⁿ ñaha-ndí xii-ndo.

⁹ Te cuéi tàú ndisa-ndí cachí tnúhu-ndí xii-ndo sá chíndèe ñaha-ndo xii-ndí ní cùu, dico ní quide chiúⁿ-ndí cuèndá ní cuíní-ndí danèhé ñáhá-ndí xii-ndo nàcuáa cada-ndo cùndecu-ndo.

¹⁰ Te cútnàhá ní xíndecu ndíhi ñaha-ndí xii-ndo ní cachí-ndí sá ncháá ñáyiú ñá túú cuíní cada chiúⁿ te vá cuáha-ndo-yu sá cáxi-yu.

¹¹ Te vitna níhí-ndí tnúhu sá ío dava nchòhó ñá túú tnàhí quide chiúⁿ-ndo, chi áúⁿ ñá cuu ndí cuu ndi cuu-ni-ndo núú ndécú dàva-gá tnàha ñáyiú-ndo.

¹² Te yúhú càháⁿ-í dóho nchaa nchòhó ñáyiú ducaⁿ ñà túú cuíní cada chiúⁿ sá cáda chiúⁿ-ndo cuèndá níhí-ndó nchàa sá cóhó sá cáxi-ndó, te duha càháⁿ-í dóho-ndo, chi ducaⁿ cuíní Xítohó Jesucristú Yaa táxi tnúni ñáhá xii-o cada-ndo, te òré cada chiúⁿ-ndo te vá ío cada dusaⁿ-ndo.

¹³ Te nchòhó ñáyiú ndècu ndíhi-í ichi Xítohó Jesucristú, vá dáñá ndèé-ndó cáda-ndo mee-ni sá vaha.

¹⁴ Te núú ñáyiú ndècu ndíhi-ndo ñá túú cuíní-yu tní-yu tnúhu càháⁿ-ndí núú tütú-a, te cundehe-ni-ndo núú ndèda càá-yu, te vá níhí tnáhá-gá-ndó ndíhi-yu cuèndá sá ná cùcahaⁿ núú-yu,

¹⁵ díco vá cúú ũhú íní-ndó-yu, chi cáháⁿ-ndó dõho-yu cada-ndo sá ndécú-ndó ichi Xítohó Jesucristú ndíhi-yu.

Tnúhu ndéé núú ní ndíhi-ná

¹⁶ Te mee Xítohó Jesucristú ío váha cùu íní-gá ndécú-gá, te xicáⁿ táhú-í núú-gá sá méé-gá ná cáda te ío váha cuu íní-ndó tnàhá-ndó cùndecu-ndo cuéi nása-gá ná cùndecu-ndo. Te mee-gá ná cùndecu ndíhi ñaha-gá xii-ndo nchàa-ndo.

¹⁷ Te vitna yúhú té Páblú tée-í tnúhu-a quide ndee íní ñáhà-í xii-ndo, te díu-ni duha càa nchaa letrá-í nchaa núú tütú cáduhá-í.

¹⁸ Te xicáⁿ táhú-í núú Xítohó Jesucristú sá ío na chíndee chítúu ñaha-gá xii-ndo nchàa-ndo. Te ducaⁿ na cùnduu. Te ío chí cáda ndèe íní-ñá vitna.

TUTÚ DÍHNA NUU NĪ CADÚHA TÉ PĀBLÚ QUIHĪⁿ NDAHA TÉ TIMŪTEÚ

Té Pāblú cādúha-dé tutú quihĪⁿ ndaha té Timūteú

¹ Yúhú té Pāblú ní tendaha ñaha Yá Ndiõxí cāháⁿ-í tnúhu Xítohó Jesucristú núu ñāyiu chi ducaⁿ nĪ cachí Yá Ndiõxí cunduu, te ñu-gá cúú-gã Yaá ní dácācu nihnu ñaha xii-o núu úhú núu ndáhú. Te tnàhá Xítohó Jesucristú ducaⁿ nĪ cachí-gá sá cāháⁿ-í tnúhu-gá, te ñu-gá ní taxi-gá tnúhu ndee ñní xii-o sá cūndecu-o ndihĪ-gá ní caa ní quihĪⁿ.

² Te yòhó té Timūteú cúú-n ĩⁿ tée ní sanu ichi ndisa-í ichi Xítohó Jesucristú chí ío váha ní sándáá iní-n-gã. Te cādúha-í ĩⁿ tutú daquixi-í ndaha-n. Te xicáⁿ táhú-í núu Tátá-ó Dütú Ndiõxí ndihĪ núu Xítohó Jesucristú sá ío na chĩndee chitúu ñaha-gã xii-n, te ducaⁿ ndĪ nduú-gá ná cādá te ío váha cuu iní-n cūndecu-n.

Cuendá nchaa ñāyiu dāndahú tnàha ñāyiu-xi

³ Te nàha-n nacuáa ní cāháⁿ-í cūtnàhá ní quee-í ñuú Éfesú véxi-í distritú Macèdoniá, chí ní cachí-í sá quéndõo-n ñuú-án cāháⁿ-n dõho nchaa ñāyiu dāndahú ñāhá cachí sá cāháⁿ tnúhu Yá Ndiõxí te ñā ndáa sá cāháⁿ-yu tnúhu-gá, te ñu-ni ducaⁿ cāháⁿ-í vitna cada-n cūndecu-n.

⁴ Te cúñaha-n xii-yu sá vã cādá cuendá-yu nchaa cuendú ñihĪ-yu nācuáa ní xóo cada ñāyiu ní xĩndecu ndéé sanaha, te nchaa cuendú-án dicó chináa ñāhá-xi chí ñā túú vėdana nāndĩhĪ-xi, te ní ñā túú chĩndee ñaha-xi cada-o nacuáa cuiní Yá Ndiõxí, chí mee-ni sá quĩndáa iní-ó-gã quidė-xi quidė-o nchaa nacuáa cuiní-gá.

⁵ Te duha cāháⁿ-í cúñaha-n xii-yu cuendá sá ná cūu iní-yu tnàha ñāyiu-yu, te xini ñuhu-xi nduu ndoo nduu nine iní-yu, te cunduu váha iní-yu, te quĩndáa iní-yu Yá Ndiõxí, te vã caní ĩⁿ caní úú iní-yu, te núu ducaⁿ na cādá-yu te cuu iní ndisá-yu nchaa tnàha ñāyiu-yu.

⁶ Chi dava ñāyiu ñā túú-gã quidė-yu nchaa nācuáa cāháⁿ-í-a, chí mee-nã nchaa cuendá sá ñā túú vėdana nāndĩhĪ xĩcāháⁿ-yu.

⁷ Te cuiní-yu cāháⁿ-yu nchaa tnúhu ní cāháⁿ ndĩ Moisés dico ñā ndácú-yu, chí cuēi ní yũhu ní iní-yu cāháⁿ-yu dico ñā tēcú tnũnĪ-yu nācuáa ní cāháⁿ ndĩi, te ní tnúhu cāháⁿ mée-yu ñā cūtnũnĪ iní-yu nācuáa ndũu-xi.

⁸ Te sa nàha-o sá ncháá tnũhu ní cāháⁿ ndĩ Moisés váha, te núu na tēcú tnũnĪ-ó nã cuendá ducaⁿ nĪ ngũndecu nchaa tnúhu-án.

⁹ Te cūtnũnĪ iní-ó sá ñā díú sá cúú-xi nchaa ñāyiu quidė váha ndėcu ñuyiú-a ní ngũndecu nchaa tnúhu-án, chí ní ngũndecu-xi sá cúú-xi nchaa ñāyiu ñā túú quidė váha, ndihĪ cuendá nchaa ñāyiu ío sáa iní-xi, ndihĪ cuendá nchaa ñāyiu quidė cuehé quidė dũha, ndihĪ cuendá nchaa ñāyiu ío ndėcu cuéchi-xi, ndihĪ cuendá nchaa ñāyiu ñā túú nēhe vėdana sá yĩñũhu núu Yá Ndiõxí, ndihĪ cuendá nchaa ñāyiu ñā túú cāháⁿ váha cuendá ichi Yá Ndiõxí, ndihĪ cuendá nchaa ñāyiu sãhni tátá-xi ndihĪ nãná-xi, ndihĪ cuendá nchaa dava-gã ñāyiu sãhni tnaha,

10 ndihi cuendá nchaa cue tée cãháⁿ ndihi ñáyiú ðihí te ñá díú ñàðihí-güedé cúú-yu, ndihi cuendá tucu nchaa ñáyiú ðihí cãháⁿ ndihi cue tée te ñá díú yí-yu cùu-güedé, ndihi cuendá nchaa cue tée cãháⁿ ndihi tnàha ndi mee tée-xi, ndihi cuendá nchaa ñáyiú chiváha tnàha ñáyiú-xi cuendá sá cuini-yu nihí-yu ðihúⁿ, ndihi cuendá nchaa ñáyiú ndehnde, ndihi cuendá nchaa ñáyiú càcunehe ndéé Yá Ndióxi cuendá cuini-yu cutnùni iní tnàha ñáyiú-yu sá cãháⁿ ndáá-yu, te ñá ndáá sá cãháⁿ ndáá-yu, ndihi cuendá nchaa ñáyiú quide nchaa dava-gá sá ñá túú tàuchiuⁿ Yá Ndióxi cadá-yu. Cuendá nchaa ñáyiú ducaⁿ xiquide ní ngúndecu nchaa tnúhu-áⁿ.

11 Te nchaa tnúhu-áⁿ ìⁿ-ni cùu-xi ndihi nchaa tnúhu sá ñí cachí Yá Ndióxi cãháⁿ-í, te tnúhu-áⁿ cúú-xí tnúhu váha vìhi, chi mee-gã ío váha iní-gá.

Té Pãblú ndacáⁿ táhú-dé núú Yá Ndióxi sá ñí cundàhú iní ñáhá-gã xii-dé

12 Te Xítoho Jesucristú ní cutnùni iní-gá sá cadá ndáá-í cada-í nchaa chiúⁿ tahu-gá. Te ndacáⁿ táhú-í núú-gã sá ñí taxi-gá chiúⁿ-gã quidè-í, te ío chindee ñaha-gã xii-í.

13 Te ní taxi-gá chiúⁿ-gã quidè-í cuèi ní xóo cãháⁿ cuèhé-í cuendá-gá, te cuèi ní xóo cúú cuèhé cúú duha-í nchaa ñáyiú ndècu ichi-gá, te cuèi nándi-gá sá ñí xóo cada-í-yu dico ní cundàhú iní ñáhá Yá Ndióxi xii-í, chi vátá quindáá-gá iní-í Xítoho Jesucristú cutnàhá ducaⁿ ní xóo cada-í, te ni ñá cutnùni iní-í nchaa sá quidè-í ní cùu, te cuèi ducaⁿ ñí xóo cada-í,

14 dico Yá Ndióxi ío ní cundàhú iní ñáhá-gã xii-í te chindee ñaha-gã. Te mee Xítoho Jesucristú chindèe ñaha-gã xii-í sàndáá iní-í-gá, te cùu iní-í nchaa tnàha ñáyiú-í.

15 Te nihí-ó tnúhu sá Xítoho Jesucristú ní quixi-gã ñuyúú-a cuendá sá dácäcu nihnu-gã nchaa ñáyiú ndècu ichi cuèhé ichi duha. Te tnúhu-áⁿ cúú-xí ìⁿ tnúhu ndáá, te xini ñuhu-xi quindáá iní nchaa nchoo ñáyiú ndècu ñuyúú-a. Te yúhú cùú-í téé ío-gá ndécú cuèchi-xi núú Yá Ndióxi ní cùu.

16 Te Yá Ndióxi ní cundàhú iní ñáhá-gã ní dácäcu nihnu ñaha-gã xii yúhú téé xidó ndécú cuèchi-xi ni cùu, cuendá cutnùni iní nchaa ñáyiú sá Xítoho Jesucristú ío càhnu iní-gá. Te sá dúcáⁿ ñí quide ñaha-gã xii-í, te xíãⁿ cutnùni iní-yu sá núu na quindáá iní ñáhá-yu xii-gá te cundecú-yu ndihi-gá ni caa ni quihíⁿ.

17 Te nchaa-o chí ná càchí-ó sã ío càhnu cuu Yá Ndióxi, te canehe-o sã yíñùhu núú-gã ni caa ni quihíⁿ, chi mee-gã cúú-gã Yaá táxi tnùni nchaa nduu nchaa quíú. Te cùu-gá ìⁿ Yaá ñá túú xini núú-ó, te ìⁿ ðii díí-ni-gã ío ndècu ndihi-gã nchaa sá xini tnùni-gá.

18 Te yòhó té Timùteú téé cùu datná ìⁿ déhe mee-í sa nàha-n nacuaá ní cãháⁿ dava-gã cue téé cãháⁿ tnúhu Yá Ndióxi cuendá-n, te ðiu-ni ducaⁿ cãháⁿ-ú tucu, te cada-n nchaa nacuaá cãháⁿ tnúhu-áⁿ chí ðiu nchaa tnúhu-áⁿ canu ichi ñaha-xi xii-n cada-n nchaa nacuaá cuini Yá Ndióxi.

19 Te ío quindáá iní-n Xítoho Jesucristú, te cada váha-n cùndecu-n nacuaá cundecu váha iní-n, chí dava ñáyiú ñá túú-gã ducaⁿ quidè-yu núu xíãⁿ ñá túú-gã sàndáá iní-yu nacuaá cãháⁿ tnúhu-gã.

20 Te ðiu-ni ducaⁿ ñí quide té Himènéú ndihi té Ljandrú ní dáñá ndéè-güedé ñá túú-gã sàndáá iní-güedé nàcuáa cãháⁿ tnúhu Xítoho Jesucristú, te ní xáhaⁿ-í xii-güedé sá ná cùndoho-ná-güedé núu nása cada ñaha sàcúíhná xii-güedé, te ducaⁿ ñí xáhaⁿ-í cuendá sá vã cãháⁿ cuèhé-gã-güedé cuendá Yá Ndióxi.

2

Nacuáa cáháⁿ ndihi-o Yá Ndiöxi

¹ Te na càchí tnúhu-í xii-n ncháa nacuáa cada-n. Te díhna-gá càchí tnúhu-í sá cáháⁿ ndihi-n Yá Ndiöxi cuendá nchaa ñáyi te núu nása cùu xíndecú-yu, te cácaⁿ táhú-n núu-gá cuendá-yu, te ducaⁿ ío ndacáⁿ táhú-n núu-gá cuendá nchaa sá vâha quide ñaha-gá xii-yu.

² Te ducaⁿ cáháⁿ ndihi-n Yá Ndiöxi cuendá nchaa cue tée cùnno ndihi cuendá nchaa dava-gá cue tée cùchiuⁿ cuendá cada váha-güedé, te ducaⁿ nchòo ñá túu ñá cuu cundecu-o, te ñá túu tnàhí ná cani iní-ó cùndecu-o, te ío cundecu yíñùhu-o núu Yá Ndiöxi, te cada-o ncháa nacuáa tàu-xi cunduu.

³ Te núu ducaⁿ na càda-o cáháⁿ ndihi-o Yá Ndiöxi cuendá nchaa ñáyi te quide váha-o, te ndùu vétú iní Yá Ndiöxi Yaá ní dáçacu nihnu ñaha xii-o núu ùhú núu ndáhú.

⁴ Te mee-gá cuiní-gá sá ncháa ñáyi tecu tnùní-yu nchaa tnúhu càháⁿ-gá, chi cuiní-gá sá nánihí táhú-yu.

⁵ Te ìⁿ-ni Dútú Ndiöxi ndécú, te ìⁿ-ni Xítohó Jesucristú, te medi-ni Xítohó Jesucristú quidé-gá tnàhá tnúhu-o ndihi Yá Ndiöxi.

⁶ Te Xítohó Jesucristú ní dáñá-gá méé-gá ní sahní ñaha-güedé xii-gá cuendá sá cuiní-gá sá çacu nihnu nchaa ñáyi ndècu ñuyúú núu ùhú núu ndáhú. Te Yá Ndiöxi cuiní-gá sá ncháa ñáyi ñuyúú ndécú vitna níhí-yu tnúhu nacuáa ní cuu ní xíhí Xítohó Jesucristú.

⁷ Te Yá Ndiöxi ní cachí-gá sá càháⁿ-í tnúhu-án ndèni ní cuu núu xíndecu ñáyi ñá túu cùu ñáyi israhél, te mee-ni tnúhu ndáa dánèhé-í-yu nacuáa quindáa iní ñáhá-yu xii-gá, te yúhú càháⁿ ndáa-í sá Yá Ndiöxi ní cachí-gá sá càháⁿ-í tnúhu-gá chi ndècu ndihi-í Xítohó Jesucristú, te ñá túu dándahú ñáhá-í xii-n.

⁸ Te yúhú cuiní-í sá ncháa xichi cáháⁿ ndihi cue tée Yá Ndiöxi, te na cunduu ndoo cunduu nine iní-güedé òré ndonehe-güedé ndaha-güedé cáháⁿ ndihi ñaha-güedé xii-gá, chi vá cúu cüdééⁿ-güedé cuendá nchaa sá quidé ñaha ñáyi xii-güedé, te ni vá cání iní-güedé cúcuèhé tnàhá-güedé ndihí-yu.

⁹ Te càchí tnúhu-í xii-n sá ncháa ñáyi ñíhí ná cunduu díyo-yu nacuáa tàu-xi cunduu, te vá cùnduu cuehé cunduu duha dàtná cáa díyo nchaa ñáyi ndècu ichi cuehé ichi duha, te na ndadá-yu díquí-yu nacuáa tàu-xi cunduu, te vá ndadá cuèhé ndada duhá-yu, te vá cání iní-yu cunduu víi-yu ndihi sá ío ndèyáhu, te ni vá cání iní-yu cuihnú-yu dóo sá ío ndèyáhu.

¹⁰ Te mee-ni sá vâha cadá-yu, chi ducaⁿ tàu-xi cada nchaa ñáyi ñíhí ndécú ichi Yá Ndiöxi.

¹¹ Te òré tàca-yu núu dácuahá-yu tnúhu Yá Ndiöxi, te cue ñáyi ñíhí-án na nàhi dacuahá-yu tnúhu-gá, te cadá-yu nchaa nacuáa càháⁿ cue tée dácuaha ñaha xii-yu tnúhu-gá.

¹² Te yúhú càchí-í sá vâ cúu dácuaha ñáyi ñíhí cue tée, te ni vâ cúu tàxi tnùní ñáhá-yu xii-güedé chi cunduu tnáví-ni yuhú-yu cundedóho-yu.

¹³ Te ducaⁿ xini ñuhu-xi cadá-yu, chi Yá Ndiöxi ní cadúha-gá díhna-gá té Adán te dàtnùní ní cadúha-gá tá Èvá.

¹⁴ Te ñá díú mée té Adán ní dándahú ñáhá sàcuíhná xii-dé, chi tá Èvá ní dándahú-xi, te ñá túu ní quide váha-xi núu Yá Ndiöxi sá dúcáⁿ ní sándáa iní-xi tnúhu ní cáháⁿ sàcuíhná-án.

¹⁵ Dico ñáyi ñíhí ní nduu táhú-yu sá cóo dèhe-yu, te naníhí táhú-yu te núu vá dáñá ndèé-yu canchicúⁿ nihnú-yu ichi Yá Ndiöxi, te cundecu yíñùhú-yu

núu-gă, te cuu iní-yu nchaa tnàha ñáyíu-yu, te cadá-yu nchaa nàcuáa tàu-xi cunduu cundecú-yu.

3

Nàcuáa tàu cue té yìndaha ñaha xii ñáyíu ndècu ichi Yá Ndiòxí cada-güedé

¹ Te ío ñⁿ tnúhu càháⁿ ñáyíu sá nùu ñⁿ té cuení quìndaha ñaha xii ñáyíu ndècu ichi Yá Ndiòxí, te ñⁿ sá vâha cuení-dé cada-dé càchí-yu, te ndáá quée-xí tnúhu càháⁿ-yu.

² Te yúhú càchí-í sá cuè téé ducaⁿ na quìndaha ñaha xii ñáyíu te xini ñuhu-xi cuu-güedé cue téé quide ndáá cuendá sá vâ càháⁿ ñáyíu cuendá-güedé sá ñà túú quide ndáá-güedé. Te na cùu-güedé cue téé ndèca ñⁿ caa-ni ñadihí, te na cùu-güedé cue téé ñà túú quide cutexínu ndècu, te na cùu-güedé cue téé quide nchaa nacuáa tàu-xi cunduu, te na cùu-güedé cue téé sãñaha nùu vehe ndetatú nchaa ñáyíu ñuhu ichi, te na cùu-güedé cue téé dânehé ñáhá vâha xii ñáyíu tnúhu Yá Ndiòxí.

³ Te vâ cúu-güedé cue téé quihu, te ni vâ cúu-güedé cue téé ndècu pletú, te ni vâ cúu-güedé cue téé dicó-ni ducaⁿ ñihí dîhúⁿ, te ni vâ cúu-güedé cue téé sàni iní nâá, te ni vâ cúu-güedé cue téé ñuhu iní mee-ni dîhúⁿ. Chi na cùu-güedé cue téé vâha iní-xi te cunduu càhnu iní-güedé.

⁴ Te na cùu-güedé cue téé ío vâha sànu ichi ñadihí-xi ndihi landú-xi, te na cùu-güedé cue téé quide nacuáa sàndáá iní ñáhá lândú-xi cuendá canehe-güexi sá yíñuhu núu-güedé.

⁵ Chi núu cùu-güedé cue téé ñà ndácú cànuichi ñadihí-xi ndihi landú-xi, te vâ ndácú-güedé quìndaha-güedé cue ñáyíu ndècu ichi Yá Ndiòxí.

⁶ Te vâ cúu-güedé cue téé íchí ni sàndáá iní-xi tnúhu Yá Ndiòxí, chi na cuáháⁿ te cada nínu-güedé méé-güedé te cuíta nihnu-güedé dàtná ní xíta nihnu sácuihná.

⁷ Te xini ñuhu-xi cuu-güedé cue téé càháⁿ vâha ñáyíu cuendá-xi, cuèi ñà díú ñáyíu ndècu ichi Yá Ndiòxí cuendá sá vâ cuatnùhu ñaha ñáyíu xii-güedé, chi núu ñáhá te cudana te sácuihná quesaha-xi tàxi tnumí ñáhá-xí xii-güedé.

Cue téé chindee ñaha xii cue téé yìndaha ñaha xii ñáyíu ndècu ichi Yá Ndiòxí

⁸ Te tnàhá cue téé chindee ñaha xii cue téé yìndaha ñaha xii ñáyíu ndècu ichi Yá Ndiòxí xini ñuhu-xi cuu-güedé cue téé quide nchaa nacuáa tàu-xi cunduu, te vâ cúu-güedé cue téé càchí sá càháⁿ ndáá te ñà ndáá, te ni vâ cúu-güedé cue téé quihu, te ni vâ cúu-güedé cue téé sàni iní-xi dicó-ni ducaⁿ ñihí dîhúⁿ.

⁹ Te xini ñuhu-xi cuu-güedé cue téé ñà túú dàña ndeé sàndáá iní tnúhu Yá Ndiòxí, te na cùu-güedé cue téé ío vâha cùu iní-xi cuendá nchaa sá vâha quide-güedé.

¹⁰ Te xini ñuhu-xi coto ndeé ñáhá xii-güedé te núu cùu-güedé cue téé quide vâha, te núu cùu-güedé cue téé quide vâha ña te cuu chindee-güedé cue téé yìndaha ñaha xii ñáyíu ndècu ichi Yá Ndiòxí.

¹¹ Te tnàhá tucu nchaa ñáyíu dîhí ná cadá-yu nchaa nàcuáa tàu-xi cunduu, te vâ cunduu yiti yuhú-yu, te ni vâ cúu-yu ñáyíu quide cutexínu ndècu, te na cùu-yu ñáyíu ío vâha quide ndáá.

¹² Te nchaa cue téé chindee ñaha xii cue téé yìndaha ñaha xii ñáyíu ndècu ichi Yá Ndiòxí, xini ñuhu-xi cuu-güedé cue téé ndècu ñⁿ caa-ni ñadihí-xi, te na cùu-güedé cue téé sànu ichi vâha ñadihí-xi ndihi landú-xi.

13 Te núu na càda ndáá-güedé chindee-güedé cue tée yìndaha ñaha xii ñáyiü ndècu ichi Yá Ndiöxí, te canehé-yu sá yíñùhu núu-güedé, te ducaⁿ te vá cúu càháⁿ núu-güedé càháⁿ-güedé núu ñáyiü tnúhu Xítóhó Jesucristú sá sàndáá iní-güedé.

Ío càhmu cuu tnúhu càháⁿ Yá Ndiöxí

14 Te cuini-í ndíhi-ni quixi coto ñaha-í xii-n dico díhna-gá cadúha-í tutú-a daquixi-í ndaha-n

15 chi na cuáháⁿ cuyaa-í. Te xíaⁿ núu cadúha-í tutú-a daquixi-í ndaha-n cuèndá cutnùni iní-n ñasa cada-n cùndecu-n ndíhi nchaa ñáyiü ndècu ichi Yá Ndiöxí. Te ñáyiü-án cúu-yu dàtná ìⁿ vehe cùu cuendá Yá Ndiöxí Yaá ndécú nchaa nduu nchaa quíu, chi ndècu ndíhi ñaha-gá xii-yu, te cúu-yu ñáyiü càháⁿ váha cuèndá tnúhu-gá.

16 Te cùtnuní ndáá iní-ó sá ío càhmu cuu tnúhu càháⁿ Xítóhó Jesucristú, tnúhu sá càháⁿ nàcuáa ndùu ichi ndecu-o, te duha càháⁿ tnúhu-án:

Te ní quixi Yá cúu Ndiöxí ñuyíú-a ní cuu-gá ìⁿ ñáyiü,

te Espíritú Yá Ndiöxí ní càháⁿ ndáá-xi sá cúu-gá ìⁿ Yaá ío váha quide ndáá,

te cue espíritú xínú cuèchi núu Yá Ndiöxí ní xini ndáá-xi nchaa nàcuáa ní quide Yaá ní quixi ñuyíú-a.

Te ní xité nuu tnúhu-gá nihíü ñuyíú-a,

te ndèni ní cuu ní ngúita-yu sàndáá iní ñáhã-yu xii-gá,

te mee-gá cuánda-gá andiu.

Duha càchí tnúhu-án.

4

Ñáyiü dañá nihnu vá quìndáá-gá iní-yu Yá Ndiöxí

1 Te Espíritú Yá Ndiöxí càháⁿ ndáá-xi sá sàa nduu dañá nihnu dava ñáyiü ndècu ichi-gá vá quìndáá iní ñáhã-gã-yu xii-gá, te ducaⁿ chi cue espíritú cùndíhi yucu ñávãha dandáhú ñáhã-xí xii-yu, te mee-nã nchaa tnúhu càháⁿ nchaa ñáyiü cùndíhi nchaa espíritú-án cuhuⁿ iní-yu.

2 Te nchaa ñáyiü ducaⁿ cùndíhi cue espíritú cùndíhi yucu ñávãha-án cúu-yu ñáyiü ío dandáhú méé-xí chi càchí-yu sá càháⁿ ndáá-yu te ñã ndáá, te ñã túu tnáhí-gá ná quidé-xí iní-yu cuèndá nchaa sá cuèhé sá dúhá quidé-yu.

3 Te ñáyiü-án quesàhá-yu sá vã cúu càndeca tnaha ñáyiü, te ni vã cúu càxi-yu dava núu sá xini-yu caxi-yu, dico Yá Ndiöxí ní cadúha-gá nchaa sá nchító-ó cuèndá caxi-o, te cuini-gá sá ncháá nchòo ñáyiü sàndáá iní tnúhu-gá ndacáⁿ táhú-ó núu-gá òré caxi-o.

4 Te nchaa sá ñi cadúha Yá Ndiöxí cúu-xí sá vãha te vá dáquèe tíhú-ó, te xini ñuhu-xi ndacáⁿ táhú-ó núu-gá cuèndá nchaa xiãⁿ.

5 Te Yá Ndiöxí càchí-gá sá méé-gá quidé-gá cúu-xí sá vãha sá cúu-xí-ó te núu na ndacáⁿ táhú-ó núu-gá.

Té quide ndáá xínú cuèchi núu Xítóhó Jesucristú

6 Te núu na dàcuaha-n ñáyiü ndècu ndíhi-o ichi Xítóhó Jesucristú nchaa nàcuáa càháⁿ-í-a ña, te cuu-n ìⁿ té quide ndáá xínú cuèchi núu-gá, te nducu ndèe-ni-n dacuaha-n tnúhu Yá Ndiöxí sá sàndáá iní-n, te canchicúⁿ nihnu-ni-n càda-n nchaa nacuáa càháⁿ-gá, te núu ducaⁿ nà cada-n, te níhí ndéé-n cùndecu-n ichi-gá.

7 Te vá cádá cuendá-n nchàa cuendú cuèhé cuendú duha càháⁿ ñáyi, ndihi nchaa dava-gá cuendú sá ñà túú nàndíhi cuendá sá ñà túú nã cumání-n cùndecu-n núú Yá Ndiõxí.

8 Te núu ìⁿ chiuⁿ cada-o te nàcáa luha yiqui-o te nàndíhi-xi luha, dico ío-gá nàndíhi-xi te núu cada-o sã cùndecu yiñuhu-o núú Yá Ndiõxí. Te núu ducaⁿ na càda-o te cùu-xi ìⁿ sá vãha sá cúu-xí-ó vitna, te ni caa ni quíhíⁿ ducaⁿ cùu-xi ìⁿ sá vãha sá cúu-xí-ó.

9 Te xini ñuhu-xi sá ncháá-ndó quindáá iní-ndó nchàa tnúhu càháⁿ-í-a chi cùu-xi tnúhu ndáá.

10 Te vitna ío nducu ndee-o quide-o chiuⁿ Yá Ndiõxí Yaá ndécú nchàa nduu nchaa quíú te quide ndee iní-ó cuendá nchaa sá quidé ñaha ñáyi xii-o, chi sàndáá iní-ó sã díú-gã chindèe ñaha-gá xii-o. Te nchaa ñáyi cùndahú iní ñáhá-gã te chindèe ñaha-gá xii-yu, dico ñáyi sàndáá iní ñáhá xii-gá ío-gá cùnúu-yu chindèe ñaha-gá xii-yu, chi dàcácu nihnu ñaha-gã núú ùhú núú ndáhú.

11 Te nchaa tnúhu-án cũñaha-n xii-yu, te cáháⁿ-n dõho-yu sá ná càdá-yu nchaa nàcuáa càháⁿ-xi.

12 Te ío cada váha-n cùndecu-n cuendá sá vã yõo daquee tíhú ñáhá xii-n cuendá sá cúu-n tée cuechi, te ío váha cada-n nchàa sá tàú-n càda-n cuendá ducaⁿ cànchicúⁿ nihnu nchaa ñáyi ndecu ichi Yá Ndiõxí, te vii vii cáháⁿ ndíhí-n-yu, te cuu iní-n-yu, te ío quindáá iní-n Yá Ndiõxí, te mee-ni sã vãha cani iní-n, te ducaⁿ càda-n cuendá cànchicúⁿ nihnú-yu.

13 Te nini cùyaa-í quixi-í, te ío nducu ndèe-n cáháⁿ ndodo-n tnúhu Yá Ndiõxí núu-yu, te dacuahá-n-yu nàcuáa càháⁿ tnúhu-gá, te cáháⁿ-n dõho-yu nàcuáa cuu vii cuu váha iní-yu cundecú-yu ichi Yá Ndiõxí.

14 Te vá dáñá ndèe-n càda-n nacuáa ndùu táhú ní taxi Yá Ndiõxí ní ngúndecu ndíhi-n cùtnàhá ní sacáⁿ ndodo cue tée yindaha ñaha xii ñáyi ndecu ichi Yá Ndiõxí ndaha-güedé díquí-n, te ní cachí tnúhu-güedé sá dúcáⁿ ní cuini Yá Ndiõxí cunduu.

15 Te ni yuhu ni iní-n càda-n nchaa nacuáa càháⁿ-í-a cuendá sá ná quini ñáyi sá ío-gá váha ta quide-n cuáháⁿ.

16 Te ío váha cundehe-n nchàa nacuáa quide-n, ndihi nchaa nàcuáa dànehé-n-yu, te vá dáñá ndèe-n dùcaⁿ cada-n. Te núu ducaⁿ na càda-n te nduu táhú-n cùndecu váha-n núú Yá Ndiõxí ni caa ni quíhíⁿ ndihi nchaa ñáyi na tédõho nchaa tnúhu càháⁿ-n.

5

Nàcuáa tàú-xi cada-o cùndecu-o ndíhi ñáyi sàndáá iní tnúhu Yá Ndiõxí

1 Te vá ténáa-n nchàa cue tée cùu sacuéhé chi vii vii cáháⁿ-n dõho-güedé, te cada iní-n sã dàtná tátá-n cùu-güedé, te diu-ni ducaⁿ vii vii cáháⁿ-n dõho nchaa cue tée cuechi, te cada iní-n sã dàtná cue ñaní-n cùu-güedé.

2 Te diu-ni ducaⁿ vii vii cáháⁿ tucu-n dõho nchaa ñáyi dñí ñáyi cùu sacuéhé, te cada iní-n sã dàtná nãná-n cùu-yu, te diu-ni ducaⁿ vii vii cáháⁿ tucu-n dõho nchaa ñáyi dñí ñáyi cuechi, te cada iní-n sã dàtná cue cúha-n cùu-yu, te ío cuu váha iní-n òré ducaⁿ cáháⁿ-n dõho nchaa ñáyi cuechi-ãⁿ.

3 Te canehe-n sã yíñuhu núú ñáyi dñí ní quendóo quèé, te chindèe-n-yu núu ndáhú-yu.

4 Te núu ìᵐ ñaha quèé ndécú cuè déhe-aⁿ àdi cue déhe ñani-aⁿ, te ío xìnì ñuhu-xi cada-güexi nchaa nacuaá tàú-xi cunduu núú-aⁿ chi ducaⁿ cuiní Yá Ndiòxí cada-güexi. Te núu ducaⁿ na càda-güexi te nàncocáva-güexi quide-güexi sá vâha sá cúú-xí ñâyiu ní dâcuéhnú ñâha xii-güexi. Te núu ducaⁿ na càda-güexi te quide vâha-güexi te ío nduu vétú iní Yá Ndiòxí.

5 Te ñâyiu quèé ñâyiu ndàhú ndécú ichi Yá Ndiòxí sàndáá iní-yu sá díú-gã chindêe ñaha-gá xii-yu, te cuèi nduu cuèi niú ñá túú dàña ndeé-yu càháⁿ ndihi ñâhá-yu xii-gã.

6 Te nchaa ñâyiu quèé cúdí iní quidé nchâa sá cuèhé sá dúhá cúú-yu dàtná ñâyiu ní xihí cuèi ndècu vívũ-yu.

7 Te cúñaha-n xii nchaa ñâyiu sá ná cádá-yu nchaa tnúhu càháⁿ-í-a cuèndá sá ñá túú nã cumání-yu cundecú-yu, te ducaⁿ vã yõo càháⁿ cuèhé cuèndá-yu.

8 Te ío xìnì ñuhu-xi chindeé-yu cue tnâha ñâyíú-yu, dico ío-gá xínì ñuhu-xi chindeé-yu cue ñâyiu cùu ndi meé-yu ndècu ndihí-yu, te núu vá dúcáⁿ càdá-yu te ñá túú-gã sàndáá iní-yu cadá-yu nâcuáa càháⁿ Yá Ndiòxí. Te sá dúcáⁿ ná càdá-yu te vihi-gá quidé-yu dâcúúxí ñâyiu ndècu ichi cuèhé ichi duha.

9 Te chido tnùnì-n mēe-ni ñâyiu quèé ñâyiu sa ndècu únídico cuíá-xi àdi vihi-gá cuèndá ñâyíú-áⁿ cadá-yu nchaa nâcuáa cuiní Yá Ndiòxí núú nchâa ñâyiu ndècu ichi-gá, te ñâyíú-áⁿ xínì ñuhu-xi cuú-yu mee-ni ñâyiu ní quide ndáá ní xíndecu ndihi yi-xi.

10 Te na cúú-yu ñâyiu quèé quidé vâha cùdũ núú nchâa ñâyiu, te na cúú-yu ñâyiu quèé xínì canu ichi vâha cue landú-xi, te na cúú-yu ñâyiu sãñaha núu vehe ndetatu cue ñâyiu ñuhu ichi, te na cúú-yu ñâyiu ndècu túha quide nání chiúⁿ cuèndá cue ñâyiu ndècu ichi Yá Ndiòxí, te na cúú-yu ñâyiu chindee nchaa ñâyiu ndècu ndihi tnúndòho tnúhu ndàhú, te na cúú-yu ñâyiu ñá túú dàña ndeé quidé nchâa núú sã vâha.

11 Te vá chídó tnùnì-n ñâyiu quèé ñâyiu ñá túú ndècu únídico cuíá-xi cada chiúⁿ Yá Ndiòxí, chi núu cuèchí-gã-yu ña, te vá cùndáá-yu cadá-yu chiúⁿ-gã, chi quesâhá-yu natnândaha tucú-yu.

12 Te sá cuèndá xiãⁿ te nacháhu-yu núú Yá Ndiòxí, chi vá cádá-gã-yu nâcuáa ní cuu tnúhu cadá-yu ni cùu.

13 Te ngúíta-yu cani iní-yu quíhíⁿ-yu ndi vehe ndi vehe caca nihní-yu, te nchaa ñâyiu ducaⁿ quide ío cùu cuhndú-yu, te cùyiti yuhú-yu, te ndèni ní cuu cuáháⁿ-yu chinee díquí-yu vehe tnâha ñâyíú-yu ndèhé-yu núu nása ndécú-yu, te ñá túú tàú-yu ducaⁿ càdá-yu, te càháⁿ-yu mee-ni tnúhu sá ñá túú nàndíhi.

14 Núu xiãⁿ cuiní-í sá ncháá ñâyiu quèé ñâyiu cuechi na natnândaha tucú-yu cuèndá cuú-yu nãná, te ducaⁿ càdá-yu nchaa sá xínì ñuhu-xi cadá-yu vehé-yu, te núu ducaⁿ na càdá-yu, te nchaa ñâyiu cùu úhú iní ñáhá xii-o vá nihí-gá-yu tnúhu càháⁿ cuèhé-yu cuèndá tnúhu Yá Ndiòxí.

15 Te dava ñâyiu quèé ndécú ichi Yá Ndiòxí ní cùu ní dáñã-yu te ní tní-yu tnúhu càháⁿ sâcúíhná.

16 Te núu dava ñâyiu ndècu ichi Yá Ndiòxí ndécú ndihí-yu ìᵐ ñaha quèé cúú ndi meé-yu ña, te tàú-yu chindee ñâhá-yu xii-aⁿ cuèndá sá vã ío chí chiúⁿ-aⁿ nchaa ñâyiu ndècu ichi Yá Ndiòxí, te ducaⁿ te nchaa ñâyiu ndècu ichi-gá-áⁿ nihí ndéé-gã-yu chindêe-yu dava-gá ñâyiu quèé ñá túú védana ndècu ndihi.

17 Te nchaa cue téé ío vâha quide yíndaha ñaha xii ñâyiu ndècu ichi Yá Ndiòxí ío xìnì ñuhu-xi canehe sá yíhí ñuhu núú-güedé, te chindee ñaha xii-güedé. Te

uuⁿ-gá tàù ñáyiú ducaⁿ càdá-yú sá cúú-xí nchàa cue téé ñi yùhu ñi iní càháⁿ tnùhu-gá.

18 Te núú tùtú Yá Ndiòxi càchí-xi: “Vá chíhí-ndó ñunu yuhu ndicutu oré dánchezí-dí tríú”, duha càchí-xi. Te càchí tucu-xi ingá xichi: “Híⁿ téé quide chiuⁿ dacuítí tàú-xi sá cúhúⁿ yáhu-dé”, duha càchí-xi núú tùtú-gá.

19 Te núú íó ñáyiú véxi sàcáⁿ cuèchi núú-n cuèndá ñⁿ téé yìndaha ñaha xii ñáyiú ndècu ichi Yá Ndiòxi ñá, te cada cuèndá-n tnùhu càháⁿ-yú te núú véxi-yú ndihí úú àdi úní ñáyiú càháⁿ ndáá nàcuáa ní cuu, áⁿ núu ñáhá te vá cadá cuèndá-n tnùhu càháⁿ-yú.

20 Te núú cue téé yìndaha ñaha xii ñáyiú-áⁿ ndécú cuèchi-güedé, te cáháⁿ-n dõho-güedé núú nchàa ñáyiú ndècu ichi-gá cuèndá sá dává-gá-yú vá cúyíⁿ-yú ducaⁿ càdá-yú.

21 Te Yá Ndiòxi ndihí Xítohó Jesucristú náhá-gá ndihí cue espíritú xínú cuèchi núú-gá sá yùhú càháⁿ-í dóho-n sá cadá-n nchàa nàcuáa càháⁿ-í-a, te ñⁿ-ni càháⁿ ndihí-n cuè téé xini tnáhá ndihí-n, ndihí cue téé ñá túú xini tnáhá ndihí-n.

22 Te vá ío cundihí iní-n tàxi ndecu-n ñⁿ téé quindaha ñaha xii ñáyiú, chi díhna-gá cada cuèndá-n te núú cùu-dé ñⁿ téé quide ndáá, chi núú cuèndá-ni na tàxi ndecu-n-dé te vá cadá ndáá-dé, te yòhó ndaa díquí-n cuèndá nchaa sá cuèhé sá dúhá càda-dé, te ío coto-n mée-n vá cadá-n ñⁿ sá cuèhé sá dúhá.

23 Te ducaⁿ ío mee-ni cùhú xítí-n te vá cóhó-n mée-ni ndute, chi tnáhá luha vinú ndéhé yoho yàha stilé coho-n cuèndá cada tátna-xi.

24 Te dava ñáyiú cùtnuní nchaa sá cuèhé sá dúhá quidé-yú, te cùtnuní tucu sá nácháhu-yú na sáá nduu, te dava tucú-yú chi ñá túú cùtnuní nchaa sá cuèhé sá dúhá quidé-yú, dico na sáá nduu cùndáá cuèchi-yú te dàvá-áⁿ cùtnuní.

25 Te ducaⁿ sãtnahá-xi cùu nchaa sá vãha quide davá-yú chi cùtnuní, te cuèi ñá túú cùtnuní òré-ni dico dacuítí sã sáá nduu cùtnuní.

6

1 Te nchaa ñáyiú ndècu tnuú quidé chùⁿ ndihí ñⁿ patróóⁿ xini ñuhu-xi ío canehé-yú sá yíñùhu núú-dé cuèndá sá vã càháⁿ cuèhé ñáyiú cuèndá Yá Ndiòxi, te ñi vã càháⁿ cuèhé-yú cuèndá tnùhu-gá.

2 Te núú patróóⁿ cue ñáyiú xinu cuechi-áⁿ sàndáá iní-dé Yá Ndiòxi, te ñá díú sá dúcáⁿ sàndáá iní-dé Yá Ndiòxi te vá cánèhé-yú sá yíñùhu núú-dé, chi uuⁿ-gá tàú-yú cada váha-yú cunu cuèchí-yú núú-dé, te ducaⁿ na càdá-yú chi xinu cuechí-yú núú tãe sàndáá iní ndihí-yú tnùhu Yá Ndiòxi. Te vá dáñá ndèé-n dànehé-n-yú nchaa nàcuáa càháⁿ-í-a, te cúñaha-n xii-yú sá ná càdá-yú.

Nduu vétú iní-ó cùndecu-o

3 Te ío cue téé ñá túú tnèi-güedé nàcuáa càháⁿ tnùhu Xítohó Jesucristú, te cue téé-áⁿ càchí-güedé sá càháⁿ ndáá-güedé dico ñá ndáá, chi ñá túú càháⁿ-güedé nàcuáa cuáháⁿ tnùhu-gá. Te nchaa tnùhu Xítohó Jesucristú cúú-xí mée-ni tnùhu ndáá, te chindee ñaha-xi cada ndáá-ó cùndecu-o ichi-gá.

4 Te nchaa cue téé ducaⁿ xiquide quide cahnu-güedé méé-güedé dico ñá túú vèdana xini-güedé, te cue téé-áⁿ ñá túú ndècu váha iní-güedé chi nándi tnùhu sá ñá túú nándihí cuini-güedé cùtnàha-güedé. Te ngüíta-güedé cúú cuèdú iní tnáhá-güedé, te nàá ndihí tnáhá-güedé, te xicuehé tnáhá-güedé, te ñá túú-gá cúú váha iní núú tnáhá-güedé.

5 Te cue téé-áⁿ mee-ni nàá-güedé chi ñá túú sàni váha iní-güedé, te ni ñà túú xini-güedé nàcuáa cuáháⁿ tnúhu ndáá tnúhu Yá Ndiöxí, te cächí-güedé sá ïo váha cundecu-güedé ichi-gá chi sàni iní-güedé sá ïo vâi díhúⁿ ñihí-güedé cundecu ndihí-güedé. Te yúhú cáháⁿ-í dóho-n sã vã ñihí tnáhá-n ndihí nchaa cue téé ducaⁿ xiquide.

6 Te ndáá sá ichi Yá Ndiöxí cúú-xí ñⁿ ichi sá ïo váha cundecu-o, dico xini ñuhu-xi nduu vétú iní-ó nàcuáa ndècu-o ñuyíú-a.

7 Te nchoo cuè ñáyiu chi ñá túú vèdana ñehe-o ní quexìo ñuyíú-a, te ñiu-ni ducaⁿ ñà túú vèdana canehe-o quíhíⁿ òré ná cùú-ó.

8 Te ïo xini ñuhu-xi nduu vétú iní-ó te núu ndècu-ni sá cunchito-o ndihí dóo cuihnu-o.

9 Te ïo ñáyiu ïo cuiní-yu cuu cuicá-yu, te ñáyiu-áⁿ dácàhu iní ñáhá yècu ñáváha xii-yu cadá-yu nándi sá cuèhé sá dúhá, te nándi-gá nchaa sá cuèhé sá dúhá càhu iní-yu quidé-yu, te nchaa sá quidé-yu-áⁿ ñà túú vèdana nàndihí-xi chi uuⁿ-gá ndádá ndàhú ñáhá-xí xii-yu, te dàcuo nihnu ñaha-xi.

10 Chi nchaa ñáyiu ñuhu iní mee-ni díhúⁿ, te xíãⁿ quidé-xí ngüita-yu sàni iní-yu cadá-yu nándi sá cuèhé sá dúhá. Te ïo ñáyiu ndècu ichi Yá Ndiöxí te sá tnúhu ducaⁿ ñuhu iní mee-ni díhúⁿ ní dáñá-yu ñá túú-gã sàndáá iní ñáhá-yu xii-gã, te vitna ñá túú tnàhí-gã ndécú váha iní-yu.

Cahni iní-ó càda-o nchaa nacuáa càháⁿ Yá Ndiöxí chi sàndáá iní-ó-gã

11 Te yòhó téé quide chiuⁿ Yá Ndiöxí xini ñuhu-xi vá cadá-n dàtná quidé nchaa ñáyiu ní cachí-í sã ñà túú quide ndáá, te vá dáñá ndèè-n càda ndáá-n cùndecu-n, te cada-n nàcuáa nduu vétú iní Yá Ndiöxí, te ïo quindáá iní-n-gã, te cuu iní-n nchaa tnaha ñáyiu-n, te cada càhnu iní-n nchaa sá ná yàha-n cùndecu-n ichi-gã, te cunduu ndàhú iní-n.

12 Te cahni iní-n càda-n nchaa nacuáa cuiní Yá Ndiöxí chi sàndáá iní-n-gã, te ïo cuhuⁿ iní-n sã cùndècu-n ndihí Yá Ndiöxí ñi caa ñi quíhíⁿ, chi ñiu cuendá tnàhí-áⁿ ñi cáháⁿ ñáhá-gã xii-n, te ní cáháⁿ ndáá-n núú vâi ñáyiu sá ïo váha sàndáá iní-n-gã.

13 Te Yá Ndiöxí Yaá quidé nchito nchaandi túhú sá ïo ñuyíú naha-gã sá càháⁿ-í dóho-n vitna, te ñiu-ni ducaⁿ naha tucu Xítohó Jesucristú Yaá ní cáháⁿ tnúhu ndáá núú tẽ Pilatú

14 sã quindáá iní-n càda-n nchaa nacuáa càháⁿ Yá Ndiöxí, te nchaa tnúhu càháⁿ-gã cada-n nàcuáa vá dáquèe tíhú ñáhá ñáyiu xii-n, te ducaⁿ-ni càda-n ndéé ná sáá nduu quixi tucu Xítohó Jesucristú.

15 Te quixi tucu-gã chi ducaⁿ ñi cachí Yá Ndiöxí cunduu, te mee Yá Ndiöxí ñáhá-gã ná nduu quixi tucu Xítohó Jesucristú. Te Yá Ndiöxí ïo váha cùu iní-gã te ñⁿdií díí-ñi-gã ïo-gã cùnùu-gã dàcúúxí cuè téé tàxi tnuní ñⁿ ñⁿ nàcióⁿ ndihí nchaa dava-gã cue téé cùnuu, chi tàxi tnuní ñáhá-gã xii-güedé, te nchaa ñáyiu ndècu ñuyíú-a tàxi tnuní-gã.

16 Te ñiu-gã cúú-gã Yaá ndécú nchaa nduu nchaa quíú, te ïo càhnu cuu-gã chi dàtná dáyéhé nchicanhii dàyéhé-xi núú ndécú-gã, te vá yòo ñⁿ cùyii dayatni núú ndécú-gã, te ni ñá túú ñi ñⁿ ñáyiu xini ñáhá xii-gã te ni vã ndácú-yu quini ñáhá-yu xii-gã. Te ïo na cànehe nchaa ñáyiu sá yíñuhu núú-gã ñi caa ñi quíhíⁿ, te ducaⁿ ïo na tàxi tnuní-gã ñi caa ñi quíhíⁿ. Te ducaⁿ na cùnduu.

17 Te cáháⁿ-n dóho nchaa ñáyiu cuica ndècu ndihí nchaa sá ïo ñuyíú-a cuendá sá vã cadá càhnú-yu mèé-yu, te duuⁿ duuⁿ vá cùndèè iní-yu ñi ñⁿ sá ndécú

ndihí-yu chi vá cúdĩ-xi, te cáháⁿ-n dõho-yu sá ná cùndeé iní-yu Yá Ndiõxí chi d̄iu-gá cúú-gã Yaa ndécú nchàa nduu nchaa quiú, te chitu núú ndáhá tàxi-gá nchaa sá xíní ñùhu-o, chi cuíní-gá sá ïo cuu váha iní-ó cùndecu-o.

¹⁸ Te cáháⁿ tucu-n dõho-yu sá ná càdá-yu mee-ni sá vâha, te cuendá nchaa sá vâha cadá-yu-áⁿ te cuú-yu ñⁿ ñáyiú cuica sã cúú-xí Yã Ndiõxí, te na cùndecu túha-yu chindéé-yu cue ñáyiú ndàhú cuáñàhá-yu sá xíní ñùhú-yu.

¹⁹ Te núú ducaⁿ na càdá-yu te Yá Ndiõxí cuáñaha-gã sá ndúú tãhũ-yu na sàá nduu, te ngúndecu váha-yu ndihí-gá ni caa ni quihíⁿ.

Tnúhu ndéé núú ní ndihí-ná

²⁰ Te yòhó té Timùteú càháⁿ-í dóho-n sã ïo cada cuendá-n vã dãma tnúhu ní taxi Yá Ndiõxí danèhé-n ñáyiú, te vá cadá cuendá-n nchàa cuendú cuèhé cuendú duha ió ñuyíú-a chi ñá túú nàndíhi-xi, te ni vã cadá cuendá-n nchàa tnúhu xĩtnàha ñáyiú càchí sá xícá nàha tnúhu cue téé túha chi ñá díú ñⁿ tnúhu ndáá cúú-xí.

²¹ Te ió ñáyiú ñá túú-gã sàndáá iní-yu tnúhu Yá Ndiõxí, chi ní quide cuendá-yu nchaa tnúhu xica naha ñáyiú-áⁿ.

Te Yá Ndiõxí ná chĩndee chitúu ñaha-gã xii-n. Te ducaⁿ na cùnduu. Te ió cada ndee ìní-nã vitna.

TUTÚ CÚÚ ÒÚ NÍ CADÚHA TÉ PÄBLÚ QUIHIⁿ NDAHA TÉ TIMÛTEÚ

Té Păblú cádŭha-dé tutú quihiⁿ ndaha té Timùteú

¹ Yúhú té Păblú ní tendaha ñaha Yá Ndiõxí cáháⁿ-í tnúhu Xítóhó Jesucristú núú ñăyiu, chi ducaⁿ ní cachí Yá Ndiõxí cunduu. Te cáháⁿ-í dàtná ní cachí Yá Ndiõxí sá ncháá nchòo ñăyiu ndècu ndihi Xítóhó Jesucristú naníhí táhú-ó.

² Te yúhú té Păblú cádŭha-í tutú-a daquixí-í ndaha yòhó té Timùteú chi ío cùu iní ñáhà-í xii-n, te ñiu-í ní sanu ichi ñaha-í xii-n ichi Xítóhó Jesucristú, te xicáⁿ táhú-í núú Dŭtú Ndiõxí ndihi núú Xítóhó Jesucristú sá ío na chindee chitúu ñaha-gă xii-n, te cundáhú iní ñáhà-gă, te ducaⁿ ndí nduú-gá ná cádá te ío váha cuu iní-n cùndecu-n.

Cáháⁿ váha-o cuendá Xítóhó Jesucristú

³ Te cuéi nduu cuéi niú ducaⁿ-ní cáháⁿ ndihi-í Yá Ndiõxí cuendá-n, te ndácáⁿ táhú-í núú-gă, te xinu cuechi-í núú-gă dàtná ní quide cue ñaní tnáhà-í ní xindee ndéé sanduu, te cùtnuní iní-í sá quidé ndáá-í núú-gă dàtná ní xóo cada-güedé.

⁴ Te ío sàni iní-í naníhí tnáhà-ó cuendá ío cudí iní-í, chi ndàcu iní-í sá ío ní ndáhyú-n sã ndihú iní-n cùtnáhá ní quide ndee iní-í tnáhà-ó.

⁵ Te naha-í sá sàndáá ndisa iní-n Yá Ndiõxí dàtná ní nguíta díhna-gá xitná-n tă Lòidá ndihi náná-n tă Eùnicé quidé-yu, te cùtnuní ndáá iní-í sá díú tnáhà-n ío váha sàndáá iní-n-gă.

⁶ Te xíáⁿ dándàcu iní ñáhà-í xii-n cuendá sá ío-gá nducu ndèe-n cada-n chiuⁿ ní nduu táhú-n núú Yá Ndiõxí cada-n, chi ní taxi-gá tnúhu ndee iní ní ngúndecu ndihi-n cùtnáhá ní sacáⁿ ndodo-í ndaha-í díquí-n sã díú chiúⁿ-gá cada-n.

⁷ Te Espiritú sá ní taxi Yá Ndiõxí ndécú ndihi-o ñá túú cùu-xi ìⁿ Espiritú sá cádá nàcuáa yùhú-ó, chi cùu-xi ìⁿ Espiritú sá táxi tnúhu ndee iní cada-o chiúⁿ-gá, te ñiu-xi quide cuu iní tnáhà-ó ìⁿ ìⁿ-o, te ñiu-ni tucu-xi quide cùtnuní iní-ó nàcuáa cada-o cùndecu-o.

⁸ Te xíáⁿ núu vá cúcàhaⁿ núú-n cáháⁿ váha-n cuendá Xítóhó Jesucristú, te ni vã cúcàhaⁿ núú-n sã dúhá yìhi-í vecaá sá cuendá-gá, te xini ñuhu-xi sá tnáhà-n ndòho-n sã cuendá tnúhu-gá, te cundee ñi-n ndòho-n, chi Yá Ndiõxí chindee ñaha-gá xii-n.

⁹ Te Yá Ndiõxí ní dácăcu nihnu ñaha-gă xii-o núú ùhú núú ndáhú, te ní cachí-gá sá cádá-ó nchaa nacuáa cuiní méé-gă cunduu, te ducaⁿ ní quide-gá chi ducaⁿ ní sani iní méé-gă cunduu sá cádá váha ñaha-gă xii-o, te ñá díú sã ío váha quide-o ndecu-o ducaⁿ ní quide-gá. Te ndéé cùtnáhá vátá ngăva-gá ñuyú ní cachí-gá sá cádá váha ñaha-gă xii nchaa nchoo ñăyiu ní ngúndecu ndihi Xítóhó Jesucristú vitna.

¹⁰ Te vitna cùtnuní iní-ó sã ío váha quide ñaha-gá xii-o, chi ní quixi Xítóhó Jesucristú ñuyú-a ní dácăcu nihnu ñaha-gă xii-o núú ùhú núú ndáhú, te Yaá-áⁿ ní quide-gá cuendá sá vã cùú-gá-ó cùú dúcáⁿ-ó, chi ní cachí-gá sá cùndecu-o ní caa ní quihiⁿ te núu na quindáá iní-ó tnúhu-gá.

11 Te ní cachí-gá sá cãháⁿ-í tnúhu-gá núú ñáiyu ñá túú cùu ñáiyu isràél te dacuàha váha-í-yu tnúhu-gá, te cuèi ndèni ní cuu ndècú-yu te quíhíⁿ-í cáháⁿ-í tnúhu-gá núú-yu chi ducaⁿ ní cachí-gá cunduu.

12 Te cuèndá xiǎⁿ nãndi sá ndòhò-í vitna cuèndá-gá, dico ñá túú cùcahaⁿ núú-í chi cùnuni váha iní-í nãcuáa sàni iní Xítohó Jesucristú Yaa sàndáa iní-í, te yuhú ní dáñà-í mée-í núú ndáhá-gã, te cùnuni ndáa iní-í sá cótó ñaha-gá xii-í ndéé ná sáa nduu nãcuaca ñaha-gã.

13 Te vá dáñá ndèe-n càda-n nchaa nacuáa cãháⁿ tnúhu váha ní dánèhé ñáhà-í xii-n, te ío quíndáa iní-n Yã Ndiòxí, te nchaa-o nãcuáa ndècu-o ndihi Xítohó Jesucristú ío cuu iní tnáhá-ó ìⁿ ìⁿ-o.

14 Te cada cuèndá váha-n sã vã dãma tnúhu Yã Ndiòxí sá ní taxi-gá ndècú ndihi-n, te Espíritú-gá sá ní taxi-gá ndècú ndihi-o chindee ñaha-xi xii-n.

15 Te yòhó sa xini-n sã nchaa ñáiyu ndècu distritú Àsiá, ñáiyu ní sãndáa iní tnúhu Xítohó Jesucristú ní dáñá ñáhà-yu xii-í, te tnáhá té Fígeló ndihi té Hèrmógenés ní dáñá ñaha-güedé xii-í.

16 Te xicáⁿ táhù-í núú Xítohó Jesucristú sá ná chindee-gá cue ñáiyu cùu ndi mee te Onèsiforó, chi ñu-dé ío vai xito ní quixi-dé ní quide cuèndá ñáhá-dé xii-í, te ní taxi-dé tnúhu ndee iní, te ñá túú ní cùcahaⁿ núú-dé sá yíhí-í vecaá.

17 Te cúnáhá ní xíndecu-dé ñuú Rómá ducaⁿ-ni ní xóo nanducu ñaha-dé xii-í ndéé ndéé naníhí ñáhá-dé.

18 Te xicáⁿ táhù tucu-í núú Xítohó Jesucristú sá ná cùndahú iní ñáhá-gã xii-dé nduu na sáa cundáa cuèchi nchaa ñáiyu. Te yòhó sa xini ndáa-n sã ío ní chindee ñaha-dé xii-o cùtnáhá ní xíndecu-o ñuú Éfesú.

2

Tée quide ndáa xínú cuèchi núú Xítohó Jesucristú

1 Te yòhó téé cùu datná ìⁿ déhe mee-í ío nducu ndèe-n cada-n nacuáa níhí ndéé-gã-n cùndecu-n ichi Xítohó Jesucristú chi ñu-gá chindee ñaha-gá xii-n.

2 Te nchaa tnúhu sá ní dánèhé ñáhà-í xii-n ndihi nchaa dava-gá ñáiyu, xiǎⁿ danèhé-n dàva-gá cue téé quide ndáa cuèndá danèhé-güedé dava-gá ñáiyu.

3 Te cahni iní-n ndòho-n cunu cuechi-n núú Xítohó Jesucristú dátá cuini-n ndòho ìⁿ sandadú sàhni iní-dé xínú cuèchi-dé.

4 Chi ní ìⁿ sandadú ñá túú nãgá sání iní-dé cada-dé òré xínú cuèchi-dé cuèndá cudü-dé núú téé tàxi tnuni ñáhá.

5 Te ñu-ni ducaⁿ sãtnáhá-xi cùu tucu ìⁿ téé dàdiqui, chi núu vá dàdiqui-dé nacuáa tàù-xi cunduu te vá níhí-dé sá ndúú táhù-dé.

6 Te núu ìⁿ téé xínu cuechi ío nducu ndee-dé quidé chiùⁿ-dé chíhí-dé tatá, te ñu-dé tàù-dé díhna-gá-dé níhí-dé sá cùhúⁿ yãhu-dé.

7 Te cani iní-n nchaa tnúhu cãháⁿ-í-a, te Xítohó Jesucristú chindee ñaha-gá xii-n te tecú tnuni-n nchaa.

8 Te ndacu iní-n sã Xítohó Jesucristú ní cuu-gá ñani tnáhá ndi Dávi, te ní xíhí-gá te ní ndoto-gá, te ñu ducaⁿ ndúu tnúhu dànehé-í ñáiyu.

9 Te ío dàndoho ñaha ñáiyu xii-í cuèndá sá cãháⁿ-í tnúhu-gá, te quide ñáhà-yu xii-í dátá quidé-yu ìⁿ téé ní quide ìⁿ cuèchi cãhnu, chi ní chíhí ñáhà-yu vecaá xii-í, dico tnúhu Yã Ndiòxí chí vá ndácú-yu ngani-yu.

10 Te xiǎⁿ núu cuèi nãndi cùu nchaa sá quidé ñáhà-yu xii-í, dico quide cahnu iní-í cuèndá sá naníhí táhù tnáhá nchaa dava-gá ñáiyu cuini Yã Ndiòxí

cundecu ndihi-gá, chi nchaa ñáyi u na tnàhá tnúhu ndihi Xítóhó Jesucristú nduu táhŭ-yu cundecú-yu ndihi-gá núú ïo váha càa ndecu-gá ni caa ni quíhíⁿ.

11 Te xéhé cúu-xí ñⁿ tnúhu ndáá cuiti:

Nchoo cùu-o datná ñáyi ní xihí ndihi Xítóhó Jesucristú chi ñá túú-gã ndécú-ó ichi cuehé ichi duha,

te xiãⁿ núu cuéi na sáá nduu cùú-ó ñùyíú-a, dico ñu-ni cundecu-o ndihi-gá.

12 Te núu na cùndee iní-ó ndòho-o nándi sá ndóhó-ó sá cuendá-gã, te sáá nduu te cunuu-o ndihi-gá.

Te núu na càháⁿ-ó sá ñá túú xini-ó-gã, te ñu-ni ducaⁿ cùñaha-gã xii-o sá ñá túú xini ñáhá-gã ná sáá nduu càda ndáá-gã cuéchi nchaa ñáyi u.

13 Te núu nchoo ñá túú quide ndáá-ó ndecu-o núú-gã ñá, dico mee-gã chi ïo ndáá quidé-gã, chi Yá Ndióxi nchaa sá sání iní-gã quidé-gã.

Tée quide nacuaa nduu vétú iní Yá Ndióxi

14 Te dandacu iní-n nchaa ñáyi u ndecu ndihi-o ichi Xítóhó Jesucristú nchaa tnúhu càháⁿ-í-a, te cùñaha-n xii-yu sá Xítóhó Jesucristú cuini-gá sá ñá túú-gã nándi tnúhu cùtnàhá-yu, chi nchaa tnúhu càháⁿ-yu-áⁿ dácũta nihnu-xi ñáyi u ndédóho ñaha xii-yu, chi ñá túú vèdana nándihi nchaa tnúhu-áⁿ.

15 Te ïo nducu ndèe-n cada ndáá-n cùndecu-n núú Yá Ndióxi, te cada-n chiⁿ-gã nacuaa nduu vétú iní-gã, te càháⁿ ndáá-n tnúhu-gã, cuendá sá vã cùcàhaⁿ núú-n núú-gã.

16 Te vã cáda cuendá-n nchaa tnúhu sá ñá túú vèdana nándihi càháⁿ ñáyi u cuendá Yá Ndióxi, chi nchaa ñáyi u càháⁿ tnúhu-áⁿ ndihi nchaa ñáyi u sàcúndedóho ñaha xii-yu uuⁿ-gã quidé-yu nchaa sá cuéhe sá dúhá.

17 Te nchaa tnúhu-áⁿ cùtènuu-xi datná quidé ñⁿ cuéhe sá ñani ñaha xii ñáyi u xité nuu-xi nihí yiqui cùñu-yu. Te tnàhá té Himèneu ndihi té Filetú càháⁿ-güedé tnúhu-áⁿ quidé-güedé datná quidé ñáyi u-áⁿ.

18 Te cue té-áⁿ ñá túú-gã càháⁿ ndáá-güedé datná càháⁿ tnúhu Yá Ndióxi, chi càhí-güedé sá ncháá nchòo ñáyi u ndecu ichi Yá Ndióxi cúú-ó datná cue ñáyi u sa ní ndoto, dico na cùú ndisa-o te vã ndótó-gã-ó càhí-güedé. Te dava ñáyi u ní dáñã-yu sá sàndáá iní-yu tnúhu Yá Ndióxi sá dúcáⁿ càháⁿ-güedé.

19 Te cuéi ducaⁿ quide davá-yu, dico Yá Ndióxi ní taxi ndecu-gã cue ñáyi u ni yùhu ni iní ndécú ichi-gã, te cùtnuni sá ndécú ndihi ñaha-gã xii-yu, chi ñⁿ xichi núú tütú-gã càhí-xi sá méé-gã xini-gã cue ñáyi u cùu cuendá-gã. Te ingá tucu xichi núú tütú-gã càhí-xi sá ncháá ñáyi u sàndáá iní ñáhá xii Xítóhó Jesucristú xini ñùhu-xi sá vã cùndecu-gã-yu ichi cuéhe ichi duha.

20 Te ñáyi u cuica chi ndecu ndihi-yu vehé-yu cóhó sá ní cuáha mee-ni dñhⁿ cuááⁿ, ndihi cóhó sá ní cuáha mee-ni dñhⁿ cuixíⁿ, te nchaa cóhó-áⁿ cúu-xí datná cue ñáyi u ñá túú ná cùmání núú Yá Ndióxi. Te ndecu ndihi tucú-yu cóhó sá ní cuáha mee-ni ñùhu, ndihi cóhó sá ní cuáha mee-ni yùtnu, te nchaa cóhó-áⁿ cúu-xí datná cue ñáyi u ñá túú quide ndáá núú Yá Ndióxi.

21 Te nchaa ñáyi u ïo ndecu yiñuhu núú Yá Ndióxi cúú-yu ñáyi u ñá túú nihí tnáha ndihi cue ñáyi u ñá túú quide ndáá núú-gã, te cue ñáyi u ndecu yiñuhu núú-gã-áⁿ ñá túú tnàhí quee cáva-yu quidé-yu nchaa chiⁿ tahu-gã.

22 Te ïo cada cuendá-n vã cáda-n nacuaa quide cue tée cuechi ndecu ichi cuehé ichi duha, te cada-n nacuaa cundáá-n cùndecu-n ichi Yá Ndióxi, te quindáá iní-n-gã, te cuu iní-n nchaa tnaha ñáyi u-n, te cundecu nahi-n, chi

ducaⁿ tàù-xi cada-n ndìhi nchaa dava-gá ñáyiù sa ní nduu ndoo ní nduu nine iní-xi ñáyiù càháⁿ ndìhi ñaha xii Yá Ndiòxí.

²³ Te vá cadá cuendá-n nì ìⁿ tnúhu xítnàha ñáyiù chi ñá túú vèdana nàndíhi-xi, chi núu na càda cuendá-ó te dicó dánàá ñáhá-xí.

²⁴ Chi nchaa cue téé xínu cuechi núú Yá Ndiòxí xíní ñùhu-xi càháⁿ váha-güedé ndìhi nchaa ñáyiù, te danèhé ñáhá váha-güedé tnúhu-gá, te cunduu càhnu iní-güedé te vá nàà-güedé.

²⁵ Te vii vii càháⁿ-güedé dóho nchaa ñáyiù sáá iní-xi, ñáyiù ñá túú tnàhá iní tnúhu ndáá tnúhu Yá Ndiòxí, te ducaⁿ te cudana Yá Ndiòxí cada-gá te ndixi túu iní-yu sá ñà túú quide váha-yu ndècú-yu te quindáá iní-yu tnúhu-gá.

²⁶ Te ducaⁿ te cutnùnì iní-yu sá sàcuihná cúnùu-xi taxi tnunì ñáhá-xí xii-yu, chi dàcahu iní ñáhá-xí xii-yu quidè-yu nchaa nàcuáa cùu iní-xi ní cùu.

3

Nàcuáa cada ñáyiù òré sa ta cùyatni sáá nduu quìxi tucu Xítohó Jesucristú

¹ Te càchí tnúhu-í xii-n cuendá cunaha-n nàcuáa cada-xi òré sa ta cùyatni sáá nduu quìxi tucu Xítohó Jesucristú, chi dàvá-áⁿ ìo cada úhú-xi.

² Chi ngüíta ñáyiù cuhuⁿ iní-yu mee-ni sá cúú-xí mèe-yu, te cuhuⁿ iní-yu mee-ni ñíhúⁿ, te ìo cada càhnú-yu mèe-yu, te cunduu yíchí iní-yu, te càháⁿ cuèhé-yu cuendá Yá Ndiòxí, te vá quindáá-gá iní-yu ní tátà-yu ní nãñà-yu, te ní vá ndàcáⁿ táhú núú tnáhã-yu cuendá nchaa sá váha cada tnàhá-yu, te cadá-yu mee-ni sá ñà túú tnàhá iní Yá Ndiòxí.

³ Te vá cúú iní tnáhã ndí meé-yu, te nàa-yu te vá cuánàá-yu, te tee tnàhá-yu cuèchi neñùú, te vá cuánàa-yu cadá-yu nchaa sá cuèhé sá dúhá sàni iní-yu, te ìo cunduu cuihna iní-yu, te vá tnàhá iní-yu nchaa sá váha.

⁴ Te dayuhu cuáha cuendá tnáhã-yu núú cuè téé cùchiuⁿ, te ìo cunduu yí iní-yu cadá-yu nándi sá ñà túú váha, te ìo cada nínu-yu mèe-yu, te mee-ni nchaa sá cúdí iní-yu cadá-yu, te vá cúdí iní-yu nanducu ñíhú-yu Yá Ndiòxí.

⁵ Te quesàhá-yu sá tnàhá-yu ndècú-yu ichi Yá Ndiòxí dico vá cadá-yu nchaa nàcuáa càháⁿ-gá.

Te yúhú càchí tnúhu-í xii-n sá vá ñíhí tnáhã-n ndìhi nchaa ñáyiù ducaⁿ quide.

⁶ Te dava ñáyiù-áⁿ quíhíⁿ-yu dava vehe núú xíndecu ñáyiù, te ngüíta-yu dandáhú-yu ñáyiù ñíhí ñá túú xíní dana cuendá Yá Ndiòxí, te ñáyiù ñíhí-áⁿ cúú-yu ñáyiù ndècu vihi cuèchi-xi, chi ìo cúdí iní-yu quidè-yu nchaa nání sá cuèhé sá dúhá sàni iní-yu.

⁷ Te cuèi ìo dàcuahá-yu, dico ñá túú cutnùnì iní-yu nása cuáháⁿ tnúhu ndáá tnúhu Yá Ndiòxí.

⁸ Te ñáyiù ducaⁿ dandahú ñáhã xii cue ñáyiù ñíhí-áⁿ ñà túú càháⁿ váha-yu cuendá tnúhu Yá Ndiòxí, chi quidè-yu dàtná ní quide ndí Jánés ndìhi ndí Jámbrés chi cue ndí-áⁿ ñà túú ní cùu váha iní cue ndí núú ndí Moisés cuendá tnúhu ní càháⁿ ndí. Te ñáyiù-áⁿ cúú-yu ñáyiù sàni iní mee ñine-ni nchaa sá cuèhé sá dúhá, te cuèi càchí-yu sá sàndáá iní-yu Yá Ndiòxí dico ñá ndàá sá sàndáá iní ñáhã-yu xii-gá.

⁹ Dico vá ndácú-gá-yu dandáhú-yu vài ñáyiù, chi nchaa ñáyiù cutnùnì iní-yu sá ìo ñí ñíquí-yu, te ñá túú càháⁿ ndáá-yu dàtná ní quide cue téé úú ñá túú ní tnàhá iní tnúhu ní càháⁿ ndí Moisés.

Té Páblú dásàhú-dé té Timùteú

10 Te yòhò quidé-n nchàa nacuáa ní dánèhé ñàhá-í xii-n, te ní xiní-n nchàa nacuáa quide-í ndécù-í, te cùtnuní iní-n nàcuáa sàni iní-í ndécù-í ñuyíú-a, te xiní-n sá ïo sàndáá iní-í Yá Ndiòxí, te ïo càhnu iní-í, te cùu iní-í nchaa ñáyíu, te xiní tucu-n sá ïo quide cahnu iní-í cuèi nándi sá yáha-í ndécù-í dico ñá túú dàña ndeé-í ichi-gá.

11 Te ïo vài sá quidé ñàha ñáyíu xii-í dándòho ñàhá-yu sá ndécù-í ichi Xítohó Jesucristú, te sa ñàha tucu-n datná ní quide ñàhá-yu xii-í cùtnàhá ní xíndecu-í ñúú Antiòquia, ndihí ñúú Ìconíú, ndihí ñúú Listrá, chi ïo ní dándóhó ñàhá-yu xii-í sá cuèndá-gá. Dico Xítohó Jesucristú ïo ní xito ñàha-gá xii-í te ní chindee ñàha-gá cuèi nándi cùu sá ní yáha-í.

12 Te na càhí tnúhu ndáá-í xii-n sá ïo vài sá ñá túú vâha cada ñàha ñáyíu xii nchaa ñáyíu cuini sá ñá túú nã cumání nũú Yá Ndiòxí cuèndá sá ndécú ndihí-yu Xítohó Jesucristú.

13 Dico dava ñáyíu càhí-yu sá càháⁿ-yu tnúhu Yá Ndiòxí te ñá ndáá sá càháⁿ-yu tnúhu-gá, ñáyíu-ánⁿ uuⁿ-gá cuita cada-gá-yu nchaa sá cuèhé sá dúhá quíhíⁿ, te ducaⁿ-ni ïo dandàhú tnáhá-yu.

14 Te yòhò chi ïo váha ní sàndáá iní-n tnúhu Yá Ndiòxí sá dácuaⁿ-n, te vitna càháⁿ-í dóho-n sá vã dáñá ndeé-n quíndáá iní-n tnúhu-ánⁿ, te yòhò sa ñàha-n ná cúú ñáyíu ní dánèhé ñàhá xii-n tnúhu-gá.

15 Te yòhò chi ndeé cùtnàhá cúú làndú-n ní ngúita-n dàcuaha-n tnúhu ndeé núú tùtú Yá Ndiòxí, te ñu-ni nchaa tnúhu-gá canu ichi ñàha-xi xii-n te naníhí tãhú-n, chi sàndáá iní-n Xítohó Jesucristú.

16 Te nchaa cue téé ní tee tnúhu Yá Ndiòxí, chi ñu-ni mee-gã ní dácáhú ñí ñàhá-gá xii-güedé nàcuáa tee-güedé, te tnúhu-gá ïo váha dacuaⁿ-o nchaa dava-gá ñáyíu, te càháⁿ-xi dóho-o sá vã cùndecu-gá-ó ìchi cuehé ichi duha, te núú ñá túú quide ndáá-ó ndécù-o te nàcanu ichi ñàha-xi, te dànehé ñàhá-xi nàcuáa cada-o cùndáá-ó núú Yá Ndiòxí.

17 Te ñu-ni tnúhu-gá dátũha ñàha vâha-xi xii nchoo cuè ñáyíu ndécù ndihí-gá cuèndá cada-o nchàa núú sá vâha.

4

1 Te Xítohó Jesucristú quixi-gá taxi tnúni-gá ñuyíú-a, te cada ndáá-gá cuèchi nchaa ñáyíu sa ní xihí, ndihí cuèchi nchaa ñáyíu xíndecu vívú. Te mee-gã ndihí Yá Ndiòxí ñàhá-gá sá ïo càháⁿ-í dóho-n vitna

2 sá ïo dacuaⁿ-n ñáyíu tnúhu-gá, te vã dáñá ndeé-n dàcuahá-n-yu ndèda-ni càa òré cuèi ñá túú cuini-yu cundedóho-yu, te nchaa ñáyíu ñá túú cuini cada ndáá cúñaha ndáá-n nchàa nacuáa quidé-yu. Te cúñaha tucu-n xii-yu sá vã dúcáⁿ-gã cadá-yu, te càháⁿ-n dóho-yu cuèndá cada ndáá-yu cundecú-yu. Te ïo cunduu càhnu iní-n òré càháⁿ-n dóho-yu, te ïo dacuaⁿ-n-yu tnúhu-gá.

3 Chi sáá nduu te vã càhí-gá-yu cundedóho-yu nchaa tnúhu sá sánú ìchi ñàha cundecu váha-o nũú Yá Ndiòxí, chi mee-nã nchaa sá cúdíⁿ iní mée-yu cundedóho-yu, te ndúcú-yu cue téé danèhé ñàhá xii-yu nchaa tnúhu cùu iní-yu-ánⁿ.

4 Te vã cáda cuèndá tnàhí-gá-yu tnúhu ndáá tnúhu Yá Ndiòxí, chi mee-nã tnúhu sá ñá túú nàndihí cada cuèndá-yu.

5 Dico yòhò ïo quíhí iní-n cùndecu-n, te cahni iní-n cuèi nándi na ndòho-n, te dacuaⁿ-ni-n ñáyíu tnúhu Yá Ndiòxí, ñáyíu vátá quíndáá iní ñàhá-gá xii-gá, te cada-ni-n nchàa chiuⁿ ní táhú-gá cada-n.

6 Te yúhú sa ñùhu ichi-ná-í quíhíⁿ-í núú ndécú Yă Ndiòxí cundecu-í, chi sa ní cuyatni cahni ñaha-güedé xii-í cuendá sá xínú cuèchi-í núú-gă.

7 Te ní quide-í nchaa chi^u ní táhú Yă Ndiòxí cada-í te vitna ní xínu cava nchaa chi^u ní táhú-gă-áⁿ ñí quide-í, te ñá túú ní dàña ndeé-í ní sándáá iní-í-gă, te ducaⁿ-ni sándáá iní-í-gă ndeé vitna.

8 Te vitna sa ndòcu túha-ná sá ndúú táhù-í cuendá sá quidé ndáá-í núú Yă Ndiòxí, te Xítohó Jesucristú taxi-gă táhú-ăⁿ nduu táhù-í ná sáá nduu, chi cùu-gă ñⁿ Yaá quidé ndáá cuiti, te ñá díú-ní yúhú taxi-gă táhú-ăⁿ cuu cuendá-í, chi tnàhá nchaa ñáyiú ndètu cahnu-ná sáá nduu quixi tucu-gă ñuyú-a cuáñaha-gă táhú-ăⁿ nduu táhù-yu.

Chi^u tahu té Păblú cada té Timùteú

9 Te cuini-í sá İo ndíhi quixi-n quixi coto ñaha-n xii-í.

10 Chi té Dêmás ñá túú-gă quidé cuendá ñáhá-dě xii-í, chi mee-nă nchaa sá İo ñuyú-a İo cùdíí iní-dé. Te ní dándòo ñaha-dě cuáháⁿ-dé ñuú Tesalónica, te té Créscenté cuáháⁿ-dé cundecu-dé distritú Gálaciá, te té Titú cuáháⁿ-dé cundecu-dé distritú Dălmaciá.

11 Te ñⁿdîi-ná té Lúca ndécú ndíhi ñaha-dé xii-í, te cùñaha-n xii té Măcú quixi-n ndíhi-dé, chi téé-áⁿ ndacu-dé cada-dé ñⁿ chi^u-í.

12 Te té Tiquicú ní tendaha-İ-dé cuáháⁿ-dé ñuú Éfesú.

13 Te òrè quixi-n te yáha-n vèhe té Cărpú cáá ñuú Tróas canehe-n ñⁿ dóó țicachi ní dándòo-í vehe-dé quixi, ndíhi nchaa librú-í, te tnàhá nchaa dava-gă tutú-í ndécú vèhe-dé canehe-n quixi chi xíăⁿ İo-gă xíní ñùhu-í.

14 Te té Lijandrú téé cùu rerú İo vâi sá ñá túú vâha ní cuu quide ñaha-dé xii-í, dico mee Yă Ndiòxí náhá-gă ñása cada ñaha-gă xii-dé cuendá sá dúcáⁿ quide-dé.

15 Te vá nihí tnàhá-n ndíhi-dé chi İo cáháⁿ cuèhé-dé cuendá nchaa tnúhu cáháⁿ-ó.

16 Te cúnàhá ndécá ñaha-güedé xii-í ní sáháⁿ núú cuè téé cùchiuⁿ xito díhna nuu, chi mee dîi ní sáháⁿ te ñá túú ní sáháⁿ ni ñⁿ cue téé cùndîhi-í, chi nchaa-güedé ní dándòo ñaha-güedé xii-í, te yúhú xicáⁿ táhù-í núú Yă Ndiòxí sá vă cadá cuendá-gă sá dúcáⁿ ñí quide-güedé.

17 Dico Xítohó Jesucristú ní chindee ñaha-gă xii-í, chi ní taxi-gă tnúhu ndee İni ní cáháⁿ-í tnúhu-gă ñacuáa tăú-xi cunduu núú cuè téé-áⁿ ndíhi núú ncháa ñáyiú, dico ñá díú ñáyiú isrâel cùú-yu, te dîu-gă ní dácăcu nihnu ñaha-gă xii-í ñá túú ní sàhni ñaha-güedé.

18 Te mee Xítohó Jesucristú coto ñaha-gă xii-í te ñá túú nă cuu cuèi nándi sá ná cadá ñaha ñáyiú xii-í te dîu-ni-gă coto ñaha-gă xii-í ndeé ná sáá nduu sáá-í andîu núú ndécú-gă táxi tnúni-gă. Te nchaa-o chí ná căchí-ó sá İo cāhnu cuu-gă ni caa ni quíhíⁿ. Te ducaⁿ na cunduu.

Tnúhu ndeé núú ñí ndíhi-ná

19 Te İo cùñaha-n na càda ndee iní tá Priscá, ndíhi té Àquilú, ndíhi cue ñáyiú cùu ndi mee té Onésiforó.

20 Te té Erastú ní quendóo-dé ñuú Còrintú, te té Trófimú ní dándòo-í-dé ñuú Miletú chi cùhú-dé.

21 Te İo cundîhí iní-n quixi-n oré vátá sáá-gă yóo quidé vîxiⁿ-xi. Te İo cada ndee İni-n căchí té Èúbulú, ndíhi té Pùdenté, ndíhi té Línú, ndíhi tá Clăudiá, ndíhi nchaa dava-gă ñáyiú sándáá iní tnúhu Xítohó Jesucristú.

²² Te xìcáⁿ táhù-í núú Xítóhó Jesucristú sá ná cùndecu ndìhì ñaha-gá xii-n ndìhì nchaa dava-gá-yu. Te ducaⁿ ño na chìndee chitúu ñaha-gă xii-ndo nchàa-ndo. Te ducaⁿ na cùnduu. Te ío chí cádá ndèe iní-nă vitna.

TUTÚ NÍ CADÚHA TÉ PĀBLÚ QUIHIⁿ NDAHA TÉ TÌTÚ

Té Pāblú cādúha-dé tutú quíhíⁿ ndaha té Títú

¹ Yúhú té Pāblú xínú cuèchi-í núú Yá Ndióxi, te diu-gá ní tendaha ñaha-gá xii-í cāháⁿ-í tnúhu Xítohó Jesucristú núú ñáyiú cuendá quíndáá iní nchaa ñáyiú ní cachí Yá Ndióxi naníhí tǎhú, ndihí cuendá sá tècú tnúni váha-yu tnúhu-gá, te ñáyiú na quíndáá iní tnúhu-gá cada ndáá-yu cundecú-yu ichi-gá.

² Te yúhú dācuàha-í-yu tnúhu-gá cuendá cundecu ndihí-yu tnúhu ndee iní sá cundecu ndihí-yu Yá Ndióxi ní caa ní quíhíⁿ, chi ndéé cǔtnháá vátá ngáva-gá ñuyíú-a ní cachí-gá sá cundecu ndihí ñaha-gá xii-yu, te ñá túú dāndahú ñáhá-gǎ, chi quide-gá ⁱⁿ sá cāháⁿ-gá.

³ Te ní sáá nduu ní cachí-gá sá ñihí-yu tnúhu nācuáa cuáháⁿ tnúhu-gá, te diu-ni tnúhu-áⁿ ní cachí Yá Ndióxi Yáá dācācu nihnu ñaha xii-o núú ùhú núú ndáhú sá dācuàha-í ñáyiú.

⁴ Te tutú-a cādúha-í cuendá daquixi-í ndaha yòhó té Títú, téé ní sanu ichi ndisa-í ichi Xítohó Jesucristú, chi ⁱⁿ-ni tnúhu sàndáá iní-ó. Te xicáⁿ tǎhú-í núú Tǎtá-ó Dǔtú Ndióxi sá ïo na chĩndee chitúú ñaha-gǎ xii-n, te diu-ni-gá ná cada te ïo váha cuu iní-n cundecu-n. Te xicáⁿ tǎhú tǔcu-í núú Xítohó Jesucristú Yáá dācācu nihnu ñaha xii-o núú ùhú núú ndáhú sá díú-ní òucaⁿ na cada ñaha-gá xii-n.

Chiuⁿ quide té Títú òstritú Crétá

⁵ Te yúhú ní dāndōo ñaha-í xii-n òstritú Crétá, chi cuíní-í cada-n nchaa chiuⁿ cumání, te cuíní-í taxi ndecu-n cuè téé quíndaha ñaha xii cue ñáyiú sàndáá iní tnúhu Yá Ndióxi xĩndecu ⁱⁿ ⁱⁿ ñuú yĩndèhu òstritú-áⁿ, te cada-n nācuáa ní cachí-í cada-n.

⁶ Te cue téé cada chiuⁿ-áⁿ xíní ñùhu-xi cuu-güedé mee-ni cuè téé ïo váha quide ndáá nācuáa vá yōo cāháⁿ dóho-güedé, te na cùu-güedé cue téé ndecu ⁱⁿ òstritú-í ñadĩhí-xi. Te ducaⁿ nchaa landú-güedé ná cùu-güexi landú sàndáá iní ñáhá xii Yá Ndióxi cuendá sá vǎ yōo cuatnuñaha xii-güexi quesahá-yu sá ïo sáá iní-güexi te quide-güexi nāndi sá ñá túú tǎu-güexi cada-güexi.

⁷ Chi xini ñuhu-xi sá nchaa cuè téé quíndaha ñaha xii ñáyiú sàndáá iní tnúhu Yá Ndióxi ïo cundecu yĩñuhu-güedé, chi ducaⁿ tǎu-xi cada nchaa cue téé quide chiuⁿ Yá Ndióxi, te xini ñuhu tucu-xi sá vǎ cúu-güedé cue téé ñíí iní-xi, te ni vǎ cúu-güedé cue téé líhli iní-xi, te ni vǎ cúu-güedé cue téé quíhu, te ni vǎ cúu-güedé cue téé plètú, te ni vǎ cúu-güedé cue téé òcú-ni ducaⁿ ñihí díhúⁿ.

⁸ Te xini ñuhu-xi cuu-güedé cue téé sǎñaha ñuú vehe ndetatú cue ñáyiú ñùhu ichi, cue téé quide váha sá cúu-xi tñaha ñáyiú-xi, cue téé ïo váha cǔtnuní iní-xi nācuáa cada cundecu ñuyíú-a, cue téé quide ndáá xĩndecu, cue téé quide nchaa nācuáa nduu vétú iní Yá Ndióxi, cue téé xito mee-xi ñá túú quide cutexínu.

⁹ Te na cùu-güedé cue téé ïo váha sàndáá iní tnúhu váha tnúhu Yá Ndióxi sá ní dānehé ñáhá-í xii-ndo cuendá ducaⁿ te cue téé-áⁿ ndacu-güedé cāháⁿ-güedé dóho ñáyiú cuendá cādá-yu nchaa nācuáa cāháⁿ Yá Ndióxi, te níhí-güedé tnúhu

cáháⁿ váha-güedé núu nchàa ñáyiú dàquee tíhú tnúhu Yá Ndiöxí, te mee-ni cuè téé ducaⁿ quide váha taxi ndecu-n quindaha-güedé ñáyiú sàndáá iní tnúhu-gá.

¹⁰ Te na càchí tnúhu-í xii-n sá vái ñáyiú sàá iní-xi íó, te cáháⁿ-yu mee-ni tnúhu sá ñá túú nàndíhi, te dándahú-yu tnàhá ñáyiú-yu, te ñáyiú isràèl ío-gá vài-yu ducaⁿ xíquide.

¹¹ Te nchaa ñáyiú ducaⁿ xíquide xini ñuhu-xi nducu-o tnúhu cúñaha-o xí-yu cuèndá cadí-yu yuhú-yu, chí dānehé-yu dava-gá ñáyiú ìⁿ sá ñá túú tàú-yu dacuàhá-yu, te ducaⁿ quidé-yu cuèndá-ni sá ñihí-yu díhúⁿ, te ío titní xichi ní cuu dāndahú-yu nchaa ñáyiú xīndecu ìⁿ-ni vèhe.

¹² Te ní cachí ìⁿ téé ío váha sàá díquí-xi ndècu mei ñuú distrítú Crétá sá ncháá ñáyiú ñuú-dé-áⁿ ío ndèhndé-yu, te ío cuihna iní-yu, te ío vài xexí-yu, te cùhndú-yu.

¹³ Te ndáá ní cáháⁿ-dé chi ducaⁿ quidé-yu, te xíáⁿ ío cáháⁿ-n dōho-yu cuèndá sá ná quindáá váha iní-yu tnúhu Yá Ndiöxí.

¹⁴ Te cúñaha-n xí-yu sá vā cadá cuèndá-yu nchaa tnúhu ndehnde cáháⁿ ñáyiú isràèl, te ní vā cadá cuèndá-yu nchaa tnúhu cáháⁿ ñáyiú ñá túú cuini quindáá iní tnúhu Yá Ndiöxí.

¹⁵ Te nchaa sá ní cadúha Yá Ndiöxí ío ñuyíú-a cùu-xi mee nine-ni sá vāha sá cúú-xí nchàa ñáyiú sa ní nduu ndoo ní nduu nine iní-xi ndècu ichi Yá Ndiöxí. Dico nchaa sá ní cadúha-gá ñá túú cùu-xi sá vāha sá cúú-xí nchàa ñáyiú ndècu ichi cuehé ichi duha, chí ñá túú sàndáá iní-yu tnúhu-gá, chí mee-ni sá cuèhé sá dúhá ñuhu iní-yu, te ñá túú quide cuendá-yu núu quide váha-yu àdi ñá túú quide váha-yu ndècú-yu.

¹⁶ Te càchí-yu sá sàndáá iní-yu Yá Ndiöxí, dico nchaa sá quidé-yu-áⁿ càchí tnùní-xi sá ñá ndáá. Te Yá Ndiöxí chí duuⁿ duuⁿ ñá túú tnàhá iní-gá nchaa nàcuáa quidé-yu, chí ío sàá iní-yu, te ñá túú quidé-yu ní ìⁿ sá vāha.

2

Tnúhu váha tnúhu Yá Ndiöxí

¹ Te yòhó òrè dānehé-n ñáyiú, te danèhé-n-yu mee-ni nàcuáa cáháⁿ tnúhu váha tnúhu Yá Ndiöxí.

² Te nchaa cue téé cùu sacuéhé ná càda cuendá-güedé vā cadá cùtexínu-güedé cundecu-güedé, te na cùndecu yiñuhu-güedé, te na cuàha váha-güedé cuèndá nàcuáa cada-güedé cundecu-güedé, te na quindáá váha iní-güedé Yá Ndiöxí, te na cùu iní-güedé tnàha ñáyiú-güedé, te na cùnduu cahnu iní-güedé cuèi nāndí sá ná yāha-güedé.

³ Te vitna cáháⁿ tucu-í sá cúú-xí nchàa ñáyiú dìhí ñáyiú cùu sacuéhé sá ná cùndecu yiñuhú-yu, te vā cùu-yu ñáyiú yiti yùhu-xi, te ní vā cùu-yu ñáyiú quihu, te na dānehé-yu nchaa dava-gá ñáyiú cada váha-yu.

⁴ Te na dāsahú-yu nchaa ñáyiú dìhí ñáyiú cuechi cuèndá ná cùu iní-yu yíⁿ-yu, ndihi cue landú-yu,

⁵ ndihi cuèndá sá ná càni váha iní-yu nàcuáa cundecú-yu, ndihi cuèndá sá vā cání iní-yu cadá-yu ní ìⁿ sá cuèhé sá dúhá, ndihi cuèndá sá ná càdá-yu nchaa chiuⁿ ñuhu vehé-yu, ndihi cuèndá sá cadá váha-yu nchaa tnàha ñáyiú-yu, ndihi cuèndá sá ná càdā-yu nchaa nàcuáa cáháⁿ yíⁿ-yu, te ducaⁿ xini ñuhu-xi cadá-yu cuèndá sá vā yōo cáháⁿ cuèhé cuèndá tnúhu Yá Ndiöxí. Duha cúñaha-n xii cue

ñáiyu ñáí ñáiyu cùu sacuéhé cuendá ducaⁿ dàsahú-yu nchaa ñáiyu ñáí ñáiyu cuechi.

⁶ Te yòhó cáháⁿ-n dõho nchaa cue téé cuechi cuendá sá ná caní váha iní-güedé nàcuáa cundecu-güedé,

⁷ Te cada-n mèe-ni sá váha cuendá ducaⁿ càncicúⁿ nihnu-güedé cada-güedé, te òré danèhé-n-güedé te ío váha cuu iní-n dànehé-n-güedé, te ndihí tnúhu yíñùhu cáháⁿ ndihí-n-güedé.

⁸ Te cáháⁿ-n mèe-ni tnúhu váha, te ducaⁿ te vá yõo ìⁿ cáháⁿ cuèhé cuendá tnúhu cáháⁿ-n, te nchaa ñáiyu cùu úhú iní ñáhá xii-o cucahaⁿ núú-yu, te vá ñihí-yu tnúhu cáháⁿ cuèhé-yu cuendá-ó.

⁹ Te ío cáháⁿ-n dõho nchaa cue téé xínu cuechi sá ná quindáá iní-güedé cada-güedé nchaa chiúⁿ tahu patróoⁿ-güedé nàcuáa cudüi-güedé núú cuè téé-áⁿ, te vá càháⁿ sáá iní-güedé.

¹⁰ Te vá caní iní-güedé duhu-güedé, te cada ndáá-güedé cuendá sá ñà túú nã caní iní ñáhá cuè patróoⁿ-güedé, te ducaⁿ te cutnùní iní ñáiyu sá tnúhu Yá Ndiõxí ío váha dànehé ñáhá-xí nàcuáa cada-o cundecu-o, te diu-gá cúú-gã Yáa dácãcu nihnu ñaha xii-o núú ùhú núú ndàhú.

¹¹ Te nchoo ní cutnùní iní-ó sá Yá Ndiõxí ío cundahú iní-gá nchaa nchoo ñáiyu ndècu ñuyú-a, te ní taxi-gá tnúhu ndee ñni sá nánihí tàhú nchaandí tãhú ñáiyu te núu na quindáá iní ñáhã-yu xii-gá.

¹² Te ní cachí-gá sá dáñá-ó nchãa ichi cuehé ichi duha chi ñã tnàhá iní-gá cundecu-o ichi-áⁿ, te vá ío cuhuⁿ iní-ó nchãa sá ío ñuyú-a, te ní cachí tucu-gá sá ío caní iní-ó nàcuáa cundecu-o vitna ndecu-o ñuyú-a te cada ndáá-ó cundecu-o cuendá nduu vétú iní-gá.

¹³ Te cundetú-o sáá nduu càhnu víhi, nduu quixi tucu Xítohó Jesucristú Yáa cúú Ndiõxí-ó, te diu-gá ní dácãcu nihnu ñaha-gã xii-o núú ùhú núú ndàhú. Te nduu-ãⁿ ío cudíí iní-ó.

¹⁴ Te mee-gã ní xihí-gá chi ducaⁿ ní cuiní-gá cunduu, te ducaⁿ ní quide-gá cuendá nchoo vá cundecu-gá-ó ichi cuehé ichi duha, te nduu ndoo nduu nine iní-ó, te ducaⁿ te cuu-o cuè ñáiyu quindaha-gã, te ní yùhu ní iní-ó càda-o mee-ni sá váha.

¹⁵ Te nchaa tnúhu-áⁿ danèhé-n-yu te cúñaha-n xii-yu nàcuáa cadá-yu, te cáháⁿ-n dõho-yu te núú ñã túú quide ndáá-yu. Te cada-n sã cúú-n ìⁿ téé xínu cuechi núú Yá Ndiõxí, te vá dáñá-n mèe-n daquee tíhú ñáhá ñáiyu xii-n.

3

Nchaa sá tàù ñáiyu ndècu ichi Yá Ndiõxí cadá-yu

¹ Te cúñaha-n xii-yu sá ná quindáá iní-yu cadá-yu nchaa nàcuáa càháⁿ nchaa cue téé cùchiúⁿ, te tàù-yu chindee ñáhá-yu xii-güedé nchaa chiúⁿ váha quide-güedé.

² Te vá càháⁿ cuèhé-yu cuendá ñáiyu, te vá cundüu pletú-yu, te na cùú-yu ñáiyu ndàhú iní-xi, te na cundahú iní-yu nchaa tnàha ñáiyú-yu.

³ Te tnàhá-ó ní xóo cada-o dàtná quidé ñáiyu-áⁿ vitna, chi ío ñi ñi ñi-ó chi ñã tècú tnùní-ó nàcuáa càháⁿ tnúhu Yá Ndiõxí ní cùu, te ío ní xínduu sáá iní-ó núú-gã, te ní xíndecu-o ìⁿ ichi sá ñã túú tàù-ó cundecu-o ni cuu, te nãndí sá cuèhé sá dúhá ío ñuyú-a ní xóo cudíí iní-ó ní xóo cada-o chi ní xóo taxi tnùní ñáhá-xí xii-o, te ní xóo cada cuèhé ní xóo cada duha-o ni cùu, te ní xíndecu-o

ichi cuedú iní, te cuendá nchaa sá nǐ xóo cada-o-ǎn xǐǎn ío ní xóo cuu úhú iní ñáhá ñáyiú xii-o, te ducaⁿ-ni nchòo tucu ní xóo cuu úhú iní-ò-yu.

⁴Te Yá Ndiòxí Yáá ní dácäcu nihnu ñaha xii-o núú ùhú núú ndàhú ní dándíxí tũu-gá iní-ó nàcuáa cutnùní iní-ó sǎ ío váha iní-gá, te cùu iní ñáhá-gǎ xii nchaa nchoo ñáyiú ndècu ñuyíú-a.

⁵Te Yá Ndiòxí ní dácäcu nihnu ñaha-gǎ xii-o núú ùhú núú ndàhú, dico ñá díú cuendá ìⁿ sá váha quide-o ndecu-o ñuyíú-a ducaⁿ nǐ quide-gá, chi mee-gǎ ducaⁿ tnàhí ní cundàhú iní ñáhá-gǎ xii-o. Te ní nduu ndoo ní nduu nine iní-ó, te ní cuu-o dàtná ìⁿ ñáyiú saa, chi Espíritú Yá Ndiòxí ducaⁿ nǐ quide ñaha-xi xii-o.

⁶Te Espíritú-gá ní taxi-gá ni yùhu ni iní-gá ndécú ndìhi-o, te ducaⁿ nǐ quide-gá chi ní sàndáá iní-ó Xitohó Jesucristú Yáá ní dácäcu nihnu ñaha xii-o núú ùhú núú ndàhú.

⁷Te ío cundahú iní ñáhá-gǎ xii-o núu sa ní quide ndáá-gá cuèchi-o te ní cuu-o dèhe-gá, núu xǐǎn vitna ndètu-ná-ó sǎá nduu ndùu táhú-ó cùndecu-o ndìhi-gá ni caa ni quíhíⁿ.

⁸Te tnúhu ní cáháⁿ-í-a cùu-xi tnúhu ndáá cuiti, te cuíní-í sá nǐ yuhu ni iní-n cáháⁿ-n tnúhu-gá núu-yu cuendá sá ncháá ñáyiú sàndáá iní ñáhá xii Yá Ndiòxí nducu ndèe-yu cadá-yu mee-ni sá váha, te tnúhu-áⁿ cúú-xí mèe-ni tnúhu váha, te ío váha sá cúú-xí-yu.

⁹Te vá cádá cuendá-n nchàa tnúhu sá ñà túú nàndíhi xitnàha ñáyiú, te vá cádá cuendá-n ñáyiú nándi cáháⁿ cuendá nchaa sá nǐ xóo cada cue ñáyiú ní xindecu ndéé sanaha, te vá cádá cuendá-n nchàa tnúhu xitnàha ñáyiú xicuehé tnáhá cuendá tnúhu ní chídó tnùní ndíi Moisés, chi nchaa tnúhu xitnàhá-yu-áⁿ ñà túú tnàhí nandíhi-xi, te dàcuíta ñaha-xi xii-o.

¹⁰Te núu ío ñáyiú ní nguíta-yu nándi tnúhu cáháⁿ-yu cuendá sá vǎ cúú ìⁿnuu cue ñáyiú ndècu ichi Yá Ndiòxí ñá, te ñáyiú-áⁿ cáháⁿ sàhú-n dõho-yu ìⁿ úú xito, te núu vǎ tnǐ-yu tnúhu cáháⁿ-n ñá, te vá nihí tnáhá-gǎ-n ndìhí-yu.

¹¹Te ducaⁿ càda-n, chi ñáyiú-áⁿ duuⁿ duuⁿ ñá túú-gǎ cuíní-yu cadá-yu sá váha, chi mee-nǎ sá cuèhé sá dúhá tnàhá iní-yu cadá-yu, te cutnuni iní mèe-yu sá ñà túú quide ndáá-yu, te sǎá nduu te nacháhu-yu nchaa sá quidé-yu.

Nàcuáa cada té Títu

¹²Te cuíní-í tendaha-í té Àrtemás quixi-dé núú ndécú-n àdi té Tiquicú, te òré ná quèxio ndéda-ni càa ìⁿ cue té-a núú ndécú-n, te ío nducu ndèe-n quíhíⁿ-n ñùu Nicópolis núú quíhíⁿ-í cundecu-í, chi yàcáⁿ cuíní-í quíhíⁿ-í cundecu-í yóo quidé víxiⁿ-xi.

¹³Te ío cuañaha-n nchàa sá xíní ñùhu té Zénás téé ío váha xíní nchaa nàcuáa cáháⁿ léi, ndìhi té Apolós cuendá sá ñà túú nǎ cumání xii-güedé ichi.

¹⁴Te cuíní-í sá ncháá ñáyiú ndècu ndìhi-o ichi Yá Ndiòxí cada váha-yu, te cuañáhá-yu ìⁿ sá xíní ñùhu ñáyiú, te ío váha chiùⁿ cadá-yu te núu ducaⁿ na càdá-yu.

Tnúhu ndéé núú nǐ ndìhi-ná

¹⁵Te vitna ío cada ndee iní-n càchí nchaa ñáyiú ndècu ndìhi-í iha, te cúñaha-n sǎ ío na càda ndee iní nchaa ñáyiú cùu iní ñáhá xii-o, ñáyiú sàndáá iní ñáhá xii Yá Ndiòxí. Te Yá Ndiòxí ío na chindee chitúu ñaha-gǎ xii-ndo nchàa-ndo. Te ducaⁿ na cùnduu. Te ío chí cádá ndèe iní-nǎ vitna.

TUTÚ NÍ CADÚHA TĒ PĀBLÚ QUIHIⁿ NDAHA TĒ FILEMÓN

Té Pāblú cādūha-dé tutú quihiⁿ ndaha té Filemón

¹ Te yúhú té Pāblú tée yihiⁿ vecaá sá cuendá Xítohó Jesucristú cādūha-í ìⁿ tutú ndihiⁿ té Timùteú cuendá daquixi-í ndaha yòhó té Filemón, te ío cùu iní ñáhà-í xii-n chi tnàhá-n quide-n chiuⁿ Yá Ndiòxí. Te tutú-a tēndaha-í quixi ndaha-n

² ndihiⁿ ndaha ñaha nàni Apiá ñaha ndecu ndihi-o ichi Xítohó Jesucristú, ndihiⁿ ndaha té Àrquipú, chi tnàhá-dé quidé-dě chiuⁿ Yá Ndiòxí, ndihiⁿ ndaha nchaa ñáyiú tàcá vehe-n dācuahá-yu tnúhu-gá.

³ Te xicáⁿ tǎhù-í núú Tātá-ó Dütú Ndiòxí ndihiⁿ núú Xítohó Jesucristú sá ío na chindee chitúu ñaha-gá xii-ndo, te ducaⁿ ndiⁿ nduú-gá ná cādá te ío váha cuu iní-ndó cūndecu-ndo.

Té Filemón ío sàndáá iní-dé Xítohó Jesucristú te cùu iní-dé tnàha ñáyiú-dé

⁴ Te ndiⁿ tnàhá òré càháⁿ ndihi-í Yá Ndiòxí cuendá-n ndàcáⁿ tǎhù-í núú-gá.

⁵ Chi nihí-í tnúhu sá ío sàndáá iní-n Xítohó Jesucristú, te cùu iní-n cuè ñáyiú ndecu ichi-gá.

⁶ Te xicáⁿ tǎhù-í núú Yá Ndiòxí sá dàtná-ni sàndáá iní-n-gǎ ducaⁿ-ni dānehé-n ñáyiú cuendá ducaⁿ ngūnu ichi-yu tnàhá-yu, te cutnūni iní-yu nācuáa ndūu nchaa sá váha tàxi Xítohó Jesucristú xii-o, te tnàhá-yu nduu tǎhū-yu nchaa sá váha-áⁿ.

⁷ Te yòhó té Filemón cúu-n tēe ndecu ndihi-í ichi Xítohó Jesucristú cǎchí tnúhu-í xii-n sǎ ío cùdíⁿ iní-í cuendá sá ío váha quide-n ndecu-n, chi cùu iní-n nchaa ñáyiú ndecu ichi Yá Ndiòxí, te uuⁿ-gá nihí ndéè-í sá dúcáⁿ quide-n, te diu-n ío sáhǎ-n-yu tnúhu ndee iní ndécú ndihi-yu.

Té Pāblú chindèe tnúhu-dé té Ònésimú

⁸ Te yúhú té Pāblú ní taxi Xítohó Jesucristú tnúhu ndee iní ndécú ndihi-í sá táxi tnūni ñáhà-í xii-n te tahu-í chiuⁿ cada-n, dico vá táxi tnūni ñáhà-í xii-n,

⁹ chi váha-gá sá càháⁿ ndàhú-í núú-n sǎ cādá-n nchaa nacúaa càháⁿ-í chi ío cùu iní ñáhà-í xii-n. Chi yúhú sa ta yihi-í cuaháⁿ, te yihi-í vecaá cuendá sá càháⁿ-í tnúhu Xítohó Jesucristú.

¹⁰ Te càháⁿ ndàhú-í núú-n sǎ ñà túú nǎ cani iní-n cuendá té Ònésimú, chi ní cuu-dé vitna dàtná ìⁿ dehe-í, chi ní sàndáá iní-dé tnúhu Yá Ndiòxí ní xáhaⁿ-í xii-dé vitna yihi-í vecaá.

¹¹ Te nàha-n sá cūtnàhá ní xindecu ndihi-n-dě ñǎ túú ní quide ndáá-dé, dico vitna ío váha quide-dé ndécú ndihi-í-dé, te diu-ni ducaⁿ cāda-dé òré cundecu ndihiⁿ tucu-n-dě.

¹² Te vitna tendaha-í-dé ndixi-dé cundecu tucu-n ndihi-dé, te òré queheⁿ cuendá-n-dě, te cada iní-n sǎ yúhú ní queheⁿ cuendá-n.

¹³ Te vitna yihi-í vecaá sá cuendá tnúhu Xítohó Jesucristú, te cuiní-í ngani-í-dé cunu cuechi-dě núú-í cuendá cada-dé núú-n ní cùu.

¹⁴ Dico ñǎ túú ní ngani-í-dé, chi vátá dǎtnúhu ndihiⁿ ñaha-gǎ-í xii-n nūu nása cachí-n cūnduu. Te ñǎ cūndèe iní-í cada yica-í cada-n ìⁿ sá váha sá cúu-xi-í, chi cuiní-í sá méé-n cǎni iní-n nūu cuu àdi sá vǎ cúu.

15 Te ní cunduu nĩ quee té Ònesimú vehe-n, te cudana te mee Yá Ndiõxí ducaⁿ nĩ cachí-gá cunduu cuèndá dacuàha-dé cada váha-dé. Te ndixi tucu-dé cundecu ndihí ducaⁿ-nã-n-dě.

16 Te vá cúú-gã-dé dàtná ìⁿ tée xínu cuechi chi ní cuu-dé dàtná ìⁿ ñani-ó chi ní sándáá iní-dé Yá Ndiõxí, te yúhú ío cùu iní-í-dé, dico yòhó uuⁿ-gá cuu iní-n-dě, chi cùu-dé ìⁿ tñaha ñáyiu-o, te ndècu-dé ichi Yá Ndiõxí.

17 Te ìⁿ-ni cùu-o ndecu-o ichi Yá Ndiõxí nũu xiãⁿ càháⁿ ndàhú-í núú-n sã quéhéⁿ cuèndá-n-dě dàtná quéhéⁿ cuèndá-n yúhú òré quéxio-í vehe-n.

18 Te núu ío ìⁿ sá nĩ cumání-dě núú-n ñã túú ní quide ndáá-dé cùtnàhá ní xíndecu-n ndihí-dé, àdi ío ìⁿ sá tàù-dé te vá ndàcáⁿ cuèndá-n núú-dě, chi yúhú ndacáⁿ cuèndá-n núú-í.

19 Te ndaha mee yúhú té Pãblú cádũha-í tutú-a càchí tnúhu-í xii-n sã ná chãhu-í nchaa sá nĩ quide-dé. Dico dandàcu saú iní-n sã yúhú ní sanu ichi ñaha-í xii-n ichi Xítóhó Jesucristú.

20 Dico yòhó tée ndècu ndihí-í ichi Xítóhó Jesucristú cada ndee iní-n càda-n tnúhu ndàhú càháⁿ-í núú-n chi ndècu-o ichi-gá. Te ducaⁿ càda-n nacuaa cuu-xi dàtná ìⁿ tnúhu ndee iní sá cúú-xì-í, chi ndi ndùú-ó ndècu-o ichi-gá.

21 Te cùtnuní iní-í sá cádá-n nchaa nacuaa càháⁿ-í, te cùtnuní tucu iní-í sá ío-gá vãi sá vãha cada-n dàcúúxí tnúhu ndàhú càháⁿ-í núú-n, núu xiãⁿ tëndaha-í tutú-a véxi ndaha-n.

22 Te vitna cuiní-í cada túha-n ìⁿ vehe cundecu-í, chi sàni iní-í sá quíxí còto ñaha-í xii-ndo, te ndètu-í sáá nduu-ãⁿ chi nchòhò xìcáⁿ táhú-ndó nũu Yá Ndiõxí cuèndá-í.

Tnúhu ndéé núú nĩ ndihí-ná

23 Te ío cada ndee iní-n càchí té Ěpafrás tée yìhí ndihí-í vecaá sá cuèndá tnúhu Xítóhó Jesucristú.

24 Te ío cada ndee iní tucu-n càchí té Măcú, ndihí té Arístarcú, ndihí té Dēmás, ndihí té Lùcá, chi tñahá cue té-ãⁿ quide-güedé chiúⁿ Xítóhó Jesucristú.

25 Te Xítóhó Jesucristú ío na chĩndee chitúu ñaha-gã xii-ndo nchàa-ndo. Te ducaⁿ na cunduu. Te ío chí cádá ndèe iní-nã vitna.

TUTÚ QUIHⁿ NDAHA CUE ÑÁYIU HÈBREÚ

Dútú Ndióxi ní cachí-gá sá Dêhe-gá cada núú-gã

¹ Te ndéé sanaha, Yá Ndióxi ní xáhaⁿ-gã xii cue téé ní cachí iní mée-gã cada núú-gã cáháⁿ-güedé tnúhu-gá núú ncháa ñani tnáhá-ó nì xíndecu ndéé dàvá-án te ðiu ducaⁿ ní quide-güedé. Te titní xito ducaⁿ nì xáhaⁿ-gã xii-güedé ní cáháⁿ-güedé tnúhu-gá. Te ndi ðííⁿ ndì ðííⁿ nì xítñuhu ñaha-gã xii-güedé nàcuáa cáháⁿ-güedé tnúhu-gá núú-yu.

² Te sátá ní cuu vai nduu ta yáha cuáháⁿ, te ní sáá nduu nì cachí Yá Ndióxi sá Dêhe-gá cada núú-gã cáháⁿ tnúhu-gá núú-ó. Te ðiu-ni mee-gã ní táúchíúⁿ nì cadúha Dêhe-gá ñuyúú ndihi ncháa sá íó, te ní cachí-gá sá ncháá cùu-xi cuená Dêhe-gá.

³ Te Dêhe Yá Ndióxi ío cànhu cuu-gá dàtná cànhu cuu mee-gá, te dàtná-ni sàni iní mée-gã ðiu-ni ducaⁿ sàni iní Dêhe-gá chi tnàhá-gá cúú-gã Ndióxi, te sá cuená tnúhu cáháⁿ Dêhe-gá xiáⁿ ndécú-ni ncháa sá íó ñuyúú, te ducaⁿ chi ío cànhu cuu Dêhe-gá, te ðiu-ni Dêhe-gá ní quide nàcuáa vá cündecu-gá cuèchi-o. Te sátá dúcáⁿ te ní ngóo-gá xio cùha Tátá-gã Dútú Ndióxi Yá ío cùnnu ndecu andiu.

Dêhe Dútú Ndióxi ío-gá cùnnu-gá dàcúúxi cuè espíritú xínú cuèchi núú-gã

⁴ Te Dêhe Yá Ndióxi ío-gá cùnnu-gá dàcúúxi cuè espíritú xínú cuèchi núú-gã, te ducaⁿ chi ní nduu táhú-gã núú Tátá-gã Dútú Ndióxi sá ío-gá cunuu-gã dàcúúxi cuè espíritú-án.

⁵ Chi Yá Ndióxi ñá túú ní xáhaⁿ-gã xii ní ñíⁿ cue espíritú xínú cuèchi núú-gã dàtná ní xáhaⁿ-gã xii Dêhe-gá, te duha ní xáhaⁿ-gã:

Yòhó cúú-n Dêhe mee-í,
te ducaⁿ-ni cündecu-n núú ndécú-í.
Duha ní xáhaⁿ-gã. Te ní cachí tucu Yá Ndióxi:
Yúhú cúú-í Tátá Yáá-án,
te mee-gá cúú-gã Dêhe-í.
Duha ní cachí-gá.

⁶ Te cútnáhá ní tendaha-gã Dêhe-gá Yá ío cùnnu ní quixi-gã ñuyúú-a, te ní cachí-gá:

Tàu-xi sá ncháá cuè espíritú xínú cuèchi núú-í chiñuhu-xi Dêhe-í.
Duha ní cachí-gá.

⁷ Te Yá Ndióxi ní cáháⁿ-gá cuená cue espíritú xínú cuèchi núú-gã, te ní cachí-gá:

Yúhú quidé-í sá ncháá cuè espíritú xínú cuèchi núú-í cúú-xi dàtná táchí,
te ðiu-ni cue espíritú-án quidé-í sá cúú-xi dàtná itá ñuhú.
Duha cächí-gá.

⁸ Dico Dêhe-gá chi ñá túú dùcaⁿ ni xáhaⁿ-gã, chi duha ní xáhaⁿ-gã:

Yòhó tnàhá-n cùu-n Ndióxi dàtná cúú yúhú Yáá cúú Tátá-n,
te ducaⁿ-ni tàxi tñuní-n nì caa nì quíhíⁿ,
te ío váha ndáá quidé-n tàxi tñuní-n.

⁹ Te dàquee tíhú-n ncháa sá cuèhé sá dúhá, te cùu iní-n ncháa sá váha, núú xiáⁿ yúhú Yáá cúú Tátá-n nì quide-í sá ío-gá vii ío-gá váha cuu iní-n, dàcúúxi ncháa dava-gã ñáiyiu ndecu ndihi-n.

Duha ní xáhaⁿ-gã xii Déhe-gá.

¹⁰ Te ní xáhaⁿ tùcu Yá Ndiõxí xii Déhe-gá:

Yòhó cúú-n Yàá ío cùnuu, chi ndéé cùtnàhá ñá túú vèdana ná ìò te ní cadúha-n ñùyíú ndihí andíu.

¹¹ Te andíu ndihí ñuyíú chi naa-xi, dico yòhó chi cundecu-ni-n ñi caa ñi quíhíⁿ.

Te andíu ndihí ñuyíú chi ndihí-xi dàtná ndíhí ñⁿ dóó,

¹² te dàtná cuíní-n quide ñáyíu ndihí ñⁿ dóó òré ndàcáⁿ tnáhnũ-yu tàxi ndecu-yu ñⁿ xio, ducaⁿ càda-n ñuyíú ndihí andíu,

te dàtná nádàma dóó ñáyíu ducaⁿ càda tucu-n ñuyíú ndihí andíu.

Te yòhó dàtná-ni càa-n ndecu-n vitna ducaⁿ-ni cùnduu-n cundecu-n ñi caa ñi quíhíⁿ, chi vá yíí tnàhí-n.

Duha ní xáhaⁿ Yá Ndiõxí xii Déhe-gá.

¹³ Te Yá Ndiõxí ñá túú ní xáhaⁿ-gã xii ñi ñⁿ cue espíritú xínú cuèchi núú-gã dàtná ní xáhaⁿ-gã xii Déhe-gá, te duha ní xáhaⁿ tùcu-gá:

Ngóo xio cùha-í taxi tnùní-n,

te yúhú cada-í te nchaa sá cúú ùhú iní ñáhá xì-n canehe-xi sá yíñùhu núú-n.

Duha ní xáhaⁿ-gã xii Déhe-gá.

¹⁴ Te nchaa espíritú xínú cuèchi núú Yá Ndiõxí mee-ni chùuⁿ-gá quidé-xí, chi tëndaha-gá cue espíritú-án cuáháⁿ-xi nchaa núú ndécú cuè ñáyíu ní nduu táhú cundecu ndihí-gá chindee ñàha-xi xíí-yu.

2

Vá dáñá ndèé-ó tnúhu sá càháⁿ nàcuáa naníhí tàhú-ó

¹ Te sá cuendá sá ío cùnuu Xitohó Jesucristú, núu xíáⁿ ío xìni ñuhu-xi cada cuendá-ó nchaa tnúhu càháⁿ-gá sá sà ní xíndedóho-o cuendá sá vã dáñá ñihu-o.

² Te cue espíritú xínú cuèchi núú Yá Ndiõxí ní càháⁿ-xi tnúhu-gá ndéé sanaha, te tnúhu ní càháⁿ cue espíritú-án cúú-xí sã ndáá cuíti. Te nchaa ñáyíu ñá túú ní cuíní tní nchaa tnúhu ní càháⁿ cue espíritú-án, te ñi ñá túú ní cuíní-yu cundedóho-yu, nchaa ñáyíu-án ñi nacháhu-yu nàcuáa nduu nchaa cuèchi ní quidé-yu ñⁿ ñⁿ-yu.

³ Te sá dúcáⁿ ñi yáha cue ñáyíu-án, xíáⁿ cùtnùní ndáá iní-ó sã vã càcu ñihu-o te núu na dàña ñihu-o tnúhu sá càháⁿ nàcuáa naníhí tàhú-ó, tnúhu sá ío cùnuu, chi nacháhu-o te núu ducaⁿ na càda-o. Te díhna-gá Xitohó Jesucristú ní càháⁿ-gá tnúhu-án te nchaa ñáyíu ní xíndedóho nchaa nàcuáa nduu tnúhu-án ñi càháⁿ ndáá-yu tnúhu-án nũú-ó.

⁴ Te tnàhá Yá Ndiõxí cùndihí-gá nchaa ñáyíu-án quidé-gã nàcuáa cutnùní iní-ó sã tnúhu-án cúú-xí tnúhu ndáá, chi quide-gá titní núú sã vã yò tnàhí ndàcu cada te ío cùñùhu-o. Te Espíritú Yá Ndiõxí quidé-xí nàcuáa nduu táhú-ó ndí dííⁿ nũú chùuⁿ cada-o nàcuáa cuíní méé-gã. Te sá dúcáⁿ quide Yá Ndiõxí nchaa xíáⁿ, xíáⁿ cùtnùní iní-ó sã tnàhá-gá càháⁿ-gá sá tnúhu-án cúú-xí tnúhu ndáá.

Xitohó Jesucristú ní xínduu yiqui cùñú-gá dàtná cáá yiqui cuñú nchoo cuè ñáyíu ñuyíú-a

⁵ Te Yá Ndiõxí vá táxí ndecu-gá cue espíritú xínú cuèchi núú-gã taxi tnùní-xi ñuyíú sáá sã vátá quíní-gá-ó, te díu cuendá xíáⁿ càháⁿ-í.

⁶ Te núú tùtú Yá Ndiõxí càhí-xi:

Yòhó Dútú Ndiòxí ñá túú ná cúú cuè ñáyiú ñuyúú núu ndacu iní-n-yu, àdi chindeé-n-yu.

7 Te yòhó ní cachí-n sá nchàa ñáyiú ñuyúú-a vá cúnúú-yu dàtná cúnúú cue espíritú xínú cuèchi núú-n,

dico ní cachí-n sá sàá nduu te ío cunúú-yu tnahá-yu, te mee-n cǎháⁿ-n sǎ ío cǎhnu cuú-yu,

te ní cachí tucu-n sǎ táxí tñuní-yu nchaa sǎ ní cadúha-n.

8 Te ducaⁿ nchàandi túhú sǎ ío quíndàhá-yu.

Duha cǎchí-xi núú tútú-gá. Te sǎ dúcáⁿ ní cachí Yǎ Ndiòxí sǎ quíndàha ñáyiú ñuyúú nchaa sǎ ío, xiǎⁿ cútñuní sǎ ncháandi túhú sǎ ío taxi tñuní-yu, dico vátá sǎá-gá nduu ducaⁿ quíni-ó càda-xi.

9 Te nchoo sa ñaha-o sǎ tñáá-ní ní quide Yǎ Ndiòxí cuendá sǎ vǎ cúnúú Xítohó Jesucristú dàtná cúnúú cue espíritú xínú cuèchi núú-gǎ. Te ducaⁿ ní quide Yǎ Ndiòxí chi ní cundàhú iní-gǎ nchaa ñáyiú ñuyúú-a, chi ní cachí-gǎ sǎ Dèhe-gǎ cuú cuendá nchaa-yu, te Xítohó Jesucristú ío ní ndoho-gǎ òré ní xihí-gǎ, núu xiǎⁿ ní nduu táhú-gǎ cúnúú vihi-gǎ vitna. Te mee Yǎ Ndiòxí cǎchí-gǎ sǎ ío cǎhnu cuu Dèhe-gǎ.

10 Te Yǎ Ndiòxí ní cadúha-gǎ nchaandi túhú sǎ ío nàcuáa ní cachí iní mée-gǎ, te sǎ dúcáⁿ ní quide-gǎ núu xiǎⁿ váha-ni sǎ ní cachí-gǎ sǎ Xítohó Jesucristú nándi ndoho-gǎ te cuú-gǎ cuendá ducaⁿ ñà túú tnahí-gǎ ná cùmání-gǎ núú Yǎ Ndiòxí. Te sǎ dúcáⁿ ní cuu núu xiǎⁿ ní níhí Yǎ Ndiòxí nàcuáa cada-gǎ cǎndeca-gǎ nchaa ñáyiú cuu dèhe-gǎ quíhíⁿ núú ío váha cǎa cundecú-yu ndihí-gǎ ni caa ni quíhíⁿ. Te Xítohó Jesucristú cúú-gǎ Yaá ní quide nàcuáa nduu táhú cue ñáyiú cundecú-yu ndihí Yǎ Ndiòxí.

11 Te Xítohó Jesucristú cúú-gǎ Yaá quidé ndècu yiñuhu ñáyiú núú Yǎ Ndiòxí ñáyiú sàndáá iní ñháá xii-gǎ, te Xítohó Jesucristú ndihí cue ñáyiú-áⁿ ìⁿ-ni Yàá cúú Tǎtǎ-yu ndihí-gǎ, núu xiǎⁿ Xítohó Jesucristú Yaá cúú Dèhe Dútú Ndiòxí ñá túú cùcahaⁿ núú-gǎ cǎháⁿ-gǎ sǎ ñàni-gǎ ndihí cùha-gǎ cúú nchaa ñáyiú-áⁿ.

12 Te quèe ndáá-xi nàcuáa cǎháⁿ-xi núú tútú Yǎ Ndiòxí núú cǎchí-xi nàcuáa ní xáhaⁿ Xítohó Jesucristú xii Tǎtǎ-gǎ Dútú Ndiòxí, te duha ní xáhaⁿ-gǎ:

Cǎháⁿ váha-í cuendá-n núú nchàa cue tée cuu datná ñani-í ndihí núú nchàa cue ñáyiú dihí cúú dàtná cùha-í,

te cata-í ndudú chiñuhu ñaha-í xii-n núú tàcá-yu.

Duha yòdo tñuni núú tútú-gǎ nàcuáa ní xáhaⁿ Dèhe-gǎ xii-gǎ.

13 Te ìngá tucu xichi núú tútú Yǎ Ndiòxí cǎháⁿ-xi nàcuáa ní cǎháⁿ Xítohó Jesucristú cuendá-gǎ, te duha ní cachí-gǎ:

Yúhú nchaa-ni nduu quíndáá iní-í Tǎtǎ-í Dútú Ndiòxí.

Duha cǎchí-xi núú tútú Yǎ Ndiòxí nàcuáa ní cǎháⁿ Xítohó Jesucristú. Te ìngá tucu xichi núú tútú Yǎ Ndiòxí cǎháⁿ-xi nàcuáa ní cǎháⁿ tucu Xítohó Jesucristú, te duha ní cachí-gǎ:

Iha ndècu ndihí-í nchaa ñáyiú cuu dèhe Tǎtǎ-í Dútú Ndiòxí, te diu-ni ñáyiú-áⁿ ní taxi cuendá Tǎtǎ-í cuu cuendá-í.

Duha cǎchí-xi núú tútú-gǎ nàcuáa ní cǎháⁿ Xítohó Jesucristú.

14 Te sǎ cuendá nchaa ñáyiú cuu dèhe Yǎ Ndiòxí cúú-yu yiqui cùñú, núu xiǎⁿ ducaⁿ tnahá Xítohó Jesucristú ní cuu-gǎ yiqui cùñú, te ducaⁿ ní cuu-gǎ yiqui cùñú cuendá cuú-gǎ, te sǎ dúcáⁿ cúú-gǎ te ndacu-gǎ daquèe tǎhú-gǎ sácúíhná, te diu sácúíhná-áⁿ quidé-xi xihí ñáyiú.

15 Te ducaⁿ ní quide-gá cuendá sá cuè ñáyiú ñuyúú-a vá yùhú-gá-yu sá cùu-yu, chi nchaa-ni nduu yùhú-yu sá cùu-yu.

16 Te na càchí tnúhu ndáá-í sá Xítohó Jesucristú ní quixi-gá cuendá chindee-gã cue ñáyiú cùu ñani tnáhá ndíi Àbrahám, te ñá díú cuendá sá chindèe-gã cue espíritú xínú cuèchi núú Yá Ndiòxí.

17 Te cuendá xíáⁿ núu dai ní xini ñuhu-xi sá cúu-gã ñáyiú cuendá yãha-gá nándi sá yãha-gá dàtná yãha cue ñáyiú cùu ndi mee-gá cuendá ducaⁿ cùu-gá dútú ïo cùnnuu te cuu ndáá-gá núú Yá Ndiòxí, te cundahú iní-gá nchaa ñáyiú te cuú-gá cuendá sá vá cùndècu-gá cuèchi-yu núú Yá Ndiòxí.

18 Te mei òrè ndóhó Xítohó Jesucristú ní xito ndéé ñáhá sàcuíhná xii-gá te núu ndisa sá vá cáda-gã ní ìⁿ sá ñà túú tàù-gá cada-gá, te sá dúcáⁿ ní ndoho-gá xíáⁿ núu ndácú-gã chindèe-gã nchaa ñáyiú ducaⁿ yãha.

3

Xítohó Jesucristú ïo-gá cùnnu-gá dàcúúxí ndíi Moisés

1 Te nchòhó cúu-ndó ñáyiú ndècu ndíi-í ichi Xítohó Jesucristú ñáyiú cùu cuendá Yá Ndiòxí, te tnáhá-ndó cùu-ndo ñáyiú ní cáháⁿ ñáhá-gã cuendá cundecu-ndo ndíi-gá. Te yùhú càchí tnúhu-í xii-ndo sã ïo váha cada cuendá-ndó nàcuáa ndùu cuendá Xítohó Jesucristú, chi ñu-gá cúu-gã Yaá ní tendaha ñàha Dútú Ndiòxí ní quixi-gã ñuyúú-a, te ñu-gá cúu-gã Dútú ïo cùnnuu chi quide-gá núú Yá Ndiòxí. Te ñu-ni cuendá Xítohó Jesucristú càháⁿ tnúhu sá ní sàndáá iní-ó.

2 Te mee Yá Ndiòxí ní sáha chiùⁿ-gá Xítohó Jesucristú, te ïo ndáá quidé-gã chiùⁿ-áⁿ sá cúu-xí Yá Ndiòxí, te ñu-ni ducaⁿ ní quide ndíi Moisés ní quide ndíi chiùⁿ ní táhú Yá Ndiòxí, te ïo ndáá ní quide ndíi chiùⁿ-gá sá cúu-xí nchaa ñáyiú cùu cuendá-gá, te cue ñáyiú-áⁿ cúu-yu dàtná vehe mee-gã.

3 Te ìⁿ tée dàcaa ìⁿ vehe váha ïo càhnu-gá cúu-dě dàcúúxí vèhe dacao-dé. Te ducaⁿ sàtnahá-xi cùu Xítohó Jesucristú chi ïo-gá càhnu cuu-gá dàcúúxí ndíi Moisés.

4 Te nchoo sã naha-o sá ncháá vèhe dacuítí ndècu cue tée ní dácáá, dico sa ñàha tucu-o sá Yá Ndiòxí quidé-gã ndécú nchaa sá ïo ñuyúú-a.

5 Te ndíi Moisés-áⁿ ïo ndáá ní quide ndíi chiùⁿ ní táhú Yá Ndiòxí ní quide ndíi sá cúu-xí nchaa ñáyiú cùu cuendá-gá. Te sá dúcáⁿ ní quide ndíi xíáⁿ ní cuu ndíi ìⁿ tée ní xinu cuechi núú Yá Ndiòxí. Te ní xáhaⁿ ndíi xii nchaa ñáyiú cùu cuendá-gá nàcuáa cáháⁿ-gã ndéé cuèé-gã.

6 Dico Xítohó Jesucristú cúu-gã Déhe mee Yá Ndiòxí, te cùu-gá Yaá ïo quide ndáá yíndaha-gã nchaa ñáyiú cùu cuendá Yá Ndiòxí. Te tnáhá-ó cùu-o ñáyiú cùu cuendá-gá, te ñu-ni ducaⁿ cùu cuendá ñáhá-gã xii-o te núu na càncicúⁿ ñihnu-ni-o càni ndáá iní-ó cuendá-gã ndéé ná sáa nduu ngündecu-o ndíi-gã.

Cue ñáyiú cùu cuendá Yá Ndiòxí ïo váha cùu iní-yu ndécú-yu ndíi-gá

7 Te núú tütú Yá Ndiòxí yódó tnùnì nàcuáa ní cáháⁿ Espíritú-gá, te duha ní cachí-xi:

Te núu nchòhó ndèdóho-ndo nchaa tnúhu càháⁿ Yá Ndiòxí vitna,

8 te vá cùndùu sáá iní-ndó dàtná ní xínduu sáá iní ñáyiú ní dáquéé tíhú tnúhu

Yá Ndiòxí, ñáyiú ní xíndecu Xítí yucu,
chi ñáyiú-áⁿ ní xito ndéé-yu Yá Ndiòxí núu nása cada ñaha-gã xíi-yu.
Duha ní cachí Espíritú-gá.

9 Te càchí tucu Espíritú Yá Ndiòxí nàcuáa ní cáháⁿ méeé-gã, te duha ní cachí-gá:

Xítí yucu ní xito ndéé ñáhá cuè ñaní tnáhá-ndó nǐ xíndecu ndéé sanaha xii-í, te ducaⁿ nǐ quide ñáhá-yu cuèi ní xiní-yu nchaa sá nǐ quide-í ndi ùdico cuía nǐ xíndecú-yu xítí yucu-áⁿ.

10 Te sá dúcáⁿ nǐ quidé-yu núu xíáⁿ ní cudéèⁿ-í núǔ-yu, núu xíáⁿ ní cáháⁿ-í cuendá-yu, te ní cachí-í:

“Ñáyiú-a quide-ní-yu nchaa sá ñà túú tàù-yu cadá-yu te ni ñà túú cuíní-yu cadá-yu nchaa nàcuáa sàni iní-í, te ni ñà túú cuíní-yu cadá-yu nàcuáa càháⁿ-í”, duha ní cáháⁿ-í cuendá-yu.

11 Te xíáⁿ núu ní cudéèⁿ-í núǔ-yu te ní xáhaⁿ ndáá-í xii-yu sá vǎ ndúú tǎhǔ-yu cundecu váha-yu núú ndécú-í.

Duha ní cachí Yǎ Ndióxí càchí Espíritú-gá.

12 Te nchòhó ñáyiú ndècu ndihi-í ichi Xítóhó Jesucristú, càháⁿ-í dóho-ndo sǎ ïo cada cuendá-ndó vǎ cáni cuèhé iní-ndó te ngóo-ndo vǎ quindáá-gá iní-ndó Yǎ Ndióxí te dañá-ndo ìchi-gá, te ñiú-gá cúú-gǎ Yaá ndécú nchaa nduu nchaa quíú.

13 Te ñⁿ nduu ñⁿ nduu ío chí cuáha tnàha tnúhu ndee iní cundecu-ndo nini ndecu-ndo ñuyíú-a cuendá sá vǎ xínu iní-ndó càda-ndo nándi sá cuèhé sá dúhá, te ducaⁿ te vǎ cúú sǎá iní-ndó núǔ Yǎ Ndióxí.

14 Te vǎ dáñá ndéé-ó càni ndáá iní-ó nàcuáa cada ñaha Yǎ Ndióxí xii-o, te dàtná-ni ní sani iní-ó ndéé cútnáhá ní tuha-o ìchi Yǎ Ndióxí, te ñiú-ni ducaⁿ càni iní-ó ndéé ná sǎá nduu vǎ cundècu-gá-ó ñuyíú-a, te núu ducaⁿ na càda-o te cùu ñⁿnuu-o ndihi Xítóhó Jesucristú.

15 Te duha càháⁿ-xi ñⁿ xichi núú tütú Yǎ Ndióxí:

Te núu nchòhó ndédóho-ndo nàcuáa càháⁿ Yǎ Ndióxí vitna,

te vǎ cundúu sǎá iní-ndó dàtná ní xínduu sǎá iní cue ñáyiú ní dáquée tǎhǔ tnúhu-gá ndéé sanaha.

Duha càchí-xi núú tütú-gá.

16 Te cue ñáyiú ducaⁿ nǐ xínduu sǎá iní-xi cúú-yu ñáyiú ní ndeñuhu ndíi Moisés nacióⁿ Ègiptú, te ñáyiú-áⁿ nǐ xíndedóho-yu tnúhu ní cáháⁿ Yǎ Ndióxí te ní quide sǎá iní-yu ní dáquée tǎhǔ-yu tnúhu-gá.

17 Te ndi ùdico cuía nǐ xúhuⁿ-yu ichi ío ní cudééⁿ Yǎ Ndióxí núǔ-yu cuendá sá nǐ quidé-yu nándi nchaa sá cuèhé sá dúhá, te ñáyiú-áⁿ nǐ xíhi-yu xítí yucu.

18 Te nchaa ñáyiú-áⁿ ñà túú ní cuíní-yu tníi-yu tnúhu ní cáháⁿ Yǎ Ndióxí núu xíáⁿ ní cáháⁿ ndáá-gá sá vǎ ndúú tǎhǔ-yu cundecú-yu núú ïo váha càa ndecu-gá.

19 Te xíáⁿ núu nchoo cùtnuní iní-ó sǎ nchaa ñáyiú-áⁿ ñà túú ní ndúu tǎhǔ-yu cundecu váha-yu núú ndécú-gǎ, chi ñá túú ní sàndáá iní-yu tnúhu ní cáháⁿ-gá.

4

1 Te vitna ndècu ndihi-gá-ó tnúhu Yǎ Ndióxí tnúhu sá dánèhé ñáhá xii-o sá cúú cundecu váha-o núú ndécú-gǎ, te tàù-xi quiyùhú iní-ó chi na cuáháⁿ te vǎ ndúú tǎhǔ-ó cundecu váha-o núú ndécú-gǎ.

2 Te tnáhá nchoo nǐ ngúndecu ndihi-o tnúhu sá càháⁿ nàcuáa naníhi tǎhú-ó dàtná ní xíndecu ndihi cue ñáyiú ndéé sanaha, dico ñáyiú-áⁿ chi ñà túú vèdana ni nàndíhi-xi cuèi ní xíndedóho-yu tnúhu-áⁿ chi ñà túú ní sàndáá iní ñáhǎ-yu xii-gá.

³ Dico nchoo cùu-o ñáyiu ní sándáá iní tnúhu Yá Ndiòxí, núu xíǎⁿ nduu táhú-ó cùndecu váha-o núú ndécú-gá, te ní quee ndáá-xi nàcuáa càháⁿ-gá núú tütú-gá núú càchí-xi:

Yúhú ní cudèèⁿ-í núú-yu, te ní càháⁿ ndáá-í sá vǎ ndúú tǎhǔ-yu cundecu váha-yu núú ndécú-í.

Duha ní cachí-gá. Te cuu nduu táhǔ-yu cundecu váha-yu núú ndécú Yá Ndiòxí ní cùu, chi sa ní xínu cava nchaa chiuⁿ ní quide-gá sá ñí cadúha-gá ñuyíú.

⁴ Te núú tütú Yá Ndiòxí càháⁿ-xi nàcuáa ní quide-gá nduu úsá, te duha càchí-xi: Yá Ndiòxí ní quide chiuⁿ-gá ñú nduu ní quide-gá nchaa chiuⁿ-gá te ní ndetátú-gá nduu úsá.

Duha càchí-xi núú tütú-gá.

⁵ Te càchí tucu-xi núú tütú Yá Ndiòxí nàcuáa ní càháⁿ-gá cuendá cue ñáyiu ndéé sanaha, te duha ní cachí-gá:

Cue ñáyiu-a vǎ ndúú tǎhǔ-yu cundecu váha-yu núú ndécú-í ndétátú-í.

Duha ní cachí-gá.

⁶ Te ñáyiu ní xíndedóho tnúhu sá càháⁿ nàcuáa naníhí tǎhú-ó ndéé sanaha, ñá túú ní nduu táhǔ-yu cundecu váha-yu núú ndécú Yá Ndiòxí ndétátú-gá, te ducaⁿ chí ñá túú ní sándáá iní ñáhá-yu xii-gá, dico ió-gá ñáyiu nduu táhú cundecu váha núú ndécú-gá ndétátú-gá.

⁷ Te ní xica cuéhé nduu sá dúcáⁿ ñá túú ní sándáá iní ñáhá ñáyiu-áⁿ xii-gá, te dǎtnúú ní càháⁿ ndí Dávíí yuhu-gá nàcuáa cada-gá vitna, te ñiu-ni nàcuáa sa yòdo tnuní ñiu-ni ducaⁿ chido tnuní tucu-í nàcuáa ní càháⁿ ndí yuhu-gá, te duha ní cachí-gá:

Te núu nchòhó ndédóho-ndo tnúhu càháⁿ-í te vǎ cadá sàá iní-ndó.

Duha ní cachí-gá.

⁸ Te ndí Jòsué ní sanu ichi ndí ñáyiu núú quíhíⁿ-yu cundecu váha-yu, dico ñá díú cuendá xíǎⁿ ní càháⁿ Yá Ndiòxí, chi cuendá nàcuáa cada-gá vitna ní càháⁿ-gá.

⁹ Núu xíǎⁿ sáá nduu ndúú táhú nchaa ñáyiu cùu cuendá Yá Ndiòxí ngúndecu váha-yu núú ndécú-gá ndétátú-gá.

¹⁰ Te nchaa ñáyiu ducaⁿ na ndúú táhú cundecu váha núú ndécú Yá Ndiòxí ndétátú-gá, te tnáhá-yu ndetátú-yu cuendá nchaa sá vǎha ní quidé-yu dǎtná ndetátú mée-gá.

¹¹ Te xíni ñuhu-xi sá nchóó ño nducu ndèe-o nducu-o nacuáa cada-o cuendá nduu táhú-ó ngúndecu váha-o núú ndécú Yá Ndiòxí ndétátú-gá, chi na cuáháⁿ dava-ndo càda-ndo datná ní quide cue ñáyiu ñá túú ní sándáá iní ñáhá xii-gá, te vǎ ndúú tǎhú-ndó cùndecu váha-ndo núú ndécú-gá te núu ducaⁿ na càda-ndo.

¹² Te tnúhu Yá Ndiòxí cúú-xí dǎtná ñⁿ sá nchító-ó chí quidé-xi nándí sá quidé-xí, te cùu-xi datná ñⁿ sá déeⁿ víhí-gǎ dàcúúxí ñⁿ yuchí sá ndéé úú xio núú-xi. Te ducaⁿ sǎtnahá-xi cùu tnúhu-gá chí quée-xi iní-ó, te dǎndixi túu-xi nchaandi túhú sá sání iní-ó te núu quide váha-o àdi ñá túú quide váha-o ndécú-o.

¹³ Te ní ñⁿ sá ñí cadúha Yá Ndiòxí vǎ cání iní-ó sǎ ndácú-xí nguǎvǎha-xi núú-gǎ, chí nchaandi túhú sá sání iní-ó ndécú túu-xi núú-gǎ, te ñiu núú Yàá-áⁿ na cání cuendá-ó nchàa sá quidé-ó.

¹⁴ Te Xítohó Jesucristú cúu-gă Dútú İo cùnnu ndecu ndihi-o, te diu-gă cúu-gă Dêhe Dútú Ndiöxí, te Yaá-áⁿ cuândaa-gă andiu nî nucúndecu-gă núu Yă Ndiöxí, núu xiáⁿ tàu-xi sá cánciçúⁿ nihnu-ni-o quindáá iní-ó-gă.

¹⁵ Te mee Yaá-áⁿ İo cùnnu-gă cúu-gă dútú-ó ndecu ndihi-o, te İo na cùndahú iní ñáhá-gă xii-o cuendá sá ñă nihí ndéé-ó cùndecu-o. Te ducaⁿ càda-gă chi ní yáha-gă dàtná yáha mee-o, chi nchaa sá nî yáha-gă-áⁿ nî cuu-xi sá cáda-gă nándi nchaa sá cuèhé sá dúhá ní cùu dico ni İⁿ ñá túú ní quide-gă.

¹⁶ Núu xiáⁿ tàu-ó să nchóo nî yuhu nî iní-ó cǎháⁿ ndihi-o Yă Ndiöxí Yaá İo cùndahú iní ñáhá xii-o chindee ñaha-gă, te ducaⁿ càda-o te cùndahú iní ñáhá-gă chindee ñaha-gă xii-o ndêda-ni cǎa oré xíní ñùhu-o-gă.

5

¹ Te nchaa cue dútú cùnnu núu ñáyiu isrâel diu-ni ñáyiu cùu-güedé, te ducaⁿ nî ngúndecu-güedé cuendá cada-güedé chiⁿ sá cúu-xí Yă Ndiöxí cuendá-yu, chi diu cue téé-áⁿ nî xóo nacani cuendá-güedé núu-gă quiti ní xóo cahni-güedé ní xóo nduu táhú-gă, te ducaⁿ nî xóo cada-güedé cuendá sá cáda cǎhnu iní Yă Ndiöxí cuéchi-yu, te ducaⁿ nî xóo nacani cuendá tucu-güedé núu-gă nchaa dava-gă sá nî xóo nihí-güedé ní xóo nduu táhú-gă.

² Te nchaa cue dútú-áⁿ nî xóo cundee iní-güedé nchaa sá nî xóo cada nchaa ñáyiu ñá túú ní quide ndáá ñáyiu ñá túú cùtnuní iní-xi, te ducaⁿ nî xóo cada cue dútú-áⁿ chi tnáhá-güedé ñá túú ní xóo nihí ndéé-güedé cundecu-güedé cuendá nchaa sá nî xóo yáha-güedé.

³ Te sá cuendá sá dúcáⁿ ñá túú ní xóo nihí ndéé-güedé nüu xiáⁿ dai ní xini ñuhu-xi sá tnáhá-güedé cuáha-güedé Yă Ndiöxí sá ndúú táhú-gă cuendá méé-güedé dàtná quidé-güedé cuendá ñáyiu.

⁴ Te ni İⁿ téé vá ndácú-dé cuu-dé dútú cùnnu cuendá-ni sá cǎchí iní méé-dé te núu ñá díú mèe Yă Ndiöxí ducaⁿ cuiní-gă sá cúu-dé dútú cùnnu datná ní quide-gă ndí Àrón.

⁵ Te cuéi Xítohó Jesucristú chi ñá díú mèe-gă ní quide-gă méé-gă İⁿ dútú cùnnu nacúaa cada nınu-gă méé-gă, chi mee Tătá-gă Dútú Ndiöxí ducaⁿ nî cachí-gă sá cúu-gă Dútú cùnnu, te ducaⁿ chi Yă Ndiöxí ní xáhaⁿ-gă:

Yòhó cúu-n Dêhe-ı,
te cuiní-ı sá dúhá-ni cùndecu-n núu ndécù-ı.
Duha ní xáhaⁿ-gă xii Xítohó Jesucristú.

⁶ Te núu tütú Yă Ndiöxí yódó tnúnı nàcuáa ní xáhaⁿ tucu-gă xii Xítohó Jesucristú, te duha ní xáhaⁿ-gă:

Yòhó cúu-n dütú cundecu ni caa ni quíhıⁿ,
te cùu-n datná ní cuu ndí Melquisédéc.
Duha ní xáhaⁿ-gă xii Xítohó Jesucristú.

⁷ Te cúnáhá ní xındecu Xítohó Jesucristú ñuyıú-a te nihi ní xóo cǎháⁿ ndihi-gă Yă Ndiöxí te ní xóo cǎháⁿ ndáhú-gă núu-gă, te ní xóo ndáhyú-gă òré ducaⁿ nî xóo cǎháⁿ ndihi-gă Yă Ndiöxí, te ducaⁿ nî quide-gă chi nàha-gă sá Yă Ndiöxí cúu-gă Yaá ndacu dǎcácu nihnu ñaha xı-gă cuendá sá vǎ cùú dúcáⁿ-gă. Te Yă Ndiöxí ní xındedóho-gă nchaa tnúhu ní cǎháⁿ Xítohó Jesucristú cuendá sá nî quide-gă nchaa nàcuáa ní xáhaⁿ Yă Ndiöxí cada-gă.

⁸ Te sá cuendá nchaa sá nî ndoho Xítohó Jesucristú xiáⁿ ní cùtnuní iní-gă cada-gă nchaa dava-gă sá vǎha nàcuáa cuiní méé Yă Ndiöxí cada-gă. Te ducaⁿ nî cuu cuéi cùu-gă Dêhe Yă Ndiöxí.

9 Te sá dúcáⁿ nĩ quide-gá nchaa nàcuáa cuiní meeé Yá Ndiõxí, xiãⁿ nõu vitna cùu-gá Yaá dáccu nihnu nchaa ñáyi u sàndáá iní ñáhá xii-gá núu ùhú núu ndáhú.

10 Te meeé Yá Ndiõxí ní cachí-gá sá Xítohó Jesucristú cúu-gá dútú cúnùu datná ní cunu u ndí Melquisèdec cùtnáhá ní cuu ndí dútú ñuyíú-a.

Cuendá ñáyi u cuiní daña nihnu ichi Yá Ndiõxí

11 Te vai-gá tnúhu ndècu cáháⁿ-í nàcuáa ndùu cuendá Xítohó Jesucristú, ndihí ndí Melquisèdec, te dicó-ni sá nchòhó ío cuèé tecú tnùní-ndó, te yúhú ío ùhú nihí-í nàcuáa cáháⁿ-í nàcuáa tecú tnùní-ndó.

12 Te nchòhó sa ní cuu cuèhé nduu ndècu-ndo ichi Xítohó Jesucristú, te tau-ndó dànehé-ndó cuè ñáyi u ndècu ichi-gá tnúhu-gá nõu dicó sá cúu, dico xini ñuhu-ni-xi sá cùndècu ñáyi u danèhé ñáhá tnúhu-gá xii-ndo, tnúhu sá nĩ dácuaáhá-ndó ndéé díhna sá ñá túu ùhú tecú tnùní-ndó. Te sá dúcáⁿ quide-ndo núu xiãⁿ cúu-ndó dàtná cue landú vitna sàdi camá, landú vátá cúu-gá caxi dítá.

13 Chi nchaa ñáyi u cùu datná landú vitna sàdi, ñáyi u-áⁿ cúu nèñuú-yu ñá túu cùtnuní iní-yu nàcuáa cáháⁿ tnúhu sá cáháⁿ nàcuáa cada ndáá-yu cundecú-yu.

14 Te nchaa sá vátá cúu-gá caxi cue landú yíquiⁿ xiãⁿ cúu-xi cuendá cue ñáyi u sacuéhé, te xiãⁿ cúu-xi dàtná tnúhu sá dácuaáha ñáyi u sa ní nihí ndéé ndècu ichi-gá, ñáyi u sa ní cutnùní váha iní-xi nándi cùu nchaa sá cuèhé sá dúhá, ndihí nándi cùu nchaa sá vaha.

6

1 Te xiãⁿ nõu vitna xini ñuhu-xi dacuaaha-o dava-gá tnúhu Yá Ndiõxí cuendá ducaⁿ te cuu-o ñáyi u tècú tnùní nchaa tnúhu-gá. Te xini ñuhu-xi sá ncháá tnúhu Xítohó Jesucristú sá nĩ dácuaáhá-ó ndéé díhna vá dácuaáha-gá-ó dàtná ní dácuaáhá-ó chi sa tècu tnùní-ó. Te ñá túu-gá xini ñuhu-xi dacuaaha-o datná ní dácuaáhá-ó ndéé díhna nàcuáa cada-o ndixi cuèchi iní-ó cuendá nchaa sá cuèhé sá dúhá quide-o, sá tá dácuaíta nihnu ñaha xii-o cuáháⁿ ní cùu. Te ducaⁿ vá dácuaáha-gá tucu-o dàtná ní dácuaáhá-ó ndéé díhna nàcuáa cada-o quèndáá iní-ó Yá Ndiõxí,

2 ndihí cuendá nàcuáa ní dácuaáhá-ó nàcuáa cuandute-o, ndihí cuendá nàcuáa cada-o càcáⁿ ndodo-o ndàha-o díqui ñáyi u ní sàndáá iní ñáhá xii-gá. Te ducaⁿ ñá túu-gá xini ñuhu tucu-xi dacuaaha-o datná ní dácuaáhá-ó ndéé díhna cuendá nàcuáa ndoto cue ñáyi u ní xihí, ndihí cuendá nàcuáa ní dácuaáhá-ó sá Yá Ndiõxí daquihíⁿ-gá ñáyi u núu ùhú núu ndáhú ni caa ni quíhíⁿ.

3 Te núu Yá Ndiõxí ná càchí-gá, te cuita dacuaáha-gá-ó ncháa dava-gá tnúhu sá cùmání quíhíⁿ.

4 Te cue ñáyi u sa tècú tnùní tnúhu Yá Ndiõxí, ñáyi u sa xini nchaa nàcuáa ndùu nchaa sá vaha quide ñaha Yá Ndiõxí xii-o ndihí-yu, ñáyi u sa chindee ñaha Espiritú Yá Ndiõxí,

5 ñáyi u sa cùtnuní iní-xi sá ío váha tnúhu Yá Ndiõxí, ñáyi u sa xini nàcuáa ta quide Yá Ndiõxí véxi nchaa sá vã yõ tnàhí ndàcu cada,

6 te núu ñáyi u-áⁿ ná ngúta tucú-yu daquèé tíhú duúⁿ-yu tnúhu Yá Ndiõxí, te vá ndácú-gá-ó ná canu ichi-ó-yu nàcuáa ndixi cuèchi iní-yu te núu ducaⁿ na càdá-yu, te sá dúcáⁿ ná càdá-yu te tnàhá-yu cùu-yu dàtná cue téé ní sahni ñaha xii Xítohó Jesucristú Déhe Yá Ndiõxí núu cùrúxi. Te sá dúcáⁿ ná càdá-yu te ngóo dava-gá ñáyi u cáháⁿ cuèhé-yu cuendá Xítohó Jesucristú.

7 Te nchaa ñáiyu cùú-yu dàtná ñuhu, chi ñuhu-án ndi tnahá òré cúúⁿ dǎú te xihí-xi ndute, te dava ñuhu váha cùú sá xítú ñáiyu, te sá cúú núú ñuhu-án ïo nàndíhi-xi, te mee Yá Ndióxí quidé-gǎ cúú sǎ váha núú ñúhú-ǎⁿ.

8 Dico núu da iñu na ndaa núú ñuhu-án te ñá túú vèdana nàndíhi-xi te núu ducaⁿ, te Yá Ndióxí vá cúú váha iní-gǎ cuendá ñuhu-án sǎ dúcáⁿ dà iñu ndaa núú-xi, te iñu-án ndíhi-xi cáyú. Te ducaⁿ sǎtnahá-xi cùú ñáiyu dàquee tíhú tnùhu Yá Ndióxí chi ñá túú cùú váha iní-gǎ núú-yu.

Nihí-ó sǎ ndétú-ó ndiú táhú-ó

9 Te cuéi duha càháⁿ-í dico nchòhó cue ñáiyu ío cùú iní-í, chi cùtnuní ndáá iní-í sǎ vǎ cadá-ndó dàtná xíquide dava-gǎ ñáiyu, te mee-ni sǎ váha cuu xii-ndo chi cùu-ndo ñáiyu sa ní naníhí táhú.

10 Te ducaⁿ chi Yá Ndióxí cúú-gǎ Yaá ío váha quide ndáá, te vá dáná ndòdo iní-gǎ nchaa sǎ váha quide-ndo, te ni vǎ dáná ndòdo iní-gǎ nàcuáa quide-ndo cuu iní-ndó-gǎ, te sǎ dúcáⁿ quide-ndo cuu iní-ndó-gǎ xiǎⁿ chindèe-ndo cue ñáiyu ndècu ndíhi-ndo ichi Xitohó Jesucristú, te ducaⁿ-ni ta quide-ndo véxi ndéé vitna.

11 Te cuíní-í sǎ ñⁿ-ndo nducu ndee-ndo cada-ndo nacuáa cuíní Yá Ndióxí dàtná tá quide-ndo véxi, te ñiú-ni ducaⁿ càda-ndo ndéé ná sǎá nduu ndiú táhú-ndó cùndecu-ndo ndíhi-gǎ núú ndécú-gǎ, te ducaⁿ te níhí-ndó nchàandi túhú sǎ ndétú-ndó ndiú táhú-ndó cùndecu ndíhi-ndo ni caa ni quíhíⁿ.

12 Te yúhú cuíní-í sǎ nchòhó vá túhío-ndo càda-ndo nchaa nacuáa cuíní Yá Ndióxí, te cada-ndo dàtná quidé ñáiyu sàndáá iní tnúhu-gǎ, ñáiyu càhnu iní-xi. Te sǎ dúcáⁿ quidé-yu xiǎⁿ níhí-yu nchaa sǎ ní cachí Yá Ndióxí nduu táhú-yu.

13 Te cùtnàhá ní xáhaⁿ Yá Ndióxí xii ndíi Àbrahám nàcuáa cada-gǎ, te ní cacunehe-gǎ méé-gǎ nàcuáa cutnùní iní ndíi sǎ ndáa cada-gǎ nàcuáa ní xáhaⁿ-gǎ xii ndíi, te vá yóo ñⁿ ní cacunehe-gǎ cuendá sǎ quindáá iní ndíi tnúhu ní càháⁿ-gǎ. Te ducaⁿ ní quide-gǎ chi ñⁿ dli dli-ni mee-gǎ ío cùnuu-gǎ.

14 Te duha ní xáhaⁿ-gǎ xii ndíi Àbrahám: “Yòhó té Àbrahám na cachí tnúhu ndáá-í xii-n sǎ ïo chindee ñàha-í xii-n, te cáyá cuéhé víhí ñàní tnáhá-n”, duha ní xáhaⁿ-gǎ xii ndíi.

15 Te ndíi Àbrahám ío ní quide ndee iní ndíi ní xindetu ndíi, te ducaⁿ te Yá Ndióxí ní quide-gǎ nàcuáa ní xáhaⁿ-gǎ cada-gǎ sǎ cúú-xí ndíi.

16 Te núu ñⁿ ñáiyu càháⁿ ñⁿ tnúhu ndáá cuíti te càcu nehé-yu Yá Ndióxí cuendá quindáá iní tnàha ñáiyú-yu tnúhu càháⁿ-yu, te òré ducaⁿ na càháⁿ-yu te ñá túú-gǎ sǎ dácàá ñáiyu càháⁿ ndíhi-yu cuendú.

17 Te ducaⁿ ní quide Yá Ndióxí ní càháⁿ ndáá-gǎ sǎ cadá-gǎ nàcuáa ní cachí-gǎ, te ducaⁿ ní càháⁿ-gǎ cuendá nchaa ñáiyu ní cachí-gǎ nduu táhú sǎ cadá-gǎ nàcuáa cutnùní iní-yu sǎ quidé-gǎ ñⁿ sǎ càháⁿ-gǎ, te ni ñà túú nàdáma-gǎ ñⁿ sǎ càháⁿ-gǎ.

18 Te nchoo ní natuha-o Yá Ndióxí cuendá dàcácu nihnu ñàha-gǎ xii-o núú ùhú núú ndàhú, te ní níhí-ó tnùhu ndee iní ndécú ndíhi-o cuendá sǎ vǎ dáñá ndéé-ó cùndetu-o sǎá nduu ndiú táhú-ó cùndecu-o ndíhi-gǎ. Te ducaⁿ ní níhí-ó tnúhu ndee iní chi Yá Ndióxí ní càháⁿ ndáá-gǎ sǎ cadá-gǎ nàcuáa ní cachí-gǎ, te ñá túú dàndahú ñàhá-gǎ, te ni ñà túú nàdáma-gǎ ñⁿ sǎ ní cachí-gǎ cada-gǎ.

19 Te tnúhu ndee iní ndécú ndíhi-o xiǎⁿ quidé-xí cùtnuní ndáá iní-ó sǎ ndiú táhú-ó cùndecu-o ndíhi Yá Ndióxí núú ndécú-gǎ, te ducaⁿ cùtnuní ndáá ndisa iní-ó sǎ cuendá Xitohó Jesucristú Yaá ndécú núú Yá Ndióxí.

²⁰ Te ducaⁿ nĩ nucúndecu Xítóhó Jesucristú núú Yá Ndiòxí cuèndá ducaⁿ càncicúⁿ nihnu-o càda-o, te ducaⁿ nĩ nucúndecu-gá núú Yá Ndiòxí chi cùu-gá dútú cúnùu datná ní cunu ndĩ Melquisèdec ñuyíú-a, te ducaⁿ-ni cùu-gá dútú cúnùu nĩ caa nĩ quíhíⁿ.

7

Xítóhó Jesucristú cúu-gá dútú datná ní cuu ndĩ Melquisèdec

¹ Te ndĩ Melquisèdec ní xíndaha ndĩ cue ñáyiú ñúú Sàlém, te ní cuu ndĩ dútú ní xinu cuechi ndĩ núú Dútú Ndiòxí Yáá ío cunu. Te ndĩ Melquisèdec-án nĩ xicáⁿ táhú ndĩ núú Yá Ndiòxí cuèndá ndĩ Àbrahám cúnahá ní sáháⁿ ndĩ Àbrahám-án nĩ nàá ndĩ ndĩhí cue dava-gá cue téé yíndaha ñáyiú. Te cue téé-án ñá túú ní ndàcu-güedé nàá-güedé ndĩhí ndĩ Àbrahám-án chi ní xíta-güedé.

² Te nchaa sá nĩ níhí ndĩ Àbrahám-án núú nĩ nàá ndĩ, te ní quide ndĩ úxí xichi te ñⁿ xichi núú ùxí-án nĩ sáñaha ndĩ xii ndĩ Melquisèdec. Te ñúu ndĩ Melquisèdec-án quée-xí: Téé ío váha quide ndáá yíndaha ñaha xii ñáyiú, duha quèe-xi. Te ní xóo danàni ñahá-yu xii ndĩ Téé yíndaha ñúú Sàlém, duha ní xóo danàni ñahá-yu. Te tnúhu Sàlém-án quée-xí: Ñúú ndécú ñahi, duha quèe-xi tnúhu-án. Núú xiáⁿ quée tucu-xi nacuáa ñani ndĩ Téé yíndaha ñúú ndécú ñahi, duha quèe tucu-xi ñúu ndĩ.

³ Te ñá túú tnúhu núú yoo cùu tátá ndĩ ndĩhí ñaná ndĩ, te ní ñá túú tnúhu núú yoo cùu xí ndĩ ndĩhí xítá ndĩ, te ní ñá túú tnúhu núú ná ndĩ cùu ñáyiú ní cuu ñani tnáhá ndĩ ní xíndecu ndéé sanaha-gá, te ní ñá túú tnúhu núú ná ama ní cacu ndĩ, te ní ñá túú tnúhu núú ná ama ní xíhí ndĩ. Te ndĩ-án ducaⁿ-ni ní cuu ndĩ dútú ní xíndecu ndĩ, te ducaⁿ sátnahá-xi cùu Xítóhó Jesucristú déhe Yá Ndiòxí chi cuu-gá dútú nĩ caa nĩ quíhíⁿ.

⁴ Te vitna chí cuáha váha cuèndá sá ndĩ Melquisèdec ní cuu ndĩ ñⁿ téé ío ní cuu càhnu ní xíndecu ñuyíú-a, chi ndĩ Àbrahám téé ní cuu ñani tnáhá-ó ní xíndecu ndéé sanaha ní quide ndĩ úxí xichi nchaa sá nĩ níhí ndĩ núú nĩ nàá ndĩ. Te ñⁿ xichi núú ùxí-án nĩ sáñaha ndĩ xii ndĩ Melquisèdec.

⁵ Te ndĩ Moisés ní chídó tnùní ndĩ nacuáa cada nchaa dútú, cue téé ní cuu ñani tnáhá ndĩ Lèví sá cuè téé-án queheⁿ-güedé ñⁿ xichi núú ùxí xichi sá níhí cue ñáyiú isràél ñáyiú cùu ñani tnáhá-güedé cuu cuèndá-güedé. Te ducaⁿ quide-güedé cuèi ñani tnáhá-güedé ndĩhí-yu ní cuu ndĩ Àbrahám.

⁶ Te cuèi ñá díú ñani tnáhá ndĩ Melquisèdec cúu ndĩ Àbrahám díco ní queheⁿ ndĩ Melquisèdec-án ñⁿ xichi núú ùxí xichi nchaa sá nĩ níhí ndĩ Àbrahám. Te ndĩ Melquisèdec-án nĩ xicáⁿ táhú ndĩ núú Yá Ndiòxí cuèndá ndĩ Àbrahám. Te ñúu-ni ndĩ Àbrahám-án nĩ xáhaⁿ Yá Ndiòxí xii ndĩ sá cáda váha ñaha-gá xii ndĩ.

⁷ Te sa cùtnuní iní-ó sá ñúu ñⁿ téé na càcáⁿ táhú-dé núú Yá Ndiòxí cuèndá ñⁿ ñáyiú, te téé-án cúnùu-gá-dé.

⁸ Te cue dútú ñáyiú isràél quéhéⁿ-güedé ñⁿ xichi núú ùxí xichi nchaa sá níhí-yu cùu cuèndá-güedé, te cue téé-án cuú-güedé. Te núú tütú Yá Ndiòxí càchí-xi sá ndĩ Melquisèdec ndécú-ní ndĩ, te ducaⁿ càháⁿ-xi chi ñá túú tnúhu sá ní xíhí ndĩ.

⁹⁻¹⁰ Te sá dúcáⁿ nĩ sáñaha ndĩ Àbrahám sá ní nduu táhú ndĩ Melquisèdec, te xiáⁿ cada iní-ó sá sá ndecu ndĩhí ndĩ Àbrahám cue ñani tnáhá ndĩ Lèví cue téé cùu dútú, cue téé queheⁿ ñⁿ xichi núú ùxí xichi nchaa sá níhí ñáyiú

israél cuèi vátá cáciu-gǎ-güedé. Te cada iní-ó sǎ tnàhá-güedé ní sáha-güedé ndíi Melquisèdec ìñ xichi núú ùxí xichi nchaa sá nǐ níhí ndíi Àbrahám núú nǐ nàà ndíi. Te ducaⁿ càda iní-ó chí cue téé-áⁿ cúú-güedé ñaní tnàhá ndíi Àbrahám cuèi vátá cáciu-gǎ-güedé dàvá-áⁿ.

11 Te sá cuendá cue dútú cue téé cùu ñaní tnàhá ndíi Lèví ní ngúndecu ndíhi cue ñáyíu israél tnúhu sá sánú ichi ñaha xii-yu nàcuáa cadá-yu cundecú-yu. Te ñaní tnàhá ndíi Àrón cúú cuè dútú-ǎⁿ. Te núú dicó cue dútú-ǎⁿ ní ndacu-güedé cada-güedé nàcuáa cudiù ñáyíu israél núú Yá Ndióxi, te ñá túú-gǎ xíní ñùhu-xi ngúndecu ingá dútú dàtná ndíi Melquisèdec ní cùu. Te dútú-ǎⁿ ñà túú ní cùu-dé dàtná ní cuu cue ñaní tnàhá ndíi Àrón.

12 Te núú cuè dútú cue téé cùu ñaní tnàhá ndíi Lèví-áⁿ nǐ ngúndecu ingá dútú. Te sá dúcáⁿ nǐ ngúndecu ingá dútú xǎⁿ dacuítíi nǐ xini ñùhu-xi sá dǎma nàcuáa ndùu tnúhu sá sánú ichi ñaha xii-yu nàcuáa cadá-yu cundecú-yu.

13-14 Te ñiu-ni cuendá dútú-ǎⁿ sa nihí-ó tnúhu, te dútú-ǎⁿ cúú Xítóhó Jesucristú, te ñá díú ñaní tnàhá ndíi Àrón cúú-gǎ chí ñaní tnàhá ndíi Judá cúú-gǎ. Te nchaa-o tà xíní ndáá-ó sǎ ñaní tnàhá ndíi Judá cúú-gǎ, te ndíi Moisés ñá túú tnàhí ná ní càchí ndíi cuendá cue ñaní tnàhá ndíi Judá sá cúú-güedé dútú, chí nǐ ñⁿ-güedé ñá túú ní cùu-güedé dútú ní cùu.

15 Te vitna cùtnuní ndáá iní-ó nàcuáa ní cuu, chí Xítóhó Jesucristú cúú-gǎ ingá dútú dàtná ní cuu ndíi Melquisèdec.

16 Te ñá díú cuendá tnúhu sá sánú ichi ñaha xii ñáyíu nàcuáa cadá-yu cundecú-yu ducaⁿ nǐ cùu-gǎ dútú, chí ní cuu-gǎ dútú cuendá sá cúú-gǎ Yáa cundecu nǐ caa nǐ quíhíⁿ chí vá ñⁿ ndùu te ndíhi nihnu-gǎ.

17 Te duha ní xáhaⁿ Yá Ndióxi xii-gǎ:

Yòhó cúú-n dütú dàtná ní cuu ndíi Melquisèdec,

te cundecu-n nchàa nduu nchaa quíú.

Duha ní xáhaⁿ Yá Ndióxi xii-gǎ.

18 Te xǎⁿ núu nchaa tnúhu ndéé díhna, tnúhu sá nǐ xíndecu ndíhi cue dútú ñá túú-gǎ cúnùu-xi vitna chí ñá túú-gǎ xíní ñùhu-xi te nǐ ñá túú ná chindéè ñaha-xi.

19 Te ñiu-ni tnúhu-áⁿ cúú-xí tnúhu sá nǐ chídó tnùní ndíi Moisés canu ichi ñaha xii ñáyíu nàcuáa cadá-yu cundecú-yu. Te tnúhu-áⁿ ñà túú vèdana nǐ quide-xi nacuáa chindee-xi ñáyíu cudiù-yu núú Yá Ndióxi. Dico vitna ní ngúndecu ndíhi-o tnúhu ndee iní sá ño-gǎ váha dàcúúxí tnúhu ndéé díhna, chí ndècu ndíhi-o Xítóhó Jesucristú Yáa cúú dütú-ó. Te Yáa-áⁿ quide-gǎ tnàhá tnúhu-o ndíhi Yá Ndióxi vitna.

20 Te Yá Ndióxi ní cáháⁿ ndáá cuítí-gǎ sá Xítóhó Jesucristú cuu-gǎ dútú.

21 Dico ñá túú dùcaⁿ ní cáháⁿ-gǎ cuendá cue ñaní tnàhá ndíi Lèví cue téé ní cuu dútú, cuèi mei òré ní chisaha-güedé ní cuu-güedé dútú. Te cùtnàhá ní chisaha Xítóhó Jesucristú cúú-gǎ dútú, te Yá Ndióxi ní xáhaⁿ ndáá cuítí-gǎ xii-gǎ, te duha ní xáhaⁿ-gǎ:

Yúhú Dütú Ndióxi càháⁿ ndáá cuítí-í te vá dàmà-í tnúhu càháⁿ-í:

“Yòhó cúú-n dütú dàtná ndíi Melquisèdec,

te cundecu-n nǐ caa nǐ quíhíⁿ.”

Duha ní xáhaⁿ Yá Ndióxi xii Xítóhó Jesucristú.

22 Te Xítohó Jesucristú quidé-gã nàcuáa cutnùni ndáá iní-ó sã Yã Ndiõxí cada-gã ingá núú sã vãha sã cúú-xí-ó dàtná ní cachí-gã, te xiãⁿ cúú-xí sã ïo-gã vãha dàcúúxí tnùhu ní cáháⁿ-gã ndéé díhna.

23 Te ío cuéhé cue ñani tnáhã ndí Leví ní cuu-güedé dútú, te ducaⁿ cuendá sã ñã túú ní cùdí-güedé cundecu-güedé chi ní ndíhi-güedé ní xíhí.

24 Dico Xítohó Jesucristú chi vá cúú-gã, chi cundecu-gã ñi caa ñi quíhíⁿ núú xiãⁿ diu-ñi-gã cuu-gã dútú, te vá yõo ñⁿ-gã cuu dútú cada núú-gã.

25 Te núú xiãⁿ Xítohó Jesucristú dácãu nihnu ñaha-gã xii nchoo ñãyiú núú ùhú núú ndàhú, nchoo ñãyiú sandáá iní ñáhã xii-gã, te diu-ñi nchoo cùu-o ñãyiú tnáhã tnùhu ndíhi Yã Ndiõxí, te vá ñⁿ ndùu-gã te cuíta nihnu-o. Te ducaⁿ chi Xítohó Jesucristú ñã túú xòcuíñí-gã núú Yã Ndiõxí càháⁿ ndàhú-gã cuendá-ó.

26 Te Xítohó Jesucristú cúú-gã Yaá cúú dútú cùnùu xini ñuhu-o cundecu ndíhi-o, te diu-gã cúú-gã Yaá chindèe chítúu ñaha xii-o, te cùu-gã Yaá ío quide ndáá núú Yã Ndiõxí, te cùu-gã Yaá cándòo canine chi ñã túú tnáhí cuéchi-gã. Te ñã túú tnáhí quide-gã dàtná quidé nchàa cue ñãyiú ndècu ichi cuéhé ichi duha, te cùu-gã Yaá ní nucúndecu andíu núú ndécú Yã Ndiõxí te yacáⁿ táxi tnùni-gã.

27 Te ñã túú quide-gã dàtná ní quide cue dútú ñi cunuu ñi xíndecu, chi cue dútú-ãⁿ ñⁿ nduu ñⁿ nduu ní xóo cahni-güedé quiti ní xóo nduu táhú Yã Ndiõxí, te díhna-gã cuendá nchaa cuéchi mee-güedé ducaⁿ ñi xóo cada-güedé te dàtnùni ducaⁿ ñi xóo cada tucu-güedé cuendá nchaa cuéchi ñãyiú. Dico Xítohó Jesucristú chi ñⁿ xito-ñi ní xíhí-gã sã cúú-xí nchàa ñãyiú chi ducaⁿ ñi sani iní-gã, te vá ñⁿ ndùu-gã ducaⁿ càda tucu-gã.

28 Te sã cuendá nchaa tnùhu ní chídó tnùni ndí Moisés xiãⁿ ní xíndecu cue téé ní cuu dútú cùnùu, te cue téé-áⁿ ñi cuu-güedé cue téé yíca cuéchi-xi. Te sátá dúcáⁿ ñi chídó tnùni ndí Moisés nàcuáa cada ñãyiú, te ní xica cuéhé víhí ndùu te dàtnùni ní cáháⁿ ndáá cuíti Yã Ndiõxí sã Dèhe-gã cuu-gã dútú cùnùu. Te Yaá cúú Dèhe-gã-áⁿ ñi quide-gã nchaa nàcuáa tàù-xi cunduu, te diu-ñi ducaⁿ càda-gã ñi caa ñi quíhíⁿ.

8

Xítohó Jesucristú cúú-gã dútú cùnùu

1 Te Xítohó Jesucristú Yaá cúú dútú cùnùu ndecu ndíhi-o cuándaa-gã andíu, te ní ngóo-gã xio cùha Dútú Ndiõxí Yaá ío cùnùu, te tnáhã-gã cùnùu-gã. Te diu cuendá-a cùu-xi sã ïo-gã cùnùu ta cáháⁿ-ndí véxi.

2 Te núú ndécú Yã Ndiõxí cúú-xí núú lí víhí. Te cada iní-ó sã cúú-xí ñⁿ vehe te xiãⁿ ndécú Xítohó Jesucristú cúú-gã dútú, te vehe-áⁿ ñi dácáá mèe Yã Ndiõxí te ñã díú cué téé ñuyíú-a.

3 Te sã cuendá nchaa tnùhu ní chídó tnùni ndí Moisés xiãⁿ ní xíndecu cue dútú cùnùu cuendá sã cáhni-güedé quiti nduu táhú Yã Ndiõxí, te nacani cuendá-güedé núú-gã nchaa dava-gã sã ñihí-güedé nduu táhú-gã. Te xiãⁿ núú dai ní xini ñuhu-xi sã tnáhã Xítohó Jesucristú cuãñaha-gã ñⁿ sã ndúú táhú Yã Ndiõxí, te táhú-ãⁿ cúú-xí mèe-gã chi ní xíhí-gã ní cuu-gã dàtná ñⁿ táhú sã cúú-xí Yã Ndiõxí.

4 Te núu ni xíndecu-ñi Xítohó Jesucristú ñuyíú-a te vá cúú-gã dútú ní cùu, chi sa ndècu cue dútú sãñaha nchàa sã ndúú táhú Yã Ndiõxí dàtná càháⁿ nchaa tnùhu ní chídó tnùni ndí Moisés.

⁵ Te nchaa sá quidé cuè dútú ñáyiú isràél nŭtnahá-xi luha nchaa sá quidé Xítóhó Jesucristú Yáá cúú dŭtú cúnúu ndecu andiú. Te quèè ndáá-xi nàcuáa ní xáhaⁿ Yá Ndióxi xii ndíi Moisés cŭtnáhá tá cŭyatni ngúita ndíi dacàa ndíi vehe-gá, te duha ní xáhaⁿ-gá: “Ío váha cada cuèndá-n nàcuáa dacàa-n vehe-í dàtná cáá sá ní dánèhè ñáhà-í xii-n xití yucu”, duha ní xáhaⁿ-gá xii ndíi.

⁶ Dico vitna chi Xítóhó Jesucristú cúú-gá dŭtú cúnúu, te ío-gá càhnu nduu chiúⁿ quide-gá dàcúúxí cuè dŭtú cue ñáyiú isràél. Te diu Xítóhó Jesucristú cúú-gá Yáá quidé tnáhá tnúhu-o ndíi Yá Ndióxi, te ducaⁿ chi Yá Ndióxi ío-gá váha ndúu tnúhu ní cáháⁿ-gá xito cùu uú dàcúúxí tnúhu ní cáháⁿ-gá ndéé díhna, te ducaⁿ ío váha ndúu tnúhu ní cáháⁿ-gá xito cùu uú chi ní cachí-gá sá ìngá núú sá ío-gá váha cada ñaha-gá xii-o vitna.

⁷ Te núu nàcuáa ní cachí Yá Ndióxi cada ñaha-gá xii-o ndéé díhna ni quide-xi nchaa nàcuáa tàú-xi cunduu nàcuáa nduu táhú-ó cŭndecu váha-o nŭú-gá ñá, te ñá túú xini ñuhu-xi cáháⁿ tucu-gá sá cadá-gá ìngá núú sá váha sá cúú-xí-ó vitna ni cuu.

⁸ Te Yá Ndióxi ñá túú ní cùu váha iní-gá núú ñáyiú isràél nŭu xíáⁿ ní cáháⁿ-gá cuèndá-yu, te duha ní cachí-gá: Yúhú cúú-í Dŭtú Ndióxi, te duha ndúu tnúhu na càháⁿ-í: Sáá nduu te cada-í ìngá núú sá váha sá cúú-xí cuè ñani tnáhá ñáyiú isràél, ndíi cue ñani tnáhá ndíi Jùdá diu-ni ñáyiú isràél.

⁹ Te tnúhu sá càháⁿ-í-a ñá túú ñⁿ-ni cuu-xi ndíi tnúhu sá ní xáhaⁿ-í xii cue ñáyiú ní cuu ñani tnáhá-yu ní xíndecu ndéé sanaha cada-í-yu, te diu-ni dàvá-áⁿ ní quide yica-í ní ndeñuhu-í-yu nacióⁿ Ègiptú, te ñá túú ní cuini-yu tní-yu tnúhu ní xáhaⁿ-í xii-yu cuèndá ducaⁿ càda váha-í-yu,

te xíáⁿ nŭu ní dáñá ñihnu-í-yu ñá túú-gá ní quide cuèndá-í-yu.

¹⁰ Te na sáá nduu te duha ndúu tucu ìngá núú sá váha cada-í cue ñáyiú isràél. Te yúhú cada-í nàcuáa cutnùni váha iní-yu nàcuáa cuini-í cadá-yu, te ducaⁿ ni yuhu ni iní-yu cadá-yu. Te yúhú Yá Ndióxi quindaha-í-yu, te mèe-yu cuú-yu ñáyiú cùu cuèndá-í.

¹¹ Te dàvá-áⁿ chi ni ñáyiú cùu ndi mèe-yu, te ni cuè dava-gá ñáyiú vá cŭtnúhu tnáhá-yu sá nátùha ñahá-yu xii-í, chi dàvá-áⁿ nchaa ñáyiú cundecu ndíi ñáhá-yu xii-í, cuèi ñáyiú cùnūu te cuèi ñáyiú ñá túú cùnūu.

¹² Te dàvá-áⁿ cada càhnu iní-í nchaa sá cuèhè sá dúhá quidé-yu, te vá ñⁿ ndúu-gá ndacu iní-í nchaa sá quidé-yu. Duha ní cachí Yá Ndióxi cuèndá ñáyiú isràél.

¹³ Te sá dúcáⁿ ní cáháⁿ Yá Ndióxi sá cadá-gá ìngá núú sá váha sá cúú-xí ñáyiú xíáⁿ cŭtnùni sá tnúhu sá ní cáháⁿ-gá díhna ñá túú-gá xini ñuhu-xi. Te cada iní-ó sá tnúhu-áⁿ cúú-xí ñⁿ sá ní cunaha ndècu te ñá túú-gá nándíi-xi te cuíta-ná-xi, ducaⁿ sátnahá-xi cùu tnúhu sá ní cáháⁿ-gá ndéé díhna.

9

Cuèndá vehe Yá Ndióxi

¹ Te tnúhu sá ní cáháⁿ Yá Ndióxi ndéé díhna cùu-xi cuèndá nàcuáa cada ñáyiú isràél chiñuhu ñáhá-yu xii-gá, ndíi cuèndá vehe-gá caa ñuyú-á.

2 Te ñáyiú isráel ní dácáã-yu vehe Yá Ndióxi, te vehe-án ní cuu-xi vehe dóo te ní xúhuⁿ nehu xítí-xi. Te cuàrtú díhna ní xínani-xi cuàrtú ní cuu íí, te xíaⁿ ní xíndecu ìⁿ sá ndéé dité-xi sá ní cándodó ìⁿ caa candíl núú dité-xi, te ní xínutnìⁿ ìⁿ mèsá ní xóo códó pàá ní xóo nduu táhú Yá Ndióxi.

3 Te cuàrtú cúú úú ní xínani-xi cuàrtú ní cuu íí víhí-gã.

4 Te xítí cuàrtú-án ní xínutnìⁿ ìⁿ sá ní cuáha mee-ni díhúⁿ cuááⁿ te núú xǎⁿ ní xóo cahmí-güedé dúsa sá sàháⁿ tnámí. Te ñu-ni xíaⁿ ní xíndecu tucu ìⁿ cájá ní cuu mee-ni díhúⁿ cuááⁿ te xítí cájá-án ní xúhuⁿ ìⁿ lítu ní cuáha mee-ni díhúⁿ cuááⁿ, te xítí lítu-án ní xúhuⁿ mànáá sá ní xóo caxí-yu dàvá-án. Te ñu-ni xítí cájá-án ní xúhuⁿ tnudli ndíi Àrón sá ní saa itá-xi, ndíi yúú sá ní xíndeé tnúhu ní cáháⁿ Yá Ndióxi nàcuáa cada ñáyiú. Te duha ní xínani cájá-án: Cájá sá ñúhú tnúhu ní cáháⁿ Yá Ndióxi sá cúú-xí ñáyiú, duha ní xínani-xi.

5 Te núú cájá-án ní cándodó úú tnàhá sá ní cadúha-yu, te xíaⁿ cáá-xí dàtná cáá espíritú xínú cuèchi núú Yá Ndióxi. Te cuendá úú xǎⁿ ní cutnùnì iní-yu sá ño cǎhnu cuu Yá Ndióxi, te sá ní cadúha-yu-án ndéé ndíxíⁿ-xi, te ndíxíⁿ-xi-án dǎhu-xi xio xio yúú quidé cǎhnu iní Yá Ndióxi nchaa yíca cuèchi ñáyiú, dico vá cúú-gã cáháⁿ-í cuendá nchaa dava-gã xǎⁿ vitna.

6 Te nchaa xǎⁿ ní xíndecu xítí vehe Yá Ndióxi, te cue dútú ní xóo quíhu-güedé ìⁿ nduu ìⁿ nduu xítí cuàrtú díhna ní xóo cada-güedé nàcuáa tàú-güedé cada-güedé sá cúú-xí Yá Ndióxi.

7 Te cuàrtú cúú úú-án chi mee-ni dǔtú cúnúú ní xóo quíhu-dé ìⁿ xito-ni ndi tnàhá cuíá. Te ndi tnàhá òré ducaⁿ ní xóo quíhu dútú cúnúú-án te ní xóo canehe-dé ñíñí ní xóo quíhu ní xóo nduu táhú Yá Ndióxi. Te ducaⁿ ní xóo cada dútú-án cuendá sá Yá Ndióxi cada cǎhnu iní-gã nchaa yíca cuèchi mee-dé, ndíi nchaa yíca cuèchi ñáyiú.

8 Te sá dúcáⁿ mée-ni dútú cúnúú ní xóo quíhu-dé xítí cuàrtú ní cuu íí-gã-án, xǎⁿ Espíritú Yá Ndióxi quidé-xí cutnùnì iní-ó sá ñini ducaⁿ ní xíndecu vehe-án ní xóo cada-yu nàcuáa ní xóo cǎháha Yá Ndióxi cada-yu. Te xǎⁿ cutnùnì sá vátá sàá-gã nduu cǎháⁿ ndíhí-yu Yá Ndióxi nàcuáa tàú-xi cunduu.

9 Te sá dúcáⁿ ní xíndecu vehe-án, ndíi sá dúcáⁿ ní xóo cada nchaa cue dútú-án, xǎⁿ cutnùnì iní-ó nàcuáa quidé Yá Ndióxi vitna, chi nchaa quíⁿ ní xóo cǎhni cue dútú-án ní xóo nduu táhú Yá Ndióxi, ndíi nchaa dava-gã sá ní xóo nduu táhú-gã ñá túú ní quíde-xi nàcuáa nduu ndoo nduu nine iní cue ñáyiú nàcuáa cutnùnì iní-yu sá ñà túú-gã cuèchi-yu ndéu núú Yá Ndióxi.

10 Te sá dúcáⁿ ní xóo cada nchaa dútú-án ní ñíhí tnàhá-xí ndíi nchaa tnúhu sá dánèhé ñáhá xii ñáyiú ná cúú sá cǎxí-yu ndíi ná cúú sá cúú còhó-yu ndíi nàcuáa ndàhá-yu. Te tnúhu-án ní cuu-xi mee-ni sá ní sanu ichi ñaha xii-yu nàcuáa cundecú-yu ñuyíú-a. Te tnúhu-án ní nàndíhí-xi ndéé ní sáá nduu ní nadama Yá Ndióxi tnúhu-án cuendá sá vã dúcáⁿ-gã cada-yu cundecú-yu.

11 Te Xítohó Jesucristú ní quixi-gã ñuyíú-a, te ñu-gã cúú-gã Yaá cúú dǔtú cúnúú, te xíaⁿ ní xóo quíde-gã nchaa sá vǎha sá cúú-xí-ó. Te vitna ní nucúndecu-gã núú ño yúú ño vǎha cǎa, te núú ndécú-gã-án ñà túú cùu-xi ìⁿ vehe sá ní dácáá cuè té ñuyíú-a.

12 Te cada iní-ó sá Xítohó Jesucristú cuánguihu-gã xítí cuàrtú núú ní cuu íí víhí dàtná ní xóo cada dútú cúnúú ní xíndecu ndéé sanaha, chi ní nucúndecu-gã núú ndécú Yá Ndióxi. Dico ñá túú ní quíde-gã dàtná ní xóo cada dútú cúnúú ní xíndecu ndéé sanaha, chi dútú-án òré ní xóo quíhu-dé xítí cuàrtú ní cuu

í-gã-án, te ní xóo canehe-dé níńí chívá ndihí níńí chěhlu ní xóo quíhu. Dico Xítóhó Jesucristú chi níńí méé-gã ní sati ní xihí-gá núú cùrúxí, te xiáⁿ duuⁿ duuⁿ cuáháⁿ-gá ní nucúndecu-gá núú ndécú Yá Ndióxí. Te sá dúcáⁿ ní quide-gá xiáⁿ ní naníhí tǎhú-ó.

¹³ Te nchaa ñáyiú ní xóo cada nàcuáa vá cúú-gã-yu ñáyiú ní cuu íí, ñáyiú-án ní xóo códó ñáhá cué dútú níńí ndicutu, ndihí níńí chívá, ndihí yáa cùńú chěhlu quiti sǎhni-güedé cuendá nduu íí tucú-yu.

¹⁴ ¡Dico níńí Xítóhó Jesucristú chi ío-gá nándihí-xi sá cúú-xí nchòo ñáyiú xĩndecu vitna! Te cuendá níńí-gã-án, chi Espiritú Yá Ndióxí sá ndécú nchaa nduu nchaa quíú ní cuu ñⁿnuu-xi ndihí Xítóhó Jesucristú sá cúú cúú-gá cuendá cuu-gá dàtná ñⁿ tǎhú sá cúú-xí Yá Ndióxí cuéi cùu-gá Yáa ñá túú tnáhí cuéchi-xi, te ní sati níńí-gã te ní xihí-gá. Te cuendá xiáⁿ ní cutnùní iní-ó sǎ Yá Ndióxí ní quide càhnu iní-gá nchaa sá ñá túú vǎha ní quide-o, te ní nduu ndoo ní nduu nine iní-ó. Te ducaⁿ ní nduu ndoo ní nduu nine iní-ó cuendá sá ndácú-ó cùnu cuechi-o núú Yá Ndióxí Yáa ndécú nchaa nduu nchaa quíú.

¹⁵ Te Xítóhó Jesucristú ní quide ndáá-gá núú Yá Ndióxí cuendá cue ñáyiú ndècu ñuyúú-a. Te cuendá xiáⁿ Yá Ndióxí cada-gá ingá núú sǎ vǎha sá cúú-xí-yu dàtná ní cachí-gá, te ducaⁿ càda-gá sá cuendá nchaa ñáyiú ní cáháⁿ-gá cundecu ndihí-gá, chi ñáyiú-án nduu tǎhú-yu cundecu ndihí váha ñáhá-yu xii-gá ní caa ní quíhíⁿ chi ducaⁿ ní cachí-gá, te ducaⁿ chi Xítóhó Jesucristú ní xihí-gá núú cùrúxí cuendá sá Yá Ndióxí cada càhnu iní-gá nchaa yicá cuéchi-yu, nchaa cuéchi sá ní quidé-yu cúnàhá ní cunuu tnúhu sá ní cáháⁿ-gá díhna.

¹⁶ Te nchoo xini-ó sǎ ñú ñⁿ téé na càdúha ñⁿ tutú nàcuáa cada ñáyiú dàcǎhñu-yu nchaa sá ndécú ndihí-dé, te tutú-án xini ñúhu-xi ndéé ná yǎha nduu cúú-dé.

¹⁷ Te ñá túú tàú-xi cada ñáyiú nàcuáa càháⁿ-xi núú tütú-án ñini ndècu téé ní cadúha, dico sátá ná yǎha cuú-dé te cadá-yu nàcuáa càháⁿ-xi.

¹⁸ Te cuéi tnúhu ní cáháⁿ Yá Ndióxí ndéé díhna nàcuáa cada váha-gá ñáyiú, te diu-ni ndihí níńí ní cundáá-xi chi ní sǎhni-güedé quiti te ní sati níńí-güedi.

¹⁹ Te ndíi Moisés ní cáháⁿ ndodo ndíi núú nchaa ñáyiú nàcuáa ní cachí Yá Ndióxí cadá-yu, te nàcuáa-ni ndúu tnúhu ní chídó tnùní ndíi núú tütú ndíi ní cáháⁿ ndíi, te ní dácá ndíi ndute níńí chěhlu ndihí níńí chívá líhli, te ní queheⁿ ndíi ñⁿ dité yutnu nani hisópó ndihí luha idi ticuèhé, te ní chindóyo ndíi níńí-án. Te ní sódó ndíi núú tütú ndèé tnúhu Yá Ndióxí sá ní chídó tnùní ndíi-án, te tnáhá cue ñáyiú xĩndecu-án ní chúcú ndíi.

²⁰ Te ní xáhaⁿ ndíi Moisés xii-yu: “Cuendá níńí-a ní cundáá sá Yá Ndióxí cada ñaha-gá xii-ndo sǎ vǎha chi ducaⁿ ní cachí-gá cada-gá sá cúú-xí-ndó”, duha ní xáhaⁿ ndíi xii-yu.

²¹ Te diu-ni ducaⁿ ní quide tucu ndíi ní chúcú ndíi níńí vehe-gá ndihí nchaa sá nándihí-güedé òré chíñúhu-güedé Yá Ndióxí ndécú xiti vehe-gá-án.

²² Te tnúhu ní chídó tnùní ndíi Moisés càchí-xi sá méé-ní níńí chucu-güedé nchaa sá cànehe chíuⁿ-güedé òré chíñúhu-güedé Yá Ndióxí, te sacú-nǎ te ndihí ndoo nchaa xiáⁿ chucu-güedé níńí ní cùu. Te dacuitíi ní xini ñúhu-xi sá catí níńí cuendá ducaⁿ càda cahnu iní Yá Ndióxí nchaa yicá cuéchi ñáyiú.

Xítóhó Jesucristú ní xihí-gá núú cùrúxí cuendá sá vǎ cùndècu-gá cuéchi-o núú Yá Ndióxí

23 Te sá cuendá sá nǐ xíhí Xítohó Jesucristú núú cùrúxí, xiǎⁿ ñá túú-gǎ cuéchi-o ndècu núú Yǎ Ndiòxí. Te cuendá nchaa sá nǐ xíhí xití vehe-gá sá nǐ dácáá ñǎyiu isràèl xiǎⁿ cùtnùní iní-ó nàcuáa quide-xi núú ndécú-gǎ. Te dacuití nǐ xini ñuhu-xi sǎ cáhni-güedé cue quití ní cachí Yǎ Ndiòxí cuendá nduu íí nchaa sá nǐ xíhí xití vehe-gá-áⁿ. Te cuéi ducaⁿ nǐ sahani-güedé cue quití-áⁿ dico ñá túú ní quide-xi nacuáa ngúndecu váha-o núú Yǎ Ndiòxí. Dico Xítohó Jesucristú ní xíhí-gá, te sá nǐ xíhí-gá xiǎⁿ ní quide-gá nàcuáa ngúndecu váha-o núú Yǎ Ndiòxí.

24 Te Xítohó Jesucristú cuánda-gá andiu núú ndécú Yǎ Ndiòxí cǎháⁿ ndáhú-gá cuendá-ó, te Xítohó Jesucristú chi ñá díú ñⁿ vehe ní dácáá cué téé ñuyú-a cuánguihu-gá. Te vehe Yǎ Ndiòxí sá nǐ dácáá cué ñǎyiu isràèl ñuyú-a ndéé sanaha, ndihí nchaa nàcuáa ní xóo cada-güedé xití vehe-gá-áⁿ xiǎⁿ cùtnùní iní-ó nàcuáa quide-xi núú ndécú-gǎ.

25 Te dutú cúnúu núú ñǎyiu isràèl ní xóo quíhu-dé núú cuiá núú cuiá xití cuártú ní cuu íí víhí-gǎ-áⁿ, te ní xóo canehe-dé ñíñí ní xóo quíhu xití cuártú-áⁿ dico ñá díú ñíñí meé-dé. Dico Xítohó Jesucristú chi ñá túú dùcaⁿ ní quide-gá chi ñⁿ xito-ni ní sati ñíñí-gǎ te ní xíhí-gá.

26 Chi núu ní xíhí-gá nuu núu te ndéé cùtnàhá ní ngáva ñuyú ducaⁿ ngüita-gá cada-gá ní cùu, te vitna ta ndihí nduu cuáháⁿ ní quixi-gá ñuyú-a ní xíhí-gá ñⁿ xito-ni cuendá cuu-gá dàtná ñⁿ táhú sǎ cúu-xí Yǎ Ndiòxí, te ducaⁿ ní quide-gá cuendá sá vǎ cùndècu-gá cuéchi ñǎyiu núú Yǎ Ndiòxí.

27 Te nchoo cué ñǎyiu ñuyú-a chi ñⁿ xito-ni cuú-ó te dàtnùní ducaⁿ te cada ndáá Yǎ Ndiòxí cuéchi-o.

28 Te ducaⁿ sǎtnahá-xi cùu Xítohó Jesucristú chi ñⁿ xito-ni ní xíhí-gá cuendá sá vǎ cùndècu-gá cuéchi ñǎyiu núú Yǎ Ndiòxí, te ducaⁿ ní cuu ní xíhí-gá chi mee-gǎ ducaⁿ ní cachí-gá cunduu. Te quixi tucu Xítohó Jesucristú ñuyú-a dico ñá díú-gǎ sá cadá-gǎ cuendá sá vǎ cùndècu-gá cuéchi ñǎyiu núú Yǎ Ndiòxí, chi quixi-gá nacuaca-gá nchaa ñǎyiu ndètu ñaha xii-gá cuendá cundecú-yu ndihí-gá ní caa ní quíhíⁿ.

10

1 Te nchaa tnúhu ní xáhaⁿ ndíi Moisés xii ñǎyiu isràèl cadá-yu, nchaa tnúhu-áⁿ ní quide-xi ní cutnùní luha iní-yu nàcuáa cada Yǎ Ndiòxí cada váha ñaha-gǎ xii-o vitna. Dico ñá díú mèi nacuáa ní xáhaⁿ ndíi Moisés xii ñǎyiu quide Yǎ Ndiòxí vitna chi dáma quide-gá. Te nchaa tnúhu ní cáháⁿ ndíi Moisés ñá túú ní ndàcu-xi cada-xi nacuáa cundáá nchaa ñǎyiu túha ñaha xii Yǎ Ndiòxí cuéi ní xóo cahni-güedé quití ní xóo nduu táhú-gǎ núú cuiá núú cuiá.

2 Te núu dicó sá nǐ xóo cahni-güedé quití ní xóo nduu táhú Yǎ Ndiòxí ní quide-xi nacuáa nduu ndoo nduu nine iní cue ñǎyiu, te vǎ cáhni-gǎ-güedé cue quití-áⁿ nduu táhú-gǎ ní cùu, te ducaⁿ te cutnùní iní-yu sá ñá túú-gǎ cuéchi-yu ndècu núú Yǎ Ndiòxí ní cùu.

3 Te sá dúcáⁿ ní xóo cahni-güedé quití ní xóo nduu táhú Yǎ Ndiòxí núú cuiá núú cuiá, xiǎⁿ ní xóo ndacu iní cue ñǎyiu nchaa sá cuèhé sá dúhá ní xóo cadá-yu.

4 Te ducaⁿ chi ñíñí ndicutu-áⁿ ndihí ñíñí chivá-áⁿ ñá túú ní xóo ndacu-xi cada-xi nàcuáa vǎ cùndècu cuéchi-yu núú Yǎ Ndiòxí.

⁵ Te xiáⁿ nõu cùtnàhá ní quexìo Xìtohó Jesucristú ñuyíu-a ní xáhaⁿ-gã xii Yá Ndiõxí:

Yòhó Tàtà-í, ñã túú ndùu vétú váha iní-n sã sàhni-güedé quiti ndùu táhú-n, te ni ñã túú ndùu vétú váha tucu iní-n cuendá nchaa dava-gã sá táxí-güedé ndúú tãhú-n,

núu xiáⁿ ní quide túha-n yìqui cuñú-í cuendá yúhú cuú-í te nduu táhú ñáhá-n xii-í.

⁶ Te ni ñã túú ndùu vétú váha iní-n cuendá quiti sàhmi-güedé ndúú tãhú-n te ni ñã túú ndùu vétú váha iní-n cuendá nchaa dava-gã sá táxí-güedé ndúú tãhú-n cuendá sá vã cùndècu-gã cuéchi ñáyiu núú-n.

⁷ Núu xiáⁿ yúhú ní cachí-í xii yòhó Tàtà-í Dútú Ndiõxí sá yúhú véxi-í ñuyíu-a cada-í nchaa sá cuiní-n càda-í dàtná yódó tñuní cuendá-í núu tütú-n.

Duha ní xáhaⁿ Xìtohó Jesucristú xii Tàtá-gã Dútú Ndiõxí.

⁸ Te Xìtohó Jesucristú díhna-gã ní xii-gã Yá Ndiõxí Yáá cúu Tàtá-gã: “Yòhó Tàtà-í ñã túú ndùu vétú váha iní-n cuendá quiti sàhni-güedé ndúú tãhú-n, ndihí cuendá quiti sàhmi-güedé ndúú tãhú tucu-n cuendá sá vã cùndècu-gã cuéchi ñáyiu núú-n, ndihí cuendá nchaa dava-gã táhú sã táxí-güedé xii-n ñã túú ndùu vétú váha iní-n cuendá nchaa xiáⁿ”, duha ní xáhaⁿ Xìtohó Jesucristú xii Tàtá-gã Dútú Ndiõxí. Te ducaⁿ ní xáhaⁿ-gã cuéi núú tütú ndí Moisés yódó tñuní sá dúcáⁿ càda-güedé.

⁹ Te sáta dúcáⁿ te ní xáhaⁿ tucu-gã xii Tàtá-gã Dútú Ndiõxí: “Yòhó Tàtà-í Dútú Ndiõxí, mee-í véxi-í ñuyíu-a cuendá cada-í nchaa nàcuáa cuiní-n”, duha ní xáhaⁿ-gã xii Tàtá-gã. Te sá dúcáⁿ nì cáháⁿ Xìtohó Jesucristú xiáⁿ ní cutnùní sá ñã túú-gã xini ñùhu-xi ducaⁿ cada-güedé cahni-güedé nchaa quiti-áⁿ, te ducaⁿ chi mee Xìtohó Jesucristú ní xihí-gã ní cuu-gã dàtná ìⁿ táhú sã cúu-xí Yá Ndiõxí, te ducaⁿ ní cuu chi ducaⁿ tñahí ní cachí Yá Ndiõxí cunduu.

¹⁰ Te Xìtohó Jesucristú ní quide-gã nàcuáa ní cuiní Yá Ndiõxí cada-gã, chi ní xihí-gã núu cùrúxí chi ducaⁿ ní cuiní méé-gã cunduu, te ìⁿ xito-ni ní xihí-gã sá cuendá nchaa ñáyiu, te cuendá xiáⁿ nõu ndècu yíñuhu-o núú-gã vitna.

¹¹ Te cue dútú ñáyiu isràel chi ìⁿ nduu ìⁿ nduu ní xóo cahni-güedé quiti ní xóo nduu táhú-gã, te ñã túú ní dàma-güedé nàcuáa ní xóo cada-güedé. Te nchaa sá ñi xóo cada-güedé-áⁿ ñã túú ní quide-xi nàcuáa vã cùndècu-gã cuéchi ñáyiu núú Yá Ndiõxí.

¹² Dico Xìtohó Jesucristú ní cachí-gã sá cúu cùú-gã, te ní xihí-gã núu cùrúxí cuendá nchaa yicá cuéchi nchaa nchoo ñáyiu ndècu ñuyíu-a. Te sáta dúcáⁿ te dàtnùní ní ngóo-gã xio cùha Dútú Ndiõxí táxí tñuní-gã, te vã ìⁿ ndùu ìⁿ quíú-gã te cuú-gã.

¹³ Te diu-ni xiáⁿ cundecu-gã cundetú-gã ndéé sáá nduu cànehe nchaa sá cúu ùhú iní ñáhá xii-gã sá yíñuhu núú-gã.

¹⁴ Te cuendá sá ñi xihí Xìtohó Jesucristú ìⁿ xito-ni xiáⁿ ní cuu-gã dàtná ìⁿ táhú sã cúu-xí Yá Ndiõxí, xiáⁿ ní quide-xi sá ncháá ñáyiu cùu cuendá-gã ñã túú-gã ná cumání-yu núú-gã ni caa ni quíhíⁿ.

¹⁵ Te mee Espíritú Yá Ndiõxí càháⁿ ndáá-xi nàcuáa ní cáháⁿ-gã cuendá-ó, te duha ní cáháⁿ-gã:

¹⁶ Sáá nduu te cada-í nchaa ñáyiu nàcuáa na càháⁿ-í-a, te cada-í nàcuáa cutnùní iní-yu tñúhu sá dánhé-í-yu tñúhu sá cánúichi ñaha xii-yu nàcuáa cadá-yu cundecú-yu, te cada tucu-í sá tñíⁿ-yu nchaa tñúhu-áⁿ.

Duha ní cachí-gá.

¹⁷ Te ní cachí tucu-gá:

Te vá ííⁿ ndùu ííⁿ quíú-gá ndacu iní-í sá quidé sáá iní-yu tnúhu-í, te ni vá ííⁿ ndùu ííⁿ quíú-gá te ndacu iní-í nchaa sá cuèhé sá dúhá quidé-yu. Duha ní cáháⁿ Yá Ndiòxí cächí Espíritú-gá.

¹⁸ Te sá dúcáⁿ quide cahnu iní Yá Ndiòxí nchaa cuéchi-o, núu xíáⁿ ñá túú-gá xíní ñuhu-xi cuú quiti nduu táhú-gá cuèndá nchaa sá cuèhé sá dúhá quide-o.

Tàú-ó sá tnahá tnúhu-o ndìhi Yá Ndiòxí

¹⁹ Te cue dútú ní xóo cunuu núú ñáyiú isráèl cue téé-áⁿ ní xóo quíhu-güedé xití cuártú ní cuu íí víhí-gá. Dico nchoo cuè ñáyiú ndècu ichi Xítóhó Jesucristú vitna tàú-ó sá ní yuhu ni iní-ó tnahá tnúhu-o ndìhi Yá Ndiòxí. Te cuu tnahá tnúhu-o ndìhi-gá chi Xítóhó Jesucristú ní sati níñí-gá te ní xíhí-gá núú cùrúxí.

²⁰ Te cada iní-ó sá dóó sá ní xíndedí nàcuáa ní xóo quíhu-güedé xití cuártú ní cuu íí víhí-gá-áⁿ ní xóocuñí, te ducaⁿ càda iní-ó chi Xítóhó Jesucristú ní xíhí-gá cuèndá nchoo níhí-ó nàcuáa cada-o ngündecu váha-o sá cúú-xí-gá.

²¹ Te ñu-gá cúú-gá Yáá cúú dútú-ó, te ñu-gá cúú-gá Dútú cùnùu ndecu-gá núú ndécú Yá Ndiòxí.

²² Núu xíáⁿ xíní ñuhu-xi sá ío tnahá tnúhu-o ndìhi Yá Ndiòxí, te vá cání ííⁿ caní úú iní-ó, te ío váha quíndáá iní-ó-gá chi ñu-gá ní ndada ndoo ní ndada nine-gá iní-ó cuèndá nchoo cùtnuní iní-ó sá ñá túú-gá cuéchi-o ndècu núú-gá. Te ní sandute-o cuèndá sá dúcáⁿ ní nduu ndoo ní nduu nine iní-ó.

²³ Te nchoo cáháⁿ ndáá-ó sá ndécú ndìhi-o tnúhu ndee iní sá ndúú táhú-ó cùndecu ndìhi-o Yá Ndiòxí, te xíní ñuhu-xi sá vá dáñá ndèé-ó càncicúⁿ nihnu-o tnúhu ndee iní-áⁿ chi Yá Ndiòxí cada-gá nàcuáa ní cachí-gá sá cúú-xí-ó.

²⁴ Te xíní ñuhu-xi cuhuⁿ iní tnahá-ó te chindee tnahá-o nacuáa ducaⁿ cùu iní tnahá-gá-ó, te cada-o mèe-ni sá váha.

²⁵ Te nchoo vá dáñá ndèé-ó nàtacá-ó núú dácuaⁿha-o tnúhu Yá Ndiòxí, te vá cádá-ó dàtná xíquide davá-yu ñá túú-gá cuíní-yu quixí-yu núú dácuaⁿha-o tnúhu-gá. Chi xíní ñuhu-xi sá cuáha tnahá-o tnúhu ndee iní canchicúⁿ nihnu-o ìchi-gá, te uuⁿ-gá ducaⁿ tàú-xi cada-o vitna ta cuyatni nduu quixi tucu Xítóhó Jesucristú ñuyúú-a.

²⁶ Te cue ñáyiú sa ní tecú tnùní nàcuáa cáháⁿ tnúhu Yá Ndiòxí te núu na ngúíta-yu ñucùuⁿ cadá-yu nándi sá cuèhé sá dúhá, te áúⁿ nã cuu ní xíhí Xítóhó Jesucristú cuèndá-yu, te ni vá yóo ííⁿ-gá cuú cuèndá sá vá cùndecu-gá cuéchi-yu núú Yá Ndiòxí.

²⁷ Te núu ducaⁿ na cadá-yu nándi sá cuèhé sá dúhá, te ío quíyùhú iní-yu nàcuáa cada ñaha Yá Ndiòxí xíi-yu. Chi nchaa ñáyiú cùu úhú iní ñáhá xíi-gá daquíhíⁿ ñáhá-gá xíi-yu núú ñùhú núú càyú núú ío ndohó-yu.

²⁸ Te nchaa ñáyiú ní xóo daquèe tíhú tnúhu ní cáháⁿ ndí Moisés, te núu ndècu úú àdi úní ñáyiú cãháⁿ ndáá sá dúcáⁿ ní dáquéé tíhú-yu tnúhu ní cáháⁿ ndí, te vá yóo ní xóo cundàhú iní ñáhá xii nchaa ñáyiú ducaⁿ ní xóo cada chi ní xóo cahni ñaha-güedé.

²⁹ Te núu ducaⁿ ní ndoho cue ñáyiú ducaⁿ ní dáquéé tíhú tnúhu ní cáháⁿ ndí Moisés-áⁿ, te uuⁿ-gá ndoho cue ñáyiú dàquèe tíhú ñáhá xii Xítóhó Jesucristú Yáá cúú Dèhe Yá Ndiòxí ñu-ni ñáyiú cächí sá ñá túú nàndìhi níñí-gá. Te níñí-gá-áⁿ ní sati, te ní xíhí-gá, te ducaⁿ ní cuu cuèndá cada Yá Ndiòxí íngá núú sá váha sá cúú-xí nchòo ñáyiú ndècu ñuyúú-a dàtná ní cachí-gá cada-gá.

Te diu-ni cuendá níñí-gá-áⁿ ní nduu ndoo ní nduu nine iní cue ñáyiú-áⁿ ní cùu, te diu-ni ñáyiú-áⁿ càháⁿ úhú-yu Espíritú Yá Ndióxi sá chindèe chitúu ñaha xii-o.

30 Te nchoo sà naha-o sá Yá Ndióxi càchí-gá ìⁿ xichi núú tütú-gá: “Yúhú cada-í te nacháhu ñáyiú nchaa sá quidè-yu, te duha càháⁿ-í chi nachinaa-í cuendá nchaa sá quidè-yu-áⁿ”, duha càchí-gá. Te sa nàha tucu-o nacuaá càháⁿ-xi núú tütú-gá núú càchí-xi: “Yá Ndióxi cada ndáá-gá cuendá nchaa sá quidè ñáyiú cùu cuendá-gá”, duha càchí-xi núú tütú-gá.

31 ;Te ío ndàhú ndoho cue ñáyiú na dàndoho ñaha Yá Ndióxi, te diu-gá cúú-gá Yaá cúnúu nchaa nduu nchaa quíú!

32 Te chí dándàcu iní nàcuáa ní quide-ndo cùtnàhá vitna cuu saa ní tecú tnùn-ndó tnúhu Yá Ndióxi, chí dàv-áⁿ ní quide càhmu iní-ndó cuèi nándi sá ní yáha-ndo cuendá-gá.

33 Te dava-ndo ní quide úhú ñáhá ñáyiú xii-ndo núú chítú núú tàcá, te nándi tnúhu cuèhé tnúhu duha ní xáháⁿ-yu xii-ndo. Te dava-ndo ní cuyiⁿ-ni-ndo ní xíndecu ndíhi tnàha-ndo cuèi nándi ní ndoho dava-gá-ndó.

34 Te ní cundàhú iní-ndó cuè ñáyiú yíhi vecaá, te cuèi ní quendeé ñáyiú sá ndécú ndíhi-ndo dico ñá túú ní ndíhú iní-ndó chí ní cudíⁿ-ni iní-ndó. Te ducaⁿ ní quide-ndo chí sa nàha-ndo sá ndúú táhú-ndó sá ío-gá vaha, te xiáⁿ cundecu ndíhi-ndo ní caa ní quíhíⁿ.

35 Te xiáⁿ vá dàñá ndéé-ndó quindáá iní-ndó nàcuáa ní cachí Yá Ndióxi cada ñaha-gá xii-ndo, chí sáá nduu te ío vaha cada ñaha-gá xii-ndo.

36 Te nchòhó xíní ñùhu-xi ío cada ndee iní-ndó càda-ndo nchaa nacuaá càháⁿ Yá Ndióxi, te ducaⁿ te nduu táhú-ndó sá ní cachí-gá nduu táhú-ndó cundecu ndíhi-ndo ní caa ní quíhíⁿ.

37 Te Yá Ndióxi càchí-gá núú tütú-gá: Ta cùyatni vií-nà nduu quixi Yaá quixi ñuyúú-a, te vá cùyàa-gá.

38 Te nchaa ñáyiú cundáá núú-í ñá túú dàña ndeé-yu sàndáá iní ñáhá-yu xii-í, te cuendá xiáⁿ cundecu-ní-yu ichi-í, dico núu na dàñá-yu ichi-í te vá cúú vaha iní-í núú-yu. Duha càchí Yá Ndióxi núú tütú-gá.

39 Dico nchoo chí ñá túú cùu-o ñáyiú ducaⁿ xíquide dàñá-ó ichi Yá Ndióxi, chí cùu-o ñáyiú nchicúⁿ nihnu-ni sàndáá iní-ó-gá, te sá ducáⁿ te nduu táhú-ó cundecu-o ndíhi-gá ní caa ní quíhíⁿ, te ñá túú cùu-o ñáyiú dàña nihnu ichi-gá te xíta nihnú-yu.

11

Ñáyiú sàndáá iní ñáhá xii Yá Ndióxi

1 Te núu sàndáá ndisa iní-ó Yá Ndióxi te ducaⁿ cùtnuní ndáá iní-ó sá nihí-ó sá cuní-ó núú-gá. Te núu sàndáá iní-ó-gá te ducaⁿ cùtnuní ndáá tucu iní-ó sá càháⁿ ndáá-gá cuendá nchaa sá ñà túú xìní-ó.

2 Te ducaⁿ ní quide ñáyiú ní xíndecu ndéé sanaha ío ní sàndáá iní-yu Yá Ndióxi te xiáⁿ núu ío vaha ní cuu iní ñáhá-gá xii-yu.

3 Te núu nchoo sàndáá ndisa iní-ó Yá Ndióxi te cùtnuní ndáá iní-ó sá sá cuendá tnúhu ní càháⁿ-gá ní cuáha andíu ndíhi ñuyúú-a. Te cùtnuní iní-ó sá ñà díú sá cuendá ìⁿ sá tūu ndèhe-o ío ñuyúú-a ní cuáha andíu ndíhi ñuyúú-a.

4 Te ndíi Àbél ío ní sàndáá iní ndíi Yá Ndióxi núu xiáⁿ ío-gá ní cuu iní-gá sá ní sáñaha ndíi ní nduu táhú-gá dàcúúxí sá ní sáñaha ndíi Cáin xii-gá ní nduu

táhú-gã. Te ndíi Àbél-án nǐ cutnùnǐ iní ndíi sá nǐ cudíu ndíi núú Yá Ndiòxí cuèndá sá nǐ queheⁿ cuèndá-gá sá nǐ sáñaha ndíi ní nduu táhú-gã. Te cuèi ñá túú-gã ndíi ndècu ñuyíú-a dico yòdo tnuní sá nǐ sándáá iní ndíi Yá Ndiòxí cuèndá ducaⁿ càda-o canchicúⁿ nihnu-o.

5 Te té Ènóc téé ní xíndecu ndéé sanaha ñà túú ní xíhí-dé chi ní nacuaca ñaha túu Yá Ndiòxí xii-dé cuèndá sá nǐ sándáá iní ñáhá-dé xii-gã. Te vá yòo ní nànihí ñáhá xii-dé chi mee-gã ní nacuaca ñaha-gã xii-dé. Te núú tùtù Yá Ndiòxí càchí-xi sá cùtnàhá vátá nàcuàca ñaha-gã xii té Ènóc, te ní quide-dé mee-ni nàcuáa ní cuu váha iní ñáhá-gã xii-dé.

6 Te nchaa ñáyiu ñá túú sándáá iní ñáhá xii Yá Ndiòxí ñá ndácú-yu cadá-yu nàcuáa cudíú-yu núú-gã, chi nchaa ñáyiu cuiní tuha ñaha xii-gã xíní ñùhu-xi sá quíndáá iní-yu sá ndécú-gã, te quíndáá iní-yu sá ñuu na nànducu nihnu ñáhá-yu xii-gã te cuáñaha-gã xii-yu sá ndúú táhú-yu.

7 Te Yá Ndiòxí ní dátùha-gã ndíi Nöé nchaa nàcuáa cada-gã. Te ní quide ndíi nchaa nàcuáa ní xáhaⁿ Yá Ndiòxí cada ndíi, te ní cadúha ndíi ñⁿ bàrcú cuèndá xití bàrcú-án quèe ndíi ndíhi nchaa ñáyiu vehe ndíi cuèndá cácu nihnú-yu. Te ducaⁿ nǐ quide ndíi chi ní sándáá iní ndíi Yá Ndiòxí. Te sá dúcáⁿ nǐ sándáá iní ndíi-án Yá Ndiòxí xíáⁿ ní cutnùnǐ sá ncháá ñáyiu ío ndècu cuèchi-yu, chi ñá túú ní cànchicúⁿ nihnú-yu cadá-yu nàcuáa ní quide ndíi. Te sá dúcáⁿ nǐ quide ndíi ní sándáá iní ndíi Yá Ndiòxí xíáⁿ ío ní cundáá ndíi núú-gã.

8 Te Yá Ndiòxí ní xáhaⁿ-gã xii ndíi Àbrahám sá quée ndíi ñuu núú ndécú ndíi quíhíⁿ ndíi ñngá xichí cundecu ndíi. Te ní quide ndíi nàcuáa ní xáhaⁿ Yá Ndiòxí chi ní quee ndíi cuáháⁿ ndíi núú cuáñaha Yá Ndiòxí cundecu ndíi. Te òré ní quee ndíi núú ndécú ndíi te ñá túú ní cutnùnǐ iní ndíi ndéé cúu núú cuáháⁿ ndíi cundecu ndíi. Te ducaⁿ nǐ quide ndíi chi ní sándáá iní ndíi Yá Ndiòxí.

9 Te sá dúcáⁿ nǐ sándáá iní ndíi Yá Ndiòxí ñuu xíáⁿ ní xíndecu ndíi núú nǐ sáñaha-gã cundecu ndíi, te cuèi ducaⁿ dico ñá túú ní quide ñuu ndíi xíáⁿ. Te ní xóo cundecu ndíi vehe cùtexínu vehe dóó. Te díu-ni ducaⁿ nǐ quide ndíi Isáác ndíhi ndíi Jàcób chi tnàhá cue ndíi-án nǐ cachí Yá Ndiòxí sá ndúú táhú cue ndíi xíáⁿ cundecu cue ndíi.

10 Te ducaⁿ nǐ quide ndíi Àbrahám chi ní xíndetu ndíi ndéé ní sáá nduu ndùu táhú ndíi cundecu ndíi núú ndécú Yá Ndiòxí. Te núú ndécú-gã-án cúú-xí ñuu ní cadúha mee-gã, te ñuu-án cudíi-xi ní caa ní quíhíⁿ.

11 Te ndíi Sàrá, sa ní xídó cuíá ndíi sá cóó dèhe ndíi chi sa ní sahnu vñhi ndíi, dico Yá Ndiòxí ní quide-gã te ní xóo ñⁿ déhe ndíi. Te ducaⁿ chi ní sándáá iní ndíi Yá Ndiòxí te ní cutnùnǐ ndáá iní ndíi sá cadá-gã nàcuáa ní xáhaⁿ-gã xii ndíi.

12 Te cuèi ío ní sahnu ndíi Àbrahám ndíhi ñadhíⁿ ndíi, ndíi Sàrá dico dacuitíⁿ nǐ nduu táhú-yu ní xóo ñⁿ déhe-yu. Te xíáⁿ núu ío cuéhé ndíquínⁿ yává ndíi Àbrahám ní cáyá dàtná cuéhé chòdíní ndèè andíu, ndíhi dàtná cuéhé ñuhu cùchí làmár, chi ní vá yòo ñⁿ ndacu cahu ñaha xii-yu sá cuèhè-yu.

13 Te cue ndíi-án ducaⁿ-ni ní sándáá iní cue ndíi Yá Ndiòxí ndéé ní sáá nduu nǐ xíhí cue ndíi. Te cue ndíi-án ñá túú ní ndùu táhú cue ndíi quíní cue ndíi nchaa nàcuáa ní cachí Yá Ndiòxí cada-gã, dico ní cutnùnǐ ndáá iní cue ndíi-án nàcuáa cada-gã núú cuáháⁿ núú vèxi. Te ío ní cudíi iní cue ndíi, te ní cachí cue ndíi sá dicó-ni ichi yáha cue ndíi ñuyíú-a, chi ñá díú ñuyíú-a cundecu ducaⁿ cue ndíi.

14 Te sá dúcáⁿ ndùu tnúhu ní cáháⁿ cue ndíi-án, xíáⁿ ní cutnùnǐ sá cuíní cue ndíi ñngá xichí núú cundècu cue ndíi.

15 Te ni ñà dǎú ñúú núú nǐ quee cue ndíi ni cuíní cue ndíi núhú cue ndíi. Chi núú ducaⁿ ni sàni iní cue ndíi te núhú cue ndíi ni cùu.

16 Dico ñáhá chi cuíní cue ndíi quíhíⁿ cue ndíi ìⁿ xichi núú vǎha-gá cáá cùndecu cue ndíi. Te núú dúcáⁿ ìo-gá vǎha càa-ánⁿ cúu-xí ñúú núú ndécú Yǎ Ndióxi, te sá dúcáⁿ nǐ sani iní cue ndíi xiǎⁿ núu ío vǎha cùu iní Yǎ Ndióxi càhí-gá sǎ ñà túú cùcahaⁿ núú-gǎ cúu-gǎ Ndióxi cue ndíi-ánⁿ, te cùtnuní iní-ó sǎ ndàá sá dúcáⁿ càháⁿ-gá chi ní quide túha-gá ìⁿ xichi núú cùndecu cue ndíi-ánⁿ.

17 Te ndíi Àbrahám ní xǐndecu ìⁿdíi-ni déhe ndíi ndíhi ñadíhí ndíi, te cùtnàhá ní xito ndéé ñáhá Yǎ Ndióxi xii ndíi ní xícáⁿ-gá déhe ndíi, ndíi Isàac cuendá nduu táhú ñáhá-gá xii ndíi. Te ní xáhaⁿ ndíi sá cúu nduu táhú-gǎ déhe ndíi, te ducaⁿ nǐ quide ndíi chi ní sándáá iní ñáhá ndíi xii-gá. Te sa ndecu túha ndíi sá cuñaha ndíi déhe ndíi xii-gá cuèi mee Yǎ Ndióxi ní xáhaⁿ ndàá-gá xii ndíi

18 sá sǎ cuendá ndíi Isàac te ngùndecu cue ñani tnáhá ndíi.

19 Te sá ducaⁿ nǐ quide ndíi Àbrahám, chi ní cutnùní ndáá iní ndíi sá Yǎ Ndióxi ndácú-gǎ dándoto-gá cuèi ñáyiu sa ní xíhí. Te sá dúcáⁿ nǐ xáhaⁿ ndíi xii Yǎ Ndióxi sá cúu nduu táhú-gǎ déhe ndíi, te xiǎⁿ cada iní-ó sǎ sǎ ní xíhí ndíi Isàac te ní ndoto tucu ndíi ní nucùndecu ndíi ndíhi tǎtá ndíi, ndíi Àbrahám.

20 Te ndíi Isàac ní xícáⁿ táhú ndíi núú Yǎ Ndióxi cuendá sá cáda vǎha-gá cue déhe ndíi, ndíi Jàcób ndíhi ndíi Esàú núú cuaháⁿ núú vèxi. Te ducaⁿ nǐ quide ndíi chi ní sándáá iní ndíi Yǎ Ndióxi.

21 Te sa ta cùyatni-ná nduu cùu ndíi Jàcób, te ní xícáⁿ táhú ndíi núú Yǎ Ndióxi cuendá cue déhe ñani ndíi déhe ndíi Chèé. Te yituu-ná ndíi tatnu ndíi ní chiñuhu ndíi Yǎ Ndióxi. Te ducaⁿ nǐ quide ndíi chi ní sándáá iní ñáhá ndíi xii-gá.

22 Te cùtnàhá sa ta cùyatni vií-nǎ nduu cùu ndíi Chèé, te ní cachí ndíi sá cuè ñáyiu isràél sáá nduu quèé-yu núú xǐndecú-yu-ánⁿ. Te ní cáháⁿ tucu ndíi nàcuáa cadá-yu yiquí cùnú ndíi na sáá nduu quèé-yu núú ndécú-yu-ánⁿ. Te ducaⁿ nǐ quide ndíi chi ní sándáá iní ndíi Yǎ Ndióxi.

23 Te cùtnàhá ní cacu ndíi Moisés te ní chiváha ñaha nǎná ndíi ndíhi tǎtá ndíi úní yóó. Te ducaⁿ nǐ quide cue ndíi-ánⁿ chi ní sándáá iní cue ndíi Yǎ Ndióxi. Te ní quide cuendá cue ndíi-ánⁿ sǎ ìo vǎha càa ndíi Moisés déhe cue ndíi, te ñà túú ní yùhú cue ndíi nàcuáa ní cáháⁿ tée cùu Faraón sá cáhni-dě cue landú.

24 Te sáta nǐ sahnu ndíi Moisés te duuⁿ duuⁿ ní cachí ndíi sá vǎ càháⁿ ñáyiu sá dèhe yoco tée cùu Faraón cúu nǎná ndíi. Te ducaⁿ nǐ quide ndíi chi ní sándáá iní ndíi Yǎ Ndióxi.

25 Te ducaⁿ nǐ quide tucu ndíi chi ní tnahá-gá iní ndíi ndoho ndíi ndíhi nchaa ñáyiu cùu cuendá Yǎ Ndióxi dàcúxí sǎ cùdǎí iní ndíi cundecu tnaa ndíi ichi cuèhé ichi duha.

26 Chi ní sani iní ndíi sá vǎha-gá ndoho ndíi cúcuèhé ñáhá cuè ñáyiu xii ndíi sá cuendá Yaá quixi ñuyú-a dàcúxí sǎ cùndecu ndíhi ndíi nchaa sá ìo Ègiptú. Te ducaⁿ nǐ quide ndíi chi ní xúhuⁿ iní ndíi sá Yǎ Ndióxi cuñaha-gǎ sá ndúú táhú ndíi.

27 Te ndíi Moisés ní quee ndíi nàcióⁿ Ègiptú te ñà túú ní quide cuendá ndíi sá ìo cùdèéⁿ tée cùu Faraón núú ndíi. Te ducaⁿ nǐ quide ndíi chi ní sándáá iní ndíi Yǎ Ndióxi. Te ní quide càhnu iní ndíi cuendá nchaa sá nǐ yáha ndíi, te ní quide iní ndíi sá Yǎ Ndióxi ndécú ndíhi ñaha túu-gá xii ndíi cuèi ñà túú ní xini núú ñáhá ndíi xii-gá. Te ducaⁿ nǐ sani iní ndíi chi Yǎ Ndióxi ndécú ndíhi ñaha-gá xii ndíi.

28 Te ndii Moisés cúu ndii téé ní tausaha ní quide vico pàscuá ndihi cue ñáiyu isráel, te dàvá-án ní táuchíúⁿ ndii ní sahní-yu mbéé te níñi quiti-áⁿ ní dácánúu-yu yuyehé-yu. Te ducaⁿ ní quide ndii chi ní sándáá iní ndii Yá Ndióxi. Te ducaⁿ ní quide tucu ndii cuèndá sá espíritú sá ní tendaha Yá Ndióxi cahni-xi mee-ni déhe téé déhe díhna cue ñáiyu Ègíptú, te vá cáhni-xí ní ñⁿ déhe cue ñáiyu isráel.

29 Te ndute lámár sá nání Măr Tícuèhé ní quée dava-xi ní natúu ñuhu yìchí ní níhí ní yáha cue ñáiyu isráel. Te ducaⁿ ní cuu chi ní sándáá iní-yu Yá Ndióxi. Te cue téé Ègíptú tñhá-güedé nchìcúⁿ-güedé cuáháⁿ dico ñá túú ní ndàcu-güedé yáha-güedé chi ní ndihi-güedé ní cáhá.

30 Te cue ñáiyu isráel ní dúcúⁿ ndèé-yu úsá nduu ñuu Jericò te ní ngoyo nchaa sá ñúdòco. Te ducaⁿ ní cuu chi ní sándáá iní-yu Yá Ndióxi.

31 Te ñⁿ ñaha ní xíndecu ichi díí iní ní xínani-aⁿ Ràháb, ñaha-án ñá túú ní xíhí-aⁿ dàtná ní xíhí nchaa ñáiyu ío ní cuu sàá iní-xi núú Yá Ndióxi, chi ní cuu váha iní-aⁿ núú cue téé ní tendaha cuè ñáiyu isráel ní sángoto dayuhu ñúu-aⁿ. Te ducaⁿ ní quide-aⁿ chi ní sándáá iní-aⁿ Yá Ndióxi.

32 Te núu dicò sá cúú te cáháⁿ-í cuèndá ndii Gedèón, ndihi cuèndá ndii Bàrác, ndihi cuèndá ndii Sànsón, ndihi cuèndá ndii Jèfté, ndihi cuèndá ndii Dàvií, ndihi cuèndá ndii Sàmuel, ndihi cuèndá nchaa cue téé ní xóo cáháⁿ tñúhu Yá Ndióxi ndéé sanaha, te nchaa cuèndá cue téé-án cáháⁿ-í te núu dicò cùyáchí-í dico ñá túú cùyáchí-í.

33 Te nchaa cue ndii-án ní sándáá iní cue ndii Yá Ndióxi nñu xíáⁿ ní xóo ndacu cue ndii ní xóo nàá cue ndii ndihi nchaa ñáiyu dava-gá ñuu. Te nchaa ñáiyu-án ñá túú ní xóo ndacú-yu nàá-yu ndihi cue ndii, te ní xóo cada cue ndii nchaa nàcuáa tàú-xi cunduu, te ní quide váha ñaha Yá Ndióxi xii cue ndii dàtná ní cachí-gá cada ñaha-gá xii cue ndii. Te cuèi nchaa cue quiti dééⁿ ñá túú ní ndàcu-güedé ná cada ñaha-güedé xii cue ndii.

34 Te ní xóo ndacu cue ndii ní xóo ndahvá cue ndii ñuhú sá vā yō tñàhí ndàcu ndahvá, te ní cácu cue ndii vá yō ní ndàcu cahni ñaha xii cue ndii. Te cue ndii-án ñá túú níhí ndéé cuè ndii ní cùu, dico ní níhí ndéé cuè ndii chi Yá Ndióxi ní chindee ñaha-gá xii cue ndii, te nchaa ndii-án ío ní níhí ndéé cuè ndii ní nàa cue ndii ndihi nchaa ñáiyu ní cuu úhú iní ñáhá xii cue ndii, te nchaa ñáiyu ducaⁿ ní xóo nàá ndihi cue ndii-án ñá túú ní xóo ndacú-yu nàá ndihi ñáhá-yu xii cue ndii chi ní xóo cunú-yu. Te ducaⁿ ní cuu chi ní sándáá iní cue ndii Yá Ndióxi.

35 Te dava ñáiyu díhí ní nduu táhú-yu ní ndoto cue ñáiyu ní xíndecu ndihí-yu ní nucúndecu ndihi ñaha tucú-yu.

Te dava ñáiyu ío ní dándóhó ñaha tñaha ñáiyú-yu te ní xíhí-yu, dico ñá túú ní dàñá-yu ichi váha nàcuáa cácu níhnú-yu núú tñaha ñáiyú-yu, te ducaⁿ chi ní cuini-yu sá ndótò-yu ndéé cuèé-gá nàcuáa ngúndecu váha-yu núú ndécú Yá Ndióxi.

36 Te dava cue ndii ío ní ndoho cue ndii chi ío ní cudíquí ndéé ñáhá ñáiyu xii cue ndii, te ní canihá-yu xii cue ndii, te dava cue ndii ní dácútú ñáhá-yu, te ní chíhí ñáhá-yu xii cue ndii vecaá.

37 Te dava cue ndii ní sahní ñáhá-yu ndihi yúú. Te dava cue ndii ní chidava ndáá ñáhá-yu ní xehndé ñáhá-yu ndihi sièrrá. Te dava cue ndii ní xito ndéé ñáhá-yu te núu ndisa sá sándáá iní cue ndii Yá Ndióxi, te dava cue ndii ní sahní ñáhá-yu ndihi machítí. Te mee-ni ññi mbéé ndihi ññi chivá, ní xóo cuu dóo cue ndii. Te mee-ni ññi cue quiti-án ní xóo cuu dóo cue ndii cuèi ndèni ní cuu ní

xóo çaça cuu cue ndíi. Te mee-ni cuè téé ndàhú ní cuu cue ndíi. Te ío ní xóo dandihú-yu iní cue ndíi, te nándi sá ní xóo cada ñahá-yu xii cue ndíi ní xóo dandòho ñahá-yu.

³⁸ Te cue ndíi-án ïo-gá ní xínduu váha iní cue ndíi dàcúúxí nchàa dava-gá ñáyiu. Te nchaa cue ndíi-án ní xica cuu cue ndíi cuèi nchaa núú ñà túú vǎ yóo tñàhí ndècu, te cuèi xití yucu ní xica cuu cue ndíi. Te ní xóo cada vehe cue ndíi nchaa yaú cava. Te ndèni ní cuu nchii yaú ní xóo cundecu cue ndíi.

³⁹ Te ío ní cudíu cue ndíi núú Yǎ Ndiòxí cuendá sá ní sàndáá iní ñahá cuè ndíi xii-gá. Te cuèi ducaⁿ ní quide cue ndíi dico ñá túú ní xini cue ndíi nchaa sá ní cachí Yǎ Ndiòxí cada-gá.

⁴⁰ Te ducaⁿ ní cuu chi ìⁿ sá ïo-gá váha ní cachí Yǎ Ndiòxí cada-gá. Te sá dúcáⁿ ïo-gá váha ní cachí-gá cada-gá cúú-xí cuendá nchoo ndíi cuendá cue ndíi-án cuendá sá ñà díú mèe-ni cue ndíi-án cundáá cue ndíi núú-gǎ, chi tñahá nchoo cundáá-ó núú-gǎ.

12

Ío cuhuⁿ iní-ó Xítóhó Jesucristú

¹ Te cue ñáyiu ní xíndecu ndéé sanaha ní quidé-yu nàcuáa ní cutnùni sá ní sàndáá iní-yu Yǎ Ndiòxí. Te cada iní-ó sǎ ncháá ñáyiu-án xíndéhé ñahá-yu xii-o vitna. Núú xiǎⁿ xini ñuhu-xi sǎ vǎ cáda-ó nì ìⁿ sǎ cuèhé sǎ dúhá chi ðiu nchaa xiǎⁿ quidé-xi ñà túú cundáá-ó núú Yǎ Ndiòxí. Te vǎ cáda cuendá-ó nchàa sǎ quidé tñèñu iní-ó nàcuáa ndacu-o càda-o nchaa nacuáa càháⁿ-gá. Te ío càhnu cunduu iní-ó càncichúⁿ nihnu-o càda-o nchaa nacuáa ní cachí-gá cada-o cundecu-o ñuyú-a.

² Te ío cuhuⁿ iní-ó Xítóhó Jesucristú, chi ðiu-gá ní quide ní sàndáá iní-ó Yǎ Ndiòxí, te ðiu-ni ducaⁿ quide-gá cuèi vitna te cuèi ndéé núú cuaháⁿ núú vèxi ðiu-ni ducaⁿ càda-gá sǎ quindáá iní-ó Yǎ Ndiòxí. Te Xítóhó Jesucristú ío ní quide ndee iní-gá ní ndoho-gá te ní xihí-gá núú cùrúxí, te ñá túú ní quide cuendá-gá cuèi ìⁿ sácáⁿ núú cúú-xi sǎ dúcáⁿ ní ndoho-gá. Te ducaⁿ ní quide-gá chi sa nàha-gá sǎ ná yǎha sǎ dúcáⁿ ndòho-gá te ío cudíi iní-gá. Te vitna núcòo-gá xio cùha núú núcòo Yǎ Ndiòxí te tàxi tñuní-gá.

³ Te xini ñuhu-xi sǎ ïo cada cuendá-ndó nàcuáa ní quide Xítóhó Jesucristú chi Yáá-án ïo ní quide càhnu iní-gá nchaa sǎ ní ndoho-gá ní quide ñaha nchàa ñáyiu ndècu ichi cuehé ichi duha xii-gá. Te ducaⁿ càda cuendá-ndó nàcuáa ní quide-gá cuendá sǎ vǎ tūu dusaⁿ-ndo, te ni vǎ nátùhú iní-ndó càda-ndo nchaa nacuáa càháⁿ-gá.

⁴ Te nchòhó dáquèe tihú-ndó nchàa sǎ cuèhé sǎ dúhá dico vátá cáhni ñàha-gá-yu xii-ndo sǎ dúcáⁿ quide-ndo.

⁵ Te ndacu iní-ndó nàcuáa càháⁿ Tátá-ó Dùtú Ndiòxí dásàhú ñahá-gǎ xii nchoo cuè ñáyiu cùu déhe-gá. Te duha càchí-gá núú tütú-gá:

Nchòhó cue déhe mee-ì, vǎ cáni iní-ndó sǎ àúⁿ nǎ cuu dándoho ñaha-í xii-ndo, te ni vǎ nátùhú iní-ndó òré càháⁿ-í dóho-ndo nàcuáa cada-ndo cundecu-ndo.

⁶ Chi mee-ì dándòho-í nchaa ñáyiu cùu iní-í cuendá sǎ cundáá-yu núú-í, te quide úhú-í-yu, te ðiu-ní-yu cùu-yu ñáyiu càchí-í cúú déhe-í.

Duha càchí-gá núú tütú-gá.

⁷ Te ío cada ndee iní-ndó sǎ dúcáⁿ dándoho ñaha Yǎ Ndiòxí xii-ndo, chi quide-gá sǎ cúú-gǎ Tátá-ó. Te ñá túú nì ìⁿ téé cùu tátá te cachí-ó sǎ ñà túú sànu ichi-dé cue déhe-dé nàcuáa tàú-xi cunduu.

8 Te núu Yá Ndióxi ñá túú dàndoho ñaha-gá xii-ndo dàtná dándòho-gá cue ñáyiú càchí-gá cúú dèhe-gá, te ñá díú dèhe mee-gã cúú-ndó te núu ducaⁿ, chi cùu-ndo datná cue ñáyiú ñá túú cùtnuní yoo cùu tátá-xi.

9 Te nchoo sà naha-o sá cùtnàhá ní cuu landú-ó ní sanu ichi ñaha tátá-ó nàcuáa tàú-xi cunduu, te ducaⁿ ní xóo canehe-o sá yíñuhu núú-güedè te ñi-u-ni ducaⁿ nèhe-o sá yíñuhu núú-güedè vitna. Te núu ducaⁿ ní sándáá iní-ó tátá-ó, te ío-gá xíní ñuhu-xi quíndáá iní-ó Tátá-ó Dütú Ndióxi cuendá ducaⁿ nduu táhú-ó cùndecu-o ndihi-gá ní caa ní quíhíⁿ, chi ñi-u-gá cúú-gã Yaá ní chihí iní-ó.

10 Te cùtnàhá ní cuu landú-ó, ñá túú títí nduu ní càniha tátá-ó ní sanu ichi ñaha-güedè xii-o nàcuáa ní cuu iní méé-güedè. Te Yá Ndióxi ducaⁿ dàndoho ñaha-gá xii-o sànu ichi ñaha-gá cuendá cúú-xí sã vãha sá cúú-xí-ó, te ducaⁿ quide-gá cuendá nchoo càda ndáá-ó dàtná quidé mèe-gá.

11 Te óré véxi ñⁿ tnúndòho sá cúú-xí-ó te ñá túú cùdíí iní-ó chi dándihú iní ñáhá-xí xii-o. Te nchaa ñáyiú ngúnu ichi sá cuendá nchaa tnúndòho-áⁿ te ngüita-yu quide ndáá-yu, te ío vãha cùu iní-yu ndécú-yu.

Vá dáquèe tihú-ó tnũhu Yá Ndióxi

12 Te núu xiãⁿ ío chí ndúcú ndèe-gá canchicúⁿ nihnu-ndo ìchi Xítoho Jesu cristú, te vá díco yica cùu iní-ndó cànchicúⁿ nihnu-ndo ìchi-gá.

13 Te cada vãha-ndo cùndecu-ndo ichi-gá cuendá nchaa ñáyiú sàni ñⁿ sàni úú iní-xi níhí ndèè-yu cundecú-yu ichi-gá te vá ná tũhú iní-yu canchicúⁿ nihnú-yu.

14 Te nducu-ndo nàcuáa cada-ndo cùndecu vãha-ndo ndihi cue tñaha ñáyiú-ndo, te ío cada vãha-ndo cùndecu-ndo nacuáa cundáá-ndó núú Yá Ndióxi chí núu vá dúcáⁿ càda-ndo te vá ndúú táhú-ndó cùndecu-ndo ndihi-gá.

15 Te ío vãha cada cuendá-ndó nàcuáa cada-ndo cùndecu-ndo, chí núu ñáhá te vá chíndèe ñaha-gá Yá Ndióxi xii-ndo. Te ío vãha cada cuendá tucu-ndo nàcuáa cundecu-ndo vã cání cuèhé iní-ndó cuendá Yá Ndióxi, chí núu ducaⁿ na càda-ndo te dava-gá ñáyiú ndècu ndihi-ndo ichi-gá tñahá-yu ngüita-yu ducaⁿ cadá-yu, te vá cùndècu vãha-gá-ndó ndihí-yu ichi-gá.

16 Te cada cuendá tucu-ndo sã vã cùndècu-ndo ichi díí iní, te ní vã dáquèe tihú-ndó ní ñⁿ sá cúú cuendá Yá Ndióxi dàtná ní quide ndíi Esàú, chí sá cuãñaha tátá ndíi-án nduu táhú ndíi ní cùu ní dama ndíi ñⁿ cóhó comidá.

17 Te nchòhó sa naha-ndo sá cùtnàhá ní cuiní ndíi Esàú cácáⁿ táhú tátá ndíi núú Yá Ndióxi cuendá nchaa sá ndúú táhú ndíi ní cùu, te ñá túú ní xicáⁿ táhú tátá ndíi núú Yá Ndióxi nàcuáa cuiní méé ndíi ní cùu. Te ní ndáhyú víhí ndíi, te cuèi ducaⁿ ní quide ndíi díco ñá túú ní ndàcu-gá ndíi nàníhí ndíi táhú sã ní dama ndíi comidá.

18 Te cue ñáyiú isràèl ní sátuhá-yu ñⁿ yucu núú càyú ñuhú, te nchòhó ñá túú ndèe ducaⁿ sàháⁿ tuha-ndo ñⁿ yucu núú càyú ñuhú dàtná ní quide cue ñáyiú-áⁿ. Te cùtnàhá ducaⁿ ní sátuhá-yu yucu-áⁿ te ní cunee víhí níhíi yucu-áⁿ, te ní quene táchí níhí.

19 Te ní tecú dóho-yu ní cáháⁿ ñⁿ cútú, te ní tecú tucu dóho-yu ní cáháⁿ Yá Ndióxi ní cáháⁿ ndihi ñaha-gã xií-yu. Te nchaa ñáyiú ní tecú dóho-xi ní cáháⁿ-gá te ní cuiní-yu sã vã càháⁿ-gá.

20 Te ducaⁿ ní quidé-yu chí ñá túú ní cùndee iní-yu nàcuáa ní cáháⁿ-gá, te duha ní cachí-gá: “Te cuèi ñⁿ quiti nà yáha xití yucu-a, te cahni-ndo-di ndihi yúú àdi ndihi ñⁿ yutnu puyá”, duha ní cachí-gá.

21 Te sá dúcáⁿ ní quide-xi ní xiní-yu xiǎⁿ ío ní dáyùhú ñáhá-xí xìi-yu. Te tnahá té Moisés ní yùhú-dé, te ní cachí-dé: “Quidi ñaha-xi xii-í sá yùhú-í”, duha ní cachí-dé.

22 Te nchòhó, ñá túú quide-ndo datná ní quide cue ñáyiu-áⁿ ní sáháⁿ tuhá-yu yucu-áⁿ, dico cada iní-ndó sǎ sà ní tuha-ndo yùcu Sión sá ndécú núú ndécú Yá Ndióxi, ndihí ñuú-gá ñuú Jerusalén sá cáá àndi^u te diu-gá cúú-gǎ Yaá ndécú nchaa nduu nchaa quíú. Te diu-ni xiáⁿ xíndecu cuéhé víhí cué espíritu xínú cuèchi núú-gǎ

23 chíñùhò ñaha-xi xii-gǎ. Te nchòhó cúú-ndó cué ñáyiu cùu cuendá Yá Ndióxi, te ní tnahá tnúhu-ndo ndihí nchaa dava-gǎ ñáyiu cùu cuendá-gǎ, ñáyiu yòdo tnuní núú tütú-gǎ ndécú àndi^u, te diu-ni ñáyiu-áⁿ cuañaha-gǎ xii-yu sá ndúú tǎhù-yu. Te nchòhó ní tuha-ndo Yá Ndióxi Yaá cada ndáá yícá cuèchi nchaa ñáyiu. Te cada iní-ndó sǎ ní tnahá tnúhu-ndo ndihí cue ñáyiu ní quide ndáá ní xíndecu ichi Yá Ndióxi ñuyúú-a. Te ñáyiu-áⁿ ñà túú tnahí-gǎ ná cùmǎní-yu vitna ndécú-yu núú-gǎ.

24 Te ní tnahá tnúhu-ndo ndihí Xítohó Jesucristú Yaá ní quide nàcuáa cada Yá Ndióxi ingá núú sǎ vǎha sá cúú-xí nchaa nchoo ñáyiu ndècu ñuyúú-a, chí ní sati níñí-gǎ te ní xihí-gǎ núú cùrúxí. Te níñí Xítohó Jesucristú ñá túú ñⁿ-ni cuu-xi ndihí níñí ndíi Àbél, chí diu cuendá níñí-gǎ-áⁿ ní quide càhnu iní Yá Ndióxi nchaa cuèchi-o.

25 Núu xiǎⁿ ío cada cuendá-ndó vǎ dáquèe tihú-ndó tnúhu càháⁿ Yá Ndióxi, chí nchaa ñáyiu ní xíndecu ndéé sanaha òucaⁿ ní quidé-yu ní dáquée tǎhù-yu tnúhu ní cáháⁿ-gǎ ñuyúú-a sá cúú-xí-yu. Te ñá túú ní cǎcu-yu chí ní nacháhu-yu sá dúcáⁿ ní quidé-yu. Te uuⁿ-gǎ tucu nchoo chí vǎ cǎcu-o te núu ducaⁿ na dàquee tihú-ó tnúhu càháⁿ Yá Ndióxi ndéé andi^u sǎ cúú-xí-ó.

26 Te cùtnàhá ní cáháⁿ Yá Ndióxi ndéé sanaha te ní quidi-xi ñuyúú. Te vitna càchí-gǎ: “Yúhú quidi tucu-í ingá xito ñuyúú, te ñá díú mèe-ni ñuyúú ducaⁿ quèdi-í chí tnahá andi^u quèdi-í”, càchí-gǎ.

27 Te sá dúcáⁿ càháⁿ-gǎ sǎ ìngá xito tucu ducaⁿ càda-gǎ xiǎⁿ cùtnùnì sá ncháándì tǎhù sǎ tǔu ndèhe-o danaa-gǎ. Te nchaa sǎ ñà túú ndéé tǔu quini-ó ñuyúú-a xiǎⁿ vǎ quídí-xí te ni vǎ náá-xí.

28 Te núú ní cachí Yá Ndióxi nduu tǎhù-ó cùndecu-o chí mee-gǎ táxí tnùnì-gǎ xiǎⁿ, te ni vǎ quídí-xí te ni vǎ náá-xí. Te xiǎⁿ ío xiní ñuhu-xi ndacáⁿ tǎhù-ó núú-gǎ, te yíñùhu yíñùhu cunu cuechi-o núú-gǎ nàcuáa cuu vǎha iní-gǎ, te ducaⁿ cùhuⁿ iní-ó sǎ ío càhnu cuu-gǎ.

29 Te Tǎtá-ó Dütú Ndióxi cúú-gǎ dàtná ñⁿ ñuhú chí danàa-gǎ nchaa sǎ ñà túú quide nacuáa cuu vǎha iní-gǎ.

13

Nàcuáa tàù-xi cada-o cuendá cuu vǎha iní Yá Ndióxi

1 Te nchaa nchòhó ñáyiu ndècu ichi Xítohó Jesucristú, vǎ dǎná ndéé-ndó cùu iní tnahá-ndó nàcuáa ndècu-ndo ichi-gǎ.

2 Te cunaha-ndo sǎ núu ío ñáyiu ñùhu ichi ní quexió-yu vehe-ndo te cuañaha-ndo vèhe ndetatú-yu, te cuañaha-ndo sǎ cáxí-yu. Chí davá-yu ndéé espíritu xínú cuèchi núú Yá Ndióxi ní sáháⁿ vehé-yu ní queheⁿ cuendá-yu te ñá túú ní cùtnuní iní-yu sǎ díú espíritu xínú cuèchi núú-gǎ cúú-xí.

³ Te ndacu tucu iní-ndó cue ñáyiú xixíhi vecaá, te cada iní-ndó sã tnàhá-ndó yíhi-ndo vecaá ndihí-yu. Te ndacu tucu iní-ndó nchàa ñáyiú ío ndòho, te cada iní-ndó sã tnàhá-ndó ndòho-ndo ndihí-yu.

⁴ Te nchaa ñáyiú na càchí-yu sá ñⁿ sá vâha cùu-xi sá ñⁿ tée ndihí ñⁿ ñàdihí ná nihí tnàhá-yu candeca tnàhá-yu. Te nchòhó cue tée vá cání iní-ndó cãháⁿ ndihí-ndo ñàdihí te núu ñá díú ñàdihí-ndó cùu-yu. Te ducaⁿ-ni nchòhó cue ñáyiú dñí tucu vá cání iní-ndó cãháⁿ ndihí-ndo tée te núu ñá díú yí-ndo cuu-güedé, chi Yá Ndiòxí dandòho-gá nchaa ñáyiú ndècu ichi díí ñí.

⁵ Te vá cùhúⁿ iní-ndó mèe-ni díhúⁿ. Te núu nándi cùu nchaa sá ndécú ndihí-ndo te diu-ni nchaa xiáⁿ sa nduu vétú iní-ndó, chi Yá Ndiòxí ní cachí-gá: “Ni ñⁿ nduu vá dáñá nihnu ñaha-í xii-ndo, chi nchaa-ni nduu chindee ñaha-í”, duha ní cachí-gá.

⁶ Te xiáⁿ núu nchoo ñí yuhu ñí iní-ó cãháⁿ-ó ñⁿ ñⁿ-o, te cachí-ó:

Yá Ndiòxí cúu-gã Yáa chindèe ñaha xii-í,

núu xiáⁿ ñá túú yùhú-í cuèí nándi cãháⁿ ñáyiú cada ñàhá-yu xii-í.

Duha cachí-ó.

⁷ Chí ndácú ñí cue tée ní sanu ichi ñaha xii-ndo ichi Xítohó Jesucristú cue tée ní cãháⁿ tnúhu Yá Ndiòxí núu-ndó, te ío váha chí nácuaãha cuendá nàcuáa ní quide nchaa cue tée-áⁿ ní xíndecu-güedé ndéé ní sáá nduu ní xihí-güedé. Te ío quindáa iní-ndó Yá Ndiòxí dàtná ní xóo cada cue tée-áⁿ.

⁸ Te dàtná-ni ní quide Xítohó Jesucristú ndéé sanaha diu-ni ducaⁿ quide-gá vitna, te diu-ni ducaⁿ càda-gá ndéé núu cuaháⁿ núu vèxi.

⁹ Te vá dáñá-ndó mèe-ndo dandahú ñàhá ñáyiú dacàháⁿ ñàhá xii-ndo natuha-ndo ingá ichi, ñáyiú dànehé tnàha ñáyiú-xi nándi sá ñí cutúha-yu, te nchaa xiáⁿ ñá túú ñⁿ-ni caháⁿ-xi ndihí tnúhu sá ndécú ndihí-ndo. Te Yá Ndiòxí chindèe ñaha-gá xii-o nàcuáa nihí ndéé-ó cùndecu-o ichi-gá, te ducaⁿ te cuu-xi sá vâha sá cúu-xí-ó, te ñá díú cuendá ñⁿ sá xéxi-ó nihí ndéé-ó ndècu-o ichi-gá. Te dava ñáyiú càchí-yu sá dává núu comidá cuu caxi-o te dava ñàhá nàcuáa nihí ndéé-ó cùndecu-o ichi-gá, dico ñá ndáa sá sã dúcáⁿ vã cáxi-ó nchaa núu comidá nihí ndéé-ó cùndecu-o ichi-gá.

¹⁰ Chi Xítohó Jesucristú ní xihí-gá cuendá-ó núu cùrúxí, te nchaa ñáyiú nchicúⁿ nihnu-ni quide nchaa nacuáa ní quide nchaa dútú ní xinu cuechi núu Yá Ndiòxí ndéé sanaha, ñáyiú-áⁿ vã cúu tnàhá tnúhu-yu ndihí Xítohó Jesucristú Yáa ní xihí núu cùrúxí sá dúcáⁿ quide-yu.

¹¹ Chi dútú cùnùu-gá ní xíndecu ndihí cue ñáyiú isràèl, tée-áⁿ ñí xóo canehe-dé ñíñí nchaa quiti ní xóo cahni-dé ní xóo quihu ndéé xiti cuartú ní cuu í-í-gã. Te ducaⁿ ñí xóo cada dútú-áⁿ cuendá cada càhnu iní Yá Ndiòxí nchaa yíca cuèchi ñáyiú, te cuñú nchaa quiti-áⁿ ñí xóo cahmi-güedé ñⁿ xio yuhu ñúú.

¹² Te ducaⁿ ñí yáha Xítohó Jesucristú chi ndéé ñⁿ xio yuhu ñúú ní sahani ñaha-güedé xii-gá. Te cuendá ñíñí-gã sá ñí sati núu cùrúxí núu ní xihí-gá, ní nduu ndoo ní nduu nine iní cue ñáyiú sàndáa iní ñàhá xii-gá.

¹³ Te vitna chí ná tùha-o Xítohó Jesucristú te cada ndee ñí-ó ndòho-o datná ní ndoho-gá.

¹⁴ Te ñuyíú-a ní ñⁿ xichi ñá túú ndéé cáá ñⁿ ñúú cudíi ñí caa ñí quíhíⁿ cuendá cundecu-o, dico ducaⁿ-ni ñúhu iní-ó ñⁿ xichi núu ndúú tãhú-ó cùndecu-o ní caa ñí quíhíⁿ.

15 Te núu xíáⁿ xíní ñùhu-xi sá vǎ dáńá ndèè-ó chĩñuhu-o Dúťú Ndióxí chi Xítóhó Jesucristú ní quide-gǎ nǎcuáa ndacu-o tnǎhá tnúhu-o ndihí Yá Ndióxí, te òré cǎháⁿ ndihí-o-gǎ te nuu núu ndacáⁿ táhú-ó núu-gǎ. Te nchaa tnúhu cǎháⁿ-ó òré cǎháⁿ ndihí-o-gǎ cúu-xi dátńá ñⁿ táhú sǎ cúu-xí-gǎ.

16 Te vǎ dáńá ndèè-ndó cǎda-ndo mee-ni sǎ vǎha cundecu-ndo, te ducaⁿ chĩndee tńaha-ndo ñⁿ ñⁿ-ndo ndihí sǎ ndécú ndihí-ndo. Te núu ducaⁿ na cǎda-ndo te cani iní-ndó sǎ cúu-xí dátńá ñⁿ táhú sǎ ño vǎha cùu iní Yá Ndióxí.

17 Te quĩndáá iní-ndó cǎda-ndo nchaa nacuáa cǎháⁿ cue tée yĩndaha ñaha xii-ndo nacuáa ndècu-ndo ichi Xítóhó Jesucristú, chi ñiu cue tée-áⁿ quide cuendá ñǎhá-güedé xii-ndo nacuáa cundecu vǎha-ndo núu-gǎ. Te sǎá nduu nǎcani tnúhu-güedé núu-gǎ núu ní quide vǎha-güedé ñá túú ní quide vǎha-güedé ní xĩndecu ndihí ñaha-güedé xii-ndo. Te núu ducaⁿ na cǎda-ndo quĩndáá iní-ndó-güedé te cudíⁿ iní-güedé cundecu ndihí ñaha-güedé xii-ndo, te vǎ ndihú iní-güedé. Te núu vǎ dúcáⁿ cǎda-ndo te vǎ cúu-xí sǎ vǎha xii-ndo nchǎa sǎ quide-güedé sǎ cúu-xí-ndó.

18 Te cǎháⁿ ndǎhú-í núu-ndó sǎ cǎháⁿ ndihí-ndo Yá Ndióxí cuendá-ndí. Te nchúhú cútńuní ndǎá iní-ndí sǎ ñǎ túú nǎ cǔmǎní-ndí núu Yá Ndióxí, te ducaⁿ chi ndècu-ndí nǎcuáa quide-ndí cundáá-ndí núu-gǎ.

19 Te cǎháⁿ ndǎhú tucu-í núu-ndó sǎ ño cǎcǎⁿ táhú-ndó núu Yá Ndióxí cuendá sǎ méé-gǎ ná cǎdá te ño ndihí quixí coto ñaha tucu-í xii-ndo.

Tnúhu ndéé núu ní ndihí-ná

20 Te Yá Ndióxí Yaá quide cùu vǎha iní-ó ndècu-o, Yaá-áⁿ ní dándótó-gǎ Xítóhó Jesucristú. Te Xítóhó Jesucristú-áⁿ cúu-gǎ dátńá ñⁿ toli ño-gǎ quéné cǎva xito mbéé. Te ducaⁿ sǎtnahǎ-xi cùu-gǎ cuendá sǎ ní sati níńí-gǎ te ní xíhí-gǎ, te ducaⁿ ní cuu cuendá sǎ ní quide ndǎá-gǎ ndihí Yá Ndióxí sǎ cǎdá-gǎ ingǎ núu sǎ vǎha sǎ cúu-xí nchòo cue ñǎyiu ndècu ñuyú-a. Te nǎcuáa ní quide ndǎá-gǎ ndihí Yá Ndióxí te ñiu-ni ducaⁿ cǎda-xi núu cuahǎⁿ núu vèxi.

21 Te xicǎⁿ táhú-í núu Yá Ndióxí sǎ méé-gǎ ná chĩndee ñaha-gǎ xii-ndo cuendá cada-ndo mēe-ni sǎ vǎha nǎcuáa cuĩní méé-gǎ, te mee-gǎ ná cǎdá ñaha-gǎ xii-o nchǎa sǎ vǎha sǎ sǎní iní-gǎ. Te ñiu-ni ducaⁿ na tǎuchiuⁿ-gǎ cada Xítóhó Jesucristú sǎ cúu-xí-ó, ñuha xicǎⁿ táhú-í núu-gǎ. Te vitna nchaa-o chí ná cǎchí-ó sǎ ño cǎhnu cuu Xítóhó Jesucristú ní caa ní quihíⁿ. Te ducaⁿ na cùnduu.

22 Te cǎháⁿ ndǎhú-í núu nchòhó ñǎyiu ndècu ndihí-í ichi Xítóhó Jesucristú sǎ cǎdá cǎhnu iní-ndó nǎcuáa ndùu nchaa tnúhu cǎháⁿ-í dásǎhú ñǎhá-í xii-ndo, chí ñǎ túú vǎi tnúhu chido tnuní-í núu tútú-a sǎ cúu-xí-ndó.

23 Te cǎchí tnúhu-í xii-ndo sǎ tē Timùteú tée ndècu ndihí-o ichi Xítóhó Jesucristú ní cǎcu-dé ñǎ túú-gǎ yihí-dé vecaá. Te núu na quèxio ndihí-dé núu ndécú-í te quixi-í ndihí-dé núu ndécú-ndó quixi coto ñaha-ndí.

24 Te cǔñaha-ndo sǎ ño na cǎda ndee iní nchaa cue tée yĩndaha ñaha xii-ndo nacuáa ndècu-ndo ichi Yá Ndióxí. Te ducaⁿ cǔñaha tucu-ndo xii nchaa dava-gǎ ñǎyiu cùu cuendá-gǎ sǎ ño na cǎda ndee iní-yu. Te cue ñǎyiu nàcióⁿ Itàliá ñǎyiu ndècu ndihí-o ichi-gǎ cǎchí-yu sǎ ño cada ndee iní-ndó.

25 Te Yá Ndióxí ño na chĩndee chitúu ñaha-gǎ xii-ndo nchǎa-ndo. Te ducaⁿ na cùnduu. Te ño chí cǎdá ndèe iní-nǎ vitna.

TUTÚ NÍ CADÚHA TĒ SÀNTIAÚ

Té Sàntiaú cadúha-dé tutú quíhíⁿ ndaha ñáyiú isràél nchíté nuu nìhì ñuyúú

¹ Yúhú té Sàntiaú xínú cuèchi-í núú Yá Ndiòxí ndìhì núú Xítóhó Jesucrístú, te tée-í tñuhu-a quide ndee iní ñáhà-í xii nchòhò ñáyiú isràél nchíté nuu nìhì ñuyúú-a.

Yá Ndiòxí táxi-gã sá xìnì tñùnì-ó

² Te nchòhò ñáyiú ndècu ndìhì-í ichi Xítóhó Jesucrístú, ío cudíí iní-ndó cùndecu-ndo cuéi ná cùu sá ùhú véxi cuèndá-ndó,

³ chi ducaⁿ te cutnùnì iní-ndó sá sàndáá ndisa iní-ndó-gã, te cunduu càhnu iní-ndó cuéi ná ná yáha-ndo.

⁴ Te cunduu càhnu-ni iní-ndó te ducaⁿ te cuu-ndo ñáyiú váha, te cundáá-ndó núú Yá Ndiòxí, te ducaⁿ te ñá túú-gã ná cumánì-ndó núú-gã.

⁵ Te núu cumánì sá xìnì tñùnì-ó, te cácaⁿ-ó núú Yá Ndiòxí te mee-gã taxi-gá, chi ío váha iní-gã, te ñá túú cùnini iní-gã núú-ó.

⁶ Te nì yùhu nì iní-ó cácaⁿ-ó núú-gã, te quindáá ndisa iní-ó sá táxi-gã sá cúmání quini tñùnì-ó, te vá cánì ñⁿ canì úú iní-ó. Chi nchaa ñáyiú sàni ñⁿ sàni úú iní-xì cùú-yu dàtná ndute làmár cuáháⁿ-xì duha cuáháⁿ-xì dàcáⁿ nàá-xì òré quéné tächí.

⁷ Te nchaa ñáyiú ducaⁿ sàni iní-xì, te vá cánì ñⁿ-yu sá nìhì-yu sá xìcáⁿ-yu núú-gã.

⁸ Chi nchaa ñáyiú sàni ñⁿ sàni úú iní-xì ñá cùtnùnì iní-yu ndèdacàa sá sánì iní-yu cadá-yu.

⁹ Te nchaa ñáyiú ndàhú ñáyiú ndècu ichi-gã, xìnì ñuhu-xì ñá túú-gã ná canì iní-yu, mee-nã cudíí iní-yu, chi Yá Ndiòxí chindèe ñaha-gã xií-yu.

¹⁰ Te nchaa ñáyiú cuica xìnì ñuhu-xì cundecu váha iní-yu núú Yá Ndiòxí cuéi ná ná yáha-yu. Chi ñáyiú-áⁿ cùú-yu dàtná itá nchaa cùhú sá ñá túú cùdii naha.

¹¹ Chi òré ní cuu nìhì cahni nchícanhii, te ní dádií-ni-xì nchaa cùhú cuíí-áⁿ te ní cóyo-ni nchaa itá-xì, te ñá túú-gã cáá víi. Te ducaⁿ sàtnahá-xì cùu ñáyiú cuica chi núú chíúⁿ-nì-yu xihí-yu.

Nchaa ñáyiú quide cahnu iní-xì nchaa sá yáha-yu

¹² Te váha táhú nchaa ñáyiú quide cahnu-ni iní-xì cuéi nándì sá yáha-yu ndécú-yu ichi Yá Ndiòxí, chi òré ná ndíhì nchàa xiáⁿ yáha-yu, te cuáñaha Yá Ndiòxí ñⁿ coróná váha vìhì cundecu ndìhì-yu, te ndáá chi ducaⁿ càháⁿ Yá Ndiòxí sá táxi-gã xii nchaa nchoo ñáyiú ñuhu iní ñáhá xii-gã.

¹³ Te nchaa ñáyiú sàni iní-xì cada nándì sá cuèhé sá dúhá, te vá cánì iní-yu sá Yá Ndiòxí táuchiuⁿ-gã ducaⁿ càdá-yu, chi Yá Ndiòxí ñá quiú te canì iní-gã cada-gã ñⁿ sá cuèhé sá dúhá, te nì ñá túú tàuchiuⁿ-gã sá dúcáⁿ càdá-yu.

¹⁴ Te cuínì-yu cadá-yu nchaa sá cuèhé sá dúhá chi ducaⁿ véxi iní-yu.

¹⁵ Te nchaa ñáyiú ío ñuhu iní nchaa sá cuèhé sá dúhá te quidè-yu, te núu na càda-ní-yu te cuíta nìhnú-yu.

¹⁶ Te nchòhò ñáyiú ío cùu iní-í ndécú ndìhì-í ichi Xítóhó Jesucrístú, vá dáñá-ndó mèe-ndo dandahú ñáhá ñáyiú xii-ndo.

¹⁷ Chi nchaa sá váha véxi-xì núú Yá Ndiòxí Yaá ndécú àndiú, chi diu mee-gã ní cadúha-gã andiú ndìhì nchaa chódínì, ndìhì yóó, ndìhì nchícanhii. Te Yá

Ndiõxí ñá túú ndì queheⁿ ndì queheⁿ-gá sá cání ñí-gá, te ni ñà túú cùu-gá dàtná ìⁿ cuándáhú cuáháⁿ-xí duha cuáháⁿ-xí dàcáⁿ, chí ìⁿ-ni sá sání ñí-gá.

18 Te Yá Ndiõxí ní cuíní-gá sá cúú-ó dèhe-gá, te ndáá sá cúú-ó dèhe-gá chí sàndáá ñí-ó tnùhu-gá. Te nchoo ñáyíu sàndáá ñí-xí tnùhu-gá cúnùu-gá-ó chí ní nduu-o dèhe-gá.

Ichi ndáá cuiti

19 Te nchòhò ñáyíu ío cùu ñí-í ndécú ndìhi-í ichi Xítóhò Jesucristú, cundedóho-ndo ìⁿ tnùhu na càháⁿ-í-a. Te cuíní-í sá cùndecu túha-ndo cùndedóho-ndo tnùhu Yá Ndiõxí, te caní váha ñí-ndó nàcuáa càháⁿ-ndó, te cunduu càhnu ñí-ndó te vá cùdèéⁿ-ndó.

20 Chí núu na cùdèéⁿ-ó te ñá túú quide váha-o núú Yá Ndiõxí.

21 Te daña-ndo nchàa sá cuèhé sá dúhá ío ñuyíú-a. Te quindáá ñí-ndó tnùhu Yá Ndiõxí ndécú ndìhi-ndo, te vá cùndùu sáá ñí-ndó, te ducaⁿ te naníhí tàhú-ndó.

22 Te quindáá ñí-ndó tnùhu-gá te vá cuèndá-ni cundedóho-ndo, chí núu na cùndedóho-ndo te vá tníí-ndó ñá, te dicó-ni dàndáhú-ndó mèe-ndo te vá nánihí tàhú-ndó.

23 Chí nchaa ñáyíu dicó-ni sàcùndedóho tnùhu-gá te ñá túú sàndáá ñí-yu, ñáyíu-áⁿ cúú-yu dàtná ìⁿ ñáyíu sàcùndéhé-ní núú-xí núú yùtátá.

24 Chí ñíni ndèhé-yu ní xiní-yu núú-yu, te ní xócání-yu te ní nacuaanaa-ní-yu nàcuáa càa núú-yu. Te ducaⁿ sàtnahá-xí cùu ñáyíu sàcùndedóho tnùhu Yá Ndiõxí, te ñá túú tníí-yu.

25 Te nchaa ñáyíu dàcuaha ndisa tnùhu ní dándò Yá Ndiõxí ñìhnu-ní-yu ichi-gá, chí ñá díú ìⁿ sá vèe cùu-xí. Te ñáyíu-áⁿ ñà túú dicó-ni sàcùndedóho-yu chí quide ndáá-yu núú-gá, te cùdíí ñí-yu xíndecú-yu.

26 Te nchaa ñáyíu càchí sá ndécú ichi ndáá te cùtexínu-ni càháⁿ-yu, te xíáⁿ dicó-ni dàndáhú-yu mèe-yu sá ndécú-yu ichi ndáá.

27 Te núu ndècu-o ichi ndáá cuiti ichi Dútú Ndiõxí, te chindee-o nchàa ñáyíu ní ndóo ndàhú, ndìhi ñáyíu quèé ndécú ndìhi tnùndòho tnùhu ndàhú, te vá càdá-ó nàndì sá cuèhé sá dúhá ío ñuyíú-a.

2

Ìⁿnuu-ni cùu ñí-ó nchàa tnahà ñáyíu-o

1 Te nchòhò ñáyíu ndècu ndìhi-í ichi Xítóhò Jesucristú Yáá cúnùu, ìⁿnuu-ni càháⁿ ndìhi váha-ndo nchàa tnahà ñáyíu-ndo.

2 Te núu núú nàtácá-ndó chíñuhu-ndo Yá Ndiõxí ní sáá ìⁿ téé ío váha càa dóó ñíhnú-dè, te ní sáá tucu ìⁿ téé ñìhnu dóó ndàhú,

3 te núu téé ñìhnu dóó váha-ni-áⁿ néhé-ndó sá yíñùhu núú-dè, te taxinucóo-ndo-dè ìⁿ núú xilé váha, te téé ndàhú-áⁿ daxòcòo-ndo-dè ìⁿ xio àdi canucóo-ndo-dè núú ñíhú,

4 te núu ducaⁿ na càda-ndo te ñá túú quide váha-ndo. Chí ìⁿ-ni-dé cúú ñí-ndó, te ìⁿ-dé ñá túú cùu ñí-ndó.

5 Te nchòhò ñáyíu ío cùu ñí-í ndécú ndìhi-í ichi Xítóhò Jesucristú, chí cùndedóho tucu tnùhu na càháⁿ-í-a. Yá Ndiõxí càháⁿ-gá vai ñáyíu ndàhú cuèndá tnahá tnùhu ndìhi ñàhá-yu xii-gá, te ndècu váha-gá-yu dàcúúxí ñáyíu cuica ñáyíu ñá túú sàndáá ñí tnùhu-gá, chí ní càchí-gá sá ncháá ñáyíu na cùu ñí ñáhá xii-gá nduu tàhú-yu cundecú-yu ndìhi-gá ní caa ní quíhíⁿ.

6 Te nchòhó, ñá túú nèhe-ndo sá yíñùhu núú ñǎyiu ndáhú, chi núú ñǎyiu cuica-ni nèhe-ndo sá yíñùhu. ¿Te náa ñá cútñùní iní-ndó sǎ ñǎyiu cuica dāndoho ñaha-gá-yu xii-ndo, te cāndeca ñáhá-yu sáháⁿ núú cuè tée cùchiuⁿ-áⁿ?

7 Te diu-ní-yu ío cǎháⁿ cuèhé-yu cuèndá Xítóhó Jesucristú, te nchòhó sá ní nduu-ndo dēhe-gá.

8 Te ñⁿ ndudú cúnùu-gá ní cǎháⁿ Yǎ Ndiòxí ní ngódó tñùní núú tútú-gá cǎchí-xi sá cúú iní-ó tñaha ñǎyiu-o dātñá cúú iní-ó mèe-o. Te núu ducaⁿ na càda-o te quide váha-o.

9 Dico núu ñá túú cùu iní ñⁿnuu-o cuè tñaha ñǎyiu-o, te cuu cuéchi xii-o chi ñá túú quide-o nacuáa cǎháⁿ Yǎ Ndiòxí.

10 Te núu ñⁿ ñǎyiu ndaunihnu ñⁿ sá cǎháⁿ Yǎ Ndiòxí, te dava-ni quidé-yu ña, te ñǎyiu-áⁿ ñá túú quidé-yu nacuáa cǎháⁿ ndudú Yǎ Ndiòxí.

11 Te Yǎ Ndiòxí ní cachí-gá sá tée ndècu ñadihí-xi vǎ cǎháⁿ ndihí-dé ingǎ ñadihí. Te diu-ni-gá ní cachí-gá sá vǎ cǎhni-ó tñaha ñǎyiu-o. Te cuéi ñá túú cǎháⁿ ndihí-o ingǎ ñadihí, te núu sǎhni-o tñaha ñǎyiu-o te ñá túú quide-o nacuáa cǎháⁿ ndudú Yǎ Ndiòxí.

12 Te nchoo xini ñuhu-xi cǎháⁿ-ó tñùhu váha te cada ndáá-ó, chi ñá díú ñⁿ sá vèe cùu-xi sá ní cachí Yǎ Ndiòxí cada-o. Te mee-gá ní cachí-gá sá cǎdá ndáá-gá cuéchi-o na sǎá nduu.

13 Te nchaa ñǎyiu ñá túú cùndahú iní tñaha ñǎyiu-xi, te vǎ cùndahú iní ñáhá-gǎ xií-yu na sǎá nduu càda ndáá-gá cuéchi-yu. Te nchaa ñǎyiu cùndahú iní tñaha ñǎyiu-xi te Yǎ Ndiòxí cundáhú iní ñáhá-gǎ xií-yu na sǎá nduu-ǎⁿ.

Quindáá iní-ó Yǎ Ndiòxí te cada váha-o

14 Te nchòhó ñǎyiu ndècu ndihí-í ichi Xítóhó Jesucristú, te núu cǎchí-ó sǎ sàndáá iní-ó Yǎ Ndiòxí te ñá túú quide-o sá vǎha, te ñá túú ndéé nándihí-xi, chi vǎ nánihí tǎhú-ó te núu ducaⁿ na càda-o.

15 Te núu ndèhe-o ñⁿ tñaha ñǎyiu-o ñá túú dǒó-yu àdi ñá túú sǎ cúnchitò-yu,

16 te xǎhaⁿ-o: “Núhú-n te nducu-n dǒó cuihnu-n te nducu-n sǎ cǎxí-n”, xǎhaⁿ-o, te ñá túú nǎ sǎñaha-o, te sǎ dúcáⁿ quide-o te ñá túú quide váha-o.

17 Te núu cǎchí-ó sǎ sàndáá iní-ó Yǎ Ndiòxí te ñá túú quide váha-o ndècu-o, te vèdana nándihí-xi.

18 Te ío ñǎyiu cǎchí-yu sǎ sàndáá iní-yu Yǎ Ndiòxí, te ío ñǎyiu cǎchí-yu sǎ méé-ní sǎ vǎha quidé-yu. Te yúhú cǎchí-í sǎ núu ñá túú quide-o sǎ vǎha, te ñá túú sàndáá iní-ó Yǎ Ndiòxí. Te nchoo quide-o sǎ vǎha núu xiǎⁿ cútñùní iní-ó sǎ sàndáá iní-ó-gǎ.

19 Te ío ñǎyiu cǎchí sǎ ñⁿdii-ni Yǎ Ndiòxí ndécú, te váha-ni cǎháⁿ-yu. Te tñahá yucu ñǎvǎha ndihí nchaa espíritú cùndihí-xi xiní-xi sǎ ndécú ñⁿdii-ni Yǎ Ndiòxí, te yùhú-xi dico ñá túú tñì-xi tñùhu-gá.

20 Te ío ñⁿ díquí-ó te núu na cǎchí-ó sǎ sàndáá iní-ó Yǎ Ndiòxí, te vǎ cǎdá-ó sǎ vǎha.

21 Te ñani tñahá-ó ndíi Àbrahám téé ní xíndecu ndéé sanaha ní ngúndecu váha ndíi núú Yǎ Ndiòxí, chi ní xito ndéé ñáhá-gǎ xii ndíi núu ndisa sǎ cǎhni ndíi déhe ndíi té Isáac nduu tǎhú-gǎ ní cùu, te dǎvǎ-áⁿ ní cútñùní iní-gǎ sǎ ío sàndáá iní ñáhá ndíi xii-gǎ, núu ñá ní dàña-gǎ cahni ndíi déhe ndíi.

22 Te ñaha-o sǎ ndíi Àbrahám ñá díú-ní sǎ méé-ní sǎ ní sàndáá iní ñáhá ndíi xii-gǎ, chi ní tñì ndíi tñùhu-gǎ.

²³ Te ducaⁿ ñi quee ndáá-xi nàcuáa càháⁿ-xi núú tütú Yá Ndióxi núú càchí-xi: “Ndií Àbrahám ní sándáá iní ndíí ní quide ndíi nchaa nàcuáa ní xáhaⁿ Yá Ndióxi, te ní ngúndecu váha ndíi núú-gá, te ní cachí-gá sá cúú ndíi ñⁿ téé ío váha tnahá tnúhu ndíi-gá”, duha càchí-xi núú tütú-gá.

²⁴ Te xíáⁿ cútùnùni iní-ó sã ñã díú mèe-ni sá quíndáá iní-ó Yá Ndióxi, chí núu na càda-o nacuáa cuu váha iní-gá te ngúndecu váha-o núú-gá

²⁵ dàtná ní quide-gá tá Ràháb ñⁿ ñadíhí ní xíndecu ndéé sanaha, chí xíchí-áⁿ ní xíndecu-xi ichi díí iní, dico ní tuha-xi ichi Yá Ndióxi te ní ngúndecu váha-xi núú-gá, chí ní chindee-xi cuè téé israhél cue téé ní xica chùuⁿ-gá, te ní sanu ichi ñaha-xi xii-güedé ñⁿ ichi núú vã nánihí ñáhá cuè téé cùu úhú iní ñáhá xii-güedé.

²⁶ Te nchaa ñáyiú càchí sá sándáá iní Yá Ndióxi, te ñã tóú quidé-yu nacuáa càháⁿ-gá ñáyiú-áⁿ cúú-yu dàtná ñⁿ ñáyiú ní xíhí. Chí ñã tóú-gá ndíxí tóu iní-yu nchaa sá cuèhé sá dúhá quidé-yu. Duha sãtnahá-xi cùu nchaa ñáyiú ñã tóú cuíni tñiⁿ tnúhu càháⁿ Yá Ndióxi.

3

Nàcuáa quide yaa-o

¹ Te nchòhó ñáyiú ndécu ndíi-í ichi Xítohó Jesucristú, vá ncháá-ndó càni iní-ndó cùu-ndo mestrú dacuáha-ndo ñáyiú tnúhu Yá Ndióxi chí íí cáá-xí. Chí na quítnahá nduu nacuáha-o cuendá núú-gá, te núu ñã tóú ní quide ndáá-ó ñã, te vá cúú váha iní-gá núú-ó.

² Te nchaa-o ío cuèhé sã ñã tóú váha quide-o. Te nchaa ñáyiú ñã tóú càháⁿ tnúhu cuèhé tnúhu duha cùu-yu ñáyiú ñã tóú ñã cúmání chí ío ndáá quidé-yu. Te xini-yu cotñiⁿ-yu mèe-yu, te quide váha-yu núú Yá Ndióxi.

³ Te dàtná cuíni-ndó cùu ñⁿ quiti te núu na chíhi-o frenú yuhu-di, te cotñiⁿ-o-di te ngúnu ichi-di, te ducaⁿ sãtnahá-xi cùu ñáyiú sácótniⁿ mee-xi, chí ñã tóú càháⁿ-yu tnúhu cuèhé tnúhu duha.

⁴ Te dàtná cuíni-ndó cùu barcú cuèi nàhmu vihi-xi, dico òré quéné ñihi táchí te tündaha-xi ñⁿ xio, dico téé dàcaca ndacu-dé dáquihíⁿ-dé-xi ndíi ñⁿ yutnu sá dánani-güedé tímú ndaa núú càchí iní-dé quíhíⁿ-xi.

⁵ Te ducaⁿ cùu tucu yaa-o chí ío líhli-xi dico ío cuèhé tnúhu càháⁿ-ó ndíi-xi. Te ducaⁿ-ni sãtnahá-xi cùu tucu sá lúhá ñúhú chí sãhmi-xi ñⁿ yucu.

⁶ Te diu-ni ducaⁿ sãtnahá-xi cùu yaa-o chí ío cuèhé tnúhu cuèhé tnúhu duha càháⁿ-ó ndíi-xi, te dàcuíta nihnu ñaha-xi xii-o. Te ío cuèhé cuèchi quide-o ndíi-xi cuendá sá ñuyúú-a ñúhu tnahá ñúhú tñiⁿ yucu ñãvãha dàticá nihnu ñaha-xi.

⁷ Te ndacu-o càda masú-ó ncháa núú quiti ló ñuyúú cuèi quiti dééⁿ quiti xica núú ñúhú, te cuèi quiti ndáva, te cuèi cóó, te cuèi quiti ñúhu xití ndute làmár, chí ducaⁿ quide dava cue téé ñuyúú-a.

⁸ Dico yaa-o chí vá yõ ñⁿ ndacu cada masú ñáhá xii-xi nacuáa càháⁿ-ó mèe-ni tnúhu váha ndíi-xi, chí mee-ni tnúhu cuèhé tnúhu duha cùmuu-gá càháⁿ-ó ndíi-xi. Te cùu-xi datná ñⁿ venènú chí dàtiyu-xi iní-ó.

⁹ Te diu-ni ndíi yaa-o quide cahnu-o Dútrú Ndióxi Yáá cúú Tãtá-ó, te diu-ni ndíi yaa-o càháⁿ úhú-ó cuè tnahá ñáyiú-o. Te xini ñuhu-xi vá dúcáⁿ càda-o, chí mee-gá ní chíhi-gá sá xini tñiⁿ-ó ndíi iní-ó, dàtná cáá mèe-gá ñúhú iní-gá.

10 Te diu-ni yuhu-o quèe tnúhu váha càháⁿ-ó, te diu-ni yuhu-o quèe tnúhu cuèhé tnúhu duha. Te nchòhò ñáyiú ndècu ndihí-í ichi Xítohó Jesucristú canaha-ndo sá ñà túú ndùu váha-xi ducaⁿ càda-o.

11 Te ñà túú xìní-ndó sá ìⁿ núú quèé ñihni ndute, te quèe ndute váha te quèe ndute úá-áⁿ.

12 Te nchòhò ñáyiú ndècu ndihí-í ichi Xítohó Jesucristú, te ñà túú xìní-ndó sá ìⁿ yutnu ngúxí, te cùuⁿ aceitúná, àdi xìní-ndó sá ìⁿ yoho yaha stilé te cùuⁿ ngúxí. Te ducaⁿ cuèi ìⁿ núú quèé ñihni ndute, vá cúú quèe ndute váha te quee ndute úhá. Te ducaⁿ sátnahá-xi cùu yuhu-o chi vá cúú càháⁿ-ó tnúhu váha te càháⁿ-ó tnúhu cuèhé tnúhu duha.

Nchaa sá váha xìní tnùnì-ó tàxi Yá Ndiòxí

13 Te núú ndècu ñáyiú túha tnuú-ndó ñáyiú cùtnuní iní-xi, te xìní ñuhu-xi mee-ni sá váha cada-yu, ducaⁿ te cutnùnì iní-ó sá túha ndisá-yu, te vá cada càhnú-yu mèe-yu.

14 Te núú nchoo cuèdú iní-ó te cuìnì-ó cùnuu-o núú tnàha ñáyiú-o, te vá càchí-ó sá túha-o, chi ñà túú quide ndáá-ó te núú ducaⁿ na càda-o.

15 Chi ñà díú xǎⁿ ní dànehé ñáhá Yá Ndiòxí, chi ñuyúy iha ní cacu nihnu-xi cuèndá sá yùcu ñávàha dàcahu iní ñáhá-xí.

16 Te núú ndécú ñáyiú cuèdú iní ñáyiú cuìnì cunuu, te yàcáⁿ mee-ni ndáhu nàà xíndecú-yu, te ñà túú quide váha-yu, chi mee-ni nchàa sá cuèhé sá dúhá quide-yu.

17 Te núú ní taxi Yá Ndiòxí sá xìní tnùnì-ó, te cada váha-o, te càháⁿ ndihí váha-o nchàa tnaha ñáyiú-o, te tniⁿ-o tnúhu váha càháⁿ-yu, te cundáhu iní-ó-güë-yu te chindee-ö-yu, te vá cání ìⁿ caní úú iní-ó, te ío cunduu ndáá iní-ó.

18 Te núú cuìnì-ó ñà túú nã cuu cundecu-o ñuyúy-a, te cada váha-o sá cúú-xí tnàha ñáyiú-o cuèndá sá ñà túú nã cuu cundecu-o ndihí-yu. Te ducaⁿ te nguínchicúⁿ dava-gá tnàha ñáyiú-o càda váha-yu.

4

Vá cúú cùndecu-o ichi Yá Ndiòxí te cada-o nãndi sá cuèhé sá dúhá

1 ¿Te xìní-ndó nã cuèndá nàà ñáyiú te xǎsahni tnàhá-yu-áⁿ? Te nàa-yu sá tnúhu cuèdú iní, chi diu-ni xǎⁿ ñúhú ìní-yu, te ñà túú ndècu váha iní-yu.

2 Chi cuìnì-yu cundecu ndihí-yu ìⁿ sá ñà túú ndècu ndihí-yu, te ñà túú ñihí-yu núú xǎⁿ xǎcuu cuèdú iní tnáhá-yu, te xǎcuèhé tnáhá-yu, te càni tnahá-yu, te xǎsahni tnàhá-yu. Te ñà túú ñihí-yu sá cuìnì-yu chi ñà túú xǎcáⁿ-yu núú Yá Ndiòxí.

3 Te cuèi xǎcáⁿ-yu ìⁿ sá cuìnì-yu núú-gã te ñà túú sǎnaha-gã, chi ñà túú xǎcáⁿ-yu ìⁿ sá cúú xǎ-yu sá váha, chi ìⁿ sá ná ndihí-yu núú cáda-yu nchaa sá cuèhé sá dúhá xǎcáⁿ-yu, núú xǎⁿ ñà ñihí-yu.

4 Te nchaa ñáyiú ducaⁿ xǎquide ío cùu sáá iní-yu núú Yá Ndiòxí. Te nàha-ndo sá ncháá ñáyiú cùdíí ìní-xi cundecu ichi cuèhé ichi duha cùu úhú iní-yu Yá Ndiòxí, chi vá cúú cùndecu-o ichi cuèhé ichi duha, te cundecu-o ichi-gá.

5 Te ñà túú díò ducaⁿ càháⁿ-xi núú tùtú Yá Ndiòxí núú càchí-xi: “Yá Ndiòxí ní taxi-gá Espiritú-gá ndécú ndihí-o. Te Espiritú-gá-áⁿ cuìnì-xi sá mèe-ní-gá cuhuⁿ iní-ó”, duha càchí-xi núú tùtú-gá.

6 Te Yá Ndiòxí ío chindee ñaha-gá cuèndá cada ndáá-ó núú-gã dàtná càchí tucu-xi núú tùtú-gá núú càchí-xi: “Yá Ndiòxí ñà túú cùu váha iní-gá núú

nchàa ñáiyu quide cahnu mee-xi, dico chñdee-gá cue ñáiyu ndàhú iní-xi”, duha càháⁿ-xi núú tütú-gá.

⁷ Te cada-ndo nàcuáa càháⁿ Yá Ndiõxí. Te vá cáda-ndó nàcuáa cuiní yucu ñávãha, ducaⁿ te xóo cóo ndéé ñáhá-xí xii-ndo.

⁸ Te tñi-ndo tnũhu càháⁿ Yá Ndiõxí te cundecu ndihi ñaha-gã xii-ndo. Te nchaa nchòhó ñáiyu ndècu ichi cuehé ichi duha daña-ndo ichi-áⁿ te cada váha-ndo. Te nchaa nchòhó ñáiyu sàni iní cunu cuechi núú Yá Ndiõxí te quide-ni-ndo nchaa sá cuèhé sá dúhá, te ñá túú quide váha-ndo núu ducaⁿ, chi xini ñuhu-xi sá càcáⁿ-ndó núú Yá Ndiõxí sá ná ndádá ndòo ndada nine-gá iní-ndó.

⁹ Te ndixi cuéchi iní-ndó nchàa sá quidé-ndó ndéé ndáhyú ndisa-ndo sá ndihú iní-ndó, te ñá díú dà cudíí iní-ndó.

¹⁰ Te náhmá-ndó núú Yá Ndiõxí nchaa sá ñi quide-ndo, te ngúndecu váha-ndo núú-gã.

Vá càháⁿ-ó nchàa sá quidé tñaha ñáiyu-o

¹¹ Te nchòhó ñáiyu ndècu ndihi-í ichi Xítohó Jesucristú, vá cuátnũhu tñaha-ndo, chi nchaa ñáiyu sãtnuhu tñaha dicó-ni ndàa nuú-yu ndèhe tñahá-yu, te ñá túú càháⁿ váha-yu cuendá tnũhu Yá Ndiõxí sá sánú ichi ñaha xii-yu nàcuáa cundecú-yu, chi ñaquee tíhũ-yu tnũhu-áⁿ. Te núu càchí-ndó sã ñà túú càháⁿ váha tnũhu Yá Ndiõxí, te xiáⁿ queé-xí sã ñà túú sãndáá iní-ndó tnũhu càháⁿ-gá, te cuiní-ndó cunu tnũhu-ndo núú tnũhu-gá.

¹² Te mee Yá Ndiõxí ní cachí-gá nàcuáa cada-o, te ñi-ndé mee-gã càháⁿ-gá te núu ní quide váha-o, àdi ñá túú ní quide váha-o. Te ñi-ndé mee-gã dàcácu nihnu ñaha-gã xii-o núú ùhú núú ndàhú, te ñi-ndé daquihíⁿ ñáhá-gã xii-o núú ùhú núú ndàhú-áⁿ te núu vá cáda vãha-o. Te nchoo ñà túú ñã cúú-ó, te núu mee-ni nchàa sá quidé tñaha ñáiyu-o cundehe-o.

Ñá túú cùtnuní iní-ó ñãsa túndaá-ó ñgá nduu

¹³ Te dava nchòhó càchí-ndó sã vítná àdi tneé quíhíⁿ-ndó ñiⁿ ñuú, te yàcáⁿ cundecu-ndo ñiⁿ cuía cada-ndo ñiⁿ ndáhú te níhí-ndó díhúⁿ.

¹⁴ Te ni ñã xini-ndó ñã cúú sã yãha-ndo vítna àdi tneé. Te nchoo cùu-o datná ñiⁿ vícò núhú, chi vícò-áⁿ tnãvíí ndéhé-ó te tna tnaa-gá sa ní ndóñhú-xí. Ducaⁿ sãtnahá-xi cùu nchoo chi ñiⁿ úú nduu duha vèxi-o ñiⁿ yíú-a te ndoñuhu-o.

¹⁵ Te núu sãndáá iní-ó Yá Ndiõxí te duha càháⁿ-ó: “Te núu Ndiõxí ná càchí-gá sã cùndecu tnaa-o ñiⁿ yíú-a te cada chiúⁿ-o”, duha cachí-ó.

¹⁶ Dico mee-ndo chi ío ñiⁿ iní-ndó cuiní-ndó cunu tnũhu-ndo núú Yá Ndiõxí, te ñá túú nduu váha-xi sá dúcáⁿ quide-ndo.

¹⁷ Te núu xini-ó càda-o sã vãha te ñá túú quide-o, te cùu-xi ñiⁿ cuéchi núú-gã.

5

Tnúhu sá dátũha ñaha xii nchaa ñáiyu cuica ñã túú sãndáá iní tnũhu Yá Ndiõxí

¹ Te nchòhó ñáiyu cuica ñáiyu cuihna iní-xi cundedóho-ndo tnũhu na càháⁿ-í-a. Vitna nguíta-ndo ndihú iní-ndó, te ndáhyú víhí-ndó, chi quixi ñiⁿ tnúndòho cuendá-ndó te ndqho víhi-ndo.

² Te nchaa sá ndécú ndihi-ndo ndihi cuita tiu quíhíⁿ, te quee tíquidi dóo-ndó,

³ te díhúⁿ-ndó caxi cudi ñúhu. Te xíaⁿ cuita naquiní ndeé-ndó tnúndòho sá ñà túú quide váha-ndo. Te ndihi-ndo ndihi díhúⁿ-ndó sá ñi taxúha-ndo, chi vitna sa ta cùyatni sáá nduu ndihi ñuyúⁿ-a.

⁴ Te nchaa cue téé ní quide chiúⁿ núú chíúⁿ-ndó ñi ndatnúhu-ndo ndihi-güedé nàcuáa cháhu-ndo-güedé ní cùu, te ñá túú ní cháhu-ndo-güedé nàcuáa ní xáhaⁿ-ndo xii-güedé, núú xíaⁿ ío ndècuéchi-ndo. Te Yá Ndióxi Yáa ndécú àndiu ní tecú dóho-gá nàcuáa càháⁿ-güedé sá ñi dándàhú-ndó-güedé.

⁵ Te nchòhó ñáiyu cuica, sá ndécú váha-ni-ndo cùndee iní-ndó, núú quide-ni-ndo nchaa sá vèxi iní-ndó. Te cùu-ndo datná ñⁿ quiti nùcuíhnu mee-ni xèxi-di, te sáá nduu sàhni-güedé-di. Te ducaⁿ sàtnahá-xi cùu nchohó chi ndècu váha-ndo vitna, te sáá ñⁿ nduu nàcháhu-ndo nchàa sá quidé-ndó núú Yá Ndióxi te núú vá quíndáá iní-ndó-gã.

⁶ Te quide úhú iní-ndó sàhni-ndo cue ñáiyu quide ndáá núú Yá Ndióxi, te ñá túú ñá quidè-yu.

Cunduu càhnu iní-ó te càháⁿ ndihi-o Yá Ndióxi

⁷ Te nchòhó ñáiyu ndècu ndihi-í ichi Xítohó Jesucristú, cada ndee-ni iní-ndó cùndetu-ndo ndéé ná quixi tucu-gá ñuyúⁿ-a, te cada-ndo datná quidé nchàa ñáiyu chìhi tatá chi sàcùndetú-yu ndéé cúúⁿ dáú te chìhi-yu. Te cùndee-ni iní-yu sàcùndetú-yu ndéé cúúⁿ-gã dáú te cùu itú-yu, te ndùdí iní-yu.

⁸ Te ducaⁿ càda nchohó tucu cada ndee iní-ndó cùndetu-ndo, chi sa ta cùyatni nduu quixi tucu Xítohó Jesucristú.

⁹ Te duha nduu tnúhu càháⁿ-í núú nchòhó ñáiyu ndècu ndihi-í ichi Xítohó Jesucristú, vá ndàcáⁿ cuéchi núú tnáha-ndó te núú nása cùu ndecu-ndo, chi ñá cuèhé-gá nduu cùmání te quixi Cristú nacuaca ñaha-gã xii-o cùndecu-o núú Yá Ndióxi, te mee-gã cada ndáá-gã cuéchi-o.

¹⁰ Te nchòhó ñáiyu ndècu ndihi-í ichi Xítohó Jesucristú, ndacu iní-ndó nàcuáa ní quide nchaa cue téé ní xóo càháⁿ tnúhu Yá Ndióxi ndéé sanaha sá ío càhnu ní xínduu iní-güedé cuéi nándi ní ndoho-güedé.

¹¹ Te cùtnuní iní-ó sá cúú-ó ñáiyu ío váha táhú-xi te núú na càda cahnu iní-ó nchàa sá ná yáha-o cuèndá Yá Ndióxi. Te nàha-ndo sá ndii Jób ducaⁿ ñi quide ndii, chi nándi sá ñi yáha ndii te ní quide càhnu iní ndii. Te sátá ñi yáha ní ndoho ndii, te ío cuèhé sá ñi sáñaha Yá Ndióxi xii ndii. Chi ío váha iní-gá te ío cùndahú iní-gá nchaa ñáiyu ío càhnu iní-xi.

¹² Te nchòhó ñáiyu ndècu ndihi-í ichi Xítohó Jesucristú, chí cùndédóho tucu tnúhu na càháⁿ-í-a, chi ío xini ñuhu-xi. Vá cáciu nèhe-ndo Yá Ndióxi òré cuíni-ndó sá cùtnuní iní ñáiyu sá ndáá cada-ndo ñⁿ sá càháⁿ-ndó. Te ñi vá cáciu nèhe-ndo sá càchí-yu cùu ndiósí cádúha cue téé ñuyúⁿ-a. Te núú ñⁿ sá xicáⁿ tnáha ñáiyu-ndo núú-ndó te cùñaha-ni-ndo te núú cuu àdi sá vã cúú. Te vá cáciu nèhe-ndo Yá Ndióxi, ducaⁿ te vá dándòho ñaha-gã xii-ndo.

¹³ Te núú ndòho-ndo te càháⁿ ndihi-ndo Yá Ndióxi, àdi te núú ndècu váha-ndo te cudíí iní-ndó te chiñuhu-ndo-gã,

¹⁴ àdi núú cùhú-ndó te cana-ndo cuè téé yíndaha ñaha xii-ndo nacuáa ndècu-ndo ichi Yá Ndióxi cuèndá tee-güedé acití díquí-ndó, te cacán táhú-güedé núú-gã cuèndá-ndó datná ní cachí méé-gã cunduu.

¹⁵ Te núú quíndáá ndisa iní-ndó sá ndúha-ndo, te ndúha-ndo chi Yá Ndióxi cada tátna ñaha-gã xii-ndo, àdi núú ní quide-ndo ñⁿ sá ñà túú tàú-ndó càda-ndo núú-gã te cada càhnu iní-gá cuéchi-ndo.

¹⁶ Te xini ñuhu-xi cútnũhu tnàha-ndo oré ñá túú cùndáá-ndó nũú Yă Ndiõxí cuèndá chindee tnũhu tnàha-ndo cáháⁿ ndihí-ndo-gă te xocani-gă cuéhé-ndó, te cada càhnu iní-gă nchaa sá ñà túú vâha ní quide-ndo te núu cundecu váha iní-ndó. Te nchaa ñáyiu ndècu váha iní-xi núú Yă Ndiõxí na càcáⁿ-yu #ⁿ sá cuìní-yu núú-gă te ñihí-yu, chi sàá tnũhu-yu núú-gă.

¹⁷ Te té Èliás, téé ní xíndecu ndéé sanaha ní cáa-dé dàtná cáá nchòo. Te ní cáháⁿ ndihí-dé Yă Ndiõxí ní yùhu ní iní-dé ní xáhaⁿ-dè xii-gă sá vâ dácùuⁿ-gă dáú, te ní tn#-gă tnũhu ní cáháⁿ-dé, te ñá ní dàcuuⁿ-gă dáú ùní cuiá dava.

¹⁸ Te dàtnùní ducaⁿ te ní cáháⁿ ndihí tucu té Èliás-áⁿ Yă Ndiõxí sá dácùuⁿ-gă dáú te ní cuuⁿ, te ní cuu tucu nchaa sá ní xitu-güedé.

¹⁹ Te nchòhó ñáyiu ndècu ndihí-í ichi Xítóhó Jesucrìstú, te núu dava-ndo sà ndecu-ndo ichi Yă Ndiõxí ní cùu te ní dáñá-ndó, te ndècu tucu dava-ndo nadaxínu iní tnáhá-ndó nùcúndecu tucu-ndo ichi-gă,

²⁰ te núu ducaⁿ na càda-ndo te dàcácu nihnu tnàha-ndo núú ùhú núú ndàhú, te mee Yă Ndiõxí cada càhnu iní ñáhá-gă xii-ndo cuéi ío cuéhé cuèchi ní quide-ndo.

TUTÚ DÍHNA NUU NĪ CADÚHA TÉ PÈLÚ

Té Pèlú cádũha-dé tutú sá cúú-xí cuè ñáyiú sàndáá iní ñáhá xì Yá Ndiõxí

¹ Yúhú té Pèlú ní tendaha ñaha Xítohó Jesucristú xicá cùu-í càháⁿ-í tnúhu-gá, te cádúha-í tutú-a sá cúú-xí nchòhó ñáyiú xínchíté nuu ndècu distritú Pòntó, ndihì distritú Gàlaciá, ndihì distritú Capadociá, ndihì distritú Àsiá, ndihì distritú Bitiniá.

² Chi Dútú Ndiõxí ní cachí-gá sá cúú-ndó dèhe-gá ndéé cútñahá vátá ngáva-gá ñuyúí, te Espiritú-gá ní quide-xi ndècu yiñuhu-ndo núú-gá vitna. Te ní cachí-gá sá cúú-ndó dèhe-gá cuendá tñi-ndo nchàa tnúhu càháⁿ Xítohó Jesucristú, ndihì cuendá nduu ndoo nduu nine iní-ndó, chi ñiú cuendá-áⁿ nĩ xihí Xítohó Jesucristú. Te xicáⁿ táhù-í núú Yá Ndiõxí sá ïo na chindee chitúu ñaha-gã xii-ndo cuèi vitna te cuèi núú cuaháⁿ núú vèxi, te ñiú-ni-gá ná cádá te ïo váha cuu iní-ndó cùndecu-ndo.

Tnúhu ndee iní sá ndécú ndihì ñáyiú sàndáá iní ñáhá xì Yá Ndiõxí

³ Te vitna chí ná càchí-ó sã ïo càhnu cuu Yá Ndiõxí Yaá cúú Tátá Xítohó Jesucristú, chi ñiú-gá ïo ní cundàhú iní ñáhá-gã xii-o ñũu xiãⁿ ní quide-gá sá nchóó nĩ nduu-o dàtná ñⁿ ñáyiú saa vitna. Te ducaⁿ nĩ quide ñaha-gã xii-o cuendá sá Xítohó Jesucristú ní xihí-gá te ní ndoto-gá. Te cuendá sá nĩ nduu-o dàtná ñⁿ ñáyiú saa, xiãⁿ ní ngùndecu ndihì-o tnúhu ndee iní

⁴ sá cùndècu ndihì-o-gá nĩ caa nĩ quihíⁿ, chi ducaⁿ nĩ cachí-gá cunduu. Te yàcáⁿ vá quini-gá-ó nĩ ñⁿ sá cuèhé sá dúhá, te ïo cudíí iní-ó cùndecu-o ndihì-gá nĩ caa nĩ quihíⁿ.

⁵ Te sá sàndáá iní-ó Yá Ndiõxí, núu xiãⁿ coto ñaha-gã xii-o ndéé ná sàá nduu nàqueheⁿ cuendá ñáhá-gã chi ïo càhnu cuu-gá.

⁶ Te xiãⁿ ïo cudíí iní-ndó ndècu-ndo, te cuèi nándi ndòho-ndo ndecu-ndo dico sacú-ni nduu ducaⁿ ndòho-ndo.

⁷ Te òré ná cádá càhnu iní-ndó yáha-ndo nchàa sá ná càda ñaha ñáyiú xii-ndo, te ducaⁿ te cutnùni sàndáá ndisa iní-ndó Yá Ndiõxí, te sá dúcáⁿ sàndáá iní-ndó Yá Ndiõxí ïo-gá váha dàcúúxi díhúⁿ cuàáⁿ chi xiãⁿ ñã tuú cudíi-xi. Te cuèi ducaⁿ dico xito ndéé náhí-ni-güedé ñũu ndisa cùu-xi díhúⁿ cuàáⁿ. Te ducaⁿ sãtnahá-xi cùu nchóhó cuendá nchaa sá ndóhó-ndó, te na sàá nduu quixi tucu Xítohó Jesucristú te cúñaha-gã xii-ndo: “Ïo váha ní quide-ndo, te vitna ïo càhnu cuu-ndo, te táú-ndó nùcùndecu váha-ndo”, duha cúñaha-gã xii-ndo.

⁸ Te vitna ïo cùu iní-ndó Xítohó Jesucristú cuèi vátá quini-gá-ndó-gã, te ducaⁿ ïo sàndáá iní-ndó-gã, te ïo cudíí iní-ndó te súúni nĩ ñã cútñùni iní-ndó nãsa cunduu tnúhu càháⁿ-ndó sã dúcáⁿ ïo cudíí iní-ndó

⁹ cuendá sá nĩ naníhí tàhú-ndó, chi ní sàndáá iní-ndó-gã.

¹⁰ Te cue téé ní xóo càháⁿ tnúhu Yá Ndiõxí ndéé sanaha nĩ cachí-güedé nàcuáa cada-gá cundàhú iní ñáhá-gã xii-o vitna. Te cue téé-áⁿ ïo váha ní dàcuáhá-güedé nàcuáa cada Yá Ndiõxí dàcácu nihnu ñaha-gã xii-o vitna.

¹¹ Te Espiritú Xítohó Jesucristú ní ngùndecu ndihì cue téé-áⁿ ní xáhaⁿ-xi xii-güedé nàcuáa ndoho-gá, te ní xáhaⁿ tucu-xi xii-güedé sá sãtã ná yáha ndoho-gá te ïo cunuu-gã ndihì Yá Ndiõxí. Te ïo ní sani iní-güedé ñũu ná nduu sãá ducaⁿ càda-xi, ndihì nchaa nándi-gá cúú sã cádá-xi.

12 Te Yá Ndiöxí ní xáhaⁿ-gá xii-güedé sá ncháá tñuhu váha càháⁿ-güedé vá cúú-xí cuendá méé-güedé, chi cuendá nchoo cuè ñáyi ndècu ñuyúú-a vitna cùu-xí. Te ñiú-ni tñuhu-áⁿ cúú tñuhu càháⁿ nchúhú cue téé càháⁿ tñuhu Yá Ndiöxí núú-ndó. Te Espíritú sá ní taxi Yá Ndiöxí ndécú ndíhi-o chindee ñaha-xi xii-ndí càháⁿ-ndí tñuhu-gá. Te cue espíritú xínú cuèchi núú Yá Ndiöxí ío cuíní-xi quíni ndáá-xi nchaa nàcuáa cuháⁿ tñuhu-áⁿ.

Yá Ndiöxí càchí-gá sá cáda-ó mèe-ni sá vâha

13 Te sá dúcáⁿ ío váha ní quide ñaha Yá Ndiöxí xii-ndo xíáⁿ xíní ñuhu-xi ío váha cuáha-ndo cuendá nàcuáa cundecu-ndo te vá cání ìní-ndó càda-ndo ni ìⁿ sá cuèhé sá dúhá, te ío quindáá ìní-ndó sá Yá Ndiöxí cada váha ñaha-gá nduu na quixi tucu Xítohó Jesucristú.

14 Te ío tñi-ndo nchaa tñuhu càháⁿ Yá Ndiöxí, te vá cúhúⁿ-gá ìní-ndó nãndi sá cuèhé sá dúhá sá ní xúhuⁿ ìní-ndó cùtnàhá vátá cùndècu-gá-ndó ìchi-gá te ní vâ cáda-ndó.

15 Te cada-ndo mèe-ni sá vâha cundecu-ndo dàtná quidé mèe Yá Ndiöxí Yáá ní càháⁿ ñáhá xii-o cundecu-o ndíhi-gá.

16 Te càchí-gá núú tütú-gá: “Cada-ndo mèe-ni sá vâha cundecu-ndo, chi ducaⁿ quide yúhú”, duha càchí-gá núú tütú-gá.

17 Te Yá Ndiöxí cada ndáá-gá cuèchi nchaa ñáyi, te vá cáda cuendá-gá cuèi náí ñáyi cùú-yu, te nchòhó càchí-ndó sá ñíú Tátá-ndó cùu-gá te ndáá, núú xíáⁿ xíní ñuhu-xi canehe-ndo sá yíñuhu núú-gá ndi nchaa nduu cundecu-ndo ñuyúú-a.

18 Te ñiú-gá ní dácacu nihnu ñaha-gá xii-ndo ìⁿ ichi sá ñà túú nãndíhi ní sanu ichi ñaha cuè ñaní tnáhá-ndó ní xíndècu ndéé sanaha ni cùu, te nchòhó sa ñaha-ndo sá sá dúcáⁿ ní quide ñaha Yá Ndiöxí ní dácacu nihnu ñaha-gá xii-ndo ìchi-áⁿ ñà túú ní cháhu-gá ní ìⁿ díhúⁿ cuááⁿ, te ní ìⁿ díhúⁿ cuixíⁿ sá ndíhi nihnu ñuyúú-a cuendá-ndó.

19 Chi Xítohó Jesucristú ní quixi-gá ní sati níñí-gá, te ní xíhí-gá núú cùrúxi cuendá sá nchóó nãníhí tàhú-ó, te cùu-gá dàtná ìⁿ mbèé quiti ío váha ìní-xi, quiti càndoo canine.

20 Te ducaⁿ ní ndoho Xítohó Jesucristú, chi ducaⁿ tnáhi ndéé tñuni ndoho-gá ndéé cùtnàhá vátá ngáva-gá ñuyúú. Te ducaⁿ ní yáha-gá cùtnàhá ní quixi-gá óré vitna cùmání sáá nduu nàa ñuyúú-a cuendá nchoo cùu-xi sá vâha xii-o vitna.

21 Te nchòhó sa níhí-ndó tñuhu nàcuáa ní yáha Xítohó Jesucristú cùtnàhá ní quixi-gá ñuyúú-a, núú xíáⁿ sãndáá ìní-ndó Yá Ndiöxí. Te Yá Ndiöxí ní dándótó-gá Xítohó Jesucristú, te sátá ní dándótó ñaha-gá te ní cachí-gá sá ío càhu cuu Xítohó Jesucristú. Te sá dúcáⁿ ní cuu, xíáⁿ ío sãndáá ìní-ndó Yá Ndiöxí, te ní taxi-gá tñuhu ndee ìní ndécú ndíhi-ndo sá sáá nduu cundecu-ndo ndíhi-gá ni caa ni quíhíⁿ.

22 Te Espíritú Yá Ndiöxí ní quide-xi te ní sãndáá ìní-ndó tñuhu-gá, te xíáⁿ ní nduu ndoo ní nduu nine ìní-ndó, te cùu ìní tnáhá ndisa-ndo nàcuáa ndècu-ndo ichi Yá Ndiöxí, te xini ñuhu ndisa-xi sá ío ni yùhu ni ìní-ndó cùu ìní tnáhá-ndó ìⁿ ìⁿ-ndo.

23 Te nchòhó ní nduu-ndo dàtná ìⁿ ñáyiúú saa sá cuendá tñuhu Yá Ndiöxí, te tñuhu-áⁿ candeca-xi ìní-ndó ní caa ni quíhíⁿ, te vá ìⁿ nduu ndíhi nihnu-xi, te ñá ñíú cuendá ñáyiúú ñuyúú-a ni nduu-ndo ìⁿ ñáyiúú saa chi cuendá tñuhu-gá.

24 Chi núú tütú Yá Ndiöxí càchí-xi:

Nchaa ñáyi ndècu ñuyú-a cùú-yu dàtná cùhú, chi cùhú-ǎⁿ tnaa-ni cùdí-xi te xihí-xi, ducaⁿ sǎtnahá-xi cùú-yu.

Te nchaa sá ndécú ndihí-yu cùu-xi datná ìⁿ itá cùhú-ǎⁿ, chi itá-áⁿ tnaa-ni tucu cùdí-xi te ndàhvá-xi, ducaⁿ sǎtnahá-xi cùu nchaa sá ndécú ndihí-yu.

²⁵ Dico tnúhu Yá Ndiòxí chi vá náá tnàhí-xi, chi duha-ni ndècu-xi, te ñu-ni duha cundecu-xi ní caa ní quíhíⁿ.

Duha càchí-xi núú tütú-gá. Te ñu tnúhu-áⁿ ní dánèhé ñáhá nchùhú cue téé càháⁿ tnúhu Yá Ndiòxí xii-ndo.

2

¹ Te xíǎⁿ xíní ñuhu-xi dañá-ndo nchaa núú sá cuèhé sá dúhá, te dañá-ndo ìchi tnúhu ndehnde, te dañá-ndo vá dándàhú-gá-ndó mèe-ndo sá quidé vâha-ndo, te dañá-ndo ìchi cuedú íní, te dañá-ndo nchâa tnúhu yiti.

² Te cada-ndo cuendá sá cùú-ndó dàtná cue landú yíquíⁿ vitna sadi camá, chi landú-áⁿ mee-ni sàdi-güexi te sàhnu-güexi. Te cada iní-ndó sá dúcáⁿ càda-ndo chí xini ñuhu-xi sá ïo cuhuⁿ iní-ndó dàcuaha-ndo tnúhu Yá Ndiòxí, chi xíǎⁿ cùú-xí mèe-ni tnúhu váha, te ducaⁿ te cuita cuehnu nihnu-ndo ìchi-gá quíhíⁿ ndéé ná sáá nduu cùndecu-ndo núú ndécú-gá.

³ Te ducaⁿ xini ñuhu-xi cada-ndo, chí nchòhó sa ní cutnùnì ndisa iní-ndó sá Yá Ndiòxí ïo váha iní-gá.

Xítohó Jesucristú cùú-gá dàtná ìⁿ yúú

⁴ Te ïo nanducu nihnu-ni-ndo Xítohó Jesucristú Yaá quidé nàcuáa naníhí tǎhú-ó. Te ñu-gá ní cuu-gá dàtná ìⁿ yúú sá ñà túú nàndihí sá cùú-xí ñáyi ñuyú-a, chí ní dáquéé tǎhú ñáhá-yu xii-gá. Dico Yá Ndiòxí ní cachí-gá sá Xítohó Jesucristú cùú-gá dàtná ìⁿ yúú sá ïo-gá váha, chí ïo cùnuu-gá.

⁵ Te nchòhó sa ní naníhí tǎhú-ndó, te ïo-gá chí nándücu nihnu Yá Ndiòxí cuendá cuu ìⁿnuu-ndo cùndecu-ndo ndihí Espiritú-gá. Te núu ducaⁿ na càda-ndo te cuu-ndo dàtná yúú váha dàcaa-güedé dava vehe, te cuu tucu-ndo dàtná cue dütú ní xinu cuechi núú Yá Ndiòxí ndéé sanaha, nàcuáa ñà túú ná cumání-ndó núú-gá, chí nchaa cue téé-áⁿ ní xóo cuáha ñaha-güedé sá ní xóo nduu tǎhú-gá. Te nchòhó vitna tǎu-ndó càda-ndo nchaa nacuáa càháⁿ-gá, te nduu vétú iní-gá. Te ducaⁿ càda-ndo chí ndècu-ndo ndihí Xítohó Jesucristú.

⁶ Te Yá Ndiòxí cachí-gá núú tütú-gá:

Yúhú taxi ndecu-í ìⁿ Yaá ñuú Sìlón,

te cuu-gá dàtná ìⁿ yúú váha sá sánútnǎ-güedé xíquí cimientú ìⁿ vehe, chí yúhú ní cachí-í sá Yáa-áⁿ ïo cunuu-gá.

Te nchaa ñáyi quindáá iní ñáhá xii-gá vá ìⁿ ndùu ndixi cuéchi iní-yu sá dúcáⁿ sàndáá iní ñáhá-yu xii-gá.

Duha càchí-gá núú tütú-gá.

⁷ Te nchòhó ñáyi sàndáá iní ñáhá xii Xítohó Jesucristú ïo cùu iní-ndó-gá, te nchaa ñáyi ñà túú sàndáá iní ñáhá xii-gá quidé-yu dàtná càháⁿ-xi núú tütú Yá Ndiòxí núú cachí-xi:

Yúú sá ní dáquéé tǎhú cue téé dàcaa vehe, xíǎⁿ cùú-xí yúú sá ïo-gá nándihí vitna. Duha càchí-xi núú tütú-gá. Te yúú-ǎⁿ cada iní-ó sá cùú-xí Xítohó Jesucristú, chí ní dáquéé tǎhú ñáhá-güedé xii-gá.

⁸ Te càchí tucu-xi ingá xichi núú tütú Yá Ndiòxí:

Yúú-ǎⁿ nguñenu ñáyi te ndúá-yu.

Duha càchí-xi núú tùtú-gá. Te tnúhu-án quée-xí sã ïo quide sáá iní ñáiyu núú-gã, chi ñá túú cuiní-yu tñí-yu tnúhu càháⁿ-gá, te ducaⁿ tnàhí ndéé tnuní sá ncháá ñáiyu ñá túú cuiní tñí tnúhu càháⁿ-gá, te ïo cùu sáá iní-yu núú-gã.

Ñáiyu ndècu ndihí Yá Ndiòxí

⁹ Te nchoo cùu-o ñáiyu sa ní dáquée ðíⁿ ñaha Yá Ndiòxí xii-o cuendá cundecu-o ndihí-gá, te cùu-o dútú xínú cuèchi-o núú-gã, te mee-gã cúú-gã Yaá ïo cùnuu, te cùu-o ñáiyu quide ndáá xíndecu ichi-gá te cùu tucu-o ñáiyu yíndaha-gá. Te ducaⁿ nĩ quide ñaha-gã xii-o cuendá sá cñaha-o xii nchaa ñáiyu sá ïo càhnu cuu-gá, te ïo vai núú sã vãha quide-gá, te ðiu-gá ní quide ní ðañá-ó ncháa ichi cuehé ichi duha ndècu-o ní cuu, te ní sanu ichi ñaha-gã xii-o ïⁿ ichi váha, te vitna cùtnuní iní-ó sã ïo càhnu cuu-gá.

¹⁰ Te nchoo cùu-o ñáiyu ñá túú ndècu ndihí Yá Ndiòxí ní cùu, dico vitna ní ngúndecu ndihí-o-gã, te ðává-án vátá sáá-gá nduu cada váha ñaha-gã xii-o, dico vitna sa ní sáá nduu quide váha ñaha-gã xii-o, chi ïo cùndahú iní ñáhá-gã.

Cada váha-o cùndecu-o cunu cuechi-o núú Yá Ndiòxí

¹¹ Te nchòhó ïo cùu iní ñáhà-í xii-ndo, te càchí tnúhu-í xii-ndo sã nchóó cùu-o datná cue ñáiyu ndècu tnaduha ïⁿ ñuuú, te ducaⁿ sãtnahá-xi cùu-o chi tnaa-ni ndècu-o ñuyú-a, te sáá nduu nduu táhú-ó cùndecu-o núú ndécú Yá Ndiòxí táxí tnuní-gá, te xiãⁿ càháⁿ ndàhú-í núú-ndó sã vã cadá-ndó nĩ ïⁿ sá cuèhé sá ðuhá sãni iní-ndó, chi nchaa xiãⁿ ñá túú cùu-xi sá vãha sá cúú-xí-ndó.

¹² Te cada váha-ndo cùndecu-ndo núú ncháa ñáiyu ñá túú ndècu ichi Yá Ndiòxí, te cuèi na càháⁿ ñáiyu sá nchòhó nchìcúⁿ nihnu-ndo ìchi cuehé ichi duha, dico quini-yu nchaa sá vãha quide-ndo, dico na sáá nduu ðàndixi túu Yá Ndiòxí iní-yu sá ñá túú quide váha-yu ndécú-yu, te ðává-án cachí-yu sá quidé vãha-ndo ndècu-ndo, te cada càhnú-yu Yá Ndiòxí.

¹³ Te Xítohó Jesucristú cuiní-gá sá nchòhó ïo quindáá iní-ndó ncháa cue tée cùchiuⁿ taxi tnuní ñáhá xii-ndo, te ducaⁿ-ni quindáá iní-ndó cuèi mee tée cùnuu vihi-gá yíndaha ñaha xii ñáiyu.

¹⁴ Te ducaⁿ-ni quindáá iní-ndó ncháa dava-gá cue tée cùnuu, chi Yá Ndiòxí ducaⁿ nĩ cachí-gá cunduu sá cuè tée-áⁿ cada ndáá-güedé nchaa cuèchi ñáiyu quide cuehé quidé ðuha ndecu, te cáháⁿ váha-güedé cuendá nchaa ñáiyu xíquide váha ndècu.

¹⁵ Te Yá Ndiòxí cuiní-gá sá cadá vãha-ndo cùndecu-ndo cuendá nchaa ñáiyu ïo nĩ ðiquí-xi càháⁿ cuèhé cuendá-ndó sã ndécú-ndó ìchi Yá Ndiòxí vá ñhí-gá-yu tnúhu càháⁿ-yu.

¹⁶ Te nchòhó, Yá Ndiòxí ní quide-gá sá cúú-ndó ñáiyu cuu cada nàcuáa véxi iní mée-xí, dico ñá ðíú sã ðucáⁿ nĩ quide ñaha-gã xii-ndo, te ngóo-ndo càni iní-ndó cada-ndo nãndi sá cuèhé sá ðuhá, chi cada-ndo sã cúú-ndó ñáiyu xínu cuechi núú Yá Ndiòxí.

¹⁷ Te canehe-ndo sã yíñùhu núú ncháa ñáiyu, ndihí núú tée cùnuu vihi yíndaha ñaha xií-yu, te cuu iní tnáhá ñdĩ mee-ndo nacuéa ndècu-ndo ìchi Yá Ndiòxí, te ïo canehe-ndo sã yíñùhu núú-gã.

Nchaa nàcuáa ndoho-o cùndecu-o ìchi Xítohó Jesucristú

¹⁸ Te nchaa nchòhó ñáiyu xínu cuechi canehe-ndo sã yíñùhu núú cuè patróoⁿ-ndó, te quindáá iní-ndó cada-ndo nchaa chiuⁿ tahu-güedé. Te ïⁿ-ni cada-ndo núú cuè tée váha iní-xi, ndihí núú cuè tée ïo cuihna iní-xi.

19 Te núu nchòhó ná càda ndee iní-ndó ndòho-ndo nchaa sá ñà túú tàù-ndó ndòho-ndo cuendá sá cuíní-ndó cùndáá-ndó núú Yá Ndióxi ñá, te ío nduu vétú iní-gá.

20 Te núu nchòhó ní quide-ndo ñí cuéchi, te sàhni iní-ndó dàndòho ñaha ñáyiú xii-ndo, ¿te ná sá vâha cùu xíáⁿ-í? Dico núu nchòhó ná cáda ndèe iní-ndó ndòho-ndo nchaa sá cáda ñaha ñáyiú xii-ndo sá cuendá sá quidé-ndó sá vâha ñá, te núu ducaⁿ na càda-ndo te cùu-xi ñí sá vâha núú Yá Ndióxi.

21 Te Yá Ndióxi ní cachí-gá sá cáda ndèe iní-ó ndòho-o nándi ndòho-o sá cuendá sá quidé-ó sá vâha, chí ío ní ndòho Xítóhó Jesucristú cuendá-ó, te ducaⁿ tàù-ó càncicúⁿ nihnu-o càda ndee iní-ó ndòho-o nándi ndòho-o, chí ducaⁿ ní quide-gá.

22 Te mee-gá ñá túú quide-gá ni ñí sá cuèhé sá dúhá, te ni ñí tnúhu ndehnde ñà túú càháⁿ-gá.

23 Te òré ní xóo cúcuèhé ñáhá-güedé xii-gá, te ñá túú ní xóo danchòcáva-gá tnúhu cuèhé, te òré ní xóo dàndòho ñaha-güedé xii-gá, te ñá túú ní xáhaⁿ-gá xii-güedé sá ío ná cada ñaha-gá, chí núú ndáhá Yá Ndióxi ní xóo nachihi-gá mée-gá, ndíhi nchaa sá sání iní-güedé cada ñaha-güedé xii-gá. Te Yá Ndióxi cúú-gá Yáá ío vâha cada ndáá cuéchi nchaa ñáyiú na sáá nduu.

24 Te Xítóhó Jesucristú cúú-gá Yáá ní xíhi núú cùrúxi cuendá nchaa cuéchi nchoo ñáyiú ndècu ñuyíú-a. Te ducaⁿ ní xíhi-gá cuendá nchoo dùuⁿ duuⁿ daña-o nchaa ichi cuèhé ichi duha, te cada ndáá-ó cùndecu-o ichi-gá. Te ní dánícuèhé ñáhá-güedé xii-gá, te sá dúcáⁿ ní ndòho-gá xíáⁿ ní ngúndecu vâha nchoo vitna.

25 Te nchoo cùu-o datná cue mbéé cue quití ní xíta ni cùu, dico vitna ní tuha-o Xítóhó Jesucristú, te Yáá-áⁿ cúú-gá datná ñí toli xító ñaha-gá xii-o vitna cuendá sá vâ cuíta nihnu-o.

3

Nàcuáa tàù ñáyiú tnándaha cadá-yu cundecú-yu

1 Te nchaa nchòhó ñáyiú ñíhi ní tnandaha ío quindáá iní-ndó yíi-ndo cuendá sá núu ñá túú sàndáá iní-güedé tnúhu Yá Ndióxi te quindáá iní-güedé cuendá sá ndéhé-güedé quidé ndáá-ndó ndècu-ndo, te ni ñá túú xini ñuhu-xi cáháⁿ-ndó tnúhu-gá núú-güedé.

2 Chí ndèhe mee-güedé sá nchòhó quidé ndáá-ndó ndècu-ndo, te nèhe-ndo sá yíñùhu núú Yá Ndióxi.

3 Te vâ cání iní-ndó mèe-ni cunduu vii-ndo, te ndada-ndo ñíquí-ndó nàcuáa tàù-xi cunduu, te vâ cání iní-ndó nándi canehe-ndo, te ni vâ cání iní-ndó cuñhu-ndo mee-ni dóo vâha sá ío vii ndáa.

4 Chí iní-ndó xini ñuhu-xi cunduu vii cunduu vâha-xi núú Yá Ndióxi cuéi vitna te cuéi núú cuáháⁿ núú vèxi, te cuu-ndo ñáyiú ío càhnu iní-xi, te núu ducaⁿ na càda-ndo te ío cuu vâha iní Yá Ndióxi.

5 Te ducaⁿ ío vii ío vâha ní xínduu iní nchaa ñáyiú ñíhi ní xíndecu ndéé sanaha, te ñáyiú-áⁿ ío ní sàndáá iní-yu Yá Ndióxi te ní cudíú-yu núú-gá, te ní tníí-yu nchaa tnúhu ní cáháⁿ yíi-yu.

6 Te ducaⁿ ní xóo cada ndíi Sárá ní xóo quindáá iní ndíi yíi ndíi, ndíi Àbrahám, te ní cánehe ndíi ñíhi-áⁿ sá yíñùhu núú yíi ndíi. Te núu nchòhó quidé vâha-ndo ndècu-ndo te ñá túú yùhú-ndó ná cada ñaha tnàha ñáyiú-ndo xii-ndo, te núu ducaⁿ quide vâha-ndo ndècu-ndo te quide-ndo datná ní quide ndíi Sárá.

7 Te nchòhò cue tée ndècu ñadihí-xi ío váha cuáha-ndo cuendá nàcuáa cundecu váha-ndo ndihí-yu, te ío vii cáháⁿ ndihí-ndó-yu, chi ñáyiú-áⁿ íí-gá-yu dàcúúxí nchòo cue tée, te ducaⁿ càda-ndo chi ndi ndúú-ndó ndúu táhú-ndó cùndecu-ndo ndihí Yá Ndiòxí, te núu ducaⁿ na càda-ndo te òrè cáháⁿ ndihí-ndo Yá Ndiòxí te tedóho ñaha-gá xii-ndo.

Ñáyiú quíde sá vâha ndòhò-yu

8 Te càchí tnúhu tucu-í xii-ndo sá ío cuu ñⁿnuu-ndo cùndecu-ndo, te cundáhú iní tnáhá-ndó ñⁿ ñⁿ-ndo, te cuu iní tnáhá tucu-ndo nacúáa ndècu-ndo ichi Yá Ndiòxí, te cuu-ndo ñáyiú ndàhú iní-xi.

9 Te núu ñⁿ sá ñà túú vâha quíde ñaha ñáyiú xii-ndo, te ñá díú-ní dùcaⁿ nanchocáva-ndo càda-ndó-yu, àdi xicuehé ñáhá-yu xii-ndo, te vá ná dànhocáva-ndo ñiú-ni tnúhu cuèhé, chi cáháⁿ táhú-ndó núú Yá Ndiòxí cuendá sá ná cádá vâha ñaha-gá xii-yu, te ducaⁿ càda-ndo chi Yá Ndiòxí ní cáháⁿ ñáhá-gá xii-ndo cuendá sá cádá vâha ñaha-gá xii-ndo tnáhá-ndó.

10 Te núú tùtú Yá Ndiòxí càchí-xi:

Nchaa ñáyiú cuíní cundecu váha ndi nchàa nduu ñini cundecú-yu ñuyíú-a, xìni ñuhu-xi sá vâ cáháⁿ-yu tnúhu cùtexínu, te ni vâ dácuàndehndé-yu.

11 Te xìni ñuhu-xi duuⁿ duuⁿ dañá-yu nchaa ichi cuèhé ichi duha, te cadá-yu mee-ni sá vâha, te ío ndùcú-yu nàcuáa cadá-yu cundecu váha-yu ndihí tnàha ñáyiú-yu te ñiú-ni ducaⁿ càncicúⁿ nihnú-yu cadá-yu.

12 Te Yá Ndiòxí xító-gá nchaa ñáyiú quíde ndáá núú-gá te tedóho-gá nchaa tnúhu càháⁿ-yu, dico nchaa ñáyiú ñá túú cuíní cada ndáá, ñáyiú-áⁿ ñà túú cùu váha iní-gá núú-yu.

Duha càchí-xi núú tùtú-gá.

13 Te vá yòo níhí ndéé càda ñaha xii-o ñⁿ sá ñà túú vâha te núu mee-ni sá vâha na càda-o cundecu-o.

14 Àdi núu ná cúú sá ná cádá ñaha ñáyiú xii-o sá cuendá sá quíde vâha-o ndècu-o ña, te sá dúcáⁿ ná cádá ñáhá-yu xii-o cùu-xi ñⁿ sá vâha sá cúú-xí-ó núú Yá Ndiòxí. Te na càchí tnúhu-í xii-ndo sá vâ yùhú-ndó-yu, te ni vâ cùndéyí-ndó cuendá nchaa sá ná càda ñáhá-yu xii-ndo.

15 Te nèhe-ndo sá yíñuhu núú Xítohó Jesucristú. Te ío cundecu túha-ndo dànehé-ndó ñáyiú véxi ndècu tnúhu núú-ndó nàcuáa ndúu tnúhu ndee iní ní taxi Xítohó Jesucristú ndécú ndihí-ndo, te cuu vii cuu váha iní-ndó cáháⁿ ndihí-ndó-yu, te cáháⁿ-ndó núú-yu mee-ni tnúhu yíñuhu nacúáa cùu váha iní Yá Ndiòxí.

16 Te ío cada váha-ndo cùndecu-ndo cuendá sá vâ cùndéyí-ndó, te núu ducaⁿ na càda-ndo, te nchaa ñáyiú xicuehé ñáhá xii-ndo cuendá sá quíde vâha-ndo ndècu-ndo ichi Xítohó Jesucristú quendóo canúú-yu ndihí nchaa tnúhu càháⁿ-yu, chi nchòhò quíde vâha-ndo ndècu-ndo.

17 Te vâha-gá sá ndóhó-ó cuendá sá quíde-ó sá vâha te núu mee Yá Ndiòxí ducaⁿ cuíní-gá cundúu, te ñá díú sá ndóhó-ó cuendá sá ñà túú quíde-o sá vâha.

18 Te Xítohó Jesucristú ní xihí-gá sá cuendá nchaa cuéchi nchaa nchoo ñáyiú ndècu ñuyíú-a, te ñⁿ xito-ni ducaⁿ ní xihí-gá te ducaⁿ te vá cùu tnàhí-gá, te mee-gá cúú-gá Yáá ñá túú tnàhí cuéchi-xi, te ducaⁿ ní ndoho-gá cuendá nchaa cuéchi ñáyiú ndècu ñuyíú-a ñáyiú ñá túú cuíní cada ndáá núú Yá Ndiòxí, te

ducaⁿ ní cuu cuendá sá núcũndecu váha-yu núú Yá Ndiõxí te núu na quĩndáá iní ñáhã-yu xii-gá. Te mee-gã ní xihí-gá dico Espiritú-gá chi ní xĩndecu-ni-xi,

¹⁹ te Espiritú-gá ní sáhãⁿ-xi ní cáháⁿ-xi tnúhu Yá Ndiõxí núú ncháa espíritú ñáyiú ndècu núú ùhú núú ndáhú.

²⁰ Te ñáyiú-án cúú ñáyiú ní xĩndecu ndéé sanaha cũtnáhã ní xĩndecu ndíi Nõé, chi ñáyiú-án ïo ní quide sãã iní-yu núú Yá Ndiõxí. Te Yá Ndiõxí ïo váha iní-gá, chi ní dácácã-gã nduu ní xĩndecuu ndíi Nõé ní cadúha ndíi bàrcú cuendá ndétú-gã ndixi cuéchi iní-yu sá ñã túú quide váha-yu ndécú-yu ni cùu. Te dàvã-áⁿ ní ndaa ndute ñuyíú te ní cácu únã duha ná tnáhã ñáyiú, chi ní quée-yu xití bàrcú-áⁿ, te ñã túú ní cãhá-yu.

²¹ Te sá dúcãⁿ ní cácu ñáyiú únã-áⁿ ñã túú ní cãhá-yu ndute ní ndaa ñuyíú dàvã-áⁿ. Te xĩãⁿ quée-xí sã cuãndute ñáyiú vitna, te naníhí tàhú-yu te núu na quĩndáá iní-yu tnúhu ndáã tnúhu Yá Ndiõxí. Te ñã díú sã cuãndute-o te nduu ndoo nduu nine yiqui cuñú-ó te naníhí tàhú-ó, chi xini ñuhu-xi nãhmã-ó núú Yá Ndiõxí ncháa yicã cuéchi-o, te nduu ndoo nduu nine iní-ó, te ducaⁿ te naníhí tàhú-ó, chi Xitohó Jesucristú ní xihí-gá cuendá-ó te ní ndoto-gá.

²² Te Yaá-án cuãndaa-gá andiú, te ní ngóo-gá xio cùha Yá Ndiõxí, te tàxi tnuní-gá ncháa espíritú cúnúu ndihí ncháa dava-gá cue espíritú xínú cuéchi.

4

Cada-o nãcuáa cuiñí méé Yá Ndiõxí

¹ Te Xitohó Jesucristú ní ndoho-gá cũtnáhã ní xĩndecu-gá ñuyíú-a, te vitna nchòhó cundecu túha-ndo ndòho-ndo cuendá-gá, chi ncháa ñáyiú ndòho nãndi sá ndòhó cuendá-gá dàñã-yu ncháa sá cuèhé sá dúhá.

² Te ducaⁿ ñã túú-gã ndécú-yu ichi cuèhé ichi duha, chi mee-nã nãcuáa càháⁿ Yá Ndiõxí quidè-yu ndécú-yu ñuyíú-a.

³ Te nchòhó sa nãha-ndo sá ïo cuèhé núú sã cuèhé sá dúhá ní xóo cada-o cũtnáhã vátã cundecu-gã-ó ichi Yá Ndiõxí, chi ní xóo cada-o ncháa sá cuèhé sá dúhá cùdíi ïni ncháa ñáyiú ñã túú sãndáá iní tnúhu-gá, te dàvã-áⁿ ní xóo cada-o ncháa núú sã cuèhé sá dúhá, te ní xóo caní cuèhé ní xóo caní duha iní-ó, te ní cuu-o cuè ñáyiú quihu, te ní xóo cundecu-o víco núú ní xóo cada-o ncháa sá ñã túú váha, te ní xóo níhí tnáhã-ó ndihí ncháa tnaha quihu-o, te ní xóo chiñuhu-o ncháa sá cãchí-yu cùu ndiõxí te ñã ndáã sá ndiõxí cúú ncháa xĩãⁿ, te nãndi-gá ncháa sá cuèhé sá dúhá ní xóo cada-o dàvã-áⁿ.

⁴ Te ñáyiú-án cúúñuhu-yu vitna sá ñã túú-gã ñihí tnáhã-ó ndihí-yu cada-o ncháa sá cuèhé sá dúhá quidè-yu, te xĩãⁿ càháⁿ cuèhé-yu cuendá-ó vitna.

⁵ Dico sáã nduu te ñáyiú-án nãhmã-yu ncháa sá quidè-yu núú Xitohó Jesucristú, chi ñiú-gá sa ndècu túha-gá sá cadã ndáã-gá cuéchi ncháa ñáyiú sa ní xihí, ndihí cuéchi ncháa ñáyiú xĩndecu vívú.

⁶ Te cue ñáyiú sa ní xihí ní xĩndedòho tnúhu Xitohó Jesucristú, te cuèi ní xihí-yu dàtnã xihí dava-gã ñáyiú, dico espíritú-yu chi ní nduu tàhú-xi ndècu váha-xi dàtnã ndécú Yá Ndiõxí.

⁷ Te vitna ta cùyatni danaa Yá Ndiõxí ñuyíú-a núu xĩãⁿ ïo váha cuãha-ndo cuendá nãcuáa cundecu-ndo, te càháⁿ ndihí-ndo-gã.

⁸ Te xini ñuhu-xi sá ïo cuu iní tnáhã-ndó ñiⁿ ñiⁿ-ndo, chi núu ducaⁿ na cùu iní tnáhã-ndó ñiⁿ ñiⁿ-ndo, te vá caní-gã iní-ndó càda cuendá-ndó ncháa sá ñã túú váha quide ñaha ñáyiú xii-ndo,

9 te nchòhò ñáyíu xĩndecu vehe-xi cuáha nùu-ndo vehe xii cue ñáyíu ñùhu ichi na ndetatú-yu, te ío váha cuu iní-ndó dùcaⁿ cada-ndo.

10 Te Yá Ndiòxí ní taxi-gá ndí dííⁿ núú tǎhú ndécú ndíhi-ndo ìíⁿ ìíⁿ-ndo, te nàcuáa ndùu tǎhú ní nduu tǎhú-ndó ìíⁿ ìíⁿ-ndo te ducaⁿ chĩndee tñaha-ndo, te vǎ dáña ndèè-ndó càda-ndo nchaa nacuáa tàuchíuⁿ Yá Ndiòxí cada-ndo, te chĩndee ñaha-gá xii-ndo.

11 Te dava nchòhò ñáyíu càháⁿ tnúhu Yá Ndiòxí núú ñáyíu, xĩni ñuhu-xi càháⁿ-ndó nàcuáa ndùu tnúhu-gá núú-yu, te dava nchòhò ñáyíu quide nchaa núú chĩuⁿ chĩndee tñaha ñáyíu-xi, xĩni ñuhu-xi cada-ndo sá Yá Ndiòxí chĩndèe ñaha-gá xii-ndo, te ducaⁿ càda-ndo nchaa núú sá váha, chi Xítóhó Jesucristú tñahá-gá chĩndèe ñaha-gá xii-ndo, te ducaⁿ ío cuu càhnu Yá Ndiòxí. Te vitna tàú-ó càháⁿ-ó sá ío càhnu cuu Xítóhó Jesucristú, chi díu-gá cúnùu-gá nchaa nduu nchaa quíú, te ducaⁿ na cùnduu.

Ndoho tñahá-ó cùndecu-o ichi Xítóhó Jesucristú

12 Te nchòhò ñáyíu ío cùu iní-í, vá cúñùhu-ndo sǎ ío ndòho-ndo ndecu-ndo ichi Xítóhó Jesucristú, chi sá dúcáⁿ ndòho-ndo-án cùnùní ndisa sá sàndáá iní-ndó-gǎ, te vá cání iní-ndó nǎ cuèndá ducaⁿ ndòho-ndo.

13 Chi da cudíí iní-ndó te núu ndòho-ndo datná ní ndoho Xítóhó Jesucristú, te ducaⁿ súúní cùdíí iní-ndó òré ná quíxi tucu-gá ñuyú-a te dàvá-án quini-ndó sǎ ío càhnu cuu-gǎ.

14 Te núu xĩcuèhé ñahá ñáyíu ndècu ichi cuehé ichi duha xii-ndo cuèndá sá ndécú-ndó ichi Xítóhó Jesucristú, te xǎⁿ cúú-xí ìíⁿ sá váha sá cúú-xí-ndó núú-gǎ, te ducaⁿ chi Espíritú Yá Ndiòxí sá ío cùnunu ndecu ndíhi ñaha-xi xii-ndo, te nchaa ñáyíu ndècu ichi cuehé ichi duha-ǎⁿ càháⁿ cuèhé-yu cuèndá Xítóhó Jesucristú, dico nchòhò càchí-ndó sǎ ío càhnu cuu-gǎ.

15-16 Te núu nchòhò dándòho ñaha ñáyíu xii-ndo sǎ cuèndá sá ndécú-ndó ichi Xítóhó Jesucristú ñá, te vá cúú càháⁿ núú-ndó, chi ndacáⁿ tǎhú-ndó núú Yá Ndiòxí cuèndá sá ndécú-ndó ichi-gǎ. Te cuèí ndòho-ndo ndecu-ndo, dico ñá túú cùu-ndo ñáyíu sàhni ndíyí te ní ñá túú cùu-ndo ñáyíu dùhu, te ní ñá túú cùu-ndo ñáyíu quide cuehé quidé dùha, te ní ñá túú cùu-ndo ñáyíu chĩndee tnúhu tñaha ñáyíu-xi ìíⁿ sǎ ñá túú tàú-ndó càda-ndo.

17 Te vitna sa quèsaha Yá Ndiòxí cada ndáá-gǎ nchaa sá quidé nchò ñáyíu ndècu ndíhi-gǎ, te núu ducaⁿ te ndèè-gǎ cada-gǎ nchaa ñáyíu ñá túú sàndáá iní ñahá xii-gǎ òré ná sáá nduu dùcaⁿ cada ñaha-gǎ xii-yu.

18 Te nchòhò xini-ndó sǎ ñáyíu quide váha ndècu ichi Xítóhó Jesucristú ndòho tñahá-yu ndécú-yu, dico sáá nduu te nduu tǎhù-yu cundecú-yu ndíhi-gǎ. Te núu ducaⁿ ndòho nchaa ñáyíu quide váha ña, ¿te nása-gǎ yáha nchaa ñáyíu ndècu ichi cuehé ichi duha na sáá nduu càda ndáá Yá Ndiòxí cuéchi-yu-i?

19 Te nchaa nchòhò ñáyíu ndòho nacuáa cuíní Yá Ndiòxí xĩni ñuhu-xi sá vǎ dáña ndèè-ndó càda váha-ndo cùndecu-ndo, te ío quindáá iní-ndó sǎ xító ñaha-gǎ xii-ndo. Te díu-gǎ cúú-gǎ Yáa ní cadúha ñaha xii-o, te quide-gǎ ìíⁿ sǎ càháⁿ-gǎ.

5

Nàcuáa tàú-xi cada ñáyíu ndècu ichi Xítóhó Jesucristú

1 Te yúhú càháⁿ-í dóho nchaa nchòhò cue téé yĩndaha nchaa dava-gǎ ñáyíu ndècu ichi Xítóhó Jesucristú, chi tñahá yúhú yĩndàhá-í ñáyíu ndècu ichi-gǎ, te

sàndáá iní-í tnúhu-gá, te ní xiní-í nchaa nàcuáa ní ndoho-gá, te sáá nduu te tnàhá-í cunuu-í ndihi-gá.

² Te ío canehe cuendá-ndó nchaa ñáyi ndècu ichi Yá Ndiöxí yíndàha-ndo te cada-ndo dàtná quidé cuè toli, chi cue téé-áⁿ ío váha xito-güedé mbéé-güedé. Te canehe cuendá-ndó-yu sá cúú iní méé-ndó te ñá díú sá ío ñⁿ ñáyi cada yica ñàha xii-ndo, te ni ñá díú sá cuíní-ndó cùhuⁿ yáhu-ndo, chi ni yùhu ni iní-ndó còto-ndó-yu, chi ducaⁿ cuíní Yá Ndiöxí cunduu.

³ Te vá cádá-ndó sá ío cunuu-ndo núú-yu, chi cada-ndo mèe-ni sá váha cuendá ducaⁿ cànchicúⁿ nihnú-yu cadá-yu tnàhá-yu.

⁴ Te òrè ná quíxí tùcu Xítohó Jesucristú Yáá néhé cuendá ñàhá xii-o nchaa-o ñuyú-a, te taxi-gá sá ío váha nduu táhú-ó, te cunuu-o ndihi-gá ni caa ni quíhíⁿ.

⁵ Te nchòhó ñáyi ndècu ichi Xítohó Jesucristú càháⁿ-í dóho-ndo sá ío quindáá iní-ndó cuè téé yíndaha ñàha xii-ndo nacuaá ndècu-ndo ichi-gá, te nchaa-ndo tàú-ndó quindáá iní tnàhá-ndó ñⁿ ñⁿ-ndo, chi núú tùtú Yá Ndiöxí càhí-xi ñⁿ xichí:

Nchaa ñáyi quide cahnu mee-xi ñá túú cùu váha iní Yá Ndiöxí núú-yu, dico nchaa ñáyi ndàhú iní-xi te chindee ñàha-gá xií-yu.

Duha càhí-xi núú tùtú-gá.

⁶ Te daña-ndo mèe-ndo núú ndáhá Yá Ndiöxí, chi mee-gá ío cunuu-gá. Te núú ducaⁿ na càda-ndo, te sáá nduu te cada nínu ñàha-gá xii-ndo.

⁷ Te nchaa sá yáha-ndo ndècu-ndo te nachihi-ndo ndàha Yá Ndiöxí, chi mee-gá xító ñàha-gá xii-ndo.

⁸ Te ío váha cuáha-ndo cuendá cundecu-ndo, te quíhi iní-ndó chi sácúhna xícá cùu-xi cuíní-xi dacuíta nihnu ñàha-xi xii-o, chí ío cùu úhú iní ñàhá-xí, te cùu-xi datná ñⁿ quítí dééⁿ xícá ndècu sá cáxí-xí.

⁹ Te ío quindáá iní-ndó Xítohó Jesucristú, te vá dàñá-ndó mèe-ndo dandahú ñàhá sácúhna xii-ndo càda-ndo nacuaá cuíní-xi, chi ñàha-ndo sá ncháá ñáyi ndècu ichi Xítohó Jesucristú xíndecu nihí ñuyú ndóhó-yu dàtná ndóhó nchò ndècu-o ichi-gá.

¹⁰ Dico sacú-ni nduu duha cundoho-o te dàtnúni ñá túú-gá ná cumání-ó cùndecu-o núú Yá Ndiöxí, te dàvá-áⁿ vǎ cání ñⁿ cani úú iní-ó cùndecu-o ichi-gá. Te ío-gá ngúndecu ndihi-o tnúhu ndee iní cada-o nchaa nacuaá càháⁿ-gá, te ducaⁿ càda-o chi mee Yá Ndiöxí ío chindee ñàha-gá xii-o, te díu-ni Yáá-áⁿ ío cùu iní ñàhá-gá xii-o, chí ní cáháⁿ ñàhá-gá xii-o cùndecu-o núú ío váha càa ndècu-gá cundecu-o ní caa ni quíhíⁿ, te ducaⁿ ní quide-gá chí ní sándáá iní-ó Xítohó Jesucristú.

¹¹ Te ío ndacáⁿ táhú-ó núú Yá Ndiöxí chí ío càhnu cuu-gá, te cunuu-gá nchaa nduu nchaa quíú. Te ducaⁿ na cùnduu.

Tnúhu ndéé núú ní ndihi-ná

¹² Te té Silvanú xiní-í sá cúú-dé ñⁿ téé quide ndáá ndécú ichi Xítohó Jesucristú, te díu-dé ní cáháⁿ ndàhú-í núú-dé ní tee-dé ñⁿ úú tnúhu sá ní xáhaⁿ-í xii-dé núú tùtú-a cuendá daquixí-í ndaha-ndo, te núú tùtú-a càhí tnúhu ndáá-í xii-ndo sá Yá Ndiöxí ío cùu iní ñàhá-gá, te chindee ñàha-gá xii-ndo ndècu-ndo, te càhí tnúhu tucu-í xii-ndo sá ío quindáá iní-ndó sá ndáa ducaⁿ quide ñàha-gá xii-ndo.

¹³ Te cue ñáyi ndècu ñuú Babiloniá, ñáyi ndècu ichi Yá Ndiöxí, díu-ni ñáyi ní cachí Yá Ndiöxí sá nánihí tàhú dàtná cúú nchòhó, ío quide ndee iní ñàhá-yu

xii-ndo, te tnàhá té Mǎcú té cùu datná ìḡ déhe-í quidé ndèe iní ñáhá-dě xii-ndo.

¹⁴ Te ndihì tnúhu yĩñùhu cada ndee iní tnáhá-ndó ìḡ ìḡ-ndo, te xìcáⁿ táhù-í nùú Yǎ Ndiǒxí sá ïo na cùndecu nahi nchaa nchohó ñáyi^u ndècu ndihì Xítóhó Jesucristú. Te ducaⁿ na cùnduu. Te ío chí cádá ndèe iní-nǎ vitna.

TUTÚ CÚÚ ÒÚ NÍ CADÚHA TÉ PÈLÚ

Té Pèlú cádúha-dé tutú quíhíⁿ ndaha ñáyiú sàndáá iní tnúhu Yá Ndiòxí

¹ Yúhú té Xímú, àdi Pelú chí úú òú-í, xínú cuèchi núú Xítóhó Jesucristú, chí mee-gã ní tendaha ñaha-gã xii-í xicá cùu-í càháⁿ-í tnúhu-gã. Te cádúha-í tutú-a sá cúú-xí nchàa nchòhó ñáyiú sàndáá iní ñáhá xii-gã dàtná sàndáá iní-ndí-gã, te ducaⁿ chí Tãtá-ó Dùtú Ndiòxí ní dácàháⁿ-gã iní-ó ní sàndáá iní-ó-gã, chí cùu-gã Yáá ío váha quide ndáá ndíhi Xítóhó Jesucristú Yáá dácãcu nihnu ñaha xii-o núú ùhú núú ndàhú.

² Te xicáⁿ táhù-í núú Yá Ndiòxí sá ùuⁿ-gã uuⁿ-gã ná cuita chindee chitúu ñaha-gã xii-ndo quíhíⁿ, te ducaⁿ ío váha cuu iní-ndó cùndecu-ndo, te ducaⁿ càda-gã chí ta cùtnuní-gã iní-ndó nàcuáa ndùu cuendá-gã, te ducaⁿ ta cùtnuní tucu iní-ndó nchàa nacuáa ndùu cuendá Xítóhó Jesucristú Yáá cúú Xítóhó-ó.

Nàcuáa quide ñáyiú ndècu ichi Xítóhó Jesucristú

³ Te Yá Ndiòxí ío càhnu cuu-gã chí chindee ñaha-gã xii-o quide ndáá-ó ndècu-o datná cuiní mée-gã, te ducaⁿ chí cùtnuní iní-ó nàcuáa sàni iní Xítóhó Jesucristú Yáá ní càháⁿ ñáhá xii-o. Te òré ní càháⁿ ñáhá-gã xii-o te ní cùtnuní iní-ó sã ío càhnu cuu-gã te ío váha quide-gã.

⁴ Te ducaⁿ ní cùtnuní tucu iní-ó nàcuáa ní càháⁿ-gã cada ñaha-gã xii-o, te tnúhu ní càháⁿ-gã-áⁿ ío càhnu cuu-xi te ío váha, te nchoo ní sàndáá iní-ó tnúhu-áⁿ núu xiáⁿ ñá túú-gã ndécú-ó ichi cuehé ichi duha te ní ñá túú-gã sání iní-ó càda-o nándi sá cuèhé sá dúhá, te ní cuu vii ní cuu váha iní-ó vitna.

⁵ Te sá dúcáⁿ quide-gã te xiáⁿ ío nducu ndèe-ndo cada-ndo nchaa nacuáa càháⁿ-í-a, te nchòhó sàndáá iní-ndó-gã dico ñá díú mèe-ni xiáⁿ chí tnàhá xíní ñùhu-xi cada ndáá-ndó cùndecu-ndo. Te núu quide ndáá-ndó ndècu-ndo te xini ñuhu-xi tecú tnùní-ndó tnúhu-gã.

⁶ Te núu tècú tnùní-ndó te cùu-ndo ñáyiú xini cotnii mee-xi, te núu cùu-ndo ñáyiú sàcòo tnií mee-xi te xini ñuhu-xi cunduu cahnu iní-ndó cuèi nándi sá ná yáha-ndo cùndecu-ndo, te núu càhnu iní-ndó te xini ñuhu-xi cada ndáá-ndó cùndecu-ndo datná cuiní mée Yá Ndiòxí cada-ndo.

⁷ Te núu quide ndáá-ndó ndècu-ndo, te xini ñuhu-xi ío cuu iní tnàhá ndí mee-ndo nacuáa ndècu-ndo ichi-gã, te núu cùu iní tnàhá ndí mee-ndo te xini ñuhu-xi cuu iní-ndó nchàa dava-gã tnàha ñáyiú-ndo.

⁸ Te núu sa ducaⁿ quide-ndo ndècu-ndo te uuⁿ-gã cuita ducaⁿ càda-ndo quíhíⁿ núú cuàháⁿ núú vèxi, te núu ducaⁿ quide-ndo te cùu-ndo cue ñáyiú ñá túú dàna iní-xi xíndecu, te cuita cùtnuní-gã iní-ndó nchàa nacuáa sàni iní Xítóhó Jesucristú quíhíⁿ.

⁹ Te nchaa ñáyiú ñá túú cuiní ducaⁿ càda cuú-yu ñáyiú ñá túú tnàhí ndíxi túu iní-xi sá Yá Ndiòxí sa ní ndada ndoo ní ndada nine-gã iní-yu cuendá nchaa sá cuèhé sá dúhá ní xóo cadá-yu, te ñáyiú-áⁿ cúú-yu dàtná íiⁿ ñáyiú cuáá àdi datná íiⁿ ñáyiú ñá túú cùtnuní váha núú-xi, te ducaⁿ sàtnahá-xi cùú-yu cuendá sá dúcáⁿ quidè-yu.

¹⁰ Te xiáⁿ núu yúhú càháⁿ-í dóho nchaa nchòhó ñáyiú ndècu ichi Xítóhó Jesucristú, te ío nducu ndèe-ndo cada váha-ndo cùndecu-ndo cuendá cùtnuní ndáá iní-ndó sã Yá Ndiòxí ní càháⁿ ñáhá-gã xii-ndo, te ducaⁿ ní quide-gã chí

ducaⁿ nĩ cachí-gá cada-gá. Te vá ñⁿ ndũu cani iní-ndó dàña-ndo ichi-gá, te núu vá dáña ndéé-ndó càda-ndo nchaa nacuaá càháⁿ-í-a.

¹¹ Te núu ducaⁿ na càda-ndo cundecu-ndo, te ío víi ío váha cada Yá Ndiõxí queheⁿ cuendá ñáhá-gá xii-ndo òré ná sàa-ndó núu ndécú Xítohó Jesucristú táxi tnũni-gá nchaa nduu nchaa quíú, te ñũ-ni Yaá-ãⁿ cúú Xítohó-ó te ní dácãcu nihũu ñaha-gá xii-o núú ùhú núú ndáhú.

¹² Te ducaⁿ-ni quĩhi-í dandacu iní ñáhà-í xii-ndo nchàa tnũhu càháⁿ-í-a cuẽi sa xini-ndó tnũhu-án, te cuẽi sàndáá váha iní-ndó nchàa tnũhu ndáá dácuaaha-ndo.

¹³ Te yúhú quidé cuendá-í sá ío tàú-xi cáháⁿ-í dóho-ndo ñini ndecu-í ñuyíú-a cuendá sá vã nãcuànaa-ndo nacuaá cada-ndo cundecu-ndo.

¹⁴ Chi Xítohó Jesucristú ní cachí-gá sá ñã túú-gá vãi nduu cundecu-í ñuyíú-a te cuú-í.

¹⁵ Te ío nducu ndèe-í nducu-í nãcuáa cada-í cuendá quendóo ndih-ndo nchàa tnũhu càháⁿ-í-a, te cuẽi na yãha cuú-í dico vá nãcuànaa-ndo cada-ndo nchaa nacuaá càháⁿ tnũhu sá dánèhé ñáhà-í xii-ndo vitna.

Cue tée ní xini núú sã ío càhnu cuu Xítohó Jesucristú

¹⁶ Te sa ní dánèhé ñáhá-ndĩ xii-ndo sã ío càhnu cuu Xítohó Jesucristú. Te ní cachí tnũhu tucu-ndĩ nãcuáa cada-gá òré quixi tucu-gá, te tnũhu-án cúú-xi tnũhu ndáá cuiti te ñã díú tnũhu sá ní sani iní cue ñãyiu ñuyíú-a cùu-xi, chi nchũu ní xini núú-ndĩ nãcuáa ní quide-xi cùtnàhá ní cutnũni iní-ndĩ sá ío càhnu cuu Xítohó Jesucristú.

¹⁷ Chi dává-ãⁿ ío váha ní quide Tãtã-ó Dútú Ndiõxí ní quide càhnu-gá Xítohó Jesucristú, te ñũ-ni dává-ãⁿ ní cáháⁿ Dútú Ndiõxí ndéé andũ ní xáhaⁿ-gã xii Xítohó Jesucristú: “Yòhó cúú-n Dẽhe-í tée ío cùu iní-í, te ío cùdũ ñã ñáhà-í xii-n”, duha ní xáhaⁿ Yã Ndiõxí xii Xítohó Jesucristú.

¹⁸ Te nchũhú ní tecú dóho-ndĩ ní cáháⁿ Yã Ndiõxí ndéé andũ cùtnàhá ducaⁿ ní xáhaⁿ-gã xii Xítohó Jesucristú, chi tnàhá-ndĩ ndécú-ndĩ ndih-gá yucu núú dúcãⁿ ní quide càhnu ñaha Yã Ndiõxí xii-gá.

¹⁹ Te ndècu ndih-o nchaa tnũhu ní cáháⁿ cue tée ní xóo cáháⁿ tnũhu Yã Ndiõxí ndéé sanaha te nchaa tnũhu-án càháⁿ-xi nchaa nãcuáa cada-xi vitna, te cùtnũni iní-ó sã tnũhu ndáá cúú-xí, te xini ñũhu-xi cada cuendá váha-ndo nchàa nacuaá càháⁿ tnũhu-án, chi tnũhu-án cúú-xí dàtnã ñũ ñũhú dáyehé-xi ndéé òré véxi túndaá quené chòdini cáhnú dáyehé-di. Te ducaⁿ sãtnahá-xi cùu tnũhu-án chi quide-xi nacuaá cutnũni iní-ó cuendá Xítohó Jesucristú.

²⁰ Te xini ñũhu-xi sã ío-gá cada cuendá-ndó sã ñã túú ñãyiu tecú tnũni ní ñũ tnũhu sá ní chidó tnũni cue tée ní cáháⁿ tnũhu Yã Ndiõxí ndéé sanaha, te núu Yã Ndiõxí vá cadá-gã nãcuáa cutnũni iní-yu nãcuáa càháⁿ nchaa tnũhu-án.

²¹ Te cue tée-ãⁿ ío ní xindecu yĩñũhu-güedé núú Yã Ndiõxí, te nchaa tnũhu sá ní cáháⁿ-güedé-ãⁿ ñã túú cùu-xi tnũhu sá ní cahu iní mée-güedé, chi Espiritú Yã Ndiõxí ní dácáhú ñã ñáhá-xí xii-güedé nãcuáa cunduu tnũhu cáháⁿ-güedé.

2

Cue tée càchí sá càháⁿ tnũhu Yã Ndiõxí te ñã ndàá

¹ Te ndéé sanduu chi ní xindecu cue tée ní xóo dandáhú ñáhá xii ñãyiu isràel càchí sá càháⁿ tnũhu Yã Ndiõxí te ñã ndáá sá càháⁿ-güedé tnũhu-gá, te ñũ-ni ducaⁿ tucu cundecu cue tée dandáhú ñáhá xii-ndo vitna, chi cachí-güedé sá càháⁿ-güedé tnũhu Yã Ndiõxí te ñã ndáá. Te cue tée-ãⁿ ío yidáhu

cáháⁿ-güedé, te nchaa tnúhu cáháⁿ-güedé-áⁿ dacuíta nihnu ñaha-xi xii-ndo te núu na tédóho-ndo, chi cue téé-áⁿ vǎ nūnuu-güedé sá Xitohó Jesucristú ní xihí-gá cuendá-güedé. Te sá dúcáⁿ cada-güedé ío-gá ndíhi dacuíta nihnu-güedé méé-güedé.

² Te vai ñáyiú xínu iní-yu cadá-yu nándi sá cuèhé sá dúhá cuendá sá dúcáⁿ cada cue téé-áⁿ, te cuendá xíáⁿ ngóo ñáyiú cáháⁿ úhú-yu cuendá ichi Yá Ndióxi.

³ Te mee-ni tnúhu sá ní cahu iní cue ñáyiú ñuyíú-a danèhé ñáhá-güedé xii-ndo, te quesaha-güedé sá cúú-xí tnúhu ndáá te ñá ndáá cuendá-ni sá cuañaha-ndo díhúⁿ xii-güedé, chi ñu-ni xíáⁿ tnàhí cuhuⁿ iní-güedé, dico Yá Ndióxi sa ní cunaha ndècu túha-gá cuendá cada ndáá-gá cuèchi-güedé, te na sáá nduu te cuíta nihnu duuⁿ-güedé, chi Yá Ndióxi vǎ nácuánaa-gá íiⁿ sá ní cachí-gá cada-gá.

⁴ Te Yá Ndióxi ñá túú ní quide cahnu iní-gá sá ní quide cue espíritú ñá túú ní cuini cada ndáá xínú cuèchi núú-gǎ ní cùu, chi ní dáquihíⁿ ñáhá-gǎ xii-xi íiⁿ xichi núú ío ndòho-xi ndecu-xi, te xíáⁿ cundedí nihnu-xi ndéé sáá nduu cuíta nihnu duuⁿ-ná-xi.

⁵ Te Yá Ndióxi ñá túú ní quide cahnu tucu iní-gá nchaa sá ní quide ñáyiú ñuyíú díhna, chi dàvá-áⁿ ní dándáá-gǎ ndute ñuyíú ní cáhá nchaa ñáyiú ndècu ichi cuèhé ichi duha te íiⁿndi-ni té Nòé ndíhi úsá-gǎ tucu cue ñáyiú cùu ndi mee-dé ní dácacu nihnu-gǎ. Te té Nòé-áⁿ cúú-dé téé ní cáháⁿ dóho-yu nácuáa cada váha-yu cundecú-yu ní cùu te ñá túú ní cuini-yu.

⁶ Te Yá Ndióxi ní dǎngává-gǎ ñuhú ní dánáá-gǎ ñáyiú ñuú Sòdomá ndíhi ñáyiú ñuú Gòmorrá te mee-nǎ yáá ní nduu ñuú-áⁿ. Te sá dúcáⁿ ní cuu xíáⁿ cúnùnì iní-ó nácuáa cada ñaha Yá Ndióxi xii nchaa ñáyiú ñá túú quide váha.

⁷ Dico té Lót téé ní quide ndáá ní xíndecu íiⁿ ñuú-áⁿ dàvá-áⁿ chi ní dácacu nihnu ñaha-gǎ xii-dé. Te nchaa ñáyiú ñuú núú ní xíndecu-dé-áⁿ ío ní xínduu cuíhna iní-yu, te mee-ni ichi díí iní ní xíndecú-yu, te sá dúcáⁿ ní xóo cadá-yu xíáⁿ ío ní ndíhú iní té Lót.

⁸ Te íiⁿ nduu íiⁿ nduu ní xóo cada ndàhú-xi iní té Lót-áⁿ cuendá nchaa tnúhu cuèhé tnúhu duha ní xóo cáháⁿ-yu ní xóo cundedóho-dé, ndíhi cuendá nchaa sá cuèhé sá dúhá ní xóo cadá-yu ní xóo quini-dé, te mee-dé ní cuu-dé íiⁿ téé ní xínduu víi ní xínduu váha iní-xi núú Yá Ndióxi.

⁹ Te sá dúcáⁿ ní yáha té Nòé ndíhi té Lót, xíáⁿ cúnùnì iní-ó sǎ Yá Ndióxi ío chindee-gǎ cue ñáyiú quide ndáá ndécú ichi-gǎ cuendá sá vǎ cadá-yu nándi sá cuèhé sá dúhá cuèí nándi na ndòhó-yu cundecú-yu. Te Yá Ndióxi cachí-gǎ sá ncháá ñáyiú ndècu ichi cuèhé ichi duha sa ndècu túha-yu sá quihíⁿ-yu núú úhú núú ndàhú nduu nǎ yáha cundáá cuèchi-yu.

¹⁰ Te uuⁿ-gǎ cada ñaha Yá Ndióxi xii nchaa cue téé ndècu ichi díí iní, te dàquee tíhú-güedé nchaa tnúhu sá sánú ichi ñaha xii-o nacúáa cada-o cúndecu-o, te cùu-güedé cue téé ñí iní-xi, te yíi iní-güedé, te ñá túú yùhú-güedé cáháⁿ úhú-güedé cuendá nchaa espíritú cúnùu.

¹¹ Te cue espíritú xínú cuèchi núú Yá Ndióxi ío cùnnuu-xi dacúúxí cuè téé-áⁿ, dico ñá túú cùyí-xi cáháⁿ-xi dátá cáháⁿ cue téé-áⁿ óré ndácáⁿ cuèchi-xi núú Yá Ndióxi cuendá nchaa sá quidé cue espíritú cúnndíhi yucu ñáváha.

¹² Te nchaa cue téé dandàhú ñáhá xii-ndo-áⁿ cúú-güedé dátá cue quiti, chi cue quiti-áⁿ ñá túú ndècu sá xini tnùnì-güedé, chi cue quiti-áⁿ ní cacu-güedé sá tníí-ó-güedé te cahni-o-güedé. Te ducaⁿ sátnahá-xi cùu nchaa cue téé-áⁿ, chi cáháⁿ cuèhé-güedé cuendá ndédani cǎa espíritú cuèí ñá túú xini-güedé ná

espíritú cúu-xí, te diu-ni mee-güedë dácuita nihnu-güedé méé-güedë sá dúcáⁿ quide-güedé,

13 te sáá nduu te nacháhu-güedé nchaa sá quidé-güedë-áⁿ, te cuëi nduu cuëi níú cúdíí ínî-güedé quidé-güedë nchaa núú sá cuèhé sá dúhá sàni ínî-güedé. Te òré nàtacá-ndó càda-ndo ìⁿ vico chiñuhu-ndo Yá Ndiòxí te chitnahá ñáhá-güedé xii-ndo, te cada dusaⁿ-güedé sá cúdíí ínî-güedé sá dándàhú ñáhá-güedé xii-ndo, te dicó sácáⁿnúú cuãha ñaha-güedé xii-ndo dùcaⁿ na cada-güedé.

14 Te nchaa cue téé-áⁿ òré xínî-güedé ìⁿ ñáyiú ðìhí te ndìhi-ni sàni ínî-güedé cáháⁿ ndìhi ñaha-güedé xií-yu, te ñá túú ndúu vétú ínî-güedé cuendá nchaa sá cuèhé sá dúhá quide-güedé chi uuⁿ-gá uuⁿ-gá sánî ínî-güedé cada-güedé. Te cuáháⁿ-güedé dándàhú-güedé nchaa ñáyiú ñá túú níhî ndéé càda ndáá cuendá canchicúⁿ nihnú-yu nchaa tnúhu càháⁿ-güedé. Te mee-ni nchaa sá ndécú ndìhi tnaha ñáyiú-güedé cúú ínî-güedé, te cue téé-áⁿ cúú-güedé cue téé duuⁿ duuⁿ sa ní xíta nihnu núú Yá Ndiòxí.

15 Chi cùu-güedé cue téé vâ cánî-gã ínî-xi cada ndáá, te nchicúⁿ nihnu-ná-güedé quidé-güedé nàcuáa ní xóo cada ndíi Bàlaám déhe ndíi Bèór, chi ndíi Bàlaám-áⁿ ní xóo tnahá ínî ndíi cada ndíi chiúⁿ cuehé nàcuáa ní xóo níhî ndíi díhúⁿ.

16 Te Yá Ndiòxí ní quide-gá ní cáháⁿ búrru ndíi ní tenàà ñáhá-dí xii ndíi cuendá sá vâ cadá ndíi ìⁿ cuèchi sàni ínî ndíi cada ndíi ní cùu. Te sá dúcáⁿ ní cuu xiáⁿ ní nguítuu ndíi ñá túú ní quide ndíi ìⁿ sá ñá túú nàndìhi sàni ínî ndíi ní cùu.

17 Te nchaa cue téé ducaⁿ xíquide cùu-güedé dàtná ìⁿ doco yìchí, te cùu tucu-güedé dàtná ìⁿ vícò sá xidó tàchí te ñá túú dàú nchídó-xí, te sa ndècu túha ìⁿ xichi núú Ìo nee quíhîⁿ-güedé cundecu-güedé ní caa ní quíhîⁿ.

18 Te cue téé-áⁿ càháⁿ-güedé dàtná càháⁿ ìⁿ téé Ìo cùu cahnú dico ñá túú vèdana nàndìhi nchaa tnúhu càháⁿ-güedé, te cue téé-áⁿ dándàhú-güedé nchaa ñáyiú íchí ní dàñá íchi cuehé ichi duha, te xãháⁿ-güedé xií-yu sá cúú-ní cadá-yu nchaa sá cuèhé sá dúhá quide nchaa ñáyiú ndècu ichi díí ínî,

19 te xãháⁿ tucu-güedé sá cúú-ní cadá-yu nání véxi ínî-yu cuëi sá vãha te cuëi sá cuèhé, dico mee-güedé chi mee-ni sá cuèhé sá dúhá cùnúu quide-güedé. Te nchaa ñáyiú ñá ndácú dàña nándi sá cuèhé sá dúhá cúu-yu dàtná ìⁿ ñáyiú xínu cuechi ñá túú tnahá dàñá quèe núú chíúⁿ patróoⁿ-xi. Te ducaⁿ sãtnahá-xi cúu-yu chi ñá ndácú-yu dàñá-yu nándi sá cuèhé sá dúhá quide-yu.

20 Te núu ñáyiú sa ní dàñá nchaa ichi cuehé ichi duha cuendá sá ní cutnùni ínî-yu nàcuáa ndúu tnúhu Xíttohó Jesucristú, Yaá ní dácäcu nihnu ñaha xii-o núú ùhú núú ndàhú ná nànchocáva ínî-yu cundecu tucú-yu ichi cuehé ichi duha, te mee-ná sá cuèhé sá dúhá tàxi tñunî ñáhá-xí xií-yu, te núu ducaⁿ te vaa-gá tucu cadá-yu dàcúúxí dàtná ní xóo cadá-yu cùtnahá vátá cùtnùni-gá ínî-yu nàcuáa ndúu tnúhu-gá.

21 Te váha-gá sá vâ ngùnu ichí-yu ichi ndáá ní cùu te ñá díú sá sá ní ngúnu ichí-yu te ní dàñá-yu nchaa tnúhu-gá sá sá ní níhî-yu ndècu ndìhî-yu sànu ichi ñaha-xi nacúaa cundecu-yu ní cùu.

22 Te ñáyiú ducaⁿ xíquide quèe ndáá-xi nàcuáa cuáháⁿ ìⁿ cuèndú sá càchî-xi: “Iná ní nacaxi-dí sá ní ndusaⁿ-dí, te cùchí quití íchí ní xichi ndute càndoo cuáháⁿ-ni tucu-dí cuchi ñuhu-dí núú ndèhyú”, duha cuáháⁿ cuèndú-áⁿ.

3

Xítohó Jesucristú quixi tucu-gá

1 Te nchaa nchòhó ñáiyu ío cùu iní-í cùtnuní iní-í sá ío váha sàni iní-ndó, te xéhé cúú-xí tütú cúú úú cádúha-í sá cúú-xí-ndó, te ìⁿ-ni càháⁿ-í dándàcu iní ñàhá-í xii-ndo nchaa tnúhu sá sà ní xíndedóho-ndo.

2 Chi cuiní-í sá vâ nâcuànaa-ndo nchaa tnúhu ní càháⁿ nchaa cue téé ní xóo càháⁿ tnúhu Yá Ndióxi ndéé sanaha, te ni vâ nâcuànaa-ndo nchaa tnúhu ní càháⁿ cue téé ní càháⁿ tnúhu Xítohó Jesucristú Yáá ní dácâcu nihnu ñaha xii-o núú ùhú núú ndàhú, chi ñiu nchaa tnúhu-án sánú ichi ñaha-xi xii-o nacuáa cada-o cùndecu-o.

3 Te ío-gá xíní ñùhu-xi cutnuni iní-ndó nâcuáa cada-xi òré vátá sàá-gá nduu quixi tucu Xítohó Jesucristú ñuyú-a, te cächí tnúhu-í xii-ndo sá cùndecu ñáiyu cuhuⁿ iní mee-ni nchaa sá cuéhé sá dúhá te mee-ni xiãⁿ cadá-yu, te càháⁿ cuéhé càháⁿ duhá-yu cuendá tnúhu Yá Ndióxi.

4 Te cachí-yu: “Ñá ndàá sá quixí Xítohó Jesucristú ñuyú-a, chi núu quixi-gá te sá ndéé ama-gá sa ní quexio-gá ní cùu. Te dàtná-ni quide-xi vitna ñiu-ni duha ní quesaha-xi quide-xi ndéé cùtnàhá ní ngáva ñuyú, te ñiu-ni duha quide-xi ndéé cùtnàhá ní xíndecu cue ñani tnàhá-ó ndéé sanaha, te ñiu-ni duha quide-xi ndéé ní sáá nduu ní xíhí-güedé, te ñiu-ni duha quide-xi ndéé vitna”, duha càháⁿ-yu.

5 Te ñucùuⁿ cadá-yu vâ cadá cuendá-yu sá Yá Ndióxi ní càháⁿ-gá te ní ngúndecu andiù ndihi ñuyú-a, te ñiu-gá ní quide ní quene ñuhu yíchi xití ndute ní ngúndecu-xi ìⁿ xio.

6 Te ìⁿ xito ní dándáá Yá Ndióxi ndute ñuyú-a ní dánáá-gá nchaa sá ío.

7 Te Yá Ndióxi ní cachí-gá sá cùndecu-ni ñuyú-a ndihi andiù ndéé ná sáá nduu cada-gá nchaa nâcuáa ní càháⁿ-gá sá cúú-xí nchaa ñáiyu ndecu ichi cuéhé ichi duha, te dàvá-án danàa-gá nchaa ñáiyu-án chi cáyú andiù ndihi ñuyú-a.

8 Te nchaa nchòhó ñáiyu ío cùu iní-í, ío cuhuⁿ iní-ndó tnúhu na càháⁿ-í-a, chi Yá Ndióxi ñá túú sàni iní-gá dàtná sání ñni méé-ó, te ìⁿ nduu cùu-xi datná úxi cièndú cuíá, te úxi cièndú cuíá-ãⁿ cúú-xí dàtná ìⁿ nduu sá cúú-xí-gã.

9 Te Yá Ndióxi ñá túú dàna ndodo iní-gá vâ cadá-gã ìⁿ sá càháⁿ-gá dàtná cächí cue ñáiyu sá dáná ndòdo iní-gá cada-gã ìⁿ sá càháⁿ-gá, chi ñucùuⁿ tnahí dâcaca-gã nduu cuendá sá ío cùndahú iní ñàhá-gã xii-o, te cuiní-gá sá ncháá ñáiyu ndixi túu iní-yu sá ñà túú quide váha-yu ndécú-yu te tuhá-yu ichi-gá, te ducaⁿ quide-gá chi cuiní-gá sá vâ cuíta nihnu ni ìⁿ-yu.

10 Te dàtná quidé cue ñadúhú quíhu-güedé ìⁿ vehe dùhu-güedé òré ñá túú yíhi iní xítohó vehe-án, te ducaⁿ càda Xítohó Jesucristú chi nduu ñà túú yíhi iní ñáiyu ñuyú-a quixi tucu-gá, te dàvá-án cada-xi andiù dàtná quidé-xi òré níhi víhi caháⁿ ñúhu, te ñiu-ni òré-án ndoñuhu àndiù, te cáyú nchaa chódíní, te cáyú tucu tnàhá ñuyú-a ndihi nchaa sá ío.

11 Te vitna nchòhó sa xíní-ndó sá náá ñuyú-a te xiãⁿ ío xíní ñuhu-xi cada váha-ndo cùndecu-ndo, te cada-ndo nâcuáa cuiní méé Yá Ndióxi cunduu.

12 Te ío nducu ndèe-ndo ducaⁿ cada-ndo cuendá ducaⁿ ndihi-ni sáá nduu càda-gá nchaa nâcuáa càháⁿ-gá, te ducaⁿ nchòhó cundecu túha-ndo sáá nduu-án. Te ñiu-ni nduu-án ndoñuhu àndiù chi cáyú-xi, te ñiu-ni ducaⁿ ndoñuhu tucu nchaa chódíní chi ndihi-ñi cáyú.

¹³ Te nchoo ndètu-o sáá nduu cùndecu-o ìíⁿ ñuyíú sáá, te quini-ó ìíⁿ andiú saa datná ní cachí Yá Ndióxi, te yàcáⁿ chi mee-nă cue ñáyiú quide váha cundecu.

¹⁴ Te nchòhó ñáyiú ío cùu iní-í, nini ndètu-ndo sáá nduu dùcaⁿ cada-xi ío nducu ndèe-ndo cada-ndo mee-ni sá váha cundecu-ndo ìchi Yá Ndióxi, te cundecu nahi-ndo, te cada-ndo nchàa nacuáa vá cùndècu cuéchi-ndo núú-gă.

¹⁵ Te ío cada cuendá-ndó sá dăcaca-gă nduu dùcaⁿ cada-gă chi cuini-gă sá nchăá ñáyiú naníhi tăhú-yu. Te té Păblú tée ío cùu iní-ó ndècu ndihi-o ìchi Xítóhó Jesucristú diu-ni năcuáa căháⁿ-í-a diu-ni ducaⁿ nî tee-dé ìíⁿ núú tûtú ní dăquixí-dě ndaha-ndo, te ní tee-dé năcuáa ní dăcáhú ìni ñáhá Yá Ndióxi xii-dé.

¹⁶ Te diu-ni ducaⁿ căháⁿ-dé nchaa dava-gă núú tûtú cądŭha-dé, te dava tnúhu căháⁿ-dé ío úhú tecú tnùnı-ó, núú xıăⁿ ñáyiú ñă túú cùtnunı váha inı-xi, ñáyiú ío yáchı sândăá inı-xi ìíⁿ tnúhu, ñáyiú-áⁿ təcú tnùnı dătnı-yu nchaa tnúhu ní chídó tnùnı-dé, ndihi nchaa dava-gă tnúhu yòdo tnunı núú tûtú Yá Ndióxi, te sá dúcáⁿ quidé-yu te dăcuıta nihnú-yu mée-yu.

¹⁷ Te nchòhó ñáyiú ío cùu inı-ı, sa cùtnunı inı-ndó năcuáa quide dava ñáyiú, núú xıăⁿ ío xını ñuhu-xi quıhi inı-ndó cùndecu-ndo cuendá ducaⁿ cùndecu-ni-ndo ìchi-gă, te vá dăñá-ndó mée-ndo dandahú ñáhá nchàa cue tée ndècu ìchi cuéhé ìchi duha, chi cue tée-áⁿ ñă túú sàni váha inı-güedé cuendá tnúhu Yá Ndióxi. Te núú na dăña-ndo mee-ndo dandahú ñáhá-güedé xii-ndo te vá cùndècu váha-gă-ndó ìchi-gă dătná ndécú-ndó vitna.

¹⁸ Te nchòhó uuⁿ-gă uuⁿ-gă cuita cutnùnı-gă inı-ndó quıhıⁿ nchaa năcuáa ta chındee ñaha Xítóhó Jesucristú xii-ndo cuăháⁿ. Te ducaⁿ ío-gă cuita cutnùnı inı-ndó nchàa nacuáa sàni inı-gă, te diu-gă cúú-gă Yaá ní dăcăcu nihnu ñaha xı-o núú úhú núú ndăhú. Te chí ná căchı-ó să ío căhnu cuu-gă cuéi vitna té cuéi ndée núú cuăháⁿ núú vëxi. Te ducaⁿ na cùnduu. Te ío chí cądá ndèe inı-nă vitna.

TUTÚ DÍHNA NÍ CADÚHA TÉ JUÁÁ

Tnúhu sá càháⁿ nàcuáa naníhí tãhú-ó

1 Te yúhú té Juáá càchí tnúhu-í xii-ndo cuendá Cristú Yaá càháⁿ nàcuáa cundecu ndihí-o Yã Ndiõxí. Te Cristú-án sa ndècu-gá ndéé cútñàhá ní ngáva ñuyú. Te yúhú ní xiní núu-í ndihí cue téé ní xica cuu ndihí-í nàcuáa càa nàcuáa nduu-gá. Te ní xíndedóho-ndí tnúhu ní cáháⁿ-gá, te ní tendaha-ndí-gá te ní cutnùní ndáá iní-ndí sá ñⁿ yiqui cuñú cúú-gã.

2 Te ní quixi túu-gá ñuyú-a, te ní xiní-ndí-gá, te xíãⁿ càchí tnúhu ndáá-ndí xii-ndo. Te càchí tnúhu tucu-ndí sá ndécú-gã ndihí Tãtá-gã Dútú Ndiõxí ní cùu, te ní quixi-gá ñuyú-a ní xíndecu-ndí ndihí-gã. Te ní cachí tnúhu-gá xii-ndí sá ndúú tãhú-ó cùndecu ndihí-o Yã Ndiõxí ní caa ní quíhⁿ te núu na quíndáá iní-ó-gã.

3 Te xíãⁿ dátúu-ndí núu-ndó nchaa sá ñí xiní-ndí, ndihí nchaa sá ñí xíndedóho-ndí cuendá cuu ñⁿnuu-o nchaa-o datná nchúhú cúú ñⁿnuu-ndí ndihí Tãtá-ó Dútú Ndiõxí, ndihí Déhe-gá Xítohó Jesucristú.

4 Te xíãⁿ núu tée-í nchaa tnúhu-a cuendá cudíⁿ iní-ó nchaa-o.

Yã Ndiõxí cúú-gã datná ñⁿ ñuhú

5 Te nchaa tnúhu ní dánèhé ñáhá Xítohó Jesucristú xii-ndí, xíãⁿ dánèhé ñáhà-í xii-ndo. Te ní cachí-gá sá Yã Ndiõxí cúú-gã datná ñⁿ ñuhú dáyèhé-gá iní-ó, te ducaⁿ sãtnahá-xi cùu-gá chi ío váha quide-gá, te ñã túú quide-gá ní ñⁿ sá cuèhé sá dúhá.

6 Te núu càchí-ó sã ndécú-ó ichi Yã Ndiõxí, te quide-ni-o nchaa sá cuèhé sá dúhá, te dàcuandehnde-o te ñã túú quide ndáá-ó núú-gã.

7 Te núu na càda váha-o datná quidé mée-gá, te cuu ñⁿnuu-o nchaa-o. Te ndada ndoo ndada nine-gá iní-ó, chi cada càhnu iní-gá nchaa sá cuèhé sá dúhá quide-o, chi ñiu cuendá-án ní xíhí Déhe-gá Xítohó Jesucristú núu cùrúxí.

8 Te núu càchí-ó sã ñã túú quide-o ní ñⁿ sá cuèhé sá dúhá, te dandahú-ó mée-o, te ñã túú quide ndáá-ó núú Yã Ndiõxí.

9 Te núu na nãhmá-ó nchaa yíca cuèchi-o núú-gã, te mee-gã cada càhnu iní-gá, te ndada ndoo-gá iní-ó, cuendá cada ndáá-ó cùndecu-o ichi-gá, chi mee-gã ío váha quide-gá te ío ndáá quidé-gã, ducaⁿ ní cáháⁿ-gá te ducaⁿ quide-gã.

10 Te núu na càchí-ó sã ñã túú quide-o ní ñⁿ sá cuèhé sá dúhá, te quide-o Yã Ndiõxí ñⁿ ñándèhndé, dico ñã túú ndèhnde-gá. Te ñã túú ndècu tnúhu-gá iní-ó te núu ducaⁿ na càda-o.

2

Xítohó Jesucristú càháⁿ ndàhú-gá cuendá-ó

1 Te nchóhó ñãyiu cùu datná déhe-í, chido tnuní-í nchaa tnúhu-a cuendá sá vã cádá-ndó ní ñⁿ sá cuèhé sá dúhá. Dico núu ñⁿ-ndo quide-ni-ndo nãndí sá cuèhé sá dúhá, te ndècu ñⁿ Yaá càháⁿ ndàhú cuendá-ó núú Yã Ndiõxí. Te Yaá-án cúú-gã Xítohó Jesucristú Yaá quidé ndáá.

² Te ní xihí-gá sá cuendá nchaa yícá cuěchi-o cuendá ngúndecu váha-o núú-gă te núu na quíndáá iní-ó-gă. Te ñá díú-ní sá cuendá yícá cuěchi nchoo ní xihí-gá, chí tnàhá cuendá nchaa yícá cuěchi ñáiyu ní càa xico ñuyíú.

³ Te núu cada-o nchaa nacuaá càháⁿ Yá Ndióxi, te cutnùni iní-ó sá ndécú-ó ìchi-gă.

⁴ Te núu càchí-ó sá ndécú-ó ìchi-gă te ñá túú quide-o nacuaá càháⁿ-gă, te dàcuandehnde-o, te ñá túú quide ndáá-ó núú-gă.

⁵ Te núu sàndáá ndisa iní-ó tnùhu-gă, te quide-o nchaa nacuaá càháⁿ-gă, te ducaⁿ te cùu iní ndisa-o-gă, te cùtnuní ndáá iní-ó sá ndécú-ó ìchi-gă.

⁶ Te núu càchí-ó sá ndécú-ó ìchi Yá Ndióxi, te xini ñuhu-xi cada ndáá-ó cùndecu-o ñuyíú-a dàtná ní quide ndáá Xitohó Jesucristú cùtnàhá ní xíndecu-gă ñuyíú-a.

Ndudú sáá

⁷ Te nchòhó ñáiyu ndècu ndihi-í ichi Xitohó Jesucristú, ñá túú chido tnuní-í ìⁿ tnùhu saa sà cúu-xí-ndó, chí ñu-ni tnùhu sá ní ngúndecu ndihi-ndo ndéé díhna, tnùhu ní xíndedóho-ndo ndéé cùtnàhá ní sàndáá iní-ndó-gă, xíⁿ chídó tnùn-í.

⁸ Te tnùhu-a cùu-xi datná ìⁿ tnùhu saa tèe-í dándàcu iní ñàhá-í xii-ndo nàcuáa ní quide Xitohó Jesucristú cùtnàhá ní quixi-gă ñuyíú-a ní quide váha-gă, te tnàhá nchòhó ní tnì-ndo tnùhu-gă te quide váha-ndo tnàhá-ndó. Te vitna ìⁿ nduu ìⁿ nduu ta cùu vai ñáiyu ta dàña nchaa sá cuèhé sá dúhá cuáháⁿ, chí Xitohó Jesucristú tá dándixi túu-gă iní-yu cuendá cutnùni iní-yu nàcuáa nduu cuendá Yá Ndióxi.

⁹ Te núu càchí-ó sá quidé váha-o, te cùu úhú iní-ó tnàhá ñáiyu-o, te xíⁿ ñá túú quide ndáá-ó, chí ndècu-ni-o ichi cuehé ichi duha sá dúcáⁿ quide-o.

¹⁰ Te núu na cùu iní-ó tnàhá ñáiyu-o dàtná cúu iní ñàhá mèe Yá Ndióxi xii-o ña, te quide ndáá-ó núú-gă, te vá cànúchi-o tnàhá ñáiyu-o ìⁿ ichi cuehé ichi duha.

¹¹ Te núu cùu úhú iní-ó tnàhá ñáiyu-o, te ñá túú quide váha-o núú Yá Ndióxi, chí ndècu-ni-o ichi cuehé ichi duha, te ñá túú cùtnuní iní-ó sá quidé-ó. Chí cùu-o datná ìⁿ tée ndècu núu nées chí ñá cùtnuní núu-dè ndéé ichi quíhíⁿ-dé. Ducaⁿ sàtnahá-xi cùu nchoo chí ñá cùtnuní iní-ó ndéé ichi quíhíⁿ-ó te núu ducaⁿ na càda-o cuu úhú iní-ó tnàhá ñáiyu-o.

¹² Te nchòhó ñáiyu cùu datná déhe-í, yúhú chídó tnùn-í tnùhu-a ìⁿ núú tütú càchí tnùhu-í xii-ndo sá ní quide càhnu iní Yá Ndióxi nchaa cuěchi-ndo, chí ñu cuendá-áⁿ ní xihí Xitohó Jesucristú.

¹³ Te nchòhó ñáiyu sacuéhé, yúhú tèe-í tnùhu-a sá cúu-xí-ndó chí càháⁿ ndihi-ndo Jèsús, te Yaá-áⁿ sa ndècu-gă ndéé cùtnàhá ní ngáva ñuyíú. Te nchòhó ñáiyu nchícúⁿ-gă téé tucu-í tnùhu-a sá cúu-xí-ndó chí ñá túú sàndáá iní-ndó tnùhu càháⁿ yucu ñávàha.

Te nchaa nchòhó ñáiyu cùu datná déhe-í, tèe tucu-í tnùhu-a sá cúu-xí-ndó, chí sa càháⁿ ndihi-ndo Tàtá-ó Dütú Ndióxi.

¹⁴ Te nchòhó ñáiyu ní sàhnu, yúhú chídó tnùn-í tnùhu-a ìⁿ núú tütú chí càháⁿ ndihi-ndo Jèsús, te Yaá-áⁿ sa ndècu-gă ndéé cùtnàhá ní ngáva ñuyíú. Te nchòhó ñáiyu nchícúⁿ-gă, yúhú chídó tnùn-í tnùhu-a chí ío nihí ndéé-ndó ndècu-ndo, chí tnì-ndo tnùhu càháⁿ Yá Ndióxi. Te ñá túú sàndáá iní-ndó tnùhu càháⁿ yucu ñávàha.

15 Te vá cùhúⁿ ìní-ndó nì ìⁿ sá cuèhé sá dúhá ìó ñuyúⁿ-a, te ni vǎ cáni ìní-ndó càda-ndo. Chi núu na cùhuⁿ ìní-ó nchàa sá cuèhé sá dúhá ìó ñuyúⁿ-a ña, te ñá túú Tǎtá-ó Dùtú Ndiòxí ñúhú ìní-ó te núu ducaⁿ na càni ìní-ó.

16 Te nchaa ñáyiu ñuyúⁿ-a quidé-yu nchaa sá cuèhé sá dúhá, chi ñiu nchaa xǎⁿ cúdǎ ìní-yu cadá-yu. Te nchaa sá cuèhé sá dúhá sàni ìní-yu, ndihí nchaa sá xini-yu quidé-yu. Te xiquide nínu-yu mèe-yu cuendá nchaa sá ndécú ndihí-yu. Te nchaa sá ñá túú vǎha ìó cacu nihnu-xi ñuyúⁿ-a.

17 Te nchaa sá ñá túú vǎha ìó ñuyúⁿ-a, ndihí nchaa sá sání cuèhé sání dùha ìní-yu cuita ndihí nihnu-xi quíhíⁿ. Te nchaa ñáyiu tñèi tnúhu càháⁿ Yǎ Ndiòxí cundecú-yu ndihí-gá ni caa ni quíhíⁿ.

Tnúhu ndáá tnúhu Yǎ Ndiòxí ndihí tnúhu ndehnde

18 Te nchòhó ñáyiu cùu datná déhe-í, sa nihí-ndó tnúhu sá quíxí ìⁿ tée cunuu-gǎ-dé cuu úhú ìní-dé Cristú. Te sa xindecu-gǎ ñáyiu cùu úhú ìní ñáhá xii-gǎ, núu xǎⁿ cúnùnì ìní-ó sǎ sà ta cuyatni nduu naa ñuyúⁿ-a.

19 Te ñáyiu-áⁿ nǐ xindecu ndihí ñáhá-yu xii-o, te ní quee-yu cuáháⁿ-yu chi ñá túú ní cùu ìⁿnuu-o ndihí-yu. Chi núu ñíⁿ ní cùu ìⁿnuu-o ndihí-yu te cundecu ndihí ñáhá-yu xii-o ni cùu. Te duha ní cuu cuendá cutnùnì ndáá ìní-ó nchaa-o sá ñá túú cùu ìⁿnuu-o ndihí-yu, chi ñá túú sàndáá ìní-yu Yǎ Ndiòxí.

20 Te Xitohó Jesucristú ní taxi-gǎ Espíritú Yǎ Ndiòxí ndécú ndihí-o, núu xǎⁿ tècú tnùnì-ó tnúhu-gǎ.

21 Te cuendá sá xini-ndó tnúhu ndáá tnúhu Yǎ Ndiòxí nùu xǎⁿ téé-í tnúhu-a, te ñá díú ìⁿ sá ñá cúnùnì ìní-ndó cùu-xi. Te sa nàha-ndo sá nì ìⁿ tnúhu ndehnde ñá túú ñùtnahá-xi núú tnúhu Yǎ Ndiòxí, chi mee ñine-ni tnúhu ndáá cùu-xí.

22 Te nchaa ñáyiu càchí sá ñá díú Jèsús cùú Cristú Yaá ní tendaha Yǎ Ndiòxí ní quixi ñuyúⁿ-a dàcuandehndé-yu, te cùu úhú ìní-yu Jèsús. Te ñiu-ni-yu càchí-yu sá ñá díú Déhe Yǎ Ndiòxí cùú Jèsús, te sá dúcáⁿ quidé-yu te cùu úhú ìní-yu Yǎ Ndiòxí ndihí Déhe-gǎ Jèsús.

23 Te nchaa ñáyiu ñá túú sàndáá ìní sá Déhe Yǎ Ndiòxí cùú Jèsús, ñáyiu-áⁿ ñá túú ndécú-yu ichi Tǎtá-ó Dùtú Ndiòxí. Te nchaa ñáyiu càháⁿ sá Déhe Yǎ Ndiòxí cùú Jèsús, ñáyiu-áⁿ ndécú-yu ichi Tǎtá-ó Dùtú Ndiòxí.

24 Te nchaa tnúhu Yǎ Ndiòxí ní tecú dóho-ndo ndèé díhna, tnúhu-áⁿ cuhuⁿ ìní-ndó. Te núu nchaa tnúhu-áⁿ ná cùhuⁿ-ni ìní-ndó, te cundecu ndihí-ndo Yǎ Ndiòxí ndihí Déhe-gǎ cuèi vá cundècu túu-ndo ndihí-gǎ ñuyúⁿ-a.

25 Te Jèsús ní cachí-gǎ sá ndúú tǎhú-ó cundecu ndihí-o-gǎ ni caa ni quíhíⁿ andiu.

26 Te cuendá nchaa ñáyiu dàndahú ñáhá xii-ndo ní chídó tnùnì-í tnúhu-a,

27 dico nchòhó chi ndècu ndihí-ndo Espíritú Yǎ Ndiòxí sá nǐ taxi Xitohó Jesucristú. Núu xǎⁿ ñá túú xini ñuhu-ndo ñáyiu danèhé ñáhá xii-ndo, chi mee Espíritú-gǎ dánèhé ñáhá-xi nchàa sá vǎha. Te nchaa sá dánèhé ñáhá-xi xii-ndo cuu-xi sá ndáá, te ñá díú ìⁿ tnúhu ndehnde. Te vitna chí cǎnchícúⁿ nihnu-ni ichi Yǎ Ndiòxí dàtná ní sanu ichi ñaha mèe Espíritú-gǎ xii-ndo.

28 Te nchòhó ñáyiu cùu datná déhe-í, chí cǎnchícúⁿ nihnu-ni ichi Xitohó Jesucristú, chí cuendá óré ná quíxí tùcu-gǎ ñuyúⁿ-a te vá yùhú-ndó te nì vá cùú càhaⁿ núú-ndó nùú-gǎ.

29 Te nchòhó sa nàha-ndo sá mèé-gǎ quidé ndáá-gǎ, te sa xini-ndó sǎ ncháá ñáyiu quide ndáá cùu-yu déhe Yǎ Ndiòxí.

3

Ñáiyu cùu déhe Yá Ndiöxí

1 Te chí cuáha cuendá sá ïo cùu iní ñáhá Tātá-ó Dütú Ndiöxí xii-o cuendá sá cùú-ó déhe-gá, chí ducaⁿ ní cachí-gá, te déhe ndisa-gá cùú-ó. Te núu xiǎⁿ ñáiyu ndècu ichi cuehé ichi duha ñá cùú quini ñáhá-yu xii-o, chí ñá túú xini-yu nacúaa ndùu cuendá Yá Ndiöxí.

2 Te nchòhó ñáiyu ïo cùu iní-í, vitna cùu-o déhe Yá Ndiöxí, te vátá cùtnùnì váha-gá iní-ó nása cunduu-o ndéé núú cuáháⁿ núú vèxi. Dico sa cùtnunì iní-ó sá òré ná quixi tucu Xítohó Jesucristú te nduu-o dàtná cáá mèe-gá, chí quini-ó-gá nacúaa-ni càa nacúaa-ni ndùu-gá.

3 Te nchaa ñáiyu sa ndètu ñaha xii-gá sa ta ngündecu túha-yu cuáháⁿ, chí ta ndùu ndoo nduu nine iní-yu cuáháⁿ dàtná cáá ndòo caa nine mee-gá.

4 Te nchaa ñáiyu quide nándi sá cuehé sá dúhá ñá túú quide váha-yu núú Yá Ndiöxí, chí ní cachí-gá sá vǎ dúcáⁿ càda-o.

5 Te sa ñaha-ndo sá ní quixi túu Xítohó Jesucristú ñuyíú-a cuendá cada càhnu iní-gá nchaa sá cuehé sá dúhá quide-o, chí mee-gá ñá túú quide-gá ní ìⁿ sá cuehé sá dúhá.

6 Te nchaa ñáiyu ndècu ichi Yá Ndiöxí ñá túú ñùhú-yu ichi cuehé ichi duha. Te nchaa ñáiyu ñùhu ichi cuehé ichi duha ñá túú xini-yu nacúaa ndùu cuendá Xítohó Jesucristú te ní ñá túú xini-yu nása càa-gá.

7 Te nchòhó ñáiyu cùu datná déhe-í, vǎ dáñá-ndó mèe-ndo dandahú ñáhá ñáiyu ndècu ichi cuehé ichi duha, chí càchí-yu sá cùú cùndecu-o ichi Yá Ndiöxí te cada-o nándi sá cuehé sá dúhá dico ñá ndáá. Te nchaa ñáiyu quide váha quide ndáá-yu dàtná quidé mèe Jesús.

8 Te nchaa ñáiyu ndècu ichi cuehé ichi duha ndècu ndihí-yu yucu ñávǎha, chí ducaⁿ quide mee-xi ndéé cùtnàhǎ vátá ngǎva-gá ñuyíú. Te xiǎⁿ ní quixi Jèsús Déhe Yá Ndiöxí ní dáquée tǐhú-gǎ nchaa sá quidé yùcu ñávǎha.

9 Te nchaa ñáiyu ní natuha ichi Yá Ndiöxí ní nduu-yu déhe-gá, te ñá túú-gǎ quidé-yu nándi sá cuehé sá dúhá chí ní ndada ndoo ní ndada nine-gá iní-yu. Núu xiǎⁿ ñá túú-gǎ quidé-yu nándi sá cuehé sá dúhá, chí ní ngündecu ndihì ñaha-gǎ xii-yu.

10 Te cùtnunì iní-ó nándi cùu ñáiyu cùu déhe Yá Ndiöxí, te cùtnunì iní-ó nándi cùu ñáiyu cùu déhe yucu ñávǎha. Te nchaa ñáiyu ñá túú quide ndáá, te cùu úhú iní-yu tnàha ñáiyú-yu, te ñáiyu-áⁿ ñá dǐú dèhe Yá Ndiöxí cùú-yu.

Cuu iní tnáhá-ó ìⁿ ìⁿ-o

11 Te ndéé òré ní natuha-o ichi Yá Ndiöxí ní tecú dóho-o sá cùú iní-ó tnàha ñáiyu-o.

12 Te vǎ cùndùu úhú iní-ó dàtná ní quide ndíi Cǎin, chí ndíi-áⁿ ní xíndecu ndíi ndihì yucu ñávǎha núu xiǎⁿ ní sahnì ndíi ñanì ndíi. Te ducaⁿ ní quide ndíi chí ní xíndecu ndíi ichi cuehé ichi duha, te ñanì ndíi ní xíndecu-dé ichi váha.

13 Te nchòhó ñáiyu ndècu ndihì-í ichi Xítohó Jesucristú, vǎ cádá cuendá-ndó sá cùú úhú iní ñáhá nchaa ñáiyu ndècu ichi cuehé ichi duha xii-ndo.

14 Te cunaha-ndo na càchì tnúhu-í xii-ndo sá núu na cùu iní-ó tnàha ñáiyu-o, te cùtnunì iní-ó sá sǎ ní dáñá-ó ichi sǎ tá dàcuíta ñihnu ñaha xii-o cuáháⁿ ní cùu, te vitna ní tnǐ-o ìchi váha. Te nchaa ñáiyu ñá túú cùu iní tnàha ñáiyu-xi ñùhu-ní-yu ichi cuáháⁿ-yu núú úhú núú ndàhú.

15 Te nchaa ñáyiú ñá cúú quíní ndée tñaha ñáyiú-xi cúú-yu dátá ñá ñáyiú sàhni ndíyi. Te nchòhò sa nàha-ndo sá nì ñá ñáyiú sàhni ndíyi ñá túú ndècu ndihí-yu tnúhu ndee iní sá nánihí tǎhú-yu.

16 Te Xítohó Jesucristú ní xihí-gá cuèndá nchaa yíca cuèchi-o, núu xíáⁿ cútnùnì iní-ó sǎ ìo cùu iní ñáhá-gǎ xii-o. Te xíáⁿ cútnùnì iní-ó nàcuáa cada-o cùu iní-ó tñaha ñáyiú-o, te cuèi na cùú-ó cuèndá sá cúú-xí ñáⁿ-yu, cuèndá-nǎ sá ná dàcácu nihnu-ó-yu núú tnúndòho ndecú-yu.

17 Te núu ndècu ndihí-o sá cóhó sǎ cáxí-ó ndihí nchaa sá nándihí-o, te ndècu ñáyiú ndǎhú ñá túú vèdana ná ndécú ndihí, te ñá túú chindee-ó-yu, te ñá túú cùu iní-ó Yǎ Ndióxi te núu ducaⁿ na cada-o.

18 Te nchòhò ñáyiú cùu datná déhe-í vá cuèndá-ni cùnáha cáháⁿ-ndó sǎ cúú iní tñáhá-ndó, chí cuu iní tñáhá ndisa-ndo te coto tñaha-ndo.

Vá yùhú-ó núú Yǎ Ndióxi

19 Te núu ducaⁿ na cada-o, te cutnùnì iní-ó sǎ ndécú-ó ìchi ndáá ichi Yǎ Ndióxi, te ñá túú-gǎ ná quihí iní-ó núú-gǎ.

20 Te núu ndihí iní-ó cuèndá ñá sǎ ní quide-o, te sa nàha Yǎ Ndióxi te núu ní quide váha-o àdi ní quide cuèhé-ó, chí sa nàha ndáá-gǎ nàcuáa càa iní-ó.

21 Te nchòhò ñáyiú ìo cùu iní-í, na càchí tnúhu-í xii-ndo, te núu ñá túú ná sání iní-ó te ñá túú ná quidé-ó, te vá yùhú-ó núú Yǎ Ndióxi.

22 Te nchaa sá vǎha na càcáⁿ-ó núú Yǎ Ndióxi, te mee-gǎ taxi-gǎ chí tnè-o tnúhu càháⁿ-gǎ, te quide-o nchaa nàcuáa cùu iní-gǎ.

23 Te ní cachí Yǎ Ndióxi sá quíndáá iní-ó Dèhe-gǎ Xítohó Jesucristú, te cuu iní-ó tñaha ñáyiú-o dátá ní cachí-gǎ.

24 Te nchaa ñáyiú tnè tnúhu-gǎ ndécú-yu ichi-gǎ, te ndècu ndihí ñaha-gǎ xií-yu. Te cutnùnì iní-ó sǎ ndécú-ó ndihí-gǎ chí ní taxi-gǎ Espiritú-gǎ ndécú ndihí-o.

4

Ñáyiú ndècu ndihí Espiritú Yǎ Ndióxi ndihí ñáyiú cùu úhú iní ñáhá xii Xítohó Jesucristú

1 Te nchòhò ñáyiú ìo cùu iní-í, vá cùtexínu quíndáá iní-ndó tnúhu càháⁿ nchaa ñáyiú càchí sá ndécú ndihí Espiritú Yǎ Ndióxi. Chí díhna-gǎ cada cuèndá váha-ndo te núu càháⁿ ndáá-yu nàcuáa càháⁿ tnúhu Yǎ Ndióxi, chí ìo vǎi ñáyiú ñuyúú-a cachí-yu sǎ càháⁿ-yu tnúhu-gǎ dico ñá ndáa.

2 Te duha cutnùnì iní-ó nǎndi cùu ñáyiú ndècu ndihí Espiritú Yǎ Ndióxi. Nchaa ñáyiú càháⁿ ndáá sǎ Xítohó Jesucristú ní quixi-gǎ ñuyúú-a te ní cuu-gǎ ñá yiqui cùúú, ñáyiú-áⁿ cúú-yu ñáyiú cùu cuèndá Yǎ Ndióxi.

3 Te nchaa ñáyiú ñá túú càháⁿ nàcuáa càa Jesús cútnáhá ní quixi-gǎ ñuyúú-a ñáyiú-áⁿ dándahú ñáhá-yu, chí ñá túú cúú-yu ñáyiú cùu cuèndá Yǎ Ndióxi. Te ñá ní-yu cùu úhú iní-yu Jesús. Te nchòhó sa nàha-ndo sǎ cúndècu ñáyiú cuu úhú iní ñáhá xii-gǎ, dico yùhú càchí tnúhu-í xii-ndo sǎ sǎ ndecú-yu.

4 Te nchòhò ñáyiú cùu datná déhe-í, ndècu ndihí-ndo Yǎ Ndióxi, te ñá dáñá-ndó dándahú ñáhá nchaa ñáyiú càchí sǎ càháⁿ tnúhu-gǎ te ñá ndáa. Te ñá túú sándáá iní-ndó chí Yǎ Ndióxi Yáá ndécú ndihí-ndo taxi tnuní víhí-gǎ dàcúúxí yùcu ñávǎha ndècu ndihí nchaa ñáyiú ñúhu ichi cuèhé ichi duha.

5 Te nchaa ñáyiú dándahú ñáhá sǎ càháⁿ tnúhu Yá Ndióxi ndécü-yu ichi cuèhé ichi duha, te mee-ni cuendá nchaa sá íó ñuyúú-a càháⁿ-yu. Te tédóho ñaha ncháa dava-gá ñáyiú ndècu ñu-ni ichi cuèhé ichi duha.

6 Te nchoo cùu-o ñáyiú cùu cuendá Yá Ndióxi. Te nchaa ñáyiú xñdecu ichi-gá tníⁿ-yu tnúhu càháⁿ-ó, te nchaa ñáyiú ñá túú ndècu ichi-gá ñá túú tníⁿ-yu tnúhu càháⁿ-ó. Te duha te cùtnuní iní-ó nǎndi cùu ñáyiú càháⁿ ndáá, te cùtnuní tucu iní-ó nǎndi cùu ñáyiú dándahú ñáhá.

Cuu iní-ó tnàha ñáyiú-o dàtná cúú iní ñáhá mèe Yá Ndióxi xii-o

7 Te nchòhó ñáyiú ío cùu iní-í, xini ñuhu-xi cuu iní tnáhá-ó dàtná cúú iní ñáhá mèe Yá Ndióxi xii-o, chi mee-gǎ táxi-gǎ sá xini tnùn-ó cuendá cuu iní-ó tnàha ñáyiú-o. Te nchaa ñáyiú cùu iní tnàha ñáyiú-xi cùu-yu déhe Yá Ndióxi, te cùtnuní ndáá iní-yu sá ndécú ndíhi ñaha-gá xii-yu.

8 Te nchaa ñáyiú ñá túú cùu iní tnàha ñáyiú-xi ñá túú ndècu ndíhi-yu Yá Ndióxi. Te nchaa ñáyiú ndècu ndíhi Yá Ndióxi, ñáyiú-áⁿ sǎñaha-gǎ sá xini tnùn-yu cuendá cuu iní-yu tnàha ñáyiú-yu.

9 Te cùtnuní iní-ó sǎ cúú iní ñáhá Yá Ndióxi xii-o ncháa-o, chi ní tendaha-gǎ ñⁿdii díí-ni Déhe-gǎ Xítoho Jesucristú ní quixi-gǎ ñuyúú-a cuendá sá díú-gǎ cada te naníhí tǎhú-ó, te núu na quíndáá iní-ó tnúhu-gǎ.

10 Te ío cùu iní ñáhá Yá Ndióxi xii-o ncháa-o. Te ñá díú sǎ méé-ó cùu iní-ó-gǎ, chi díhna-gǎ méé-gǎ sa cùu iní ñáhá tnáhí-gǎ xii-o, núu xíáⁿ ní tendaha-gǎ Déhe-gǎ ní quixi-gǎ ñuyúú-a ní xíhí-gǎ sá cuendá nchaa yíca cuèchi-o.

11 Te nchòhó ñáyiú ío cùu iní-í, xini ñuhu-xi cuu iní tnáhá-ó, chi mee Yá Ndióxi ío cùu iní ñáhá-gǎ xii-o.

12 Te ní ñⁿ nchoo ñáyiú ndècu ñuyúú-a ñá túú xini-ó nàcuáa càa Yá Ndióxi, dico nchoo ñáyiú ní tuha ichi-gǎ chi cùtnuní iní-ó sǎ ndécú ndíhi ñaha-gǎ xii-o. Núu xíáⁿ cúú iní tnáhá-ó ñⁿ ñⁿ-o, te cùtnuní iní-ó sǎ cúú iní ndisa-o-gǎ.

13 Te cùtnuní iní-ó sǎ ndécú-ó ìchi-gǎ, te ndècu ndíhi ñaha-gǎ xii-o, chi ní taxi-gǎ Espiritú-gǎ ndécú ndíhi-o.

14 Te yúhú ndíhi dava-gǎ cue téé ní xica cuu ndíhi-gǎ càháⁿ-ndí sá ní xini-ndí Jèsús Déhe Yá Ndióxi ní quixi-gǎ ñuyúú-a, chi Tǎtá-ó Dütú Ndióxi ní tendaha ñaha xii-gǎ ní quixi-gǎ cuendá dàcácu nihnu-gǎ nchaa nchoo ñáyiú ndècu ñuyúú-a núú ùhú núú ndàhú.

15 Te nchaa ñáyiú càháⁿ ní yúhu ní iní-xi sǎ Déhe Yá Ndióxi cúú Jèsús, ñáyiú-áⁿ ndécü-yu ichi-gǎ te ndècu ndíhi ñaha-gǎ xii-yu.

16 Te sàndáá iní-ó ní yuhu ní iní-ó sǎ Yá Ndióxi cúú iní ñáhá-gǎ xii-o, chi ducaⁿ iní-gǎ. Te nchaa ñáyiú cùu iní ñáhá xii Yá Ndióxi ndécú ndíhi ñaha-gǎ xii-yu.

17 Te núu ndisa cùu iní-ó Yá Ndióxi te vá yúhú-ó òré ná sǎá nduu tàudíⁿ ñaha-gǎ xii-o tnúú nchaa ñáyiú ndècu ichi cuèhé ichi duha, chi quide ndáá-ó ndècu-o núú-gǎ ñuyúú-a dàtná ní quide mee Jèsús.

18 Chi nchaa ñáyiú cùu iní ñáhá xii Yá Ndióxi ñá túú-gǎ yúhú-yu, te núu cùu iní ndisá-yu-gǎ. Te núu yúhú-yu te xíáⁿ sa ndòhó-yu, chi ñùhú-yu ichi cuáháⁿ-yu núú ùhú núú ndàhú, chi nchaa ñáyiú yúhú ñá túú cùu iní ndisá-yu Yá Ndióxi.

19 Te cuu iní-ó Yá Ndióxi, chi mee-gǎ ndéé cùtnàhá vátá quíndáá-gǎ iní-ó tnúhu-gǎ sa cùu iní ñáhá-gǎ xii-o.

²⁰ Te nchaa ñáyiú càchí sá cúú íní-yu Yá Ndiòxí, te cùu úhú íní-yu tnàha ñáyiú-yu, ñáyiú-áⁿ dácuàndehndé-yu. Te núu ñá túú cùu íní-yu tnàha ñáyiú-yu ndècu ñuyíú-a ña, te uuⁿ-gá quidè-yu Yá Ndiòxí Yaa ñá túú xíní núú-yu.

²¹ Te càchí-gá núú tnùhu-gá sá ñáyiú na cùu íní ñáhá xìi Yá Ndiòxí, te ducaⁿ-ni cùu íní-yu tnàha ñáyiú-yu.

5

Nchaa ñáyiú ní ndacu ní dáñá ichi cuehé ichi duha

¹ Te nchaa ñáyiú sàndáá íní sá Jèsús cúú-gá Cristú Yaa ní quixi ñuyíú-a, ñáyiú-áⁿ cùu-yu déhe Yá Ndiòxí. Te cùu íní-yu Tátá-ó Dütú Ndiòxí, te cùu íní-yu Déhe-gá.

² Te núu cùu íní-ó Yá Ndiòxí te quide-o nacuaá càháⁿ-gá, te cùtnuní íní-ó sá cúú íní tnáhá ndìsa-o nacuaá ndècu-o ichi-gá.

³ Te núu cùu íní-ó Yá Ndiòxí te tnì-o tnùhu càháⁿ-gá, chi cùtnuní íní-ó sá ñá díú ñⁿ sá ùhú cúú-xí dàtná càchí ñáyiú.

⁴ Te nchaa nchoo ñáyiú cùu déhe-gá sa ní dáñá-ó ichi cuehé ichi duha, chi ní sàndáá íní-ó Jèsús núu xíáⁿ ní ndacu-o ní dáñá-ó ichi-áⁿ.

⁵ Te nchaa ñáyiú sàndáá íní sá Déhe Yá Ndiòxí cúú Jèsús ní ndacú-yu ní queé-yu ichi cuèhé ichi duha.

Nàcuáa ní càháⁿ Yá Ndiòxí cuèndá Jèsús

⁶ Te Xítóhó Jesucristú ní quixi-gá ñuyíú-a, te ní sandute-gá. Te ñá díú-ní xíáⁿ, chi ní xihí-gá sá cuèndá nchaa yíca cuèchi-o. Te Espiritú Yá Ndiòxí càháⁿ-xi mee-ni sá ndàá, chi càháⁿ Espiritú-gá-áⁿ sá Jèsús cúú-gá Cristú Yaa ní quixi ñuyíú-a.

⁷ Te úní testíú ndécú àndiu, Tátá-ó Dütú Ndiòxí, ndihi Déhe-gá Xítóhó Jesucristú, ndihi Espiritú-gá. Te ñⁿ-ní tnùhu càháⁿ ndi núní testíú-áⁿ.

⁸ Te ducaⁿ cùu-xi ñuyíú-a tucu, chi càháⁿ Espiritú Yá Ndiòxí sá Jèsús cúú-gá Cristú. Te ní sandute-gá, te ní xihí-gá sá cuèndá nchaa yíca cuèchi-o. Te xíáⁿ cùtnuní ndáá íní-ó sá díú Jèsús cúú-gá Cristú.

⁹ Te núu tnì-o tnùhu váha càháⁿ ñáyiú, te váha-gá tnì-o tnùhu càháⁿ Yá Ndiòxí, chi càháⁿ ndáá-gá sá Déhe-gá cúú Jèsús.

¹⁰ Te nchaa ñáyiú sàndáá íní sá Jèsús cúú-gá Déhe Yá Ndiòxí, ñáyiú-áⁿ cùtnuní íní-yu sá cúú-xí ñⁿ sá ndáá. Te nchaa ñáyiú ñá túú sàndáá íní tnùhu càháⁿ Yá Ndiòxí quidè-yu-gá ñⁿ ñándéhdé, dico ñá túú ndèhnde-gá, chi mèe-yu ñá túú sàndáá íní-yu sá Déhe-gá cúú Jèsús dàtná càchí méé-gá.

¹¹ Te Yá Ndiòxí càchí tnùhu ndáá-gá sá cùndècu-o ndihi-gá ni caa ni quíhíⁿ. Te duha càháⁿ-gá chi sàndáá íní-ó Déhe-gá.

¹² Te nchaa ñáyiú na quíndáá íní ñáhá xìi Déhe-gá cundecú-yu ndihi-gá ni caa ni quíhíⁿ. Te nchaa ñáyiú ñá túú sàndáá íní ñáhá xìi Déhe-gá vá cùndècú-yu ndihí-gá.

Sáhú ndéé núú ní ndihi-ná

¹³ Te cuèndá sá sàndáá íní-ndó Déhe Yá Ndiòxí núu xíáⁿ chídó tnùn-í tnùhu-a cuèndá cutnùn-í íní-ndó sá cùndècu ndihi-o-gá ni caa ni quíhíⁿ.

¹⁴ Te ñá túú tnùhu yùhú càháⁿ ndihi-o Yá Ndiòxí, chi tedóho ñaha-gá xii-o núu ñⁿ-ná sá ná càcáⁿ-ó núú-gá dàtná cuíni méé-gá.

15 Te cùtnuní iní-ó sã táxí-gã sá xicáⁿ-ó núú-gã, chi nàha-o sá tèdóho ñaha-gã xii-o núu na càcáⁿ-ó nàcuáa cùu iní-gá.

16 Te núu xiní-ó ñáyiú ndècu ichi Yá Ndiöxí te quidè-yu sá ñà túú vãha núú-gã, te ndèhe-o sá ñà túú ní xíta nihnu duúⁿ-yu, te cãháⁿ ndihi-o Yã Ndiöxí cuendá-yu, te dàcácu nihnu ñaha-gã xíi-yu te núu na núcúnu ichi váha-yu. Chi ió ñáyiú xidó quidè nãndi sá ñà túú vãha te xíta nihnu duúⁿ-yu, te vá cãháⁿ ndihi-gá-ó Yã Ndiöxí cuendá-yu.

17 Te nchaa sá cuèhé sá dúhá cùu-xi yíca cuèchi, dico ñá ncháá-xí cùu-xi sá dácúita nihnu ñaha dùuⁿ.

18 Te nàha-o sá nchóó ñáyiú cùu déhe Yá Ndiöxí ñà túú-gã sání iní-ó càda-o nãndi sá cuèhé sá dúhá. Te ducaⁿ chi mee Jèsús déhe Yá Ndiöxí xító ñaha-gá xii-o, núu xíãⁿ ñà ndácú-gã yucu ñávãha dàxínu iní ñáhá-xí xii-o cada-o sá ñà túú vãha.

19 Te nchoo nàha-o sá ndécú ndihi-o Yá Ndiöxí. Te nchaa ñáyiú ndècu ichi cuèhé ichi duha tàxi tnuní ñáhá-nã yucu ñávãha xíi-yu.

20 Te nàha tucu-o sá ñùyíú-a ní quixi Jèsús Déhe Yá Ndiöxí ní taxi-gá sá xiní tnuní-ó cuendá cutnùní iní-ó sã mée-gã cúú-gã Ndiöxí-ó. Te ndècu ndihi-o mee-gã ndihi Déhe-gã Jèsús, te ìⁿdii díi-ni mee-gã cúú-gã Yã Ndiöxí, te ndècu dava-gá sá nácuaça ñaha-gá xii-o cùndecu-o ndihi-gá ni caa ni quíhíⁿ.

21 Te nchóhó ñáyiú cùu datná déhe-í, vá quindáá iní-ndó nchàa sá cãchí-yu cùu ndióxí, chi dicó ndaha cue téé ñuyíú-a ní cuáha nchaa xíãⁿ. Te ducaⁿ na cùnduu. Te ío chí cádá ndèe iní-nã vitna.

TUTÚ CÚÚ ÛÚ NÍ CADÚHA TÉ JUÀÁ

Tnúhu Yá Ndiõxí ndihi ñacuáa cuu iní tnáhá-ó

¹ Te yúhú té Juàá téee yìndaha ñaha xii ñáiyu sàndáá iní tnúhu Jèsús, tèe-í tnúhu-a ìⁿ núú tütú daquixi-í ndaha yòhó ñaha ní cáháⁿ ñáhá Yá Ndiõxí, te nchaa tnúhu-a cùu-xi tnáhá cuèndá cue déhe-n, chi ío cùu iní ñáhà-í xii-ndo, chi ndècu-ndo ichi Yá Ndiõxí. Te ñá díú-ní mèe-í cúú iní ñáhà-í xii-ndo, chi nchaa-ndí ñacuáa sàndáá iní-ndí tnúhu-gá cúú iní ñáhà-ndí xii-ndo.

² Te cùu iní ñáhà-ndí xii-ndo chi ndècu ndihi-ndo tnúhu ndáá tnúhu Yá Ndiõxí, te ducaⁿ-ní cùndecu-o ndihi tnúhu-áⁿ ní caa ní quíhíⁿ.

³ Te xicáⁿ táhù-í núú Tátá-ó Dütú Ndiõxí, ndihi núú Dèhe-gá Xítohó Jesucristú sá ná chindèe ñaha-gá xii-ndo, te coto ñaha-gá te ío váha cuu iní-ndó cùndecu-ndo. Te duha xicáⁿ táhù-í núú-gá chi ndècu ndihi-o tnúhu ndáá tnúhu Yá Ndiõxí, te cùu iní-ó-gá.

⁴ Te ío cùd^{íí} iní-í, chi ní naníhí-í ìⁿ ùú déhe-n, te quidé-yu ñacuáa sànu ichi ñaha tnúhu ndáá dàtná ní táuchíúⁿ mèe Tátá-ó Dütú Ndiõxí.

⁵ Te vitna yòhó ñaha ní cáháⁿ ñáhá Yá Ndiõxí, càchí tnúhu-í xii-n sá xíní ñùhu-xi cuu iní-ó tnàha ñáiyu-o. Te ñá díú ìⁿ tnúhu saa cùu-xi, chi diu-ni tnúhu sá ní ngúndecu ndihi-o ndéé cùtnàhá ní tuha-o ichi Yá Ndiõxí.

⁶ Te núu cùu iní-ó Yá Ndiõxí, te cùu iní-ó tnàha ñáiyu-o dàtná ní cachí mée-gá, te tñi-o nchaa tnúhu càháⁿ-gá. Te ní cachí-gá sá cúú iní-ó-gá, te cuu iní-ó tnàha ñáiyu-o. Te tnúhu-a ní tecú dòho-o ndéé cùtnàhá ní tuha-o ichi-gá.

Cue téee dàndahú tnàha ñáiyu-xi

⁷ Te ío vài ñáiyu dàndahú ñáhá xica cuú-yu ñuyíú-a, te càchí-yu sá ñá ndàá sá Xítohó Jesucristú ní cuu-gá ìⁿ ñáiyu ndisa. Te nchaa ñáiyu duha càháⁿ dácuañdehndé-yu, te cùu úhú iní-yu Jèsús.

⁸ Te quíhí iní-ndó sá vā dàndahú ñáhá ñáiyu-áⁿ xii-ndo cuèndá sá vā cuíta chiúⁿ Yá Ndiõxí ní quíde-o. Te òrè ná quíxí tucu Jesús ñuyíú-a te taxi-gá nchaa sá váha cùu iní mée-gá cundecu ndihi-o.

⁹ Te nchaa ñáiyu dàña tnúhu Xítohó Jesucristú, te nàtní^í-yu ìngá ichi, ñáiyu-áⁿ ñá túú ndècu ndihi-yu Yá Ndiõxí. Te nchaa ñáiyu ñá túú dàña tnúhu Xítohó Jesucristú ndècu ndihi-yu Yá Ndiõxí ndihi Dèhe-gá Xítohó Jesucristú.

¹⁰ Te núu véxi ñáiyu núú ndécú-ndó càchí-yu sá càháⁿ-yu tnúhu Yá Ndiõxí te ñá ndáá, te vā cuàha-ndo tnúhu danèhè ñáhà-yu xii-ndo, te ní vā cuàha-ndó-yu tnúhu ndee iní cuèndá chiúⁿ quíde-yu.

¹¹ Chi núu na càháⁿ ndihi váha-ndó-yu, te dàtná tnúhu sá chindèe-ndó-yu quíde-yu nchaa sá cuèhè sá dúhá.

Tnúhu ndéé núú ní ndihi-ná

¹² Te ío vài-gá tnúhu cuíní-í cachí tnúhu-í xii-ndo, dico vā téee-gá-í chi cuíní-í quixi-í núú ndécú-ndó ndàtnúhu-o cuèndá cudíí víhí iní-ó nchaa-o.

¹³ Te nchaa cue déhe cùhú-n, ñáiyu ní cáháⁿ ñáhá Yá Ndiõxí quíde ndèe iní ñáhà-yu xii-n.

TUTÚ CÚÚ ÒNÍ NÍ CADÚHA TÉ JUÀÁ

Càháⁿ váha-yu cuèndá té Gǎyú

¹ Te yúhú té Juàá téè yìndaha ñaha xii ñáyíu sàndáá iní tnúhu Jèsús, chido tnuní-í tnúhu-a ìⁿ núú tutú sá cúú-xí yòhó té Gǎyú téè ío cùu iní-í, chí ndècu ndihí-n tnúhu ndáá tnúhu Yá Ndiòxí.

² Te yòhó téè ío cùu iní-í, xicáⁿ táhù-í núú Yá Ndiòxí sá cùndècu váha-n ñà túú nǎ cumání xii-n, te vá cùhú-n, chí sa nàha-í sá ndécú váha-n núú Yá Ndiòxí.

³ Te ío ní cudíí iní-í òré ní sáá ñáyíu ndècu ichi Yá Ndiòxí, te ní cachí tnúhu-yu sá sàndáá ndisa iní-n tnúhu ndáá òu-ni tnúhu-gá te tñi-n nchaa nacuaá càháⁿ tnúhu-áⁿ.

⁴ Te ío cùdíí iní-í ní nìhí-í tnúhu sá ncháá-ní ñáyíu ní sanu ichi-í ichi Yá Ndiòxí ndécú-ní-yu ichi-gá, te quide-ní-yu nchaa nacuaá càháⁿ-gá.

⁵ Te yòhó téè ío cùu iní-í, ío váha quide-n núú Yá Ndiòxí, chí chindee-n nchaa ñáyíu véxi dava-gá ñuú xicá, ñáyíu sàndáá iní tnúhu Yá Ndiòxí.

⁶ Te nchaa ñáyíu-áⁿ càháⁿ-yu núú tàcá ñáyíu càháⁿ ndihí Yá Ndiòxí iha sá ío cùu iní-n nchaa tñaha ñáyíu-n dàtná càháⁿ Yá Ndiòxí. Te yúhú càháⁿ ndàhú-í núú-n sǎ cǎdá ndèe-ni iní-n chindee-n nchaa ñáyíu-áⁿ nchaa sá xíní ñuhú-yu ichi. Te núu ducaⁿ na càda-n te quide-n nacuaá cùu iní Yá Ndiòxí, te xìnu cuechi-n tñahá-n nùú-gǎ.

⁷ Chí nchaa ñáyíu-áⁿ ní tñí-yu ichi cuáháⁿ-yu càháⁿ-yu tnúhu Jèsús. Te ñá túú tñí-yu ní ìⁿ sǎ ñàha ñáyíu ñá túú ndècu ichi Yá Ndiòxí.

⁸ Te núu xíǎⁿ nchoo xìni ñuhu-xi chindee-o nchaa ñáyíu xìnu cuechi núú-gǎ ñáyíu càháⁿ tnúhu-gá, te ducaⁿ te cutnùnì iní-ó sǎ tñahá-ó xìnu cuechi-o ndihí-yu núú-gǎ.

Ñá túú quide váha té Diótrefés

⁹ Te yúhú ní tendaha-í tutú cuáháⁿ núú tàcá ñáyíu chìñuhú-yu Yá Ndiòxí, dico ìⁿ téè ndècu-áⁿ nání-dě Diótrefés, te ñá sàndáá iní-dé nchaa tnúhu càháⁿ-í, chí cuíní-dé cunuu-dé nùú-yu.

¹⁰ Te òré quixi-í te cada ndáá-ó nchaa tnúhu cuèhé tnúhu duha càháⁿ-dé cuèndá-í. Te ñá díú-ní xǎⁿ quidè-dé, chí nchaa ñáyíu véxi ingá ñuú càháⁿ tnúhu Yá Ndiòxí ñá túú càháⁿ ñàhá-dé vehe-dé, te ní ñá dáñá-dé càháⁿ ndihí ñaha dàva-gá ñáyíu xii-yu. Te nchaa ñáyíu cuíní càháⁿ ndihí ñaha xii-yu, te quèñuhu ñaha duuⁿ-ni-dé ñá dáñá-gǎ-dé níhí tñahá-yu ndihí nchaa ñáyíu tàcá dǎcuàha tnúhu Yá Ndiòxí.

¹¹ Te yòhó téè ío cùu iní-í, vá cùndècu-n ichi cuehé ichi duha dàtná quidè nchaa dava-gá ñáyíu, cada-n mèe-ni sá váha. Chí nchaa ñáyíu quide váha ndécú-yu ichi Yá Ndiòxí. Te nchaa ñáyíu quide nchaa sá cuèhé sá dúhá ñá túú ndécú-yu ichi Yá Ndiòxí.

Nchaa ñáyíu càháⁿ váha-yu cuèndá té Demètriú

¹² Te nchaa ñáyíu càháⁿ váha-yu cuèndá té Demètriú, chí quide ndáá-dé dàtná càháⁿ Yá Ndiòxí. Te tñahá yúhú càháⁿ-í cuèndá-dé sá ío váha quide-dé, te nchòhó sa nàha-ndo sá yúhú càháⁿ ndáá-í.

Tnúhu ndéé núú ní ndihí-ná

¹³ Te vai-gá tnúhu cuíní-í cachí tnúhu-í xii-n ni cùu, dico ñá ní tèe-gá-í,

¹⁴ chi cuini-í quixi ndi-í, te cáháⁿ-ó nũú nũú-ó.

¹⁵ Te ío cada ndee ini, te xicáⁿ táhù-í núú Yă Ndiõxí sá ná cùndecu váha-n ñà túú ñă cuu cundecu-n. Te nchaa cue ñáyiú xini tnáhá ndi-ó ndecu iha quide ndee ini ñáhă-yu xii-n. Te yôhó cúñaha-n nchaa ñáyiú xini tnáhá ndi-í ndécú xíáⁿ ná càda ndee ini-yu. Te ío cada ndee ini-ñă vitna.

TUTÚ NÍ CADÚHA TÉ JUDÁS

Té Judás cadúha-dé tutú quíhíⁿ ndaha ñáyiú ní cachí Yă Ndiöxí nduu cuendá-gá

¹ Yúhú té Judás ñani té Jacobó xínú cuèchi-í núú Xítóhó Jesucristú, te cadúha-í tutú-a sá cúú-xí nchòhó ñáyiú ní cachí Yă Ndiöxí Yaá cúú Tătá-ó nduu cuendá-gá, ñáyiú ío cùu iní-gá. Te dàtná-ni xito ñaha-gá xii-ndo vitna ñi-u-ni ducaⁿ còto ñaha-gá xii-ndo ndéé ná sáá nduu quíxi tucu Xítóhó Jesucristú ñuyíú-a.

² Te xicáⁿ táhú-í núú Yă Ndiöxí sá ïo-gá ná chindee chitúu ñaha-gá xii-ndo, te na cùtnuní-gá iní-ndó sá ïo cùu iní ñáhá-gá xii-ndo, te ducaⁿ ïo váha cuu iní-ndó cùndecu-ndo.

*Ñáyiú ñá túú càháⁿ tnúhu ndáá tnúhu Yă Ndiöxí
(2 Pedro 2:1-17)*

³ Te nchòhó ñáyiú ío cùu iní-í, ducaⁿ-ni ïo sàni iní-í cadúha-í ñⁿ tutú sá cúú-xí-ndó cuendá danèhé ñáhá-í xii-ndo nàcuáa ní cuu ní naníhí tǎhú-ó dico ñá túú cadúha-í, dico vitna quide cuendá-í sá xíní ñùhu-gá-xi càháⁿ-í núú tǔtú-í sá nchòhó ío cundehe-ndo tnúhu càháⁿ-ndó ndíhi ñáyiú, te càháⁿ-ndó nàcuáa nduu tnúhu sàndáá iní mée-ndó, chi ñi-u-ni tnúhu-áⁿ ní càháⁿ Yă Ndiöxí sá cúú-xí nchàa ñáyiú ndècu ichí-gá. Te vitna ñá túú-gá ná tnúhu càháⁿ-gá sá cúú-xí-yu, chi sa ní càháⁿ duuⁿ-gá.

⁴ Te duha càháⁿ-í núú tǔtú-a sá cúú-xí-ndó, chi ñihí-í tnúhu sá xicá cùu ñáyiú chitnahá ñáhá xii-ndo, te ní ñá túú xíní-ndó ná ñáyiú cúú-yu, te ñáyiú-áⁿ cúú-yu ñáyiú cùu ùhú iní ñáhá xii Yă Ndiöxí. Te ñⁿ xichi núú tǔtú Yă Ndiöxí càchí-xi sá ñáyiú-áⁿ quíhíⁿ-yu núú ùhú núú ndàhú, te ñi-u-ni ñáyiú-áⁿ càchí-yu sá ïo váha iní Yă Ndiöxí núu xíáⁿ cuu-ni cadá-yu nchaa sá cuèhé sá dúhá. Te dàquee tǐhú-yu Yă Ndiöxí Yaá ío cùnuu, ndíhi Xítóhó Jesucristú.

⁵ Te nchòhó sa xíní váha-ndo nàcuáa ní quide Yă Ndiöxí ndéé sanaha dico dàndacu iní ñáhá-í xii-ndo, chi dàvá-áⁿ ní queñuhu-gá ñáyiú isràél nàcióⁿ Ègiptú, te dava ñáyiú-áⁿ ñá túú ní sàndáá iní ñáhá-yu xii-gá te ní dánáá ñaha-gá xii-yu.

⁶ Te nchaa espíritú ñá túú ní cùní cada ndáá cunu cuechi núú Yă Ndiöxí ní quee-xi núú ndécú-xí, te mee-gă ní sadí nihnu ñaha-gá xii-xi ñⁿ xichi núú néé te vá cǎcu-xi, chi sáá nduu te nayáha-xi cundecu-xi núú ùhú núú ndàhú ní caa ní quíhíⁿ.

⁷ Te dàndacu iní ñáhá tǔcu-í xii-ndo nàcuáa ní yáha ñáyiú ñiú Sòdomá, ndíhi ñáyiú ñiú Gòmorrá, ndíhi nchaa ñáyiú ñiú ní cǎa yatní xíáⁿ, chi tñahá-yu ñá túú ní quide váha-yu dàtná ní quide nchaa cue espíritú-áⁿ. Chi cue téé ní xóo càháⁿ ndíhi tñaha ní mee-güedé, te ñi-u-ni ducaⁿ ní xóo cada cue ñáyiú ñiú tucu. Te sá dúcáⁿ ní quide-yu núu ní dǎngóyó Yă Ndiöxí ñiúhú ñiú-yu ní dánáá ñaha-gá xii-yu. Te xíáⁿ cùtnuní iní-ó sá nchàa ñáyiú ñá túú cùní cada váha núú-gá quíhíⁿ-yu núú ùhú núú ndàhú ní caa ní quíhíⁿ.

⁸ Te ñi-u-ni ducaⁿ quide ñáyiú chitnahá ñáhá xii-ndo cuini-yu dandàhú ñáhá-yu, chi càchí-yu sá dácòto ñaha saní-yu nàcuáa cadá-yu, núu xíáⁿ nándi nchaa sá cuèhé sá dúhá quide-yu sá cúú-xí yiqui cuñú-yu, te dàquee tǐhú-yu

nchaa nàcuáa càháⁿ Yă Ndiöxí cada-o, te càháⁿ úhú-yu cuendá nchaa espíritu cúnù.

⁹ Te mee espíritu cúnù-gá xínú cuèchi núú Yă Ndiöxí nání Mìguél ní nàá-xi ndìhi sácúihná cuendá yiqui cúnú ndíi Moisés. Te espíritu-án ñà túú ní cùyi-xi càháⁿ úhú-xi sácúihná-ăⁿ, chi ní xáhaⁿ-ni-xi: “Mee Yă Ndiöxí nánhá-gă te núú nása cada ñaha-gă xii-n”, duha ní xáhaⁿ-xi.

¹⁰ Te nchaa ñáyiú ducaⁿ dándahú ñáhá xii-ndo-án càháⁿ cuèhé-yu cuendá nchaa sá vátá cúnùnì-gá iní-yu nása ndùu, te quidé-yu dàtná quidé cuè quiti chi cue quiti-án quidé-güèdi nání véxi iní-güèdi, te ni ñà túú cúnunì iní-güèdi nchaa sá quidé-güèdi. Te ducaⁿ sà tnahá-xi cùu-yu, chi nchaa sá cuèhé sá dúhá véxi iní-yu quidé-yu, te sá dúcáⁿ quidé-yu xiăⁿ tá xíta nihnú-yu cuáháⁿ.

¹¹ Te ndàhú ní cuú-yu chi ío ndohó-yu!, chi quidé-yu dàtná ní quide ndíi Cãin. Te nándi sá quidé-yu cuendá sá cuiní-yu ðíhúⁿ dàtná ní xóo cada ndíi Bàlaám. Te ío cùu sáá iní-yu núú Yă Ndiöxí dàtná ní xóo cada ndíi Còré, núú xiăⁿ tá xíta nihnú-yu cuáháⁿ.

¹² Te dicó sácáⁿnúú sãha ñáhá-yu xii-ndo òré nátacá-ndó quide-ndo vico chiñuhu-ndo Yá Ndiöxí. Te òré xéxi ndìhi ñáhá-yu xii-ndo te mee-ni sá cúu-xi mèe-yu quide cuendá-yu, te ñà túú nèhé-yu sá yíñuhu núú Yă Ndiöxí. Te cùu-yu dàtná ìⁿ vícò sã cuáháⁿ-xi duha cuáháⁿ-xi dàcáⁿ te ñà túú dǎú nchídó-xí, ducaⁿ sà tnahá-xi cùu-yu. Te cùu tucú-yu dàtná ìⁿ yutnu vídí sá ñà túú tñahí cùuⁿ sávidí-xi, te nchaa yutnu ducaⁿ ñà túú cùuⁿ sávidí-xi te tñuhu-güèdè ndéé yóho-xi te xihí duu-xi. Te ducaⁿ sãtnahá-xi cùu-yu, chi ñà túú quide váha-yu.

¹³ Te cùu tucú-yu dàtná ndute làmár, chi ndute-áⁿ òré càndá-xi te quecío tíñú-xi ìⁿ xio. Te cùu tucú-yu dàtná ìⁿ chódíní cuáháⁿ-di duha cuáháⁿ-di dàcáⁿ. Te ducaⁿ sãtnahá-xi cùu-yu, chi ñà túú cuiní-yu cada váha-yu. Te ñáyiú-án daquihíⁿ ñáhá Yă Ndiöxí xií-yu ìⁿ xichi núú néé núú sà ndecu túha cundecú-yu ni caa ni quihíⁿ.

¹⁴ Te ndíquíⁿ yává ndíi Àdán téé cùu usá ní xínani Ènóc ní dácáhú ìní ñáhá Yă Ndiöxí xii-dé ní càháⁿ-dé ðiu-ni cuendá nchaa ñáyiú-án. Te ní cachí-dé: “Na cachí tñuhu-í xii-ndo sã Yă Ndiöxí quixi-gá ndìhi cuèhé víhí espíritu xínú cuèchi núú-gă.

¹⁵ Te dàvá-án cada ndáá-gá cuèchi nchaa ñáyiú te daquihíⁿ-gá nchaa ñáyiú ndecu ichi cuèhé ichi duha núú úhú núú ndàhú, te ducaⁿ càda ñaha-gá xii-yu, chi mee-ni sá cuèhé sá dúhá quidé-yu, te càháⁿ úhú ñáhá-yu xii-gă”, duha ní cachí te Ènóc.

¹⁶ Te ñáyiú-án ìo yica ìní-yu chi ñà túú ndùu vétú iní-yu nàcuáa ndècú-yu ñuyíú-a, te sãtnuhú-yu tñaha ñáyiú-yu te mee-ni sá cuèhé sá dúhá sàni iní-yu quidé-yu, te quide cahnú-yu mèe-yu, te mee-ni càháⁿ váha-yu núú tñaha ñáyiú-yu cuendá cuiní-yu sá cadá váha ñaha ñáyiú-án xií-yu.

Té Judás càháⁿ-dé dóho ñáyiú ndecu ichi Yă Ndiöxí

¹⁷ Te nchòhó ñáyiú ío cùu iní-í, càháⁿ ndàhú-í núú-ndó sã ìo cuhuⁿ iní-ndó tñuhu sá sá ní dánhèhé ñáhá cuè téé ní tendaha Xitohó Jesucristú càháⁿ tñuhu-gá núú ñáyiú.

¹⁸ Te sa nàha-ndo sá ní cachí-güèdè sá cùmání-gă quixi tucu Xitohó Jesucristú ñuyíú-a, te coo ñáyiú càháⁿ cuèhé càháⁿ duha cuendá tñuhu-gá. Te ñáyiú-án cadá-yu mee-ni sá cuèhé sá dúhá véxi iní mèe-yu.

19 Te ñáyiú-áⁿ cúŷ-yu ñáyiú càháⁿ nándi tñuhu sá ñà túú nàndíhi cuèndá sá vǎ cúú ìⁿnuu-ndo cundecu-ndo, te mee-ni sǎ cuèhé sá dúhá ñùhu iní-yu, te ñá túú ndècu ndihí-yu Espiritú Yǎ Ndiòxí.

20 Te nchòhó ñáyiú ío cùu iní-í, ío dacuàha-ndo tñuhu Yá Ndiòxí sá ní sándáá iní-ndó cuèndá ducaⁿ cuita cuehnu nihnu-ndo ichi-gá quíhíⁿ, te cáháⁿ ndihí-ndo Yá Ndiòxí nàcuáa ðàcahu iní ñáhá Espiritú-gá xii-ndo.

21 Te ío coto-ndo mèe-ndo cundecu-ndo cuèndá cuu váha iní ñáhá Yá Ndiòxí xii-ndo, te cundetu-ndo sǎá nduu quixi Xítohó Jesucristú ñuyíú-a nacuaca ñaha-gǎ xii-ndo cùndecu-ndo ndihí-gá ni caa ni quíhíⁿ, chi Yaá-áⁿ ío cùndahú iní ñáhá-gǎ xii-o.

22 Te ñáyiú sàni ìⁿ sàni úú iní-xi cúñaha-ndo xii-yu nàcuáa cadá-yu cundecú-yu ichi Yá Ndiòxí.

23 Te nchaa ñáyiú ta xíta nihnu ñùhu ichi cuáháⁿ núú ùhú núú ndàhú, ío cundihi iní-ndó cùñaha-ndo xii-yu tñuhu Yá Ndiòxí cuèndá sá ná cǎcu nihnú-yu, te cundàhú iní-ndó-yu, te quíhi iní-ndó vǎ cadá-ndó tñahá-ndó nàcuáa quidé-yu, chi daquèe tíhú-ndó nchàa sá cuèhé sá dúhá quidé-yu-áⁿ.

Nàcuáa ndacáⁿ táhú-ó núú Yá Ndiòxí

24 Te Yá Ndiòxí chindee ñàha-gá xii-ndo cuèndá sá vǎ cùndecu-ndo ichi cuehé ichi duha, te cunduu ndoo cunduu nine iní-ndó càndeca ñaha-gá xii-ndo quíhíⁿ cundecu-ndo núú ío váha càa ndecu-gá, te ío cudíí iní-ndó.

25 Te Yá Ndiòxí ío ndècu ndihí-gá nchaa sá xìní tñuní-gá te ðiu-gá ní dácǎcu nihnu ñaha-gǎ xii-o núú ùhú núú ndàhú, te ducaⁿ ní quide ñaha-gǎ xii-o chi ndècu ndihí-o Xítohó Jesucristú. Te ío ndacáⁿ táhú-ó núú Yá Ndiòxí, chi ío càhnu cuu-gá ndécú-gǎ táxi tñuní-gá, te súúní váha iní-gá, te ndàcu-gá quidé-gǎ nchaa sá váha, te ducaⁿ-ni ío càhnu cuu-gá ndéé cùtnàhá vátá ngáva-gǎ ñuyíú, te ducaⁿ-ni ío càhnu cuu-gá ndéé vitna, te ðiu-ni ducaⁿ ío càhnu cuu-gá ni caa ni quíhíⁿ, duha xìní ñuhu-xi ndacáⁿ táhú-ó núú-gǎ. Te ducaⁿ na cùnduu. Te ío chí cadá ndèe iní-nǎ vitna.

NCHAA SÁ NĪ XINÍ TÉ JUÀÁ NDIHI NCHAA SÁ NĪ TECÚ DÓHO-DE

Xítóhó Jesucristú xáhaⁿ-gã xii té Juàá nchaa nàcuáa cada-xi ñuyú

¹ Te Yá Ndiöxí ní xáhaⁿ-gã xii Xítóhó Jesucristú nchaa sá tá cüyatni víi-nã cada-xi ñuyú-a cuèndá sá cũñaha-gã xii cue téé xínu cuechi núú-gã, te Xítóhó Jesucristú ní tendaha-gã ñⁿ espíritú xínu cuèchi núú-gã ní quixi-xi ní cachí tnúhu-xi nchaa tnúhu-áⁿ xii yúhú té Juàá téé xínu cuechi núú-gã, te nchaa tnúhu-áⁿ ndèé núú tütú-a.

² Te yúhú cächí tnúhu ndáá-í xii-ndo nàcuáa ní cáháⁿ Yá Ndiöxí, te cáháⁿ ndáá tucu-í cuèndá Xítóhó Jesucristú, ndihi cuèndá nchaa sá ní xiní-í.

³ Te váha táhú ñáyiú dàcuaha nchaa tnúhu ndèé núú tütú-a, te váha tucu táhú ñáyiú ndèdóho, te váha tucu táhú nchaa ñáyiú tn̄i nacuáa càháⁿ-xi, chi sa ta cüyatni víi-nã nduu càda-xi nchaa nacuáa càháⁿ-xi.

Té Juàá cádũha-dé tutú quíh̄iⁿ ndaha ndi ùsá xichi cue ñáyiú ndècu ichi Yá Ndiöxí

⁴ Te yúhú té Juàá cádũha-í tutú daquixi-í ndi ùsá xichi núú ndécú nchòhó ñáyiú ndècu ichi Yá Ndiöxí ndécú dīstritú Àsiá. Te mee-gã ná chīndee chitúu ñaha-gã xii-ndo, te ío váha cuu iní-ndó cūndecu-ndo. Te cuèi ndéé sanaha diu-ni-gã ndécú, te diu-ni-gã ndécú cuèi vitna, te ducaⁿ-ni cūndecu-gã cuèi ndéé núú cuàháⁿ núú v̄xi, te diu-ni ducaⁿ ño na chīndee chitúu ñaha ndi ùsá cue espíritú ndécú núú-gã xii-ndo, te ío váha cuu iní-ndó cūndecu-ndo.

⁵ Te diu-ni ducaⁿ na càda tucu Xítóhó Jesucristú, te diu-gã cúú-gã Yáá cáháⁿ ndáá, te diu-ni-gã ní xíhí-gã te díhna-gã ní ndoto, te dàtn̄ni ndéé cuèé-gã te ndoto cue ñáyiú ní xíhí, te diu-ni-gã táxi tn̄ni-gã nchaa cue téé yīndaha ñaha xii ñáyiú ndècu ñuyú-a. Te ío cūu iní ñáhá-gã xii-o, te mee-gã ní sati níñi-gã te ní xíhí-gã núú cūrúxí sá cuèndá nchaa sá cuèhé sá dúhá quide-o, te ní ndada ndoo ní ndada nine-gã iní-ó,

⁶ te vitna ní quide ñaha-gã xii-o dàtná cue téé yīndaha ñáyiú, te ní quide ñaha tūcu-gã xii-o dàtná cue dūtú xínu cuèchi-o núú Tātá-gã Dútú Ndiöxí. Te vitna nchaa-o chí ná cächí-ó sã ño càhnu cuu Xítóhó Jesucristú, te ío cūnuu-gã, te ducaⁿ-ni na cūnuu-gã ni caa ni quíh̄iⁿ. Te ducaⁿ na cūnduu.

⁷ Te cundehe-ndo àndiú! Chi ichi xití vícò quixi Xítóhó Jesucristú, te nchaa ñáyiú ndècu ñuyú-a quini ñáhã-yu xii-gã, te tnáhã nchaa ñáyiú ñⁿ-ni cūu ndihi ñáyiú ní dán̄icuehè ñáhã xii-gã quini ñáhã-yu, te nchaa ñáyiú xīndecu niñi ñuyú, ñáyiú ñã tūú cūu váha iní ñáhã xii-gã ndihú iní-yu òrè quini ñáhã-yu xii-gã, te ndáá sá dúcáⁿ càda-xi.

⁸ Te Yá Ndiöxí cächí-gã: “Yúhú ío cūnuu-í chi diu-í sa ndècu ndéé cūtnáhã ní ngáva ñuyú, te diu-ni-í cūndecu ndéé ná sàá nduu nàa-xi ndihi nchaa sá ío, chí yúhú cūndecu-í ni caa ni quíh̄iⁿ”, duha cächí Yá Ndiöxí Yáá ndácú quide nchaandi tūhú sá v̄ha. Chi diu-ni-gã sa ndècu ndéé cūtnáhã ní ngáva ñuyú, te diu-ni-gã ndécú-gã vitna, te ducaⁿ-ni cūndecu-gã ni caa ni quíh̄iⁿ.

Té Juàá ní xiní-dé Xítóhó Jesucristú Yáá ío cūnuu

9 Te yúhú té Juáá té ndècu ndihi-ndo ichi Xítóhó Jesucristú, tnàhá-í ndóhò-í cuendá-gá dàtná ndóhó-ndó, te tnàhá-í nduu táhù-í cundecu ndihi ñaha-í xii-ndo núú ndécú Yá Ndiòxí táxi tnùni-gá. Te ío quide cahnu iní-ó cuèi nándi yáha-o ndècu-o sá cuendá Xítóhó Jesucristú. Te yúhú ní ngava-í vecaá ìñ ñuú nání Pátmós, te ñuú-án cáá xítí ndute làmár. Te ducaⁿ ní cuu cuendá sá càháⁿ-í tnáhu Yá Ndiòxí, te càháⁿ váha-í cuendá Xítóhó Jesucristú.

10 Te ìñ nduu ndumíngú nduu nàtacá-ó chíñuhu-o Yá Ndiòxí ní quide ñaha Espiritú-gá xii-í nàcuáa càchí iní-xi, te ní tecú dóho-í níhi ní càháⁿ ìñ sá ní càháⁿ ndàa sàtà-í te dàtná níhi càháⁿ ìñ cútú ducaⁿ níhi ní càháⁿ-xi.

11 Te càchí sá càháⁿ-án:

—Yúhú sa ndècu-í ndéé cútñàhá ní ngáva ñuyúú, te ñuú-í cundecu-í ndéé ná sàá nduu nàa-xi ndihi nchaa sá ío, te chido tnùni-n ìñ núú tütú sá ná dànehé núú ñàhá-í xii-n, te daquihíⁿ-n tütú-án ndi úsá xichi núú xíndecu cue ñáyiu ndècu ichi Yá Ndiòxí xíndecu distritú Àsiá, ndaha ñáyiu ñuú Éfesú, ndaha ñáyiu ñuú Èsmirná, ndaha ñáyiu ñuú Pèrgamú, ndaha ñáyiu ñuú Tiàtirá, ndaha ñáyiu ñuú Sárdís, ndaha ñáyiu ñuú Filadelfiá, ndaha ñáyiu ñuú Laodiceá, nchaa ñáyiu ñuú-án daquihíⁿ-n tütú-án ndahá-yu —càchí sá càháⁿ-án.

12 Te ní nchócuñhu-í ndéhè-í núu ná cúú sá càháⁿ-án, te ní xiní-í xínutnì ùsá tnàhá sá ní cuáha mee-ni dñhúⁿ cuááⁿ sá ndéé dité-xi, te núú dité-xi-án yíndòdo ìñ caa candíl.

13 Te cuádava tnuú nchaa xíáⁿ ní xiní-í nùtnì Yá cáá dàtná cáá nchaa nchoo ñáyiu ndècu ñuyúú-a, te ñihu-gá ìñ dóó cání càa-xi ndéé núú sàhá-gá, te yídúcuⁿnuu ìñ sìnhú ní cuáha mee-ni dñhúⁿ cuááⁿ pèchú-gá.

14 Te idi díquí-gá cuixíⁿ quiyí dàtná cuixíⁿ idi dava mbéé, àdi yúhá sá quée òré quidé vixiⁿ-xi, te tinùu-gá quidé-xí dàtná quidé-xí òré sàá itá ñuhu.

15 Te sàhá-gá súúni dátásaⁿ-xi dàtná dátásaⁿ sá nání bròncé òré càyú-xi ducaⁿ dátásaⁿ-xi sàhá-gá, te dónaha tnúhu càháⁿ-gá quidé-xí dàtná quidé-xí dónaha titnì víhí yúte.

16 Te xio ndaha cùha-gá núndàha-gá úsá tnàhá chódíní, te mei yùhu-gá quéné ìñ yuchi càhnú ndéé úú xio núú-xi, te núú-gá quidé-xí dàtná quidé-xí núú nchíanchii òré súúni ngòyo cahni.

17 Te sá dúcáⁿ càa Yáá-án ní xiní-í núu xíáⁿ ní yùhú-í ní nduá-í núú-gá, te ní cuu-í dàtná ìñ téé ní xíhí sá dúcáⁿ ò ní yùhú-í, dico mee-gá ní sacáⁿ ndodo-gá ndaha cùha-gá núú yiqui cùñú-í, te ní cachí-gá:

—Vá yùhú-n, chí ñuú-í yúhú sa ndècu-í ndéé cútñàhá ní ngáva ñuyúú, te ñuú-í yúhú cundecu-í ndéé ná sàá nduu nàa-xi ndihi nchaa sá ío.

18 Te yúhú cùú-í Yáá ní xíhí te ní ndoto-í, te vitna ndècu vívú-í, te ducaⁿ-ni cundecu-í ñi caa ñi quihíⁿ. Te yúhú cùnùu-í núú nchaa ñáyiu ní xíhí te ñuú-í cùnùu-í núú ndécú-yu.

19 Te chido tnùni-n nchàa sá ní xiní-n-án ìñ núú tütú, ndihi nchaa nàcuáa cùu vitna, ndihi nchaa sá cádá-xí ndéé núú cuàháⁿ núú vèxi-gá.

20 Te na càchí tnúhu-í xii-n nàcuáa quèe-xi ndi úsá chódíní ní xiní-n yòtni-í xio ndaha cùha-í, ndihi nàcuáa quèe-xi ndi úsá sá ní cuáha mee-ni dñhúⁿ cuááⁿ, sá ndéé dité-xi te yíndodo ìñ caa candíl núú dité-xi-án. Te ndi úsá chódíní-án, xíáⁿ cùú-xí sá cútñùni iní-ó sá ndécú úsá cue téé xinu cuechi núú Yá Ndiòxí, te ndi úsá cue téé-án ndécú-güedè ndi úsá xichi núú ndécú ñáyiu ndècu ichi Yá Ndiòxí. Te cuendá ndi úsá sá ndéé dité-xi-án, xíáⁿ cùú-xí sá cútñùni iní-ó sá ndécú úsá xichi ñáyiu ndècu ichi Yá Ndiòxí —duha càchí Yáá càháⁿ-án.

2

Tnúhu sá cúu-xí ñáyiú xĩndecu ichi Yá Ndiõxí ndécú ñùú Èfesú

1 Te ní cachí tucu Yaá cãháⁿ-áⁿ xii-í sá chídó tñuní-í nchaa tnúhu sá vitná cãháⁿ-gá ñⁿ núú tütú, te tendaha-ĩ quíhíⁿ ndaha téé xĩnu cuechi núú Yá Ndiõxí ndécú ñùú Èfesú sá cúu-xí cuè ñáyiú xĩndecu ichi-gá ndécú ñùú-áⁿ, te duha ní cachí-gá: “Yúhú cúu-í Yaá nũndãha úsá chódíní xio ndaha cùha-í, te xica cuu-í núú ndécú ndí usá sá ñí cuáha mee-ni dǐhúⁿ cuáaⁿ, sá ndéé dité-xi te yĩndodo ñⁿ caa candíl núú dité-xi.

2 Te yúhú xini-í nchaa ñacuáa quide nchohó ñáyiú xĩndecu ichi Yá Ndiõxí ndécú ñùú Èfesú, te xini-í sá ïo ndúcu ndee-ndo quide chiuⁿ-ndo cuendá-gá, te ío quide cahnu iní-ndó ndecu-ndo quide-ndo chiuⁿ-gá. Te xini-í sá ñã tũú tñahí tñahá iní-ndó ñacuáa quide nchaa ñáyiú ndecu ichi cuehé ichi duha. Te xini tucu-í sá xító ndéé-ndó cuè téé cachí sá ñí tendaha-ĩ véxi cãháⁿ tnúhu-í te ñã ndáá sá cãháⁿ-güedé tnúhu-í, te ducaⁿ te cùtnuní iní-ndó sá ñã ndáá sá cãháⁿ-güedé tnúhu-í.

3 Te xini tucu-í sá ïo ndòho-ndo quide-ndo chiuⁿ cuendá-í, te ducaⁿ ïo quide cahnu iní-ndó cuèi nándi yãha-ndo, te ñã tũú cùu dusaⁿ-ndo quide-ndo chiuⁿ-áⁿ.

4 Dico ñã tũú cùu váha iní-í chi nchòhó ñã tũú-gã quidé-ndó dàtná ní xóo cada-ndo cùtnãhá vitna cùu víi-ni ní sándáá iní ñáhá-ndó xii-í, chi vitna ñã tũú-gã cúu iní ñáhá vñhi-ndo datná ní xóo cada-ndo dàvá-áⁿ.

5 Te chí dándacu iní ñacuáa ní xóo cada-ndo cùtnãhá vitna cùu saa ní sándáá iní ñáhá-ndó xii-í, te ndixi cuèchi iní-ndó sá ñã tũú-gã quidé vãha-ndo ndecu-ndo vitna, te nucuíta saa tũcu-ndo cada-ndo datná ní xóo cada-ndo ndéé dǐhna. Te nchòhó cada iní-ndó sá ndécú ndǐhi-ndo ñⁿ sá ñí cuáha mee-ni dǐhúⁿ cuáaⁿ, sá ndéé dité-xi te yĩndodo ñⁿ caa candíl núú dité-xi. Te núu vá ndíxí cuèchi iní-ndó ñacuáa quide-ndo ndecu-ndo ñã, te quixi-í xocãni-í xǐãⁿ, te ducaⁿ sãtnahá-xi cada ñaha-ĩ xii-ndo te núu vá ndíxí cuèchi iní-ndó ñacuáa quide-ndo ndecu-ndo, te ducaⁿ te vá yõo-gá ñàtacá chiñuhu ñaha xii-í ñuú-ndó.

6 Dico quide vãha-ndo ñⁿ xichi chi dàquee tihú-ndó nchaa sá quidé cuè ñáyiú cùu nicolaitás, te yúhú tñahá-í dàquèe tihú-í nchaa sá quidé ñáyiú-áⁿ.

7 Te nchòhó cada cuendá vãha-ndo ñacuáa xãhaⁿ-ĩ xii Espiritú Yá Ndiõxí xãhaⁿ-xi xii cue ñáyiú ndecu ichi-gá xĩndecu nchaa xichi. Te duha ndúu tnúhu xãhaⁿ-ĩ xii Espiritú-gá xãhaⁿ-xi xii-yu: Cũñaha-n xii nchaa ñáyiú sá núu na cada ndee iní-yu yãha-yu nándi sá ná yãha-yu sá cuendá-í, te yúhú cada-í te nduu táhũ-yu cundecu vãha-yu núú ndécú Yá Ndiõxí, duha xãhaⁿ-ĩ xii Espiritú-gá cúu-xi ñáyiú”, duha cachí Yaá cãháⁿ-áⁿ. Te nchaa tnúhu-áⁿ ñí chídó tñuní-í sá cúu-xi ñáyiú xĩndecu ichi Yá Ndiõxí ndécú ñùú Èfesú.

Tnúhu sá cúu-xí ñáyiú xĩndecu ichi Yá Ndiõxí ndécú ñùú Èsmirná

8 Te ní cachí tucu Yaá cãháⁿ-áⁿ xii-í sá chídó tñuní-í nchaa tnúhu sá vitná cãháⁿ-gá ñⁿ núú tütú, te tendaha-ĩ quíhíⁿ ndaha téé xĩnu cuechi núú Yá Ndiõxí ndécú ñùú Èsmirná sá cúu-xí cuè ñáyiú xĩndecu ichi-gá ndécú ñùú-áⁿ, te duha cachí-gá: “Yúhú ndécú-í ndéé cùtnãhá ní ngáva ñuyúú, te diu-ni-í cundecu-í ndéé ná sãá nduu ñaa-xi ndǐhi nchaa sá ïo, te diu-ni-í ní xihí te ní ndoto-í ndécú-í vitna.

9 Te yúhú xini-í nchaa ñacuáa quide nchohó ñáyiú ndecu ichi Yá Ndiõxí ndécú ñùú Èsmirná. Te xini-í sá ïo ndòho-ndo ndecu-ndo sá cuendá-í, te xini tucu-í sá ïo ndáhú-ndó dico cùu-ndo ñáyiú xĩndecu vãha núú Yá Ndiõxí. Te xini

tucu-í sá ïo cãháⁿ cuèhé ñãyiu isràél cuendá-ndó, dico ñã túú quidé-yu nãcuáa tàù-yu cadá-yu sá cúú-yu ñãyiu isràél, chi cùú-yu ñãyiu xĩnu cuechi mee-ni núú sãcũhã.

¹⁰ Dico nchòhó vá yùhú-ndó cuèi nãndi cùu nchaa sá ná ndòho-ndo cuendá-í, chi sãcũhã cada-xi te ngava dava-ndo vècaá, te ducaⁿ càda-xi chi cuiñi-xi coto ndeé ñãhá-xi xii-ndo núu ndisa sá vá ná túhú iní-ndó sã nchicúⁿ nihnu-ndo ìchi Yá Ndiõxí. Te ndoho-ndo ùxi nduu dico vá ðãñã ndeé-ndó cãchicúⁿ nihnu-ni-ndo ìchi-gá cuèi na cùú-ndó sã cuendá-gá, te yùhú cada-í te nduu táhú-ndó cùndecu-ndo ndihi-gá ni caa ni quíhíⁿ.

¹¹ Te nchaa nchòhó cada cuendá váha-ndo nãcuáa xãhaⁿ-í xii Espíritú Yá Ndiõxí xãhaⁿ-xi xii cue ñãyiu ndècu ìchi-gá xĩndecu nchaa xichi, te duha ndùu tnúhu xãhaⁿ-í xii Espíritú-gá xãhaⁿ-xi xii-yu: Cũñaha-n xii nchaa ñãyiu sá núu na cùndee iní-yu yãha-yu nãndi sá ná yãha-yu sá cuendá-í te vá cuíta nihnú-yu na sãá nduu cuíta nihnu nchaa dava-gá ñãyiu, duha xãhaⁿ-í xii Espíritú-gá cúu-xi ñãyiu”, duha ní cachí Yáá cãháⁿ-áⁿ. Te nchaa tnúhu-áⁿ ní chídó tnùni-í sá cúú-xi ñãyiu xĩndecu ìchi Yá Ndiõxí ndécú ñùú Èsmirnã.

Tnúhu sá cúú-xi ñãyiu xĩndecu ìchi Yá Ndiõxí ndécú ñùú Pèrgamú

¹² Te ní cachí tucu Yáá cãháⁿ-áⁿ xii-í sá chídó tnùni-í nchaa tnúhu sá vítã cãháⁿ-gá ìhⁿ núú tútú, te tendaha-í quíhíⁿ ndaha tée xĩnu cuechi núú Yá Ndiõxí ndécú ñùú Pèrgamú sá cúú-xi cuè ñãyiu xĩndecu ìchi-gá ndécú ñùú-áⁿ, te duha cãchí-gá: “Yùhú cùú-í Yáá néhé ìhⁿ yuchí cãní te ndeé úu xio núú-xi.

¹³ Te yùhú xini-í nchaa nãcuáa quide nchòhó cue ñãyiu xĩndecu ìchi Yá Ndiõxí ndécú ñùú Pèrgamú, te xini tucu-í sá ndécú-ndó núú ïo cùnuu yucu ñãvãha, te ñã túú ðãña ndeé-ndó nchicúⁿ nihnu-ndo ìchi-í, te ducaⁿ ïo sãndãá iní ñãhá-ni-ndó xii-í, te ðiu-ni ducaⁿ ní quide-ndo cùtnãhá ní sahi-güedé té Àntipás núú ndécú-ndó ðiu-ni núú dúcãⁿ ïo cùnuu yucu ñãvãha. Te ndii-áⁿ ní quide ndãá ndii ní xĩndecu ndii ìchi-í chi ní cãháⁿ váha ndii cuendá-í.

¹⁴ Dico ñã túú cùu váha iní-í cuendá ìhⁿ úú sá quidé-ndó, chi ndècu ndihi-ndo ñãyiu nchicúⁿ nihnu-ni nchaa nãcuáa ní cãháⁿ ndii Bàlaám. Chi ndii-áⁿ ñã túú ní quide váha ndii chi ní dácãhú ìni ndii ìngá tée ní xĩnani Bàlác nãcuáa cada-dé canu ìchi-dé cue ñãyiu isràél ìngá ìchi sá ñã túú vãha, chi ní xãhaⁿ tã Bàlác-áⁿ xii-yu sá cãxi-yu nchaa sá ndúú táhú nchaa sá ní cadúha cue tée ñuyú-a ðanani ñãyiu ndiõxí te ñã ndãá sá ndiõxí cúú-xi, te ní dácãhú ìni ñãhá-dẽ xii-yu sá cùndécú-yu ìchi ðii ìni.

¹⁵ Te ndècu ndihi tucu-ndo ñãyiu nchicúⁿ nihnu sá dãcuàha cue ñãyiu cùu nicolaitás. Te nchaa sã dãcuàha ñãyiu-áⁿ dáquèe tíhù-í,

¹⁶ te nchòhó chí dãndixi cuèchi iní sá ñã túú quide váha-ndo ndècu-ndo, chi núu ñãhá te quixi-í náá-í ndihi cue ñãyiu-áⁿ ndihi yuchí cãní sã quéné yùhu-í.

¹⁷ Te nchaa nchòhó cada cuendá váha-ndo nãcuáa xãhaⁿ-í xii Espíritú Yá Ndiõxí xãhaⁿ-xi xii cue ñãyiu ndècu ìchi-gá xĩndecu nchaa xichi. Te duha ndùu tnúhu xãhaⁿ-í xii Espíritú-gá xãhaⁿ-xi xii-yu: Cũñaha-n xii nchaa ñãyiu sá núu na càda ndee iní-yu yãha-yu nãndi sá ná yãha-yu sá cuendá-í, te yùhú cuãñaha-í sá ndúú yùhu xii-yu cãxi-yu ìhⁿ sá vãtã quini-gá-yu cãxi-yu. Te xiãⁿ cúu-xi mãnáá sá ní xóo cãxi cue ñãyiu ní xĩndecu ndéé sanaha, te cuãñaha tucu-í ìhⁿ caa yúu cuixíⁿ xii-yu, te núú yúú-ãⁿ cundeé ìhⁿ ðiu saa. Te ðiu-áⁿ vã yõ tnãhi xini chi ìhⁿ ðii ðii-ni ñãyiu na quèheⁿ cuendá ðiu-áⁿ quini-yu, duha xãhaⁿ-í xii Espíritú-gá cúu-xi ñãyiu”, duha cãchí Yáá cãháⁿ-áⁿ. Te nchaa tnúhu-áⁿ ní chídó tnùni-í sá cúú-xi ñãyiu xĩndecu ìchi Yá Ndiõxí ndécú ñùú Pèrgamú.

Tnúhu sá cúú-xí cuè ñáyiú xĩndecu ichi Yá Ndióxi ndécú ñùú Tiàtirá

18 Te ní cachí tucu Yaá càhá^{n-án} xii-í sá chídó tnùnì-í nchaa tnúhu sá vitná càhá^{n-á} gá ñⁿ núú tütú, te tendaha-í quihíⁿ ndaha tée xĩnu cuechi núú Yá Ndióxi ndécú ñùú Tiàtirá sá cúú-xí cuè ñáyiú xĩndecu ichi-gá ndécú ñùú-áⁿ, te duha càchí-gá: “Yúhú cúú-í Déhe Yá Ndióxi, te càa tinuu-í dàtná cáá itá ñuhú, te sáhá-í cáá dàtná cáá sá nání bróncé òré ñuhú-xí núú ñuhú càyú-xi.

19 Te yúhú xini-í nchaa nàcuáa quide nchóhó ñáyiú xĩndecu ichi Yá Ndióxi ndécú ñùú Tiàtirá. Te xini tucu-í sá ïo cùu iní-ndó Yá Ndióxi te sàndáá iní-ndó-gá. Te xini tucu-í nàcuáa ndùu chiuⁿ quide-ndo sá cúú-xí-gá. Te xini tucu-í sá ïo quide cahnu iní-ndó cuèi nándi cùu sá yáha-ndo ndècu-ndo. Te xini tucu-í sá ïo-gá ndúcú ndèe-ndo quide váha-ndo vitna dacúxí cùtnàhá vitna cùu saa ní sàndáá iní-ndó Yá Ndióxi.

20 Dico ñá túú cùu váha iní-í cuèndá ñⁿ sá quidé-ndó, chi ñá túú tnàhí ná sání iní-ndó ndècu ndihì-ni-ndo ñáyiú nchìcúⁿ nihnu nchaa nàcuáa dànehé ñáhá ñáha nani Jezabél. Te ñaha-áⁿ càchí-aⁿ sá càhá-aⁿ tnúhu Yá Ndióxi dico ñá ndáá sá càhá-aⁿ tnúhu-gá, te cuáhá-aⁿ dandahú-aⁿ nchaa ñáyiú xĩnu cuechi núú-í ndihì nchaa sá dánhé ñáhá-áⁿ cuèndá cundecú-yu ichi dǎí iní, te caxi-yu nchaa sá ndúú táhu nchaa sá ní cadúha cue tée ñuyú-a dānani ñáyiú ndiόxi te ñá ndáá sá ndiόxi cúú nchaa xiǎn.

21 Te ní cuu vai nduu ta dacaca-í ndécú-án cuèndá ndixi cuèchi iní-aⁿ sá ñá túú quide váha-aⁿ ndècu-aⁿ, te cuèi ducaⁿ quide-í dico ñá túú cuini-aⁿ dañ-aⁿ ni ñⁿ sá cuèhé sá dúhá quide-aⁿ.

22 Te vitna yúhú ïo dandòho-í-aⁿ chi tnǎi ñaha cuèhé xii-aⁿ, te diu-ni ducaⁿ ïo dandòho-í nchaa ñáyiú quide datná quidé-án te núu vá ndíxí cuèchi iní-yu sá ñá túú quide váha-yu ndécú-yu, te dàñá-yu nchaa sá cuèhé sá dúhá quidé-yu.

23 Te nchaa ñáyiú cùndihì ñaha xii ñaha-áⁿ cahni-í-yu, te ducaⁿ te nchòhó ndihì dava-gá nchaa ñáyiú xĩndecu ichi Yá Ndióxi ndécú nchaa xichi cutnuní iní-ndó ndihì-yu sá yúhú cúú-í Yaá xini ndáá nchaa nàcuáa sàni iní ñáyiú, ndihì nchaa nàcuáa quide-xi iní-yu. Te nchòhó nàcuáa ndùu sá quidé-ndó ñⁿ ñⁿ-ndo te ducaⁿ cùnduu sá táxi-í nduu táhú-ndó.

24 Te dava nchòhó ñáyiú ndècu ñùú Tiàtirá, ñáyiú ñá túú nchìcúⁿ nihnu nàcuáa dànehé ñáhá ñáha nani Jezabél-áⁿ ñá túú xini-ndó nǎ cúú sá càchí ñáyiú ndùu yuhu dacahu iní ñáhá yùcu ñáváha. Te nchòhó, ñá túú nǎgá cachí tnúhu-í xii-ndo càda-ndo

25 diu-ñá sá ïo nducu ndèe-ndo cada-ndo nchaa nacuáa càháⁿ tnúhu sá ndécú ndihì-ndo, te ducaⁿ-ni càda-ndo ndéé òré quixi tucu-í.

26 Te nchaa nchòhó ñáyiú na càda ndee iní yáha nándi sá ná yáha sá cuèndá-í, te núu na càda-ni-ndo nchaa nacuáa cuini-í cada-ndo ndéé nduu vá cùndècu-gá-ndó ñuyú-a, te yúhú taxi-í tnúhu ndee iní xii-ndo sá táxi tnùnì-ndó nchaa ñáyiú ñuyú

27 dàtná ní quide mee Tǎtǎ-í Dútú Ndióxi ní taxi-gá tnúhu ndee iní ndécú ndihì-í, te ducaⁿ càda ñaha-í xii-ndo tàxi-í tnúhu ndee iní xii-ndo cuèndá ïo taxi tnùnì-ndó, te cada iní-ndó sá cadá-ndó cuè ñáyiú dàtná quidé-xí ñⁿ quidi òré táhú-xi càchi duuⁿ-xi, te ducaⁿ chi nchòhó cada-ndo sá ncháá ñáyiú ñá túú quide váha cuíta nihnú-yu.

28 Te cada iní-ndó sá dàtná dáyèhé chódiní quiti quène oré sa ta tũndaá-nǎ cuáháⁿ ducaⁿ càda-xi oré ná sáá nduu ngũíta-xi cada váha-xi, te ducaⁿ chi yúhú cada-í nàcuáa nduu táhú-ndó cùndecu ndihì ñaha-ndo xii-í núú ïo váha càa ndecu-í.

29 Te nchaa nchòhó cada cuendá váha-ndo nàcuáa xáhaⁿ-í xii Espíritú Yá Ndióxi xáhaⁿ-xi xii cue ñáyi ndècu ichi-gá xñdecu nchaa xichi”, duha càchí Yaá càháⁿ-áⁿ. Te nchaa tnúhu-áⁿ ní chídó tnùnì-í sá cúu-xí ñáyi xñdecu ichi Yá Ndióxi ndécú ñùú Tiàtirá.

3

Tnúhu sá cúu-xí ñáyi xñdecu ichi Yá Ndióxi ndécú ñùú Sárdís

1 Te ní cachí tucu Yaá càháⁿ-áⁿ xii-í sá chídó tnùnì-í nchaa tnúhu sá vítná càháⁿ-gá ìⁿ núú tùtú, te tendaha-í quíhíⁿ ndaha téé xinu cuechi núú Yá Ndióxi ndécú ñùú Sárdís sá cúu-xí cuè ñáyi xñdecu ichi-gá ndécú ñùú-áⁿ te duha càchí-gá: “Yúhú cúu-í Yaá ndécú ndíhi ndi usá espíritú cúu cuendá Yá Ndióxi, te diu-ni-í cúu-í Yaá ndécú ndíhi ndi usá chódíní. Te yúhú xìnì-í nchaa nàcuáa quide nchohó ñáyi xñdecu ichi Yá Ndióxi ndécú ñùú Sárdís, te xìnì-í sá cúu-ndó dàtná ñáyi ní xíhí cuèi càchí ñáyi sá ñhá.

2 Te chí cuáha cuendá nàcuáa quide-ndo ndecu-ndo vitna, te ndecu ndèe-ndo cada-ndo ìⁿ úú-gá nchaa sá váha nchicúⁿ nihnu-ndo vitna, chi sa ndètu vií-ná dañá-ndo nchaa-ndí túhú sá váha quide-ndo ni cuu, te quide cuendá-í sá ñà túú quide-ndo nchaa nacuáa cuini Yá Ndióxi cada-ndo.

3 Te chí dándacu iní nàcuáa càháⁿ tnúhu sá ní xíndedóho-ndo cūtnáhá ní tuha-ndo ichi Yá Ndióxi, te canchicúⁿ nihnu-ndo càda-ndo nacuáa càháⁿ tnúhu-áⁿ, te ndixi cuèchi iní-ndó sá ñà túú quide váha-ndo ndècu-ndo, te núu vá nacuáha-ndo cuendá nàcuáa quide-ndo ndecu-ndo ña, te cada-í dàtná quidé ñàdúhú, chi òré ñà túú ná yíhí ìní-ndó quèxio-í núú ndécú-ndó.

4 Dico ndècu ndíhi-ndo ìⁿ úú ñáyi cãndoo caa nine iní-xi, chi ñáyi-áⁿ ní nduu táhú-yu cuihnú-yu dóó cuixíⁿ cuendá cundecu ndíhi-í-yu, te ducaⁿ chi cudiú-yu núú-í.

5 Te nchaa ñáyi na càda ndee iní-xi yáha nándi sá ná yáha sá cuendá-í, te ñáyi-áⁿ nduu táhú-yu cuihnú-yu dóó cuixíⁿ, te vá náquète-í diú-yu núú tùtú núú yódó tnùnì cue ñáyi ní nduu táhú cundecu ndíhi-í ní caa ní quíhíⁿ, te cúñaha-í xii Tàtá-í Dútú Ndióxi ndíhi cue espíritú xínú cuèchi núú-í sá ñáyi-áⁿ cúu-yu ñáyi cuu cuendá-í.

6 Te nchaa nchòhó cada cuendá váha-ndo nàcuáa xáhaⁿ-í xii Espíritú Yá Ndióxi xáhaⁿ-xi xii cue ñáyi ndècu ichi-gá xñdecu nchaa xichi”, duha càchí Yaá càháⁿ-áⁿ. Te nchaa tnúhu-áⁿ ní chídó tnùnì-í sá cúu-xí ñáyi xñdecu ichi Yá Ndióxi ndécú ñùú Sárdís.

Tnúhu sá cúu-xí cuè ñáyi xñdecu ichi Yá Ndióxi ndécú ñùú Filàdelfía

7 Te ní cachí tucu Yaá càháⁿ-áⁿ xii-í sá chídó tnùnì-í nchaa tnúhu sá vítná càháⁿ-gá ìⁿ núú tùtú, te tendaha-í quíhíⁿ ndaha téé xinu cuechi núú Yá Ndióxi ndécú ñùú Filàdelfía sá cúu-xí cuè ñáyi xñdecu ichi-gá ndécú ñùú-áⁿ, te duha càchí-gá: “Yúhú cúu-í Yaá ío váha quide ndáá te ñà túú tnàhí cuèchi-í. Te díhna-gá ndíi Dàvíi ní taxi tnùnì ndíi ñáyi, te vitna yúhú táxi tnùnì-í-yu, te yúhú càháⁿ-í te núu ndèndida càa ñáyi ndíhu ndaha-í te ndèndida càa ñáyi vá ndíhu ndaha-í.

8 Te yúhú xìnì-í nchaa nàcuáa quide nchohó ñáyi xñdecu ichi Yá Ndióxi ndécú ñùú Filàdelfía, te yúhú ní quide-í nàcuáa ní níhí-ndó ìⁿ ichi cahnu quide-ndo chiuⁿ-í, te vá yóo ìⁿ cada nàcuáa vá níhí-gá-ndó nàcuáa cada-ndo chiuⁿ-í. Te cuèi ñà túú ío níhí ndéé-ndó cundecu-ndo ichi Yá Ndióxi dico

tn̄i-ndo nchaa tn̄uhu càháⁿ-í, te ni ìⁿ xito ñá túú càháⁿ-ndó sã ñã túú ndècu nd̄ihi ñaha-ndo xii-í.

⁹ Te nchaa ñáyiú quide nchaa nacuaá cuiní yucu ñãvãha, ñáyiú-án cúu-yu ñáyiú israél, te cuéi cúu-yu ñáyiú israél dico ñã túú quidé-yu nacuaá tau-yu cada-yu, te yúhu cada-í sã ncháá ñáyiú-án canehé-yu sã yíñuhu núu-ndó, te cutn̄uní iní-yu sã yúhu ío cùu iní ñãhá-í xii-ndo.

¹⁰ Te ío quide ndee-ni iní-ndó nchicúⁿ nihnu-ndo quide-ndo nchaa nacuaá ní cáháⁿ-í, te xíãⁿ coto ñaha-í xii-ndo ñã túú nã tnahá-ndó nd̄uu na quixi nchaa tn̄undòho tn̄uhu ndàhú ñuyíú-a. Te òré quexio nchaa tn̄undòho-án ñuyíú-a te dàvá-án cutn̄uní nacuaá nd̄uu sã quidé ìⁿ ìⁿ ñáyiú.

¹¹ Te ío nd̄ihi quixi tucu-í. Te vá dáñã ndéé-ndó càda-ndo nchaa sã vãha nchicúⁿ nihnu-ndo quide-ndo cuendá sã vã cuíta sã ñí cachí Yã Ndiòxí nduu táhú-ndó.

¹² Te nchaa nchòhó ñáyiú na càda ndee iní yáha nándi sã ná yãha sã cuendá-í, te yúhú cada-í sã nchòhó ío cuu càhnu-ndo cundecu-ndo núú ndécú Tãtà-í Dútú Ndiòxí, te vá ìⁿ nd̄uu-gá xocuñí-ndó núú ndécú-gã. Te cada iní-ndó sã dàtná sã chídó tn̄uní-í ñiú Tãtà-í Dútú Ndiòxí ñi-ndo chi ducaⁿ-ni cundecu-ndo nd̄ihi-gã, te cada tucu iní-ndó sã dàtná sã chídó tn̄uní-í nacuaá nani ñuú-gã ñi-ndo, chi ñiú ñuú-gã-án cundecu-ndo, te ñuú-án nání-xí Jèrusalén Sáá, duha nani ñuú-gã. Te ñuú-án quee-xi and̄iu núú ndécú Yã Ndiòxí Yaá cúú Tãtà-í quee-xi ñuyíú. Te cada tucu iní-ndó sã dàtná sã chídó tn̄uní-í ñiú mee-í ñi-ndo, te xíãⁿ cúú-xí ìⁿ ñiú saa, te ducaⁿ càda iní-ndó chi cundecu nd̄ihi ñaha-ndo xii-í.

¹³ Te nchaa nchòhó cada cuendá váha-ndo nacuaá xãhaⁿ-í xii Espiritú Yã Ndiòxí xãhaⁿ-xi xii cue ñáyiú ndècu ichi-gã x̄ndecu nchaa xichí”, duha càchí Yaá càháⁿ-án. Te nchaa tn̄uhu-án ñí chídó tn̄uní-í sã cúú-xí ñáyiú x̄ndecu ichi Yã Ndiòxí ndécú ñuú Filadelfiá.

Tnúhu sã cúú-xí ñáyiú x̄ndecu ichi Yã Ndiòxí ndécú ñuú Laodiceá

¹⁴ Te càchí tucu Yaá càháⁿ-án xii-í sã chídó tn̄uní-í nchaa tn̄uhu sã vítñá càháⁿ-gã ìⁿ núú tütú, te tendaha-í quihíⁿ ndaha téé x̄inu cuechi núú Yã Ndiòxí ndécú ñuú Laodiceá sã cúú-xí cué ñáyiú x̄ndecu ichi-gã ndécú ñuú-án, te duha càchí-gã: “Yúhú cúu-í Yaá quidé núú Yã Ndiòxí, te cúu-í Yaá quidé ndáá chi càháⁿ ndáá cuiti-í nacuaá càháⁿ Yã Ndiòxí. Te yúhú cúu-í Yaá ní quide ní nḡundecu nchaa sã ñí cadúha Yã Ndiòxí.

¹⁵ Te yúhú x̄iní-í nchaa nacuaá quide nchòhó ñáyiú x̄ndecu ichi Yã Ndiòxí ndécú ñuú Laodiceá, te x̄iní-í sã ñã túú cuiní-ndó cãnchicúⁿ nihnu-ndo nchaa nacuaá càháⁿ-í, te ni ñã túú cuiní-ndó dáña duuⁿ-ndo. Te váha-gã sã dúúⁿ dùuⁿ cada-ndo nchaa nacuaá càháⁿ-í àdi núú ñáhã te duuⁿ duuⁿ daña-ndo.

¹⁶ Te sã dúcãⁿ quide-ndo ñã túú cuiní-ndó dùuⁿ duuⁿ-ni cada-ndo nacuaá càháⁿ-í, te ni ñã túú cuiní-ndó dùuⁿ duuⁿ-ni daña-ndo te sáá nduu vã cündèe-gã iní-í cuendá nchaa sã quidé-ndó-ãⁿ, te daquèe tíhú ñãhá-í xii-ndo.

¹⁷ Te càchí-ndó sã cuicá-ndó, te ío váha ta yãha-ndo nchaa nduu cuáhãⁿ, te ñã túú tn̄ahí ná cúmãní xii-ndo, te ñã túú cutn̄uní iní-ndó sã cúú-ndó dàtná cue ñáyiú ío ndàhú yãha, te cùu-ndo datná ñáyiú ndàhú, ñáyiú ío cùndahú iní ñáhã tn̄aha ñáyiú-xi, te cùu-ndo datná cue ñáyiú cuáá, te cùu tucu-ndo datná cue ñáyiú ndàhú ñã túú tn̄ahí dóó-xi.

¹⁸ Te na càchí tn̄uhu-í xii-ndo sã cadá-ndó dàtná x̄iquide cue ñáyiú sãaⁿ ìⁿ sã ñí cuáha mee-ni ñiúⁿ cuááⁿ sã ío váha càa, te ducaⁿ quidé-yu te ío-gã cúú

cuicá-yu. Te cada tucu-ndo dàtná xĩquide cue ñáyiú sàaⁿ dóo cuixíⁿ sácũhnu-yu cuendá sá vǎ cúu-yu dàtná ñáyiú ndàhú ñá túú dǒo-xi, te cada tucu-ndo dàtná quidé cue ñáyiú sàaⁿ yúcú quèe núú-xi nàcuáa cutnùnǐ váha núú-yu, te duha càháⁿ-í xǎhaⁿ-í xii-ndo chí cuinǐ-í sá nàtuha ñaha-ndo xii-í, te ío váha cundecu-ndo sǎ cúu-xí Yǎ Ndiǒxí.

¹⁹ Te càháⁿ-í dóho nchaa ñáyiú cùu inǐ-í òré ñá túú quide ndáá-yu, te dǎndoho-í-yu, núú xǎⁿ cuinǐ-í sá nchòhó ndixi cuèchi inǐ-ndó sǎ ñá túú quide váha-ndo ndècu-ndo.

²⁰ Te na càhǐ tñuhu-í xii-ndo sǎ yǔhú cúu-í dàtná ìⁿ tée nùtnǐ yuyèhe ndaa quehé te càháⁿ-í ñáyiú yǐhi xitǐ vehe, te núú na càda cuendá-yu sá càháⁿ-í te nacaáⁿ-yu yuyèhe te quǐhu-í xitǐ vehe cudǐni-í ndihǐ-yu, te duha càháⁿ-í chí cuinǐ-í cundecu ndihǐ ñaha-í xii-ndo.

²¹ Te nchaa nchòhó ñáyiú na càda ndee inǐ-xi yáha nǎndǐ sá ná yáha sá cuendá-í, te yǔhú taxi-í xii-ndo ìⁿ xichi núú ndécù-í cundecu-ndo te cunuu-ndo tñahá-ndó dàtná cùnùu-í, chí yǔhú ducaⁿ ñǐ quide ndee inǐ-í ní yáha-í nǎndǐ sá ñǐ yáha-í te vitna ní nduu táhù-í ndécù-í núú ndécú Tǎtà-í Dútú Ndiǒxí cùnùu-í.

²² Te nchaa nchòhó cada cuendá váha-ndo nàcuáa càháⁿ Espiritú Yǎ Ndiǒxí xǎhaⁿ-xi xii cue ñáyiú ndècu ichi-gǎ xĩndecu nchaa xichiⁿ, duha càhǐ Yáá càháⁿ-án. Te nchaa tñuhu-án ñǐ chidó tñùnǐ-í sá cúu-xí ñáyiú xĩndecu ichi Yá Ndiǒxí ndécú ñùú Laodiceá.

4

Nàcuáa chíñuhu ñáyiú Yá Ndiǒxí andiu

¹ Te sátá ñǐ yáha ducaⁿ ñǐ cuu te ní xinǐ-í nchǐ andiu, te ní cáháⁿ tucu Yáá ní cáháⁿ ndihǐ ñaha xii-í dǐhna, te Yáá-án ñǐ cáháⁿ ñihǐ-gǎ dàtná càháⁿ ñihǐ ìⁿ cútú, te ní cachǐ-gǎ xii-í:

— Taquène iha te na dǎnehé ñáhà-í xii-n nchàa nacuáa cada-xi ndéé núú cuahán núú vǐxi — càhǐ-gǎ.

² Te òré-ni-án ñǐ quide ñaha tucu Espiritú Yǎ Ndiǒxí xii-í nàcuáa càhǐ inǐ-xi, te dǐu-ni òré-án ñǐ xinǐ-í nùtnǐ ìⁿ xilé váha andiu te càa datná cáá xilé sácǒo nchihǐ cue ñáyiú ío cùnùu, te núú xilé váha-án núcǒo Yáá táxi tñùnǐ.

³ Te Yáá-án cáá-gǎ dàtná cáá yǔú chàhnhǐ yúú váha sá nánǐ jǎspé, te càa tucu-gǎ dàtná cáá yǔú váha sá nánǐ cǒrnalíná, te ñuhu doco ñaha ìⁿ cóo yáhnchǐ xii-gǎ, te tǎsaⁿ-dǐ dàtná tǎsaⁿ ìⁿ yúú váha sá nánǐ èsmeraldá.

⁴ Te ní xinǐ tucu-í nùtnǐ ócǒ cúmǐ xilé váha ñǐ càndéé núú núcǒo-gǎ, te núú xilé-án xĩnucóo ócǒ cúmǐ cue tée cùu sacuéhé te xixǐhnu-güedé mee-ni dǒo cuixíⁿ, te ìⁿ caa coróná sá ní cuáha mee-ni dǐhúⁿ cuáán xixúhuⁿ dǐquǐ-güedé.

⁵ Te núú núcǒo Yáá táxi tñùnǐ-án sǎá ndúté, te càháⁿ ñuhu te xica chíhi-xi dǒndaha, te cǎyú úsá itǐ núú núcǒo-gǎ, te sá úsá itǐ-án xǎⁿ cútñùnǐ sá ndécú úsá espíritú cúu cuendá-gǎ.

⁶ Te ndècu ìⁿ sá ndécú ndàa núú-gǎ te xǎⁿ cáá dàtná cáá làmár, te dàtná cáá vidriú cáá ñihǐ.

Te ní càndéé dǐñǐ Yáá núcǒo-án xĩnutnǐ cúmǐ quiti te titnǐ víhǐ tĩnuu-güedi ndee ndàa sátá-güedi ndihǐ ndàa núú-güedi.

⁷ Te quiti dǐhna nuu càa-dǐ datná cáá ndicaha, te quiti cùu uú cáá-dǐ dàtná cáá ndicutu, te quiti cùu unǐ néhé-dǐ núú tée, te quiti cùu cumǐ cáá-dǐ dàtná cáá yàcolo oré cuáhàⁿ-dǐ núú táhǐ.

8 Te ndi cù mí quiti-án ndèè ìñú ndíxíⁿ-güedi ìⁿ ìⁿ-güedi, te ñihí xití ndíxíⁿ-güedi ndíhi ndàa sátá ndíxíⁿ-güedi ndèè tinùu-güedi, te nduu núú chíñùhu-güedi Yá Ndiòxí, te xáhaⁿ-güedi xii-gá:

Yòhó Dútú Ndiòxí ducaⁿ-ni ta quide ndáá-n vèxi, te ducaⁿ-ni quide ndáá-n cuèi vitna, te ñiu-ni ducaⁿ càda ndáá-n núú cuaháⁿ núú vèxi, te cùu-n Yaá quidé nchàa-ndi túhú sá váha, te ñiu-ni-n sà ndecu-n ndéé cútñàhá ní cuáha ñuyúyú, te ñiu-ni-n ndecu-n cuèi vitna, te ñiu-ni-n cùndecu-n cuèi ndéé núú cuaháⁿ núú vèxi.

Duha xáhaⁿ cuè quiti-án xii Yaá núcõo núú xilé váha-án chíñùhu ñaha-güedi.

9 Te cue quiti-án ìo ndácáⁿ táhú-güedi núú Yaá núcõo núú xilé váha-án cuèndá nchaa sá quidé-gá. Te Yaá-án cúú-gá Yaá ndécú nchàa nduu nchaa quíú. Te cue quiti-án càchí-güedi sá ìo càhnu cuu-gá te nèhe-güedi sá yíñùhu núú-gá. Te ndi tnahá òré ducaⁿ càháⁿ-güedi,

10 te ndi òcò cù mí cue téé cùu sacuéhé xñucóo-án ngüñí xití-güedé núú Yàa núcõo-án, chí ñiu-gá cúú-gá Yaá ndécú nchàa nduu nchaa quíú te chíñùhu ñaha-güedé xii-gá, te tàva-güedé coróná ñúhú díquí-güedé te tàxi ndecu-güedé núú-gá, te xáhaⁿ-güedé xii-gá:

11 Yòhó cúú-n Dútú Ndiòxí Yaá cúú cuèndá ñáhá xì-ndí,

te ìo càhnu cuu-n, te ìo váha quide-n,

te nèhe-ndí sá yíñùhu núú-n, chí ducaⁿ tàù-xi cada-ndí,

chí yòhó cúú-n Yàa ní cadúha nchaandi túhú sá ìo,

te ducaⁿ ní ngúndecu nchaa xiáⁿ chí mee-n dùcaⁿ ní sani iní-n càda-n.

5

Cuèndá Yaá cáá dàtná cáá ìⁿ mbéé quiti ní dánicüehé-güedé ndíhi cuèndá ìⁿ tutú

1 Te ní xiní tucu-í sá Yàa núcõo núú xilé váha-án nùndàha-gá ìⁿ tutú ní nacaúnuu xio ndaha cùha-gá, te ndèè lètrá ndàa sátá-xi ndíhi ndàa xití-xi, te úsá tnahá tutú líhli ñùhu seyú ndéé sátá tutú-án cuèndá sá vǎ dáñá-xí nacaá.

2 Te ní xiní-í ìⁿ espíritú xínú cuèchi núú Yá Ndiòxí, te ndee víhí-xi te níhi càháⁿ-xi, te càchí-xi:

—¿Yoo tàù-xi xocàni nchaa tutú líhli ñùhu seyú ndéé sátá tutú-a te nadacáá-xi? —càchí espíritú-án.

3 Dico ní àndiu, te ní núú ñuyúyú-a, te ní ndàa xití ñuhu ñá túú ìⁿ ñáyiu tàù-xi nadacáá tutú-án te cundéhé-yu.

4 Te yúhú ní ngüita-í ndàhyú víhí-í cuèndá sá ñà túú ní ìⁿ ñáyiu tàù-xi nadacáá tutú-án cundéhé-yu.

5 Te ìⁿ cue téé cùu sacuéhé xñucóo xiáⁿ ní cachí-güedé xii-í:

—Vǎ ndàhyú-gá-n, te cada cuèndá-n chí Yaá ìo cùnuu cuu ndi mee cue ñáyiu cùu ñani tnahá ndíi Judá, ñiu-ni Yaá cúú ñani tnahá ndíi Dàvií, Yaá-án cúú-gá Yaá ní ndacu ní yáha nchaa nándi sá ní yáha, núú xiáⁿ ñiu-gá tàù-gá xocàni-gá nchaa tutú líhli ñùhu seyú ndéé sátá tutú-án te nadacáá-gá —duha càchí téé cùu sacuéhé-án.

6 Te tnuú ndi òcò cù mí cue téé cùu sacuéhé xñucóo-án, ndíhi tnuú ndi cù mí quiti xñutní-án, ndíhi núú núcõo Yaá táxi tñuní-án ní xiní-í nùtní ìⁿ Yaá cáá dàtná cáá ìⁿ mbéé quiti ní dánicüehé-güedé te ní xihí-di ní cùu te ní ndoto-di, te ndéé úsá ndiqui-di, te ndéé úsá tinùu-di, te sá úsá tinùu-di-án cútñuní sá ndécú

ùsá espíritú cúú cuendá Yá Ndiòxí, ducaⁿ càa Yaá-áⁿ nǐ xiní-í. Te cue espíritú-áⁿ nǐ tendaha-gǎ xícá cùu-xi nǐ caa xico ñuyíú.

7 Te Yaá cáá dàtná cáá ìⁿ mbéé quiti ní dánicuehé-güedé-áⁿ nǐ sáháⁿ-gá núú Yáá núcõo núú xilé váha-áⁿ.

8 Te òré ní queheⁿ-gá tutú-áⁿ te ndi cùmí quiti xĩnutnǐ xíaⁿ nǐ ngüíñí xítí-güedi núú-gǎ, te ducaⁿ nǐ ngüíñí xítí tucu ndi òcò cùmí cue téé cùu sacuéhé xĩnucóo-áⁿ, te ndi díⁿ núú-güedé xĩnehe-güedé yaá sá nání arpá, te xĩnehe tucu-güedé ndí díⁿ núú-güedé ìⁿ caa tǐcùú ní cuáha mee-ni díhúⁿ cuááⁿ, te chitu dùsa sá sáháⁿ tnámí. Te ñúhmá dùsa sá sáháⁿ tnámí-áⁿ cúú-xí dàtná nchaa tnúhu càháⁿ nchaa ñáyiu ndècu ichi Yá Ndiòxí òré càháⁿ ndihí ñàhá-yu xii-gá.

9 Te xita-güedé ìⁿ ndudú sáá ndihí cue quiti-áⁿ chíñùhu ñaha-güedé xii-gá, te càchí-güedé ndihí cue quiti-áⁿ:

Yòhó tàú-n queheⁿ-n tutú-a te xocàni-n nchaa tutú líhli ñùhu seyú ndèé sátá-xi, chi yòhó ní sati ñíñí-n te ní xihí-n,

te cuendá xíaⁿ ní nduu cuendá Yá Ndiòxí cue ñáyiu ìⁿ ìⁿ nàcióⁿ, ndihí ñáyiu xĩndecu ìⁿ ìⁿ ñuú, ndihí ñáyiu càháⁿ ndí díⁿ ndí díⁿ núú tnúhu, ndihí ñáyiu xĩndecu ìⁿ ìⁿ xichí.

10 Te ní quidè-n-yu dàtná cue téé yĩndaha ñáyiu, te ní quide tucú-n-yu dàtná cue dútú sá cúú-xí Yá Ndiòxí.

Te sáá nduu te taxi tnùní-yu ñuyíú-a.

Duha càháⁿ cue téé-áⁿ ndihí cue quiti-áⁿ chíñùhu-güedé ndihí-güedi Yaá-áⁿ.

11 Te sátá dúcáⁿ te ní tecú dóho-í ní cáháⁿ cuéhé víhí espíritú xínú cuèchi ni candéé núú núcõo Yaá táxi tnùní-áⁿ, ndihí núú xĩnutnǐ ndi cùmí cue quiti-áⁿ, ndihí núú xĩnucóo cue téé cùu sacuéhé-áⁿ, te ní xiní-í sá súuní cuéhé víhí espíritú-áⁿ xĩndecu xíaⁿ,

12 te níhi ní cáháⁿ cue espíritú-áⁿ, te càchí-xi:

Yòhó Yaá cáá dàtná cáá ìⁿ mbéé quiti ní dánicuehé-güedé te ní xihí ní cùu te ní ndoto,

te yòhó ío càhnu cuu-n, te ndècu ndihí-n nchaandi túhú,

te ío ndècu ndihí-n sá xini tnùní-n,

te ndàcu-n quide-n nchaa sá culní-n,

te nèhe-ndí sá yĩñùhu núú-n, te ío váha quide-n,

te chíñùhu ñaha-ndí xii-n, chi ducaⁿ tàú-ndí cada-ndí chi ío càhnu cuu-n.

Duha càchí nchaa cue espíritú-áⁿ xáhaⁿ-xi xii-gá chíñùhu ñaha-xi.

13 Te ní tecú dóho-í ní cáháⁿ nchaandi túhú sá ní cadúha Yá Ndiòxí ndécú àndíu, ndihí nchaa sá ndécú ñùyíú, ndihí nchaa sá ndécú xítí ñuhu, ndihí nchaa sá ñùhú xítí ndute lámár, te xĩcachí-xi:

Yòhó Yaá núcõo núú xilé váha, ndihí yòhó Yaá cáá dàtná cáá ìⁿ mbéé quiti ní dánicuehé-güedé táxi tnùní-ndó, te nèhe-ndí sá yĩñùhu núú-ndó,

te ducaⁿ ío ndàcáⁿ táhú-ndí núú-ndó, chi ío váha quide-ndo te ío cùnuu-ndo,

te diu-ni duha cáháⁿ váha-ndí cuendá-ndó nǐ caa nǐ quíhíⁿ.

Duha càchí nchaa sá ní cadúha Yá Ndiòxí.

14 Te ndi cùmí cue quiti xĩnutnǐ-áⁿ càchí-güedi:

—¡Ducaⁿ na cùnduu! —cachí-güedi.

Te ndi òcò cùmí cue téé cùu sacuéhé xĩndecu-áⁿ nǐ ngüíñí xítí-güedé chíñùhu-güedé Yaá ndécú nchaa nduu nchaa quíú.

6

Cuèndá úsá tutú líhli ñùhu seyú

1 Te sáta dúcáⁿ te ní xiní-í sá Yáa cáá dàtná cáá ìⁿ mbéé quiti ní dánícuèhé-güedé-áⁿ ní xócání-gã ìⁿ tutú líhli ñùhu seyú ndéé sáta tütú sá ní nadúcúⁿ nuu-áⁿ, te ní tecú dóho-í ní cáháⁿ ìⁿ quiti cúmí xĩnutní-áⁿ, te níhi ní cáháⁿ-di dàtná cáháⁿ ñùhu, te càchí-di:

—jTaquìxi cundehe-n! —cachí-di.

2 Te òré-ni-áⁿ ní xiní-í ìⁿ cuàyú cuixíⁿ yódó ñàha ìⁿ sá yódó ñàha xii-di, te sá yódó ñàha xii-di-áⁿ néhé-xí ìⁿ arcú sá cúú tnùxí-xi, te ní nduu táhú-xi ìⁿ coróná, te ní ndacu-xi ní cunuu-xi te ducaⁿ-ni ta cunuu-xi cuáháⁿ.

3 Te òré ní xócání-gã tutú líhli cùu uú ñùhú seyú ndéé sáta tütú sá ní nadúcúⁿ nuu-áⁿ, te ní tecú dóho-í ní cáháⁿ tucu ingá quiti cùu uú xĩnutní-áⁿ, te càchí-di:

—jTaquìxi cundehe-n! —cachí-di.

4 Te òré-ni-áⁿ ní xiní tucu-í ìⁿ cuàyú tícuèhé ní quee-di cuáháⁿ-di, te yòdo ñàha ìⁿ sá yódó ñàha xii-di, te sá yódó ñàha xii-di-áⁿ ní níhi-xi tnùhu ndee ìní sá dátícanuu-xi ñáyíu vá cùndècu ndihí tnaha váha-gá-yu, te ngüíta ñáyíu cahni tnàhá-yu, te ní nduu táhú-xi ìⁿ yuchí cáhnú vñhi.

5 Te òré ní xócání tucu Yaa-áⁿ ingá tutú líhli cùu uní ñùhú seyú ndéé sáta tütú sá ní nadúcúⁿ nuu-áⁿ, te ní tecú dóho-í ní cáháⁿ quiti cùu uní xĩnutní xíáⁿ, te càchí-di:

—jTaquìxi cundehe-n! —cachí-di.

Te òré-ni-áⁿ ní xiní tucu-í ìⁿ cuàyú tnuú te yòdo ñàha tucu ìⁿ sá yódó ñàha xii-di, te sá yódó ñàha-áⁿ nùndàha-xi úú yaxíⁿ libré.

6 Te ní tecú dóho-í ní cáháⁿ ìⁿ sá ní cáháⁿ tnuú cue quiti xĩnutní-áⁿ, te càchí-xi:

—Ìⁿ cuártú-nã trùú níhi-ndó sã ìⁿ dñhúⁿ denàriú, te uní cuártú-nã cebàdá níhi-ndó sã ìⁿ tucu dñhúⁿ denàriú, dico acítí ndihí ndudí ndéhé yoho yàha stilé chí vá ndíhí ñìhnu —duha càchí sá cáháⁿ-áⁿ.

7 Te òré ní xócání tucu Yaa-áⁿ tutú líhli cùu cumí ñùhú seyú ndéé sáta tütú sá ní nadúcúⁿ nuu-áⁿ, te ní tecú tucu dóho-í ní cáháⁿ tucu ingá quiti cùu cumí xĩnutní-áⁿ, te càchí-di:

—jTaquìxi cundehe-n! —cachí-di.

8 Te òré-ni-áⁿ ní xiní tucu-í ìⁿ cuàyú yàhá, te yòdo ñàha tucu ìⁿ sá yódó ñàha xii-di, te sá yódó ñàha xii-di-áⁿ nání-xí Sã xihí, te xíáⁿ sáhní-xí ñáyíu, te sáta xíáⁿ nchícúⁿ sá néhé núú ndécú ñáyíu ní xihí. Te cúmí xichi cùu ñuyúú, te sá sáhní ñàha xii ñáyíu-áⁿ ní níhi-xi tnùhu ndee ìní danàa-xi ñáyíu ìⁿ xichi ñuyúú, te davá-yu cahni ñàha-xi ndihí yuchí, te cada-xi sá cóo tnámá te cuú-yu, te cada tucu-xi sá cóo cuèhé cahni-xi ñáyíu, te ñu-ni tucu-xi cada sá ncháá quiti dééⁿ cahni-di ñáyíu.

9 Te òré ní xócání tucu Yaa-áⁿ tutú líhli cùu uhúⁿ ñùhú seyú ndéé sáta tütú sá ní nadúcúⁿ nuu-áⁿ, te òré-áⁿ ní xiní-í nùtní ìⁿ núú sácódó sã ndúú táhú Yá Ndióxi, te ndàa caha xíáⁿ ní xiní-í xĩndecu nchaa àlmá ñáyíu ní sahní-güedé núú ñuyúú sã cuèndá tnùhu Yá Ndióxi, ndihí sá cuèndá sá ní cáháⁿ váha-yu cuèndá-gá.

10 Te nchaa àlmá-áⁿ níhi xícáháⁿ-xi, te xàhaⁿ-xi xii Yá Ndióxi:

—Yòhó Dútú Ndióxi cúu-n Yáa ñá túú tnàhí cuéchi-xi, te ñá túú tnàhí queé cáva-n quide-n ìⁿ sá cáháⁿ-n. ¿Te ná ndéé ama dandòho-n ñáyíu ndècu ñuyúú

nachinaa-n cuèndá sá nǐ quide ñàhá-yu xii-ndí-i? —càchí cue àlmá-áⁿ xǎhaⁿ-xi xii-gá.

11 Te sátá dúcáⁿ te nchaa cue àlmá ñáyiú-áⁿ nǐ níhí-xi dóo cuixíⁿ ní queé cuíhnu-xi, te ní xitnúhu ñaha xii-xi sá ná ndètatú-xi te cundetú tnaa-xi ndéé ná xínu cava cuú ñáyiú nàcuáa ndèé tñuní dàtná ní xihí cue ñáyiú dii àlmá-xi cùu-xi. Te ñáyiú sa ní xihí-áⁿ ìⁿ-ni cùu-yu ndihí ñáyiú vitna cuú-áⁿ chi mee-ni chiúⁿ Xítóhó Jesucrístú quidě-yu, te ñiu-ni ichi-gá ndécú-yu.

12 Te òré ní xócání tucu Yaá-áⁿ tutú líhli cùu iñú ñúhú seyú ndéé sátá tütú sá nǐ nadúcúⁿ nuu-áⁿ, te ní xiní-í súúní níhi ní quidi-xi ñuyiú, te ní cutnuu ñihí núú nchíanchii dàtná ìⁿ dóo tñúú, te ní cuu ticuehè níñí ñihí núú yóo.

13 Te ní xiní-í ní ngoyo chódíní ñuyiú-a dàtná ngóyó ngúxí yíhí òré quéné táchí níhi.

14 Te ní xiní-í ní nadúcúⁿnuu andíu dàtná nádúcúⁿnuu ìⁿ tutú te ní ndóñúhú-xi, te nchaa tindúú ní xica ndehe-xi núú ndécú-xi, te ducaⁿ ní xica ndehe tucu nchaa tindúú yichí ndécú xiti ndute làmár.

15 Te nchaa cue téé yindaha ñáyiú ní nguíváha-güedé, ndihí nchaa dava-gá cue téé ío tàxi tñuní, ndihí nchaa ñáyiú cuica, ndihí nchaa cue téé tàxi tñuní sandàdú, ndihí cue sandàdú cue téé ío váha sàà díquí-xi nàcuáa cada-güedé nàa-güedé, ndihí nchaa ñáyiú ñá túú tñàhí dàñá quee núú chiúⁿ patróoⁿ-xi, ndihí nchaa ñáyiú dàñá queé núú chiúⁿ patróoⁿ-xi. Te dava ñáyiú-áⁿ ní nguíváha-yu xiti yaú, te davá-yu ní nguíváha-yu nchaa tñuu cava.

16 Te xǎháⁿ-yu nchaa tindúú ndihí nchaa cava:

—Chí tácuúⁿ chiváha ñaha-ndo xii-ndí cuèndá sá vǎ quini ñáhá Yàá ío tàxi tñuní núcóo núú xilé váha, ndihí cuèndá sá vǎ dándòho ñaha Yaá cáá dàtná cáá ìⁿ mbéé quiti ní dánícuhè-güedé, chí Yaá-áⁿ ío cùdééⁿ-gǎ núú-ndí —duha càchí nchaa ñáyiú-áⁿ xǎháⁿ-yu xii nchaa tindúú-áⁿ ndihí nchaa cava-áⁿ.

17 Te vitna ní sáá nduu ío cùu cahnu nduu tñúndòho tñúhu ndàhú, te vǎ yóo ìⁿ cundee ìni-xi yáha nchaa tñúndòho-a.

7

Ñáyiú isràél ñáyiú nanthí tàhú

1 Te sátá xǎháⁿ te ní xiní-í cúmi tñàhá espíritú xínú cuèchi núú Yǎ Ndióxi xínutñí-xi ndi cúmi xio ñuyiú, te cue espíritú-áⁿ nǐ ngani-xi táchí cuèndá sá vǎ cuícó-gǎ-xi ní làmár, te ní díquí yutnu, te ní ìⁿ xichi ñuyiú vǎ cuícó-gǎ-xi.

2 Te cue espíritú-áⁿ ndécú ndihí-xi tñúhu ndee ìni danàa-xi sá ío làmár ndihí sá ío ñuhu yichí, te ní xiní tucu-í íngá espíritú xínú cuèchi núú Yǎ Ndióxi ní quee nchita-xi ndàa nacuéa quène nchíanchii, te nùndaha-xi seyú Yǎ Ndióxi Yaá ndécú nchàa nduu nchaa quíú, te níhi ní cáháⁿ-xi xǎháⁿ-xi xii ndi cúmi cue espíritú-áⁿ:

3 —Vǎ danàa-ndo sá ío làmár, te ní vǎ danàa-ndo yutnu, te ní ìⁿ sá ío ñuyiú vǎ danàa-ndo, chí cundetú-ndo ndéé ná tàxi ndecu-ndí ìⁿ señá tneé nchaa ñáyiú xínu cuechi núú Tátá-ó Dütú Ndióxi —duha càchí espíritú-áⁿ xǎháⁿ-xi xii ndi cúmi espíritú xínutñí ndi cúmi xichi ñuyiú.

4 Te ní tecú dóho-í ní cáháⁿ ìⁿ sá nǐ cáháⁿ, te ní cachí-xi sá núú ndí ùxúú xichi cue ñáyiú isràél te ní xínu ìⁿ cièndú údico cúmi ñil-yu ní ngúndecu señá tneé-yu.

⁵ Te núú ññ ciendú údico cúmí mĩ ñáyiu-án, te ní xínu úxúú mĩl cue ñani tnáhá ndii Jùdá ní ngúndecu sèñá tneé-yu, te úxúú mĩl cue ñani tnáhá ndii Rùbén, te úxúú mĩl cue ñani tnáhá ndii Gàd,

⁶ te úxúú mĩl cue ñani tnáhá ndii Àsér, te úxúú mĩl cue ñani tnáhá ndii Neftalí, te úxúú mĩl cue ñani tnáhá ndii Manàsés,

⁷ te úxúú mĩl cue ñani tnáhá ndii Mió, te úxúú mĩl cue ñani tnáhá ndii Lèví, te úxúú mĩl cue ñani tnáhá ndii Isàcár,

⁸ te úxúú mĩl cue ñani tnáhá ndii Zabùlón, te úxúú mĩl cue ñani tnáhá ndii Chèé, te úxúú mĩl cue ñani tnáhá ndii Benjàmín, nchaandi túhu ñáyiu-án ní ngúndecu sèñá tneé-yu.

Cuéhé víhí ñáyiu ñihnu dóo cuixíⁿ

⁹ Te sátá xǎⁿ te ní xiní-í cuéhé víhí ñáyiu, ñáyiu ññ ññ nacióⁿ, ndihi ñáyiu ññ ññ ñuú, ndihi ñáyiu càháⁿ ndi dǎⁿ ndi dǎⁿ núú tnũhu, ndihi ñáyiu ní xíndecu ññ ññ xichi, te nchaa ñáyiu-án xínutní-yu ndaa núú Yàá táxí tnùní núcõo núú xilé váha, ndihi núú Yàá cáá dàtná cáá ññ mbéé quiti ní dánicuehé-güedé, te vá yõo ññ ndacu cahu ñaha xii-yu chi cuéhé víhí-yu, te nchaá-yu xixíhnu-yu mee-ni dóo cuixíⁿ, te nundahá-yu nchaá-yu ññ caa ndàha yutnu ñũú.

¹⁰ Te nchaá-yu níhi xicáháⁿ-yu, te càchí-yu: Yàá táxí tnùní núcõo núú xilé váha cùu-gá Ndiõxí-ó, te ñu-gá ndihi Yàá cáá dàtná cáá ññ mbéé quiti ní dánicuehé-güedé ní dácäcu ñihnu ñaha-gá xii-o núú úhú núú ndàhú. Duha càchí nchaa ñáyiu-án.

¹¹ Te nchaa espíritú xínu cuèchi núú Yá Ndiõxí ní nadúcuⁿndèe-xi xínutní-xi ní càndéé núú núcõo Yàá núcõo núú xilé váha, ndihi núú xínucõo cue tée cùu sacuéhé, ndihi cue ndi cúmí quiti xínutní-án, te nchaa-xi ní ngúñí xítí-xí te ní ngúnu ndeyi-xi núú Yàá núcõo núú xilé váha-án, te nchaa-xi ní ngúíta-xi chĩñuhu ñaha-xi xii-gá,

¹² te càchí-xi: Na càháⁿ ndáá-ndí núú yòhó Tátá-ndí Dútú Ndiõxí sá ío càhnu cuu-n, te ndàcu-n quide-n nchaa sá váha cuñí-n, te ío váha quide-n, te ndècu ndihi-n nchaa sá xiní tnùní-n, te chĩñuhu ñaha-ndí xii-n, te ducaⁿ ndàcáⁿ táhú-ndí núú-n cuendá nchaa sá quidé-n, te nèhe-ndí sá yíñuhu núú-n, te tnũhu càháⁿ-ndí-a cùu-xi tnũhu ndáá, te ñu-ni duha càháⁿ-ndí ndéé núú cuaháⁿ núú vèxi.

Duha càchí nchaa cue espíritú-án xáhaⁿ-xi xii Yàá núcõo núú xilé váha-án.

¹³ Te ññ cue tée cùu sacuéhé xíndecu-án ní xicáⁿ tnúhú-dé núú-í, te càchí-dé: —¿Yóndi cùu ñáyiu dàcáⁿ xixíhnu dóo cuixíⁿ-án, te ndèé véxi-yu núu dàcáⁿ xíndáá-yu-i? —càchí-dé.

¹⁴ Te yúhú ní xáhaⁿ-í:

—Tátá, ñá túú xiní-í, dico mee-n xiní-n —duha ní xáhaⁿ-í xii-dé.

Te dàtnùní ní cachí tnũhu-dé xii-í ná cúú ñáyiu-án, te càchí-dé:

—Nchaa ñáyiu-a cùu-yu ñáyiu ní quee núú ío víhí tnũhu ndòho tnũhu ndàhú sá vǎ cündèe iní-ó te véxi-yu iha, te cùu-yu ñáyiu sa ní nduu ndoo ní nduu nine iní-xi cuendá sá ní sati níñí Yàá cáá dàtná cáá ññ mbéé quiti ní dánicuehé-güedé, cuendá xǎⁿ vitna ní ndihí-yu ní nduu cuixíⁿ dóo xixíhnu-yu.

15 Te núu xíáⁿ vitna ní nduu táhũ-yu ndécú-yu núú ndécú Yá Ndiòxí Yaá táxí tñuní núcõo núú xilé váha, te cuéi nduu cuéi niú xínú cuèchí-yu núú-gã vitna, te ñu-gá xító ñaha-gá xii-yu.

16 Te vitna ní sáa-yu núú-gã cundecú-yu te vá ndóhó-gã-yu docó, te ni vã quíni-gá-yu ndohó-yu yíchí-yu ndute, te ni vã quíni-gá-yu ndohó-yu cahni nchíanchii, te ñá túú-gã ná cahni ndohó-yu.

17 Te ducaⁿ chi Yaá cáá ðàtná cáá ñⁿ mbéé quiti ní dánicuèhé-güedé ndécú-gã núú núnñi xilé váha núcõo Yá Ndiòxí Yaá táxí tñuní, Yaá-áⁿ coto ñaha-gã xii-yu ðàtná quidé ñⁿ toli oré xító-dẽ mbéé-dẽ, te candeca ñaha-gã xii-yu quíñiⁿ núú tõo ndute, te ndute-áⁿ cúú-xí ndüte candeca iní-yu, te Yá Ndiòxí cada-gá sá vã quíni-gá-yu tñuhu ndàhyú —duha ní cachí tñuhu téé cùu sacuéhé-ãⁿ xii-í.

8

Cuendá tícúú sá ñí cuáha mee-ni ðíhúⁿ cuááⁿ

1 Te sátá dúcáⁿ te Yaá cáá ðàtná cáá ñⁿ mbéé quiti ní dánicuèhé-güedé ní xócáni-gã tutú líhli cùu usá ñúhú sèyú ndéé sátá tutú sá ñí nadúcúⁿnuu-áⁿ, te òré-áⁿ ñí cunahi sũúni ñavíi-ñá ní cuu andiú ðàtná cuádava òré.

2 Te ní xiní-í úsá tñhá espíritú xínú cuèchi núú Yá Ndiòxí xínutñi-xi núú núcõo-gá, te ní níhí-xi ñⁿ caa cütú xínehe-xi.

3 Te ðàtnuní ní xiní tucu-í ingá espíritú xínú cuèchi núú-gã ní quexio-xi nehe-xi ñⁿ tícúú ní cuáha mee-ni ðíhúⁿ cuááⁿ te ñuhu vai dúsa sá sàháⁿ tñámí, te ní ngúnutñi espíritú-áⁿ núú ndécú sã ñí cuáha mee-ni ðíhúⁿ cuááⁿ núú sácõdó sã ndúú táhú Yá Ndiòxí, te xíáⁿ núnñi-xi ndàa núú-gã, te dúsa sá sàháⁿ tñámí-áⁿ cahni espíritú-áⁿ núú sácõdó sã ndúú táhú-gã-áⁿ cuendá ñúhmá dúsa-áⁿ cundihi-xi nchaa tñuhu càháⁿ ñáyiu càháⁿ ndihi ñaha xii-gá, nchaa ñáyiu cùu cuendá-gá.

4 Te nundaha espíritú-áⁿ tícúú ñúhú dúsa sá sàháⁿ tñámí càyú, te quène ñúhmá núnñi-xi núú Yá Ndiòxí, te ñúhmá-áⁿ cundihi-xi nchaa tñuhu càháⁿ ñáyiu càháⁿ ndihi ñaha xii-gá, nchaa ñáyiu cùu cuendá-gá.

5 Te ní queheⁿ espíritú-áⁿ tícúú te ní dáchitú-xi ñúhú yódó núú sácõdó sã ndúú táhú Yá Ndiòxí, te ní xítenuu-xi ñuyúú, te òré ducaⁿ ñí quide-xi te ní càháⁿ víhí ñúhu, te ío dusaⁿ ñí quide-xi ñuyúú, te ní sáá nduté, te níhi vñi ní tñáa.

Ndi úsá espíritú ní tiú-xi ñⁿ caa cütú xínehe-xi

6 Te ndi úsá cue espíritú xínehe ñⁿ caa cütú-áⁿ ñí ngúndecu túha-xi cuendá tiú-xi.

7 Te espíritú ðíhna nuu ñí tiú-xi cütú néhé-xí, te ñuyúú-a ní ngoyo ñíñi ðàcánuu-xi ndihi ñúhú ndihi níñí, te luha-ná te cuu dava ñuyúú ní càyú, te luha-ná te cuu dava tucu nchaa yutnu ío ñuyúú ní càyú, te luha-ná te cuu dava tucu nchaa cùhú ío ñuyúú ní càyú.

8 Te espíritú cúú úú ní tiú-xi cütú néhé-xí, te ðàtná cáá ñⁿ tindúú cáá ñⁿ sá ñí ngava xítí làmár te nchícúⁿ ñúhú, te luha-ná te cuu dava ndute làmár-áⁿ ñí nduu-xi níñí.

9 Te luha-ná te cuu dava nchaa quiti xixúhuⁿ xítí làmár-áⁿ ñí xíhí-güedi, te luha-ná te cuu dava nchaa bàrcú ní quée naa-xi xítí ndute.

10 Te espíritú cúú ùní ní tiú-xi cütú néhé-xí, te ní ngava ñⁿ chódíní cáhnú ndéé andiú ñuyúú te nchícúⁿ ñúhú-ði, te ñúhú-áⁿ cáá ðàtná cáá ñúhú íti. Te

luha-ná te cuu dava nchaa yúte ní ngava chódíní-ǎⁿ, te luha-ná te cuu dava tucu nchaa núú quénihni ndute ní ngava-di.

11 Te chódíní-ǎⁿ nání-dí: Yúcú Úá. Te ndute xica nchaa yúte-áⁿ ndihí nchaa ndute quénihni-ǎⁿ ní cuu úá-xi dátá yúcú úá, te io cuéhé ñáyiú ní xihí sá dúcáⁿ ní cuu úá ndute-áⁿ.

12 Te espíritú cúú cùmí ní dácàháⁿ-xi cútú néhé-xí, te luha-ná te cuu dava nchíanchii ñá túú ní dàyehé-xi, te ducaⁿ lùha-ná tucu cuu dava yóó ñá túú ní dàyehé-di, te ducaⁿ lùha-ná te cuu dava tucu nchaa chódíní ñá túú ní dàyehé-güedi, te luha-ná te cuu dava nduu ñá túú ní dàyehé nchíanchii, te ducaⁿ lùha-ná te cuu dava niú ñá túú ní dàyehé yóó ndihí nchaa chódíní.

13 Te sáta dúcáⁿ te ní xiní-í xícó ìⁿ espíritú xínú cuèchi núú Yá Ndióxi núú tàchí, te ní tecú dóho-í níhi càháⁿ-xi, te càchí-xi:

—jío ndàhú ndoho nchaa ñáyiú xĩndecu ñuyú órè ná dácàháⁿ úní-gá cue espíritú cúmání cútú xĩnehe-xi, chí sa xĩndecu túha-ná-xi sá dácàháⁿ-xi!— duha càchí espíritú-áⁿ.

9

1 Te espíritú cúú ùhúⁿ ní tiú-xi cútú néhé-xí, te òrè-áⁿ ní xiní-í ní quee ìⁿ espíritú andiú te càa-xi datná cáá ìⁿ chódíní, te ní ngava-xi ñuyú, te ní níhí-xi ìⁿ ndacaá néhé-xí cuendá nacaáⁿ-xi yuyèhe yaú cùnú víhí.

2 Te ní nacaáⁿ-xi yaú-áⁿ te ní ngüíta-xi ní quene ñúhmá dátá quéné ñúhmá ìⁿ xítnú cáhnú víhí, te ní quene táchí ní xítenuu-xi ñúhmá-ǎⁿ te ní sadí-xi núú nchíanchii, te ní cunee ñuyú.

3 Te xití ñúhmá-ǎⁿ ní quene tíca làngóstá, te ní xítenuu-di ñuyú, te dééⁿ-güedi dátá dééⁿ nchacua.

4 Te ní ngündecu ndihí-güedi tnúhu ndee ìní cuendá sá dándòho-güedi mee-ni ñáyiú ñá túú ndèé sèñá Yá Ndióxi tneé-xi, te ñá túú nã cada-di nchaa yutnu ndihí nchaa cúhú.

5 Te ñá túú tnúhu ndee ìní ndécú ndihí-güedi sá cáhní-güedi ñáyiú, chí mee-ni sá dándòho ñaha-güedi xií-yu úhúⁿ yóó. Te òrè ní ngüíta-güedi dándòho ñaha-güedi xií-yu te tàhú tnúhú núú dáquèe-güedi iñu-güedi dátá quidé-xi núú dáquèe nchacua iñu-güedi.

6 Te ñáyiú-áⁿ xicáⁿ táhú-yu sá ndihí cuú-yu cuendá sá io ndòhó-yu dàquèe ñaha nchaa quití-áⁿ iñu-di xií-yu te ñá cuíní-xi cuú-yu, te ìⁿ nduu ìⁿ nduu sàni iní-yu cuú-yu te ñá túú cuíní-xi cuú-yu chí ñá túú tnúhu xihí sá cuú-xi-yu.

7 Te nchaa tíca làngóstá-áⁿ xĩndáa-güedi dátá ndáa nchaa cuayú cue téé cuáháⁿ naá, te díquí-güedi ñúhu ìⁿ sá cáá dátá cáá còroná ní cuáha mee-ni díhúⁿ cuááⁿ, te núú-güedi càa datná cáá núú cuè téé.

8 Te idi díquí-güedi càa datná cáá idi díquí ñáyiú dìhí, te núhu-güedi càa datná cáá ñúhu ndicaha.

9 Te yidúcúⁿnuu-güedi ìⁿ sá cáá dátá cáá càá, te ndíxíⁿ-güedi quíde-xi datná quidé-xi núú vèxi cuéhé víhí càrretá sá táñuhu cuayú cuáháⁿ-güedé ndihí-güedi núú naá-güedé.

10 Te ndèé iñu núú lùhmá-güedi dátá ndèé iñu núú lùhmá nchacua, te iñu núú lùhmá-güedi-áⁿ dáquèe-güedi ñáyiú dándòho ñaha-güedi xií-yu, te ducaⁿ-ni càa-güedi dándòho ñaha-güedi xií-yu ndèé xínu úhúⁿ yóó.

11 Te nchaa tíca làngóstá-án táxí tnùnì ñáhá espíritú sá táxí tnùnì yaú cùnú víhí, te espíritú-án nání-xí Àbadón tnúhu hèbreú, te tnúhu griégú nání-xí Àpolión, te ndi ndùú tnúhu-án quéeé-xí: Sá dánàa ñáyíu.

12 Te tnúndòho-a cuu-xi tnúndòho díhna nuu, te vitna cùmání ùú-gá.

13 Te espíritú cúú iñú ní tiú-xi cútú néhé-xí. Te núú Yă Ndiöxí nùtnñ ì# sá nǐ cuáha mee-ni díhúⁿ cuááⁿ núú sácódó sá ndúú tǎhú-gǎ, te ndi cùmí xíquí-xi xǐndecu ì# caa ndìqui, te ní tecú dóho-í ní cáháⁿ ì# sá nǐ cáháⁿ nihnu ndi cùmí ndìqui-án.

14 Te sá cáháⁿ nihnu ndìqui-án xǎhaⁿ-xi xì espíritú cúú iñú sá nǐ tiú cútú-ǎⁿ:
—Cuáháⁿ nandaxi-n ndi cumí espíritú ndútú ndècu yúte càhnu nani Eúfratés —càhí sá cáháⁿ-án xǎhaⁿ-xi xì espíritú-án.

15 Te sátá dúcáⁿ te ní nandáxí ndi cùmí cue espíritú-án cuendá cahni-xi cuéhé víhí ñáyíu, te sa yatni dátá cuádava ñáyíu xǐndecu ñuyíu cahni-xi, te ducaⁿ chí sa ndècu túha tñàhí cue espíritú-án ndétú-xí sàà òrè, àdi nduu, àdi yóó, àdi cuía ducaⁿ càda-xi cahni-xi ñáyíu.

16 Te ní xíní-í nchaa cue sandàdú cùndìhí-xi xixódó-güedě cuàyú, te ní níhì-í tnúhu sá xǐnu úú cièndú millón-güedě.

17 Te duha xǐndáa cue cuàyú-án ndihi cue téé yòdo ñaha-án nǐ xíní-í: Te cue téé-án yídúcúⁿ nuu ì# sá yídúcúⁿ nuu pèchú-güedé, te luha ticuéhé te luha cuìi dátá cuìi andiu, te luha cuááⁿ, te nchaa cuàyú-án cáá díquí-güedi dátá cáá díquí ndicaha, te yuhu-güedi quène ñuhú ndihi ñúhmá, ndihi àzufré nchicúⁿ ñuhú.

18 Te ío cuéhé ñáyíu ñuyíú nǐ xíhí chí luha-ná te cudavá-yu ní xíhí sá cuendá ñuhú-án ndihi ñúhmá-ǎⁿ ndihi àzufré-án.

19 Te ndihi núú lúhmá-güedi ndihi yuhu-güedi dándoho-güedi ñáyíu, te núú lúhmá-güedi nèhe-xi díquí cóó, te diu-ni dátá cáá cóó cáá níhí lúhmá-güedi.

20 Te nchaa dava-gá ñáyíu ní cácu ñá túú ní xíhí núú ncháa tnúndòho-án ñà túú ní cuìni-yu dàñá-yu ichi cuéhé ichi duha ndécú-yu, chí quide cahnu-ní-yu nchaa espíritú cùndìhí yucu ñávàha, ndihi nchaa sá càhí-yu cùu ndiöxí ní cadúha cue téé ñuyíú-a, te dava xǐǎⁿ ní cuáha mee-ni díhúⁿ cuááⁿ, te dava ní cuáha mee-ni díhúⁿ cuìxíⁿ, te dava ní cuáha sá nání bròncé, te dava ní cuáha mee-ni yúú, te dava ní cuáha mee-ni yùtnu, te nchaa xǐǎⁿ ñá túú cùtnuní núú-xi, te ní ñà túú tècú dóho-xi, te ní ñǎ ndácú-xí càca-xi.

21 Te ní sá sáhní tñahá-yu, te ní sá sáhní ndüu tñahá-yu, te ní sá ndécú-yu ichi díí ìni, te ní sá dúhú ndächiuⁿ tñahá-yu ñá túú ní cuìni-yu dàñá-yu.

10

Èⁿ espíritú xínú cuèchi núú Yă Ndiöxí néhé-xí ì# librú

1 Te sátá dúcáⁿ te ní xíní tucu-í ì# espíritú cùnùu xínu cuechi núú Yă Ndiöxí ní quee-xi andiu, te yìhí-xi xití vícò cuǎnguee-xi ñuyíú te ndàa díquí-xi ndècu ì# cóó yáhnchí, te núú-xi súúní chàhnchí dátá chàhnchí núú nchìcanchii, te ndi ndúú díhíⁿ-xi càa dátá cáá itá ñuhú.

2 Te nùndaha-xi ì# librú lìhli ní nandíca, te sáhá cùha-xi ní sani-xi núú ndute làmár, te sáhá dátni-xi ní sani-xi núú ñuhu yìchí.

3 Te espíritú-án níhí víhí ní cáháⁿ-xi, te ní quide-xi dátá quidé ì# ndicaha oré cánásaa-di, te oré ducaⁿ níhí víhí ní cáháⁿ-xi te úsá xito ní cáháⁿ ñuhu.

⁴ Te sáta ní yáha ní cáháⁿ ñúhu-áⁿ úsá xito, te chido tnùn-í í ñⁿ núú tütú nàcuáa ní cáháⁿ-xi ní cùu, te mei òré-áⁿ ní tecú dóho-í ní cáháⁿ ñⁿ sá ní cáháⁿ andiu te cächí-xi:

—Vá chídó tnùn-í nàcuáa ní cáháⁿ ñúhu-áⁿ, iní méé-ní-n ná cùhuⁿ —duha cächí sá ní cáháⁿ-áⁿ.

⁵ Te espíritú sá nútn^ñ ñⁿ xio sáhá-xi núú ndute lámár-áⁿ ndihí ingá xio sáhá-xi núú ñuhu yichí-áⁿ ní xiní-í ní ndonehe-xi ndaha cùha-xi,

⁶ te cächí-xi:

—Yá Ndiöxí Yáá ndécú ncháa nduu nchaa quíú Yáá ní cadúha ñuyíú, ndihí andiu, ndihí lámár, ndihí nchaa sá íó, Yáá-áⁿ náhá ndáá-gá sá yúhú cáháⁿ ndáá-í, te vá cùyaa víhi

⁷ te cada-xi nchaa nàcuáa ndùu tnúhu ndùu yuhu ní cáháⁿ-gá, tnúhu ní xáhaⁿ-gá xii cue téé ní xinu cuechi núú-gá, cue téé ní xóo cáháⁿ tnúhu-gá ndéé sanaha, chí òré ná tíú espíritú cúú úsá cútú néhé-xí, te òré-áⁿ cada-xi nchaa nàcuáa ndùu tnúhu ndùu yuhu sá ní xáhaⁿ-gá xii nchaa cue téé-áⁿ —duha cächí espíritú-áⁿ.

⁸ Te sáta dúcáⁿ te ní tecú tucu dóho-í ní cáháⁿ tucu sá ní cáháⁿ andiu-áⁿ, te cächí-xi xii-í:

—Cuàháⁿ te queheⁿ-n libré líhli sá ní nàndicá nùndàha espíritú-áⁿ, espíritú sá nútn^ñ ñⁿ xio sáhá-xi núú ndute lámár, te ñⁿ xio sáhá-xi núú ñuhu yìchí —duha cächí sá ní cáháⁿ-áⁿ.

⁹ Te yúhú ní sáháⁿ-í núú ndécú espíritú-áⁿ xicáⁿ-í libré líhli nèhe-xi-áⁿ, te ní cächí-xi:

—Iha te caxi-n, te cuvídí yuhu-n dàtná cúvídí òré xíhí-n ndudí ñúñú, dico xití-n chí cada úa-xi —cächí-xi.

¹⁰ Te ní queheⁿ-í libré líhli nùndaha espíritú-áⁿ ní xexi-í, te yuhu-í ní quide vídí-xi dàtná vídí ndudí ñúñú, dico sáta ní ngava-xi xití-í te ní quide úa-xi.

¹¹ Te ní cächí tucu espíritú-áⁿ xii-í:

—Dacuití cáháⁿ tucu-n nàcuáa cächí Yá Ndiöxí cuèndá ñáyíu titní víhí nàcióⁿ, ndihí cuèndá ñáyíu titní víhí ñúú, ndihí cuèndá ñáyíu cáháⁿ ndí dííⁿ ndí dííⁿ núú tnúhu, ndihí cuèndá cue téé yíndaha ñáyíu.

11

Cuèndá úu cue cáháⁿ nàcuáa cächí Yá Ndiöxí

¹ Te ní níhí-í ñⁿ tnuyoo nàcuáa chicùhá-í ñⁿ sá chicùhá-í, te ní cáháⁿ ñⁿ sá ní cáháⁿ, te cächí-xi:

—Ndacuíñí te chicùhá-n vèhe Yá Ndiöxí, te chicùhá tucu-n núú sácódó sá ndúú táhú-gá, te cahu-n ná daha tnàhá ñáyíu chíñuhu ñaha xii-gá xíndecu.

² Dico vá chicùhá-n ndàa quehé vehe-gá, chí xíáⁿ ní nduu cuèndá cue ñáyíu ñá túú cùu ñáyíu isráél, te ñáyíu-áⁿ nduu nuu-ná-yu núú ní cuu ñuú-gá, te cadá-yu dàtná cächí iní méé-yu, te údico úú yóó ducaⁿ cadá-yu.

³ Te yúhú tendaha-í úú tnàhá cue téé cáháⁿ yuhu-í nàcuáa cächí Yá Ndiöxí, te úxúú cièndú únídico nduu ducaⁿ cáháⁿ-güedé yuhu-í cada-güedé núù-í, te cuihnu-güedé dóó tnúú sá sácuihnu cue ñáyíu ndihú iní-xi —duha cächí sá cáháⁿ-áⁿ.

⁴ Te ndí ndúú cue téé-áⁿ cúú-güedé dàtná úú yutnu òlívú sá xínutn^ñ núú Yá Ndiöxí, ndihí dàtná úú sá ndéé dité-xi, sá yíndòdo ñⁿ caa candíl núú dité-xi ndéu tucu núú-gá, te diu-gá cúú-gá Yáá yíndàha ñuyíú.

5 Te ñáyi na càni iní-xi ná cada ñaha xii-güedé te yuhu-güedé quene ñuhú cahmi ñaha-xi xii-yu, te ducaⁿ càda-güedé cahni-güedé nchaa ñáyi na cùu úhú iní ñáhá xii-güedé.

6 Te ndi ndüü-güedé ndécú ndihi-güedé tnúhu ndee iní cada-güedé sá vǎ cúuⁿ dǎú, te ducaⁿ càda-güedé nini cǎháⁿ-güedé nàcuáa cǎchí Yǎ Ndiǒxí, te ndacu-güedé nadatiu-güedé ndute nduu-xi níñí, te ndacu-güedé dandòho-güedé nchaa ñáyi titní núu tnúhu ndòho, te ducaⁿ càda-güedé ná daha xito cǎchí iní méé-güedé.

7 Te ná yáha sá cǎháⁿ-güedé nàcuáa ní cǎchí Yǎ Ndiǒxí, te dàvá-áⁿ quene ìⁿ quiti dééⁿ yàú cùnú víhí sǎ ïo nèhé cáá, te quiti-áⁿ ngüíta-di nàà-di ndihi ndi ndüü cue téé-áⁿ te cahni ñaha-di xii-güedé.

8 Te yiqui cuñú cue téé-áⁿ cautüu-xi ìⁿ tnuú ñuú cǎhnú ñuú ní sahani-güedé Xitohó Jesucristú núu cùrúxí, te ñuú Yaá-áⁿ cúu Xitohó-ó ndihi-güedé, te cǎchí ñáyi sá ñuú-áⁿ cúu-xí dàtná ñuú Sòdomá ndihi nàcióⁿ Ègíptú.

9 Te úní nduu dava cautüu yiqui cuñú-güedé xíáⁿ, te ñáyi nchaa nàcióⁿ, ndihi ñáyi nchaa ñuú, ndihi ñáyi cǎháⁿ ndí dǐíⁿ ndí dǐíⁿ núu tnúhu, ndihi ñáyi xǐndecu nchaa xichi quini-yu yiqui cuñú-güedé, te vǎ dáñǎ-yu nguíndüxi.

10 Te nchaa ñáyi-áⁿ nduu vétú iní-yu sá dúcáⁿ cùu cue téé cǎháⁿ nàcuáa cǎchí Yǎ Ndiǒxí-áⁿ, te ïo cudǐí iní-yu, te nándi sá cuáha táhu tnáhǎ-yu sá cudǐí iní-yu sá dúcáⁿ ní xíhí-güedé, te ducaⁿ chi ñuú-güedé ní quide ïo ní ndohó-yu.

11 Te sátá ná yǎhá úní nduu dava sá dúcáⁿ cùu-güedé te Yǎ Ndiǒxí dandòto ñaha-gǎ xii-güedé, te ndacóo-güedé, te nchaa ñáyi na quini sá ndótó-güedé te yùhú víhí-yu.

12 Te ndi ndüü cue téé-áⁿ tecú dóho-güedé cǎháⁿ ìⁿ sá cǎháⁿ ndéé andü, te cùñaha-xi xii-güedé:

—Chí táquene ìha —duha cùñaha sǎ cǎháⁿ-áⁿ xii-güedé.

Te cue téé-áⁿ quǐhu-güedé ìⁿ xití vícú caa-güedé andü, te nchaa ñáyi cùu úhú iní ñáhá xii-güedé quini ñáhǎ-yu xii-güedé caa-güedé andü.

13 Te òré-áⁿ níhi víhi tnáa ñuyíú, te úxí xichi cùu-xi ñuú núu cùndecu-güedé-áⁿ te ìⁿ xichi ñuú-áⁿ naa, te cuú úsá mǐl ñáyi, te nchaa dava-gǎ ñáyi cácu vǎ cùu yùhú víhí-yu, te cǎchí-yu sǎ ïo cǎhnu cuu Yǎ Ndiǒxí Yaá ndécú andü.

14 Te tnúndòho-a cuu-xi tnúndòho cuu úú yáha, te vitna sa ndètu víí-nǎ tucu sǎá tnúndòho cuu uní.

Espiritú cúu úsá tiú-xi cútú nēhé-xí

15 Te espíritu cúu úsá ní tiú-xi cútú nēhé-xí, te òré-áⁿ ní tecú níhi ní cǎháⁿ titní sǎ ní cǎháⁿ andü, te cǎchí-xi:

Nchaa sá cùu cuendá nchaa ñáyi ñuyíú táxi tnùni-yu ni cùu ní nduu cuendá

Tátá-ó Dütú Ndiǒxí táxi tnùni-gǎ,

Te tnáhá Yaá ní tendaha-gǎ ní sáháⁿ ñuyíú táxi tnùni-gǎ nchaa xíǎⁿ,

te ñuú-gǎ taxi tnùni-gǎ ni caa ni quíhíⁿ.

Duha ní cǎháⁿ nchaa sǎ ní cǎháⁿ-áⁿ.

16 Te ndi òcú cùmi cue téé sacuéhé xǐncúo núu xilé váha ní ngüíñí xití-güedé núu Yǎ Ndiǒxí, te ní nuu núu-güedé ndáa núu ñuhú te ní ngüíta-güedé chíñúhu ñaha-güedé xii-gǎ,

17 te cǎchí-güedé:

Ío ndàcáⁿ táhu-ndí núu yòhó Dütú Ndiǒxí,

Yaá ndácú quide nchaandi túhú sǎ váha,

te ðiu-ni-n ndècu-n ndéé cùtnàhà ní ngáva ñuyúú, te ðiu-ni-n ndècu-n vitna, te ðiu-ni-n cùndecu-n ndéé núú cuáháⁿ núú vèxi, te ío càhnu cuu-n te ní ngúíta-n Ìo-gá táxí tñuní-n.

¹⁸ Te nchaa ñáyiu xĩndecu ñuyúú xĩcudéẽⁿ-yu núú-n, te vitna ní sáá nduu dàndohóⁿ-yu chi ñá túú cùu váha iní-n núũ-yu, te cada ndáá-n cuèchi nchaa ñáyiu sa ní xíhí, te ní sáá tucu nduu cuáñaha-n sã ndúú tãhú nchaa ñáyiu ní xinu cuechi núú-n ní cáháⁿ-yu tñuhu-n, ndihi nchaa ðava-gá ñáyiu cùu cuendá-n, chi ñáyiu-áⁿ néhẽ-yu sá yíñùhu núú-n, te cuèi ñáyiu cùnunu ndihi ñáyiu ñá túú cùnunu cuáñaha-n sã ndúú tãhũ-yu, te ní sáá tucu nduu dànaa-n nchaa ñáyiu sãhni tñaha ñáyiu-xi. Duha càchí ndi òcò cúmí cue téé sacuéhé-ãⁿ xãhaⁿ-güedẽ xii Yá Ndiõxi.

¹⁹ Te ní xiní-í ní nacaáⁿ yuyèhe vehe Yá Ndiõxi andiu, te xiti vehe-gá-áⁿ ní xiní-í ndécú cajú ñúhú sã yódó tñuní nàcuáa ní cundáa cada-gá sá cúú-xi ñáyiu, te òré-áⁿ ní xiní-í ní sáá ndúté, te ní cáháⁿ ñúhu te ío dusaⁿ ní quide-xi, te níhi vihi ní tnáa, te súuní càhnu dáú ñíñí ní cuuⁿ.

12

Cuendá ñⁿ ñadihí ndihi cuendá ñⁿ quiti dééⁿ nání drágón

¹ Te ío vihi ní quide-xi ñⁿ sá ñⁿ quide-xi andiu, te ní xiní-í ñⁿ ñadihí te dóó níhnú-áⁿ quide-xi datná quidé-xí núú nchĩcanchii, te ndàa núú sãhá-aⁿ quide-xi datná quidé-xí núú yóó, te ñúhu ñⁿ coroná díquí-aⁿ te ndéé ùxúú chódíní.

² Te ñúhu déhe-aⁿ te càna saa-aⁿ sá quidé úhú ñáhá-xí xii-aⁿ chi sa ndètu vii-ná cacu déhe-aⁿ.

³ Te dàtñuní ní quide tucu-xi sá ñⁿ quide-xi andiu, te ní xiní-í ñⁿ quiti càhnu quiti ticuehé, quiti dééⁿ nání drágón, te ndéé úsá díquí-ði ndihi úxí ndiqui-ði, te ñⁿ caa coroná ñúhú ñⁿ caa díquí-ði-áⁿ.

⁴ Te quiti-áⁿ luha-ná te cuu ðava nchaa chódíní dãngòyo-ði ñuyúú ndihi lúhmá-ði, te quiti-áⁿ ñⁿ ngúnu tñí-ði núú ñaha ndètu vii-ná cacu déhe-xi-áⁿ cuendá caxi-ði déhe-aⁿ òré cacu ní cùu.

⁵ Te ñaha-áⁿ ñⁿ cacu déhe-aⁿ te téé cùu-dé, te té líhli-áⁿ Ìo cunuu-dẽ taxi tñuní-dé nchaa ñáyiu ñuyúú, te mee Yá Ndiõxi ní nacuaa ñaha-gá xii té líhli-áⁿ cuendá cundecu ndihi ñaha-dẽ xii-gá núú ndécú-gã táxí tñuní-gá.

⁶ Te ñadihí-áⁿ ní xinu-aⁿ cuáhá-aⁿ xiti yucu núú ñⁿ quide túha Yá Ndiõxi cundecu-aⁿ cuendá xiáⁿ níhí-aⁿ caxi-aⁿ, te ducaⁿ níhí-aⁿ sá caxí-áⁿ ùxúú cièndú únidico nduu chi ducaⁿ nduu cundecu-aⁿ xiáⁿ.

⁷ Te sátá dúcáⁿ te andiu ní xiní-í espíritú cùnunu xinu cuechi núú Yá Ndiõxi nání Miguél, ndihi nchaa ðava-gá espíritú cùndihí-xi, te nchaa espíritú-áⁿ nãá-xi ndihi quiti dééⁿ nání drágón ndihi nchaa espíritú cùndihí-ði.

⁸ Te quiti-áⁿ ñá túú ní ndàcu-ði ndihi nchaa espíritú cùndihí-ði, te ñá túú ní níhí-gã-ði núú cùndècu-ði andiu ndihi nchaa espíritú cùndihí-ði-áⁿ.

⁹ Te cue espíritú xínú cuèchi núú Yá Ndiõxi-áⁿ ní dãngává-xí quiti dééⁿ nání drágón-áⁿ ndihi nchaa espíritú cùndihí-ði ñuyúú, te quiti-áⁿ cúú-ði mèi sácuihná àdi sá càchí-ó cùu yucu ñávãha, te ðiu xiáⁿ ní dándàhú-xi ñáyiu níhí ñuyúú, te ðiu-ni xiáⁿ ní nduu-xi cóó ní dándàhú-xi ñáyiu ndéé sanaha.

¹⁰ Te ní tecú dóho-í níhi ní cáháⁿ tucu ñⁿ sá ñⁿ cáháⁿ andiu, te càchí-xi:

—Vitna te Yá Ndiöxí ní quide-gá ní ngúndecu ñáyiú ndihi-gá, te ío càhnu cuu-gá, te ío tàxi tnuní-gá, te tnàhá Cristú Yaá ní tendaha Yá Ndiöxí ní quixi ñuyíú-a ío tàxi tnuní-gá, te ducaⁿ chi sa ní xócuñí sáculhá sá sùúni núnúu sacáⁿ cuéchi núú Tàtá-ó Dütú Ndiöxí cuendá nchaa ñáyiú ndècu ndihi-o ichi-gá, te nduu niú ducaⁿ sàcáⁿ cuéchi-xi núú-gã cuendá-yu ni cùu.

11 Dico ní ndacú-yu ní cunúú-yu núú sáculhá sá dúcáⁿ sàcáⁿ cuéchi cuendá-yu-án ní cùu, te ducaⁿ ní cunúú-yu sá cuendá Yaá cáá dàtná cáá ñⁿ mbéé quiti ní dánicuèhé-güedé, chi Yaá-án ní sati níñí-gã te ní xihí-gá sá cuendá-yu, te ducaⁿ ní cunuu tucú-yu sá cuendá sá sàndáá iní ñáhã-yu xii Yaá-án, te ñã túú ní yùhú-yu cuú-yu sá cuendá-gá.

12 Te vitna ío chí cúdí ñni nchaa nchòhó espíritú xínú cuéchi núú Yá Ndiöxí, ndihi nchaa nchòhó ñáyiú ndècu andiu, dico ñndàhú ní cuu nchaa ñáyiú xíndecu nihí ñuyíú! Chí sùúni cudééⁿ sáculhá ní ngava-xi te nándi cada ñaha-xi xii-yu, te ducaⁿ chí cùnnumí iní-xi sá sàcú duha-ná nduu cudí-xi cundecu-xi —duha càchí sá ní cáháⁿ andiu.

13 Te sàtá ní quee quiti dééⁿ nání dragón-án andiu ní ngava-di ñuyíú quiti cùu meí sáculhá-án, te quiti-án ní chinchícúⁿ-di ñadhí ñaha ní cacu déhe téé-xi-án.

14 Te ñadhí-án ní nduu táhú-aⁿ ní quene úú ndíxi-aⁿ, te càa datná cáá ndíxiⁿ ñⁿ yacòlo cahnu vihi cuendá ndava-aⁿ núhú-aⁿ yucu núú ní cachí Yá Ndiöxí cundecu-aⁿ, te yàcáⁿ cundecu-aⁿ úní cuíá dava cuendá sá vã nihí ñáhã quiti dééⁿ quiti nání dragón-án te xíáⁿ nihí-aⁿ sá cáxi-án, te quiti-án cúú tucu-di datná ñⁿ cóó dééⁿ.

15 Te quiti-án ní quene cuéhé ndute yuhu-di, te ndute ní quene yuhu-di-án ní cuu-xi ñⁿ yúte, te ducaⁿ ní quide-di cuendá ndute-án cuido-xi ñadhí-án ní cùu.

16 Te ñuhu yichí ní chindee-xi ñadhí-án, chí ní ndátá te ní quee naa-ni ndute ní quene yuhu quiti-án.

17 Te sá dúcáⁿ ní quide-xi xíãⁿ ní cudééⁿ víhi quiti-án núú ñadhí-án, te ní xica-di cuáhã-di núú xíndecu nchaa dava-gá cue déhe ñadhí-án cuendá nàà ndihi ñaha-di, te ñáyiú-án cúú-yu ñáyiú tñi nchaa tnúhu càháⁿ Yá Ndiöxí, te nchícúⁿ nihnú-yu nchaa tnúhu sá càháⁿ vaha cuendá Xitohó Jesucristú.

13

Cuendá úú quiti

1 Te yúhú ní ngúnu tñi-í yuhu làmár, te ní xiní-í ní quene ñⁿ quiti te ndéé úsá díquí-di te úxi ndiqui-di, te núú ñⁿ ñⁿ ndiqui-di-án ndécú ñⁿ caa coroná. Te ñⁿ ñⁿ díquí-di-án ndéé tnúhu sá càháⁿ úhú-xi cuendá Yá Ndiöxí.

2 Te quiti-án cáá-dí dàtná cáá cuñí, te sáhã-dí càa datná cáá sáhã òso, te yuhu-di càa datná cáá yùhu ndicaha. Te quiti dééⁿ nání dragón ní sáñaha-di tnúhu ndee ñni xii quiti-án cuendá taxi tnùní víhí-dí, te dragón-án ní sáñaha-di núú ndécú-dí tàxi tnuní-di xii quiti ní quene xití làmár-án, te ducaⁿ ní quide-di cuendá sá nihí ndéé quiti-án cunuu-di.

3 Te ñⁿ díquí quiti ní quene xití làmár-án càhú víhi càa ní nícuèhé, te sa ndètu víí-nã cuú-di sànuu dico ní ndúha-di, te nihí ñuyíú ní nihí ñáyiú tnúhu sá dúcáⁿ ní cuu, te ío ní cuñúhu-yu te ní tuhá-yu quiti-án.

4 Te nchaa ñáyiú-án nǐ cachí-yu sá ïo càhnu cuu quiti dééⁿ quiti nàni dragón-án cuendá sá nǐ sáñaha-di tnúhu ndee ìní sá táxi tnùnǐ quiti ní quene xití làmár-án, te ní ngúita-yu ní chiñuhú-yu quiti ní quene xití làmár-án, te càchí-yu: –Vá yõo ìⁿ nǔtnahá ñáhá xìi quiti-a, te ní vǎ yõo ìⁿ ndacu nàá ndihi ñaha xii-di –cachí-yu.

5 Te ní níhí-di tnúhu ndee ìní sá càháⁿ úhú-di Yá Ndiõxí, te cada càhnu-di mee-di, te údico úú yóo ducaⁿ nǐ níhí-di tnúhu ndee ìní-án cunuú-di.

6 Te ducaⁿ nǐ quide-di ní càháⁿ úhú-di Yá Ndiõxí ndihi cuendá nchaa sá quidé-gǎ, te ñiu-nǐ ducaⁿ nǐ càháⁿ úhú-di núú ndécú-gǎ, te ní càháⁿ úhú tucu-di nchaa ñáyiú ndècu ndihi-gá andiu.

7 Te ducaⁿ nǐ níhí-di tnúhu ndee ìní sá nàá-di ndihi nchaa ñáyiú cùu cuendá Yá Ndiõxí, te ducaⁿ nàá ndihi ñaha-di xii-yu ndéé òré vǎ ndácú-gǎ-yu nàá ndihi ñáhá-yu xii-di, te tnàhá ní ngúndecu ndihi-di tnúhu ndee ìní sá táxi tnùnǐ-di ñáyiú nchaa nàcióⁿ, ndihi ñáyiú nchaa ñuú, ndihi nchaa ñáyiú càháⁿ ndí ñíⁿ ndí ñíⁿ nǔú tnúhu, ndihi ñáyiú xíndecu nchaa xichi.

8 Te cue ñáyiú níhí ñuyúú nǐ cachí-yu sá ïo càhnu cuu quiti-án, te ñáyiú-án cúú-yu ñáyiú ñá túú yòdo tnunǐ núú tùtú Yáá cáá dàtná cáá ìⁿ mbéé quiti ní dánicuehé-güedé Yáá ní xihí ní cùu te ní ndoto. Te ndéé cútnàhá ní ngáva ñuyúú sa yòdo tnunǐ ñáyiú naníhí tàhú, dico ñáyiú càchí sá ïo càhnu cuu quiti-án ñà túú yòdo tnunǐ-yu núú tùtú-gá.

9 Te nchaa nchòhó ñáyiú xíndedóho chí cündedóho váha nchaa nàcuáa cuáháⁿ tnúhu-án.

10 Te nchaa ñáyiú na chihí tnaha ñáyiú-xi vecaá te sáá nduu te quihíⁿ-yu tnàhá-yu vecaá, te nchaa ñáyiú sàhni tnaha ñáyiú-xi ndihi yuchí te ñiu-nǐ ndihi yuchí cuú-yu tnàhá-yu, te xíáⁿ nǔú ïo xini ñuhu-xi sá ncháá ñáyiú cùu cuendá Yá Ndiõxí cunduu càhnu ìní-yu, te quindáá ìní ñáhá-yu xii-gá.

11 Te ní xiní tucu-í ingá quiti ní quene-di núú ñuhu yichí, te ndéé úú ndiqui-di te càa datná cáá ndiqui canerú, te càháⁿ-di dàtná càháⁿ quiti dééⁿ nání dragón.

12 Te dàtná ndécú ndihi quiti ní quene xití làmár-án tnúhu ndee ìní sá táxi tnùnǐ-di ducaⁿ ndècu ndihi quiti ní quene ñuhu yichí-án tnúhu ndee ìní taxi tnùnǐ-di cada-di núú quiti ní quene xití làmár-án, te quiti ní quene ñuhu yichí-án nǐ quide yica-di sá ncháá ñáyiú xíndecu níhí ñuyúú chiñuhú-yu quiti ní quene xití làmár-án, quiti càhú víhí nǐ tnahá ní nícuèhé te ní ndúha-di.

13 Te quiti ní quene xití ñuhu yichí-án nǐ quide-di titní núú sǎ vǎ yõo tnàhí ndacu cada, te nchaa ñáyiú ní xiní-yu sá ndèé andiu nǐ dǎngóyó-dí ñuhú ñuyúú.

14 Te sá dúcáⁿ nǐ ngúndecu ndihi-di tnúhu ndee ìní ní quide-di nchaa xíáⁿ ní quide-di núú quiti ní quene xití làmár-án, te sá dúcáⁿ nǐ quide-di te xíáⁿ ní dándàhú-di nchaa ñáyiú xíndecu níhí ñuyúú, te ní xáhaⁿ-di xii-yu sá ndúcú-yu ìⁿ sá cádúha-yu nàcuáa-nǐ càa nacuáa-nǐ ndùu quiti ní quene xití làmár-án, quiti càhú víhí nǐ tnahá ní nícuèhé díquí-xi-án nǐ quée machití te ñá túú ní xihí-di chí ní xíndecu-nǐ-di.

15 Te quiti ní quene xití ñuhu yichí ní ngúndecu ndihi tucu-di tnúhu ndee ìní sá chíhí-dí ìní sá nǐ cadúha-yu-án, sá ní natavá-yu dàtná cáá quiti ní quene xití làmár-án, te ducaⁿ nǐ quide quiti-án cuendá càháⁿ sá ní cadúha-yu-án, te xíáⁿ cada-xi cuú nchaa ñáyiú ñá túú ní cuini chiñuhu ñaha xii-di.

16 Te quiti ní quene xití ñuhu-án quidé-dí sá ncháá ñáyiú ngúndéé ìⁿ tnunǐ ndaha cùhá-yu àdi tneé-yu, te ducaⁿ nǐ quide-di cuéi ñáyiú cunuú te cuéi ñáyiú

ñá túú cùnuu, te cuèi ñáyiú cuica te cuèi ñáyiú ndàhú, te cuèi ñáyiú ñá túú dàña quee núú chíúⁿ patróóⁿ-xi, te cuèi nchaa ñáyiú dàña queé núú chíúⁿ patróóⁿ-xi nchaa-yu ducaⁿ ní ngúndeé tñuní ñíí-yu.

17 Te ní quide-di sá ncháá ñáyiú ñá túú ndèe tñuní ñíí-xi vá cúú cuááⁿ-yu sá càhí iní-yu te ní vâ cúú dicó-yu ìⁿ sá cuiní-yu dicó-yu, te tñuní-áⁿ cúú-xí òú quiti ní quene xítí làmár-áⁿ àdi númerú-di.

18 Te xini ñuhu-xi sá ncháá ñáyiú ío váha cùtñuní iní-xi ío váha cuáha-yu cuendá nàcuáa quèe-xi númerú quiti-áⁿ, te númerú-áⁿ cúú-xí ìñú cièndú únídico ìñú, te cùu-xi cuendá ìⁿ ñáyiú ñuyíú.

14

Cuendá ìⁿ cièndú údico cúmí mǐl ñáyiú

1 Te sátá dúcáⁿ te ní xiní-í Yáá cáá dàtná cáá ìⁿ mbéé quiti ní dánícuehé-güedé nutñí-gá ìⁿ yucu ñúú nání Sión ndécú àndiú, te nutñí-gá ndihi ìⁿ cièndú údico cúmí mǐl ñáyiú, te tneé-yu ndèe òú-gá ndihi òú tátá-gá Dútú Ndiòxi.

2 Te ní tecú dóho-í ní quide-xi àndiú dàtná quidé-xí núú xicá cuèhé víhí ndúte, te quide tucu-xi datná quidé-xí òré níhi víhi caháⁿ ñuhu, te quide tucu-xi datná quidé-xí òré cuèhé víhí ñáyiú càní-yu àrpá.

3 Te ní tecú dóho-í xixita yuhu sá xítá yuhu núú Yáá núcòo núú xilè váha, ndihi núú ndi cúmí cue quiti xñutñí-áⁿ, ndihi núú nchaa cue tée cùu sacuéhé xñucóo-áⁿ, te xixita-xi ìⁿ ndudú sáá. Te mee-ni cuè ñáyiú ìⁿ cièndú údico cúmí mǐl-áⁿ quèe díquí-yu ndudú-áⁿ, te ñáyiú-áⁿ cúú-yu ñáyiú ní dácácu nihnu ñaha Yáá cáá dàtná cáá ìⁿ mbéé quiti ní dánícuehé-güedé núú ñáyiú ndècu ichi cuehé ichi duha xñdecu ñuyíú, te vá yòo ìⁿ-gá quèe díquí-xi ndudú sáá-áⁿ chi mee-ni ñáyiú ní cácu nihnu-áⁿ quèe díquí-yu.

4 Te ñáyiú ní cácu nihnu-áⁿ cúú-yu ñáyiú ñá túú ní xñdecu ichi díí ìní, te cùu-yu ñáyiú càndoo canine iní-xi, te ndèni ní cuu cuáháⁿ Yáá cáá dàtná cáá ìⁿ mbéé quiti ní nícuèhé-áⁿ, te ducaⁿ-ni ndèndaha ñàhá-yu xii-gá cuáháⁿ, te ñáyiú-áⁿ ní cácu nihnú-yu núú nchaa ñáyiú ñuyíú, ñáyiú ndècu ichi cuehé ichi duha, te ñáyiú ní cácu nihnu-áⁿ cúú-yu ñáyiú díhna nuu ní nduu táhú Yá Ndiòxi cuu cuendá-gá ndihi Yáá cáá dàtná cáá ìⁿ mbéé quiti ní dánícuehé-güedé.

5 Te cùu-yu ñáyiú ñá túú càháⁿ ní ìⁿ tñuhu ndehnde, te càndoo canine iní-yu ndécú-yu núú núcòo Yá Ndiòxi táxi tñuní-gá.

Cuendá úní cue espíritú xínú cuèchi núú Yá Ndiòxi

6 Te sátá dúcáⁿ te ní xiní-í ìⁿ espíritú xínú cuèchi núú Yá Ndiòxi xícó-xí cuàdava àndiú, te ndècu ndihi-xi tñuhu sá càháⁿ nàcuáa naníhí tàhú-ó, tñuhu sá ñá túú tñahí ndihi nihnu te tñuhu-áⁿ danèhé espíritú-aⁿ nchaa ñáyiú ndècu ñuyíú, ñáyiú nchaa nàcióⁿ, ndihi ñáyiú nchaa ñúú, ndihi nchaa ñáyiú càháⁿ ndí dííⁿ ndí dííⁿ núú tñuhu, ndihi ñáyiú xñdecu nchaa xichi.

7 Te níhi ní càháⁿ-xi te càhí-xi:

—Nchaa nchòhò ñáyiú ndècu ñuyíú canehè-ndo sá yíñuhu núú Yá Ndiòxi, te cachí-ndó sá ío càhnu cuu-gá chi sa ní sáá nduu càda ndáá-gá nchaa cuèchi-ndo, te chiñuhu-ndo-gá chi òú-gá ní cadúha-gá àndiú, ndihi ñuhu yìchí, ndihi làmár, ndihi nchaa ndóhyo —duha càhí espíritú-áⁿ.

8 Te nchicúⁿ tucu ingá espíritú xínú cuèchi núú Yá Ndiòxi, te càhí-xi:

—Vitna ní naa ñuú Babiloniá ñuú ío cùnuu, te ducaⁿ ní naa chi cue ñáyiú ñuú-áⁿ ní quidé-yu ní xíta nihnu nchaa ñáyiú nihíi ñuyíú, chi ní sanu ichi ñàhá-yu ichi cuèhé ichi duha —duha càchi espíritú-áⁿ.

⁹ Te nchicúⁿ tucu ingá espíritú xínú cuèchi núú Yá Ndiöxí te níhi càháⁿ-xi, te càchí-xi:

—Nchaa ñáyiú chiñuhu ñaha xii quiti ní quene xití làmár, ndihi sá ní natava ñàhá-yu nàcuáa càa-di-áⁿ, ñáyiú ní dáñá mée-xi ní ngúndeé tñuní ndahá-yu àdi tneé-yu,

¹⁰ ñáyiú-áⁿ súúni dàndoho ñaha Yá Ndiöxí xii-yu chi ío cùdeéⁿ-gá, te ducaⁿ ío dandòho ñaha-gá xii-yu chi daquihíⁿ ñàhá-gá xii-yu núú ñùhú núú ñùhú àzufré càyú-xi, te núú cuè espíritú xínú cuèchi núú-gá ducaⁿ dàndoho ñaha-gá xii-yu, ndihi núú Yáa cáa dàtná cáa ìⁿ mbéé quiti ní dánicuehé-güedé.

¹¹ Te ni caa ni quihíⁿ quene ñùhmá núú dúcáⁿ cùndecú-yu ndohó-yu-áⁿ, te cuéi nduu cuéi níu ducaⁿ ndohó-yu. Te ducaⁿ ndòho nchaa ñáyiú chiñuhu ñaha xii quiti ní quene xití làmár, ndihi sá ní natava ñàhá-yu nàcuáa càa-di-áⁿ, te ñiu-ni ñáyiú-áⁿ cúu-yu ñáyiú ní ngúndeé tñuní ndaha-xi àdi tneé-xi —duha càchí espíritú-áⁿ.

¹² Te xiáⁿ xini ñùhu-xi sá ncháá ñáyiú cùu cuendá Yá Ndiöxí cunduu càhnu iní-yu, chi ñiu-ni-yu cùu-yu ñáyiú tñi nchaa tñuhu càháⁿ-gá, te ni yùhu ní iní-yu sàndáá iní-yu Xitohó Jesucristú.

¹³ Te sáta dúcáⁿ te ní tecu dóho-í ní cáháⁿ ìⁿ sá ní cáháⁿ andiu, te càchí-xi:

—Chido tñuní-n ìⁿ núú tütú nàcuáa na càháⁿ-í-a. “Není vitna ío váha táhú nchaa ñáyiú sàndáá iní tñuhu Xitohó Jesucristú te xihí-yu” —duha càchí sá ní cáháⁿ-áⁿ.

Te Espíritú Yá Ndiöxí ní cáháⁿ-xi, te càchí-xi:

—Ndáá, chi ndetatú-yu chi ñá túú-gá nágá chiúⁿ ndohó-yu cadá-yu, te Yá Ndiöxí sa ñaha-gá nchaa nàcuáa ndùu chiúⁿ ní quidé-yu —duha càchí Espíritú-gá.

Nchaa sá cúu núú ñùhú

¹⁴ Te sáta dúcáⁿ te dàtñuní ní xini-í ìⁿ vícò cuixíⁿ, te núú vícò-áⁿ ní xini-í núcõ ìⁿ Yaá, te càa-gá dàtná cáa ìⁿ téé ñuyíú, te díquí-gá ñùhú ìⁿ coroná ní cuáha mee-ni dñhúⁿ cuááⁿ, te nùndaha-gá ìⁿ yuchí ndíquí te súúni dééⁿ.

¹⁵ Te ní xini-í ìⁿ espíritú xínú cuèchi núú Yá Ndiöxí ní quee-xi xití vehe-gá, te níhi ní cáháⁿ-xi xàhaⁿ-xi xii Yaá núcõ núú vícò-áⁿ:

—Sa ní cuu ñaquehndé-n ncháa sá ní cuu ñuyíú ndihi yuchí ndíquí-n, chi sa ní cuu nucóo tñaha-xi —duha càchí espíritú-áⁿ xàhaⁿ-xi xii Yaá-áⁿ.

¹⁶ Te Yaá núcõ núú vícò-áⁿ ní dáyàha ndodo-gá yuchí ndíquí-gá núú ñuyíú ní nataxi tñaha-gá nchaa sá ní cuu.

¹⁷ Te ní xini tucu-í ingá espíritú xínú cuèchi núú Yá Ndiöxí ní quee-xi xití vehe-gá sá cáa àndiu, te nùndaha-xi tñahá-xi ìⁿ yuchí ndíquí dééⁿ.

¹⁸ Te ní xini tucu-í ní quee tucu ingá espíritú xínú cuèchi núú Yá Ndiöxí núú nùtñi núú sácõdó sá ndúú táhú-gá, te ndècu ndihi-xi tñuhu ndee iní táxi tñuní-xi ñuhú, te espíritú-áⁿ níhi ní cáháⁿ-xi xàhaⁿ-xi xii espíritú néhé yuchí ndíquí dééⁿ-áⁿ:

—Ngúíta ñaquehndé-n ndihi yuchí ndíquí-n ndéhé yoho yàha stilé sá ío ñuyíú chi sa ní cuu ñatehndé —duha càchí espíritú-áⁿ xàhaⁿ-xi xii espíritú néhé yuchí ndíquí-áⁿ.

19 Te espíritú néné yùchí ndíquí-áⁿ ní dáyàha ndodo-xi yuchí ndíquí-xí núú ñùyúú ní nàquehdé-xi nchaa ndéhé yoho yàha stilé, te ní chihi-xi ìⁿ xichi núú ní chihi-xi cuèndá xiáⁿ quihni-xi quee ndudí-xi, te sá dúcáⁿ ní quide-xi xiáⁿ cútnùni iní-ó sá ìo cùdéeⁿ Yá Ndiòxí núú ñáyiú ñuyúú.

20 Te ndéhé yoho yàha stilé-áⁿ ní quihni-xi ìⁿ xio yuhu ñùú, te ndudí ndéhé yoho yàha stilé-áⁿ ní nduu-xi ñíí te ní quee-xi núú quíhni ñìhnu espíritú-áⁿ. Te úni cièndú mìl mètrú ní xica ñíí-áⁿ, te dàtná ìⁿ mètrú dava ní sáá cuehnu ñíí-áⁿ ní xica-xi.

15

Úsá tnúndòho

1 Te ìo vìhi ní quide-xi ìⁿ sá ní quide-xi andiú te ní cuñúhu vìhi-í, te ní xiní-í úsá tnàhá espíritú xínú cuèchi núú Yá Ndiòxí, te ìⁿ ìⁿ cue espíritú-áⁿ ndécú ndìhi-xi tnúhu ndee ìní dandòho-xi ñáyiú ñuyúú, te nà yàha nchaa tnúndòho-áⁿ, te vá cùdéeⁿ-gá Yá Ndiòxí núú-yu dandòho ñaha-gá xií-yu.

2 Te ní xiní-í ìⁿ làmár te ndute làmár-áⁿ cáá dàtná cáá vìdriú, te dàcánuu-xi ndìhi ñuhú, te yuhu làmár-áⁿ xìnutnìi nchaa ñáyiú ní ndacu ní dáqueé tìhú ñáhá xìl quiti ní quene xití làmár-áⁿ, te ducaⁿ ní ndacú-yu ní dáqueé tìhú-yu sá ní natava ñáhá-yu nàcuáa càa-di-áⁿ, te ducaⁿ ní ndacu tucú-yu ní dáqueé tìhú tucú-yu númerú-di sá cúú dàtná dèu-di, te nchaa ñáyiú-áⁿ ní nduu táhú-yu núú Yá Ndiòxí àrpá xìnehé-yu cuèndá caní-yu.

3 Te xìxítá-yu ndudú sá ní xita ndí Moisés ndí ní xinu cuechi núú Yá Ndiòxí ndéé sanaha, te xita tucú-yu ndudú Yá cáá dàtná cáá ìⁿ mbéé quiti ní dánícuèhé-güedé, te càchí-yu:

Yòhó Dútú Ndiòxí ìo càhnu cuu-n, chi quide-n nchaa sá vâ yòo tnàhí ndàcu cada,

te cùu-n Yáá ndácú quide nchaandi tùhú sá vâha,

te ìo ndáá quidé-n te ìo ndáá càháⁿ-n, te yìndaha-n nchaa ñáyiú ñìhì ñuyúú.

4 Te nchaa ñáyiú nèhé-yu sá yíñùhu núú-n,

te nchaá-yu càchí-yu sá ìo càhnu cuu-n,

chi ìⁿ dìi dìi-ni yòhó cúú-n Yáá ìo váha quide ndáá,

te nchaa ñáyiú ñìhì ñuyúú nataká-yu chiñuhu ñáhá-yu xii-n,

te ducaⁿ càdà-yu chi ndéhé-yu nchaa sá vâha quide-n.

Duha càchí ñáyiú-áⁿ xìxítá-yu.

5 Te sáta dúcáⁿ te ní xiní-í ní nacaáⁿ yuyèhe vehe Yá Ndiòxí andiú, te xití vehe-gá-áⁿ ndécú sá ndéé tnúhu-gá.

6 Te xití vehe-gá-áⁿ ní quee úsá tnàhá espíritú xínú cuèchi núú-gá, te ìⁿ ìⁿ-xi ndècu ndìhi-xi tnúhu ndee ìní dandòho-xi ñáyiú, te xìxìhnu-xi mee-ni dóó vâha, te súúni vâha càndoo, te chàhnchí, te yìdúcúⁿ nuu cìrchú ní cuáha mee-ni dìhúⁿ cuááⁿ pèchú ndi úsá cue espíritú-áⁿ.

7 Te ìⁿ quiti cúmi xìnutnìi núú nùtnìi xilé váha ní sáñaha-di ìⁿ caa sá nahá tícúú ní cuáha mee-ni dìhúⁿ cuááⁿ xii ìⁿ ìⁿ espíritú-áⁿ, te xití nchaa tícúú-áⁿ ñuhú ìⁿ sá ñuhú te xiáⁿ cútnùni sá Yá Ndiòxí dandòho-gá ñáyiú ñuyúú, te diu-gá cúú-gá Yáá ndécú nchaa nduu nchaa quíú.

⁸ Te xití vehe-gá-án ní chítú ñũhmá, te ducaⁿ ní quide-gá cuendá cutnùnì iní ñáiyu sá Ìo càhnu cuu-gá táxì tñùnì-gá, te vá yõ ìⁿ cuu quíhu xití vehe-gá-án ndéé ndìhi ndì usá tñúndòho cada ndì usá cue espíritú-án ñuyú.

16

Tnúndòho cada-xi ñuyú

¹ Te sátá dúcáⁿ te ní tecú dóho-í níhi ní cáháⁿ ìⁿ sá ní cáháⁿ xití vehe Yá Ndiòxí, te xáhaⁿ-xi xì ndì usá cue espíritú-án:

—Chí cuàháⁿ coyo-ndo sá ñúhú xití nchaa tícùù néhé-ndó-án núù ñuyú, chí sá ñúhú-án cúú-xì tñúndòho tendaha Yá Ndiòxí sá cúú-xì nchaa ñáiyu ñuyú —duha càchí sá càháⁿ-án.

² Te espíritú díhna ní sáháⁿ-xi ní coyo-xi sá ñúhú xití tícùù néhé-xí-án ñuyú, te nchaa ñáiyu ñuhu tñunì quiti ní quene xití làmár ñáiyu ní chiñuhu sá ní natava ñàhá-yu xii-di, nchaa ñáiyu-án ní quené-yu ndìhyi tèhyú te súúnì dándòho ñaha-xi xii-yu.

³ Te espíritú cúú ùù ní coyo-xi sá ñúhú xití tícùù néhé-xí núù làmár, te ndute làmár-án ní nduu-xi ñíí te càa-xi datná cáá ñíí ñáiyu sa ní xíhí, te nchaa quiti ñuhu xití làmár-án ní xíhí-güedi.

⁴ Te espíritú cúú ùnì ní coyo-xi sá ñúhú xití tícùù néhé-xí nchaa yúte ndìhi nchaa núù quenìhni ndute, te ndute nchaa yúte-án ndìhi nchaa ndute quenìhni-án ní nduu-xi ñíí.

⁵ Te sátá dúcáⁿ te ní tecú dóho-í ní cáháⁿ ìⁿ espíritú xínú cuèchi núú Yá Ndiòxí, espíritú yíndàha ndute, te xáhaⁿ-xi xì Yá Ndiòxí:

—Yòhó Dútú Ndiòxí cúú-n Yáá quidé ndáá cuiti núu duha quide-n tendaha-n tñúndòho-a, te diu-ni-n cùu-n Yáá ndécú ndéé cùtnàhá ní ngáva ñuyú, te diu-ni-n cùu-n Yáá ndécú vitna te ñá túú tñàhí cuèchi-n.

⁶ Chí cue ñáiyu ñuyú ní dácácá-yu ñíí nchaa ñáiyu ní cáháⁿ tñuhu-n ndìhi nchaa dava-gá ñáiyu cùu cuendá-n, te ní sahní-yu nchaa ñáiyu-án, te vitna ní dátíú-n ndute ní nduu-xi ñíí te ducaⁿ-ni càa ndute-án xíhí-yu, te ducaⁿ tàù-xi ndohó-yu cuendá sá ní sahní-yu cue ñáiyu cùu cuendá-n —duha càchí espíritú-án xáhaⁿ-xi xii-gá.

⁷ Te ní tecú tucu dóho-í ní cáháⁿ ìⁿ sá ní cáháⁿ núú nútníí núú sácódó sá ndúú tãhú Yá Ndiòxí, te xáhaⁿ-xi xii-gá:

—Ndáá sá yòhó Dútú Ndiòxí Yáá ndácú quide nchaandi túhú sá vãha dándòho-n ñáiyu nàcuáa tàù-xi cunduu —duha càchí sá càháⁿ-án xáhaⁿ-xi xii-gá.

⁸ Te espíritú cúú cùmì ní coyo-xi sá ñúhú xití tícùù néhé-xí núù nchìcanchii cuendá nchìcanchii-án cahmì-xi nchaa ñáiyu ñuyú.

⁹ Te ncháá-yu ní ndoho vîhí-yu ní cáyú-yu, te cuèi ducaⁿ ní ndohó-yu dico ñá túú ní cùnní-yu ndixi cuèchi iní-yu cuendá nchaa sá ñà túú vãha quidé-yu, te ní ñà túú ní càchí-yu sá Ìo càhnu cuu Yá Ndiòxí chí da ní cáháⁿ úhú-yu cuendá-gá, te diu-gá cúú-gá Yáá ducaⁿ ní tendaha tñúndòho-án sá cúú-xí-yu.

¹⁰ Te espíritú cúú ùhúⁿ ní coyo-xi sá ñúhú xití tícùù néhé-xí núù ndécú quiti ní quene xití làmár-án táxì tñùnì-di, te nchaa núú táxì tñùnì-di ní cuu nee, te nchaa ñáiyu ñuyú ndéé yàá-ná-yu nàcaxi nihnú-yu sá ndòhò-yu.

11 Dico ni dùcaⁿ ñá túú ní cuíní-yu dàñá-yu ni ñⁿ sá cuèhé sá dúhá quidé-yu, chi da ní cáháⁿ úhú-yu cuèndá Yá Ndióxi Yaá ndécú àndiu sá cuèndá sá dándòho ñaha ndíhyi tèhyú ndéè-yu-áⁿ ndihi nchaa dava-gá sá yáha-yu.

12 Te espíritú cúú iñú ní coyo-xi sá ñúhú xítí tícúú néhé-xí xítí yúte càhnu nani Eúfratés, te ndute yúte-áⁿ ñí yíchí cuèndá yáha cue téé yìndaha ñáyiu xìndecu ndàa xio nacuaá quène nchìcanchii.

13 Te ní xiní-í ní quee ñⁿ espíritú cúndìhi yucu ñávàha yuhu quiti dééⁿ nání dràgón, te ní xiní tucu-í ní quee tucu ingá espíritú cúndìhi yucu ñávàha yuhu quiti ní quee xítí làmár, te ní xiní tucu-í ní quee tucu ingá espíritú cúndìhi yucu ñávàha yuhu téé dándahú ñáyiu càchí sá càháⁿ tnúhu Yá Ndióxi te ñá ndáa, te ndi nùní espíritú-áⁿ xìndáa-xi dàtná cáá làhvá.

14 Te ndi nùní espíritú-áⁿ quidé-xí sá vǎ yǎo tnàhi ndàcu cada, te xica datacá-xi nchaa cue téé yìndaha ñaha xii ñáyiu xìndecu nihií ñuyíú cuèndá nàa-güedé mei ndùu cachí Yá Ndióxi coo tnúndòho cahnu vihi-gá, te ñiu mee Yá Ndióxi cúú-gǎ Yaá ío càhnu cuu.

15 Te Yaá cúú Xìtohó-ó ñí cachí-gá: “Cunaha-ndo chi nduu ñà túú yìhi iní-ndó quixi-í núú ndécú-ndó, te cada-í dàtná quidé ñàdúhú. Te váha táhú nchaa nchòhó ñáyiu xìndecu túha, chi cùu-ndo datná cue ñáyiu xìndecu túha xixìhnu-ni dóó-xi cuèndá sá vǎ cúcàhaⁿ núú-yu dàtná cúcàhaⁿ núú cuè ñáyiu ñá túú nihnu dóó-xi, te duha càháⁿ-í cuèndá sá nchòhó cundecu túha-ndo órè quexìo-í”, duha càchí-gá.

16 Te ndi nùní cue espíritú cúndìhi yucu ñávàha-áⁿ ñí dátàcá-xi nchaa cue téé yìndaha ñaha xii ñáyiu, te ní taxi ndecu ñaha-xi ñⁿ xichi núú nání Àrmagedón, duha nani xiáⁿ tnúhu hèbreú.

17 Te espíritú cúú ùsá ní coyo-xi sá ñúhú xítí tícúú néhé-xí núú tàchí, te ní tecú dóho-í níhi ní cáháⁿ Yaá núcòo núú xilé váha xítí vehe-gá, te càchí-gá:

—Xéhé-nǎ cúmǎní te xínu cava nchaa tnúndòho tnúhu ndàhú —duha càchí-gá.

18 Te sátá dúcáⁿ te ní sáá nduté te ní cáháⁿ ñúhu, te súúni dùsaⁿ ní quide-xi, te níhi vihi ní tnáa ñuyíú, te ndéé cùtnàhá ní ngúndecu ñáyiu ñuyíú te vátá ñⁿ xito-gá níhi tnáa dàtná ní quide-xi.

19 Te ñuú càhnú ío cùnuu nani Babiloniá ní quée dava-xi ní cuu-xi úní xichi, te nchaa ñuú cáá nihií ñuyíú ñí ngoyo nchaa vehe, chi Yá Ndióxi ní ndacu iní-gá nchaa sá cuèhé sá dúhá quide nchaa ñáyiu ñuú Babiloniá-áⁿ, te ducaⁿ ní quide ñaha-gá xii-yu chi ío cudééⁿ-gǎ núú-yu.

20 Te nchaa tìndúú ñí ndóñúhú-xí cuèi nchaa tìndúú ñuhu yíchí ndécú xítí làmár.

21 Te ní xiní-í ní cuuⁿ ñíñi nàhnu vihi ní ngaundodo-xi cue ñáyiu ñuyíú, te nchaa ñíñi-áⁿ vèe-xi dàtná údico kílu, te cue ñáyiu ñuyíú ñí cáháⁿ úhú-yu cuèndá Yá Ndióxi sá dúcáⁿ ñí dácúúⁿ-gǎ ñíñi nàhnu vihi-áⁿ, chi ní cuu-xi ñⁿ tnúndòho cahnu vihi sá cúú-xí-yu.

17

Ñadìhi ndécú ichi dǎi iní

1 Te núú ùsá espíritú néhé tícúú-áⁿ, te ñⁿ-xi ní quixi-xi núú ndécú-í, te càchí-xi xii-í:

—Néhe ná quíhíⁿ-ó dànehé ñàhá-í xii-n nchàa tnúndòho sá ndóhó ñàdihí ñaha ndècu ichi díí ìní, te ñaha-án cúnùu-aⁿ nucóo-aⁿ núú ñúhú vìhi ndute.

² Te ñaha-án ndécú díí ìní-aⁿ ndihí nchaa cue téé yíndaha ñaha xii ñáyiu xíndecu nihí ñuyíú, te nchaa dava-gá ñáyiu ñuyíú ló ìní-yu nchícúⁿ nihnú-yu quidé-yu nchaa nàcuáa quide ñaha-án —duha càchí espíritú-án.

³ Te òré ducaⁿ quide ñaha Espíritú Yá Ndiòxí xii-í nàcuáa càchí ìní-xi, te ìⁿ espíritú xínú cuèchi núú-gã ndécá ñaha-xi xii-í cuáháⁿ ìⁿ xití yucu, te xití yucu-án ní xini-í ìⁿ ñadihí yódó-án ìⁿ quití ticuehé, te ndéé úsá díquí-di te úxí ndiqui-di, te nihí-di ndéé tnuní-di mee-ni tnúhu sá càháⁿ ùhú cuendá Yá Ndiòxí.

⁴ Te ñadihí-án níhnú-án dóó muràdú ndihí dóó tícuèhé, te mee-ni sá ní cuáha díhúⁿ cuááⁿ, ndihí yúú vâha sá nání pèrlá, ndihí nchaa dava-gá núú yúú vâha, mee-ni nchàa xíãⁿ ní cuáha sá yíhí lóho-aⁿ, ndihí sá ñúhú dúcúⁿ-aⁿ, ndihí sá ñúhú dúcúⁿ ndáhá-án, te nùndaha-aⁿ ìⁿ tícuú ní cuáha mee-ni díhúⁿ cuááⁿ te ñuhu mee-ni sá cuèhé sá dúhá, te xíãⁿ cútnùní ìní-ó sá cúú-án ìⁿ ñadihí ñaha ndècu ichi cuèhé ichi duha.

⁵ Te tneé-aⁿ ndéé tnuní ìⁿ tnúhu, te càchí-xi: “Ñúú Babiloniá ñúú ío cùnùu, cada ìní-ndó sá cúú-xí mèi ñadihí-a, te ðiu ñadihí-a cùu-aⁿ ñaha sanu ichi ñaha xii nchaa ñáyiu díhí ñáyiu ndècu ichi díí ìní, te nándi-gá nchaa sá cuèhé sá dúhá sànu ichi-aⁿ nchaa ñáyiu cada-yu”, duha càháⁿ tnúhu ndéé tnuní tneé ñadihí-án. Te vá yó tòcú tnuní ná cuendá ducaⁿ càháⁿ tnúhu-án.

⁶ Te ní cutnùní ìní-í sá díú ñaha-án ní dácácá-án níñí ñáyiu cùu cuendá Yá Ndiòxí ní sahní ñaha-aⁿ xii-yu, te ñáyiu ní xihí-án cúú-yu ñáyiu ní càháⁿ vâha cuendá Xitohó Jesucristú, te sá dúcáⁿ ní quide-aⁿ te ní nduu-aⁿ dàtná ìⁿ ñáyiu quíhu. Te ío ní cuñúhu-í sá dúcáⁿ ní cuu ní xini-í.

⁷ Te sá tá dúcáⁿ te espíritú xínú cuèchi núú Yá Ndiòxí-án càchí tucu-xi xii-í:

—Vá ndéé dúcáⁿ cùñúhu-n, chi vitna na càchí tnúhu-í xii-n nàcuáa quèe-xi cuendá quití ndéé úsá díquí-xi ndihí úxí ndiqui-xi-án, ndihí nàcuáa quèe-xi cuendá ñadihí ñaha yòdo ñaha xii-di-án.

⁸ Te quití ní xini-n-ãⁿ cúú-dí ìⁿ quití sa ní xíndecu te vitna ñá túú-gã-di ndècu, te sáá nduu te quene-di yaú cùnú vìhí sã ío nèhé cáá, te dàtnùní sáá nduu te quíhíⁿ-di núú ùhú núú ndàhú ní caa ní quíhíⁿ, te cue ñáyiu xíndecu ñuyíú cuñúhu vìhí-yu quití-án chi cùu-di ìⁿ quití sa ní xíndecu ní cùu te sáá nduu cùndecu tucu-di, te ñáyiu ducaⁿ cùñúhu ñaha xii-di-án ñá túú yòdo tnuní-yu núú tütú núú yódó tnuní cue ñáyiu naníhí tàhú, chi ndéé cútnàhá vátá ngãva-gá ñuyíú ducaⁿ sa yòdo tnuní cue ñáyiu naníhí tàhú.

⁹ Te nchaa ñáyiu tècú tnuní xini ñuhu-xi cani vâha ìní-yu cuendá tnúhu-a. Te ndi úsá díquí quití-án cada ìní-ó sá cúú-xí úsá tìndúú núú núcóo ñadihí-án.

¹⁰ Te ndi úsá díquí quití-án cada ìní-ó sá cúú-xí úsá tnàhá cue téé yíndaha ñaha xii ñáyiu, te ùhúⁿ cue téé-án ñá túú-gã cùnùu-güedé vitna, te ìⁿ téé-án cùnùu-dé vitna te ingá-dé vátá sáá-gã nduu cùnùu-dé, te na sáá nduu dùcaⁿ cunuu-dé te sacúⁿ ní nduu cunuu-dé.

¹¹ Te quití ní xíndecu ní cùu te ñá túú-gã-di ndècu vitna, cùu-di datná téé cùu uná yíndaha ñaha xii ñáyiu, te ìⁿ-ni cùu-di ndihí cue téé úsá yíndaha ñáyiu-án, te quití-án sáá nduu cuíta nihnu-di quíhíⁿ-di núú ùhú núú ndàhú ní caa ní quíhíⁿ.

¹² Te ndi úxí ndiqui quití-án cada ìní-n sá cúú-xí úxí tnàhá cue téé quíndaha ñaha xii ñáyiu, dico vátá sáá-gã nduu cùnùu-güedé quíndaha ñaha-güedé

xii-yu. Te cue téé-áⁿ níhí-güedé tnúhu ndee ìní taxi tnùnì-güedé ndihì quiti-áⁿ, dico tnaa-ni taxi tnùnì-güedé ndihì quiti-áⁿ.

¹³ Te ndi ùxí cue téé-áⁿ cuu ìⁿnuu-güedé taxi tnùnì-güedé, te chindee-güedé quiti-áⁿ cuendá cuu ìⁿnuu-güedé ndihì-di cuendá taxi tnùnì-gá-di.

¹⁴ Te cue téé-áⁿ nàà-güedé ndihì Yaá cáá dàtná cáá ìⁿ mbéé quiti ní dánìcuèhé-güedé dico vá ndácú-güedé nàà-güedé ndihì-gá chi cuíta-güedé. Te ñu-gá cúú-gá Yaá ío cùnuu taxi tnunì cuèi nchaa téé yìndaha ñaha xii ñáyiù, te ducaⁿ-ni tàxi tnunì-gá cuèi nchaa dava-gá-yu. Te mee Yá Ndiòxí ní cachí-gá nándi cùu nchaa ñáyiù cundecu ndihì Yaá cáá dàtná cáá ìⁿ mbéé quiti ní dánìcuèhé-güedé-áⁿ, te ñu-ni ñáyiù-áⁿ cúú-yu ñáyiù ní cáháⁿ-gá te cùú-yu ñáyiù quide ndáá ndécú ìchi-gá —duha càchí espíritú xínú cuèchi núú-gá.

¹⁵ Te ní cachí tucu espíritú-áⁿ xii-í:

—Ndute ñùhu núú núcõo ñadhì ñaha ndècu ìchi díí ìní-áⁿ, ndute-áⁿ cada ìní-n sá cúú-xí ñáyiù nchaa nàcióⁿ, ndihì ñáyiù nchaa ñuú, ndihì ñáyiù xìndecu nchaa xichi, ndihì ñáyiù càháⁿ ndí dííⁿ ndí dííⁿ núú tnúhu.

¹⁶ Te dàtná ní cachí-í sá ndí uxí ndiqui quiti ní xiní-n-áⁿ cúú-xí ùxí tnàhá cue téé quìndaha ñaha xii ñáyiù, te cue téé-áⁿ cuu úhú ìní-güedé ñadhì ñaha ndècu ìchi díí ìní-áⁿ, te ni vâ cadá cuendá ñáhá-gá-güedé xii-aⁿ, te ndada ndàhú ñáhá-güedé, te dacàchi ñaha-güedé xii-aⁿ, te cahmí ñaha-güedé.

¹⁷ Te mee Yá Ndiòxí ducaⁿ dàcaháⁿ-gá ìní cue téé-áⁿ cuendá cada-güedé nàcuáa cùnì méé-gá, te xíáⁿ núu cuu ìⁿnuu-güedé cuendá cúñaha-güedé xii quiti-áⁿ cada-di núú-güedé taxi tnùnì-di, te ducaⁿ-ni càda-di núú-güedé taxi tnùnì-di ndéé ná sàá nduu càda Yá Ndiòxí nàcuáa ní cachí-gá.

¹⁸ Te ñadhì ñaha ní xiní-n-áⁿ cada ìní-n sá cúú-áⁿ ñuú càhnú ñuú ío cùnuu, te ñuú-áⁿ ndécú tèe ío-gá cùnuu taxi tnunì nchaa cue téé yìndaha ñaha xii ñáyiù xìndecu ñuyú —duha ní cachí espíritú xínú cuèchi núú Yá Ndiòxí xii-í.

18

Ní naa ñuú Babiloniá

¹ Te ducaⁿ te dàtnunì ní xiní tucu-í ingá espíritú xínú cuèchi núú Yá Ndiòxí, te ndéé andiù nì dátãsaⁿ-xi te ní dáyéhé-xi ñuyú, te espíritú-áⁿ ío cùnuu-xi.

² Te níhì ní cáháⁿ-xi, te càchí-xi:

—Ní sáá nduu nàa ñuú càhnú ñuú cùnùu nani Babiloniá, te xíáⁿ-nã nataká nchaa núú espíritú cùndihì yucu ñávãha cundecu-xi, te vá queé-gá-xi xíáⁿ, te ñu-ni xíáⁿ nataká nchaa quiti ndàva núú tàchì nchaa quiti ndehe quide, quiti ñá túú tnàhá ìní ñáyiù te xíáⁿ-nã cundecu-güedí.

³ Te ducaⁿ chí ñáyiù ñuú-áⁿ sánú ìchí-yu nchaa ñáyiù ñihì ñuyú ìchi cuèhé ìchi duha, te ducaⁿ-ni xìnhicúⁿ nihnu nchaa ñáyiù ñuyú xìquidé-yu, te nchaa cue téé cùnuu yìndaha ñaha xii ñáyiù, cue téé-áⁿ cúú ìⁿnuu-güedé ndihì nchaa ñáyiù ñuú-áⁿ quidé-güedé ndihì-yu nándi sá cuèhé sá dúhá. Te nchaa ñáyiù dico nándi sá dícò queheⁿ ñáyiù ñuú-áⁿ ío cùu cuicá-yu, te ducaⁿ queheⁿ nchaa ñáyiù ñuú Babiloniá-áⁿ nchaa sá dícò ñáyiù-áⁿ cuendá xíáⁿ cãnehé-yu ndécú-yu ìchi cuèhé ìchi duha —duha càchí espíritú-áⁿ.

⁴ Te sá tá dúcáⁿ te ní tycú dõho-í ní cáháⁿ ìⁿ sá ní cáháⁿ andiù, te càchí-xi:

—Nchaa nchõhò ñáyiù cùu cuendá-í quee-ndo ñuú Babiloniá cuendá sá vâ cùndècu-ndo tnàhá-ndó ìchi cuèhé ìchì duha dàtná ndécú ñáyiù ñuú-áⁿ, te ducaⁿ te vá quìní-ndó tnùndõho tnúhu ndàhú sá quíxí cùu xii ñáyiù-áⁿ.

5 Chi ío cuéhé cuëchi-yu ní cuu ndècu núú Yá Ndiòxí, te mee-gã náhá-gã nàcuáa ndùu nchaa sá quidè-yu.

6 Te nchòhó ñáyiú cùu cuendá-í, chí nánchòcáva dandòho-ndo ñáyiú-án dàtná quidé mée-yu dándohó-yu cue ñáyiú, te úú xito nanchòcáva-ndo dándohó-ndó-yu, te ducaⁿ càda-ndo cuendá ío-gá ndohó-yu.

7 Te ío quide cahnú-yu mée-yu, te ío cùdíí iní-yu quidé-yu nchaa núú sá cuéhé sá dúhá, te sá dúcáⁿ xidó-yu quidé-yu nchaa sá cuéhé sá dúhá núu xíáⁿ nchòhó ío dandòho-ndó-yu, te ducaⁿ chí ñáyiú ñuú-án sání iní-yu, te cächí-yu: “Nchúhú cúú-ndí dàtná ìⁿ ñadihí ñá túú quèé, ñaha ío cùnùu yíndaha ñaha xii ñáyiú. Te ducaⁿ sátnahá-xi cùu-ndí chí nchaa-ni nduu ío váha cùu iní-ndí ndécú-ndí, te ni vã sáá ìⁿ nduu te ndíhú iní-ndí”, duha cächí ñáyiú ñuú-án.

8 Te sá cuendá nchaa sá quidè-yu-án núu xíáⁿ ìⁿ-ni ndùu sáá tnúndòho sá cúú-xí-yu, te ío ndohó-yu chí ñuú-yu coo tnamá, te coo cuéhé cahni ñaha-xi xii-yu, te ío ndíhú iní-yu, te cáyú ñuú-yu, te ducaⁿ ndòhó-yu chí Dútú Ndiòxí ío cùnùu-gá, te diu-gá ducaⁿ dándohó ñaha-gá xii-yu —duha cächí sá ní cáháⁿ àndiu-án.

9 Te nchaa cue téé cùnùu yíndaha ñaha xii ñáyiú ío ndáhyú-güedé sá ndíhú iní-güedé òré ná quini-güedé quene ñúhmá cáyú ñuú cue ñáyiú Babiloniá, chí diu cue téé-án cúú-güedé cue téé cùu ìⁿnuu ndihí-yu quide-güedé nchaa núú sá cuéhé sá dúhá ndihí-yu, te ducaⁿ chí ío tnàhá iní-güedé cundecu-güedé ndihí-yu ichi díí iní.

10 Te cue téé-án xica-nã cundecu-güedé cundehe-güedé nàcuáa ndohó nchaa ñáyiú ñuú-án sá yùhú-güedé nchaa tnúndòho-án, te cächí-güedé:

—¡Ndàhú nchòhó ñáyiú ñuú cáhnú ñuú cùnùu nani Babiloniá! Chi uuⁿni ní sáá nchaa tnúndòho tnúhu ndàhú sá cúú-xí-ndó —duha cachí-güedé.

11 Te nchaa ñáyiú dícó nchaa sá nándihí ñáyiú ñuú Babiloniá tnàhá-yu ío ndáhyú-yu sá ndíhú iní-yu chí vá yò-gá cuaaⁿ nchaa sá dícó-yu.

12 Te dícó-yu nchaa sá ní cuáha mee-ni díhúⁿ cuàán, ndihí nchaa sá ní cuáha mee-ni díhúⁿ cuixíⁿ, te dícó tucú-yu sá ní cuáha mee-ni yúú váha yúú nání pèrlá, ndihí nchaa dava-gá sá ní cuáha dava-gá yúú váha, te dícó-yu tnàhá dóó sèdá, ndihí ingá núú dóó váha sá nání línú, ndihí dóó muradú, ndihí dóó tícuèhé te mee-ni dóó váha cùu-xi, te dícó tucú-yu tnàhá yutnu sá sàháⁿ tnámí, te dícó tucú-yu sá ní cuáha sá nání màrfil, te dícó tucú-yu sá ní cuáha mee-ni yútnu váha sá ío ndèyáhu, te dícó tucú-yu sá ní cuáha mee-ni càá, ndihí sá ní cuáha mee-ni sá nání bròncé, ndihí sá ní cuáha mee-ni yúú váha yúú nání màrmól.

13 Te dícó tucú-yu canèlá, ndihí yúcu sá sàháⁿ tnámí, ndihí dúsa sá sàháⁿ tnámí, ndihí yúcu sá nání mirrá, te dícó tucú-yu ingá núú dúsa sá sàháⁿ tnámí nani olivánú, te dícó tucú-yu ndudí ndéhé yoho yáha stilé, ndihí acití yutnu nani olivú, ndihí yuchi triú váha, te dícó tucú-yu nchaa dava-gá núú triú, te dícó-yu tnàhá mbéé, ndihí cuàyú, ndihí nchaa dava-gá quiti tatá, te dícó tucú-yu tnàhá carrètá, te dícó tucú-yu tnàhá ñáyiú xìnu cuechi, ñáyiú ñá túú tnàhí dàhá quee núú chíúⁿ pàtróóⁿ-xi.

14 Te nchaa ñáyiú dícó-án cùñahá-yu xii ñáyiú ñuú Babiloniá:

—¡Nchaa sá ío cùdíí iní-ndó cundecu ndihí-ndo ni cuu vá ndácú-gã-ndó ñihí-ndó vitna, te nchaa sá sání iní-ndó sá ío váha càa ndecu ndihí-ndo ndihí

nchaa dava-gá sá ndécú ndìhi-ndo ní ndìhi nihnu-xi vitna, te ni ìn̄ nduu-gá vá nihí-ndó nì ìn̄ xíáⁿ cundecu ndìhi-ndo! —duha cúñaha ñáyi-u-áⁿ xíi-yu.

15 Te nchaa ñáyi-u ní cuu cuica ní xóo dico nándi nchaa sá ní xóo dico ní queheⁿ cue ñáyi-u ñúú Babiloniá, nchaa ñáyi-u-áⁿ xica-ná cundecú-yu cundehé-yu sá yuhú-yu cuendá nchaa tnúndòho sá yáha cue ñáyi-u ñúú-áⁿ, te ío ndáhyú-yu sá ndìhú iní-yu sá dúcáⁿ ndòho ñáyi-u-áⁿ.

16 Te cúñaha tucú-yu:

—¡Ndàhú nchòhó ñáyi-u xíndecu ñúú cáhnú ñúú nání Babiloniá! Chi nchòhó cúú-ndó dàtná ìn̄ ñadìhí ñaha nihnu dóo vâha dóo muradú, ndìhi dóo tícuèhé, te mee-ní sá ní cuáha díhúⁿ cuááⁿ, ndìhi mee-ní sá ní cuáha yúú vâha yúú nání pèrlá, ndìhi sá ní cuáha dava-gá yúú vâha sá ío vii ndâa mee-ní nchâa xíáⁿ ní cuáha sá yíhí lôho-aⁿ, ndìhi sá ñúhú dúcúⁿ-aⁿ, ndìhi sá ñúhú dúcúⁿ ndáhá-áⁿ.

17 ¡Te uuⁿni ní ndìhi nihnu nchaandi túhú sá ndécú ndìhi ñadìhí-áⁿ, te ducaⁿ sátnahá-xi cùu nchòhó ní cùu! —duha cúñahá-yu xii cue ñáyi-u ñúú Babiloniá.

Te nchaa cue téé dàcaca barcú ndìhi nchaa cue téé tàxi tnuní bàrcú-áⁿ, ndìhi nchaa ñáyi-u ñúhu xití bàrcú-áⁿ, ndìhi nchaa dava-gá cue téé nándi chiùⁿ quide ndecu lamár, nchaa ñáyi-u-áⁿ xica cùndecú-yu

18 te quiní-yu òré quene ñúhmá cáyú ñúú cue ñáyi-u Babiloniá, te níhi cáháⁿ-yu, te cachí-yu:

—Ni ìn̄ ñúú ñá túú nùtnahá-xi ñúú Babiloniá —duha cáháⁿ-yu.

19 Te nchaa ñáyi-u-áⁿ chidò-yu ñuhu díquí-yu, te nguíta-yu ndáhí-yu sá ndìhú iní-yu, te níhi cáháⁿ-yu, te cachí tucú-yu:

—¡Ndàhú nchòhó ñáyi-u xíndecu ñúú cáhnú ñúú nání Babiloniá! Chi ío cuica-ndo ní cùu, te ñiu-ndo ní quide ní cuu cuica nchâa ñáyi-u ndècu ndìhi barcú, te vitna uuⁿni ní naa-ndo ndìhi ñúú-ndó —duha cachí-yu.

20 Te nchaa nchòhó ñáyi-u ndècu andi-u ío chí cúdí ìní sá dúcáⁿ dàndoho Yá Ndiòxí nchaa ñáyi-u ñúú Babiloniá-áⁿ, te ñiu-ni ducaⁿ chí cúdí ìní nchaa nchòhó cue téé ní cachí Xítohó Jesucristú cáháⁿ tnúhu-gá, te ñiu-ni ducaⁿ chí cúdí ìní nchaa nchòhó cue téé càháⁿ tnúhu Yá Ndiòxí nàcuáa dàcahu iní ñáhá-gá xii-ndo, te ñiu-ni ducaⁿ chí cúdí ìní nchaa dava-gá nchòhó ñáyi-u cùu cuendá-gá cuendá sá dúcáⁿ dàndoho-gá nchaa ñáyi-u ñúú-áⁿ. Te ducaⁿ càda ñaha-gá xii cue ñáyi-u-áⁿ cuendá nchaa sá quidé ñáhá-yu xii-ndo.

21 Te sátá dúcáⁿ te ní xiní-í ìn̄ espíritú xínú cuèchi núú Yá Ndiòxí, te espíritú-áⁿ ío ndee-xi te ní queheⁿ-xi ìn̄ yúú cáhnú dàtná càhnu yódó te ní dáquèe-xi xití ndute lamár, te càchi-xi:

—Dàtná ní quide-í ní dáquèe-í yúú xití ndute ducaⁿ càda-xi ñúú cáhnú ñúú Babiloniá, chí ñáyi-u ñúú-áⁿ ío ndìhi naá-yu ndìhi ñúú-yu, te vá ìn̄ ndùu ìn̄ quíú-gá quiní ñáhá ñáyi-u xii-yu.

22 Te ni ìn̄-gá ñáyi-u càni arpá, te ni ìn̄-gá ñáyi-u tìú vîlu, te ni ìn̄-gá ñáyi-u tìú cútú, te ni ìn̄-gá yaá vá cóo ñúú-áⁿ, te ni ìn̄-gá cue ñáyi-u xini cada ìn̄ núú chiùⁿ vá cóo-gá, te ní vá yòo-gá canehe chiùⁿ yúú cúú yódó mullínú.

23 Te ni ìn̄-gá ñúhú vá cùndècu ñúú-áⁿ, te ni ìn̄ nduu-gá vá cóo víco tnándaha, te ñáyi-u ñúú-áⁿ ñáyi-u quide ndáhú cúú-yu ñáyi-u ío-gá cuicá-yu dàcúúxí ñáyi-u quide ndáhú xíndecu nihí ñuyúú, dico ncháa-yu naá-yu chí quide nduú-yu te ío dàndahú-yu cue ñáyi-u ñuyúú sá dúcáⁿ quide-yu.

24 Te ñi-u-ni ñi-u-áⁿ ní dácá-cá-yu níñi cue téé ní cáháⁿ tnúhu Yá Ndiòxí, te ñi-u-ni ducaⁿ ní quidé-yu nchaa dava-gá cue ñáyiu cùu cuendá-gá, te ñi-u-ni-yu quide xisahni tnàha ñáyiu ñuyú —duha càchí espíritu-áⁿ.

19

1 Te sátá dúcáⁿ te ní tecú dóho-í níhi ní cáháⁿ cuéhé víhí ñáyiu andi-u, te càchí-yu:

¡Ío càhnu cuu Yá Ndiòxí!, chi ñi-u-gá cúu-gá Yaá ní dácá-cu nihnu ñaha xì-o núu ùhú núu ndàhú, te ío cùnuu-gá, te mee-ni sá vâha quide-gá,

2 te mee-gá ío váha ndáá quidé-gá quidé ndáá-gá cuéchi nchaa ñáyiu, chi ñi-u-gá ní dáquihíⁿ-gá ñadihí ñaha ndècu ichi díí ìní núu ùhú núu ndàhú, chi ñi-u-aⁿ ní sanu ichi-aⁿ ñáyiu ñuyú ichi cuéhé ichi duha, te ducaⁿ ní dáquihíⁿ ñahá-gá xii-aⁿ núu ùhú núu ndàhú chi nàchinaa-gá sá ní sahní-aⁿ cue ñáyiu ní xinu cuechi núu-gá.

Duha càchí-yu.

3 Te càchí tucú-yu:

—¡Ío càhnu cuu Yá Ndiòxí!, chi nchaa nduu nchaa quíú ducaⁿ-ni quène ñùhú núu ñùhú ñàha-áⁿ càyú-aⁿ —duha càchí-yu.

4 Te ndi òcò cùmí cue téé cùu sacuéhé xíndecu-áⁿ ní ngüñí xítí-güedé núu Yá Ndiòxí núu núcòo-gá táxí tnùní-gá, te tnàhá cue quiti cùmí xínutnñí-áⁿ ní ngüñí xítí-güedé núu-gá, te cue téé-áⁿ càchí-güedé ndihi cue quiti-áⁿ:

—Sá ndáá sá ío càhnu cuu Yá Ndiòxí —duha càchí-güedé ndihi cue quiti-áⁿ.

5 Te sátá dúcáⁿ te ní tecú dóho-í ní cáháⁿ ìⁿ sá ní cáháⁿ mei núu nútnñí xilè váha núcòo Yá Ndiòxí, te càchí sá càháⁿ-áⁿ:

Nchaa nchòhó ñáyiu xinu cuechi núu Yá Ndiòxí, ñi-u-ni nchòhó ñáyiu nèhe sá yíñùhu núu-gá,

càháⁿ-ndó sá ío càhnu cuu-gá cuèi cùnuu-ndo àdi ñá túu cùnuu-ndo.

Duha càchí sá càháⁿ-áⁿ.

Íⁿ vico cùu datná vico tnándaha

6 Te sátá dúcáⁿ te ní tecú dóho-í ní cáháⁿ cuéhé víhí ñáyiu andi-u, te òré ducaⁿ ní cáháⁿ-yu te ní quide-xi datná quidé-xí núu xicá cuéhé víhí ndùte, te ní quide tucu-xi datná quidé-xí òré càháⁿ níhi víhi ñùhu, te càchí-yu:

¡Ío càhnu cuu Dútú Ndiòxí Yaá cúu Tátá-ó! Te ío cùnuu-gá táxí tnùní-gá, te quide-gá nchaandi túhú sá vâha.

7 Te ío chí ná cùdíí ìní-ó, te chí ná càchí-ó sá ío càhnu cuu Yá Ndiòxí, chi vitna ní sáá nduu càda Yaá cáá datná cáá ìⁿ mbéé quiti ní dánícuéhé-güedé ìⁿ vico, te cùu-xi datná vico tnándaha.

Te nchaa ñáyiu cùu cuendá-gá sa ní ndihí-yu sa ndècu túha-yu cundecú-yu vico-áⁿ, te cada ìní-ó sá ñáyiu-áⁿ cúu-yu datná ìⁿ ñadihí xichí tnándaha ndihi-gá,

8 te ñáyiu-áⁿ ní nduu táhú-yu cuihnú-yu dóo vâha dóo chàhnchí sá ío váha càndoo.

Duha càchí-yu.

Te sá dúcáⁿ ní nduu táhú ñáyiu cùu cuendá Yá Ndiòxí dóo vâha ñihnú-yu, xíáⁿ cùtnùní ìní-ó sá cúu-yu ñáyiu quide ndáá núu-gá.

9 Te ìⁿ espíritu xínú cuéchi núu Yá Ndiòxí ní cachí tnúhu-xi xii-í, te càchí-xi:

—Chido tnùnì-n ìḥⁿ nùú tùtù nàcuáa na càháⁿ-í-a: “Váha táhú nchaa ñáyíu ní cáháⁿ ñáhá Yáá cáá dàtná cáá ìḥⁿ mbéé quiti ní dánícuèhé-güedé cundecú-yu vico, te vico-án cúú-xí dàtná vico tnándaha cada-gá”, te duha chido tnùnì-n chí tnúhu-a cùu-xí tnúhu ndáá tnúhu Yá Ndiöxí —duha càchí espíritú-áⁿ.

10 Te ní ngúíñí xítí-í nùú espíritú-áⁿ cuendá chiñuhu-í-xí ní cùu, te ní cachí-xi:

—Vá dúcáⁿ càda-n, chí tnàhá-í dícò xínú cuèchi-í nùú Yá Ndiöxí dàtná quidé-n xínu cuèchi-n nùú-gã ndihì nchaa dava-gá ñáyíu ndècu ndihì-n ìchì-gá, ñáyíu nchìcúⁿ nihnu quide ni yuhu ni iní nchaa nàcuáa càháⁿ Xítohó Jesucristú, te nùú xíáⁿ càchí-í sá vã dúcáⁿ càda-n, chí mee Yá Ndiöxí chiñuhu-n —duha càchí espíritú-áⁿ.

Te nchaa cue téé càháⁿ tnúhu Yá Ndiöxí càháⁿ-güedé nàcuáa ndùu tnúhu càháⁿ Xítohó Jesucristú.

Cuendá Yaáyódo ìḥⁿ cuayú cuixíⁿ

11 Te ní xini-í nchì andíu, te ní xini-í ní quee ìḥⁿ Yaáyódo-gã ìḥⁿ cuayú cuixíⁿ. Te Yaá-áⁿ nání-gã Yaáyódo ndáá cuiti, duha nani-gã. Te quide-gá nchaa sá càháⁿ-gã, te ío váha quide ndáá-gã cuèchi nchaa ñáyíu, te nchaa ñáyíu nàá ndihì ñaha xii-gã ío váha xini-gã nàcuáa cada ñaha-gã xii-yu chí ío ndáá quidé-gã.

12 Te tinùu-gã dáyèhé-xi dàtná dáyèhé ñuhú, te titní coróná ñuhú díquí-gã, te nèhe-gã ìḥⁿ sá ndèè diù-gã, te vã yõ ìḥⁿ cùtnuní iní-xi nása cuáháⁿ tnúhu-áⁿ, chí ìḥⁿ díí-ni mee-gã náhá-gã nàcuáa càháⁿ-xi.

13 Te Yaá-áⁿ níñnú-gã ìḥⁿ dóó ní cuu mee-ni ññí, te Yaá-áⁿ càchí tnúhu-gã nchaa nàcuáa sàni iní Yá Ndiöxí, nùú xíáⁿ nání-gã Tnúhu Yá Ndiöxí.

14 Te sátá-gã nchìcúⁿ nchaa espíritú xínú cuèchi nùú Yá Ndiöxí, te cue espíritú-áⁿ cúú-xí dàtná sandadú, te xixíhnu-xi dóó cuixíⁿ dóó vãha sá cándò, te xixódó-xi cuayú cuixíⁿ.

15 Te yuhu Yaáyódonùu-áⁿ quéné ìḥⁿ yuchí cáhnú, te ndihì yuchí-áⁿ dánícuèhé-gã nchaa ñáyíu xindècu ñuyíú, te ío dandòho ñaha-gã xii-yu, te dàtná quidé téé quihni ndéhé yoho yàha stilé ducaⁿ sãtnahá-xi cada ñaha-gã xii-yu, chí ío dandòho ñaha-gã xii-yu cuendá sá ío cùdèéⁿ-gã. Te mee-gã ío cùnuu-gã táxí tnùnì-gã, te quide-gã nchaandi túhú sá vãha.

16 Te sátá dóó níñnú Yáá-áⁿ ndihì nùú tícacáⁿ-gã yódó tnùnì nàcuáa nani-gã, te duha càháⁿ-xi: “Téé ío cùnuu taxi tnuní ñáhá xii nchaa cue téé yindaha ñaha xii ñáyíu ndihì nchaa dava-gã ñáyíu”, duha ndèè tnuní sátá dóó-gã-áⁿ ndihì tícacáⁿ-gã-áⁿ.

17 Te dātnuní ní xini-í ìḥⁿ espíritú xínú cuèchi nùú Yá Ndiöxí nùtnḥ-xi nùú nchìcanchii, te níhi ní cáháⁿ-xi, te xãhaⁿ-xi xii nchaa quiti ndava nùú tàchí:

—Nchaa nchòhó quiti ndáva, chí táquixi chí caxi-ndo nchàa sá ní quide túha Yá Ndiöxí,

18 chí caxi-ndo cuñú nchaa cue téé yindaha ñaha xii ñáyíu, ndihì cuñú nchaa cue téé tàxi tnuní ñáhá xii cue sandadú, ndihì cuñú nchaa cue téé ío ññí xindáa, ndihì cuñú nchaa cuayú, ndihì cuñú nchaa cue téé ní xódó ñaha xii-güedi, ndihì cuñú nchaa dava-gã ñáyíu, ñáyíu ñá túú tnàhí ní dàñá quee nùú chíúⁿ pàtróóⁿ-xi, ndihì cuñú nchaa ñáyíu ní dàñá ní quee nùú chíúⁿ pàtróóⁿ-xi, ndihì cuñú nchaa ñáyíu cùnuu, ndihì cuñú nchaa ñáyíu ñá túú cùnuu, te nchaa cuñú-áⁿ caxi-ndo —càchí espíritú-áⁿ xãhaⁿ-xi xii nchaa quiti-áⁿ.

19 Te sáta dúcáⁿ te ní xiní tucu-í quití ní quene xití lámár, ndihí nchaa cue téé yíndaha ñaha xii ñáyiú, ndihí nchaa cue téé cùu sandadú-güedé ní naníhí tnáhá-güedé ndihí quití-án cuendá cuu ñⁿnuu-güedé ndihí-di nàà-güedé ndihí Yaá yódó cuáyú-án, ndihí nchaa cue espíritú cúú sàndadú ndihí-gá.

20 Te cue espíritú cúú sàndadú ndihí Yaá-án ní tñⁿ-xi quití-án, ndihí téé ío dándahú ñáhá xii ñáyiú càchí sá càháⁿ tnúhu Yá Ndiöxí te ñá ndáá sá càháⁿ-dé tnúhu-gá, te ñⁿ-ni téé-án ní quide-dé titní núú sá vǎ yǒo tnáhí ndácu cada núú quití-án. Te sá dúcáⁿ ní quide téé-án xíáⁿ ní dándahú-dé ñáyiú ní sándáá iní-yu ní quée-yu tnuní quití-án, te ní chiñhúhú-yu sá ní dándácú ñáhá-yu xii-di, te cue espíritú-án ní dáquée-xi quití-án núú ñhúhú núú ñhúhú àzufre càyú-xi, ndihí téé ducaⁿ dándahú ñáhá xii ñáyiú-án, te xíáⁿ cuhuⁿ téé-án ndihí quití-án, te ío ndoho-dé ndihí-di.

21 Te ndihí yuchí cáhnú sǎ quéné yùhu Yaá yódó cuáyú-án ní sahní-gá nchaa dava-gá cue téé cündihí quití-án, te nchaa cue quití ndáva ní chítú xití-güedi ní xexi-güedi cuñú nchaa cue téé-án.

20

Úxí ciendú cuía

1 Te sáta dúcáⁿ te ní xiní-í ñⁿ espíritú xínú cuèchi núú Yá Ndiöxí ní quee-xi andiú, te nùndaha-xi ndacaá nacaáⁿ-xi yèhe ñⁿ yaú cùnú víhí núú cündecu sáculhná, te nùndaha tucu-xi ñⁿ cadená cáhnú.

2 Te espíritú-án ní tñⁿ-xi quití dééⁿ nání drágón, te ñⁿ-ni quití-án cúú-dí mèi yucu ñáváha sá nání sáculhná, te ñⁿ-ni xíáⁿ ní nduu-xi cóo ndéé sanaha. Te espíritú-án ní dácútú ñàha-xi xii-di, te ducaⁿ-ni cündutu-di ndéé xínu úxí ciendú cuía.

3 Te sáta ní dácútú ñàha espíritú-án xii-di te ní dáquée ñaha-xi xii-di yaú-án chi ñⁿ-ni yaú-án tàú-di quée-di cundecu-di. Te ní nacadí-xi yuyèhe yaú-án, te ní tee-xi sèyú yuyèhe-án cuendá sá vǎ quéné-gǎ-di dándahú-di cue ñáyiú ñuyúú, te xíáⁿ cundedí nihnu-di ndéé xínu úxí ciendú cuía. Te sáta ná yáha úxí ciendú cuía-án te nandáxi-di te quene-di yaú núú ñhúhú-dí-ǎⁿ caca cuu tnaa-di ñⁿ ùú nduu.

4 Te dǎtnùní ní xiní-í xínutnǎí titní xilé váha, te xíáⁿ xínucóo nchaa ñáyiú ní ngündecu ndihí tnúhu ndee iní cada ndáá cuèchi nchaa ñáyiú, te ní xiní-í xíndecu tnáhá cue ñáyiú ní xehndé-güedé dúcúⁿ-xi cuendá sá ní càháⁿ-yu tnúhu Yá Ndiöxí, ndihí cuendá sá ní càháⁿ váha-yu cuendá Xítohó Jesucrístú. Te ñⁿ-ni ñáyiú-án cúú-yu ñáyiú ñá túú ní chiñhúhú-yu quití ní quene xití lámár-án, te ní ñá túú ní chiñhúhú-yu sá ní dándácú ñáyiú ní natava ñáhá-yu xii-di, te ní ñá túú ní dàñá-yu mée-yu quée-yu tnuní quití-án chi ní tñéé-yu te ní ndáhá-yu ñá túú ní dàñá-yu quée tnuní-di. Te ní xiní-í ní ndoto cue ñáyiú-án cuendá tnáhá-yu cunúú-yu taxi tnùní-yu ndihí Xítohó Jesucrístú úxí ciendú cuía.

5 Te dava ñáyiú ní xíhí ñá túú ní ndótó-yu, chi ndéé yáha úxí ciendú cuía te dǎtnùní ndotó-yu. Te ñáyiú ní xiní-í ní ndoto-án cúú-yu ñáyiú ní ndoto díhna nuu.

6 j Te ío váha ní tnáhá nchaa ñáyiú ní nduu táhú ní ndoto díhna nuu!, chi cue ñáyiú-án ío cùdiú-yu núú Yá Ndiöxí, te nchaa ñáyiú-án vǎ quíhíⁿ-yu núú ùhú núú ndáhú, te ñáyiú-án cúú-yu dútú ndécúⁿ-yu núú Yá Ndiöxí ndihí núú Xítohó Jesucrístú, te ñáyiú-án cúnúú-yu dǎtná cúnúú Xítohó Jesucrístú, te cunuu ndihí ñáhá-yu xii-gá úxí ciendú cuía.

7 Te sátá ná yáha úxí cièndú cuíá-ǎⁿ te sácuihná quee-xi núú yíndèdè nihnu-xi-áⁿ,

8 te ngúíta tucu-xi dandàhú-xi nchaa ñáyíu xíndecu nihí ñuyíú, te cuèi ñáyíu ñúú Gõg, te cuèi ñáyíu ñúú Màngóg ducaⁿ quíhíⁿ-xi dandàhú ñáhá-xí xíi-yu, te datácá-xi nchaa ñáyíu cuèndá nàà-yu, te cuéhé víhí-yu dàtná cuéhé ñuhu cúchí làmár.

9 Te nchaa ñáyíu-ánⁿ tñíi-yu ichi quíhíⁿ-yu ìⁿ ichi sá cuàháⁿ núú cáá ìⁿ yodo cahnu vihi, te sáá-yu núú xíndecu ñáyíu cùu cuendá Yá Ndiõxí, te ñáyíu-ánⁿ chidòcò-yu cue ñáyíu cùu cuendá-gá-áⁿ ndihí ñúú-yu, te ñúú-áⁿ ío cùu iní-gá, dico mee Yá Ndiõxí dangòyo-gá ñuhú cahmi-gá nchaa ñáyíu ducaⁿ chidoco ñaha xii ñáyíu cùu cuendá-gá-áⁿ, te nchaa ñáyíu-ánⁿ cuú.

10 Te sácuihná sá dúcáⁿ dandahú ñáhá xii ñáyíu chidoco ñaha xii ñáyíu cùu cuendá Yá Ndiõxí-ánⁿ dàquée ñaha-gá xii-xi núú ñùhú núú ñùhú àzúfré càyú-xi, te diu-ni xíáⁿ sa ñuhu quiti ní quene xití làmár, ndihí téé ní dandahú ñáyíu ní xáhaⁿ-dè xii-yu sá càháⁿ-dè tñúhu Yá Ndiõxí te ñá ndáá sá càháⁿ-dè tñúhu-gá, te xíáⁿ cuhuⁿ-xi ndoho-xi ni caa ni quíhíⁿ ndihí quiti ní quene xití làmár, ndihí téé càchí sá càháⁿ tñúhu Yá Ndiõxí te ñá ndáá sá càháⁿ-dè tñúhu-gá.

Cùndáá cuéchi ñáyíu

11 Te ní xiní-í nútñí ìⁿ xilé váha xilé cuixíⁿ, te núú xilé-áⁿ núcõ ìⁿ Yaá. Te ndèhe Yaá-áⁿ ni ndóñúhú àndiu ndihí ñuyíú-a, te ducaⁿ ni ndóñúhú-xí chí vá cùndècu-gá-xi.

12 Te sátá dúcáⁿ te ní xiní-í nchaa ñáyíu ní xihí ní cùu, ñáyíu cùnuu ndihí ñáyíu ñá túú cùnuu xínutñí-yu núú Yáá núcõ núú xilé váha-áⁿ, te Yaá-áⁿ cúú-gá Yá Ndiõxí, te òrè-áⁿ ní nandicá nchaa tutú núú yódó tñuní nchaa nàcuáa ndùu sá ní quide ìⁿ ìⁿ ñáyíu-ánⁿ, te ní nandicá tucu ìngá tutú núú yódó tñuní nchaa ñáyíu ní naníhí tãhú, te nchaa ñáyíu ní xihí ní cùu xínutñí-yu núú Yá Ndiõxí cundáá cuéchi-yu, te nchaa nàcuáa ndùu nchaa cuéchi-yu yòdo tñuní núú nchaa tutú-áⁿ ducaⁿ cùndáá.

13 Te nchaa ñáyíu ní xihí xití ndute làmár, ndihí nchaa ñáyíu ní xihí núú ñuhu yìchí nchaa ñáyíu-ánⁿ cundáá cuéchi-yu nàcuáa ní quidè-yu ìⁿ ìⁿ-yu.

14 Te vitna te vá cùú-gá ñáyíu chí ñá túú-gá tñúhu xihí, te nchaa ñáyíu ñuhu núú ñùhú núú càyú ñáyíu-áⁿ cúú-yu ñáyíu ní xíta nihnu ni caa ni quíhíⁿ.

15 Te ducaⁿ chí nchaa ñáyíu ñá túú yòdo tñuní núú tütú núú yódó tñuní nchaa ñáyíu naníhí tãhú ní dáquée ñaha Yá Ndiõxí xii-yu núú ñùhú núú càyú.

21

Andiu sàa ndihí ñuyíú sáá

1 Te sátá dúcáⁿ te ní xiní-í andiu sàa ndihí ñuyíú sáá, te andiu sá ndécú ñíhna ndihí ñuyíú sá ndécú ñíhna ní ndóñúhú-xí, te tñáhá làmár ní ndóñúhú-xí.

2 Te yúhú té Juáá ní xiní-í ñúú Jerusálén sáá ní quee-xi núú ndécú Yá Ndiõxí, te ñúú-áⁿ cúú-xí ñúú méé-gá, te ío vii càa chí càa datná cáá ìⁿ ñadihí xíchí tñándaha.

3 Te ní tecú dóho-í níhi ní cáháⁿ ìⁿ sá ní cáháⁿ andiu, te càchí-xi:

—Chí cùndèdóho ìⁿ tñúhu na càháⁿ-í-a: Yá Ndiõxí ndécú ndihí-gá cue ñáyíu vitna, te ducaⁿ-ná cundecu ndihí ñaha-gá xii-yu, te diú-yu cúú-yu ñáyíu cùu cuendá-gá, te vá ìⁿ ndùu ìⁿ quíú-gá te dañá ñaha-gá xii-yu.

4 Te mee Yá Ndiöxí cada-gá sá ñà túú tñàhí-gá ná cani iní-yu cundecú-yu, te ni vǎ quíní-gá-yu tñúhu xihí, te ni vǎ quíní-gá-yu tñúhu ndàhyú, te ni vǎ quíní-gá-yu tñúhu ndìhú iní-xi, te ni vǎ quíní-gá-yu tñúhu cùhú, chi nchaa sá nǐ xini-yu ñuyúyí díhna vǎ quíní-gá-yu vitna —duha cǎchí sá nǐ cǎháⁿ-áⁿ.

5 Te Yaá núcõo núú xilé váha-áⁿ nǐ cachí tñúhu-gá xii-í, te cǎchí-gá:

—Yúhú quidè-í nǎcuáa nduu saa nchàa sá cundecu vitna. Te vitna chido tñùní-n ñⁿ núú tütú nchaa tñúhu sá nǐ cǎháⁿ-í-a, chi nchaa tñúhu-a cùu-xi tñúhu ndáá cuiti —duha cǎchí-gá.

6 Te dǎtnùní ní cachí tñúhu tucu-gá xii-í:

—Sa ní xínu cava nchaa chùuⁿ ní sani iní-í cada-í, te diu-ni yúhú cùu-í Yaá sa ndècu ndéé cùtnàhá ní ngáva ñuyúyí, te diu-ni-í cundecu-í ni caa nǐ quíhíⁿ. Te nchaa ñáyiu cuini tuha ñaha xii-í te cada iní-yu sá dǎtná ndute cùu-xi sá cuǎñaha tǎhù-í xii-yu candeca-xi iní-yu ni caa nǐ quíhíⁿ.

7 Te nchaa ñáyiu na cundee iní yáha nǎndi sá ná yáha-yu sá cuendá-í, te ñáyiu-áⁿ nduu tǎhù-yu cundecu váha-yu, te yúhú cuu-í Ndiöxí-yu, te ducaⁿ mée-yu cuú-yu déhe-í.

8 Te nchaa ñáyiu na yùhú ndoho cuendá-í quíhíⁿ-yu núú ñùhú núú càyú ndihi ñáyiu ñá túú sǎndáá iní ñáhá xii-í, ndihi ñáyiu quide nǎndi nchaa sá cuèhé sá dúhá, ndihi ñáyiu sǎhni tnaha, ndihi ñáyiu ndècu ichi díí iní, ndihi ñáyiu quide nduu, ndihi ñáyiu chìñuhu nchaa sá cǎchí-yu cùu ndióxí ní cadúha cue téé ñuyúyí-a, ndihi ñáyiu dàcuandehnde, nchaa ñáyiu ducaⁿ xǐquide-áⁿ cuíta nihnú-yu chi quíhíⁿ-yu núú ñùhú núú ñùhú àzúfré càyú-xi —duha ní cǎháⁿ Yá Ndiöxí ní cachí tñúhu-gá xii-í.

Ñúú Jerusàlén sáá

9 Te núú usá espíritú xǐnehe tícùú ñùhú tñuhu ndòho, te ñⁿ-xi ní quixi-xi te cǎchí-xi:

—Taqúxi, te na dànehé ñáhà-í xii-n nchàa ñáyiu cùu cuendá Yaá cáá dǎtná cáá ñⁿ mbéé quiti ní dǎnícuehé-güedé, ñáyiu-áⁿ cada iní-n sǎ cùú-yu dǎtná ñⁿ xíchí cuéchí vitna tnándaha, te ducaⁿ càda iní-n sǎ cùú-yu chi cundecú-yu ndihi-gá —duha ní cachí tñúhu espíritú-áⁿ xii-í.

10 Te òré quidé ñaha espíritú Yá Ndiöxí xii-í nǎcuáa cǎchí iní-xi, te espíritú nehé tícùú-áⁿ ndécá ñàha-xi xii-í cuáasaá ñⁿ tǎndúú dùcúⁿ, te xiáⁿ nǐ dǎnehé núú ñáhá-xi xii-í ñúú Jerusàlén te ñúú-áⁿ ní quee-xi núú ndécú Yá Ndiöxí, te ñúú-áⁿ cùu-xi ñúú mée-gǎ.

11 Te ñúú-áⁿ ño cǎhnu cuu-xi chi ducaⁿ ño cǎhnu cuu mee-gá, te dǎtásaⁿ-xi dǎtná dǎtásaⁿ yúú váha sá nǎní jǎspé yúú cáá dǎtná cáá vǐdriú sá tùu ñngá xio ndàa sátá-xi.

12 Te nǐ cǎndéé yuhu ñúú-áⁿ sùúni dùcúⁿ nchaa sá ñùhú dòco, te nchíí úxúú yuyèhe-xi, te ndi tnahá ñⁿ ñⁿ yuyèhe-áⁿ xǐndecu ñⁿ caa espíritú xínú cuèchi núú Yá Ndiöxí. Te ndi tnahá ñⁿ ñⁿ yuyèhe-áⁿ yódó tñùní diù ñⁿ caa xichi cue ñáyiu isráél.

13 Te úní yuyèhe-xi nchíí ndàa xio nacuáa quène nchíanchii, te úní tucu yuyèhe-xi nchíí ndàa nacuáa quée nchíanchii, te úní tucu yuyèhe-xi nchíí ndàa xio cuha nacuáa quène nchíanchii, te úní tucu yuyèhe-xi nchíí ndàa xio datni nacuáa quène tucu nchíanchii.

14 Te sá ñúhú dòco-áⁿ chi úxúú tnahá yúú cúú cìmientú-xi, te ndi tnahá ñⁿ ñⁿ yúú-áⁿ ndèé ñⁿ caa ñúu cue téé ní cáháⁿ tñúhu Yaá cáá dàtná cáá ñⁿ mbéé quiti ní dánicuehé-güedé, te ñúu mee-gã ní táuchíúⁿ-gã ní cáháⁿ-güedé tñúhu-gã.

15 Te espíritu sá cáháⁿ ndihi ñaha xii-í-áⁿ néhé-xí ñⁿ sá cání ní cuáha mee-ni díhúⁿ cuááⁿ, te ndihi xiáⁿ chíchúhá-xi ñúú-áⁿ, ndihi sá ñúhú dòco ñúú-áⁿ, ndihi nchaa yuyèhe-xi.

16 Te ñúú-áⁿ ñⁿ-ni nèhe-xi cuendá quèhéⁿ-xi ndihi cuendá càni-xi, te espíritu-áⁿ ní chíchúhá-xi ndihi sá néhé-xí-áⁿ ñúú-áⁿ, te nèhe-xi ócò úú ciendú míl mētrú sá cání te ñúu-ni ducaⁿ nèhe-xi cuendá quèhéⁿ-xi, te ñúu-ni ducaⁿ nèhe-xi sá ñúúⁿ nchaa vehe càa ñúú-áⁿ.

17 Te dàtnúⁿ ní chíchúhá-xi sá ñúhú dòco ñúú-áⁿ, te xiáⁿ néhé-xí ùnídico cúmí mētrú sá ñúúⁿ, te ní chíchúhá-xi dàtná chíchúhá cue ñáyúu ñúyúú-a.

18 Te sá ñúhú dòco-áⁿ ní cuáha mee-ni yúú vaha yúú sá nání jǎspé, te ñíhí ñúú-áⁿ cúú-xí mèe-ni díhúⁿ cuááⁿ, te càa datná cáá vidiú sá ñó vaha càndoo te túu ndàa ingá xio.

19 Te ndi úxúú yúú cúú cìmientú sá ñúhú dòco-áⁿ ndèé ndí ñⁿ nùú yúú vii càa sáta-xi, te yúú díhna ndèé mee-ni yúú vaha sá nání jǎspé sáta-xi, te yúú cúú úú ndèé tucu ingá núú yúú vaha sá nání zǎfirú sáta-xi, te yúú cúú ùní ndèé tucu ingá núú yúú vaha sá nání ágatá sáta-xi, te yúú cúú cùmí ndèé ingá núú yúú vaha sá nání èsmèaldá sáta-xi.

20 Te yúú cúú ùhúⁿ ndèé tucu ingá núú yúú vaha sá nání ònícé sáta-xi, te yúú cúú ñúú ndèé tucu ingá núú yúú vaha sá nání còrnalíná sáta-xi, te yúú cúú ùsá ndèé tucu ingá núú yúú vaha sá nání crisólítú sáta-xi, te yúú cúú ùná ndèé tucu ingá núú yúú vaha sá nání bèrilú sáta-xi, te yúú cúú ñⁿ ndèé tucu ingá núú yúú vaha sá nání tòpacíú sáta-xi, te yúú cúú ùxí ndèé tucu ingá núú yúú vaha sá nání crisopásá sáta-xi, te yúú cúú ùxí ñⁿ ndèé tucu ingá núú yúú vaha sá nání jácintú sáta-xi, te yúú cúú ùxúú ndèé tucu ingá núú yúú vaha sá nání àmatístá sáta-xi.

21 Te ndi úxúú yuyèhe sá ñúhú dòco-áⁿ cúú-xí mèe-ni yúú vaha sá nání pèrlá, te ndúu ñí yúú cúú ñⁿ ñⁿ yuyèhe-áⁿ. Te tñúú cáhnú ndècu xití ñúú-áⁿ cúú-xí mèe-ni díhúⁿ cuááⁿ, te càa-xi datná cáá vidiú sá túu ndàa ingá xio.

22 Te ní xiní-í sá ñà túú vèhe núú chíñúhu ñáyúu Dútú Ndióxi cáá ñúú-áⁿ, chi mee-ná Dútú Ndióxi Yaá quidé nchàa-ndi túhú sá vaha ndècu ñúú-áⁿ, ndihi Yaá cáá dàtná cáá ñⁿ mbéé quiti ní dánicuehé-güedé.

23 Te ñúú-áⁿ ñà túú-gã xíní ñúhu-xi nchicanhii dayèhé-xi, te ni yóó ñà túú-gã xíní ñúhu-xi, chi mee-ná Yá Ndióxi dáyéhé-gã ñúú-áⁿ ndihi Yaá cáá dàtná cáá ñⁿ mbéé quiti ní dánicuehé-güedé.

24 Te cue ñáyúu nchaa ñúú cáá ñúyúú, ñáyúu ní naníhí tàhú xíndecu ñúú-áⁿ dáyéhé-gã núú-yu, te nchaa cue téé yíndaha ñaha xii-yu nèhe-güedé sá yíñúhu sá cúú-xí ñúú-áⁿ, te quide cahnu ñaha-güedé xii-gã.

25 Te yuyèhe ñúú-áⁿ ñà túú tñàhí nàndedí, te ñúú-áⁿ ñà túú tñàhí cùndiquíⁿ.

26 Te nchaa ñáyúu nèhé-yu sá yíñúhu sá cúú-xí ñúú-áⁿ te quide cahnú-yu Yá Ndióxi.

27 Te ñúú-áⁿ vǎ cúú cùndecu ni ñⁿ ñáyúu ndècu ichi cuehé ichi duha, te ni ñⁿ ñáyúu ndehnde, te ni ñⁿ ñáyúu quide sá ñà túú cùu vaha iní Yá Ndióxi vǎ cúú cùndecú-yu ñúú-áⁿ, chi mee-ni ñáyúu naníhí tàhú ñáyúu yòdo tñuní núú túú Yaá cáá dàtná cáá ñⁿ mbéé quiti ní dánicuehé-güedé, mee-ni ñáyúu-áⁿ cùndecú-yu ñúú-áⁿ.

22

1 Te sáta dúcáⁿ te diu-ni espíritú-áⁿ ní dánèhé núú ñáhá-xí xì-í yúte núú ñuhú ndúte candoo canine, te ndute-áⁿ candeca-xí iní ñáyíu ní caa ní quíhíⁿ, te ndute-áⁿ quée-xí mèi núú núcõo Yá Ndiõxí ndihí Yaá cáá dàtná cáá ñⁿ mbéé quiti ní dánicuehé-güedé.

2 Te cuádava tnuú cáhnú yáha xítí ñuú-áⁿ cáá yúte-áⁿ, te xio xio yuhu yúte-áⁿ níhnú yùtnu cuuⁿ sávidí-xí, te sávidí nchaa yutnu-áⁿ cúú tucu-xí sá cándeca iní ñáyíu ní caa ní quíhíⁿ, te nchaa yutnu-áⁿ cúúⁿ sávidí-xí úxúú xito ñⁿ cuíá chí ndí tnahá yóó cúúⁿ sávidí-xí, te nchaa ndaha-xí cùu-xí tátna sá cúú-xí ncháa ñáyíu.

3 Te vá yõo ñⁿ-gá cada ñⁿ sá ñà túú cùu váha iní Yá Ndiõxí ñuú-áⁿ. Chí ñuú-áⁿ núcõo mee Yá Ndiõxí ndihí Yaá cáá dàtná cáá ñⁿ mbéé quiti ní dánicuehé-güedé xítaxi tnùní-gá, te nchaa ñáyíu xínu cuechí núú-gá cada càhnu ñahá-yu xii-gá.

4 Te nchaa ñáyíu-áⁿ cundehe núú-yu Dútú Ndiõxí, te neé-yu cundee dùu-gá.

5 Te ñuú-áⁿ vã quíní-gá-yu niú, te ní vã cánèhe chiuⁿ-gá-yu ñuhú cutnùní núú-yu, te ní nchícanchii ñà túú-gã xíní ñuhu-xi dayehé ñuú-áⁿ chí mee Dútú Ndiõxí dáyyehé-gá, te ní caa ní quíhíⁿ cunúú-yu cundecú-yu ñuú-áⁿ.

Sa ta cùyatni nduu quixi tucu Xítohó Jesucristú

6 Te sáta dúcáⁿ te ní cachí tnúhu espíritú xínú cuèchi núú Yá Ndiõxí-áⁿ xii-í: —Nchaandi túhú tnúhu-a cùu-xi mee-ni tnúhu ndáá cuiti. Te Yá Ndiõxí Yaá dácáhu iní nchaa cue téé cáháⁿ tnúhu-gá nàcuáa cáháⁿ-güedé ní tendaha-gá ñⁿ espíritú xínú cuèchi núú-gá ní quixi-xi ní dánèhé-xi nchaa ñáyíu xínu cuechi núú-gá nchaa nàcuáa cada-gá, te vá cùyaa-gá ducaⁿ càda-gá —duha càchí espíritú-áⁿ.

7 Te ní cáháⁿ Xítohó Jesucristú, te càchí-gá:

—¡Ío ndíhí quixi tucu-í!

¡Te ío váha tnahá nchaa ñáyíu tní nchaa tnúhu càháⁿ Yá Ndiõxí yódó tnùní núú tütú-a! —duha càchí-gá.

8 Te yúhú té Juáá ní tecú dóho-í nchaa nàcuáa ní ngódó tnùní núú tütú-a, te ní xíní núú-í nchaa nàcuáa cada-xi ndéé cuéé-gá. Te sáta dúcáⁿ ní cuu te ní ngúíñí xítí-í núú espíritú sá ní dánèhé núú ñáhá ncháa xíáⁿ cuendá chíñuhu-í-xi ní cùu.

9 Te ní cachí-xi:

—Vá dúcáⁿ càda-n, chí yúhú dicó xínú cuèchi-í núú Yá Ndiõxí dàtná cúú yòhó ndihí nchaa dava-gá ñáyíu ndècu ndihí-n ichi-gá càháⁿ-ndó tnúhu-gá, ndihí nchaa ñáyíu tní nchaa tnúhu ndéé núú tütú-a, te xíáⁿ càchí-í sá vá dúcáⁿ càda-n, chí mee Yá Ndiõxí ducaⁿ chíñuhu-n-gá —càchí espíritú-áⁿ xii-í.

10 Te ní cachí tnúhu tucu-xi xii-í, te càchí-xi:

—Vá chídáhu-n ní ñⁿ tnúhu Yá Ndiõxí ndéé núú tütú-a, chí sa ní cuyatni cada-xi nchaa nàcuáa ndéé tnùní.

11 Te daña sá ncháá ñáyíu ndècu ichi cuehé ichi duha na cùndecu-ní-yu ichi-áⁿ, te ducaⁿ-ni dàña-n nchaa ñáyíu quide nándi-gá nchaa sá cuéhé sá dúhá ná càda nahi-ní-yu nchaa sá cuéhé sá dúhá sàni iní-yu, te nchaa ñáyíu quide váha te ducaⁿ-ní na càda váha-yu cundecú-yu, te nchaa ñáyíu quide nchaa nàcuáa cùu váha iní Yá Ndiõxí te dñu-ni ducaⁿ na càdá-yu cundecú-yu —duha càchí espíritú-áⁿ.

12 Te ní cachí Xítohó Jesucristú:

—Cundedóho-n tnúhu na càháⁿ-í-a. Ío ndíhi quixi tucu-í, te canehe-í nchaa sá ndúú táhú ñáyi quixi, te nàcuáa ndùu chiuⁿ ní quidé-yu ìⁿ ìⁿ-yu te ducaⁿ cùnduu sá cuñaha-í nduu táhú-yu.

13 Te yúhú cùu-í Yaa sa ndècu ndéé cùtnàhá ní ngáva ñuyúú, te diu-ni-í cundecu-í ni caa ni quíhíⁿ —duha càchí-gá.

14 Te váha táhú nchaa ñáyi sa ní nduu ndoo ní nduu nine iní-xi, chi ñáyi-áⁿ ní nduu táhú-yu quíhu-yu xití ñuú-áⁿ, te caxí-yu sávidí yutnu nùtní-áⁿ te xíáⁿ candeca-xi iní-yu ni caa ni quíhíⁿ.

15 Te ñuú-áⁿ vâ cúu quíhu ni ìⁿ ñáyi ndècu ichi cuehé ichi duha, ni cué ñáyi quide nduu, te ni cué ñáyi ndècu ichi díí iní, te ni cué ñáyi sàhni tnaha ñáyi-xi, te ni cué ñáyi chiñuhu nchaa sá ní cadúha cue téé ñuyúú-a càchí-yu cùu ndiòxí, te ni cué ñáyi tnàhá iní dacuàndehnde, te ni ìⁿ ñáyi ducaⁿ xíquide vá ndúú táhú-yu quíhu-yu xití ñuú-áⁿ.

16 Te ní cáháⁿ tucu Xítóhó Jesucristú, te càchí-gá:

—Yúhú Xítóhó Jesucristú ní tendaha-í espíritú xínú cuèchi núu-í cuendá cachí tnúhu-xi xii-n nàcuáa ndùu tnúhu cùñaha-n xii nchaa ñáyi ndècu ndíhi-n ichi-í dacuàha tnúhu-í ìⁿ ìⁿ ñuú. Te yúhú cùu-í mei ñàní tnàhá ndí Dáví, te cada iní-n sâ cùu-í dàtná ìⁿ chódíní quiti quène datneé —duha càchí-gá.

17 Te nchaa ñáyi cùu cuendá Xítóhó Jesucristú Yaa cáá dàtná cáá ìⁿ mbéé quiti ní dánícuèhé-güedé, diu-ni ñáyi-áⁿ cúu-yu ñáyi cada iní-ó sâ cúu-yu ìⁿ ñadíhí xíchí tnàndaha ndíhi ñaha xii-gá, te ñáyi-áⁿ ìⁿ-ni càháⁿ-yu ndíhi Espíritú Yá Ndiòxí, te xáhãⁿ-yu ndíhi Espíritú-gá xii nchaa dava-gá ñáyi:

—Chí táquixi —cachí-yu xáhãⁿ-yu ndíhi Espíritú Yá Ndiòxí.

Te nchaa ñáyi ducaⁿ ndédóho tnúhu-áⁿ vitna, te xini ñuhu-xi ducaⁿ cáháⁿ-yu tnàhá-yu cùñahá-yu xii nchaa dava-gá ñáyi-áⁿ, te nchaa ñáyi cuini tuha ichi-gá te na quixí-yu, te dicó ducaⁿ cùu táhú-yu sá cándeca iní-yu ni caa ni quíhíⁿ.

18 Te nchaa nchòhó ñáyi ndédóho nchaa nàcuáa càháⁿ tnúhu Yá Ndiòxí ndéé núu tütú-a càháⁿ-í dóho-ndo. Te núu ìⁿ ñáyi na còdo-gá tnúhu chido tnúni-yu núu tütú-a, te Yá Ndiòxí ío dandòho ñaha-gá xii-yu chi yáha-yu nchaa tnúndòho yodo tnúni núu tütú-a te núu ducaⁿ na cadá-yu.

19 Te núu ìⁿ ñáyi na chidáhu dava tnúhu Yá Ndiòxí ndéé núu tütú-a te ñáyi-áⁿ vâ ndúú táhú-yu cundecu-yu ñuú-gá, te ni vâ ndúú táhú-yu sá cándeca iní-yu ni caa ni quíhíⁿ dàtná yódó tnúni núu tütú-a.

20 Te Xítóhó Jesucristú Yaa càháⁿ sá ncháá tnúhu-a cùu-xi tnúhu ndáá ní cáháⁿ-gá ní tecú dóho-í, te càchí-gá:

—Ndáá sá ío ndíhi quixi tucu-í —duha càchí-gá.

Te yúhú ní xáhaⁿ-í xii-gá:

—Ducaⁿ na cùnduu, taquixi yohó Xítóhó Jesucristú —duha ní xáhaⁿ-í xii-gá.

21 Te Xítóhó Jesucristú ío na chindee chítúu ñaha-gã xii-ndo ncháa-ndo. Te ducaⁿ na cùnduu. Te ío chí cadá ndèe iní-nã vitna.